


Dios  
pejumelivaisibaxuto  
pejanalivaisibaxuto



New Testament in Guahibo

Dios pejumelivaisibaxuto pejanalivaisibaxuto  
New Testament in Guahibo

copyright © 2011 Wycliffe Bible Translators, Inc.

Language: Guahibo

Translation by: Wycliffe Bible Translators, Inc.

Copyright Information

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Guahibo

© 2011, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-08-06

---

PDF generated using Haiola and XeLaTeX on 4 Mar 2019 from source files dated 1 Mar 2019  
bc03f416-faf8-5000-bfb5-5ca8a3fa98cf

## Contents

SAN MATEO . . . . .	1
SAN MARCOS . . . . .	89
SAN LUCAS . . . . .	141
SAN JUAN . . . . .	232
HECHOS . . . . .	292
ROMANOS . . . . .	372
1 CORINTIOS . . . . .	408
2 CORINTIOS . . . . .	446
GÁLATAS . . . . .	470
EFESIOS . . . . .	485
FILIPENSES . . . . .	497
COLOSENSES . . . . .	505
1 TESALONICENSES . . . . .	513
2 TESALONICENSES . . . . .	519
1 TIMOTEO . . . . .	523
2 TIMOTEO . . . . .	532
TITO . . . . .	539
FILEMÓN . . . . .	543
HEBREOS . . . . .	545
SANTIAGO . . . . .	573
1 SAN PEDRO . . . . .	582
2 SAN PEDRO . . . . .	593
1 SAN JUAN . . . . .	600
2 SAN JUAN . . . . .	608
3 SAN JUAN . . . . .	609
JUDAS . . . . .	611
APOCALIPSIS . . . . .	615

## Pexanialivaisi Jesucristo pelivaisi, San Mateo peyaquinaelivaisi

*Jesucristo pijasalinaivimi yabara pelivaisi  
(Lc 3.23-38)*

<sup>1</sup> Mapalivaisije Jesucristo pijasalinaivimi pelivaisi. Jesucristo rabaja Davidpijinë pemoxiyajuvënë. Davidpijinë pijinia Abrahampijinë pemomoxiyajuvënë. <sup>2</sup> Copiaya Abrahampijinë xaina pexënato. Pevënë Isaac. Isaacpijinë juya pexënato xaina. Pevënë Jacob. Jacobpijinë juya pexi xaina. Pexiyajuvënë pevënë Judá. Judápijinë pematapijinëbeje, pejuyapijivi ata, xaina. <sup>3</sup> Judápijinë juya pexënatobeje xaina. Itsanë pevënë Fares. Itsanë Zara. Bajaraponëmibeje penapijiva pevënë Tamar. Farespijinë juya pexënato xaina. Pevënë Esrom. Esrompijinë juya pexënato xaina. Pevënë Aram. <sup>4</sup> Arampijinë juya pexënato xaina. Pevënë Aminadab. Aminadabpijinë juya pexënato xaina. Pevënë Naasón. Naasónpijinë juya pexënato xaina. Pevënë Salmón. <sup>5</sup> Salmónpijinë juya pexënato xaina. Pevënë Booz. Boozpijinë penapijiva pevënë Rahab. Boozpijinë juya pexënato xaina. Pevënë Obed. Obedpijinë penapijiva pevënë Rut. Obedpijinë juya pexënato xaina. Pevënë Isaí. <sup>6</sup> Isaípijinë juya pexënato xaina. Pevënë David. Bajaraponëmi nacuaejetsinëmi. Davidpijinë yacajërëta Uríaspijinë pijavami. Nexata bajarapajivibeje juya pexënato xainabeje. Pevënë Salomón. <sup>7</sup> Salomónpijinë juya pexënato xaina. Pevënë Roboam. Roboampijinë juya pexënato xaina. Pevënë Abías. Abíaspijinë juya pexënato xaina. Pevënë Asa. <sup>8</sup> Asapijinë juya pexënato xaina. Pevënë Josafat. Josafatpijinë juya pexënato xaina. Pevënë Joram. Jorampijinë juya pexënato xaina. Pevënë Uzías. <sup>9</sup> Uzíaspijinë juya pexënato xaina. Pevënë Jotam. Jotampijinë juya pexënato xaina. Pevënë Acáz. Acázpijinë juya pexënato xaina. Pevënë Ezequías. <sup>10</sup> Ezequíaspijinë juya pexënato xaina. Pevënë Manasés. Manaséspijinë juya pexënato xaina. Pevënë Amón. Amónpijinë juya pexënato xaina. Pevënë Josías. <sup>11</sup> Josíaspijinë juya pexi xaina. Pexiyajuvënë pevënë Jeconías. Jeconías pematapijinë, pejuyapijivi ata, xaina. Pamatacabi Israel nacuapijivi cobecëbiaya caponatsi Babilonia nacuyabelia, bajarapamatacabi naexana Jeconíaspijinë.

<sup>12</sup> Bjaraxuacujinae Jeconíaspijinë juya pexënato xaina. Pevënë Salatiel. Salatielpijinë juya pexënato xaina. Pevënë Zorobabel. <sup>13</sup> Zorobabelpijinë juya pexënato xaina. Pevënë Abiud. Abiudpijinë juya pexënato xaina. Pevënë Eliaquim. Eliaquimpijinë juya pexënato xaina. Pevënë Azor. <sup>14</sup> Azorpijinë juya pexënato xaina. Pevënë Sadoc. Sadocpijinë juya pexënato xaina. Pevënë Aquim. Aquimpijinë juya pexënato xaina. Pevënë Eliud. <sup>15</sup> Eliudpijinë juya pexënato xaina. Pevënë Eleazar. Eleazarpijinë juya pexënato xaina. Pevënë Matán. Matánpijinë juya pexënato xaina. Pevënë Jacob. <sup>16</sup> Jacobpijinë juya pexënato xaina. Pevënë José. Bajaraponëmi María pamoná. Bjarapovami Jesús pena, ponë yabara: “Cristo, ponë Dioso athëbëvetsica itorobatsi jivi pecapanepaenexa,” jaitsi.

<sup>17</sup> Nexata Abrahampijinëmita petaxuxuabicujinae jivi penaexanaponaejava, trecenëta naexana Davidpijinë. Bjaraxuacujinae icatsia Davidpijinëmita petaxuxuabicujinae jivi penaexanaponaejava, trecenëta icatsia naexana Jeconíaspijinë. Pamatacabi Israel nacuapijivi cobecëbiaya caponatsi Babilonia nacuyabelia, naexana Jeconíaspijinë. Bjaraxuacujinae icatsia Jeconíaspijinëmita petaxuxuabicujinae jivi penaexanaponaejava, trecenë pijavata naexana Jesucristo jane baja, ponë Dioso athëbëvetsica itoroba jivi pecapanepaenexa.

*Pacuenia Jesús naexana yabara pelivaisi  
(Lc 2.1-7)*

<sup>18</sup> Jesucristo itsa naexana mapanacuataje, naexana mapacueniaje. Copiata Josébeje Mariabeje najumejaitabeje penapitsinexabeje. Nexata baja María jejai Josébeje penapitsinexabeje. Bajaraxuacujinae penapitsivajënaeyabeje, María nayapëtane penacoxitsijava Espiritu Santo pejamatabëcueneta. <sup>19</sup> José, María jane baja pamonanexa, bitso penajamatabëcuenereviabinë. Bajaraxuata José apo jitsipae daxitajivi pitabarata pevajunupaebijava María penacoxitsijava. Nexata picani José bëpënëa jamatabëjumai tsaponaponae:

—Itsanëjavabelia María nacoxita. Nexata ajumejibia copatsianajë. Apo pitsinë baja tsane María tajavanexa, jamatabëjai picani bëpënëa tsaponaponae José.

<sup>20</sup> Pamatacabi abaxë José bajarapacuenia najamatabëxainaponaponae, majitsinaebota José tsitanaitajëtatsi Dioso pitorobinëtsica, ángel. Nexata ángel jumaitsi Joséjavabelia:

—José, xamë raja Davidpijinë pemomomë. Pëtsa cujunavame nepitsijava María nijavanexa. Tsipaji raja panacueto María yacotaponaponae, Espiritu Santo saya pejamatabëcueneta nacoxita. <sup>21</sup> Bajarapova exanaena penacuetonëyo. Vënërubianame bajarapanacuetonëyo Jesús. Tsipaji raja bajaraponë capanepaena daxita pijajivi pibisiacuene pexanaeneconimivecua. <sup>22</sup> Bajarapacuenia María penacuetonëyo exanaena pecopiapatsinexa pacuenia baja cajena bajayata Diosojumepaebinëmi profetanëmi Dioso pejamatabëcueneta tajëvelia vajunupaeba. Profetanëmi bajayata tajëvelia bajarapanacuetonëyo yabara jumaitsi mapacueniaje:

<sup>23</sup> Petiriva apo naperabëquenatsinejeva pebijavabelia, nacoxitsiana. Exanaena penacuetonëyo. Vënërubianatsi Emanuel. “Emanuel,” pejaijume: “Dioso nacayajava,” pejaijume, jai bajayata tajëvelia profetanëmi Dioso pejamatabëcueneta, jai ángel majitsinaebota Joséjavabelia.

<sup>24</sup> Nexata José piamajitsinaecujinae naëcota. José jumecovënëta pacuenia itorobatsi ángel. Nexata baja José pijaboyaberena María barëpata pijavanexa. <sup>25</sup> Itsiata abaxë José apo imoxoyobi pijava penamataxainacuetonëyo pevecuanaexanaevajënaeyatsi. Bajarapanacuetonëyo jane baja José vënëruba JESUS.

## 2

*Pacuenia tulupu perubenaejava pecanaëcobivi najetarubena petaenexa Jesúsnyëyo yabara pelivaisi*

<sup>1</sup> Jesús naexana Belén tomarata, Judea nacuata pecaetomarata. Bajarapamatacabi nacuaevetsinë Herodes Judeanacua eveta. Nexata Jesús penaexanaecujinae, pebijivi, tulupu perubenaejava pecanaëcobivi, pata tajënacujavavetsina. Pata Jerusalén tomara javabetsina. <sup>2</sup> Tulupu perubenaejava pecanaëcobivi yanijobapona jivijavabelia:

—¿Detsa jota barëecatsi panacuetonëyo naexana judíovi pepo pevetsinënexa? Payapëtaniji bajaraponëyo penaexanaejava. Tsipaji baja cajena pataniji bajaraponëyo penaexanaejavata penaitajëtsituluputo. Bajarapatuluputo pataniji patajanacuatatareca. Bajaraxuata paponainajë mabetsinaje patataenexa bajaraponëyo, bajaraponëyo pitabarata yaiyataeya patamatabacabëta patatonubenaenexa, jai tsaponae jivijavabelia tulupu perubenaejava pecanaëcobivi.

<sup>3</sup> Nexata Herodes, Judeanacua pevetsinë, vënëlivaisitane tulupu perubenaejava pecanaëcobivi bajarapacuenia pejumaitsaponaejava jivijavabelia Jesúsnyëyo yabara. Nexata Herodes bitso najamatabëxaina. Daxita Jerusalén tomarata pejinavanapaevi ata bitso najamatabëxaina. <sup>4</sup> Nexata Herodes junata daxita sacerdotevi penamatacaitorobivi, judíovi pecujarubivi yajava, penacaetuatsinexa Herodes pijabota. Nexata Herodes jumaitsi penacaetuatsivijavabelia:

—Bajayata profetanë tajëvelia itsa vajunupaeba Cristo penaexanaejavanexa, ¿detsa jota yabara: “Bajarajota Cristo naexanaena,” jai? jai Herodes.

<sup>5</sup> Nexata penacaetuatsivi jumaitsi Herodesjavabelia:

—Belén tomarata raja naexanaeyapaeba, Judea nacuata peecaetomarata. Bajayata baja cajena Diosojumepaebinëmi profetanëmi tajëvelia vajunupaeba bajaraponë penaexanaejavanexa Belén tomarata. Bajayata Diosojumepaebinëmi profetanëmi peyaquinaelivaisita bajaraponë penaexanaejavanexa yabara tajëvelia jumaitsi mapacueniaje:

<sup>6</sup> Belén tomarata naexanaena jivi pepo pevetsinënexa. Bajaraponë jane baja evetsiana Dioso pijajivi, Israel nacuapijivi. Bajaraxuata Judea nacuata penaetomaraxi, daxita tomaraxivecua, Be léntomara cajena bitso peyaiyataetomaratsi tsane, jai baja cajena mapacueniaje bajayata tajëvelia Diosojumepaebinëmi profetanëmi peyaquinaelivaisita, jai penacaetuatsivi Herodesjavabelia.

<sup>7</sup> Bajaraxuacujinae Herodes muetsia junata tajënacuvetsina pepatsivi, tulupu perubenaejava pecanaëcobivi. Nexata Herodes jumaitsi tulupu perubenaejava pecanaëcobivijavabelia:

—¿Detsa baja pajuametobeje xaina bajarapatuluputo penaitajësicujinae? jai.

<sup>8</sup> Nexata petsipaebicujinaetsi Herodes itorobalia bajarapamonae Belén tomarabelia. Herodes jumaitsi tulupu perubenaejava pecanaëcobivijavabelia:

—Paponaremelia Belén tomarabelia. Xaniavaetsia pajaitsianame bajaraponëyo. Itsa pacaxitajarabianame, panevajunucaponaeremena. Nexata xanë ata nalianë tsane. Yaiyataeya tamatabacabëta tonanucæjitsianë bajaraponëyo pitabarata, jai Herodes tulupu perubenaejava pecanaëcobivijavabelia.

<sup>9</sup> Nexata jane baja tulupu perubenaejava pecanaëcobivi ponalia Belén tomarabelia. Nexata bajarapamonae namutualia penajetarubenaejavata, jemata icatsia napebeta tuluputo, patuluputo bajarapamonae tane pijanacuatareca. Nexata bajarapatuluputo bajarapamonae matacanajetarucatsi. Matapania itsajota Jesúsnyëyo pena barëecatsti pematatsënëatsia, bajarapatuluputo rucojopa. <sup>10</sup> Tulupu perubenaejava pecanaëcobivi itsa tane bajarapatuluputo, bitso barëya. <sup>11</sup> Nexata bajarapamonae boyalia itsa joneya, tane Jesúsnyëyo, pena yajava. Nexata tulupu perubenaejava pecanaëcobivi yaiyataeya pematabacabëta tonubenajunua Jesúsnyëyo pitabarata. Bajaraxuacujinae pecapatsicajonixi matapana, penamatamotsijavanë pejebicajonixi. Nexata Jesúsnyëyo rajuta orojavanë. Rajutanua petuxujuvijavabeje. Itsajava inciensovënëjava. Itsajava mirravënëjava. <sup>12</sup> Bajaraxuacujinae tulupu perubenaejava pecanaëcobivi meravivi majitsinaebota Dioso itavetatsi penaviabiyaniiva nacuaevetsinë Herodesjavabelia. Nexata tulupu perubenaejava pecanaëcobivi saicaya namutua baja naviaba pijanacuayabereca.

*Pacuenia José barënajetabajirava Jesúsnyëyo Egipto nacuyabelia yabara pelivaisi*

<sup>13</sup> Tulupu perubenaejava pecanaëcobivi penaviabicujinae, Dioso pijaáangel meravivi José majitsinaebota tsitanaitajëtatsi. Nexata ángel jumaitsi Joséjavabelia:

—José, nonotapunare baja. Barëponare baja penacuetonëyo, pena yajava. Barënajetabajiravare Egipto nacuyabelia. Bajarajotalia barëponaponaename. Matapania icatsia itsa catsipaebianatsi, barënaviatsiaremena. Tspaji raja nacuaevetsinë Herodes tsiquirinëyo tsimaxërenajitsiatsi pebeyaxuabinexatsi, jai ángel Joséjavabelia.

<sup>14</sup> Nexata José nonotapuna. Piamajitsinaemeravi baja José barëpona Jesúsnyëyo, pena yajava. Barënajetabajirava Egipto nacuyabelia. <sup>15</sup> Bajarajotalia José barëponapona bajayajebi. Matapania baja Herodes itsa tëpa, José barëpatsijitsiarena Israel nacuyaberena. Bajarapacuenia tocopiapatatsi tspaji baja cajena bajayata Diosojumepaebinëmi profetanëmi Dioso pejamatabëcueneta tajëvelia jumaitsi Jesús yabara mapacueniaje: “Taxënato icatsia junatsiarenejë penaviatsinexa Egipto nacuverena,” jai ra Dioso, jai baja cajena bajayata tajëvelia profetanëmi Jesús yabara.

*Pacuenia nacuaevetsinë Herodes pijajivi itoroba pebinacuetoxi pebeponaenexa yabara pelivaisi*

<sup>16</sup> Nacuaevetsinë Herodes picani jumaitsi tulupu perubenaejava pecanaëcobivijavabelia: “Itsa pacaxitajarabianame bajarapanacuetonëyo, panevajunucaponaeremena,”

jai picani Herodes Jesúsnëyo yabara. Itsiata tulupu perubenaejava pecanaëcobivi caxitajarabi ata Jesúsnëyo, apo vajunucaponae Herodesjavabelia. Nexata Herodes itsa yapëtane tulupu perubenaejava pecanaëcobivi apo pevajunucaponaejavatsirena, caxitajarabi ata Jesúsnëyo, Herodes bitso anaepana. Nexata Herodes pijajivi itoroba. Jumaitsi:

—Pabeponaename daxita pebinacuetoxi Belén tomarata, Belén tomarajumavelia penaebonëjava ata. Daxita papebinacuetoxi abaxë apo xainae acueyabi pavaibeje, pabeponaename. Pejananaexanaenacuetoxi ata pabeponaenane, jai Herodes pijajivijavabelia.

Bजारapacuenia Herodes pijajivi itoroba pebinacuetoxi pebeponaenexa, Jesúsnëyo picani peyajavabeyaxuabinexatsi. Tsipaji tulupu perubenaejava pecanaëcobivi Herodesjavabelia tsipaeba paepatota taxuxuaba petaejava tuluputo. <sup>17</sup> Itsa bajarapacuenia pebinacuetoxi beponatsi Belén tomarata, copiapata jane baja pacuenia baja cajena Diosojumepaebinëmi profeta Jeramíaspijinë bajayata tajëvelia yaquina pebinacuetoxi pebejavanexatsi yabara. Bajayata baja cajena profeta Jeramíaspijinë peyaquinaelivaisita tajëvelia jumaitsi mapacueniaje:

<sup>18</sup> Belén tomarajumaverena, Ramá tomarata, ayaicuenia matanueyabiana. Raquelpijiva pemomoxi pexi matanueyabiana. Itavetsi atatsi tsane, itsiata apo copatsi tsane bitso penajamatabëxainaejava. Tsipaji pexi totëpaenatsi, jai bajayata tajëvelia profeta Jeramíaspijinë peyaquinaelivaisita pexoxibeponaejavanexatsi yabara bajarapatomarata.

<sup>19</sup> Nacuaevevtsinë baja Herodes pepuatëpae, Dioso icatsia pijaáangel itoroba Joséjavabelia. Nexata ángel meravi majitsinaebota José tsitanaitajëtatsi Egipto nacuata.

<sup>20</sup> Nexata ángel jumaitsi Joséjavabelia:

—José, nonotapunare. Barëponaename baja tsiquirinëyo, pena yajava. Barënaviaremelia baja icatsia Israel nacuayabelia. Tëpa rabaja ponë picani jamatabëbeyaxuabatsi tsiquirinëyo, jai ángel majitsinaebota Joséjavabelia.

<sup>21</sup> Nexata baja José nonotapuna. Barëpona tsiquirinëyo, pena yajava. José icatsia barënaviata Israel nacuayabelia. <sup>22</sup> Nacuaevevtsinëmi Herodespijinë pexënato pevënë Arquelao. Nexata Arquelao eveta Judeanacua paxa pevënamuto. Nexata José itsa vënëlivaisitane nacuaevevtsinëmi Herodespijinë pexënato pevetsijava Judeanacua, José cujunava Jesúsnëyo pebarëponaejava Judea nacuayabelia. Majitsinaebota José Dioso itavetatsi Jesúsnëyo pebarëponaeyaniva Judea nacuayabelia. Nexata José barëpona Jesúsnëyo Galilea nacuayabelia. <sup>23</sup> José itsa barëpata Jesúsnëyo Galilea nacuayabelia, Nazaret tomarata barëpatajopa pebarëcaenexa Nazaret tomarata. Bजारapacuenia José Nazaret tomarata itsa barëca Jesúsnëyo, copiapata jane baja pacuenia baja cajena bajayata Diosojumepaebivimi profetavi tajëvelia jumaitsi. Diosojumepaebivimi profetavi bajayata baja cajena tajëvelia jumaitsi Jesús yabara mapacueniaje: “Ponë Dioso itorobijitsiatsica jivi pecapanepaenexa, bajaraponë yabara jivi jumai tsane: ‘Mara ponëje Nazaret tomarapijinëje,’ jai tsane,” jai baja cajena bajayata tajëvelia profetavimi Jesús yabara.

### 3

*Pacuenia Juan jivibautisabinë Dioso pitorobilivaisi jivi tsipaeba petusato nacuata yabara pelivaisi*

*(Mr 1.1-8; Lc 3.1-9, 15-17; Jn 1.19-28)*

<sup>1</sup> Jesús itsa baja xaina bejamatabëcuene treinta pavaibeje, Juan jivibautisabinë najetaruca Judea nacuatusatojava. <sup>2</sup> Juan jivibautisabinë Dioso pitorobilivaisi jivi tsipaebanajetaruca. Jumai tsanajetaruca mapacueniaje:

—Dioso rabaja pijajivi pevetsimatacabinexa, imoxoyo baja pevajënae pecopiapatsinexa. Nexata baja pacopabare pibisiacuene paneexanabiabijava. Panajamatabëcuenepeñëyorore Diosojavabelia, jai tsanajetaruca Juan jivijavabelia.

<sup>3</sup> Bajarapacuenia Juan Dioso pitorobilivaisi jivi itsa tsipaebanajetaruca, copiapata jane baja pacuenia Diosojumepaebinēmi profeta, Isafāspijinē, bajayata tajēvelia yaquina Juan pelivaisi. Juan jivibautisabinē Dioso pitorobilivaisi jivi petsipaebanajetarucaejavanexa yabara, yaquina. Profeta Isafāspijinē peyaquinaelivaisita tajēvelia jumaitsi mapacueni-aje:

Tanejumulivaisipaebinē vavajai tsane petusato nacuata. Jumaitsi tsane jivijavabelia: “Jivi baxaneba panamutoverena najetarucaejitsia petuxanenē. Batoroviaex-ananua namuto. Bajara pijinia pacuenia paxamē ata panajamatabēcuenexani-avaere pepo petuxanenē pepatsivajēnaeyarena,” jai tsane tanejumulivaisipaebinē,

jai profeta Isafāspijinē bajayata peyaquinaelivaisita Dioso pitorobilivaisi Juan jivi petsipaebanajetarucaejavanexa yabara.

<sup>4</sup> Juan naxatata camellonata pexanaejava. Naepacēta cuerobocoto. Pexaejava ēbosese, jabēra yajava. <sup>5</sup> Juan petsipaebilivaisi pejumetaenexatsi, muxunapatabiabatsi Jerusalén tomarapijivi, Judea nacuapijivi ata, Jordānmene imoxoyopijivi ata. <sup>6</sup> Nexata bajarapamonae pibisiacuene pexanaejavami, rovia Diosojavabelia navecuapaebapona. Nexata bajarapamonae Juan bautisabapona Jordán meneta.

<sup>7</sup> Jivibitsaētoخانeto pata Juanjavaberena pebautisabinexa picani Juan. Bajarapamonae apo jumecovēnētsi ata Dioso pitorobilivaisi, jamatabēcuenenavēxaniabiaya jamatabējumaitsi:

—Juan itsa nacabautisabiana, Dioso nacacapanepaena, jamatabējai.

Nexata Juan itsa tane ayaibitsaētoخانeto fariseovi, saduceovi ata, pepatsijavarena Juan picani pebautisabinexa, nexata Juan jumaitsi bajarapamonaejavabelia:

—¡Panejamatabēcuenenavēxaniabivi! Pacuenia jomo rēcēpa itsa tane isoto petajue-najetarucaejava, bajara saya paitsimē. Dioso rabaja papecananeconitsia exanaemata-cabinexa, pacaimoxoyotapona. Itsiata acuenebi tsane panevecuapanepaenexa Dioso papecananeconitsia exanaematacabinexa. <sup>8</sup> Itsa pajitsipame Dioso papecacapanepaejava, pacopabare pibisiacuene paneexanabiabijava. Dioso pajumecovēnētavanapare. Nexata daxitajivi pacayapētaena pepacuene baja panecopabijava pibisiacuene paneexanabi-abijavami. Pacayapētaenanua panenajamatabēcuenē pēnēyorotsijava Diosojavabelia. <sup>9</sup> Jamatabēcuenenavēxaniabiaya pētsa panajumaitsimē: “Vaxaitsi cajena Abrahampijinē pemomoxitsi. Nexata Dioso nacacapanepaena,” panajamē pētsa. Abrahampijinē picani papemomoxi atamē, itsiata pibisiacuene itsa paexananapame, nexata bajarapacuenē apo pacatonamatamotsi tsipae Diosojavabelia papecacapanepaenexa. Dioso baja ca-jena caējēpatsi jivi pexanaenexa mapaibotonēmi ataje, Abrahampijinē bepemomoxi Dioso petaenexa. Nexata bajarapamonae ata Dioso itsa apo jumecovēnētsi, Dioso apo capanepae tsipae. Nexata pacopabare pibisiacuene paneexanabiabijava papeca-capanepaenexa Dioso. <sup>10</sup> Peubinaenē pexainaenē itsa apo tonacuaitsitsi pexaniacuai, nicata sipalita daxita ponaenē apo tonacuaitsitsi pexaniacuai. Nexata baja penicatsicujinae itsa niona bajaraponaenē, caetuata. Xuaba isotojavabelia. Nexata bajaraponaenēmi tajuatsi. Bajara pijinia pacuenia paxamē ata Dioso pacaxuabiana infiernojavabelia papecatajuenexa, Dioso apo panejumecovēnētsivi. <sup>11</sup> Xanē raja saya jivi bautisabaponajē merata. Tsipaji baja bajarapamonae copaba pibisiacuene pexanabiabijava. Najamatabēcuenepēnēyorotanua Diosojavabelia. Itsiata baitsi jane ponē tacovēverena najetarucaena, tabautisabivi Espiritu Santo tsijamatabējoneyaexanaenatsi, pitarunutsicotia yajava. Xanē raja saya beveliamatabēcuenenēnē bajaraponēvecua. Nexata bajaraponē vecuaauranē pijazapato ata tatocaponaenexa beprijavitonēcuenianē. <sup>12</sup> Arrozxainaenē baja itsa vereta arroz pesiricaejava, jēaba arroz pejëabijavata pepitsinexa epexu. Nexata pijaarroz pejëabijavata, saicaya tsatapona epexu pesivecua. Nexata epexu xaniavaeteta peetsibojavabelia. Pesi pijinia penetapona vayafuabelia petajuitsinexa. Bajara pijinia

pacuenia paxamë ata Dioso pejumecovënëtsivivecua Dioso pacatsatsiana papecaxuabinexa infiernojavabelia panenaxuabinexa baja daxitamatacabijavabelianexa. Pamonae pijinia Dioso pejumecovënëtsivi, Dioso capanepaenatsi pijanacuayabetsia. Pamonae pijinia Dioso apo jumecovënëtsi, Dioso naneconitsiaexanaenatsi daxitamatacabijavabelianexa apo peverevereaeisotojavabelia, jai Juan daxita bajarapamonaejavabelia.

*Pacuenia Juan bautisaba Jesús yabara pelivaisi*

*(Mr 1.9-11; Lc 3.21-22)*

<sup>13</sup> Jesús naropota Galilea nacujavaverena. Nexata pata Jordán menejavaberena. Jordán menejavata Juan ponapona. Nexata Jesús pata Juanjavaberena pebautisabinexatsi Juan. <sup>14</sup> Juan picani apo jitsipae pebautisabijava Jesús. Juan nexata jumaitsi Jesúsjavabelia:

—¿Detsa xuajitsia patame tacabautisabinexa? Xamë rajane biji xanë benebautisabame, jai Juan Jesúsjavabelia.

<sup>15</sup> Itsiata Jesús jumaitsi Juanjavabelia:

—Aeconoxae itsiata pacuenia baja cavajëtatsi, netoexanaename. Xanepana vajaexanaenexa daxita Dioso vajanacaitorobicuenia, jai Jesús Juanjavabelia.

Nexata baja Juan jejai pebautisabinexa Jesús. <sup>16</sup> Nexata jane baja Juan bautisaba Jesús. Jesús pebautisabicujinaetsi nonotajuna menevetsina. Bajarapaepatota Jesús tane athëbëtatsia itaboxo penapatsijava. Nexata Jesús tane Espíritu Santo perunaejavatsica beucucuto. Tsimatarunaicatsi. <sup>17</sup> Nexata Juan jumetane athëbëvetsica Dioso pejumait-sijava: “Mara ponë taxënato tasivanëje. Sivajamatabëcuenebarëyanë bitso,” pejaijava.

4

*Pacuenia Jesús jamatabëcueneëjëbatsi dovathi yabara pelivaisi*

*(Mr 1.12-13; Lc 4.1-13)*

<sup>1</sup> Jesús pebautisabicujinaetsi, Espíritu Santo ponaeyaexanatsi petusato nacujavabelia. Bajarabelia ponaeyaexanatsi pejamatabëcueneëjëbinexatsi dovathi.

<sup>2</sup> Nexata petusato nacuata Jesús ponapona cuarenta pamatacabibeje, cuarenta pameravibeje yajava. Bajara pijinia pamatacabibeje Jesús apo xae pexaejava. Nexata Jesús bitso pijani. <sup>3</sup> Nexata dovathi Jesús imoxoyotatsi pejamatabëcueneëjëbinexatsi Jesús picani pibisiacuene pexanaenexa. Dovathi jumaitsi Jesúsjavabelia:

—Itsa pepacuene Dioso pexënatomë, itorobare mapabotonëje penaexanaenexa pan, jai dovathi.

<sup>4</sup> Jesús nexata jumaitsi dovathijavabelia:

—Jume raja. Dioso raja pejumelivaisibaxutota jumaitsi mapacueniaje: “Jivi raja apo namatavenonae ëpexaejava pexaenexa. Jivi raja namatavenona daxita Dioso pejumelivaisi ata pejumecovënëtsinexa pexainaenexa matacabi apo peverevereaejava,” jai raja Dioso pejumelivaisibaxutota, jai Jesús dovathijavabelia.

<sup>5</sup> Bajaraxuacujinae icatsia Jesús barëliatsi dovathi Jerusalén tomarabelia. Barëjunayatsi templobo matatuyabetsia. <sup>6</sup> Nexata templobo matatutatsia dovathi icatsia jumaitsi Jesúsjavabelia:

—Itsa pepacuene Dioso pexënatomë, jirevaremeca irabereca. Bajarapacuenia jirevaremeca irabereca tsipaji xamë nitsacueneyaniva pecaevecsina Dioso pejumelivaisibaxutota jumaitsi mapacueniaje:

Dioso itorobianica pijaánglelevi pecaevecsina. Nexata ánglelevi pecobeta cayotsiana pecataxutsaquitsianiva ibotonëjavabelia, jai Dioso pejumelivaisibaxutota xamë pecaevecsina ánglelevi, jai dovathi Jesúsjavabelia.

<sup>7</sup> Jesús nexata icatsia jumaitsi dovathijavabelia:

—Jume raja. Dioso raja pijinia pejumelivaisibaxutota jumaitsi mapacueniaje: “It-sajivi ata jamatabëcuenenavëxaniabiaya pijacuata apo bejamatabëjumaitsi: ‘Xanë Dioso jamatabëcueneëjëtsianajë. Nexata exanaenajë pacuene bitso netsiayai tatëpaenexa.

Itsiata Dioso neyavenonaena tavecuapanepaenexa bajaraxua. Nexata bajarapacuenia yapëtaenajë Dioso taneyavenonaejava,' apo bejamatabëjai," jai Dioso pejumelivaisibaxutota, jai Jesús dovathijavabelia.

<sup>8</sup> Jesús icatsia barëliatsi dovathi pinijitsutoxanetojavabelia. Barëjunayatsi bajarapatsutojumabetsia. Nexata bajarapatsutojumavetsica dovathi Jesús tsitajëtatsi daxitanacuanë. Daxita bajarapanacuanëta daxitacuene pexinaejava yajavatsitajëtatsi.  
<sup>9</sup> Nexata icatsia dovathi jumaitsi Jesúsjavabelia:

—Ayaijamatabëcuenenënë netaeya taitabarata nematabacabëta itsa netonucajuame, nexata daxita mapanacuanëtaje, daxitacuene xua xaina, cayajavarajutsianatsi, jai dovathi Jesúsjavabelia.

<sup>10</sup> Nexata Jesús jumaitsi dovathijavabelia:

—Dovathi, nevecuanatixire. Dioso raja pejumelivaisibaxutota jumaitsi mapacueniaje: “Daxitajivi vajëcae pematatabacabëta caenë pepo petuxanenë Diosojavabelia. Tonacuenebinua bajaraëponënexa,” jai raja Dioso pejumelivaisibaxutota, jai Jesús dovathijavabelia.

<sup>11</sup> Nexata baja dovathi Jesús vecuaponatsi. Bajaraxuacujinae ángelevi patsica Jesús peyavenonaenexatsi.

*Pacuenia Jesús Galilea nacuata taxuxuaba Dioso pitorobilivaisi jivi petsipaebijava yabara pelivaisi*

*(Mr 1.14-15; Lc 4.14-15)*

<sup>12</sup> Jesús vënëlivaisitane Juan peetsijavatsi penaneconitsivi pejebabiabibota. Nexata Jesús pona Galilea nacuayabelia. <sup>13</sup> Itsiata Jesús apo ponaponae Nazaret tomarata. Ponapona Capernaum tomarata. Capernaum tomara eca Zabolónvënë nacuabeje Nef-talivënë nacuabejevata. Capernaumtomara eca pucaxanetoitapata. <sup>14</sup> Bajarapacuenia Jesús itsa patajopa Capernaum tomarata Dioso pitorobilivaisi jivi petsipaebinexa, copi-apata jane baja pacuenia bajayata Diosojumepaebinë profeta, Isaíaspijinë, tajëvelia yaquina Jesús pelivaisi. Dioso pitorobilivaisi Jesús Capernaum tomarata jivi petsipaebijavanexa yabara, Isaíaspijinë peyaquinaelivaisita tajëvelia jumaitsi mapacueniaje:

<sup>15-16</sup> Zabolón nacuapijivi, Nef-tali nacuapijivi ata, Jordánmene itsapanaverenapijivi ata, bitso apo yapëtae Dioso pitorobilivaisi. Galilea nacuata pejinavanapaevi ata, itsaxuayo jinavanapa ayaibitsaëtoxonetonë apo judíovi, bitso apo yapëtae Dioso pitorobilivaisi. Daxita bajarapanacuanëpijivi pexaniajailivaisi, Dioso pitorobilivaisi, apo peyapëtaexae, bepitaquirinacuanëjava jinavanapa. Nexata pacuenia pinijicotiaxaneto itayotsipatsi petaenexa xaniavaetsia, bajara pijinia pacuenia bajarapamonae jamatabëcueneitayotsianatsi itsa tsipaebianatsi Diosojavabelia pecapanepaelivaisinexatsi,

jai tajëvelia Isaíaspijinë peyaquinaelivaisita Dioso pitorobilivaisi Jesús petsipaebijavanexa yabara bajarapanacuanëpijivijavabelia.

<sup>17</sup> Nexata Capernaum tomarata Jesús taxuxuaba Dioso pitorobilivaisi jivi petsipaebijava. Dioso pitorobilivaisi Jesús itsa tsipaeba, jivijavabelia jumai tsaponae mapacueniaje:

—Dioso rabaja papecaevetsimatacabinexa, imoxoyo baja pevajënae pecopiapatsinexa. Nexata baja pacopabare pibisiacuene paneexanabiabijava. Panajamatabëcuenepënëy-orore Diosojavabelia, jai tsaponae Jesús jivijavabelia.

*Pacuenia Jesús junata cuatro ponëbeje dujuai peyamatajucabiabivi yabara pelivaisi*

*(Mr 1.16-20; Lc 5.1-11)*

<sup>18</sup> Jesús najetaruca Galilea pucaxaneto itapaya. Nexata Galilea pucaitapata Jesús taenuta anijanëbeje nacaebananëbeje, Simónbeje Andrésbeje. Simón itsavënë Pedro. Bajaraponëbeje daxitamatacabi canacujitsia dujuai yamatajucabiabibeje. Dujuai peyamatajucabiabijavatabeje, yamatajucaponaponabeje. <sup>19</sup> Nexata Jesús jumaitsi Simónbeje Andrésbejevabelia:

—Naxanitsia. Panepënaponarebeje. Nexata pacacujarubianatsibeje jivi paneju-caenexabeje. Pacuenia dujuai payamatajucabiabamebeje, bajarapacuenia jivi pajucaename Dioso pijajivinexa, jai Jesús.

<sup>20</sup> Nexata Simónbeje Andrésbeje dujuai peyamatajucabiabijavamibeje, bajarajota puenetabuatabeje. Nexata baja naponabeje Jesús pepëta.

<sup>21</sup> Bajaraxuacujinae icatsia bebeliayo pevajënaeyabelia Jesús barëpona. Icatsia taenuta anijanëbeje nacaebananëbeje, Zebedeo pexënatobeje. Bajaraponëbeje Santiagobeje Juanbeje. Pijajeraënëta paxa yajava xanebaponaponabeje dujuai peyamatajucaejavanexabeje. Nexata icatsia Jesús junata Santiagobeje Juanbeje. <sup>22</sup> Nexata bajarajota paxa puenetanutabeje jera yajava. Santiagobeje Juanbeje naponabeje baja Jesús pepëta.

*Pacuenia Jesús livaisi tsipaeba jivi ayaibitsaëtoxfanetojavabelia yabara pelivaisi*  
(Lc 6.17-19)

<sup>23</sup> Jesús jane baja najetaruca daxita Galilea nacujava. Dioso pitorobilivaisi tsi-paebapona judfovi penacaetuatabibonëjava. Jesús tsipaebapona jivijavabelia pexanialivaisi. Tsipaebapona Dioso pijajivi pevetsijavanexa. Jamatejemayaexanaponanua daxitaviriavitane pexainaevimi. <sup>24</sup> Nexata daxita Siria nacujava pejinavanapaevi ata vënëlivaisitanetsi Jesús. Jesús tocapatatsi daxitaviriavitane pexainaevi. Tocapatatsinua dovathi peyajavajinavanapaevi. Tocapatatsinua pedevacaibivitsi. Tocapatatsinua petabusipacuenabivitsi. Jesús nexata jamatejemayaexanapona daxita bajarapamonae. <sup>25</sup> Nexata Jesús pënaponatsi jivi ayaibitsaëtoxfaneto Galilea nacujapijivi, Decápolis nacujapijivi ata, Jerusalén tomarapijivi ata, Judea nacujapijivi ata, Jordánmene itsapanaverenapijivi ata.

## 5

*Pacuenia Jesús jivi livaisi tsipaeba petsutoyenepanajavata yabara pelivaisi*  
(Lc 6.20-23)

<sup>1</sup> Jesús itsa tane jivibitsaëtoxfaneto, nexata junaya petsutotsia. Bajarapatsutoyenepanata epatota ecaya. Nexata bajarajota Jesús pijajivi matatoyorotsia nacaetu-atatsi. <sup>2</sup> Nexata Jesús taxuxuaba livaisi petsipaebijava. <sup>3</sup> Jesús jumaiti pijajivijavabelia mapacueniaje:

—Jamatabëcuenebarëya tsavanapae tsane pamona picani mapanacuata yajamatabëcuenebëjai tsavanapae pibisiacuene pexanabiabijava. Bajarapamonae jonena Dioso pijanacuayabetsia.

<sup>4</sup> Jamatabëcuenebarëya tsavanapae tsane pamona picani mapanacuata bejamatabëjiobi tsavanapae itsamonae pibisiacuene petoexanaeatsi. Bajarapamonae Dioso jamatabëcueneavenonaenatsi.

<sup>5</sup> Jamatabëcuenebarëya tsavanapae tsane pamona apo jamatabëbëjai tsabiabi mapanacuata, itsacueniababiabi atatsi itsamonae. Apo cuenecanaviatabiabinua. Bajarapamonae jinavanapaena Dioso pijanacuatatsia pacuenia Dioso najumecapanepaeya jumaiti bajarapamonae yabara.

<sup>6</sup> Jamatabëcuenebarëya tsavanapae tsane pamona mapanacuata bitso daxitacuene matatoxenetsia jitsipabiaba pexanaenexa Dioso pitorobicueniatsi. Dioso baja cajena yavenonabiabianatsi pexanaenexa bajarapacuenia.

<sup>7</sup> Jamatabëcuenebarëya tsavanapae tsane pamona mapanacuata itsamonae ata itaxutotsoniataeyabiaba. Dioso nexata juya itaxutotsoniataeyabiabianatsi bajarapamonae.

<sup>8</sup> Jamatabëcuenebarëya tsavanapae tsane pamona mapanacuata ëpexaniacuene pexanaenexa najamatabëxainabiaba. Bajarapamonae taena Dioso.

<sup>9</sup> Jamatabëcuenebarëya tsavanapae tsane pamona mapanacuata penaitoyavimi ata, nbarajamatabëcuene xanepanaeyaexanapona. Bajarapamonae yabara: “Taxi,” jai tsane Dioso.

<sup>10</sup> 'Jamatabëcuenebarëya tsavanapae tsane pamona mapanacuata bejiobiaexanabi-abatsi Dioso pitorobicueniatsi pexanabiabijava yabara. Bajarapamona jonena Dioso pijanacuayabetsia.

<sup>11</sup> 'Patajajivixamë, itsamona pibisiacuenia itsa pacabaracuaicuajai, itsiata pajamatabëcuenebarëyamë tsavanapae tsane. Bajarapamona pacabejiobiaexanae ata tsane, najumetsënëtsiaya pacabaracuaicuajai atanua tsane, itsiata pajamatabëcuenebarëyamë tsavanapae tsane. <sup>12</sup> Bajara tsipaji pacuenia panevajënaeyapijivimi ata, Diosojumepaebivimi profetavi, bajayata bejiobiaexanatsi. Nexata pasivajamatabëcuenebarëyamë tsavanapae tsane paxamë ata bajarapacuenia itsa pacaexanaena. Tsipaji raja athëbëtatsia itsamatacabi Dioso pacarajutsiana bitso pexaniacuene, jai Jesús pijajivijavabelia.

*Pacuenia Dioso pejumecovënëtsivi mapanacuata pejamatabëcuene beyajo, bepecotianua, yabara pelivaisi*

*(Mr 9.50; Lc 14.34-35)*

<sup>13</sup> Icatsia Jesús jumaitsi petsutoyenepanajavata pijajivi ayaibitsaëtoxanetojavabelia:

—Yajobeno xanepana vajaexabinexa pevi piabejyaniva. Paxamë rabaja pijinia bepajajomë tsavanapae mapanacuapijivijavabeliaje, mapanacuapijivi bitso piabejyaniva pibisiacuenia pexanaeneconi yabara. Paxamë xaniavaetsia panetsipaebavanapaexae Dioso pejumelivaisi, bajarapamona bitso pibisiacuenia apo exanae. Itsiata yajo pexaicaejavami itsa ajibi tsipae, ¿detsa nexata pacuenia icatsia naxaicaeyaexanaejitsipa? Acuenebi. Itsacuenejavayonexa ata baja apo xanepanae tsipae. Saya pexuabinexa, jivi petaxunanonobinexa, xanepanaejitsipa. Bajara pijinia paxamë ata paitsimë tsipae itsa pacopatsipame Dioso panejumecovënëtsijava. Pajamatabëcuenesaëjibimë tsipae. Nexata itsacuenejavayonexa ata, apo paxanepanaemë tsipae.

<sup>14</sup> 'Pacuenia piitayotsicotia itayota piitaquirirjavata, bajara pijinia pacuenia paxamë ata Dioso panejumecovënëtsivi pajamatabëcueneitayotsianame pijamatabëcueneitaquirivimi. Bajarapacuenia pajamatabëcueneitayotsianame itsa patsitajinavanapaename xaniavaetsia daxitajivi pitabarata. Petsutojumata peecaetomara acuenebi penacaranatecaejava tsipae. <sup>15</sup> Itsajivi ata lámparabë pitanojotsicujinae, apo etsi cajoniënëalia. Biji rajane athëbëyo etsia daxitaboënë pitayotecaenexa. <sup>16</sup> Bajara pijinia pacuenia paxamë ata paitsimëre. Xaniavaetsia patsitajinavanapare daxitajivi pitabarata. Nexata bajarapamona pacacuenetaena pexaniacuene paneexanavanapaejava. Nexata bajarapamona itsa pacacuenetaena pexaniacuene paneexanavanapaejava, jumai tsane paxamë yabara paneaxa Diosojavabelia: “Diosomë, bitso ayajamatabëcuenenëmë. Yavenonabiabame nijajivi,” jai tsane bajarapamona paneaxa, athëbëtatsia peecaenëjavabelia, jai Jesús pijajivijavabelia.

*Pacuenia Jesús tsipaeba pijajivi bajayata Dioso Moiséspijinëta penajumecopatsilivaisi yabara pelivaisi*

<sup>17</sup> Icatsia Jesús jumaitsi petsutoyenepanajavata pijajivi ayaibitsaëtoxanetojavabelia:

—Pëtsa panesivajamatabëjumaitsimë: “Maponë patajopaje piajibiaexanaenexa Dioso Moiséspijinëta penajumecopatsilivaisi. Palivaisi ata Diosojumepaebivimi profetavi bajayata tsipaebapona piajibiaexanaenexa,” panesivajamatabëjamë pëtsa. Apo patajopaenë tajibiayaexanaenexa bajarapalivaisibeje. Biji rajane patajopajë taexanaenexa jane baja daxita pacuenia tajëvelia nevajunupaeba bajarapalivaisitabeje. <sup>18</sup> Xaniajanë pacuenia pacatsipaebijitsiatsi. Dioso Moiséspijinëta penajumecopatsilivaisi epatua itsalivaisicuenia, caetanetoyo ata, Dioso apo ithothiana tsane. Pacuenia baja Dioso najumecapanepaeya jumaitsi, bajarapacuenia tsitecaena. Nexata copiapatsiana daxita xua Dioso tajëvelia najumecapanepaeya jumaitsi bajarapalivaisitabeje. <sup>19</sup> Nexata pajivi jumecovënëtsi ata Dioso Moiséspijinëta penajumecopatsilivaisi, itsiata itsa apo jumecovënëtsi caelivaisiyo bajarapayajuvënëlivaisiyo, naneconitsiana Diosojavabelia. Bajarapajivi itsa itavetsiananua itsamonae ata pejumecovënëtsiyaniva bajarapalivaisiyo,

nexata bajarapaneconi yabara bajarapajivi beveliajamatabëcuenejivi taenatsi daxitajivivecua Dioso pijanacuatatsia. Pajivi jumeconvënëta daxita bajarapalivaisi, itsa tsipaebanua itsamonae ata pejumecovënëtsinexa bajarapalivaisi, nexata bajarapajivi ayaijamatabëcuenejivi taenatsi Dioso pijanacuatatsia. <sup>20</sup> Xaniajanë pacuenia pacatsipaebijitsiatsi. Paxamë xaniavaetsia Dioso pajumecovënëre. Xaniavaetsia Dioso pajumecovënëre judíovi pecujarubivi Dioso pejumecovënëtsijava matatoxenetsia. Xaniavaetsia Dioso pajumecovënëre fariseovi ata Dioso pejumecovënëtsijava matatoxenetsia. Paxamë xaniavaetsia Dioso itsa apo pajumecovënëtsimë tsane, nexata pacuenia bajarapamonae apo jone tsane Dioso pijanacuayabetsia, bajara paxamë ata paitsimë tsane. Apo panajonemë tsane Dioso pijanacuayabetsia, jai Jesús pijajivijavabelia.

*Pacuenia Jesús muxujioba pijajivi pecopatsinexa penabaraanaepanabiabijava yabara pelivaisi*

*(Lc 12.57-59)*

<sup>21</sup> Icatsia Jesús jumaitsi petsutoyenepanajavata pijajivi ayaibitsaëtoxanetojavabelia:

—Paxamë rabaja payapëtaneme pacuenia bajayata Moiséspijinë jumaitsi panijasalinaivimijavabelia. Moiséspijinë bajayata panijasalinaivimijavabelia jumaitsi mapacueniaje: “Pëtsa pabeyaxuabame jivitonë. Pajivi beyaxuaba jivitonë, bajarapajivi pananeconitsiaexanaename,” jai Moiséspijinë panijasalinaivimijavabelia. <sup>22</sup> Itsiata baitsi jane xanë pacatsipaebatsi mapacueniaje. Pajivi baraanaepana itsajivijavabelia, bajarapajivi naneconita Diosojavabelia. Nutsianatsi Dioso pitabarata pananeconitsiaexanaenexatsi. Pajivi itsajivi bijatane pibisiacuenia, bajarapajivi naneconita Diosojavabelia. Bajarapaneconi yabara nutsianatsi itsajota nacaetuatabiaba tomara pevetsivi. Nexata naneconitsiaexanaenatsi. Pajivi itsajivi pitoyaxae, anaeya jumaitsi: “Xamë saya bitso pecamatajemabinë,” jai, bitso tsiayaitsi. Bajarapaneconi yabara bajarapajivi Dioso naneconitsiaexanaenatsi infierno isotojavabelia.

<sup>23</sup> Itsa paponame altarvënëjavajavabelia panerajutsinexa ofrenda Diosojavabelia, nexata bajarapaepatota itsa panajamatabënapitame itsajivijavabelia itsacuene panexanaejava, nexata mapacuenia paexanaenameje. <sup>24</sup> Altarvënëjava pitabarata abaxë papuenerere ofrenda panerajutsijavanexa Diosojavabelia. Paponare caecuenia pajivijavabelia pananeconitame panenabarajamatabëcuene xanepanaenexabeje icatsia. Bajaraxuacujinae icatsia panaviatsiaremena altarvënëjavajavaberena panerajutsinexa jane baja ofrenda Diosojavabelia.

<sup>25</sup> Itsa pananeconitame itsajivijavabelia, nexata itsa pacacapona bajarapajivi jueznëjavabelia papecaneconitsinexa, namutua xaniavaetsia panabarëcuaicuaijamërebeje panenasivajamatabë xanepanaenexabeje xua yabara picani pacaneconitsijitsia. Bajarapacuenia xaniavaetsia panabarëcuaicuaijamërebeje papecanutsiyaniva jueznë pitabarata. Tsipaji raja jueznë itorobijitsipa policíavi panijaneconi yabara papecacaponenexa pananeconitsivi pejebabiabiboyabelia. Nexata policíavi pacananeconitsiaexanetsipa pananeconitsivi pejebabiabibota. <sup>26</sup> Xaniajanë pacuenia pacatsipaebijitsiatsi. Nexata pananeconitsivi pejebabiabibota itsa pacananeconitsiaexanetsipa, bajaraverena bepijia apo papitsapaemë tsipae. Matapania pamatamotsipame daxita xua yabara pacananeconitsiaexaneta, papitsapaejitsipame, jai Jesús pijajivijavabelia.

*Pacuenia Jesús pijajivi muxujioba penacojobinë itsava pejaitsiyaniva pijavavecua yabara pelivaisi*

<sup>27</sup> Icatsia Jesús jumaitsi petsutoyenepanajavata pijajivi ayaibitsaëtoxanetojavabelia:

—Paxamë rabaja payapëtaneme pacuenia bajayata Dioso Moiséspijinëta penajumecopatsilivaisi jumaitsi. Dioso Moiséspijinëta penajumecopatsilivaisi jumaitsi mapacueniaje: “Pëtsa jaitame itsava nijavavecua,” jai. <sup>28</sup> Itsiata baitsi jane xanë mapacuenia pacatsipaebatsije. Ponë petiriva itsa taenuta, nexata itsa jamatabëjumaitsi: “Jema xania tavitota pibisiacuenie apo caexanaetsi mapovajavabeliaje,” itsa jamatabëjai, bajaraponë naneconita Diosojavabelia. Nexata najëpaeya naneconitabeje Diosojavabelia ponëbeje pepacuene itsavajavabelia pibisiacuenie pevitota exana pijavavecua.

<sup>29</sup> Panecujuaitaxutota panetaejava yabara pibisiacuene itsa paexaname, panaitaxutocajure. Tajë baja paxuare. Xanepana panenavecuaxuabinexa bajarapaitaxuto, padaxitaperabëtojivimë Dioso papecaxuabianiva infiernojavabelia. <sup>30</sup> Panecujuacobeta pibisiacuene itsa paexaname, panacobecaucure. Tajë baja paxuare. Xanepana panenavecuaxuabinexa, bajarapacobe padaxitaperabëtojivimë Dioso papecaxuabianiva infiernojavabelia, jai Jesús pijajivijavabelia.

*Pacuenia Jesús pijajivi muxujioba penacojobinë pijava pexuabianiva yabara pelivaisi*  
(Mt 19.9; Mr 10.11-12; Lc 16.18)

<sup>31</sup> Icatsia Jesús jumaitsi petsutoyenepanajavata pijajivi ayaibitsaëtoxfanetojavabelia:

—Bajayata Dioso Moiséspijinëta penajumecopatsilivaisi jumaitsi mapacueniaje: “Ponë jamatabëxuaba pijava, copiaya toyaquinae cuyalatobaxuto pijavajavabelia. Toyaquinae pijava pitavetsilivaisi. Nexata xuacujinae xuabi pijava,” jai bajayata Dioso Moiséspijinëta penajumecopatsilivaisi. <sup>32</sup> Itsiata baitsi jane xanë mapacuenia pacatsipaebatsije. Ponë pijava xuaba, itsanëjavabelia bajarapova pevitota pibisiacuene apo vecuaexanae atatsi, bajaraponë naneconita Diosojavabelia pijava pexuabixae. Petiriva pamona pexuabixae, nacojobijitsipa itsanëjavabelia. Nexata jane baja bajaraponë pijava pibisiacuene vecuaexanaejitsipatsi itsanëjavabelia. Tsipaji abaxë bajaraponë pijavacuenia Dioso totanetsi. Nexata pijinia ponë pita bajaraponë pexuabicovëvami, bajaraponë ata pibisiacuene exana pevitota. Tsipaji abaxë bajaraponë pijavacuenia Dioso totanetsi, jai Jesús pijajivijavabelia.

*Pacuenia Jesús pijajivi muxujioba, Jesús pijajivi itsa navajunupaeba xua exanaejitsia, itsajumeyo ata yajava pejumaitsiyaniva jivi pejumexaniataenexatsi yabara pelivaisi*

<sup>33</sup> Icatsia Jesús jumaitsi petsutoyenepanajavata pijajivi ayaibitsaëtoxfanetojavabelia:

—Paxamë rabaja payapëtaneme pacuenia bajayata Moiséspijinë jumaitsi panijasalinaivimijavabelia. Panijasalinaivimi penajumetsënëtsiyaniva, bajayata Moiséspijinë panijasalinaivimijavabelia jumaitsi mapacueniaje: “Itsa baja pepacuene najumecapanepaeya panavajunupaebame xua paexanaejitsiamë, itsamonae papecajumexaniataenexa itsa pajumaitsimë: ‘Xaniajanë raja. Cajumaitsi mapacueniaje Dioso pitabarata,’ itsa pajamë, pëtsa epatua panajamatabëcopatame bajaraxua paexanaenejevamë,” jai bajayata Moiséspijinë panijasalinaivimijavabelia. <sup>34</sup> Itsiata baitsi jane xanë mapacuenia pacaitorobatsije. Najumecapanepaeya itsa panavajunupaebame xua paexanaejitsiamë, roviaia panavajunupaebare. Pëtsa pematatsënëa itsajumeyo ata yajava pajumaitsimë jivi papecajumexaniataenexa. Papecajumexaniataenexa itsajivi pëtsa pajumaitsimë mapacueniaje: “Xaniajanë raja. Cajumaitsi mapacueniaje Dioso pitabarata,” pajamë pëtsa. Pëtsa pajumaitsimënu: “Xaniajanë raja. Cajumaitsi mapacueniaje athëbënacua pevenëta,” pajamë pëtsa. Tsipaji bajarajotatsia Dioso eca pijatronovënëjavata, itsajota ecabiaba pitorobinexa pijajivi. <sup>35</sup> Pëtsa pajumaitsimënu: “Xaniajanë raja. Cajumaitsi mapacueniaje mapairaje pevenëta,” pajamë pëtsa. Tsipaji raja Dioso pijaira. Pëtsa bajarapacuenia pajumaitsimë Jerusaléntomara ata pevenëta. Tsipaji Jerusaléntomara Dioso pepo nacuaeavetsinë pijatomara. <sup>36</sup> Pëtsa pajumaitsimënu: “Xaniajanë cajena. Itsa apo xaniajanë tsane, nexata nacaevetsianajë tanematathinaxuabinexamë tatëpaenexa,” pajamë pëtsa. Tsipaji panematabocoto ata Dioso eveta. Nexata paxamë apo pacacajëjipae caematanatoyo ata panenamatananiojaiyaexanaenexa, panenamatanatsaejaiyaexanaenexa ata. <sup>37</sup> Itsa pepacuene paexanaejitsiamë, “Jājā, exanaenajë,” pajamë roviaia. Itsa apo pajamatabëexanaemë, “Jume, apo exanaenë tsane,” pajamë roviaia. Pematatsënëa pëtsa pajumaitsimë itsajumeyo ata jivi papecajumexaniataenexa. Tsipaji bajarapajume dovathi pejamatabëcueneta pajumaitsimë tsipae, jai Jesús pijajivijavabelia.

*Pacuenia Jesús pijajivi muxujioba pecuene naviatitsiyaniva itsajivi itsacueniabi atatsi yabara pelivaisi*  
(Lc 6.29-30)

<sup>38</sup> Icatsia Jesús jumaitsi petsutoyenepanajavata pijajivi ayaibitsaëtoxanetojavabelia:

—Paxamë rabaja payapëtaneme pacuenia bajayata Dioso Moiséspijinëta penajumecopatsilivaisi jumaitsi. Bajayata Dioso Moiséspijinëta penajumecopatsilivaisi jumaitsi mapacueniaje: “Pajivi itsanë itaxutobijanatsi, juya bajarapajivi namatamoitaxutobijiana. Pajivi ata itsanë vonotanabiabatsi, juya bajarapajivi namatamovonotanabiabi,” jai bajayata Dioso Moiséspijinëta penajumecopatsilivaisi. <sup>39</sup> Itsiata baitsi jane xanë mapacuenia pacaitorobatsije. Itsanë itsa jamatabëpacabia, pëtsa panayajivibiame. Itsanë itsa pacaitabarapacabixuaba anaeya, nexata icatsia itsanenia ata papecaitarapacataxubinexa, panaitabaracaevere. <sup>40</sup> Itsajivi itsa pacaneconitsijitsia jueznëjavabelia paneamoneyabijamatabëcuene papecavecuapitsinexa panijacamisa, nexata patocopare panijacamisajumavelia panenaxatatsijava ata papecavecuapitsinexa. <sup>41</sup> Vajabitsaë itsa pacacoponaeyaexana pijajava anijakilómetrobejecuenia, nexata patocaponare pematatsënëa ata. Cuatro pakilómetrobejecuenia ata patocaponare. <sup>42</sup> Bitso bepejiobijivi itsa pacavajëta itsacuenejavayo, parajure. Itsa pacacovaeta, patsicopare. “Jume,” pajamë pëtsa, jai Jesús pijajivijavabelia.

*Pacuenia Jesús pijajivi muxujioba piasivanexa pitoyavi atatsi yabara pelivaisi (Lc 6.27-28, 32-36)*

<sup>43</sup> Icatsia Jesús jumaitsi petsutoyenepanajavata pijajivi ayaibitsaëtoxanetojavabelia:

—Paxamë rabaja payapëtaneme pacuenia bajayata Dioso Moiséspijinëta penajumecopatsilivaisi jumaitsi mapacueniaje: “Pasivamëre papecayapëtaenë bitso. Paitoyamëre papecaitoiyavi,” jai bajayata Dioso Moiséspijinëta penajumecopatsilivaisi. <sup>44</sup> Itsiata baitsi jane xanë mapacuenia pacaitorobatsije. Pasivamëre papecaitoiyavi ata. Pamona. Pamonae ata pibisiacuena pacabaracuauaijai, bajarapamonae paxamë xaniavaetsia pabaracuauaijamëre. Pamonae ata pacaitoya, bajarapamonae pexaniacuene patoexanare. Pamonae ata pibisiacuena pacabijatane, pibisiacuene pacaexanae ata, patovajëre Diosojavabelia peyavenonaenexatsi. <sup>45</sup> Bajarapacuenia nexata paneaxa, athëbëtatsia peecaenë, papeximëcuena patsitajinavanapaename. Bajaraponë, paneaxa, yavenonabiaba daxitajivi. Nexata pexaniajamatabëcuenevi, pibisiajamatabëcuenevi ata, najëpaeya pijapabianë petonaxaniabinexatsi icotia copata. Bajarapacuenia pijinia ema ata copata. <sup>46</sup> Itsa pasivamë tsipae ëpapecaasivavi, nexata pexaniacuene apo paxainaemë tsipae Diosojavabelia. Pataneme rabaja. Gobierno pejamatabëcueneta impuestomatamo peyanijobabiabivi bitso pibisiacuene exana. Itsiata bajarapamonae ata asiva piasivavitsi. <sup>47</sup> Xaniavaetsia itsa pacopiapitsipame ëpanyapëtaevi, nexata pexaniacuene apo paexanaemë tsipae pamonae Dioso apo pejumecovënëtsivivecu. Tsipaji Dioso apo pejumecovënëtsivi ata xaniavaetsia copiapitabiaba peyapëtaevitsi. <sup>48</sup> Pacuenia jamatabëcueneitsi pejamatabëcuenexanepanaenë, paneaxa, athëbëtatsia peecaenë, bajara paxamë ata pajamatabëcueneitsimëre, jai Jesús pijajivijavabelia.

## 6

*Pacuenia Jesús pijajivi muxujioba pexaniacuene pexanaenexa yabara pelivaisi*

<sup>1</sup> Icatsia Jesús jumaitsi petsutoyenepanajavata pijajivi ayaibitsaëtoxanetojavabelia:

—¡Xania baja tsane! Pëtsa pexaniacuene paexaname saya jivi papecacuenetaenexa, “Maponë bitso pexaniajamatabëcuenenëje,” papecasivajamatabëjainexa saya paneexanaejava yabara. Bajarapacuenia itsa paexanaejitsipame, nexata paneaxa, athëbëtatsia peecaenëjavabelia, apo paxainaemë tsipae itsacuenejavayo ata, pexaniacuenejavayo, papecarajutsinexa athëbëtatsia. <sup>2</sup> Bajaraxuata itsa payavenoname bepejiobivi, pëtsa panavajunupaebame daxitajivijavabelia paneyavenonaejava bepejiobivi. Itsamonae

xua exana, navajunupaebabiaba daxitajivi pitabarata judíovi penacaeuatabiabibonëjava, callejava ata. Bajarapamonae navajunupaebabiaba bepejiobivi peyavenonaejava, bepexaniajamatabëcuenevi saya petaenexatsi jivi. Xaniajanë pacuenia pacatsipaebijitsiatsi. Pamonae bajarapacuenia navajunupaebabiaba, bajarapacuenia penavajunupaebabiabixae, Diosojavabelia apo xinae tsane athëbëtatsia perajutsijavanexatsi. <sup>3</sup> Itsa payavenoname bepejiobivi, pëtsa panavajunupaebame itsajivijavabelia ata, bitso papecayapëtaejivijavabelia ata. <sup>4</sup> Muetsia payavenonare bepejiobivi. Nexata paneaxa, papecataenë muetsia paneexanaejava ata, pacarajutsiana bepejiobivi muetsia paneyavenonaematamo, jai Jesús pijajivijavabelia.

*Pacuenia Jesús pijajivi tsipaeba pacuenia Diosojavabelia vajëcaejitsia yabara pelivaisi (Lc 11.2-4)*

<sup>5</sup> Icatsia Jesús jumaitsi petsutoyenepanajavata pijajivi ayaibitsaëtoxanetojavabelia:

—Itsa pavajëcame Diosojavabelia, pëtsa pavajëcame pacuenia itsamonae vajëcabiaba. Bajarapamonae saya jema vajëcabiaba Diosojavabelia jivi petaenexatsi Dioso bepejumecovënëtsivi. Bajarapamonae jitsipabiaba nucaeya pevajëtsinexa Diosojavabelia daxitajivi pitabarata judíovi penacaeuatabiabibonëjava, calle penaepacaxitarabijava ata. Bajarapacuenia vajëcabiaba Diosojavabelia Dioso bepejumecovënëtsivi petaenexatsi jivi. Xaniajanë pacuenia pacatsipaebijitsiatsi. Pamonae bajarapacuenia exanabiaba, bajarapacuenia pexanaexae, Diosojavabelia apo xinae tsane athëbëtatsia perajutsijavanexatsi. <sup>6</sup> Nexata paxamë Diosojavabelia itsa pavajëcame, pacaenëmë canacujitsia, pajonemeya panijaboyalialia. Pabaupaxatare. Bajaraxuacujinae pavajëcare paneaxajavabelia. Nexata paneaxa pacayajava tsane bajarajota. Nexata paneaxa, papecataenë muetsia paneexanaejava ata, pacarajutsiana bajaraxua paneexanaematamo.

<sup>7</sup> Itsa pavajëcame Diosojavabelia, pëtsa napëna pavajëcame saya piapianexa panevajëcaejava pacuenia Dioso apo peyapëtaevi vajëcabiaba. Dioso apo peyapëtaevi jamatabëcuenenavëxaniabiaya jamatabëjumai tsabiabi: “Itsa bitso apia vajavajëcaejava Diosojavabelia, nexata matapania Dioso nacajumetaena vajavajëcaejava,” jamatabëjai tsabiabi Dioso apo peyapëtaevi. <sup>8</sup> Pëtsa bajarapacuenia paxamë pajamatabëcueneitsimë. Panevajëcaevajënaeya ata raja paneaxa, Dioso, yapëtane xua panamatavenoname. <sup>9</sup> Bajaraxuata itsa pavajëcame Diosojavabelia, pavajëre mapacueniaje:

Taxamë, athëbëtatsia neecaenë, jitsipajë pecayiyataejava daxitajivi. <sup>10</sup> Jitsipajë naxanitsiayo pecopiapatsijava daxita nijajivi nevetsijava mapanacuataje. Jitsipajë daxitajivi mapanacuata nejitsipaecuenia pecatoexanabiabinexa, pacuenia baja athëbëtatsia nijajivi nejitsipaecuenia catoexanabiaba, bajarapacuenia pecatoexanavanapaenexa mapanacuapijivi ataje. <sup>11</sup> Ajena, pamatacabinexa, panerajure pataxaejavanexa pacuenia panamatavenonajë. <sup>12</sup> Panevecuaajibiaexanare pibisiacuene pataexanaeconimi. Pacuenia paxanë pajamatabëcueneceavajë, pabarajamatabëcuenexanepanana, itsamonae paxanëjavaberena pibisiacuene patanexanaejava, bajara pijinia pacuenia xamë ata nitabarata pibisiacuene pataexanaejava jamatabëcueneceavare. Panebarajamatabëcuene xanepanarena. <sup>13</sup> Panevecuatsare dovathi patanejamatabëcuenejëbivaniva. Panecapanepare jane pibisiacuenevecua. Pamatacabi xamë taxuxuabianame daxita nijajivi nevetsijava mapanacuataje, nejamatabëcuenesaëta evetsianame. Nexata nijajivi jumai tsane xamë yabara: “Dioso cajena bitso ayaijamatabëcuenenë,” jai tsane. Bajarapacuenia nijajivi evetsianame daxitamatacabijavabelianexa, pajamë tsane mapacueniaje itsa pavajëcame Diosojavabelia,

jai Jesús pijajivijavabelia.

<sup>14</sup> Jesús icatsia jumaitsi pijajivijavabelia:

—Nexata paxamë itsamonae pibisiacuene pacaexanae ata, pajamatabëcueneceavare. Pabarajamatabëcuenexanepanarena. Nexata paxamë itsamonae pibisiacuene

papecaexanaejava, itsa pajamatabëcuenecaevianame, itsa pabarajamatabëcuenexanepanaenamenua, nexata paneaxa, athëbëtatsia peecaenë, pitabarata pibisiacuene paneexanaejava jamatabëcuenecaeviana. Pacabarajamatabëcuenexanepanaenanua.<sup>15</sup> Paxamë itsa apo pajamatabëcuenecaevimë tsane itsamonae pibisiacuene papecaexanaejava, itsa apo pabarajamatabëcuenexanepanaemënu tsane, nexata paneaxa ata apo jamatabëcuenecaevi tsane. Apo pacabarajamatabëcuenexanepanaenanua tsane, pitabarata pibisiacuene paneexanaejava, jai Jesús pijajivijavabelia.

*Pacuenia Jesús pijajivi tsipaeba pacuenia Jesús pijajivi exanaejitsia pamatacabibeje Diosojavabelia vajëta pona pexaejava xaenejeva yabara pelivaisi*

<sup>16</sup> Icatsia Jesús jumaiti petsutoyenepanajavata pijajivi ayaibitsaëttoxanetojavabelia:

—Itsa apo paxaemë panexaejava pamatacabibeje pavajëcame Diosojavabelia, pëtsa pajinavanapame panaitabaraquiatsinejevamë, panamatatiatsinejevamënu. Itsamonae Diosojavabelia itsa vajëcabiaba pexaejava xaenejeva, pamatacabibeje vajëcabiaba Diosojavabelia, apo naitabaraquiatabiabi, apo namatatiatabiabinua. Bajarapacuenia jinavana-pabiaba pamatacabibeje vajëcabiaba Diosojavabelia tsipaji saya bajarapamonae jitsipa petaevitsi pesivajamatabëjumaitisinxatsi: “Mapamonaeje Dioso bitso pejumecovënëtsivi. Diosojavabelia bitso pevajëcaevi pexaejava xaenejeva. Nayapëtane Diosojavabelia bitso pevajëcaejava. Tsipaji naitabaraquiatsinejeva, namatatiatsinejevanua, jinavana,” pesivajamatabëjainexatsi petaevitsi. Xaniajanë pacuenia pacatsipaebijitsiatsi. Bajarapamonae pexaejava xaenejeva vajëcabiabi ata Diosojavabelia, itsiata bajaraxua apo tonamatamotsitsi Diosojavabelia. Tsipaji saya jivi petaenexatsi Dioso bepejumecovënëtsivi, bajarapacuenia vajëcabiaba.<sup>17</sup> Paxamë itsa apo paxaemë panexaejava pamatacabibeje pavajëcame Diosojavabelia, itsiata panaitabaraquiare. Panamatatiarenua xaniavaetsia.<sup>18</sup> Bajarapacuenia paexanaename jivi peyapëtaeyaniva Diosojavabelia panevajëcaponaejava panexaejava paxaenejevamë. Caenë paneaxa, papecayajavanë, yapëtaena. Nexata bajaraponë itsamatacabi pacarajutsiana panijamatamo, jai Jesús pijajivijavabelia.

*Pacuenia Jesús pijajivi tsipaeba xaniavaetsia Dioso petonacuenebavanapaenexa itsamatacabi ayajjava pexainaenexa athëbëtatsia yabara pelivaisi*

(Lc 12.33-34)

<sup>19</sup> Icatsia Jesús jumaiti petsutoyenepanajavata pijajivi ayaibitsaëttoxanetojavabelia:

—Pëtsa pacaetuataponame ayajjava panexainaejavanexa mapanacuataje. Tsipaji pacatobijianaejitsipa piucubaxaevi. Pacatotasibijitsipatsinua. Pacatonacobetoxotsipana penacobetoxotsivi.<sup>20</sup> Dioso jane xaniavaetsia patonacuenebavanapare. Nexata Diosojavabelia ayajjava pexaniacuene paxainaename athëbëtatsia. Nexata bajarajotatsia apo pacatobijiana tsane piucubaxaevi. Apo pacatotasibitsinua tsane. Penacobetoxotsivi ata apo pacatonacobetoxotsi tsane.<sup>21</sup> Panacuatatsia pacatoxaniavaeta panexainaejavanexa, bajarapanacua panejamatabëëthëtovetsina pajamatabënjinavanapaename, jai Jesús pijajivijavabelia.

*Pacuenia vajaitaxuto belámparabë yabara pelivaisi*

(Lc 11.34-36)

<sup>22-23</sup> Icatsia Jesús jumaiti petsutoyenepanajavata pijajivi ayaibitsaëttoxanetojavabelia:

—Lámparabë bo ënëtuatuajëta itayoteca xaniavaetsia vajataenexa. Bajara pijinia itsi paneitaxuto ata. Paneitaxutoxanepanaexae xaniavaetsia panatsivajënaetaneme. Itsa paitaxutobejemë tsipae, nexata xaniavaetsia apo panatsivajënaetaemë tsipae. Pacatsitaaitaquiri saya tsipae. Bajara pijinia itsi panejamatabëcuene ata. Dioso itsa pacajamatabëcueneitayota, pajitsipaename paneexanabiabinexa pacuenia Dioso pacaitoroba. Nexata xaniavaetsia pajinavanapaename. Itsa panajamatabëxainaejitsipame bitso panexainaejava ëpaxamënexa, nexata bitso pajamatabëcueneitaquirimë tsipae, jai Jesús pijajivijavabelia.

*Pacuenia Jesús pijajivi muxujioba bitso pejitsipaeyaniva palata yabara pelivaisi*  
(Lc 16.13)

<sup>24</sup> Icatsia Jesús jumaitsi petsutoyenepanajavata pijajivi ayaibitsaëtoxanetojavabelia:

—Itsajivi ata acuenebi caecuenia petonacuenebijava anijanëbeje pijatuxanenëbejejavabelia. Caenëjavabelia, ponë jitsipa petonacuenebinexa, tonacuenebijitsipa. Ponëjavabelia apo jitsipae petonacuenebijava, apo tonacuenebi tsipae. Bajara pijinia itsi pajivi bitso jitsipa Dioso. Pajivi bitso jitsipa Dioso, nexata itsa tonacueneba Dioso, acuenebi bitso pejitsipaeyajava palata, jai Jesús pijajivijavabelia.

*Pacuenia Dioso pijajivi eveta mapanacuataje yabara pelivaisi*  
(Lc 12.22-31)

<sup>25</sup> Icatsia Jesús jumaitsi petsutoyenepanajavata pijajivi ayaibitsaëtoxanetojavabelia:

—Xaniajanë pacuenia pacatsipaebijitsiatsi. Pëtsa pasivanajamatabëxainame ëpanexaejava, ëpaneapaejava ata, panevënajinavanapaenexa. Pëtsa pasivanajamatabëxainamenua ëpanenaxatabijavanexa ata. Apo jinavanapaetsi cajena ëvajaxaejavanexa. Apo jinavanapaetsinua ëvajanaperabëxatabinexa. <sup>26</sup> Pataema baratsuimonae pepunaevi. Apo ubi pexaejavanexa. Apo notsinua penaveretaponaejava peetsinexa bota. Itsiata Dioso, paneaxa, athëbëtatsia peecaenë, rajutabiaba pexaejavanexa. ¡Paxamë rabiji bitsoyo Dioso pacaasiva baratsuimonae matatoxenetsia papecarajutsinexa daxita xua panamatavenoname! Bajaraxuata pëtsa bitso pasivanajamatabëxainame ëpanexaejavanexa. <sup>27</sup> ¿Detsa jane ponë paxamëyajuvënënë caëjëpatsi pijacujiruta medio metrocuenia matavëjëa penavitsabiaexanaenexa? Ajibi. Bitso jamatabëbëjai ata tsipae pevitsabinexa, itsiata apo navitsabiaexanae tsipae pijacujiruta.

<sup>28</sup> Bajaraxuata pëtsa bitso pasivanajamatabëxainame ëpanenaxatabijavanexa. Pacanaëjëre pacuenia vitsabapona pematono vayafojava. Bajarapamatono apo natsijumanacuenebi. Penaxatatsijavanexa ata apo natsijumaexanae. <sup>29</sup> Bajayata nacuaevetsinëmi Salomónpijinë, bitso pexainaenëmi. Naitabëtsiaya naxatabiaba bitso pexaniavirijavanë. Itsiata baitsi jane Salomónpijinë penaitabëtsijava matatoxenetsia bitso aitaë mapamatontoxije. <sup>30</sup> Paxamë bevelia panejumecovënëtsivi Dioso, asaëya bepajumecovënëtame Dioso papecaevetsijava. Ajena pitsijavata vayafota tanetsi pexaniaponamatontoxi. Bajaraxuacujinae, caematacabibejecujinae, tajuat si baja bajarapaponamatontoximi. Pacuenia Dioso aitaëyaexana ponamatontoxi, bajara pijinia pacuenia paxamë ata Dioso pacaxatabiana piatibëjava itsa pajumecovënëtame Dioso. <sup>31</sup> Bajaraxuata pëtsa jamatabëbëjaiya pajamatabëjumaitsimë: “¿De tsaeta xua xaenatsi? ¿De tsaeta xua matavëjëa apaenatsi? ¿De tsaeta xua naxatabianatsi?” pajamatabëjamë pëtsa. <sup>32</sup> Pamonaë Dioso apo pejumecovënëtsivi, bajarapacuenia bitso sivanajamatabëxainabiaba ëpexaejavanexa, ëpenaxabijavanexa ata. Itsiata baitsi jane paneaxa paxainame, athëbëtatsia peecaenë. Bajaraponë yapëtane daxita xua panamatavenoname. <sup>33</sup> Bajaraxuata, daxita xua panamatavenoname, matatoxenetsia, Dioso pijacuene bitso pasivanajamatabëxainabiabianame panetoexanavanapaenexa pacuenia Dioso pacaitoroba. Nexata Dioso pacarajutsiana daxita xua panamatavenoname. <sup>34</sup> Itsa baja pajamatabëcuenebëjamë ajena pitsijavata itsacuenejavayo yabara, pëtsa caecuenia payajavajamatabëcuenebëjamë xua yabara meravja pitsijavata pacatocopiapatsijitsia. Tsipaji xua caematacabi canacujitsia nacatocopiapatabiaba vajajamatabëcuenebëjainexa, ayaijava baja tsabiabi. Bajaraxuata ajena pitsijavata apo besivajamatabëcuenebëjait si xua meravja pitsijavata nacatocopiapatsijitsia, jai Jesús pijajivijavabelia.

## 7

*Pacuenia Jesús pijajivi muxujioba pitaxutotsoniataenexa itsamonae ata, pacuenia bajarapamonae ata Dioso itaxutotsoniatanetsi, yabara pelivaisi*  
(Lc 6.37-38, 41-42)

<sup>1</sup> Icatsia Jesús jumaitsi petsutoyenepanajavata pijajivi ayaibitsaëtoxanetojavabelia:

—Pëtsa panataneme pepacue ne bepaneaneconijibivi. Nexata itsamonae pibisiacuene pexanaejava xaniavaetsia payapëtaenejevamë, pëtsa pabaracuaicuaijamë mapacueniaje: “Bजारapitsipibisiacuene pexanaevi, Dioso bitso ayaicuenia naneconitsiaexanaenatsi,” pajamë pëtsa. Tsipaji paxamë ata pijinia bajarapitsineconi ita paxainame, Dioso bitso ayaicuenia pacananeconitsiaexanaejitsipa. <sup>2</sup> Itsamonae pexanaejava xaniavaetsia payapëtaenejevamë, pëtsa pabaracuaicuaijamë mapacueniaje: “Bजारapitsicuene pexanaevi Dioso naneconitsiaexanaenatsi,” pajamë pëtsa. Tsipaji paxamë ata bajarapitsicuene ita paexaname, itsamonae pijinia bajarapacuenia pacabaracuaicuaijai tsipae. <sup>3</sup> Bजारaxuata paxamë pepacue ne bepaneaneconijibivi nataeya pëtsa pamuxujobame itsajivi pijaneconi yabara. Tsipaji raja apo payapëtaemë paxamë ata pijinia paneconivajëto paxainame. <sup>4</sup> Nexata paxamë ata ayaineconixaneto ita paxainame, nexata itsajivijavabelia apo bepajumaitsimë: “Papibisiacuene exaname, copare baja,” apo bepajamë. <sup>5</sup> Yamaxëitorobiaya saya bepexaniajamatabëcuenevi nataeya pacuaicuaijamë tsabiabi. Itsamonae pijaneconi yabara pabaracuaicuaijamë tsabiabi. Itsiata pijinia paxamë ata paneconivajëto paxainame, apo payapëtaemë. Paxamë copiaya pacopabare pibisiacuene paneexanabiabijava. Bajara jane xuacujinae paitavetsianame itsamonae ata pibisiacuene pexanaejava pecopabinexa, jai Jesús pijajivijavabelia.

<sup>6</sup> Icatsia Jesús jumaitsi petsutoyenepanajavata pijajivi ayaibitsaëtoxanetojavabelia:

—Pëtsa matavëjëa patsipaebaponame Dioso pejumelivaisi, pamonae patsipaebi atamë, apo yayatae bajarapalivaisi. Tsipaji saya capocaponabiaba bajarapalivaisi. Vaxaitsi itsanë pijaaviri pexaejavanexa rajutsi atatsi tsipae, saya nacaitoya tsipae. Nacasinijitsipana. Bajara pijinia jamatabëcueneitsi pamonae apo yayatae Dioso pejumelivaisi, patsipaebi atamë. Pacuenia marrano ata ita rajutsipatsi perlavënëjava, bitso penamatamotsijava, saya taxunanonobijitsipa, bajara saya jamatabëcueneitsi bajarapamonae, jai Jesús pijajivijavabelia.

*Pacuenia Jesús pijajivi tsipaeba pacuenia Diosojavabelia vajëtaponeajitsia yabara pelivaisi (Lc 11.9-13; 6.31)*

<sup>7</sup> Icatsia Jesús jumaitsi petsutoyenepanajavata pijajivi ayaibitsaëtoxanetojavabelia:

—Pavajëtaponare Diosojavabelia bajayajebi ata pacuenia bajayajebi ata pajaitsipame panecaxitajarabinexa ita pacatonaxuaba itsacuenejavayo. Pavajëtaponare Diosojavabelia asaëyata pacuenia asaëyata padocodocotsipame baupa papecatobaupatsinexa ita baupa xatatanuta. <sup>8</sup> Bजारapacuenia asaëyata pavajëtaponare Diosojavabelia tsipaji pajivi vajëtabiaba, rajutabiabatsi. Pajivi ata jaitabiaba, caxitajarababiaba. Pajivi ata baupa docodocotabiaba, tobaupatabiabatsi.

<sup>9</sup> Paxamë papebijivimë panexi panexinaevi. Panexënatonëyo ita pacavajëta panbë, apo panacoxirajutsimë tsipae iboto. <sup>10</sup> Itsa pacavajëta dujuainëyo, apo panacoxirajutsimë tsipae jomo. <sup>11</sup> Paxamë paneajamatabëcuenebejevi ata, payapëtaneme panenacoxirajutsinexa pexaniajava. Paneaxa, athëbëtatsia peecaenë, bitso biji cajena pexaniajamatabëcuenenë paxamë matatoxenetsia. Bजारaponë pacarajutsiana pexaniacuene ita pavajëtame.

<sup>12</sup> 'Xua pexaniacuene, paxamë pajitsipame itsamonae papecatoexanaenexa, copiya paxamë bajarapapexaniacuene patoexanare bajarapamonaejavabelia. Bजारapajamatabëcuene jëpa Dioso Moiséspijinëta penajumecopatsilivaisi. Diosojumepaebivimi profetavi peyaquinaelivaisianë ata jëpa bajarapajamatabëcuene, jai Jesús pijajivijavabelia.

*Tsiquiribaupayo epatajërëtsialia yabara pelivaisi (Lc 13.24)*

<sup>13</sup> Icatsia Jesús jumaitsi petsutoyenepanajavata pijajivi ayaibitsaëtoxanetojavabelia:

—Pajonemeya tsiquiribaupayojavalia panepatsinexa Dioso pijanacuayabelia. Tsipaji pinijibaupa, pinijinamutonua, pata infernojavabelia. Nexata jivi ayaibitsaëtoxanetonë

bajaraxuayo jonepona. <sup>14</sup> Pabaupa tsiquiribaupayo, tsiquirinamutoyonua, bajarapamuto pata matacabi apo pevereverecejave pexinaevi pijanacuayabelia. Nexata saya caejiviyobeje bajaraxuayo jonepona, jai Jesús pijajivijavabelia petsutoyenepanajavata.

*Pacuenia peubinaēnē itsa nacuaita, nayapētane pavirianaecuene yabara pelivaisi*

*(Lc 6.43-44)*

<sup>15</sup> Icatsia Jesús jumaitsi petsutoyenepanajavata pijajivi ayaibitsaētoxfanetojavabelia: —Xania panayajivitaema. Pamona saicayacuenia Dioso pejumelivaisivecua jivi tsipaebapona, bajarapamona najumetsēnētsiaya pacajumai tsabiabi: “Paxanē raja Dioso patanitorobicuenia livaisi jivi patsipaebaponajē,” pacajai tsabiabi. Bajarapamona Dioso pejumecovēnētsivi cuenecataeya najonena paxamējavaberena. Itsiata baitsi jane pacuenia nevēthē pianaepanaevi jamatabēcueneitsi, bajara jamatabēcueneitsi. Jamatabēpacacopatsiaexana Dioso panejumecovēnētsijavami. <sup>16</sup> Vaxaitsi rabaja yapētanetsi mapacueneye. Peubinaenē itsa nacuaita, yapētanetsi ponaecuai xanepana vajaxaenexa. Nexata bajarapona cuaxanetsi. Pona pijinia pibisiacuai nacuaita, yapētanetsi piabejecuene. Nexata bajarapona apo cuaxaetsi. Nexata pacuenia peubinaenē itsa nacuaita, nayapētane ponaecuai xanepana vajacuaixaenexa, bajara pijinia pacuenia paxamē payapētaename pacuenia jamatabēcueneitsi bajarapamona itsa pacuetaename xua exanavanapa. Uvaru apo paucutsimē cucunanaeta. Higovēncuaito ata apo paucutsimē jomovaēnaeta. <sup>17</sup> Nexata pona pexaniana, pexaniacuai pijinia nacuaita vajaxaenexa. Pona pijinia pibisiana, ēpiabejecuai nacuaita. <sup>18</sup> Pexaniana pexaniacuai nacuaita. Apo nacuaiti piabejecuai. Pibisiana pijinia apo nacuaiti pexaniacuai. <sup>19</sup> Daxita ponaenē nacuaita pibisiacuai, apo vajaxaecuai, yapētanetsi. Nexata daxita bajaraponaenēmi nicatatsi. Nexata tajuitatsi isotota. <sup>20</sup> Bajara pijinia pacuenia paxamē ata payapētaename itsa pacuetaename xua exanavanapa pamona saicayacuenia Dioso pejumelivaisivecua jivi tsipaebapona, jai Jesús pijajivijavabelia.

*Pacuenia daxitajivi apo jone tsane Dioso pijanacuayabetsia yabara pelivaisi*

*(Lc 13.25-27)*

<sup>21</sup> Icatsia Jesús jumaitsi petsutoyenepanajavata pijajivi ayaibitsaētoxfanetojavabelia: —Daxita pamona: “Tajatuxanenē,” tanejaivi ata, itsa apo jumecovēnētsi tsane taxa Dioso, athēbētatsia peecaenē, nexata apo jone tsane taxa Dioso pijanacuayabetsia. Itsiata pamona exanavanapa taxa, athēbētatsia peecaenē, pejisipaecuenia, ēbajarapamona jonena taxa pijanacuayabetsia. <sup>22</sup> Pamatacabi copiapatsiana pijaneconi pexinaevi Dioso penaneconitsiaexanaematacabinexa, bajarapamatacabi jivi ayaibitsaētoxfanetonē nejumaitsi tsane: “Patajatuxanenē, xamē baja cajena nejamatabēcueneta jivi patsipaebabiabajē Dioso pejumelivaisi. Nevēnētanua dovathi jivivecua pacapitsapaponajē. Nevēnētanua pinijicuene pataexanaejavanē, Dioso pesaēta paexanaponajē,” nejai tsane jivi ayaibitsaētoxfanetonē. <sup>23</sup> Itsiata baitsi jane xanē jumaitsinē tsane bajarapamonaejavabelia: “Apo pacayapētaetsi cajena paxamē. Panevecuaponare pibisiacuene paneexanabiabivi,” janē tsane bajarapamonaejavabelia, jai Jesús pijajivijavabelia.

*Pacuenia Jesús livaisi tsipaeba anijanēbeje bo pexanaenēbeje pelivaisicuenia yabara pelivaisi*  
*(Mr 1.22; Lc 6.47-49)*

<sup>24</sup> Jesús icatsia jumaitsi petsutoyenepanajavata pijajivi ayaibitsaētoxfanetojavabelia: —Pajivi nejumecovēnētsiana patacatsipaebilivaisi, nexata itsa exanaena taitorobicuenia, apo nacueratsi tsane. Bajarapajivi piatajairata pijabo bepexanetsinē tsane. Tsipaji ponē pijabo exanaejitsia, peyapētaexae itsajota pijabo exanetsijitsia pebubutsijavanexa, nexata baja bajarajota apo exanetsi pijabo. Nexata pijabo exaneta bitso piatajairata. Nexata bajaraponē bo pexanaejave apo nacueratsi. <sup>25</sup> Bo peveretetsicujinae ayaiemaxaneto jopa. Menianē avajubua tsapona. Ira bubuta. Ayaijovibo bitso bubujai pijabojavaberena. Itsiata pijabo apo toxuabitsitsia. Tsipaji pijabo exaneta piatajairata. <sup>26</sup> Pajivi nejumetae ata patacatsipaebilivaisi, apo nejumecovēnētsi tsane, nexata itsa apo exanae tsane taitorobicuenia, bajarapajivi nacueratsiana. Pacuenia tajetabota bo pexanetsinē

nacuerata bo pexanaejava, bajara itsi tsane. Ponë tajetabota pijabo exaneta, yapëtae ata emarapae pecopiapatsijavanexa, bajaraponë nacuerata bo pexanaejava. <sup>27</sup> Tspiji bo peveretetsicujinae ayaiemaxaneto jopa. Menianë avajubua tsaponae. Ira bubuta. Ayaijovibo bitso bubujai pijabojavaberena. Pijabo nexata toxuabayatsi. Pepacuene baja nexata bomi abeje, jai Jesús mapacueniaje pijajivijavabelia.

<sup>28</sup> Itsa baja Jesús najumevereta petsutoyenepanajavata bajarapalivaisi petsipae-bijava, pejumetaevitsi bitso jamatabëcuenenabenajaca. <sup>29</sup> Jesús pejumetaevitsi bitso jamatabëcuenenabenajaca tspiji Jesús livaisi tsipaeba pinijijamatabëcuene pexainaenëcuenia. Apo tsipaebi pacuenia judíovi pecujarubivi tsipaebabiaba.

## 8

*Pacuenia Jesús jamatejemayaexana bajayajebi bitso peperabëtsabanaenë yabara pelivaisi (Mr 1.40-45; Lc 5.12-16)*

<sup>1</sup> Itsa baja Jesús runaica petsutojumavetsica, jivi ayaibitsaëtoxaneto pënaponatsi. <sup>2</sup> Nexata imoxoyotatsi bajayajebi bitso peperabëtsabanaenë. Pitabarata pematatabacabëta tonucatsi. Bitso peperabëtsabanaenë jumaitsi Jesúsjavabelia:

—Jesús, cacaëjëpa raja tanejamatejemayaexanaenexamë. Itsa jitsipame, nejamatejemayaexanare mapavitanevecuaje, jai bitso peperabëtsabanaenë.

<sup>3</sup> Nexata Jesús pecobeta perabëjayalia bitso peperabëtsabanaenë. Jesús jumaitsi bajaraponëjavabelia:

—Jājā, jitsipajë cajena. Jamatejemamë rabaja, jai Jesús bajayajebi bitso peperabëtsabanaenëjavabelia.

Bajarapacuenia Jesús pejumaitisijavata peperabëtsabanaenëmi baja perabëxanepananajereca. <sup>4</sup> Nexata icatsia Jesús jumaitsi bajaraponëjavabelia:

—Nejumetaema. Pëtsa tsipaebame itsajivijavabelia ata tacajamatejemayaexanaejava. Naitajëtsiaremelia jane sacerdotenëjavabelia, templobota penacuenebinëjavabelia. Nexata jivi yapëtaena pepacuene baja pecavecuajibijava niavitanejavami. Diosonexa rajuremelia ofrenda sacerdotenëjavabelia pecavecuajibiaexanaexae niavitanejavami. Bajara tspiji pacuenia bajayata vajasalinainëmi Moiséspijinë nacaitoroba. Nexata sacerdotenë cataena pecavecuajibijava baja niavitanejavami, jai Jesús bajaraponëjavabelia.

*Pacuenia vajabitsaë pijacapitán pijabota petonacuenebaponaponaenëtsi, Jesús tojamatejemayaexana yabara pelivaisi (Lc 7.1-10)*

<sup>5</sup> Itsa baja Jesús pata Capernaum tomarabelia, Romano nacuapijivajabitsaëvi pijacapitán Jesús imoxoyorenatsi pevajëtsinexatsi. <sup>6</sup> Vajabitsaëvi pijacapitán bitso ayaicuenia vajëta Jesúsjavabelia. Jumaitsi:

—Petuxanenë, tajajivitonë raja tajabota camata boboca. Bitso cuenabatsi. Pinijicuenia navixaetaeyabiaba, jai.

<sup>7</sup> Nexata Jesús jumaitsi capitánjavabelia:

—Xanë ponaenajë nijaboyabelia. Nexata catojamatejemayaexanaenatsi nijajivitonë, jai Jesús.

<sup>8</sup> Nexata capitán jumaitsi Jesúsjavabelia:

—Petuxanenë, xanë raja bitso beveliajamatabëcuenenënë xamëvecua. Nexata apo xanepanae tsipae nejonejava tajaboyabelia. Nexata saya maveliaje ënijume itorobare. Nexata tajajivitonë netojamatejema tsane. <sup>9</sup> Xanë ata xainajë taneitorobabiabivi taneitorobicuenia tajumecovënëtabiabinexa. Xanë ata juya xainajë vajabitsaëvi tajajivi taitorobicuenia tanetoexanabiabinexa. Nexata itsa itorobajë caenë vajabitsaënë peponaenexa, bajaraponë ponabiaba. Itsa junarenajë itsanë vajabitsaënë pepatsinexa xanëjavaberena, bajaraponë patabiabarëna. Itsa itorobajë tajajivitonë tanetoexanaenexa itsacuenejavayo, nexata netoexanabiaba. Bajara pijinia pacuenia xamë ata nexanaenexa

cacaëjêpa. Nexata saya maveliaje ënijume itorobare saya ënijumeta tajajivitonë taneto-jamatejemayaexanaenexamë, jai capitán Jesúsjavabelia.

<sup>10</sup> Jesús ita jumetane bajarapacuenia capitán pejumaitsijavatsi, nexata Jesús jamaatabëcuenenabenajaca. Nexata Jesús jumaiti pepënaponaevitsijavabelia:

—Xaniajanë pacuenia pacatsipaebijitsiatsi. Israel nacuapijivi nejumecovënëtsi ata, itsiata caeto ata apo caxitajarabaxuabinë xanëjavaberena bitso tanesivanajamatabëcuenecopatsinë pacuenia mapacapitán nesivajamatabëcuenecopatsiaya jumait-sije. <sup>11</sup> Nexata pacatsipaebatsi paneyapëtaenexa. Apo judíovi ata raja, ayaibitsaëtoxonetonë daxitanacuanëpijivi, Dioso jumecovënëtsiana. Nexata apo judíovi ata capanepaenatsi Dioso pijanacuayabetsia. Nexata bajarapamonae Dioso pijanacuatsia, Abrahampijinë yajava, nabaniana. Isaacpijinë ata, Jacobpijinë ata yajava, nabaniana.

<sup>12</sup> Itsiata bailsi jane judíovi, pamonae picani Dioso athëbëtatsia toxaniavaetatsi peyajajinavanapaenexatsi, bajarapamonae caranata apo jumecovënëtsi Dioso. Nexata bajarapamonae infernojavabelia Dioso xuabianatsi. Bajarajota nuena. Navonosiniana bitso penavixaetaexae, jai Jesús mapacueniaje pepënaponaevitsijavabelia.

<sup>13</sup> Nexata icatsia Jesús jumaiti capitánjavabelia:

—Ponare baja nijaboyabelia. Catoexanatsi rabaja pacuenia xanëjavaberena nesivana-jamatabëcopatsiaya jumaitsimë tacatoexanaenexa, jai Jesús capitánjavabelia.

Nexata bajarapaepatota capitán pijabotalia pijajivitonë baja tojamatejematsi.

*Pacuenia Simón Pedro pijava pena Jesús tojamatejemayaexana yabara pelivaisi*  
(Mr 1.29-31; Lc 4.38-39)

<sup>14</sup> Jesús pona Pedro pijaboyabelia. Nexata Pedro pijabota Jesús taeyabuata Pedro pijava pena peromaebanucaejavatsi camata. <sup>15</sup> Nexata Jesús cobejayata peromaebanucavatsi. Jesús pecobejayatsijavata, bajarapova vecuaajibitsireca baja domae. Nexata baja bajarapova jamatejema. Jesús bana pexaejava bajarapova toexanatsi.

*Pacuenia ayaibitsaëto jivi, piavitanevi, Jesús jamatejemayaexana yabara pelivaisi*  
(Mr 1.32-34; Lc 4.40-41)

<sup>16</sup> Itsa baja ajena meravitsia, Jesúsjavaberena tocapatatsi ayaibitsaëto dovathi peyajajinavanapaevi. Caejumeta saya Jesús caecuenia dovathi vecuacapitsapa bajarapamonae. Bajarajota jamatejemayaexananua daxita piavitanevi. <sup>17</sup> Bajarapacuenia Jesús ita exana, copiapata jane baja pacuenia Jesús yabara bajayata Diosojumepaebinëmi profeta Isaíaspijinë tajëvelia vajunupaeba. Profeta Isaíaspijinë bajayata tajëvelia jumaiti mapacueniaje: “Bajaraponë nacavecuajibiaexanaena vajaavitanejavami,” jai bajayata tajëvelia Isaíaspijinë Jesús yabara.

*Pacuenia picani Jesús jamatabëpënatonatsi itsamonae yabara pelivaisi*  
(Lc 9.57-62)

<sup>18</sup> Nexata Jesús ita tane jivi ayaibitsaëto pematatoyoronaejavatsi, pijajivi junata pepënaxuabinexatsi pucaxaneto itsapanabelia. <sup>19</sup> Nexata bajarapaepatota judíovi pecujarubinë Jesús imoxoyorenatsi. Judíovi pecujarubinë jumaiti Jesúsjavabelia:

—Petuxanenë, itsabelia poname, capënaponaeatsi cajena, jai.

<sup>20</sup> Nexata Jesús jumaiti judíovi pecujarubinëjavabelia:

—Itsa nepënaponaejitsipame, apo napatabiabimë tsipae tajabota nenacueraevetabibinexa. Tsipaji tajabo apo xainaenë. Namo pijamëthëanë xaina pepatabiabinexa pemajitabiabinexa. Baratsui ata pematapenanë xaina. Itsiata bailsi jane xanë, Daxitajivi Pematapijinënë, itsajavabelia ata apo xainaenë itsajota nacueraevetabiabijitsianë, jai Jesús judíovi pecujarubinëjavabelia.

<sup>21</sup> Nexata Jesús pijajiviyajuvënëne jumaiti Jesúsjavabelia:

—Tajatuxanenë, caepatoyo abaxë necopare tamëthëtsinexa taxa petëpaenë, jai.

<sup>22</sup> Jesús nexata jumaiti pijajivitonëjavabelia:

—Naxanitsia. Nepënaponare. Copare matabi apo pevereverecaejava apo pexainaevinexa pemëthëcaenexatsi nijamonaemi ita tëpa, jai Jesús pijajivitonëjavabelia.

*Pacuenia Jesús itaveta joviboxaneto, malataca yajava, piayajavami yabara pelivaisi*  
(Mr 4.35-41; Lc 8.22-25)

<sup>23</sup> Jesús, pijajivi yajava, runa jera ënëabereca. Nexata Jesús pijajivi jerata yajavana-jetaruca pucajava. <sup>24</sup> Nexata jemata pinijijoviboxaneto najetaruca. Malatacaxanetonë bitso ayai. Nexata malataca jera ënëaberena mera epabajarabapona. Itsiata Jesús jamatejema majitanuca. <sup>25</sup> Nexata Jesús pijajivi yaitavabatsi pemajitanucaenë. Jesús pijajivi jumaitsi:

—¡Patajatuxanenë, panecapanepare! ¡Vaxaitsimi rabaja yaothopaenatsi! jai Jesús pijajivi.

<sup>26</sup> Nexata Jesús jumaitsi pijajivijavabelia:

—¿Detsa xuajitsia bitso pajunavame? ¿Tsipaji apo payapëtaemë Dioso papecaevetsi-  
java? jai Jesús pijajivijavabelia.

Nexata Jesús namatacotapuna. Pinijijumeta itavetaxuaba jovibo, malataca yajava. Nexata baja daxita puca vainae ecaxuaba. <sup>27</sup> Nexata Jesús pijajivi itsa tane bajaraxua, jamatabëcuenenabenajaca. Nexata Jesús pijajivi najumaitsi:

—¿De meta tsipaji maponëje? ¡Itaveta jovibo, malataca yajava! ¡Jumecovënëtatsi baja rovia maponëje! ¡Nexata baja jovibo, malataca yajava, ajibi tsaxuabi! najai Jesús pijajivi.

*Pacuenia Gadara tomarapijinëbeje, dovathivi peyajavaponaponaenëbeje, Jesús vecuacapit-  
sapa Gerasa nacuata yabara pelivaisi*

(Mr 5.1-20; Lc 8.26-39)

<sup>28</sup> Jesús pijajivi barëpata pucaxaneto itsapanabelia, Gerasa nacuyabelia. Jesús itsa pata Gerasa nacuata, Gadara tomarapijinëmibeje pitsaparenabeje jivimëthëanëjavaverena. Imoxoyorenatsibeje Jesús. Bajaraponëbeje dovathivi peyajavaponaponaenëbeje. Bitso anaepanabiababeje. Nexata itsajivi ata apo ponabiabi bajaraxuayo perucaenamutojava. <sup>29</sup> Nexata dovathivi peyajavaponaponaenëbeje vavajaibeje.

—Jesús, Dioso pexënatomë, ¿detsa xua namatavenoname paxanëbejejavaberena? ¿Dioso tsaja daxitajivi penaneconitsia exanaematacabinexavajënaeya patame patane-  
naneconitsiaexanaenexamëbeje? jaiibeje Jesúsjavabelia dovathivi peyajavaponapon-  
aenëbeje.

<sup>30</sup> Nexata bajarajota, imoxoyo petsutojavata, marranobitsaëtohaneto xaevanapa.

<sup>31</sup> Nexata dovathivi bitso vajëca Jesúsjavabelia. Jumaitsi:

—Itsa panexuabijitsiamë maponëbejevecuaje, panetocopare patajonenexa marra-  
nobitsaëtohanetojavabelia, jai.

<sup>32</sup> Nexata Jesús jumaitsi dovathivijavabelia:

—Paponare baja panejonenexa marranobitsaëtohanetojavabelia, jai.

Nexata bajaraponëbeje dovathivi vecuapitsapatsibeje. Nexata baja marranobitsaë-  
tohanetojavabelia junua dovathivi. Nexata daxita bajara pamarranobitsaëtohanetomi  
cujinaeyeca. Pucaxaneto itapajanituareca othopareca. Bajarajota daxita marranobit-  
saëtohanetomi meneta bubuna.

<sup>33</sup> Bajara pamarranobitsaëtohanetomi pevetavanapaevi, rëcëpeca. Itsa bajarapa-  
monae Gadara tomarabelia pata, tsipaeba pacuenia tane. Tsipaebanua pacuenia  
Jesús dovathivi vecuacapitsapa dovathivi peyajavaponaponaenëbeje. <sup>34</sup> Nexata daxita  
bajarapatomarapijivi ponarena Jesúsjavaberena. Nexata itsa tanetsi Jesús, daxita  
bajarapamonae jumaitsi Jesúsjavabelia:

—Pexaniacuene pacavajëtatsi. Ponare baja patajanacuavecua, jai bajarapamonae  
Jesúsjavabelia tsipaji cujunavatsi.

## 9

*Pacuenia Jesús jamatejemayaexana petabusipacuenabinëtsi yabara pelivaisi*  
(Mr 2.1-12; Lc 5.17-26)

<sup>1</sup> Jesús runareca jera ënëabereca. Nicabilia puca itsapanabelia. Pata nexata pi-  
jatomarabelia. <sup>2</sup> Bajarajota Jesús tocapatatsi petabusipacuenabinëtsi. Pacamayota

bocabiaba, yavëtarapatatsi. Jesús jamatabëcueneyapëtane pacuenia sivanajamatabëxainatsi petocapatsivitsi. “Nacatojamatejemayaexanaenatsi cajena,” pesivajamatabëjajjavatsi Jesús jamatabëcueneyapëtane. Bajaraxuata petabusipacuenenbinëtsijavabelia Jesús jumaitsi mapacueniaje:

—Tajabananë, jamatabëcuenebarëyamëre. Pibisiacuene rabaja nexanaeneconimi cavecuaajibiaexanatsi, jai Jesús petabusipacuenabinëtsijavabelia.

<sup>3</sup> Nexata judíovi pecujarubivi itsa jumetaeyena bajarapacuenia Jesús pejumaitsijava, najamatabëxainena.

—Maponë Jesúsje Dioso apo pejitsipaecuenia cuaicuaijai, jamatabëjai tsenae judíovi pecujarubivi Jesús yabara.

<sup>4</sup> Jesús jamatabëcueneyapëtane judíovi pecujarubivi bajarapacuenia pesivanajamatabëxainaejavatsi. Nexata Jesús jumaitsi judíovi pecujarubivijavabelia:

—Panesivanajamatabëxainame xanëjavaberena pibisijamatabëcuene. <sup>5</sup> Paxamë apo pacacaëjêpae ata itsajivi pibisiacuene pexanaeneconipanevecuaajibiaexanaenexa, pacacaëjêpa picani saya jema panejumaitsinexa petabusipacuenenbinëtsijavabelia mapacueniaje: “Cavecuaajibiaexanatsi rabaja pibisiacuene nexanaeneconimi,” panejainexa. Tsi-paji itsajivi ata apo yapëtae tsipae saya jema panejumaitsijava. Itsiata baitsi jane itsa apo pacacaëjêpae panejamatejemayaexanaenexa petabusipacuenenbinëtsi, acuenebi panejumaitsinexa bajaraponëjavabelia mapacueniaje: “Nonotapunare. Nijacamayo pire. Ponare baja,” panejainexa. Tsi-paji bajarapacuenia pajumaitsimë ata, itsa apo jamatejema tsipae bajaraponë, nexata daxitajivi pacayapëtaejitsipa apo papecacajêpaeacuene panejamatejemayaexanaenexa, jai nexata Jesús judíovi pecujarubivijavabelia.

<sup>6</sup> Icatsia Jesús jumaitsi judíovi pecujarubivijavabelia:

—Xanë Daxitajivi Pematapijinënë, mapanacuata necaëjêpa tavecuaajibiaexanaenexa itsajivi pibisiacuene pexanaeneconimi ata pacuenia baja exanajë maponëjavabeliaje. Nexata patanecueneyapëtaenexamë tanecaëjêpaeacuene tavecuaajibiaexanaenexa itsajivi pibisiacuene pexanaeneconimi ata, pataema pacuenia jamatejemayaexanaejitsianë maponëje, jai Jesús judíovi pecujarubivijavabelia.

Nexata icatsia Jesús jumaitsi petabusipacuenabinëtsijavabelia:

—Nonotapunare baja. Nijacamayo pire. Nijaboyabelia baja ponare, jai Jesús.

<sup>7</sup> Nexata bajarapacuenia Jesús pejumaitsijavata, petabusipacuenabinëmitsi nonotapuna. Pijaboyabelia baja pona. <sup>8</sup> Nexata jivi itsa tane bajaraxua, junava cajena bitso. Nexata bajarapamonaë jumaitsi Diosojavabelia:

—Diosomë, bitso ayaijamatabëcuenenëmë. Tsi-paji jivi caëjêpaeyaexaname pini-jicuene pexanaenexa, jai.

*Pacuenia Jesús pijajivitonënexa junata Mateo yabara pelivaisi*

*(Mr 2.13-17; Lc 5.27-32)*

<sup>9</sup> Jesús baja vecuapona itsajota jamatejemayaexana petabusipacuenabinëtsi. Nexata Jesús penajetarucacajavata taeyeta Mateo. Mateo gobierno pejamatabëcuene impuestomatamo pematamoyanijobabinë. Pabota jivijavabelia Mateo impuestomatamo matamoyanijobabiaba, bajarapabota eca Mateo. Nexata Jesús jumaitsi Mateojavabelia:

—Mateo, nepënaponare, jai.

Jejai Mateo. Nexata nonotapuna. Mateo baja napona Jesús pepëta.

<sup>10</sup> Nexata Mateo junata Jesús pebarënanabinexa pijabota. Nexata Mateo pijabota Jesús pexajava naxane. Mateo pijabota naena ayaibitsaëto gobierno pejamatabëcuene jivijavabelia impuestomatamo petomatamoyanijobivi. Itsamonae ata nanabane, piijamatabëcuenebejevi. Jesús pijajivi nayajavaeca bajarapamesajavata. <sup>11</sup> Nexata fariseovi itsa tane bajarapacuenia, jamatabëcuenenavëxaniabiaya jumaitsi Jesús pijajivijavabelia:

—Papecacujarubinë rabaja Jesús naneconita Diosojavabelia. Tsi-paji gobierno pejamatabëcueneta impuestomatamo pematamoyanijobabivijavata,

pijamatabëcuenebejevijavatanua, naxaeyeca pexaejava, jai fariseovi Jesús pijajivijavabelia.

<sup>12</sup> Jesús nexata jumetaeyeca bajarapacuenia fariseovi pejumaitsijava. Nexata Jesús jumaiti fariseovijavabelia:

—Pevaëbinë raja apo vaëbi pejamatabëjemavi. Pevaëbinë raja piavitanevi vaëba. Bajara pijinia xanë ata itsinë. Sivapatajopajë tajunatsinexa pibisiajamatabëcuenevi pecapanepaenexatsi Diosojavabelia. <sup>13</sup> Paponare. Palebianame Dioso pejumelivaisibaxuto. Nexata payapëtaename pajamatabëcuene yabara jumaiti Dioso pejumelivaisibaxutota mapacueniaje: “Jitsipajë paneitaxutotsoniataejava itsamona. Apo jitsipaenë saya patanetobeyabiabijavamë dajubicuene ofrendacuenia patanerajutabiabinexamë,” jai Dioso pejumelivaisibaxutota. Xanë raja apo sivapatajopaenë tajunatsinexa pamona baja aneconijibi tsavanapae. Biji rajane sivapatajopajë tajunatsinexa pijaneconi pexainaevi. Junataponajë bajarapamona pecopabinexa pibisiacuene pexanaejava penajamatabëcuenepeñeyorotsinexa Diosojavabelia, jai Jesús fariseovijavabelia.

*Pacuenia Jesús yanijobatsi pamatacabibeje jivi vajëtafona Diosojavabelia pexaejava apo pexaeyabiabixae yabara pelivaisi*

*(Mr 2.18-22; Lc 5.33-39)*

<sup>14</sup> Juan pijajivi Jesús imoxoyorenatsi. Nexata Juan pijajivi jumaiti Jesúsjavabelia mapacueniaje:

—Petuxanenë, paxanë pataxaejava apo paxaeyabiabinë pamatacabibeje pavajëtafonaajë Diosojavabelia. Bajara pijinia itsi fariseovi ata pamatacabibeje vajëtafona Diosojavabelia. Pexaejava apo xaeyabiabi. ¿Detsa xuajitsia xamë nijajivi pamatacabibeje vajëtafona Diosojavabelia pexaejava xaeyabiaba? jai Juan pijajivi Jesúsjavabelia.

<sup>15</sup> Nexata Jesús jumaiti Juan pijajivijavabelia:

—Pamona junatatsi penacasabifistajavabelia penanabaninexa, apo atsovi pexaejava itsa abaxë yajavaecatsi pejananacasabinë. Itsiata baitsi jane pejananacasabinë itsa tsimaxëpatsipatsi pevecuacaponanexatsi itsajavabelia, nexata bajarapamona pexaejava apo xae tsipae. Tsipaji bitso najamatabëxainaejitsipa pevecuacaponaxaetsi. Bajara pijinia itsi tajajivi ata. Tayajavaponaponaeepato abaxë apo atsobabiabi pexaejava pamatacabibeje Diosojavabelia vajëtafona. Itsiata pamatacabi xanë necaponaena bajarapamonaevecta, nexata jane baja bajarapamatacabi pexaejava apo xae tsane bitso tanesivanajamatabëxainaxae, jai Jesús Juan pijajivijavabelia.

<sup>16</sup> Nexata Juan pijajivi perujujamatabëcuene baja penavecuacopatsinexa, Jesús livaisi tsipaeba comparacióncuenia, Juan pijajivi pejumecovënëtsinexa ëpejanalivaisi, Jesús petsipaebilivaisi. Juan pijajivi anijajamatabëcuenebeje pexainaeyaniva, perujujamatabëcuene baja pecopabinexa, Jesús livaisi tsipaeba comparacióncuenia. Perujujamatabëcuene yabara Jesús jumaiti Juan pijajivijavabelia mapacueniaje:

—Itsajivi ata raja apo catsatarutsi pejanapana perujunaxatatsiesetofavabelia. Itsa catsatarutsipa pejanapanata perujunaxatatsiesetofavabelia, nexata pejanapana yanarobotsipa perujuesetofavaverena. Nexata biji bitso pinijivojoto titinaejitsipa. <sup>17</sup> Itsajivi ata pijinia apo epacae pejanavinoranë perujubocodoruanëjavabelia bajayajebi peyajebinexa. Pejanavinoranë itsa epacaejitsipa perujubocodoruanëjavabelia, nexata pejanavinoranë yatititibia tsipae. Tsipaji perujubocodoruanë apo yanayeretsi tsipae. Tsipaji pejanavinoranë pejumalitsëxë abaxë xaina. Nexata itsa yatititibia tsipae, naxuabijitsipa vinoranëmi. Bajaraxuata bepaca pejanavinoranë pejanabocodoruanëjavabelia. Nexata vinoranë peyaxanepanaenexa bajayajebi ata pejanabocodoronëta, jai Jesús Juan pijajivijavabelia.

Bजारapacuenia Jesús jumaiti Juan pijajivi pejumecovënëtsinexa ëpejanalivaisi, Jesús petsipaebilivaisi, perujujamatabëcuene baja pecopabinexa.

*Pacuenia Jesús copiaya namutoepatota jamatejemayaexana piavitaneva, pacuenia icatsia cotocaevi toasaëyaexana Jairo pexënatovayo, petëpaevayomi, yabara pelivaisi*

(Mr 5.21-43; Lc 8.40-56)

<sup>18</sup> Jesús livaisi petsipaebanucaejavata Juan pijajivijavabelia, judíovi penacaetuatabi-abibo pevetsinë parena Jesúsjavaberena. Nexata bajaraponë Jesús pitabarata yaiyataeya pematabacabëta nucajunua. Jumaitsi Jesúsjavabelia:

—Taxënatovayo rabaja aeconoxae netotëpa. Itsiata baitsi jane itsa poname tabajoyabelia, nexata itsa netoperabëjayatsianame necobeta, icatsia netoasaë tsane, jai bajaraponë Jesúsjavabelia.

<sup>19</sup> Nexata Jesús nonotapuna. Judíovi penacaetuatabi-abibo pevetsinë pepëta Jesús, pijajivi yajava, napona. <sup>20</sup> Nexata Jesús namutua penajetarucaejavata, pepënëverena imoxoyotatsi petiriva, piavitaneva. Bajarapova pijanacuene pecapunaecujinaetsi doce baja pavai-beje xaina. Nexata bajarapova Jesús pepënëvelia ponataba, jivibitsaëtoxaneto tuatujëjavalialia. Nexata bajarapova tojayataba Jesús penaxatatsijavacopia. <sup>21</sup> Bajarapacuenia tojayataba Jesús penaxatatsijavacopia tsipaji bajarapova jamatabëjumaitssi mapacueniajé:

—Itsa tojayatabianajë Jesús penaxatatsijavacopia, nexata tavitaneyavami nevecuaajibi tsane, jamatabëjai bajarapova.

<sup>22</sup> Nexata Jesús napënëyorotaxuaba. Taenuta bajarapova. Nexata Jesús jumaitssi bajarapovajavabelia:

—Jamatabëcuenebarëyamëre. Xamë nesivajamatabëjumaitssimë: “Itsa tojayatabianajë Jesús penaxatatsijava, nexata tavitaneyavami nevecuaajibi tsane,” nesivajamatabëjamë. Bajaraxuata jamatejemamë baja, jai Jesús bajarapovajavabelia.

Bajarapacuenia Jesús pejumaitssijavata bajarapova jamatejema baja. <sup>23</sup> Bajaraxuacujinae Jesús jane baja pata judíovi penacaetuatabi-abibo pevetsinë pijaboyabelia. Nexata Jesús itsa pata, tane pevajënae pepatsivi, flauta piobivinexa itsabelia caponaejitsia petëpaevayo pemëthëtsinexa piobinexa. Tanenua jivi bitso pinijicuenia pemataneuyabavanapaejava petëpaevayo.

<sup>24</sup> Nexata Jesús jumaitssi bajarapamonaejavabelia:

—Papitsapare mapabovecuaje. Pejanava raja apo tëpae. Saya raja majita, jai Jesús tsipaji yapëtane Jesús piasaëyaexanaejavanexa bajarapovayo.

Nexata saya bajarapamonae Jesús jumecapocaponatsi bajarapacuenia pejumaitssijava. <sup>25</sup> Jesús nexata bajarapamonae bovecua pitsapaeyaexana. Nexata itsaxuayolia petëpaevayo boca, Jesús joneya. Cobepita petëpaevayo. Bajarapovayo baja namatacota. <sup>26</sup> Nexata daxita bajarapanacuapijivi Jesús vënëlivaisitanetsi piasaëyaexanaejava petëpaevayomi.

*Pacuenia Jesús itaxutoxaniavaeta bitso pitaxutotsëcënaenëmibeje yabara pelivaisi*

<sup>27</sup> Itsa baja Jesús pona judíovi penacaetuatabi-abibo pevetsinë pijabovecua, anijanëbeje bitso pitaxutotsëcënaenëbeje Jesús pënaponatsi. Bajaraponëbeje vavajaiya jumai tsaponaebeje Jesúsjavabelia:

—¡Jesús, Davidpijinë pemomo, paneitaxutotsioniatamabeje! jaibeje tsaponae Jesúsjavabelia.

<sup>28</sup> Itsa baja Jesús joneya pabojavabelia pona, nexata bajaraponëbeje pënajoneyatsibeje. Nexata Jesús bajarajota jumaitssi bajaraponëbejejavabelia:

—¿Payapëtanemebeje tsaja tanecajëjëpaecuene patacaitaxutoxanepanaeya exanaejavanexabeje? jai Jesús bitso pitaxutotsëcënaenëbejejavabelia.

Nexata bitso pitaxutotsëcënaenëbeje jumaitssibeje Jesúsjavabelia:

—Jājā, payapëtanijibeje cajena, jaibeje.

<sup>29</sup> Nexata Jesús itaxutojayata bitso pitaxutotsëcënaenëbeje. Jesús jumaitssi bitso pitaxutotsëcënaenëbejejavabelia:

—Pacuenia baja xanëjavaberena nesivanajamatabëcuenecopatsiaya panesivanajamatabëxainamebeje patacaitaxutoxaniavaetsinexabeje, bajarapacuenia pacatoexanatsibeje, jai Jesús.

<sup>30</sup> Nexata bitso pitaxutotsëcënaenëmibeje itaxutoxanepanabeje baja. Bajaraxuacujinae Jesús asaëya jumeitaveta bajaraponëbeje. Jumaitsi:

—Pëtsa panavajunupaebamebeje itsamonaejavabelia patacaitaxutoxaniavaetsijavabeje, jai Jesús.

<sup>31</sup> Itsiata saya ajena bajarapabovecua pitsapaliabeje, navajunupaebaponabeje. Pacuenia Jesús itaxutoxaniavaetatsibeje, navajunupaebaponabeje daxita bajarapanacuajava.

*Pacuenia Jesús natsipaebiaexana apo pecuaicuaijainëmi yabara pelivaisi*

<sup>32</sup> Itsa baja bovecua pitsapabeje ponëbeje Jesús itaxutoxanepanaeyaexana, bitso pitaxutotsëcënaenëmibeje, nexata icatsia itsamonae Jesús tocaparenatsi apo pecuaicuaijainë. Bajaraponë dovathi peyajavaponaponaenë. <sup>33</sup> Nexata apo pecuaicuaijainë Jesús dovathi itsa vecuacapitsapa, cuaicuaijai baja xaniavaetsia. Nexata petaevitsi bitso jamatabëcuenenabenajaca. Najumaitsi bajarapamonae:

—Caeto ata cajena Israel nacuata itsajivi ata apo tae mapitsicuneje, najai bajarapamonae.

<sup>34</sup> Itsiata baitsi jane fariseovi jamatabëcuenenavëxaniabiaya jumaitsi Jesús yabara:

—Mara ponëje dovathi jivivecua capitsapabiaba dovathivi pepo penamatacaitorobinë pesaëta, jai fariseovi Jesús yabara.

*Pacuenia Jesús itaxutotsoniatane jivi yabara pelivaisi*

<sup>35</sup> Jesús najetaruca daxita tomaranëjava, tsiquiritomaxijava ata. Nexata bajarapatomaranëjava judïovi penacaetuatabibonëjava pexanialivaisi Jesús jivi tsipaebanajetaruca. Tsipaebanajetaruca daxita Dioso pijajivi pevetsijavanexa. Piavitanevi ata Jesús jamatejemayaexanapona, daxitaviriavitane pexainaevimi. <sup>36</sup> Jesús jivi itsa tane, itaxutobejiobiatane. Tsipaji jivi bitso baja cajena cuerana. Apo caëjëpaetsinua jivi penatoexanaenexa itsacunejavayo ata. Jesús jivi sivajamatabëjumaitsi mapacueniaje:

—Pacuenia itsi ovejabitsaëtoxaneto itsa toajibitsi pevetsinëtsi, bajara itsi mapamonaeje, sivajamatabëjai Jesús.

<sup>37</sup> Nexata Jesús jumaitsi pijajivijavabelia:

—Xaniajanë pacuenia pacatsipaebijitsiatsi. Pabita peubijava penaveretsijava abaxë bitso ayajava sajina penotsinexa. Tsipaji saya caejiviyobeje penotsivi. Bajara pijinia itsi jivi ata Diosojavabelia penajamatabëcopabivinexa. Abaxë sajina ayaibitsaëtoxaneto. Itsiata baitsi jane Dioso panetonacuenebivi pacaejiviyomëbeje saya. <sup>38</sup> Bajaraxuata Diosojavabelia pavajëcabiabare icatsia itsamonae Dioso pijajivi pitorobinexa papecayavenon-aenexa, jai Jesús pijajivijavabelia.

## 10

*Pacuenia Jesús pijajivi ayaibitsaëtoxanetoyajuvënëvi itapeta saya doce ponëbeje apóstolevinexa yabara pelivaisi*

(Mr 3.13-19; Lc 6.12-16)

<sup>1</sup> Jesús pijajivi ayaibitsaëtoxanetoyajuvënëvi junata saya doce ponëbeje Jesús pebarënacaetuatsinexa. Jesús pijajivi pecaëjëpaejamatabëcuenetsi jamatabëcuenecaëjëpaeyaexana dovathi peyajavajinavanapaevi pevecuacapitsapaponaenexa, pejamatejemayaexanaponaenexanua daxitaviriavitane pecapunaevitsi.

<sup>2</sup> Mara doce ponëbeje Jesús pijajivi, apóstolevi, pevënëanëje. Itsanë pevënë Simón. Itsavënë bajaraponë Pedro. Itsanë pevënë Andrés, Simón pejuyapijinë. Itsanëbeje pijinia Santiagobeje Juanbeje nacaebananëbeje, Zebedeo pexënatobeje. <sup>3</sup> Itsanë pevënë Felipe. Itsanë Bartolomé. Itsanë Tomás. Itsanë Mateo, impuestomatamo gobierno pejamatabëcuene jivijavabelia petomatamoyanijobinëmi. Itsanë pevënë Santiago, Alfeo pexënato. Itsanë pevënë Lebeo. Bajaraponë itsavënë Tadeo. <sup>4</sup> Itsanë Simón, celotenë.

Itsanë pevenë Judas Iscariote. Bajaraponë bexëjavabelia canajetsijtsiatsi Jesús pijava-jabitsaë pecobeyabelia pebeyaxuabinexatsi.

*Pacuenia Jesús pijajivi itoroba Dioso pitorobilivaisi jivi petsipaebanajetarubenaenexa yabara pelivaisi*

(Mr 6.7-13; Lc 9.1-6)

<sup>5</sup> Jesús pijajivi pitorobivajënaeya jumaitsi pijajivijavabelia mapacueniaje:

—Pëtsa paponame apo judíovi pijanacuayabelia. Pëtsa paponame Samaria nacuata penaetomaranëjavabelia ata. <sup>6</sup> Paponare jane Israel nacuapijivijavabelia. Pacuenia ovejabitsaëtoxaneto pevetsinëtsi vecuanaxuabavanapa, bajara pijinia pacuenia Israel nacuapijivi Diosovecua naxuabavanapa. <sup>7</sup> Patsipaebanajetarubenaename bajarapamonae imoxoyo baja pevajënae pecopiapatsijavanexa Dioso pijajivi pevetsimatacabinexa. <sup>8</sup> Pajamatejemayaexanaponaename piavitanevi. Pasaëyaexanaponaenamenua petëpaevimi ata. Pajamatejemayaexanaponaenamenua bajayajebi bitso peperabëtsabanaevi. Pavecuacapitsapaponaenamenua dovathi peyjavajinavanapaevi. Amoneya raja pacacaëjëpaeyaexanatsi bajarapacuenia paneexanaponaenexa. Bajaraxuata amoneya jivi pajamatejemayaexanaponaename. Pëtsa pamatamoyanijobame panejamatejemaya exanaejamatabëcuene, jai Jesús pijajivijavabelia pitorobivajënaeya.

<sup>9</sup> Jesús icatsia jumaitsi pijajivijavabelia pitorobivajënaeya:

—Panijanamutonexa pëtsa pacaponame palata. <sup>10</sup> Pëtsa pacaponame panijadoro ata. Saya pajumaponaename caenaxatatsi. Panenataxuxatatsijava ata, pataxunaponaename caejava. Naeboyo ata pëtsa pacaponame. Pamonaejavabelia livaisi patsipaebianame, pacarajutsiana panexaejava. Bajarapacuenia pacarajutsiana tsipaji pajivi xaniavaetsia itsanëjavabelia tonacueneba, bajarapajivi juya pexaejava barajutatsi.

<sup>11</sup> 'Itsa papatabiabianame pinijitomarata, tsiquiritomarayojavata ata, bajarajota pajitabiabianame ponë peyaiyataenëtsi. Nexata bajaraponë pijabota pamajitabiabianame. Pëtsa panatixitaponaeme itsaboyabelia panemajitsinexa. Matapania icatsia itsajavabelia itsa paponaname, bajarapabovecua papitsapaename. <sup>12</sup> Itsa pabota papatsijitsiamë, ajena pajonejitsiamëlia, pajumaitsimë tsabiabi tsane: “Diosojavabelia raja pacatovajëtsijtsiatsi xaniavaetsia panejinavanapaenexa,” pajamë tsabiabi tsane. <sup>13</sup> Itsa bajarapabopijivi pacacopiapitsiana xaniavaetsia, nexata pacuenia Diosojavabelia patovajëtame, yavenonaenatsi Dioso. Itsiata baitsi jane itsa apo pacacopiapitsi tsane xaniavaetsia, nexata pëtsa patovajëtame Diosojavabelia peyavenonaenexatsi. <sup>14</sup> Itsa apo pacacopiapitsi tsane, itsa apo jitsipaenua tsane papecanamuxunaevetsinexa panetsipaebilivaisi, bajarapabo pavecuaponaename. Bajarapatomara ata baja pavecuaponaename. Nexata baja itsa paponaejitsiamë bajarapatomaravecua, paneponaevajënae, bajarapatomarata panataxuatsapërëvarëbianame. Bajarapacuenia itsa panataxuatsapërëvarëbianame, bajarapatomarapijivi yapëtaena Diosojavabelia penaneconitsicuene apo papecacopiapitsixae papecanamuxunaevetsinexa panetsipaebilivaisi. <sup>15</sup> Xaniajanë pacuenia pacatsipaebijitsiatsi. Pamatacabi Dioso naneconitsiaexanaena daxita pijaneconi pexainaevi, bajarapamatacabi Dioso ayaicuenia naneconitsiaexanaenatsi patomarapijivi apo pacacopiapitsi tsane. Paneconivajëtota bajayata Dioso naneconitsiaexana Sodoma tomarapijivimi, Gomorra tomarapijivimi ata, bajarapaneconivajëto matatoxenetsia itsamatacabi Dioso naneconitsiaexanaena patomarapijivi apo pacacopiapitsi tsane, jai Jesús pijajivijavabelia pitorobivajënaeya.

*Pacuenia Jesús pijajivi bejioxiaexanaejitsiatsi yabara pelivaisi*

<sup>16</sup> Icatsia Jesús jumaitsi pijajivijavabelia:

—¡Xania panayajivitaename! Pacaitorobianatsi raja bitso pibisiacuene pexanabibivijavabelia. Pacuenia ovejaxi tsiayaitsi itsa jinavanapa pianaepanaevi nevëthë tuatuajëata, bajarapaitsimë tsane. Nexata pacuenia unupijivi nayajivitaeyajinavanapa pitsacueniabiyantivatsi, bajara paitsimë tsane. Pacuenia ata ucucu aneconijibia jinavanapa, bajara paitsimë tsavanapae tsane. <sup>17</sup> Xania baja tsane. Patajajivixaemë raja

jivi pacaneconitsiana papecananeconitsiaexanaenexa. Nexata itsajota nacaetuatabiaba tomara pevetsivi, bajarabelia pacacaponana. Judíovi penacaetuatabibonëjava pacajumatitibabeyabiabiana penaneconitsivi pejumaconitabiabimacata. <sup>18</sup> Patajajivixaemë pacanubiananua nacuaevetsivi pitabarata, presidentevi pitabarata ata. Bajarajota nexata xanë talivaisi patsipaebianame bajarapamonaevjavabelia, apo judíovi ata pitabarata. <sup>19</sup> Itsiata baitsi jane itsa pacanubiana nacuaevetsivi pitabarata, pëtsa pajamatabëbëjamë panenayajivicuauicuaijainexa bajarapamonaevjavabelia. Tsipaji raja paepatota panayajivicuauicuaijamëjitsia, bajarapaepatota Dioso pejamatabëcueneta pacacuaicuaijaiyaxanaena. <sup>20</sup> Itsa panayajivicuauicuaijamë tsane, paxamë panijacuata apo pacuaicuaijamë tsane. Espiritu Santo raja pacacuaicuaijaiyaxanaena.

<sup>21</sup> 'Itsamonae pematapijivi, pejuyapijivi ata, canajetsiana nacuaevetsivijavabelia pebeyaxuabinexatsi. Itsamonae nacoxicanajetsiana nacuaevetsivijavabelia pebeyaxuabinexatsi. Itsamonae canajetsiana paxa, pena ata, nacuaevetsivijavabelia pebeyaxuabinexatsi. <sup>22</sup> Daxita nacuapijivi pacaitoya tsane patajajivixaemë. Pajivi bejiobiaexanae atatsi tsane, itsiata itsa casaë tsaponaponae tsane tanejumecovënëtsijava, bajarapajivi capanepaenatsi Dioso pijanacuayabetsia. <sup>23</sup> Itsa patomarata pacabejiobiaexanaena, bajarapatomaravecua parëcëpecaename itsatomarabelia. Xaniajanë pacuenia pacatsipaebijitsiatsi. Daxita Israel nacuata penaetomaranëjava abaxë patsipaebiveretsinejevamë pexanialivaisi, xanë, Daxitajivi Pematapijinë, itacarajeta icatsia patsianicajë.

<sup>24</sup> 'Itsajivi ata apo jamatabëcuenematatoxenetsi pecujarubinëtsi. Itsajivi ata pijinia itsanë itsa pijajivitonë, apo jamatabëcuenematatoxenetsi pijatuxanenë. <sup>25</sup> Pacuenia pecujarubinë itsamonae copiaya bejiobiaexanatsi, bajarapacuenia icatsia bajaraponë pecujarubivi ata bejiobiaexanaenatsi. Pacuenia petuxanenë copiaya bejiobiaexanatsi, bajarapacuenia icatsia pijajivitonë ata cotocaevi bejiobiaexanaenatsi. Xanë panijatuxanenë: “Beelzebú, daxita dovathivi pijatuxanenë,” nejai tsabiabi itsamonae. Nexata pijinia patajajivixaemë bitso pibisiavënëta paxamë ata cotocaevi pacajunatabiabiana, jai Jesús pijajivijavabelia.

*Pacuenia Jesús pijajivi tsipaeba pecujunaviyaniva pebeyaxuabijavatsi yabara pelivaisi (Lc 12.2-7)*

<sup>26</sup> Icatsia Jesús jumaitsi pijajivijavabelia:

—Pëtsa pacujunavame jivi, pacaatiobi ata. Daxita xua jivi muetsia pibisiacuenexana, bexëjavabelia cueneyapëtaeponaenatsi daxitajivi. <sup>27</sup> Palivaisianë muetsia vajaepatojavata pacatsipaebaponatsi, bajarapalivaisianë paxamë pinijijumeta patsipaebaponaename jivi penacaetuatabibijavata. <sup>28</sup> Pëtsa pacujunavame jivibevevi ata. Bajarapamonaevjavabelia pacabeyaxuabi ata tsipae, acuenebi matavëjëa papecaitsacueniabinexa pepo panejamatabëcuenjavabelia. Biji rajane pacujunavare Dioso, ponë caëjëpatsi papecaxuabinexa infiernojavabelia papecabeyaxuabicujinae.

<sup>29</sup> 'Anijanëbeje baratsuitojeje namatamota saya caepalatanëyo. Itsiata baitsi jane caenë ata baratsuito Dioso pepëya jemata muetsia apo jopaetsica petëpaenë. Tsipaji paneaxa, Dioso, asiva baratsui ata. <sup>30</sup> Dioso cajena bitso pacaasiva baratsui matatoxenetsia. Nexata panematatanoxi ata, caematanatoyo canacujitsia, Dioso namataëjëta. <sup>31</sup> Bajaraxuata pëtsa pacujunavame itsacuenjavayo ata. Tsipaji paxamë Dioso bitso pacaasiva baratsuitoxi matatoxenetsia, jai Jesús pijajivijavabelia.

*Pacuenia Jesús pijajivi apo benayavajunuaxainae Jesús pijajivicuene yabara pelivaisi (Lc 12.8-9)*

<sup>32</sup> Icatsia Jesús jumaitsi pijajivijavabelia:

—Daxita pamonaevjavabelia, jivi pitabarata itsa navajunupaebiana tajajivicuene, xanë ata vajunupaebianajë bajarapamonaevjavabelia taxa, athëbëtatsia peecaenëjavabelia. <sup>33</sup> Pamonaevjavabelia jumai tsane itsamonaejavabelia: “Xanë cajena Jesús apo pijajivitonë,” jai tsane, nexata pijinia bajarapamonaevjavabelia yabara xanë jumaitsinë tsane taxa Diosojavabelia: “Mara pamonaevjavabelia apo tajajivije,” janë tsane, jai Jesús pijajivijavabelia.

*Pacuenia Jesús apo penajuajumecovënëtsixae, nacaemonae ata apo najamatabëcuenejëpae tsane yabara pelivaisi*

*(Lc 12.51-53; 14.26-27)*

<sup>34</sup> Icatsia Jesús jumaitsi pijajivijavabelia:

—Pëtsa panesivajamatabëjumaitsimë mapacueniaje: “Jesús rabaja patsica mapanacuayabetsicaje daxitajivi mapanacuataje najamatabëcuenejëpaeya pejinavana-paeyaexanaenexa,” panesivajamatabëjamë pëtsa. Bajaraxuanexa apo patsinëtsica. Biji rajane xanë tapatsixaetsica mapanacuayabetsicaje, jivi itsa nejumecovënëtsiana, apo najamatabëcuenejëpae tsane pamonaejavabelia apo nejumecovënëtsi, nacaemonae ata. Napijavajabitsaë tsane namataenetsia. <sup>35</sup> Xanë apo tanenajuajumecovënëtsixaebeje, pebibeje paxabeje apo najamatabëcuenejëpaebeje tsane. Petirivabeje ata, pexënatoyobeje xanë apo tanenajuajumecovënëtsixae penabeje apo najamatabëcuenejëpaebeje tsane. Pamebeje ata pecopenabeje apo najamatabëcuenejëpaebeje tsane. <sup>36</sup> Nexata xanë apo tanenajuajumecovënëtsixae, caejivi canacujitsia beprijavajabitsaëjivi taenatsi pijamonaejivi ata.

<sup>37</sup> Pajivi nejumecovënëtsi ata, apo niasiva tsane paxa, pena ata, piasivajava mata-toxenetsia, bajarapajivi apo tajajivi tsane. Pajivi nejumecovënëtsi ata, apo niasiva tsane pexënato, pexënatoyo ata, piasivajava matatoxenetsia, bajarapajivi apo tajajivi tsane. <sup>38</sup> Pajivi nejumecovënëtsi ata, pecajunavi apo nepënaponae tsane pebeyaxu-abixaejitsiatsi xanë tajumelivaisi yabara, bajarapajivi apo tajajivi tsane. <sup>39</sup> Pajivi nayavajunuaxaina tajajivicuene pebejioabixanaeyanivatsi, pebeyaxuabiyavivatsinua, bajarapajivi naxuabiana daxitamatacabijavabelianexa. Itsiata baitsi jane pajivi beyaxu-abatsi tajajivixae, bajarapajivi daxitamatacabijavabelianexa Dioso capanepaenatsi, jai Jesús pijajivijavabelia.

*Pacuenia Dioso matamotsijitsiatsi pamonae xaniavaetsia copiapita Jesús pijajivi yabara pelivaisi*

*(Mr 9.41)*

<sup>40</sup> Icatsia Jesús jumaitsi pijajivijavabelia:

—Pajivi pacacopiapitsiana patajajivixaemë, bajaraxua xanë taniji tanecopiapitsijava. Pajivi necopiapitsiana, bajaraxua taxa Dioso tane pecopiapitsijavatsi. <sup>41</sup> Diosojumepaebinë Dioso matamotsianatsi petonacuenebimatamo. Nexata pajivi xaniavaetsia copiapita Diosojumepaebinë, bajarapajivi ata Dioso matamotsianatsi. Nexata xuavajëto Diosojumepaebinë Dioso matamotsianatsi, bajara pijinia xuavajëto Dioso matamotsianatsi pajivi copiapita Diosojumepaebinë. Pajivi ata exanabiaba Dioso pitorobicueniatsi, bajarapajivi ata Dioso matamotsianatsi. Nexata pajivi xaniavaetsia copiapita pajivi exanaponapona Dioso pitorobicueniatsi, bajarapajivi ata Dioso matamotsianatsi. Nexata xuavajëto Dioso matamotsianatsi pajivi exanaponapona Dioso pitorobicueniatsi, bajara pijinia xuavajëto bajarapajivi Dioso matamotsianatsi.

<sup>42</sup> Pajivi yavenonaena tajajivi, tsiquirijavayo ata mera rajutsiana piapaenexa, bajara-pajivi pepacune matamotsianatsi Dioso, jai Jesús pijajivijavabelia.

## 11

*Pacuenia Juan jivibautisabinë itoroba pijajiviyajuvënëvi Jesúsjavabelia yabara pelivaisi*  
*(Lc 7.18-35)*

<sup>1</sup> Jesús baja najumevereta pijajivi doce ponëbejejavabelia livaisi petsipaebijava. Nexata baja Jesús pona livaisi petsipaebinexa bajarapanacuata penaetomaranëjava.

<sup>2</sup> Bajarapamatacabi Juan jivibautisabinë naneconitsiaponapona penaneconitsivi peje-babiabibota. Nexata Juan vënëlivaisitane Dioso pesaëta Jesús pinijicuene pexanaponaejava. Bajaraxuata Juan itoroba pijajiviyajuvënëvi Jesúsjavabelia. <sup>3</sup> Juan itoroba pijajivi peyanijobinexa Jesúsjavabelia. Nexata Juan pijajivi jumaitsi Jesúsjavabelia:

—¿Xamë tsabaja Cristomë? ¿Xamë tsabaja tajëvelia cavajunupaebaona nepatsijavanexatsica daxitajivi necapanepaenexa? Itsa apo Cristomë, ¿abaxë tsaja pacopiaeve-tavanapaenajë itsanë pepatsinexatsica? jai Juan pijajivi Jesúsjavabelia.

<sup>4</sup> Nexata Jesús jumaitsi Juan pijajivijavabelia:

—Paponare baja. Patsipaebianame Juan pacuenia baja pataneme taexanaponaejava. Patsipaebianamenua pacuenia baja pajumetaneme tatsipaebilivaisi jivijavabelia. <sup>5</sup> Apo petaevimi ata itaxutoxaniavaetaponajë xaniavaetsia petaenexa. Petabusipacuenabiv-itsinua daxita jinavanapaeyaexanaponajë. Bajayajebi bitso peperabëtsabanaevinua vecuaajibiaexanaponajë. Bitso pemuxusipanaevinua jumetaeyaexanaponajë baja xaniavaetsia pejumetaenexa. Petëpaevimi ata icatsia asaëyaexanaponajë. Pexanialivaisinua pecapanepaelivaisinexatsi pibisiacue ne pexanaeconimivecua tsipaebaponajë bepejiobivijavabelia. Daxita bajaraxua taexanaponaejava patanetaejavamë, patsipaebianame Juanjavabelia. <sup>6</sup> Pajumaitsimënu tsane Juanjavabelia: “Jesús raja jumaitsi: ‘Jamatabëcuenebarëya pajivi tsiteca jumecovënëta xanë Dioso pexënatocuenenë,’ jai raja Jesús,” pajamë tsane Juanjavabelia, jai Jesús Juan pijajivijavabelia.

<sup>7</sup> Itsa baja Juan pijajivi naviabalia, nexata bajarapamonae pecovëta Jesús taxuxuaba jivijavabelia petsipaebijava Juan pelivaisi. Jesús jumaitsi jivijavabelia mapacueniaje:

—Itsa paponame petusato nacuyabelia, pamatacabi Juan ponapona petusato nacuata, ¿detsa pitsicuene pajamatabënaponaremelia panetaenexa bajarajotalia? ¿Paponaremelia tsaja saya panetaenexa musuli penajëabijava jovibota? <sup>8</sup> Itsa apo paponamëlia panetaenexa musuli penajëabijava jovibota, ¿detsa nexata pitsicuene panetaenexa paponaremelia? ¿Paponaremelia tsaja saya panetaenexa naitabëtsiaya pexaniajava penaxatatsinë? Paxamë rabaja payapëtaneme mapacuenieje. Pamonae naitabëtsiaya pexaniajava naxatababiaba, bajarapamonae jinavanapa nacuanë pevetsivi pijabonëjava. <sup>9</sup> ¿Detsa nexata xua pajamatabënaponaremelia panetaenexa petusato nacuyabelia? Paponaremelia raja panetaenexa Diosojumepaebinë profetanë. Xaniajanë pacuenia pacatsipaebijitsiatsi. Juan itsa pataneme, pepacuenie jane baja pepo profetanë, Diosojumepaebinë, pataneme. Nexata saya bevelia profetanë apo pataemë. <sup>10</sup> Juan pexanaejavanexa, bajayata tajëvelia Dioso pejumelivaisibaxutota vajunupaeba. Dioso tanejumatijava ata xanëjavaberena Juan yabara, Dioso pejumelivaisibaxutota jumaitsi mapacueniaje:

Itorobianajë nevajënaeyabelia tanejumelivaisipaebinënexa, jivi pecatsivajënae najamatabëcuenexaniavaetsinexa, jai bajayata Dioso pejumelivaisibaxutota tapatsivajënaeya Juan tanelivaisi paebanajetarucaejavanexa yabara.

<sup>11</sup> Xaniajanë pacuenia pacatsipaebijitsiatsi. Juan ayaijamatabëcuenenë mapanacuataje. Nexata bajayata Juan pevajënaeya paprofetavi jinavanapa, itsanë ata Juan apo jamatabëcuenematatoxenetsitsi. Itsiata baitsi jane pajivi beveliajamatabëcuenejivi ata, itsa nejumecovënëta tacapanepaejavanexa, bajarapajivi ayaijamatabëcuenejivi Dioso exanaenatsi Juan matatoxenetsia.

<sup>12</sup> Juan jivibautisabinë petaxuxuabijavaveliacujinae, Dioso pitorobilivaisi jivi petsipaebanajetarucaejava mapamatacabijavaberena ataje, ayaibitsaëtoxaneto picani jivi jitsipa Dioso pitorobilivaisi pejumecovënëtsinexa. Itsiata itsamonae pesaëta caranatapona bajarapamonae pejumecovënëtsianiva Dioso pitorobilivaisi. <sup>13</sup> Juan penaexanaevajënaeya, daxita Diosojumepaebivimi profetavi tajëvelia vajunupaebaona itsamatacabi Dioso pijajivi pevetsijavanexa. Dioso Moiséspijinëta penajumecopatsilivaisi ata, tajëvelia vajunupaeba Dioso pijajivi pevetsijavanexa. <sup>14</sup> Itsa baja jamatabëpajumecovënëtame, pajumecovënëre xua aeconoxae pacatsipaebijitsiatsi. Dioso pejumelivaisibaxutota tajëvelia jumaitsi mapacueniaje: “Eláspijinë icatsia patsiana,” jai. Bajarapacuenia tajëvelia itsa jumaitsi, Juan jivibautisabinë yabara jumaitsi. Tsipaji pacuenia jamatabëcueneitsi profeta Eláspijinë, bajara jamatabëcueneitsi Juan ata. Nexata Juan

pepatsivajënaeya, tajëvelia yapëtanetsi pacuenia Juan exanaejitsia. <sup>15</sup> Pajivi jamatabëne-jumeyapëtane patacatsipaebilivaisi, nenamuxunaevetsi xaniavaetsia, jai Jesús jivijavabelia.

<sup>16</sup> Jesús icatsia jumaitsi jivijavabelia:

—¿Detsa meta pacuenia yapëtaeyaexanaenajë itsamonaejavabelia bajarapamonae xaniavaetsia papecayapëtaenexa pacuenia paxamë pajamatabëcueneitsimë tsavana-pae? Jumaitsinë meta tsane paxamë yabara mapacueniaje: “Bजारapamonae abaxë saya bepejevaxijivixi, pajivixi tomara tuatuajëjava banamuxusitenavanapa. Pejevaxijivixi itsa namuxusitenavanapa, bavavajai tsenae penajua namuxusitenaevijavabelia. <sup>17</sup> Pevavajaijavata bajumaitsi: ‘Pacatoobecatsi picani flauta. Itsiata apo payavajibimë. Pacatonaxëanecatsi picani penemuxunanuevajinexa ata. Itsiata apo panuemë,’ bajai tsenae pejevaxi penajua namuxusitenaevijavabelia. Bajara saya jamatabëcueneitsi pamonae aeconoxae jinavanapa mapanacuataje,” janë meta tsane paxamë yabara. <sup>18</sup> Juan jivibautisabinë Dioso pitorobilivaisi jivi tsipaebanajetaruca. Pexaejava itsajavata apo xaeyabiabi, pamatacabibeje Diosojavabelia vajëta. Vinora ata apo apaeyabiabi. Nexata bajaraponë yabara jamatabëcuenenavëxaniabiaya pajumaitsimë tsabiabi: “¡Juan raja dovathi yajavaponaponal!” pajamë tsabiabi jamatabëcuenenavëxaniabiaya. <sup>19</sup> Bajaraxuacujinae icatsia xanë, Daxitajivi Pematapijinënë, najetarucajë. Itaxutojema xaniji. Matavëjëa apaeyabiabajënu. Nexata xanë yabara icatsia jamatabëcuenenavëxaniabiaya pajumaitsimë tsabiabi: “¡Pataema maponëje! Ayaijava xaeyabiaba. Ayaira matavëjëa apaeyabiabanua piaitajibinexa. Barënajamatabëcuenejëpanua gobierno pejamatabëcuene impuestomatamo pematamoyanijobabiabivi. Pamonae ata piamatabëcuenebejevi, barënajamatabëcuenejëpa,” pajamë tsabiabi xanë yabara. Itsiata baitsi jane xuanë paxanëbeje Juanbeje paexanaponajëbeje, bajaraxuanë Dioso pejamatabëcueneta pataexanaejavabeje itsamonae xaniavaetsia yapëtaena. Nexata daxita bajarapamonae yapëtaena pacuenia Dioso paneyapëtaeyaexanabeje pepacuenepo pexaniajajamatabëcuene, jai Jesús mapacueniaje jivijavabelia.

*Pacuenia Jesús jumaitsi patomarapijivijavabelia apo jumecovënëtsitsi yabara pelivaisi (Lc 10.13-15)*

<sup>20</sup> Itsatomaranëjava Dioso pesaëta Jesús pinijicuene pexanaejavanë navitsia exanapona. Itsiata bajarapatomaranëpijivi apo copabi pibisiacuene pexanabiabijava. Apo najamatabëcuenepënëyorotsi Diosojavabelia. Nexata Jesús ajumesaëya jumaitsi bajara patomaranëpijivijavabelia:

<sup>21</sup> ¡Bitso bepajibimë tsane paCorazín tomarapijivimë! ¡Bitso bepajibimë tsane paBetsaida tomarapijivimë ata! Pinijicuene Dioso pesaëta taexanaejavanë patae atamë, itsiata apo panejumecovënëtsimë. Apo pacopabimë pibisiacuene panexanabiabijava. Apo panajamatabëcuenepënëyorotsimë Diosojavabelia. Bajayata Tiro tomarapijivimi, Sidón tomarapijivimi ata, petuatuajëta bajarapitsipinijicuene itsa tsitaexanaejitsipajë, nexata bajarapamonaemi copabijitsipa pibisiacuene pexanaejava. Najamatabëcuenepënëyorotsipa Diosojavabelia. Bजारapamonaemi nexata pibisiacuene pexanabiabineconi bitso yajamatabëcuenebëjai tsipae. Nexata Diosojavabelia petsitanajamatabëcueneitajëtsinexa peyamatabëcuenebëjaijava pibisiacuene pexanabiabineconi, naxatabijitsipa piayopapaëbërëjavanë. Enaejitsipa irata. Ipumana ata natsimataothocaejitsipa bitso peyamatabëcuenebëjaixae pibisiacuene pexanabiabineconi. <sup>22</sup> Xaniajanë pacuenia pacatsipaebijitsiatsi. PaCorazín tomarapijivimë, paBetsaida tomarapijivimë ata, patae atamë pinijicuene Dioso pesaëta taexanaejavanë, apo panejumecovënëtsimë. Nexata pamatacabi Dioso naneconitsiaexanaena daxita pijaneconi pexainaevi, bajarapamatacabi bitso ayaicuenia Dioso pacananeconitsiaexanaena. Paneconivajëtota bajayata Dioso naneconitsiaexana Tiro tomarapijivimi, Sidón tomarapijivimi ata, bajarapaneconivajëto matatoxenetsia Dioso bitso

ayaicuenia pacananeconitsiaexanaena. <sup>23</sup> Paxamë paCapernaum tomarapijivimë, jamatabëcuenenavëxaniabiaya pajamatabëjumaitsimë tsabiabi: “Vaxaitsi cajena ayaijamatabëcuenevitsi. Nexata Dioso nacacapanepaena athëbëabetsia,” pajamatabëjamë tsabiabi. Itsiata baitsi jane athëbëabetsia Dioso apo pacacapanepae tsane. Dioso raja pacaxuabiana infernojavabelia apo patanejumecovënëtsixaemë. Bajayata Sodoma tomarapijivimijavata itsa exanaejitsipajë Dioso pesaëta pinijicuene taexanaejava, pacuenia paxamëjavata exanaponajë, nexata Sodoma tomarapijivimi copabijitsipa pibisiacuene pexanaejava. Najamatabëcuenepënëyorotsipa Diosojavabelia. Nexata bajarapamonae Dioso apo verebiabi tsipaetsi pibisiacuene pexanaeneconi yabara. Nexata abaxë mapamatacabi ataje jivi jinavanapaejitsipa bajarapatomarata. <sup>24</sup> Xaniajanë pacuenia pacatsipaebijitsiatsi. Pamatacabi Dioso naneconitsiaexanaena pijaneconi pexainaevi, ayaicuenia Dioso pacananeconitsiaexanaena. Tsipaji Dioso pesaëta navitsia pinijicuene taexanaponaejava patae atamë, apo panejumecovënëtsimë. Nexata Sodoma tomara-pijivimi matatoxenetsia Dioso bitso ayaicuenia pacananeconitsiaexanaena, jai Jesús patomarapijivijavabelia apo jumecovënëtsitsi.

*Pacuenia Jesús pijajivi junata pejamatabëcuenesaëyaexanaenexa pejamatabëcuenecueranaejavavecua yabara pelivaisi*

*(Lc 10.21-22)*

<sup>25</sup> Jesús pevajëtsijavata paxa Diosojavabelia jumaitsi:

—Axa, nevetsinë athëbëtatsia. Nevetsinë mapanacuajava ataje. “Ayaijamatabëcuenenëmë bitso,” cajaitsi. Tsipaji pamona bitso apo penacujarubivi ata, yapëtaeyaexanaename nevetsijavanexa daxita nijajivi mapanacuataje. Bajarapamonae yapëtaeyaexanaename pexanialivaisi, xanë talivaisi, palivaisi vecuamatayatame bitso peyapëtaevi mapanacuapijilivaisije. Bajarapalivaisi vecuamatayatame bitso penacujarubivi ata mapanacuapijicuene yabaraje. <sup>26</sup> Bajarapacuenia exaname tsipaji baja exaname nejitsipacuenia, jai Jesús paxa Diosojavabelia pevajëtsijavata.

<sup>27</sup> Icatsia Jesús jumaitsi pijajivijavabelia:

—Taxa Dioso baja cajena netocopata tayapëtaenexa daxitacuene. Itsajivi ata apo nejamatabëcueneyapëtae pacuenia xanë jamatabëcuenetsinë, Dioso pexënatonë. Caenë taxa Dioso nejamatabëcueneyapëtane. Itsajivi ata apo jamatabëcueneyapëtae pacuenia taxa Dioso jamatabëcuenetsi. Caenënë xanë, pexënatonë, jamatabëcueneyapëtaniji. Pamona tojitsipajë tayapëtaeyaexanaenexa pacuenia taxa Dioso jamatabëcuenetsi, bajarapamonae ata yapëtaeyaexanaponaejanë. <sup>28</sup> Pabita penacuenebabinë, piarevejava pejotababinë, bitso bavemaxëcuerana. Bajara pijinia pacuenia paxamë ata bitso itsa pajamatabëcuenecueraname pibisiacuene paneexanabiabijava yabara, xanëjavaberena paponare panejamatabëcuenesaënexa icatsia. <sup>29</sup> Bueyubeje banavësijumacaevetabeje petsivësijumabuatsinexatsibeje yugovënëjava penacuenebinexabeje. Bajara pijinia pacuenia paxamë ata panajamatabëcuenecaevere patacatsijamatabëcuenebuatsinexa patacatsipaebilivaisi. Panejumecovënëtsianame pacuenia pacaitorobatsi patanetonacuenebinexamë. Nexata panevajënaeyabelia panejamatabëcueneyapëtaeponaename. Tsipaji xanë xaniavaetsia pacatsipaebaponaenatsi. Xanë beayaijamatabëcuenenë apo nataenë. Nexata bajarajota panajamatabëcueneevetsianame panejamatabëcuenesaënexa icatsia. <sup>30</sup> Pacuenia bueyu tsivësijumabuatatsi yugovënëjava petoyapëxanepanaenexatsi penacuenebijava, bajara pijinia pacuenia paxamë ata pacatoyapëxanepanaeyaexanaenatsi paneexanaenexa xua pacaitorobijitsiatsi, jai Jesús pijajivijavabelia.

*Pacuenia Jesús pijajivi trigoxu namutua siricanajetarubena penacueraevetsimatatabita yabara pelivaisi*

*(Mr 2.23-28; Lc 6.1-5)*

<sup>1</sup> Judíovi penacueraevetsimatacabita Jesús, pijajivi yajava, najetaruca trigo pabianëjava. Jesús pijajivi bitso piajani. Nexata trigoxu siricanajetarubena. Xuxaeyabuatapona.

<sup>2</sup> Nexata fariseovi tane Jesús pijajivi pesiricanajetarubenaajava trigoxu. Nexata fariseovi jumaitsi Jesúsjavabelia:

—Taema mapamonaaje. Dioso Moiséspijinëta penajumecopatsilivaisi vajanacaitavetsicuene nijajivi exana. Apo nacaitavetsi ata trigoxu vajaxaejava, itsiata ajena penacueraevetsimatacabixae, nijajivi apo bexanae mapacuenaje, jai fariseovi Jesúsjavabelia.

<sup>3</sup> Nexata Jesús jumaitsi fariseovijavabelia:

—Ajena, penacueraevetsimatacabita, tajajivi bajarapacuenia exanae ata, itsiata apo pibisiacuene. Tsipaji bitso piajani. ¿Apo palebimë tsipaji Dioso pejumelivaisibaxuto paneyapëtaenexa pacuenia vajasalinainë Davidpijinë, pebarëponaevi yajava, exana pamatacabi bitso piajani? <sup>4</sup> Davidpijinë joneya Dioso pijatemploboyalia. Nexata Dioso pijatemplobënëta, mesajumata, bobena Diosonexa ofrendacuenia petojebipanbëanë. Bajarapapanbëanë apo tocopatsitsi picani Davidpijinë, pijajivi ata, pexaenexa penaneconitsiyaniva Diosojavabelia. Èsacerdotevi picani tocopatatsi pexaenexa. Davidpijinë apo sacerdotenë ata, pijajivi barëxae ata bajarapapanbëanë, itsiata apo vënananeconitsi Diosojavabelia. <sup>5</sup> ¿Apo palebimë tsipaji Dioso Moiséspijinëta penajumecopatsilivaisi paneyapëtaenexa pacuenia jumaitsi sacerdotevi yabara? Sacerdotevi templobota penacuenebivi, penacueraevetsimatacabita ata apo nacueraevetabiabi. Penacueraevetsimatacabita sacerdotevi nacuenebabiabi ata templobota, itsiata apo naneconitsi Diosojavabelia. <sup>6</sup> Xanë cajena ayaijamatabëcuenenënë. Nexata Dioso netojitsipa jivi taneyaiyataenexa templobo matatoxenetsia. <sup>7</sup> Dioso pejumelivaisibaxutota jumaitsi mapacueniaje: “Jitsipajë paneitaxutotsoniataenexa itsamonae ata. Apo jitsipañë cajena saya patanetobeyabiabinexamë dajubicuene ofrendacuenia patanerajutabiabinexamë,” jai Dioso pejumelivaisibaxutota. Xua yabara jumaitsi bajarapacuenia, apo pajumeyapëtaemë baja cajena. Tsipaji itsa pajumeyapëtaejitsipame xua yabara jumaitsi, nexata tajajivi ata paitaxutotsoniataejitsipame. Nexata tajajivi trigoxu pexaejava yabara apo panejumaitsimë tsipae: “Dioso Moiséspijinëta penajumecopatsilivaisi vajanacaitavetsicuene nijajivi exanapona,” apo panejamë tsipae. Tsipaji tajajivi apo naneconitsi Diosojavabelia. Tsipaji tajajivi bitso piajanixae, trigoxu xane. <sup>8</sup> Nexata xanë, Daxitajivi Pematapijinënë, netoxanepana cajena tatsipaebinxua xuanepana jivi pexanaenexa penacueraevetsimatacabita ata, jai Jesús mapacueniaje fariseovijavabelia trigo pabianëjavata.

*Pacuenia Jesús jamatejemayaexana pebi pecobetsaquenaenë yabara pelivaisi*

*(Mr 3.1-6; Lc 6.6-11)*

<sup>9</sup> Trigo pabianëjavata Jesús livaisi petsipaebicujinae fariseovijavabelia, Jesús baja vecuapona pabianë. Nexata Jesús joneya judíovi penacaetuatabiboyalia. <sup>10</sup> Nexata bajarajota pebi naeca, pecobetsaquenaenë. Itsamonae fariseovi bajarajota jamatabëneconitatsi Jesús. Nexata Jesús naitaxutocaevetatsi xua yabara neconitsijitsiatsi. Nexata fariseovi Jesús jamatabëcuenejëbiaya yanijobatsi mapacueniaje.

—¿Vajanacueraevetsimatacabita ata tsaja xanepana piavitanevi vajajamatejemayaexanaenexa? jai fariseovi Jesúsjavabelia.

<sup>11</sup> Jesús nexata jumaitsi fariseovijavabelia:

—Paxamëyajuvënëvi pijaoveja itsa tojopaejitsiparecatsi meramëthëareca, penacueraevetsimatacabita ata ponaejitsipa. Nexata jutsipaina pijaoveja. ¿Baja tsabaitsi jane?

<sup>12</sup> ¡Biji ra jivitonë bitso namatamota oveja matatoxenetsia! Bajaraxuata itsiata naxatoxanepana vaxaexanaenexa pexaniacuene vajanacueraevetsimatacabita ata, jai Jesús fariseovijavabelia.

<sup>13</sup> Nexata Jesús jumaitsi pecobetsaquenaenëjavabelia:

—Namaxërovire, jai Jesús.

Itsa bajaraponë namaxërovita, pacuenia itsanenia cobeitsi, bajara cobeitsi. Cobexanepanareca baja. Pecobetsaquenaajavami baja ajibi. <sup>14</sup> Nexata fariseovi itsa tane

Jesús pecobexanepanaeyaexanaejava pecobetsaquenaenë, fariseovi anaepana. Nexata pitsaparena judíovi penacaetuatabibibovecua. Nexata jane baja fariseovi najumejaita Jesús pebeyaxuabinexatsi.

*Pacuenia Diosojumepaebinë profetanë bajayatami tajëvelia vajunupaebatsi Jesús yabara pelivaisi*

<sup>15</sup> Jesús jamatabëcueneyapëtane pacuenia fariseovi sivanajamatabëxainatsi. Jesús picani fariseovi jamatabëbeyaxuabatsi. Nexata baja Jesús bajarapamonae vecuapona itsajavabelia. Jivi ayabitsaëttoxaneto Jesús pënaponatsi. Jesús nexata jamatejemayaexana daxita piavitanevi. <sup>16</sup> Jesús jumeitaveta bajarapamonae petsipaebiyaniiva itsamonaejavabelia Jesús Dioso pexënatocuene. <sup>17</sup> Bajarapacuenia Jesús pejamatejemayaexanaevi itsa jumeitaveta petsipaebiyaniiva itsamonaejavabelia, copiapata jane baja pacuenia bajayata Diosojumepaebinëmi profeta Isaíaspijinë tajëvelia jumaitsi. Dioso pejumaitsijava Jesús yabara profeta Isaíaspijinë bajayata tajëvelia jumaitsi mapacueniaje:

<sup>18</sup> Maponë taitapetsinë, taitorobicuenia exanabiaba. Bajaraponë tasivanë. Sivajamatabëcuenenabarëyanë. Espíritu Santo runaeyaexanaenicajë bajaraponë pematatsënëatsica. Bajaraponë apo judíovijavabelia tsipaebiana tananeconitsiaexanaejavanexa daxita pibisiacuene pexanaevi. <sup>19</sup> Bajaraponë itsajivijavabelia ata apo jumeanaenotsi tsane. Livaisi itsa tsipaebapona, pinijijumeta apo vavajai tsane. <sup>20</sup> Pamona xanë tajumelivaisi pejumecovënëtsijava abaxë apo ajamatabëcuenesaë ata, itsiata bajaraponë bajarapamonae apo xuabi tsane. Capanepaena. Pamatacabi tocopiapatsianatsi bajaraponë pijajivi pevetsimatacabinexa, xaniavaetsia bajaraponë evetsiana daxita pijajivi. <sup>21</sup> Nexata daxitajivi, apo judíovi ata, sivanajamatabëcuenecopatsianatsi bajaraponë pecapanepaenexa, jai bajayata tajëvelia profeta Isaíaspijinë Dioso pejumaitsijava Jesús yabara. Bajarapacuenia bajayata tajëvelia jumaitsi Isaíaspijinë peyaquinaebaxutota.

*Pacuenia itsamonae Jesús yabara jamatabëcuenenavëxaniabiaya jumaitsi: “Beelzebú raja pesaëta Jesús dovathi jivivecua capitsapapona,” jai yabara pelivaisi*

*(Mr 3.20-30; Lc 11.14-23; 12.10)*

<sup>22</sup> Jesús tocapatatsi bitso pitaxutotsëcënaenë, apo penatsipaebinë. Bajaraponë dovathi yajavaponapona. Bajaraponë Jesús jamatejemayaexana. Xaniavaetsia baja nexata tane. Natsipaebanua baja. <sup>23</sup> Jivi itsa tane Jesús pejamatejemayaexanaejava bajaraponë, jamatabëcuenenabenajaca. Nexata jivi najumaitsi Jesús yabara:

—¿Matsaeta ponë Davidpijinë pemomoje, Dioso pitorobinëtsicaje? najai bajarapamonae Jesús yabara.

<sup>24</sup> Nexata fariseovi itsa jumetane bajarapacuenia jivi pejumaitsijava, fariseovi jumaitsi jivijavabelia:

—Mara ponë Jesúsje, dovathi jivivecua capitsapabiaba Beelzebú pesaëta. Beelzebú raja daxita dovathivi pitorobinë, jai fariseovi jivijavabelia jamatabëcuenenavëxaniabiaya Jesús yabara.

<sup>25</sup> Jesús jamatabëcueneyapëtane pacuenia fariseovi sivanajamatabëxainatsi. Nexata Jesús jumaitsi fariseovijavabelia:

—Nacaenacuapijivi ata itsa navecuanatsanaejitsipa penasivanavajabitsaëtsinexa, namataenetsia naverebiabijitsipa nacaenacuapijivi ata. Bajara pijinia itsipae nacaetomarpijivi ata. Itsa navecuanatsanaejitsipa penasivanavajabitsaëtsinexa, nexata namataenetsia naverebiabijitsipa nacaetomarpijivi ata. Bajara pijinia itsipae nacaemonae ata. Itsa navecuanatsanaejitsipa penasivanavajabitsaëtsinexa, nexata namataenetsia naverebiabijitsipa nacaemonae ata. <sup>26</sup> Bajara pijinia itsipae dovathi ata. Dovathi jivivecua itsa capitsapaponaejitsipa pijajivi, dovathivi, nexata bepijavajabitsaënë taejitsipatsitsi pijajivi. Itsajamatabëcuene vecuaxinaejitsipa pijajivi. Pesaë ata apo xinaaponae tsipae. <sup>27</sup> Paxamë ata panijajivi dovathi jivivecua capitsapabiaba. Nexata xanë Beelzebú pesaëta dovathi jivivecua itsa capitsapabiabajë, ¿detsa nexata ponë pesaëta panijajivi

ata dovathi jivivecua capitsapabiaba? Caenë rabaja Dioso pesaëta. Nexata panijajivi ata pacayapëtane bajarapacuenia jamatabëcuenenavëxaniabiaya panejumaitsijava xanë yabara. <sup>28</sup> Espiritu Santo raja pesaëta xanë dovathi jivivecua capitsapabiabajë. Nexata baja picani jivi beyapëtane Dioso baja petaxuxuabijava pijajivi pevetsijava paxamë tuatuajëta, jai Jesús fariseovijavabelia.

<sup>29</sup> Fariseovi pecanaëjëtsinexa Jesús bitso piasaënëcuene dovathi matatoxenetsia, Jesús icatsia jumaitsi fariseovijavabelia mapacueniaje:

—Itsajivi ata apo caëjëpaetsi pejonenexa bitso piasaënë pijaboyalia peyacajërëtsinexa xua xaina pijabota. Itsiata itsa patsipa bajaraponë matatoxenetsia bitso piasaënë, nexata cobecëtabuatsipatsi. Taxucëtabuatsipatsi yajava. Matapania bajarapacuenia yacajërëtsipatsi daxita xua xaina pijabota.

<sup>30</sup> Pajivi apo neyavenonaeyacaetuatsi jivi Diosojavabelia, bajarapajivi betajavajabitsaëjivi. Tsiapaji apo taneyavenonaeyacaetuatsixae, jivi nevecuanacayajata Dioso picani pejumecovënëtsiviminexa.

<sup>31</sup> Bajaraxuata pacatsipaebijitsiatsi, Dioso caëjëpatsi daxitajivi pibisiacuene pexanaeconimi pevecuaajibiaexanaenexa. Pibisiacuenia jivi Dioso baracuaicuajai ata, bajarapaneconi ata Dioso caëjëpatsi pevecuaajibiaexanaenexa. Itsiata baitsi jane pajivi pibisiacuenia baracuaicuajai Espiritu Santo, pacuenia paxamë pajumaitsimë, Dioso apo vecuaajibiaexanae tsane bajarapaneconi. <sup>32</sup> Pajivi pibisiacuenia nebaracuaicuajai ata, xanë, Daxitajivi Pematapijinënë, bajarapaneconi ata itsiata Dioso vecuaajibiaexanaenatsi itsa vajëta Diosojavabelia. Itsiata baitsi jane pajivi pibisiacuenia baracuaicuajai Espiritu Santo, bajarapaneconi Dioso apo vecuaajibiaexanae tsanetsi. Daxitamatacabijavabelianexa apo vecuaajibiaexanae tsanetsi bajarapaneconi, jai Jesús fariseovijavabelia.

*Pacuenia peubinaenë itsa nacuaita, nayapëtane pavirianaecuene yabara pelivaisi*  
(Lc 6.43-45)

<sup>33</sup> Icatsia Jesús jumaitsi fariseovijavabelia:

—Pexaniavirianaenë itsa ubatsi, nacuaita pijinia pexaniacuai. Ponae pijinia pibisiana, nacuaita pibisiacuai. Caeviriana canacujitsia yapëtanetsi itsa nacuaita.

<sup>34</sup> Bajara pijinia pacuenia paxamë ata dovathi papijajivimë, panayapëtaneme panejamatabëcuenebejjava. Nexata apo pacacaëjëpae panecuaicuajainexa pexaniacuene yabara. Pajamatabëcuene bëpënë panejamatabëëthëtota panajamatabëxainame, panecuivojotuatina pitsapa panecuaicuajainexa. <sup>35</sup> Itsamonae pijinia majamatabëcueneitsije. Pacuenia vajaubinae, pexaniana, pexaniacuai pijinia nacuaita, bajara pijinia jamatabëcueneitsi itsamonae. Ponë pexaniajamatabëcuenenë, pexaniacuene yabara cuacuajai. Tsiapaji pexaniajamatabëcuene xaina pejamatabëëthëtota. Ponë pijinia pibisiajamatabëcuenenë pibisiacuene yabara cuacuajai. Tsiapaji pibisiajamatabëcuene najamatabëxaina pejamatabëëthëtota. <sup>36</sup> Xaniajanë pacuenia pacatsipaebijitsiatsi. Pamatacabi Dioso naneconitsiaexanaena daxita pijaneconi pexanaevi, caejivi canacujitsia, naneconitsiaexanaponaena caejumeyo canacujitsia pibisiacuenia pecuaicuajaijava yabara. <sup>37</sup> Pibisiacuenia panecuaicuajaijava yabara Dioso pacananeconitsiaexanaena. Pexanialivaisi itsa pacuaicuajamë tsabiabi tsane, nexata paneconijibimë tsane Diosojavabelia, jai Jesús fariseovijavabelia.

*Pacuenia pibisiajamatabëcuenevi Jesús picani itorobatsi Dioso pesaëta pinijicuene pexanaejava petsitaexanaenexa yabara pelivaisi*

(Mr 8.12; Lc 11.29-32)

<sup>38</sup> Fariseovi, judíovi pecujarubivi ata, jumaitsi Jesúsjavabelia:

—Jesús, pajitsipajë patataenexa Dioso pesaëta pinijicuene nexanaejava, patacayapëtaenexa pepacuene Dioso athëbëvetsica pecaitorobinëcuenetsica, jai bajarapamona.

<sup>39</sup> Jesús nexata jumaitsi bajarapamonaevjavabelia:

—Bitso pibisiacuene paneexanaevi, Dioso panejumecovënëtsijavami panecopabivi. Paneitorobame picani Dioso pesaëta pinijicuene taexanaejava patacatsitaexanaenexa

pataneyapëtaenexamë Dioso pepacuene athëbëvetsica taneitorobinëcuenetsica. Itsiata baitsi jane Dioso pesaëta pinijicuene taexanaejava apo pacatsitaexanae tsanetsi. Bajayata pacuena Diosojumepaebinëmi profeta Jonáspijinë exanatsi, bajara ëpitsicuene taneexanaejava pacatsitajëtsianatsi. <sup>40</sup> Bajayata Jonáspijinë boca ayainë dujuainë pënëta acueyabi pamatacabibeje, acueyabi pameravibeje yajava. Bajara pijinia pacuena xanë ata, Daxitajivi Pematapijinënë, bocaenajë mëthëta acueyabi pamatacabibeje, acueyabi pameravibeje yajava. <sup>41</sup> Bajayata Nínive tomarapijivimi itsa jumetane Dioso pitorobilivaisi, Jonáspijinë petsipaebilivaisi, copaba pibisiacuene pexanaejava. Najamatabëcuenepënëyorota Diosojavabelia. Copiapatsiana rabaja Dioso papecananeconitsia exanaematacabinexa daxita panijaneconi panexainaevi. Panijaneconi panexainaevi pacanubiana Dioso pitabarata. Nexata bajarapamatacabi Nínive tomarapijivimi nonobapunaena Diosojavabelia papecaneconitsinexa Dioso apo panejumecovënëtsivi. Xanë majotaje ponaponajë, bitso ayaijamatabëcuenenënë Jonáspijinëmi matatoxenetsia. Nexata pacatsipaebi atatsi Dioso pejumelivaisi, itsiata apo panejumecovënëtsimë. Apo panajamatabëcuene pënëyorotsimënua pibisiacuene paneexanaejavavecua. Bajaraxuata ayaineconi paxainame Diosojavabelia. <sup>42</sup> Pamatacabi Dioso naneconitsiaexanaena pijaneconi pexainaevi, bajayata peponaponaevami, Saba nacuapijivi pevetsivami, nonotapunaena Diosojavabelia papecaconitsinexa Dioso apo panejumecovënëtsivi. Bajarapova pacaneconitsiana. Tsipaji bajayata bajarapovami tajë nacuataverena ata muxunarena pejumetaenexa Salomónpijinë, bitso daxitalivaisi peyapëtaenëmi, petsipaebilivaisi. Xanë majotaje ponaponajë, bitso ayaijamatabëcuenenënë Salomónpijinëmi matatoxenetsia. Nexata pacatsipaebi atatsi Dioso pejumelivaisi, itsiata apo panejumecovënëtsimë. Apo panenamuxunaevetsimënua. Bajaraxuata Dioso pacananeconitsiaexanaena, jai Jesús tajëvelia fariseovijavabelia, judíovi pecujarubivijavabelia ata.

*Pacuenia dovathi jivitonë pevejamatabëpitsapaecujinaetsi, icatsia naviarena pecovëyaberena petsijamatabëecaenexatsi icatsia yabara pelivaisi*

*(Lc 11.24-26)*

<sup>43</sup> Jesús jumaitsi fariseovijavabelia, judíovi pecujarubivijavabelia ata:

—Dovathi itsa vejamatabëpitsapa jivitonë, nexata dovathi jinaruta petseviiranëjava. Jaitapona itsanëjavabelia petsijamatabëjonenexa penacueraevetsinexa bajaraponëjavata. Itsa apo caxitajarabi ponëjavabelia tsijamatabëjonejitsia, nexata dovathi jamatabëjumaitsi: <sup>44</sup> “Naviatsianajë meta icatsia tajabomijavabelia, paboverena pitsapajë,” jamatabëjai dovathi, ponëjavaverena pitsapa icatsia petsijamatabëjonenexatsi. Dovathi baja caevëa itsa naviarena, caxitajaraba peyjavaponaponaenëmitsi. Nexata peyjavaponaponaenëmitsi pejamatabëëthëto, dovathi tane bepënësajinecaebo, bepënëxaniavaetetsibo, bepiracajuetetsibo. <sup>45</sup> Nexata dovathi icatsia sivapona peyjavapatsinexarena itsadovathivi, siete ponëbeje. Bajarapadovathivi bitso piacujirubejevi copiaya padovathi matatoxenetsia. Daxita bajarapadovathivi pebi tsijamatabëjunuatsi peyjavaponaponaenexa. Belia jane baja pebi dovathivi bitso bejiobiaexanatsi. Copiaya abaxë caenë itsa tsijamatabëecatsi pacuena bejiobiaexanabiabatsi, matatoxenetsia bejiobiaexanatsi. Bajara pijinia pacuena tocopiapatsianatsi pamonaë aconoxae jinanapana, piacujirubejevi, jai Jesús fariseovijavabelia, judíovi pecujarubivijavabelia ata.

*Pacuenia Jesús pejuyapijivi, pena yajava, nubena bojumavelia yabara pelivaisi*

*(Mr 3.31-35; Lc 8.19-21)*

<sup>46</sup> Jesús abaxë jivi livaisi itsa tsipaeba bo ënëtuatujëalia, pata Jesús pejuyapijivi, pena yajava. Nexata bojumavelia nubena bajarapamonae. Jamatabëbarëcuaicuajitsi picani Jesús. <sup>47</sup> Nexata itsajivi Jesús tsipaebatsi.

—Patajatuxanenë, ena raja, nejuyapijivi yajava, nuca bojumaverena. Bajarapamonae pina jitsipa pecabarëcuaicuajijajava, jaitsi Jesús.

<sup>48</sup> Nexata Jesús jumaitsi petsipaebijivitsijavabelia:

—¿Detsa pitsijamatabëcuenevi taena, tajuyapijivinu? jai Jesús.

<sup>49</sup> Nexata Jesús pecobeta itaropita pijajivi. Jumaitsi petsipaebijivitsijavabelia:

—Mara jane pamona taenajivije, tajuyapijivinu. <sup>50</sup> Tsipaji raja pajivi exana taxa, athëbëtatsia peecaenë, pitorobicueniatsi, bajarapajivi cajena tajuyapijinë, tajuyapijiva, taenanua, jai Jesús petsipaebijivitsijavabelia.

## 13

*Pacuenia Jesús jivi livaisi tsipaeba pabi peubinë pelivaisicuenia yabara pelivaisi*

*(Mr 4.1-9; Lc 8.4-8)*

<sup>1</sup> Jesús baja ita najumevereta jivijavabelia livaisi petsipaebijava, pitsapa baja bajarapabovetua. Pona baja itsajavabelia. Nexata Jesús ecojopa pucaxaneto itapata.

<sup>2</sup> Nexata pucaitapata jivi ayaibitsaëtoxaneto Jesús itaxutuanacaetuatatsi. Nexata Jesús runareca jera ënëabereca. Ecareca jera ënëtareca. Daxita jivibitsaëtoxaneto nubena tajetabovelia. <sup>3</sup> Nexata Jesús daxitacuene livaisianë tsipaeba jivijavabelia. Jesús jumai tsaponae bajarapamonaejavabelia mapacueniaje:

—Peubinë pona pabiabelia peubinexa. <sup>4</sup> Nexata ita pata pabita, peubixu pexucayajabajarabicuenia ubanajetaruca. Pexucayajabajarabijavata itsaxu othopa pabi tuatuajëjava penajetarucaenamutojumata. Nexata bajarajota pata baratsui. Xane bajarapaxumi juvinejeva. <sup>5</sup> Itsaxu pijinia othopa ibopananëjumata, itsajota bitso ira apo aitayaë. Nexata bajarapaxu bepimia juva. Tsipaji bitso ira apo aitayaë. <sup>6</sup> Nexata icotia bitso ita ataju, nexata bajarapaxu juvi ata, tsaquenapona. Tsipaji irabereca bitso apo atabunepepiareca. <sup>7</sup> Itsaxu pijinia othopa xanëebacabomijavata. Nexata peubixu xanëebotonë caecuenia ita yajavajuva, bitso xanëebotonë matakënëntsia peubijavami. <sup>8</sup> Itsaxu pijinia othopa pexaniairata. Bajarapaxu ita juva, vitsaba. Xaniavaetsia nacuita. Itsabotonë capitsapa cien paxutoyobeje tsaponae. Itsabotonë capitsapa sesenta paxutoyobeje tsaponae. Itsabotonë capitsapa treinta paxutoyobeje tsaponae. <sup>9</sup> Pajivi jamatabënejumeyapëtane patacatsipaebilivaisi, nenamuxunaevetsi xaniavaetsia, jai Jesús bajarapalivaisi petsipaebivijavabelia.

*Pacuenia yabara Jesús jivijavabelia livaisi tsipaeba ëcomparacióncuenia yabara pelivaisi*

*(Mr 4.10-12; Lc 8.9-10)*

<sup>10</sup> Jesús pijajivi imoxoyotatsi. Nexata Jesús pijajivi jumaitsi Jesúsjavabelia:

—Patajatuxanenë, jivijavabelia livaisi ita tsipaebame, ¿detsa xuajitsia tsipaebame ëcomparacióncuenia? jai Jesús pijajivi.

<sup>11</sup> Nexata Jesús jumaitsi pijajivijavabelia:

—Paxamë rabaja xaniavaetsia Dioso pacayapëtaeyaexana Dioso papijajivimë papecaevetsijava. Itsiata itsamonae apo yapëtae bajarapacuenia. <sup>12</sup> Pajivi xaniavaetsia nejumeyapëtane tatsipaebilivaisi, bajarapajivi icatsia itsalivaisi pematatsënëa Dioso yapëtaeyaexanaenatsi. Itsiata pajivi apo jitsipae pematatsënëa pejumeyapëtaeponaenexa tatsipaebilivaisi, bajarapajivi xuayovajëto jumeyapëtane picani, nacofënëtsiana.

<sup>13</sup> Bajaraxuata livaisi ita tsipaebajë bajarapamonae, ëcomparacióncuenia tsipaebajë. Nexata bajarapamonae tae ata Dioso pesaëta pinijicuene taexanaejava, itsiata apo yapëtae pajamatabëcuene yabara exanajë pinijicuene taexanaejava. Namuxunaevetsi ata tatsipaebilivaisi, itsiata apo jumeyapëtae pajamatabëcuene xaina tatsipaebilivaisi.

<sup>14</sup> Bajarapacuenia apo jumeyapëtae tsipaji jane baja tocopiapatatsi pacuenia bajayata tajëvelia Diosojumepaebinëmi profeta Isaíaspijinë yaquina. Dioso pejumaitsijava apo tanejumeyapëtaevinexa yabara, bajayata profeta Isaíaspijinë peyaquinaelivaisita jumaitsi mapacueniaje:

Bajarapamonae picani jumetaena. Itsiata apo jumeyapëtae tsane xua yabara tsi-paebianatsi. Bajarapamonae taena picani. Itsiata apo yapëtae tsane pajamatabëcuene xaina petaejava. <sup>15</sup> Bajarapamonae ajamatabëcuenetaja tsane. Bajaraxuata benamuxuacabiaya pejinavanapaevi tsane. Benaitaxutotsaquebiaya pejinavanapaevi tsane. Itsa bajarapacuenia apo itsipae, nexata yapëtaejitsipa pajamatabëcuene xaina xua taena. Jumeyapëtaejitsipanua palivaisi

jumetaena. Pejamatabëëthëtojavavetsina jumeyapëtaejitsipa. Nexata xanëjavaberena najamatabëcuenepënëyorotsipa perujumatabëcuenevecua. Nexata xanë jamatabëcuene xanepanaeyaexanaejitsipajë, jai bajayata tajëvelia Isafaspijinë peyaquinaelivaisita xua yabara tsipaebajë bajarapamonae apo tanejumeyapëtaejavanexa yabara.

<sup>16</sup> Itsiata baitsi jane paxamë baja pajamatabëcuenebarëyamë. Tsipaji payapëtaneme pajamatabëcuene xaina xua pataneme. Pajumeyapëtanemenua pajamatabëcuene xaina palivaisi pajumetaneme. <sup>17</sup> Xaniajanë pacuenia pacatsipaebijitsiatsi. Bajayatami ayaibitsaëto profetavimi necopiaevetavanapa tanetaenexa picani tapatsijavatsica. Itsamonae ata aneconijibia pejinavanapaevi Dioso pitabarata, necopiaevetavanapa picani tane-taenexa tapatsijavatsica. Itsiata apo netaenejeva, daxita bajarapamonaemi tëpa baja. Jamatabëjumetaeyabiabanua picani palivaisianë baja aeconoxae paxamë pacatsipae-baponatsi. Itsiata apo jumetaenejeva bajarapalivaisianë, bajarapamonaemi tëpa baja, jai Jesús pijajivijavabelia.

*Pacuenia Jesús yapëtaeyaexana pijajivi pajamatabëcuene xaina palivaisi tsipaeba peubinë pelivaisicuenia yabara pelivaisi*

*(Mr 4.13-20; Lc 8.11-15)*

<sup>18</sup> Icatsia Jesús jumaitsi pijajivijavabelia:

—Xaniavaetsia panenamuxunaevere panejumeyapëtaenexa pajamatabëcuene xaina palivaisi pacatsipaebatsi pabita peubinë pelivaisicuenia. <sup>19</sup> Pamonaë jumetae ata Dioso pejumelivaisi, itsiata itsa apo jumeyapëtae pejamatabëëthëtota, bajarapamonae bepiothopaexu pabi tuatuajëjava penajetarucaenamutojumata. Nexata najetaruca dovathi. Nexata bajarapamonae tsijamatabëjuvinejevatsi, dovathi vecuapitatsi bajarapalivaisimi, petsijamatabëubilivaisimitsi. <sup>20</sup> Pacuenia pijinia itsi paxu othopa ibopananëjumata, itsajota bitso ira apo aitayaë, bajara tsijamatabëcueneitsitsi itsamonae Dioso pitorobilivaisi. Bajarapamonae jumetane Dioso pitorobilivaisi. Nexata picani bajarapalivaisi barëyaya jumecovënëta. <sup>21</sup> Itsiata baitsi jane pacuenia irabereca apo atabunepipi-areca paxu othopa ibopananëjumata, nexata nabijiana, bajara tsijamatabëcueneitsitsi bajarapamonae Dioso pitorobilivaisi. Tsipaji pepacuene pejamatabëëthëtovetsina apo jumecovënëtsi bajarapalivaisi. Nexata apo ajamatabëcuenesaë tsavanapae bajayajebi pejumecovënëtsinexa bajarapalivaisi. Nexata itsa tocopiapatatsi daxita petoayapëbe-jecuenetsi, itsa yalivaisibatsinua Dioso pitorobilivaisi yabara, nexata pejumecovënëtsijava bajarapalivaisi bepijia copaba. Pevajënaeyabelia apo jumecovënëtavanapae. <sup>22</sup> Pacuenia pijinia paxu othopa xanëebacabomijavata, itsa juva, bitso matacënënatsi xanëebotonë, bajara tsijamatabëcueneitsitsi itsamonae Dioso pitorobilivaisi. Jumetane picani bajarapamonae Dioso pitorobilivaisi. Itsiata baitsi jane bitso jamatabëcueneenatsi mapanacuapijicuenia yabaraje. Tsipaji najamatabëxaina ayaijava palata pexainaenexa. Nexata pijacuata najamatabëcueneyamaxëitojoroba. Bajaraxuata Dioso pitorobilivaisi apo tovitsabitsi pejamatabëëthëtota. Nexata pacuenia itsi pabita piacuaijibibotonë, bajara itsi bajarapamonae. Tsipaji Dioso xaniavaetsia apo tojinavanapae. <sup>23</sup> Pacuenia pijinia itsi paxu othopa pexaniairata, bajara tsijamatabëcueneitsitsi itsamonae Dioso pitorobilivaisi. Bajarapamonae jumetane Dioso pitorobilivaisi. Jumeyapëtanenua. Nexata pevajënaeyabelia tsijamatabëcuenevitsabaponatsi Dioso pitorobilivaisi. Nexata pacuenia peubijava capitsapa itsabotonë cien paxutoyobeje tsaponae, itsabotonë sesenta paxutoyobeje tsaponae, itsabotonë treinta paxutoyobeje tsaponae, bajara tsijamatabëcueneitsitsi bajarapamonae Dioso pitorobilivaisi, jai Jesús pijajivijavabelia.

*Pacuenia peubijava tuatuajëa piabejjava juva yabara pelivaisi*

<sup>24</sup> Dioso apo pejumecovënëtsivi, pamonaë najinavanapa Dioso pejumecovënëtsivijavata, itsamatacabi Dioso naneconitsiaexanaena. Nexata jivi peyapëtaenexa bajarapamonae Dioso penaneconitsiaexanaejavanexa, Jesús comparacióncuenia livaisi tsipaeba jivi ayaibitsaëtoxanetojavabelia. Jesús jumaitsi mapacueniaje:

—Mara pacuene jëpaje Dioso pijajivi pevetsijavaje. Pabi pexainaenë, ëpexaniaviri-atrigoxu uba pijapabita. <sup>25</sup> Itsiata baitsi jane daxitajivi pemajitsijavata meravi, pabi pexainaenë pijavajabitsaenë tojunuatsi pijapabita. Nexata toubatsi trigo tuatujëjava pibisiaviriajava, betrigobotonë pecataejava. Bajaraxuacujinae vemaxëpona baja. <sup>26</sup> Nexata trigoxu juva. Vitsaba. Itsa baja trigobotonë namatonota, nexata matapania bajarajota nayapëtane pibisiaviriajava yajava penamatonotsijava. <sup>27</sup> Nexata pabi pexainaenë pijajivi pata petsipaebinxatsi. Pabixainaenë pijajivi jumaitsi: “Nijapabita ubame ëpexaniaviriatrigoxu. ¿De tsaeta pacuenia pitsapa pibisiaviriaxu pibisiajava peyavajuvinexa trigoxava?” jai pabixainaenë pijajivi. <sup>28</sup> Nexata pabixainaenë jumaitsi pijajivijavabelia: “Tajavajabitsaenë raeta bajaraxua uba,” jai. Nexata pabixainaenë pijajivi jumaitsi: “¿Jitsipame tsaja bajaraxua pataxunaejava?” jai. <sup>29</sup> Itsiata baitsi jane pabixainaenë jumaitsi pijajivijavabelia: “Jume. Tsipaji panexunaejavata payavaxunaejitsipame trigobotonë. <sup>30</sup> Copatsianatsi abaxë penacuaitsinexa. Nexata penotsimatacabi itorobianajë tanetonotsivi copiaya pecaetuatsinexa piabejjava. Pepacunanë exanaena. Bajaraxuacujinae bajaraxua tajuitsiana. Bajaraxuacujinae ëtrigoxu netonotsiana taetabiabibota tanetoetsinexa,” jai pabixainaenë pijajivijavabelia, jai Jesús jivi ayaibitsaëttoxanetojavabelia.

*Pacuenia mostazaxutoyo pejuvicujinae, mostazanae bepíjia vitsaba yabara pelivaisi*  
(Mr 4.30-32; Lc 13.18-19)

<sup>31</sup> Jesús livaisi tsipaeba comparacióncuenia jivi ayaibitsaëttoxanetojavabelia. Jumaitsi mapacueniaje:

—Dioso raja pijajivi pevetsijava maitsije. Pacuenia mostazaxutoyo pejuvicujinae, bepíjia vitsaba mostazanae, bajara pijinia itsane Dioso pijajivi ata. Bepíjia Dioso pijajivi ayaibitsaëttoxaneto naexanaena. Pabi pexainaenë mostazaxu uba pijapabita. <sup>32</sup> Mostazaxu raja bitso tsiquirixutoxi daxita peubixuvecua. Itsiata baitsi jane mostazanae itsa juva, bepíjia vitsaba. Caevaita pinijinae naexana itsapeubinaenë matatoxenetsia. Nexata baratsui ata pata bajaraponaeta. Pematapenanë exana bajaraponaemaxërananëjava. Bajara pijinia itsane jivi ata. Bepíjia ayaibitsaëto Dioso pijajivi naexanaena, jai Jesús jivi ayaibitsaëttoxanetojavabelia.

*Pacuenia pan pexanaematabënexa, levaduravënëjava fufunaeyaexana yabara pelivaisi*  
(Lc 13.20-21)

<sup>33</sup> Jesús livaisi tsipaeba comparacióncuenia jivi ayaibitsaëttoxanetojavabelia. Jumaitsi mapacueniaje:

—Dioso raja pijajivi pevetsijava maitsije. Pacuenia pan pexanaematabënexa, levaduravënëjava yacaëjëpa daxita panmatabëjava, bajara pijinia itsi Dioso pijajivi pevetsijava. Yacaëjëpaena daxitanacuanëjava. Petiriva pan pexanaenexa, acueyabi patarroxanetobeje trigobenonë matajërëaba levaduravënëjavata. Nexata pan pexanaematabënexa, ayaimatabë ata, levaduravënëjava pijinia tsiquirijavayo ata, itsiata levaduravënëjava yacaëjëpa daxitamatabëjava. Nexata levaduravënëjava fufunaeyaexana daxita panmatabënexa. Bajara pijinia itsi Dioso pijajivi pevetsijava. Yacaëjëpa daxitanacuanëjava Dioso pijajivi pevetsicuenia, jai Jesús jivi ayaibitsaëttoxanetojavabelia.

*Pacuenia Jesús jivi livaisi tsipaebabiaba comparacióncuenia yabara pelivaisi*  
(Mr 4.33-34)

<sup>34</sup> Jesús itsa tsipaeba jivijavabelia Dioso pijajivi pevetsijavanexa, livaisianë tsipaebapona ëcomparacióncuenia. <sup>35</sup> Bajarapacuenia Jesús jivi livaisianë itsa tsipaebapona ëcomparacióncuenia, tocopiapatatsi jane baja pacuenia Diosojumepaebinë profetanë bajayata tajëvelia yaquina Jesús petsipaebaponaejavanexa yabara. Jesús comparacióncuenia jivi livaisi petsipaebaponaejavanexa yabara, profetanë peyaquinaebaxutota jumaitsi mapacueniaje:

Jivi itsa tsipaebajë, livaisi tsipaebianajë comparacióncuenia. Tsipaebianajë pitsicuenia Dioso nacua pexanaejavaveliacujinae itsajivi ata abaxë apo yapëtae,

jai tajëvelia bajayata profetanë peyaquinaebaxutota Jesús jivi livaisi comparacióncuenia petsipaebaponaejavanexa yabara.

*Pacuenia Jesús pijajivi yapëtaeyaexana pajamatabëcuene xaina palivaisi tsipaeba trigobotonë tuatujëa pejuvijava pelivaisicuenia yabara pelivaisi*

<sup>36</sup> Jesús naviabiaexana jivi ayaibitsaëtoxaneto. Bajaraxuacujinae Jesús boya joneya. Bajarapabota Jesús pijajivi imoxorenatsi. Nexata Jesús pijajivi jumaitsi:

—Patajatuxanenë, panetsipaebare pajamatabëcuene xaina palivaisi tsipaebame jivi ayaibitsaëtoxanetojavabelia. Baitsi palivaisi tsipaebame trigobotonë tuatujëa pejuvijava pelivaisicuenia, jai Jesús pijajivi.

<sup>37</sup> Nexata Jesús jumaitsi pijajivijavabelia:

—“Ponë uba pexaniaviriatrigoxu,” itsa janë, xanë rabaja, Daxitajivi Pematapijinënë, yabara nayabarajumaitsinë. <sup>38</sup> “Pijapabi,” itsa janë, mapanacua yabaraje jumaitsinë. “Pexaniaviriatrigoxu,” itsa janë, Dioso pijanacuayabetsia pejonevinexa yabara jumaitsinë. “Pibisiaviriajava pejuvijava,” itsa janë, dovathi pijajivinexa yabara jumaitsinë. <sup>39</sup> “Pijavajabitsaënë, ponë pabi pexainaenë toubatsi pibisiaviriajava pejuvinexa,” itsa janë, dovathi yabara jumaitsinë. “Penotsimatacabi,” itsa janë, mapanacua peverevereaejavaneja yabara jumaitsinë. “Tanetonotsivi itorobianajë,” itsa janë, ángelevi yabara jumaitsinë. <sup>40</sup> Nexata pacuenia piabejejava caetuata pexuabinexa isotojavabelia, bajara pijinia pacuenia tocopiapatsianatsi dovathi pijajivi pexuabinexatsi isotojavabelia mapanacuaje peverevereaeatacabi. <sup>41</sup> Bajarapamatacabi xanë, Daxitajivi Pematapijinënë, itorobianajë tajaángelevi taevetsinacua tanetovecuajutsinexa daxita pamona pibisiacuene pexanabiabivi. Pamona ata itsamonaejavabelia pibisiacuene exanaeyaexana, bajarapamona ata taevetsinacua netovecuajutsiana tajaángelevi. <sup>42</sup> Bajarapamona xuabianatsi infiernojavabelia. Bajarajota nuena. Navonosiniana bitso penavixaetaexae. <sup>43</sup> Pamona jumecovënëtsiajinavanapa Dioso pitorobicueniatsi, bajarapamona perabënitayotsiana taxa Dioso pijanacuatatsia. Pacuenia matcabipijijuameto naitayota, bajarapacuenia perabënitayotsiana. Pajivi jamatabënejumeyapëtane, patacatsipaebilivaisi nenamuxunaevetsi xaniavaetsia, jai Jesús pijajivijavabelia.

*Pacuenia pebi caxitajaraba bitso penamatamotsijavanë, itsanë irata pemëthëtetsijavami, yabara pelivaisi*

<sup>44</sup> Icatsia Jesús comparacióncuenia jumaitsi pijajivijavabelia:

—Pebi irata mëthëteta bitso penamatamotsijavanë. Bajaraxuanë bitso xanepana. Nexata juya itsanë bexëjavabelia bajaraxuanë caxitajarabeta irata. Nexata abaxë bajaraponë apo jutsi bajaraxua. Abaxë saya mataacateta bajarajota. Nexata jamatabëcuenebarëyaya pona pijaboyabelia. Nexata xuacujinae bajaraponë canajeta daxita pexinaejavaximi. Nexata bajaraponë yacomuata bajarapaira. Tsipaji xua bajaraponë caxitajarabeta irata, bitso xanepana. Bitso namatamota. Nexata pacuenia bitso xanepana, bitso namatamotanea, xuanë bajaraponë bajarapaira yacomuata, bajara pijinia itsi Dioso pijajivi pevetsijava. Bitso xanepana. Bitso namatamotanea, jai Jesús pijajivijavabelia.

*Perlavënëjava bitso penamatamotsijava yabara pelivaisi*

<sup>45</sup> Icatsia Jesús jumaitsi pijajivijavabelia:

—Pacuenia itsi bitso pexaniaviriajava perlavënëjava, bajara pijinia itsi Dioso pijajivi pevetsijava, bitso pexaniacuene. Perlavënëjavanë pecanajetarutsinë jaitapona pexaniaviriajavanë juya pecanajetaponaenexa. <sup>46</sup> Nexata itsa caxitajarabaxuaba pexaniaviriaperlajava, bitso penamatamotsijava, pona pijaboyabelia pecanajetsinexa daxita pexinaejavami. Nexata comuata bajarapaperlajava, jai Jesús pijajivijavabelia.

*Dujuai peyamatajucaejava yabara pelivaisi*

<sup>47</sup> Icatsia Jesús comparacióncuenia jumaitsi pijajivijavabelia:

—Dujuai peyamatajucaejavata, pibisiaviriadujuai itsa yamatajuta, havecuatsatapona. Bajara pijinia itsi Dioso pijajivi pevetsijava.

Dioso pijajivi vecuatsatapona apo pejumecovënëtsivitsi pexuabinexa infiernojavabelia. Dujuai peyamatajucaejava manuameneta copareca. Nexata daxitaviriadujuai yamatajuta. <sup>48</sup>Itsa vënëca bajaraxua, nexata juta tajetabojavabelia. Bajarajota itapetapona pexaniaviriadujuai. Pexaniaviriadujuai jebapona bemapirejavabelia. Pibisiaviriadujuai pijinia xuabapona. <sup>49</sup>Bajara pijinia itsane nacua pevereverecaematacabi. Angelevi ponaena. Nexata pibisiacuene pexanaevi saicaya tsatsianatsi pexuabinexatsi. Dioso pijinia pitorobicueniatsi pejinavanapaevi saicaya tsatsianatsi pecapanepaenexatsi. <sup>50</sup>Nexata pibisiacuene pexanaevi xuabianatsi infiernojavabelia. Bajarajota nuena. Navonosiniana bitso penavixaetaexae, jai Jesús pijajivijavabelia.

*Bitso penamatamotsijavanë, pejanajavanë, perujujavanë ata, yabara pelivaisi*

<sup>51</sup>Jesús yanijoba pijajivijavabelia.

—¿Panejumeyapëtaneme tsabaja daxita xua yabara pacatsipaebatsi? jai Jesús.

Nexata Jesús pijajivi jumaitsi:

—Jājā, pacajumeyapëtanetsi rabaja, jai.

<sup>52</sup>Nexata Jesús jumaitsi pijajivijavabelia:

—Ponë judíovi pecujarubinë ata, itsa nejumecovënëta, bajaraponë ata tajajivitonë tsane. Nexata pacuenia bo pexainaenë pijabovecua jutapona bitso penamatamotsijavanë, pejanajavanë, perujujavanë ata, bajara pijinia jamatabëcueneitsi tsane ponë nejumecovënëtsiana, judíovi pecujarubinë ata. Tsipaji bajaraponë yapëtaena pexanialivaisianë jivijavabelia petsipaebinexa. Bajaraponë yapëtaena xanë talivaisianë, pejanalivaisianë, perujulivaisianë ata, jai Jesús pijajivijavabelia.

*Pacuenia Jesús naviata pijanacuayabelia, Nazaret tomarabelia, yabara pelivaisi*  
(Mr 6.1-6; Lc 4.16-30)

<sup>53</sup>Jesús baja penajumeveretsicujinae jivijavabelia livaisianë petsipaebijava comparacióncuenia, pona baja icatsia itsajavabelia. <sup>54</sup>Jesús baja naviata pevitsabinacuayabelia. Nexata Jesús pevitsabinacuata taxuxuaba livaisi petsipaebijava judíovi penacatuatabibibota. Nexata pejumetaevitsi sivajamatabëcuenenabenajacatsi. Nexata bajarapamonae Jesús jamatabëcueneabiatsi. Bajarapamonae Jesús yabara najumaitsi mapacueniaje:

—¿De tsaeta jota maponë nacujaruba peyapëtaenexa mapalivaisije? ¿De tsaeta pacuenia caëjëpatsi mapacuenia Dioso pesaëta pinijicuene pexanaenexaje? <sup>55</sup>Maponëje vaxaitsiyajuvënë, carpinteronëmi pexënato. Maponëje María pexënato. Bajaraponë pejuyapijivi, Santiago, José, Simón, Judas. <sup>56</sup>Papetiriavi ata vajatomarata jinavanapa, maponëje pejuyapijivi. ¿Detsa verena nexata capitsapa palivaisianë nacatsipaebapona maponëje? najai bajarapamonae Jesús yabara.

<sup>57</sup>Nacaetomarapijivixae, bajarapamonae Jesús apo jumexaniataetsi. Nexata Jesús jumaitsi bajarapamonaejavabelia:

—Bajara maitsabiabije. Diosojumepaebivi profetavi itsanacuapijivi yaiyataeyabiabatsi. Itsiata pijanacuapijivi, pijamonae ata, apo yaiyataeyabiabitsi, jai Jesús pijatomarapijivijavabelia.

<sup>58</sup>Jesús pevitsabitomarata pejinavanapaevi apo jumecovënëtsitsi. Bajaraxuata Jesús Dioso pesaëta pinijicuene pexanaejava bajarapatomarata bitso apo tsitaexanae.

## 14

*Pacuenia Juanpijinë jivibautisabinëmi beyaxuabatsi yabara pelivaisi*  
(Mr 6.14-29; Lc 9.7-9)

<sup>1</sup>Herodes, Galileanacua pevetsinë. Nexata Herodes Jesús vënëlivaisitanetsi Dioso pesaëta pinijicuene pexanaponaejava. <sup>2</sup>Nexata Herodes pijajivijavabelia jamatabëcuenavëxaniabiaya jumaitsi Jesús yabara:

—Juanpijinēmi raeta jivibautisabinēmi icatsia asaē petēpaecujinae. Bajaraxuata caējēpatsi Dioso pesaēta pinijicuene pexanaenexa, jai Herodes Jesús yabara.

<sup>3</sup> Bajarapacuenia Herodes jumaitsi tsipaji abaxē Juanpijinē ita asaē, Herodes pijajivi, vajabitsaēvi, itoroba Juanpijinē pevaetabinexatsi. Nexata vajabitsaēvi Juanpijinē cobecētsiaya caponatsi penaneconitsivi pejebabiabiboyabelia. Bajarapacuenia Herodes pijajivi itoroba Herodes pijava, Herodíasva, pejamatabēcueneta. Herodíasva picani copiata pita Felipe, Herodes pejuyapijinē. Nexata Herodes pejuyapijinē pijava yacajērēta. <sup>4</sup> Nexata Herodes pejuyapijinē pijava peyacajērētsixae, Juanpijinē abaxē ita apo vaetabitsi, Herodes muxujioba. Juanpijinē jumaitsi Herodesjavabelia:

—Acuenebi raja nejuyapijinē pijava nepitsijava, jai Juanpijinē Herodesjavabelia.

<sup>5</sup> Bajarapacuenia Juanpijinē Herodes pemuxujiobixae, Herodes picani jamatabēbeyaxuabatsi Juanpijinē. Itsiata baitsi jane abaxē apo beyaxuabitsi. Tsipaji Herodes cujunava jivi. Daxitajivi Juanpijinē yapētanetsi Diosojumepaebinēcueneta.

<sup>6</sup> Nexata Herodes ita najamatabēnapita penaexanaematacabi, fiesta exana. Herodes junata jivi ayaibitsaēto. Nexata bajarapafiestamatacabi pejonēyo, pijava pexēnatoyo, pijacujirucuenia caevayo yavajiba daxita Herodes pejunatsivi pitabarata. Nexata Herodes bitso barēitajitsipa peyavajibijava pejonēyo. <sup>7</sup> Nexata Herodes najumecapanepaeya pexaniajaijumeta jumaitsi pejonēyojavabelia:

—Xua jitsipame nevajētsianame. Nexata ita nevajētsianame, itsacuenejava ata carajutsianatsi, jai Herodes najumecapanepaeya pejonēyojavabelia.

<sup>8</sup> Nexata bajarapovayo pena pitorobicueniatsi jumaitsi mapacueniaje Herodesjavabelia:

—Nerajure platota Juan jivibautisabinē pematabocoto, jai bajarapovayo Herodesjavabelia.

<sup>9</sup> Bajarapacuenia Herodes pejonēyo ita jumaitsi, Herodes bejamatabējiobi tsana-jetsireca. Herodes nexata acuenebi: “Jume,” pejaijava. Tsipaji baja najumecapanepaeya jumaitsi pejonēyojavabelia pexaniajaijumeta daxita Herodes pejunatsivi pitabarata. Nexata Herodes jejai. <sup>10</sup> Nexata Herodes pijajivi, vajabitsaēvi, itoroba penaneconitsivi pejebabiabiboyabelia pevēsiucutaxuabinexatsi Juanpijinē. <sup>11</sup> Bajaraxuacujinae vajabitsaēvi Juanpijinē pematabocoto tocaparenatsi platota. Nexata Herodes rajutsiaexana pejonēyojavabelia. Bajarapova juya pena rajuta. Nexata baja Herodíasva yapētane capanepaeya baja Juanpijinē pebeyaxuabijavatsi.

<sup>12</sup> Nexata Juanpijinē pijajivi parena itsajota Juanpijinē boca petēpaenē. Pitatsi petēpaenē. Nexata Juanpijinē pijajivi mēthētatsi. Bajaraxuacujinae bajarapamonae pona Jesúsjavabelia petsipaebinexa Juanpijinē pebeyaxuabijavatsi.

*Pacuenia Jesús pexaejava rajuta cinco mil ponēbeje yabara pelivaisi  
(Mr 6.30-44; Lc 9.10-17; Jn 6.1-14)*

<sup>13</sup> Jesús vënëlvaisitane Juanpijinē pebeyaxuabijavatsi. Nexata Jesús epijajivi jerata barēpona itsabelia ajibi jivi. Itsiata baitsi jane jivi ayaibitsaētoxfaneto yapētane itsabelia Jesús pona. Nexata pijatomaranē vecuapona. Matatsēnēa najetarubena pepējaisivitsi Jesús. <sup>14</sup> Itsa Jesús nonotajuna jeravecua, tane jivibitsaētoxfaneto. Nexata Jesús itaxutobejiobiatane bajarapamonae. Tocapatatsi piavitanevi. Nexata Jesús tojamate-jemayaexana piavitanevi. <sup>15</sup> Itsa baja caniviyo tsaponae, Jesús pijajivi cujibarenatsi. Nexata Jesús pijajivi jumaitsi:

—Caniviyo rabaja bitso. Majotaje ajibi pexaejava. Tsipaji itsajivi ata pijabo apo xinae. Itorobare baja jivi peponaenexa tomaraxijavabelia pecomuacaenexa pexaejava, jai Jesús pijajivi.

<sup>16</sup> Nexata Jesús jumaitsi pijajivijavabelia:

—Apo beponae raja abaxē. Paxamē parajure pexaejava, jai Jesús pijajivijavabelia.

<sup>17</sup> Nexata Jesús pijajivi jumaitsi:

—Paxainajē saya cinco papanbēbeje, anijanēyobeje dujuainēyobeje yajava, jai.

<sup>18</sup> Nexata Jesús jumaitsi pijajivijavabelia:

—Panetocarenamëre pan maberenaje, dujuainëyobeje yajava, jai Jesús.

<sup>19</sup> Nexata Jesús itoroba daxitajivi penaenexa ponajavata. Nexata Jesús pita cinco papanbëbeje, anijanëyobeje dujuainëyobeje yajava. Athëbëa benaëcotsia. Jumaitsi Diosojavabelia:

—Pexaniacuene panetoexaname. Panerajutame pataxaejava, jai Jesús Diosojavabelia.

Bajaraxuacujinae Jesús pan epatsicacapona. Pijajivijavabelia rajuta bajarapapan. Nexata juya Jesús pijajivi tsicobetsana jivijavabelia. <sup>20</sup> Daxita xaniavaetsia nabane. Bajaraxuacujinae Jesús pijajivi caetuata pan, dujuai yajava, jivi peyajuvënëcopabejebijavanë. Nexata vënëba doce xuabeje bemapirecuenia pexanaejavanë. <sup>21</sup> Pamona pexaejava xane, ayaibitsaëtoxaneto. Cinco mil ponëbeje namatajëtatsi xaniavaetsia. Petiriavi, pejevaxi ata, apo namatajëtsitsi.

*Pacuenia Jesús mene itaboxoya najetaruca yabara pelivaisi*

*(Mr 6.45-52; Jn 6.16-21)*

<sup>22</sup> Jesús jivi ayaibitsaëtoxaneto pexaejava perajutsicujinae, Jesús pijajivi bepiglia runaeyaexanareca jera ënëabereca. Jesús pijajivi copiata itoroba penicabinexa puca itsapanabelia, Betsaida tomarabelia. Nexata Jesús abaxë caenë nacopatanuca bajarajota. <sup>23</sup> Itsa baja jivi napëvereta penaviabijava, Jesús junaya petsutojumabetsia caenë pevajëtsinexa Diosojavabelia. Nexata Jesús yameravibatsi bajarapatsutojumatsia. <sup>24</sup> Bajarapaepatota Jesús pijajivi jerata epatua nabuatapona pepatsinexa puca itsapanabelia. Nexata Jesús pijajivi pevajënaeverena joviboxaneto najetaruca, malataca bitso ayai. Nexata malataca mene epabajarabapona jera ënëaberena. Nexata mera vënëcapona jera ënëaberena. <sup>25</sup> Bajaraxuacujinae bajayacunua, ajena matabijitsia, Jesús pijajivi pecovëvelia imoxoyotanjetaruca. Jesús najetaruca mene itaboxoya. <sup>26</sup> Jesús pijajivi ita tanetsi mene itaboxoya penjetarucaejava, nabenajaca. Vavajai pecajunavi.

—¡Petëpaenë raeta pejumape najetaruca! jai Jesús pijajivi.

<sup>27</sup> Nexata Jesús jumaitsi pijajivijavabelia:

—Xanë raja. Pëtsa panecujunavame. Pajamatejemamëre saya, jai Jesús pijajivijavabelia.

<sup>28</sup> Nexata Pedro jumaitsi Jesúsjavabelia:

—Tajatuxanenë, ita pepacuene xamë, nexata nejunaremelia talianexa mene itaboxoyalialia, xamëjavabelia, jai Pedro.

<sup>29</sup> Nexata Jesús jumaitsi Pedrojavabelia:

—Renamëre baitsi baja, jai Jesús.

Pedro nexata jeravecu runareca meniabereca. Lia mene itaboxoyalialia pepatsinexa Jesúsjavabelia. <sup>30</sup> Itsiata baitsi jane Pedro ita tane jovibo piasaëjava, bitso cjunavataba. Nexata bubunanajereca. Pedro ajena bubunanajereca, vavajai.

—¡Tajatuxanenë, nevaetabare! jai Pedro.

<sup>31</sup> Bepiglia Jesús cobepitajaraba. Jumaitsi Pedrojavabelia:

—Tsiquirijavayo saya nejumecovënëtame tacaevetsijava. ¿Detsa xuajitsia nejumeebiataneme? jai Jesús.

<sup>32</sup> Nexata baja Jesúsbeje Pedrobeje jera ënëabelia ita nonoliabeje, joviboxanetomi baja ajibi tsaxuabi. <sup>33</sup> Nexata daxita jerata peponaevi pematabacabëta tonubena Jesús pitabarata. Jumaitsi bajarapamona:

—Xaniajai rabaja. Xamë Dios pexënatomë, jai bajarapamona Jesúsjavabelia.

*Pacuenia Jesús jamatejemayaexana piavitanevi Genesaret nacuata yabara pelivaisi*

*(Mr 6.53-56)*

<sup>34</sup> Jesús, pijajivi yajava, pata puca itsapanabelia. Pata Genesaret nacuata. <sup>35</sup> Genesaret nacupijivi ita yapëtanetsi Jesúscuene, nexata daxita bajarapanacuajava vajunupabatsi pepatsijava. Nexata tocapatatsi daxita piavitanevi Jesúsjavaberena. <sup>36</sup> Piavitanevi pecapatsivi pinijicuenia jumai tsabiabi Jesúsjavabelia:

—Pexaniacuene bitso netoexanare. Tocopatsianame maponėje pecatojayatsinexa nenaxatatsijavacopia, jai tsabiabi.

Nexata daxita pamonaē Jesús penaxatatsijavacopia tojayataponatsi, jamatejema tsaponae piavitanejavavecua.

## 15

*Pacuenia Jesús tsipaeba xua jivi jamatabēcuenebijianatsi yabara pelivaisi*  
(Mr 7.1-23)

<sup>1</sup> Fariseovi, judíovi pecujarubivi yajava, pata Jerusalén tomaraverena. Bajarapamonaē Jesús imoxoyorenatsi. Nexata bajarapamonaē jumaitsi Jesúsjavabelia:

<sup>2</sup> —Jesús, nijajivi naneconita Diosojavabelia. Tsipaji nijajivi apo jumecovēnētsiajinavanapae vajasalinaivi pijacuene. Nijajivi itsa xane pexaejava, xane anijatonē napēna nacobequiatsinejeva, jai bajarapamonaē Jesúsjavabelia.

<sup>3</sup> Nexata Jesús jumaitsi fariseovijavabelia, judíovi pecujarubivijavabelia ata:

—Paxamē apo pajumecovēnētsimē Dioso pitorobilivaisi saicaya vajasalinaivi pijacuene panecatsitecaenexa. <sup>4</sup> Dioso Moiséspijinēta penajumecopatsilivaisi jumaitsi mapacueniaje: “Axa yaiyataema. Ena ata yaiyataema. Pajivi pibisiacuenia bijatane paxa, pena ata, bajarapajivi pabeyaxuare,” jai Dioso Moiséspijinēta penajumecopatsilivaisi.

<sup>5</sup> Itsiata baitsi jane paxamē jivi pamuxubijiapeneta biabame peyaiyataeyaniva paxajivi, penajivi ata. Paxamē jivijavabelia pajumaitsimē tsabiabi mapacueniaje: “Axa, ena ata, itsa cavajēta neyavenonaenexa, nexata itsa apo jitsipaemē neyavenonaejava, jumaitsimē tsane mapacueniaje: ‘Daxita xua pacarajutsipatsibeje picani patacayavenonaenexabeje, daxita bajaraxua tsipaebajē baja tarajutsinexa Diosojavabelia. Nexata acuenebi patacarajutsinexabeje,’ jamē tsane neyavenonaeyaniva,” pajamē tsabiabi jivijavabelia. <sup>6</sup> Nexata caranata Dioso pejumaitsi jume: “Axa yaiyataema. Ena ata yaiyataema,” pejaijume jivi pejumecovēnētsijavami paxamē pacopatsiaexanaponame. Tsipaji paxamē patsipaebaponame saicaya vajasalinaivi pijalivaisi. <sup>7</sup> ¡Paxamē saya jivi paneyamaxēi-tojorobivi! Dioso jumepaebinēmi profeta Isaíaspijinē baja cajena bajayata tajēvelia xaniavaetsia pacavajunupaeba. Bajayata Dioso tajēvelia pejumaitsi jiva paxamē yabara, profeta Isaíaspijinē peyaquinaelivaisita jumaitsi mapacueniaje:

<sup>8</sup> Bajarapamonaē nejitsipaena saya pijumeta. Itsiata pepo tanejitsipaejamatabēcuenenevecuatajē tsane. <sup>9</sup> Saya baitsi bajarapamonaē pijajumaitsi tsane: “Pacajitsipatsi,” nejai tsane itajara. Itsiata apo xaniajai tsane. Bajarapamonaē saya jivi tsipaebaponaena pejamatabēcuenepijilivaisi. Pepo taitorobilivaisi apo tsipaebi tsane,

jai tajēvelia Isaíaspijinē

peyaquinaelivaisita Dioso pejumaitsi jiva paxamē yabara, jai Jesús fariseovijavabelia, judíovi pecujarubivijavabelia ata.

<sup>10</sup> Nexata icatsia Jesús junata jivi. Jumaitsi jivijavabelia:

—Panenamuxunaevere xaniavaetsia patanejumeyapētaenexamē patacatsipaebilivaisi. <sup>11</sup> Xua jivi xane pecuibovojotota, pexaevajēnaeya napēna anijatonē apo nacobequiatsi ata, apo jamatabēcuenebijianaetsi. Apo vēnananeconitsi Diosojavabelia. Baitsi rajane xua jivi pecuibota pibisiacuenia cuaicuaijai, bajara jane xua jivi bajamatabēcuenebijianatsi, jai Jesús bajarapamonaējavabelia.

<sup>12</sup> Nexata Jesús pijajivi imoxoyorenatsi. Jesús pijajivi jumaitsi:

—Patajatuxanenē, ¿yapētaneme tsabaja fariseovi pecabaraanaepanaejava itsa cajumetane bajarapacuenia nejumaitsi jiva? jai Jesús pijajivi.

<sup>13-14</sup> Nexata fariseovi yabara Jesús jumaitsi pijajivijavabelia:

—Panamuxujemare saya bajarapamonaē. Bajarapamonaē saya apo yapētae. Bajarapamonaē bepitatsēcēnaevi. Nexata bepematacaponaevi pitatsēcēnaevi pijinia. Pitatsēcēnaenē itsa matacaponaejitsipa itsanē pijinia pitatsēcēnaenē, nexata najuajopaejitsiparecabeje mēthēxanetojavareca. Pabita piabejejava itsa juva, nexata yatabutopaya jonatsi

vajaveretsinexa. Bajara pijinia pacuenia taxa, athëbëtatsia peecaenë, verebiabianatsi daxita bajarapamonae, jai Jesús pijajivijavabelia fariseovi yabara.

<sup>15</sup> Pedro nexata jumaiti Jesúsjavabelia:

—Patajatuxanenë, paneyapëtaeyaexanare pajamatabëcuene xaina palivaisi tsipae-bame jivijavabelia. Palivaisi baitsi jumaitimë: “Xua jivi xane pecuibota, apo jamatabëcuenebijianaetsi,” jamë, jai Pedro Jesúsjavabelia.

<sup>16</sup> Nexata Jesús jumaiti:

—¿Paxamë ata tsarovia abaxë apo panejumeyapëtaemë? <sup>17</sup> Daxitacuene xua jivi xane pecuibovojotota, junua pecotsorotubereca. Bajaraxuacujinae vecuapitsapatsi. <sup>18</sup> Baitsi rajane xua jivi pecuibuatsina pitsapa pecuaicuaijainexa pacuenia najamatabëx-aina pejamatabëëthëtovetsina, bajara jane xua jivi jamatabëcuenebijianatsi. <sup>19</sup> Tsipaji rabaja jivi pejamatabëëthëtovetsina pitsapa pibisiacuene penajamatabëxainanexa. Pitsapa jivi pebeyaxuabijamatabëcuenenexa. Pitsapa pebi pijava pevecuanamatayajitsi jamatabëcuenenexa. Pitsapa petirivijavabelia pebi penaperabëquenetsiatæ jamatabëcuenenexa. Pitsapa penacobetoxotsijamatabëcuenenexa. Pitsapa itsamonæ pexanaejava yabara najumetsënëtsiaya pepaebijamatabëcuenenexa. Pitsapa itsamonæ yabara najumetsënëtsiaya pebaracuaijai jamatabëcuenenexa. Daxita bajarapajamatabëcuene pitsapa jivi pejamatabëëthëtovetsina. <sup>20</sup> Daxita bajarapajamatabëcuene jivi jamatabëcuenebijianatsi. Jivi raja pexaejava xae ata, anijatonë napëna nacobequiatsinejeva, apo jamatabëcuenebijianaetsi, jai Jesús pijajivijavabelia.

*Pacuenia Jesús itsanacuapijiva pexënatoyo tojamatejemayaexana yabara pelivaisi (Mr 7.24-30)*

<sup>21</sup> Jesús baja Genesaret nacuavecua pona. Naropota itsanacuayabelia, itsabelia eca anijatomarabeje, Tiro tomarabeje Sidón tomarabeje. Jesús baja pata bajarapanacuayabelia. <sup>22</sup> Nexata bajarapanacuata ponapona cananeaviriava. Bajarapova apo judíova. Bajarapova Jesúsjavaberena pata. Pinijijumeta bajarapova jumaiti Jesúsjavabelia:

—¿Petuxanenë, Davidpijinë pemomomë, nitaxutotsoniataema! Taxënatovayo dovathi yajavaponapona. Bitso bejiobiayaexanabiabatsi, jai bajarapova Jesúsjavabelia.

<sup>23</sup> Itsiata Jesús apo jumepitsi. Nexata Jesús pijajivi imoxoyorenatsi. Jesús pijajivi jumaiti Jesúsjavabelia:

—Patajatuxanenë, ponaeyaexanare baja mapovaje. Bitso raxua nacapëvabanajetaruca, jai Jesús pijajivi.

<sup>24</sup> Nexata Jesús jumaiti bajarapovajavabelia:

—Dioso baja cajena nitoroba tayavenonaenexa ëjudíovi, Israel nacuapijivi, pamona Dioso tane beoveja. Tsipaji bajarapamonæ Diosovecua naxuabavanapa, jai Jesús bajarapovajavabelia.

<sup>25</sup> Itsiata bajarapova imoxoyorenatsi Jesús. Bajarapova Jesús yaiyataeya pematabacabëta nucajunua Jesús pitabarata. Nexata bajarapova jumaiti Jesúsjavabelia:

—¿Petuxanenë, neyavenonare! jai.

<sup>26</sup> Nexata Jesús jumaiti bajarapovajavabelia:

—Apo xanepanae copiaya xamë itsanacuapijivamë tacayavenonaenexa. Abaxë copiyaya veyavenonajë tajanacuapijivi, judíovi. Xamë copiaya itsa cayavenonaëjitsipatsi, nexata pacuenia pejevaxi pexaejavaminexa yacajërëtsipajë tarajutsinexa avirixijavabelia, bajara itsinë tsipae, jai Jesús bajarapovajavabelia.

<sup>27</sup> Itsiata baitsi jane bajarapova ajumesaë tsaponæ. Icatsia jumaiti Jesúsjavabelia:

—Xaniajamë rabaja picani. Itsiata neyavenonare. Tsipaji avirixi ata baxane pexainanëtsi pexaeyecaemesa bëxëpanareca piothopaepërë. Bajara pijinia pacuenia itsiata itsanacuapijiva atanë, neyavenonare, jai bajarapova Jesúsjavabelia.

<sup>28</sup> Nexata icatsia Jesús jumaiti bajarapovajavabelia:

—¿Petiriva, bitso najamatabëcueneocopatame Diosojavabelia pecayavenonaenexa! Nexata pacuenia jumaitimë, bajarapacuenia Dioso baja cajena catoexanaena, jai Jesús.

Bajarapaepatota bajarapova pexënatovayo Jesús pejamatabëcueneta tojamatejematsi baja pijabotalia.

*Pacuenia Jesús jamatejemayaexana ayaibitsaëtoخانeto piavitanevi yabara pelivaisi*

<sup>29</sup> Itsa panacuata eca Tiro tomarabeje Sidón tomarabeje, Jesús baja vecuapona. Nexata Jesús najetaruca Galilea pucaxaneto muxubërëa. Nexata Jesús petsutojumabetsia junaya. Nexata petsutojumatsia Jesús ecojopa. <sup>30</sup> Nexata jivi ayaibitsaëtoخانeto pata Jesúsjavaberena. Tocapatatsi pejayujayunaevi. Tocapatatsinua bitso pitaxutotsëcënaevi. Tocapatatsinua apo pecuaicuaijaivi. Tocapatatsinua penabejenaevi. Tocapatatsinua ayaibitsaëtoخانeto piavitanevi. Bajarapamonae tojebatsi Jesús pitabarata. Nexata Jesús jamatejemayaexana daxita bajarapamonae. <sup>31</sup> Nexata jivi jamatabëcuenenabenajaca ita tane pecuaicuaijajava apo pecuaicuaijivimi. Jesús xanepanaeyaexana penabejenaevimi ata. Xanepanaeyaexana pejayujayunaevimi ata. Itaxutoxanepanaeyaexana bitso pitaxutotsëcënaevimi ata. Nexata jivi ita tane bajarapacuenë, jumatsi Diosojavabelia: “Diosomë, bitso ayaijamatabëcuenenëmë, palsrael nacuapijivinë patajaDiosomë,” jai bajarapamonae.

*Pacuenia Jesús rajuta pexaejava bejamatabëcuene cuatro mil pajivibeje yabara pelivaisi*  
(Mr 8.1-10)

<sup>32</sup> Jesús jivi ayaibitsaëtoخانeto pënjajinapanatsi. Nexata Jesús junata pijajivi. Jumatsi pijajivijavabelia mapacueniaje:

—Netsitabejiobi baja rovia mapamonaeje. Tsipaji baja ajena acueyabi pamatacabibeje xaina xanëjavata pejinapanapaecujinae. Pemarue baja tovereverecatsi. Pexaejava xaenejeva, apo jitsipaenë taitorobijava peponaenexa pijabonëjavabelia. Namuto epatua meta cuenabijitsipatsi piajani, jai Jesús pijajivijavabelia.

<sup>33</sup> Nexata Jesús pijajivi jumatsi:

—¿Detsa jane pacuenia pexaejava tocaxitajarabianatsi mapajivibitsaëtoخانetoje? Majotaje ajibi pexaejava. Tsipaji itsajivi ata pijabo apo xinae majotaje, jai Jesús pijajivi.

<sup>34</sup> Nexata Jesús yanijoba pijajivijavabelia.

—¿Detsa papanbëbeje paxainame? jai.

Nexata Jesús pijajivi jumatsi:

—Siete papanbëbeje paxainajë, dujuainëxi yajava, jai.

<sup>35</sup> Nexata Jesús itoroba daxitajivi penaenexa irata. <sup>36</sup> Nexata Jesús pita siete papanbëbeje, dujuainëxi yajava. Nexata Jesús jumatsi Diosojavabelia:

—Pexaniacuene panetoexaname. Panerajutame pataxaejava, jai.

Bjaraxuacujinae Jesús epatsicacaponä pan, dujuainëxi yajava. Nexata Jesús pepatsicacaepan rajuta pijajivijavabelia. Nexata juya Jesús pijajivi tsicobetsana bajarapajivi bitsaëtoخانetojavabelia. <sup>37</sup> Daxita bajarapamonae nabane xaniavaetsia. Nexata peyajuvënëcopabijavanë Jesús pijajivi caetuata. Vënëba siete xuabeje bemapirecuenia pexanaejavanë. <sup>38</sup> Pamonae pexaejava xane, ayaibitsaëtoخانeto. Cuatro mil ponëbeje namataëjëtatsi xaniavaetsia. Petiriavi, pejevaxi ata, apo namataëjëtsitsi. <sup>39</sup> Pexaecujinae pexaejava, Jesús baja naviabiayaexana jivi. Nexata Jesús runareca jera ënëabereca. Pona baja Magdala nacuayabelia.

## 16

*Pacuenia fariseovibeje saduceovibeje Jesús itorobatsi Dioso pesaëta pinijicuenë pexanaejava petsitaexanaenexa picani yabara pelivaisi*

(Mr 8.11-13; Lc 12.54-56)

<sup>1</sup> Fariseovibeje saduceovibeje pata Jesúsjavaberena. Nexata bajarapamonae Jesús jamatabëcueneëjëbiaya itorobatsi picani pinijicuenë pexanaejava Dioso pesaëta Jesús petsitaexanaenexa. Bajarapacuenia picani Jesús itorobatsi peyapëtaenexatsi Dioso pepacuenë athëbëvetsica pitorobinëcuenetsitsica.

<sup>2</sup> Nexata Jesús jumatsi bajarapamonaejavabelia:

—Pamatacabi caniviyo itaboxo tsobia, paxamë pajumaitsimë tsabiabi: “Meravia pexaniamatacabi tsane. Tspiji itaboxo tsobia,” pajamë tsabiabi. <sup>3</sup> Pamatacabi bajayacunua nacuaiboxo itacaënanuca, pajumaitsimë tsabiabi: “Ajena anacuayaijitsia daxita matacabi. Tspiji nacuaiboxo itacaënanuca,” pajamë tsabiabi. Payapëtaneme picani xaniavaetsia pacuenia matacabi itsijitsia. Tspiji itarërebo pepitsapaexae, payapëtaeyabiabame. Itsiata baitsi jane patae atamë Juan jivibautisabinëmi pexanaponaejava, xanë ata taexanaponaejava patae atamë, itsiata apo payapëtaemë Dioso athëbëvet-sica taneitorobinëcuenetsica. <sup>4</sup> Bitso pibisijamatabëcuene xaina pamona copaba Dioso pejumecovënëtsijavami. Bajarapamona picani nitoroba Dioso pesaëta pinijicue taexanaejava tatsitaexanaenexa taneyapëtaenexa pepacue Dioso athëbëvet-sica taneitorobinëcuenetsica. Itsiata baitsi jane Dioso pesaëta pinijicue taexanaejava, apo tsitaexanaenë tsane. Pacuenia bajayata Diosojumepaebinë profeta Jonáspijinë exanatsi, bajara ëpitsicue taneexanaejava, tsitajëtsianajë, jai Jesús petëpaecujinae icatsia Dioso piasaëyaexanaejavanexatsi yabara.

Jesús baja nexata bajarapamona vecuapona.

*Pacuenia Jesús pijajivi muxujioba fariseovi petsipaebilivaisi pejumecovënëtsianiva yabara pelivaisi*

*(Mr 8.14-21)*

<sup>5</sup> Jesús pijajivi nicabilia puca itsapanabelia. Nexata nacofënëta pamarue. Apo capona pan. <sup>6</sup> Nexata Jesús pijajivi muxujioba pejumecovënëtsianiva fariseovi, saduceovi ata, itsa tsipaebatsi saicayacuenia Dioso pejumelivaisivecua. Jesús jumaiti pijajivijavabelia mapacueniaje:

—Panejumetaema. Xania panayajivitaema fariseovi pijalevadura. Panayajivitaema saduceovi ata pijalevadura, jai Jesús pijajivijavabelia.

Bajarapacuenia Jesús jumaiti fariseovi petsipaebaponaelivaisi, saduceovi ata petsipaebaponaelivaisi, Jesús pijajivi pejumecovënëtsianiva. <sup>7</sup> Itsiata Jesús pijajivi apo jumeyapëtaetsi. Bajaraxuata Jesús pijajivi nabarëcuaicuajai bajarapacuenia Jesús pejumaitisijume yabara. Jesús pijajivi jamatabëcuenenavëxaniabiaya najumaiti:

—Jesús nacajumaiti: “Xania panayajivitaema fariseovi pijalevadura. Panayajivitaema saduceovi ata pijalevadura,” nacajai. Baja raeta pacuenia Jesús nacajumaiti pan apo vajacaponaexae, najai Jesús pijajivi jamatabëcuenenavëxaniabiaya.

<sup>8</sup> Jesús pijajivi jamatabëcueneyapëtane bajarapacuenia jamatabëcuenenavëxaniabiaya pejumaitisijava levadura yabara. Nexata Jesús jumaiti pijajivijavabelia:

—¿Detsa xuajitsia panajumaitsimë: “Baja raeta pacuenia Jesús nacajumaiti pan apo vajacaponaexae,” panajamë? ¿Apo payapëtaemë tspiji tanecaëjëpaejava taexanaenexa pan itsa namatavenonatsi! <sup>9</sup> Paxamë abaxë apo panejumeyapëtaemë. ¿Apo panajamatabënapitsimë tspiji pacuenia exanajë pamatacabi pan namatavenonatsi? Tsicobetsanajë cinco papanbëmibeje cinco mil ponëbeje pexaenexa. ¿Detsa xuabeje pavënëbame peyajuvënënacopabijavanë bemapirecuenia pexanaejavanë? <sup>10</sup> ¿Apo panajamatabënapitsimë nua tspiji pacuenia tsicobetsanajë siete papanbëmibeje cuatro mil pajivibeje pexaenexa? ¿Detsa xuabeje bajarapamatacabi pavënëbame peyajuvënënacopabijavanë bemapirecuenia pexanaejavanë? <sup>11</sup> Itsa pacajumaiti: “Xania panayajivitaema fariseovi pijalevadura. Panayajivitaema saduceovi ata pijalevadura,” itsa pacajaiti, pan yabara apo pacajumaiti, jai Jesús pijajivijavabelia.

<sup>12</sup> Nexata jane baja Jesús pijajivi xaniavaetsia jumeyapëtanetsi. Nexata Jesús pijajivi najumaiti: “Xania panayajivitaema fariseovi pijalevadura. Panayajivitaema saduceovi ata pijalevadura,” nacajai tsaena Jesús, fariseovi, saduceovi ata, itsa nacatsipaeba saicayacuenia Dioso pejumelivaisivecua vajajumecovënëtsianiva, najai Jesús pijajivi.

*Pacuenia Pedro jumaiti Jesúsjavabelia: “¿Xamë raja Cristomë!” jai yabara pelivaisi*  
*(Mr 8.27-30; Lc 9.18-21)*

<sup>13</sup> Jesús, pijajivi yajava, najetaruca Cesarea de Filipovënë tomaramuxunenia. Nexata Jesús pijajivijavabelia jumaitsi mapacueniaje:

—Xanë, Daxitajivi Pematapijinënë. ¿Detsa jivi jumai tsabiabi xanë yabara? ¿De tsaeta xanë ponënë? jai Jesús pijajivijavabelia.

<sup>14</sup> Nexata Jesús pijajivi jumaitsi:

—Itsamonae xamë yabara jumai tsabiabi: “Juanpijinëmi raeta jivibautisabinëmi icatsia asaë,” jai tsabiabi. Itsamonae pijinia jumai tsabiabi: “Diosojumepaebinëmi raeta, profeta Elíaspijinë, ponëmi bajayata ponapona, icatsia asaë,” jai tsabiabi. Itsamonae pijinia jumai tsabiabi: “Diosojumepaebinëmi raeta profeta Jeremíaspijinë, ponëmi bajayata ponapona, icatsia asaë. Itsa jume, nexata meta bajayata Diosojumepaebivimi profetavimiyajuvënë icatsia asaë,” jai tsabiabi itsamonae xamë yabara, jai Jesús pijajivi.

<sup>15</sup> Nexata Jesús jumaitsi pijajivijavabelia:

—¿Detsa nexata paxamë pajamatabëitsimë xanë yabara? ¿Detsa xanë ponënë? jai Jesús pijajivijavabelia.

<sup>16</sup> Nexata Simón Pedro jumaitsi Jesúsjavabelia:

—Xamë cajena Cristomë, athëbëvetsica Dioso pecaitorobinëtsica jivi necapanepaenexa. Xamë Dioso piasaëtsaponaponaenë pexënatomë, jai Pedro Jesúsjavabelia.

<sup>17</sup> Jesús nexata jumaitsi Pedrojavabelia:

—Simón, Juan pexënatomë, xamë jamatabëcuenebarëyamë. Tsipaji itsajivi ata apo cayapëtaeyaexanae xanë taneyapëtaenexamë Cristocuenenë. Biji rajane taxa, athëbë-tatsia peecaenë, cayapëtaeyaexana. <sup>18</sup> Nexata catsipaebianatsi mapacueniaje. Xamë rabaja Pedromë, beibotomë. Pacuenia ibopanaxanetojumata pexanetsibo bajayajebi ajamatabësaë tsecae, bajara pijinia itsane tajajivi tanejumecovënëtsivi Cristocuenenë. Nexata dovathi apo jamatabëcuenematatoxenetsitsi tsane. <sup>19</sup> Pacuenia baupaevetsinë evetsiaexanatsi llavianë, bajara pijinia pacuenia caevetsiaexanaenatsi athëbënacuai-pijilivaisianë. Xua itavetsianame mapanacuataje, bajaraxua Dioso ata athëbënacuatatsia itaveta. Xua tocopatsianame pexanaenexa mapanacuataje, bajaraxua Dioso ata athëbë-nacuatatsia tocopata pexanaenexa, jai Jesús Pedrojavabelia.

<sup>20</sup> Nexata Jesús pijajivi jumeitaveta petsipaebiyani va itsajivijavabelia ata: “Mara ponë Cristoje, Dioso athëbëvetsica pitorobinëtsica jivi pecapanepaenexa,” pejaiyaniva.

*Pacuenia Jesús tajëvelia navajunupaeba pebeyaxuabijavanexatsi yabara pelivaisi*

*(Mr 8.31-9.1; Lc 9.22-27)*

<sup>21</sup> Jesús pebeyaxuabijavanexatsi, tajëvelia navajunupaeba pijajivijavabelia. Jumaitsi mapacueniaje:

—Ponaejitsianë Jerusalén tomarabelia. Nexata bajarajotalia nebejiobiaexanaena judíovi pijaancianovi, sacerdotevi penamatacaitorobivi ata, judíovi pecujarubivi ata. Bajaraxuacujinae nebeyaxuabiana. Itsiata baitsi jane tatëpaecujinae, acueyabi matabacabita, icatsia asaënë tsane, jai Jesús tajëvelia pijajivijavabelia.

<sup>22</sup> Nexata Pedro junata Jesús pebarëponatabinexa pesaicaeyojavabelia. Nexata Pedro pesaicaeyojavatalia jumaitsi Jesúsjavabelia:

—¡Tajatuxanenë, Dioso caitaxutotsoniataena bajarapamonae pecaexanaeyaniva daxita pacuenia tajëvelia navajunupaebame! jai Pedro Jesúsjavabelia.

<sup>23</sup> Nexata Jesús Pedrovecua napënëyorotaxuaba. Taenuca pijajivi penaejavabelia. Nexata Jesús napënëyorotsia jumai tsanuca Pedrojavabelia:

—¡Dovathi, nevecuanatixire! Nejamatabëcueneëjëbijitsipame. Necopare Dioso taneitorobicuenia taexanaenexa. Xamë apo jitsipaemë pacuenia Dioso jitsipa taexanaenexa. Saya jitsipame pacuenia jivi jitsipa taexanaenexa, jai Jesús.

<sup>24</sup> Nexata Jesús jumaitsi pijajivijavabelia:

—Pajivi jitsipa tanepënaponaejava, bajarapajivi copatsi pejitsipaecuenia penajamatabëxainabiabijavami. Exanaponaponae taitorobicuenia. Najamatabëcueneveretsinua, bejiobiaexanaejitsia atatsi, beyaxuabijitsia atatsinua, Dioso pejumelivaisi yabara pijamatabëcuenesaë tsaponaponae nexa. Nexata jane baja xuacujinae nepënaponae. <sup>25</sup> Pajivi exanaponaponae penatojitsipaecuenia, apo xainae tsane matabi apo peverevereaejava. Pajivi xanë tajamatabëcueneta copata penatojitsipaecuenia pexanaejavami, bajarapajivi xainaena matabi apo peverevereaejava. <sup>26</sup> Pajivi exanaponaponae penatojitsipaecuenia, bajarapajivi Diosovecua naxuabiana. Nexata bajarapajivi daxitacuene xainae ata, mapanacuapijicueneje, itsiata nacuerata. Tsipaji pexainacuene apo capanepae tsanetsi Diosojavabelia. Tsipaji acuenebi tsane itsajivi ata pematamotsinexa penaxuabianiva Diosovecua. <sup>27</sup> Xanë, Daxitajivi Pematapijinë, yajavapatsianicajë taxa Dioso pijapenivenivenaectia. Yajavapatsianicajënu tajaängelevi. Nexata matamotaponaeajë caejivi canacujitsia, tanetonacuenebivi. Naneconitsiaexanaenajë pijinia pijaneconi pexinaevi. <sup>28</sup> Xaniajanë pacuenia pacatsipaebijitsiatsi. Daxita paxamë patëpaenejevamë, xanë, Daxitajivi Pematapijinë, tajajivi ayaibitsaëtoxaneto naexanaena. Nexata paxamëyajuvënevi pepuatae tsane xanë tajajivi ayaibitsaëtoxaneto taevetsijava, tëpaena, jai Jesús pijajivijavabelia.

## 17

### *Pacuenia Jesús caeepatoyo perabënivenivenataba yabara pelivaisi (Mr 9.2-13; Lc 9.28-36)*

<sup>1</sup> Jesús petëpaejavanexa tajëvelia penavajunupaebicujinae, seis pamatacabibejecujinae, Jesús pijajivi, acueyabi ponëbeje, barëjunaya pinijitsutoxanetojumabetsia. Jesús barëjunaya mapamatabëxëyoje: Pedro, Santiago, Juan. Bajarapamatabëxëyo Jesús barëjunaya pinijitsutoxanetojumabetsia. Santiago raja pejuyapijinë Juan. <sup>2</sup> Nexata petsutojumatsia Jesús perabënivenivenareca bajarapamonae pitabarata. Pacuenia matabipijijumeto banaitayota, bajarapacuenia Jesús itabaranaitayota. Penaxatatsijavareca, daxita nivenivenaeya niojai. <sup>3</sup> Nexata bajarajota Jesús pijajivi tane bajayata petëpaenëmibeje, Moiséspijinëbeje Elíaspijinëbeje. Jesús barëcuaicuaijatsi bajaraponëbeje. <sup>4</sup> Nexata Pedro jumaiti Jesúsjavabelia mapacueniaje:

—¡Patajatuxanenë, pijacuaxae panebarëponame! Itsa jitsipame, pacatoexanaenatsi acueyabi pabobërëtoheje. Itsabobërëto xamënexa tsane. Itsabobërëto Moisésnexa tsane. Itsabobërëto Elíasnexa tsane, jai Pedro Jesúsjavabelia.

<sup>5</sup> Itsa abaxë Pedro cuaicuaijai tsanuca, penaitayotsiitarërëbo matacataxuabatsi daxita bajarapamonae. Nexata bajarapamonae jumetane bajarapaitarërëbojavavetsica Dioso pejumaitisijava: “Mara ponë taxënato, tasivanëje. Bitso siva-jamatabëcuenebarëyanë. Pajumetaema bajaraponë,” pejaijavatsica bajarapamonae jumetane.

<sup>6</sup> Jesús pijajivi ita jumetane bajarapacuenia Dioso pejumaitisijavatsica, irataeya othopa irata. Jesús pijajivi bitso najunaviaca. <sup>7</sup> Nexata Jesús imoxoyolia pijajivi. Jayalia. Jumaiti pijajivijavabelia:

—Panonobapunare. Pëtsa pajunavame, jai Jesús pijajivijavabelia.

<sup>8</sup> Nexata Jesús pijajivi ita naëcobarëcëpalia Jesúsjavabelia, ajibi baja Moisésbeje Elíasbeje. Caenë baja Jesús nuca.

<sup>9</sup> Nexata Jesús pijajivi ita barërunanucaponaeica petsutojumavetsica, jumeitaveta pijajivi. Jumaiti pijajivijavabelia:

—Pëtsa patsipaebame itsajivi ata pacuene pataneme. Matapania xanë, Daxitajivi Pematapijinë, icatsia asaënë tsane tatëpaecujinae, nexata jane baja matapania patsipaebianame, jai Jesús pijajivijavabelia.

<sup>10</sup> Nexata Jesús pijajivi yanijoba Jesúsjavabelia. Jumaiti:

—Patajatuxanenë, ¿detsa xuajitsia judíovi pecujarubivi jumai tsabiabi: “Bajayata ponëmi ponaponae, Elíaspijinë, petëpaecujinae icatsia asaë tsane. Bajaraponë copiata

patsiana. Bajaraxuacujinae patsiana Cristo, pepo vajanacacapanepaenënexa jane baja,” jai tsabiabi? jai Jesús pijajivi.

<sup>11</sup> Nexata Jesús jumaitsi pijajivijavabelia:

—“Copiata Elíaspijinë patsiana. Nexata bajaraponë jamatabëcuenexanetsiana daxitajivi,” itsa jai, Juanpijinëmi jivibautisabinëmi yabara jumaitsi. Xaniajai rabaja pacuenia judíovi pecujarubivi jumaitsi. <sup>12</sup> Xaniajanë pacuenia pacatsipaebijitsiatsi. Elíaspijinë rabaja patajopa. Itsiata jivi apo yapëtaetsi ponëcuene. Nexata pacuenia jivi jitsipa pexanaenexa bajaraponëjavabelia, exana baja. Beyaxuabatsi. Bajara pijinia pacuenia xanë ata, Daxitajivi Pematapijinënë, nebejiobiaexanaena bajarapamonae, jai Jesús pijajivijavabelia.

<sup>13</sup> Nexata Jesús pijajivi jumeyapëtanetsi. Nexata Jesús pijajivi jamatabëjumaitsi:

—“Elíaspijinë rabaja patajopa,” itsa jai Jesús, Juanpijinëmi jivibautisabinëmi yabara jumaitsi, jamatabëjai Jesús pijajivi.

*Pacuenia Jesús jamatejemayaexana pejevaxinë, dovathi peyajavaponaponaenë, yabara pelivaisi*

(Mr 9.14-29; Lc 9.37-43)

<sup>14</sup> Jesús pijajivi, acueyabi ponëbeje, barënaviata petsutojumavetsica. Nexata bajarapatsutoxanetotabuta vajënaeevetatsi jivi ayaibitsaëtoxaneto. Nexata pebi Jesús imoxoyorenatsi. Bajaraponë Jesús yaiyataeya pematabacabëta nucajunua Jesús pitabarata. Bajaraponë jumaitsi Jesúsjavabelia:

<sup>15</sup> —Jesús, netoitaxutotsoniataema taxënatonëyo. Netodevacababiabatsi raja. Bitso bejiobi tsabiabi. Anijatonë isotuabelia natajuitabiaba. Itsajavata menialia jopabiabalia.

<sup>16</sup> Nijajivijavaberena picani capatajë tanetojamatejemayaexanaenexa. Itsiata baitsi jane apo caëjëpaetsi tanetojamatejemayaexanaenexa, jai bajaraponë Jesúsjavabelia.

<sup>17</sup> Nexata Jesús jumaitsi pijajivijavabelia:

—¡Paxamë baja rovia apo pajumecovënëtsimë Dioso papecayavenonaejavanexa! Bajaraxuata apo pacajamatabëcuenecaëjëpae pejevaxinë panevecuacapitsapaenexa dovathi. ¡Paneajamatabëcuenetajavi baja rovia! Pexaniajailivaisivecua saicayacuenia panajamatabëxainame. ¿Detsa paepatojebi abaxë paxamëjavata ponaponaenajë? ¿Detsa paepatojebi abaxë paxamëjavabelia ajamatabëcuenesaënë tsaponapona tsane patanejumecovënëtsinexamë? Panetocarenamëre pejevaxinë, jai Jesús pijajivijavabelia.

<sup>18</sup> Nexata Jesús itaveta dovathi pejevaxinë pevecuapitsapaenexatsi. Nexata baja pejevaxinë dovathi vecuapitsapatsi. Pejevaxinë baja jamatejema.

<sup>19</sup> Bajaraxuacujinae Jesús pijajivi barëcuaicuaijaitsi pijaepatojavata. Jesús pijajivi jumaitsi:

—Patajatuxanenë, ¿detsa xuajitsia meta paxanë apo panecaëjëpae patavecuacapitsapaenexa dovathi? jai Jesús pijajivi.

<sup>20</sup> Nexata Jesús jumaitsi pijajivijavabelia:

—Apo pacacaëjëpae pejevaxinë panevecuacapitsapaenexa dovathi. Tsipaji xaniavaetsia apo pajumecovënëtsimë Dioso papecayavenonaejavanexa. Xaniajanë pacuenia pacatsipaebijitsiatsi. Paxamë tsiquirijavayo ata itsa pajumecovënëtsipame Dioso papecayavenonaejavanexa, nexata pacacaëjëpaejitsipa Dioso pesaëta pinijicuene paneexanaenexa. Nexata itsa pajumaitsimë tsipae mapatsutoxanetojavabeliaje: “Vecuanatixire majotaje. Itsajavabelia ecaename,” itsa pajamë, pacajumecovënëtsipa. Nexata natixitsipa. Nexata paxamë paneexanaenexa itsacuenejavayo ata, apo pacatsitaayapëbeje tsipae itsa pepacuene xaniavaetsia pajumecovënëtsipame Dioso papecayavenonaejavanexa. <sup>21</sup> Mara paviriadovathije apo jitsipae pepitsapaejava. Matapania panexaejava apo paxaemë tsipae pamatacabibeje asaëyata Diosojavabelia pavajëtaponame dovathi pepitsapaenexa, pitsapaejitsipa, jai Jesús pijajivijavabelia.

*Pacuenia icatsia Jesús tajëvelia navajunupaeba pebeyaxuabijavanexatsi yabara pelivaisi*  
(Mr 9.30-32; Lc 9.43-45)

<sup>22</sup> Jesús abaxë pijajivi itsa barëponapona Galilea nacuata, pijajivijavabelia tajëvelia navajunupaebapona pebeyaxuabijavanexatsi. Jesús pijajivijavabelia jumai tsaponae mapacueniaje:

—Xanë, Daxitajivi Pematapijinënë, necanajetsiana itsamonae pecobeyabelia.

<sup>23</sup> Bajarapamonae nebeyaxuabiana. Itsiata baitsi jane tanebeyaxuabicujinae, acueyabi maticabita, icatsia asaënë tsane,” jai tsaponae Jesús pijajivijavabelia.

Nexata Jesús pijajivi itsa jumetanetsi bajarapacuenia Jesús penavajunupaebaponaeva petëpaejavanexa, Jesús pijajivi bitso najamatabëxaina.

*Pacuenia Jesús matamota impuestomatamo yabara pelivaisi*

<sup>24</sup> Jesús, pijajivi yajava, pata Capernaum tomarata. Nexata Capernaum tomarata impuestomatamo pematamoyanijobabiabivi pona Pedrojavabelia. Nexata bajarapamonae yanijobatsi Pedro.

—Pedro, ¿xaniajai tsaja? ¿Panijatuxanenë impuestomatamo apo matamotabiabi, paimpuestomatamo judíovi matamobabiaba templobo pevetsivijavabelia? jaitsi.

<sup>25</sup> Pedro nexata jumaitsi:

—Jājã. Matamotabiaba cajena, jai.

Nexata Pedro joneya Jesús peecaeboyalia. Nexata Pedro pejonejavatalia Jesús peecaeboyalia, Jesús jumaitsi Pedrojavabelia:

—Pedro, ¿detsa xamë jamatabëcueneitsimë? Nacuaeetsivi palata pepitsinexa, pijajivi itoroba impuestomatamo petoyanijobinexatsi. ¿Detsa nexata pamonaevjavabelia nacuaeetsivi pijajivi yanijobabiaba impuestomatamo? ¿Nacuaeetsivi tsaja pijamonaejavabelia? Itsa jume, ¿saicayavijavabelia tsaja, nacuaeetsivi pevetsinacuata pejinavanapaevijavabelia? jai Jesús Pedrojavabelia.

<sup>26</sup> Pedro nexata jumaitsi Jesúsjavabelia:

—Nacuaeetsivi raja pijajivi impuestomatamo yanijobabiaba saicayavijavabelia, nacuaeetsivi pevetsinacuata pejinavanapaevijavabelia. Apo yanijobabiabi nacuaeetsivi pijamonaejavabelia, jai Pedro Jesúsjavabelia.

Jesús nexata jumaitsi Pedrojavabelia:

—Pacuenia nacuaeetsivi pijamonae apo matamotsitsi impuestomatamo, bajara pijinia pacuenia xanë ata apo jitsipaenë picani tamatamotsinexa impuestomatamo templobo pevetsivijavabelia taxa Dioso pijatemploboxae. <sup>27</sup> Itsiata baitsi jane xamë matamotsianame itsajivi ata vajanacabaraanaepanaeyanivabeje. Liamëre pucaxanetojavabelia. Èjëbianame culupabota. Padujuainëyo copiaya catoxaena, jutsianame. Pecuibota caxitajarabianame palatanëyo. Bajarapapalatanëyota caëjëpaena vajamatomotsinexabeje impuestomatamo xanë tamatamotsinexa, xamë ata nematamotsinexa. Nexata bajarapapalatanëyo caponaename impuestomatamo nematamotsinexa templobo pevetsivijavabelia, jai Jesús Pedrojavabelia.

## 18

*Pacuenia Jesús pijajivi jumaitsi: “¿Detsa ponë paxanëyajuvënëne panevecuaayaijamatabëcuenenë?” jai Jesúsjavabelia yabara pelivaisi*

*(Mr 9.33-37; Lc 9.46-48)*

<sup>1</sup> Jesús baja itsa najumevereta Pedrojavabelia pecuaicuaijajava impuesto yabara, daxita Jesús pijajivi imoxoyorenatsi. Nexata Jesús pijajivi jumaitsi Jesúsjavabelia:

—Patajatuxanenë, ¿detsa ponë paxanëyajuvënëne bitso ayaijamatabëcuenenë tsane daxitavecua Dioso pijanacuatatsia? jai.

<sup>2</sup> Nexata Jesús junata pejevaxinëyo. Pijajivi tuatuajëta nuteta pejevaxinëyo. <sup>3</sup> Jesús nexata jumaitsi pijajivijavabelia:

—Xaniajanë pacuenia pacatsipaebijitsiatsi. Mapapejevaxinëyoje beveliajamatabëcuenenëyo nataeya najamatabëcuenecopata Diosojavabelia Dioso pevetsinexatsi. Nexata paxamë itsa apo panajamatabëcuenepënëyorotsimë tsane perujujamatabëcuenecua beveliajamatabëcuenevi panenataenexa pacuenia mapapejevaxinëyo itsije, nexata apo

pajonemë tsane Dioso pijanacuayabetsia. <sup>4</sup> Nexata ponë jitsipa Dioso pijanacuatatsia ayaijamatabëcuenenë penaexanaenexa daxitavecua, bajaraponë beveliajamatabëcuenenë natae, pacuenia mapapejevaxinëyo jamatabëcueneitsije. <sup>5</sup> Pajivi copiapita tanejumecovënëtsijiviyo, mapitsijamatabëcuenejiviyoje, bajaraxua xanë taniji tanecopiapitsijava, jai Jesús pijajivijavabelia.

*Pacuenia Jesús pijajivi muxujioba itsajivi ata pibisiacuene pexanaeyaexanaeyaniva yabara pelivaisi*

*(Mr 9.42-48; Lc 17.1-2)*

<sup>6</sup> Jesús jumaitsi pijajivijavabelia:

—Pajivi pibisiacuene exanaeyaexanaejitsipa mapitsipejevaxijivixi ataje, tanejumecovënëtsiyajuvënëjiviyo, bajarapajivi Diosojavabelia bitso naneconitsipa. Nexata Dioso ayaicuenia bajarapajivi naneconitsiaexanaejitsipatsi. Nexata pajivi najamatabëxaina pibisiacuene pexanaeyaexanaenexa tanejumecovënëtsivijavabelia, abaxë pibisiacuene exanaeyaexanaenejeva, bevësicëtatsi ibotoxanetojavabelia. Nexata bajarapajivi yamaëya, ibotoxaneto yajava, bexuarecatsi pucaxaneto tuatuajëareca. Bajarapajivi bexuarecatsi bitso penaneconitsiyana Diosojavabelia pibisiacuene itsa exanaeyaexana tanejumecovënëtsiviyajuvënëvi. <sup>7</sup> ¡Dioso bitso naneconitsiaexanaenatsi mapanacuapijivi pibisiacuene pexanaevi! Pibisiacuene vajanacaexanaeyaexanae jamatabëcuenenexa, navita mapanacuataje. Bajarapajamatabëcuene tsitecaponaena pevajënaeyabelia. Nexata pajivi pejamatabëcueneta itsamonae pibisiacuene exanaeyaexana, bajarapajivi bitso Dioso naneconitsiaexanaenatsi.

<sup>8</sup> 'Bajaraxuata panecobeta, panetaxuta ata, pibisiacuene itsa paexaname, panacobe-caucure. Panataxucaucure. Tajë panavecuaxuare. Itsiata xanepana panejonenexa cobemataxucaeya, taxumataxucaeya ata, apo pevereverecaenacuajavabelia. Biji rajane apo xanepanae tsipae anijacobebeje, anijataxubeje ata yajava, panejonenexa apo pevereverecaesotojavabelia. <sup>9</sup> Paneitaxutota panetaejava yabara ata pibisiacuene itsa paexaname, panaitaxutocajure. Itsiata xanepana panejonenexa pacaeitaxutojivimë apo pevereverecaenacuajavabelia. Biji rajane apo xanepanae tsipae anijaitaxutobeje yajava panejonenexa infiernojavabelia, jai Jesús pijajivijavabelia.

*Pacuenia Jesús pijajivi livaisi tsipaeba oveja penaxuabinë pelivaisicuenia yabara pelivaisi*  
*(Lc 15.3-7)*

<sup>10</sup> Jesús jumaitsi pijajivijavabelia:

—Itsamonae mapanacuata bijiaya taeyabiaba mapitsipejevaxijivixi ataje, tanejumecovënëtsijivixi. Saya beveliajamatabëcuenevi taeyabiaba. Pëtsa bajarapacuenia paxamë ata bijiaya pataneme tanejumecovënëtsivi. Bijiaya pëtsa pataneme mapitsipejevaxinëyo ataje, tanejumecovënëtsijiviyo. Tsipaji bajarapamonae ángelevi yajavajinavanapa peyavenonabinexatsi. Bajarapaángelevi taxa Dioso, athëbëtatsia peecaenë, pitabarata jinavanapa. <sup>11</sup> Xanë, Daxitajivi Pematapijinënë, patajopajë tacapanepaenexa daxita Diosovecua naxuabiaya pejinavanapaevimi, jai Jesús pijajivijavabelia.

<sup>12</sup> Jesús icatsia jumaitsi pijajivijavabelia:

—Pacanaëjère mapacueneye. Pebi xainaejitsipa cien ponëbeje oveja. Nexata itsa toyajuvënënxuabijitsipatsi caenë, oveja pexainanë puenetsipa noventa y nueve ponëbeje oveja. Bajaraxuacujinae jaitsipa petonaxuabinëtsi. <sup>13</sup> Xaniajanë pacuenia pacatsipaebijitsiatsi. Bajaraponë itsa caxitajarabijitsipa pijaoveja, petonaxuabinëmitsi, bitso barëyataejitsipa. Nexata noventa y nueve ponëbeje, apo petonaxuabivitsi, pesivajamatabëcuenebarëyajava, matatoxenetsia bitso sivajamatabëcuenebarëya tsipae petonaxuabinëmitsi. <sup>14</sup> Bajara pijinia pacuenia paneaxa ata, athëbëtatsia peecaenë, apo jitsipae pevecuanaxuabinexatsi caejivi ata mapitsipejevaxijivixi ataje, tanejumecovënëtsivi, jai Jesús pijajivibelia.

*Pacuenia Dioso pejumecovënëtsijivi bebarajamatabëcuenexanepana, itsacueniabi atatsi itsajivi, yabara pelivaisi*

*(Lc 17.3)*

<sup>15</sup> Icatsia Jesús jumaitsi pijajivijavabelia:

—Itsanë Dioso pejumecovënëtsinë pibisiacuene papecatoexanaejava, itsa pavënëlivaisitaename, xaniavaetsia payanijobianame caenëjavata. Nexata xaniavaetsia itsa panabarëcuaicuajamëbeje, panabarajamatabëcuene xanepanaenamebeje. <sup>16</sup> Xaniavaetsia itsa apo pacabarëcuaicuajai tsane, nexata Dioso pejumecovënëtsinë pajunatsianame caenë, anijanëbeje ata, paneyajavaponaenexa pibisiacuene papecatoexanaenëjavabelia pemuxujiobinexatsi. Nexata bajaraponëbeje pacajumetaena xaniavaetsia panebarëcuaicuajajava pibisiacuene papecatoexanaenëjavabelia. Bajarapacuenia itsa paexanaename, nexata pacuenia Dioso pejumelivaisibaxutota jumaitsi, paexanaename. <sup>17</sup> Ponë pibisiacuene pacatoexana, itsa apo namuxunaevetsi tsane paneyajavaponaenëbeje ata pemuxujiobijava, nexata daxita Dioso pejumecovënëtsivi penacaetuatsijavata, payanijobianame papibisiacuene pacatoexana. Nexata ponë pibisiacuene pacatoexanaena, daxita Dioso pejumecovënëtsivi muxujiobianatsi. Bajaraponë itsa apo namuxunaevetsi tsane, muxujiobi atatsi Dioso pejumecovënëtsivi, nexata bajaraponë pataename Dioso apo pejumecovënëtsinëcuenia. Panavecuaitavetsianame pepatsiyani va panenacaetuatsijavata, jai Jesús pijajivijavabelia.

<sup>18</sup> Icatsia Jesús jumaitsi pijajivijavabelia:

—Xaniajanë pacuenia pacatsipaebijitsiatsi. Xua jivi paitavetsianame pexanaeyaniva mapanacuataje, bajaraxua Dioso athëbënacuataatsia ata itaveta. Xua jivi patocopat-sianame pexanaenexa mapanacuataje, bajaraxua Dioso ata athëbënacuataatsia tocopata pexanaenexa, jai Jesús pijajivijavabelia.

<sup>19</sup> Icatsia Jesús jumaitsi pijajivijavabelia:

—Pacatsipaebijitsiatsinua mapacueniaje. Mapanacuata paanijanëmëbeje itsa panajamatabëcuenejëpamebeje xua pavajëtsijitsiamëbeje Diosojavabelia, nexata taxa, athëbë-tatsia peecaenë, pacajumecovënëtsianabeje xua pavajëtamebeje. <sup>20</sup> Tsipaji itsajota anijajivibeje, acueyabi ata, nacaetuata, tanejumecovënëtsivi, bajarajota xanë bajarapamonae yajavaecaenajë, jai Jesús pijajivijavabelia.

<sup>21</sup> Nexata Pedro imoxoyolia Jesús. Pedro jumaitsi Jesúsjavabelia:

—Tajatuxanenë, panetsipaebame rabaja. Panejumaitsimë mapacueniaje: “Itsajivi Dioso pejumecovënëtsijivi pibisiacuene itsa pacaexanaena, pajamatabëcaevianame. Barajamatabëcuenexanepanaeya pataename. Itsa pavënëlivaisitaename pibisiacuene papecatoexanaejava, xaniavaetsia payanijobianame caenëjavata. Nexata xaniavaetsia itsa panabarëcuaicuajamëbeje, panabarajamatabëcuene xanepanaenamebeje,” panejamë. ¿Detsa xuabeje pibisiacuene nexanae ata, pibisiacuene netoexanae atanua, jamatabëcaevianajë barajamatabëcuenexanepanaeya tataenexa bajarapajivi? ¿Siete tsaja xuabeje ata? jai Pedro Jesúsjavabelia.

<sup>22</sup> Jesús nexata jumaitsi Pedrojavabelia:

—Siete xuabejenexa yabara apo jumaitsinë. Biji rajane siete pasetentabeje pibisiacuene pacaexanae ata, pibisiacuene pacatoexanae atanua, pajamatabëcaevare barajamatabëcuenexanepanaeya panetaenexa, baitsi cuatrocientos noventa xuabeje ata, jai Jesús Pedrojavabelia.

*Ponë apo jitsipae pebarajamatabëcuenexanepanaenexa itsanëjavabelia yabara pelivaisi*

<sup>23</sup> Jesús livaisi tsipaeba comparacióncuenia pijajivijavabelia. Jumaitsi mapacueniaje:

—Dioso pijanacuataatsia pijajivijavabelia exanaena pacuenia nacuaevetsinë pijajivijavabelia baexana. Nacuaevetsinë jitsipa piamoneyabivitsi pematamotsinexatsi xua amoneyabatsi. <sup>24</sup> Nexata itoroba pijajivi petotsipaebaponaenexatsi daxita pamona amoneyabatsi. Nexata pijajivi tobarëparenatsi ponë bitso ayajava amoneyabatsi, baitsi

millones de pesos piamoneyabinëtsi. <sup>25</sup> Nexata bajaraponë apo xainae pematamotsi-javanexatsi. Nexata nacuaevetsinë itoroba pijajivi. Jumaitsi: “Mara ponë bitso ayajava niamoneyabaje. Nexata pacanajetaxuabianame dajubicuenia itsamonaejavabelia amoneya petonacuenebaponaenexa daxitamatacabijavabelianexa. Daxita pexi, pijava ata, pecobecovë ata yajava, pacanajetaxuabianame. Bajarapacuenia pitsianajë tsiquirijavayo ata taneamoneyabijavamatamo,” jai nacuaevetsinë pijajivijavabelia. <sup>26</sup> Nexata ponë amoneyaba, nacuaevetsinë pitabarata pematabacabëta nucajunua. Pinijicuenia vajëta nacuaevetsinëjavabelia. Jumaitsi: “Nejamatabëcueneevere abaxë. Camatamotsianatsi rabaja daxita xua camoneyabatsi,” jai. <sup>27</sup> Nexata nacuaevetsinë itaxutotsoniatane piamoneyabinëtsi. Nexata nacuaevetsinë jumaitsi piamoneyabinëtsijavabelia: “Daxita rabaja taneamoneyabijavamë, iquinajë. Nexata baja apo nematamotsimë tsane,” jai nacuaevetsinë piamoneyabinëtsijavabelia. Bajaraxuacujinae copata baja penaviatsinexa. <sup>28</sup> Nexata bajaraponë penaviatsinexa, ajena pitsapalia nacuaevetsinë pijabovëcua, caxitarabaxuaba itsanë penajuanacuenebabiabinëbeje nacuaevetsinë pijajava. Bajaraponë nexata jamatabëjumaitsi: “Maponë tsiquirijavayovajëto niamoneyabi ataje, yanijobianajë tanematamotsinexa,” jamatabëjai. Nexata cuibocamisavaetaba. Cuibocuetsaca asaëyata. Jumaitsi bajaraponëjavabelia: “Nematamore taneamoneyabijavamë,” jai. <sup>29</sup> Nexata piamoneyabinëtsi bajaraponë pitabarata pematabacabëta nucajunua. Pinijicuenia vajëta. Jumaitsi: “Nejamatabëcueneevere abaxë. Camatamotsianatsi raja itsiata daxita xua camoneyabatsi,” jai. <sup>30</sup> Itsiata baitsi jane bajaraponë piamoneyabinëtsi apo itaxutotsoniatae. Barëpona baja penaneconitsivi pejebabiabi-bojavabelia penaneconitsiaexanaenexa. Bajarapacuenia pematamotsinexatsi daxita piamoneyabijavatsi. <sup>31</sup> Nexata nacuaevetsinë pijajivi itsa tane bajarapacuenia pexanaejava penajua nacuenebabiabinëbejejavabelia, bajarapamonae bitso najamatabëx-aina. Nexata nacuaevetsinë pijajivi ponalia petsipaebinexa bajaraxua pijatuxanenëjavabelia. <sup>32</sup> Nexata nacuaevetsinë pijajivi itsa tsipaebatsi, itoroba icatsia pijajivi petojunatsinexatsi bajaraponë. Nexata itsa tocapatatsi, nacuaevetsinë jumaitsi bajaraponëjavabelia: “Niajamatabëcuenebejenë baja rovia. Catoiquinatsi rabaja picani taneamoneyabijavamë. Tsipaji pinijicuenia nevajëtame. <sup>33</sup> Pacuenia caitaxutotsoniatanetsi, bajara pijinia pacuenia itaxutotsoniataejitsipame pecaamoneyabinë,” jai nacuaevetsinë. <sup>34</sup> Nexata nacuaevetsinë bitso baraanaepana millones de pesos piamoneyabinëtsijavabelia. Nexata nacuaevetsinë jumaitsi pijajivijavabelia: “Bajaraponë pacaponaeremelia penaneconitsivi pejebabiabi-bojavabelia penaneconitsiaexanaenexatsi. Bajarajota naneconitsiaponaponaena ëpematamoveretsijavabelianexa daxita taneamoneyabijava,” jai nacuaevetsinë, jai Jesús pijajivijavabelia.

<sup>35</sup> Jesús icatsia jumaitsi pijajivijavabelia:

—Bajara pijinia pacuenia paxamë ata taxa, athëbëtatsia peecaenë, pacaexanaena, itsa apo pajamatabëcaevimë tsane panebarajamatabëcuene xanepanaenexa pamonaepacaitacueniaba, jai Jesús pijajivijavabelia.

## 19

*Pacuenia Jesús jivi livaisi tsipaeba penacojobinë pijava pexuabiyaniya yabara pelivaisi (Mr 10.1-12; Lc 16.18)*

<sup>1</sup> Jesús pijajivi pemuxujobicujinae pebarajamatabëcuene xanepanaenexa itsamonaepacacueniabi atatsi, Jesús baja pona Galilea nacuaavecua. Jesús nexata pata Judea nacua-yabelia, Jordánmene itsapanabelia. <sup>2</sup> Jivi ayaibitsaëtoxfaneto pënaponatsi. Bajarajotalia Jesús jamatejemayaexana piavitanevi.

<sup>3</sup> Nexata fariseovi Jesús imoxoyorenatsi. Jamatabëcueneëjëbiaya yanijobatsi. Jesús bijiaya itsa jumeconaviata, peneconitsinexatsi picani. Nexata fariseovi jumaitsi Jesús-javabelia:

—¿Xanepana tsaja penacojobinë pijava pexuabinexa itsacuenejavayo ata yabara? jai fariseovi.

<sup>4</sup> Jesús nexata jumaitsi fariseovijavabelia:

—¿Apo palebimē tsipaji paneyapētaenexa pacuenia Dioso pejumelivaisibaxutota jumaitsi? Pamatacabi Dioso taxuxuaba nacua pexanaejava, bajarapamatacabi Dioso exana pebi, pijava yajava. <sup>5</sup> Nexata Dioso pejumelivaisibaxutota jumaitsi mapacueniaje: “Pebi itsa nacojioba pijavajavabelia, banatsata paxavecua, pena atavecua. Nexata Dioso tane anijajivimibeje becaejivi,” jai Dioso pejumelivaisibaxutota. <sup>6</sup> Nexata Dioso apo tae beanijajivibeje. Becaejivi saya tane Dioso. Bajaraxuata itsanē ata apo bexuabi pijava. Tsipaji Dioso pejamatabēcueneta napitsiaexanatsibeje, jai Jesús fariseovijavabelia.

<sup>7</sup> Nexata icatsia fariseovi jumaitsi Jesúsjavabelia:

—¿Detsa xuajitsia bajayata Moiséspijinē copata penacojiobinē petoyaquinaenexa cuyalatobaxuto pijava pitavetsilivaisi pexuabinexa bajarapacuenia? jai fariseovi.

<sup>8</sup> Jesús nexata jumaitsi fariseovijavabelia:

—Paneajamatabēcuenetajaxae, Moiséspijinē pacatocopata bajarapacuenia paneexanaenexa panexuabinexa panijavajivi. Itsiata baitsi jane Dioso pexanaejivibejejavaveliacujinae, apo tocopatsi picani bajarapacuenia pexanaenexa. <sup>9</sup> Nexata mapacuenia pacatsipaebianatsije. Ponē pijava xuaba, itsanējavabelia bajarapova pevitota pibisiacuene apo vecuaexanae atatsi, bajaraponē naneconita Diosojavabelia pijava pexuabixae. Nexata pijava pexuabinē itsa nacojioba icatsia itsavajavabelia, bajaraponē pibisiacuene exana pevitota. Tsipaji pepo pijavavecua jaita itsava. Dioso cajena abaxē bajaraponē pexuabiva pijavacuenia totanetsi. Ponē ata itsanē pexuabiva pita, bajaraponē ata pibisiacuene exana pevitota. Tsipaji itsanē pijavami pita, pova abaxē Dioso totanetsi itsanē pijavacuenia, jai Jesús fariseovijavabelia.

<sup>10</sup> Nexata Jesús pijajivi jumaitsi Jesúsjavabelia:

—Itsa bajarapacuenia pebi apo tocopatsitsi itaxutojema pijava pexuabinexa, nexata meta baja apo benacojiobi, jai Jesús pijajivi.

<sup>11</sup> Jesús nexata jumaitsi pijajivijavabelia:

—Daxitajivi apo nejumeyapētae tsane xua yabara jumaitsinē. Itsiata nejumeyapētaena pamonaē Dioso jamatabēcueneyavenonatsi. <sup>12</sup> Apo caejamatabēcuenē raja xua yabara pebijivi apo nacojiobi. Itsamonae penabejenaenē naexana. Nexata apo caējēpaetsi penacojiobijava. Itsamonae jivi pejamatabēcueneta bepenabejenaenēcuenia exanatsi. Nexata apo caējēpaetsi penacojiobijava. Itsamonae ēDiosojavabelia pijacuene petonacuenebinexa, apo nacojiobi. Nexata ponē jamatabēcuenecaējēpatsi nacojiobinejeva peponaponaenexa ēDiosojavabelia pijacuene petonacuenebinexa, bajaraponē nejumecovēnētsi, jai Jesús pijajivijavabelia.

*Pacuenia Jesús jumaitsi pejevaxijivixijavabelia yabara pelivaisi*

*(Mr 10.13-16; Lc 18.15-17)*

<sup>13</sup> Jesúsjavaberena itsamonae pejevaxijivixi tocapataponatsi Jesús pecobeta pejayataponaenexa. Petovajētsinexatsinua Diosojavabelia, tocapataponatsi. Nexata Jesús pijajivi itaveta pexi pecapatsivi. Jesús pijajivi jumaitsi pexi pecapatsivijavabelia:

—Pētsa patocapataponame panexi Jesúsjavaberena, jai.

<sup>14</sup> Nexata Jesús jumaitsi pijajivijavabelia:

—Pētsa paitavetame. Pacopare pejevaxijivixi pepatsinexa xanējavaberena. Mapit-sipejevaxijivixije jumeaebinejeva, xaniavaetsia bajumecovēnēta palivaisi tsipaebatsi. Nexata pamonaē jitsipa pejonejava Dioso pijanacuayabetsia, bajara pijinia pacuenia jumeaebinejeva, xaniavaetsia bejumecovēnēta Dioso pejumelivaisi, jai Jesús pijajivijavabelia.

<sup>15</sup> Jesús nexata pecobeta jayatapona pejevaxijivixi, caejiviyo canacujitsia. Bajaraxuacujinae Jesús baja pona bajarapanacuavecua.

*Pacuenia pevējēato, bitso pexainaenē, cuaicuaijai Jesúsjavabelia yabara pelivaisi*

*(Mr 10.17-31; Lc 18.18-30)*

<sup>16</sup> Pevējēato pata Jesúsjavaberena. Nexata pevējēato jumaitsi Jesúsjavabelia:

—Petuxanenë, pexaniajamatabëcuenenëmë. ¿Detsa pitsicuene, pexaniacuene, ex-  
anaenajë taxainaenexa matababi apo peverevereaejava? jai pevëjëato.

<sup>17</sup> Jesús nexata jumaitsi pevëjëatojavabelia:

—¿Detsa xuajitsia: “Pexaniajamatabëcuenenëmë,” nejamë? Ajibi raja itsapebi ata  
pexaniajamatabëcuenenë. Caenë rabaja Dioso pexaniajamatabëcuenenë. Itsiata itsa  
jitsipame nexainaenexa matababi apo peverevereaejava, jumecovënëre pacuenia Dioso  
pejumelivaisita itoroba jivi pejumecovënëtsinexa, jai Jesús pevëjëatojavabelia.

<sup>18</sup> Nexata pevëjëato jumaitsi Jesúsjavabelia:

—¿Detsa palivaisi nexata jumecovënëtsianajë? jai.

Nexata Jesús jumaitsi pevëjëatojavabelia:

—Dioso pejumelivaisibaxutota jumaitsi mapacueniaje: “Pëtsa beyaxuabame jivitonë.  
Pëtsa jaitame itsava nijavavecu. Pëtsa nacobetoxotame. Pëtsa itsamonae pexanaejava  
yabara najumetsënëtsiaya paebame. <sup>19</sup> Axa yaiyataema. Ena ata yaiyataema. Asivamëre  
itsajivi ata pacuenia xamë nijacuata nasivamë,” jai Dioso pejumelivaisibaxutota, jai Jesús  
pevëjëatojavabelia.

<sup>20</sup> Pevëjëato nexata jumaitsi Jesúsjavabelia:

—Daxita rabaja bajarapalivaisianë jumecovënëtajë. ¿Detsa xua netosaica abaxë  
taexanaenexa? jai pevëjëato.

<sup>21</sup> Nexata Jesús jumaitsi pevëjëatojavabelia:

—Itsa jitsipame pepacuene nejamatabëcuenexanepanaejava, neja-  
matabëcuenevitsabijavanua, nexata ponare. Canajetsianame daxita xua xainame.  
Bajarapamatamomi tsicobetsanaename bepejiovi. Nexata bajarapacuenia xainaname  
bitso nexanaejava Dioso pijanacuatatsia. Bajaraxuacujinae nepënaponaename, jai Jesús  
pevëjëatojavabelia.

<sup>22</sup> Nexata pevëjëato itsa jumetane bajarapacuenia Jesús pejumaitsijava, najamatabëx-  
ainaeya baja vecuapona Jesús. Tsipaji pevëjëato daxitacuene bitso pexainaenë. Nexata  
pevëjëato apo jamatabëjumecovënëtsi palivaisi Jesús tsipaeba.

<sup>23</sup> Nexata pevëjëato pecovëta Jesús jumaitsi pijajivijavabelia:

—Xaniajanë pacuenia pacatsipaebijitsiatsi. Ponë bitso daxitacuene pexainaenë,  
tsiayapëbejetsi bitso penajamatabëcuenecopatsinexa Diosojavabelia pecapanepaenex-  
atsi Dioso pijanacuayabetsia. <sup>24</sup> Icatsia matavëjëa pacajumaitsi. Pacuenia camello  
acuenebi pejonejava palutaetoitaxutovojoatualia, bajara pijinia pacuenia bitso pex-  
ainaenë acuenebi tsane pejonejava Dioso pijatomarabetsia, jai Jesús pijajivijavabelia.

<sup>25</sup> Jesús pijajivi itsa jumetane bajarapacuenia Jesús pejumaitsijava, bitso jamatabëc-  
uenabenajaca. Jesús pijajivi jumaitsi Jesúsjavabelia:

—¿Detsa nexata pitsivi panepaena Diosojavabelia bitso pexinaevi ata itsa apo  
panepae tsane Diosojavabelia? jai.

<sup>26</sup> Jesús asaëya naëcota pijajivijavabelia. Jumaitsi pijajivijavabelia:

—Jivi raja apo caëjëpaetsi pijacuata penacapanepaenexa Diosojavabelia. Caenë Dioso  
caëjëpatsi. Dioso raja caëjëpatsi daxitacuene pexanaenexa, jai Jesús pijajivijavabelia.

<sup>27</sup> Nexata Pedro jumaitsi Jesúsjavabelia:

—Patajatuxanenë, paxanë rabaja pacopatajë daxitacuene pataxainaejavami. Nexata  
baja pacapënajinavanapatsi. ¿Detsa xua meta panerajutsiana? jai Pedro Jesúsjavabelia.

<sup>28</sup> Nexata Jesús jumaitsi pijajivijavabelia:

—Xaniajanë pacuenia pacatsipaebijitsiatsi. Pamatacabi daxitacuene pejanajava icat-  
sia naexanaena, xanë, Daxitajivi Pematapijinënë, ecaenajë tronovënëjavatä taevetsinexa  
daxitajivi. Bajarapamatacabi paxamë ata, doce paponëmëbeje patanepënajinavana-  
paevimë, paenaename, pacaenëmë canacujitsia, panijatronota vajanajuaevevtsinexa  
xua evetsianajë. Nexata paxamë paenaename jueznëcuenia panenaneconitsiaex-  
anaenexa pijaneconi pexinaevi. Pananeconitsiaexanaename Israelpijinëmi pexi, doce  
ponëmibeje, pemomoxi. <sup>29</sup> Daxita pamonaë tajamatabëcueneta pueneta pijabomi,  
pematapijivi ata, peyuyapijivi ata, paxa ata, pena ata, pijava ata, pexi ata, pijairanë

ata, Dioso nexata bajarapamonae rajutsianatsi ayaijava bitso pepuenetsijavanēmi mata-toxenetsia. Caejavayomijamatabēcuene tsaponae, rajutsianatsi cien xuabeje tsaponae pevajēnaeyabelia. Rajutsianatsinua matababi apo pevereverecaejava. <sup>30</sup> Pamonae aeconoxae mapamatacabitaje ayaijamatabēcuenevi tanetsi, bajarapamonae itsamatacabi Dioso beveliamatabēcuenevi exanaenatsi. Pamonae pijinia mapamatacabitaje beveliamatabēcuenevi tanetsi, bajarapamonae itsamatacabi Dioso ayaijamatabēcuenevi exanaenatsi, jai Jesús pijajivijavabelia.

## 20

*Pacuenia Jesús livaisi tsipaeba pabi pexainaenē petonacuenebivitsi najēpaeya pematamotsijava pelivaisicuenia yabara pelivaisi*

<sup>1</sup> Icatsia Jesús jumaitsi pijajivijavabelia:

—Aeconoxae Dioso pejumelivaisi comparacióncuenia pacatsipaebianatsi patanejumeyapētaenexamē. Dioso pijajivi pematamotsijava pijanacuatsia, jēpa mapalivaisije. Pabixaneto pexainaenē ponapona. Ajena matababi tsarucaponae, naropota jivi pejaitsinē petonacuenebinexatsi uvavēnjējava peubipabita. <sup>2</sup> Caxitajarabaxuaba baja nexata jivi. Junata petonacuenebinexatsi. Caematacabi matamotsiapaeba caedenario. Jejai nexata bajarapamonae. Nexata itoroba pijapabiabelia petonacuenebinexatsi. <sup>3</sup> Bajaraxuacujinae juameto baja tajē itsa rucaina, a las nueve, naropota icatsia. Taenuba tomara tuatujēta pebijivi, saya jema pejinavanapaevi. <sup>4</sup> Nexata jumaitsi bajarapamonaejavabelia: “Paxamē ata paponaremelia tajapabiabelia. Panetonacuenebianame. Pacamatamotsianatsi raja xaniavaetsia,” jai pabixainaenē. <sup>5</sup> Nexata bajarapamonae ata ponalia petonacuenebinexatsi. Bajaraxuacujinae, matonejeepeatota, junata icatsia itsamonae. Bajarapamonae ata ponalia petonacuenebinexatsi. Bajaraxuacujinae, bejamatabēcuene a las tres, junata icatsia itsamonae. Bajarapamonae ata ponalia petonacuenebinexatsi. <sup>6</sup> Bajaraxuacujinae, caniviyo, bejamatabēcuene a las cinco, pabixainaenē icatsia pona tomara tuatujēareca. Caxitajarabaxuaba icatsia pebijivi, saya jema pejinavanapaevi. Nexata pabixainaenē jumaitsi bajarapamonaejavabelia: “¿Detsa xuajitsia saya daxitamatacabi pajinavanapame panacuenebinejevamē?” jai. <sup>7</sup> Nexata bajarapamonae jumaitsi: “Tsipaji itsajivi ata apo panejunatsi patatonacuenebinexa,” jai. Nexata pabixainaenē jumaitsi: “Paxamē ata paponaremelia tajapabiabelia patanetonacuenebinexamē. Pacamatamotsianatsi raja xaniavaetsia,” jai pabixainaenē. Nexata bajarapamonae jejai. Ponalia petonacuenebinexatsi. <sup>8</sup> Nexata baja juameto itsa tabujuniya, pabixainaenē jumaitsi pijajivitonējavabelia: “Junare baja tanetonacuenebivi. Matamobare baja. Copiaya matamobare pamonae pepacotocaevi pejonevi. Pamonae pepacopiaya pejonevi cotocaevi matamobianame,” jai pabixainaenē pijajivitonējavabelia. <sup>9</sup> Nexata pamonae pepacotocaevi junua a las cinco penacuenebinexa, parena pematamobinexatsi. Nexata caenē canacujitsia matamobatsi caedenario. <sup>10</sup> Nexata daxita pamonae bajayacunua pepacopiaya junua penacuenebinexa, pepacotocaevi juya parena pematamobinexatsi. Nexata bajarapamonae jamatabējumaitsi: “Caedenario meta pematatsēnēa vaxaitsi nacamatamobiana. Tsipaji copiaya vaxaitsi junuatsi vajanacuenebinexa,” jamatabējai bajarapamonae. Itsiata baitsi jane bajarapamonae ata, caenē canacujitsia, matamobatsi caedenario tsaponae. <sup>11</sup> Nexata bajarapamonae penacuenebimatamo baja itsa nota, baraanaepana pabixainaenējavabelia. <sup>12</sup> Jumaitsi bajarapamonae: “Mapamonae cotocaevi pepatsivi, nacueneba saya caehora. Paxanē baja rovia ayaicuenia panacuenebajē. Icotia daxitamatacabi panetsajava. Itsiata mapamonae matamobame pacuenia panematamobame,” jai bajarapamonae. <sup>13</sup> Itsiata baitsi jane pabixainaenē jumaitsi bajara pamonaeayajuvēnēnjējavabelia: “Itsacuenejavayo ata pibisiacuene apo pacaexanaetsi. Patacajunatsijavata patanetonacuenebinexamē, caedenario pacatsipaebatsi patacamatamotsinexa patanetonacuenebimatamomē. Nexata baja bajarapacuenia pacarajutatsi. <sup>14</sup> Panijamatamo baja papitame. Paponare

baja panijabonëjavabelia. Pamona cotocaevi junua tanetonacuenebinexa, bajarapamona ata matamobajë pacuenia pacamatamobatsi. Bajarapacuenia matamobajë pacuenia xanë jitsipajë. <sup>15</sup> Tajapalataxae, netoxanepana pacuenia jitsipajë tarajutsinexa. ¿Pacobecaëbame tsaja bajarapamona ayaijava tarajutsixae? jai pabixainaenë petonacuenebivitsi yajuvënëjavabelia. <sup>16</sup> Bajara pijinia pacuenia Dioso ata, pacuenia jitsipa, exanaena pijajivijavabelia. Pamona mapanacuata ayaijamatabëcuenevi tanetsi, bajarapamona itsamatacabi Dioso beveliamatabëcuenevi exanaenatsi. Pamona pijinia mapanacuata beveliamatabëcuenevi tanetsi, bajarapamona itsamatacabi Dioso ayaijamatabëcuenevi exanaenatsi. Bajarapacuenia Dioso exanaena tsipaji picani jivi ayaibitsaëtoxaneto Dioso junata. Itsiata bajarapamonaeyajuvënëvi, caejiviyobeje saya, Dioso jumecovënëta, jai Jesús pijajivijavabelia.

*Pacuenia icatsia Jesús tajëvelia navajunupaeba pebeyaxuabijavanexatsi yabara pelivaisi*  
(Mr 10.32-34; Lc 18.31-34)

<sup>17</sup> Jesús pona Jerusalén tomarabelia. Nexata Jesús, pijajivi ayaibitsaëto yajava, najetaruca namutua, itsamona yajava. Nexata bajarapamonaevetua ëpijajivi, doce ponëbeje, Jesús junata pimoxoyotsinexatsi. Nexata Jesús pebeyaxuabijavanexatsi, tajëvelia navajunupaeba pijajivijavabelia. Jesús jumaitsi mapacueniaje:

<sup>18</sup> —Panejumetaema. Mara Jerusalén tomarabelia ponatsije. Bajarajotalia xanë, Daxitajivi Pematapijinënë, tanevaetabinexa necanajetsiana sacerdotevi penamatacaitorobivi pecobeyabelia. Necanajetsiana judfovi pecujarubivi pecobeyabelia ata. Nexata xanë neneconitsiana tanebeyaxuabinexa. <sup>19</sup> Bajaraxuacujinae icatsia necanajetsiana itsanacuaverena pepatsivi pecobeyabelia. Bajarapamona necanecaponaena. Nejumatitibabena penaneconitsivi pejumaconitabiabimacata. Bajaraxuacujinae cruzajavabelia necobematabiabarutsiana tatëpaenexa. Itsiata baitsi jane tanebeyaxuabicujinae, acueyabi matababita, icatsia asaënë tsane, jai Jesús pijajivijavabelia tajëvelia penavajunupaebijavata pebeyaxuabijavanexatsi.

*Pacuenia Santiagobeje Juanbeje pena vajëta Jesúsjavabelia pexaniacuene petoexanaenexatsi yabara pelivaisi*  
(Mr 10.35-45)

<sup>20</sup> Santiagobeje Juanbeje paxa pevënë Zebedeo. Nexata bajaraponëbeje pena barëliatsibeje Jesúsjavabelia. Bajarapova pematatabacabëta nucajunua Jesús pitabarata. Vajëta pexaniacuene petoexanaenexatsi. <sup>21</sup> Nexata Jesús jumaitsi bajarapovajavabelia:

—¿Detsa pitsicuene jitsipame tacatoexanaenexa? jai Jesús.

Nexata bajarapova jumaitsi Jesúsjavabelia:

—Pamatacabi daxitacuene evetsianame, tocopatsianame taxënatobeje nemuxuneneta penaecaenexabeje panenajuaevevetsinexa. Itsanë tocopatsianame necujanenia peecaenexa. Itsanë tocopatsianame netsavenononia peecaenexa, jai bajarapova Jesúsjavabelia.

<sup>22</sup> Nexata Jesús jumaitsi Santiagobeje Juanbejevabelia:

—Paxamëbeje apo payapëtaemëbeje xua pavajëcaeyaexanamebeje ena xanëjavaberena. ¿Pacacajëpabeje tsaja panenacaevetsinexabeje papecabebiobiaexanaenexabeje pacuenia xanë nacaevetsianajë tanebejiobiaexanaenexa? ¿Pacacajëpabejenua tsaja panenacaevetsinexabeje papecabeyaxuabinexabeje pacuenia xanë nacaevetsianajë tanebeyaxuabinexa? jai Jesús Santiagobeje Juanbejevabelia.

Nexata Santiagobeje Juanbeje jumaitsibeje:

—Jājā, panecaëjëpabeje cajena, jaibeje.

<sup>23</sup> Nexata icatsia Jesús jumaitsi Santiagobeje Juanbejevabelia:

—Paxaniajamëbeje rabaja. Paxamëbeje pacabebiobiaexanaenabeje pacuenia xanë nebejiobiaexanaena. Pacabeyaxuabianabejenua pacuenia xanë nebeyaxuabiana. Itsiata baitsi jane xua panevajëtamebeje panenaecaenexabeje, itsanë tacujanenia, itsanë tatsavenononia, bajaraxua Dioso apo netocopatsi patacatocopatsinexabeje. Tsipaji

raja taxa Dioso ëpitapetsivinexa abaxë bajaraxua toxaniavaeta, jai Jesús Santiagobeje Juanbejejavabelia.

<sup>24</sup> Nexata diez ponëbeje Jesús pijajivi vënëtane pepëya bajaraxua Santiagobeje Juanbeje Jesúsjavabelia pevajëcaejavabeje. Nexata bajarapamonae jamatabëcuenebaraanaepana Santiagobeje Juanbejejavabelia. <sup>25</sup> Nexata Jesús daxita pijajivi junata. Jesús jumaiti pijajivijavabelia:

—Payapëtaneme rabaja pacuenia nacuaeetsivi exana. Eveta caenacua canacujitsia. Nexata nacuaeetsivi pijajivicuenia eveta pamonaë jinavanapa pevetsinacuanëjava. Nexata bajarapanacuanë pevetsivi ayaijamatabëcuenevi nataeyabiaba. Xua jamatabëitoroba pevetsinacuanëjava pejinavanapaevi petoexanaenexatsi, ajumesaëya itorobabiaba petoexanaenexatsi. <sup>26</sup> Pëtsa paxamë bajarapamonae cuenejëpaëya bajarapacuenia paexaname itsamonaëjavabelia. Biji rajane ponë paxamëyajuvënënë jitsipa ayaijamatabëcuenenë penaexanaenexa daxita paxamëvecua, bajaraponë daxita paxamë bepanijajivitonëcuenia bepacayavenonabiaba. <sup>27</sup> Ponë paxamëyajuvënënë jitsipa penaexanaenexa papecanamatacaitorobinënexa, bajaraponë daxita paxamë bepanijajivitonëcuenia bepacayavenonabiaba. <sup>28</sup> Tsipaji rabaja xanë ata, Daxitajivi Pematapijinë atanë, apo patajopaenë jivi taneyavenonaenexa. Biji rajane xanë patajopajë tayavenonaenexa daxitajivi. Patajopajë tasivatëpaenexa jivi ayaibitsaëtoxaneto pibisiacuenepexanaeconimi taneconimatamotsinexa, jai Jesús pijajivijavabelia.

*Pacuenia Jesús itaxutoxanepanaëyaexana bitso pitaxutotsëcënaenëbeje, apo petaenëbeje, yabara pelivaisi*

*(Mr 10.46-52; Lc 18.35-43)*

<sup>29</sup> Jesús, pijajivi yajava, pitsapa Jericó tomaravecua. Nexata jivi ayaibitsaëto pënaponatsi. <sup>30</sup> Panamutojava Jesús najetaruca, bajarapanamutojavata ecabeje bitso pitaxutotsëcënaenëbeje, apo petaenëbeje. Nexata bajaraponëbeje itsa jumetanebeje bajarapanamutua imoxoyo Jesús penajetarucaëjava, vavajaiibeje tsecae.

—¡Jesús, Davidpijinë pemomomë, paneitaxutotsoniataemabeje! jaibeje tsecae pitaxutotsëcënaenëbeje.

<sup>31</sup> Jivi picani jumeitavetatsibeje pemoyanexabeje tsecae. Itsiata biji bitsoyo orijibia vavajaiibeje tsecae.

—¡Jesús, Davidpijinë pemomomë, paneitaxutotsoniataemabeje! jaibeje tsecae Jesúsjavabelia.

<sup>32</sup> Nexata Jesús muxunanucojopa. Junata pitaxutotsëcënaenëbeje. Jesús jumaiti bajaraponëbejejavabelia:

—¿Detsa xua pajitsipamebeje patacaexanaenexabeje? jai.

<sup>33</sup> Nexata bajaraponëbeje jumaitisibeje Jesúsjavabelia:

—Jesús, pajitsipajëbeje pataitaxutoxanepanaëjavabeje, jaibeje tsecae.

<sup>34</sup> Nexata Jesús itaxutotsoniatane bajaraponëbeje. Jesús itaxutojayata bajaraponëbeje. Bajarajota caecuenia bajaraponëbeje itaxutoxanepanabeje baja. Nexata bajaraponëbeje Jesús pepëta naponabeje.

## 21

*Pacuenia Jesús pata Jerusalén tomarata yabara pelivaisi*

*(Mr 11.1-11; Lc 19.28-40; Jn 12.12-19)*

<sup>1</sup> Jesús baja pijajivi barëimoxoyotanajetaruca Jerusaléntomara. Barëpata baja Betfagé tomarata. Patsutojumata nubena olivonaenë, bajarapatsutoyenepanata eca Betfagétomara. Nexata Betfagé tomarata Jesús jumaiti pijajivitonëbejejavabelia mapacueniaje:

<sup>2</sup> —Paponarebeje mapatomarayo ecaliajejavabelia. Bajarajotalia, ajena papatsiaremeliabeje, pataenutsianamebeje burro pecëtanutsinëtsi, pexënatonëyo yajava. Paisinaenamebeje bajarapaburrobeje. Payamaëyacarenamëbeje tsane. <sup>3</sup> “¿Detsa xuajitsia burrobeje paisinamebeje?” itsa pacajaiibeje tsane itsajivi, nexata pajumaitsimëbeje

tsane: “Vajatuxanenë raja namatavenona. Aeconoxae raja icatsia canaviatsiarena,” pajamëbeje tsane, jai Jesús pijajivitonëbejejavabelia.

<sup>4</sup> Bajarapacuenia Jesús ita jumaiti, tocopiapatatsi jane baja pacuenia Diosojumepaebinëmi profetanë bajayata tajëvelia yaquina Jesús pepatsijavanexa yabara Jerusalén tomarata. Jerusalén tomarata Jesús pepatsijavanexa yabara, profetanëmi bajayata peyaquinaelivaisita jumaiti mapacueniaje:

<sup>5</sup> Pajumaitsimë tsane Jerusalén tomarapijivijavabelia: “Pataename pepo paneevetsinë paxamëjavaberena penajetarucaejava. Beveliajamatabëcuenenëcuenia najetarucaena. Pejanaburroyota yapatanajetarucaena,” pajamë tsane Jerusalén tomarapijivijavabelia,

jai bajayata tajëvelia profetanëmi peyaquinaelivaisita Jerusalén tomarata Jesús pepatsijavanexa yabara.

<sup>6</sup> Nexata Jesús pijajivitonëbeje liabeje. Jumecovënëtabeje pacuenia Jesús itorobatsibeje. <sup>7</sup> Yamaëya carenabeje burro, pexënatonëyo yajava. Nexata bajarapaburrobeje Jesús pijajivi tsijumajeba pijacama,” pajamë tsane Jerusalén tomarapijivijavabelia, jai bajayata tajëvelia profetanëmi peyaisajumavelia penaxatabijavanë. Jesús yanajetaruca burrota. <sup>8</sup> Panamutuarena Jesús najetaruca, bajarapanamutuarena jivi ayaibitsaëtoxoneto, pijacamisajumavelia penaxatabijavanë, Jesús pevajënaeya namutua yerequejebapona. Itsamonae naemaxërananë, pebaxu yajava, ucubaba. Nexata namutua Jesús tsivajënaeitabëtsiaya jebaponatsi yaiyataeya pecopiapitsinexatsi. <sup>9</sup> Jesús penajetarucajavata jivi ayaibitsaëtoxoneto Jesús pevajënaeya namataxainaeya najetarubena. Itsabit-saëtoxoneto Jesús pecovëya cotocaevanajetarubena. Daxita bajarapamonae vavajai tsanajetarubena. Jumaiti tsanajetarubena:

—¡Dioso yavenonaenatsi maponëje, pepo nacuaevetsinëmi Davidpijinë pemomo! ¡Dioso yavenonaenatsi maponë najetarucaje nacua pevetsinënexa Dioso pejamatabëcueneta! Nexata vaxaitsi pexaniajamatabëcuene rajutatsi Diosojavabelia, jai tsanajetarubena bajarapamonae.

<sup>10</sup> Nexata Jesús ita pata Jerusalén tomarata, daxita Jerusalén tomarapijivi jamatabëcuenenabenajaca. Nexata nayanijoba.

—¿Detsa meta maponë najetarucaje? najai bajarapamonae.

<sup>11</sup> Nexata jivi jumaiti:

—Jesús ra manajetarucaje, Diosojumepaebinë profetanë. Galilea nacuata peecae-tomara, Nazaret tomarapijinë, jai bajarapamonae.

*Pacuenia Jesús Jerusalén tomarata templovecua pitsapaeyaexana pecanajetabiabivi, pecomuacabiabivinua, yabara pelivaisi*

*(Mr 11.15-19; Lc 19.45-48; Jn 2.13-22)*

<sup>12</sup> Jesús ita pata Jerusalén tomarata, joneya temploboyalia. Nexata templobota Jesús tane pecanajetabiabivi, pecomuacaevinua. Nexata daxitaiti:

—Jesús ra manajetarucaje, Diosojumepaebinë profetanë. Galilea nacuata peecae-tomara, Nazaret tom bajarapamonae Jesús pitsapaeyaexana templovecua. Palata pecambiababiabivi ata pijamesanëmi Jesús topënëyorobajaraba. Ucucu pecanajetabiabivi ata penabiabijavanëminua topënëyorobajaraba.

<sup>13</sup> Jesús jumaiti bajarapamonaejavabelia:

—Dioso baja cajena pejumelivaisibaxutota mapatemplobo yabara tajëvelia jumaiti mapacueniaje: “Tajabo raja jivi xanëjavaberena penavajëcaebo tsane,” jai Dioso pejumaitisjava Dioso pejumelivaisibaxutota. Itsiata baiti jane paxamë yamaxëitojorobiaya panenacobetoxotsinexa panacaetuatabiabame mapabotaje, jai Jesús templobota pecanajetabiabivijavabelia.

<sup>14</sup> Bajarajota templobota Jesús imoxoyorenatsi pitaxutotsēcēnaevi, pejayujayunaev-inua. Nexata Jesús bajarapamonae xanepanaeyaexana. <sup>15</sup> Templobota nubena sacerdotevi. Nubena judíovi pecujarubivina. Bajarapamonae taenubena Jesús pitaxutoxanepanaeyaexanaejava pitaxutotsēcēnaevi. Taenubenanua Jesús pexanepanaeyaexanaejava pejayujayunaevi. Jumetaenubenanua pejevaxi templobota pevavajaijavata pejumaitsijava Jesús yabara: “¡Dioso yavenonaenatsi maponēje, pepo nacuaevetsinēmi Davidpijinē pemomo!” pejaijava Jesús yabara. Bajaraxuata sacerdotevi baraanaepanatsi Jesús. Judíovi pecujarubivi ata baraanaepanatsi Jesús.

<sup>16</sup> Nexata bajarapamonae jumaiti Jesúsjavabelia:

—¿Tsipaji apo jumetaemē mapapejevaxi xamē yabara pejumaitisaponaejavaje? ¿Apo necajumeitavetsi? jai.

Nexata Jesús jumaiti bajarapamonaejavabelia:

—Jājā. Jumetaniiji picani. Itsiata apo jumeitavetsinē. ¿Paxamē tsipaji Dioso pejumelivaisibaxuto apo palebimē paneyapētaenexa pacuenia tajēvelia jumaiti xanē yabara bajarapapejevaxi pevavajaijavanexa? Dioso pejumaitisijava xanējavaberena, tajēvelia Dioso pejumelivaisibaxutota jumaiti mapacueniaje:

Pejevaxi, mitoapaenacuetoxí ata, naxēanaeyaexanaename penaxēanaejavata xamējavaberena pecajumaitsinexa: “Ayaijamatabēcuenenēmē bitso,” pecajainexa, jai Dioso pejumelivaisibaxutota xanējavaberena Dioso pejumaitisijava. Bajaraxuata mapapejevaxije jumaiti bajarapacuenia, jai Jesús sacerdotevijavabelia, judíovi pecujarubivijavabelia ata.

<sup>17</sup> Nexata baja Jesús bajarapamonaevecua pona. Jerusalén tomaravecua pitsapa. Navialia Betania tomarayojavabelia. Nexata Jesús Betania tomarayota majita.

*Pacuenia Jesús bijataenuta higeranae piacuaijibixae yabara pelivaisi*  
(Mr 11.12-14, 20-26)

<sup>18</sup> Jesús pijajivi Betania tomarata pebarēmajitsicujinae, meravia pitsijavata, bajayacunua, Jesús pijajivi barēlia icatsia Jerusalén tomarabelia. Jesús nexata namutua penajetarucavajavata, piajani. <sup>19</sup> Jesús nexata taenuta higeranae namuto muxuneneta. Nexata Jesús imoxoyolia higeranae, pecuai itsa xaina, pexaenexa. Pecuai itsiata apo xinae higeranae. Ēpebaxu saya tsanucae. Bajaraxuata nexata Jesús jumaiti higeranaejavabelia:

—¡Xamē baja apo nacuaitsimē tsane! jai Jesús.

Bajarapacuenia Jesús pejumaitisijavata, bepíjia higeranae tēpanajereca yatabutopaya. <sup>20</sup> Nexata Jesús pijajivi itsa tane bajaraxua, jamatabēcuenenabenajaca. Nexata Jesús pijajivi nayanijoba.

—¿Detsa pacuenia maponae bepíjia tēpanajerecaje? najai.

<sup>21</sup> Nexata Jesús jumaiti pijajivijavabelia:

—Xaniajanē pacuenia pacatsipaebijitsiatsi. Itsa pajamatabējumaitsimē tsipae Dioso yabara: “Dioso nejumecovēnētsiana xua vajētsianajē Diosojavabelia,” itsa pajamatabējamē tsipae, nexata paxamē ata pacacaejēpaejitsipā paneexanaenexa pacuenia exanajē mapahigeranaejavabeliaje. Itsiata ēbajarapacuenē paneexanaenexa, apo pacacaejēpae tsipae. Pematatsēnēa itsacuenejavanēnua paneexanaenexa, pacacaejēpaejitsipā. Nexata itsa pajumaitsimē tsipae mapatsutojavabelia ataje: “Natixire majotavecuaje. Pucaxanetojavabelia jopare,” itsa pajamē tsipae, pacajumecovēnētsipa. Nexata mapatsuto ataje paneitorobicuenia pacajumecovēnētsipa. <sup>22</sup> Nexata daxitacuene xua pavajētsianame Diosojavabelia, pasivajamatabējumaitsimē tsane mapacueniaje: “Xua vajētajē Diosojavabelia, pepacuenē Dioso nejumecovēnētsiana,” pasivajamatabējamē tsane. Nexata xua pavajētsianame Diosojavabelia, Dioso pacajumecovēnētsiana, jai Jesús pijajivijavabelia.

*Pacuenia Jesús caējēpatsi daxitacuene pexanaenexa yabara pelivaisi*  
(Mr 11.27-33; Lc 20.1-8)

<sup>23</sup> Jesús junua temploboyalia. Nexata templobota Jesús jivi livaisi tsipaeba. Nexata templobota Jesús imoxoyorenatsi sacerdotevi, judíovi pijaancianovi yajava. Nexata bajarapamonae jumaiti Jesúsjavabelia:

—¿Jipatsa pejamatabécueneta pecanajetabiabivi, pecomuacaevinua, capitsapame matemplobopanabovécuaje? jai bajarapamonae Jesúsjavabelia.

<sup>24</sup> Nexata Jesús jumaiti bajarapamonaejavabelia:

—Xanë copiaya caejumeyo pacayanijobianatsi. Itsa paxamë panejumecanaviatsianame, nexata xanë juya pacatsipaebianatsi ponë nitoroba taexanaenexa bajarapacuenene. <sup>25</sup> ¿Jipatsa jane pejamatabécueneta Juanpijinë jivi bautisabaponapona? ¿Dioso tsaja pejamatabécueneta? Itsa jume, ¿jivi tsaja pejamatabécueneta? jai Jesús bajarapamonaejavabelia.

Nexata epamonae nabarécuaicuaijai. Najumaiti:

—¿De meta pacuenia jumecanaviatsianatsi? Vaxaiti ita jumai tsipaetsi: “Dioso raja pejamatabécueneta,” ita jai tsipaetsi, nexata Jesús nacajumai tsipae: “¿Detsa nexata xuajitsia apo pajumecovënëtsimë Juanpijinë pepaebilivaisi?” nacajai tsipae. <sup>26</sup> “Jivi raja saya pejamatabécueneta Juanpijinë jivi bautisabaponapona,” ita jai tsipaetsi, nexata jivi belia nacabeyejebijitsipa. Bajarapacuenia nacabeyejebijitsipa tsipaji raja Juanpijinë yabara daxitajivi sivajamatabëjumaiti: “Juanpijinë raja pepacuenene Dioso jumepaebinëmi,” sivajamatabëjai, najai sacerdotevi, judíovi pijaancianovi yajava.

<sup>27</sup> Nexata saya bajarapamonae jumaiti Jesúsjavabelia:

—Apo payapëtaenë ponë Juanpijinë itorobatsi jivi pebautisabaponaenexa, jai.

Nexata Jesús jumaiti bajarapamonaejavabelia:

—Nexata xanë ata apo pacatsipaebi tsanetsi ponë nitoroba taexanaenexa bajarapacuenene, jai Jesús.

*Pacuenia Jesús jivi livaisi tsipaeba anijanëbeje pexënatobeje pexainaenë pelivaisicuenia yabara pelivaisi*

<sup>28</sup> Jesús icatsia jumaiti sacerdotevijavabelia, judíovi pijaancianovijavabelia ata:

—Panejumecanaëjësianame palivaisi aeconoxae pacatsipaebijitsiatsi. Pebi xaina anijanëbeje pexënatobeje. Nexata pexënatojavabelia jumaiti: “Taxënato, ajena netonacuenebianame tajauvabacabota,” jai pexënatojavabelia. <sup>29</sup> Nexata bajaraponë paxajavabelia jumaiti: “¡Jume! ¡Apo jitsipaenë tanacuenebijava! jai. Itsiata xuacujinae bajaraponë icatsia najamatabëxaina. Nexata jamatabëjumaiti: “Xanë baja rovia pibisi-ajamatabëcuene najamatabëxainajë. Nexata baja ponajë taxa tatonacuenebinexa,” jamatabëjai. Naropota baja penacuenebinë. <sup>30</sup> Bajaraxuacujinae pexënatobeje pexainaenë pona icatsia itsanë pexënatojavabelia. Bajaraponëjavabelia ata jumaiti: “Taxënato, ajena netonacuenebianame tajauvabacabota,” jai pexënatojavabelia. Nexata jejai itajara pexënato. Itsiata apo pona. <sup>31</sup> ¿Detsa ponë bajaraponëbejeyajuvënënë paxa jumecovënëta? jai Jesús bajarapamonaejavabelia.

Nexata bajarapamonae jumaiti Jesúsjavabelia:

—Copiata ponë paxa itorobatsi, apo jejai ata, itsiata paxa tonacueneba, bajaraponë paxa jumecovënëta, jai.

Nexata Jesús jumaiti bajarapamonaejavabelia:

—Xaniajanë pacuenia pacatsipaebijitsiatsi. Bajara pijinia itsane pamona copabiana pibisiacuene pexanabiabijavami, pamona najamatabécuenepënëyorotsiana Diosojavabelia. Impuestomatamo gobierno pejamatabécuenene petomatamoyanijobabiabivimi ata jonena Dioso pijanacuayabetsia ita najamatabécuenepënëyorota Diosojavabelia. Petiriavi palata pepitsinexa pevitota pibisiacuene pexanabiabivimi ata jonena Dioso pijanacuayabetsia ita najamatabécuenepënëyorota Diosojavabelia pibisiacuene pexanabiabijavamivecua. Itsiata baitsi jane paxamë apo pajonemë tsane. <sup>32</sup> Juanpijinë jivibautisabinë patajopa Dioso pejumelivaisi papecatsipaebinexa panenajamatabécuenene

pēnēyorotsinexa pibisiacuene paneexanabiabijavavecua. Itsiata paxamē apo pajumecovēnētsimē bajarapalivaisi. Itsiata bajarapalivaisi jumecovēnēta impuestomatamo gobierno pejamatabēcuene pematamoyanijobabiabivi. Petiriavi palata pepitsinexa pevitota pibisiacuene pexanabiabivimi ata jumecovēnēta bajarapalivaisi. Paxamē patae atamē bajarapamonae pejumecovēnētsijava, itsiata apo panajamatabēcuene pēnēyorotsimē panejumecovēnētsinexa Dioso, jai Jesús bajarapamonaejavabelia.

*Pacuenia exana pijamatabēcuenebejevi, itsanē pijauvacababo petoevetsivi, yabara pelivaisi (Mr 12.1-12; Lc 20.9-19)*

<sup>33</sup> Icatsia Jesús jumaitsi sacerdotevijavabelia, judíovi pijaancianovijavabelia ata:

—Xaniavaetsia panemuxunaevere mapalivaisije. Pijaira pexainaenē pijairata uba ayaibacaboboxaneto uvavēnējava. Bajaraxuacujinae pijaira matatoyorotsia, ibopanaxanetonē mataropotsia pefaratsijavata, yacaranata. Bajarapayacaranatsijava athēbēabetsia apia jivitonē matatoxenetsia. Bajaraxuacujinae irata mēthē cueyeta. Nexata pecueyetsimēthējavata exana uvacuaibarēmene pecayujucabiabijavanexa. Bajaraxuacujinae pijauvacababo tuatuajēta exananuta piapiabotsia, penacuaitsimatacabi itsa tonaveretatsi, athēbēyo pevetaabiabeaenexa pijauvacababo.

'Nexata bajaraponē itsamonae evetsiaexana pijauvacababo. Uvacababo pexainaenē jumaitsi petoevetsivitsijavabelia: "Pamatacabi cuainaveretsiana, natsicobetsatsianatsi. Pamatacabi raja cuainaveretsiana, tajajivitonē itorobiarenajē xua panetotsatsianame tanetopitsinexa," jai uvacababo pexainaenē petoevetsivitsijavabelia. Nexata uvacababo pexainaenē tajē nacuaayabelia pona. <sup>34</sup> Itsa baja uvacababo pexainaenē yapētane pecopiapatsijava uvacuai penaveretsimatacabi penotsinexa, nexata uvacababo pexainaenē itoroba pijajivi. Itoroba petoevetsivitsijavabelia petsicobetsatsinexatsi. <sup>35</sup> Nexata uvacababo pexainaenē pijajivi uvacababo petoevetsivitsi totaicatsi. Caenē bajarapamonaejajuvēnēnē toconibabiatsi. Itsanē pepacuene tobeyaxuabatsi. Itsanē ibotonēta totseconatsi. <sup>36</sup> Nexata uvacababo pexainaenē icatsia itsabitsaēto pijajivi itorobalia. Bajara icatsia pacuenia exana uvacababo pevetsivi.

<sup>37</sup> 'Nexata uvacababo pexainaenē itoroba icatsia pexēnato jane baja. Uvacababo pexainaenē jamatabējumaitsi: "Netoyaiyataena meta taxēnato," jamatabējai. <sup>38</sup> Itsiata baitsi jane uvacababo petoevetsivitsi uvacababo pexainaenē pexēnato ata apo toyaiyataetsi. Itsa tane uvacababo pexainaenē pexēnato, bajarapamonae najumaitsi: "Mara ponēje paxa pevēnamuto paxa pijauvacababo pitsipaje. Naxanitsia. Beyaxuabatsi. Nexata raja vaxaitsi vajauvacababo tsane," najai uvacababo petoevetsivitsi. <sup>39</sup> Nexata icatsia uvacababo pexainaenē pexēnato ata tovaetabatsi. Caponaliatsi bajarapauvacababo pēnēyabelia. Nexata uvacababo pexainaenē pexēnato ata bajarapacuenia icatsia tobeyaxuabatsi, jai Jesús.

<sup>40</sup> Nexata bajarapalivaisi yabara Jesús yanijoba sacerdotevijavabelia, judíovi pijaancianovijavabelia ata. Jesús jumaitsi:

—Uvacababo pexainaenē itsa patsiarena, ¿de tsaeta xua exanaena uvacababo petoevetsivitsijavabelia? jai Jesús bajarapamonaejavabelia.

<sup>41</sup> Nexata bajarapamonae jumaitsi Jesúsjavabelia:

—Pijauvacababo raeta pexainaenē apo itaxutotsoniatae tsane. Nexata verebiabiana bajarapamonae pibisiacuene pexanaevi. Nexata icatsia itsamonae evetsiaexanaena bajarapauvacababo. Nexata uvacuai penaveretsimatacabi bajarapamonae itsa nota, tsicobetsatsianatsi pacuenia baja tocaējētatsi uvacababo pexainaenē perajutsinexatsi, jai bajarapamonae.

<sup>42</sup> Nexata Jesús jumaitsi bajarapamonaejavabelia:

—Payapētaneme rabaja pacuenia Dioso pejumelivaisibaxutota tajēvelia jumaitsi xanē yabara. Iboto pelivaisicuenia Dioso pejumelivaisibaxutota jumaitsi xanē yabara mapacueniaje:

Paiboto itsamonae boexanaevi naitaxutojematabuatsiana petsitaabejexaetsi itajara, bajarapaiboto itsanē pitsiana. Nexata bajarapaibotota xaniavaetsia nayaētsiana

botabu daxita itsaibo matatoxenetsia. Vajatuxanenē Dioso raja exanaena bajarapacuenē. Nexata bitso nacatsita pexaniacuene tsane bajarapacuenē, jai tajēvelia Dioso pejumelivaisibaxutota xanē yabara.

ʼBajarapacuenia tajēvelia Dioso pejumelivaisibaxutota itsa jumaitsi, paxamē apo patanejumecovēnētsijavanexamē yabara jumaitsi. Dioso taneitapetsijava daxitajivi tacapanepaenexa yabara ata jumaitsi. <sup>43</sup> Nexata pacuenia uvabacabo pexainaenē icatsia itsamonae evetsiaexanaena, bajara pijinia pacuenia Dioso exanaena paxamējavabelia. Xua picani Dioso pacaevetsiaexana, copiarucaena. Nexata juya itsamonae Dioso evetsiaexanaena bajaraxua, pamonaē xaniavaetsia jumecovēnēta Dioso pitorobicueniatsi. <sup>44</sup> Pamonaē apo nejumecovēnētsi Dioso pexēnatocuenenē, bajarapamonaē bitso bejamatābējiobi tsane apo tanejumecovēnētsixae. Pacuenia ibotojumata pefirapecaejivi, itsa tsapatecatsi, pevixae bitso yanabejiobita, bajara itsane. Pamonaē naneconitsiaexanaenajē, bajarapamonaē pepacuenē naxuabiana daxitamatacabijavabelianexa. Pacuenia iboto pematacēnēbinētsi apo asaē, bajara itsane, jai Jesús bajarapamonaējavabelia.

<sup>45</sup> Sacerdotevi penamatacaitorobivi, fariseovi yajava, itsa jumetane bajarapacuenia Jesús pejumaitsiyava, bajarapamonaē jamatabējumai tsenae: “Vaxaitsi yabara raeta jumaitsi,” jamatabējai tsenae bajarapamonaē. <sup>46</sup> Nexata picani bajarapamonaē Jesús jamatabēvaetabatsi. Itsiata bajarapamonaē jamatabējumaitsi: “Bajaraponē jivi tanetsi Diosojumepaebinēcuene. Nexata nacaitsacueniabijitsipa vaxaitsi itsa vaetabijitsipatsi maponēje,” jamatabējai tsenae bajarapamonaē. Bajaraxuata Jesús apo vaetabitsi.

## 22

*Pacuenia Jesús jivi livaisi tsipaeba penacasabifiesta pexanaenē pelivaisicuenia yabara pelivaisi*  
(Lc 14.15-24)

<sup>1-2</sup> Jesús icatsia livaisi tsipaeba sacerdotevijavabelia, judíovi pijaancianovijavabelia ata. Bajarapacuenia Jesús tsipaeba bajarapamonaē peyapētaenexa pacuenia itsamatacabi itsijitsia, pamatacabi Dioso pijajivi evetsiana. Jesús jumaitsi mapacueniaje:

—Pepo nacuaevetsinē fiesta exana pexēnato petonacasabifiestanexatsi. <sup>3</sup> Nexata nacuaevetsinē jumaitsi pijajivijavabelia: “Pamonaē baja tajēvelia junatājē, patsipaebare baja tanetopatsinexarena fiestanexa jane baja,” jai nacuaevetsinē pijajivijavabelia. Pijajivi baja nexata pona petsipaebinexa. Itsiata pejunatsivi apo jitsipae peponaejava. Nexata nacuaevetsinē pijajivi naviabarena petsipaebinexa pijatuxanenējavabelia. <sup>4</sup> Nexata nacuaevetsinē itsamonae icatsia pijajivi itorobalia pesivaponaenexalia. Nacuaevetsinē jumaitsi pijajivijavabelia: “Pajumaitsimē tsane tajunatsivijavabelia: ‘Veretejeba rabaja panexaejavanexa. Beyaexana rabaja baca penasitsivi, becerro yajava. Daxita rabaja veretejeba panenabaninexa. Naxanitsia. Daxita pina paponaremelia,’ pajamē tsane tajunatsivijavabelia,” jai nacuaevetsinē pijajivijavabelia. <sup>5</sup> Itsiata baitsi jane bajarapamonaē icatsia sivaponaē atalia, nacuaevetsinē pejunatsivi apo jejai. Pejunatsiviyajuvēnēnē itsanē pona pijapabianējavabelia. Itsanē pijinia pona penavijatsinexa. <sup>6</sup> Itsamonae nacuaevetsinē pijajivi taicatsi. Bejiobiaexanatsi pibisiacuenia. Beyejebatsi baja belia. <sup>7</sup> Bajaraxuata nexata nacuaevetsinē bitso baranaepana pejunatsivimijavabelia. Nexata nacuaevetsinē itorobalia vajabitsaēvi pebenexa pamonaē tobeyejebatsi pijajivi. Itorobanua pijatomaranēmi ata petotajuitsinexa. <sup>8</sup> Bajaraxuacujinaē nacuaevetsinē icatsia pijajivijavabelia jumaitsi: “Daxitacuene baja picani veretejebiaexanajē taxēnato penacasabifiestanexa. Itsiata baitsi jane tajunatsivimi apo nepotopsirena. <sup>9</sup> Paponaremelia pinijicallexanetonējavabelia. Nexata daxita pamonaē pacaxitajarabaponaename bajarapacallexanetonējava, pajunataponaename taxēnato penacasabifiestajavaberena pepatsinexa,” jai nacuaevetsinē pijajivijavabelia. <sup>10</sup> Nexata nacuaevetsinē pijajivi ponalia. Najetarubena callexanetonējava. Junataponā daxita

pamonae caxitajarabapona. Junatapona piamatabëcuenebejevi, pejamatabëcuenexanepanaevi ata. Nexata bajarapamonae barëpona fiesta pexanaebojavabelia. Nexata pabota fiesta exana, vënëca jivi.

<sup>11</sup> Nexata nacuaevetsinë jonena bajarapaboyarena petaenexa petopatsivitsi. Daxita pamona topatatsi, jumapata xua banaxataba itsa pona penacasabifiestajavabelia. Nexata nacuaevetsinë taenuta bajarajota itsanë, saicayavirijava penaxatatsinë. Apo naxatatsi xua naxataba daxita. <sup>12</sup> Nexata nacuaevetsinë jumaiti bajaraponëjavabelia: “¿Detsa xuajitsia najunuame apo nenaxatatsinë pacuenia daxita naxataba penacasabifiestajavaberena penajonevi?” jai nacuaevetsinë. Nexata bajaraponë moya nuca. <sup>13</sup> Nexata nacuaevetsinë jumaiti mesa pevetsivijavabelia: “Maponë pataxucëreje. Pacobecëre yajava. Paxuaremelia bopënëyabelia, pitaquirijavabelia. Bajarajotalia nuena. Navonosiniana bitso penavixaetaexae,” jai nacuaevetsinë. <sup>14</sup> Pacuenia fiesta pexanaenë ayaibitsaëtoxaneto junatsi ata, caejiviyobeje saya topatatsi, bajara pijinia itsi Dioso pejunatsivi ata. Dioso picani ayaibitsaëtoxaneto junata pijajivinexa. Itsiata saya caejiviyobeje jumecovënëtatsi, jai Jesús sacerdotevijavabelia, judíovi pijaancianovijavabelia ata.

*Pacuenia Jesús jamatabëcueneëjëbiaya yanijobatsi impuestomatamo pematamotsijava yabara pelivaisi*

*(Mr 12.13-17; Lc 20.20-26)*

<sup>15</sup> Fariseovi nacaetuata penabarëcuaicuaijainexa. Bajarapamonae najamatabëcuenejëpa Jesúsjavabelia jamatabëcueneëjëbiaya peyanijobinexa. Nexata Jesús bijiaya itsa jumecanaviata, Jesús picani peneconitsinexatsi nacuaevetsinëjavabelia. <sup>16</sup> Nexata fariseovi itoroba pijajivi, Herodes pijajivi yajava, Jesúsjavabelia jamatacueneëjëbiaya livaisi peyanijobinexa. Nexata fariseovi pijajivi, Herodes pijajivi yajava, Jesúsjavabelia jamatabëcueneëjëbiaya jumaiti:

—Jesús, payapëtaniji cajena nexaniajaicuene, xua yabara tsipaebabiabame livaisianë. Pexaniajaicuene tsipaebabiabame pacuenia Dioso jitsipa jivi petojinavanapaenexatsi. Petuxanevi ata xamë apo cujunavimë. Apo auramë livaisi netsipaebabijava. Nexata daxitajivi najëpaeya livaisi tsipaebabiabame. <sup>17</sup> Panetsipaebare pacuenia najamatabëxainame mapacuene yabaraje. ¿Xanepana tsaja vajamatamotsinexa impuestomatamo Romanonacua pepo pevetsinëjavabelia? Itsa jume, ¿apo xanepanae tsaja vajamatamotsinexa? jai bajarapamonae jamatabëcueneëjëbiaya Jesúsjavabelia.

<sup>18</sup> Itsiata baitsi jane Jesús jamatabëcueneyapëtane bajarapamonae jamatabëcueneëjëbiaya peyanijobijavatsi peneconitsinexatsi picani. Nexata Jesús jumaiti bajarapamonaejavabelia:

—Paneyamaxëitojorobivi, ¿detsa xuajitsia jamatabëcueneëjëbiaya paneyanijobame?

<sup>19</sup> Panetsitajëre pitsipalatanëyota pamatamotabiabame impuestomatamo, jai Jesús bajarapamonaejavabelia.

Nexata bajarapamonae Jesús tocaponarenatsi palatanëyo. <sup>20</sup> Jesús itsa tane bajarapalatanëyo, nexata jumaiti bajarapamonaejavabelia:

—¿Jipatsa mapitabaraje, pevënënu, ruca mapapalatanëyojumataje? jai Jesús.

<sup>21</sup> Nexata bajarapamonae jumaiti Jesúsjavabelia:

—Romanonacua raja pepo pevetsinë pitabara, pevënënu, jai.

Nexata Jesús jumaiti bajarapamonaejavabelia:

—Nexata parajutabiabianame Romanonacua pepo pevetsinë pijajava. Parajutabiabianame pijinia saicaya Diosojavabelia Dioso pijajava, jai Jesús.

<sup>22</sup> Nexata Jesús xaniavaetsia itsa jumecanaviata, bajarapamonae jamatabëcuenenabenajaca bajarapacuenia Jesús pejumaitsijavata. Nexata baja copatatsi Jesús jamatabëcueneëjëbiaya peyanijobijavatsi. Naviaba baja bajarapamonae.

*Pacuenia Jesús tsipaeba jivi petëpaecujinae icatsia piasaëjavanexa yabara pelivaisi*  
*(Mr 12.18-27; Lc 20.27-40)*

<sup>23</sup> Saduceovi saicaya itsalivaisi xaina. Bajarapamonae jamatabëcuenenavëxaniabiaya jumai tsabiabi: “Petëpaevi rabaja petëpaecujinae, icatsia apo asaë tsane,” jai tsabiabi. Nexata saduceovi imoxoyorenatsi Jesús. Saduceovi Jesúsjavabelia jumaiti mapacueni-aje:

<sup>24</sup> —Jesús, Moiséspijinë bajayata vajanacatoyaquinaelivaisi, jumaiti mapacueni-aje: “Ponë pematapijinë pepua penacojiobinë baja, totëpatsi pexi xainaenejeva, nexata juyapijinë bepita pematapijinëmi pijavami. Bjarapacuenia juyapijinë bepita pematapijinëmi pijavami pexi pexainaenexa bajarapovajavabelia. Nexata pexi itsa xainabeje, bematapijinëmi pexi petaenexa daxitajivi,” jai Moiséspijinë bajayata vajanacatoyaquinaelivaisi. <sup>25</sup> Nexata jinavanapa ënacaemonae siete ponëbeje paxanëjavata. Pepo matapijinë copiyaya nacojioba. Nexata bajaraponë pijava vecuatëpa pexi xainaenejeva. Nexata pematapijinëmi pepënarucaenë pita pematapijinëmi pijavami. <sup>26</sup> Nexata icatsia bajaraponë ata tëpa pexi xainaenejeva bajarapovajavabelia. Nexata icatsia itsanë tuatuajëmatapijinë pita bajarapova. Bajara icatsia ponë ata tëpa pexi xainaenejeva bajarapovajavabelia. Bjarapacuenia tëpa daxita siete ponëmibeje nacaemonaemi, bajarapova pepitaponaevi. Itsiata itsanë ata pexi apo xinae bajarapovajavabelia. <sup>27</sup> Bjaraxuacujinae bajarapova ata tëpa baja. <sup>28</sup> “Jivi raja petëpaecujinae, Dioso icatsia asaëyaexanaenatsi,” jamë. ¿Detsa nexata ponë bajarapomonaeyajuvënënë pijava tsane bajarapova bajarapamatacabi? Daxita pamonaë siete ponëmibeje nacaemonaë pitapona picani bajarapovami, jai saduceovi Jesúsjavabelia.

<sup>29</sup> Nexata Jesús jumaiti saduceovijavabelia:

—Paxamë saya pajamatëbëcuenenavëxaniabame. Paxamë raja apo payapëtaemë pacuenia Dioso pejumelivaisibaxutota jumaiti. Apo payapëtaemënuu pacuenia Dioso cajëpatsi daxitacuene pexanaenexa. Bjaraxuata jamatabëcuenenavëxaniabiaya paneyanijobame: “¿Detsa ponë pitsiana bajarapova?” panejamë. <sup>30</sup> Pamatacabi raja petëpaevimi Dioso icatsia asaëyaexanaenatsi, apo nacojiobi baja tsane. Bjarapamat-acabita itsajivi ata pexënatoyo apo canajetsi tsane pebijavabelia petonacojiobinexatsi. Bjarapamonae nacojiobinejeva, jinavanapaena athëbëtatsia pacuenia ángelevi jinavanapa. <sup>31</sup> Itsa pepacuene paxamë xaniavaetsia paneyanijobame paneyapëtaenexa Dioso icatsia piasaëyaexanaejavanexatsi petëpaevimi, nexata pacatsipaebianatsi. Paxamë rabaja payapëtaneme pacuenia bajayata Dioso jumaiti. Abraham baja pepuatëpae, Isaac ata baja pepuatëpae, Santiago ata baja pepuatëpae, bajarapomonae yabara bajayata Dioso jumaiti Moiséspijinëjavabelia mapacueni-aje: <sup>32</sup> “Xanë rabaja abaxë Abraham pijaDiosonë. Isaac ata pijaDiosonë. Jacob ata pijaDiosonë,” jai baja cajena Dioso bajayata petëpaevimi yabara. Bjarapacuenia Dioso pejumaitisixae, nayapëtane bajarapomonae bajayata tëpae ata, Diosovecua apo penaxuabijava. Aeconoxae ata bajarapomonae Dioso yajavajinavanapa athëbëtatsia, jai Jesús saduceovijavabelia.

<sup>33</sup> Jivi ayabitsaëtoxaneto itsa jumetane bajarapacuenia Jesús pejumaitisijava saduceovijavabelia, jivi bitso jamatabëcuenenabenajaca Jesús petsipaebilivaisi yabara.

*Palivaisi bitso jivi bejumecovënëta daxita Dioso pitorobilivaisianë pejumecovënëtsijava mata-toxenetsia yabara pelivaisi*

*(Mr 12.28-34)*

<sup>34</sup> Saduceovi Jesús peyanijobijumetsi, xaniavaetsia Jesús jumecanaviata. Nexata baja moya saduceovi. Nexata fariseovi itsa vënëtane saduceovijavabelia Jesús xaniavaetsia pejumecanaviatsijava, nexata fariseovi nacaetuata penabarëcuaijainexa. Nexata fariseovi najumejaita pacuenia yanijobijitsia Jesúsjavabelia. <sup>35</sup> Nexata fariseoviyajuvënënë, judíovi pecujarubinë, Jesúsjavabelia jamatabëcueneëjëbiaya yanijoba. Jumaiti Jesúsjavabelia mapacueni-aje:

<sup>36</sup> —Jesús, ¿detsa palivaisi bitso jivi bejumecovënëta daxita Dioso pitorobilivaisianë pejumecovënëtsijava matatoxenetsia? jai.

<sup>37-38</sup> Jesús nexata jumaiti judíovi pecujarubinëjavabelia:

—Palivaisi bitso jivi bejumecovënëta daxita Dioso pitorobilivaisianë pejumecovënëtsijava matatoxenetsia, jumaiti mapacueniaje: “Pasivamëre panijatuxanenë panijaDioso daxita panejamatabëëthëtojavavetsina, daxita panejamatabëcueneta ata, daxita panejamatabëxainaesäeta ata,” jai. Bajarapalivaisi bitso jivi bejumecovënëta daxita Dioso pitorobilivaisianë pejumecovënëtsijava matatoxenetsia. <sup>39</sup> Bajaraxuacujinae pecotocaevilivaisi, palivaisi bitso jivi bejumecovënëta, jumaiti icatsia mapacueniaje: “Pasivamëre itsajivi ata pacuenia paxamë panijacuata panasivamë,” jai. Bajarapalivaisi ata jivi bitso bejumecovënëta. <sup>40</sup> Pajivi jumecovënëta bajarapalivaisibeje, Dioso baja tanetsi pejumecovënëtsijivicuene daxita Dioso pitorobilivaisianë. Nexata palivaisi ata bajayata Dioso Moiséspijinëta najumecopata, bajarapalivaisi ata pejumecovënëtsijivicuene Dioso tanetsi. Diosojumepaebivimi profetavi ata palivaisianë bajayata tsipaeba, bajarapalivaisi ata pejumecovënëtsijivicuene Dioso tanetsi, jai Jesús judíovi pecujarubinëjavabelia.

*Pacuenia Jesucristo yabara Davidpijinë bajayata tajëvelia: “Tajatuxanenë,” jai, yabara pelivaisi*

*(Mr 12.35-37; Lc 20.41-44)*

<sup>41</sup> Fariseovi penacaetuatsijavata, fariseovijavabelia Jesús pijacuata nayabarajumaiti mapacueniaje:

<sup>42</sup> —¿Detsa pacuenia pasivanajamatabëxainaname Cristo itsa patsianica? ¿Jipatsa pexënato tsane? nayabarajai Jesús pijacuata fariseovijavabelia.

Nexata fariseovi jumaiti Jesúsjavabelia:

—Davidpijinë pemomo tsane, jai.

<sup>43</sup> Nexata Jesús jumaiti fariseovijavabelia:

—Pajamatabëcuenenavëxaniabame raja. Cristo raja Dioso pexënato. Bajayata Dioso pejumaitisijava Cristo yabara, Davidpijinë Espíritu Santo pejamatabëcueneta tajëvelia jumaiti mapacueniaje:

<sup>44</sup> Dioso jumaiti tajatuxanenëjavabelia:

“Ecare abaxë tacujanenia. Vecatsivajënae jumecovënëtsiaexanaenatsi abaxë copiaya nijavajabitsaë nitorobicuenianexa,” jai Dioso tajatuxanenëjavabelia, jai bajayata tajëvelia Davidpijinë mapacueniaje Cristo yabara.

<sup>45</sup> Nexata Davidpijinë bajayata Cristo yabara: “Tajatuxanenë,” itsa jai, nexata Cristo, Davidpijinë apo pemomo. Tsipaji baja cajena saicaya Cristo Dioso pexënato, nayabarajai Jesús pijacuata fariseovijavabelia fariseovi pecanaëjëtsinexa Cristo Dioso pexënatocuene.

<sup>46</sup> Nexata itsanë ata fariseoviyajuvënënë Jesús apo jumepitsitsi caejumeyo ata. Bajaraxuacujinae fariseovi, saduceovi ata, cujunava Jesúsjavabelia baja jamatabëcuenejëbiaya livaisi peyanijobijava.

## 23

*Pacuenia Jesús tsipaeba fariseovijavabelia, judíovi pecujarubivijavabelia ata, bajarapamonae penaneconitsijava Diosojavabelia yabara pelivaisi*

*(Mr 12.38-40; Lc 11.37-54; 20.45-47)*

<sup>1</sup> Jesús jumaiti jivi ayaibitsaëtojavabelia, pijajivijavabelia ata:

<sup>2</sup> —Judíovi pecujarubivi, fariseovi ata, Dioso tocopatatsi jivi xaniavaetsia peyapëtaeyaexanaponaenexa pajamatabëcuenelivaisi xaina Dioso Moiséspijinëta penajumecopatsilivaisimi. <sup>3</sup> Nexata pajumecovënëtsianame daxita pacuenia bajarapamonae pacatsipaebapona. Itsiata baitsi jane pëtsa paexaname pacuenia bajarapamonae exanavanapa. Tsipaji xua bajarapamonae pacaitaveta paxamë paneexanaeyaniva, bajaraxua itsiata bajarapamonae exanabiaba. <sup>4</sup> Palivaisianë ayapëbeje itsajivi ata pejumecovënëtsinexa, bajarapalivaisianë pacatsipaebabiaba panejumecovënëtsinexa. Pamonaë bajarapacuenia pacatsipaeba, itsanë ata bajarapamonaeayajuvënënë apo jamatabënajinae pexanaenexa bajarapacuenia. <sup>5</sup> Daxita xua bajarapamonae exana, exanabiaba saya jivi petaenexatsi.

Bajarpamonae jamatabějumi tsabiabi: “Bajaraxua itsa exanaenatsi, jivi nacayaiyataena,” jamatabėjai tsabiabi. Bajarpamonae pitapata, pecofiata ata, becajonixicuenia pexanaejavaxita yacajonia cēbarubejebabiaba Diosojumelivaisi peyaquinaebaxutoxi. Bajarpamonae itsamonae matatoxenetsia pijaumanavaitabēnexa, piapiafleco pijanavatabuyalia cēbarubabiaba. Bajarpacuenia bitso jitsipabiaba pexanabiabinexa.<sup>6</sup> Bajarpamonae itsa najunatatsi fiestajavabelia penanabaninexa, nexata jitsipabiaba penaenexa pexaniaviriajavanēta. Nexata natsiitapetabiaba penaenexa peyaiyataevitsi penaenexa petsinubijavanēta. Bajarpamonae itsa najoneyabiaba judíovi penacae-tuatabiabibota, jitsipabiaba penaenexa peyaiyataevitsi penaenexa petsinubijavanēta.<sup>7</sup> Bajarpamonae bitso jitsipabiaba jivi pebajacobinexatsi yaiyataeya callejava ata. “Patanecujarubinē,” pejajjavatsi ata, bitso jitsipabiaba, jai Jesús mapacueniaje fariseovi yabara, judíovi pecujarubivi ata yabara.

<sup>8</sup> Icatsia Jesús jumaitsi jivi ayaibitsaētojanetojavabelia, pijajivijavabelia ata:

—Pētsa paxamē pajitsipame jivi papecajumaitsinexa paxamējavabelia: “Patanecujarubinē,” papecajainexa. Tsipaji daxita paxamē bepanacaemonaemē Dioso panejumecovēnētsivixae. Xanē, caenēnē Cristonē, athēbēvetsica Dioso taneitorobinētsica jivi tacapanepaenexa, panexainame patacucujarubinēnexa.<sup>9</sup> Itsanē itsa pacacujaruba, “Axa,” pajamē pētsa bajaraponējavabelia. Tsipaji caenē paneaxa paxainame, ponē eca athēbētatsia.<sup>10</sup> Pētsa pajitsipame itsamonae papecajumaitsinexa: “Jivi pevetsinē,” papecajainexa. Tsipaji xanē, caenēnē Cristonē, patacaevetsinē.<sup>11</sup> Ponē paxamēyajuvenēnē pacavecuaayajamatabēcuenenē, bajaraponē pacayavenonabiaba padaxitamē.<sup>12</sup> Pajivi daxitajivi matatoxenetsia pijacuata ayajamatabēcuenējivi natane, bajarapajivi itsamatacabi daxitajivivecua beveliamatabēcuenējivi Dioso exanaenatsi. Pajivi pijinia daxitajivivecua pijacuata beveliamatabēcuenējivi natane, bajarapajivi itsamatacabi daxitajivi matatoxenetsia ayajamatabēcuenējivi Dioso exanaenatsi, jai Jesús jivi ayaibitsaētojanetojavabelia, pijajivijavabelia ata.

<sup>13</sup> Jesús icatsia jumaitsi fariseovijavabelia, judíovi pecujarubivijavabelia ata:

—¡Paxamē saya jivi paneyamaxēitojorobivi! ¡Paxamē judíovi panecujarubivi, fariseovimēnua, ayaineconi panatsixainame Diosojavabelia! Pacuenia bo babaupaxatata jivi pejoneyaniva, bajara bepacuenia paxamē paexaname. Itsamonae jitsipae ata pejonenexa Dioso pijanacuayabetsia, apo pacopatsimē pejonenexa saicayalivaisi panecujarubixae. Paxamē ata apo pajitsipaemē panejonenexa Dioso pijanacuayabetsia.

<sup>14</sup> ¡Paxamē saya jivi paneyamaxēitojorobivi! ¡Paxamē judíovi panecujarubivi, fariseovimēnua, ayaineconi panatsixainame Diosojavabelia! Yamaxēitojorobiaya pavecuanotabiabame pamonajivi pevecuatēpaevanētsi pecobecovējavaximi. Bajaraxuacujinae pinijicuenia itajara Diosojavabelia pavajēcabiabame. Itsiata pepo panexaniajijamatabēcueneta apo pavajēcabiabimē Diosojavabelia. Bajarpacuenia pavajēcabiabame saya jivi papecataenexa Dioso itajara bitso bepanejumečovēnētsivi. Bajaraxuata bitso ayaicuenia Dioso pacananeconitsiaexanaena pamatacabi Dioso naneconitsiaexanaena daxita pamonaē Dioso apo pejumecovēnētsivi.

<sup>15</sup> ¡Paxamē saya jivi paneyamaxēitojorobivi! ¡Paxamē judíovi panecujarubivi, fariseovimēnua, ayaineconi panatsixainame Diosojavabelia! Palivaisi pacajinavana-pame, caejivi ata panejumecovēnētsiaexanaenexa, papecacuenejēpaenexanua, ayaicuenia daxitajava jivi patsipaebarutame. Nexata pajivi pacajumečovēnēta, bajarapajivi pevajēnaeyabelia bitso naneconitapona Diosojavabelia. Nexata paxamē panejamatabēcueneta bajarapajivi paxamē matatoxenetsia bitso Dioso naneconitsiaexanaenatsi pexuabinexatsi infiernojavabelia.

<sup>16</sup> ¡Paxamē apo payapētae atamē, Dioso pejumelivaisi jamatabēcuenenavēxaniabi-aya pacujarubabiabame itsamonae! Nexata paxamē panecujarubijamatabēcueneta

bajarapamonae pananeconitsiaexaname Diosojavabelia. ¡Bajaraxuata ayaineconi panatsixainame Diosojavabelia! Paxamë jivijavabelia jamatabëcuenenavëxaniabiaya pajumaitsimë tsabiabi: “Pajivi itsanëjavabelia najumecapanepaeya jumaitsi pejumexaniataenexatsi: ‘Catoexanaenatsi pepacuene. Cajumaitsi cajena templobo pevënëta,’ jai, apo itsacuene. Bajarapajivi pejumaitsicovëya apo exanae ata, itsiata apo naneconitsi Diosojavabelia,” pajamë tsabiabi. “Pajivi rajane itsanëjavabelia jumaitsi pejumexaniataenexatsi: ‘Catoexanaenatsi pepacuene. Cajumaitsi cajena templobopijiorojavanë pevënëta,’ jai, bajara jane xua abeje. Nexata bajarapajivi exanae pejumaitsicovëya penaneconitsiyaniva Diosojavabelia,” pajamë tsabiabi jivijavabelia.<sup>17</sup> Pajamatabëcuenenavëxaniabame raja saya bajarapacuenia itsa pajumaitsimë. Biji rajane templobo beyaiyatanetsi bajarapatemplobopijiorojavanë matatoxenetsia. Bajarapaorojavanë ata yaiyatanetsi. Tsipaji bajarapaorojavanë templobopijiorojavanë.<sup>18</sup> Jamatabëcuenenavëxaniabiaya pajumaitsimë tsabiabinua: “Pajivi itsanëjavabelia najumecapanepaeya jumaitsi pejumexaniataenexatsi: ‘Catoexanaenatsi pepacuene. Cajumaitsi altarpvënëjava pevënëta,’ jai, apo itsacuene. Bajarapajivi pejumaitsicovëya apo exanae ata, itsiata apo naneconitsi Diosojavabelia,” pajamë tsabiabi. “Pajivi rajane pejumexaniataenexatsi itsanëjavabelia jumaitsi: ‘Catoexanaenatsi pepacuene. Cajumaitsi altarpvënëjavajumata pebuatsiofrenda pevënëta,’ jai, bajara jane xua abeje. Nexata bajarapajivi pepacuene exanae pejumaitsicovëya penaneconitsiyaniva Diosojavabelia,” pajamë tsabiabinua jivijavabelia.<sup>19</sup> Paneamatabocotajavi, bepaneitatsëcënavanapaevinua panejamatabëëthëtota. Biji rajane beyaiyatanetsi altarpvënëjava, bajarapaaltarpvënëjavajumata pebuatsiofrenda matatoxenetsia. Bajarapaofrenda ata yaiyatanetsi. Tsipaji altarpvënëjavajumata boca.<sup>20</sup> Pajivi jumaitsi: “Cajumaitsi altarpvënëjava pevënëta,” jai, caecuenia yajavavënëjona bajarapaaltarpvënëjavajumata pebocaeofrenda.<sup>21</sup> Pajivi pijinia najumecapanepaeya jumaitsi pejumexaniataenexatsi: “Cajumaitsi templobo pevënëta,” jai, caecuenia yajavavënëjona bajarapatemplobota peponapon-aenë Dioso.<sup>22</sup> Pajivi pijinia najumecapanepaeya jumaitsi pejumexaniataenexatsi: “Cajumaitsi athëbëtatsia panacua pevënëta,” jai, caecuenia yajavavënëjona Dioso pijatrono. Caecuenia yajavavënëjonanua Dioso, ponë ecabiaba bajarapatronota pitorobabiabinexa pijajivi.

<sup>23</sup> ¡Paxamë jivi paneyamaxëitojorobivi! ¡Paxamë judíovi panecujarubivi, pafariseovimënu, ayaineconi panatsixainame Diosojavabelia! Panenacanabijava diez xuabejeyajuvënëjava, caejavayo, parajutabiabame ofrendacuenia Diosojavabelia. Daxitaviria paneubijavaxi ata, diez xuabejeyajuvënëjava, caejavayo, parajutabiabame ofrendacuenia Diosojavabelia. Bajarapacuenia parajutabiabi atamë, apo pajumecovënëtsimë itsalivaisianë, Dioso papecatonajumecopatsilivaisianë, palivaisianë picani bitso Dioso pacatojitsipa panejumecovënëtsinexa. Bajarapalivaisianë picani pacaitoroba itsamonaejavabelia pexaniacuene panetoexanabiabinexa. Pacaitorobanua picani paneitaxutotsoniataeyabiabinexa itsamonae ata. Pacaitorobanua picani xaniavaetsia panenajamatabëcuenecopatsinexa Diosojavabelia. Bajarapacuenia picani bepaexanavana-pame pacopatsinejevamë bajaraxua, ofrendacuenia panerajutabiabijava Diosojavabelia.<sup>24</sup> ¡Paxamë apo payapëtae atamë Dioso pejumelivaisi, jamatabëcuenenavëxaniabiaya pacujarubabiabame itsamonae! Palivaisianë Dioso najumecopata panejumecovënëtsinexa, bajarapalivaisianë yajuvënëlivaisixi, saya beveliajamatabëcuenelivaisixi, pacaasaëmë tsavanapae. Palivaisianë picani Dioso bitso pacatojitsipa panejumecovënëtsinexa, caranata panamuxujematame. Nexata panecujarubivi panecujarubicuenia pexanavanapaexae, panecujarubivi ata naneconita Diosojavabelia pacuenia paxamë pananeconitame Diosojavabelia.

<sup>25</sup> ¡Paxamë jivi paneyamaxëtojorobivi! ¡Paxamë judíovi panecujarubivi, pafariseovimënu, ayaineconi panatsixainame Diosojavabelia! “Najamatabëcuenebijanaejitsipajë Diosojavabelia,” panejamatabëjaitsiabiabixae, panecaxaevajënae panecaxaenëanë, taza ata, naniavelia paquiatabiabame xaniavaetsia panijasalinaicue-

nia. Tsipaji jamatabëcuenenavëxaniabiaya pajamatabëjumaitsimë tsabiabi: “Itsa caxae-jitsipajë xaniavaetsia quiatsinejevanë, Diosojavabelia naneconitsipajë,” pajamatabëjamë tsabiabi. Itsiata baitsi jane panejamatabëëthëtota bëpënëa panajamatabëxainabiabame pibisiacuene. Panajamatabëxainabiabame itsanë pecobecovë paneyacajërëtsinexa. Panajamatabëxainabiabamenua panexainaenexa ayaijava ëpaxamënexa. <sup>26</sup> Paxamë pafariseovimë, bepeneitaxutotsëcënaevi panejamatabëëthëtota. Pajivi quiata pecaxaenë, taza yajava, piaxuirajibinexa, copiaya xaniavaetsia quiata pënëvelia. Bajaraxuacujinae xaniavaetsia quiata pejumavelia. Bajara pijinia pacuenia paxamë ata copiaya Dioso pacajamatabëcuenequiatsi paneajamatabëcuenexuirajibinexa. Nexata bajaraxuacujinae pacajamatabëcuenecaëjëpaena paneexanaenexa ëpexaniacuene pacuenia Dioso pacaitoroba.

<sup>27</sup> ¡Paxamë saya jivi paneyamaxëitojorobivi! ¡Paxamë judíovi panecujarubivi, pafariseovimënu, ayaineconi panatsixainame Diosojavabelia! Itsajota jivimëthëanë bobena, jivimëthëanëjumavereca itsamonae caiquina peniojairata bajarapacuenia pitabëtsinexa. Itsiata baitsi jane bëpënëareca petëpaevimi petsabanaejava, pesi yajava, abeje. Bajaraxua apo jitsipaetsi vajajatsinexa. Bajara pijinia paxamë ata Dioso patsitajamatabëcueneitsimë. <sup>28</sup> Itsamonae naniavelia itsa pacatane, pacatane bepaxaniajamatabëcuenevimë itajara. Itsiata baitsi jane panejamatabëëthëtota bëpënëa panajamatabëxainabiabame jivi paneyamaxëitojorobinexa. Itsajava ata pematatsënëa pibisiacuene paneexanaenexa, panajamatabëxainabiabame.

<sup>29</sup> ¡Paxamë saya jivi paneyamaxëitojorobivi! ¡Paxamë judíovi panecujarubivi, paxamë ata pijinia pafariseovimë, ayaineconi panatsixainame Diosojavabelia! Bajayata panijasalinaivi Diosojumepaebivimi profetavi beyejeba. Nexata mëthëca. Nexata mapamatacabitaje bajarapaprofetavimi pemëthëanëjumavereca bo paexanabiabame itabëtsiaya, jivi itsa tane, penajamatabënapitabiabinexa bajarapaprofetavimi. Pamonaemi ata bajayata tëpa, pamona aneconi jibia pejinavanapaevimi Dioso pitabarata, pemëthëanëjumavereca aeconoxae mapamatacabitaje itabëtsiaya parubabiabame itsacuenejavaxi. <sup>30</sup> Bajarapacuenia itabëtsiaya paneexanaecujinae, jivijavabelia pajumaitsimë tsabiabi mapacueniaje: “Vajasalinaivimi bajayata pibisiacuene exana. Beyaxuababiaba profetavimi. Paxanë bajarapamatacabi pajinavanapae atanë tsipae, apo payavenonaenë tsipae bajarapamonaemi pebeyabiabijava profetavimi,” pajamë tsabiabi. <sup>31</sup> “Vajasalinaivimi beyaxuababiaba profetavimi,” panejaixae, panavajunupaebame papemomoxicuene më bajayata pamonaemi beyaxuababiaba profetavimi. Bajarapamonaemi papemomoxixaemë, pacuenia bajarapamonaemi jamatabëcueneitsi, bajara paxamë ata pajamatabëcueneitsimë. <sup>32</sup> Paxamë ata papibisiajamatabëcuenevixaemë, xanë ata jamatabëpanebeyaxuabame. ¡Panebeyaxuare paneveretsinexa xua panijasalinaivimi taxuxuaba!

<sup>33</sup> ¡Paxamë bitso pibisiacuene paneexanaevi! Pacuenia jomo rëcëpeca itsa tane petajuenajetaruaejava isoto, bajara paitsimë. Itsiata apo papanepaemë tsane infier-novecua panijaneconi yabara. <sup>34</sup> Paxamë picani pacatoitorobianatsi Diosojumepaebivi profetavi. Pacatoitorobianatsinua picani bitso Dioso pijacuene peyapëtaeyaxanaevitsi. Pacatoitorobianatsinua picani xanë talivaisi papecatsipaebivinexa. Itsiata baitsi jane bajarapamonaeyajuvënëvi itsamonae pabeyaxuabaponaename. Itsamonae cruzajavabelia pacobematabiaxuaababiabianame. Itsamonae pajumatitibabeyabiabianame penaneconitsivi panejumaconitabiabimacata judíovi penacaetuatabiabibonëjava. Itsamonae pabaraponabiabianame itsa tomanëjavabelia ata panebejiobiaexanaenexa. <sup>35</sup> Bajarapacuenia nexata paxamë ayaineconi panatsixainaename Diosojavabelia. Daxita pamona aneconi jibia pejinavanapaevimi Dioso pitabarata, bajayata panijasalinaivimi beyaxuababiaba. Nexata bajarapaneconimi yajava paxamë pacatsijumajopaena. Dioso pitabarata aneconi jibia pejinavanapaevimi, panijasalinaivimi pebeyaxuabaponaejava, taxuxuaba Abelpijinëta. Bajaraxuacujinae icatsia pevajënaeyabelia beyaxuabapona itsamonae ata, Dioso pitabarata aneconi jibia pejinavanapaevimi. Nexata bexëajavaberena

ata Berequíaspijinē pexēnatomī, Zacaríaspijinē, panijasalinaivi beyaxuaba. Zacaríaspijinēmi panijasalinaivimi beyaxuaba templobopanabota, templobobeje altarvënëjavabeje tuatujēta. <sup>36</sup> Xaniajanē pacuenia pacatsipaebijitsiatsi. Daxita pamonaemi Dioso pitabarata aneconijibia pejinavanapaevimi, panijasalinaivimi beyaxuababiaba. Bajarapaneconimi yajava, paxamē aeconoxae panejinavanapaevi, pacatsijumajopaena Dioso papecananeconitsiaexanaenexa, jai Jesús judíovi pecujarubivijavabelia, fariseovijavabelianua.

*Pacuenia Jesús najamatabëxainaeya sivanua Jerusalén tomarapijivi yabara pelivaisi*  
(Lc 13.34-35)

<sup>37</sup> Jesús najamatabëxainaeya sivanua Jerusalén tomarapijivi. Jumaitsi pesivanuejavata mapacueniaje:

—¡PaJerusalén tomarapijivimē, pabeyabiabame Diosojumepaebivimi profetavi! ¡lbotonēta ata patseconabiabame bajarapacuenia panebeyaxuababiabinexa Diosojumelivaisi pecaponaevi paxamējavaberena! ¡Pacuenia vacara banacoxicaetuata pecorofetobëxëpanaberena, bajara pijinia pacuenia xanē ata picani bitso jitsipabiabajē patacaetuatsinexa, patacapanepaenexa picani panijaneconivecua! ¡Itsiata baitsi jane paxamē apo pajejamē cajena! <sup>38</sup> Panejumetaema. Dioso rabaja pacacopata papecaevetabiabijavami. Nexata baja panijatemplobota Dioso apo ponaponae. <sup>39</sup> Xaniajanē pacuenia pacatsipaebijitsiatsi. Paxamē rabaja apo panetaemē tsane matavējēa. Matapania itsa panejumecovënëtsianame Cristonëcuenenē, Dioso taneitorobinëtsica, icatsia panetaename. Itsa panesivajamatabëjumaitsimēnua tsane: “Dioso, bitso yavenonare maponē najetarucaje, nejamatabëcueneta penajetarucanē,” itsa panesivajamatabëjamē tsane xanē yabara, nexata jane baja icatsia panetaename itsa patsianicajē, jai Jesús mapacueniaje najamatabëxainaeya pesivanuejavata Jerusalén tomarapijivi.

## 24

*Pacuenia Jesús pijajivi tajëvelia tsipaeba itsamatacabi itsanacuapijivi templobo pexuabijavanexatsica yabara pelivaisi*  
(Mr 13.1-2; Lc 21.5-6)

<sup>1</sup> Jesús pitsaparena temploboverena. Itsa baja Jesús vecuaponaejitsia templobo, pijajivi imoxorenatsi. Nexata Jesús pijajivi jumaitsi:

—Patajatuxanenē, templobo nataema pemuxuneneta penaeboxanetonē ata, jai.

<sup>2</sup> Nexata Jesús tajëvelia vajunupaeba itsamatacabi itsanacuapijivi bajarapaboxanetonēmi pepenetsijavanexatsica. Jesús jumaitsi pijajivijavabelia mapacueniaje:

—Xaniajanē pacuenia pacatsipaebijitsiatsi. Daxita raja paboxanetonē pataneme, bajarapaboxanetonēmi itsamatacabi itsanacuapijivi penetsianica irabetsica. Nexata paibotonē catsanaruba mapaboxanetonētaje, itsaiboto ata pejumavereca apo bocae tsane, jai Jesús tajëvelia pijajivijavabelia.

*Pacuenia itsijitsia Jerusalén tomarata, daxitanacuanëjava ata, mapanacua pecopiarucaevajënaeje yabara pelivaisi*  
(Mr 13.3-23; Lc 21.7-24; Lc 17.22-24)

<sup>3</sup> Jesús eca petsutojumata, patsutojumata olivonaenē apaaxayo. Jesús itsa eca petsutojumata, nexata pijajivi pijaepatojavata imoxoyorenatsi peyanijobinexatsi. Nexata Jesús pijajivi jumaitsi:

—Patajatuxanenē, pajitsipajē patanetsipaebinexamē patayapëtaenexa paepatota copiapatsijitsia xua vajunupaebame. ¿Detsa peneta pitsicuene pataenajē icatsia itsa patsijitsiamëtsica? ¿Detsa peneta pitsicuene pataenajē mapanacua ata itsa vereverecaejitsiaje? jai Jesús pijajivi.

<sup>4</sup> Nexata Jesús tajëvelia vajunupaeba pacuenia itsamatacabi itsijitsia mapanacuataje. Jesús jumaitsi pijajivijavabelia mapacueniaje:

—Xania panayajivitaename. Pëtsa panacopatame itsajivi ata papecayamaxëitojorobinexa. <sup>5</sup> Tsipaji raja peyamaxëitojorobivinexa, ayaibitsaëto patsiana bexanë itajara tsane. Bajarapamonae najumetsënëtsiaya jumai tsane: “Xanë raja Cristonë, athëbëvetsica Dioso taneitorobinëtsica jivi tacapanepaenexa,” jai tsane. Bajarapamonae jivi ayaibitsaëto yamaxëitojorobiana. <sup>6</sup> Vajabitsaë pexanaejava imoxoyonacuanëjjava, tajënacuanëjjava ata, pavënëlivaisitaename. Itsiata pëtsa pajunavame. Bajara peneta itsane mapanacua pevereverecaevajënaeje. Itsiata baitsi jane bepïjia bajarapamat-acabi mapanacuaje abaxë apo vereverecajuni tsane. <sup>7</sup> Mapanacuaje pevereverecaevajënaeje peneta copiaya itsaviriavi nabena itsaviriavijavabelia. Itsanacuanëpijivi pijinia nabena itsanacuanëpijivijavabelia. Ayaijaniboxaneto najetarucaena itsanacuanëjjava. Vitane cuene ata najetarucaena itsanacuanëjjava. Ira najëabiana ayai cuenia itsanacuanëjjava. <sup>8</sup> Daxita bajarapacue ne itsa pataename, saya abaxë taxuxuabaponaena piayaicuene, jai Jesús pijajivijavabelia tajëvelia pevajunupaebijavata pacuenia itsamatacabi itsijitsia mapanacuataje.

<sup>9</sup> Icatsia Jesús taxëvelia vajunupaeba pacuenia itsamatacabi itsijitsia mapanacuataje. Jesús jumaitsi pijajivijavabelia mapacueniaje:

—Nexata paxamë pacacaponae na cuae vetsivijavabelia papecabejiobiaexanaenexa. Nexata pacabeyejebiana. Daxitanacuanëpijivi pacaitoya tsabiabi tsane patajajivixaemë. <sup>10</sup> Nexata bajarapamatacabit jivi ayaibitsaëto navecuacopabiana tanejumecovënëtsijava. Namataenetsia naitoya tsane. Namataenetsia nacana jetsiana na cuae vetsivi pecobeyabelia. <sup>11</sup> Nexata ayaibitsaëto najetarubenaena jivi petsipaebaponaevinexa saicayalivaisi Dioso pejumelivaisivecua. Be Diosojumelivaisipaebivicuenia tsipaebaponaena. Bajarapamonae yamaxëitojorobiana jivi ayaibitsaëto xaneto. <sup>12</sup> Jivi pibisiacuene pexanavanapaevi, pevajënaeyabelia ayaibitsaëto xaneto tsaponae tsane. Nexata ayaibitsaëto Dioso pejumecovënëtsivi, namataenetsia penaasivajava vereverecaponaena. <sup>13</sup> Itsiata pajivi ajamatabëcuenesaë tsane Dioso pejumecovënëtsijava petëpaejavabelianexa, bajarapajivi Dioso capanepaenatsi. <sup>14</sup> Itsamonae daxita nacuanëjjava tsipaebiana jivi peyapëtaenexa imoxoyo baja pevajënae Dioso pijajivi pecapanepaejavanexa. Bajaraxuacujinae jane baja mapanacua vereverecaenaeje, jai Jesús pijajivijavabelia tajëvelia pevajunupaebijavata pacuenia itsamatacabi itsijitsia mapanacuataje.

<sup>15-16</sup> Icatsia Jesús tajëvelia vajunupaeba papiayaicuene itsamatacabi copiapatsijitsia Jerusalén tomarata. Jesús jumaitsi pijajivijavabelia mapacueniaje:

—Diosojumepaebinëmi profeta Danielpijinë piayaicuene tajëvelia pevajunupaebilivaisi bajayata yaquina. Xua panijatamaranëmi vereverecaeyaexanaejitsiatsi, bajaraxua pelivaisi yaquina. (Pajivi lebiana mapalivaisije, yapëtaena papiayaicuene vajunupaeba mapalivaisitaje.) Nexata paxamë itsa pataename bajarapapiayaicuene penucaejava templobota, nexata Judea nacuata pejinavanapaevi pëtsa nubena. Naxanitsiayo rëcëpecaena petsutonëjavabelia. <sup>17</sup> Pajivi pijabojumata athëbëyo ecaya, itsa vënëlivaisitaena bajarapapiayaicuene penucaejava templobota, bajarapajivi perunaecujinaetsica, bepïjia najetabajiraviana. Pëtsa joneya pijaboyalia pejutsinexa pecobecovë. <sup>18</sup> Pajivi pijinia nacuenebaponaena pijapabita, itsa vënëlivaisitaena bajarapapiayaicuene penucaejava templobota, bepïjia najetabajiraviana. Pëtsa naviata pijaboyabelia pejutsinexa penaxatabijava. <sup>19</sup> ¡Papetiriavi penacueto yacotajinavanapa, bitso bejiobi tsane bajarapamatacabi! ¡Bitso nabejiobitsiaya jinavanapaena! ¡Papetiriavi ata mitoapaenacuetoxi isajinavanapa, bitso bejiobi tsane bajarapamatacabi! <sup>20</sup> Bajaraxuata tajëvelia Diosojavabelia pavajëcare piyapëbejematacabit papecatocopiapatsiyaniva bajarapapiayaicuene. Nexata pamatacabi parëcëpecaename, pexaniamatacabi Dioso pacatocopatsiana bitso nabejiobitsiaya paneponaeyaniva. Pavajëcare nua penacueraevetsimatacabit bajarapapiayaicuene papecatocopiapatsiyaniva, nexata papecatoayapëbejeyaniva. <sup>21</sup> Tsipaji raja bajarapamatacabi bitso jivi bejiobi tsane. Pabejiobicuene abaxë jivi caeto ata apo tae Dioso nacua pexanaecujinae, bajarapabejiobicuene taena. Bajaraxuacujinae icatsia itsamonae bejiobiaexanae atatsi tsane, itsiata bajarapacuenia bitso apo

bejiobiaexanaetsi tsane. <sup>22</sup> Dioso epatua yatuucutsiana jivi bitso nabejiobitsiaya pejinavanapaematacabianëminexa bitso jivi nabejiobitsia pejinavanapaeyaniva. Dioso epatua itsa apo yatuucutsi tsipae bitso jivi nabejiobitsiaya pejinavanapaematacabianëminexa, caejivi ata apo asaë tsipae. Itsiata baitsi jane Dioso piasivaxae pijajivi, pitapetsivi, Dioso epatua yatuucutsiana bitso jivi nabejiobitsiaya pejinavanapaematacabianëminexa, jai Jesús pijajivijavabelia tajëvelia pevajunupaebijavata papiayaicuene itsamatacabi copi-  
apatsijitsia mapanacuataje.

<sup>23</sup> Icatsia Jesús tajëvelia navajunupaeba icatsia pepatsijavanexatsica. Jesús jumaitsi pijajivijavabelia mapacueniaje:

—Nexata itsajivi yamaxëitojorobiaya itsa pacajumaitsi tsane: “Pataema. Mara Cristo nucaje,” itsa pacajai tsane, pëtsa pajumecovënëtame. Itsa pacajumaitsinua tsane: “Bajarajota nuca Cristo,” itsa pacajai tsane, pëtsa pajumecovënëtame. <sup>24</sup> Itsamonae jumai tsane: “Xanë raja Cristonë,” jai tsane. Itsiata jemajai tsane. Itsamonae jumai tsane: “Diosojumepaebinënë raja, profetanënë,” jai tsane. Itsiata jemajai tsane. Bajarapamonae itajara exanaena pinijicuene pexanaejavanë peyamaxëitojorobinexa saya jivi. Nexata bajarapacuenia itsamonae yamaxëitojorobaponaenatsi. Itsiata pamonaepapacuenia Dioso pijajivi, Dioso pitapetsivitsi, bajarapamonae apo yamaxëitojorobi tsanetsi. <sup>25</sup> Tajëvelia rabaja maje pacatsipaebatsije. <sup>26</sup> Nexata itsamonae itsa pacajumai tsane: “Cristo raja ponapona petusato nacuatatia. Naxanitsia. Panataename,” itsa pacajai tsane, pëtsa paponaremelia. Itsa pacajumaitsinua tsane: “Cristo raja ponapona mapaënëyatuucutsibotaje. Naxanitsia. Panataename,” itsa pacajai tsane, pëtsa pajumecovënëtame. <sup>27</sup> Payapëtaneme rabaja mapacuenieje. Yamaxë itsa nivejai tsajuni athëbëvetsica, caecuenia jivi bacotiatane daxitajava. Bajara pijinia peneta pacuenia daxitanacuanëpijivi caecuenia netaena pamatacabi patsianicajë xanë, Daxitajivi Pematapijinënë. <sup>28</sup> Payapëtaneme rabaja mapacuenie ataje. Quequeremonae bepijia bayapëtane itsajota petuxutsaebinë boca. Nexata bajarajota bepijia banacaetuana. Bajara pijinia pacuenia daxitanacuanëpijivi tajajivi bepijia yapëtaena tapatsijavatsica. Nexata bepijia nacaetuanaena xanëjavaberena, jai Jesús pijajivijavabelia tajëvelia penavajunupaebijavata icatsia pepatsijavanexatsica.

*Pacuenia Jesús tajëvelia navajunupaeba icatsia pepatsijavanexatsica petëpaecujinae yabara pelivaisi*

*(Mr 13.24-37; Lc 21.25-33; 17.26-30, 34-36)*

<sup>29</sup> Jesús tajëvelia navajunupaeba itsamatacabi icatsia pepatsijavanexatsica. Jesús jumaitsi pijajivijavabelia mapacueniaje:

—Xanë tapatsivajënaetsica jivi taena pecujunavicuene. Jivi nabejiobitsiaya jinavana-paena. Nexata jivi nabejiobitsiaya pejinavanapaematacabicujinae, matacabipijijuameto aitaquiri tsane. Meravipijijuameto ata aitaquiri tsane. Tulupu ata othopaenica irabetsica. Daxitacuene, xua rubena athëbëtatsia, najëabiana. Xaniavaetsia apo rubenae tsane. <sup>30</sup> Bajaraxuacujinae jane baja xanë athëbëvetsica najetarucaenajë, Daxitajivi Pematapijinënë. Nexata daxitaviriavi mapanacuapijivi natsinuena pecajunavi pijaneconi yabara. Nexata bajarapaepatota, xanë, Daxitajivi Pematapijinënë, jivi netaena athëbëvetsica itarërëbota tanajetarucaejava. Patsianicajë daxitacuene taevetsinexa. Tanivenivenaecotia yajavapatsianicajë. <sup>31</sup> Bajaraxuacujinae trompeta itsa najumetsiana ayajumeta, itorobianajë tajaängelevi. Angelevi daxitanacuanëjavaverena xanëjavaberena neto-caetuatsiana tajajivi, pamonaepapacuenia Dioso pitapetsivitsi, jai Jesús pijajivijavabelia tajëvelia penavajunupaebijavata itsamatacabi icatsia pepatsijavanexatsica.

<sup>32</sup> Jesús icatsia tajëvelia vajunupaeba pacuenia itsamatacabi itsijitsia mapanacuataje. Jesús jumaitsi pijajivijavabelia mapacueniaje:

—Pacanaëjere pacuenia itsi higeranae. Itsa maxëranajuva, nexata pejanabaxu pitsapa. Nexata bajarapacuenia payapëtaneme vai baja imoxoyo pevajënae pejonenexa.

<sup>33</sup> Bajara pijinia pacuenia peneta itsa pataename pecopiapatsijava xua tajëvelia vajunupaebajë, nexata payapëtaename imoxoyo baja tavajënae tsane tapatsijavanexatsica. <sup>34</sup> Xaniajanë pacuenia pacatsipaebijitsiatsi. Pitsijamatabëcuenevi aeconoxae mapamatacabitaje jinavanapa, bajarapitsijamatabëcuenevi abaxë, bexëajavabelia ata, apo vereverecae tsane. Matapania xua tajëvelia vajunupaebajë itsa baja copiapatsiana, bajarapamonae jane baja vereverecaena. <sup>35</sup> “Itaboxo, ira yajava, tsitecaena daxitamatacabijavabelianexa,” jamatabëjai ata tsane itsamonae, itsiata jamatabëcunenavëxaniabiana. Tsipaji jemata itaboxo, ira yajava, vereverecaena. Nexata palivaisi pacatsipaebatsi, apo najumetsënëtsinë tsane. Nexata xua tajëvelia vajunupaebajë, pacuenia baja najumecapanepaeya jumaitsinë, daxita bajaraxua copiapatsiana, jai Jesús pijajivijavabelia.

<sup>36</sup> Icatsia Jesús jumaitsi pijajivijavabelia:

—Itsajivi ata apo yapëtae pamatacabita, paepatota ata, copiapatsijitsia daxita xua tajëvelia vajunupaebajë. Athëbëpijivi ata, ángelevi, apo yapëtae. Xanë, Dioso pexë nato atanë, apo yapëtaenë. Caenë taxa Dioso yapëtane, jai Jesús pijajivijavabelia tajëvelia pevajunupaebijavata pacuenia itsamatacabi itsijitsia mapanacuataje.

<sup>37</sup> Jesús icatsia tajëvelia navajunupaeba itsamatacabi icatsia pepatsijavanexatsica. Jesús jumaitsi pijajivijavabelia mapacueniaje:

—Pacuenia bajayata jemata itsi pamatacabi Noépijinë ponapona, bajara icatsia jemata itsane pamatacabi xanë, Daxitajivi Pematapijinënë, patsianicajë. <sup>38</sup> Pamatacabi Noépijinë ponapona ira pebubutsivajënaeya, jivi picani xaniavaetsia jamatejema pexaejava xaevanapa. Apaevanapanua. Nacojiobapona itsamonae. Itsamonae pexënatoyonë pebijavabelia canajetapona petonacojiobinexatsi. Bajarapamonae jamatejema saya jinavanapa. Nexata bajarapamatacabi Noépijinë ëpijamona pinijibarcocoxanetojavabelia barëjunua. <sup>39</sup> Daxitajivi abaxë itsiata apo yapëtae paepatota tocopiapatsijitsiatsi peyabubutsijavanexatsi. Nexata itsajivi ata yapëtaenejeva jemata ayaiemaxaneto itsa jopa ira pebubutsinexa, yapëtane jane baja. Bajarapamatacabi bubuna daxitajivi. Bajara pijinia pacuenia itsajivi ata yapëtaenejeva xanë, Daxitajivi Pematapijinënë, tapatsijavanexatsica, jemata patsianicajë. <sup>40</sup> Nexata bajarapamatacabita anijanëbeje najuanacuenebanucaenabeje pabita. Itsanë tanejumecovënëtsinë tsane. Itsanë apo tanejumecovënëtsinë tsane. Nexata tanejumecovënëtsinë pitsianatsi ángelnë. Apo tanejumecovënëtsinë copatanutsianatsi. <sup>41</sup> Bajara pijinia itsane petirivabeje ata. Najacuabanucaenabeje caejavata. Nexata tanejumecovënëtsiva pitsianatsi ángelnë. Apo tanejumecovënëtsiva copatanutsianatsi.

<sup>42</sup> Nexata nejamatabëcueneevetsiaya panecopiaevetavanapaename. Tsipaji raja apo panevajënaeyapëtaemë tsane paepatota xanë panijatuxanenënë icatsia patsijitsianëtsica. <sup>43</sup> Pacanaëjère mapacuejeje. Bo pexainanë itsa yapëtaejitsipa paepatota meravi pijaboyaberena patsijitsia pecobecovë petonacobetoxotsinënexatsi, nexata naëcotsiaya vajënaeevetsipa. Apo copatsi tsipae pijaboyaberena petojoneyanivatsi penacobetoxotsinënexa. <sup>44</sup> Bajara pijinia pacuenia paxamë ata najamatabëcuenexaniavaetsiaya panecopiaevetavanapaename. Tsipaji xanë, Daxitajivi Pematapijinënë, paepatota apo panejamatabënajinaemë tapatsijavanexatsica, jemata icatsia patsianicajë, jai Jesús pijajivijavabelia tajëvelia penavajunupaebijavata itsamatacabi icatsia pepatsijavanexatsica.

*Pacuenia Jesús pijajivijavabelia livaisi tsipaeba petuxanenë pijajivitonëbeje pelivaisicuenia yabara pelivaisi*

*(Lc 12.41-48)*

<sup>45</sup> Jesús livaisi tsipaeba pijajivijavabelia petuxanenë pijajivitonëbeje pelivaisicuenia. Bajarapacuenia pijajivijavabelia tsipaeba copiaevetsiaya petonacuenebavanapaenexatsi icatsia pepatsimatacabitsicajavabelianexa. Jesús jumaitsi mapacueniaje:

—Petuxanenë pijajivitonë, ponë xaniavaetsia pijatuxanenë pecovëta tonacuenebaponaponaena, majamatabëcueneitsi tsaneje. Bajaraponë itsajamatabëcuene xainaenejeva, copiaevetaponaponaena pijatuxanenë pepatsijavabelianexa. Bajaraponë pijatuxanenë pijajivi pecovëta tovetaponaponaena piabatabiabinexa pexaejava caematacabi canacujitsia pacuenia pijatuxanenë itorobatsi. <sup>46</sup>Bajaraponë bitso barëya tsane pamatacabi pijatuxanenë patsiana, xaniavaetsia pijajivi petoevetaponaponaexae pecovëta. <sup>47</sup>Xaniajanë pacuenia pacatsipaebijitsiatsi. Ponë xaniavaetsia tonacuenebiana pijatuxanenë pecovëta, bajaraponë evetsiaexanaenatsi daxita xua xaina pijatuxanenë. <sup>48</sup>Itsa bajaraponë piagamatabëcuenebejenë tsipae, nexata pijatuxanenë pecovëta jamatabëjumaitsi tsipae: “Tajatuxanenë ajibi tsarucæ tsane bajayajebi,” jamatabëjai tsipae. <sup>49</sup>Nexata toconibabeyabiabijitsipa pijatuxanenë pijajivi. Ayaijava xaeyabiabijitsipa. Naapaeyabiabijitsipana piaitajibivita. <sup>50</sup>Nexata itsajota apo jamatabënajinae tsipae pijatuxanenë pepatsijavanexa, patsipa pijatuxanenë. <sup>51</sup>Nexata bajaraponë ayaicuenia naneconitsiaexanaejitsipatsi pijatuxanenë. Pacuenia jivi peyamaxëitojorobabiabivi, Dioso ayaicuenia naneconitsiaexanaenatsi, bajarapacuenia pijatuxanenë naneconitsiaexanaejitsipatsi. Nexata natsinuejitsipa. Navonosinijitsipana bitso penavixaetaexae, jai Jesús pijajivijavabelia petuxanenë pijajivitonëbeje pelivaisicuenia petsipaebijavata.

Bajarapacuenia Jesús tsipaeba pijajivi xaniavaetsia pecopiaevetavanapaenexatsi Jesús icatsia pepatsimatacabiticajavabelianexa.

## 25

*Pacuenia Jesús pijajivi livaisi tsipaeba diez papejanavabeje pijalámparabëxi pecaponaevi pelivaisicuenia yabara pelivaisi*

<sup>1</sup>Jesús icatsia jumaitsi pijajivijavabelia:

—Pamatacabi icatsia patsianicajë, tajajivi peyapëtaexae tapatsijavanexatsica, jamatabëcueneaitavaya necopiaevetavanapaena. Itsamonæ tajajivi yapëtae ata tapatsijavanexatsica, itsiata jamatabëcueneaitavaya apo necopiaevetavanapae tsane. Bajarapacuenie yabara pacatsipaebianatsi mapalivaisije. Diez papejanavabeje yapëtane itsava pejana penacasabijavanexa. Nexata diez papejanavabeje pijalámparabëxi, caeva canacujitsia, xaniavaeta penaponaenexa. Nexata capona pijalámparabëxi pabojavabelia eca penacasabivanexa. Bajarajota vajënaeevetsijitsia pepatsijava penacasabinënexa. Nexata itsa ponabeje penacasabijivibejenexa, bajarapapejanavi penaponaenexa bajarapajivibeje pepëta penacasabifiestajavabelia. <sup>2-4</sup>Bajarapamonaeyajuvënëvi, cinco povabeje, yapëtae ata picani petsicaponaejavanexa aceiteranë pijalámparabëxinexa, itsiata apo tsicaponae itsa tovereverecatsti aceitera peepatsinexa icatsia pijalámparabëxijavabelia. Cinco pijinia povabeje peyapëtaexae petsicaponaejavanexa aceiteranë pijalámparabëxinexa, tsicapona. <sup>5</sup>Nexata bajarapapetiriavi itayotena pijalámparabëxita. Bajayajebi picani vajënaeevetena penacasabinënexa pepatsijava. Nexata pijalámparabëxita paaceiteranë capona, tovereverecaponatsi baja. Tsipaji penacasabinënexa abaxë cuenenajemata pepatsinexa. Nexata baja daxita bajarapapetiriavi belia itamajitsipana. Nexata baja majita. <sup>6</sup>Bajaraxuacujinae ayaimeravi tuatujëta jumetane pevavajajava. “¡Najetaruca rajane baja penacasabinënexa! ¡Papitsaparemena jane baja panecopiapitsinexa!” pejajava jumetane. <sup>7</sup>Nexata daxita bajarapapetiriavi nonobapuna pecopiapitsinexa jane baja. Papetiriavi aceiteranë tsicapona, epaca pijalámparabëxijavabelia. Caeva canacujitsia pijalámparabëxi ayaicotia exana. <sup>8</sup>Nexata papetiriavi apo tsicapona aceiteranë, jumaitsi aceiteranë petsicaponaevijavabelia mapacueniaje: “Panenarajure tsiquirijavaxi aceiteraxi. Tsipaji patajalámparabëxi panetoitacaëcaënazona,” jai bajarapamona. <sup>9</sup>Itsiata aceiteranë petsicaponaevi jumaitsi: “Jume. Apo caëjëpae. Paxanë ata meta apo panetocaëjëpae tsipae. Paponaremelia. Panijacuata pacomuare

itsajotalia canajetabiaba aceiteranë,” jai aceiteranë petsicaponaevi pijalámparabëxinexa. <sup>10</sup> Nexata papetiriavi aceiteranë apo tsicaponae pijalámparabëxinexa, ponalia aceiteranë pecomuacaenexa. Nexata pecovëta penacasabinënexa patanajetaruca. Nexata papetiriavi aceiteranë tsicaponae pijalámparabëxinexa, naponae baja penacasabifíestanexa pexanaebojavabelia. Pejonecujinaelia baupaxatata. <sup>11</sup> Bajaraxuacujinae aceiteranë pijalámparabëxi petsicomuacaevi pata. Nexata bajarapapetiriavi jumaitsi penacasabinënexajavabelia: “¡Panetobaupare! ¡Panetobaupare! jai tsanubenae bojumavelia. <sup>12</sup> Nexata penacasabinënexa jumaitsi: “Xaniajanë pacuenia pacatsipaebijitsiatsi. Apo pacayapëtaetsi cajena paxamë,” jai bajarapapetiriavijavabelia, jai Jesús mapalivaisije pijajivijavabelia.

<sup>13</sup> Jesús icatsia jumaitsi pijajivijavabelia:

—Pacuenia cinco povabeje peyapëtaexae, aceiteranë tsicaponae pijalámparabëxinexa, bajara pijinia pacuenia paxamë ata paneyapëtaexae, jamatabëcueneaitavaya panecopi-aevetavanapaename. Tsipaji apo payapëtaemë tsane pamatacabita, paepatota ata, xanë, Daxitajivi Pematapijinëné, icatsia patsijitsianëtsica, jai Jesús pijajivijavabelia.

*Pacuenia Jesús pijajivi livaisi tsipaeba pijapalata pijajivi pevetsiaexanaenë pelivaisicuenia yabara pelivaisi*

*(Lc 19.11-27)*

<sup>14</sup> Jesús icatsia jumaitsi pijajivijavabelia:

—Tacovëta patajajivimë, itsamonae ata, pamonae tajajivi, panetonacuenebianame. Nexata pamatacabi icatsia patsianicajë, pacuenia pacasivanajamatabëxainaejitsiatsi, aeconoxae pacatsipaebianatsi. Pacatsipaebianatsi comparacióncuenia mapacueniaje. Petuxanenë ita ponaejitsia tajënacuyabelia, junata pijajivi. Evetsiaexana pijapalata petoevetsinexatsi pecovëta.

<sup>15</sup> Caenë canacujitsia evetsiaexanaponae petocanacuenebinexatsi pecovëta pacuenia bajarapamonae caëjëpatsi. Nexata petuxanenë pijinia evetsiaexana cinco mil ponëbeje pepovi, bitso penamatamotsivi. Itsanë pijinia evetsiaexana dos mil ponëbeje. Itsanë pijinia evetsiaexana mil ponëbeje. Bajaraxuacujinae petuxanenë pona tajënacuyabelia.

<sup>16</sup> Nexata jane baja ponë evetsiaexana cinco mil ponëbeje, canacueneba jane baja pecovëta bajarapapalata. Nexata pematatsënëa topitsapatsi icatsia itsacinco mil ponëbeje. Nexata baja daxitata diez mil ponëbeje caejavata. <sup>17</sup> Bajara pijinia pacuenia itsanë canacueneba dos mil ponëbeje. Nexata pematatsënëa topitsapatsi icatsia itsados mil ponëbeje. <sup>18</sup> Itsiata baitsi jane ponë toeveta mil ponëbeje, pona pematayatsinexa pijatuxanenë pijapalata. Matayatsia mëhëteta irata.

<sup>19</sup> Bexëa nexata najetaruca petuxanenë. Junata pijajivi peyapëtaenexa pacuenia toevetatsi pecovëta pijapalata. <sup>20</sup> Copiaya pata ponë cinco mil ponëbeje evetsiaexanatsi. Nexata bajaraponë tocanaviata pijatuxanenëjavabelia diez mil ponëbeje. Jumaitsi bajaraponë pijatuxanenëjavabelia: “Nevetsiaexaname cinco mil ponëbeje tacatoevetsinexa. Bajara macatocanaviatatsi bajarapapalataje. Catocanaviatatsi yajava icatsia itsacinco mil ponëbeje, xua nacanabajë bajarapapalata,” jai bajaraponë pijatuxanenëjavabelia. <sup>21</sup> Nexata petuxanenë jumaitsi: “Xanepana rabaja. Xaniavaetsia netoevetaponaponame. Itsajamatabëcuene apo najamatabëxainamë. Tsiquirijavayo ata xaniavaetsia netoevetame. Nexata aeconoxae caevetsiaexanaenatsi pematatsënëa ayaijava. Jonemena xanëjavaberena barëyaya neponaponaeenexa xanëjavata,” jai petuxanenë pijajivitonëjavabelia. <sup>22</sup> Bajaraxuacujinae pata ponë dos mil ponëbeje evetsiaexanatsi. Nexata bajaraponë jumaitsi pijatuxanenëjavabelia: “Nevetsiaexaname dos mil ponëbeje tacatoevetsinexa. Bajara macatocanaviatatsi bajarapapalataje. Catocanaviatatsi yajava icatsia itsados mil ponëbeje, xua nacanabajë bajarapapalata,” jai bajaraponë pijatuxanenëjavabelia. <sup>23</sup> Nexata petuxanenë jumaitsi: “Xanepana rabaja. Xaniavaetsia netoevetaponaponame. Itsajamatabëcuene apo najamatabëxainamë. Tsiquirijavayo ata xaniavaetsia netoevetame. Nexata aeconoxae caevetsiaexanaenatsi pematatsënëa ayaijava. Jonemena xanëjavaberena barëyaya neponaponaeenexa xanëjavata,” jai

petuxanenē pijajivitonējavabelia. <sup>24</sup> Icatsia pata ponē evetsiaexana mil ponēbeje. Bajaraponē jumaitsi pijatuxanenējavabelia: “Cacueneyapētanetsi. Xamē nijajivi apo itaxutobejiobiataeyabiabimē. Xamē nijajivi ubiaexanabiabame neubiaexanabiabijava nexata bajarapamonae pejamatabēcueneta ayaijava palata pecatopitsapaenexa. Bajara pijinia pacuenia xanē ata nevecuapitsipame xua nacanabijitsipajē nijapalatata itsa canacuenebijitsipajē. <sup>25</sup> Bajaraxuata junavajē. Ponajē irata tamatayatsiamēthētetsinexa nijapalata. Bajara manijapalata catocanaviatatsije,” jai bajaraponē pijatuxanenējavabelia. <sup>26</sup> Nexata petuxanenē jumaitsi: “Tajajivitonē atamē, itsiata ajamatabēcuenebemē. Afaetabimēnua. Xamē baja cajena yapētaneme tajajivi taubiaexanabiabijava, taubiaexanabiabijava nexata bajarapamonae pejamatabēcueneta ayaijava palata tane-topitsapaenexa. <sup>27</sup> Bajaraxuata xanepanaejitsipa itsa netocanacuenebiaexanaejitsipame tajapalata banco pevetsivijavabelia. Nexata aeconoxae banco pevetsivi tajapalata pecacovaetsijamatabēcueneta netocanaviatsipa tajapalata pematatsēnē,” jai petuxanenē pijajivitonējavabelia.

<sup>28</sup> Nexata petuxanenē jumaitsi bajarajota penubenaevijavabelia: “Pavecuapire bajarapamil ponēbeje. Nexata juya parajure ponējavabelia xaina diez mil ponēbeje. Tsipaji bajaraponē caējēpatsi tanetoevetsinexa pematatsēnē. <sup>29</sup> Tsipaji pajivi ayaijava baja xaina, pematatsēnē icatsia itsajava rajutsianatsi. Nexata xainaena ayaijava. Itsiata pajivi tsiquirijavayo xaina, bajarapajivi pijatsiquirijavayomi vecuapitsianatsi. <sup>30</sup> Maponē tajajivitonēje, itsacuenejavayonexa ata, apo netoxanepanae. Paxuabaremelia pitaquirijavabelia. Bajarajota natsinuena. Navonosiniananua bitso penavixaetaexae,” jai petuxanenē, jai Jesús comparacióncuenia pijajivijavabelia.

Bajarapacuenia Jesús jumaitsi pamonaē pijaneconi pexainaēvi Jesús penaneconitsiaexanaenexa pamatacabi icatsia patsianica.

*Pacuenia Dioso naneconitsiaexanaena pijaneconi pexainaēvi yabara pelivaisi*

<sup>31</sup> Jesús tajēvelia navajunupaeba pacuenia itsamatacabi exanaejitsia mapanacuataje. Jesús jumaitsi pijajivijavabelia mapacueniaje:

—Xanē, Daxitajivi Pematapijinēnē, icatsia itsa najetarucaenajē daxitanacua taevetsinexa, ángelevi nematatoyoronaeya yajavanajetarucaenajē. Nexata ecaenajē tajapenivenivenaetronovēnējavata. <sup>32-33</sup> Nexata daxitanacuanēpijivi caetuatsianatsi taitabarata. Tsataponaenajē bajarapamonae. Oveja pevetsinē ovejavecua chivo saicaya tsatapona. Nexata oveja pevetsinē petsavenononia chivo nubenaeyaexana. Pecujuanenia pijinia oveja nubenaeyaexana. Bajara pijinia pacuenia xanē tsataponaenajē Dioso apo pejumecovēnētsivi, Dioso pejumecovēnētsivivecua. Dioso apo pejumecovēnētsivi tatsavenononia nubenaeyaexanaenajē. Dioso pijinia pejumecovēnētsivi tacujuanenia nubenaeyaexanaenajē. <sup>34</sup> Nexata jumaitsinē tsane tacujuanenia penubenaevijavabelia, Dioso pejumecovēnētsivi: “Naxanitsia. Paxamē taxa papecaitaxutotsoniataēvi. Payajavajinavanapaename taxa pijanacuatatsia, itsajotatsia pacatoxaniavaeta tajēvelia. Dioso pacatoxaniavaeta nacua pexanaejavaveliacujinae. <sup>35</sup> Itsa tajani, paxamē taxaejava panerajutame. Itsa mera jitsipajē, panerajutame mera. Itsanacuaverena itsa patajē, panecopiapitame xaniavaetsia. <sup>36</sup> Itsa ajibi bitso tanaxatatsijava, panerajutame tanaxatatsijavanexa. Itsa avitanenē, papatame patanevetsinexamē. Itsa neeta penaneconitsivi pejebabiabibota, papatame patanetaenexamē,” janē tsane tacujuanenia penubenaevijavabelia. <sup>37</sup> Nexata bajarapamonae nejumai tsane: “Tajatuxanenē, ¿detsa pacujinae niajanijavata patajocarajutsi nexaejava?” nejai tsane. ¿Detsa pacujinae mera nejitsipaejavata patajocarajutsi mera? nejai tsane. <sup>38</sup> Itsa jume, nejumai tsane: “¿Detsa pacujinae itsanacuaverena nepatsinē patajacopiapitsi xaniavaetsia?” nejai tsane. Itsa jume, nejumai tsane: “¿Detsa pacujinae piajibijavata bitso nenaxatatsijava patajocarajutsi nenaxatatsijavanexa?” nejai tsane. <sup>39</sup> Itsa jume, nejumai tsane: “¿Detsa pacujinae niavitanejavata patajaponae patacaevetsinexa?” nejai tsane. Itsa jume, nejumai tsane: “¿Detsa pacujinae pecaetsijavata penaneconitsivi pejebabiabibota patajaponae

patacataenexa?” nejai tsane. <sup>40</sup> Nexata xanë jumaitsinë tsane bajarapamonaejavabelia: “Xaniajanë pacuenia pacatsipaebijitsiatsi. Daxita xua patoexaname paneyavenonaenexa tajajiviyajuvënëjivi, beveliajamatabëcuenevi petaevitsijavabelia, bajaraxua xanë taniji xanëjavaberena bepatanetoexanaejavamë,” janë tsane.

<sup>41</sup> Nexata tatsavenononia penubenaevi, Dioso apo pejumecovënëtsivijavabelia, jumaitsinë tsane: “Panevecuanatsare panijaneconi paneyajavajinavanapaevi. Paponaremelia apo peverevereaeisotojavabelia. Bajarapaisoto Dioso tajëvelia toxaniavaeta dovathinexa, dovathi pijajivinexa ata. <sup>42</sup> Xanë ita tajani, paxamë apo panerajutsimë taxaejava. Itsa mera jitsipajë, apo panerajutsimë mera. <sup>43</sup> Itsanacuaverena ita patajë, apo panecopiapitsimë xaniavaetsia. Itsa ajibi bitso tanaxatatsijava, apo panerajutsimë tanaxatatsijavanexa. Itsa avitanenë, apo papatsimë patanevetsinexamë. Itsa neeta penaneconitsivi pejebabiabibota, apo papatsimë patanetaenexamë,” janë tsane tatsavenononia penubenaevijavabelia. <sup>44</sup> Nexata bajarapamonae pijaneconi peyajavajinavanapaevi nejumai tsane: “Tajatuxanenë, ¿detsa pacujinae niajanijavata apo pacarajutsitsi nexaejava?” nejai tsane. Itsa jume, nejumai tsane: “¿Detsa pacujinae mera nejitsipaejavata mera apo pacarajutsitsi?” nejai tsane. Itsa jume, nejumai tsane: “¿Detsa pacujinae itsanacuaverena nepatsinë, apo pacacopiapitsitsi xaniavaetsia?” nejai tsane. Itsa jume, nejumai tsane: “¿Detsa pacujinae bitso pecatoajibijavata nenaxatatsijava, apo pacarajutsitsi nenaxatatsijavanexa?” nejai tsane. Itsa jume, nejumai tsane: “¿Detsa pacujinae niavitanejavata, apo paponanë patacaevetsinexa?” nejai tsane. Itsa jume, nejumai tsane: “¿Detsa pacujinae penaneconitsivi pejebabiabibota pecaetsijavata, apo paponanë patacataenexa?” nejai tsane bajarapamonae. <sup>45</sup> Nexata xanë jumaitsinë tsane bajarapamonaejavabelia: “Xaniajanë pacuenia pacatsipaebijitsiatsi. Bajarapacuenia ita apo patoexanaemë paneyavenonaenexa tajajiviyajuvënëjivijavabelia, nexata bajaraxua xanë taniji xanëjavaberena apo patanetoexanaejavamë,” janë tsane pijaneconi peyajavajinavanapaevijavabelia. <sup>46</sup> Bajaraxuacujinae bajarapamonae ponaena penaneconitsijajinavanapaenexa daxitamatacabijavabelianexa. Pamonae Dioso pejumecovënëtsivi, bajarapamonae Dioso rajutsianatsi matababi apo peverevereaejava, jai Jesús pijajivijavabelia tajëvelia penavajunupaebijavata itsamatababi penaneconitsiaexanaejavanexa pijaneconi pexainaevi, pamatababi icatsia patsianica.

## 26

*Pacuenia picani Jesús pijavajabitsaë jamatabëvaetabatsi yabara pelivaisi*  
(Mr 14.1-2; Lc 22.1-2; Jn 11.45-53)

<sup>1</sup> Itsa baja Jesús najumevereta pijajivijavabelia livaisi petsipaebijava, Jesús icatsia tajëvelia navajunupaeba itsamonae cruzajavabelia pecobematabiabarutsijavanexatsi. Jesús jumaitsi pijajivijavabelia mapacueniaje:

<sup>2</sup> —Payapëtaneme rabaja anijamatacabibeje pesajinaejava pejonenexa baja pascuavënëfiesta. Nexata xanë, Daxitajivi Pematapijinënë, necanajetsiana itsamonae pecobeyabelia tanecobematabiabarutsinexa cruzajavabelia, jai Jesús pijajivijavabelia tajëvelia penavajunupaebijavata cruzajavabelia pecobematabiabarutsijavanexatsi.

<sup>3</sup> Nexata bajarapaepatota nacaetuata sacerdotevi penamatacaitorobivi. Nacaetuata judíovi pecujarubivinua. Nacaetuata judíovi pijaancianovinua. Daxita bajarapamonae nacaetuata Caifásvënëne pijaboxanetota. Bajaraponë Caifás, sacerdotevi pepo penamatacaitorobinë. <sup>4</sup> Bajarajota daxita bajarapamonae najumejaita. Penajumetsënëtsilivaisita picani Jesús jamatabëvaetabatsi pebeyaxuabinexatsi. <sup>5</sup> Itsiata bajarapamonae najumaitsi:

—Fiestajavata meta abaxë apo vaetabi tsanetsi jivi vajanacaitsacueniabiyaniva, najai daxita bajarapamonae.

*Pacuenia Jesús petiriva tsimataepanatsi petuxujuviaceitera yabara pelivaisi*  
(Mr 14.3-9; Jn 12.1-8)

<sup>6</sup> Jesús ponapona Betania tomarata, Simón pijabota. Simón bajayajebi bitso peperabëtsabanaenëmi. <sup>7</sup> Nexata Jesús petiriva cobenaimoxoyorenatsi petuxujuviaceitera, alabastrobotellabëta pejeaceitera. Bajarapora bitso penamatamotsira. Nexata Jesús penabanecaejavata mesata, bajarapova tsmataepanaicatsi bajarapaaceitera. <sup>8</sup> Nexata Jesús pijajivi ita taeyena Jesús petsimataepanaejavatsitsica bajarapaaceitera, Jesús pijajivi jamatabëcueneanaepanareca. Nexata ëpamonae najumai tsenae:

—¿Detsa xuajitsia saya xuaba bajarapacuenia maporaje? <sup>9</sup> Canajetsipa rajane. Nexata matamopitsipa ayaimatamo. Bajarapapalata rajutsipa bepejiobivi bajarapacuenia peyavenonaenexa, najai tsenae Jesús pijajivi.

<sup>10</sup> Nexata Jesús jumetane bajarapacuenia pijajivi pejumaitsijava. Nexata Jesús jumaitsi pijajivijavabelia:

—¿Detsa xuajitsia bajarapacuenia pajumaitsimë bajarapova pexanaejava yabara? Mara povaje pexaniacuene nexanaje. <sup>11</sup> Daxitamatacabi raja bepejiobivi jinavanapa itsaxuayo pajinavanapame. Itsiata baitsi jane xanë daxitamatacabi apo ponaponaenë tsane paxamëjavata. <sup>12</sup> Itsamonae petëpaejivi batsiperabëëpana petuxujuviaceitera peperabëxaniavaetsinexa pemëthëtsivajënae. Bajara pijinia pacuenia mapovaje netsimataepana petuxujuviaceitera, abaxë apo tëpae atanë. Nexata baja bajarapova neperabëxaniavaeta itsamonae tanemëthëtsivajënae. <sup>13</sup> Xaniajanë pacuenia pacatsipaebijitsiatsi. Daxitanacuanëjava tajajivi ita paebanajetarubenaena pexanialivaisi jivi tacapanepaelivaisinexa, vajunupaebabiabiananua pacuenia exana xanëjavaberena mapapetirivaje, jai Jesús pijajivijavabelia tajëvelia penavajunupaebijavata pebeyaxuabijavanexatsi.

*Pacuenia Judas Jesús yajumejailia pijavajabitsaë pecobeyabelia pecanajetsinexa yabara pelivaisi*

(Mr 14.10-11; Lc 22.3-6)

<sup>14</sup> Jesús pijajivi, doce ponëbejeyajuvënënë, pevënë Judas Iscariote. Nexata Judas pona sacerdotevi penamatacaitorobivijavabelia. Jesús jane baja yajumejailiatsi pecanajetsinexatsi. <sup>15</sup> Nexata Judas jumaitsi sacerdotevi penamatacaitorobivijavabelia:

—¿Detsa pacuenia panerajutsipame panecobeyabelia ita canajetsipajë Jesús? jai Judas.

Nexata bajarapamonae Judas matamotatsi treinta ponëbeje pepo palatanëanë, bitso penamatamotsinëanë. <sup>16</sup> Nexata bajaraxuacujinae Judas Jesús naitaxutocaevetsia ponapona. Nexata paepatota Judas toyapëxanepanatsi, perajutsinexa jane baja Jesús bajarapamonae pecobeyabelia.

*Pacuenia Jesús barë nabane pijajivi pecopiarutsinabani baja pebeyaxuabivajënaetsi yabara pelivaisi*

(Mr 14.12-25; Lc 22.7-23; Jn 13.21-30; 1 Co 11.23-26)

<sup>17</sup> Junua jane baja fiesta, pafiestajava judíovi baxane levadurata matajërëabinejeva pexanaepan. Nexata Jesús pijajivi imoxoyorenatsi. Yanijobatsi pijajivi.

—¿Detsa belia paponanajë patacamitsaexanaenexa, xua jivi baxane pascua fiestamat-acabi, nexaenexa? jai Jesús pijajivi.

<sup>18</sup> Nexata Jesús jumaitsi pijajivijavabelia:

—Paponare tomarabelia. Pacatsipaebianatsi ponë pijabota papatsijitsiamë. Pajumaitsimë tsane bo pexainanëjavabelia mapacueniaje: “Vajanacacujarubinë raja jumaitsi: ‘Imoxoyo rabaja tavajënae tanebeyaxuabinexa. Nexata bajaraponë pijabo netsicopatsiana patacabarëxaenexa xua jivi baxane pascua fiestamatacabi,’ jai raja vajanacacujarubinë,” pajamë tsane bo pexainanëjavabelia, jai Jesús pijajivijavabelia.

<sup>19</sup> Nexata baja Jesús pijajivi pona pacuenia Jesús jumaitsi. Nexata xua jivi baxane pascua fiestamatacabi daxita Jesús pijajivi pebarëxaenexa, Jesús pijajivi exana jane baja.

<sup>20</sup> Nexata baja ajena meraviyotsia, Jesús pijajivi, doce ponëbeje, barëca mesa muxuneneta. <sup>21</sup> Nexata pexaeyenaejavata Jesús jumaitsi pijajivijavabelia:

—Xaniajanë pacuenia pacatsipaebijitsiatsi. Caenë paxamëyajuvënënë necanajetsiana tajavajabitsaë pecobeyabelia, jai Jesús pijajivijavabelia Judas yabara.

<sup>22</sup> Nexata Jesús pijajivi bejamatabëjibireca. Nexata Jesús pijajivi, caenë canacujitsia, Jesúsjavabelia yanijobapona.

—Tajatuxanenë, ¿xanë tsaja tsane? jai tsaponae Jesús pijajivi.

<sup>23</sup> Nexata Jesús jumaitsi pijajivijavabelia:

—Ponëbeje peneta caecuenia panajuacajabutsianajëbeje panbë platojavabelia, bajara-ponë necanajetsiana tajavajabitsaë pecobeyabelia. <sup>24</sup> Xanë, Daxitajivi Pematapijinënë, tēpaenajë pacuenia baja cajena xanë yabara Dioso pejumelivaisibaxutota tajëvelia jumaitsi. Itsiata ponë tajavajabitsaë pecobeyabelia necanajetsiana, bajaraponë bitso bejiobi tsane pinijicuenia. Itsa meta bajaraponë apo naexanae tsipae, bajarapacuenia apo necanajetsi tsipae. Nexata xanepanaejitsipa bajaraponë itsa apo naexanae tsipae. Tsipaji apo naneconitsi tsipae Diosojavabelia, jai Jesús pijajivijavabelia Judas yabara.

<sup>25</sup> Nexata Judas, ponë jane baja canajetsijitsiatsi Jesús pijavajabitsaë pecobeyabelia, jumaitsi:

—Petuxanenë, ¿xanë tsaja tsane? jai.

Nexata Jesús jumaitsi:

—Jājā, xamë rabaja tsane, jai.

<sup>26</sup> Pexaeyenaevavata Jesús pita panbë. Jesús jumaitsi Diosojavabelia:

—Pexaniacuene panetoexaname. Panerajutame pan, jai.

Bajaraxuacujinae Jesús epatsënëquejeba bajarapapanbë. Rajuta pijajivi. Jesús jumaitsi pijajivijavabelia:

—Paxaema. Mara tavitoje, jai.

<sup>27</sup> Bajaraxuacujinae icatsia Jesús copavënëjavata yapita piapaeranexa. Diosojavabelia jumaitsi:

—Pexaniacuene panetoexaname. Panerajutame maporaje, jai.

Bajaraxuacujinae pijajivi bajarapora rajuta. Jumaitsi pijajivijavabelia:

—Papaema padaxitamë maporaje. <sup>28</sup> Tsipaji tajana othopaena jivi ayaibitsaëtoxoneto pibisiacuene pexanaeneconi pevecuaajibiaexanaenexatsi. Nexata tatēpaejava pejamatabëcueneta, jivi yapētaena pepacuene xaniajai Dioso jivi pecapanepaejavanexa, pacuenia baja cajena tajëvelia Dioso najumecapanepaeya jumaitsi. <sup>29</sup> Xaniajanë pacuenia pacatsipaebijitsiatsi. Xanë rabaja mapanacuataje matavējëa apo apaenë tsane uvacuaira, matapania icatsia pejanauvacuaira pacayajavaapaenatsi taxa pijanacuatatsia, jai Jesús pijajivijavabelia penavajunupaebijavata pebexuabijavanexatsi.

*Pacuenia Jesús tajëvelia jumaitsi Pedrojavabelia: “Pedro, xamë raja nayavajunuaxainaename tajajivitonëcuenemë,” jai yabara pelivaisi*

*(Mr 14.26-31; Lc 22.31-34; Jn 13.36-38)*

<sup>30</sup> Jesús pijajivi barënaxëana Diosojumevajianë. Bajaraxuacujinae Jesús pijajivi barëpona petsutojumabelia. Patsutojumata olivonaenë apaaxayo, bajarapatsutojumabelia barëpona. <sup>31</sup> Nexata bajarapatsutojumata Jesús jumaitsi pijajivijavabelia:

—Daxita raja paxamë ajena, pameravi, panexuabarëcëpecaename. Tsipaji rabaja patanexuabarëcëpecaejavanexamë yabara, Dioso pejumelivaisibaxutota tajëvelia jumaitsi mapacueniaje: “Bexuabianatsi raja oveja pevetsinë. Nexata pijaovejabit- saëto nacayajatsia rëcëpecaena,” jai Dioso pejumelivaisibaxutota paxamë patanexuabarëcëpecaejavanexamë yabara. Nexata ajena, pameravi, tajavajabitsaë itsa nevaetabiana tanebexuabixana, daxita paxamë panexuabarëcëpecaename. <sup>32</sup> Itsiata baitsi jane tatēpacujinae, icatsia asaënë tsane. Nexata paxamë panevajënaeyabelia, copiata ponaenajë Galilea nacuyabelia, jai Jesús pijajivijavabelia.

<sup>33</sup> Nexata Pedro jumaitsi Jesúsjavabelia:

—Daxita mapamonaeye caxuabarëcëpecae ata tsane, xanë cajena apo caxuabatabajiravi tsanetsi, jai Pedro.

<sup>34</sup> Nexata Jesús jumaitsi Pedrojavabelia:

—Xaniajanë pacuenia catsipaebijitsiatsi. Ajena rabaja, pameravi, nanianaevëpata, vacara pefiabivajënaeya, nayavajunuaxainaename tajajivitonëcuenemë. “Apo yapë-taenë cajena bajaraponë,” jamë tsane xanë yabara acueyabi xuabeje, jai Jesús Pedrojavabelia.

<sup>35</sup> Itsiata Pedro jumaitsi Jesúsjavabelia:

—Nebeyaxuabijitsia ata tsane xamë yajava, itsiata cajena apo nayavajunuaxainaenë tsane nijajivitonëcuenenë, jai Pedro Jesúsjavabelia.

Daxita Jesús pijajivi bajarapacuenia jumaitsi.

*Pacuenia Jesús vajëta Diosojavabelia Getsemanívënëjavata yabara pelivaisi  
(Mr 14.32-42; Lc 22.39-46)*

<sup>36</sup> Jesús pijajivi pecunuameravita yajavapata Getsemanívënëjavata. Bajarajota Jesús jumaitsi pijajivijavabelia:

—Paneevetenare abaxë majotaje. Abaxë raja imoxoyo majotaliaje vajëtsijitsianë Diosojavabelia, jai Jesús pijajivijavabelia.

<sup>37</sup> Nexata Jesús barëpona acueyabi ponëbeje pijajivi. Jesús pijajivi barëpona pesaicaeyojavabelia mapamatabëxëyoje. Pedro, Santiago, Juan, bajarapamatabëxëyo. Santiagobeje Juanbeje Zebedeo pexënatobeje. Bajaraxuacujinae Jesús bitso najamatabëxaina. Nexata bejamatabëjjiobireca.

<sup>38</sup> Nexata Jesús jumaitsi pijajivi acueyabi ponëbejejavabelia:

—Xanë bitso pinijicuenia najamatabëxainajë. Nexata bitso tanajamatabëxainaejava, jamatabëyatëpajë. Paxamë abaxë majotaje panacopabare. Paitavamë tsane. Pëtsa abaxë pamajitame, jai Jesús pijajivi acueyabi ponëbejejavabelia.

<sup>39</sup> Nexata Jesús caenë pevajënaeyabelia icatsia tsiquirijavayo ponataba. Nexata Jesús irataeya bocajunua pevajëtsinexa Diosojavabelia. Jumaitsi Diosojavabelia:

—Taxa Diosomë, netocopatame picani tanebeyaxuabinexa betajibicueneta. Daxitacuene raja cacaëjëpa nexanaenexa. Nexata necapanepare bajarapabejibicuenenevecua. Itsiata xanë apo tajitsipaecuene ata, pacuenia xamë jitsipame, netocopatsianame, jai Jesús Diosojavabelia pevajëtsijavata pebeyaxuabijavanexatsi.

<sup>40</sup> Bajaraxuacujinae Jesús naviarena acueyabi ponëbeje pijajivijavaberena. Caxitaraba Jesús pijajivi pemajitanubenaevi. Nexata Jesús jumaitsi Pedrojavabelia:

—¿Apo pacacaëjëpae tsabaja rovia caepatoyo ata paneaitavatsenaenexa? <sup>41</sup> Pëtsa pamajitame. Paitavamëre. Pavajëre Diosojavabelia papecayavenonaenexa pibisiacuene paneexanaeyaniva. Tsipaji raja dovathi pacajamatabëcueneëjëbiana. Paxamë picani panejamatabëcueneta pexaniacuene jamatabëpaexanabiabame. Itsiata baitsi jane apo pajamatabëcuenesaëmë pexaniacuene paneexanaenexa, jai Jesús Pedrojavabelia.

<sup>42</sup> Nexata icatsia Jesús pona pecovëyabelia pevajëtsinexa icatsia Diosojavabelia. Vajëta Diosojavabelia mapacueniaje.

—Axa, itsa apo jitsipaemë tanevecuatsatsinexamë betajibicueneta tatëpaejavanexa, nexata pacuenia jitsipame, netocopatsianame, jai Jesús Diosojavabelia.

<sup>43</sup> Bajaraxuacujinae Jesús icatsia naviarena pijajivijavaberena. Caxitaraba icatsia Jesús pijajivi pemajitanubenaevi. Tsipaji baja Jesús pijajivi bitso itamajitsipana.

<sup>44</sup> Nexata abaxë bajarapamonae pemajitanubenaevajavata, Jesús icatsia pona pecovëyabelia pevajëtsinexa icatsia Diosojavabelia. Nexata icatsia vajëta Diosojavabelia pacuenia vajëta copiaya xuabeje vajëta. <sup>45</sup> Bajaraxuacujinae icatsia Jesús naviarena pijajivijavaberena. Jumaitsi Jesús pijajivijavabelia:

—¿Abaxë tsarovia tsiteca pamajitanubename? Copiapata rabaja paepatota xanë, Daxitajivi Pematapijinënë, necanajetsijitsia pibisiacuene pexanaevi pecobeyabelia.

<sup>46</sup> Panonobapunare baja. Ponaenatsi baja. Imoxoyo rabaja najetaruca tajavajabitsaë pecobeyabelia tanecanajetsinënexa, jai Jesús pijajivijavabelia Judas yabara.

*Pacuenia Jesús vaetabatsi pijavajabitsaë yabara pelivaisi  
(Mr 14.43-50; Lc 22.47-53; Jn 18.2-11)*

<sup>47</sup> Jesús pijavajabitsaë pevaetabijavatanevatsi, cuaicuajai tsanucæ pijajivijavabelia. Nexata bajarapaepatota patanajetaruca Judas, Jesús pijajivi doce ponëbejeyajuvënëni. Judas pënanajetarubenatsi jivi ayaibitsaëtovaneto. Bajarapamonaeyajuvënëvi itsamonæ canajetarubena espadanë. Itsamonæ canajetarubena naebonë yajava. Bajarapamonaë itorobatsi sacerdotevi penamatacaitorobivi, judíovi pijaancianovinua. <sup>48</sup> Judas pebarërenavajënaë bajarapamonaë, copiaya baja cajena Judas tsipaeba pacuenia bajarapamonaë yapëtaejitsia Jesús cuene. Judas jumaitsi mapacueniajæ:

—Ponë raja peneta bajacobiaya itabaratsutsunexuabianajë, bajaraponë Jesús tsane. Bajaraponë pavaetabianame. Pacobecëtsiana xaniavaetsia, jai baja cajena Judas pemat-acanajetarucaevijavabelia pebarërenavajënaë.

<sup>49</sup> Nexata jane baja Judas itsa patanajetaruca, exana pacuenia jumaitsi pematacanajetarucaevijavabelia. Judas Jesús itabaratsutsuniaya bajacobatsi Judas jane baja pematacanajetarucaevi peyapëtaenexa Jesús cuene. <sup>50</sup> Jesús nexata jumaitsi Judasjavabelia:

—Judas, ¿detsa xua yabara patame? jai.

Nexata jane baja Jesús petsimaxëponaevitsi, cujibarëcëpaliatsi. Vaetabatsi. Cobecëtsatsi xaniavaetsia pecaponaenexatsi.

<sup>51</sup> Bajarajota Jesús pijajiviyajuvënëni pijaespada navemarajonotaxuabina. Muxuyoropaebiaxuaba sacerdotevi pepo penamatacaitorobinë pijajivitonë. <sup>52</sup> Nexata Jesús jumaitsi pijajivitonëjavabelia:

—Nijaespada baja xataremeca pevënojojavareca. Tsipaji pamonaë namaxëvanita espadata, daxita bajarapamonaë juya espadata babiatsi, jai Jesús.

<sup>53</sup> Icatsia Jesús jumaitsi:

—Itsa vajëtsipajë taxa Diosojavabelia taneyavenonaevinexa tanetoitorobinexatsica, nexata tavajëtsiepatota netoitorobijitsipaica bitso ayaibitsaëtovanetonë ángelevi. <sup>54</sup> Itsa vajëtsipajë taxa Diosojavabelia tanetoitorobinexatsica taneyavenonaevinexa, nexata baja apo netocopiapatsi tsipæ pacuenia Dioso pejumelivaisibaxutota tajëvelia nevajunupaeba pacuenia nevaetabijitsia tanebeyaxuabinexa, jai Jesús pijajivitonëjavabelia.

<sup>55</sup> Nexata Jesús bajarajota jumaitsi petsimaxëponaevitsijavabelia:

—Paxamë meta panetaneme betanacobetoxotsinë. Bajaraxuata pacaponame espadanë, naebonë yajava, patanevaetabinexamë pacuenia pavaetababiabame penacobetoxotsinë. Xanë caematacabi canacujitsia Dioso pejumelivaisi paxamëjavabelia pacatsipaebabiabatsi templobota. Itsiata bajarapamatacabi apo panevaetabimë. <sup>56</sup> Mara pacuenia panevaetabameje tanetocopiapatsixæ baja pacuenia Dioso pejumelivaisibaxutota bajayata tajëvelia nevajunupaeba, jai Jesús pevaetabivitsijavabelia.

Nexata jane baja Jesús pijavajabitsaë pevaetabijavatatsi, daxita Jesús pijajivi xubarëcëpecatsi pacuenia baja cajena Jesús tajëvelia jumaitsi pijajivijavabelia.

*Pacuenia Jesús nutatsi judíovi penamatacaitorobivi pitabarata yabara pelivaisi*

*(Mr 14.53-65; Lc 22.54-55, 63-71; Jn 18.12-14, 19-24)*

<sup>57</sup> Jesús pevaetabivitsi caponaliatsi Caifás pijaboyabelia. Bajaraponë Caifás sacerdotevi pepo penamatacaitorobinë. Nexata Caifás pijabota nacaetuaana judíovi pecujarubivi, judíovi pijaancianovi yajava. <sup>58</sup> Itsa baja Jesús caponaliatsi, nexata Pedro bajarapamonaë pecovëya tajiyo najetaruca. Sacerdotevi pepo penamatacaitorobinë pijabo matatoyorotsia yacaranata ibopanaxanetonë mataropotsia pefaratsijavaxanetota. Nexata bajarapayacaranatsijavaxaneto baupa, Pedro najoneya bopanabojavabelia, itsabelia Jesús cajunuatsi. Nexata sacerdotevi pepo penamatacaitorobinë pijabopanabota, Pedro naeca templobopijipolicíavita. Bajarajota Pedro naeca petænexa pacuenia Jesús pijavajabitsaë exanatsi.

<sup>59</sup> Nexata bajarapabo ënëtuatuajëta sacerdotevi penamatacaitorobivi, judíovi pijaancianovi ata yajava, judíovi pecujarubivi ata yajava, nabarëcuaicuajai. Bajarapamonaë nayanijoba.

—¿Jipatsa yapëtane Jesús pibisiacuenë pexanaejava, paneconi yabara beyaxuabijitsiatsi? najai tsaponaë.

Itsiata bajarapamonae apo caxitajarabi itsaneconi ata, Jesús pijaneconi. Najumetsënëtsiaya picani peneconitsilivaisinexa, jaita penajumetsënëtsilivaisita picani Jesús pebeyaxuabinexatsi. <sup>60</sup> Ayaibitsaëto pata penajumetsënëtsilivaisi pepaebinxaxa Jesús yabara. Itsiata caelivaisi ata najumetsënëtsilivaisi apo paebi bajarapamonae. Nexata bajarapamonae apo caxitajarabi paneconi yabara Jesús naneconitsiaexanaejitsiatsi pebeyaxuabiaexanaenexatsi. Bajaraxuacujinae belia anijanëbeje caelivaisi najumetsënëtsilivaisi neconitatsibeje.

<sup>61</sup> Jumaitsibeje bajaraponëbeje Jesús yabara:

—Maponë jumaitsije: “Xanë necaëjëpa taxuabinexatsica Dioso pijatemplobo. Necaëjëpanua acueyabi matababita icatsia taveretetsinexa itsabo,” jai maponëje, jabeje bajaraponëbeje Jesús yabara.

<sup>62</sup> Nexata jane baja sacerdotevi pepo penamatacaitorobinë nonotapuna bajarapamonae pitabarata. Nexata jumaiti Jesúsjavabelia:

—¿Apo yapëtaemë tsaja itsalivaisiyo ata nejumecanaviatsinexa? ¿Xaniajai tsabaja pacuena maponëbeje caneconitsiajumaitsibeje? jai sacerdotevi pepo penamatacaitorobinë.

<sup>63</sup> Jesús itsiata moya. Nexata bajaraponë icatsia jumaiti Jesúsjavabelia:

—Caitorobatsi caecuenia tanenavajunupaebinxamë nexaniajaijumeta. Itsajume, Diosojavabelia naneconitsianame. Panenavajunupaebare xaniavetsia itsa xamë Cristomë, athëbëvetsica Dioso pecaitorobinëtsica jivi necapanepaenexa. ¿Xamë tsaja Dioso pexënatomë? jai.

<sup>64</sup> Nexata Jesús jumaiti:

—Jājā, xanë rabaja pacuena nejumaitsimë. Nexata icatsia pacajumaititsi. Paxamë raja panetaename xanë, Daxitajivi Pematapijinënë, taecaejava Dioso pecujuanenia, daxitajamatabëcuene pecaëjëpaenëtsi. Panetaenamenua tanajetarucaejava athëbëvetsica itarërebota, jai Jesús.

<sup>65</sup> Bajarapacuenia Jesús pejumaitisijava itsa jumetane, sacerdotevi pepo penamatacaitorobinë penaxatatsijava anaeya titinaxuaba. Bajarapacuenia titinaxuaba pi-anaepanaexae Jesús pejumaitisijava yabara. Nexata sacerdotevi pepo penamatacaitorobinë jumaiti daxita penacaetuatsivijavabelia:

—Mara ponë Dioso apo pejitsipaecuenia cuaicuaijaije. Dioso bepexënato nataeya cuaicuaijai. Pijacuata rabaja naneconita bajarapacuenia pecuaicuaijaixae. Pematatsënëa baja apo namatavenonaetsi itsamonae vajanacatsipaebinxaxa paneconi yabara maponëje naneconitsiaexanaejitsiatsi. Paxamë rabaja pajumetaneme maponëje Dioso apo pejitsipaecuenia pecuaicuaijaijava. <sup>66</sup> ¿Detsa nexata paxamë pajamatabëitsimë? jai sacerdotevi pepo penamatacaitorobinë daxita penacaetuatsivijavabelia.

Nexata daxita penacaetuatsivi jumaiti:

—Naneconita rabaja Diosojavabelia. Nexata baja beyaxuabianatsi, jai bajarapamonae Jesús yabara.

<sup>67</sup> Nexata bajarapamonae Jesús itabarasuabatsi. Bajaraxuacujinae papaëbërëpanata itaxutocëtatsi. Pitaxutocëtsicujinaetsi itabaratsaquibabeponatsi pecobethaitonëta. Itsamonae itabarapacubaxuababiabatsi. <sup>68</sup> Nexata bajarapamonae jumai tsaponae Jesúsjavabelia:

—¿Xamë raja itsa Cristomë, athëbëvetsica Dioso itsa pecaitorobinëtsica jivi necapanepaenexa, nexata vënëjonare ponë caitabarapacubaxuaba! jai tsaponae bajarapamonae.

*Pacuena Pedro nayavajunuaxaina Jesús pijajivitonëcuene yabara pelivaisi*

*(Mr 14.66-72; Lc 22.56-62; Jn 18.15-18, 25-27)*

<sup>69</sup> Itsa abaxë Jesús sacerdotevi pepo penamatacaitorobinë pijabo ënëtuatuajëalia yanijobaponatsi xua yabara naneconitsiaexanaejitsiatsi, Pedro naitaxutocaevetsiaya naeca bopanabota. Nexata bajarapabota penacuenebiva Pedro kujirenatsi. Bajarapova jumaiti Pedrojavabelia:

—Xamë ata rabaja naponaponame Jesústa, Galilea nacuapijinëta, jai.

<sup>70</sup> Nexata Pedro itsiata nayavajunuaxaina Jesús pijajivitonëcuene. Daxita bajarajota penubenaevi pitabarata Pedro jumaitsi:

—Xanë cajena apo yapëtaenë pacuene yabara nejumaitsimë, jai.

<sup>71</sup> Sacerdotevi pepo penamatacaitorobinë pijabo matatoyorotsia yacaranata ibopanaxanetonë mataropotsia pefaratsijavaxanetota. Nexata bajarapayacaranatsijavaxaneto baupajavabelia Pedro natixilia. Nuca bajarapabaupa muxuneneta. Bajarajota icatsia itsava, bajarapabota penacuenebiva, Pedro taenutatsi. Nexata bajarapova ata Pedro yabara icatsia jumaitsi bajarajota penubenaevijavabelia:

—Mara ponë ata naponapona Jesústaje, Nazaret tomarapijinëta, jai bajarapova.

<sup>72</sup> Nexata icatsia Pedro nayavajunuaxaina Jesús pijajivitonëcuene. Pedro jumaitsi:

—Xaniajanë. Dioso pitabarata cajumaitsi. Apo yapëtaenë cajena bajaraponë, jai.

<sup>73</sup> Bajaraxuacujinae icatsia, caeapatoyocujinae, bajarajota penubenaevi cujibarëcëpaliatsi Pedro. Jumaitsi bajarapamonae:

—Xaniajai raeta baja cajena. Xamë Jesús pijajiviyajuvënënëmë. Tsipaji rabaja Galilea nacuapijivi penatsipaebicuenia natsipaebame, jai bajarapamonae Pedrojavabelia.

<sup>74</sup> Nexata Pedro jumaitsi:

—Itsa apo xaniajanë tsipae paxamëjavabelia, nexata Diosojavabelia naneconitsipajë. Apo yapëtaenë cajena bajaraponë, jai Pedro.

Itsa baja Pedro najumevereta bajarapacuenia pejumaitsijava, vacara fiaba. <sup>75</sup> Nexata bajarajota Pedro najamatabënapitajaraba Pedrojavabelia Jesús pejumaitsijava mapacueniaje: “Ajena rabaja, pameravi, vacara pefiabivajënaeya, nayavajunuaxainaename tajajivitonëcuenëmë. ‘Xanë cajena apo yapëtaenë bajaraponë,’ jamë tsane xanë yabara acueyabi xuabeje,” pejaijava Jesús Pedrojavabelia, Pedro najamatabënapitajaraba. Nexata baja Pedro pitsapalia bo matatoyorotsia peyacaranatsijava pënëyabelia. Pinijicuenia Pedro nua.

## 27

### *Pacuenia Jesús caponaliatsi Pilatojavabelia yabara pelivaisi*

(Mr 15.1; Lc 23.1-2; Jn 18.28-32)

<sup>1</sup> Ajena baja maticabi tsarucaponae, sacerdotevi penamatacaitorobivi, judíovi pijaancianovi yajava, najamatabëjëpa pacuenia exanaejitsia Jesús pebeyaxuabiaexanaenexatsi.

<sup>2</sup> Nexata Jesús cobecëtsiaya caponaliatsi nacuaeavetsinë Poncio Pilatojavabelia.

### *Pacuenia Judas nabeyaxuaba yabara pelivaisi*

<sup>3</sup> Judas canajetaxuabatsi Jesús pijavajabitsaë pecobeyabelia. Bajaraponë itsa tane Jesús penaneconitsijava pebeyaxuabinexatsi, nexata bitso najamatabëxaina. Nexata pona petocanaviatsinexa perajutsipalatamitsi, treinta ponëbeje pepo palatanëanë, bitso penamatamotsinëanë. Tocanaviatsijitsia sacerdotevi penamatacaitorobivijavabelia, judíovi pijaancianovijavabelia ata. <sup>4</sup> Judas jumaitsi bajarapamonaejavabelia:

—Pibisiacuene baja rovia exanajë. Bajaraponë itsacuenejavayo ata apo exanaenejeva, panecobeyabelia baja canajetaxuabajë, jai Judas.

Nexata bajarapamonae jumaitsi Judasjavabelia:

—¡Paxanë raja patajamatabëcueneta apo naneconitsimë tsane! ¡Xamë raja nijacuata naneconitame! jai bajarapamonae Judasjavabelia.

<sup>5</sup> Nexata Judas templobota othotajarabeta perajutsipalatanëanëmitsi. Bajaraxuacujinae pitsapalia. Pona baja. Nexata pijacuata nabeyaxuaba. Pepuanavësicëtsi athëbëvetsica perucaemaëtoxanetota, athëbëvetsica jirevica irabetsica penacuibosi catarërëtarabaxuabinexa. Bajarapacuenia pijacuata Judas nabeyaxuaba.

<sup>6</sup> Nexata sacerdotevi penamatacaitorobivi caetuata Judas piothotajarabetsipalatanëanë. Najumaitsi bajarapamonae:

—Acuenebi mapapalataje vajabuatsinexa ofrenda vajajebabiabicajónita. Tsipaji bajarapalata pejamatabëcueneta jivitonë beyaxuabijitsiatsi, najai bajarapamonae.

<sup>7</sup> Nexata bajarapamonae najamatabējēpa bajarapapalatanēanēta pecomuatsinexa ira. Nexata bajarapamonae bajarapapalatanēanēta comuata canalitonē pefaratabiabinē pijairami. Bajarapamonae comuata bajarapaira, itsanacuaverena pepatsivi itsa tēpa Jerusalén tomarata, bajarapairata pemēthētabiabinexa. <sup>8</sup> Bajaraxuata mapamatabijavaberena ataje vērērua bajarapaira mapejumaitsivēnēje: “Papalata pejamatabēcueneta jivitonē beyaxuabatsi, bajarapapalatata pecomuatsiira,” pejaivēnē vērērua. <sup>9</sup> Bajarapacuenia itsa comuata bajarapaira, copiapata jane baja pacuenia Diosojumepabinēmi profeta Jeremiaspijinē bajayata tajēvelia vajunupaeba bajarapalata. Profeta Jeremiaspijinē baja cajena bajarapapalata yabara tajēvelia jumaitsi mapacueniaje: “Israelnacia pevetsivi rajutsiana jivitonē pecanajetsinējavabelia treinta ponēbeje, pepo platananitota pexanaenēanē. Bajarapapalatanēanē icatsia bajarapamonae pitsiana. <sup>10</sup> Nexata bajarapapalatanēanēta bajarapamonae comuatsiana canalitonē pefaratabiabinē pijairami, pacuenia Dioso tajēvelia nejumaitsi,” jai bajayata profeta Jeremiaspijinē tajēvelia pevajunupaebijavata Jesús pematamopitsipalatanexatsi.

*Pacuenia Jesús nutatsi Pilato pitabarata yabara pelivaisi*

(Mr 15.2-5; Lc 23.3-5; Jn 18.33-38)

<sup>11</sup> Jesús nutatsi nacuaevecsinnē Pilato pitabarata. Nexata Pilato jumaitsi Jesúsjavabelia: —¿Xamē tsaja judíovi pepo nevetsinnē? jai Pilato.

Nexata Jesús jumaitsi Pilatojavabelia:

—Jājā, xanē rabaja pacuenia nejumaitsimē, jai Jesús Pilatojavabelia.

<sup>12</sup> Sacerdotevi penamatacaitorobivi, judíovi pijaancianovi yajava, Jesús neconitaponae atatsi, apo jumepitsi. <sup>13</sup> Nexata Pilato jumaitsi Jesúsjavabelia:

—¿Apo jumetaemē tsaja pacuenia mapamonae caneconitaponaje? jai.

<sup>14</sup> Jesús neconitsi atatsi, itsiata apo jumepitsi. Bajaraxuata Pilato jamatabēcuenenabenajaca. Apo yapētae pacuenia Pilato exanaejitsia Jesúsjavabelia.

*Pacuenia baja Pilato tocopata Jesús pebeyaxuabinexatsi yabara pelivaisi*

(Mr 15.6-20; Lc 23.13-25; Jn 18.38-19.16)

<sup>15</sup> Nacuaevecsinnē Pilato xaina pijacujirucue. Caevai canacujitsia, pascua fiestamatacabi, Pilato copatabiaba caenē penaneconitsinnē pepitsapaenexa penaneconitsivi pejebabiabibovecua. Pajivi yabara jivi vajētabiaba Pilatojavabelia, bajarapajivi Pilato copatabiaba pascua fiestamatacabi. Bajarapacuenia Pilato caenē copatabiaba jivi pesivajamatabēcue xanepanaenexatsi. <sup>16</sup> Pamatacabi Jesús naneconitsiaexanatsi, bajarapamatacabi penaneconitsivi pejebabiabibota naneconitsiaponapona jivibenē, Barrabásvēnēnē. Bajaraponē bitso piacujirubejenēcuene yapētanetsi daxitajivi. <sup>17</sup> Nexata daxita Jerusalén tomarapijivi penacaetuatsijavata Pilato jumaitsi:

—¿Detsa ponē pajitsipame patacatocapitsapaenexa penaneconitsivi pejebabiabibovecua pepitsapaenexa? ¿Barrabás tsaja? Itsa jume, ¿Jesús tsaja, ponē yabara jivi jumaitsi: “Cristo raja athēbēvetsica Dioso pitorobinētsitsica jivi pecapanepaenexa,” jaitsi? jai Pilato bajarapamonaejavabelia.

<sup>18</sup> Pilato jamatabējumaitsi:

—Xua Jesús exanaponapona, sacerdotevi penamatacaitorobivi cueneitoyatsi. Bajaraxuata netocaparena, jamatabējai.

<sup>19</sup> Pilato abaxē eca itsajota ecabiaba penaneconitsivi penaneconitsiaexanaenexa. Nexata Pilato pijava tonajumeitorobarenatsi. Pilato pijava Jesús yabara jumaitsiarena mapacueniaje: “Copare bajaraponē, ponē itsacueneneconiyo ata apo penaneconitsinnē. Ajena raja, meravi, amajitsinaebejenē bajaraponē yabara,” jaitsirena Pilato pijava. Nexata picani Pilato jamatabēcopata Jesús.

<sup>20</sup> Itsiata baitsi jane bajarapaepatota sacerdotevi penamatacaitorobivi, judíovi pijaancianovi yajava, jivijavabelia muxubijiapenetsia jumai tsaponae:

—Pavajētsianame Barrabás pecapitsapaenexatsi. Pavajētsianame Jesús pebeyaxuabinexatsi, jai tsaponae bajarapamonae.

<sup>21</sup> Nexata nacuaevevtsinē Pilato icatsia yanijoba jivijavabelia:

—¿Detsa ponē nexata pajitsipame patacatocapitsapaenexa? jai Pilato.

Nexata bajarapamonae jumaitsi:

—Panetocapitsapare Barrabás, jai.

<sup>22</sup> Pilato nexata jumaitsi bajarapamonaejavabelia:

—¿Detsa nexata xua exanaenajē Jesúsjavabelia, ponē yabara: “Cristo, ponē Dioso athēbēvetsica itorobatsi jivi pecapanepaenexa,” jaitsi? jai Pilato bajarapamonaejavabelia.

Nexata daxita bajarapamonae jumaitsi Pilatojavabelia:

—¿Cruzajavabelia cobematabiabarutsiaexanarel! jai bajarapamonae.

<sup>23</sup> Nexata Pilato jumaitsi bajarapamonaejavabelia:

—¿Detsa pitsineconi yabara cobematabiabarutsiaexanaejitsipajē cruzajavabelia? jai Pilato Jesús yabara.

Itsiata bajarapamonae icatsia pinijijumeta vavajai.

—¿Cruzajavabelia cobematabiabarutsiaexanarel! jai tsaponae.

<sup>24</sup> Pilato tane piajumesaējjava bajarapamonae. Muxujiobi ata, apo jumecovēnētsitsi. Bitsoyo biji caranata bajarapamonae jamatabēnanaecajematapona bajarapatomarata. Nexata Pilato penacobequiatsinexa, pijajivi itoroba petocarenanexatsi mera. Pilato nacobequiata daxitajivi pitabarata bajarapamonae peyapētaenexa Jesús apo penaneconitsiaexanaecuene. Pilato jumaitsi bajarapamonaejavabelia:

—Xanē raja tajamatabēcueneta apo beyaxuabiaexanaenē tsane maponēje, planeconijibinē. Paxamē panejamatabēcueneta pabeyaxuabiaexanaename, jai Pilato.

<sup>25</sup> Nexata daxita bajarapamonae jumaitsi:

—¿Itsa bajaraponē planeconijibinē Diosojavabelia, nexata bajaraponē patabeyaxuabineconi jema panetsijumajopaena, pataxi yajava! jai bajarapamonae Pilatojavabelia.

<sup>26</sup> Nexata baja Pilato tocopata Barrabás pepitsapaenexa penaneconitsivi pejebabiabibovecua. Itorobanua vajabitsaēvi ayaicuenia Jesús pejumatitibabenexatsi penaneconitsivi pejumaconitabiabimacata. Bajaraxuacujinae Pilato tocopata baja Jesús vajabitsaēvi pecobematabiabarutsinexatsi cruzajavabelia.

<sup>27</sup> Nexata baja Pilato pijajivi, vajabitsaēvi, Jesús caponaliatsi nacuaevevtsinē Pilato pijaboxanetojavabelia. Nexata bajarajota Jesús matatoyorotsia nacaetuatatsi daxita vajabitsaēvi. <sup>28</sup> Jesús penaxatatsijava vajabitsaēvi vejumajonotatsi saicayajava pexatatsinexatsi. Nexata jane baja vajabitsaēvi Jesús quenetsiataeya xatatatsi petsobiajjava benacuaevevtsinēcuenia petaenexatsi. <sup>29</sup> Becoronacuenia pemataxatatsinexatsi, peejuvitoyoroto tsimataexanatsi. Bajarapatoyoroto Jesús mataxatatatsi. Tsiocerutatsinua naebo pecujanenia benacuaevevtsinēcuenia petaenexatsi. Nexata bepeyaiyataecueniatsi bajarapamonae pematabacabēta tonubenatsi Jesús pitabarata. Quenetsiataeya jumai tsaponaetsi:

—¿Bajaco, judíovi pepo pevetsinē! jai tsaponaetsi bajarapamonae.

<sup>30</sup> Suabaponatsi. Vecuapitatsi naebo. Bajarapanaebota mataconitajarababiabatsi.

<sup>31</sup> Bajarapacuenia quenetsiataeya pecapocaponaecujinaetsi, vejumajonotatsi baja pexatatsijavatsi. Jesús baja icatsia xatatatsi penaxatatsijava. Caponaliatsi jane baja pecobematabiabarutsinexatsi cruzajavabelia.

*Pacuenia jane baja Jesús cruzajavabelia cobematabiabarutatsi yabara pelivaisi  
(Mr 15.21-32; Lc 23.26-43; Jn 19.17-27)*

<sup>32</sup> Vajabitsaēvi Jesús itsa caponaliatsi tomaravecua, namutota caxitajaraba Simónvēnēnē, Cirene tomarapijinē. Nexata vajabitsaēvi Simón itorobatsi, pacruzajavabelia Jesús cobematabiabarutsijitsiatsi, peyavenonaeyacaponaenexa.

<sup>33</sup> Jesús caponaliatsi Gólgotavēnē tsutojavabelia, bajarapatsutojumata pecobematabiabarutsinexatsi cruzajavabelia. “Gólgota,” itsa jai hebreojumeta, mapajumetaje pejumaitsi jume: “Jivimatasipatsuto,” pejaijume. <sup>34</sup> Bajarajota picani Jesús rajutatsi

vinora, pematajërëabira piatsaxarata. Jesús picani rajutatsi bitso penavixaetaeyaniva pecobematabiabarutsijavatatsi cruzajavabelia. Jesús pajane bajarapora. Itsiata apo apae.

<sup>35</sup> Nexata jane baja Jesús vajabitsaëvi cobematabiabarutatsi cruzajavabelia. Bajaraxuacujinae vajabitsaëvi bajarajota canamuxusita beibotoxi. Bajarapacuenia canamuxusita peyapëtaenexa ponë pitaponaejitsia caejava canacujitsia Jesús penaxatatsijavami, xua jumaponapona. Bajarapacuenia vajabitsaëvi natsicobetsana Jesús penaxatatsijavami. Bajarapacuenia vajabitsaë ita natsicobetsana Jesús penaxatatsijavami, tocopiapatatsi jane baja pacuenia Diosojumepaebinëmi profetanë bajayata tajëvelia vajunupaeba Jesús penaxatatsijava. Jesús penaxatatsijava yabara, profetanëmi bajayata tajëvelia jumaitsi mapacueniaje: “Natsicobetsanaena penaxatatsijava. Canamuxusitsiana beibotoxi peyapëtaenexa ponë pitaponaejitsia,” jai profetanëmi. <sup>36</sup> Bajaraxuacujinae vajabitsaëvi bajarajota evetena penaitaxutocaevetsinexatsi Jesús. <sup>37</sup> Bajarajota Jesús pematabocoto matatsënëyo cruzajavata, yaquinaruta tablapayota itsamonae ata peyapëtaenexa pajamatabëcuene yabara naneconitsiaexanatsi Jesús. Jumai tsarutsi peyaquinaeitane cruzajavata mapacueniaje: “Mara ponë Jesúsje, judíovi pepo pevetsinë,” jai tsarutsi Jesús yabara.

<sup>38</sup> Anijanëbeje penacobetoxotsinëbeje Jesús yajavacobematabiabarutatsi. Caenë canacujitsia pijacruzata rubatsi. Bajaraponëbeje Jesús pemuxuneneta rutatsibeje. Itsanë Jesús pecujanenia rutatsi. Itsanë Jesús petsavenonenia rutatsi. <sup>39</sup> Jesús pecobematabiabarutsijavatatsi cruzajavabelia, bajaraxuayo penajetarubenaevi Jesús itaropitsiaya bijataeyabiabatsi. <sup>40</sup> Jumai tsabiabi bajarapamonae:

—Xamë raja imata jumaitsimë: “Xuabianicajë templobo. Acueyabi matabita icatsia veretetsianajë itsabo,” jamë. Nacapanepare jane baja nijacuata. Itsa xaniajai Dioso pexënatomë, nexata cruzajavavetsica runaimica, jai tsabiabi Jesúsjavabelia bajaraxuayo penajetarubenaevi.

<sup>41</sup> Bajara pijinia pacuenia sacerdotevi penamatacaitorobivi capocaponatsi Jesús. Judíovi pecujarubivi ata capocaponatsi. Fariseovi ata capocaponatsi. Judíovi pijaancianovi ata capocaponatsi Jesús. Ëpamonae najumaitsi:

<sup>42</sup> —Maponëje itsamonae yabara jumai tsabiabi: “Capanepaenajë jivi,” jai tsabiabi. Caranata pijacuata penacapanepaenexa apo caëjëpaetsi. Itsa xaniajai Israel nacuapijivi pepo pevetsinë, nexata aeconoxae cruzajavavetsica runaenica vajataenexa. Nexata jane baja jumecovënëtsianatsi Cristonëcuene. <sup>43</sup> Bajaraponë pina najamatabëcuene copata Diosojavabelia peyavenonaenexatsi. “Xanë raja Dioso pexënatonë,” jai tsabiabinua. Nexata taenatsi aeconoxae Dioso pecapanepaejavatsi, najai bajarapamonae capocaponaeja Jesús yabara.

<sup>44</sup> Ponëbeje penacobetoxotsinëbeje Jesús yajavacobematabiabarutatsi, bajaraponëbeje ata Jesús bijataerucatsibeje bajarapacuenia.

*Pacuenia baja Jesús tēpa yabara pelivaisi*  
(Mr 15.33-41; Lc 23.44-49; Jn 19.28-30)

<sup>45</sup> Jesús baja ita tēpaejitsia, ajena matonejitsia, daxita nacuanëjava aitaquiri tsajuni. Matapania caniviyojavabelia, bejamatabëcuene a las tres, nacua napebeta icatsia. <sup>46</sup> Nexata paepatota icatsia nacua napebeta, bajarapaepatota pinijicuenia Jesús aëjai. Jumaitsi:

—Eli, Eli, ¿lama sabactani? jai Jesús.

Bajarapacuenia Jesús ita jumaitsi pijajumeta, mapajumetaje pejumaitsi jume: “Taja-Dioso, tajaDioso, ¿detsa xuajitsia baja tajaepato necopatame?” pejaijume.

<sup>47</sup> Nexata itsamonae bajarajota penubenaevi bijiaya jumetane bajarapacuenia Jesús pejumaitsi jume. Nexata saya jamatabëcuenenavëxaniabiaya jumaitsi bajarapamonae:

—Mara ponë junata profeta Elíaspijinëmi, Diosojumepaebinëmi, jai bajarapamonae.

<sup>48</sup> Nexata bajarapamonaeyajuvënëne bepijia cujinaelia pecarenanexa esponjavënëjava. Nexata esponjavënëjava jabutaba piajatuvonorayalia. Bajaraxuacujinae esponjavënëjava naeboupita cëtaruta. Toyotsiatsi Jesús petsutsuninexa picani bajaraxua.  
<sup>49</sup> Itsiata itsamonaë jumaitsi:

—Copare abaxë. Taenatsi Elíaspijinë itsa najetaruca pecapanepaenexatsi, jai bajarapamonaë capocaponaeya.

<sup>50</sup> Icatsia Jesús pinijicuenia aëjai. Bajaraxuacujinae jane baja Jesús tēpanajereca.  
<sup>51</sup> Paepatota Jesús tēpanajereca, bajarapaepatota templobo ënëtuatuajëalia peyatucutarutsipana, ayaiapaëbërëpanaxaneto, titititica tuatuajëareca, athëbëvetsicacujinae irabereca. Ira najëaba. Ibotoxanetonë ata sarapajunujunua. <sup>52-53</sup> Ayaibitsaëto Dioso pepua pejumecovënëtsivi petëpaevimi pemëthëanë ata napananubena. Nexata Jesús acueyabi matabacabita icatsia itsa asaë petëpaecujinae, pamonaë pemëthëanë napananubena, bajarapamonaë ata cotocaevi asaë. Nexata pitsapa mëthëvetsina. Nexata bajarapamonaë pona Jerusalén tomarabelia. Bajarajotalia naitajëbapona jivi ayaibitsaëtojavabelia.

<sup>54</sup> Jesús cruzata petëpaejavata vajabitsaëvi pijacapitán, pijajivi yajava, nuca. Taenubena Jesús petëpaejava. Jesús petëpaejavata ira najëaba. Nexata bajarapamonaë itsa tane ira penajëabijava, itsajavanë ata itsa taepona, bajarapamonaë bitso junava. Jumaitsi:

—Matsaena ponë tēpaje, pepacuene baja rovia Dioso pexënato, jai bajarapamonaë.

<sup>55</sup> Bajarajota petiriavibitsaëtoxaneto tajiyoverena taenubena Jesús petëpaejava. Bajarapapetiriavi Jesús pepëta napona Galilea nacuaverena, Jesús peyavenonaevimitsi.

<sup>56</sup> Bajara papetiriavibitsaëtoxaneto tuatuajëta nanubena mapamatabëxëyoje. Itsava Mariävënëva, Magdala tomarapijiva. Itsava icatsia Mariävënëva. Bajarapova Santiagobeje Josébeje pena. Itsava pijinia Salomévänevëva. Bajarapova pijinia Santiagobeje Juanbeje pena. Bajarapova Salomévänevëva, Zebedeo pijava.

*Pacuenia Jesús petëpaenë mëthëtatsi yabara pelivaisi*

(Mr 15.42-47; Lc 23.50-56; Jn 19.38-42)

<sup>57</sup> Itsa baja caniviyotsia, José, Arimatea tomarapijinë, pona nacuaevetsinë Pilatojavabelia. Bajaraponë José bitso pexainanë pexainaejava. José jumecovënëtaaponapona Jesús Cristocuene. <sup>58</sup> Nexata José itsa pata nacuaevetsinë Pilatojavabelia, vajëta petocopatsinexatsi pemëthëtsinexa Jesús petëpaenë. Nexata Pilato itoroba pijajivi petocopatsinexatsi. <sup>59</sup> Nexata José cruzajavavetsica pitsica Jesús petëpaenë. Mataquionae aeya daxitanëreca matabacëba pexaniaviria piapiásabanapanata, piaxuirajibipanata.  
<sup>60</sup> Bajaraponë José, pamatacabi tēpa pemëthëtsinexatsi picani, iboitapajanitojavata piniijibovaju toexanabuatsi cajena. Nexata bajarapaibovajulia José buata Jesús petëpaenë. Nexata bajaraxuacujinae pinijiibopanaxaneto José tixirena. Yavajuvëpaacatabuata. Nexata baja José naviata pijaboyabelia. <sup>61</sup> Bajarajota ibovaju itapajavata eecabeje anijavabeje ëMariävënëvabeje. Itsava María, Magdala tomarapijiva.

*Pacuenia vajabitsaëvi Jesús pemëthë evetavanapa yabara pelivaisi*

<sup>62</sup> Pascuafiesta pejonematacabinexa pevajënaeya pamatacabi, judíovi baja banacuenevereta penacuenebijava. Nexata baja pamatacabi judíovi banacuenevereta penacuenebijava, bitso baja itsa caniviyotsia, sacerdotevi penamatacaitorobivi, fariseovi ata, ponalia Pilatojavabelia. <sup>63</sup> Nexata bajarapamonaë jumaitsi Pilatojavabelia Jesús yabara:

—Pamatacabi abaxë bajaraponë asaë tsaponaponaë bitso najumetsënëtabiaba. Jumai tsabiabi: “Tatëpaecujinae, acueyabi matabacabita, icatsia asaënë tsane,” jai tsabiabi. Bajarapejumaitsiyava paxanë apo panacofënëtsinë. <sup>64</sup> Nexata nijajivi itorobare bajaraponë pemëthë xaniavaetsia pevetsinexa. Nexata nijajivi bajaraponë pemëthë xaniavaetsia evetsiana acueyabi matabacijavabelia, bajaraponë pecapaëbimatabacijavabelia. Nexata acuenebi tsane pijajivi meravi pejutsinexatsi mëthëvecua. “Namatacota rabaja Jesús,”

pejajava ata jivijavabelia, acuenebi tsane. Itsa bajarapacuenia pijajivi jumai tsipae, nexata najumetsënëtsipa copiaya Jesús penajumetsënëtsijava matatoxenetsia. Nexata bajarapacuenia yamaxëitorobijitsipa jivi ayaibitsaëtoxaneto, jai bajarapamonae Pilatojavabelia.

<sup>65</sup> Pilato nexata jumaitsi bajarapamonaejavabelia:

—Mapamonae tajajivi, vajabitsaëvije, payajavaponare. Nexata paitorobare bajarapamonae Jesús pemëthë pevetsinexa xaniavaetsia, jai.

<sup>66</sup> Nexata bajarapamonae vajabitsaevi barëponalia Jesús pemëthëjavabelia. Bajarapamonae pemaëtoupi catsataruta Jesús pebuatsiibovajutsi pevëpaacatsiibopanajumata. Itsaupi pijinia catsata iboitapajanitojavabelia. Bajarapacuenia exana peyapëtaenexa petixitsijava muetsia Jesús peyavajuvëpa acatabuatsiibopanatsi. Bajaraxuacujinae itoroba vajabitsaëvi Jesús pemëthëvëpa pevetavanapaenexa.

## 28

*Pacuenia Jesús petëpaecujinae icatsia asaë yabara pelivaisi*  
(Mr 16.1-8; Lc 24.1-12; Jn 20.1-10)

<sup>1</sup> Judíovi baja penacueraevetsimatacabi ita verevereca, meravia pitsijavata, bajayacunua, ajena matacabi tsarucaponae, María, Magdala tomarapijiva, itsaMaría yajava, taeyojopaliabeje Jesús pebuatsiibovajutsijavabelia. <sup>2</sup> Jemata ira najëaba. Tsipaji Dioso pijaángel runaica athëbëvetsica. Angel ita pata Jesús pebuatsiibovajutsijavata, tixita Jesús peyavajuvëpa acatsiibopanaxanetomi. Bajaraxuacujinae ángel eca bajarapabopanajumata. <sup>3</sup> Bajaraponë ángel naitayota. Pacuenia yamaxëcotia itsi, bajara cotiaitsi ángel. Penaxatatsijava niojai daxita peniojaijava matatoxenetsia. <sup>4</sup> Vajabitsaë, pamonae evetanubena Jesús pebuatsiibovajutsivëpa, ita tane ángel, neconecojai pecajunavi. Bobenajunua bepetëpaevi. <sup>5</sup> Nexata ángel jumaitsi petirivabejejavabelia:

—Pëtsa pajunavamebeje. Yapëtaniji xua yabara paponamebeje. Jesús pecobematabiabarutsinëmitsi cruzajavabelia, pajaitamebeje. <sup>6</sup> Ajibi raja tsarucacae majotaje. Asaë rabaja icatsia pacuenia baja cajena tajëvelia jumaitsi. Parenamërebeje panetaenexabeje itsajota picani buatatsi. <sup>7</sup> Bajaraxuacujinae paliamëbeje tsane bepíjia. Pijajivijavabelia patsipaebianamebeje mapacueniaje: “Petëpaenëmi rabaja icatsia asaë. Panevajënaeyabelia pina pona Galilea nacuyabelia. Baja pina jotalia pacaxitajarabianame,” pajamëbeje tsane pijajivijavabelia. Bajarapalivaisiyo xainajë patacatsipaebinexabeje, jai ángel bajarapovabejejavabelia.

<sup>8</sup> Nexata bajarapovabeje naviatabajiravabeje Jesús pebuatsiibovajutsivecua. Junavabeje picani. Itsiata barëyabeje bitso. Cujinaetabajiravabeje petsipaebinexabeje Jesús pijajivijavabelia. <sup>9</sup> Bajarapovabeje namutualia pecujinaejinaenajetarucacaejavatabeje, Jesús jemata tsitanaitajëtatsibeje. Nexata bajarapovabeje cujitaliabeje Jesúsjavabelia. Bajacobatsibeje. Nexata pematatabacabëta nucajunuabeje. Sitaicaliabeje yaiyataeya Jesús pecopiapitsinexabeje bajarapacuenia. <sup>10</sup> Jesús nexata jumaitsi bajarapovabejejavabelia:

—Pëtsa pajunavamebeje. Paliamërebeje tajajivijavabelia. Pajumaitsimëbeje tsane tajajivijavabelia: “Jesús raja jumaitsi. Paponaeremelia pina Galilea nacuyabelia. Baja pina jotalia pacacaxitajarabiana Jesús,” pajamëbeje tsane tajajivijavabelia, jai Jesús.

*Pacuenia vajabitsaëvi navajunupaeba yabara pelivaisi*

<sup>11</sup> Paepatota ëMaríavënevabeje naviatabeje Jesús pebuatsiibovajutsijavavelia, vajabitsaëvi, Jesús pemëthë pevetsiviyajuvënëvi, pona tomarabelia. Bajarapamonae tsipaeba sacerdotevi penamatacaitorobivijavabelia pacuenia tane bajarapamonae. <sup>12</sup> Nexata sacerdotevi penamatacaitorobivi pona judíovi pijaancianovijavabelia penabarëcuaicuaijainexa penajamatabëjëpaenexa pacuenia exanaejitsia. Nexata jane baja bajarapamonae najamatabëcuenejëpa. Nexata bajarapamonae rajuta ayaijava palata vajabitsaëvijavabelia. <sup>13</sup> Bajarapamonae jumaitsi vajabitsaëvijavabelia:

—Jivijavabelia pajumaitsimë tsane: “Meravi pataitamajitsita, Jesús pijajivi pata. Nexata bajarapamonae juta Jesús petëpaenë,” pajamë tsane. <sup>14</sup> Nexata nacuaevetsinë Pilato itsa jumetaena mapajumeje, paxanë itsiata pacayavenonaenatsi itsacuene papecaexanaeyaniva, jai bajarapamonae vajabitsaëvijavabelia.

<sup>15</sup> Nexata vajabitsaëvi jejai. Nota bajarapapalata. Nexata jane baja vajabitsaëvi pona najumetsënëtsiaya jivijavabelia pejumaitsinexa pacuenia itorobatsi. Nexata vajabitsaëvi najumetsënëtsiaya jumai tsaponae jivijavabelia:

—Meravi pataitamajitsita, Jesús pijajivi pata. Nexata Jesús pijajivi petëpaenë jutatsi, jai tsaponae jivijavabelia.

Bajarapacuenia vajabitsaevi pepaebixae, judíovi juya bajarapacuenia natsipaebapona. Nexata mapamatacabijavaberena ataje judíovi jumai tsabiabi:

—Jesús pijajivi petëpaenë jutatsi, jai tsabiabi.

*Pacuenia Jesús petëpaecujinae icatsia itsa asaë, pijajivi itoroba pejumelivaisi jivi petotsipae-banajetarubenaenexatsi daxitanacuanëjava yabara pelivaisi*

*(Mr 16.14-18; Lc 24.36-49; Jn 20.19-23)*

<sup>16</sup> Jesús pijajivi once ponëbeje pona Galilea nacuyabelia. Jesús pijajivi pona petsutojumabelia, patsutojumatalia Jesús caxitajarabiapaebatsi. <sup>17</sup> Nexata bajarapatsutojumata Jesús pijajivi itsa taenuta Jesús, yaiyataeya pitabarata pematabacabëta tonubena. Itsiata itsamonae Jesús pijajiviyajuvënëvi jamatabëcuenenavëxaniabiaya jamatabëjumaitsi:

—Apo Jesús meta, jamatabëjai.

<sup>18</sup> Nexata Jesús pijajivi kujirena. Jumaitsi pijajivijavabelia:

—Dioso baja cajena nevetsiaexana daxitacuene athëbëtatsia, daxita mapanacuajava ataje, taevetsinexa. <sup>19</sup> Nexata pacaitorobatsi. Paponare daxitanacuanëjava daxitanacuanëpijivi tajumelivaisi patanetotsipaebinexamë tanejumecovënëtsinexa. Bajarapamonae pabautisabaponaename taxa pevënëta, xanë ata pexënatonë tavënëta, Espíritu Santo ata pevënëta. <sup>20</sup> Bajarapamonae patsipaebaponaename pejumecovënë-tavanapaenexa daxita pacuenia pacaitorobatsi. Pëtsa panacofënëtame daxitamatacabi patacayajavaponaponaajava. Nacua peverevereaejavabelianexa ata pacayajavaponaponaenatsi, jai Jesús pijajivijavabelia.

## Pexanialivaisi Jesucristo pelivaisi, San Marcos peyaquinaelivaisi

*Pacuenia Juan jivibautisabinë jivi livaisi tsipaeba petusato nacuata yabara pelivaisi*  
(Mt 3.1-12; Lc 3.1-9, 15-17; Jn 1.19-25)

<sup>1</sup> Mara pacuenia taxuxuaba pexanialivaisi, Jesucristo Dioso pexënato pelivaisije.

<sup>2</sup> Bajayata Diosojumepaebinëmi, profeta Isaíaspijinë, tajëvelia yaquina Dioso pejumaitisjava pexënatojavabelia. Dioso jumaitsi pexënatojavabelia mapacueniaje:

Itorobianajë nevajënaeyabelia tanejumelivaisipaebinënexa. Catsivajënaexanebijitsia nijanamuto. <sup>3</sup> Nexata tanejumelivaisipaebinë vavajai tsane petusato nacuata.

Jumaitsi tsane jivijavabelia: “Jivi baxaneba panamutoverena najetarucaejitsia petuxanenë. Batoroviaexananua namuto. Bajara pijinia pacuenia paxamë ata panajamatabëcuenexaniavaere pepo petuxanenë pepatsivajënaeya paxamëjavaberena,” jai tsane tanejumelivaisipaebinë xamë yabara,

jai bajayata tajëvelia Dioso pexënatojavabelia pejumaitisjava Juan jivibautisabinë jivijavabelia Dioso pejumelivaisi petsipaebanajetarucaejavanexa yabara.

<sup>4</sup> Bajaraxuata nexata Juan jivibautisabinë Dioso pejumelivaisipaebinë najetaruca petusato nacujava Jesús pevajënaeya. Juan jivijavabelia jumai tsaponae mapacueniaje:

—Pacopabare pibisiacuene paneexanabiabijava. Panajamatabëcuenepëñëyorore Diosojavabelia. Bajaraxuacujinae pacabautisabianatsi. Nexata Dioso pacavecuaajibiaexanaena panijaneconimi, jai tsaponae Juan jivijavabelia.

<sup>5</sup> Nexata ayaibitsaëtoxaneto Judea nacuapijivi, Jerusalén tomarapijivinia, muxunaponabiabatsi Juan petsipaebilivaisi penamuxunaevetabibinexatsi. Nexata bajarapamonae pibisiacuene pexanaejavami, roviaia Diosojavabelia navecuapaebapona. Bajaraxuacujinae Juan bautisabapona bajarapamonae Jordán meneta.

<sup>6</sup> Juan naxatata camellonata pexanaejava. Naepacëta cuerobocoto. Pexaejava ëbosese, jabëra yajava. <sup>7</sup> Juan Jesús pelivaisi jivi tsipaebapona. Jumai tsaponae tajëvelia Jesús yabara:

—Tacovëverena patsiana itsanë. Bajaraponë daxitacuene pexanaenexa pecaëjëpaenëtsi tsane. Xanë raja saya beveliajamatabëcuenenënë bajaraponëvecua. Nexata vecuaauranë bajaraponë beprijavitonënë tanataenexa. Nexata auranë pijazapato ata tataxujonotsinexa. <sup>8</sup> Xanë raja saya pacabautisabatsi merata. Ponë rajane xanëcujinae patsiana, bajaraponë pacatsijamatabëjoneyaexanaponaena Espiritu Santo, jai tsaponae Juan jivijavabelia Jesús yabara tajëvelia pevajunupaebijavata Jesús penajetarucaejavanexa.

*Pacuenia Juan bautisaba Jesús yabara pelivaisi*  
(Mt 3.13-17; Lc 3.21-22)

<sup>9</sup> Jesús najetaruca Nazaret tomaraverena, Galilea nacuata peacaetomaraverena. Nexata Juan bautisaba Jesús Jordán meneta. <sup>10</sup> Jesús pebautisabicujinaetsi menevetsina penotajunaejavata, tane itaboxo penapatsijava. Bajarajota Jesús tane Espiritu Santo ata perunaejavatsica pematatsënëatsica beucucuto. <sup>11</sup> Jesús jumetanenua athëbëvetsica Dioso pejumaitisjavatsi: “Xamë raja taxënatomë, bitso tacaasivanë. Bitso casivajamatabëcuenenëbarëyatsi,” pejaijavatsi.

*Pacuenia Jesús jamatabëcuenejëbatsi dovathi yabara pelivaisi*  
(Mt 4.1-11; Lc 4.1-13)

<sup>12</sup> Jesús Juan pebautisabicujinaetsi, bepijiayo Espiritu Santo ponaeyaexanatsi petusato nacuyabelia. <sup>13</sup> Bajarajotalia daxitacueneviria unupijivi jinavanapa. Nexata bajarajota

Jesús ponapona, caenë, cuarenta pamatacabibeje. Bajarapamatacabianëta dovathi picani Jesús jamatabëcueneëjêbatsi pibisiacuene pexanaenexa. Bajaraxuacujinae ángelevi runaica Jesús peyavenonaenexatsi.

*Pacuenia Jesús Galilea nacuata taxuxuaba Dioso pitorobilivaisi jivi petsipaebijava yabara pelivaisi*

(Mt 12.12-17; Lc 4.14-15)

<sup>14</sup> Juan penaneconitsiaexanaenexatsi vajabitsaë vaetabatsi. Nexata penaneconitsivi pejebabiabibota Juan naneconitsiaponapona. Nexata abaxë Juan penaneconitsivi pejebabiabibota itsa ponapona, Jesús najetaruca Galilea nacujavaberena. Jesús jivi tsi-paebaponarena pexanialivaisi. Tsipaebaponarena daxita Dioso pijajivi pevetsijavanexa.

<sup>15</sup> Jesús jumai tsaponae jivijavabelia mapacueniaje:

—Imoxoyo rabaja pevajënae pecopiapatsinexa Dioso papecaevetsimatacabinexa. Nexata pacopabare pibisiacuene paneexanabiabijava. Panajamatabëcuenepënëyorore Diosojavabelia. Pajumecovënëre mapapexanialivaisije papecacapanepaelivaisinexa, jai tsaponae Jesús jivijavabelia.

*Pacuenia Jesús junata cuatro ponëbeje dujuai peyamatajucabiabivi yabara pelivaisi*

(Mt 4.18-22; Lc 5.1-11)

<sup>16</sup> Jesús najetaruca Galilea pucaxaneto itapaya. Nexata Galileapuca itapata Jesús taenuta anijanëbeje nacaebananëbeje, Simónbeje Andrésbeje. Bajaraponëbeje daxitamatacabi canacujitsia dujuai yamatajucabiababeje. <sup>17</sup> Nexata Jesús jumaitsi bajaraponëbejejavabelia:

—Naxanitsia. Panepënaponarebeje. Nexata pacacujarubianatsibeje jivi panejucanexabeje. Pacuenia dujuai payamatajucabiabamebeje, bajarapacuenia jivi pajucaenamebeje Dioso pijajivinexa, jai Jesús bajaraponëbejejavabelia.

<sup>18</sup> Nexata bajaraponëbeje dujuai peyamatajucabiabijavamibeje bajarajota puenetatabeje. Nexata baja naponabeje Jesús pepëta.

<sup>19</sup> Nexata icatsia bebeliayo pevajënaeyabelia Jesús barëpona. Icatsia Jesús taenuta anijanëbeje Santiagobeje Juanbeje, Zebedeo pexënatobeje. Bajaraponëbeje pijajeraënëta xanabanucabeje dujuai peyamatajucaejavabeje. <sup>20</sup> Nexata icatsia Jesús junata bajaraponëbeje ata. Nexata bajaraponëbeje bajarajota jerata puenetanutabeje paxa Zebedeo jane baja. Nexata Zebedeo, pijajivi yajava, nacopatanuca bajarajota. Nexata baja Santiagobeje Juanbeje naponabeje Jesús pepëta.

*Pacuenia pebi dovathi peyajavaponaponaenë Jesús jamatejemayaexana yabara pelivaisi*

(Lc 4.31-37)

<sup>21</sup> Nexata Jesús, pijajivi yajava, pata Capernaum tomarabelia. Judíovi penacueraevetsimatacabita Jesús joneya judíovi penacaetuatabiabiabiboyalia. Nexata bajarajota Jesús jivi livaisi tsipaeba. <sup>22</sup> Nexata Jesús pejumetaevitsi jamatabëcuenenabenajaca Jesús petsipaebilivaisi yabara. Bajarapamonae jamatabëcuenenabenajaca tsipaji xaniavaetsia Jesús tsipaeba Dioso pitorobinëtsicuenia. Apo tsipaebi pacuenia judíovi pecujarubivi tsi-paebabiaba. <sup>23</sup> Bajarajota pebi dovathi peyajavaponaponaenë naeca. Nexata bajaraponë Jesúsjavabelia vavajai tsaxuabi. Jumaitsi:

<sup>24</sup> —¡Jesús, Nazaret tomarapijinëmë, panevecuaponare baja! ¿Detsa xua paneexanaejitsiamë? ¿Najetarucame tsaja pataneveretsinexamë? Xanë cajena cayapëtanetsi. Xamë raja Dioso pexënatomë, pepo pexaniajamatabëcuenenëmë, jai dovathi peyajavaponaponaenë Jesúsjavabelia.

<sup>25</sup> Jesús nexata jumeitaveta dovathi. Jumaitsi:

—¡Moyamëre! ¡Vecuapitsapare baja maponëje! jai Jesús.

<sup>26</sup> Nexata dovathi pebi pinijicuenia devacaibiaexanatsi. Dovathi vavajai pinijicuenia. Nexata baja dovathi pitsatabijirava jivitonëvecua. <sup>27</sup> Nexata daxisajivi bajarapacuenia itsa tane, bitso jamatabëcuenenabenajaca. Najumaitsi bajarapamonae:

—¿Detsa mapitsicueneje? ¿Detsa mapitsipejanacujarubicueneje? ¡Maponėje Jesús, beDioso pitorobinětsitsica! ¡Dovathi ata jumecověnětatsi! ¡Nexata Jesús pitavetsixae dovathi, pebi baja vecuapitsapatsi! najai bajarapamonae.

<sup>28</sup> Nexata daxita Galilea nacuapijivi bepíjia Jesús vėnělivaisitanetsi Dioso pesaėta pinijicuene pexanaponaejava.

*Pacuenia Simón Pedro pijava pena Jesús tojamatejemayaexana yabara pelivaisi*  
(Mt 8.14-15; Lc 4.38-39)

<sup>29</sup> Jesús baja pitsapa judíovi penacaetuatabibovecua. Nexata Santiagobeje Juanbeje Jesús yjavapona. Jesúsšana napona Simónbeje Andrésbeje pijaboyabelia. <sup>30</sup> Nexata Simón pijabota Simón pijava pena Jesúsšana pevajěnae romaebanucatsi camata. Nexata itsamonae bepíjia Jesús tsipaebarečěpatsi bajarapova peromaebanucaejavatsi. <sup>31</sup> Nexata Jesús imoxoyotabilia peromaebanucaeavatsi. Cobeyotsiaya matakota. Nexata bajarajota peromaebanucaeavatsi vecuaajibi tsanajetsitsireca baja domae. Nexata bajarapova Jesúsšana pexaejava toexanatsi.

*Pacuenia ayaibitsaėto jivi piavitanevi Jesús jamatejemayaexana yabara pelivaisi*  
(Mt 8.16-17; Lc 4.40-41)

<sup>32</sup> Itsa baja ajena meravitsia, Jesúsjavaberena tocapatatsi daxita piavitanevi. Tocapatatsinua dovathi peyajavajinavanapaevinua. <sup>33</sup> Daxita tomarapijivi Jesús pepatsibota baupjavaberena nacaetuata. <sup>34</sup> Nexata Jesús jamatejemayaexana ayaibitsaėto daxitacuenevitane pexainaevimi. Vecuacapitsapanua dovathi peyajavajinavanapaevi. Jesús apo tocopatsi dovathi pecuaicuaijainexa jivijavabelia pevajunupaebiyantatsi. Tsipaji dovathi xaniavaetsia Jesús yapėtanetsi Dioso pexėnatocuene.

*Pacuenia Dioso pitorobilivaisi Jesús jivi tsipaeba Galilea nacuata yabara pelivaisi*  
(Lc 4.42-44)

<sup>35</sup> Pepo bajayacunua, abaxė itsa apo napebetsi matakabi, Jesús naėcota. Nexata pitsapalia bovecua. Pesaicaeyojavabelia pona pevajėtsinexa Diosojavabelia. Jesús nexata pecovėta matakabi baja. <sup>36</sup> Itsa baja matakabi, Simónšana Jesús pėjaitaponalia. <sup>37</sup> Itsa baja bajarapamonae Jesús caxitajaraba, jumaitsi bajarapamonae:

—Daxita raja cajaitaruta pecataenexa, jai bajarapamonae Jesúsjavabelia.

<sup>38</sup> Nexata Jesús jumaitsi:

—Ponatsi baja imoxoyo penaetomaraxijavabelia bajarajotalia tatsipaebinexa Dioso pitorobilivaisi. Bajaraxuanexa bovecua pitsaparenajė, jai Jesús.

<sup>39</sup> Nexata daxita Galilea nacujava Jesús jivi tsipaebapona Dioso pitorobilivaisi judíovi penacaetuatabibonėjava. Jesús jivi dovathi vecuacapitsapapanua.

*Pacuenia Jesús jamatejemayaexana bajayajebi bitso peperabėtsabanaenė yabara pelivaisi*  
(Mt 8.1-4; Lc 5.12-16)

<sup>40</sup> Jesús imoxoyorenatsi bajayajebi bitso peperabėtsabanaenė. Nexata bajaraponė pe-matabacabėta nucajunua Jesús pitabarata. Bajaraponė pinijicuenia vajėta Jesúsjavabelia. Jumaitsi:

—Cacaėjėpa tanejamatejemayaexanaenexamė. Itsa jitsipame, nejamatejemayaexanare mapavitanevecuaje, jai peperabėtsabanaenė Jesúsjavabelia.

<sup>41</sup> Nexata Jesús bajaraponė itaxutobejiobiatane. Pecobeta perabėjayalia. Jumaitsi:

—Jājā, jitsipajė cajena. Jamatejemamė rabaja, jai Jesús peperabėtsabanaenėjavabelia.

<sup>42</sup> Bajarapacuenia Jesús pejumaitsijavata peperabėtsabanaenėmi baja perabėxanepananajereca. Jamatejema baja. Peperabėtsabanaejavami baja ajibi. <sup>43</sup> Nexata baja Jesús naviatsiaexana bajaraponė. Pinijicuenia Jesús muxujioba bajaraponė penaviatsivajėnaeya. Jesús jumaitsi:

<sup>44</sup> —Nejumetaema. Pėtsa itsajivijavabelia tsipaebame tacajamatejemayaexanaejava. Naitajėremelia jane sacerdotenėjavabelia templobota penacuenebinėjavabelia. Nexata sacerdotenė cataena pecavecuajibijava baja niavitanejavami. Diosonexa rajuremelia ofrenda sacerdotenėjavabelia pecavecuajibiaexanaexae niavitanejavami. Bajara tsipaji

pacuenia bajayata vajasalinainēmi Moiséspijinē nacaitoroba. Nexata jivi yapētaena pepacuenē baja pecavecuaajibijava niavitanejavami, jai picani Jesús bajayajebi bitso peperabētsabanaenēmijavabelia.

<sup>45</sup> Nexata bajaraponē lia. Itsiata tsipaebanajetaruca daxitajivijavabelia Jesús pejamatejemayaexanaejavatsi. Bajaraxuata Jesús apo jitsipae naitajētsiaya pejonejava itsatomarabelia ata, jivi ayaibitsaētoxfaneto pematatoyoronaeyanivatsi. Jesús saya ponapona tomaranē piajibijava. Itsiata cajena daxita nacuanējjavaverena jivi muxunapatabiabatsi Jesús.

## 2

### *Pacuenia Jesús jamatejemayaexana petabusipacuenabinētsi yabara pelivaisi (Mt 9.1-8; Lc 5.17-26)*

<sup>1</sup> Itsamatacabi icatsia Jesús naviarena Capernaum tomarberena. Nexata jivi yapētane pabota Jesús patajopa. <sup>2</sup> Nexata jivibitsaētoxfaneto nacaetuata Jesús pepatsibota. Bo baupa ata cajena bitso jivi vënëca. Nexata bajarapamonaejavabelia Jesús tsipaeba Dioso pitorobilivaisi. <sup>3</sup> Nexata cuatro ponēbeje parena, camayota peyavētacaranajetarubenaevi petabusipacuenebinētsi. <sup>4</sup> Nexata petabusipacuenabinētsi acuenebi bajarapamonaē pecapatsijava Jesús pitabarayabelia. Tsipaji bo ēnētuaatujē bitso jivi yavënëca. Nexata petabusipacuenabinētsi pecapatsivi, bomatatu javavetsica vojoexana Jesús pecanacujitsiatsica. Nexata bajarapavojotuatsica camayota yacopatsica petabusipacuenebinētsi. <sup>5</sup> Jesús jamatabēcueneyapētane pacuenia bajarapamonaē sivanajamatabēxainatsi. “Nacatojamatejemayaexanaenatsi cajena,” pesivajamatabējaijavatsi Jesús jamatabēcueneyapētane. Bajaraxuata petabusipacuenebinētsijavabelia Jesús jumaitsi mapacueniaje:

—Tajabanānē, pibisiacuene rabaja nexanaeneconimi cavecuaajibiaexanatsi, jai Jesús.

<sup>6</sup> Bajarajota judíovi pecujarubiviyajuvēnēvi naena. Bajarapamonaē itsa jumetaeyena bajarapacuenia Jesús pejumaitsijava, nexata jamatabēcuenenavēxaniabiaya bēpēnēa jamatabējumai tsenae mapacueniaje:

<sup>7</sup> —Maponēje Jesús Dioso apo pejitsipacuenia cuaicuajiai. Itsanē ata cajena apo caējēpaetsi itsajivi pibisiacuene pexanaeneconi pevecuaajibiaexanaenexa. Caenē Dioso caējēpatsi pevecuaajibiaexanaenexa bajarapacuenē, jamatabējai tsenae bajarapamonaē.

<sup>8</sup> Jesús jamatabēcueneyapētane bajarapamonaē jamatabēcuenenavēxaniabiaya bajarapacuenia pesivanajamatabēxainaejavatsi. Nexata Jesús jumaitsi bajarapamonaejavabelia:

—Pētsa bajarapacuenia panesivanajamatabēxainame. Tsipaji cajena xanē necaējēpa jivi pibisiacuene pexanaeneconimi tavecuaajibiaexanaenexa. <sup>9</sup> Paxamē apo pacacaējēpae ata itsajivi pibisiacuene pexanaeneconi panevecuaajibiaexanaenexa, pacacaējēpa picani saya jema panejumaitsinexa petabusipacuenebinētsijavabelia mapacueniaje: “Cavecuaajibiaexanatsi rabaja pibisiacuene nexanaeneconimi,” panejainexa. Tsipaji itsajivi ata apo yapētae tsipae saya jema panejumaitsijava. Itsiata baitsi jane itsa apo pacacaējēpae panejamatejemayaexanaenexa petabusipacuenebinētsi, acuenebi panejumaitsinexa bajaraponējavabelia mapacueniaje: “Nonotapunare. Nijacamayo pire. Ponare baja,” panejainexa. Tsipaji bajarapacuenia pajumaitsimē ata, itsa apo jamatejema tsipae bajaraponē, nexata daxitajivi pacayapētaejitsipa apo papecacaējēpacuene panejamatejemayaexanaenexa, jai nexata Jesús judíovi pecujarubivijavabelia.

<sup>10</sup> Icatsia Jesús jumaitsi bajarapamonaejavabelia:

—Xanē, Daxitajivi Pematapijinēnē, mapanacuata necaējēpa tavecuaajibiaexanaenexa itsajivi pibisiacuene pexanaeneconimi ata pacuenia baja exanajē maponējavabeliaje. Nexata patanecueneyapētaenexamē tanecaējēpacuene tavecuaajibiaexanaenexa itsajivi pibisiacuene pexanaeneconimi ata, pataema pacuenia jamatejemayaexanaejitsianē maponējē, jai Jesús judíovi pecujarubivijavabelia.

Nexata icatsia Jesús jumaitsi petabusipacuenebinētsijavabelia:

<sup>11</sup> —Xamë cajumaititsi. Nonotapunare. Nijacamayo pire. Nijaboyabelia baja ponare, jai Jesús.

<sup>12</sup> Nexata bajarapacuenia Jesús pejumaitisjavata petabusipacuenebinëmitsi nonotapuna. Pebocaecamayo baja pita. Pitsapalia baja daxitajivi pitabarata. Nexata daxitajivi itsa tane bajarapacuenia, jamatabëcuenenabenajaquena. Bajarapamonae jumai tsenae mapacueniaje:

—Dioso cajena bitso ayaijamatabëcuenenë. Caeto ata abaxë mapitsicuenia pexanaejava apo taetsije, jai tsenae bajarapamonae.

*Pacuenia Jesús pijajivitonënexa junata Levívënënë yabara pelivaisi*  
(Mt 9.9-13; Lc 5.27-32)

<sup>13</sup> Jesús pona pucaxaneto itapajavabelia. Nexata jivi ayaibitsaëtoxaneto pënapatatsi bajarabelia. Nexata Dioso pejumelivaisi Jesús tsipaeba bajarapamonaejavabelia. <sup>14</sup> Bajaraxuacujinae penajetarucavejavata Jesús taeyeta Levívënënë, Alfeo pexënato. Leví eca pabota gobierno pejamatabëcuenia jivijavabelia matamoyanijobabiaba impuestomatamo. Nexata Jesús jumaiti Levíjavabelia:

—Leví, naxanitsia. Nepënaponare, jai Jesús.

Jejai Leví. Nexata nonotapuna. Leví baja napona Jesús pepëta.

<sup>15</sup> Nexata Leví junata Jesús pebarënananinexa pijabota. Nexata Leví pijabota Jesús pexaejava naxane. Leví pijabota ayaibitsaëto naena gobierno pejamatabëcuenia jivijavabelia impuestomatamo pematamoyanijobabiabivi. Itsamonae ata nanabane piagamatabëcueniebejevi. Nexata Jesús pijajivi nabarëca bajarapamonaejavata. <sup>16</sup> Nexata fariseovi, judíovi pecujarubivinua, Jesús taeyetatsi daxita bajarapamonaejavata pijajivi penabarënananecavejava. Nexata bajarapamonae jamatabëcuenenavëxaniabiaya jumaiti Jesús pijajivijavabelia:

—Papecacujarubinë Jesús nanconita Diosojavabelia. Tsipaji gobierno pejamatabëcueneta impuestomatamo pematamoyanijobabiabivijavata, piagamatabëcueniebejevijavatanua, naxaeyeca pexaejava, jai bajarapamonae Jesús pijajivijavabelia.

<sup>17</sup> Itsa Jesús jumetane mapajumeje, nexata jumaiti bajarapamonaejavabelia:

—Pevaëbinë raja apo vaëbi pejamatejemavi. Pevaëbinë raja piavitanevi vaëba. Bajara pijinia xanë ata itsinë. Apo sivapatajopaenë tajunatsinexa pamonae baja aneconijibi tsavanapae. Sivapatajopajë raja tajunatsinexa pijaneconi pexainaevi. Bajarapamonae junataponajë pecopabinexa pibisiacuenia pexanaejava penajamatabëcuenepënëyorotsinexa Diosojavabelia, jai Jesús bajarapamonaejavabelia.

*Pacuenia Jesús yanijobatsi pamatacabibeje jivi vajëtapona Diosojavabelia pexaejava apo pexaeyabiabixae yabara pelivaisi*

(Mt 9.14-17; Lc 5.33-39)

<sup>18</sup> Itsamatacabi Juan pijajivi, fariseovi pijajivinua, pexaejava apo xaevanapae pamatacabibeje Diosojavabelia vajëcapona. Nexata itsamonae Jesúsjavaberena pata. Yanijobatsi pexaejava piatsobicuenia yabara. Jumaiti mapacueniaje:

—Juan pijajivi, fariseovi pijajivinua, pexaejava apo xaeyabiabi pamatacabibeje Diosojavabelia vajëtapona. ¿Detsa xujitsia itsiata xamë nijajivi pexaejava xaeyabiaba pamatacabibeje Diosojavabelia vajëtapona? jai Jesús peyanijobivitsi.

<sup>19</sup> Nexata Jesús jumaiti bajarapamonaejavabelia:

—Pamonae junatatsi penacasabifistajavabelia penanabaninexa, apo atsobi pexaejava itsa abaxë yajavaecatitsi pejananacasabinë. Itsa abaxë pejananacasabinë yajavaponaponatsi, acueniebi pexaejava piatsobinexa bajarapamonae. <sup>20</sup> Itsiata baitsi jane itsa pejananacasabinë tsimaxëpatsipatsi pevecuacaponanexatsi itsajavabelia, nexata bajarapamonae pexaejava apo xae tsipae. Tsipaji bitso najamatabëxainaejitsipa pevecuacaponaxaetsi. Bajara pijinia itsi tajajivi ata. Tayajavaponaponaeepato abaxë apo atsobabiabi pexaejava pamatacabibeje Diosojavabelia vajëtapona. Itsiata pamatacabi

xanë necaponaena bajarapamonaevacqua, nexata jane baja bajarapamatacabi pexaejava apo xae tsane bitso tanesivanajamatabëxainaxae, jai Jesús peyanijobivitsijavabelia.

<sup>21</sup> Nexata bajarapamonaevacqua perujamatabëcuene baja pecopabinexa, Jesús livaisi tsipaeba comparacióncuena bajarapamonaevacqua pejumecovënëtsinexa ëpejanalivaisi, Jesús petsipaebilivaisi. Bajarapamonaevacqua anijamatabëcuenebeje pexainaxayana perujamatabëcuene baja pecopabinexa, Jesús livaisi tsipaeba comparacióncuena. Perujamatabëcuene yabara Jesús jumaisi bajarapamonaevacqua mapacueniaje:

—Itsajivi ata raja apo catsatarutsi pejanapana perujunaxatatsiesetojavabelia. Itsa catsatarutsipa pejanapanata perujunaxatatsiesetojavabelia, nexata pejanapana yanarobotsipa perujesetojavaverena. Nexata biji bitso pinijivojoto titinaejitsipa. <sup>22</sup> Itsajivi ata pininia apo epacae pejanavinoranë perujubocodoruanëjavabelia bajayajebi peyajebinexa. Pejanavinoranë itsa epacaejitsipa perujubocodoruanëjavabelia, nexata pejanavinoranë yatititibia tsipae. Tsipaji perujubocodoruanë apo yanayeretsi tsipae. Tsipaji pejanavinoranë pejumalitsëxë abaxë xaina. Nexata itsa yatititibia tsipae, mene naxuabijitsipa, vinoranëmi. Bajaraxuata bepaca pejanavinoranë pejanabocodoruanëjavabelia, jai Jesús peyanijobivitsijavabelia bajarapamonaevacqua pejumecovënëtsinexa ëpejanalivaisi, Jesús petsipaebilivaisi, perujamatabëcuene baja penacopabinexa.

*Pacuenia Jesús pijajivi namutua siricanajetarubena trigoxu penacueraevetsimatacabita yabara pelivaisi*

*(Mt 12.1-8; Lc 6.1-5)*

<sup>23</sup> Judíovi penacueraevetsimatacabita Jesús, pijajivi yajava, najetaruca namutua trigo pbianëjava. Nexata Jesús pijajivi piagianaxae, trigoxu siricanajetarubena. Xuxaeyabuata-pona. <sup>24</sup> Nexata fariseovi jumaisi Jesúsjavabelia:

—¡Taema mapacuenaje! Dioso Moiséspijinëta penajumecopatsilivaisita vajanacaitavetsicuene, nijajivi exana. Apo nacaitavetsi ata trigoxu vajaxaejava, itsiata ajena penacueraevetsimatacabixae, nijajivi apo bexanaevacqua mapacuenaje, jai fariseovi Jesúsjavabelia.

<sup>25</sup> Nexata Jesús jumaisi fariseovijavabelia:

—Ajena, penacueraevetsimatacabita, tajajivi bajarapacuenia exanaevacqua, itsiata apo pibisiacuene. Tsipaji bitso piagani. ¿Apo palebimë tsipaji Dioso pejumelivaisibaxuto paneyapëtaenexa pacuenia vajasalinainëmi Davidpijinë, pebarëponaponaevi yajava, exana pamatacabi bitso piagani? <sup>26</sup> Davidpijinë joneya Dioso pijatemploboyalia pamatacabi Abiatarpijinë daxita sacerdotevi penamatacaitorobinë tsaponaponaevacqua. Nexata Dioso pijatemploboënëta, mesajumata, bobena Diosonexa ofrendacuenia petojebipanbëanë. Bajarapapanbëanë itsajivi ata apo tocopatsitsi pexaenexa penaneconitsiyanaevacqua Diosojavabelia. Èsacerdotevi picani tocopatatsi pexaenexa. Davidpijinë apo sacerdotenë ata, xae ata bajarapapanbëanë pijajivi barë, itsiata apo vënananeconitsi Diosojavabelia, jai Jesús fariseovijavabelia.

<sup>27</sup> Icatsia Jesús jumaisi fariseovijavabelia:

—Dioso raja tocopata caematacabi jivi penacueraevetsinexa. Tsipaji Dioso yapëtane pacuenia jivi namatavenona penacueraevetsinexa. Dioso apo exanaevacqua jivi saya jema peyayataenexa penacueraevetsimatacabianë. <sup>28</sup> Nexata xanë, Daxitajivi Pematapijinë, netoxanepana cajena tatsipaebinexa pacuene xanepana jivi pexanaenexa penacueraevetsimatacabita ata, jai Jesús fariseovijavabelia.

### 3

*Pacuenia Jesús jamatejemayaexana pebi pecobetsaquenaenë yabara pelivaisi*

*(Mt 12.9-14; Lc 6.6-11)*

<sup>1</sup> Penacueraevetsimatacabita Jesús joneya judíovi penacaetuatabiboyalia. Nexata bajarajota pebi naeca pecobetsaquenaenë. <sup>2</sup> Nexata Jesús naitaxutocaevetatsi

fariseovi petaenexatsi pecobetsaquenaenë pejamatejemayaexanaejava penacueraevetsimatacabita. Nexata Jesús pecobetsaquenaenë itsa jamatejemayaexana penacueraevetsimatacabita, “Jesús raja naneconita Diosojavabelia. Tsipaji penacueraevetsimatacabita nacueneba,” pejainexa bajarapamonae. <sup>3</sup> Nexata Jesús jumaitsi pecobetsaquenaenëjavabelia:

—Nonotapunare. Nucare mapamonae pitabarataje, jai.

<sup>4</sup> Nexata Jesús jumaitsi fariseovijavabelia:

—Penacueraevetsimatacabita ata xanepana vajaexanaenexa pexaniacuene. Xanepana vajajamatejemayaexanaenexa piavitanevi, jai Jesús fariseovijavabelia.

Nexata fariseovi Jesús apo jumepitsitsi. <sup>5</sup> Nexata Jesús anaeya naëcota bajarapamonae. Bajaraxuacujinae Jesús bejamatabëjjobireca. Tsipaji yapëtane piamatabëcuenetajajava fariseovi. Nexata Jesús jumaitsi pecobetsaquenaenëjavabelia:

—Namaxërovire, jai.

Nexata pecobetsaquenaenë namaxërovita. Bajarajota cobexanepananajereca baja. Pecobetsaquenaejavami ajibi. <sup>6</sup> Nexata fariseovi itsa tane Jesús pecobexanepanaejaxanaejava pecobetsaquenaenë, fariseovi anaepana. Nexata bajarapabovecua pitsapa. Pona penabarëcuaicuajainexa nacuaevetsinë Herodes pijajivijavabelia. Bajarapamonae najumejaita Jesús pebeyaxuabinexatsi.

*Pacuenia jivi nacaetuata Galilea pucaxaneto itapata yabara pelivaisi*

<sup>7</sup> Jesús, pijajivi yajava, pona Galilea pucaxaneto itapayabelia. Nexata Jesús pënaponaliatsi ayaibitsaëtoxaneto Galilea nacuapijivi. <sup>8</sup> Nexata Jesús pënaponaliatsi Judea nacuapijivinia, Jerusalén tomarapijivinia, Idumea nacuapijivinia, Jordánmene itsapanaverenapijivinia, imoxoyo Tiro tomaravecua pejinavanapaevinua, imoxoyo Sidón tomaravecua pejinavanapaevinua. Daxita bajarapamonae Jesús pënaponaliatsi tsipaji Jesús vënëlivaisitanetsi Dioso pesaëta pinijicuene pexanaponaejava. <sup>9</sup> Nexata Jesús pijajivi itoroba jera petoxaniavaetarutsinexatsi menetareca. Itsa bajarapajivibitsaëtoxaneto Jesús bitso matacënënaponatsi, nexata bajarapamo ënëabereca Jesús perunaenexareca. <sup>10</sup> Jesús baja ayaibitsaëto piavitanevi jamatejemayaexana. Bajaraxuata itsamonae, piavitanevi, Jesúsjavabelia natorotaponabiaba pejayatsinexatsi.

<sup>11</sup> Dovathi peyajavajinavanapaevi Jesús itsa taeyabiabatsi, bajarapamonae irata othopabiaba Jesús pitabarata. Bajarapamonae aëjai tsabiabi.

—Xamë tsaena Dioso pexënatomë, jai tsabiabi dovathi peyajavajinavanapaevi.

<sup>12</sup> Nexata Jesús jumeitaveta bajarapamonae. Jumaitsi:

—“Dioso raja pexënato,” pajamë pëtsa xanë yabara itsajivijavabelia, jai Jesús bajarapamonaejavabelia.

*Pacuenia Jesús pijajivi ayaibitsaëtoxanetoyajuvënëvi itapeta saya doce ponëbeje após-tolevinexa yabara pelivaisi*

*(Mt 10.1-4; Lc 6.12-16)*

<sup>13</sup> Jesús pijajivi ayaibitsaëtoxanetoyajuvënëvi, doce saya ponëbeje, itapeta após-tolevinexa. Jesús pitapetsivajënae após-tolevinexa, junaya petsutojumabetsia. Bajaravetsica Jesús junatanuca ponëbeje jamatabëitapeta após-tolevinexa. Nexata pamonae Jesús itapeta após-tolevinexa, junaya petsutojumabetsia, Jesúsjavabetsia. <sup>14</sup> Nexata Jesús caetuata caebitsaëtotoyo, doce ponëbeje pijajivi, pepënajinavanapaevinexatsi. Jesús itorobijitsianua bajarapamonae daxitanacuanëjava jivi petsipaebanajetarubenaenexa Dioso pitorobilivaisi. <sup>15</sup> Jesús pijajivi jamatabëcuenecaëjëpaeyaexana Dioso pesaëta pejamatejemayaexanaponaeenexa piavitanevi. Jamatabëcuenecaëjëpaeyaxananua Dioso pesaëta dovathi jivi pevecuacapsapaponaeenexa. <sup>16</sup> Jesús pijaapóstolevi, doce ponëbeje, mapevënëanëje. Copiaya ponë pevënë Simón. Bajaraponë Jesús vënëruuba itsavënë, Pedro. <sup>17</sup> Itsanë Santiago. Itsanë Juan. Santiagobeje Juanbeje nacaebananëbeje, Zebedeo pexënatobeje. Bajaraponëbeje Jesús vënëruuba Boanerges. “Boanerges,” itsa jai, bajarapamonae pijajumeta mapajumetaje pejumaitsijume: “Yamaxë pexënatobeje,”

pejaijume. <sup>18</sup> Itsanë pevënë Andrés. Itsanë Felipe. Itsanë Bartolomé. Itsanë Mateo. Itsanë Tomás. Itsanë Santiago, Alfeo pexënato. Itsanë Tadeo. Itsanë Simón, celotenë. <sup>19</sup> Itsanë Judas Iscariote. Bajaraponë bexëajavabelia Jesús canajetsijitsiatsi pijavajabitsaë pecobeyabelia pebeyaxuabinexatsi.

*Pacuenia itsamonae Jesús yabara jamatabëcuenenavëxaniabiaya jumaitsi: “Beelzebú raja pesaëta, Jesús dovathi jivivecua capitsapapona,” jai yabara pelivaisi*

*(Mt 12.22-32; Lc 11.14-23; 12.10)*

<sup>20</sup> Jesús boya joneya pijajivi yajava. Icatsia jivibitsaëtoxaneto nacaetuata. Nexata acuenebi Jesús pijajivi pebarënabanijava. <sup>21</sup> Itsamonae Jesús yabara jumaitsi: “Jesús raja matajemabatsi,” jai. Nexata bajarapacuenia itsamonae Jesús yabara pejumaitsiyava, Jesús pijamonae vënëlivaisitanetsi. Nexata Jesús pijamonae ponarena Jesúsjavaberena pebarëponaenexatsilia picani.

<sup>22</sup> Judíovi pecujarubivi, Jerusalén tomaraverena peponaevi, jamatabëcuenenavëxaniabiaya Jesús yabara jumaitsi:

—Mara ponë Jesúsje, Beelzebú yajavaponapona. Beelzebú raja daxita dovathivi pevetsinë. Bajaraxuata Jesús Beelzebú pesaëta dovathi jivivecua capitsapapona, jai judíovi pecujarubivi jamatabëcuenenavëxaniabiaya Jesús yabara.

<sup>23</sup> Nexata Jesús junata bajarapamonae jamatabëcuenenavëxaniabiaya pejumaitsiyava pecanaëjëtsinexa. Nexata bajarapamonaejavabelia Jesús jumaitsi mapacueniaje:

—Beelzebú raja dovathivi jivivecua apo capitsapapona tsipae. Tsipaji Beelzebú dovathi jivivecua itsa capitsapaponaejitsipa, nexata Beelzebú bepijavajabitsaë taejitsipa pijajivi. <sup>24</sup> Pacanaëjëre mapacuenieje. Nacaenacuapijivi ata itsa navecuanatsanaejitsipa penasivanavajabitsaëtsinexa, namataenetsia naverebiabijitsipa nacaenacuapijivi ata.

<sup>25</sup> Bajara pijinia nacaemonae ata itsipae. Itsa navecuanatsanaejitsipa penasivanavajabitsaëtsinexa, namataenetsia naverebiabijitsipa nacaemonae ata. <sup>26</sup> Bajara pijinia itsipae dovathi ata. Dovathi jivivecua itsa capitsapaponaejitsipa pijajivi dovathivi, nexata bepijavajabitsaënë taejitsipatsi pijajivi. Nexata apo sivaajamatabëcuenesaë tsipae pexanaponaejavanexa. Nacopiarucaeyaexanaejitsipa dovathi, jai Jesús judíovi pecujarubivijavabelia.

<sup>27</sup> Bajarapamonae pecanaëjëtsinexa Jesús bitso piasaënëcuene dovathi matatoxenetsia, Jesús icatsia jumaitsi bajarapamonaejavabelia mapacueniaje:

—Itsajivi ata apo caëjëpaetsi pejonenexa bitso piasaënë pijaboyalia peyacajërëtsinexa xua xaina pijabota. Itsiata itsa patsipa bajaraponë matatoxenetsia bitso piasaënë, nexata cobecëtabuatsipatsi. Taxucëtabuatsipatsi yajava. Matapania bajarapacuenia yacajërëtsipatsi daxita xua xaina pijabota. Bajara pijinia pacuenia xanë ata bitso tasaënë dovathi matatoxenetsia. Bajaraxuata necaëjëpa jivivecua tacapitsapaenexa dovathivi.

<sup>28</sup> Xaniajanë pacuenia pacatsipaebatsi. Dioso cajena caëjëpatsi daxitajivi pibisiacuene pexanaeneconi pevecuaajibiaexanaenexa. Pibisiacuena jivi Dioso baracuaicuajai ata, bajarapaneconi ata Dioso caëjëpatsi pevecuaajibiaexanaenexa. <sup>29</sup> Itsiata baitsi jane pajivi pibisiacuena baracuaicuajai Espiritu Santo, bajarapajivi Dioso apo vecuaajibiaexanae tsane bajarapaneconi. Bajarapajivi naneconitsiana daxita matabijavabelianexa, jai Jesús bajarapamonaejavabelia.

<sup>30</sup> Bajarapacuenia Jesús jumaitsi tsipaji Jesús Espiritu Santo yajavaponapona atatsi, judíovi pecujarubivi jumaitsi Jesús yabara: “Jesús raja Beelzebú yajavaponapona,” jai. Nexata bajaraxuata bajarapamonae naneconita Espiritu Santojavabelia.

*Pacuenia Jesús pejuyapijivi, pena yajava, nubena bojumavelia yabara pelivaisi*

*(Mt 12.46-50; Lc 8.19-21)*

<sup>31</sup> Jesús pejuyapijivi, pena yajava, pata Jesúsjavaberena. Itsiata bajarapamonae boyalia apo jonelia Jesús penucaeboyalia. Nexata bajarapamonae junatsiaexana Jesús pejumetaeyenaevitsijavabelia. <sup>32</sup> Nexata pamonae Jesús petsipaebilivaisi matatoyorotsia jumetaeyenatsi, Jesúsjavabelia jumaitsi:

—Patajatuxanenë, ena raja, nejuyapijivi yajava, nuca patapënëverena. Cajaita raja xamë, jai bajarapamonae Jesúsjavabelia.

<sup>33</sup> Nexata Jesús jumaitsi bajarapamonaejavabelia:

—¿Detsa pitsijamatabëcuenevi taena, tajuyapijivinu? jai Jesús.

<sup>34</sup> Bajaraxuacujinae Jesús naëcota pematatoyorotsiaenaevitsi. Jumaitsi bajarapamonaejavabelia:

—Mara jota pamona xanëjavata penaevije, bajarapamonae jane taenajivi, tajuyapijivinu. <sup>35</sup> Tsipaji raja pamona exana pacuenia Dioso itorobatsi, bajarapamonae jane baja tajuyapijivi, taenajivinu, jai Jesús bajarapamonaejavabelia.

## 4

### *Pacuenia Jesús jivi livaisi tsipaeba peubinë pelivaisicuenia yabara pelivaisi* (Mt 13.1-9; Lc 8.4-8)

<sup>1</sup> Icatsia Jesús taxuxuaba livaisi petsipaebijava Galilea pucaxaneto itapajavata. Nexata jivi ayaibitsaëtoxfaneto nacaetuata itsajota Jesús livaisi tsipaebanuca. Nexata Jesús runareca jera ënëabereca. Ecareca jera ënëtareca. Daxita jivibitsaëtoxfaneto tajetabovelia nubena. <sup>2</sup> Nexata Jesús daxitacuene livaisianë tsipaeba jivijavabelia. Jesús jumai tsaponae bajarapamonaejavabelia mapacueniaje:

<sup>3</sup> —Panenamuxunaevere mapalivaisije. Peubinë pona pabiabelia peubinexa. Nexata itsa pata pabita, peubixu pexucayabajarabicuenia ubanajetaruca. <sup>4</sup> Nexata pexucayabajarabijavata itsaxu othopa pabi tuatujëjava, penajetarucaenamutojumata. Nexata bajarajota pata baratsui. Xane bajarapaxumi juvinejeva. <sup>5</sup> Itsaxu pijinia othopa ibopananëjumata, itsajota bitso ira apo aitayaë. <sup>6</sup> Nexata icotia bitso itsa ataju, nexata bajarapaxu juvi ata, tsaquenapona. Tsipaji irabereca bitso apo atabunepiari. <sup>7</sup> Itsaxu pijinia othopa xanëebacabomijavata. Nexata peubixu xanëebotonë caecuenia itsa yajavajuva, bitso xanëebotonë matakënëntsatsi peubijavami. Nexata peubijava apo xainae pecuai. <sup>8</sup> Itsaxu pijinia othopa pexaniairata. Nexata juva. Xaniavaetsia vitsabaponanua. Xainanua pecuai. Itsabotonë capitsapa treinta paxutobeje tsaponae. Itsabotonë capitsapa sesenta paxutobeje tsaponae. Itsabotonë capitsapa cien paxutobeje tsaponae, jai Jesús bajarapalivaisi petsipaebivijavabelia.

<sup>9</sup> Nexata icatsia Jesús jumaitsi jivibitsaëtoxfanetojavabelia:

—Pajivi jamatabënjumeyapëtane patacatsipaebilivaisi, nenamuxunaevetsi xaniavaetsia, jai Jesús.

### *Pacuenia yabara Jesús jivijavabelia livaisi tsipaeba ëcomparacióncuenia yabara pelivaisi* (Mt 13.10-17; Lc 8.9-10)

<sup>10</sup> Jesús livaisi petsipaebicujinae, jivibitsaëtoxfaneto baja Jesús vecuanaviabatsi. Nexata Jesús pijaepato barënacopata doce ponëbeje pijajivi, itsamonae itsiata yajava. Nexata bajarapamonae Jesús yanijobatsi. Bajarapamonae jumaitsi Jesúsjavabelia:

—Palivaisi jivijavabelia tsipaebame peubinë pelivaisicuenia, pajamatabëcuene xaina, patayapëtaenexa panetsipaebare, jai bajarapamonae Jesúsjavabelia.

<sup>11</sup> Nexata Jesús jumaitsi bajarapamonaejavabelia:

—Paxamë rabaja xaniavaetsia Dioso pacayapëtaeyaexana Dioso papijajivimë papecaevetsijava. Bajarapacuenie abaxë daxitajivi apo yapëtae. Baitsi ra saicaya pamona apo tajajivi, tsipaebajë livaisianë ëcomparacióncuenia. <sup>12</sup> Bajaraxuata nexata bajarapamonae tae ata Dioso pesaëta pinijicuene taexanaejava, itsiata apo yapëtae pajamatabëcuene yabara exanajë pinijicuene taexanaejava. Nenamuxunaevetsi ata tatsipaebilivaisi, itsiata apo jumeyapëtae pajamatabëcuene xaina tatsipaebilivaisi. Bajarapacuenia apo jumeyapëtae penajamatabëcuenecopatsiyani Diosojavabelia pibisiacuene pexanaeconimi Dioso pevecuaajibiaexanaeyanivatsi, jai Jesús.

*Pacuenia Jesús yapëtaeyaexana pijajivi, itsamonae yajava, pajamatabëcuene xaina palivaisi tsipaeba peubinë pelivaisicuenia yabara pelivaisi*

*(Mt 13.18-23; Lc 8.11-15)*

<sup>13</sup> Jesús icatsia jumaitsi pijajivijavabelia:

—Itsa apo pajumeyapëtaemë pajamatabëcuene xaina palivaisi pacatsipaebatsi peubinë pelivaisicuenia, ¿detsa nexata pacuenia pajumeyapëtaename daxita palivaisianë pacatsipaebijitsiatsi comparacióncuenia? jai Jesús pijajivijavabelia.

<sup>14</sup> Nexata icatsia Jesús jumaitsi pijajivijavabelia pijajivi peyapëtaenexa pajamatabëcuene xaina palivaisi tsipaeba peubinë pelivaisicuenia:

—Pajivi raja peubixu uba, bajarapajivi bepepaebinë Dioso pitorobilivaisi. <sup>15</sup> Pacuenia itsi pabita peubixu, paxu othopa pabi tuatujëjava penajetarucaenamutojumata, bajara tsijamatabëcueneitsitsi itsamonae Dioso pitorobilivaisi. Bajarapamonae itsa tsipaebatsi Dioso pitorobilivaisi, jumetane picani. Tsijamatabëubatsi jane baja picani Dioso pitorobilivaisi. Itsiata baitsi jane pejumetaecujinae bajarapalivaisi, bepijia dovathi najetaruca bajarapamonaejavaberena. Nexata bajarapamonae tsijamatabëjuvinejevatsi, dovathi vecuapitatsi bajarapalivaisimi, petsijamatabëubilivaisimitsi. <sup>16</sup> Pacuenia pijinia itsi paxu othopa ibopananëjumata, itsajota bitso ira apo aitayaë, bajara tsijamatabëcueneitsitsi itsamonae Dioso pitorobilivaisi. Bajarapamonae jumetane Dioso pitorobilivaisi. Nexata picani bajarapalivaisi barëyaya jumecovënëta. <sup>17</sup> Itsiata baitsi jane pacuenia irabereca apo atabunepiireca paxu othopa ibopananëjumata, nexata nabijiana, bajara tsijamatabëcueneitsitsi bajarapamonae Dioso pitorobilivaisi. Tsipaji pepacuene pejamatabëëthëtovetsina apo jumecovënëtsi bajarapalivaisi. Nexata apo ajamatabëcuenesaë tsavanapae bajayajebi pejumecovënëtsinexa bajarapalivaisi. Nexata itsa tocopiapatatsi daxita petoayapëbejecuenetsi, itsa yalivaisibatsinua Dioso pitorobilivaisi yabara, nexata pejumecovënëtsijavami bajarapalivaisi bepijia copaba. Pevajënaeyabelia apo jumecovënëtavapanapae. <sup>18</sup> Pacuenia pijinia paxu othopa xanëebacabomijavata, itsa juva, bitso maticënënatsi xanëebatonë, bajara tsijamatabëcueneitsitsi itsamonae Dioso pitorobilivaisi. Jumetane picani bajarapamonae Dioso pitorobilivaisi. <sup>19</sup> Itsiata baitsi jane bitso jamatabëcueneenatsi mapanacuapijicuene yabaraje. Tsipaji najamatabëxaina ayaijava palata pexainaenexa. Nexata pijacuata najamatabëcueneyamaxëitojoroba. Daxitacuene mapanacuapijicuene bitso jitsipa pexainaenexa. Bajaraxuata Dioso pitorobilivaisi apo tovitsabitsi pejamatabëëthëtota. Nexata pacuenia itsi pabita piacuaijibibotonë, bajara itsi bajarapamonae. Tsipaji Dioso xaniavaetsia apo tojinavanapae. <sup>20</sup> Pacuenia pijinia itsi paxu othopa pexaniairata, bajara tsijamatabëcueneitsitsi itsamonae Dioso pitorobilivaisi. Bajarapamonae itsa tsipaebatsi Dioso pitorobilivaisi, tsijamatabëjunuatsi. Nexata tsijamatabëcuenevitsabaponatsi Dioso pitorobilivaisi. Nexata pacuenia peubijava capit-sapa itsabotonë treinta paxutobeje tsaponae, itsabotonë sesenta paxutobeje tsaponae, itsabotonë cien paxutobeje tsaponae, bajara tsijamatabëcueneitsitsi bajarapamonae Dioso pitorobilivaisi, jai Jesús pijajivijavabelia.

*Pacuenia Jesús pijajivi livaisi tsipaeba lámparabë pelivaisicuenia yabara pelivaisi*

*(Lc 8.16-18)*

<sup>21</sup> Jesús icatsia jumaitsi doce ponëbeje pijajivijavabelia, itsamonaejavabelia ata:

—Itsajivi ata lámparabë pitanojotsicujinae apo etsi cajoniënëalia. Apo etsi cama bëxëpanalia ata. Jume baja cajena. Biji rajane athëbëyo etsia daxitaboënë pitayotecaenexa.

<sup>22</sup> Bajara pijinia itsi palivaisianë tsipaebaponajë comparacióncuenia daxitajivi picani peyapëtaenexa. Najumematayatsia apo tsipaebaponaenë. Itsamonae nejumetae ata, aeconoxae abaxë apo nejumeyapëtae pajamatabëcuene xaina tatsipaebilivaisianë. Itsiata itsamatacabi, bexëjavabelia, daxitajivi nejumeyapëtaena pajamatabëcuene xaina palivaisianë comparacióncuenia tsipaebaponajë. <sup>23</sup> Pajivi jamatabënejumeyapëtane patacatsipaebilivaisi, xaniavaetsia nenamuxunaevetsi, jai Jesús pijajivijavabelia.

<sup>24</sup> Icatsia Jesús jumaitsi bajarapamonaejavabelia:

—Panejumecanaäjēre patacatsipaebilivaisi. Itsamonae ata itsa pacatsipaebiana, bajarapamonae ata pajumecanaäjētsianame papecatsipaebilivaisi. Palivaisivajēto panejumecanaäjētsianame, nexata bajarapalivaisivajēto pajumeyapētaename. Itsiata icatsia pematatsēnēa bajarapitsilivaisivajēto Dioso pacayapētaeyaexanaena. <sup>25</sup> Pajivi xaniavaetsia nejumeyapētane patacatsipaebilivaisi, bajarapajivi icatsia itsalivaisi pematatsēnēa Dioso jumeyapētaeyaexanaenatsi. Itsiata pajivi apo jitsipae pematatsēnēa pejumeyapētaeponaenexa, bajarapajivi palivaisiyovajēto picani jumeyapētane, nacofēnēt-siana, jai Jesús.

*Pacuenia peubixu pejuvicujinae, Dioso pesaēta vitsaba yabara pelivaisi*

<sup>26</sup> Jesús icatsia jivi comparacióncuenia livaisi tsipaeba Dioso pijajivi pevetsicue yabara. Jumaitsi mapacueniaje:

—Pacuenia peubixu pejuvicujinae, Dioso pesaēta vitsaba, bajara pijinia pacuenia Dioso pijajivi ata Dioso pesaēta jinavanapa. Peubinē pabita peubixu xucayabajaranajetaruca. <sup>27</sup> Peubinē peubicujinae vemaxēmajitabiaba meravi canacujitsia. Naēcotabiaba matababita. Bajarapacuenia panepapona matababianē. Nexata pijinia peubixu pabita juva. Vitsabapona. Itsiata baitsi jane peubinē apo yapētae pacuenia peubixu pijacuata juva. <sup>28</sup> Ira raja pejamatabēcueneta naxaniaba peubijava. Copiata pepaboto vitsabaya. Xuacujinae namatonota. Xuacujinae cuainavereta. <sup>29</sup> Itsa baja yaniona peubijava, penotsivi pona penotsinexa. Tspijaji baja penotsimatababinexa tocopiapatatsi, jai Jesús jivijavabelia.

*Pacuenia mostazaxutoyo pejuvicujinae, mostazanae bepijia vitsaba yabara pelivaisi*  
(Mt 13.31-32; Lc 13.18-19)

<sup>30-31</sup> Jesús icatsia jumaitsi doce ponēbeje pijajivijavabelia, itsamonaejavabelia ata:

—¿De meta xua pelivaisi jēpa Dioso pijajivi bepijia ayaibitsaēto xaneto penaexanaejavanexa? Jivi meta peyapētaenexa ayaibitsaēto xaneto bepijia Dioso pijajivi penaexanaejavanexa, mostazaxutoyo meta pelivaisicuenia tsipaebianajē. Jumaitsinē meta tsane: “Pacuenia mostazaxutoyo pejuvicujinae, bepijia vitsaba mostazanae, bajara pijinia itsane Dioso pijajivi ata. Bepijia Dioso pijajivi ayaibitsaēto xaneto naexanaena. Mostazaxu raja bitso tsiquirixutoxi daxita peubixuvecu. <sup>32</sup> Itsiata baitsi jane mostazanae itsa juva, bepijia vitsaba. Caevaita pinijinae naexana itsapeubinaenē matatoxenetsia. Nexata baratsui ata pematapenanē exana mostazanaemaxērananējavata. Bajara pijinia itsane jivi ata. Bepijia ayaibitsaēto Dioso pijajivi naexanaena,” janē meta tsane mapacueniaje, jai Jesús pijajivijavabelia, itsamonaejavabelia ata.

*Pacuenia Jesús jivi livaisi tsipaebabiaba ēcomparacióncuenia yabara pelivaisi*  
(Mt 13.34-35)

<sup>33</sup> Dioso pitorobilivaisi Jesús tsipaebabiaba jivijavabelia. Dioso pitorobilivaisi Jesús jivi tsipaebabiaba ēcomparacióncuenia. Pacuenia baja jivi caējēpatsi pejumeyapētaenexa, bajarapacuenia Jesús tsipaebabiaba. <sup>34</sup> Jesús ēcomparacióncuenia livaisi tsipaebabiaba bajarapamonaejavabelia. Itsiata saicaya Jesús ēpijajivijavabelia xaniavaetsia yapētaeyaexanabiaba pajamatabēcue xaina daxita bajarapalivaisianē.

*Pacuenia Jesús itaveta joviboxaneto, malataca yajava, piayajjavami yabara pelivaisi*  
(Mt 8.23-27; Lc 8.22-25)

<sup>35</sup> Dioso pitorobilivaisi Jesús tsipaeba jivijavabelia. Bajarapamatacabi Jesús petsipae-bicujinae itsa baja caniviyotsia, Jesús jumaitsi pijajivijavabelia:

—Nicabaliatsi mapapucaxaneto itsapanabeliaje, jai Jesús.

<sup>36</sup> Nexata baja Jesús, pijajivi yajava, vecuapona jivi. Pajerata Jesús ecareca, pijajivi yajava pona. Itsiata itsamonae pēnaponatsi itsajeranēta. <sup>37</sup> Nexata pinijijoviboxaneto jemata najetaruca. Nexata malataca jera ēnēaberena mera epabajarabapona. Nexata baja jera ēnēaberena mera vēnēcaponā. <sup>38</sup> Jesús itsiata majitanuca jamatejema

jeratabufejavavetsina. Namatabëxëyaëtanuca penamatabëxëyaëtabiabijavata. Nexata Jesús pijajivi yaitavabatsi. Jesús pijajivi jumaitsi:

—¡Patajatuxanenë, vaxaitsimi rabaja yaothopaenatsi! ¿Apo jamatabëcuenebëjamë tsaja? jai Jesús pijajivi.

<sup>39</sup> Nexata Jesús pemajitanucaenëmi naëcotapuna. Pinijijumeta itavetaxuaba jovibo. Jesús jumaitsi pucavavabelia, jovibovavabelia ata:

—¡Vainae ecare baja! jai.

Bajarapacuenia Jesús pejumaitsijavata jovibo baja ajibi tsaxuabi. Daxitapuca baja nexata vainae ecaxuaba. <sup>40</sup> Nexata Jesús jumaitsi pijajivijavabelia:

—¿Detsa xuajitsia bitso pajunavame? ¿Tsipaji apo payapëtaemë Dioso papecaevetsi-java? jai Jesús.

<sup>41</sup> Nexata Jesús pijajivi najunaviaca bajarapacuenie petaexae. Ëpamonae najumaitsi:

—¿De meta tsipaji maponëje? ¡Itaveta jovibo, malataca ata! ¡Jumecovënëtatsi baja rovia maponëje! ¡Nexata baja jovibo, malataca yajava, ajibi tsaxuabi! najai Jesús pijajivi.

## 5

*Pacuenia pebi, dovathivi peyajavaponaponanë, Jesús vecuacapitsapa Gerasa nacuata yabara pelivaisi*

*(Mt 8.28-34; Lc 8.26-39)*

<sup>1</sup> Jesús pijajivi barëpata pucaxaneto itsapanabelia, Gerasa nacuyabelia. <sup>2</sup> Nexata Jesús jeravavetsina nonotajuna. Pebi dovathivi peyajavaponaponanë, kujitabarenatsi jivimëthëanëjavaverena. <sup>3</sup> Bajaraponë ponaponabiaba jivimëthëanëjavata. Itsajivi ata apo caëjëpaetsi pecëtsinexa bajaraponë cadenamaëtota ata. <sup>4</sup> Cadenamaëtonëta picani taxucëtabiabatsi anijatonë. Cobecëtabiabatsi picani yajava. Itsiata cajena pecobecëtsicadenamaëtotsi ucutarababiaba pesaëta. Bajaraxuacujinae petaxucëtsicadenamaëtotsi pecobeta tsaquibiaxuababiaba. Nexata cadenamaëtomi tsiquirijavaxi exanapenatabiaba. Itsajivi ata cajena apo caëjëpaetsi pecëtsinexa bajaraponë. Tsipaji bitso asaë. <sup>5</sup> Bajaraponë petsutonëjava, jivi petëpaevi pemëthëcaejava, matabijebi, meravijebi yajava, ponaponabiaba. Vavajai tsabiabaponaponae. Ibotonëjavabelia natsaquibajarababiabaponaponae. <sup>6</sup> Bajaraponë itsa taetaba Jesús penajetarucæjava, nexata tajëverena kujinaeponarena Jesúsjavaberena. Jesús pitabarata pematbacabëta nucajunua. <sup>7</sup> Bajaraponë aëjai pinijijumeta Jesús pitabarata.

—Jesús, pepo Dioso, athëbëtatsia peecaenë, pexënatomë. ¿Detsa xua jaitame xanëjavaberena? Pexaniacuenie bitso cavajëtatsi Dioso pitabarata. Nejamatabëcuenebejiobitsipame, jai dovathivi peyajavaponaponanë Jesúsjavabelia.

<sup>8</sup> Bajarapacuenia jumaitsi dovathivi peyajavaponaponanë tsipaji Jesús jeravavetsina penonotajunaejavata, dovathivi peyajavaponaponanë pemataene-naejavatatsi, Jesús itaveta dovathivi. Jesús jumaitsi dovathivijavabelia mapacueniaje:

—¡Dovathivi, bajaraponë baja pavacuapitsapare! jai Jesús.

<sup>9</sup> Nexata Jesús jumaitsi bajaraponëjavabelia:

—¿Detsa pavënëmë? jai.

Nexata dovathivi peyajavaponaponanë navënëpaeba.

—Tavënë raja Legión. Tsipaji raja bitso paayaibitsaëtoxanetonë, jai dovathivi peyajavaponaponanë.

<sup>10</sup> Nexata dovathivi pinijicuenia vajëta Jesúsjavabelia itsairabelia pejutsiyanivatsi bajarapairavecua. <sup>11</sup> Nexata bajarajota, imoxoyo petsutojavata, marranobitsaëtoxaneto xaevanapa. <sup>12</sup> Dovathivi bitso vajëca Jesúsjavabelia.

—Paneitorobare marranobitsaëtoxanetojavabelia. Panetocopare patajonenexa bajara pamarranobitsaëtoxanetojavabelia, jai dovathivi.

<sup>13</sup> Nexata Jesús tocopata pacuenia dovathivi vajëcatsi. Dovathivi baja pebi vecuapitsapetsi. Nexata baja marranobitsaëtoxanetojavabelia dovathivi junua. Bajara

pamarranobitsaëtoxoneto jinavanapa anijamilbeje ponëbeje. Nexata daxita marranobitsaëtoxonetomi cujinaeyeca. Pucaxaneto itapajanituareca othopareca. Nexata daxita marranobitsaëtoxonetomi meneta bubuna.

<sup>14</sup> Bajara pamarranobitsaëtoxonetomi pevetavanapaevi rëcëpeca. Pona, pacuene tane, petsipaebinexa tomarapijivijavabelia, petsipaebinexa vayafotusatojava penaevijavabelia ata. Nexata jivi ponarena petaenexa bajarapacuene. <sup>15</sup> Nexata dovathivi peyjavaponaponaenëmi bajarapamonae taeyeta Jesús pemuxuneneta. Bajaraponë penaxatatsijava baja naxatateca. Jamatejema baja. Xaniavaetsia eca. Nexata bajarapamonae cjunavatsi Jesús. <sup>16</sup> Pamonaen cunenetsi Jesús pejamatejemayaexanaejava dovathivi peyjavaponaponaenëmi, bajarapamonae paeba pepatsivijavabelia daxita pacuene tane. Paeba pacuene ata Jesús exana marranobitsaëtoxonetojavabelia. <sup>17</sup> Nexata Gerasa nacuapijivi jumaitsi Jesúsjavabelia:

—Pexaniacuene pacavajëtatsi. Ponare baja patajanacuavecua, jai Gerasa nacuapijivi Jesúsjavabelia tsipaji cjunavatsi.

<sup>18</sup> Jesús baja itsa runareca jera ënëabereca, ponë dovathivi peyjavaponaponaenëmi, bitso picani navajëca Jesús pepëta penaponaenexa. <sup>19</sup> Itsiata Jesús apo jejai. Jumaitsi bajaraponëjavabelia:

—Ponare nijaboyabelia. Nijamonae tsipaebare papinijicuene Dioso caexana. Tsipaebare pacuenia ata caitaxutotsoniatane Dioso, jai Jesús dovathivi peyjavaponaponaenëmijavabelia.

<sup>20</sup> Nexata baja dovathivi peyjavaponaponaenëmi pona. Taxuxuaba penavajunupaebijava papinijicuene Jesús exanatsi. Bajaraponë navajunupaebaona Decápolisvënë nacujava. Decápolisvënë nacuata eca diez patomarabeje. Daxitajivi jamatabëcuenenabenajaca itsa jumetanetsi bajaraponë penavajunupaebaonaejava.

*Pacuenia Jesús copiaya namutoepatota jamatejemayaexana piavitaneva, pacuenia icatsia cotocaevi toasaëyaexana Jairo pexënatovayo, petëpaevayomi, yabara pelivaisi (Mt 9.18-26; Lc 8.40-56)*

<sup>21</sup> Jesús icatsia pecovëyaberena jerata naviarena pucaxaneto itsapanaverena. Nexata tajetabojavatarena jivibitsaëtoxoneto Jesús matatoyoronatsi. <sup>22</sup> Nexata bajarajota napatajopa Jairovënë. Bajaraponë judíovi penacaetuatabiabibo pevetsiviyajuvënë. Jairo itsa taetaba Jesús, nexata Jairo pematatabacabëta yayataeya Jesús pitabarata nacujunua. <sup>23</sup> Pinijicuenia Jairo vajëta Jesúsjavabelia. Jumaitsi:

—Taxënatoyo raja netobitso. Najumalipeneta rabaja petëpaenexa. Pexaniacuene netoexanare. Naxanitsia. Netoperabëjayatsianame necobeta petëpaeyaniva, jai Jairo.

<sup>24</sup> Jejai Jesús. Jesús nexata napona Jairo pepëta. Nexata jivibitsaëtoxoneto Jesús pepënaponaevitsi matatoyorotsia cënënanajetarubenatsi. <sup>25</sup> Bajarapajivibitsaëtoxoneto tuatujëta itsava, pijanacuene pecapunaevatsi, nanajetaruca. Bajarapova pijanacuene pecapunaecujinaetsi doce baja pavaibeje xaina. <sup>26</sup> Bitso nexata bajarapova bejiobi pexainaecuene yabara pevaëbivitsi pejamatabëcueneta. Tsipaji belia daxita pexainaejavaximi navecuavereta pematamobaponaeta pevaëbivitsi. Itsiata apo caevi piavitaneacuene. Biji caranata pevajënaeyabelia capunaponatsi piavitaneacuene. <sup>27</sup> Nexata bajarapova jumetane itsamonae pecuaicuaijajava Jesús piavitanevi pejamatejemayaexanaponaejava yabara. Nexata bajarapova ponataba Jesús pepënëvelia, jivibitsaëtoxoneto tuatujëta. Nexata bajarapova tojayataba Jesús penaxatatsijava. <sup>28</sup> Tsipaji cajena bajarapova jamatabëjumaitsi: “Itsa Jesús penaxatatsijava tojayatabianajë, tavitaneyavami nevecuajibi tsane,” jamatabëjai. <sup>29</sup> Nexata bajarapova itsa tojayataba Jesús penaxatatsijava, bajarajota pijanacuenemi vecuajibitsi baja. Nexata bajarapova pijanacuenemi pecaevijavareca, nayapëtane. <sup>30</sup> Jesús ata nayapëtane pesaëta pejamatejemayaexanaejava pepënëyabelia. Nexata pejayatabijavatatsi Jesús napënëyorotaxuaba. Naëcobaruta. Yanijoba jivijavabelia.

—¿Jipatsa tanaxatatsijava netojayataba? jai.

<sup>31</sup> Nexata Jesús pijajivi jumaitsitsi:

—Taneme rabaja jivibitsaëtoxañeto pecacënënanajetarubenaëjava. ¿Detsa xuajitsia: “¿Jipatsa tanaxatatsijava netojayataba?” jamë? jaitsi Jesús pijajivi.

<sup>32</sup> Jesús naëcobaruta daxitajivijava petaenexa pajivi tojayatabatsi penaxatatsijava. <sup>33</sup> Nexata bajarapova neconecojai tsanucaë pecajunavi penayapëtaexae Jesús pejamatejemayaexanaëjavatsi. Nexata bajarapova najetabarena Jesús pitabarayaberena. Pematabacabëta nucajunua. Nexata daxita pacuene exana, bajarapova tsipaeba Jesús-javabelia. <sup>34</sup> Nexata Jesús jumaitsi bajarapovajavabelia:

—Xamë nesivajamatabëjumaitsimë: “Jesús penaxatatsijava itsa tojayatabianajë, tavi-tanejavami nevecuaajibi tsane,” nesivajamatabëjamë. Bajaraxuata jamatejemamë baja. Ponare baja jamatejema. Niavitanejavami rabaja ajibi, jai Jesús bajarapovajavabelia.

<sup>35</sup> Bajarapacuenia Jesús pejumaitsanucaëjavata namutoepatota, Jairo pijaboverena peponaevi mataenenatsi. Bajarapamonae jumaitsi Jairojavabelia:

—Jairo, nexënatoyo rabaja tëpa. Pëtsa baja matavëjëa jamatabëitonotaponame Jesús, jai bajarapamonae Jairojavabelia.

<sup>36</sup> Jesús jumetae ata bajarapajume, itsiata jumaitsi Jairojavabelia:

—Jairo, pëtsa najamatabëxainame. Najamatabëcuenecopare saya ëxanëjavaberena nexënatovayo pecatoasaënexa, jai Jesús Jairojavabelia.

<sup>37</sup> Nexata Jesús, pajivibitsaëtoxañeto pënanajetarubenatsi, pueneta bajarajota. Jesús pona Jairo pijaboyabelia. Jesús saya yajavalia mapamatabëxëyoje: Pedro, Juan, Santiago, Jairo jane baja. Juanbeje Santiagobeje nacaebananëbeje. <sup>38</sup> Itsa baja Jesús palia Jairo pijaboyabelia, tane jivibitsaëto pinijijumeta pemataneuyabijava petëpaevayo. <sup>39</sup> Jesús itsa joneya boyalia, jumaitsi bajarapamonaejavabelia:

—Pëtsa bitso pamatanueyabame. Pejanava raja apo tëpae. Saya raja majitanuca, jai Jesús tsipaji yapëtane Jesús piasaëyaexanaëjavanexa bajarapovayo.

<sup>40</sup> Bajarapacuenia Jesús pejumaitsiijava, bajarapamonae saya jumecapocaponatsi. Nexata daxita Jesús bovecua pitsapaëyaexana. Itsaxuayolia petëpaevayo boca, Jesús barëjoneya caejiviyobeje saya. Jesús saya barëjoneya mapamatabëxëyoje: petëpaevayo paxa, pena, Jesús pijajivi, acueyabi ponëbeje. Bajarapamatabëxëyo saya Jesús barëjoneya. <sup>41</sup> Nexata Jesús petëpaevayo cobepita. Jesús pijajumeta jumaitsi:

—Talita cumi, jai, mapajumetaje pejumaitsiijume: “Pejanava, nonotapunare,” pejaijume.

<sup>42</sup> Bajarapacuenia Jesús pejumaitsiijavata, pejanavayo nonotabapuna. Ponapona baja. Bajarapovayo doce pavaibeje xaina. Nexata Jesús peyajavajonevilia pinijicuenia jamatabëcuenenabenajaca bajarapacuenia itsa tane. <sup>43</sup> Nexata Jesús pinijicuenia jumaitsi:

—Pëtsa itsajivi ata patsipaebame mapacuenieje, jai Jesús.

Bajaraxuacujinae Jesús jumaitsi pejanavayo penajavabelia:

—Nexënatovayo pexaëjava rajure, jai.

## 6

*Pacuenia Jesús naviata pijanacuayabelia, Nazaret tomarabelia, yabara pelivaisi (Mt 13.53-58; Lc 4.16-30)*

<sup>1</sup> Jesús baja, pijajivi yajava, pona Capernaum tomaravecua. Naviata pijanacuayabelia, pevitsabitomarabelia. <sup>2</sup> Judíovi penacueraevetsimatatabita Jesús taxuxuaba jivi livaisi petsipaebijava judíovi penacaetuatabiabibota. Ayaibitsaëtoxañeto pejumetaevitsi siva-jamatabëcuenenabenajacatsi. Nexata bajarapamonae Jesús jamatabëcuenaebiatanatsi. Bajarapamonae Jesús yabara najumaitsi mapacueniaje:

—¿Detsa meta verena maponë capitsapa mapajamatabëcuenelivaisije? ¿Detsa pacuenia meta yapëtane daxita mapacuenieje? ¡Pitsipinijicuenie maponë exanaje, vaxaitsi abaxë caeto ata apo taetsi! ¡Matapania matanetsije! <sup>3</sup> Maponëje vaxaitsiyajuvënë. Carpinteronë. María pexëñato. Bajaraponë pejuyapijivi Santiago, José, Judas, Simón. Papetiriavi ata vajatomarata jinavanapa, bajaraponë pejuyapijivi, najai bajarapamonae Jesús yabara.

Nacaetomarapijivixae, bajarapamonae Jesús apo jumexaniataetsi. <sup>4</sup> Nexata Jesús jumaitsi bajarapamonaejavabelia:

—Bajara maitsabiabije. Diosojumepaebivi profetavi itsanacuapijivi yaiyataeyabia-batsi. Itsiata pijanacuapijivi, pijaviriavi, pijamonae ata, apo yaiyataeyabiabitsi, jai Jesús.

<sup>5</sup> Nexata Jesús bajarajota jivi ayaibitsaëtojavabelia pinijicuene pexanaejava apo tsitaexanae. Tsipaji apo jumecovënëtsitsi. Saya caejiviyobeje piavitanevi pecobeta jayata. Jamatejemaya exana. <sup>6</sup> Nexata Jesús bitso najamatabëxaina. Tsipaji jivi apo jumecovënëtsitsi. Bajaraxuacujinae Jesús tsiquiritomaraxijava Dioso pitorobilivaisi jivi tsipaebanajetaruca.

*Pacuenia Jesús pijajivi itoroba Dioso pitorobilivaisi jivi petsipaebanajetarubenaenexa yabara pelivaisi*

*(Mt 10.5-15; Lc 9.1-6)*

<sup>7</sup> Jesús junata pijajivi doce ponëbeje penacatuatsinexa. Nexata Jesús pijajivi itoroba anijanëbeje tsaponae. Jesús pijajivi pecaëjëpaejamatabëcuenetsi jamatabëcuenecaëjë-paeyaexana dovathi peyajavajinavanapaevi pevecuacapitsapaponaenexa. <sup>8</sup> Jesús jane baja pijajivi penaropobivajënae, Jesús jumaitsi pijajivijavabelia mapacueniaje:

—Pëtsa itsacuenejava ata pacaponame panijanamutonexa. Pëtsa pacaponame panemarue ata, dorota ata, palata ata. Ènaeboyosaya pacaponare. <sup>9</sup> Itsiata pataxunaponare panenataxuxatabijava. Caejava panenaxatatsijava pajumaponare. Pëtsa anijacamisabeje pacaponame. <sup>10</sup> Itsajota papatabiabianame, caebota pamajitabianame. Pëtsa panatixitaponame itsaboyabelia panemajitsinexa. Matapania icatsia itsajavabelia itsa paponaname, bajarapabovecua papitsapaponaenexa. <sup>11</sup> Patomarata apo pacacopiapitsi tsane, itsa apo jitsipaenua tsane papecanamuxunaevetsinexa panetsipaebilivaisi, nexata paponaname bajarapatomaravecua. Paneponaevajënae bajarapatomarata panataxuatsapërëvarëbianame. Bajarapacuenia itsa panataxuatsapërëvarëbianame, bajarapatomarapijivi yapëtaena Diosojavabelia penaneconitsicuene apo papecacopiapitsixae papecanamuxunaevetsinexa panetsipaebilivaisi. Xaniajanë pacuenia pacatsipaebijitsiatsi. Pamatacabi Dioso jivi naneconitsiaexanaena, bajarapamatacabi Dioso bitso naneconitsiaexanaenatsi patomarapijivi apo pacacopiapitsi tsane. Paneconivajëtota bajayata Dioso naneconitsiaexana Sodoma tomarapijivimi, Gomorra tomarapijivimi ata, bajarapaneconivajëto matatoxenetsia Dioso naneconitsiaexanaenatsi patomarapijivi apo pacacopiapitsi tsane, jai Jesús pijajivijavabelia.

<sup>12</sup> Nexata jane baja Jesús pijajivi naropoba Dioso pitorobilivaisi jivi petsipaebanajetarubenaenexa. Jesús pijajivi naropoba anijanëbeje tsaponae. Nexata Jesús pijajivi jumaitsonae jivijavabelia:

—Pacopabare baja pibisiacuene paneexanabiabijava. Panajamatabëcuenepënëyorore Diosojavabelia, jai tsaponae.

<sup>13</sup> Jesús pijajivi dovathi peyajavajinavanapaevi vecuacapitsapapona. Piavitanevi ata mataexabapona aceiteranëta. Bajarapacuenia Jesús pijajivi jamatejemayaexanapona piavitanevi.

*Pacuenia bajayata Juanpijinë jivibautisabinëmi beyaxuabatsi yabara pelivaisi*

*(Mt 14.1-12; Lc 9.7-9)*

<sup>14</sup> Herodes, Galileanacua pevetsinë. Nexata Herodes jumetane itsamonae jamatabëcuenenavëxaniabiaya pejumaitsiyava Jesús yabara: “Juanpijinë raeta jivibautisabinëmi icatsia asaë petëpaecujinae. Bajaraxuata caëjëpatsi Dioso pesaëta pinijicuene pexanaenexa,” pejaijava itsamonae jamatabëcuenenavëxaniabiaya Jesús yabara, Herodes jumetane.

<sup>15</sup> Itsamonae pijinia jumaitsonae Jesús yabara:

—Bajayata raeta ponëmi ponapona, profeta Elíaspijinëmi, baja raeta ponë, jai tsaponae itsamonae.

Itsamonae pijinia jumaitsonae Jesús yabara:

—Diosojumepaebinë profeta raja. Tshipaji rabaja pacuenia bajayata profetavi jina-  
vanapa, bajara icatsia maponë itsije, jai tsaponae itsamonae.

<sup>16</sup> Bajarapacuenia itsamonae jamatabëcuenenavëxaniabiaya pejumaitsaponaejava  
Jesús yabara, Herodes itsa jumetane, Herodes ata jamatabëcuenenavëxaniabiaya ju-  
maitsi Jesús yabara:

—Maraeta Juanpijinëmije, ponëmi bajayata xanë tajajivi vësiucutaxuabiaexanjë.  
Icatsia raeta asaë petëpaecujinae, jai Herodes jamatabëcuenenavëxaniabiaya Jesús  
yabara.

<sup>17</sup> Bajarapacuenia Herodes jumaiti tshipaji abaxë Juanpijinë itsa asaë, Herodes pija-  
jivi, vajabitsaëvi, itoroba Juanpijinë pevaetabinexatsi. Nexata vajabitsaëvi Juanpijinë  
cobecëtsiaya caponatsi penaneconitsivi pejebabiabiboyalia. Bajarapacuenia Herodes  
pijajivi itoroba Herodes pijava, Herodíasva, pejamatabëcueneta. Herodíasva picani  
copiata pita Felipe, Herodes pejuyapijinë. Nexata Herodes pejuyapijinë pijava yacajërëta.

<sup>18</sup> Nexata Herodes pejuyapijinë pijava peyacajërëtsixae, Juanpijinë abaxë itsa apo  
vaetabitsi, muxujioba Herodes. Juanpijinë jumaiti Herodesjavabelia:

—Acuenebi raja nejuyapijinë pijava nepitsijava,” jai Juanpijinë Herodesjavabelia.

<sup>19</sup> Nexata bajarapacuenia Juanpijinë pejumaitsixae, itoyatsi Herodíasva. Nexata  
abaxë Juanpijinë itsa ponapona penaneconitsivi pejebabiabibota, bajarapova picani  
Juanpijinë jamatabëbeyaxuabiaexanatsi. Itsiata apo cajëpaetsi. <sup>20</sup> Tshipaji Herodes  
yapëtane Juanpijinë bitso pejamatabëxanepanaenëcuene. Nexata Herodes yaiyatane  
Juanpijinë. Bajaraxuata Herodes apo tocopatsi pijava pejamatabëcueneta pebeyaxu-  
abinexatsi Juanpijinë. Juanpijinë itsa cuaicuajai tsabiabi Herodesjavabelia, nexata  
picani Herodes jamatabëbjai tsabiabi pijaneconi yabara. Itsiata Herodes xaniavaetsia  
namuxunaevetabiaba. <sup>21</sup> Nexata pamatacabi Herodes najamatabënapita penaexanae-  
matacabi, najamatabëxaina pexaniafiesta pexanaenexa. Bajarapafiestajava Herodes  
junata pijaboyaberena jivi ayaibitsaëtoxaneto penabaninexa. Junata Herodes pijajivi,  
pamonae toevetatsi pijairanë. Junata vajabitsaëvi pevetsivinua. Junata petuxanevinua,  
Galilea nacuata pejinavanapaevi. Nexata bajarapafiestajavata Herodíasva toyapëx-  
anepanatsi Juanpijinë pebeyaxuabiaexanaenexatsi. <sup>22</sup> Herodíasva toyapëxanepanatsi  
tshipaji pexënatoyo joneya Herodes pejunatsivi pebarënanabaneceajavalia pijacujirucuenia  
caevayo peyavajibinexa. Nexata Herodes pejunatsivi bitso barëitajitsipa pejionëyo  
peyavajibijava. Nexata Herodes najumecapanepaeya pexaniajajumeta jumaiti pe-  
jionëyojavabelia:

—Nevajëre xua jitsipame. Carajutsianatsi raja. <sup>23</sup> Pacuenejava nevajëtsianame,  
carajutsianatsi. Itsa nevajëtsianame taneevetsiaexanaenacua ata, tuatuajëjava carajut-  
sianatsi, jai Herodes najumecapanepaeya pejionëyojavabelia.

<sup>24</sup> Nexata bajarapovayo pitsatabalia. Jumaiti penajavabelia:

—¿Detsamë ra xua vajëtsianajë? jai penajavabelia.

Nexata Herodíasva pexënatoyojavabelia jumaiti:

—Juan jivibautisabinë pematabocoto vajëre, jai.

<sup>25</sup> Nexata bepimia bajarapovayo jopajoneya Herodes pecaejavabelia. Jumaiti  
Herodesjavabelia:

—Jitsipajë cajena tanerajutsinexamë platota Juan jivibautisabinë pematabocoto, jai  
bajarapovayo Herodesjavabelia.

<sup>26</sup> Nexata Herodes pinijicuenia bejamatabëjiobi tsanjetsireca. Herodes nexata  
acuenebi: “Jume,” pejaijava. Tshipaji baja Herodes najumecapanepaeya jumaiti pe-  
jionëyojavabelia pexaniajajumeta daxita pejunatsivi pitabarata. <sup>27</sup> Nexata Herodes  
bepimia itoroba vajabitsaënë petocarenanexatsi Juan pematabocoto. <sup>28</sup> Vajabitsaënë  
nexata pona penaneconitsivi pejebabiabiboyabelia. Juanpijinëmi vësiucutaxuabatsi.  
Juanpijinëmi pematabocoto vajabitsaënë carena platota. Nexata pejanava rajutatsi.  
Nexata bajarapovayo juya pena rajuta. Nexata baja Herodíasva yapëtane capanepaeya  
baja Juanpijinë pebeyaxuabijavatsi.

<sup>29</sup> Nexata Juanpijinë pijajivi itsa vënëtanetsi pebeyaxuabijavatsi, bajarapamonae ponarena Juanpijinë pebocaejavaberena. Pitatsi petëpaenë. Pepitsicujinaetsi Juanpijinë pijajivi mëthëtatsi.

*Pacuenia Jesús pexaejava rajuta cinco mil ponëbeje yabara pelivaisi*

*(Mt 14.13-21; Lc 9.10-17; Jn 6.1-14)*

<sup>30</sup> Jesús pitorobivi, apóstolevi, naviabanajetarubena Jesúsjavaberena. Nexata bajarapamonae Jesúsjavabelia navajunupaeba daxita pacuene exanavanapa, pacuenia ata jivi livaisi tsipaebavanapa. <sup>31</sup> Nexata Jesús jumaitsi bajarapamonaejavabelia:

—Naxanitsia. Ponatsi pesajinaejavabelia. Nacueraevetsianatsi caepatoyo, jai Jesús.

Bajarapacuenia Jesús jumaitsi pijajivijavabelia tsipaji jivibitsaëtoxonetonë topatabi-abatsi. Itsamonae naviabaponabiaba. Itsamonae juya patabiaba. Nexata Jesús pijajivi pebarënananinexa, apo cuenecaëjöpabiabitsi. <sup>32</sup> Nexata Jesús ëpijajivi jerata yajavapona itsabelia jivi ajibi. <sup>33</sup> Itsiata jivi ayaibitsaëtoxoneto pëtanetsi Jesús peponaejava. Nexata itsabelia Jesús pona, matatsënëa pënacujinaerubenatsi daxita tomaranëpijivi. Caranata Jesús pevajënaeyabelia pata bajarapamonae. <sup>34</sup> Itsa baja Jesúsbana nonobajunaya jeravecua, Jesús tane jivibitsaëtoxoneto. Nexata Jesús bajarapamonae itaxutobejibiatane. Nexata Jesús bajarapamonae sivajamatabëjumaitsi mapacueniaje:

—Pacuenia baitsi ovejabitsaëtoxoneto itsa toajibitsi pevetsinëtsi, bajara itsi mapamonaeje, sivajamatabëjai Jesús.

Nexata Jesús ayaicuenia livaisi tsipaeba bajarapamonaejavabelia. <sup>35</sup> Itsa baja bitso caniviyotsia, Jesús pijajivi cujibarenatsi. Jumaitsitsi:

—Caniviyo rabaja bitso. Majota ajibi pexaejava. Tsipaji itsajivi ata pijabo apo xinae.

<sup>36</sup> Itorobare baja jivi peponaenexa imoxoyo penaetomaranëjavabelia pecomuacaenexa pexaejava, jaitsi Jesús pijajivi.

<sup>37</sup> Jesús nexata jumaitsi pijajivijavabelia:

—Paxamë parajure pexaejava, jai.

Nexata Jesús pijajivi jumaitsi:

—¿Paponanajë tsaja tomarabelia patacomuatsinexa pan doscientos denariota bajarapamonae pexaenexa? jai Jesús pijajivi.

<sup>38</sup> Jesús icatsia jumaitsi pijajivijavabelia:

—¿Detsa papanbëbeje paxainame paxamë? Pataema copiata, jai Jesús.

Jesús pijajivi petaecujinae tsipaeba Jesúsjavabelia. Jumaitsi:

—Paxainajë saya cinco papanbëbeje, anijanëyobeje dujuainëyobeje yajava, jai Jesús pijajivi.

<sup>39</sup> Nexata Jesús itoroba daxitajivi penaenexa ponajavata. <sup>40</sup> Nexata bajarapamonae pepobitsaëtonë natsanaeya ena. Caebitsaëtota enapona cien pajivibeje. Itsabitsaëtota enapona cincuenta pajivibeje. Bajarapacuenia caebitsaëto canacujitsia enapona.

<sup>41</sup> Nexata Jesús pita cinco papanbëbeje, anijanëyobeje dujuainëyobeje yajava. Athëbëa benaëcotsia. Jumaitsi Diosjavabelia:

—Pexaniacuene panetoexaname. Panerajutame pataxaejava, jai Jesús.

Bajaraxuacujinae Jesús pan epatsicacapona. Pijajivijavabelia rajutapona pepatsicacaejava. Nexata juya Jesús pijajivi pan tsicobetsana jivijavabelia. Dujuaijavaxi ata tsicobetsana jivijavabelia. <sup>42</sup> Daxita xaniavaetsia nabane. <sup>43</sup> Bajaraxuacujinae Jesús pijajivi caetuata pan, dujuai yajava, jivi peyajuvënëcopabejebijavanë. Nexata vënëba doce xuabeje bemapirecuenia pexanaejavanë. <sup>44</sup> Pamonae pexaejava xane, ayaibitsaëtoxoneto. Itsiata ëpebijivi namataëjëtatsi cinco mil ponëbeje.

*Pacuenia Jesús mene itaboxoya najetaruca yabara pelivaisi*

*(Mt 14.22-27; Jn 6.16-21)*

<sup>45</sup> Jesús jivi ayaibitsaëtoxoneto pexaejava perajutsicujinae, Jesús pijajivi bepijia runaeyaexanareca jera ënëabereca. Jesús pijajivi copiata itoroba penicabinexa puca itsapanabelia, Betsaida tomarabelia. Jesús baja jivi naviabiaexana. Bajaraxuata abaxë

caenë nacopatanuca bajarajota. <sup>46</sup> Itsa baja jivi napëvereta penaviabijava, Jesús junaya petsutojumabetsia pevajëtsinexa Diosojavabelia. <sup>47</sup> Itsa baja bitso meravi, Jesús pijajivi pucaxaneto itapavecua tajë baja yanajetarubenalía. Jesús abaxë bajarapaepatota caenë nacopatanucarena pucaxanetoitapatarena. <sup>48</sup> Nexata Jesús tane pijajivi petoayapëbejéjavatsi pevaetsijava. Tsipaji bitso joviboxaneto ayai pevajënaeverena. Bajaraxuacujinae bajayacunua, ajena matabijitsia, Jesús pijajivi pecovëvelia imoxoyotanajetaruca. Jesús najetaruca mene itaboxoya. Rovia picani xenetsijitsia. <sup>49</sup> Jesús pijajivi ita tanetsi mene itaboxoya penajetarucaejava, Jesús pijajivi jamatabëjumaitsi:

—¡Petëpaenëmi raeta pejumape najetaruca! jamatabëjai.

Nexata Jesús pijajivi vavajai tsaxuabi ayaijumeta. <sup>50</sup> Tsipaji daxita Jesús pijajivi tane bajarapacuenia penajetarucaejava. Nexata Jesús pijajivi jamatabëcuenenajunaviaca. Nexata Jesús bepijiayo jumaitsi pijajivijavabelia:

—Xanë raja. Pëtsa panecujunavame. Pajamatejemamëre saya, jai Jesús pijajivijavabelia.

<sup>51</sup> Nexata baja Jesús nonolia bajarapajera ënëabelia. Ajibi baja tsaxuabi jovibo. Nexata Jesús pijajivi pinijicuenia jamatabëcuenenajunaviaca. Tsipaji tane jovibo, malataca yajava, Jesús piajibiaexanaejava. <sup>52</sup> Jesús baja picani pijajivi copiaya tane, pan tsiquirijavayomi ata, jivibitsaëtoxanetojavabelia Jesús perajutsijava. Itsiata Jesús pijajivi apo jamatabëcueneyapëtae Jesús pecaëjëpaenëcuenetsi pinijicueni pexanaenexa. Abaxë bajarapamonae ajamatabëcuenetaja.

*Pacuenia Jesús jamatejemayaexana piavitanevi Genesaret nacuata yabara pelivaisi (Mt 14.34-36)*

<sup>53</sup> Jesús pijajivi jerata yajavapata puca itsapanabelia. Pata Genesaret nacuayabelia. Peyapatsijera bajarajota puca itapata querataruta. <sup>54</sup> Nexata Jesús, pijajivi yajava, nonotajunaya jeravecua. Bajarajota bepijia jivi yapëtanetsi Jesús cuene. <sup>55</sup> Nexata Jesús pepatsijava penatsipaebinexa, navajunucacujinaejinaruta daxita bonëjava. Nexata piavitanevi pijacamaxita yavëtarapatatsi itsajota jivi jumetane Jesús pepatsijava. <sup>56</sup> Jesús pata tsiquiritomaraxijava, pinijitomaranëjava ata, tomarapënyë penaebonëjava ata. Daxitajava, ita patomarata Jesús patabiaba, bajarapatomaranëjava callejavata, jivi tojebabiabatsi piavitanevi. Piavitanevi pecapatsivi pinijicuenia jumai tsabiabi Jesúsjavabelia:

—Pexaniacuene bitso netoexanare. Tocopatsianame maponëje pecatojayatsinexa nenaxatatsijavacopia, jai tsabiabi.

Nexata daxita pamona Jesús penaxatatsijavacopia tojayataponatsi, jamatejema baja tsaponae piavitanejavamivecua.

## 7

*Pacuenia Jesús tsipaeba xua jivi jamatabëcuenebijianatsi yabara pelivaisi (Mt 15.1-20)*

<sup>1-4</sup> Daxita judíovi catsiteca pijasalinaivimi pijacuene. Judíoviyajuvënëvi, pamona fariseovi naexana, bajarapamonae bitso catsiteca pijasalinaivimi pijacuene daxita judíovi matatoxenetsia. Jamatabëcuenenavëxaniabiaya jamatabëjumai tsabiabi:

—Itsa catsitecajë tajasalinaivimi pijacuene, nexata Dioso aneconijibia netaena, jamatabëjai tsabiabi.

Nexata bajarapamonae pijasalinaicuenia anijatonë xaniavaetsia ita apo napënanacobequiatsi, pexaejava apo xaeyabiabi. Itsajota pexaejavacuene canajetabiaba, bajaraverena ita naviaba pecomuacaecujinae, bajarapamonae pijasalinaicuenia xaniavaetsia ita apo napënanacobequiatsi, pexaejava apo xaeyabiabi. Bajarapamonae pematatsënë navitsia itsacujiruxi ata, pijasalinaivimi pijacujiru, catsiteca. Bajarapamonae tazaxi, mera peyajebinëanë ata, pecasetsinëanë ata, camanë ata, pijasalinaivimi pijacuenia xaniavaetsia quiatabiaba. Nexata judíovi pecujarubivi Jerusalén tomaraverena pata. Nexata judíovi pecujarubivi, fariseovi yajava, cujibarenatsi Jesús. Nexata bajarapamonae

tane Jesús pijajivi judíovi pijasalinaicuenia anijatonë napënanacobequiatsinejeva pena-banijava. Bajaraxuata bajarapamonae jumaitsi Jesúsjavabelia:

—Jesús, nijajivi naneconita Diosojavabelia. <sup>5</sup> Tsipaji nijajivi apo jumecovënëtsiajinavanapae vajasalinaivi pijacuene. Nijajivi itsa xane pexaejava, anijatonë napëna apo nacobequiatabiabi, jai bajarapamonae Jesúsjavabelia.

<sup>6</sup> Jesús nexata jumaitsi bajarapamonaejavabelia:

—¡Paxamë saya jivi paneyamaxëitojorobivi! Diosojumelivaisipaebinëmi profeta Isáaspijinë baja cajena bajayata tajëvelia xaniavaetsia pacavajunupaeba. Bajayata Dioso tajëvelia pejumaitsijava paxamë yabara profeta Isáaspijinë peyaquinaelivaisita jumaitsi mapacueniaje:

Bajarapamonae nejitsipaena saya pijumeta. Itsiata pepo tanejitsipaejamatabëcuene nevecuatajë tsane. <sup>7</sup> Saya baitsi bajarapamonae pijajumaitsiata tsane: “Pacajitsipatsi,” nejai itajara tsane. Itsiata apo xaniajai tsane. Bajarapamonae saya jivi tsipaebaponaena pejamatabëcuenepijilivaisi. Pepo taitorobilivaisi apo tsipaebi tsane,

jai tajëvelia Dioso pejumaitsijava paxamë yabara Isáaspijinë peyaquinaelivaisita, jai Jesús bajarapamonaejavabelia.

<sup>8</sup> Jesús icatsia jumaitsi fariseovijavabelia, judíovi pecujarubivijavabelia ata:

—Paxamë Dioso papecaitorobicuenia apo paexanaemë. Caranata ëvajasalinaivi pijacuene pacatsitecame. Nexata vajasalinaivi pijacuena xaniavaetsia paquiatabiabame mera peyajebinëanë. Xaniavaetsia paquiatabiabame tazaxi ata. Pematatsënëa navitsia itsacujiru ata pacatsitecame. <sup>9</sup> Apo pajumecovënëtsimë Dioso pitorobilivaisi vajasalinaivi pijacuene panecatsitecaenexa. Apo pajumecovënëtsi atamë Dioso pitorobilivaisi, jamatabëcuenenavëxaniabiaya pajamatabëjumaitsimë tsabiabi: “Pexaniacuene raja exanjë,” pajamatabëjamë tsabiabi. <sup>10</sup> Bajayata Dioso najumecopata Moiséspijinëta. Bajarapalivaisi jumaitsi: “Axa yayataema. Ena ata yayataema. Pajivi pibisiacuenia bijatane paxa, pena ata, bajarapajivi pabeyaxuare,” jai Dioso Moiséspijinëta penajumecopatsilivaisi. <sup>11-12</sup> Itsiata baitsi jane paxamë jivi pamuxubijiapenatabiabame peyayataeyaniva paxajivi, penajivi ata. Paxamë pajumaitsimë tsabiabi mapacueniaje: “Axa, ena ata, itsa cavajëta neyavenonaenexa, nexata itsa apo jitsipaemë neyavenonaejava, jumaitsimë tsane mapacueniaje: ‘Daxita xua pacarajutsipatsibeje picani patacayavenonaenexabeje, daxita bajaraxua tsipaebajë baja tarajutsinexa Diosojavabelia. Nexata baja acuenebi patacarajutsinexabeje,’ jamë tsane neyavenonaeyaniva,” pajamë tsabiabi jivijavabelia. <sup>13</sup> Nexata caranata Dioso pejumaitsijume: “Axa yayataema. Ena ata yayataema,” pejaijume, paxamë jivi pacopabiaexanaponame. Tsipaji paxamë patsipaebaponame saicaya vajasalinaivimi pijalivaisi. Itsalivaisianë ata pematatsënëa saicayacuenia patsipaebaponame Dioso pitorobilivaisivecua, jai Jesús judíovi pecujarubivijavabelia, fariseovijavabelia ata.

<sup>14</sup> Nexata icatsia Jesús junata jivi. Jumaitsi jivijavabelia:

—Daxita paxamë panenamuxunaevere xaniavaetsia patanejumeyapëtaenexamë. <sup>15</sup> Xua jivi pecuibota xane, pexaevajënae napëna anijatonë apo nacobequiatsi ata, apo jamatabëcuenebijaetsi. Apo vënananeconitsi Diosojavabelia. Baitsi rajane xua jivi najamatabëxaina pejamatabëëthëtovetsina, xua ata pibisiacuenia cuaicuaijai, bajara baitsi jane xua jivi bajamatabëcuenebijaetsi. <sup>16</sup> Pajivi jamatabënejumeyapëtanepatacatsipaebilivaisi, nenamuxunaevetsi xaniavaetsia, jai Jesús.

<sup>17</sup> Itsa baja Jesús jivivecua natixita, boya joneya. Nexata boyalia pijajivi yanijobatsi bajarapalivaisi. <sup>18</sup> Nexata Jesús jumaitsi pijajivijavabelia:

—¿Paxamë ata tsarovia abaxë apo panejumeyapëtaemë? Daxitacuene raja pexaejava jivi xae ata, apo jamatabëcuenebijaetsi. Diosojavabelia apo vënananeconitsi. <sup>19</sup> Tsipaji raja jivi pexaejava apo tsijamatabëëthëjonetsi. Saya pënëareca joneca. Bajaraxuacujinae icatsia vecuapitsapatsi, jai Jesús.

Bजारapacuenia Jesús jumaitsi Jesús pijajivi peyapëtaeyaexanaenexa pacuenia daxitacuene jivi pexaejava xae ata, apo pibisiacuene.

<sup>20</sup> Icatsia Jesús jumaitsi:

—Baitsi rajane jivi pejamatabëëthëtojavavetsina, papibisiajamatabëcuene pitsapa, bajara baitsi jane xua jivi jamatabëcuenebijianatsi. <sup>21</sup> Tsipaji rabaja jivi pejamatabëëthëtojavavetsina pitsapa pibisiacuene penajamatabëxainanexa. Pitsapa pebi pijava pevecuanamatayajitsi jamatabëcuenenexa. Pitsapa petiriavijavabelia pebi penaperabëquenetsiatae jamatabëcuenenexa. Pitsapa jivitonë pebeyaxuabijamatabëcuenenexa. <sup>22</sup> Pitsapa penacobetoxotsijamatabëcuenenexa. Pitsapa itsamonae pecobecovë penaxainaejabijamatabëcuenenexa. Pitsapa piacujirubejijamatabëcuenenexa. Pitsapa itsamonaejavabelia peyamaxëitojorobijamatabëcuenenexa. Pitsapa itsamonae pexainae cuene pecobecaëbijamatabëcuenenexa. Pitsapa itsajivi pibisiacuena pebaracuaicuaijai jamatabëcuenenexa. Pitsapa ayajamatabëcuenejivi penataejamatabëcuenenexa. Pitsapa saya jema peponapnaejamatabëcuenenexa. <sup>23</sup> Daxita bajarapajamatabëcuene jivi pejamatabëëthëtojavavetsina pitsapa. Nexata bajarapacuenia jivi jamatabëcuenebijianatsi, jai Jesús pijajivijavabelia.

*Pacuenia Jesús itsanacuapijiva pexënatoyo tojamatejemayaexana yabara pelivaisi (Mt 15.21-28)*

<sup>24</sup> Jesús baja Genesaret nacuavecua pona. Naropota itsanacuayabelia, itsabelia eca anijatamarabeje, Tiro tomarabeje Sidón tomarabeje. Nexata Jesús bajarapanacuatalia bota patajopa. Muetsia picani Jesús patsijitsia. Itsiata acuenebi muetsia pepatsijava. <sup>25</sup> Nexata bepijia petiriva vënëlivaisitaetabatsi Jesús pepatsijava. Nexata petiriva pata Jesúsjavaberena. Nexata bajarapova yayataeya Jesús pitabarata pematatabacabëta nucajunua. Bajarapova pexënatoyo dovathi yajavaponapona. <sup>26</sup> Bajarapova sirofeniciaviriava, apo judíoiva. Nexata Jesúsjavabelia jumaitsi:

—Pexaniacuene bitso netoexanare. Taxënatovayo netovecuapitsapare dovathi, jai bajarapova.

<sup>27</sup> Nexata Jesús jumaitsi bajarapovajavabelia:

—Copiaya abaxë veyavenonajë tajanacuapijivi, judíoivi. Tsipaji apo xanepanae xamë itsanacuapijivamë copiaya tacayavenonaenexa. Xamë copiaya itsa cayavenonaejitsipatsi, nexata pacuenia pejevaxi pexaejavaminexa yacajërëtsipajë tarajutsinexa avirixijavabelia, bajara itsinë tsipae, jai Jesús bajarapovajavabelia.

<sup>28</sup> Itsiata baitsi jane bajarapova ajumesaë tsaponae. Icatsia jumaitsi Jesúsjavabelia:

—Xaniajamë rabaja picani. Itsiata neyavenonare. Tsipaji avirixi ata mesa bëxëpanata itsa nubena, nexata pejevaxi pexaepanpërë itsa othopareca mesa bëxëpanareca, banaxane avirixi ata. Bajara pijinia pacuenia itsiata itsanacuapijiva atanë, neyavenonare, jai bajarapova Jesúsjavabelia.

<sup>29</sup> Nexata icatsia Jesús jumaitsi bajarapovajavabelia:

—Xaniavaetsia nejumecanaviatame. Naviare baja nijaboyabelia. Dovathi rabaja catovecuapitsapatsi nexënatovayo, jai Jesús.

<sup>30</sup> Itsa baja bajarapova pijaboyabelia pata, pexënatovayo taeyabuata jamatejema baja pebocaejava camata. Nexata yapëtane pexënatovayo baja petovecuapitsapaejavatsi dovathi.

*Pacuenia Jesús jamatejemayaexana bitso siyanë, apo pejumetaenë, piajumecëcënë, yabara pelivaisi*

<sup>31</sup> Jesús baja naropota Tiro nacuavecua. Najetaruca Sidón nacujava. Bajaraxuacujinae najetaruca Decápolis nacujava. Bajaraxuacujinae patajopa Galilea pucaxanetojavabelia.

<sup>32</sup> Bajarajota jivi tocapatatsi siyanë, bitso apo pejumetaenë, piajumecëcënë. Nexata bajarapamonae jumaitsi Jesúsjavabelia:

—Jesús, pexaniacuene panetoexanare. Panetojayare maponëje pejumetaenexa, pecuaicuaijainexanua, jai bajarapamonae.

<sup>33</sup> Nexata Jesús jivivecua bajaraponë barëpona pesaicaeyojavabelia. Nexata Jesús pecobesitota namataenetsia muxuvojobëta. Bajaraxuacujinae nacobesioniatã. Ebarëtojayata. <sup>34</sup> Nexata Jesús athëbëa benaëcotsia. Jesús athëbë venajumalixuabica. Nexata Jesús pijajumeta jumaitsi bajaraponëjavabelia:

—¡Efata! jai.

“Efata,” pejajjume Jesús pijajumeta, mapajumetaje pejumaitsiijume: “¡Muxuvojorucaremelia!” pejajjume.

<sup>35</sup> Bajarapacuenia Jesús pejumaitsijavata, bajaraponë muxuvojorucalia baja. Jumetane jane baja. Peebarëto ata jane baja xanepana. Natsipaeba baja xaniavaetsia. <sup>36</sup> Nexata Jesús jumaitsi bajaraponë petocapatsivitsijavabelia:

—Pëtsa papaebame itsamonaëjavabelia pacuene exanajë maponëjavabeliaje, jai picani Jesús asaëyata.

Itsiatã bajarapamonae jumeitavetsi atatsi, bitso tsipaebapona jivijavabelia. <sup>37</sup> Nexata pamonae jumetane bajarapalivaisi, pinijicuenia jamatabëcuenenabenajaca. Bajarapamonae jumaitsi:

—Bajaraponë, Jesús, daxitacuenevitane pexainaevi ata xaniavaetapona. Siyavi ata, bitso apo pejumetaevimi ata, jumetaeyaexanapona. Apo pecaëjëpaevitsi ata pecuaicuaijajava, cuaicuaijajayaexanapona xaniavaetsia, jai bajarapamonae Jesús yabara.

## 8

### *Pacuenia Jesús rajuta pexaejava bejamatabëcuene cuatro mil pajivibeje yabara pelivaisi (Mt 15.32-39)*

<sup>1</sup> Itsamatacabi Jesús jivibitsaëtoxaneto muxunanacaetuatatsi. Nexata bajarapamonae penabaninexa, bajarajota pexaejava apo xainae. Nexata Jesús junata pijajivi. Jesús jumaitsi pijajivijavabelia mapacueniaje:

<sup>2</sup> —Netsitabejioji baja rovia mapamonaeje. Tsipaji baja ajena acueyabi pamatacabibeje xaina xanëjavata pejinavanapaecujinae. Pemarue baja tovereverecatsi. <sup>3</sup> Itsã meta itorobijitsipajë pijabonëjavabelia peponaenexa pexaejava xaenejeva, apo asaë meta tsipae namutua peponaejava. Tsipaji raja itsamonaë pata tajëverena, jai Jesús pijajivijavabelia.

<sup>4</sup> Nexata Jesús pijajivi jumaitsi:

—¿Detsã jane pacuenia pexaejava berajutatsi? Majotaje ajibi pexaejava. Tsipaji itsajivi ata pijabo apo xainae, jai Jesús pijajivi.

<sup>5</sup> Nexata Jesús yanijoba pijajivijavabelia.

—¿Detsã papanbëbeje paxainame? jai.

Nexata Jesús pijajivi jumaitsi:

—Siete papanbëbeje paxainajë, jai.

<sup>6</sup> Nexata Jesús itoroba daxitajivi penaenexa irata. Nexata Jesús pita siete papanbëbeje. Nexata Diosojavabelia Jesús jumaitsi:

—Pexaniacuene panetoexaname. Panerajutame pataxaejava, jai.

Bajaraxuacujinae Jesús epatsicacaponã pan. Nexata Jesús pepatsicacaepã rajutapona pijajivijavabelia. Nexata juya Jesús pijajivi bajarapapan tsicobetsana daxitajivi pexaenexa. <sup>7</sup> Djuainëxinua xaina. Icatsia Jesús jumaitsi Diosojavabelia dujuainëxi yabara:

—Pexaniacuene panetoexaname. Panerajutame dujuainëxi, jai.

Nexata icatsia pijajivi itoroba petsicobetsanaenexa daxitajivi bajarapadjuainëxi. <sup>8</sup> Daxitajivibitsaëtoxaneto nabane xaniavaetsia. Nexata peyajuvënëcopabijavanë Jesús pijajivi caetuata. Vënëba siete xuabeje bemapirecuenia pexanaejavanë. <sup>9</sup> Pexaejava nabane bejamatabëcuene cuatro mil pajivibeje. Nexata jane baja pexaejava pexaecujinae, Jesús jivi naviabiaexana pijabonëjavabelia. <sup>10</sup> Bajaraxuacujinae Jesús, pijajivi yajava, runareca jera ënëbareca. Jesús pijajivi barëponã Dalmanuta nacuyavabelia.

*Pacuenia fariseovi Jesús itorobatsi Dioso pesaëta pinijicuene pexanaejava petsitaexanaenexa picani yabara pelivaisi*

(Mt 16.1-4; Lc 12.54-56)

<sup>11</sup> Fariseovi Jesúsjavaberena pata. Bajarapamonae jamatabëcueneëjëbiaya jumenotaponatsi. Nexata bajarapamonae jumaiti Jesúsjavabelia:

—Jesús, Dioso pesaëta pinijicuene exanare. Nexata pacacueneyapëtaenatsi Dioso pepacuene athëbëvetsica pecaitorobinëcuenetsica, jai.

<sup>12</sup> Nexata bajarapamonae yabara Jesús bitso jamatabëcuenebëjai. Nexata Jesús athëbëvenajumalixuabica. Jumaiti:

—¿Detsa xuajitsia panevajëcame pinijicuene patacatsitaexanaenexa pataneyapëtaenexamë pepacuene Dioso athëbëvetsica taneitorobinëcuenetsica. Xaniajanë pacuenia pacatsipaebijitsiatsi. Itsiata apo pacatsitaexanaetsi tsane pinijicuene taexanaejava, jai Jesús.

<sup>13</sup> Nexata baja Jesús bajarapamonae vecuapona. Icatsia runareca jera ënëabereca. Pucaxaneto itsapanabelia baja Jesús pona.

*Pacuenia Jesús pijajivi muxujioba fariseovi petsipaebilivaisi pejumecovënëtsiyaniva yabara pelivaisi*

(Mt 16.5-12)

<sup>14</sup> Jesús pijajivi nacofënëta pamarue. Nexata saya caepanbëyo capona jerata. <sup>15</sup> Nexata Jesús pijajivi muxujioba pejumecovënëtsiyaniva fariseovi itsa tsipaebatsi saicayacuenia Dioso pejumelivaisivecua. Jesús jumaiti pijajivijavabelia mapacueniaje:

—Panejumetaema. Xania panayajivitaema fariseovi pijalevadura, jai Jesús pijajivijavabelia.

Bajarapacuenia Jesús jumaiti fariseovi petsipaebilivaisi, nacuaeavetsinë ata, Herodes, petsipaebilivaisi, Jesús pijajivi pejumecovënëtsiyaniva.

<sup>16</sup> Itsiata Jesús pijajivi apo jumeyapëtaetsi. Bajaraxuata Jesús pijajivi nabarëcuacuajai bajarapacuenia Jesús pejumaitisijume yabara. Jesús pijajivi najumaiti:

—Jesús nacajumaiti: “Xania panayajivitaema fariseovi pijalevadura,” nacajai. Baja raeta pacuenia Jesús nacajumaiti pan apo vajacaponaxae, najai Jesús pijajivi.

<sup>17</sup> Jesús pijajivi jamatabëcueneyapëtane bajarapacuenia jamatabëcuenenavëxaniabiaya panajumaitisijava levadura yabara. Nexata Jesús jumaiti pijajivijavabelia:

—¿Detsa xuajitsia panajumaitisimë: “Baja raeta pacuenia Jesús nacajumaiti pan apo vajacaponaxae,” panajamë? Paxamë abaxë apo panejumeyapëtaemë xua yabara pacajumaitisitsi. Pajamatabëcuenetajamë bitso. <sup>18</sup> Pan yabara raja apo pacajumaitisitsi. Pan itsa namatavenonaejitsipatsi, necaëjëpa taexanaenexa. ¿Apo panajamatabënapitsimë tsipaji pacuenia exanajë pamatacabi pan namatavenonatsi? <sup>19</sup> Pacujinae epatsicacajë cinco papanbëmibeje panetsicobetsanaenexa cinco mil ponëbejejavabelia, bajarapacujinae peyajuvënëcopabijavanë, ¿detsa xuabeje pavënëtame bemapirecuenia pexanaejavanë? jai Jesús pijajivijavabelia.

Nexata Jesús pijajivi jumaiti:

—Doce xuabeje pavënëtajë, jai.

<sup>20</sup> Jesús icatsia jumaiti:

—Pacujinae epatsicacajë siete papanëmibeje panetsicobetsanaenexa cuatro mil pajivibejejavabelia, bajarapacujinae peyajuvënëcopabijavanë, ¿detsa xuabeje pavënëtame bemapirecuenia pexanaejavanë? jai Jesús.

Nexata Jesús pijajivi jumaiti:

—Siete xuabeje pavënëtajë, jai.

<sup>21</sup> Nexata Jesús jumaiti pijajivijavabelia:

—¿Panejumeyapëtaneme tsabaja pan yabara apo patacajumaitisijava? Xanë pacajumaitisitsi: “Xania panayajivitaema fariseovi pijalevadura,” pacajaitsi. Bajarapacuenia

pacajumaitsitsi panejumecovënëtsiyaniva fariseovi petsipaebilivaisi, panejumecovënëtsiyaniva nacuaeavetsinë ata Herodes. Tsipaji bajarapamona pacatsipaebiana saicayacuenia Dioso pejumelivaisivecua, jai Jesús pijajivijavabelia.

*Pacuenia Jesús itaxutoxaniavaeta bitso pitaxutotsëcënaenë, apo petaenë tsiquirijavayo ata, yabara pelivaisi*

<sup>22</sup> Jesús, pijajivi yajava, patajopa Betsaida tomarata. Nexata Jesús tocanajetarubenatsi bitso pitaxutotsëcënaenë, apo petaenë. Pinijicuenia vajëcatsi Jesús pitaxutojayatsinexa bajaraponë pitaxutoxanepanaenexa. <sup>23</sup> Nexata Jesús cobepita. Barëpona pesaicaeyojavabelia, tomarapënëyabelia. Nexata bajarajotalia Jesús peionitota itaxutoexaba. Itaxutojayata. Bajaraxuacujinae Jesús yanijoba.

—¿Cacaëjëpa tsabaja netaejava? jai Jesús.

<sup>24</sup> Nexata bajaraponë naëcota. Jumaitsi:

—Taniji pebijivi pejinavanapaejava. Itsiata saya benetsita naejavanë, jai bajaraponë.

<sup>25</sup> Nexata icatsia Jesús itaxutojayata. Bajara jane xaniavaetsia naitaxutobabatsiaya naëcota. Itaxutoxanepana jane baja. Xaniavaetsia baja tane. <sup>26</sup> Nexata Jesús jumaitsi bajaraponëjavabelia:

—Naviare nijaboyabelia. Pëtsa abaxë poname tomarabelia. Pëtsa paebame itsajivijavabelia ata pacuene caexanatsi, jai Jesús.

*Pacuenia Pedro jumaitsi Jesúsjavabelia: “¿Xamë raja Cristomë! jai yabara pelivaisi (Mt 16.13-20; Lc 9.18-21)*

<sup>27</sup> Jesús, pijajivi yajava, najetaruca. Pona pepatsinexa Cesarea de Filipovënë tomaramumaverena penaetomaraxijavabelia. Namutua abaxë penajetarubenaejavata Jesús jumaitsi pijajivijavabelia:

—¿Detsa jivi jumai tsabiabi xanë yabara? ¿De tsaeta xanë ponënë? jai Jesús pijajivijavabelia.

<sup>28</sup> Nexata Jesús pijajivi jumaitsi:

—Itsamonae xamë yabara jumai tsabiabi: “Juanpijinëmi raeta jivibautisabinëmi icatsia asaë,” jai tsabiabi. Itsamonae pijinia jumai tsabiabi: “Diosojumepaebinëmi raeta, profeta Elíaspijinë, ponëmi bajayata ponapona, icatsia asaë,” jai tsabiabi. Itsamonae pijinia jumai tsabiabi: “Bajayata raeta Diosojumepaebivimi profetavimiyajuvënënë icatsia asaë,” jai tsabiabi xamë yabara, jai Jesús pijajivi.

<sup>29</sup> Nexata icatsia Jesús jumaitsi pijajivijavabelia.

—¿Detsa nexata paxamë pajamatabëitsimë xanë yabara? ¿Detsa xanë ponënë? jai Jesús pijajivijavabelia.

Nexata Pedro jumaitsi Jesúsjavabelia:

—Xamë cajena Cristomë, athëbëvetsica Dioso pecaitorobinëtsica jivi necapanepaenexa, jai Pedro Jesúsjavabelia.

<sup>30</sup> Nexata Jesús pijajivijavabelia jumaitsi:

—Pëtsa bajarapacuenia itsajivijavabelia papaebame. “Cristo raja,” pajamë pëtsa xanë yabara, jai Jesús.

*Pacuenia Jesús tajëvelia navajunupaeba pebeyaxuabijavanexatsi yabara pelivaisi (Mt 16.21-28; Lc 9.22-27)*

<sup>31</sup> Jesús pebeyaxuabijavanexatsi, tajëvelia navajunupaeba pijajivijavabelia. Jumaitsi mapacueniaje:

—Xanë, Daxitajivi Pematapijinënë, pinijicuenia bejiobinë tsane. Judíovi pijaancianovi, sacerdotevi penamatacaitorobivinua, judíovi pecujarubivinua, apo nejumecovënëtsi tsane Cristonëcuenenë. Nexata bitso nebejiobiaexanaena. Bajaraxuacujinae nebeyaxuabiana. Itsiata baitsi jane tatëpaecujinae, acueyabi matababita, icatsia asaënë tsane, jai Jesús pijajivijavabelia tajëvelia penavajunupaebijavata pebeyaxuabijavanexatsi.

<sup>32</sup> Jesús jumenapebetsiaya pijajivi xaniavaetsia tsipaeba mapajumeje. Nexata Pedro junata Jesús pebarëponatabinexa pesaicaeyojavabelia. Nexata Pedro pesaicaeyojavatalia jumaitsi Jesúsjavabelia:

—Pëtsa bajarapacuenia cuaicuajamë netëpaejavanexa yabara, jai Pedro Jesúsjavabelia.

<sup>33</sup> Nexata Jesús Pedrovecua napënyorotaxuaba. Taenuca pijajivi penaevjavabelia. Nexata Jesús napënyorotsia jumai tsanucæ Pedrojavabelia:

—¡Dovathi, nevecuanatixire! Tsipaji xamë apo jitsipaemë pacuenia Dioso jitsipa taexanaenexa. Saya ëjivi pacuenia jitsipa taexanaenexa, jitsipame, jai Jesús.

<sup>34</sup> Nexata Jesús junata pijajivi, daxita jivibitsaëto yajava. Jumaitsi bajarapamonæjavabelia:

—Pajivi jitsipa tanepënaponæjava, bajarapajivi copatsi pejitsipaecuenia pexanaenexa penajamatabëxainabiabijavami. Exanaponaponæ taitorobicuenia. Najamatabëcueneveretsinua bejiobiaexanaejitsia atatsi, beyaxuabijitsia atatsinua, Dioso pejumelivaisi yabara piajamatabëcuenesaë tsaponaponæenexa. Nexata jane baja xuacujinae nepënaponaena. <sup>35</sup> Pajivi exanaponapona penatojitsipaecuenia, apo xainæ tsane matakabi apo peverevereæjava. Pajivi xanë tajamatabëcueneta copata penatojitsipaecuenia pexanabiabijavami, jivi tacapanepælivaisitanexa pejamatabëcuenetanua, bajarapajivi xainaena matakabi apo peverevereæjava. <sup>36</sup> Pajivi exanaponapona penatojitsipaecuenia, bajarapajivi Diosovecua naxuabiana. Nexata bajarapajivi daxitacuene xainæ ata mapanacuapijicueneje, itsiata nacuerata. Tsipaji pexainaecuene apo capanepæ tsanetsi Diosojavabelia. <sup>37</sup> Tsipaji acuenebi tsane itsajivi ata pematamotsinexa penaxuabiyana Diosovecua. <sup>38</sup> Pajivi tajajivitonë ata, Dioso apo pejumecovënëtsivi tuatujëta, pibisiacuene pexanaevi tuatujëta ata, navënëlivaisicaura tsane xanë tajajivitonëcuene, tanejumecovënëtsijava ata yabara, nexata juya xanë bajarapajivi, tajajivitonë ata, tajajivitonëcuene vënëlivaisicauranë tsane taxa Diosojavabelia. Bajarapajivi vënëlivaisicauranë tsane pamatakabi icatsia patsianicajë. Baitsi pamatakabi xanë, Daxitajivi Pematapijinënë, ángelevi yajava, patsianicajë, pamatakabi yajavapatsianicajënuata taxa Dioso pijapenivenivenæcotia, jai Jesús pijajivijavabelia.

## 9

<sup>1</sup> Icatsia Jesús jumaitsi jivijavabelia:

—Xaniajanë pacuenia pacatsipaebijitsiatsi. Daxita paxamë patëpaenejevamë, Dioso taxuxuabiana pijajivi pevetsijava mapanacuataje. Nexata paxamëyajuvënëvi pepuatae tsane Dioso petaxuxuabijava pijajivi pevetsijava mapanacuataje, tëpaena. Dioso raja pijajivi evetsiana pinijijamatabëcuenesaëta, jai Jesús jivijavabelia.

*Pacuenia Jesús caepatoyo perabënivenivenataba yabara pelivaisi  
(Mt 17.1-13; Lc 9.28-36)*

<sup>2</sup> Jesús petëpaejavanexa tajëvelia penavajunupaebicujinae, seis pamatakabibejucujinae, Jesús pijajivi, acueyabi ponëbeje, barëpona pinijitsutoxanetojumabetsia. Jesús barëjunaya mapamatabëxëyoje: Pedro, Santiago, Juan. Bajarapamatabëxëyo Jesús barëjunaya pinijitsutoxanetojumabetsia. Nexata petsutojumatsia Jesús perabënivenivena bajarapamonæ pitabarata. <sup>3</sup> Jesús penaxatatsijava bitso nivenivena. Bitso niojai. Mapanacuataje pexaniaquiatsiva ata apo caëjëpaetsi bajarapacuenia peniojaiyaxanaenexa. <sup>4</sup> Jesús pijajivi bajarajota tane jemata penitajëtsijava bajayata petëpaenëmibeje, Elíaspijinëbeje Moiséspijinëbeje. Jesús barëcuaicuajaitsi bajaraponëbeje. <sup>5</sup> Nexata Pedro jumaitsi Jesúsjavabelia mapacueniaje:

—¡Patajatuxanenë, pijacuaxæ panebarëponame! Pacatoexanaenatsi acueyabi pabobërëtoje. Itsabobërëto xamënexa tsane. Itsabobërëto Moisésnæxa tsane. Itsabobërëto Elíasnæxa tsane, jai Pedro Jesúsjavabelia.

<sup>6</sup> Bajarapacuenia Pedro jumaitsi Jesúsjavabelia canaëjësinejeva. Tsipaji bitso bajarapamonae najunaviaca. Nexata apo yapëtae pacuenia jumaitsijsitsia. <sup>7</sup> Nexata daxita bajarapamonae pematatsënëvetsica itarërëbo mataacataxuabatsi. Nexata bajarapamonae jumetane bajarapaitarërëbojavavetsica Dioso pejumaitsijava.

—Mara ponë taxënato, tasivanëje. Panamuxunaevere bajaraponë, jaitsica Dioso Jesús pijajivijavabelia.

<sup>8</sup> Bajarajota bajarapamonae ita naëcobarëcëpalia Jesúsjavabelia, ajibi baja bajaraponëbeje. Caenë baja Jesús nuca.

<sup>9</sup> Nexata Jesús pijajivi ita barërunanucaponaica petsutojumavetsica, jumeitaveta pijajivi. Jumaitsi pijajivijavabelia:

—Pëtsa patsipaebame itsajivi ata pacuene pataneme. Matapania xanë, Daxitajivi Pematapijinënë, icatsia asaënë tsane tatëpaecujinae, nexata jane baja matapania patsipaebianame, jai Jesús pijajivijavabelia.

<sup>10</sup> Bajarapamonae, acueyabi ponëbeje, jumecovënëta pejumaitsicueniatsi. Itsiata ëpamonae nayanijobabiaba.

—Jesús jumai tsabiabi: “Tatëpaecujinae icatsia asaënë tsane,” jai tsabiabi. ¿De tsamëra pajamatabëcuene xaina bajarapalivaisi? najai tsabiabi bajarapamonae.

<sup>11</sup> Nexata Jesús pijajivi yanijoba Jesúsjavabelia. Jesús pijajivi jumaitsi:

—Patajatuxanenë, ¿detsa xuajitsia judíovi pecujarubivi jumai tsabiabi: “Bajayata ponëmi ponapona, Elíaspijinë, petëpaecujinae icatsia asaë tsane. Bajaraponë copiata patsiana. Bajaraxuacujinae patsiana Cristo, ponë Dioso athëbëvetsica itorobijitsiatsica pepo vajanacacapanepaenënexa jane baja,” jai tsabiabi? jai Jesús pijajivi Jesúsjavabelia.

<sup>12</sup> Nexata Jesús jumaitsi pijajivijavabelia:

—“Copiata Elíaspijinë patsiana. Nexata bajaraponë jamatabëcuenexanetsiana daxitajivi,” ita jai, Juanpijinëmi jivibautisabinëmi yabara jumaitsi. Nexata baja xaniajai pacuenia judíovi pecujarubivi jumaitsi. Tsipaji baja Juanpijinë tavajënaeya jivi jamatabëcuenexanetanajetaruca. Xanë, Daxitajivi Pematapijinënë, athëbëvetsica Dioso nitoroba jivi tacapanepaenexa. Nexata xanë yabara tajëvelia Dioso pejumelivaisibaxutota jumaitsi mapacueniaje: “Bejiobi tsane pinijicuenia. Apo jitsipaetsi tsane. Naitaxutojematsianatsi,” jai xanë yabara tajëvelia Dioso pejumelivaisibaxutota, jai Jesús pijajivijavabelia.

<sup>13</sup> Jesús icatsia jumaitsi pijajivijavabelia Juanpijinëmi yabara:

—Xaniajanë pacuenia pacatsipaebijitsiatsi. Elíaspijinë rabaja patajopa. Pepatsicujinae baja exanatsi daxita pacuenia jamatabëexanatsi. Nexata exanatsi pacuenia baja cajena Dioso pejumelivaisibaxutota tajëvelia jumaitsi bajaraponëmi yabara, jai Jesús pijajivijavabelia Juanpijinëmi yabara.

*Pacuenia Jesús jamatejemayaexana pejevaxinë, dovathi peyajavaponaponaenë, yabara pelivaisi*

*(Mt 17.14-21; Lc 9.37-43)*

<sup>14</sup> Jesús pijajivi, acueyabi ponëbeje, petsutojumabetsia pebarëponaecujinae, icatsia barënaviatsica. Itsamonae Jesús pijajivi pepuenetsivijavabetsica, barënaviatsica. Nexata Jesús tane pijajivi jivibitsaëttoxaneto pevajënae pematatoyoronaejavatsi. Jesús tanenua judíovi pecujarubivi anaeya pejumenotsijavatsi Jesús pijajivi. <sup>15</sup> Nexata bajarapamonae ita taerëcëpa Jesús, daxita jamatabëcuenebarëyaya cujinaeyeca Jesúsjavabelia pebajacobinexatsi Jesús. <sup>16</sup> Nexata Jesús jumaitsi bajarapamonaejavabelia:

—¿Detsa xua yabara panajumeanaenotame pinijicuenia? jai Jesús.

<sup>17</sup> Caenë bajarapajivi bitsaëttoxanetoyajuvënënë jumaitsi Jesúsjavabelia:

—Jesús, mara picani taxënatonëyo, dovathi peyajavaponaponaenëyo, catocanajetarucatsije. Maponëyoje dovathi apo netonatsipaebiaexanaetsi. <sup>18</sup> Itsa raja dovathi

vaetababiabatsi, irata xuababiabatsi. Nexata bajarajota pecuibohtamu tsabiabi. Vonoquirairajainua tsabiabi. Daxitanëyo aperabëbaba tsatababiabireca. Picani raja nija-jivijavabelia jumaitsinë: “Panetovecuacapitsapare dovathi,” janë. Itsiata bajarapamonae apo caëjëpaetsi tanetovecuacapitsapaenexa, jai bajaraponë Jesúsjavabelia.

<sup>19</sup> Jesús nexata jumaitsi pijajivijavabelia:

—¡Paxamë baja rovia apo pajumecovënëtsimë Dioso papecayavenonaejavanexa! Bajaraxuata apo pacajamatabëcuenecaëjëpae pejevaxinë panevecuacapitsapaenexa dovathi. ¿Detsa paepatojebi abaxë paxamëjavata ponaponaenajë? ¿Detsa paepatojebi abaxë paxamëjavabelia ajamatabëcuenesaënë tsaponapona tsane patanejumecovënëtsinexamë? Panetocarenamëre pejevaxinë, jai Jesús pijajivijavabelia.

<sup>20</sup> Nexata tocarenatsi Jesús pejevaxinë. Dovathi itsa tanetsi Jesús, nexata icatsia bajarajota dovathi pejevaxinë tēpajoneyaexanatsi. Irata xuabatsi pejevaxinë. Nexata pejevaxinë natorenaba irata. Pethamu pitsapa pecuibuatsina. <sup>21</sup> Nexata Jesús yanijoba pejevaxinë paxajavabelia.

—¿Detsa pamatacabibeje xaina petaxuxubicujinaetsi mapacueneye? jai Jesús.

Nexata pejevaxinë paxa jumaitsi:

—Penacuetojavaveliacujinae cajena taxuxuabatsi. <sup>22</sup> Bajayajebi picani isotojavalia dovathi netoxuababiabaliatsi. Menialia ata netoxuababiabaliatsi. Beyaxuabijitsiatsi bajarapacuenia. Xamë itsa cacaëjëpa itsacuenia ata taneyavenonaenexamë, ¡nitaxutotsoniataema! ¡Neyavenonare! jai pejevaxinë paxa Jesúsjavabelia.

<sup>23</sup> Nexata Jesús jumaitsi pejevaxinë paxajavabelia:

—Pajivi jumecovënëta Dioso peyavenonaejavanexatsi, bajarapajivi Dioso yavenonatsi daxita xua namatavenona, jai Jesús.

<sup>24</sup> Nexata pejevaxinë paxa aëjai. Jumaitsi:

—¡Jumecovënëtajë baja cajena! ¡Neyavenonare bitso orijibia tajumecovënëtsinexa! jai bajaraponë Jesúsjavabelia.

<sup>25</sup> Nexata Jesús itsa tane jivibitsaëtoxaneto penacaetuataponaejava Jesúsjavaberena, nexata Jesús itaveta dovathi. Jumaitsi:

—Dovathi, xamë pejevaxinë apo nenatsipaebiaexanaenë. Apo nejumetaeyaexanaenënuua. Xanë caitavetatsi. Pitsapare mapapejevaxinëvecuaje. Pëtsa baja icatsia junuame matavëjëa maponëyojavaberena, jai Jesús dovathijavabelia.

<sup>26</sup> Nexata dovathi pejevaxinë icatsia aëjaiyaexanatsi. Tēpajoneyaexanatsi. Vecuapitsapatsi jane baja. Puenetabuatatsi bepetëpaenëyo. Nexata itsamonae bajarajota jumaitsi:

—Pejevaxinë rabaja tēpa, jai bajarapamonae.

<sup>27</sup> Nexata Jesús cobepita pejevaxinë. Cobevaetabiaya yotsina. Nexata pejevaxinë nonotabapuna.

<sup>28</sup> Nexata xuacujinae Jesús boya itsa joneya, Jesús pijajivi jumaitsi:

—¿Detsa xuajitsia meta paxanë apo panecaëjëpae patavecuacapitsapaenexa dovathi? jai Jesús pijajivi.

<sup>29</sup> Nexata Jesús jumaitsi pijajivijavabelia:

—Mara paviria dovathije apo jitsipae pepitsapaejavaje. Matapania panexaejava apo paxaemë tsipae panevajëtsinexa asaëyata Diosojavabelia panecapitsapaenexa dovathi, pitsapaejitsipa, jai Jesús pijajivijavabelia.

*Pacuenia icatsia Jesús tajëvelia navajunupaeba pebeyaxuabijavanexatsi yabara pelivaisi (Mt 17.22-23; Lc 9.43-45)*

<sup>30</sup> Jesús pejevaxinë dovathi pevecuacapitsapaecujinae, Jesús baja, pijajivi yajava, pona. Nexata Jesús, pijajivi yajava, najetaruca Galilea nacuajava. Jesús jitsipa pijajivi pebarënajetarucaenexa bajaraxuayo itsajivi ata yapëtaenejevatsi. <sup>31</sup> Tsipaji Jesús pebeyaxuabijavanexatsi, tajëvelia navajunupaebapona pijajivijavabelia. Jumai tsaponae Jesús pijajivijavabelia mapacueniaje:

—Xanë, Daxitajivi Pematapijinënë, necanajetsiana itsamonae pecobeyabelia. Bajaramonae nebeyaxuabiana. Itsiata baitsi jane tanebeyaxuabicujinae, acueyabi matacabita, icatsia asaënë tsane, jai tsaponae Jesús pijajivijavabelia.

<sup>32</sup> Itsiata pijajivi apo jumeypëtaetsi. Bajarapamonae ajumeura Jesúsjavabelia peyanijobinexa bajarapalivaisi yabara.

*Pacuenia Jesús pijajivi: “¿Detsa ponë vaxaitsiyajuvënëne nacavecuaayaijamatabëcuenenë bitso?” najai tsanajetarubena yabara pelivaisi*

(Mt 18.1-5; Lc 9.46-48)

<sup>33</sup> Jesús pijajivi barëpata Capernaum tomarata. Jesús pijajivi pebarëpatsicujinae, boyalia itsa barëjoneya Jesús, yanijoba pijajivijavabelia.

—¿Detsa pitsicuene yabara namutua bitso panajumenotanajetarubename? jai Jesús.

<sup>34</sup> Nexata Jesús pijajivi moya. Tsipaji Jesús pijajivi namutua najumaitsi tsanajetarubena:

—¿Detsa ponë vaxaitsiyajuvënëne nacavecuaayaijamatabëcuenenë bitso? najai tsanajetarubena Jesús pijajivi.

<sup>35</sup> Nexata Jesús eca. Junata pijajivi, doce ponëbeje. Jumaitsi pijajivijavabelia:

—Pajivi jitsipa ayaijamatabëcuenejivi penaexanaenexa daxitajivi matatoxenetsia, bajarapajivi beveliamatabëcuenejivi natae peyavenonaenexa daxitajivi, jai Jesús pijajivijavabelia.

<sup>36</sup> Bajaraxuacujinae Jesús cobepita pejevaxinëyo. Pijajivi pitabarata nuteta. Bajaraxuacujinae Jesús isapita. Jumaitsi pijajivijavabelia:

<sup>37</sup> —Pajivi copiapita tanejumeconvënënsijiviyo, mapitsipejevaxinëyo ataje, xanë taniji tanecopiapitsijava. Pajivi necopiapita, ëxanë apo necopiapitsi. Ponë nitoroba, neyajavacopiapita, jai Jesús pijajivijavabelia.

*Pacuenia Jesús jumaitsi pijajivijavabelia itsa vënëlivaisitane itsanë dovathi jivivecua pecapitsapaejava Jesús pevënëta yabara pelivaisi*

(Mt 10.42; Lc 9.49-50)

<sup>38</sup> Jesús pijajivitonë, Juan, jumaitsi Jesúsjavabelia:

—Tajatuxanenë, pataniji itsanë nevënëta dovathi jivivecua pecapitsapaejava. Itsiata bajaraponë apo paxanëyajuvënëne. Nexata paitavetajë bajaraponë dovathi jivivecua pecapitsapaponaejava, jai Juan.

<sup>39</sup> Nexata Jesús jumaitsi Juanjavabelia:

—Pëtsa paitavetame bajaraponë. Tsipaji raja pajivi pinijicuene pexanaejava exana tavënëta, bajaraxuacujinae acuenebi bajarapajivi tanebaranatsipaebinexa pibisiacuenia. <sup>40</sup> Tsipaji raja pajivi pibisiacuene apo najamatabëxainae vaxaitsijavaberena, bajarapajivi nacajamatabëcueneavenona. Bajarapajivi bevaxaitsijamatabëcuenejivi. <sup>41</sup> Xaniajanë pacuenia pacatsipaebijitsiatsi. Pajivi tsiquirijavayo ata mera pacarajutsiana paneapaenexa patajajivixaemë, bajarapajivi pepacuene Dioso matamotsianatsi mera papecarajutsimatamo, jai Jesús Juanjavabelia.

*Pacuenia Jesús pijajivi muxujioba itsajivi ata pibisiacuene pexanaeyaexanaeyaniva yabara pelivaisi*

(Mt 18.6-9; Lc 17.1-2)

<sup>42</sup> Icatsia Jesús jumaitsi pijajivijavabelia:

—Pajivi pibisiacuene exanaeyaexanaejitsipa mapitsipejevaxijivixi ataje, tanejumeconvënënsiyajuvënënsijiviyo, bajarapajivi Diosojavabelia bitso naneconitsipa. Nexata Dioso ayaicuenia naneconitsiaexanaejitsipatsi. Nexata pajivi najamatabëxaina pibisiacuene pexanaeyaexanaenexa tanejumeconvënënsivijavabelia, abaxë pibisiacuene exanaeyaexanaenejeva, bajarapajivi bevësicëtatsi ibotoxanetojavabelia. Nexata bajarapajivi yamaëya, ibotoxaneto yajava, bexuarecatsi pucaxaneto tuatujëareca. Bajarapajivi bexuarecatsi bitso penaneconitsianiva Diosojavabelia pibisiacuene itsa exanaeyaexana

tanejumeconvënëtsiviyajuvënëvi. <sup>43</sup> Bajaraxuata panecobeta pibisiacuene itsa paexaname, panacobecaucure. Itsiata xanepana panejonenexa cobemataxucaeaya apo pevereverecaenacuajavabelia. Biji rajane apo xanepanae tsipae panejonenexa infiernojavabelia anijacobebeje yajava, itsajota isotocotia apo itaxupae caeto ata. <sup>44</sup> Bajarajota apo tēpae oro, jivivixaevi. Isotocotia ata apo itaxupae caeto ata. <sup>45</sup> Itsa panetaxuta ata pibisiacuene paexaname, panataxucaeure. Itsiata xanepana panejonenexa taxumataxucaeaya apo pevereverecaenacuajavabelia. Biji apo xanepanae tsipae panejonenexa infiernojavabelia anijataxubeje yajava. <sup>46</sup> Bajarajota apo tēpae oro, jivivixaevi. Isotocotia ata apo itaxupae caeto ata. <sup>47</sup> Paneitaxutota ata panetaejava yabara pibisiacuene itsa paexaname, panitaxutocajure. Itsiata xanepana panejonenexa pacaeitaxutojivimē apo pevereverecaenacuajavabelia, Dioso pijanacuayabelia. Biji rabiji apo xanepanae tsipae panejonenexa anijaitaxutobeje yajava infiernojavabelia. <sup>48</sup> Bajarajota apo tēpae oro, jivivixaevi. Isotocotia ata apo itaxupae caeto ata.

<sup>49</sup> Dajubinē jivi itsa beyaxuaba Diosojavabelia ofrendacuenia pevi perajutsinexa, viexaba yajota pevixanepanaenexa. Bajara pijinia pacuenia pejamatabēcuenexanepanaenexa, daxita Dioso pijajivi ata jamatabēcuenējēbianatsi mapanacuataje. <sup>50</sup> Yajo raja xanepana. Itsiata yajo pexaicaejavami itsa ajibi tsipae, apo xanepanae tsipae itsacuenejavayonexa ata. Bajara pijinia pacuenia paxamē ata pajamatabēcuenēit-simē tsipae Diosojavabelia, itsa apo pavecuapanepaemē tsipae papecajamatabēcuenējētaponaejava. Nexata pajamatabēcuenesaēmēre panejamatabēcuenexanepanaenexa Diosojavabelia. Pajinavanapare xaniavaetsia itsamonaejavabelia ata, jai Jesús pijajivijavabelia itsajivi ata Jesús pijajivi pibisiacuene pexanaeyaexanaeyaniva.

## 10

*Pacuenia Jesús jivi livaisi tsipaeba penacojobinē pijava pexuabiyanima yabara pelivaisi (Mt 19.1-12; Lc 16.18)*

<sup>1</sup> Jesús baja pona Capernaum tomaravecua. Pona Judea nacuayabelia. Bajaraxuacujinae Jordánmene itsapanabelia, paira, Jesús pona. Bajarajotalia icatsia jivibitsaētoخانانو پاتا Jesúsjavaberena. Nexata icatsia Jesús livaisi tsipaeba bajarapamonae. Tsipaji baja cajena Jesús livaisi petsipaebanajetaruaenē. <sup>2</sup> Nexata fariseovi Jesús cujibarenatsi petsipaebilivaisi yabara jamatabēcuenējēbiaya peyanijobinexatsi. Nexata Jesús bijiaya itsa jumecanaviata, neconitsijitsiatsi. Nexata fariseovi jumaitsi Jesúsjavabelia:

—¿Xanepana tsaja penacojobinē pijava pexuabinexa? jai.

<sup>3</sup> Jesús nexata jumaitsi fariseovijavabelia:

—¿Detsa pacuenia bajayata Moiséspijinē pacaitoroba panijavajivi panexuabiyanima? jai Jesús.

<sup>4</sup> Nexata fariseovi jumaitsi Jesúsjavabelia:

—Moiséspijinē tocopata, ponē pijava jamatabēxuaba, pexuabinexa. Itsiata baitsi jane Moiséspijinē tocopata, ponē pijava xuabijitsia, copiaya petoyaquinaenexa cuyalato-baxuto pijavajavabelia. Nexata ponē pijava xuabijitsia, copiaya pijava toyaquinabiaba pitavetsilivaisi pexuabinexa jane baja pijava. Bajarapacuenia pexanaenexa, ponē pijava jamatabēxuaba, Moiséspijinē tocopata, jai fariseovi Jesúsjavabelia.

<sup>5</sup> Nexata Jesús jumaitsi fariseovijavabelia:

—Moiséspijinē raja bajarapacuenia pacatocopata panejamatabēcuenelivaisitajaxae.

<sup>6</sup> Pamatacabi Dioso taxuxuaba nacua pexanaejava, bajarapamatacabita Dioso exana pebi, pijava yajava. <sup>7</sup> Bajaraxuata pebi itsa nacojoba pijavajavabelia, banatsata paxavecua, pena atavecua. <sup>8</sup> Nexata Dioso tane anijajivimibeje becaejivi. Nexata Dioso apo tae beanijajivibeje. Becaejivi saya tane Dioso. <sup>9</sup> Bajaraxuata itsanē ata apo bexuabi pijava. Tsipaji Dioso pejamatabēcueneta napitsiaexanatsibeje, jai Jesús fariseovijavabelia.

<sup>10</sup> Bajaraxuacujinae Jesús pijajivi pijaepato itsa barēnacopata bota, nexata Jesús pijajivi yanijobatsi bajarapacuenē yabara. <sup>11</sup> Nexata Jesús jumaitsi pijajivijavabelia:

—Ponë pijava pexuabicujinae, itsava icatsia itsa pita, bajaraponë pibisiacuene exana pevitota. Nexata naneconita Diosojavabelia. Tsipaji itsava jaita pepo pijavavecua. Dioso cajena abaxë bajaraponë pexuabiva pepo pijavacuenia totanetsi. <sup>12</sup> Bajara pijinia itsi petiriva ata pamona pevecuanaviatsicujinae, itsanë icatsia itsa pitatsi. Bajarapova pibisiacuene exana pevitota. Nexata naneconita Diosojavabelia. Tsipaji itsanë jaita pepo pamonavecua, ponë abaxë Dioso totanetsi pamonacuenia, jai Jesús pijajivijavabelia.

*Pacuenia Jesús jumaiti pejevaxijivixijavabelia yabara pelivaisi*

*(Mt 19.13-15; Lc 18.15-17)*

<sup>13</sup> Jesúsjavaberena itsamonae pejevaxijivixi tocapataponatsi Jesús pejayataponae nexa pecobeta. Nexata Jesús pijajivi itaveta pexi pecapatsivi. Jesús pijajivi jumaiti pexi pecapatsivijavabelia:

—Pëtsa patocapataponame panexi Jesúsjavaberena, jai.

<sup>14</sup> Nexata Jesús itsa tane bajarapacuenia pijajivi pejumaitisijava, Jesús jamatabëcuenaeapanaxuareca. Jumaiti pijajivijavabelia:

—Pëtsa paitavetame. Pacopare pejevaxijivixi pepatsinexa xanëjavaberena. Mapitsipejevaxijivixije jumeabinejeva, xaniavaetsia bajumecovënëta palivaisi tsipaebatsi. Nexata pamona jitsipa pejonejava Dioso pijanacuayabetsia, bajara pijinia pacuenia jumeabinejeva xaniavaetsia bejumecovënëta Dioso pejumelivaisi. <sup>15</sup> Xaniajanë pacuenia pacatsipaebijitsiatsi. Mapitsipejevaxijivixije itsa jumecovënëta palivaisi tsipaebatsi, bajumecovënëta xaniavaetsia jumeabinejeva. Bajara pijinia pacuenia jumeabinejeva, xaniavaetsia bejumecovënëta Dioso pejumelivaisi pamona jitsipa pejonejava Dioso pijanacuayabetsia, jai Jesús pijajivijavabelia.

<sup>16</sup> Nexata Jesús isapitapona pejevaxijivixi, caejiviyo canacujitsia. Pecobeta jayatapona. Jesús pejevaxijivixijavabelia jumai tsapona:

—Dioso xaniavaetsia caevetsiana, jai tsapona.

*Pacuenia pevëjëato, bitso pexainanë, cuaicuaijai Jesúsjavabelia yabara pelivaisi*

*(Mt 19.16-30; Lc 18.18-30)*

<sup>17</sup> Pabota Jesús pejevaxijivixi isapitapona, bajarapabovecua itsajavabelia baja icatsia Jesús ponaejitsia. Nexata baja Jesús itsa naropotsijitsia, pevëjëato kujinaerucarena Jesúsjavaberena. Jesús pitabarata pematabacabëta nucajunua. Jumaiti pevëjëato Jesúsjavabelia:

—Petuxanenë, pexaniajamatabëcuenenëmë. ¿Detsa pitsicuene bexanajë taxainaenexa matacabi apo pevereverecaejava? jai pevëjëato.

<sup>18</sup> Nexata Jesús jumaiti pevëjëatojavabelia:

—¿Detsa xuajitsia: “Pexaniajamatabëcuenenëmë,” nejamë? Ajibi raja itsapebi ata pexaniajamatabëcuenenë. Caenë rabaja Dioso pexaniajamatabëcuenenë. <sup>19</sup> Xamë baja yapëtaneme pacuenia Dioso pejumelivaisita itoroba jivi pejumecovënëtsinexa. Jumaiti mapacueniaje: “Pëtsa jaitame itsava nijavavecua. Pëtsa beyaxuabame jivitonë. Pëtsa nacobetoxotame. Pëtsa itsamonae pexanaejava yabara najumetsënëtsiaya paebame. Pëtsa yamaxëitojorobiaya vecuapitame itsajivi pexainaejava. Axa yaiyataema. Ena ata yaiyataema,” jai Dioso pejumelivaisita. Xamë baja yapëtaneme bajarapalivaisi, jai Jesús pevëjëatojavabelia.

<sup>20</sup> Nexata pevëjëato jumaiti Jesúsjavabelia:

—Petuxanenë, daxita rabaja bajarapalivaisianë jumecovënëtajë pejevaxinëjavaveliacujinaenë, jai pevëjëato.

<sup>21</sup> Nexata Jesús asivaya tane pevëjëato. Jumaiti:

—Caejava raja catosaica nexanaenexa. Ponare necanajetsinexa daxita nexainaecuenemi. Bajarapamatamomi tsicobetsanaename bepejiobivi. Nexata bajarapacuenia xainaname bitso nexainaecuene Dioso pijanacuatatsia. Nexata najamatabëcueneverere, cabejiobiaexanae ata, cabeyaxuabijitsia atanua tajumelivaisi yabara, nijamatabëcuenesaë tsaponaponaenexa. Nexata jane baja xuacujinae nepënaponaename, jai Jesús pevëjëatojavabelia.

<sup>22</sup> Nexata pevëjëato itsa jumetane bajarapacuenia Jesús pejumaitsijava, najamatabëx-ainaeya baja vecuapona Jesús. Tsipaji pevëjëato daxitacuene bitso pexainaenë. Nexata pevëjëato apo jamatabëjumecovënëtsi palivaisi Jesús tsipaeba.

<sup>23</sup> Nexata pevëjëato pecovëta Jesús pijajivi matatoyorotsia naëcota. Jumaitsi:

—¡Pamonae bitso daxitacuene pexinaeivi, tsiayapëbejetsi penajamatabëcueneco-patsinexa Diosojavabelia pecapanepaenexatsi Dioso pijanacuayabetsia! jai Jesús pijajivi-javabelia.

<sup>24</sup> Nexata Jesús pijajivi jamatabëcuenenabenajaca itsa jumetane bajarapacuenia Jesús pejumaitsijava. Nexata icatsia Jesús jumaitsi pijajivijavabelia:

—Tajamonae, pamonae bitso ëpexinaejavanexa najamatabëxaina, bajarapamonae bitso tsiayapëbejetsi tsane pejonenexa taxa Dioso pijanacuayabetsia. <sup>25</sup> Pacuenia camello ayainëxae, acuenebi pejonejava palutaetoitaxutovojotualia, bajara pijinia pacuenia bitso pexainaenë acuenebi tsane pejonejava Dioso pijatomarabetsia. Tsipaji najamatabëxaina bitso ayaijava pexainaenexa, jai Jesús pijajivijavabelia.

<sup>26</sup> Jesús pijajivi itsa jumetane bajarapacuenia Jesús pejumaitsijava, bitso jamatabëcuenenabenajaca. Nexata bajarapamonae jumaitsi Jesúsjavabelia:

—¿Detsa nexata pitsivi panepaena Diosojavabelia bitso pexinaeivi ata itsa apo panepae tsane Diosojavabelia? jai.

<sup>27</sup> Nexata Jesús asaëya naëcota pijajivijavabelia. Jumaitsi pijajivijavabelia:

—Jivi raja apo caëjëpaetsi pijacuata penacapanepaenexa Diosojavabelia. Caenë Dioso caëjëpatsi jivi pecapanepaenexa. Dioso raja caëjëpatsi daxitacuene pexanaenexa, jai Jesús pijajivijavabelia.

<sup>28</sup> Nexata Pedro jumaitsi Jesúsjavabelia:

—Patajatuxanenë, paxanë rabaja pacopatajë daxitacuene pataxinaejavami. Nexata baja pacapënjavanapatsi, jai Pedro.

<sup>29</sup> Nexata Jesús jumaitsi:

—Xaniajanë pacuenia pacatsipaebijitsiatsi. Pajivi xanë tajamatabëcueneta, jivi tacapanepaelivaisitanexa pejamatabëcuenetanua, pueneta pijabomi, pematapijivi ata, pejuyapijivi ata, paxa ata, pena ata, pijava ata, pexi ata, pijapabianë ata, nexata bajarapajivi bitso ayaijava Dioso rajutsianatsi pepuenetsijavanëmi matatoxenetsia. <sup>30</sup> Caejavayomijamatabëcuene tsaponae, rajutsianatsi mapanacuataje cien xuabeje tsaponae pevajënaeyabelia. Bajarapajivi icatsia xainaena bonë, pematapijivi ata, pejuyapijivi ata, pena ata, pexi ata, pabianë ata. Itsiata bajarapajivi itoya tsanetsi mapanacuapijivije. Bejiobiaexanabianatsinua. Itsiata baitsi jane bexëajavabelia xainaena matababi apo peverevereaejava. <sup>31</sup> Pamonae aeconoxae mapamatacabitaje ayaijamatabëcuenevi tanetsi, bajarapamonae Dioso beveliajamatabëcuenevi exanaenatsi. Pamonae pijinia mapamatacabitaje beveliajamatabëcuenevi tanetsi, bajarapamonae Dioso ayaijamatabëcuenevi exanaenatsi, jai Jesús pijajivijavabelia.

*Pacuenia icatsia Jesús tajëvelia navajunupaeba pebeyaxuabijavanexatsi yabara pelivaisi (Mt 20.17-19; Lc 18.31-34)*

<sup>32</sup> Jesús, pijajivi yajava, najetaruca namutua. Pona Jerusalén tomarabelia. Jesús pijajivi, pepënaponaevitsi, jamatabëcuenenabenajaca. Tsipaji Jesús apo junavi bajarabelia peponaejava, yapëtae ata, pacuenia exanaejitsiatsi Jerusalén tomarata. Nexata Jesús icatsia junata pijajivi, doce ponëbeje, pesaicaeyojavabelia. Navajunupaeba tajëvelia pacuenia exanaejitsiatsi Jerusalén tomarata. <sup>33</sup> Jumaitsi Jesús tajëvelia pijajivijavabelia:

—Panejumetaema. Mara Jerusalén tomarabelia ponatsije. Bajarajotalia xanë, Daxitajivi Pematapijinëne, sacerdotevi penamatacaitorobivi, judíovi pecujarubiv-  
inua, pecobeyabelia necanajetsiana tanevaetabinexa. Nexata xanë neneconitsiana tanebeyaxuabinexa. Bajaraxuacujinae icatsia necanajetsiana itsanacuaverena pepatsivi pecobeyabelia. <sup>34</sup> Bajarapamonae necanecaponaena. Nesuabiana. Nejumatitibabena penaneconitsivi pejumaconitabiabimacata. Bajaraxuacujinae nebeyaxuabiana jane baja.

Itsiata baitsi jane tanebeyaxuabicujinae, acueyabi matabita, icatsia asaënë tsane, jai tajëvelia pijajivijavabelia Jesús penavajunupaebijavata pebeyaxuabijavanexatsi.

*Pacuenia Santiagobeje Juanbeje vajëtabeje Jesúsjavabelia pexaniacuene petoexanaenexatsibeje yabara pelivaisi*

(Mt 20.20-28)

<sup>35</sup> Zebedeo pexënatobeje, Santiagobeje Juanbeje, imoxoyoliabeje Jesús. Jumaitsibeje Jesúsjavabelia:

—Patajatuxanenë, pacuenia pacavajëtsijitsiatsibeje, bajarapacuenia pajitsipajëbeje patanetoexanaenexamëbeje, jaibeje Santiagobeje Juanbeje Jesúsjavabelia.

<sup>36</sup> Nexata Jesús jumaitsi:

—¿Detsa pitsicuene pajitsipamebeje patacatooexanaenexabeje? jai.

<sup>37</sup> Nexata Santiagobeje Juanbeje jumaitsi:

—Pamatacabi daxitacuene evetsianame, panetocopatsianamebeje patanaecaenexabeje nemuxuneneta vajanajuaevetsinexa. Itsanë naecaena necujanenia. Itsanë naecaena netsavenononia, jaibeje.

<sup>38</sup> Nexata Jesús jumaitsi:

—Paxamëbeje apo payapëtaemëbeje xua panevajëtamebeje. ¿Pacacaëjëpabeje tsaja panenacaevetsinexabeje papecabebiobiaexanaenexabeje pacuenia xanë nacaevetsianajë tanebejiobiaexanaenexa? ¿Pacacaëjëpabeje tsaja panenacaevetsinexabeje papecabeyaxuabinexabeje pacuenia xanë nacaevetsianajë tanebeyaxuabinexa? jai Jesús pijajivitonëbejejavabelia.

<sup>39</sup> Nexata Santiagobeje Juanbeje jumaitsi:

—Jājā, panecaëjëpabeje cajena, jaibeje.

Nexata icatsia Jesús jumaitsi Santiagobeje Juanbejejavabelia:

—Paxamëbeje pacabebiobiaexanaenabeje pacuenia xanë nebejiobiaexanaena. Pacabeyaxuabianabejenua pacuenia xanë nebeyaxuabiana. <sup>40</sup> Itsiata baitsi jane xua panevajëtamebeje panenaecaenexabeje, itsanë tacujanenia, itsanë tatsavenononia, bajaraxua Dioso apo netocopatsi patacatocopatsinexabeje. Tsipaji raja taxa Dioso ëpitapetsivinexa abaxë bajaraxua toxaniavaeta, jai Jesús Santiagobeje Juanbejejavabelia.

<sup>41</sup> Diez ponëbeje, Jesús pijajivi, itsa vënëtane pepëya bajaraxua Santiagobeje Juanbeje Jesúsjavabelia pevajëcaejavabeje, nexata bajarapamonae jamatabëcuenebaraanaepana Santiagobeje Juanbejejavabelia. <sup>42</sup> Nexata Jesús daxita pijajivi junata. Jesús jumaitsi pijajivijavabelia:

—Payapëtaneme rabaja pacuenia nacuaevetsivi exana. Eveta caenacua canacujitsia. Nexata nacuaevetsivi pijajivicuenia eveta pamona jinafanapa pevetsinacuanëjava. Nexata bajarapanacuanë pevetsivi ayaijamatabëcuenevi nataeyabiaba. Xua jamatabëitoroba pevetsinacuanëjava pejinavanapaevi petoexanaenexatsi, ajumesaëya itorobabiaba petoexanaenexatsi. <sup>43</sup> Pëtsa paxamë bajarapamonae cuenejëpaeya bajarapacuenia paexaname itsamonaejavabelia. Biji rajane ponë paxamëyajuvënënë jitsipa ayaijamatabëcuenenë penaexanaenexa daxita paxamëvecua, bajaraponë daxita paxamë bepanijajivitonëcuenia bepacyavenonabiaba. <sup>44</sup> Ponë paxamëyajuvënënë jitsipa penaexanaenexa papecanamatacaitorobinënexa, bajaraponë daxita paxamë bepanijajivitonëcuenia bepacyavenonabiaba. <sup>45</sup> Tsipaji rabaja xanë ata, Daxitajivi Pematapijinë atanë, apo patajopaenë jivi taneyavenonaenexa. Biji rajane xanë patajopajë tayavenonaenexa daxitajivi. Patajopajë tasivatëpaenexa jivi ayaibitsaëtoxaneto pibisiacuene pexanaeneconimi taneconimatamotsinexa, jai Jesús pijajivijavabelia.

*Pacuenia Jesús itaxutoxanepanaeyaexana Bartimeo, bitso pitaxutotsëcënaenë, apo petaenë, yabara pelivaisi*

(Mt 20.29-34; Lc 18.35-43)

<sup>46</sup> Jesús, pijajivi yajava, pata Jericó tomarabelia. Jesús icatsia, pijajivi yajava, itsamonenua ayaibitsaëtoxaneto yajava, pitsapa Jericó tomaravecua. Nexata Bartimeovënënë,

Timeo pexënato, eca namuto muxuneneta. Bartimeo, bitso pitaxutotsęcënaenë, apo petaenë. Jivijavabelia amoneya palata pevajęcabiabinë. <sup>47</sup> Nexata Bartimeo ita jumetane Nazaret tomarapijinë Jesús imoxoyo penajetarucaejava, vavajai tsecae.

—¡Jesús, Davidpijinë pemomomë, nitaxutotsoniataema! jai tsecae Bartimeo.

<sup>48</sup> Nexata picani itsamonae jumeitavetatsi Bartimeo pemoyanexa. Itsiata bitsoyo orijibia vavajai tsecae.

—¡Davidpijinë pemomomë, nitaxutotsoniataema! jai tsecae Jesúsjavabelia.

<sup>49</sup> Nexata Jesús muxunanucojopa. Jumaitsi jivijavabelia:

—Pajunaremena bajaraponë, jai.

Nexata bajarapamonae junarena Bartimeo. Pejunatsivirena jumaitsi Bartimeojavabelia:

—Najamatabësaëtaxuare. Nonotapunare. Jesús raja cajunarena, jai bajarapamonae.

<sup>50</sup> Nexata Bartimeo penajumaxuabipana xuabapuna. Bepijia najetabarena Jesúsjavaberena. <sup>51</sup> Nexata Jesús yanijoba Bartimeojavabelia.

—¿Detsa xua jitsipame tacaexanaenexa? jai Jesús.

Nexata Bartimeo bitso pitaxutotsęcënaenë, jumaitsi Jesúsjavabelia:

—Jesús, jitsipajë taitaxutoxanepanaejava, jai.

<sup>52</sup> Nexata Jesús jumaitsi:

—Ponare baja. Nesivajamatabëjumaitsimë: “Jesús nitaxutoxanepanaeyaexanaena,” nesivajamatabëjamë. Bajaraxuata itaxutoxanepaname baja, jai Jesús Bartimeojavabelia.

Bajarapacuenia Jesús pejumaitsijavata, Bartimeo baja xaniavaetsia tane. Nexata baja bajaraponë Jesús pepëta napona.

## 11

### *Pacuenia Jesús pata Jerusalén tomarata yabara pelivaisi*

*(Mt 21.1-11; Lc 19.28-40; Jn 12.12-19)*

<sup>1</sup> Jesús baja pijajivi barëimoxoyotanajetaruca Jerusaléntomara. Barëpata baja Betfagë tomarayobeje Betania tomarayobeje muxuneneta. Itsajota petsutojumata nubena olivonaenë, bajarajota Jesús barëpata. Bajarajota pebarëpatsicujinae Jesús itoroba anijanëbeje pijajivitonëbeje. <sup>2</sup> Jesús jumaitsi pijajivitonëbejejavabelia mapacueniaje:

—Paponarebeje mapatomarayo ecaliajejavabelia. Ajena papatsiaremeliabeje, pataenutsianamebeje burro, pecëtanutsinëtsi. Bajarapaburro itsajivi ata abaxë apo jumaponae. Paisinaenamebeje. Payamaëcarenamëbeje tsane. <sup>3</sup> “¿Detsa xuajitsia paisinamebeje burro?” ita pacajaibeje tsane itsajivi, nexata pajumaitsimëbeje tsane: “Vajatuxanenë raja namatavenona. Aeconoxae raja icatsia canaviatsiarena,” pajamëbeje tsane, jai Jesús pijajivitonëbejejavabelia.

<sup>4</sup> Nexata Jesús pijajivitonëbeje liabeje. Caxitajarabanutabeje burro baupa muxuneneta. Cëtanutatsi burro namuto muxuneneta. Nexata bajaraponëbeje burro isinabeje.

<sup>5</sup> Nexata bajarajota pejinavanapaevi yanijobatsibeje.

—¿Detsa xuajitsia paisinamebeje burro? jaitsibeje.

<sup>6</sup> Nexata bajaraponëbeje jumaitsibeje pacuenia baja Jesús itorobatsibeje. Nexata tocopatatsibeje pecaponaenexabeje. <sup>7</sup> Nexata jane baja burro capatabeje Jesúsjavaberena. Nexata Jesús pijajivi pijacamisajumavelia penaxatabijavanë burro tsijumajeba. Bajarapajumata Jesús ecaya. <sup>8</sup> Jesús penajetarucaenamutojavarena jivi ayaibitsaëttoxaneto pijacamisajumavelia penaxatabijavanë namutua tsivajënaeyerequejebaponatsi. Itsamonae naemaxërananë, pebaxu yajava, ucubaba. Nexata namutua Jesús tsivajënaeitabëtsiaya jebaponatsi yayataeya Jesús pecopiapitsinexatsi. <sup>9</sup> Jesús penajetarucajavata jivi ayaibitsaëttoxaneto Jesús pevajënaeya namataxainaeya najetarubena. Itsabitsaëttoxaneto Jesús pecovëya cotocaevanajetarubena. Daxita bajarapamonae vavajai tsanajetarubena. Jumai tsanajetarubena:

—¡Dioso yavenonaenatsi maponë najetarucaje! ¡Vajatuxanenë pejamatabëcueneta najetaruca! <sup>10</sup> ¡Dioso yavenonaenatsi maponë najetarucaje nacua pevetsinënexa! ¡Pacuenia bajayata vajasalinainëmi Davidpijinëmi nacua eveta, bajarapacuenia evetsijitsia! ¡Nexata vaxaitsi pexaniajamatabëcuene rajutatsi Diosojavabelia! jai tsanajetarubena bajaramonae.

<sup>11</sup> Nexata jane baja Jesús patajopa Jerusalén tomarata. Templobojavalia joneya. Nexata Jesús templobota naitaxutocaeveta, pacuene jivi exana templobota, petaenexa. Nexata baja Jesús pepuatae pacuene jivi exana templobota, Jesús baja icatsia pona. Navita abaxë Betania tomarabelia pijajivi, doce ponëbeje, yajava. Tsipaji baja caniviyotsia.

*Pacuenia Jesús bijataenuta higeranae piacuajibixae yabara pelivaisi*  
(Mt 21.18-19)

<sup>12</sup> Jesús pijajivi barëmajita Betania tomarata. Nexata bajayacunua Jesús icatsia pijajivi barëlia Jerusalén tomarabelia. Nexata Jesús namutua penajetarucaejavata, piajani. <sup>13</sup> Jesús namutovecua tajiyotalia higeranae yabaxua taenuta. Nexata Jesús taeyojopalia bajaraponae pecuai perubenaajava. Itsa Jesús pata bajaraponaejavabelia, ëpebaxu saya tsanuca. Tsipaji cajena abaxë apo penacuaitsimatacabi. <sup>14</sup> Nexata Jesús jumaitsi higeranaejavabelia:

—Itsajivi ata apo cacuaixae tsane matavëjëa, jai Jesús.

Nexata pijajivi jumetanetsi bajarapacuenia Jesús pejumaitsijava higeranaejavabelia.

*Pacuenia Jesús Jerusalén tomarata templobovecua pitsapaeyaexana pecanajetabiabivi, pecomuacabiabivinua, yabara pelivaisi*  
(Mt 21.12-17; Lc 19.45-48; Jn 2.13-22)

<sup>15</sup> Jesús, pijajivi yajava, pata Jerusalén tomarata. Nexata Jesús joneya temploboyalía. Nexata templobota Jesús tane pecanajetabiabivi, pecomuacaevinua. Nexata daxita bajararamonae Jesús pitsapaeyaexana templobovecua. Palata pecambiabiabivi ata pijamesanëmi Jesús topënyorobajaraba. Ucucu pecanajetabiabivi ata penabiabijavanëminua topënyorobajaraba. <sup>16</sup> Jesús apo tocopatsi itsajivi ata itsacuenejava pecaponanexa templobojava. <sup>17</sup> Jesús livaisi tsipaeba. Jumaitsi bajarajota pepatsivijavabelia:

—Dioso baja cajena pejumelivaisibaxutota mapatemplobo yabara tajëvelia jumaitsi mapacueniaje: “Tajabo raja daxitanacuanëpijivi xanëjavaberena penavajëcaebo tsane,” jai Dioso pejumaitsijava Dioso pejumelivaisibaxutota. Itsiata baitsi jane paxamë yamaxëitojorobiaya panenacobetoxotsinexa panacaetuatabiabame mapabotaje, jai Jesús templobota pecanajetabivijavabelia.

<sup>18</sup> Sacerdotevi penamatacaitorobivi, judíovi pecujarubivinua, jumetane daxita pacuenia Jesús exana jivijavabelia templobota. Nexata bajararamonae najumejaita pacuenia Jesús beyaxuabijitsiatsi. Bajararamonae cjunavatsi Jesús. Tsipaji daxitajivi jamatabëcuenenabenajaca Jesús petsipaebilivaisi yabara. <sup>19</sup> Ajena baja meravitsia, Jesús yajavapona pijajivi Jerusalén tomaravecua.

*Pacuenia higeranae tēpanuca yabara pelivaisi*  
(Mt 21.20-22)

<sup>20</sup> Jesús pijajivi barëmajita Betania tomarata. Nexata bajayacunua Jesús icatsia, pijajivi yajava, najetaruca pecovënamutua. Bajararamonae taenuta higeranae baja petēpanucaejava daxita yatabutopaya. <sup>21</sup> Nexata Pedro najamatabënapita higeranae Jesús pebijataenutsijava. Nexata Pedro jumaitsi Jesúsjavabelia:

—Tajatuxanenë, jica, taema. Pona higeranae bijataenutame, tēpanuca baja. ¿Detsa meta pacuenia tēpa baja? jai Pedro.

<sup>22</sup> Nexata Jesús jumaitsi pijajivijavabelia:

—Paxamë bitso pajumecovënëre Dioso papecatoexanaenexa pacuenia pavajëtame.

<sup>23</sup> Xaniajanë pacuenia pacatsipaebijitsiatsi. Itsa pajamatabëjumaitsimë tsipae Dioso

yabara: “Dioso nejumecovënëtsiana xua vajëtsianajë Diosojavabelia,” ita pajamatabëjamë tsipae, pacajumecovënëtsipa mapatsuto ataje. Nexata ita pajumaitsimë tsipae mapatsutojavabeliaje: “Natixire majotavecuaeje. Pucaxanetojavabelia jopare,” ita pajamë tsipae, pacajumecovënëtsipa. Nexata mapatsuto ataje paneitorobicuenia, pacajumecovënëtsipa. Itsa pajumecovënëtsianame Dioso papecatoexanaejavanexa, ita panajamatabëxainaenamenua Dioso ëpapecajumecovënëtsijavanexa, xua pavajëtsianame Diosojavabelia, Dioso pacajumecovënëtsiana. <sup>24</sup> Bajaraxuata pacajumaitsitsi. Daxita xua pavajëtsianame Diosojavabelia, pasivajamatabëjumaitsimë tsane: “Xua vajëtajë Diosojavabelia, pepacueene Dioso nejumecovënëtsiana,” pasivajamatabëjamëre. Nexata xua pavajëtsianame Diosojavabelia, Dioso pacajumecovënëtsiana. <sup>25</sup> Itsajivi pibisiacueene papecaexanaejava, pajamatabëcuenecaevare panevajëtsijavata Diosojavabelia. Nexata pabarajamatabëcuenexanepanare bajarapajivi. Nexata pijinia paneaxa, athëbëtatsia peecaenë, jamatabëcuenecaeviana paxamë ata pitabarata pibisiacueene paneexanaejava. <sup>26</sup> Paxamë ita apo pajamatabëcuenecaevimë tsane itsanë pibisiacueene papecaexanaejava, ita apo pabarajamatabëcuenexanepanaemënu tsane, nexata pijinia paneaxa, athëbëtatsia peecaenë, apo jamatabëcuenecaevi tsane paxamë pitabarata pibisiacueene paneexanaejava. Apo pacabarajamatabëcuenexanepanaenua tsane, jai Jesús pijajivijavabelia.

*Pacuenia Jesús cajëpatsi daxitacueene pexanaenexa yabara pelivaisi*  
(Mt 21.23-27; Lc 20.1-8)

<sup>27</sup> Jesús, pijajivi yajava, pata Jerusalén tomarata. Jesús ita ponapona templobota, nexata sacerdotevi penamatacaitorobivi, judíovi pecujarubivinua, judíovi pijaancianovinua, parena Jesúsjavaberen. <sup>28</sup> Nexata bajarapamonae jumaitsi Jesúsjavabelia:

—¿Jipatsa pejamatabëcueneta pecanajetabiabivi, pecomuacaevinua, capitsapame mapatemplobovecuaje? jai bajarapamonae Jesúsjavabelia.

<sup>29</sup> Nexata Jesús jumaitsi bajarapamonaejavabelia:

—Xanë copiaya caejumeyo pacayanijobianatsi. Itsa paxamë panejumecaviatsianame, nexata xanë juya pacatsipaebianatsi ponë nitoroba taexanaenexa bajarapacueene.

<sup>30</sup> ¿Jipatsa jane pejamatabëcueneta Juanpijinë jivi bautisabaponapona? ¿Dioso tsaja pejamatabëcueneta? Itsa jume, ¿jivi tsaja pejamatabëcueneta? Panejumecanaviare baitsi jane, jai Jesús bajarapamonaejavabelia.

<sup>31</sup> Nexata ëpamonae nabarëcuaicuaijai. Najumaitsi:

—¿De meta pacuenia jumecanaviatsianatsi? Vaxaitsi ita jumai tsipaetsi: “Dioso raja pejamatabëcueneta,” ita jai tsipaetsi, nexata Jesús nacajumai tsipae: “¿Detsa nexata xuajitsia apo pajumecovënëtsimë Juanpijinë pepaebilivaisi?” nacajai tsipae. <sup>32</sup> “Jivi raja saya pejamatabëcueneta Juanpijinë jivi bautisabaponapona,” acuenebi vajajaijava. Tsipaji mapatamarapivijive ayaibitsaëtoخانeto Juanpijinë yabara sivajamatabëjumaitsi: “Juanpijinë raja pepacueene Diosojumepaebinëmi,” sivajamatabëjai. Nexata bajarapamonae nacabeyejebijitsipa, najai Jesús peyanijobivitsi.

<sup>33</sup> Nexata saya bajarapamonae jumaitsi Jesúsjavabelia:

—Apo payapëtaenë ponë Juanpijinë itorobatsi jivi pebautisabaponaenexa, jai.

Nexata Jesús jumaitsi bajarapamonaejavabelia:

—Nexata xanë ata apo pacatsipaebi tsanetsi ponë nitoroba taexanaenexa bajarapacueene, jai Jesús.

## 12

*Pacuenia exana piJamatabëcuenebejevi, itsanë pijauvabacabo petoevetsivi, yabara pelivaisi*  
(Mt 21.33-46; Lc 20.9-19)

<sup>1</sup> Jesús livaisi tsipaeba sacerdotevi penamatacaitorobivijavabelia, judíovi pecujarubivijavabelia ata, judíovi pijaancianovijavabelia ata. Jumaitsi mapacueniaje:

—Pijaira pexainaenë pijairata uba ayaibacaboxaneto uvavënëjava. Bajaraxuacujinae pijaira matatoyorotsia ibopanaxanetonë mataropotsia pefaratsijavata yacaranata. Bajarapayacaranatsijava athëbëabetsia apia jivitonë matatoxenetsia. Bajaraxuacujinae irata mëthë cueyeta. Nexata pecueyetsimëthëjavata exana uvacuaibarëmene pecayujucabiabijavanexa. Bajaraxuacujinae pijauvabacabo tuatuajëta exananuta piapiabotsia, penacuaitsimatacabi ita tonaveretatsi, athëbëyo pevetabiabecaenexa pijauvabacabo. Nexata bajaraponë itsamonae evetsiaexana pijauvabacabo. Uvabacabo pexainaenë jumaiti petoevensivitsijavabelia: “Pamatacabi cuainaveretsiana, natsicobetsatsianatsi. Pamatacabi raja cuainaveretsiana, tajajivitonë itorobiarenajë xua panetotsatsianame tanetopitsinexa,” jai uvabacabo pexainaenë petoevensivitsijavabelia. Nexata uvabacabo pexainaenë tajë nacuyabelia pona. <sup>2</sup> Itsa baja uvabacabo pexainaenë yapëtane pecopiapatsijava uvacuai penaveretsimatacabi penotsinexa, nexata uvabacabo pexainaenë itoroba pijajivitonë. Itoroba petoevensivitsijavabelia petsicobetsatsinexatsi. <sup>3</sup> Nexata uvabacabo pexainaenë pijajivitonë tovaetabatsi. Toconibabiatsi. Petoconibabecujinaetsi cobesa naviatsiaexanaliatsi. <sup>4</sup> Itsiata uvabacabo pexainaenë icatsia itoroba itsanë pijajivitonë petsicobetsatsinexatsi. Bajaraponë ata icatsia tomatajorobixuabatsi. Pibisiacuenia tobijatanetsi. <sup>5</sup> Itsiata icatsia uvabacabo pexainaenë itoroba itsanë pijajivitonë. Bajaraponë jane baja tobeyaxuabatsi. Bajaraxuacujinae abaxë icatsia uvabacabo pexainaenë itoroba itsamonae. Bajarapamonae yajuvënëvi itsamonae totsiquibabiatsi. Itsamonae tobeyejebatsi.

<sup>6</sup> Abaxë uvabacabo pexainaenë icatsia pitorobinexa, caenë tonacopatatsi. Pexënato bitso piasivanë. Nexata jane baja uvabacabo pexainaenë pexënato icatsia itoroba. Uvabacabo pexainaenë jamatabëjumaiti: “Tajauvabacabo tanetoevensivi tajajivi apo netoyaiyatae ata, itsiata meta taxënato netoyaiyataena,” jamatabëjai uvabacabo pexainaenë. <sup>7</sup> Itsiata uvabacabo petoevensivitsi uvabacabo pexainaenë pexënato ata, apo toyaiyataetsi. Itsa tane uvabacabo pexainaenë pexënato, bajarapamonae najumaiti: “Mara ponëje paxa pevënamuto paxa pijauvabacabo pitsipaje. Naxaniatsia. Beyaxuabatsi. Nexata raja vaxaitsi vajauvabacabo tsane,” najai uvabacabo petoevensivitsi. <sup>8</sup> Nexata icatsia uvabacabo pexainaenë pexënato ata tovaetabatsi. Icatsia pexënato ata tobeyaxuabatsi. Petëpaenë xuabatsi bajarapauvabacabo pënëyabelia, jai Jesús sacerdotevi penamatacaitorobivijavabelia, judíovi pecujarubivijavabelia ata, judíovi pijaancianovijavabelia ata.

<sup>9</sup> Icatsia Jesús jumaiti bajarapamonaejavabelia:

—¿De meta nexata xua exanaena uvabacabo pexainaenë pijauvabacabo petoevensivitsijavabelia? Uvabacabo raja pexainaenë patsiarena. Verebiabiana daxita bajarapamonae. Nexata icatsia itsamonae evetsiaexanaena bajarapauvabacabo, jai Jesús bajarapamonaejavabelia.

<sup>10</sup> Icatsia Jesús jumaiti:

—Payapëtaneme rabaja pacuenia Dioso pejumelivaisibaxutota tajëvelia jumaiti xanë yabara. Ibotto pelivaisicuenia Dioso pejumelivaisibaxutota jumaiti xanë yabara mapacueniaje:

Paiboto itsamonae boexanaevi naitaxutojematabuatsiana petsitaabejexaetsi itajara, bajarapaiboto itsanë pitsiana. Nexata bajarapaibotota xaniavaetsia nayaëtsiana botabu daxita itsaibo matatoxenetsia. <sup>11</sup> Vajatuxanenë Dioso raja exanaena bajarapacuenia. Nexata nacatsita pexaniacuenia bitso tsane bajarapacuenia, jai tajëvelia Dioso pejumelivaisibaxutota xanë yabara.

Bajarapacuenia tajëvelia Dioso pejumelivaisibaxutota ita jumaiti, paxamë apo patanejumecovënëtsijavanexamë yabara jumaiti. Dioso taneitapetsijava daxitajivi tacapanepaenexa yabara ata jumaiti, jai Jesús bajarapamonaejavabelia.

<sup>12</sup> Bajarapamonae picani Jesús jamatabëvaetabatsi. Tsipaji bajarapamonae jumeyapëtanetsi Jesús pejumaitisijava bajarapamonae yabara. Itsiata abaxë apo vaetabitsi. Tsipaji cjunava jivi. Nexata baja Jesús bajarapamonae vecuapona.

*Pacuenia Jesús jamatabëcueneējēbiaya yanijobatsi impuestomatamo pematamotsijava yabara pelivaisi*

*(Mt 22.15-22; Lc 20.20-26)*

<sup>13</sup> Fariseoviyajuvēnēvi, Herodes pijajiviyajuvēnēvinua, najetarubena Jesúsjavaberena. Bajarapamonae pevetsivitsi itorobatsi livaisi peyanijobinexatsi Jesús. Nexata Jesús bajarapamonae bijiaya itsa jumeconaviata, peneconitsinexatsi picani nacuaeavetsinējavabelia. <sup>14</sup> Nexata bajarapamonae pata Jesúsjavaberena. Bajarapamonae jamatabëcueneējēbiaya jumaiti Jesúsjavabelia:

—Jesús, payapētaniji cajena nexaniajaicuene, xua yabara tsipaebabiabame livaisianē. Petuxanevi ata xamē apo cjunavimē. Apo auramē livaisi netsipaebabiabijava. Nexata daxitajivi najēpaeya livaisi tsipaebabiabame. Pexaniajailivaisi tsipaebabiabame pacuenia Dioso jitsipa jivi pejinavanapaenexa. ¿Xanepana tsaja vajamatamotsinexa impuestomatamo Romanonacua pepo pevetsinējavabelia? Itsa jume, ¿apo xanepana tsaja vajamatamotsinexa? jai bajarapamonae jamatabëcueneējēbiaya Jesúsjavabelia.

<sup>15</sup> Itsiata baitsi jane Jesús jamatabëcueneyapētane bajarapamonae jamatabëcueneējēbiaya peyanijobijavatsi peneconitsinexatsi picani. Nexata Jesús jumaiti bajarapamonaejavabelia:

—¿Detsa xuajitsia jamatabëcueneējēbiaya paneyanijobame? Panetocarenamēre palatanēyo. Taejitsianē, jai Jesús.

<sup>16</sup> Nexata bajarapamonae Jesús tocaponarenatsi palatanēyo. Nexata Jesús jumaiti bajarapamonaejavabelia:

—¿Jipatsa mapitabaraje, pevenēnua, ruca mapapalatanēyotaje? jai Jesús.

Nexata bajarapamonae jumaiti Jesúsjavabelia:

—Romanonacua raja pepo pevetsinē pitabara, pevenēnua, jai.

<sup>17</sup> Nexata Jesús jumaiti bajarapamonaejavabelia:

—Nexata parajutabiabianame Romanonacua pepo pevetsinē pijajava. Parajutabiabianame pijinia saicaya Diosojavabelia Dioso pijajava, jai Jesús.

Nexata Jesús itsa jumeconaviata bajarapacuenia, bajarapamonae jamatabëcuenenabenajaca bajarapacuenia Jesús pejumaitisijavata. Nexata bajarapamonae jamatabëjumaiti:

—¿Xaniavaetsia baja rovia Jesús panejumecanaviata! jamatabējai.

*Pacuenia Jesús tsipaeba jivi petēpaecujinae icatsia piasaējavanexa yabara pelivaisi*

*(Mt 22.23-33; Lc 20.27-40)*

<sup>18</sup> Saduceovi saicaya itsalivaisi xaina. Bajarapamonae jamatabëcuenenavēxaniabiaya jumai tsabiabi: “Petēpaevi rabaja petēpaecujinae, icatsia apo asaē tsane,” jai tsabiabi. Nexata saduceovi imoxoyorenatsi Jesús. Saduceovi jumaiti Jesúsjavabelia mapacueni-aje:

<sup>19</sup> —Jesús, Moiséspijinē bajayata vajanacatoyaquinaelivaisi, jumaiti mapacueni-aje: “Ponē pematapijinē pepua penacojiobinē baja, totēpatsi pexi xainaenejeva, nexata juyapijinē bepita pematapijinēmi pijavami. Bajarapacuenia juyapijinē bepita pematapijinēmi pijavami pexi pexainaenexa bajarapovajavabelia. Nexata pexi itsa xainabeje, bematapijinēmi pexi petaenexa daxitajivi,” jai Moiséspijinē bajayata vajanacatoyaquinaelivaisi. <sup>20</sup> Nexata jinavanapa ēnacaemonae siete ponēbeje. Pepo matapijinē copiaya nacojioba. Nexata bajaraponē pijava vecuatēpa pexi xainaenejeva. <sup>21</sup> Nexata pematapijinēmi pepēnarucaenē pita pematapijinēmi pijavami. Nexata icatsia bajaraponē ata tēpa pexi xainaenejeva bajarapovajavabelia. Nexata icatsia itsanē tuatuajēmatapijinē pita bajarapova. Bajaraponē ata icatsia tēpa pexi xainaenejeva bajarapovajavabelia.

<sup>22</sup> Bajarapacuenia tēpa daxita siete ponēmibeje nacaemonae, bajarapova pepitaponaevi. Itsiata itsanē ata pexi apo xainae bajarapovajavabelia. Bajaraxuacujinae belia bajarapova ata tēpa baja. <sup>23</sup> “Jivi raja petēpaecujinae, Dioso icatsia asaēyaexanaenatsi,” jamē. ¿Detsa nexata ponē, bajarapomonaeyajuvēnēnē, pijava tsane bajarapova bajarapamatacabi?

Daxita pamonae siete ponēmibeje, nacaemonae, pitapona picani bajarapovami, jai saduceovi Jesúsjavabelia.

<sup>24</sup> Nexata Jesús jumaitsi saduceovijavabelia:

—Paxamē saya pajamatabēcuenenavēxaniabame. Paxamē raja apo payapētaemē pacuenia Dioso pejumelivaisibaxutota jumaitsi. Apo payapētaemēnua pacuenia Dioso caējēpatsi daxitacuenē pexanaenēxa. Bajaraxuata jamatabēcuenenavēxaniabiaya paneyanijobame: “¿Detsa ponē pitsiana bajarapova?” panejamē. <sup>25</sup> Pamatacabi raja petēpaevimi Dioso icatsia asaēyaexanaenatsi, apo nacojioi baja tsane. Bajarapamat-acabita itsajivi ata pexēnatoyo apo canajetsi tsane pebijavabelia petonacojiobinexatsi. Bajarapamonae nacojiobinejeva, jinavanapaena athēbētatsia pacuenia ángelevi jinavanapa. <sup>26</sup> Itsa pepacuene paxamē paneyanijobame Dioso icatsia piasaēyaexanaejavanexatsi petēpaevimi, nexata pacatsipaebianatsi. Paxamē rabaja payapētaneme pacuenia bajayata Moiséspijinē peyaquinaebaxutota jumaitsi. Bajarapabaxutota jumaitsi pacuenia Moiséspijinē Dioso barēcuaicuajaitsi tsiquirinaemēyo petajueyecaecotiajavavereña. Abraham baja peputēpae, Isaac ata baja peputēpae, Jacob ata baja peputēpae, bajarapamonae yabara bajayata Dioso jumaitsi Moiséspijinējavabelia mapacueniaje: “Xanē rabaja abaxē Abraham pijaDiosonē, Isaac ata pijaDiosonē, Jacob ata pijaDiosonē,” jai Dioso Moiséspijinējavabelia bajayata petēpaevimi yabara. <sup>27</sup> Bajarapacuenia Dioso pejumaitsixae, nayapētane bajarapamonae bajayata tēpae ata, Diosovecua apo penaxuabijava. Aeconoxae ata bajarapamonae Dioso yajavajinavanapa athēbētatsia. Nexata paxamē itsa pajumaitsimē: “Petēpaevi rabaja petēpaecujinae, icatsia apo asaē tsane,” itsa pajamē, pinijicuenia pajamatabēcuenenavēxaniabame, jai Jesús saduceovijavabelia.

*Palivaisi bitso jivi bejumecovēnēta daxita Dioso pitorobilivaisianē pejumecovēnētsijava matatoxenetsia yabara palivaisi*

*(Mt 22.34-40)*

<sup>28</sup> Judíovi pecujarubinē pata Jesúsjavaberena. Nexata bajaraponē Jesús jumetanetsi xaniavaetsia pejumecanaviataponaejava saduceovijavabelia. Nexata judíovi pecujarubinē jumaitsi Jesúsjavabelia:

—¿Detsa palivaisi bitso jivi bejumecovēnēta daxita Dioso pitorobilivaisianē pejumecovēnētsijava matatoxenetsia? jai.

<sup>29</sup> Jesús nexata jumaitsi judíovi pecujarubinējavabelia:

—Palivaisi bitso jivi bejumecovēnēta, daxita Dioso pitorobilivaisianē pejumecovēnētsijava matatoxenetsia jumaitsi mapacueniaje: “Paxamē, Israelpijinē papemomoximē, pajumetaema. Vajatuxanenē rabaja caenē Dioso. <sup>30</sup> Bajaraponē panijatuxanenē, panijaDioso, daxita panejamatabēthētojavavetsina pasivamēre. Pasivamērē daxita panejamatabēcueneta ata, daxita panenajamatabēxainaesaēta ata, daxita panesaēta ata,” pejailivaisi bitso jivi bejumecovēnēta daxita Dioso pitorobilivaisianē pejumecovēnētsijava matatoxenetsia. <sup>31</sup> Bajaraxuacujinae pecotocaevilivaisi, palivaisi bitso jivi bejumecovēnēta, jumaitsi icatsia mapacueniaje: “Pasivamēre itsajivi ata pacuenia paxamē panijacuata panaasivamē,” jai. Bajarapalivaisi ata jivi bitso bejumecovēnēta. Ajibi rabaja itsalivaisi pematatsēnē, Dioso pitorobilivaisi, palivaisi bitso jivi bejumecovēnēta,” jai Jesús judíovi pecujarubinējavabelia.

<sup>32</sup> Nexata icatsia judíovi pecujarubinē jumaitsi Jesúsjavabelia:

—Jesús, xaniajamē rabaja pacuenia jumaitsimē. Caenē tsaena Dioso ponapona. Ajibi tsaena pematatsēnē itsanē Dioso. <sup>33</sup> Bejumecovēnētatsi Dioso daxita vajajamatabēthētojavavetsina, daxita vajanajamatabēxainaesaēta ata, daxita vajasaeāta ata. Biasivatsi itsajivi ata pacuenia vaxaitsi vajacuata nasivatsi. Daxita bajaraxua itsa jumecovēnētatsi, bitso nacatonamatamota Diosojavabelia. Bajaraxua bitso nacatonamatamota ofrenda Diosojavabelia vajarajutabiabijava matatoxenetsia. Baitsi xua Diosonexa ofrendacuenia totajuitabiabatsi, dajubicuene itsa tobeyabiabatsi, bajaraxua matatoxenetsia bitso nacatonamatamota, jai judíovi pecujarubinē Jesúsjavabelia.

<sup>34</sup> Jesús itsa jumetane judíovi pecujarubinē xaniavaetsia pejumecanaviatsijavatsi, nexata Jesús jumaitsi judíovi pecujarubinējavabelia:

—Tsiquirijavayo catosaica Diosojavabelia nenajamatabēcuenecopatsinexa nijatuxanenē Dioso nexanaenexa, jai Jesús judíovi pecujarubinējavabelia.

Bajaraxuacujinae daxitajivi baja Jesús cujunavatsi. Nexata baja Jesús jivi jamatabēcuenējēbiaya livaisi apo yanijobitsi.

*Pacuenia Jesucristo yabara Davidpijinē bajayata tajēvelia: “Tajatuxanenē,” jai, yabara pelivaisi*

*(Mt 22.41-46; Lc 20.41-44)*

<sup>35</sup> Jesús livaisi tsipaeba templobota. Jesús pijacuata nayabarajumaitsi:

—¿Detsa xuajitsia judíovi pecujarubivi apo jumecovēnētsi Cristo Dioso pexēnatocuene, ponē athēbēvetsica Dioso itorobijitsiatsica jivi pecapanepaenexa? Bajarapamonae saya jamatabēcuenenavēxaniabiaya jumai tsabiabi Cristo yabara: “Cristo raja itsa patsiana, Davidpijinē pemomo tsane,” jai tsabiabi. <sup>36</sup> Davidpijinē bajayata Espíritu Santo pejamatabēcueneta tajēvelia jumaitsi Cristo yabara mapacueniaje:

Dioso jumaitsi tajatuxanenējavabelia: “Ecare abaxē tacujuanenia. Vecatsivajēnae jumecovēnētsiaexanaenatsi abaxē copiaya nijavajabitsaē nitorobicuenianexa,” jai Dioso tajatuxanenējavabelia,

jai bajayata tajēvelia Davidpijinē mapacueniaje Cristo yabara.

<sup>37</sup> Nexata Davidpijinē bajayata Cristo yabara: “Tajatuxanenē,” itsa jai, nexata Cristo Davidpijinē apo pemomo. Tsipaji baja cajena Cristo saicaya Dioso pexēnato, nayabarajai Jesús judíovi pecujarubivi pecanaējētsinexa Cristo Dioso pexēnatocuene.

Nexata jivibitsaētoخانeto Jesús pejumetaevitsi jumebarēyatanetsi.

*Pacuenia Jesús jumaitsi jivijavabelia: “Judíovi pecujarubivi bitso pinijicuenia Dioso naneconitsiaexanaenatsi,” jai yabara pelivaisi*

*(Mt 23.1-36; Lc 11.37-54; 20.45-47)*

<sup>38</sup> Jesús jivi ayaibitsaētoخانetojavabelia, pijajivijavabelia ata, livaisi tsipaeba. Nexata Jesús livaisi petsipaebijavata jumaitsi mapacueniaje:

—Xania, panayajivitaema, palivaisi judíovi pecujarubivi tsipaebapona, panejumecovēnētsiyaniva. Bajarapamonae jitsipabiaba tomara tuatujējjava piapiajavanē penaxatabiabavanapaenexa jivi peyaiyataenexatsi. Jitsipabiabanua bitso yayiyataeya pebajacobinexatsi callejava. <sup>39</sup> Bajarapamonae itsa najoneyabiaba judíovi penacatuatabiabibonējjava, jitsipabiaba penaenexa pexaniavirijavanēta. Nexata natsiitapetabiaba penaenexa peyaiyataevitsi penaenexa petsinubijavanēta. Bajarapamonae itsa napatabiaba fiestajava ata, jitsipabiaba penaenexa peyaiyataevitsi penaenexa petsinubijavanēta. <sup>40</sup> Bajarapamonae yamaxēitojorobiaya vecuanotabiabanua pamonajivi pevecuatēpaevanētsi pecobecovējavaxi. Bajarapamonae itajara pinijicuenia vajēcabiaba Diosojavabelia. Itsiata pepo pexaniajaiamatabēcueneta apo vajēcabiabi. Bajarapacuenia vajēcabiaba saya jivi petaenexatsi Dioso itajara bitso bepejumecovēnētsivi. Nexata bajarapamonae bitso pinijicuenia Dioso naneconitsiaexanaenatsi pamatacabi Dioso naneconitsiaexanaena daxita pamonae Dioso apo pejumecovēnētsivi, jai Jesús judíovi pecujarubivi yabara.

*Pacuenia ofrenda rajuta Diosojavabelia pamona pevecuatēpaevatsi yabara pelivaisi*

*(Lc 21.1-4)*

<sup>41</sup> Itsamatacabi Jesús eca templobota. Pacajonita jivi palata jeyabiaba ofrendacuenia perajutsijava Diosojavabelia, bajarapacajoni pecanacujitsita Jesús eca. Nexata Jesús cobetaeyeca jivi palata pejeponaejava bajarapacajonita. Ayaijava palata pexainaevi, caejivi canacujitsia, ayaijava palata jepona. <sup>42</sup> Bajarajota napata pamona pevecuatēpaevatsi, bepejiobiva. Nexata bajarapova najia anijapalatanēyobeje piamatamobinēyobeje.

<sup>43</sup> Nexata Jesús junata pijajivi. Jumaitsi pijajivijavabelia:

—Xaniajanë pacuenia pacatsipaebijitsiatsi. Mapovaje pamona pevecuatëpaevatsi bejiobi bitso. Xuayo jia cajonita ofrendacuenia perajutsinexa Diosojavabelia, bajaraxuayo bitso Dioso sivajamatabëcuenebarëya daxita xua itsamonae jia bajarapacajonita matatoxenetsia. <sup>44</sup> Tsipaji rabaja xua bajarapamonae apo namatavenonae, jia bajarapacajonita ofrendacuenia perajutsinexa Diosojavabelia. Itsiata mapovaje bepejiobiva daxitajavayomi penaevetsijavayotaminexa, jia bajarapacajonita ofrendacuenia perajutsinexa Diosojavabelia, jai Jesús pijajivijavabelia.

## 13

*Pacuenia Jesús pijajivitonëjavabelia tajëvelia tsipaeba itsamatacabi itsanacuapijivi templobo pexuabijavanexatsica yabara pelivaisi*

*(Mt 24.1-2; Lc 21.5-6)*

<sup>1</sup> Itsa baja Jesús, pijajivi yajava, pitsaparena templobovecua, Jesús pijajivitonë jumaitsi Jesúsjavabelia:

—¡Tajatuxanenë, jica, nataema mapaibotoxanetonëje, mapaboxanetonë ataje! jai Jesús pijajivitonë.

<sup>2</sup> Nexata Jesús tajëvelia jumaitsi pijajivitonëjavabelia:

—Daxita raja mapaboxanetonë tanemeje, bajarapaboxanetonëmi itsamatacabi itsanacuapijivi penetsianica irabetsica. Nexata mapaibotoxanetonëmije itsaiboto ata pejumavereca apo boca tsane, jai Jesús tajëvelia pijajivitonëjavabelia.

*Pacuenia itsijitsia Jerusalén tomarata, daxitanacuanëjava ata, mapanacua pecopiarucaevajënaeje yabara pelivaisi*

*(Mt 24.3-28; Lc 21.7-24; 17.22-24)*

<sup>3</sup> Jesús eca petsutojumata. Patsutojumata olivonaenë apaaxayo templobo canacujitsijavalia, bajarapatsutojumata Jesús eca. Nexata Pedro, Santiago, Juan, Andrés, bajarapamatabëxëyo pijaepatojavata Jesúsjavabelia jumaitsi:

<sup>4</sup> —Patajatuxanenë, pajitsipajë patanetsipaebinexamë patayapëtaenexa paepatota copiapatsijitsia xua vajunupaebame. ¿Detsa peneta pitsicuene pataenajë itsa copiapatsijitsia xua jumaitsimë templobo yabara? jai bajarapamonae Jesúsjavabelia.

<sup>5</sup> Jesús nexata tajëvelia vajunupaeba pacuenia itsamatacabi itsijitsia mapanacuataje. Jesús jumaitsi pijajivijavabelia mapacueniaje:

—Xania panayajivitaename. Pëtsa panacopatame itsajivi ata papecayamaxëitorobinexa. <sup>6</sup> Tsipaji raja peyamaxëitorobinexa ayaibitsaëto patsiana bexanë itajara tsane. Bajarapamonae najumetsënëtsiaya jumai tsane: “Xanë raja Cristonë, Dioso athëbëvetsica taneitorobinëtsica jivi tacapanepaenexa,” jai tsane. Bajarapamonae jivi, ayaibitsaëto yamaxëitorobiana.

<sup>7</sup> Vajabitsaë pexanaejava imoxoyonacuanëjava, tajënacuanëjava ata, pavënëlivaisitaename. Itsiata pëtsa pajunavame. Bajarä peneta itsane mapanacua pevereverecaevajënaeje. Itsiata baitsi jane bepijia bajarapamatacabi mapanacuaje abaxë apo vereverecajuni tsane. <sup>8</sup> Mapanacuaje pevereverecaevajënae peneta copiaya itsaviriavi nabena itsaviriavijavabelia. Itsanacuanëpijivi pijinia nabena itsanacuanëpijivijavabelia. Ira najëbiana ayaicuenia nacuanëjava. Ayaijaniboxaneto najetarucaena nacuanëjava. Ayaicuenia bitso jivi bejiobi tsane nacuanëjava. Daxita bajarapacuenia itsa pataename, saya abaxë taxuxuabaponaena piyaicuenia, jai Jesús pijajivijavabelia tajëvelia pevajunupaebijavata pacuenia itsamatacabi itsijitsia mapanacuata.

<sup>9</sup> Icatsia Jesús tajëvelia vajunupaeba pacuenia itsamatacabi itsijitsia mapanacuataje. Jesús jumaitsi pijajivijavabelia mapacueniaje:

—Nexata paxamë xania panayajivitaename. Tsipaji raja xanë patajajivixaemë, tomara pevetsivijavabelia pacacaponabiabiana. Bajarapamonae pacajumaconibabeyabiabiana judíovi penacaetuatabibonëta. Paxamë patajajivixaemë pacanubiana nacuaevetsivi pitabarata, presidente vi ata pitabarata. Nexata bajarajota bajarapamonaejavabelia

patsipaebianame xanë talivaisi. <sup>10</sup> Nexata daxitanacuanëpijivijava patsipaebanajetarubenaename pecapanepaelivaisinexatsi. <sup>11</sup> Itsa pacataicaena papecaneconitsinexa nacuaevevtsivijavabelia, pëtsa pajamatabëcuenebëjamë panenayajivicuaicuaijainexa bajarapamonaejavabelia. Palivaisi panejamatabëcuenevetsina pacatonaitajëtsiana, patsipaebianame bajarapamonaejavabelia. Tsipaji raja bajarapaepatota Espiritu Santo pacacuaicuaijayaexanaena. Paxamë baitsi panejamatabëcueneta apo pacuaicuaijamë tsane. <sup>12</sup> Bajarapamatacabi patajajivixaemë, panacaemonae atamë, itsajivi panijamonaejivi ata pacacanajetsiana nacuaevevtsivijavabelia papecabeyaxuabinexa. Paneaxa ata, paneena ata, pacacanajetsiana nacuaevevtsivijavabelia papecabeyaxuabinexa. Panexi ata pacacanajetsiana nacuaevevtsivijavabelia papecabeyaxuabinexa. <sup>13</sup> Daxitajivi pacaitoya tsane patajajivixaemë. Itsiata pajivi ajamatabëcuenesaë tsane Dioso pejumecovënëtsijava nacua pecopiarucaejavabelianexa, bajarapajivi Dioso capanepaenatsi, jai Jesús pijajivijavabelia tajëvelia pevajunupaebijavata pacuenia itsamatacabi itsijitsia mapanacuataje.

<sup>14</sup> Icatsia Jesús tajëvelia vajunupaeba papiayaicuene itsamatacabi copiapatsijitsia Jerusalén tomarata. Jesús jumaitsi pijajivijavabelia mapacueniaje:

—Diosojumepaebinëmi, profeta Danielpijinë, tajëvelia Dioso pitorobicueniatsi piayaicuene pevajunupaebilivaisi bajayata yaquina. Xua panijatamaranëmi vereverecaeyaexanaejitsiatsi, bajaraxua pelivaisi yaquina. (Pajivi lebiana mapalivaisije, yapëtaena papiayaicuene vajunupaeba mapalivaisitaje.) Nexata paxamë pataename bajarapapiayaicuene penucaejava templobota, itsajota picani apo benucae. Nexata Judea nacuata pejinavanapaevi ita vënëlivaisitaena bajarapapiayaicuene penucaejava templobota, pëtsa nubena. Naxanitsiayo bajarapamonae rëcëpecaena ibotsutonëjavabelia. <sup>15</sup> Pajivi pijabojumata athëbëyo ecaya, ita vënëlivaisitaena bajarapapiayaicuene penucaejava templobota, bajarapajivi perunaecujinaetsica bepijia najetabajiraviana. Pëtsa joneya pijaboyaliala pejutsinexa pecobecovë. <sup>16</sup> Pajivi pijinia nacuenebaponapona pijapabita, ita vënëlivaisitaena bajarapapiayaicuene penucaejava templobota, bepijia najetabajiraviana. Pëtsa naviata pijaboyabelia pejutsinexa penaxatabijava. <sup>17</sup> ¡Papetiriavi penacueto yacotajinavanapa, bitso bejiobi tsane bajarapamatacabi! ¡Bitso nabejibitsiaya jinavanapaena! ¡Papetiriavi ata mitoapaenacuetoxi isajinavanapa, bitso bejiobi tsane bajarapamatacabi! <sup>18</sup> Bajaraxuata tajëvelia Diosojavabelia pavajëcare piayapëbejematacabita papecatocopiapatsiyaniva bajarapapiayaicuene. Nexata pamatacabi parëcëpecaename, pexaniamatacabi Dioso pacatocopatsiana bitso nabejibitsiaya paneponaeyaniva. <sup>19</sup> Tsipaji raja bajarapamatacabi bitso jivi bejiobi tsane. Pabejio-bicuene abaxë jivi caeto ata apo tae Dioso nacua pexanaecujinae, bajarapabejio-bicuene taena. Bajaraxuacujinae icatsia itsamonae bejiobiaexanae atatsi tsane, itsiata bajarapacuenia bitso apo bejiobiaexanaetsi tsane. Tsipaji Dioso epatua yatuucutsiana jivi bitso nabejibitsiaya pejinavanapaematacabianëminexa, bitso jivi nabejibitsiaya pejinavanapaeyaniva. <sup>20</sup> Dioso epatua ita apo yatuucutsi tsipae bitso jivi nabejibitsiaya pejinavanapaematacabianëminexa, caejivi ata apo asaë tsipae. Itsiata baitsi jane Dioso piavivaxae pijajivi, pitapetsivi, Dioso epatua yatuucutsiana bitso jivi nabejibitsiaya pejinavanapaematacabianëminexa, jai Jesús pijajivijavabelia tajëvelia pevajunupaebijavata papiayaicuene itsamatacabi copiapatsijitsia Jerusalén tomarata.

<sup>21</sup> Icatsia Jesús tajëvelia vajunupaeba pacuenia itsamatacabi mapanacuataje patsijitsia peyamaxëitojorobivi Dioso pejumecovënëtsivi peyamaxëitojorobinexatsi. Jesús jumaitsi pijajivijavabelia mapacueniaje:

—Nexata itsajivi yamaxëitojorobiaya ita pacajumaitsi tsane: “Pataema. Mara Cristo nucaje,” ita pacajai tsane, pëtsa pajumecovënëtame. Itsa pacajumaitsi tsane: “Bajarajota nuca Cristo,” ita pacajai tsane, pëtsa pajumecovënëtame. <sup>22</sup> Itsamonae jumai tsane: “Xanë raja Cristonë,” jai tsane. Itsiata jemajai tsane. Itsamonae jumai tsane: “Diosojumepaebinëni raja, profetanënë,” jai tsane. Itsiata jemajai tsane. Bajarapamonae itajara exanaena pinijicuene pexanaejavanë peyamaxëitojorobinexa saya

jivi. Nexata bajarapacuenia itsamonaē yamaxëitojorobaponaenatsi. Itsiata pamonaē pepacuenē Dioso pijajivi, Dioso pitapetsivitsi, bajarapamonaē apo yamaxëitojorobi tsanetsi. <sup>23</sup> ¡Xania baja tsane! Xanë rabaja pacatsipaebatsi tajëvelia daxitacuene panenayajivitaenexa, jai Jesús pijajivijavabelia tajëvelia pevajunupaebijavata pacuenia itsamatacabi mapanacuataje patsijitsia peyamaxëitojorobivi Dioso pejumecovënëtsivi peyamaxëitojorobinexatsi.

*Pacuenia Jesús tajëvelia navajunupaeba icatsia pepatsijavanexatsica petëpaecujinae yabara pelivaisi*

*(Mt 24.29-35, 42, 44; Lc 21.25-36)*

<sup>24</sup> Jesús tajëvelia navajunupaeba itsamatacabi icatsia pepatsijavanexatsica. Jesús jumaitsi pijajivijavabelia mapacueniaje:

—Xanë tapatsivajënaetsica, jivi taena pecujunavicuene. Jivi nabejobitsiaya jinavana-paena. Nexata jivi nabejobitsiaya pejinavanapaematacabicujinae matacabipijijuameto aitaquiri tsane. Meravipijijuameto ata aitaquiri tsane. <sup>25</sup> Tulupu ata othopaenica irabetsica. Daxitacuene, xua rubena athëbëtatsia, najëabiana. Xaniavaetsia apo rubenaē tsane. <sup>26</sup> Nexata bajarapaepatota xanë, Daxitajivi Pematapijinënë, jivi netaena athëbëvetsica itarërëbota tanajetarucaejava. Patsianicajë daxitacuene taevetsinexa. Tanivenivenaeco-tia yajavapatsianicajë. <sup>27</sup> Bajaraxuacujinae ángelevi itorobianajë, pamonaē tajajivi, Dioso pitapetsivitsi, daxitanacuanëjavaverena tanetocaetuatsinexa xanëjavaberena, jai Jesús pijajivijavabelia tajëvelia penavajunupaebijavata itsamatacabi icatsia pepatsijavanexatsica.

<sup>28</sup> Icatsia Jesús tajëvelia vajunupaeba pacuenia itsamatacabi itsijitsia mapanacuataje. Jesús jumaitsi pijajivijavabelia mapacueniaje:

—Pacanaëjëre pacuenia itsi higeranae. Itsa maxëranajuva, nexata pejanabaxu pitsapa. Nexata bajarapacuenia payapëtaneme vai baja imoxoyo pevajënae pejonejavanaxa. <sup>29</sup> Bajara pijinia pacuenia peneta itsa pataename pecopiapatsijava, xua yabara pacatsipaebatsi, nexata payapëtaneme imoxoyo baja tavajënae tsane tapatsijavanexatsica. <sup>30</sup> Xaniajanë pacuenia pacatsipaebijitsiatsi. Pitsijamatabëcuenevi aeconoxae mapamatacabitaje jinavanapa, bajarapitsijamatabëcuenevi abaxë, bexëjavabelia ata, apo vereverecae tsane. Matapania xua yabara pacatsipaebatsi, itsa baja copiapatsiana, bajarapamonaē jane baja vereverecaena. <sup>31</sup> “Itaboxo, ira yajava, tsitecaena daxitamatacabijavabelianexa,” jamatabëjai ata tsane itsamonaē, itsiata jamatabëcuenenavëxaniabiana. Tsipaji jemata itaboxo, ira yajava, vereverecaena. Nexata palivaisi pacatsipaebatsi, apo najumetsënëtsinë tsane. Nexata xua yabara pacatsipaebatsi, pacuenia baja najumecapanepaeya jumaitsinë, daxita bajaraxua copiapatsiana, jai Jesús pijajivijavabelia tajëvelia pevajunupaebijavata pacuenia itsamatacabi itsijitsia mapanacuataje.

<sup>32</sup> Jesús icatsia jumaitsi pijajivijavabelia:

—Itsajivi ata apo yapëtae pamatacabita, paepatota ata, copiapatsijitsia daxita xua yabara tajëvelia pacatsipaebatsi. Athëbëpijivi ata, ángelevi, apo yapëtae. Xanë, Dioso pexënato atanë, apo yapëtaenë. Caenë taxa Dioso yapëtane, jai Jesús pijajivijavabelia.

<sup>33</sup> Icatsia Jesús jumaitsi pijajivijavabelia:

—Xania baja tsane. Daxitamatacabi saya panecopiaevetavanapaename. Tsipaji raja apo payapëtaemë tsane paepatota patsijitsianëtsica. <sup>34</sup> Nexata pacuenia bo pexainaenë, pijabo evetsiaexana pijajivi, bajara xanë itsinë tsane. Bo pexainaenë itsa ponaejitsia tajënacuyabelia, pijajivi evetsiaexana pijabo. Nexata pijajivi, caejivi canacujitsia, rajutapona petonacuenebavanapaejavanexatsi pecovëta. Nexata pijajiviyajuvënë itoroba baupa pevetsinënexa petoetabiabinexatsi pijabobaupa. Bo pexainaenë jumaitsi bajaraponëjavabelia: “Xaniavaetsia netoetabiabianame baupa matapania tapatsimatacabijavabelianexa,” jai bo pexainaenë. <sup>35</sup> Nexata paxamë ata bajarapacuenia panecopiaevetavanapaename matapania tapatsimatacabitsicajavabelianexa. Tsipaji raja apo payapëtaemë tsane pamatacabita patsijitsianëtsica. Ajena meravi, caecanivia, patsipajë. Meravi tuatujëta ata patsipajë. Matacabivëpata ata patsipajë. Bajayacunua

ata patsipajë. <sup>36</sup> Bajaraxuata xania baja tsane. Daxitamatacabi saya panecopiaevetavana-paename. Jemata itsa patsipajë, paepatota apo panecopiaevetsimë, pacacaxitajarabijit-sipatsi panemajitsijavata. <sup>37</sup> Palivaisi pacatsipaebatsi paxamëjavabelia, daxitajivinexa jumaitsinë. ¡Daxitamatacabi saya panecopiaevetavanapaename! jai Jesús pijajivijavabelia.

## 14

*Pacuenia picani Jesús pijavajabitsaë jamatabëvaetabatsi yabara pelivaisi*  
(Mt 26.1-5; Lc 22.1-2; Jn 11.45-53)

<sup>1</sup> Anijamatacabibeje abaxë ajibi pejonenexa pascuafiesta, itsafiestanua, pafiestajava judíovi baxane levadurata matajërëbinejeva pexanaepan. Nexata bajarapafiestabejeva-jënaeya, sacerdotevi penamatacaitorobivi, judíovi pecujarubivinua, najumejaita picani bajarapafiestajava pevaetabinexatsi Jesús. Penajumetsënëtsilivaisita picani jamatabëvaetabatsi Jesús pebeyaxuabinexatsi. <sup>2</sup> Itsiata bajarapamonae najumaitsi:

—Fiestajava meta abaxë apo vaetabi tsanetsi jivi vajanacaitsacueniabiyana, najai bajarapamonae.

*Pacuenia Jesús petiriva tsimataepanatsi petuxujuviaceitera yabara pelivaisi*  
(Mt 26.6-13; Jn 12.1-8)

<sup>3</sup> Jesús ponapona Betania tomarata, Simón pijabota. Simón bajayajebi bitso peper-abëtsabanaenëmi. Nexata Jesús pexaeyecaejavata mesata, petiriva cobenaimoxoyorenatsi petuxujuviaceitera, nardovënëra, alabastrobotellabëta pejeaceitera. Bajarapora bitso penamatamotsira. Nexata bajarapova yavëtoxobiaxuaba bajarapora, petuxujuviaceitera. Bajaraxuacujinae Jesús tsimataepanaicatsi bajarapaaceitera. <sup>4</sup> Bajarajota itsamonae penaenaevi itsa taeyena Jesús petsimataepanaejavatsitsica, bajarapamonae jamatabëanaepanareca. Nexata ëpamonae najumai tsenae:

—¿Detsa xuajitsia saya xuaba bajarapacuenia maporaje? <sup>5</sup> Canajetsipa rajane. Nexata matamopitsipa trescientos padenariobeje matatoxenetsia. Bajarapapalata rajutsipa bepejiobivi bajarapacuenia peyavenonaenexa, najai tsenae ëpamonae.

Bajarapamonae anaepana bajarapovajavabelia.

<sup>6</sup> Nexata Jesús jumaitsi bajarapamonaejavabelia:

—¿Detsa xuajitsia bajarapacuenia pajumaitsimë bajarapova pexanaejava yabara? Mara povaje pexaniacuene nexanaje. <sup>7</sup> Daxitamatacabi raja bepejiobivi jinavanapa itsaxuayo pajinavanapame. Pamatacabi pajitsipame pexaniacuene panetoexanaenexa bepejiobivijavabelia, nexata patoexanaename. Itsiata baitsi jane xanë daxitamatacabi apo ponaponaenë tsane paxamëjavata. <sup>8</sup> Mara papetirivaje pexaniacuene netoexana pacuenia baja cuenecaëjëpatsi. Itsamonae petëpaejivi batsiperabëepana petuxujuviaceitera peperabëxaniavaetsinexa pemëthëtsivajënae. Bajara pijinia pacuenia mapovaje netsimataepana petuxujuviaceitera, abaxë apo tēpae atanë. Nexata baja bajarapova neperabëxaniavaeta itsamonae tanemëthëtsivajënae. <sup>9</sup> Xaniajanë pacuenia pacatsipaebijitsiatsi. Daxitanacuanëjava tajajivi itsa paebanajetarubenaena pexanialivaisi jivi tacapanepaelivaisinexa, vajunupaebabiabiananua pacuenia exana xanëjavaberena mapapetirivaje, jai Jesús pijajivijavabelia.

*Pacuenia Judas pona Jesús pijavajabitsaë pecobeyabelia pecanajetsinexatsi yabara pelivaisi*  
(Mt 26.14-16; Lc 22.3-6)

<sup>10</sup> Jesús pijajivi doce ponëbejeyajuvënënë pevënë Judas. Itsavënë Iscariote. Nexata Judas pona sacerdotevi penamatacaitorobivijavabelia. Jesús jane baja yajumejailiatsi pecanajetsinexatsi. Nexata jane baja Judas Jesús canajetatsi sacerdotevi penamatacaitorobivi pecobeyabelia. <sup>11</sup> Nexata sacerdotevi penamatacaitorobivi itsa tane bajara-pacuene, barëya. Jumaitsi bajarapamonae Judasjavabelia:

—Palata pacarajutsianatsi, jai.

Nexata jane baja xuacujinae Judas Jesús naitaxutocaevetaponaponatsi. Nexata paepa-tota Judas toyapëxanepanatsi, perajutsinexa jane baja bajarapamonae pecobeyabelia.

*Pacuenia Jesús barë nabane pijajivi pecopiarutsinabani baja pebeyaxuabivajënaetsi yabara pelivaisi*

(Mt 26.17-29; Lc 22.7-23; Jn 13.21-30; 1 Co 11.23-26)

<sup>12</sup> Junua jane baja fiesta, pafiestajava judíovi baxane levadurata matajërëabinejeva pexanaepan. Bajarapamatacabi ovejaxi babia pexaenexa pascua fiestamatacabi. Nexata Jesús yanijobatsi pijajivi.

—¿Detsa belia paponae najë patacamitsaexanaenexa pascua fiestamatacabi pexaejava nexaenexa? jai Jesús pijajivi.

<sup>13</sup> Nexata Jesús itoroba anijanëbeje pijajivitonëbeje. Jumaitsi:

—Tomarabelia paponarebeje. Bajarajotalia pacaxitajarabianamebeje mera canalito pecanajetarucaenë. Bjaraponë papënanajetarucaenamebeje. <sup>14</sup> Pabota bajaraponë joneyojopaena, bajarapabo pexainaenëjavabelia pajumaitsimëbeje tsane: “Vajanacacujarubinë raja jumaitsi: ‘¿Detsa jota pënëyatuucutsibo eca, pabota tajajivi barëxaejitsianë xua jivi baxane pascua fiestamatacabi?’ jai raja vajanacacujarubinë,” pajamëbeje tsane bajarapabo pexainaenëjavabelia. <sup>15</sup> Nexata athëbëabetsia anijairabeje pënëyatuucutsibojavata, pacatsitajëtsianabeje. Bajarapaboënëta athëbëyotsia paira ayaiënëtuatuajë tsane. Daxitacuene bajarajota xainaena. Nexata vajaxaejavanexa bajarajotatsia paexanaenamebeje, jai Jesús pijajivitonëbejejavabelia.

<sup>16</sup> Nexata jane baja ponabeje Jesús pijajivitonëbeje. Patabeje baja tomarabelia. Caxitajarababeje daxita pacuenia Jesús jumaitסיםibeje. Nexata xua jivi baxane pascua fiestamatacabi daxita Jesús pijajivi pebarëxaenexa, bajaraponëbeje exanabeje jane baja.

<sup>17</sup> Itsa baja meravitsia, Jesús patajopa bajarajota pijajivi, doce ponëbeje, yajava.

<sup>18</sup> Daxita mesata pexaeyenaevjavata, Jesús jumaitsi pijajivijavabelia:

—Xaniajanë pacuenia pacatsipaebijitsiatsi. Caenë paxamëyajuvënënë, xanëjavata pexaeyecaenë, necanajetsiana tajavajabitsaë pecobeyabelia, jai Jesús.

<sup>19</sup> Nexata Jesús pijajivi bejamatabëjireca. Nexata Jesús pijajivi, caenë canacujitsia, Jesúsjavabelia yanijobapona.

—¿Xanë tsaja tsane? jai tsaponae Jesús pijajivi.

<sup>20</sup> Nexata Jesús jumaitsi pijajivijavabelia:

—Doce paponëmëbejeyajuvënënë raja. Ponëbeje peneta caecuenia panajuacajabut-sianajëbeje panbë platojavabelia, bajaraponë tsane. <sup>21</sup> Nexata xanë, Daxitajivi Pematapijinënë, tēpaenajë pacuenia baja cajena xanë yabara Dioso pejumelivaisibaxutota tajëvelia jumaitsi. Itsiata ponë tajavajabitsaë pecobeyabelia necanajetsiana, bajaraponë bitso bejiobi tsane pinijicuenia. Itsa meta bajaraponë apo naexanae tsipae, bajarapacuenia apo necanajetsi tsipae. Nexata xanepanaejitsipatsi bajaraponë itsa apo naexanae tsipae. Tsipaji apo naneconitsi tsipae Diosojavabelia, jai Jesús pijajivijavabelia.

<sup>22</sup> Nexata pexaeyenaevjavata Jesús pita panbë. Jesús jumaitsi Diosojavabelia:

—Pexaniacuene panetoexaname. Panerajutame pan, jai.

Bajaraxuacujinae epatsënëquejeba bajarapapanbë. Rajuta pijajivi. Jesús jumaitsi pijajivijavabelia:

—Paxaema. Mara tavitoje, jai.

<sup>23</sup> Bajaraxuacujinae icatsia Jesús copavënëjavata yapita pijajivi pebarëapaeranexa. Diosojavabelia jumaitsi:

—Pexaniacuene panetoexaname. Panerajutame maporaje, jai.

Bajaraxuacujinae pijajivi bajarapora rajuta. Daxita Jesús pijajivi bajarapora apa.

<sup>24</sup> Jesús pijajivijavabelia jumaitsi:

—Tajana raja othopaena jivi ayaibitsaëtoxaneto pecapanepaenexatsi. Nexata tatëpaejava pejamatabëcueneta, jivi yapëtaena pepacuene xaniajai Dioso jivi pecapanepaejavanexa, pacuenia baja cajena tajëvelia Dioso najumecapanepaeya jumaitsi. <sup>25</sup> Xaniajanë pacuenia pacatsipaebijitsiatsi. Xanë rabaja matavëjëa apo apaenë tsane uvacuaira

mapanacuataje, matapania icatsia apaenajë Dioso pijanacuatatsia pejanauvacuaira, jai Jesús pijajivijavabelia.

*Pacuenia Jesús tajëvelia jumaitsi Pedrojavabelia: “Pedro, xamë raja nayavajunuaxainaename tajajivitonëcuenemë,” jai, yabara pelivaisi*

*(Mt 26.30-35; Lc 22.31-34; Jn 13.36-38)*

<sup>26</sup> Jesús pijajivi barëanaxëana Diosojumevajianë. Bajaraxuacujinae Jesús pijajivi barëpona petsutojumabelia. Patsutojumata olivonaenë apaaxayo, bajarapatsutojumabelia barëpona. <sup>27</sup> Nexata bajarapatsutojumata Jesús jumaitsi pijajivijavabelia:

—Daxita raja paxamë ajena, pameravi, panexuabarëcëpecaename. Tsipaji rabaja patanexuabarëcëpecaejavanexamë yabara, Dioso pejumelivaisibaxutota tajëvelia jumaitsi mapacueniaje: “Beyaxuabianatsi raja oveja pevetsinë. Nexata pijaovejabit-saëto nacayajatsia rëcëpecaena,” jai Dioso pejumelivaisibaxutota paxamë patanexuabarëcëpecaejavanexamë yabara. Nexata ajena, pameravi, tajavajabitsaë itsa nevaetabiana tanebeyaxuabinexa, daxita paxamë panexuabarëcëpecaename. <sup>28</sup> Itsiata baitsi jane tatëpacujinae icatsia asaënë tsane. Nexata paxamë panevajënaeyabelia copiata ponaenajë Galilea nacuyabelia, jai Jesús pijajivijavabelia.

<sup>29</sup> Nexata Pedro jumaitsi Jesúsjavabelia:

—Daxita mapamonaeye caxuabarëcëpecae ata tsane, xanë cajena apo caxuabatabajiravi tsanetsi, jai Pedro.

<sup>30</sup> Nexata Jesús jumaitsi Pedrojavabelia:

—Xaniajanë pacuenia catsipaebijitsiatsi. Ajena rabaja, pameravi, nanianaevëpata, anijajumebeje vacara pefiabivajënaeya, nayavajunuaxainaename tajajivitonëcuenemë. “Apo yapëtaenë cajena bajaraponë,” jamë tsane xanë yabara acueyabi xuabeje, jai Jesús Pedrojavabelia.

<sup>31</sup> Itsiata Pedro ajumesaëya jumaitsi Jesúsjavabelia:

—Nebeyaxuabijitsia ata tsane xamë yajava, itsiata cajena apo nayavajunuaxainaenë tsane nijajivitonëcuenenë, jai Pedro Jesúsjavabelia.

Daxita Jesús pijajivi bajarapacuenia jumaitsi.

*Pacuenia Jesús vajëta Diosojavabelia Getsemanívënëjavata yabara pelivaisi*

*(Mt 26.36-46; Lc 22.39-46)*

<sup>32</sup> Jesús, pijajivi yajava, pata Getsemanívënëjavata. Bajarajota Jesús jumaitsi pijajivijavabelia:

—Paneevetenare abaxë majotaje tavajëtsiepatoyo Diosojavabelia, jai.

<sup>33</sup> Nexata Pedro, Santiago, Juan, bajara saya pamatabëxëyo, Jesús barëpona pesaicaeyojavabelia. Bajaraxuacujinae Jesús bitso najamatabëxaina. Nexata bejamatabëjiobireca.

<sup>34</sup> Nexata Jesús jumaitsi pijajivi acueyabi ponëbejejavabelia:

—Xanë bitso pinijicuenia najamatabëxainajë. Nexata tanajamatabëxainaejava yatëpaejitsianë. Paxamë abaxë majotaje panacopabare. Paitavamë tsane. Pëtsa pamajitame, jai Jesús pijajivi acueyabi ponëbejejavabelia.

<sup>35</sup> Nexata Jesús, caenë, pevajënaeyabelia icatsia tsiquirijavayo ponataba. Tsipaji Jesús tajëvelia yapëtane pacuenia Dioso tocopatatsi bitso ayaicuenia pebejiobiaexanaenexatsi paepatota pijavajabitsaë beyaxuabijitsiatsi. Nexata Jesús irataeya bocajunua pevajëtsinexa Diosojavabelia. Vajëta picani Diosojavabelia bitso bejiobitsiaya pebeyaxuabiyaniavatsi. <sup>36</sup> Nexata Jesús pevajëtsijavata Diosojavabelia, jumaitsi:

—Taxa Diosomë, netocopatame picani tanebeyaxuabinexa betajibicueneta. Daxitacuene raja cacaëjëpa nexanaenexa. Nexata necapanepare bajarapabejiobicuenevecua. Itsiata xanë apo tajitsipaecuene ata, pacuenia xamë jitsipame, netocopatsianame, jai Jesús pevajëtsijavata Diosojavabelia.

<sup>37</sup> Bajaraxuacujinae Jesús naviarena acueyabi ponëbeje pijajivijavaberena. Caxitaraba Jesús pijajivi pemajitanubenaevi. Nexata Jesús jumaitsi Pedrojavabelia:

—Simón, ¿pamajitanubename tsaja? ¿Apo pacacaējēpae tsabaja rovia caeepatoyo ata paneaitavatsenaenexa? <sup>38</sup> Pětsa pamajitame. Paitavamēre. Pavajēre Diosojavabelia pibisiacuene paneexanaeyaniva. Tsipaji raja dovathi pacajamatabēcuenējēbiana. Paxamē picani panejamatabēcueneta pexaniacuene jamatabēpaexanabiabame. Itsiata baitsi jane apo pajamatabēcuenesaēmē pexaniacuene paneexanaenexa, jai Jesús Pedrojavabelia.

<sup>39</sup> Nexata icatsia Jesús pona pecovēyabelia pevajětsinexa icatsia Diosojavabelia. Bajara icatsia pacuenia Jesús vajēta Diosojavabelia pacuenia vajēta copiata. <sup>40</sup> Icatsia Jesús naviarena pijajivijavaberena. Caxitajaraba icatsia Jesús pijajivi pemajitanubenaevi. Tsipaji baja Jesús pijajivi bitso itamajitsipana. Nexata Jesús pijajivi apo yapētae pacuenia jumecanaviatsijitsia Jesúsjavabelia. <sup>41</sup> Icatsia abaxē Jesús naviata pecovēyabelia pevajětsinexa icatsia Diosojavabelia. Bajaraxuacujinae, acueyabi baja xuabeje pevajětsicujinae, Jesús icatsia rena pijajivijavaberena. Jumaitsi Jesús pijajivijavabelia:

—¿Abaxē tsarovia tsiteca pamajitanubename? Ajibi rabaja. Copiapata rabaja paepatota xanē, Daxitajivi Pematapijinēnē, necanajetsijitsia pibisiacuene pexanaevi pecobeyabelia. <sup>42</sup> Panonobapunare baja. Ponaenatsi baja. Imoxoyo rabaja najetaruca tajavajabitsaē pecobeyabelia tanecanajetsinēnexa, jai Jesús pijajivijavabelia Judas yabara.

*Pacuenia Jesús vaetabatsi pijavajabitsaē yabara pelivaisi*  
(Mt 26.47-56; Lc 22.47-53; Jn 18.2-11)

<sup>43</sup> Jesús pijavajabitsaē pevaetabijavatnaxatsi, cuaicuaijai tsanucac pijajivijavabelia. Nexata bajarapaepatota patanajetaruca Judas, Jesús pijajivi doce ponēbejeyajuvēnēnēmi. Judas pēnanajetarubenatsi jivi ayaibitsaētoxaneto. Bajarapamonaeyajuvēnēvi itsamonae canajetarubena espadanē. Itsamonae canajetarubena naebonē yajava. Bajarapamonaē itorobatsi sacerdotevi penamatacaitorobivi, judíovi pecujarubivi ata, judíovi pijaancianovi ata. <sup>44</sup> Judas pebarērenavajēnae bajarapamonaē, copiaya baja cajena Judas tsipaeba pacuenia bajarapamonaē yapētaejitsia Jesúsacuene. Judas jumaitsi mapacueniaje:

—Ponē raja peneta bajacobiaya itabaratsutsunexuabianajē, bajaraponē Jesús tsane. Bajaraponē pavaetabianame. Pacobecētsianame xaniavaetsia. Nexata panecobecētsinē pacaponaeremena, jai baja cajena Judas pematacanajetarucaevijavabelia pebarērenavajēnae.

<sup>45</sup> Nexata jane baja Judas itsa patanajetaruca, exana pacuenia baja cajena jumaitsi pematacanajetarucaevijavabelia. Judas Jesús itabaratsutsuniaya bajacobatsi, Judas jane baja pematacanajetarucaevi peyapētaenexa Jesúsacuene. <sup>46</sup> Nexata jane baja Jesús pijavajabitsaē vaetabatsi. Cobecētatsi xaniavaetsia.

<sup>47</sup> Bajarajota Jesús pijajiviyajuvēnēnē pijaespada navemarajonotaxuabina. Muxuyoropaebiaxuaba sacerdotevi pepo penamatacaitorobinē pijajivitonē. <sup>48</sup> Nexata Jesús jumaitsi pevaetabivitsijavabelia:

—Paxamē meta panetaneme betanacobetoxotsinē. Bajaraxuata pacaponame espadanē, naebonē yajava, patanevaetabinexamē pacuenia pavaetababiabame penacobetoxotsinē. <sup>49</sup> Xanē caematacabi canacujitsia Dioso pejumelivaisi paxamējavabelia pacatsipaebabiabatsi templobota. Itsiata bajarapamatacabi apo panevaetabimē. Mara pacuenia panevaetabameje tanetocopiapatsixae baja pacuenia Dioso pejumelivaisibaxutota bajayata tajēvelia jumaitsi xanē yabara, jai Jesús pevaetabivitsijavabelia.

<sup>50</sup> Nexata jane baja Jesús pijavajabitsaē pevaetabijavatatsi, daxita Jesús pijajivi xubarēcēpecatsi pacuenia baja cajena Jesús jumaitsi tajēvelia pijajivijavabelia.

*Pacuenia pevějēato najetabajirava yabara pelivaisi*

<sup>51</sup> Pevějēato pēnanajetaruca Jesús pecaponaevitsi. Sábanata namataquinanajetaruca. Nexata pevějēato bajarapamonaē yasábanavaetabatsi. <sup>52</sup> Nexata pevějēato sábananaisinaxuaba. Najetabajirava jumasanē.

*Pacuenia Jesús nutatsi judíovi penamatacaitorobivi pitabarata yabara pelivaisi*  
(Mt 26.57-68; Lc 22.54-55, 63-71; Jn 18.12-14, 19-24)

<sup>53</sup> Jesús caponaliatsi sacerdotevi pepo penamatacaitorobinē pijaboyabelia. Nacaetuta bajarajota daxita sacerdotevi penamatacaitorobivi, judíovi pijaancianovi ata yajava, judíovi pecujarubivi ata yajava. <sup>54</sup> Itsa baja Jesús caponaliatsi, nexata Pedro bajarapamonae pecovëya tajíyo najetaruca. Sacerdotevi pepo penamatacaitorobinē pijabo matatoyorotsia yacaranata ibopanaxanetonē, mataropotsia pefaratsijavaxanetota. Nexata bajarapayacaranatsijavaxaneto baupa, Pedro najoneya bopanabojavabelia, itsabelia Jesús cajunuatsi. Nexata sacerdotevi pepo penamatacaitorobinē pijabopanabota, Pedro nanonopeca isoto muxuneneta templobopijipolicíavita.

<sup>55</sup> Nexata bajarapabo ënëtuatuajëta sacerdotevi penamatacaitorobivi, judíovi pijaancianovi ata yajava, judíovi pecujarubivi ata yajava, nabarëcuaiçuaijai. Bajarapamonae nayanijoba.

—¿Jipatsa yapëtane Jesús pibisiacuene pexanaejava, paneconi yabara beyaxuabijitsiatsi? najai tsaponae.

Itsiata bajarapamonae apo caxitajarabi itsaneconi ata Jesús pijaneconi. <sup>56</sup> Itsamonae saya penajumetsënëtsilivaisi paeba Jesús yabara. Itsiata caelivaisi najuapaebi ata, najumejëpaeya apo paebi bajarapamonae. <sup>57</sup> Itsamonae nonobapuna. Penajumetsënëtsilivaisi paeba Jesús yabara. Penonobapunaeviyajuvënënë jumaitsi mapacueniaje:

<sup>58</sup> —Paxanë raja, pamatabëxëyo panubenajë majotaje, pajumetaniji Jesús pejumatsijava. Bajaraponë jumaitsi: “Xanë raja xuabianicajë mapatemploboje, jivi pexanaebo. Acueyabi matcabita icatsia itsabo veretetsianajë. Jivi apo pexanaebo tsane,” jai maponë Jesúsje, jai penonobapunaeviyajuvënënë.

<sup>59</sup> Itsiata daxita bajarapamonae najumejëpaeya apo paebi.

<sup>60</sup> Nexata jane baja sacerdotevi pepo penamatacaitorobinē nonotapuna bajarapamonae pitabarata. Nexata jumaitsi Jesúsjavabelia:

—¿Apo yapëtaemë tsaja itsalivaisiyo ata nejumecanaviatsinexa? ¿Xaniajai tsabaja pacuenia mapamonae caneconitsiajumaitsi? jai Jesúsjavabelia sacerdotevi pepo penamatacaitorobinē.

<sup>61</sup> Jesús itsiata moya. Apo jumepitsi cajena. Nexata icatsia sacerdotevi pepo penamatacaitorobinē jumaitsi Jesúsjavabelia:

—¿Xamë tsabaja pepacuene Cristomë, athëbëvetsica Dioso pecaitorobinëtsica jivi necapanepaenexa? ¿Xamë tsaja, Dioso pexënatomë? jai.

<sup>62</sup> Nexata Jesús jumaitsi bajaraponëjavabelia:

—Jājā, xanë rabaja. Paxamë raja panetaename, Daxitajivi Pematapijinënë, taecaejava Dioso pecujuanenia, daxitajamatabëcuene pecajëpaenëtsi. Panetaenamenua tanajetarucaejava athëbëvetsica itarërëbota, jai Jesús.

<sup>63</sup> Bajarapacuenia Jesús pejumatsijava itsa jumetane, sacerdotevi pepo penamatacaitorobinē penaxatatsijava anaeya titinaxuaba. Bajarapacuenia titinaxuaba pi-anaepanaexae Jesús pejumatsijava yabara. Nexata sacerdotevi pepo penamatacaitorobinē jumaitsi daxita penacaetuatsivijavabelia:

—Pijacuata rabaja pejumatsijumeta naneconita. Pematatsënëa apo namatavenonaetsi itsamonae vajanacatsipaebinexa paneconi yabara maponëje naneconitsiaexanaejitsiatsi. <sup>64</sup> Paxamë rabaja pajumetaneme maponëje Dioso apo pejitsipaecuenia pecuaicuaiçuaijava. Tsipaji Dioso bepexënato nataeya cuaicuaiçuaijai. ¿Detsa nexata paxamë pajamatabëtsimë? jai sacerdotevi pepo penamatacaitorobinē daxita penacaetuatsivijavabelia.

Nexata daxita penacaetuatsivi jumaitsi:

—Naneconita rabaja Diosojavabelia. Nexata baja beyaxuabianatsi, jai bajarapamonae Jesús yabara.

<sup>65</sup> Nexata bajarapamonaeyajuvënëvi Jesús itabarasuabatsi. Bajaraxuacujinae pa-paëbërëpanata itaxutocëtatsi. Pitaxutocëtsicujinaetsi itabaratsaquibabeponatsi pecobethaitonëta. Nexata bajarapamona jumi tsaponae Jesúsjavabelia:

—¡Vënëjonare ponë caitabaratsaquibabepona! jai tsaponae bajarapamona.  
Bajaraxuacujinae templobopijipolicíavi itabarapacabiauxuabatsi Jesús.

*Pacuenia jane baja Pedro nayavajunuaxaina Jesús pijajivitonëcuene yabara pelivaisi*  
(Mt 26.69-75; Lc 22.56-62; Jn 18.15-18, 25-29)

<sup>66</sup> Itsa abaxë Jesús sacerdotevi pepo penamatacaitorobinë pijabo ënëtuatuajëalia yanijobaponatsi xua yabara naneconitsiaexanaejitsiatsi, Pedro naitaxutocaevetsiaya naeca bopanabota. Nexata bajarajota taeyetatsi petiriva, sacerdotevi pepo penamatacaitorobinë pijabota penacuenebiva. <sup>67</sup> Bajarapova Pedro taeyetatsi penanonopecaejavata. Nexata bajarapova naitaxutobabatsia asaëya taenucatsi Pedro. Jumaitsitsi:

—Xamë ata rabaja naponaponame Jesússta, Nazaret tomarapijinëta, jaiti.

<sup>68</sup> Nexata Pedro itsiata nayavajunuaxaina Jesús pijajivitonëcuene. Nexata Pedro jumaiti bajarapovajavabelia:

—Jume raja. Apo yapëtaenë cajena bajaraponë. Apo yapëtaenë pacuene yabara nejumaitisimë, jai Pedro.

Bajaraxuacujinae Pedro pejonebaupajavaverenajavabelia natixilia. Nexata vacara fiaba. <sup>69</sup> Icatsia bajarapova Pedro tanetsi. Nexata pamonae bajarajota nubena, bajarapamonaejavabelia bajarapova jumaiti:

—Mara ponëje Jesús pijajiviyajuvënënëje, jai bajarapova Pedro yabara.

<sup>70</sup> Icatsia nexata Pedro jumaiti:

—Jume raja. Apo yapëtaenë cajena bajaraponë, jai.

Bajaraxuacujinae, icatsia caepatoyocujinae, bajarajota penubenaevi Pedro jumaitisitsi:

—Xaniajai raeta baja cajena. Xamë Jesús pijajiviyajuvënënëmë. Tsipaji rabaja Galilea nacuapijinëmë. Galilea nacuapijivi pecuacuaijaicuenia cuaicuaijamë, jaiti.

<sup>71</sup> Nexata Pedro pejumexaniataenexatsi, ajumesaëya jumaiti:

—Itsa apo xaniajanë tsipae paxamëjavabelia, nexata Diosojavabelia naneconitsipajë. Apo yapëtaenë cajena ponë yabara panejumaitisimë, jai Pedro.

<sup>72</sup> Itsa baja Pedro najumevereta bajarapacuenia pejumaitisijava, vacara icatsia fiaba. Nexata bajarajota Pedro najamatabënapitajaraba pacuenia Jesús jumaitisitsi: “Anijajumebeje vacara pefiavivajënaeya, nayavajunuaxainaename tajajivitonëcuenëmë. ‘Xanë cajena apo yapëtaenë bajaraponë,’ jamë tsane xanë yabara acueyabi xuabeje,” pejavatsi Jesús, Pedro najaaraba. Nexata bajarajota Pedro bitso najamatabëxaina Jesús pejumaitisijumetsi yabara. Pedro nexata nua.

## 15

*Pacuenia Jesús nutatsi Pilato pitabarata yabara pelivaisi*  
(Mt 27.1-2, 11-14; Lc 23.1-5; Jn 18.28-38)

<sup>1</sup> Ajena baja matabi tsarucaponae, sacerdotevi penamatacaitorobivi, judíovi pijaancianovi ata yajava, judíovi pecujarubivi ata yajava, nacaetuata. Icatsia pematatsënëa itsamonae bajarapitsijamatabëcuenevi yajavanacaetuata penabarëcuacuaijainexa. Bajaraxuacujinae bajarapamonae Jesús cobecëtsiaya caponaliatsi nacuaevetsinë Pilatojavabelia. <sup>2</sup> Nexata Pilato yanijobatsi Jesús.

—¿Xamë tsaja judíovi pepo nevetsinë? jaiti.

Nexata Jesús jumaiti Pilatojavabelia:

—Jãjã, xanë rabaja pacuenia nejumaitisimë, jai Jesús Pilatojavabelia.

<sup>3</sup> Sacerdotevi penama itsamonae bajarapitsijamatabëcuenevi yajtacaitorobivi jumaiti Pilatojavabelia:

—Jesús raja bitso pibisiacuene exanabiaba, jai.

<sup>4</sup> Nexata icatsia Pilato yanijobatsi Jesús.

—¿Itsalivaisiyo ata tsaja apo yapëtaemë nejumecanaviatsinexa? ¿Apo jumetaemë mapacuenia pecaneconitsijavaje? jaitsi.

<sup>5</sup> Itsiata Jesús matavëjëa apo jumepitsi Pilatojavabelia. Bajaraxuata Pilato apo yapëtae pacuenia exanaejitsia Jesúsjavabelia.

*Pacuenia baja Pilato tocopata Jesús pebeyaxuabinexatsi yabara pelivaisi*  
(Mt 27.15-31; Lc 23.13-25; Jn 18.38-19.16)

<sup>6</sup> Nacuaevetsinë Pilato xaina pijacujirucuen. Caevai canacujitsia, pascua fiestamat-acabi, Pilato copatabiaba caenë penaneconitsinë pepitsapaenexa penaneconitsivi peje-babiabibovecua. Pajivi yabara jivi Pilatojavabelia vajëcabiaba, Pilato nexata copatabiaba bajarapajivi pascua fiestamatacabi. Bajarapacuenia Pilato caenë copatabiaba jivi pesiva-jamatabëcuene xanepanaenexatsi. <sup>7</sup> Pamatacabi Jesús naneconitsiaexanatsi, bajarapa-matacabi Barrabásvënënë jivi pebarëbevi barënaneconitsiaponapona penaneconitsivi pejebabiabibota. Barrabás, itsamonae yajava, barënabia picani gobierno pijajivijavabelia. Nexata taicatsi. Naneconitsiaexanejebatsi penaneconitsivi pejebabiabibota. <sup>8</sup> Nexata jivi pona Pilatojavabelia. Jumaitsi bajarapamonae Pilatojavabelia:

—Pacuenia pascua fiestamatacabi copatabiabame caenë pepitsapaenexa penaneconitsivi pejebabiabibovecua, bajarapacuenia panetocopare caenë pepitsapaenexa penaneconitsivi pejebabiabibovecua, jai bajarapamonae Pilatojavabelia.

<sup>9</sup> Nexata Pilato jumaitsi bajarapamonaejavabelia:

—¿Pajitsipame tsaja patacatocopatsijava pepitsapaenexa Jesús, pajudíovimë pepo papecaevetsinë? jai Pilato.

<sup>10</sup> Bajarapacuenia Pilato jumaitsi tsipaji yapëtane pajamatabëcuene yabara sacer-dotevi penamatacaitorobivi tocaponarenatsi Jesús. Pilato jamatabëcuenyapëtane sacerdotevi penamatacaitorobivi Jesús pecueneitoyaxaetsi petocaponaejavatsirena.

<sup>11</sup> Nexata bajarapamonae asaëya vajëca Barrabás pecapitsapaenexatsi. Tsipaji baja cajena sacerdotevi penamatacaitorobivi muxubijiapenetsia jumaitsi jivijavabelia:

—Asaëya pavajëcaename Barrabás pecopatsinexatsi. Nexata Barrabás copatsianatsi pepitsapaenexa penaneconitsivi pejebabiabibovecua. Pëtsa pavajëcame Jesús pecopatsinexatsi, jai baja cajena sacerdotevi penamatacaitorobivi jivijavabelia.

<sup>12</sup> Nexata icatsia Pilato yanijoba jivijavabelia:

—¿Detsa nexata xua pajitsipame taexanaenexa maponëjavabeliaje: “Judíovitsi pepo vajanacaevetsinë,” paneyabarajainëjavabelia? jai Pilato judíovijavabelia Jesús yabara.

<sup>13</sup> Nexata bajarapamonae vavajai pinijijumeta.

—¿Cruzajavabelia cobematabiabarutsiaexanare! jai Pilatojavabelia.

<sup>14</sup> Nexata Pilato jumaitsi bajarapamonaejavabelia:

—¿Detsa pitsineconi yabara nexata cobematabiabarutsiaexanaejitsipajë? jai Pilato Jesús yabara.

Itsiata bajarapamonae icatsia pinijijumeta vavajai.

—¿Cruzajavabelia cobematabiabarutsiaexanare! jai tsaponae.

<sup>15</sup> Nexata baja Pilato tocopata Barrabás pepitsapaenexa penaneconitsivi pejebabi-abibovecua jivi barajamatabëcuene xanepanaeya petaenexatsi. Nexata Pilato pijajivi, vajabitsaëvi, itoroba copiaya Jesús ayaicuenia pejumatitibabenexatsi penaneconitsivi pejumaconitabiabimacata. Bajaraxuacujinae Pilato tocopata baja Jesús vajabitsaëvi pecobematabiabarutsinexatsi cruzajavabelia.

<sup>16</sup> Nexata baja vajabitsaëvi Jesús caponaliatsi nacuaevetsinë Pilato pijaboxaneto-javabelia. Nexata bajarajota nacaetuata daxita vajabitsaëvi. <sup>17</sup> Bajaraxuacujinae Jesús quenetsiataeya xatatatsi peraënaetsautsaucaejava. Xua nacuaevetsinë banax-atata, bajaraxua xatatatsi benacuaevetsinëcuenia petaenexatsi. Coronacuenia pematax-atatsinexatsi, peejuvitoyoroto tsimataexanatsi. Bajarapatoyoroto Jesús mataxatatatsi.

<sup>18</sup> Bajaraxuacujinae quenetsiataeya bajacobaponatsi.

—¿Bajaco, judíovi pepo pevetsinë! jai tsaponae bajarapamonae Jesúsjavabelia.

<sup>19</sup> Bajarapamonae caenë canacujitsia mataconibiaxuabaponatsi naebota. Suabaponatsinua. Beyaiyataeya itajara pematabacabëta tonubenajoneyabiabatsi Jesús pitabarata. <sup>20</sup> Jesús quenetsiataeya pecapocaponaecujinaetsi, vejumajonotatsi baja xua xatatatsi, peraënaetsausaucaejava. Jesús baja icatsia xatatatsi penaxatatsijava. Caponaliatsi jane baja pecobematabiabarutsinexatsi cruzajavabelia.

*Pacuenia jane baja Jesús cruzajavabelia cobematabiabarutatsi yabara pelivaisi*

*(Mt 27.32-44; Lc 23.26-43; Jn 19.17-27)*

<sup>21</sup> Alejandrobeje Rufobeje paxa, Simónvënë, Cirene tomarapijinë. Nexata Simón najetaruca vayafotusatojavaverena. Nexata vajabitsaëvi Simón junatatsi, pacruzajavabelia Jesús cobematabiabarutsijitsiatsi, peyavenonaeyacaponaenexa.

<sup>22</sup> Caponaliatsi Jesús Gólgotavënë tsutojavabelia. “Gólgota,” itsa jai hebreojumeta, mapajumetaje pejumaitsijume: “Jivimatasipatsuto,” pejaijume. <sup>23</sup> Bajarajota picani Jesús rajutatsi vinora piapaenexa, pematajërëabira mirravënëjavata, bitso penavixae-taeyaniva pecobematabiabiavatatsi cruzajavabelia. Itsiata Jesús apo apae. <sup>24</sup> Nexata jane baja Jesús vajabitsaëvi cobematabiabarutatsi cruzajavabelia. Bajaraxuacujinae vajabitsaëvi bajarajota canamuxusita beibotoxi. Bajarapacuenia canamuxusita peyapëtaenexa ponë pitaponaejitsia caejava canacujitsia Jesús penaxatatsijavami, xua jumaponapona. Bajarapacuenia vajabitsaëvi natsicobetsana Jesús penaxatatsijavami.

<sup>25</sup> Bajayacunuaepatota, a las nueve, Jesús cobematabiabarutatsi cruzajavabelia. <sup>26</sup> Bajarajota Jesús pematabocoto matatsënëyo yaquinaruta tablapayota itsamonae ata peyapëtaenexa pajamatabëcuene yabara Jesús cobematabiabarutatsi cruzajavabelia. Jumai tsarutsi peyaquinarutsiitane cruzajavata mapacueniaje: “Mara ponëje judíovi pepo pevetsinëje,” jai tsarutsi Jesús yabara. <sup>27</sup> Anijanëbeje penacobetoxotsinëbeje, Jesús yajavacobematabiabarutatsi. Caenë canacujitsia pijacruzata rubatsi. Bajara-ponëbeje Jesús pemuxuneneta rutatsibeje. Itsanë Jesús pecujuanenia rutatsi. Itsanë Jesús petsavenonenia rutatsi. <sup>28</sup> Bajarapacuenia Jesús itsa yajavacobematabiabarutatsi penacobetoxotsinëbeje, nexata Jesús tocopiapatatsi pacuenia baja cajena Dioso pejumelivaisibaxutota tajëvelia jumaiatsi Jesús yabara. Dioso pejumelivaisibaxutota tajëvelia jumaiatsi Jesús yabara mapacueniaje: “Naneconitsiaexanaenatsi bepibisiacuene pexanaenëcuena,” jai baja cajena tajëvelia Dioso pejumelivaisibaxutota Jesús yabara.

<sup>29</sup> Jesús pecobematabiabarutsijavatatsi cruzajavabelia, bajaraxuayo penajetarubenaevi Jesús itaropitsiaya bijataeyabiabatsi. Jumai tsabiabi bajarapamonae:

—Yiara jane maitsimëje. Xamë raja imata jumaitsimë: “Xuabianicajë templo. Acueyabi matababita icatsia veretetsianajë itsabo,” jamë. <sup>30</sup> Nacapanepare jane baja nijacuata. Cruzajavavetsica runaimica, jai tsabiabi Jesúsjavabelia bajaraxuayo penajetarubenaevi.

<sup>31</sup> Bajara pijinia pacuenia sacerdotevi penamatacaitorobivi, judíovi pecujarubivi ata, capocaponatsi Jesús. Ëpamonae najumaitsi:

—Maponëje itsamonae yabara jumai tsabiabi: “Capanepaenajë jivi,” jai tsabiabi. Caranata pijacuata penacapanepaenexa, apo cajëpaetsi. <sup>32</sup> Itsa xaniajai pepacuene Cristo, athëbëvetsica Dioso pitorobinëtsica jivi pecapanepaenexa, Israel nacuapijivi pepo pevetsinëxanua, aeconoxae runaenica cruzajavavetsica vajataenexa. Nexata jane baja jumecovënëtsianatsi Cristonëcuene, najai bajarapamonae capocaponaeya Jesús yabara.

Ponëbeje ata Jesús yajavacobematabiabarutatsi, bajaraponëbeje ata, Jesús bijataerucatsibeje.

*Pacuenia baja Jesús tēpa yabara pelivaisi*

*(Mt 27.45-56; Lc 23.44-49; Jn 19.28-30)*

<sup>33</sup> Jesús baja itsa tēpaejitsia, ajena matonejejitsia, daxita nacujava aitaquiri tsajuni. Matapania caniviyojavabelia, bejamatabëcuene a las tres, nacua napebeta icatsia. <sup>34</sup> Nexata icatsia paepatota nacua napebeta, bajarapaepatota pinijicuenia Jesús aëjai. Jumaitsi:

—Eloi, Eloi, ¿lama sabactani? jai Jesús.

Bajarapacuenia Jesús itsa jumaitsi pijajumeta, mapajumetaje pejumaitsijume: “Taja-Dioso, tajaDioso, ¿detsa xuajitsia baja tajaepato necopatame?” pejajijume.

<sup>35</sup> Nexata itsamonae bajarajota penubenaevi bijiaya jumetane bajarapacuenia Jesús pejumaitsijava. Nexata saya jamatabëcuenenavëxaniabiaya jumaitsi bajarapamonae:

—Jica, pajumetaema. Mara ponë junata profeta Elíaspijinëmije, Diosojumepaebinëmi, jai bajarapamonae.

<sup>36</sup> Nexata bajarapamonaeajuvënënë piajatuvinorayalia bepijia jabutaxuaba esponjavënëjva. Bajaraxuacujinae esponjavënëjva naeboupita cëtaruta. Toyotsiatsi picani Jesús petsutsuninexa bajaraxua. Ponë picani Jesús toyotsiatsi bajaraxua petsutsuninexa, bajaraponë jumaitsi penajuanubenaevijavabelia:

—Bajarapacuenia abaxë copatarutatsi Jesús. Taenatsi Elíaspijinë itsa najetaruca cruzavecua penutsinexatsitsica Jesús, jai bajaraponë capocaponaeya.

<sup>37</sup> Jesús icatsia pinijicuenia aëjai. Bajaraxuacujinae jane baja Jesús tëpanajereca.

<sup>38</sup> Paepatota Jesús tëpanajereca, bajarapaepatota templobo ënëtuatujëalia peyatuu-cutarutsipana, ayaipapaëbërëpanaxaneto, titititica tuatujëareca, athëbëvetsicacujinae irabereca. <sup>39</sup> Nexata paepatota Jesús tëpanajereca, vajabitsaëvi pijacapitán Jesús pitabara canacujitsialia nuca. Nexata bajaraponë taenuca Jesús pinijicuenia peaëjaijva. Taenucanua Jesús petëpanajetsijavareca. Nexata vajabitsaëvi pijacapitán jumaitsi:

—Matsaena ponë tëpaje, pepacueña baja rovia Dioso pexënato, jai.

<sup>40</sup> Bajarajota petiriavibitsaëtoxaneto tajijoverena taenubena Jesús petëpaejva. Bajarapapetiriavi tuatujëta nanubena mapamatabëxëyoje. Itsava Maríavënëva, Magdala tomarapijiva. Itsava Salomévenëva. Itsava icatsia Maríavënëva. Bajarapova Santiagobeje Josébeje pena. Bajaraponë Santiago, pevëjëato abaxë itsanë Santiagovënëvecua.

<sup>41</sup> Pamatacabi abaxë Jesús ponapona Galilea nacuata, bajarapapetiriavi Jesús pënanavanapatsi peyavenonaenexatsi. Papetiriavibitsaëtojavata Maríabana nanubena, bajarapapetiriavi ata Maríabana Jesús najuapënaponarena Galilea nacuaverena Jerusalën tomaraberena.

*Pacuenia Jesús petëpaenë mëthëtatsi yabara pelivaisi*

(Mt 27.57-61; Lc 23.50-56; Jn 19.38-42)

<sup>42-43</sup> José Arimatea tomarapijinë, judíovi pevetsinë, peyayataenëtsi. Bajaraponë José copiaevetaponapona pecopiapatsijava pamatacabi caenë Dioso evetsijitsia daxita pijajivi mapanacuataje. Judíovi baja penacueraevetsimatacabinexa pevajënaeya pamatacabi, caniviyotsia baja. Bajarapamatacabi judíovi banacuenevereta baja penacuenebijava. Nexata bajarapaepatota José acueneura ata, najamatabësaëta. Nexata lia nacuaevetsinë Pilatojavabelia. Nexata José vajëta Pilatojavabelia petocopatsinexatsi Jesús petëpaenë pemëthëtsinexa. <sup>44</sup> Nexata Pilato jamatabëjumaitsi:

—Xaniajai tsamë rabaja Jesús tëpa, jamatabëjai tsipaji abaxë bajayajebi Jesús apo rucae cruzajavabelia pecobematabiabarutsicujinaetsi.

Nexata Pilato junata vajabitsaëvi pijacapitán. Nexata Pilato yanijoba vajabitsaëvi pijacapitánjavabelia, Jesús petëpaecuene Pilato peyapëtaenexa. <sup>45</sup> Nexata vajabitsaëvi pijacapitán tsipaeba Pilatojavabelia.

—Jesús rabaja capanepaeya tëpa, jai.

Nexata jane baja Pilato José tocopatatsi cruzajavavetsica pepitsinexa Jesús petëpaenë. <sup>46</sup> Nexata José comuata pexaniavirasábana. Bajaraxuacujinae José jane baja cruzajavavetsica pitsica Jesús petëpaenë. Daxitanëreca mataquionaeya matacacëba pexaniaviria piapiasábanapanata. Bajaraxuacujinae itsajota cajena José iboitapajanitovavata pinijibovaju exanaeyaexanabuata petëpaevi pebuataponaenexa, bajarapaibovajualia José buata Jesús petëpaenë. Bajaraxuacujinae pinijibopanaxaneto José tixirena. Yavajuvëpaacatabuata. <sup>47</sup> María Magdala tomarapijiva, itsava pijinia María, José pena, bajarapovabeje tanebeje itsajota Jesús buatatsi petëpaenë.

## 16

*Pacuenia Jesús petëpaecujinae icatsia asaë yabara pelivaisi*  
(Mt 28.1-10; Lc 24.1-12; Jn 20.1-10)

<sup>1</sup> Judíovi baja penacueraevetsimatacabi itsa verevereca, acueyabi povamaxëto comuata petuxujuvira. Itsava Maríavënëva, Magdala tomarapijiva. Itsava Salomévenëva. Itsava icatsia Maríavënëva. Bajarapova Santiago pena. Bajarapamonae petuxujuvira comuata peperabëexabinexa picani Jesús petëpaenë. <sup>2</sup> Nexata baja judíovi penacueraevetsimatacabi itsa verevereca, meravia pitsijavata, ajena baja matacabi tsarucaponae, bajarapamonae ponalia Jesús pebuatsiibovajutsijavabelia. <sup>3</sup> Nexata bajarapamonae namutualia najumaitsi tsanajetarubena:

—¿Jipatsa meta nacatotixitsiana Jesús peyavajuvëpa acatabuatsiibopanaxanetotsi? najai tsanajetarubena bajarapamonae.

<sup>4</sup> Nexata bajarapamonae itsa imoxoyotabuatapona, naëcobarëcëpalia ibovajujavabelia. Nexata taeyabuata ibopanaxanetomi petixitabuatsijavalia ibovajuvëpavecua. Bajarapaibopana bitso pinijiibopanaxaneto. <sup>5</sup> Nexata petiriavi itsa joneya Jesús pebuatsiibovajutsijavalia, taeyeta pecuajuanenia pevëjëato. Bajaraponë naxatateca piapiajava penioponajava. Nexata petiriavi najunaviaca. <sup>6</sup> Nexata pevëjëato jumaitsi petiriavijavabelia:

—Pëtsa panajunaviacame. Paxamë picani pajaitame Jesús, Nazaret tomarapijinë, ponë cobematabiabarutatsi cruzajavabelia. Asaë rabaja icatsia bajaraponë petëpaecujinae. Ajibi rabaja tsarucacae majotaje. Pataema jane itsajota picani buatatsi. <sup>7</sup> Paponare baja. Patsipaebianame pijajivijavabelia, Pedrojavabelia ata. Pajumaitsimë tsane bajarapamonaejavabelia: “Jesús pina panevajënaeyabelia pona Galilea nacuayabelia. Baja pina jotalia pacaxitajarabianame Jesús pacuenia baja pacajumaitsi,” pajamë tsane pijajivijavabelia, jai pevëjëato petiriavijavabelia.

<sup>8</sup> Nexata saya bajarapapetiriavi rëcëpeca Jesús pebuatsiibovajutsivecua. Neconecojai saya pecajunavi. Nexata namutoepatua apo tsipaebi itsajivijavabelia ata. Tsipaji bitso junava.

*Pacuenia Jesús petëpaecujinae, icatsia itsa asaë, tsitanaitajëta María Magdala tomarapijivajavabelia yabara pelivaisi*  
(Jn 20.11-18)

<sup>9</sup> Judíovi baja penacueraevetsimatacabi itsa verevereca, meravia pitsijavata, ajena baja matacabi tsarucaponae, Jesús icatsia asaë petëpaecujinae. Bajarapamatacabi copiata Jesús tsitanaitajëta María, Magdala tomarapijivajavabelia. Bajarapova cajena copiaya Jesús vecuacapitsapa siete padovathibeje itsa abaxë Jesús apo beyaxuabitsi. <sup>10</sup> Nexata María, Magdala tomarapijiva, Jesús petsitanaitajëtsicujinaetsi, pona Jesús pijajivijavabelia. Nexata María pevajënae Jesús pijajivi abaxë vënueyena Jesús. Nexata María itsa pata Jesús pijajivijavabelia, tsipaeba pacuenia María tane Jesús. <sup>11</sup> María jumaitsi Jesús pijajivijavabelia:

—Jesús rabaja icatsia asaë petëpaecujinae. Taniji rabaja tajacuata, jai.

Itsiata Jesús pijajivi apo jumexaniataetsi María.

*Pacuenia Jesús petëpaecujinae icatsia itsa asaë, tsitanaitajëta pijajivitonëbejevavabelia yabara pelivaisi*  
(Lc 24.13-35)

<sup>12</sup> Jesús pijajivitonëbeje najetarucabeje namutua. Nexata Jesús pijajivitonëbeje namutua penajetarucacajavatabeje, Jesús tsitanaitajëta beitsanëcuenia pijajivitonëbejevavabelia. <sup>13</sup> Nexata Jesús pijajivitonëbeje itsa tanebeje Jesús, naviatecabeje. Nexata pacuenia tanebeje Jesús, tsipaebabeje itsamonae Jesús pijajivijavabelia. Itsiata bajarapamonae apo jumexaniataetsibeje.

*Pacuenia Jesús petēpaecujinae, icatsia itsa asaë, pijajivi itoroba pexanialivaisi jivi petsipaebanajetarubenaenexa daxitanacuanējava yabara pelivaisi*

*(Mt 28.16-20; Lc 24.36-49; Jn 20.19-23)*

<sup>14</sup> Bexëajavabelia icatsia Jesús tsitanaitajëta pijajivi once ponëbejejavabelia penabanaejavata mesata. Nexata Jesús pinijicuenia muxujioba pijajivi piamatabëcuene-tajaxae. Muxujiobanua apo pejumecovënëtsixae petsipaebijavatsi pamonaë tane Jesús icatsia piasaëjava petēpaecujinae. <sup>15</sup> Nexata Jesús jumaitsi pijajivijavabelia:

—Paponare daxitanacuanējava daxitajivi panetsipaebanajetarubenaenexa pexanialivaisi pecapanepaelivaisinexatsi. <sup>16</sup> Pajivi jumecovënëtsiana bajarapalivaisi, nexata pabautisabianame. Bajarapajivi Diosojavabelia capanepaenatsi. Pajivi apo jumecovënëtsi tsane bajarapalivaisi, daxitamatacabijavabelianexa naneconitsiana Diosojavabelia. <sup>17</sup> Pamonaë peneta jumecovënëtsiana bajarapalivaisi, mapacuenia exanavana-paenaje. Tavënëta jivivecua capitsapaponaena dovathi. Itsavirijumetanua, apo penatsipaebijumemi ata, jemata natsipaebiana. <sup>18</sup> Bajarapamonaë jomo pecobeta pitsi ata tsane, apae atanua tsane jivi petēpaeyaexanaera, itsiata apo tēpae tsane. Bajarapamonaë itsa nacobeuatsiana piavitanejivi pematatsënëvereca, pejayatsijivi jamatejema tsane piavitanejavavecua, jai Jesús pijajivijavabelia.

*Pacuenia Jesús petēpaecujinae, icatsia itsa asaë, naviata baja athëbëabetsia yabara pelivaisi*  
*(Lc 24.50-53)*

<sup>19</sup> Vajatuxanenë Jesús livaisi petsipaebicujinae pijajivijavabelia, Dioso baja pesaëta catsiatsi athëbëabetsia. Nexata athëbëtatsia Jesús eca Dioso pecujanenia penajuaevetsinexabeje daxitacuene. <sup>20</sup> Nexata jane baja Jesús pijajivi daxitanacuanējava jivi tsipaebanajetarubena bajarapapexanialivaisi. Nexata daxita pamonaë jumetaeyabiabatsi, jumecovënëtabiabatsi pexaniajailivaisi petsipaebicuene. Tsipaji Jesús pijajivi jamatabëcueneyavenonabiaba Jesús pijajivi pinijicuene pexanaenexa jivijavabelia livaisi petsipaebabiabijavata.

## Pexanialivaisi Jesucristo pelivaisi, San Lucas peyaquinaelivaisi

*Pacuenia Lucas taxuxuaba mapabaxutotaje Jesucristo pelivaisi, petoyaquinaejava Teófilovënëñjavabelia, yabara pelivaisi*

<sup>1-2</sup> Pamatacabi abaxë Jesús ponapona mapanacuataje, jivi ayaibitsaëtoخانeto tanetsi peponaponaejava. Bajarapamonae tanetsi Jesús petaxuxuabijavaveliacujinae jivi livaisi petsipaebaponaejava. Nexata bajarapamonae paebanajetarubena tomaranëjava Jesús pelivaisi, pexanialivaisi. Nexata tomaranëjava Jesús pelivaisi pejumetaevi, ayaibitsaëto, baja cajena yaquina juya mataropotsia petsipaebinexa itsamonaejavabelia. Pacuenia Jesús petaevitsi vajunupaebatsi, bajarapamonae yaquina baja cajena Jesucristo pelivaisi. <sup>3</sup> Nexata xanë ata mapamatacabitaje yanijobaponajë bajarapalivaisi daxita peyapëtaevijavabelia. Yanijobaponajë xaniavaetsia tayapëtaenexa pacuenia Jesús exanapona petaxuxuabijavaveliacujinae mapanacuataje. Teófilo, catoyaquinatsi. Catoyaquinatsi mapabaxutotaje xamë ata xaniavaetsia neyapëtaenexa daxita bajarapalivaisi, Jesucristo pelivaisi. Netsitaxanepana tacatoyaquinaenexa daxita bajarapalivaisi neyapëtaenexa pacuenia jumai tsaponae caelivaisi canacujitsia Jesús pexanaponaejavanë yabara, caejava canacujitsia. <sup>4</sup> Copiaya baja picani itsamonae catsipaeba bajarapalivaisi. Itsiata icatsia xanë catoyaquinatsi neyapëtaenexa jane baja xaniavaetsia bajarapalivaisi pexaniajailivaisicuene.

*Pacuenia ángel tajëvelia jumaitsi Zacaríasjavabelia: “Nexënatonëyo raja xainaename,” jai yabara pelivaisi*

<sup>5</sup> Pamatacabi abaxë Herodes eveta Judeanacua, bajarapamatacabi ponapona sacerdotenë Zacarías. Bajaraponë sacerdotevi Abíasvënëviyajuvënëñ. Zacarías pijava pevënë Elisabet. Bajarapova sacerdotenëmi Aarónpijinë pemomoxiyajuvënëva. <sup>6</sup> Bajarapajivibeje xaniavaetsia aneonijibia Dioso pitabarata toponaponaebeje. Dioso jumecovënëtsiaya ponaponaebeje pacuenia Dioso itorobatsi judíovi xaniavaetsia pejivanapaenexa. <sup>7</sup> Itsiata bajarapajivibeje pexi apo xainaebeje. Tsipaji Elisabet mavecova. Nexata bajarapajivibeje bitso baja perujujiviyobeje.

<sup>8</sup> Nexata itsamatacabi Zacarías templobota nanacuenebijitsia sacerdotevi penacuenebicuene Dioso pitabarata. Pasemanata daxita sacerdotevi, Abíasvënëvi, nacobenaevetsijitsia templobo, bajarapasemana Zacarías daxisemana nanacuenebijitsia templobota. <sup>9</sup> Nexata abaxë sacerdotevi petaxuxuabivajënaeya penacuenebijava, pijacujirucuenia exana penayapëtaeponaenexa xua caenë canacujitsia nacuenebijitsia templobota. Nexata sacerdotevi pijacujirucuenia pexanaecujinae, itsa baja yapëtane xua caenë canacujitsia nacuenebijitsia templobota, nexata Zacarías tocopatatsi temploboënëalia petajuitsinexa inciensovënëjava, petuxujuvijava. Bajaraxuata Zacarías joneya temploboyalia petajuitsinexa jane baja inciensovënëjava temploboënëalia. <sup>10</sup> Paepatota Zacarías tajuitanuca inciensovënëjava temploboënëalia, jivi ayaibitsaëtoخانeto templobojumavelia vajëcanubena Diosojavabelia. <sup>11</sup> Nexata Zacarías temploboënëalia, altarvënëjava muxuneneta, tsitanaitajëtatsi ángel. Paaltarvënëjavajumata incienso tajuitabiaba Diosonexa, bajarapaaltarvënëjava pecujanenia pamuxunenejavata, Zacarías taenuta ángel. <sup>12</sup> Nexata Zacarías itsa taenuta ángel, apo yapëtae pacuenia exanaejitsia Zacarías. Bitso jamatabëcuenenajunaviaca. <sup>13</sup> Nexata ángel jumaitsi Zacaríasjavabelia:

—Zacarías, pëtsa junavame. Dioso baja cajena cajumetane nevajëtsijava. Nexata nijava Elisabet catonacoxitsiana. Nexënatonëyo baja xainaename. Vënërubianame bajaraponëyo Juan. <sup>14</sup> Piniijucuenia, jivi ayaibitsaëto yajava, barëyamë tsane bajaraponëyo itsa catonaexanaena. <sup>15</sup> Tsipaji bajaraponëyo ayaijamatatabëcuenenë tsane Dioso pitabarata.

Apo apae tsane piataneranë. Vinora ata apo apae tsane. Penaexanaejavaveliacujinae tsijamatabëvënëcaenatsi Espiritu Santo. Nexata Espiritu Santo pitorobicueniatsi, exanabiabiana. <sup>16</sup> Bajaronë, Juan, Israel nacuapijivi najamatabëcuenecopatsiaexanaena Diosojavabelia. <sup>17</sup> Bajayata Diosojumepaebinëmi, profeta Elíaspijinë, ayaijamatabëcuenenëmi, Dioso pesaë yjavaponapona. Espiritu Santo ata pitorobicueniatsi, exanaponapona. Bajara icatsia itsane Juan ata. Bajaronë pejamatabëcueneta, penacoxiitoyavimi ata, icatsia nacoxiasiva tsane. Bajaronë pejamatabëcueneta, itsamonae pijinia pibisijamatabëcuene pexainaevi ata, jamatabëcuene xanepanaeyaexanaena pexaniajamatabëcuene pexainaenexa. Bajarapacuenia bajaronë jivi jamatabëcuene xanepanaeyaexanaena pepo petuxanenë penajetarucaevajënaeya. Nexata bajarapamonae xaniavaetsia copiapitsiana pepo petuxanenë pamatacabi najetarucaena, jai ángel Zacaríasjavabelia.

<sup>18</sup> Zacarías nexata yanijoba ángeljavabelia. Jumaitsi:

—Itsa taxënato xinaejitsianë, ¿detsa peneta pitsicuene taenajë tayapëtaenexa? Tshipaji rabaja xanë perujunë. Tajava ata baja perujuva, jai Zacarías.

<sup>19</sup> Nexata ángel jumaitsi Zacaríasjavabelia:

—Xanë raja Gabrielnë, Dioso pijajivitonënë. Dioso baja cajena nitoroba tacatsipaebinexa mapapexanialivaisije. <sup>20</sup> Xamë saya nejumeaebame, xaniavaetsia catsipaebi atatsi xua pepacuene catocopiajopaejitsia. Nexata baja aeconoxae apo cacaëjëpae tsane necuaicuajijava. Matapania jane baja pamatacabi catocopiajopaena xua yabara najumecapanepaeya catsipaebatsi, natsipaebianame icatsia, jai ángel Zacaríasjavabelia.

<sup>21</sup> Bajarapaepatota jivi templobo jumavelia evetanubenatsi Zacarías pepitsapaejavarena. Najumaitsi bajarapamonae:

—¿De meta xuajitsia Zacarías bepijia apo pitsapaerena templobovecua? najai bajarapamonae.

<sup>22</sup> Itsa jane baja Zacarías pitsaparena templobovecua, apo caëjëpaetsi pecuaicuajijava. Nexata pamonae evetanubenatsi templobo jumavelia, najumaitsi:

—Zacarías raeta bemajitsinaebota temploboënëlia itsacuene tane, najai.

Nexata Zacarías apo pecaëjëpaexatsi pecuaicuajijava, pecobeta tsipaeba besiyancuenia jivi peyapëtaeyaexanaenexa.

<sup>23</sup> Itsa baja Zacarías vereta penacuenebijava templobota pamatacabibeje itorobatsi penacuenebinexa, naviata baja pijaboyabelia. <sup>24</sup> Bajaraxuacujinae Zacarías pijava, Elisabet, nacoxita jane baja. Nexata bajarapova penacoxitsijava itsa yapëtane, cinco pajuametobejecuenia itsajavabelia pijabovecua apo ponapona. <sup>25</sup> Elisabet jamatabëjumaitsi:

—Dioso raja taneitaxutotsoniataexae, neyavenona tanacoxitsinexa mapacueniaje. Nexata baja apo auranë tsane tacoxibijava yabara, jamatabëjai Elisabet.

#### *Pacuenia ángel tajëvelia jumaitsi Maríajavabelia yabara pelivaisi*

<sup>26</sup> Elisabet baja seis pajuametobeje pepuaxinae penacoxitsicujinae, Dioso icatsia itoroba pijaángel Gabriel. Pijaángel itoroba Nazaret tomarabelia, Galilea nacuata peetaetomarabelia. <sup>27</sup> Dioso itoroba ángel petsipaebinexa Maríajavabelia. María abaxë pebi apo pequenetsiataevatsi. Angel pepatsivajënaeya Maríajavabelia, Maríabeje baja cajena Josébeje nabarëcuacuajaiibeje penapitsinexabeje. Nacuaevetsinëmi Davidpijinë pemomoxiyajuvënë José. <sup>28</sup> Angel nexata joneya María peponaponaebota. Angel jumaitsi Maríajavabelia:

—María, cabajacobatsi. Pexaniajamatabëcuenia Dioso pecataeva. Dioso cayjavaponaponaena. Bitso cayavenonaena xamë daxita nevëna petiriavi matatoxenetsia, jai ángel.

<sup>29</sup> Nexata María itsa jumetane bajarapacuenia ángel pejumaitsijavatsi, María jamatabëjumaitsi:

—¿Detsa meta pitsijamatabëcuene yabara nejumaitsi ángel mapacueniaje? jamatabëjai María.

<sup>30</sup> Icatsia ángel tajëvelia jumaitsi Maríajavabelia:

—María, pëtsa junavame. Tsipaji raja Dioso pexaniajamatabëcuenia catane. <sup>31</sup> Xamë raja nacoxitsianame. Cavecuanaexanaena raja pebinëyo. Bajaraponëyo vënërubianame Jesús. <sup>32</sup> Bajaraponëyo ayaijamatabëcuenenë tsane. “PinijiDioso, athëbëtatsia peecaenë, mapexënatoje,” jaitsi tsane jivi. Nexata vajatuxanenë Dioso nacuaeavetsinë exanaenatsi. Pacuenia pijasalinainëmi Davidpijinë bajayata nacuaeavetsinëmi, bajara icatsia itsane. <sup>33</sup> Bajaraponë evetsiana Israel nacuapijivi daxita matabicabijavabelianexa, jai ángel tajëvelia Maríajavabelia.

<sup>34</sup> Nexata María jumaitsi ángeljavabelia:

—¿Detsa pacuenia nacoxitsipajë? Xanë raja tamona apo xainaenë, jai María ángeljavabelia.

<sup>35</sup> Angel nexata tajëvelia jumaitsi Maríajavabelia:

—Espíritu Santo raja patsianica xamëjavabetsica. Nexata Espíritu Santo Dioso pesaëta caevetsiana. Bajaraxuata panacuetonëyo cavecuanaexanaena, tsatsianatsi Diosonexa. “Dioso ra mapexënatoje,” jaitsi tsane jivi. <sup>36</sup> Nijamonaeva ata Elisabet, perujuva ata, exanaena penacuetonëyo. “Mavecova raja,” jai atatsi jivi, itsiata baja penacoxitsicujinae xaina baja seis pajuametobeje. <sup>37</sup> Dioso raja caëjëpatsi daxitacuene pexanaenexa, jai ángel tajëvelia Maríajavabelia.

<sup>38</sup> Nexata María jumaitsi ángeljavabelia:

—Xanë raja Dioso pijajivitovanë. Pacuenia nejumaitsimë, bajarapacuenia Dioso xanëjavaberena exanaena, jai María.

Nexata baja María vecuaponatsi ángel.

*Pacuenia María sivaxaina Elisabetjavabelia yabara pelivaisi*

<sup>39</sup> María penacoxitsijavanexa petsipaebicujinaetsi ángel, caematabibejecujinae, María pona petsutonënacuada pecaetomarabelia. Bajarapatomara eca Judea nacuada. <sup>40</sup> Nexata María joneya Zacarías pijaboyalía. Bajacabanuta pijamonaeva Elisabet. <sup>41</sup> María itsa bajacabanuta Elisabet, nexata Elisabet peyacotajinaenacuetoyo tsicotonayucutarabatsi. Nexata jane baja Elisabet tsijamatabëvënëcatsi Espíritu Santo. <sup>42</sup> Nexata Elisabet Espíritu Santo itorobatsi pinijijumeta Maríajavabelia pejumaitsinexa mapacueniaje:

—Dioso cajena bitso cayavenona daxita petiriavi matatoxenetsia. Panacuetonëyo ata exanaename, bajarapanacuetonëyo Dioso bitso peyavenonabiabinëtsi tsane. <sup>43</sup> Xamë tajatuxanenë penamë tsane. ¿Detsa xuajitsia beveliamatabëcueneva atanë, nesivaxainamerë? <sup>44</sup> Itsa nebajacabanutame, tayacotajinaenacuetoyo nayucutarabara pebarëyaxae. <sup>45</sup> Barëyamë Dioso pecajumaitsicuenia nejumecovënëtsiva. Tsipaji pepacuene catocopiapatsiana daxita pacuenia vajatuxanenë Dioso pitorobinëtsica ángel tajëvelia catsipaeba, jai Elisabet Maríajavabelia.

<sup>46</sup> Nexata María jumaitsi Elisabetjavabelia:

Tajamatabëëthëtojavavetsina jumaitsinë Diosojavabelia: “Ayaijamatabëcuenenëmë bitso,” janë. <sup>47</sup> Sivajamatabëcuenebarëyanë Dioso tanecapanepaenënexa. <sup>48</sup> Sivajamatabëcuenebarëyanë. Tsipaji pijajivitovanë, beveliamatabëcueneva atanë, Dioso nitapeta. Tatëpaecujinae ata tsane, tavënamuto, pevajënaeyabelia daxitajivi xanë yabara jumai tsabiabi tsane: “Dioso bitso peyavenonae-vamitsi,” jai tsabiabi tsane. <sup>49</sup> Bajarapacuenia daxitajivi jumai tsabiabi tsane xanë yabara. Tsipaji ayaijamatabëcuenenë Dioso netoexanabiabiana ayaicue pexanaejavanë. Dioso raja apo pejitsipaenë jivi pibisiacuene pexanaejava. <sup>50</sup> Daxita pamona Dioso yaiyataena, bajarapamonae juya Dioso itaxutotsoniataeyabiabiana. <sup>51</sup> Dioso raja pecaëjëpaenëtsi pinijicuene ata pexanaenexa pecobeta. Pamona jamatabëjumaitsi tsavanapae: “Vaxaitsi cajena ayaijamatabëcuenevitsi,” jamatabëjai tsavanapae, bajarapamonae Dioso nacayajatsiaexana baja. <sup>52</sup> Pinijinacuanë pevetsivimi ata, bajarapanacuanë pevetsijavami Dioso vecuapitsapaeyaexana. Nexata bajaraxuacujinae Dioso juya evetsiaexana

bajarapanacuanë beveliajamatabëcuenevimi ata. <sup>53</sup> Pamonaë pijinia bitso pijajani, bajarapamonae Dioso rajuta pexanianabanijava. Pamonaë pijinia bitso pexainaevi mapanacuapijicuene, bajarapamonae Dioso apo pejumecovënëtsixae, bajarapamonae Dioso apo rajutsi. <sup>54</sup> Dioso yavenona pijajivi, Israel nacuapijivi. Apo nacofënëtsi cajena. Dioso itaxutotsoniataeyabiaba Israel nacuapijivi. <sup>55</sup> Bajarapacuenia Dioso pijajivi itaxutotsoniataeyabiaba daxitamatacabi-javabelianexa. Tsipaji baja cajena bajarapacuenia Dioso najumecapanepaeya jumaitsi vajasalinainëmi Abrahampijinjëjavabelia, daxita pemomoxijavabelianexa ata pitaxutotsoniataeyabiabijavanexa yabara,

jai María Elisabetjavabelia.

<sup>56</sup> Nexata María acueyabi pajuametobeje naponapona Elisabet pijabota. Bajaraxuacujinae María baja naviaata pijaboyabelia.

*Pacuenia Juan naexana jivibautisabinënexa yabara pelivaisi*

<sup>57</sup> Juameto baja ecaica, pajuametota Elisabet penacueto vecuanaexanaejitsiatsi. Penacuetonëyo jane baja vecuanaexanatsi. <sup>58</sup> Itsa Elisabet yapëtane Dioso pitaxutotsoniataecuenetsi, bitso Elisabet jamatabëcuenebarëya. Daxita pamonaë ata ena imoxoyo, pijabo muxuneneta, bajarapova pijamonaeyajuvënëvi ata, sivajamatabëcuenebarëyatsi. <sup>59</sup> Itsa baja penacuetonëyo caesemana xaineca penaexanaecujinae, Elisabetbeje Zacaríasbeje pexënatonëyo perabëcaucutsiaexanabeje judíovicuenia. Baitsi boupiperabëcaucutsiaexanabeje. Nexata daxita bajarapamonae pata Elisabetbeje Zacaríasbejavaberena. Bajarajota picani penacuetonëyo tovënërubijitsiatsibeje paxa pevënëcuenia paxa picani pevënëxainanexa. <sup>60</sup> Itsiata Elisabet jumaitsi pamonaëjavabelia picani tovënërubijitsiatsibeje:

—Jume. Pevënë raja tsane Juan, jai Elisabet bajarapamonaejavabelia.

<sup>61</sup> Nexata bajarapamonae jumaitsi:

—¿Detsa xuajitsia jitsipame bajarapavënë? Itsanë ata cajena nijamonaeyajuvënëne apo xainae bajarapavënë, jai bajarapamonae Elisabetjavabelia.

<sup>62</sup> Nexata bajarapamonae penacuetonëyo jane baja paxa junata. Pecobeta yanijoba pavënë Zacarías jitsipa petovënërubinexatsi. <sup>63</sup> Nexata Zacarías vajëta tablapayo peyaquinaenexa. Nexata yaquinaruta: “Juan rabaja pevënë,” pejaiitane. Nexata daxita bajarapamonae jamatabëcuenenabenajaca. <sup>64</sup> Bajarajota jemata icatsia Zacarías cuaicuaijai baja. Nexata jivi pitabarata Zacarías jumai tsaponae Diosojavabelia:

—Diosomë, ayajamatabëcuenenëmë bitso, jai tsaponae.

<sup>65</sup> Daxita pamonaë bajarapatomarata imoxoyo penaevi, itsa jumetane pacuenia Zacarías Dioso yavenonaponatsi, pinijicuenia jamatabëcuenenabenajaca. Itsamonae bajarapanacuata petsutonëjava penaevi ata, daxita bajarapamonae ata, vënëlivaisitane bajarapacueni yabara. <sup>66</sup> Daxita pamonaë jumetane bajarapacueni yabara, apo nacofënëtsi. Jamatabënjajinavanapabiaba bajarapacueni. Nexata bajarapamonae nayanijobabiaba.

—¿De meta jamatabëcueneitsi tsane bajarapanacuetonëyo itsa vitsabiana? najai tsabiabi bajarapamonae.

Bajarapacuenia nayanijobabiaba tsipaji bitso Dioso yavenonaponatsi bajarapanacuetonëyo.

*Pacuenia Zacarías tajëvelia jumaitsi yabara pelivaisi*

<sup>67</sup> Zacarías, Juan jivibautisabinënexa paxa, tsijamatabëvënëcatsi Espiritu Santo. Nexata Zacarías Espiritu Santo itorobatsi jivijavabelia pejumaitsinexa mapacueniaje:

<sup>68</sup> Pexaniajamatabëcuene rajutatsi vaxaitsi pepo vajatuxanenëjavabelia, Israel nacuapijivitsi vajuDiosojavabelia. Tsipaji pijajivitsi nacatoitorobianica vajanacapanepaenënexa vaneconivecua. <sup>69</sup> Dioso cajena nacatoitorobianica pinijicueni pexanaëjava pecaëjëpaenëtsi vajanacapanepaenexa. Bajaraponë Dioso

pijajivitonēmi Davidpijinē pemomoxiyajuvēnēnē tsane. <sup>70</sup> Bajayata Diosojumepaebivimi profetavi, Dioso pitorobicueniatsi pejinavanapaevi, tajēvelia najumecapanepaeya jumaitsi bajaraponē vajanacacapanepaejavanexa yabara. <sup>71</sup> Tajēvelia profetavimi najumecapanepaeya jumaitsi bajaraponē vajanacacapanepaejavanexa vajavajabitsaēvivecua, daxita vajanacaitoyavi atavecua. <sup>72</sup> Dioso nacaitaxutotsoniataena pacuenia tajēvelia najumecapanepaeya jumaitsi vajasalinaivimijavabelia. Dioso cajena apo nacofēnētsi pacuenia najumecapanepaeya jumaitsi vajasalinaivimijavabelia. <sup>73</sup> Bajayata copiaya bajarapacuenia yabara Dioso najumecapanepaeya jumaitsi vajasalinainēmi Abrahampijinējavabelia. <sup>74</sup> Dioso baja najumecapanepaeya jumaitsi vajanacacapanepaenexa vajavajabitsaēvecua. Bajarapacuenia Dioso nacacapanepaena ajunavijibia vajatonacuenebavanapaenexa. <sup>75</sup> Nexata bajarapacuenia Dioso ita tonacuenebavanapaenatsi, jinavanapaenatsi pibisiacuene exanaenejevatsi Dioso pitabarata vajaasaētsavanapaeepato abaxē mapanacuataje,

jai Zacarías jivijavabelia tajēvelia pevajunupaebijavata Jesús Dioso pitorobijavanexatsitsica vajanacacapanepaenexa.

<sup>76</sup> Icatsia Zacarías jumaitsi pexēnatonēyojavabelia mapacueniaje:

Taxēnatonēyo, xamē yabara itsamonae jumai tsabiabi tsane: “Mara ponēje pinijiDioso, athēbētatsia peecaenē, pijaprofetanēje,” jai tsabiabi tsane. Xamē raja itsaxuayo pepo petuxanenē najetarucaejitsia, pevajēnaeya jivi tsipaebanajetarucaename pesivanajamatabēcuenecopatsinexa bajaraponējavabelia pamatacabi bajaraponē najetarucaena. <sup>77</sup> Tsipaebanajetarucaename jivijavabelia pacuenia Dioso bajarapamonae capanepaejitsiatsi. Tsipaji bajarapamonae pibisiacuene pexanaeoneconimi Dioso vecuaajibiaexanaenatsi. <sup>78</sup> Dioso vajanacaitaxutotsoniataexae, nexata nacayapētaeyaexanaena vajanacacapanepaenēnexa athēbēvetsica pepatsijavanexatsica. <sup>79</sup> Nexata bajaraponē jivijavabelia ita tsipaebanajetarucaena pexaniajailivaisi, jamatabēcueneyotayotsiana daxita pijamatabēcueneyotayotsianaisi. Baitsi pamonaē picani cujanava petēpaejava, bajaraponē petsipaebilivaisi pejamatabēcueneta, bajarapamonae yapētaena jamatabēcuenexanepaenaya pejinavanapaenexa,

jai Zacarías pexēnatonēyojavabelia tajēvelia pevajunupaebijavata Jesús jivijavabelia Dioso pejumelivaisi petsipaebanajetarucaejavanexa.

<sup>80</sup> Nexata jane baja xuacujinae Juan jivibautisabinēnexa vitsabanajetaruca. Yajavaajamatabēcuenesaē baja cajena tsanajetarucaē Dioso pejumelivaisi yabara. Nexata baja Juan ita penaveretsinē, ponapona petusato nacuata. Matapania ita taxuxuabijitsia jivi petsipaebinexa Jesús pelivaisi, naitajēta jivijavabelia pevēnēlvaisitaenexatsi daxita Israel nacuapijivi.

## 2

### *Pacuenia Jesús naexana yabara pelivaisi* (Mt 1.18-25)

<sup>1</sup> Imoxoyo baja pevajēnae Jesús penaexanaejavanexa. Nexata bajarapamatacabijava Romanonacua pepo pevetsinē, Augusto, taxuxuaba pijajivi pitorobijava jivi petonamataējētsinexatsi. Jumaitsi pijajivijavabelia:

—Daxitajivi, pamonaē taevetsinacuanējava jinavanapa, panetonamataējētsianame, jai.

<sup>2</sup> Bajarapamatacabi pijinia nacuae vetsinē Cireniovēnēnē saicaya itsanacua eveta, Siriavēnēnacua. <sup>3</sup> Nexata nacuae vetsinē Augusto pevetsinacuanējava penaetomaranēta pejinavanapaevi, apo jinavanapae ēpijatomaranējava. Itsamonae najinavanapa itsatomaranējava. Bajaraxuata pamonaē najinavanapa itsatomaranējava, caejivi canacujitsia, pijasalinaivimi pijatomaranējavabelia pona. Bajarapamonae pona pena-mataējētsinexatsi pijasalinaivimi pijatomaranējava.

<sup>4</sup> Bajaraxuata José ata barëpona Belén tomarabelia. José barënaropota Nazaret tomarata, Galilea nacuata peecaetomarata. José barëpona Belén tomarabelia, Judea nacuata peecaetomarabelia. Tsipaji baja cajena José pijasalinainëmi, Davidpijinë, bajayata Belén tomarata ponapona. <sup>5</sup> José barëpona María, pova pita pijavanexa. Bajarapova yacotapona itsa baja imoxoyo pevajënae penacueto pevecuanaexanaenexatsi. <sup>6-7</sup> Nexata baja itsa patabeje Belén tomarata, ponaponabeje dajubi pevetabiabibota. Tsipaji baja pabota jivi patabiaba, pevajënaebeje baja jivi yavënëca. Nexata apo nayacaëjëpaetsibeje bajarapabota penaecaenexabeje. Bajaraxuata patabeje dajubi pevetabiabibota. Nexata dajubi pevetabiabibota María jane baja vecuanaexanatsi penacuetonëyo, copiaya penacoxitsinacueto. Barëca dajubi pevetabiabibota. Jumaquioneta papaëbërëpanaxita. Buateta dajubi pexaejavanexa pemitsaothocabiabimoënëta.

*Pacuenia ángelevi patsica Jesús penaexanaelivaisi petsipaebinexa oveja pevetsivijavabelia yabara pelivaisi*

<sup>8</sup> Belén tomarajumaverena imoxoyovayafota, oveja pevetsivi evetavanapa. Bajarapamonae meravi nacobenaevetabiaba pijaovejabitsaëtonë. <sup>9</sup> Jemata oveja pevetsivi tsitanaitajëtatsi Dioso pijaáγγελ. Nexata Dioso pijapenivenivenaecotia oveja pevetsivi matatoyorotsia itayotatsi. Najunaviaca bajarapamonae pinijicuenia. <sup>10</sup> Nexata áγγελ jumaitsi oveja pevetsivijavabelia:

—Pëtsa panajunaviacame. Pexanialivaisi raja pacatocanajetarucatsi pesivabarëyanexa daxitajivi. <sup>11</sup> Ajena rabaja, mapameravitaje, naexana baja daxitajivi pecapanepaenënexa. Naexana Belén tomarata, patomarata bajayata nacuaevetsinëmi Davidpijinëmi ponapona. Ponë naexana, bajaraponë pepo petuxanenë Cristo, Dioso athëbëvetsica pitorobinëtsitsica jivi pecapanepaenexa. <sup>12</sup> Paneyapëtaenexa pacuenia pacatsipaebatsi, penacuetonëyo pataeyabuatetsianame mapacueniaje. Penacuetonëyo pataeyabuatetsianame papaëbërëpanaxita pejumaquionaenacuetonëyotsi. Boquecaena dajubi pexaejava pemitsaothocabiabimoënëta, jai áγγελ oveja pevetsivijavabelia.

<sup>13</sup> Bajara saya jota jemata oveja pevetsivi tsitanaitajëtatsi ayaibitsaëtoxaneto ángelevi, copiaya petsipaebiáγγελnëtsijavata. Bajarapamonae ángelevi pexaniajamatabëcuene rajuta Diosojavabelia. Penaxëanaejavata ángelevi jumaitsi mapacueniaje:

<sup>14</sup> ¡Dioso, athëbëtatsia peecaenë, pinijicuenia rabaja exana! Pamona Dioso jume-covënëta, Dioso sivajamatabëcuenebarëyatsi. Daxita bajarapamonae jamatabëcuenexanepanaeya jinavanapaeyaexanaena Dioso, jai ángelevi penaxëanaejavata.

<sup>15</sup> Itsa baja ángelevi naviaba athëbëabetsia, oveja pevetsivi ángelevi pecovëta najumaitsi:

—Ponaliatsi Belén tomarabelia. Taenatsi pecopiapatsijava pacuene yabara vajatuxanenë Dioso pitorobiáγγελnëtsica nacatsipaeba, najai oveja pevetsivi ángelevi pecovëta.

<sup>16</sup> Nexata bajarapamonae bepijiayo ponalia Belén tomarabelia. Pata itsajota Maríabeje Josébeje barëecabeje penacuetonëyo. Penacuetonëyo boqueca dajubi pexaejava pemitsaothocabiabimoënëta. <sup>17</sup> Oveja pevetsivi itsa taeyabuateta penacuetonëyo pacuenia baja cajena ángelnë tsipaebatsi, nexata pona petsipaebaponaenexa daxitajivijava pacuenia bajarapanacuetonëyo taeyabuateta. <sup>18</sup> Nexata daxita pamona jümetane oveja pevetsivi pepaebilivaisi, jamatabëcuenenabenajaca. <sup>19</sup> María baja cajena pejamatabëëthëtota yapëtaeponapona daxita bajarapacuene yabara. <sup>20</sup> Oveja baja pevetsivi naviabaponalia. Oveja pevetsivi namutualia jumai tsanajetarubena Diosojavabelia:

—Diosomë, bitso ayaijamatabëcuenenëmë. Pexaniajamatabëcuene pacarajutatsi patanetoexanaexaemë pexaniacuene, jai tsaponalia oveja pevetsivi.

Bajarapacuenia jumaitsi tsipaji baja tane daxita pacuenia ángelnë tsipaebatsi.

*Pacuenia Jesúsnyëo caponaliatsi temploboyabelia yabara pelivaisi*

<sup>21</sup> Jesús nexa penaexanaecujinae, ocho matabita, perabēcaucutatsi judíovicuenia. Baitsi bou Piperabēcaucutatsi. Vēnērubatsinua jane baja pevēnē pexainaenexa. Vēnērubatsi “Jesús,” pejaivēnēta. Tsipaji baja cajena abaxē María nacoxitsinejeva Jesús nexa, tajēvelia ángel jumaitsi Maríjavabelia: “Bajaraponēyo vēnērubianame Jesús,” jai.

<sup>22</sup> Nexata jane baja tocopiajopatsibeje Josébeje Maríabeje pexanaenexabeje pacuenia bajayata Dioso Moiséspijinēta penajumecopatsilivaisi itorobatsi daxita judíovi pexanaenexa penacuetonēyo ita tonaexantsi. Nexata Jerusalén tomarabelia barēponabeje penacuetonēyo. Nexata Jerusalén tomarata, templobota, María ofrenda rajuta Diosojavabelia penajamatabēcuene xaniavaetsinexa Diosojavabelia. Rajutabejenua penacuetonēyo Diosojavabelia pijajivitonēnexa petonacuenebinexa ita penaveretsinē.

<sup>23</sup> Bajarapacuenia Josébeje Maríabeje exanabeje tsipaji Dioso Moiséspijinēta penajumecopatsilivaisi jumaitsi: “Penacasabijivibeje pexi ita xainabeje, nexata copiaya panacuetonēyo xainabeje, totsatsibeje Dioso pijajivitonēnexa,” jai. <sup>24</sup> Josébeje Maríabeje rajutabeje ofrenda Diosojavabelia pacuenia Dioso Moiséspijinēta penajumecopatsilivaisi itorobatsibeje. Rajutabeje tsiquiriviria ucucutoyobeje. Itsa jume, rajutabeje meta pinijiyoviria ucucutobeje.

<sup>25</sup> Bajarapamatacabi ponapona Jerusalén tomarata Simeónvēnēnē. Bajaraponē jume-covēnētsiaponapona pacuenia Dioso pejumelivaisibaxutota jumaitsi. Nexata bajarapamatacabi Israelnagua eveta Romano nacuverena ēpēpatsivi. Nexata Romano nacuverena pepatsivi pevetsixae Israelnagua, bejiobiaexanabiabatsi Israel nacuapijivi. Bajaraxuata Simeón copiaevetaponapona Dioso pejamatabēcueneta petovecuajutsinexatsi Israelnagua pevetsivi. Nexata baja Romano nacuverena pepatsivi, pevecuapitsapaenexa Israelnagua pevetsicue. Espíritu Santo yajavaponapontsi Simeón. <sup>26</sup> Nexata Espíritu Santo pejamatabēcueneta Simeón tajēvelia yapētaeyaexantsi pacuenia Simeón petēpaevajēnae taejitsia Cristo, ponē Dioso athēbēvetsica itorobiapaebica jivi pecapanepaenexa. <sup>27</sup> Nexata Espíritu Santo pejamatabēcueneta Simeón joneyaexantsi temploboyabelia. Bajaraxuata Simeón tane Maríabeje Josébeje pebarējonejavatabeje Jesúsnyo temploboyarena pexanaenexabeje pacuenia Dioso Moiséspijinēta penajumecopatsilivaisi itorobatsibeje. <sup>28</sup> Nexata Simeón isapita Jesúsnyo. Pexaniajamatabēcuene rajuta Diosojavabelia. Pexaniajamatabēcuene Simeón perajutsijavata Diosojavabelia, Simeón jumaitsi mapacueniaje:

<sup>29</sup> Tajatuxanenē, baja rajane netocopatsianame nijajivitonēnē jamatabēcuenexanepanaeya tatēpaenexa. Tsipaji baja netaeyaexaname pacuenia baja cajena tajēvelia najumecapanepaeya nejumaitsimē. <sup>30</sup> Taitaxutota rabaja taniji maponēje, ponē itorobimica jivi pecapanepaenēnexa xamējavabelia.

<sup>31</sup> Ponē itorobimica jivi pecapanepaenēnexa, daxitajivi taenatsi. <sup>32</sup> Maponēje petsipaebilivaisita, pamona apo judíovi ata, jamatabēcueneitayotsiana. Yapētaeyaexanaena pacuenia jamatabēcueneitsimē. Nexata maponēje pejamatabēcueneta apo judíovi yaiyataena nijajivi judíovi,

jai Simeón templobota Diosojavabelia pexaniajamatabēcuene perajutsijavata Jesúsnyo yabara.

<sup>33</sup> Nexata Josébeje Maríabeje ita jumetanebeje bajarapacuenia Simeón pejumaitsi-java Jesúsnyo yabara, jamatabēcuenenabenajacabeje. <sup>34-35</sup> Bajaraxuacujinae Simeón tovajēta Diosojavabelia peyavenonaenexatsibeje Josébeje Maríabeje, Jesúsnyo yajava. Bajaraxuacujinae Simeón jumaitsi Maríjavabelia:

—Mapanacuetonēyoje, Dioso itapetatsi. Maponēje petsipaebilivaisi jivi ayaibitsaēto-xaneto apo jumecovēnētsi tsanetsi. Nexata jivi ayaibitsaēto-xaneto naxuabiana, Israel nacuapijivi. Ayaibitsaēto-xaneto pijinia jumecovēnētsianatsi. Nexata pijinia ayaibitsaēto-xaneto capanepaena. Maponēje Dioso pesaēta pinijicue pexanaejava, tsitaexanaena jivi peyapētaenexa Dioso pitorobinētsitsica. Maponēje itajētsiana pacuenia jivi ayaibitsaēto-xaneto, caejivi canacujitsia, bēpēnē pibisiajamatabēcuene najamatabēxainabiaba. Jivi ayaibitsaēto-xaneto apo jumecovēnētsi tsanetsi. Pibisiacuenia

saya baranatsipaebianatsi. María, xamë nexata pepo nejamatabëethëtojavavetsina bitso sivajamatabëcuenebëjamë tsane itsa yapëtaename pacuenia exanaejitsiatsi, jai Simeón Maríajavabelia Jesús yabara tajëvelia pevajunupaebijavata pacuenia Jesús exanaejitsiatsi.

<sup>36-37</sup> Bajara pijinia pamatacabi templobota ponapona Diosojumepaebiva profetava, Anavënëva. Bajarapova Fanuelpijinë pexënatoyo, Aserpijinë pemomoxiyajuvënëva. Bajarapova bitso baja perujuva. Ochenta y cuatro baja pavaibeje xaina. Nacasaba picani abaxë itsa pejanava. Penacasabicujinae siete pavaibeje pepuaxainae pamonajavabelia, vecuatëpatsi pamona. Itsajavabelia apo vecuaponabiabi templobo. Matacabijebi, meravijebi yajava, Dioso tonacuenebabiaba templobota. Itsajavata pexaejava apo xaeyabiabi pamatacabibeje vajëcabiaba Diosojavabelia. <sup>38</sup> Nexata bajarapova ata pata itsajota Josébeje Maríabeje nucabeje templobota. Simeón pisanucaejavata Jesúsnyëo, isataenuta bajarapova. Nexata bajarapova pexaniajamatabëcuene rajuta Diosojavabelia Jesúsnyëo yabara. Romano nacuaverena pepatsivi Israelnacia pevetsixae, Israel nacuapijivi copiaevetavanapa Dioso pejamatabëcueneta petovecuajutsinexatsi, nexata baja Romano nacuaverena pepatsivi pevecuapitsapaenexa Israelnacia pevetsicuene. Nexata daxita pamona copiaevetavanapa Dioso pejamatabëcueneta petovecuajutsinexatsi Israelnacia pevetsivi, daxita bajarapamonaejavabelia, bajarapova tsipaebabiaba Jesúsnyëo pelivaisi.

*Pacuenia Jesús ponapona Nazaret tomarata pebarënaviatsicujinaetsi templobojavaverena yabara pelivaisi*

<sup>39</sup> Josébeje Maríabeje Jerusalén tomarata templobota exanaeveretabeje baja daxita pacuenia Dioso Moiséspijinëta penajumecopatsilivaisi itorobatsibeje. Nexata baja pijatomarabelia Jesúsnyëo barënaviatabeje, Nazaret tomarabelia, Galilea nacuata peecae-tomarabelia. <sup>40</sup> Nexata jane baja Jesúsnyëo vitsaba Nazaret tomarata. Ajamatabëcuene-saë tsaponae Dioso pijacuene yabara. Jamatabëcuenevitsabaponanua. Dioso yavenon-aponatsi ayaicuenia.

*Pacuenia Jesúsnyëo templobota barëcuacuajai judíovi pecujarubivijavabelia yabara pelivaisi*

<sup>41</sup> Caevai canacujitsia Josébeje Maríabeje ponabiababeje Jerusalén tomarabelia. Ponabiababeje pascuavënëfiesta penataeyabiabinexabeje. <sup>42</sup> Nexata baja Jesúsnyëo doce pavaibeje itsa xaina, barëponabeje icatsia Jerusalén tomarabelia pascuafiesta penataenexa. <sup>43</sup> Itsa baja copiaruca pascuafiesta, daxita baja penataevi bajarapafiesta, naviaba baja pijabonëjavabelia. Nexata Jesúsnyëo nacopatanucalia Jerusalén tomaratalia. Maríabeje Josébeje abaxë apo yapëtaebeje Jesúsnyëo pevecuanacopatsijavatsiliabeje. <sup>44</sup> Jamatabëjumaitsibeje saya:

—Jesúsnyëo raeta nanajetaruca vajanajuaponaevita, jamatabëjaiabeje.

Bajaraxuata caematacabi baja pepuaponaebeje namutua, itaxanabeje Jesúsnyëo. Nexata yanijobabeje pijamonaejavabelia, peyapëtaevitsibejejavabelia ata. <sup>45</sup> Itsiata apo caxitajarabibeje. Nexata naviatecabeje Jerusalén tomarabelia pejaitsinexabeje Jesúsnyëo.

<sup>46</sup> Acueyabi matacabita caxitajarababeje templobota. Jesúsnyëo naeca judíovi pecujarubivi tuatujëta. Jumetaeyeca bajarapamona penabarëcuacuajailivaisi. Nexata Jesúsnyëo yanijobapona bajarapamona penabarëcuacuajailivaisi yabara. <sup>47</sup> Nexata daxita Jesúsnyëo pejumetaeyenaevitsi, taeyena Jesúsnyëo xaniavaetsia pejumeyapëtaejava judíovi pecujarubivi penabarëcuacuajailivaisi. Taeyenanua xaniavaetsia pejumecanaviataponaejava, abaxë tsiquirinëyovajëto ata. Bajaraxuata jamatabëcuenenabenajaquena bajarapamona. <sup>48</sup> Josébeje Maríabeje itsa tanebeje bajarajota Jesúsnyëo penaecaejava, nexata jamatabëcuenenabenajacabeje. María nexata jumaitsi:

—Taxënato, ¿detsa xuajitsia panevëpënacoparemenabeje? Paxanëbeje patacajaitarutsijavatabeje, bitso pacaitaxanatsibeje, jai María.

<sup>49</sup> Nexata Jesúsnyëo jumaitsi penajavabelia:

—¿Detsa xuajitsia bajarapacuenia panejaitarutamebeje? Panejaitisipamebeje raja mapabotaje. Tsipaji raja xanë taxa Dioso pijacuene taexanaenexa mapabotaje, nejamatabëcueneenabiaba, jai Jesúsñëyo.

<sup>50</sup> Itsiata bajarapajivibeje apo jumeyapëtaebeje pajamatabëcuene yabara jumaitsi Jesúsñëyo.

<sup>51</sup> María baja cajena pejamatabëëthëtota yapëtaeponapona daxita bajarapacuenia yabara. Nexata baja bajarapajivibeje pepëta Jesúsñëyo napona baja Nazaret tomara-belía. Nazaret tomarata Jesúsñëyo xaniavaetsia jumecovënëtsiaponapona pacuenia Josébeje Maríabeje itorobabiababeje. <sup>52</sup> Jesús abaxë vitsabanajetaruca. Jamatabëcuene vitsabanajetarucanua. Nexata Dioso pexaniajamatabëcuenia tanetsi. Daxita pamona Jesúsñëyo yapëtanetsi, pexaniajamatabëcuenia tanetsi.

### 3

*Pacuenia Juan jivibautisabinë jivi livaisi tsipaeba petusato nacuata yabara pelivaisi (Mt 3.1-12; Mr 1.1-8; Jn 1.19-28)*

<sup>1</sup> Pamatacabi pepo nacuaevetsinë Tiberiovënënë xaina quince pavaibeje pevetsicujinae Romanonacua, bajara pijinia pamatacabi itsanacuanë eveta itsamonae. Bajaramatacabi nacuaevetsinë Poncio Pilato eveta Judeanacua. Bajara pijinia pamatacabi nacuaevetsinë Herodes eveta Galileanacua. Bajara pijinia pamatacabi Herodes pejuyapijinë, nacuaevetsinë Felipe, eveta Itureanacua, Traconitenacua yajava. Bajara pijinia pamatacabi nacuaevetsinë Lisianas eveta Abilinianacua. <sup>2</sup> Bajara pijinia pamatacabi Anásbeje Caifásbeje Israel nacuata sacerdotevi pepo penamatacaitorobinëbeje tsaponapona. Bajara pijinia pamatacabi Juan, Zacarías pexënato, petusato nacuata ponapona. Nexata Dioso itorobatsi jivi petsipaebanajetarucaenexa Dioso pitorobilivaisi. <sup>3</sup> Nexata Juan jivi tsipaebanajetaruca Dioso pitorobilivaisi daxita Jordánmene imoxoyo penaenacuanëta pejinavanapaevijava. Juan jumai tsanajetaruca jivijavabelia:

—Panajamatabëcuenepeñëyorore Diosojavabelia. Pacopabare pibisiacuene paneexanabiabijava. Nexata pacabautisabianatsi Dioso papecavecuajibiaexanaenexa pibisiacuene paneexanaeconimi, jai tsanajetaruca Juan jivijavabelia.

<sup>4</sup> Bajarapacuenia Juan jivi itsa tsipaebanajetaruca, copiajopa jane baja pacuenia Diosojumepaebinëmi profeta Isaíaspijinë bajayata tajëvelia yaquina Juan yabara. Juan jivibautisabinë Dioso pitorobilivaisi jivijavabelia petsipaebanajetarucaejavanexa yabara, yaquina. Profeta Isaíaspijinë peyaquinaelivaisita tajëvelia jumaitsi mapacueniaje:

Tanejumulivaisipaebinë vavajai tsane petusato nacuata. Jumai tsane jivijavabelia: “Jivi baxaneba panamutoverena najetarucaejitsia petuxanenë. Batoroviaexananua namuto. <sup>5</sup> Daxita namutua pafotonë rubena, atsa baothoca penamatajëpaeyaexanaenexa namuto. Daxita petsutonëmi, pinijiibotsutoxanetonëmi ata, banamatajëpaeyaexana. Baroviayaexananua penatoxorotsinamutomi ata. Banamatajëpayaexananua namutua pebobenaemëthëanëmi ata. Bajara pijinia pacuenia paxamë ata panajamatabëcuene xaniavaere pepo petuxanenë pepatsivajënaeya paxamëjavaberena. <sup>6</sup> Nexata daxitanacuanëpijivi yapëtaena Dioso pecapanepaejavanexatsi pijaneconivecua,”

jai baja cajena profeta Isaíaspijinë bajayata peyaquinaelivaisita, Dioso pitorobilivaisi, Juan jivi petsipaebanajetarucaejavanexa yabara.

<sup>7</sup> Jivi ayaibitsaëtoxaneto pata Juanjavaberena Juan picani pebautisabinexa bajarapamonae. Bajarapamonae apo jumecovënëtsi ata Dioso pitorobilivaisi, jamatabëcuene navëxaniabiaya jamatabëjumaitsi:

—Juan itsa nacabautisabiana, Dioso nacacapanepaena, jamatabëjai.

Nexata Juan jumaitsi bajarapamonaejavabelia:

—¡Panejamatabëcuenenavëxaniabivi! Pacuenia jomo rëcëpeca itsa tane isoto petajuenajetarucajava, bajara saya paitsimë. Dioso rabaja papecananeconitsia exanamatacabinexa pacaimoxoyotapona. Itsiata acuenebi tsane panevecuapanepaenexa

Dioso papecananeconitsia exanaematacabinexavecua. <sup>8</sup> Itsa pajitsipame Dioso papecacapanepaejava, pacopabare pibisiacuene paneexanabiabijava. Dioso pajumecov-  
 enëtsiajinavanapare. Nexata daxitajivi pacayapëtaena pepacuene baja panecopabijava  
 pibisiacuene paneexanabiabijavami. Pacayapëtaenanua panenajamatabëcuene pënëy-  
 orotsijava Diosojavabelia. Jamatabëcuenenavëxaniabiaya pëtsa panajumaitsimë: “Vax-  
 aitsi cajena Abrahampijinë pemomoxitsi. Nexata Dioso nacacapanepaena,” panajamë  
 pëtsa. Abrahampijinë picani papemomoxi atamë, itsiata pibisiacuene itsa paexana-  
 vanapame, nexata bajarapacuene apo pacatonamatamotsi tsipae papecacapanepaenexa  
 Diosojavabelia. Dioso baja cajena caëjöpatsi jivi pexanaenexa mapaibotonëmi ataje,  
 Abrahampijinë bepemomoxi Dioso petaenexa. Nexata bajarapamonae ata Dioso itsa  
 apo jumecovënëtsi, Dioso apo capanepae tsipae. Nexata pacopabare pibisiacuene  
 paneexanabiabijavami papecacapanepaenexa Dioso. <sup>9</sup> Peubinaenë pexainaenë itsa apo  
 tonacuaitsitsi pexaniacuai, nicata sipalita daxita ponaenë apo tonacuaitsitsi pexa-  
 niacuai. Nexata baja penicatsicujinae, itsa niona bajaraponaenë, caetuata. Xuaba  
 isotojavabelia. Nexata bajaraponaenëmi tajuatsi. Bajara pijinia pacuenia paxamë ata  
 Dioso pacaxuabiana infiernojavabelia papecatajuenexa, Dioso apo panejumecovënëtsivi,  
 jai Juan bajarapamonaejavabelia.

<sup>10</sup> Nexata bajarapamonae jumaitsi Juanjavabelia:

—¿Detsa nexata pacuene paexanaenajë daxitajivi pataneyapëtaenexa pepacuene  
 patacopabijava pibisiacuene pataexanabiabijavami? jai bajarapamonae.

<sup>11</sup> Nexata Juan jumaitsi bajarapamonaejavabelia:

—Pajivi anijacamisabeje xaina, rajutsi pajiviyo apo xinae camisa. Pajivi pexaejava  
 xaina, tsicobetsatsi pajiviyojavabelia apo xinae pexaejava, jai Juan.

<sup>12</sup> Gobierno pejamatabëcuene impuestomatamo pematamoyanijobabiabivi ata, pata  
 Juanjavaberena Juan picani pebautisabinexa bajarapamonae. Nexata bajarapamonae ata  
 jumaitsi Juanjavabelia:

—Juan, ¿detsa pacuene paexanaenajë daxitajivi pataneyapëtaenexa pepacuene pata-  
 copabijava pibisiacuene pataexanabiabijavami? jai bajarapamonae.

<sup>13</sup> Nexata Juan jumaitsi bajarapamonaejavabelia:

—Itsa pamatamoyanijobabiabame impuestomatamo, pamatamoyanijobabiabare pa-  
 matamota papecaitorobivi pacatocopata paneyanijobabiabinexa. Pëtsa matatox-  
 enetsia bajarapamatamovecua yamaxëitojorobiaya payanijobabiabame paxamë saya  
 panepitsinexa bajarapapalata, jai Juan bajarapamonaejavabelia.

<sup>14</sup> Nexata icatsia vajabitsaë ata jumaitsi Juanjavabelia:

—Juan, ¿jica paxanë tsane? ¿Detsa pacuene paexanaenajë daxitajivi pataneyapë-  
 taenexa pepacuene patacopabijava pibisiacuene pataexanabiabijavami? jai vajabitsaë.

Nexata Juan jumaitsi vajabitsaëjavabelia:

—Pëtsa panejumesaëta itsajivi ata palata payacajërètame. Pëtsa najumetsënëtsiaya  
 itsajivi ata pananeconitsiaexaname saya palata papecarajutsinexa pecajunavi. Saya  
 pasivabarëyamëre pacueneta pacamatamotapona papecaitorobivi, jai Juan vajabitsaë-  
 javabelia.

<sup>15</sup> Jivi itatsacajinaeya copiaevetavanapa Cristo, ponë Dioso athëbëvetsica itorobijitsia  
 pepatsijavatsica jivi pecapanepaenexa. Nexata bajarapamonae Juan itsa tanetsi, bajara-  
 pamonae jamatabëcuenenavëxaniabiaya jamatabëjumaitsi Juan yabara:

—Baja raeta jane maCristoje, daxitajivi pecapanepaenënexa, jamatabëjai bajarapa-  
 monae Juan yabara.

<sup>16</sup> Nexata Juan jumaitsi daxita bajarapamonaejavabelia:

—Xanë raja saya pacabautisabatsi merata. Itsiata baitsi jane itsanë tacovëver-  
 ena najetarucaena. Bajara jane ponë pacatsijamatabëjoneyaexanaena Espíritu Santo,  
 pitarunutsicotia yajava. Xanë raja saya beveliajamatabëcuenenënë bajaraponëvecua.  
 Nexata bajaraponë vecuaauranë pijazapato ata tataxujonotsinexa beprijavitonëcueni-  
 anë. <sup>17</sup> Arrozxainaenë baja itsa vereta arroz penotsijava, jëaba arroz pejëabijavata

ëpexu pepitsinexa. Nexata pijaarroz pejëabijavata, tsatapon saicaya ëpexu pesivecua. Nexata ëpexu xaniavaeteta peetsibojavabelia. Pesi pijinia penetapon vayafuabelia petajuitsinexa. Bajara pijinia pacuenia paxamë ata, Dioso pejumecovënëtsivivecua Dioso pacatsatsiana papecaxuabinexa infiernojavabelia panenaxuabinexa baja daxitamatacabijavabelianexa. Pamonaë pijinia Dioso pejumecovënëtsivi, Dioso capanepaenatsi pijanacuayabetsia. Pamonaë pijinia Dioso apo jumecovënëtsi, Dioso naneconitsiaexanaenatsi daxitamatacabijavabelianexa apo peverevere caeisotojavabelia, jai Juan daxita bajarapamonaëjavabelia.

<sup>18</sup> Bajarapacuenia ayailivaisianëta Juan muxujiobapona jivi. Tsipaëbanajetaruca pexanialivaisi pecapanepaelivaisinexatsi Diosojavabelia. <sup>19</sup> Bajaraxuacujinaë icatsia Juan itaveta nacuaevetsinë Herodes. Tsipaji Herodes pejuyapijinë pijava yacajërëta, Herodíasvënëva. Daxita Herodes pibisiacuene pexanaëjavanë ata, itaveta Juan. <sup>20</sup> Itsiata baitsi jane Juan Herodes apo jumecovënëtsi. Caranata biji orijibia icatsia Herodes pibisiacuene exana. Herodes itoroba pijajivi Juan pevaetabinexatsi, penaneconitsivi pejëbabiabibota peetsinexatsi.

*Pacuenia Juan bautisaba Jesús yabara pelivaisi*

*(Mt 3.13-17; Mr 1.9-11)*

<sup>21</sup> Juan pevaetabivajënaetsi penaneconitsivi pejëbabiabibota peetsinexatsi, jivi bautisabaponapona. Bajarapamatacabi Juan bautisaba Jesús ata. Jesús pebautisabicujinaetsi itsa vajëta Diosojavabelia, athëbëtatsia itaboxo napatsia. <sup>22</sup> Athëbëvetsica Espiritu Santo naitajëtsiaya Jesús tsmatarunaicatsi beucucuto. Nexata Jesús jumetane athëbëvetsica Dioso pejumaitsijavatsi: “Xamë raja taxënatomë, bitso tacaasivanë. Bitso casivajamatabëcuenebarëyatsi,” pejaijavatsi.

*Jesucristo pijasalinaivimi pevënëanë yabara pelivaisi*

*(Mt 1.1-17)*

<sup>23</sup> Itsa baja Jesús xaina bejamatabëcuene treinta pavaibeje, taxuxuaba jane baja jivi Dioso pitorobilivaisi petsipaëbijava. Jivi tanetsi Jesús beJosé pexënato. José paxapijinë pevënë Elí. <sup>24</sup> Elí paxapijinë pevënë Matat. Matat paxapijinë pevënë Leví. Leví paxapijinë pevënë Melqui. Melqui paxapijinë pevënë Jana. Jana paxapijinë pevënë José. <sup>25</sup> José paxapijinë pevënë Matatías. Matatías paxapijinë pevënë Amós. Amós paxapijinë pevënë Nahum. Nahum paxapijinë pevënë Esli. Esli paxapijinë pevënë Nagai. <sup>26</sup> Nagai paxapijinë pevënë Maat. Maat paxapijinë pevënë Matatías. Matatías paxapijinë pevënë Semei. Semei paxapijinë pevënë Josec. Josec paxapijinë pevënë Judá. <sup>27</sup> Judá paxapijinë pevënë Joanán. Joanán paxapijinë pevënë Resa. Resa paxapijinë pevënë Zorobabel. Zorobabel paxapijinë pevënë Salatiel. Salatiel paxapijinë pevënë Neri. <sup>28</sup> Neri paxapijinë pevënë Melqui. Melqui paxapijinë pevënë Adi. Adi paxapijinë pevënë Cosam. Cosam paxapijinë pevënë Elmadam. Elmadam paxapijinë pevënë Er. <sup>29</sup> Er paxapijinë pevënë Josué. Josué paxapijinë pevënë Eliezer. Eliezer paxapijinë pevënë Jorim. Jorim paxapijinë pevënë Matat. <sup>30</sup> Matat paxapijinë pevënë Leví. Leví paxapijinë pevënë Simeón. Simeón paxapijinë pevënë Judá. Judá paxapijinë pevënë José. José paxapijinë pevënë Jonam. Jonam paxapijinë pevënë Eliaquim. <sup>31</sup> Eliaquim paxapijinë pevënë Melea. Melea paxapijinë pevënë Mena. Mena paxapijinë pevënë Matata. Matata paxapijinë pevënë Natán. <sup>32</sup> Natán paxapijinë pevënë David. David paxapijinë pevënë Isaí. Isaí paxapijinë pevënë Obed. Obed paxapijinë pevënë Booz. Booz paxapijinë pevënë Sala. Sala paxapijinë pevënë Naasón. <sup>33</sup> Naasón paxapijinë pevënë Aminadab. Aminadab paxapijinë pevënë Admin. Admin paxapijinë pevënë Arni. Arni paxapijinë pevënë Esrom. Esrom paxapijinë pevënë Fares. Fares paxapijinë pevënë Judá. <sup>34</sup> Judá paxapijinë pevënë Jacob. Jacob paxapijinë pevënë Isaac. Isaac paxapijinë pevënë Abraham. Abraham paxapijinë pevënë Taré. Taré paxapijinë pevënë Nacor. <sup>35</sup> Nacor paxapijinë pevënë Serug. Serug paxapijinë pevënë Ragau. Ragau paxapijinë pevënë Peleg. Peleg paxapijinë pevënë Heber. Heber paxapijinë pevënë Sala. <sup>36</sup> Sala paxapijinë

pevënë Cainán. Cainán paxapijinë pevënë Arfaxad. Arfaxad paxapijinë pevënë Sem. Sem paxapijinë pevënë Noé. Noé paxapijinë pevënë Lamec. <sup>37</sup> Lamec paxapijinë pevënë Matusalén. Matusalén paxapijinë pevënë Enoc. Enoc paxapijinë pevënë Jared. Jared paxapijinë pevënë Mahalaleel. Mahalaleel paxapijinë pevënë Cainán. <sup>38</sup> Cainán paxapijinë pevënë Enós. Enós paxapijinë pevënë Set. Set paxapijinë pevënë Adán. Adánpijinë Dioso pexanaenëtsi.

## 4

*Pacuenia picani Jesús jamatabëcueneëjébatsi dovathi yabara pelivaisi*  
(Mt 4.1-11; Mr 1.12-13)

<sup>1</sup> Jesús baja naviarena Jordán meneverena Juan pebautisabicujinaetsi. Tsijamatabëvënëcatsi bitso Espíritu Santo. Nexata Espíritu Santo ponaeyaexanatsi petusato nacuyabelia. <sup>2</sup> Bajarajotalia Jesús ponapona cuarenta pamatacabibeje. Bajara pijinia pamatacabibeje Jesús pexaejava apo xae. Jesús nexata bitso piyani. Dovathi nexata jamatabëcueneëjébatsi pibisiacuene picani pexanaenexa. <sup>3</sup> Dovathi jumaitsi Jesúsjavabelia:

—Itsa pepacuene Dioso pexënatomë, itorobare mapaibotoyoje penaexanaenexa panbë, jai dovathi Jesúsjavabelia.

<sup>4</sup> Jesús nexata jumaitsi dovathijavabelia:

—Jume raja. Dioso raja pejumelivaisibaxutota jumaitsi mapacueniaje: “Jivi raja apo namatavenonae epexaejava pexaenexa. Jivi raja namatavenona daxita Dioso pejumelivaisi ata pejumecovënëtsinexa pexainaenexa matacabi apo peverevereaejava,” jai raja Dioso pejumelivaisibaxutota, jai Jesús dovathijavabelia.

<sup>5</sup> Bajaraxuacujinae icatsia Jesús barëliatsi dovathi pinijitsutoxanetojavabelia. Barëjunayatsi bajarapatsutojumabetsia. Nexata bajarapatsutojumavetsica dovathi Jesús tsitajëtatsi bepijia daxitanacuanë. <sup>6</sup> Nexata icatsia dovathi jumaitsi Jesúsjavabelia:

—Xanë raja carajutsianatsi daxita mapanacuanëje nevetsinexa. Daxita bajarapanacuanëta paitabëcuene taneme, cayajavarajutsianatsi. Nexata bitso nexainaenë tsane nexinaejava. Daxita tanerajutsijavanëmi, necaëjépa juya tarajutsinexa pajivijavabelia jamatabërajutajë. <sup>7</sup> Ayaijamatabëcuenenënë netaeya taitabarata nematabacabëta ita netonucajunuame, nexata daxita mapanacuanëje nijanacuanë tsane, jai dovathi Jesúsjavabelia.

<sup>8</sup> Nexata Jesús jumaitsi dovathijavabelia:

—Dovathi, nevecuanatixire. Dioso raja pejumelivaisibaxutota jumaitsi mapacueniaje: “Daxitajivi vajëcae pematabacabëta caenë, pepo petuxanenë Diosojavabelia. Tonacuenebinua bajaraëponënexa,” jai raja Dioso pejumelivaisibaxutota, jai Jesús dovathijavabelia.

<sup>9</sup> Bajaraxuacujinae abaxë icatsia Jesús barëliatsi dovathi Jerusalén tomarabelia. Jerusalén tomarata barëjunayatsi temploboxaneto matatuyabetsia. Nexata templobomatatutatsia dovathi icatsia jumaitsi Jesúsjavabelia:

—Itsa pepacuene Dioso pexënatomë, jirevaremeca irabereca. <sup>10</sup> Bajarapacuenia jirevaremeca irabereca. Tsipaji xamë peitsacueneyaniva pecaevetsinexa, Dioso pejumelivaisibaxutota jumaitsi mapacueniaje:

Dioso itorobianica pijaánglelevi pecaevetsinexa. <sup>11</sup> Nexata ánglelevi pecobeta cayotsiana pecataxutsaquitsiyaniya ibotonëjavabelia, jai Dioso pejumelivaisibaxutota xamë pecaevetsinexa ánglelevi, jai dovathi Jesúsjavabelia.

<sup>12</sup> Jesús nexata icatsia jumaitsi dovathijavabelia:

—Jume raja. Dioso raja pijinia pejumelivaisibaxutota jumaitsi mapacueniaje: “Itsajivi ata jamatabëcuenenavëxaniabiaya pijacuata apo bejamatabëjumaitsi: ‘Xanë Dioso jamatabëcueneëjëtianajë. Nexata natoexanaenajë pacuene bitso netsiyayi tatëpaenexa. Itsiata Dioso neyavenonaena tavecuapanepaenexa bajaraxua. Nexata bajarapacuenia

yapëtaenajë Dioso taneyavenonaejava, 'apo bejamatabëjai," jai Dioso pejumelivaisibaxutota, jai Jesús dovathijavabelia.

<sup>13</sup> Bajaraxuacujinae itsa baja dovathi daxitacuene Jesús jamatabëcueneëjëbiveretatsi pibisiacuene picani Jesús pexanaenexa, nexata abaxë yatucopatatsi itsamatacabijavabelia icatsia pejamatabëcueneëjëtsinexatsi.

*Pacuenia Jesús Galilea nacuata taxuxuaba Dioso pitorobilivaisi jivi petsipaebijava yabara pelivaisi*

*(Mt 4.12-17; Mr 1.14-15)*

<sup>14</sup> Jesús baja itsa naviaata petusato nacuaverena, Galilea nacuayaberena, Espiritu Santo pesaë yajavaponapona. Nexata daxita Galilea nacuapijivi vënëlivaisitanetsi Jesús.

<sup>15</sup> Judíovi penacaetuatabibonëjava Jesús jivi livaisi tsipaebanajetaruca. Daxitajivi nexata Jesús yabara jumai tsabiabi: "Maponëje bitso ayaijamatabëcueneë," jai tsabiabi.

*Pacuenia Jesús naviaata pijatomarabelia, Nazaret tomarabelia, yabara pelivaisi*

*(Mt 13.53-58; Mr 6.1-6)*

<sup>16</sup> Nexata Jesús naviaata pevitsabitomarabelia, Nazaret tomarabelia. Nexata pepat-sicujinae Nazaret tomarata, judíovi penacueraevetsimatacabita Jesús najoneya judíovi penacaetuatabiboyalia. Tsipaji baja cajena Jesús bajarapacuenia exanabiaba. Nexata judíovi penacaetuatabibota Jesús nonotapuna Dioso pejumelivaisibaxuto petsimuxulebinexa daxita bajarajota penaevi pejumetaenexa. <sup>17</sup> Nexata Jesús tsicoberutatsi profeta Isaíaspijinë bajayata peyaquinaebaxuto. Nexata Jesús bajarapabaxuto baxupata. Nexata jane baja daxita bajarajota penaevi pejumetaenexa, Jesús tsimuxuleba itsajota bajarapabaxutota tajëvelia Jesús yabara jumaiti mapacueniaje:

<sup>18</sup> Dioso pijaEspiritu Santo netsijamatabëeca. Tsipaji Dioso nitapeta tatsipaebinexa pex-anialivaisi pibisiacuene pexanabiabijava bepeyajamatabëcuenejibivijavabelia. Nitorobanua tajamatabëcueneexaniavaetsinexa bajarapamonae pibisiacuene pex-anabiabineconi yabara bepeyajamatabëcuenejibijavavecua. Nitorobanua tajamatabëcueneexaniavaetsinexa pamonae pijamatabëcueneitaquirivi, pamonae abaxë apo yapëtae pexaniajailivaisi. Nitorobanua tacapanepaenexa pamonae jamatabëcuenebejibitabiabatsi pijavajabitsaë. <sup>19</sup> Nitorobanua tatsipaebinexa pacuenia baja Dioso najamatabëcuenevereta pecapanepaenexa pijajivi, pejaitanejavata tajëvelia Jesús yabara Isaíaspijinë peyaquinaebaxutota Jesús tsimuxulebanuca daxita bajarajota penaevi pejumetaenexa.

<sup>20</sup> Bajaraxuacujinae Jesús baja bajarapabaxuto baxuacata. Tocanaviata baja judíovi penacaetuatabibota penacuenebinëjavabelia. Bajaraxuacujinae Jesús baja icatsia ecareca. Daxita pamonae judíovi penacaetuatabibota ena, Jesús asaëyata taeyenatsi.

<sup>21</sup> Nexata icatsia Jesús jumaiti bajarapamonaejavabelia:

—Aeconoxae Dioso pejumelivaisibaxuto pacatsimuxulebiveretatsi. Xua yabara bajarapabaxutota jumaiti, bajaraxua baja aeconoxae mapamatacabitaje copiapata baja, jai Jesús bajarapamonaejavabelia.

<sup>22</sup> Nexata daxitajivi pexaniajamatabëcuena Jesús yabara cuaicuajai. Jamatabëcuenebenajaca pexanialivaisi Jesús petsipaebixae. Nexata bajarapamonae Jesús jamatabëcueneaebiatanetsi. Nexata bajarapamonae nayanijobena. Najumaiti:

—¿Matsa baja ponë Josépijinë apo pexënatoje? najai tsenae bajarapamonae Jesús yabara.

Tsipaji saya bajarapamonae jamatabëjumai tsenae:

—Josépijinë raja pexënato, jamatabëjai tsenae.

<sup>23</sup> Nexata Jesús jamatabëcuene yapëtane pacuenia sivanajamatabëxainatsi bajarapamonae. Nexata Jesús jumaiti bajarapamonaejavabelia:

—Xaniajanë cajena pacuenia pacatsipaebijitsiatsi. Pacuenia pajumaitsimë tsabiabi pajiyojavabelia pajamatabëcueneaebiataneme, bajara pijinia pacuenia xanëjavaberena ata panejumaitsimë tsane patanejamatabëcueneaebiataexaemë. Panejumaitsimë tsane

mapacueniaje: “Pacuenia pacavënëlivaisitanetsi Dioso pesaëta pinijicuene nexanaejava Capernaum tomarata, bajara icatsia pitsicuene exanare majotaje nevitsabitomarata,” panejamë tsane, jai Jesús judíovi penacaetuatabibota penaevijavabelia.

<sup>24</sup> Icatsia Jesús jumaitsi bajarapamonaejavabelia:

—Xaniajanë cajena pacuenia pacatsipaebijitsiatsi. Itsanë ata Diosojumepaebinëmi profetanë pijanacuapijivi apo jumecovënëtsitsi petsipaebilivaisi. Jamatabëcuene aebi-ataeyabiabatsi pijanacuapijivi. <sup>25</sup> Bajayata profetanëmibeje pinijicuene exanae atabeje, pinijicuene apo exanaebeje pijanacuata. Bajara pijinia pacuenia xanë ata pinijicuene apo exanaenë tsane tavitsabitomarata. Bajayata, abaxë pamatacabi profeta Elíaspijinë ponapona Israel nacuata, bajarapamatacabi, emarapae ata, ema apo jopae. Nexata acueyabi pavaibeje epatua ajibi ema. Nexata daxita nacuanëjava bitso janibo. Bajara-pamatacabi janibovajënaeya pamonajivi pevecuatëpaevanëtsi ayaibitsaëto jinavanapa Israel nacuata. Bitso bejiobi tsavanapae. <sup>26</sup> Itsiata Elíaspijinë Dioso apo itorobitsi peyavenonaenexa bajarapamonaejavuvënëva. Elíaspijinë Dioso itorobatsi peponaenexa Sarepta tomarapijivijavabelia, Sarepta tomarata pamona pevecuatëpaevatsi Elíaspijinë peyavenonaenexa. Sareptatomara eca Sidón nacuata. <sup>27</sup> Bajayata, Elíaspijinë pevënamuto, profeta Eliseopijinë ponapona Israel nacuata. Bajayajebi bitso peperabëtsabanaevi, ayaibitsaëto picani jinavanapa Israel nacuata. Itsiata bajarapamatacabi profeta Eliseopijinë caenë ata pijanacuapijinë, bajayajebi bitso peperabëtsabanaeviyajuvënënenë, apo jamatejemayaexanae. Caenë bajayajebi bitso peperabëtsabanaenë Naamán, Siria nacuverena pepatsinë, jamatejemayaexana, jai Jesús judíovi penacaetuatabibota penaevijavabelia.

<sup>28</sup> Nexata bajarapamonae itsa jumetane bajarapacuenia Jesús pejumaitsijava, bitso Jesús baranaepanatsi bajarapamonae. <sup>29</sup> Bajarapamonae nonobapuna. Vaetabatsi Jesús. Caponaliatsi tomarajumabelia. Patsutoyenepanata eca Nazarettomara, bajarapatsutojumabetsia Jesús caponayatsi pexuabinexatsireca picani bajarapatsuto itapanitojavareca. <sup>30</sup> Itsiata baitsi jane Jesús bajarapamonae tuatuajëta najetarucacae ata, pëtaenejevatsi vecuapona baja Capernaum tomarabelia. Nexata baja Jesús vecuapanepa bajarapamonae.

*Pacuenia pebi, dovathi peyajavaponaponaenë, Jesús jamatejemayaexana yabara pelivaisi (Mr 1.21-28)*

<sup>31</sup> Jesús pata Capernaum tomarata. Capernaum tomara eca Galilea nacuata. Nexata Capernaum tomarata Jesús jivi livaisi tsipaeba judíovi penacueraevetsimatacabita. <sup>32</sup> Itsa bajarapamonae jumetane palivaisi Jesús tsipaeba, jamatabëcuenenabenajaca. Tsipaji xaniavaetsia tsipaeba Dioso pitorobinëtsicuenia.

<sup>33</sup> Bajarajota judíovi penacaetuatabibota pebi, dovathi peyajavaponaponaenë, naeca. Nexata bajaraponë Jesúsjavabelia vavajai tsaxuabi. Jumaitsi:

<sup>34</sup> —¡Jesús, Nazaret tomarapijjinëmë, panevecuaponare baja! ¿Detsa xua paneexanae-jitsiamë? ¿Najetarucame tsaja pataneveretsinexamë? Xanë cajena cayapëtanetsi. Xamë raja Dioso pexënatomë, pepo pexaniajamatabëcuenenëmë, jai dovathi peyajavaponaponaenë Jesúsjavabelia.

<sup>35</sup> Jesús nexata jumeitaveta dovathi. Jumaitsi:

—¡Moyamëre! ¡Vecuapitsapare baja maponëje! jai Jesús.

Nexata dovathi pebi xuabatsi irata daxita bajarapamonae pitabarata. Dovathi baja pebi vecuapitsapatsi itsiata itsacuene exanaenejevatsi. <sup>36</sup> Nexata daxitajivi bajarapacuenia itsa tane, bitso jamatabëcuenenabenajaca. Najumaitsi bajarapamonae:

—¿De meta pacuenia maponë caëjëpatsi pijumeta pexanaenexa mapacueniaje? ¡Maponëje Jesús, beDioso pitorobinëtsitsica! ¡Itaveta dovathi pepitsapaenexa jivivecua! ¡Nexata baja dovathi pitsapa jivivecua! najai bajarapamonae.

<sup>37</sup> Nexata Jesús vënëlivaisitanetsi daxita bajarapanacuapijivi.

*Pacuenia Simón Pedro pijava pena Jesús tojamatejemayaexana yabara pelivaisi*  
(Mt 8.14-15; Mr 1.29-31)

<sup>38</sup> Judíovi penacaetuatabiabibo pevecuapitsapaecujinae, Jesús joneya Simón Pedro pijaboyalia. Nexata bajarajota Jesús pevajënae, Simón pijava pena bitso romaebanucatsi. Nexata bajarajota itsamonae Jesús tsipaebarecëpatsi bajarapova peromaebanucaejavatsi. <sup>39</sup> Jesús nexata cujilia peromaebanucaeavatsi. Vecuaitaveta peromaebijavatsi. Nexata bajarajota peromaebanucaeavatsi domae baja vecuaajibi tsanajetsitsireca. Bajarapova baja jamatejema. Nexata bajarapova Jesúsbana pexaejavanexa toexanatsi.

*Pacuenia ayaibitsaëto jivi, piavitanevi, Jesús jamatejemayaexana yabara pelivaisi*  
(Mt 8.16-17; Mr 1.32-34)

<sup>40</sup> Itsa baja ajena meravitsia, jivi piavitanevi, daxitaviriavitane pexainaevi, tocapatatsi Jesúsjavaberena. Jesús nexata perabëjayataponae caejivi canacujitsia, piavitanevi. Bajarapacuenia Jesús jamatejemayaexana daxita piavitanevi. <sup>41</sup> Itsamonae ayaibitsaëto, dovathi peyajavajinavanapaevi, Jesús vecuacapitsapapona. Nexata dovathi itsa pitsapa, vavajai tsabiabi Jesúsjavabelia.

—Xamë raja Dioso pexënatomë, jai tsabiabi.

Nexata Jesús jumeitavetabiaba dovathi. Apo tocopatabiabi pecuaicuajainexa petsipaebiyaniwa itsamonaejavabelia. Tsipaji dovathi xaniavaetsia yapëtanetsi Cristo athëbëvetsica Dioso pitorobijavatsi jivi pecapanepaenexa.

*Pacuenia Dioso pitorobilivaisi Jesús jivi tsipaeba Galilea nacuata yabara pelivaisi*  
(Mr 1.35-39)

<sup>42</sup> Bajayacunua, ajena baja matacabi tsarucaponae, Jesús pitsapa tomaravecua. Pona pesaicaeyojavabelia. Nexata jivi pëjaitatsi. Yapënapatatsi itsajota Jesús eca. Asivatsi bajarapamonae Jesús pevecuaponaeyaniva itsjavabelia. <sup>43</sup> Nexata Jesús jumaitsi bajarapamonaejavabelia:

—Itsatomaranëjava ata raja tsipaebijitsianë pexanialivaisi pacuenia Dioso evetsijitsia pijajivi mapanacuataje. Bajarapalivaisi tatsipaebinexa jivi, Dioso baja cajena nitoroba, jai Jesús bajarapamonaejavabelia.

<sup>44</sup> Bajarapacuenia Jesús Judea nacujava livaisi jivi tsipaebanajetaruca judíovi penacaetuatabiabibonëjava.

## 5

*Pacuenia dujuai bitso ayajavaxaneto juta peyamatajucaejavata yabara pelivaisi*  
(Mt 4.18-22; Mr 1.16-20)

<sup>1</sup> Itsamatacabi Jesús nuca Genesaret pucaxaneto itapata. Nexata jivi ayaibitsaëtoxaneto cënënaponatsi imoxoyo pejumetaenexatsi Jesús petsipaebilivaisi, Dioso pitorobilivaisi. <sup>2</sup> Nexata Jesús anijajerabeje taeruta bajarajota pucaitapata. Bajarapamobeje dujuai peyamatajucaevi Simónbana vecuanonobajunarëcëpa. Nexata bajarajota imoxoyo Simónbana quiatanubena dujuai peyamatajucaejava. <sup>3</sup> Nexata Jesús runareca jera ënëabereca, Simón pijajera ënëabereca. Jesús itoroba Simón jera peyatorotsinexatsilia tsiquirijavayo puca tuatujëyojavabelia. Jesús eca jeraënëta. Nexata Jesús jera ënëjavaverena livaisi tsipaebeca bajarapajivi bitsaëtoxanetojavabelia. <sup>4</sup> Itsa baja Jesús copata jivi livaisi petsipaebijava, nexata jumaitsi Simónjavabelia:

—Pavaeremelia jera piavajubujavabelia. Pacoparemeca dujuai paneyamatajucaejava. Payamatajutsianame dujuai, jai Jesús Simónjavabelia.

<sup>5</sup> Nexata Simón jumaitsi Jesúsjavabelia:

—Jesús, payamatajucajë rabaja picani meravijebi. Itsiata apo payamatajutsinë caenëyo ata. Itsiata pacuenia paneitorobame, pacopatsiarecajë dujuai patayamatajucaejava, jai Simón Jesúsjavabelia.

<sup>6</sup> Nexata copareca pitorobicueniatsi. Itsa jutsina dujuai peyamatajucaejava, ayaijavaxaneto bitso dujuai yajutsina. Nexata dujuai peyamatajucaejava imoxo peyamaëucuucuae. <sup>7</sup> Nexata itacovaebarena penajuayamatajucaeivi peponaenexarena itsamota peyavenonaenexatsi. Bajarapamonae nubenalia puca itapatalia. Nexata bajarapamonae ponarena. Vënëta bajarapamobeje dujuai. Imoxo dujuai peyabubunae bajarapamobeje. <sup>8</sup> Nexata Simón Pedro itsa tane bajarapacueni, pematabacabëta tonuca Jesús pitabarata. Jumaitsi Jesúsjavabelia:

—Tajatuxanenë, nevecuanatixire. Tshipaji xanë pibisiacueni taexanaenë, jai Simón Jesúsjavabelia.

<sup>9</sup> Bajarapasamota peyavenonaenexatsi. Bajarapamonae nubenalia puca itapatalia. Nexata bajarapamonae ponarena. Vëncuenia Simón jumaitsi tshipaji penajuayamatajucaeivi yajava bitso jamatabëcuenenabenajaca, bitso ayaijavaxaneto dujuai peyamatajutsixae. <sup>10</sup> Ponëbeje Simón yanatatsi, Santiagobeje Juanbeje. Bajaraponëbeje Zebedeo pexënatobeje. Bajaraponëbeje ata jamatabëcuenenabenajacabeje. Nexata Jesús jumaitsi Simónjavabelia:

—Pëtsa najunaviacame. Cacularubianatsi jivi nejucaenexa. Nexata pacuenia dujuai jucabiabame, bajarapacuenia jivi jucaenama Dioso pijajivinexa, jai Jesús Simónjavabelia.

<sup>11</sup> Nexata bajarapamonae robobocalia jerabeje tajetabojavabelia. Bajaraxuacujinae bajarapamonae pecajinavanapaejavaximi rajuta itsamonaejavabelia. Bajaraxuacujinae pënäpona baja Jesús.

*Pacuenia Jesús jamatejemayaexana bajayajebi bitso peperabëtsabanaenë yabara pelivaisi (Mt 8.1-4; Mr 1.40-45)*

<sup>12</sup> Jesús itsa ponäpona tomarata, nexata bajarajota patajopa pebi, bajayajebi bitso peperabëtsabanaenë. Itsa bajaraponë tane Jesús, pematabacabëta irataeya bocajunua Jesús pitabarata. Vajëta pinijicuenia Jesúsjavabelia. Jumaitsi:

—Tajatuxanenë, cacaëjëpa raja tanejamatejemayaexanaenexamë mapavitanevecuaje. Itsa jitsipame, nejamatejemayaexanare mapavitanevecuaje, jai bitso peperabëtsabanaenë Jesúsjavabelia.

<sup>13</sup> Nexata Jesús pecobeta perabëjayalia bitso peperabëtsabanaenë. Jumaitsi bajaraponëjavabelia:

—Jājā, jitsipajë cajena. Jamatejemamë rabaja, jai Jesús peperabëtsabanaenëjavabelia.

Bajarapacuenia Jesús pejumaitsijavata peperabëtsabanaenëmi baja perabëxanepananajereca. <sup>14</sup> Nexata Jesús jumeitaveta bajayajebi bitso peperabëtsabanaenëmi petsipaebiyäniva itsajiviyojavabelia ata pacuenia Jesús jamatejemayaexana bajaraponë. Jesús jumaitsi:

—Naitajëremelia jane sacerdotenëjavabelia, templobota penacuenebinëjavabelia. Nexata sacerdotenë cataena pecavecuaajibijava baja niavitanejavami. Diosonexa rajuremelia ofrenda sacerdotenëjavabelia pecavecuaajibixae niavitanejavami. Bajara tshipaji pacuenia bajayata vajasalinainëmi Moiséspijinë nacaitoroba. Nexata jivi yapëtaena pepacuene baja pecavecuaajibijava niavitanejavami, jai picani Jesús bajayajebi bitso peperabëtsabanaenëmijavabelia jivi ayabitsaëto pevënëlivaisitaeyanivatsi.

<sup>15</sup> Itsiata Jesús vënëlivaisitanetsi daxita bajarapanacuapijivi. Nexata Jesús jivi itsa vënëlivaistanetsi, ayabitsaëtoxaneto patäpona Jesúsjavaberena penamuxunaevetsinexatsi petsipaebilivaisi. Bajarapamonae pata Jesús pejamatejemayaexanaenexanua piavitanejavavecua. <sup>16</sup> Itsiata Jesús itsajavata jivivecua natixitabiaba pesaicaeyojavabelia. Bajarajota vajëtabiaba Diosojavabelia.

*Pacuenia Jesús jamatejemayaexana petabusipacuenabinëtsi yabara pelivaisi (Mt 9.1-8; Mr 2.1-12)*

<sup>17</sup> Itsamatacabi Jesús jivi livaisi tsipaeba. Bajarajota naena fariseovi. Naenanua judíovi pecujarubivi ata. Bajarapamonae pata Galilea nacuata penaetomaranëjavaverena, Judea

nacuata penaetomaranëjavaverena ata, Jerusalén tomaraverena ata. Nexata bajarapamatacabi Jesús Dioso pesaëta caëjëpaeyaexanatsi jivi pejamatejemayaexanaenexa piavitanejavavecu. <sup>18</sup> Nexata bajarajota Jesúsjavaberena pebijivi camayota yavëtacara-parena petabusipacuenabinëtsi. Bajarapamonae picani bajaraponë boyalia yavëtacara-jonejtsialia peyabuatsinexa Jesús pitabarata. <sup>19</sup> Itsiata acuenebi boyalia pecajonejava. Tsipaji bitso jivi bajarapabo yavënëca. Nexata bajarapamonae petabusipacuenabinëtsi bojumabetsia cajunaya. Bomatatu javavetsica vojoexana. Nexata bajarapavojotuatsica petabusipacuenabinëtsi camayota yacopatsicatsi jivi tuatujëatsica Jesús pitabarayatsica. <sup>20</sup> Jesús jamatabëcueneyapëtane pacuenia bajarapamonae sivanajamatabëxainatsi. “Nacatojamatejemayaexanaenatsi cajena,” pesivajamatabëjaijavatsi Jesús jamatabëcueneyapëtane. Bajaraxuata petabusipacuenabinëtsijavabelia Jesús jumaiti mapacueniaje:

—Pibisiacuene rabaja nexanaeneconimi cavecuajibiaexanatsi, jai Jesús bajaraponëjavabelia.

<sup>21</sup> Nexata judíovi pecujarubivi, fariseovinua, itsa jumetaeyena Jesús pejumaitisijava bajarapacuenia, najamatabëxainena bëpënëa mapacueniaje:

—¿De meta maponëje? Maponëje Dioso apo pejitsipaecuenia cuaicuajiai. Itsanë ata cajena apo caëjëpaetsi itsajivi pibisiacuene pexanaeneconimi pevecuajibiaexanaenexa. Caenë Dioso caëjëpatsi itsajivi pibisiacuene pexanaeneconimi pevecuajibiaexanaenexa, jamatabëjai tsenae bajarapamonae bëpënëa Jesús yabara.

<sup>22</sup> Nexata Jesús jamatabëcueneyapëtane bajarapamonae bëpënëa pesivanajamatabëxainenaenajava bajarapacuenia. Nexata Jesús jumaiti bajarapamonaejavabelia:

—Pëtsa bajarapacuenia panesivanajamatabëxainame. Tsipaji cajena xanë necaëjëpa jivi pibisiacuene pexanaeneconi tavecuajibiaexanaenexa. <sup>23</sup> Paxamë apo pacacaëjëpae ata itsajivi pibisiacuene pexanaeneconi panevecuajibiaexanaenexa, pacacaëjëpa picani saya jema panejumaitsinexa pejamatejemavijavabelia mapacueniaje: “Cavecuajibiaexanatsi rabaja pibisiacuene nexanaeneconimi,” panejainexa. Tsipaji itsajivi ata apo yapëtae tsipae saya jema panejumaitisijava. Itsiata baitsi jane itsa pepacuene apo pacacaëjëpae panejamatejemayaexanaenexa petabusipacuenabinëtsi, nexata acuenebi panejumaitsinexa bajaraponëjavabelia mapacueniaje: “Nonotapunare. Ponare baja,” panejainexa. Tsipaji bajarapacuenia pajumaitsimë ata, itsa apo jamatejema tsipae bajaraponë, nexata daxitajivi pacayapëtaejitsipa apo papecacajaëjëpaecuenia panejamatejemayaexanaenexa bajaraponë, jai nexata Jesús bajarapamonaejavabelia.

<sup>24</sup> Icatsia Jesús jumaiti bajarapamonaejavabelia:

—Xanë, Daxitajivi Pematapijinënë, mapanacuata necaëjëpa tavecuajibiaexanaenexa itsajivi pibisiacuene pexanaeneconimi ata pacuenia baja exanajë maponëjavabeliaje. Nexata patanecueneyapëtaenexamë tanecaëjëpaejava tavecuajibiaexanaenexa itsajivi pibisiacuene pexanaeneconimi ata, pataema pacuenia jamatejemayaexanaejitsianë maponëje, jai Jesús bajarapamonaejavabelia.

Nexata icatsia Jesús jumaiti petabusipacuenebinëtsijavabelia:

—Xamë cajumaititsi. Nonotapunare. Nijacamayo pire. Nijaboyabelia baja ponare, jai Jesús.

<sup>25</sup> Nexata bajarapacuenia Jesús pejumaitisijavata, petabusipacuenebinëmitsi nonotabapuna baja daxitajivi pitabarata. Pebocaecamayo pita. Pona baja pijaboyabelia. Penajetarucaejavata namutua, Diosojavabelia jumai tsanajetaruca: “Diosomë, pexaniacuene netoexaname,” jai tsanajetaruca bajaraponë. <sup>26</sup> Nexata daxita pamonaenane tane petabusipacuenabinëmitsi baja pejamatejemajava, pinijicuenia jamatabëcuenenabena-jaca. Nexata bajarapamonae jumaiti Diosojavabelia:

—Diosomë, pexaniacuene bitso nexanaenë, jai Diosojavabelia.

Daxitajivi itsa tane bajaraponë pejamatejemajava, pejamatabëcueneta bëpënëa bitso junava. Nexata bajarapamonae najumaiti:

—Ajena, mapamatacabitaje, tanetsi Dioso pinijicuene pexanaejava, najai bajarapamonae.

*Pacuenia Jesús pijajivitonënexa junata Levívënënë yabara pelivaisi  
(Mt 9.9-13; Mr 2.13-17)*

<sup>27</sup> Jesús baja vecuapona pabota jamatejemayaexana petabusipacuenabinëtsi. Nexata Jesús penajetarucaejavata taeyeta Levívënënë. Bajaraponë pematamoyanijobinë impuestomatamo gobierno pejamatabëcuene. Pabota jivijavabelia matamoyanijobabiaba impuestomatamo, bajarapabota eca Leví. Nexata Jesús jumaitsi Levíjavabelia:

—Leví, nepënaponare, jai Jesús.

<sup>28</sup> Jejai Leví. Nexata nonotapuna. Copata baja daxita pacuene bajarajota nacuenebabiaba. Pënapona Jesús.

<sup>29</sup> Bajaraxuacujinae Leví pijabota napata Jesús. Nexata Leví pinijifiesta toexana Jesús-nexa. Tsipaji Leví jamatabëcuenebarëya Jesús pejunatsixaetsi pijajivitonënexa. Nexata Leví pijabota naena ayaibitsaëto jivijavabelia impuestomatamo pematamoyanijobivi gobierno pejamatabëcuene. Itsamonae ata Leví pijabota naena mesa muxuneneta.

<sup>30</sup> Nexata fariseovi, judíovi pecujarubavinua, Leví pijabo jumapënëvelia penubenaevi, jamatabëcuenenavëxaniabiaya baracuaicuajitsi Jesús pijajivijavabelia. Bajarapamonae Jesús yabara jumaitsi:

—Jesús rabaja naneconita Diosojavabelia. Tsipaji gobierno pejamatabëcuene impuestomatamo pematamoyanijobabiabivijavata, piagamatabëcuenebejevijavatanua, naxaeyeca pexaejava, jai bajarapamonae jamatabëcuenenavëxaniabiaya Jesús pijajivijavabelia.

<sup>31</sup> Jesús itsa jumetane fariseovi, judíovi pecujarubivinua, pebaracuaicuajijavatsi, nexata Jesús jumaitsi bajarapamonaejavabelia mapacueniaje:

—Pevaëbinë raja apo vaëbi pejamatejemavi. Pevaëbinë raja piavitanevi vaëba.

<sup>32</sup> Bajara pijinia xanë ata itsinë. Apo sivapatajopaenë tajunatsinexa pamonae baja aneconijibi tsavanapae. Sivapatajopajë raja tajunatsinexa pijaneconi pexainaevi. Bajarapamonae junataponajë pecopabinexa pibisiacuene pexanaejava, penajamatabëcuenepeñeyorotsinexa Diosojavabelia, jai Jesús bajarapamonaejavabelia.

*Pacuenia Jesús yanijobatsi pamatacabibeje jivi vajëtapona Diosojavabelia pexaejava apo pexaeyabiabixae yabara pelivaisi*

*(Mt 9.14-17; Mr 2.18-22)*

<sup>33</sup> Fariseovi, judíovi pecujarubivinua, jumaitsi Jesúsjavabelia:

—Juan pijajivi, fariseovi pijajivinua, pexaejava apo xaeyabiabi pamatacabibeje Diosojavabelia vajëcapona. ¿Detsa xuajitsia xamë nijajivi pexaejava xaeyabiaba Diosojavabelia pevajëcaematacabianë ata? jai bajarapamonae.

<sup>34</sup> Jesús nexata comparacióncuenia jumaitsi bajarapamonaejavabelia:

—Pamonae junatatsi penacasabifiestajavabelia penanabaninexa, apo atsobi pexaejava itsa abaxë yajavaecatsi pejananacasabinë. <sup>35</sup> Itsiata baitsi jane itsa pejananacasabinë tsimaxëpatsipatsi pijavajabitsaë pevecuacaponanexatsi itsajavabelia, nexata pecovëta bajarapamonae apo xae tsipae pexaejava. Tsipaji bitso najamatabëxainaejitsipa. Bajara pijinia itsi tajajivi ata. Tayajavaponaponaeepato abaxë apo atsobabiabi pexaejava pamatacabibeje Diosojavabelia vajëtapona. Itsiata pamatacabi xanë necaponaena bajarapamonaevecua, nexata jane baja bajarapamatacabi pexaejava apo xae tsane bitso tanesivanajamatabëxainaeaxae, jai Jesús peyanijobivitsijavabelia.

<sup>36</sup> Nexata bajarapamonae perujujamatabëcuene baja penavecuacopatsinexa, Jesús livaisi tsipaeba comparacióncuenia, bajarapamonae pejumecovënëtsinexa ëpejanalivaisi, Jesús petsipaebilivaisi. Bajarapamonae anijajamatabëcuenebeje pexainaeayaniva, perujujamatabëcuene baja penavecuacopabinexa, Jesús livaisi tsipaeba comparacióncuenia. Perujujamatabëcuene yabara Jesús jumaitsi bajarapamonaejavabelia mapacueniaje:

—Itsajivi ata apo caucutsi pejananaxatatsijava pejanapana pecatsatarutsinexa perujunaxatatsiesetojavabelia. Itsa caucutsipa pecatsatarutsinexa pejanapana perujunaxatatsiesetojavabelia, nexata bijianaejitsipa pejananaxatatsijava. Apo itajitsipaenua tsipae pejanapana perucaejava perujunaxatatsiesetojavabelia.<sup>37</sup> Itsajivi ata pijinia apo epacae pejanavinoranë perujubocodoruanëjavabelia bajayajebi peyajebinexa. Pejanavinoranë itsa epacaejitsipa perujubocodoruanëjavabelia, nexata pejanavinoranë yatititibia tsipae. Tsipaji perujubocodoruanë apo yanayeretsi tsipae xaniavaetsia. Tsipaji pejanavinoranë pejumalitsëxë abaxë xaina. Nexata itsa yatititibia tsipae, naxuabijitsipa vinoranëmi.<sup>38</sup> Bajaraxuata bepaca pejanavinoranë pejanabocodoruanëjavabelia.<sup>39</sup> Itsajivi perujuvinora piapaecujinae, apo jitsipae piapaenexa pejanavinora. Tsipaji jamatabëjumaitsi: “Perujuvinora bitso xanepana pejanavinora matatoxenetsia,” jamatabëjai, jai Jesús bajarapamonaejavabelia comparacióncuenia. Bajarapacuenia Jesús jumaitsi comparacióncuenia tsipaji bajarapamonae catsiteca perujujamatabëcuene. Nexata Jesús jitsipa bajarapamonae pejumecovënëtsinexa ëpejanalivaisi, palivaisi Jesús tsipaeba.

## 6

*Pacuenia Jesús pijajivi namutua siricanajetarubena trigoxu judíovi penacueraevetsimatacabita yabara pelivaisi*

*(Mt 12.1-8; Mr 2.23-28)*

<sup>1</sup> Judíovi penacueraevetsimatacabita Jesús, pijajivi yajava, najetaruca namutua trigo pbianëjava. Nexata Jesús pijajivi pïajanixae, trigoruanë siricanajetarubena. Xunacobenacaquiatanajetarubena. Xuxaeyabaatapona. <sup>2</sup> Nexata fariseoviyajuvënëvi jumaitsi Jesús pijajivijavabelia:

—Paxamë raja paexaname Dioso Moiséspijinëta penajumecopatsilivaisi vajanacaitavetsicuene. Apo nacaitavetsi ata trigoxu vajaxaeyaniva, itsiata ajena penacueraevetsimatacabixae, apo bepaexanaemë mapacueniaje, jai fariseovi Jesús pijajivijavabelia.

<sup>3</sup> Jesús nexata jumaitsi fariseovijavabelia:

—Ajena, penacueraevetsimatacabita, tajajivi bajarapacuenia exanae ata, itsiata apo pibisiacuene. Tsipaji bitso piajani. ¿Apo palebimë tsipaji Dioso pejumelivaisibaxuto paneyapëtaenexa pacuenia vajasalinainëmi Davidpijinë, pebarëponaponaevi yajava, exana pamatacabi bitso piajani? <sup>4</sup> Bajaraponë Davidpijinë joneya Dioso pijatemploboyalia. Nexata Dioso pijatemploboënëta, mesajumata bobena Diosonexa ofrendacuenia petojebipanbëanë. Bajarapapanbëanë itsajivi ata apo tocopatsitsi pexaenexa penaneconitsiyaniva Diosojavabelia. Ësacerdotevi picani pexaenexa tocopatatsi. Davidpijinë apo sacerdotenë ata, pijajivi barëxae ata bajarapapanbëanë, itsiata apo vënananeconitsi Diosojavabelia, jai Jesús fariseovijavabelia.

<sup>5</sup> Icatsia pematatsënëa Jesús jumaitsi fariseovijavabelia:

—Xanë, Daxitajivi Pematapijinënë, netoxanepana cajena tatsipaebinexa pacuene xanepana jivi pexanaenexa penacueraevetsimatacabita ata, jai Jesús.

*Pacuenia Jesús jamatejemayaexana pebi pecobetsaquenaenë yabara pelivaisi*

*(Mt 12.9-14; Mr 3.1-6)*

<sup>6</sup> Itsamatacabi Jesús joneya judíovi penacaetutabiabiboyalia judíovi penacueraevetsimatacabita. Nexata bajarajota Jesús jivi livaisi tsipaeba. Bajarajota pebi pecujanenia pecobetsaquenaenë, naeca. <sup>7</sup> Nexata Jesús naitaxutocaevetenatsi judíovi pecujarubivi, fariseovinua, petaenexatsi Jesús pejamatejemayaexanaejava pecobetsaquenaenë judíovi penacueraevetsimatacabita. Nexata Jesús pecobetsaquenaenë itsa jamatejemayaexana penacueraevetsimatacabita, “Jesús raja pibisiacuene exana,” pejainexa bajarapamonae. <sup>8</sup> Nexata Jesús yapëtane pacuenia bajarapamonae sivanajamatabëxainatsi. Nexata Jesús jumaitsi pecobetsaquenaenëjavabelia:

—Nonotapunare. Nucare majotaje mapamonae pitabarataje, jai Jesús.

Nexata pecobetsaquenaenë nonotapuna. Nuca bajarapamonae pitabarata. <sup>9</sup> Nexata Jesús jumaitsi penaitaxutocaevetenaevitsijavabelia:

—Penacueraevetsimatacabita ata xanepana vajaexanaenexa pexaniacuene. Xanepana vajajamatejemayaexanaenexa piavitanevi, jai Jesús penaitaxutocaevetenaevitsijavabelia.

<sup>10</sup> Jesús matatoyorotsia naëcoba daxita pamonaenë ena bajarajota. Jesús jumaitsi pecobetsaquenaenëjavabelia bajarapamonae pitabënejeva:

—Namaxërovire, jai Jesús.

Nexata baja pecobetsaquenaenë namaxërovita. Bajarajota cobexanepananajereca baja. Pecobetsaquenaenëjavami ajibi. <sup>11</sup> Nexata judíovi pecujarubivi, fariseovinu, itsa tane Jesús pecobexanepanaeyaexanaenëjavabelia pecobetsaquenaenë, bitso anaepana. Nexata jane baja najumejaita pacuenia Jesús beyaxuabijitsiatsi.

*Pacuenia Jesús pijajivi ayaibitsaëtoxañetoyajuvënëvi itapeta saya doce ponëbeje apóstolevinexa yabara pelivaisi*

*(Mt 10.1-4; Mr 3.13-19)*

<sup>12</sup> Jesús pijajivi ayaibitsaëtoxañetoyajuvënëvi, doce saya ponëbeje, itapeta apóstolevinexa. Jesús pitapetsivajënaeya apóstolevinexa, junaya petsutojumabetsia pevajëtsinexa Diosojavabelia. Nexata Jesús meravijebi bajarapatsutojumatsia vajëta pona Diosojavabelia. <sup>13</sup> Bajayacunua, ajena baja matacabi tsarucaponae, Jesús junata daxita pijajivibitsaëtoxañeto bajaraponëjavabelia. Nexata bajarajota itapeta pijajivibitsaëtoxañetoyajuvënëvi, doce saya ponëbeje. Bajarapamonae Jesús vënëruba apóstolevi. <sup>14</sup> Pamonaenë Jesús itapeta apóstolevinexa mapevënëanëje. Copiaya ponë, pevënë Simón. Bajaraponë Jesús vënëruba itsavënë, Pedro. Itsanë Andrés, Simón Pedro jane baja pejuyapijinë. Itsanë Santiago. Itsanë Juan. Itsanë Felipe. Itsanë Bartolomé. <sup>15</sup> Itsanë Mateo. Itsanë Tomás. Itsanë Santiago, Alfeo pexënato. Itsanë Simón, celotenë. <sup>16</sup> Itsanë Judas, Santiago pejuyapijinë. Itsanë Judas Iscariote. Bajaraponë bexëjavabelia Jesús canajetsijitsiatsi pijavajabitsaë pecobeyabelia pebeyaxuabinexatsi.

*Pacuenia Jesús jivi ayaibitsaëtoxañeto livaisi tsipaeba yabara pelivaisi*

*(Mt 4.23-25)*

<sup>17</sup> Jesús baja, pijajivi ayaibitsaëtoxañeto yajava, runaica petsutojumavetsica. Nexata epatua petsutoyeneapanajavata, itsajota ira namatajëpa, Jesús yajavanuca pijajivi ayaibitsaëtoxañeto. Bajarajota nexata jivi nacaetuata ayaibitsaëtoxañeto. Bajarapamonae Judea nacuapijivi, itsamonae Jerusalén tomarapijivi, itsamonae Tiro tomarapijivi, itsamonae Sidón tomarapijivi. Tiro tomarabeje Sidón tomarabeje, manuameneitapata ecabeje. Daxita bajarapatomaranëpijivi nacaetuata pejumetaenexa Jesús petsipaebilivaisi. Bajarapamonae patanua Jesús pejamatejemayaexanaenexa piavitanejavavecu. <sup>18</sup> Bajarapamonaeyajuvënëvi itsajamatabëcuene tsabiabi dovathi pejamatabëcueneta. Bajarapamonaenua Jesús jamatejemayaexana. <sup>19</sup> Daxita pamonaenë bajarajota nacaetuata, Jesús picani jamatabëjayabatsi. Tsipaji Jesús daxitajivi piavitanejavavecu jamatejemayaexanapona pecaëjëpejamatabëcuenetatsi.

*Pacuenia Jesús pijajivi tsipaeba Jesús pijajivi pejamatabëcuenebarëyajavanexa, apo pejamatabëcuenebarëyajavanexanua, yabara pelivaisi*

*(Mt 5.1-12)*

<sup>20</sup> Jesús pijajivi naëcota asaëya. Jumaitsi bajarapamonaejavabelia:

—Panajamatabëcuene copabame baja Diosojavabelia paneponaenexa Dioso pijatomarabetsia. Bajaraxuata paxamë bepanejamatabëcuenejiobivimi panijaneconi yabara, aeconoxae baja pajamatabëcuenebarëyamë Diosojavabelia.

<sup>21</sup> 'Pajitsipame Dioso pijacuene. Pajamatabëcuenebarëyamë baja. Tsipaji Dioso athëbëtatsia pacarajutsiana daxitacuene xua panamatavenoname.

'Paneyanuevimi pibisiacuene paneexanaeneconi yabara, pacavecuajibiaexana baja bajarapaneconi. Bajaraxuata itsamatacabi pajamatabëcuenebarëyamë tsane.

<sup>22</sup> 'Xanë, Daxitajivi Pematapijinënë, patajajivixaemë, itsa pacaitoya tsane jivi, itsiata pasivajamatabëcuenebarëyamë tsane. Bajarapamonae pacanavecuaitavetsi ata tsane, itsiata pasivajamatabëcuenebarëyamë tsane. Pibisiacuenia pacabijatae ata tsane, pibisiacuenia pacabaracuaicuaijai ata tsane, itsiata pasivajamatabëcuenebarëyamë tsane. <sup>23</sup> Bajarapacuenia pacaexanae ata tsane, itsiata pasivajamatabëcuenebarëyamë tsane. Tsipaji raja Dioso athëbëtatsia pacarajutsiana bitso pexaniacuene jivi papecaitoiyajamatabëcuene. Pamonaë pacaitoya tsane, bajarapamonae pijasalinaivimi bajayata itoya Diosojumepaëbivimi profetavi. Nexata bajarapamonae pijasalinaivimi bajayata bejiobiaexanapona Diosojumepaëbivimi profetavi. Bajarapamonae aeconoxae ata pijasalinaivimi cuenejëpavanapa. Bajaraxuata paxamë ata icatsia bajarapamonae pacaitoya tsane pijasalinaivimi pecuenejëpavanapaexae.

<sup>24</sup> 'Daxitacuene mapanacuata panexainaeivi, Dioso bitso ayaicuenia pacabejiobiaexanaena. Tsipaji pacabarëyamë tsavanapae ëpanexainaejava mapanacuataje.

<sup>25</sup> 'Bitso bepajamatabëcuenejëbimë tsane daxitacuene mapanacuata panenatojitsipaëcuene panexainaeivi. Pasivajamatabëcuenebarëyamë picani tsavanapae panexainaejava. Itsiata baitsi jane itsamatacabi itsa patëpaename, panetëpaecujinae panajamatabëxainae name ayaicuenia.

'Bepajamatabëcuenejëbimë tsane panejëajëajitsabiabivi sivabarëyaya mapanacuapijicueneje. Paneasaëtsavanapaeepato abaxë mapanacuataje panesivajamatabëcuenebarëya tsabiabixae bajarapacueni, panetëpaecujinae bitso payanue name pibisiacueni paneexanaeconi.

<sup>26</sup> 'Mapanacuapijivi pexaniacuenia pacabaracuaicuaijai tsabiabi saicayacuenia Dioso pejumelivaisivecua panetsipaëbabiabixae. Itsiata baitsi jane pamatacabi Dioso pacananeconitsiaexanaena, bitso bepajamatabëcuenejëbimë tsane. Tsipaji pacuenejëpame bajayata pamonaemi jinavanapa. Bajarapamonaemi bajayata jivi tsipaëbabiaba saicayacuenia Dioso pejumelivaisivecua. Nexata bajarapamonaemi pexaniacuenia baracuaicuaijaitsi tsabiabi mapanacuapijivije, jai Jesús pijajivi ayaibitsaëtoxanetojavabelia.

*Pacuenia Jesús pijajivi muxujioba piasivanexa pitoyavi atatsi yabara pelivaisi  
(Mt 5.38-48; 7.12)*

<sup>27</sup> Icatsia Jesús jumaitsi petsutoyenepanajavata pijajivi ayaibitsaëtoxanetojavabelia:

—Pacatsipaëbijitsiatsi icatsia patanenamuxunaevetsivimë. Pasivamëre papecaitoiyavi ata. Pexaniacuene patoexanare pamonaë pacaitoya. <sup>28</sup> Payavenonare pamonaë pacabijatane pibisiacuenia. Pamonaë pacabaracuaicuaijai pibisiacuenia, patovajëre Diosojavabelia peyavenonaenexatsi. <sup>29</sup> Itsajivi itsa pacaitabarapacabi axuaba anaeya, nexata icatsia itsanenia ata patonaitabaracaevere papecaitarapacabi axuabinexa. Itsajivi itsa pacayacajërëta panijacamisajumavelia panenaxatatsijava, nexata patocopare panijacamisa ata papecayacajërëtsinexa. <sup>30</sup> Pajivi itsacuenejavayo amoneya pacavajëta, parajure. Itsajivi itsa pacayacajërëta itsacuenejavayo, pëtsa payanijobame papecatocanavitsinexa. <sup>31</sup> Xua pexaniacuene, paxamë pajitsipame itsamonaë papecatoexanaenexa, copiaya paxamë bajarapapexaniacuene patoexanare bajarapamonaëjavabelia, jai Jesús pijajivi ayaibitsaëtoxanetojavabelia.

<sup>32</sup> Icatsia Jesús jumaitsi pijajivijavabelia:

—Itsa pasivamë tsipae ëpapecaasivavi, nexata pexaniacuene apo paxainaemë tsipae Diosojavabelia. Tsipaji piamatabëcuenebejevi ata, pamonaë asivatsi, banamataenet-sianasiva. <sup>33</sup> Pexaniacuene itsa patoexanaëjitsipame pexaniacuene ëpapecatoexanaëvijavabelia, nexata apo paxainaemë tsipae pexaniacuene Diosojavabelia. Tsipaji piamatabëcuenebejevi ata, pexaniacuene batoexana penajamatabëcuenejëpaëvijavabelia.

<sup>34</sup> Itsa patsicopatsipame epänejamatabëcuene yapëtaevijavabelia baja, papecatocanaviatsinexa pacuenia patsicopatame, nexata apo paxainaemë tsipae pexaniacuene Diosojavabelia. Tsipaji piamatabëcuenebejevi ata, batsicopata penajamatabëcuenejēpaevijavabelia, pamonaē jamatabëcuenyapētane baja petocanaviatsinexatsi. <sup>35</sup> Nexata pasivamēre panijavajabitsaē ata. Bajarapamonaējavabelia pexaniacuene patoexanare. Bajarapamonaē patsicopare panajamatabëxainaenejevamē papecatocanaviatsinexa panetsicopatsicuenia. Bajarapacuenia bitso paxainaename pexaniacuene Diosojavabelia papecarajutsinexa athëbētatsia. Bajarapacuenia itsa paexanavanapaename, Dioso, athëbētatsia peecaenë, pexicuenia pacaexanaena. Tsipaji Dioso pitaxutotsoniataenë piamatabëcuenebejevi ata. Itsamonae Dioso yavenonae atatsi, itsiata apo canaējētsi Dioso peyavenonaejavatsi. Bajarapamonaē apo canaējētsi ata Dioso peyavenonaejavatsi, itsiata tsiteca Dioso itaxutotsoniataeyabiaba. <sup>36</sup> Pacuenia Dioso daxitajivi itaxutotsoniataeyabiaba, bajarapacuenia paxamē ata itsamonae ata paitaxutotsoniataename, jai Jesús pijajivi ayaibitsaëtoxanetojavabelia.

*Pacuenia Jesús pijajivi muxujioba pitaxutotsoniataenexa itsamonae ata, pacuenia bajarapamonaē ata Dioso itaxutotsoniatanetsi, yabara pelivaisi*

*(Mt 7.1-5)*

<sup>37</sup> Icatsia Jesús jumaitsi pijajivi ayaibitsaëtoxanetojavabelia petsutoyenepanajavata: —Pëtsa panataneme pepacuene bepaneaneconijibivi. Nexata itsamonae pibisiacuene pexanaejava xaniavaetsia payapëtaenejevamē, pëtsa pabaracuaicuajiamē mapacueniaje: “Bajarapitsipibisiacuene pexanaevi, Dioso bitso ayaicuenia naneconitsiaexanaenatsi,” pajamē pëtsa. Nexata paxamē ata juya bajarapacuenia itsamonae apo pacabaracuaicuajijai tsane pibisiacuene paneexanaejava yabara. Itsamonae pibisiacuene pacaexanae ata, pajamatabëcueneceavare. Pabarajamatabëcueneexanepanarena. Nexata pijinia Dioso pitabarata pibisiacuene paneexanaejava Dioso jamatabëcueneceaviana. Pacabarajamatabëcueneexanepanaenanua. <sup>38</sup> Parajutaponare itsamonaejavabelia penamatavenonaejavaxi. Nexata juya paxamē Dioso pacarajutaponaena pacuenia jitsipa papecarajutsinexa. Pacarajutsiana xuavajëto itsamonae parajutame matatoxenetsia, jai Jesús daxitajivijavabelia petsutoyenepanajavata.

<sup>39</sup> Jesús icatsia comparacióncuenia tsipaeba bajarapamonaējavabelia mapalivaisije: —Ponë bitso itaxutotsëcëna, apo caējëpaetsi pematacaponaenexa itsanë, ponë pijinia bitso itaxutotsëcëna. Itsa matacaponaējitsipa, nexata najuajopaejitsiparecabeje bajaraponëbeje caemëthëxanetojavareca. <sup>40</sup> Itsajivi pijinia itsa nacujaruba, yapëtae ata baja penacujarubijava, apo jamatabëcuene matatoxenetsi pecujarubinëtsi. Itsa baja penacujarubijivi vereta xaniavaetsia penacujarubijava, nexata saya najamatabëcuenejēpabeje pecujarubinëtsibeje, jai Jesús pijajivijavabelia.

<sup>41</sup> Jesús pijajiviyajuvënëvi pepacuene bepianeconijibivi natane. Nexata itsa cujirutane itsamonae itsacuenjavayo pexanaejava, jumai tsabiabi: “Mapitsicuene pexanaevi Dioso bitso ayaicuenia naneconitsiaexanaenatsi,” jai tsabiabi. Nexata bajarapacuenia pejumaitsiabixae, Jesús pijajivi piurabinexa jumaitsi mapacueniaje:

—Pëtsa paxamē pepacuene bepaneaneconijibivi nataeya pamuxujiobame itsajivi pijaneconi yabara. Tsipaji raja apo payapëtaemë paxamē ata pijinia paneconivajëto paxainame. <sup>42</sup> Nexata paxamē ata ayaineconixaneto itsa paxainame, nexata itsanëjavabelia apo bepajumaitsimë: “Tajabananë, papibisiacuene exaname, copare,” apo bepajamë. Yamaxëitojorobiaya saya bepexaniajamatabëcuenevi nataeya pacuaicuajiamë tsabiabi. Itsamonae pijaneconi yabara pabaracuaicuajiamë tsabiabi. Itsiata pijinia paxamē ata paneconivajëto paxainame, apo payapëtaemë. Paxamë copiaya pacopabare pibisiacuene paneexanabiabijava. Bajara jane xuacujinae paitavetsianame itsamonae ata pibisiacuene pexanaejava penavecuacopatsinexa, jai Jesús pijajivijavabelia.

*Pacuenia peubinaenë itsa nacuaita, nayapëtane pavirianaecuene yabara pelivaisi*

*(Mt 7.17-20; 12.34-35)*

<sup>43</sup> Icatsia Jesús jumaitsi pijajivi ayaibitsaëtoxanetojavabelia petsutoyenepanajavata:

—Pexaniavirianaenē itsa ubatsi, nacuaitsi pijinia pexaniacuai. Apo nacuaitsi pibisiacuai. Ponaē pijinia pibisianaē, apo nacuaitsi pexaniacuai. <sup>44</sup> Caevirianaē canacujitsia yapētanetsi itsa nacuaitsi. Higovēnecuaitsi apo paucutsimē cucunanaeta. Uvaru pijinia apo paucutsimē saya pejuviēnēbotota. <sup>45</sup> Bajara pijinia itsi jivi ata. Pexaniajamatabēcuenenē pexaniacuene yabara cuaicuajai. Tsipaji pexaniajamatabēcuenē xaina pejamatabēēthētota. Pibisiajamatabēcuenenē pijinia pibisiacuene yabara cuaicuajai. Tsipaji pibisiajamatabēcuenē najamatabēxaina pejamatabēēthētota. Nexata pacuene yabara pebi pecuaibovojotota cuaicuajai, bajarapacuene pitsapa pejamatabēēthētōjavavetsina, jai Jesús pijajivijavabelia.

*Pacuenia Jesús livaisi tsipaeba anijanēbeje bo pexanaenēbeje pelivaisicuenia yabara pelivaisi (Mt 7.24-27)*

<sup>46</sup> Icatsia Jesús jumaisi pijajivi ayaibitsaētojanetojavabelia petsutoyenepanajavata:

—¿Detsa xuajitsia: “Tajatuxanenē,” panejamē tsabiabi ata, itsiata apo panejumecovēnētsimē patacaitorobicuenia? <sup>47-48</sup> Pajivi xanējavaberena pata tanenamuxu-naevetsinexa, tanejumecovēnētsinexanua, bajarapajivi apo nacueratsi tsane. Bajara-pajivi piatajairata bo bepexanaenē tsane. Bajara-pajivi yabara pacatsipaebianatsi. Bo pexanaenēnexa, peyapētaexae itsajota pijabo exanaejitsia pebubutsijavanexa, nexata naesituru atajaya xaniavaetsia mēthēca piatajairata. Nexata pijabo toyabubutsi ata, petojopaeyanivatsi. Bajaraxuacujinae bo baja vereteta. Itsa baja mene avajubuatsica, pijabo toyabubutatsi. Mera asaētsica bojavabetsica. Itsiata pijabo apo tonanequetsitsi. Tsipaji naesituru xaniavaetsia mēthēca piatajairata. Nexata bajaraponē apo nacueratsi bo pexanaejava. <sup>49</sup> Pajivi nejumetae ata tsane tatsipaebilivaisi, itsiata itsa apo nejumecovēnētsi tsane tatsipaebilivaisi, nacueratsiana. Bajarapajivi tajetabota bo bepexanaenē tsane. Ponē tajetabota pijabo exaneta, yapētae ata emarapae pecopiapatsijavanexa, bajaraponē nacuerata bo pexanaejava. Tsipaji bo peveretetsicujinae, mene avajubuatsica. Nexata pijabo toyabubutatsi. Bo nexata jopaica. Pepacuene baja nexata abeje, jai Jesús pijajivijavabelia.

## 7

*Pacuenia vajabitsaē pijacapitán pijabota petonacuenebaponaponaenētsi, Jesús tojamatejemayaexana yabara pelivaisi (Mt 8.5-13)*

<sup>1</sup> Jesús baja itsa najumevereta pijajivi ayaibitsaētojaneto livaisi petsipaebijava petsutoyenepanajavata, pona baja Jesús Capernaum tomarabelia. <sup>2</sup> Capernaum tomarata ponapona Romano nacuapijinē, vajabitsaē pijacapitán. Bajaraponē pijajivitonē, bitso piasivanē, toavitanetsi. Totēpaejitsiatsi baja. <sup>3</sup> Bajaraponē capitán vēnēlivaisitanetsi Jesús pejamatejemayaexanaponaejava piavitanevi. Nexata capitán jumaisi judíovi pijaancianovijavabelia:

—Panetojunaremelia Jesús. Pabarēpatsiaremena tajaboyaberena tanetojamatejemayaexanaenexa tajajivitonē, jai capitán judíovi pijaancianovijavabelia.

<sup>4</sup> Nexata bajarapamonae pona Jesúsjavabelia. Itsa pata Jesúsjavabelia, pinijicuenia junata. Jumaisi Jesúsjavabelia:

—Bajaraponē capitán bitso pexaniajamatabēcuenenē. Nexata tojamatejemayaexanaenē pijajivitonē. <sup>5</sup> Tsipaji raja bajaraponē nacaasiva vaxaitsi judíovitsi. Matamota cajena pijapalatata vajanacatoexanetsinexa vajanacaetuatabibonexa, jai judíovi pijaancianovi Jesúsjavabelia.

<sup>6</sup> Nexata Jesús nalia bajarapamonae pepēta. Itsa baja imoxoyotanajetarubena capitán pijabo, nexata capitán icatsia peyapētaevitsi itoroba Jesús pemataenenaenexatsi. Capitán peyapētaevitsi itoroba Jesúsjavabelia pejumaitsinexa mapacueniaje:

—Petuxanenē, pētsa paremena tajaboyaberena. Apo caquenetsiataejitsipaetsi. Beveliajamatabēcuenenēnē raja saya xanē xamēvecua. Nexata apo xanepanae tsipae

nenajonejava tajaboyaberena. <sup>7</sup> Apo nejamatabëcuenecaējēpaenua taponaejava xamējavabelia ata. Saya bajaraverena itorobare ēnijume. Nexata tajajivitonē netojamatejema tsane. <sup>8</sup> Xanē ata xainajē taneitorobabiabivi taneitorobicuena tajumecovēnētābiabinexa. Xanē ata juya xainajē vajabitsaē, tajajivi, taitorobicuena tanetoexanabiabinexa. Nexata ita itorobajē caenē vajabitsaēnē peponaenexa, bajaraponē ponabiaba. Itsa junarenajē itsanē vajabitsaēnē pepatsinexa maberenaje, bajaraponē patabiabarena. Itsa itorobajē tajajivitonē tanetoexanaenexa itsacuenējavayo, nexata netoexanabiaba. Bajara pijinia pacuena xamē ata nexanaenexa, cacaējēpa. Nexata saya bajaraverena ēnijume itorobare saya ēnijumeta tajajivitonē tanetojamatejemayaexanaexamē, jai capitán mapacueniaje petonajumeitorobijume Jesúsjavabelia.

<sup>9</sup> Jesús ita jumetane bajarapacuenia capitán petonajumeitorobijumetsi, jamatabëcuenenabenajaca capitán petonajumeitorobijumetsi yabara. Nexata napēnēyorotaxuaba Jesús. Jumaitsi pepēnanajetarubenaevitsijavabelia:

—Xaniajanē pacuena pacatsipaebijitsiatsi. Caeto ata cajena Israel nacuapijinē apo caxitajarabaxuabinē xanējavaberena bitso tanesivanajamatabëcuenecopatsinē pacuena mapacapitán nesivajamatabëcuenecopatsiaya jumaitsije, jai Jesús capitán yabara. <sup>10</sup> Nexata baja pamona capitán itorobalia Jesús petsipaebinxatsi capitán penajumeitorobilivaisi, naviabarena baja capitán pijaboyaberena. Itsa baja pata boyaberena, caxitajaraba baja capitán pijajivitonē pejamatejemanē.

*Pacuenia pamona pevecuatēpaevatsi pexēnato Jesús toasaēyaexana, petēpaenēmi, yabara pelivaisi*

<sup>11</sup> Jesús pona Naín tomarabelia. Nexata yanatatsi pijajivi, itsamonae yajava, ayaibitsaētoxfaneto. <sup>12</sup> Itsa baja Jesús patanajetaruca Naín tomara imoxoyojavata, nexata camataenenatsi petēpaenē pecanajetarubenaevi. Bajarapamonae petēpaenē tomaravelia capitsapa pemēthēsixinexa tomarapēnēyabelia. Ponē tēpa, bajaraponēmi pamona pevecuatēpaevatsi pexēnato, pepo cainē. Nexata pamona pevecuatēpaevatsi pexēnato, petēpaenē, ita caponaliatsi pemēthēsixinexatsi, tomaraverena jivi ayaibitsaētoxfaneto pēnaponatsi. <sup>13</sup> Nexata Jesús ita tane bajarapova, tsitabejibitsi bitso. Nexata Jesús jumaitsi bajarapovajavabelia:

—Matanueyabijitsipame, jai Jesús.

<sup>14</sup> Nexata Jesús cujitalabalia petēpaenē peyacajoniacanajetarubenaevi. Pecobeta jayata cajoni. Nexata petēpaenē peyacajoniacanajetarubenaevi, nubenaothopa. Nexata Jesús jumaitsi petēpaenējavabelia:

—Pevējēato, xanē raja cajumaitsitsi. Namatacore, jai Jesús.

<sup>15</sup> Nexata baja petēpaenēmi namatacota. Cuaicuaijai. Jesús baja tocanaviata piasaēnē penajavabelia. <sup>16</sup> Nexata daxita petaevisi jamatabëcuenenabenajaca. Najumaitsi bajarapamonae:

—Dioso bitso ayaijamatabëcuene. Pinijijamatabëcuene pexainaenē, profeta, nacatsitanajamatabëcueneitajēta. Dioso pinijicuene pexanaejava ata nacatsitajēta vajataenexa, najai bajarapamonae Jesús yabara.

<sup>17</sup> Daxita Judea nacuapijivi, imoxoyo nacuanējava ata pejinavanapaevi, Jesús vēnēlivaisitanetsi xua exana.

*Pacuenia Juan jivibautisabinē itoroba pijajivitonēbeje Jesúsjavabelia yabara pelivaisi (Mt 11.2-19)*

<sup>18</sup> Juan jivibautisabinē naneconitsia ponapona penaneconitsivi pejebabiabibota. Nexata pijajivi tsipaebatsi daxita Jesús pexanaponaejava yabara. Nexata Juan junata anijanēbeje pijajivitonēbeje pitorobinexa Jesúsjavabelia. <sup>19</sup> Juan pitorobivajēnae pijajivitonēbeje, jumaitsi bajaraponēbejejavabelia:

—Pajumaitsimēbeje tsane Jesúsjavabelia: “ ‘Xamē tsabaja Cristomē? ¿Xamē tsabaja tajēvelia cavajunupaebapona nepatsijavanexatsica daxitajivi necapanepaenexa? Itsa apo Cristomē, ¿abaxē tsaja pacopiaevetavanapaenajē itsanē athēbēvetsica Dioso

pitorobinexatsicatsi jivi pecapanepaenexa? jai raja Juan,” pajamëbeje tsane Jesúsjavabelia, jai Juan pijajivitonëbejejavabelia.

<sup>20</sup> Nexata Juan pijajivitonëbeje itsa patabeje Jesúsjavabelia, Juan pijajivitonëbeje jumaitsibeje Jesúsjavabelia:

—Juan raja jivibautisabinë paneitorobabeje patacayanijobinexabeje. “¿Xamë tsabaja Cristomë? ¿Xamë tsabaja tajëvelia cavajunupaebapona nepatsijavanexatsica daxitajivi necapanepaenexa? Itsa apo Cristomë, ¿abaxë tsaja pacopiaevetavanapaenajë itsanë pepatsijavanexatsica?” jai raja Juan, jaibeje jane baja Jesúsjavabelia.

<sup>21</sup> Nexata bajaraponëbeje pitabëta Jesús jamatejemayaexanapona ayaibitsaëtoxaneto pivitanevi. Dovathi peyajavajinavanapaevi ata vecuacapitsapa dovathi. Itaxutoxanepanaeyaexananua pamona bitso itaxutotsëcëna. <sup>22</sup> Nexata Jesús jumaiti Juan pijajivitonëbejejavabelia:

—Paponarebeje baja. Patsipaebianamebeje Juanjavabelia pacuenia baja patanemebeje taexanaponaejava. Patsipaebianamebejenua pacuenia baja pajumetanemebeje tatsipaebilivaisi jivijavabelia. Apo petaevimi ata itaxutoxaniavaetaponajë xaniavaetsia petaenexa. Petabusipacuenabivitsinua daxita jinavanapaeyaexanaponajë. Bajayajebi bitso peperabëtsabanaevinua vecuaajibiaexanaponajë baja. Bitso pemuxusipanaevinua jumetaeyaexanaponajë baja xaniavaetsia pejumetaenexa. Petëpaevimi ata icatsia asaëyaexanaponajë. Pexanialivaisinua pecapanepaelivaisinexatsi pibisiacuene pexanaeneconimivecua, tsipaebaponajë bepejiobivijavabelia. Daxita bajaraxua taexanaponaejava patanetaejavamëbeje, patsipaebianamebeje Juanjavabelia. <sup>23</sup> Pajumaitisimëbejenua tsane Juanjavabelia: “Jesús raja jumaiti: ‘Jamatabëcuenebarëya pajivi tsiteca nejumecovënëta xanë Dioso pexënatocuenenë,’ jai raja Jesús,” pajamëbeje tsane Juanjavabelia, jai Jesús Juan pijajivitonëbejejavabelia.

<sup>24</sup> Itsa baja Juan pijajivitonëbeje naviatabeje, nexata bajaraponëbeje pecovëta Jesús taxuxuaba jivijavabelia petsipaebijava Juan pelivaisi. Jesús jumaiti jivijavabelia:

—Itsa paponame petusato nacuayabelia pamatacabi Juan ponapona petusato nacuata, ¿detsa pitsicuene pajamatabënaponaremelia panetaenexa bajarajotalia? ¿Paponaremelia tsaja saya panetaenexa musuli penajëabijava jovibota? <sup>25</sup> Itsa apo paponamëlia panetaenexa musuli penajëabijava jovibota, ¿detsa nexata pitsicuene panetaenexa paponaremelia? ¿Paponaremelia tsaja saya panetaenexa naitabëtsiaya pexaniajava penaxatatsinë? Paxamë rabaja payapëtaneme mapacueneye. Pamona naitabëtsiaya pexaniajava naxatabiaba, pamona ata nabanebiaba pexanianabanijavanë, bajarapamona jinavanapa nacuanë pevetsivi pijabonëjava. <sup>26</sup> ¿Detsa nexata xua pajamatabënaponaremelia panetaenexa petusato nacuayabelia? Paponaremelia raja panetaenexa Diosojumepaebinë profetanë. Xaniajanë pacuenia pacatsipaebijitsiatsi. Juan itsa pataneme, pepacuenene jane baja pepo profetanë, Diosojumepaebinë, pataneme. Nexata saya bevelia profetanë apo pataemë. <sup>27</sup> Juan pexanaejavanexa, bajayata tajëvelia Dioso pejumelivaisibaxutota vajunupaeba. Dioso tanejumaitsijava ata xanëjavaberena, Dioso pejumelivaisibaxutota jumaiti mapacueniaje:

Itorobianajë nevajënaeyabelia tanejumelivaisipaebinënexa jivi pecatsivajënae najamatabëcuene xaniavaetsinexa, jai bajayata Dioso pejumelivaisibaxutota athëbëvetsica tapatsivajënaeyatsica Juan tanelivaisi paebanajetarucaejavanexa yabara.

<sup>28</sup> Juan ayajamatabëcuenenë mapanacuataje. Nexata bajayata Juan pevajënaeya paprofetavimi jinavanapa, itsanë ata Juan apo jamatabëcuenematatoxenetsitsi. Itsiata baitsi jane pajivi beveliajamatabëcuenejivi ata, itsa najamatabëcopata baja Diosojavabelia pijatuxanenë pexanaenexa, bajarapajivi juya Dioso ayajamatabëcuenejivi exanaenatsi Juan matatoxenetsia, jai Jesús Juan jivibautisabinë yabara.

<sup>29</sup> Juan vënëlivaisitanetsi daxitajivi. Impuestomatamo pematamoyanijobivi ata gobierno pejamatabëcuene, vënëlivaisitanetsi. Bajarapamona jumecovënëta palivaisi Dioso najumecopata Juanjavabelia. Nexata Juan bautisaba bajarapamona. <sup>30</sup> Itsiata

fariseovi, judíovi pecujarubivivina, namuxujemata bajarapalivaisi. Nexata picani pacuenia Dioso tojtisipatsi bajarapamonae pexanaenexa, apo exanae. Nexata Juan apo bautisabi bajarapamonae.

<sup>31</sup> Jesús icatsia jumaitsi jivijavabelia:

—¿Detsa meta pacuenia yapëtaeyaexanaenajë itsamonaejavabelia bajarapamonae xaniavaetsia papeçayapëtaenexa pacuenia paxamë pajamatabëcueneitsimë tsavanapae? Jumaitsinë meta tsane paxamë yabara mapacueniaje: <sup>32</sup> “Bajarapamonae abaxë saya bepejevaxijivixi, pajivixi tomara tuatuajëjava banamuxusitenavanapa. Pejevaxijivixi itsa namuxusitenavanapa, bavavajai tsenae penajua namuxusitenaevijavabelia. Pevavajaijavata bajumaitsi: ‘Pacatoobecatsi picani flauta. Itsiata apo payavajibimë. Pacatonaxëanecatsi picani panemuxunanuevajinexa ata. Itsiata apo panuemë,’ bajai tsenae pejevaxi penajua namuxusitenaevijavabelia. Bajara saya jamatabëcueneitsi pamonae aeconoxae jinavanapa mapanacuataje,” janë meta tsane paxamë yabara. <sup>33</sup> Juan jivibautisabinë Dioso pitorobilivaisi jivi tsipaebanajetaruca. Pexaejava itsajavata apo xaeyabiabi pamatacabibeje Diosojavabelia vajëtaona. Vinora ata apo apaeyabiabi. Nexata bajaraponë yabara jamatabëcuenenavëxaniabiaya pajumaitsimë tsabiabi: “¡Juan raja dovathi yajavaponapona!” pajamë tsabiabi jamatabëcuenenavëxaniabiaya. <sup>34</sup> Bajaraxuacujinae icatsia xanë, Daxitajivi Pematapijinënë, najetarucajë. Itaxutojema xaniji. Matavëjëa apaeyabiabajënu. Nexata xanë yabara icatsia jamatabëcuenenavëxaniabiaya pajumaitsimë tsabiabi: “¡Pataema maponëje! Ayaijava xaeyabiaba. Ayaira matavëjëa apaeyabiabanua piaitajibinexa. Barënajamatabëcuenejëpanua gobierno pejamatabëcuene impuestomatamo pematamoyanijobabiabivi. Pamonae ata piamatabëcuenebejevi, barënajamatabëcuenejëpa,” pajamë tsabiabi xanë yabara. <sup>35</sup> Itsiata baitsi jane itsamonae xaniavaetsia yapëtaena paxanëbeje Juanbeje Dioso pejamatabëcueneta bitso pataneyapëtaeyaexanaejavabeje. Nexata daxita bajarapamonae yapëtaena pacuenia Dioso paneyapëtaeyaexanabeje pepacuene pepo pexaniajajamatabëcuene, jai Jesús mapacueniaje jivijavabelia.

*Pacuenia Jesús exanatsi Simón pijabota yabara pelivaisi*

<sup>36</sup> Fariseonë, Simónvënë, pijabota Jesús penanabaninexa, junatatsi. Nexata Jesús napona Simón pijaboyabelia. Jesús naeca mesa muxuneneta penanabaninexa. <sup>37</sup> Bajarapatomarata ponapona petiriva, pibisiacuene pexanabiabiva pevitota palata pepitsinexa. Bajarapova itsa jumetane penanabanijavanexa Jesús Simón pijabota, nexata bajarapova capata alabastrovënë ibotota pexanaebotellabë. Pevënëcaebë pexaniapetuxujuviaceitera. Bajarapova capata bajarapaaceitera Jesús petsitaxuepacaenexa. <sup>38</sup> Nexata bajarapova Jesús petaxusalibënenia, pematatabacabëta nucajunua petsitaxuepacaenexa jane baja bajarapaaceitera. Nexata saya bajarajota itacarajeta bajarapova nua. Tsipaji pibisiacuene pexanabiabineconi bitso yanajamatabëxaina. Nexata bajarapova pitaxutobarëmene othopa Jesús petaxujavabereca. Nexata bajarapova pematadata taxuiquica. Bajaraxuacujinae yaiyataeya taxutsutsune. Tsitaxuepaca jane baja petuxujuviaceitera. <sup>39</sup> Nexata Simón, ponë Jesús junatatsi, itsa tane pacuenia petiriva exana Jesúsjavabelia, nexata Simón jamatabëjumaitsi mapacueniaje:

—Itsa peneta pepacuene maponë Jesús, pepo profetanë tsipaeje, nexata yapëtaejitsipa pitsijamatabëcueneva taxujayabatsi. Yapëtaejitsipa bajarapova pibisiacuene pexanabiabivacuene. Nexata apo tocopatsi tsipae petaxujayabinexatsi, jamatabëjai Simón Jesús yabara.

<sup>40</sup> Nexata Jesús jumaitsi Simónjavabelia:

—Simón, xainajë livaisiyo tacatsipaebinexa, jai Jesús.

Simón nexata jumaitsi:

—Jesús, netsipaebare, jai.

<sup>41</sup> Nexata Jesús jumaitsi Simónjavabelia comparacióncuenia:

—Palata petsicopababiabinē amoneyabatsi anijanēbeje. Caenē amoneyabatsi quinientos padenariobeje. Itsanē amoneyabatsi saya cincuenta padenariobeje. <sup>42</sup> Nexata bajaraponēbeje apo xainaēbeje juya petocanaviatsinexabeje petsicopatsimatamotsibeje. Nexata palata petsicopatsinē jumaitsi bajaraponēbejejavabelia: “Iquinajē baja bajaraxuami pataniamoneyabijavamēbeje. Naxuabi baja jema,” jai. ¿Detsa nexata ponē bitso sivajamatabēcuenebarēya palata petsicopatsinētsibejejavabelia? jai Jesús Simónjavabelia.

<sup>43</sup> Simón nexata jumaitsi Jesúsjavabelia:

—Ponē meta picani ayaijava amoneyaba, sivajamatabēcuenebarēya palata petsicopatsinētsijavabelia, jai Simón.

Nexata Jesús jumaitsi:

—Xaniajamē rabaja, jai Jesús Simónjavabelia.

<sup>44</sup> Jesús napēnēyorota petirivajavabelia. Nexata jumaitsi Simónjavabelia:

—Simón, ¿taneme tsabaja pacuenia exana xanējavaberena mapovaje? Xanē junuajē nijaboyaberena. Itsiata yaiyataeya xaniavaetsia apo necopiapitsimē. Apo nerajutsimē mera ata tanataxuiquatsinexa. Mapovaje netaxuquiata baja pitaxutobarēmeneta. Netaxuiquicanua pematana. <sup>45</sup> Xamē nijabota patsi atanē, apo nitabaratsutsunimē tanecopiapitsinexamē xaniavaetsia. Mapovaje tapatsicujinae apo copatsi cajena yaiyataeya tanetaxutsutsuneponaējava. <sup>46</sup> Xamē xaniavaetsia tanecopiapitsinexamē, apo netsimataepanaemē aceitera. Mapovaje netsitaxuepaca pexaniāpetuxujuviaceitera. <sup>47</sup> Nexata catsipaebatsi neyapētaenexa mapacuenije. Mapovaje pinijicuenia nesivajamatabēcuenebarēya. Tsipaji ayaineconi ata pibisiacuene pexanaeneconimi, vecuaajibiaexanajē. Pajivi saya tsiquirineconiyo vecuaajibiaexanajē, pibisiacuene pexanaeneconi, nayapētane. Tsipaji saya bajarapajivi tsiquirijavayo nesivajamatabēcuenebarēya, jai Jesús Simónjavabelia.

<sup>48</sup> Nexata Jesús jumaitsi petirivajavabelia:

—Pibisiacuene rabaja nexanaeneconimi cavecuajibiaexanatsi, jai Jesús.

<sup>49</sup> Itsamonae ata, pamonaē Simón junata penanabaninexa Simón pijabota, naena mesa muxuneneta. Nexata bajarapamonae najumai tsenae Jesús yabara:

—¿Detsa meta maponēje? Jamatabēcuenenavēxaniabiaya natane bepejamatabēcuenecaējēpaenētsi jivi pibisiacuene pexanaeneconi pevecuaajibiaexanaenexa, najai tsenae bajarapamonae.

<sup>50</sup> Nexata Jesús jumaitsi petirivajavabelia:

—Dioso pecacapanepaeva tsane pibisiacuene nexanaeneconimivecua. Tsipaji nesivanajamatabēcueneocopatame xanējavaberena. Jamatejema baja ponare. Cavecuajibiaexanatsi rabaja pibisiacuene nexanaeneconimi, jai Jesús petirivajavabelia.

## 8

### *Pacuenia Jesús, pijajivi, pebijivi, petiriavinua, yajavanajetaruca yabara pelivaisi*

<sup>1</sup> Simón pijabota Jesús penanabanicujinae, najetaruca pinijitomaranējava, tsiquirito-maraxijava ata. Tsipaebanajetaruca pacuenia Dioso pijajivi evetsijitsia. Jesús, pijajivi doce ponēbeje, apóstolevi, yajavanajetaruca. <sup>2</sup> Jesús yajavanajetaruca petiriavinua, papetiriavi dovathi vecuacapitsapa yajuvēnēvi. Papetiriavi ata piavitanejavavecua Jesús jamatejemaya exana yajuvēnēvi, Jesús yajavanajetaruca. Bajarapapetiriaviyajuvēnēva, caeva pevēnē María, Magdala tomarapijiva. Bajarapova Jesús vecuacapitsapa siete ponēbeje dovathivi. Bajarapadovathivi Jesús pevecuacapitsapaecujinae, María pēnaponatsi. <sup>3</sup> Itsava pevēnē Juana, Cuzavēnēnē pijava. Bajaraponē Cuzavēnēnē, nacuaevetsinē Herodes pijajivitonē. Itsava pevēnē Susana. Bajarapapetiriavi pematatsēnē, itsapetiriavi, ayaibitsaēto, yajavanajetaruca Jesús. Bajarapapetiriavi pexainaepalatayajuvēnējava, rajuta Jesúsjavabelia. Nexata xuaxi Jesús pijajivi barēnamatavenona pebarēcomuatsinexa bajarapapalatata.

*Pacuenia Jesús jivi livaisi tsipaeba peubinë pelivaisicuenia yabara pelivaisi*  
(Mt 13.1-9; Mr 4.1-9)

<sup>4</sup> Jivi naropoba tomaranëjavaverena. Pata Jesúsjavaberena petaenexatsi. Itsa baja ayaibitsaëtoخانeto nacaetuata Jesúsjavaberena, nexata Jesús livaisi tsipaeba peubinë pelivaisicuenia. Jesús jumaitsi mapacueniaje:

<sup>5</sup> —Peubinë pona pabiabelia peubinexa. Nexata itsa pata pabita, peubixu pexucaya-jabajarabicuenia ubanajetaruca. Nexata itsaxu othopa pabi tuatuajëjava penajetarucaenamutojumata. Bajarapaxu jivi taxunanonoba. Nexata bajarapaxumi juvinejeva baratsui xane. <sup>6</sup> Itsaxu pijinia othopa ibopananëjumata, itsajota bitso ira apo aitayaë. Nexata bajarapaxu juvi ata, tsaquenapona. Tsipaji ira tseva. <sup>7</sup> Itsaxu pijinia othopa xanëebacabomijavata. Nexata peubixu xanëebotonë caecuenia itsa yajavajuva, bitso xanëebotonë matakënëntsatsi peubijavami. <sup>8</sup> Itsaxu pijinia othopa pexaniairata. Bajarapaxu itsa juva, vitsaba. Nexata xaniavaetsia nacuaita. Itsabotonë capitsapa cien paxutoyobeje ata, jai Jesús jivi ayaibitsaëtoخانetojavabelia.

Itsa Jesús tsipaeba bajarapalivaisi, pinijijumeta jumaitsi:

—Pajivi jamatabëjumeyapëtane patacatsipaebilivaisi, nenamuxunaevetsi xaniavaetsia, jai Jesús bajarapalivaisi petsipaebivijavabelia.

*Pacuenia yabara Jesús jivijavabelia livaisi tsipaeba ëcomparacióncuenia yabara pelivaisi*  
(Mt 13.10-17; Mr 4.10-12)

<sup>9</sup> Nexata Jesús pijajivi yanijobatsi. Jesús pijajivi jumaitsi Jesúsjavabelia:

—Palivaisi jivijavabelia tsipaebame peubinë pelivaisicuenia, pajamatabëcuene xaina, patayapëtaenexa panetsipaebare, jai Jesús pijajivi Jesúsjavabelia.

<sup>10</sup> Jesús nexata jumaitsi pijajivijavabelia:

—Paxamë rabaja xaniavaetsia Dioso pacayapëtaeyaexana Dioso papijajivimë papecaevetsijava. Bajarapacuenia abaxë daxisajivi apo yapëtae. Bajaraxuata bajarapamonae itsa tsipaebajë livaisi, ëcomparacióncuenia tsipaebaponajë. Nexata bajarapamonae tae ata Dioso pesaëta pinijicuene taexanaejava, itsiata apo yapëtae pajamatabëcuene yabara exanajë pinijicuene taexanaejava. Namuxunaevetsi ata tatsipaebilivaisi, itsiata apo jumeyapëtae pajamatabëcuene xaina tatsipaebilivaisi, jai Jesús pijajivijavabelia.

*Pacuenia Jesús yapëtaeyaexana pijajivi pajamatabëcuene xaina palivaisi tsipaeba peubinë pelivaisicuenia yabara pelivaisi*

(Mt 13.18-23; Mr 4.13-20)

<sup>11</sup> Icatsia Jesús jumaitsi pijajivijavabelia:

—Mara pajamatabëcuenelivaisi xainaje, palivaisi pacatsipaebatsi pabita peubinë pelivaisicuenia. Pacuenia itsi pabita peubixu, bajara pijinia itsi Dioso pitorobilivaisi jivi pejamatabëëthëtota. Dioso pitorobilivaisi jivi itsa tsipaebatsi, tsijamatabëubatsi Dioso pitorobilivaisi. <sup>12</sup> Nexata pacuenia itsi pabita peubixu, paxu othopa pabi tuatuajëjava penajetarucaenamutojumata, bajara tsijamatabëcueneitsitsi itsamonae Dioso pitorobilivaisi. Bajarapamonae itsa tsipaebatsi Dioso pitorobilivaisi, jumetane picani. Tsijamatabëubatsi jane baja picani Dioso pitorobilivaisi. Itsiata baitsi jane pejumetaecujinae bajarapalivaisi, bepijia dovathi najetaruca bajarapamonaejavaberena. Nexata bajarapamonae tsijamatabëjuvinejevatsi, petsijamatabëubilivaisitsi dovathi baja vecuapitatsi bajarapalivaisimi. Vecuapitatsi pevajënaeyabelia Dioso pejumecovënëtsianiva, Dioso pecapanepaeyanivatsi pibisiacuene pexanaeconivecua. <sup>13</sup> Pacuenia pijinia itsi paxu othopa ibopananëjumata, itsajota bitso ira apo aitayaë, bajara tsijamatabëcueneitsitsi itsamonae Dioso pitorobilivaisi. Bajarapamonae Dioso pitorobilivaisi jumetane. Nexata picani bajarapalivaisi barëyaya jumecovënëta. Itsiata baitsi jane pacuenia irabereca apo atabunepepiareca paxu othopa ibopananëjumata, nexata nabijiana, bajara tsijamatabëcueneitsitsi bajarapamonae Dioso pitorobilivaisi. Tsipaji saya caeepatoyo jumecovënëta bajarapalivaisi. Nexata paepatota dovathi jamatabëcueneëjëtatsi, copaba baja

bjarapalivaisi pejumecovënëtsijavami. <sup>14</sup> Pacuenia pijinia paxu othopa xanëebacabomijavata, itsa juva, bitso matacënënatsi xanëebotonë, bajara tsijamatabëcueneitsitsi itsamonae Dioso pitorobilivaisi. Jumetane picani bjarapamonae Dioso pitorobilivaisi. Itsiata baitsi jane bitso jamatabëcueneenatsi mapanacuapijicuene yabaraje. Tsipaji najamatabëxaina ayaijava palata pexainaenexa. Najamatabëxainanua pexanaenexa pacuene mapanacuapijivi exana saya jema pebarëyanexa. Bjaraxuata Dioso pitorobilivaisi apo tovitsabitsi pejamatabëëthëtota. Nexata pacuenia itsi pabita piacuaijibibotonë, bajara itsi bjarapamonae. Tsipaji Dioso xaniavaetsia apo tojinavanapae. <sup>15</sup> Pacuenia pijinia itsi paxu othopa pexaniairata, bajara tsijamatabëcueneitsitsi itsamonae Dioso pitorobilivaisi. Bjarapamonae ajamatabëcuenuirajibi. Èpexaniajamatabëcuene najamatabëxaina. Casaë tsavanapae pevajënaeyabelia Dioso pejumelivaisi pejumecovënëtsijava. Nexata Dioso pejumelivaisi tsijamatabëcuenevitsabaponatsi pevajënaeyabelia. Tsipaji exanavanapa Dioso pitorobicueniatsi, jai Jesús pijajivijavabelia itsa tsipaeba peyapëtaeyaexanaenexa palivaisi jivijavabelia tsipaeba pabita peubinë pelivaisicuenia.

*Pacuenia Jesús pijajivijavabelia livaisi tsipaeba lámparabë pelivaisicuenia yabara pelivaisi (Mr 4.21-25)*

<sup>16</sup> Icatsia Jesús jumaitsi pijajivijavabelia:

—Itsajivi ata lámparabë pitanojotsicujinae, apo mataacatetsi itsacuenejavata. Cama bëxëpanalia ata apo etsi. Biji rajane athëbëyo etsia jivi boyaberena pejonevi pet-sivajënaeitayotecaenexa. <sup>17</sup> Bajara pijinia itsi palivaisianë tsipaebaponajë comparacióncuenia daxitajivi picani peyapëtaenexa. Najumematayatsia apo tsipaebaponaenë. Itsamonae nejumetae ata, aeconoxae abaxë apo nejumeyapëtae pajamatabëcuene xaina tatsipaebilivaisianë. Itsiata itsamatacabi, bexëjavabelia, daxitajivi nejumeyapëtaena pajamatabëcuene xaina palivaisianë comparacióncuenia tsipaebaponajë, jai Jesús pijajivijavabelia.

<sup>18</sup> Icatsia Jesús jumaitsi pijajivijavabelia:

—Panejumecanaëjère patacatsipaebilivaisi. Itsamonae ata itsa pacatsipaebiana, bjarapamonae ata pajumecanaëjëtsianame papecatsipaebilivaisi. Palivaisivajëto panejumecanaëjëtsianame, nexata bjarapalivaisivajëto panejumeyapëtaename. Itsiata icatsia pematatsënëa bjarapitsilivaisivajëto Dioso pacayapëtaeyaexanaena. Pajivi xaniavaetsia nejumeyapëtane patacatsipaebilivaisi, bjarapajivi icatsia itsalivaisi pematatsënëa Dioso jumeyapëtaeyaexanaenatsi. Itsiata pajivi apo jitsipae pematatsënëa pejumeyapëtaeponaenexa, bjarapajivi palivaisiyovajëto picani jumeyapëtane, nacofënëtsiana, jai Jesús pijajivijavabelia.

*Pacuenia Jesús pejuyapijivi, pena yajava, nubena bojumavelia yabara pelivaisi (Mt 12.46-50; Mr 3.31-35)*

<sup>19</sup> Jesús pejuyapijivi, pena yajava, pata Jesúsjavaberena. Itsiata acuenebi bjarapamonae pimoxoyotsijava Jesús. Tsipaji bitso jivi ayaiBITSaëto Jesús matatoyorotsia vënëcatsi. <sup>20</sup> Nexata pamonaë Jesús petsipaebilivaisi matatoyorotsia jumetaeyenatsi, jumaitsi Jesúsjavabelia:

—Patajatuxanenë, ena raja, nejuyapijivi yajava, nuca patapënëverena. Bjarapamonae pina jitsipa pecataejava, jai Jesúsjavabelia.

<sup>21</sup> Nexata Jesús jumaitsi daxita bjarapamonaejavabelia:

—Pamonae jumetane Dioso pejumelivaisi, jumecovënëtanua pacuenia Dioso itorbatsi, bjarapamonae jane baja tajuyapijivi, taenajivinua, jai Jesús bjarapamonaejavabelia.

*Pacuenia Jesús itaveta joviboxaneto, malataca yajava, piayajjavami yabara pelivaisi (Mt 8.23-27; Mr 4.35-41)*

<sup>22</sup> Itsamatacabi Galilea nacuata Jesús, pijajivi yajava, runareca jera ënëabereca. Jumaitsi pijajivijavabelia:

—Nicabaliatsi mapapucaxaneto itsapanabeliaje, jai Jesús.

<sup>23</sup> Itsa baja naropobalia, Jesús majitanuca. Nexata pinijjoviboxaneto jemata najetaruca. Malataca nexata bitso ayai. Nexata malataca jera enäberena mera epabajarabapona. Mera nexata vënëcapona jera enäberena. Bubunaejitsia baja bajarapamo.

<sup>24</sup> Nexata Jesús pemajitanucaenë pijajivi yaitavabatsi. Jesús pijajivi jumaitsi:

—¡Patajatuxanenë, vaxaitsimi rabaja yaothopaenatsi! jai Jesús pijajivi.

Nexata Jesús pemajitanucaenëmi naëcotapuna. Pinijijumeta itavetaxuaba jovibo, malataca yajava. Jovibo baja nexata ajibi tsaxuabi. Mene ata baja nexata vainae ecaxuaba. <sup>25</sup> Nexata Jesús jumaitsi pijajivijavabelia:

—¿Detsa xuajitsia bitso pajunavame? ¿Tsipaji apo payapëtaemë Dioso papecaevetsi-  
java? jai Jesús pijajivijavabelia.

Nexata Jesús pijajivi itsa tane Jesús pitavetsijava jovibo, malataca yajava, Jesús pijajivi jamatabëcuenenajunaviaca bënëna. Nexata Jesús pijajivi najumaitsi:

—¿De meta tsipaji maponëje? ¡Itaveta jovibo, malataca yajava! ¡Nexata jumecovënë-  
tatsi! ¡Nexata baja jovibo, malataca yajava, ajibi tsaxuabi! najai Jesús pijajivi.

*Pacuenia pebi, dovathivi peyajavaponaponaenë, Jesús vecuacapitsapa Gerasa nacuata yabara pelivaisi*

*(Mt 8.28-34; Mr 5.1-20)*

<sup>26</sup> Jesús pijajivi barëyaëta pucaxaneto itsapanabelia, Gerasa nacuyabelia. Gerasanacua boca puca itsapanaverena, Galileanacua pecanacujitsialia. <sup>27</sup> Itsa Jesús jeravecua nonotajunaya, mataenenarenatsi bajarapanacuapijinë, dovathivi peyajavaponaponaenë. Bajaraponë bajayajebi baja jumasa ponaponabiaba. Pijabota apo ponapona. Jivimëthëanëjavata saya ponaponabiaba. <sup>28</sup> Nexata bajaraponë itsa pata Jesúsjavaberena, pematatabacabëta nucajunua Jesús pitabarata. Pinijijumeta aëjai.

—Jesús, Dioso athëbëtatsia peecaenë pexënatomë. ¿Detsa xua jaitame xanëjavaberena? Pexaniacuene bitso cavajëtatsi. Nejamatabëcuenebejibitsipame, jai dovathivi peyajavaponaponaenë Jesúsjavabelia.

<sup>29</sup> Bajarapacuenia jumaitsi dovathivi peyajavaponaponaenë tsipaji Jesús jerajavavetsina penonotajunaejavata, dovathivi peyajavaponaponaenë pemataene-  
naejavatatsi, Jesús itaveta dovathivi. Jesús jumaitsi dovathivijavabelia mapacueniaje:  
“¡Dovathivi, bajaraponë baja pavecuapitsapare!” jai. Bajaraponë anijatonë dovathivi vaetababiabatsi. Jivi picani bajaraponë cadenamaëtonëta cobecëtabiabatsi. Yajavataxucëtabiabatsi cadenamaëtonëta xaniavaetsia picani peecaenexa. Itsiata baitsi dovathivi peyajavaponaponaenë ucubabiaba cadenamaëtonëmi. Dovathivi pejamatabëcueneta najetabajiravabiaba petusatuabelia. <sup>30</sup> Nexata Jesús jumaitsi bajaraponëjavabelia:

—¿Detsa pavënëmmë? jai Jesús.

Nexata bajaraponë navënëpaeba.

—Tavënë raja Legión, jai.

Bajarapacuenia navënëpaeba tsipaji dovathivi ayaibitsaëtoxoneto tsijamatabëjina-  
vanapatsi. <sup>31</sup> Bajarapadovathivi vajëta Jesúsjavabelia infiernojavabelia Jesús pitoro-  
biyaniva. <sup>32</sup> Nexata bajarajota, imoxoyo petsutojavata, marranobitsaëtoxoneto xae-  
vanapa. Dovathivi bitso vajëta Jesúsjavabelia.

—Panetocopare patajonenexa marranobitsaëtoxonetojavabelia, jai dovathivi.

Jesús nexata pevajëtsicueniatsi tocopata. <sup>33</sup> Nexata dovathivi pebi vecuapitsapecatsi. Nexata marranobitsaëtoxonetojavabelia baja junua dovathivi. Nexata daxita bajara-  
pamarranobitsaëtoxonetomi cujinaeyeca. Pucaxaneto itapajanituareca othopareca. Bajarajota daxita marranobitsaëtoxonetomi meneta bubuna.

<sup>34</sup> Marrano pevetsivi itsa tane bajarapacueni, rëcëpeca. Pona, pacuene tane, petsi-  
paebinexa tomarapivijavabelia, petsipaebinexa vayafotusatojava penaevijavabelia ata.

<sup>35</sup> Nexata jivi ponarena petaenexa bajarapacueni. Jivi itsa parena Jesúsjavaberena,

taeyeta dovathivi peyajavaponaponaenëmi peecaejava Jesús pemuxuneneta. Penaxatatsijava baja bajaraponë naxatateca. Jamatejema baja. Xaniavaetsia eca. Nexata bajarapamonae cujunavatsi Jesús. <sup>36</sup> Pamonaen cuenetanetsi Jesús pejamatejemayaexanaejava dovathivi peyajavaponaponaenëmi, bajarapamonae paeba pepatsivijavabelia daxita pacuenia tane. <sup>37</sup> Bajarapamonae bitso cujunavatsi Jesús. Nexata daxita Gerasa nacuapijivi jumaitsi Jesúsjavabelia:

—Pexaniacuene pacavajëtatsi. Ponare baja patajanacuavecua, jai Gerasa nacuapijivi Jesúsjavabelia tsipaji cujunavatsi.

Nexata baja Jesús runareca jera ënëabereca. Ponaejitsia baja. <sup>38</sup> Nexata dovathivi peyajavaponaponaenëmi bitso picani navajëca Jesúsjavabelia penaponaenexa picani Jesús pepëta.

—Petuxanenë, netocopare tanaponaenexa nepëta, jai picani Jesúsjavabelia.

Itsiata Jesús apo jejai. Jumaitsi bajaraponëjavabelia:

<sup>39</sup> —Ponare nijamonaejavabelia. Tsipaebianame pacuenia ayaicuene nijatuxanenë Dioso catoexana, jai Jesús.

Nexata baja bajaraponë pona. Tsipaebaona daxita pijatomarapijivijavabelia pacuenia Jesús jamatejemayaexanatsi.

*Pacuenia Jesús copiaya namutoepatota jamatejemayaexana piavitaneva, pacuenia icatsia cotocaevi toasaëyaexana Jairo pexënatovayo, petëpaevayomi, yabara pelivaisi*

*(Mt 9.18-26; Mr 5.21-43)*

<sup>40</sup> Jesús icatsia pecovëyaberena naviarena jerata pucaxaneto itsapanaverena. Nexata jivi ayaibitsaëttoxaneto copiapitatsi barëyaya. Tsipaji baja cajena copiaevetavanapatsi pepatsijavarena. <sup>41</sup> Nexata bajarajota napatajopa Jairovënënë. Bajaraponë judïovi penacaetuatabiabibo pevetsinë. Jairo pematatabacabëta yayataeya Jesús pitabarata nucajunua. Pinijicuenia junata. Jumaitsi Jesúsjavabelia:

—Tapëta ponare tajaboyabelia, jai.

<sup>42</sup> Bajarapacuenia Jairo jumaitsi Jesúsjavabelia tsipaji caevayo pexënatovayo totëpaejitsiatsi. Bajarapovayo xaina doce pavaibeje. Itsa Jesús napona Jairo pepëta, jivibitsaëttoxaneto Jesús pepënaponaevitsi matatoyorotsia cënënanajetarubenatsi.

<sup>43</sup> Bajarapajivibitsaëttoxaneto tuatujëta, itsava pijanacuene pecapunaevatsi nana-jetaruca. Bajarapova pijanacuene pecapunaecujinaetsi, doce baja pavaibeje xaina. Beyajiobi tsabiabi bajarapajana. Daxita pexainaejavaximi navecuavereta pematamobita pevaëbivitsi. Itsiata baitsi jane itsanë ata pevaëbivitsi apo jamatejemayaexanaetsi bajarapavitanevecua. <sup>44</sup> Nexata bajarapova ponataba Jesús pepënëvelia, jivibitsaëttoxaneto tuatujëalia. Nexata bajarapova tojayataba Jesús penaxatatsijavacopia. Nexata bajarapaepatota pijanacuenemi vecuaajibitsi baja.

<sup>45</sup> Jesús nexata jumaitsi:

—¿Jipatsa tanaxatatsijava netojayataba? jai Jesús.

Daxitajivi jumaitsi Jesúsjavabelia:

—Xanë cajena apo cajayatabitsi, jai.

Nexata Pedrohana jumaitsi:

—Patajatuxanenë, jivibitsaëttoxaneto raja camatatoyorotsia cënënanajetarubena. Apo becaajayatsijibi. ¿Detsa xuajitsia: “¿Jipatsa tanaxatatsijava netojayataba?” jamë? Itsajiviyo raeta baja cajayataba, jai Pedrohana.

<sup>46</sup> Nexata Jesús jumaitsi:

—Itsajiviyo baja cajena tanaxatatsijava netojayataba. Yapëtaniji bajarapajiviyo taja-matejemayaexanaejava tasaëta, jai Jesús.

<sup>47</sup> Nexata petiriva jamatabëjumaitsi:

—Jesús baja yapëthane tanejamatejemayaexanaejava, jamatabëjai.

Nexata bajarapova najetabarena Jesús pitabarayaberena. Neconecojai pecajunavi. Pematatabacabëta tonucajunua Jesús pitabarata. Bajarapova nexata navajunupaeba daxitajivi tuatujëta pacuene yabara tojayataba Jesús penaxatatsijava. Navajunupaebanua

pacuenia jamatejemayaexanatsi pejayatabijavata. <sup>48</sup> Nexata Jesús jumaitsi bajarapovajavabelia:

—Xamë nesivajamatabëjumaitsimë: “Jesús penaxatatsijava itsa tojayatabianajë, tavitanejavami nevecuaajibi tsane,” nesivajamatabëjamë. Bajaraxuata jamatejemamë baja. Ponare baja jamatejema, jai Jesús bajarapovajavabelia.

<sup>49</sup> Bajarapacuenia Jesús pejumaitsanucaejavata namutoepatota, pataba jivitonë Jairo pijaboverena. Bajaraponë jumaitsi Jairojavabelia:

—Jairo, nexënatoyo rabaja tëpa. Pëtsa baja matavëjëa jamatabëitonotaponame Jesús, jai bajaraponë Jairojavabelia.

<sup>50</sup> Jesús jumetae ata bajarapajume, itsiata jumaitsi Jairojavabelia:

—Jairo, pëtsa najamatabëxainame. Najamatabëcuenecopare saya ëxanëjavaberena. Nexënatovayo raja jamatejema tsane, jai Jesús Jairojavabelia.

<sup>51</sup> Itsa Jesús pata Jairo pijabota, apo tocopatsi ayailbitsaëto penajonenexa Jesús pepëta petëpaevayo pebocaejavabelia. Tocopata saya penajonenexa mapamatabëxëyoje. Pedro, Santiago, Juan, petëpaevayo paxa, pena, bajara saya pamatabëxëyo tocopata penajonenexa Jesús pepëta. Pamonae Jesús pevajënae ena Jairo pijabota, bajarapamonae Jesús pitsapaeyaexana. <sup>52</sup> Daxitajivi pinijicuenia matanueyaba petëpanucaevayo. Nexata Jesús jumaitsi:

—Pëtsa pamatanueyabame. Pejanava raja apo tëpae. Saya raja majitanuca, jai Jesús bajarapamonaejavabelia tsipaji yapëtane Jesús piasaëyaexanaejavanexa bajarapovayo.

<sup>53</sup> Bajarapacuenia Jesús pejumaitsiijava, bajarapamonae saya Jesús jumecapocaponatsi. Tsipaji bajarapamonae yapëtane bajarapovayo baja picani pepacueni petëpaejava.

<sup>54</sup> Nexata Jesús petëpaevayo cobepita. Jumaitsi pinijijumeta:

—Pejanavayo, nonotabapunare, jai Jesús.

<sup>55</sup> Nexata bajarapacuenia Jesús pejumaitsiijavata, petëpanucaevayomi nonotabapuna. Asaë baja icatsia petëpaevayomi. Nexata Jesús jumaitsi pejanavayo penajavabelia:

—Nexënatovayo pexaejava rajure, jai Jesús.

<sup>56</sup> Nexata pejanavayo paxa, pena ata, bitso jamatabëcuenenabenajacabeje. Nexata Jesús jumaitsi bajarapajivibejevabelia:

—Pëtsa papaebamebeje itsajivijavabelia ata pacuene pacatoexanatsibeje, jai Jesús.

## 9

*Pacuenia Jesús pijajivi itoroba Dioso pitorobilivaisi jivi petsipaebanajetarubenaenexa yabara pelivaisi*

*(Mt 10.5-15; Mr 6.7-13)*

<sup>1</sup> Jesús junata pijajivi, doce ponëbeje, penacaetuatsinexa. Nexata Jesús jumaitsi bajarapamonaejavabelia mapacueniaje:

—Pacajamatabëcuene caëjëpaeyaexanatsi rabaja papecacaëjëpaejamatabëcuene dovathi peyajavajinavanapaevi ata panevecuacapitsaponaenexa. Pacajamatabëcuene caëjëpaeyaexanatsinua piavitanevi ata panejamatejemayaexanaponaenexa.

<sup>2</sup> Patsipaebanajetarubenaename daxitajivijava pacuenia Dioso pijajivi evetsijitsia. Piavitanevi ata pajamatejemayaexanaponaename, jai Jesús pijajivijavabelia.

<sup>3</sup> Jesús jane baja pijajivi penaropobivajënae, Jesús jumaitsi pijajivijavabelia mapacueniaje:

—Pëtsa itsacuenejava ata pacaponame panijanamutonexa. Pëtsa pacaponame naebo, doro ata, panemarue ata, palata ata. Caejava saya panenaxatatsijava pajumaponare. Pëtsa anijacamisabeje pacaponame. <sup>4</sup> Itsa papatabiabianame tomarata, caebota pama-jitabiabianame. Pëtsa panatixitaponame itsaboyabelia panemajitsinexa. Matapania icatsia itsajavabelia itsa ponaename, bajarapabovecua papitsapaename. <sup>5</sup> Patomarata apo pacacopiapitsi tsane pexanialivaisi panetsipaebinexa, nexata pavecuaponaename bajarapatomara. Panevecuaponaevajënae bajarapatomara, bajarapatomarata panataxuatsapërëvarëbianame. Bajarapacuenia itsa panataxuatsapërëvarëbianame, yapëtaena

bajarapatomarapijivi Diosojavabelia penaneconitsicuene apo papecacopiapitsixae papecanamuxunaevetsinexa panetsipaebilivaisi, jai Jesús pijajivijavabelia.

<sup>6</sup> Bajaraxuacujinae Jesús pijajivi naropoba jane baja. Najetarubena daxitatomaraxijava. Tsipaebanajetarubena jane baja pexanialivaisi jivi pecapanepaelivaisinexatsi pibisiacuene pexanaeneconimivecua. Jamatejemayaexanaponanua piavitanevi daxitajava.

*Pacuenia Juanpijinë jivibautisabinëmi beyaxuabatsi yabara pelivaisi*

*(Mt 14.1-12; Mr 6.14-29)*

<sup>7</sup> Herodes, Galileanacua pevetsinë, vënëlivaisitanetsi daxita Jesús pinijicuene pexanaponaejava. Nexata Herodes najamatabëcueneepatajërërëcaeya najamatabëxaina Jesús yabara. Tsipaji itsamonae jamatabëcuenenavëxaniabiaya Jesús yabara jumai tsaponae: “Juanpijinë raeta jivibautisabinëmi petëpaecujinae icatsia asaë,” jai tsaponae Jesús yabara. Nexata bajarapacuenia itsamonae pejumaitsaponaejava Herodes pejumetaexae, najamatabëcueneepatajërërëcaeya najamatabëxaina Jesús yabara.

<sup>8</sup> Itsamonae pijinia jumai tsaponae Jesús yabara:

—Bajayata raeta ponëmi ponapona, profeta Elíaspijinëmi, icatsia asaë, jai tsaponae itsamonae.

Itsamonae pijinia jumai tsaponae Jesús yabara:

—Bajayata raeta pamonami jinavanapa, profetavimiyajuvënë, icatsia asaë, jai tsaponae itsamonae Jesús yabara.

Bajarapacuenia itsamonae jamatabëcuenenavëxaniabiaya pejumaitsaponaejava Jesús yabara, Herodes jumetane.

<sup>9</sup> Nexata Herodes jamatabëjumaitsi:

—Xanë bajayata tajajivi itorobajë Juanpijinë jivibautisabinëmi pebeyaxuabinexa. Nexata baja tajajivi Juanpijinëmi vësiucutaxuaba. Beyaxuaba baja. ¿De tsaeta nexata ponë pinijicuene pexanaponaejava, vënëlivaisitaeyabiabajë? jamatabëjai Herodes Jesús yabara.

Bajaraxuata Herodes bitso jamatabëtane Jesús.

*Pacuenia Jesús pexaejava rajuta cinco mil ponëbeje yabara pelivaisi*

*(Mt 14.13-21; Mr 6.30-44; Jn 6.1-14)*

<sup>10</sup> Jesús pitorobivi, apóstolevi, jivi pexanialivaisi petsipaebanajetarubenaecujinae, naviabanajetarubena baja Jesúsjavaberena. Nexata bajarapamonae pepatsicujinae Jesúsjavaberena, navajunupaeba Jesúsjavabelia daxita pacuenia exanavanapa. Nexata Jesús barëpona pijajivi pesajinaejavabelia, Betsaidatomara imoxoyojavabelia. <sup>11</sup> Itsiata baitsi jane jivi ayaibitsaëtoxaneto pëtanetsi. Nexata bajarapamonae Jesús pecovëvelia pëjaitatsi. Nexata bajarapamonae itsa pata Jesúsjavata, Jesús copiapita xaniavaetsia. Nexata Jesús tsipaeba bajarapamonaejavabelia pacuenia Dioso eveta pijajivi mapanacuataje. Jesús jamatejemayaexananua piavitanevi.

<sup>12</sup> Itsa baja caniviyo tsaponae, Jesús pijajivi doce ponëbeje cujibarenatsi. Jumaitsi:

—Itorobaremelia baja jivi peponaenexa imoxoyo penaetomaraxijavabelia, imoxoyo penaebonëjavabelia ata. Bajarabelia bajarapamonae namajitsiana. Pexaejavanua namit-savajëtsiana. Majotaje ajibi pexaejava. Tsipaji itsajivi ata pijabo apo xinae majotaje, jai Jesús pijajivi.

<sup>13</sup> Nexata Jesús jumaitsi pijajivijavabelia:

—Paxamë parajure pexaejava, jai Jesús.

Nexata Jesús pijajivi jumaitsi:

—Paxainajë saya cinco papanbëbeje, anijanëyobeje dujuainëyobeje yajava. ¿Jitsipame tsaja patacomuacaenexa pexaejava daxita mapamonae penaxaenexaje? jai Jesús pijajivi.

<sup>14</sup> Bajarapajivibitsaëtoxaneto bejamatabëcuene cinco mil ponëbeje. Nexata Jesús jumaitsi pijajivijavabelia:

—Paenaeyaexanare pepobitsaëtonë, bejamatabëcuene cincuenta ponëbeje tsaponae caebitsaëtota, jai Jesús pijajivijavabelia.

<sup>15</sup> Nexata Jesús pijajivi bajarapacuenia exana. Enaeyaexana jane baja daxita jivibitsaë-toxaneto. <sup>16</sup> Nexata Jesús pita cinco papanbëbeje, anijanëyobeje dujuainëyobeje yajava. Athëbëa benaëcotsia. Jumaitsi Diosojavabelia:

—Pexaniacuene panetoexaname. Panerajutame pataxaejava, jai Jesús.

Bjaraxuacujinae Jesús pan epatsicacapona, dujuainëyobeje yajava. Pepatsicacaejava pijajivijavabelia rajutapona petsicobetsanaenexa daxitajivi. <sup>17</sup> Daxita xaniavaetsia nabane. Bjaraxuacujinae jivi peyajuvënëcopabejebijavanë, Jesús pijajivi vënëba doce xuabeje bemapirecuenia pexanaejavanë.

*Pacuenia Pedro jumaitsi Jesúsjavabelia: “¡Xamë raja Cristomë!” jai yabara pelivaisi (Mt 16.13-19; Mr 8.27-29)*

<sup>18</sup> Itsamatacabi Jesús caenë vajëta Diosojavabelia pijajivi pitabëta. Nexata xuacujinae Jesús jumaitsi pijajivijavabelia:

—¿Detsa jivi jumai tsabiabi xanë yabara? ¿De tsaeta xanë ponënë? jai Jesús pijajivijavabelia.

<sup>19</sup> Nexata Jesús pijajivi jumaitsi:

—Itsamonae xamë yabara jumai tsabiabi: “Juanpijinë raeta jivibautisabinëmi icatsia asaë,” jai tsabiabi. Itsamonae pijinia jumai tsabiabi: “Diosojumepaebinëmi raeta. Profeta Elíaspijinë, ponëmi bajayata ponapona, icatsia asaë,” jai tsabiabi. Itsamonae pijinia jumai tsabiabi: “Bajayata raeta Diosojumepaebivimi profetavimiyajuvënënë icatsia asaë,” jai tsabiabi xamë yabara, jai Jesús pijajivi.

<sup>20</sup> Nexata icatsia Jesús jumaitsi pijajivijavabelia:

—¿Detsa nexata paxamë pajamatabëitsimë xanë yabara? ¿Detsa xanë ponënë? jai Jesús pijajivijavabelia.

Nexata Pedro jumaitsi Jesúsjavabelia:

—Xamë raja cajena Cristomë, athëbëvetsica Dioso peccaitorobinëtsica jivi necapana-paenexa. Xamë cajena Dioso pexënatomë, jai Pedro Jesúsjavabelia.

*Pacuenia Jesús tajëvelia navajunupaeba pebeyaxuabijavanexatsi yabara pelivaisi (Mt 16.20-28; Mr 8.30-9.1)*

<sup>21</sup> Jesús jumeitaveta pijajivi. Jumaitsi mapacueniaje:

—Pëtsa pajumaitsimë jivijavabelia: “Jesús raja Dioso pexënato,” pajamë pëtsa, jai Jesús.

<sup>22</sup> Nexata Jesús pebeyaxuabijavanexatsi, tajëvelia navajunupaeba. Jumaitsi pijajivijavabelia mapacueniaje:

—Xanë, Daxitajivi Pematapijinënë, pinijicuenia bejiobinë tsane. Judíovi pijaancianovi, sacerdotevi penamatacaitorobivinia, judíovi pecujarubivinia, apo nejumecovënëtsi tsane xanë Cristonëcuenenë. Nexata bitso nebejiobiaexanaena. Bjaraxuacujinae nebeyaxuabiana. Itsiata baitsi jane tatëpaecujinae, acueyabi maticabita, icatsia asaënë tsane, jai Jesús pijajivijavabelia tajëvelia penavajunupaebijavata pebeyaxuabijavanexatsi.

<sup>23</sup> Bjaraxuacujinae Jesús jumaitsi daxitajivijavabelia:

—Pajivi jitsipa tanepënaponaejava, bajarapajivi copatsi penatojitsipaecuenia pexanaenexa penajamatabëxainabiabijavami. Exanaponapona taitorobicuenia. Bjarapajivi caematacabi canacujitsia najamatabëcueneveretsinua, bejiobiaexanaejitsia atatsi, beyaxuabijitsia atatsinua, Dioso pejumelivaisi yabara piamatabëcuenesaë tsaponaponaenexa. Nexata jane baja xuacujinae nepënaponaena. <sup>24</sup> Pajivi exanaponapona penatojitsipaecuenia, apo xainae tsane maticabi apo pevereverecaejava. Pajivi xanë tajamatabëcueneta copata penatojitsipaecuenia pexanaejavami, bajarapajivi xainaena maticabi apo pevereverecaejava. <sup>25</sup> Pajivi exanaponapona penatojitsipaecuenia, bajarapajivi Diosovecua naxuabiana. Nexata bajarapajivi daxitacuene xainae ata mapanacuapijicuenëje, itsiata nacuerata. Tsipaji pexainaecuene apo capanepae tsanetsi Diosojavabelia. <sup>26</sup> Pajivi tajajivitonë ata, navënëlivaisicaura tsane jivijavabelia xanë

tajajivitonëcuene, tanejumecovënëtsijava ata yabara, nexata juya xanë, Daxitajivi Pematapijinënë, bajarapajivi tajajivitonë ata, tajajivitonëcuene vënëlivaisicauranë tsane taxa Diosojavabelia. Bajarapajivi vënëlivaisicauranë tsane pamatacabi icatsia pat-sianicajë taxa Dioso pijapenivenivenaecotia yajava, tananeconitsiaexanaenexa daxita pijaneconi pexainaevi. Yajavapatsianicajënu Dioso pijaängelevi. <sup>27</sup> Xaniajanë pacuenia pacatsipaebijitsiatsi. Daxita paxamë patëpaenejevamë, Dioso taxuxuabiana daxita pijajivi pevetsicuene mapanacuataje. Nexata paxamëyajuvënëvi pepuatae tsane Dioso petaxuxuabijava daxita pijajivi pevetsicuene mapanacuataje, tēpaena, jai Jesús bajarapamonaejavabelia.

*Pacuenia Jesús caepatoyo perabënivenivenataba yabara pelivaisi*  
(Mt 17.1-8; Mr 9.2-8)

<sup>28</sup> Jesús petëpaejavanexa tajëvelia penayajunupaebicujinae, bejamatabëcuene ocho pamatacabibejecujinae, Jesús pijajivi, acueyabi ponëbeje, barëjunaya petsutojumabetsia. Barëjunaya mapamatabëxëyoje: Pedro, Santiago, Juan. Bajarapamatabëxëyo Jesús barëjunaya petsutojumabetsia pevajëtsinexa Diosojavabelia. <sup>29</sup> Diosojavabelia pevajëtsijavata, Jesús itabaranivenivena. Penaxatatsijava ata bitso nivenivenaeya niojai. <sup>30</sup> Bajarajota jemata naitajëta anijanëbeje, ponëmibeje bajayata tēpa. Bajaraponëbeje Jesús barëcuaicuaijajitsi. Bajaraponëbeje tsaena Moiséspijinëbeje Elíaspijinëbeje. <sup>31</sup> Bajaraponëbeje matatoyorotsia nivenivenabeje. Jesúsbana nabarëcuaicuaijai Jesús petëpaejavanexa yabara. Pacuenia Jesús bejiobiaexanaejitsiatsi Jerusalén tomarata, bajarapacuenia yabara nabarëcuaicuaijai. <sup>32</sup> Pedrovana penajuajinavanapaevi bitso itamajitsipanae ata, itsiata naëcotavanapa. Nexata bajarapamonae tane Jesús matatoyorotsia penivenivenaejava. Tanenua Moisésbeje Elíasbeje pebarëcuaicuaijavatsi Jesús. <sup>33</sup> Itsa baja Moisésbeje Elíasbeje Jesúsvecua ponaejitsiatsibeje, nexata bajarapapatota Pedro jumai tsaxuabi Jesúsjavabelia:

—¡Patajatuxanenë, pijacuaxae panebarëponame! Pacatoexanaenatsi acueyabi pabobërëtoje. Itsabobërëto xamënexa tsane. Itsabobërëto Moisésnexa tsane. Itsabobërëto Elíasnexa tsane, jai Pedro.

Pedro xaniavaetsia najamatabëxainaenejeva, bajarapacuenia jumaitsi. <sup>34</sup> Pedro abaxë itsa cuaijai tsanucuae, itarërëbo mataacataxuabatsi daxita bajarapamonae. Jesús pijajivi najunaviaca itsa mataacataxuabatsi itarërëbo. <sup>35</sup> Nexata bajarapaitarërëbojavavetsica Dioso jumaitsitsica:

—Mara ponë taxënato, tasivanëje. Bajaraponë panamuxunaevere, jaitsica Dioso itarërëbojavavetsica Jesús pijajivijavabelia.

<sup>36</sup> Itsa baja Dioso najumevereta bajarapacuenia pejumaitsijavatsica, Jesús pijajivi tane caenë baja Jesús penucaejava bajarajota. Jesús pijajivi tae ata bajarapacuenia, moya saya jinavanapa. Bajarapamonae abaxë apo tsipaebi itsamonaejavabelia, tae ata bajarapacuenia.

*Pacuenia Jesús jamatejemayaexana pejevaxinë, dovathi peyajavaponaponaenë, yabara pelivaisi*  
(Mt 17.14-21; Mr 9.14-29)

<sup>37</sup> Jesús pebarëcuaicuaijaicujinae Moisésbeje Elíasbeje, pijajivi acueyabi ponëbeje yajava, naviatsica petsutojumavetsica. Nexata mataenenatsi jivi ayaibitsaëtoxaneto.

<sup>38</sup> Nexata caenë bajarapajivi bitsaëtoxanetoyajuvënëvi pinijijumeta jumaitsi Jesúsjavabelia:

—Jesús, nitaxutotsoniataema. Netotaema taxënatonëyo. Caenëyo rabaja tsipaji xainajë. <sup>39</sup> Dovathi vaetababiabatsi. Nexata jemata aëjai tsabiabi. Tëpajoneyaexanabiabatsi. Daxitanë neconecojaiya aperabëbaba tsatababiabireca. Nexata bajarajota pecuiothamu tsabiabi. Bitso bejiobiaexanabiabatsi. Dovathi abaxë apo jamatabëcopatsi. <sup>40</sup> Picani raja nijajivijavabelia jumaitsinë: “Panetovecuacapitsapare dovathi,” janë. Itsiata apo caëjëpaetsi tanetovecuacapitsapaenexa, jai bajaraponë Jesúsjavabelia.

<sup>41</sup> Nexata Jesús jumaitsi daxita pijajivijavabelia:

—¡Paxamë baja rovia apo pajumecovënëtsimë Dioso papecayavenonaejavanexa! Bajaraxuata apo pacajamatabëcuenecaëjêpae pejevaxinë panevecuacapitsapaenexa dovathi. ¡Paneajamatabëcuenetajavi baja rovia! ¿Detsa paepatojebi abaxë paxamëjavabelia ajamatabëcuenesaënë tsaponaponae tsane patanejumecovënëtsinexamë? jai Jesús daxita pijajivijavabelia.

Nexata Jesús jumaitsi pejevaxinë paxajavabelia:

—Barërenamëre nexënatonëyo, jai Jesús.

<sup>42</sup> Ajena pejevaxinë imoxoyotabarena Jesúsjavaberena, dovathi icatsia irata xuabatsi pejevaxinë. Daxitanë aperabëbaba tsatabireca. Nexata Jesús itaveta dovathi pejevaxinë pevecuapitsapaenexatsi. Nexata baja Jesús jamatejemayaexana pejevaxinë. Tocanaviata baja pejamatejemanë paxajavabelia. <sup>43</sup> Daxitajivi bitso jamatabëcuenenabenajaca Dioso pesaëta Jesús pevecuacapitsapaexae dovathi bajaraponëyo.

*Pacuenia icatsia Jesús tajëvelia navajunupaeba pebeyaxuabijavanexatsi yabara pelivaisi*  
(Mt 17.22-23; Mr 9.30-32)

Jivibitsaëtoxaneto Jesús jamatabëcuenenabarëyaya tanetsi daxita Jesús pexanaejava yabara. Nexata Jesús pebeyaxuabijavanexatsi, tajëvelia navajunupaeba pijajivijavabelia. Jesús jumaitsi mapacueniaje:

<sup>44</sup> —Xaniavaetsia panenamuxunaevere. Pëtsa panacofënëtame. Xanë, Daxitajivi Pematapijinënë, necanajetsiana itsamonae pecobeyabelia, jai Jesús pijajivijavabelia tajëvelia penavajunupaebijavata pebeyaxuabijavanexatsi.

<sup>45</sup> Itsiata baitsi jane Jesús pijajivi apo jumeyapëtae xua yabara Jesús jumaitsi. Baitsi bajarapamonae Dioso apo tocopatsitsi pejumeyapëtaeyaniva xua yabara Jesús jumaitsi. Bajarapamonae ajumeura Jesúsjavabelia peyanijobijava xua yabara Jesús jumaitsi.

*Pacuenia Jesús pijajivi: “¿Detsa ponë vaxaitsiyajuvënënë nacavecuaayaijamatabëcuenenë bitso?” najai tsanajetarubenaë namutua yabara pelivaisi*  
(Mt 18.1-5; Mr 9.33-37)

<sup>46</sup> Jesús pijajivi anaeya namutua najumenotsiaya nalivaisitanajetarubena. Najumaitsi tsanajetarubenaë bajarapamonae:

—¿Detsa ponë vaxaitsiyajuvënënë nacavecuaayaijamatabëcuenenë bitso? najai tsanajetarubenaë Jesús pijajivi.

<sup>47</sup> Nexata Jesús pijajivi jamatabëcueneyapëtane pacuenia najamatabëxaina. Nexata Jesús cobepita pejevaxinëyo. Pemuxuneneta nuteta. <sup>48</sup> Jumaitsi pijajivijavabelia:

—Pajivi copiapita tanejumecovënëtsijiviyo, mapitsipejevaxinëyo ataje, xanë taniji tanecopiapitsijava. Pajivi necopiapita, ëxanë apo necopiapitsi. Ponë nitoroba, neyajavacopiapita. Nexata pëtsa bepaayaijamatabëcuenenë panataneme. Tsipaji ponë paxamëyajuvënënë beveliajamatabëcuenenë natane paxamëvecua, bajaraponë bitso ayaijamatabëcuenenë taenatsi Dioso daxita paxamë matatoxenetsia, jai Jesús pijajivijavabelia.

*Pacuenia Jesús jumaitsi pijajivijavabelia itsa vënëlivaisitane itsanë dovathi jivivecua pecapitsapaejava Jesús pevënëta yabara pelivaisi*  
(Mr 9.38-40)

<sup>49</sup> Jesús pijajivitonë, Juan, jumaitsi Jesúsjavabelia:

—Tajatuxanenë, pataniji itsanë nevënëta dovathi jivivecua pecapitsapaejava. Itsiata bajaraponë apo paxanëyajuvënënë. Nexata paitavetajë bajaraponë dovathi jivivecua pecapitsapaponaëjava, jai Juan.

<sup>50</sup> Nexata Jesús jumaitsi Juanjavabelia:

—Pajivi pibisiajamatabëcuene apo najamatabëxainae vaxaitsijavaberena, bajarapajivi nacajamatabëcueneyavenona. Bajarapajivi bevaxaitsijamatabëcuenejivi. Bajaraxuata pëtsa baja paitavetame bajaraponë xanë tavënëta jivivecua dovathi itsa capitsapapona, jai Jesús Juanjavabelia.

*Pacuenia Jesús jumeitaveta Santiagobeje Juanbeje yabara pelivaisi*

<sup>51</sup> Itsa baja imoxoyo pevajënae pamatacabi Jesús athëbëabetsia Dioso caponaejitsiatsi, ajamatabëcuenesaë baja peponaenexa Jerusalén tomarabelia. <sup>52</sup> Jesús nexata pevajënaeyabelia pijajivitonëbeje natsivajënaeitoroba, Santiagobeje Juanbeje. Bajaraponëbeje ponabeje Samaria nacuata peecaetomarajavabelia petocovaetsinexabeje pabota picani Jesús patsijitsia. <sup>53</sup> Itsiata baitsi jane Samaria nacuapijivi apo jamatabëcopiapitsitsi Jesús. Tsipaji baja bajarapamonae yapëtane Jesús peponaejavanexa Jerusalén tomara-belia. <sup>54</sup> Nexata Jesús pijajivitonëbeje itsa yapëtanebeje Samaria nacuapijivi Jesús apo pecopiapitsijavanexatsi, nexata jumaitisibeje Jesúsjavabelia:

—Patajatuxanenë, bajayata profeta Elíaspijinë vajëta Diosojavabelia Dioso pitorobinexatsica isotocotia peverebiabinexa pïajamatabëcuenebejevi. ¿Baja tsaja pitsicuene jitsipame patavajëtsinexa Diosojavabelia peveriapaenexatsi pamonae apo jitsipae pecacopiapitsijava? jaibeje Jesús pijajivitonëbeje.

<sup>55</sup> Nexata Jesús naëcota pijajivitonëbejejavabelia. Jumeitaveta pijajivitonëbeje. Jesús jumaitsi:

—Paxamëbeje apo pajamatabëcuenyapëtaemëbeje Espiritu Santo, ponë pacaya-javaponaponabeje. <sup>56</sup> Xanë, Daxitajivi Pematapijinënë, apo patsinëtsica taverebiabinexa jivi. Biji rajane patsicajë tacapanepaenexa jivi pibisiacuene pexanaeconivecua, jai Jesús pijajivitonëbejejavabelia.

Nexata baja Jesús, pijajivi yajava, pona itsatomarabelia.

*Pacuenia picani itsamonae Jesús jamatabëpënaponatsi yabara pelivaisi  
(Mt 8.19-22)*

<sup>57</sup> Jesús pijajivi namutua peyajavanajetaruaejavata, judíovi pecujarubinë jumaitsi Jesúsjavabelia:

—Jesús, itsabelia poname, capënaponaeatsi cajena, jai judíovi pecujarubinë.

<sup>58</sup> Nexata Jesús jumaitsi bajaraponëjavabelia:

—Itsa nepënaponaejitsipame, apo napatabiabimë tsipae tajabota nenacueraevetabiabinexa. Tsipaji tajabo apo xainaenë. Namo pijamëthëanë xaina pepatabiabinexa pema-jitabiabinexanua. Baratsui ata pematapenanë xaina. Itsiata baitsi jane xanë, Daxitajivi Pematapijinënë, itsajavabelia ata apo xainaenë, itsajota nacueraevetabiabijitsianë, jai Jesús.

<sup>59</sup> Bajaraxuacujinae Jesús jumaitsi icatsia itsanëjavabelia:

—Nepënaponare, jai Jesús.

Nexata bajaraponë jumaitsi:

—Tajatuxanenë, caepatoyo abaxë necopare tamëthëtsinexa taxa petëpaenë, jai bajaraponë Jesúsjavabelia.

<sup>60</sup> Jesús nexata jumaitsi bajaraponëjavabelia:

—Copare matacabi apo pevereverecaejava apo pexainaevinexa pemëthëcaenexatsi nijamonaemi itsa tëpa. Xanë saicaya nepënaponare jivi netsipaebinexa pacuenia Dioso evetsijitsia daxita pijajivi mapanacuataje, jai Jesús bajaraponëjavabelia.

<sup>61</sup> Bajaraxuacujinae icatsia itsanë jumaitsi Jesúsjavabelia:

—Tajatuxanenë, jitsipajë tacapënaponaejava. Itsiata abaxë caepatoyo necopare tanapëjiobinexa tajabota pejinavanapaevijavabelia, jai bajaraponë.

<sup>62</sup> Nexata Jesús jumaitsi bajaraponëjavabelia:

—Pajivi Dioso tonacuenebi ata, itsiata jamatabënajinabiaba pijaperujamatabëcuene, xua exanabiaba, bajarapajivi apo caëjëpaetsi xaniavaetsia Dioso petonacuenebinexa pitorobicueniatsi. Tsipaji najamatabëcueneepatajërërëcaeya nacueneba, jai Jesús bajaraponëjavabelia.

<sup>1</sup> Jesús icatsia itsamonae itapeta pijajivinexa, setenta ponëbeje. Bajarapamonae Jesús itoroba anijanëbeje tsaponae Jesús pevajënaeya Dioso pejumelivaisi jivi petsipaebanajetarubenaenexa. Itoroba petsipaebanajetarubenaenexa daxita tomaranëjava, tsiquir-itomaraxijava ata, itsaxuayo Jesús najetarucaejitsia. <sup>2</sup> Jesús pijajivi penaropobivajënae, Jesús jumaitsi pijajivijavabelia mapacueniaje:

—Xaniajanë pacuenia pacatsipaebijitsiatsi. Ayaipabi pexainaenë caecuenia uba ayaijava peubijava. Nexata baja itsa tonaveretatsi peubijava, caejiviyobeje tonotatsi. Nexata notsi ata, abaxë bitso ayaijava tosajinatsi penotsinexa. Bajara pijinia itsi jivi ata Diosojavabelia penajamatabëcuenecopabivinexa. Abaxë sajina ayaibitsaëtoxaneto. Itsiata baitsi jane paxamë Dioso panetonacuenebivi pacaajiviyomëbeje saya. Bajaraxuata Diosojavabelia pavajëre icatsia Dioso pijajivi pematatsënëa itsamonae pitorobinexa papecayavenonaenexa. <sup>3</sup> Paponare baja Dioso pejumelivaisi jivi panetsipaebanajetarubenaenexa. Panayajivitaeyajinavanapaename. Pacaitorobianatsi raja bitso pibisiacue pexanabiabivijavabelia. Pacuenia ovejaxi tsiayaitsi itsa jinavanapa pianaepanaevi nevëthë tuatujëata, bajarapaitsimë tsane. <sup>4</sup> Pëtsa pacaponame itsacuenëjava ata, dorota, palata ata, zapato ata. Itsa pabajacobianame itsajivi namutoepatota, pëtsa bajayajebi pabarëcuaijamë tsanunubenaenexa panenajematsiyaniva. <sup>5</sup> Itsa pajonejitsiamë itsamonae pijaboyalia, panejonevajënaelia copiaya pajumaitsimë tsane Diosojavabelia: “Dioso, yavenonare mapabopijivije jamatabëcuenexanepanaeya pejinavanapaenexa,” pajamë tsane copiaya Diosojavabelia. <sup>6</sup> Bajarapabo pexainaenë itsa jitsipaena pejamatabëcuene xanepanaeyaexanaenexatsi Dioso, nexata bajaraponë jamatabëcuene xanepanaeyaexanaenatsi Dioso. Itsa apo muxujitsipae tsane bajarapacuenia panejumaitsijava, nexata Dioso apo jamatabëcuene xanepanaeyaexanae tsanetsi bajaraponë. <sup>7</sup> Itsajota papatabiabianame, caebota pamajitabianame. Pëtsa panatixitaponame itsaboxijavabelia. Aurajibia paxaeyabianamenua xua pacaabata bajarapabota. Pëtsa pauramë panexaejava papecarajutsijava yabara. Tsiipaji panetsipaebixae patacaitorobilivaisi, pacarajutsiana panexaejava. Tsiipaji itsajivi itsa tonacueneba itsanëjavabelia, barajutatsi pexaejava. <sup>8</sup> Itsa papatabiabianame tomarata, itsa pabota bajarapatomarapijivi xaniavaetsia pacacopiapita, nexata panaxaename xua pacaabata. <sup>9</sup> Bajarapatomarata pajamatejemayaexanaename piavitanevi. Pajumaitsimë tsane bajarapatomarapijivijavabelia: “Dioso daxita pijajivi pevetsimatacabinexa, imoxoyo baja pevajënae pecopiapatsinexa,” pajamë tsane. <sup>10</sup> Itsiata baitsi jane patomarata panepatsicujinae apo pacacopiapitsi tsane, bajarapatomarapijicallejavata panubenaename. Pajumaitsimë tsane bajarapatomarapijivijavabelia mapacueniaje: <sup>11</sup> “Panijatomarapijiatsapërë patataxuta rubena. Nexata panavetaxuvarëbajë. Bajarapacuenia panavetaxuvarëbajë panenayapëtaenexa Diosojavabelia panenaneconitsijava. Pananeconitame Diosojavabelia. Tsiipaji apo panecopiapitsimë patanenamuxunaevetsinexamë palivaisi picani pacatsipaebijitsiatsi. Itsiata panenamuxunaevere paneyapëtaenexa mapalivaisije. Dioso daxita pijajivi pevetsimatacabinexa, imoxoyo baja pevajënae pecopiapatsinexa,” pajamë tsane. <sup>12</sup> Xaniajanë pacuenia pacatsipaebijitsiatsi. Pamatacabi Dioso naneconitsiaexanaena daxita pijaneconi pexainaevi, bajarapamatacabi bitso ayaicuenia Dioso naneconitsiaexanaena patomarapijivi apo pacacopiapitsi tsane. Paneconivajëtota bajayata Dioso naneconitsiaexana Sodomata tomarapijivimi, bajarapaneconivajëto matatoxenetsia Dioso naneconitsiaexanaena patomarapijivi apo pacacopiapitsi tsane, jai Jesús pijajivijavabelia, setenta ponëbejejavabelia.

*Pacuenia Jesús jumaitsi patomarabejijivi Dioso xuabijitsia infernojavabelia apo pejumecovëntsixaetsi yabara pelivaisi*

*(Mt 11.20-24)*

<sup>13</sup> Icatsia Jesús jumaitsi pijajivijavabelia, setenta ponëbejejavabelia:

—¡Bitso bejiobi tsane Corazín tomarapijivi! ¡Bitso bejiobi tsane Betsaida tomara-pijivi ata! Pinijicuene Dioso pesaëta taexanaejavanë, xua itsajivi ata apo caëjëpaetsi

pexanaenexa, bajarapatomarabejepijivi tae ata, itsiata apo nejumecovënëtsi. Apo copabi pibisiacuene pexanabiabijava. Apo najamatabëcuenepeñëyorotsi Diosojavabelia. Bajayata Tiro tomarapijivimi, Sidón tomarapijivimi ata, petuatuajëta bajarapitsipini-jicuene itsa tsitaexanaejitsipajë, nexata bajarapamonaemi copabijitsipa pibisiacuene pexanaejava. Najamatabëcuenepeñëyorotsipa Diosojavabelia. Bajarapamonaemi nexata pibisiacuene pexanaebiabineconi bitso yajamatabëcuenebëjai tsipae. Nexata Diosojavabelia petsitanajamatabëcueneitajëtsinexa peyajamatabëcuenebëjaijava pibisiacuene pexanabiabineconi, naxatabijitsipa piayopapaëbërëjavanë. Enaejitsipa irata. Ipumana ata natsimataothocaejitsipa bitso peyajamatabëcuenebëjaixae pibisiacuene pexanabiabineconi. <sup>14</sup> Itsiata baitsi jane Corazín tomarapijivi, Betsaida tomarapijivi ata, tae ata pinijicuene Dioso pesaëta taexanaejavanë, apo nejumecovënëtsi. Nexata pamatacabi Dioso naneconitsiaexanaena daxita pijaneconi pexainaevi, bajarapamatacabi bitso ayaicuenia Dioso naneconitsiaexanaenatsi. Paneconivajëtota bajayata Dioso naneconitsiaexana Tiro tomarapijivimi, Sidón tomarapijivimi ata, bajarapaneconivajëto matatoxenetsia Dioso bitso ayaicuenia naneconitsiaexanaena Corazín tomarapijivi, Betsaida tomarapijivi ata. <sup>15</sup> Capernaum tomarapijivi picani najamatabëxaina Dioso pecaponaejavatsi athëbëabetsia. Itsiata baitsi jane bajarapamonaemi apo tanejumecovënëtsixae, Dioso xuabianatsi infiernojavabelia, jai Jesús Corazín tomarabeje Betsaida tomarabejepijivi yabara.

<sup>16</sup> Icatsia Jesús jumaitsi pijajivijavabelia, setenta ponëbejejavabelia:

—Pajivi pacanamuxunaevetsiana, bajarapajivi taenajë xanë tanenamuxunaevetsijava. Pajivi pacanayajiviitavetsiana, bajarapajivi taenajë xanë tanenayajiviitavetsijava. Bajarapajivi Dioso ata taenatsi Dioso penayajiviitavetsijava. Bajarapacuenia Dioso ata taenatsi penayajiviitavetsijava tsipaji xanë Dioso nitoroba, jai Jesús pijajivijavabelia Jesús pijajivi setenta ponëbeje pitorobivajënaeya.

Nexata jane baja Jesús pijajivi naropoba. Dioso pejumelivaisi jivi tsipaebanajetarubena daxita tomanëjjava. Saicaya navecuanajetarubena anijanëbeje tsaponae.

*Pacuenia Jesús pijajivi, setenta ponëbeje, naviabanajetarubena, Dioso pejumelivaisi jivi daxitanacuanëjava petsipaebanajetarubenaecujinae, yabara pelivaisi*

<sup>17</sup> Jesús pijajivi, setenta ponëbeje, Dioso pejumelivaisi jivi daxitanacuanëjava petsipaebanajetarubenaecujinae, barëyaya naviabanajetarubena Jesúsjavaberena. Nexata pepatsicujinae bajarapamonaemi jumaitsi Jesúsjavabelia:

—Tajatuxanenë, dovathivi baja cajena itsa paitavetaponajë nevënëta, panejumecovënëtabiaba, jai bajarapamonaemi Jesúsjavabelia.

<sup>18</sup> Jesús nexata jumaitsi pijajivijavabelia:

—Xanë baja cajena taniji dovathi athëbëvetsica pejopaejavatsica pacuenia yamaxë bajopaica. <sup>19</sup> Xanë baja cajena pacajamatabëcuene caëjëpaeyaexanatsi papecacaëjëpaejamatabëcuene panejamatabëcuene matatoxenetsinexa vajavajabitsaënë dovathi. Nexata jomo pacuetsacuetsanae atamë tsane, aqueto ata pacuetsacuetsanae atamë tsane, apo pacaitsacueniabi tsane. <sup>20</sup> Itsiata pëtsa bitso pasivajamatabëcuenebarëyamë dovathi itsa paitavetame papecajumecovënëtsijava. Bitso jane pasivajamatabëcuenebarëyamëre tsavanapae Dioso papijajivixaemë Dioso papecavënëyaquinarubijava athëbëtatsia, jai Jesús pijajivijavabelia, setenta ponëbejejavabelia.

*Pacuenia Jesús jamatabëcuenebarëya yabara pelivaisi*  
(Mt 11.25-27; 13.16-17)

<sup>21</sup> Jesús bitso jamatabëcuenebarëyayaexanatsi Espiritu Santo. Nexata Jesús jumaitsi paxa Diosojavabelia:

—Axa, nevetsinë athëbëtatsia. Nevetsinë mapanacuajava ataje. “Ayaijamatabëcuene nemë bitso,” cajaitsi. Tsipaji pamonaemi bitso apo penacujarubivi ata, yapëtaeyaexaname pacuenia itsamatacabi daxita nijajivi evetsijitsiamë mapanacuataje. Bajarapamonaemi yapëtaeyaexanaename pexanialivaisi, xanë talivaisi, palivaisi vecuamatayatame

bitso peyapëtaevi mapanacuapijilivaisije. Bajarapalivaisi vecuamatayatame bitso penacujarubivi ata mapanacuapijicuene yabaraje. Bajarapacuenia exaname tsipaji baja exaname nejitsipaecuenia, jai Jesús paxa Diosojavabelia pevajëtsijavata.

<sup>22</sup> Icatsia Jesús jumaitsi pijajivijavabelia, jivijavabelia ata:

—Taxa Dioso baja cajena netocopata tayapëtaenexa daxitacuene. Itsajivi ata apo nejamatabëcueneyapëtae pacuenia xanë jamatabëcueneitsinë, Dioso pexënatonë. Caenë, taxa Dioso, nejamatabëcueneyapëtane. Itsajivi ata apo jamatabëcueneyapëtae pacuenia taxa Dioso jamatabëcueneitsi. Caenënë, xanë pexënatonë, jamatabëcueneyapëtaniiji pacuenia taxa Dioso jamatabëcueneitsi. Pamonae tojitsipajë tayapëtaeyaexanaenexa pacuenia taxa Dioso jamatabëcueneitsi, bajarapamonae ata yapëtaeyaexanaenajë, jai Jesús pijajivijavabelia, jivijavabelia ata.

<sup>23</sup> Nexata Jesús napënyorota. Ēpijajivijavabelia jumaitsi:

—Paxamë baja pajamatabëcuenebarëyamë panetaexae pacuene baja pataeponame. <sup>24</sup> Xaniajanë pacuenia pacatsipaebijitsiatsi. Bajayata ayaibitsaëto profetavimi necopiaevetanapa picani tanetaenexa tapatsijavatsica. Nacuaevetsivimi ata necopiaevetanapa picani tanetaenexa tapatsijavatsica. Itsiata netaenejeva tapatsijavatsica, bajarapamonaemi tēpa baja. Jamatabëjumetaeyabiabanua picani palivaisianë baja aeconoxae paxamë pacatsipaebaponatsi. Itsiata apo jumetaenejeva bajarapalivaisinë, bajarapamonaemi tēpa baja, jai Jesús pijajivijavabelia.

*Pacuenia pexaniajamatabëcuenenë, Samaria nacuapijinë, yavenona itsanë yabara pelivaisi*

<sup>25</sup> Itsamatacabi Jesús livaisi tsipaebanuca pijajivijavabelia. Nexata bajarajota judíovi pecujarubinë nonotapuna. Bajaraponë Jesúsjavabelia jamatabëcuenejëbiaya jumaitsi:

—Jesús, ¿detsa xua exanaenajë Dioso tanerajutsinexa matacabi apo pevereverecaejava? jai judíovi pecujarubinë.

<sup>26</sup> Nexata Jesús jumaitsi judíovi pecujarubinëjavabelia:

—¿Detsa jane jumaitsi bajarapacuenia yabara bajayata Dioso Moiséspijinëta penajumecopatsilivaisi jivi pejumecovënëtsinexa? jai Jesús.

<sup>27</sup> Nexata judíovi pecujarubinë jumaitsi Jesúsjavabelia:

—Bajayata Dioso Moiséspijinëta penajumecopatsilivaisi jumaitsi mapacueniaje: “Daxita panejamatabëëthëtojavavetsina, daxita panejamatabëcueneta ata, daxita pane-saëta ata, daxita panenajamatabëxainaesaëta ata, pasivamëre panijatuxanenë panija-Dioso. Pasivamëre itsajivi ata pacuenia paxamë panijacuata panasivamë,” jai bajayata Dioso Moiséspijinëta penajumecopatsilivaisi, jai judíovi pecujarubinë Jesúsjavabelia.

<sup>28</sup> Nexata icatsia Jesús jumaitsi judíovi pecujarubinëjavabelia:

—Xaniavaetsia nejumecanaviatame. Bajarapacuenia exanaponaponare. Nexata pepacuene xainaename matacabi apo pevereverecaejava, jai Jesús.

<sup>29</sup> Itsiata baitsi jane judíovi pecujarubinë bijiaya jumecovënëta bajarapalivaisi. Asivaya apo tae itsamonae ata. Bajaraxuata judíovi pecujarubinë matavëjëa jumaitsi Jesúsjavabelia:

—¿Detsa nexata pitsijivi asivanë tsane? jai judíovi pecujarubinë.

<sup>30</sup> Nexata icatsia Jesús jumaitsi judíovi pecujarubinëjavabelia mapacueniaje:

—Pebi namutua najetaruca Jerusalén tomaraverena. Naropota pepatsinexa Jericó tomaraberena. Nexata jivi pecaponaejava peyacajërëbabiabivi, bajaraponë epatua vaetabatsi. Daxita pecobecovë yacajërëtatsi. Penaxatabijavanëmi ata yacajërëtatsi. Nexata pinijicuenia conibabiatsi. Puenetabuatatsi picani petëpanucaenexa bajarajota.

<sup>31</sup> Nexata bajarapanamutua sacerdotenë najetaruca, templobota penacuenebabiabinë. Nexata sacerdotenë bajaraponë itsa taeyabuata, matavaquetanucapona. Pona baja rovia. <sup>32</sup> Bajaraxuacujinae icatsia bajarapanamutua itsanë, templobota penacuenebabiabinë, najetaruca. Bajaraponë taenucajopa. Bajaraxuacujinae matavaquetanucapona. Pona baja icatsia rovia bajaraponë ata. <sup>33</sup> Bajaraxuacujinae icatsia bajarapanamutua Samaria nacuapijinë najetaruca. Nexata bajaraponë itsa taeyabuata, tsitabejibitsi

bitso. <sup>34</sup> Nexata bajaraponë cujilia. Vajënëvaëba aceiterata, vinorata yajava. Vajënëcëba papaëbërëpanaxita. Bajaraxuacujinae Samaria nacuapijinë pijaburrojumata buatsia. Nexata bajaraponë capona jivi pepatabiabiboyabelia. Bajarajota Samaria nacuapijinë eveta xaniavaetsia. <sup>35</sup> Meravia pitsijavata Samaria nacuapijinë itsa baja ponaejitsia itsabelia najetaruca, juta anijapalatanëbeje, bitso penamatamotsinëbeje. Matamota bajarapabo pexainaenë. Jumaitsi bajaraponëjavabelia: “Netoevetsianame maponëje. Itsa matamovereverecaena, pematatsënëa nevetsimatamo, bajarapapalata icatsia caevëarena camatamotsianatsi,” jai Samaria nacuapijinë bo pexainaenëjavabelia, jai Jesús mapacueniaje judíovi pecujarubinëjavabelia.

<sup>36</sup> Bajaraxuacujinae judíovi pecujarubinëjavabelia Jesús yanijoba bajarapalivaisi yabara. Jumaitsi mapacueniaje:

—Pamonaë, acueyabi ponëmaxëto, taeyabuata pecobecovë peyacajërëtsinëtsi. ¿Detsa ponë bajarapamonaeyajuvënëne asivaya tane bajaraponë? jai Jesús.

<sup>37</sup> Nexata judíovi pecujarubinë jumaitsi Jesúsjavabelia:

—Ponë pitaxutotsoniataexae yavenona, bajaraponë asivaya tane, jai judíovi pecujarubinë Jesúsjavabelia.

Nexata Jesús jumaitsi judíovi pecujarubinëjavabelia:

—Ponare baja. Xamë ata bajarapacuenia asivaya itaxutotsoniataeyabiabianame itsamonae ata, jai Jesús judíovi pecujarubinëjavabelia.

#### *Pacuenia Jesús jumaitsi Martabeje Mariabeje pijabota yabara pelivaisi*

<sup>38</sup> Jesús, pijajivi yajava, najetaruca pevajënaeyabelia. Nexata tomarayota pata. Bajarapatomarayota Jesús xaniavaetsia copiapitatsi petiriva, Martavënëva. Nexata Marta pijabota Jesús napata. <sup>39</sup> Marta pejuyapijiva xaina, Maríavënëva. Nexata María eca Jesús pitabarata penamuxunaevetecaenexa Jesús petsipaebilivaisi. <sup>40</sup> Nexata Marta bitso jamatabëcueneenatsi penacuenabijava, Jesús pexaejavanexa ata pemitsaexanaenexa. Nexata Marta cujilia Jesús. Jumaitsi:

—Tajatuxanenë, tajuyapijiva netocopata caevanë taexanaenexa daxita xua exanaejitsianë. Itorobare taneyavenonaenexa, jai Marta Jesúsjavabelia.

<sup>41</sup> Nexata Jesús jumaitsi Martajavabelia:

—Marta, xamë bitso cajamatabëcueneena nexanaenexa daxita xuanë jamatabëexaname. <sup>42</sup> Caejava bitso xanepana nexanaenexa, tanenamuxunaevetsinexamë. María baja cajena tanenamuxunaevetecaexae tatsipaebilivaisi, catsuitapeta pexaniacuene daxitacuene matatoxenetsia. Nexata acuenebi itsajivi ata peyacajërëtsijavatsi tatsipaebilivaisi pejumetaejava, jai Jesús Martajavabelia.

## 11

#### *Pacuenia Jesús pijajivi tsipaeba pacuenia Diosojavabelia vajëcaejitsia yabara pelivaisi (Mt 6.9-15; 7.7-11)*

<sup>1</sup> Jesús vajëtabiaba Diosojavabelia. Nexata itsamatacabi, itsa baja Jesús najumevereta pevajëtsijava Diosojavabelia, Jesús pijajiviyajuvënëne jumaitsi Jesúsjavabelia:

—Patajatuxanenë, panejumecujarubare pacuenia pavajëtabiabijitsianë Diosojavabelia. Pacuenia Juanpijinë jivibautisabinëmi jumecujarubabiaba pijajivi pacuenia vajëtabiabijitsia Diosojavabelia, bajara pijinia pacuenia xamë ata panejumecujarubare pavajëtabiabijitsianë Diosojavabelia, jai Jesús pijajiviyajuvënëne.

<sup>2</sup> Jesús nexata jumaitsi pijajivijavabelia mapacueniaje:

—Itsa pavajëtabiabianame Diosojavabelia, pajumaitsimë tsabiabi tsane:

Taxamë, athëbëtatsia neecaenë, jitsipajë pecayaiyataejava daxitajivi. Jitsipajë naxanitsiayo pecopiapatsijava daxita nijajivi nevetsijava mapanacuataje. Jitsipajë daxitajivi mapanacuata nejitsipaecuenia pecatoexanabiabijava, pacuenia baja

athëbëtatsia nijajivi nejitsipaecuenia catoexanabiaba, bajarapacuenia pecatoexanavanapaenexa mapanacuapijivi ataje. <sup>3</sup> Caematacabi canacujitsia panerajure pataxaejavanexa pacuenia panamatavenonajë. <sup>4</sup> Panebarajamatabëcuene xanepanarenuua nitabarata pibisiacuene pataexanaejava. Nexata panevecuaajibiaexanare pibisiacuene pataexanaeconi. Tsipaji paxanë ata itsamonae paxanëjavaberena pibisiacuene patanexanaejava pajamatabëcuenecavajë. Nexata pabarajamatabëcuenexanepanajë. Panevecuatsare dovathi patanepanajamatabëcueneëjëbiyaniva. Panecapanepare jane pibisiacuenevecua, pajamëtsane mapacueniaje itsa pavajëtabiabianame Diosojavabelia,

jai Jesús pijajivijavabelia.

<sup>5</sup> Icatsia Jesús pijajivijavabelia jumaitsi comparacióncuenia Jesús pijajivi peyapëtaenexa pacuenia vajëcabiabijitsia Diosojavabelia:

—Paxamëyajuvënëneravi tuatuajëta ponaejitsipa bitso peyapëtaenëtsi pijaboyabelia. Nexata jumai tsipae: “Cacovaetatsi acueyabi papanbëyobeje. <sup>6</sup> Itsanë raja, taneyapëtaenë, tajëverena peponaenë, aeconoxae tajabota netopata. Nexata bitso pijajani. Itsiata xanë apo xainaenë itsacuenejavayo ata pexaejava tarajutsinexa,” jai tsipae paxamëyajuvënëneravi tuatuajëta peyapëtaenëtsijavabelia. <sup>7</sup> Nexata bo ënëverena bajaraponë jumepitsipatsi. Jumaitsi tsipae: “Nejamatabëitonotsipame. Baupa rabaja xaniavaetsia xatatanutajë. Taxi raja barëmajitanucajë caecamata. Nexata acuenebi tanonotapunaejava tacarajutsinexa xua nevajëtame. Itsa nonotapunaejitsipajë, yaitavabijitsipajë taxi,” jai tsipae peyapëtaenëtsi. Itsiata baitsi jane bajaraponë perajutsinexatsi ajumesaëya vajëcaponaejitsipa. <sup>8</sup> Xaniajanë pacuenia pacatsipaebijitsiatsi. Bajaraponë apo jamatabënonotapunaeta, itsiata nonotapunaejitsipa perajutsinexa pecovaebijavatsi. Itsiata peyapëtaenëxatsi, bajarapacuenia apo rajutsi tsipae. Biji rajane rajutsipa daxita pacuenia namatavenona ajumesaëya pevajëcaponaejatsi. <sup>9</sup> Xaniajanë pacuenia pacatsipaebijitsiatsi. Itsacuenejavayo itsa pacatonaxuabijitsipa, nexata bajayajebi ata pajaitsipame matapania panecaxitajarabijavabelianexa. Bajara pijinia pacuenia bajayajebi ata pavajëtabiabianame Diosojavabelia papecajumecovënëtsinexa. Bo ata itsa baupa xatatanuta, nexata asaëyata pabaupadocodocotsipame matapania papecatobaupatsijavabelianexa. Bajara pijinia pacuenia asaëyata pavajëtabiabianame Diosojavabelia papecajumecovënëtsinexa. <sup>10</sup> Bajarapacuenia asaëyata pavajëtabiabianame Diosojavabelia. Tsipaji pajivi vajëtabiaba, rajutabiabatsi. Pajivi ata jaitabiaba, caxitajarababiaba. Pajivi ata baupa docodocotabiaba, tobaupatabiabatsi, jai Jesús pijajivijavabelia comparacióncuenia.

<sup>11-12</sup> Icatsia Jesús jumaitsi pijajivijavabelia:

—Paxamë papebijivimë, panexi panexinaevi. Panexënatonëyo itsa pacavajëta panbë, apo panacoxirajutsimë tsipae iboto. Itsa pacavajëta dujuainëyo, apo panacoxirajutsimë tsipae jomo. Itsa pacavajëta vacaratobëto, apo panacoxirajutsimë tsipae aqueto. <sup>13</sup> Paxamë paneajamatabëcuenebejevi ata, payapëtaneme panenacoxirajutsinexa pexaniajava. Paneaxa, athëbëtatsia peecaenë, bitso biji cajena pexaniajamatabëcueneenë paxamë matatoxenetsia. Bajaraponë pacarajutsiana pexaniacuene itsa pavajëtame. Bajaraponë rajutsiana Espiritu Santo daxita pamonaevajëtatsi, jai Jesús pijajivijavabelia.

*Pacuenia itsamonae Jesús yabara jamatabëcuenenavëxaniabiaya jumaitsi: “Beelzebú raja pesaëta Jesús dovathi jivivecua capitsapapona,” jai yabara pelivaisi*

*(Mt 12.22-30; Mr 3.20-27)*

<sup>14</sup> Pebi ponapona, dovathi pejamatabëcueneta apo penatsipaebinë. Nexata bajaraponë Jesús dovathi vecuacapitsapa. Pebi baja dovathi Jesús itsa vecuacapitsapa, natsipaeba baja. Jivibitsaëtoxoneto petaevi bajarapacuenia, bitso jamatabëcuenenabenajaca.

<sup>15</sup> Itsiata baitsi jane itsamonae fariseovi Jesús baracuaicuajitsi pibisiacuena.

—Maponë Jesúsje, dovathi jivivecua capitsapabiaba Beelzebú pesaëta. Beelzebú raja daxita dovathivi pepo penamatacaitorobinë, jai fariseovi jamatabëcuenenavëxaniabiaya Jesús yabara.

<sup>16</sup> Itsamonae icatsia fariseovi Jesús picani jamatabëcueneëjëbiaya itorobatsi pini-  
jicueene Dioso pesaëta pexanaejava Jesús petsitaexanaenexa. Bajarapacuenia picani  
itorobatsi fariseovi peyapëtaenexa pepacueene Jesús Dioso pitorobinëcuenetsitsica.  
<sup>17</sup> Itsiata Jesús jamatabëcueneypëtane pacuenia fariseovi sivanajamatabëxainatsi. Nex-  
ata fariseovijavabelia Jesús jumaitsi mapacueniaje:

—Nacaenacuapijivi ata itsa navecuanatsanaejitsipa penasivanavajabitsaëtsinexa, nex-  
ata namataenetsia naverebiabijitsipa daxita bajarapamonae. Bajara pijinia pacuenia  
nacaemonae ata itsipae. Itsa navecuanatsanaejitsipa penasivanavajabitsaëtsinexa,  
nexata namataenetsia naverebiabijitsipa nacaemonae ata. <sup>18</sup> Bajara pijinia itsipae  
dovathi ata. Dovathi jivivecua itsa capitsapaponaejitsipa pijajivi, dovathivi, nexata  
bepijavajabitsaë taejitsipa pijajivi. Itsajamatabëcuene vecuaxinaejitsipa pijajivi. Pesaë  
ata apo xainaponae tsipae. Mapacuenia pacatsipaebatsije tsipaji paxamë xanë yabara  
apo pacanaëjëtsinejevamë jamatabëcuenenavëxaniabiaya pajumaitsimë: “Jesús raja  
dovathi jivivecua capitsapabiaba Beelzebú pesaëta,” pajamë xanë yabara. <sup>19</sup> Paxamë ata  
panijajivi dovathi jivivecua capitsapabiaba. Nexata xanë Beelzebú pesaëta dovathi ji-  
vivecua itsa capitsapabiabajë, ¿detsa nexata ponë pesaëta panijajivi ata dovathi jivivecua  
capitsapabiaba? Caenë rabaja Dioso pesaëta. Nexata panijajivi ata pacayapëtane baja-  
rapacuenia jamatabëcuenenavëxaniabiaya panejumaitsijava xanë yabara. <sup>20</sup> Espíritu Santo  
pesaëta xanë dovathi jivivecua capitsapabiabajë. Nexata baja picani jivi beyapëtane  
Dioso baja petaxuxuabijava pijajivi pevetsijava paxamë tuatujëta, jai Jesús fariseovi-  
javabelia.

<sup>21</sup> Fariseovi pecanaëjëtsinexa Jesús bitso piasaënëcuene dovathi matatoxenetsia, Jesús  
icatsia comparacióncuenia jumaitsi fariseovijavabelia mapacueniaje:

—Ponë bitso piasaënë, aitatsacaya pijanae cobenaevetabiabijitsipa pijabo, itsamonae  
peyacarëjëtsiyanivatsi pecobecovë. Nexata daxita pecobecovë xaniavaetsia tobobenae-  
jitsipatsi, jai Jesús dovathi pijajivi pevetsijava yabara.

<sup>22</sup> Icatsia Jesús pijacuata nayabarajumaitsi mapacueniaje:

—Itsiata bailsi jane itsa najetarucaejitsipa itsanë bitso piasaënë boxainaenë mata-  
toxenetsia, nexata cueneamoneyabijitsipatsi. Aitatsacaya pijanae cobenaevetabiabi ata  
tsipae, itsiata vecuapitsipatsi pijanae, daxita pecobecovëjavaxi yajava, nayabarajai Jesús  
pijacuata comparacióncuenia dovathi pejamatabëcueneamoneyabijava yabara.

<sup>23</sup> Icatsia Jesús jumaitsi fariseovijavabelia:

—Pajivi apo neyavenonaeyacaetuatsi jivi Dioso pijajivinexa, bajarapajivi betajavajabit-  
saëjivi. Tsiipaji apo taneyavenonaeyacaetuatsixae, jivi nevecuanacayajata Dioso picani  
pejumecovënëtsiviminexa, jai Jesús fariseovijavabelia.

*Pacuenia dovathi jivitonë pevejamatabëpitsapaecuujinaetsi, icatsia naviarena pecovëyaberena  
petsijamatabëcaenexatsi icatsia yabara pelivaisi*

*(Mt 12.43-45)*

<sup>24</sup> Icatsia Jesús jumaitsi fariseovijavabelia:

—Dovathi itsa vejamatabëpitsapa jivitonë, nexata dovathi jinaruta petseviiranë-  
java. Jaitapona itsanëjavabelia petsijamatabëjonenexa dovathi penacueraevetsinexa  
bajaraponëjavata. Itsa apo caxitajarabi, ponëjavabelia tsijamatabëjonejitsia, nexata  
dovathi jamatabëjumaitsi: “Naviatsianajë meta icatsia tajabomijavabelia, paboverena  
pitsapajë,” jamatabëjai dovathi, ponëjavaverena pitsapa icatsia petsijamatabëjonenex-  
atsi. <sup>25</sup> Dovathi baja caevëa itsa naviarena, caxitajaraba peyjavaponaponaenëmitsi.  
Nexata peyjavaponaponaenëmitsi pejamatabëëthëto, dovathi tane bepënësajinecaebo,  
bepënëxaniavaetetsibo, bepiracajuetetsibo. <sup>26</sup> Nexata dovathi icatsia sivapona peya-  
javapatsinexarena itsadovathivi, siete ponëbeje. Bajarapadovathivi bitso piacujirubejevi  
copiaya padovathi matatoxenetsia. Daxita bajarapadovathivi pebi tsijamatabëjunuatsi  
peyjavaponaponaenexa. Belia jane baja pebi dovathivi bitso bejiobiaexanatsi. Copiaya  
abaxë caenë itsa tsijamatabëcatsi pacuenia bejiobiaexanabiabatsi, matatoxenetsia  
bejiobiaexanatsi, jai Jesús fariseovijavabelia.

*Pacuenia Jesús tsipaeba xua yabara jivi jamatabëcuenebarëya yabara pelivaisi*

<sup>27</sup> Itsa abaxë Jesús livaisi tsipaeba fariseovijavabelia, petiriva bajarapajivi bitsaëttoxanetoyajuvënëva pinijijumeta vavajai tsaxuabi. Jumaitsi Jesúsjavabelia:

—Jamatabëcuenebarëya baja cajena ena, pecanavitaniabiva, pecavitsatsiva! jai petiriva Jesúsjavabelia.

<sup>28</sup> Nexata Jesús jumaitsi bajarapovajavabelia:

—Xaniajamë rabaja. Itsiata baitsi jane pamonaë jumetane Dioso pejumelivaisi, nexata itsa jumecovënëta bajarapalivaisi, bajarapamonaë jane bitso jamatabëcuenebarëya tsavanapae taena matatoxenetsia, jai Jesús petirivajavabelia.

*Pacuenia pibisiajamatabëcuenevi Jesús picani itorobatsi Dioso pesaëta pinijicuene pexanaejava petsitaexanaenexa yabara pelivaisi*

(Mt 12.38-42; Mr 8.12)

<sup>29</sup> Jivi ayaibitsaëttoxaneto Jesús itsa matatoyorotsia nacaetuatatsi, nexata Jesús jumaitsi:

—Pamonaë aeconoxae jinavanapa, bitso pibisiajamatabëcuenevi. Bajarapamonaë picani nitoroba Dioso pesaëta pinijicuene taexanaejava tatsitaexanaenexa, taneyapëtaenexa Dioso pepacuene athëbëvetsica taneitorobinëcuenetsica. Itsiata baitsi jane Dioso pesaëta pinijicuene taexanaejava, apo tsitaexanaenë tsane. Bajayata pacuenia Diosojumepaëbinëmi profeta Jonáspijinë exanatsi, bajara ëpitsicuene taneexanaejava, tsitajëtsianajë. <sup>30</sup> Bajayata daxita Nínive tomarapijivi yapëtane profeta Jonáspijinë Dioso pitorobinëcuenetsi. Tsipaji ayaicuene exanatsi Dioso. Bajara pijinia pacuenia xanë ata, Daxitajivi Pematapijinënë, pinijicuene Dioso nexanaena. Nexata daxita pamonaë aeconoxae jinavanapa, neyapëtaena pepacuene Dioso athëbëvetsica taneitorobinëcuenetsica. <sup>31</sup> Itsamatacabi copiapatsiana Dioso penaneconitsiaexanaematacabinexa daxita pijaneconi pexainaevi. Bajarapamonaë nubianatsi Dioso pitabarata. Nexata bajarapamatacabi bajayata povami ponapona, Saba nacuapijivimi pevetsivami, nonotapunaena. Nexata bajarapova Diosojavabelia neconitsiana pamonaë aeconoxae jinavanapa, Dioso apo pejumecovënëtsivi. Bajarapova neconitsiana tsipaji bajayata bajarapovami tajë nacuatabuverena ata muxunanajetaruca pejumetaenexa Salomónpijinë, bitso daxitalivaisi peyapëtaenëmi, petsipaëbilivaisi. Xanë raja majotaje ponaponajë, bitso ayaijamatabëcuenenënë Salómonpijinëmi matatoxenetsia. Itsiata baitsi jane pamonaë aeconoxae jinavanapa mapanacuataje, apo nenamuxunaevetsi. Bajaraxuata ayaineconi xaina Diosojavabelia, jai Jesús.

<sup>32</sup> Icatsia Jesús jumaitsi jivi ayaibitsaëttoxanetojavabelia:

—Bajayata Nínive tomarapijivi itsa jumetane Dioso pitorobilivaisi, Jonáspijinë petsipaëbilivaisi, copaba pibisiacuene pexanaejava. Najamatabëcuenepënëyorota Diosojavabelia. Pamatacabi copiapatsiana Dioso penaneconitsiaexanaematacabinexa daxita pijaneconi pexainaevi, bajarapamatacabi Nínive tomarapijivimi ata nonobapunaena Diosojavabelia peneconitsinexa pamonaë aeconoxae jinavanapa, Dioso apo pejumecovënëtsivi. Tsipaji xanë majota ponaponajë bitso ayaijamatabëcuenenënë Jonáspijinëmi matatoxenetsia. Itsiata baitsi jane pamonaë aeconoxae jinavanapa mapanacuataje, tsipaëbi atanë Dioso pejumelivaisi, apo najamatabëcuenepënëyorotsi pibisiacuene pexanaejavavecua. Bajaraxuata Dioso naneconitsiaexanaenatsi bajarapamonaë, jai Jesús jivi ayaibitsaëttoxanetojavabelia tajëvelia pevajunupaëbijavata itsamatacabi Dioso jivi penaneconitsiaexanaejavanexa.

*Pacuenia vajaitaxuto belámparabë yabara pelivaisi*

(Mt 5.15; 6.22-23)

<sup>33</sup> Icatsia Jesús jumaitsi jivibitsaëttoxanetojavabelia:

—Itsajivi ata lámparabë pitanojotsicujinae, apo mataacatetsi itsacuenejavata. Cajiönënëalia ata apo etsi lámparabë. Biji rajane athëbëyo etsia. Jivi boyaberena pejonevi tsivajënaeitayotecajitsia. <sup>34</sup> Lámparabë boënëta itayoteca xaniavaetsia vajataenexa.

Bajara pijinia itsi paneitaxuto ata. Paneitaxutoxanepanaexae, xaniavaetsia panatsivajënaetaneme. Itsa paitaxutobejemë tsipae, nexata xaniavaetsia apo panatsivajënaetaemë tsipae. Pacatsitaaitaquiri saya tsipae. Bajara pijinia itsi panejamatabëcuene ata. Dioso itsa pacajamatabëcueneitayota, pajitsipaename paneexanabiabinexa pacuenia Dioso pacaitoroba. Nexata xaniavaetsia pajinavanapaename. Itsa panajamatabëxainaejitsipame bitso panexainaejava ëpaxamënexa, nexata bitso pajamatabëcueneitaquirimë tsipae. <sup>35</sup> Panayajivitaema xua panajamatabëxainabiabame, papecajamatabëcuene aitaquiriyaexanaeyaniva. <sup>36</sup> Itsa paexanavanapaename pacuenia Dioso pacaitoroba, nexata pacajamatabëcueneitayotsiana Dioso. Tsiquirijavayo ata apo aitaquiri tsane panejamatabëcuene. Nexata pacuenia lámparabë daxita boënë xaniavaetsia itayoteca pecotiata, bajara pijinia pacuenia paxamë ata pacajamatabëcueneitayotsiana Dioso, jai Jesús jivi ayaibitsaëtoxanetojavabelia.

*Pacuenia Jesús tsipaeba fariseovijavabelia, judíovi pecujarubivijavabelia ata, pacuenia bajarapamonae naneconita Diosojavabelia yabara pelivaisi*

*(Mt 23.1-36; Mr 12.38-40; Lc 20.45-47)*

<sup>37</sup> Itsa baja Jesús najumevereta livaisi petsipaebijava, nexata fariseonë junatatsi Jesús penanabaninexa fariseonë pijabota. Jesús nexata najoneya fariseonë pijaboyalia. Naeca mesa muxuneneta penanabaninexa. <sup>38</sup> Fariseonë itsa tane Jesús penabanijava anijatonë nacobequiatsinejeva, fariseonë jamatabëcuenenabenajaca. Pacuenia daxita judíovi pijacuenia anijatonë nacobequiatabiaba penabanivajënae, apo itsi Jesús. <sup>39</sup> Nexata Jesús jumaitsi fariseovijavabelia:

—Paxamë pafariseovimë panecaxaejavajënae plato, taza ata, naniavelia bapaquiatame xaniavaetsia panijacuenia. Tsipaji jamatabëcuenenavëxaniabiaya pajamatabëjumaitsimë tsabiabi: “Itsa caxaejitsipajë xaniavaetsia quiatsinejevanë, Diosojavabelia naneconitsipajë,” pajamatabëjamë tsabiabi. Bajarapacuenia paquiatabiabi atamë xaniavaetsia panecaxaejavanënexa papecajamatabëcuene bijianaeyaniva picani, itsiata pananeconitaponame Diosojavabelia. Tsipaji bajarapacuenia paquiatabiabi atamë, caranata panejamatabëëthëtota panajamatabëxainabiabame pibisiacuene. Panajamatabëxainabiabame itsanë pecobecovë paneyacajërëtsinexa. Panajamatabëxainabiabamenua paneexanaenexa pibisiacuene ata. <sup>40</sup> ¡Apo paneyapëtaevi baja rovia! Dioso cajena pexanaenë dexitacuene. Dioso baja cajena pacaperabëexana. Pacajamatabëëthëexananua. <sup>41</sup> Pejanajamatabëcuene itsa paxinaejitsipame, nexata pexaniacuene patoexanabiabijitsipame itsamonaevjavabelia. Daxita xua ata papecajamatabëcuene bijianaeyaniva, pajanijunavame panexaeyaniva, xua ata pacobejunavame panejayatsiyaniva, apo pacatsitapibisiacuene tsipae, jai Jesús fariseovijavabelia.

<sup>42</sup> Icatsia Jesús jumaitsi fariseovijavabelia:

—¡Paxamë pafariseovimë ayaineconi panatsixainame Diosojavabelia! Panenacanabijava diez xuabejeyajuvënëjava, caejavayo, parajutabiabame ofrendacuenia Diosojavabelia. Daxitaviria paneubijavaxi ata diez xuabejeyajuvënëjava, caejavayo, parajutabiabame ofrendacuenia Diosojavabelia. Xanepana baja picani bajarapacuenia panerajutabiabijava Diosojavabelia. Itsiata bajarapacuenia parajutabiabi atamë, pepacuene apo pajitsipaemë Dioso. Bajaraxuata pananeconitame Diosojavabelia. Pananeconitamenua Diosojavabelia tsipaji pacuene ata picani xanepana panetoexanabiabinexa itsamonaevjavabelia, apo pasivanajamatabëxainaemë. Bajaraxua picani paxamë bepanajamatabëxainame panetoexanabiabinexa itsamonaevjavabelia, jai Jesús fariseovijavabelia.

<sup>43</sup> Icatsia Jesús jumaitsi fariseovijavabelia:

—¡Paxamë pafariseovimë ayaineconi panatsixainame Diosojavabelia! ¡Tsipaji bepaayaijamatabëcuenevimë panataeyabiabame! Judíovi penacaetuatabiabilonëjava itsa panajoneyabiabame, pajitsipabiabame paneenaenexa peyaiyataevitsi penaenexa

petsinubijavanëta. Pajitsipabiabamenua jivi papecabajacobinexa callejava bitso yayi-ataeya, jai Jesús fariseovijavabelia.

<sup>44</sup> Icatsia Jesús jumaitsi judíovi pecujarubivijavabelia, fariseovijavabelia ata:

—¡Paxamë judíovi panecujarubivi, paxamë ata pijinia pafariseovimë, ayaineconi panatsixainame Diosojavabelia! Paxamë itajara jivi bepatsita pexaniajamatabëcuenevimë tsabiabi pibisiajamatabëcuene panexainaevi ata. Pacuenia itsamonae pona jivi pemëthëanë matatsënëa apo peyapëtaexae xua xaina bëpënëareca, bajara pijinia itsi pamonaë pacayaiyatane apo peyapëtaexae pacuenia pajamatabëcuenebejemë bëpënëa. Bajarapamonae pacayaiyatane tsipaji apo yapëtaë bajarapamonae bëpënëa paneajamatabëcuenebejejava, jai Jesús judíovi pecujarubivijavabelia, fariseovijavabelia ata.

<sup>45</sup> Nexata bajarapacuenia Jesús pejumaitisijavata, judíovi pecujarubiviyajuvënëne jumaitsi Jesúsjavabelia:

—Jesús, itsa mapacuenia jumaitsimëje, paxanë yabara ata pibisiacuenia jumaitsimë, jai Jesúsjavabelia judíovi pecujarubiviyajuvënëne.

<sup>46</sup> Jesús nexata jumaitsi judíovi pecujarubinëjavabelia:

—¡Paxamë ata, judíovi panecujarubivi, ayaineconi panatsixainame Diosojavabelia! Palivaisianë ayapëbeje itsajivi ata pejumecovënëtsinexa, bajarapalivaisianë jivi pat-sipaebabiabame pejumecovënëtsinexa. Bajarapalivaisianë patsipaebabiabi atamë itsamonae pejumecovënëtsinexa, paxamë itsiata apo panajamatabëxainae më paneexanaenexa bajarapacuenia, jai Jesús judíovi pecujarubinëjavabelia.

<sup>47</sup> Icatsia Jesús jumaitsi judíovi pecujarubivijavabelia:

—¡Paxamë judíovi panecujarubivi, ayaineconi panatsixainame Diosojavabelia! Bajayata pamatacabi jinavanapa panijasalinaivimi, beyaxuababiaba Diosojumepaebivimi profetavi. Nexata juya paxamë bajarapaprofetavimi pemëthëanëjumavereca bonë paexanajebame, jivi itsa tane bajarapabonë, penajamatabënapitabiabinexa bajarapaprofetavimi. <sup>48</sup> Bajarapacuenia paneexanaexae, pacuenejëpame bajayata panijasalinaivimi pexanaecuene. Panijasalinaivi bajayata beyaxuababiaba profetavimi. Nexata juya paxamë bonë paexanajebame bajarapaprofetavimi pemëthëanëjumavereca, jai Jesús judíovi pecujarubivijavabelia.

<sup>49</sup> Icatsia Jesús jumaitsi judíovi pecujarubivijavabelia:

—Bajarapacuenia paneexanaejavanexa yabara, daxitacuene Dioso peyapëtaenëxae, bajayata tajëvelia jumaitsi paxamë yabara mapacueniaje: “Bajarapamonaejavabelia toitorobianajë profetavi. Toitorobianajënu a apóstolevi ata. Bajarapamonae itsiata beyaxuababiabiana tatoitorobiviyajuvënëvi. Bejiobiaexanabiabiananua tatoitorobiviyajuvënëvi,” jai baja cajena bajayata tajëvelia Dioso bajarapacuenia paxamë paneexanaejavanexa yabara. <sup>50</sup> Dioso baja cajena nacua pexanaejavaveliacujinae, panijasalinaivimi beyaxuabapona profetavimi. Nexata bajarapaneconi yajava paxamë pananeconitame Diosojavabelia. Nexata bajarapaneconi yajava Dioso pacananeconitsiaexanaena, paxamë aeconoxae mapamatacabitaje panejinavanapaevi. <sup>51</sup> Panijasalinaivimi profetavimi pebeyaxuabaponaejava, taxuxuaba Abelpijinëta. Bajaraxuacujinae icatsia pevajënaeyabelia beyaxuabapona itsaprofetavimi ata. Nexata bexëjavaberena ata icatsia panijasalinaivimi beyaxuaba Zacaríaspijinëmi. Zacaríaspijinëmi panijasalinaivimi beyaxuaba templobopanabota, baitsi templobobeje altarvënëjavabeje petuatuajëta. Xaniajanë pacuenia pacatsipaebijitsiatsi. Nexata bajarapaneconi yajava Dioso pacananeconitsiaexanaena paxamë, aeconoxae mapamatacabitaje panejinavanapaevi, jai Jesús judíovi pecujarubivijavabelia.

<sup>52</sup> Icatsia Jesús jumaitsi judíovi pecujarubivijavabelia:

—¡Paxamë judíovi panecujarubivi, ayaineconi panatsixainame Diosojavabelia! “Vaxaitsi xaniavaetsia Dioso pejumelivaisi yapëtanetsi,” pajamatabëjamë tsabiabi picani. Itsiata baitsi jane apo payapëtaemë. Saicayalivaisi Dioso pejumelivaisivecua jivi pat-sipaebabiabame. Pacuenia bo baupaxatata jivi pejoneyaniva, bajara saya pacuenia

paxamë paexaname jivijavabelia. Nexata itsamonae jitsipae ata pejonejava picani Dioso pijanacuayabetsia, paxamë saicayalivaisi panetsipaebabiabixae, apo pacopatsimë pejonenexa Dioso pijanacuayabetsia. Paxamë ata apo pajitsipaemë panejonenexa Dioso pijanacuayabetsia, jai Jesús judíovi pecujarubivijavabelia.

<sup>53-54</sup> Bjarapacuenia Jesús pejumaitsicujinae, pitsapa baja bovecua. Bjaraxuacujinae judíovi pecujarubivi, fariseovi yajava, Jesús itoyatsi. Nexata jamatabëitonotabiabatsi. Jamatabëcuenejëbiaya livaisi yanijobabiabatsi. Nexata Jesús bijiaya ita jumecanaviata, bjarapalivaisi yabara peneconitsinexatsi picani nacuaevetsinëjavabelia.

## 12

*Pacuenia Jesús tsipaeba jivi pejumecovënëtsiyaniva fariseovi petsipaebilivaisitsi yabara pelivaisi*

<sup>1</sup> Penacaetuataponaejavata jivi pepo ayaibitsaëtoxoneto cajena tsaponae, baitsi miles pajivibeje. Nexata jivi nataxucuetsabataxuabapona. Nexata Jesús pijajivijavabelia copiaya tsipaeba livaisi, pejumecovënëtsiyaniva fariseovi ita tsipaebatsi saicayalivaisi Dioso pejumelivaisivecua. Jesús pijajivijavabelia jumaitsi mapacueniaje:

—Xania panayajivitaema fariseovi pijalevadurayaniva. “Levadura,” ita janë, peyamaxëitojorobilivaisi yabara pacajumaitsi. Fariseovi raja bepacatsita pexaniajamatabëcuenevi itajara tsane, pibisiagamatabëcuene pexinaevi ata. <sup>2</sup> Daxita abaxë palivaisianë jivi aeconoxae apo yapëtae, bjarapalivaisianë itsamatacabi daxitajivi yapëtaeponaena xaniavaetsia. Pibisiacuene muetsia itsajivi pexanaejava ata, itsamatacabi xaniavaetsia yapëtaena daxitajivi. <sup>3</sup> Xua ata muetsia pavajunupaebame meravi, bjaraxua ata, itsamatacabi itsajivi vajunupaebiana matacabita daxitajivijavata. Xua ata pënëyatuucutsiboënëta baupa xatatsiaya muetsia vëpaxapaxajaiya pavajunupaebame, bjaraxua ata itsamatacabi itsajivi pinijijumeta vajunupaebiana jivi penacaetuatsijavata, jai Jesús pijajivijavabelia.

*Pacuenia Jesús tsipaeba pijajivi pecujunaviyaniva jivivevi yabara pelivaisi (Mt 10.26-31)*

<sup>4</sup> Icatsia Jesús jumaitsi pijajivijavabelia:

—Tajamonae, pacatsipaebijitsiatsi. Pëtsa pacujunavame jivivevi ata. Bjarapamonae pacabeyaxuabi ata tsipae, acuenebi matavëjëa papecaitsacueniabixae. <sup>5</sup> Biji rajane pacatsipaebijitsiatsi panecujunavinexa Dioso. Tsipaji Dioso caëjëpatsi papecaxuabixae infiernojavabelia papecabeyaxuabicujinae, jai Jesús pijajivijavabelia.

<sup>6</sup> Icatsia Jesús jumaitsi pijajivijavabelia:

—Cinco ponëbeje baratsui saya namatamota anijapalatanëyobeje. Tsipaji amatamobi. Bjarapacuenia amatamobi ata, itsiata caenëyo ata Dioso apo nacofënëtsi bjarapabaratsuiyajuvënë. <sup>7</sup> Paxamë rabiji bitso Dioso pacaasiva baratsui matatoxenetsia. Tsipaji panamatamotame baratsui matatoxenetsia. Dioso bitso papecaasivaxae, panematanaxoiti ata, caematanatoyo canacujitsia, Dioso baja cajena namataëjëta. Bjaraxuata pëtsa pacujunavame itsacuenejava ata, jai Jesús pijajivijavabelia.

*Pacuenia Jesús pijajivi apo benayavajunuaxainae Jesús pijajivicuene yabara pelivaisi (Mt 10.32-33; 12.32; 10.19-20)*

<sup>8</sup> Icatsia Jesús jumaitsi pijajivijavabelia:

—Pacatsipaebijitsiatsi raja. Daxita pamonaë tajajivi, jivi pitabarata navajunupaebiana tajajivicuene. Bjarapamonae juya xanë, Daxitajivi Pematapijinënë, vajunupaebianajë tajajivicuene Dioso pijaängelevi pitabarata. <sup>9</sup> Pamonaë jumai tsane itsamonaejavabelia: “Xanë cajena Jesús apo pijajivitonënë,” jai tsane, bjarapamonae yabara juya xanë, jumaitsinë tsane: “Mara pamonaë cajena apo tajajivije,” janë tsane Dioso pijaängelevi pitabarata, jai Jesús pijajivijavabelia.

<sup>10</sup> Icatsia Jesús jumaitsi pijajivijavabelia:

—Pajivi pibisiacuenia nebaracuaicuaijai ata, xanë, Daxitajivi Pematapijinënë, bajarapaneconi yabara itsa navajëta Diosojavabelia, itsiata vecuaajibiaexanaenatsi Dioso. Itsiata baitsi jane pajivi pibisiacuenia baracuaicuaijai Espiritu Santo, bajarapajivi bajarapaneconi Dioso apo vecuaajibiaexanaetsi tsane, jai Jesús pijajivijavabelia.

<sup>11</sup> Icatsia Jesús jumaitsi pijajivijavabelia:

—Itsa pacacaponaelia tomaraevetsivijavabelia, judfovi penacaetuatabiabibojavabelia ata, papecyanijobinexa, pëtsa pajamatabëcuenebëjamë panenayajivicuaicuaijaijavanexa yabara. <sup>12</sup> Tsipaji raja bajarapaepatota, Espiritu Santo pacacuaicuaijaiyaexanaena pacuenia panayajivicuaicuaijamëjitsia, jai Jesús pijajivijavabelia.

*Pacuenia Jesús jivi livaisi tsipaeba bitso pesivanajamatabëxainayana ayajava pexainajava pexainanexa yabara pelivaisi*

<sup>13</sup> Jivi ayabitsaëtoxanetoyajuvënë jumaitsi Jesúsjavabelia:

—Jesús, taxapijinë picani petëpaevajënae netocopata pevënamuto tapitsinexa pecobecovëyajuvënëjavanë. Nexata tamatapijinë pita bajaraxuanë. Nexata itorobare tamatapijinë tanerajutsinexa taxapijinë tanerajutsiapaebijavanë, jai bajaraponë Jesúsjavabelia.

<sup>14</sup> Jesús nexata jumaitsi bajaraponëjavabelia:

—Itsajivi ata cajena apo nitorobi jueznënexanë, tananeconitsiaexanaenexa ponë naneconita. Itsajivi ata cajena apo nitorobi axapijinë pecobecovë patacatsicobet-satsinexabeje, jai Jesús.

<sup>15</sup> Nexata icatsia Jesús jumaitsi daxitajivijavabelia:

—Xania pataema. Pëtsa bitso panajamatabëxainame ëpaxamënexa ayajava panexainanexa. Tsipaji jivi pexainajava ayajava xainae ata tsipae, bajarapamonae pexainajava yabara jamatabëcuenexanepanaeya apo jinavanapae tsipae, jai Jesús.

<sup>16</sup> Nexata Jesús tsipaeba livaisi bajarapamonaejavabelia mapacueniaje:

—Ponapona bitso riconë. Pijapabianë tocapiapabiabatsi ayajava pexainacuene. <sup>17</sup> Riconë nexata jamatabëjumaitsi: “¿De meta pacuenia exanaenajë? Netoajibi baja rovia taetaponaejavabelianexa taubijava,” jamatabëjai riconë. <sup>18</sup> Riconë nexata icatsia jamatabëjumaitsi: “Yapëtaniji rajane baja pacuenia exanaejitsianë. Paboxita jebabiabajë taubijava, penetsianicajë taexanaenexa icatsia ayaboxanetonë bajarapacovëta. Bajarapoboxanetonëta jane baja jebianajë daxita taubijava, daxita tacobecovë yajava. <sup>19</sup> Nexata baja xainanajë bajayajebinexa daxitacuene xua namatavenonajë. Nexata jane baja xuacujinae nacueraevetsianajë. Pexaniacuene nabanebiabianajë. Pexaniaviriaranëna matavëjëa apaeyabiabianajë taitajibinexa. Nexata barëyanë tsabiabi tsane,” jamatabëjai riconë. <sup>20</sup> Nexata bajarapaepatota Dioso jumaitsi riconëjavabelia: “Apo neyapëtaenë baja rovia xamë. Ajena baja, mapameravitaje, tëpaename. ¿Jipatsa nexata nevënamuto pitsiana daxita nexaniavaetejebijavanëmi?” jai Dioso riconëjavabelia, jai Jesús mapalivaisije daxitajivijavabelia.

<sup>21</sup> Icatsia Jesús jumaitsi bajarapamonaejavabelia:

—Bajara pijinia pacuenia paxamëyajuvënëvi ata tocopiapatsianatsi pamona ayajava natocaetuatapona ëpamonae pexainanexa. Bajarapamonae itsiata pepacuene bepejio-bivi tsane Diosojavabelia, jai Jesús bajarapamonaejavabelia.

*Pacuenia Dioso pijajivi eveta mapanacuataje yabara pelivaisi (Mt 6.25-34)*

<sup>22</sup> Jesús nexata jumaitsi pijajivijavabelia:

—Xaniajanë pacuenia pacatsipaebijitsiatsi. Pëtsa pasivanajamatabëxainame ëpanexaejava panevënanjavanapaenexa. Pëtsa pasivanajamatabëxainamenua ëpanenaxatabijavanexa ata. <sup>23</sup> Apo jinavanapaetsi cajena ëvajaxaejavanexa. Apo jinavanapaetsinua ëvajanaperabëxatabinexa. <sup>24</sup> Pacanaëjere pacuenia baratsui apo ubi pexaejavanexa. Apo notsinua penaveretaponaejava. Apo xainanua penaveretaponaejava peetsibonexa. Itsiata Dioso rajutabiabatsi pexaejavanexa. ¡Paxamë rabiji bitsoyo Dioso pacaasiva

baratsuimonae matatoxenetsia papecarajutsinexa daxita xua panamatavenoname! Bajaraxuata pëtsa pasivanajamatabëxainame ëpanexaejavanexa, ëpanenaxatabijavanexa ata. <sup>25</sup> ¿Detsa jane ponë paxamëyajuvënë caëjëpatsi pijacujiruta medio metrocuenia matavëjëa penavitsabiaexanaenexa? Ajibi. Bitso jamatabëbëjai ata tsipae pevitsabinexa, itsiata apo navitsabiaexanae tsipae pijacujiruta. Nexata saya najamatabëcuene cueratsipa pejamatabëcuenebëjaijava penavitsabiaexanaejavanexa. Tsipaji apo tonamata-motsitsi bajaraxua. <sup>26</sup> Bajara pijinia pacatoitsi paxamë ata daxita xua pasivajamatabëcuenebëjamë. Apo pacatonamatamotsi. Bajaraxuata apo bepajamatabëcuenebëjamë itsacuenëjavayo ata yabara, jai Jesús pijajivijavabelia.

<sup>27</sup> Icatsia Jesús jumaitsi pijajivijavabelia:

—Pacanaëjëre pacuenia bitso pexaniamatono pitsapa, mapamatonoje. Bajarapamatono apo natsijumanacuenebi. Penaxatatsijavanexa ata apo natoexanae. Bajayata nacuaevetsinë Salomónpijinë bitso pexainaenëmi. Naitabëtsiaya naxatabiaba bitso pexaniavirijavanë. Itsiata baitsi jane Salomónpijinë penaitabëtsijava matatoxenetsia bitso aitabë mapamatonotoxije. <sup>28</sup> Paxamë, bevelia Dioso panejumecovënëtsivi, asaëya bepajumecovënëtame Dioso papecaevetsijava. Ajena pitsijavata vayafota tanetsi pexaniaponamatantoxi. Bajaraxuacujinae, caematacabibejecujinae, tajuatsi baja bajarapaponamatantoximi. Pacuenia Dioso aitabëyaexana ponamatantoxi, bajara pijinia pacuenia paxamë ata itsamatacabi Dioso pacaxatabiana piatabëjava. <sup>29</sup> Bajaraxuata pëtsa pasivanajamatabëxainavanapame ëpanexaejavanexa, ëpanematavëjëaapaejavanexa ata. Biji rajane pajumecovënëtavanapare Dioso. <sup>30</sup> Pamona Dioso apo pejumecovënëtsivi, bitso sivanajamatabëxainabiaba ëpexaejavanexa, ëpanexatabijavanexa ata. Itsiata baitsi jane paneaxa Dioso paxainame. Bajaraponë yapëtane daxita xua panamatavenoname. <sup>31</sup> Bajaraxuata, daxita xua panamatavenoname, matatoxenetsia Dioso pijacuene bitso pasivanajamatabëxainabiabianame Dioso pijacuene panetoexanavanapaenexa. Nexata Dioso pacarajutsiana daxita xua panamatavenoname, jai Jesús pijajivijavabelia.

*Pacuenia Jesús tsipaeba pijajivi xaniavaetsia Dioso petonacuenebavanapaenexa itsamatacabi ayajjava pexainaenexa athëbëtatsia yabara pelivaisi*

(Mt 6.19-21)

<sup>32</sup> Icatsia Jesús jumaitsi pijajivijavabelia:

—Tajamonae, paxamë patajajivimë pacaëjiviyomëbeje ata, pëtsa pajunavame. Tsipaji paneaxa pacaitapeta panecobenaevetsinexa pamatacabi bajaraponë evetsiana daxitacuene. <sup>33</sup> Pacanajere panexainaeyajuvënëjava, bitso paneasivajava ata. Nexata bajarapapalata parajutsianame bitso bepejiobivijavabelia. Nexata juya Dioso athëbëtatsia pacarajutsiana bitso penamatamotsijava, apo pevereverecejava. Bajarajotatsia acuenebi pejonejava penacobetoxotsivi papecayacajërëtsinexa. Itsanë ata ajibi papecatoucubaxaenënexa. <sup>34</sup> Panacuatatsia pacatoxaniavaeta panexinaejavanexa, bajarapanacua panejamatabëthëtovetsina pajamatabënajinavanapaename, jai Jesús pijajivijavabelia.

*Pacuenia Jesús pijajivi tsipaeba pacujinae icatsia patsijitsiatsica najamatabëcuenexaniavaetsiaya pevajënae pijajivi pecopiaevetavanapaenexatsi yabara pelivaisi*

<sup>35</sup> Jesús icatsia pepatsijavanexatsica tajëvelia navajunupaeba. Jesús jumaitsi pijajivijavabelia mapacueniaje:

—Icatsia raja jemata patsianicajë. Nexata najamatabëcuenexaniavaetsiaya panecopiaevetavanapaename. <sup>36</sup> Payapëtaneme rabaja mapacuenije. Petuxanenë itsa pona penacasabifiestajavabelia, pijajivi tonajumecopata meravijebi ata pecopiaevetavanapaenexatsi pepatsijavarena. Nexata petuxanenë pijajivi meravi ata copiaevetavanapatsi. Nexata petuxanenë jemata meravi najetarucae ata, baupa itsa docodocota, nexata bajarapamonae bepijia tobaupata pijatuxanenë. <sup>37</sup> Bajarapamonae barëya pijatuxanenë

naëcotsiaya pecopiaevetavanapaejavata pepatsixae. Xaniajanë pacuenia pacatsipae-bijitsiatsi. Nexata petuxanenë pijajivi caecuenia petobaupatsixaetsi, petuxanenë pijajivi sivajamatabëcuenebarëya. Nexata petuxanenë pepatsicujinae xaniavaeta mesa. Enaeyaexanaena pijajivi. Nexata caranata petuxanenë bajarapamonae beprijajivitonë nataeya rajuta pexaejava pijajivi. <sup>38</sup> Meravi tuatuajëta petuxanenë patsi ata, itsa jume, maticabivëpata patsi ata, nexata petuxanenë pijajivi naëcotsiaya pecopiaevetavanapaejavata pijatuxanenë pecaxitajarabixaetsi, petuxanenë pijajivi barëya. <sup>39</sup> Pacanaëjëre mapacuenije. Bo pexainaenë itsa yapëtaejitsipa paepatota meravi pijabojavaberena patsijitsia pecobecovë petonacobetoxotsinënexatsi, nexata apo majitsi tsipae. Vajënaeevetecaejitsipa meravijebi. Apo copatsi tsipae pijaboyaberena petojoneyanivatsi penacobetoxotsinënexa. <sup>40</sup> Bajara pijinia pacuenia paxamë ata najamatabëcuenexaniavaetsiaya panecopiaevetavanapaename tapatsijavatsica. Tsipají xanë, Daxitajivi Pematapijinënë, paepatota apo panejamatabënajinaemë tapatsijavanexatsica, jemata icatsia patsianicajë, jai Jesús pijajivijavabelia tajëvelia penavajunupaebijavata icatsia pepatsijavanexatsica.

*Pacuenia Jesús pijajivijavabelia livaisi tsipaeba, petuxanenë pijajivitonëbeje pelivaisicuenia, yabara pelivaisi*

*(Mt 24,45-51)*

<sup>41</sup> Pedro jumaitsi Jesúsjavabelia:

—Tajatuxanenë, ¿palivaisi aeconoxae panetsipaebame, baja tsaja palivaisi ëpaxanë panijajivinexanë? Itsa jume, ¿itsamonaenexa ata tsaja yajava? jai Pedro.

<sup>42</sup> Jesús nexata jumaitsi Pedrojavabelia:

—Mara pejamatabëcueneitsivinexa yabara pacatsipaebatsije. Petuxanenë pijajivitonë, ponë xaniavaetsia pijatuxanenë pecovëta tonacuenebaponapona pijacuene, mait-sije. Petuxanenë pijajivitonë itsajamatabëcuene xainaenejeva, copiaevetaponapona pijatuxanenë pepatsimaticabijavabelianexa. Bajaraponë pijatuxanenë pijajivi pecovëta toevetaponapona xaniavaetsia. Toabataponapona pexaejava caematacabi canacujitsia pacuenia itorobatsi pijatuxanenë. <sup>43</sup> Bajaraponë bitso barëya pamatacabi pijatuxanenë pata xaniavaetsia pijajivi pecovëta petoetaponaponaexae. <sup>44</sup> Xaniajanë pacuenia pacatsipaebijitsiatsi. Ponë bajarapacuenia xaniavaetsia tonacueneba pijatuxanenë pecovëta, bajaraponë icatsia evetsiaexanatsi daxita xua xaina pijatuxanenë. <sup>45</sup> Petuxanenë pijajivitonë itsa pijamatabëcuenebejenë tsipae, nexata bajaraponë pijatuxanenë pecovëta jamatabëjumai tsipae: “Tajatuxanenë ajibi tsarucae tsane bajayajebi,” jamatabëjai tsipae. Nexata pijatuxanenë pijajivi, pamonaevetsiaexanatsi xaniavaetsia picani petoetsinexa, toconibabeyabiabijitsipa. Conibabeyabiabijitsipa pebijivi, petiriavi ata. Bajaraponë ayajava pexaejava xaeyabiabijitsipa. Aitajibinua tsabiabi tsipae. <sup>46</sup> Nexata itsajota apo jamatabënajinae tsipae pijatuxanenë pepatsijavanexa, bajarapaepatota jemata patsipa pijatuxanenë. Nexata bajaraponë pijatuxanenë pinijicuenia naneconitsiaexanaejitsipatsi. Bajara pijinia pacuenia Dioso ata itsamatacabi pinijicuenia naneconitsiaexanaena pamonaevetsiaexanaevetsi, jai Jesús Pedrojavabelia.

<sup>47</sup> Icatsia Jesús jumaitsi pijajivijavabelia:

—Ponë itsanë pijajivitonë, yapëtae ata picani pacuenia itorobatsi pijatuxanenë petoexanaenexa, itsiata itsa apo toexanae pijatuxanenë pitorobicueniatsi, bajaraponë pinijicuenia jumaconibabejitsipatsi ayaicuerobocotota. <sup>48</sup> Ponë ata pijinia itsanë pijajivitonë, itsa apo jume yapëtae xaniavaetsia petoexanaenexa pacuenia pijatuxanenë itorobatsi, nexata pijatuxanenë pitorobicueniatsi saicayacuenia itsa toexana, bajaraponë ata jumaconibabejitsipatsi. Itsiata pinijicuenia apo jumaconibabe tsipaetsi. Pajivi pijinia ayajava rajutatsi, bajarapajivi yabara vaxaitsi basivajamatabëjumaitssi: “Juya meta mapajivije ayajava rajutabiabiana itsamonaevajavabelia,” basivajamatabëjaitssi. Pajivi pijinia evetsiaexanatsi ayajava, bajarapajivi pevetsiaexanaenëtsi sivajamatabëjumaitssi:

“Itsa netocanacuenebiana taevetsiaexanaejava, ayaijava netopitsapaena,” sivajamatabë-jaitsi pevetsiaexanaenëtsi, jai Jesús pijajivijavabelia.

*Pacuenia Jesús apo penajuajumecovënëtsixae, nacaemonae ata apo najamatabëcuenejëpae tsane yabara pelivaisi*

(Mt 10.34-36)

<sup>49</sup> Icatsia Jesús jumaitsi pijajivijavabelia:

—Xanë raja patajopajë daxitanacuapijivi pibisiacuene pexanaeconi yabara tasivatë-paenexa. Nexata bajarapamonaeyajuvënëvi itsamonae nejumecovënëtsiana. Nexata nacaemonae ata apo najamatabëcuenejëpae tsane. Itsa baja capanepaeya cruzata daxitajivi sivatëpaejitsipajë, jamatabëcuenebarëyanë baja tsipae. <sup>50</sup> Itsiata baitsi jane abaxë netosajina bajaraxua yabara tanejamatabëcuenejëtsinexa tanebeyaxuabijavata. ¡Bitso baja rovia najamatabëxainajë! ¡Matapania nebeyaxuabiana, jamatabëcueneceavianajë! <sup>51</sup> Pëtsa panesivajamatabëjumaitsimë mapacueniaje: “Jesús rabaja patsica mapanacuayabetsicaje daxitajivi mapanacuataje najamatabëcuenejëpae pejinavana-paeyaexanaenexa,” panesivajamatabëjamë pëtsa. Bajaraxuanexa apo patsinëtsica. Biji rajane xanë tapatsixaetsica mapanacuayabetsicaje, jivi itsa nejumecovënëtsiana, apo najamatabëcuenejëpae tsane pamonaeyavabelia apo nejumecovënëtsi, nacaemonae ata. Itsamonae napijavajabitsaë tsane. Nexata apo najamatabëcuenejëpae tsane. <sup>52</sup> Ajena mapamatacabijavaveliacujinaeje jivi apo najamatabëcuenejëpae tsane. Cinco pajivibeje, nacaemonae ata, caebota pejinavanapaevi ata, apo najamatabëcuenejëpae tsane xanë apo tanenajuajumecovënëtsixaebeje. Pamonaë cinco pajivibeje nacaemonae, bajarapamonaeyajuvënëvi, acueyabi pajivibeje, nejumecovënëtsiana. Anijajivibeje apo nejumecovënëtsi tsane. Itsa jume, anijajivibeje nejumecovënëtsiana. Acueyabi pajivibeje apo nejumecovënëtsi tsane. <sup>53</sup> Bajarapabopijivi, paxabeje pexënatobeje, apo najamatabëcuenejëpaebeje tsane xanë apo tanenajuajumecovënëtsixaebeje. Petirivabeje pijinia, penabeje pexënatoyobeje ata, apo najamatabëcuenejëpaebeje tsane xanë apo tanenajuajumecovënëtsixaebeje. Pamebeje pecopenabeje ata apo najamatabëcuenejëpaebeje tsane xanë apo tanenajuajumecovënëtsixaebeje, jai Jesús pijajivijavabelia.

*Pacuenia Jesús asaëya jivi muxujioba apo pecanaëjëtsixae Jesús Dioso pexënatocuene yabara pelivaisi*

(Mt 16.1-4; Mr 8.11-13)

<sup>54</sup> Jesús icatsia jumaitsi jivi ayaibitsaëtoxanetojavabelia:

—Itsa pataneme vaëvetsica itarërëbo pepitsapaejava, nexata pajumaitsimë tsabiabi: “Ajena raja emajitsia,” pajamë tsabiabi. Nexata bajarapamatacabi ema jopabiaba. <sup>55</sup> Itsa pataneme jovibo pepitsapaejava epatajërëtsiarena la surverena, pajumaitsimë tsabiabi: “Ajena raja icotia ataju tsane,” pajamë tsabiabi. Nexata bajarapamatacabi icotia ataju tsabiabi. <sup>56</sup> Nexata itsamonae pacatane bepatsita pexaniajamatabëcuenevimë itajara, papibisiajamatabëcuenevi atamë. Payapëtaeyabiabame pacuenia matacabi itsijitsia itarërëbo pepitsapaejava panetaeyabiabixae. Bajarapacuenia picani payapëtaeyabiabame. Itsiata baitsi jane patae atamë daxita xua Juanpijinëmi jivibautisabinëmi exanapona, patae atamëna daxita xua xanë ata exanaponajë, caranata xanë apo paneyapëtaemë Dioso athëbëvetsica taneitorobinëcuenetsica, jai Jesús jivi ayaibitsaëtoxanetojavabelia.

*Pacuenia pananeconitsijivi xaniavaetsia bebarëcuaicuaijai pajivijavabelia naneconita penasivajamatabëxanepanaenexabeje, peneconitsiyanivatsi jueznëjavabelia, yabara pelivaisi*

(Mt 5.25-26)

<sup>57</sup> Jesús icatsia jumaitsi jivi ayaibitsaëtoxanetojavabelia:

—Pacanaëjëre panijacuata paneexanaenexa pacuene xanepana. <sup>58</sup> Itsa pananeconitame itsajivijavabelia, nexata itsa pacacapona bajarapajivi jueznëjavabelia papecaneconitsinexa, namutua xaniavaetsia panabarëcuaicuaijamërebeje panenasivajamatabë xanepanaenexabeje xua yabara pacaneconitsijitsia.

Bजारपacuena xaniavaetsia panabarëcuaicuajamërebeje papecanutsiyaniwa jueznë pitabarata. Tsipaji raja jueznë itorobijitsipa policíavi panijaneconi yabara papecacaponaenexa penaneconitsivi pejebabiabiboyabelia. Nexata policíavi pacananeconitsiaexanetsipa penaneconitsivi pejebabiabibota.<sup>59</sup> Xaniajanë pacuena pacatsipaebijitsiatsi. Nexata penaneconitsivi pejebabiabibota itsa pacananeconitsiaexanetsipa, bajaraverena bepíjia apo papitsapaemë tsipae. Matapania pamatamotsipame daxita xua yabara pacananeconitsiaexaneta, papitsapaejitsipame, jai Jesús jivi ayaibitsaëtoxanetjavabelia.

## 13

*Pacuenia jivi benajamatabëcuenepënëyorota pibisiacuene pexanabiabijavavecua yabara pelivaisi*

<sup>1</sup> Itsamonae jumaitsi Jesúsjavabelia:

—Galilea nacuverena pepatsivi, baca beyaxuaba Jerusalén tomarata templobota. Bजारपamonaë baca beyaxuaba ofrendacuena pevi perajutsinexa Diosojavabelia. Nexata bajarapaepatota nacuaevetsinë Pilato pibisiacuene exana. Itoroba vajabitsaë Galilea nacuapijivimi pebeyejebinexatsi templobota. Itsajota Galilea nacuapijivimi baca beyaxuababuata, bajarapacovëta icatsia beyejebatsi bajarapamonaemi. Nexata bajarapamonaemi pijana namatajërëata bacajana yajava, jai itsamonae Jesúsjavabelia.

<sup>2</sup> Jesús nexata jumaitsi bajarapamonaëjavabelia:

—“Pamonaemi bajarapacuena beyejebatsi, bitso meta pibisiacuene pexanaevimi daxita pijanacuapijivi matatoxenetsia. Bजारaxuata beyejebatsi penaxuabinexa Diosovecua,” ¿pajamatabëjamë tsaja? <sup>3</sup> Jume baja cajena. Bजारapamonaemi ata picani bitso pibisiacuene apo exanaë pijanacuapijivi matatoxenetsia. Itsiata Dioso tocopatatsi bajarapamonaemi pebeyejebinexatsi, penacopabivi pecanaëjëtsinexa Diosojavabelia penaneconitsijava. Paxamë ata itsa apo pacopabimë tsane pibisiacuene peneexanabiabijava, itsa apo panajamatabëcuenepënëyorotsimë tsane Diosojavabelia, nexata bajarapacuena paxamë ata panaxuabianame Diosovecua itsa patëpaename. <sup>4</sup> Pamatacabi ata jemata Jerusalén tomarata jopanucaya athëbëabetsia piapiabotsia, Torre de Siloëvënëbo, dieciocho pajivibeje matakënëbatsi. Nexata baja tëpa bajarapamonaemi. “Pamonaemi matakënëbatsi, pibisiacuene meta bitso pexanaevimi daxita Jerusalén tomarapijivi matatoxenetsia. Bजारaxuata matakënëbatsi penaxuabinexa Diosovecua,” ¿pajamatabëjamë tsaja? <sup>5</sup> Jume baja cajena. Bजारapamonaemi ata picani bitso pibisiacuene apo exanaë pijatomarapijivi matatoxenetsia. Paxamë ata itsa apo pacopabinë tsane pibisiacuene paneexanaëjava, itsa apo panajamatabëcuenepënëyorotsimë tsane Diosojavabelia, nexata daxita paxamë ata bajarapacuena panaxuabianame Diosovecua itsa patëpaename, jai Jesús bajarapamonaëjavabelia.

*Pacuenia Jesús jivi livaisi tsipaëba piacuajibihigueranaë pelivaisicuenia yabara pelivaisi*

<sup>6</sup> Jesús jivi livaisi tsipaëba piacuajibihigueranaë pelivaisicuenia. Jesús jivi piacuajibihigueranaë pelivaisicuenia petsipaëbijavata, pijaperujamatabëcuene apo penavecucopatsivi yabara Jesús jumaitsi mapacueniajaje:

—Pebi pijapabi tuatujëta caenae peubinaë xainanuta, higueravënënaë. Nexata picani taeyojopalia bajaraponaë penacuaitsijava. Itsiata baitsi jane apo nacuaitsi. <sup>7</sup> Nexata jumaitsi pijapabi petoëvetsinëtsijavabelia: “Taema maponaëje. Acueyabi picani pavaibeje taeyopajë tacuainotabiabinexa maponaëcuaije. Itsiata acuaijibi tsabiabi. Nexata baja netonicataxuaë. Apo becopatanutsitsi bajaraponaë. Ira caranatanuca saya,” jai pijapabi pexainaënë. <sup>8</sup> Itsiata baitsi jane pijapabi petoëvetsinëtsi jumaitsi: “Copatanutsianatsibeje abaxë mapavaije. Nexata bacatuirabianajë bacatasitoxita. <sup>9</sup> Baja raeta xuacujinaë xanepanaëna. Nexata aeconoxae pavai nacuaitsiana. Nexata aeconoxae pavai ata itsa apo nacuaitsi tsane, nexata jane baja catonicataxuabianatsi,” jai pijapabi petoëvetsinëtsi, jai Jesús.

Bजारapacuenia Jesús jumaitsi tsipaji Dioso xuabijitsia pamonaē pijaperujujamaatabēcuene apo pecopatsivi.

*Pacuenia Jesús jamatejemayaexana judíovi penacueraevetsimatacabita penajumafurutsivami yabara pelivaisi*

<sup>10</sup> Itsamatacabita judíovi penacueraevetsimatacabita, Jesús jivi livaisi tsipaeba judíovi penacaetuatabiabibota. <sup>11</sup> Bजारajota naeca petiriva. Dovathi pejamatabēcueneta bajarapova dieciocho pavaibeje xaina penajumafurutsicujinae. Nexata apo caējēpaetsi tsiquirijavayo ata penaepasirovitsijava. <sup>12</sup> Itsa Jesús taeyeta bajarapova, nexata junarena. Jesús jumaitsi bajarapovajavabelia:

—Niatanejavami rabaja cavecuajibi, jai Jesús bajarapovajavabelia.

<sup>13</sup> Jesús tsimatanacobeuata bajarapova. Nexata bajarajota petiriva naepasirovitsixanepana baja. Nexata bajarapova jumai tsaponae Diosojavabelia:

—¡Diosomē, bitso pexaniacuene netoexaname ayaijamatabēcuenenēxaemē! jai tsaponae bajarapova Diosojavabelia.

<sup>14</sup> Itsiata baitsi jane judíovi penacaetuatabiabibo pevetsinē Jesús baraanaepanatsi judíovi penacueraevetsimatacabita Jesús pejamatejemayaexanaexae penajumafurutsiva. Tsipaji judíovi apo jitsipae itsajivi ata itsacuenejavayo pexanaenexa penacueraevetsimatacabita. Nexata judíovi penacaetuatabiabibo pevetsinē jamatabējumaitsi:

—Jesús nacueneba penacueraevetsimatacabita. Jesús apo jumecovēnētsi patajasalinaivi patanitavetsicuene, jamatabējai.

Nexata judíovi penacaetuatabiabibo pevetsinē najumejematsiaya jumaitsi jivijavabelia:

—Caesemana canacujitsia xainaponatsi seis pamatacabibeje vajanacuenebinexa. Bजारapamatacabijava bepatatsi vajanacajamatejemayaexanaenexa. Nexata abaxē penacueraevetsimatacabita apo bepatsitsi vajanacajamatejemayaexanaenexa, jai judíovi penacaetuatabiabibo pevetsinē najumejematsiaya jivijavabelia.

<sup>15</sup> Nexata Jesús jumaitsi judíovi penacaetuatabiabibo pevetsinējavabelia:

—Paxamē saya jivi paneyamaxēitorobivi. Bepatsita pexaniajamatabēcuenevimē itajara itsamonaē, papibisiajamatabēcuenevi atamē. Paxamē ata panacuenebabiabame penacueraevetsimatacabita ata. Paxamē penacueraevetsimatacabita ata panijabaca, burro ata, paisinabiabame panecaponaenexa merajavabelia mera piapaenexa. <sup>16</sup> Mapovaje Abrahampijinē pemomoxiyajuvēnēva jamatejemayaexanajē. Tsipaji bajarapova namatamota Dioso pitabarata dajubinē matatoxenetsia. Dovathi pejamatabēcueneta penajumafurutsicujinae, xaina baja dieciocho pavaibeje. Bजारaxuata penacueraevetsimatacabita ata jamatejemayaexanajē pīatanecuenevecua, jai Jesús judíovi penacaetuatabiabibo pevetsinējavabelia.

<sup>17</sup> Bजारapacuenia Jesús itsa jumaitsi, nexata daxita pecueneitoyavitsi moya ena. Aura tsenae bajarapamonaē. Itsamonaē pijinia Jesús sivajamatabēcuenebarēyatsi pinijicuene Dioso pesaēta pexanaponaejavanē yabara.

*Pacuenia mostazaxutoyo pejuvicujinae, mostazanae bepījia vitsaba yabara pelivaisi*  
(Mt 13.31-32; Mr 4.30-32)

<sup>18</sup> Jesús jumaitsi jivijavabelia:

—¿De meta xua pelivaisi jēpa Dioso pijajivi bepījia ayaibitsaētoxfaneto penaexanaejavanexa? Jivi meta peyapētaenexa ayaibitsaētoxfaneto bepījia Dioso pijajivi penaexanaejavanexa, mostazaxutoyo meta pelivaisicuēnia tsipaebianajē. <sup>19</sup> Pebi capona mostazaxutoyo peubinexa pijapabita. Nexata baja mostazaxutoyo pebi itsa uba pijapabita, bajarajota mostazanae bepījia vitsaba. Bepījia baja mostazanae pinijinae naexana. Baratsui ata exana pematapenanē bajaraponaemaxēranaxijava. Bajara pijinia pacuenia Dioso pijajivi ata itsane. Bepījia ayaibitsaētoxfaneto naexanaena Dioso pijajivi, jai Jesús jivijavabelia.

*Pacuenia pan pexanaematabënexa, levaduravënējjava fufunaeyaexana yabara pelivaisi*  
(Mt 13.33)

<sup>20</sup> Icatsia Jesús jumaitsi jivijavabelia:

—¿De meta palivaisi jëpa pecacaējëpaejava Dioso pijajivi pevetsicuene daxitanacuanëjava? ¿De meta pacuenia jivi livaisi tsipaebianajë peyapëtaenexa Dioso pijajivi pevetsicuene peyacaējëpaejava daxitanacuanëjava? <sup>21</sup> Levaduravënējjava meta pelivaisicuenia tsipaebianajë. Petiriva pan pexanaenexa, acueyabi patarrobeje trigobenonë matajërëaba levaduravënējjavata. Nexata pan pexanaematabënexa, ayaimatabë.

*Tsiquiribaupayo epatajërëtsialia yabara pelivaisi*  
(Mt 7.13-14, 21-23)

<sup>22</sup> Jesús jivi livaisi tsipaebanajetaruca pinijitomaranëjava, tsiquiritomaraxijava ata, pepatsinexa Jerusalén tomarabelia. <sup>23</sup> Nexata Jesús jivi livaisi petsipaebijavata, itsanë yanijobatsi Jesús. Bajaraponë jumaitsi Jesúsjavabelia:

—Jesús, ¿Dioso tsaja capanepaena caebitsaëtoyo saya? jai.

Nexata Jesús jumaitsi daxita jivijavabelia:

<sup>24</sup>—Xaniajanë pacuenia pacatsipaebijitsiatsi. Pajamatabëcuenesaëmëre bitso panevajënaeyabelia itsamatacabi athëbëtatsia panejonenexa tsiquiribaupayojavalia. Jivi picani itsamatacabi athëbëtatsia ayaibitsaëttoxaneto jamatabëjonena tsiquiribaupayojavalia. Itsiata apo caējëpaetsi tsane pejonenexa. <sup>25</sup> Bo pexainaenë itsa notapunaena baupa pexatatsinexa, paxamë bo jumapënëvelia panubenaename. Nexata picani panejonenexa pabaupadocodocotsianame. Pajumaitsimë tsane: “Tajatuxanenë, panetobaupare,” pajamë tsane. Itsiata bajaraponë pacajumaitsi tsane: “Apo pacayapëtaetsi cajena paxamë. Itsaverena ata papatame, apo yapëtaenë,” pacajai tsane. <sup>26</sup> Nexata paxamë pajumaitsimë tsane: “Xamë baja cajena panebarënanabame. Panebarëmatavëjëaapamenua. Patajatamaranëjava ata baja cajena jivi livaisi tsipaebabiabame,” pajamë tsane. <sup>27</sup> Itsiata bajaraponë pacajumaitsi tsane: “Apo pacayapëtaetsi cajena paxamë. Itsaverena ata papatame, apo yapëtaenë. Pibisiacuene paneexanabiabivi, panevecuaponare baja,” pacajai tsane. <sup>28</sup> Dioso pijanacuatatsia pataename Abrahampijinë, Isaacpijinë ata, Jacobpijinë ata, daxita Diosojumepaebivimi profetavi ata. Daxita bajarapamonae penajuajinavanapaejava Dioso pijanacuatatsia pataename. Nexata paxamë bajarajota pinijicuenia panatsinuename. Panavonosinianamenua bitso paneanaepanaexae. Tsi-pajai paxamë Dioso pijanacuavecuca panenaxuabinexa pacaxuabiana infiernojavabelia. <sup>29</sup> Itsavirijumevi patsiana daxitanacuanëjavaverena. Nexata daxita bajarapamonae naenaena penabaninexa Dioso pijanacuatatsia. <sup>30</sup> Pamonaeeaconoxae mapamatacabitaje ayaijamatabëcuenevi tanetsi, bajarapamonaeyajuvënëvi, ayaibitsaëttoxaneto, itsamatacabi Dioso bevelijamatabëcuenevi exanaenatsi. Pamonaee pijinia mapamat-acabitaje bevelijamatabëcuenevi tanetsi, bajarapamonaeyajuvënëvi, ayaibitsaëttoxaneto, itsamatacabi Dioso ayaijamatabëcuenevi exanaenatsi, jai Jesús daxitajivijavabelia.

*Pacuenia Jesús najamatabëxainaeya sivanua Jerusalén tomarapijivi yabara pelivaisi*  
(Mt 23.37-39)

<sup>31</sup> Itsa baja Jesús najumevereta jivi livaisi petsipaebijava, fariseovi pata Jesúsjavaberenena. Nexata fariseovi jumaitsi Jesúsjavabelia:

—Jesús, mapatomara baja vecuaponareje. Nacuaeavetsinë raja Herodes cabeyaxuabipaeba, jai fariseovi.

<sup>32</sup> Jesús nexata jumaitsi fariseovijavabelia:

—Paponaremelia. Bajaraponë Herodes, jivi peyamaxëitojorobabiabinëjavabelia, pajumaitsimë tsane mapacueniaje: “Jesús raja jumaitsi: ‘Ajena raja abaxë, meravia ata icatsia, vecuacapitsapaponaenajë dovathi peyajavajinavanapaevi. Piavitanevi ata jamatejemayaexanaponaenajë. Nexata abaxë pameravia bajarapacuenia taexanaejava copatsianajë,’ jai raja Jesús,” pajamë tsane Herodesjavabelia. <sup>33</sup> Diosojumepaebivimi

profetavimi beyejebabiabatsi Jerusalén tomarata. Tsipaji profetavi acuenebi saicayatamarata petëpaejava Jerusalén tomaravecua. Bajaraxuata xanë ata ponaenajë tava-jënaeyabelia Jerusalén tomarabelia. Nexata ponaenajë ajena. Itsa jume, meravia, pameravia ata, tanebeyaxuabinexa Jerusalén tomarata, jai Jesús fariseovijavabelia.

<sup>34</sup> Nexata Jesús najamatabëxainaeaya sivanua Jerusalén tomarapijivi. Jerusalén tomarapijivi Jesús najamatabëxainaeaya pesivanuejavata, jumaitsi mapacueniaje:

—¡PaJerusalén tomarapijivimë, pabeyajebabiabame Diosojumepaebivimi profetavi! ¡lbotonëta ata patseconabiabame bajarapacuenia panebeyaxuababiabinexa Diosojumelivaisi pecaponaevi paxamëjavaberena! ¡Pacuenia vacara banacoxicaetuata pecorofetobëxëpanaberena, bajara pijinia pacuenia xanë ata picani bitso jitsipabiabajë patacacae-tuatsinexa, patacacapanepaenexa picani panijaneconivecua! ¡Itsiata baitsi jane paxamë apo pajejamë cajena! <sup>35</sup> Panejumetaema. Dioso rabaja pacacopata papecaevetabibijavami. Nexata baja panijatemplobota Dioso apo ponaponae. Xaniajanë pacuenia pacatsipaebijitsiatsi. Paxamë baja apo panetaemë tsane matavëjëa. Matapania itsa panejumecovënëtame Cristonëcuenenë, Dioso taneitorobinëtsica, icatsia panetaename. Itsa panesivajamatabëjumaitsimënuua tsane: “Dioso, bitso yavenonare maponë najetarucaje. Bajaraponë nejamatabëcueneta najetaruca,” itsa panesivajamatabëjamë tsane, nexata jane baja icatsia panetaename itsa patsianicajë, jai Jesús mapacueniaje najamatabëxainaeaya pesivanuejavata Jerusalén tomarapijivi.

## 14

### *Pacuenia Jesús jamatejemayaexana pebi, bitso daxitanë peyajinaenë, yabara pelivaisi*

<sup>1</sup> Itsamatacabi, judíovi penacueraevetsimatacabita, Jesús pona fariseovi penamatacaitorobinë pijaboyabelia penanabaninexa. Nexata bajarapabota itsamonae fariseovi Jesús naitaxutocaevetatsi. <sup>2</sup> Nexata Jesús pitabarata eca pebi, daxitanë peyajinaenë. <sup>3</sup> Jesús nexata jumaitsi judíovi pecujarubivijavabelia, fariseovijavabelia ata:

—¿Penacueraevetsimatacabita ata tsaja piavitanevi vajajamatejemayaexanaenexa, Dioso nacatocopata? Jume. ¿Apo nacatocopatsi tsaja? jai Jesús judíovi pecujarubivijavabelia, fariseovijavabelia ata.

<sup>4</sup> Itsiata bajarapamonae moya ena. Nexata Jesús cobepita peyajinaenë. Jamatejemayaexana baja. Itoroba baja peponaenexa bajarapabovecua. <sup>5</sup> Jesús nexata jumaitsi judíovi pecujarubivijavabelia, fariseovijavabelia ata:

—Itsa panijaburro, panijabaca ata, pacatojopaejitsipareca meramëthëareca, nexata penacueraevetsimatacabita ata, bepijia pajutarëcëpaejitsipame. ¿Baja tsabaitsi jane? jai Jesús judíovi pecujarubivijavabelia, fariseovijavabelia ata.

<sup>6</sup> Nexata bajarapamonae acuenebi pejumecanaviatsijava Jesúsjavabelia.

### *Pacuenia Jesús jivi muxujioba peyaiyataevitsi penaenexa petsinubijavanëta penaenexa penatsiitapetsiyaniva yabara pelivaisi*

<sup>7</sup> Fariseonë pijabota Jesús tane fariseonë pejunatsivi. Bajarapamonae natsiitapeta peyaiyataevitsi penaenexa petsinubijavanëta penaenexa mesa muxuneneta. Nexata Jesús muxujioba bajarapamonae beveliajamatabëcuenevi penataenexa. Jesús jumaitsi daxitajivijavabelia mapacueniaje:

<sup>8</sup> —Itsa pacajunata panenanabaninexa penacasabifiestajavabelia, pëtsa panatsiitapetame paneenaenexa peyaiyataevitsi penaenexa petsinubijavanëta. Tsipaji itsanë ayaijamatabëcuenenë paxamë matatoxenetsia itsa najunatatsi, napatsipa. <sup>9</sup> Nexata papecajunatsinë pacacujitsiparena. Nexata pacajumai tsipae: “Tocopare bajaraxua maponë peecaenexaje,” pacajai tsipae. Nexata paxamë pauramë tsipae itsa pacanatixitsiaexana paneecaenexa beveliajamatabëcuenevi penaenexa petsinubijavanëta. <sup>10</sup> Itsa pacajunata, paenaename beveliajamatabëcuenevi penaenexa petsinubijavanëta. Matapania papecajunatsinë itsa pacajumai tsane: “Natixiremena. Peyaiyataevitsi penaenexa

tatsinubijavanëta ecare,” itša pacajai tsane, paenaename bajaraxuanëta. Nexata bajarapacuenia daxita mesa muxuneneta panenajuaenaevi pacataena papecayaiyataejava papecajunatsinë. <sup>11</sup> Pajivi ayaijamatabëcuenejivi natane, bajarapajivi beveliajamatabëcuenejivi taenatsi Dioso. Pajivi pijinia beveliajamatabëcuenejivi natane, bajarapajivi ayaijamatabëcuenejivi taenatsi Dioso, jai Jesús judíovi pecujarubivijavabelia, fariseovijavabelia ata.

<sup>12</sup> Nexata Jesús icatsia jumaitsi pejunatsifariseonëtsijavabelia:

—Itša junatame itsamonae nebarënananinexa nijabota matonejepijijava, itša jume, caniviyopijijava ata, pëtsa junatame ëneyapëtaevi. Pëtsa junatame nebarënananinexa ënijamonae. Pëtsa junatame ënijamonaeviriavi ata. Pëtsa junatame ëricovi, pamonaenijabo muxuneneta jinavanapa. Tsipaji bajarapamonae juya canamatamojunatsipa pijabota pecabarënananinexa. Nexata bajarapacuenia canamatamotsipa bajarapamonae. <sup>13</sup> Itša junatame itsamonae fiesta nebarëxanaenexa, junatsianame bepejibivi, penabejenaevi ata, pejayujayunaevi ata, bitso pitaxutotsëcënaevi ata. <sup>14</sup> Nexata bajarapacuenia pepacuene jamatabëcuenebarëyamë tsane. Tsipaji bajarapitsivi acuenebi juya pecanamatamojunatsijava tsane. Nexata nijamatamo xainaename pamatacabi icatsia Dioso asaëyaexanaena pamonaenë tëpa, pexaniajamatabëcuenevimi, jai Jesús pejunatsifariseonëtsijavabelia.

*Pacuenia Jesús jivi livaisi tsipaeba pinijifiesta pexanaenë pelivaisicuenia yabara pelivaisi (Mt 22.1-10)*

<sup>15</sup> Daxita mesa muxuneneta penaevi jumetane Jesús petsipaebilivaisi. Nexata fariseoviyajuvënëne jumaitsi Jesúsjavabelia:

—Jamatabëcuenebarëya tsane pajivi nanabaniana Dioso pijanacuatatsia, jai fariseoviyajuvënëne.

<sup>16</sup> Nexata fariseovi peyapëtaenexa itsamonae Dioso apo pejumecovënëtsijava, junatsi atatsi, Jesús jumaitsi comparacióncuenia mapacueniaje:

—Fiesta pexanaenë pijajivi itoroba ayaijava pexaejava pexanaenexa. Nexata tajëvelia junatsiaexana jivi ayaiBITSaëtoXaneto petopatsinexatsi. <sup>17</sup> Bajaraxuacujinae pexaejava baja itša vereta, fiesta pexanaenë itoroba pijajivitonë peponaenexa pejunatsivijavabelia: “Naxanitsia baja. Pexaejava rabaja vereta,” pejainexa. <sup>18</sup> Itsiata baitsi jane daxita pejunatsivi apo topatsitsirena. Itsanë saya peponaeyaniva, pijajivitonëta tonajumeitorobarenatsi pejumaitsilivaisi mapacueniaje: “Xanë aeconoxaeta comuatabajë ira. Nexata ponaejitsianë bajarabelia tataenexa bajarapaira. Pexaniacuene netoexanaename. Pëtsa jamatabëcueneanaepaname xanëjavaberena,” pejailivaisi tonajumeitorobarenatsi pijajivitonëta. <sup>19</sup> Itsanë pijinia saya peponaeyaniva, pijajivitonëta tonajumeitorobarenatsi pejumaitsilivaisi mapacueniaje: “Xanë comuatajë diez ponëbeje bueyu tanetoroborobocaevinexa. Nexata ponaejitsianë taëjëtsinexa bajarapabueyu. Pexaniacuene netoexanaename. Pëtsa jamatabëcueneanaepaname xanëjavaberena,” pejailivaisi tonajumeitorobarenatsi pijajivitonëta. <sup>20</sup> Itsanë pijinia saya peponaeyaniva, pijajivitonëta tonajumeitorobarenatsi pejumaitsilivaisi mapacueniaje: “Xanë raja aeconoxaeta nacasabajë. Bajaraxuata acuenebi taponaejava,” pejailivaisi tonajumeitorobarenatsi pijajivitonëta. Bajarapacuenia daxita pamonaenë picani fiesta pexanaenë junata, peponaeyaniva saya tonajumeitorobarenatsi pijajivitonëta. <sup>21</sup> Nexata fiesta pexanaenë pijajivitonë naviarena pijatuxanenëjavaberena. Tsipaeba pijatuxanenëjavabelia daxita pacuenia najumerubatsi. Nexata fiesta pexanaenë anaepana. Jumaitsi pijajivitonëjavabelia: “Naxanitsiayo liamëre tomarabelia. Junatanajetarucaename jivi pinijicallexanetonëjava, tsiquiricallexijava ata. Junatsianame bepejibivi, penabejenaevi ata, pejayujayunaevi ata, bitso pitaxutotsëcënaevi ata, penanabaninexa tajabota,” jai fiesta pexanaenë pijajivitonëjavabelia. Nexata baja pijajivitonë pona pejunatsinexa jivi. <sup>22</sup> Jivi pebarëpatsicujinaerena, jumaitsi pijatuxanenëjavabelia: “Tajatuxanenë, exanajë rabaja taneitorobicueniamë. Itsiata abaxë sajinanubena itsamesanë itsamonae,” jai bajaraponë pijatuxanenëjavabelia. <sup>23</sup> Nexata petuxanenë icatsia jumaitsi

pijajivitonëjavabelia: “Liamëre icatsia carreteranëjavabelia, namutonëjavabelia ata. Junatanajetarucaename asaëyata carreterajava pepónaevi, namutojava ata peponaevi, penanabaninexa tajabota pevënëcaenexa tajabo. <sup>24</sup> Pamonae picani copiata junatajë penanabaninexa, caenë ata bajarapamonaeyajuvënënë, apo naxae tsane bajarapapexaejava,” jai petuxanenë pijajivitonëjavabelia, jai Jesús fariseoviyajuvënënëjavabelia jivi peyapëtaenexa itsamonae Dioso apo pejumecovënëtsijava, junatsi atatsi.

*Pacuenia Jesús tsipaeba jivijavabelia, pajivi Jesús jamatabëpënaponatsi, copiaya penajamatabëcueneveretsinexa Jesús pepënaponaevajënaeyatsi yabara pelivaisi*  
(Mt 10.37-38)

<sup>25</sup> Jivibitsaëttoxaneto Jesús pënjajinavanapatsi. Nexata Jesús napënëyorota bajarapamonaëjavabelia. Jesús jumaitsi mapacueniaje:

<sup>26</sup> —Ponë xanëjavaberena patsi ata, itsiata itsa apo niasiva tsane daxita pijamonae matatoxenetsia, nexata bajaraponë apo tajajivitonë tsane. Bajaraponë itsa apo niasiva tsane paxa, pena ata, pematapijivi ata, pejuyapijivi ata, piasivajava matatoxenetsia, nexata apo tajajivitonë tsane. Bajaraponë itsa apo niasiva tsane pijava, pexi ata, pijacuata penaasivajava ata, matatoxenetsia, nexata bajaraponë apo tajajivitonë tsane. <sup>27</sup> Ponë xanë yabara itsamonae jamatabëpebeyaxuabixaetsi, jamatabëpebejibiaexanaexaetsinua, nexata pecajunavi itsa apo nepënaponae tsane, bajaraponë apo tajajivitonë tsane. <sup>28</sup> Paxamëyajuvënënë itsa jamatabëexana bo, athëbëabetsia piapiaboxanetotsia, nexata copiaya najamatabëcueneveretsipa pacuenia exanaejitsia. “¿Netocaëjëpa tsmëra baja tajapalatata taveretsinexa tajabo?” jamatabëjai tsipae copiaya. <sup>29</sup> Itsa apo najamatabëcueneveretsi tsipae copiaya, nexata bo pexanaejava taxuxuabi ata, apo veretsi tsipae itsa apo tocaëjëpaetsi pijapalata. Nexata pijabo petotaevitsi, capocaponaëjitsipatsi. <sup>30</sup> Baracuaicuajitsi tsipae: “Bajaraponë picani taxuxuaba pijabo pexanaejava. Itsiata apo tocaëjëpaetsi pijapalata peveretsinexa pijabo,” jaitsi tsipae capocaponaëya petotaevitsi. <sup>31</sup> Nacuaevetsinë pijinia, itsanacuaverena itsa sivanavajabitsaëtsijitsiatsi, nexata copiaya najamatabëxainaejitsipa. Jamatabëjumaitsi tsipae mapacueniaje: “Tajajivi saya diez mil ponëbeje. Tanebarëtsimaxëponaevinexa, veinte mil ponëbeje. ¿Baja tsmëra tajajivi nebarëcuenecaëjëpaena tabarëbenexa tajavajabitsaënë pijajivi, veinte mil ponëbejejavabelia?” jamatabëjai tsipae copiaya. <sup>32</sup> Nexata bajarapacuenia penajamatabëxainaecujinae, bajaraponë yapëtaejitsipa apo pebarëcuenecaëjëpaejavatsi pebarëbenexa pijavajabitsaënë pijajivijavabelia. Itsa abaxë tajë pevajënae pepatsijavarena pijavajabitsaënë, nexata najumexuabijitsipalia pijajivita penabarajamatabëcuene xanepanaenexabeje vajabitsaëcuene pexanaeyanivabeje. <sup>33</sup> Bajara pijinia pacuenia paxamëyajuvënëvi ata itsa apo najamatabëcueneveretsi copiaya penajamatabëcuenepeñëyorotsinexa daxita pexainaejavavecua, nexata acuenebi tajajivi taexanaenexa, jai Jesús jivi ayaibitsaëttoxanetojavabelia.

*Pacuenia Jesús jivi livaisi tsipaeba comparacióncuenia pacuenia jamatabëcueneitsi tsipae Jesús pijajivitonë itsa copatsipa Jesús pejumecovënëtsijavami yabara pelivaisi*  
(Mt 5.13; Mr 9.50)

<sup>34</sup> Jesús icatsia comparacióncuenia jumaitsi jivi ayaibitsaëttoxanetojavabelia mapacueniaje:

—Yajo abaxë itsa xaica, xanepana. Itsiata yajo pexaicaejavami itsa ajibi tsipae, ¿detsa pacuenia icatsia naxaicaeyaxanaejitsipa? Acuenebi. <sup>35</sup> Itsacuenejavayonexa ata baja apo xanepanae tsipae. Nexata peubijava petsibacathocaenexa ata, apo xanepanae tsipae. Tsipaji pacuenia peubijava petsibacathocaebeno, itsa tsibacathoca, peubijava naxaniabiaexana, bajara apo itsi tsipae bajarapayajomi. Pacuenia bacatasi ata itsa tsibacathoca, peubijava naxaniabiaexana, bajara apo itsi tsipae bajarapayajomi. Nexata saya jema xuabijitsipa bajarapayajomi. Pajivi jamatabënejumeyapëtane patacatsipaebilivaisi, nenamuxunaevetsi xaniavaetsia, jai Jesús comparacióncuenia bajarapamonaëjavabelia.

Bajarapacuenia Jesús jumaitsi comparacióncuenia jivi peyapëtaenexa pacuenia jamatabëcueneitsipae Jesús pijajivitonë itsa copatsipa Jesús pejumecovënëtsijavami. Nexata Diosovecua naxuabijitsipa.

## 15

*Pacuenia Jesús jivi livaisi tsipaeba oveja penaxuabinë pelivaisicuenia yabara pelivaisi (Mt 18.10-14)*

<sup>1</sup> Gobierno pejamatabëcuene impuestomatamo pematamoyanijobabiabivi, pata Jesúsjavaberena. Yajavaparenanua piamatabëcuenebejevi. Bajarapamonae pata penamuxunaevetsinexa Jesús petsipaebilivaisi. <sup>2</sup> Nexata fariseovibeje judíovi pecujarubivibeje itsa tane gobierno pejamatabëcuene impuestomatamo pematamoyanijobabiabivi pepatsijava Jesúsjavaberena, itsa tanenua piamatabëcuenebejevi ata pepatsijava Jesúsjavaberena, nexata fariseovibeje judíovi pecujarubivibeje Jesús baracuaicuaijaisi. Bajarapamonae najumaitsi mapacueniaje:

—Mara ponëje naneconita Diosojavabelia. Tsipaji copiapitabiaba piamatabëcuenebejevi ata. Naxaeyabiabanua pexaejava bajarapamonaeta, najai fariseovibeje judíovi pecujarubivibeje Jesús yabara jamatabëcuenenavëxaniabiaya.

<sup>3</sup> Nexata Jesús pebaracuaicuaijaixaetsi, Jesús bajarapamonaejavabelia livaisi tsipaeba mapacueniaje:

<sup>4</sup> —Paxamëyajuvënënë xinaejitsipa cien ponëbeje oveja. Nexata itsa toyajuvënë naxuabijitsipatsi caenë, oveja pexainaenë petusatota puenetsipa noventa y nueve ponëbeje. Nexata jaitsipa petonaxuabinëtsi matapania pecaxitajarabijavabelianexa. <sup>5</sup> Nexata oveja pexainaenë itsa baja caxitajarabijitsipa petonaxuabinëmitsi, barëyataejitsipa. Boyaberena vëtarapatsipa petonaxuabinëmitsi. <sup>6</sup> Nexata oveja pexainaenë petonaxuabinëmitsi itsa capatsipa boyaberena, junatsipa peyapëtaevitsi. Junatsipa pijabo muxuneneta imoxoyo penaevi ata. Nexata oveja pexainaenë jumai tsipae bajarapamonaejavabelia: “Panecobenabarëyamëre. Tsipaji tajaovejayo, tanetonaxuabinëyomi picani, caxitajarabajë baja,” jai tsipae oveja pexainaenë bajarapamonaejavabelia. <sup>7</sup> Xaniajanë pacuenia pacatsipaebijitsiatsi. Mapanacuataje Dioso pitabarata pijaneconi pexainaejivi ata, itsa copatsiana pibisiacuenepexanabibijava, itsa namatabëcuenepënëyorota Diosojavabelia, bajara pijinia pacuenia sivabarëyatsi tsane athëbëtatsia pejinavanapaevi. Bajarapajivi, athëbëtatsia pejinavanapaevi, sivabarëyatsi tsane noventa y nueve pajivibeje Dioso pitabarata pianeconijibitsavanapaevi pesivabarëyatsiabibijava matatoxenetsia, jai Jesús fariseovijavabelia, judíovi pecujarubivijavabelia ata.

*Pacuenia Jesús livaisi tsipaeba penaxuabipalatanëyo pelivaisicuenia yabara pelivaisi*

<sup>8</sup> Icatsia Jesús jumaitsi fariseovijavabelia, judíovi pecujarubivijavabelia ata:

—Petiriva xinaejitsipa diez ponëbeje palatanëanë, bitso penamatamotsinëanë. Nexata itsa toyajuvënë naxuabijitsipatsi caenë, itanojotsipa lámpara. Bo ira cajuetsipa xaniavaetsia pejaitsinexa. Matapania itsa pitabuatsipa petonaxuabipalatanëtsi, copatsipa pejaitsijava. <sup>9</sup> Itsa baja caxitajarabijitsipa petonaxuabipalatanëmitsi, nexata junatsipa peyapëtaevitsi. Junatsipa pijabo muxuneneta imoxoyo penaevi ata. Bajarapova nexata jumai tsipae bajarapamonaejavabelia: “Panecobenabarëyamëre. Tsipaji tajapalatanëyo, tanetonaxuabinëyomi picani, caxitajarabajë baja,” jai tsipae petiriva bajarapamonaejavabelia. <sup>10</sup> Xaniajanë pacuenia pacatsipaebijitsiatsi. Pajivi copatsiana pibisiacuenepexanabibijavami, itsa namatabëcuenepënëyorotsiananua Diosojavabelia, bajara pijinia pacuenia athëbëtatsia ángelevi sivabarëyatsi tsane, jai Jesús fariseovijavabelia, judíovi pecujarubivijavabelia ata.

*Pacuenia picani juyapijinë paxavecua naxuabaponapona yabara pelivaisi*

<sup>11</sup> Icatsia Jesús livaisi tsipaeba fariseovijavabelia, judíovi pecujarubivijavabelia ata. Jesús jumaitsi mapacueniaje:

—Pebi xaina anijanēbeje pexēnatobeje. <sup>12</sup> Nexata juyapijinē jumaitsi paxajavabelia: “Axa, xuanē picani netocopatame tapitsinexa nevēnamuto, bajaraxuanē abaxē apo tēpae atamē, nerajure baja tajajavanexa,” jai juyapijinē. Nexata pexēnatobeje pexainaenē pexēnatobejejavabelia rajuta daxita pexainaejavanēmi. <sup>13</sup> Nexata paxa perajutsicujinaetsibeje, caematacabibejecujinae, juyapijinē canajeta daxita pexainaejavanēmi pecaetuatsinexa palata. Bajaraxuacujinae jane baja pona tajēnacuyabelia. Bajarajotalia pibisiacuene exanaponapona. Nexata vereta daxita paxa perajutsijavanēmitsi. <sup>14</sup> Nexata daxita bajarapanacuapijivi janibocuene tsipatatsi. Bajaraponē peveretsicujinae daxita pijapalatami, bitso namatavenona pexaejava. <sup>15</sup> Nexata jaita penacuenebinexa bajarapanacuata pecaenējavabelia. Bajaraponē itorobatsi pijairanējava petoebetaponaponaenexa pijamarrano. <sup>16</sup> Nexata bajaraponē bitso pīajanixae, pepenenexa picani ayaijava jamatabēxaeyabiaba bopocuai, marrano pexaeyabiabijava. Bajarajota itsajivi ata apo rajutsitsi pexaejavanexa. <sup>17</sup> Nexata belia bajaraponē xaniavaetsia najamatabēxaina. Jamatabējumaitsi mapacueniaje: “Taxa pijabota pexaejava ayaijava xaina pijajivi ayaibitsaēto piabatsinexa. Tonacopatabiabatsi ayaijava pexaejava. Itsiata xanē majotaje tēpaejitsianē baja tajani. <sup>18</sup> Nexata taxajavabelia naviatsianajē. Jumaitsinē meta tsane taxajavabelia: ‘Axa, pibisiacuene exanajē Diosojavabelia, xamējavabelia ata. <sup>19</sup> Abejenē raja. Auranē baja rovia xamējavabelia: “Taxēnato,” tanejamējava. Nexata saya nijajivitonēnē nexanare,’ janē meta tsane taxajavabelia,” jamatabējai juyapijinē. <sup>20</sup> Nexata baja naviaata paxajavabelia.

’Itsa abaxē tajēverena najetaruca, pexēnato pexainaenē copiatane. Nexata bajaraponē pexēnato itaxutobejiobiatane. Mataenetsia cujinaejinalia pexēnato. Nacoxivaetabarucapona. Copiapitsiaya itabaratsutsunexuaba pexēnato. <sup>21</sup> Nexata bajaraponē jumaitsi paxajavabelia: “Axa, pibisiacuene raja exanajē Diosojavabelia, xamējavabelia ata. Abejenē raja. Nexata baja rovia auranē xamējavabelia: ‘Taxēnato,’ tanejamējava,” jai paxajavabelia. <sup>22</sup> Itsiata baitsi jane pexēnato pexainaenē bajarajota jumaitsi pijajivijavabelia: “Naxanitsia. Bepijiayo taxēnato patocaponaremena daxita matatoxenetsia pexaniapana, penajumaxuabipana. Pajumaacare bajarapapanata. Anillonua pacobesixatare. Zapatonua pataxuxatare. <sup>23</sup> Penasitsinē becerro papiremelia. Pabeyaxuabianame vajaxaenexa. ¡Fiesta exanaenatsi vajabarēyanexa! <sup>24</sup> Tsipaji raja maponē taxēnatoje: ‘Tēpa meta baja,’ sivajamatabējanē picani. Itsiata tsaena ponapona. ‘Naxuaba meta baja,’ sivajamatabējanē picani. Itsiata baja icatsia patajopa,” jai pexēnato pexainaenē pijajivijavabelia. Nexata taxuxuaba fiesta pexanaejava.

<sup>25</sup> ’Bajarapamatacabi matapijinē pabiabelia nacuenebaponapona. Nexata penavitsinē bo itsa imoxoyotanajetaruca, jumetane música. Jumetanenua peyavajibijava. <sup>26</sup> Nexata bajaraponē junata paxa pijajiviyajuvēnēnē. Jumaitsi: “¿Detsa pitsicuene yabara fiesta paexaname?” jai matapijinē. <sup>27</sup> Nexata paxa pijajivitonē jumaitsi: “Nejuyapijinē baitsi patajopa. Axa nexata paneitoroba patabeyaxuabinexa becerro, penasitsinē. Jamatejema tsaena ponapona nejuyapijinē,” jai bajaraponē matapijinējavabelia. <sup>28</sup> Nexata matapijinē bitso anaepana. Apo jitsipae boyabelia pejonejava. Nexata paxa sivapitsaparenatsi. Jumaitsi pexēnatojavabelia: “Naxanitsia. Najonemeya,” jai pexēnatojavabelia. <sup>29</sup> Nexata matapijinē jumaitsi paxajavabelia: “Jume. Bajayajebi baja rovia catonacuenebaponaponatsi xanē. Caeto ata cajena apo cajumeapajejaitsi. Itsiata baitsi jane caeto ata apo nerajutsimē chivoyo ata fiesta tabarēexanaenexa tayapētaevi. <sup>30</sup> Itsiata aeconoxae patajopa baja nexēnato, ponē vereta nijapalatami petiriavijavabelia. Nexata tobeyaxuabame becerro, penasitsinē,” jai matapijinē paxajavabelia. <sup>31</sup> Nexata bajaraponē jumaitsi pexēnatojavabelia: “Taxēnato, xamē cajena xanējavata ponaponame dexitamatacabi. Nexata daxita xua taxainaejava nijajava baja cajena. <sup>32</sup> Itsiata aeconoxae namatavenonatsi vajabarēyanexa. Tsipaji nejuyapijinē: ‘Tēpa meta baja,’ tasivajamatabējainēmi, itsiata tsaena asaē. Penaxuabaponaponaenēmi icatsia baja patajopa,” jai bajaraponē pexēnatojavabelia, jai Jesús mapalivaisije fariseovijavabelia, judíovi pecujarubivijavabelia ata.

## 16

*Pacuenia pijatuxanenë pecobecovë petoevetsinë toveretapona pevetsiaexanaejavanëtsi yabara pelivaisi*

<sup>1</sup> Jesús pijajivijavabelia livaisi tsipaeba. Jumaitsi mapacueniaje:

—Petuxanenë, bitso pexainaenë, ponapona. Bajaraponë xaina pijajivitonë petoevetsinexatsi pecobecovë. Itsiata pepëya pijajivitonë pecobecovë toveretaponatsi. Nexata itsamonae tsipaebatsi pepëya pijajivitonë pecobecovë petoveretaponaejavatsi. <sup>2</sup> Nexata petuxanenë pijajivitonë junata. Jumaitsi pijajivitonëjavabelia: “Xamë pina tapëya netoveretapona tacaevetsiaexanaejava. Pabaxutojavabelia matamoy-aquinarubame xuanë canajetapona tacobecovë, xuanëna netocomuatapona, bajarapabaxuto netocanaviatsianame. Nexata baja itsa netocanaviatsianame bajarapabaxuto, matavëjêa apo netoevetsimë tsane tacobecovë,” jai petuxanenë pijajivitonëjavabelia. <sup>3</sup> Nexata pijajivitonë sivapona bajarapabaxuto petocanaviatsinexa pijatuxanenë. Nexata bajarapabaxuto petocanaviatsivajënae jamatabëjumaitsi: “¿De tsaeta xua exanaenajë? Tajatuxanenë baja necapitsapaejitsia pecobecovë tatoevetaponaenajavavecua. Apo necaëjêpae tsane tanacuenebinexa pabi tajacuata tanaevetsinexa. Bitso auranëna tsipae itsamonaejavabelia amoneya tavajëtaponaenexa palata tanamitsacomuatabinexa taxaejava. <sup>4</sup> Taneamoneyabivi meta abaxë, xua niamoneyaba, bevelia tovënëjonaponaenajë. Nexata tajatuxanenë tanecapitsapaecujinae, bajarapamonae pijaboyabelia itsa ponaenajë, xaniavaetsia necopiapitsiana. Nexata bajarapamonaejavata naponaponaenajë,” jamatabëjai bajaraponë. <sup>5</sup> Nexata bajaraponë junata daxita pamona abaxë amoneyabatsi. Nexata pamona amoneyabatsi, bajarapamonae, caenë canacujitsia, patapona bajaraponëjavaberena. Nexata bajaraponë copiaya petopatsinëtsijavabelia jumaitsi: “¿Detsa pacuenia niamoneyabame abaxë, xua tajatuxanenë pijajava catsicopatatsi? jai bajaraponë. <sup>6</sup> Nexata ponë amoneyabatsi, jumaitsi: “Camoneyabatsi abaxë tacarajutsinexa aceiteranë ochocientos pagalónbeje,” jai. Nexata bajaraponë jumaitsi piamoneyabinëtsijavabelia: “Bevelia saya catocopatsianatsi. Mara picani pacuenia niamoneyabameje, tanetoitanerubibaxutotamëje. Pire cajena. Icatsia itsabaxutojavabelia saya cuatrocientos pagalónbejenexa bepíjia yaquinarure. Nexata saya bajarapacuenia tajatuxanenë rajutsianame,” jai bajaraponë piamoneyabinëtsijavabelia. <sup>7</sup> Bajaraxuacujinae icatsia itsanë topatatsi. Nexata icatsia jumaitsi bajaraponëjavabelia: “¿Jica xamë? ¿Detsa pacuenia niamoneyabame?” jai. Nexata bajaraponë jumaitsi: “Camoneyabatsi abaxë tacarajutsinexa cien pabultobeje trigoxubultonë,” jai. Nexata bajaraponë jumaitsi piamoneyabinëtsijavabelia: “Mara picani pacuenia niamoneyabameje, tanetoitanerubibaxutotamëje. Pire cajena. Icatsia itsabaxutojavabelia saya ochenta pabultobejenexa yaquinarure. Nexata saya bajarapacuenia tajatuxanenë rajutsianame,” jai bajaraponë piamoneyabinëtsijavabelia. Bajarapacuenia exanapona daxita piamoneyabivitsijavabelia pesivajamatabëcuene xanepanaenexatsi, xaniavaetsia pecopiapitsinexatsi pijabota penaponaponaenexa, pijatuxanenë itsa navecuacapitsapatsi. Nexata jane baja daxita piamoneyabivitsi tocanaviabatsi. Bevelia matamota petoyaitanetuarutapona baxutonëtsi. <sup>8</sup> Bajaraxuacujinae pijatuxanenëjavabelia pona perajutsinexa jane baja bajarapabaxutonë. Nexata pijatuxanenë jumaitsi: “Xamë baja rovia pibisiacuene exaname. Itsiata bailsi jane niaitatsacaxae, exaname pacuenia catoxanepanaejitsia nevajënaeyabelia,” jaisi pijatuxanenë. Nexata pacuenia pijatuxanenë pepëya pecobecovë petocanajetabinë ajamatabëcueneitatsaca, bajara pijinia pacuenia Dioso apo pejumecovënëtsivi ajamatabëcueneitatsaca Dioso pejumecovënëtsivi matatoxenetsia mapanacuapijicue yabaraje, jai Jesús pijajivijavabelia.

<sup>9</sup> Icatsia Jesús jumaitsi pijajivijavabelia:

—Pacamuxujiobatsi xaniavaetsia. Mapanacuapijipalatata payavenonare itsamonae. Nexata pacuenia pijatuxanenë pecobecovë petoevetsinë, pesivajamatabëcuene xanepanaevitsi xaina, xaniavaetsia pecopiapitsinexatsi pijabota penaponaponaenexa

pijatuxanenë pecapitsapaecujinaetsi, bajara pijinia pacuenia paxamë ata athëbëtatsia paxainaename papecasivajamatabëcuene xanepaenaevi. Nexata pamatacabi patëpame, itsajota apo panamatavenonaemë palata, Dioso pacacopiapitsiana apo pevereverecaebonëjavatatsia, jai Jesús pijajivijavabelia.

<sup>10</sup> Icatsia Jesús jumaitsi pijajivijavabelia:

—Pajivi xaniavaetsia toeveta tsiquirijavayo ata itsanë pecobecovë, bajarapajivi xaniavaetsia toevetsipa ayaijava ata. Pajivi bijiaya toeveta tsiquirijavayo ata itsanë pecobecovë, bajarapajivi bijiaya toevetsipa ayaijava ata. <sup>11</sup> Itsanë pecobecovë, mapanacuapijicueje, palata ata, xaniavaetsia itsa apo patoevetsimë tsipae, nexata itsajivi ata apo pacaevetsiaexanae tsipae Dioso pijacuene, xua bitso namatamota mapanacuapijicue matatoxenetsiaje. <sup>12</sup> Itsa xaniavaetsia apo patoevetsimë tsipae itsanë pecobecovë, nexata pitsijava picani pacaevetsiaexana, bajarapitsijava itsajivi ata apo pacarajutsi tsipae pepo panijajavanexa, jai Jesús pijajivijavabelia.

<sup>13</sup> Icatsia Jesús jumaitsi pijajivijavabelia:

—Itsajivi ata acuenebi caecuenia petonacuenebijava anijanëbeje pijatuxanenëbeje. Caenëjavabelia jitsipaejitsipa petonacuenebijava. Itsanëjavabelia apo jitsipae tsipae petonacuenebijava. Bajara pijinia itsi pajivi bitso jitsipa Dioso. Pajivi bitso jitsipa Dioso, nexata itsa tonacueneba Dioso, acuenebi bitso pejitsipaejava palata, jai Jesús pijajivijavabelia.

<sup>14</sup> Fariseovi, bitso palata pejitsipaevi, jumetaeyena Jesús petsipaebilivaisi pijajivijavabelia. Nexata fariseovi jumecapocaponatsi Jesús. <sup>15</sup> Jesús nexata jumaitsi fariseovijavabelia:

—Paxamë pajitsipabiabame jivi pejumaitsinexa paxamë yabara: “Fariseovi raja pexaniajamatabëcuenevi,” pejainexa. Itsiata baitsi jane Dioso pacajamatabëcuenyapëtane pexaniajamatabëcuene apo panexainaevicuene. Pacuene bitso jivi tsitapexaniacuenetsi, bajarapacuene Dioso apo tsitapexaniacuenetsi, jai Jesús fariseovijavabelia.

*Pacuenia Jesús tsipaeba fariseovijavabelia bajayata Dioso Moiséspijinëta penajumecopatsilivaisi, pacuenia ata Dioso pijajivi evetsijitsia, yabara pelivaisi*

<sup>16</sup> Icatsia Jesús jumaitsi fariseovijavabelia:

—Juanpijinë jivibautisabinëmi pepatsivajënaeya, jivi xaina Dioso Moiséspijinëta penajumecopatsilivaisi pejumecovënëtsinexa. Bajayata Diosojumepaebivi profetavi ata petsipaebilivaisianë ata, xaina jivi pejumecovënëtsinexa. Itsiata Juanpijinë pepatsicujinae, pexanalivaisi tsipaebaponajë. Tsipaebaponajë Dioso pijajivi pevetsijavanexa. Nexata daxitajivi bitso jitsipa penajonenexa Dioso pijanacuayabetsia, jai Jesús fariseovijavabelia.

<sup>17</sup> Icatsia Jesús jumaitsi fariseovijavabelia:

—Mapanacuaje, itaboxo yajava, jemata vereverecaena. Itsiata baitsi jane palivaisi Dioso Moiséspijinëta najumecopata, bajarapacuena apo vereverecae tsane. Nexata daxita pacuene yabara tajëvelia vajunupaeba bajarapalivaisita, pepacuene xaniajai tsane, jai Jesús fariseovijavabelia.

*Pacuenia Jesús livaisi tsipaeba penacojiobinë pijava pexuabivaniva yabara pelivaisi (Mt 19.1-12; Mr 10.1-12)*

<sup>18</sup> Icatsia Jesús jumaitsi fariseovijavabelia:

—Ponë pijava xuaba, nexata icatsia itsava itsa pita, bajaraponë pibisiacuene exana pevitota. Nexata naneconita Diosojavabelia. Tsipaji pepo pijavavecua jaita itsava. Dioso cajena abaxë bajaraponë pexuabiva pepo pijavacuena totanetsi. Ponë ata itsanë pexuabiva pita, bajaraponë ata pibisiacuene exana pevitota. Nexata naneconita Diosojavabelia. Tsipaji itsanë pijava yacajërëta, pova abaxë Dioso tanetsi itsanë pepo pijavacuena, jai Jesús fariseovijavabelia.

*Bitso riconë Lázarobeje yabara pelivaisi*

<sup>19</sup> Icatsia Jesús livaisi tsipaeba fariseovijavabelia. Jesús jumaitsi mapacueniaje:

—Bitso pexainaenë, riconë, ponapona. Daxitamatacabi naxatabiaba bitso pexaniavirijavanë. Pexaejava, pexaniavirijava, xaeyabiaba. <sup>20</sup> Riconë pijabo mata-toyorotsia yacaranata ibopanaxanetonë mataropotsia pefaratsijavaxanetota. Nexata bajarapacaranatsijavaxaneto jumavelia baupa muxuneneta, bepejiohinë, Lázarovënënë, boquecabiaba. Lázaro daxitanë perabëtsabana. <sup>21</sup> Lázaro picani jamatabëxaeyabiaba riconë pexaeyabiabijavata piothopaepërë mesa bëxëpanareca. Avirixi ata patabiaba itsajota Lázaro bocabiaba. Petsabanaejava raebabiabatsi. <sup>22</sup> Nexata baja belia Lázaro tēpa. Petēpaecujinae Lázaro ángelevi caponayatsi Dioso pijanacuayabetsia, itsabetsia Abrahampijinë petēpaecujinae ponapona. Bajaraxuacujinae riconë ata tēpa. Mëthë-tatsi. <sup>23</sup> Riconëmi petēpaecujinae pata petēpaevi pepatabiabinacuayabelia. Nexata bajarapanacuata riconëmi bitso navixaetaeya bejiobi tsaponapona. Nexata riconëmi athëbëa benaëcotsia. Tajëtatsia taenuta Abraham penucaejava. Lázaro nucaya Abraham pemuxunenetatsia. <sup>24</sup> Nexata riconëmi vavajai. Jumaitsi Abrahamjavabelia: “Amo Abraham, nitaxutotsoniataema. Netoitorobimica Lázaro. Nacobeupijabutsi merata neebarëtocainejebiaexanaejitsia. Bitso jamatabëfaenajë mapatajutaje,” jai riconëmi. <sup>25</sup> Nexata Abraham jumaitsi riconëmijavabelia: “Tamomo, najamatabënapire. Pamat-acabi pinaena abaxë asaëmë tsaponapona nenaexanaeirata, ëpexaniacuene picani xainame. Lázaro pijinia pamatacabi abaxë asaë tsaponapona, bitso picani bejiobi. Itsiata juya mapamatacabi pexaniacuena majotaje catsuponapona. Xamë biji navixaetaeya ponaponame. <sup>26</sup> Itsajivi jamatabëponae ata bajarabereca, acuenebi itsiata pepanepaenexa bajarabereca. Tspaji bitso ayaiitapajanitoxanetoreca. Bajaraxuata paxamë ata apo pacacäëjēpae panepaenexa mabetsinaje,” jai Abraham. <sup>27</sup> Nexata icatsia riconëmi jumaitsi Abrahamjavabelia: “Amo Abraham, pexaniacuene cavajëtatsi. Tonajumeitorobianame Lázarota taxa pijaboyabelia. <sup>28</sup> Bajarajotalia xainajë cinco ponëbeje tajuyapijivi. Xaniavaetsia Lázaro tsipaebiana. Muxujiobiana bajarapamonae ata peponaeyaniva mapanavixaetaeyabiabinacuaya berenaje,” jai riconëmi Abrahamjavabelia. <sup>29</sup> Nexata icatsia Abraham jumaitsi riconëmijavabelia: “Bajarapamonae baja xaina Moiséspijinë peyaquinaelivaisianë. Diosojumepaebivimi profetavi ata peyaquinaelivaisianë ata, xaina baja. Nexata nejuyapijivi itsa apo jitsipae tsane peponaenexa bajarapanacuayabelia, nexata nejuyapijivi jumecovënëtsiana bajarapamonami peyaquinaelivaisianë,” jai Abraham riconëmijavabelia. <sup>30</sup> Riconëmi icatsia jumaitsi Abrahamjavabelia: “Jume raja. Apo jumecovënëtsi tsane cajena bajarapalivaisianë. Itsiata itsajivi itsa asaë tsane petēpaecujinae penaviatsinexa pecovëyabelia, tsipaebiana tajuyapijivijavabelia. Nexata tajuyapijivi copabiana pibisiacuene pexanabiabijava. Najamatabëcuenepeñeyorotsiana Diosojavabelia,” jai riconëmi Abrahamjavabelia. <sup>31</sup> Nexata icatsia Abraham jumaitsi riconëmijavabelia: “Nejuyapijivi itsa apo jumecovënëtsi Moiséspijinë peyaquinaelivaisianë, Diosojumepaebivimi profetavi peyaquinaelivaisi ata, nexata pajivi asaë petēpaecujinae, mavelia ponae ata tsipaeje petsipaebinexa nejuyapijivijavabelia, itsiata nejuyapijivi apo jumecovënëtsi tsipae bajarapajivi ata,” jai Abraham riconëmijavabelia, jai Jesús fariseovijavabelia.

## 17

*Pacuenia Dioso pijajivixae, itsamonae jamatabëcueneëjēbijitsiatsi pibisiacuene pexanaenexa yabara pelivaisi*

*(Mt 18.6-7, 21-22; Mr 9.42)*

<sup>1</sup> Jesús jumaitsi pijajivijavabelia:

—Xanë tajajivixae, itsamonae jamatabëcueneëjēbabiabianatsi pibisiacuene pexanaenexa. Nexata itsamonae pejamatabëcueneta tajajivi pibisiacuene exanaena. Nexata pajivi pejamatabëcueneta tajajivi pibisiacuene exanaena, bajarapajivi Diosojavabelia bitso naneconitsiana. Nexata bajarapajivi pinijicuenia Dioso naneconitsiaexanaenatsi. <sup>2</sup> Itsamonae Dioso pejumecovënëtsivi, abaxë bepejevaxijamatabëcuene xaina Dioso pejumecovënëtsijava yabara. Nexata apo ajamatabëcuenesaë. Nexata pajivi

tajajivijavabelia pibisiacuene jamatabëexanaeyaexana, abaxë tajajivijavabelia pibisiacuene exanaeyaexanaenejeva, bajarapajivi bevësicëtatsi ibotoxanetojavabelia. Nexata bajarapajivi yamaëya, ibotoxaneto yajava, bexuarecatsi pucaxaneto tuatuajëareca. Bajarapacuenia bexuarecatsi, tajajivijavabelia pibisiacuene itsa exanaeyaexana bitso penaneconitsiyaniva Diosojavabelia. <sup>3</sup> Nexata xania. Panayajivitaema pibisiacuene, jai Jesús pijajivijavabelia.

Icatsia Jesús jumaitsi pijajivijavabelia:

—Itsanë Dioso panenajuajumecovënëtsivi pibisiacuene itsa pacaexanaena paxamëjavaberena, bajaraponë xaniavaetsia paitavetsianame. Nexata baja itsa aura tsane pibisiacuene papecaexanaejava yabara, nexata pexaniajaijumeta itsa pacanavajunupae-biana pecopatsijavanexa bajarapacueni, pajamatabëcuenecaevianame pibisiacuene papecaexanaejava. Pabarajamatabëcuenexanepanaename bajaraponë. <sup>4</sup> Caematacabita siete xuabeje pibisiacuene pacaexanae ata tsane, itsiata siete xuabeje itsa aura tsane pibisiacuene papecaexanaejava yabara, nexata pexaniajaijumeta itsa pacanavajunupae-biana pecopatsijavanexa bajarapacueni, itsiata pajamatabëcuenecaevianame. Pabarajamatabëcuenexanepanaename bajaraponë, jai Jesús pijajivijavabelia.

*Pacuenia Jesús jumaitsi pijaapóstolevijavabelia yabara pelivaisi*

<sup>5</sup> Jesús pijaapóstolevi jumaitsi Jesúsjavabelia:

—Patajatuxanenë, paneyavenonare: “Xanë cajena necaëjëpa daxitacuene taexanaenexa,” nejait sabiabijava orijibia patacajumecovënëtsinexa, jai Jesús pijaapóstolevi.

<sup>6</sup> Nexata Jesús jumaitsi pijaapóstolevijavabelia:

—Tsiquirijavayo ata xanë yabara itsa pajamatabëjumaitsimë tsipae: “Xaniajai cajena. Jesús caëjëpatsi daxitacuene pexanaenexa,” itsa pajamatabëjamë tsipae, nexata paxamë ata pacacaëjëpaejitsipa ayaicuene paneexanaenexa. Nexata itsa pajumaitsimë tsipae mapanaejavaxanetojavabeliaje: “Yatabutopaya natixire. Nucaename pucaxaneto tuatuajëtalía,” itsa pajamë tsipae, nexata naejava ata pacajumecovënëtsipa cajena, jai Jesús pijaapóstolevijavabelia.

*Pacuenia itsajivi pijatuxanenë pitorobicueniatsi toexanabiaba yabara pelivaisi*

<sup>7</sup> Jesús icatsia jumaitsi pijaapóstolevijavabelia:

—Paxamëyajuvënënë xainaejitsipa pijajivitonë. Nexata itorobijitsipa petonacuenebaponaponaenexatsi. Nexata bajaraponë pijatuxanenë ira petocueponaponaecujinae, patsipa pijatuxanenë pijaboyaberena. Itsa jume, baca petoevetaponaponaecujinae patsipa. Nexata paxamëyajuvënënë petuxanenëxae, pijajivitonëjavabelia apo jumai tsipae: “Jonemena baja. Ecare nexaejava tacarajutsinexa,” apo jai tsipae pijajivitonëjavabelia. <sup>8</sup> Jume baja cajena. Biji rajane jumai tsipae pijajivitonëjavabelia: “Netoexanare taxaejavanexa. Nexata abaxë nevetanucaename tanabanijavata. Bajaraxuacujinae xamë nabanianame,” jai tsipae pijajivitonëjavabelia. <sup>9</sup> “Xanepana rabaja. Pexaniacuene bitso netoexaname,” apo jai tsabiabinua pijajivitonëjavabelia petonacuenebabiabijavatsi yabara. Bajarapacuenia apo jumai tsabiabi tsipae tsipaji saya pijajivitonë tsaponapona. Nexata pacuenia pijatuxanenë itorobatsi, bajaraponë exanabiabijitsipa. <sup>10</sup> Bajarapacuenia paxamë ata patoexanare Dioso papecaitorobicuenia. Itsa patoveretsianame Dioso papecaitorobicuenia panetoexanavanapaejava, nexata saya namataenetsia panajumaitsimë tsane: “Vaxaitsi saya vajatuxanenë pijajivitsi. Nexata vajanacaitorobicuenia toexanavanapatsi,” panajamë tsane. Pëtsa panajumaitsimë: “Itsajivi meta nacajumai tsane: ‘Xanepana rabaja. Xaniavaetsia Dioso patonacuenebame,’ nacajai meta tsane,” panajamë pëtsa, jai Jesús pijaapóstolevijavabelia.

*Pacuenia Jesús jamatejemaya exana diez ponëbeje, bajayajebi bitso peperabëtsabanaevi, yabara pelivaisi*

<sup>11</sup> Jesús pona Jerusalén tomarabelia. Itsajota Samaria nacuabeje Galilea nacuabeje namuxunenecaxitarababeje, bajaraxuayo Jesús najetaruca. <sup>12</sup> Itsa baja Jesús patsijitsia

tsiquiritomarayojavabelia, mataenenatsi diez ponëbeje bajayajebi bitso peperabëtsabanaevi. Itsiata tajiyo bajarapamonae vecuanubenaothopatsi. <sup>13</sup> Bajarapamonae ayaijumeta jumaitsi Jesúsjavabelia:

—¡Jesús, paneitaxutotsoniataema! jai.

<sup>14</sup> Nexata Jesús itsa tane bajarapamonae, Jesús jumaitsi bajarapamonaejavabelia:

—Panitajëtsianame sacerdotevijavabelia papecaperabëtaenexa, jai Jesús bajarapamonaejavabelia.

Nexata bajarapamonae pona sacerdotevijavabelia. Nexata bajarapamonae namutua penajetarubenaevavata pepatsinexa sacerdotevijavabelia, namutua baja perabëxanepananajetarubena. <sup>15</sup> Daxita bajarapamonae peperabëxanepanaevava itsa tane, nexata caenë saya bajarapamonaeayajuvënënë naviateca Jesúsjavabelia. Bajaraponë namutua ayaijumeta Diosojavabelia jumai tsanajetaruca: “¡Diosomë, bitso ayaijamatabëcuenenëmë! ¡Tavitanejavami baja vecua, nejamatejemayaexaname!” jai tsanajetaruca bajaraponë Diosojavabelia.

<sup>16</sup> Bajaraponë itsa pata Jesúsjavabelia, pematatabacabëta irataeya bocajunua Jesús pitabarata.

—Pexaniacuene netoexaname. Nejamatejemayaexaname baja tavitanejavamivecua, jai Jesúsjavabelia.

Bajaraponë Samaria nacuapijinë. <sup>17</sup> Nexata Jesús jumaitsi bajarajota penubenaevijavabelia:

—Diez ponëbeje bitso peperabëtsabanaevi jamatejemayaexanajë. ¿Detsa meta xua-jitsia daxita apo najuapatsi? <sup>18</sup> Maponëje caenë saicaya nacuapijinë, apo judionë ata, naviateca Diosojavabelia pejumaitsinexa: “¡Diosomë, bitso ayaijamatabëcuenenëmë! ¡Tavitanejavami baja vecua, nejamatejemayaexaname!” pejainexa Diosojavabelia, jai Jesús bajarajota penubenaevijavabelia Samaria nacuapijinë yabara.

<sup>19</sup> Nexata Samaria nacuapijinëjavabelia Jesús jumaitsi:

—Nonotapunare. Ponare baja. Jamatejemamë rabaja tanejumecovënëtsixaemë tacajamatejemayaexanaevanexa, jai Jesús.

*Pacuenia Jesús tsipaeba pijajivijavabelia, fariseovijavabelia ata, pecopiapatsijava baja Dioso pijajivi pevetsijava mapanacuataje yabara pelivaisi*

*(Mt 24.23-28, 36-41)*

<sup>20</sup> Fariseovi jumaitsi Jesúsjavabelia:

—¿Detsa paepatota copiapatsiana Dioso pijajivi pevetsijava pijajivi mapanacuataje? jai fariseovi.

Nexata Jesús jumaitsi fariseovijavabelia:

—Dioso taxuxuabi ata pijajivi pevetsijava mapanacuataje, apo taetsi vajaitaxutota.

<sup>21</sup> Nexata jivi apo jumai tsane: “Copiapata rabaja majotaje Dioso pijajivi pevetsijava mapanacuataje,” apo jai tsane. “Copiapata rabaja majotaliaje Dioso pijajivi pevetsijava mapanacuataje,” apo jainua tsane. Dioso rabaja capanepaeya aeconoxae evetapona pijajivi paxamë tuatujëta, jai Jesús fariseovijavabelia.

<sup>22</sup> Nexata Jesús itsamatacabi mapanacuaje pevetsijavanexa, tajëvelia navajunupaeba pijajivijavabelia. Jesús jumaitsi mapacueniaje:

—Itsamatacabi xanë, Daxitajivi Pematapijinënë, mapanacuaje taevetsinë tsane. Nexata paxamë picani bitso pajitsipaenema patanetaenexamë mapanacuaje taevetsicuene. Itsiata baitsi jane apo pataemë tsane mapanacuaje taevetsicuene. <sup>23</sup> Nexata itsamonae pacajumai tsane: “Bajarajotalia eca mapanacua pepo pevetsinëje,” pacajai tsane xanë yabara. Itsa jume, pacajumai tsane: “Majota ecaje, mapanacua pepo pevetsinëje,” pacajai tsane xanë yabara. Itsiata pëtsa paponame. Pëtsa pamuxunaponamenua bajarapamonae pepëta. <sup>24</sup> Pacuenia yamaxë itsa nivejai tsajuni athëbëvetsica, caecuenia jivi cotiatane daxitajava, bajara pijinia pacuenia daxitanacuanëpijivi caecuenia netaena pamatacabi patsianicajë xanë, Daxitajivi Pematapijinënë. <sup>25</sup> Itsiata copiaya ayaicuenia

navixaetaeya bejiobinē tsane. Mapanacuataje pejinavanapaevi apo nejumlahcovēnētsinua tsane Dioso athēbēvetsica taneitorobinēcuenetsica. <sup>26</sup> Pacuenia bajayata jemata itsi pamatacabi Noépijinē ponapona, bajara icatsia jemata itsane pamatacabi xanē, Daxitajivi Pematapijinēnē, jemata icatsia patsianicajē. <sup>27</sup> Bajayata pamatacabi Noépijinē ponapona, jivi picani xaniavaetsia jamatejema pexaejava xaevanapa. Apaevanapanua. Nacojiobapona itsamonae. Itsamonae pexēnatoyonē pebijavabelia canajetapona petonacojiobinexatsi. Bajarapamonae jamatejema saya jinavanapa. Nexata bajarapamat- acabi Noépijinē epijamonae pinijibarcojavabelia barējunua. Nexata daxitajivi merata bubuna jemata ira itsa bubuta. <sup>28</sup> Bajara pijinia itsi bajayata pamatacabi Lotpijinē ponapona. Jivi saya jamatejema jinavanapa. Pexaejava xaevanapa. Apaevanapanua. Comuacapona. Canajetapona. Ubapona pijapabianē. Pijabonē ata exanapona. <sup>29</sup> Itsiata baitsi jane pamatacabi Lotpijinē Sodomatomara vecuapitsapa, jemata athēbēvetsica pinijicuenia isotonē othopaica. Othopaica pitarutsiibotonēnua. Nexata daxita Sodomatomarapijivimi tajuat- si. Nexata baja verebiabatsi. <sup>30</sup> Bajara pijinia pacuenia icatsia jemata itsane pamatacabi xanē, Daxitajivi Pematapijinēnē, jemata icatsia patsianicajē, jai Jesús pijajivijavabelia tajēvelia penavajunupaebijavata icatsia pepatsijavanexatsica.

<sup>31</sup> Icatsia Jesús jumaitsi pijajivijavabelia:

—Pamatacabi xanē jemata patsianicajē, itsajivi ata pētsa sivanajamatabēxaina mapanacuapijicueneye. Nexata pajivi athēbēyo bojumlahatsia ecaya, perunaecujinaetsica, pētsa sivanajamatabēxaina pijaboēnēalia pebobenaevanē pejutsinexa. Pajivi pijinia pijapabita nacuenebaponapona, pētsa najamatabēxaina penaviatsinexa pijaboyabelia. <sup>32</sup> Panajamatabēnapire pacuenia bajayata Lotpijinē pijavami exanatsi. Lotpijinē pijavami pesivanajamatabēxainaexae mapanacuapijicueneye, napijivitaeyojopa. Nexata baja tēpa. <sup>33</sup> Pajivi exanapona penatojitsipaecuenia, apo xainae tsane matacabi apo peverevereaejava. Itsiata baitsi jane pajivi xanē tajamatabēcueneta copatsiana penatojitsipaecuenia pexanabiabijavami, bajarapajivi xainaena matacabi apo peverevereaejava, jai Jesús pijajivijavabelia.

<sup>34</sup> Icatsia Jesús jumaitsi tajēvelia pijajivijavabelia:

—Xaniajanē pacuenia pacatsipaebijitsiatsi. Pamatacabi patsianicajē, bajarapameravi anijanēbeje majitanucaenabeje caecamata. Itsanē tanejumlahcovēnētsinē tsane. Itsanē apo tanejumlahcovēnētsinē tsane. Nexata tanejumlahcovēnētsinē pitsianatsi ángelnē. Apo tanejumlahcovēnētsinē copatabuatsianatsi. <sup>35</sup> Anijavabeje pijinia najuacuabanucaenabeje caejavata. Nexata tanejumlahcovēnētsiva pitsianatsi. Apo tanejumlahcovēnētsiva copatanutsianatsi. <sup>36</sup> Anijanēbeje pijinia najuanacuenebanucaenabeje pabita. Nexata tanejumlahcovēnētsinē pitsianatsi. Apo tanejumlahcovēnētsinē copatanutsianatsi, jai Jesús tajēvelia pijajivijavabelia.

<sup>37</sup> Jesús nexata pijajivi itsa jumetane bajarapacuenia Jesús pejumlahsijava, bajarapamonae jumaitsi Jesúsjavabelia:

—Patajatuxanenē, ¿detsa jota bajarapacuenia yajuvēnēpitsianatsi? jai Jesús pijajivi.

Nexata Jesús jumaitsi tajēvelia pijajivijavabelia:

—Pacuenia quequeremonae bepimia yapētane itsajota petuxutsaebinē boca bajarajota penacuatsinexa, bajara pijinia pacuenia daxita tajajivi bepimia yapētaena tapatsijavat- sica penacuatsinexa xanējavaberena, jai Jesús pijajivijavabelia.

## 18

*Pacuenia Jesús pijajivijavabelia livaisi tsipaeba jueznē pelivaisicuenia yabara pelivaisi*

<sup>1</sup> Jesús pijajivi livaisi tsipaeba mapacueniaje Jesús pijajivi jamatabēcuenecueranaenejeva pevajētabiabinexa Diosojavabelia. <sup>2</sup> Nexata Jesús jumaitsi pijajivijavabelia:

—Tomarata ponapona jueznē. Bajaraponē pevetsinē jivi penaneconitsiaexanae- cuene. Bajaraponē Dioso apo cujunavi. Jivi ata apo cujunavi. <sup>3</sup> Bajarapatomarata

ponapona pamona pevecuatēpaevatsi. Bajarapova ponabiaba jueznējavabelia peju-maitsabiabinexa: “Naneconitsiaexanare ponē xanējavaberena naneconita. Naneconitsiaexanare pacuenia caitoroba nijatuxanenē bajarapitsivi nenaneconitsiaexanaenexa,” pejaitsabiabinexa, bajarapova ponabiaba jueznējavabelia. <sup>4</sup> Itsiata abaxē bajayajebi jueznē apo jamatabēcuēnyavenonae bajarapova. Belia baja bexēa jueznē jejai. Nexata jueznē jamatabējumaitsi: “Dioso picani apo cujunavinē. Jivi ata picani apo cujunavinē. <sup>5</sup> Itsiata mapovaje tanejamatābēitonotabiabixae, yavenonaenajē pacuenia nitorobabiaba. Nexata baja bajarapova matavējēa apo patabiabirena tsane xanējavaberena tanecueranaeayexanaenexa,” jamatabējai jueznē, jai Jesús pijajivijavabelia.

<sup>6</sup> Jesús icatsia jumaitsi pijajivijavabelia:

—Bajara jamatabēcuēneitsi jueznē, pibisiajamatabēcuēnenē ata. Yavenona bajara-pova asaēya pevājēcabiabixaetsi. <sup>7</sup> Bajara pijinia pacuenia Dioso ata pijajivi yavenonaena itsamonae pibisiacuene itsa exanatsi. Bajarapacuenia Dioso pijajivi yavenonaena bajarapamonae itsa vajētabiabiana Diosojavabelia matacabijebi, meravi yajava. Dioso cajena apo cuenenajematsi tsane itsa yavenonaena pijajivi. <sup>8</sup> Xaniajanē pacuenia pacatsipaebijitsiatsi. Dioso apo cuenenajematsi tsane itsa yavenonaena pijajivi itsamonae pibisiacuene pexanaeyanivatsi. Pamatacabi xanē, Daxitajivi Pematapijinēnē, icatsia patsianicajē, ¿caxitajarabianajē tsaja abaxē tanecopiaevetavanapaevi? jai Jesús pijajivijavabelia.

*Pacuenia itsanē fariseonē, itsanē impuestomatamo gobierno pejamatabēcuēne pematamoyanijobinē, vajētabeje Diosojavabelia yabara pelivaisi*

<sup>9</sup> Itsajota Jesús pijajivijavabelia livaisi tsipaeba, bajarajota nubena itsamonae. Bajarapamonae jamatabējumai tsabiabi: “Vaxaitsi cajena pexaniajamatabēcuēnevitsi itsamonaevecua. Itsamonae bitso nacavecuapibisiajamatabēcuēnevi,” jamatabējai tsabiabi. Nexata bajarapamonaejavabelia Jesús livaisi tsipaeba. Jumaitsi mapacueniaje:

<sup>10</sup> —Anijanēbeje tsiabeje templobojavabetsia pevājētsinexabeje Diosojavabelia. Caenē fariseonē. Itsanē gobierno pejamatabēcuēne impuestomatamo pematamoyanijobabiabinē. <sup>11</sup> Nexata fariseonē nuca. Fariseonē pevājētsijavata Diosojavabelia, bitso bepexaniajamatabēcuēnenē nataeya jumaitsi mapacueniaje: “Diosomē, pexaniajamatabēcuēne carajutatsi. Tsipaji pacuenia itsamonae jamatabēcuēneitsi tsenae, bajara xanē apo jamatabēcuēneitsinē. Yamaxēitojorobiaya jivi apo tavecuanacobetoxotsinē. Apo tacujirubejenē cajena. Apo tajaitsinē itsava tajavavecua. Pacuenia maponēje gobierno pejamatabēcuēne impuestomatamo pematamoyanijobabiabinē jamatabēcuēneitsije, bajara xanē apo tajamatābēcuēneitsinē. <sup>12</sup> Caesemana canacujitsia, anijamatācabibeje, namamatābēcuēnexaniavaetsiaya ponaponabiabajē xaenejevanē taxaejava tacavājētsinexa xamējavabelia. Daxita pacuene nacanabajē, diez xuabejeyajuvēnējava, caejava, xamējavabelia carajutabiabatsi ofrendacuēnia,” jai mapacueniaje fariseonē templobota pevājētsijavata Diosojavabelia. <sup>13</sup> Nexata ponē gobierno pejamatabēcuēne impuestomatamo pematamoyanijobabiabinē, pevājētsijavata Diosojavabelia tajiyo nucalia piau-raxae. Athēbēabetsia ata penavēyotsijava cujunava. Namēpabēbenuca pecobeta pejamatabēbējaixae pibisiacuēne pexanaeiconi yabara. Nexata bajaraponē Diosojavabelia pevājētsijavata jumaitsi mapacueniaje: “¡Diosomē, nitaxutotsoniataema! ¡Pibisiacuēne cajena bitso xanē exanabiabajē!” jai bajaraponē templobota pevājētsijavata Diosojavabelia, jai Jesús mapacueniaje bepexaniajamatabēcuēnevi penataevijavabelia.

<sup>14</sup> Icatsia Jesús jumaitsi bajarapamonaejavabelia:

—Xaniajanē pacuenia pacatsipaebijitsiatsi. Ponē gobierno pejamatabēcuēne impuestomatamo pematamoyanijobabiabinē, bajarapacuenia pevājētsixae Diosojavabelia, Dioso baja vecuaajibiaexanatsi pibisiacuēne pexanaeiconimi. Nexata baja bajaraponē naviata pijaboyabelia planeconijibinē. Ponē fariseonē, navajētsi ata Diosojavabelia, itsiata pijaneconi yajava naviata pijaboyabelia. Tsipaji beayajamatābēcuēnenē natane pevājētsijavata Diosojavabelia. Bajaraxuata pajivi beayajamatābēcuēnejivi natane

itsamonaevacqua, bajarapajivi beveliajamatabëcuenejivi exanaenatsi Dioso. Pajivi saya beveliajamatabëcuenejivi natane itsamonaevacqua, bajarapajivi ayaijamatabëcuenejivi exanaenatsi Dioso, jai Jesús bepexaniajamatabëcuenevi penataevijavabelia.

*Pacuenia Jesús jumaitsi pejevaxijivixijavabelia yabara pelivaisi*

*(Mt 19.13-15; Mr 10.13-16)*

<sup>15</sup> Itsamona pejevaxijivixi tocapataponatsi Jesús pecobeta pejayataponanexa. Nexata Jesús pijajivi ita tane bajarapacueni, Jesús pijajivi itaveta pexi pecapatsivi. Jesús pijajivi jumaitsi pexi pecapatsivijavabelia:

—Pëtsa patocapataponame panexi Jesúsjavabelia, jai.

<sup>16</sup> Nexata Jesús jumaitsi pijajivijavabelia:

—Pëtsa paitavetame. Pacopare pejevaxijivixi pepatsinexa xanëjavaberena. Mapitsipejevaxijivixije jumeabinejeva xaniavaetsia bajumecovënëta palivaisi tsipaebatsi. Nexata pamona jitsipa pejonejava Dioso pijanacuayabetsia, bajara pijinia pacuenia jumeabinejeva xaniavaetsia bejumecovënëta Dioso pejumelivaisi. <sup>17</sup> Xaniajanë pacuenia pacatsipaebijitsiatsi. Mapitsipejevaxijivixije ita jumecovënëta palivaisi tsipaebatsi, bajumecovënëta xaniavaetsia jumeabinejeva. Nexata pamona jitsipa pejonejava Dioso pijanacuayabetsia, bajara pijinia pacuenia jumeabinejeva xaniavaetsia bejumecovënëta Dioso pejumelivaisi. Nexata pamona jumeabinejeva xaniavaetsia jumecovënëtsiana Dioso pejumelivaisi, bajarapamona jonena Dioso pijanacuayabetsia. Itsiata baitsi jane pamona Dioso pejumelivaisi jumeabinejeva xaniavaetsia apo jumecovënëtsi tsane, apo jone tsane Dioso pijanacuayabetsia, jai Jesús pijajivijavabelia.

*Pacuenia pevëjëato, bitso pexainaenë, cuaicuajjai Jesúsjavabelia yabara pelivaisi*

*(Mt 19.16-30; Mr 10.17-31)*

<sup>18</sup> Pevëjëato, judíovi pevetsinë, yanijoba Jesúsjavabelia. Pevëjëato jumaitsi mapacueniaje:

—Petuxanenë, pexaniajamatabëcuenenëmë, ¿detsa pitsicuene exanaenajë taxainaenexa matababi apo peverevereaejava? jai pevëjëato.

<sup>19</sup> Nexata Jesús jumaitsi pevëjëatojavabelia:

—¿Detsa xuajitsia: “Pexaniajamatabëcuenenëmë,” nejamë? Ajibi raja itsapebi ata pexaniajamatabëcuenenë. Caenë rabaja Dioso pexaniajamatabëcuenenë. <sup>20</sup> Xamë baja yapëtaneme pacuenia Dioso pejumelivaisita itoroba jivi pejumecovënëtsinexa. Jumaitsi mapacueniaje: “Pëtsa jaitame itsapetiriva nijavavegua. Pëtsa beyaxuabame jivitonë. Pëtsa nacobetoxotame. Pëtsa itsamona pexanaejava yabara najumetsënëtsiaya pae-bame. Axa yaiyataema. Ena ata yaiyataema,” jai Dioso pejumelivaisita. Xamë baja yapëtaneme bajarapalivaisi, jai Jesús pevëjëatojavabelia.

<sup>21</sup> Nexata pevëjëato jumaitsi Jesúsjavabelia:

—Daxita rabaja bajarapalivaisianë jumecovënëtajë pejevaxinënjavaveliacujinae, jai pevëjëato.

<sup>22</sup> Itsa Jesús jumetane bajarapacuenia pejumecanaviatsijavatsi, nexata icatsia jumaitsi pevëjëatojavabelia:

—Abaxë raja catosaica caejava nexanaenexa. Canajere daxita nexinaejavami. Bajarapamatamomi tsicobetsanaename bepejiobivi. Bajaraxuacujinae nepënaponaename. Nexata bajarapacuenia xainaename bitso nexainaecuene Dioso pijanacuatatsia, jai Jesús pevëjëatojavabelia.

<sup>23</sup> Bajarapacuenia Jesús ita jumaitsi pevëjëatojavabelia, nexata pevëjëato bitso bejamatabëjiobi tsanajetsireca. Tsipaji pevëjëato daxitacuene bitso pexainaenë. Nexata pevëjëato apo jamatabëjumecovënëtsi palivaisi Jesús tsipaeba. <sup>24</sup> Itsa Jesús tane pevëjëato bepejamatabëjiobi tsanajetsijavareca, nexata pevëjëato pecovëta jumaitsi pijajivijavabelia:

—Pamona bitso daxitacuene pexinaevi, tsiayapëbejetsi bitso penajamatabëcuene copatsinexa Diosojavabelia pecapanepaenexatsi Dioso pijanacuayabetsia!

<sup>25</sup> Pacuenia camello acuenebi pejonejava palutaetoitaxutovojotualia, bajara pijinia pacuenia bitso pexainaenë acuenebi tsane pejonejava Dioso pijatomarabetsia, jai Jesús pijajivijavabelia.

<sup>26</sup> Nexata Jesús pijajivi jumaitsi Jesúsjavabelia:

—¿Detsa nexata pitsivi panepaena Diosojavabelia, bitso pexinaevi ata, itsa apo panepae tsane Diosojavabelia? jai Jesús pijajivi.

<sup>27</sup> Jesús nexata jumaitsi pijajivijavabelia:

—Pacune jivi apo caëjèpaetsi pexanaenexa, bajarapacune Dioso caëjèpatsi pexanaenexa, jai Jesús pijajivijavabelia.

<sup>28</sup> Nexata Pedro jumaitsi Jesúsjavabelia:

—Patajatuxanenë, paxanë rabaja pacopatajè daxitacuene pataxinaejavami. Nexata baja pacapënajinavanapatsi, jai Pedro.

<sup>29-30</sup> Jesús nexata jumaitsi:

—Xaniajanë pacuenia pacatsipaebijitsiatsi. Pajivi Dioso pijacuene petonacuenebinexa pueneta pijabomi, paxa ata, pena ata, pematapijivi ata, pejuyapijivi ata, pijava ata, pexi ata, nexata bajarapajivi mapanacuataje pepuenetsijavami matatoxenetsia Dioso rajutsianatsi. Nexata bajarapajivi bexëajavabelia petëpaecujinae ata Dioso rajutsianatsi matakabi apo pevereverecejava, jai Jesús pijajivijavabelia.

*Pacuenia icatsia Jesús tajëvelia navajunupaeba pebeyaxuabijavanexatsi yabara pelivaisi (Mt 20.17-19; Mr 10.32-34)*

<sup>31</sup> Jesús itsamonaevueca ëpijajivi, doce ponëbeje, junata pimoxoyotsinexatsi. Nexata Jesús pebeyaxuabijavanexatsi, tajëvelia navajunupaeba pijajivijavabelia. Jesús jumaitsi mapacueniaje:

—Panejumetaema. Mara Jerusalén tomarabelia ponatsije. Bajayata Diosojumepaebivimi profetavi, xanë, Daxitajivi Pematapijinë, talivaisi tajëvelia yaquina. Pacuenia nexanaejitsia, daxita bajarapalivaisi bajayata profetavimi tajëvelia yaquina. Nexata daxita pacuenia xanë talivaisi bajayata tajëvelia profetavimi yaquina, daxita jane baja bajarapacune Jerusalén tomaratalia netocopiapatsiana. <sup>32</sup> Itsanacuaverena pepatsivi pecobeyabelia necanajetsiana tanebeyaxuabinexa. Bajarapamonae necanecaponaena. Nebijataena pibisiacuenia. Nesuabiana. <sup>33</sup> Nejumatitibabena penaneconitsivi pejumacunitabiabimacata. Bajaraxuacujinae nebeyaxuabiana. Itsiata baitsi jane tanebeyaxuabicujinae, acueyabi matakabita, icatsia asaënë tsane, jai Jesús pijajivijavabelia tajëvelia penavajunupaebijavata pebeyaxuabijavanexatsi.

<sup>34</sup> Itsiata Jesús pijajivi apo jumeyapëtae pajamatabëcuene yabara Jesús jumaitsi.

*Pacuenia Jesús itaxutoxanepanaeyaexana bitso pitaxutotsëcënaenë, Jericó tomarapijinë, yabara pelivaisi*

*(Mt 20.29-34; Mr 10.46-52)*

<sup>35</sup> Jesús imoxoyotanajetaruca Jericótomara. Nexata namuto muxuneneta eca bitso pitaxutotsëcënaenë, apo petaenë. Bajaraponë amoneya palata vajëcabiabeca jivijavabelia. <sup>36</sup> Nexata bitso pitaxutotsëcënaenë itsa jumetane jivibitsaëttoxaneto pecuaicuai-jai tsanajetarubenaejava namutua, bajaraponë epajunateca.

—¿Detsa xua pajaitame? jai tsecae bajaraponë.

<sup>37</sup> Nexata jivi jumaitsi bajaraponëjavabelia:

—Jesús raja, Nazaret tomarapijinë, maxuayo najetarucaje, jai jivi.

<sup>38</sup> Nexata pitaxutotsëcënaenë vavajai tsecae.

—¡Jesús, Davidpijinë pemomomë, nitaxutotsoniataema! jai tsecae bajaraponë.

<sup>39</sup> Nexata picani itsamona, Jesús pevajënaeya penajetarubenaevi, jumeitaveta bajaraponë pemoyanexa. Itsiata biji bitsoyo orijibia vavajai tsecae.

—¡Davidpijinë pemomomë, nitaxutotsoniataema! jai tsecae pitaxutotsëcënaenë.

<sup>40</sup> Nexata Jesús muxunanucojopa. Jumaitsi pijajivijavabelia:

—Panetocomacaponaremena pitaxutotsëcënaenë, jai Jesús.

Itsa baja imoxoyo tocanajetarubenatsi, Jesús jumaitsi pitaxutotsēcēnaenējavabelia:

<sup>41</sup> —¿Detsa xua jitsipame tacaexanaenexa? jai Jesús.

Nexata bitso pitaxutotsēcēnaenē jumaitsi Jesúsjavabelia:

—Jesús, jitsipajē taitaxutoxanepanaejava, jai pitaxutotsēcēnaenē.

<sup>42</sup> Jesús nexata jumaitsi pitaxutotsēcēnaenējavabelia:

—Itaxutoxanepaname rabaja. Tsipaji nesivajamatabējumaitsimē mapacueniaje: “Jesús nitaxutoxanepanaeyaexanaena,” nesivajamatabējamē, jai Jesús pitaxutotsēcēnaenējavabelia.

<sup>43</sup> Bajarapacuenia Jesús pejumaitsijavata, bitso pitaxutotsēcēnaenēmi xaniavaetsia baja tane. Nexata bajaraponē napona baja Jesús pepēta. Bajaraponē namutua jumai tsanajetarucae Diosojavabelia:

—¡Diosomē, bitso pexaniacuene netoexaname! jai tsanajetarucae bajaraponē.

Pamonae ata tane bajaraponē pitaxutoxanepanaejava baja, daxita bajarapamonae ata Diosojavabelia jumai tsanajetarubena:

—¡Diosomē, bitso ayajamatabēcuenenēmē! jai tsanajetarubena Diosojavabelia.

## 19

### *Pacuenia nabarēcuaicuaijaibeje Jesúsbeje Zaqueobeje yabara pelivaisi*

<sup>1</sup> Jesús najetaruca Jericó tomarajava. <sup>2</sup> Jericó tomarata ponapona Zaqueovēnēnē. Bajaraponē gobierno pejamatabēcuenē impuestomatamo pematamoyanijobabiabivi penamatacaitorobinē. Zaqueo bitso pexainaenē pexainaejava. <sup>3</sup> Nexata Zaqueo jamatabētane Jesús. Itsiata apo caējēpaetsi petaejava. Tsipaji Zaqueo petoyaecaenēyo. Jivibitsaētoxoneto matatoyorotsia nubenatsi Jesús Zaqueo pevajēnae. <sup>4</sup> Nexata Zaqueo kujinaeponalia jivibitsaētoxoneto pevajēnaeyabelia Jesús peponaenamutuabelianexa. Junaya naejavatsia athēbēvetsica petaenucaenexa Jesús penajetarucaejava. <sup>5</sup> Nexata Jesús namutua itsa imoxoyotanajetaruca, itsa ponaeta Zaqueo athēbēyo nucaya, bajaraponaejavatsia Jesús naēcotsia. Nexata Jesús taenutsia Zaqueo. Jesús nexata jumaitsi Zaqueojavabelia:

—Zaqueo, naxanitsiayo runaimica. Nijaboyabelia raja patsijitsianē, jai Jesús.

<sup>6</sup> Nexata Zaqueo naxanitsiayo runajopaica. Barēyaya copiapita pijaboyabelia pebarēponaenexa Jesús. <sup>7</sup> Daxita pamonae Jesús matatoyorotsia najetarubenatsi, itsa tane bajarapacuenē, Jesús baracuaicuaijaitsi tsanajetarubena. Ēpamonae najumaitsi tsanajetarubena Jesús yabara:

—Jesús raja naponaponaejitsia Zaqueo pijabota, caranata pibisiacuene pexanaenē pijabota, najai tsanajetarubena bajarapamonae Jesús yabara.

<sup>8</sup> Nexata Zaqueo pijabota Jesús eca mesa muxuneneta. Bajarajota Jesús pitabarata Zaqueo nonotapuna. Jumaitsi Jesúsjavabelia:

—Tajatuxanenē nejumetaema. Tsatsianejē namatajēpaeya taxainajava tarajutsinexa bepejibivijavabelia. Pamonae yamaxēitojorobiaya vecuanotajē tamatamoyanijobijavata impuestomatamo, bajarapamonae tocanaviabianajē. Nexata tayamaxēitojorobijamatabēcuenē bajarapamonae rajutsianajē juya cuatro xuabeje tsaponai caijavayomijamatabēcuenē, jai Zaqueo Jesúsjavabelia.; <sup>9</sup> Nexata Jesús jumaitsi Zaqueojavabelia:

—Zaqueo, ajena rabaja pamatacabi, caxitajarabame, nijamonae yajava, nijaneconivecua pecacapanepaejavanexa Diosojavabelia. Tsipaji baja nijamonae barējumecovēnētame Dioso. Zaqueo, xamē Abrahampijinē pemomo atamē, abaxē picani Dioso apo catae Abrahampijinē pemomomēcuenia. Itsiata baitsi jane ajena baja Diosojavabelia nenajamatabēcuenecopatsixae, Dioso jane baja catane pepacuene Abrahampijinē pemomomēcuenia. <sup>10</sup> Xanē, Daxitajivi Pematapijinēnē, sivapatajopajē tajaitsinexa Diosovecua penaxuabivi tacapanepaenexa pijaneconivecua, jai Jesús Zaqueojavabelia.

*Oro palatanēanē, diez ponēbeje, yabara pelivaisi*  
(Mt 25.14-30)

<sup>11</sup> Zaqueo pijabota itsamonae namuxunaevetena Jesús petsipaebilivaisi Zaqueojavabelia. Pamonaē namuxunaevetena, jamatabēcuenenavēxaniabiaya jamatabējumai tsenae: “Imoxoyo rabaja ecalia Jerusaléntomara. Nexata Jesús itsa patsialia Jerusalén tomarabelia, copiajopaena jane baja daxita Dioso pijajivi pevetsijava,” jamatabējai tsenae bajarapamonae. Bajarapacuenia jamatabējumai tsenae tsipaji baja Jerusaléntomara imoxoyo ecalia Jesús pepatsinexa. <sup>12</sup> Bajaraxuata Jesús livaisi tsipaeba bajarapamonaejavabelia. Jesús jumaimatabēcuenenavēxaniabiaya jamatabējumai tsenae: “Imoxoyo rabaja ecaliatsi mapacueniaje:

—Petuxanenē ponapona pijanacuata. Nexata pepo nacuaevetsinē tonajumeitorobarenatsi tajēnacuaaverena. Petonajumeitorobijumetsirena jumaitsirena mapacueniaje: “Ponaename maberenaje nacua nevetsinēnexa tacaexanaenexa nijanacua nevetsinexa. Bajaraxuacujinae naviatsiaremelia nijanacua jane baja nevetsinexa,” jaitsirena petonajumeitorobijumetsirena. <sup>13</sup> Nexata petuxanenē peponaevajēnae, junata pijajivi, diez ponēbeje. Nexata petuxanenē pijajivi evetsiaexana pijapalatanēanē, oronēanē, bitso penamatamotsinēanē. Caenē canacujitsia caepalatanē evetsiaexanapona. Nexata petuxanenē pijajivi jumaiti pijajivijavabelia: “Bajarapapalatata pacomuataponaename. Xua pacomuataponaename, icatsia pacanajetaponaename. Nexata bajarapacuenia netoayajava tsaponae tsane tajapalata,” jai petuxanenē pijajivijavabelia. Bajaraxuacujinae pona jane baja. <sup>14</sup> Itsiata baitsi jane pevetsinacuatana pejinavanapaevi, bitso itoyatsi petuxanenē. Nexata bajarapamonae petuxanenē pecovēvelia itsamonae itorobalia, itsajotalia petuxanenē nacua pevetsinēnexa exanaejitsiatsi, bajarajotalia pejumaitsinexa: “Apo pajitsipaenē bajaraponē patanevetsinēnexa patajanacuata,” pejainexa petuxanenē yabara. <sup>15</sup> Itsiata baitsi jane petuxanenē pijanacua baja pevetsinēnexa exanatsi. Nexata baja naviarena pijanacuayabereña pevetsinexa jane baja pijanacua. Nexata baja pareña. Nexata petuxanenē pepatsicujinaerena, junata icatsia pijajivi peyapētaenexa jane baja pacuenia caenē canacujitsia pijapalatanēanē pijajivi tocanacuenebatsi pecovēta. <sup>16</sup> Copiaya pepatsinē jumaiti pijatuxanenējavabelia: “Tajatuxanenē, nijapalatanē, taneevetsiaexanaenēmē, catopitsapa baja diez ponēbeje. Nexata baja daxitata once ponēbeje,” jai. <sup>17</sup> Nacuaevetsinē nexata jumaiti pijajivitonējavabelia: “Xanepana rabaja. Xaniavaetsia netoebetaponaponaename. Tsiquirijavayo ata xaniavaetsia netoebetame. Nexata icatsia diez patomarabeje netoebetaponaponaename,” jai nacuaevetsinē pijajivitonējavabelia. <sup>18</sup> Icatsia itsanē pijatuxanenē pijapalatanē petoevetsinē pata. Nexata bajaraponē jumaiti: “Tajatuxanenē, nijapalatanē, taneevetsiaexanaenēmē, catopitsapa baja cinco ponēbeje pematatsēnē,” jai. <sup>19</sup> Nacuaevetsinē nexata jumaiti pijajivitonējavabelia: “Xamē icatsia cinco patomarabeje netoebetaponaponaename,” jai nacuaevetsinē pijajivitonējavabelia. <sup>20</sup> Nexata icatsia itsanē pijatuxanenē pijapalatanē petoevetsinē pata. Jumaiti pijatuxanenējavabelia: “Tajatuxanenē, mara nijapalatanēje, taneevetsiaexanaenēmē. Pañuelopanayota yamatacētsiaya catoebetatsi. <sup>21</sup> Bajarapacuenia catoebetatsi tsipaji cacujunavatsi. Nijamatabēcuenesaenē. Xamē apo itaxutobejiobiataeyabiabimē nijajivi, pamonaē catoeveta nijajava. Itorobabiabame nijajivi pecatopitsinexa apo nijajava ata. Itorobabiabamenua pecatonotsinexa apo neubiaexanaejava ata,” jai pijatuxanenē pijapalatanē petoevetsinē. <sup>22</sup> Nexata nacuaevetsinē jumaiti pijajivitonējavabelia: “¡Acujirubemē xamē! Bijiaya netoebetame. Naneconitame bajarapacuenia tanejumaitisijavamē yabara. Xamē baja cajena yapētaneme tajamatabēcuenesaenējava tajajava yabara. Pacuenia itorobabiabajē tajajivi tanetopitsinexa apo tajajava ata, yapētaneme baja. Pacuenia ata itorobabiabajē tanetonotsinexa apo taubiaexanaejava ata, yapētaneme baja. <sup>23</sup> Xanepanaejitsipa xamē banco pevetsivi itsa netocanacuenebiaexanaejitsipame tajapalatanē. Nexata banco pevetsivi aeconoxae tajapalatanē netocanaviatsipa. Nexata pecacovaetsijamatabēcuenē itsajava palata netoyajavacanaviatsipa,” jai nacuaevetsinē pijajivitonējavabelia. <sup>24</sup> Nexata nacuaevetsinē jumaiti pijajivijavabelia: “Tajapalatanē panetovecuapire maponēje. Nexata juya parajure ponē xaniavaetsia netoeveta tajapalatanē. Bajaraponē xaniavaetsia netocanacueneba.

Nexata baja pematatsënä diez papalatanëbeje netopitsapaeyaexana. Nexata taevetsiaexanaenëta once ponëbeje,” jai nacuaeavetsinë. <sup>25</sup> Nexata nacuaeavetsinë pijajivi jumaiti pijatuxanenëjavabelia: “Patajatuxanenë, bajaraponë xaina baja ayaijava. ¿Detsa xuajitsia rajutsijitsiamë pematatsënä?” jai pijajivi. <sup>26</sup> Nexata nacuaeavetsinë jumaiti pijajivijavabelia: “Pacatsipaebatsi rabaja. Pajivi baja ayaijava xaina, pematatsënä icatsia itsajava rajutsianatsi. Itsiata pajivi tsiquirijavayo xaina, bajarapajivi pijatsiquirijavayomi vecuapitsianatsi. <sup>27</sup> Tajavajabitsaë, pamonaë picani apo jitsipae mapanacua taevetsijavaje, bajarapamonae pacaponaremena maberenaje patanevecuaverebiabinexamë taitabëta,” jai nacuaeavetsinë pijajivijavabelia, jai Jesús livaisi petsipaebijavata Zaqueo pijabota.

*Pacuenia Jesús pata Jerusalén tomarata yabara pelivaisi*

*(Mt 21.1-11; Mr 11.1-11; Jn 12.12-19)*

<sup>28</sup> Jesús baja itsa najumevereta livaisi petsipaebijava Zaqueo pijabota, pona baja Jerusalén tomarabelia. <sup>29</sup> Jerusalén tomaravecua imoxoyo eca petsuto. Bajarapatsutojumata nubena olivonaenë. Bajarapatsuto canacujitsita anijatomarayobeje ecabeje, Betfagé tomarayobeje Betania tomarayobeje. Jesús itsa imoxoyotanajetaruca bajarapatomarayobeje, nexata itoroba pijajivitonëbeje bajarapatomarayobejavabelia. <sup>30</sup> Jesús jumaiti pijajivitonëbejavabelia:

—Paponarebeje mapatomarayo ecaliajevabelia. Itsa rabaja papatsiaremeliabeje, pataenutsianamebeje burro pecëtanutsinëtsi. Bajarapaburro itsajivi ata abaxë apo jumaponae. Paisinaenamebeje. Payamaëcarenamëbeje tsane. <sup>31</sup> “¿Detsa xuajitsia paisinamebeje burro?” itsa pacajaiibeje tsane itsajivi, nexata pajumaitsimëbeje tsane: “Vajatuxanenë raja namatavenona,” pajamëbeje tsane, jai Jesús pijajivitonëbejavabelia.

<sup>32</sup> Nexata Jesús pijajivitonëbeje liabeje. Pacuenia Jesús jumaiti, bajarapacuenia caxitajarabanucabeje burro. <sup>33</sup> Nexata itsa isinabeje, burro pexainaevi jumaitisibeje:

—¿Detsa xuajitsia paisinamebeje burro? jaitsibeje.

<sup>34</sup> Nexata Jesús pijajivitonëbeje jumaitisibeje burro pexainaevijavabelia:

—Vajatuxanenë raja namatavenona. Bajaraxuata paisinajëbeje, jaibeje.

<sup>35</sup> Nexata jane baja burro capatabeje Jesúsjavaberena. Nexata Jesús pijajivi burro tsijumajeba pijacamisajumavelia penaxatabijavanë. Jesús baja bajarapaburrojumata ecaya. <sup>36</sup> Jesús itsa yanajetaruca burrota, panamutoveliala Jesús patsijitsia Jerusalén tomarabelia, bajarapanamutua jivi pijacamisajumaveliala penaxatabijavanë namutua tsivajënaeyerequejebaponatsi yaiyataeya pecopiapitsinexatsi. <sup>37</sup> Patsutojumata olivonaenë nubena, bajarapatsutojavatsica namuto namatonocarucaica. Nexata bajarapanamutuatsica Jesús imoxoyotanajetaruca pepatsinexa Jerusalén tomarata. Nexata jivi ayaibitsaëtoxaneto, Jesús pijajivi yajava, vavajai tsanajetarubenaë. Sivabarëyaya vavajai Diosojavabelia:

—¡Diosomë, bitso ayaijamatabëcuenenëmë! jai tsanajetarubenaë bajarapamonae.

Bajarapacuenia vavajai tsanajetarubenaë tsipaji bajarapamonae kujirutaeyabiaba Jesús Dioso pesaëta ayaicueene pexanaponaejavanë. <sup>38</sup> Bajarapamonae jumai tsanajetarubenaë Jesús yabara:

—¡Maponë najetarucaje, bitso ayaijamatabëcuenenë Dioso pejamatabëcueneta najetaruca jivi pevetsinënexa! ¡Jamatabëcuenexanepanaeya jinavanapa daxita pamonaë athëbëtatsia jinavanapa! ¡Pinijicueene rabaja exana Dioso! jai tsanajetarubenaë namutua daxita Jesús pijajivi.

<sup>39</sup> Nexata fariseovi najetarubena bajarapajivibitsaëtoxaneto tuatuajëta. Nexata fariseovi jumaiti Jesúsjavabelia:

—Jesús, jumeitavere baja nijajivi bajarapacuenia pejumaitsiyaniva xamë yabara, jai fariseovi.

<sup>40</sup> Nexata Jesús jumaiti fariseovijavabelia:

—Xaniajanë pacuenia pacatsipaebijitsiatsi. Mapamonaaje moya itsa najetarubenaejitsipa, nexata juya ibotonë vavajai tsenae tsipae, jai Jesús fariseovijavabelia.

<sup>41</sup> Itsa baja Jesús imoxoyo taeyeta Jerusaléntomara, nexata Jesús sivanua Jerusalén tomarapijivi. <sup>42</sup> Jesús pesivanuejavata Jerusalén tomarapijivi, Jesús jumaitsi Jerusalén tomarapijivi yabara mapacueniaje:

—¡Bitso picani jitsipajë Jerusalén tomarapijivi mapamatacabitaje peyapëtaenexa pacuenia Dioso pepacuene jamatabëcuene xanepanaeyaexanaejitsipatsi, itsa nejumecovënëtsipa! Abaxë raja aeconoxae Dioso apo tocopatsitsi peyapëtaeyaniva bajarapacuene. <sup>43</sup> Nexata tocopiapatsianatsi pibisiamatacabi. Pijavajabitsaë tsimaxëpat-sianatsi. Nexata pijatomara matatoyorotsia foto yacaranatsia cuerutsianatsi pet-simaxënubenaenexatsi bajarapafotota. Pijatomara matatoyorotsia peyacaranatsiibopanaxanetopënëya, pijavajabitsaë foto matatoyorotsia cuenatsi. Bजारapacuenia yacaranatsianatsi pijavajabitsaë. <sup>44</sup> Nexata irabetsica topenetsianatsi pijabonëmi. Nexata daxita Jerusalén tomarapijivi benatsi. Pijatomara matatoyorotsia peyacaranatsiibopanaxanetomi ata tosarababenatsi. Nexata itsaibopana ata apo boca tsane itsaibopana jumavereca. Bजारapacuenia itsane tsipaji xanë apo neyapëtae Dioso athëbëvetsica taneitorobinëtsica, Daxitajivi Pematapijinënë, jai Jesús pesivanuejavata Jerusalén tomarapijivi.

*Pacuenia Jesús Jerusalén tomarata templobovecua pitsapaeyaexana pecanajetabiabivi, pecomuacabiabivinua, yabara pelivaisi*

*(Mt 21.12-17; Mr 11.15-19; Jn 2.13-22)*

<sup>45</sup> Jesús pepatsicujinae Jerusalén tomarata, joneya temploboyalia. Nexata templobota Jesús tane pecanajetabiabivi, pecomuacabiabivinua. Nexata daxita bajarapamonae Jesús pitsapaeyaexana templobovecua. <sup>46</sup> Jesús jumaitsi bajarapamonaejavabelia:

—Dioso baja cajena pejumelivaisibaxutota mapatemplobo yabara tajëvelia jumaitsi mapacueniaje: “Tajabo raja jivi xanëjavaberena penavajëcaebo tsane,” jai Dioso pejumelivaisibaxutota. Itsiata baitsi jane paxamë yamaxëitojorobiaya panenacobetoxotsinexa, panacaetuatabiabame mapabotaje, jai Jesús templobota pecanajetabiabivijavabelia.

<sup>47</sup> Bजारaxuacujinae caematacabi canacujitsia Jesús jivi livaisi tsipaebabiaba bajarapatemplobota. Nexata sacerdotevi penamatacaitorobivi, judíovi pecujarubivinua, tomaraevetsivinua, najumejaita picani Jesús pebeyaxuabinexatsi. <sup>48</sup> Itsiata acuenebi Jesús pebeyaxuabijavatsi. Tsipaji Jesús itsacueneneconi ata apo xinae. Daxitajivi yayitanetsi. Jesús jivi petsipaebilivaisianë xaniavaetsia namuxunaevetabiabatsi.

## 20

*Pacuenia Jesús cajëjëpatsi daxitacuene pexanaenexa yabara pelivaisi*

*(Mt 21.23-27; Mr 11.27-33)*

<sup>1</sup> Itsamatacabi Jesús templobota jivi livaisi tsipaeba. Tsipaeba pexanialivaisi jivi pecapanepaelivaisinexatsi pibisiacuene pexanaeneconivecua. Nexata bajarajota pata sacerdotevi penamatacaitorobivi, judíovi pecujarubivinua, judíovi pijaancianovinua.

<sup>2</sup> Nexata bajarapamonae jumaitsi Jesúsjavabelia:

—Panetsipaebare cajena. ¿Jipatsa pejamatabëcueneta pecanajetabiabivi, pecomuacabiabivinua, capitsapame mapatemplobovecuaje? jai.

<sup>3</sup> Jesús nexata jumaitsi bajarapamonaejavabelia:

—Xanë copiaya caejumeyo pacayanijobianatsi patanejumecanaviatsinexamë.

<sup>4</sup> ¿Jipatsa jane pejamatabëcueneta Juanpijinë jivi bautisabaponapona? ¿Dioso tsaja pejamatabëcueneta? Itsa jume, ¿jivi tsaja pejamatabëcueneta? jai Jesús bajarapamonaejavabelia.

<sup>5</sup> Nexata ëpamonae nabarëcuaicuaijai. Najumaitsi:

—¿De meta pacuenia jumecanaviatsianatsi? Vaxaitsi itsa jumai tsipaetsi: “Dioso raja pejamatabëcueneta,” itsa jai tsipaetsi, nexata Jesús nacajumai tsipae: “¿Detsa

nexata xuajitsia apo pajumecovënëtsimë Juanpijinë pepaebilivaisianë?” nacajai tsipae. <sup>6</sup>“Jivi raja saya pejamatabëcueneta Juanpijinë jivi bautisabaponapona,” itsa jai tsipaetsi, nexata daxitajivi anaeya ibotonëta nacatseconaejitsipa vajanacabeyejebinexa. Bajarpacuenia nacabeyejebijitsipa tsipaji daxitajivi Juanpijinë yabara sivajamatabëjumaitsi: “Juanpijinë raja pepacuene Diosojumepaebinëmi,” sivajamatabëjai, najai sacerdotevi penamatacaitorobivi, judíovi pecujarubivinua, judíovi pijaancianovinua.

<sup>7</sup> Nexata saya bajarapamonae jumaitsi Jesúsjavabelia:

—Apo payapëtaenë ponë Juanpijinë itorobatsi jivi pebautisabaponaenexa, jai.

<sup>8</sup> Nexata Jesús jumaitsi bajarapamonaejavabelia:

—Nexata xanë ata apo pacatsipaebi tsanetsi ponë nitoroba tacapitsapaenexa bajarapamonae templobovecua, jai Jesús.

*Pacuenia exana pijamatabëcuenebejevi, itsanë pijauvacababo petoevetsivi yabara pelivaisi (Mt 21.33-44; Mr 12.1-11)*

<sup>9</sup> Jesús taxuxuaba livaisi petsipaebijava jivijavabelia. Jumaitsi mapacueniaje:

—Pijaira pexainaenë pijairata uba ayaibacaboxaneto uvavënëjava. Bajaraxuacujinae itsamonae evetsiaexana pijauvacababo. Jumaitsi bajarapamonaejavabelia: “Pamatacabi cuainaveretsiana, natsicobetsanaenatsi. Pamatacabi raja cuainaveretsiana, tajajivitonë itorobiarenajë xua panetotsatsianame tanetopitsinexa,” jai uvabacabo pexainaenë petoevetsivitsijavabelia. Nexata uvabacabo pexainaenë tajënacuyabelia pona bajayajebi pijabitsarucaenexa. <sup>10</sup> Itsa baja uvabacabo pexainaenë yapëtane pecopiapatsijava uvacuai penaveretsimatacabi penotsinexa, nexata uvabacabo pexainaenë itoroba pijajivitonë. Itoroba petoevetsivitsijavabelia petsicobetsatsinexatsi. Nexata uvabacabo pexainaenë pijajivitonë tovaetabatsi. Toconibabiatsi. Petoconibabecujinaetsi cobesa naviatsiaexanaliatsi. <sup>11</sup> Itsiata uvabacabo pexainaenë icatsia itoroba itsanë pijajivitonë petsicobetsatsinexatsi. Bajaraponë ata icatsia pibisiacuenia tobijatanetsi. Toconibabiatsi. Peconibabecujinaetsi cobesa naviatsiaexanaliatsi. <sup>12</sup> Itsiata uvabacabo pexainaenë icatsia itoroba itsanë pijajivitonë. Icatsia bajaraponë ata tomatajorobabiatsi. Uvacabopënëyabelia xuabatsi.

<sup>13</sup> Nexata uvabacabo pexainaenë jamatabëjumaitsi: “¿Detsa nexata xua exanaenajë? Itorobianajë cajena taxënato, tasivanë. Itsa raeta itorobianajë taxënato, bajarapamonae netoyaiyataena,” jamatabëjai uvabacabo pexainaenë. <sup>14</sup> Itsiata baitsi jane uvabacabo petoevetsivitsi, uvabacabo pexainaenë pexënato ata apo toyaiyataetsi. Itsa tane uvabacabo pexainaenë pexënato, bajarapamonae najumaitsi: “Mara ponëje itsamatacabi paxa pevënamuto paxa pijauvacababo pitsipaje. Naxanitsia. Beyaxuabatsi. Nexata raja vaxaitsi vajauvacababo tsane,” najai uvabacabo petoevetsivitsi. <sup>15</sup> Nexata uvabacabo pexainaenë pexënato ata tovaetabatsi. Caponaliatsi bajarapauvacababo pepënëyabelia. Bajarapacuenia icatsia tobeyaxuabatsi, jai Jesús.

Nexata Jesús yanijoba bajarapalivaisi petsipaebivijavabelia. Jumaitsi:

—¿De meta nexata xua exanaena uvabacabo pexainaenë pijauvacababo petoevetsivitsijavabelia? <sup>16</sup> Uvacababo raja pexainaenë, patsiarena. Verebiabiana daxita bajarapamonaemi. Nexata icatsia itsamonae evetsiaexanaena bajarapauvacababo, jai Jesús bajarapamonaejavabelia.

Jesús penamuxunaevetsivitsi itsa jumetane bajarapacuenia Jesús pejumaitsijava, bajarapamonae jumaitsi:

—¿Dioso pëtsa copata bajarapacuenia pexanaenexa paxanëjavaberena! jai bajarapamonae.

<sup>17</sup> Nexata Jesús asaëyata naëcota bajarapamonaejavabelia. Jumaitsi bajarapamonaejavabelia:

—Payapëtaneme rabaja pacuenia Dioso pejumelivaisibaxutota tajëvelia jumaitsi xanë yabara. Iboti pelivaisicuenia Dioso pejumelivaisibaxutota jumaitsi xanë yabara mapacueniaje:

Paiboto itsamonae boexanaevi naitaxutojematabuatsiana petsitaabejexaetsi itajara, bajarapaiboto itsanë pitsiana. Nexata bajarapaibotota xaniavaetsia nayaëtsiana botabu daxita itsaibo matatoxenetsia, jai tajëvelia Dioso pejumelivaisibaxutota xanë yabara.

'Bajarapacuenia tajëvelia Dioso pejumelivaisibaxutota itsa jumaitsi, judíovi penamatacaitorobivi apo tanejumecovënëtsijavanexa yabara jumaitsi. Dioso taneitapetsijava daxitajivi tacapanepaenënexa yabara ata jumaitsi, jai Jesús.

<sup>18</sup> Icatsia Jesús jumaitsi mapacueniaje:

—Pamonae apo nejumecovënëtsi Dioso pexënatocuenenë, bajarapamonae bitso bejamatabëjiobi tsane apo tanejumecovënëtsixae. Pacuenia ibotojumata pefirapecaejivi, itsa tsapatecatsi, pevixae bitso yanabejiobita, bajara itsane. Pamonae naneconitsiaexanaenajë, bajarapamonae pepacuenene naxuabiana daxitamatacabijavabelianexa. Pacuenia iboto pematacënëbinëtsi apo asaë, bajara itsane, jai Jesús bajarapamonaejavabelia.

*Pacuenia Jesús jamatabëcueneëjëbiaya yanijobatsi impuestomatamo pematamotsijava yabara pelivaisi*

*(Mt 22.15-22; Mr 12.13-17)*

<sup>19</sup> Palivaisi Jesús tsipaeba templobota, bajarapalivaisi sacerdotevi penamatacaitorobivi, judíovi pecujarubivi ata, jumeyapëtane. Nexata bajarapamonae najumaitsi:

—Vaxaitsi raja Jesús nacajai, najai.

Nexata picani bajarajota bajarapamonae Jesús jamatabëvaetabatsi. Itsiata bajarapamonae abaxë apo vaetabitsi. Tsipaji cujunava jivi. <sup>20</sup> Nexata itsamatacabi bajarapamonae itorobarena pijajivi yaenebiaya petonamuxunaevetsinexatsi Jesús. Nexata bajarapamonae pijajivi bepexaniajamatabëcuenevi itajara jinavanapa Jesúsjavata. Bajarapamonae namuxunaevetena Jesús jivi livaisi petsipaebijavata. Bijiaya Jesús jivi livaisi itsa tsipaeba, bajarapalivaisi yabara picani Jesús pecaponaenexatsi nacuaevetsinëjavabelia peneconitsinexatsi. <sup>21</sup> Nexata bajarapamonae jamatabëcueneëjëbiaya jumaitsi Jesúsjavabelia mapacueniaje:

—Jesús, pacayapëtanetsi jivi pepacuenene pexaniajailivaisi netsipaebijava. Daxitajivi, ricovi ata, bepejiobivi ata, najëpaeya yaiyataeya pexaniajailivaisi tsipaebabiabame bajarapamonae pejinavanapaenexa pacuenia Dioso jitsipa. <sup>22</sup> Panetsipaebare. ¿Xanepana tsaja vajamatamotsinexa impuestomatamo Romanonacua pepo pevetsinëjavabelia? Itsa jume, ¿apo xanepanae tsaja vajamatamotsinexa? jai bajarapamonae jamatabëcueneëjëbiaya Jesúsjavabelia.

<sup>23</sup> Itsiata baitsi jane Jesús jamatabëcueneyapëtane bajarapamonae jamatabëcueneëjëbiaya peyanijobijavatsi peneconitsinexatsi picani. Nexata Jesús jumaitsi bajarapamonaejavabelia:

—¿Detsa xuajitsia panejamatabëcueneëjëbame? <sup>24</sup> Panetsitajëre palatanëyo, jai Jesús.

Nexata bajarapamonae tsitajëtatsi palatanëyo. Nexata Jesús jumaitsi bajarapamonaejavabelia:

—¿Jipatsa mapitabaraje, pevënënu, ruca mapapalatanëyojumataje? jai Jesús.

Nexata bajarapamonae jumaitsi Jesúsjavabelia:

—Romanonacua raja pepo pevetsinë pitabara, pevënënu, jai.

<sup>25</sup> Nexata Jesús jumaitsi bajarapamonaejavabelia:

—Nexata parajutabiabianame Romanonacua pepo pevetsinë pijajava. Parajutabiabianame pijinia saicaya Diosojavabelia Dioso pijajava, jai Jesús.

<sup>26</sup> Nexata bajarapamonae ajibi Jesús peyabaravaetabijavatsi jivijavabelia livaisi petsipaebijava yabara. Tsipaji xaniavaetsia Jesús jumecanaviata bajarapamonae jamatabëcueneëjëbiaya peyanijobijavatsi. Caranata bajarapamonae jamatabëcuenenabenajaca xaniavaetsia Jesús pejumecanaviatsixae bajarapamonaejavabelia. Moya baja nexata ena bajarapamonae.

*Pacuenia Jesús tsipaeba jivi petëpaecujinae icatsia piasaëjavanexa yabara pelivaisi*  
(Mt 22.23-33; Mr 12.18-27)

<sup>27</sup> Saduceovi saicaya itsalivaisi xaina. Bajarapamonae jamatabëcuenenavëxaniabiaya jumai tsabiabi: “Petëpaevi rabaja petëpaecujinae, apo asaë icatsia tsane,” jai tsabiabi. Nexata saduceovi imoxoyobatsi Jesús. Saduceovi jumaiti Jesúsjavabelia mapacueniaje:

<sup>28</sup> —Jesús, Moiséspijinë bajayata vajanacatoyaquinaelivaisi, jumaiti mapacueniaje: “Ponë pematapijinë pepua penacojiobinë baja, itsa tëpa pexi xainaenejeva, nexata juyapijinë bepita pematapijinëmi pijavami. Bjarapacuenia juyapijinë bepita pematapijinëmi pijavami pexi pexainaenexa bajarapovajavabelia. Nexata pexi itsa xainabeje, bematapijinëmi pexi petaenexa daxitajivi,” jai Moiséspijinë bajayata vajanacatoyaquinaelivaisi. <sup>29</sup> Nexata jinavanapa ënacaemonae, siete ponëbeje. Pepo matapijinë copiata nacojioba. Nexata bajaraponë pijava vecuatëpa pexi xainaenejeva. <sup>30</sup> Nexata pematapijinëmi pepënarucaenë pita pematapijinëmi pijavami. Nexata icatsia bajaraponë ata tëpa pexi xainaenejeva bajarapovajavabelia. <sup>31</sup> Nexata icatsia itsanë tuatuajëmatapijinë pita bajarapova. Bajara icatsia ponë ata tëpa pexi xainaenejeva bajarapovajavabelia. Bjarapacuenia daxita baja siete ponëbeje, nacaemonaemi, pitaponae ata bajarapova, itsiata itsanë ata pexi apo xinae bajarapovajavabelia. Bjarapacuenia daxita siete ponëmibeje tëpa. Verevereca baja. <sup>32</sup> Belia baja bajarapova ata tëpa. <sup>33</sup> “Jivi raja petëpaecujinae, Dioso icatsia asaëyaexanaenatsi,” jamë. ¿Detsa nexata ponë, bajarapomonaeyajuvënënë, pijava tsane bajarapova bajarapamatacabi? Daxita pamonaemi siete ponëmibeje, nacaemonaemi, pitapona picani bajarapovami, jai saduceovi Jesúsjavabelia.

<sup>34</sup> Nexata Jesús jumaiti saduceovijavabelia:

—Aeconoxae mapanacuataje pebijivi, petiriavi ata, nacojiobapona. Itsamonae pexënatoyonë pexinaevi pebijavabelia canajetapona petonacojiobinexatsi. <sup>35</sup> Itsiata baitsi jane pamonaemi Dioso itapetatsi, apo pevereverecaenacuataatsia jinavanapaena. Bjarapamonae petëpaecujinae, Dioso icatsia asaëyaexanaenatsi. Bjarapamonae bajarapanacuataatsia apo nacojiobi baja tsane. Bjararajotatsia itsajivi ata pexënatoyo apo canajetsi tsane pebijavabelia petonacojiobinexatsi. <sup>36</sup> Bjarapamonae acuenebi tsane petëpaevia. Tsipaji bajarapamonae jinavanapaena athëbëtatsia pacuenia ángelevi jinavanapa. Bjarapamonae baja Dioso pexi tsane. Tsipaji baja petëpaecujinae Dioso icatsia asaëyaexanaenatsi. <sup>37</sup> Moiséspijinë bajayata yaquina pacuenia Dioso tsipaebatsi tsiquirinaemëyo petajueyecaecotiajavaverena. Nexata Moiséspijinë peyaquinaelivaisita, jumaiti pacuenia Dioso icatsia asaëyaexanaejitsia petëpaevimi. Nexata Moiséspijinë nacayapëtaeyaxana Dioso icatsia piasaëyaexanaejavanexa petëpaevimi. Tsipaji baja Abraham peputëpae, Isaac ata baja peputëpae, Jacob ata baja peputëpae, bajarapamonae yabara bajayata Moiséspijinë peyaquinaelivaisita jumaiti mapacueniaje: “Xanë rabaja Abraham pijaDiosonë, Isaac ata pijaDiosonë, Jacob ata pijaDiosonë,” jai baja cajena Dioso bajayata Moiséspijinëjavabelia. <sup>38</sup> Bjarapacuenia Dioso pejumaitsixae, nayapëtane bajarapamonae bajayata tēpae ata, Diosovecua apo penaxuabijava. Aeconoxae ata bajarapamonae Dioso yajavajinavanapa athëbëtatsia. Daxita petëpaevi Dioso cajena apo tsitatëpaetsi, jai Jesús saduceovijavabelia.

<sup>39</sup> Nexata judíovi pecujarubivi jumaiti Jesúsjavabelia:

—Jesús, saduceovi xaniavaetsia jumecanaviatame, jai judíovi pecujarubivi.

<sup>40</sup> Bjaraxuacujinae saduceovi cjunava baja icatsia peyanijobijava Jesúsjavabelia.

*Pacuenia Jesucristo yabara Davidpijinë bajayata tajëvelia: “Tajatuxanenë,” jai yabara pelivaisi*

(Mt 22.41-46; Mr 12.35-37)

<sup>41</sup> Jesús pijacuata nayabarajumaiti judíovi pecujarubivijavabelia mapacueniaje:

—¿Detsa xuajitsia jivi apo canaëjëtsi Cristo Dioso pexënatocuene? Jivi saya jamatabëcuenenavëxaniabiaya jumai tsabiabi Cristo yabara: “Cristo raja itsa patsiana, saya Davidpijinë pemomo tsane,” jai tsabiabi. <sup>42</sup> Davidpijinë bajayata tajëvelia pejumait-sijava Cristo yabara Salmosvënëbaxutota, jumaiti mapacueniaje:

Dioso jumaitsi tajatuxanenëjavabelia: “Ecare abaxë tacujuanenia. <sup>43</sup> Vecatsivajënae jumecovënëtsiaexanatsi abaxë copiaya nijavajabitsaë nitorobicuenianexa,” jai Dioso tajatuxanenëjavabelia, jai Salmosvënëbaxutota Davidpijinë bajayata pejumaitisijava Cristo yabara.

<sup>44</sup> Nexata Davidpijinë bajayata Cristo yabara: “Tajatuxanenë,” itsa jai, nexata Cristo Davidpijinë apo pemomo. Tsipaji baja cajena Cristo saicaya Dioso pexënato, nayabarajai Jesús judíovi pecujarubivijavabelia, judíovi pecujarubivi pecanaëjëtsinexa Cristo Dioso pexënatocuene.

*Pacuenia Jesús tsipaeba pijajivijavabelia judíovi pecujarubivi penaneconitsijava Diosojavabelia yabara pelivaisi*

(Mt 23.1-36; Mr 12.38-40; Lc 11.37-54)

<sup>45</sup> Itsa abaxë daxitajivi namuxunaevetatsi Jesús petsipaebilivaisi, Jesús jumaitsi pijajivijavabelia:

<sup>46</sup> —Xania, panayajivitaema palivaisi judíovi pecujarubivi tsipaebaona panejumecovënëtsiyaniva. Bajarapamonae jitsipabiaba tomara tuatujëjava piapiajavanë penaxatabiabavanapaenexa jivi peyaiyataenexatsi. Jitsipabiabanua bitso yayiyataeya pebajacobinexatsi callejava. Bajarapamonae itsa najoneyabiaba judíovi penacaetutatabibonëjava, jitsipabiaba penaenexa pexaniavirijavanëta. Nexata natsiitapetabiaba penaenexa peyaiyataevitsi penaenexa petsinubijavanëta. Bajarapamonae itsa napatabiaba fiestajava ata, jitsipabiaba penaenexa peyaiyataevitsi penaenexa petsinubijavanëta. <sup>47</sup> Bajarapamonae yamaxëitojorobiaya vecuanotabiabanua pamonajivi pevecuatëpaevanëtsi pecobecovëjavaxi. Bajarapamonae itajara pinijicuenia vajëcabiaba Diosojavabelia. Itsiata pepo pexaniajajamatabëcueneta apo vajëcabiabi. Bajarpacuenia vajëcabiaba saya jivi petaenexatsi Dioso itajara bitso bepejumecovënëtsivi. Nexata bajarapamonae bitso pinijicuenia Dioso naneconitsiaexanaenatsi pamatacabi Dioso naneconitsiaexanaena daxita pamonae Dioso apo pejumecovënëtsivi, jai Jesús pijajivijavabelia judíovi pecujarubivi yabara.

## 21

*Pacuenia ofrenda rajuta Diosojavabelia pamona pevecuatëpaevatsi yabara pelivaisi*

(Mr 12.41-44)

<sup>1</sup> Templobota Jesús cobetane bitso pexainaevi ayajava palata pejeponaejava cajonijavabelia. Bajarajota jivi palata jeyabiaba ofrendacuenia perajutsijava Diosojavabelia.

<sup>2</sup> Bajarajota Jesús cobetanenua pamona pevecuatëpaevatsi, bepejiobiva, penajeyava anijapalatanëyobeje. Bajarapova najia anijapalatanëyobeje piamatamobinëyobeje. <sup>3</sup> Jesús nexata jumaitsi pijajivijavabelia:

—Xaniajanë pacuenia pacatsipaebijitsiatsi. Mapovaje pamona pevecuatëpaevatsi bejiobi bitso. Xuayo jia cajonita ofrendacuenia perajutsinexa Diosojavabelia, bajaraxuayo bitso Dioso sivajamatabëcuenebarëya daxita xua itsamonae jia bajarapacajonita mata-toxenetsia. <sup>4</sup> Tsipaji rabaja xua bajarapamonae apo namatavenonae, jia bajarapacajonita ofrendacuenia perajutsinexa Diosojavabelia. Itsiata mapovaje, bepejiobiva, daxitajavayo penaevetsijavayotaminexa jia bajarapacajonita ofrendacuenia perajutsinexa Diosojavabelia, jai Jesús pijajivijavabelia.

*Pacuenia Jesús tajëvelia tsipaeba pijajivi itsamatacabi itsanacuapijivi pexuabijavanexatsica templobo yabara pelivaisi*

(Mt 24.1-2; Mr 13.1-2)

<sup>5</sup> Jerusalén tomarata templobo itabëtsiaya exaneta pexaniaviriaibotonëta. Jivi Diosojavabelia ofrendacuenia perajutsijavanë ata, templobota itabëtsiaya ruba templobo pitaitabëtsecaenexa. Nexata Jesús pijajiviyajuvënëvi nabarëcuaicuaijai tsaponae templobo pitabëtetsijava yabara. Nexata Jesús tajëvelia vajunupaeba pacuenia itsamatacabi

itsanacuapijivi xuabijitsiatsica templobo, daxita bajarapaaitabëcuene yajava. Jesús jumaitsi pijajivijavabelia mapacueniaje:

<sup>6</sup> —Itsamatacabi itsanacuapijivi xuabianica mapatemplobomije. Nexata daxita xua pataneme, pitabëcuene yajava, penetsianica. Nexata templobopijiibotonë caeiboto ata pejumavereca apo boca tsane, jai Jesús pijajivijavabelia.

*Pacuenia itsijitsia Jerusalén tomarata, daxitanacuanëjava ata, mapanacua pecopiarucaevajënaeje yabara pelivaisi*

*(Mt 24.3-28; Mr 13.3-23)*

<sup>7</sup> Jesús pijajivi jumaitsi:

—Patajatuxanenë, pajitsipajë patanetsipaebijavamë patayapëtaenexa paepatota copiapatsijitsia xua vajunupaebame. ¿Detsa pitsicuene peneta pataenajë itsa copiapatsijitsia xua jumaitsimë templobo yabara? jai Jesús pijajivi.

<sup>8</sup> Jesús nexata tajëvelia vajunupaeba pacuenia itsamatacabi itsijitsia mapanacuataje. Jesús pijajivijavabelia jumaitsi mapacueniaje:

—Xania panayajivitaename. Pëtsa panacopatame itsajivi ata papecayamaxëitorobinexa. Tsipaji raja peyamaxëitorobinexa, ayaibitsaëto patsiana bexanë itajara tsane. Bajarapamonae najumetsënëtsiaya jumai tsane: “Xanë raja Cristonë, athëbëvet-sica Dioso taneitorobinëtsica jivi tacapanepaenexa,” jai tsane. “Imoxoyo rabaja pevajënae nacua pevereverecaenexa,” jai tsane itsamonae. Itsiata pëtsa pajumecovënëtame bajarapamonae. Pëtsa papënaponamenua. <sup>9</sup> Vajabitsaë pexanaejava imoxoyonacuanëjava, tajënacuanëjava ata, pavënëlivaisitaename. Itsiata pëtsa pajunavame. Peneta bajara itsane mapanacua pevereverecaevajënaeje. Itsiata baitsi jane bepimia bajarapamatacabi mapanacuaje abaxë apo vereverecajuni tsane, jai Jesús pijajivijavabelia tajëvelia pevajunupaebijavata pacuenia itsamatacabi itsijitsia mapanacuata.

<sup>10</sup> Jesús icatsia tajëvelia vajunupaeba pacuenia itsamatacabi itsijitsia mapanacuataje. Jesús jumaitsi pijajivijavabelia mapacueniaje:

—Mapanacuaje pevereverecaevajënae, peneta copiaya itsaviriavi nabena itsaviriavijavabelia. Itsanacuanëpijivi pijinia nabena itsanacuanëpijivijavabelia. <sup>11</sup> Ira najëabiana ayaicuenia nacuanëjava. Nacuanëjava ayaijaniboxaneto najetarucaena, piavitane cuene yajava. Itaboxotatsia pitsapaena piayaijunavicuene, pinijicuene pexanaejavanë yajava, jai Jesús pijajivijavabelia.

<sup>12</sup> Icatsia Jesús tajëvelia vajunupaeba pacuenia itsamatacabi itsijitsia mapanacuataje. Jesús jumaitsi pijajivijavabelia mapacueniaje:

—Bajarapacuenie pecopiajopaevajënaeya patajajivixaemë, pacataicaena. Pacabejiobiaexanaena. Pacacaponae judíovi penacaetuatabiibonëjavabelia papecaneconitsinexa. Penaneconitsivi pejebabiabibota pacajebiana. Patajajivixaemë, pacanubiana presidente vi pitabarata, nacuaevetsivi pitabarata ata. <sup>13</sup> Nexata bajarajota xanë talivaisi, pexanialivaisi, patsipaebianame xaniavaetsia. <sup>14</sup> Nexata pëtsa tajëvelia panatsinajamatabëxainame pacuenia panayajivicuaicuaijamëjitsia bajarapamonaejavabelia. <sup>15</sup> Tsipaji paepatota panayajivicuaicuaijamëjitsia, bitso peyapëtaevicuenia pacacuaicuaijiaexanaenatsi. Nexata caenë ata panijavajabitsaënë apo caëjëpaetsi tsane papecajumecanaviatsinexa. <sup>16</sup> Bajarapamatacabi patajajivixaemë, panacaemonae atamë, itsajivi panijamonaejivi ata pacacanajetsiana nacuaevetsivijavabelia papecabeyaxuabinexa. Paneaxa ata, paneena ata, panijabanajivi ata, bitso papecayapëtaejivi ata, bajarapamonae caranata pacacanajetsiana. Nexata pacayajuvënëbeyaxuabiana. <sup>17</sup> Daxitajivi pacaitoya tsabiabi tsane patajajivixaemë. <sup>18</sup> Itsiata baitsi jane pepo panejamatabëcuenelivaisi bajarapamonae apo itsacueniabi tsane. <sup>19</sup> Itsa pajamatabëcuenesaemë tsavanapae tsane, nexata matacabi apo pevereverecaenexa paxainaename, jai Jesús pijajivijavabelia tajëvelia pevajunupaebijavata pacuenia itsamatacabi itsijitsia mapanacuataje.

<sup>20</sup> Icatsia Jesús tajëvelia vajunupaeba papiayaicuenie itsamatacabi copiapatsijitsia Jerusalén tomarata, Jesús jumaitsi pijajivijavabelia mapacueniaje:

—Itsa pataename vajabitsaë, itsanacuaverena pepatsivi, Jerusaléntomara matatoyorotsia peyacaranatsijavatsi, nexata pajamatabëitsimë tsane: “Imoxoyo rabaja pevajënae Jerusaléntomara pevereverecaenexa,” pajamatabëjamë tsane. <sup>21</sup> Nexata bajarapamatacabi Judea nacuata pejinavanapaevi, itsa tane bajarapacuene, berëcëpeca cajena ibotsutonëjavabelia. Jerusalén tomarapijivi ata berëcëpeca pijatomaravecu. Itsamonae pijinia, Jerusalén tomarapijivi, bajarapamatacabi Jerusalén tomarapënëyabelia itsa jinavanapa, apo benaviabirena pijaboyaberena. <sup>22</sup> Bajarapacuenia Jerusalén tomarapijivi itsa tocopiajopaenatsi, tocopiajopaenatsi jane baja Dioso penaneconitsiaexanaematacabitsi. Nexata jane baja tocopiajopaenatsi daxita pacuenia baja cajena pepo bajayatami tajëvelia vajunupaeba Diosojumelivaisibaxutota. <sup>23</sup> Bajarapavajabitsaëmatacabi bitso ayaicuenia bejiobi tsane mapanacuapijivije. ¡Papetiriavi penacuetto yacotajinavanapa, bitso bejiobi tsane bajarapamatacabi bitso nabejiobitsiaya peponaexae tsane! ¡Papetiriavi ata mitoapaenacuettoxi isajinavanapa, bitso bejiobi tsane bajarapamatacabi! Bajarapacuenia daxita mapanacuapijivije pinijicuenia Dioso naneconitsiaexanaenatsi. <sup>24</sup> Bajarapavajabitsaëmatacabi itsanacuaverena Jerusalén tomarapijivi vajabitsaë tsi-maxëpatsianatsi. Nexata itsabitsaëtomi, Jerusalén tomarapijivimi, beyejebianatsi. Itsabitsaëtomi pijinia, Jerusalén tomarapijivimi, caponaenatsi itsanacuanëjavabelia. Nexata bajaraxuacujinae itsanacuanëpijivi patsiana Jerusalén tomarata. Nexata juya bajarapamonae jinavanapaena Jerusalén tomarata. Nexata itsanacuaverena pepatsivi evetsiana Jerusaléntomara. Matapania daxita itsanacuaverena pepatsivi vecuapit-sapaena Jerusaléntomara, copatsiana baja bajarapamonae pevetsijava Jerusaléntomara, jai Jesús pijajivijavabelia tajëvelia pevajunupaebijavata papiayaicueene itsamatacabi copiapatsijitsia Jerusalén tomarata.

*Pacuenia Jesús tajëvelia navajunupaeba icatsia pepatsijavanexatsica petëpaecejinae yabara pelivaisi*

*(Mt 24.29-35, 42-44; Mr 13.24-37)*

<sup>25</sup> Jesús tajëvelia navajunupaeba itsamatacabi icatsia pepatsijavanexatsica. Jesús jumaitsi pijajivijavabelia mapacueniaje:

—Xanë tapatsivajënaetsica, jivi taena pecujunavicuene. Matacabipijijuametotatsia, xua naitajëtsiana, meravipijijuametotatsia ata, xua naitajëtsiana, tulupujavatatsia ata, xua naitajëtsiana, bajaraxuanë jivi bitso cjunavianana. Daxita nacuanëpijivi bitso najunaviacaena itsa jumetaena manuameneta pinijimalataca bitso penajumetsijava. <sup>26</sup> Daxitanacuanëjava bitso jivi najamatabëxainana itsa taena piayaicueene petocopiajopaejavatsi. Nexata daxita nacuanëjava jivi tëpajoneyabiabiana pecajunavi. Daxita xua athëbëtatsia rubena, najëabiana. Xaniavaetsia apo rubenae tsane. <sup>27</sup> Nexata bajarapaepatota jivi netaena, Daxitajivi Pematapijinënë, athëbëvetsica itarërëbota tana-jetarucaejava. Patsianicajë daxitacuene taevetsinexa. Tanivenivenaectotia yajavapatsianicajë. <sup>28</sup> Itsa pataename pecopiajopaejava bajarapacuene, nexata panajamatabëcuenesaëtsianame. Tsipaji rabaja imoxoyo pevajënae tsane papecacapanepaenexa jivi papecabebijobia exanaebibijavamivecu, jai Jesús pijajivijavabelia tajëvelia penavajunupaebijavata itsamatacabi icatsia pepatsijavanexatsica.

<sup>29</sup> Icatsia Jesús tajëvelia vajunupaeba pacuenia itsamatacabi itsijitsia mapanacuataje. Jesús jumaitsi pijajivijavabelia mapacueniaje:

—Pacanaëjere pacuenia itsi higuerranae, itsavirianaenë ata. <sup>30</sup> Itsa baja imoxoyo pevajënae tsaponae vai pejonejavanexa, bajaraponaenë pejanabaxu juva. Nexata bajarapacuenia payapëtaneme vai baja imoxoyo pevajënae pejonejavanexa. <sup>31</sup> Bajara pijinia pacuenia peneta itsa pataename pecopiapatsijava xua yabara pacatsipaebatsi, nexata payapëtaname imoxoyo baja pevajënae pecopiapatsijavanexa tsane pamatacabi daxita Dioso pijajivi evetsijitsia mapanacuataje, jai Jesús pijajivijavabelia tajëvelia pevajunupaebijavata pacuenia itsamatacabi itsijitsia mapanacuataje.

<sup>32</sup> Icatsia Jesús jumaitsi pijajivijavabelia:

—Xaniajanë pacuenia pacatsipaebijtsiatsi. Pitsijamatabëcuenevi aeconoxae mapamatacabitaje jinavanapa, bajarapitsijamatabëcuenevi abaxë, bexëajavabelia ata, apo vereverecae tsane. Matapania xua yabara pacatsipaebatsi itsa baja copiapatsiana, bajarapamonae jane baja vereverecaena. <sup>33</sup>“Itaboxo, ira yajava, tsitecaena daxitamatacabijavabelianexa,” jamatabëjai ata tsane itsamonae, itsiata jamatabëcuenenavëxaniabiana. Tsipaji jemata itaboxo, ira yajava, vereverecaena. Nexata palivaisi pacatsipaebatsi, apo najumetsënëtsinë tsane. Nexata xua yabara pacatsipaebatsi, pacuenia baja najumecapanepaeya jumaitsinë, daxita bajaraxua copiapatsiana, jai Jesús pijajivijavabelia.

<sup>34</sup> Icatsia Jesús jumaitsi pijajivijavabelia:

—Nayajivitaeya pajinavanapaename. Pëtsa panajamatabëxainame pibisiacuene paneexanaenexa, paneaitajibinexa ata. Pëtsa pasivanajamatabëxainame maëpanacuapijijamatabëcueneje. Belia bajarapacuenia paneexanavanapaejavata, jemata copiapatsipa tapatsimatacabinexatsica. <sup>35</sup> Pacuenia dujuai peyamatajucaejava, meniareca jemata jivi xuareca dujuai peyamatajutsinexa, bajara pijinia pacuenia xanë tapatsimatacabinexatsica, jemata daxitanacuanëjava copiapatsiana. <sup>36</sup> Bajaraxuata nayajivitaeya pajinavanapaename. Daxitamatacabi canacujitsia panayajivivajëcabiabianame Diosojavabelia paneajamatabëcuenesaë tsaponaenexa, panevecuapanepaponaenexa daxita papibisiacuene pacatocopiapataponaena. Daxita bajarapapibisiacuene panevecuapanepacujinae ata, pavajëcabiabianame Diosojavabelia. Nexata pamatacabi xanë, Daxitajivi Pematapijinënë, patsianicajë, papecacaëjëpaenexa panenubenaejava taitabarata, jai Jesús pijajivijavabelia.

<sup>37</sup> Caematacabi canacujitsia Jesús livaisi tsipaebabiaba templobota. Nexata icatsia caemeravi canacujitsia Jesús tomaravecua pitsapabiaba pemajitabiabinexa petsutojumabelia. Nexata patsutojumata olivonaenë nubena, bajarapatsutojumata Jesús majitabiaba. <sup>38</sup> Daxita bajayacunua canacujitsia jivi patabiaba templobota penamuxunaevetabibinexatsi Jesús petsipaebilivaisi.

## 22

*Pacuenia Judas pona Jesús pijavajabitsaë pecobeyabelia pecanjetsinexatsi yabara pelivaisi (Mt 26.1-5, 14-16; Mr 14.1-2, 10-11; Jn 11.45-53)*

<sup>1</sup> Imoxoyo baja pevajënae pejonenexa pascuavënëfiesta. Bajarapafiestamatacabi jivi baxane levadurata matajërëabinejeva pexanaepan. <sup>2</sup> Sacerdotevi penamatacaitorobivi, judíovi pecujarubivinia, najumejaita pacuenia picani bajarapamonae Jesús beyaxuabijtsiatsi. Itsiata abaxë bajarapamonae Jesús apo beyaxuabitsi. Tsipaji bajarapamonae jivi cujunava.

<sup>3</sup> Nexata dovathi tsijamatabëjunuatsi Judas. Judas, ponë vënërubatsi itsavënë, Iscariote. Bajaraponë Jesús pijajivi, doce ponëbejeyajuvënë. <sup>4</sup> Judas yapëtane itsajota nacaetuata sacerdotevi penamatacaitorobivi, templobopijipolicíavi penamatacaitorobivi yajava. Nexata bajarabelia Judas pona pebarëcuaicuaijainexa bajarapamonae. Nexata Judas tsipaeba pacuenia rajutsijitsia Jesús bajarapamonae pecobeyabelia. <sup>5</sup> Nexata bajarapamonae barëya. Rajutsiapaebatsi palata. <sup>6</sup> Jëjai Judas. Nexata Judas Jesús naitaxutocaevetsia ponapona. Paepatota Judas toyapëxanepanatsi, perajutsinexa jane baja Jesús bajarapamonae pecobeyabelia. Bajarapacuenia Judas najamatabëxaina pexanaenexa itsajota bitso jivi apo navitsi.

*Pacuenia Jesús barënbane pijajivi pecopiarutsinabani baja pebeyaxuabivajënaetsi yabara pelivaisi*

*(Mt 26.17-29; Mr 14.12-25; Jn 13.21-30; 1 Co 11.23-26)*

<sup>7</sup> Junua jane baja pascuavënëfiesta, pafiestamatacabi jivi baxane levadurata matajërëabinejeva pexanaepan. Bajarapamatacabi ovejaxi babia pexaenexa pascua fiestamatacabi. <sup>8</sup> Nexata Jesús itoroba pijajivitonëbeje, Pedrobeje Juanbeje. Jesús jumaitsi pijajivitonëbejjavabelia:

—Paponarebeje paneexanaenexabeje vajaxaejavanexa. Xua jivi baxane pascua fiesta-matacabi, bajaraxua vajaxaenexa paexanaenamebeje, jai Jesús pijajivitonëbejejavabelia.

<sup>9</sup> Nexata Pedrobeje Juanbeje jumaitsibeje Jesúsjavabelia:

—¿Detsa jota jitsipame bajaraxua pataexanaenexabeje? ¿Detsajota bajaraxua xae-natsi? jai beje.

<sup>10</sup> Jesús nexata jumaiti pijajivitonëbejejavabelia:

—Tomarabelia ita papatsianamebeje, pacaxitajarabianamebeje mera canalito pecanajetarucaenë. Bajaraponë papënanajetarucaenamebeje. Pabota bajaraponë joneyojopaena, bajarapabota panapatsianamebeje. <sup>11</sup> Nexata pajumaitsimëbeje tsane bajarapabo pexainaenëjavabelia: “Vajanacacujarubinë raja Jesús jumaiti: ‘¿Detsa jota pënëyatuucutsibo eca, pabota tajajivi barëxaejitsianë xua jivi baxane pascua fiestamatacabi?’ jai raja Jesús,” pajamëbeje tsane bajarapabo pexainaenëjavabelia. <sup>12</sup> Nexata athëbëabetsia anijairabeje pexainaebojavata, pacatsitajëtsianabeje. Bajarapaboënëta, athëbëyotsia paira, ayaiënëtuatuajë tsane. Daxitacuene bajarajota xainaena. Nexata xua jivi baxane pascua fiestamatacabi, bajarajota paexanaenamebeje vajaxaenexa, jai Jesús pijajivitonëbejejavabelia.

<sup>13</sup> Nexata jane baja bajaraponëbeje ponabeje. Caxitajarababeje daxita pacuenia Jesús jumaiti. Nexata xua jivibaxane pascua fiestamatacabi, daxita Jesús pijajivi pebarëxaenexa, bajaraponëbeje exanabeje jane baja.

<sup>14</sup> Itsa baja copiajopa pexaeapatotanexa, Jesús, pijajivi doce ponëbeje, apóstolevi, yajava, eca mesa muxuneneta. <sup>15</sup> Nexata Jesús jumaiti pijajivijavabelia:

—Tatëpaevajënae bitso jitsipajë patacayajavaxaejava mapapascua fiestamatacabi pexaejavaje. <sup>16</sup> Xaniajanë pacuenia pacatsipaebijitsiatsi. Matavëjëa rabaja mapanacuataje apo xanë tsane pascua fiestamatacabi pexaejava. Matapania daxita patajajivimë Dioso ita pacacapanepaena panijaneconivecua, bajara jane icatsia matapania taxa Dioso pijanacuataatsia xanajë pascua fiestamatacabi pexaejava, jai Jesús pijajivijavabelia.

<sup>17</sup> Nexata Jesús copavënëjavata yapita pijajivi pebarëapaeranexa. Jesús jumaiti Diosojavabelia:

—Pexaniacuene panetoexaname. Panerajutame maporaje, jai Jesús.

Bajaraxuacujinae pijajivijavabelia jumaiti:

—Maporaje payapire. Papaema padaxitamë mapacopataje. <sup>18</sup> Xaniajanë pacuenia pacatsipaebijitsiatsi. Matavëjëa rabaja mapanacuataje apo apaenë tsane uvacuaire. Matapania ita copiajopaena daxita Dioso pijajivi pevetsimatacabi, apaenajë icatsia, jai Jesús pijajivijavabelia.

<sup>19</sup> Bajaraxuacujinae Jesús pita panbë. Jesús jumaiti Diosojavabelia:

—Pexaniacuene panetoexaname. Panerajutame pan, jai Jesús.

Bajaraxuacujinae epatsënëquejeba bajarapapanbë. Rajuta pijajivi. Jesús jumaiti pijajivijavabelia:

—Paxaema. Mara tavitoje, patacasivatëpaejava paxamënexa. Tatëpaecujinae mapacuenia paexanabianameje patanenajamatabënapitabiabinexamë, jai Jesús pijajivijavabelia.

<sup>20</sup> Nexata jane baja daxita Jesús pijajivi barë nabane. Penabanicujinae Jesús icatsia yapita pijajivi pebarëapaeranexa. Jesús jumaiti pijajivijavabelia:

—Dioso baja cajena najumecapanepaeya jumaiti pejanalivaisi papecacapanepaenexa bajaraponëjavabelia. Bajarapacuenia pacacapanepaena tajana pejamatabëcueneta. Tajana raja runaena papecacomuatsinexa pibisiacuene paneexanaeneconimivecua. Mapacapaejavataje padaxitamë papaema panenajamatabënapitabiabinexa pacuenia Dioso bajarapapejanalivaisita najumecapanepaeya jumaiti papecacapanepaenexa bajaraponëjavabelia, jai Jesús pijajivijavabelia.

<sup>21</sup> Icatsia Jesús jumaiti pijajivijavabelia:

Panejumetaema. Ponë necanajetsijitsia tajavajabitsaë pecobeyabelia, bajaraponë naeca mapamesa muxunenetaje. <sup>22</sup> Xanë, Daxitajivi Pematapijinënë, tēpaenajë pacuenia

tajëvelia Dioso netocopata. Itsiata baitsi jane ponë necanajetsiana tajavajabitsaë pecobeyabelia, bitso bejiobi tsane, jai Jesús.

<sup>23</sup> Nexata Jesús pijajivi najumai tsenae:

—¿De meta ponë vaxaitsiyajuvënënë, canajetsiana Jesús pijavajabitsaë pecobeyabelia? najai tsenae Jesús pijajivi.

*Pacuenia Jesús pijajivi: “¿Detsa ponë vaxaitsiyajuvënënë nacavecuaayaijamatabëcuenenë bitso?” najai yabara pelivaisi*

<sup>24</sup> Jesús pijajivi anaeya najumenotsiaya nalivaisita. Najumaitsi:

—¿Detsa ponë vaxaitsiyajuvënënë nacavecuaayaijamatabëcuenenë? najai Jesús pija-jivi.

<sup>25</sup> Nexata Jesús jumaitsi pijajivijavabelia:

—Nacuaevecsivi pacuenia jamatabëpacaitoroba panetoexanaenexa, ajumesaëya pacaitorobabiaba papijajivimë, bajarapamonae pevetsinacuanëjava panejinavanapaevi. Itsiata baitsi jane bajarapacuenia pacabejiobiaexanabiabi ata, bajarapamonae jitsipabiaba paxamë bajarapamonae yabara panejumaitsinexa: “Bajaraponë vajanacayanacuaevecsivënë, bitso pexaniacue ne nacatoexanabiaba,” panejainexa. <sup>26</sup> Pëtsa paxamë bajarapamonae cuenejëpaeya bepaayaijamatabëcuenenimë panataneme. Ponë raja peneta paxamëyajuvënënë daxita paxamë pacavecuaayaijamatabëcuenenë, bajaraponë peneta daxitajivi beprijajivitonëcuenia yavenonaena. <sup>27</sup> Mapanacuata petuxanenë itsa xaeyeca mesata, petuxanenë jamatabëcueneevetatsi pijajivitonë. Tsipaji petuxanenë ayaijamatabëcuenenë pijajivitonë matatoxenetsia. Itsiata xanë bajarapitsijamatabëcuenenë apo xainaenë. Ponaponajë paxamëjavata daxita paxamë bepanijajivitonënëcuenia patacayavenonaenexa, jai Jesús.

<sup>28</sup> Icatsia Jesús jumaitsi pijajivijavabelia:

—Pacuenia jivi nitoya, nebejiobiaexananua, bajarapacuenia paxamë ata patajajivix-aemë, pacaexana. Bajarapacuenia pacaexanae ata tsane, itsiata apo panenavecuacopabimë tsane. Tsitecaeya paneyajavajinavanapame. <sup>29</sup> Bajaraxuata nexata pacuenia taxa Dioso nitoroba jivi taevetsinexa, bajara pijinia pacuenia juya xanë ata paxamë pacaitorobatsi jivi paneevetsivinexa. <sup>30</sup> Nexata paxamë pacajamatabëcuenecaëjë-paena taevetsinacuatatsia tajamesata panenanabaninexa, panenamatavejëaapaenex-anua. Paenaename jueznëcuenia panenaneconitsiaexanaenexa pijaneconí pexainaevi. Nexata pananeconitsiaexanaename Israelpijinëmi pexi, doce ponëmibeje, pemomoxiya-juvënëvi, jai Jesús pijajivijavabelia.

*Pacuenia Jesús tajëvelia jumaitsi Pedrojavabelia: “Pedro, xamë raja nayavajunuaxainaename tajajivitonëcuenemë,” jai yabara pelivaisi*

(Mt 26.31-35; Mr 14.27-31; Jn 13.36-38)

<sup>31</sup> Jesús jumaitsi Pedrojavabelia:

—Simón, dovathi baja cajena jamatabëcapita xanëvecua. Bitso caja-matabëcuenenëjëbiana tanenavecuacopatsinexamë. Pacuenia arrozxainaenë arrozxu jëba pesi pevecuaxuabinexa, bajara pijinia pacuenia pecaxuabinexa xanëvecua cajamatabëcuenenëjëbiana dovathi. <sup>32</sup> Itsiata baitsi jane catovajëtatsi Diosojavabelia necopatsiyanima tanejumecovënëtsijavamë. Itsa navecuapaebianame nenaneconitsijava Diosojavabelia, nexata jane baja bajaraxuacujinae jamatabëcuenenë babataponaponaename Dioso pejumecovënëtsivi, jai Jesús Pedrojavabelia.

<sup>33</sup> Pedro nexata jumaitsi Jesúsjavabelia:

—Tajatuxanenë, najamatabëcueneveretajë baja. Penaneconitsivi pejebabiabibota caetsi ata, tanaponaponaenexa xamëta. Najamatabëcueneveretajë baja tacayjavatë-paenexanua, jai Pedro Jesúsjavabelia.

<sup>34</sup> Nexata icatsia Jesús jumaitsi:

—Pedro, xaniajanë pacuenia catsipaebijitsiatsi. Ajena, mapameravitaje, vacara pe-fiabivajënaeya nayavajunuaxainaename tajajivitonëcuenemë. “Xanë cajena apo yapë-taenë bajaraponë,” jamë tsane acueyabi xuabeje xanë yabara, jai Jesús Pedrojavabelia.

*Pacuenia baja itsa imoxoyo pevajënae Jesús pebeyaxuabinexatsi, tsipaeba pijajivijavabelia yabara pelivaisi*

<sup>35</sup> Jesús yanijoba pijajivijavabelia. Jesús jumaitsi mapacueniaje:

—Imata panamuto itsa pacaitorobatsi Dioso pejumelivaisi jivi daxitanacuanëjava panetsipaebanajetarubenaenexa, pacaitavetatsi panecaponaeyaniva doru, palata ata, zapato ata. ¿Bajarapamatacabi panamatavenoname tsaja itsacuenëjava? jai Jesús pijajivijavabelia.

Nexata Jesús pijajivi jumaitsi:

—Jume. Apo panamatavenonaenë cajena itsacuenëjava ata bajarapamatacabi, jai.

<sup>36</sup> Jesús nexata jumaitsi:

—Baja rajane aeconoxae panamuto, pajivi doru xaina, bajarapajivi caponae pijadoru. Palata ata caponae. Pajivi espada apo xinae, bajarapajivi penajumaxuabipana canajetsi. Comuatsi espada. <sup>37</sup> Xaniajanë pacuenia pacatsipaebijitsiatsi. Pacuenia xanë yabara Diosojumelivaisibaxutota tajëvelia jumaitsi, bajarapacuenia netocopiapatsiana. Dioso pejumelivaisibaxutota tajëvelia xanë yabara jumaitsi mapacueniaje: “Naneconitsiaex-anaenatsi bepibisiacuene pexanaenëcuenia,” jai tajëvelia xanë yabara Diosojumelivaisi-baxutota. Nexata bajarapacuenia imoxoyo baja pevajënae tanetocopiapatsinexa, jai Jesús pijajivijavabelia.

<sup>38</sup> Nexata Jesús pijajivi jumaitsi:

—Tajatuxanenë, mara anijaespadabejeje, jai Jesús pijajivi.

Nexata Jesús jumaitsi pijajivijavabelia:

—Xanëpana rabaja, jai Jesús.

*Pacuenia Jesús vajëta Diosojavabelia Getsemanívnëjavata yabara pelivaisi (Mt 26.36-46; Mr 14.32-42)*

<sup>39</sup> Jesús pitsapa bovecua. Pacuenia ponabiaba, bajarapacuenia icatsia pona petsuto-jumabelia. Patsutojumata olivonaenë apaaxayo, bajarapatsutojumabelia pona. Nexata Jesús pijajivi pënaponatsi. <sup>40</sup> Jesús pijajivi itsa barëpata bajarapatsutojumabelia, Jesús jumaitsi pijajivijavabelia:

—Pacajamatabëcuenejëbiana raja dovathi pejamatabëcueneta. Pavajëtaponare aeconoxae Diosojavabelia paneajamatabëcuenesaënexa panecopabiyanima patanejume-covënëtsijavamë, jai Jesús.

<sup>41</sup> Nexata Jesús pijajivi vecuanatixilia bejamatabëcuene treinta metro. Jesús nuca-junua pematabacabëta pevajëtaponanexa Diosojavabelia. <sup>42</sup> Jesús pevajëtsijavata jumai tsaponae Diosojavabelia:

—Taxa Diosomë, netocopatame picani tanebeyaxuabinexa betajibicueneta. Itsa jitsipame, necapanepare bajarapabejibicuenëvecua. Itsiata xanë apo tajitsipaecuene ata, pacuenia xamë jitsipame, netocopatsianame, jai Jesús pevajëtsijavata Diosojavabelia.

<sup>43</sup> Nexata Jesús athëbëpijiángel tsitanaitajëtatsi pejamatabëcuene asaëyaexanaenexatsi. <sup>44</sup> Jesús pebeyaxuabijavanexatsi yabara, bitso natsinajamatabëxaina. Nexata Jesús bitso orijibia asaëyata vajëtaponae Diosojavabelia. Jesús bitso janetatsi. Pacuenia itsi pijana, bajara itsi Jesús pejanetsibarëmenetsi. Topitopijai irabereca.

<sup>45</sup> Jesús pevajëtsicujinae itsa nonotapuna, lia pijajivijavabelia. Nexata Jesús pijajivi caxitajaraba pemajitanubenaevi. Tsipaji Jesús pijajivi bitso penajamatabëxainajava, cuerana. <sup>46</sup> Nexata Jesús jumaitsi pijajivijavabelia:

—¿Detsa xuajitsia pamajitanubename? Panonobapunare. Pavajëtaponare Diosojavabelia, dovathi pejamatabëcueneta pacajamatabëcuenejëbi ata paneajamatabëcuene-saënexa, jai Jesús pijajivijavabelia.

*Pacuenia Jesús vaetabatsi pijavajabitsaë yabara pelivaisi*  
(Mt 26.47-56; Mr 14.43-50; Jn 18.2-11)

<sup>47</sup> Jesús pijavajabitsaë pevaetabijavatanexatsi, cuaicuaijai tsanucæ pijajivijavabelia. Nexata bajarapaepatota jivi ayaibitsaëtoxaneto, Jesús petsimaxëponaevitsi, najetarubena. Ponë vënërubatsi Judas, Jesús pijajivi doce ponëbejeyajuvënënëmi, matacana-jetaruca bajarapamonæ. Nexata Judas najetabalia Jesúsjavabelia. Itabaratsutsuniaya bajacobatsi. <sup>48</sup> Nexata Jesús bajarajota jumaitsi Judasjavabelia.

—Judas, ¿matsa pacuenia nitabaratsutsuniaya nebajacobame xanë, Daxitajivi Pemat-pijinënë, tanecanajetsinexamë tajavajabitsaë pecobeyabeliaje? jai Jesús.

<sup>49</sup> Jesús pijajivi itsa tane pacuenia Jesús exanaejitsiatsi, nexata bajarapamonæ jumaitsi Jesúsjavabelia:

—Tajatuxanenë, ¿namaxëvanitsianatsi tsaja espadata? jai Jesús pijajivi.

<sup>50</sup> Nexata caenë Jesús pijajiviyajuvënënë namaxëvanita. Sacerdotevi pepo penamata-caitorobinë pijajivitonë muxuyoropaebiaxuaba pecujuanenia pamuxuyoroto. <sup>51</sup> Nexata Jesús jumaitsi pijajivitonëjavabelia:

—Copabare baja, jai Jesús.

Nexata Jesús bajaraponë muxuyororuta icatsia bajara-ponë. <sup>52</sup> Pamonaë Jesús tsimaxëpatatsi, itsamonæ sacerdotevi penamatacaitorobivi, itsamonæ templobopijipolicíavi penamatacaitorobivi, itsamonæ judíovi pijaancianovi. Bajarapamonæ caponaejitsiatsilia Jesús. Nexata Jesús jumaitsi bajarapamonæjavabelia:

—Paxamë meta panetaneme betanacobetoxotsinë. Bajaraxuata pacaponame espadanë, naebonë yajava, patanevaetabinexamë pacuenia pavaetababiabame penacobetoxotsinë. <sup>53</sup> Xanë caematacabi canacujitsia Dioso pejumelivaisi paxamëjavabelia pacatsipaebabiabatsi templobota. Itsiata bajarapamatacabi apo panevaetabimë. Nexata mapaepatotaje panetsimaxëpatame dovathi, jivi piajamatabëcuene itaquiriyaexanaenë, papecaitorobixæ, jai Jesús petsimaxëpatsivitsijavabelia.

*Pacuenia jane baja Pedro nayavajunuaxaina Jesús pijajivitonëcuene yabara pelivaisi*  
(Mt 26.57-58, 69-75; Mr 14.53-54, 66-72; Jn 18.12-18, 25-27)

<sup>54</sup> Jesús pevaetabicujinaetsi, caponaliatsi sacerdotevi pepo penamatacaitorobinë pijaboyabelia. Nexata Pedro bajarapamonæ pecovëvelia tajiyo pënanajetaruca. <sup>55</sup> Nexata pabota Jesús capatatsi, bajarajota, panabo tuatujëta, vajabitsaë isoto itajuruteta. Bajarapamonæ isoto matatoyorotsia ena. Pedro nexata naitaxutocaevetsiaya naeca bajarapamonæjavata. <sup>56</sup> Nexata bajarapabota penacuenebiva, Pedro itsa taeyetatsi penanonopecajavata isoto muxuneneta, naitaxutobabatsia asaëya taenucatsi. Nexata itsamonæjavabelia bajarapova jumaitsi Pedro yabara:

—Mara ponë ata Jesús pijajivitonëje, jai bajarapova.

<sup>57</sup> Nexata Pedro jumaitsi bajarapovajavabelia:

—Jume raja. Xanë cajena apo yapëtaenë bajaraponë, jai Pedro bajarapovajavabelia Jesús yabara.

<sup>58</sup> Bajaraxuacujinae icatsia itsajivi Pedro taeyetatsi. Bajarapajivi ata icatsia jumaitsi Pedrojavabelia:

—Xamë ata rabaja cajena Jesús pijajiviyajuvënënëmë, jai.

Nexata Pedro jumaitsi bajarapajivijavabelia:

—Jume raja. Xanë raja cajena apo Jesús pijajiviyajuvënënënë, jai Pedro.

<sup>59</sup> Bejamatabëcuene caehoracujinae, icatsia itsanë jumaitsi:

—Xaniajai rabaja cajena. Maponëje Jesússta naponaponaje. Tsipaji rabaja bajaraponë ata Galilea nacuapijinë, jai bajaraponë Pedro yabara.

<sup>60</sup> Nexata Pedro nayajumetane. Pedro nexata jumaitsi bajaraponëjavabelia:

—Apo yapëtaenë cajena pacuene yabara jumaitsimë, jai Pedro.

Bajarapacuenia Pedro pejumaitsijavata, vacara baja fiaba. <sup>61</sup> Nexata Jesús bov-erena namuxufeta Pedrojavaberena. Taeyerenatsi Pedro. Nexata bajarapaepatota

Pedro najamatabēnapitajaraba Jesús pejumlahitsijavatsi: “Pedro, ajena, mapameravitaje, vacara pefiabivajēnaeya nayavajunuaxainaename tajajivitonēcuenemē. ‘Xanē cajena apo yapētaenē bajaraponē,’ jamē tsane xanē yabara acueyabi xuabeje,” pejaijavatsi Jesús, najamatabēnapitajaraba Pedro. <sup>62</sup> Nexata baja Pedro pitsapalia bopanabovecua. Pinijicuenia nua.

*Pacuenia Jesús pijavajabitsaē capocaponatsi yabara pelivaisi*  
(Mt 26.67-68; Mr 14.65)

<sup>63</sup> Pamonae Jesús vaetabatsi, capocaponatsi. Itabaratsaquibabeponatsi pecobethaitonēta. <sup>64</sup> Papaēbērēpanata itaxutocētatsi. Pitaxutocētsicujinaetsi icatsia itabaratsaquibabeponatsi pecobethaitonēta. Nexata bajarapamonae jumai tsaponae Jesúsjavabelia:

—ǃVēnējonare ponē caitabaratsaquibaba! jai tsaponae.

<sup>65</sup> Pibisiacuenianua bajarapamonae jumai tsaponae Jesúsjavabelia.

*Pacuenia Jesús nutatsi judíovi penamatacaitorobivi pitabarata yabara pelivaisi*  
(Mt 26.59-66; Mr 14.55-64; Jn 18.19-24)

<sup>66</sup> Ajena baja matabi tsarucaponae, nacaetuata judíovi pijaancianovi, sacerdotevi penamatacaitorobivi yajava, judíovi pecujarubivi yajava. Nexata Jesús caponarenatsi bajarapamonae penacaetuatsijavaberena. Bajarajota bajarapamonae jumlahsi Jesúsjavabelia:

<sup>67</sup> —Panetsipaebare. ǃXamē tsabaja rovia Cristomē, athēbēvetsica Dioso pecaitorobinētsica jivi necapanepaenēnexa? jai bajarapamonae.

Nexata Jesús jumlahsi bajarapamonaejavabelia:

—“Xanē rabaja Cristonē, athēbēvetsica Dioso taneitorobinētsica jivi tacapanepaenexa,” pacajai atatsi tsipae, itsiata apo panejumecovēnētsimē tsipae.

<sup>68</sup> Itsalivaisiyo pacayanijobi atatsi tsipae, itsiata apo panejumecanaviatsimē tsipae. Apo panecopatsimēnua tsipae. <sup>69</sup> Itsiata baitsi jane tavajēnaeyabelia xanē, Daxitajivi Pematapijinēnē, ecaenajē taxa Dioso pecujuanenia patanajuavevetsinexabeje daxitacuene. Bajaraponē pecaējēpaenētsi daxitajamatabēcuene, jai Jesús bajarapamonaejavabelia.

<sup>70</sup> Nexata daxita bajarapamonae jumlahsi Jesúsjavabelia:

—ǃXamē tsabaja Dioso pexēnatomē? jai bajarapamonae.

Nexata Jesús jumlahsi bajarapamonaejavabelia:

—ǃJājā, xanē rabaja pacuenia panejumlahitsimē. Bajaraponēnē, jai Jesús.

<sup>71</sup> Nexata bajarapamonae najumlahitsi:

—Ajibi rabaja abaxē vajeavetaponaejava jivi neconitsiaya vajanacatsipaebaponaenexa pacuene yabara naneconitsiaexanaejitsiatsi maponēje. Vaxaitsi rabaja vajacuata jumetanetsi pacuenia maponēje cuaicuajai Dioso apo pejitsipaecuenia. Tsipaji beDioso pexēnato natane, najai bajarapamonae.

## 23

*Pacuenia Jesús nutatsi Pilato pitabarata yabara pelivaisi*  
(Mt 27.1-2, 11-14; Mr 15.1-5; Jn 18.28-38)

<sup>1</sup> Daxita judíovi pijaancianovi nonobapuna. Sacerdotevi penamatacaitorobivi ata nonobapuna. Judíovi pecujarubivi ata nonobapuna. Nexata bajarapamonae Jesús caponaliatsi itsaboyabelia, Judeanacua pevetsinē Pilato pijaboyabelia. <sup>2</sup> Bajarajota Pilato pitabarata bajarapamonae neconitsiaya jumlahsi Jesús yabara:

—Mara ponēje naneconita. Tsipaji muxubijiapenetapona jivi pianaepanaenexa nacuaevetsivijavabelia. Paneitavetaponanua patamatamotsiyaniva Romanonacua pepo pevetsinē pejamatabēcueneta impuestomatamo pataneyanijobijava. Jumai tsaponae: “Xanē raja Cristonē, nacua taevetsinē,” jai tsaponae maponēje, jai bajarapamonae Jesús yabara neconitsiaya Pilatojavabelia.

<sup>3</sup> Nexata Pilato jumaitsi Jesúsjavabelia:

—¿Xamë tsaja judíovi pepo nevetsinē? jai.

Nexata Jesús jumaitsi Pilatojavabelia:

—Jājā, xanē rabaja pacuenia nejumaitsimē, jai Jesús Pilatojavabelia.

<sup>4</sup> Pilato nexata jumaitsi sacerdotevi penamatacaitorobivijavabelia, jivi ayaibitsaëtox-anetojavabelia ata:

—Apo caxitajarabinē cajena itsacujiruneconi ata pexainaejava maponēje, paneconi yabara naneconitsijitsia, jai Pilato.

<sup>5</sup> Itsiata bajarapamonae ajumesaë. Orijibia neconitsia jumaitsi Jesús yabara:

—Bajaraponē daxita Judea nacuapijivi muxubijiapenetapona bajarapamonae pianaepanaenexa Judeanacua pevetsivijavabelia. Taxuxuaba cajena bajaraponē bajara-pacuenie pexanaejava Galilea nacuata. Nexata maberena ataje bajarapacuenia icatsia exanapona, jai bajarapamonae Jesús yabara Pilatojavabelia.

*Pacuenia Jesús nutatsi Herodes pitabarata yabara pelivaisi*

<sup>6</sup> Pilato itsa jumetane bajarapamonae peneconitsijavatsi Jesús, nexata Pilato jumaitsi bajarapamonaejavabelia:

—¿Matsa ponēje Jesús, Galilea nacuapijinēje? jai Pilato.

<sup>7</sup> Nexata bajarapamonae tsipaeba Pilatojavabelia Jesús Galilea nacuapijinēcuene. Nexata Pilato itoroba pijajivi Jesús pecaponaenexatsilia Herodesjavabelia. Tsipaji Herodes Galileanacua pevetsinē. Bajarapamatacabi Herodes ponapona Jerusalén tomarata.

<sup>8</sup> Nexata Herodes itsa tane Jesús, barēya. Tsipaji Herodes vënëlivaisitaeyabiaba Dioso pesaëta Jesús pinijicuene pexanaponaejavanē. Nexata Jesús pinijicuene pexanaejava Dioso pesaëta jamatabētane Herodes. <sup>9</sup> Nexata Herodes ayaicuenia yanijobapona Jesúsjavabelia. Itsiata Jesús apo jumepitsi caejumeyo ata. <sup>10</sup> Bajarajota nubena sacerdotevi penamatacaitorobivi, judíovi pecujarubivi yajava. Bajarapamonae ayai-jumeta neconitaponatsi Jesús Herodesjavabelia. <sup>11</sup> Nexata Herodes, pijajivi yajava, Jesús capocaponatsi. Bitso pexaniajava, xua nacuaevetsinē banaxatata, bajaraxua Jesús quenetsiataeya xatatatsi. Bajarapacuenia Jesús quenetsiataeya xatatatsi pepo nacuaevetsinēcuenia petaenexatsi. Bajaraxuacujinae icatsia canaviabarenatsi Pilatojavaberena. <sup>12</sup> Pilatobeje Herodesbeje naitoyabeje picani. Itsiata bajarapamatacabi nabarajamatabëcuenexanepanabeje. Naxaniababeje baja.

*Pacuenia baja Pilato tocopata Jesús pebeyaxuabinexatsi yabara pelivaisi*

*(Mt 27.15-26; Mr 15.6-15; Jn 18.39-19.16)*

<sup>13</sup> Pilato junata penacaetuatsinexa sacerdotevi penamatacaitorobivi. Junata penacaetuatsinexa judíovi pevetsivi ata. Junata penacaetuatsinexa bajarapatomarata pejinavanapaevi ata. <sup>14</sup> Nexata Pilato jumaitsi bajarapamonaejavabelia Jesús yabara:

—Paxamē panetocapatame maponēje. “Mara ponēje naneconita. Tsipaji muxubi-jiapenetapona jivi pianaepanaenexa nacuaevetsivijavabelia,” panejamē. Itsiata baitsi jane xanē picani tajacuata yanijobajē xaniavaetsia paneitabëta. Nexata xua yabara paneconitame, ajibi picani. Maponēje itsacujiruneconi ata apo xinae, paneconi yabara naneconitsijitsia. <sup>15</sup> Herodes ata apo naneconitsiaexanaetsi. Saya icatsia nacato-canaviarena. Pataneme rabaja. Itsacujiruneconi ata apo xinae maponēje, paneconi yabara beyaxuabijitsiatsi. <sup>16</sup> Nexata tajajivi itorobianajē bajaraponē saya tajajivi pe-jumaconibabenexa penaneconitsivi pejumaconibabeyabiabimacata. Bajaraxuacujinae copatsianajē, jai Pilato bajarapamonaejavabelia.

<sup>17</sup> Caevai canacujitsia, pascuavënë fiestamatacabi, Pilato copatabiaba caenē penaneconitsinē pepitsapaenexa penaneconitsivi pejebabiabibovecua. Pilato copatabiaba ponē jivi vajëtatsi pecopatsinexa. Nexata bajarapacuenia copatabiaba jivi pesivajamatabëcuene xanepanaenexatsi. <sup>18</sup> Nexata bajarapamonae itsa jumetane Pilato picani Jesús pecopatsiapaebijava, nexata daxita bajarapamonae caecuenia vavajai

Jesús yabara. Bajarapamonae pevavajaijavata, Jesús yabara jumaitsi Pilatojavabelia mapacueniaje:

—¡Majane ponë beyaxuareje! ¡Barrabás jane panetocapitsapare! jai bajarapamonae.

<sup>19</sup> Bajaraponë Barrabás Jesús pevajënaeya bajarapatomarata barënabia gobierno pija-jivijavabelia. Nexata Barrabás jivitonë beyaxuaba. Bjaraxuata naneconitsiaponapona penaneconitsivi pejebabiabibota. <sup>20</sup> Pilato picani jamatabëcopata Jesús. Bjaraxuata picani icatsia Pilato tsipaebijitsia jivijavabelia Jesús baja pecopatsinexa. <sup>21</sup> Itsiata baitsi jane bajarapamonae orijibia vavajai.

—¡Cruzajavabelia cobematabiabarutsiaexanare! ¡Cruzajavabelia cobematabiabarutsiaexanare! jai tsaponae bajarapamonae Pilatojavabelia.

<sup>22</sup> Icatsia Pilato jumaitsi bajarapamonaejavabelia:

—¿Detsa xuajitsia? ¿Detsa papibisiacuene exana maponëje? Apo caxitajarabinë cajena itsacujiruneconi ata, paneconi yabara beyaxuabijitsiatsi. Nexata tajajivi itorobianajë bajaraponë saya tajajivi pejumaconibabenexa penaneconitsivi pejumaconibabeyabiabimacata. Bjaraxuacujinae copatsianajë peponaenexa baja, jai Pilato.

<sup>23</sup> Itsiata bajarapamonae ajumesaë. Vavajai tsaponae.

—¡Cruzajavabelia cobematabiabarutsiaexanare! jai tsaponae bajarapamonae Pilatojavabelia.

Nexata bajarapamonae, sacerdotevi penamatacaitorobivi yajava, bitso pevavajait-saponaexae, belia baja Pilato jejai. <sup>24</sup> Nexata baja Pilato tocopata pacuenia bajarapamonae vajëtatsi. <sup>25</sup> Nexata Pilato itoroba pijajivi Barrabás, ponë jivitonë beyaxuaba, pecapitsapaenexatsi pepitsapaenexa baja penaneconitsivi pejebabiabibovecua. Caranata Jesús, planeconijibinë, pebeyaxuabinexatsi Pilato itoroba pijajivi.

*Pacuenia jane baja Jesús cruzajavabelia cobematabiabarutatsi yabara pelivaisi*  
(Mt 27.32-44; Mr 15.21-32; Jn 19.17-27)

<sup>26</sup> Vajabitsaë itsa caponaliatsi Jesús cruzajavabelia pecobematabiabarutsinexatsi, Simón pijinia najetaruca vayafoverena. Nexata vajabitsaë vaetabatsi Simón. Simón Cirene tomarapijinë. Nexata Simón vajabitsaë itorobatsi, pacruzajavabelia Jesús cobematabiabaruttsijitsiatsi, petocaponaenexa. Nexata bajarapacruza Simón tovëtacaranajetaruca Jesús pecovëya.

<sup>27</sup> Jesús pënanajetarubenatsi, jivi ayaibitsaëtoxaneto. Bjarapamonaejavuvënëvi, petiriavi ayaibitsaëto, Jesús bitso pënuayababuataponatsi ayaijumeta. <sup>28</sup> Nexata Jesús napënëyorota. Jumaitsi bajarapapetiriavijavabelia:

—Paxamë petiriavi, pajerusalén tomarapijivimë, pëtsa panepënuayabame xanë. Paxamë jane panatsinuema. Panexi ata patsinuema. <sup>29</sup> Itsa copiajopaena piayaimatacabi, jivi bitso bejiobi tsane. Nexata jivi jumai tsane: “Mavecovi itsiata bevelia nacatsunabejiobitane pexi apo pexainaexae,” jai tsane jivi bajarapamatacabi mavecovi yabara.

<sup>30</sup> Nexata bajarapamatacabi jivi bitso itsa nabejiobitaena, belia jitsipaena petëpaejava. Nexata jivi najumai tsane: “Vajatëpaenexa, nacatoxanepanaejitsipa pinijibotsutonë itsa nacamatacënëbajarabijitsipa,” najai tsane jivi. <sup>31</sup> Xanë itsacujiruneconi apo xainae atanë, nebejiobiaexanaena itsa necobematabiabarutsiana cruzajavabelia. Nexata pamona pibisiacuene pexanaevi bitso xanë matatoxenetsia, bejiobiaexanaenaenatsi itsa tocopiapatsianatsi piayaimatacabi, jai Jesús bajarapapetiriavijavabelia.

<sup>32</sup> Itsabelia vajabitsaë Jesús caponatsi, bajarabelia anijanëbeje penaneconitsinëbeje, Jesús yajava, caponatsi. Bjaraponëbeje pijamatabëcuenebejenëbeje vajabitsaë caponatsibeje Jesús peyajavabeyaxuabinexatsibeje. <sup>33</sup> Itsa baja capaliatsi Jivimataspavënë tsutojavabelia, nexata cruzajavabelia Jesús yjavacobematabiabarutatsi bajaraponëbeje. Itsanë rutatsi itsacruzata Jesús pecujuanenia. Itsanë rutatsi itsacruzata Jesús petsavenonenia. <sup>34</sup> Jesús baja cruzajavabelia pepuacobematabiabaruttsi, jumaitsi paxa Diosojavabelia:

—Axa, mapamonaaje itaxutotsoniataema. Vecuaxuare paneconi xaina pibisiacuene taneexanaexae mapacueniaje. Tsipaji raja apo yapëtae. Bajaraxuata mapacuenia nexanaje, jai Jesús paxa Diosojavabelia.

Nexata vajabitsaë, pamonae Jesús cobematabiabarutatsi cruzajavabelia, bajarajota namuxusita. Penamuxusitsijavaxi irata natsipenepeneta. Bajarapacuenia vajabitsaë penamuxusitsijavaxi canamuxusita peyapëtaenexa ponë pitaponaejitsia caejava canacujitsia Jesús penaxatatsijavami, xua jumaponapona. <sup>35</sup> Bajarajota daxitajivi taenubena. Judíovi pevetsivi Jesús capocaponatsi. Bajarapamonaë capocaponaeya jumaitsi Jesús yabara:

—Ëitsamonae yabara jumai tsabiabi: “Capanepaenajë jivi,” jai tsabiabi. Baja rajane pijacuata nacapanepae itsa xaniajai pepacuene Cristo, Dioso athëbëvetsica pitorobinëtsica jivi pecapanepaenexa, jai judíovi pevetsivi Jesús yabara.

<sup>36</sup> Vajabitsaë ata Jesús capocaponatsi. Nexata capocaponaeya cujibarenatsi. Rajutsijitsiatsi piajatuvinora piapaenexa Jesús. <sup>37</sup> Nexata vajabitsaë jumaitsi Jesúsjavabelia:

—Itsa xamë judíovi pepo nevetsinë, nexata nacapanepare nijacuata, jai vajabitsaë Jesúsjavabelia.

<sup>38</sup> Bajarajota Jesús pematobocoto matatsënëyo tablapajumata, Pilato pijajivi yaquinaruta acueyabi paviriavibeje pijajumeta. Itsaitane yaquinaruta griegojumeta. Itsaitane yaquinaruta latínjumeta. Itsaitane yaquinaruta hebreojumeta. Peyaquinarubiitane jumai tsarubi mapacueniaje: “Mara ponëje judíovi pepo pevetsinëje,” jai tsarubi Jesús yabara. <sup>39</sup> Itsanë piagamatabëcuenebejenë cruzajavabelia pecobematabiabarutsinëtsi, Jesús anaeya bijataerucatsi.

—Itsa xamë Cristomë, athëbëvetsica Dioso pecaitorobinëtsica jivi necapanepaenexa, nijacuata nacapanepare. Paxanëbeje ata panecapaneparebeje, jai tsarucacae Jesúsjavabelia.

<sup>40</sup> Itsanë pijinia itsacruzajavabelia pecobematabiabarutsinëtsi, jumeitavetaruca. Jumai tsarucacae penajuananeconitsinëbejejavabelia:

—¿Dioso tsaja apo cujunavimë netëpaenexa, cacobematabiabi ata nijaneconi yabara mapacueniaje? <sup>41</sup> Vaxaibeje rabiji vajaneconi xainatsibeje vajatëpaenexabeje. Nacarutabeje mapacueniaje pibisiacuene vajaexanaexaebeje. Mabiji ponëje caeto ata pibisiacuene apo exanae, jai tsarucacae bajaraponë jumeitavetsiaya penajuananeconitsinëbejejavabelia.

<sup>42</sup> Icatsia xuacujinae bajaraponë jumaitsi Jesúsjavabelia:

—Jesús, xanë nenajamatabënapitsianame pamatacabi xamë evetsianame mapanacuaje, jai bajaraponë Jesúsjavabelia.

<sup>43</sup> Nexata Jesús jumaitsi bajaraponëjavabelia:

—Xaniajanë pacuenia catsipaebijitsiatsi. Ajena, pamatacabi, neyjavaponaponaename paraísojavatatsia, jai Jesús bajaraponëjavabelia.

*Pacuenia baja Jesús tëpa yabara pelivaisi*

*(Mt 27.45-56; Mr 15.33-41; Jn 19.28-30)*

<sup>44</sup> Jesús baja itsa tëpaejitsia, matonejeepatota, daxita nacuanëjava aitaquiri tsajuni. Matapania acueyabi pahorabejecujinae, caniviyojavabelia, nacua napebeta icatsia.

<sup>45</sup> Paepatota Jesús tëpanajereca, bajarapaepatota templobo ënëtuatuajëalia pënëyatuucutarutsipana, ayaipapaëbërëpana, tuatuajëatsica tititicaica. <sup>46</sup> Nexata Jesús ayaijumeta jumaitsi Diosojavabelia:

—Axa, xamëjavabelia daxita tajamatabëcuene carajutatsi, jai Jesús.

Itsa baja Jesús najumevereta bajarapajume, tëpanajereca jane baja.

<sup>47</sup> Nexata Romano nacuapijinë, vajabitsaë pijacapitán, itsa tane daxita bajarapacuenia, bajaraponë Diosojavabelia jumaitsi:

—Diosomë, bitso ayaijamatabëcuenenëmë. Xaniajai tsaena baja. Maponë tëpaje, pianeconijibinë, jai vajabitsaë pijacapitán.

<sup>48</sup> Daxita pajivibitsaëtoxaneto taenubena pacuenia Jesús jumaliverevereca, bajaramonae bitso najamatabëxainaeya naviaba pijabonëjavabelia. <sup>49</sup> Daxita pamonae Jesús peyapëtaevitsi, pebijivi, petiriavi ata, pamonae Galilea nacuaverena pënaponatsi, tajijojavaverena taenubena, petaenexa Jesús pebeyaxuabijavatsi.

*Pacuenia Jesús petëpaenë buatatsi ibovajualia yabara pelivaisi*  
(Mt 27.57-61; Mr 15.42-47; Jn 19.38-42)

<sup>50</sup> Jerusalén tomarata nonapona José, Arimatea tomarapijinë. Bajaraponë pexania-jamatabëcuenenë, xaniavaetsia peponaponaenë Dioso pitabarata. Bajaraponë judíovi pevetsinë. <sup>51</sup> José copiaevetapona pecopijopaejava pamatacabi caenë Dioso evetsijitsia daxita pijajivi mapanacuataje. Nexata José apo jamatabëcuenejëpae pacuenia judíovi exana Jesúsjavabelia. <sup>52</sup> José nexata lia nacuaevetsinë Pilatojavabelia. Vajëta petocopatsinexatsi pemëthëtsinexa petëpaenë Jesús. <sup>53</sup> Bajaraxuacujinae José cruza-javavetsica pitsica Jesús petëpaenë. Daxitanëreca mataquionaeya matacacëba pexani-aviria piapiasábanapanata. Nexata cajena itsajota José iboítapajanitovavata pinijibovaju toexanabuatatsi petëpaevi pebuataponaenexa, bajarapaibovajualia buata Jesús petëpaenë. Bajarapavajualia abaxë itsajiviyo ata petëpaejiviyo José apo buatsi. <sup>54</sup> Pamatacabi José bajarapacuenia vajëta Pilatojavabelia Jesús petëpaenë pemëthëtsinexa, bajarapamatacabi judíovi penacuenebijava banacuenevereta baja pecopijonevajënaeya penacueraevetsimatacabinexa. Nexata paepatota José ibovajualia buata Jesús petëpaenë, bajarapaepatota José baja tocopiapataponatsi penacueraevetsimatacabinexa.

<sup>55</sup> Papatiriavi Jesús pënaponatsi Galilea nacuaverena, bajarapapetiriavi tajiyó José pecovëya najetarubena. Nexata bajarapapetiriavi tane Jesús petëpaenë José pebuatsijava bajarapaibovajualia. <sup>56</sup> Bajaraxuacujinae bajarapapetiriavi naviaba baja pijaboyabelia. Nexata pepatsicujinae pijaboyabelia, bajarapapetiriavi xaniavaeta pexaniapetuxujuvira, pexaniapetuxujuvitsapato yajava, Jesús petëpaenë peperabëexabinexa. Nexata abaxë bajarapapetiriavi nacueraeveta judíovi penacueraevetsimatacabita pacuenia itorobatsi Dioso Moiséspijinëta bajayata penajumecopatsilivaisi.

## 24

*Pacuenia Jesús petëpaecujinae icatsia asaë yabara pelivaisi*  
(Mt 28.1-10; Mr 16.1-8; Jn 20.1-10)

<sup>1</sup> Judíovi baja penacueraevetsimatacabi verevereca. Nexata meravia pitsijavata, ajena juameto pitsapaina, papetiriavi xaniavaeta pexaniapetuxujuvijava, icatsia ponalia Jesús petëpaenë pebuatsiibovajutsijavabelia. Patuxujuvijava xaniavaeta Jesús petëpaenë peperabëexabinexa, caponalia Jesús petëpaenë peperabëexabinexa jane baja picani. Itsapetiriavi yajava ponalia peyanabinexatsi. <sup>2</sup> Itsa baja palia, nexata bajarapapetiriavi tane Jesús petëpaenë pebuatsiibovajutsi peyavëpaacatsiibopanaxanetomi petixitanutsijavalia. <sup>3</sup> Bajarapamonae joneya picani Jesús pebuatsiibovajutsijavalia. Itsiata baitsi jane apo caxitajarababuatsi petëpaenë, pepo petuxanenë Jesús. <sup>4</sup> Nexata bajarapapetiriavi bitso jamatabëcuenenajunaviaca. Apo yapëtae pacuenia exanaejitsia. Bajarajota nexata bajarapapetiriavi taenuta anijanëbeje ángelnëbeje. Bajaraponëbeje penaxatatsijavabeje nivenivena bitso. <sup>5</sup> Bajarapapetiriavi bitso cununava bajarapaángelnëbeje. Nexata pecajunavi pematabacabëta irataeya bobena. Nexata bajarapaángelnëbeje jumaitsi petiriavijavabelia:

—¿Detsa xuajitsia petëpaenë pebuatsijavatatsi, pajaitame? Bajaraponë asaë baja icatsia. <sup>6</sup> Bajaraponë majotaje ajibi baja tsarucae. Dioso rabaja icatsia asaëyaexanatsi. Panajamatabënapire pacuenia pacatsipaeba Galilea nacuata pamatacabi abaxë asaë tsaponapona. <sup>7</sup> Bajaraponë baja cajena tajëvelia pacajumaitsi: “Xanë, Daxitajivi Pematapijinënë, necanajetsiana pibisijamatabëcuenevi pecobeyabelia. Nexata bajarapamonae cruzajavabelia necobematabiabarutsiana tanebeyaxuabinexa. Itsiata baitsi jane tanebeyaxuabicujinae, acueyabi matacabita, icatsia asaënë tsane,” pacajai

baja cajena tajëvelia Jesús ita abaxë pamatacabi pacayajavaponapona, jai ángelnëbeje petiriavijavabelia.

<sup>8</sup> Nexata bajarapapetiriavi najamatabënapita pacuenia Jesús tajëvelia jumaitsi.

<sup>9</sup> Nexata baja bajarapapetiriavi naviabarena Jesús petëpaenë pebuatsiibovajutsijavav-  
erena. Nexata bajarapapetiriavi tsipaeba daxita bajarapacuene yabara once ponëbeje,  
Jesús pijaapóstolevijavabelia. Tsipaebanua daxita itsamonae Jesús pijajivijavabelia  
ata. <sup>10</sup> Bajarapapetiriavijavuvënëvi itsava Maríavënëva. Bajarapova Magdala tomara-  
pijiva. Itsava pijinia Juanavënëva. Itsava pijinia icatsia Maríavënëva. Bajarapova  
Santiago pena. Itsapetiriavi yajava tsipaeba bajarapacuene yabara apóstolevijavabelia.  
<sup>11</sup> Bajarapapetiriavi apóstolevijavabelia tsipaebi ata bajarapacuene yabara, itsiata após-  
tolevi apo jumexaniataetsi. Apóstolevi saya bajarapalivaisi yabara jamatabëjumaitsi:  
“Saya meta bajarapapetiriavi pijacuata exana bajarapalivaisi,” jamatabëjai apóstolevi.

<sup>12</sup> Itsiata baitsi jane Pedro pitsapalia bovecua. Nexata cujinaejinalia Jesús petëpaenë  
pebuatsiibovajutsijavabelia. Nexata Pedro bajarapabovajualia ita naëcolia, taeyejeba  
pebobenaeyava bajarajota daxitanëreca Jesús mataquionaeya pematacacëbipanamit-  
sireca. Nexata baja Pedro naviata boyaberena. Najamatabëxaina bajarapacuene yabara.

*Pacuenia Jesús petëpaecujinae icatsia ita asaë, pijajivitonëbeje pëcaxitajarabaxuaba, Emaús  
tomarabelia peponaenëbeje, yabara pelivaisi*

*(Mr 16.12-13)*

<sup>13</sup> Pamatacabi bajarapapetiriavi tane ángelnëbeje, bajarapamatacabi Jesús pijajivi-  
tonëbeje Jerusalén tomaravelia naropotabeje. Ponabeje Emaús tomarabelia. Ba-  
jarapatomara eca once pakilómetrobeje Jerusalén tomaravecua. <sup>14</sup> Bajaraponëbeje  
baracuaicuaijabeje tsanajetarucæ daxita pacuene copiapata. <sup>15</sup> Itsa abaxë bajarapali-  
vaisi cuaicuaijai tsanucaponaebeye, Jesús pëcaxitajarabalia. Nexata Jesús muxuneniana-  
jetaruca bajaraponëbeje. <sup>16</sup> Bajaraponëbeje tae atabeje Jesús, itsiata apo yapëtaebeye  
Jesúscuene. <sup>17</sup> Nexata Jesús yanijoba bajaraponëbejejavabelia. Jesús jumaitsi:

—¿Detsa pitsicuene pabaracuaicuaijamëbeje tsanucaponaenamutua? ¿Detsa xuajitsia  
bepajamatabëcuenejibimëbeje? jai Jesús bajaraponëbejejavabelia.

<sup>18</sup> Bajaraponëbeje itsanë pevënë Cleofas. Nexata Cleofas jumaitsi Jesúsjavabelia:

—Daxitajivi baja cajena yapëtane pacuene copiapata Jerusalén tomarata mapamata-  
cabitaje. ¿Xamë tsaja caenëmë apo nijanayapëtae bajarapacuene, naponaponaenatamë  
bajarapatomarata? jai Cleofas caranata Jesúsjavabelia.

<sup>19</sup> Nexata Jesús jumaitsi bajaraponëbejejavabelia:

—¿Detsa pitsicuene copiapata? jai.

Nexata icatsia bajaraponëbeje jumaitsi Jesúsjavabelia:

—Jesúspijinë raja, Nazaret tomarapijinëmi, profetanëmi. Piniijicuene exanapona  
Dioso pesaëta. Bitso xaniavaetsia jivi pexanialivaisi tsipaebapona. Nexata daxi-  
tajivi sivajamatabëcuenebarëya bajaraponëmi. Dioso ata sivajamatabëcuenebarëy-  
atsi. <sup>20</sup> Nexata sacerdotevi penamatacaitorobivi, vajanacaevetsivi yajava, canajetatsi  
Jesúspijinëmi. Canajetaxuabatsi Jesúsijinë cruzajavabelia pecobematabiabarutsinex-  
atsi pebeyaxuabinexatsi. <sup>21</sup> Paxanë picani bajaraponëmi yabara pajamatabëjumaitsinë:  
“Bajaraponë nacavecuacapitsapaena itsanacuaverena pepatsivi, pamonaenapo judíovi,  
vajanacayanacuaevetsijavavecua pepitsapaenexa,” pajamatabëjanë tsavanapae picani  
Jesúspijinë yabara. Nexata Jesúsijinë pebeyaxuabicujinaetsi, ajena baja xaina acueyabi  
pamatacabibeje. <sup>22</sup> Paxanëyajuvënëvi, petiriavi, ajena, bajayacunua, panenabenaja-  
caeyaexana. Bajarapamonae bajayacunua, ajena juameto pitsapaina, ponalia Jesús  
petëpaenë pebuatsiibovajutsijavabelia. <sup>23</sup> Itsiata apo caxitajarababuatsi bajarajota  
Jesús petëpaenë. Nexata bajarapapetiriavi naviabarena. Bajarapamonae panetsipaeba  
pacuenia bemajitsinaebota tane ángelnëbeje. Angelnëbeje pina nexata jumaitsiibeje  
petiriavijavabelia: “Jesús rabaja asaë tsaponaponaen icatsia,” jai pina. <sup>24</sup> Nexata itsa-  
monae paxanëjuvënëvi pona Jesús petëpaenë pebuatsiibovajutsijavabelia. Nexata tane

pacuenia baja petiriavi panetsipaeba. Jesús itsiata petëpaenë apo taeyabuatsi, jaibeje Jesúsjavabelia Emaús tomarabelia peponaenëbeje.

<sup>25</sup> Nexata Jesús jumaitsi bajaraponëbejejavabelia:

—¡Paxamëbeje saya paneajamatabëcuenetajanëbeje! Apo pajumecovënëtsimëbeje daxita profetavi peyaquinaelivaisianë. <sup>26</sup> Nexata apo payapëtaemëbeje pacuenia Cristo, Dioso athëbëvetsica pitorobinëtsitsica jivi pecapanepaenexa, copiaya bitso bejiobiaexanaejitsiatsi peponaevajënaeya paxa Diosojavabetsia athëbëtatsia paxa pemuxuneneta peecaenexa, nayabarajai Jesús bajaraponëbejejavabelia.

<sup>27</sup> Nexata Jesús xaniavaetsia navajunupaeba bajaraponëbejejavabelia daxita pacuenia Dioso pejumelivaisibaxutota tajëvelia jumaitsi Jesús yabara. Taxuxuaba jane baja penavajunupaebijava pacuenia Moiséspijinë peyaquinaebaxutota tajëvelia jumaitsi Jesús yabara. Bajaraxuacujinae icatsia navajunupaeba pacuenia daxita itsaprofetavi peyaquinaebaxutonëta ata jumaitsi Jesús yabara.

<sup>28</sup> Itsa baja imoxoyotanajetarubena patomarata bajaraponëbeje patsijitsiabeje, Jesús itajara rovia bepeponaejitsia bajaraponëbejevecua. <sup>29</sup> Nexata bajaraponëbeje bitso asivabeje Jesús penajuamajitsinexa bajarapatomarata. Jumaitsidebeje bajaraponëbeje Jesúsjavabelia:

—Namajire abaxë mapatomarataje. Caniviyo rabaja bitso. Meravijitsia rabaja, jaibeje bajaraponëbeje Jesúsjavabelia.

Nexata baja Jesús najoneya pabota bajaraponëbeje patabeje. <sup>30</sup> Itsa bajaraponëbeje yajavaecabeje mesa muxuneneta, Jesús pita panbë. Jumaitsi paxa Diosojavabelia:

—Pexaniacuene panetoexaname. Panerajutame pan, jai Jesús.

Bajaraxuacujinae epatsënëquejeba panbë. Rajutatsi bajaraponëbeje. <sup>31</sup> Bajarajota matapania bajaraponëbeje yapëtanebeje Jesús cuene. Itsiata baitsi jane bajarajota vecuacaevatsibeje Jesús. Apo taebeje baja matavëjëa.

<sup>32</sup> Nexata bajaraponëbeje najumaitsidebeje:

—Namutua vajanacanavajunu paebanucaponaejavatabeje pacuenia jumaitsi Diosojumelivaisibaxutota, bitso muxunajamatabëcuenenarëyatsibeje, najaiibeje bajaraponëbeje.

<sup>33</sup> Nexata bajarajota bepimia naropotabeje Emaús tomaravecua. Naviatabeje baja Jerusalén tomarabelia. Nexata Jerusalén tomarabelia itsa patabeje, caxitajarababeje penacaetuatsijavata once ponëbeje apóstolevi, itsamonae yajava Jesús pijajivi. <sup>34</sup> Nexata penacaetuatsivi jumaitsi bajaraponëbejejavabelia:

—Xaniajai baja cajena. Vajatuxanenë icatsia asaë tsaponaponae. Simón baja tsitanaitajëtatsi, jai bajarapamonae.

<sup>35</sup> Nexata ponëbeje Emaús tomaraverena patabeje, tsipaebabeje bajarapamonaejavabelia pacuenia namutoepatualia pëcaxinatsibeje Jesús. Tsipaebabejenua pacuenia matapania yapëtanebeje Jesús cuene, pitabëta itsa epatsënëquejeba panbë.

*Pacuenia Jesús petëpaecujinae tsitanaitajëta pijajivijavabelia yabara pelivaisi (Mt 28.16-20; Mr 16.14-18; Jn 20.19-23)*

<sup>36</sup> Ponëbeje Emaús tomaraverena patabeje, tsipaebabeje Jesús pijajivijavabelia pacuenia tanebeje Jesús Emaús tomaratalia. Nexata bajarapaepatota Jesús tsitanaitajëta pijajivijavabelia. Jesús jemata nuca pijajivi tuatujëta. Jesús bajacoba pijajivi.

<sup>37</sup> Nexata Jesús pijajivi bitso nabenajaca.

—Petëpaenëmi raeta pejumape maje, jamatabëjai bajarapamonae Jesús yabara.

<sup>38</sup> Nexata Jesús jumaitsi pijajivijavabelia:

—¿Detsa xuajitsia pajunavame? ¿Detsa xuajitsia panejamatabëthëtota pajumeabame icatsia tasaëjava? <sup>39</sup> Panecobetaema. Tataxubeje ata pataema. Xanë rabaja maje. Panejayabare. Paneyorobarenu xaniavaetsia. Petëpaenëmi raja peneta pejumape avijibi. Asijibinua. Apo perabëitsi cajena pacuenia xanë perabëitsinë, jai Jesús pijajivijavabelia.

<sup>40</sup> Jesús itsa jumaitsi mapacueniaje, nacobeitajëta pijajivijavabelia. Nataxuitajëta yajava. <sup>41</sup> Jesús pijajivi bitso tsitapexaniacuenetsi. Itsiata baitsi jane Jesús pijajivi abaxë apo jumexaniatae xaniavaetsia Jesúscuene. Jesús nexata jumaitsi pijajivijavabelia:

—¿Paxainame tsabaja itsacueneyavayo patanerajutsinexamë taxaenexa? jai Jesús.

<sup>42</sup> Nexata Jesús pijajivi rajutatsi pesebidujuaijavayo, jabëperiyo yajava. <sup>43</sup> Pita baja Jesús. Nexata Jesús pijajivi pitabarata xane. <sup>44</sup> Nexata Jesús jumaitsi pijajivijavabelia:

—Mapacuenene taneexanaejavanexa yabaraje, pacatsipaebabiabatsi baja cajena tajëvelia pamatacabi abaxë pacayajavaponaponatsi. “Pacuenia bajayata tajëvelia xanë yabara jumaitsi Moiséspijinë peyaquinaebaxutota, Diosojumepaebivimi profetavi peyaquinaebaxutota ata, Salmosvënëbaxutota ata, bajarapacuenia netocopiapatsiana,” pacajaitsi tsabiabi baja cajena pamatacabi abaxë pacayajavaponaponatsi. Daxita rabaja bajarapacuenene netocopiapata jane baja, jai Jesús pijajivijavabelia.

<sup>45</sup> Nexata Jesús pijajivi jamatabëcuenecaëjëpaeyaexana Jesús pijajivi xaniavaetsia pejumeyapëtaenexa pacuenia Dioso pejumelivaisibaxutota tajëvelia jumaitsi Jesús yabara.

<sup>46</sup> Jesús jumaitsi pijajivijavabelia mapacueniaje:

—Dioso pejumelivaisibaxutota tajëvelia jumaitsi pacuenia xanë, Cristonë, athëbëvetsica Dioso taneitorobinëtsica jivi tacapanepaenexa, nebejobitsiaya nebeyaxuabijitsia. Jumaitsinua pacuenia tatëpaecujinae, acueyabi matacabita, icatsia Dioso ni-asaëyaexanaejitsia tatëpaejavavecu. <sup>47</sup> Jumaitsinua pacuenia patajajivimë tajumelivaisi patsipaebaponaejitsiamë daxitajivijavabelia. Nexata tajumelivaisi patsipaebaponaename daxitajivi penajamatabëcuenepënëyorotsinexa Diosojavabelia, pibisiacuenene pexanaeneconimi pevecuaajibiaexanaenexatsi Dioso. Copiaya Jerusalén tomarata pataxuxuabianame panetsipaebijava. Bajaraxuacujinae patsipaebanajetarubenaename daxitanacuanëjava. <sup>48</sup> Paxamë rabaja pataneme daxita pacuene netocopiapata. Nexata jivi patsipaebaponaename daxita bajarapacuenene yabara. <sup>49</sup> Espíritu Santo, ponë taxa Dioso najumecapanepaeya pacarajutsiapaeba, pacatoitorobianicatsi papecatsijamatabëjonenexa. Abaxë pajinavanapaename majotaje Jerusalén tomarata. Matapania Dioso athëbëvetsica pacajamatabëcuene caëjëpaeyaexanaena pinijicuenene panexanaponaenexa, paponaname jane baja tajumelivaisi jivi panetsipaebanajetarubenaenexa daxitanacuanëjava, jai Jesús pijajivijavabelia.

*Pacuenia Jesús petëpaecujinae icatsia itsa asaë, tsia baja athëbëabetsia yabara pelivaisi (Mr 16.19-20)*

<sup>50</sup> Jesús pijajivi matalalia Betania tomarabelia. Jesús nacobeyotsiaya pijajivi tovajëcanuca Diosojavabelia Jesús pijajivi peyavenonaenexatsi Dioso. <sup>51</sup> Nexata saya bajarajota Jesús pijajivi athëbëabetsia baja vecuapona. Jesús baja Dioso caponatsi athëbëabetsia.

<sup>52</sup> Jesús pijajivi jamatabëjumaitsi:

—¡Vajatuxanenë bitso ayaijamatabëcuenenë! jamatabëjai.

Bajaraxuacujinae Jesús pijajivi barëyaya naviaba Jerusalén tomarabelia.

<sup>53</sup> Templobojavabelia Jesús pijajivi joneyabiaba pevajëcabiabinexa Diosojavabelia. Jesús pijajivi pexaniajamatabëcuene rajutabiaba Diosojavabelia.

## Pexanialivaisi Jesucristo pelivaisi, San Juan peyaquinaelivaisi

*Pacuenia vaxaitsi banaexanatsi mapanacuataje, bajarapacuenia Cristo penaexanaejava mapanacuataje paxa Dioso pejamatabëcuenelivaisi itajëtsinexa yabara pelivaisi*

<sup>1</sup> Itsa abaxë ajibi itsacuenejavayo ata mapanacuataje, Cristo baja cajena ponapona athëbëtatsia. Cristo raja paxa Dioso pejamatabëcuenelivaisiitajëtsinë jivijavabelia. Cristobeje paxa Diosobeje najuaponaponabeje. Cristo ata rabaja Dioso baja cajena. <sup>2</sup> Daxitacuene baja cajena pexanaejava petaxuxuabivajënaeya ata, Cristobeje paxa Diosobeje najuaponaponabeje. <sup>3</sup> Cristo baja cajena daxitacuene mapanacuapijicueneje exana. Exana athëbëpijicuene ata. Bajarapacuenia exanaeyaexanatsi paxa Dioso. Bajaraxuata itsacuenejavayo ata apo vecuaexanaetsi itsanë ata. <sup>4</sup> Cristo baja cajena rajuta piasaëjumali daxitacueneviria mapanacuataje. Cristo baja cajena bepecotia picani. Nexata jivi jamatabëcueneitayota pexaniajailivaisita. <sup>5</sup> Pacuenia pecotia itayota piaitaquirijavata, bajarapacuenia Cristo petsipaebilivaisita jivi jamatabëcueneitayota. Nexata dovathi, jivi piamatabëcuene itaquiriyaexanaenë, apo caëjëpaetsi peverevere-caeyaexanaenexa bajarapalivaisi.

<sup>6</sup> Nexata Dioso itoroba caenë pebi. Bajaraponë pevënë Juan. <sup>7</sup> Nexata Juan pona petsipaebinexa jivijavabelia Cristo pelivaisi. Nexata Juan tsipaeba daxitajivi pejumetaenexa Cristo pelivaisi, pejumecovënëtsinexanua. <sup>8</sup> Juan raja jivi apo pejamatabëcueneitayotsinë. Juan raja pona saya jivi petsipaebanajetarucaenexa xaniavaetsia Cristo pelivaisi. <sup>9</sup> Bajaraponë Cristo jamatabëcueneitayotsiana daxitajivi. Bajaraponë xaniajai jivi pejamatabëcueneitayotsinë. Bajaraponë Cristo patsica baja mapanacuayabetsicaje.

<sup>10</sup> Cristo, ponë paxa Dioso jamatabëcuenelivaisiitajëta jivijavabelia, ponapona baja mapanacuataje. Itsiata baitsi jane mapanacuapijivi apo yapëtae bajaraponë mapanacua pexanaenëcueneje. <sup>11</sup> Cristo patsica pexanaenacuayabetsica. Itsiata baitsi jane mapanacuapijivi apo jumecovënëtsitsi Dioso pexënatocuene. <sup>12</sup> Itsiata itsamonae jumecovënëtatsi. Nexata Cristo tocopata bajarapamonae paxa Dioso pexi pexanaenexatsi. <sup>13</sup> Bajarapamonae penaexanaematacabi, abaxë Dioso pexicuenia apo taetsi. Pebi petiriva pepitsicujinae, pexi itsa jamatabëxainabeje, pexi xainabeje. Itsiata bajarapamonae itsa naexana, abaxë Dioso apo pexi. Matapania pacuenia Dioso tojitsipatsi, bajarapamonae itsa jumecovënëta Cristo Dioso pexënatocuene, Dioso pexi exanatsi.

<sup>14</sup> Cristo, paxa Dioso pejamatabëcuenelivaisi itajëtsinënexa jivijavabelia, itsa patsica mapanacuayabetsicaje, naexana pacuenia vaxaitsi baexanatsi mapanacuataje. Nexata bajarapacuenia Cristo ponapona vaxaitsi tuatujëta. Bajaraponë vënërubatsi Jesús. Paxanë payapëtaniji Cristo ayaijamatabëcuenenëcuene. Tsipaji pataniji pinijicuene pexanaejavanë. Bajaraponë Cristo, pepo caenë Dioso pexënato. Pinijicuenia asiva mapanacuapijivije. Cuaicuajai ëpexaniajailivaisi. <sup>15</sup> Bajaraxuata Juan, Jesús itsa vajunupaebanajetaruca jivijavabelia, jumai tsanajetarucacae mapacueniaje:

—Baja rajane maponë yabara pacajumaitsitsije: “Ponë tacovëverena patsiana, bajaraponë bitso xanë nevecuaayaijamatabëcuenenë. Tsipaji baja cajena tanaexanaevajënaeya ata bajaraponë ponapona,” jai tsanajetarucacae Juan jivijavabelia Jesús yabara.

<sup>16</sup> Bajaraponë Jesús cajena pepo pexaniajamatabëcuenenë. Pexaniacuene nacatoexanabiaba. Nacayavenonabiaba. <sup>17</sup> Bajayatami baja cajena picani Dioso Moisésipijnëta najumecopata jivi pejumecovënëtsinexa. Itsiata baitsi jane mapamatacabita Jesucristo patajopaica mapanacuayabetsicaje vajanacatsipaebinexa paxa Dioso vajanacaasivajava, vajanacatsipaebinexanua pexaniajailivaisi. <sup>18</sup> Itsajivi ata vaxaitsiyajuvënëjivi Dioso apo tae. Bajaraxuata apo yapëtaetsi pacuenia Dioso jamatabëcuenelivaisiitsi. Itsiata

caenë Dioso pexënato, ponëbeje najuaponaponabeje, bajaraponë nacayapëtaeyaex-  
anaica pacuenia jamatabëcuenelivaisiitsi paxa Dioso.

*Pacuenia Juan jivibautisabinë Jesucristo pelivaisi xaniavaetsia tsipaebanajetaruca jivijav-  
abelia yabara pelivaisi*

*(Mt 3.11-12; Mr 1.7-8; Lc 3.15-17)*

<sup>19</sup> Judíovi, Jerusalén tomarapijivi, Juanjavabelia itoroba sacerdotevi, itsamonae tem-  
plobo pevetsivi yajava, bajarapamonae peyanijobinexa Juanjavabelia. Nexata bajarapa-  
monae itsa pata Juanjavabelia, yanijoba Juanjavabelia. Jumaitsi:

—¿Jipatsamë xamë? ¿Xamë tsaja Dioso pecaitapetsinë? jai bajarapamonae Juanjav-  
abelia.

<sup>20</sup> Juan nexata bajarapamonaejavabelia xaniavaetsia roviafia navajunupaeba. Jumaitsi:  
—Xanë ra apo Cristonë, ponë Dioso athëbëvetsica itorobijitsiatsica jivi peca-  
panepaenexa, jai Juan.

<sup>21</sup> Nexata icatsia matavëjëa yanijobatsi.

—¿Detsa nexata ponëmë? ¿Xamë tsaja profeta Elíaspijinëmë, ponëmi bajayata  
ponapona? jai bajarapamonae Juanjavabelia.

Nexata Juan jumaitsi:

—Jume raja. Xanë raja bajara apo ponënë, jai Juan.

Nexata icatsia yanijobatsi matavëjëa.

—¿Xamë tsabaja nexata profetanëmë? ¿Xamë tsabaja pacacopiaevetavanapatsi  
nepatsijavanexatsica? jai bajarapamonae Juanjavabelia.

Nexata icatsia Juan jumaitsi:

—Jume raja. Xanë raja apo bajaraponënë, jai.

<sup>22</sup> Nexata bajarapamonae jumaitsi:

—¿Detsa nexata ponëmë? Pajitsipajë patanenavajunupaebinexamë xaniavaetsia  
patayapëtaenexa ponëcuenemë patatsipaebinexa patanitorobivijavabelia. ¿Detsa nex-  
ata pacuenia navajunupaebianame? jai bajarapamonae Juanjavabelia.

<sup>23</sup> Juan nexata jumaitsi bajarapamonaejavabelia:

—Xanë raja saya petusato nacuata itsa jumelivaisipaebajë, tavavajainë: “Panaja-  
matabëcuenexaniavaere pepo petuxanenë pepatsivajënaeyarena,” tajainë. Bajara-  
pacuenia tajumaitzijavanexa, bajayatami tajëvelia yaquina profeta Isaíaspijinë, jai Juan.

<sup>24</sup> Nexata fariseovi pitorobivitsi icatsia yanijobatsi Juan.

<sup>25</sup> —Itsa xamë apo Cristomë, apo Elíaspijinëmëna, apo profetanëmëna, ponë  
pacopiaevetavanapajë pepatsijavanexatsica, ¿detsa nexata xuajitsia xamë jivi bautis-  
abapona? jaitsi bajarapamonae.

<sup>26</sup> Juan nexata jumaitsi:

—Xanë saya bautisabaponajë ëmerata. Itsiata paxamë tuatuajëta ponapona ponë apo  
payapëtaemë. <sup>27</sup> Bajaraponë tacovëverena jane baja pata. Itsiata xanë bajaraponëvecua  
beveliajamatabëcuenenënë. Nexata acobeuranë tatoisinaenexa ata pijazapatomaëto  
tataxujonotsinexa pijazapato, jai Juan bajarapamonaejavabelia Jesús yabara.

<sup>28</sup> Bajarapacuenia Juan yanijobatsi Jordánmene itsapanatalia, Betaniavënë tomaraja-  
vata, Juan jivi itsa bautisabaponapona.

*Pacuenia Jesús beovejayo tanetsi yabara pelivaisi*

<sup>29</sup> Fariseovi pijajivi Juan peyanijobicujinaetsi peyapëtaenexatsi ponëcuene, meravia  
pitsijavata, Juan taetaba Jesús penajetarucaejava Juanjavaberena. Nexata Juan jumaitsi  
jivijavabelia:

—Pataema, mara ponëje, Dioso athëbëvetsica pitorobinëtsitsicaje. Bajaraponë Dioso  
bepijaovejayo tsane. Pacuenia jivi ovejajo babeyaxuaba pevi ofrendacuenia pera-  
jutsinexa Diosojavabelia, bajara itsanetsi maponëje. Nacaevetsiana pebeyaxuabinexatsi.  
Nexata bajarapacuenia matamotsiana daxita nacuanëpijivi pibisiacuene pexanaecon-  
imi. <sup>30</sup> Baja rajane maponë yabara itsa pacatsipaebatsi, pacajumaitsiitsi tsabiabi ma-  
pacueniaje: “Tacovëverena patsiana itsanë. Bajaraponë nevecuaayajamatabëcuenenë

bitso. Tsipaji baja cajena tanaexanaevajënaeya ata, bajaraponë ponapona,” pacajaitsi tsabiabi. <sup>31</sup> Apo yapëtaenë picani bajaraponë. Itsiata apo yapëtae atanë, pacabautisabanajetarucatsi merata palsrael nacuapijivimë. Ponë yabara pacatsipaebatsi, bajara jane maponë najetarucaje, jai Juan jivijavabelia Jesús penajetarucæjavata.

<sup>32</sup> Icatsia Juan jumaitsi jivijavabelia Jesús yabara:

—Xanë taniji Espíritu Santo perunaevajatsica athëbëvetsica beucucuto. Nexata tsimatanacopatsicsi bajaraponë. <sup>33</sup> Xanë abaxë itsiata apo yapëtaenë bajaraponë Cristocuene. Itsiata Dioso, taneitorobinë merata jivi tabautisabaponaenexa, nejumaitsi baja cajena copiata: “Papebi pematatsënëatsica taename Espíritu Santo perunaevajatsicsica petsijamatabëcaenexatsi, bajaraponë jane baja jivi tsijamatabëjoneyaexanaena Espíritu Santo,” nejai baja cajena copiata Dioso. <sup>34</sup> Pacuenia baja cajena taniji, pacatsipaebatsi. Bajaraponë baja cajena Dioso pexënato, jai Juan jivijavabelia Jesús yabara.

*Pamonaevajatsica Jesús yajavapona yabara pelivaisi*

<sup>35</sup> Juan jivijavabelia petsipaebicujinaevajatsica Jesús Dioso pexënatocuene, meravia pitsijavata, Juan yajavapona anijanëbeje pijajivitonëbeje. <sup>36</sup> Itsa Juan tane Jesús pexenetanajetarucæjavatsi, nexata Juan jumaitsi pijajivitonëbejevajatsica:

—Pataemabeje. Mara ponë najetarucaje, Dioso bepijaovejayo tsane, jai Juan pijajivitonëbejevajatsica Jesús pebeyaxuabijavanexatsi yabara, tsipaji Jesús tocopiapatsijitsiatsi pacuenia Dioso tocopatatsi.

<sup>37</sup> Nexata Juan pijajivitonëbeje itsa jumetanëbeje bajarapacuenia Juan pejumajatsijava, Juan pijajivitonëmibeje pënaponabeje Jesús. <sup>38</sup> Jesús napënyorotojopa. Taenucajopa. Yanijoba bajaraponëbejevajatsica.

—¿Detsa xua pajaitamebeje? jai Jesús.

Nexata bajaraponëbeje jumajatsibeje:

—Petuxanenë, ¿detsa jota ecame? jai beje Jesúsjavabelia.

<sup>39</sup> Jesús nexata jumajatsi bajaraponëbejevajatsica:

—Naxanitsia. Panataenamebeje itsajota ponaponaevajatsica, jai Jesús.

Nexata bajaraponëbeje naponabeje baja Jesús pepëta caniviyoeapatota. Nexata baja tanebeje itsajota ponapona Jesús. Nexata bajarapamatacabi nayacaniviyobeje tsaponaponaevajatsica Jesúsjavata.

<sup>40</sup> Bajaraponëbejevajatsica Andrés. Andrés raja Simón Pedro pejuyapijinë. <sup>41</sup> Andrés nexata bepija pona pematapijinë Simón pejajatsinexa. Itsa baja Andrés pematapijinë caxitajaraba, jumajatsi pematapijinëjavabelia:

—Pacaxitajarabajë rabaja Mesías, jai Andrés pematapijinëjavabelia.

Bajarapamonaevajatsica pijajumeta: “Mesías,” itsa jai, mapajumetaje pejumajatsijume: “Cristo, ponë athëbëvetsica Dioso itorobijitsiatsica jivi pecapanepaenexa,” pejaijume.

<sup>42</sup> Nexata Andrés barëlia pematapijinë Simón Jesúsjavabelia. Itsa Jesús tane Simón, nexata Jesús jumajatsi Simónjavabelia:

—Simón, xamë raja Jonás pexënatomë. Cavënërubianatsi Cefas, jai Jesús Simónjavabelia.

“Cefas,” itsa jai, bajarapamonaevajatsica pijajumeta mapajumetaje pejumajatsijume: “Pedro,” pejaijume.

*Pacuenia Jesús junata Felipebeje Natanaelbeje Jesús pijajivitonëbejenexa yabara pelivaisi*

<sup>43</sup> Jesús baja ponajatsi Galilea nacuyabelia. Jesús nexata peponaevajatsica, caxitajarabaxuaba Felipe. Nexata Jesús jumajatsi Felipejavabelia:

—Nepënaponaenaxa, jai Jesús.

<sup>44</sup> Bajaraponë Felipe Betsaida tomarapijinë. Andrésbeje Pedrobeje ata Betsaida tomarapijinëbeje. <sup>45</sup> Felipe nexata pona pejajatsinexa Natanael. Itsa baja Felipe caxitajaraba, jumajatsi Natanaeljavabelia:

—Pacaxitajarabajë rabaja ponë pelivaisi bajayatami tajëvelia Moiséspijinë yaquina. Dioso penajumecopatsilivaisi jivi pejumecovënëtsinexa bajayata Moiséspijinë itsa

yaquina, yaquinanua bajaraponë ata pelivaisi. Bajaraponë pelivaisi bajayata profetavi ata tajëvelia yaquina. Bajaraponë Jesús Nazaret tomarapijinë, Josépijinë pexënato, jai Felipe Natanaeljavabelia.

<sup>46</sup> Nexata Natanael jumaitsi:

—Itsanë ata cajena pexaniajamatabëcuenenë Nazaret tomarata apo ponaponae, jai Natanael.

Felipe nexata jumaitsi Natanaeljavabelia:

—Naxanitsia. Nataename jane, jai Felipe.

<sup>47</sup> Jesús itsa tane Natanael pecujitanajetarucaejavatsi, nexata Jesús Natanael yabara jumaitsi pijajivijavabelia:

—Mara ponë najetarucaje, Israelpijinë pemomo, Dioso pitabarata xaniavaetsia peponaponenë. Apo peyamaxëitorobinë itsajivi ata, jai Jesús pijajivijavabelia Natanael yabara.

<sup>48</sup> Nexata Natanael jumaitsi Jesúsjavabelia:

—¿Detsa pacuenia nejamatabëcueneyapëtaneme? jai Natanael.

Nexata Jesús jumaitsi Natanaeljavabelia:

—Felipe cajena pecajunatsivajënaeya, catanetsi neecaejava higuerae bëxëpanata. Nexata cajamatabëcueneyapëtanetsi, jai Jesús.

<sup>49</sup> Natanael nexata jumaitsi Jesúsjavabelia:

—Petuxanenë, xamë rabaja Dioso pexënatomë. Israelnacua pepo nevetsinë, jai Natanael Jesúsjavabelia.

<sup>50</sup> Jesús nexata jumaitsi:

—“Catanetsi cajena neecaejava higuerae bëxëpanata,” tacajaixae, jamatabëjumaitsimë xanë yabara: “Maponëje Dioso cajena pexënato,” jamatabëjamë. Xamë taename bajarapacuenenë matatoxenetsia Dioso pesaëta pinijicuene taexanaejavanë, jivi apo pexanaecapanepaejavanë. Nexata bajaraxuanë taexanaejava itsa taename, pepacuenenë jane baja neyapëtaename Dioso pexënatocuenenë, jai Jesús Natanaeljavabelia.

<sup>51</sup> Icatsia Jesús jumaitsi pijajivijavabelia:

—Xaniajanë pacuenia pacatsipaebijitsiatsi. Pataename itaboxo penapatsijava. Pataenamenua Dioso pijaánglevi pejunaejavatsia athëbëabetsia. Pataenamenua perunaejavatsica ata xanëjavabetsica, Daxitajivi Pematapijinënëjavabetsica, jai Jesús pijajivijavabelia.

## 2

*Pacuenia Jesús exana Caná tomarata pamatacabi Caná tomarapijinë nacasaba yabara pelivaisi*

<sup>1</sup> Jesús pebarëcuaicuaijaicujinae Natanael, acueyabi pamatacabibejecujinae, Caná tomarapijinë exana penacasabifiestanexa. Galilea nacuata eca Canátomara. Jesús pena naponapona fiesta pexanaejavata. <sup>2</sup> Nexata Jesús pijajivi nabarëjunatatsi penacasabifiestajavabelia. Jesús nexata pijajivi nabarëpata penacasabifiestajavabelia. <sup>3</sup> Fiesta pexanaenë ita baja tovereverecatsi vinora, Jesús pena jumaitsi:

—Vinora rabaja tovereverecatsi, jai pexënatojavabelia.

<sup>4</sup> Jesús nexata jumaitsi penajavabelia:

—Ena, ¿detsa xuajitsia netsipaebame bajarapacuenenë? Abaxë raja apo netocopiapatsi paepatota exanaejitsianë bajaraxua, jai Jesús penajavabelia.

<sup>5</sup> Nexata Jesús pena jumaitsi mesa pevetsivijavabelia:

—Daxita pacuenia taxënato aeconoxae pacaitorobiana, paexanaename, jai.

<sup>6</sup> Nexata bajarajota nubena seis pacanalitobeje, ibocanalitonë. Caecanalitota mera caëjëpapona bejamatabëcuene quince pagalónbeje. Nexata bajarapacanalitonëta peyaenaemeranëta, judíovi pijacuenia anijatonë xaniavaetsia nacobequiatabiaba penabanivajënae. <sup>7</sup> Jesús nexata jumaitsi mesa pevetsivijavabelia:

—Pavënëbare mera mapacanalitonë nubenaje, jai Jesús.

Nexata mesa pevetsivi xaniavaetsia mera vënëba bajarapacanalitonë. Piupiyorotoxijava copabapona.

<sup>8</sup> Nexata Jesús jumaitsi bajarapamonaejavabelia:

—Papuare tsiquirirayo. Patocaponaremelia fiesta pevetsinë pepajaninexa, jai Jesús.

Nexata baja mesa pevetsivi tocaponalia. <sup>9</sup> Nexata jane baja fiesta pevetsinë pajane bajarapora, merami pexanaevinora. Bajaraponë abaxë apo yapëtae itsaverena capitsapa bajarapavinora. Itsiata mesa pevetsivi yapëtane mera pevënëbixae bajarapacanalitonëta. Pepajanicujinae vinora, fiesta pevetsinë junata fiesta pexanaenë, ponë pejananacasabinë. <sup>10</sup> Nexata fiesta pevetsinë jumaitsi pejananacasabinëjavabelia:

—Mapavinoraje bitso xanepana. Daxita pamonaë fiesta pexanaevi, copiaya batsanaeyaexana pexaniavinora. Nexata baja fiesta pexanaenë pejunatsivi itsa apa ayaijava, cotocaevi batsanaeyaexana bevelia penamatamotsivinoranë. Tsipaji baja ayaijava piapaexae, cotocaevi apae ata beveliarara, apo yapëtae beveliaracuene. Itsiata baitsi jane xamë bajarapacuenia apo exanaemë. Evetame abaxë cotocaevi patanerajutsinexamë pexaniavinora, jai fiesta pevetsinë pejananacasabinëjavabelia.

<sup>11</sup> Bajarapapiniijicue Dioso pesaëta Jesús exana Caná tomarata. Canátomara eca Galilea nacuata. Caná tomarata Jesús jane baja taxuxuaba Dioso pesaëta piniijicue pexanaponaëjava. Bajarajota jane baja Jesús najamatabëcueneitajëta Dioso pesaëta ayaiacuene pexanaëjava pecaëjëpaenëcuenetsi. Nexata pijajivi orijibia sivanamatabëcuenecopabapontsi. Jesús pijajivi jamatabëjumaitsi:

—Xaniajai rabaja. Pepacuene Cristo, ponë copiaevetavanapatsi pepatsijavatsica vajanacacapanepaenexa, jamatabëjai.

<sup>12</sup> Bajaraxuacujinae Jesús baja pona Capernaum tomarabelia. Yajavapona pena, pejuyapijivinuua, pijajivinuua. Capernaum tomarata caematacabibeje jinavanapa.

*Pacuenia Jesús Jerusalén tomarata templovecua pitsapaeyaexana pecanajetsivi, pecomua-caevinuua, yabara pelivaisi*

*(Mt 21.12-13; Mr 11.15-18; Lc 19.45-46)*

<sup>13</sup> Judíovi baja pijafiesta pexanaenexa, toimoxoyotsi pascuavënëfiesta. Bajaraxuata Jesús pona Jerusalén tomarabelia. <sup>14</sup> Nexata Jerusalén tomarata, templobota, Jesús caxitajarabaxuaba pecanajetanubenaevi baca, oveja ata, ucucu ata. Tane palata pecambiabenaevinuua. <sup>15</sup> Jesús itsa tane bajarapacuene, nexata quiobataba peyorotsimacanexa. Nexata Jesús daxitajivibitsaëto capitsaparena temploboënëverena. Bajarapamonae pijaoveja yajava, pijabaca yajava, Jesús capitsaparena. Nexata palata pecambiabenaevi pijapalata irabelia tocayajabajaraba. Pijamesaxi ata topënëyorobajaraba. <sup>16</sup> Nexata ucucu pecanajetanubenaevijavabelia Jesús jumaitsi:

—Mapaucucuje pacapitsaparemelia. ¡Pëtsa pacanajetame mapaboënëtaje, taxajavabelia jivi penavajëcaebota! jai Jesús.

<sup>17</sup> Nexata Jesús pijajivi itsa jumetane bajarapacuenia Jesús pejumaitsijava, jumenamatabënënapita pacuenia Dioso pejumelivaisibaxutota jumaitsi. Bajarapacuenia Jesús pexanaponaëjavanexa yabara, tajëvelia Dioso pejumelivaisibaxutota jumaitsi mapacueniaje: “Neyabarabeyaxuabijitsia ata tsane, jitsipajë Dioso pijabo petoyaiyataejavatsi,” jai Dioso pejumelivaisibaxutota.

<sup>18</sup> Nexata judíovi itsa tane Jesús jivi pecapitsapaejava temploboënëverena, judíovi jumaitsi Jesúsjavabelia:

—¿Dioso tsaja caitoroba nejutsinexa bajarapamonae temploboënëvecua? Itsa caitoroba Dioso bajarapacuenia nexanaenexa, nexata pinijicue ata exanare Dioso pesaëta patacayapëtaenexa Dioso pecaitorobinëcuene, jai judíovi Jesúsjavabelia.

<sup>19</sup> Nexata Jesús jumaitsi judíovijavabelia:

—Itsa paxuabimica mapatemploboje, nexata icatsia veretetsianajë acueyabi matababita, nayabarajai Jesús judíovijavabelia petëpaecujinae icatsia Jesús piasaëjavanexa yabara.

<sup>20</sup> Nexata judíovi apo jumeypëtae xua yabara Jesús jumaitsi. Bajaraxuata judíovi jumaitsi mapacueniaje:

—Xamë acueyabi maticabita apo maticotsimë tsipae. Itsamonae baja cajena mapatemploboxanetoje peveretsinexa, nacueneba cuarenta y seis pavaibeje, jai judíovi.

<sup>21</sup> Itsiata baitsi jane Jesús peperabëto yabara: “Mapatemploboje,” jai saya. <sup>22</sup> Bajaraxuata icatsia Jesús itsa asaë petëpaecujinae, Jesús pijajivi jumenajamatabënapitatsi. Jesús pijajivi jumenajamatabënapitatsi tajëvelia Jesús penavajunupaebijava mapacueniaje: “Itsiata baitsi jane tatëpaecujinae, acueyabi maticabita, icatsia asaënë tsane,” pejajava, Jesús pijajivi jumenajamatabënapitatsi. Nexata Jesús pijajivi jume-covënëta pacuenia Dioso pejumelivaisibaxutota jumaitsi. Jesús ata pacuenia jumaitsi, jumecovënëta.

#### *Pacuenia Jesús jamatabëcueneyapëtane daxitajivi yabara pelivaisi*

<sup>23</sup> Pamatacabi pascuafiesta exana, Jesús ponapona Jerusalén tomarata. Nexata Jerusalén tomarata jivi ayaibitsaëtohaneto jumecovënëta Cristocuene. Tsipaji bajarapamonae Jesús cuenetanetsi Dioso pesaëta pinijicuene pexanaejavanë, jivi apo pexanaecapanepaejavanë. Itsiata baitsi jane bajarapamonae pepacuene xaniavaetsia apo jumecovënëtsi. <sup>24</sup> Bajaraxuata Jesús apo yajavaponaponae bajarapamonae. Tsipaji Jesús jamatabëcueneyapëtane bajarapamonae xaniavaetsia apo pejumecovënëtsijavatsi. <sup>25</sup> Jesús apo namatavenonae itsajivi petsipaebinexatsi peyapëtaenexa pacuenia jamatabëcueneitsi jivi. Tsipaji Jesús pejamatabëcueneyapëtaenë pacuenia daxitajivi jamatabëcueneitsi.

### 3

#### *Pacuenia Jesús barëcuaicuaijai Nicodemo yabara pelivaisi*

<sup>1</sup> Nicodemo fariseonë. Nexata catsitecaponapona fariseovi pijacuene. Nicodemo judíovi pevetsiviyajuvënë. <sup>2</sup> Nexata Nicodemo meravivi pona Jesúsjavabelia. Nexata itsa pata, Jesúsjavabelia Nicodemo jumaitsi:

—Petuxanenë, pacayapëtanetsi baja cajena athëbëvetsica Dioso pecaitorobinëcuenetsica patanetsipaebaponaenexamë Dioso pejumelivaisi. Itsa Dioso apo cayajavaponapona tsipae, nexata apo exanaemë tsipae pinijicuene nexanaejavanë, xuanë baja exanapona, jai Nicodemo Jesúsjavabelia.

<sup>3</sup> Nexata Jesús jumaitsi Nicodemojavabelia:

—Xaniajanë pacuenia catsipaebijitsiatsi. Pajivi Dioso pejamatabëcueneta apo naexanae tsane icatsia bepejananaexanaejiviyo, bajarapajivi Dioso apo pijajivitonë tsane, jai.

<sup>4</sup> Nexata Nicodemo jumaitsi Jesúsjavabelia:

—¿Detsa jane pacuenia penaveretsijivi baja icatsia naexanaejitsipa bepejananaexanaejiviyo? ¡Apo cajëpaetsi rabaja icatsia pejonenexa pena pecototualia penaexanaenexa icatsia bepejananaexanaejiviyo! jai Nicodemo Jesúsjavabelia.

<sup>5-6</sup> Jesús nexata jumaitsi Nicodemojavabelia:

—Xaniajanë pacuenia catsipaebijitsiatsi. Pajivi pena pecototoverena naexana, yaperabëanaexana baja cajena. Pajivi pijinia Espíritu Santo pejamatabëcueneta naexana bepejananaexanaejiviyo, bajarapajivi Diosojavabelia jamatabëcuenesaëyaexanatsi, Espíritu Santo petsijamatabëcaexaetsi. Pajivi Dioso pejamatabëcueneta jamatabënaexana icatsia bepejananaexanaejiviyo, bajarapajivi xanepana pebautisabinexatsi merata. Nexata bajarapajivi Espíritu Santo rajutsianatsi pejanajamatabëcuene. Nexata bajarapajivi Dioso pijajivitonëcuena evetsianatsi. <sup>7</sup> “Xamë ata baja cajena icatsia benaexaname bepejananaexanaejiviyocuenia,” tacajajava yabara, pëtsa jamatabëcuenenabenajacame. <sup>8</sup> Jovibo banajetaruca itsabelia jamatabënajetaruca. Jumetaneme saya ëpijume. Itsiata apo yapëtaemë itsaverena pona, itsabelia ata pona. Bajara pijinia pacuenia apo yapëtaemë pacuenia jivi Espíritu Santo pejamatabëcueneta naexanaeyaexanatsi bepejanaexanaejivicuena, jai Jesús Nicodemojavabelia.

<sup>9</sup> Nexata icatsia Nicodemo jumaitsi Jesúsjavabelia:

—¿Detsa pacuenia itsipae bajaraxua? jai Nicodemo.

<sup>10</sup> Jesús nexata jumaitsi:

—Xamē picani Israel nacuapijivi necujarubinē. ¿Itsia tsaja apo jumeypētaemē palivaisi catsipaebatsi? <sup>11</sup> Xaniajanē pacuenia catsipaebijitsiatsi. Juan jivibautisabinē. Bajaraponēbeje patayapētaelivaisibeje, jivi patsipaebaponajēbeje. Xua pepacuenē patanijibeje, bajaraxua ata jivijavabelia patsipaebaponajēbeje. Itsia baitsi jane patatsipaebilivaisianēbeje, apo panejumecovēnētsimē. <sup>12</sup> Catsipaebi atatsi xua Dioso exanapona mapanacuataje, itsia apo nejumecovēnētsimē. ¿Detsa nexata pacuenia nejumecovēnētsianame itsa catsipaebianatsi xua Dioso exanapona athēbētatsia? jai Jesús.

<sup>13</sup> Icatsia Jesús pijacuata nayabarajumaitsi Nicodemojavabelia:

—Itsajivi ata cajena apo ponae Dioso pijanacuayabetsia icatsia pepatsinexatsica mapanacuayabetsicaje petsipaebinexa jivijavabelia pacuenia itsi athēbētatsia. Caenē, Daxitajivi Pematapijinē, caējēpatsi jivi petsipaebinexa pacuenia itsi athēbētatsia. Tsipaji baja cajena bajaraponē athēbēvetsica pepatsinē. Tsipaji baja cajena athēbētatsia peponaponaenē. <sup>14</sup> Bajayata petusato nacuata jivi ayaibitsaēto yatēpaponā jomo pesinijavatsi. Nexata bajarapaepatota Moiséspijinē jomo jumapecataeya pexanaenē, naejavata athēbēyo ruta. Nexata jomo pesinivitsi peyatēpaeviminexa, itsa taepona bajaraponē, asaē tsaponae. Bajara pijinia pacuenia, Daxitajivi Pematapijinē ata, athēbēyo rutsianatsi cruzajavabelia. Bajarapacuenia rutsianatsi cruzata petēpaenexa. <sup>15</sup> Nexata pajivi bajaraponējavabelia sivanajamatabēcopata, apo naxuabi tsane. Bajarapajivi xainaena matakabi apo peverevereaejava, nayabarajai Jesús pijacuata Nicodemojavabelia.

*Pacuenia Dioso exana piasivaxae mapanacuapijivije yabara pelivaisi*

<sup>16</sup> Icatsia Jesús pijacuata nayabarajumaitsi Nicodemojavabelia:

—Pinijicuenia Dioso asiva mapanacuapijivije. Bajaraxuata itorobica pepo caenē pexēnato mapanacuayabetsicaje mapanacuapijivije Diosovecua penaxuabianiva. Pamonaē sivanajamatabēcopata Dioso pexēnatojavabelia, apo naxuabi tsane. Bajarapamonaē matakabi apo peverevereaejava, Dioso rajutsianatsi. <sup>17</sup> Dioso apo itorobitsica pexēnato mapanacuayabetsicaje mapanacuapijivije pijaneconi yabara penaneconitsiaexanaenexa. Biji rajane Dioso itorobica pexēnato, pejamatabēcueneta Dioso pecaapanepaenexa mapanacuapijivije pibisiacuene pexanaeneconimivecua, nayabarajai Jesús pijacuata Nicodemojavabelia.

<sup>18</sup> Icatsia Jesús pijacuata nayabarajumaitsi Nicodemojavabelia:

—Pajivi sivanajamatabēcopata Daxitajivi Pematapijinējavabelia, bajarapajivi Dioso apo naneconitsiaexanaetsi tsane pibisiacuene pexanaeneconimi yabara. Pajivi apo sivanajamatabēcopatsi Daxitajivi Pematapijinējavabelia, bajarapajivi baja naneconita Diosojavabelia. Nexata Dioso naneconitsiaexanaenatsi. Tsipaji apo sivanajamatabēcopatsi pepo caenē Dioso pexēnatojavabelia. <sup>19</sup> Ponē Daxitajivi Pematapijinē, bepecotia picani. Tsipaji jivi tsipaebapona pexaniajailivaisi jivi pejamatabēcuenēitayotsinexa. Itsia mapanacuapijivi apo jitsipae pejamatabēcuenēitayotsinexatsi. Jitsipa saya pi-aitaquirijamatabēcuenē. Tsipaji bajarapamonaē pibisiacuene exanavanapa. Bajaraxuata bajarapamonaē naneconitsiaexanaenatsi Dioso. <sup>20</sup> Daxita pamonaē pibisiacuene pexanavanapaevi, apo jitsipae Daxitajivi Pematapijinē pejamatabēcuenēitayotsinexatsi. Bajaraxuata Daxitajivi Pematapijinējavabelia apo patsi. Tsipaji cujunava peyapētaeyaexanaeyanivatsi penaneconitsijava Diosojavabelia pibisiacuene pexanaeneconi yabara. <sup>21</sup> Pamonaē jumecovēnēta Dioso pexaniajailivaisi, bajarapamonaē apo cujunavi. Bajarapamonaē pata Daxitajivi Pematapijinējavabelia pejamatabēcuenēitayotsinexatsi. Bajarapamonaē jitsipa daxitajivi peyapētaenexatsi Dioso peyavenonaponaējavatsi xua exanavanapa, nayabarajai Jesús pijacuata Nicodemojavabelia.

*Pacuenia Juan jivibautisabinē vajunupaeba Jesús yabara pelivaisi*

<sup>22</sup> Jesúsbeje Nicodemobeje pecuaicuaijaicujinaebeje, Jesús baja, pijajivi yajava, pona Judea nacuyabelia. Nexata Judea nacuata bajayajebi Jesús pijajivi barëponapona. Bajarapamonae bautisabapona jivi. <sup>23</sup> Juan pijinia itsamonae bautisabaponapona Enón tomarata. Enóntomara eca Salimtomara imoxoyojavata. Bajarajota Juan jivi bautisabaponapona tsipaji ayaimera. Juan jivi topataponatsi pebautisabinexa. Nexata pepataponaevi, Juan bautisabapona. <sup>24</sup> Bajarapacuenia Juan jivi bautisabaponapona abaxë itsa apo etsitsi penaneconitsivi pejebabiabibota.

<sup>25</sup> Nexata Juan pijajiviyajuvënëvi anaeya najumenotsiaya cuaicuaijai judíonëjavabelia. Juan pijajivi jumaitsi:

—¿De meta ponë itsa nacabautisaba, nacajamatabëcuenexaniavaetsiana Dioso vanacabarajamatabëcuene xanepanaenexa? jai Juan pijajivi judíonëjavabelia.

<sup>26</sup> Nexata Juan pijajivi pona Juanjavabelia. Nexata bajarapamonae Juanjavabelia jumaitsi Jesús yabara:

—Ponë caxitajarabame Jordánmene itsapanatalia, ponë vajunupaebame paxanëjavaberena, bajaraponë ata aeconoxae jivi bautisabapona. Nexata daxitajivi bajaraponëjavabelia pona, jai Juan pijajivi.

<sup>27</sup> Nexata Juan jumaitsi pijajivijavabelia:

—Xuavajëto xaina caejivi canacujitsia, Dioso perajutsixaetsi xaina. <sup>28</sup> Pamatacabi jumaitsinë tsabiabi jivijavabelia: “Xanë raja apo Cristonë, ponë Dioso athëbëvetsica itorobijitsiatsica jivi pecapanepaenexa. Saya raja taneitorobinë Cristo pevajënaeya, talivaisipaebanajetarucaenënexa,” itsa janë, paxamë ata panejumetaeyabiabame. <sup>29</sup> Ponë pita petiriva pijavanexa, nacasaba. Nexata pejananacasabinë peyapëtaenëtsi, namuxunaevetanuca imoxoyo. Bajaraponë ata nabarëya itsa jumetane pejananacasabinë pebarëyajava. Bajara pijinia pacuenia xanë ata aeconoxae bitso jamatabëcuenebarëyanë, itsa vënëlivaisitaniji jivi peponaejava Jesúsjavabelia. <sup>30</sup> Pevajënaeyabelia jivi ayaibitsaëtoxaneto Jesús pënaponaenatsi. Xanë nexata tanepënaponaevi bevelia tsaponae tsane, jai Juan pijajivijavabelia.

*Pacuenia Juan tsipaeba pijajivijavabelia Jesús athëbëvetsica pepatsijava yabara pelivaisi*

<sup>31</sup> Icatsia Juan jumaitsi pijajivijavabelia:

—Athëbëvetsica pepatsinë, bitso cajena ayaijamatabëcuenenë daxitajivi matatoxenetsia. Pamonae naexana mapanacuataje, bajarapamonae saya mapanacuapijivije. Nexata saya cuaicuaijai ëmapanacuapijicuene yabaraje. Itsiata baitsi jane ponë athëbëvetsica pepatsinë, bajaraponë daxitajivi matatoxenetsia bitso ayaijamatabëcuenenë. <sup>32</sup> Bajaraponë picani tsipaeba jivijavabelia pacuene tane athëbëtatsia. Tsipaebanua picani palivaisi ata jumetane athëbëtatsia. Itsiata baitsi jane daxitajivi jumeabatsi petsipaebilivaisianë. <sup>33</sup> Pajivi jumecovënëta athëbëvetsica pepatsinë pepaebilivaisi, bajarapajivi Dioso ata yabara jamatabëjumaitsi: “Dioso cajena pexaniajailivaisi pepaebinë,” jamatabëjai. <sup>34</sup> Ponë Dioso itorobatsi, bajaraponë tsipaeba jivijavabelia Dioso pitorobilivaisi. Tshipaji Dioso rajutatsi Espíritu Santo. Yajavaponaponaeyaexanatsinua Espíritu Santo ayaicuenia. <sup>35</sup> Dioso bitso asiva pexënato. Tocopata daxisacuene pevetsinexa, pitorobinexanua. <sup>36</sup> Pajivi najamatabëcopata Dioso pexënatojavabelia, xainaena matakabi apo pevereverecejave. Pajivi apo najamatabëcopatsi Dioso pexënatojavabelia, matakabi apo pevereverecejave apo xinae tsane. Bajarapajivi Dioso naneconitsiaexanaenatsi daxita matakabijavabelianexa, jai Juan pijajivijavabelia.

4

*Pacuenia Jesús barëcuaicuaijai Samaria nacuapijiva yabara pelivaisi*

<sup>1</sup> Fariseovi jumetane jivi pejumaitsiyava: “Jesús baja pijajivi ayaibitsaëtoxaneto xainaponapona. Bautisabaponanua jivi ayaibitsaëto Juan matatoxenetsia,” pejaijava.

<sup>2</sup> Itsiata Jesús pecobeta apo bautisabi caejivi ata. Jesús rajane pijajivi bautisabapona jivi.

<sup>3</sup> Nexata Jesús itša yapětane fariseovi pevënëlivaisitaejavatsi pacuenia jivi baracuaicuai-jaitsi, nexata naviata Judea nacuverena. Pona Galilea nacuyabelia.

<sup>4</sup> Nexata Galilea nacuyabelia peponaenë, Jesús, pijajivi yajava, patanajetaruca Samaria nacujava. Tsipaji bajaraxuayo namuto najetaruca. <sup>5</sup> Nexata Jesús ecojopa Samaria nacuaata peecaetomarata, Sicarvënë tomarata. Sicar tomaravecua imoxoyo boca pairayo Jacobpijinë bajayata rajuta pexënato Josépijinë. <sup>6</sup> Bajarapairayota eca meramëthë, pamëthë Jacobpijinë bajayata cueyeta. Jesús sicuerana peponaejava namuto. Nexata Jesús ecojopa meramëthë muxuneneta. Matonejeepatota Jesús ecojopa. <sup>7-8</sup> Jesús caenë eca meramëthëjavata. Tsipaji Jesús pijajivi tomarabelia pona pecomuacaenexa pexaejava. Nexata bajaraberena Samaria nacupijiva rena pepuatsinexa mera bajarapamëthëta. Nexata Jesús jumaiti Samaria nacupijivajavabelia:

—Mera nerajure, jai Jesús.

<sup>9</sup> Nexata Samaria nacupijiva jumaiti:

—¿Detsa xuajitsia mera nevajëtame niapaenexa? Xamë judíonëmë. Xanë saicaya Samaria nacupijivanë, jai bajarapova Samaria nacupijiva Jesúsjavabelia.

Bajarapacuenia Samaria nacupijiva jumaiti Jesúsjavabelia tsipaji judíovibeje Samaria nacupijivibeje naitajitsibiaya nanaëcotabiaba. <sup>10</sup> Nexata Jesús jumaiti Samaria nacupijivajavabelia:

—Pajamatabëcuene Dioso jitsipa pecarajutsinexa, apo yapëtaemë. Xanë ata mera tacavajëtsinë apo nejamatabëcuenyapëtaemë. Itša nejamatabëcuenyapëtaejitsipame, nexata xanëjavaberena copiaya mera nevajëtsipame tacarajutsinexa. Nexata carajutsipatsi piatavamera, jivi pejamatabëcueneasaëyaexanaamera daxitamatacabijavabelianexa, jai Jesús Samaria nacupijivajavabelia.

<sup>11</sup> Nexata Samaria nacupijiva jumaiti Jesúsjavabelia:

—Xamë apo caponaemë nijavaxiyo mera nepuatsinexa. Meramëthë raja tajëreca bitso. ¿Detsa jota pitsipame nexata piatavamera tanerajutsinexamë? <sup>12</sup> Vajasalinainëmi Jacobpijinë ayaijamatabëcuenenëmi. Bajayata nacatocopata mapameramëthëje. Bajaraponëmi, pexi ata, pijadajubi ata, mera apa mapamëthëtaje. ¿Xamë tsaja nexata Jacobpijinëmi matatoxenetsia bitso ayaijamatabëcuenenëmë? jai Samaria nacupijiva Jesúsjavabelia.

<sup>13</sup> Jesús nexata jumaiti:

—Jivi apaeyabiabi ata mapamëthëpijimeraje, itsiata mera pejitsipaejava apo tovereverecabiabitsi. <sup>14</sup> Pajivi apaena xanë tarajutsimera, bajarapajivi xainaena matababi apo peverevereaejava. Nexata pacuenia meramëthë eca daxitamatacabijavabelianexa, bajara itši tsane bajarapajivi, jai Jesús.

<sup>15</sup> Nexata Samaria nacupijiva jumaiti Jesúsjavabelia:

—Bajarapamera nerajure icatsia mera tanamatavenonaponaeyaniva. Nexata baja mera apo puanabiabinë tsane mapamëthëaberenaje, jai Samaria nacupijiva.

<sup>16</sup> Jesús nexata jumaiti Samaria nacupijivajavabelia:

—Amona junaremëlia. Yajavarenamë tsane, jai Jesús.

<sup>17</sup> Nexata Samaria nacupijiva jumaiti:

—Apo xainaenë raja tamona, jai.

Nexata Jesús jumaiti:

—“Apo xainaenë raja tamona,” itša jamë, apo najumetsënëtsimë cajena. <sup>18</sup> Xainame picani amonajivi cinco ponëbeje. Ponë aeconoxae xainame, apo amona cajena. Tsipaji saya nijajara. Bajaraxuata xaniavaetsia netsipaebame, jai Jesús Samaria nacupijivajavabelia.

<sup>19</sup> Nexata Samaria nacupijiva itša jumetane bajarapacuenia Jesús pejumaitisijava, nexata Samaria nacupijiva jumaiti Jesúsjavabelia:

—¿Xamë tsabaja Diosojumepaebinëmë profetanëmë? <sup>20</sup> Patajasalinaivimi baja cajena navajëcabiaba Diosojavabelia mapatsutojumataliaje. Itsiata baitsi jane pajudíovimë

pajumaitsimë tsabiabi: “Jivi itsa navajëca Diosojavabelia, benavajëcabiaba Jerusalén tomarata Dioso pejumecovënëtsinexatsi,” pajamë tsabiabi, jai Samaria nacuapijiva.

<sup>21</sup> Jesús nexata jumaitsi:

—Nejumecovënëtsianame pacuenia catsipaebijitsiatsi. Imoxoyo rabaja pevajënae papecatocopiapatsinexa Diosojavabelia panevajëcabiabinexa, paponaejevamë mapatsutojavabeliaje, paponaejevamë Jerusalén tomarabelia ata. <sup>22</sup> PaSamaria nacuapijivimë, pavajëcabiabi atamë Diosojavabelia, xaniavaetsia apo payapëtaemë Dioso. Paxanë rajane pajudíovinë xaniavaetsia payapëtaniji Dioso, ponëjavabelia pavajëcabiabajë. Tspaji xanë daxitajivi tacapanepaenë tsane, judíoviyajuvënënë. <sup>23</sup> Ajena mapamatcabijavaveliacujinaeje, pevajënaeyabelia ata tsaponae, daxita pamonaе jamatabëvajëta Diosojavabelia, bajarapamonae xaniavaetsia vajëtsiana daxita pejamatabëëthëtovajavetsina. Pepo pexaniajaijamatábëcueneta vajëtsiana Diosojavabelia. Bajarapitsivi Dioso jitsipa pevajëtsijavatsi. <sup>24</sup> Dioso cajena apo vajataenë. Pamonaе vajëta Diosojavabelia, xaniavaetsia pexaniajaijamatábëcueneta bevajëta, pepo pejamatabëëthëtovajavetsina, jai Jesús Samaria nacuapijivajavabelia.

<sup>25</sup> Nexata Samaria nacuapijiva jumaitsi:

—Yapëtaniji rabaja pepatsijavanexatsica Mesías, ponë Cristo, baitsi ponë athëbëvetsica Dioso itorobijitsiatsica jivi pecapanepaenexa. Itsa bajaraponë patsianica, nacatsipaebiana daxitacuenelivaisianë, jai Samaria nacuapijiva Jesúsjavabelia.

<sup>26</sup> Jesús nexata jumaitsi Samaria nacuapijivajavabelia:

—Xanë rabaja Cristonë, jai.

<sup>27</sup> Nexata bajarapaepatota tomaraverena parena Jesús pijajivi. Bajarapamonae jamatabëcuenenabenajaca Jesús pecuaicuaijaitsanucaexae Samaria nacuapijivajavabelia. Itsiata itsanë ata: “¿Detsa xua jitsipame?” apo jai Samaria nacuapijivajavabelia. Jesúsjavabelia ata apo yanijobi: “¿Detsa xuajitsia bajarapova barëcuaiicuaijamë?” apo jai itsanë ata. <sup>28</sup> Nexata bajarajota Samaria nacuapijiva pueneteta pijacanalito. Navialia pijatomarabelia. Tsipaebalia jivi. Nexata jumaitsi Jesús yabara:

<sup>29</sup> —Panataemelia ponë netsipaeba daxita pacuenia exanajë. ¿Baja tsamëra jane apo Cristo, ponë athëbëvetsica Dioso itorobijitsiatsica jivi pecapanepaenexa? jai Samaria nacuapijiva.

<sup>30</sup> Nexata bajarapamonae pijatomaravelia ponalia. Taeothopalia Jesús. <sup>31</sup> Itsa abaxë bajarapamonae apo patsilia Jesúsjavabelia, Jesús pijajivi jumaitsi:

—Patajatuxanenë, naxaema itsajavayo, jai.

<sup>32</sup> Nexata Jesús jumaitsi pijajivajavabelia:

—Xainajë raja saicaya taxaejavanexa paxamë apo paneyapëtaejava, jai Jesús.

<sup>33</sup> Nexata Jesús pijajivi, ëpamonae, nayanijoba.

—¿Itsanë tsamëra tspaji vajacovëta Jesús pexaejava tocapatatsi penabaninexa? najai Jesús pijajivi.

<sup>34</sup> Nexata Jesús jumaitsi:

—Pacuenia taneitorobinëtsica nitoroba, jitsipajë taexanaenexa. Jitsipajë baja tanacueneveretsinexa xua nitoroba. Bajara jane xua betaxaejava taniji. <sup>35</sup> Paxamë pajumaitsimë tsabiabi peubijava yabara: “Saica raja abaxë cuatro pajuametobeje peubijava penaveretsinexa,” pajamë tsabiabi. Itsiata xanë pacatsipaebianatsi jivi yabara. Pataema mapamonae najetarubenaje. Pacuenia baja peubijava navereta penotsinexatsi, bajara itsi mapamonaeje. Mapamonaeje jumecovënëtsiana itsa tsipaebianatsi Dioso pejumelivaisi. <sup>36</sup> Pajivi tsipaebiana tajumelivaisi jivi pejumecovënëtsiaexanaenexa, matababi apo pevereveceajava jivi pexainaenexa, bajarapajivi sivajamatábëcuenenabarëya tsane ayaibitsaëto itsa jumecovënëtsianatsi. Itsamonae baja picani namataxainaeja tsipaeba bajarapamonaejavabelia Dioso pejumelivaisi. Itsiata baitsi jane apo jumecovënëtsitsi. Nexata bajarapamonae ata itsa vënëlivaisitaena pejumecovënëtsijava tajumelivaisi, bajarapamonae ata sivajamatábëcuenenabarëya tsane. <sup>37</sup> Jivi bajumaitsi peubijava yabara mapacueniaje: “Copiaya itsanë uba. Itsa baja navereta peubijava, saicaya icatsia itsanë

nota,” bajai. <sup>38</sup> Nexata baja itsaxuayo itsamonae copiaya Dioso pejumelivaisi asaëyata tsipaebapona, bajara icatsia xuayo paxamë ata talivaisi panetsipaebinexa, pacaitorobatsi. Nexata pamonaie copiaya Dioso pejumelivaisi tsijamatabëubatsi, ayaibitsaëto bajarapamonae najamatabëcuenecopaba baja Diosojavabelia panetsipaebixae talivaisi, jai Jesús pijajivijavabelia.

<sup>39</sup> Samaria nacuapijiva, pova Jesús barëcuaicuaijai mera mëthëjavata, pijatomarapijivijavabelia tsipaeba ayaibitsaëtojanetjavabelia Jesús yabara. Nexata Samaria nacuata pejinavanapaevi, Sicar tomarapijivi, ayaibitsaëtojaneto jumecovënëta Cristocuene. Jumecovënëta Cristocuene penavajunupaebixae bajarapova bajarapatomarapijivijavabelia: “Daxita pacuene exanjë, Jesús netsipaeba,” pejaixae. <sup>40</sup> Nexata Samaria nacuapijivi itsa parena Jesúsjavaberena, bajarapamonae Jesús asivatsi penaponapon-aenexa bajarapamonaejavata. Nexata Jesús bajarapamonaejavata naponapona anijamatabibeje. <sup>41</sup> Itsa bajarapamonae pijacuata jumetane Jesús petsipaebilivaisi, nexata icatsia ayaibitsaëtojaneto jumecovënëta Cristocuene. <sup>42</sup> Nexata bajarapamonae jumaitsi penavajunupaebivajavabelia:

—Pajumecovënëtajë apo ëpatanetsipaebijumemë yabara. Biji rajane pajumecovënëtajë tsipaji baja patajacuata ata pajumetaniji Jesús vajanacatsipaebilivaisi. Payapëtaniji baja cajena bajaraponë pexaniajaijava Cristocuene. Payapëtaniji bajaraponë mapanacuapijivije pecapanepaejavanexa, pibisiacuene pexanaeconimivecua, jai bajarapamonae penavajunupaebivajavabelia.

*Pacuenia Jesús tojamatejemayaexana gobierno pijajivitonë pexënatonëyo yabara pelivaisi*

<sup>43</sup> Samaria nacuata anijamatabibeje Jesús peponaponaecujinae, vecuapona baja Samarianacua. Nexata jane baja pona Galilea nacuyabelia. <sup>44</sup> Jesús jumai tsabiabi pijajivijavabelia:

—Pajivi Dioso jumepaebabiaba, bajarapajivi apo yaiyataetsi pijanacuapijivi, jai tsabiabi Jesús.

<sup>45</sup> Itsa baja Jesús palia Galilea nacuyabelia, bajarapanacuapijivi xaniavaetsia copiapitatsi. Tsipaji baja cajena bajarapamonae ata Jerusalén tomarata pascua fiestamatacabi Jesús tanetsi. Nexata Jesús ayaicuene Dioso pesaëta pexanaejava bajarapamonae cujirutanetsi fiestamatacabi.

<sup>46</sup> Nexata icatsia Jesús naviata Caná tomaraberena. Canátomara eca Galilea nacuata. Bajarapatomarata Jesús copiaya merami exana vinora. Caná tomarata ponapona gobierno pijajivitonë, ayaijamatabëcuenenë. Bajaraponë pexënatonëyo toavitane tsanucaetsi Capernaum tomaratalia. <sup>47</sup> Nexata gobierno pijajivitonë vënëlvivisitantsi Jesús Judea nacujavaverena pepatsijava, Galilea nacuyaberena. Nexata bajaraponë lia Jesúsjavabelia. Piniicuenia junata pijaboyabelia pebarëponaenexa Jesús petojamatejemayaexanaenexatsi pexënatonëyo. Tsipaji baja gobierno pijajivitonë pexënatonëyo totëpaejitsiatsi. <sup>48</sup> Nexata Jesús jumaitsi bajaraponëjavabelia:

—Paxamë cajena apo panejumecovënëtsimë. Matapania itsa pataneme ayaicuene Dioso pesaëta taexanaejava, jivi apo pexanaecapanepaejava, panejumecovënëtsianame, jai Jesús.

<sup>49</sup> Nexata gobierno pijajivitonë jumaitsi:

—Jesús, naxanitsiayo tapëta ponare taxënatonëyo abaxë petëpaejavajënaeya, jai.

<sup>50</sup> Jesús nexata jumaitsi bajaraponëjavabelia:

—Naviaremelia nexënatonëyojavabelia. Nexënatonëyo rabaja icatsia catojamatejema, jai Jesús.

Bajaraponë jumecovënëta pacuenia Jesús jumaitsi. Nexata baja lia pijaboyabelia.

<sup>51</sup> Itsa bajaraponë patanajetarucalia, nexata pijajivi mataenenarenatsi. Nexata pijajivi jumaitsi:

—Nexënatonëyo rabaja icatsia jamatejema tsecae, jaitsi.

<sup>52</sup> Nexata bajaraponë yanijoba pijajivijavabelia.

—¿Detsa xuayota juameto itsa ruca, jamatejema baja? jai tsapatsi bajaraponë.

Nexata pijajivi jumaitsi:

—Canivi, matonejeepatota, vecuaajibitsi baja peromaebijavatsi, jai pijajivi.

<sup>53</sup> Nexata bajaraponë jamatabëjumaitsi:

—Bajarapaepatota canivi Jesús nejumaitsi: “Nexënatonëyo rabaja icatsia catojamatejema,” nejai, jamatabëjai.

Bjaraxuata bajaraponë, pijamonae yajava, jumecovënëta Jesús Cristonëcuene.

<sup>54</sup> Jesús penaviatsicujinae Judea nacujavaverena, Galilea nacujavaberena, cotocaevi bajarapapinjicuene Dioso pesaëta exana Galilea nacuata.

## 5

*Pacuenia Betzativënë pucayojavata Jesús jamatejemayaexana petabusipacuenabinëtsi yabara pelivaisi*

<sup>1</sup> Judíovi fiesta exana Jerusalén tomarata. Nexata Jesús nalia. <sup>2</sup> Jerusalén tomarata, ovejaxi pecajoneyabiabaupa imoxoyojavata, pecueyetsipucayo eca. Bjarapapucayo hebreojumeta pevënë Betzata. Bjarapapucayo matatoyorotsia cinco pabobërëtoheje eca. <sup>3</sup> Bjarapabobërëtonëjavata piavitanevi ayaibitsaëtoxaneto bobena. Itsamonae bitso pitaxutotsëcënaevi. Itsamonae pejayujayunaevi. Itsamonae peperabëcuenabivitsi. Daxita bajarapamonae evetanubena pucayo pemenenacujirubijava. <sup>4</sup> Athëbëvetsica ángel jemata runabiabica pucayojavabetsica. Nexata pucayo menenacujirubabiaba. Pemenenacujirubijavata, pajivi copiaya runareca pucayojavabereca, bajarapajivi pavitane cuene capunatsi, vecuaajibiaexanabiabatsi. <sup>5</sup> Bjarajota naboca treinta y ocho pavaibeje piavitanetsanucaenë, petabusipacuenabinëtsi. <sup>6</sup> Itsa Jesús taeyabuata bajaraponë, nexata yapëtaeyabuata bajayajebi piavitanenëcuene. Nexata Jesús jumaitsi bajaraponëjavabelia:

—¿Jitsipame tsaja nejamatejemajava? jai Jesús.

<sup>7</sup> Nexata bajaraponë jumaitsi:

—Itsajivi ata apo xainaenë tanecopatsinexareca pucayojavabereca itsa mene nacujiruba. Ajena narunabiabijitsianëreca, bajarapaepatota itsajivi netsurunabiabareca copiaya, jai piavitanetsanucaenë.

<sup>8</sup> Jesús nexata jumaitsi piavitanetsanucaenëjavabelia:

—Namatacore. Pire nijapanayo. Ponare baja, jai Jesús.

<sup>9</sup> Bjarapacuenia Jesús pejumaitsijavata, jamatejema baja piavitanetsanucaenëmi. Pita baja pijapanayo. Ponaexanepana baja. Bjarapacuenia petabusipacuenabinëtsi Jesús jamatejemayaexana judíovi penacueraevetsimatacabita. <sup>10</sup> Nexata judíovi jamatabëcuenenavëxaniabiaya jumaitsi petabusipacuenabinëmitsijavabelia:

—Ajena raja vajanacueraevetsimatacabi. Nexata apo xanepanae necaponaponaenexa nijapanayo, jai judíovi, tsipaji bajarapamonae apo jitsipae itsajivi ata pexanaenexa itsacuenëjavayo ata penacueraevetsimatacabita.

<sup>11</sup> Nexata petabusipacuenëbinëmitsi jumaitsi judíovijavabelia:

—Tanejamatejemayaexanaenë raja nejumaitsi: “Nijapanayo pire. Ponare baja,” nejai, jai petabusipacuenëbinëmitsi judíovijavabelia.

<sup>12</sup> Nexata icatsia judíovi jumaitsi:

—¿Jipatsa nexata cajumaitsi: “Nijapanayo pire. Ponare baja,” cajai? jai.

<sup>13</sup> Itsiata baitsi jane bajaraponë apo vënëyapëtae pavënëne jamatejemayaexanatsi. Apo vënëyapëtae Jesús. Tsipaji bitso jivi ayaibitsaëtoxaneto bajarajota jinavanapa. Jesús baja cajena pepuaponae itsajavabelia, yanijobatsi. <sup>14</sup> Bjaraxuacujinae icatsia Jesús caxitajarabaxuaba bajaraponë templobota. Nexata Jesús jumaitsi bajaraponëjavabelia:

—Taema. Aeconoxae baja jamatejemamë. Icatsia pëtsa baja matavëjëa exaname pibisiacuene. Icatsia raja itsa exaname, bitsomë tsipae, jai Jesús bajaraponëjavabelia.

<sup>15</sup> Nexata bajaraponë pona baja. Tsipaeba judíovijavabelia.

—Jesús tsaena raja nejamatejemayaexana, jai judíovijavabelia.

<sup>16</sup> Bajaraxuata nexata judíovi Jesús jamatabëitonotatsi. Jamatabëbeyaxuabatsinua. Tsipaji jamatejemayaexana piavitanevi judíovi penacueraevetsimatacabita. <sup>17</sup> Nexata Jesús jumaitsi judíovijavabelia:

—Taxa Dioso raja piavitanevi jamatejemayaexanabiaba daxitamatacabi. Bajaraxuata xanë ata piavitanevi jamatejemayaexanajë daxitamatacabi, jai Jesús judíovijavabelia.

<sup>18</sup> Bajarapacuenia Jesús penalivaisipaebixae judíovijavabelia, itoyatsi bitso. Bajarapamonae jamatabëbeyaxuabatsi. Tsipaji Jesús jamatejemayaexana piavitanevi judíovi penacueraevetsimatacabita. Orijibia Jesús jumaitsi: “Taxa raja Dioso,” jai. Bajarapacuenia Jesús pejumaitsixae, nexata judíovi bitso jamatabëbeyaxuabatsi.

*Pacuenia Dioso pexënato jamatabëcuenecaëjëpatsi daxitacuene pexanaenexa yabara pelivaisi*

<sup>19</sup> Jesús jumaitsi judíovijavabelia:

—Xaniajanë pacuenia pacatsipaebijitsiatsi. Xanë, Dioso pexënatonë, itsacuenejavayo ata apo exanaenë ëxanë tajamatabëcueneta. Pacuenia taniji taxa pexanaejava, bajarapacuenia xanë ata exanajë. <sup>20</sup> Taxa niasiva. Nexata neyapëtaeyaexana daxita pacuene taxa yapëtane. Tavajënaeyabelia neyapëtaeyaexanaponaena bajarapacuenie matatox- enetsia ayaicuene taexanaponaenexa. Nexata exanaenajë ayaicuene taexanaejavanë. Paxamë itsa pataename ayaicuene taexanaejavanë, pajamatabëcuenenabenajacaname. <sup>21</sup> Taxa petëpaevimi ata icatsia asaëyaexana. Xanë ata necaëjëpa tasaëyaexanaenexa petëpaejivi ata, pajivi jamatabëasaëyaexanajë. <sup>22</sup> Taxa raja apo naneconitsiaexanae tsane itsajivi ata. Xanë raja, pexënatonë, nitoroba tananeconitsiaexanaenexa pibisi- acuene pexanaevi. <sup>23</sup> Bajarapacuenia nitoroba tananeconitsiaexanaenexa taneyaiy- ataenexa daxitajivi pacuenia bajarapamonae yaiyatane taxa. Pajivi apo neyaiyatae, Dioso pexënatonë, bajarapajivi taxa ata apo yaiyatae, jai Jesús judíovijavabelia.

<sup>24</sup> Icatsia Jesús jumaitsi judíovijavabelia:

—Xaniajanë pacuenia pacatsipaebijitsiatsi. Pajivi nenamuxunaeveta tapaebilivaisi, itsa jumecovënëtanua Dioso athëbëvetsica taneitorobinëcuenetsica, nexata bajarapa- jivi xainaena matacabi apo pevereverecejava. Nexata bajarapajivi apo naneconitsi- aexanaenë tsane pibisiacuene pexanaeneconi yabara. Bajarapajivi tēpae ata tsane, capanepaenatsi Diosojavabelia. <sup>25</sup> Xaniajanë pacuenia pacatsipaebijitsiatsi. Pamonae apo xinae matacabi apo pevereverecejava, pijamatacabi baja tocopiapatatsi tane- jumetaenexa, xanë Dioso pexënatonë, tatsipaebilivaisi. Nexata pajivi nesivanaja- matabëcopata, xainaena matacabi apo pevereverecejava. <sup>26</sup> Taxa raja caëjëpatsi jivijavabelia perajutsinexa matacabi apo pevereverecejava. Nexata xanë ata taxa necaëjëpaeyaexana jivi tarajutsinexa matacabi apo pevereverecejava. <sup>27</sup> Nitorobanua tananeconitsiaexanaenexa pibisiacuene pexanaevi. Tsipaji xanë, Daxitajivi Pematapi- jinënë. <sup>28</sup> Pëtsa pajamatabëcuenenabenajacame patacatsipaebilivaisi yabara. Itsamat- acabi nejumetaena daxita petëpaevimi ata tatsipaebilivaisi. <sup>29</sup> Nexata bajarapamonae pemëthëanëmi vecuapitsapaena. Pamonae pexaniacuene pexanaevimi, Dioso icatsia asaëyaexanaenatsi. Nexata bajarapamonae xainaena matacabi apo pevereverecej- ava. Pamonae pibisiacuene pexanaevimi, icatsia Dioso asaëyaexanae atatsi tsane, bajarapamonae naneconitsiaya jinavanapaena daxitamatacabijavabelianexa, jai Jesús judíovijavabelia.

*Pacuenia Jesús jivi tsitanajamatabëcueneitajëta pecaëjëpaenëcuenetsi daxitacuene pex- anaenexa yabara pelivaisi*

<sup>30</sup> Icatsia Jesús jumaitsi judíovijavabelia:

—Xanë tajamatabëcueneta apo exanaenë tsane itsacuenejavayo ata. Taneitorobinë- sica taneitorobicuenia, pijaneconi pexainaevi naneconitsiaya jinavanapaeyaexanae- najë. Nexata saya itaxutojema apo naneconitsiaexanaenë tsane. Itsa naneconit- siaexanaenajë jivi, paneconivajëto xaina caejivi canacujitsia, bajarapaneconivajëto- ta caejivi canacujitsia naneconitsiaexanaenajë. Apo exanaenë tsane pacuenia jamatabëex- anajë tajacuata. Pacuenia jitsipa taxa taneitorobinëtsica, bajarapacuenia exanaenajë.

<sup>31</sup> Itsa navënëlivaisipaebijitsipajë, “Xanë rabaja ayaijamatabëcuenenënë,” itsa janë tsipae, itsiata itsamonae saya nejumeaebijitsipa. <sup>32</sup> Itsiata baja Juanpijinë jivibautisabinëmi nevajunupaeba xaniavaetsia. Yapëtaniji bajaraponë tanevajunupaebijava pexaniajajamatabëcueneta. <sup>33</sup> Paxamë itsamonae paitorobame tanevënëlivaisiyanijobinexa Juan jivibautisabinëmijavabelia. Nexata Juanpijinë xanë talivaisi, pexaniajailivaisi, tsipaeba paneitorobivijavabelia. <sup>34-36</sup> Pacanajamatabënapitsiaexanatsi pacuenia Juanpijinë nevënëlivaisipaeba panejumecovënëtsinexa patacapanepaejavanexa taxa Diosojavabelia. Juanpijinë abaxë itsa ponapona mapanacuataje, belámparabë picani. Pacajamatabëcueneitayota. Caepatoyo picani pasivajamatabëcuenebarëyamë papecatsipaebilivaisi. Juanpijinë itsa nevënëlivaisipaeba, pacayapëtaeyaexana baja cajena pexaniajailivaisi tapaebinëcuene. Itsiata baitsi jane Juanpijinë bajarapacuenia apo pacatsipaebi ata tsipae, xanë xainajë itsanë tanevënëlivaisipaebinënexa. Bajaraponë bitso ayaijamatabëcuenenë Juanpijinëmi matatoxenetsia. Bajaraponë taxa. Taxa netocopata pinijicuene taexanaenexa. Nexata pinijicuene exanajë daxitajivi tanesivajamatabëjumaitsinexa: “Xaniajai tsaena. Maponëje pepacuene Dioso athëbëvetsica pitorobinëtsitsicaje.” tanesivajamatabëjainexa. <sup>37</sup> Taxa, ponë nitorobica, tajëvelia baja cajena nevënëlivaisi yaquinaeyaexana pejumelivaisibaxutota. Caeto ata taxa livaisi papecatsipaebijava, apo pajumetaemë. Apo pataemënu. <sup>38</sup> Nexata pejumelivaisi apo pacatsijamatabëjone. Tsipaji apo panejumecovënëtsimë taxa athëbëvetsica taneitorobinëtsica. <sup>39</sup> Paxamë picani xaniavaetsia palebabiabame Dioso pejumelivaisibaxuto. Bajarapacuenia palebabiabame tsipaji jamatabëcuenenavëxaniabiaya pajamatabëjumaitsimë tsabiabi: “Xaniavaetsia itsa lebajë Dioso pejumelivaisi, nexata Dioso nerajutsiana matacabi apo peverevereaejava,” pajamatabëjamë tsabiabi. Itsa palebabiabame Dioso pejumelivaisibaxuto, ponë yabara palebabiabame, xanë rabaja cajena. <sup>40</sup> Paxamë itsiata apo panejumecovënëtsimë panexainaenexa matacabi apo peverevereaejava, jai Jesús judíovijavabelia.

<sup>41</sup> Icatsia Jesús jumaitsi judíovijavabelia:

—Apo exanaenë ayaiacuene taexanaejava saya jivi tanesivajamatabëjumaitsinexa: “Jesús raja ayaijamatabëcuenenënë,” tanesivajamatabëjainexa. <sup>42</sup> Pacajamatabëcueneyapëtanetsi. Yapëtaniji cajena apo panejitsipaejava Dioso. <sup>43</sup> Xanë athëbëvetsica patsicajë mapanacuayabetsicaje taxa Dioso taneitorobixaeetsica. Itsiata apo panejumecovënëtsimë. Itsanë itsa pacatopatsiana saya bajaraponë pejamatabëcuenepijilivaisi papecatsipaebinexa, nexata pajumecovënëtsianame. <sup>44</sup> Paxamë pajitsipame mapanacuata ëjivi papecasivabarëyanexa, papecayaiy-ataenexanua. Apo panajamatabëxainaemë cajena Dioso papecasivabarëyanexa. Bajaraxuata apo pacacaëjépae panejumecovënëtsinexa Dioso pejumelivaisi. <sup>45</sup> “Mara ponëje nacanconitsijitsia Diosojavabelia,” panesivajamatabëjamë pëtsa. Xanë raja apo pacaneconitsi tsanetsi. Paxamë jamatabëcuenenavëxaniabiaya pajamatabëjumaitsimë tsabiabi: “Bajayata Dioso Moiséspijinëta najumecopata jivi pejumecovënëtsinexa. Bajarapalivaisi baja jumecovënëtsiajinavanapatsi. Bajaraxuata nacacapanepaena Dioso,” pajamatabëjamë tsabiabi jamatabëcuenenavëxaniabiaya. Itsiata bajarapalivaisivecua saya pajinavanapame. Nexata bajarapalivaisi pacaneconitsiana Diosojavabelia. <sup>46</sup> Itsa pepacuene pajumecovënëtsipame Dioso Moiséspijinëta penajumecopatsilivaisi, nexata xanë ata panejumecovënëtsipame. Tsipaji cajena bajayatami tajëvelia nevajunupaeba Moiséspijinë peyaquinaebaxutota. <sup>47</sup> Apo pajumecovënëtsimë Moiséspijinë peyaquinaelivaisi. Bajaraxuata nexata apo panejumecovënëtsimë xanë patacatsipaebilivaisi, jai Jesús judíovijavabelia.

## 6

*Pacuenia Jesús pexaejava rajuta cinco mil ponëbeje yabara pelivaisi  
(Mt 14.13-21; Mr 6.30-44; Lc 9.10-17)*

<sup>1-4</sup> Bitso baja imoxoyo pevajënae pejonenexa judíovi pijafiesta, pascuavënëfiesta. Bajarapamatacabi Jesús pona Galilea pucaxaneto itsapanabelia. Bajarapapuca itsavënë Tiberiaspuca. Nexata jivi ayaibitsaëtoxoneto Jesús pënaponatsi. Tsipaji Dioso pesaëta Jesús ayaicuene exanapona. Piavitanevi jamatejemayaexana pona. Nexata Jesús junaya petsutojumabetsia. Jesús, pijajivi yajava, ecaya petsutojumatatsia. <sup>5</sup> Itsa Jesús tane jivibitsaëtoxoneto pecujibijavatsirena, Jesús jumaiti Felipejavabelia:

—¿Detsa belia comuatsianatsi pexaejava pexaenexa mapabitsaëtoxonetoje? jai Jesús.

<sup>6</sup> Bajarapacuenia Jesús jumaiti tsipaji jamatabëyapëtane pacuenia Felipe jumezanavitsijitsiatsi. Jesús baja cajena picani yapëtane pacuenia pexaejava mitsaexanaejitsia bajarapajivibitsaëtoxoneto. <sup>7</sup> Nexata Felipe jumaiti Jesúsjavabelia:

—Doscientos denariocuenia comuatsi atatsi tsipae pan, apo yacaëjëpaetsi tsipae pexaenexa daxita mapajivibitsaëtoxonetoje, jai Felipe.

<sup>8</sup> Itsanë Jesús pijajivitonë Andrés, Simón Pedro pejuyapijinë, jumaiti Jesúsjavabelia:

<sup>9</sup> —Majotaje napatajopa pejevaxinëyo. Xaina bajaraponëyo cinco papanbëbeje, cebadavënëbenota pexanaepanbëanë. Xaina anijanëyobeje dujuainëyobeje yajava. Bajaraxuaxi apo caëjëpae tsipae cajena vajarajutsinexa mapajivibitsaëtoxonetoje, jai Andrés.

<sup>10</sup> Nexata Jesús jumaiti pijajivijavabelia:

—Daxita bajarapamonae paenaeyaexanare, jai Jesús.

Nexata Jesús pijajivi itoroba jivi penaenexa ponajumavereca. Bajarapajivibitsaëtoxoneto bejamatabëcuene cinco mil meta ponëbeje. <sup>11</sup> Nexata Jesús pita panbëxi. Bajaraxuacujinae pexaenexa vajëta Diosojavabelia.

—Pexaniacuene panetoexaname. Panerajutame pataxaejavanexa, jai Jesús Diosojavabelia.

Bajaraxuacujinae Jesús pan rajuta pijajivijavabelia. Nexata juya Jesús pijajivi tsicobetsana daxita penaevivibitsaëtoxonetojavabelia. Bajara icatsia pacuenia Jesús vajëta Diosojavabelia dujuainëyobeje pexaenexa.

—Pexaniacuene panetoexaname. Panerajutame pataxaejavanexa, jai Jesús Diosojavabelia.

Bajaraxuacujinae icatsia dujuaijavaxi tsicobetsana daxita penaevivibitsaëtoxonetojavabelia. Daxita bajarapamonae xaniavaetsia nabane. <sup>12</sup> Itsa baja bajarapamonae penia, Jesús jumaiti pijajivijavabelia:

—Pacaeture baja peyajuvënënacopabenaejavanë penaxuabenaeyaniva, jai Jesús pijajivijavabelia.

<sup>13</sup> Nexata Jesús pijajivi caetuata peyajuvënënacopabenaejavanë. Vënëba doce xuabeje bemapirecuenia pexanaejavanë. Cinco papanbëmibeje picani cebadavënëbenota pexanaepanbëanë. <sup>14</sup> Nexata bajarapajivibitsaëtoxoneto itsa tane Jesús ayaicuene Dioso pesaëta pexanaejava, najumaiti Jesús yabara:

—Diosojumepaebinë profeta, ponë vaxaitsi copiaevetavanapatsi pepatsijavanexatsica, bajara jane maponëje. <sup>15</sup> Vaetabianatsi maponëje. Vajanacayanacuaeetsinë exanaenatsi bajaraponë, najai picani bajarapamonae.

Nexata Jesús jamatabëcueneyapëtane bajarapacuenia pesivanajamatabëxainaejavatsi. Bajaraxuata Jesús baja vecuapona. Najetaruca pinijitsutonëjava caenë.

*Pacuenia Jesús mene itaboxoya najetaruca yabara pelivaisi*

*(Mt 14.22-27; Mr 6.45-52)*

<sup>16</sup> Itsa baja meravi, Jesús pijajivi puca itapayabereca pona. <sup>17</sup> Jesús abaxë patsinejeva pijajivijavata, aitaquiri baja. Nexata pijajivi runareca jera ënëabereca. Nicabijitsia Capernaum tomarabelia. <sup>18</sup> Jesús baja pijajivi pepuaponae jerata, taxuxuaba jovibo pebubujajava. Nexata malataca bitso ayai. <sup>19</sup> Pavëpata Jesús pijajivi naropoba, bajarapavëpa baja bejamatabëcuene cinco pakilómetrobeje, seis pakilómetrobeje ata, pepuavecuanajetarubenaelia, Jesús pijajivi kujitanajetaruca. Jesús najetaruca mene

itaboxoya. Nexata Jesús pijajivi tanetsi. Jesús pijajivi cjunavatsi. <sup>20</sup> Nexata Jesús jumaiti pijajivijavabelia:

—¡Xanë raja najetarucajë! ¡Pëtsa panecujunavame! jai Jesús pijajivijavabelia.

<sup>21</sup> Nexata Jesús pijajivi jamatabëcuenebarëya. Jesús baja nexata nonorena jera ënëaberena. Nexata bajarapaepatota Jesús baja, pijajivi yajava, pata Capernaum tomarabelia.

*Pacuenia Jesús pëjaitatsi jivi yabara pelivaisi*

<sup>22</sup> Pamonaë Jesús pexaejava rajuta, abaxë nacopabalia puca itsapanatalia. Nexata meravia pitsijavata bajarapamonaë najumaiti:

—Canivi caejera perucaejava, tanetsi majotaje. ËJesús pijajivi runareca penicabinexalia. Nexata Jesús nacopatanuca majotaje, najai bajarapamonaë.

<sup>23</sup> Bajara saya paepatota itsamonaë jeranë yaparena Tiberias tomaraverena. Itsajota Jesús pevajëtsicujinaë Diosojavabelia pexaejava rajuta jivi ayaibitsaëtoxaneto, bajarajota vecuaimoxoyo yaëba. <sup>24</sup> Nexata pamonaë Jesús pexaejava rajuta, bajarapamonaë tane Jesús pijajivi pebarëajibitsarucaejava bajarajota. Nexata bajarapamonaë runareca jera ënëabereca penicabinexalia Capernaum tomarabelia. Bajarapatomarabelia pona pepëjaitinexatsi Jesús.

*Pacuenia Jesús bepitaavapan yabara pelivaisi*

<sup>25</sup> Jesús pepëjaitisivitsi itsa pata Capernaum tomarabelia, caxitajarabatsi Jesús. Nexata bajarapamonaë jumaiti Jesúsjavabelia:

—Jesús, ¿detsa pacujinaë patame baja maberenaje? jai.

<sup>26</sup> Jesús nexata jumaiti bajarapamonaëjavabelia:

—Xaniajanë pacuenia pacatsipaëbijitsiatsi. Paxamë panejaitame tsipaji xaniavaetsia panabaneme xanëjavata. Apo panejaitsimë panejumecovënëtsinexamë Cristocuenenë, Dioso taneitorobinëtsica. Pataë atamë ayaicuene Dioso pesaëta taexanaejava, apo panejumecovënëtsimë. <sup>27</sup> Pëtsa pacajamatabëcueneena ëpevereverecejava yabara. Pacuenia panexaejava baverevereca, bajarapitsijava. Biji rajane pacajamatabëcueneenaë apo pevereverecejava yabara. Nexata xanë, Daxitajivi Pematapijinënë, pacarajutsianatsi matababi apo pevereverecejava. Taxa Dioso baja cajena nitoroba patacarajutsinexa matababi apo pevereverecejava, jai Jesús bajarapamonaëjavabelia.

<sup>28</sup> Nexata bajarapamonaë jumaiti Jesúsjavabelia:

—¿Detsa nexata xua bepaexanajë Dioso pejitsipaecuene? jai bajarapamonaë.

<sup>29</sup> Nexata Jesús jumaiti bajarapamonaëjavabelia:

—Mara pacuene Dioso jitsipa paneexanaenexaje. Panejumecovënëre xanë Dioso taneitorobicuënetsica, jai Jesús.

<sup>30</sup> Nexata icatsia bajarapamonaë jumaiti Jesúsjavabelia:

—¿Detsa nexata xua pinijicuene Dioso pesaëta nexanaejava panetsitaexanaename patacajumecovënëtsinexa Dioso pecaitorobicuënetsica? <sup>31</sup> Vajasalinaivimi pina bajayata baxaevanapa manávënëjava petusato nacuata pacuenia baja Dioso pejumelivaisibaxutota jumaiti. Dioso baja cajena pejumelivaisibaxutota jumaiti mapacueniaje: “Bajarapamonaë rajutabiabatsi pexaejava athëbëpijijava,” jai Dioso pejumelivaisibaxutota vajasalinaivimi yabara, jai bajarapamonaë Jesúsjavabelia.

<sup>32</sup> Jesús nexata bajarapamonaëjavabelia jumaiti:

—Xaniajanë pacuenia pacatsipaëbijitsiatsi. Moiséspijinë petusato nacuata vajasalinaivimi pexaejava apo rajutsi athëbëpijijava. Taxa Dioso raja rajutabiaba bajarapamonaë pexaejavanexa. Nexata pijiniá aeconoxae paxamë ata Dioso pacarajutsiana athëbëpijipan, pepacuene pexaniajaipan. <sup>33</sup> Ponë athëbëvetsica pepatsinë, Dioso rabaja pijapan. Bajaraponë mapanacuapijivijavabeliaje rajutsiana matababi apo pevereverecejava, nayabarajai Jesús pijacuata bajarapamonaëjavabelia.

<sup>34</sup> Nexata bajarapamonaë jumaiti:

—Jesús, bajarapapan panerajutaponaename daxitamatababi canacujitsia, jai.

<sup>35</sup> Nexata Jesús jumaitsi bajarapamonaejavabelia:

—Papan jivi rajutsianatsi matacabi apo peverevereaejava, xanë rabaja bajarapannë. Pajivi xanëjavaberena pata, apo piajani cajena tsane pejamatabëthëtota. Pajivi nesivanajamatabëcopata xanëjavaberena, apo jitsipae tsane icatsia mera. <sup>36</sup> Paxamë apo panejumecovënëtsimë, patae atamë Dioso pesaëta pinijicuene taexanaejava. <sup>37</sup> Daxita pamonaë taxa tanerajutsivi, patsiana xanëjavaberena. Pajivi patsiana xanëjavaberena, apo navecuaitavetsinë tsane. <sup>38</sup> Xanë apo patsinëtsica athëbëvetsica taexanaenexa ëtajamatabëcujirupijijava. Biji rajane patsicajë taexanaenexa pacuenia nitoroba taneitorobinëtsica. <sup>39</sup> Mara pacuene taxa Dioso jitsipa tatoexanaenexaje. Apo jitsipae cajena tatoxabijava caejivi ata tanerajutsiviyajuvënëvi. Pamatacabi icatsia patsianicajë, daxita bajarapamonae tosaëyaexanaenajë icatsia petëpaejavamivecua. <sup>40</sup> Mara pacuene taxa Dioso jitsipaje. Daxita pamonaë tanetaevi Dioso pexënatonë, nexata itsa nesivanajamatabëcopata, bajarapamonae xainaena matacabi apo peverevereaejava. Bajarapamonae icatsia asaëyaexanaenajë petëpaejavamivecua pamatacabi icatsia patsianicajë, jai Jesús bajarapamonaejavabelia.

<sup>41</sup> “Xanë rabaja athëbëvetsica tapatsipan,” penayabarajajava Jesús jivijavabelia, judíovi baracuaicuaijaitsi pepënëvelia. <sup>42</sup> Nexata judíovi najumaitsi:

—Mara ponë Jesús, Josépijinë pexënatote. Vaxaitsi baja cajena yapëtanetsi paxapijinë, pena ata. Nexata bajaraponë acuenebi pejumaitsijava: “Athëbëvetsica tapatsinë,” pejajava, najai judíovi Jesús yabara.

<sup>43</sup> Nexata Jesús jumaitsi bajarapamonaejavabelia:

—Jamatabëcuenenavëxaniabiaya pëtsa panebaracuaicuaijamë tapënëverena. <sup>44</sup> Itsajivi ata raja apo caëjëpaetsi pijacuata xanëjavaberena tanesivanajamatabëcopatsinexa. Matapania taxa Dioso, taneitorobinëtsica, itsa caëjëpaeyaexanaenatsi, nesivanajamatabëcopatsiana. Pajivi nesivanajamatabëcopatsiana, asaëyaexanaenajë petëpaejavamivecua pamatacabi icatsia patsianicajë. <sup>45</sup> Bajayata Diosojumepaëbivimi peyaquinaelivaisi jumaitsi mapacueniaje: “Dioso cajena yapëtaeyaexanaena daxitajivi pexaniajailivaisi,” jai. Nexata pajivi jumecovënëta taxa peyapëtaeyaexanaelivaisi, bajarapajivi xanë ata nesivanajamatabëcuenecopatsiana, jai Jesús judíovijavabelia.

<sup>46</sup> Icatsia Jesús jumaitsi judíovijavabelia:

—Itsajivi ata cajena taxa apo tae. Xanë raja caenënë taxa Dioso taniji. Tsipaji bajaravetsica tapatsinë. <sup>47</sup> Xaniajanë pacuenia pacatsipaëbijitsiatsi. Pajivi nesivanajamatabëcopatsiana, xainaena matacabi apo peverevereaejava. <sup>48</sup> Xanë rabaja pitavapannënë. Nexata jivi rajutsianajë matacabi apo peverevereaejava. <sup>49</sup> Bajayata panijasalinaivimi xaevanapa picani manávënëjava petusato nacuata. Itsiata baitsi jane bajarapamonae bajayajebi bajaraxua xaevanapae ata, tëpa itsiata. <sup>50</sup> Xanë raja pacanavajunupaëbatsi athëbëvetsica tapatsinë. Pajivi nesivanajamatabëcuenecopatsiana, pepacuene apo tēpae tsane. <sup>51</sup> Xanë rabaja cajena pitavapannënë, athëbëvetsica tapatsinë. Pajivi jumecovënëtsiana tasivatëpaejava pijaneconi yabara, jamatabëcueneaitava tsaponaponae tsane daxitamatacabijavabelianexa. Papan rajutsianajë tanejumecovënëtsivi, tavito rabaja tsane. Navirajutsianajë daxitanacuapijivi pexainaenexa matacabi apo peverevereaejava, nayabarajai Jesús judíovijavabelia.

<sup>52</sup> Nexata judíovi najumeanaenota ëpamonae bajarapacuenia Jesús pejumaitsijava yabara. Najumaitsi bajarapamonae:

—¿Detsa pacuenia maponë nacanavirajutsipa vajavixaenexaje? Acuenebi raja vanacananavirajutsijava vajavixaenexa, najai judíovi.

<sup>53</sup> Jesús nexata jumaitsi judíovijavabelia:

—Xaniajanë pacuenia pacatsipaëbijitsiatsi. Xanë, Daxitajivi Pematapijinënë. Itsa paxamë apo panevixaemë tsane, apo panejanaapaemënu tsane, nexata matacabi apo peverevereaejava, apo paxainaemë tsane. <sup>54</sup> Pajivi nevixaena, nejanaapaenanua, xainaena matacabi peverevereaejava. Pamatacabi icatsia patsianicajë, bajarapajivi

icatsia asaëyaexanaenajë petëpaejavamivecua. <sup>55</sup> Tavito rabaja cajena pepo pexaniajajava jivi pexaenexa. Tajana rabaja pijinia pepo pexaniajajava jivi piapaenexa. <sup>56</sup> Pajivi nevixaena, nejanaapaenanua, bajarapajivi yajavaponaponaenajë. Bajarapajivi ata pijinia neyjavaponaponaena. <sup>57</sup> Taxa, ponë nitorobica, bajaraponë daxitamatacabijavabelianexa piasaëtsaponaponaenë. Bajaraponë pejamatabëcueneta xanë ata daxitamatacabijavabelianexa asaënë tsaponaponaenë. Nexata pajivi nevixaena, bajarapajivi pijinia tajamatabëcueneta asaë tsaponaponaenë tsane daxitamatacabijavabelianexa. <sup>58</sup> Athëbëvetsica pepatsipan, xua yabara baja pacatsipaebatsi, bajarapapan apo jëpae papan bajayata panijasalinaivimi xaevanapa. Bajarapapanmi bajayajebi xaevanapae ata, bajarapamonaemi itsiata tëpa baja cajena. Biji rajane pajivi xanë nevixaena, ponaponaena daxitamatacabijavabelianexa, jai Jesús judíovijavabelia.

<sup>59</sup> Bajarapacuenia Jesús jumaiti judíovijavabelia livaisi petsipaebijavata Capernaum tomarata, judíovi penacaetuatabiabibota.

#### *Matacabi apo peverevereaejava yabara pelivaisi*

<sup>60</sup> Ayaibitsaëto, pamonaenë Jesús pepëta najinavanapa, itsa jumetane Jesús petsipaebilivaisi, apo jumexaniatae. Najumaiti epamonaenë:

—Penajumetsënëtsilivaisi saya nacatsipaeba. ¿Jipatsa jumecovënëtsiana? Ajibi cajena, najai epamonaenë.

<sup>61</sup> Nexata Jesús jamatabëcueneyapëtane pacuenia pepënëvelia baracuaicuajitsi. Nexata Jesús yanijoba pepënaponaevitsijavabelia. Jumaiti:

—¿Apo bepexaniajailivaisi tsaja pajumetaneme patacatsipaebilivaisi? <sup>62</sup> Xanë Daxitajivi Pematapijinë. ¿Detsa paitsimë tsipae itsa pataejitsipame tatsiajava athëbëabetsia taponaponaenacuamijavabetsia? <sup>63</sup> Espiritu Santo baja cajena pejamatabëcueneta jivi xaina matacabi apo peverevereaejava. Eživi raja pejamatabëcueneta apo cajëpaetsi pexainaenexa matacabi apo peverevereaejava. Patacatsipaebilivaisi baja cajena papecatsijamatabëjonenexa picani, panexainaenexa matacabi apo peverevereaejava. <sup>64</sup> Itsiata baitsi jane paxamëyajuvënëvi abaxë apo nejumecovënëtsi, jai Jesús.

Jesús bajarapalivaisi petsipaebivajënae ata, jamatabëcueneyapëtane pamonaenë apo jumecovënëtsijitsiatsi. Jamatabëcueneyapëtanenua tajëvelia ponë canajetsijitsiatsi pijavajabitsaë pecobeyabelia. <sup>65</sup> Nexata Jesús icatsia jumaiti pepënaponaevitsijavabelia:

—Bajaraxuata cajena pacajumaititsi: “Itsajivi ata raja apo cajëpaetsi pijacuata xanëjavaberena tanesivanajamatabëcopatsinexa. Matapania taxa Dioso, taneitorobinëtsica, itsa cajëpaeyaexanaenatsi, nesivanajamatabëcopatsiana,” pacajitsi, jai Jesús pepënaponaevitsijavabelia.

<sup>66</sup> Bajara nexata jota ayaibitsaëto Jesús pepënaponaevitsi vepënaviabatsi baja. Nexata bajarapamonaenë pematatsënëa baja apo pënaponaevitsi Jesús. <sup>67</sup> Nexata Jesús yanijoba doce ponëbeje pijajivijavabelia. Jumaiti:

—¿Paxamë ata tsabaja pajamatabënnaviabame? jai Jesús.

<sup>68</sup> Nexata Simón Pedro jumaiti Jesúsjavabelia:

—Tajatuxanenë, itsa panaviabajë, ¿jipatsa nexata papënaponaejitsipajë xamëvecua? Xamë rabaja caenëmë panetsipaebame matacabi apo peverevereaejava pataxainaenexa. <sup>69</sup> Paxanë rabaja pacajumecovënëtsi patanetsipaebilivaisimë. Pacayapëtanetsinua baja cajena Cristocuenemë, Dioso piasaëtsaponaponaenë daxitamatacabijavabelianexa pexënatomë, jai Simón Pedro Jesúsjavabelia.

<sup>70</sup> Jesús nexata jumaiti pijajivijavabelia:

—Xanë rabaja pacaitapetatsi doce paponëmëbeje. Itsiata baitsi jane paxamëyajuvënë, itsanë, dovathi pijajivitonë tsaponaponaenë, jai Jesús.

<sup>71</sup> Bajarapacuenia Jesús itsa jumaiti, Judas Iscariote, Simón pexënato, yabara jumaiti. Judas Jesús canajetsijitsiatsi pijavajabitsaë pecobeyabelia. Judas rabaja picani Jesús pijajivitonë, doce ponëbejeyajuvënë.

## 7

*Pacuenia Jesús pejuyapijivi apo jumecovënëtsitsi yabara pelivaisi*

<sup>1</sup> Jesús ponapona Galilea nacujava. Apo jitsipae peponaponaejava Judea nacujava. Tsipaji bajarajota judíovi jamatabëbeyaxuabatsi. <sup>2</sup> Imoxoyo baja pevajënae pejonenexa fiesta, pafiestamatacabi judíovi bobërëtonë exanabiaba. Nexata judíovi bajarapabobërëtonëta jinavanapabiaba bajarapafiestamatacabi. <sup>3</sup> Nexata Jesús pejuyapijivi junatatsi penaponaenexa bajarapafiestajavabelia. Jesús pejuyapijivi jumaitsi:

—Pëtsa nacopatame majotaje. Judea nacujavabelia liamëre. Bajarajotalia pijinia Dioso pesaëta pinijicuene nexanaponaejava nijajivi tsitaexanaename. <sup>4</sup> Pajivi pexanaejava yabara jitsipa pevënëlivaisitaenexatsi daxitanacuapijivi, bajarapajivi pexanaejava muetsia apo exanae. Nexata pepacuene Dioso pesaëta pinijicuene ita exanaponaename, nexata icatsia pinijicuene tsitaexanaename fiestajavata daxitanacuapijivi pitabarata. Nexata daxitajivi cayapëtaena, jaitsi Jesús pejuyapijivi.

<sup>5</sup> Jesús pejuyapijivi ata apo jamatabëjumecovënëtsi Cristocuene. Bajaraxuata bajarpacuenia pejuyapijivi ata jumaitsitsi. <sup>6</sup> Nexata Jesús jumaitsi pejuyapijivijavabelia:

—Abaxë raja tajamatacabi apo netocopiapatsi tanaitajëtsinexa daxitajivijavabelia. Itsiata paxamë apo paitsimë. Paepatota jamatabëpaponame, pacatoxanepana paneponaenexa. <sup>7</sup> Mapanacuapijivi cajena acuenebi paxamë papecaitojajava. Itsiata baitsi jane xanë nitoya. Tsipaji itavetaponajë pibisiacuene pexanavanapaejava. <sup>8</sup> Paxamë baja paponare fiestajavabelia. Xanë ra abaxë apo ponaenë. Tsipaji abaxë apo netocopiapatsi paepatota ponaejitsianë, jai Jesús pejuyapijivijavabelia.

<sup>9</sup> Bajarapacuenia Jesús pejumaitsicujinae, abaxë Jesús nacopatanuca Galilea nacujata pecotocaevinexa.

*Pacuenia Jesús napona fiestajavabelia yabara pelivaisi*

<sup>10</sup> Jesús pejuyapijivi fiestajavabelia pepuaponae, Jesús ata cotocaevi napona fiestajavabelia. Jesús nexata jivibitsaëto tuatuajëta apo naponae muetsia pepatsinexa. <sup>11</sup> Jesús picani jaitatsi judíovi pevetsivi fiestajava. Najumaitsi judíovi pevetsivi:

—¿Detsa xania jota ponapona bajaraponë? najai judíovi pevetsivi Jesús yabara.

<sup>12</sup> Ayabitsaëto jivi vëpaxapaxajaiya baracuaicuaijaitsi Jesús. Itsamonae jumaitsi Jesús yabara:

—Pexaniajamatabëcuenenë raja, jai itsamonae.

Itsamonae pijinia jumaitsi:

—Apo pexaniajamatabëcuenenë raja Jesús. Peyamaxëitojorobinë ra saya jivi, jai Jesús yabara.

<sup>13</sup> Itsajivi ata apo cuaicuaijai ayaijumeta Jesús yabara. Tsipaji jumejunava judíovi pevetsivi pejumetaeyanivatsi.

<sup>14</sup> Itsa baja fiesta epatua tsaponae pevereverecaenexa, nexata Jesús joneya temploboyalialia. Taxuxuaba jane baja livaisi petsipaebijava. <sup>15</sup> Judíovi pevetsivi jamatabëcuenenabenajaca ita jumetane Jesús pepaebilivaisi. Nexata judíovi pevetsivi najumaitsi:

—Maponëje bitso livaisi yapëtane. Picani livaisi apo nacujarubi pacuenia vaxaitsi nacujarubatsi, najai tsanubenaë judíovi pevetsivi Jesús yabara.

<sup>16</sup> Jesús nexata jumaitsi judíovi pevetsivijavabelia:

—Tatsipaebilivaisi raja apo tajamatabëcuenepijilivaisi. Dioso raja, ponë nitorobica, bajaraponë pejumelivaisi tsipaebaponajë. <sup>17</sup> Pajivi jamatabëexana Dioso pejitsipaecuenia, bajarapajivi yapëtaena pepacuene Dioso pejumelivaisi tatsipaebijava. Nexata yapëtaenanua tajamatabëcuenepijilivaisi ita tsipaebajë. <sup>18</sup> Pajivi tsipaeba ëpejamatabëcuenepijilivaisi, tsipaeba saya jivi peyaiyataenexatsi. Itsiata baitsi jane pajivi tsipaeba jivi peyaiyataenexa Dioso, bajarapajivi cajena tsipaeba pexaniajailivaisi. Bajarapajivi apo yamaxëitojorobi jivi. Tsipaji pacuenia Dioso itorobatsi, tsipaeba, jai Jesús judíovi pevetsivijavabelia.

<sup>19</sup> Jesús icatsia jumaitsi judíovijavabelia:

—Moiséspijinē baja cajena bajayata yaquina Dioso penajumecopatsilivaisi jivi pejume-covēnētsinexa. Itsiata baitsi jane paxamēyajuvēnjivi, caejivi ata, apo jumecovēnētsi bajarapalivaisi. Bajarapalivaisi pacaitavetsi ata jivi panebeyaxuabiyani, ¿detsa xuajitsia itsiata xanē jamatabēpanebeyaxuabame? jai Jesús judíovijavabelia.

<sup>20</sup> Nexata judíovi jumaitsi Jesúsjavabelia:

—Dovathi baja cajena yajavaponaponame. Itsajivi ata raja apo jamatabēcabeyaxuabi, jai judíovi.

<sup>21</sup> Jesús nexata jumaitsi bajarapamonaejavabelia:

—Caejavayo Dioso pesaēta pinijicuene taexanaejava exanajē penacueraevetsimat-acabita. Nexata itsa pataneme bajarapacuene, daxita paxamē pajamatabēcuenen-abenajacame penacueraevetsimatatabita taexanaexae bajarapacuene. <sup>22</sup> Paxamē ata penacueraevetsimatatabita ata panacuenebababame. Tsipaji penacuetonēyo paperabēcaucutabiabame penacueraevetsimatatabita ata ocho pamatabibeje itsa xaina penaexanaecujinae. Baitsi paboupipebabēcaucutabiabame, Moiséspijinē baja cajena papecaitorobicuene. (Itsiata Moiséspijinē apo taxuxuabi bajarapacuene. Bajaraponēmi cajena pevajēnaeya ata, panijasalinaivimi taxuxuaba bajarapacuene.)

<sup>23</sup> Bajarapacuenia penacuetonēyo paperabēcaucutabiabame penacueraevetsimatatabita ata, panejumecovēnētsinexa Moiséspijinē pitorobicuenia. ¿Detsa nexata xuajitsia xanē panebaraanaepaname penacueraevetsimatatabita pebi tajamatejemayaexanaejava yabara? <sup>24</sup> Xaniavaetsia abaxē payapētaenejevamē itsajivi pibisiacuene pexanaejava, pētsa abaxē pananeconitsiaexaname. Matapania xaniavaetsia payapētaename, payanijobianamenua, itsa baja xaniajai naneconita, baja rajane pananeconitsiaexaname, jai Jesús judíovijavabelia.

*Pacuenia Jesús navajunupaeba itsaverena pata yabara pelivaisi*

<sup>25</sup> Itsamonae Jerusalén tomarata pejinavanapaevi najumaitsi Jesús yabara:

—¿Matsa ponē apo jaitarutsitsi pebeyaxuabinexatsije? <sup>26</sup> ¡Pataema! Bajaronē cuaicuajiai tsanuae daxitajivi pitabarata. Itsiata itsajivi ata apo jumeitavetsi. Vajanacaevetsivi ata meta jumecovēnēta bajaraponē pepacuene Dioso athēbēvetsica pitorobijavatsitsica jivi pecapanepaenexa. Bajaraxuata bajarapamonae apo jumeitavetsi. <sup>27</sup> Vaxaitsi cajena yapētanetsi itsaverena pata maponēje. Nexata acuenebi pijacuata: “Cristonē raja,” pejajava. Tsipaji Cristo yabara tajēvelia jumaitsi mapacueniaje: “Itsajivi ata apo yapētae tsane itsaverena patsijitsia Cristo,” jai, najai Jerusalén tomarapijivi Jesús yabara.

<sup>28</sup> Nexata Jesús livaisi petsipaebijavata templobota, jumetane bajarapamonae pebaracuaicuajiajavatsi. Nexata Jesús ayaijumeta jumaitsi bajarapamonaejavabelia:

—Xanē yabara pajumaitsimē: “Yapētanetsi bajaraponē. Yapētanetsinua itsaverena pata bajaraponē,” pajamē. Itsiata baitsi jane apo patsinē tajamatabēcueneta. Biji rajane taneitorobinētsica ponapona athēbētatsia. Paxamē cajena apo payapētaemē bajaraponē. <sup>29</sup> Xanē yapētaniji bajaraponē. Tsipaji athēbēvetsica tapatsinē. Bajaraponē baja cajena nitorobica mapanacuayabetsicaje, jai Jesús bajarapamonaejavabelia.

<sup>30</sup> Nexata picani Jesús bajarapamonae jamatabēvaetabatsi penaneconitsiaexanaenexatsi. Itsiata abaxē itsajivi ata apo vaetabitsi. Tsipaji abaxē Jesús apo tocopiapatsitsi pijamatababi pevaetabinexatsi. <sup>31</sup> Itsiata baitsi jane bajarapamonaejayuvēnēvi ayaibitsaēto jumecovēnēta Cristocuene. Nexata bajarapamonae najumaitsi:

—Itsa pina Cristo patsianica, Dioso pesaēta pinijicuene pexanaejava exanaena. Bajara maponē pepacuene Cristoje, ponē Dioso athēbēvetsica itorobijitsiatsica jivi pecapanepaenexa. Tsipaji nacatsitajēta pesaē. Pinijicuene pexanaejava exana Dioso pesaēta. Tsipaji cajena itsanē ata mapanacuata apo caējēpaetsi bajarapitsipinijicuene pexanaenexa, najai bajarapamonae Jesús yabara.

*Pacuenia fariseovi itoroba policíavi Jesús pevaetabinexatsi yabara pelivaisi*

<sup>32</sup> Fariseovi jumetane jivi pejumaitisjiva: “Pepacuene rabaja maponë Cristoje,” pejajava Jesús yabara. Nexata fariseovibeje judíovi penamatacaitorobivibeje najamatabëcuenejèpabeje pitorobinexa policíavi. Nexata policíavi pona templobojavabelia pevaetabinexatsi picani Jesús. Itsiata abaxë Jesús apo vaetabitsi. <sup>33</sup> Jesús nexata templobota jumaitis judíovijavabelia:

—Abaxë raja bajayayo itsiata pacayajavaponaponaenatsi. Bajaraxuacujinae jane baja naviatiansianijë taneitorobinësicajavabetsia. <sup>34</sup> Paxamë picani panejaitiansiname. Itsiata apo panecaxitajarabimë tsane. Tsipaji apo pacacajèpae tsane paneponaenexa itsabetsia ponaejitsianë, jai Jesús judíovijavabelia.

<sup>35</sup> Nexata judíovi nayanijoba èpamonae.

—¿De tsaeta belia maponë pijaponaejitsiaje peponaenexa, itsajota vaxaitsi apo caxitajarabijitsiatsi? Ponaejitsia raeta griegovi pijatomaranëjavabelia, itsabelia judíovi jinavanapa. Griegovi raeta livaisi tsipaebijitsia Jesús. <sup>36</sup> Jesús nacajumaitis: “Paxamë picani panejaitiansiname. Itsiata apo panecaxitajarabimë tsane. Tsipaji apo pacacajèpae tsane paneponaenexa itsabetsia ponaejitsianë,” nacajai. ¿De tsaeta pitsijamatabëcuene yabara bajarapacuenia Jesús nacajumaitis? najai judíovi.

#### *Apo pevereverecaemera yabara pelivaisi*

<sup>37</sup> Pafiestamatacabi judíovi bobërëtonë exanabiaba, pecopiarucaematacabi, jivi bitso najamatabëcuenereviabiaya bajinavanapa. Nexata bajarapamatacabi jivi ayaibitsaëto pitabarata Jesús nonotabapuna. Ayaijumeta Jesús jumai tsanucae:

—Pajivi mera jitsipa, xanëjavaberena pona piapaenexa. <sup>38</sup> Dioso pejumelivaisibaxutota jumaitis mapacueniaje: “Pajivi nesivanajamatabëcuenecopatsiana, bajarapajivi pejamatabëèthëtota xainaena daxitamatacabi pepitsaparucaemera. Baitsi bajarapajivi asivaya taeyabiabiana itsamonae ata. Nexata jamatabëcueneyavenonabiabiana itsamonae ata tanesivanajamatabëcuene copatsinexa, bajarapamonae ata pexainaenexa matacabi apo pevereverecejave,” jai Jesús judíovijavabelia.

<sup>39</sup> “Pajivi nesivanajamatabëcuenecopatsiana, bajarapajivi pejamatabëèthëtota xainaena daxitamatacabi pepitsaparucaemera,” itsa jai Jesús, jumaitis Espíritu Santo yabara. Baitsi pajivi jumecovënëta Jesús petsipaebilivaisi, tsijamatabëcaenatsi Espíritu Santo. Itsiata baitsi jane abaxë Espíritu Santo apo patsitsica. Tsipaji abaxë Jesús apo pona athëbëabetsia.

#### *Pacuenia daxitajivi Jesús yabara apo najamatabëcuenejèpae yabara pelivaisi*

<sup>40</sup> “Pajivi nesivanajamatabëcopatsiana, bajarapajivi pejamatabëèthëtota xainaena daxitamatacabi pepitsaparucaemera,” pejajava Jesús, jivi itsa jumetane, itsamonae jumaitis:

—Xaniajai rabaja. Maponë Diosojumepaebinë profetanëje, ponë copiaevetavanapatsi pepatsijavanexatsica, jai bajarapamonae.

<sup>41</sup> Itsamonae pijinia jumaitis:

—Jume raja. Bajara maponë Cristoje, ponë Dioso athëbëvetsica itorobijitsiatsica jivi pecapanepaenexa, jai itsamonae.

Itsiata itsamonae jumaitis:

—¡Apo Cristo raja! Tsipaji Cristo Galilea nacuaverena apo patsi tsipae. <sup>42</sup> Dioso baja cajena pejumelivaisibaxutota jumaitis pacuenia Davidpijinë pemomoxiyajuvënënë naexanaejitsia Cristo. Bajaraponë peneta naexanaena Belén tomarata, patomarata Davidpijinë bajayata ponapona, jai bajarapamonae.

<sup>43</sup> Bajarapacuenia nexata jivi ayaibitsaëto apo najamatabëcuenejèpae Jesús yabara.

<sup>44</sup> Itsamonae picani Jesús jamatabëvaetabatsi penaneconitsiaexanaenexatsi. Itsiata itsajivi ata apo vaetabitsi.

#### *Pacuenia Jesús yabara judíovi pevetsivi apo jumecovënëtsi Cristonëcuene yabara pelivaisi*

<sup>45</sup> Papolicíavi picani fariseovibeje judíovi penamatacaitorobivibeje itorobalia Jesús pevaetabinexatsi, itsiata apo vaetabitsi. Naviabalia baja cobesa. Nexata fariseovibeje judíovi penamatacaitorobivibeje jumaitsi policíavijavabelia Jesús yabara:

—¿Detsa xuajitsia apo pacaponaemërena bajaraponë? jai fariseovibeje judíovi penamatacaitorobivibeje.

<sup>46</sup> Nexata policíavi jumaitsi:

—Bajaraponë Dioso pitorobicueniatsi, xaniavaetsia jivi livaisi tsipaeba, itsajivi ata apo pepaebicuenia. Bajaraxuata apo pavaetabinë patacaponaenexarena, jai policíavi.

<sup>47</sup> Nexata fariseovi jumaitsi:

—¿Paxamë ata tsabaja pacayamaxëitojoroba bajaraponë? <sup>48</sup> Caenë ata vajanacaevet-siviyajuvënënë, fariseoviyajuvënënë ata, apo jumecovënëtsi baja cajena bajaraponë Cristonëcuene. <sup>49</sup> Pamonaë jumecovënëta bajaraponë Cristonëcuene, apo yapëtae pacuenia bajayata Dioso Moiséspijinëta penajumecopatsilivaisi jumaitsi jivi pejumecovënëtsinexa. Nexata bajarapamonae apo peyapëtaexae bajarapalivaisi, naneconita Diosojavabelia. Nexata Dioso naneconitsiaexanaenatsi, jai fariseovi policíavijavabelia Jesús Cristonëcuene pejumecovënëtsivi yabara.

<sup>50</sup> Nicodemo, ponë copiaya Jesús taeyojopalia meravi, bajaraponë naeca bajarajota. Bajaraponë Nicodemo fariseoviyajuvënënë. Nicodemo nexata jumaitsi pevëna fariseovijavabelia:

<sup>51</sup> —Vajalivaisi cajena nacaitaveta itsajivi ata vajananeconitsiaexanaeyaniva, abaxë copiaya xaniavaetsia navajunupaebinejeva paneconi xaina bajarapajivi, jai Nicodemo.

<sup>52</sup> Nexata bajarapamonae jumaitsi Nicodemojavabelia:

—¿Xamë ata tsabaja Galilea nacuapijinëmë necajumecovënëtsi bajaraponë Cristonëcuene? Lebare Dioso pejumelivaisibaxuto. Yapëtaename pacuenia jumaitsi. Caenë ata cajena Diosojumepaebinë profeta apo patsi Galilea nacujavaverena, jai bajarapamonae.

*Petiriva pibisiacuene pexanaeva pamona pepëya yabara pelivaisi*

<sup>53</sup> Fariseovibeje judíovi penamatacaitorobivibeje pebijataecujinae policíavi, fariseovi baja caenë canacujitsia naviaba pijabonëjavabelia.

## 8

<sup>1</sup> Jesús pona Olivovënë tsutojavabelia. <sup>2</sup> Nexata meravia pitsijavata, bajayacunua, Jesús icatsia naviarena temploboyaberena. Nexata daxitajivi itaxutuanacaetuanatsi. Nexata Jesús ecojopa templobota. Livaisi tsipaeba bajarapamonaejavabelia. <sup>3</sup> Nexata temploboyaberena judíovi pecujarubivi, fariseovi yajava, caparena petiriva Jesúsjavaberena. Bajarapamonae petiriva vaetaba pamona pepëya itsanëjavabelia pevitota pibisiacuene pexanaponaponaejavata. Nexata petiriva nutatsi daxitajivi pitabarata. <sup>4</sup> Nexata judíovi pecujarubivi, fariseovi yajava, jumaitsi Jesúsjavabelia:

—Jesús, mara povaje pavaetabajë pamona pepëya itsanëjavabelia pibisiacuene pexanaponaponaejavata. <sup>5</sup> Dioso Moiséspijinëta penajumecopatsilivaisi nacaitoroba baja cajena vajatseconaenexa ibotonëta bajarapitsiva vajabeyaxuabinexa bajarapacuenia. ¿Detsa paitsinë tsane mapovaje? jai bajarapamonae Jesúsjavabelia.

<sup>6</sup> Bajarapamonae jumaitsi bajarapacuenia Jesús saya pejamatabëcueneëjëtsinexatsi. Nexata Dioso Moiséspijinëta penajumecopatsilivaisivecua, saicayacuenia, Jesús itsa jumecanaviata, bajarapamonae neconitsijitsiatsi picani. Itsiata Jesús jamatabëcueneyapëthane pacuenia bajarapamonae sivanajamatabëxainatsi. Nexata Jesús ira taeyecaxuaba. Pecobesitota ira yaquineca. <sup>7</sup> Bajarapamonae bitso yanijobapona Jesúsjavabelia. Nexata jane baja Jesús nonotapuna. Jumaitsi bajarapamonaejavabelia:

—Ponë paxamëyajuvënënë pibisiacuene apo pexanaenë, bajaraponë copiata iboto bixanae bajarapovajavabelia, jai Jesús.

<sup>8</sup> Nexata icatsia Jesús ecareca. Ira taeyeca icatsia. <sup>9</sup> Nexata bajarapamonae itsa jumetane bajarapacuenia Jesús pejumaitsiyava, bajarapamonae

najamatabēnapita, caenē canacujitsia, pibisiacuene pexanavanapaejava. Nexata bajaramonae, caenē canacujitsia, templobovecua pitsapapona. Copiaya perujuvi pitsapa. Bajaraxuacujinae pevějēavi pitsapa. Itsa baja daxita pitsapa, caenē Jesús templobota nacopateca petiriva yajava. Bजारapova abaxē nuca bajarajota. <sup>10</sup> Nexata Jesús ita notapuna, caeva taenuta. Nexata Jesús jumaiti petirivajavabelia:

—¿Detsa belia pona pamonae caneconita picani? ¿Itsanē ata tsaja apo cabixanae ibotota nijaneconi yabara pecananeconitsiaexanaenexa? jai Jesús petirivajavabelia.

<sup>11</sup> Nexata bajarapova jumaiti:

—Jume raja. Caenē ata apo nebixanae ibotota, jai bajarapova.

Nexata Jesús jumaiti:

—Xanē ata apo cananeconitsiaexanaetsi. Ponare baja. Pētsa baja icatsia pibisiacuene exaname, jai Jesús bajarapovajavabelia.

*Jesús mapanacuapijivije pexaniajailivaisita pejamatabēcueneitayotsinē yabara pelivaisi*

<sup>12</sup> Jesús icatsia templobota jumaiti jivijavabelia:

—Xanē raja pexaniajailivaisita daxitanacuapijivi jamatabēcueneitayotsianajē. Pajivi nepēnaponaena, bajarapajivi jamatabēcueneitayotsianajē. Nexata xainaena matababi apo pevereveceajava. Bजारapajivi itsamatabijavabelia ata apo ajamatabēcueneitaquiri tsane, jai Jesús jivijavabelia.

<sup>13</sup> Nexata fariseovi jumaiti Jesúsjavabelia:

—Xamē saya nijacuata najamatabēcuenelivaisipaebame. Nexata apo payapētaenē nexaniajaicuene. Bजारaxuata apo pacajumecovēnētsitsi, jai fariseovi.

<sup>14</sup> Jesús nexata jumaiti fariseovijavabelia:

—Najamatabēcuenelivaisipaebi atanē tajacuata, itsiata cajena xaniajanē. Tsipaji xanē yapētaniji itsaverena patajē. Itsabelia ata ponaejitsianē, yapētaniji. Itsiata paxamē apo payapētaemē itsaverena patajē. Itsabelia ata ponaejitsianē, apo payapētaemē. <sup>15</sup> Paxamē paexanabiabame pacuenia baexana mapanacuapijivije. Itaxutojema jivi pananeconitsiaexanabiabame payapētaenejevamē pepacuene paneconivajēto xaina. Xanē abaxē apo naneconitsiaexanaenē itsajivi ata. <sup>16</sup> Itsiata itsamatababi, ita naneconitsiaexanaenajē Diosjavabelia pijaneconi pexainaevi, naneconitsiaexanaenajē paneconivajētota xaina. Tsipaji caenēnē apo naneconitsiaexanaenē tsane. Taxa Dioso, ponē nitorobica, bajaraponē neyajava tsane jivi tananeconitsiaexanaematababi. <sup>17</sup> Dioso Moiséspijinēta penajumecopatsilivaisi peyaquinaebaxutota jumaiti mapacueniaje: “Palivaisi anijajivibeje najumejēpaeya paebabeje, bajarapalivaisi bepajumecovēnētame,” jai. <sup>18</sup> Xanē baja cajena najamatabēcuenelivaisipaebajē. Taxa ata, ponē nitorobica, nevajunupaeba. Nexata baja panijanēnēbeje najumejēpaeya pacatsipaebatsibeje xanē talivaisi, jai Jesús fariseovijavabelia.

<sup>19</sup> Nexata fariseovi jumaiti:

—¿Detsa jota nexata ponapona axa? jai.

Nexata Jesús jumaiti fariseovijavabelia:

—Paxamē ra cajena apo paneyapētaemē. Taxa ata apo payapētaemē. Itsa paneyapētaejitsipame, nexata taxa ata payapētaejitsipame, jai Jesús fariseovijavabelia.

<sup>20</sup> Bजारapacuenia Jesús jumaiti livaisi petsipaebijavata templobota. Itsajota ofrendacuenia palata pejebabiabicajonianē bobena, bajarajota Jesús livaisi tsipaebanuca. Itsiata abaxē itsajivi ata Jesús apo vaetabitsi penaneconitsiaexanaenexatsi. Tsipaji abaxē pijamatababi apo tocopiapatsitsi pevaetabinexatsi.

*Pacuenia Jesús tajēvelia jumaiti: “Paxamē apo pacacaējēpae tsane paneponaenexa itsabelia ponaejitsianē,” jai yabara pelivaisi*

<sup>21</sup> Jesús icatsia templobota tajēvelia jumaiti fariseovijavabelia:

—Xanë pacavecuaponaenatsi. Nexata paxamë panejaitsoniane. Paxamë pibisiacuene paneexanaeneconi, Dioso apo pacavecuajibiaexanae tsane. Nexata panijaneconi payajavatëpaename. Bajaraxuata paxamë apo pacacaëjëpae tsane paneponaenexa itsabelia ponaejitsianë, jai Jesús fariseovijavabelia.

<sup>22</sup> Nexata judíovi jamatabëcuenenavëxaniabiaya najumaitsi Jesús yabara:

—Covë nabeyaxuabijitsia. Bajaraxuata nacajumaitsi: “Apo pacacaëjëpae tsane paxamë paneponaenexa itsabelia ponaejitsianë,” nacajai, najai judíovi.

<sup>23</sup> Nexata Jesús jumaitsi judíovijavabelia:

—Paxamë baja cajena mapanacuapijivimëje. Xanë saicaya athëbëvetsica tapatsinë. Paxamë mapanacuata panëjinavanapaevije. Xanë raja maapo panacuapijinëje.

<sup>24</sup> Bajaraxuata pacajumaitsi: “Paxamë pibisiacuene paneexanaeneconi, Dioso apo pacavecuajibiaexanae tsane. Nexata panijaneconi payajavatëpaename,” pacajaitsi. Nexata paxamë panijaneconi payajavatëpaename itsa apo panejumecovënëtsimë patacavecuajibiaexanaejavanexa pibisiacuene paneexanaeneconi, jai Jesús fariseovijavabelia.

<sup>25</sup> Nexata fariseovi jumaitsi Jesúsjavabelia:

—¿Detsa xamë ponëmë? jai.

Jesús nexata jumaitsi:

—Pacanavajunupaebatsi rabaja. Tataxuxuabijavaveliacujinae livaisi patacatsipaebijava, pacanavajunupaebaponatsi baja cajena. <sup>26</sup> Paxamë bitso pibisiacuene paexanabiabame. Nexata ayailivaisi xainajë itsamonaejavabelia patacavajunupaebinexa pibisiacuene paneexanaejava. Nexata pibisiacuene paneexanaeneconi yabara, necaëjëpa picani patacananeconitsiaexanaenexa. Itsiata baitsi jane ponë nitorobica, petsipaebinë pexaniajailivaisi. Pacuenia bajaraponë netsipaeba xanëjavaberena, bajarapacuenia juya xanë tsipaebajë mapanacuapijivijavabeliaje, jai Jesús fariseovijavabelia.

<sup>27</sup> Itsiata baitsi jane fariseovi apo jumeyapëtae bajarapacuenia Jesús petsipaebijava paxa Dioso yabara. <sup>28</sup> Bajaraxuata Jesús jumaitsi bajarapamonaejavabelia:

—Itsa xanë, Daxitajivi Pematapijinë, paneyotarutsiaexanaename cruzajavabelia patanebeyaxuabiaexanaenexamë, nexata matapania bajarapamatacabi paneyapëtaename ponëcuenenë. Nexata bajarapamatacabi payapëtaenamenua patacatsipaebijava apo tajamatabëcuenepijilivaisi. Biji rajane pacuenia taxa copiata netsipaeba, bajarapacuenia juya pacatsipaebatsi paxamëjavabelia. <sup>29</sup> Taxa, ponë nitorobica, neyjavaponapona baja cajena. Tajaepato apo neponaponaeyaexanae. Tsipaji exanabiabajë pacuene yabara taxa nesivajamatabëcuenenëbarëyajitsia, jai Jesús bajarapamonaejavabelia.

<sup>30</sup> Itsa Jesús jumaitsi bajarapacuenia, ayaibitsaëtoxaneto judíovi jumecovënëtsi Cristonëcuene: “Xaniajai cajena. Maponëje Dioso itorobicatsi,” jamatabëjai judíovi Jesús yabara.

*Dioso pexi yabara pelivaisi, dovathi ata pexi yabara pelivaisi*

<sup>31</sup> Pajudíovi jumecovënëta Cristonëcuene, bajarapajudíovijavabelia Jesús jumaitsi:

—Itsa paxamë tsiteca pajumecovënëtavanapaename patacatsipaebilivaisi, nexata baja pepacuene patajajivimë tsane. <sup>32</sup> Nexata palivaisi pacatsipaebatsi, payapëtaename baja pexaniajailivaisicuene. Nexata baja itsa payapëtaename bajarapapexaniajailivaisi, pacopabianame baja itsanë papecaitorobicuenia panetoexanabiabijavami, jai Jesús bajarapajudíovijavabelia.

<sup>33</sup> Nexata pajudíovi apo jumecovënëtsi Cristonëcuene, jumaitsi Jesúsjavabelia:

—Paxanë rabaja cajena Abrahampijinë papemoxinë. Paxanë dajubicuenia apo panecanajetsi itsanëjavabelia amoneya patatonacuenebabiabinexa. “Pacopabianame baja itsanë papecaitorobicuenia panetoexanabiabijavami,” itsa panejamë, ¿detsa pitsilivaisi yabara panejumaitsimë? jai Jesúsjavabelia pajudíovi apo jumecovënëtsi Cristonëcuene.

<sup>34</sup> Jesús nexata jumaitsi bajarapajudíovijavabelia:

—Xaniajanë pacuenia pacatsipaebijitsiatsi. Daxita pamonaë pibisiacuene pexanaevi, jamatabëcueneitorobabiabatsi dovathi pejamatabëcueneta. <sup>35</sup> Ponë itsanë pijajivitonë naexana, bajaraponë itsiata pijatuxanenë apo pexiyajuvënënë. Ponë petuxanenë pexiyajuvënënë, daxitamatacabijavabelianexa petuxanenë pexënato tsaponaponae. <sup>36</sup> Nexata pijinia xanë, Dioso pexënatonë, itsa copiarucaeyaexanaenajë dovathi papecaitorobabiabijavami, copiarucaeyaexanaenajë daxitamatacabijavabelianexa. Nexata baja dovathi apo pacaitorobabiabi tsane matavëjëa pibisiacuene paneexanaenexa. <sup>37</sup> Yapëtaniji cajena Abrahampijinë papemomoxicuenemë. Itsiata baitsi jane jamatabëpanebeyaxuabame. Tsipaji apo panejumecovënëtsimë patacatsipaebilivaisi. <sup>38</sup> Xanë rabaja pacuenia taxa netsitajëta, jivi tsipaebabiabajë. Paxamë ata paexanabiabame pacuenia paneaxajivi pacaitoroba, jai Jesús judíovijavabelia.

<sup>39</sup> Nexata judíovi jumaitsi:

—Pataxajivi baja cajena pexaniajamatabëcuenevi. Abrahampijinë rabaja cajena patamopijjinëmi, patajasalinainëmi, jai judíovi.

Jesús nexata jumaitsi bajarapamonaëjavabelia:

—Itsa pepacuene paxamë Abrahampijinë papemomoximë tsipae, paexanaeijitsipame peneta pacuenia exanabiaba Abrahampijjinëmi. <sup>40</sup> Pacatsipaebi atatsi pexaniajailivaisi, pacuenia taxa Dioso netsipaeba, itsiata paxamë jamatabëpanebeyaxuabame. ¡Abrahampijinë cajena caeto ata apo exanaë bajarapitsicuene! <sup>41</sup> Paxamë paexanabiabame pacuenia itsanë paneaxa pacaitorobabiaba, jai Jesús judíovijavabelia dovathi yabara.

Nexata judíovi jumaitsi:

—Paxanë cajena mapanacuataje pataenajivi apo panenacoxitsi itsanëjavabelia pataxajivivecua pibisiacuene pexanaecujinae. Paxainajë caenë pataxa, athëbëpijinë. Pataxa rabaja Dioso, jai bajarapamonaë.

<sup>42</sup> Nexata Jesús jumaitsi bajarapamonaëjavabelia:

—Itsa pepacuene Dioso paneaxa tsipae, nexata paxamë asivaya panetaeijitsipame. Tsi-paji Diosojavavetsica tapatsinë. Majotaje ponaponajë. Xanë raja saya tajamatabëcueneta apo patsinëtsica. Dioso raja nitorobica. <sup>43</sup> ¿Detsa xuajitsia paxamë apo panejumeyapëtaemë patacatsipaebilivaisi? Apo pajitsipaemë patanenamuxunaevetsinexamë bajarapalivaisi. <sup>44</sup> Paxamë rabaja cajena paneaxa dovathi. Papijajivimë. Pejitsipaecuena jamatabëpatoexanabiabame. Dovathi rabaja cajena jivibenë Dioso nacua pexanaejava petaxuxuabijavaveliacujinae. Pexaniajailivaisi apo najamatabëxainae. Caeto ata cajena pexaniajailivaisi apo paebi. Itsa najumetsënëta, bajaraponë pijacujiru baja cajena. Tsipaji penajumetsënëtsinë. Jivi ata najumetsënëtsiaexanabiaba. <sup>45</sup> Xanë baja cajena pexaniajailivaisi pacatsipaebatsi. Itsiata apo panejumecovënëtsimë. <sup>46</sup> ¿Jipatsa paxamëyajuvënënë netane pibisiacuene taxanaejava? Ajibi cajena. Itsacuenejavayo ata, xua pibisiacuene, apo exanaenë. Pexaniajailivaisi pacatsipaebabiabi atatsi, ¿detsa xuajitsia itsiata apo panejumecovënëtsimë? <sup>47</sup> Pajivi Dioso pijajivitonë, bajarapajivi namuxunaeveta Dioso pejumelivaisi. Itsiata baitsi jane paxamë Dioso apo papijajivimë. Bajaraxuata apo pajitsipaemë patanenamuxunaevetsinexamë Dioso pejumelivaisi, jai Jesús judíovijavabelia.

*Pacuenia Cristo, ponë Dioso itorobica, ponapona baja cajena Abrahampijinë pevajënaeya ata yabara pelivaisi*

<sup>48</sup> Judíovi jumaitsi Jesúsjavabelia:

—Paxanë itsa pacajumaitsi: “Xamë raja Samaria nacuapijjinëmë, dovathi neyjavaponaponanë,” itsa pacajaitsi, paxaniajanë cajena, jai judíovi Jesúsjavabelia.

<sup>49</sup> Jesús nexata jumaitsi judíovijavabelia:

—Xanë cajena dovathi apo yajavaponaponanë. Xanë taxa Dioso yaiyataeya ponaponajë. Itsiata paxamë apo paneyaiyataemë. <sup>50</sup> Xanë raja xua exanaponajë, apo exanaenë jivi saya taneyaiyataenexa. Itsiata baitsi jane taxa netojitsipa jivi taneyaiyataenexa. Bajaraponë naneconitsiaexanaena pamonaë apo neyaiyatae. <sup>51</sup> Xaniajanë pacuenia pacatsipaebijitsiatsi. Pajivi jumecovënëtsiana tatsipaebilivaisi, bajarapajivi tēpae ata

tsane, pepacujiru apo tēpae tsane daxitamatacabijavabelianexa. Nexata xainaena matababi apo peverevereaejava, jai Jesús judíovijavabelia.

<sup>52</sup> Nexata judíovi jumaitsi:

—Aeconoxae pepacuene dovathi pecayajavaponaponaejava, payapētaniji. Tsipaji Abrahampijinēmi tēpa. Daxita Diosojumepaebivimi profetavi ata, tēpa. Itsiata xamē jumaitsimē tsaponae: “Pajivi jumecovēnētsiana tatsipaebilivaisi, bajarapajivi tēpae ata tsane, pepacujiru apo tēpae tsane daxitamatacabijavabelianexa,” jamē tsaponae. <sup>53</sup> Vamopijinēmi Abrahampijinē, ayaijamatabēcuenenēmi ata, bajayata tēpa. Daxita Diosojumepaebivimi profetavi ata tēpa. ¿Xamē tsaja Abrahampijinēmi matatoxenetsia beayaijamatabēcuenenēmē nataneme? ¿Detsa beponēmē nataneme? jai judíovi.

<sup>54</sup> Jesús nexata jumaitsi judíovijavabelia:

—Itsa xanē tajacuata najumaitsinē tsipae: “Xanē bitso ayaijamatabēcuenenēnē,” itsa janē tsipae, nexata ajumematamobinē tsipae. Itsiata baitsi jane taxa Dioso, ponē yabara paxamē ata: “PatajaDioso raja,” pajamē, bajaraponē neyaiyatane. <sup>55</sup> Itsiata paxamē apo payapētaemē bajaraponē. Xanē cajena yapētaniji. Nexata xanē Dioso yapētae atanē, itsa yavajunuaxainaejitsipajē, “Apo yapētaenē cajena bajaraponē,” itsa janē tsipae Dioso yabara, najumetsēnētsipajē pacuenia paxamē panajumetsēnētabiabame. Itsiata xanē pepacuene Dioso yapētaniji. Jumecovēnētajēnua pacuenia Dioso nitorobabiaba. <sup>56</sup> Bajayata Abrahampijinē panijasalinainēmi jamatabēcuenebarēya. Tsipaji tajēvelia yapētane mapanacuayabetsicaje tapatsijavanexatsica. Nexata Abrahampijinēmi nesivajamatabēcuenebarēya baja cajena, jai Jesús judíovijavabelia.

<sup>57</sup> Nexata judíovi jumaitsi Jesúsjavabelia:

—Abaxē raja xamē apo xainaemē cincuenta pavaibeje ata. ¿Detsa pacuenia nexata taejitsipame Abrahampijinē? Abrahampijinē baja cajena pepo bajayatami tēpa, jai judíovi Jesúsjavabelia jumeabiaya.

<sup>58</sup> Jesús nexata jumaitsi judíovijavabelia:

—Xaniajanē pacuenia pacatsipaebijitsiatsi. Xanē raja cajena ponaponajē Abrahampijinē pevajēnaeya ata, jai Jesús judíovijavabelia.

<sup>59</sup> Nexata bajarapacuenia Jesús itsa jumaitsi judíovijavabelia, judíovi nota ibotonē. Tseconaejitsiatsi picani Jesús ibotonēta. Itsiata baitsi jane Jesús namatayatsia pitsapa templobovecua bajarapamonae petuatuajēalia. Jesús baja nexata judíovi itsajavabelia vecuapona.

## 9

### *Pacuenia Jesús itaxutoxanepanaeyaexana ecēnaenē yabara pelivaisi*

<sup>1</sup> Jesús najetaruca namutua. Nexata tane penaexanaejavaveliacujinae bitso pitaxutotsēcēnaenē. <sup>2</sup> Nexata Jesús pijajivi jumaitsi Jesúsjavabelia:

—Patajatuxanenē, ¿detsa meta xuajitsia maponē naexana bitso pitaxutotsēcēnaenēje? ¿Paxa tsaeta pibisiacuene pexanaejamatabēcuene? Itsa jume, ¿pena tsaeta pibisiacuene pexanaejamatabēcuene maponē itaxutotsēcēnaje? Itsa jume, ¿baja tsaeta ponē pijacuatata pibisiacuene natoexana? jai Jesús pijajivi.

<sup>3</sup> Jesús nexata jumaitsi pijajivijavabelia:

—Jume raja. Mara ponēje paxa, pena ata, pibisiacuene pexanaejamatabēcuene, apo itaxutotsēcēnaeje. Naexana bitso pitaxutotsēcēnaenē saya daxitajivi petaenexatsi Dioso icatsia pitaxutoxanepanaeyaexanaejavatsi. <sup>4</sup> Payapētaneme rabaja mapacueneje. Matabacabita xanepana vajanacuenebinexa. Itsa baja meravi, acuenebi vajanacuenebinexa. Bajara pijinia itsinē xanē ata. Taponaponaematababi xanepana tatonacuenebinexa ponē nitorobica. Itsa pamatababi nebeyaxuabiana, acuenebi tsane tatonacuenebinexa. <sup>5</sup> Abaxē paepatojebi ponaponaenajē mapanacuataje, daxitajivi jamatabēcueneitayotsianajē pexaniajailivaisita, jai Jesús pijajivijavabelia.

<sup>6</sup> Bajarapacuenia Jesús pejumaitsicujinae irabelia suabaxuaba. Peionitota tsorobojavayo exana. Nexata itaxutoexaba bitso pitaxutotsēcēnaenē. <sup>7</sup> Nexata Jesús jumaitsi bitso pitaxutotsēcēnaenējavabelia:

—Ponare baja. Naitaxutoquiaremelia pecueyetsipucayojavabelia, Siloévēnē pucayojavabelia, jai Jesús.

“Siloé,” itsa jai bajarapamonae pijajumeta, mapajumeta pejumaitsi jume: “Pitorobinētsitsica,” pejai jume.

Nexata bitso pitaxutotsēcēnaenē lia baja. Naitaxutoquiatojopalia. Naviarena baja pitaxutoxanepanaenē. <sup>8</sup> Nexata itsajota ponapona bitso pitaxutotsēcēnaenēmi, imoxoyo penaevi, pamonae ata taeyabiabatsi, daxita bajarapamonae nayanijoba.

—¿Matsa ponē palata amoneya pevajēcabiabeaenēmije? najai bajarapamonae.

<sup>9</sup> Nexata itsamonae jumaitsi:

—Jājā, bajara covē ponē, jai.

Itsiata itsamonae jumaitsi:

—Apo ponē raja. Bajara saya itsiata beponē, jai.

Nexata pitaxutotsēcēnaenēmi pijacuata jumaitsi:

—Jājā, xanē rabaja, jai bajaraponē.

<sup>10</sup> Nexata bajarapamonae jumaitsi pitaxutotsēcēnaenēmijavabelia:

—¿Detsa nexata pacuenia taneme baja? jai.

<sup>11</sup> Nexata pitaxutotsēcēnaenēmi jumaitsi:

—Ponē raja Jesúsvenēnē, exana tsorobojavayo. Nitaxutoexaba. Nexata nejumaitsi: “Liamēre pecueyetsipucayojavabelia, Siloévēnē pucayojavabelia. Naitaxutoquiaremelia,” nejai Jesús. Nexata baja lianē. Itsa naitaxutoquiatajē bajarapapucayota, taniji baja, jai pitaxutotsēcēnaenēmi.

<sup>12</sup> Nexata bajarapamonae jumaitsi:

—¿Detsa jota bajaraponē ponapona? jai.

Nexata icatsia pitaxutotsēcēnaenēmi jumaitsi:

—Apo yapētaenē itsajota ponapona, jai.

*Pacuenia bitso pitaxutotsēcēnaenēmi caponaliatsi fariseovijavabelia peyanijobinexatsi yabara pelivaisi*

<sup>13</sup> Pitaxutotsēcēnaenēmi pitaxutoxanepanaejava jivi itsa tane, yanijobatsi peyapētaenexa pacuenia itaxutoxanepana. Pamonae yanijobaponatsi, bajarapamonae pitaxutotsēcēnaenēmi caponaliatsi fariseovijavabelia. <sup>14</sup> Pamatacabi Jesús exana tsorobojavayo pitaxutoxanepanaeyaexanaenexa bitso pitaxutotsēcēnaenēmi, bajarapamatacabi judíovi penacueraevetsimatacabi. <sup>15</sup> Nexata jane baja fariseovi yanijoba pitaxutotsēcēnaenēmijavabelia.

—¿Detsa pacuenia nexata itaxutoxanepaname? jai fariseovi.

Nexata pitaxutotsēcēnaenēmi jumaitsi:

—Nitaxutoexaba raja tsorobojavayota. Bajaraxuacujinae naitaxutoquiatajē. Nexata aeconoxae taniji baja, jai pitaxutotsēcēnaenēmi fariseovijavabelia.

<sup>16</sup> Nexata fariseovi najumaitsi:

—Ponē bajarapacuene exana, Dioso apo pitorobinētsi cajena. Tsipaji apo yaiyatae penacueraevetsimatacabi, najai fariseovi.

Itsiata bajarapamonaeyajuvēnēvi itsamonae najumaitsi:

—Itsa pibisiacuene pexanaenē tsipae, apo caējēpae tsipaetsi bajarapitsipinijicuene pexanaenexa, najai itsamonae.

Nexata daxita fariseovi apo najamatabēcuenejēpae. <sup>17</sup> Nexata icatsia fariseovi yanijoba pitaxutotsēcēnaenēmijavabelia.

—¿Detsa jane xamē bejamatabēitsimē ponē caitaxutoxanepanaeyaexana yabara? jai fariseovi.

Nexata pitaxutotsēcēnaenēmi jumaitsi:

—Bajaraponē cajena Diosojumepaebinē profeta, jai.

<sup>18</sup> Judíovi apo jumexaniatae pitaxutoxanepanaeyaexanaejavatsi yabara. Nexata bajarapamonae junata pitaxutotsécēnaenēmi paxa, pena yajava. <sup>19</sup> Judíovi jane baja yanijoba pitaxutotsécēnaenēmi paxabeje penabejejavabelia. Jumaitsi:

—¿Baja tsa maponē panexēnatobejeje, ponē penaexanaejavaveliacujinae pitaxutotsécēnaenēmije? ¿Detsa pacuenia aeconoxae baja tane? jai judíovi.

<sup>20</sup> Nexata pitaxutotsécēnaenēmi paxabeje penabeje jumaitsibeje:

—Maponēje pataxēnatobeje payapētaniibeje cajena. Payapētaniibejenua penaexanaejavaveliacujinae pitaxutotsécēnaejava. <sup>21</sup> Itsiata baitsi jane aeconoxae apo payapētaenēbeje pacuenia baja itaxutoxanepana. Apo payapētaenēbejenua ponē itaxutoxanepanaeyaexanatsi. Bajaraponē taxēnato payanijobare. Penaveretsinē rabaja. Pijacuatata pacatsipaebiana, jai pitaxutotsécēnaenēmi paxabeje penabeje judíovijavabelia.

<sup>22</sup> Judíovi baja cajena najamatabēcuenejēpa pevajēnaeitavetsinexa penajoneyaniva judíovi penacaetuatabiabiobjavaberena pajivi jumaitsi: “Jesús rabaja cajena Cristo, ponē Dioso athēbēvetsica itorobijitsiatsica jivi pecapanepaenexa,” pejajivi. Bjaraxuata pitaxutotsécēnaenēmi paxabeje penabeje bajarapacuenia jumecanaviatabeje pecujunavixaebeje judíovi. <sup>23</sup> Bjaraxuata bajarapajivibeje jumaitsibeje: “Taxēnatojavabelia payanijobare. Penaveretsinē rabaja,” jaibeje.

<sup>24</sup> Nexata judíovi icatsia junata pitaxutotsécēnaenēmi. Jumaitsi bajaraponējavabelia:

—Panetsipaebare xaniavaetsia Dioso pitabarata. Paxanē baja cajena payapētaniiji bajaraponē pibisiacuene pexanaenēcuene, jai judíovi Jesús yabara.

<sup>25</sup> Nexata pitaxutotsécēnaenēmi jumaitsi:

—Pibisiacuene meta pexanaenē. Xanē apo yapētaenē. Itsiata baitsi jane nitaxutoxanepanaeyaexana taitaxutotsécēnaenēmi, jai pitaxutotsécēnaenēmi.

<sup>26</sup> Nexata icatsia judíovi jumaitsi:

—¿Detsa pacuenia catoexana netaenexa? jai judíovi.

<sup>27</sup> Nexata pitaxutotsécēnaenēmi jumaitsi judíovijavabelia:

—Pacatsipaebatsi rabaja picani xaniavaetsia. Itsiata apo panejumecovēnētšimē. ¿Detsa xuajitsia pajitsipame patacatsipaebaponaenexa icatsia? ¿Paxamē ata tsaja pajitsipame panejumecovēnētšinexa bajaraponē papijajivinexamē? jai pitaxutotsécēnaenēmi judíovijavabelia.

<sup>28</sup> Nexata judíovi bijatanetsi pitaxutotsécēnaenēmi. Jumaitsi:

—Xamē raeta baja cajena bajaraponē pijajivitonēmē. Paxanē raja saicaya Moiséspijinē petsipaebilivaisi pajumecovēnētavanapajē. <sup>29</sup> Paxanē baja cajena payapētaniiji pepacuene Dioso pebarēcuaicuajijavatsi Moiséspijinē. Itsiata baitsi jane ponē cabarēcuaicuajijai, apo payapētaenē itsaverena pata, jai judíovi.

<sup>30</sup> Nexata pitaxutotsécēnaenēmi jumaitsi judíovijavabelia:

—¿Detsa xuajitsia nitaxutoxanepanaeyaexanae ata, apo payapētaemē itsaverena pata bajaraponē? <sup>31</sup> Yapētanetsi baja cajena mapacueneje. Diosojavabelia vājētsi ata pamona pibisiacuene pexanaevi, Dioso baja cajena apo namuxunaevetsi. Dioso baja cajena banamuxunaeveta itsa vajētatsi pejitsipaecuenia yaiyataeya petojinavanapaevitsi. <sup>32</sup> Caeto ata mapanacuapijivi apo vēnēlivaisitaetsi ponē caējēpatsi pitaxutoxanepanaeyaexanaenexa penaexanaejavaveliacujinae bitso pitaxutotsécēnaenē. <sup>33</sup> Peneta bajaraponē itsa apo patsi tsipae Diosojavavetsica, nexata apo caējēpaetsi tsipae pexanaenexa Dioso pesaēta pinijicuene pexanaejava, jai pitaxutotsécēnaenēmi judíovijavabelia.

<sup>34</sup> Nexata judíovi jumaitsi:

—Xamē cajena pibisiacuene exaname nenaexanaejavaveliacujinae. ¿Itsiata tsaja caranata pibisiacuene nexanaenē jamatabēpanemuxujobame? jai judíovi pitaxutotsécēnaenēmijavabelia.

Nexata torotajarabaxuabatsi judíovi penacaetuatabiabiobo pevecuapitsapaenexa.

*Pacuenia Dioso apo pejumecovēnētšivi jamatabēcueneaitaquiri tsavanapae yabara pelivaisi*

<sup>35</sup> Jesús vënëlivaisitane pitaxutoxanepanaeyaexanaenë judíovi petorobajarabijavatsi judíovi penacaetuatabihibo pevecuapitsapaenexa. Nexata Jesús itsa caxitajaraba pitaxutoxanepanaeyaexanaenë, Jesús jumaiti pitaxutoxanepanaeya exanaenëjavabelia:

—¿Najamatabëcopatame tsabaja Dioso pexënatojavabelia? nayabarajai Jesús.

<sup>36</sup> Nexata ponë Jesús itaxutoxanepanaeyaexana, jumaiti:

—¿Detsa ponë Dioso pexënato tanajamatabëcopatsinexa bajaraponëjavabelia? jai.

<sup>37</sup> Jesús nexata pijacuata nayabarajumaiti:

—Ponë rabaja cabarëcuaicuajai, Dioso rabaja pexënato, nayabarajai Jesús.

<sup>38</sup> Nexata ponë Jesús itaxutoxanepanaeyaexana, pematatabacabëta nuca Jesús pitabarata. Jumaiti Jesúsjavabelia:

—Tajatuxanenë, casivanajamatabëcopatatsi baja cajena, jai.

<sup>39</sup> Nexata Jesús jumaiti pitaxutoxanepanaeya exanaenëjavabelia:

—Xanë patajë mapanacuayabetsicaje jivi penayapëtaenexa pijaneconi pexainaejava. Nexata pamona pexaniajailivaisi tatsipaebijavata najamatabëcueneypëtaena pijamatabëcueneitaquirijava, bajarapamona jamatabëcueneitayotsianajë pexaniajailivaisita. Pamona jemajai. Apo yapëtae ata pexaniajailivaisi, jamatabëjumaiti: “Vaxaiti rabaja yapëtanetsi pexaniajailivaisi,” jamatabëjai, bajarapamona apo jamatabëcueneitayotsinë tsane, jai Jesús.

<sup>40</sup> Nexata fariseovi, bajarajota penubenaevi, jumetane bajarapacuenia Jesús pejumait-sijava. Nexata fariseovi jumaiti Jesúsjavabelia.

—¿Paxanë ata tsabaja pajamatabëcueneitaquirinë tsavanapae? jai.

<sup>41</sup> Jesús nexata jumaiti fariseovijavabelia:

—Jājā, bitso pajamatabëcueneitaquirimë tsavanapae. Tsipaji jamatabëcuenenavëxaniabiaya pajamatabëjumaitimë tsabiabi: “Vaxaiti rabaja jumecovënëtatsi Dioso,” pajamatabëjamë tsabiabi. Nexata Dioso pejumelivaisi payapëtae atamë, itsiata pibisiacuene paexanabiabame. Nexata bitso pananeconitame Diosojavabelia. Paxamë Dioso pejumelivaisi apo paneyapëtaexae, itsa pajamatabëcueneitaquirimë tsipae, nexata bitso apo pananeconitsimë tsipae Diosojavabelia, jai Jesús fariseovijavabelia.

## 10

### *Oveja pecajoneyabiabiorral yabara pelivaisi*

<sup>1</sup> Jesús jumaiti fariseovijavabelia:

—Xaniajanë pacuenia pacatsipaebijitsiatsi. Oveja pecajoneyabiabiorral enëabelia saicayanë pejonenexa, apo jone corral baupajava. Junaya saya peyenepanatsia pejonenexalia. Bajaraponë penacobetoxotsinënexa oveja. <sup>2</sup> Ponë peneta joneya corral baupayalia, bajaraponë cajena oveja pevetsinë. <sup>3</sup> Nexata corral baupa pevetsinë tobaupatatsi pijaoveja pecapitsapaenexa. Itsa baja pijaoveja capitsapa corralvecua, pijaoveja jumeyapëtanetsi. Tsipaji junatapon pijaoveja caenë canacujitsia pevënëta. <sup>4</sup> Pecapitsapaecujinae daxita pijaoveja, bajaraponë oveja pevajënaeya namataxainanajetaruca. Nexata pijaoveja pënaponatsi. Tsipaji jumeyapëtanetsi pijaoveja. <sup>5</sup> Oveja apo pënaponae tsipae saicayanë. Tsipaji apo jumeyapëtae. Vecuarëcëpecaeijitsipa saya, nayabarajai Jesús fariseovijavabelia.

<sup>6</sup> Bajarapacuenia Jesús oveja pevetsinëcuenia nataeya comparacióncuenia nalivaisipaeba fariseovijavabelia. Itsiata fariseovi apo jumeyapëtaetsi Jesús comparacióncuenia penalivaisipaebijava.

### *Pacuenia Jesús xaniavaetsia eveta pijajivi yabara pelivaisi*

<sup>7</sup> Jesús jumaiti fariseovijavabelia:

—Xaniajanë pacuenia pacatsipaebijitsiatsi. Pacuenia oveja junua corral baupajava, pepanepaenexa corral enëaberena, bajara xanë itsinë jivi pejonenexa xanëjava, pepanepaenexa Dioso pijatomarabetsia. <sup>8</sup> Itsamona xanë tavajënaeya penajumetsënëtsilivaisi jivi tsipaebapona. Bajarapamona oveja bepenacobetoxotsivi. Jamatabëneyacajërëta tajajivi. Itsiata baitsi jane tajajivi apo jumecovënëtsi bajarapamona. <sup>9</sup> Xanë rabaja

cajena baupanë. Pajivi nesivanajamatabëcopatsiana, jonena xanëjava pepatsinexa Dioso pijatomarabetsia. Bajarapajivi capanepaenatsi Diosojavabelia. Pijaoveja xaniavaetsia pevetsinë, caebajayacunua canacujitsia capitsapa corralvecua oveja pexaejava pejaitsinexa. Icatsia caecaniviyo canacujitsia cajunua corraljavaberena. Bajara pijinia pacuenia xanë ata xaniavaetsia evetsianajë pajivi nesivanajamatabëcopatsiana, jai Jesús fariseovijavabelia.

<sup>10</sup> Icatsia Jesús jumaitsi fariseovijavabelia:

—Penacobetoxotsinë bapata oveja penacobetoxotsinexa, pebeyaxuababiabinexanua. Bajarapacuenia oveja peveretaponaenexa bapata. Bajara pijinia jamatabëcueneitsi pamonaë pata penajumetsënëtsilivaisi jivi petsipaebaponaenexa. Itsiata baitsi jane xanë patajopaicajë mapanacuayabetsicaje xanë tajamatabëcueneta jivi pexainaenexa matababi apo pevereverecaëjava, bitso jamatabëcuenebarëyaya pejinavanapaenexanua. <sup>11</sup> Pacuenia itsi xaniavaetsia pevetsinë pijaoveja, bajara pijinia xanë itsinë taevetsinexa tajajivi. Xaniavaetsia pevetsinë pijaoveja jamatabëjumaitsi: “Itsanë netobeyaxuabijitsia ata tsane tajaoveja, apo copatsinë tsane tanetoyajuvënëbeyaxuabianiva tajaoveja. Nexata xanë tajaoveja yapijivinacaevetsianajë tanebeyaxuabinexa,” jamatabëjai. Bajara pijinia xanë ata jamatabëitsinë tajajivi yabara. <sup>12</sup> Itsiata ponë saya toevetsipa itsanë pijaoveja, bajaraponë apo xainae tsipae bajarapaovejabitsaëto. Saya tovetaponaponaejitsipa pematamotsinexatsi. Nexata nevëthë oveja itsa tsimaxënjatarucaeijitsipa, bajaraponë xuabatabajiravijitsipa ovejabitsaëtomi. Nexata oveja nevëthë itsa yajuvënëvaetabijitsipatsi, nacayajatecaeijitsipa ovejabitsaëtomi. <sup>13</sup> Oveja pevetsinë najetabajiravijitsipa. Tsipaji saya pematamotsinexatsi nacuenebaponaponaejitsipa. Nexata apo jamatabëbëjai tsipae oveja yabara, jai Jesús fariseovijavabelia.

<sup>14-15</sup> Icatsia Jesús jumaitsi:

—Pacuenia itsi xaniavaetsia pevetsinë pijaoveja, bajara pijinia itsinë xanë ata taevetsinexa tajajivi, pamonaë taniji beovejacuenia. Pacuenia taxa neyapëtane, bajara pijinia pacuenia xanë ata yapëtaniji taxa. Pacuenia pijinia xaniavaetsia yapëtaniji tajajivi, bajara pijinia pacuenia tajajivi ata neyapëtane. Xanë sivatëpaenajë tajajivi. <sup>16</sup> Xainajë baja itsabitsaëto tajajivi. Itsiata abaxë bajarapamonaë apo yajavajinavanapae mapabitsaëtojavataje. Itsiata itsamatababi capatsianajë bajarapamonaë mapabitsaëtojavaberena. Nexata daxita bajarapamonaë nejumecovënëtsiana taitorobicuenia. Caebitsaëtoxaneto jane baja tajajivi netonaexanaena. Bajarapamonaë xanë caenëne evetsianajë, jai Jesús.

<sup>17</sup> Icatsia Jesús jumaitsi:

—Taxa niasiva. Tsipaji tajajivi yabara nacaevetsianajë tanebeyaxuabinexa. Itsiata icatsia tatëpaecujinaë asaënë tsane. <sup>18</sup> Itsa apo nacaevetsinë tsipae tanebeyaxuabinexa, itsajivi ata apo caëjëpaetsi tsipae tanebeyaxuabinexa. Itsiata tajacuata nacaevetsianajë tanebeyaxuabinexa. Necaëjëpa tatëpaenexa. Necaëjëpanua icatsia tasaënexa tatëpaecujinaë. Bajarapacuenia taxa netocopata, jai Jesús.

<sup>19</sup> Judíovi itsa jumetane bajarapacuenia Jesús pejumaitsijava, judíovi apo najamatabëcuenejëpae. <sup>20</sup> Judíovi ayaibitsaëto najumaitsi Jesús yabara:

—Dovathi raja bajaraponë yajavaponaponatsi. Matajemabatsi ra saya. ¿Detsa xuajitsia bajaraponë panamuxunaevetame? najai bajarapamonaë.

<sup>21</sup> Itsiata bajarapamonaëyajuvënëvi itsamonae najumaitsi:

—Ponë dovathi yajavaponaponatsi, apo caëjëpaetsi tsipae cajena pecuaicuaijainexa mapacueniaje. Apo caëjëpaetsinua tsipae pitaxutoxanepanaëyaexanaenexa bitso pitaxutotsëcënaenëmi, najai bajarapamonaëyajuvënëvi Jesús yabara.

*Pacuenia Jesús judíovi navecuaitavetatsi yabara pelivaisi*

<sup>22</sup> Emarapaeta Jerusalén tomarata fiesta exana. Bajarapafiesta exana judíovi penajamatabënapitsinexa bajayata judíovi pijasalinaivi templo pexanebetsijava. <sup>23</sup> Nexata

pamatacabi fiesta exana, Jesús ponapona bajarapatemplobojavata, Portal de Salomón-vënëjavata. <sup>24</sup> Nexata Jesús judíovi matatoyorotsia nacaetuatatsi. Judíovi jumaitsi Jesúsjavabelia:

—Apo payapëtaenë pacuenia panajamatabëxainaejitsianë xamë yabara. ¿Detsa pacujinae paneyapëtaeyaexanaename patacayapëtaenexa pepacuenene ponëmë? Itsa pepacuenene Cristomë, Dioso athëbëvetsica pecaitorobinëtsica jivi necapanepaenexa, panetsipaebare cajena roviaia, jai judíovi.

<sup>25</sup> Jesús nexata jumaitsi judíovijavabelia:

—Pacatsipaebatsi rabaja picani roviaia. Itsiata apo panejumecovënëtsimë. Taxa Dioso pesaëta pinijicuene exanajë. Bajara papinijicuene exanajë taxa taneitorobicuenia. Nexata itsa exanajë bajarapapinijicuene, pacatsitaexanatsi picani taxa taneitorobicuene.

<sup>26</sup> Itsiata baitsi jane apo panejumecovënëtsimë Cristonëcuenenë. Tsipaji paxamë apo patajajivimë. <sup>27</sup> Tajajivi, pamonaë taniji beovejacuena, bajarapamonae nejumeyapë-tane. Bajarapamonae pijinia yapëtaniji. Nexata nepënapona. <sup>28</sup> Bajarapamonae rajutsianajë matacabi apo pevereverecaëjava. Bajarapamonae taxa Diosovecua apo naxuabi tsane. Itsajivi ata apo neyacajërëtsi tsane tajajivi. <sup>29</sup> Taxa baja cajena ayaijamatabëcuenenë daxitajivi matatoxenetsia. Bajaraponë nerajuta bajarapamonae.

Nexata itsajivi ata apo caëjëpaetsi tsane taxa pecobevecua pepitsinexa bajarapamonae. <sup>30</sup> Taxa, xanë, caenë rabaja panaexanajëbeje, jai Jesús judíovijavabelia.

<sup>31</sup> Nexata picani bajarajota judíovi jamatabëbeyaxuabatsi Jesús. Judíovi nota ibotonë Jesús picani petseconaenexatsi ibotonëta. <sup>32</sup> Jesús nexata jumaitsi judíovijavabelia:

—Ayaijava pexaniacuene taxa Dioso pesaëta exanaponajë paxamë paneitabarata. ¿Detsa nexata pitsineconi yabara panetseconaëjitsiamë ibotonëta? jai Jesús judíovijavabelia.

<sup>33</sup> Judíovi nexata jumaitsi:

—Pexaniacuene raja nexanaëjava yabara apo pacatseconaëjitsiatsi. Pacatseconaëjitsiatsi raja nenaneconitsixae Diosojavabelia. Tsipaji pibisiacuena, Dioso apo pejitsipae-cuenia, cuaicuaijamë. Xamë saya jivitonë atamë, beDiosonëmë nataneme, jai judíovi Jesúsjavabelia.

<sup>34</sup> Jesús nexata jumaitsi judíovijavabelia:

—Dioso pejumaitsijava, Dioso pejumelivaisibaxutota jumaitsi mapacueniaje: “Paxamë ata rabaja padiosovimë,” jai Dioso pejumelivaisibaxutota Dioso pejumecovënëtsivi yabara. <sup>35</sup> Nexata Dioso pejumelivaisibaxutota bajarapacuenia itsa jumaitsi Dioso pejumecovënëtsivi yabara, acuenebi bajarapamonae yabara vajajumaitsinexa: “Bajarapamonae apo diosovi,” vajajainexa. <sup>36</sup> Dioso cajena nitapeta. Nexata nitorobica mapanacuayabetsicaje. ¿Detsa nexata xuajitsia panejumaitsimë: “Xamë raja naneconitame Diosojavabelia. Pibisiacuena cuaicuaijamë Dioso apo pejitsipae-cuenia. Tsipaji jumaitsimë: ‘Xanë raja Dioso pexënatonë,’ jamë,” panejamë. <sup>37</sup> Itsa apo exanaenë tsipae pacuenia taxa nitoroba, nexata acuenebi tsipae patanesivanajamatabëcopatsinexamë. <sup>38</sup> Itsiata baitsi jane exanaponajë pacuenia taxa nitoroba. Nexata apo pane-sivanajamatabëcopatsi atamë, itsiata bepajumecovënëtame Dioso pesaëta taexanaëjava, pacuene baja exanaponajë. Itsa pajumecovënëtsianame bajarapacuenene Dioso pesaëta taexanaponaejava, nexata payapëtaename taxa Dioso taneyajavaponaponaejava. Payapëtaenamenua xanë ata pijinia taxa Dioso tayajavaponaponaejava, jai Jesús judíovijavabelia.

<sup>39</sup> Bajarapacuenia Jesús jumaitsi ata, itsiata judíovi jamatabëvaetabatsi penaneconit-siaexanaenexatsi. Itsiata Jesús vecuapanepa.

<sup>40</sup> Nexata Jesús navialia Jordánmene itsapanabelia, panacuatalia copiaya Juanpijinë jivi bautisababiaba. Bajarajotalia Jesús ponapona. <sup>41</sup> Jivi ayaibitsaëtoxaneto ponalia petaenexatsi Jesús. Nexata bajarapamonae jumaitsi:

—Juanpijinë Dioso pesaëta pinijicuene apo exanaponae ata, itsiata daxita pacuenia tajëvelia vajunupaeba maponë yabaraje, xaniajai cajena, jai bajarapamonae Jesús yabara.

<sup>42</sup> Nexata jane baja bajarajota jivi ayabitsaëtoxaeto jumecovënëta Jesús Dioso athëbëvetsica pitorobinëcuenetsi.

## 11

### *Pacuenia baja Lázaro tēpa yabara pelivaisi*

<sup>1</sup> Lázaro, Betania tomarapijinë, avitane tsanucæ Betania tomarata. Bajarapatomarata ponaponabeje pematapijivabeje, Maríabeje Martabeje. <sup>2</sup> Bajarapova María itsamatacabi Jesús tsitaxuepanaena petuxujuvira. Daxitarayomi tsitaxuepanaena. Bajaraxuacujinae bajarapova pematanaata taxuiquicaenanua. <sup>3</sup> Nexata pamatacabi Lázaro avitane tsanucæ, Maríabeje Martabeje tonajumeitorobaliabeje Jesús. Jumaitsibeje:

—Tajatuxanenë, niasivanë raja Lázaro catoavitane, jaibeje.

<sup>4</sup> Jesús ita jumatane bajarapovabeje petonajumeitorobijumetsi, nexata Jesús jumaitsi pijajivijavabelia:

—Mapavitane taje Lázaro apo tēpae tsane daxitamatacabijavabelianexa. Biji rajane bajarapavitane pejamatabëcueneta jivi yapëtaena Dioso pinijicuene pexanaenexa pecaëjēpaenëcuenetsi. Yapëtaenanua xanë ata, Dioso pexënatonë, pinijicuene taexanaenexa tanecaëjēpaenëcuene, jai Jesús pijajivijavabelia.

<sup>5</sup> Jesús bitso asivaya taeyabiaba Martabana, Maríabana, Lázarobana. <sup>6</sup> Jesús vënëlivaisitæ ata Lázaro bitso piavitanejava, itsiata abaxë apo ponæ Betania tomarabelia. Anijamatacabibeje abaxë ponapona Jordánmene itsapanatalia. <sup>7</sup> Bajaraxuacujinae Jesús jumaitsi pijajivijavabelia:

—Ponaliatsi icatsia Judea nacuayabelia, jai Jesús.

<sup>8</sup> Jesús nexata pijajivi jumaitsi:

—Patajatuxanenë, canivita saya judíovi bajarajotalia jamatabëcatsecona picani ibotonëta. ¿Itsiata tsabaja icatsia ponaeliatsi bajarabelia? jai pijajivi.

<sup>9</sup> Jesús nexata jumaitsi pijajivijavabelia:

—Matacabi raja xaina doce pahorabeje. Nexata pajivi matacabita ponapona, apo firapecae. Tsipaji icotiata napebeta xaniavaetsia. <sup>10</sup> Itsiata pajivi meravi ponapona, firapeca. Tsipaji meravi apo napebetsi xaniavaetsia. Bajara pijinia xanë ata itsinë. Ponæ ata tsanetsi Betania tomarabelia, itsiata apo nitsacueniabi tsane. Tsipaji abaxë tajamatacabi apo netocopiapatsi, jai Jesús pijajivijavabelia petëpæjavanexa yabara.

<sup>11</sup> Bajaraxuacujinae Jesús peponævajënæ jumaitsi pijajivijavabelia:

—Vajayapëtaenë rabaja Lázaro majitanuca. Nexata baja ponajë. Itavabijitsianë Lázaro, jai Jesús.

<sup>12</sup> Nexata pijajivi jumaitsi:

—Patajatuxanenë, itsa raeta saya Lázaro majitanuca, itsiata jamatejema tsane, jai Jesús pijajivi.

<sup>13</sup> “Vajayapëtaenë rabaja Lázaro majitanuca,” itsa jai Jesús, Jesús picani pejumait-sijume, “Lázaro rabaja tēpa,” pejaijume. Itsiata Jesús pijajivi apo jumeyapëtaetsi. Bajarapamonæ Jesús pijajivi jamatabëcuenenavëxaniabiaya jamatabëjumaitsi: “Lázaro meta saya majitanuca pacuenia majitanucabiaba meravi,” jamatabëjai. <sup>14</sup> Bajaraxuata nexata Jesús roviaia jumaitsi pijajivijavabelia:

—Lázaro rabaja tēpa. <sup>15</sup> Paepatota Lázaro tēpa, bajarajotalia apo ponaponaenë. Bajaraxuata barëyanë paxamë yabara. Barëyanë tsipaji Lázaro petëpaexæ, xaniavaetsia panejumecovënëtsianame. Baja nexata ponatsi, jai Jesús pijajivijavabelia.

<sup>16</sup> Jesús pijajiviyajuvënënë, Tomás, ponë icatsia itsavënë vënërubatsi Sapalanë. Bajaraponë jumaitsi penajuaponaevijavabelia:

—Naponatsi Jesús pepëta. Ibotonëta itsa tseconatsi, vajayajavatëpaenexa bajaraponë, jai Tomás.

### *Pacuenia Jesús caëjëpatsi petëpævi ata icatsia piasaëyaexanaenexa yabara pelivaisi*

<sup>17</sup> Pepuaxainæ baja cuatro pamatacabibeje Lázarapijinë pemëthëtsicujinaetsi, Jesús matapania patajopa Betania tomarata. <sup>18</sup> Betaniatomara eca imoxoyo Jerusalén

tomaravecu. Bejamatabëcuene anijakilómetrobeje epatua navecuacabeje bajarapatomarabeje. <sup>19</sup> Jesús pepatsivajënaeya Betania tomarata, ayaibitsaëtoxfaneto judíovi pata Martabeje Maríabejejavaberena Lázaro petëpaexae. Bajarapamonae jumaitsi bajarapovabejejavabelia:

—Paxanë itsiata pacayanabatsi. Panajamatabëxainajë paxanë ata papecavecuatëpaexaebeje panejuyapijinëbeje, Lázaro, jai bajarapamonae.

<sup>20</sup> Itsa Marta vënëlivaisitane Jesús penajetarucaejava, pitsapa pijabovecu pematane-naenexa Jesús. María itsiata bota nacopateca. <sup>21</sup> Nexata Marta itsa mataenenatsi Jesús, Marta jumaitsi Jesúsjavabelia:

—Tajatuxanenë, itsa majota ponaponaejitsipameje, apo tēpae tsipae tajuyapijinë.

<sup>22</sup> Itsiata yapëtaniji aeconoxae ata Dioso carajutsiana daxita pacuene vajëtame Diosojavabelia, jai Marta.

<sup>23</sup> Nexata Jesús jumaitsi Martajavabelia:

—Nejuyapijinë raja itsiata icatsia asaë tsaponaponae tsane, jai Jesús.

<sup>24</sup> Nexata Marta apo jumeypëtae Jesús piasaëyaexanaejavanexa Lázaro. Bajaraxuata Marta jumaitsi Jesúsjavabelia mapacueniaje:

—Yapëtaniji rabaja pacuenia icatsia Lázaro Dioso asaëyaexanaejitsiatsi pamatacabita icatsia asaëyaexanaenatsi daxita petëpaevimi, jai Marta.

<sup>25</sup> Nexata Jesús jumaitsi Martajavabelia:

—Xanë rabaja petëpaevi ata icatsia tasaëyaexanaenë, tarajutsinë matababi apo pevereverecejava. Pajivi nejumecovënëtsiana Cristonëcuenenë, bajarapajivi tēpae ata, itsiata icatsia asaë tsane. <sup>26</sup> Pajivi abaxë pamatacabita asaë tsaponaponae mapanacuataje, itsa nejumecovënëtsiana Cristonëcuenenë, bajarapajivi tēpae ata, xainaena matababi apo pevereverecejava. ¿Xamë tsabaja bajarapalivaisi jumecovënëtame? jai Jesús Martajavabelia.

<sup>27</sup> Marta nexata jumaitsi:

—Tajatuxanenë, jumecovënëtajë rabaja. Xamë rabaja cajena Cristomë, Dioso pexënatomë, ponë pacopiaevetavanapajë athëbëvetsica pepatsijavanexatsica mapanacuayabetsicaje jivi pecapanepaenexa, jai Marta.

*Pacuenia Jesús vënu Lázaro pemëthëjavata yabara pelivaisi*

<sup>28</sup> Itsa baja Marta najumelivaisivereta bajarapalivaisi, naviata pijaboyabelia pejunatsinexa pejuyapijiva María. Nexata Marta muetsia jumaitsi Maríajavabelia:

—Vajanacacujarubinë rabaja pata. Cajunalia raja bajaraponë, jai Marta.

<sup>29</sup> Caejumetae María Jesús pejunatsijavatsilia, nonotabapuna. Pona Jesúsjavabelia petaenexa. <sup>30</sup> Jesús abaxë apo patsi Betania tomaraberena. Ecojopa abaxë itsajotalia Marta mataenenatsi. <sup>31</sup> Pajudíovi bajarapovabeje pijabota pata peyanabinexatsibeje Lázaro petëpaexae, bajarapamonae tane María penonotabapunaejava bepíjia pepitsatabijavalia bovecua. Nexata bajarapamonae María pënaponatsi. Tsipaji bajarapamonae jamatabëjumaitsi:

—María raeta pejuyapijinëmi pemëthëjavabelia pona pemataneuyabinexa, jamatabëjai:

<sup>32</sup> Itsa María palia, itsajotalia Jesús ecojopa, nexata María pematabacabëta nucajunua Jesús pitabarata. Jumaitsi:

—Tajatuxanenë, itsa majota ponaponaejitsipameje, apo tēpae tsipae tajuyapijinë Lázaro, jai María Jesúsjavabelia.

<sup>33</sup> Jesús itsa tane María penueyaxuabijava, judíovi ata María peyjavapatsivi penuejava itsa tane, Jesús nexata bitso najamatabëxainaxuaba. <sup>34</sup> Nexata Jesús jumaitsi bajarapamonaejavabelia:

—¿Detsa jota pamëthëtame Lázaro? jai Jesús.

Nexata bajarapamonae jumaitsi Jesúsjavabelia:

—Naxanitsia. Taename itsajota pamëthëtajë Lázaro, jai.

<sup>35</sup> Jesús nexata vënu Lázaro. <sup>36</sup> Nexata judíovi najumaitsi:

—Pataema Jesús penuejava. Jesús picani bitso asiva petëpaenëmi, najai judíovi.

<sup>37</sup> Itsamonae judíovi najumaitsi Jesús yabara:

—Mara ponëje itaxutoxaniavaeta bitso pitaxutotsëcënaenëmi ataje xaniavaetsia petaenexa. ¿Apo caëjëpaetsi tsamëra tsipae Lázaropijinë pejamatejemayaexanaenexa petëpaeyaniva? najai bajarapamonae.

*Pacuenia Lázaro petëpaecujinae Jesús icatsia asaëyaexana yabara pelivaisi*

<sup>38</sup> Jesús bitso sivanajamatabëxaina Lázaropijinë. Nexata Jesús cujilia Lázaropijinë pemëthëtsiibovajutsijavabelia. Iboanaxanetota Lázaro yamëthëvëpa acatabuatatsi.

<sup>39</sup> Jesús nexata jumaitsi bajarajota penapatsivijavabelia:

—Pavecuatixiremëlia mapaibopanaxanetoje, jai Jesús.

Nexata Marta, petëpaenë pematapijiva, jumaitsi:

—Tajatuxanenë, tuxutsaeba raeta baja bitso Lázaro. Tsipaji rabaja petëpaecujinae, ajena baja cuatro pamatacabibeje xaina, jai Marta Jesúsjavabelia.

<sup>40</sup> Jesús nexata jumaitsi Martajavabelia:

—Catsipaebatsi rabaja pacuenia taejitsiamë Dioso ayaicuene pexanaejava ita jume-covënëtame Dioso, jai Jesús.

<sup>41</sup> Nexata bajarapamonae Lázaropijinë pemëthëvëpavecua tixilia ibopanaxaneto. Jesús itaboxo naëcotsiaya jumaitsi:

—Taxa, pexaniajamatabëcuene carajutatsi tanejumetaexaemë. <sup>42</sup> Yapëtaniji cajena tanenamuxunaevetabibijavamë. Itsiata icatsia cavajëtatsi mapamonaeje ayabitsaëtoxaneto pejumecovënëtsinexa taneitorobinëcuenemëtsica, jai Jesús Diosojavabelia.

<sup>43</sup> Bajarapacuenia Jesús pejumaitsicujinae, ayaijumeta jumaitsi Lázaro pebuatsiibovajutsijavabelia:

—¿Lázaro, bajara jane mëthëvecua pitsaparemena! jai Jesús.

<sup>44</sup> Nexata baja Lázaro petëpaenëmi pitsaparena mëthëvecua. Piapiasábanata daxitanëreca mataquionaeya pematacacëbicujinaetsireca abaxë, pitsaparena. Pitabaraacatsipapaëbërëpanatsi abaxë tsiteca itabaraacatatsi. Jesús nexata jumaitsi bajarapamonaejavabelia:

—Pavecuaisinare bajarapapana. Pacopare peponaenexa pijaboyabelia, jai Jesús.

*Pacuenia picani Jesús pijavajabitsaë jamatabëvaetabatsi yabara pelivaisi*

*(Mt 26.1-5; Mr 14.1-2; Lc 22.1-2)*

<sup>45</sup> Judíovi, pamonaë María yanabatsi, tane Lázaro petëpaenëmi Jesús piasaëyaexanaejava. Nexata bajarapamonaeyajuvënëvi ayabitsaëto jumecovënëta Jesús Dioso pexënatocuene. <sup>46</sup> Itsiata itsamonae bajarapamonaeyajuvënëvi pona fariseovijavabelia. Nexata tsipaeba pacuenia Jesús Lázaro petëpaenëmi asaëyaexana. <sup>47</sup> Nexata fariseovi, sacerdotevi penamatacaitorobivi yajava, nacaetuata. Nexata bajarapamonae junata penacaetuatsinexa judíovi pijaancianovi, judíovi pecujarubivi ata yajava. Nexata bajarapamonae najumaitsi:

—¿Detsa meta vaxaitsi itsanetsi? Bajaraponë Dioso pesaëta pinijicuene pexanaejava exanapona. <sup>48</sup> Itsa vaxaitsi cuenecopatsipatsi bajarapacuene pexanaponaejava, daxitajivi jumecovënëtaaponaejitsipa bajaraponë. Apo jumecovënëtsi tsipae Romanonacua pevetsivi. Nexata Romanonacua pevetsivi anaepanaejitsipa. Itorobijitsiparena pijajivi, vajabitsaë. Nexata vajabitsaë ita patsiparena, vajatemplobo nacatoxuabijitsipaica. Nacaverebiabijitsipanua, najai bajarapamonae.

<sup>49</sup> Bajarapamonaeyajuvënëni pevënë Caifás. Bajarapamatacabi bajaraponë Caifás, sacerdotevi pepo penamatacaitorobinë tsaponaponaë. Nexata Caifás jumaitsi penajua-nacaetuatsivijavabelia:

—Paxamë raja apo payapëtaemë. <sup>50</sup> Nexata Romanonacua pevetsivi vajabitsaë ita itorobarena, vajanacaverebiabiyanaiva, bepanajamatabëxainame mapacueniaje. Bajaraponë caenë ita beyaxuabiaexanaenatsi, bajaraponë pejamatabëcueneta daxita judíovitsi vajavajabitsaë apo nacaverebiabi tsane, jai Caifás Jesús yabara.

<sup>51</sup> Itsiata baitsi jane Caifás apo jumaitsi bajarapacuenia pijacuata penajamatabëx-ainaecuenia. Biji rajane bajarapamatacabi Caifás daxita sacerdotevi pepo penamatacaitorobinëxae, Dioso bajarapacuenia jumaitsiayaexanatsi. Bajarapacuenia Caifás tajëvelia jumaitsi tsipaji Jesús sivatëpaejitsia daxita judíovi. <sup>52</sup> Itsiata Jesús apo sivatëpae tsane ëjudíovi. Daxitanacuanëjava, pamonaë nacayajataruta Dioso pexi, bajarapamonae ata pecaetuatsinexa, sivatëpaena Jesús. <sup>53</sup> Bajarapacuenia bajara pamatacabijavaveliacujinae cajena judíovi pevetsivi najamatabëveretapona pacuenia bajarapamonae Jesús beyaxuabijitsiatsi.

<sup>54</sup> Bajaraxuata Jesús apo ponabiabi baja itsabelia judíovi nacaetuatabiaba. Nexata Judea nacuavecua pitsapa. Jesús baja nexata pona petusatonacua imoxoyojavabelia, Efraïnvënë tomarajavabelia. Nexata bajarapatomarata Jesús ponapona pijajivi yajava.

<sup>55</sup> Imoxoyo baja pevajënaë judíovi pijafiesta pejonematacabinexa, pascuavënëfiesta. Nexata jivi ayaibitsaëttoxaneto pona Jerusalén tomarabelia. Pona pexanaenexa pacuenia exanabiaba fiestavajënaëya penajamatabëcuene xaniavaetsinexa Diosojavabelia. Bajarapamonae naropoba tsiquiritomaraxijavaverena. <sup>56</sup> Nexata bajarapamonae jaitarutatsi Jesús. Itsa bajarapamonae nacaetuata templobota, nayanijoba. Najumaitsi:

—¿Detsa xamë jamatabëitsimë? ¿Jesús tsamëra patsiana mapafiestajavaje? Jume. Apo patsi tsamëra tsane, najai ëpamonae.

<sup>57</sup> Nexata fariseovibeje sacerdotevi penamatacaitorobivibeje najumecopata jivijavabelia petonaitaxutocaevetsinexatsi Jesús. Nexata pajivi yapëtane itsajota Jesús ponapona, petsipaëbinexa bajarapamonaejavabelia. Nexata fariseovibeje sacerdotevi penamatacaitorobivibeje itsa yapëtane itsajota Jesús ponapona, pevaetabinexatsi Jesús penaneconitsiaexanaenexatsi.

## 12

### *Pacuenia Jesús petiriva tsitaxuepanatsi petuxujuviaceitera yabara pelivaisi* (Mt 26.6-13; Mr 14.3-9)

<sup>1</sup> Pejonenexa baja pascuavënëfiesta, saica seis pamatacabibeje. Nexata bajarapamat-  
acabi Jesús baja pona Betania tomarabelia. Bajarapatomarata ponapona Lázaro, ponë  
Jesús asaëyaexana petëpaenëmi. <sup>2</sup> Bajarajota Jesús pexaejava toexanatsi caniviyopiji-  
java. Bajarajota Marta pexaejava tsanaponapona. Lázaro nanabaneca pamesata Jesús  
nabaneca. <sup>3</sup> Nexata María carena epatuabotellabëyota petuxujuviaceitera, nardovënëra.  
Bajarapora bitso penamatomotsira. Nexata bajarapaaceitera María tsitaxuepana Jesús.  
Bajaraxuacujinae icatsia pematánata taxuiquica. Daxita bo tuatuajë tuxudereecaruta.  
<sup>4</sup> Nexata Jesús pijajiviyajuvënënenë, Judas Iscariote, Simón pexënato, ponë itsamatacabi  
Jesús canajetsijitsiatsi pijavajabitsaë pecobeyabelia, jumaitsi:

<sup>5</sup> —¿Detsa xuajitsia apo canajetsi bajarapatuxujuvira. Matamopitsipa trescientos  
denario. Bajarapapalata rajutsipa bepejiobivi bajarapacuenia peyavenonaenexa, jai  
Judas Iscariote.

<sup>6</sup> Itsiata bajarapacuenia Judas apo jumaitsi pesivanajamatabëxainaexae bepejiobivi.  
Judas raja penacobetoxotsinë. Jesús bana pijapalatadoro pevetsiaexanaenëxaetsi, Judas  
nacobetoxotabiaba bajarapapalatayajuvënëjava. <sup>7</sup> Nexata Jesús jumaitsi Judasjavabelia  
petiriva yabara:

—Copare bajarapova xanëjavaberena pexanaenexa bajarapacuenia. Itsamonae petë-  
paejivi batsiperabëëpana petuxujuviaceitera peperabëxaniavaetsinexa pemëthëtsivajë-  
nae. Bajara pijinia pacuenia mapovaje xaniavaeta bajarapora tanetsiperabëëpanaenexa,  
apo tëpae atanë, taneperabëxaniavaetsinexa itsamonae tanemëthëtsivajënae. Tsipaji  
baja imoxoyo tavajënae tanemëthëtsinexa. <sup>8</sup> Daxitamatacabi raja bepejiobivi jinavanapa  
itsaxuayo pajinavanapame paneyavenonaenexa. Itsiata baitsi jane xanë daxitamatacabi  
apo ponaponaenë tsane paxamëjavata, jai Jesús Judasjavabelia.

### *Pacuenia judíovi najamatabëxaina pebeyaxuabinexatsi Lázaro yabara pelivaisi*

<sup>9</sup> Ayaibitsaëtoخانeto judíovi vënëlivaisitanetsi Jesús pepatsijava Betania tomarata. Judíovi nexata ponalia Betania tomarabelia petaenexatsi Jesús. Itsiata bajarapamonae apo ponaelia petaenexa ëJesús. Ponalia petaenexanua Lázaro, ponë Jesús asaëyaexana, petëpaenëmi. <sup>10</sup> Nexata sacerdotevi penamatacaitorobivi daxita baja sivanajamatabëjëpa pebeyaxuabinexatsi Lázaro, Jesús yajava. <sup>11</sup> Bajarapamonae najamatabëjëpa pebeyaxuabinexatsi Lázaro. Tsipaji judíovi ayaibitsaëto natsanapona sacerdotevivecua petaexae Lázaro piasaëtsaponaponaevajava petëpaecujinae. Nexata bajarapajudíovi jume-covënëtapona Jesús Dioso pexënatoeuene.

*Pacuenia Jesús pata Jerusalén tomarata yabara pelivaisi*  
(Mt 21.1-11; Mr 11.1-11; Lc 19.28-40)

<sup>12</sup> Jivi ayaibitsaëtoخانeto pata Jerusalén tomarata pascuafiesta petaenexa. Nexata bajarapamonae Jesús vënëlivaisitanetsi pepatsijavanexa Jerusalén tomarata. Jesús naropota Betania tomaraverena. <sup>13</sup> Nexata bajarapamonae Jesús pevajënae baxuucubaba benaxarebobaxutonë. Bajarapamonae pona baja pecopiapitsinexa Jesús. Itsa panamutoverena Jesús najetaruca, bajarapanamutuabelia bajarapamonae pona. Itsa baja bajarapamonae Jesús copiapita, bajarapamonae vavajai tsabuatapona.

—¡Dioso yavenonaenatsi! ¡Maponë najetarucaje, vajatuxanenë pejamatabëcueneta najetaruca Israel nacuapijivi pepo pevetsinënexa! jai tsanajetarubena bajarapamonae Jesús yabara.

<sup>14</sup> Nexata Jesús caxitajarabaxuaba burro. Bajarapaburro Jesús jumaponatsi pepatsinexa Jerusalén tomarata. Jesús burrojumata pepatanajetarucavejavanexa Jerusalén tomarata, Dioso pejumelivaisibaxutota tajëvelia jumaitsi mapacueniaje:

<sup>15</sup> PaJerusalén tomarapijivimë, pëtsa pajunavame. Pataename pepo papecaevetsinënexa penajetarucavejava. Pejanaburroyota yapatanajetarucaena, jai tajëvelia Dioso pejumelivaisibaxuto Jesús burrojumata pepatanajetarucavejavanexa Jerusalén tomarata.

<sup>16</sup> Itsa bajarapacuenia Jesús pata Jerusalén tomarata, copiapata jane baja pacuenia Dioso pejumelivaisibaxutota tajëvelia jumaitsi Jesús yabara. Bajarapamatacabi Jesús pijajivi tae ata bajarapacueni, itsiata abaxë apo yapëtae pecopiapatsijava bajarapacueni. Matapania baja Jesús pepuapona athëbëabetsia, Jesús pijajivi yapëtane pecopiapatsijava baja pacuenia Dioso pejumelivaisibaxutota tajëvelia jumaitsi Jesús yabara.

<sup>17-18</sup> Pamona tane pamatacabi Jesús Lázaro asaëyaexana petëpaenëmi, bajarapamonae tsipaeba Jerusalén tomarapijivijavabelia. Tsipaeba pacuenia bajarapamonae tane Jesús Lázaro piasaëyaexanaevajava petëpaenëmi. Bajaraxuata jivi ayaibitsaëto pitsapa tomaravelia pecopiapitsinexatsi Jesús. <sup>19</sup> Nexata fariseovi itsa tane bajarapacueni, najumaitsi:

—Pataema. Daxitajivi pënaponatsi Jesús. Vaxaitsi baja nexata acuenebi vajaexanaevajava Jesús jivi pepënaponaejavatsi yabara, najai fariseovi.

*Pacuenia Grecia nacuapijivi Jesús jamatabëtanetsi yabara pelivaisi*

<sup>20</sup> Ayaibitsaëto jivi pata Jerusalén tomarata Diosojavabelia pevajëtsinexa pascuavënë fiestamatacabita. Bajarapamonaeyajuvënëvi itsamonae Grecia nacuapijivi. <sup>21</sup> Nexata Grecia nacuapijivi cujibaliatsi Felipe. Felipe Betsaida tomarapijinë. Betsaidatomara eca Galilea nacuata. Nexata Grecia nacuapijivi jumaitsi Felipejavabelia:

—Felipe, pajamatabëtaniji raja Jesús, jai.

<sup>22</sup> Felipe nexata pona Andrésjavabelia petsipaebinexa pacuenia Grecia nacuapijivi jumaitsi. Nexata Felipebeje Andrésbeje ponabeje petsipaebinexabeje Jesúsjavabelia.

<sup>23</sup> Nexata Jesús jumaitsi bajaraponëbejevavabelia:

—Xanë, Daxitajivi Pematapijinënë, tajamatacabi baja netocopiapata tanaviatsinexa baja athëbëabetsia ayaijamatabëcuenenënë Dioso taneexanaenexa. <sup>24</sup> Xaniajanë pacuenia pacatsipaebijitsiatsi. Trigoxuto itsa apo ubitsi irabelia, saya tsitecanuca caexutoyo. Itsiata itsa ubatsi, pejuvicujinae xutsabana vajuabixutoyomi penacopatsinexa

pejanaboto. Nexata itsa nacuaita bajarapaboto, ayaijava pexu capitsapa. <sup>25</sup> Bajara pijinia itsi jivi ata. Pajivi jamatabëjumaitsi ata tsane petëpaeyaniva: “Xanë nayajivitaeyaponaponaenajë tanebejiobiaexanaeyaniva, tanebeyaxuabiyaniva ata,” jamatabëjai ata tsane, itsiata tēpaena. Nexata Diosovecua naxuabiana. Biji rajane pajivi nesivanajamatabëcopatsiaya jamatabëjumaitsi tsane: “Jema nebejiobiaexanaena. Jema nebeyaxuabiananua Jesús pijajivitonëxaenë,” jamatabëjai tsane, bajarapajivi xainaena matabacabi apo peverevereceajava. <sup>26</sup> Pajivi jamatabënetonacueneba, bajarapajivi nepënaponaena. Nexata pajivi netonacuenebiana, neyjavaponaponaena itsajota ponaponaenajë. Pajivi netonacuenebiana, bajarapajivi yabara taxa Dioso jumaitsi tsane: “Bajarapajivi sivajamatabëcuenebarëyanë,” jai tsane, jai Jesús Felipebeje Andrésbejejavabelia.

*Pacuenia Jesús tajëvelia navajunupaeba pacuenia beyaxuabijitsiatsi yabara pelivaisi*

<sup>27</sup> Jesús bēpënëa jamatabëjumaitsi:

—Aeconoxae bitso najamatabëxainajë. ¿Detsa meta jumaitsinë tsane taxajavabelia? Jumaitsinë meta tsane: “Taxa, betajibicuenia tanebeyaxuabijavaminexa, vecuanecapanepaename,” janë meta tsane taxajavabelia. Jume raja. Bajarapacuenia meta apo vajëtsinë tsane. Tsipaji betajibicuenia tanebeyaxuabinexa, patajë mapanacuayabetsicaje, jamatabëjai Jesús.

<sup>28</sup> Nexata Jesús Diosojavabelia jumaitsi:

—Taxa, pacuenia jitsipame nexanaenexa jivi pecayiyataenexa, exanare, jai Jesús.

Nexata bajarajota Jesús jumetane athëbëvetsica ayaijume. Jumaitssica mapacueniaje:

—Jivi rabaja cajena neyaiyatane. Itsiata matavëjëa neyaiyataena, jaitsica.

<sup>29</sup> Jivibitsaëto bajarajota penubenaevi jumetane bajarapajume. Nexata bajarapamonae jumaitsi:

—Yamaxë raeta najumeta, jai.

Itsamonae pijinia jumaitsi:

—Angel raeta barëcuaicuaijaitsi Jesús, jai.

<sup>30</sup> Nexata Jesús jumaitsi bajarapamonaejavabelia:

—Xanë raja tajumetaenexa bajarapajume apo jumaitssica. Paxamë raja panelumetaenexa jumaitssica. <sup>31</sup> Aeconoxae rabaja copiapatsiana Dioso penaneconitsiaexanaematababinexa daxita pijaneconi pexainaevi. Vecuaxuabiananua dovathi, ponë mapanacuata jivi itorobabiaba pibisiacuene pexanaenexa. <sup>32</sup> Itsa neyotarutsiana cruzajavabelia tanebeyaxuabinexa, nexata daxitajivi jitsipaeyaexanaenajë xanë tanesivanajamatabëcuene copatsinexa, jai Jesús.

<sup>33</sup> Bajarapacuenia Jesús tajëvelia jumaitsi jivijavabelia jivi peyapëtaenexa pacuenia Jesús tēpaejitsia. <sup>34</sup> Nexata bajarapamonae jumaitsi Jesúsjavabelia:

—Dioso Moiséspijinëta penajumecopatsilivaisi tajëvelia jumaitsi mapacueniaje: “Cristo, ponë athëbëvetsica Dioso itorobijitsiatsica jivi pecapanepaenexa, asaë tsaponapona tsane daxitamatabacijavabelianexa pevetsinexa mapanacuaje,” jai. Itsiata xamë Cristo atamë, jumaitsimë: “Xanë, Daxitajivi Pematapijinënë, neyotarutsiana cruzajavabelia tanebeyaxuabinexa,” jamë. ¿Detsa nexata ponë Cristo daxita matabacijavabelianexa asaë tsaponapona tsane? jai bajarapamonae Jesúsjavabelia.

<sup>35</sup> Nexata Jesús jumaitsi bajarapamonaejavabelia:

—Imoxoyo rabaja pevajënae taponamatababinexa. Abaxë raja itsiata taponaponaematababibeje, pacatsipaebianatsi pexaniajailivaisi patacajamatabëcueneitayotsinexa. Nexata itsa pacatsipaebianatsi pexaniajailivaisi, panelumecovënëtsianame panejajamatabëcueneitaquiriyaniva. Pajivi ajamatabëcueneitaquiri, apo xinae tsane matabacabi apo peverevereceajava. <sup>36</sup> Xanë rabaja pexaniajailivaisita pacajamatabëcueneitayotsianatsi. Taponaponaematababibeje abaxë mapanacuataje, panesivanajamatabëcopatsianame. Bajarapacuenia nexata jamatabëcuenenaitayotsiaya pajinavanapaename, jai Jesús bajarapamonaejavabelia.

Bajarapacuenia pejumaitsicujinae, Jesús baja pona pevecuanamatayabinexa bajarapamonae.

*Pacuenia judíovi jamatabējumaitsi Jesús yabara: “Maponėje apo Cristo, ponė copiaeveta-vanapatsi vajanacacapanepaenexa,” jamatabėjai yabara pelivaisi*

<sup>37</sup> Jesús ayai cuene pexanaejava Dioso pesaėta judíovi pitabarata exanapona. Judíovi tae ata bajarapacuenie, itsiata apo jumecovėnėtsi Cristocuene. <sup>38</sup> Nexata judíovi itsa apo jumecovėnėtsi Cristocuene, copiapata jane baja pacuenia bajayata tajėvelia yaquina Diosojumepaebinėmi, profeta Isaíaspijinė. Judíovi Cristocuene apo pejumecovėnėtsijavanexa yabara, bajayata Isaíaspijinė peyaquinaelivaisita tajėvelia jumaitsi mapacueniaje:

Dioso, patatsipaebilivaisi cajena jivi apo panejumecovėnėtsi tsane. Bajarapamonae apo panejumecovėnėtsi tsane,

tae ata nesaėta pinijicuene pataexanaejava, jai bajayata tajėvelia Isaíaspijinė peyaquinaelivaisita judíovi Cristocuene apo pejumecovėnėtsijavanexa yabara.

<sup>39</sup> Bajaraxuata Cristo patsi ata, judíovi apn jumecovėnėtsi Cristocuene. Isaíaspijinė peyaquinaelivaisita, judíovi yabara icatsia tajėvelia jumaitsi mapacueniaje:

<sup>40</sup> Bajarapamonae Dioso itaxutotsėcėnaeyaexanaena. Ajamatabėcuenetajaya exanaenanua. Bajarapacuenia Dioso exanaena bajarapamonaejavabelia. Nexata bajarapamonae tae ata tsane pinijicuene Dioso pesaėta pexanaejava, itsiata bajarapamonae apo yapėtae tsane pajamatabėcuenelivaisi xaina petaejava. Nexata bajarapamonae Diosojavabelia apo najamatabėcuenepėnėyorotsi tsane perujujamatabėcuenevecua. Nexata apo jamatabėcuenexaniavaetsinė tsane,

jai bajayata tajėvelia Isaíaspijinė peyaquinaelivaisita judíovi Cristocuene apo pejumecovėnėtsijavanexa yabara.

<sup>41</sup> Bajarapacuenia Isaíaspijinė yaquina tsipaji bajayata Isaíaspijinė bemajitsinaebota tane Jesús ayaijamatabėcuene pexainaenėcuene. Bajaraxuata bajayata Isaíaspijinė bajarapacuenia Jesús vajunupaeba baja cajena.

<sup>42</sup> Itsiata judíoviyajuvėnėvi ayaibitsaėto jumecovėnėta Cristocuene. Judíovi pevetsivi ata jumecovėnėta Cristocuene. Bajarapamonae judíovi pevetsivixae, apo navajunupaebi pejumecovėnėtsijava Cristocuene. Tsipaji cujunava fariseovi. Bajarapamonae bėpėnėa jamatabējumaitsi:

—Apo navajunupaebinė tsane tajumecovėnėtsijava Cristocuene tanecapitsapaeyaniva fariseovi judíovi penacaetuatabibovecua, jamatabėjai bėpėnėa bajarapamonae.

<sup>43</sup> Tsipaji bajarapamonae jitsipa penajuaevetsivi pesivabarėyajavatsi Dioso pesivabarėyajavatsi matatoxenetsia.

*Pacuenia jivi naneconitsijitsia Diosojavabelia itsa apo jumecovėnėtsi Jesús petsipaebilivaisi yabara pelivaisi*

<sup>44</sup> Jesús jumaitsi ayaijumeta jivijavabelia:

—Pajivi jumecovėnėtsiana Cristocuenenė, bajarapajivi ėxanė yabara apo jumecovėnėtsi tsane. Taxa, ponė nitorobica, bajaraponė yabara ata jumecovėnėtsiana. <sup>45</sup> Pajivi necuenyapėtaena, bajarapajivi taneitorobinėtsica ata cuenyapėtaena. <sup>46</sup> Xanė rabaja pexaniajailivaisita jamatabėcueneitayotsianajė mapanacuapijivije. Nexata pajivi jumecovėnėtsiana Cristocuenenė, apo ajamatabėcueneitaquiri tsane. <sup>47</sup> Pajivi jumeyapėtae ata tsane tatsipaebilivaisi, itsiata itsa apo jumecovėnėtsi tsane bajarapalivaisi, bajarapajivi naneconitsiana Diosojavabelia. Itsiata xanė bajarapajivi apo naneconitsiaexanaenė tsane. Tsipaji xanė apo patsinėtsica tananeconitsiaexanaenexa mapanacuapijivije. Biji rajane xanė patsicajė tacapanepaenexa mapanacuapijivije. <sup>48</sup> Pajivi nenayajivitavetsiana, apo nejumecovėnėtsinua tsane tatsipaebilivaisi ata, bajarapajivi taxa Dioso naneconitsiaexanaenatsi. Bajarapajivi taxa Dioso naneconitsiaexanaena pamatacabi naneconitsiaexanaena daxita pijaneconi pexinaevi tatsipaebilivaisi apo pejumecovėnėtsixae. <sup>49</sup> Tsipaji xanė tajamatabėcueneta apo paebinė bajarapalivaisi. Taxa raja, ponė nitorobica, nitoroba bajarapalivaisi jivi tatsipaebinexa. <sup>50</sup> Yapėtaniji baja cajena jivi

pexainaejavanexa matabi apo pevereveceajava itsa jumecovëneta taxa pitorobilivaisi. Nexata bajarapalivaisi itsa tsipaebaponajë jivijavabelia, tsipaebaponajë pacuenia taxa Dioso nitoroba tatsipaebinexa, jai Jesús jivijavabelia.

## 13

*Pacuenia Jesús beveliajamatabëcuenenë nataeya taxuquiatapona pijajivi, caenë canacujitsia, yabara pelivaisi*

<sup>1</sup> Caematacabi baja saica pejonenexa pascuavënëfiesta. Jesús nexata yapëtane pamatacabitata pijavajabitsaë beyaxuabijitsiatsi. Yapëtanenua peponaejavanexa paxa Diosojavabetsia. Jesús bitso asiva pijajivi, mapanacuapijivije. Jesús nexata bajarapamatacabi pijajivi tsitanajamatabëcueneitajëta piasivacuene.

<sup>2</sup> Jesús pijajivi barë nabane caniviyopijijava. Nexata Judas Iscariote, Simón pexënato, dovathi pejamatabëcueneta najamatabëxainaeaxanatsi. Nexata Judas najamatabëxaina Jesús pecanajetsinexa pijavajabitsaë pecobeyabelia. <sup>3</sup> Jesús yapëtane paxa Dioso perajutsijavatsi daxitacuene pevetsinexa. Yapëtanenua paxa Diosojavavetsica pepatsijava. Icatsia pacuenia ata naviatsijitsia paxa Diosojavabetsia, yapëtane. <sup>4</sup> Nexata Jesús pijajivi pebarë nabanijavata, Jesús nonotapuna mesajavata. Najumajonota penaxatatsijava. Nexata toalla naepacëta. <sup>5</sup> Jesús mera epata penacobequiatsinëjavabelia petaxuquiatsinexa pijajivi. Jesús nexata beveliajamatabëcuenenë nataeya taxuquiatapona pijajivi, caenë canacujitsia. Taxuquicapona icatsia pijatoallata penaepacëtsipanata.

<sup>6</sup> Itsa Jesús taxuquiatsijitsia Simón Pedro, nexata Simón Pedro jumaitsi:

—Tajatuxanenë, apo jitsipaenë tanetaxuquiatsijavamë. Tsipaji ayaijamatabëcuenenëmë, jai Simón Pedro Jesúsjavabelia.

<sup>7</sup> Jesús nexata jumaitsi:

—Aeconoxae abaxë apo yapëtaemë pajamatabëcuene yabara cataxuquiatsijitsiatsi. Itsiata baitsi jane bexëjavabelia yapëtaename, jai Jesús.

<sup>8</sup> Nexata Pedro jumaitsi:

—Apo catonataxucopatsi tsanetsi tanetaxuquiatsinexamë, jai Pedro.

Jesús nexata jumaitsi:

—Itsa apo cataxuquiatsi tsanetsi, nexata apo tajajivitonëmë tsane, jai Jesús Pedrojavabelia.

<sup>9</sup> Simón Pedro nexata jumaitsi:

—Tajatuxanenë, ëtataxu nexata apo netoquiatsimë tsane. Tacobe ata, tamatabocoto ata, netoquiatsianame, jai Pedro.

<sup>10</sup> Jesús nexata jumaitsi Pedrojavabelia:

—Pajivi baja navane, apo namatavenonae baja pequiatsinexatsi daxitanë. Saya namatavenona ëpetaxuquiatsinexatsi. Tsipaji baja daxitanë axuirajibi. Paxamë rabaja pajamatabëcuenexuirajibimë. Itsiata baitsi jane apo padaxitamë, jai Jesús Pedrojavabelia.

<sup>11</sup> “Pajamatabëcuenexuirajibimë. Itsiata baitsi jane apo padaxitamë,” jai Jesús. Tsipaji yapëtane tajëvelia ponë canajetsijitsiatsi pijavajabitsaë pecobeyabelia.

<sup>12</sup> Petaxuquiatsicujinae pijajivi, Jesús baja icatsia penaxatatsijava naxatata. Eca icatsia mesa muxuneneta. Jumaitsi pijajivijavabelia:

—¿Payapëtaneme tsabaja paxamë pajamatabëcuene yabara pacataxuquiatatsi?

<sup>13</sup> “Vajanacacujarubinë,” pajamë tsabiabi itsa panabarëcuaijiamë xanë yabara. Itsajavata: “Vajatuxanenë,” pajamë tsabiabi. Paxaniajamë rabaja cajena. Bajara tsipaji taitsinë. <sup>14</sup> Xanë, patacujarubinë ata, panijatuxanenë atanënu, beveliajamatabëcuenenënë nataeya pacataxuquiatatsi bepanijajivitonënëcuenia. Nexata bajarapacuenia paxamë ata beveliajamatabëcuenevi nataeya panataxuquiatatabianame namataenetsia. <sup>15</sup> Pacatsitaexanatsi bajarapacuenia paxamë ata bajarapacuenia namataenetsia panenatoexanaenexa. <sup>16</sup> Xaniajanë pacuenia pacatsipaebijitsiatsi.

Paxamë cajena apo panejamatabëcuene matatoxenetsimë. Tsipaji itsanë ata apo

jamatabëcuenematatoxenetsi pitorobinëtsi. <sup>17</sup> Payapëtaneme rabaja pajamatabëcuene yabara panijatuxanenë atanë, beveliajamatabëcuenenënë nataeya pacataxuquiatatsi. Nexata pijinia paxamë ata bajarapacuenia beveliajamatabëcuenevi nataeya namataenetsia nasivaya ita panayavenonabianame, pajamatabëcuenebarëyamë tsavanapae tsane, jai Jesús pijajivijavabelia.

<sup>18</sup> Icatsia Jesús jumaitsi pijajivijavabelia:

—Daxita raja itsiata apo pajamatabëcuenebarëyamë tsavanapae tsane. Tsipaji caenë paxamëyajuvënë, ponë naxaena xanëta, bajaraponë necanajetsiana tajavajabitsaë pecobeyabelia pacuenia tajëvelia jumaitsi Dioso pejumelivaisibaxutota. Yapëtaniji ponë necanajetsijitsia. Tsipaji xanë patacaitapetsivi patajajivinexamë, pacajamatabëcuenyapëtanetsi pacaenëmë canacujitsia. Nexata pacuenia tajëvelia Dioso pejumelivaisibaxutota jumaitsi xanë yabara, bajarapacuenia netocopiapatsiana. <sup>19</sup> Pacatsipaebatsi bajarapacuenia taneexanaevajënaeya. Nexata ita nebeyaxuabiana, panejumecovënëtsianame xanë Cristocuenenë pacuenia baja cajena pacatsipaebatsi. <sup>20</sup> Xaniajanë pacuenia pacatsipaebijitsiatsi. Pajivi copiapitsiana taitorobinë, xanë neyjavacopiapitsiana. Pajivi necopiapitsiana, bajarapajivi neyjavacopiapitsiana taxa Dioso, ponë nitorobica, jai Jesús pijajivijavabelia.

*Pacuenia Jesús navajunupaeba Judas pecanajetsijavanexatsi pijavajabitsaë pecobeyabelia yabara pelivaisi*

(Mt 26.20-25; Mr 14.17-21; Lc 22.21-23)

<sup>21</sup> Jesús pejamatabëthëtota bëpënëa bitso natsinajamatabëxaina. Nexata roviaia Jesús jumaitsi pijajivijavabelia:

—Xaniajanë pacuenia pacatsipaebijitsiatsi. Caenë paxamëyajuvënë necanajetsiana tajavajabitsaë pecobeyabelia, jai Jesús pijajivijavabelia.

<sup>22</sup> Nexata Jesús pijajivi nataeyena. Tsipaji apo yapëtae ponë yabara Jesús jumaitsi.

<sup>23</sup> Jesús pijajiviyajuvënë, caenë bitso asivaya tane. Bajaraponëbeje Jesúsbeje namuxuneniaxaeyecabeje. <sup>24</sup> Nexata bajaraponë Jesúsjavabelia petoyanijobinexatsi, Simón Pedro pecobeta itorobeca.

—Yanijobare ponë yabara Jesús jumaitsi, jai tsecae Simón Pedro pecobeta.

<sup>25</sup> Nexata bajaraponë natixireca. Eca bitso Jesús pemuxuneneta peyanijobinexa Jesúsjavabelia.

—Tajatuxanenë, ¿jipatsa yabara jumaitsimë? jai bajaraponë Jesúsjavabelia.

<sup>26</sup> Nexata Jesús jumaitsi pijajivitonëjavabelia, bitso piasivanëjavabelia:

—Ponë ra peneta panjavayo tocjabutsianajë, bajaraponë tsane, jai Jesús pijajivitonëjavabelia, bitso piasivanëjavabelia.

Nexata Jesús panjavayo pita. Cajabuta. Nexata jane baja rajuteta Judas Iscariote, Simón pexënatjavabelia. <sup>27</sup> Judas ita pita pan, nexata bajarajota Judas dovathi tsijamatabëjunuatsi. Nexata Jesús jumaitsi Judasjavabelia:

—Xua baja exanaejitsiamë, naxanitsiayo baja exanare, jai Jesús.

<sup>28</sup> Itsiata baitsi jane pamonaë najuaxaeyena bajarapamesata, apo jumeyapëtae xua yabara Jesús jumaitsi Judasjavabelia. <sup>29</sup> Judas tovetabiaba bajarapamonaë pijapalata-doro. Bajaraxuata Judas yabara Jesús pijajivi jamatabëjumaitsi:

—Jesús raeta itoroba Judas pecomuatsinexa vajaxaejavanexa fiestajavata. Itsa jume, itoroba meta perajutsinexa itsacuenejavaxi bepejiobivijavabelia, jamatabëjai Jesús pijajivi.

<sup>30</sup> Itsa baja Judas pan pita, bovecua pitsapalia vayafuabelia, meravi baja.

*Pacuenia Jesús pijajivi itoroba namataenetsia penasivatsavanapaenexa yabara pelivaisi*

<sup>31</sup> Pabota Jesús pijajivi barënacaetuata, bajarapabovecua Judas pitsapalia. Nexata Judas pepitsapaecujinaelia Jesús jumaitsi pijajivijavabelia:

—Aeconoxae rabaja xanë, Daxitajivi Pematapijinënë, najamatabëcueneitajëtsianajë ayaijamatabëcuene taxainaejava. Taxa Dioso ata bajarajota yajavajamatabëcueneitajëtsianajë ayaijamatabëcuene pexainaejava. <sup>32</sup> Nexata taxa Dioso juya nejamatabëcueneitajëtsiana ayaijamatabëcuene taxainaejava. Bajarapacuenë baja naxanitsiayo taxa Dioso exanaena. <sup>33</sup> Bepataximë patacataevi. Bajara maapo pacayajavaponaponaetsi tsane bajayajebije. Paxamë panejaitsoniane. Pacuenia jumaitsinë itsamonae judfovijavabelia, bajarapacuenia paxamëjavabelia ata pacajumaitsijsiatsi. Apo pacacajëpae tsane paneponaenexa itsabelia ponaejitsianë. <sup>34</sup> Pacatsipaebijitsiatsi icatsia pejanalivaisi. Paexanavanapaename mapacueniaje. Pasivamë tsavanapae tsane itsamonae ata. Pacuenia xanë pacaasivatsi, bajarapacuenia namataenetsia panaasivamë tsavanapae tsane. <sup>35</sup> Namataenetsia itsa panaasivamë tsavanapae tsane, nexata daxitanacuanëpijivi pacayapëtaena patajajivicuenemë, jai Jesús pijajivijavabelia.

*Pacuenia Jesús tajëvelia jumaitsi Pedrojavabelia: “Pedro, xamë nayavajunuaxainaname tajajivitonëcuenemë,” jai yabara pelivaisi*

(Mt 26.31-35; Mr 14.27-31; Lc 22.31-34)

<sup>36</sup> Simón Pedro yanijoba Jesúsjavabelia.

—Tajatuxanenë, ¿detsa belia ponaejitsiamë? jai Pedro.

Nexata Jesús jumaitsi Pedrojavabelia:

—Itsa belia ponaejitsianë, aeconoxae apo cacajëpae tanepënaponaenexamë. Itsiata baitsi jane itsamatacabi nepënaponaename, jai Jesús Pedrojavabelia.

<sup>37</sup> Nexata Pedro jumaitsi Jesúsjavabelia:

—Tajatuxanenë, ¿detsa xuajitsia apo necajëpae aeconoxae tacapënaponaenexa? Daxita pacuenia nitorobame, catoexanaejitsipatsi. Nebeyaxuabijitsia ata tsipae xamë yabara, apo cacopatsi tsipaetsi, jai Pedro Jesúsjavabelia.

<sup>38</sup> Jesús nexata jumaitsi Pedrojavabelia:

—¿Xaniajamë tsaja? ¿Nacaevetsipame pecabeyaxuabinexa taneasivaxaemë? Xaniajanë pacuenia catsipaebijitsiatsi. Vacara raja pefiavivajënaeya, nayavajunuaxainaname tajajivitonëcuenemë. “Apo yapëtaenë cajena bajaraponë,” jamë tsane xanë yabara acueyabi xuabeje, jai Jesús Pedrojavabelia.

## 14

*Pacuenia Jesús benamuto paxa Diosojavabetsia yabara pelivaisi*

<sup>1</sup> Jesús jumaitsi pijajivijavabelia:

—Pëtsa bitso panajamatabëxainame patacavecuaponaejavanexa yabara. Panajamatabëcuenecopare Diosojavabelia, xanëjavaberena ata. <sup>2</sup> Taxajavatatsia pexaniabobitsaëtonë xaina panejinavanapaenexa. Itsa bajara apo itsipae, apo pacatsipaebi tsipaetsi. Nexata bajarabetsia ponaejitsianë patacatsivajënaexaniavaetsinexa itsajota papatsijitsiamë. <sup>3</sup> Xanë taponaeucujinae mavetsiaje, itsa baja veretsianajë patacatsivajënaexaniavaetsijava itsajota papatsijitsiamë, icatsia patsianicajë patacacaponaeenexatsia jane baja. Nexata bajarajotatsia pacayajavaecaenatsi, itsajota ecaenajë. <sup>4</sup> Paxamë baja payapëtaneme itsabelia ponaejitsianë. Payapëtanemenua baja panepatsinexa itsajotatsia ecaejsitsianë, jai Jesús pijajivijavabelia.

<sup>5</sup> Nexata Tomás, Jesús pijajivitonë, jumaitsi:

—Tajatuxanenë, apo payapëtaenë cajena itsabelia ponaejitsiamë. ¿Detsa nexata pacuenia payapëtaenajë namuto pataponaenexa itsabelia ponaejitsiamë? jai Tomás Jesúsjavabelia.

<sup>6</sup> Jesús nexata jumaitsi:

—Xanë rabaja benamutonë. Tsipaji xanë tajamatabëcueneta jivi panepaena athëbëbetsia. Xanë rabaja pepo pexaniajailivaisi jivi tatsipaebaponaenë. Xanë rabaja xainajë matacabi apo peverevereaejava tarajutsinexa pamonaesivanajamatabëcopata. Itsajivi ata apo patsicapanepae tsane taxajavabetsia xanë itsa apo nejumecovënëtsi.

<sup>7</sup> Paxamë picani bajayata apo paneyapëtaemë. Nexata picani taxa ata apo payapëtaemë.

Aeconoxae rabaja paneyapëtaneme. Nexata baja taxa ata payapëtaneme. Patanemenua baja, jai Jesús.

<sup>8</sup> Nexata Felipe jumaitsi Jesúsjavabelia:

—Tajatuxanenë, panetsitajëre axa. Pajitsipajë baja cajena bitso axa patataenexa, jai Felipe Jesúsjavabelia.

<sup>9</sup> Jesús nexata jumaitsi:

—Felipe, bajayajebi rabaja pacayajavaponaponatsi. ¿Itsiata tsaja abaxë xaniavaetsia apo paneyapëtaemë? Pajivi netane, bajarapajivi taxa ata tane. ¿Detsa xuajitsia nexata nevajëcame taxa netaenexa? <sup>10</sup> Taxa baja cajena neyjavaponapona. Xanë ata taxa yajavapononajë. ¿Abaxë tsaja apo jumecovënësimë? Palivaisi pacatsipaebatsi, tajamatabëcueneta baja cajena bajarapalivaisi apo pacatsipaebitsi. Taxa raja, ponë neyjavaponapona, bajaraponë pejamatabëcueneta bajarapalivaisi neyapëtaeyaexana. Nexata bajarapalivaisi pacatsipaebatsi. <sup>11</sup> Panejumecovënëre taxa tayjavaponaponaejava. Panejumecovënërenua taxa ata taneyjavaponaponaejava. Patacatsipaebilivaisianë apo panejumecovënëtsi atamë, itsiata ayaicuene Dioso pesaëta taexanaexae, panejumecovënëre taxa tayjavaponaponaejava. <sup>12</sup> Xaniajanë pacuenia pacatsipaebijitsiatsi. Pajivi nejumecovënëtsiana, bajarapajivi exanaena pacuenia xanë exanajë. Ayaicuene taexanaejava matatoxenetsia bajarapajivi exanaena. Tsipaji xanë naviat-sianijë taxajavabetsia. <sup>13-14</sup> Daxita xua xanë tavënëta pavajëtsianame taxajavabelia, pacatoexanaenatsi cajena. Xanë, Dioso pexënatonë, bajarapacuenia pacatoexanaenatsi taxajavabelia panejamatabëcuenëbarëyanexa, jai Jesús pijajivijavabelia.

*Pacuenia Jesús najumecapanepaeya jumaitsi pitorobinexatsica Espiritu Santo jivijavabetsica yabara pelivaisi*

<sup>15</sup> Icatsia Jesús jumaitsi pijajivijavabelia:

—Itsa paneasivamë, paexanabiabianame pacuenia pacaitorobatsi. <sup>16</sup> Vajëtsianajë taxajavabelia itsanë juya papecatoitorobinexatsica papecayavenonaenënexa daxitamatabijavabelianexa. Bajaraponë Espiritu Santo. <sup>17</sup> Espiritu Santo cajena pepo pexaniajailivaisi jivi peyapëtaeyaexanaenë. Bajaraponë mapanacuapijivi abaxë apo tsijamatabëcaetsi. Tsipaji bajarapamonae apo nejumecovënëtsi. Nexata apo yapëtae ponë Espiritu Santo. Apo yapëtaenua cajena Espiritu peponaponaejava ata. Itsiata baitsi jane paxamë Espiritu Santo payapëtaneme baja. Tsipaji baja bajaraponë pacayajavaponapona. Espiritu Santo cajena pacatsijamatabëcaena dexitamatabijavabelianexa. <sup>18</sup> Ponaë atanë tsane taxajavabetsia, itsiata apo pacaxuabi tsanetsi. Icatsia raja patsianicajë patacayajavaponaponaenexa. <sup>19</sup> Caematabibejecujinae baja jivi apo netae tsane. Itsiata icatsia paxamë panetaename. Paxamë paxainaname matabi apo peverevereaejava. Tsipaji tatëpaecujinae icatsia asaënë tsaponaponae tsane. <sup>20</sup> Pamatabi Espiritu Santo patsianica paxamëjavabetsica, bajarapamatabi payapëtaename taxa tayjavaponaponaejavanexa. Payapëtaenamenua pataneyajavajinavanapaejavanexamë. Payapëtaenamenua xanë ata patacayajavaponaponaejavanexa. <sup>21</sup> Pajivi yapëthane, taitorobicuenia nejumecovënëtanua, bajarapajivi niasiva. Pajivi niasiva, bajarapajivi taxa juya asivatsi. Xanë ata bajarapajivi asivanë. Tsitanaitajëtsianajë bajarapajivijavabelia, jai Jesús pijajivijavabelia.

<sup>22</sup> Itsanë Judasvënënë, itsiata apo Judas Iscariote, jumaitsi Jesúsjavabelia:

—Tajatuxanenë, ¿detsa xuajitsia ëpaxanë panetsitanaitajëtsianame? ¿Detsa xuajitsia apo tsitanaitajëtsimë tsane itsamonaejavabelia? jai Judas Jesúsjavabelia.

<sup>23</sup> Jesús nexata jumaitsi Judasjavabelia:

—Pajivi niasiva tsane, nejumecovënëtsiananua tatsipaebilivaisi, bajarapajivi juya taxa asiva tsanetsi. Nexata paxanëbeje, taxabeje, bajarapajivi payajavaponaenajëbeje.

<sup>24</sup> Pajivi apo niasiva tsane, bajarapajivi apo nejumecovënëtsinua tsane tatsipaebilivaisi. Xanë palivaisi pacatsipaebaponatsi, xanë raja apo tajumelivaisi. Taxa raja, ponë nitorobica, pejumelivaisi, jai Jesús Judasjavabelia.

<sup>25</sup> Icatsia Jesús jumaitsi pijajivijavabelia:

—Abaxë patacayajavaponaponaepato pacatsipaebijitsiatsi mapacueniaje. <sup>26</sup> Taxa tamatabëcueneta, Espíritu Santo pacatoitorobianica papecayavenonabiabinexa. Nexata Espíritu Santo pacayapëtaeyaexanaena daxitacuene. Pacanajamatabënapitsiaexanaenanua daxita palivaisi pacatsipaebaponatsi, jai Jesús.

<sup>27</sup> Icatsia Jesús jumaitsi pijajivijavabelia:

—Pacanapëjibatsi jamatabëcuenexanepanaeya. Pacajamatabëcuene barëyayaexanaenatsi. Bजारapajamatabëcuenebarëyajava, apo jëpae mapanacuata pebarëyajava. Nexata bepíjia apo vereverecae tsane paxamë panejamatabëcuenebarëyajava. Pëtsa pajamatabëcuenebëjamë. Pëtsa pacujunavamenua itsacuene ata. <sup>28</sup> Panejumetaneme rabaja patacajumaitsijava mapacueniaje: “Xanë baja ponaenajë taxajavabetsia. Itsiata baitsi jane icatsia pacasivapatsianicatsi,” patacajajava. Itsa bitso panejitsipaejitsipame, nexata pasivajamatabëcuenebarëyamë tsipae taponaejavanexa taxajavabetsia. Tsipaji taxa nevecuaayaijamatabëcuenenë. <sup>29</sup> Bजारapacuenia pacajumaitsi taponaejavënaeya. Nexata itsa copiapatsiana patacajumaitsicovëya, panejumecovënëtsianame Dioso pexënatocuenenë, jai Jesús pijajivijavabelia.

<sup>30</sup> Icatsia Jesús jumaitsi pijajivijavabelia:

—Apo necuenaçaëjëpae rabaja pematatsënëa livaisi patacatsipaebaponaenexa. Tsipaji rabaja imoxoyo dovathi najetaruca, ponë mapanacuapijivi pijatuxanenë. Itsiata baitsi jane bajaraponë apo çaëjëpaetsi xanë taneitorobinexa tatoexanaenexa pacuenia picani bajaraponë jitsipa. Apo çaëjëpaetsinua taneitsacueniabinexa. <sup>31</sup> Biji rajane pacuenia taxa nitoroba tatoexanaenexa, bajarapacuenia exanaenajë. Nexata daxita mapanacuapijivije yapëtaena taxa tasivajava. Panonobapunare. Ponatsi baja mapacovëvecuaje, jai Jesús pijajivijavabelia.

## 15

### *Pacuenia Jesús bepeubinae yabara pelivaisi*

<sup>1-2</sup> Jesús jumaitsi comparacióncuenia pijajivijavabelia:

—Xanë rabaja bepexaniaviriauvanaenë. Nexata paxamë patajajivimë, bepatamaxëranamë. Pacuenia peubijava pevetsinë xaniavaetsia eveta, bajara pijinia pacuenia taxa nacaeveta. Nexata pacuenia peubijava pevetsinë vecuacucuba pibisiamaxëranaxi, penacopatsinexa ëpexaniamaxëranë, bajara itsi taxa. Nexata pacuene taxa apo pata-tojitsipae, pacavecuajibiaexanaponaena. Nexata pacuenia taxa Dioso pata-tojitsipa, panejavënaeyabelia paexanavanapaename. <sup>3</sup> Paxamë rabaja panejumecovënëtame patacatsipaebilivaisi. Bजारaxuata taxa baja pacavecuaxuaba pibisijamatabëcuenemi. <sup>4</sup> Paxamë paneyajavajinavanapaename. Nexata xanë ata pacayajavaponaponaenatsi. Pamaxërana apo tabunucae tsipae pepo naejavabelia, apo nacuaitsi tsipae. Bajara pijinia pacuenia paxamë ata paitsimë tsipae itsa apo paneyajavajinavanapaemë tsipae. Xaniavaetsia apo pajinavanapaemë tsipae, jai Jesús pijajivijavabelia.

<sup>5</sup> Icatsia Jesús jumaitsi pijajivijavabelia:

—Xanë rabaja beuvanaenë. Paxamë nexata bepatamaxërananëmë. Nexata pajivi neyajavaponaponaena, xanë ata pijinia bajarapajivi yajavaponaponaenajë. Bजारapajivi exanabiabiana bitso Dioso pejitsipaecuenia. Itsa apo paneyajavajinavanapaemë tsipae, nexata apo pacacaëjëpae tsipae panijacuata pexaniacuene paneexanaenexa. <sup>6</sup> Peubijava pevetsinë, piabejemaxëranaxi caucuba penacopatsinexa ëpexaniamaxërananë. Bजारaxuacujinae bajarapamaxëranaxi xuaba. Nexata baja itsa niona bajarapamaxëranaxi, caetuata pexuabinexa isotojavabelia. Bajara pijinia pacuenia taxa Dioso exanaenatsi pamonaë apo neyajavajinavanapae tsane, jai Jesús pijajivijavabelia.

<sup>7</sup> Icatsia Jesús jumaitsi:

—Itsa paxamë tsitecaeya panejumecovënëtavapanapaename, nexata apo panacofënëtsimë tsane patacatsipaebilivaisi. Nexata panejavëtabiabiname xua pajitsipame. Nexata pacarajutsianatsi xua panejavëtame. <sup>8</sup> Itsa paxamë jivi patsitaexanavanapaename taxa Dioso pejitsipaecuenia, jivi yayataenatsi taxa. Nexata daxitajivi paxamë yabara jumai

tsane: “Xaniajai rabaja. Bajarapamonae pepacuene Jesús pijajivi,” jai tsane. <sup>9</sup> Pacuenia taxa niasiva, bajara pijinia pacuenia xanë ata pacaasivatsi. Tsiteca paexanavanapaename xua pacaitorobatsi. Tsipaji bitso pacaasivatsi. <sup>10</sup> Taxa niasiva. Tsipaji baja jumecovënëtajë taneitorobicuenia. Nexata yapëtaniji taxa taneasivajava. Bajara pijinia pacuenia paxamë ata itsa panejumecovënëtavapanapenae pacuenia pacaitorobatsi, nexata payapëtaename patacasivajava, jai Jesús pijajivijavabelia.

<sup>11</sup> Icatsia Jesús jumaitsi pijajivijavabelia:

—Xanë bitso jamatabëcuenebarëyanë. Nexata pacatsipaebatsi paxamë ata panejamatabëcuenebarëyanexa pacuenia xanë jamatabëcuenebarëyanë. Pacatojitsipatsi bitso panejamatabëcuenebarëya tsavanapaenexa. <sup>12</sup> Mapacuenia paexanavanapaenameje. Pacuenia xanë pacaasivatsi, bajara pijinia pacuenia paxamë ata namataenetsia panaasivamë tsavanapae tsane pacaenëmë canacujitsia. <sup>13</sup> Pajivi peyapëtaejivitsi bitso asiva, jamatabëcuene yavenonabiabijitsipa daxitacuene yabara. Peyapëtaejivitsi pijaneconi yabara ata, yapijivinabeyaxuabiaexanaejitsipa. Nexata bajarapacuenia daxitajivi yapëtaejitsipa pepacujiru bajarapajivi bitso piasivajava peyapëtaejivitsi. Bajarapacuenia yapijivinabeyaxuabia exanaejitsipa bitso piasivaxae peyapëtaejivitsi. Nexata baja pematatsënëa itsajivi ata apo caëjëpaetsi bajarapacuenia pexanaejivi matatoxenetsia piasivanexa peyapëtaejivitsi. <sup>14</sup> Itsa paexanavanapaename pacaaitorobicuenia, nexata baja patajamonaemë tsane. <sup>15</sup> Aeconoxae baja cajena saya bepatajajivicueniamë apo pacataetsi. Bepatajamonaemë baja bitso pacatanetsi. Tsipaji baja pacayapëtaeyaexanatsi daxita pacuenia taxa nitoroba taexanaenexa. Tsipaji mapanacuata petuxanenë pijajivi apo yapëtaeyaexanae daxita pacuenia petuxanenë exanaejitsia. <sup>16</sup> Paxamë raja apo panejunatsimë. Biji rajane xanë pacajunatatsi patanepënaponanexamë. Nexata xanë pacaitorobatsi paneexanavanapaenexa Dioso pejitsipaecuenia. Nexata xua paexanavanapaename, apo peverevereacajavanexa tsane. Daxita pacuene tavënëta pavajëtsianame taxa Diosojavabelia, pacarajutsiana cajena. <sup>17</sup> Mara pacuene paneexanaenexa pacaitorobatsije. Namataenetsia panaasivamë tsavanapae tsane pacaenëmë canacujitsia, jai Jesús pijajivijavabelia.

*Pacuenia Jesús pijajivi mapanacuapijivi itoyajitsiatsi yabara pelivaisi*

<sup>18</sup> Jesús icatsia tajëvelia jumaitsi pijajivijavabelia:

—Mapanacuapijivi, Dioso apo pejumecovënëtsivi, itsa pacaitoya tsane, panajamatabënapitsianame xanë copiaya taneitoyajava bajarapamonae. <sup>19</sup> Mapanacuapijivi, pamona Dioso apo pejumecovënëtsivi, namataenetsia nasiva tsavanapae. Paxamë ata bajarapamonae itsa pajamatabëcuenejëpa vanapaejitsipame, nexata paxamë ata bajarapamonae pacaasiva tsipae. Itsiata baitsi jane xanë baja pacajunatatsi bajarapamonaevécua. Nexata baja paxamë apo pajamatabëcuenejëpaemë bajarapamonae. Bajaraxuata pacaitoya tsane bajarapamonae. <sup>20</sup> Panajamatabënapitabiabianame najumecapanepaeya patacajumaitsijava: “Itsanë ata apo jamatabëcuenematatoxenetsi pijatuxanenë,” patacajaijava. Nebejiobiaexana itsamonae. Nexata paxamë ata itsamonae pacabejiobiaexanaena. Itsamonae nejumecovënëta tatsipaebilivaisi. Nexata pijinia paxamë ata itsamonae paju jumecovënëtsiana panetsipaebilivaisi. <sup>21</sup> Bajarapacuenia pacaexanaena mapanacuapijivije xanë patajajivixaemë. Tsipaji bajarapamonae apo yapëtae Dioso, ponë nitorobica, jai Jesús tajëvelia pijajivijavabelia.

<sup>22</sup> Icatsia Jesús jumaitsi pijajivijavabelia:

—Xanë itsa apo patsinëtsica tsipae mapanacuayabetsicaje, mapanacuapijivi apo naneconitsi tsipae Diosojavabelia. Tsipaji bajarapamonae Dioso apo peyapëtaexae, pibisiacuene exanaejitsipa. Nexata xanë tapatsixaetsica mapanacuayabetsicaje, bajarapamonae yapëthane baja Dioso. Nexata bajarapamonae yapëtae ata Dioso, pibisiacuene pexanaexae, nexata naneconita Diosojavabelia. Nexata acuenebi bajarapamonae pejumaitsijava pibisiacuene pexanaejava yabara: “Apo tayapëtaexae Dioso, pibisiacuene exanajë,” pejaijava. <sup>23</sup> Nexata pamona nitoya, bajarapamonae taxa ata itoya. <sup>24</sup> Bajarapamonaejavata Dioso pesaëta pinijicuene taexanaejava exanabiabajë. Bajaraxua

itsajivi ata apo exanae mapanacuata. Bajarapamonaejavata pinijicuene taexanaejava itsa apo exanaenë tsipae, apo naneconitsi tsipae Diosojavabelia. Tsipaji bajarapamona apo yapëtae tsipae Dioso. Bajarapamona tae ata Dioso pesaëta pinijicuene taexanaejava, itsiata apo nejumecovënëtsi. Bajarapamona nitoya. Taxa ata itoya. Nexata naneconita Diosojavabelia. <sup>25</sup> Bajarapacuenia nitoya tsipaji baja cajena bajayata tajëvelia bajarapamona taneitoyajavanexa yabara, Dioso pejumelivaisibaxutota jumaitsi mapacueniaje: “Nitoya tsane bajarapamona, ajibi taneyabaraitoyajava ata,” jai tajëvelia Dioso pejumelivaisibaxutota xanë yabara, jai Jesús pijajivijavabelia.

<sup>26</sup> Icatsia Jesús jumaitsi pijajivijavabelia:

—Vajëtsianajë taxajavabelia pitorobinexatsica Espíritu Santo, pexaniajailivaisi pepaebinënexa. Itsa patsianica Espíritu Santo taxajavavetsica, nexata pacayavenonaena. Pacajamatabëcuene asaëyaexanaenanua. Espíritu Santo xanë nevajunupaebiana xaniavaetsia. <sup>27</sup> Paxamë baja cajena tataxuxuabijavaveliacujinae jivi livaisi tatsipaebijava, paneyajavajinavanapame. Bajaraxuata paxamë ata xaniavaetsia panevajunupaebianame, jai Jesús pijajivijavabelia.

## 16

<sup>1</sup> Icatsia Jesús jumaitsi pijajivijavabelia:

—Bajarapacuenia pacatsipaebatsi panecopabiyaniva patanejumecovënëtsilivaisimë. <sup>2</sup> Paxamë papecaitooyavi, pacacapitsapabiabiana judíovi penacaetuatabibibovecua. Belia jane baja itsamatacabijavabelia pacabeyejebiana. Nexata pamona pacabeyejebiana, jamatabëcuenenavëxaniabiaya jumaitsi tsane: “Dioso pejitsipaecuenia tobeyejebajë mapamonaaje,” jai tsane. <sup>3</sup> Bajarapamona xanë apo neyapëtae. Apo yapëtae cajena taxa ata. Bajaraxuata bajarapacuenia pacaexanaena. <sup>4</sup> Bajarapacuenia tajëvelia pacatsipaebatsi baja cajena. Nexata jane baja pamatacabi pacatsipatsiana bajarapacuenia, panajamatabënapitsianame pacuenia baja cajena tajëvelia pacatsipaebatsi, jai Jesús pijajivijavabelia.

*Pacuenia Espíritu Santo exanaejitsia jivijavabelia yabara pelivaisi*

Icatsia Jesús jumaitsi pijajivijavabelia:

—Tataxuxuabijavaveliacujinae jivi livaisi tatsipaebijava, abaxë apo pacatsipaebitsi mapacuenia yabaraje. Bajarapacuenia apo pacatsipaebitsi tsipaji abaxë pacayajavaponaponatsi. <sup>5</sup> Itsiata baitsi jane aeconoxae baja payapëtae atamë tanaviatsijavanexa taneitorobinëjavabetsia, itsanë ata paxamëyajuvënënë apo neyanijobi. “¿Detsa belia ponaejitsiamë?” apo nejai. <sup>6</sup> Pacanavajunupaebatsi baja cajena tanaviatsijavanexa. Bajaraxuata bitso panajamatabëxainame. <sup>7</sup> Palivaisi aeconoxae pacatsipaebijitsiatsi, pexaniajailivaisi cajena. Pacatoxanepanaena itsa baja pacavecuaponaenatsi. Itsa apo pacavecuapona tsipaetsi, apo pacatopatsitsica tsipae Espíritu Santo papecajajavaponaponanexa. Espíritu Santo pacayavenonabiabiana. Pacajamatabëcuene asaëyaexanaenanua. Itsa ponaenajë taxajavabetsia, nexata Espíritu Santo pacatoitorobianicatsi. <sup>8</sup> Nexata Espíritu Santo patsianica. Nexata Espíritu Santo pejamatabëcuenetjailivaisi cajena. Pacatoxanepanaena itsa baja pacavecuaponaenatsi. Itsa apo pacavecuapona tsipaetsi, apo pa, pamona Dioso apo pejumecovënëtsivi, nacueneyapëtaena pibisiacuene pexanaejava. Yapëtaenanua pacuene xanepana pexanavanapaenexa Dioso pitabarata. Yapëtaenanua pacuenia Dioso naneconitsiaexanaejitsiatsi bajarapamona pibisiacuene pexanaeneconi yabara. <sup>9</sup> Espíritu Santo pejamatabëcueneta, bajarapamona nacueneyapëtaena pibisiacuene pexanaevicuene. Tsipaji xanë bajarapamona apo nejumecovënëtsi pibisiacuene pexanaeneconi tavecuaajibiaexanaejavanexa. <sup>10</sup> Nexata Espíritu Santo pejamatabëcueneta, bajarapamona yapëtaena pacuene xanepana pexanavanapaenexa Dioso pitabarata. Tsipaji baja xanë naviatianajë taxajavabetsia. Nexata baja bajarapamona pematatsënëa apo netae tsane. <sup>11</sup> Bajarapamona Espíritu Santo pejamatabëcueneta, yapëtaena pacuenia Dioso naneconitsiaexanaejitsia daxita pamona pibisiacuene pexanaevi dovathi pejamatabëcueneta. Tsipaji Dioso

naneconitsiaexanaena dovathi, ponë mapanacuapijivi itorobabiaba pibisiacuene pexanaenexa, jai Jesús pijajivijavabelia.

<sup>12</sup> Icatsia Jesús jumaiti pijajivijavabelia:

—Ayailivaisi picani abaxë xainajë patacatsipaebinexa. Itsiata baiti jane abaxë apo pacajamatabëcuenecaëjêpae bajarapalivaisi panejumeyapëtaenexa. <sup>13</sup> Matapania pamatacabi patsianica Espiritu Santo, ponë pexaniajailivaisi pepaëbinë, bajaraponë pacayapëtaeyaexanaena daxita pexaniajailivaisi. Espiritu Santo raja apo pacayapëtaeyaexanae tsane saicaya pejamatabëcuene pijilivaisi. Daxita raja pacuenia taxa Dioso jumaiti, juya Espiritu Santo pacayapëtaeyaexanaena. Nexata tajëvelia Espiritu Santo pacayapëtaeyaexanaena pacuene pevajënaeyabelia copiapataponaejitsia. <sup>14</sup> Espiritu Santo pejamatabëcueneta jivi neyayataena. Tsipaji xanë talivaisi, pexaniajailivaisi, Espiritu Santo pacayapëtaeyaexanaena. <sup>15</sup> Daxita taxa pexinaejava, xanë ata rabaja tajajava. Bajaraxuata pacajumaititsi: “Xanë talivaisi, pexaniajailivaisi, Espiritu Santo pacayapëtaeyaexanaena,” pacajaiti, jai Jesús pijajivijavabelia.

*Pacuenia bepejamatabëcuene jobivimi jamatabëcuene barëyajitsia yabara pelivaisi*

<sup>16</sup> Icatsia Jesús jumaiti pijajivijavabelia:

—Caematacabibejecujinae rabaja apo panetaemë tsane. Itsiata icatsia itsamatacabibejecujinae panetaename. Bajara jane xuacujinae ponaenajë baja taxajavabetsia, jai Jesús.

<sup>17</sup> Nexata pijajiviyajuvënëvi nayanijoba ëpamonae.

—¿Detsa majumaiti pajumeje? Jesús nacajumaiti: “Caematacabibejecujinae rabaja apo panetaemë tsane. Itsiata icatsia itsamatacabibejecujinae panetaename. Bajara jane xuacujinae ponaenajë baja taxajavabetsia,” nacajai. <sup>18</sup> ¿De tsaeta pejumaitisijume: “Caematacabibejecujinae rabaja apo panetaemë tsane. Itsiata icatsia itsamatacabibejecujinae panetaename,” nacajai? Apo jumeyapëtaetsi cajena xua yabara nacajumaiti, najai Jesús pijajivi.

<sup>19</sup> Jesús jamatabëcuene yapëtane pacuenia picani pijajivi jamatabëyanijobatsi. Nexata Jesús tajëvelia jumaiti pijajivijavabelia:

—Pacajumaititsi mapacueniaje: “Caematacabibejecujinae rabaja apo panetaemë tsane. Itsiata icatsia itsamatacabibejecujinae panetaename,” pacajaiti. ¿Baja tsa pajume yabara panayanijobame? <sup>20</sup> Xaniajanë pacuenia pacatsipaebijitsiatsi. Xanë itsa tēpaenajë, paxamë panuename. Bitso xanëjitsia panajamatabëxainaname. Itsiata baiti jane pamona apo nejumecovënëtsi, barëya tsane tatēpaejava yabara. Itsiata baiti jane xuacujinae paxamë icatsia bitso panesivajamatabëcuene barëyamë tsane itsa panetaename icatsia. <sup>21</sup> Pamatacabi petiriva vixaenotatsi penacueto pevecuanaexanaenexatsi, bitso bayanajamatabëxaina. Itsiata penacueto pevecuanaexanaecujinaetsi, pevixae apo najamatabënapitsi. Panacueto baja vecuanaexanatsi, sivajamatabëcuene barëya. <sup>22</sup> Bajara pijinia pacuenia paxamë ata bitso panajamatabëxainaname itsa tēpaenajë. Itsiata icatsia itsa panetaename, bitso panesivajamatabëcuene barëyamë tsane. Nexata itsajivi ata apo caëjêpaetsi tsane papecavecuajibiaexanaenexa panejamatabëcuene barëyajava, jai Jesús pijajivijavabelia.

<sup>23</sup> Icatsia Jesús jumaiti pijajivijavabelia:

—Pamatacabi icatsia panetaename, apo paneyanijobimë baja tsane itsacuenejavayo ata. Tsipaji baja Espiritu Santo pacayapëtaeyaexanaena daxitacuene. Xaniajanë pacuenia patsipaebijitsiatsi. Taxa pacarajutsiana daxita xua tavënëta pavajëtabiabianame taxajavabelia. <sup>24</sup> Abaxë tavënëta taxajavabelia apo pavajëtsimë itsacuenejavayo ata. Aeconoxae rajane baja tavënëta taxajavabelia pavajëtabiabianame. Nexata taxa itsa pacarajutsiana xua pavajëtsianame, bitso pajamatabëcuene barëyamë tsane taxajavabelia, jai Jesús pijajivijavabelia.

*Pacuenia Jesús jamatabëcuene amoneyaba dovathi, ponë itorobabiaba mapanacuapijivije pibisiacuene pexanaenexa, yabara pelivaisi*

<sup>25</sup> Icatsia Jesús jumaitsi pijajivijavabelia:

—Palivaisi baja pacatsipaebabiabatsi, najumematayatsiaya pacatsipaebabiabatsi. Itsiata itsamatacabi livaisi apo pacatsipaebi tsanetsi najumematayatsiaya. Biji rajane pacatsipaebianatsi jumenapebetsiaya taxa pelivaisi. <sup>26</sup> Bajarapamatacabi paxamë baja taxajavabelia pavajëtabiabianame tavënëta. Nexata baja xanë apo patacatovajëtabiabi tsanetsi taxajavabelia. <sup>27</sup> Paxamë paneasivamë. Panejumecovënëtamenua taxa taneitorobinëcuenetsica. Bajaraxuata paxamë taxa pacaasiva. Nexata panijacuata taxajavabelia itsa pavajëtabiabianame, taxa pacajumetaena. <sup>28</sup> Xanë baja cajena ponaponajë taxajavatatsia. Nexata taxajavavetsica ponajë tapatsinexa mapanacuayabetsicaje. Nexata icatsia ponaenajë mapanacuavecuaje. Naviatsianiajë baja taxajavabetsia, jai Jesús pijajivijavabelia.

<sup>29</sup> Nexata Jesús pijajivi jumaitsi:

—Baja rajane jumenapebetsiaya panetsipaebame. Najumematayatsia baja apo panetsipaebimë. <sup>30</sup> Nexata baja pacajamatabëcueneyapëtanetsi daxitacuene neyapëtaenëcuene. Xamë panejamatabëcueneyapëtaneme palivaisi picani jamatabëpacayanijobatsi. Bajaraxuata pacajumecovënëtatsi baja Dioso athëbëvetsica pecaitorobinëcuenetsica, jai Jesús pijajivi.

<sup>31</sup> Jesús nexata jumaitsi pijajivijavabelia:

—¿Nexata tsabaja aeconoxae panejumecovënëtame taxa Dioso athëbëvetsica taneitorobinëcuenetsica? <sup>32</sup> Imoxoyo rabaja pevajënae panenacayatsinexa panenaviabinexa panijabonëjavabelia. Paxamë panexuabanutsianame caenënë. Itsiata baitsi jane apo caenënë tsane. Tshipaji taxa yajavaponaponajë. <sup>33</sup> Bajarapacuenetajëvelia paneyapëtaenexa, pacatsipaebabiabatsi baja cajena. Nexata xanëjavaberena panenajamatabëcuenecopatsixae, ajunavijibia pajinavanapaename. Mapanacuata panejinavanapaepato mapanacuapijivije pacabejiobiaexanabiabiana. Itsiata pajamatabëcueneesaëmë tsavanapae tsane. Xanë rabaja jamatabëcueneamoneyabajë dovathi, ponë itorobabiaba mapanacuapijivije pibisiacuene pexanaenexa, jai Jesús pijajivijavabelia.

## 17

### *Pacuenia Jesús pijajivi tovajëta paxa Diosojavabelia yabara pelivaisi*

<sup>1</sup> Jesús dovathi pejamatabëcueneamoneyabijava pijajivijavabelia petsipaebicujinae, Jesús athëbëa benaëcotsia. Nexata jumaitsi paxa Diosojavabelia:

—Taxa, netocopiapata rajane baja daxita pacuenia netocopatame. Tsitajëre jivi pacuenia xanë nexënatoxaenë, bitso ayaijamatabëcuenenenë. Bajarapacuenia itsa tsitajëtsianame, nexata jivi yapëtaena pacuenia xamë Diosomë bitso ayaijamatabëcuenenemë. <sup>2</sup> Xamë rabaja netocopatame daxitajivi taevetsinexa. Nexata necaëjëpa tarajutsinexa matacabi apo peverevereaejava daxita pamonaerajutame. <sup>3</sup> Matacabi apo peverevereaejava pexainaevinexa, cayapëtane baja caenëmë pepo Diosonëcuenemë. Bajarapamonae neyapëtanenua baja Jesucristonë athëbëvetsica taneitorobinëmëtsica, jai Jesús paxa Diosojavabelia.

<sup>4</sup> Icatsia Jesús jumaitsi paxa Diosojavabelia:

—Xanë rabaja mapanacuapijivijavabeliaje, apo pecajumecovënëtsivijavabelia, cajamatabëcueneitajëtatsi bitso ayaijamatabëcuene nexainaejava. Veretajënuu baja daxita xua nitorobame tacatoexanaenexa. <sup>5</sup> Taxa, pamatacabi abaxë ajibi mapanacuaje, itsa cayajavaponaponatsi, necotia yajavaponaponajë ayaijamatabëcuenenëxaenë. Bajarapacuenia icatsia aeconoxae ata netocopatsianame vajanajuaevetaponaponaebeje daxitacuene, jai Jesús paxa Diosojavabelia.

<sup>6</sup> Icatsia Jesús jumaitsi paxa Diosojavabelia:

—Xamë itapetame itsamonae mapanacuataje tanesivanajamatabëcopatsinexa. Xanë nexata yapëtaeyaexanajë bajarapamonae pacuenia jamatabëcueneitsimë. Bajarapamonae nijajivi nerajutame. Xaniavaetsia cajumecovënëta nijumelivaisi. <sup>7</sup> Aeconoxae

baja bajarapamonae nijajivi yapētane xamē nejamatabēcueneta taexanaponaejava daxita xuanē exanaponajē. <sup>8</sup> Daxita palivaisi netsipaebame, xanē juya bajarapalivaisi tsipaebajē bajarapamonae. Nexata nejumecovēnēta. Nexata yapētane bajarapamonae pepacuene tapatsijava xamējavavetsica. Nejumecovēnēta xamē athēbēvetsica taneitorobinēcuenemētsica, jai Jesús paxa Diosojavabelia.

<sup>9</sup> Icatsia Jesús jumaitsi paxa Diosojavabelia:

—Cavajētatsi bajarapamonaenexa. Apo cavajētsitsi raja apo pecajumecovēnēt-sivinexa. Cavajētatsi raja tanerajutsivimēnēta. <sup>10</sup> Daxita pamonae nijajivi, bajarapamonae xanē ata tajajivi. Daxita pamonae tajajivi, bajarapamonae xamē ata nijajivi. Daxitajivi neyapētane ayaijamatabēcuenē taxainaejava. Tsipaji tajajivi xaniavaetsia netojinavanapa, jai Jesús paxa Diosojavabelia.

<sup>11</sup> Icatsia Jesús jumaitsi paxa Diosojavabelia:

—Xanē baja apo ponaponaenē tsane mapanacuataje. Tsipaji baja ponaejitsianē xamējavabetsia. Itsiata baitsi jane tajajivi jinavanapaena abaxē mapanacuataje. Taxamē, bitso nianeconijibinē. Tanerajutsivimē nesaēta evetsianame pibisiacuevecua. Vaxaitsibeje caejamatabēcuenē xainatsibeje. Nexata bajarapamonae ata tojitsipajē caejamatabēcuenē pexainaenexa. Pacuenia vaxaitsibeje jamatabēcuenēitsibeje, bajara pejamatabēcuenēitsinexa. <sup>12</sup> Itsa abaxē yajavaponaponajē bajarapamonae mapanacuataje, nesaēta evetaponaponajē. Nexata apo nevecuanaxuabi daxita. Caenē saya nevecuanaxuabiana. Bajaraponē nevecuanaxuabiana tsipaji tocopiapatsianatsi pacuenia baja cajena tajēvelia jumaitsi nijumelivaisibaxutota bajaraponē yabara, jai Jesús paxa Diosojavabelia Judas yabara.

<sup>13</sup> Icatsia Jesús jumaitsi paxa Diosojavabelia mapacueniaje:

—Aeconoxae baja ponaenajē xamējavabetsia. Itsiata abaxē taponaponatabiepa-toyo mapanacuataje, cavajētatsi. Bajarapacuenia cavajētatsi tajajivi bitso pejamatabēcuenēbarēyanexa pacuenia xanē bitso jamatabēcuenēbarēyanē. <sup>14</sup> Xanē baja tajajivi tsipaebajē nijumelivaisi. Pacuenia mapanacuapijivije, apo pecajumecovēnētsivi, jamatabēcuenēitsi, xanē apo jamatabēcuenēitsinē. Bajaraxuata tajajivi ata itoyatsi mapanacuapijivije. Tsipaji apo jamatabēcuenējēpae. <sup>15</sup> Apo cavajētsitsi raja nejutsinexa tajajivi mapanacuapijivivecuaje. Cavajētatsi raja nevetabiabinexa tajajivi dovathivecua. <sup>16</sup> Pacuenia xanē apo jamatabēcuenējēpaenē mapanacuapijivije, bajara pijinia pacuenia tajajivi ata apo jamatabēcuenējēpae mapanacuapijivije. <sup>17</sup> Nijumelivaisi cajena pexaniajailivaisi. Bajaraxuata tanejumecovēnētsivi baja yavenonaename penatsatsinexa dovathi pejamatabēcuenēvecua. Nexata bajarapamonae exanavanapaena xamē netojitsipaecuenia nijumelivaisi baja petsijamatabēcaexaetsi. <sup>18</sup> Pacuenia xamē nitorobame pexaniajailivaisi tatsipaebinexa mapanacuapijivijavabeliaje, bajara pijinia pacuenia juya xanē ata itorobajē tajajivi pexaniajailivaisi petsipaebinexa mapanacuapijivijavabeliaje. <sup>19</sup> Pacuenia xamē netojitsipame, tajajivi yapijivinacaevetsianajē xanē tanebeyaxuabinexa. Nexata bajarapamonae pacuenia xamē tojitsipame, catoxanavanapaena. Tsipaji baja bajarapamonae yapētane nijumelivaisi pexaniajailivaisicuenē, jai Jesús paxa Diosojavabelia.

<sup>20</sup> Icatsia Jesús jumaitsi paxa Diosojavabelia mapacueniaje:

—Itsiata apo cavajētsitsi etajajivinexa. Cavajētatsi raja bexējavabelia tanejumecovēnētsivinexa ata. Tajajivi itsamatacabi bajarapamonaejavabelia itsa tsipaebaponaena tajumelivaisi, nexata bexējavabelia bajarapamonae nejumecovēnētsiana. <sup>21</sup> Nexata cavajētatsi daxita bajarapamonae penajamatabēcuenējēpaenexa. Xamē neyjavaponaponaenē. Xanē ata pijinia cayjavaponaponatsi. Bajara pijinia pacuenia tojitsipajē daxita bajarapamonae ata vajanacayajavajinavanapaenexabeje. Tojitsipajē bajarapamonae penajamatabēcuenējēpaenexa. Nexata bajarapamonae najamatabēcuenējēpaeya pejinavanapaejava, itsa tane daxita mapanacuapijivije, pejumecovēnētsinexa xamē athēbēvetsica taneitorobinēcuenemētsica. <sup>22</sup> Pacuenia xamē yapētaeyaxename tajajivijavabelia xanē bitso ayaijamatabēcuenē taxainaejava, bajara pijinia

pacuenia xanë ata bajarapamonaejavabelia yapëtaeyaexanajë baja bajarapamonaë ata ayaijamatabëcuenevi baja penaexanaejava tanejumecovënëtsixae. Nexata bajarapamonaë tanejumecovënëtsixae, najamatabëcuenejëpa baja pacuenia vaxaitsibeje najamatabëcuenejëpatsibeje. <sup>23</sup> Tajajivi yajavaponaponajë. Xamë pijinia neyjavaponaponame. Nexata tajajivi caejamatabëcuene xainaena. Nexata daxita mapanacuapijivije itsa taena tajajivi najamatabëcuenejëpaeya pejinavanapaejava, yapëtaena xamë athëbëvetsica taneitorobinëcuenemëtsica. Yapëtaenanua bajarapamonaë niasivajava pacuenia xanë ata niasivamë, jai Jesús paxa Diosojavabelia.

<sup>24</sup> Icatsia Jesús jumaitsi paxa Diosojavabelia:

—Taxa, bajarapamonaë xamë nerajutame. Nexata jitsipajë bajarapamonaë ata pe-najinavanapaenexa itsabelia ponaëjitsianë. Jitsipajë bajarapamonaë taneyajavajinavanapaenexa, taneyapëtaenexa bitso ayaijamatabëcuene taxainaejava. Tsipaji nacua nexanaevajënaeya ata, xamë niasivamë. Bajaraxuata ayaijamatabëcuenenënë nexaname. <sup>25</sup> Taxa, itsaneconi ata apo nexainaenë. Mapanacuapijivi, pamonaë apo cajumecovënëtsi, apo cayapëtae. Itsiata xanë cayapëtanetsi. Mapamonaëje, tajajivi, yapëtane baja xamë athëbëvetsica taneitorobijavamëtsica. <sup>26</sup> Xanë tajajivi yapëtaeyaexanajë pecayapëtaenexa. Abaxë itsiata pevajënaeyabelia pecayapëtaeponaenexa, yapëtaeyaexanaponaenajë. Pacuenia xanë niasivamë, bajara pijinia pacuenia bajarapamonaë ata namataenetsia penasivanexa, yapëtaeyaexanaponaenajë. Xanë bajarapamonaë yajavaponaponaenajë, jai Jesús paxa Diosojavabelia.

## 18

*Pacuenia Jesús pijavajabitsaë vaetabatsi pebeyaxuabinexatsi jane baja yabara pelivaisi (Mt 26.47-56; Mr 14.43-50; Lc 22.47-53)*

<sup>1</sup> Jesús pevajëtsicujinae paxa Diosojavabelia, pijajivi barëpona Cedrónvënënajato itsapanabelia. Nexata bajarajotalia peubinaenë bacabobëxëpanata, Jesús pijajivi barëpata. <sup>2</sup> Bajarajota cajena Jesús pijajivi barënacaetuatabiaba. Bajaraxuata Judas, Jesús pijajivitonë ata, ponë canajetsijitsiatsi pijavajabitsaë pecobeyabelia, yapëtane itsajota Jesús pijajivi barënacaetuatabiaba. <sup>3</sup> Nexata Judas peyapëtaexae, bajarajota barëpata vajabitsaë. Barëpatanua templobopijipolicíavi. Bajarapamonaë itorobatsi sacerdotevi penamatacaitorobivibeje fariseovibeje. Judas pematacaponaevi capona espadanë, naebonë yajava. Lámparabëanënuu capona. Beisotabuqueranënuu capona penatsivajënaeitayotsinexa. <sup>4</sup> Nexata baja Jesús yapëtane daxita pacuenia exanaejitsiatsi bajarapamonaë. Nexata Jesús najetabalia. Jumaitsi bajarapamonaëjavabelia:

—¿Jipatsa pajaitame? jai Jesús.

<sup>5</sup> Nexata bajarapamonaë jumaitsi:

—Jesús raja, Nazaret tomarapijinë, pajaitajë, jai bajarapamonaë.

Jesús nexata jumaitsi:

—Xanë rabaja maje, jai.

Judas, ponë Jesús pijavajabitsaë pecobeyabelia canajetatsi, nanuca bajarapamonaëjavavata. <sup>6</sup> “Xanë rabaja maje,” pejaijavata Jesús, bajarapamonaë pematabëxëpa toquequenaponaëlia. Othopa irata. <sup>7</sup> Nexata icatsia Jesús jumaitsi:

—¿Jipatsa nexata pajaitame? jai.

Nexata icatsia bajarapamonaë jumaitsi:

—Jesús raja, Nazaret tomarapijinë, pajaitajë, jai bajarapamonaë.

<sup>8</sup> Nexata Jesús jumaitsi bajarapamonaëjavabelia:

—“Xanë rabaja maje,” pacajaitsi rabaja. Xanë itsa panejaitame, pacopatsianame mapamonaëje peponaenexa, jai Jesús pijajivi yabara.

<sup>9</sup> Bajarapacuenia Jesús itsa jumaitsi, copiajopa jane baja pacuenia tajëvelia jumaitsi Jesús. Jesús baja cajena pijajivi yabara tajëvelia jumaitsi mapacueniaje: “Pamonaë taxa nerajuta, itsanë ata apo nevecuanaxuabi tsane,” jai cajena Jesús tajëvelia pijajivi yabara. Bajarapacuenia jane baja copiajopa. <sup>10</sup> Nexata Jesús pijajivitonë, Simón Pedro,

namaracëtaaponapona espada. Nexata Simón Pedro espada navemarajonotaxuabina. Pecujuanenia pamuxuyorotomi, muxuyoropaebiaxuaba sacerdotevi pepo penamatacaitorobinë pijajivitonë. Ponë Simón Pedro muxuyoropaebiaxuaba, pevënë Malco.  
<sup>11</sup> Nexata Jesús jumaitsi Pedrojavabelia:

—Nijaespada baja pevënojojavareca xataremeca. Taxa baja cajena netocopata tanebejjobiaexanaenexa. Bajaraxuata nacaevetsianajë tanebejjobiaexanaenexa, jai Jesús Pedrojavabelia.

*Pacuenia Jesús nutatsi sacerdot. Pecujuanenia pamuxuyorotomi, muxuyoropaebiaxuaba sacerdotevi pepo penamatacaitorobinë pitabarata yabara pelivaisi*  
 (Mt 26.57-58; Mr 14.53-54; Lc 22.54)

<sup>12</sup> Vajabitsaëvi pijacapitán, pijajivi yajava, judíovi pijapolicíavinua, nacobe-navaetabatsi Jesús. Nexata cobecëtatsi. <sup>13</sup> Caponatsi baja Anásvënë pijaboyabelia. Anás paxuyo Caifás. Bjarapamatacabi Caifás sacerdotevi pepo penamatacaitorobinë tsaponapona. <sup>14</sup> Bjaraponë Caifás jumaitsi baja cajena copiaya judíovijavabelia Jesús yabara: “Bjaraponë caenë itsa beyaxuabiaexanaenatsi, bjaraponë pejamatabëcueneta daxita judíovitsi vajavajabitsaë apo nacaverebiabi tsane,” jai.

*Pacuenia jane baja Pedro nayavajunuaxaina Jesús pijajivitonëcuene yabara pelivaisi*  
 (Mt 26.69-70; Mr 14.66-68; Lc 22.55-57)

<sup>15</sup> Itsa baja Jesús caponaliatsi sacerdotevi pepo penamatacaitorobinë pijaboyabelia, Simón Pedrobeje, itsanëbeje, Jesús pijajivitonëbeje, tajiyo pënanajetarucabeje. Ponë Simón Pedro yanatatsi, bjaraponë yapëtanetsi sacerdotevi pepo penamatacaitorobinë. Sacerdotevi pepo penamatacaitorobinë pijabo matatoyorotsia yacaranata ibopanaxanetonë, mataropotsia pefaratsijavaxanetota. Nexata ponë Pedro yanatatsi, bjarapayacaranatsijavaxaneto baupa najoneya. Nexata panepa bopanabojavabelia, itsabelia Jesús cajunuatsi. <sup>16</sup> Nexata Pedro nucojopa sacerdotevi pepo penamatacaitorobinë pijabo matatoyorotsia peyacaranatsijavaxaneto baupa jumavelia. Nexata ponë Pedro yanatatsi, caevëa pitsaparena. Nexata bjaraponë cuaicuajai baupa pevetsivajavabelia Pedro ata penajonenexalia. Nexata baja Pedro ata tocopatatsi bopanabojavabelia penajonenexalia. Nexata baja Pedro ata najoneya bopanabojavabelia. <sup>17</sup> Nexata baupa pevetsiva jumaitsi Pedrojavabelia:

—¿Xamë ata tsabaja Jesús apo pijajivitonëmë? jai.

Pedro nexata jumaitsi:

—Jume raja. Xanë raja Jesús apo pijajivitonënë, jai Pedro.

<sup>18</sup> Bjarapaepatota bitso bjarapameravi cainejeba. Nexata bjarapabota penacuenebivi, policíavi yajava, isoto itajuruteta bopanabota. Bjarapamonae nonopanubena. Nexata Pedro nanuca bjarapamonaejavata. Nanonopanuca.

*Pacuenia sacerdotevi pepo penamatacaitorobinë Jesús yanijobatsi yabara pelivaisi*  
 (Mt 26.59-66; Mr 14.55-64; Lc 22.66-71)

<sup>19</sup> Anás jane baja sacerdotevi pepo penamatacaitorobinë jumaitsi Jesúsjavabelia:

—¿Detsa pamatabëxëyo nijajivi? ¿Detsa palivaisi tsipaebabiabame nijajivi? jai.

<sup>20</sup> Jesús nexata jumaitsi Anásjavabelia:

—Xanë daxitajivi pexanialivaisi tsipaebabiabajë itsajota nacaetuatabiaba. Tsipaebabiabajë penacaetuatsibonëjava, templobota ata. Muetsia cajena itsamatacabi ata apo tsipaebinë. <sup>21</sup> ¿Detsa xuajitsia nexata neyanijobame? Yanijobare pamonaejavabelia tsipaebabiabajë. Nexata bjarapamonae catsipaebiana pacuenia nejumetaeyabiaba. Bjarapamonae yapëtane xua yabara pexanialivaisi tsipaebabiabajë, jai Jesús sacerdotevi pepo penamatacaitorobinëjavabelia.

<sup>22</sup> Itsa bjarapacuenia Jesús jumaitsi, nexata bjarajota penucaenë templobopi-jipolicíanë itabarapacataxuabatsi. Policíanë jumaitsi Jesúsjavabelia:

—Pëtsa bjarapacuenia cuaicuajamë sacerdotevi pepo penamatacaitorobinëjavabelia, jai.

<sup>23</sup> Jesús nexata jumaitsi policíanëjavabelia:

—Itsa pibisiacuena cuacuaijanë, netsipaebare papibisiacuene yabara cuacuaijanë. ¿Detsa xuajitsia saya xaniavaetsia tajumaitsiyava yabara, nebiame? jai Jesús.

<sup>24</sup> Nexata Anás itoroba Jesús cobecëtsiaya tsiteca pecaponaenexatsi Caifásjavabelia, ponë sacerdotevi pepo penamatacaitorobinëjavabelia.

*Pacuenia icatsia Pedro nayavajunuaxaina Jesús pijajivitonëcuene yabara pelivaisi*  
(Mt 26.71-75; Mr 14.69-72; Lc 22.58-62)

<sup>25</sup> Pedro abaxë nanonopanuca isotojavata. Nexata bajarajota penubenaevi jumaitsi:  
—¿Xamë ata tsabaja Jesús apo pijajivitonëmë? jaitsi.

Pedro nexata nayavajunuaxainaeya jumaitsi:

—Jume raja. Xanë raja Jesús apo pijajivitonënë, jai Pedro.

<sup>26</sup> Nexata icatsia bajarajota sacerdotevi pepo penamatacaitorobinë pijajivitonë, ponë Pedro muxuyoropaebiaxuaba pijamonaenë, jumaitsi:

—Xamë cajena covë catanetsi Jesúsjavata, peubinaenë bacabojavata, jai.

<sup>27</sup> Pedro icatsia nayavajunuaxainaeya jumaitsi:

—Jume raja. Xanë cajena apo yapëtaenë Jesús, jai Pedro.

Itsa baja Pedro najumeveretaba bajarapacuenia pejumaitsiyava, vacara baja fiaba.

*Pacuenia Jesús nutatsi Pilato pitabarata yabara pelivaisi*  
(Mt 27.1-2, 11-14; Mr 15.1-5; Lc 23.1-5)

<sup>28</sup> Itsa baja ajena matababi tsina, Jesús capitsapatsi Caifás pijabovecua. Nexata Jesús caponaliatsi nacuaeavetsinë Pilato pijaboyabelia. Judíovi, pamonaenajetarubena Jesús peneconitsinexatsi, apo najonelia nacuaeavetsinë Pilato pijaboyalía. Tsipaji Pilato apo judíonë. Judíovi apo joneyabiabi apo judíonë pijaboyalía. Bajarapamonae itsa jonejitsipa Pilato pijaboyalía, bajarapamonae judíovixae, jamatabëjumai tsipae: “Najamatabëcuenebijianajë Dioso pitabarata apo judíonë pijaboyalía tanajonexae. Nexata tavëna judíovi apo netocopatsi tsane tanaxaenexa pascua fiestamatacabipi pexaejava,” jamatabëjai tsipae bajarapamonae. <sup>29</sup> Nexata Pilato pitsaparena. Jumaitsi judíovijavabelia:

—¿Detsa pitsineconi yabara pacapatame maponëje? jai Pilato judíovijavabelia.

<sup>30</sup> Nexata judíovi jumaitsi:

—Itsa raja pibisiacuene apo pexanaenë tsipae, apo pacatocapatsi tsipaetsi maberenaenaje, jai judíovi.

<sup>31</sup> Nexata icatsia Pilato jumaitsi:

—Paca ponaremelia caevëalia. Pananeconitsiaexanaename panijacuata pacuenia panijalivaisi pacaitoroba paneexanaenexa, jai Pilato judíovijavabelia.

Nexata judíovi icatsia jumaitsi:

—Paxamë baitsi jane apo panetocopatsimë patabeyaxuabinexa itsanë ata pijaneconi yabara, jai judíovi.

<sup>32</sup> Bajarapacuenia Jesús tocopiapatatsi pacuenia baja cajena tajëvelia pijajivijavabelia navajunupaebapona pebeyaxuabijavanexatsi. <sup>33</sup> Nexata Pilato icatsia joneya pijaboyalía. Jumaitsi Jesúsjavabelia:

—¿Xamë tsaja judíovi pepo nevetsinë? jai.

<sup>34</sup> Jesús nexata jumaitsi Pilatojavabelia:

—¿Xamë tsaja nejamatabëcueneta neyanijobame? Jume. ¿Catsipaeba tsaja itsamonae xanë judíovi pepo taevetsinëcuene? jai Jesús.

<sup>35</sup> Pilato nexata jumaitsi:

—Xanë raja apo judíonënë. Bajarapacuenia apo tacasivanajamatabëxainaeta. Judíovi raja, caranata nijanacuapijivi, sacerdotevi penamatacaitorobivi yajava, cacapata maberenaenaje pecaneconitsinexa xanëjavaberena. ¿Detsa jane xua exaname? jai Pilato Jesúsjavabelia.

<sup>36</sup> Nexata Jesús jumaitsi Pilatojavabelia:

—Mara panacua xanë apo taevetsinëje. Itsa ra peneta mapanacua taevetsinë tsi-paeje, nexata paepatota judíovi nevaetaba, daxita tajajivi neyapijivinamaxëvanitsipa tapanepaenexa. Xanë raja mapanacua apo taevetsinëje, jai Jesús Pilatojavabelia.

<sup>37</sup> Nexata Pilato jumaitsi:

—¿Xamë tsaja nexata jivi nevetsinë? jai.

Jesús nexata jumaitsi:

—Jājā, xanë raja jivi taevetsinë pacuenia nejumaitsimë. Bajaraxuata patajē mapanacuayabetsicaje tatsipaebinexa jivi pexaniajailivaisi. Daxita pamonaē jitsipa pexaniajailivaisi, nenamuxunaevetabiaba bajarapalivaisi, jai Jesús Pilatojavabelia.

<sup>38</sup> Nexata Pilato jumaitsi Jesúsjavabelia:

—¿Detsa pacuenia nayapētane pexaniajailivaisicuene? jai.

*Pacuenia baja Pilato tocopata Jesús pebeyaxuabinexatsi yabara pelivaisi*

*(Mt 27.15-31; Mr 15.6-20; Lc 23.13-25)*

Pilato peyanijobicujinae Jesúsjavabelia, Pilato icatsia pitsapalia. Nexata Pilato jumaitsi judíovijavabelia:

—Apo caxitajarabinë cajena itsacujiruneconi ata pexanaejava, paneconi yabara bajaraponë naneconitsijitsia. <sup>39</sup> Penaneconitsivi pejebabiabibota naneconitsia peponapon-aenë pepitsapaenexa itsa panevajētame, nexata pascua fiestamatacabi caenë pacatocapitsapabiabatsi. ¿Pajitsipame tsaja patacatocapitsapaenexa penaneconitsivi pejebabi-abibovecua pepitsapaenexa pajudíovimë papecaevetsinë? jai Pilato judíovijavabelia Jesús yabara.

<sup>40</sup> Nexata bajarajota daxitajudíovi vavajai.

—¡Pētsa abaxë copatame bajaraponë! ¡Panetocapitsapaename jane Barrabás! jai judíovi.

Bajaraponë Barrabás bitso penacobetoxotsinë. Bajaraxuata penaneconitsivi pejebabi-abibota, naneconitsiaponapona.

## 19

<sup>1</sup> Pilato pijajivi itoroba Jesús pejumatatitibabenexatsi penaneconitsivi pejumaconitabi-abimacata. <sup>2</sup> Nexata pejumatatitibabecujinaetsi vajabitsaë Jesús becoronacuenia tsimataexanatsi peejuvitoyoroto. Mataxatatatsi bajarapaejuvitoyoroto. Bajaraxuacujinae quenetsiataeya benacuaevetsinëcuenia xatatatsi peraënaeyatsautsaucaejava. <sup>3</sup> Nexata vajabitsaë imoxoyoliatsi Jesús. Vajabitsaë capocaponaeya jumaitsi tsabuataponae Jesúsjavabelia:

—¡Bajaco, judíovi pepo pevetsinë! jai tsabuataponae.

Vajabitsaë pecobeta Jesús itabarapacababeyabuataponatsi.

<sup>4</sup> Pilato nexata icatsia pitsapalia. Jumaitsi judíovijavabelia:

—Pacatocanaviarenatsi icatsia maberenaje paneyapētaenexa. Apo caxitajarabinë itsacujiruneconi ata pexanaejava, paneconi yabara naneconitsijitsia maponëje, jai Pilato Jesús yabara.

<sup>5</sup> Nexata peejuvitoyoroto Jesús namataxatatatsiaya pitsaparena. Naxatata peraënaeyatsautsaucaejava. Nexata Pilato jumaitsi judíovijavabelia:

—¡Baja rajane nuca maponëje! jai Pilato.

<sup>6</sup> Nexata sacerdotevi penamatacaitorobivi, policíavi yajava, itsa tanetsi Jesús, nexata bajarapamonae vavajai.

—¡Cruzajavabelia cobematabiabarutsiaexanare! ¡Cruzajavabelia cobematabiabarutsiaexanare! jai bajarapamonae Jesús yabara.

Pilato nexata jumaitsi bajarapamonaejavabelia:

—Paxamë pacaponaremelia. Cruzajavabelia pacobematabiabarutsianame. Tsi-paji raja xanë apo caxitajarabinë itsacujiruneconi ata pexanaejava, jai Pilato.

<sup>7</sup> Nexata judíovi jumaitsi Pilatojavabelia:

—Mara ponë Dioso apo pejitsipaecuenia jumaitsije: “Xanë raja Dioso pexënatonë,” jai. Paxanë pajudíovinë patajalivaisita itaveta bajarapacuenia pejumaitsiyaniva itsajivi ata. Bajaraxuata bajaraponë baja bebeyaxuabatsi, jai judíovi Jesús yabara.

<sup>8</sup> Pilato itsa jumetane bajarapamonae pejumaitsijava: “Mara ponë Dioso apo pejitsipaecuenia jumaitsije: ‘Xanë raja Dioso pexënatonë,’ jai,” pejajjava Jesús yabara, nexata bitso Pilato junava. <sup>9</sup> Nexata icatsia Pilato pijaboyalía barëjoneya Jesús. Yanijoba icatsia Jesúsjavabelia.

—¿Detsa nexata verena neponaenë? jai Pilato.

Itsiata Jesús apo jumepitsi.

<sup>10</sup> Nexata Pilato jumaiti:

—¿Detsa xuajitsia apo nejumepitsimë? ¿Apo yapëtaemë tsipaji mapanacua taevetsinëcueneje? Nejamatabëcuenecaëjëpa raja taitorobinexa tajajivi cruzajavabelia pecacobematabiabarutsinexa. Nejamatabëcaëjëpanua taitorobinexa pecacopatsinexa ata, jai Pilato.

<sup>11</sup> Jesús nexata jumaiti:

—Itsa Dioso apo catocopatsi tsipae mapanacua nevetsinexaje, nexata xanëjavaberena ata apo cacaëjëpae tsipae taneitsacueniabexamë. Itsiata baitsi jane ponë necanajeta xamë necobeyabelia, bitso naneconita Diosojavabelia xamë matatoxenetsia, jai Jesús Pilatojavabelia.

<sup>12</sup> Itsa bajarapacuenia Jesús jumaiti, nexata picani Pilato jamatabëcopatatsi Jesús.

Itsiata baitsi jane judíovi vavajai Jesús pecopatsiyanivatsi. Jumaiti:

—¿Itsamonaë raja paxanëyajuvënëvi jitsipa maponëje pevetsinënexatsi! ¿Nexata itsa copatsianame maponëje, naneconitsianame nijatuxanenëjavabelia, Romanonacua pepo pevetsinëjavabelia, pepo vajanacayanacuaevetsinëjavabelia jane baja! ¿Nexata maponëbejeje nijatuxanenëbeje naitoyabeje tsane! jai judíovi Pilatojavabelia.

<sup>13</sup> Nexata Pilato itsa jumetane bajarapacuenia judíovi pejumaitsijava, Pilato eca tribunalvënëjavata, xuata Pilato ecabiaba jivi itsa naneconitsiaexanaejitsia. Xuata Pilato ecabiaba jivi itsa naneconitsiaexanaejitsia, hebreojumeta pevënë Gabata. Bajarajota pirafaratsiira. Nexata Pilato itorobeca pijajivi pecapitsapaenexatsi Jesús Pilato pijabovecua. <sup>14</sup> Pascuavënëfiesta pejonematacabinexa pevajënaeya pamatacabi, matoneje, bajarapacuenia Jesús exanatsi. Nexata Pilato jumai tsecae judíovijavabelia:

—¿Mara jota nucaje papecaevetsinëje! jai Pilato Jesús yabara.

<sup>15</sup> Itsiata saya bajarapamonae vavajai.

—¿Beyaxuabiaexanare! ¿Jema tëpae! ¿Cruzajavabelia cobematabiabarutsiaexanare! jai judíovi.

Pilato nexata jumaiti:

—¿Pajitsipame tsaja cruzajavabelia tacobematabiabarutsiaexanaejava papecaevetsinëmi? jai Pilato.

Nexata sacerdotevi penamatacaitorobivi jumaiti Pilatojavabelia:

—Caenë raja Romanonacua pevetsinë paxainajë pepo patanevetsinë. Paxanë raja apo paxainanë itsanë pematatsënëa pepo patanevetsinë, jai sacerdotevi penamatacaitorobivi.

<sup>16</sup> Nexata baja Pilato rajuta judíovi pecobeyabelia Jesús pecobematabiabarutsinexatsi cruzajavabelia. Itsiata Pilato pijajivi itoroba Jesús pecaponaenexatsilia petsutojumabelia.

*Pacuenia jane baja Jesús cruzajavabelia cobematabiabarutatsi yabara pelivaisi*

*(Mt 27.32-44; Mr 15.21-32; Lc 23.26-43)*

<sup>17</sup> Jesús nexata vajabitsaë itsa caponaliatsi, caponaeyaexanatsi cruza, pacruzajavabelia Jesús cobematabiabarutsijitsiatsi. Caponaliatsi Jivimatasipavënë tsutojavabelia. Hebreojumeta bajarapatsuto pevënë Gólgota. <sup>18</sup> Bajarapatsutojumata Jesús cruzajavabelia cobematabiabarutatsi. Anijanëbeje yajavacobematabiabarutatsi. Caenë canacujitsia pijacruzata rubatsi. Itsanë Jesús pecujanenia ruca. Itsanë Jesús petsavenonenia ruca.

<sup>19</sup> Pilato pijajivi itoroba petoyaquinaenexatsi tablapayojumata. Nexata Pilato pijajivi itoroba bajarapatablapayo petomatabiabarutsinexatsi Jesús perucaecruzaupita. Jumai tsaruae bajarapaitane mapacueniaje: “Mara ponëje Jesús, Nazaret tomarapijinëje, judíovi pepo pevetsinë,” jai tsaruae bajarapaitane. <sup>20</sup> Pajumatsutota Jesús cobematabiabarutatsi cruzajavabelia, bajarapajumatsuto eca tomaravecua imoxoyo. Bajaraxuata judíovi ayaibitsaëtoxaneto tomarapijivi leba bajarapaitane. Bajarapaitane yaquinaruta acueyabi paviriavibeje pijajumeta. Yaquinaruta hebreojumeta, griegojumetanua, latínjumetanua. <sup>21</sup> Nexata sacerdotevi penamatacaitorobivi jumaitsi Pilatojavabelia:

—Apo xanepanae raja neyaquinarutsiaexanaenexa mapejumaitsiitaneje, “Mara ponëje, judíovi pepo pevetsinëje,” pejaiitane. Biji rajane icatsia yaquinarutsiaexanare pejumaitsiitane mapacueniaje: “Mara ponë jumaitsi: ‘Xanë raja judíovi pepo taevetsinë,’ jai,” pejaiitane icatsia yaquinarutsiaexanare, jai sacerdotevi penamatacaitorobivi Pilatojavabelia.

<sup>22</sup> Nexata Pilato jumaitsi sacerdotevi penamatacaitorobivijavabelia:

—Pacuenia baja yaquinarutsiaexanajë, bajarapacuenia jema rucae, jai Pilato sacerdotevi penamatacaitorobivijavabelia.

<sup>23</sup> Vajabitsaë Jesús pecobematabiabarutsicujinaetsi cruzajavabelia, Jesús penaxatatsijavami, xua jumaponapona, vajabitsaë nota. Cuatro xuabeje tsanaeya jeba. Caenë canacujitsia natsicobetsanaejitsia. Saicaya tsatabuata itsajava, xua Jesús naxatatabiaba piapiajavareca. Bajaraxua apo xainae pecaucutsiajoronaejava. Pecuejava saya caepanacujinae. <sup>24</sup> Nexata vajabitsaë najumaitsi:

—Apo titicae tsanetsi bajaraxua. Canamuxusitsianatsi beibotoxi vajayapëtaenexa ponë pitsijitsia bajaraxua, najai vajabitsaë.

Bajarapacuenia vajabitsaë itsa exana, Jesús jane baja tocopiapatatsi pacuenia baja cajena Dioso pejumelivaisibaxutota, tajëvelia jumaitsi Jesús penaxatatsijava yabara. Dioso baja cajena pejumelivaisibaxutota, tajëvelia jumaitsi Jesús penaxatatsijava yabara mapacueniaje: “Natsicobetsanaena tanaxatatsijava. Canamuxusitsiana beibotoxi peyapëtaenexa ponë pitsijitsia,” jai baja cajena tajëvelia Dioso pejumelivaisibaxutota Jesús penaxatatsijava yabara. Nexata vajabitsaë canamuxusita beibotoxi peyapëtaenexa ponë pitsijitsia piapiajavareca, Jesús penaxatatsijavami.

<sup>25</sup> Pacujinae abaxë Jesús athëbëyo ruca cruzata, cruza bëxëpanata nubena acueyabi povamaxëto ëMaríavënëvanë. Itsava Jesús pena. Itsava Jesús penava, Cleofas pijava. Itsava María, Magdala tomarapijiva. <sup>26</sup> Nexata Jesús itsa taerucaica, taenutsica pena, pijajivitonë bitso piasivanë yajava. Jesús pena pemuxuneneta nuca bajaraponë. Jesús nexata jumaitsi penajavabelia:

—Ena, maponë nuca nemuxunenetaje, benexënatocuenia taename, jai Jesús penajavabelia.

<sup>27</sup> Bajaraxuacujinae icatsia Jesús jumaitsi pijajivitonëjavabelia:

—Mapovaje beenacuenia taename, jai Jesús.

Bajaraxuacujinae Jesús pijajivitonë pijaboyabelia barëpona Jesús pena, Jesús pena penaecaenexa bajaraponë pijabota.

*Pacuenia baja Jesús tēpa yabara pelivaisi*

*(Mt 27.45-56; Mr 15.33-41; Lc 23.44-49)*

<sup>28</sup> Jesús baja yapëtane petocopiarucaejavatsi daxita pacuenia tajëvelia vajunupaebatsi Dioso pejumelivaisibaxutota. Nexata jane baja Jesús pecopiarutsinexa daxita abaxë xua tosaicatsi, Jesús jumaitsi:

—Mera bitso jitsipajë, jai Jesús.

<sup>29</sup> Nexata bajarajota vaxi eca. Vënëqueca piajatuvinora. Nexata vajabitsaënë esponjavënëjava jabuta bajaraporayalia. Bajaraxuacujinae naeboupita ruta bajarapaesponjavënëjava. Toyotsiatsi Jesús. Tsicuiborutatsi Jesús petsutsuninexa. <sup>30</sup> Jesús nexata tsutsune bajaraxua. Bajaraxuacujinae Jesús jumaitsi:

—Daxita rajane baja taexanaejava, veretajë, jai Jesús.

Nexata irataeya tēpanajereca.

*Pacuenia Jesús becuerebota yencacuatatsi yabara pelivaisi*

<sup>31</sup> Pascuavēnē fiesta junua. Nexata abaxē caematacabi sajina pejonenexa judíovi penacueraevetsimatacabinexa. Bajaraxuata judíovi apo jitsipae Jesúsbana baja matavējēa perubenaeyava cruzata. Tsipaji pascuavēnē fiestamatacabi itsa junua judíovi penacueraevetsimatacabinexa, judíovi bitso banajamatabēcuenereviaba daxita penacueraevetsimatacabanē matatoxenetsia. Bajaraxuata judíovi vajēta Pilatojavabelia Pilato vajabitsaē pitorobinexa pethaēepatsicababenexatsi Jesúsbana, cruzata perubenaevi, bepíjia bajarapamonae petēpaenexa. Itsa baja bajarapamonae tēparubena, penotsinexatsitsica cruzavecua pecaponaenexatsi itsajavabelia. <sup>32</sup> Nexata vajabitsaē itsa ponalia, Jesús peyajava cobematabiabarutsinētsibeje asaēbeje abaxē tsarucae. Bajaraxuata copiaya itsanē thaēepatsicabiabatsi. Bajaraxuacujinae icatsia itsanē thaēepatsicabiabatsi. <sup>33</sup> Nexata Jesús vajabitsaē itsa cujibaliatsi, taerutatsi baja Jesús petēpaenē. Bajaraxuata Jesús apo thaēepatsicabiabitsi.

<sup>34</sup> Itsiata baitsi jane vajabitsaēviyajuvēnēnē becuerebota Jesús yencacuatatsi. Bajarapavajēnyarena pitsapa pijana, mera yajava. <sup>35</sup> Xanē raja, Juannē, pacatoyaquinatsi mapalivaisije. Tataenē bajarapacuenē. Nexata xanē yapētaniji bajarapacuenē pexaniajaicuenē. Nexata bajarapalivaisi pacatoyaquinatsi panejumecovēnētsinexa paxamē ata. <sup>36</sup> Bajarapacuenia Jesús apo thaēepatsicabiabitsi petocopiapatsixaetsi pacuenia baja cajena Dioso pejumelivaisibaxutota tajēvelia jumaitsi Jesús yabara. Dioso baja cajena pejumelivaisibaxutota Jesús yabara tajēvelia jumaitsi mapacueniaje: “Apo siepatsicabiabitsanetsi itsiata caesitoyo ata,” jai baja cajena tajēvelia Dioso pejumelivaisibaxutota Jesús yabara. <sup>37</sup> Itsabaxutota pijinia tajēvelia jumaitsi Jesús yabara mapacueniaje: “Bajarapamonae taena pecacuatsivajēnētsi,” jai baja cajena itsabaxutota Jesús peyenecacuatsijavanexatsi yabara.

*Pacuenia Jesús petēpaenē mēthētatsi yabara pelivaisi*

(Mt 27.57-61; Mr 15.42-47; Lc 23.50-56)

<sup>38</sup> José, Arimatea tomarapijinē. Bajaraponē judíovi pevetsiviyajuvēnēnē. Nexata José jumecovēnētaponapona Jesús Cristocuene. Itsiata apo najamatabēcueneitajētsi pejumecovēnētsijava Jesús Cristocuene. Tsipaji cujunava penajuaevetsivi judíovi. Nexata baja Jesús itsa tēpa, José itsiata najamatabēcueneitajēta. José vajēta Pilatojavabelia Jesús petēpaenē pepitsinexatsica cruzajavavetsica pemēthētsinexa. Nexata baja tocopatatsi. Nexata José lia Jesús perucaejavabelia pecaponaenexa Jesús petēpaenē. <sup>39</sup> Nicodemo, ponē meravi pona pebarēcuaicuaijainexa Jesús, bajaraponē ata judíovi pevetsiviyajuvēnēnē. Nexata Nicodemo Joséta nalia. Caponabeje treinta pakilobeje petuxujuvibenonē, pematajērēabibenonē petuxujuvijavata. <sup>40</sup> Nexata Josébeje Nicodemobeje cruzajavavetsica pitsicabeje Jesús petēpaenē. Petsiothocaecujinaebeje petuxujuvibenonē, pexaniaviria piapiasábanapanata mataquionaeya daxitanēreca matcacēbabeje. Bajarapacuenia exanabeje tsipaji judíovi baxaniavaeta petēpaejiviyo pemēthētsinexa bajarapacuenia. <sup>41</sup> Itsajota Jesús cruzajavabelia cobematabiabarutatsi, bajarajota imoxoyo peubinaenē ayaibacaboxaneto eca. Bajarapabacabojavata Jesús petēpaevajēnaeya, José cajena exanaeyaexanabuata iboitapajanitojavata pinijiibovaju. José pijamonaejivi itsa totēpatsi, pebuatsinexa bajarapaibovajulia. José ata itsa tēpa, pebuatsinexatsi bajarapaibovajualia. Nexata bajarapaibovajualia abaxē itsajiviyo ata petēpaejiviyo apo buatsitsi. <sup>42</sup> Nexata bajarapaibovajualia Josébeje Nicodemobeje Jesús petēpaenē buatabeje. Tsipaji bajarapaibovaju boca imoxoyo. Judíovi ata baja penacueraevetsimatacabinexa, bitso baja imoxoyo pejonenexa. Bajaraxuata bajarapaibovajualia Jesús petēpaenē buatatsi.

## 20

*Pacuenia Jesús petëpaecujinae icatsia asaë yabara pelivaisi**(Mt 28.1-10; Mr 16.1-8; Lc 24.1-12)*

<sup>1</sup> Judíovi baja penacueraevetsimatacabi verevereca. Nexata meravia pitsijavata, bajayacunua, ajena matacabi tsarucaponae, itsiata abaxë itsa aitaquiri, María Magdala tomarapijiva pona Jesús petëpaenë pebuatsiibovajutsijavabelia. Nexata María tane ibopanaxanetomi petixitanutsijavalia ibovajuvëpavecua. <sup>2</sup> Nexata María cujinaejinarena itsaberena Simón Pedro ponapona. Bajarajota Simón Pedro yajavaponapona itsanë Jesús pijajivitonë, ponë bitso asiva Jesús. Nexata María jumaitsi bajaraponëbejejavabelia:

—Vajatuxanenëmi ra covë jutatsi pebuatsiibovajutsivecua. Apo payapëtaenë raja itsabelia icatsia buatatsi, jai María.

<sup>3</sup> Nexata Pedrobeje Jesús pijajivitonëbeje ponabeje Jesús pebuatsiibovajutsijavabelia. <sup>4</sup> Najuacujinaejinaliabeje. Itsiata itsanë Jesús pijajivitonë bitsojinaeya cujinaejina Pedro matatoxenetsia. Bajaraponë copiaya palia Jesús pebuatsiibovajutsijavabelia. <sup>5</sup> Itsa bajaraponë nabëxëtsutsiaya naëcolia ibovaju bëxëpanalia, nexata taeyabualia Jesús daxitanë pematacacëbipanamitsireca pebocaejava bajarapaibovajualia. Bajaraponë itsiata abaxë apo jonelia. <sup>6</sup> Bajaraxuacujinae Simón Pedro cotocaevi pata. Nexata ibovajualia Pedro joneya. Pedro ata tane Jesús pematacacëbipanamitsireca pebocaejava bajarajota. <sup>7</sup> Papanata Jesús saicaya matacëtatsi, apo yajavabocae bajarajota. Saicayajavata xaniavaetsia quionabuata. <sup>8</sup> Nexata ponë copiaya pata Jesús pebuatsiibovajutsijavata, najoneya jane baja. Tane pacuenia Jesús vecuapitsapa bajarapaibovaju. Nexata jane baja bajaraponë jumecovënëta xaniavaetsia Jesús icatsia piasaëjava petëpaecujinae. <sup>9</sup> Abaxë picani bajaraponë apo jumeyapëtae pacuenia Dioso pejumelivaisibaxutota jumaitsi Jesús petëpaecujinae icatsia piasaëjavanexa yabara. <sup>10</sup> Bajaraxuacujinae Jesús pijajivitonëbeje naviatabeje baja pijaboyabelia.

*Pacuenia Jesús petëpaecujinae tsitanaitajëta María Magdala tomarapijivajavabelia yabara pelivaisi**(Mr 16.9-11)*

<sup>11</sup> María nuenuca Jesús petëpaenë pebuatsiibovajutsijumavelia. Nexata María yaitaxutonueya nabëxëtsutsiaya naëcolia ibovaju bëxëpanalia. <sup>12</sup> Nexata María taeyelia anijanëbeje ángelnëbeje, penioponaejava penaxatatsinëbeje. Ecabeje itsajota picani Jesús petëpaenë buatatsi. Itsanë eca Jesús pematabocotomijavavereca. Itsanë eca Jesús petaxumijavatsina. <sup>13</sup> Nexata ángelnëbeje jumaitsi beje Maríjavabelia:

—¿Detsa xuajitsia nuame? jai beje.

María nexata jumaitsi:

—Tsipaji covë itsamonae jutatsi tajatuxanenëmi. Nexata apo yapëtaenë itsabelia icatsia buatatsi, jai María ángelnëbejejavabelia.

<sup>14</sup> María ajena najumeveretanajelia bajarapacuenia pejumaitsijava, napënëyorotsiaya naëcolia. Taenuta Jesús penucaejava bajarajota. Itsiata abaxë María apo yapëtae Jesús cuene. <sup>15</sup> Nexata Jesús jumaitsi Maríjavabelia:

—¿Detsa xuajitsia nuame? ¿Jipatsa jaitame? jai Jesús.

María nexata Jesús yabara saya jamatabëjumaitsi:

—Matsamëra ponë mapaunubacabo pevetsinëje, jamatabëjai María.

Bajaraxuata María caranata Jesúsjavabelia jumaitsi mapacueniaje:

—Xamë itsa jutame Jesús petëpaenë, netsipaebare itsajota buatame. Pitsijitsianë tacaponaenexa, jai María.

<sup>16</sup> Jesús nexata junataxuaba María pevënëta.

—¡María! jai Jesús.

María nexata napënëyorolia Jesúsjavabelia. Judíovi pijajumeta María jumaitsi Jesúsjavabelia:

—¡Rabuni! jai. “Rabuni,” itsa jai hebreojumeta, mapajumetaje pejumaitsijume: “Xamë tanecujarubinëmë,” pejajjume.

<sup>17</sup> Jesús nexata icatsia jumaitsi Maríjavabelia:

—Pëtsa nejayaremena. Tsipaji raja abaxë apo ponaenë taxa peecaejavabetsia. Ponare jane tajajivijavabelia. Tsipaebianame tajajivijavabelia taponaejavanexa taxajavabetsia. Taxa rabaja, paxamë ata paneaxa. Ponë tajaDioso, bajaraponë paxamë ata panijaDioso, jai Jesús Maríjavabelia.

<sup>18</sup> Nexata María Magdala tomarapijiva pona baja petsipaebinexa Jesús pijajivijavabelia. Pona baja petsipaebinexa pacuenia tane pepo petuxanenë Jesús. Nexata María Jesús pijajivijavabelia tsipaebanua daxita pacuenia Jesús jumaitsi.

*Pacuenia Jesús petëpaecujinae tsitanaitajëta pijajivijavabelia yabara pelivaisi*

(Mt 28.16-20; Mr 16.14-18; Lc 24.36-49)

<sup>19</sup> Pamatacabi María tane Jesús, icatsia itsa asaë petëpaecujinae, bajarapameravi nacaetuata daxita Jesús pijajivi. Daxita baupanë xaniavaetsia nayabaupaxataba. Tsipaji Jesús pijajivi judíovi cununava. Jesús itsiata joneya. Jemata nuca pijajivi tuatujëta. Jesús jumaitsi pijajivijavabelia:

—¡Paxamë saya pajamatabëjemamëre! ¡Pëtsa pajunavame! jai Jesús.

<sup>20</sup> Bajarapacuenia Jesús pejumaitsicujinae, pijajivijavabelia tsitajëta pecobevejënëbeje. Nayenevajënëitajëtanua pijajivijavabelia. Bajarajota Jesús pijajivi bitso barëya icatsia petaexae pijatuxanenë. <sup>21</sup> Nexata Jesús icatsia jumaitsi:

—¡Paxamë saya pajamatabëjemamëre! ¡Pëtsa pajunavame! Pacuenia taxa nitoroba, bajarapacuenia juya pacaitorobatsi jivijavabelia pexanialivaisi panetsipaebaponaenexa, jai Jesús pijajivijavabelia.

<sup>22</sup> Nexata Jesús uxunelia asaëyata pijajivi pematatsënëalia. Jumaitsi pijajivijavabelia:

—Espíritu Santo pacopiapire panejamatabëëthëtota papecatsijamatabëecaenexa.

<sup>23</sup> Nexata itsamonae pibisiacuene pexanaeneconi itsa pavecuaajibiaexanaename, nexata baja pibisiacuene pexanaeneconimi pepacuene vecuaajibitsi tsane. Itsa apo pavecuaajibiaexanaemë tsane itsamonae pibisiacuene pexanaeneconi, nexata pibisiacuene pexanaeneconi apo vecuaajibitsi tsane, jai Jesús pijajivijavabelia.

*Pacuenia Tomás Jesús tane Dioso piasaëyaexanaecujinaetsi petëpaecujinae yabara pelivaisi*

<sup>24</sup> Jesús pijajiviyajuvënënë, pevënë Tomás, ponë vënërubatsi itsavënë, Sapalanë. Bajaraponë piajibitsarucaejavata, Jesús pijajivijavabelia tsitanaitajëta. <sup>25</sup> Nexata Tomás itsa pata, Jesús pijajivi jumaitsi Tomásjavabelia:

—Pacatsutanetsi rabaja necovëta vajatuxanenë, jai Jesús pijajivi.

Nexata Tomás jumeabiaya jumaitsi:

—Itsa pepacuene taenajë cruzajavabelia clavota pecobematabiabarutsivajënëtsibeje, nacobesibëtsianajë pecobevejënëyalia. Nacobesibëtsianajë peyenevajënëyalia ata. Nexata jane baja matapania jumecovënëtsianajë Jesús icatsia piasaëjava petëpaecujinae, jai Tomás Jesús yabara.

<sup>26</sup> Bajaraxuacujinae, ocho pamatacabibejecujinae, Jesús pijajivi icatsia bota nacaetuata. Tomás ata jane baja naponapona. Nexata daxita baupanë icatsia xaniavaetsia nayabaupaxataba. Jesús itsiata joneya. Jemata nuca pijajivi tuatujëta. Jesús jumaitsi pijajivijavabelia:

—¡Paxamë saya pajamatabëjemamëre! ¡Pëtsa pajunavame! jai Jesús.

<sup>27</sup> Bajaraxuacujinae Jesús jumaitsi Tomásjavabelia:

—Tomás, taema rajane baja tacobevejënëbeje. Nacobesibëtsiaremelia jane baja tacobevejënëyalia. Nacobesirovire jane baja tayenevajënëyalia nebëtsinexa. Pëtsa baja xuacujinae jumeabame. Jumecovënëre jane baja icatsia tasaëjava tatëpaecujinae, jai Jesús Tomásjavabelia.

<sup>28</sup> Nexata Tomás jumaitsi Jesúsjavabelia:

—¡Tajatuxanenë, tajaDioso! jai Tomás.

<sup>29</sup> Jesús nexata icatsia jumaitsi:

—Tomás, aeconoxae rajane baja jumecovënètame icatsia tasaëjava tatëpaecujinae. Tsipaji baja nijacuata netaneme. Xamë matatoxenetsia bitso nesivajamatabëcuenebarëya tsane pamonaepo netae ata, itsiata jumecovënëta icatsia tasaëjava tatëpaecujinae, jai Jesús Tomásjavabelia.

*Pajamatabëcuene yabara yaquina mapacuyalatoje yabara pelivaisi*

<sup>30</sup> Jesús pijajivi pitabëta exanapona orijibia itsajavanë pinijicuene Dioso pesaëta pexanaejavanë. Itsiata bajaraxuanë pelivaisi apo yajavayaquinaenë mapacuyalato-taje. <sup>31</sup> Itsiata mapalivaisi pacatoyaquinatsije panejumecovënëtsinexa Jesús athëbëvet-sica Dioso pitorobijavatsica vajanacapanepaenexa, panejumecovënëtsinexanua Jesús Dioso pexënatocuene. Nexata itsa pajumecovënëtsianame mapalivaisije, paxainaename maticabi apo pevereverecejava Jesús pejamatabëcueneta.

## 21

*Pacuenia Jesús petëpaecujinae icatsia itsa asaë, tsitanaitajëta pijajivijavabelia, siete ponëbe-jejavabelia, yabara pelivaisi*

<sup>1</sup> Jesús petëpaecujinae icatsia itsa asaë, tsitanaitajëta pijajivijavabelia Tiberiasvënë pucaxanetoitapata. Jesús icatsia pijajivi itsa tsitanaitajëta, maitisije. <sup>2</sup> Caejavata Jesús pijajivi najuajinavanapa mapamatabëxëyoje. Najuaponaponabeje Simón Pedrobeje Tomásbeje, ponë vënërubatsi itsavënë, Sapalanë. Najuaponaponabeje pijinia anijanëbeje, Zebedeo ëpexënatobeje. Najuaponaponabeje pijinia itsanëbeje icatsia pematatsënëa. Natanael ata naponapona bajarajota. Canávënë tomarapijinë Natanael. Canátomara eca Galilea nacuata. <sup>3</sup> Nexata Simón Pedro jumaitsi penajuajinavanapaevijavabelia:

—Djuuai raja yamatajucaeitsianë, jai Pedro.

Nexata penajuajinavanapaevi jumaitsi:

—Paxanë ata panaponaenajë xamëta, jai.

Nexata pucaxanetojavabelia pona. Bajarajotalia jerata naropoba. Itsiata bajarapameravi caenë ata dujuainë bajarapamonaepo yamatajutsi. <sup>4</sup> Ajena baja maticabi tsina, Jesús pijajivi tsitanaitajëta Tiberiaspuca itapata. Itsiata Jesús pijajivi apo yapëtaetsi Jesúscuene. <sup>5</sup> Nexata Jesús jumaitsi pijajivijavabelia:

—¿Jica? ¿Djuuainë apo payamatajutsimë caenë ata? jai Jesús.

Nexata Jesús pijajivi jumaitsi:

—Ajibi cajena, jai.

<sup>6</sup> Nexata icatsia Jesús jumaitsi pijajivijavabelia:

—Djuuai paneyamatajucaejava, panecujuanenia pamuxunene, pacoparemeca jer-yenepanareca. Bajarapacuenia payamatajutsianame dujuai, jai Jesús pijajivijavabelia.

Nexata Jesús pijajivi dujuai peyamatajucaejava bajarapacuenia copareca. Bajarax-uacujinae pejutsinexatsina menevecua apo caëjëpaetsi. Tsipaji bitso ayaijava dujuai tojunuatsi. <sup>7</sup> Nexata Jesús pijajivitonë, ponë Jesús bitso asiva, bajaraponë jumaitsi Pedrojavabelia:

—¡Vajatuxanenë tsaena rabaja maje! jai Pedrojavabelia.

Nexata Simón Pedro caejumetaetabi bajarapacuenia pejumaitsijava Jesús yabara, jumasa penucaenë, naxatataxuaba penaxatatsijava. Jopanucalia menialia naxanitsiayo pepatabinexa Jesúsjavabelia. <sup>8</sup> Jesús pijajivi meneitapavecua tajë apo yarubenaepo. Cien metrocuenia saya yarubenalia. Nexata itsamonae Pedrobana penajuajinavanapaevi jerata pata tajetabuabelia. Robobocabuatapona dujuai peyamatajucaejava. Tovënëcatsi cajena dujuai. <sup>9</sup> Bajarapamonaepo itsa nonobajunalia tajetabuabelia, taeyeta isotoitaire. Bajara paisotoitairejumavereca taeyabuata dujuainë, panbëanë yajava. <sup>10</sup> Nexata Jesús jumaitsi pijajivijavabelia:

—Aeconoxae dujuai itsa payajutsiaremena, pacaponaenimina panexaniavaetsinexa, jai Jesús pijajivijavabelia.

<sup>11</sup> Pedro nexata jeraënëa berunareca tajetabuaberena peyarobobocaenexarena dujuai peyamatajucaejava. Nexata bajaraxua dujuai vënëca pinijidujuainëanë. Ciento cincuenta y tres ponëbeje. Itsiata dujuai peyamatajucaejava, dujuai ayaijava ata, apo yaucuucuae. <sup>12</sup> Nexata Jesús jumaitsi pijajivijavabelia:

—Naxanitsia. Vepanabiananame, jai Jesús pijajivijavabelia.

Itsanë ata Jesús pijajivitonë apo yanijobi Jesúsjavabelia. “¿Jipatsamë?” apo jai. Tshipaji baja bajarapamonae yapëtane pijatuxanenë Jesúsucue. <sup>13</sup> Jesús nexata cujilia bajarapaisoto. Pita baja panbëanë. Tscibetsana pijajivi. Bajarapacuenia icatsia Jesús dujuaijavanë ata tscibetsana pijajivi.

<sup>14</sup> Bajarapacuenia Jesús pijajivijavabelia acueyabijava tsitanaitajëta, petëpaecujinae icatsia itsa asaë.

*Pacuenia Jesús petëpaecujinae itsa naitajëta cuaicuaijai Simón Pedrojavabelia yabara pelivaisi*

<sup>15</sup> Penabaniveretsicujinae Jesús jumaitsi Simón Pedrojavabelia:

—Simón, Jonás pexënatomë, ¿xamë tsaja bitso niasivamë mapamonae taneasivajava matatoxenetsiaje? jai Jesús.

Pedro nexata jumaitsi:

—Jājā. Xamë rabaja nejamatabëcueneyapëtaneme tacaasivajava, jai Pedro Jesúsjavabelia.

Jesús nexata jumaitsi Pedrojavabelia:

—Nexata pacuenia pijaoveja pevetsinë xaniavaetsia baeveta pijaoveja, bajara pijinia pacuenia xamë xaniavaetsia netoebetabiananame tajajivi, pamona tanepejanajumecovënëtsivi. Bajarapamonae taniji betajaovejacuenia, jai Jesús.

<sup>16</sup> Nexata icatsia Jesús jumaitsi Pedrojavabelia:

—Simón, Jonás pexënatomë, ¿xamë tsaja niasivamë? jai.

Pedro nexata icatsia jumaitsi:

—Jājā. Xamë rabaja nejamatabëcueneyapëtaneme tacaasivajava, jai Pedro Jesúsjavabelia.

Jesús nexata icatsia jumaitsi:

—Nexata xamë netoevetsianame tajajivi, pamona nesivanajamatabëcopata xanëjavaberena. Bajarapamonae taniji betajaovejacuenia, jai Jesús.

<sup>17</sup> Icatsia matavëjëa Jesús jumaitsi Pedrojavabelia:

—Simón, Jonás pexënatomë, ¿xamë tsaja niasivamë? jai icatsia.

Pedro nexata bejamatabëjiobireca matavëjëa peyanijobaponaexaetsi Jesús piasivajava yabara. Nexata Pedro jumaitsi Jesúsjavabelia:

—Xamë baja cajena yapëtaneme daxitacue. Nexata baja nejamatabëcueneyapëtaneme bitso tacaasivajava, jai Pedro.

Jesús nexata tajëvelia jumaitsi Pedrojavabelia:

—Nexata xamë netoevetsianame tajajivi, pamona taniji betajaovejacuenia.

<sup>18</sup> Xaniajanë pacuenia catsipaebijitsiatsi. Itsa abaxë pamatacabi pevëjëatomë, naxatatabiabame nenaxatatsijava nijacuata. Nexata nejitsipaejavabelia ponabiabame. Itsa pamatacabi perujunëmë tsane, pacuenia bitso perujunëyo banamaxëcaeveta itsajivi pijacamisa pexatatsinexatsi, bajarapacuenia namaxëcaevetsianame itsamonae pecacobecëtsinexa pecacaponanexa itsabelia picani apo jitsipaemë tsane neponaejava, j Xaniajanë pacuenia catsipaebijitsiatsi. Itsa abaxë pamatacabi pevëjëatomë, naxatai Jesús tajëvelia Pedrojavabelia.

<sup>19</sup> Bajarapacuenia Jesús jumaitsi Pedrojavabelia Pedro tajëvelia peyapëtaenexa pacuenia beyaxuabijitsiatsi Dioso pejumelivaisi pejumecovënëtsixae. Itsa baja Jesús najumev-ereta bajarapacuenia pejumaitsijava, Jesús jumaitsi Pedrojavabelia:

—Pedro, naxanitsia. Nepënaponare, jai Jesús.

Nexata baja Pedrobeje Jesúsbeje ponatabebeje pesaicaeyojavabelia.

*Jesús pijajivitonë, ponë bitso Jesús asiva, penavajunupaebijava yabara pelivaisi*

<sup>20</sup> Xanë Juannë, Jesús pijajivitonënë, bitso taneasivanë. Pamatacabi caniviyopijijava panabaniji Jesús pebeyaxuabivajënaetsi, xanë Jesús pemuxuneneta ecajë. Nexata bajarajota yanijobecajë. “Tajatuxanenë, ¿jipatsa cacanajetsiana nijavajabitsaë pecobeyabelia?” janë Jesúsjavabelia. Nexata Jesús pebeyaxuabicujinaetsi, icatsia itsa asaë, panetsitanaitajëta. Nexata bajarapamatacabi Jesúsbeje Pedrobeje pesaicaeyojavabelia ponatababeje. Nexata xanë pecovëvelia cotocavajë. Nexata Pedro Jesús pecovëya najetaruca. Pedro itsa napënëyorotaba caevëarena, netaetaba bajaraponëbeje pecovëya tanajetarucajava. <sup>21</sup> Nexata Pedro itsa netane, xanë tatëpaejavanexa yabara, yanijoba Jesúsjavabelia.

—Tajatuxanenë, ¿detsa pacuenia tëpaena maponëje? jai Pedro Jesúsjavabelia.

<sup>22</sup> Jesús nexata jumaitsi Pedrojavabelia xanë yabara:

—Itsa xanë tojitsipaejitsipajë bajaraponë piasaëtsaponaponaenexa, asaë tsaponaponaë tsipae matapania icatsia tapatsimatacabitsicajavabelianexa. Pëtsa bajaraponë tatocopatsijava yabara, najamatabëxainame. Tsipaji xua bajaraponë tocopatsipajë, apo xamënexa tsipae. Nexata xamë saicaya caasaëmë tsaponaponaë tsane nexanaejava, pacuene caitorobatsi, jai Jesús Pedrojavabelia.

<sup>23</sup> Bajaraxuata patanajuajinavanapaevi, Jesús pijajivi, xanë yabara jamatabëcuenenavëxaniabiaya najumai tsabiabi: “Juan raeta apo tëpae tsane,” najai tsabiabi. Itsiata baitsi jane Jesús apo jumaitsi: “Juan raja apo tëpae tsane.” apo jai. Jumaitsi rajane mapacueniaje: “Itsa xanë tojitsipaejitsipajë bajaraponë piasaëtsaponaponaenexa, asaë tsaponaponaë tsipae matapania icatsia tapatsimatacabitsicajavabelianexa. Pëtsa bajaraponë tatocopatsijava yabara, najamatabëxainame. Tsipaji xua bajaraponë tocopatsipajë, apo xamënexa tsipae,” jai Jesús xanë yabara Pedrojavabelia.

<sup>24</sup> Xanë Jesús pijajivitonënë. Patanajuajinavanapaevi xanë yabara jamatabëcuenenavëxaniabiaya najumai tsabiabi: “Juan raeta apo tëpae tsane,” najai tsabiabi. Bajarapacuenia tanesivajamatabëjumaitsinë, Juannë, yaquinajë daxita mapalivaisije. Yapëtanetsi baja cajena palivaisianë Jesús nacatsipaeba, pexaniajailivaisianë.

<sup>25</sup> Jesús pinijicuene pexanaejavanë Dioso pesaëta, ayaijava exana mapanacuataje. Itsajavanë ata exana pematatsënëa. Nexata bajaraxuanë, caejavayo canacujitsia pelivaisi, itsamonae itsa yaquinaejitsipa, bajaraxuanë pelivaisibaxutonë bitso ayaijava tsipae. Nexata meta bajarapalivaisibaxutonë vënëcaejitsipa mapanacuaje.

## Pacuenia exanavanapa Jesús pitorobivi, apóstolevi

*Pacuenia Jesús tajëvelia vajunupaeba Espíritu Santo pepatsijavanexatsica mapanacuayabet-sicaje yabara pelivaisi*

<sup>1</sup> Teófilo, xanë Lucasnë, catoyaquinatsi mapabaxutoje. Copiaya baja cajena catoy-aquinatsi itsabaxutota daxita Jesús pexanaejavanë pelivaisi. Nexata copiyapijibaxu-tota catoyaquinatsi xuamaxëto Jesús exana petaxuxuabijavaveliacujinae pexanaejava. Daxita bajaraxuanë pelivaisi, catoyaquinatsi. Pacuenia ata Jesús pexanialivaisi jivi tsipaebaponapona, abaxë itsa ponapona mapanacuataje, bajarapalivaisi ata catoy-aquinatsi. <sup>2</sup> Matapania pamatacabi Jesús athëbëabetsia Dioso caponatsi, bajarajota Jesús baja copiaruta pexanaejava. Nexata baja itsajota Jesús copiaruta pexanaejava, bajarajota pijinia copiarutajë copiyapijibaxutota tacatoyaquinaejava, Jesús pexanaejavanë pelivaisi. Athëbëabetsia Jesús Dioso pecaponaevajënaetsi, Jesús itapeta pijajiviya-juvënëvi apóstolevinexa. Nexata Jesús itoroba pijajivi, apóstolevi, jivi pexanialivaisi petsipaebanajetarubenaenexa daxitanacuanëjave. Espíritu Santo pejamatabëcueneta Jesús yapëtaeyaexanatsi pacuenia itorobijitsia pijajivi, apóstolevi. <sup>3</sup> Bajaraxuacujinae Jesús pijavajabitsaë beyaxuabatsi. Jesús petëpaecujinae icatsia itsa asaë, anijatonë tsitanaitajëtabiaba pijajivijavabelia. Cuarenta baja pamatacabibeje itsa panepa Jesús icatsia piasaëcujinae, pona jane baja athëbëabetsia. Bajarapacuenia anijatonë Jesús pijajivi petsitanaitajëtsixae petëpaecujinae, nexata pijajivi yapëtanetsi Jesús icatsia piasaëjava petëpaecujinae. Jesús pijajivi itsa tsitanaitajëtabiaba, Jesús pijajivi tsipaebabiaba Dioso pijajivi pevetsijavanexa.

<sup>4</sup> Nexata Jesús pijajivi itsa tsitanaitajëta Jerusalén tomarata, Jesús jumaitsi pijajivijavabelia mapacueniaje:

—Pëtsa abaxë paponame mapatomaravecuaje. Pacopiaevetavanapaename abaxë Espíritu Santo. Bajaraponë yabara taxa Dioso najumecapanepaeya jumaitsi papeca-toitorobinexatsica. Xanë ata bajaraponë yabara pacatsipaebatsi baja cajena panecopi-aevetavanapaenexa. <sup>5</sup> Juanpijinë raja jivi bautisabanajetaruca ëmerata. Itsiata baitsi jane caematacabibejecujinae paxamë Dioso pacatsijamatabëjoneyaexanaena Espíritu Santo, jai Jesús pijajivijavabelia.

*Pacuenia Jesús petëpaecujinae icatsia itsa asaë, athëbëabetsia baja pona yabara pelivaisi*

<sup>6</sup> Jesús petëpaecujinae icatsia itsa asaë, tsitanaitajëta pijajivijavabelia. Nexata Jesús pijajivi penacaetuatsijavata, Jesús pijajivi yanijobatsi. Jesús pijajivi jumaitsi mapacueniaje:

—Patajatuxanenë, ¿xaniajai tsabaja? ¿Itsanacuapijivi pevetsijava mapanacuaje pecopatsinexa, xamë vecuapitsapaeyaexanaename mapamatacabitaje? ¿Nexata tsaja javiriavi judíovi juya evetsiaexanaename vajanacayanacuaevetsinexa? jai Jesús pijajivi.

<sup>7</sup> Nexata Jesús jumaitsi pijajivijavabelia:

—Xua yabara paneyanijobame, paneyapëtaenexa, taxa Dioso apo pacatocopatsi. Apo pacatocopatsi paneyapëtaenexa pamatacabita, paepatota ata, taxa Dioso pexanaejava, copiapatsijitsia. Caenë taxa Dioso yapëtane pamatacabi bajaraxua copiapatsijitsia. <sup>8</sup> Itsiata baitsi jane paxamë ajumejunavijibia papaebianame xanë talivaisi Espíritu Santo itsa pacatsijamatabëpatsianica paxamëjavabetsica. Nexata panelivaisipaebana-jetarubenaename Jerusalén tomarajava, Judea nacuajava ata, Samaria nacuajava ata, tajënacuatubujava ata, jai Jesús pijajivijavabelia.

<sup>9</sup> Bajarapacuenia Jesús pejumaitsicujinae pijajivijavabelia, Jesús baja pijajivi pitabëne-jeva, athëbëabetsia Dioso caponatsi. Itarërëbo baja Jesús pëcaevaya. Nexata baja Jesús pijajivi acuenebi matavëjëa petaejava. <sup>10</sup> Nexata Jesús pijajivi pëtaenubena athëbëabetsia Jesús pepëcaevijavatsia. Nexata ángelnëbeje, penioponaejava penaxatatsinëbeje,

Jesús pijajivi jemata bajarajota tsitanaitajétatsi. <sup>11</sup> Nexata ángelnébeje jumaitsibeje Jesús pijajivijavabelia:

—PaGalilea nacuapijivimé, ¿detsa xuajitsia athébëabetsia pataenubename? Bajaroné Jesús paxaméjavavetsia Dioso pacavecuacaponatsi athébëabetsia. Bajaroné icatsia itsamatacabi patsianica. Pacuenia pataneme petsiajava, bajara icatsia pacuenia patsianica, jai ángelnébeje Jesús pijajivijavabelia.

*Pacuenia Jesús pijajivi natsicueyaitapeta Matíasvënëné apóstolenéna yabara pelivaisi*

<sup>12</sup> Jesús baja peponaecujinae athébëabetsia, Jesús pijajivi, apóstolevi, naviaba Jerusalén tomarabereña. Naviaba olivonaenë penubenaetsutojavaverena. Bajarapatsuto eca caekilómetrocuena Jerusalén tomaravecua. <sup>13</sup> Nexata Jesús pijajivi pata Jerusalén tomarata. Nexata pabota Jesús pijajivi najinavanapa, athébëyo pexanaeirajavabetsia junaya. Tsipaji baja cajena tsicopatatsi bajarapairatatsia pejinavanapaenexa. Pamona Jesús pijajivi apóstolevi, mapevënëanëje. Itsanë pevënë Pedro. Itsanë Santiago. Itsanë Juan. Itsanë Andrés. Itsanë Felipe. Itsanë Bartolomé. Itsanë Mateo. Itsanë Santiago, Alfeo pexenato. Itsanë Simón. Bajaroné celotenë. Itsanë pevënë Judas, Santiago pejujapijinë. <sup>14-15</sup> Pabota Jesús pijajivi apóstolevi najinavanapa, athébëyo pexanaeirajavatatsia, nacaetuatabiaba caejavata pevajëtabinexa Diosojavabelia. Jesús pena María, Jesús pejujapijivi ata, itsapetiriavi ata yajava, nacaetuatabiaba pevajëtabinexa Diosojavabelia. Bajarapajivibitsaëto ciento veinte pajivibeje. Nexata penacaetuatsijavata bajarapamonae tuatujëta Pedro nonotapuna. Pedro nexata jumaiti penacaetuatsivijavabelia:

<sup>16</sup>—Tajamonae, copiapata rajane baja pacuenia baja cajena tajëvelia jumaiti Dioso pejumelivaisibaxutota. Pacuenia bajayata Davidpijinë Espíritu Santo pejamatabëcueneta tajëvelia vajunupaebiaexanatsi Judaspijinë pexanaejavanexa, copiapata jane baja. Tsipaji Judaspijinë itsa matacapona pamona Jesús vaetabijitsiatsi, Judaspijinë tocopiapatatsi baja pacuenia Davidpijinë tajëvelia jumaiti. <sup>17</sup> Judaspijinë picani paxanëyajuvënëñemi. Jesús picani bajaraponëmi itapeta penacuenebinexa paxanëta. <sup>18</sup> Judaspijinë ira comuata pibisiacuene pexanaematamopalatata. Bajaronëmi pijacuatata nabeyaxuaba. Nexata penabeyaxuabicujinae, pematono ira bejopaica. Nexata cototititicajunua. Daxita pënëmi pitsatarabarena. <sup>19</sup> Daxita Jerusalén tomarapijivi vënëlivaisitanetsi daxita xua tocopiapatatsi Judaspijinëmi. Nexata Judaspijinëmi pecomuatsiira, Jerusalén tomarapijivi vënërubá Acéldama. “Acéldama,” itsa jai bajarapamonae pijajumeta, mapajumetaje pejumaitisijume: “Papalata pejamatabëcueneta jivitonë beyaxuabatsi, bajarapalatata pecomuatsiira,” pejaijume, jai Pedro penacaetuatsivijavabelia.

<sup>20</sup> Icatsia Pedro jumaiti penacaetuatsivijavabelia:

—Salmosvënëbaxutota tajëvelia Judaspijinë yabara comparacióncuena jumaiti mapacueniaje:

Pijabo jivinebo xuabetsiana. Itsajivi ata apo ponaponae tsane bajarapabota, jai tajëvelia Salmosvënëbaxutota Judaspijinë apóstolenë penaexanaejavavecua pepit-sapaejavanexa yabara.

Itsajavata Salmosvënëbaxutota icatsia tajëvelia jumaiti Judaspijinë yabara mapacueniaje:

Bajaronëmi penacuenebijavami, itsanë pitsiana, jai itsajavata Salmosvënëbaxutota itsanë icatsia apóstolenë penaexanaejavanexa yabara Judaspijinë pepitsapaejamatabëcuene, jai Pedro penacaetuatsivijavabelia.

<sup>21</sup> Icatsia Pedro jumaiti:

—Caenë panetsicueyaajibi doce paponëbejenexanë Jesús petëpaecujinae Dioso icatsia piasaëyaexanaejavatsi patatajava patanajuapaebinexa. Bajaraxuata bitapetatsi itsanë pataneyabinexa. Paxamë tuatujëta ena patanajuapënajinavanapaevi vajatuxanenë Jesús pamatacabi abaxë ponapona mapanacuataje. <sup>22</sup> Juanpijinë raja bautisaba Jesús.

Bajara pamatacabijavaveliacujinae, panajuapənajinavanapajē Jesús, matapania athëbëabetsia Dioso patanevecua caponaematacabitsijavabelia. Nexata bajarapitsinë bitapetatsi Jesús petëpaecujinae Dioso icatsia piasaëyaexanaejavatsi patataejava patanajuapaebinexa, jai Pedro penacaetuatsivijavabelia.

<sup>23</sup> Nexata pamonaē nacaetuata, Dioso pejumecovënëtsivi, anijanëbeje itapeta, Pedrobana jane baja Jesús penajuapənajinavanapaevi. Bajaraponëbejeyajuvënënë caenë acueyabi pavënëbeje xaina. Itsavënë José. Itsavënë Barsabás. Itsavënë Justo. Itsanë caevënë xaina. Bajaraponë pevënë Matías. <sup>24</sup> Bajaraxuacujinae bajarapamonae najumaitsi:

—Vajëtsianatsi Diosojavabelia vajanacayapëtaeyaxanaenexa, najai.

Nexata jane baja bajarapamonae peyapëtaenexa, ponë Dioso itapetsijitsiatsi apóstolenënexa, vajëta Diosojavabelia. Bajarapamonae pevajëtsijavata Diosojavabelia, jumaitsi mapacueniaje:

—Patajatuxanenë, daxitajivi nejamatabëcueneyapëtaenë. Maponëbejeyajuvënënëje, ponë itapetame apóstolenënexa, panetsitajëre. <sup>25</sup> Nexata ponë itapetame, pitsiana xua Judaspijinë vecuapitsapa. Bajaraxua Judaspijinë vecuapitsapa peponaexae infiernojavabelia, jai bajarapamonae pevajëtsijavata Diosojavabelia.

<sup>26</sup> Bajaraxuacujinae bajarapamonae pijacuenecujirua exana peyapëtaenexa jane baja ponë apóstolenënexa. Nexata bajarapamonae yapëtane Matías apóstolenënexa. Nexata baja Matías najunua once ponëbeje Jesús pijajivi apóstolevijavabelia. Nexata baja apóstolevi doce ponëbeje.

## 2

*Pacuenia jane baja athëbëvetsica Espíritu Santo patsica Jesús pijajivi petsijamatabëjonenexatsi yabara pelivaisi*

<sup>1</sup> Itsa baja panepa cincuenta pamatacabibeje pascuavënëfiesta pevereverecaecujinae, icatsia junua Pentecostésvënëfiesta. Nexata bajarapamatacabi daxita Jesús pijajivi nacaetuata caejavata. <sup>2</sup> Nexata bajarapamatacabi athëbëvetsica jemata najumeta bepinijijoviboxaneto. Nexata pabota Pedrobana nacaetuatenä, daxitabo najumeteca. <sup>3</sup> Bajarapamonae tane athëbëvetsica perunaejavatsica bepitarunutsicotia. Nexata bajarapamonae caejivi canacujitsia bajarapacotia tsimatanatsanaeyarunaicatsi. <sup>4</sup> Nexata daxita bajarapamonae tsijamatabëvënëcatsi Espíritu Santo. Nexata bajarapamonae jemata taxuxuaba penatsipaebijava itsaviriajumenëta, apo penatsipaebijumemi picani. Espíritu Santo saya pejamatabëcueneta bajarapacuenia itsaviriajumenëta natsipaebiaexanatsi.

<sup>5</sup> Bajarapamatacabita Jerusalén tomarata jinavanapa ayaibitsaëtoخانeto judíovi. Bajarapamonae saicaya daxitanacuanëjjava penaexanaevi. Bajarapamonae saya napata Jerusalén tomarata penataenexa Pentecostésvënëfiesta. Bajarapamonae bitso pejumecovënëtsivi Dioso. <sup>6</sup> Nexata bajarapamonae itsa jumetane bepinijijoviboxaneto athëbëvetsica penajumetsijava, nexata pabota Jesús pijajivi nacaetuatenä, bajarapabota muxunanacaetuana ayaibitsaëtoخانeto bajarapamonae. Paviriajumenëta Jesús pijajivi Espíritu Santo pejamatabëcueneta natsipaebiaexanatsi, bajarapamonae pijajumenë. Nexata bajarapamonae xaniavaetsia jumetane xua yabara Jesús pijajivi tsipaebapona. Bajaraxuata bajarapamonae bitso jamatabëcuenenabenajaca. Tsipaji bajarapamonae caenacuapijivi canacujitsia xaniavaetsia jumetaepona pepo pijajumeta Jesús pijajivi petsipaebilivaisianë. <sup>7</sup> Athëbëvetsica bepinijijoviboxaneto penajumetsijava pemuxunanacaetuanaevi, pinijicuenia najamatabëxainäeya jamatabëcuenenabenajaca. Nexata bajarapamonae najumaitsi:

—Daxita mapamonae nacatsipaebanubenaje, Galilea nacuapijivi. Apo penatsipaebivi picani vajajumenë. <sup>8</sup> Vaxaitsi itsaverena patatsi, caenacuapijivitsi canacujitsia saicaya xainatsi vajajumenë, apo penatsipaebijumenë mapamonaeje. ¿Detsa pacuenia itsiata vaxaitsi, caenacuapijivitsi canacujitsia, vajanaexanaejavaveliacujinae vajanatsipaebijumenëta caëjëpatsi penatsipaebinexa mapamonaeje? <sup>9</sup> Vaxaitsiyajuvënëvi raja

itsamonae Partia nacuapijivi. Itsamonae Media nacuapijivi. Itsamonae Elam nacuapijivi. Itsamonae Mesopotamia nacuapijivi. Itsamonae Judea nacuapijivi. Itsamonae Capadocia nacuapijivi. Itsamonae Ponto nacuapijivi. Itsamonae Asiavënë nacuapijivi. <sup>10</sup> Itsamonae Frigia nacuapijivi. Itsamonae Panfilia nacuapijivi. Itsamonae Egipto nacuapijivi. Itsamonae Africa nacuapijivi, Cirene tomarapënëverenapijivi. Itsamonae vaxaitsiyajuvënëvi judíovi, Roma tomarapijivi. Itsamonae apo judíovi, Roma tomara-pijivi. Bajarapamonae apo judíovi ata, Dioso jumecovënëtavanapa pacuenia vaxaitsi judíovitsi jumecovënëtavanapatsi Dioso. <sup>11</sup> Itsamonae vaxaitsiyajuvënëvi Creta nacuapijivi. Itsamonae Arabia nacuapijivi. Itsiata daxitatsi jumetanetsi xaniavaetsia Jesús pijajivi vajanacatsipaebilivaisianë vajajumenëta. Caejivi canacujitsia bajarapamonae Dioso pinijicuene pexanaejava yabara nacatsipaebapona, najai athëbëvetsica bepinijijoviboxaneto penajumetsijava pemuxunanacaetuaevia.

<sup>12</sup> Nexata daxita bajarapamonae jamatabëcuenenajunaviacanubena. Nexata bajarapamonae najumaitsi:

—¿Detsa meta mapitsijamatabëcuene yabara itsije? najai.

<sup>13</sup> Itsamonae saya jumecaponaeya jumaitsi Jesús pijajivi yabara:

—Aitajibi ra saya mapamonaeje, jai.

*Pacuenia Pedro tsipaeba athëbëvetsica bepinijijoviboxaneto penajumetsijava pemuxunanacaetuaevijavabelia yabara pelivaisi*

<sup>14</sup> Apóstolenë Pedro nonotapuna once ponëbeje apóstolevi yajava. Nexata Pedro pini-jijumeta jumaitsi athëbëvetsica bepinijijoviboxaneto penajumetsijava pemuxunanacaetuaevijavabelia:

—Tajamonae judíovi, Jerusalén tomarata panenapatsivi, panenamuxunaevere. Paxamë ata Jerusalén tomarata paneenaevi, xaniavaetsia panenamuxunaevere paneyapëtaenexa xua yabara pacatsipaebijitsiatsi. <sup>15</sup> Paxamë mapamonae yabaraje pajumaitsimë: “Aitajibi ra saya mapamonaeje,” pajamë. Mara pamona apo aitajibije. Bajayacunuaepato raja abaxë maje. Bajarapaepatota jivi apo aitajibi tsabiabi. <sup>16</sup> Mara pamona paxamë panijajumenëta Espíritu Santo pejamatabëcueneta natsipaebiaexanatsije pecopiapatsixae baja xua bajayata tajëvelia Joelpijinë Diosojumepaebinëmi vjunupaeba. Bajaraxua yabara Dioso pejumaitsiyava Joelpijinë bajayata tajëvelia jumaitsi mapacueniaje:

Dioso jumaitsi: <sup>17</sup> “Itsa baja imoxoyo pevajënae tsane mapanacua pevereverecaenexaje, itorobianicajë Espíritu Santo daxitanacuapijivi, pamona tajajivi petsijamatabëjonenexatsi. Daxita panexi, pebijivi, petiriavi, paebiana palivaisi Espíritu Santo paebiaexanaenatsi, xanë talivaisi. Pevëjëavi pebijivi taena xua tsitajëtsianajë bemajitsinaebocuenia. Perujuvi pebijivi piamajitsinaejavata tsipaebianajë. <sup>18</sup> Nexata daxita pamona tanetonacuenebivi, pebijivi, petiriavi ata, bajarapamatacabi Espíritu Santo toitorobianicajë petsijamatabëjonenexatsi. Nexata bajarapamonae paebiana xanë talivaisi. <sup>19</sup> Tsitajëtsianajë itaboxotatsia pinijicuene taexanaejava. Daxita mapanacuajava ata pinijicuene taexanaejava tsitajëtsianajë. Ayai tsane pijana. Ayai tsane isotocotia. Ayai tsane petsëxë mapanacuataje. <sup>20</sup> Nexata matacabipijijuameto aitaquiri tsane. Meravipijijuameto bepijana itatsobia tsane. Bajara itsane mapanacuataje itsa baja peneta imoxoyo pevajënae tsane icatsia pepatsimatacabinexatsica pepo petuxanenë. Bajarapamatacabi bajaraponë pinijicuene pexanaejava pecaëjëpaenëcuenetsi, tsitajëtsiana daxitajivijavabelia. <sup>21</sup> Nexata pajivi navajëtsiana pepo petuxanenëjavabelia, bajarapajivi capanepaenatsi,” jai Dioso,

jai bajayata tajëvelia Joelpijinë Diosojumepaebinëmi Dioso pejumaitsiyava bajaraxua yabara, jai Pedro athëbëvetsica bepinijijoviboxaneto penajumetsijava pemuxunanacaetuaevijavabelia.

<sup>22</sup> Icatsia Pedro jumaitsi bajarapamonaejavabelia:

—Tajamonae judíovi, panenamuxunaevere paneyapëtaenexa xua yabara pacatsipaebijtsiatsi. Jesús, Nazaret tomarapijinë, Dioso pesaëta pinijicuene pexanaejava exanapona paxamë tuatuajëta. Nexata Jesús pacayapëtaeyaexana Dioso ayaicuene pexanaejava pecaëjëpaenëcuenetsi. Bajarapacuenia paxamë baja payapëtaneme Jesús Dioso pitorobinëcuenetsi. Xaniavaetsia rabaja payapëtaneme paxamëjavata Jesús pexanaejava bajarapapinijicuene.<sup>23</sup> Bjaraponë Jesús paxamë panecobeyabelia canajetatsi. Nexata paxamë pabeyaxuabame. Tsipaji patocopatame piagamatabëcuenebejevi Jesús cruza-javabelia pecobematabiabarutsinexatsi. Bjarapacuenia Jesús pabeyaxuabame tsipaji baja cajena Dioso tajëvelia najamatabëxaina bajarapacuenia Jesús panebeyaxuabinexa.<sup>24</sup> Itsiata baitsi jane Jesús petëpaecujinae Dioso icatsia asaëyaexanatsi. Dioso capanepatsi petëpaejavavecu. Tsipaji Jesús Dioso pexënatoxae, acuenebi pematatoxenetsijavatsi petëpaejava.<sup>25</sup> Bajayata Davidpijinë tajëvelia yaquina Dioso pejumelivaisibaxutota Jesús icatsia piasaëjavanexa petëpaecujinae. Davidpijinë itsa yaquina Jesús pejumaittsijava Diosojavabelia icatsia piasaëjavanexa petëpaecujinae, yaquina mapejumaittsiitaneje:

Yapëtaniji Dioso taneyajavaponaponaejava. Tamuxuneneta ponapona, tacujuanenia.

Bjaraxuata apo junavinë tsane.<sup>26</sup> Bjaraxuata jamatabëcuenebarëyanë tsane. Nexata jivijavabelia tsipaebianajë tajamatabëcuenebarëyajava. Bjaraxuata yapëtaniji tatëpaecujinae icatsia tasaëjavanexa.<sup>27</sup> Xamë, Diosomë, apo necopatsimë tsane petëpaevi peponaenacuayabelia. Apo necopatsimënu tsane taperabëtsabanaenexa nexënatonë.<sup>28</sup> Netsitajëtame baja cajena taponamenamutonexa taxainaenexa matabi apo pevereverecaejava. Nejamatabëcuenebarëyaexaname itsa neyjavaponaponame,

pejaiitane bajayata Davidpijinë yaquina Dioso pejumelivaisibaxutota Jesús pejumaittsijava Diosojavabelia, jai Pedro athëbëvetsica bepiniijiviboxaneto penajumetsijava pemuxunanacaetuanavijavabelia.

<sup>29</sup> Icatsia Pedro jumaittsi bajarapamonaejavabelia:

—Tajamonae, jumenapebetsiaya pacatsipaebianatsi vajasalinainëmi Davidpijinë yabara. Bajayata baja tëpa Davidpijinëmi. Nexata mëthëtatsi. Yapëtanetsi itsajota mëthëtatsi.<sup>30</sup> Davidpijinëmi raja Diosojumepaebinëmi profetanëmi. Davidpijinëmi baja cajena yapëtanë pacuenia Dioso pexaniaajajumeta najumecapanepaeya jumaittsi. Davidpijinëmijavabelia Dioso najumecapanepaeya jumaittsi mapacueniaje: “Pacuenia xamë evetame Israelnacua, bajara icatsia pacuenia bexëjavabelia caenë nemomoxiyajuvënë evetsiana nevetsinacuami, Israelnacua,” jai Dioso najumecapanepaeya mapacueniaje Davidpijinëmijavabelia Jesús yabara.<sup>31</sup> Davidpijinë baja cajena tajëvelia yapëtanë Jesús athëbëvetsica Dioso pitorobijavanexatsi jivi pecapanepaenexa. Tajëvelia yapëtanënu Jesús petëpaecujinae Dioso icatsia piasaëyaexanaejavanexatsi. Bjaraxuata bajayata Davidpijinë tajëvelia cajena vajunupaeba Jesús petëpaecujinae Dioso icatsia piasaëyaexanaejavanexatsi. Davidpijinëmi peyaquinaebaxutota tajëvelia Jesús yabara jumaittsi mapacueniaje: “Nexata apo copatsi tsanetsi petëpaevi peponaenacuayabelia. Apo copatsi tsanetsinua peperabëtsabanaenexa,” jai baja cajena Davidpijinë peyaquinaebaxutota Jesús yabara.<sup>32</sup> Bjaraxuata Jesús baja icatsia Dioso asaëyaexanatsi petëpaecujinae. Jesús Dioso piasaëyaexanaejavatsi, daxita baja paxanë pataniji. Bjaraxuata pacatsipaebatsi.<sup>33</sup> Jesús caponatsi athëbëabetsia Dioso pecujuanenia peecaenexa. Nexata baja paxa Dioso rajutatsi Espíritu Santo pacuenia baja cajena najumecapanepaeya Dioso jumaittsi. Nexata bajaraxuacujinae Jesús juya itorobica Espíritu Santo paxanëjavabetsica. Nexata xua pinijicuene pexanaejava, aeconoxae pataenubename, pajumetanemenua, palivaisianë mapamonae panijajumenëta pacatsipaebaje, bajaraxua Espíritu Santo pejamatabëcueneta exana.<sup>34</sup> Itsiata baitsi jane ponë athëbëabetsia Dioso caponatsi, apo Davidpijinë. Davidpijinë bajayata tajëvelia Jesús yabara jumaittsi mapacueniaje:

Dioso jumaittsi tajatuxanenëjavabelia: “Evetecare abaxë tacujuanenia.<sup>35</sup> Vecatsivajënae jumecovënëtsiaexanaenatsi abaxë copiaya nijavajabitsaë nitorobicuenianexa,”

jai Dioso tajatuxanenëjavabelia,  
jai bajayata tajëvelia Davidpijinë Jesús yabara.

<sup>36</sup> Bajaraxuata daxita Israel nacuapijivi xaniavaetsia beyapëtane Jesús pelivaisi, ponë paxamë pacobematabiabarutame cruzajavabelia. Bajaraponë Jesús, Dioso exanatsi pepo petuxanenë. Bajaraponë Jesús, Cristo cajena, ponë Dioso itorobica vajanacacapanepaenexa, jai Pedro athëbëvetsica bepinijijoviboxaneto penajumetsijava pemuxunanacaetuaevijavabelia.

<sup>37</sup> Itsa bajarapamonae jumetane Pedro bajarapacuenia pejumaitsijava, nexata bajarapamonae bejamatabëjiobireca pinijicuenia. Nexata bajarapamonae yanijoba Pedrojavabelia, itsamonae Jesús pijajivi apóstolevijavabelia ata.

—Tajamonae, ¿detsa nexata pitsicuene paexanaenajë patajaneconi yabara? jai nexata bajarapamonae Pedrobanajavabelia.

<sup>38</sup> Pedro nexata jumaitsi bajarapamonaejavabelia:

—Daxita paxamë pibisiacuene paneexanaejava pacopabare. Panajamatabëcuenepënyorore Diosojavabelia. Nexata pacabautisabiana Jesucristo pejamatabëcueneta papecavecuajibiaexanaenexa daxita pibisiacuene paneexanaeconi. Bajara jane xuacujinae Dioso pacarajutsiana Espíritu Santo papecatsijamatabëjonenexa.

<sup>39</sup> Dioso raja cajena jitsipa papecarajutsinexa Espíritu Santo. Dioso raja jitsipa panexijavabelia ata perajutsinexa Espíritu Santo. Dioso raja jitsipa itsanacuanëpijivi, tajënacuanëjava pejinavanapaevi ata, perajutsinexa Espíritu Santo. Daxita pamonaee Dioso junatsiana pijajivinexa, tsijamatabëjonenatsi Espíritu Santo, jai Pedro bajarapamonaejavabelia.

<sup>40</sup> Bajarapacuenia Pedro itsa tsipaeba, itsalivaisi pematatsënëa tsipaeba bajarapamonaejavabelia. Pedro pinijicuenia muxujioba bajarapamonae. Pedro jumaitsi mapacueni-aje:

—Pamonae Jesús beyaxuaba, pibisiacuene pexanaevi, bajarapamonae naxuabiana. Nexata paxamë ata bajarapamonae paneyajavanaxuabianiva, pavecuanajamatabëcuenepënyorore Diosojavabelia, jai Pedro.

<sup>41</sup> Nexata Pedro petsipaebilivaisi bajarapamatacabi jumecovënëtatsi tres mil pajivimaxëto. Nexata daxita bajarapamonae Jesús pijajivi bautisaba. Nexata bajarapamonae najunua baja Jesús pijajivijavabelia. <sup>42</sup> Nexata bajarapamonae jumecovënëta palivaisi Jesús pijajivi apóstolevi tsipaebapona. Daxita bajarapamonae Jesús pijajivi yajava, apóstolevinua yajava, najamatabëcuenejëpaeya jinavanapa. Daxita nacaetuatabiaba pevajëcabiabinexa Diosojavabelia. Nacaetuatabiabanua caejavata pexaenexa, penajamatabënapitabiabinexa xua yabara Jesús sivatëpatsi.

*Pacuenia jinavanapa pamonaee copiaya Jesús pelivaisi jumecovënëta yabara pelivaisi*

<sup>43</sup> Daxitajivi cujunava Dioso. Tsipaji Dioso yavenonabiaba apóstolevi. Nexata apóstolevi Dioso pesaëta pinijicueni pexanaejava, exanabiaba. <sup>44</sup> Daxita pamonaee jumecovënëta Jesús pelivaisi, nacaetuatabiaba najamatabëcuenejëpaeya. Bajarapamonae daxita pexainaejava nacobenaxainaeya evetabiaba. <sup>45</sup> Paepatota itsajivi bitso namatavenona, peyavenonaenexa bajarapamonae yajuvënëvi pexainaejava canajetapona. Pijairanë ata canajetapona. Pijabonë ata canajetapona. Pacuenejavaxi xaina, canajetapona. Nexata bajaraxuamatamopalata, daxita bajarapamatamo, natsicobetsanabiaba pacuenia caejivi canacujitsia namatavenona. <sup>46</sup> Bajarapamonae caematacabi canacujitsia nacaetuatabiaba templobota. Daxita bajarapamonae pijabonëjava jamatabëcuenebarëyaya xaeyabiaba pexaejava najamatabëcuenejëpaeya. <sup>47</sup> Nexata bajarapamonae jumai tsabiabi Diosojavabelia: “Diosomë, bitso ayaijamatabëcuenenëmë. Paneyavenonabiabame,” jai tsabiabi. Nexata daxita Jerusalén tomarapijivi, bajarapamonae pexaniacuena yaiyataeyabiabatsi. Nexata itsamonae ata, caematacabi canacujitsia Jesús pelivaisi jumecovënëtapona pecapanepaenexatsi pibisiacuene pexanaeeneconivecua. Bajarapamonae najonepona Jesús pelivaisi pejumecovënëtsivijavabelia.

## 3

*Pacuenia apóstolenēbeje Jesús pejamatabēcueneta xanepanaeyaexanabeje apo pecaējē-paenētsi peponaponaejava yabara pelivaisi*

<sup>1</sup> Judíovi caniviyoeapatota, bejamatabēcueneta a las tres, templobota vajēcabiaba Diosojavabelia. Nexata itsamatacabi, bajarapaepatota, Pedrobeje Juanbeje naponabeje templojavabelia. <sup>2</sup> Ponē apo pecaējēpaenētsi peponaponaejava penaexanaejavabeliacujinae, capatabiabatsi pijamona peetabiabinexatsi templobobaupa muxuneneta. Bajarpabaupa pevënë Pexaniabaupa. Caematacabi canacujitsia bajarapabaupa muxuneneta bajaraponē etabiabatsi pijamona. Nexata bajaraponē amoneya palata vajēcabiabeca bajarapabaupajava pejoneponaevita templojavaberena. <sup>3</sup> Nexata itsa bajaraponē taeyeca Pedrobeje Juanbeje pejonenajetaruaejavabeje templojavaberena, vajēqueca palata. <sup>4</sup> Nexata Pedrobeje Juanbeje naēcotabeje bajaraponējavabelia. Nexata Pedro jumaitsi bajaraponējavabelia:

—Panetaemabeje, jai Pedro.

<sup>5</sup> Nexata bajaraponē naitaxutocaevetsiaya jamatabējumai tsecae:

—Nerajutsianabeje tsamē raja itsacuenejavayo, jamatabējai tsecae bajaraponē.

<sup>6</sup> Pedro nexata jumaitsi bajaraponējavabelia:

—Palata raja apo xainaenē. Itsiata baitsi jane xua xainajē, carajutsianatsi. Jesucristo, Nazaret tomarapijinē, pecaxanepanaeyaexanaexae baja, nonotapunare. Ponaponare baja, jai Pedro.

<sup>7</sup> Nexata bajaraponē pecujuanenia pacobe, Pedro cobeveatabiayotsia. Bajarajota bajaraponē daxitaneniabeje asisaēreca baja. <sup>8</sup> Nexata bajaraponē jirevajunua. Petaxuta nuca. Ponapona baja. Nexata bajaraponē templobo enēabelia najoneya Pedrobeje Juanbeje pepēta. Bajaraponē jirevanajetarua. Jumai tsanajetaruae Diosojavabelia:

—Diosomē, ¡bitso ayaijamatabēcuenenēmē! ¡Tsipaji baja nexanepanaeyaexaname! jai tsanajetaruae Diosojavabelia.

<sup>9</sup> Nexata daxitajivi tanetsi peponaponaejava. Jumetanetsinua pexaniajamatabēcueneta perajutsijava Diosojavabelia. <sup>10</sup> Bajarapamonae itsa tanetsi, yapētanetsi palata pevajēcabiabecaenēmi templobobaupa muxuneneta, Pexaniabaupavënë muxuneneta. Nexata daxita bajarapamonae itsa tane bajaraponē baja pexanepanaejava, bitso jamatabēcuenenajunaviaca.

*Pacuenia Jesús pelivaisi Pedro jivi tsipaeba templobo enētuaatujēta, Portal de Salomónvënëjavata, yabara pelivaisi*

<sup>11</sup> Ponē penaexanaejavaveliacujinae apo peponaponaenēmi, Pedro pexanepanaeyaexanaecujinae, Pedrobeje Juanbeje apo copatsitsibeje. Nexata templobo enētuaatujēta, Portal de Salomónvënëjavata, ponē Pedro xanepanaeyaexana, Pedrobeje Juanbeje najuamaxēvaetabanucatsibeje. Nexata jivi ayaibitsaēto itaxutuaothopatsi. Jamatabēcuenenabenajaca bajarapamonae. <sup>12</sup> Nexata Pedro itsa tane bajarapamonae pejamatabēcuenenabenajacaejava, nexata Pedro jumaitsi bajarapamonaejavabelia:

—Tajamona judíovi, ¿detsa xuajitsia pajamatabēcuenenabenajacame maponē yabaraje? ¿Detsa xuajitsia bitso panenaēcobamebeje mapacueniaje? Paxanēbeje yabara meta pajamatabējumaitsimē mapacueniaje: “Maponēbeje xanepanaeyaexanabeje apo pecaējēpaenēmitsi peponaponaejava. Tsipaji baja caējēpatsibeje bajarapacueneta pexanaenexabeje. Bajarapacueneta caējēpatsibeje tsipaji meta Dioso pitabarata aneonijibia ponaponabeje,” pajamatabējamē meta paxanēbeje yabara. Paxanēbeje raja patajamatabēcuenetabeje apo paexanaenēbeje bajarapacueneta. Jesús raja exana bajarapacueneta. <sup>13</sup> Vajasalinaivi baja cajena Abrahampijinē, Isaacpjinē, Jacobpjinē. Bajarapamonae pijaDioso pexenato Jesús. Nexata Dioso jivi yapētaeyaexana Jesús bitso ayaijamatabēcueneta pexainaenēcueneta. Bajaraponē Jesús paxamē parajutame vajanacayanacuaevetsivi pecobeyabelia. Vajanacayanacuaevetsinē Pilato copatsijitsia ata Jesús, itsiata paxamē pajumesaēmē. Apo pajitsipaemē Pilato

pecopatsijava Jesús. <sup>14</sup> Apo pavajëcaemë Pilatojavabelia pecopatsinexatsi Jesús, itsacueneneconiyo apo pexainaenë, pepo pianeconijibinë. Caranata biji pibisiacuene pexanaenë, jivibenë, pecopatsinexatsi, pajumesaëmmë. Pavajëcame Pilatojavabelia jivibenë pepitsapaenexa penaneconitsivi pejebabiabibovecua. <sup>15</sup> Ponë Dioso itorobica vajanacarajutsinexa matabi apo peverevereceajava, bajaraponë caranata pabeyaxuabame. Itsiata baitsi jane Jesús petëpaecujinae, Dioso icatsia asaëyaexanatsi. Bajarapacuenë patataexae, pacatsipaebatsi. <sup>16</sup> Bajaraponë Jesús pejamatabëcueneta xanepanaeyaexanatsi baja maponëje, apo pecaëjëpaenëmitsi peponaponaejava. Maponëje najamatabëcuenecopata Jesúsjavabelia. Bajaraxuata maponëje Jesús baja xanepanaeyaexanatsi paneitabarata, panetaeyabiabinë, paneyapëtaenë, jai Pedro bajarapamonaejavabelia Portal de Salomónvënëjavata.

<sup>17</sup> Icatsia Pedro jumaiti bajarapamonaejavabelia:

—Tajamonae, yapëtaniji pacuene pacabarëexana itsamonae, papecaevetsivi yajava. Tsiapaji apo payapëtaemë xaniavaetsia. Bajaraxuata pabeyaxuabame Jesús. <sup>18</sup> Bajayata Diosojumepaebivimi profetavi tajëvelia vajunupaeba Jesús athëbëvetsica Dioso pitorobijavanexatsi jivi pecapanepaenexa. Profetavimi tajëvelia vajunupaebanua Jesús bitso pebejibiaexanaejavanexatsi daxitajivi pijaneconi yabara. Bajarapacuenë Jesús baja tocopiapatatsi itsa pabeyaxuabame. Tsiapaji baja Dioso bajarapacuenia tocopatatsi. <sup>19</sup> Nexata baja aeconoxae paneyapëtaexae Jesús petëpaejava daxitajivi pijaneconi yabara, pacopabare baja panijaperujamatabëcuenemi. Panajamatabëcuenepënëyorore baja Diosojavabelia. Nexata pibisiacuene paneexanaeneconimi, Dioso pacavecuaajibiaexanaena. Nexata pacajamatabëcuene asaëyaexanaena Dioso. <sup>20</sup> Tsiapaji raja icatsia itsamatabi Dioso athëbëvetsica itorobianica Jesús, ponë bajayata Dioso itapeta papecayavenonaenexa. <sup>21</sup> Jesús raja abaxë ecaya athëbëtatsia. Matapania pamatabi Dioso xanebijitsia daxitacuene, icatsia patsianica Jesús. Bajarapacuenia Jesús pepatsijavanexatsica, Diosojumepaebivimi profetavi bajayata tajëvelia vajunupaeba. <sup>22</sup> Vajasalinaivimijavabelia baja cajena bajayata tajëvelia profeta Moiséspijinë Jesús yabara jumaiti mapacueniaje: “Pacuenia nitoroba xanë profetanënxanë, bajarapacuenia icatsia vajatuxanenë Dioso itorobiana itsanë profetanë, paxamë panemomoxiyajuvënënë tsane. Nexata pacuene yabara bajaraponë profeta pacatsipaebiana, pajumecovënëtsianame xaniavaetsia. <sup>23</sup> Tsiapaji daxita pamonaë apo jumecovënëtsi tsane bajaraponë profeta petsipaebilivaisi, pepacuene Dioso pijajivivecua tsatsiana. Nexata bajarapamonae Dioso verebabena,” jai baja cajena bajayata tajëvelia Moiséspijinë vajasalinaivimijavabelia Jesús pepatsijavanexatsica yabara, jai Pedro bajarapamonaejavabelia Portal de Salomónvënëjavata.

<sup>24</sup> Icatsia Pedro jumaiti bajarapamonaejavabelia:

—Xua baja aeconoxae mapamatabitaje copiapatapona, bajayata tajëvelia profeta Samuelpijinë copiaya vajunupaeba. Bajara icatsia xuacujinae cotocaevi paprofetavimi ata bajarapacuenia tajëvelia vajunupaebapona bajaraxua. <sup>25</sup> Paxamë rabaja profetavimi papemomoximë. Nexata xua Dioso najumecapanepaeya jumaiti perajutsinexa panijasalinaivimijavabelia, bajaraxua paxamë Dioso pacarajutsiana. Bajayata tajëvelia Dioso jumaiti vajasalinainëmi Abrahampijinëjavabelia Jesús yabara: “Caenë nemomoxiyajuvënënë itorobianajë jivi peyavenonaenexa. Nexata nemomoxiyajuvënënë yavenonaena caenacuapijivi canacujitsia, mapanacuata pejinavanapaevi,” jai Dioso tajëvelia Abrahampijinëmijavabelia Jesús yabara. <sup>26</sup> Nexata baja copiaya paxamëjavabetsica Dioso pexënato pacatoitorobica. Bajarapacuenia Dioso pexënato pacatoitorobica paxamë pacaëjivimë canacujitsia papecayavenonaenexa panenajamatabëcuene pënëyoroitsinexa pibisiacuene paneexanaejavavecua, jai Pedro bajarapamonaejavabelia Portal de Salomónvënëjavata.

*pelivaisi*

<sup>1</sup> Pedrobeje Juanbeje abaxë Jesús pelivaisi tsipaebabeje bajarapamonaejavabelia Portal de Salomónvënëjavata. Nexata bajaraberena jemata patanajetarubena sacerdotevi. Patanajetarubena saduceovinua. Pematatsënëa patanajetaruca itsanë capitán. Bajaronë capitán templobopijipolicíavi pevetsinë. <sup>2</sup> Daxita bajarapamonaë baraanaepanatsibeje Pedrobeje Juanbeje. Tsipaji Pedrobeje Juanbeje Jesús pelivaisi petsipaebijavatabeje, jumai tsaponaebeje:

—Jivi tēpae ata tsane, icatsia asaë tsane petēpaecujinae. Bajarapalivaisi cajena pexaniajailivaisi. Tsipaji baja icatsia Jesús asaëyaexanatsi petēpaecujinae, jaibeje tsaponae.

<sup>3</sup> Nexata bajarapamonaë vaetabatsibeje. Caponaliatsibeje peetsinexatsibeje penaneconitsivi pejebabiabibota. Meravia pitsijavata jutsijitsiatsibeje. Tsipaji baja bitso caniviyo. <sup>4</sup> Itsiata baitsi jane baja jivibitsaëtoxanetonë capanepaeya jumecovënētatsibeje pevaetabivajënaeyatsibeje. Nexata daxita pamonaë jumecovënëta Jesús pelivaisi, ëpebijivi namataëjëtatsi cinco mil ponëbeje.

<sup>5</sup> Nexata meravia pitsijavata nacaetuata judíovi pevetsivi. Nacaetuata judíovi pijaancianovinua. Nacaetuata judíovi pecujarubivinua. Daxita bajarapamonaë nacaetuata Jerusalén tomarata. <sup>6</sup> Nexata bajarajota napata sacerdotenë Anás. Bajaronë Anás sacerdotevi pepo penamatacaitorobinëmi. Napata Caifás ata. Napata Juan ata. Napata Alejandro ata. Napata itsamonaë ata, Anás pijamonaë. <sup>7</sup> Nexata Pedrobeje Juanbeje nutatsibeje daxita bajarapamonaë pitabarata. Nexata bajarapamonaë jumaitsi Pedrobeje Juanbejavabelia:

—¿Jipatsa pejamatabëcueneta paxanepanaeyaexanamebeje apo pecaëjēpaenëmitsi peponaponaëjava? jai bajarapamonaë Pedrobeje Juanbejavabelia.

<sup>8-9</sup> Nexata Pedro Espíritu Santo bitso jamatabëcueneyavenonatsi. Nexata Pedro jumaitsi bajarapamonaëjavabelia:

—Paxamë judíovi paneevetsivi, paxamë ata pijinia paancianovimë, paneyanijobamebeje paneyapētaenexa ponë pejamatabëcueneta paxanepanaeyaexanjēbeje apo pecaëjēpaenëmitsi peponaponaëjava. Paneyanijobamebejenua paneyapētaenexa pacuenia paxanepanaeyaexanjēbeje bajaraponë. <sup>10</sup> Nexata pacatsipaebianatsi daxita paxamë paneyapētaenexa daxita Israel nacupijivi ata peyapētaenexa. Jesús, Nazaret tomarapijinë, ponë paxamë pacobematabiabarutame cruzajavabelia, bajaraponë icatsia Dioso asaëyaexanatsi petēpaecujinae. Bajaronë Jesús pejamatabëcueneta maponë paneitabarata nucaje, xanepanaeyaexanatsi, jai Pedro.

<sup>11</sup> Icatsia Pedro jumaitsi bajarapamonaëjavabelia:

—Bajaronë Jesús yabara Dioso pejumelivaisibaxutota bajayata tajëvelia jumaitsi comparacióncuenia mapacueniaje:

Paiboto itsamonaë boexanaevi naitaxutojematabuatsiana petsitaabejexaetsi itajara, bajarapaiboto itsanë pitsiana. Nexata bajarapaibotota xaniavaetsia yaëtsiana botabu daxita itsaibo matatoxenetsia, jai tajëvelia Dioso pejumelivaisibaxutota.

Bajarapacuenia Dioso pejumelivaisibaxutota comparacióncuenia itsa jumaitsi Jesús yabara, judíovi penamatacaitorobivi Jesús apo pejumecovënëtsijavanexa yabara, jumaitsi. Dioso pitapetsijavatsi Jesús daxitajivi pecapanepaenexa yabara ata jumaitsi.

<sup>12</sup> Caenë Jesús caëjēpatsi vajanacacapanepaenexa pibisiacuene vajaexanaeconivecua. Bajaraxuata Dioso itorobica Jesús. Tsipaji baja ajibi pematatsënëa mapanacuataje itsanë ata pejamatabëcueneta vajanacacapanepaenexa Diosojavabelia, jai Pedro bajarapamonaëjavabelia.

<sup>13</sup> Bajarapamonaë yapētane Pedrobeje Juanbeje ajumejunavijibia Jesús pelivaisi petsipaebijavabeje bajarapamonaëjavabelia. Bajarapamonaë yapētanenua bajaraponëbeje bajayajebi apo penacujarubinëbeje peyaquinaëjava. Itsiata bitso yapētanebeje pexanialivaisi. Saya bajaraponëbeje penacuenebinëbeje. Nexata judíovi pevetsivi jamatabëcuenenabenajaca. Bajarapamonaë nexata jamatabëjumaitsi Pedrobeje Juanbeje yabara:

—Bajaraponëbeje cajena penaponaponaenëbeje Jesústa. Bajaraxuata bitso baja yapë-tanebeje bajarapalivaisi, jamatabëjai.

<sup>14</sup> Bajarapamonae tane apo pecaëjëpaenëmitsi peponaponaejava penanucuaejava Pedrobeje Juanbejejavata. Nexata bajarapamonae acuenebi pejumaitsijava: “Jume raja. Jesús raja pejamatabëcueneta apo xanepanae maponëje,” acuenebi pejaijava. Tsipaji apo pecaëjëpaenëmitsi peponaponaejava Jesús pejamatabëcueneta ponapona baja. <sup>15</sup> Nexata bajarapamonae Pedrobeje Juanbeje caeepatoyo navecuacapitsapatsibeje pecovëta ëpamonae penabarëcuaicuaijainexa.

<sup>16</sup> Nexata Pedrobeje Juanbeje pecovëta caeepatoyo penavecuacapitsapaejavatatsibeje, bajarapamonae najumaitsi:

—¿Detsamë raja pacuene exanaenatsi bajaraponëbejejavabelia? Daxita Jerusalén tomaripijivi xaniavaetsia yapëtane bajaraponëbeje pexanepanaeyaexanaejavabeje apo pecaëjëpaenëmitsi peponaponaejava. Nexata acuenebi jivijavabelia vajajumaitsijava: “Apo xanepanaeyaexanaebeje raja bajaraponëbeje,” vajajaijava. <sup>17</sup> Pinijicuenia vaxaitsi bajaraponëbeje itavetsianatsi petsipaebiyavabeje matavëjëa Jesús pelivaisi itsajiviyojavabelia ata. Nexata bajarapacuenia apo tsipaebibeje baja tsane itsamonaejavabelia Jesús pelivaisi, najai bajarapamonae Pedrobeje Juanbeje pecovëta caeepatoyo penavecuacapitsapaejavatatsibeje.

<sup>18</sup> Nexata icatsia Pedrobeje Juanbeje caevëalia pejonenexaliabeje, junaliatsibeje. Nexata jane baja bajarapamonae jumaitsi Pedrobeje Juanbejejavabelia:

—Pëtsa baja icatsia matavëjëa jivi patsipaebaponaamebeje Jesús pelivaisi. Pacoparebeje baja jivi panetsipaebaponaejavabeje Jesús pelivaisi, jai bajarapamonae.

<sup>19</sup> Nexata Pedrobeje Juanbeje jumaitsiabeje bajarapamonaejavabelia:

—Paxamë panijacuata panajamatabëxainare pacuene xanepana pataexanaponaenexabeje Dioso pitabarata. Itsa pacajumecovënëtsipatsibeje paxamë patanitavetsijavamëbeje, nexata apo pajumecovënëtsinëbeje tsipae Dioso patanitorobijavabeje. <sup>20</sup> Acuenebi cajena patacopatsijavabeje jivi patatsipaebaponaejavabeje xua patanijibeje, palivaisi ata pajumetanijibeje, jaibeje Pedrobeje Juanbeje bajarapamonaejavabelia.

<sup>21</sup> Icatsia judíovi pevetsivi orijibia itavetatsibeje jivi petsipaebaponaeyanivabeje Jesús pelivaisi. Bajaraxuacujinae copatatsibeje baja peponaenexabeje. Ajibi peyabarananeconitsia exanaejavanexatsibeje. Tsipaji daxitajivi jumai tsaponae Diosojavabelia:

—Diosomë, bitso ayaijamatabëcuenenëmë, jai tsaponae.

Bajarapacuenia daxitajivi pexaniajamatabëcuene rajuta Diosojavabelia Pedrobeje Juanbeje pexanepanaeyaexanaexabeje apo pecaëjëpaenëmitsi peponaponaejava.

<sup>22</sup> Ponë xanepanaeyaexanatsi Dioso pesaëta pinijicuenene pexanaejavata, bajaraponë penaexanaecujinae xaina baja cuarenta pavaibeje pematatsënëa.

*Pacuenia Dioso pejumecovënëtsivi vajëca Diosojavabelia pecaëjëpaeyaexanaenexatsi Jesús pelivaisi ajumejunavijibia jivi pepaebaponaenexa yabara pelivaisi*

<sup>23</sup> Itsa baja Pedrobeje Juanbeje judíovi pevetsivi copatatsibeje peponaenexabeje, navialiabeje baja itsabelia jinavanapa Dioso pejumecovënëtsivi. Nexata Pedrobeje Juanbeje Jesús pelivaisi jivi petsipaebaponaeyanivabeje sacerdotevi penamatacaitorobivi pitavetsijavatsibeje, navajunupaebabeje Dioso pejumecovënëtsivijavabelia. Navajunupaebabejenua judíovi pijaancianovi ata pitavetsijavatsibeje. <sup>24</sup> Nexata Dioso pejumecovënëtsivi itsa jumetane Pedrobeje Juanbeje penavajunupaebijavabeje, nexata daxita Dioso pejumecovënëtsivi Pedrobana najamatabëcuenejëpaeya vajëca Diosojavabelia. Daxita bajarapamonae pevajëcaejavata Diosojavabelia, jumaitsi mapacueniaje:

—Xamë pinijiDiosomë, nexanaenë cajena itaboxo. Nexanaenë daxita itaboxopijicueneta. Nexanaenë ira ata. Nexanaenë daxita irapijicueneta. Nexanaenë manuamene ata. Nexanaenë daxita manuamenepijicueneta. <sup>25</sup> Xamë Diosomë, bajayata Espíritu Santo

pejamatabëcueneta tajëvelia yapëtaeyaexaname patajasalinainëmi Davidpijinë. Nexata nijajivitonë Davidpijinë tajëvelia nexënato Jesús yabara jumaitsi mapacueniaje:

Itsanacuanëpijivi, pamonaë apo judíovi, bitso anaepanabiabiana. Saya jema najamatabëxainabiabiana pexanaenexa picani xua apo cajëpaetsi pexanaenexa.  
<sup>26</sup> Pinijinacuanë pevetsivi nacaetuatsiana. Tomaranë pevetsivi ata nacaetuatsiana. Bajarapamonae najamatabëxainaena, xamë Diosomë, nijacuene pecatobijianaenexa. Najamatabëxainaenanua pebejioviaexanaenexa Cristo, ponë itorobianimica jivi pecapanepaenexa,

jai bajayata tajëvelia Davidpijinë Espíritu Santo pejamatabëcueneta, Jesús pebejioviaexanaejavanexatsi yabara, jai Pedrohana pevajëcaejavata Diosojavabelia.

<sup>27</sup> Icatsia Pedrohana jumaitsi pevajëcaejavata Diosojavabelia:

—Mapatomarataje Herodesbeje, Poncio Pilatobeje, barënacaetuatabeje itsanacuanëpijivi. Barënacaetuatabeje apo judíovi. Barënacaetuatabeje judíovi ata yajava. Bajarapamonae nacaetuata penajumejaitsinexa pacuenia beyaxuabijitsiatsi nexënato Jesús, ponë athëbëvetsica itorobimica. Bajarapacuenia itsa barënacaetuatabeje, copiapata jane baja xua bajayata tajëvelia Davidpijinë vajunupaeba.

<sup>28</sup> Bajarapamonae nacaetuata pexanaenexatsi daxita pacuenia baja cajena bajayata nexënato tocopatame pexanaenexatsi. <sup>29</sup> Patajatuxanenë, yapëtaneme judíovi pevetsivi patanitavetsijava jivi patatsipaebaponaeyaniva nexënato pelivaisi. Paxanë panijajivinë. Nexata panerajutsianame patanecajëpaejamatabëcuene ajumejunavijibia jivi patatsipaebaponaenexa nexënato pelivaisi. <sup>30</sup> Itsa patomarata patsipaebianajë nexënato pelivaisi, jamatejemayaexanaename piavitanevi. Pinijicuene nexanaejava exanaename jivi peyapëtaenexa bitso ayaijamatabëcuene nexainaenëcuene. Bajarapapinijicuene exanaename nexënato Jesús pejamatabëcueneta, jai Pedrohana pevajëcaejavata Diosojavabelia.

<sup>31</sup> Itsa baja bajarapamonae vereta pevajëcaejava Diosojavabelia, bajarajota ira nanequetajaraba. Daxita bajarapamonae Espíritu Santo tsijamatabëvënëcatsi. Nexata bajarapamonae Espíritu Santo petsijamatabëvënëcaexaetsi, ajumejunavijibia jane baja jivi tsipaebapona Jesús pelivaisi.

*Pacuenia Dioso pejumecovënëtsivi, xua xaina, daxita nacobenaxainaeyaeveta yabara pelivaisi*

<sup>32</sup> Ayaibitsaëtoxaneto Dioso pejumecovënëtsivi najamatabëjëpaeya jinavanapa. Bajarapamonae xua xaina, apo najamatabëxainae caejivi pexainaenexa. Nexata daxita bajarapamonae xua xaina, nacobenaxaina daxita. <sup>33</sup> Nexata apóstolevi asaëya tsipaebabiaba jivijavabelia Jesús pelivaisi. Tsipaebabiaba pacuenia icatsia Dioso asaëyaexanatsi vajatuxanenë Jesús petëpaecujinae. Dioso bitso yavenonabiabatsi daxita bajarapamonae. <sup>34</sup> Nexata bajarapamonae Dioso pejumecovënëtsivi caenë ata apo yajuvënëbejiobi pexainaejava yabara. Tsipaji pamonaë bitso xaina iranë, bonë ata, canajetabiaba. Nexata bajarapamonae xua canajeta, bajarapamatamopalata capatabiaba. <sup>35</sup> Nexata bajarapapalata rajutabiaba apóstolevijavabelia. Nexata juya apóstolevi tsicobetsanabiaba penajuajinavanapaevijavabelia pacuenia baja caejivi canacujitsia namatavenonapona. <sup>36</sup> Bajarapamonaeyajuvënënë itsanë pevënë José, Chiprevënë tunaetota penaexanaenë. Bajaraponë Levípijinë pemomoxiyajuvënënë. Bajaraponë apóstolevi vënërubatsi itsavënë, Bernabé. Bajarapavënë hebreojumeta pejumaitsiyume: “Jivi pejamatabëcuenebarëyayaexanaenë,” pejaijume. <sup>37</sup> Nexata José ata pijaira canajeta. Bajaraxuacujinae José capata pijairamatamopalata. Nexata bajarapapalata rajuta apóstolevijavabelia.

*Pacuenia tēpabeje Ananíasbeje pijava Safirabeje, penajumetsënëtsixaebeje apóstolenë Pedro pitabarata yabara pelivaisi*

<sup>1</sup> José pijaira pecanajetsicujinae, Ananías ata pijava Safirabeje yajuvënëcanajetabeje pijaira. <sup>2</sup> Nexata Ananíasbeje pijavabeje pijairamatamoyajuvënëpalata muetsia copatabeje. Bajaraxuacujinae Ananías peyajuvënëcopatsipalata calia apóstolevijavabelia. Nexata Ananías jumaitsi apóstolevijavabelia:

—Tajaira yajuvënëcanajetajë. Nexata pacarajutatsi daxita bajarapairamatamopalata panetsicobetsanaenexa vajanajuajinavanapaevijavabelia, jai.

<sup>3</sup> Nexata Pedro jumaitsi Ananíasjavabelia:

—Ananías, ¿detsa xuajitsia jumecovënëtame dovathi pecayamaxëitorobijava ne-najumetsënëtsinexa Espiritu Santojavabelia? Xamë baja rovia nijairamatamopalata yajuvënëcopatame. <sup>4</sup> Nijairami necanajetsivajënaeya, nijaira baja cajena picani saicaya. Nijaira necanajetsicujinae ata, xua nijairamatamo pitame, nijajava baja cajena picani saicaya. ¿Detsa xuajitsia nexata mapacuenia neyamaxëitorobijava najamatabëx-ainameje? Èpaxanëjavaberena baja cajena apo najumetsënëtsimë. Najumetsënëtame baja cajena Diosjavabelia ata, jai Pedro.

<sup>5</sup> Ananías itsa jumetane bajarapacuenia Pedro pejumaitsijava, Ananías petëpaenë irata jopa. Nexata daxita pamona vënëlvaisitane bajarapacuenia Ananías petëpaejava, pinijicuenia jamatabëcuenenajunaviaca. <sup>6</sup> Nexata pabota Ananías petëpaenë boca, bajarapaboyarena pevëjëavi jonena. Mataquiona petëpaenë. Bajaraxuacujinae capitsapalia pemëthëtsinexa.

<sup>7</sup> Bajaraxuacujinae bexëa, acueyabi pahorabejecujinae, Ananíaspijinë pijava jonena. Bajarapova abaxë apo yapëtae pamona pevecuatëpaejavatsi. <sup>8</sup> Pedro icatsia yanijoba bajarapovajavabelia. Jumaitsi:

—Netsipaebare. ¿Xaniajai tsabaja? ¿Mapamatamotaje pacanajetamebeje panijairamibeje? jai Pedro.

Nexata bajarapova jumaitsi:

—Xaniajai rabaja. Bajarapacuenia pacanajetajëbeje, jai bajarapova.

<sup>9</sup> Nexata Pedro jumaitsi bajarapovajavabelia:

—¿Detsa xuajitsia amonabeje panajamatabëcuenejëpamebeje panenajumetsënëtsinexabeje Espiritu Santojavabelia? Namuxunaevere. Jumia naviabanajetarubena rabaja amonami pemëthëcaevilia. Bajarapamonae icatsia xamë ata cacaponaelia pecamëthëtsinexa, jai Pedro.

<sup>10</sup> Nexata bajarajota Pedro pitabarata bajarapova ata icatsia petëpaeava irata jopa. Itsa jonena pevëjëavi penaviabanajetarubenaevi, Ananíaspijinë pemëthëcaevilia, caxitajarababuata petëpanucaeva. Nexata icatsia bajarapamonae capitsapalia bajarapova pemëthëtsinexa pamonami pemëthë muxuneneta. <sup>11</sup> Nexata daxita Dioso pejumecovënëtsivi, itsamonae ata, pamona bajarapajivibeje petëpaejava vënëlvaisitanetsi, bitso junava.

*Pacuenia apóstolevi pinijicuene pexanaejavanë exanapona Dioso pesaëta yabara pelivaisi*

<sup>12</sup> Apóstolevi Dioso pesaëta exanapona pinijicuene pexanaejavanë Jerusalén tomarapijivi pitabarata. Daxita Dioso pejumecovënëtsivi nacaetuatabiaba templobo ënëtuatuajëta, Portal de Salomónvënëjavata. <sup>13</sup> Itsamonae, pamona Dioso apo pejumecovënëtsivi, junava penanacaetuatsijava bajarapomonaeta. Itsiata daxita Jerusalén tomarapijivi pexaniacuenia yaiyataeyabiaba Dioso pejumecovënëtsivijavabelia. <sup>14</sup> Pevajënaeyabelia jivibitsaëtoxaneto jumecovënëtaponna Jesús pelivaisi, pebijivi, petiriavi ata. Nexata daxita bajarapamonae nanacaetuatabiaba Dioso pejumecovënëtsivijavabelia. <sup>15</sup> Apóstolevi Dioso pesaëta pinijicuene pexanaponaexae, itsamonae tocapatabiabatsi piavitanevi callejavaberena. Nexata piavitanevi tojebabiabatsi callejavata camata. Itsamonae tulimanëta tojebabiabatsi. Nexata Pedro itsa najetaruca callejava, piavitanevi jitsipabiaba Pedro pitacaënae ata petsijopaejavatsi pejamatejemanexa bajarapamonae piavitanejavavecua. <sup>16</sup> Nexata jivibitsaëtoxanetonë patabiaba Jerusalén tomaraberena imoxoyo

penaetomaraxijavaverena penaropobivi. Bajarapamonae Pedro tocapatabiabatsi piavitanevi. Tocapatabiabatsinua bitso dovathi peyajavajinavanapaevi. Nexata Pedro daxita bajarapamonae jamatejemayaexanabiaba.

*Pacuenia apóstolevi taicatsi penaneconitsiaexanaenexatsi yabara pelivaisi*

<sup>17</sup> Sacerdotevi pepo penamatacaitorobinē yajavaponapona saduceovi. Nexata daxita bajarapamonae pinijicuenia anaepana apóstolevijavabelia. Tsipaji cuenecaēbatsi. <sup>18</sup> Bajaraxuata taicatsi apóstolevi. Jebatsi penaneconitsivi pejebabiabibota. <sup>19</sup> Itsiata bailsi jane bajarapameravi Dioso pijaängel apóstolevi tobaupanatsi penaneconitsivi pejebabiabibo baupanē. Nexata ángel apóstolevi matacapitsapaliatsi. Angel jumaitsi apóstolevijavabelia:

<sup>20</sup> —Paponare templobojavabelia. Patsipaebianame jivijavabelia mapapejanalivaisi, Dioso vajanacayjavaponaponaevajava, jai ángel apóstolevijavabelia.

<sup>21</sup> Apóstolevi itsa jumetane bajarapacuenia ángel pejumaitsijava, nexata ajena mat-acabi tsina, apóstolevi ponalia templobojavabelia. Nexata apóstolevi templobota Jesús pelivaisi jivi tsipaebanubena.

Nexata pijinia bajarapaepatota sacerdotevi pepo penamatacaitorobinē peyajavaponaponaevi barēnacaetuata itsabota. Nexata junata penacaetuatsinexa judíovi pijaancianovi. Junatanua penacaetuatsinexa judíovi pecujarubivi. Nexata bajarapamonae jumaitsi templobopijipolicíavijavabelia:

—Panetosivaponaremelia apóstolevi penaneconitsivi pejebabiabibojavabelia. Nexata panetobarēpatsiaremena maberenaje, jai.

<sup>22</sup> Nexata templobopijipolicíavi itsa ponalia, apo caxitajarabi apóstolevi penaneconitsivi pejebabiabibota. Nexata apo pecaxitajarabixae, naviabarena cobesa petsipaebinexa penacaetuatsivijavabelia. <sup>23</sup> Nexata templobopijipolicíavi jumaitsi bajarapamonaejavabelia:

—Itsa papaliajē penaneconitsivi pejebabiabibojavabelia, daxitabaupanē xaniavaetsia nabaupaxatabanubena. Bajarajota nubena picani pevetanubenaevi baupanē. Itsiata bailsi jane itsa pabaupatajē, caenē ata apo ecae bajarapabo ēnētuaatujēalia, jai policíavi.

<sup>24</sup> Nexata templobopijipolicíavi pijacapitán, sacerdotevi penamatacaitorobivinua, itsa jumetane bajarapacuenia policíavi pejumaitsijava, bajarapamonae jamatabējumaitsi:

—¿Detsamēra nexata itsi apóstolevi? jamatabējai bajarapamonae.

<sup>25</sup> Nexata bajarapaepatota itsanē pebi parena, templobojavaverena peponaenē. Jumaitsi bajaraponē bajarapamonaejavabelia:

—¡Panejumetaema! Pamonae pacajunuame penaneconitsivi pejebabiabibota, bajarapamonae cajena nubena templobotalia. Jivijavabelia tsipaebanubena Jesús pelivaisi, jai bajaraponē.

<sup>26</sup> Nexata templobopijipolicíavi pijacapitán barēlia pijajivi. Nexata policíavi apóstolevi xaniavaetsia saya caponarenatsi. Tsipaji jamatabējumaitsi:

—Anaeya itsa taicaejitsipatsi apóstolevi, nexata jivi nacabaraanaepanaejitsipa. Nexata nacatseconaejitsipa ibotonēta, jamatabējai policíavi.

<sup>27</sup> Itsa baja apóstolevi caparenatsi, nexata nubatsi sacerdotevi penamatacaitorobivi pitabarata, judíovi pijaancianovinua pitabarata, judíovi pecujarubivinua pitabarata. Nexata bajarajota sacerdotevi pepo penamatacaitorobinē jumaitsi apóstolevijavabelia:

<sup>28</sup> —Paxanē baja cajena pacajumaitsitsi: “Pētsa baja matavējēa jivi patsipaebame Jesús pelivaisi,” pacajaitsi. ¿Itsiata tsabaja rovia apo panejumecovēnētsimē? Pataema jane pacuenia Jerusalén tomarata yacājēpapona panetsipaebilivaisi. Paxamē jamatabēpaneneconitame Jesús pebeyaxuabijavatsi yabara, jai sacerdotevi pepo penamatacaitorobinē apóstolevijavabelia.

<sup>29</sup> Nexata sacerdotevi pepo penamatacaitorobinē bajarapacuenia pejumaitsixae, Pedro, itsaapóstolevi yajava, jumaitsi bajarapamonaejavabelia:

—Namatavenonatsi vajajumecovënëtsinexa xua vajaDioso nacaitoroba. Nexata Dioso vajanacaitorobicuenia, saicayacuenia jivi itsa nacaitoroba, apo bejumecovënëtsitsi. <sup>30</sup> Paxamë Jesús pabeyaxuabame pamatacabita pacobematabiabarutame cruzajavabelia. Vajasalinaivimi pijaDioso Jesús icatsia asaëyaexanatsi petëpaecujinae. <sup>31</sup> Nexata Dioso jumaiti Jesúsjavabelia: “Ecare tacujanenia. Xamë rabaja ayaijamatabëcuenenëmë. Jivi nevetsinë tsane. Necapanepaenënu tsane,” jai Dioso Jesúsjavabelia. Bajarapacuenia Dioso jumaiti Jesúsjavabelia vaxaitsi judíovitsi pibisiacuene vajaexanabiabijava vajacopabijavanexa yabara jumaiti. Vajanajamatabëcuene pënëyorotsijavanexa ata Diosojavabelia yabara jumaiti. Tsipaji Dioso jitsipa Jesús pejamatabëcueneta daxitajivi aneconijibia petaenexa. <sup>32</sup> Nexata bajarapacuenia yabara jivijavabelia itsa patsipaebaponajë, Espíritu Santo paneyajava tsabiabi. Dioso cajena rajutapona Espíritu Santo pamona jumecovënëta Dioso, jai Pedro, itsaapóstolevi yajava, daxita bajarapamonaejavabelia.

<sup>33</sup> Nexata daxita bajarapamona itsa jumetane bajarapacuenia Pedrobana pejumaitisijava, nexata bitso anaepana. Jamatabëbeyejebatsi picani apóstolevi. <sup>34</sup> Itsiata apo beyejebitsi. Tsipaji bajarapamonaeyajuvënënë judíovi pecujarubinë, Gamalielvënënë, nonotapuna daxita penajuavi pitabarata. Bajaraponë fariseonë, Dioso Moiséspijinëta penajumecopatsilivaisi pecujarubinë. Daxitajivi peyayataenëtsi. Nexata Gamaliel itoroba apóstolevi caepatoyo pepitsapaenexalia. <sup>35</sup> Nexata apóstolevi caepatoyo pepitsapaejavatalia, pecovëta, Gamaliel jumaiti penajuavijavabelia:

—Tajamona judíovi, panajamatabëxainare xaniavaetsia. Pëtsa paexaname pacuenia panajamatabëxainame mapamonaejavabeliaje. <sup>36</sup> Panajamatabënapire pacuenia Teudasvënënëmi bajayata exanatsi. Bajaraponëmi picani nacua pevetsinënexa, ayaijamatabëcuenenë bitso jamatabënaexana. Nexata picani pijajivinexa pënajinavanapatsi cuatrocientos ponëbeje. Itsiata Teudaspijinëmi beyaxuabatsi. Bajaraponëmi pepënajinavanapaevitsi, pamona pijajivinexa picani, daxita nacayajateca. Nexata copiaruca baja bajarapacuenemi. <sup>37</sup> Bajaraxuacujinae icatsia pamatacabi gobierno pejamatabëcueneta daxitajivi namataëjëtsi, Judasvënënëmi, Galilea nacupijjinëmi, bajarapacuenia pijinia jivi ayabitsaëtoxfaneto pënajinavanapatsi. Bajaraponëmi ata beyaxuabatsi. Nexata daxita pepënajinavanapaevitsi nacayajateca. Nexata baja copiaruca bajarapacuenemi. <sup>38</sup> Bajaraxuata nexata mapamonaaje apóstolevi yabara pacatsipaebijitsiatsi. Pëtsa paitsacueniabame bajarapamona. Itsa bajarapamona saya mapanacuapijivi pejamatabëcueneta tsipaebavanapaje, bepíjia peneta bajarapamona petsipaebilivaisi vereverecaena. <sup>39</sup> Itsa jume, Dioso pejamatabëcueneta bajarapamona bajarapalivaisi jivi itsa tsipaebavanapa, nexata acuenebi tsipae paxamë bajarapacuenia panevereverecaëyaexanaejava. Belia ayaineconi panatsiexanaejitsipame Diosojavabelia, jai Gamaliel daxita penajuavijavabelia.

<sup>40</sup> Nexata daxita bajarapamona jumecovënëtsi Gamaliel. Apóstolevi icatsia caevëlia pejonexalia junaliatsi. Bajaraxuacujinae apóstolevi, caenë canacujitsia, ayaiacuenia jumaititibabeponatsi penaneconitsivi pejumaconitabiabimacata. Itavetatsi icatsia matavëjëa jivi petsipaebiyanaiva Jesús pelivaisi. Bajaraxuacujinae copabatsi jane baja peponaenexa. <sup>41</sup> Apóstolevi nexata pitsaparena bajarapabovëca. Barëyaya ponalia apóstolevi. Tsipaji Dioso tocopatatsi bajarapacuenia bepejiobiaexanaponaenexatsi Jesús pijajivixae. <sup>42</sup> Nexata caematacabi canacujitsia templobota, bonëjava ata, apóstolevi asaëya Jesús pelivaisi tsipaebapona jivijavabelia. Apóstolevi jivijavabelia tsipaebapona pexanialivaisi, Jesucristo, ponë Dioso itorobica jivi pecapanepaenexa, pelivaisi.

## 6

### *Pacuenia itapetatsi siete ponëbeje díaconovinexa yabara pelivaisi*

<sup>1</sup> Jesús pelivaisi pejumecovënëtaponaevi, pevajënaeyabelia ayabitsaëtoxfanetonë tsapona. Bajarapamatacabi Jesús pelivaisi jumecovënëtapona griegovi, judíovi ata.

Nexata pamonajivi pevecuatēpaevanētsi, pamonae bitso bejiobi, bajarapamonaejavabelia apóstolevi rajutabiaba penamatavenonaejavanē. Nexata Jesús pelivaisi penajua-jumecovēnētsivi, pamonae griegovi, jumaitsi judíovijavabelia:

—Caematacabi canacujitsia apóstolevi pamonajivi pevecuatēpaevanētsijavabelia, tsi-cobetsanabiaba pexaejavanexa. Nexata xuavajētonē panijaviriavijavabelia rajutabiaba, bajaraxuavajētonē patajaviriavijavabelia apo rajutabiabi, jai griegovi judíovijavabelia.

<sup>2</sup> Doce ponēbeje, apóstolevi, najamatabēcuenejēpa pacuenia exanaejitsia judíovibeje griegovibeje penacobecaēbabiabixae. Nexata apóstolevi junata penacaetuatsinexa daxita pamonae Jesús pelivaisi pejumecovēnētsivi. Nexata baja itsa nacaetuata daxita bajarapamonae, apóstolevi jumaitsi bajarapamonaejavabelia:

—Tajamonae, paxanē itsa patsicobetsanabiabijitsipajē pexaejava bitso penamatavenonaevijavabelia, nexata apo panecuenecaējēpabiabi tsipae jivi patatsipaebinexa Dioso pitorobilivaisi. <sup>3</sup> Nexata paitapetsianame siete ponēbeje, paxamēyajuvēnēvi. Paitapetsianame papebijivi caejamatabēcuene pexainaevi, bitso petsijamatabēvēnēcaevitsi Espíritu Santo, bitso peyapētaeyaexanaevitsi Espíritu Santo pejamatabēcuene. Bajarapamonae paitorobianame bepejiobivijavabelia petsicobetsanabiabinexa penamatavenonaecuene. <sup>4</sup> Nexata paxanē saicaya patsitecavanapaenajē patavajēcabiabijava Diosojavabelia. Patsipaebabiabianajēnua Dioso pitorobilivaisi jivijavabelia, jai apóstolevi penacaetuatsijavata daxita Jesús pelivaisi pejumecovēnētsivijavabelia.

<sup>5</sup> Nexata daxita pamonae nacaetuata, itsa jumetane bajarapacuenia apóstolevi pejumaitsijava, tsitanepanatsi. Nexata bajarapamonae itapeta mapamatabēxēyoje. Itapeta Estebanvēnēnē, ponē bitso Dioso pejumecovēnētsinē, Espíritu Santo petsijamatabēvēnēcaenētsi. Itapeta Felipevēnēnē. Itapeta Prócorovēnēnē. Itapeta Nicanorvēnēnē. Itapeta Timónvēnēnē. Itapeta Parmenasvēnēnē. Itapeta Nicolásvēnēnē. Nicolás itsanacuapijinē, Antioquía tomarapijinē. Bajaraponē apo judionē. Itsiata judíovicuenia Dioso najumecovēnētaponapona. <sup>6</sup> Daxita bajarapamatabēxēyo pitapetsicujinaetsi, nubatsi apóstolevi pitabarata. Nexata pamonae itapetatsi, caenē canacujitsia pematabocotojumavereca apóstolevi nacobebuatanubena Diosojavabelia petovajētsijavata.

<sup>7</sup> Nexata jane baja apóstolevi, itsamonae yajava, Dioso pitorobilivaisi jivi tsipaebapona Jerusalén tomarata. Nexata Jerusalén tomarata ayaibitsaētoxfaneto tsaponae Jesús pelivaisi pejumecovēnētsivi. Sacerdotevi ata ayaibitsaēto jumecovēnētaponapona Jesús pelivaisi.

*Pacuenia Esteban vaetabatsi penaneconitsiaexanaenexatsi yabara pelivaisi*

<sup>8</sup> Dioso bitso yavenonabiabatsi Esteban. Nexata Esteban Dioso pesaēta pinijicuene pexanaejava, exanabiaba. Daxitajivi pitabarata Dioso pesaēta pinijicuene pexanaejava, Esteban exanapona. <sup>9</sup> Nexata itsamonae Esteban anaeya jumenotatsi. Bajarapamonae nacaetuatabiaba judíovi penacaetuatabiabibota. Bajarapabo pevēnē Esclavos Libertos. Bajarapamonae caenacuaverena apo pepatsivi. Itsamonae Cirene nacuaverena pepatsivi. Itsamonae Alejandría tomaraverena pepatsivi. Itsamonae Cilicia nacuaverena pepatsivi. Itsamonae Asíavēnē nacuaverena pepatsivi. Bajarapamonaeyajunēnēvi Esteban anaeya jumenotatsi. <sup>10</sup> Nexata bajarapamonaeyajuvēnēvi Esteban anaeya itsa jumenotatsi, Espíritu Santo yavenonatsi pejumecanaviatsijavata bajarapamonaejavabelia. Bajaraxuata nexata daxita bajarapamonae Esteban apo jumecanaviatsicapanepaetsi juya. <sup>11</sup> Nexata pamonae Esteban anaeya jumenotatsi, matamota itsamonae Esteban peneconitsinexatsi jivijavabelia. Nexata pamonae matamotatsi penajumetsēnētsinexa Esteban yabara, najumetsēnētsia jane baja jumaitsi jivijavabelia:

—Pajumetaniji pibisiacuenia Esteban pebaracuaicuajitsabiabijava Moiséspijinē. Pajumetanijinua pibisiacuenia pebaracuaicuajitsabiabijava Dioso ata, jai bajarapamonae Esteban yabara.

<sup>12</sup> Bajarapacuenia bajarapamonae pejumaitsixae, nexata daxitajivi anaepana. Judíovi pijaancianovi ata anaepana. Judíovi pecujarubivi ata anaepana Estebanjavabelia. Nexata daxita bajarapamonae Esteban cujibarenatsi. Vaetabatsi. Caponaliatsi penutsinexatsi sacerdotevi penamatacaitorobivi pitabarata, judíovi pijaancianovi ata pitabarata, judíovi pecujarubivi ata pitabarata. <sup>13</sup> Nexata icatsia bajarapamonae junata pamonae jane baja matamota najumetsënëtsiaya peneconitsinexatsi Esteban. Nexata bajarapamonae itsa pata, jumaiti Esteban yabara:

—Mara ponëje Esteban apo cueranae Dioso apo pejitsipaecuenia pebaracuaicuaijaitiabiabijava templobo. Apo cueranaenua Dioso Moiséspijinëta penajumecopatsilivaisi ata pebaracuaicuaijaitiabiabijava. <sup>14</sup> Pajumetaniji maponëje pejumaitisijava: “Jesús, Nazaret tomarapijinë, xuabianica mapatemploboje. Dioso Moiséspijinëta penajumecopatsilivaisi ata vajajumecovënëtsijava, nacacopabiaexanaena Jesús,” jai maponëje, jai najumetsënëtsiaya Esteban yabara pamonae matamotatsi.

<sup>15</sup> Nexata sacerdotevi penamatacaitorobivi, judíovi pijaancianovi ata, judíovi pecujarubivi ata, naëcobarëcëpatsi Esteban. Nexata bajarapamonae Esteban pitabaranaëcobarëcëpaejavatatsi, betsita ángelnëitabara tsarucae Esteban.

## 7

### *Pacuenia Esteban jumecanaviata sacerdotevi pepo penamatacaitorobinë yabara pelivaisi*

<sup>1</sup> Sacerdotevi pepo penamatacaitorobinë jumaiti Estebanjavabelia:

—¿Xaniajai tsabaja? ¿Jumaitsimë tsabiabi pacuenia mapamonae caneconitsiajumaitisije? jai sacerdotevi pepo penamatacaitorobinë.

<sup>2</sup> Nexata sacerdotevi penamatacaitorobivijavabelia, judíovi pijaancianovijavabelia ata, judíovi pecujarubivijavabelia ata, Esteban jumaiti mapacueniaje:

—Tajamonae, patanevetsivimë, panenamuxunaevere. VajaDioso bitso ayaijamatábëcuenenë. Tsitanaitajëta baja cajena bajayata vajasalinainë Abrahampijinëjavabelia. VajaDioso tsitanaitajëta Abrahampijinëjavabelia abaxë Abrahampijinë itsa ponapona Mesopotamia nacuata. Bajarapanacuata Abrahampijinë ponapona pevarapaevajënaeya Harán nacuayabelia. <sup>3</sup> Dioso jumaiti Abrahampijinëjavabelia: “Nijairavecu ponare. Daxita nijamonae ata vecuaponare. Ponare pairajavabelia catsitajëtsianatsi,” jai Dioso Abrahampijinëjavabelia. <sup>4</sup> Bajaraxuata Abrahampijinë Caldea nacuajavaverena pona. Nexata pata Harán nacuayaberena. Bajarapanacuata Abrahampijinë itsa ponapona, nexata paxapijinëmi Harán nacuata vecuatëpatsi. Paxapijinëmi pevecuatëpaecujinaetsi, Dioso icatsia Abrahampijinë varapaeyaexanatsi mapairajavaberena, itsajota vaxaitsi aeconoxae jinavanapatsi. <sup>5</sup> Itsiata Abrahampijinë Dioso apo rajutsitsi itsairayo ata pepo pijairanexa. Jume cajena. Tsiquiriirayo ata apo rajutsitsi. Itsiata tajëvelia Dioso najumecapanepaeya jumaiti Abrahampijinëjavabelia: “Carajutsianatsi nijairanexa daxita mapaira tanemeje. Nevënamuto nexi bajarapaira xainaena,” jai Dioso. Abaxë Abrahampijinë pexi itsa apo xinae, bajarapacuenia Dioso najumecapanepaeya jumaiti Abrahampijinëjavabelia. <sup>6</sup> Icatsia Dioso tajëvelia jumaiti Abrahampijinëjavabelia: “Itsamatacabi nemomoxi mapairaje vecuaponaena. Nexata najinavanapaena itsanacuapijivi pijanacuata. Bajarapanacuata nemomoxi itsanacuaverena pepatsivixae tsane, bajarapanacuapijivi pijajivi exanaenatsi. Bepejibicuenia nacuenebiaexanabianatsi. Cuatrocientos pavaibeje nemomoxi bepejibicuenia jinavanapaena bajarapanacuatalia. <sup>7</sup> Xanë nexata naneconitsiaexanaenajë panacuapijivi nemomoxi pijajivi exanaenatsi. Bajaraxuacujinae nemomoxi bajarapanacuavecua pitsapaena. Nexata icatsia mapanacuayaberena patsiana. Nexata mapanacuataje xanëjavaberena najamatabëcuenecopatsiaya navajëcabiabiana,” jai baja cajena tajëvelia Dioso Abrahampijinëjavabelia. <sup>8</sup> Nexata Abrahampijinë Dioso itorobatsi peperabëcaucutaponaenexa daxita papebinacuetoxi naexana Abrahampijinë pijabota, bailsi peboupiperabëcaucutaponaenexa. Bajarapacuenia Abrahampijinë pexanaenexa Dioso itorobatsi Abrahampijinë penajamatabënapitabiabinexa Dioso peyavenonaeyapaebijavatsi. Nexata

Abrahampijinē pijava vecuanaexanatsi pebinēyo. Bajaraponēyo pevēnē Isaac. Nexata baja penacuetonēyo penaexanaecujinae, ocho pamatacabibeje itsa xaina, Abrahampijinē boupiperabēcaucuta pexēnatonēyo pacuenia Dioso itorobatsi. Bajaraxuacujinae icatsia juya Isaacpjinē pexēnato xaina. Isaacpjinē pexēnato pevēnē Jacob. Bajara icatsia pacuenia Isaacpjinē ata boupiperabēcaucuta pexēnatonēyo. Bajaraxuacujinae icatsia Jacobpjinē pexi xaina doce ponēbeje. Bajara icatsia pacuenia Jacobpjinē ata boupiperabēcaucuba pexi. Bajarapadoce ponēbejejavaverena penaexanaponaevi doce pabitsaētobeje naexana, jai Esteban sacerdotevi penamatacaitorobivijavabelia, judíovi pijaancianovijavabelia ata, judíovi pecujarubivijavabelia ata.

<sup>9</sup> Icatsia Esteban jumaitsi bajarapamonaejavabelia:

—Nexata Jacobpjinē pexi, ponēbeje nacaemonaemi, vaxaitsi vajasalinaivi. Bajarapamonaemi pejuyapjinē Josépjinē. Nexata Josépjinē cuenecaēbatsi pematapijivi. Bajaraxuata Josépjinē pecaponaenexatsi Egipto nacuyabelia, canajetaxuabatsi pematapijivi. Itsiata Josépjinē Dioso yajavaponaponatsi. <sup>10</sup> Nexata Josépjinē bepejiobiaexanaejavaminexatsi Egipto nacuata, vecuapanepaponapona. Dioso daxitacuenē Josépjinē Egipto nacuata yapētaeyaexanaponatsi. Bajaraxuata Egiptonacua pevetsinēmi, Josépjinē pexaniajamatabēcuenia tanetsi. Nexata Egiptonacua pevetsinēmi tocopatatsi Josépjinē pecobenaevetsinexa Egiptonacua. Egiptonacua pevetsinēmi pijabo ata peto-evetsinexa, Josépjinē tocopatatsi, jai Esteban bajarapamonaejavabelia.

<sup>11</sup> Icatsia Esteban jumaitsi bajarapamonaejavabelia:

—Nexata pinijianiboxaneto pata daxita Egipto nacujava, Canaán nacujava ata. Nexata bitso bejiobi jivi. Canaán nacuata vajasalinaivi jane baja apo xinae pexaejava. <sup>12</sup> Itsiata Egipto nacuata janibovajēnaeya, Josépjinē pecomuaquejebijava ayaijava xani-avaetejeba trigoxu. Nexata Jacobpjinē vēnētane Egipto nacuata pexaejava pexinaejava trigoxu. Nexata Jacobpjinē pexi itoroba Egipto nacujavabelia pesivaponaenexalia pexaejava. Bajarapanamuto ponalia, copiaya jane baja pexaejava pesivaponaenamutolia Jacobpjinē pexi, pamonaē jane baja vajasalinaivi. Itsiata Jacobpjinē pexi pejuyapjinējavata comuacae ata, apo yapētae pejuyapjinēcuene. <sup>13</sup> Bajaraxuacujinae vajasalinaivi icatsia cotocaevi panamuto itsa sivaponalia pexaejava, nexata Josépjinē jumaitsi pematapijivijavabelia: “Xanē raja Josépjinē panejuyapjinēnē,” jai Josépjinē. Bajaraxuata nexata Egipto nacuaepevetsinēmi yapētane bajarapamonaē Josépjinē pjamonaecuene. <sup>14-15</sup> Nexata Josépjinē tonajumexuaba paxa Jacobpjinē penavarapaenexa Egipto nacuyabelia. Nexata Jacobpjinē daxita pexi, pemomoxi yajava, varapa Egipto nacuyabelia. Nexata Jacobpjinē, daxita pexi, pemomoxi yajava, itsa pata Egipto nacuata pejinavanapaenexa, nanamataējēta setenta y cinco pajivibeje. Bajaraxuacujinae Egipto nacuata Jacobpjinē tēpa. Pexi ata vajasalinaivimi jane baja bajarapanacuata icatsia tēpa. <sup>16</sup> Bexēajavabelia vajasalinaivimi jane baja petēpaevimi pesijebinexatsi ibovajuta, Siquem tomarata, sicaponatsi Siquem tomarabelia. Bajarapaibovajuta cajena jivi petēpaevi, jebabiaba. Abrahampijinē abaxē itsa asaē vajasalinaivimi pevajēnaeya, comuata bajarapaibovaju. Hamorpjinē pexita comuata bajarapaibovaju, jai Esteban sacerdotevi penamatacaitorobivijavabelia, judíovi pijaancianovijavabelia ata, judíovi pecujarubivijavabelia ata.

<sup>17</sup> Icatsia Esteban jumaitsi bajarapamonaejavabelia:

—Nexata baja itsa panepapona bejamatabēcuenē trescientos veinte pavaiibeje vajasalinaivimi pejinavanapaecujinae Egipto nacuata, nexata Abrahampijinē pemomoxi, vajasalinaivimi jane baja, ayaibitsaēttoxaneto tsaponae Egipto nacuata. Nexata jane baja pijinia imoxoyo pevajēnae tsaponae pecopiapatsinexa pacuenia Dioso pexaniajaijumeta najumecapanepaeya jumaitsi Abrahampijinējavabelia, bailsi jane baja Dioso pejamatabēcueneta vajasalinaivimi pejuvetsinexatsi Egipto nacuverena pejinavanapaenexa Canaán nacuata. <sup>18</sup> Nexata bajarapamatacabi itsanē junua pevetsinexa Egiptonacua. Ponē Egiptonacua pejanaevetsinē, bajaraponē apo yapētae Josépjinē Egiptonacua pevetsinēmicuene. Tsipaji baja bajayata, bajaraponē pevajēnaeya, tēpa

baja Josépíjinë. <sup>19</sup> Nexata Egiptonacua pejanaevetsinë, vajasalinaivimi apo itaxutotsoniataetsi. Ayaicuenia nacuenebiaexanabiabatsi. Bejiobiaexanabiabatsinua. Vajasalinaivi pexi pebinëyo itsa tonaexanatsi, nacuaevetsinë pejamatabëcueneta penetsiaexanabiabatsi bajarapacuenia petëpaenexa pebinacuetoxi. <sup>20</sup> Bajarapamatacabi naexana Moiséspíjinë. Moiséspíjinë bitso pexanianacuetonëyo. Dioso barëya tanetsi. Nexata Moiséspíjinë penaexanaecujinae, paxabeje penabeje muetsia evetatsi bota acueyabi pajuametobeje. <sup>21</sup> Bajaraxuacujinae Moiséspíjinë paxabeje penabeje xua-batsi baja. Nexata nacuaevetsinë pexënatoyo Moiséspíjinë pitatsi nacoxyabijitsiatsi. Nexata nacuaevetsinë pexënatoyo Moiséspíjinë vitsatatsi pexënatonëyocuenia. <sup>22</sup> Nexata Moiséspíjinë cujarubatsi daxitacuene, xua Egipto nacuapijivi yapëtane. Nexata Moiséspíjinë bitso yapëtane livaisi petsipaebinexa jivijavabelia. Pexanaejava ata pecobeta bitso yapëtane, jai Esteban sacerdotevi penamatacaitorobivijavabelia, judíovi pijaancianovijavabelia ata, judíovi pecujarubivijavabelia ata.

<sup>23</sup> Icatsia Esteban jumaitsi bajarapamonaejavabelia:

—Itsa baja Moiséspíjinë cuarenta pavaibeje xaina penaexanaecujinae, sivanajamatabëxaina petaenexa pijamonae itsajota jinavanapa. <sup>24</sup> Nexata baja Moiséspíjinë pona petaenexa pijamonae. Nexata baja Moiséspíjinë itsa ponapona panacuata pijamonae jinavanapa, Moiséspíjinë pitabëta Egipto nacuapijinë tobejiobiaexanatsi pijamonaenë. Nexata Moiséspíjinë bajarajota pijamonaenë yamatamobeyaxuaba Egipto nacuapijinë. <sup>25</sup> Moiséspíjinë nexata jamatabëjumaitsi: “Daxita tajamonae, Israelpíjinë pemomoxi, nesivajamatabëjumaitsi tsane: ‘Moisés cajena nacayavenonaena vajavecuapitsapaenexa Egiptonacua,’ nesivajamatabëjai tsane,” jamatabëjai picani Moiséspíjinë. Itsiata baitsi jane Moiséspíjinë pijamonae bajarapacuenia apo sivajamatabëjumaitsi. <sup>26</sup> Moiséspíjinë pebeyaxuabicujinae Egipto nacuapijinë, icatsia meravia pitsijavata, Moiséspíjinë caxitajaraba anijanëbeje penabejavatabeje. Bajaraponëbeje Moiséspíjinë ëpijamonaenëbeje, Israelpíjinë pemomobeje. Nexata Moiséspíjinë xaniavaetsia itaveta penabeyanivabeje matavëjëa. Jumaitsi: “¡Panabejitsipamebeje! Panapijamonaenëmëbeje raja. ¿Detsa xuajitsia panabiamebeje?” jai Moiséspíjinë. <sup>27</sup> Nexata ponë matapita penabejavabeje, torotajarabatsi Moiséspíjinë. Bajaraponë jumaitsi Moiséspíjinëjavabelia: “¿Jipatsa catocopata patanevetsinënexamë? ¿Jipatsa catocopata, pibisiacuene itsa paexanjë, pataneconitsiaexanabiabinexamënu? <sup>28</sup> ¿Nebeyaxuabijitsiamë tsaja icatsia xanë ata pacuenia canivi beyaxuabame Egipto nacuapijinë?” jaitsi Moiséspíjinë pijamonaenë. <sup>29</sup> Nexata Moiséspíjinë itsa jumetane bajarapacuenia pejumaitsijavatsi pijamonaenë, nexata Moiséspíjinë najetabajirava Madián nacuyavabelia. Bajarapanacuatalia ponapona. Nexata bajarapanacuatalia Moiséspíjinë nacojioba. Xaina anijanëbeje pexënatobeje, jai Esteban sacerdotevi penamatacaitorobivijavabelia, judíovi pijaancianovijavabelia ata, judíovi pecujarubivijavabelia ata.

<sup>30</sup> Icatsia Esteban jumaitsi bajarapamonaejavabelia:

—Bajaraxuacujinae icatsia cuarenta baja pavaibeje itsa panepa Moiséspíjinë peponaponaecujinae Madián nacuata, Dioso tsitanaitajëtatsi beángelnëcuenia. Bajarapacuenia tsitanaitajëtatsi petusato nacuata, Sinaivënëtsuto canacujitsita. Tsiquirinaemëyo petajueyecaecotia tuatuajëta, tsitanaitajëtsitsi Dioso Moiséspíjinë. Itsiata tsiquirinaemëyo apo veriajavitsi. <sup>31</sup> Moiséspíjinë itsa tane, jamatabëcuenenabenajaca. Nexata cujitalia xaniavaetsia imoxoyo petaenexa tsiquirinaemëyo petajueyecaecotia. Nexata bajarapacotiajavaverena Dioso jumaitsi Moiséspíjinëjavabelia: <sup>32</sup> “Xanë raja nijasalinaivimi pijaDiosonë. Abrahampíjinë, Isaacpíjinë ata, Jacobpíjinë ata, pijaDiosonë,” jai Dioso. Nexata bajarajota Moiséspíjinë neconecojai pecajunavi. Apo naëcotsilia baja icatsia matavëjëa. <sup>33</sup> Nexata icatsia bajarapacotiajavaverena Dioso jumaitsi Moiséspíjinëjavabelia: “Nataxujonore nijazapato. Tsi-paji raja taitabarata nucame. <sup>34</sup> Taniji rabaja tajajivi nijamonae Egipto nacuata bitso bepejiobicuenia pejinavanapaejava. Jumetaniji bajarapamonae penatsinueyabiabijava. Nexata runaicajë bajarapamonae tajutsinexa Egipto nacuverena. Naxanitsia. Caitorobijitsiatsi Egipto nacuyavabelia,” jai

Dioso Moiséspijinējavabelia tsiquirinaemēyo petajueyecaecotiajavaberena, jai Esteban sacerdotevi penamatacaitorobivijavabelia, judíovi pijaancianovijavabelia ata, judíovi pecujarubivijavabelia ata.

<sup>35</sup> Icatsia Esteban jumaitsi bajarapamonaejavabelia:

—Nexata Moiséspijinē Dioso itorobatsi peponaenexa Egipto nacuayabelia, vajasalinaivimi Egipto nacuata pebejiobiaexanabiabijavatsivecua pejutsinexa Egipto nacuaverena. Moiséspijinē peponaevajēnaeya Egipto nacuayabelia, pamatacabi abaxē Moiséspijinē ponapona panacuata vajasalinaivimi jinavanapa, bajarapamatacabi vajasalinaivimi Moiséspijinē navecuaitavetatsi. Vajasalinaivimi jumaitsi Moiséspijinējavabelia: “¿Jipatsa catocopata patanevetsinēnexamē? ¿Jipatsa catocopata, pibisiacuene itsa paexanjē, pataneconitsiaexanabinexamēnua?” jai vajasalinaivimi. Bajarapacuenia vajasalinaivimi navecuaitavetsi ata, itsiata Dioso itorobatsi Moiséspijinē peponaenexa vajasalinaivimijavabelia. <sup>36</sup> Moiséspijinē nexata pona Egipto nacuayabelia. Nexata Egipto nacuata Moiséspijinē Dioso pesaēta pinijicuene pexanaejava, exanapona. Bajaraxuacujinae Moiséspijinē Egipto nacuaverena vajasalinaivimi jane baja matacana-jetaruca. Nexata Moiséspijinē epatuarena Rojovēnē manuamene maxēranajavata, Dioso pesaēta pinijicuene pexanaejava exana. Bajaraxuacujinae cuarenta pavaibeje itsa jinavanapa petusato nacuata, itsajavanē icatsia Dioso pesaēta pinijicuene pexanaejavanē, Moiséspijinē exanapona. <sup>37</sup> Bajarapamatacabi cajena Moiséspijinē jumaitsi vajasalinaivimijavabelia: “Pacuenia xanē Dioso nitoroba Diosojumelivaisi jivi tatsipaebinēnexa profetanēnexamē, bajarapacuenia Dioso pacatoitorobianica itsanē profetanē Diosojumelivaisi papecatsipaebinēnexa. Bajaraponē paxamēyajuvēnēnē tsane. Bajaraponē pajumecovēnētsianame,” jai cajena Moiséspijinē bajayata tajēvelia vajasalinaivimijavabelia Jesús yabara. <sup>38</sup> Moiséspijinē barēnacaetuata vajasalinaivimi petusato nacuata, Sinaivēnē tsutomuxuneneta. Nexata Sinaivēnē tsutojumabetsia caenē Moiséspijinē junaya. Nexata Sinaivēnē tsutojumatsia Moiséspijinē ángeljavabelia tocuaijai vajasalinaivimi. Nexata Moiséspijinēta Dioso penajumecopatsilivaisi jivi pejumecovēnētsinexa, Sinaivēnē tsutojumatsia tonajumecopatatsi. Bajarapalivaisi Dioso najumecopata Moiséspijinēta vaxaitsi ata bajarapalivaisi vajaxainaenexa mapamatacabijavaberenaje, jai Esteban sacerdotevi penamatacaitorobivijavabelia, judíovi pijaancianovijavabelia ata, judíovi pecujarubivijavabelia ata.

<sup>39</sup> Icatsia Esteban jumaitsi bajarapamonaejavabelia:

—Vajasalinaivimi apo jamatabējumecovēnētsi Moiséspijinē. Apo jitsipae cajena matavējēa penamatacaitorobinēnexamē. Vajasalinaivimi picani najamatabēxaina epatua Moiséspijinē pevepēnaviabinexamē Egipto nacuayabelia. <sup>40</sup> Moiséspijinē bajayajebi ponaponaya Sinaivēnē tsutojumatsia. Nexata Moiséspijinē pecovēta vajasalinaivimi jumaitsi Aarónpijinējavabelia: “Exanare diosovi vajanacamatacaponaenexa. Apo yapētaetsi rabaja pacuenia exanatsi Moisés vajanacamatacaponaenē Egipto nacuaverena,” jai. <sup>41</sup> Nexata vajasalinaivimi becerro jumapecataeya exana oronē. Nexata bajarapajumapenējavabelia pevi perajutsinexa, ofrendacuenia tobija dajubi. Bajaraxuacujinae vajasalinaivimi jamatabēcuenebarēyaya fiesta exana pecobeta pexanaexae oronē. Tsipaji bajarapajumapenē vajasalinaivimi beprijadisonē tane. <sup>42</sup> Bajaraxuata Dioso baja copata peyavenonaejava vajasalinaivimi. Nexata baja Dioso tocopata vajasalinaivimi najamatabēcuene copatsiaya penavajēcabiabinexa itaboxopijitulupujavabelia. Diosojumepaebinē profeta peyaquinaebaxutota, Dioso pejumaitsijava vajasalinaivimi yabara jumaitsi mapacueniaje:

Israelpijinē papemomoximē, pamatacabi abaxē pajinavanapame cuarenta pavaibeje petusato nacuatalia, pabeyabiabi atamē baca, oveja yajava, bajarapavi xanē apo panerajutabiabimē ofrendacuenia. <sup>43</sup> Bajarapavi parajutabiabame ofrendacuenia panenatoexanaediosovijavabelia. Tsipaji bajarapamatacabi pacajinavanapame

carpabo bepanijadisonē panetaenē Molocvēnēdisonē pijabonexa. Pacajinavanapamenua tuluputo, jumapecataeya panenatoexanaetutuluputo, Renfánvēnētutuluputo. Nexata bajarapatuluputo pataneme bepanijadiso. Panecobeta saya paneexanaediosovi, pacajinavanapame najamatabēcuenecopatsiaya bajarapadiosovijavabelia panenavajēcabiabinexa. Bajaraxuata panijanacuavecua pacaponaeyaexanaenatsi Babilonianacua pēnēyabelia pairajavabelia, jai Dioso pejumaitsijava mapacueniaje profetanē peyaquinaebaxutota vajasalinaivimi yabara, jai Esteban sacerdotevi penamatacaitorobivijavabelia, judíovi pijaancianovijavabelia ata, judíovi pecujarubivijavabelia ata.

<sup>44</sup> Icatsia Esteban jumaitsi bajarapamonaejavabelia:

—Bajayata vajasalinaivimi itsa jinavanapa petusato nacuata, cajinavanapa Dioso pijacarpoboxaneto, bajarapabota Diosojavabelia pevajētabiabinexa. Nexata Dioso Moiséspijinēta penajumecopatsilivaisi, Dioso peyaquinaebopanayobeje, vajasalinaivimi xaniavaetabuatabiaba bajarapacarpabo ēnētuaatujēta. Copiaya Moiséspijinē jumapecataeya Dioso tsitajētatsi pacuenia bajarapacarpabo exanetsijitsia. Nexata juya Moiséspijinē itoroba vajasalinaivijavabelia. Nexata vajasalinaivimi exaneta bajarapacarpabo pacuenia Dioso cuenecataeya tsitajētatsi Moiséspijinē. <sup>45</sup> Bajaraxuacujinae bajarapacarpabo rajutatsi vajasalinaivimi pecajinavanapaenexa. Nexata vajasalinaivimi itsabelia varapa, caponabiaba bajarapacarpabo. Moiséspijinē baja itsa tēpa, Josuépijinē juya matabapona vajasalinaivimi. Josuépijinē nexata pamatacabi vajasalinaivimi matabanajetaruca, caparena bajarapacarpabo mapanacuayaberenaje. Nexata vajasalinaivimi vajabitsaē exana mapanacuataje pejinavanapaevimijavabelia. Nexata vajasalinaivimi mapairaje yacajērēta. Pamatacabi Josuépijinē vajasalinaivimi matabanajetaruca mapanacuayaberenaje, Dioso rēcēpecaeyaexanatsi mapanacuapijivimije Josuébana pevajēnaetarena. Nexata bexējavaberena ata, pamatacabi Davidpijinē mapanacua evetaje, vajasalinaivimi abaxē cajinavanapa bajarapacarpabo. <sup>46</sup> Nexata Dioso pexaniajatabēcuenia tanetsi Davidpijinē, mapanacuaje pevetsinēmi. Nexata picani Davidpijinē bitso jitsipa Dioso pijabonexa templobo pexanaeyaexanaenexa. Baitsi paDioso bajayata Jacobpijinē jumecovēnēta, Davidpijinē jane baja pamopijinēmi. <sup>47</sup> Itsiata baitsi jane Davidpijinē Dioso apo tocopatsitsi templobo pexanaeyaexanaenexa. Davidpijinē pexēnato, Salomónpijinē, Dioso pijabonexa templobo exanaeyaexana, Davidpijinē baja pepuatēpae. <sup>48</sup> Pepo Dioso athēbētatsia peecaenē, bajaraponē apo ponaponae bota, jivi pexanaebota. Diosojumepaebinē profetanē bajayata jumaitsi mapacueniaje Dioso pejumaitsijava:

<sup>49</sup> Athēbētatsia daxitacuene taevetsinē. Mapanacuajava ata taevetsinē. ¿Detsa nexata xuajitsia bo panetoexanetsipame? Apo namatavenonaenē cajena bo tanacueravevetsinexa. <sup>50</sup> Xanē daxitacuene taexanaenē, jai profeta bajayata Dioso pejumaitsijava, jai Esteban sacerdotevi penamatacaitorobivijavabelia, judíovi pijaancianovijavabelia ata, judíovi pecujarubivijavabelia ata.

<sup>51</sup> Icatsia Esteban jumaitsi bajarapamonaejavabelia:

—Paneajamatabēcuenetajavi. Paneamatabocotajavinua. Apo pajumecovēnētšimē Dioso pejumelivaisi. Apo pacopatsimē Espíritu Santo papecatsijamatabējonenexa. Pacuenia panijasalinaivimi bajayata itsi, bajara saya icatsia paxamē paitsimē. <sup>52</sup> Diosojumepaebivi profetavi tajēvelia vajunupaebapona Cristo, pepo pianeconijibinē pepatsijavanexatsica. Nexata panijasalinaivimi daxita bajarapaprofetavimi bejiobiaexanabiaba. Beyejebabiabanua. Nexata jane baja Cristo itsa patsica, paxamē pijavajabitsaē pecobeyabelia pacanajetaxuabame. Bajarapacuenia Cristo pabeyaxuabame. <sup>53</sup> Angelevi pacarajutsi ata Dioso Moiséspijinēta penajumecopatsilivaisi jivi pejumecovēnētšinexa, itsiata paxamē apo pajumecovēnētšimē bajarapalivaisi, jai Esteban sacerdotevi penamatacaitorobivijavabelia, judíovi pijaancianovijavabelia ata, judíovi pecujarubivijavabelia ata.

*Pacuenia Esteban beyaxuabatsi yabara pelivaisi*

<sup>54</sup> Sacerdotevi penamatacaitorobivi, judíovi pijaancianovi ata, judíovi pecujaru-bivi ata, itsa jumetane Esteban petsipaebilivaisi, anaepana bitso Estebanjavabelia. Nexata bajarapamonae pecaanae, navonoquiarabaxane. <sup>55</sup> Itsiata Esteban bitso jamatabëcuenevënëca Espíritu Santo. Esteban athëbëa benaëcotsia. Nexata tane Dioso pijapenivenivenaecotia. Taenutsianua Jesús penucaejava paxa Dioso pemuxuneneta, pecujanenia. <sup>56</sup> Nexata Esteban jumaitsi daxita bajarapamonaejavabelia:

—¡Panataema! Taniji itaboxo penapatsijavatsia. Daxitajivi Pematapijinë, ponë naexana mapanacuataje, pacuenia vaxaitsi banaexanatsi, nucaya paxa Dioso pemuxuneneta, pecujanenia, jai Esteban.

<sup>57</sup> Nexata sacerdotevi penamatacaitorobivi, judíovi pijaancianovi ata, judíovi pecujarubivi ata, pecobenëta namuxuvojoacaba. Bajarapamonae vavajai pinijicuenia. Daxita caecuenia cujibarenatsi Esteban pevaetabinexatsi. <sup>58</sup> Bajarapamonae Esteban caponaliatsi tomarapënëyabelia. Nexata tomarapënëta Esteban tseconatsi ibotonëta. Nexata daxita pamona jumetane Esteban petsipaebilivaisi, najumajonejeba pijacamisajumavelia penaxatabijavanë. Nexata Esteban petseconaevajënaetsi ibotonëta, bajarapamonae penajumajonejebijavanë pevëjëato Saulovënë evetsiaexanatsi. <sup>59</sup> Petseconanubenaevajatatsi ibotonëta, Esteban vajëta Diosojavabelia. Jumaitsi:

—Tajatuxanenë Jesús, daxita pepo tajamatabëcuene pire, jai Esteban.

<sup>60</sup> Bajaraxuacujinae Esteban pematabacabëta nuca. Aëjai pinijijumeta.

—Tajatuxanenë, itaxutobejiobiataema mapamonaeje. Vecuaajibiaexanare paneconi natsiexana xamëjavabelia tanebejiobiaexanaexae mapacueniaje, jai Esteban.

Bajaraxuacujinae Esteban tëpanajereca baja.

## 8

*Pacuenia Saulo jaita Jesús pelivaisi pejumecovënëtsivi penaneconitsiaexanaenexa yabara pelivaisi*

<sup>1-3</sup> Sacerdotevi penamatacaitorobivi, judíovi pijaancianovi ata, judíovi pecujaru-bivi ata, Estebanpijinë baja itsa beyaxuabatsi, Saulo tsitaxanepanatsi. Nexata pebijivi, pamona Dioso bitso jumecovënëta, bajarapamonae Estebanpijinë mëthëtatsi. Matanueyabatsi bitso.

Bajarapamatacabi jane baja sacerdotevi penamatacaitorobivi, judíovi pijaancianovi ata, judíovi pecujarubivi ata, taxuxuaba pebejiobiaexanaponaejava Jesús pelivaisi pejumecovënëtsivi Jerusalén tomarata. Saulo jane baja jaitaruta Jesús pelivaisi pejumecovënëtsivi Jerusalén tomarata. Caebo canacujitsia jonepona. Nexata taicapona pebejivi, petiriavi ata, pamona Jesús pelivaisi pejumecovënëtsivi. Penaneconitsivi pejebabiabi-boyabelia Saulo cajonepona bajarapamonae. Nexata ayaibitsaëtoxaneto Jesús pelivaisi pejumecovënëtsivi, Jerusalén tomarapijivi, rëcëpeca itsatomaranëjavabelia. Itsamonae rëcëpeca Samaria nacuyabelia. Itsiata apóstolevi nacopaba Jerusalén tomarata.

*Pacuenia pexanialivaisi, Jesús pelivaisi, pejumecovënëtsivi, tsipaebapona Samaria nacujava yabara pelivaisi*

<sup>4</sup> Pamona Jesús pelivaisi pejumecovënëtsivi, rëcëpeca Jerusalén tomaravecua. Nexata itsaxuayo bajarapamonae najetarubena, jivi tsipaebanajetarubena pexanialivaisi, Jesucristo pelivaisi. <sup>5</sup> Pamona rëcëpeca yajuvënë, pevëne Felipe. Bajaraponë lia Samaria nacuata pecaetomarajavabelia. Bajarapatomarapijivijavabelia Felipe tsipaeba Jesús pelivaisi. Jumaitsi:

—Jesús raja Cristo, ponë Dioso itorobica jivi pecapanepaenexa, jai tsapona Felipe Samaria nacuata pecaetomarapijivijavabelia.

<sup>6</sup> Itsa patomarata Felipe Jesús pelivaisi tsipaebabiaba, jivi ayaibitsaëtoxaneto nacaetuatabiaba. Daxita bajarapamonae xaniavaetsia namuxunaevetabiaba Felipe itsa tsipaebabiaba Jesús pelivaisi. Bajarapamonae tane Felipe Dioso pesaëta pinijicuene

pexanaejavanë. <sup>7</sup> Pamonaë dovathi peyjavajinavanapaevi, Felipe vecuacapitsapabiaba. Dovathi pinijijumeta aëjai tsabiabi itsa vecuacapitsapabiaba Felipe. Nexata dovathi peyjavajinavanapaevimi, jamatejema baja tsabiabi. Pamonaë ata petabusipacuenabivitsi, peyayujayunaevi ata, jamatejemayaexanapona Felipe. <sup>8</sup> Bajaraxuata daxita bajarapatomarapijivi jamatabëcuenebarëya.

<sup>9</sup> Bjarapatomarata Simónvënënë ponapona. Bjaraponë jivi pejorobabiabinë. Bajayajebi daxita Samaria nacuapijivi yamaxëitojorobaponapona. Simón jumai tsabiabi bajarapatomarapijivijavabelia:

—Xanë bitso jivi taxaniavaetsinë, jai tsabiabi.

<sup>10</sup> Daxitajivi, petuxanevi ata, Simón pejumaitisijava namuxunaevetabiabatsi. Bjarapamonaë nexata Simón yabara jumai tsabiabi:

—Maponëje Simón pinijicuene pexanaejava caëjëpatsi. Dioso raeta yavenonatsi, jai tsabiabi bajarapamonaë Simón yabara.

<sup>11</sup> Bjarapacuenia Samaria nacuapijivi xaniavaetsia jumecovënëtabiaba tsipaji Simón pejorobicuena bajayajebi jivi yamaxëitojorobabiaba. <sup>12</sup> Nexata Felipe Samaria nacuapijivijavabelia tsipaeba Dioso pijajivi pevetsijavanexa. Jesucristo pelivaisi ata tsipaeba. Nexata Samaria nacuapijivi jumecovënëta Felipe petsipaebilivaisi. Bjarapamonaë pebijivi, petiriavi ata, Felipe bautisaba.

<sup>13</sup> Nexata jane baja Simón jivi pejorobabiabinë ata jumecovënëta Felipe petsipaebilivaisi. Nexata baja Simón ata Felipe bautisaba. Bjaraxuacujinaë Felipe pepëta naponapona Simón. Nexata Simón jamatabëcuenenabenajacabiaba itsa taeyabiaba Dioso pesaëta Felipe pinijicuene pexanaponaëjavanë.

<sup>14</sup> Nexata apóstolevi Jerusalén tomarata pejinavanapaevi, vënëlivaisitane Samaria nacuapijivi Dioso pitorobilivaisi pejumecovënëtsijava. Nexata apóstolevi jumaitsi peyajuvënënëbejjavabelia:

—Pedro, paxamëbeje Juanbeje, pataemeliabeje Samaria nacuapijivi, pejumecovënëtsivi Dioso pitorobilivaisi, jai apóstolevi.

Nexata Pedrobeje Juanbeje ponabeje. <sup>15</sup> Itsa bajaraponëbeje patabeje Samaria nacuayabelia, tovajëtabeje Diosojavabelia Espíritu Santo petsijamatabëpatsinexatsitsica Samaria nacuapijivi, Dioso pitorobilivaisi pejumecovënëtsivi. <sup>16</sup> Bjarapacuenia tovajëtabeje tsipaji abaxë Samaria nacuapijivi Espíritu Santo apo tsijamatabëpatsitsitsica. Abaxë saya bautisabatsi bajarapamonaë Jesús pevënëta. <sup>17</sup> Nexata Pedrobeje Juanbeje petovajëtsijavatabeje Diosojavabelia, tsimatanacobebeuatabeje Samaria nacuapijivi. Nexata jane baja Samaria nacuapijivi Espíritu Santo tsijamatabëpatsicatsi.

<sup>18</sup> Nexata Simón itsa tane Samaria nacuapijivi Espíritu Santo petsimatarunaëjavatsitsica apóstolenëbeje Samaria nacuapijivi tsimatanacobebeuatsiaya petovajëtsijavatabeje Diosojavabelia, nexata Simón palata tsipaeba apóstolenëbejjavabelia. <sup>19</sup> Simón jumaitsi:

—Panerajurebeje mapacaëjëpaejamatabëcueneje. Pajivi tsimatanacobebeuatajë tatorovajëtsijavata Diosojavabelia, bajarapajivi petsimatarunaënexatsitsica Espíritu Santo, jai Simón apóstolenëbejjavabelia.

<sup>20</sup> Nexata Pedro jumaitsi Simónjavabelia:

—Xamë cajena Dioso caxuabiana infiernojavabelia. Nexata vereverecaename nijapalata yajava. Tsipaji najamatabëxainame necomuatsinexa ëpalatata Dioso amoneya jivi perajutsijavatsica. <sup>21</sup> Tsipaji pepacuene apo najamatabëcuene copatsimë xaniavaetsia Diosojavabelia. Nexata Dioso patajumecovënëtsivita, apo nanacuenebimë tsane. <sup>22</sup> Copare baja papibisiacuene najamatabëxainame. Najamatabëcuene pënëyorore Diosojavabelia. Vajëre Diosojavabelia pecavecuajibiaexanaenexa papibisiacuene najamatabëxainame. <sup>23</sup> Xanë cajena yapëtaniji necueneëbijava Jesús pelivaisi pejumecovënëtsivi. Yapëtanijinua pecajamatabëcuene cënënaejava pibisiacuene nexanaeconi, jai Pedro.

<sup>24</sup> Nexata Simón jumaitsi:

—Panetovajërebeje Diosojavabelia tanevecuaajibiaexanaenexa paneconi xainajë Dioso tanexuabiyaniava infiernojavabelia pacuenia panejumaitsimëbeje, jai Simón.

<sup>25</sup> Bajaraxuacujinae Pedrobeje Juanbeje bajarapatomarapijivijavabelia tsipaebabeje pacuenia tanebeje Dioso pexanaejava. Tsipaebabejenua Dioso pitorobilivaisi. Bajaraxuacujinae Pedrobeje Juanbeje itsa navialiabeje Jerusalén tomarabelia, Samaria nacuata penaetomaranëjava tsipaebanajetarucabeje pexanialivaisi, Jesús pelivaisi.

*Pacuenia Felipe bautisaba Etiopía nacuapijinë yabara pelivaisi*

<sup>26</sup> Dioso pijaängel jumaitsi Felipejavabelia:

—Nonotapunare. Maxuayolia roviafia liamëreje. Panamuto Jerusalén tomaraverena naropota pepatsinexa Gaza tomarabelia, bajarapanamutualia liamëre, jai ángel Felipejavabelia.

Bajarapanamuto petusato nacuajava rucalia pepatsinexa Gaza tomarabelia. <sup>27</sup> Nexata Felipe xaniavaeta pijavaxi peponaenexa baja. Bajaraxuacujinae naropolia jane baja. Nexata bajarapanamutualia Felipe caxitajaraba Etiopía nacuapijinë. Bajaraponë palata pevetsinë. Etiopíanacua pevetsiva pijapalata tovetabiaba. Bajaraponë, Etiopía nacuapijinë, Jerusalén tomarajavabelia pona najamatabëcuenecopatsiaya pevajëtsinexa Diosojavabelia templobota. <sup>28</sup> Nexata baja Etiopía nacuapijinë Jerusalén tomaraverena naviatanajetaruca. Navialia baja pijanacuayabelia. Pijamoyota, carrozavënëmoyota, yanajetaruca. Nexata lebanajetaruca Diosojumelivaisipaebinë profeta Isaíaspijinë bajayata peyaquinaebaxuto. <sup>29</sup> Nexata Espiritu Santo jumaitsi Felipejavabelia:

—Bitsojinaremelia. Pëcaxinaeremelia mapamoje. Imoxoyo pemuxunenia nucaponae-name, jai Espiritu Santo.

<sup>30</sup> Felipe nexata kujinaejinalia. Nexata baja Felipe pëcaxinalia Etiopía nacuapijinë. Nexata Felipe jumetane Etiopía nacuapijinë peleanajetarucaejava profeta Isaíaspijinë peyaquinaebaxuto. Nexata Felipe jumaitsi Etiopía nacuapijinëjavabelia:

—¿Xamë tsaja pepacuene jumeyapëtaneme palivaisi lebanajetarucame? jai Felipe.

<sup>31</sup> Nexata Etiopía nacuapijinë jumaitsi:

—¿Detsa pacuenia jumeyapëtaejitsipajë itsa apo netsipaebi xaniavaetsia itsanë ata? jai.

Nexata Etiopía nacuapijinë junatatsi Felipe carrozavënëmoyo ënëabetsia Felipe penajunaenexatsia penamuxuneniaecaenexabeje.

<sup>32</sup> Profeta Isaíaspijinë peyaquinaebaxutota, palivaisi Etiopía nacuapijinë lebanajetaruca, tajëvelia Jesús yabara jumaitsi mapacueniaje:

Pacuenia oveja moya, caponae atatsilia pebeyaxuabinexatsi, bajara pijinia pacuenia bajaraponë ata moya tsane, caponae atatsilia pebeyaxuabinexatsi. Pacuenia ovejaya naxunae atatsi, moya, bajara pijinia pacuenia bajaraponë ata moya tsane, yapëtae ata pebejiobiaexanaejavanexatsi. <sup>33</sup> Bejiobiaexanaenatsi. Pibisiacuene apo exanae ata, naneconitsiaexanatsi. Itsajivi ata bajaraponë yabara apo jumaitsi tsane: “Mara pamonaeye bajaraponëmi pemomoxije,” apo jai tsane. Tsipaji beyaxuabianatsi,

jai tajëvelia mapacueniaje Isaíaspijinë peyaquinaebaxutota Jesús yabara, palivaisi Etiopía nacuapijinë lebanajetaruca.

<sup>34</sup> Nexata Etiopía nacuapijinë jumaitsi Felipejavabelia:

—Pexaniacuene netoexanare. Netsipaebare ponë yabara yaquina profeta Isaíaspijinë mapacueniaje. ¿Baja tsa ponë pijacuata nayabarajumaitsi? Itsa jume, ¿itsanë yabara tsaja jumaitsi? jai Etiopía nacuapijinë Felipejavabelia.

<sup>35</sup> Nexata palivaisi Etiopía nacuapijinë lebanajetaruca, bajarapalivaisi Jesús yabara pejumaitsijava copiaya Felipe yapëtaeyaexana. Bajaraxuacujinae icatsia tsipaeba pexanialivaisi, Jesús pelivaisi. <sup>36</sup> Penajetarucaejavatabeje bajarapanamutua, patabeje itsajota merayo eca. Nexata Etiopía nacuapijinë jumaitsi Felipejavabelia:

—Mara jota meraje. Jitsipajë picani xanë tanebautisabinexamë. Itsiata baitsi jane yapëtaneme xua yabara apo xanepanae tanebautisabinexamë, jai Etiopía nacuapijinë Felipejavabelia.

<sup>37</sup> Nexata Felipe jumaitsi:

—Itsa jumecovënëtime xaniavaetsia daxita nejamatabëëthëtojavaverena, nexata necaëjëpa tacabautisabinexa, jai Felipe.

Nexata bajaraponë jumaitsi:

—Jumecovënëtajë rabaja. Jesucristo raja xaniajai Dioso pexënato, jai Etiopía nacuapijinë Felipejavabelia.

<sup>38</sup> Nexata bajaraponë pijamo nucojopaeyaexana. Bajaraponëbeje Felipebeje runarecabeje merajavabereca. Felipe bautisaba Etiopía nacuapijinë. <sup>39</sup> Nexata penonotajunaecujinaetsinabeje, Espiritu Santo pitatsi Felipe Etiopía nacuapijinë pitabarata. Itsiata Etiopía nacuapijinë apo tae pacuenia Felipe pitatsi Espiritu Santo. Bajaraxuacujinae Etiopía nacuapijinë apo taetsi baja Felipe matavëjëa. Itsiata Etiopía nacuapijinë pona baja barëyaya pijanacuayabelia. <sup>40</sup> Felipe Espiritu Santo caliatsi Azoto tomarabelia. Felipe nexata daxita tomanëjava tsipaebanajetaruca pexanialivaisi, Jesús pelivaisi. Matapania Felipe itsa patajopa Cesarea tomarata, caejavata ponapona.

## 9

*Pacuenia Saulo jumecovënëta Jesús yabara pelivaisi*

*(Hch 22.6-16; 26.12-18)*

<sup>1</sup> Saulo cajena Jerusalén tomarata apo copatsi petaicaponaejava daxita pamonaes Jesús pelivaisi jumecovënëta pebeyejebiaexanaenexa. Bajaraxuata Saulo pona daxita sacerdotevi pepo penamatacaitorobinëjavabelia. <sup>2</sup> Nexata Saulo sacerdotevi pepo penamatacaitorobinëjavabelia jumaitsi:

—Netsicobeyaquinare cuyalatobaxutonë tacaponaenexa Damasco tomarabelia. Damasco tomaratalia judíovi penacaetuatabibonë pevetsivi tarajutsinexa. Nexata bajarapamonae itsa tane neyaquinaebaxutonë, tanetocopatsinexa daxita Jesús pelivaisi pejumecovënëtsivi tataicaenexa. Nexata itsa taicajë pebijivi, petiriavi ata, tacapatsinexa mapatomaraberenaje penaneconitsivi pejebabiabibota tajebinexa, jai Saulo.

Nexata sacerdotevi pepo penamatacaitorobinë jejai. Nexata cuyalatobaxutonë tsi-cobeyaquinatsi Saulo pecaponaenexa Damasco tomarabelia. <sup>3</sup> Bajaraxuacujinae Saulo jane baja pona Damasco tomarabelia. Nexata ajena Saulo imoxoyotanajetaruca Damascotomara, jemata Saulo penajetarucavejavata namutua matatoyorotsia naitayotatsi athëbëvetsica. <sup>4</sup> Nexata Saulo irataeya bocajunua irata. Jumetaenuca athëbëvetsica pejumaitsijava Jesús. Jumaitsi mapacueniaje:

—Saulo, Saulo, ¿detsa xuajitsia tajajivi netobejiobiaexanaponame? jai Jesús.

<sup>5</sup> Nexata Saulo jumaitsi:

—Tajatuxanenë, ¿detsa ponëmë? jai.

Nexata icatsia athëbëvetsica Jesús jumaitsi Saulojavabelia:

—Xanë raja Jesúsne. Tajajivi netobejiobiaexanaponame. ¿Detsa xuajitsia apo tajit-sipaecuenia exanaponame? Xamë nijacuata najamatabëcuenebijianaponame, jai Jesús athëbëvetsica.

<sup>6</sup> Saulo nexata neconecojai pecajunavi. Nexata jumaitsi:

—Tajatuxanenë, ¿detsa xua nexata jitsipame taexanaenexa? jai.

Nexata Jesús jumaitsi:

—Nonotapunare baja. Ponaename baja Damasco tomarabelia. Bajarajotalia catsipae-biana pacuenia exanaejitsiamë, jai Jesús.

<sup>7</sup> Nexata papebijivi Saulo yajavanajetaruca, najunaviacanubena. Nexata moya nubena. Tsi-paji jumetane pajume athëbëvetsica jumaitsi Saulojavabelia. Bajarapajume jumetae ata, itsiata bajarapamonae apo tae jivitonë. <sup>8</sup> Nexata Saulo, irata pebocaenëmi, nonotapuna. Naëcobaruta picani. Itsiata apo naëcotsixanepanae. Tsi-paji itaxutomeravibatsi.

Nexata papebijivi Saulo yajavanajetaruca, bajarapapebijivi saya Saulo comacaponaliatsi Damasco tomarabelia. <sup>9</sup> Nexata Saulo natsivajänaetaenejeva, Damasco tomarata ponapona acueyabi pamatacabibeje. Apo xae pexaejava. Apo apaenua mera.

<sup>10</sup> Damasco tomarata ponapona Ananías, Dioso pejumecovënëtsinë. Nexata Jesús bemajitsinaebocuenia tsitanaitajëta Ananíasjavabelia. Nexata Jesús junataxuaba.

—¡Ananías! jai.

Nexata Ananías jumaitsi Jesúsjavabelia:

—Tajatuxanenë, canamuxunaevetatsi rabaja, jai Ananías.

<sup>11</sup> Nexata Jesús bajarajota jumaitsi Ananíasjavabelia:

—Nonotapunare. Ponaename pacallejavabelia jivi vënëruba Peroviacalle. Bajarajotalia Judas pijabota vënëyanijobianame Saulovënënë, Tarso tomarapijinë. Bajaraponë Saulo maparucaeje xanëjavaberena navajëqueca. <sup>12</sup> Bajaraponë Saulo bemajitsinaebocuenia tsitajëtajë pacuenia exanaejitsiamë bajaraponëjavabelia. Nexata Saulo bemajitsinaebota catane pacuenia nejonecujinaelia bajaraponë tsmatanacobeuatsijitsiamë petaenexa icatsia xaniavaetsia, jai Jesús Ananíasjavabelia.

<sup>13</sup> Nexata Ananías itsa jumetane bajarapacuenia Jesús pejumaitsijava, nexata Ananías jumaitsi Jesúsjavabelia:

—Tajatuxanenë, anijatonë vënëlivaisitaniji pacuenia bajaraponë Saulo exanapona. Vënëlivaisitaniji bajaraponë pebejiobiaexanaponaejava Jerusalén tomarata daxita pecajumecovënëtsivi. <sup>14</sup> Maberena ataje icatsia itorobatsi sacerdotevi penamatacaitorobinë petotaicaenexa daxita pamona pecajumecovënëtsivi jinavanapa mapatomarataje, jai Ananías Jesúsjavabelia.

<sup>15</sup> Nexata Jesús jumaitsi Ananíasjavabelia:

—Ponare baja. Tsipaji bajaraponë Saulo itapetajë baja tanelivaisipaebinexa itsanacuanëpijivijavabelia, tanelivaisipaebinexanua bajarapanacuanë pevetsivijavabelia ata, tanelivaisipaebinexanua Israel nacuapijivijavabelia. <sup>16</sup> Xanë Saulo tsitajëtsianajë pacuenia itsamatacabi Saulo itsamonae bejiobiaexanaejitsiatsi. Bajaraponë bitso bejiobiaexanaenatsi talivaisi yabara, jai Jesús Ananíasjavabelia bemajitsinaebocuenia petsitanaitajëtsijavata.

<sup>17</sup> Bajaraxuacujinae Ananías jane baja lia. Joneya pabota Saulo ponapona. Ananías nexata nacobebeuata Saulo pematobocotojumavereca. Ananías jumaitsi Saulojavabelia:

—Tajabananë Saulo, pepo petuxanenë raja Jesús, ponë catsitanaitajëta namutua nenajetarucaejavata, bajaraponë nitoroba. Bajaraponë nitoroba tacatsimatanacobeuatsinexa pecavecuaajibinexa baja pecaitaxutomeravibijava icatsia baja netaenexa xaniavaetsia. Nitorobanua tacatsimatanacobeuatsinexa pecatsijamatabëvënëcaenexa Espíritu Santo, jai Ananías Saulojavabelia.

<sup>18</sup> Bajarapacuenia Ananías pejumaitsijava Saulojavabelia, Saulo veitaxutoothopatsi xua itaxutocaranatatsi, bedujuaitseboco. Nexata jane baja icatsia Saulo xaniavaetsia tane. Saulo nexata nonotapuna. Bajaraxuacujinae bautisabatsi baja. <sup>19</sup> Bajaraxuacujinae pexaejava baja xane. Nexata baja icatsia Saulo aperabësaëreca. Saulo nexata Damasco tomarata caematacabibeje naponapona Dioso pejumecovënëtsivita.

*Pacuenia Saulo paeba Jesús pelivaisi Damasco tomarata yabara pelivaisi*

<sup>20</sup> Saulo pejumecovënëtsicujinae Jesús Dioso pexënatocuene, bepijiayo Saulo taxuxuaba jivi petsipaebijava Jesús pelivaisi judíovi penacaetuatabibonëjava. Saulo jivi itsa tsipaebapona Jesús pelivaisi, jumai tsaponae.

—Pepacuene raja Dioso pexënato Jesús, jai tsaponae Saulo.

<sup>21</sup> Nexata daxita pamona jumetane Saulo petsipaebilivaisi, jamatabëcuenenabena-jaca. Najumaitsi bajarapamonae Saulo yabara:

—Mara ponëje bejiobiaexanapona Jerusalén tomaratalia daxita pamona jumecovënëta Jesús pelivaisi. Icatsia picani pata mapatomaraberenaje petaicaenexa daxita pamona jumecovënëta Jesús pelivaisi. Nexata itsa taica, pecaponaenexa picani

Jerusalén tomarabelia, sacerdotevi penamatacaitorobivijavabelia, najai bajarapamonae Saulo yabara.

<sup>22</sup> Itsiata Saulo ajumejunavijibia bitso asaëyata tsipaebapona Jesús pelivaisi. Nexata Saulo xaniavaetsia jivi yapëtaeyaexana xaniajai Jesús Dioso pitorobinëtsitsica jivi peca-panepaenexa. Nexata judíovi Damasco tomarata penaevi moya. Apo yapëtae pacuenia jumecanaviatsijitsiatsi Saulo.

*Pacuenia Saulo vecuapanepa judíovi yabara pelivaisi*

<sup>23</sup> Saulo Damasco tomarata petaxuxubicujinae Jesús pelivaisi jivi petsipaebapona-ejava, bexëjavabelia judíovi sivanajamatabëcueneyanabatsi pebeyaxuabinexatsi Saulo.

<sup>24</sup> Nexata caematacabi canacujitsia, caemeravi canacujitsia ata, Saulo judíovi vajënaeevetabiabatsi pebeyaxuabinexatsi picani. Pabaupaxanetojavalía jivi pitsapabiaba Damasco tomaravelia penaropobivi, bajarapabaupaxaneto muxuneneta Saulo judíovi vajënaeevetabiabatsi pebeyaxuabinexatsi picani. Itsiata Saulo nayalivaisiajumetane judíovi pebeyaxuabiapaebijavatsi. Bajaraxuata Saulo bajarapabaupaxanetojavalía apo pitsapaelia. <sup>25</sup> Damascotomara matatoyorotsia yacaranata piatayaëibopanaxanetota. Bajarapayacaranatsijavaxaneto athëbëabetsia apia, pacuenia pinijinaejavaxaneto apia. Bajarapayacaranatsijavaxaneto ibopananë mataropotsia catsanaeya farata. Nexata Dioso pejumecovënëtsivi, Saulo pepënaponaevisi, itsa baja meravi, Saulo ecaeyaexanatsi bemapirecuenia pexanaejavaxanetoënëta. Nexata Damasco tomara matatoyorotsia peyacaranatsiibopanaxaneto yenepanata athëbëyo perucaeventanavojotualia, Saulo yacoparecatsi irabereca Damasco tomarapënëyabelia. Bajarapacuenia Saulo Damasco tomarata judíovivecua panepa pebeyaxuabiyanivatsi.

*Pacuenia Saulo Jerusalén tomarata copiapitatsi yabara pelivaisi*

<sup>26</sup> Saulo itsa patajopa Jerusalén tomarata, Saulo picani jitsipa penaponapona-ejava Jesús pelivaisi pejumecovënëtsivijavata. Itsiata daxita bajarapamonae Saulo kujunavatsi. Tsipaji apo jumexaniataetsi Saulo pejumecovënëtsijava Jesús pelivaisi. <sup>27</sup> Itsiata Bernabé barëlia apóstolevijavabelia apóstolevi peyapëtaenexatsi Saulo. Nexata Bernabé tsipaeba apóstolevijavabelia pacuenia Saulo namutua penajetarucaejavata tane Jesús bemajitsinaebota. Pacuenia ata Saulo Jesús barëcuaicuaijatsi, Bernabé tsipaeba apóstolevijavabelia. Pacuenia ata Saulo ajumejunavijibia tsipaebapona Damasco tomarata Jesús pelivaisi, Bernabé tsipaeba apóstolevijavabelia. <sup>28</sup> Nexata baja Saulo ponapona Jerusalén tomarata. Naponapona apóstolevijavata. <sup>29</sup> Saulo tsipaebapona ajumejunavijibia Jesús pelivaisi. Saulo barëcuaicuaijai tsabiabi judíovi, griegojume penatsipaebivi. Barënajumenotabiaba bajarapamonae. Itsiata baitsi jane bajarapamonae najamatabëxaina pacuenia beyaxuabijitsiatsi Saulo. <sup>30</sup> Jesús pelivaisi pejumecovënëtsivi, jumetane Saulo pebeyaxuabiapaebijavatsi. Nexata Jesús pelivaisi pejumecovënëtsivi, Saulo pë-naxuabatsi Cesarea tomarabelia. Bajarajotacujinae Saulo itorobatsi pevajënaeyabelia penajetarucaenexa pepatsinexa Tarso tomarabelia.

<sup>31</sup> Bajaraxuacujinae nexata daxitajava, itsaxuayo Jesús pelivaisi pejumecovënëtsivi jinavanapa, xaniavaetsia baja jinavanapa. Copabatsi baja pebejiobiaexanabiabijavatsi. Nexata Judea nacuata, Galilea nacuata ata, Samaria nacuata ata, Jesús pelivaisi pejumecovënëtsivi caebitsaëto canacujitsia xaniavaetsia jinavanapa. Nexata daxita jamatabëcuenevitsabapona Jesús pelivaisi pejumecovënëtsijava. Bajarapamonae xaniavaetsia jumecovënëtavanapa Jesús pelivaisi pibisiacuene pexanaeyaniva. Espíritu Santo yavenonaponatsi. Nexata itsamonae ata Jesús pelivaisi apo pejumecovënëtsivimi, ayaibitsaëtoxaneto jumecovënëtapona Jesús pelivaisi.

*Pacuenia Jesucristo pejamatabëcueneta Pedro jamatejemayaexana Eneasvënënë yabara pelivaisi*

<sup>32</sup> Pedro najetaruca daxitatomaranëjava pesivaxainaenexa Dioso pejumecovënëtsivi. Nexata najetaruca Lida tomarajava ata pesivaxainaenexa Lida tomarata pejinavana-paevi, Dioso pejumecovënëtsivi. <sup>33</sup> Nexata Pedro Lida tomarata taeyabuata Eneasvënënë.

Bajaraponë ocho pavaibeje xaina camata peboacaecujinae. Tsipaji tabusipacuenabatsi.  
<sup>34</sup> Pedro nexata jumaitsi bajaraponëjavabelia:

—Eneas, cajamatejemayaexana rabaja Jesucristo. Nonotapunare. Xanebare nijacama, jai Pedro.

Nexata Eneas bajarajota nonotapuna. <sup>35</sup> Nexata daxita Lida tomarapijivi, Sarón nacuapijivi ata, tanetsi Eneas pejamatejemajava. Bajarapamonae nexata pijaperujujamatatabëcuene pecatsitecaejavami, copaba baja. Najamatabëcuenecopaba baja Jesucristo-javabelia.

*Pacuenia Pedro Dorcasvënëva petëpaecujinae icatsia asaëyaexana yabara pelivaisi*

<sup>36</sup> Jope tomarata ponapona Dioso pejumecovënëtsiva, Tabitavënëva. Bajarapova pevënë griegojumeta Dorcas. Dorcas daxita matababi canacujitsia pexaniacuene toexanabiaba itsamonaejavabelia. Bepejiobivijavabelia rajutabiaba penamatavenonaejavaxi bajarapacuenia peyavenonaenexa. <sup>37</sup> Pamatababi Pedro ponapona Lida tomarata, Dorcas avitane Jope tomarata. Nexata baja Dorcas tēpa Jope tomarata. Peperabëquiatsicujinaetsi petëpaeva buatatsi anijairabeje pexainaebō ënëtuatuajëta. Athëbëyo pairatsia, bajarapaënëtuatuajëtatsia buatatsi. <sup>38</sup> Jopetomara eca imoxoyo Lida tomaravecua. Dioso pejumecovënëtsivi vënëlivaisitanetsi Pedro peponaponaejava Lida tomarata. Nexata Dioso pejumecovënëtsivi itoroba anijanëbeje pejumaitsinexabeje Pedrojavabelia: “Pedro, naxanitsia. Liamëre Jope tomarabelia,” pejainexabeje Pedrojavabelia. Nexata bajaraponëbeje Lida tomarabelia sivaliabeje Pedro.

<sup>39</sup> Nexata Pedro narena bajaraponëbeje pepëta. Pedro itsa napata pabota petëpaeva boca, tsitajëtatsi itsajota petëpaeva boca. Nexata pamonajivi pevecuatëpaevanëtsi, Dorcaspijiva pevënuvitsi, Pedro matatoyorotsia itaxutuanuenubenatsi. Bajarapamonae Pedro tsitajëbatsi Dorcaspijiva pejorocejavanë, penaxatabijavanë, penajumaacabipananë ata, xuanë Dorcaspijiva rajuta bajarapamonaejavabelia pamatababi abaxë asaë tsaponapona. <sup>40</sup> Nexata paënëtuatuajëta petëpaeva boca, bajarapaënëtuatuajëvecua Pedro daxita bajarapamonae pitsapaeyaexana. Bajarapamonae itsa pitsapalia, Pedro pematabacabëta nuca pevajëtsinexa Diosojavabelia. Nexata Pedro pevajëtsicujinae Diosojavabelia, napënëyorota petëpaevajavabelia. Pedro jumaitsi petëpaevajavabelia:

—Tabita, nonotapunare, jai Pedro.

Nexata petëpaevami naëcota. Itsa tanetsi Pedro, bajarapova namatacota. <sup>41</sup> Pedro nexata bajarapova cobevaetabiaya nonotapunaeyaexana. Nexata Pedro junarena daxita Dioso pejumecovënëtsivi, pamonajivi pevecuatëpaevanëtsi ata. Nexata tsitajëta bajarapamonaejavabelia petëpaevami icatsia piasaëjava. <sup>42</sup> Nexata Dioso pesaëta bajarapapinjicue Pedro pexanaejava, daxita Jope tomarapijivi yapëtane. Nexata jivibitsaëtoxaneto jumecovënëta Jesús Dioso pexënatocuene. <sup>43</sup> Nexata Pedro bajayajebi ponapona Jope tomarata. Simón bacabocotonë peyacueyacuecaeyaexanaenë, pijabota Pedro naponapona.

## 10

*Pacuenia Pedro barëcuaicuaijai Corneliövënëne yabara pelivaisi*

<sup>1</sup> Cesarea tomarata ponapona Corneliövënëne. Apo judíonë. Bajaraponë Italia nacuaverena pepatsivi vajabitsaëvi pijacapitán. <sup>2</sup> Cornelio pijabopijivi barëjumecovënëtaponapona Dioso. Dioso bitso yayataeya Cornelio ponapona. Cornelio palata ayajava rajutabiaba judíovijavabelia peyavenonaenexa judíovi bepejiobivi. Cornelio vajëtabiaba Diosojavabelia. <sup>3</sup> Itsamatababi caniviyopatota, bejamatabëcuene a las tres, Cornelio bemajitsinaebota tane Dioso pijaángel pejonejavarena pijaboyarena. Nexata junataxuabatsi.

—¡Cornelio! jaitsi.

<sup>4</sup> Cornelio nexata naëcota ángeljavabelia. Bitso cujunava. Nexata Cornelio jumaitsi ángeljavabelia:

—¿Detsa xua jitsipame? jai.

Nexata ángel jumaitsi:

—Nevajëtabijava Diosojavabelia, nerajutabijava ata penamatavenonaecue ne bepejibivijavabelia, daxita bajaraxua Dioso tsitaxanepanatsi. Dioso nexata apo nacofënëtsi bajaraxua. <sup>5</sup> Itorobare nijajivi Jope tomarabelia pecatojunatsinexa Simón, ponë itsavënë vënërubatsi, Pedro. <sup>6</sup> Bajaraponë Simón naponapona Jope tomarata, itsanë Simón, bacabocotonë peyacueyacucaeyaexanaenë, pijabota. Bajaraponë Simón pijabo eca manuamene itapata. Nexata Simón, ponë itsavënë vënërubatsi, Pedro, itsa patsiarena, catsipaebiana pacuenia exanaejitsiamë, jai ángel Corneliojavabelia bemajitsinaebota.

<sup>7</sup> Bjarapacuenia ángel bemajitsinaebota pejumaitsicujinae Corneliojavabelia, ángel baja pona. Nexata Cornelio junata anijanëbeje pijabota petonacuenebaponaponaenëtsibeje. Pematatsënëa junata caenë vajabitsaënë. Bjaraponë vajabitsaënë Dioso peyaiy-ataenë. Bjaraponë Cornelio yavenonabiabatsi. <sup>8</sup> Nexata Cornelio copiata tsipaeba bajarapamonaejavabelia daxita pacuenia tsipaebatsi ángel. Bjaraxuacujinae Cornelio itoroba bajarapamonae peponaenexa jane baja Jope tomarabelia, Simón pesivapon-aeenexa. Nexata baja bajarapamonae naropoba.

<sup>9</sup> Meravia pitsijavata, matonejeepatota, bajarapamonae Jope tomara imoxoyotana-jetarubena. Bajara pijinia paepatota Pedro pabota naponapona, bajarapabo jumabet-sia junaya. Bjarapabo pejumanamatajëpaebo. Pedro junaya bajarapabojumatatsia pevajëtsinexa Diosojavabelia. <sup>10</sup> Pedro bitso pijajani. Jamatabë nabane picani. Itsiata pexaejava pexanaevi abaxë apo veretsi pexaejava. Nexata Pedro bemajitsinaebota tane. <sup>11</sup> Pedro tane itaboxo penapatsijava. Nexata athëbëvetsica runaica irabetsica ayaipanax-aneto, besábanapanaxaneto. Bjarapapanaxaneto cuatro pamaëtotabeje namataenetsia upicëta. Bjarapacuenia yamaëya copatsica. <sup>12</sup> Bjarapapanaxaneto tuatuajëta nubena daxitacueneviria. Nubena daxitaviria cuatro pataxutabeje pejinavanapaevi. Bobena daxitaviria pecotobëxëta pejinavanapaevi. Nubena daxitaviria pepunaevi. <sup>13</sup> Nexata Pedro jumetane athëbëvetsica pejumaitsijava: “Pedro, nonotapunare. Beyaxuare daxita mapamonaeje nexaenexa,” pejaijava athëbëvetsica, Pedro jumetane.

<sup>14</sup> Nexata Pedro jumaitsi:

—Jume raja. Caeto ata raja xanë apo xanë bajarapavirianëxi tanejamatabëcuenebi-jianaeyaniva. Tsipaji Dioso Moiséspijinëta patanetonajumecopatsilivaisi, paneitaveta bajarapavirianëxi pataxaeyaniva, jai Pedro.

<sup>15</sup> Icatsia athëbëvetsica jumaitsi Pedrojavabelia:

—Pavirianëxi caitorobatsi nexaenexa, xaema. Pëtsa jumaitsimë: “Apo xanë raja bajarapavirianëxi tanejamatabëcuenebijianaeyaniva,” jamë pëtsa, jai athëbëvetsica.

<sup>16</sup> Acueyabi xuabeje bajarapacuenia athëbëvetsica napëna jumaitsi Pedrojavabelia. Bjaraxuacujinae bajarapapanaxaneto athëbëabetsia baja icatsia yapëcaevaya. <sup>17</sup> Pedro nexata najamatabëxainaya jamatabëjumaitsi tsecae:

—¿Detsa meta pitsijamatabëcuene yabara netsitajëta bajaraxua? jamatabëjai tsecae Pedro.

Pedro abaxë itsa najamatabëxaineca bajarapacuenia, Cornelio pijajivi pata. Pabota Pedro naponapona, bajarapabo matatoyorotsia yacaranata ibopanaxanetonë mataropotsia pefaratsijavaxanetota. Nexata bajarapayacaranatsijavaxaneto baupa muxuneneta nubena bajarapamonae. Bjarapamonae namutuarena yanijobanajetarubena jivijavabelia peyapëtaenexa itsajota eca Simón, bacabocotonë peyacueyacucaeyaexanaenë, pijabo. <sup>18</sup> Nexata bajarapamonae pepatarëcëpaecujinae, baupa pënëvelia ayaijumeta yanijoba. Jumaitsi:

—¿Baja tsa mapabota Simón naponapona, ponë vënërubatsi itsavënë, Pedro? jai bajarapamonae.

<sup>19</sup> Pedro abaxë bojumatatsia athëbëyo najamatabëxainecaya bemajitsinaebota petae-java yabara. Nexata Espiritu Santo jumaitsi Pedrojavabelia:

—Taema. Acueyabi ponēbeje casivaparena. <sup>20</sup> Nexata nonotapunare. Runaremecca baja nenaponaenexa bajarapamonae pepēta. Jamatejema saya ajamatabēcuenecovēbia naponae name. Tsipaji raja xanē itorobarenajē bajarapamonae, jai Espiritu Santo Pedrojavabelia.

<sup>21</sup> Nexata baja Pedro runareca Cornelio pijajivijavabereca. Pedro jumaitsi bajarapamonaejavabelia:

—Ponē pajaitame, xanē rabaja maje. ¿Detsa xuajitsia panesivaparemena? jai Pedro.

<sup>22</sup> Nexata Cornelio pijajivi jumaitsi Pedrojavabelia:

—Vajabitsaēvi raja pijacapitán Cornelio pejamatabēcuene panajetarubenajē. Bajaronē pexaniajamatabēcuenenē. Dioso bitso pejumecovēnētsinē. Nexata bajaraponē Diosojavabelia vajēcabiaba. Daxita judíovi yaiyatanetsi. Nexata judíovi jumai tsabiabi bajaraponē yabara: “Pexaniajamatabēcuenenē raja Cornelio,” jai tsabiabi. Dioso raja pijaángel itorobatsi Cornelio pecajunatsinexa. Bajaraxuata paxanē pacasivaponarenatsi Cornelio pijaboyabelia nenaponaenexa. Cornelio cajumetaejitsia palivaisi tsipaebijitsiamē bajaraponējavabelia, jai Cornelio pijajivi Pedrojavabelia.

<sup>23</sup> Nexata Pedro copiapita boyaberena pejonenexa bajarapamonae. Bajarapamonae abaxē namajita bajarapabota. Bajayacunua jane baja Pedro napona bajarapamonae pepēta. Pedro pēyanatatsi itsamonae Jope tomarapijivi, Dioso pejumecovēnētsivi. Itsiata abaxē bajarapamatacabi apo patsilia. Epatua abaxē majitaothopa.

<sup>24</sup> Nexata meravia pitsijavata Pedrojana jane baja palia Cesarea tomarabelia. Cornelio nexata pijabota yajavanuca pejunatsivi, pijamonaeviriavi. Yajavanucanua itsamonae, pamonae bitso Cornelio peyapētaevitsi. Pedro jane baja barēvajēnaeevetanucatsi.

<sup>25</sup> Pedro itsa patanajetaruca Cornelio pijabopanabota, Cornelio copiapitatsi. Nexata Cornelio pematabacabēta nucajunua Pedro pitabarata. Tsipaji bitso yaiyataeya copiapitsijitsia picani. <sup>26</sup> Nexata Pedro apo jitsipae bajarapacuenia bitso yaiyataeya pecopiapitsijavatsi. Nexata Pedro maxēvaetaba. Nonotapunaeyaexana. Nexata Pedro jumaitsi Corneliojavabelia:

—Nonotapunare. Tsipaji saya pacuenia xamē jamatabēcueneitsimē, bajara saya xanē ata jamatabēcueneitsinē, jai Pedro.

<sup>27</sup> Nexata Pedro Cornelio barēcuaicuajai tsanucaponae panabojavarena. Pedro itsa najoneya Cornelio pijaboyalia, tane jivibitsaētoxfaneto Cornelio pijabota penacaetuat-sivi. <sup>28</sup> Nexata Pedro jumaitsi Cornelio pijabota penacaetuatsivijavabelia:

—Paxamē baja cajena xaniavaetsia payapētaneme mapacueneje. Paxanē pajudíovinē patajasalinaivimi apo panetocopatsi patayajavajinavanapaenexa apo judíovi. Bijiaya pataeyabiabajē apo judíovi. Apo panetocopatsinua patajonenexa apo judíovi pijaboyalia. Itsiata baitsi jane aeconoxaeta baja Dioso nitaveta tacopatsinexa baja bajarapajamatabēcuene. Nexata Dioso netocopata tayajavaponaponaenexa apo judíovi ata. Netocopatanua tanajonenexa apo judíovi ata pijaboyalia. <sup>29</sup> Bajaraxuata itsa nejunata taponaeenexa maberenaje, narenanē bepíjia ajamatabēcuenecovēbia. Nexata jamatabēyapētaniji xua yabara panejunatame, jai Pedro Cornelio pijabota penacaetuat-sivijavabelia.

<sup>30</sup> Nexata bajarajota Cornelio jumaitsi Pedrojavabelia:

—Xanē imata, canivioepatota, bejamatabēcuene a las tres, vajētajē Diosojavabelia. Nexata bajarapaepatota jemata taitabarata netsitanaitajēta ángel. Ajena baja cuatro pamatacabibeje xaina bajarapacueni tataecujinae. Angel penaxatatsijava nivenivena.

<sup>31</sup> Nexata ángel nejumaitsi: “Cornelio, Dioso rabaja cajumetane nevajētsijava. Yapētane baja nerajutabiabijava bepejiobivijavabelia penamatavenonaecuene. <sup>32</sup> Nexata nijajivi itorobare Jope tomarajavabelia pecatojunatsinexa Simón, ponē vērūbatsi itsavēnē, Pedro. Bajaronē naponapona itsanē Simón, bacabocotonē peyacueyacaeyaexanaenē, pijabota. Bajaronē Simón pijabo eca manuaemene itapata. Nexata Simón, ponē itsavēnē vērūbatsi, Pedro, itsa patsiarena, catsipaebiana pacuenia exanaejitsiamē,”

nejai ángel. <sup>33</sup> Bajaraxuata bepijiayo casivaponaeyaexanatsi. Xamë baja nexata pexaniajatabëcuenia netopatame. Bajaraxuata nevajënae daxita paxanë panacaetuatajë Dioso pitabarata. Pacaevetatsi patacajumetaenexa daxita palivaisi Dioso caitoroba patanetsipaebinexamë, jai Cornelio Pedrojavabelia.

*Pacuenia Pedro livaisi tsipaeba Cornelio pijabota yabara pelivaisi*

<sup>34</sup> Pedro jane baja taxuxuaba livaisi petsipaebijava. Jumaitsi:

—Matapania rajane baja yapëtaniji. Najëpaeya tsaena Dioso nacajitsipa daxitavirivitsi. <sup>35</sup> Caenacuapijivi canacujitsia, pamonaë Dioso yaiyataeyajinavanapa, jumecovënëtsiajinavanapanua pacuenia Dioso itorobatsi, bajarapamonaë Dioso jitsipa. <sup>36</sup> Dioso cajena pexanialivaisi, Jesucristo pelivaisi, tonajumecopata Israel nacuapijivijavabelia. Nexata bajarapalivaisi tsipaebatsi Israel nacuapijivi pibisiacuene pexanaeconivecua Jesucristo pejamatabëcueneta pecapanepaenexatsi Dioso. Jesucristo raja daxitajivi pijatuxanenë. <sup>37</sup> Payapëtaneme rabaja mapacueneye. Juanpijinë jivibautisabinëmi jivi livaisi petsipaebanajetarucaecujinae, pebautisabaponaecujinaenua, Jesús cotocaevi tsipaebanajetaruca Galilea nacujava, Judea nacujava ata. <sup>38</sup> Payapëtaneme rabaja mapacueneye. Jesús, Nazaret tomarapijinë, Dioso rajuta Espíritu Santo. Nexata Espíritu Santo pejamatabëcueneta Jesús caëjëpatsi daxitacuene pexanaenexa. Nexata Jesús jamatejemayaexanapona daxita pamonaë dovathi pejamatabëcueneta avitane. Bajarapacuenia Jesús exanapona tsipaji Dioso yajavaponaponatsi. <sup>39</sup> Paxanë baja cajena pataniji daxita xua Jesús exanapona Judea nacuata, Jerusalén tomarata ata. Itsamonaë beyaxuabatsi Jesús. Cobematabiabarutatsi cruzajavabelia. <sup>40</sup> Itsiata baitsi jane Jesús pemëthëtsicujinaetsi, acueyabi matababita, Dioso icatsia asaëyaexanatsi. Dioso Jesús caëjëpaeyaexanatsi patanetsitanaitajëtabinexa paxanëjavaberena. <sup>41</sup> Itsiata Jesús apo tsitanaitajëtsi daxitajivijavabelia. Èpaxanëjavaberena saya panetsitanaitajëtabiaba. Tajëvelia baja cajena Dioso paneitapeta patataevinexa Jesús petëpaecujinae icatsia itsa asaë. Bajaraxuata Jesús petëpaecujinae icatsia itsa asaë, panetsitanaitajëtabiaba. Nexata panebarë nabane. Panebarëmatavjëaapanua. <sup>42</sup> Nexata Jesús paneitoroba patatsipaebaponaenexa daxitajivijavabelia pexanialivaisi, Jesús pelivaisi. Paneitorobanua patatsipaebaponaenexa Dioso pejamatabëcueneta itsamatacabi Jesús penaneconitsiaexanaejavanexa daxita pijaneconi pexinaevi. Itsamatacabi Jesús naneconitsiaexanaena pi-asaëvi, petëpaevimi ata. <sup>43</sup> Athëbëvetsica Jesús pepatsivajënaetsica, bajayata jinavanapa Diosojumepaebivimi profetavi. Nexata profetavimi tajëvelia vajunupaebapona Jesús pejamatabëcueneta Dioso pevecuaajibiaexanaejavanexa pibisiacuene pexanaeconimi, pajiviyo jumecovënëta Jesús pelivaisi, jai Pedro Cornelio pijabota penacaetuatsivijavabelia.

*Pacuenia Espíritu Santo tsijamatabëjunuatsi apo judíovi ata yabara pelivaisi*

<sup>44</sup> Pedro abaxë livaisi petsipaebanucaejavata Corneliobanajavabelia, Espíritu Santo tsijamatabëjunuatsi daxita pamonaë jumetaeyena Pedro petsipaebilivaisi. <sup>45</sup> Nexata judíovi Dioso pejumecovënëtsivi, Pedro peyajavapatsivi, itsa tane bajarapacueneye, jamatabëcuenenabenajacanubena. Jamatabëcuenenabenajaca tsipaji apo judíovi ata Espíritu Santo tsijamatabëjunuatsi. <sup>46</sup> Nexata Pedro peyajavapatsivi yapëthane Espíritu Santo petsijamatabëjonejavatsi Corneliobana. Tsipaji Corneliobana cuaicuaijai itsavirijajumenëta, apo penatsipaebijumenëmi. Corneliobana jumai tsaponaë Diosojavabelia:

—Diosomë, bitso ayajamatabëcuenenëmë, jai tsaponaë.

<sup>47</sup> Bajaraxuata Pedro jumaitsi peyajavapatsivijavabelia:

—Pacuenia vaxaitsi Dioso nacarajuta Espíritu Santo, bajara pijinia pacuenia mapamonaë ataje Dioso rajutatsi Espíritu Santo. Bajaraxuata itsajivi ata acuenebi pejumaitisjava bajarapamonaë yabara: “Pëtsa mapamonaëje pabautisabame merata,” pejaijava, jai Pedro.

<sup>48</sup> Nexata Jesucristo pevënëta Pedro bautisaba Corneliobana. Pedro pebautisabicujinae Corneliobana, asivatsi abaxë Pedro penaponaponaenexa bajarajota caematacabibeje.

## 11

*Pacuenia Pedro navajunupaeba Dioso pejumecovënëtsivijavabelia Jerusalén tomarata yabara pelivaisi*

<sup>1</sup> Apóstolevi vënëlivaisitane apo judíovi ata Corneliobana pejumecovënëtsijava Jesús pelivaisi. Judea nacuata pejinavanapaevi ata, pamona jumecovënëta Jesús pelivaisi, vënëlivaisitane apo judíovi ata Corneliobana pejumecovënëtsijava Jesús pelivaisi.

<sup>2</sup> Nexata pamatacabi Pedro pata Jerusalén tomarata, judíovi, pamona jumecovënëta Jesús pelivaisi, jumaitsi Pedrojavabelia:

<sup>3</sup> —¿Detsa xuajitsia Cesarea tomarata naponapona apo judíovi pijabota? ¿Detsa xuajitsia nanabaneme apo judíovita? jai judíovi Pedrojavabelia.

<sup>4</sup> Nexata Pedro tsipaeba judíovijavabelia pacuenia taxuxuaba bajarapacue yabara. Pedro jumaitsi judíovijavabelia:

<sup>5</sup> —Pamatacabi naponaponajë Jope tomarata Simón, bacabocotonë peyacueyacuecaeyaexanaenë, pijabota, vajëtajë Diosojavabelia. Nexata Diosojavabelia tavajëtsijavata bemajitsinaebota taniji athëbëvetsica perunaejavatsica ayaipanaxaneto, besábana panaxaneto. Bajarapapanaxaneto cuatro pamaëtotabeje namataenetsia upicëta. Nexata bajarapapanaxaneto xanëjavabetsica yamaëya copatsica. <sup>6</sup> Itsa naitaxutobabatsia naëcotajë xaniavaetsia tataenexa xua yajavanajetaruca bajarapapanaxaneto tuatuajëta, nexata taniji cuatro pataxutabeje pejinavanapaevi. Taniji unupijivinua, pianaepeanaevi. Taniji pecotobëxëta pejinavanapaevinua. Taniji pepunaevinua. <sup>7</sup> Nexata jumetaniji athëbëvetsica tanejumaitsijava: “Pedro, nonotapunare. Beyaxuare daxita mapamonaeye nexaenexa,” nejai. <sup>8</sup> Nexata jumaitsinë: “Jume raja. Caeto ata raja xanë apo xanë bajarapavirianëxi tanejamatabëcuenebijianaeyaniva. Tsipaji Dioso Moiséspijinëta patanetonajumecopatsilivaisi, paneitaveta bajarapavirianëxi pataxaeyaniva,” janë. <sup>9</sup> Nexata athëbëvetsica icatsia nejumaitsi: “Pavirianëxi caitorobatsi nexaenexa, xaema. Pëtsa jumaitsimë: ‘Apo xanë raja bajarapavirianëxi tanejamatabëcuenebijianaeyaniva,’ jamë pëtsa,” nejai athëbëvetsica. <sup>10</sup> Acueyabi xuabeje bajarapacuenia athëbëvetsica napëna nejumaitsi. Bajaraxuacujinae bajarapapanaxaneto daxita bajarapamona athëbëabetsia baja icatsia yapëcaevaya. <sup>11</sup> Bajarapaepatota jane baja acueyabi ponëbeje nesivapata pabota naponaponajë. Bajarapamonae itorobatsi Cesarea tomaraverena. <sup>12</sup> Nexata Espíritu Santo nitoroba bajarapamonae pepëta ajamatabëcueneconvëbia tanaponaenexa Cesarea tomarabelia. Mapamonaeye vajamona, seis ponëbeje Dioso pejumecovënëtsivi, nepëyanata Cesarea tomarabelia. Nexata panajoneyajë Cornelio, vajabitsaëvi pijacapitán, pijaboyalia. <sup>13</sup> Nexata Cornelio panetsipaeba pijabota petsitanaitajëtsijavatsi ángel. Ángel pina jumaitsi Corneliojavabelia: “Itorobare nijajivi Jope tomarabelia peccatojunatsinexa Simón, ponë vënërubatsi itsavënë, Pedro. <sup>14</sup> Bajaraponë ita patsiarena, catsipaebiana pacuenia exanaejitsiamë Dioso pecavecuajibiaexanaenexa daxita pibisiacue nexanaeconimi, daxita nijabopijivi yajava,” jai pina ángel Corneliojavabelia. <sup>15</sup> Nexata jane baja ita taxuxuabajë livaisi tatsipaebijava Corneliobanajavabelia, Espíritu Santo tsijamatabëpatsicatsi Corneliobana. Pacuenia vaxaitsi copiaya nacatsijamatabëpatsica Espíritu Santo, bajara pijinia pacuenia bajarapamonae ata tsijamatabëpatsicatsi Espíritu Santo. <sup>16</sup> Nexata najamatabënapitajë Jesús patanejumaitsijava mapacueniaje: “Juanpijinë raja jivi bautisabanajetaruca ëmerata. Itsiata bailsi jane caematacabibejecujinae paxamë Dioso pacatsijamatabëjoneyaexanaena Espíritu Santo,” patanejajiva Jesús, najamatabënapitajë. <sup>17</sup> Xaniajai baja cajena. Dioso rajutapona Espíritu Santo apo judíovi ata pacuenia vaxaitsi nacarajuta Espíritu Santo vajajumecovënëtsixae vajatuxanenë Jesucristo. Nexata acuenebi tacaranatsijava Dioso perajutsijava Espíritu Santo apo judíovi ata, jai Pedro judíovijavabelia, Jesús pelivaisi pejumecovënëtsivijavabelia.

<sup>18</sup> Nexata judíovi itsa jumetane bajarapacuenia Pedro pejumaitsijava, moya baja. Nexata judíovi jamatabëcuenebarëya Diosojavabelia. Nexata Dioso yabara jumaitisi:

—Xaniajai rabaja. Dioso bajarapacuenia exana apo judíovi ata matakabi apo peverevereaejava pexainaenexa, itsa copaba pibisiacuene pexanabiabijava penajamatabëcuenepeñëyorotsinexa Diosojavabelia, jai judíovi.

*Pacuenia Dioso pejumecovënëtsivi Antioquía tomarata jinavanapa yabara pelivaisi*

<sup>19</sup> Pamatacabi Estebanpijinë beyaxuabatsi, Dioso pejumecovënëtavanapaevi Jerusalén tomarata rëcëpeca daxitanacuanëjava. Bajarapacuenia rëcëpeca tsipaji bitso bejio-biaexanaponatsi. Jesús pelivaisi pejumecovënëtsixae, itoyatsi. Itsamonae tajëbelia rëcëpeca Fenicia tomarabelia. Itsamonae rëcëpeca Chipre tunaetota peecaetomarabelia. Itsamonae rëcëpeca Antioquía tomarajavabelia. Nexata bajarapamonae Jesús pelivaisi tsipaebapona bajarapatomaranëjava ëjudíovijavabelia. Itsaviriavijavabelia apo tsipaebapona. <sup>20</sup> Itsamonae Jesús pelivaisi pejumecovënëtsivi, Chipre tunaetota peecaetomarapijivi, Cirene tomarapijivi ata, pona Antioquía tomarabelia. Bajarapamonae pijinia Antioquía tomarata apo judíovijavabelia tsipaebapona pexanialivaisi, Jesús pelivaisi. <sup>21</sup> Pamona apo judíovijavabelia tsipaeba Jesús pelivaisi, Dioso yavenonatsi. Nexata apo judíovi ayaibitsaëtoxaneto jumecovënëta Jesús pelivaisi. Najamatabëcuenepeñëyoro Diosojavabelia pibisiacuene pexanabiabijavavecu.

<sup>22</sup> Jerusalén tomarata pejinavanapaevi, Jesús pelivaisi pejumecovënëtsivi, vënëlivaisitane apo judíovi ata Antioquía tomarapijivi Jesús pelivaisi pejumecovënëtsijava. Nexata bajarapamonae Bernabé itorobaliatsi Antioquía tomarabelia petaenexa apo judíovi ata Jesús pelivaisi pejumecovënëtsijava. <sup>23</sup> Nexata Bernabé itsa pata Antioquía tomarabelia, tane apo judíovi ata Dioso peyavenonaejavatsi. Nexata Bernabé sivajamatabëcuenebarëya apo judíovi ata. Nexata Bernabé muxujioba apo judíovi ata daxita bajarapamonae pejamatabëthëtovetsina ajamatabëcuenesaëya peyavajinavanapaenexa Dioso. <sup>24</sup> Bernabé bitso pexaniajamatabëcuenenë. Jamatabëcuenevënëca Espíritu Santo. Nexata exanabiaba Espíritu Santo pitorobicueniatsi. Dioso bitso pejumecovënëtsinë Bernabé. Bajaraxuata nexata jivibitsaëtoxaneto jumecovënëta Dioso.

<sup>25</sup> Bajaraxuacujinae Bernabé baja pona Tarso tomarabelia pejaitsinexa Saulo. Nexata baja Bernabé itsa caxitajaraba Saulo, barërena Saulo Antioquía tomaraberena. <sup>26</sup> Nexata Antioquía tomarata caevai naponaponabeje Dioso pejumecovënëtsivijavata. Jivi ayaibitsaëtoxaneto livaisi tsipaebabiababeje. Antioquía tomarata daxita pamona Jesús pelivaisi jumecovënëtavanapa, bajarapamonae pijatomarapijivi pepo copiaya jane baja vënërubatsi Cristianovi.

<sup>27</sup> Pamatacabi abaxë Bernabébeje Saulobeje ponaponabeje Antioquía tomarata, Dioso jumepaebivi profetavi, Jerusalén tomaraverena penaropobivi, pata Antioquía tomarata.

<sup>28</sup> Bajarapaprofetavijavuvënë pevënë Agabo. Nexata Agabo nonotapuna Dioso pejumecovënëtsivi penacaetuatsijavata. Nexata Agabo tajëvelia vajunupaeba ayaijaniboxaneto pecopiapatsijavanexa tajëvelia Espíritu Santo peyapëtaeyaexanaexaetsi. Agabo jumaitisi mapacueniaje:

—Ayaijaniboxaneto raja copiapatsiana daxitanacuanëjava, jai tajëvelia Agabo.

Bajarapajaniboxaneto bexëa copiapata Agabo pejumaitisicuenia pamatacabi nacuaevetsinë Claudio evetaponapona Romanonacua. <sup>29</sup> Bajaraxuata cajena janibovajënaeya, Antioquía tomarapijivi daxita Dioso pejumecovënëtsivi najamatabëcuenejëpa peyavenonaenexa Judea nacuapijivi Dioso pejumecovënëtsivi. Nexata Antioquía tomarapijivi, caenë canacujitsia, najamatabëcuenevereta Judea nacuapijivijavabelia perajutsinexa palata pacuenia cuenecaëjëpatsi. <sup>30</sup> Nexata baja Antioquía tomarapijivi itsa tocaetuatsivereta, bajarapamonae itorobatsibeje Bernabébeje Saulobeje petocaponaenexabeje bajarapapalata Judea nacuapijivijavabelia, Dioso pejumecovënëtsivi pijaancianovijavabelia. Nexata ancianovi petsicobetsanaenexa bepejiobivijavabelia.

## 12

*Pacuenia Pedro etatsi penaneconitsivi pejebabiabibota yabara pelivaisi*

<sup>1</sup> Nacuaevetsinē Herodes bejiobiaexanapona Jesús pelivaisi pejumecovēnētsivi.  
<sup>2</sup> Herodes pijajivi itoroba espadata pebeyaxuabinexatsi Santiago, Juan pematapijinēmi.  
<sup>3</sup> Herodes ita tane judíovi petsitaxanepanaejavatsi Santiago pebeyaxuabijavatsi, nexata icatsia Herodes itoroba pijajivi Pedro pevaetabinexatsi. Bajarapacuenia Herodes exana fiestamatacabi, pafiestamatacabi judíovi baxane levadurata matajērēabinejeva pexanaepan. <sup>4</sup> Pedro pevaetabucujinaetsi, penaneconitsivi pejebabiabibota etatsi. Bajarapabota cuatro pabitsaētobeje vajabitsaēvi Pedro nacobenaevetabiabatsi. Itsabitsaēto ita pitsapa, juya itsabitsaēto evetabiabatsi. Caebitsaētota jinavanapa vajabitsaēvi cuatro ponēbeje tsaponae. Nexata picani Herodes najamatabēxaina Pedro penutsinexatsi daxita judíovi pitabarata pascuavēnēfiesta pevereverecaecujinae. <sup>5</sup> Nexata Pedro eca penaneconitsivi pejebabiabibota. Vajabitsaē xaniavaetsia Pedro yabaupaevetabiabatsi bajarapabovecua Pedro pepitsapaeyaniva. Itsiata baitsi jane daxita Dioso pejumecovēnētsivi, asaēyata Diosojavabelia tovajētaponatsi Pedro.

*Pacuenia Dioso pejamatabēcueneta Pedro capanepatsi penaneconitsivi pejebabiabibovecua yabara pelivaisi*

<sup>6</sup> Pamatacabi picani Herodes Pedro nutsijitsiatsi daxita judíovi pitabarata, bajarapamatacabivajēnaeya pameravi, penaneconitsivi pejebabiabibito ēnētatuajēta Pedro majitanuca anijanēbeje vajabitsaēnēbeje, pevetsinētsibeje, petuatuajēta. Vajabitsaēnēbeje Pedro yamaēcabocatsibeje anijacadenamaētotabeje. Itsanēbeje pijinia yabaupaevetatsi.  
<sup>7</sup> Jemata Dioso pijaángel naitajēta Pedrojavata. Nexata penaneconitsivi pejebabiabibito ēnētatuajēta naitayota. Pedro pemajitanucaenē ángel yenejayatabatsi Pedro penaēcotsinexa. Ángel jumaitsi Pedrojavabelia:

—Naxanitsiayo nonotapunare, jai ángel.

Nexata Pedro pecobecētsicadenamaētotsibeje vecobejoparecatsi baja. <sup>8</sup> Nexata icatsia ángel jumaitsi Pedrojavabelia:

—Nijacorrea xaniavaetsia naepacatarērēre. Nataxuxatare baja nijazapato, jai ángel.

Pedro nexata xaniavaetsia naepacatarērētaxuaba pijacorrea. Nataxuxatataxuaba pijazapato. Nexata icatsia ángel jumaitsi:

—Naxatare nijacamisajumavelia nenaxatatabiabiava. Nepēnaponare, jai ángel Pedrojavabelia.

<sup>9</sup> Pedro nexata napona ángel pepēta. Itsiata Pedro xaniavaetsia apo najamatabēcueneyapētae. Nexata Pedro xaniavaetsia apo yapētae pepacuene ángel pebarēponaejavatsi. Nexata saya Pedro jamatabējumaitsi:

—Amajitsinaenē meta, jamatabējai.

<sup>10</sup> Itsiata baitsi jane xenetsiabeje penamataxainae ēnētatuajētareca peyabaupaevete-caevajabitsaēnētsi. Icatsia xenetabeje pecotocaevi ēnētatuajētatsina peyabaupaevete-caevajabitsaēnētsi. Bajaraxuacujinae pepitsapaenexabeje callejavabelia, nucojopabeje pepo baupaxanetojavata jane baja. Bajarapabaupaxaneto hierrobaupaxaneto. Nexata bajarapabaupaxaneto tonabaupatatsibeje pijacuata. Pitsatabaliabeje jane baja callejavabelia. Nexata callejavareca penajetarucaejavatabeje, ángel jemata ajibi tsojopae.

<sup>11</sup> Pedro jane baja xaniavaetsia najamatabēcueneyapētane. Nexata Pedro jamatabējumaitsi:

—Baja rajane matapania aeconoxae xaniavaetsia najamatabēcueneyapētaniji. Dioso tsaena itorobica pijaángel tanecapanepaenexa Herodes pecobevecua. Nexata baja judíovi apo netae tsane Herodes pijajivi tanebeyaxuabiava, jamatabējai Pedro.

<sup>12</sup> Pedro najamatabëxaina pacuenia exanaejitsia. Nexata lia María pijaboyabelia. Bajarapova María, Juan pena, ponë vënërubatsi itsavënë, Marcos. María pijabota ayaibitsaëtoxaneto Dioso pejumecovënëtsivi nacaetuata Diosojavabelia petovajëcaenexatsi Pedro. <sup>13</sup> María pijabo matatoyorotsia yacaranata ibopanaxanetonë mataropotsia pefaratsijavaxanetota. Nexata bajarapayacaranatsijavaxaneto baupa, Pedro docodocota petobaupatsinexatsi. Nexata bajarapabota penacuenebivayo, Rode, pitsaparena petaenexa ponë baupa docodocotanunuca. <sup>14</sup> Nexata Rode itsa jumeyapëtane Pedrocuene, nexata abaxë apo tobaupatsi. Rode cujinaelia boyabelia pejamatabëcuenebarëyatsajonexae. Nexata Rode tsipaeba María pijabota penacaetuatsivijavabelia. Jumaitsi:

—¡Pedro rajane baja nucalia baupa pënëverena! jai Rode.

<sup>15</sup> Nexata bajarapamonae jumaitsi:

—¡Camatajemaba raja saya! jai.

Itsiata icatsia Rode jumaitsi:

—¡Xaniajanë raja pepacuene! Pedro raja nucalia baupa pënëverena, jai Rode.

Bajarapamonae nexata jumaitsi:

—Apo Pedro raeta. Pevetsiángeltsi raeta, jai bajarapamonae.

<sup>16</sup> Nexata bajarapamonae pecuaicuaijajavata, Pedro tsiteca baupa docodocotanunuca. Nexata jane baja bajarapamonae tobaupata Pedro pejonenexarena. Bajarapamonae itsa tanetsi Pedro, bajarapamonae jamatabëcuenenajunaviaca. <sup>17</sup> Nexata Pedro nacobeyota bajarapamonae pemoyanexa. Pedro tsipaeba pacuenia Dioso pejamatabëcueneta capanepatsi penaneconitsivi pejebabiabibovecua. Pedro jumaitsi:

—Patsipaebianame mapalivaisije Santiagojavabelia. Patsipaebianame itsamonaejavabelia ata, Dioso pejumecovënëtsivijavabelia, jai Pedro.

Bajaraxuacujinae Pedro pitsapalia. Itsajavabelia icatsia pona.

<sup>18</sup> Itsa baja matabi tsina, vajabitsaëvi, pamona Pedro evetabiabatsi pananeconitsivi pejebabiabibota, bitso jamatabëcuenebëjai. Tsipaji bajarapamonae apo yapëtae itsabelia Pedro pona. <sup>19</sup> Nexata Herodes itoroba bajarapamonae pejaitsinexatsi Pedro. Itsiata bajarapamonae Pedro apo caxitajarabitsi. Nexata picani Herodes xaniavaetsia yanijoba pamona Pedro evetabiabatsi penaneconitsivi pejebabiabibota. Nexata baja bajarapamonae Pedro pevecuapanepaexae, Herodes anaepana. Nexata Herodes itsamonae vajabitsaëvi itoroba bajarapamonae pebeyejebinexatsi Pedro bajarapamonae pevecuapanepaexae. Nexata baja beyejebatsi. Bajaraxuacujinae nacuaeavetsinë Herodes Judea nacuaevecua pona. Pona Cesarea tomarabelia peponaponaenexa Cesarea tomarata.

#### *Pacuenia tËpa nacuaeavetsinë Herodes yabara pelivaisi*

<sup>20</sup> Nacuaeavetsinë Herodes itsa ponapona Cesarea tomarata, baraanaepana bitso Tiro tomarapijivijavabelia, Sidón tomarapijivijavabelia ata. Nexata Herodes pebaraanaepanaexae, bajara patomarabejepijivijavabelia copatsiaexana pexaejava petocaponabiabijava bajara patomarabejepijivijavabelia. Nexata bajarapatomarabejepijivi sivanajamatabëcueneyanaba xaniavaetsia pebarëcuaicuaijainexa nacuaeavetsinë Herodesjavabelia. Tsipaji bajarapatomarabejepijivi jitsipa icatsia pexaejava petocapatabinexatsi pijatomarabejevaberena Herodes pevetsinacuajavaverena. Nacuaeavetsinë Herodes pijabo petoavetsinëtsi pevënë Blasto. Nexata Tiro tomarapijivibeje Sidón tomarapijivibeje copiaya cuaijai Blastojavabelia Blasto pexaniajamatabëcuene petoxainaenexa petocuaicuaijainexa Herodesjavabelia. Nexata Blasto jejai. Tocuaicuaijai Herodesjavabelia Herodes icatsia pebarajamatabëxanepanaenexa bajara patomarabejepijivijavabelia. <sup>21</sup> Nexata Herodes tocajëta pamatacabi patsijitsia bajarapatomarabejepijivi Herodes pijaboyabelia. Nexata pamatacabi Herodes tocajëta bajarapamonae pepatsinexa, Herodes naitabëtsia naxatata nacuaeavetsinë penaxatatsicuenia. Nexata jane baja bajarapatomarabejepijivi pata pebarëcuaicuaijainexa Herodes. Nexata daxita bajarapamonae pitabarata nacuaeavetsinë peecaejavata, Herodes eca. Nexata Herodes xaniavaetsia barëcuaicuaijai

bajara patomarabejepijivijavabelia. <sup>22</sup> Nexata bajarapatomarabejepijivi Herodes yabara pinijijumeta yamaxëitojorobiaya jumai tsaponae pebarajamatabëxanepanaenexatsi:

—¡Maponëje nacabarëcuaijaije, apo jivitonë! ¡Diosonë tsaena! jai tsaponae bajarapatomarabejepijivi Herodes yabara.

<sup>23</sup> Bajarpacuenia pejumaitisijava bajarapatomarabejepijivi Herodes apo pejumeitavetsixae, Dioso pijaängel naneconitsiaexanatsi Herodes. Avitaniayaexanatsi. Herodes nexata oro ënëverenetsi. Herodes nexata oro pënëverenijavatsi yatëpa.

<sup>24</sup> Nexata Dioso pejumecovënëtsivi, daxitanacuanëjava tsipaebapona Dioso pitorobilivaisi. Nexata Dioso pitorobilivaisi pejumecovënëtsivi ayaibitsaëtoxaneto tsaponae.

<sup>25</sup> Itsa baja Bernabébeje Saulobeje palata petocaponaevijavabelia livaisi petsipaebijavabeje najumeveretabeje, naviatabeje baja Jerusalén tomaraverena. Navialiabeje baja Antioquía tomarabelia. Barëliabeje Juan, ponë vënërubatsi itsavënë, Marcos.

## 13

*Pacuenia Bernabébeje Saulobeje junatatsibeje Dioso pitorobilivaisi jivi petsipaebaponaenexabeje daxitanacuanëjava yabara pelivaisi*

<sup>1</sup> Antioquía tomarata Dioso pejumecovënëtsivijavata, jinavanapa mapamatabëxëyoje. Itsanë Bernabé. Itsanë Simón, ponë vënërubatsi itsavënë, Negro. Itsanë Lucio. Bajaraponë Cirene tomarapijinë. Itsanë Saulo. Itsanë Manaén. Bajarapamonae cajena profetavi, Dioso pejumecovënëtsivijavabelia livaisi petsipaebabiabivina. Herodes Galileanacua pevetsinë. Herodesbeje Manaénbeje penajuavitsabinëbeje. <sup>2</sup> Itsamatacabi daxita bajarapaprofetavi, Dioso pejumecovënëtsivi yajava, culto pexanaevajënaeya, pexaejava apo xae japasa Diosojavabelia pevajëcaenexa. Nexata bajarajota Espiritu Santo jumaitsi daxita bajarapamonaejavabelia:

—Panetotsare saicaya Bernabébeje Saulobeje. Xua yabara junatajëbeje, bajaraxua jane baja tanetonacuenëbinexabeje, jai Espiritu Santo.

<sup>3</sup> Nexata jane baja daxita bajarapamonae japasa vajëca Diosojavabelia. Bajaraxuacujinae Bernabébeje Saulobeje bajarapamonae tsmatanacobebuatatsibeje. Tovajëtatsibeje Diosojavabelia. Nexata jane baja copatatsibeje peponaenexabeje jivi daxitanacuanëjava petsipaebaponaenexabeje Dioso pitorobilivaisi.

*Pacuenia apóstolenëbeje Dioso pitorobilivaisi jivi tsipaebabeje Chipre tunaetoxanetota penaetomaranëjava yabara pelivaisi*

<sup>4</sup> Bernabébeje Saulobeje Espiritu Santo pejamatabëcueneta itorobatsibeje. Nexata baja ponabeje Seleucia tomarabelia. Nexata Seleucia tomarata naropotabeje. Naponabeje velapanata peponaebarcota. Nanicababeje Chipre tunaetoxanetojavabelia.

<sup>5</sup> Nexata napaliabeje Salamina tomarata. Bajarapatomarata tsipaebaponabeje Dioso pitorobilivaisi judíovi penacaetuatabiabinëjava. Juan napona Bernabébeje Saulobeje pepëta peyavenonabiabinexa. <sup>6</sup> Nexata bajarapamonae Chipre tunaetoxaneto matatuverelia. Nexata pata Pafos tomarata. Bajarapatomarata bajarapamonae caxitajaraba judiónë, Barjesúsvënënë. Bajaraponë jivi pejorobinë. Bajaraponë jivi yamaxëitojorobiaya jumai tsabiabi: “Xanë raja tsipaebabiabajë Dioso taneitorobicuenia,” jai tsabiabi.

<sup>7</sup> Nexata Barjesúsbeje najuaponaponabiababeje Sergio Paulobeje. Sergio Paulo Chipre tunaetoxaneto pevetsinë. Sergio Paulo cajena bitso bepíjia peyapëtaenë palivaisi tsipaebatsi. Nexata Sergio Paulo pijajivi itoroba petojunatsinexatsi Bernabébeje Saulobeje. Tsipaji Sergio Paulo bitso jamatabëjumetane Dioso pitorobilivaisi. <sup>8</sup> Itsiata baitsi jane Barjesús, jivi pejorobinë, ponë vënërubatsi itsavënë, Elimas, najamatabëcuene epatajërërëcaeyaexana Sergio Paulo Bernabébeje Saulobeje petsipaebaponaelivaisibeje yabara. Bajarapacuenia Barjesús najamatabëcuene epatajërërëcaeyaexana Sergio Paulo pejumecovënëtsiyaniva Dioso pitorobilivaisi. <sup>9</sup> Nexata Saulo, ponë vënërubatsi itsavënë, Pablo, tsijamatabëvënëcatsi Espiritu Santo. Nexata Pablo naëcota asaëyata Barjesúsjavabelia. <sup>10</sup> Pablo jumaitsi Barjesúsjavabelia:

—¡Xamë jivi neyamaxëitojorobinë, pibisiacuene nexanaenë, dovathi pijajivitonëmë, pexaniajamatabëcuene pexanaejava nitoyanë! Apo jamatabëcopatsimë nenajumet-sënëtsijava pejumecovënëtsiyaniva pamonaë picani jamatabëjumecovënëta Dioso pijapexaniajailivaisi. <sup>11</sup> Dioso raja aeconoxae cananeconitsiaexanaena. Nexata apo natsivajënaetaemë tsane. Matapania anijajuametone panepaena, icatsia natsivajënaetaename, jai Pablo Barjesúsjavabelia.

Nexata bajarajota Barjesús itaxutomeravibajunuatsi. Bitso itaxutoaitaquiri. Nexata saya Barjesús nacobenajayabaruta itsanë pecobeveatabinexatsi pecomacaponanexatsi pijaboyabelia. <sup>12</sup> Sergio Paulo itsa tane bajarapacuene, nexata jumecovënëta Jesús pelivaisi. Sergio Paulo bitso jamatabëcuenenajunaviaca itsa jumetane Jesús pelivaisi Bernabébeje Pablobeje petsipaebijavatabeje.

*Pacuenia Pablobeje Bernabébeje ponaponabeje Antioquía tomarata, Pisidia nacuada peccaetomarata, yabara pelivaisi*

<sup>13</sup> Pablobana Chipre tunaetota Jesús pelivaisi petsipaebavanapaecujinae, Pafos tomarata nanaropoba velapanata peponaebarcoxanetota. Nicaba Panfilia nacuyabelia. Nexata Panfilia nacuatatia pata Perge tomarata. Juan baja Perge tomarata itsajamatabëcuene najamatabëxaina. Nexata baja naviateca Jerusalén tomarabelia. <sup>14</sup> Nexata Pablobeje Bernabébeje icatsia nanaropotabeje Perge tomarata. Nexata icatsia patabeje Antioquía tomarabelia, Pisidia nacuada peccaetomarabelia. Judíovi penacuer-aevetsimatacabita Pablobeje Bernabébeje najunuabeje judíovi penacaetuatabiabibota. Bajarajota naecabeje. <sup>15</sup> Nexata daxita bajarapabota pejonevi, namuxunaeveta Dioso Moiséspijinëta penajumecopatsilivaisi. Namuxunaevetanua Diosojumepaebivimi profetavi bajayata peyaquinaelivaisi ata. Bajaraxuacujinae judíovi penacaetuatabiabibo pevetsivi, pijajivitonë itoroba. Nexata bajaraponë jumaitsi Pablobeje Bernabébejejavabelia:

—Tajabananëbeje, itsa payapëtanemebeje itsalivaisiyo panetsipaebinexabeje, aeconoxae patsipaebianamebeje jivi pijajamatabëcuenesaënexa Diosojavabelia, jai bajaraponë Pablobeje Bernabébejejavabelia.

<sup>16</sup> Nexata jane baja Pablo nonotapuna. Nacobeyota jivi pemoyanexa. Pablo nexata jumaitsi:

—Tajamonae judíovi, panenamuxunaevere. Tajamonae, paxamë ata apo pajudíovimë, Dioso panejitsipaevi, abaxë panenamuxunaevere pacuenia jumaitsinëjitsia. <sup>17</sup> PaDioso aeconoxae judíovitsi vajaDioso, bajarapaDioso bajayata baja cajena itapetatsi vajasalinaivimi pijajivinexa. Nexata Dioso pejamatabëcueneta vajasalinaivimi pexi ayaibitsaëtoxaneto xainapona. Nexata vajasalinaivimi ayaibitsaëtoxaneto tsaponae pamatacabijinavanapa Egipto nacuada. Nexata Dioso pesaëta vajasalinaivimi matacaponatsi Egipto nacuverena. <sup>18</sup> Vajasalinaivimi Dioso pejitsipaecuenia apo exanabiabi ata, itsiata Dioso cuarenta pavaibeje xaniavaetsia evetatsi petusato nacuada. <sup>19</sup> Dioso cajena verebiaba siete panacuabejepijivi, Canaávnënë nacuada pejinavanapaevimi. Nexata baja Dioso vajasalinaivimi totsatsi bajarapanacuanëjava juya pejinavanapaenexa. <sup>20</sup> Bajaraxuacujinae Dioso itoroba vajasalinaiviyajuvënëneví juezmonae penaexanaponanexa, vajasalinaivimi pevetsivinexatsi. Juezmonae nexata penaexanaponaevi, vajasalinaivimi evetavanapatsi cuatrocientos cincuenta pavaibeje. Matapania profeta Samuelpijinë evetatsi vajasalinaivimi, copata baja juezmonae pevetsijavatsi. Tsi-paji baja profeta Samuelpijinë pecotocaevijueznë. <sup>21</sup> Nexata vajasalinaivimi jumaitsi profeta Samuelpijinëjavabelia: “Pajitsipajë nitorobijava vajayajuvënënë penaexanaenexa vajanacayanacuaevetsinënexa,” jai. Nexata profeta Samuelpijinë Dioso pejamatabëcueneta itoroba Saúlpijinë vajasalinaivimi cuarenta pavaibeje peyanacuaevetaponaponaenexatsi. Bajaraponëmi Saúlpijinë, Cispijinë pexënato, vajasalinainëmi Benjamínpijinë pemomoxiyajuvënënë. <sup>22</sup> Bajaraxuacujinae Saúlpijinë Dioso copatsiaexanatsi pecopatsinexa baja vajasalinaivimi peyanacuaevetsijavatsi. Nexata juya Dioso itoroba Davidpijinë vajasalinaivimi peyanacuaevetsinexatsi. Dioso jumaitsi Davidpijinë

yabara mapacueniaje: “Isaí pexënato, David, jamatabëcueneyapëtaniji. Bajarapitsinë jitsipajë. Bajaraponë David daxita pacuenia jitsipajë, netoexanaena,” jai Dioso Davidpijinë yabara. <sup>23</sup> Davidpijinë raja pemomoyota naexana Jesús. Dioso cajena itorobica Jesús Israel nacuapijivitsi vajanacacapanepaenexa pacuenia Dioso tajëvelia najumecapanepaeya jumaiti vajasalinaivimijavabelia. <sup>24</sup> Jesús petaxuxuabivajënaeya jivi livaisi petsipaebaponaeyava, copiaya Juanpijinë jivibautisabinëmi tsipaebanajetaruca daxita Israel nacuapijivijava. Jumai tsanajetarucæ Juanpijinë: “Pacopabare baja daxita pibisiacuene paneexanabiabijava. Panajamatabëcuenepënyorore Diosojavabelia. Bajaraxuacujinae pacabautisabianatsi,” jai tsanajetarucæ Juanpijinë. <sup>25</sup> Juanpijinë abaxë itsa apo beyaxuabitsi, jumai tsaponæ jivijavabelia: “Ponë pacopiaevetavanapame, xanë raja apo bajaraponë. Xanëcujinae rajane bajaraponë najetarucaena. Xanë raja saya beveliamatabëcuenenënë bajaraponëvecua. Nexata bajaraponë beprijavitonëncuenia ata tataxujonotsinexa pijazapato, vecuaauranë,” jai tsaponæ Juanpijinë Jesús yabara, jai Pablo judíovijavabelia judíovi penacaetuatabiabibota.

<sup>26</sup> Icatsia Pablo jumaiti judíovijavabelia judíovi penacaetuatabiabibota:

—Tajamonæ Abrahampijinë papemomoximë, Dioso paneyaiyataevi. Dioso raja nacatoitoroba mapalivaisije vajanacacapanepaenexa Diosojavabelia. <sup>27</sup> Itsiata Jerusalén tomarapijivi apo yapëtae Jesús pecapanepæjavanexatsi. Jerusaléntomara pevetsivi ata apo yapëtae Jesús pecapanepæjavanexatsi. Bajarapamonæ apo jumeyapëtaenua pacuenia jumaiti Jesús yabara bajayata profetavi peyaquinaebaxutota. Penacueraevetsimatacabianë canacujitsia lebabibi ata bajarapabaxuto judíovi penacaetuatabiabibota, itsiata bajarapamonæ apo jumeyapëtae. Bajarapamonæ itsa neconita Jesús pebeyaxuabinexatsi, nexata judíovi exana pacuenia baja cajena Diosojumepæbivi profetavi tajëvelia vajunupaeba Jesús pexanaejavanexatsi. <sup>28</sup> Judíovi apo caxitajarabi ata Jesús itsacueneneconi pexainæjava, itsiata bajarapamonæ vajëta nacuaevetsinë Pilatojavabelia Jesús pebeyaxuabinexatsi. <sup>29</sup> Nexata jane baja Jesús itsa beyaxuabatsi, copiapata jane baja daxita pacuenia Jesús yabara tajëvelia jumaiti Dioso pejumelivaisibaxutota. Bajaraxuacujinae Jesús petëpaenë pitsicatsi cruzajavavetsica. Bajaraxuacujinae mëthëtatsi. <sup>30</sup> Itsiata baitsi jane Dioso icatsia asaëyaexanatsi Jesús petëpaecujinae. <sup>31</sup> Jesús petëpaecujinae Dioso icatsia itsa asaëyaexanatsi, bajayajebi anijatonë tsitanaitajëtabiaba pijajivijavabelia, pamonæ yanatatsi pamatacabi Jesús pona Galilea nacujavaverena Jerusalén tomaraberena. Bajarapamonæ nexata maparucæje tsipaebapona jivijavabelia Jesús pelivaisi, jai Pablo bajarapamonæjavabelia judíovi penacaetuatabiabibota.

<sup>32</sup> Icatsia Pablo jumaiti bajarapamonæjavabelia judíovi penacaetuatabiabibota:

—Nexata pacatsipaebianatsi pexanialivaisi. Dioso cajena vajasalinaivimijavabelia tajëvelia najumecapanepaeya jumaiti pacuenia Dioso toexanaejitsia vajasalinaivijavabelia. <sup>33</sup> Vaxaitsi rabaja cajena bajarapamonæmi pemomoxitsi. Nexata pacuenia Dioso tajëvelia najumecapanepaeya jumaiti vajasalinaivimijavabelia, nacatocopiapata jane baja. Tsipaji baja Jesús Dioso icatsia asaëyaexanatsi petëpaecujinae pacuenia baja cajena jumaiti Salmosbaxutota. Dioso pejumaitisijava Jesúsjavabelia, Salmosbaxutota jumaiti mapacueniaje: “Ajena raja, pamatacabi, canutatsi daxitajivi pitabarata pecayapëtaenexa xanë taxënatocuenemë,” jai cajena Salmosbaxutota Dioso pejumaitisijava Jesúsjavabelia. <sup>34</sup> Dioso baja asaëyaexanatsi Jesús petëpæjavavecua. Jesús baja nexata icatsia apo tæpæ tsane itsamatacabijavabelia ata. Bajarapacuenia yabara baja cajena vaxaitsi yapëtanetsi. Tsipaji Dioso pejumelivaisibaxutota tajëvelia jumaiti mapacueniaje: “Caexanaenatsi pacuenia baja cajena najumecapanepaeya jumaitinë Davidpijinëjavabelia,” jai Dioso pejumelivaisibaxutota bajayata Dioso pejumaitisijava Jesúsjavabelia. <sup>35</sup> Bajaraxua yabara Jesús pejumaitisijava Diosojavabelia Salmosbaxutota icatsia jumaiti mapacueniaje: “Nexënatonë apo necopatsimë tsane taperabëtsabanaejavabelia,” jai Salmosbaxutota. <sup>36</sup> Davidpijinë abaxë itsa asaë tsaponaponæ, jumecovënëtsiaponapona pacuenia Dioso itorobatsi. Bajaraxuacujinae Davidpijinë tæpa baja. Nexata Davidpijinë mëthëtatsi pamojivimi pemëthëanë muxuneneta. Nexata Davidpijinë mëthëabelia perabëtsabana

baja. <sup>37</sup> Itsiata baitsi jane Jesús, ponë Dioso icatsia asaëyaexanatsi, petëpaecujinae bajaraponë apo perabëtsabanae cajena mëthëabelia. <sup>38</sup> Tajamonae, bepayapëtaneme ponë yabara pacatsipaebatsi. Jesús raja pejamatabëcueneta Dioso baja pacavecuajibiaexana pibisiacuene paneexanaeconomie. <sup>39</sup> Pajivi Jesús jumecovënëtsiana, bajarapajivi daxita pibisiacuene pexanaeconomie Dioso vecuajibiaexanaenatsi Jesús pejamatabëcueneta. Pajivi apo jumecovënëtsicapanepe atã Dioso Moiséspijinëta penajumecopatsilivaisi, jamatabëjumaitsi: “Xanë baja jumecovënëtajë Dioso Moiséspijinëta penajumecopatsilivaisi. Nexata pibisiacuene taexanaeconomie Dioso nevecuajibiaexanaena,” jamatabëjai, itsiata bajarapajivi pibisiacuene pexanaeconomie Dioso apo vecuajibiaexanaetsi tsane. Tsipaji Dioso Moiséspijinëta penajumecopatsilivaisi itsajivi atã apo jumecovënëtsicapanepe. <sup>40</sup> Xania baja tsane. Xaniavaetsia pajinavanapaename papecatocopiapatsiyaniva pacuenia Diosojumepaebivi profetavi peyaquinaebaxutota tajëvelia jumaitsi. Tsipaji raja profetavi peyaquinaebaxutota, tajëvelia jumaitsi mapacueniaje:

<sup>41</sup> Panecapocaponaevi, ¡xania baja pataename! Panajunaviacaename raja. Tsipaji raja panevecuanaxuabianame. Panejinavanapaeepeatota xanë, Diosonë, exanaenajë ayaicuene taexanaejavanë. Nexata taexanaejavanë pelivaisi, itsamonae xaniavaetsia pacatsipaebi atã tsane, itsiata apo pajumecovënëtsimë tsane, jai Diosojumepaebivi profetavi peyaquinaebaxutota Dioso penaneconitsiaexanaejavanexa yabara pamona Dioso apo pejumecovënëtsivi, jai Pablo bajarapamonaejavabelia judíovi penacaetuatabiabibota.

<sup>42</sup> Pablobeje baja Bernabébeje pitsapaejitsiabeje judíovi penacaetuatabiabibovecua. Nexata bajarajota pamona apo judíovi, junatatsibeje icatsia itsamatacabi judíovi penacueraevetsimatatabita petsipaebinxabeje bajarapalivaisi. <sup>43</sup> Penacaetuatsivi baja naviaba judíovi penacaetuatabiabibovecua. Nexata Pablobeje Bernabébeje judíovi penacaetuatabiabibovecua itsa pitsapabeje, jivi ayaibitsaëto pënaponatsibeje. Bajarapamonaeyajuvënëvi itsamonae judíovi, itsamonae apo judíovi. Pamona apo judíovi, bajarapamona catsiteca judíovicuenia Dioso pejumecovënëtsijava. Nexata Pablobeje Bernabébeje muxujjobabeje bajarapamona pevajënaeyabelia ajamatabëcuenesaëya pejumecovënëtanapaenexa Dioso pitaxutotsoniatæjavatsi.

<sup>44</sup> Bajara jane xuacujinae icatsia judíovi penacueraevetsimatatabita, bajarapatomarpijivi muxunanacaetuatsibeje ayaibitsaëtoxonetonë Dioso pitorobilivaisi penamuxunaevetsinexatsibeje. <sup>45</sup> Nexata judíovi itsa tane bajarapajivibitsaëtoxonetonë Pablobeje Bernabébeje pemuxunanacaetuatsijavatsibeje, judíovi bitso cuenecaëbatsi. Nexata judíovi jumaitsi jivijavabelia pejumecovënëtsiyaniva bajarapalivaisi:

—Pacuenia Pablo pacatsipaeba, apo xaniajai cajena, jai judíovi Pablo petsipaebilivaisi yabara.

Judíovi bitso pibisiacuena baracuaicuajitsi Pablo. <sup>46</sup> Itsiata Pablobeje Bernabébeje ajumejunavijibia tsipaebaponabeje Dioso pitorobilivaisi. Jumaitsidebe tsaponae mapacueniaje:

—Copiaya baja picani pacatsipaebatsibeje Dioso pitorobilivaisi paxamë pajudíovimëjavabelia. Itsiata apo pajitsipaemë bajarapalivaisi panejumecovënëtsinexa. Tsipaji apo pajitsipaemë panexainaenexa matatabi apo peverevereaejava. Paxanëbeje baja nexata pacavecuaponatsibeje patatsipaebinxabeje bajarapalivaisi apo judíovijavabelia.

<sup>47</sup> Bajarapacuenia pacavecuaponatsibeje tsipaji baja pepo petuxanenë bajarapacuenia paneitorobabeje. Dioso cajena pejumelivaisibaxutota tajëvelia jumaitsi mapacueniaje:

Caitorobianatsi nejamatabëcuenitayotsinexa pamona apo judíovi. Baitsi jane tsipæbanajetarucaename tajumelivaisi daxitanacuanëjava, nacuatabujava atã pejinavanapaevi, pecapanepaenexatsi pibisiacuene pexanaeconomievecua,

jai Dioso pejumelivaisibaxutota, jai Pablo judíovijavabelia.

<sup>48</sup> Apo judíovi itsa jumetane bajarapacuenia Pablo pejumaitsijava, nexata apo judíovi jamatabëcuenenarëya. Nexata apo judíovi jumaitsi:

—Dioso cajena pitorobilivaisi pexanialivaisi bitso, jai.

Nexata jane baja apo judíovi ata jumecovënëta Dioso, pamona baja cajena tajëvelia Dioso itapeta matabi apo peverevecejava pexainaenexa. <sup>49</sup> Nexata jane baja daxita bajarapanacuata pejinavanapaevi jumetane Dioso pitorobilivaisi. <sup>50</sup> Itsiata baitsi jane pajudíovi Pablobeje Bernabébeje cueneitoyatsibeje, muxubijiapenetsiaya barëcuaicuaijai tomaraevetsivijavabelia, petuxanevi pijavajivijavabelia ata. Nexata bajarapamona anaepana Pablobeje Bernabébejevabelia. Nexata baja Pablobeje Bernabébeje capit-sapatsibeje bajarapanacuavecua. <sup>51</sup> Nexata Pablobeje Bernabébeje bajarapatomarata nataxuatsapërëvarëbabeje. Bajarapacuenia nataxuatsapërëvarëbabeje bajarapatomarpijivi peyapëtaenexa penaneconitsijava Diosojavabelia, apo pejumecovënëtsixae Dioso pitorobilivaisi. Bajaraxuacujinae Pablobeje Bernabébeje Iconio tomarabelia baja ponabeje. <sup>52</sup> Itsiata daxita pamona Dioso pejumecovënëtsivi, Antioquía tomarata pejinavanapaevi, jamatabëcuenebarëya. Espíritu Santonua jamatabëcuenevënëcavanapa. Nexata exanabiaba pacuenia Espíritu Santo itorobatsi.

## 14

### *Pacuenia Pablobeje Bernabébeje ponaponabeje Iconio tomarata yabara pelivaisi*

<sup>1</sup> Iconio tomarata Pablobeje Bernabébeje judíovi penacaetutabiabibota najoneyabeje. Bajarajota xaniavaetsia tsipaebabeje Jesús pelivaisi. Nexata jivibitsaëtoxoneto judíovi, apo judíovi ata, jumecovënëta Jesús pelivaisi. <sup>2</sup> Itsiata baitsi jane itsamonae judíovi, Dioso apo pejumecovënëtsivi, itoroba apo judíovi pianaepanaenexa Jesús pelivaisi pejumecovënëtsivijavabelia. <sup>3</sup> Bajarapacuenia peyapëtaexaabeje, Pablobeje Bernabébeje bajayajebi ponaponabeje bajarajota. Tsipaebabiababeje ajumejunavijibia Jesús pelivaisi. Tsipaji yapëtanebeje Dioso peyjavaponaponaejavatsibeje. Nexata daxitajivi yapëtaeyaexanaponabeje Dioso pitaxutotsoniatæjavatsi bajarapamona. Nexata daxita bajarapamona yapëtane Jesús pelivaisi pexaniajailivaisicuenia. Tsipaji bajaraponëbeje ayaicuenia pexanaejava Dioso pesaëta exanaponabeje. <sup>4</sup> Itsiata bajarapatomarapijivi apo najamatabëcuenejëpae. Itsamonae jitsipa pejumecovënëtsinexa judíovi petsipaebilivaisi. Itsamonae jitsipa pejumecovënëtsinexa apóstolenëbeje petsipaebilivaisi. <sup>5</sup> Nexata judíovi, apo judíovina, tomara pevetsivina, jamatabëbijatanetsibeje Pablobeje Bernabébeje. Jamatabëtseconatsibejenua ibotonëta. <sup>6</sup> Nexata Pablobeje Bernabébeje nayajumetanebeje pacuenia exanaejitsiatsibeje. Nexata vecuanajetabajiravabeje Litra tomarabelia, Derbe tomarabelia ata. Bajarapatomarabeje ecabeje Licaonia nacuata. Bajarapatomarabeje pepënëya penaetomaraxijava ata najetarucabeje. <sup>7</sup> Daxita bajaraxuayo tsipaebanajetarucabeje pexanialivaisi, Jesús pelivaisi.

### *Pacuenia Pablo ibotonëta tseconatsi Litra tomarata yabara pelivaisi*

<sup>8</sup> Litra tomarata naeca petaxucuenabinëtsi. Penaexanaejavaveliacujinae apo ponaponae caeto ata. <sup>9</sup> Bajaraponë najumetaeyeca Pablo petsipaebilivaisi. Nexata Pablo naitaxutobabatsiaya naëcota bajaraponëjavabelia. Nexata Pablo jamatabëcuene yapëtane petaxucuenabinëtsi pejamatabëjumaitisijava: “Dioso pepacuene cajëpatsi tanetaxuxanepanaeyaexanaenexa,” pejamatabëjaijava. <sup>10</sup> Nexata Pablo pinijijumeta jumaitis petaxucuenabinëtsijavabelia:

—Nonotapunare. Ponaponare baja, jai Pablo.

Nexata bajaraponë jirevapuna. Ponapona baja. <sup>11</sup> Jivibitsaëtoxonetonë itsa tane Pablo petaxuxanepanaeyaexanaejava petaxucuenabinëmitsi, nexata bajarapamona pijajumeta, Licaonijumeta, pinijijumeta jumaitis mapacueniaje:

—¡Diosonëbeje cajena! ¡Bevaxaitsi jivitonëbejecuenia patsica vaxaitsijavabetsica! jai bajarapamona.

<sup>12</sup> Bajarapanacuapijivi xaina pijadivosi. Itsiata apo pepo diosovi. Nexata Bernabé tanetsi beZeusvënëdiosonë. Pablo pijinia tanetsi beHermesvënëdiosonë. Tsipaji Pablo penamatacanajetarucaenë. Nexata jivi barëcuaicuaijai tsabiabi. <sup>13</sup> Zeusvënëdiosonë

pijatemplobo eca Listratomara jumaverena, Listra tomarabelia pejonebaupa imoxoyovecua. Nexata sacerdotenë, Zeusvënëdiosonë pijatemplobota penacuenebabiabinë, capata torobitsaëto Listra tomarabelia pejonebaupajavaberena. Bajarapatorobitsaëto matabocoitabëtsiaya tsmataruba pematono. Nexata sacerdotenë, Listra tomarapijivi yajava, tobejitsiatsibeje picani bajarapatorobitsaëto Pablobeje Bernabébeje ofrendacuenia bajarapavi petotajuitsinexatsibeje. Bajarapacuenia picani totajuitsijitsiatsibeje tsipaji bediosonëbeje tanetsibeje. <sup>14</sup> Nexata Bernabébeje Pablobeje itsa jumetanebeje bajarapacuenie petoexanaejavanexatsibeje, apo jitsipaebeje. Nexata penaxatatsijavabeje mëpabëtitinaxuabarecabeje. Tsipaji Dioso apo pejitsipaecuenia bajarapamonae toexanaejitsiatsibeje. Nexata cujinaejinaliabeje jivibitsaëtoxanetonë penacaetuanajavabelia. Nexata bajarapajivibitsaëtoxanetonë tuatuajëta nucabeje. Pinijijumeta Pablo jumaitsi:

<sup>15</sup> —¿Detsa xuajitsia bajarapacuenie panetoexanaejitsiamë? Paxanëbeje ata raja saya pajivitonënëbeje. Pacuenia paxamë pajamatabëcueneitsimë, bajara saya paxanëbeje ata patajamatabëcueneitsinëbeje. Papatajopajëbeje patacatsipaebinxabeje pexanialivaisi. Panajamatabëcuenepënëyorore bajarapacuenia paneexanabiabijavavecua panejumecovënëtsinexa pepo Dioso apo peyamatacabiavereverecaenë. Dioso raja daxitacuenie pexanaenë. Exana mapanacuaje, mapanacuapijicuenie yajava. Exana itaboxo ata, itaboxopijicuenie yajava. Exana manuumene ata, manuumenepijicuenie yajava. <sup>16</sup> Dioso copata vajavajënaeya daxitanacuapijivi pejinavanapaenexa pijacuata penatojitsipaecuenia. <sup>17</sup> Nexata Dioso daxitacuenie pexanaejava, nacobecovëtaeyaexanabiaba daxitajivijavabelia. Nexata picani bajarapamonae becanaëjëta Dioso peponaponaejava. Tsipaji Dioso pexaniacuene toexanabiaba bajarapamonaemijavabelia. Bajara icatsia pacuenia vaxaitsijavaberena ata pexaniacuene Dioso nacatoexana. Ema nacatorunaeyaexanabiabica. Nexata vajaubijava nacatonaxaniabiaexanabiaba. Nexata bajarapacuenia vajaxaejava nacarajutabiaba. Nacajamatabëcueniebarëyayaexananua, jai Pablo pamonaejavabelia picani torobitsaëto tobejitsiatsibeje.

<sup>18</sup> Bajarapacuenia Pablo jumaitsi ata, itsiata picani bajarapamonae jamatabëtobiatsibeje torobitsaëto petotajuitsinexatsibeje bajarapavi ofrendacuenia Pablobeje Bernabébejenexa. Itsiata baja belia copatsiaexanabeje.

<sup>19</sup> Nexata judíovi, Dioso apo pejumecovënëtsivi, parena Antioquía tomaraverena, Iconio tomaraverena ata. Bajarapajudíovi Listra tomarapijivijavabelia najumetsënëtsiaya neconitatsibeje Pablobeje Bernabébeje pebaraanaepanaenexatsibeje. Nexata Listra tomarapijivi ibotonëta tseconatsi Pablo. Bajaraxuacujinae tomarapënëyabelia robobocaliatsi. Tsipaji baja bepetëpaenë taeyabuatsi. <sup>20</sup> Itsiata baitsi jane Dioso pejumecovënëtsivi Pablo matatoyorotsia itsa taenubenatsi pexuababuatsijavatatsi, nexata Pablo nonotapuna icatsia. Icatsia Pablo caevëa jonena Listra tomaraberena. Meravia pitsijavata Pablobeje Bernabébeje ponabeje baja Derbe tomarabelia.

<sup>21</sup> Nexata Derbe tomarata tsipaebaponaponabeje pexanialivaisi, Jesús pelivaisi. Nexata jumecovënëtsibeje jivibitsaëtoxaneto. Bajaraxuacujinae icatsia naviatanajetarucabeje Listra tomarajava, Iconio tomarajava ata, Antioquía tomarajava ata. <sup>22</sup> Bajarapatomaranëjava Jesús pelivaisi tsipaebanajetarucabeje pejamatabëcuene asaëyaexanaponaenexabeje Dioso pejumecovënëtsivi. Muxujiobaponabeje bajarapamonae pevajënaeyabelia ajamatabëcuenesaëya pecatsitecaenexa Dioso pejumecovënëtsijava. Pablobeje Bernabébeje jumai tsaponabeje Dioso pejumecovënëtsivijavabelia:

—Dovathi pejamatabëcueneta, pinijicuenia nacajamatabëcueneëjëtaponae na daxita vajajonevinexa Dioso pijanacuayabetsia, jaibeje tsaponae Dioso pejumecovënëtsivijavabelia.

<sup>23</sup> Caebitsaëto canacujitsia, Dioso pejumecovënëtsivijava, toitapetaponabejenua ancianovinexa, Dioso pejumecovënëtsivi pevetsivinexa. Nexata itsa pabitsaëtojavata toitapetsijitsiabeje, penacaetuatsivajënaeya apo xaeyabiabibeje pexaejava. Nexata

penacaetuatsijavata itsa toitapetabeje, japasa tovajëtabiababeje Diosojavabelia bajaramonae peyavenonaenexatsi Dioso. Jumai tsabiabibeje Diosojavabelia:

—Diosomë, xaniavaetsia yavenonaename mapaancianovije xaniavaetsia pecatovetsinexa nijajivi, jaibeje tsabiabi Diosojavabelia.

*Pacuenia Pablobeje Bernabébeje naviatabeje Antioquia tomarabelia, Siria nacuata peecae-tomarabelia, yabara pelivaisi*

<sup>24</sup> Pablobeje Bernabébeje Pisidianacua pexenetsicujinaebeje, patabeje Panfilia nacuyabelia. <sup>25</sup> Nexata Panfilia nacuata, Perge tomarata, Dioso pitorobilivaisi jivi tsipaebabeje. Bajaraxuacujinae icatsia patabeje Atalia tomarata. <sup>26</sup> Nexata Atalia tomarata naropotabeje barcota. Menia jane baja ponabeje. Naviatabeje jane baja Antioquia tomarabelia. Tsipaji baja cajena pamatacabi taxuxuabijitsiabeje Dioso pitorobilivaisi jivi petsipaebanajetarucaenexabeje, naropotabeje Antioquia tomarata. Nexata pamatacabi naropotabeje Antioquia tomarata, penaropotsivajënaeyabeje, Dioso pejumecovënëtsivi tsimatanacobebuatatsibeje Dioso peyavenonaponaejavatsibeje jivi petsipaebanajetarucavatabeje Dioso pitorobilivaisi. Pablobeje Bernabébeje Antioquia tomarata patabeje. Tsipaji baja toveretabeje daxita pacuenia Dioso itorobatsibeje. <sup>27</sup> Itsa baja Antioquia tomarata patabeje, junatabeje penacaetuatsinexa daxita Dioso pejumecovënëtsivi. Nexata bajarapamonaejavabelia tsipaebabeje daxita Dioso peyavenonaponaejavatsibeje. Tsipaebabejenua apo judíovi ata pejumecovënëtsijava Dioso pitorobilivaisi. Tsipaji baja cajena Dioso tocopata apo judíovi ata pejumecovënëtsinexa bajarapalivaisi. <sup>28</sup> Pablobeje Bernabébeje Antioquia tomarata bajayajebi naponaponabeje Dioso pejumecovënëtsivijavata.

## 15

*Pacuenia apóstolevi, ancianovi yajava, nacaetuata Jerusalén tomarata yabara pelivaisi*

<sup>1</sup> Pamatacabi Pablobeje Bernabébeje ponaponabeje Antioquia tomarata, judíovi, Judea nacuaverena peponaevi, pata Antioquia tomarata. Nexata bajarapamonae Dioso pejumecovënëtsivijavabelia livaisi tsipaeba. Petsipaebijavata bajarapamonae jamatabëcuenenavëxaniabiaya jumaitsi mapacueniaje:

—Panamatavenoname paxamë ata papecaperabëcaucubinexa pacuenia Dioso Moiséspijinëta najumecopata. Itsa jume, nexata acuenebi tsane papecacapanepaejava Diosojavabelia, jai tsaponae judíovi, pepatsivi Judea nacuaverena.

<sup>2</sup> Bajarapacuenia pejumaitsaponaexae, nexata Pablobeje Bernabébeje pinijicuenia namataenetsia barënajumenotabeje pajudíovi pata Judea nacuaverena. Nexata Antioquia tomarapijivi Dioso pejumecovënëtsivi, Pablobeje Bernabébeje itapetatsibeje pitorobinexatsibeje Jerusalén tomarabelia. Nexata Pablobeje Bernabébeje yajavaponabeje Dioso pejumecovënëtsiviyajuvënëvi. Itorobatsibeje peyanijobinexabeje peperabëcaucubicuene yabara apóstolevijavabelia, ancianovijavabelia ata, Jerusalén tomarata pejinavanapaevijavabelia.

<sup>3</sup> Itorobatsibeje Dioso pejumecovënëtsivi. Nexata Pablobana itsa pona, najetarubena Fenicia nacujava, Samaria nacujava ata. Bajaraxuayo Dioso pejumecovënëtsivijavabelia tsipaebapona apo judíovi ata pijaperujamatabëcuene pecopabijava, pejumecovënëtsinexa Dioso. Nexata daxita Dioso pejumecovënëtsivi jamatabëcuenebarëya itsa jumetane bajarapalivaisi.

<sup>4</sup> Pablobana itsa pata Jerusalén tomarabelia, Dioso pejumecovënëtsivi, apóstolevinua, ancianovinua, xaniavaetsia copiapitatsi. Nexata Pablobeje Bernabébeje bajarapamonaejavabelia tsipaebabeje daxita Dioso peyavenonaponaejavatsibeje pamatacabi Dioso pitorobilivaisi jivi tsipaebanajetarucabeje. <sup>5</sup> Nexata fariseovi, Dioso pejumecovënëtsivi, nonobapuna. Fariseovi jumaitsi mapacueniaje:

—Dioso pejumecovënëtsivi apo judíovi ata, namatavenona peperabëcaucubinexatsi. Namatavenonana bajarapamonae pejumecovënëtsinexa Dioso Moiséspijinëta penajumecopatsilivaisi, jai fariseovi Dioso pejumecovënëtsivi.

<sup>6</sup> Nexata nacaetuata apóstolevi, ancianovi yajava, apo judíovi ata peperabëcaucubijavatsi yabara penabarëcuaicuaijainexa. <sup>7</sup> Bajayajebi baja namataenetsia penabarëcuaicuaijaicujinae, nexata Pedro nonotapuna. Jumaitsi:

—Tajamonae, payapëtaneme rabaja mapacueneye. Xanë baja cajena bajaya Dioso nitapeta, paxamëyajuvënë, apo judíovijavabelia tatsipaebinexa pexanialivaisi, Jesús pelivaisi. Nexata apo judíovi ata Dioso pecapanepaenexatsi Jesús pelivaisi itsa jumecovënëta. <sup>8</sup> Dioso cajena daxitajivi pejamatabëcueneyapëtaenë. Yapëtanetsi Dioso aneconijibia petaejava apo judíovi ata. Yapëtanetsi bajarapacueneye tsipaji apo judíovi ata Dioso rajuta Espíritu Santo. Pacuenia vaxaitsi judíovitsi Dioso nacarajuta Espíritu Santo, bajara pijinia pacuenia Dioso rajuta Espíritu Santo apo judíovi ata. <sup>9</sup> Pacuenia vaxaitsi judíovitsi Dioso nacajitsipa, bajara pijinia pacuenia Dioso jitsipa apo judíovi ata. Bajaraxuata apo judíovi ata pibisiacuene pexanaeconimi Dioso vecuaajibiaexanatsi Jesús pelivaisi pejumecovënëtsixae. <sup>10</sup> Pëtsa pajumeaebame Dioso aneconijibia petaejava apo judíovi ata. Pëtsa bajarapamonae paitorobame pejumecovënëtsinexa piayapëbejelivaisi, Dioso Moiséspijinëta penajumecopatsilivaisi. Tsipaji bajarapalivaisi vaxaitsi ata apo nacacaëjêpae vajajumecovënëtsinexa. Vajasalinaivimi ata apo caëjêpaetsi pejumecovënëtsinexa bajarapalivaisi. <sup>11</sup> Vaxaitsi baja jumecovënëtatsi Jesús pelivaisi. Nexata vajatuxanenë Jesucristo pejamatabëcueneta Dioso vajanacaitaxutotsoniataexae, nacapanepaena pibisiacuene vajaexanaeconivecua. Bajara pijinia pacuenia apo judíovi ata Jesucristo pejamatabëcueneta Dioso capanepaenatsi pibisiacuene pexanaeconivecua, jai Pedro apóstolevijavabelia, ancianovijavabelia ata.

<sup>12</sup> Dioso pitorobilivaisi Bernabébeje Pablobeje apo judíovijava itsa tsipaebanajetarcabeje, Dioso pesaëta pinijicuene pexanaejavanë exanaponabeje. Nexata bajaraxua Bernabébeje Pablobeje itsa navajunupaebabeje, daxita apóstolevi, ancianovi ata, moyana. Xaniavaetsia namuxunaevetena. <sup>13</sup> Itsa baja Pablobeje Bernabébeje najumeveretabeje petsipaebijavabeje, nexata Santiago jumaitsi apóstolevijavabelia, ancianovijavabelia ata:

—Tajamonae, panenamuxunaevere. <sup>14</sup> Simón Pedro raja nacatsipaeba Dioso aneconijibia petaejava apo judíovi ata pecapanepaenexa pibisiacuene pexanaeconivecua Jesús pelivaisi itsa jumecovënëta. <sup>15</sup> Bajarapacuenia apo judíovi ata aneconijibia Dioso petaejavanexa yabara, bajayata tajëvelia Diosojumepaebivi profetavi peyaquinaelivaisita vajunupaeba baja cajena. Dioso pejumatsijava apo judíovi yabara Dioso pejumelivaisibaxutota jumaitsi mapacueniaje:

<sup>16</sup> “Bajayata abaxë pamatacabi Davidpijinë evetaponapona Israelnacua, xaniavaetsia jivi nejumecovënëtavanapa. Bajara icatsia pacuenia jivi xaniavaetsia tanejumecovënëtavanapaenexa, yavenonaenajë. <sup>17</sup> Nexata apo judíovi ata, daxita pamonaenajë junnatsianajë tajajivinexa, bajarapamonae ata jitsipaena tanejumecovënëtsinexa,” jai bajayata Dioso mapacueniaje. <sup>18</sup> Dioso baja cajena tajëvelia yapëtaeyaexana daxita mapacueneye yabaraje,

jai profetavi peyaquinaelivaisita, jai Santiago apóstolevijavabelia, ancianovijavabelia ata.

<sup>19</sup> Icatsia Santiago jumaitsi apóstolevijavabelia, ancianovijavabelia ata:

—Nexata xanë jamatabëitsinë mapacueniaje. Apo jamatabëitonotsi tsanetsi baja matavëjêa apo judíovi, pamonaenae baja najamatabëcuenepënëyorota Diosojavabelia. <sup>20</sup> Itsiata baitsi jane caelivaisiyobeje toyaquinaenatsi cuyalatobaxutota vajayapëtaeyaexanaenexa bajarapamonae. Itsamonae xaina pecobeta saya jumapecataeya pexanaenëanë bepíjadosovi petaenexa. Nexata bajaraxuanëjavabelia ofrendacuenia pevi perajutsinexa, tobeyabiaba baca, oveja ata. Toyaquinaenatsi bajarapayajuvënëvi pexaeyaniva. Toyaquinaenatsinua daxita pebijivi peyapëtaenexa, daxita petiriavi ata peyapëtaenexa. Papebijivi baja nacojioba, pematayajibiyavatsi itsavajavabelia pijavavecua. Papebijivi pijinia abaxë apo nacojiobi, pematayajibiyavatsi petirivajavabelia. Bajara pijinia pacuenia petiriavi ata. Papepetiriavi baja nacojioba, pemataya-

jibyanivatsi itsanëjavabelia pamonavecu. Papetiriavi pijinia abaxë apo nacojiobi pematayajibyanivatsi pebijavabelia. Toyaquinaenatsinua bajarapamonae pexaeyaniva cuibocuetsacaeya pebeyaxuabinë pevi, pexaeyaniva peja ata. Bajarapacuenia toyquinaenatsi apo judíovi ata Dioso pejumecovënëtsivi peyapëtaenexa xua vaxaitsi judíovitsi cjunavatsi. Nexata itsamatacabijavabelia ata apo judíovi pejamatabëcuenebijiánaeyaniva judíovijavabelia. <sup>21</sup> Tsipaji bajarapalivaisi Dioso Moiséspijinëta penajumecopatsijavaveliacujinae, vajasalinaivimi caetomara canacujitsia itavetabiabatsi bajarapacuenie. Itavetabiabatsi bajarapacuenie penacueraevetsimatacabianë canacujitsia penacaetuatabiabiabonëjava, jai Santiago apóstolevijavabelia, ancianovijavabelia ata.

<sup>22</sup> Nexata daxita apóstolevi, ancianovinua, daxita Dioso pejumecovënëtsivinua, najamatabëjêpa penaitapetsinexa bajarapamonaeyajuvënëvi pitorobinexa Antioquía tomarabelia Pablobeje Bernabébeje pepëta. Nexata itapetatsibeje Silasbeje Judasbeje. Judas vënërubatsi itsavënë, Barsabás. Bajaraponëbeje Dioso pejumecovënëtsivi penamatacaitorobivi yajuvënënebeje. <sup>23</sup> Pacuyalatobaxuto bajaraponëbeje tocaponaejitsiabeje Antioquía tomarapijivijavabelia, Siria nacuapijivijavabelia ata, Cilicia nacuapijivijavabelia ata, jumaitsi mapacueniaje:

—Tajamonae, paxanë paapóstolevinë, pacajamatabënajinaliatsi. Vajamonae ancianovi ata pacajamatabënajinalia. Pacajamatabënajinaliatsi daxita apo pajudíovimë, Antioquía tomarata panejinavanapaevi. Paxamë ata Siria nacuata panejinavanapaevi, pacajamatabënajinaliatsi. Paxamë ata Cilicia nacuata panejinavanapaevi, pacajamatabënajinaliatsi. <sup>24</sup> Pavënëlivaisitaniji pacuenia pacajumaitsi paxanëyajuvënëvi papecasivaxainaevilia. Bajarapamonae pina nexata pacanajamatabëcuene epatajërërëcaeyaexanapona. Tsipaji pina bajarapamonae pacajumaitsi: “Panamatavenoname paxamë ata papecaperabëcaucubinexa. Panamatavenonamenua panejumecovënëtsinexa Dioso Moiséspijinëta penajumecopatsilivaisi,” pacajai pina. Pamonae pacajumaitsi bajarapacuenia, paxanë cajena apo paitorobinë paxamëjavabelia. <sup>25</sup> Nexata paxanë patanacaetuatsijavata, panajamatabëcuenejêpajê pataitapetsinexa ponëbeje paitorobijitsianë paxamëjavabelia pecaponaenexabeje patacatoyaquinaelivaisi. Bajaraponëbeje naliabeje Bernabébeje Pablobeje pepëta. <sup>26</sup> Vajabananëbeje, Bernabébeje Pablobeje, bitso vaxaitsi asivatsi. Bajaraponëbeje vajatuxanenë Jesucristo pejumelivaisi yabara itsamonae jamatabëbeyaxuababiabi atatsibeje, itsiata ajamatabëcuenesaëbeje tsaponapona. <sup>27</sup> Nexata bajaraponëbeje pepëta pacatoitorobatsi Judasbeje Silasbeje. Nexata Judasbeje Silasbeje xaniavaetsia pacatsipaebiana pacuene yabara pacatoyaquinatsi cuyalatobaxutota. <sup>28</sup> Itsa panacaetuatajê Espíritu Santo paneyavenona patayapëtaenexa peyapëxanepanaelivaisi patacatoitorobinexa panejumecovënëtsinexa. Nexata baja apo panamatavenonaemë panejumecovënëtsinexa piayapëbejelivaisi, palivaisi daxita pajudíovinë pajumecovënëtajê. Pacaitorobatsi palivaisi bitso panamatavenoname panejumecovënëtsinexa. <sup>29</sup> Pecobeta saya jumapecataeya pexanaenëanëjavabelia ofrendacuenia pevi perajutsinexa itsamonae itsa tobia baca, oveja ata, pëtsa paxaneme bajarapayajuvënëvi. Pëtsa paxaneme peja. Pëtsa paxaneme cuibocuetsacaeya pebeyaxuabinë pevi. Papebijivi baja nacojioba, pëtsa matayajibatsi itsavajavabelia pijavavecu. Papebijivi pijinia abaxë apo nacojiobi, pëtsa matayajibatsi petirivajavabelia. Bajara pijinia pacuenia petiriavi ata. Papetiriavi baja nacojioba, pëtsa matayajibatsi itsanëjavabelia pamonavecu. Papetiriavi pijinia abaxë apo nacojiobi, pëtsa matayajibatsi pebijavabelia. Itsa pajumecovënëtame bajarapalivaisi, nexata xaniavaetsia pajinavanapaename. Bajara saya palivaisiyo pacatoyaquinatsi, jai apóstolevi, ancianovi yajava, apo judíovijavabelia petoyaquinaebaxutota Jerusalén tomaravelia.

<sup>30</sup> Nexata jane baja bajarapacuyalatobaxuto petocaponaenexabeje apo judíovijavabelia, Judasbeje Silasbeje itorobatsibeje penaponaenexabeje Pablobeje Bernabébeje pepëta. Nexata baja naponabeje. Bajarapamonae pata Antioquía tomarabelia. Nexata Antioquía tomarapijivi junata daxita Dioso pejumecovënëtsivi penacaetuatsinexa.

Nexata penacaetuatsijavata rajutabeje bajarapacuyalatobaxuto. <sup>31</sup> Antioquía tomarijivi itsa leba bajarapacuyalatobaxuto, bajarapamonae bitso jamatabëcuenebarëya. <sup>32</sup> Judasbeje Silasbeje Diosojumepaebinëbeje profetanëbeje. Nexata ayailivaisi tsipaebabeje Antioquía tomarijivijavabelia. Nexata baja bajarapamonae ajamatabëcuenesaë Diosojavabelia pejumetaexae palivaisi tsipaebabeje Judasbeje Silasbeje bajarapamonaejavabelia. <sup>33</sup> Bajayajebi baja Antioquía tomarata Judasbeje Silasbeje naponaponabeje. Bajaraxuacujinae Dioso pejumecovënëtsivijavabelia xaniavaetsia napëjiobabeje penavitsinexabeje baja pitorobivitsijavabelia. <sup>34</sup> Pepuanapëjiobibeje baja, Silasbeje abaxë itsiata icatsia nacopatabeje bajarajota. <sup>35</sup> Pablobeje Bernabébeje ata abaxë ponaponabeje Antioquía tomarata. Dioso pitorobilivaisi tsipaebaponaponabeje. Itsamonae Dioso pejumecovënëtsivi yajavaponaponabeje Dioso pitorobilivaisi penajuatsipaebabiabinexa.

*Pacuenia icatsia Pablo cotocaevi panamuto pona jivi icatsia petsipaebinexa Dioso pitorobilivaisi yabara pelivaisi*

<sup>36</sup> Antioquía tomarata Pablobeje Bernabébeje bajayajebi ponaponabeje. Pablo jumaitsi Bernabéjavabelia:

—Ponatsibeje icatsia vajataenexabeje vajamonae Dioso pejumecovënëtsivi. Daxita tomaranëjava, itsaxuayo baja imata tsipaebanajetarucatsibeje Dioso pitorobilivaisi, bajaraxuayo icatsia najetarucaenatsibeje. Taenajetarucaenatsibeje pacuenia jinavanapa bajarapamonae, jai Pablo Bernabéjavabelia.

<sup>37</sup> Bernabé nexata bitso jitsipa pebarëponaenexabeje icatsia Juan, ponë vënërubatsi itsavënë, Marcos. <sup>38</sup> Itsiata baitsi jane Pablo apo jitsipae baja icatsia Marcos pebarëponaenexabeje. Tsipaji imata copiaya panamuto barëponabeje picani, Marcos epatua naviateca Panfilia nacuata. Nexata Marcos xaniavaetsia apo yavenonaeyaveretsi Dioso pitorobilivaisi jivi petsipaebaponaejava. <sup>39</sup> Nexata Pablobeje Bernabébeje apo najamatabëcuenejëpaebeje Marcos pebarëponaevajabejenexa yabara. Nexata baja Pablobeje Bernabébeje navecuanatsatabeje. Bernabé jane baja nexata Marcos barëpona. Velapanata peponaebarcota Bernabébeje Marcosbeje naponabeje. Nexata nicababeje Chipretunaeto nacuyabelia. <sup>40</sup> Nexata pijinia Pablo itapeta Silas peyanatsinexatsi. Dioso pejumecovënëtsivi tovajëtatsibeje Diosojavabelia peyavenonaponaenexatsibeje penajetarucaevajabeje. <sup>41</sup> Nexata Pablobeje Silasbeje Siria nacujava, Cilicia nacujava ata, Dioso pitorobilivaisi jivi tsipaebanajetarucabeje. Nexata bajarapanacuanëpijivi Dioso pejumecovënëtsivi, caebitsaëto canacujitsia, Diosojavabelia ajamatabëcuenesaë tsapona.

## 16

*Pacuenia Timoteo Listra tomarata nanaropota Pablobeje Silasbeje pepëta yabara pelivaisi*

<sup>1</sup> Pablobeje Silasbeje patabeje Derbe tomarata. Patabeje Listra tomarata ata. Listra tomarata caxitajarababeje Dioso pejumecovënëtsinë, Timoteo. Timoteo pena judíova, Dioso pejumecovënëtsiva. Itsiata baitsi jane Timoteo paxapijinë griegonë. <sup>2</sup> Daxita Dioso pejumecovënëtsivi, Listra tomarijivi, Iconio tomarijivi ata, Timoteo yabara jumai tsabiabi:

—Timoteo raja xaniavaetsia Dioso jumecovënëtapona, jai tsabiabi.

<sup>3</sup> Pablo jitsipa Timoteo pebarëponaejava. Nexata Pablo Timoteo pebarëponaevajënae, judíovi pijacuenia perabëcaucutsiaexana. Baitsi boupiperabëcaucutsiaexana. Bajarapacuenia Pablo perabëcaucutsiaexana pebaraanaepanaeyanivatsi pevëna judíovi. Tsipaji itsaxuayo barënajetarucaejitsia, judíovi penaperabëcaucubivi jinavanapa. Nexata judíovi apo jitsipae peyajavajinavanapaejava apo peperabëcaucutsinëtsi. Nexata Pablo Timoteo perabëcaucutsiaexanaenejeva itsa barënajetarucaejitsipa bajarapamonaejava, yapëtaejitsipatsi Timoteo, apo peperabëcaucutsijavatsi. Tsipaji Timoteo paxapijinë griegonë, apo peperabëcaucutsinëtsi. <sup>4</sup> Pablobana tomaranëjava itsa najetarubena, caetomarijivi canacujitsia, tsipaebapona Dioso pejumecovënëtsivijavabelia palivaisi

toyaquinatsi Jerusalén tomaraverena. Tsipaebanajetarubena caetomarapijivi canacujitsia pejumecovënëtsinexa pacuenia apóstolevi, ancianovi ata, itorobatsi Jerusalén tomaraverena. <sup>5</sup> Bajaraxuata Dioso pejumecovënëtsivi, caebitsaëto canacujitsia, bitso ajamatabëcuenesaë tsaponae Diosojavabelia. Caematacabi canacujitsia Dioso pitorobilivaisi ayaibitsaëto jumecovënëtaona.

*Pacuenia Pablo bemajitsinaebota tane Macedonia nacuapijinë yabara pelivaisi*

<sup>6</sup> Espíritu Santo apo tocopatsitsi Pablobana petsipaebinexa Dioso pitorobilivaisi Asivënë nacuata. Bajaraxuata Pablobana najetarubena Frigia nacujava, Galacia nacujava ata. <sup>7</sup> Pablobana ita najetarubena Misianacua muxubërëa, jamatabëpata picani Bitinia nacujava. Itsiata baitsi jane Espíritu Santo apo tocopatsitsi pepatsinexa Bitinia nacujava. <sup>8</sup> Nexata Misianacua canacujitsialia roviaia ponalia. Pata Troas tomarabelia. <sup>9</sup> Nexata Troas tomarata meraví Pablo bemajitsinaebota taenuta Macedonia nacuapijinë. Macedonia nacuapijinë asaëyata jumaitsi Pablojavabelia:

—Naxanitsia. Macedonia nacuyabelia ponare. Paneyavenonaename, jai Macedonia nacuapijinë.

<sup>10</sup> Pablo bemajitsinaebota petaenutsicujinae Macedonia nacuapijinë, bepíjia paxaniavaetajë patajavaxi patanicabinexalia Macedonia nacuyabelia. Nexata panajumaitsinë:

—Xaniajai cajena. Dioso nacaitoroba Macedonia nacuapijivijavabelia vajatsipaebinexa pexanialivaisi, Jesús pelivaisi, panajanë.

*Pacuenia Pabloje Silasbeje ponaponabeje Filipos tomarata yabara pelivaisi*

<sup>11</sup> Troas tomarata panaropobajë. Panaponajë barcota. Roviaia panayanicabaliajë patapatsinexa Samotraciatunaeto nacuyabelia. Troas tomarata patanaropobicujinae, meravia pitsijavata, panapatajë Neápolis tomarabelia. <sup>12</sup> Bajaraxuacujinae matatsënëa paponajë Filipos tomarabelia. Filipostomara Macedonia nacuata eca. Filipostomara daxita tomaranëvecua ayaitomaraxaneto. Filipos tomarata najinavanapa ayaibitsaëto xaneto Roma tomaraverena pepatsivi. Bajarapatomarata panajinavanapajë caematacabi maxëto. <sup>13</sup> Nexata abaxë ita panajinavanapajë Filipos tomarata, judíovi penacueravetsimatacabit papitsapajë tomarapënëyabelia. Paponajë mene itapayavelia patajitsinexa itsajota nacaetuatabiaba judíovi pevajëcabiabinexa Diosojavabelia. Nexata mene itapaya ita pajaitanajetarubenajë, petiriavi penacaetuatenavei mene itapata, patayejebajë. Nexata pajamatabëjumaitsinë:

—Bajara macovë jotaje judíovi nacaetuatabiaba pevajëcabiabinexa Diosojavabelia, pajamatabëjanë.

Nexata bajarajota panaenajë. Nexata bajarajota Dioso pitorobilivaisi patsipaebajë petiriavijavabelia. <sup>14</sup> Bajarapapetiriavijavuvënëva pevënë Lidia. Bajarapova Tiatira tomarapijiva, penamatamotsipapaëbërë, perajejaipapaëbërë, pecanajetabiabiva. Dioso bitso pejumecovënëtsiva. Bajarapova panenamuxunaeveta xaniavaetsia. Dioso jamatabëcueneyavenonatsi. Nexata bajarapova jumecovënëta Pablo petsipaebilivaisi. <sup>15</sup> Bajaraxuacujinae bajarapova, pijabopijivi yajava, ita bautisabatsi baja, bajarapova panejumaitsi:

—Itsa paxamë panetaneme pepacue ne Dioso tajumecovënëtsivacuene, nexata tajabota abaxë panajinavanapaename, panejai bajarapova.

Bitso bajarapova asaëyata panejunata patanajinavanapaenexa pijabota. Nexata panaponajë bajarapova pijaboyabelia bajarapova pijabota patanajinavanapaenexa.

<sup>16</sup> Paponabiabajë mene itapayabelia Dioso pitorobilivaisi patatsipaebabiabinexa itsajota judíovi nacaetuanabiaba. Belia itsanamutota panemataenena petiriva, dovathi peyjavaponaponaeva. Bajarapadovathi pejamatabëcueneta tajëvelia petiriva yapëtaeyabiaba itsacuenejavaxi yabara. Bajarapova pijamonae pecanajetsivatsi pijatuxanevi amoneya petonacuenebabiabinexa. Nexata bajarapova pijumata pijatuxanevi ayaijava palata pitabiaba. Tsipaji itsajivi ita yanijoba bajarapovajavabelia itsacuenejavayo yabara, bajarapova tajëvelia xaniavaetsia tsipaebabiaba. Nexata pacuenia bajarapova

tajëvelia jumai tsabiabi itsajivijavabelia, xaniajai tsabiabi. Nexata papalata matamotabi-abatsi petsipaebabijamatabëcuene, pijatuxanevi pitabiaba. <sup>17</sup> Bajarapova nexata panepënanajetarucabiaba. Bajarapova pinijijumeta jumai tsanajetarucabiabi paxanë yabara:

—Mapapebijivije, athëbëtatsia peecaenë Dioso pijajivi. Pacatsipaebapona papeca-capanepaelivaisinexa pibisiacuene paneexanaeconivecua, jai tsanajetarucabiabi petiriva paxanë yabara.

<sup>18</sup> Bajarapacuenia najuamatacabianë jumai tsanajetarucabiabi itsa panepënanajetarucabiaba. Nexata bitso Pablo pejamatabëitonotabiabixaetsi, belia napënëyorotaxuaba bajarapovajavabelia. Jumaitsi:

—Dovathi, caitavetatsi Jesucristo pevënëta. Vecuapitsapare baja mapovaje, jai Pablo. Bajarapacuenia Pablo pejumaitsijavata dovathi baja petiriva vecuapitsapatsi.

<sup>19</sup> Nexata bajarapova pijatuxanevi yapëtane baja pecopiarucaejava bajarapova pijumata palata penotabiabijava. Nexata bajarapova pijatuxanevi vaetabatsibeje Pablobeje Silasbeje. Robobocaponaliatsibeje tomara tuatuajëabelia. Caponatsibeje tomara pevetsivijavabelia. <sup>20</sup> Jivi penaneconitsiaexanabiabivi, juezmonae, pitabarata nutatsibeje. Pamonae Pablobeje Silasbeje vaetabatsibeje, najumetsënëtsiaya jumaitsi juezmonaejavabelia Pablobeje Silasbeje yabara:

—Mara papebibeje judíonëbeje. Anaepanaeyaexanaponabeje vajatomarapijivi.

<sup>21</sup> Tsipaebaponabeje vajanacuapijivi pejumecovënëtsinexa palivaisi vaxaitsi Romano nacuapijivitsi apo nacatocopatsi vajajumecovënëtsinexa, jai najumetsënëtsiaya bajarapamonae Pablobeje Silasbeje yabara.

<sup>22</sup> Nexata jivi ayaibitsaëttoxaneto baranaepanatsibeje Pablobeje Silasbeje. Nexata juezmonae itoroba vajabitsaë Pablobeje Silasbeje penaxatatsijavabeje pevejuma-jonotsinexatsibeje. Bajaraxuacujinae itoroba ayaicuenia pejumaconibabenexatsibeje naebota. <sup>23</sup> Ayaicuenia pejumaconibabecujinaetsibeje, juezmonae icatsia itoroba vajabitsaë Pablobeje Silasbeje penaneconitsivi pejebabiabibota peetsinexatsibeje. Bajaraxuacujinae icatsia juezmonae itoroba penaneconitsivi pejebabiabibo pevetsinë Pablobeje Silasbeje xaniavaetsia pevetsinexatsibeje penaneconitsivi pejebabiabibo ënëtuatuajëta. <sup>24</sup> Penaneconitsivi pejebabiabibo pevetsinë juezmonae pitorobixaetsi xaniavaetsia pevetsinexa, nexata penaneconitsivi pejebabiabibo pënëyatuucubijavanë, pecopiarucaejavatareca, Pablobeje Silasbeje etatsibeje. Peponaponaeyanivabeje penaitabarataeyaexanaetablapabeje tusatualia sixataliatsibeje. Bajaraxuacujinae xaniavaetsia yasicatarërëtatsibeje cepovënëjavata.

<sup>25</sup> Nexata meravituatuajëta Pablobeje Silasbeje vajëtabeje Diosojavabelia. Dioso-jumevajianë naxëanecabeje Diosojavabelia. Itsamonae pijinia penaneconitenaevi bajarapabota, jumetanatsibeje penaxëanecaejavabeje. <sup>26</sup> Nexata jemata bajarapaepatota ira najëabapeneta pinijicuenia. Penaneconitsivi pejebabiabibo, daxitabo, nanequebeca. Caecuenia daxita baupanë nabaupana pijacuata. Daxita penaneconitsivi pacadenamaëtonëta cobecëbejebatsi, vecobeothopatsi. <sup>27</sup> Penaneconitsivi pejebabiabibo pevetsinë naëcotapuna pemajitecaenëmi. Nexata itsa tane daxita baupanë penabaupanaejava, navemarajonotaxuabina pijaespada penabeyaxuabinexa picani. Tsipaji jamatabëjumaitsi:

—Daxita meta baja penaneconitsivi rëcëpeca. Nexata bajarapajamatabëcuene yabara nenaneconitsiaexanaena tomara pevetsivi, jamatabëjai.

<sup>28</sup> Nexata bajarajota itacarajeta Pablo pinijijumeta jumai tsaxuabi:

—Pëtsa nabeyaxuabame. Daxita raja patananeconitsivi panubenajë, jai Pablo.

<sup>29</sup> Nexata penaneconitsivi pejebabiabibo pevetsinë itoroba pijajivitonë petocarenanexatsi pitayotabiabijava. Nexata bepijia tocarenatsi. Penaneconitsivi pejebabiabibo pevetsinë bitso neconecojai pecajunavi. Nexata bajaraponë pematabacabëta nucajunua Pablobeje Silasbeje pitabarata. <sup>30</sup> Bajaraxuacujinae penaneconitsivi pejebabiabibo

pevetsinē barēpitsapaliatsibeje Pablobeje Silasbeje. Penaneconitsivi pejebabiabibo pevetsinē jumaitsi:

—¿Detsa xua exanaenajē tanecapanepaenexa Diosojavabelia? jai Pablobeje Silasbejejavabelia.

<sup>31</sup> Nexata Pablobeje Silasbeje jumaitsideje:

—Najamatabēcuenecopare pepo petuxanenē Jesucristojavabelia pecacapanepaenexa Diosojavabelia. Xamē nijabota pejinavanapaevi ata Jesucristojavabelia najamatabēcuenecopatsi pecapanepaenexatsi Diosojavabelia, jaiibeje.

<sup>32</sup> Nexata Pablobeje Silasbeje tsipaebabeje Dioso pitorobilivaisi bajaraponējavabelia, daxita pijabota pejinavanapaevijavabelia ata. <sup>33</sup> Penaneconitsivi pejebabiabibo pevetsinē bajarapaepatota, meravi, Pablobeje Silasbeje jumavajēnēquiatatsibeje. Nexata bajaraponē, pijabopijivi yajava, bautisababeje Pablobeje Silasbeje. <sup>34</sup> Bajaraxuacujinae penaneconitsivi pejebabiabibo pevetsinē pijaboyabelia Pablobeje Silasbeje barēliatsibeje. Nexata pexaejava rajutatsibeje. Bajaraponē, pijabopijivi yajava, pinijicuenia jamatabēcuenearēya Dioso pejumecovēnētsixae.

<sup>35</sup> Nexata pepo bajayacunua juezmonae itorobalia vajabitsaē penaneconitsivi pejebabiabibo pevetsinējavabelia pejumaitsinexa: “Capitsapaename pina baja Pablobeje Silasbeje,” pejainexa. <sup>36</sup> Nexata penaneconitsivi pejebabiabibo pevetsinē jumaitsi Pablojavabelia:

—Juezmonae rabaja netonajumeitorobarena patacapitsapaenexabeje. Paponarebeje baja xaniavaetsia, jai penaneconitsivi pejebabiabibo pevetsinē.

<sup>37</sup> Itsiata baitsi jane Pablo jumaitsi juezmonae pitorobivajabitsaēvijavabelia:

—Juezmonae naneconita pijatuxanevijavabelia, paxanēbejejavaberena ata. Tsipaji abaxē copiata xaniavaetsia yapētaenejeva paneconi paxainajēbeje, paxanēbeje paRomano nacuapijinē atanēbeje, juezmonae itoroba paxamēyajuvēnēvi patanejumaconibabenexabeje daxita tomarapijivi pitabarata. Bajaraxuacujinae paneetabeje mapabotaje. Nexata aeconoxae juezmonae saya paxamē pacaitorobarena pepēya patanecapitsanaenexamēbeje. Juezmonae ponaerena pijacuata patanecapitsapaenexabeje, jai Pablo juezmonae pitorobivajabitsaēvijavabelia.

<sup>38</sup> Nexata vajabitsaē tsipaeba juezmonaejavabelia pacuenia Pablo jumaitsi. Nexata juezmonae itsa jumetane Pablobeje Silasbeje Romano nacuapijinēbejecuene, bitso jamatabēcuenenajunaviaca. <sup>39</sup> Nexata juezmonae parena. Jumaitsi Pablobeje Silasbejejavabelia:

—Pauranē paxamēbejejavabelia vajabitsaē pataitorobixae pibisiacuene papecaexanaenexabeje, jai juezmonae.

Nexata juezmonae pijacuata Pablobeje Silasbeje penaneconitsivi pejebabiabibovecua capitsapatsibeje. Juezmonae barajamatabēcuenexanepanaeya Pablobeje Silasbeje itorobatsibeje peponaenexabeje baja tomaravecua. <sup>40</sup> Pablobeje Silasbeje pecapitsapaecuinaetsibeje, ponabeje baja Lidia pijaboyabelia. Nexata Lidia pijabota itsa tanebeje Dioso pejumecovēnētsivi, muxujiobabeje bajarapamonae piamatabēcuenesaēnexa Diosojavabelia. Bajaraxuacujinae ponabeje baja bajarapatomaravecua.

## 17

*Pacuenia Pablobeje Silasbeje Tesalónica tomarata jaitatsibeje pevaetabinexatsibeje yabara pelivaisi*

<sup>1</sup> Pablobeje Silasbeje najetarucabeje Anfípolis tomarajava, Apolonia tomarajava ata. Bajaraxuacujinae patabeje Tesalónica tomarabelia. Nexata Pablobeje Silasbeje Tesalónica tomarata naponaponabeje acueyabi pasemanabeje. Tesalónica tomarata eca judíovi penacaetuatabiabibo. <sup>2</sup> Nexata Pablo pijacujirucuenia judíovi penacueraevetsimatacabianē canacujitsia najoneyabiaba bajarapabota. Dioso pitorobilivaisi Pablo tsipaebabiaba bajarapabota penacaetuatabiavijavabelia. Tsipaebabiaba pacuenia Dioso pejumelivaisibaxutota jumaitsi. <sup>3</sup> Pablo jumai tsabiabi judíovi penacaetuatabiabibota:

—Dioso baja cajena pejumelivaisibaxutota tajëvelia vajunupaebatsi Cristo, ponë baja Dioso itorobica jivi pecapanepaenexa. Tajëvelia baja cajena Dioso pejumelivaisibaxutota Cristo vajunupaebatsi pijavajabitsaë ayaicuenia pebejiobiaexanaejavanexatsi. Vajunupaebatsinua baja cajena Cristo petëpaecujinae icatsia piasaëjavanexa. Bajaraponë raja Jesús, ponë pelivaisi pacatsipaebatsi. Bajaraponë raja Cristo, ponë Dioso itorobica jivi pecapanepaenexa, jai tsabiabi Pablo ita tsipaebabiaba Dioso pitorobilivaisi judfovi penacaetuatabiabibota.

<sup>4</sup> Nexata judfoviyajuvënëvi jumecovënëta Pablo petsipaebabiabilivaisi. Ayaibitsaëto griegovia ata, Dioso pejitsipaevi, jumecovënëta Pablo petsipaebabiabilivaisi. Ayaibitsaëto petiriavi ata, petuxanevi pijavajivi, jumecovënëta Pablo petsipaebibilivaisi. Nexata daxita bajarapamonae nacaetuatabiaba Pablobeje Silasbejejavata. <sup>5</sup> Nexata judfovi, pamonaë apo jumecovënëtsi Pablo petsipaebabiabilivaisi, Pablo cuenecaëbatsi. Tsipaji Pablojavabelia jivi ayaibitsaëto jonepona. Nexata bajarapajudfovi junata jivi ayaibitsaëtoxaneto pibisijamatabëcuenevi, saya jema pejinavanapaevi tomarapijicallejava. Nexata pejunatsicujinae bajarapajudfovi pejunatsivi jane baja barënacaetuata. Nexata daxita bajarapajudfovi, pejunatsivi jane baja yajava, barënajamatabëcueneyanaba. Nexata itoroba bajarapatomarapijivi pianaepanaenexa Dioso pejumecovënëtsivijavabelia. Pablobeje Silasbeje naponaponabeje Jasónvënënë pijabota. Nexata daxita pamonaë anaepana bajarapatomarata, Pablobeje Silasbeje jemata tsimaxëpatatsibeje Jasón pijabota. Vaetabijitsiatsibeje picani penutsinexatsibeje tomara pevetsivi pitabarata. <sup>6</sup> Jasón pijabota Pablobeje Silasbeje apo pecaxitajarabixaetsibeje, nexata pamonaë anaepana, vaetabatsi Jasón, itsamonae yajava, pamonaë Dioso pejumecovënëtsivi. Robobocaponaliatsi Jasónbana tomara pevetsivijavabelia. Nexata pamonaë anaepana, tomara pevetsivi pitabarata najumetsënëtsiaya pinijijumeta jumaitsi Pablobeje Silasbeje yabara:

—Pablobeje raja Silasbeje daxitanacuanëjava pejinavanapaevi itorobaponabeje pianaepanaenexa. Nexata jane baja aeconoxae vajatomarajavaberena ata patabeje. <sup>7</sup> Nexata Jasón, maponë nucaje, tocopata pijabota penaponaponaeenexabeje Pablobeje Silasbeje. Daxita pamonaë Jasón mayajavanucaje, Pablobana ata, daxita bajarapamonae, apo jumecovënëtsi cajena Romanonacua pepo pevetsinë pitorobilivaisi. Daxita bajarapamonae jumai tsabiabi: “Romanonacua pepo pevetsinë rabaja apo nacayanacuaevevetsi. Itsanë rabaja nacayanacuaeveteta. Bajaraponë pevënë Jesús,” jai tsabiabi daxita bajarapamonae, jai najumetsënëtsiaya tomara pevetsivijavabelia pamonaë anaepana.

<sup>8</sup> Nexata bajarapacuenia pejumaitsiyava ita jumetane, daxita tomarapijivi tomara pevetsivinua bitso anaepana. <sup>9</sup> Nexata Jasón, Dioso pejumecovënëtsivi yajava, palata matamotsiaexanatsi tomara pevetsivijavabelia, Pablobeje Silasbeje pevecuapit-sapaenexabeje bajarapatomara. Tomara pevetsivi jumaitsi:

—Ita rabaja ponaenabeje bajaraponëbeje mapatomaravecuaje, pacatocanaviabi-anatsi panijapalata, jai tomara pevetsivi Jasónbanajavabelia.

Bajaraxuacujinae copabatsi baja Jasónbana penaviabinexa pijabonëjavabelia.

#### *Pacuenia Pablobeje Silasbeje ponaponabeje Berea tomarata yabara pelivaisi*

<sup>10</sup> Jasónbana tomara pevetsivi pecopabicujinaetsi, bajarapameravi, Dioso pejumecovënëtsivi bepíjia itorobatsi Pablobeje Silasbeje peponaenexabeje, Berea tomarabelia. Pablobeje Silasbeje pepatsicujinaeliabeje Berea tomarata najunuabeje judfovi penacaetuatabiabibojavabelia. <sup>11</sup> Ajamatabëcuenetaja pajudfovi jinavanapa Tesalónica tomarata. Nexata apo jumecovënëtsi Dioso pitorobilivaisi. Pajudfovi jinavanapa Berea tomarata, bajarapacuenia apo ajamatabëcuenetaja. Bajarapajudfovi bitso jitsipa pejumetaenexa Dioso pitorobilivaisi. Nexata Pablo caematacabi canacujitsia judfovi penacaetuatabi-abibota Dioso pitorobilivaisi tsipaebabiaba bajarapajudfovijavabelia. Nexata Pablo ita copata petsipaebabiabijava, bajarapajudfovi pijacuata Dioso pejumelivaisibaxutota xaniavaetsia nacujarubabiaba peyapëtaenexa xaniajai bajarapacuenia ita jumaitsi Pablo petsipaebabiabilivaisi. <sup>12</sup> Berea tomarapijivi judfovi ayaibitsaëto jumecovënëta Pablo

petsipaebabiabilivaisi. Ayaibitsaëto pijinia griegovi ata jumecovënëta. Jumecovënëta pebijivi. Jumecovënëta petiriavi ata. Bajarapapetiriavi petuxanenëanë pijavajivi. <sup>13</sup> Pajudíovi jinavanapa Tesalónica tomarata, Pablo vënëlivaisitanetsi Dioso pitorobilivaisi petsipaebabiabijava Berea tomarata. Nexata bajarapajudíovi ponalia Berea tomarabelia. Nexata bajarapajudíovi itoroba Berea tomarapijivi ayaibitsaëto pianaepanaenexa Pablojavabelia. <sup>14</sup> Nexata Berea tomarapijivi, pamonaë jumecovënëta Pablo petsipaebabiabilivaisi, bajarapamonaë Pablo bepíjia itorobatsi peponaenexa manuamene itapata peetaetomarabelia. Silasbeje abaxë Timoteobeje nacopatabeje Berea tomarata. <sup>15</sup> Pamonaë Pablo yanataponaliatsi, pënaxuabatsi Atenas tomarabelia. Nexata Atenas tomaraverena bajarapamonaeta Pablo tonajumexuaba Silasbeje Timoteobeje. Jumaitsi:

—Itsa cuencaëjêpaenatsibeje, bepíjia renabeje tsane tanecaxitajarabinexabeje Atenas tomarata, jai Pablo bajarapamonaëjavabelia.

Bajaraxuacujinaë pamonaë Pablo pënaxuabatsi, naviaba baja Berea tomarabelia.

*Pacuenia Pablo ponapona Atenas tomarata yabara pelivaisi*

<sup>16</sup> Pablo abaxë Atenas tomarata evetaponapona Silasbeje Timoteobeje pepatsijavabeje Atenas tomaraberena. Nexata Pablo itsa ponapona Atenas tomarata, tane pecobeta jumapecataeya pexanaenëanë piapaxayojava daxita Atenas tomara tuatua-jêjava. Nexata Atenas tomarapijivi pematabacabêta nubenabiaba pevajêcabiabinexa bajarapajumapecataevijavabelia. Nexata Pablo itsa tane bajarapacuenë, bejamatabêjiobi bitso. <sup>17</sup> Nexata judíovi penacaetuatabiabibota Pablo Dioso pitorobilivaisi yabara barë-najumenotabiaba pevëna judíovi. Barë-najumenotabiabanua apo judíovi ata, pamonaë Dioso pejitsipaevi. Caematacabi canacujitsia barë-najumenotabiabanua pamonaë Pablo caxitajarabatsi tomara tuatua-jêta. <sup>18</sup> Nexata Pablo caxitajaraba pebijivi, epicúreomonaë pecujarubilivaisi pejumecovënëtavanapaevi. Caxitajarabanua itsapebijivi, estoicosmonaë pecujarubilivaisi pejumecovënëtavanapaevi. Bajarapamonaë ata Pablo barë-najumenota. Nexata Pablo pebarë-najumenotsijavata, bajarapamonaëyajuvënëvi Pablo yabara muetsia najumaitsi:

—¿Detsa meta pitsilivaisi maponêje namatatsapatsia nacabarêcuaicuaijajje? najai bajarapamonaë Pablo yabara.

Itsamonaë pijinia Pablo yabara najumaitsi:

—Itsanacuapíjivi racovê pijadioso vi pelivaisipaëbinê, najai bajarapamonaë.

Bajarapacuenia najumaitsi tsipaji Pablo tsipaebapona pexanialivaisi, Jesús pelivaisi. Tsipaebaponanua petêpaevimi icatsia itsamatacabi piasaëjavanexa petêpaecujinaë. <sup>19</sup> Nexata bajarapamonaë Pablo barëponaliatsi Areópagovënê tsutojavabelia, patsutojavabelia tomara pevetsivi nacaetuatabiaba penabarêcuaicuaijainexa. Itsa baja palia bajarabelia, bajarapamonaë jumaitsi Pablojavabelia:

—Panetsipaebare patayapêtaenexa papejanalivaisi tsipaebaponame.

<sup>20</sup> Panetsimuxuaitothia abaxë palivaisi tsipaebaponame. Nexata pajitsipajê patayapêtaenexa pajamatabêcuenelivaisi xaina palivaisi tsipaebaponame, jai Atenas tomarapíjivi Pablojavabelia.

<sup>21</sup> Atenas tomarapíjivi, itsanacuaverena pepatsivinua, pamonaë bajarapatomarata najinavanapa, daxita bajarapamonaë jamatabêcueneenabiabatsi pejanalivaisi pejumetaeyabiabinexa. Jamatabêcueneenabiabatsinua petsipaebabiabinexa itsamonaëjavabelia ata.

<sup>22</sup> Nexata Pablo nonotapuna bajarapamonaë tuatua-jêta Areópagovënê tsutojavata. Jumaitsi:

—PaAtenas tomarapíjivimê, pacatanetsi rabaja panijadioso bitso papecajamatabêcueneenabiabijava. <sup>23</sup> Tanajetarucabiabijavata panijatomaracallejava, taeyabiabajê itsaxuayo pavajêcabiabame panijadiosovijavabelia. Nexata caxitajarabajê altarvënêjava, itsajota jivi vajêcabiaba abaxë apo yapêtae ata padiosojavabelia vajêcabiaba. Bajarapaaltarvënêjavata peyaquinarutsiitane jumai tsarucaë mapacueniajê: “Padioso abaxë apo yapêtaetsi, bajarapadiosojavabelia

vajęcabiabianatsi mapaaltarjavataje,” jai tsarucae peyaquinarutsiitane. PaDioso yabara yaquinaruta bajarapaaltarvęcęjavata, nexata bajarapaDiosojavabelia paxamę baja najamatabęcuenecopatsiaya panavajęcabiabame, abaxę apo payapętae atamę bajarapaDioso, bajarapaDioso yabara jane baja aeconoxae pacatsipaebijitsiatsi, jai Pablo Atenas tomarapijivijavabelia.

<sup>24</sup> Icatsia Pablo jumaitsi Atenas tomarapijivijavabelia:

—PaDioso yabara pacatsipaebijitsiatsi, mapanacua exanaje. Exana daxita mapanacuapijicuene yajava. BajarapaDioso pepo pevetsinę jane baja daxita mapanacuaje. Pevetsinę itaboxo ata. BajarapaDioso cajena apo ponaponae jivi pexanaetemplota. <sup>25</sup> BajarapaDioso apo namatavenonae jivi peyavenonaenexatsi. Tsipaji apo namatavenonae itsacuenęjavayo ata. Biji rajane bajaraponę nacarajuta caepatoyo vajasaętsavanapaejumaliyonexa. Nacarajutanua daxita xua namatavenonatsi, jai Pablo pepo Dioso, athęcęcętatsia peecaenę, yabara.

<sup>26</sup> Icatsia Pablo jumaitsi Atenas tomarapijivijavabelia:

—BajarapaDioso abaxę copiaya caenę pebi exana. Bajaraxuacujinae bajarapapebijavaverena naexanapona daxitavirijumevi pijasalinaivimi. Nexata bajarapapebijavaverena penaexanaponaevi yacęjępa pejinavanapaejava daxitanacuanęjava. Nexata Dioso caevirijumevi canacujitsia tocopatapona pamatacabibeje asaę tsavanapaejitsia. Tocopataponanua panacuanęjava jinavanapaejitsia. <sup>27</sup> Bajarapacuenia Dioso tocopata mapanacuataje daxita bajarapamonae Dioso pejitsipaenexa penajamatabęcuenecopatsinexa Diosojavabelia. Dioso cajena taję apo nacavecuaponaponae. <sup>28</sup> Dioso raja pejamatabęcueneta asaę tsavanapaetsi. Bajarapacuenia Dioso pejamatabęcueneta asaę tsavanapaetsi tsipaji baja cajena paxamęyajuvęcęvi bajayata peyaquinaelivaisita jumaitsi: “Vaxaitsi ata rabaja Dioso pexitsi,” jai. <sup>29</sup> Nexata Dioso itsa pexitsi, Dioso yabara jamatabęcuenenavęcaniabiaya apo bejamatabęjumaitssiti mapacueniaje: “Dioso raja oronanitota, platananitota ata, ibotota ata pexanaenętsi. Nexata pacuenia bitso pecujanivitsi pecobeta pexanaenęanę pexaniacuenia exana, bajara pitsinę Dioso,” apo bejamatabęjaitsi jamatabęcuenenavęcaniabiaya Dioso yabara. <sup>30</sup> Jivi abaxę bajayata apo yapętae Dioso peponaponaejava. Nexata bajayata jivi pibisiacuene exanabiabi ata, Dioso abaxę najamatabęcuenecataita. Nexata abaxę Dioso apo naneconitsiaexanae bajarapamonae pibisiacuene pexanabiabijava yabara. Itsiata baitsi jane maparucęje Dioso itoroba daxitajivi daxitanacuanęjava pejinavanapaevi pibisiacuene pexanabiabijava pecopabinexa baja, penajamatabęcuenepęcęcęyorořtsinexa Diosojavabelia. <sup>31</sup> Bajarapacuenia Dioso itoroba tsipaji baja Dioso jivi penaneconitsiaexanaematacabinexa tocaęcętaruta. Pamatacabi Dioso tocaęcętaruta, itsa copiapatsiana, naneconitsiaexanaena daxitanacuanępijivi. Nexata Dioso jivi itsa naneconitsiaexanaena, caejivi canacujitsia paneconivajęto xainapona, bajarapaneconivajętota naneconitsiaexanaponaena. Ponę jivi naneconitsiaexanaejitsia, Dioso baja cajena itapeta. Daxitajivi beyapętane ponę Dioso itapeta. Tsipaji baja bajaraponę Dioso icatsia asaęyaexana petępaecujinae, jai Pablo Atenas tomarapijivijavabelia Jesęc yabara.

<sup>32</sup> Nexata Atenas tomarapijivi itsa jumetane bajarapacuenia Pablo pejumaitssijava Jesęc petępaecujinae Dioso icatsia piasaęyaexanaejavatsi yabara, Atenas tomarapijivi Pablo jumecaponatsi. Itsamonae pijinia itsiata jumaitsi Pablojavabelia:

—Icatsia itsamatacabijavabelia pacanamuxunaevetsianatsi bajarapalivaisi, jai itsamonae.

<sup>33</sup> Nexata baja Pablo bajarapamonae vecuapona. <sup>34</sup> Itsamonae itsiata pęcnaponatsi. Bajarapamonae jumecovęcęcęta Pablo petsipaebilivaisi. Pamonaе jumecovęcęcęta Pablo petsipaebilivaisi yajuvęcęcęcę, pevęcęcę Dionisio. Bajaraponę Dionisio, Areopagovęcęcę tsutojavata penacaetuatabiabiivi pevetsiviyajuvęcęcęcęcę. Petiriva ata, Damarisvęcęcęva, jumecovęcęcęcęta Pablo petsipaebilivaisi. Itsamonae yajava jumecovęcęcęcęta.

## 18

*Pacuenia Pablo ponapona Corinto tomarata yabara pelivaisi*

<sup>1</sup> Atenas tomarata Pablo jivi petsipaebaponaponaecujinae Dioso pitorobilivaisi, pona baja. Nexata pata Corinto tomarabelia. <sup>2</sup> Nexata Corinto tomarata Pablo caxitaraba judíonë, Aquilavënëñë, Ponto nacuapijinë. Bajaraponë Aquila caematacabibeje abaxë xaina Corinto tomarata pepatsicujinae Italia nacuaverena. Yajavapata pijava Priscilavënëva. Bjarapajivibeje Italia nacuaverena patabeje. Bjaraverena patabeje tsipaji Romanonacua pepo pevetsinë, Claudiovënëñë, capitsapapona daxita judíovi pepitsapaenexa Roma tomaravecu. Romatomara eca Italia nacuata. Nexata Pablo pona Aquila pijaboyabelia. <sup>3</sup> Nexata Aquila pijabota Pablo naponapona. Nexata carpabonë Pablo nayavenonaeya jorocabiaba Aquila. Pablo nanacueneba tsipaji Pablo ata yapëtane pejorocejava carpabonë. <sup>4</sup> Judíovi penacaetuatabiabibota, penacueraevetsimatacabianë canacujitsia, Pablo judíovi tsipaebabiaba Dioso pitorobilivaisi. Pablo tsipaebabiaba judíovijavabelia, apo judíovijavabelia ata, bajarapamonae pejumecovënëtsinexa palivaisi Pablo tsipaebabiaba.

<sup>5</sup> Silasbeje Timoteobeje Corinto tomarata itsa patabeje Macedonia nacuaverena, Pablo baja copata Aquila peyavenonaeyajorocabiabijava carpabonë. Nexata Pablo caematacabianacujitsia Jesús yabara jumai tsaponae judíovijavabelia:

—Jesús raja pepacuene Cristo, ponë copiaevetavanapatsi pepatsijavatsica vajanacapanepaenexa, jai tsaponae Pablo Jesús yabara.

<sup>6</sup> Nexata bajarapacuenia Pablo pejumaitsaponaejava Jesús yabara, judíovi baraanaepanatsi. Pablo pibisiacuenia bijatanetsi. Nexata Pablo penaxatatsijava najumajonotaxuaba. Nënëbabia bajarapamonae peyapëtaenexa penaneconitsijava Diosojavabelia. Tsipaji apo jumecovënëtsitsi, Pablo tsipaebi ata Jesús yabara. Pablo nexata jumaitsi judíovijavabelia:

—Paxamë saya panejamatabëcueneta panaxuabianame Diosovecu. Xanë tajamatabëcueneta apo panaxuabimë tsane. Panijacuata panaxuabianame. Tsipaji cajena pacatsipaebi atatsi Jesús yabara, apo panejumecovënëtsimë. Aeconoxae rabaja copatajè patacatsipaebabiabijava paxamëjavabelia bajarapalivaisi. Tavajënaeyabelia baja ponanajè tatsipaebaponaenexa bajarapalivaisi apo judíovijava, jai Pablo judíovijavabelia.

<sup>7</sup> Nexata Pablo judíovi penacaetuatabiabibovecu pitsapa. Nexata pona Justovënëñë pijaboyabelia. Nexata Justo pijabota Pablo naponapona. Bjaraponë Justo penavajëcababinë Diosojavabelia. Pijabo eca judíovi penacaetuatabiabibo muxuneneta. <sup>8</sup> Nexata Crispovënëñë, judíovi penacaetuatabiabibo pevetsinë, daxita pijabopijivi barëjumecovënëta Jesús pelivaisi. Ayaibitsaëto Corinto tomarapijivi, pamonaе jumetane Pablo petsipaebabiabilivaisi, jumecovënëta. Nexata bajarapamonae nabautisaba. <sup>9</sup> Nexata meravi bemajitsinaebota Dioso jumaitsi Pablojavabelia:

—Pëtsa junavame. Pëtsa copatame netsipaebaponaejava tajumelivaisi. <sup>10</sup> Xanë raja cayajavatsi. Nexata itsajivi ata apo caitsacueniabi tsane. Tsipaebaponaename tajumelivaisi. Tsipaji rabaja tajajivi ayaibitsaëto tsaponae mapatomarataje, jai Dioso.

<sup>11</sup> Nexata Pablo ponapona Corinto tomarata dieciocho pajuametobeje. Tsipaebapona Dioso pitorobilivaisi Corinto tomarapijivijavabelia.

<sup>12</sup> Pamatacabi Galiónvënëñë Acayanacua evetapona, judíovi najamatabëcuenejèpaeya tsimaxënae tuatatsi Pablo pevaetabinexatsi. Nexata itsa vaetabatsi, Pablo caponaliatsi penutsinexatsi nacuae vetsinë Galión pitabarata. <sup>13</sup> Nexata judíovi jumaitsi nacuae vetsinë Galiónjavabelia:

—Mara ponëje jivi livaisi tsipaebapona pejumecovënëtsinexa Dioso. Itsiata baitsi jane saicayacuenia Dioso pejumelivaisivecu tsipaebapona. Paxanë cajena bajarapacuenia apo panetonajumecopatsi Dioso Moiséspijinëta penajumecopatsilivaisi, jai judíovi nacuae vetsinë Galiónjavabelia Pablo yabara.

<sup>14</sup> Ajena picani Pablo jumepitsijitsia judíovi, itacarajeta nacuae vetsinë Galión jumaitsi judíovijavabelia:

—Paxamë pajudíovimë, bepayapëtaneme mapacueneye. Itsa maponëje nacobetoxot-sipa, jivitonë ata itsa beyaxuabijitsipa, pacajumexaniataejitsipatsi. Nexata naneconitsi-aexanaejitsipajë. <sup>15</sup> Paxamë saya pabarënajumenotame maponëje papecatsipaebapon-aelivaisi yabara. Pabarënajumenotamenua panijasalinaivi pijalivaisi yabara ata. Nexata saya paxamë panijacuata bajaraxua yabara pabarëcuaicuaijamëre pacuenia pajitsipame. Xanë raja apo evetsinë bajarapalivaisi, jai nacuaevevtsinë Galión judíovijavabelia.

<sup>16</sup> Nexata baja nacuaevevtsinë Galión navecuapitsapaeyaexana judíovi. <sup>17</sup> Nacuaevevtsinë Galión judíovi navecuapitsapaeyaexanae ata, caecuenia abaxë judíovi apo ponae pijabonëjavabelia. Nexata griegovi, bajarajota penubenaevi, nacobenavaetaba judíoviyajuvënënë, Sóstenesvënënë. Bajaraponë Sóstenes judíovi penacaetuatabiabibo pevetsinë. Nexata griegovi Sóstenes conibabia nacuaevevtsinë Galión pitabarata, ajibi ata peyabaraconibabejava. Nexata nacuaevevtsinë Galión tae ata bajarapacueneye, apo itavetsi.

*Pacuenia Pablo pepatsicujinae Antioquía tomarata, icatsia naropota acueyabinamutonexa jivi petsipaebaponaenexa Dioso pitorobilivaisi yabara pelivaisi*

<sup>18</sup> Pablo abaxë bajayajebi ponapona Corinto tomarata. Bajaraxuacujinae Dioso pejumecovënëtsivita napëjioba. Napona barcota Siria nacuyabelia. Pablo yajavapona Priscilabeje Aquilabeje. Nexata epatua Cencrea tomarata, Pablo mataxunatsi. Daxitamatanami matacasibatsi jivi peyapëtaenexatsi petoveretsijava Dioso petonacuenebijava pacuenia baja cajena Diosojavabelia Pablo najumecapanepaeya jumaitsi. <sup>19</sup> Pablobana Aquilabana Priscilabana itsa pata Efeso tomarata, Pablo baja vecuanatsata Priscilabeje Aquilabeje. Nexata Pablo Efeso tomarata joneya judíovi penacaetuatabiabiaboyalia. Nexata bajarajota barënalivaisita judíovi. <sup>20</sup> Nexata picani Efeso tomarata Pablo judíovi asivatsi abaxë penaponaponaenexa anijamatacabianë. Itsiata Pablo apo jejai. <sup>21</sup> Nexata Pablo itsa napëjioba, bajarapamonaejavabelia jumaitsi:

—Naxanetajë tapatsinexa Jerusalén tomarabelia tataenexa pafieta baja imoxoyo pevajënae pejonenexa. Itsiata icatsia najetarucaenajë paxamëjavaberena itsa Dioso jitsipa, jai Pablo judíovijavabelia.

Nexata Pablo Efeso tomarata barcota nanaropota. <sup>22</sup> Itsa baja Pablo pata Cesarea tomarabelia, pona icatsia Jerusalén tomarabelia pebajacobinexa daxita Dioso pejumecovënëtsivi. Bajaraxuacujinae icatsia naviata Antioquía tomarabelia. <sup>23</sup> Antioquía tomarata bajayajebi ponapona. Bajaraxuacujinae icatsia naropota. Najetaruca daxita tomaranëjava. Najetaruca Galacia nacuada penaetomaranëjava, Frigia nacuada penaetomaranëjava ata. Bajarapatomaranëjava pejinavanapaevi Dioso pijalivaisita Pablo jamatabëcuene asaëyaexananajetaruca daxita Dioso pejumecovënëtsivi.

*Pacuenia Apolos Dioso pitorobilivaisi tsipaeba Efeso tomarapijivijavabelia yabara pelivaisi*

<sup>24</sup> Judíonë Apolosvënënë pata Efeso tomarata, Alejandría tomarapijinë. Bajaraponë xaniavaetsia Dioso pitorobilivaisi jivi tsipaebabiaba. Jumeyapëtane bitso pacuenia Dioso pejumelivaisibaxutota jumaitsi. <sup>25</sup> Apolos itsamonae epatua tsipaebatsi Jesús pelivaisi. Itsiata baitsi jane xaniavaetsia daxitalivaisi apo tsipaebitsi. Palivaisi Juanpijinë jivijavabelia tsipaebapona, bajarapalivaisi Apolos xaniavaetsia tsipaebatsi. Juanpijinë jivi pebautisabaponaenexa ata Apolos xaniavaetsia tsipaebatsi. Apolos xaniavaetsia Jesús pelivaisi apo tsipaebi atatsi, itsiata ajamatabëcueneasaëya xaniavaetsia tsipaebanajetaruca Jesús pelivaisi. <sup>26</sup> Apolos ajumejunavijibia Dioso pitorobilivaisi jivi tsipaeba judíovi penacaetuatabiabibota. Nexata Priscilabeje Aquilabeje itsa jumetanebeje Apolos petsipaebilivaisi, nexata bajarapajivibeje junatabeje Apolos. Nexata Apolos napona Priscilabeje Aquilabeje pijaboyabelia. Nexata bajarapajivibeje daxitalivaisi jane baja, Jesús pelivaisi, xaniavaetsia tsipaebabeje Apolosjavabelia xaniavaetsia Apolos peyapëtaenexa Jesús pelivaisi. <sup>27</sup> Itsa baja Apolos naropotsijitsia Efeso tomaravecua peponaenexa Acaya nacuyabelia, Dioso pejumecovënëtsivi, Efeso tomarapijivi, yavenonatsi peponaenexa. Tsicobeyaquinatsi cuyalatobaxuto pecaponaenexa, Dioso pejumecovënëtsivijavabelia

perajutsinexa Acaya nacuata. Bajarapacuenia tsicobeyaquinatsi Acaya nacuapijivi, Dioso pejumecovënëtsivi, xaniavaetsia Apolos pecopiapitsinexatsi. Apolos baja itsa pata Acaya nacuyabelia, Apolos bitso yavenona Acaya nacuapijivi Dioso pejumecovënëtsivi. <sup>28</sup> Daxitajivijavabelia Apolos tsipaebapona Jesús pelivaisi. Nexata pacuenia Dioso pejumelivaisibaxutota jumaitsi Jesús yabara, Apolos tsipaebapona daxitajivijavabelia. Nexata Apolos daxitajivi yapëtaeyaexanapona Jesús pepacuenene Dioso athëbëvetsica pitorobijavatsitsica jivi pecapanepaenexa. Nexata baja judíovi moya ena. Tsipaji acuenebi judíovi: “Jume raja,” pejajjava Apolos petsipaebilivaisi yabara.

## 19

### *Pacuenia Pablo ponapona Efeso tomarata yabara pelivaisi*

<sup>1</sup> Pamatacabi abaxë Apolos ponapona Corinto tomarata, bajarapamatacabi pijinia Pablo ibotsutonë nacujavaverena najetaruca pepatsinexa Efeso tomaraberena. Efeso tomarata Pablo itsa pata, caxitajaraba caejivibeje Jesús pelivaisi pejumecovënëtsivi. <sup>2</sup> Nexata Pablo yanijoba bajarapamonaejavabelia.

—¿Espíritu Santo tsabaja pacatsijamatabëjunua pamatacabi ajena pajumecovënëtame Jesús pelivaisi? jai Pablo.

Nexata bajarapamonae jumaitsi:

—Jume. Apo payapëtaenë patanetsijamatabëjonejava Espíritu Santo. Apo pavënëtaenë cajena Espíritu Santo ata, jai bajarapamonae Pablojavabelia.

<sup>3</sup> Nexata Pablo jumaitsi:

—¿Detsa pitsijamatabëcuene yabara pacabautisaba? jai Pablo bajarapamonaejavabelia.

Nexata bajarapamonae jumaitsi:

—Pajamatabëcuene yabara raja Juanpijinë panetsipaeba, bajarapajamatabëcuene yabara panebautisaba, jai bajarapamonae.

<sup>4</sup> Pablo nexata jumaitsi bajarapamonaejavabelia:

—Juanpijinë raja bautisabapona pamona baja copaba pibisiacuene pexanaejava, pamona baja najamatabëcuenepënëyorota Diosojavabelia. Itsiata baitsi jane Juanpijinë jumai tsaponae jivijavabelia: “Panamatavenoname panejumecovënëtsinexa ponë xanë tacovëverena patsiana, baitsi Jesús. Bajaraponë Cristo, ponë Dioso itorobica,” jai tsaponae Juanpijinë jivijavabelia, jai Pablo bajarapamonaejavabelia.

<sup>5</sup> Bajarapamonae itsa jumecovënëta Jesús pelivaisi, nexata Pablo bautisaba bajarapamonae petuxanenë Jesús pevënëta. <sup>6</sup> Nexata Pablo pevajëtsijavata Diosojavabelia, tsimatanacobeuata bajarapamonae. Nexata bajarapamonae Espíritu Santo tsijamatabëjunuatsi. Nexata bajarapamonae itsa cuaicuajai, ajumeitothia pecuaicuajaijava. Tsipaji itsaviriajumenëta, apo penatsipaebijumenëmi, cuaicuajai. Bajaraxuacujinae jane baja bajarapamonae Dioso pitorobilivaisi tsipaebapona jivijavabelia. <sup>7</sup> Daxita meta bajarapamonae bejamatabëcuene doce ponëbeje.

<sup>8</sup> Efeso tomarata Pablo acueyabi pajuametobeje ponapona. Nexata Pablo Efeso tomarata, judíovi penacaetuatabiabiabota, judíovijavabelia ajumejunavijibia tsipaebabiaba Dioso pitorobilivaisi. Pablo judíovi barënajumenotabiaba Dioso pijajivi pevetsijavanexa yabara. Bajarapacuenia Pablo barënajumenotabiaba judíovi pejumecovënëtsinexa Dioso pijajivi pevetsijavanexa. <sup>9</sup> Itsamonae itsiata amatabocotaja. Apo jitsipae pejumecovënëtsijava bajarapalivaisi. Bajarapamonae daxitajivi pitabarata pibisiacuena baracuacuajai pexanialivaisi, Jesús pelivaisi. Nexata baja Pablo vecuanatsata bajarapamonae apo pejumecovënëtsixae Jesús pelivaisi. Pablo nexata, Jesús pelivaisi pejumecovënëtsivi yajava, pona Tirannovënëne pijaescuelabojavabelia, bajarapabota penacaetuatabiabinexa. Bajarapabota nexata Pablo caematacabi canacujitsia pexanialivaisi, Jesús pelivaisi, jivi tsipaebabiaba. <sup>10</sup> Bajarapacuenia Pablo tsipaebapona anijavaibeje. Nexata daxita Asiavënë nacuapijivi, judíovi, apo judíovi ata, jumetane petuxanenë Jesús pelivaisi. <sup>11</sup> Dioso yavenonatsi Pablo Dioso pesaëta pinijicuene

pexanaejavanë pexanaponaenexa. <sup>12</sup> Nexata pamonaë toavitanetsi, pijamonaë Pablo penaxatabijavanë, pijapañueloxi ata, daxita xuaxi Pablo naperabëcajayaba, tocaponabiaba piavitanevi peperabëcajayabinexa. Nexata piavitanevi bajaraxua itsa tsiperabëbuatatsi, jamatejema baja tsabiabi. Dovathivi peyjavajinavanapaevi ata vecuapitsapabiabatsi.

<sup>13-14</sup> Itsamonaë judíovi tomaranëjava najetarubena. Bajarapamonaë Jesús pelivaisi apo jumecovënëtsi ata, itsiata dovathi jivivecua capitsapapona. Pajudíovi bajarapacuenia dovathi jivivecua capitsapapona, siete ponëbeje tsavanapae. Bajarapamonaë Escevavënënë, sacerdotevi penamatacaitorobinë, ëpexi tsavanapae. Nexata bajarapamonaë vënëtane Jesús. Nexata bajarapamonaë najumaitsi:

—Dovathi jivivecua capitsapaenatsi petuxanenë Jesús pevënëta, najai.

Nexata jane baja itsa tane dovathi peyjavaponaponaenë, bajarapamonaë jumaitsi:

—Dovathi, pacaitavetatsi, ponë Pablo vajunupaebapona, petuxanenë Jesús pevënëta. Vecuapitsapare baja maponëje, jai Escevavënënë pexi dovathi peyjavaponaponaenëjavabelia.

<sup>15</sup> Nexata Esceva pexi itsa itaveta dovathi, dovathi jumaitsi mapacueniaje:

—Yapëtaniji raja Jesús. Yapëtaniji Pablo ata. Itsiata paxamë apo pacayapëtaetsi. ¿Detsa jane paxamë papamonaemë? jai dovathi.

<sup>16</sup> Nexata bajarajota dovathi peyjavaponaponaenë, tsimaxëjirevarenatsi bajarapamonaë. Pinijisaëta dovathi peyjavaponaponaenë biatsi. Nexata amoneyabatsi. Pinijicuenia tsaquibabiatsi. Vejumatitcatsi penaxatabijavanëmi. Nexata bajaraponë pijabovetua bajarapamonaë yarëcëpeca pebejavatsi. Jumasa nexata rëcëpeca. <sup>17</sup> Nexata daxita Efeso tomarapijivi, judíovi, apo judíovi ata, vënëlivaisitane pacuenia dovathi peyjavaponaponaenë exanatsi Esceva pexi. Nexata Efeso tomarapijivi bitso jamatabëcuenenajunaviaca. Nexata daxita bajarapamonaë yaiyatane Jesús pevënë.

<sup>18</sup> Nexata ayaibitsaëttoxaneto Dioso pejumecovënëtsivi, patapona Pablobanajavaberenana. Nexata bajarapamonaë daxitajivi pitabarata navecuapaebapona pibisiacuenepexanabiabijava. <sup>19</sup> Nexata ayaibitsaëto penajorobicuene peyapëtaevi, capata pijacuyalatobaxutonë, penajorobicuene yabara pecajinavanapaebaxutonë. Pamatacabi bajarapamonaë comuaca bajarapabaxutonë, ayaimatamota comuaca. Nexata daxita bajarapamonaë bajarapacuyalatobaxutonëmi tajuita isotota daxitajivi pitabarata. Petajuitsicujinaë itsa namataëjëta petajuitsibaxutonëmi pematamo, xuaba pina cincuenta mil ponëbeje palatanëanë. Bajarapapalatanëanë bitso penamatamotsinëanë. <sup>20</sup> Nexata bajarapacuenia Dioso pitorobilivaisi yacaëjëpapona baja daxitanacuanëjava. Nexata ayaibitsaëto tsaponaë Dioso pejumecovënëtsivi.

<sup>21</sup> Bajaraxuacujinaë Pablo najamatabëxaina peponaenexa Macedonia nacujava, Acaya nacujava ata, petaenajetarucaenexa Dioso pejumecovënëtsivi. Bajaraxuacujinaë ponaëjitsia Jerusalén tomarabelia. Pablo nexata jumaitsi:

—Tapatsicujinaë Jerusalén tomarabelia, ponaenajë icatsia Roma tomarabelia ata, jai Pablo.

<sup>22</sup> Nexata Pablo itoroba Macedonia nacuyabelia anijanëbeje pijajivitonëbeje, Timoteobeje Erastobeje. Pablo abaxë bajayajebi ponapona Asiavënë nacuata.

*Pacuenia picani Pablo Efeso tomarata jamatabëbeyaxuabatsi yabara pelivaisi*

<sup>23</sup> Pablo itsa ponapona Asiavënë nacuata, Efeso tomarapijivi bitso anaepana Jesús pelivaisi pejumecovënëtsivijavabelia. <sup>24</sup> Efeso tomarapijivi anaepana Pablobanajavabelia Demetrio pejamatabëcueneta. Demetrio platananita templobo jumapecataeya exanabiaba, tsiquiriboxi. Saya pecobeta jumapecataeya pexanaediosova, Artemisavënë diosova, pijatemplobo jumapecataeya Demetrio exanabiaba bajarapaboxi. Demetrio templobo jumapecataeya itsa exanabiaba, bajarapaboxi pebarënacuenebivi bitso ayaicuenia palata barëpitabiaba bajarapaboximatamo. <sup>25</sup> Nexata Demetrio junata pebarënacaetuatsinexa daxita pebarënacuenebabiabivi bajarapaboxi. Junatanua itsamonaë ata, pamonaë pijinia jumapecataeya pexanaejavanë nacuenebabiaba. Nexata Demetrio jumaitsi bajarapamonaëjavabelia:

—Paxamë rabaja payapëtaneme mapacueneye. Jumapecataeya vajaexanabiabijavanë vajacanajetabiabixae, ayaijava palata xainaponatsi. <sup>26</sup> Pataneme rabaja. Pa-jumetanemenua baja Pablo pejumaitsaponaejava mapacueniaje: “Jivi raja pecobeta jumapecataeya pexanaenëanë, apo diosovi cajena,” pejaitssaponaejava. Nexata jivi ayaibitsaëtoخانeto mapatomarapijivije jumecovënëtapona Pablo bajarapacuenia pet-sipaebaponaejava. Itsiata apo ëmapatomarapijivije. Daxita Asiavënë nacuapijivi ata jumecovënëtapona. <sup>27</sup> Bajarapacuenia jivi ayaibitsaëto pejumecovënëtaponaejava apo nacatoxanepanae. Tsipaji jivi apo nacacomuatsi tsipae Artemisavënë diosova pijacuen vajanacuenebijava. Pinijijamatabëcuene pexainaediosova Artemisa pijatemplobo ata, apo yayiatae tsipae. Baitsi padiosova daxita Asiavënë nacuapijivi, daxitanacuanëpijivi ata, pematabacabëta tonubenabiaba pevajëcabiabinexa bajarapovajavabelia, vereverecaejitsipa. Nexata baja bajarapovajavabelia jivi apo vajëcabiabi tsipae, jai Demetrio templobo jumapecataeya tsiquiriboxi pexanabiabivijavabelia.

<sup>28</sup> Nexata bajarapamonae itsa jumetane bajarapacuenia Demetrio pejumaitsijava, nexata bitso bajarapamonae anaepana. Pinijijumeta vavajai tsaponae. Jumaitsi:

—¡Pinijijamatabëcuene raja pexainaediosova Artemisa, Efeso tomarapijivitsi vajadiosova! jai tsaponae bajarapamonae.

<sup>29</sup> Nexata daxita Efeso tomarapijivi itsa jumetane, bitso anaepana Pablobanajavabelia. Nexata ponëbeje Pablo yanatatsi, Gayobeje Aristarcobeje, Efeso tomarapijivi vaetabatsibeje. Bajaraponëbeje Macedonia nacuapijinëbeje. Daxitajivi vaetabiaya nacobenacaponatsibeje pinijiboxanetojavabelia, itsabelia baja cajena daxita tomarapijivi nacaetuatabiaba. <sup>30</sup> Pablo picani jumaitsi Dioso pejumecovënëtsivijavabelia:

—Xanë najonejitsianë mapaboyalijaje taneyanatsinëbeje tayajivicuaicuaijainexa penacaetuatsivijavabelia, jai.

Itsiata Dioso pejumecovënëtsivi apo tocopatsitsi Pablo penajonenexalia. <sup>31</sup> Asiavënë nacuapijivi pevetsivi, Pablo yapëtanetsi. Nexata bajarapamonae asaëya Pablo tonajumeitorobarenatsi penajoneyaniva bajarapaboyabelia pebeyaxuabiyativatsi. <sup>32</sup> Efeso tomarapijivi penacaetuatsijavata, nalivaisijëpaeya apo cuaicuaijai. Nexata pevavajajavata itsamonae itsalivaisicuenia vavajaiya jumai tsaponae. Itsamonae pijinia itsalivaisicuenia vavajai tsaponae. Tsipaji jivi ayaibitsaëtoخانeto apo yapëtae palivaisi yabara nacaetuata. <sup>33</sup> Nexata Efeso tomarapijivi penacaetuatsijavata, caejiviyobeje judíovi nanacaetuata. Bajarapajudíovi yapëtanë palivaisi yabara jivi ayaibitsaëto nacaetuata. Nexata bajarapajudíovi tsipaeba Alejandrovënënjëjavabelia Alejandro peyapëtaenexa xua yabara jivi ayaibitsaëto nacaetuata. Tsipaji Alejandro ata judíonë. Nexata Alejandro pevëna judíovi pëntorobajarabiaya itorobatsi daxitajivi pitabarata penucaenexa. Nexata Alejandro nacobeyota jivi pemoyanexa petsipaebinexa Efeso tomarapijivi pinaepanaeyaniva daxita judíovijavabelia. <sup>34</sup> Itsiata baitsi jane Efeso tomarajivi apo tocopatsi Alejandro pecuaicuaijainexa. Itsa daxitajivi yapëtanë Alejandro judíonëcuene, nexata daxita vavajaiya jumai tsaponae anijahorabejecuenia mapacueniaje:

—¡Pinijijamatabëcuene raja pexainaediosova Artemisa, Efeso nacuapijivitsi vajadiosova! jai tsaponae bajarapamonae.

<sup>35</sup> Bajaraxuacujinae nexata tomara jane baja pevetsinë daxitajivi moyaexana. Nexata jumeitavetsiaya jumaitsi:

—PaEfeso tomarapijivimë, daxitanacuanëpijivi baja cajena yapëtanë vajanacatocopat-sijava vajaevetsinexa mapatomarataje peecaëbo, pinijijamatabëcuene pexainaediosova Artemisa pijatemplobo. Daxitanacuanëpijivi baja cajena yapëtanë diosojumapeibotova, Artemisa, athëbëvetsica pejopaejava mapatomarataje. <sup>36</sup> Nexata bajarapadiosojumapeibotova athëbëvetsica pejopaejava yabara, acuenebi itsajivi ata: “Jume,” pejaijava. Nexata pajamatejemamëre. Pëtsa abaxë itsacuenë paexaname copiaya panajamatabëxainenejevamë xaniavaetsia. <sup>37</sup> Mapapebibeje paxamë pacapatameje, apo penacobe-toxotsinëbeje templobopijijava. Pibisiacuenia apo baracuaicuaijaibejenua vajadiosova Artemisa, jai Efeso tomara pevetsinë Efeso tomarata penacaetuatsivijavabelia.

<sup>38</sup> Icatsia tomara pevetsinë jumaitsi bajarapamonaejavabelia:

—Demetriobana itsa jamatabëneconita itsajivi, nexata neconitsi juezmonae pitabarata, jivi peneconitabiabibota. Bajara saya xua juezmonae evetavanapa. <sup>39</sup> Itsa apo paneconitsijitsiamë jivi, saya itsa panacaetuatame itsacuenelivaisiyo yabara, nexata saya roviaalia papaebare xaniavaetsia daxitajivi penacaetuatsijavata, pacuenia gobierno nacaitoroba. <sup>40</sup> Xaniajanë pacuenia pacatsipaebijitsiatsi. Ajena, mapamatacabitaje, mapacuenia itsa exanaponaejitsipatsije, nacananconitsiaexanaejitsipa gobierno. Bajarapacuenia nacananconitsiaexanaejitsipa tsipaji itsacueneneconi itsajivi xainaenejeva, mapacuenia anaeya nacaetuatatsije, jai Efeso tomara pevetsinë penacaetuatsivijavabelia.

<sup>41</sup> Itsa baja Efeso tomara pevetsinë najumevereta bajarapacuenia petsipaebijava, itoroba baja daxitajivi penaviabinexa pijabonëjavabelia.

## 20

*Pacuenia Pablo najetaruca Macedonia nacujava, Grecia nacujava ata, yabara pelivaisi*

<sup>1</sup> Itsa baja Efeso tomarapijivi jamatabëcaeva pianaepanaejava, nexata Pablo junata penacaetuatsinexa daxita Dioso pejumecovënëtsivi. Nexata Pablo muxujioba Dioso pejumecovënëtsivi pevajënaeyabelia piamatabëcuenesaë tsavanapaenexa Dioso pejumecovënëtsijava. Pablo nexata pexaniacuenia napëjioba bajarapamona. Bajaraxuacujinae Pablo baja pona Macedonia nacujavelia. <sup>2</sup> Nexata Pablo itsa pata Macedonia nacujavelia, pexanialivaisi tsipaebanajetaruca Macedonia nacujapijivi Dioso pejumecovënëtsivi pevajënaeyabelia piamatabëcuenesaë tsavanapaenexa Dioso pejumecovënëtsijava. Bajaraxuacujinae icatsia Pablo pata Grecia nacujavelia. <sup>3</sup> Nexata Grecia nacujata Pablo ponapona acueyabi pajumetobeje. Bajaraxuacujinae picani Pablo barcota naponaejitsia Siria nacujavelia. Nexata Pablo nayajumetane Siria nacujata judíovi pevajënaeevetsijavatsi pebeyaxuabinexatsi. Bajaraxuata Pablo najamatabëxaina icatsia pecovëya penaviatsinexa matatsënëa Macedonia nacujava. <sup>4</sup> Pamona Pablo yanatatsi, mapevënëanëje. Sópater, Berea tomarapijinë. Aristarcobeje pijinia Segundobeje, Tesalónica tomarapijinëbeje. Gayo pijinia Derbe tomarapijinë. Timoteo pijinia Listra tomarapijinë. Tíquicobeje pijinia Trófimobeje, Asiavënë nacujapijinëbeje. Bajarapamona Pablo yanatatsi. Nexata Pablo itsa barëpata Filipos tomarata, xanë Lucasnë, necaxitaraba. <sup>5</sup> Nexata daxita pamona Pablo yanatatsi, namataxainaeya baja ponalia Troas tomaravelia. Nexata paxanëbeje Pablobeje abaxë panacopatajëbeje Filipos tomarata, Macedonia nacujata peecaetomarata. Nexata pamona namataxainaeya baja ponalia, paneevetavanapabeje Troas tomaratalia. <sup>6</sup> Nexata paxanëbeje Filipos tomarata barcota pananaropotajëbeje pepuavereverecae baja pafiestamatacabi judíovi baxane levadurata matajërëabinejeva pexanaepan. Panaponajëbeje jane baja Troas tomaravelia. Cinco matacabita panapaliajëbeje Troas tomaravelia. Nexata pamona paneevetavanapabeje Troas tomaratalia, papëcaxinajëbeje baja. Nexata abaxë Troas tomarata pajinavanapajë siete pamatacabibeje.

*Pacuenia Pablo ponapona Troas tomarata yabara pelivaisi*

<sup>7</sup> Troas tomarata domingomatacabi panacaetuatajë daxita Dioso pejumecovënëtsivi yajava, patanajamatabënapitsinexa xua yabara Cristo sivatëpa. Pablo nexata livaisi tsipaeba. Meravia baja pitsijavata Pablo Mileto tomaravelia naropotsijitsia. Bajaraxuata Pablo livaisi tsipaeba meravijebi. <sup>8</sup> Panacaetuatajë athëbëabetsia pënëyatuucubibota. Nexata athëbëyo paira paenayajë, itsajotatsia pitayotsijavanë ayajava rubena xaniavaetsia pitayotsinexa. <sup>9</sup> Nexata pevëjëato ventanajavata eca, Euticovënënë. Pablo nexata bajayajebi livaisi tsipaeba. Nexata belia pevëjëato bitso itamajitsipaneca. Nexata baja majiteca. Pemajitecaenë nexata pevëjëato jopareca acueyabi pairabejevavereca. Nexata pevëjëato itsa sivarunarecatsi, petëpaenë baja pitatsi. <sup>10</sup> Nexata Pablo sivarunareca.

Pematabacabēta ecaeya isapita petēpaenē. Nexata Pablo jumaitsi Dioso pejumecovēnēt-sivijavabelia:

—Pētsa panajamatabēxainame. Asaē rabaja icatsia pevējēato, jai Pablo.

Nexata pevējēato icatsia asaē. <sup>11</sup> Nexata Pablo icatsia caevēa junaya. Pejunaecujinaet-sia epatsēnēca jane baja pan. Tsicobetsana jane baja daxita Dioso pejumecovēnēt-sivi pexaenexa. Pexaecujinae abaxē icatsia Pablo bajayajebi cuaicuaijai. Pecuaicuaijainē belia yamatacabibecatsi. Bajaraxuacujinae Pablo jane baja pona Mileto tomarabelia. <sup>12</sup> Nexata baja pevējēato piasaēnē barēnaviabatsi pijaboyabelia. Barēya bitso bajarapamonae piasaēxae pevējēato petēpaecujinae.

*Pacuenia Pablobana naropoba Troas tomarata pepatsinexa Mileto tomarabelia yabara pelivaisi*

<sup>13</sup> Paxanē Pablo paneitoroba barcota menia namataxainaeya patanaponaenexa Asón tomarabelia. Bajarapacuenia Pablo paneitoroba tsipaji Pablo matatsēnēa najetarucaejitsia pepatsinexa Asón tomarabelia. Nexata Pablo itsa pata Asón tomarata, bajarapatomarata patayapitsinexa. <sup>14</sup> Nexata jane baja Pablo itsa pata Asón tomarata, Pablo baja nanonorena barco ēnēaberena. Nexata baja panaponajē Mitilene tomarabelia. <sup>15</sup> Bajaraxuacujinae icatsia Mitilene tomarata pananaropobajē. Nexata meravia pitsijavata panapatajē Quíotomara canacujitsialia pecaetomarabelia. Bajarapatomarata icatsia patananaropobicujinae, meravia icatsia pitsijavata, panapatajē Samos tunaetota pecaetomarabelia. Bajarapatomarata icatsia patananaropobicujinae, panapatajē icatsia Trogilio tomarabelia. Nexata abaxē Trogilio tomarata panacueraevetajē. Nexata icatsia Trogilio tomarata patananaropobicujinae, caematacabicujinae, icatsia panapatajē jane baja Mileto tomarabelia. <sup>16</sup> Pablo rovia jamatabēxeneta Efesotomara, Asiavēnē nacuata pecaetomara. Tsipaji apo jamatabēponaponae bajayajebi Asiavēnē nacuata. Pablo bepíjia jamatabēpata Jerusalén tomarabelia Pentecostésvēnē fiestavajēnaeya.

*Pacuenia Pablo Mileto tomarata livaisi tsipaeba Efeso tomaraverena pepatsivi, ancianovijavabelia, yabara pelivaisi*

<sup>17</sup> Mileto tomaravelia Pablo tonajumeitoroba Efeso tomarapíjivi ancianovi pepatsinexarena Mileto tomaraberena. <sup>18</sup> Nexata baja ancianovi itsa parena Pablojavaberena, Pablo jumaitsi bajarapaancianovijavabelia:

—Paxamē baja cajena payapētaneme mapacueneje. Asiavēnē nacuata tapatsimatacabijavaveliacujinae, Dioso pitorobilivaisi tsipaebaponaponajē Asiavēnē nacuata. Daxitamatacabi tonacuenebajē Dioso pijacuene. <sup>19</sup> Dioso pijacuene itsa tonacuenebaponaponajē, apo jamatabējumaitsinē: “Xanē bitso ayaijamatabēcuenenēnē,” apo jamatabējanē. Itsa taeyabiabajē itsamonae pecopabijava Dioso pejumecovēnēt-sijavami, bitso sivanueyabiabajē. Bitso bejiobinēnua tsabiabi tsipaji judíovi jamatabēnebeyaxuababiaba. <sup>20</sup> Daxita Dioso pitorobilivaisi pacatsipaebabiabatsi papecajamatabēcueneyavenon-aenexa. Caelivaisi ata apo pacavecuacopatsitsi. Pacatsipaebabiabatsi baja cajena daxitajivi pitabarata. Pacatsipaebabiabatsinua baja cajena panijabonējava ata. <sup>21</sup> Asaēya tsipaebabiabajē judíovi, apo judíovi ata, daxita bajarapamonae pecopabinexa pibisiacuene pexanabiabijava penajamatabēcuenepēnēyorotsinexa Diosojavabelia. Bajaraxuacujinae jane baja pejumecovēnēt-sinexa vajatuxanenē Jesucristo pelivaisi. <sup>22</sup> Mara jotacujinaeje ponaenajē Jerusalén tomarabelia Espíritu Santo taneitorobixae bajarabelia taponaeenexa. Itsiata xaniavaetsia apo yapētaenē pacuenia nexanaejitsia Jerusalén tomarapíjivi. <sup>23</sup> Itsiata caejavayo yapētaniji. Caetomara canacujitsia Dioso pitorobilivaisi tatsipaebanajetarucaejavata Espíritu Santo nejumai tsabiabi: “Caetsiana raja penaneconitsivi pejebabiabibota. Xamē bitso benejiobicuene taename,” nejai tsabiabi Espíritu Santo. <sup>24</sup> Itsiata bailsi jane cajena apo junavinē bajarapacuene yabara. “Belia nebeyaxuabijitsipa,” apo jamatabējanē cajena. Jamatabēveretajē pacuene vajatuxanenē Jesús nitoroba tatonacuenebinexa daxitajivi tatsipaebanajetarucaenexa pexanialivaisi, Dioso vajanacaitaxutotsoniataejava, jai Pablo ancianovijavabelia.

<sup>25</sup> Icatsia Pablo jumaitsi ancianovijavabelia:

—Paxamējava naponaponajë patacatsipaebinexa Dioso pevetsijavanexa daxita pijajivi. Tajëvelia baja cajena yapëtaniji. Apo panetaemë rabaja tsane matavëjëa.

<sup>26</sup> Bajaraxuata ajena baja pacatsipaebatsi. Itsajivi paxamëyajuvënëjivi itsa naxuabiana Diosovecua, apo naxuabi tsane xanë tajamatabëcueneta. <sup>27</sup> Apo naxuabi tsane xanë tajamatabëcueneta tsipaji baja daxita Dioso pitorobilivaisi xaniavaetsia baja cajena pacatsipaebatsi. Caelivaisiyo ata apo pacavecuacopatsitsi, jai Pablo ancianovijavabelia.

<sup>28</sup> Icatsia Pablo jumaitsi ancianovijavabelia:

—Xaniavaetsia nayajivitaeya pajinavanapare pibisiacuene paneexanaeyaniva. Pacuenia oveja pexainaevi xaniavaetsia evetavanapa pijaoveja, bajara pijinia pacuenia xaniavaetsia paevetavanapaename daxita pamona Dioso pejumecovënëtsivi. Espiritu Santo raja pacaitoroba panetoevetsinexa vajatuxanenë Jesús pijajivi, pamona comuata pijanata. <sup>29</sup> Tajëvelia baja cajena yapëtaniji tacovëya penajetarubenaeyavanexa saicayacuenia Dioso pejumelivaisivecua petsipaebivi. Bajarapamona njetarubenaena jivi Dioso pejumecovënëtsijava pevereverecaeyaexanaenexa. Pacuenia nevëthë pianaepanaevi verene oveja, bajara jamatabëcueneitsane bajarapamona pevereverecaeyaexanaenexa jivi Dioso pejumecovënëtsijavami. <sup>30</sup> Paxamëyajuvënëvi ata saicayacuenia Dioso pejumelivaisivecua tsipaebaponaena peyamaxëitorobinexa Dioso pejumecovënëtsivi. Nexata Dioso pejumecovënëtsivi navecuanatsanaena pepënaponaenexa bajarapamona. <sup>31</sup> Bajaraxuata xaniavaetsia paevetavanapare Dioso pejumecovënëtsivi. Panajamatabënapire mapacueeneje. Xanë baja cajena acueyabi pavaibeje, caematacabi canacujitsia, meravijajava, caeto ata apo copatsinë patacamuxujijobijava bitso patacaasivaxae. Itsajavata tanuejavata ata pacamuxujijobabiabatsi, jai Pablo Efeso tomarapijiancianovijavabelia.

<sup>32</sup> Icatsia Pablo jumaitsi bajarapamonaeyavabelia:

—Tajamona, nexata baja pacacopatatsi Dioso pecobeyabelia Dioso papecaevetsinexa. Dioso pejumelivaisi nacatsipaeba Dioso vajanacaasivajava. Nexata bajarapalivaisi pacajamatabëcueneyavenonaena. Bajarapalivaisi caëjëpatsi papecajamatabëcuene asaëyaexanaenexa Diosojavabelia. Dioso pacacapanepaena pacuenia Dioso capanepaena daxita pamona Dioso aneconijibia tane. <sup>33</sup> Xanë itsa naponaponajë paxamëjavata, apo najamatabëxainaenë tanaxainaeyabinexa itsanë pijapalata, penaxatabijava ata. <sup>34</sup> Payapëtaneme baja cajena mapacueeneje. Tacobeta nacuenebajë tanamatavenonaeyavaxi tacomuataponaenexa, tayajavaponaponaevi ata tatocomuatsinexa. <sup>35</sup> Pacatsitanacueneitajëtatsi baja cajena pacuenia paxamë ata bepanacuenebame. Bepayavenonamenua itsamona bitso bepejijobivi. Tsipaji baja cajena vajatuxanenë Jesús jumaitsi mapacueniaje: “Xanepana bitso itsamonaeyavabelia vajarajutabiabijava vaxaitsi itsamona vajanacarajutabiabijava matatoxenetsia. Tsipaji bitso jamatabëcuenebarëyatsi itsa rajutatsi itsamonaeyavabelia vajanacarajutsijava matatoxenetsia,” jai raja Jesús, jai Pablo ancianovijavabelia.

<sup>36</sup> Itsa baja Pablo najumevereta bajarapacuenia petsipaebijava, Pablo daxita ancianovi pematabacabëta barënuca pebarënavajëtsinexa Diosojavabelia. <sup>37</sup> Bajaraxuacujinae Pablo baja pona. Nexata ancianovi pënuayabatsi. Nexata Pablo itsa napëjijoba ancianovi, yaitaxutonueya vaetabiaya itabaratsutsuneponatsi. <sup>38</sup> Bitso ancianovi najamatabëxaina. Tsipaji Pablo jumaitsi:

—Apo panetaemë rabaja tsane matavëjëa, jai.

Bajaraxuacujinae Pablo barcojavabelia peponaeyavata, bajarapamona pënuaxuabaliatsi barcojavabelia.

## 21

### *Pacuenia Pablo pona Jerusalén tomarabelia yabara pelivaisi*

<sup>1</sup> Itsa baja panapëjijobiveretajë ancianovi, panarunarecajë baja barco ënëabereca. Pananicabaliajë roviaalia patapatsinexalia Cos tomarabelia. Bajaraxuacujinae, meravia

pitsijavata, panapatajē abaxē epatua Rodas tomarata. Bajaraxuacujinae abaxē icatsia panapatajē Pátara tomarabelia. <sup>2</sup> Nexata Pátara tomarata icatsia pacaxitajarabajē itsabarco. Bajarapabarco ponaejitsia Fenicia nacuyabelia. Nexata icatsia bajarapabarcota patanaponaenexa, panarunarecajē bajarapamo ēnēabereca. Panaponajē jane baja. <sup>3</sup> Nexata barcota patanajetarubenaevavata, pataeyetajē patatsavenononia Chipretunaeto. Paxenetanajetarubenaevavata rovia. Paponajē Siria nacuyabelia. Nexata baja papatajē Siria nacuyabelia Tiro tomarata. Nexata Tiro tomarata juteta barcoēnēta pecaponaevava. <sup>4</sup> Nexata Tiro tomarata pacaxitajarabajē Dioso pejumecovēnētsivi. Bajarapamonaevavata pajinavanapajē siete pamatacabibeje. Bajarapamonaevavata tajēvelia Espiritu Santo pejamatabēcueneta yapētaeyaexanatsi Pablo pebejiobiaexanaevavanexatsi Jerusalén tomarata. Nexata bajarapamonaevavata jumaitsi Pablojavabelia:

—Pētsa poname Jerusalén tomarabelia, jai picani bajarapamonaevavata.

<sup>5</sup> Itsiata baja icatsia siete pamatacabibejecujinae panaropobajē. Nexata Tiro tomara-pijivi, daxita Dioso pejumecovēnētsivi, pijavajivi yajava, pexi yajava, patapēta naponalia mene itapayabelia patanepētaenexa pataponaevava. Nexata mene itapatalia, tajetabota, daxita bajarapamonaevavata yajava, panubenajē patamatabacabēta patavajētsinexa Diosojavabelia. <sup>6</sup> Bajaraxuacujinae panapējiobajē baja daxita Dioso pejumecovēnētsivi. Icatsia baja panarunarecajē barco ēnēaberena. Bajarapamonaevavata baja naviabilia pijabonējavabelia.

<sup>7</sup> Tiro tomarata patananaropobicujinae, panapatajē Tolemaida tomarabelia. Bajarapatomarata pabajacobajē Dioso pejumecovēnētsivi. Bajarapamonaevavata panajinavanapajē caematacabi. <sup>8</sup> Meravia icatsia pitsijavata pananaropobajē. Panapatajē icatsia Cesarea tomarabelia. Cesarea tomarata patapatsicujinae, panaponajē Felipe pijaboyabelia. Felipe, Dioso pitorobilivaisi jivi petsipaebinē, siete ponēbeje diáconoviayuvēnēnē. Bajaraponē pijabota panajinavanapajē. <sup>9</sup> Felipe xaina cuatro povabeje pexi. Bajarapapetiriavi abaxē apo nacojiobi. Bajarapamonaevavata tsipaebabiaba jivijavabelia Dioso pitorobilivaisi, palivaisi Espiritu Santo pejamatabēcueneta yapētaeyaexanatsi. <sup>10</sup> Itsa baja paxainajē anijamatacabianē Felipe pijabota patanapatsicujinae, Judea nacuverena pata Diosojumepaebinē profeta, Agabovēnēnē. <sup>11</sup> Bajaraponē pata paxanējavaberena Felipe pijabota. Nexata Agabo Pablo pijacorreabocoto veepajonotatsi. Bajarapabocotota Agabo nacobecētabeje. Nataxucētabeje yajava. Nexata Agabo jumaitsi:

—Espiritu Santo raja nejumaitsi tajēvelia mapacueniaje: “Jerusalén tomarata pejinavanapaevi, judíovi, mapacuenia cētsianatsi mapacorreabocoto pexainaenēje. Bajaraxuacujinae canajetsianatsi itsanacuapijivi pecobeyabelia, apo judíovijavabelia,” jai raja tajēvelia Espiritu Santo, jai Agabo Pablo yabara.

<sup>12</sup> Nexata itsa pajumetaniji bajarapacuenia Agabo patanetsipaebijava, nexata paxanē, Cesarea tomara-pijivi yajava, panacobenaasivanē picani Pablo peponaevaniva Jerusalén tomarabelia. <sup>13</sup> Nexata Pablo panejumaitsi:

—¿Detsa xuajitsia panuame? ¿Panenajamatabēxainaeva exanaevajitsiamē tsaja? Xanē raja evetajē tanecētsinexa. Evetajē tanebeyaxuabijava ata Jerusalén tomarata vajatuxanenē Jesús pelivaisi yabara, panejai Pablo.

<sup>14</sup> Pasiva atanē tsabiabi, Pablo itsiata apo najamatabēcopatsi peponaevava Jerusalén tomarabelia. Nexata baja belia pacopatajē pataasivatsabiabijava. Pajumaitsinē nexata:

—Pacuenia Dioso tojitsipatsi pexanaenexatsi, beexanaenatsi baja, pajanē.

<sup>15</sup> Caematacabibejecujinae paxaniavaetajē patacobecovējavaxi. Nexata jane baja panaropobajē Jerusalén tomarabelia. <sup>16</sup> Itsamonaevavata Dioso pejumecovēnētsivi, Cesarea tomara-pijivi, paneyanalia. Bajarapamonaevavata panebarēpona Mnasónvēnēnē, Chipretunaeto nacuapijinē, pijaboyabelia. Nexata bajaraponē pijabota panajinavanapajē. Bajaraponē copiaya Dioso pejumecovēnētsiviyajuvēnēnē.

*Pacuenia Pablo Jerusalén tomarata Santiago barēcuaicuaijai yabara pelivaisi*

<sup>17</sup> Itsa papatajē Jerusalén tomarabelia, Dioso pejumecovēnētsivi panecopiapita jamatabēcuenebarēyaya. <sup>18</sup> Nexata meravigia pitsijavata Pablo panebarēsivaxaina Santiagojavabelia. Nexata Santiago pijabota naena ancianovi. <sup>19</sup> Nexata Pablo bajarapamonae bajacoba. Pebajacobicujinae Pablo bajarapamonaejavabelia navajunupaeba daxita pacuene Pablo exanapona apo judíovijava ata Dioso peyavenonaexaetsi. <sup>20</sup> Itsa jumetane bajarapacuenia Pablo penavajunupaebijava, nexata Santiago, ancianovi yajava, jamatabēcuenebarēya. Nexata daxita bajarapamonae pejumetaexae bajarapacuenē, pexaniajamatabēcuene rajuta Diosojavabelia. Nexata Santiagobana jumaitsi Pablojavabelia:

—Patajabanā, yapētaneme baja cajena mapacuenēje. Judíovi bitso ayaibitsaētoxoneto, miles pajivibeje Dioso pejumecovēnētsivi. Yapētanemenua baja mapacuenēje. Daxita bajarapajudíovi jumecovēnētsi ata Jesús pelivaisi, itsiata abaxē tsiteca jumecovēnētavanapa Dioso Moiséspijinēta penajumecopatsilivaisi. <sup>21</sup> Pajudíovi apo jumecovēnētsi Jesús pelivaisi, xamē netsipaebaponaelivaisi cayabaranajumetsēnētabiaba. Nexata bajarapajudíovi najumetsēnētsiaya jumai tsabiabi Jesús pelivaisi pejumecovēnētsijudíovijavabelia: “Itsa raja Pablo livaisi tsipaebapona judíovijava, itsanacuanējava pejinavanapaevi, Pablo itavetabiaba judíovi pecopatsinexa Dioso Moiséspijinēta penajumecopatsilivaisi pejumecovēnētsijavami. Itavetabiabanua bajarapamonae pecopabinexa peperabēcaucubijava pexi. Pablo itavetabiabanua bajarapamonae pecatsitecaeyaniva vajasalinaivi pijacuene,” jai tsabiabi bajarapamonae najumetsēnētsiaya xamē yabara Jesús pelivaisi pejumecovēnētsijudíovijavabelia, jai Santiagobana Pablojavabelia.

<sup>22</sup> Icatsia Santiagobana jumaitsi Pablojavabelia:

—¿Detsa nexata vaxaitsi itsanetsi? Itsa raeta judíovi Jesús pelivaisi pejumecovēnētsivi, cavēnēlivaisitane nepatsijava, nacaetuatsiana penabarēcuaiicuaijainexa xamē yabara. <sup>23</sup> Nexata daxitajivi pecayapētaenexa nejumecovēnētsijava Dioso Moiséspijinēta penajumecopatsilivaisi, exanaename pacuenia pacaitorobijitsiatsi. Majotaje cuatro ponēbeje paxanējajuvēnēvi vereta baja pexanaejava pacuenia baja najumecapanepaeya jumaitsi Diosojavabelia. Nexata bajarapamonae ponaejitsia temploboyabelia ofrenda perajutsinexa Diosojavabelia. <sup>24</sup> Nexata naponaname bajarapamonaeta temploboyabelia. Nexata templobota nanajamatabēcuenexaniavaetsianame nijamatabēcuenesaēnexa Diosojavabelia. Pacuenia bajarapamonae najamatabēcuenexaniavaetsijitsia pijamatabēcuenesaēnexa Diosojavabelia, bajarapacuenia nanajamatabēcuenexaniavaetsianame. Nexata daxita xua bajarapamonae notsiana templobota ofrenda perajutsinexa Diosojavabelia, ponējavabelia notsiana, bajaraxua xamē daxita cobecovēmatamotsianame. Bajaraxuacujinae bajarapamonae daxitamatanami matacasibianatsi. Bajarapacuenia itsa exanaename, daxita judíovi cayapētaena nejumecovēnētsijava Dioso Moiséspijinēta penajumecopatsilivaisi. Nexata daxita judíovi yapētaena najumetsēnētsiaya pecabaracuaiicuaijai tsabiabijava pajudíovi apo jumecovēnētsi Jesús pelivaisi. <sup>25</sup> Pamonae apo judíovi, pijasalinaivi apo itavetsitsi daxita pacuene vaxaitsi judíovitsi vajasalinaivi nacaitaveta. Nexata pamonae apo judíovi ata, Dioso pejumecovēnētsivi, pataitavetsinexa, caelivaisiyobeje patoyaquinajē cuyalatota. Itsa patoyaquinajē, pajumaitsinē mapacueniaje: “Pecobeta saya pexanaenēanējavabelia pevi perajutsinexa ofrendacuenia itsa tobia baca oveja ata, pētsa paxaneme bajarapayajuvēnēvi. Pētsa paxaneme peja. Pētsa paxaneme cuibocuetsacaeya pebexuabinē pevi. Papebijivi baja nacojioba, pētsa matayajibatsi itsavajavabelia pijavavecua. Papebijivi pijinia abaxē apo nacojiobi, pētsa matayajibatsi petirivajavabelia. Bajara pijinia pacuenia petiriavi ata. Papetiriavi baja nacojioba, pētsa matayajibatsi itsanējavabelia pamonavecua. Papetiriavi pijinia abaxē apo nacojiobi, pētsa matayajibatsi pebijavabelia,” pajanē itsa patoyaquinajē apo judíovijavabelia, jai Santiagobana Pablojavabelia.

*Pacuenia Pablo templobota vaetabatsi penaneconitsivi pejebabiabibota peetsinexatsi yabara pelivaisi*

<sup>26</sup> Santiagobana Pablo pitorobicujinaetsi, meravia pitsijavata, Pablo napona pebi-jivi cuatro ponēbeje pepēta pacuenia Santiagobana itorobatsi. Pablo nexata najamatabēcuenexaniavaetapona piajamatabēcuenesaēnexa Diosojavabelia cuatro ponēbeje yajava. Bajaraxuacujinae Pablo temploboyalia joneya sacerdotevijavabelia, petsipaebinexa pamatacabi copiarucaejitsia Pabloana penajamatabēcuenexaniavaetsijava Diosojavabelia. Bajarapamatacabi cuatro ponēbeje Diosojavabelia ofrenda perajutsijavanēnexa templobota notsijitsia. Nexata picani daxita bajaraxua Pablo cobecovēmata-motsijitsia bajaraxua pecanajetsivijavabelia.

<sup>27</sup> Nexata siete pamatacabibejucujinae, pamatacabi jane baja Pablo, cuatro ponēbeje yajava, Diosojavabelia ofrenda rajutsijitsia, Pablo templobota tanetsi judíovi, Asiavēnē nacuaverena pepatsivi. Nexata bajarapajudíovi itoroba daxita Jerusalén tomarapijivi pianaepanaenexa Pablojavabelia. Nexata Jerusalén tomarapijivi, Asiavēnē nacuaverena pepatsivi yajava, nacobenavaetabatsi Pablo. <sup>28</sup> Nexata bajarapamonae vavajai pinijijumeta. Najumetsēnētsiaya jumaitsi:

—¡Tajamonae judíovi, naxanitsia! ¡Paneyavenonare! Maçonēje daxitanacuanējava livaisi tsipaebanajetaruca daxitanacuanēpijivi vajanacaitoyanexa vaxaitsi manacuapijivitsije. Itavetaponanua Dioso Moiséspijinēta penajumecopatsilivaisi jivi pejumecovēnētsiyaniva. Itavetaponanua mapatemplobo ataje jivi peyaiyataeyaniva. Apo judíovi ata Pablo barējoneyabiaba matemploboyarenaje. Nexata baja Dioso tsitaabejetsi mapatemploboje, Dioso pijatemplobo. Nexata baja Pablo naneconita Diosojavabelia, jai najumetsēnētsiaya judíovi Pablo yabara Asiavēnē nacuaverena pepatsivi.

<sup>29</sup> Bajarapacuenia vavajaiya jumaitsi tsipaji baja copiaya bajarapajudíovi Pablo tanetsi pebarēponaponaejava Jerusalén tomarata apo judíonē, Trófimovēnēnē, Efeso tomarapijinē. Nexata jamatabēcuenenavēxaniabiaya bajarapamonae jamatabējumaitsi:

—Pablo raeta apo judíonē barējuna mapatemploboyarenaje, jamatabējai Trófimo yabara.

Pablo cajena Trófimo apo barējone temploboyalia.

<sup>30</sup> Nexata Asiavēnē nacuaverena pepatsivi, Pablo yabara penajumetsēnētsilivaisi, daxita Jerusalén tomarapijivi jumetane. Nexata bitso anaepana. Nexata daxita bajarapamonae cujinaejinarena templojavaberena. Bajarapamonae vaetabatsi Pablo. Robobocatsi vayafuabelia templobobōnēvecua. Nexata templobobaupaxanetonē bepíjia vecuabaupaxatabatsi. <sup>31</sup> Bajarapamonae picani Pablo jamatabēbeyaxuabatsi. Nexata bajarapaepatota itsamonae tsipaeba vajabitsaē pepo pevetsinē, comandantejavabelia. Tsipaeba pacuenia daxita Jerusalén tomarapijivi bitso anaepanavanapa. <sup>32</sup> Nexata comandante bepíjia barēlia pijajivi vajabitsaēvi, vajabitsaēvi pijacapitánvi yajava. Cujinaejina jivi penacaetuatsijavabelia. Nexata judíovi itsa tane comandante vajabitsaēvi pebarēpatsijava, nexata judíovi copaba pebejavatsi Pablo. <sup>33</sup> Nexata comandante Pablo kujirenatsi. Vaetabiaexanatsi pijajivi. Comandante itoroba pijajivi Pablo pecētsinexatsi anijacadenamaētotabeje. Bajaraxuacujinae yanijoba judíovijavabelia.

—¿Detsa maçonēje? ¿Detsa xua exana maçonēje? jai comandante.

<sup>34</sup> Nexata bajarapajivi bitsaētoxonetonēyajuvēnēvi comandantejavabelia najuatsipaebanubena pinijijumeta. Nexata comandante apo jumetae xaniavaetsia bitso jivi pevavajaixae. Nexata comandante itoroba vajabitsaē Pablo pecaponaenexatsi vajabitsaē pijaboyabelia. <sup>35</sup> Pablo capatatsi vajabitsaē pijaboitapata. Vajabitsaē pijabo pepēnēvelia xaina beescaleracuenia pexanaejava. Nexata bajarajota Pablo vajabitsaē nacobenayotsiaya cajunayatsi vajabitsaē pijaboyalia pecajonenexatsi. Tsipaji icatsia bajarajota Pablo jivi bejitsiatsi bitso pianaepanaexae. <sup>36</sup> Jivibitsaētoxonetonē Pablo barabocabuataponatsi. Vavajai tsabuataponae bajarapamonae.

—¡Pabeyaxuare! jai tsabuataponae Pablo yabara.

*Pacuenia Pablo navajunupaeba jivibitsaētoxonetonējavabelia yabara pelivaisi*

<sup>37</sup> Itsa baja Pablo vajabitsaëvi pijaboyalia cajonejitsiatsi, nexata Pablo griegojumeta jumaitsi comandantejavabelia:

—Netocopare tacatsipaebinexa caejumeyo, jai Pablo.

Nexata comandante jumaitsi:

—¿Xamë tsaja natsipaebame griegojume? <sup>38</sup> ¿Xamë tsaja apo Egipto nacuapijinëmë? ¿Xamë tsaja imata jivi apo itorobimë pianaepanaenexa gobiernojavabelia? ¿Xamë tsaja imata penamaxëvanitsivi cuatro mil ponëmaxëto apo barënajetabajiravimë petusato nacuyabelia? jai comandante Pablojavabelia.

<sup>39</sup> Nexata Pablo jumaitsi:

—Jume raja. Xanë raja saicaya judíonënë, Tarso tomarapijinënë. Tarsotomara cajena pinijitomara daxita Cilicia nacuata penaetomaranëvecua. Pexaniacuene netoexanare. Netocopare livaisi tatsipaebinexa mapamonaevajaveliaje, jai Pablo.

<sup>40</sup> Nexata comandante tocopatatsi livaisi petsipaebinexa. Pablo nuca vajabitsaë pijabo pepënëvelia beescaleracuenia pexanaevajumata. Pablo nacobeyota jivi pemoyanexa. Nexata baja jivi itsa moya, Pablo navajunupaeba bajarapamonaevajavelia hebreojumeta.

Pablo jumaitsi:

## 22

<sup>1</sup> —Tajamonae, panenamuxunaevere. Paxamë ata vajanacua paneevetsivi, panenamuxunaevere. Vepacanavajunupaebatsi daxita xua exanajë, jai Pablo hebreojumeta judíovijavabelia.

<sup>2</sup> Bajarapajudíovi itsa jumetane palivaisi Pablo tsipaeba hebreojumeta, nexata bitso ajumejibia namuxunaevetena. Nexata Pablo icatsia jumaitsi:

<sup>3</sup> —Xanë raja judíonënë. Naexanajë Tarso tomarata, Cilicia nacuata peecaetomarata. Itsiata vitsabajë mapatomarataje, Jerusalén tomarata. Pecujarubinë Gamaliel necujaruba. Nexata xaniavaetsia necujaruba daxita vajasalinaivi pijacuene. Nexata picani jamatabëjumaitsinë tsabiabi: “Daxita tajamatabëcueneta Dioso pejitsipaecuenia tonacuenebianajë,” jamatabëjanë tsabiabi. Bajarapacuenia aeconoxae daxita paxamë ata pajamatabëitsimë tsavanapae, jai Pablo.

<sup>4</sup> Pablo icatsia jumaitsi:

—Xanë abaxë picani bajayata barajinabiabajë pamonaevumecovënëta pexanialivaisi, Jesucristo pelivaisi. Pamonaevumecovënëta Jesús pelivaisi, taicaponajë pebijivi. Taicaponajë petiriavi ata. Jebaponajë bajarapamonaevumecovënëta penaneconitsivi pejebabiabibota. Jitsipajë picani pebeyejebinexatsi daxita bajarapamonaevumecovënëta. <sup>5</sup> Sacerdotevi pepo penamat-acaitorobinë, daxita judíovitsi vajaanianovi ata, pacatsipaebijitsipa bajarapacuenia, pacuenia baja xaniavaetsia pacanavajunupaebatsi. Tsipaji bajarapamonaevajavelia vajëtajë tanetsicobeyaquinaenexa cuyalato tatocaponaenexa pamonaevumecovënëta judíovi jinavanapa Damasco tomaratalia. Nexata bajarapajudíovi itsa yoroba bajarapabaxuto, tanetocopatsinexa picani Jesús pelivaisi pejumecovënëtsivi tataicaenexa. Nexata jane baja picani lianë tataicaenexa daxita pexanialivaisi, Jesús pelivaisi, pejumecovënëtsivi, taca-patsinexa picani maberenaje Jerusalén tomaraberena penaneconitsiaexanaenexatsi, jai tsanucue Pablo judíovijavabelia.

*Pacuenia Pablo navajunupaeba pacuenia taxuxuaba Jesús pelivaisi pejumecovënëtsijava yabara pelivaisi*

*(Hch 9.1-19; 26.12-18)*

<sup>6</sup> Pablo icatsia jumaitsi hebreojumeta judíovijavabelia:

—Nexata jane baja ponajë Damasco tomarabelia. Itsa baja imoxoyotanajetarucajë Damasco tomara, jemata matonejeepatota pinijicotia nematatoyorotsia naitayota athëbëvetsica. <sup>7</sup> Nexata bajarajota irataeya bocajunuajë irata. Jumetaenucajë athëbëvetsica tanejumaitsiyava: “Saulo, Saulo, ¿detsa xuajitsia xanë tajajivi netobejiobiaexanaponame?” tanejaiyava. <sup>8</sup> Nexata xanë jumaitsinë: “Tajatuxanenë, ¿detsa ponëmë?” janë. Nexata icatsia nejumaitsi: “Xanë raja Jesúsne, Nazaret tomarapijinënë. Xanë raja

tajajivi netobejiobiaexanaponame,” nejai. <sup>9</sup> Papebijivi yajavanajetarucajë, tane baja cajena athëbëvetsica penaitayotsicotia. Itsiata baitsi jane apo jumetae xua yabara nebarëcuaicuaijai athëbëvetsica. <sup>10</sup> Nexata xanë jumaitsinë: “Tajatuxanenë, ¿detsa xua nexata exanaenajë?” janë. Nexata pepo petuxanenë nejumaitsi: “Nonotapunare baja. Ponaename baja Damasco tomarabelia. Bajarajotalia catsipaebiana pacuenia exanaejitsiamë,” nejai. <sup>11</sup> Nexata bajarapacotia tataecujinae bitso nitaxutomeraviba. Apo necaējëpae tataejava. Nexata saya tayajavaponaevi necomacaponalia Damasco tomarabelia, jai Pablo judíovijavabelia:

<sup>12</sup> Icatsia Pablo jumaitsi judíovijavabelia:

—Bajarajota Damasco tomarata ponapona Ananíasvënënë, bitso pejumecovënëtsinë Dioso Moiséspijinëta penajumecopatsilivaisi. Bajaraponë Ananías yabara daxita judíovi, Damasco tomarapijivi, jumai tsabiabi: “Bitso raja Dioso pejumecovënëtsinë Ananías,” jai tsabiabi. <sup>13</sup> Nexata bajaraponë Ananías xanëjavaberena patajopa tanetaenexa. Nexata nejumai tsanucacae: “Tajabananë Saulo, icatsia rabaja itaxutoxanepaname,” nejai. Bajarpacuenia tanejumaitzijavata icatsia baja itaxutoxanepanjë. Nexata baja taniji Ananías. <sup>14</sup> Nexata icatsia Ananías nejumaitsi: “Vamojivimi rabaja pijaDioso caitapeta. Caitapeta baja neyapëtaenexa pacuenia catojitsipa netoexanaenexa. Caitapetanea netaenexa Dioso pitabarata Jesús pepo planeconijibinë. Caitapetanea nejumetaenexa Jesús pecatsipaebilivaisi. <sup>15</sup> Nexata ponaename daxitanacuanëpijivijavabelia netsipaebanajetarucanexa pacuenia taneme, pacuenia ata jumetaneme Jesús pelivaisi. <sup>16</sup> ¿Detsa nexata xuajitsia abaxë najamatabëjematsia ponaponame? Nonotapunare. Cabautisabiana. Jesúsjavabelia nenajamatabëcuenecopatsixae, daxita pibisiacuene nexanaeconimi cavecuaajibiaexanaena,” nejai Ananías, jai Pablo judíovijavabelia.

*Pacuenia Pablo itorobatsi Dioso pitorobilivaisi petsipaebaponaenexa apo judíovijava yabara pelivaisi*

<sup>17</sup> Pablo icatsia jumaitsi hebreojumeta judíovijavabelia:

—Bajaraxuacujinae Damasco tomaraverena naviarenajë baja Jerusalén tomaraberenena. Nexata itsa patajë Jerusalén tomarata, ponajë templobojavabelia tavajëtsinexa Diosojavabelia templobota. Nexata tavajëtsijavata Diosojavabelia, taniji bemajitsinaebota pepo petuxanenë Jesús. <sup>18</sup> Nexata Jesús nejumaitsi: “Naxanitsiayo bepíjia vecuaponare Jerusaléntomara. Tsipaji raja mapatomarapijivije apo cajumecovënëtsi tsane netsipaebijava xanë talivaisi,” nejai Jesús bemajitsinaebota. <sup>19</sup> Nexata xanë jumaitsinë: “Tajatuxanenë, bajarapamonae judíovi xaniavaetsia baja cajena neyapëtane. Bajarapamonae neyapëtane judíovi penacaetuatabibonëjava tataicaponaejava daxita pamonaecajumecovënëta taconibabeyabiabinexa naebota. <sup>20</sup> Bajarapamonae neyapëtane xanë ata bajarapamonae jamatabëcuenejëpaeya tataenucaejava pamatacabi Estebanpijinë, pecalivaisipaebinëmi, beyaxuabatsi. Bajarapamatacabi, pamonaecajumecovënëta beyaxuabatsi, penajumajonejebijavanë toevetanucajë,” janë pepo petuxanenë Jesúsjavabelia. <sup>21</sup> Nexata pepo petuxanenë nejumaitsi: “Ponare baja Jerusalén tomaravecua. Caitorobijitsiatsi raja itsanacuanëpijivijavabelia, apo judíovijavabelia,” nejai pepo petuxanenë, jai Pablo judíovijavabelia.

*Pacuenia Pablo exanatsi vajabitsaë pepo pevetsinë comandante yabara pelivaisi*

<sup>22</sup> Judíovi namuxunaevetatsi Pablo penavajunupaebijava. Nexata itsa jumetane judíovi pacuenia Pablo navajunupaeba, nexata icatsia judíovi vavajai tsaponae pinijumeta. Jumai tsaponae:

—¡Maponëje pabeyaxuare! ¡Mara pitsinë apo becopatsitsi peponaponaenexa matavëjëaje! jai tsaponae judíovi Pablo yabara.

<sup>23</sup> Bajarapamonae pinijumeta vavajai tsaponae. Pijacamisajumavelia penaxatabijavanë, vebabia bitso pianaepanaexae. Atsabenonë cayajabajarabarena Pablojavaberena pebaraanaepanaexaetsi. <sup>24</sup> Nexata vajabitsaë pepo pevetsinë, comandante, pijajivi itoroba Pablo pecajonenexatsi vajabitsaë pijaboyalia. Comandante itoroba pijajivi Pablo

picani pejumatitibabenexatsi penaconitsivi pejumaconitabiabimacata. Bajarapacuenia picani Pablo exanaejitsiatsi Pablo petsipaebinexa vajabitsaëjavabelia xua yabara judíovi neconitsiaya pinijicuenia vavajai tsaponae Pablo yabara. <sup>25</sup> Nexata jane baja Pablo itsa cëtetatsi vajabitsaë picani pejumatitibabenexatsi, nexata Pablo jumaitsi bajarajota penucaenë vajabitsaë pijacapitánjavabelia:

—Xanë raja Romano nacuapijinënë. Nexata itsa panejumaconibabejitsipame abaxë copiaya neneconitsinejeva juezmonae pitabarata, nexata panevemaxënaneconitsipame. Tsipaji nijatuxanenë, Romanonacua pepo pevetsinë, pacaitaveta bajarapacuenia pane-xanaeyaniva, jai Pablo vajabitsaë pijacapitánjavabelia.

<sup>26</sup> Capitán itsa jumetane bajarapacuenia Pablo pejumaitsijava, nexata capitán lia vajabitsaë pepo pevetsinë comandantejavabelia. Capitán jumaitsi comandantejavabelia:

—Xania baja tsane pacuene exanaejitsiamë Pablojavabelia. ¡Maponëje Pablo Romano nacuapijinë baja cajena! jai capitán comandantejavabelia.

<sup>27</sup> Nexata comandante rena Pablojavaberena. Jumaitsi Pablojavabelia:

—¿Xaniajai tsabaja? ¿Xamë Romano nacuapijinëmë? jai comandante.

—Jãjã, jai Pablo.

<sup>28</sup> Nexata comandante jumaitsi Pablojavabelia:

—Xanë ata baja maparucæje Romano nacuapijinënë naexanajë. Tsipaji baja matamotajë ayaimatamota bepepo Romano nacuapijinënë tanaexanaenexa, jai comandante.

Bajarapacuenia jumaitsi tsipaji comandante saicayanacuata penaexanaenë.

Pablo nexata jumaitsi comandantejavabelia:

—Xanë apo matamotsinë. Tsipaji baja cajena pepo Romano nacuapijinënë. Naexanajë cajena Romano nacuata, jai Pablo comandantejavabelia.

<sup>29</sup> Nexata picani pavajabitsaë Pablo jumaconibabejitsiatsi, vecuaponatsi baja. Vajabitsaëvi pepo pevetsinë ata, comandante, Pablo cjunavatsi itsa yapëtanetsi Pablo Romano nacuapijinëcuene. Cjunavatsi pecëtsiaexanaexaetsi cadenamaëtonëta.

*Pacuenia Pablo navajunupaeba daxita judíovi pevetsivi pitabarata yabara pelivaisi*

<sup>30</sup> Pablo penavajunupaebicujinae Romano nacuapijinëcuene, meravia pitsijavata, vajabitsaë pepo pevetsinë, comandante, jamatabëyapëtane xaniavaetsia paneconi yabara judíovi neconitsijitsiatsi Pablo. Nexata comandante pijajivi itoroba Pablo pevecuaisinaenexatsi cadenamaëto. Nexata comandante junata sacerdotevi penamatacaitorobivi, judíovi pijaancianovi ata yajava, judíovi pecujarubivi ata yajava, penacaetuatsinexa. Nexata caponarenatsi Pablo, penutsinexatsi daxita penacaetuatsivi pitabarata.

## 23

<sup>1</sup> Pablo naëcota daxita penacaetuatsivi. Nexata Pablo jumaitsi bajarapamonaejavabelia:

—Tajamonae, xaniavaetsia cajena ponaponabiabajë najamatabëcuenebijianaenejevanë Dioso pitabarata mapamatacabijavaberena ataje, jai Pablo bajarapamonaejavabelia.

<sup>2</sup> Nexata Ananías, sacerdotevi pepo penamatacaitorobinë, jumaitsi Pablo pimoxoyotanubenaevitsijavabelia:

—Pacuibotsaquibiaxuabare Pablo, jai Ananías, sacerdotevi pepo penamatacaitorobinë.

<sup>3</sup> Nexata Pablo jumaitsi Ananíasjavabelia:

—¡Dioso rajane juya pepacuene xamë catsaquibiaxuabiana! Xamë majotaje ecame taneneconitsinexamë. Tsipaji xamë xanë yabara jamatabëcuenenavëxaniabiaya jamatabëjumaitsimë: “Maponëje Pablo naneconita Diosojavabelia,” jamatabëjamë. Nexata xamë nijacuata naneconitame nijagobiernojavabelia. Tsipaji itorobame mapamonaeje tanetsaquibiaxubinexa taaneconijibinë, jai Pablo Ananíasjavabelia.

<sup>4</sup> Bajarajota penubenaevi jumaitsi Pablojavabelia:

—Xamë raja jumeitavetame Dioso pijajivitonë, sacerdotevi pepo penamatacaitorobinë, jai bajarapamonae Pablojavabelia Ananías yabara.

<sup>5</sup> Nexata Pablo jumaitsi:

—Tajamonae, xanë apo yapëtaenë Ananías sacerdotevi pepo penamatacaitorobinëcuene. Itsa yapëtaejitsipajë, apo jumaitsinë tsipae bajarapacuenia. Tsipaji Dioso pejumelivaisibaxutota jumaitsi mapacueniaje: “Pëtsa jumeitavetame pecaevetsinë,” jai Dioso pejumelivaisibaxutota, jai Pablo Ananías yabara.

<sup>6</sup> Nexata Pablo jamatabëcueneyapëtane penacaetuatsivi. Tsipaji penacaetuatsivi caelivaisi apo xainae. Jamatabëcueneyapëtaneme itsamonae pecatsitecaejava saduceovi pecujarubicuene. Jamatabëcueneyapëtane itsamonae pijinia pecatsitecaejava fariseovi pecujarubicuene. Nexata Pablo pinijijumeta jumaitsi:

—Tajamonae, xanë raja fariseonënë. Fariseovi pecujarubicuene jumecovënëtajë. Taxapijinë baja cajena fariseonë. Tamojivimi ata cajena fariseovi. Majotaje neneconitsijitsia. Tsipaji jivi petëpaecujinae Dioso icatsia piasaëyaexanaejavanexa, jumecovënëtajë, jai Pablo.

<sup>7</sup> Bajarapamonae itsa jumetane bajarapacuenia Pablo pejumaitsijava, nexata najumeanaenota fariseovibeje saduceovibeje. Bajarapamonae nexata apo najamatabëcueneyëpae baja. Nexata anaeya bajarajota navecuanatsana baja. <sup>8</sup> Saduceovi jumeababiaba fariseovi pejumecovënëtsilivaisi. Nexata saduceovi jumai tsabiabi:

—Jivi petëpaecujinae, acuenebi icatsia Dioso piasaëyaexanaejava. Ajibi raja cajena ángelevi. Ajibi raja cajena petëpaevi ata pejumape, jai tsabiabi saduceovi.

Fariseovi jumecovënëta jivi petëpaecujinae Dioso icatsia piasaëyaexanaejavanexa. Jumecovënëtanua ángelevi ata pejinavanapaejava. Jumecovënëtanua petëpaevi ata pejumape pejinavanapaejava. <sup>9</sup> Apo penajamatabëcueneyëpaexae, daxita bajarapamonae bajarajota pinijijumeta vavajai tsaponae. Nexata pamona judíovi pecujarubivi, fariseoviyajuvënëvi, nonobapuna. Anaeya jumaitsi saduceovijavabelia:

—Itsacueneta cajena pibisiacueneta apo exanae maponë Pabloje. Xaniajai meta cajena. Petëpaevivi pejumape tsipaebatsi. Itsa jume, ángel meta tsipaebatsi. Paxanë nexata itsacueneta apo paexanaenë tsane Pablojavabelia Diosojavabelia patananecotsiyanima, jai fariseovi saduceovijavabelia.

<sup>10</sup> Nexata bajarapamonae pinijicuenia nabijataeya najumeanaenotapona. Nexata vajabitsaë pepo pevetsinë, comandante, belia jamatabëjumaitsi: “Pablo meta baja bajarapamonae beyaxuabianatsi,” jamatabëjai. Nexata comandante junata pijajivi peponaenexa. Pablo baja jutatsi bajarapamonaevetua. Comandante itoroba pijajivi Pablo pecaponaenexatsi vajabitsaë pijaboyabelia.

<sup>11</sup> Nexata bajarapameravi Jesús tsitanaitajëtatsi Pablo. Jesús nuca Pablo pemuxuneneta. Jumaitsi:

—Ajamatabëcuenesaëmëre nevajënaeyabelia. Pacuenia tsipaebame xanë talivaisi majotaje Jerusalén tomarata, bajara icatsia pacuenia tsipaebianame xanë talivaisi Roma tomarata ata, jai Jesús Pablojavabelia.

*Pacuenia picani Pablo judíovi jamatabëbeyaxuabatsi yabara pelivaisi*

<sup>12</sup> Pablo petsitanaitajëtsicujinaetsi Jesús, meravia pitsijavata, judíovi nacaetuata. Najamatabëcueneyanaba jane baja picani Pablo pebeyaxuabinexatsi. Nexata picani pebeyaxuabivajënaetsi, bajarapamonae najumecapanepaeya najumaitsi:

—Vaxaitsi apo xae tsanetsi itsacueneyavayo ata. Mera ata apo apa tsanetsi. Matapania baja Pablo beyaxuabianatsi, nabanianatsi. Mera ata apaenatsi, najai bajarapamonae.

<sup>13</sup> Pamona picani Pablo jamatabëbeyaxuabatsi, cuarenta ponëbeje pematatsënëa. <sup>14</sup> Bajaraxuacujinae bajarapamonae pona sacerdotevi penamatacaitorobivijavabelia. Pona judíovi pijaancianovijavabelia ata. Tsipaji bajarapamonae caejavata nacaetuatenä. Nexata pamona cuarenta ponëbeje, pamona picani Pablo jamatabëbeyaxuabatsi, jumaitsi sacerdotevi penamatacaitorobivijavabelia, judíovi pijaancianovijavabelia ata:

—Paxanë rajane baja najumecapanepaeya panajumaitsinë: “Vaxaitsi apo xae tsanetsi itsacuenejavayo ata. Matapania baja Pablo beyaxuabianatsi, nabanianatsi,” panajanë. <sup>15</sup> Nexata paxamë sacerdotevi panenamatacaitorobivi, paxamë ata judíovi papijaancianovimë, panacaetuatsianame judíovi pecujarubivi yajava panenabarëcuaicuai-jainexa. Nexata daxita paxamë patonajumeitorobianame cuyalatota vajabitsaë pepo pevetsinë, comandantejavabelia. Pavajëtsianame comandantejavabelia papecatocarenanexa Pablo. Pajumaitsimë tsane yamaxëitorobiaya comandantejavabelia: “Pajitsipajë icatsia matavëjëa patayanijobijava Pablo, pijaneconi patayapëtaenexa xaniavaetsia, paneconi xaina,” pajamë tsane. Nexata paxanë epatotalia pavajënaeevetsianajë Pablo. Itsa rena, patabeyaxuabinexa patsinejeva maberena, jai pamona cuarenta ponëbeje, pamona picani Pablo jamatabëbeyaxuabatsi.

Nexata sacerdotevi penamatacaitorobivi, judíovi pijaancianovi ata, jejai comandantejavabelia petonajumeitorobinexa Pablo pecarenanexatsi.

<sup>16</sup> Itsiata baitsi jane Pablo pematapijiva pexënato jumetane Pablo pevajënaeevetsi-apaebijavatsi pebeyaxuabinexatsi picani. Nexata bajaraponë pona vajabitsaë pijaboyabelia. Itsa baja bajaraponë joneya vajabitsaë pijaboyalia, bajarapalivaisi tsipaeba Pablojavabelia. <sup>17</sup> Nexata bajaraxuacujinae Pablo junata caenë vajabitsaë pijacapitán. Pablo jumaitsi:

—Barëponare mapapevëjëatoje papecanamatacaitorobinë, comandantejavabelia. Itsalivaisiyo xaina petsipaebinexa, jai Pablo.

<sup>18</sup> Nexata Pablo piopaxa capitán barëponatsi vajabitsaë pepo pevetsinë, comandantejavabelia. Nexata capitán jumaitsi comandantejavabelia:

—Naneconitsia raja peponaponaenë Pablo nejunata. Nexata nitoroba tabarëponaenexa mapapevëjëatoje xamëjavaberena. Tsipaji pina catsipaebijitsia itsalivaisiyo, jai capitán comandantejavabelia.

<sup>19</sup> Nexata comandante cobepitatsi pevëjëato. Barëliatsi pesaicaeyojavabelia. Comandante nexata jumaitsi pevëjëatojavabelia:

—¿Detsa pitsilivaisi xainame tanetsipaebinexamë? jai.

<sup>20</sup> Nexata pevëjëato jumaitsi:

—Sacerdotevi penamatacaitorobivibeje, judíovi pijaancianovibeje, najamatabëcueneyanaba pecavajëtsinexa meravia netocalianexa Pablo bajarapamonaejavabelia. Bajarapamona cayamaxëitorobiaya cajumaitsiapaebi: “Pajitsipajë icatsia matavëjëa patayanijobijava Pablo, pijaneconi patayapëtaenexa xaniavaetsia, paneconi xaina,” cajaiyapaebi bajarapamona. <sup>21</sup> Itsiata pëtsa jumecovënëtame bajarapamona. Tsipaji cuarenta ponëbeje pematatsënëa namatayabiaya epatota Pablo vajënaeevetsiapaebatsi pebeyaxuabinexatsi. Bajarapamona daxita najumecapanepaeya najumaitsi baja: “Apo xae tsanetsi itsacuenejavayo ata. Mera ata apo apae tsanetsi. Matapania baja Pablo beyaxuabianatsi, nabanianatsi. Mera ata apaenatsi,” najai baja capanepaeya bajarapamona. Aeconoxae saya bajarapamonaeveta Pablo necaliajava, jai pevëjëato comandantejavabelia.

<sup>22</sup> Nexata comandante jumaitsi pevëjëatojavabelia:

—Pëtsa tsipaebame itsajivi ata tanetsipaebilivaisimë, jai comandante.

Bajaraxuacujinae pevëjëato baja itorobatsi caevëalia.

### *Pacuenia Pablo itorobatsi nacuaevetsinë Félixjavabelia yabara pelivaisi*

<sup>23</sup> Vajabitsaë pepo pevetsinë, comandante, junata anijanëbeje, vajabitsaë pijacapitánbeje. Jumaitsi:

—Panaxaniavaetsiaexanarebeje vajabitsaë petaxuta peponaevinexa doscientos ponëmaxëto, setenta pijinia ponëbeje caballojumata peponaevinexa, doscientos pijinia ponëmaxëto becuerereboxanetonë, lanzavënëjavanë, pecaponaevinexa. Panaxaniavaere paneponaenexa Cesarea tomarabelia ajena, mapameravitaje, bejamatabëcuene a las

nuevejava. <sup>24</sup> Itsacaballobeje pijinia Pablo peyaponaenexa, patoxaniavaere. Xaniavaetsia evetsiaya pacaponaename Pablo nacuaevevtsinē Félixjavabelia, jai comandante capitánbejevavelia.

<sup>25</sup> Bajaraxuacujinae comandante tsicobeyaquina cuyalatobaxuto pitorobinexa nacuaevevtsinē Félixjavabelia. Comandante peyaquinaecuyalatobaxutota jumaitsi mapacueniaje:

<sup>26</sup> “Félix, pecayaiyataenē, nacua nevetsinē. Xanē raja Claudio Lisiasvënënē catoyaquinatsi. Cabajacobatsi. <sup>27</sup> Judíovi raja vaetabatsi ponē catoitorobaliatsi, Pablovënē. Beyaxuabijitsiatsi picani. Nexata itsa vënëlivaisitaniji Pablo Romano nacuapijinēcuene, sivalianē. Tajajivi vajabitsaē taneyavenonaecueneta yacajërëtajë judíovi pecobevecua, ajena baja picani beyaxuabijitsiatsi. Nexata caponaeyaexanajë tajajivi vajabitsaē pijaboyabelia. <sup>28</sup> Bajaraxuacujinae sacerdotevi penamatacaitorobivi pitabarata, judíovi pijaancianovi ata pitabarata, judíovi pecujarubivi ata pitabarata, nutsiaexanajë. Bajarapacuenia nutsiaexanajë bajarapamonae pitabarata tayapëtaenexa jane baja picani paneconi yabara Pablo judíovi neconitsijitsiatsi. <sup>29</sup> Itsiata baitsi jane Pablo itsacueneneconi ata apo xinae, paneconi yabara beyaxuabijitsiatsi, paneconi yabara ata etsijitsiatsi penaneconitsivi pejebabiabibota. Judíovi saya Pablo neconitsijitsiatsi judíovi pijasalinaivi pijacuene yabara. <sup>30</sup> Nexata itsajivi netsipaeba judíovi namutoepatota Pablo pevajënaeevensiapaebijavatsi pebeyaxuabinexatsi. Bajaraxuata nexata najamatabëxainajë Pablo tacatoitorobinexa xamëjavabelia. Nexata pajudíovi Pablo neconitsijitsiatsi, itorobajë peneconitsinexatsi xamë nitabarata. Bajara masaya daxitajumeyoje,” jai mapacueniaje comandante petoyaquinaebaxutota nacuaevevtsinē Félixjavabelia.

<sup>31</sup> Nexata vajabitsaē exana baja pacuenia itorobatsi comandante. Bajarapameravi vajabitsaē baja Pablo caponaliatsi Antípatris tomarabelia. <sup>32</sup> Nexata meravia pitsijavata bajarapavajabitsaëyajuvënëvi, petaxuta peponaevi, Antípatris tomarata naviabarena baja pijaboyabarena. Pamonae caballojumata peponaevi, pevajënaeyabelia abaxë caponaliatsi Pablo. <sup>33</sup> Caponaliatsi Cesarea tomarabelia. Nexata Cesarea tomaratalia vajabitsaē rajuta petocaponaecuyalatobaxuto nacuaevevtsinē Félixjavabelia. Yajavarajutanua Pablo bajaraponë pecobeyabelia. <sup>34</sup> Nexata nacuaevevtsinē Félix leba baja petocapatsicuyalatobaxutotsi. Bajaraxuacujinae nacuaevevtsinē Félix jumaitsi Pablojavabelia:

—¿Detsa panacuapijinëmë? jai.

Nexata Pablo jumaitsi:

—Xanē raja Cilicia nacuapijinënē, jai.

Nexata yapëtanetsi Pablo Cilicia nacuapijinēcuene. <sup>35</sup> Nexata icatsia nacuaevevtsinē Félix jumaitsi Pablojavabelia:

—Cajumetaenatsi abaxë itsa parena judíovi pecaneconitsivinexa, jai nacuaevevtsinē Félix.

Bajaraxuacujinae nacuaevevtsinē Félix itoroba pijajivi xaniavaetsia pevetsinexatsi Pablo. Nexata Pablo evetatsi Herodespijinē pexanaeyaexanaebota.

## 24

### *Pacuenia Pablo navajunupaeba nacuaevevtsinē Félix pitabarata yabara pelivaisi*

<sup>1</sup> Pablo Cesarea tomarata penaneconitsiaexanaecujinaetsi, cinco pamatacabibejecujinae, Ananías, sacerdotevi pepo penamatacaitorobinē, parena Cesarea tomarabarena. Parena judíovi pijaancianovi yajava, Tértulovënënē yajava. Tértulo abogadonē, jivi peneconitsicuepeyapëtaenē. Bajaraxuata judíovi junata bajaraponë petocuaicuaijainexatsi nacuaevevtsinē Félixjavabelia. Nexata judíovi, Tértulo yajava, nubena nacuaevevtsinē Félix pitabarata peneconitsinexatsi jane baja Pablo. <sup>2</sup> Itsa caparenatsi Pablo, nexata Tértulo taxuxuaba peneconitsijavatsi Pablo. Tértulo jumaitsi nacuaevevtsinē Félixjavabelia mapacueniaje:

—Pecayaiyataenē nacua nevetšinē. Xaniavaetsia nevetsixae mapanacuaje, bajayajebi xaniavaetsia pajinavanapajē. Xamē nejamatabēcueneta daxita mapanacuapijicuene, xua abeje picani, xanebiaexanaponame pevājēnaeyabelia. <sup>3</sup> Nexata pabarēyanē patane-toexanaejavamē yabara daxita mapanacuajavaje. Bajaraxuata pexaniajamatabēcuenepacarajutatsi. <sup>4</sup> Caepatoyo saya pacajamatabēitonotatsi. Pexaniacuene panetoexanare. Panenamuxunaevere caejumeyobeje. <sup>5</sup> Payapētaniji baja cajena maponēje Pablo bitso piacujirubejenēcuenē. Daxitanacuanējawa, itsaxuayo judíovi jinavanapa, itorobapona pianaepanaenexa judíovi penavecyanatsanaenexa. Mara ponēje Nazaret tomarapijinēmi petsipaebilivaisi pejumecovēnētsivi, penamatacaitorobinēje. <sup>6</sup> Mara ponēje Dioso pijatemplobo Jerusalén tomaratalia jamatabēbijiana picani. Tsipaji apo judíovi barējoneya temploboēnēalia. Bajaraxuata pavaetabajē. Nexata pacuenia paneitoropa pajudíovinē patajalivaisi, jamatabēpabeyaxuabajē picani penaneconitsixae. <sup>7</sup> Itsiata baitsi jane itacarajeta vajabitsaē pepo pevetsinē, comandante Lisias, barēpata pijajivi. Pinijsaēta paneyacajērēta Pablo. Nexata comandante Lisias panejumaitsi: “Pajivi jamatabēneconita Pablo, ponae nacuaevetsinē Félixjavabelia bajaraponē pitabarata peneconitsinexa,” panejai. <sup>8</sup> Nexata itsa yanijobianame maponēje Pablo, yapētaename baja daxita pacuenia xaniavaetsia pacatsipaebatsi Pablo pexanaejawa yabara, jai Tértulo mapacueniaje nacuaevetsinē Félixjavabelia.

<sup>9</sup> Judíovi bajarajota Tértulo pemuxuneneta penubenaevi ata neconitatsi Pablo. Bajarapajudíovi jumaitsi nacuaevetsinē Félixjavabelia:

—Xaniajai rabaja Tértulo. Daxita pacuenia Tértulo cajumaitsi, bajarapacuenia exana Pablo, jai judíovi nacuaevetsinējavabelia.

<sup>10</sup> Nacuaevetsinē Félix nacobeyota juya Pablo pitorobinexatsi Pablo jane baja penavajunupaebinexa nacuaevetsinē Félix pitabarata. Nexata Pablo jumaitsi nacuaevetsinē Félixjavabelia:

—Yapētaniji baja cajena xamē bajayajebi mapanacuapijivi nenaneconitsiaexanabibijawa. Bajaraxuata barēyanē tacatsipaebinexa xua exanajē. <sup>11</sup> Nexata taxaniajaijumeta catsipaebianatsi. Itsa yanijobijitsipame itsamonaejavabelia ata, nexata catsipaebijitsipa pacuenia aeconoxae catsipaebianatsi. Ajena raja abaxē saya xainajē doce pamatacabibeje tapatsicujinae Jerusalén tomarata. Patajē najamatabēcuenecopatsiaya tanavajētsinexa Diosojavabelia templobota. <sup>12</sup> Bajarapatemplobota judíovi apo netae tabarēcuaijaijawa itsajivi ata. Apo netaenua judíovi penacaetuatabibibonējawa jivi taitorobijawa pianaepanaenexa. Apo netaenua tomanējawa ata taitorobijawa jivi pianaepanaenexa. <sup>13</sup> Nexata acuenebi itsajivi ata pejumaitsijawa xanē yabara: “Xanē raja pepacuene taniji xua Pablo exana,” pejajawa. Tsipaji itsajivi ata apo netae pibisiacuene taexanaejawa. <sup>14</sup> Nexata pacuene yabara catsipaebijitsiatsi, xaniajanē cajena. Patajasalinaivi pijaDioso jumecovēnētsiaponaponajē. Tonacuenebaponaponajē. Pejanajamatabēcueneta Dioso jumecovēnētsiaponaponajē. Baitsi pexanialivaisi, Jesucristo pelivaisi, jumecovēnētsiaponaponajē. Bajara palivaisi yabara judíovi jumaitsi tsabiabi: “Apo pexaniajailivaisi cajena bajarapalivaisi. Dioso baja cajena apo nacatocopatsi vajajumecovēnētsinexa bajarapalivaisi,” jai tsabiabi judíovi. Itsiata Jesucristo taneitorobicuenia jumecovēnētsi atanē, Dioso Moiséspijinēta penajumecopatsilivaisi yajawa jumecovēnētaaponaponajē. Bajayata Diosojumepaebivi profetavi peyaquinaelivaisianē ata jumecovēnētajē. <sup>15</sup> Mapajudíovi nubenaje, jumecovēnēta mapacuenia pejumaitsilivaisije: “Dioso icatsia asaēyaexanaena petēpaevimi,” pejailivaisi. Xanē ata bajarapalivaisi jumecovēnētajē. Baitsi daxita pamonaē tēpa, pexaniajamatabēcuenevimi, pibisijamatabēcuenevimi ata, itsamatacabi icatsia Dioso asaēyaexanaena. <sup>16</sup> Bajaraxuata bitso jitsipajē xaniavaetsia taponaponaejawa tanajamatabēcuenebijianaeyaniva Dioso pitabarata, tanajamatabēcuenebijianaeyaniva daxitajivi ata pitabarata, jai Pablo nacuaevetsinē Félixjavabelia.

<sup>17</sup> Icatsia Pablo jumaitsi nacuaevetsinē Félixjavabelia:

—Caevaimaxëto baja cajena ajibinë tsarucae Jerusalén tomaravecua Dioso pitorobilivaisi jivi tatsipaebineixa daxitanacuanëjjava. Bajaraxuacujinae icatsia naviatajë Jerusalén tomarabelia. Tocapaliajë ofrenda tarajutsinexa bepejiobivi. Patajë picani templobota ofrenda tarajutsinexa Diosojavabelia. <sup>18</sup> Itsa baja veretajë templobota tanajamatabëcuenexaniavaetsijava Diosojavabelia tajamatabëcuenesaënexa, tarajutsinexa picani bajarapaofrenda Diosojavabelia, nexata bajarapaepatota judíovi, Asiavënë nacuapijivi, necaxitajaraba templobota. Nexata nevaetaba tanenaneconitsiaexanaenexa. Itsa necaxitajaraba templobota, apo yajavanucaenë ayaibitsaëto. Daxita templobopijivi yãijai. Templobopijivi ajumejibia jinavanapa. <sup>19</sup> Bajara baitsi jane pamonaë judíovi, Asiavënë nacuapijivi, tanetaevi templobota, bepatsirena maberenaë taneneconitsinexa jane baja itsa necuenetane pibisiacuene taexanaejava. <sup>20</sup> Itsa jume, nexata mapamonaëje, nitabarata penubenaëvi, vecae taitabëta catsipaëbi, itsa netane pibisiacuene taexanaejava pamatacabi nucajë sacerdotevi penamatacaitorobivi pitabarata, judíovi pijaancianovi ata pitabarata, judíovi pecujarubivi ata pitabarata. <sup>21</sup> Saya meta caelivaisiyo bajarapamonaë catsipaëbiana xanë talivaisi. Tsipaji pamatacabi nucajë judíovi pijaancianovi pitabarata, ayaijumeta jumaitsinë: “Mapamatacabitaje neneconitsiana. Tsipaji jivi petëpaecujinae Dioso icatsia piasaëyaexanaejavanexa, jumecovënëtajë,” janë. Nexata meta bajarapacuenia tajumaitsiyava yabara bajarapamonaë jamatabëneneconita xamëjavabelia, jai Pablo nacuaevetsinë Félixjavabelia.

<sup>22</sup> Nacuaevetsinë Félix xaniavaetsia yapëtane daxitanacuanëjjava jivi pejumecovënëtaponaejava Jesucristo pelivaisi. Nexata nacuaevetsinë Félix pejumetaecujinae Pablo petsipaëbilivaisi, nacuaevetsinë Félix naviabiaexana baja pamonaë picani Pablo neconitsijitsiatsi. Nexata nacuaevetsinë Félix jumaitsi Tértulobanajavabelia, Jerusalén tomaraverena pepatsivijavabelia:

—Itsa patsiarena vajabitsaë pepo pevetsinë, comandante Lisias, yapëtaenajë pacuenia exanaejitsianë Pablojavabelia, jai.

<sup>23</sup> Nexata nacuaevetsinë Félix jumaitsi vajabitsaë pijacapitánjavabelia:

—Pablo barëevetsianame xaniavaetsia penajetabajiraviyaniva. Itsiata tocopatsianame peponaponaenexa bajarajota pacëtsinejevamë. Tocopatsianamenua peyapëtaevitsi pesivaxainaenexatsi perajutsinexatsinua penamatavenonaëjavaxi, jai nacuaevetsinë Félix vajabitsaë pijacapitánjavabelia.

<sup>24</sup> Bajaraxuacujinae, caematacabibejecujinae, nacuaevetsinë Félix icatsia pata pijava yajava, Drusilavënëva. Drusila judíova. Nexata nacuaevetsinë Félix itoroba pijajivitonë petojunatsinexatsi Pablo. Nexata Pablo itsa pata, Pablo livaisi tsipaëba nacuaevetsinë Félixjavabelia. Pablo tsipaëba jivi penajamatabëcuenecopabaponaëjava Jesucristojavabelia. <sup>25</sup> Pablo tsipaëbanua Dioso pitorobijava jivi pejinavanapaenexa pibisiacuene exanaenejeva Dioso pitabarata. Pablo tsipaëbanua jivi xaniavaetsia penaevetsijavanexa pevitota pibisiacuene pexanaeyaniva. Pablo tsipaëbanua itsamatacabi Dioso penaneconitsiaexanaejavanexa pibisiacuene pexanaëvi. Nexata nacuaevetsinë Félix itsa jumetane bajarapacuenia Pablo petsipaëbilivaisi, najunaviaca. Nexata bajarajota nacuaevetsinë Félix jumaitsi Pablojavabelia:

—Pitsapare baja abaxë. Icatsia cajunatsianatsi itsajota cuenesajinajë, jai nacuaevetsinë Félix.

<sup>26</sup> Nacuaevetsinë Félix jamatabëjumaitsi Pablo yabara:

—Pablo meta nerajutsiana palata tacopatsinexa penaneconitsijavavecua, jamatabëjai. Bajaraxuata Félix anijatonë pijajivi itorobabiaba Pablo petojunatsinexatsi pebarëcuaicuajainexatsi. <sup>27</sup> Anijavaiabeje bajarapacuenia Félix pijajivi itorobabiaba Pablo petojunatabiabinexatsi. Belia baja Félix vecuapitsapa nacua pevetsicuene. Nexata juya itsanë, Porcio Festovënëne, tocopatatsi bajarapanacua pevetsinexa. Félix baja pitsapae ata, itsiata Félix pejamatabëcueneta Pablo apo tocopatsitsi pepitsapaenexa penaneconitsijavavecua. Bajarapacuenia Félix exana judíovi pesivajamatabëcuene barëyanexatsi.

## 25

*Pacuenia Pablo navajunupaeba pejananacuaevetsinē Festo pitabarata yabara pelivaisi*

<sup>1</sup> Festo patajopa Cesarea tomarata pexanaenexatsi nacuaevetsinēnexa. Pepatsicujinae, acueyabi pamatacabibejecujinae, Festo baja pona Cesarea tomaravecu. Pona Jerusalén tomarabelia. <sup>2</sup> Nexata Jerusalén tomaratalia sacerdotevi penamatacaitorobivi Pablo neconitatsi pepēya nacuaevetsinē Festojavabelia. Neconitatsinua judíovi ata, pamonae petuxanevi. <sup>3</sup> Bajarapamonae pinijicuenia vajēta nacuaevetsinē Festojavabelia petocapatsinexatsirena Pablo Jerusalén tomaraberena. Bajarapacuenia vajēta tsipaji baja cajena bajarapamonae najamatabēcuenevereta picani Pablo pebeyaxuabi-aexanaenexatsi namutoepatota. <sup>4</sup> Nexata nacuaevetsinē Festo jumaitsi bajarapamonaejavabelia:

—Pablo raja naneconitsia ponapona Cesarea tomarata. Xanē raja caematacabibejecujinae ponaejitsianē Cesarea tomarabelia. <sup>5</sup> Pablo pibisiacuene itsa exana, nexata papecanamatacaitorobivi tapēta naponaeana Cesarea tomarabelia peneconitsinexa Pablo, jai nacuaevetsinē Festo bajarapamonaejavabelia.

<sup>6</sup> Bajarapacuenia nacuaevetsinē Festo pejumaitsicujinae, nacuaevetsinē Festo abaxē ponapona Jerusalén tomarata ocho pamatacabibeje. Itsa jume, diez meta pamatacabibeje. Bajaraxuacujinae pona jane baja Cesarea tomarabelia. Nexata meravia pitsijavata nacuaevetsinē Festo eca itsajota nacuaevetsinē ecabiaba jivi penaneconitsiaexanaenexa. Nexata pijajivi itoroba petocapatsinexatsi Pablo. <sup>7</sup> Pablo itsa joneya, nexata judíovi, Jerusalén tomaraverena pepatsivi, matatoyorotsia imoxoyotatsi Pablo. Najumetsēnētsiaya neconitatsi beayaineconi pexainaenēcuenia. Itsiata baitsi jane xua yabara picani Pablo neconitatsi picani, bajarapamonae apo jumenamatamotsi peneconitsijavatsi. <sup>8</sup> Nexata Pablo nayajivijumaitsi peneconitsiyanivatsi:

—Itsacuene ata pibisiacuene apo exanaenē. Nexata xanē judíovi pitorobilivaisijavabelia, templojavabelia ata, Romanonacua pepo pevetsinējavabelia ata, apo naneconitsinē, jai Pablo nacuaevetsinē Festojavabelia.

<sup>9</sup> Nexata nacuaevetsinē Festo yanijoba Pablojavabelia judíovi pejamatabēcuenebarēyanexa nacuaevetsinē Festojavabelia. Nacuaevetsinē Festo Pablojavabelia jumaitsi mapacueniaje:

—¿Jitsipame tsaja neponaejava Jerusalén tomarabelia bajarajotalia pecaneconitsinexa taitabarata mapacuene yabaraje? jai nacuaevetsinē Festo Pablojavabelia.

<sup>10</sup> Pablo nexata jumaitsi:

—Nucajē rabaja majotaje xamē nitabarata. Tsipaji nijatuxanenē, Romanonacua pepo pevetsinē, itoroba majotaje peneconitsinexatsi pibisiacuene pexanaevi. Bajaraxuata apo beneitorobimē itsajavabelia taneneconitsinexamē. Itsacuene ata pibisiacuene apo exanaenē judíovijavabelia. Bajarapacuenia xamē xaniavaetsia yapētaneme baja cajena. <sup>11</sup> Itsa pepacuene naneconitsipajē, nexata itsa nebeyaxuabijitsia tajaneconi yabara, nexata apo najamatabēxainaenē tsipae tavecuapanepaenexa tatēpaejava. Itsiata baitsi jane pacuenia mapamonae neneconitsiajumaitsi, apo xaniajai cajena. Nexata acuenebi itsajivi ata tanecanajetsijava mapamonae pecobeyabeliaje saya aneconijibia tanebeyaxuabinexa. Nexata jane baja xanē cavajētatsi taneitorobinexamē nijatuxanenējavabelia, Romanonacua pepo pevetsinējavabelia, bajaraponē pitabarata taneneconitsinexa, jai Pablo nacuaevetsinē Festojavabelia.

<sup>12</sup> Nexata nacuaevetsinē Festo barēcuaicuajai pijajivi, pejamatabēcueneavenonaeivitsi. Bajaraxuacujinae nacuaevetsinē Festo jumaitsi Pablojavabelia:

—Xamē nevajētame tacaitorobinexa tajatuxanenējavabelia, Romanonacua pepo pevetsinējavabelia, bajaraponē pitabarata pecaneconitsinexa pibisiacuene itsa exaname. Nexata bajaraponējavabelia ponaename, jai nacuaevetsinē Festo Pablojavabelia.

*Pacuenia Pablo navajunupaeba nacuaevetsinē Agripajavabelia yabara pelivaisi*

<sup>13</sup> Pablo pevajëtsicujinae nacuaevetsinë Festojavabelia pitorobinexatsi Romanonacua pepo pevetsinëjavabelia, caematacabibejecujinae, nacuaevetsinë Agripa, pijava Berenicevënëva yajava, parena Cesarea tomaraberena. Parenabeje pebajacobinexabeje nacuaevetsinë Festo pejanapatsinëxae nacua pevetsinënexa. <sup>14</sup> Agripabeje Berenicebeje caematacabibeje ponaponabeje Cesarea tomarata. Nexata nacuaevetsinë Festo tsipaeba nacuaevetsinë Agripajavabelia Pablo yabara. Nacuaevetsinë Festo jumaitsi:

—Majotaje xainajë pebi naneconitsia peponaponae. Félix abaxë mapanacua itsa evetaje, bajaraponë naneconitsiaexanatsi. <sup>15</sup> Nexata itsa ponajë Jerusalén tomarabelia, sacerdotevi penamatacaitorobivi, judíovi pijaancianovinua, neconitatsi Pablo xanëjavaberena. Bajarapamonaevajëta tananeconitsiaexanaenexa Pablo pebeyaxuabinexatsi. <sup>16</sup> Nexata xanë jumaitsinë bajarapamonaevajavabelia: “Romanonacua raja pepo pevetsinë pejamatabëcueneta apo pacopatsinë itsajivi ata pebeyaxuabinexatsi abaxë xaniavaetsia payapëtaenejevanë paneconi xaina. Itsajivi pibisiacuene itsa exana, nexata namatavenona pecuenetaevitsi pitabarata copiaya peneconitsinexatsi. Nexata pajivi naneconita, bajarajota xanepana penayajivicuaicuaijainexa paneconi yabara neconitatsi,” janë bajarapamonaevajavabelia, jai nacuaevetsinë Festo nacuaevetsinë Agripajavabelia.

<sup>17</sup> Icatsia nacuaevetsinë Festo jumaitsi nacuaevetsinë Agripajavabelia:

—Nexata bajarapajudíovi maberena pepatsicujinaeje, meravia pitsijavata, copiaya joneyajë taecaenexa itsajota ecabiabajë jivi itsa naneconitsiaexanaejitsianë. Nexata itorobajë tajajivi tanetocapatsinexa Pablo xanëjavaberena. Tsipaji jamatabëjumaitsinë: “Pablo meta pibisiacuene pexanaexae, neconitatsi,” jamatabëjanë. <sup>18</sup> Itsiata baitsi jane Pablo itsa pata, peneconitsivitsi apo neconitsi pibisiacuene pexanaejava yabara pacuenia picani najamatabëxainajë. <sup>19</sup> Saya judíovi jumeanaenotatsi Pablo Dioso pejumeconvënëtsijava yabara. Jumeanaenotatsinua Pablo petsipaebijava Jesús petëpaejava yabara ata. Jesús yabara Pablo jumaitsi: “Jesús raja apo tēpae. Petëpaeujinae baja icatsia Dioso asaëyaexanatsi,” jai Pablo bajarapajudíovijavabelia. <sup>20</sup> Nexata xaniavaetsia apo yapëtaenë pacuenia exanaejitsianë bajarapacuene yabara. Nexata jumaitsinë Pablojavabelia: “Jitsipame tsaja neponaejava Jerusalén tomarabelia, bajarajotalia icatsia pecaneconitsinexa pamonaevajavabelia,” janë picani. <sup>21</sup> Itsiata baitsi jane Pablo nevajëta taitorobinexa picani vajatuxanenëbejevavabelia, Romanonacua pepo pevetsinëjavabelia, bajaraponë pitabarata peneconitsinexatsi, pibisiacuene itsa exana Pablo. Itsiata abaxë xanë mapatomarataje Pablo naneconitsiaya ponaponaejaxanajë. Nexata pamatacabi necuenecaëjēpaena, itorobianajë vajatuxanenëbejevavabelia, jai nacuaevetsinë Festo nacuaevetsinë Agripajavabelia.

<sup>22</sup> Nexata nacuaevetsinë Agripa jumaitsi nacuaevetsinë Festojavabelia:

—Xanë ata jitsipajë tajumetaejava Pablo penavajunupaebijava, jai nacuaevetsinë Agripa.

Nexata nacuaevetsinë Festo jumaitsi nacuaevetsinë Agripajavabelia:

—Meravia rabaja jumetaename Pablo penavajunupaebijava, jai nacuaevetsinë Festo.

<sup>23</sup> Nexata meravia pitsijavata nacuaevetsinë Agripa pijava Berenicebeje bitso naitabëtabeje. Nexata naponabeje jivi penacaetuatabiboxanetojavabelia. Pëyanatatsibeje vajabitsaë pepo pevetsivi. Pëyanatatsibeje Cesarea tomarapijipetuxanevi ata. Penacaetuatsiboxanetojavalia barëjoneyabeje. Nexata nacuaevetsinë Festo pijajivi itoroba petocaponaejaxatsirena Pablo. <sup>24</sup> Nexata nacuaevetsinë Festo jumaitsi nacuaevetsinë Agripajavabelia, itsamonaevajavabelia ata:

—Agripa, nacua nevetsinë, daxita paxamë ata majotaje vajanajuanacaetuatsivi. Pataneme rabaja mapapebi nuca paneitabarataje. Ayaibitsaëto judíovi, Jerusalén tomarapijivi, bajaraponë neconitatsi xanëjavaberena Jerusalén tomaratalia. Bajara icatsia pamonaevajavabelia tapëta naponarena Cesarea tomaraberena. Bajara icatsia pacuenia neconitatsi xanëjavaberena. Bajarapamonaevajavabelia vavajaiya nejumai tsabiabi: “Pajitsipajë Pablo pebeyaxuabinexatsi,” nejai tsabiabi. <sup>25</sup> Itsiata baitsi jane xanë apo yapëtaenë paneconi

yabara beyaxuabijitsiatsi. Maponë nevajëta picani taitorobinexa tajatuxanenëjavabelia, Romanonacua pepo pevetsinëjavabelia, bajaraponë pitabarata peneconitsinexatsi ita pibisiacuene exana. Bajaraxuata itorobijitsianë Romanonacua pepo pevetsinëjavabelia. <sup>26</sup> Itsiata baitsi jane apo yapëtaenë pacuene yabara toyaquinaejitsianë cuyalatobaxutota tajatuxanenëjavabelia. Bajaraxuata xamë Agripa, nacua nevetsinë, mapamonae ataje, daxita paxamë paneitabarata Pablo penucaenexa pacatocapatatsi maberenaje. Pacatocapatatsi paneyanijobinexa paneconi yabara naneconita. Nexata meta paneyanijobicujinae xanë yapëtaenajë paneconi yabara naneconita. Nexata bajarajota yapëtaenajë tajatuxanenëjavabelia tatoyaquinaenexa cuyalatobaxutota paneconi yabara judíovi Pablo neconitsijitsiatsi tajatuxanenëjavabelia. <sup>27</sup> Tsipaji acuenebi taitorobijava maponëje Pablo tajatuxanenëjavabelia toyaquinaenejevanë cuyalato xaniavaetsia peyapëtaenexa paneconi yabara judíovi neconitsijitsiatsi, jai nacuaevetsinë Festo nacuaevetsinë Agripajavabelia.

## 26

### *Pacuenia Pablo navajunupaeba nacuaevetsinë Agripa pitabarata yabara pelivaisi*

<sup>1</sup> Nacuaevetsinë Agripa jumaitsi Pablojavabelia:

—Catocopatatsi rabaja nenvajunupaebinexa paneconi yabara judíovi caneconita, jai nacuaevetsinë Agripa Pablojavabelia.

Nexata Pablo yayataeya bajacoba nacuaevetsinë Agripa. Nexata Pablo jumaitsi nacuaevetsinë Agripajavabelia mapacueniaje:

<sup>2</sup> —Barëyanë. Tsipaji ajena pamatacabi netocopatame nitabarata tanavajunupaebinexa daxita paneconi yabara judíovi neneconitsijitsia. <sup>3</sup> Aeconoxaeta bitso barëyanë. Tsipaji yapëtaneme xaniavaetsia daxita palivaisi paxainajë pajudíovinë. Yapëtanemenua pajamatabëcuenelivaisi yabara panajumeanaenotabiabajë. Nexata cavajëtatsi ajamatabëcuenesaëya bajayaepato xaniavaetsia tanenamuxunaevetecaenexamë, jai Pablo nacuaevetsinë Agripajavabelia.

### *Pacuenia Pablo navajunupaeba pacuenia ponapona pamatacabi abaxë apo jumecovënëtsi Jesucristo yabara pelivaisi*

<sup>4</sup> Pablo icatsia jumaitsi nacuaevetsinë Agripajavabelia:

—Daxita judíovi baja cajena neyapëtane pacuenia copiaya ponaponajë bajarapamonaejavata. Bajarapamonae neyapëtane pacuenia ponaponajë patajanacuata tsiquirinëyojavaveliacujinaenë. Neyapëtanenua pacuenia ponaponajë Jerusalén tomarata ata. <sup>5</sup> Judíoviyajuvënëvi itsamonae naexana fariseovi. Nexata bajarapamonae Dioso Moiséspijinëta penajumecopatsilivaisi, bitso jumecovënëtsiajinavanapa itsajudíovivecua. Nexata ita yanijobijitsipame, daxita judíovi catsipaebijitsipa pacuenia picani pejevaxinëjavaveliacujinaenë catsitecaponaponajë fariseovi pecujarubicuene. <sup>6</sup> Bajarapamonae neneconitsijitsia tsipaji baja xanë jumecovënëtajë petëpaevimi itsamatacabi Dioso icatsia piasaëyaexanaejavanexa. Tsipaji baja cajena bajarapacuenia Dioso najumecapanepaeya jumaitsi patajasalinaivimijavabelia. Nexata bajarapalivaisi jumecovënëtajë. <sup>7</sup> Daxita raja paxanë, Israelpijinëmi pexi doce ponëmibeje papemomoxinë. Pacopiaevetavanapajë Dioso icatsia piasaëyaexanaejavanexa petëpaevimi pacuenia baja cajena tajëvelia Dioso najumecapanepaeya jumaitsi patajasalinaivimijavabelia. Bajaraxuata najamatabëcuenecopatsiaya pavajëtabiabajë Diosojavabelia. Patonacuenebavanapajënuca caematacabi canacujitsia, meravi yajava. Agripa, nacua nevetsinë, abaxë nenamuxunaevere. Dioso icatsia petëpaevimi piasaëyaexanaejavanexa, copiaevetaponaponajë. Bajaraxuata judíovi neneconitsijitsia. <sup>8</sup> Pëtsa pajamatabëjumaitsimë Dioso yabara: “Dioso raja apo caëjëpaetsi petëpaevi icatsia piasaëyaexanaenexa,” pajamatabëjamë pëtsa, jai Pablo bajarapamonaejavabelia.

### *Pacuenia Pablo navajunupaeba petaicaponaejava Jesús pejumecovënëtsivi pejebinexa penaneconitsivi pejebabiabibota yabara pelivaisi*

<sup>9</sup> Pablo icatsia jumaitsi nacuaevetsinē Agripajavabelia:

—Xanē abaxē Jesús itsa apo jumecovēnētsinē, jamatabējumaitsinē tsabiabi: “Xanē bejiobiaexanaenajē daxita pamonae jumecovēnēta Jesús, Nazaret tomarapijinē, pelivaisi,” jamatabējanē tsabiabi. <sup>10</sup> Nexata bajarapacuenia exanajē Jerusalén tomarata. Sacerdotevi penamatacaitorobivi taneitorobixae, ayaibitsaēto Jesús pelivaisi pejumecovēnētsivi jebaponajē penaneconitsivi pejebabiabibota. Itsa bajarapamonae naneconitsiaexanatsi, itsa beyejebatsinua, netsitaxanepana bajarapacuenia pebeyejebijavatsi. <sup>11</sup> Pamonae Jesús pelivaisi jumecovēnēta, anijatonē jumaconibabeyaexanabiabajē judíovi penacaetuatabiabibonējava. Bajarapacuenia picani exanaponajē bajarapamonae pecopabinexa Jesús pelivaisi pejumecovēnētsijava. Xanē picani cueneitoyanē bajarapamonae. Nexata itsanacuajava penaetomaranējava ata, jaitarutajē Jesús pelivaisi pejumecovēnētsivi tataicaenexa tajebinxexa penaneconitsivi pejebabiabibota, jai Pablo nacuaevetsinē Agripajavabelia.

*Pacuenia icatsia Pablo navajunupaeba pacuenia Jesús pelivaisi jumecovēnēta yabara pelivaisi (Hch 9.1-19; 22.6-16)*

<sup>12</sup> Pablo icatsia jumaitsi nacuaevetsinē Agripajavabelia:

—Bajara picani icatsia pacuenia tataicaenexa Damasco tomarata Jesús pelivaisi pejumecovēnētsivi, ponajē picani Damasco tomarabelia. Nitoroba sacerdotevi penamatacaitorobivi. Bajarapamonae pejamatabēcueneta nitoroba tataicaenexa picani Jesús pelivaisi pejumecovēnētsivi tajebinxexa penaneconitsivi pejebabiabibota. <sup>13</sup> Agripa, nacua nevetsinē, abaxē nenamuxunaevere. Nexata jane baja ponajē Damasco tomarabelia. Nexata tanajetarucaejavata namutua, taniji matonejeepatota athēbēvetsica pinijicotia tanematatoyorotsianaitayotsijava. Naitayota matabicapijijumetocotia matatoxenetsia. Daxita tayajavaponaevi tayajavanajetarucaejavata, panematatoyorotsia naitayota. <sup>14</sup> Nexata daxita paxanē irata pabobenajunuajē. Bajarajota irata jumetaenucajē hebreojumeta athēbēvetsica tanejumaitsi: “Saulo, Saulo, ¿detsa xuajitsia tajajivi netobejiobiaexanaponame? Xamē nijacuata najamatabēcuenebijianaponame,” tanejajava, jumetaenucajē irata. <sup>15</sup> Nexata xanē jumaitsinē: “Tajatuxanenē, ¿detsa ponēmē?” janē. Nexata icatsia nejumaitsi: “Xanē raja Jesúsne. Xanē raja tajajivi netobejiobiaexanaponame. <sup>16</sup> Nonotabapunare. Catsitanaitajētatsi raja tacaitapetsinexa tajajivitonēnexamē. Xamē nexata tsipaebianame itsajivijavabelia pacuenia aeconoxae netaneme. Tsipaebianamenua pacuenia icatsia catsitanaitajētatsianatsi bexēa itsamatabijavabelia. <sup>17</sup> Cacapanepaenatsi raja judíovi pecobevecua pecaitsacueniabiyaniva. Caitorobianatsi apo judíovi pijanacuanējavabelia. Apo judíovi ata pecobevecua cacapanepaenatsi pecaitsacueniabiyaniva. <sup>18</sup> Caitorobatsi rabaja netsipaebinexa apo judíovijavabelia pexanialivaisi, xanē talivaisi. Nexata apo judíovi ata najamatabēcuenē pēnēyortsiaexanaename Diosojavabelia. Nexata Dioso pexaniajailivaisita apo judíovi ata jamatabēcuenēitayotsianatsi piataquirijamatabēcuenēvecua, dovathi pejamatabēcuenē itorobabiabijavatsivecua. Nexata apo judíovi ata talivaisi jumecovēnētsiana. Nexata bajarapamonae pibisiacuene pexanaeconimi, Dioso vecuaajibiaexanaenatsi itsa jumecovēnētsiana talivaisi. Nexata apo judíovi ata pibisiacuene pexanaeconimi, Dioso vecuaajibiaexanaenatsi, pacuenia baja daxita tanejumecovēnētsivi Dioso vecuaajibiaexanatsi pibisiacuene pexanaeconimi,” nejai Jesús mapacueniaje athēbēvetsica, jai Pablo nacuaevetsinē Agripajavabelia.

*Pacuenia Pablo navajunupaeba pacuenia jumecovēnēta Jesús pitorobicueniatsi yabara pelivaisi*

<sup>19</sup> Icatsia Pablo jumaitsi nacuaevetsinē Agripajavabelia:

—Agripa, nacua nevetsinē, abaxē nenamuxunaevere. Nexata pacuenia Jesús athēbēvetsica nejumaitsi, jumecovēnētajē baja cajena. <sup>20</sup> Copiata Jesús pelivaisi tsipaebaponajē Damasco tomarapijivijavabelia, Jerusalén tomarapijivijavabelia ata, Judea nacuapijivijavabelia ata. Bajaraxuacujinae icatsia tsipaebaponajē apo judíovijavabelia

ata. Nexata itorobajë daxita bajarapamonae pecopabinexa pibisiacuene pexanabiabi-  
java penajamatabëcuenepënëyorotsinexa Diosojavabelia. Nexata itorobajë xaniavaetsia  
pejinavanapaenexa pibisiacuene pexanaeyaniva. Nexata baja bajarapacuenia ita jina-  
vanapa, daxitajivi yapëtanetsi pepacuenen penajamatabëcuenepënëyorotsijava Diosojav-  
abelia. <sup>21</sup> Bajarapalivaisi tatsipaebaponaexae, nevaetaba judíovi pamatacabi ponaponajë  
templobota. Nevaetaba tanebeyaxuabinexa picani. <sup>22</sup> Itsiata baitsi jane neyjavapon-  
apona Dioso taneyavenonaenexa mapamatacabijavaberena ataje. Bajaraxuata nucajë  
majotaje tatsipaebinexa Jesús pelivaisi daxitajivijavabelia. Jesús pelivaisi jivi ita tsipae-  
babiabajë, tsipaebabiabajë bepejiovijavabelia, pepo petuxanevijavabelia ata. Nexata  
daxita bajarapamonae najëpaeya tsipaebabiabajë peyapëtaenexa xua bajayata tajëvelia  
Diosojumepaebivi profetavi vajunupaeba. Profeta Moiséspijinë ata bajayata tajëvelia  
vajunupaeba bajaraxua. Pacuenia ata bajayata tajëvelia Diosojumepaebivimi profetavi  
copiaya jumaitsi, tsipaebabiabajë. Bajayata baja cajena profetavimi Cristo yabara ju-  
maitsi mapacueniaje: <sup>23</sup> “Pamatacabi Cristo Dioso itorobianicatsi jivi pecapanepaenexa,  
beyaxuabianatsi. Itsiata baitsi jane pebeyaxuabicujinaetsi Dioso icatsia asaëyaexanae-  
natsi. Nexata Cristo Dioso ita asaëyaexanaenatsi petëpaecujinae, namataxainae  
asaëyaexanaenatsi daxita petëpaevivecua,” jai bajayata tajëvelia profetavi. Nexata  
jane baja Cristo Dioso ita asaëyaexanatsi petëpaecujinae, namataxainae jane baja  
asaëyaexanatsi daxita petëpaevivecua. Nexata pamona Dioso pepuajumecovënëtsi  
tëpa, Dioso icatsia cotocaevi asaëyaexanaenatsi petëpaecujinae. Nexata bajarapalivaisi  
tsipaebaponajë judíovijava, apo judíovijava ata. Daxita bajarapamonae ita jume-  
covënëta bajarapalivaisi, pecapanepaenexatsi Diosojavabelia, jai Pablo nacuaevetsinë  
Agripajavabelia.

*Pacuenia Pablo petsipaebilivaisi pejumetaevitsi, sivanajamatabëxainatsi yabara pelivaisi*

<sup>24</sup> Pablo penavajunupaebijavata, nacuaevetsinë Festo jumevabaxuabatsi.

—¡Pablo, xamë raja saya camatajemaba! Camatajemaba bitso nenacujarubixae, jai  
nacuaevetsinë Festo.

<sup>25</sup> Pablo nexata jumaitsi:

—Festo, pecayiyataenë, nacua nevetsinë. Apo nematajemabi raja xanë. Palivaisi raja  
pacatsipaebatsi, pepo pexaniajailivaisi. <sup>26</sup> Bajarapalivaisi ajumejunavijibia pacatsipae-  
batsi tsipaji maponë ecaje, nacua pevetsinë Agripa, xaniavaetsia yapëtane bajarapali-  
vaisi. Agripa xaniavaetsia yapëtane daxita xua Jesús exana. Tsipaji abaxë pamatacabi  
Jesús ponapona mapanacuataje, daxita xua exana, muetsia apo exanae. <sup>27</sup> Agripa, nacua  
nevetsinë, xamë baja cajena jumecovënëtae profetavi bajayata peyaquinaelivaisi.  
¿Baja tsabaitsi jane? Cayapëtanetsi baja cajena nejumecovënëtsijava bajarapamonae  
peyaquinaelivaisi, jai Pablo nacuaevetsinë Agripajavabelia.

<sup>28</sup> Nexata nacuaevetsinë Agripa jumaitsi Pablojavabelia:

—¿Bepijia tsabaja Jesús pelivaisi jamatabënejumecovënëtsiaexaname? jai  
nacuaevetsinë Agripa.

<sup>29</sup> Nexata Pablo jumaitsi:

—Vajëtajë Diosojavabelia Jesús pelivaisi bepijia panejumecovënëtsinexa. Ita  
jume, beaxayocuenia ata panejumecovënëtsinexa. Daxita paxamë patanejumetaeye-  
naevimë, jitsipajë panejumecovënëtsijava Jesús pelivaisi. Pacuenia baja xanë ja-  
matabëcueneitsinë, Jesús pelivaisi tajumecovënëtsinë, bajara paxamë ata paneja-  
matabëcueneitsinexa. Itsiata apo pacatojitsipaetsi papecacëbinexa mapitsicadenamaë-  
tonëtaje pacuenia xanë necëtanuta, jai Pablo.

<sup>30</sup> Itsa baja Pablo najumevereta bajarapacuenia petsipaebijava, nacuaevetsinë Festo  
nonotapuna. Nacuaevetsinë Agripa ata, pijava Berenice yajava, nonotapuna. Daxita baja  
penajuanacaetuatsivi ata nonobapuna peponaenexa. <sup>31</sup> Pepitsapaecujinaelia bajarapa-  
monae najumaitsi:

—Maponėje Pablo itsacuene baja cajena apo exanae. Nexata picani ajibi paneconi yabara beyaxuabijitsiatsi. Ajibinua paneconi yabara etsijitsiatsi penaneconitsivi pejebabiabibota, najai bajarapamonae Pablo yabara.

<sup>32</sup> Nacuaevecsiniē Agripa jumaitsi nacuaevecsiniē Festojavabelia:

—Itsa apo cavajētsi tsipae nitorobinexa vajatuxanenēbejejavabelia, Romanonacua pepo pevetsiniējavabelia, bajaraponē pitabarata peneconitsinexatsi, nexata baja picani copatsipatsi pepitsapaenexa penaneconitsivi pejebabiabibovecua, jai nacuaevecsiniē Agripa Pablo yabara.

## 27

### *Pacuenia Pablo caponaliatsi Roma tomarabelia yabara pelivaisi*

<sup>1</sup> Nacuaevecsiniē Festobana najamatabēcuenevereta baja pitorobinexatsi Pablo Italia nacuayabelia, Romanonacua pepo pevetsiniējavabelia. Nexata Pablo caponaejitsiatsi vajabitsaē pijacapitán, Juliovēnēnē. Itsamonae naneconitsia pejinavanapaevi, Pablo yajava, caponaejitsiatsi. Ponē Romanonacua pepo pevetsiniē, bajaraponē pevēnē Augusto. Nexata Augusto pijajivi vajabitsaē pijacapitánmonaeyajuvēnēnē Julio. <sup>2</sup> Xanē Lucasnē, naponajē Pablota. Adramitio tomaraverena pepatsibarco ēnēabereca parunarecajē. Bajarapamo yaētanajetarucaejitsia manuamene muxubērēa penaetomaranējava, pepatsinexa Asiavēnē nacuayabelia. Payajavaponajēbeje Aristarco, Tesalónica tomara-pijinē. Tesalónicatomara eca Macedonia nacuata. <sup>3</sup> Meravia pitsijavata epatua panapatajē Sidón tomarata. Capitán Julio yaiyatanetsi Pablo. Bajaraxuata Sidón tomarata Pablo tocopatatsi penonotajunaenexa barcoēnēvecua, penasivaxainaenexa peyapētaevitsijavabelia, perajutsinexatsinua xua namatavenona Pablo. <sup>4</sup> Bajaraxuacujinae icatsia panaropobajē Sidón tomaravecua. Nexata patavajēnaeverena jovibo najetaruca. Nexata Chipretunaeto pacujibaliajē bajarapatunaeto muxubērēa patanajetarubenaenexa. Nexata Chipretunaeto patatsavenononia paxenetanajetarubenajē. Tsipaji bajarapamuxubērēvelia jovibo beyajetayo. <sup>5</sup> Cilicia nacuabeje Panfilia nacuabeje canacujitsialia papaliajē. Nexata payaētajē Mira tomarata. Miratomara eca Licia nacuata.

<sup>6</sup> Nexata Mira tomarata capitán Julio caxitajaraba barco, Alejandría tomaraverena pepatsimo. Bajarapamo ponaejitsia Italia nacuayabelia. Nexata baja pabarcota pananajetarubenajē, pavecuanonobajunajē. Nexata icatsia capitán Julio panerunaeyaexana Alejandría tomaraverena pepatsibarco ēnēabelia. <sup>7</sup> Anijamatacabianē bajarapabarcota pananajetarubenajē. Tsipaji beaxayo najetaruca. Pinijicuenecujinae itsiata panajetarubenajē Gnidotomara canacujitsita. Jovibo abaxē tsiteca najetaruca patavajēnaeverena. Nexata pamatavaquetajē Cretavēnētunaeto. Panajetarubenajē itsapaitapavelia eca Salmóntomara. Tsipaji bajarapaitapavelia jovibo beyajetayo. <sup>8</sup> Piayapēbejecuenia panajetarubenajē manuamene muxubērēa. Nexata papatajē Buenos Puertosvēnējavata, Laseatomara imoxoyojavata.

<sup>9</sup> Pamatacabianē xanepana menia patanajetarubenaenexa, panevecuapanepapona baja. Nexata baja bitso panetsiayai menia pataponaenexa. Tsipaji bajarapajuametota bitso jovibo ayai tsabiabi. Emarapae ata baja copiajunua. Nexata picani Pablo tsipaeba barcota patanajuaponaevijavabelia. <sup>10</sup> Pablo picani jumaitsi mapacueniaje:

—Xanē raja yapētaniji nacatsiayai baja bitso menia vajaponaenexa vajavajēnaeyabelia. Naxuabijitsipa raeta mapamoje. Naxuabijitsipa raeta mapamoēnētaje pecaponaejava yajava. Vaxaitsi ata meta naxuabijitsipatsi. Nexata abaxē majotaje evetavanapaenatsi emarapae pepanepaejava, jai picani Pablo.

<sup>11</sup> Itsiata capitán Julio apo jumecovēnētsi Pablo petsipaebijava. Caranata pacuenia jumaitsiabeje barco pexainaenē, barco pecaponaenē ata, capitán Julio jumecovēnēta. <sup>12</sup> Buenos Puertosvēnējavata ayapēbeje barco perucaejava bajayajebi. Nexata acuenebi bajarajota pataevetavanapaenexa emarapae pepanepaejava. Nexata picani daxita bajarapamonae bitso jitsipa patavajēnaeyabelia pataponaenexa. Jitsipa picani Cretatunaeto muxubērēa patanajetarubenaenexa, itsa cuencaējēpatsi, pepatsinexa

picani Fenice tomarata. Bajarapatomarata picani jamatabëyaëta patavetavanapaenexa emarapae pepanepaejava. Fenicetomara eca Creta tunaetototsotota. Nexata bajarapatotsotota xanepana barco perubenaenexa. Tsipaji bajarapatotsotojava apo joneyabiabi jovibo.

*Pacuenia pinijjoviboxaneto barco caponatsi Creta tunaetovecua yabara pelivaisi*

<sup>13</sup> Itsa pajinavanapajë Buenos Puertosvënëjavata, barco pexainaenë bitso jitsipa peponaenexa pevajënaeyabelia. Nexata bajarapaepatota patacovëverena beaxayo jovibo najetaruca. Nexata bajarapamonae itsa tane bajarapajovibo, jitsipa pevajënaeyabelia peyacaponaeenexatsi bajarapamonae pejitsipaecuenia. Nexata jane baja panaropobajë. Cretatunaeto muxubërëa panajetarubenajë. <sup>14</sup> Nexata jemata caepatoyocujinae pinijjoviboxaneto najetaruca Cretatunaeto epatajërëtsiarena barcojavaberena. Bajarapajovibo Nordestevënëjavato. <sup>15</sup> Bajarapajovibo barco torotaponatsi Cretatunaetovecua. Apo panecaëjëpae barco patamuxufetsinexa jovibo pevajënaevelia. Nexata baja pacopatajë pataneyacaponaeenexa jovibo. <sup>16</sup> Paponajë tsiqiritunaetoyo, Claudavënë tunaetoyo, pepënënenia. Bajaraxuayo bitso jovibo apo ayai. Barco petabufevetsina robotanajetaruca jera. Nexata itsajota jovibo beyajetayo, pinijicuenia payamaërobobocainajë jera patajutabuatsinexa barco ënëabetsina. <sup>17</sup> Bajaraxuacujinae bajarapamonae barco epacëbaponaya pinijibumacaxanetonëta barco pesarasaraëcaeyaniva malatacata. Bajarapamonae junava barco patayayaëyaëcaeyaniva Sirtevënë iratsaubonëjumata. Nexata bajarapamonae isica barcopijivelapananë. Bajaraxuacujinae bajarapamonae copata baja itsabelia jovibo pona, barco pataneyacaponaeenexa jovibota. <sup>18</sup> Meravia abaxë pitsijavata tsiteca pinijjovibo piayaijava. Nexata bajarapamonae barcoënëta pecaponaejavanë, menia yajuvënëpenereca barco pefafanaenexa. <sup>19</sup> Bajaraxuacujinae icatsia meravia pitsijavata bajarapamonae menia penereca barcoënëta pecanacuenebijavanë. <sup>20</sup> Bajayajebi baja cajena apo pataenë maticabipijijuameto, tulupu ata. Tsipaji bajayajebi pinijjovibo, ema yajava, tsitecanuca. Belia pajamatabëjumaitsinë: “Apo yapanepaetsi meta baja tsane,” pajamatabëjanë.

<sup>21</sup> Pamatacabibeje bajarapacuene pataniji, bajara pijinia pamatacabibeje apo paxaenë pataxaejava. Nexata Pablo nonotapuna bajarapamonae petuatuajëta. Pablo jumaitsi:

—Itsa paxamë panejumecovënëtsipame pacuenia pacatsipaebatsi, xanepanaejitsipa. Nexata maberena apo yaponae tsipaetsi Cretatunaetovecua. Apo bejibitsinua tsipae.

<sup>22</sup> Itsiata baitsi jane aeconoxae pëtsa panatsinajamatabëxainame. Itsajivi ata raja paxamëyajuvënëjivi itsiata apo tēpae tsane. Ebarco rajane baja naxuabiana. <sup>23</sup> Ajena baja cajena, pameravi, netsitanaitajëta ángel, Dioso pitorobinëtsica. BajarapaDioso xanë pijajivitonënë. BajarapaDioso tonacuenebaponaponajë. <sup>24</sup> Nexata ángel nejumaitsi: “Pablo, pëtsa junavame. Itsiata raja apo tēpaemë tsane. Tsipaji raja naitajëtsijitsiamë Romanonacua pepo pevetsinë pitabarata. Xamë raja nejamatabëcueneta Dioso capanepaenatsi petēpaeyaniva daxita pamona yajavanajetarucame mapabarcotaje,” nejai ángel. <sup>25</sup> Nexata daxita paxamë panajamatabëcuenesaëre panejamatabëcuenebëjaijavavecua. Najamatabërutajë Diosojavabelia vajanacacapanepaenexa Dioso. Yapëtaniji Dioso vajanacacapanepaejavanexa pacuenia baja ángel netsipaeba. <sup>26</sup> Itsiata baitsi jane cajena jovibo nacayacaponaeenexa itsatunaetojavabelia, jai Pablo.

<sup>27</sup> Catorce baja pamatacabibeje itsa paxainajë patanaropobicujinae, meravi jovibo toquebiaya paneyacaponae Adriavënë manuamenejava. Nexata meravi tuatuajëta barcota penacuenebivi jamatabëjumaitsi:

—Pitapayabelia covë payapataponajë, jamatabëjai.

<sup>28</sup> Nexata bajarapamonae pemaëtota caëjëtaponae xuavajëto mene avajubua irabereca peyapëtaenexa. Nexata treinta y seis pametrobeje xaina mene piavajubuajava irabereca. Bajaraxuacujinae, caepatoyocujinae, icatsia caëjëta. Veintisiete icatsia pametrobeje xaina mene piavajubuajava irabereca. <sup>29</sup> Nexata barcota penacuenebivi jamatabëjumaitsi:

—Barco meta payanayaëttojopaenajë ibotojumata, jamatabëjai.

Nexata bajarapamonae barco petabufevetsina, cuatro xuabeje anclavënëjavanë, yamaëya copabareca. Nexata anclavënëjavanë menebëxëpana irabelia itsa vaetaba, barco perucojopaenexa. Bajarapamonae picani bitso jitsipa bepimia peyamatacabibijavatsi, penatsivajënae taenajetarubenaenexa.<sup>30</sup> Nexata bajarapaepatota bajarapamonae picani bitso jitsipa ëpamonae penonobajunaenexa barcovecua pepanepaenexa. Nexata bajarapamonae penajuaponaevijavabelia yamaxëitojorobiaya jumaitsi:

—Icatsia raja pacopabijitsianëreca itsaanclajavanë barcoupitatsia, jai.

Nexata saya ëjera, pamo pajutabuatsinajë, bajarapamonae xuareca peyaponaenexa picani pitapayabelia.<sup>31</sup> Nexata Pablo itsa tane bajarapamonae jera pexuabijavareca, jumaitsi vajabitsaë pijacapitánjavabelia, capitán pijajivijavabelia ata:

—Mapamonaeje barcota penacuenebivi itsa ponaena mapajerataje, paxamë pavajabitsaëmë panapenetsianame meneta, jai Pablo.

<sup>32</sup> Nexata barcota penacuenebivi peponaeyaniva jerata, vajabitsaë caucutaxuaba jera pecëtarutsimaëto. Jera baja nexata pona barcovecua.

<sup>33</sup> Ajena baja matacabi tsina, Pablo itoroba daxita barcota peponaevi pexaejava pexaenexa. Pablo jumaitsi bajarapamonaejavabelia:

—Catorce baja cajena pamatacabibeje xaniavaetsia apo pamajitsimë. Panexaejava ata apo paxaemë.<sup>34</sup> Bajaraxuata pacaitorobatsi panexaejava panexaenexa, panesaë panexainaenexa panepanepaenexa. Itsiata raja daxita apo paitsacuenemë tsane, jai Pablo bajarapamonaejavabelia.

<sup>35</sup> Bajarapacuenia Pablo pejumaitsijavata, panbë pita. Panbë yabara Pablo pexaniajamatabëcuene rajuta Diosojavabelia daxita bajarapamonae pitabarata. Bajaraxuacujinae Pablo epatsënëca panbë. Pablo nexata xane pexaejava.<sup>36</sup> Daxita nexata bajarajota ajamatabëcuenesaëreca baja. Nexata bajarapamonae ata xane pexaejava.<sup>37</sup> Doscientos setenta y seis papajivinëbeje daxitata paponajë bajarapabarcota.<sup>38</sup> Nexata daxita xaniavaetsia penabanicujinae, menia penereca trigoxu sacuanë pefafanaenexa barco.

#### *Pacuenia barco bubuna manuameneta yabara pelivaisi*

<sup>39</sup> Itsa baja matacabi tsarucaponae, barcota penacuenebivi taeyelia petunaeto. Itsiata apo yapëtae bajarapatunaeto. Nexata menetotsoto taerulia. Bajarajotalia tajetabo boca. Nexata picani bajarapamonae najamatabëxaina peyaëtsinexa barco bajarapatajetabojavabelia.<sup>40</sup> Xuanë anclavënëjavanë, yamaëya copabareca, bajaraxuanë irabelia itsa vaetaba, barco patayarucojopaenexa. Bajaraxuanëmi yamaëcaucubapenereca. Sarasaranaeyaexananua barco petabufecajëbanajetarubenaepabeje. Nexata barcoupitatsia penucaenaeta velapana upicëtarutsia. Velapana nexata jovibota nayerebajaraba. Barco jane baja imoxoyotanajetaruca tajetabo.<sup>41</sup> Nexata itacarajeta barco pata itsajota anijamenebeje pesaë namataenetsia patabeje. Barco baja payajumanayaëtarabajë iritsaubojumata. Nexata bajarajota barcoupi mëthëmëthëcajunua iritsaubojavabelia. Ataja tsanuca. Barco petabufejavavetsina malataca pesaëta tabufesarabajarabatsi.<sup>42</sup> Nexata picani vajabitsaë bajarajota beyejebijitsiatsi daxita penaneconitsivi, pevecua-panepaeyanivatsi pejuejavata.<sup>43</sup> Itsiata vajabitsaë pijacapitán apo tocopatsi. Tsipaji apo jitsipae Pablo yajava pebeyaxuabijavatsi. Nexata capitán itoroba daxita pamonae yapë-tane pejuejava, copiaya pejuenexa pitapayabelia copiaya pepatsinexa matatsënëabelia.<sup>44</sup> Bajaraxuacujinae pamonae apo yapëtae pejuejava, cotocaevi itoroba tablapanëjumata, barcopanëmijumatanua, pejuenexa. Bajarapacuenia daxita panepa matatsënëabelia.

## 28

#### *Pacuenia Pablo ponapona Maltavënë tunaetojavata yabara pelivaisi*

<sup>1</sup> Itsa baja daxita paxanë xaniavaetsia papanepajë matatsënëabelia, nexata pavënë-taniji bajarapatunaeto. Bajarapatunaeto Malta vënëtunaeto.<sup>2</sup> Maltatunaetopijivi bitso paneyavenona. Bajarapamonae pinijiisotoxaneto itajuruteta. Tsipaji bitso ema tsanuca. Nexata bitso cainejeba. Panejunata daxita patanonopaenexa.<sup>3</sup> Nexata Pablo nota

petseviiso. Itamataeta bajarapaisoto. Nexata jomo bitso piatanenë, bebula, pitsatabi-jirava isotojavaverena piatajujavavecua. Nexata Pablo cobesinetsi. Pecobesinijavatatsi tsiteca yajumaruca. <sup>4</sup> Maltatunaetopijivi itsa tane Pablo jomo pecobesinerucaejavatsi, nexata najumaitsi bajarapamonae:

—Maraeta ponë jivibenëje. Bajaraxuata manuumene vecuapanepae ata, icatsia Dioso tocopatatsi jomo pesininexatsi. Nexata jivi pebejamatabëcuene, jomo pesinijavatsi peyatëpaenexa, najai Maltatunaetopijivi Pablo yabara.

<sup>5</sup> Nexata Pablo nacobenëniëbiaxuaba jomo pejopaenexa isotojavabelia. Pablo itsiata apo itsacuene. <sup>6</sup> Nexata daxita Maltatunaetopijivi jamatabëjumaitsi Pablo yabara:

—Aeconoxae meta Pablo cobeyajinaena. Itsa jume, irata meta petëpaenë jopaena, jamatabëjai.

Nexata bajarapamonae bajayaepato evetanubenaë ata Pablo petaenexatsi jomo pecobesinijavatsi peyaitsacuenejava, itsiata Pablo apo itsacuene. Nexata icatsia bajarapamonae itsacuenia najamatabëxaina Pablo yabara. Nexata najumaitsi bajarapamonae:

—¡Maraeta papebi diosonëje! najai.

<sup>7</sup> Maltatunaeto pevetsinë pevënë Publio. Nexata itsajota panubenajë, imoxoyo bobena Publio pijairanë. Nexata bajaraponë panecopiapita pexaniacuenia. Bajaraponë pijabota panajinavanapajë acueyabi pamatacabibeje. <sup>8</sup> Publio paxa avitane tsanucae camata. Romaebanucatsi. Bitso suliabatsi. Nexata Pablo taeyojopalia. Vajëta Diosojavabelia. Bajaraxuacujinae piavitanenë pematabocotojumavereca Pablo nacobebuata. Nexata baja Pablo jamatejemayaexana piavitanenëmi. <sup>9</sup> Bajarapacuenia Pablo itsa exana, nexata daxita piavitanevi Maltatunaetopijivi pata Pablojavaberena. Daxita bajarapamonae ata jamatejemayaexana Pablo. <sup>10</sup> Maltatunaetopijivi pinijicuenia paneyaiyataeya paneyavenona. Itsa baja icatsia bexëjavabelia itsabarcota panaponajë, nexata Maltatunaetopijivi panerajuta daxita patanamataavenonaëjavaxi pataponaejavata.

#### *Pacuenia Pablo pata Roma tomarata yabara pelivaisi*

<sup>11</sup> Malta vënëtunaetota panajinavanapajë acueyabi pajuametobeje. Bajaraxuacujinae baja icatsia panaponajë barcota. Bajarapabarco patavajënae pata Alejandría tomaraverena. Bajarapamo Maltatunaetototsotota daxita emarapae ruca. Evetaruca emarapaejuametone pepanepaejava. Bajarapabarcoupita rucabeje jivi saya pecobeta jumapecataeya pexanaenëbeje. Cástorbeje Póluxbeje jumapecataeya jivi pecobeta pexanaenëbeje bediosonëbeje petaenexa. <sup>12</sup> Bajarapabarcota panaponajë. Nexata jane baja panapatajë Italia nacuyabelia. Panapatajë Siracusa tomarata. Siracusa tomarata abaxë panajinavanapajë acueyabi pamatacabibeje. <sup>13</sup> Bajaraxuacujinae icatsia panaropobajë. Paponajë manuumene muxubërëa. Nexata icatsia papatajë Regio tomarata. Nexata meravia pitsijavata patacovëverena pexaniajovibo najetaruca. Nexata bajarapajovibo paneyacapona patavajënaeyabelia. Nexata icatsia anijamatacabibejecujinae papatajë Puteoli tomarata. <sup>14</sup> Puteoli tomarata pacaxitajarabajë Dioso pejumecovënëtsivi. Bajarapamonae paneasiva caesemana patanajinavanapaenexa bajarapamonaejavata. Bajaraxuacujinae jane baja matatsënëa paponajë Roma tomarabelia. <sup>15</sup> Roma tomarapijivi, Dioso pejumecovënëtsivi, patavajënaelia panevënëlivaisitane patanajetarubenaëjava. Nexata bajarapamonae panecopijairena. Nexata penamataxainaëbitsaëto panemataenena Foro de Apiovënëjavata. Bajaraxuacujinae icatsia itsabitsaëto panemataenena Tres Tabernasvënëjavatalia. Nexata Pablo itsa tane bajarapamonae, pexaniajamatabëcuene rajuta Diosojavabelia. Nexata ajamatabëcuenesaëreca Pablo bajarapamonae petaejavata. <sup>16</sup> Nexata jane baja papatajë Roma tomarabelia. Nexata Roma tomarata capitán Julio rajuta baja pamonaë naneconitsia capona Cesarea tomaraverena. Rajuta baja penaneconitsivi pejebabibibo pevetsivi penamatacaitorobinë pecobeyabelia. Itsiata Pablo tocopatatsi saicayabota peponaponaeenexa. Caenë vajabitsaënë evetaponaponatsi Pablo penajetabajiraviyaniva.

#### *Pacuenia Pablo tsipaëba Jesús pelivaisi Roma tomarata yabara pelivaisi*

<sup>17</sup> Pablo baja itsa xaina acueyabi pamatacabibeje pepatsicujinae Roma tomarata, tonajumexuaba judíovi penamatacaitorobivi pepatsinexa Pablojavaberena. Itsa baja nacaetuata judíovi penamatacaitorobivi, Pablo nexata jumaitsi judíovi penamatacaitorobivijavabelia:

—Tajamonae, itsacueene apo exanae atanë vajavëna judíovijavabelia, vajasalinaivi pecujarubicuene jumecovënëtsiaponaponae atanë, itsiata vajavëna judíovi nevaetaba Jerusalén tomaratalia. Nexata necanajeta tananeconitsinexa Romano nacuapijivi pecobeyabelia. <sup>18</sup> Nexata Romano nacuapijivi, jivi penaneconitsicueene pevetsivi, neyanijoba xua yabara vajavëna judíovi neneconita. Nexata baja picani Romano nacuapijivi necopatsijitsia. Tsipaji apo caxitajarabi itsacueneneconi ata taxinaejava, paneconi yabara nebeyaxuabiaexanaejitsia. <sup>19</sup> Itsiata baitsi jane vajavëna judíovi, pamona neneconita, apo jitsipae Romano nacuapijivi tanecopatsinexa. Jitsipa picani tanebeyaxuabinexa. Nexata xanë vajëtajë taneitorobinexa maberena Romanonacua pepo pevetsinë pitabarata tananeconitsinexa pibisiacueene itsa exanajë. Itsiata xanë apo jitsipaenë juya bajarapamonae taneconitsijava tajanacuapijivijavabelia. <sup>20</sup> Bajaraxuata nexata pacajunatatsi patacataenexa patacabarëcuaicuaijainexanua. Ponë daxita Israel nacuapijivi copiaevetavanapa athëbëvetsica pepatsijavanexatsica, xanë baja yapëtaniji bajaraponë athëbëvetsica pepatsijavatsica. Nexata xanë vajunupaebaponajë bajaraponë athëbëvetsica pepatsijavatsica. Bajaraxuata necobecëtsiaya yamaëya ponaponajë mapacadenamaëtoje, jai Pablo Roma tomarata judíovi penamatacaitorobivijavabelia.

<sup>21</sup> Nexata judíovi penamatacaitorobivi jumaitsi Pablojavabelia:

—Itsalivaisi ata baja cajena xamë yabara apo panetonajumeitorobi Judea nacuverena. Vajavëna judíovi patsi ata bajaraverena, itsiata apo panetsipaebi pibisiacueene xamë nexanaejava. <sup>22</sup> Itsiata baitsi jane pajitsipajë patanetsipaebinexamë pacuenia Jesús pelivaisi jumecovënëtame. Daxitanacuanëpijivi baja cajena baracuaicuajai tsabiabi bajara papejanapitsapaelivaisi: “Apo pexaniajailivaisi cajena bajarapalivaisi. Dioso cajena apo nacatocopatsi bajarapalivaisi vajajumecovënëtsinexa,” jai tsabiabi daxitanacuanëpijivi, jai judíovi penamatacaitorobivi Pablojavabelia.

<sup>23</sup> Nexata judíovi penamatacaitorobivi cajëta matacabi icatsia nacaetuatsijitsia pabota Pablo ponapona. Nexata jane baja icatsia itsa nacaetuata, bajarapamonae ayaibitsaëtoxaneto parena pabota Pablo ponapona. Nexata Pablo bajayacunua petaxuxuabicujinae livaisi petsipaebijava, matapania caniviyojavabelia copata. Nexata Pablo tsipaeba bajarapamonaejavabelia Dioso pijajivi pevetsijava mapanacuataje. Pablo tsipaebanua bajarapamonaejavabelia pacuenia jumaitsi Dioso Moiséspijinëta penajumecopatsilivaisi Jesús yabara. Pablo tsipaebanua pacuenia jumaitsi Diosojumepaebivi profetavi bajayata peyaquinaelivaisita Jesús yabara. Bajarapacuenia Pablo tsipaeba bajarapamonae pejumecovënëtsinexa Jesús pelivaisi. <sup>24</sup> Itsamonae bajarapamonaeajuvënëvi jumecovënëta baja bajarapacuenia Pablo petsipaebilivaisi. Itsiata itsamonae apo jumecovënëtsi. <sup>25-26</sup> Nexata daxita bajarapamonae apo najamatabëcuenejëpae. Nexata bajarapamonae penaviabivajënae Pablo icatsia jumaitsi bajarapamonaejavabelia mapacueniaje:

—Bajayata baja cajena profeta Isaíaspijinë Espíritu Santo pejamatabëcueneta tajëvelia yapëtaeyaexanatsi paxamë apo panejumecovënëtsijavanexa Jesús pelivaisi. Nexata profeta Isaíaspijinë Espíritu Santo itorobatsi petsipaebinexa vajasalinaivimijavabelia mapacueniaje:

Paxamë raja picani pajumetaeyabianame palivaisi pacatsipaebabiabiana. Itsiata apo pajumeyapëtaemë tsane xua yabara bajarapalivaisi pacatsipaebabiabiana. Paxamë raja picani pataeyabianame xua pacatsitaexanabiabiana. Itsiata apo payapëtaemë tsane pajamatabëcuene yabara bajaraxua pacatsitaexanabiabiana, jai profeta Isaíaspijinë vajasalinaivimijavabelia.

<sup>27</sup> Bajarapacuenia jumaitsi profeta Isaíaspijinë tsipaji baja cajena Dioso tajëvelia jumaitsi paxamë apo panejumecovënëtsijavanexa yabara mapacueniaje:

Bजारapamonae ajamatabëcuenetaja tsane. Nexata benamuxuacabiaya pejinavana-paevi tsane. Benaitaxutotsaquebiaya pejinavanapaevi tsane. Itsa bajarapacuenia apo itsipae, nexata yapëtaejitsipa pajamatabëcuene yabara tsitaexanatsi xua tane. Jumeyapëtaejitsipana palivaisi tsipaebatsi. Pejamatabëëthëtojavavetsina jumeyapëtaejitsipa. Nexata najamatabëcuenepënëyorotsipa perujujamatabëcuenevecua. Nexata xanë jamatabëcuene xanepanaeyaexanaejitsipajë pibisiacuenevecua,

jai baja cajena Dioso bajayata tajëvelia paxamë apo panejumecovënëtsijavanexa yabara, jai Pablo judíovijavabelia Roma tomarata.

<sup>28</sup> Pablo icatsia jumaitsi judíovijavabelia:

—Pajudíovimë, pajumeyapëtaema mapalivaisije. Ajena baja mapamatacabijavaveliacujinaeje, pevajënaeyabelia, Dioso jivi pecapanepaelivaisinexa apo judíovijavabelia ata tsipaebianatsi. Nexata apo judíovi ata xaniavaetsia namuxunaevetsiana bajarapalivaisi, jai Pablo judíovijavabelia.

<sup>29</sup> Itsa baja Pablo najumevereta bajarapacuenia petsipaebijava, nexata jane baja daxita judíovi naviaba. Nexata bajarapalivaisi yabara bajarapamonae namutua nabarëcuaicuaijai tsanajetarubena.

<sup>30</sup> Pablo penacovaetsibota anijavaibeje ponapona Roma tomarata. Pablo matamotapona bo pecovaetsijamatabëcuene. Pablo xaniavaetsia copiapitabiaba daxita pamonaesivaxainabiabatsi. <sup>31</sup> Pamonae Pablo sivaxainabiabatsi, tsipaebabiaba Dioso pijajivi pevetsijava mapanacuataje. Tsipaebabiabanua pepo petuxanenë Jesucristo pelivaisi. Tsipaebabiaba ajumejunavijibia. Itsajivi ata Pablo apo jumeitavetsitsi petsipaebabiabilivaisi.

## Mapabaxutoje San Pablo toyaquina Roma tomarapijivijavabelia

*Pacuenia Pablo toyaquina mapabaxutoje Dioso pejumecovënëtsivi, Roma tomarapijivijavabelia, yabara pelivaisi*

<sup>1</sup> Xanë Pablonë, Jesucristo pijajivitonënë. Dioso nejunata. Nexata nitoroba apóstolenëxanë tatsipaebaponaenexa jivi pexanialivaisi, Jesucristo pelivaisi, Diosojavabelia pecapanepaelivaisinexatsi.

<sup>2</sup> Bajayata vajavajënaeya, Dioso bajarapalivaisi tajëvelia yapëtaeyaexana profetavijavabelia. Nexata bajayata Diosojumepaebivi profetavi itsa yaquina Dioso pejumelivais-ibaxutonexa, bajarapamonae yaquina pacuenia Dioso tajëvelia yapëtaeyaexanatsi bajarapapexanialivaisi. <sup>3</sup> Bajarapalivaisi vajatuxanenë Jesucristo, Dioso pexënato pelivaisi. Jesucristo itsa naexana mapanacuataje, Davidpijinë pemomoxiyajuvënëvata naexana. Bajaraponë, Davidpijinë, bajayata Israelnacua pepo pevetsinëmi. <sup>4</sup> Vajatuxanenë Jesucristo petëpaecujinae, Espíritu Santo icatsia asaëyaexanatsi. Bajarapacuenia piasaëyaexanaeatsi petëpaecujinae, jivi yapëtanetsi Dioso pexënatocuene. Yapëtanetsinua piasaënëcuene ata. <sup>5</sup> Jesucristo pejamatabëcueneta Dioso paneitoroba saicaya paapóstolevinexanë, Dioso patatonacuenebinexa. Bajarapacuenia Dioso paneitoroba Dioso pejumelivaisi patatsipaebaponaenexa pamonaepo judíovijava, apo judíovi ata pejumecovënëtsinexa Dioso. <sup>6</sup> Nexata paxamë ata Roma tomarata panejinavanapaevi pajumecovënëtame baja Dioso. Tsipaji paxamë ata Dioso pacajunata Jesucristo papijajivinexamë.

<sup>7</sup> Daxita paxamë, Roma tomarata panejinavanapaevi, pacatoyaquinatsi mapabaxutoje. Dioso pacajitsipa. Nexata pacajunata papijajivinexamë. Pacatovajëtatsi vaxa Diosojavabelia, vajatuxanenë Jesucristojavabelia ata, papecaitaxutotsoniataenexa jamatabëcuenexanepanaeya panejinavanapaenexanua.

*Pacuenia picani Pablo bitso jamatabëtane Roma tomarapijivi yabara pelivaisi*

<sup>8</sup> Namataxainaeya pacatoyaquinarutatsi pacuenia jumaitsinë tsabiabi paxamë yabara Diosojavabelia. Diosojavabelia jumaitsinë tsabiabi mapacueniaje: “Sivajamatabëcuenenabarëyanë bitso bajarapamonae Jesucristo pejumecovënëtsixae,” janë tsabiabi Diosojavabelia paxamë yabara. Bajarapacuenia Diosojavabelia jumaitsinë tsabiabi tsipaji daxitanacuanëpijivi pacavajunupaeba xaniavaetsia panejumecovënëtavanapaevajava Dioso. <sup>9</sup> Xanë daxita tajamatabëcuenesaëta Dioso pijacuene tonacuenebaponaponajë jivi itsa tsipaebabiabajë pexanialivaisi, Dioso pexënato pelivaisi. Dioso yapëtane patacatovajëtabiabijava itsa pacanajamatabënapitabiabatsi tavajëtsijavata Diosojavabelia. <sup>10</sup> Vajëtabiabajë Diosojavabelia taponanexa paxamëjavabelia. Nexata Dioso itsa netocopatsiana taponanexa, ponaenajë paxamëjavabelia. Bajayajebi picani bitso jamatabëponabiabajë patacataenexa. <sup>11</sup> Nexata jitsipajë patacataenexa, patacatsipaebinexanua palivaisi Espíritu Santo neyapëtaeyaexana. Bajarapacuenia itsa pacayapëtaeyaexanaenatsi, pajamatabëcuenesaëmë tsaponae tsane orijibia Diosojavabelia. <sup>12</sup> Namataenetsia najamatabëcueneyavenonaenatsi Dioso pejumelivaisi vajajumecovënëtsijava. Pacayavenonaenatsi panejamatabëcuenesaënexa Diosojavabelia. Paxamë ata juya paneyavenonaename bajarapacuenia.

<sup>13</sup> Tajamonae, pacatojitsipatsi paneyapëtaenexa mapacuenije. Bajayajebi picani bajayajebi jamatabëponabiabajë patacataenexa. Itsiata apo necuenecaëjëpabiabi taponanexa. Jitsipajë patacatsipaebinexa Jesucristo pelivaisi paxamëyajuvënëvi, pamonaepo abaxë apo jumecovënëtsi, pejumecovënëtsinexa Jesucristo. Pamonaepo ata baja jumecovënëta, Jesucristo pijamatabëcuenesaënexa pevajënaeyabelia. Pacuenia apo

judíovi ata jumecovënëtapona pevajënaeyabelia itsaxuayo tsipaebanajetarucajë, bajara paneitsinexa paxamë ata. <sup>14</sup> Dioso nitoroba tatsipaebaponaenexa Dioso pejumelivaisi daxitajivijava. Nexata Dioso pejumelivaisi jivi tsipaebaponajë pinijitomaranëjava, sasavia penaevijava ata. Tsipaebaponajë mapanacuapijilivaisi bitso peyaëtaevijava ata, apo peyapëtaevijava ata. <sup>15</sup> Bjaraxuata bitso jitsipajë paxamë, Roma tomarata panejinavanapaevi ata, patacatsipaebinexa pexanialivaisi.

*Pacuenia pexanialivaisi, Jesucristo pelivaisi, pinijisaë xaina ayaiacuene pexanaenexa yabara pelivaisi*

<sup>16</sup> Apo ajumeuranë tsabiabi jivi tatsipaebabiabijava pexanialivaisi, Jesucristo pelivaisi, jivi pecapanepaelivaisinexatsi Diosojavabelia. Tsipaji bajarapalivaisi pejamatabëcueneta pijaneconi vecuaajibiaexanaenatsi pajivi jumecovënëta bajarapalivaisi. Copiaya patsipaebaponajë bajarapalivaisi judíovi. Bjaraxuacujinae icatsia cotocaevi patsipaebaponajë apo judíovi. <sup>17</sup> Bjarapalivaisi nacayapëtaeyaexana pacuenia Dioso nacatoexana aneconijibia Dioso vajanacataenexa. Aneconijibia baja Dioso nacamataene Jesucristojavabelia vajavajënaeyabelia vajanajamatabëcuene copataponaeaxae. Dioso ra pejumelivaisibaxutota jumaitsi mapacueniaje: “Pajivi jamatabëjumaitsi: ‘Xanë pepacuene Dioso neyavenonaena pacuenia najumecapanepaeya jumaitsi,’ jamatabëjai, bajarapajivi Dioso aneconijibia tanetsi. Bjarapajivi xainaena matababi peverevereaejava,” jai Dioso pejumelivaisibaxutota.

*Pacuenia daxitatsi mapanacuapijivitsi naneconitatsi Diosojavabelia yabara pelivaisi*

<sup>18</sup> Dioso, athëbëtatsia peecaenë, vaxaitsi jamatabëcueneyapëtanetsi. Yapëtanetsi mapacueniaje. Dioso baraanaepanapona daxita pibisiacuene pexanaevijavabelia. Bjarapamonae pevajënaeyabelia pibisiacuene pejamatabëexanaexae, apo jitsipae pejumecovënëtsinexa pexaniajailivaisi, Dioso pejumelivaisi. <sup>19</sup> Bjarapamonae xaniavaetsia beyapëtaneta picani pacuenia Dioso jamatabëcueneitsi. Tsipaji baja picani Dioso tsitanajamatabëcueneitajëta bajarapamonaejavabelia. <sup>20</sup> Jivi apo caëjëpaetsi pitaxutota petaenexa Dioso. Nexata jivi apo yapëtae pacuenia itsi Dioso. Itsiata baitsi jane picani caëjëpatsi peyapëtaenexa pacuenia Dioso jamatabëcueneitsi. Caëjëpatsi picani peyapëtaenexanua daxitamatabicabijavabelianexa Dioso bitso piasaëtsaponaponaejava. Bjaraxua picani jivi caëjëpatsi pijacuata peyapëtaenexa, itsa canaëjëtsipa Dioso pexanaevijavanë mapanacuataje. Nexata bajarapamonae acuenebi pejumaitsinexa: “Apo payapëtaenë cajena pacuenia Dioso jamatabëcueneitsi,” pejinexa. <sup>21</sup> Bjarapamonae yapëtae ata Dioso peponaponaejava, itsiata apo yayatae. Caeto ata cajena Diosojavabelia pexaniajamatabëcuene apo rajutsi. “Pexaniacuene rabaja panetoexaname,” apo jai. Biji saya caranata ënatsiquejemajava yabara najamatabëxainabiaba. Nexata pevajënaeyabelia apo peyapëtaexae pexanialivaisi, ajamatabëcueneitaquiri tsaponae. <sup>22</sup> Jamatabëcuenenavëxaniabiaya bajarapamonae jamatabëjumai tsabiabi: “Vaxaitsi cajena bitso vajayapëtaevi daxitacuene,” jamatabëjai tsabiabi bajarapamonae. Itsiata baitsi jane cajena apo yapëtae. <sup>23</sup> Bjarapamonae apo najamatabëcuenecopabi ayaijamatabëcuenenë Diosojavabelia, ponë apo petëpaenënexa daxitamatabicabijavabelianexa. Caranata saya jivi pecobeta jumapecataeya pexanaenëanëjavabelia najamatabëcuenecopaba. Bjarapamonae navajëcabiaba itsamonae pecobeta jivi jumapecataeya pexanaenëanëjavabelia. Navajëcabiabanua itsamonae pecobeta pepunaevi jumapecataeya pexanaenëanëjavabelia ata. Navajëcabiabanua itsamonae pecobeta jomo jumapecataeya pexanaenëanëjavabelia ata. Navajëcabiabanua itsamonae pecobeta cuatro pataxutabeje pejinavanapaevi jumapecataeya pexanaenëanëjavabelia ata.

<sup>24</sup> Bjaraxuata Dioso tocopata bajarapamonae pibisiacuene pexanavanapaenexa. Nexata pacuenia jamatabëexana, exanavanapa. Nexata bajarapamonae pevitota pibisiacuene namataenetsia natoexanabiaba. <sup>25</sup> Bjarapacuenia Dioso tocopata pacuenia bajarapamonae jitsipa pexanavanapaenexa tsipaji bajarapamonae Dioso pejumelivaisi,

pexaniajailivaisi, apo jamatabějumecovēnētsi. Jumecovēnēta saya caranata penajumet-sēnētsilivaisi, jivi pecobeta jumapecataeya pexanaenēanē pelivaisi. Bajarapamonae apo yaiyatae pepo Dioso, ponē daxitacuene exana mapanacuataje. Caranata yaiyataeya navajēcabiaba Dioso pecobecovējavanējavabelia. Najamatabēcuenecopabanua ēbajaraxuanējavabelia. Bajarapamonae nexata saya namuxujemata caranata pepo Dioso, ponējavabelia jivi daxitamatacabijavabelianexa jumait्सijitsia: “Diosomē, bitso ayaijamatabēcuenenēmē,” jaijitsia. Bajara itsi tsane.

<sup>26</sup> Bajaraxuata Dioso tocopata bajarapamonae pibisiacuene pexanabiabinexa. Pacuenia jamatabēexana, exanavanapa. Mapanacuata picani Dioso tocopata petiriavi pebi pejitsipaenexa. Itsiata baitsi jane bajarapamonae ēpetiriavi najitsipa. Nexata ēpetiriavi namataenetsia naperabēquenetsiataeyabiaba. <sup>27</sup> Bajara pijinia pacuenia Dioso tocopata pebijivi petiriva pejitsipaenexa. Itsiata baitsi jane bajarapamonae ēpebijivi najitsipa. Nexata ēpebijivi namataenetsia naperabēquenetsiataeyabiaba. Bajarapacuenia pibisiacuene penatsiexanaexae, Dioso ayaicuenia naneconitsiaexanaponatsi bajarapamonae.

<sup>28</sup> Bajarapamonae apo jamatabēnajinae Dioso. Pacuenia picani Dioso tojitsipatsi bajarapamonae pexanaenexa, apo exanae. Bajaraxuata Dioso tocopata bajarapamonae penajamatabēxainaenexa ēpibisiacuene pexanaejava. <sup>29</sup> Bajarapamonae exanavanapa bitso daxita pibisiacuene. Ēpibisiacuene yabara najamatabēxainabiaba penaperabēquenetsiataenexa. Daxita pibisiacuene sivanajamatabēxainabiabanua. Jamatabēnaxainaeyababiabanua itsamonae pecobecovē. Pibisiacuene jamatabēexanabiabanua itsamonaejavabelia. Cuenecaēbabiabanua itsamonae pexainaejava. Jamatabēbeyaxuababiabanua jivi. Namataenetsia nabijataeya najumeanaenotabiabanua. Bitso cajena jivi yamaxēitojorobabiabanua. Ēpamonae ata bitso naitoya tsabiabinua. <sup>30</sup> Bajarapamonae itsamonae pepēya pibisiacuena najumetsēnētsia baracuaicuaijai tsabiabinua. Bajarapamonae apo jitsipaenua Dioso. Nexata itoya Dioso pijacuene. Apo yaiyataeyabiabinua itsamonae ata. Naitaxutojematsia naēcotabiabanua itsamonae. Bajarapamonae jumait्सi tsabiabi: “Xanē bitso ayaijamatabēcuenenēnē itsamonae matatoxenetsia,” jai tsabiabi itsamonaejavabelia. Bajarapamonae najamatabēxainabiabanua itsamonae ata pibisiacuene pexanaeyaexanaenexa. Bajarapamonae apo jumecovēnētabiabinua paxajivi, penajivi ata. <sup>31</sup> Bajarapamonae apo jamatabējumeyapētaeyabiabinua caelivaisiyo ata, Dioso pejumelivaisi. Bajarapamonae itsajivijavabelia najumecapanepaeya pejumait्सicuenia, apo exanabiabinua. Bajarapamonae asivaya apo taeyabiabinua itsajivi ata. Bajarapamonae itsajivi itsa itsacueniabatsi, apo jitsipabiabi pexaniabinexa icatsia. Bajarapamonae apo itaxutotsoniataeyabiabinua itsajivi ata. <sup>32</sup> Bajarapamonae bitso xaniavaetsia yapētane picani pacuenia Dioso itorobatsi pexanaenexa. Yapētanenua picani Dioso penavecuaxuabijavanexa bajarapitsipibisiacuene pexanaevi. Itsiata baitsi jane bajarapamonae tsiteca pibisiacuene exanapona. Orijibia sivabarēya tsabiabi itsamonae ata pibisiacuene itsa exana.

## 2

*Pacuenia itsamatacabi Dioso naneconitsiaexanaejitsia pijaneconi pexinaevi yabara pelivaisi*

<sup>1</sup> Paxamē pajudíovimē, pacatsipaebianatsi mapacueniaje. Pajudíovimē pajumait्सimē tsabiabi itsajivi yabara: “Mara pajivi pibisiacuene exanaje. Nexata Dioso naneconitsiaexanaenatsi,” pajamē tsabiabi. Bajarapacuenia paxamē itsa pajumait्सimē tsabiabi itsajivi yabara, nexata paxamē ata Dioso pacananeconitsiaexanaena. Tsipaji paxamē ata pibisiacuene paexaname bajarapacuenia itsa pajumait्सimē tsabiabi itsajivi yabara.

<sup>2</sup> Yapētanetsi baja cajena mapacuenieje. Itsamatacabi Dioso naneconitsiaexanaena pibisiacuene pexanaevi. Itsamatacabi Dioso itsa naneconitsiaexanaena pibisiacuene pexanaevi, caejivi canacujitsia, paneconivajēto xaina, bajarapaneconivajētota Dioso naneconitsiaexanaponaena. <sup>3</sup> Bajara pijinia pacuenia paxamē ata pibisiacuene paexanabiabi atamē, pajumait्सimē tsabiabi itsajivi yabara: “Mara pajivi pibisiacuene exanaje. Nexata Dioso naneconitsiaexanaenatsi,” pajamē tsabiabi. Bajara pijinia pacuenia

paxamē ata bajarapitsipibisiacuene paneexanabiabixae, pētsa pajamatabējumaitsimē tsabiabi: “Vaxaitsi judíovitsi Dioso pijajivixaetsi, apo nacananeconitsiaexanae tsane Dioso,” pajamatabējamē pētsa. Tsipaji Dioso naneconitsiaexanaena daxita pibisiacuene pexanaevi. <sup>4</sup> Bepacanaējētame xaniavaetsia pacuenia Dioso jamatabēcueneitsi. Dioso cajena abaxē bepíjia apo naneconitsiaexanae pibisiacuene pexanaevi ata. Dioso raja abaxē jamatabēcueneevetaponapona pibisiacuene pexanaevi ata pevajētsinexatsi pevecuaajibiaexanaenexa pijaneconi. Paxamē ata Dioso pacatojitsipa panecopabinexa pibisiacuene paneexanabiabijava, panenajamatabēcuene pēñeyorotsinexa Diosojavabelia. Bajaraxuata abaxē Dioso pacaitaxutotsoniatane. <sup>5</sup> Itsiata paxamē pajamatabēcuenetajamē bitso. Apo pajamatabēcopatsimē pibisiacuene paneexanaejava. Nexata ayaineconi panatoexanapona panevajēnaeyabelia. Nexata ayaicuenia Dioso pacananeconitsiaexanaena pamatacabi Dioso naneconitsiaexanaena daxita pijaneconi pexainaevi. <sup>6</sup> Bajarapamatacabi Dioso naneconitsiaexanaponaena caejivi canacujitsia. Paneconivajēto natoexanapona ita abaxē asaē tsaponapona mapanacuataje, bajarapaneconivajētota Dioso caejivi canacujitsia naneconitsiaexanaponaena. <sup>7</sup> Itsamonae jamatabēcueneenabiabatsi epexaniacuene pexanabiabinexa. Bajarapamonae jitsipabiabanua pejinavanapaenexa Dioso pijapenivenivenaenacuatatsia. Jitsipabiabanua Dioso pesivajamatabēcuenebarēyanexatsi. Jitsipabiabanua pexainaenexa matacabi apo pevereverecejava. Bajarapamonae Dioso rajutsianatsi matacabi apo pevereverecejava. <sup>8</sup> Itsamonae natojitsipa daxitacuene pexainaejava ebajarapamonaenexa. Apo jumecovēñetsinua pexaniajailivaisi. Saya exanavanapa epibisiacuene. Bajarapamonae Dioso anaeya ayaicuenia naneconitsiaexanaenatsi. <sup>9</sup> Daxitajivi pibisiacuene exana, judíovi, apo judíovi ata. Daxita bajarapamonae pibisiacuene pexanaexae, Dioso bejiobiaexanaenatsi. Bitso yanajamatabēxainaenanua pijaneconi. <sup>10</sup> Itsiata baitsi jane daxita pamona pexaniacuene pexanaevi, judíovi, apo judíovi ata, Dioso pijapenivenivenaenacuatatsia jinavanapaena. Dioso sivajamatabēcuenebarēya tsanetsi. Jinavanapaenanua jamatabēcuenexanepanaeya.

<sup>11</sup> Dioso ita naneconitsiaexanaena daxita pijaneconi pexainaevi, najēpaeya naneconitsiaexanaena. Paneconivajēta xaina caejivi canacujitsia, bajarapaneconivajētota Dioso naneconitsiaexanaponaena caejivi canacujitsia. <sup>12</sup> Pamona apo judíovi, yapētae ata xua pibisiacuene, itsiata bajarapapibisiacuene exanavanapa. Nexata bajarapapibisiacuene pexanavanapaexae, Dioso naneconitsiaexanaenatsi apo judíovi. Pamona judíovi, yapētae ata pacuenia Dioso Moiséspijinēta penajumecopatsilivaisi jumaitsi pibisiacuene pexanaeyaniva, itsiata bajarapapibisiacuene exanavanapa. Nexata bajarapapibisiacuene pexanavanapaexae, Dioso naneconitsiaexanaenatsi judíovi. <sup>13</sup> Dioso raja judíovi aneconijibia apo tae saya jema judíovi peyapētaejava yabara, palivaisi Dioso tonajumecopata Moiséspijinēta. Dioso raja judíovi aneconijibia tane matapania judíovi ita exanavanapa pacuenia Dioso itoroba Moiséspijinēta petonajumecopatsilivaisita. <sup>14</sup> Pamona apo judíovi, apo tsipaebitsi Dioso Moiséspijinēta penajumecopatsilivaisi. Itsiata apo judíovi ata itsajavata exana pacuenia itoroba Dioso Moiséspijinēta penajumecopatsilivaisita. Apo judíovi apo muxujobi atatsi, yapētane pejamatabēthētota xua pexaniacuene pexanaenexa. Yapētanenua xua ata pibisiacuene pexanaeyaniva. <sup>15</sup> Pamona pexaniacuene exanavanapa tsipaebinejevatsi Dioso Moiséspijinēta penajumecopatsilivaisi, bajarapamonae exanavanapa pejamatabēthētota peyapētaecuenia, pacuenia itorobatsi Dioso Moiséspijinēta penajumecopatsilivaisita. Daxita apo judíovi yapētane pejamatabēthētota pexaniacuene pexanaenexa. Yapētanenua xua pibisiacuene pexanaeyaniva. <sup>16</sup> Jemata raja copiapatsiana pamatacabi Dioso itorobijitsia Jesucristo penaneconitsiaexanaenexa daxitajivi. Nexata Jesucristo daxitajivi naneconitsiaexanaena muetsia daxitajivi pibisiacuene pexanavanapaneconi yabara. Naneconitsiaexanaenanua papibisiacuene ata muetsia daxitajivi najamatabēxainavanapa yabara. Nexata bajarapamatacabi daxitajivi nayapētaena

Dioso penaneconitsiaexanaejavanexatsi muetsia pexanavanapaeneconi yabara. Bajarapacuenia jivi tsipaebaponajë Dioso pitorobilivaisi itsa tsipaebaponajë.

*Judíovi yabara, Dioso Moiséspijinëta penajumecopatsilivaisi ata, yabara pelivaisi*

<sup>17</sup> Pajudíovimë, pajumaitsimë tsabiabi: “Vaxaitsi raja judíovitsi. Vaxaitsi yapëtanetsi Dioso Moiséspijinëta penajumecopatsilivaisi. Bajaraxuata Dioso nacacapanepaena. Dioso raja ëjudíovitsi vajaDioso,” pajamë tsabiabi. <sup>18</sup> Payapëtaneme baja cajena xua Dioso pacatojitsipa paneexanaenexa. Payapëtanemenua Dioso Moiséspijinëta penajumecopatsilivaisi. Bajaraxuata payapëtaneme xua pexaniacuene paneitapetsinexa paneexanavanapaenexa. <sup>19</sup> Pajamatabëjumaitsimënu tsabiabi: “Vaxaitsi cajena bitso yapëtanetsi Dioso pejumelivaisi, vajatsipaebinexa pamonaë jumetaë ata Dioso pejumelivaisi, abaxë apo pejumeyapëtaevi pexaniajailivaisicuene. Vaxaitsi jamatabëcueneitayotsianatsi pamonaë pijamatabëcueneitaquirivi, Dioso pejumelivaisivecua saya pejinavanapaevi,” pajamatabëjamënu tsabiabi. <sup>20</sup> Pajamatabëjumaitsimënu tsabiabi: “Vaxaitsi cajena nacacajëpa vajayapëtaeyaexanaenexa pamonaë abaxë apo yapëtaë pacuenia Dioso jamatabëcueneitsi. Nacacajëpanua vajayapëtaeyaexanaenexa pamonaë ata pejanajumecovënëtsivi Dioso. Nacacajëpa bajarapacuenia vajayapëtaeyaexanaenexa tsipaji yapëtanetsi pacuenia Dioso jumaitsi Moiséspijinëta penajumecopatsilivaisita. Bajarapalivaisi pexaniajailivaisi baja cajena. Yapëtaeyaexana pacuenia jivi exanaejitsia,” pajamatabëjamë tsabiabi. <sup>21</sup> Bajarapacuenia paxamë patsipaebabiabi atamë itsamonaëjavabelia, itsiata paxamë ata apo paexanaemë bajarapacuenia. “jPëtsa panacobetoxotame,” pajamë tsabiabi itsamonaëjavabelia. Itsiata paxamë panacobetoxotabiabame. <sup>22</sup> “Pëtsa panaperabëquenetsiataneme itsavajavabelia panijavajivivecua,” pajamë tsabiabi ata itsamonaëjavabelia, itsiata paxamë panaperabëquenetsiataeyabiabame itsavajavabelia panijavajivivecua. Paxamë pajumaitsimë tsabiabi: “Jumapecataya pexanaenëanëjavabelia penavajëcaecuene bitso abeje. Itsa pajonejitsipame jumapecataeya pexanaenëanë penubenaebota, pacajamatabëcuene bijianaëjitsipa,” pajamë tsabiabi. Itsiata paxamë pajoneyabiabame jumapecataeya pexanaenëanë penubenaebota penamatamotsijavanë, ofrendacuenia pejebijavanë, panenacobetoxotabiabinexa. <sup>23</sup> Paxamë pajudíovimë jivi picani patsipaebabiabame Dioso Moiséspijinëta penajumecopatsilivaisi, bitso pexanepanaelivaisi. Itsiata paxamë ata apo pajumecovënëtsimë bajarapalivaisi. Bajaraxuata jivi apo yayiataë Dioso. <sup>24</sup> Bajara paneitsixae, copiapata jane baja pacuenia baja cajena Dioso pejumelivaisibaxutota tajëvelia pacavajunupaëba. Dioso pejumelivaisibaxutota tajëvelia itsa pacavajunupaëba, jumaitsi paxamë yabara mapacueniaje: “Pamonaë apo judíovi, pibisiacuenia Dioso baracuaicuajai tsane judíovi xaniavaetsia apo petsitajinavanapaexae,” jai tajëvelia Dioso pejumelivaisibaxutota paxamë Dioso apo panejumecovënëtsijavanexa yabara.

<sup>25</sup> Paxamë pajudíovimë papebijivimë, pacaperabëcaucuba itsa abaxë patsiquirinacuetoximë. Baitsi pacabouppiperabëcaucuba. Bajarapacuenia pacaperabëcaucuba panenayapëtaenexa Dioso papijajivicuenemë. Bajarapacuenia pacatonamatamota matapania itsa pajumecovënëtavanapame Dioso Moiséspijinëta penajumecopatsilivaisi. Itsa apo pajumecovënëtsimë tsipae Dioso Moiséspijinëta penajumecopatsilivaisi, papecaperabëcaucubivi ata, itsiata Dioso apo papijajivimë tsipae. <sup>26</sup> Pamonaë apo judíovi ata, apo peperabëcaucubivi atatsi, pejumecovënëtavanapaexae pacuenia Dioso Moiséspijinëta penajumecopatsilivaisi itorobatsi, nexata bajarapamonaë ata Dioso pijajivicuenia tanetsi. <sup>27</sup> Pamonaë apo judíovi, apo peperabëcaucubivi atatsi, itsiata pejumecovënëtavanapaexae Dioso Moiséspijinëta penajumecopatsilivaisi, bajarapamonaë itsamatacabi pacaurabiana Diosojavabelia. Bajarapacuenia pacaurabiana Diosojavabelia tsipaji Dioso Moiséspijinëta penajumecopatsilivaisi payapëtaë atamë, papecaperabëcaucubivi atanua, itsiata apo pajumecovënëtsimë Dioso Moiséspijinëta penajumecopatsilivaisi. <sup>28</sup> Pajivi perabëcaucutsi atatsi penayapëtaenexa Dioso pijajivitonëcuene, saya peperabëcaucutsijavatsi yabara Dioso pijajivitonëcuenia apo taetsi. <sup>29</sup> Pajivi pepacuenia Dioso pijajivitonë, bajarapajivi peneta pejamatabëëthëtovetsina Dioso jumecovënëta. Pajivi

pepacuene Dioso pijajivitonë, bajarapajivi saya naniavelia apo perabëcaucutsitsi. Biji rajane pejamatabëjëjtota pejanajamatabëcuene rajutatsi Espíritu Santo. Bajarapajivi xua exanaponapona, exanaponapona Dioso pesivabarëyanexatsi. Bajaraxua apo exanaponapona saya mapanacuapijivi pesivabarëyanexatsi.

### 3

<sup>1</sup> ¿Detsa xua judíovi xaina Diosojavabelia, pamona apo judíovivecua? ¿Detsa xua yabara toxanepanatsi Diosojavabelia ponë peperabëcaucutsinëtsi apo peperabëcaucutsinëtsivecua? <sup>2</sup> Palivaisianë judíovi toxanepanatsi Diosojavabelia, navita. Penamataxainaelivaisi, palivaisi judíovi toxanepanatsi Diosojavabelia, maitisije. Dioso tonajumelivaisicopatatsi bajarapamonaejavabelia. <sup>3</sup> Itsamonae judíovi apo jumecovënëtsi pacuenia Dioso najumecapanepaeya jumaitsi petoexanaenexatsi. Pëtsa bajarapacueneyabara pajamatabëjumaitsimë mapacueniaje: “Dioso meta itsiata apo exanae tsane pacuenia picani najumecapanepaeya jumaitsi pexanaenexa. Tsipaji judíovi apo jumecovënëtsi,” pajamatabëjamë pëtsa Dioso yabara. <sup>4</sup> Dioso cajena apo penajumetsënëtsinë. Jivi rajane banajumetsënëta. Dioso pexaniajailivaisi jivijavabelia petsipaebabiabijava yabara, tajëvelia Dioso pejumelivaisibaxutota jumaitsi mapacueniaje: Xamë Diosomë, pexaniajailivaisi jivijavabelia tsipaebabiabame. Jivi cajumeaebi ata, itsiata daxitajivi peyapëtaenexa, xamë apo nenajumetsënëtsinë, jai Dioso pejumelivaisibaxutota.

<sup>5</sup> Pibisiacuene vaxaxanaejava yabara Dioso nacananeconitsiaexanaena. Nexata Dioso vajanacananeconitsiaexanaejavata, najamatabëcueneitajëtsiana daxitajivi peyapëtaenexa Dioso apo pejitsipaeñëcuene pibisiacuene pexanaejava. Bajaraxuata pamona naneconita Diosojavabelia, Dioso naneconitsiaexanabiaba. Nexata Dioso jivi penaneconitsiaexanaejava yabara, itsa jumaitsinë tsipae: “Dioso pibisiacuene exana itsa naneconitsiaexana pijaneconi pexainaevi,” itsa janë tsipae, nexata jamatabëcuenenavëxaniabiaya jumaitsinë tsipae. Tsipaji Dioso itsa apo naneconitsiaexanae tsipae pijaneconi pexainaevi, Dioso apo najamatabëcueneitajëtsi tsipae pibisiacuene pexanaejava apo pejitsipaeñëcuene. Nexata pacuenia Dioso apo pejumecovënëtsivi banajamatabëxaina, bajarapacuenia najamatabëxainaejitsipajë. <sup>6</sup> Tsipaji Dioso saya jema jivi apo penaneconitsiaexanaenë. Itsa saya jema Dioso jivi naneconitsiaexanaejitsipa, apo naneconitsiaexanae tsipae épijaneconi pexainaevi. Nexata caejivi canacujitsia pibisiacuene pexanaeconi yabara, paneconivajëto xainapona, bajarapaneconivajëto Dioso apo naneconitsiaexanapona tsipae.

<sup>7</sup> Itsamonae meta jamatabëcuenenavëxaniabiaya jumaitsi tsane mapacueniaje: “Daxitajivi pecanëjëtsinexa Dioso apo penajumetsënëtsinëcuene, vaxaitsi yamaxëitojorobiaya jivi livaisi tsipaebabiabianatsi. Bajarapacuenia yamaxëitojorobiaya jivi livaisi tsipaebabiabi atatsi tsane, itsiata Dioso apo nacananeconitsiaexanae tsane. Tsipaji vaxaitsi yamaxëitojorobiaya jivi livaisi vajatsipaebabiabijava pejamatabëcueneta, daxitajivi canaëjëtsiana Dioso bitso pexaniajainëcuene, apo penajumetsënëtsinëcuene. Bajaraxuata Dioso apo nacananeconitsiaexanae tsane vajanajumetsënëtabiabiabijava yabara,” jai meta tsane itsamonae jamatabëcuenenavëxaniabiaya. <sup>8</sup> Bajarapacuenia itsa najamatabëxainaena bajarapamonae, nexata meta jamatabëcuenenavëxaniabiaya mataropotsia jumaitsi tsane: “Pibisiacuene meta vaxaxanaejava ata xanepana. Nexata pibisiacuene exanabiabianatsi. Tsipaji vaxaitsi pibisiacuene vaxaxanabiabiabijava pejamatabëcueneta, daxitajivi canaëjëtsiana Dioso pibisiacuene apo pexanaenëcuene,” jai meta tsane bajarapamonae jamatabëcuenenavëxaniabiaya. Bajarapacuenia itsa jumaitsi tsane, nexata pexaniajailivaisi jivijavabelia apo tsipaebabiabi tsane. Itsiata baitsi jane itsamonae najumetsënëtsiaya xanë yabara jumaitsi tsabiabi: “Pablo raja itorobapona jivi bajarapacuenia pibisiacuene pexanaenexa,” jai tsabiabi xanë yabara. Bajarapacuenia pejumaitsi xanë yabara, Dioso naneconitsiaexanaenatsi.

*Pacuenia daxitajivi naneconita Diosojavabelia yabara pelivaisi*

<sup>9</sup> ¿Nexata tsaja ějudíovi saicaya aneconijibia Dioso tane daxita mapanacuapijivi ve-  
cuaje? Jume raja. Jumaitsině baja cajena mapacueniaje. Daxitatsi mapanacuapijivitsije  
pibisiacuene ěvajaexanaevi. Judíovi, apo judíovi ata, bajara itsi. <sup>10</sup> Daxitatsi pibisiacuene  
vajaexanaejava yabara, Dioso pejumelivaisibaxutota jumaitsi mapacueniaje:

Caejivi ata aneconijibia apo ponaponae Dioso pitabarata. <sup>11</sup> Ajibi peyapĕtaejivi  
pacuenia Dioso jamatabĕcueneitsi. Ajibi pepacuene pejamatabĕĕthĕtovetsina  
pejumecovĕnĕtsijivi Dioso. <sup>12</sup> Daxita Diosovecua naxuabiaya jinavanapa.  
Daxita ajamatabĕcuenebeje. Ajibi pexaniacuene pexanabiabijivi. <sup>13</sup> Pacuenia  
petĕpaenĕ pemĕthĕ tuxutsaeba, bajara itsi bajarapamonae pecuibovojotota  
pecuaicuaijajava pibisialivaisi. Pijumeta jivi yamaxĕitojorobabiaba. Pacue-  
nia jomo pecuibovojotota xaina piatanejava, bajara pijinia itsi bajarapa-  
monae pecuaicuaijajava penajumetsĕnĕtsilivaisi. <sup>14</sup> Pecuibovojotota cuaicuai-  
jai ěpibisialivaisi pianaepanaenexa. <sup>15</sup> Itsacuene apo exanae atatsi, bepíjia  
jitsipa jivi pebeyaxuabinexa. <sup>16</sup> Itsabelia jinavanapa, bejiobiaexanabiaba itsa-  
monae. <sup>17</sup> Bajarapamonae apo yapĕtae xaniavaetsia peyajavajinavanapaenexa  
jivi. <sup>18</sup> Bajarapamonae apo canaĕjĕtsi pejunavinexa Diosojavabelia,  
jai mapacueniaje Dioso pejumelivaisibaxutota daxitatsi mapanacuapijivitsi yabara.

<sup>19-20</sup> Vaxaitsi baja cajena yapĕtanetsi mapacuenieje. Bajayata Dioso pejumelivaisi  
tonajumecopata ějudíovi picani pejumecovĕnĕtavanapaenexa. Itsiata judíovi apo  
jumecovĕnĕtsicapanepae bajarapalivaisi. Bajaraxuata judíoviyajuvĕnĕnĕ, caenĕ ata,  
acuenebi pejumaitsinexa: “Xanĕ cajena apo tonaneconitsinĕ Dioso,” pejainexa. Daxita  
mapanacuapijivi, judíovi, apo judíovi ata, beyapĕtane penaneconitsijava Diosojavabelia.  
Tsipaji itsajivi ata apo caĕjĕpaetsi pejumecovĕnĕtsinexa pacuenia itoroba Dioso pe-  
najumecopatsilivaisita. Bajarapalivaisi Dioso najumecopata pibisiacuene vajaexana-  
vanapaejava vajasivajamatabĕjumaitsinexa mapacueniaje: “Xaniajai rabaja. Xanĕ ata  
pibisiacuene taexanaenĕ,” vajajamatabĕjainexa bajarapalivaisi pejamatabĕcueneta.

*Pacuenia Dioso aneconijibia tane pajivi najamatabĕcuenecopata Jesucristojavabelia yabara  
pelivaisi*

<sup>21</sup> Aeconoxae baja mapamatacabitaje Dioso nacayapĕtaeyaexana pacuenia nacatoex-  
ana aneconijibia vajanacataenexa. Dioso apo jamatabĕjumaitsi: “Pamonae jumecov-  
ĕnĕtsicapanepa Moiséspijinĕta tanajumecopatsilivaisi, bajara ěpamonae aneconijibia  
taenajĕ,” apo jamatabĕjai. Pacuenia Dioso capanepaejitsia Dioso pejumecovĕnĕtsivi,  
bajayata Diosojumepaebivi profetavi tajĕvelia yaquina Dioso pejumelivaisibaxutota.  
<sup>22</sup> Mara pacuenia Dioso jivi aneconijibia taneje. Pajivi jamatabĕjumaitsi: “Xaniajai.  
Jesucristo itsa tĕpa cruzata, pibisiacuene taexanaeneconi yabara tĕpa,” jamatabĕjai,  
bajarapajivi Dioso aneconijibia tanetsi. Dioso aneconijibia taenatsi daxita pamona  
jumecovĕnĕta Jesucristo cruzata pesivatĕpaejavatsi pijaneconi yabara. Tsipaji Dioso  
daxitajivi najĕpaeyatane. <sup>23</sup> Daxitajivi baja cajena pibisiacuene exana. Bajaraxuata  
caejivi ata aneconijibia Dioso pejitsipacuena apo toponaponae. Daxitajivi Diosovecua  
naxuabiaya jinavanapa. <sup>24</sup> Itsiata baitsi jane Dioso pinijicuenia piasivaxae daxitajivi,  
aneconijibia tane daxita pamona jumecovĕnĕta Jesucristo cruzata pesivatĕpaejavatsi  
pijaneconi yabara. Jivi apo namatavenonae pijacuata penaneconimatamotsinexa Dioso-  
javabelia. Tsipaji baja aneconijibia tanetsi Jesucristo pecomuatsixaetsi pibisiacuene pex-  
anaeneconivecua. <sup>25</sup> Dioso copata Jesucristo petĕpaenexa cruzata vajanacaneconimata-  
motsinexa, pibisiacuene vajaexanaeneconimi. Nexata itsa jumecovĕnĕtatsi Jesucristo  
cruzata vajanacasivatĕpaejava, nacavecuaajibiaexana pibisiacuene vajaexanaeneconimi.  
Bajarapacuenia Dioso copata Jesucristo cruzata vajanacasivatĕpaenexa mapanacuapijiv-  
itsi. Tsipaji Dioso apo jitsipae pibisiacuene vajaexanaejava. Bajaraxuata Dioso anecon-  
ijibia nacatane Jesucristo itsa nacaneconimatamota, pibisiacuene vajaexanaeneconimi.

Pepo bajayata pejinavanapaevimiyajuvënëvi ata, najamatabëcuene copaba Dioso javabelia. Nexata bajarapamonaemi pibisiacuene exanae ata, itsiata Dioso apo naneconitsiaexanaetsi. Tsipaji Dioso tajëvelia yapëtane Jesucristo pesivatëpaejavanexa bajarapamonaemi ata pibisiacuene pexanae neconi yabara. <sup>26</sup> Ajena, mapamatacabitaje, Dioso jivi tsitanajamatabëcuene itajëta jivi pibisiacuene pexanaejava Dioso apo pejitsipaenëcuene. Tsitanajamatabëcuene itajëtana aneconi jibia petaejavanexa pamona jume covënëta Jesucristo pesivatëpaejavatsi cruzata pijaneconi pevecua ajibiaexanaenexatsi.

<sup>27</sup> Bajarapacuenia Dioso nacatoexana aneconi jibia vajanacataenexa. Dioso aneconi jibia apo nacatae vajacuata vajaexanaejava yabara. Biji rajane Dioso aneconi jibia nacatane vajajumecovënëtsixae Jesucristo vajanacasivatëpaejava cruzata vajaneconi yabara. Nexata ayaijamatabëcuene jivitsi vajanacataenexa, acuenebi vajajumaitsinexa itsajivijavabelia: “Xanë taexanaejava pejamatabëcuene ta, Dioso aneconi jibia netane,” vajainexa acuenebi. <sup>28</sup> Vaxaitsi baja cajena yapëtanetsi mapacueneje. Dioso aneconi jibia tane pajivi jume covënëta Jesucristo pesivatëpaejavatsi cruzata pijaneconi yabara. Bajarapajivi apo jume covënëtsi ata Dioso Moisés pijinëta penajumecopatsilivaisi, Dioso itsiata aneconi jibia tanetsi pejumecovënëtsixae Jesucristo pesivatëpaejavatsi cruzata pijaneconi yabara.

<sup>29</sup> Dioso raja ëjudíovi apo pija Dioso. Dioso raja apo judíovi ata pija Dioso. <sup>30</sup> Caenë rabaja Dioso. Pematatsënëa baja itsanë Dioso ajibi. Bajaraponë Dioso judíovi aneconi jibia tane, pamona jume covënëta Jesucristo pesivatëpaejavatsi cruzata pijaneconi yabara. Bajara pijinia pacuenia Dioso aneconi jibia tane pamona apo judíovi ata. <sup>31</sup> Vaxaitsi baja xaniavaetsia Jesucristo jume covënëtatsi vajanacasivatëpaejava cruzata vajaneconi yabara. Nexata Dioso Moisés pijinëta penajumecopatsilivaisi yabara, apo bejamatabëjumaitsi: “Dioso Moisés pijinëta penajumecopatsilivaisi tajumecovënëtsijavami, copatajë baja. Tsipaji baja jume covënëtajë Jesucristo tanesivatëpaejava cruzata tajaneconi yabara,” apo bejamatabëjaitsi. Biji rajane Jesucristo vajanacasivatëpaejava cruzata, itsa jume covënëtatsi, Dioso Moisés pijinëta penajumecopatsilivaisi ata bajarajota yajavajume covënëtatsi.

#### 4

*Pacuenia Abrahampijinë bajayata Dioso aneconi jibia tanetsi pejumecovënëtsixae pacuenia Dioso najumecapanepaeya jumaitsi yabara pelivaisi*

<sup>1</sup> Pacatsipaebijitsiatsi pajamatabëcuene livaisi yabara Abrahampijinë Dioso aneconi jibia tanetsi. <sup>2</sup> Abrahampijinë pijacuata ëpexaniacuene itsa exanabiabijitsipa, nexata jumaitsi tsipae Dioso javabelia: “Ëpexaniacuene taexanabiabixae, nexata aneconi jibia netaneme,” jai tsipae. Itsiata baitsi jane Abrahampijinë Dioso javabelia apo jumaitsi bajarapacuenia. Tsipaji Abrahampijinë ëpexaniacuene pijacuata exanabiabi ata tsipae, bajaraxua yabara Dioso aneconi jibia apo taetsi tsipae. <sup>3</sup> Biji rajane Dioso pejumelivaisibaxutota Abrahampijinë yabara jumaitsi mapacueniaje: “Abrahampijinë najamatabëcopatsiaya Dioso javabelia pejamatabëjumaitsiabiabixae: ‘Xaniajai. Pepacuene Dioso netoexanaena pacuenia najumecapanepaeya nejumaitsi,’ pejamatabëjaitsiabiabixae, nexata Dioso aneconi jibia tanetsi,” jai Dioso pejumelivaisibaxutota Abrahampijinë yabara. <sup>4</sup> Pajivi itsanë pijajava tonacuene baponapona, bajarapajivi xua rajutatsi, amoneya apo rajutsitsi. Petonacuene bixae matamotatsi. <sup>5</sup> Pajivi apo exanae ata pexaniacuene, itsiata jamatabëjumaitsi: “Dioso, ponë penaneconitsivi pijaneconivecua ajibiaexanabiaba, bajaraponë pepacuene necapanepaena pacuenia najumecapanepaeya jumaitsi tanecapanepaenexa,” jamatabëjai, bajarapajivi Dioso aneconi jibia taenatsi pecapanepaenexatsi pijaneconivecua. <sup>6</sup> Pepo bajayata Davidpijinë vajunupaeba pejamatabëcuene barëyajava pamona baja Dioso aneconi jibia tanetsi. Bajarapacuenia Dioso aneconi jibia tanetsi bajarapamona pejumecovënëtsixae Dioso najumecapanepaeya pejumaitsi cueniatsi. Bajarapamona Dioso aneconi jibia apo taetsi, pijacuata ëpexaniacuene exanabiabi ata. <sup>7</sup> Davidpijinë pepo bajayata tajëvelia bajarapamona yabara jumaitsi mapacueniaje:

Jamatabëcuenebarëya baja tsavanapae pamonae picani naneconita Diosojavabelia. Barajamatabëcuenexanepanatsi baja Dioso. Tsipaji baja pibisiacuene pexanaeneconimi, vecuaajibiaexanatsi. <sup>8</sup> Jamatabëcuenebarëya baja tsaponaponae pajivi pibisiacuene pexanaejivi ata, itsiata Dioso aneconijibia itsa tanetsi, jai mapacueniaje Davidpijinë bajayata.

<sup>9</sup> Bajarapacuenia Davidpijinë itsa jumaitsi, pejamatabëcuenebarëyatsavanapaevi baja, ëjudïovi, peperabëcaucubivitsi yabara, apo jumaitsi. Pamonae apo judïovi, apo peperabëcaucubivi atatsi, yabara jumaitsi. Xaniajanë pacuenia pacatsipaebijitsiatsi. Abrahampijinë bajayata Dioso jumecovënëta najumecapanepaeya pejumaitsicueniatsi. Nexata baja Abrahampijinë Dioso aneconijibia tanetsi pibisiacuene pexanaeneconimivecua. <sup>10</sup> ¿Abrahampijinë tsajane baja pepuaperabëcaucutsitsi, Dioso aneconijibia tanetsi? Jume raja. Abaxë apo perabëcaucutsinejeva atatsi, aneconijibia tanetsi pejumecovënëtsixae Dioso najumecapanepaeya pejumaitsicueniatsi. <sup>11</sup> Dioso baja aneconijibia pepuataetsi, Abrahampijinë perabëcaucutatsi. Bajarapacuenia Abrahampijinë perabëcaucutatsi daxitajivi peyapëtaenexatsi Dioso aneconijibia petaejavatsi. Bajaraxuata daxita pamonae apo peperabëcaucubivi atatsi, itsa jamatabëjumaitsi: “Xaniajai. Pepacuene Dioso netoexanaena pacuenia najumecapanepaeya jumaitsi,” itsa jamatabëjai, bajarapamonae Abrahampijinë bepexi Dioso tanetsi, apo peperabëcaucubivi atatsi. Abrahampijinë abaxë apo perabëcaucutsi atatsi, Dioso pejumecovënëtsixae, aneconijibia tanetsi. <sup>12</sup> Xaniajai rabaja. Abrahampijinë bepexi Dioso tanetsi daxita pamonae peperabëcaucubivitsi. Bajarapamonae Abrahampijinë bepexi Dioso tanetsi apo ëpeperabëcaucubijavatsi yabara. Biji rajane Abrahampijinë bepexi Dioso tanetsi tsipaji bajarapamonae ata abaxë apo perabëcaucubi atatsi, jumecovënëta pacuenia Dioso najumecapanepaeya jumaitsi.

*Pacuenia tocopiapatatsi pajivi jumecovënëta pacuenia Dioso najumecapanepaeya jumaitsi petoexanaenexatsi yabara pelivaisi*

<sup>13</sup> Bajayata Dioso najumecapanepaeya jumaitsi Abrahampijinëjavabelia: “Carajutsianatsi daxita mapairaje nijairanexa. Nevënamuto ata, nexi, nemomoxi ata, pijairanexa,” jai Dioso Abrahampijinëjavabelia. Bajarapacuenia Dioso jumaitsi Abrahampijinëjavabelia tsipaji Dioso aneconijibia tanetsi Abrahampijinë pejumecovënëtsixae pacuenia Dioso najumecapanepaeya jumaitsi. Nexata acuenebi vajajumaitsinexa: “Abrahampijinë Dioso aneconijibia tanetsi tsipaji jumecovënëta Dioso Moiséspijinëta penajumecovënëtsilivaisi,” vajajainexa. Tsipaji baja Abrahampijinë pepuatëpae, bexëa Moiséspijinë ponapona. <sup>14</sup> Dioso najumecapanepaeya itsa jumai tsipae perajutsinexa bajarapaira ëpamonae jumecovënëta Dioso Moiséspijinëta penajumecopatsilivaisi, nexata bajarapamonae, Abrahampijinë pemomoxi ata, apo rajutsitsi tsipae bajarapaira. Tsipaji itsajivi ata, bajarapamonaeyajuvënëjivi, apo jumecovënëtsicapanepae Dioso Moiséspijinëta penajumecopatsilivaisi. Bajarapamonae Dioso pejumecovënëtsijava ata, nacueratsipa. Dioso najumecapanepaeya bajarapaira perajutsiapaebijavamitsi ata, toajumematamobi tsipaetsi. <sup>15</sup> Tsipaji daxita pamonae apo jumecovënëtsi pacuenia Dioso itoroba Moiséspijinëta penajumecopatsilivaisita, bajarapamonae Dioso naneconitsiaexanaena. Itsiata baitsi jane itsa ajibi tsipae pitavetsilivaisitsi, nexata pijinia ajibi tsipae peyabarananeconitsia exanaejavanexatsi.

<sup>16</sup> Dioso cajena najumecapanepaeya jumaitsi Abrahampijinëjavabelia amoneya perajutsinexa bajarapaira. Perajutsinexa Abrahampijinë pexijavabelianexa ata, pemomoxijavabelianexa ata. Bajarapaira Abrahampijinë Dioso rajutsiapaebatsi Dioso najumecapanepaeya pejumaitsijavatsi Abrahampijinë pejumecovënëtsixae. Bajarapaira Dioso najumecapanepaeya itsa rajutsiapaeba pamonae jumecovënëta Dioso Moiséspijinëta penajumecopatsilivaisi, bajara ëpamonae itsiata apo rajutsiapaebi. Biji rajane rajutsiapaeba pamonae ata jumecovënëta pacuenia Dioso najumecapanepaeya jumaitsi, pacuenia bajayata Abrahampijinë jumecovënëta Dioso najumecapanepaeya pejumaitsicueniatsi. Bajaraxuata daxitatsi, Dioso vajajumecovënëtsivi, Dioso nacatane Abrahampijinë

bepexitsi. <sup>17</sup> Bajarapacuenia Abrahampijinē bepexitsi Dioso vajanacataejavanexa yabara, Dioso pejumaitisijava Abrahampijinējavabelia Dioso pejumelivaisibaxutota tajēvelia jumaitis mapacueniaje: “Ayaibitsaētoخانeto jivi bepijasalinainēmē cataeyaexanaenatsi,” jai Dioso pejumelivaisibaxutota tajēvelia Dioso pejumaitisijava Abrahampijinējavabelia vaxaitsi yabara. Dioso baja cajena icatsia piasaēyaexanaenē petēpaevimi ata. Xua picani abaxē ajibi mapanacuataje, Dioso baja exana pijumeta.

<sup>18</sup> “Abraham raeta baja pexi apo xainae tsane,” sivajamatabējai atatsi daxitajivi bajayata, itsiata Abrahampijinē Dioso apo jumeaebi. Jumecovēnēta Dioso pejumaitisicueniatsi. Evetaponapona jivi ayaibitsaētoخانeto pamo pexanaenexatsi pacuenia Dioso najumecapanepaeya jumaitisitsi. <sup>19</sup> Bajarapamatacabi Abrahampijinē imoxo pexinae cien pavaibeje. Bajaraponē pijava Sara, mavecova. Perujuvayo baja pijinia. Pexi picani pexinaenexabeje, apo caējēpaetsibeje. Tsipaji baja bitso perujujivibeje. Bajaraxua Abrahampijinē nacueneyapētae ata, itsiata jumecovēnēta Dioso pacuenia najumecapanepaeya jumaitisitsi petoexanaenexatsi. <sup>20</sup> Apo jumeaebi pacuenia Dioso najumecapanepaeya jumaitisitsi. Bitso biji pevajēnaeyabelia jamatabēcueneevetaponapona pacuenia Dioso najumecapanepaeya jumaitisitsi petocopiapatsinexatsi. Nexata Dioso yabara Abrahampijinē jumai tsabiabi: “Dioso cajena bitso ayaijamatabēcuenenē,” jai tsabiabi. <sup>21</sup> Abrahampijinē xaniavaetsia yapētane Dioso pecaējēpaenēcuenetsi petoexanaenexatsi daxita pacuenia najumecapanepaeya jumaitisitsi. <sup>22</sup> Abrahampijinē Dioso jumecovēnēta petoexanaenexatsi pacuenia najumecapanepaeya jumaitisitsi. Bajaraxuata Dioso aneconijibia tanetsi.

<sup>23</sup> Dioso pejumelivaisibaxutota jumaitis pacuenia Dioso aneconijibia tanetsi Abrahampijinē jumecovēnētsixae Dioso najumecapanepaeya pejumaitisicueniatsi. Bajarapacuenia Dioso pejumelivaisibaxutota apo jumaitis saya vajayapētaenexa Abrahampijinē pelivaisi. <sup>24</sup> Biji rajane nacyatoyaquina vaxaitsi ata vajanacamuxujobinexa. Nexata vaxaitsi ata itsa jumecovēnētatsi pacuenia Dioso najumecapanepaeya jumaitis, aneconijibia Dioso nacyatane. Bajaraponē Dioso vajatuxanenē Jesucristo icatsia asaēyaexanatsi petēpacujinae. <sup>25</sup> Dioso athēbēvetsica itorobica Jesús vajanacasivatēpaenexa mapanacuataje. Nexata Jesús itsa nacyasivatēpa, nacaneconimatamota pibisiacue ne vajaexanaenecanimi. Bajaraxuacujinae Dioso icatsia asaēyaexanatsi petēpaevjavavecua vajanacavecuaajibiaexanaenexa vajanecanimi. Nexata baja Dioso aneconijibia nacyatane Jesús pejamatabēcueneta.

## 5

### *Pacuenia jamatabēcuenenabarēya pajivi Dioso aneconijibiatanetsi yabara pelivaisi*

<sup>1</sup> Dioso aneconijibia nacyatane vajajumecovēnētsixae pacuenia Dioso najumecapanepaeya jumaitis. Nexata sivajamatabēcuenenabarēyatsi tsavanapae Dioso. Vajatuxanenē Jesucristo vajanacasivatēpaexae vajanecanini yabara, bajaraponē pejamatabēcueneta nacajamatabēcuenenabarēyayaexana. <sup>2</sup> Vajajumecovēnētsixae Jesucristo vajanacasivatēpaejava, Dioso nacaitaxutotsoniataeyabiaba. Nexata Dioso sivajamatabēcuenenabarēyatsi. Tsipaji yapētanetsi itsamatacabi Dioso vajayajavajinavanapaejavanexa penivenivenaenacuatatsia. <sup>3</sup> Mapanacuapijivi nacabejiobiaexanabiabi ata, itsiata sivajamatabēcuenenabarēyatsi tsabiabi. Tsipaji yapētanetsi vajanacabejiobiaexanabibicueneta, nacajamatabēcuenesaēyaexanapona Diosojavabelia. Nexata nacajamatabēcuenecaējēpa vajanajamatabēcuenesaētsinexa, daxita pibisiacue nacyatocopiapatsi ata. <sup>4</sup> Itsa najamatabēcuenesaētatsi, nacyatocopiapatsi ata pibisiacue, Dioso pijinia nacyasivabarēya. Nexata itsa yapētanetsi Dioso vajanacasivabarēyajava, nexata jamatabēcueneevetatsi Dioso vajanacatoexanaenexa pacuenia najumecapanepaeya jumaitis. <sup>5</sup> Nexata itsa jamatabēcueneevetatsi Dioso vajanacatoexanaenexa pacuenia najumecapanepaeya jumaitis, apo nacueratsitsi tsane. Bajarapacuenia apo nacueratsitsi tsane tsipaji baja Dioso nacyarajuta Espiritu Santo vajanacatsijamatabēcuenenexa. Nexata Espiritu Santo xaniavaetsia nacyapētaeyaxana Dioso vajanacaasivajava.

<sup>6</sup> Vaxaitsi bitso ajamatabëcuenesaëjibitsi pibisiajamatabëcuenevixaetsi. Acuenebi vajacuata vajanacapanepaenexa Diosojavabelia vajaneconi yajava. Itsiata baitsi jane Dioso pecaëjësimatecabita, Cristo nacasivatëpa pibisiacuene vajaexanaeconi yabara. <sup>7</sup> Mapanacuataje itsajivi itsa jamatabëcueneyavenona itsanë, nexata itsa beyaxuabiapaebatsi pejamatabëcueneyavenonaexae, pecajunavi baja apo jamatabëcueneyavenonae tsipae. Itsajivi meta itsiata jamatabëcueneyavenonaejitsipa, beyaxuabijitsia atatsi. Bजारapacuenia jamatabëcueneyavenonaejitsipa itsa bitso pexaniajamatabëcuenenë, ponëjavabelia jamatabëcueneyavenonaejitsia. <sup>8</sup> Itsiata baitsi jane vaxaitsi Dioso nacayavenona, pibisiacuene vajaexanaevi ata. Nexata Dioso nacatsitanajamatabëcueneitajëta bitso vajanacaasivajava. Dioso pexënato athëbëvetsica itorobica vajanacasivatëpaenexa mapanacuataje. <sup>9</sup> Jesucristo vajanacasivatëpaexae, nexata baja maparucaeje Dioso aneconijibia nacatane. Bजारaxuata yapëtanetsi Jesucristo pejamatabëcueneta Dioso vajanacacapanepaejavanexa vajanacananeconitsia exanaejavanexamivecua. <sup>10</sup> Vaxaitsi picani Dioso pijavajabitsaëvitsi. Nexata pexënato vajanacasivatëpaexae, Dioso baja nacabarajamatabëcuenexanepana. Bजारaxuata maparucaeje yapëtanetsi Dioso pepacuene vajanacacapanepaejavanexa vajanacananeconitsia exanaejavaminexavecua. Tsipaji pexënato asaë tsaponaponae vajanacatocuaicuajainënexa paxajavabelia. <sup>11</sup> Orijibia vaxaitsi bitso sivajamatabëcuenebarëyatsi Dioso vajanacaasivajava. Tsipaji vajatuxanenë Jesucristo pejamatabëcueneta Dioso baja nacabarajamatabëcuenexanepana.

#### *Adánpijinë Cristo ata yabara pelivaisi*

<sup>12</sup> Copiaya caenë, Adánpijinë, pibisiacuene exana. Nexata mapanacuataje daxitajivi pibisiacuene pexanaejavanexa, taxuxuaba. Taxuxuabanua jivi petëpaejavanexa. Nexata jivi petëpaejava, yacaëjëpa daxitanacuapijivijava. Tsipaji daxitanacuapijivi pibisiacuene exana. <sup>13</sup> Dioso Moiséspijinëta penajumecopatsilivaisi ata pevajënaeya, mapanacuapijivi pibisiacuene exanavanapa. Itsiata abaxë apo petonajumecopatsixaetsi Dioso pejumelivaisi, itsajivi ata acuenebi pejumaitsijavatsi: “Pananeconitame raja Diosojavabelia,” pejajivatsi pibisiacuene pexanaejava yabara. <sup>14</sup> Adánpijinë peponaponaejavaveliacujinae, jivi jinavanapa. Bजारapamonaemi jinavanapa Moiséspijinë pevajënaeya. Daxita bajarapamonaemi ata pibisiacuene exana. Nexata tēpaponae. Bजारapamona pibisiacuene itsa exana, itsiata Adánpijinë papibisiacuene exana, cuenejēpaeya apo exanae. Cristo, ponë tajëvelia vajunupaebatsi pepatsijavanexatsica, Adánpijinëbeje, apo najamatabëcuenejēpaebeje. Adánpijinë pejamatabëcueneta, daxitajivi pibisiacuene exanavanapa. Nexata daxitajivi naneconita Diosojavabelia. Cristo pijinia pejamatabëcueneta, jivi ayaibitsaëtoxaneto Dioso aneconijibia tanetsi.

<sup>15</sup> Nexata Adánpijinë papibisiacuene exana, apo najēpaebeje papexaniacuene Dioso nacatoexana Jesucristo pejamatabëcueneta. Caenë, Adánpijinë, pibisiacuene pexanaejava pejamatabëcueneta, daxitajivi tēpaponae. Biji rajane Dioso vajanacaitaxutotsoniatæjava, bitso pexaniacuene. Tsipaji Dioso athëbëvetsica itorobica vajatuxanenë Jesucristo vajanacasivatëpaenexa mapanacuataje, vajanacavecuaajibiaexanaenexa daxita vajaneconimi. Nexata bajarapacuenia caenë, Jesucristo, pexaniacuene exana pecapanepaenexa jivi ayaibitsaëtoxaneto. <sup>16</sup> Caenë saya picani Adánpijinë. Itsiata pibisiacuene itsa exana, yacaëjëpa daxitajivijava. Nexata daxitajivi pibisiacuene pexanaexae, naneconita Diosojavabelia. Itsiata baitsi jane Jesucristo xaniavaeta daxita xua Adánpijinë pejamatabëcueneta bijiana picani. Jesucristo pejamatabëcueneta Dioso aneconijibia tane daxita pamona jumecovënëta Jesucristo pesivatëpaejavatsi pibisiacuene pexanaeconi yabara. <sup>17</sup> Caenë Adánpijinë pibisiacuene pexanaexae, daxitajivi tēpaponae bajarapamonaemi ata pibisiacuene pexanaexae. Itsiata caenë Jesucristo vajanacasivatëpaexae, maparucaeje Dioso baja nacaitaxutotsoniatane. Bजारaxuata itsacuenejavayo ata Dioso apo toexanae atatsi, Dioso aneconijibia nacatane. Daxita pamona jumecovënëta Jesucristo pejamatabëcueneta Dioso aneconijibia petæjavatsi,

bajarapamonae ajamatabëcuenesaë tsavanapae tsane Dioso pejumecovënëtsijava Jesucristo peyavenonabiabixaetsi.

<sup>18</sup> Daxitajivi naneconita Diosojavabelia caenë, Adánpijinë, copiaya pibisiacuene pexanaexae. Caenë pijinia, Jesucristo, pexaniacuene pexanaexae, daxita pamonaë jumecovënëta Jesucristo pesivatëpaejavatsi pibisiacuene pexanaeneconi yabara, Dioso aneconijibia tanetsi. Nexata bajarapamonae Dioso rajutsianatsi matacabi apo pevereverecaejava. <sup>19</sup> Caenë, Adánpijinë, copiaya apo jumecovënëtsi Dioso pitorobicueniatsi. Nexata bajaraponë pejamatabëcueneta, jivi ayaibitsaëtoxaneto pibisiacuene exana. Nexata icatsia bexëa caenë, Jesucristo, xaniavaetsia jumecovënëta Dioso pitorobicueniatsi. Nexata Jesucristo pejamatabëcueneta, jivi ayaibitsaëtoxaneto Dioso aneconijibia tanetsi.

<sup>20</sup> Bajayata Dioso Moiséspijinëta najumecopata jivi pejumecovënëtsinexa. Nexata bajarapalivaisi itavetatsi pibisiacuene picani pexanaeyaniva. Itsiata baitsi jane jivi apo caëjëpaetsi penajamatabëcuenesaëtsinexa. Nexata pibisiacuene exanabiaba. Nexata bajarapalivaisi pitavetsixaetsi pibisiacuene picani pexanaeyaniva, itsiata jivi pibisiacuene itsa exana, nacueneyapëtane pibisiacuene pexanaejava. Nexata jivi pevajënaeyabelia pibisiacuene itsa exana, Dioso pijinia pevajënaeyabelia bitso itaxutotsoniataeponatsi.

<sup>21</sup> Daxitatsi tēpaenatsi. Tsipaji daxitatsi pibisiacuene exanatsi. Bajara pijinia pacuenia daxitatsi Dioso vajanacaitaxutotsoniataexae, Dioso aneconijibia nacatane. Dioso nacarajutsiana matacabi apo pevereverecaejava vajatuxanenë Jesucristo vajanacasivatëpaexae.

## 6

### *Pacuenia Dioso pejumecovënëtsivi pejanajamatabëcuene yajavajinavanapa yabara pelivaisi*

<sup>1</sup> Itsajivi meta jamatabëcuenenavëxaniabiaya jamatabëjumaitsi tsane: “Dioso vajanacaitaxutotsoniataexae, aneconijibia nacatane. Nexata icatsia ayaicuenia Dioso vajanacaitaxutotsoniataenexa, vajavajënaeyabelia pibisiacuene exanavanapaenatsi,” jamatabëjai meta tsane jamatabëcuenenavëxaniabiaya. <sup>2</sup> ¡Jume raja! Pëtsa baja vaxaitsi pibisiacuene exanatsi pematatsënëa. Petëpaenë baja apo najamatabëxainae pibisiacuene pexanaenexa. Bajara pijinia pacuenia vaxaitsi ata bejamatabëcueneitsitsi pibisiacuene vajaexanaeyaniva. <sup>3</sup> Paxamë bepayapëtaneme pajamatabëcuene yabara nabautisabatsi. Itsa nabautisabatsi, becaeperabëto nacaexana Jesucristojavabelia. Nexata vaxaitsi bejamatabëjumaitsitsi mapacueniaye: “Jesucristo cruzata itsa tēpa, xanë ata betaneyajavatëpae cruzata,” bejamatabëjai. Bajarapajamatabëcuene yabara nabautisabatsi. <sup>4</sup> Itsa Jesucristo bevajanacayajavatëpae, nexata bevajanacayajavamëthëtsitsi. Nexata Jesucristo petëpaecujinae, Dioso pesaëta icatsia itsa asaëyaexanatsi, bevajanacayajavaasaëyaexanaetsi icatsia. Vaxaitsi pejanajamatabëcuene vajayajavajinavanapaenexa, copatatsi baja vajaperujujamatabëcuenemi. Bajarapajamatabëcuene yabara nabautisabatsi.

<sup>5</sup> Becaeperabëto vajanacaexanaexae Jesucristojavabelia, nexata daxitatsi Jesucristo cruzata bevajanacayajavatëpae. Nexata Jesucristo petëpaecujinae, Dioso icatsia itsa asaëyaexanatsi, bevajanacayajavaasaëyaexanaetsi. <sup>6</sup> Jesucristo itsa rutatsi cruzata pebeyaxuabinexatsi, vajaperujujamatabëcuenemi yajavarutatsi vajanacavecuaajibiaexanaenexa pibisiacuene vajanacaexanaeya exanaejamatabëcuenemi. Bajarapacuenia vajanacatoexanaexae, pematatsënëa baja apo bexanaetsi pibisiacuene. <sup>7</sup> Pacuenia baja petëpaenë pibisiacuene apo exanae, bajara pijinia vaxaitsi ata bejamatabëcueneitsitsi pibisiacuene vajaexanaeyaniva. <sup>8</sup> Jesucristo cruzata bevajanacayajavatëpaexae, nexata bejamatabëjumaitsitsi mapacueniaye: “Yajavajinavanapaenatsi Jesucristo daxitamatabijavabelianexa,” bejamatabëjai. <sup>9</sup> Yapëtanetsi vajatuxanenë Jesucristo Dioso icatsia piasaëyaexanaejavatsi petëpaecujinae. Nexata baja icatsia Cristo pematatsënëa apo tēpae tsane. <sup>10</sup> Itsa baja Cristo tēpa daxitajivi pibisiacuene pexanaeneconi yabara, caecuenia copiarutsiaya sivatëpa daxitamatabijavabelianexa. Nexata baja Cristo icatsia pematatsënëa apo tēpae tsane. Biji rajane Dioso yajava daxitamatabijavabelianexa asaë tsaponaponae tsane athëbëtatsia, itsajotatsia ajibi petëpaecuene. <sup>11</sup> Nexata

paxamë panejamatabëethëtota pajamatabëjumaitsimëre tsavanapae: “Tajaperujuja-matabëcuenemi baja navecuatëpaeyabajë. Nexata baja pibisiacuene apo exanaenë tsane. Biji rajane asaenë baja tsaponaponae Dioso taneitorobicuenia tatoexanabiabinexa. Tsipaji baja tajatuxanenë Jesucristo neyjavaponapona,” pajamatabëjamëre tsavanapae.

<sup>12</sup> Bajaraxuata pëtsa baja panajamatabëxainabiabame pibisiacuene paneexanaenexa panijacuata panenatojitsipaecuenia. <sup>13</sup> Pëtsa panacopatame daxita xua pibisiacuene paneexanaenexa. Tsipaji paxamë bepanetëpaecujinae, Dioso icatsia bepepecaasaëyaexanaevi. Nexata pajumaitsimëre tsabiabi Diosojavabelia: “Tajatuxanenë, catonucatsi majotaje. Cajamatabëcueneevetaponaponaenatsi daxitamatacabijavabelianexa pacuenia xamë jitsipame tacatoexanabiabinexa,” pajamëre tsabiabi Diosojavabelia. <sup>14</sup> Nexata pacacajëpaena panenajamatabëcuenesaëtsinexa icatsia caevëalia paneexanaeyaniva papibisiacuene panijacuata panatojitsipame. Tsipaji Dioso papecaitaxutotsoniataexae, Dioso pacayavenonabiabiana. Nexata baja apo paexanavanapaemë tsane pacuenia pacaitoroba Dioso Moiséspijinëta penajumecopatsilivaisi.

*Pacuenia itsane pajivi nacopata ëpibisiacuene pexanaejavabelia yabara pelivaisi*

<sup>15</sup> Itsajivi meta jamatabëcuenenavëxaniabiaya jamatabëjumai tsane: “Dioso vanacaitaxutotsoniataexae, aneconijibia nacatane. Nexata baja tsiteca apo exanavanapae tsanetsi pacuenia nacaitoroba Dioso Moiséspijinëta penajumecopatsilivaisi. Nexata baja itaxutojema pibisiacuene exanavanapaenatsi,” jamatabëjai meta tsane itsajivi jamatabëcuenenavëxaniabiaya. ¡Jume raja! Pibisiacuene apo bexanavanapaetsi. <sup>16</sup> Paxamë rabaja xaniavaetsia payapëtaneme mapacueneje. Itsa panacopatsipame itsanë papijajivinxamë, nexata pacuenia bajaraponë pacaitorobabiaba, pajumecovënëtabiabijsipame. Bajara pijinia paitsimë tsipae itsa panacopatsipame pibisiacuene paneexanabiabinexa. Nexata bajarapapibisiacuene bepapijajivimëcuenia, pacuenia pacajamatabëcuenenitorobabiaba, paexanavanapaejitsipame. Nexata bajarapaneconi pejamatabëcueneta papitsipame panetëpaejavanexa, Diosovecua panenaxuabinexa daxitamatacabijavabelianexa. Itsiata itsa pajumecovënëtavanapaename Dioso, nexata pacuenia Dioso pacatojitsipa, patoexanavanapaename. <sup>17</sup> Bajayajebi picani panacopatame pibisiacuene paneexanavanapaenexa. Nexata pibisiacuene bepapijajivimëcuenia, pacuenia pacajamatabëcuenenitorobabiaba, ëpibisiacuene paexanavanapame. Nexata itsiata maparuaeje daxita panejamatabëcueneta pajumecovënëtavanapame baja papexaniajailivaisi itsamonae pacatsipaeba. Bajaraxuata paxamë yabara Diosojavabelia jumaitsinë tsabiabi: “Xanepana rabaja. Ayaicuenia yavenoname bajarapamonae,” janë tsabiabi. <sup>18</sup> Aeconoxae baja Dioso pacacopatsiaexana pibisiacuene paneexanavanapaejavami. Nexata jane baja panajamatabëxainame ëpexaniacuene paneexanavanapaenexa. <sup>19</sup> Peyapëxanepanaecuenia pacatoyaquinatsi mapalivaisije xaniavaetsia panejumeyapëtaenexa xua yabara pacatoyaquinatsi. Bajayajebi picani panacopatame pibisiacuene paneexanavanapaenexa. Nexata bajarapapibisiacuene bepapijajivimëcuenia pacuenia pacajamatabëcuenenitorobabiaba, ëpibisiacuene picani paexanavanapame panevajënaeyabelia. Itsiata baja aeconoxae panajamatabëcuenenajure Diosojavabelia ëpexaniacuene paneexanavanapaenexa panevajënaeyabelia. Bajarapacuenia Dioso pacatojitsipa paneexanavanapaenexa.

<sup>20</sup> Pamatacabi picani abaxë ëpibisiacuene paexanavanapame, Dioso papecatojitsipaecuenia apo paexanavanapaemë. Saya jamatejema pajinavanapame. <sup>21</sup> Itsiata apo pacatoxanepanae itsacuenejavayonexa ata daxita papibisiacuene picani paexanavanapame. Payauramë tsabiabi pibisiacuene paneexanaejava. Pamona tsiteca pibisiacuene exanavanapa, bajarapamonae Diosovecua naxuabiana daxitamatacabijavabelianexa. <sup>22</sup> Paxamë rabaja Dioso pacacapanepa pibisiacuene paneexanaeconimivecua. Bajaraxuata Diosojavabelia panajamatabëcuenenajutame baja Dioso papijajivinxamë. Nexata apo panacueratsimë tsane. Dioso papecatojitsipaecuenia pajinavanapaename. Panetëpaecujinae paxainaename matacabi apo peverevereaejava. <sup>23</sup> Pamona pibisiacuene

pexanaevi, Dioso rajutsianatsi petëpaejavanexa, Diosovecua penaxuabinexa daxitamatacabijavabelianexa. Pamona jumeconvënëta vajatuxanenë Jesucristo pesivatëpaejavatsi pijaneconi yabara, bajarapamona itsamatacabi Dioso amoneya rajutsianatsi matacabi apo peverevereaejava.

## 7

*Pacuenia Dioso pejumeconvënëtsivi Dioso Moiséspijinëta penajumecopatsilivaisi apo bejumeconvënëtsi pecapanepaenexatsi yabara pelivaisi*

<sup>1</sup> Tajamona, payapëtaneme rabaja Dioso Moiséspijinëta penajumecopatsilivaisi. Nexata baja pijinia payapëtaneme pacuenia jivi bajarapalivaisi bejumeconvënëtavanapa itsa abaxë asaë tsavanapae mapanacuataje. Itsiata baitsi jane itsa baja tëpa, acuenebi baja pematatsënëa bajarapalivaisi pejumeconvënëtavanapaenexa. <sup>2</sup> Pova baja pamona pexainaeva, acuenebi pevecuanaviatsinexa pamona, penacojobinexa icatsia itsanëjavabelia. Tsipaji Dioso Moiséspijinëta penajumecopatsilivaisi itaveta bajarapacueni. Itsiata baitsi jane pova baja pamona vecuatëpatsi, nexata matapania tocopatatsi penacojobinexa icatsia itsanëjavabelia itsa jitsipa penacojobijava. <sup>3</sup> Pova pamona pexainaeva, itsa nacojobijitsipa itsanëjavabelia, pamona abaxë itsa asaë tsaponapona, nexata bajarapova ayaineconi natsixanaejitsipa Diosojavabelia. Tsipaji pamonavecua itsanëjavabelia naperabëquenetsiatae ponaponaejitsipa. Itsiata baitsi jane baja pova baja pamona vecuatëpatsi, Dioso Moiséspijinëta penajumecopatsilivaisi apo itavetsitsi penacojobijava itsanëjavabelia. Nexata pova baja pamona vecuatëpatsi, nacojobi ata icatsia itsanëjavabelia, ayaineconi apo natsixanae tsipae Diosojavabelia.

<sup>4</sup> Tajamona, bajara pijinia paitsimë paxamë ata. Pacuenia petiriva pamona pitorobabiabicueniatsi, jumeconvënëtabiaba, bajara pijinia pacuenia pajumeconvënëtabiabame picani Dioso Moiséspijinëta penajumecopatsilivaisi papecaitorobicuenia. Jesucristo bepaneyajavatëpaexae, nexata Dioso Moiséspijinëta penajumecopatsilivaisi bepanevecuatëpae. Nexata baja icatsia apo pajumeconvënëtavanapaemë bajarapalivaisi papecaitorobicuenia. Maparucaeje Cristo baja papijajivimë, ponë icatsia Dioso asaëyaexanatsi petëpaeujinae. Cristo icatsia Dioso bepeceyajavaasaëyaexanae pacuenia Dioso pacatojitsipa paneexanavanapaenexa. <sup>5</sup> Pamatacabi abaxë Cristo pelivaisi apo jumeconvënëtsitsi, pibisiacuene exanavanapatsi vajacuata vajanatojitsipaecuenia. Nexata bajarapamatacabi itsa nacaitaveta Dioso Moiséspijinëta penajumecopatsilivaisi pibisiacuene vajaexanaeyaniva, caranata saya bevajanacaitorobi pibisiacuene vajaexanaenexa. Nexata bitso pibisiacuene exanavanapatsi. Bajaraxua yabara picani Diosovecua naxuabijinavanapatsi. <sup>6</sup> Itsiata baja maparucaeje palivaisi Dioso Moiséspijinëta najumecopata, bajarapalivaisi vajajumeconvënëtsijavami, Dioso baja nacacopabiaexana Cristo bevajanacayajavatëpaexae. Nexata papexaniacuene aeconoxae exanavanapatsi, apo exanavanapaetsi saya vajanacaitorobixae bajayata peyaquinaelivaisimi, Dioso Moiséspijinëta penajumecopatsilivaisi. Jume baja cajena. Espiritu Santo raja pejanajamatabëcueneta vajanacaitorobixae, exanavanapatsi bajarapapexaniacuene.

*Dioso Moiséspijinëta penajumecopatsilivaisi, pacuenia ata Pablo pibisiacuene pexanaenexa najamatabëxaina, penavajunupaebijava, yabara pelivaisi*

<sup>7</sup> Itsajivi meta jamatabëcuenenavëxaniabiaya jamatabëjumaitsi tsane: “Dioso Moiséspijinëta penajumecopatsilivaisi, itsacuenejavayonexa ata apo xanepanae,” jamatabëjai meta tsane. ¡Jume raja! Itsa ajibi tsipae bajarapalivaisi, nexata apo nacueneyapëtaenë tsipae pibisiacuene taexanaejava. Tsipaji Dioso Moiséspijinëta penajumecopatsilivaisita, itsalivaisianë yajava, jumaitsi mapacueniaje: “Pëtsa cobecaëbame itsajivi pexainaejava,” jai. Nexata itsa apo yapëtaenë tsipae bajarapalivaisi, xanë apo nacueneyapëtaenë tsipae pibisiacuene taexanaejava, itsajivi pexainaejava cobecaëbi atanë. <sup>8</sup> Dioso Moiséspijinëta penajumecopatsilivaisi, itsa nitaveta itsamonae pexainaejava tacobecaëbiyaniva, nexata caranata bitso betanitorobi tacobecaëbinexa itsamonae pexainaejava. Pamatacabi abaxë apo yapëtaenë Dioso Moiséspijinëta

penajumecopatsilivaisi, apo jitsipaenë picani taexanaenexa bajarapacuenē. <sup>9</sup> Bajayata abaxë itsa apo yapëtaenë bajarapalivaisi, jamatejemanë saya. Itsiata pamatacabi xaniavaetsia yapëtaniji xua yabara Dioso nitaveta, nexata jitsipajë bitso pibisiacuene taexanaenexa. Bitso najamatabëxainajë. Bajarapalivaisi pejamatabëcueneta yapëtaniji pibisiacuene taexanaexae, Diosovecua naxuabiaya tatëpaejavanexa picani. <sup>10</sup> Bajarapalivaisi Dioso najumecopata Moiséspijinëta jivi picani jamatabëcuenēbarëyaya xaniavaetsia pejinavanapaenexa. Itsiata xanë bajarapalivaisi pejamatabëcueneta apo jamatabëcuenēbarëyanë. Tsipaji pibisiacuene taexanaexae, bajarapalivaisi pejamatabëcueneta yapëtaniji Diosovecua tanaxuabijavanexa picani. Nexata bitso najamatabëxainajë. <sup>11</sup> Papibisiajamatabëcuene xainajë tajamatabëëthëtota, pibisiacuene neexanaeyaexanabiaba. Nexata pacuenia jumaitsi bajarapalivaisi, naneconitajë picani Diosovecua tanaxuabinexa.

<sup>12</sup> Palivaisi Dioso Moiséspijinëta najumecopata, pexanialivaisi cajena. <sup>13</sup> Nexata bajarapapexanialivaisi pejamatabëcueneta yapëtaniji Diosovecua tanaxuabijavanexa picani. Tsipaji xanë tajamatabëëthëtota papibisiajamatabëcuene xainajë pejamatabëcueneta, exanabiabajë pibisiacuene. Bajaraxuata Diosovecua naxuabijitsianë picani. Bajarapacuenia daxitajivi bajarapalivaisi pejamatabëcueneta, nacueneyapëtaena pibisiacuene pexanaejava. Taexanaexae xua bajarapalivaisita itaveta, naneconitajë Diosojavelia. Bajarapalivaisi itsa yapëtaniji, nexata tajamatabëëthëtota papibisiajamatabëcuene xainajë, nitorobapona bitsoyo pibisiacuene taexanaponaenexa.

<sup>14</sup> Palivaisi Dioso Moiséspijinëta najumecopata jivi pejumecovënëtsinexa, yapëtanetsi bajarapalivaisi Dioso penajumecopatsijava. Bajarapalivaisi jivi pejumecovënëtsinexa, bexaina pejanajamatabëcuene. Itsiata baitsi jane xanë bajara apo jamatabëcueneitsinë. Tajacuata saya ëtanatojitsipaecuenia exanaponaponajë. Caranata saya najamatabëxainabiabajë ëpibisiacuene taexanabiabinexa, papibisiajamatabëcuene tajamatabëëthëtota xainajë taneitorobabiabicuenia. <sup>15</sup> Xua pexaniacuene, jamatabëexanabiabajë picani. Itsiata bajaraxua apo exanabiabinë. Biji papibisiacuene apo jitsipaenë picani taexanabiabinexa, bajaraxua caranata exanabiabajë. “¿De tsaeta xuajitsia bajarapacuenia exanabiabajë?” jamatabëjanë belia. <sup>16</sup> Itsa exanabiabajë papibisiacuene picani apo jitsipaenë taexanabiabinexa, nexata sivajamatabëbëjanë tsabiabi. Bajaraxuata yapëtaniji jane baja Dioso penajumecopatsilivaisi pexanialivaisicuene. Tsipaji Dioso penajumecopatsilivaisi itaveta pibisiacuene pexanaejava. <sup>17</sup> Bajarapapibisiacuene exanae atanë, itsiata apo betanatsitaexanae itajara. Papibisiajamatabëcuene abaxë xainajë tajamatabëëthëtota, nexanaeyaexanapona bajarapapibisiacuene. <sup>18</sup> Tajamatabëcuene cajena bitso abeje. Yapëtaniji itsacuenejavayonexa ata apo netoxanepanae daxita tajamatabëcuene. Natorjitsipajë picani pexaniacuene taexanabiabinexa. Itsiata apo nejamatabëcuenecaëjëpabiabi pexaniacuene taexanabiabinexa. <sup>19</sup> Papexaniacuene jitsipajë taexanabiabinexa picani, itsiata apo exanabiabinë. Caranata saya exanabiabajë pibisiacuene, xua picani apo jitsipaenë taexanaenexa. <sup>20</sup> Nexata itsa exanabiabajë xua picani apo jitsipaenë taexanabiabinexa, nexata bajaraxua apo betanatsitaexanae itajara. Tsipaji papibisiajamatabëcuene abaxë xainajë tajamatabëëthëtota, nexanaeyaexanapona bajarapapibisiacuene.

<sup>21</sup> Nexata jane baja yapëtaniji pacuenia jamatabëcueneitsinë tsabiabi. Paepatota picani jitsipajë pexaniacuene taexanabiabinexa, itsiata apo exanabiabinë. Tsipaji papibisiajamatabëcuene xainajë, abaxë yajavaponaponajë. <sup>22</sup> Tajamatabëcueneta jamatabëjumaitsinë tsabiabi: “Jitsipajë tajumecovënëtsinexa Dioso pejumelivaisi,” jamatabëjanë tsabiabi picani. <sup>23</sup> Itsiata baitsi jane belia najamatabëcueneyapëtaniji. Papibisiacuene exanabiabajë, bajarapapibisiacuene picani tajamatabëcueneta apo jitsipaenë taexanaenexa. Tajamatabëcueneta picani jitsipajë pexaniacuene taexanaenexa, Dioso tanetotojitsipaecuenia. Caranata exanabiabajë ëpibisiacuene. Tajaperujujamatabëcuene saya bepjjavitonënëcuenia toponaponajë.

<sup>24</sup> ¡Xanë bitso bejiobinè! Bajarapapibisiajamatabëcuene yabara Dioso picani naneconitsiaexanaejitsia tanaxuabinexa Diosovecua daxitamatacabijavabelianexa. “¿Jipatsa meta nevecuaajibiaexanaena bajarapapibisiajamatabëcuene?” jamatabëjanë belia. <sup>25</sup> Nexata Diosojavabelia jumaitsinë: “Pexaniacuene rabaja netoexaname,” janë. Tsipaji vajatuxanenë Jesucristo jamatabëcuene caëjöpatsi taneyavenonaenexa. Bajaraxuata ëpibisiacuene jamatabëexanae atanë, jitsipajë daxita tajamatabëcuenevetsina tajumecovënëtsinexa pacuenia Dioso itoroba.

## 8

### *Pacuenia Espíritu Santo nacajamatabëcuene yavenona yabara pelivaisi*

<sup>1</sup> Pamonaë baja Jesucristo yajavajinavanapa, bajarapamonaë Dioso baja apo naneconitsiaexanaetsi tsane. Bajarapamonaë penatojitsipaecuenia, pibisiacuene apo exanavanapae. Biji rajane exanavanapa pacuenia Espíritu Santo tojitsipatsi. <sup>2</sup> Nexata bajarapacuenia xanë ata Jesucristo itsa yajavaponaponajë, nexata Espíritu Santo pesaëta neyavenonabiaba xaniavaetsia taponaponaenexa. Nexata baja apo exanaponaenë pibisiacuene. Papibisiajamatabëcuene picani naneconitsiaexanabiaba daxitamatacabijavabelianexa picani tananeconitsiaponaponaenexa, bajarapajamatabëcuene Espíritu Santo baja nevecuaajibiaexana. <sup>3</sup> Vaxaitsi vajacuata apo nacajamatabëcuene caëjöpae vajajumecovënëtsinexa Dioso Moisés pijinëta penajumecopatsilivaisi. Bajaraxuata apo nacacaëjöpae vajacuata vajanacapanepaenexa Diosojavabelia. Itsiata Dioso caëjöpatsi vajanacapanepaenexa. Athëbëvetsica Dioso itorobica pepo caenë pexënato. Nexata mapanacuata Dioso pexënato itsa naexana, nacaperabëjöpä picani pibisiacuene vajaexanaevi. Bajaraponë vaxaitsi pibisiacuene vajaexanaeneconi yabara, nacasivatëpa. Nexata baja nacavecuaajibiaexana papibisiajamatabëcuene picani xainatsi, pajamatabëcuene picani nacaexanaeyaexanabiaba pibisiacuene. <sup>4</sup> Bajarapacuenia Dioso nacatoexana vajanacajamatabëcuene caëjöpäenexa pexaniacuene vajaexanaejava pacuenia Dioso Moisés pijinëta penajumecopatsilivaisi jumaitsi. Nexata nacacaëjöpä vajaexanaenexa pexaniacuene. Tsipaji apo exanavanapaetsi pacuenia vajacuata natojitsipatsi. Biji rajane exanavanapatsi pacuenia Espíritu Santo nacatojitsipa.

<sup>5</sup> Pamonaë exanavanapa pijacuata penatojitsipaecuenia, bajarapamonaë jamatabëcueneenabiabatsi ëpibisiacuene pexanaenexa. Pamonaë pijinia exanavanapa Espíritu Santo pejitsipaecuenia, bajarapamonaë jamatabëcueneenabiabatsi Espíritu Santo pejitsipaecuenia pexanavanapaenexa. <sup>6</sup> Pamonaë saya exanavanapa pijacuata penatojitsipaecuenia, bajarapamonaë bepejamatabëcuenetëpaevi Dioso pitabarata. Nexata Diosovecua naxuabiaya jinavanapa. Pamonaë pijinia exanavanapa Espíritu Santo pejitsipaecuenia, bajarapamonaë jamatabëcuenebarëyaya jinavanapa Dioso pitabarata. Bajarapamonaë itsamatacabi xainaenanua matacabi apo peverevere caejava. <sup>7</sup> Pamonaë saya exanavanapa pijacuata penatojitsipaecuenia, bajarapamonaë itoya Dioso. Tsipaji apo exanaë pacuenia Dioso penajumecopatsilivaisi itorobatsi. Apo jamatabëcuene caëjöpäetsi pejumecovënëtsinexa bajarapalivaisi. <sup>8</sup> Pamonaë saya exanavanapa pijacuata penatojitsipaecuenia, bajarapamonaë apo jamatabëcuene caëjöpäetsi pexanaenexa Dioso pejitsipaecuenia.

<sup>9</sup> Maparuaeje paxamë apo paexanavanapaemë pacuenia panijacuata panatojitsipame. Espíritu Santo, ponë Cristo itorobica, pepacuene pacatsijamatabëca. Nexata Espíritu Santo pejitsipaecuenia, paexanavanapame. Pajivi Espíritu Santo apo tsijamatabëcaetsi, bajarapajivi Cristo apo pijajivitonë. <sup>10</sup> Paneperabëto tēpaena pibisiacuene paneexanaejamatabëcuene. Itsiata Cristo papijajivixae më, nexata pepo panejamatabëcuene athëbëtatsia jinavanapaena daxitamatacabijavabelianexa. Tsipaji Dioso aneconijibia pacatane. <sup>11</sup> Dioso asaëyaexanatsi Jesús petëpaecujinae. Nexata paxamë Espíritu Santo itsa pacatsijamatabëca, pacuenia Jesús Dioso asaëyaexanatsi

petëpaecujinae, bajara pijinia pacuenia paxamë ata Dioso pacaasaëyaexanaena panetëpaecujinae. Nexata panetëpaecujinae Dioso pacaperabëasaëyaexanaena Espiritu Santo papecatsijamatabëecaexae.

<sup>12</sup> Tajamonae, bajarapacuenia Dioso nacaexanaena. Bajaraxuata xanepana vajaexanavanapaenexa pacuenia Dioso nacatojitsipa. Copatatsi baja vajacuata vajanatojitsipaecuenia vajaexanabiabijavami. <sup>13</sup> Tsipaji pibisiacuene itsa paexanavanapaejitsipame panijacuata panenatojitsipaecuenia, nexata itsa patëpame, Diosovecua panaxuabijitsipame daxitamatacabijavabelianexa. Itsiata baitsi jane Espiritu Santo papecayavenonaejamatabëcueneta itsa pacopatame panijacuata panenatojitsipaecuenia pibisiacuene paneexanabiabijavami, nexata itsamatacabi paxainaename matacabi apo peverevereceajava.

<sup>14</sup> Pamonaexanavanapa Espiritu Santo pitorobicueniatsi, bajarapamonae Dioso pexi. <sup>15</sup> Itsa nacatsijamatabëjunua Espiritu Santo, Dioso pexitsi nacaexana. Saya beprijivicueniatsi apo nacaexanae cjunaviaya vajatonacuenebinexa. ¡Jume baja cajena! Biji rajane pepacuene Dioso pexitsi nacaexana. Nexata Espiritu Santo pejamatabëcueneta: “¡Axa!” nacajaiyaexana vajavajëtsijavata Diosojavabelia. <sup>16</sup> Vajajamatabëëthëtota Dioso pijaEspiritu Santo nacayapëtaeyaexana Dioso pexicuenetsi. <sup>17</sup> Nexata Dioso pexixaetsi, itsamatacabi Jesucristo yajava Dioso nacatsicobetsanaena daxita xua Dioso toxaina pexi petsicobetsanaenexa. Nexata Dioso pexixaetsi, pacuenia Jesucristo bejiobiaexanatsi, bajara pijinia pacuenia vaxaitsi ata itsamonae nacabejiobiaexanaena. Nexata jane baja xuacujinae Dioso yajavajinavanapaenatsi Dioso pijapenivenivenaenacuataatsia.

<sup>18</sup> Xaniajai. Maparucæje itsamonae nacabejiobiaexanapona mapanacuataje. Itsiata bajaraxua yabara apo najamatabëxainaetsi. Tsipaji baja yapëtanetsi itsamatacabi bitso vajajamatabëcuenenarëyajavanexa Dioso pijanacuataatsia. <sup>19</sup> Daxita mapanacuapijivi itatsacajinaeya vajënaeevetavanapa petocopiapatsinexatsi pamatacabi Dioso nacaitajëtsijitsia bajarapamonaejavabelia Dioso pexitsi vajanacaexanaecuene. Bajarapamonae vajanacayapëtaenexa Dioso pexicuenetsi, Dioso nacaitajëtsijitsia bajarapamonaejavabelia. Vaxaitsi baja Dioso vajajumecovënëtsivi, Dioso baja nacajamatabëcuenexaniavaeta. <sup>20</sup> Daxitacuene Dioso pexanaejava mapanacuataje vereverecaponaena. Tsipaji bajarapacuenia Dioso copata pevereverecaponaenexa. Bajaraxua apo naneconitsi ata Diosojavabelia, itsiata vereverecaena. Tsipaji baja Dioso copata bajarapacuenia daxitacuene pevereverecaponaenexa Adánpijinë pibisiacuene pexanaejava pejamatabëcueneta. Itsiata baitsi jane itsamatacabi Dioso copiarucaeyaexanaena daxitacuene pevereverecaponaejava. <sup>21</sup> Dioso pexitsi nacaasaëyaexanaena vajatëpaecujinae, pacuenia copiaya Cristo ata Dioso asaëyaexanatsi. Bajarapamatacabi, daxitacuene Dioso pexanaejava mapanacuataje pevereverecaponaejava, Dioso copiarucaeyaexanaena. <sup>22</sup> Yapëtanetsi baja cajena pacuenia itsi daxitacuene mapanacuataje. Pacuenia itsi unupijivi, pejuvijavanë ata, bejiobi abaxë. Tsipaji xaina piavitaneacuene, petëpaecuene ata. Nexata abaxë tsitecapona bajarapabejiobicuene mapamatacabijavaberena ataje. <sup>23</sup> Daxita xua tanetsi mapanacuataje, bajaraëxua bajarapacuenia apo bejiobi piavitaneacuene yabara. Vaxaitsi ata cajena bejiobitsi tsavanapae. Espiritu Santo vajanacatsijamatabëecaexae, yapëtanetsi mapacueneje. Dioso pexixaetsi itsamatacabi nacaperabëithianana pacuenia Cristo perabëithianatsi. Nexata bitso jitsipatsi vajajamatabëëthëtovetsina Dioso vajanacaperabëithiananaenexa vajaperabëvereverecæjavavecua. <sup>24</sup> Jumecovënëtatsi Jesucristo vajanacasivatëpaejava pibisiacuene vajaexanaeneconi yabara. Nexata yapëtanetsi Dioso vajanacaperabëithianaejavanexa. Bajarapacuenia nexata abaxë copiaevevetavanapatsi. Itsa baja Dioso nacarajutsipa xua nacarajutsipaeba, nexata baja apo copiaevetavanapatsi tsipae vajanacarajutsinexa. Tsipaji baja ajibi tsipae vajabaracopiaevetavanapaejava itsa baja nacarajutsipa. <sup>25</sup> Nexata abaxë evetavanapatsi xua Dioso nacarajutsipaeba vajanacarajutsinexa. Nexata abaxë copiaevetavanapatsi bajajajebi ata itsajamatabëcuene vecuaxainaenejevatsi.

<sup>26</sup> Vajaajamatabëcuenesaëjibixae, Espíritu Santo nacayavenonabiaba mapamatacabi ataje abaxë bajaraxua vajacopiaevetavanapaenexa. Vaxaitsi apo yapëtaetsi xaniavaetsia vajavajëtsinexa Diosojavabelia. Nexata Espíritu Santo bëpënëa bitso nacasivanajamatabëxainaeya nacatovajëtabiaba asaëyata Diosojavabelia. Xua apo vënëjonecapanepaetsi, Espíritu Santo nacatovajëtabiaba. <sup>27</sup> Dioso cajena vajanacajamatabëcueneyapëtaenë pacuenia najamatabëxainatsi. Nexata Dioso yapëtane xua Espíritu Santo nacatovajëtsijitsia. Tsipaji Dioso vajanacatojitsipaecuenia, Espíritu Santo nacatovajëtabiaba Diosojavabelia Dioso pijajivixae.

*Pacuenia Dioso pejumecovënëtsijivi daxita pibisiacuene tocopiapatsi atatsi, bejamatabëcuenematatoxeneta daxita bajarapapibisiacuene Jesucristo peyavenonabiabixaeysi yabara pelivaisi*

<sup>28</sup> Yapëtanetsi mapacuenije. Daxita xua apo vajajitsipaecuenie, Dioso nacatocopata vajanacatocopiapatabiabinexa. Nexata bajaraxua nacatocopiapatabiaba saya vajanacajamatabëcuenieëjëtsinexa. Nexata bajaraxua itsa nacajamatabëcuenieëjëta, apo nacat-sitapexaniacuene itajara. Itsiata Dioso vajajumecovënëtsivi yapëtanetsi bajaraxua vajanacajamatabëcuenieëjëtsijava pejamatabëcueneta vajanacajamatabëcuenie asaëyaexanaejavanexa Diosojavabelia. Vaxaitsi Dioso nacajunata pexitsi vajanacaexanaenexa pacuenia nacasivanajamatabëxaina. <sup>29</sup> Vajanaexanaevajënaeya ata, Dioso yapëtane pexitsi vajanacaexanaejavanexa. Nexata vajanaexanaevajënaeya ata, Dioso nacasivanajamatabëcuenievereta vajanacaexanaenexa pacuenia pexënato jamatabëcuenieitsi. Nexata vajanaexanaevajënaeya ata, Dioso nacasivanajamatabëcuenievereta Dioso pexënato pejuyapijivitsi ayaibitsaëtotsi vajanacaexanaenexa. <sup>30</sup> Bajarapacuenia vajanaexanaevajënaeya ata, Dioso vajanacasivanajamatabëcuenie veretsixae, najamatabëxaina pexitsi vajanacaexanaenexa. Nexata jane baja mapamatacabitaje nacajunata pexitsi vajanacaexanaenexa. Dioso vajanacajunatsixae, nexata nacavecuajibiaexana pibisiacuene vajaexanaeneconimi. Nexata baja aneconijibia Dioso nacatane. Nexata itsamat-acabi Dioso yajavajinavanapaenatsi Dioso pijapenivenivenaenacuatatsia.

<sup>31</sup> Nexata Dioso yabara bejumaitsitsi mapacueniaje: “Dioso cajena vajanacayavenon-aenë. Nexata itsajivi ata apo caëjëpaetsi vajanacajamatabëcuenie matatoxenetsinexa,” bejaisi. <sup>32</sup> Dioso baja cajena apo nacavecuasiva pexënato. Biji rajane copata pexënato vajanacasivatëpaenexa daxita vaxaitsi vajaneconi yabara. Nexata bajarapacuenia vajanacatoexanaexae, yapëtanetsi Dioso vajanacarajutsijavanexa daxita vajanamatavenonaecuenie ata. <sup>33</sup> Dioso baja cajena nacaitapeta. Nexata vaxaitsi yabara Dioso jumaitsi: “Bajarapamonae baja aneconijibia taniji,” jai Dioso najumecapanepaeya. Nexata cajena itsajivi ata apo caëjëpaetsi vajanacaneconitsinexa Diosojavabelia pibisiacuene vajaexanaejava yabara. <sup>34</sup> Itsajivi ata cajena apo caëjëpaetsi vajanacaneconitsiaexanaenexa pibisiacuene vajaexanaejava yabara. Tsipaji baja capanepaeya Jesucristo nacasivatëpa vajanacaneconimatamotsinexa. Nexata Cristo petëpaecujinae Dioso icatsia asaëyaexanatsi. Maparucaeje Jesucristo eca athëbëtatsia, Dioso pemuxuneneta, pecujuanenia. Cristo pijajivitsi Diosojavabelia nacayajivicuaicuaijai. <sup>35</sup> Cristo baja cajena vajanacaasivanë. Nexata itsajivi ata apo caëjëpaetsi Cristo vajanacaasivacuene vajanavecuacopiarucaeyaexanaenexa. Nacabejiobiaexanae ata tsipae, piayapëbejecuene nacatocopiapatsi ata tsipae, itsiata vajanacaasivanë Cristo tsiteca nacaasiva tsipae. Vajanacaitoyaxae, nacabarajinae ata tsipae, vajani tsabiabi ata tsipae, itsiata vajanacaasivanë Cristo tsiteca nacaasiva tsipae. Bitso bejiobi atatsi tsipae, bitso nacatsiayai ata tsipae, nacabeyaxuabiapaebi ata tsipae, daxita bajarapitsicuene nacatocopiapatsi ata tsipae, itsiata vajanacaasivanë Cristo tsiteca nacaasiva tsipae. <sup>36</sup> Vaxaitsi yabara mapajamatabëcuenelivaisi jëpaje. Bajayata Dioso pijajivi navajunupaeba Diosojavabelia pacuenia itsamonae bejiobiaexanaponatsi. Dioso pejumelivaisibaxutota bajarapamon-aemi penavajunupaebijume itanerubena. Jumaitsi mapacueniaje:

Xamë Diosomë, panijajivixae, daxitamatacabi itsamonae jamatabëpanebejebabiaba picani. Pacuenia oveja pebeyaxuabinexa capona, bajarapacuenia jamatabëpane-exanabiaba,

jai Dioso pejumelivaisibaxutota.

Bajara pijinia pacuenia vaxaitsi ata aeconoxae nacaexanapona. <sup>37</sup> Nexata daxita xua pibisiacuene, nacatocopiapatabiabiana. Nacabejiobiaexanabiabiana. Nexata itsiata vaxaitsi bajaraxua jamatabëcuene matatoxenetabianatsi. Tsipaji Cristo vajanacaasivanë, nacayavenonabiabiana. <sup>38</sup> Nexata yapëtaniji mapacueneje. Itsacuenejavayo ata apo caëjëpaetsi Cristo vajanacaasivacuene vajanacavecuacopiarucaeya exanaenexa. Vajatëpaecuene ata, vajaasaëtsavanapaecuene ata, ángelevi ata, dovathivi penamatacaitorobivi ata, apo caëjëpaetsi Cristo vajanacaasivacuene vajanacavecuacopiarucaeya exanaenexa. Piayapëbejecuene, xua baja nacatocopiapata, xua ata abaxë nacatocopiapatsijitsia, daxita bajaraxua ata, apo caëjëpaetsi Cristo vajanacaasivacuene vajanacavecuacopiarucaeya exanaenexa. <sup>39</sup> Athëbëabetsia vajaponaejava ata, ira bëxëpanabereca vajaponaejava ata, apo caëjëpaetsi Cristo vajanacaasivacuene vajanacavecuacopiarucaeya exanaenexa. Dioso pexanaejava, itsacuenejavayo ata, apo caëjëpaetsi Cristo vajanacaasivacuene vajanacavecuacopiarucaeya exanaenexa. Yapëtanetsi Dioso vajanacaasivajava. Tsipaji Dioso vajanacaasivaxae, vajatuxanenë Jesucristo athëbëvetsica itorobicatsi vajanacasivatëpaenexa mapanacuataje.

## 9

### *Pacuenia Dioso pijajivinexa itapeta judíovi yabara pelivaisi*

<sup>1</sup> Najamatabëcuenecopatajë Cristojavabelia. Nexata apo najumetsënëtsinë. Pexaniajailivaisi cajena pacatoyaquinatsi. Palivaisi pacatoyaquinatsi pexaniajailivaisicuene tayapëtaenexa, Espíritu Santo tajamatabëthëtota neyapëtaeyaexana. <sup>2</sup> Bitso sivanajamatabëxainajë tavëna judíovi, Israel nacuapijivi. Belia betaajamatabëtane tasivanajamatabëxainajëvaja bajarapamonae. <sup>3</sup> Bajarapamonae apo pejumecovënëtsixae Cristo, bitso sivanajamatabëxainajë. Bajaraxuata bajarapamonae yabara jamatabëjumaitsinë: “Itsa xanë Dioso netocopatsipa tanaxuabinexa Cristovecua, bajarapamonae juya pecapanepaenexatsi, nexata bajarapacuenia exanaejitsipajë bajarapamonae Dioso pecapanepaenexatsi,” jamatabëjanë belia tavëna judíovi yabara. <sup>4</sup> Bajarapamonae judíovi, Israelpijinë pemomoxi. Bajarapamonae pijasalinaivimijavabelia bajayata picani Dioso ayaicuenia yavenonabiaba. Itsiata bajarapamonaemi Dioso apo jumecovënëtsi. Dioso picani itapeta bajarapamonaemi Dioso pexi pexanaenexa. Bajarapamonaemi tanenua baja picani Dioso pijapenivenivenaecotia. Dioso baja picani najumecapanepaeya jumaitsinua bajarapamonaemijavabelia peyavenonabiabinexa. Dioso Moiséspijinëta penajumecopatsilivaisi ata, rajuta picani bajarapamonaemi pejumecovënëtavanapaenexa. Dioso picani itorobanua bajarapamonaemi pexanaenexa templobo, bajarapabota pevajëcabinexa Diosojavabelia. Dioso picani najumecapanepaeya jumaitsinua petoitorobinexatsica Cristo bajarapamonaemi picani pecapanepaenënexatsi pibisiacuene pexanaeneconimivecua. <sup>5</sup> Bajarapamonaemi pijasalinaivimi, pevënjonevimi Dioso pejumecovënëtsijava. Cristo itsa naexana mapanacuataje, judíonëcuenia naexana. Cristo nexata pijamonae judíovi. Bajaraponë Cristo, Diosonë baja cajena, daxitacuene pevetsinë. Nexata bajaraponëjavabelia jivi jumai tsabiabi tsane: “Xamë Cristomë, bitso baja cajena ayaijamatabëcuenenëmë,” jai tsabiabi tsane daxitamatacabijavabelianexa. Bajara itsi tsane.

<sup>6</sup> Itsiata daxita judíovi apo jumecovënëtsi pacuenia Dioso najumecapanepaeya jumaitsi. Nexata Dioso apo toexanae daxita judíovijavabelia pacuenia Dioso najumecapanepaeya jumaitsi. Nexata Dioso yabara vaxaitsi jamatabëcuenenavëxaniabiaya apo bejumaitsi mapacueniaje: “Pacuenia Dioso najumecapanepaeya jumaitsi judíovijavabelia petoexanaenexa, bajarapacuenia itsiata Dioso apo toexanae daxita judíovijavabelia,” apo bejaitsi vaxaitsi jamatabëcuenenavëxaniabiaya Dioso yabara. Bajarapacuenia Dioso yabara vaxaitsi jamatabëcuenenavëxaniabiaya apo bejumaitsi. Tsipaji Dioso tajëvelia apo itapetsi daxita judíovi pijajivinexa. Bajaraxuata pacuenia Dioso tajëvelia najumecapanepaeya jumaitsi, apo toexanae daxita judíovijavabelia. <sup>7</sup> Tsipaji bajayata Abrahampijinë pemomoxi ayaibitsaëto xainae ata, daxita itsiata Dioso apo totaetsi

Abrahampijinė pepo pemomoxicuenia. Dioso tajėvelia jumaiti Abrahampijinėjavabelia mapacueniaje: “Anijanėbeje nexėnatobeje xinae atamė tsane, taitapetsinėxae, caenė nexėnato, Isaac, pexi catotaenatsi pepo nemomoxicuenia,” jai Dioso. <sup>8</sup> Bajaraxuata yapėtanetsi mapacueneye. Pajivi naexanae ata Abrahampijinė pemomoxiyajuvėnjivi, itsiata bajarapajivi Dioso apo taetsi Abrahampijinė pepo pemomojivicuenia. Matapania pajivi jumecovėnėta pacuenia Dioso najumecapanepaeya jumaiti, bajarapajivi jane baja Abrahampijinė pepo pemomojivicuenia tanetsi Dioso. <sup>9</sup> Dioso tajėvelia najumecapanepaeya jumaiti Abrahampijinėjavabelia mapacueniaje: “Icatsia caevaicujinae patsianajė. Nexata nijava, Sara, xainaena pexėnatonacueto,” jai Dioso Abrahampijinėjavabelia Isaacpjinėnexa yabara.

<sup>10</sup> Nexata jane baja xuacujinae Isaacpjinė naexana. Bajaraxuacujinae icatsia bexėa Isaacpjinė baja pepuanacojio, Dioso icatsia tajėvelia jumaiti vajasalinainė Isaacpjinė pijava Rebecapijivajavabelia, Rebecapijiva baja pepuayacotaponaponae sapalanėbejenexa. <sup>11-13</sup> Itsa abaxė bajaraponėbeje apo naexanaebeje, pexaniacuene ata abaxė itsa apo exanaebeje, pibisiacuene ata abaxė itsa apo exanaebeje, bajarapamatacabi Dioso tajėvelia jumaiti Rebecapijivajavabelia mapacueniaje: “Panacuetonėyo copiaya cavecuanaexanaena, bajaraponėyo jamatabėcueneevetsiana pejuyapjinė pitorobabiabinexatsi pijajivitonėcuenia,” jai Dioso tajėvelia Rebecapijivajavabelia. Bajarapacuenia Dioso pejumaitisjava Rebecapijivajavabelia najumejėpabeje pacuenia jumaiti Dioso pejumelivaisibaxutota. Rebecapijiva pexėnatobeje yabara Dioso pejumelivaisibaxutota jumaiti mapacueniaje: “Asivanė juyapjinė Jacob, matapjinė Esaú matatoxenetsia,” jai Dioso pejumelivaisibaxutota Dioso pejumaitisjava. Nexata bajaraponėbeje tocopiapatatsibeje pacuenia Dioso tajėvelia jumaiti pacuenia Dioso itapetsijitsiatsi juyapjinė. Baitsi Jacob Dioso pijajivitonėnexa itapetatsi matapjinėvecua. Nexata bajarapacuenia yapėtanetsi mapacueneye. Dioso cajena baitapeta pajivi jamatabėitapeta pijajivitonėnexa. Dioso apo itapetsi bajarapajivi pexaniacuene pexanaejava yabara. Bajarapacuenia Dioso tajėvelia itapeta juyapjinė matapjinėvecua penaexanaevajėnaeyabeje ata cajena.

<sup>14</sup> Pajivi Dioso jitsipa pitapetsinexa, nexata itsa itapeta, bajaraxua yabara vaxaitsi apo bejumaitisitsi mapacueniaje: “Dioso baja pacuenia exana, apo xanepanae,” apo bejaitis vaxaitsi. <sup>15</sup> Tsipaji cajena Dioso bajayata jumaiti Moiséspjinėjavabelia: “Pajivi jamatabėitaxutotsoniataniji, itaxutotsoniatanajė,” jai Dioso. <sup>16</sup> Nexata pajivi Dioso jamatabėitaxutotsoniatane, itaxutotsoniatane. Nexata itsajivi apo jamatabėjumaitis ata: “Jitsipajė xanė Dioso taneitaxutotsoniatajava,” apo jamatabėjai ata, itsiata Dioso itaxutotsoniatanetsi. Bajarapajivi itsacuenejavayo ata Dioso pejitsipaecuenia apo exanabiabi ata, itsiata Dioso itaxutotsoniatanetsi. <sup>17</sup> Palivaisi bajayata Dioso jumaitis Egiptonacua pevetsinėjavabelia, bajarapalivaisi Dioso pejumelivaisibaxutota ruca. Jumai tsarucac mapacueniaje: “Xanė catocopatatsi nevetsinexa nijaira. Pinijicuene taexanaejava exanaenajė paxamė tuatujėta. Itsiata baitsi jane apo nejumecovėnėtsimė tsane. Nexata daxita nacuapijivi neyapėtaena tasaėnėcuene,” jai tsarucac Dioso pejumelivaisibaxutota Egiptonacua pevetsinėjavabelia Dioso pejumaitisjava. <sup>18</sup> Nexata pajivi Dioso jamatabėitaxutotsoniatane, itaxutotsoniatane. Pajivi pijinia Dioso jamatabėajamatabėcuenetajayaexana pejumecovėnėtsiyanivatsi, ajamatabėcuenetajayaexana.

<sup>19</sup> Nexata meta Dioso yabara pajumaitisimė tsane: “Bajarapacuenia Dioso jivi itsa ajamatabėcuenetajayaexana pejumecovėnėtsiyanivatsi, nexata bajarapajivi Dioso apo benaneconitsia exanae. Tsipaji bajarapajivi apo jumecovėnėtsi Dioso pijajamatabėcuenetajaya exanaeatsi” pajamė meta tsane Dioso yabara. <sup>20</sup> Tajamonae, pėtsa bajarapacuenia pajumaitisimė. Dioso yabara cajena bajarapacuenia apo bepajumaitisimė. Tsipaji Dioso pacaexana. Canalito itsa caėjėpaejitsipatsi pecuaicuaijainexa, itsacanalitovecua saicayacuenia faratsi atatsi, pefaratsivatsijavabelia apo jumaitis tsipae: “¿Detsa xuajitsia itsacanalitovecua saicayacuenia nefaratame?” apo jai tsipae pefaratsivatsijavabelia. <sup>21</sup> Tsipaji atsananitota canalito pefaratsiva caėjėpatsi canalito pefaratsinexa pacuenia jamatabėfarata. Nexata caėjėpatsi pefaratsinexa copiaya pexaniacanalito bo tuatujėta

itabëtsiaya peetsinexa. Bajaraxuacujinae bajara paatsananitoyajuvënëjavata caējēpatsi pefaratsinexa itsacanalito, beveliacanalito, pecajayababiabinexa saya.

<sup>22</sup> Bajara pijinia pacuenia Dioso baja exana jivijavabelia pacuenia tsitaxanepanatsi. Ayaicuenia Dioso jamatabēnaneconitsiaexana daxita pamonaē naneconita bajaraponējavabelia. Jamatabēsitajētānua pesaē bajarapamonaējavabelia. Itsiata baitsi jane abaxē bajayajebi Dioso najamatabēcuenecataita peverebiabivijavabelianexa. <sup>23</sup> Biji rajane pamonaē Dioso jamatabēcapanepa, bajarapamonaē capanepaena. Bajarapacuenia Dioso jamatabēexana vaxaitsi vajanacaitaxutotsoniataevijavaberena, vajanacatsitanajamatabēcuenē itajētsinexa ayaijamatabēcuenē pexainaejava. Tsipaji baja cajena vajanaexanaevajēnaeya ata, Dioso nacaitapeta vajayajavajinavanapaenexa athēbētatsia. <sup>24</sup> Vaxaitsi judíoviyajuvēnevitsi. Itsamonae vaxaitsiyajuvēnēvi apo judíovi. Itsiata Dioso nacajunata daxitatsi pijajivinexatsi. <sup>25</sup> Dioso pejumelivaisibaxutota, bajayata Oseaspijinē peyaquinaebaxutota, Dioso pejumaitsijava apo judíovi yabara, tajēvelia jumaitsi mapacueniaje:

Pamonaē picani apo tajajivi, bajarapamonaē yabara jumaitsinē tsane: “Tajajivi raja mapamonaēje,” janē tsane. Bajarapamonaē picani apo jitsipaenē. Itsiata bajarapamonaē yabara jumaitsinē tsane: “Tajajivi raja mapamonaēje, tasivavi,” janē tsane. <sup>26</sup> Panacuapijivijavabelia picani jumaitsinē tsane: “Paxamē raja apo patajajivimē,” janē tsane picani, itsiata bajarapanacuapijivi bexēa nejumecovēnētsiana. Nexata bajarapanacuapijivi yabara itsamonae jumai tsane: “Mara pamonaēje Dioso piasaētsaponaponaenē pexije,” jai tsane, jai Oseaspijinē bajayata peyaquinaebaxutota, pamonaē apo judíovi ata, Dioso pijajivi pexanaējavanexatsi yabara.

<sup>27</sup> Isaíaspijinē pijinia bajayata tajēvelia judíovi yabara jumaitsi mapacueniaje: “Israelpijinē pemomoxi bitso ayaibitsaētoxaeneto tsane. Pacuenia manuamenepijitajetaboatsapērē itsi, bajara itsane. Itsiata baitsi jane bajarapamonaēyajuvēnēvi, caejiviyobeje saya, Dioso capanepaenatsi. <sup>28</sup> Daxita pamonaē naneconita Diosojavabelia, bajarapamonaē naxanitsiayo Dioso naneconitsiaexanaena,” jai Isaíaspijinē peyaquinaebaxutota. <sup>29</sup> Itsabaxutota pijinia Isaíaspijinē peyaquinaebaxutota, icatsia jumaitsi mapacueniaje:

Dioso raja ángelevi ayaibitsaētoxaeneto penamatacaitorobinē. Bajaraponē Dioso itsa apo nacaitaxutotsoniatae tsipae, nexata daxitatsi vaxaitsi, Israelpijinē pemomoxitsi, nacaverebiabijitsipa. Nacaverebiabijitsipa pacuenia bajayata verebiabatsi daxita Sodoma tomarapijivimi, Gomorra tomarapijivimi ata, jai Isaíaspijinē peyaquinaebaxutota.

*Pacuenia judíovi apo jumecovēnētsi pexanialivaisi jivi pecapanepaelivaisinexatsi yabara pelivaisi*

<sup>30</sup> Vaxaitsi yapētānētsi mapacuenēje. Apo judíovi picani apo jumecovēnētsi ata Dioso aneconijibia petaenexatsi, itsiata Dioso aneconijibia tanetsi, pejumecovēnētsixae Jesucristo pesivatēpaejavatsi pibisiacuene pexanaeneconi yabara. <sup>31</sup> Itsiata baitsi jane judíovi jamatabēcuenēnavēxaniabiaya jumai tsabiabi: “Itsa jumecovēnētavanapaenatsi Dioso Moiséspijinēta penajumecopatsilivaisi, nexata Dioso aneconijibia nacataena,” jai tsabiabi. Itsiata bajaraxua yabara Dioso aneconijibia apo taetsi. Tsipaji apo caējēpaetsi pejumecovēnētsicapaneapaenexa bajarapalivaisi. <sup>32</sup> Apo caējēpaetsi Dioso aneconijibia petaenexatsi. Tsipaji judíovi apo jumecovēnētsi Jesucristo pesivatēpaejavatsi pibisiacuene pexanaeneconi yabara. Biji rajane jamatabēcuenēnavēxaniabiaya jumai tsabiabi. “Itsa jumecovēnētavanapaenatsi Dioso Moiséspijinēta penajumecopatsilivaisi, nexata Dioso aneconijibia nacataena,” jai tsabiabi. Bajaraxuata judíovi Diosovecua naxuabijavanapa, Cristo Dioso athēbēvetsica pitorobijavatsitsica, apo pejumecovēnētsixae. Caranata saya anaepanabiaba bajarapalivaisi yabara. <sup>33</sup> Dioso tajēvelia Cristo yabara pejumaitsijava, Dioso pejumelivaisibaxutota jumaitsi mapacueniaje:

Puenetanutsianajë Jerusalén tomarata ponë itorobijitsianë jivi pecapanepaenexa. Bajaraponë itsamonae apo jumecovënëtsitsi tsane. Nexata bajarapamonae nevecuanaxuabiana. Itsiata baitsi jane pajivi jumecovënëtsiana bajaraponë, bajarapajivi apo nacueratsi tsane, jai tajëvelia Dioso pejumelivaisibaxutota Cristo jivi pesivatëpaejavanexa pibisiacuene pexanaeneconi yabara.

## 10

<sup>1</sup> Tajamonae, jitsipajë bitso tajamatabëëthëtovetsina judíovi Dioso pecapanepaenexatsi. Bjaraxuata tovajëtabiabajë Diosojavabelia. <sup>2</sup> Judíovi picani Dioso ayaicuenia bitso jamatabëtonacuenebabiaba Dioso pesivabarëyanexatsi. Itsiata baitsi jane apo yapëtae pacuenia Dioso tojitsipatsi petoexanavanapaenexa. Judíovi saya jamatabëcuenenavëxaniababiaba. <sup>3</sup> Bajarapamonae apo yapëtae pacuenia exanaejitsia Dioso aneconijibia petaenexatsi. Jamatabëcuenenavëxaniabiaya jumai tsabiabi: “Itsa jumecovënëta-vanapaenatsi Dioso Moiséspijinëta penajumecopatsilivaisi, nexata Dioso aneconijibia nacataena,” jai tsabiabi bajarapamonae. Apo jumecovënëtsi pacuenia Dioso itorobatsi pexanavanapaenexa Dioso aneconijibia petaenexatsi. <sup>4</sup> Pajivi jumecovënëta Cristo pesivatëpaejavatsi pibisiacuene pexanaeneconi yabara, bajarapajivi Dioso baja aneconijibia tanetsi. Bjaraxuata pematatsënëa baja apo benajamatabëxainae pejumecovënëtsinexa icatsia Dioso Moiséspijinëta penajumecopatsilivaisi Dioso aneconijibia petaenexatsi.

<sup>5</sup> Pamonae jitsipa Dioso aneconijibia petaenexatsi pejumecovënëtsixae Dioso Moiséspijinëta penajumecopatsilivaisi, bajarapamonae yabara Moiséspijinë bajayata peyaquinaelivaisi jumaitsi mapacueniaje: “Pajivi jumecovënëtsicapanepaena daxita pacuenia bajarapalivaisita itorobatsi, bajarapajivi matapania Dioso aneconijibia taenatsi,” jai Moiséspijinë bajayata peyaquinaelivaisita. <sup>6</sup> Nexata baja pamonae jumecovënëta Cristo pesivatëpaejavatsi pibisiacuene pexanaeneconi yabara, bajarapamonae pejumeitavetsinexatsi, Dioso jumaitsi mapacueniaje: “Pëtsa pajamatabëjumaitsimë: ‘¿Jipatsa meta athëbëabetsia ponaena mapanacuayabetsicaje pebarëpatsinexatsica vajanacayavenonaenënexa?’ pajamatabëjamë pëtsa. <sup>7</sup> Pëtsa pajamatabëjumaitsimënu: ‘¿Jipatsa meta ponaena, itsabereca petëpaevi jinavanapa, piasaëyaexanaenexa petëpaevecua vajanacayavenonaenënexa?’ pajamatabëjamë pëtsa, jai Dioso jivi pejumeitavetsijava. Nexata itsajivi ata apo bejamatabëjumaitsi bajarapacuenia. Tshipaji baja Cristo athëbëvetsica patsica vajanacasivatëpaenexa mapanacuataje. Petëpaeujinae ata baja icatsia Cristo asaë petëpaejavavecu vajanacacapanepaenexa. <sup>8</sup> Dioso aneconijibia vajanacataejavanexa yabara, Dioso pejumelivaisibaxutota jumaitsi mapacueniaje: “Dioso rabaja pejumelivaisi panatoxainame. Bajara palivaisi yabara panabarëcuaicuajiamë tsabiabi. Panejamatabëëthëtota ata baja bajarapalivaisi yabara panajamatabëxainabiabame,” jai Dioso pejumelivaisibaxutota. Bajarapalivaisibeje nalivaisijëpabeje palivaisi paxanë pacatsipaebatsi panejumecovënëtsinexa Cristo papecasivatëpaejava pibisiacuene paneexanaeneconi yabara. <sup>9</sup> Itsamatacabi Diosojavabelia papecacapanepaevi tsane itsa paexanavanapaename mapacueniaje. Panavajunupaebabiabare itsamonaejavabelia panejumecovënëtsijava Jesús Dioso pexënatocuene. Pajumecovënërenua panejamatabëëthëtovetsina Jesús petëpaeujinae icatsia Dioso piasaëyaexanaejavatsi. <sup>10</sup> Tshipaji baja jivi pejamatabëëthëtota jumecovënëta Cristo pesivatëpaejavatsi pibisiacuene pexanaeneconi yabara. Bjaraxuata Dioso baja aneconijibia tanetsi. Jivi pecuibovojotota navajunupaebabiaba pejumecovënëtsijava Cristo pesivatëpaejavatsi pibisiacuene pexanaeneconi yabara. Nexata bajarapacuenia nayapëtane bajarapajivi Dioso pepacuene pecapanepaejavanexatsi.

<sup>11</sup> Dioso pejumelivaisibaxutota jumaitsi mapacueniaje: “Pajivi jumecovënëtsiana, bajaraponë apo nacueratsi tsane,” jai Dioso pejumelivaisibaxutota Cristo jivi pesivatëpaejavanexa pibisiacuene pexanaeneconi yabara. <sup>12</sup> Dioso raja jivi najëpaeya tane.

Pacuenia tane judíovi, bajarapacuenia tane apo judíovi ata. Caenë, Dioso, daxita bajarapamonae pijatuxanenë. Ayaicuenia Dioso itaxutotsoniatane daxita pamonaevajëta bajaraponëjavabelia. <sup>13</sup> Cristojavabelia jivi penavajëtsijavanexa, Dioso pejumelivaisibaxutota jumaitsi mapacueniaje: “Pajivi pepo petuxanenëjavabelia navajëta pecapanepaenexatsi, bajarapajivi capanepaenatsi,” jai Dioso pejumelivaisibaxutota. <sup>14</sup> Itsiata acuenebi itsajivi ata penavajëtsinexa Cristojavabelia itsa abaxë apo jumecovënëtsi Cristo pesivatëpaejavatsi pibisiacuene pexanaeneconi yabara. Itsajivi ata acuenebi pejumecovënëtsinexa Cristo pelivaisi itsa abaxë apo yapëtae Cristo pelivaisi. Itsajivi ata acuenebi peyapëtaenexa Cristo pelivaisi itsa abaxë apo tsipaebitsi. <sup>15</sup> Dioso pijajivi itsa apo itorobi tsipae daxitajivijava Cristo pelivaisi petsipaebaponaenexa, nexata itsajivi ata apo yapëtae tsipae Cristo pelivaisi. Dioso pejumelivaisi jivi petsipaebaponaevinexa yabara, Dioso pejumelivaisibaxutota jumaitsi mapacueniaje: “¡Pexaniacuene bitso itsa najetarubena pexanialivaisi jivi petsipaebivinexa!” jai.

<sup>16</sup> Pexanialivaisi tsipaebi atatsi, itsiata daxitajivi apo jitsipae pejumecovënëtsinexa pexanialivaisi pecapanepaelivaisinexatsi picani Diosojavabelia. Isaíaspijinë ata, bajayata jivi apo jumecovënëtsi. Nexata Isaíaspijinë Diosojavabelia jumaitsi mapacueniaje: “Tajatuxanenë, daxitajivi apo nejumecovënëtsi tatsipaebilivaisi. Caejiviyobeje saya nejumecovënëta,” jai bajayata Isaíaspijinë Diosojavabelia. <sup>17</sup> Nexata jivi itsa tsipaebatsi Cristo pesivatëpaejavatsi pibisiacuene pexanaeneconi yabara pejumetaexae, jumecovënëta baja.

<sup>18</sup> Judíovi ata baja picani jumetane Cristo pesivatëpaejavatsi pibisiacuene pexanaeneconi yabara. Itsiata judíovi apo jumecovënëtsi. Dioso pejumelivaisibaxutota jumaitsi mapacueniaje:

Dioso pijajivi Dioso pejumelivaisi tsipaebanajetarubena daxitanacuanëjjava. Nexata baja  
Dioso pejumelivaisi yacaëjëpa daxitanacuanëjjava,  
jai Dioso pejumelivaisibaxutota.

<sup>19</sup> Judíovi baja picani jumetane Cristo pesivatëpaejavatsi pibisiacuene pexanaeneconi yabara. Itsiata judíovi apo jumecovënëtsi. Moiséspijinë bajayata tajëvelia yaquina judíovi Dioso apo pejumecovënëtsijavanexa. Yaquinanua apo judíovi juya Dioso pejumecovënëtsijavanexa. Judíovijavabelia Dioso tajëvelia pejumaitsijava, bajayata Moiséspijinë yaquina mapacueniaje:

Itsanacuanëpijivi paxamë bijiaya panaëcotabiabame. Bajarapamonae tajajivi exanaenajë. Nexata bajarapamonae pacuenecaëbianame. Bajarapamonae tajumelivaisi apo jamatabëjumeyapëtae picani. Itsiata tajajivi exanaenajë. Nexata bajarapamonae pacuenecaëbiaanaepanaename,  
jai Moiséspijinë bajayata peyaquinaebaxutota Dioso tajëvelia pejumaitsijava judíovijavabelia.

<sup>20</sup> Isaíaspijinë ata bajayata ajumejunavijibia jumaitsi Dioso tajëvelia pejumaitsijava. Apo judíovi yabara Dioso pejumaitsijava, Isaíaspijinë jumaitsi mapacueniaje:

“Pamonae picani apo nejitsipae, apo nejumecovënëtsinua, bajarapamonae itsiata itsamatacabi nejumecovënëtsiana. Nexata baja neyapëtaena. Bajarapamonae apo nevënëlivaisiyanijobi ata, najamatabëcueneitajëtsianajë bajarapamonaejavabelia,” jai Dioso tajëvelia,  
jai bajayata Isaíaspijinë.

Bajaraxuata nayapëtane tajëvelia Dioso penajamatabëcueneveretsijava pecapanepaenexa apo judíovi ata. <sup>21</sup> Biji rajane judíovi yabara Dioso pejumaitsijava, Isaíaspijinë bajayata jumaitsi mapacueniaje: “Daxitamatacabi junatabiabajë pamonaevajëta apo nejumecovënëtsi. Bajarapamonae apo exanae taitorobicuenia,” jai bajayata Isaíaspijinë Dioso pejumaitsijava judíovi yabara. Nexata nayapëtane mapacuenieje. Judíovi junatsi atatsi Dioso, itsiata apo jumecovënëtsi Dioso pecapanepaenexatsi.

## 11

*Pacuenia judíovi, Israel nacuapijiviyajuvënëvi, Dioso capanepaejitsiatsi yabara pelivaisi*

<sup>1</sup> ¿Dioso tsabaja pijajivi judíovi, Israel nacuapijivi, daxita Dioso navecuaxuaba? Jume raja. Apo navecuaxuabi. Xanë ata raja judíonënë, Israel nacuapijinënë. Tajasalinainë cajena Abrahampijinë. Benjamínpijinë ata pemomoxiyajuvënë. <sup>2</sup> Bajayata baja cajena vajavajënaeyami, Dioso pijajivinexa itapeta judíovi, Israel nacuapijivi. Nexata Dioso apo navecuaxuabi tsane bajarapamonae. Payapëtaneme rabaja pacuenia Dioso pejumelivaisibaxutota jumaitsi profeta Elíaspijinë yabara. Profeta Elíaspijinë pina pevajëtsijavata Diosojavabelia, neconitsiaya jumaitsi Israel nacuapijivi yabara mapacueniaje: <sup>3</sup> “Tajatuxanenë, mapamonaeje, Israel nacuapijivi, catobepona daxita pecajumelivaisipaebivimi profetavi. Toxobabianua altarvënëjavanë, itsajota tajuitabiaba dajubivi pecarajutsinexa ofrendacuenia. Nexata baja xanë caenënë, nijajivitonënë, nacopatajë. Xanë ata baja jamatabënebeyaxuaba,” jai pina profeta Elíaspijinë Diosojavabelia Israel nacuapijivi yabara. <sup>4</sup> Itsiata baitsi jane Dioso pina jumaitsi profeta Elíaspijinëjavabelia mapacueniaje: “Apo caenëmë raja. Xainajë baja tajajivi, siete mil ponëbeje, Israel nacuapijiviyajuvënëvi. Bajarapamonae xaniavaetia nejumecovënëtavanapa. Pematatababëta apo tonubena penavajëcaenexa Baalvënë, jumapecaetaeya pexanaenëtsi, pitabarata,” jai pina Dioso bajayata profeta Elíaspijinëjavabelia. <sup>5</sup> Bajara pijinia itsi marucae ataje. Caejiviyobeje pijinia Dioso itapetatsi pijajivinexa pitaxutotsoniataexaetsi. <sup>6</sup> Bajarapamonae Dioso pexaniacuene petoexanavanapaejava yabara, apo itapetsitsi. Bajarapamonae Dioso itsa itapetsipatsi epexaniacuene Dioso petoexanavanapaejava yabara, nexata saya bajarapamonae Dioso itapetsipatsi epexaniacuene petoexanavanapaejava yabara. Nexata bajarapamonae saya Dioso pitaxutotsoniataexaetsi, apo itapetsitsi tsipae.

<sup>7</sup> Mara pacuenia itsi Israel nacuapijivije, Dioso apo pejumecovënëtsivi. Bajarapamonae apo jumecovënëtsi Dioso pecapanepaejavanexatsi. Itsiata baitsi jane bajarapamonaeajuvënëvi, caejiviyobeje, Dioso itapetatsi pijajivinexa. Bajarapamonae jumecovënëta pexaniajailivaisi, Dioso pejumelivaisi, pecapanepaelivaisinexatsi Diosojavabelia. Itsamonae apo jumecovënëtsi bajarapalivaisi. Tsipaji ajamatabëcuenetaja. Apo jumecovënëtsi Dioso pejumelivaisi, pexaniajailivaisi, pecapanepaelivaisinexatsi picani Diosojavabelia. <sup>8</sup> Israel nacuapijivi, Dioso apo pejumecovënëtsivi, yabara Dioso pejumelivaisibaxutota jumaitsi mapacueniaje: “Dioso ajamatabëcuenetajayaexanatsi. Bajaraxuata bajarapamonae lebiabi ata Dioso pejumelivaisibaxuto, apo jumecovënëtsi. Bajara itsi bajarapamonae mapamatacabijavaberena ataje,” jai Dioso pejumelivaisibaxutota Israel nacuapijivi, Dioso apo pejumecovënëtsivi, yabara. <sup>9</sup> Israel nacuapijivi, Dioso apo pejumecovënëtsivi, yabara bajayata Davidpijinë ata jumaitsi mapacueniaje:

Israel nacuapijivi fiesta itsa exanabiaba, jamatabëcuenenavëxaniabiaya jamatabëjumai tsabiabi: “Dioso cajena nacasivabarëya. Bajaraxuata ayaijava vajaxinaejava xainatsi,” jamatabëjai tsabiabi. Itsiata baitsi jane pebarëyajavata, itsamatacabi jemata tocopiapatsianatsi pijaneconi yabara Dioso jane baja penaneconitsiaexanaejanexatsi. <sup>10</sup> Bajarapamonae apo yapëtae pijaneconi peyajavajinavananapaejava daxitamatacabi. Pacuenia bitso piarevejava pecaponaevi, nabëxëtsutsi-aya bacapona, bajara itsi bajarapamonae pejamatabëthëtota pijaneconi yabara. Bitso yanajamatabëxaina pijaneconi,

jai bajayata Davidpijinë Israel nacuapijivi, Dioso apo pejumecovënëtsivi, yabara.

*Pacuenia apo judíovi ata Dioso capanepaejitsiatsi yabara pelivaisi*

<sup>11</sup> Judíovi apo jumecovënëtsi ata Cristo pesivatëpaejavatsi pecapanepaenexatsi Diosojavabelia, itsiata abaxë Dioso apo navecuaxuabi judíovi daxitamatacabijavabelianexa. Judíovi apo pejumecovënëtsixae Cristo pelivaisi, juya apo judíovi Dioso tocopatatsi pejumecovënëtsinexa Cristo pelivaisi pecapanepaenexatsi Diosojavabelia. Nexata apo judíovi ata pejumecovënëtsijava Cristo pelivaisi, judíovi itsa taena, nexata judíovi ata

jumecovënëtsiana Cristo pelivaisi pecapanepaenexatsi Diosojavabelia. <sup>12</sup> Judíovi apo jumecovënëtsi Cristo pelivaisi pecapanepaenexatsi Diosojavabelia. Bajaraxuata juya Dioso tocopata apo judíovi ata pejumecovënëtsinexa Cristo pelivaisi pecapanepaenexatsi Diosojavabelia. Nexata apo judíovi ata bajarapacuenia caxitajaraba baja pexaniacuene, judíovi apo pejumecovënëtsixae Cristo pelivaisi. Bajarapacuenia apo judíovi ata aeconoxae baja toxanepanatsi Dioso petocopatsixaetsi pejumecovënëtsinexa Cristo pelivaisi. Itsiata baitsi jane pacuenia apo judíovi ata aeconoxae toxanepanatsi, bajaraxua matatoxenetsia bitso pexaniacuene caxitajarabiana pamatacabi judíovi ayaibitsaëto jane baja jumecovënëtsiana Cristo pelivaisi.

<sup>13</sup> Aeconoxae baja palivaisi pacatsipaebatsi, bajarapalivaisi paxamë apo pajudíovinexamë. Jitsipajë paneyapëtaenexa Dioso taneitorobicuene. Dioso nitoroba paxamë apo pajudíovimëjavabelia patacatsipaebinexa Dioso pejumelivaisi. Nexata jamatabëjumaitsinë: “Dioso cajena netocopata ayaijamatabëcuene pexinaelivaisi jivi tatsipaebaponaenexa,” jamatabëjanë. <sup>14</sup> Bajarapacuenia Dioso pejumelivaisi pacatsipaebaponatsi tsipaji jitsipajë tajaviriavi ata, judíovi, Dioso petoexanaenexatsi pacuenia paxamë ata Dioso pacatoexana papecacapanepaenexa. Nexata meta bajarapacuenia judíoviyajuvënëvi ata jumecovënëtsiana Cristo pelivaisi pecapanepaenexatsi Diosojavabelia. <sup>15</sup> Judíoviyajuvënëvi Cristo navecuaitaveta. Nexata juya pamonaë apo judíovi, Dioso barajamatabëcuenexanepanaeyatane. Pamatacabi judíovi jumecovënëtsiana Cristo pelivaisi, Dioso pitsianatsi pijajivinexa. Bajaraxua bitso pinijicuene tsane. Judíovi aeconoxae bepetëpaevi Dioso tanetsi apo pejumecovënëtsixae Cristo pelivaisi. Nexata pamatacabi judíovi jumecovënëtsiana Cristo pelivaisi, Dioso taenatsi petëpaecujinaë bepiasaëyaexanaevitsi. <sup>16</sup> Panbë jivi ofrendacuenia itsa rajuta Diosojavabelia, copiaya pexanaepanbë barajuta. Nexata bajarapapanmatabëta cotocaevi pexanaepanata, apo rajutsi ata Diosojavabelia, Dioso pijapancuenia tane. Naejava ata petabunepe jivi ofrendacuenia itsa rajuta Diosojavabelia, nexata daxita pemaxërananë ata Dioso pijamaxërananëcuenia tane. Bajara pijinia itsi judíovi ata. Judíovi pijasalinaivimi Dioso itsa itapeta pijajivinexa, nexata judíovi pemomoxi ata Dioso pijajivicuenia tane.

<sup>17</sup> Dioso tane judíovi, beolivonaemaxërananë. Olivonaenë pexinaenë, pepo olivonaemaxërananë caucuba juya saicayaviria olivonaemaxëranaxi perubinexa bajarapacovëta. Nexata pepo olivonaë ënëtuatuajëpijimerajunia bajarapamaxëranaxi ënëtuatuajëjava pejuvarubenaenexa pepo olivonaemaxëranajavaberena. Bajara pijinia pacuenia Dioso pacatoexana paxamë apo pajudíovimë. Judíovi apo pejumecovënëtsixae Cristo pelivaisi, paxamë juya, apo pajudíovimë, Dioso papijajivimë pacaexana. <sup>18</sup> “Judíovivecua Dioso papijajivinë paneexana. Nexata paayaijamatabëcuenevinë judíovivecua,” pajamë pëtsa. Tsipaji payapëtaneme mapacuenije. Naejava, petabunepe pejamatabëcueneta, xaniavaetsia nuca. Pemaxërana pejamatabëcueneta, xaniavaetsia apo nucae. Bajara pijinia paxamë ata paitsimë. Apo pacacajëpae paneyavenonaenexa judíovijavabelia. Biji rajane judíovi bepapecayavenonaë. Tsipaji judíovi apo jumecovënëtsi Cristo pelivaisi. Nexata judíovi apo pejumecovënëtsixae, Cristo pelivaisi juya paxamë Dioso pacaitaxutotsoniatane. Nexata pacatocopata Cristo pelivaisi panejumecovënëtsinexa Dioso papecacapanepaenexa panijaneconivecua.

<sup>19</sup> Nexata meta pajumaitsimë: “Pacuenia olivonaenë pexinaenë, olivonaemaxërananë caucuba, bajarapacovëta juya perubinexa itsaviriaolivonaemaxëranaxi, bajara pijinia itsi Dioso. Dioso navecuatsata judíovi juya apo judíovitsi vajanacaitapetsinexa pijajivinexatsi,” pajamë meta. <sup>20</sup> Pacuenia olivonaenë pexinaenë, pibisiamaxërana caucuta, bajara pijinia itsi Dioso. Dioso navecuatsata judíovi apo pejumecovënëtsixae Cristo pelivaisi. Pacuenia olivonaenë pexinaenë, pecaucutsimaxërana pecovëta juya itsaviriaolivonaemaxërana ruta, bajara pijinia pacuenia paxamë ata judíovi pejamatabëcuenemi, pacapita Dioso papijajivinexamë panejumecovënëtsixae Cristo pelivaisi. Bajaraxuata pëtsa panataneme paayaijamatabëcuenevimë. Biji rajane xania. Cujunaviaya Dioso

pajinavanapare panevecuajopaeyaniva Dioso panejumecovënëtsijava. <sup>21</sup> Pacuenia olivonaenë pexainaenë, pibisiamaxërana bacaucuta, bajara pijinia pacuenia Dioso judíovi navecuatsata apo pejumecovënëtsixae Cristo pelivaisi. Judíovi picani Dioso itapeta pijajivinexa. Nexata judíovi Cristo pelivaisi apo pejumecovënëtsixae, Dioso navecuatsata pitapetsivimi ata. Nexata bajarapacuenia paxamë ata Dioso pacanavecuatsatsipa panevajënaeyabelia ita apo pajumecovënëtavanapaemë tsipae Cristo pelivaisi. <sup>22</sup> Bajaraxuata pacanaëjère mapacueneye. Dioso bitso papecaitaxutotsoniataexae, pacatocopata Cristo pelivaisi panejumecovënëtsinexa. Pacanaëjèrenua mapacueneye. Apo pejumecovënëtsixae Cristo pelivaisi, Dioso navecuatsata pitapetsivimi ata. Xaniajai cajena. Dioso naneconitsiaexanapona daxita pamonaë apo jumecovënëtsi Cristo pelivaisi. Itsiata paxamëjavabelia Dioso pacaitaxutotsoniatane. Nexata panevajënaeyabelia tsiteca Dioso pajumecovënëtavanapare. Itsa pacopabijitsipame Dioso panejumecovënëtsijava, nexata pacuenia olivonaenë pexainaenë, pibisiamaxërana bacaucuta pexuabinexa, bajara pijinia pacuenia paxamë ata Dioso pacanavecuaxuabijitsipa. <sup>23</sup> Judíovi Dioso pejumeeabijava ita copatsiana, nexata jumecovënëtsiana Cristo pesivatëpaejavatsi pecapanepaenexatsi Diosojavabelia. Nexata bajarapamonae ata Dioso pijajivi tsane. Nexata pacuenia olivonaenë pexainaenë, pecaucutsimaxëranami icatsia caevëarena pecovëta ruta, bajara pijinia pacuenia Dioso icatsia pitsianatsi judíovi Dioso pijajivinexa. <sup>24</sup> Pacuenia saicayaviria olivonaemaxërana ruta pepo olivonaemaxëranacovëta, bajarapacovëta pejuvarucaenexa, bajara pijinia pacuenia Dioso pacapita paxamë apo pajudíovi atamë Dioso papijajivinexamë. Paxamë apo pajudíoviriavi atamë, itsiata Dioso pacapita papijajivinexamë. Judíovi biji toyapëxanepanatsi icatsia pepitsinexatsi Dioso pijajivinexa. Tsipaji bajarapamonae pijasalinaivimi ata Dioso itapeta pijajivinexa.

*Pacuenia Dioso capanepaejitsia judíovi, Israel nacuapijivi, yabara pelivaisi*

<sup>25</sup> Tajamonae, panejamatabëjumaitsiyaniva mapacueniaye: “Vaxaitsi bitso vajayapëtaevi,” panejamatabëjaiyaniva, jitsipajë paneyapëtaenexa mapalivaisije, Dioso muetsia pexainabuatsilivaisimi. Judíoviyajuvënëvi baja cajena ajamatabëcuenetaja. Nexata bajarapamonae apo jumecovënëtsi Cristo pelivaisi. Nexata ayaibitsaëtoxaneto apo judíovi, ita jumecovënëtsiana Cristo pelivaisi, matapania jane baja judíovi ata jumecovënëtsiana Cristo pelivaisi. <sup>26</sup> Nexata daxita pamonaë judíovi, itsamatacabi Dioso capanepaenatsi pacuenia baja Dioso pejumelivaisibaxutota tajëvelia jumaitsi. Dioso pejumelivaisibaxutota tajëvelia jumaitsi mapacueniaye: Jerusalén tomaraverena najetarucaena daxitajivi pecapanepaenënexa. Bajaraponë daxita judíovi, pamonaë Israelpijinë pemomoxi, vecuaajibiaexanaena pibisiacuenepexanaeneconimi. <sup>27</sup> Itsa bajaraponë vecuaajibiaexanaena pibisiacuenepexanaeneconimi, nexata jane baja toexanaenajë pacuenia bajayata tajëvelia najumecapanepaeya jumaitsinë bajarapamonae pijasalinaivimijavabelia, jai tajëvelia Dioso pejumelivaisibaxutota Dioso pejumaitsiyava judíovi pecapanepaejavanaxa Cristo pejamatabëcueneta.

<sup>28</sup> Judíoviyajuvënëvi Dioso pijavajabitsaë naexana. Tsipaji apo jumecovënëtsi Cristo pelivaisi pecapanepaenexatsi Diosojavabelia. Itsiata abaxë tsiteca Dioso asiva judíovi. Tsipaji bajayata copiata Dioso itapeta bajarapamonae pijasalinaivimi pijajivinexa. <sup>29</sup> Xua Dioso rajuta judíovijavabelia, apo vecuacanaviatsi. Pamonaë pijinia Dioso junata pijajivinexa, apo navecuaxuabi tsane. Nexata itsamatacabi bajarapamonae Dioso athëbëtatsia yajavaecaena daxitamatacabijavabelianexa. <sup>30</sup> Paxamë apo pajudíovimë, pamatacabi abaxë Cristo pelivaisi apo pajumecovënëtsimë, Dioso picani apo papijajivimë. Judíovi apo pejumecovënëtsixae Cristo pelivaisi, nexata apo pajudíovi atamë, Dioso pacaitaxutotsoniatane. Papijajivimë baja pacaexana. <sup>31</sup> Bajara pijinia pacuenia itsane judíovi ata. Maparucaeje abaxë judíovi apo jumecovënëtsi Cristo pelivaisi. Itsiata itsamatacabijavabelia judíovi ata Dioso itaxutotsoniataenatsi pacuenia paxamë ata Dioso pacaitaxutotsoniatane. <sup>32</sup> Dioso tocopata daxitajivi pijacuata penatojitsipaecuenia

pexanavanapaenexa Dioso pitorobicueniatsi apo pejumecovënëtsixae. Nexata daxitajivi naneconita Diosojavabelia. Bajarapacuenia Dioso tocopata itsamatacabijavabelia icatsia pitaxutotsoniataenexa bajarapamonae.

<sup>33</sup> ¡Dioso baja cajena pitaxutotsoniataenë daxitajivi pecapanepaenexa! ¡Dioso cajena bitso peyapëtaenë! ¡Daxitalivaisi bitso pejumeyapëtaenëua! Pacuenia Dioso najamatabëcuenevereta pexanaenexa, pacuenia ata baja exanapona, vaxaitsi bajaraxua Dioso apo jamatabëcuenyapëtaetsi. <sup>34</sup> Dioso pejumelivaisibaxutota jumaitsi mapacueniaje. “Vaxaitsi apo jamatabëcuenyapëtaetsi xua najamatabëxaina Dioso. Apo nacacajëpaenua vajamuxujiobinexa ata. <sup>35</sup> Dioso cajena itsajivijavabelia ata apo amoneyabi. Nexata xua Dioso rajuta itsajivijavabelia, apo rajutsi piamoneyabimatamo,” jai Dioso pejumelivaisibaxutota Dioso yabara. <sup>36</sup> Tsipaji cajena Dioso pijacuata exana daxitacuene. Evetanua daxitacuene. Daxitacuene baja cajena Dioso pijajava. Nexata Diosojavabelia vaxaitsi bejumaitsitsi tsabiabi mapacueniaje: “¡Diosomë, bitso ayaijamatabëcuenenëmë!” bejaitsi tsabiabi daxitamatacabijavabelianexa. Bajara itsi tsane.

## 12

*Pacuenia Dioso pejumecovënëtsinë benajamatabëcuenerajuta Diosojavabelia pijajivitonënexa daxitamatacabijavabelianexa yabara pelivaisi*

<sup>1</sup> Tajamonae, payapëtaneme rabaja Dioso ayaicuenia vajanacaitaxutotsoniataejava. Bajaraxuata pacaitorobatsi mapacueniaje. Pacuenia ofrenda barajutatsi Diosojavabelia Dioso pijajavanexa, bajara pijinia pacuenia panajamatabëcuenerajure Diosojavabelia, pacuenia Dioso pacaitorobapona paneexanabiabinexa daxitamatacabijavabelianexa. Nexata ëDioso pijacuene panetonacuenebijava, pacaasaëmëre tsavanapae papecasivabarëyanexa Dioso. Bajarapacuenia Diosojavabelia panajamatabëcuenerajure panejamatabëëthëtojavavetsina panetsitanajamatabëcueneitajëtsinexa pepacuene panejitsipaejava Dioso. <sup>2</sup> Pëtsa paexanavanapame pacuenia exanavanapa Dioso apo pejumecovënëtsivi. Biji rajane panajamatabëcuene copare Diosojavabelia papecarajutsinexa pejanajamatabëcuene. Nexata bajarapacuenia payapëtaename xua Dioso pacatojitsipa paneexanabiabinexa. Xua Dioso pacatojitsipa paneexanabiabinexa, bajaraxua bitso pexaniacuene. Bajaraxua itsa paexanabiabianame, Dioso pacasivabarëya tsane.

<sup>3</sup> Dioso raja taneitaxutotsoniataexae, nitoroba tatonacuenebinexa. Bajaraxuata mapacuenia pacajumaitsitsije. Pacuenia baja aeconoxae pajamatabëcueneit-simë tsavanapae, bajarapajamatabëcuene matatoxenetsia pëtsa panataneme paayaijamatabëcuenevimë bitso. Biji rajane paejivimë canacujitsia, xuavajëto Dioso pacajamatabëcuene caëjëpaeyaexanapona paneexanabiabinexa panenajamatabëcuene copatsixae Diosojavabelia, bajarapacuenia saya baja panataema. <sup>4</sup> Jivi itsa naexana, yajavanaexana peperabëto, caeperabëtoreca. Itsiata bajarapaperabëtopijivi saicaya xainapona pevënëanë. Caevito canacujitsia saicaya xaina pexanabiabijavanexa. <sup>5</sup> Bajara pijinia pacuenia vaxaitsi ata itsitsi, Jesucristojavabelia vajanajamatabëcuene copatsivi. Ayaibitsaëto atatsi, itsiata caenë Cristo beperabëtotsi. Nexata namataenetsia nayavenonabiabianatsi.

<sup>6</sup> Caejivitsi canacujitsia, pacuenia Dioso nacatojitsipa, saicaya nacajamatabëcuene caëjëpaeyaexanapona vajaexanabiabinexa. Nexata Dioso betonacuenebavanapatsi pacuenia nacajamatabëcuene caëjëpaeyaexanapona. Dioso itsa nacajamatabëcuene caëjëpaeyaexana jivi vajatsipaebabiabinexa Dioso pejumelivaisi, nexata betsipaebababatsi xaniavaetsia pacuenia nacajamatabëcuene caëjëpaeyaexana. <sup>7</sup> Itsa pijinia Dioso nacajamatabëcuene caëjëpaeyaexana vajayavenonabiabinexa itsamonae Dioso pejumecovënëtsivi, nexata xaniavaetsia beyavenonabiabatsi Dioso pejumecovënëtsivi. Pajivi pijinia Dioso jamatabëcuene caëjëpaeyaexanatsi Dioso pejumelivaisi jivi petsipaebabiabinexa, xaniavaetsia betsipaebababatsi daxita pejamatabëcuenesaëta. <sup>8</sup> Pajivi

pijinia Dioso jamatabëcuene caëjêpaeyaexanatsi itsamonae pemuxujiobabiabinexa pejamatabëcueneasaëyaexanaenexa Dioso pejumecovënëtsijava, bajarapajivi bemuxujiobabiaba xaniavaetsia bajarapamonaejavabelia. Pajivi pijinia rajutabiaba pexainaeyajuvënëjava bepejiobivijavabelia, berajutabiaba itsajamatabëcuene xainaenejeva. Pajivi pijinia itsacuenejava evetsiaexanatsi, bevetaponapona xaniavaetsia. Pajivi pijinia yavenonabiaba piavitanevi, pamonaë ata bitso najamatabëxaina pijamonaejiviyo itsa totêpatsi, beyavenonabiaba barëyaya.

*Pacuenia Jesucristo pijajivi bexanavanapa yabara pelivaisi*

<sup>9</sup> Xaniavaetsia namataenetsia panaasivamëre tsavanapae. Paitoyamëre pibisiacuene pexanaejava. Pacaasaëmëre tsavanapae ëpexaniacuene paneexanaejava. <sup>10</sup> Pacuenia nacaenapijivi bitso nasiva, bajarapacuenia panaasivamëre tsavanapae Cristo papijajivixamë. Itsamonae Dioso pejumecovënëtsivi, patojitsipare itsamonae petaenexatsi ayaijamatabëcuenevi paxamë matatoxenetsia. Namataenetsia panayaiyataeyabiabare.

<sup>11</sup> Pacaasaëmëre tsavanapae Dioso pijacuene panetonacuenebijava. Pëtsa pafaetabimë. Daxita panejamatabëcuenesaëta patonacuenebabiabare Dioso pijacuene.

<sup>12</sup> Pasivabarëyamëre tsavanapae. Tsipaji rabaja payapëtaneme itsamatacabi panexainaejavanexa matacabi apo pevereverecejava. Itsamonae itsa pacabejiobiaexana Cristo papijajivixamë, bajayajebi ata, pëtsa pacopatame. Daxitamatacabi pavajëtabi-abare Diosojavabelia pacopatsinejevamë.

<sup>13</sup> Itsajota Dioso pejumecovënëtsivi namatavenona, payavenonabiabare. Pamonaë pacasivaxaina panijaboyaberena, xaniavaetsia pacopiapitabiabare.

<sup>14</sup> Pamonaë pibisiacuene pacaexana, patovajëtabiabare Diosojavabelia Dioso peyavenonaenexatsi. Patovajëtabiabare pexaniacuene. Pëtsa patovajëtabiabame pibisiacuene juya pibisiacuene pexanaenexatsi.

<sup>15</sup> Pamonaë barëya petocopiapatsixaetsi pexaniacuene, bajarapamonae paxamë ata pajamatabëcueneyavenonaeya barëyamëre. Pamonaë pijinia nua petocopiapatsixaetsi apo pejitsipaecuene, bajarapamonae paxamë ata pajamatabëcueneyavenonaeyanuema.

<sup>16</sup> Najamatabëcuenejêpaeya pajinavanapare. Pëtsa panataneme paayaijamatabëcuenevimë. Pamonaë beeveliajamatabëcuenevi ata, xaniavaetsia pataema. Xaniavaetsia payajavajinavanaparenu. “Xanë bitso tayapëtaenë itsamonae matatoxenetsia,” pajamatabëjamë pëtsa.

<sup>17</sup> Itsajivi pibisiacuene itsa pacaexana, pëtsa juya pibisiacuene panamatamoexaname. Paexanabiabare ëpexaniacuene, xua jivi tsitaxanepanatsi. <sup>18</sup> Xua Dioso pacajamatabëcuenecaëjêpaeyaexana paneexanaenexa, bajaraxua paexanabiabare xaniavaetsia panejinavanapaenexa, daxitajivijavabelia itsacuene paexanaenejevamë.

<sup>19</sup> Tajamonae bitso patacaasivavi, itsamonae pibisiacuene itsa pacaexana, pëtsa panamatamotame. Pacopare saya bajarapamonae Dioso penaneconitsiaexanaenexatsi. Tsipaji Dioso pejumaitisijava, Dioso pejumelivaisibaxutota jumaiti mapacueniaje: “Pamonaë pibisiacuene exana itsamonaejavabelia, xanë naneconitsiaexanaenajë,” jai Dioso pejumelivaisibaxutota. <sup>20</sup> Dioso pejumelivaisibaxutota itsabaxutota pijinia jumaiti mapacueniaje: “Nijavajabitsaënë itsa piajani, rajure pexaejava. Mera itsa jitsipa, rajure mera piapaenexa. Bajarapacuenia itsa exaname, nexata caurataena nijavajabitsaënë ata,” jai Dioso pejumelivaisibaxutota. <sup>21</sup> Itsajivi pibisiacuene itsa pacaexana, pëtsa pibisiacuene panamatamoexaname. Tsipaji bajarapacuenia panajamatabëcuene bijianaëjitsipame. Biji rajane pajivi pibisiacuene pacaexana, pexaniacuene patoexanare. Nexata bajarapacuenia pibisiacuene papecaexanaejivi ata, pajamatabëcuenecaeviaexaname.

## 13

<sup>1</sup> Daxita pamonaë gobierno pijajivi, papecayanacuaevetsivi, pacuenia bajarapamonae pacaitoroba, xaniavaetsia pajumecovënëtabiabare. Tsipaji bajarapamonae, caenë canacujitsia, Dioso pejamatabëcueneta pacayanacuaeveta. Daxita pamonaë nacua

pevetsivi, pacaeveta Dioso petocopatsixaetsi. <sup>2</sup> Nexata pajivi apo jumecovënëtsi pacuenia nacuaevetsinë itorobatsi, bajarapajivi Dioso ata apo jumecovënëtsi. Pamona apo jumecovënëtsi, nexata bajarapamona Dioso naneconitsiaexanaenatsi. <sup>3</sup> Pamona pexaniacuene exanavanapa, nacuaevetsivi apo cujunavi. Pamona pijinia pibisiacuene exanavanapa, nacuaevetsivi cujunava. Paxamë nexata pexaniacuene paexanavanapare ajunavijibia panejinavanapaenexa. Nexata pacasivabarëya tsane papecyanacuavevetsivi. <sup>4</sup> Bajarapamona Dioso pejamatabëcueneta nacuenebavanapa. Nexata pacaevetavanapa pibisiacuenevecua. Itsiata pibisiacuene itsa paexaname, papecyanacuavevetsivi bepacujunavame. Tsipaji bajarapamona Dioso tocopatatsi papecananeconitsiaexanaenexa. Dioso tocopatatsi bajarapamona penaneconitsiaexanaenexa daxita pamona pibisiacuene pexanaevi. <sup>5</sup> Bajaraxuata bejumecovënëtatsi pamona vajanacayanacuavevetsivi. Apo jumecovënëtsitsi saya vajanacaneconitsiaexanaeyaniva. Jume baja cajena. Biji rajane jumecovënëtatsi tsipaji Dioso pijajivixaetsi, vajajamatabëcueneta yapëtanetsi pacuenia bexanavanapatsi. <sup>6</sup> Bajaraxuata nacuaevetsivijavabelia impuestomatamo pamatomotabiabame panematamotsipalatata penaevetsinexa. Nacuaevetsivi, Dioso pejamatabëcueneta, tocopatatsi nacua pevetsinexa. Nexata nacua ëpevetsicuene nacueneba.

<sup>7</sup> Pacuenia pacaejivimë canacujitsia bepatoexaname gobierno pejamatabëcueneta penacuenebivijavabelia, bajarapacuenia patoexanabiabare. Bajarapamonaeyajuvënëvi itsa caetuata impuestomatamo, xuavajëto pamoneyabame, pamatomotabiabare. Pamona pijinia peyayataevitsi, payayataeyabiabare. Pamona peyayataevitsi, bajarapamona pexaniacuenia pabaracuaicuaijamëre tsabiabi. <sup>8</sup> Pëtsa pamoneyabame itsajivi ata. Biji rajane pacuenia Cristo pacaasiva, bajarapacuenia paxamë ata panaasivamëre tsavanapae. Pajivi asiva itsajivi ata pacuenia nasiva pijacuata, bajarapajivi jumecovënëtsicapane Dioso Moiséspijinëta penajumecopatsilivaisi. <sup>9</sup> Dioso Moiséspijinëta penajumecopatsilivaisi, itaveta mapacueniaje: “Pëtsa jaitame itsava nijavavecuca. Pëtsa beyaxuabame jivitonë. Pëtsa nacobetoxotame. Pëtsa najumetsënëtsiaya baracuaicuaijamë itsajivi. Pëtsa cobecaëbame itsajivi pexinaejava,” jai Dioso Moiséspijinëta penajumecopatsilivaisi. Nexata paxamë itsa pajumecovënëtsicapanepeajitsipame daxita mapalivaisije, itsalivaisiyo ata yajava, pajumecovënëtsicapanepeajitsipame mapejumaitsilivaisiyoje: “Asivamëre itsajivi ata pacuenia xamë nijacuata nasivamë,” pejailivaisiyo. <sup>10</sup> Tsipaji pajivi asiva itsajivi ata, pibisiacuene apo exanae bajarapajivijavabelia. Bajaraxuata itsa asivatsi itsamona ata, nexata jumecovënëtsicapanepeatsi daxita pacuenia Dioso nacaitoroba.

<sup>11</sup> Bajarapacuenia itsamona ata biasivatsi. Tsipaji baja yapëtanetsi bitso baja imoxoyo pevajënae icatsia Jesucristo pepatsijavanexatsica. Vajanacacapanepaenënexa, najetarucaena vajanacacapanepaenexa mapanacuavecucaje. Pamatacabi taxuxuabatsi Jesucristo vajajumecovënëtsijava, nacatsita tajëvajënae abaxë itajara Jesucristo icatsia pepatsijavanexatsica. Aeconoxae baja bitso imoxoyo pevajënae icatsia Jesucristo pepatsijavanexatsica. <sup>12</sup> Meravi abaxë aitaquiri. Itsa baja icatsia matabijitsia, pitaquirijavami baja ajibi tsapona. Bajara pijinia pacuenia imoxoyo baja pevajënae pecopiarucaenexa mapanacuapijivi pibisiacuene pexanaejava yabara pajamatabëcueneitaquirijavami. Tsipaji baja imoxoyo pevajënae icatsia Jesucristo pepatsijavanexatsica. Bajaraxuata bexanavanapatsi ëpexaniacuene Dioso pejitsipaecuenia. <sup>13</sup> Aeconoxae baja vajavajënaeyabelia, jinavanapaenatsi xaniavaetsia vajayapëtaexae pexaniajailivaisi. Apo ponae tsanetsi piatajibivijava. Apo ponae tsanetsi fiestajava ata, itsajota pibisiacuene exanavanapa. Apo exanae tsanetsi pibisiacuene vajavitota. Apo exanae tsanetsi itsacuenejava ata, xua pibisiacuene. Nabijataeya apo najumeanaenotsi tsanetsi. Itsamona ata apo cuenecaëbi tsanetsinua. <sup>14</sup> Biji rajane vajëtabiabianatsi vajatuxanenë Jesucristojavabelia vajanacayavenonabiabinexa. Vajatuxanenë Jesucristo nacajamatabëcueneasaëyaexanaena vajatojinavanapaenexa vajanacatojitsipaecuenia. Apo sivanajamatabëxainae tsanetsi pacuenia vajacuata natojitsipatsi pibisiacuene vajaexanaenexa.

## 14

*Pacuenia Pablo itaveta Roma tomarapijivi Dioso penajuajumecovënëtsivi itsa janitane pexaejava jumapecataeya pexanaenëanëjavabelia peyajuvënërajutsivi, "Pibisiacuene exana mapajivije," pejaiyaniva, yabara pelivaisi*

<sup>1</sup> Pajivi jumecovënëtsi ata Jesucristo pesivatëpaejavatsi pijaneconi yabara, itsiata abaxë itsa apo ajamatabëcuenesaë pejumecovënëtsijava, bajarapajivi ata xaniavaetsia pacopiapire panenacaetuatsibojavaberena itsa najunua. Bajarapajivi pijaneconi yabara Jesucristo pesivatëpaejavatsi pejumecovënëtsicujinae, copata baja pexaeyabiabijavami jumapecataeya pexanaenëanëjavabelia perajutsiyajuvënëvi. Nexata baja cujunava pexaejava, bepibisiacuene pexanaejava petaexae. Pëtsa pajumeanaenotame bajarapitsijivijavabelia panexaeyaexanaenexa icatsia bajarapayajuvënëvi. <sup>2</sup> Itsamonae Cristojavabelia penajamatabëcuenecopatsivi, jamatabëjumaitsi: "Daxitacuene xanepana vajaxaenexa," jamatabëjai. Itsamonae pijinia abaxë jamatabëjumaitsi: "Dioso nacananeconitsiaexanaejitsipa jumapecataeya pexanaenëanëjavabelia perajutsiyajuvënëvi itsa xanetsi," jamatabëjai. Nexata ëpeubijava xane jumapecataeya pexanaenëanëjavabelia perajutsiyajuvënëvi pexaeyaniva. <sup>3</sup> Nexata pajivi xane jumapecataeya pexanaenëanëjavabelia perajutsiyajuvënëvi, pëtsa bijiaya tane pajivi apo xae jumapecataeya pexanaenëanëjavabelia perajutsiyajuvënëvi. Pajivi pijinia apo xae jumapecataeya pexanaenëanëjavabelia perajutsiyajuvënëvi, pëtsa neconitsiaya jumaitsi jivijavabelia: "Pibisiacuene exana pajivi xane jumapecataeya pexanaenëanëjavabelia perajutsiyajuvënëvi," jai pëtsa. Tsipaji Cristojavabelia penajamatabëcuenecopatsijivi daxitacuene itaxutojema xae ata, itsiata Dioso tanetsi aneconijibia. Nexata bajarapajivi Dioso capanepaenatsi. <sup>4</sup> Dioso apo pacatocopatsi Dioso pijajivitonë neconitsiaya jivijavabelia panejumaitsinexa mapacueniaje: "Xua exana bajaraponë, pibisiacuene. Nexata Dioso naneconitsiaexanaenatsi," panejainexa. Dioso pijajivitonë xaniavaetsia Dioso itsa tonacueneba, xaniavaetsia apo tonacuenebi atanua, caenë, Dioso, toxanepanatsi, pacuenia jamatabëjumaitsi, pejumaitsinexa pijajivitonëjavabelia. Dioso cajena caëjëpatsi peyavenonaenexa pijajivi pejitsipaecuenia xaniavaetsia petojinavanapaenexatsi pesivabarëyanexa.

<sup>5</sup> Itsamonae Dioso pejumecovënëtsivi yaiyataeyabiaba matacabi. Nexata itsamatacabianëvecua caematacabi yaiyataeyabiaba. Itsamonae pijinia najëpaeya tane daxitamatacabianë. Pamonaeyaiyataeyabiaba caematacabi itsamatacabianëvecua, bajarapamonae xaniavaetsia beyapëtane pajamatabëcuenelivaisi yabara yaiyataeyabiaba caematacabi. Pamonaeyata pijinia najëpaeya tane daxitamatacabianë, xaniavaetsia beyapëtane pajamatabëcuenelivaisi yabara najëpaeya tane daxitamatacabianë. <sup>6</sup> Pajivi nacueraeveta itsamatacabi, bajarapajivi nacueraeveta peyayataenexa Dioso. Pajivi pijinia apo nacueraevetsi bajarapamatacabi, apo nacueraevetsi tsipaji jamatabëexana pacuenia Dioso itorobatsi. Pajivi pijinia xane jumapecataeya pexanaenëanëjavabelia perajutsiyajuvënëvi, bajarapajivi xane peyayataenexa Dioso. Tsipaji jamatabëjumaitsi: "Dioso cajena netocopata daxitacuene taxaenexa," jamatabëjai. Nexata pexaniajamatabëcuene rajutabiaba Diosojavabelia. Pajivi pijinia apo xae jumapecataeya pexanaenëanëjavabelia perajutsiyajuvënëvi, bajarapajivi apo xae peyayataenexa Dioso. Tsipaji jamatabëjumaitsi: "Mapavije apo xanë tananeconitsiyaniva Diosojavabelia," jamatabëjai. Nexata pexaniajamatabëcuene rajutabiaba Diosojavabelia ëpeubijava pexaeyabiabixae.

<sup>7</sup> Itsajivi ata vaxaitsiyajuvënëjivi, Dioso pejumecovënëtsijivi, apo ponaponae ëpijacuata penatojitsipaecuenia pexanaponaponanexa. Biji rajane exanaponapona pacuenia Cristo tojitsipatsi. Petëpaematacabianexa ata yabara, apo jamatabëjumaitsi: "Tëpaenajë pamatacabi natojitsipajë tatëpaejava," apo jamatabëjai. <sup>8</sup> Vaxaitsi abaxë vajaasaëtsavanapaeepato, tojinavanapatsi pacuenia vajatuxanenë nacatojitsipa. Itsiata baitsi jane itsamatacabi, tëpaenatsi. Tsipaji Dioso nacatojitsipaena vajatëpaenexa. Aeconoxae abaxë vajaasaëtsavanapaevi, vajatuxanenë pijajivitsi tsavanapae. Vajatëpacujinae ata tsane, tsiteca vajatuxanenë pijajivitsi tsavanapae tsane. <sup>9</sup> Cristo baja cajena nacasivatëpa

vajatuxanenë vaxaxanaenexa. Nexata icatsia Cristo asaë tsaponaponaë petëpaecujinaë. Bajaraxuata Cristo daxitajivi pijatuxanenë. Piasaëtsavanapaevi, petëpaevi ata, daxita pamonaë najamatabëcuenecopata bajaraponëjavabelia, Cristo cajena pijatuxanenë.

<sup>10</sup> Bajaraxuata nexata jumapecataeya pexanaenëanëjavabelia perajutsiyajuvënëvi paxamë panijabananë pexaejava yabara, baracuaicuaijaiya apo bepajumaitsimë mapacueniaje: “Maponëje pibisiacuene exana. Nexata Dioso naneconitsiaexanaenatsi,” apo bepajamë. Bijiaya ata apo bepataemë bajaraponë. Tsipaji cajena itsamatacabi daxitatsi vaxaitsi Cristo pitabarata nubenaenatsi, caejivitsi canacujitsia, vajanavajunupaebaponaenexa daxita pacuenia exanavanapatsi mapanacuataje. <sup>11</sup> Bajaraxua yabara Dioso pejumelivaisibaxutota tajëvelia jumaitsi mapacueniaje:

Dioso tajëvelia jumaitsi: “Xanë daxitamatacabijavabelianexa tasaëtsaponaponaenë. Nexata tajumaitsiijume xaniajanë. Itsamatacabi daxitajivi taitabarata pe-matabacabëta netonubenaena taneyaiyataexae. Daxitajivi nevajunupaebiana Diosonëcuenenë,”

jai Dioso pejumelivaisibaxutota mapacueniaje Dioso tajëvelia pejumaitsijava daxitajivi yabara.

<sup>12</sup> Nexata vaxaitsi itsamatacabi, caejivitsi canacujitsia, navajunupaebaponaenatsi Diosojavabelia daxita pacuenia exanavanapatsi mapanacuataje.

*Pacuenia Pablo itaveta Roma tomarapijivi Dioso penajuajumecovënëtsivi Diosovecua pejopaeyaexanaeyaniva petsitaexanaejava pejamatabëcueneta yabara pelivaisi*

<sup>13</sup> Itsamatacabi caejivitsi canacujitsia nubenaenatsi Cristo pitabarata vajanavajunupaebaponaenexa pacuenia exanavanapatsi mapanacuataje. Bajaraxuata itsanë vajabananë pexanaejava yabara, apo bebaracuaicuaijaitsi pibisiacuena. Biji rajane bejamatabëjumaitsiitsi mapacueniaje: “Apo tsitaexanaenë tsane itsacuenejavayo ata, xua yabara itsajivi, Dioso pejumecovënëtsijivi, jamatabëcuenebijianaëjitsipatsi,” bejamatabëjaitsi. <sup>14</sup> Najamatabëcuenecopatajë xaniavaetsia vajatuxanenë Jesucristojavabelia. Nexata yapëtaniji Dioso tanetocopatsijava taxaenexa xua picani cujunavajë taxaejava Jesucristojavabelia tanajamatabëcuenecopatsivajënaeya. Itsiata meta itsanë Dioso pejumecovënëtsinë bajaraxua itsa xane, jamatabëjumaitsi tsipae: “Dioso apo netocopatsi taxaenexa bajaraxua. Itsa xaejitsipajë, naneconitsipajë Diosojavabelia,” jamatabëjai tsipae. Nexata apo xae tsipae bajaraxua. <sup>15</sup> Panijabananë itsa apo pexanë jumapecataeya pexanaenëanëjavabelia perajutsiyajuvënëvi, pëtsa patsitaxaneme. Tsipaji paxamë itsa patsitaxaejitsipame jumapecataeya pexanaenëanëjavabelia perajutsiyajuvënëvi, panijabananë bepacasivajamatabëjiobi tsipae. Tsipaji panijabananë bepibisiacuene patsitaexanaeajitsipame itsa patsitaxaejitsipame jumapecataeya pexanaenëanëjavabelia perajutsiyajuvënëvi. Nexata jumapecataeya pexanaenëanëjavabelia perajutsiyajuvënëvi, panijabananë itsa patsitaxaejitsipame, nexata panijabananë asivaya apo pataemë tsipae. Tsipaji itsa pacajanitaejitsipa panexaejava jumapecataeya pexanaenëanëjavabelia perajutsiyajuvënëvi, nexata bajaraponë ata naxaejitsipa. Nexata Diosojavabelia bepaneconitsinë nataejitsipa penaxaexae jumapecataeya pexanaenëanëjavabelia perajutsiyajuvënëvi. Panetsitaxaejava pejamatabëcueneta Diosovecua panenaxuabiaexanaeyaniva panijabananë, pëtsa patsitaxaneme jumapecataeya pexanaenëanëjavabelia perajutsiyajuvënëvi. Tsipaji rabaja vajatuxanenë Cristo sivatëpa bajaraponë ata penaxuabiyaniva. <sup>16</sup> Payapëtae atamë, xua picani xanepana paneexanaenexa, itsiata panijabananë itsa cujunava bajaraxua pexanaenexa, pëtsa patsitaexaname. Tsipaji panijabananë pacataejitsipa pibisiacuene bepaneexanaevi. <sup>17</sup> Vaxaitsi baja najamatabëcuenecopabatsi Cristojavabelia. Nexata jumecovënëtavanapatsi Dioso. Apo nacaitorobi vajanayanijobabiabinexa ëvajaxaejava yabara, vaxaapaejava ata yabara. Biji rajane nacaitoroba xaniavaetsia aneconijibia najamatabëcuenejëpaeya vajajinavanapaenexa. Nacaitorobanua jamatabëcuenebarëyaya vajajinavanapaenexa Espiritu Santo vajanacatsijamatabëcaexae. <sup>18</sup> Pajivi Dioso pijacuene tonacuenebapona, sivajamatabëcuenebarëyatsi Dioso. Jivi ata xaniavaetsia yaiyatantsi.

<sup>19</sup> Xua Dioso nacayavenona vajajinavanapaenexa najamatabëcuenejëpaeya, bajaraxua exanavanapaenatsi. Xua ata nacayavenona namataenetsia vajanajamatabëcuene asaëyaexanaenexa Diosojavabelia, bajaraxua ata exanavanapaenatsi. <sup>20</sup> Pëtsa patsitaxaneme xua panijabananë tane bepitavetsijavatsi pexaeyaniva. Nexata itsa pacajanitaejitsipa panexaejava, bajarapajivi ata naxaejitsipa. Nexata bepenaneconitsinë Diosojavabelia nataejitsipa. Panexaejava pejamatabëcueneta, bajarapajivi Diosovecua pajopaeyaexanaejitsipame. Bajaraxuayaniva pëtsa patsitaxaneme xua cujunava panijabananë. Xaniajai rabaja. Daxitacuene rabaja picani xanepana vajaxaenexa. Itsiata pibisiacuene paexanaejitsipame itsa patsitaxaejitsipame xua panijabananë taejitsipa bepibisiacuene paneexanaejava itsa paxaejitsipame. <sup>21</sup> Bajaraxuata pëtsa paxaneme jumapecataeya pexanaenëanëjavabelia perajutsiyajuvënëvi. Pëtsa papamenua piatanera paneaitajibyaniva. Pëtsa paexanamenua itsacuenejava ata, xua pejamatabëcueneta panijabananë pajopaeyaexanaejitsipame Diosovecua. Pëtsa patsitaxaneme xua panijabananë jamatabëcuene faefaenaeyaexanaejitsipatsi. <sup>22</sup> Itsa baja xaniavaetsia payapëtaneme pexanepanaecuene panexaenexa, xua picani pacujunavame panexaejava Jesucristojavabelia panenajamatabëcuene copatsivajënaeya, saya pamoyamë tsane. Tsipaji Dioso yapëthane pacuenia panajamatabëxainame bajaraxua yabara. ¡Bitso jamatabëcuenebarëya pajivi pexanabiabijava yabara jamatabëjumaitsi: “Dioso pitabarata aneconijibia toponaponajë,” jamatabëjai! <sup>23</sup> Pajivi pijinia jamatabëjumaitsi ata: “Apo xanepanae tsipae taxaenexa bajaraxua,” jamatabëjai ata, itsiata itsa xaejitsipa, bajarapajivi pibisiacuene natoexanaejitsipa Diosojavabelia. Tsipaji pijacuata najamatabëcuenebijianaejitsipa. Daxita pijinia xua yabara vaxaitsi jamatabëjumaitsi: “Dioso apo jitsipae vajaexanaenexa bajaraxua,” jamatabëjai atatsi, itsiata itsa exanaejitsipatsi bajaraxua, nexata pibisiacuene natoexanaejitsipatsi Diosojavabelia.

## 15

### *Pacuenia becanaëjëtatsi vajabananë vajajamatabëcuene yavenonaenexa yabara pelivaisi*

<sup>1</sup> Vaxaitsi ajamatabëcuenesaëtsi Dioso vajajumecovënëtsijava. Nexata beyavenonatsi pamona abaxë jamatabëcuenefaefaena Dioso pejumecovënëtsijava. Pëtsa exanatsi vaxaitsi vajacuata vajanatojitsipaecuenia. <sup>2</sup> Biji rajane caejivitsi canacujitsia becanaëjëtatsi vajabananë vajajamatabëcuene yavenonaenexa. Xua yabara vajabananë ajamatabëcuenesaëjitsia, bajaraxua betoexanavanapatsi vajabananë pejamatabëcuenevitsabinexa Diosojavabelia. <sup>3</sup> Tsipaji Cristo ata, ponë Dioso athëbëvetsica itorobica jivi pëcapanepaenexa, abaxë itsa ponapona mapanacuataje, apo exanae pijacuata penatojitsipaecuenia. Biji rajane nacopata pebejiobiaexanaenexatsi pacuenia Dioso tojitsipatsi. Paxa Diosojavabelia Cristo pejumaitsijava, Dioso pejumelivaisibaxutota tajëvelia jumaitsi mapacueniaje: “Pacuenia picani jivi xamë pibisiacuena jamatabëcabaracuaicuaijai, xanë nebaracuaicuaijai tsane,” jai tajëvelia Dioso pejumelivaisibaxutota paxa Diosojavabelia Cristo pejumaitsijava. <sup>4</sup> Palivaisi bajayata yaquina Dioso pejumelivaisibaxutota, bajarapalivaisi vaxaitsi ata nacatocopata vajajumecovënëtsinexa, vajanacajamatabëcuene yavenonaenexanua. Bajaraxuata bajayajebi nacabejiobiaexanabiabi ata Dioso pijajivixaetsi, itsiata ajamatabëcuenesaëtsi tsavanapae. Tsipaji yapëtanetsi pacuenia Dioso najumecapanepaeya jumaitsi bajarapalivaisita vajanacapanepaenexa. <sup>5</sup> Itsacuenejavaxi yabara bajayajebi itsa nacajamatabëcuenejëtapona, nexata Dioso nacajamatabëcuene yavenonapona. Nacajamatabëcueneasaëyaexanapona bajayajebinexa ata. Pacatovajëtatsi Diosojavabelia Dioso papecayavenonaenexa, najamatabëcuenejëpaeya daxita panejinavanapaenexa Jesucristo papecatojitsipaecuenia. <sup>6</sup> Nexata daxita paxamë najamatabëcuenejëpaeya vajatuxanenë Jesucristo paxa Diosojavabelia pajumaitsimë tsabiabi tsane: “Diosomë, bitso ayajamatabëcuenenëmë,” pajamë tsabiabi tsane.

*Pacuenia apo judíovi ata pexanialivaisi tsipaebatsi pecapanepelivaisinexatsi yabara pelivaisi*

<sup>7</sup> Pajudíovinē, apo pajudíovi atamē, najēpaeya Cristo nacapita pijajivinexatsi. Bajara pijinia pacuenia paxamē ata najēpaeya xaniavaetsia namataenetsia panacopiapitabiabianame. Nexata bajarapacuenia itsa paexanabiabianame, daxitajivi Dioso yaiyataena. Nexata daxitajivi jumai tsabiabi tsane Dioso yabara: “Dioso cajena bitso ayaijamatabēcuenenē. Tshipaji pijajivi yavenona xaniavaetsia petojinavanapaenexatsi,” jai tsabiabi tsane. <sup>8</sup> Mara pacajumaitsitsije. Jesucristo athēbēvetsica patsica mapanacuayabetsicaje peyavenonaenexa judíovi. Bajarapacuenia Jesucristo athēbēvetsica patsica petocopiapatsixaetsi pacuenia bajayata Dioso najumecapanepaeya jumaitsi judíovi pijasalinaivijavabelia. Nexata bajarapacuenia Dioso pexaniajainēcuene najamatabēcuenetajēta judíovijavabelia. <sup>9</sup> Jesucristo athēbēvetsica patsica pemapanepaenexa apo judíovi ata. Nexata apo judíovi ata Jesucristo pejamatabēcueneta: “Diosomē, bitso ayaijamatabēcuenenēmē,” jai tsabiabi tsane Diosojavabelia. Bajara-pacuenia apo judíovi ata jumai tsabiabi tsane Diosojavabelia pitaxutotsoniataexaetsi Dioso. Nexata bajaraxua yabara Cristo paxa Diosojavabelia pejumaitsijava, Dioso pejumelivaisibaxutota jumaitsi mapacueniaje:

Xanē tajamatabēcueneta, daxitanacuanēpijivi: “Diosomē, bitso ayaijamatabēcuenenēmē,” cajai tsabiabi tsane. Catonaxēanabiabiananua vajianē ata, jai Dioso pejumelivaisibaxutota paxa Diosojavabelia Cristo pejumaitsijava.

<sup>10</sup> Apo judíovi ata Dioso pijajivi pexanaejavanexatsi yabara, itsabaxutota Dioso pejumelivaisibaxutota jumaitsi mapacueniaje:

Apo pajudíovimē, pajamatabēcuenēbarēyamēre Dioso pijajivi, judíovi yajava, jai Dioso pejumelivaisibaxutota apo judíovi ata Dioso pijajivi pexanaejavanexatsi yabara.

<sup>11</sup> Itsabaxutota pijinia Dioso pejumelivaisibaxutota jumaitsi icatsia mapacueniaje:

Paxamē apo pajudíovimē, Diosojavabelia pajumaitsimēre: “Diosomē, bitso ayaijamatabēcuenenēmē,” pajamēre. Paxamē, padaxitamē, itsamonaejavabelia pajumaitsimēre: “Caenē Dioso bitso ayaijamatabēcuenenē,” pajamēre, jai Dioso pejumelivaisibaxutota.

<sup>12</sup> Isafáspijinē pijinia itsabaxutota tajēvelia yaquina Jesucristo pelivaisi. Jumaitsi mapacueniajē:

Penacuetonēyo naexanaena. Nexata Isaípijinē bepemomonēyocuenia naexanaena. Itsa vitsabiana, Dioso evetsiaexanaenatsi jivi, daxitanacuanēpijivi. Pamonaē apo judíovi, jumecovēnētsiana bajaraponē pesivatēpaejavatsi pemapanepaenexatsi pijaneconivecua, jai tajēvelia Isafáspijinē peyaquinaebaxutota Jesucristo yabara.

<sup>13</sup> Yapētanetsi Dioso vajanacacapanepaejavanaxa Jesucristo pejamatabēcueneta. Nexata pacatovajētatsi Dioso papecajamatabēcuenē barēyayaexanaenexa. Pacatovajētatsinua jamatabēcuenexanepanaeya panejinavanapaenexa. Bajarapacuenia Dioso pacajamatabēcueneyavenonaena tshipaji Dioso pajumecovēnētame. Espíritu Santo ata, ponē pacatsijamatabēeca, pesaēta panevajēnaeyabelia pacajamatabēcuenē asaēyaexanaponaena Dioso papecacapanepaejavabelianexa.

<sup>14</sup> Tajamonae, pacayapētanetsi paxamē papexaniajamatabēcuenēvijavamē. Pacayapētanetsinua paxamē bitso paneyapētaejava Cristo papecasivatēpaejava pibisiacuene paneexanaeneconi yabara. Pacayapētanetsinua paneyapētaejava xaniavaetsia namataenetsia panenamuxujobinexa. <sup>15</sup> Tajamonae, palivaisi baja payapētaneme, bajarapayajuvēnēlivaisi panenajamatabēnapitsinexa, icatsia ajumeurajibia pacatoyaquinatsi mapabaxutotaje. Bajarapacuenia ajumeurajibia pacatoyaquinatsi tshipaji Dioso nitoroba.

<sup>16</sup> Dioso taneitaxutotsoniataexae, bajarapacuenia nitoroba Jesucristo pijajivitonēnēxanē Jesucristo pelivaisi tatsipaebabibinexa apo judíovijava. Nexata apo judíovi tshipaebabibajē pexanialivaisi, Jesucristo pelivaisi, pemapanepaelivaisinexatsi Diosojavabelia. Espíritu Santo pejamatabēcueneta apo judíovi ata Cristo pijajivi exanatsi. Bajaraxuata Dioso sivabarēyatsi Dioso pepitsinexatsi bajarapamonae, apo judíovi ata.

<sup>17</sup> Jesucristo pijajivitonëxaenë, Jesucristo neyavenonabiaba itsa tonacuenebabiabajë. Bajaraxuata barëyanë tatsipaebaponaenexa itsamonaejavabelia Jesucristo taneyavenonabiabijava tatonacuenebinexa Dioso. <sup>18</sup> Rovialia tsipaebabiabajë ajumeurajibia. Tsipaebabiabajë vajatuxanenë Jesucristo taneyavenonabiabijava tatonacuenebinexa Dioso. Vajatuxanenë Jesucristo neyavenonabiaba tatsipaebabiabinexa apo judíovijavabelia apo judíovi ata pejumecovënëtsinexa Dioso. Nexata apo judíovi itsa jumetane tatsipaebabiabilivaisi, itsa tanenua Dioso pesaëta pinijicuene taexanaponaejavanë, bajarapamonae jumecovënëta baja Jesucristo pesivatëpaejavatsi pibisiacuene pexanaeneconi yabara. <sup>19</sup> Vajatuxanenë Dioso pesaëta nejamatabëcuenecaëjëpaeyaexana pinijicuene taexanaenexa. Espíritu Santo ata pesaëta nejamatabëcueneyavenona. Bajaraxuata apo judíovi tsipaebaponajë pexanialivaisi, Jesucristo pelivaisi, Diosojavabelia pecapanepaelivaisinexatsi. Tsipaebaponajë baja bajarapalivaisi Jerusalén tomarajava. Bajaraxuacujinae tsipaebaponajë daxitanacuanëjava. Tajënacujavabelia ata, Ilírico nacujavabelia, tsipaebaponajë. <sup>20</sup> Itsa tsipaebaponajë pexanialivaisi, Jesucristo pelivaisi, jitsipajë tatsipaebaponaenexa itsaxuayo abaxë jivi apo vënëlivaisitae Cristo. Apo jitsipaenë tsipaebaponaejava itsaxuayo baja tavajënaeya itsamona tsipaebapona. <sup>21</sup> Bajarapacuenia apo judíovi itsa tsipaebaponajë Jesucristo pelivaisi, copiapata jane baja pacuenia baja cajena Dioso pejumelivaisibaxutota tajëvelia jumatsi tatsipaebaponaejavanexa yabara. Mapamatacabitaje apo judíovijava Jesucristo pelivaisi tatsipaebaponaejavanexa yabara, Dioso pejumelivaisibaxutota tajëvelia jumatsi mapacueniaje:

Pamonae abaxë apo vënëlivaisitae, ponë athëbëvetsica Dioso itorobijitsiatsica jivi pecapanepaenexa, bajarapamonae bajaraponë pelivaisi tsipaebianatsi. Nexata bajarapamonae jumecovënëtsiana ponë pelivaisi tsipaebianatsi, jai tajëvelia Dioso pejumelivaisibaxutota Dioso pitorobinëtsitsica pelivaisi apo judíovijava mapamatacabitaje tatsipaebaponaejavanexa yabara.

*Pacuenia picani Pablo jamatabëponabiaba Roma tomarabelia yabara pelivaisi*

<sup>22</sup> Bajayajebi picani bitso jamatabëpacataeyabiabatsi. Itsiata apo necueneecaëjëpae taponaeenexa paxamëjavabelia daxitanacuanëjava Dioso pejumelivaisi tatsipaebanajetarucaexae. <sup>23</sup> Aeconoxae baja veretajë tanacuenebijava mapanacuajavaje. Nexata jane baja ponaenajë paxamëjavabelia. Tsipaji picani bajayajebi jamatabëpacataeyabiabatsi. <sup>24</sup> Pamatacabi ponaenajë España nacuyabelia, patsianajë copiaya paxamëjavata patacataenexa. Itsa baja nataenatsi, bitso jamatabëcuenenabarëya tsavanapae tsanetsi. Bajaraxuacujinae jitsipajë pataneyavenonaenexamë tajanamutonexa taponaeenexa jane baja España nacuyabelia. <sup>25</sup> Bajara masaya pamatacabitaje ponaenajë Jerusalén tomarabelia ofrenda tatocaponaenexa Dioso pejumecovënëtsivi. <sup>26</sup> Dioso pejumecovënëtsivi, Macedonia nacuapijivi, Acaya nacuapijivi ata, ofrenda baja toexana. Bajarapaofrenda toexana petoitorobinexa Dioso pejumecovënëtsivi, pamonae bepejiobivi, Jerusalén tomarata pejinavanapaevi. <sup>27</sup> Macedonia nacuapijivi, Acaya nacuapijivi ata, apo judíovi. Itsiata tsitaxanepanatsi bajarapacuenia ofrenda petoexanaenexa peyavenonaenexa juya judíovijavabelia, Jerusalén tomarapijivi. Tsipaji judíovi copiaya yapëtane pexanialivaisi pecapanepaelivaisinexatsi Diosojavabelia. Nexata judíovi pejamatabëcueneta, pamonae apo judíovi ata, yapëtane baja pecapanepaelivaisinexatsi Diosojavabelia. Bajaraxuata pamonae apo judíovi beyavenona juya judíovijavabelia. Judíoviyajuvënëvi aeconoxae bitso namatavenona peyavenonaenexatsi mapanacuata penamatavenonaejavaxi yabara. <sup>28</sup> Copiaya tocalianë tsane mapaofrendaje Jerusalén tomarapijivijavabelia. Nexata bajaraxuacujinae itsa ponaenajë España nacuyabelia, copiaya patsianajë paxamëjavata. <sup>29</sup> Itsa patsianajë paxamëjavabelia, orijibia pacatsipaebianatsi pexanialivaisi, Cristo pelivaisi, bitso panejamatabëcuenenabarëyanexa.

<sup>30</sup> Tajamonae, pajumecovënëtame vajatuxanenë Jesucristo. Paneasivamënuu Espíritu Santo pejamatabëcueneta papecajamatabëcuenetitorobixae pataniasivanexamë. Bajaraxuata pexaniacuene pacavajëtatsi. Itsa pavajëtame Diosojavabelia, xanë ata asaëy-ata panetovajëtsianame, pacuenia tajacuata natovajëtabiabajë. <sup>31</sup> Panetovajëtsianame

Diosojavabelia taneyavenonaenexa taneitsacueniabiyaniva Judea nacuapijivi, Dioso apo pejumecovënëtsivi. Panetovajëtsianamenua Dioso pejumecovënëtsivi, Jerusalén tomarapijivi, tanevecuapitsinexa xaniavaetsia paofrenda tocaponaejitsianë. Pamona apo judíovi pejebipalataxae, belia bajarapaoofrenda apo nevecuapitsi tsipae bajarapamonae judíovi. <sup>32</sup> Panetovajëtsianamenua, itsa Dioso jitsipa, barëyaya tapatsinexa paxamëjavabelia. Panetovajëtsianamenua tanejamatabëcuene asaëyaexanaenexa Diosojavabelia itsa ponaponajë paxamëjavata. <sup>33</sup> Xanë pacatovajëtabiabatsi Diosojavabelia papecayajavaponaponaeenexa Dioso. Dioso cajena nacayavenonabiaba jamatabëcuenebarëyaya vajajinavanapaenexa. Bajara itsi tsane.

## 16

### *Pacuenia Pablo jamatabënjinalia peyapëtaevitsi, Roma tomarapijivi, yabara pelivaisi*

<sup>1</sup> Payavenonaename vajabanava Febe, pova ponaejitsia paxamëjavabelia. Bajarapova yavenonabiaba Dioso pejumecovënëtsivi, Cencrea tomarapijivi. <sup>2</sup> Pacopiapitsianame xaniavaetsia bajarapova vajatuxanenë Jesucristo pejamatabëcueneta, pacuenia vaxaitsi copiapitabiabatsi Dioso vajanajuajumecovënëtsivi. Xua namatavenona bajarapova, payavenonaename. Tsipaji bajarapova yavenonabiaba ayaiBITSaëto Dioso pejumecovënëtsivi. Xanë ata neyavenonabiaba.

<sup>3</sup> Nebajacobiana Prisca. Prisca pamona ata, Aquila, nebajacobiana. Bajarapajivibeje tayajavanacuenebijivibeje vajatuxanenë Jesucristo pijacuene. <sup>4</sup> Bajarapajivibeje toyai atatsibeje petëpaejavanexabeje picani, necapanepabeje tatëpaejavaminexavecua. Nexata jumaitsinë: “Pexaniacuene baja cajena bitso panetoexanamebeje,” janë bajarapajivibejevabelia. Itsiata ëxanë bajarapacuenia apo jumaitsinë. Daxita pamona apo judíovi, Dioso pejumecovënëtsivi, bajarapamonae ata, bajarapacuenia jumaitsitibeje tanecapanepaexaebje. <sup>5</sup> Pamona Dioso pejumecovënëtsivi, pamona nacaetuatabiaba Priscabeje Aquilabeje pijabota, bajarapamonae ata nebajacobiana. Nebajacobiananua tasivanë Epeneto. Bajaraponë daxita Asiavënë nacuapijivivecua copiaya najamatabëcuenecopata Jesucristojavabelia. <sup>6</sup> Nebajacobiananua María, pova bitso tonacuenebabiaba Dioso pijacuene paxamë tuatujëta. <sup>7</sup> Nebajacobiananua tajanacuapijinëbeje, Andrónicobeje Juniasvënënebeje. Bajayata bajaraponëbeje panenajuajeba penaneconitsivi pejebabiabibota. Bajaraponëbeje yayataeya baracuaicuajitsibeje pevëna apóstolevi ata. Xanë ata tanajamatabëcuenecopatsivajënaeya, bajaraponëbeje najamatabëcuenecopatabeje Cristojavabelia.

<sup>8</sup> Nebajacobiananua Ampliato. Bitso tasivanë. Tsipaji bajaraponë ata Cristojavabelia najamatabëcuenecopata. <sup>9</sup> Nebajacobiananua Urbano. Bajaraponë ata tonacuenebaponapona vajatuxanenë Jesucristo pijacuene pacuenia vaxaitsi tonacuenebavanapatsi. Nebajacobiananua Estaquis, bitso tasivanë. <sup>10</sup> Nebajacobiananua Apeles, ponë picani dovathi pejamatabëcueneta jamatabëcueneëjëtatsi Cristo pelivaisi pejumecovënëtsijava yabara. Itsiata apo copatsi pejumecovënëtsijava Cristo pelivaisi. Nebajacobiananua Aristóbulo pijamonae. <sup>11</sup> Nebajacobiananua tajanacuapijinë Herodión. Nebajacobiananua Narciso pijamonae, pamona penajamatabëcopatsivi Cristojavabelia. <sup>12</sup> Nebajacobiananua Trifenabeje Trifosabeje, povabeje tonacuenebabiaba Dioso pijacuene. Nebajacobiananua vajaasivava Pérsida, pova bitso tonacuenebabiaba Dioso pijacuene. <sup>13</sup> Nebajacobiananua Rufo, ponë bitso xaniavaetsia jumecovënëta vajatuxanenë. Bajaraponë pena ata nebajacobiana. Bajarapova bepexënatonë netaeyabiaba. <sup>14</sup> Nebajacobiananua Asíncrito, Flegonte ata, Hermas ata, Patrobas ata, Hermes ata, itsamonae ata, pamona najinavanapa bajarapamonaejavata. <sup>15</sup> Nebajacobiananua Filólogo, Julia ata, Nereo ata, Nereo pejuyapijiva ata, Olimpata, daxita itsamonae ata, Dioso pejumecovënëtsivi, pamona najinavanapa bajarapamonaejavata.

<sup>16</sup> Paxamë ata Dioso panejumecovënëtsixae, xaniavaetsia namataenetsia bitso nasivaya panabajacobabiabare. Daxita pina Dioso pejumecovënëtsivi majotaje pejinavana-paevi pacabajacobalia.

<sup>17</sup> Tajamonae, pacatsipaebatsi itsalivaisi. Penajumetsënëtsilivaisi petsipaebaponaevi, panayajivitaename papecayamaxëitojorobianiva. Bajarapamonae namataenetsia pacanajumeanaenotsiaexanaena najamatabëcuenejëpaeya panejinavanapaeyaniva panenavecuanatsanaenexa. Palivaisi baja paxamë pajumecovënëtame, bajarapalivaisivecua saicayalivaisi bajarapamonae tsipaebapona. Panavecuatsare bajarapamonae. <sup>18</sup> Bajarapamonae apo jamatabëexanae pacuenia jitsipa vajatuxanenë Jesucristo. Biji rajane saya jamatabëexana bajarapamonae pijacuata penatojitsipaecuenia. Bajarapamonae jivi tsipaebapona bepexaniajailivaisi itajara. Itsiata baitsi jane bajarapamonae saya jamatabëyamaxëitojoroba pamonae abaxë xaniavaetsia apo jumeyapëtae pexaniajailivaisi. <sup>19</sup> Daxitajivi paxamë pacavënëlvaisitane xaniavaetsia panejumecovënëtsijava Dioso. Bajaraxuata pacasivabarëyatsi. Pacatojitsipatsi paneyapëtaenexa bitso ëpexaniacuene paneexanaenexa. Pëtsa panacopatame itsajivi ata papecayamaxëitojorobinexa pibisiacuene paneexanaenexa. <sup>20</sup> Dioso baja cajena vajanacayavenonaeenë najamatabëcuenejëpaeya vajajinavanapaenexa, itsajivi ata vajanacayamaxëitojorobianiva penajumetsënëtsilivaisita. Nexata Dioso bepijia pacayavenonaena panejamatabëcueneamoneyabinexa dovathi. Pacatovajëtabiabatsi Diosojavabelia vajatuxanenë Jesucristo papecayavenonabiabinexa.

<sup>21</sup> Pabajacobianame pina Timoteo, Dioso patatonajuanacuenebinëbeje. Pabajacobianamenua pina tajanacuapijivi Lucio, Jasón ata, Sosípater ata.

<sup>22</sup> Xanë, Tercionë, mapabaxutotaje Pablo pijume tajumeyaquinaponaenë. Xanë ata pacajamatabënajinatsi. Tsipaji Jesucristojavabelia vajanajamatabëcueneocopatsivi.

<sup>23</sup> Pabajacobianame pina Gayo. Naponaponajë Gayo pijabota. Gayo tocopatabiaba daxita Dioso pejumecovënëtsivi penacaetuatabiabinexa Gayo pijabota. Pabajacobianamenua pina Erasto, ponë evetabiaba palata, Corinto tomarapijipalata. Pabajacobianamenua pina vajabananë Cuarto.

<sup>24</sup> Pacatovajëtabiabatsi Diosojavabelia daxita paxamë vajatuxanenë Jesucristo papecayavenonabiabinexa. Bajara itsi tsane.

*Pacuenia cotocaevipijilivaisita Pablo jumaitsi yabara pelivaisi*

<sup>25</sup> Vaxaitsi Dioso yabara jumaitsitsi tsabiabi: “Dioso cajena bitso ayaijamatabëcueneenë,” jaitsi tsabiabi. Dioso, daxitamatacabijavabelianexa peponaponaenë, caëjëpatsi papecjamatabëcuene asaëyaexanaenexa pejumelivaisita. Bajarapalivaisi pexanialivaisi, Jesucristo pelivaisi, jivi pecapanepaelivaisinexatsi Diosojavabelia. Bajarapalivaisi jivi tsipaebaponajë. Bajarapalivaisi bajayajebi picani Dioso muetsia xainabuata. Dioso nacua pexanaejavaveliacujinae, muetsia Dioso xainabuata Jesucristo pelivaisi. <sup>26</sup> Bajarapalivaisi bajayata Diosojumelivaisipaebivi profetavi tajëvelia yapëtane baja cajena. Nexata bajarapalivaisi profetavi yaquina. Nexata bajarapalivaisi mapamatacabitaje Dioso jane baja nacayapëtaeyaexana. Nexata Dioso pijajivi itorobapona daxitanacuanëpijivijava petsipaebinexa Jesucristo pelivaisi. Bajarapacuenia Dioso pijajivi itorobapona daxitanacuanëpijivi ata pejumecovënëtsinexa Jesucristo pelivaisi.

<sup>27</sup> ¡Caenë rabaja Dioso daxitacuene peyapëtaenë! Bajaraxuata daxitamatacabijavabelianexa voxaitsi vajatuxanenë Jesucristo pejamatabëcueneta Diosojavabelia jumaitsi tsabiabi: “¡Diosomë, bitso ayaijamatabëcuenenëmë!” jaitsi tsabiabi. Bajara itsi tsane.

## Mapabaxutoje San Pablo copiaya toyaquina Corinto tomarapijivijavabelia

*Pacuenia Pablo toyaquina mapabaxutoje Dioso pejumecovënëtsivi, Corinto tomarapijivijavabelia, yabara pelivaisi*

<sup>1</sup> Xanë Pablonë, Dioso tanetojitsipaexae, nitapeta Jesucristo pijaapóstolenënexanë. Nexata Jesucristo nitoroba jivi pexanialivaisi tatsipaebaponaenexa daxitanacuanëjava. Vajabananë Sóstenes neyavenona mapalivaisije patacatoyaquinaejava paxamëjavabelia. <sup>2</sup> Mapabaxutoje pacatoyaquinatsibeje Dioso panejumecovënëtsivi, paCorinto tomara-pijivimë. Dioso baja papijajivimë Jesucristo pejamatabëcueneta aneconijibia Dioso papecataexae. Dioso pacajunata papijajivinexamë xaniavaetsia panetojinavanapaenexa. Pacayajavajunata baja cajena daxita Dioso pejumecovënëtsivi, itsanacuanëjava pejinavanapaevi, pamonaev navajëcabiaba Jesucristojavabelia. Vajatuxanenë Jesucristo rabaja bajarapamonaev ata pijatuxanenë. <sup>3</sup> Pacatovajëtatsi vaxa Diosojavabelia, vajatuxanenë Jesucristojavabelia ata, papecaitaxutotsoniataenexa jamatabëcuenexanepanaeya panejinavanapaenexa.

*Pacuenia Corinto tomarapijivi Cristo pijajivixae, Dioso yavenonabiabatsi yabara pelivaisi*

<sup>4</sup> “Xanepana rabaja pacuenia yavenonabiabame bajarapamonaev Jesucristo pijajivixae,” janë tsabiabi Diosojavabelia tavajëtabiabijavata paxamë yabara. <sup>5</sup> Jesucristo pijajivixaemë, daxitacuene yabara Dioso pacajamatabëcueneyavenonabiaba. Pacayavenonabiabanua xaniavaetsia jivi panetsipaebinexa Dioso pejumelivaisi. Pacajumeyapëtaeyaexananua pepo pexaniajailivaisi. <sup>6</sup> Xua yabara pacatsipaebabiabatsi Cristo papecajamatabëcuene yavenonabiabinexa, baja rajane pacatocopiapata. Bajarapacuenia papecatocopiapatsixae, nexata baja pajamatabëcuenesaemë tsavanapae panejumecovënëtsijava bajarapalivaisi. <sup>7</sup> Nexata abaxë paepatojebi pacopiaevetavanapame vajatuxanenë Jesucristo icatsia pepatsijavanexatsica, Dioso pacacajëjpaeyaexanabiaba panetoexanavanapaenexa daxita pacuene Dioso pacatojitsipa. <sup>8</sup> Dioso cajena pacayavenonaponaena paneajamatabëcuenesaenëxaxa Dioso panejumecovënëtsijava daxitamatacabijavabelianexa. Nexata pamatacabi vajatuxanenë Jesucristo icatsia patsianica, toacuenebi tsanetsi itsajivi ata papecaneconitsinexa. <sup>9</sup> Dioso cajena bajarapacuenia pacatoexanaena. Tspaji pacuenia Dioso najumecapanepaeya jumai tsabiabi pexanaenexa, exanabiaba. Dioso pacajunata pexënato, vajatuxanenë Jesucristo, papijajivinexamë.

*Pacuenia Dioso pejumecovënëtsivi navecuanatsanapona apo penajamatabëcuenejpaexae yabara pelivaisi*

<sup>10</sup> Tajamonaev, pacaitorobatsi vajatuxanenë papijajivixaemë, najamatabëcuenejpaeya panejinavanapaenexa. Pëtsa panavecuanatsanaeyajoneponame itsajavabelia. Biji rajane najamatabëcuenejpaeya pajinavanapare. Najamatabëcuenejpaeya xaniavaetsia panajamatabëxainare caelivaisi. <sup>11</sup> Mapacuenia pacatoyaquinatsije tspaji Cloévënëva pijajivi netsipaeba. Apo panajamatabëcuenejpaemë pina. Daxitatsi baja cajena caenë vajatuxanenë Jesucristo pijajivitsi. Paxamë tuatujëta pina itsamonaev nabijataeya namataenetsia najumeanaenotabiaba. <sup>12</sup> Itsamonaev pina xanë yabara jumai tsabiabi: “Xanë raja saicaya Pablo pijajivitonënë,” jai pina tsabiabi. Itsamonaev pina jumai tsabiabi: “Xanë raja saicaya Apolos pijajivitonënë,” jai pina tsabiabi. Itsamonaev pina jumai tsabiabi: “Xanë raja saicaya Pedro pijajivitonënë,” jai pina tsabiabi. Itsamonaev pina jumai tsabiabi: “Xanë raja saicaya Cristo pijajivitonënë,” jai pina tsabiabi. <sup>13</sup> Bajarapacuenia paxamëyajuvënëvi apo bejumaitsi tsabiabi. Tspaji bajarapalivaisi yabara nabijataeya namataenetsia penajumeanaenotabiabixae, navecuanatsanapona. Bajarapacuenia apo benavecuanatsanaponaev tspaji baja cajena Cristo caenë tsaponaponaev. Apo navitsanaev

baja cajena. Nexata pamonaē ata Cristo pijajivi, caebitsaēto rabaja tsavanapae. Nexata apo benavecyanatsanaponae. Nexata itsajivi ata xanē yabara apo bejumaitsi: “Xanē raja saicaya Pablo pijajivitonēnē,” apo bejai. Tsipaji xanē itsajivi ata apo sivanabeyaxu-  
 abiaexanaenē cruzata. Itsajivi ata baja cajena apo bautisabitsi tavēnēta tajajivitonē penaexanaenexa. <sup>14</sup> Xanē baja cajena apo bautisabinē jivi ayaibitsaēto. Saya bautisabajē anijanēbeje, Cristobeje Gayobeje. Bajaraponēbeje itsa bautisabajē, bautisabajē Cristo pevēnēta. Nexata jivi ayaibitsaēto apo tabautisabixae, sivabarēyanē Diosojavabelia. <sup>15</sup> Nexata acuenebi itsajivi ata pejumaitsijava: “Xanē raja nebautisaba Pablo pevēnēta. Nexata Pablo pijajivitonēnē,” pejajjava. <sup>16</sup> Jemajanē tsaena. Bautisabajēnua tsaena Estēfanas pijamonae. Pematatsēnēa baja apo najamatabēnapitsinē pajiviyo bautisabajē. <sup>17</sup> Cristo apo nitorobi bitso jivi tabautisabaponaenexa. Biji rajane Cristo nitoroba tatsipaebaponaenexa jivi pexanialivaisi pecapanepaelivaisinexatsi Diosojavabelia. Nexata pacuenia Dioso nejamatabēcuenecaējēpaeya exanapona, bajarapacuenia pacatsipae-  
 baponatsi. Apo nitorobi baja cajena tatsipaebaponaenexa pematatsēnēa itsalivaisicue-  
 nia. Pacuenia tsipaebabiaba pamonaē yapētane saya maēpanacuapijilivaisije, baja-  
 rapacuenia tatsipaebinxae, Cristo apo nitorobi. Nexata itsa tsipaebaponaējitsipajē pacue-  
 nia tsipaebabiaba pamonaē yapētane saya maēpanacuapijilivaisije, nexata Jesucristo  
 vajanacasivatēpaejava cruzata tsipaebi atanē tsipae jivijavabelia, ajumematamobinē  
 tsipae.

*Pacuenia Cristo jivijavabelia tsitajēta Dioso piasaēnēcuenē, Dioso bitso daxitacuene peyapē-  
 taenēcuenē ata, yabara pelivaisi*

<sup>18</sup> Itsamonae pijaneconi yajavatēpaena. Bajarapamonae jumetae ata Jesucristo cruzata vajanacasivatēpaejava, bajarapalivaisi apo jumecovēnētsi. Benatsiquejemali-  
 vaisi saya tane. Itsiata baitsi jane vaxaitsi Dioso vajanacacapanepaevinexa, bajarapali-  
 vaisi nacayapētaeyaexana Dioso piasaēnēcuenē. <sup>19</sup> Dioso baja cajena pejumelivaisibaxu-  
 tota tajēvelia jumaitsi mapacueniaje:

Itsamonae bitso yapētane mapanacuapijilivaisije. Bajarapamonae peyapētaelivaisimi,  
 itsamatacabi vecuaajibiaexanaenajē. Pamonaē ata bitso peyapētaevi itajara  
 tanetsi mapanacuapijivije, xanē itsamatacabi jamatabēcuenēitajētsianajē pacue-  
 nia jamatabēcuenēitsi. Nexata bajarajota daxitajivi jamatabēcueneyapētaenatsi  
 bajarapamonae saya bevelia peyapētaevicuenē,  
 jai baja cajena tajēvelia Dioso pejumelivaisibaxutota.

<sup>20</sup> Ponē yapētane saya maēpanacuapijilivaisije, ajumematamobi cajena. Ponē ata bajayajebi nacujaruba maēpanacuapijilivaisije, nexata yapētae ata, ajumematamobi  
 cajena. Ponē ata bitso ajumelivaisisaēya cuaicuajai, bajaraponē ata ajumemata-  
 mobi cajena. Daxita bajarapitsivi ajumematamobi, itsa apo natovajētsi Diosojav-  
 abelia peyavenonaenexatsi peyapētaenexa jane baja xaniavaetsia. Dioso baja cajena  
 nacayapētaeyaexana mapanacuapijilivaisije natsiquejemalivaisicuenē. Tsipaji Dioso  
 apo penajamatabēxainaelivaisi. <sup>21</sup> Dioso baja cajena daxitacuene bitso peyapētaenē  
 mapanacuapijilivaisi peyapētaevi matatoxenetsia. Nexata Dioso apo tocopatsi peja-  
 matabēcueneyapētaenexatsi pamonaē bitso yapētane saya mapanacuapijilivaisije. Biji  
 rajane Dioso jamatabēcapanepa pijaneconivecua pamonaē jumecovēnēta pexanialivaisi,  
 palivaisi patsipaebaponajē, Jesucristo cruzata vajanacasivatēpaelivaisi. Bajarapalivaisi  
 itsamonae betsitanatsiquejemalivaisi atatsi, itsiata bajarapalivaisi pejamatabēcueneta  
 capanepaenatsi pamonaē jumecovēnētavanapa bajarapalivaisi.

<sup>22</sup> Judíovi itsa jumetaeyabiaba patatsipaebijava Diosojavabelia picani pecapanepaeli-  
 vaisinexatsi, najumai tsabiabi ēpamonae: “Itsa taejitsipatsi Dioso pesaēta pinijicuenē  
 pexanaejava pamonaē nacatsipaeba mapalivaisije, nexata matapania jumecovēnētsi-  
 patsi bajarapalivaisi pexaniajailivaisicuenē,” najai tsabiabi judíovi. Griegovi ata itsa  
 patsipaebabiabajē bajarapalivaisi, najumai tsabiabi ēpamonae: “Mapalivaisije itsa jume-  
 jēpaejitsipa palivaisi nacatsipaebabiaba vajayajuvēnēvi, daxitalivaisi bitso peyapētaevi,

nexata matapania jumecovënëtsipatsi pexaniajailivaisicuene mapalivaisije,” najai tsabiabi griegovi. <sup>23</sup> Itsiata baitsi jane paxanë itsa patsipaebaponajë bajarapalivaisi, “Cristo raja nacasivatëpa cruzata vajanacacapanepaenexa vajaneconivecua,” pajanë tsabiabi. Bajarapacuenia patatsipaebijava judíovi jumetaeyabiabi ata, itsiata apo jumecovënëtsi. Anaepanabiaba saya. Apo judíovi ata itsa jumetaeyabiaba Cristo vajanacasivatëpaevajava cruzata, benatsiquejemalivaisi saya jumetaeyabiabi. <sup>24</sup> Itsiata pamona Dioso junatatsi pecapanepaenexatsi, judíovi, apo judíovi ata, bajarapamonae jumeyapëtaepona bajarapalivaisi. Nexata bajarapamonae yapëtaepona Dioso piasaënëcuene. Tsi-paji bajarapamonae Dioso capanepaejitsiatsi pijaneconivecua Cristo pesivatëpaexatsi cruzata. Bajarapamonae yapëtaeponanua Dioso bitso daxitacuene peyapëtaenëcuene. Tsipaji Dioso tajëvelia najamatabëxaina bajarapamonae pibisiacuene pexanaeneconivecua pecapanepaenexa Cristo pejamatabëcueneta. <sup>25</sup> Pacuene Dioso exana jivi pecapanepaenexa pijaneconivecua, bajarapacuene mapanacuapijivije, Dioso apo pejumecovënëtsivi, betsitanatsiquejemacuenetsi. Pacuenia baja cajena Dioso tajëvelia najamatabëxaina jivi pecapanepaenexa, exana baja. Bajaraxua bitso pexaniacuene. Bitso peyapëtaevi ata mapanacuapijilivaisije, apo caëjëpaetsi bajarapacuenia penajamatabëxainaenexa. Dioso itsa copata Cristo pebeyaxuabinexatsi cruzata, bajarapaepatota Dioso saya bepiasaëjibinë tanetsi mapanacuapijivije. Itsiata baitsi jane bajarapaepatota Dioso najamatabëcueneitajëta bitso piasaënëcuene daxita mapanacuapijivije matatoxenetsia. Tsi-paji bajarapaepatota Dioso pinijicuene exana vajanacacapanepaenexa vajaneconivecua. <sup>26</sup> Tajamonae, pacanaëjère mapacueneje. Paxamëyajuvënëvi caejivibeje saya bitso peyapëtaevi mapanacuapijilivaisije. Caejiviyobeje pijinia saya ayaijamatabëcuenevi. Caejiviyobeje saya petuxanevi pexi. Paxamë paayaibitsaëtoxanetomë beveliajamatabëcuene saya panexainaevi. Bajarapacuenia beveliajamatabëcuene panexainaevi ata, itsiata Dioso pacajunata papijajivinexamë. <sup>27</sup> Pamona bitso peyapëtaevi mapanacuapijilivaisije, jumai tsabiabi paxamë bajarapalivaisi apo paneyapëtaevi yabara: “Mara pamona bitso apo peyapëtaevije,” jai tsabiabi. Itsiata Dioso pacaitapeta papijajivinexamë, apo paneyapëtaevi ata. Bajarapacuenia Dioso pacaitapeta, pamona bitso peyapëtaevi natane, piauranexa Dioso pitabarata, pamatacabi daxita Dioso papijajivimë bitso paneyapëtaevi pacaexanaena. Dioso cajena pacaitapetanua papijajivinexamë, mapanacuapijivije bepaveliajamatabëcuenevimë pacatae ata. Bajarapacuenia Dioso pacaitapeta, pamona bitso ayaijamatabëcuenevi natane, piauranexa Dioso pitabarata, pamatacabi daxita Dioso papijajivimë paayaijamatabëcuenevimë pacaexanaena. Bajarapamonae aura tsane itsa nayapëtaena jamatabëcuenenavëxaniabiaya beveliajamatabëcuenevi papecataejava Dioso papijajivimë. <sup>28</sup> Dioso baja cajena pacaitapeta papijajivinexamë, daxitajivi papecaitoyaxae, bijiaya papecanaëcotsivi ata. Bajarapacuenia Dioso pacaitapeta, pamona bitso ayaijamatabëcuenevi itajara daxitajivi tanetsi mapanacuataje, Dioso piaurabinexa. Bajarapamonae Dioso urabiana, pamatacabi daxita Dioso papijajivimë paayaijamatabëcuenevimë pacaexanaena. Bajarapamatacabi daxitajivi Dioso yapëtaeyaexanaena piajumematamobijava, pamona ayaijamatabëcuenevi itajara tanetsi mapanacuataje. <sup>29</sup> Bajaraxuata Dioso pitabarata jamatabëcuenenavëxaniabiaya itsajivi ata apo bejumaitsi itsajivijavabelia: “Xanë bitso ayaijamatabëcuene taxainaenë,” apo bejai. <sup>30</sup> Dioso papecaitaxutotsoniataexae, pacaitapeta papijajivinexamë. Nexata Jesucristo payajavajinavanapame. Vaxaitsi Dioso jamatabëcueneyapëtanetsi. Tsi-paji Jesucristo nacajamatabëcueneyavenona Dioso vajajamatabëcueneyapëtaenexa. Jesucristo pejamatabëcueneta Dioso aneconijibia nacatane. Pijajivitsinua Dioso nacaexana. Nacavecuaajibiaexananua pibisiacuene vajaexanaeneconimi. <sup>31</sup> Bajaraxuata jivijavabelia benavajunupaebatsi Dioso vajanacayavenonaejava. Tsi-paji Dioso pejumelivaisibaxutota jumaitsi mapacueniaje: “Pëtsa navajunupaebame saya nijacuata nexanaejava yabara jivi pecayaiyataenexa. Biji rajane navajunupaebare Dioso pecayavenonaponaejava. Nexata jivi Dioso yaiyataena,” jai Dioso pejumelivaisibaxutota.

## 2

*Pacuenia Jesucristo sivatëpa mapanacuapijivije yabara pelivaisi*

<sup>1</sup> Tajamona, pamatacabi ponajë paxamëjavabelia, pacatsipaebatsi baja cajena pexaniajailivaisi, Dioso pejumelivaisi. Nexata bajarapamatacabi apo pacatsipaebitsi pacuenia tsipaebabiaba pamonae bitso peyapëtaevi mapanacuapijilivaisije. Biji rajane pacatsipaebatsi xaniavaetsia jumenapebetsiaya panejumeyapëtaenexa patacatsipaebilivaisi. <sup>2</sup> Itsa ponaponajë paxamëjavata, najamatabëxainajë patacatsipaebinexa ëJesucristo pelivaisi. Nexata bitso pacatsipaebabiabatsi Jesucristo vajanacasivatëpaejava cruzata. <sup>3</sup> Paxamëjavata itsa ponaponajë patacatsipaebinexa pexaniajailivaisi, Jesucristo pelivaisi, najamatabëcueneyapëtaniji apo tanecaëjëpaejava tajacuata patacatsipaebinexa. Nexata natsijamatabëcuenebëjanë. Jamatabëcueneneconeconajë Dioso pitabarata bajarapalivaisi patacatsipaebijavanexa yabara. <sup>4</sup> Bajarapamatacabi pexaniajailivaisi itsa pacatsipaebabiabatsi, Dioso neyavenonabiaba. Xanë ëtajamatabëcuenesaëta bajarapalivaisi apo pacajumecovënëtsiaexanaetsi. Biji rajane Espiritu Santo pacatsijamatabëcuaicuaijai. Dioso pesaëta pinijicuene taexanaejava ata, pataneme. Bajaraxuata patacatsipaebilivaisi pexaniajailivaisicuene, payapëtaneme. Nexata bajarapalivaisi pajumecovënëtame. <sup>5</sup> Bajarapacuenia pacatsipaebatsi panenajamatabëcuenecopatsinexa Diosojavabelia, Dioso pesaëta papecayavenonaponanexa. Tsipaji apo pacatojitsipaetsi paneyajavajumecovënëtsinexa pamonae mapanacuataje tanetsi bitso peyapëtaevi mapanacuapijilivaisije.

*Pacuenia Dioso najamatabëcuenetitajëtaona pejumecovënëtsivitsijavabelia Espiritu Santo pejamatabëcueneta yabara pelivaisi*

<sup>6</sup> Dioso bitso pejumecovënëtsivi tuatuajëta itsa pajinavanapajë, patsipaebavanapajë Dioso pejumelivaisi, pexaniajailivaisi. Bajarapalivaisi apo yapëtae mapanacuapijivije. Mapanacuanë pevetsivi ata apo yapëtae. Bajarapamonae saicaya itsalivaisi xaina. Bajarapamonae bajarapalivaisi yajavatëpaena. <sup>7</sup> Dioso pejumelivaisi, pexaniajailivaisi, itsa patsipaebavanapajë, patsipaebavanapajë Cristo vajanacasivatëpaejava vajanacapanepaenexa vaneconivecua. Bajarapalivaisi baja cajena Dioso bajayata tajëvelia muetsia xainabuata. Matapania aeconoxae mapamatacabitaje Dioso nacayapëtaeyaexana bajarapalivaisi. Dioso baja cajena nacua pexanaevajënaeya ata, najamatabëxaina pacuenia exanaejitsia vajanacarajutsinexa matacabi apo peverevereaejava. <sup>8</sup> Nexata abaxë pamatacabi Cristo ponaponan mapanacuataje, itsanë ata mapanacuanë pevetsiviyajuvënënë apo jumeyapëtae bajarapalivaisi, Cristo pelivaisi. Bajarapamonae itsa jumeyapëtaejitsipa bajarapalivaisi, nexata Cristo apo beyaxuabi tsipaetsi cruzata, ponë pepo petuxanenë, Dioso pexënato. <sup>9</sup> Nexata bajarapamonae apo pejumeyapëtaexae Cristo pelivaisi, copiapata jane baja pacuenia Dioso pejumelivaisibaxutota tajëvelia jumaitsi mapacueniaje:

Xua abaxë itsajivi ata apo tae, apo jumetaenua, apo sivanajamatabëxainaenua, bajaraxua Dioso baja cajena toxaniavaeta pamonae Dioso pejitsipaevinexa, jai tajëvelia Dioso pejumelivaisibaxutota Cristo vajanacasivatëpaejavanexa cruzata.

<sup>10</sup> Nexata vaxaitsi Cristo vajanacasivatëpaejava, Dioso nacayapëtaeyaexana Espiritu Santo pejamatabëcueneta. Espiritu Santo baja cajena daxitacuene nacayapëtaeyaexana. Pacuenia Dioso najamatabëxaina vajanacapanepaenexa, bajaraxua ata Dioso nacayapëtaeyaexana Espiritu Santo pejamatabëcueneta.

<sup>11</sup> Vaxaitsi apo nacacaëjëpae vajajamatabëcueneyapëtaenexa pacuenia bëpënëa najamatabëxaina itsajivi. Itsiata bajarapajivi pijacuata najamatabëcueneyapëtane. Bajara pijinia pacuenia vaxaitsi ata Dioso apo jamatabëcueneyapëtae tsipaetsi pacuenia Dioso najamatabëxaina Espiritu Santo itsa apo nacayapëtaeyaexanae tsipae. <sup>12</sup> Tsipaji Dioso apo naticopatsi vajacuata vajajamatabëcueneyapëtaenexa pacuenia Dioso najamatabëxaina. Bajaraxuata Dioso nacarajuta Espiritu Santo vajanacatsijamatabëcaenexa. Nexata Espiritu Santo pejamatabëcueneta nacayapëtaeyaexana pacuenia Dioso

nacayavenonaejitsia Jesucristo pejamatabëcueneta. <sup>13</sup> Nexata livaisi itsa tsipaebaponatsi Dioso pejumecovënëtsivijavabelia, tsipaebaponatsi pacuenia Espiritu Santo nacayapëtaeyaexanapona. Apo tsipaebaponaetsi mapanacuapijicuene yabaraje, xua vajacuata banajamatabëxainatsi.

<sup>14</sup> Pajivi Dioso apo jumecovënëtsi, bajarapajivi apo jumecovënëtsi palivaisi picani Espiritu Santo ata yapëtaeyaexanaejitsiatsi. Tsipaji saya bajarapalivaisi betsitanatsiquejmalivaisitsi. Bajarapajivi apo caëjëpaetsinua pejumeyapëtaenexa palivaisi Espiritu Santo yapëtaeyaexanatsi. Tsipaji Espiritu Santo petsijamatabëenaevitsi, caëjëpatsi pejumeyapëtaenexa palivaisi Espiritu Santo yapëtaeyaexanatsi. <sup>15</sup> Pajivi tsijamatabëecatsi Espiritu Santo, bajarapajivi pejamatabëcueneta yapëtaeyaexanaponatsi xua Dioso tsitapexaniacuenetsi. Yapëtaeyaexanaponatsinua xua ata Dioso tsitapibisiacuenetsi. Nexata Dioso apo pejumecovënëtsivi apo caëjëpaetsi peneconitsinexatsi bajarapajivi Diosojavabelia. <sup>16</sup> Dioso pejumelivaisibaxutota bajaraxua yabara jumaisi mapacueniaje: “Itsajivi ata apo yapëtae pacuenia najamatabëxaina pepo petuxanenë Dioso. Nexata itsajivi ata apo caëjëpaetsi pemuxujiobinexa Dioso,” jai Dioso pejumelivaisibaxutota. Nexata pacuenia Cristo jamatabëcueneitsi, bajara vaxaitsi ata jamatabëcueneitsitsi. Nexata itsajivi ata apo caëjëpaetsi vajanacajamatabëcueneypapëtaenexa. Apo caëjëpaetsinua vajanacamuxujiobinexa.

### 3

*Pacuenia Dioso pejumecovënëtsivi najamatabëcuenejëpaeya Dioso betonacuenebavanapa yabara pelivaisi*

<sup>1</sup> Tajamonae, palivaisi abaxë ayapëbeje jivi pejumeyapëtaenexa, bajarapalivaisi tsipaebabiabajë Espiritu Santo pitorobicueniatsi pejinavanapaevijavabelia. Nexata bajarapamonae nejumeyapëtaeyabiaba. Itsiata baitsi jane paxamë bajayajebi baja Cristo pelivaisi panejumecovënëtsivi ata, piayapëbejelivaisi apo pacatsipaebabiabitsi. Tsipaji apo panejumeyapëtaemë tsipae. Bajaraxuata abaxë pacatsipaebabiabatsi pacuenia tsipaebabiabajë pamona pejanajumecovënëtsivi Cristo pelivaisi. Tsitecaeya abaxë bepapejevaxijamatabëcuenemë Cristo panejumecovënëtsijava yabara. Tsipaji apo panejumeyapëtaeponaemë panevajënaeyabelia Cristo pelivaisi. <sup>2</sup> Penacuetojiviyo abaxë ëmito barajutatsi. Apo rajutsitsi abaxë pexaenexa pevi. Bajara pijinia pacuenia paxamë ata pamatacabi ajena pajumecovënëtame Cristo pelivaisi, pacatsipaebatsi peyapëxanepanaelivaisi panejumeyapëtaenexa. Tsipaji abaxë bajarapamatacabi apo pacacaëjëpae panejumeyapëtaenexa palivaisi abaxë ayapëbeje. Itsiata baitsi jane abaxë aeconoxae ata saya patsitecavanapame. Apo pacacaëjëpae panejumeyapëtaenexa pematatsënëa. Bajaraxuata paxamë abaxë bemito paneapaejivixi Cristo pelivaisi panejumecovënëtsijava yabara. <sup>3</sup> Bajarapacuenia pajamatabëcueneitsimë tsipaji abaxë mapanacuapijivije, Dioso apo pejumecovënëtsivi, jamatabëcuenejëpaeya pajinavanapame. Paxamë abaxë panacuenecaëbabiabame. Nabijataeyanua namataenetsia panajumeanaenotabiabame. Natsanaeyanua jamatabëpanavecuajinavanapame. Nexata abaxë pacatsitecavanapame mapanacuapijivi pijacuene. <sup>4</sup> Pacuenia Dioso apo pejumecovënëtsivi najamatabëcuenejëpaeya apo jinavanapae, bajarapacuenia paxamë ata najamatabëcuenejëpaeya apo pajinavanapaemë. Tsipaji paxamëyajuvënëvi, itsamonae, xanë yabara jumai tsabiabi: “Pablo raja Apolosvecua ayaijamatabëcuenenë. Bajaraxuata xanë saicaya Pablo pijajivitonënë,” jai tsabiabi. Itsamonae pijinia jumai tsabiabi: “Apolos raja Pablovecua ayaijamatabëcuenenë. Bajaraxuata xanë Apolos pijajivitonënë,” jai tsabiabi.

<sup>5</sup> Xanë Pablonë, apo ayaijamatabëcuenenë. Apolos ata raja apo ayaijamatabëcuenenë. Paxanëbeje ata raja Apolosbeje saya Dioso papijajivitonënëbeje. Bajaraxuata pacatsipaebatsibeje vajatuxanenë Cristo pelivaisi. Nexata baja pajumecovënëtame vajatuxanenë Cristo pelivaisi. Paxanëbeje patonacuenebajëbeje vajatuxanenë Cristo pacuenia paneitorobabeje. <sup>6</sup> Pabixinaevi bauba pabita xua jamatabëuba. Bajaraxuacujinae pabita peubijava eveta petoayabacabejeyanivatsi. Itsiata baitsi jane xua

uba pabita, Dioso pejamatabëcueneta tovitsabiaexanatsi. Bajara pijinia pacuenia xanë ubajë Dioso pejumelivaisi paxamë panejamatabëëthëtota. Bajaraxuacujinae Apolos pacaevetaponapona Dioso pejumelivaisita. Itsiata baitsi jane Dioso pejamatabëcueneta pacajamatabëcuene vitsabiaexanapona. <sup>7</sup> Nexata ponë uba, ponë ata evetaponapona, apo ayaijamatabëcuenenëbeje. Caenë baja cajena Dioso ayaijamatabëcuenenë. Tsipaji pacuenia pabita peubijava Dioso pejamatabëcueneta vitsabiaexana, bajara pijinia pacuenia Dioso pejamatabëcueneta pacatsijamatabëvitsabiaexanapona Dioso pejumelivaisi. <sup>8</sup> Pamonaë jivi tsijamatabëuba Dioso pejumelivaisi, pamonaë ata evetavanapa Dioso pijajivi, najamatabëcuenejëpa daxita. Itsanë ata apo ayaijamatabëcuenenë itsamonaëve-cua. Itsiata Dioso matamotsianatsi caenë canacujitsia saicaya petonacuenebimatamo. <sup>9</sup> Paxanë raja Dioso pijacue ne panebarënacueneba. Paxamë ra pijinia bepapabimë, papabita Dioso panebarëubapona pejumelivaisi. Pacuenia pabita peubijava Dioso pejamatabëcueneta vitsabiaexana, bajara pijinia pacuenia panejamatabëëthëtota Dioso pejumelivaisi vitsabiaexanapona.

Paxamë raja Dioso bepapijabomënuu, paboxaneto Dioso panebarëexanapona. <sup>10</sup> Bo pexanaevi, pexaniabo pexanaenexa, itsaxuayo bo ënëtuatuajënexa, copiaya feratonë bamatatorotsia cueruba ibotoxanetonë pemëthëcaenexa bajarapaferatonëjava. Bajaraxuacujinae bajara paibotoxanetonëjumavereca itsaibotonë banajumacatsanejebapona. Nexata xanë, pacuenia Dioso netocopata, copiaya pacatsipaebatsi pexanialivaisi Jesucristo pelivaisi. Nexata baja pajumecovënëtame bajarapalivaisi. Bajaraxuata xanë bo ënëtuatuajënexa matatoyorotsia taferacuejava, bitso betanecujaninë. Bajarapaferatonëjava ibotoxanetonë tamëthëcaejava ata, bitso betanecujaninë. Tsipaji xanë copiaya pacatsipaebatsi Cristo pelivaisi. Nexata juya pamonaë coto-caevi pacatsipaebavanapa, pacatsipaeba panevajënaeyabelia panejamatabëcuenesaë tsaponaenexa Cristo pelivaisi panejumecovënëtsijava. Bajarapamonaë boyenepananexa ibotonë bepecatsanaponaevi bo ënëtuatuajënexa matatoyorotsia tamëthëcaëibotoxanetonëjumavereca. Boyenepananexa pecatsanaponaevi baitapetapona ëpexaniaviriajava, paviriajava tsixanepana boyenepananexa. Bajara pijinia itsi pamonaë pacaevetavanapa. Ëpexanialivaisi pacatsipaebabiaba panejamatabëcuenesaënexa Diosojavabelia. <sup>11</sup> Payapëtaneme rabaja mapacueneye. Itsajivi baja capanepaeya boyenepananexa, itsa tsivajënaemëthëca ibotoxanetonë, nexata baja itsajivi ata bajarapajumabereca icatsia itsaibotoxanetonë apo bemëthëcae. Bajara pijinia paitsimë paxamë ata. Capanepaeya baja pajumecovënëtame Jesucristo papecasivatëpaejava Dioso papecavecuaajibiaexanaenexa pibisiacue ne paneexanaeconimi. Nexata baja apo bepajumecovënëtsimë saicayalivaisi. Tsipaji baja ajibi pematatsënëa itsalivaisi papecacapanepaelivaisinexa panijaneconivecua. <sup>12</sup> Pamonaë bo exana, maitsije. Itsamonaë exana bitso penamatamotsijavanëta. Itsamonaë exana bevelia penamatamotsijavanëta. Pamonaë pacatsipaebapona pexaniajailivaisi pacuenia Dioso yapëtaeyaexanaponatsi, bajarapamonaë bo bepexanaevi bitso penamatamotsijavanëta bajayajebi bo piamatabësäetsecaenexa. Bajarapamonaë bo bepexanaevi oronanitonëta, platananitonëta ata, penamatamotsiibotonëta ata. Pamonaë pijinia saya pejamatabëcueneta peyapëtaelivaisi pacatsipaebapona, bajarapamonaë bo bepexanaevi bevelia penamatamotsijavanëta, bajayajebi apo piamatabësäëjavanëta. Bajarapamonaë bo bepexanaevi saya naejavanëta, patebaxutoxita ata, bearrozbotoxita ata. <sup>13</sup> Nexata pamatacabi Cristo patsianica, bajarapamatacabi nayapëtaena caejivi canacujitsia Cristo pijajivi, pamonaë xaniavaetsia tonacuenebavanapa. Bajarapamatacabi Cristo isoto yajavapatsianica. Nexata bajarapaisotota Cristo ëjëtaponaena xua pijajivi, caejivi canacujitsia, tonacuenebatsi. Nexata bajarapacuenia Cristo yapëtaena xaniavaetsia pijajivi petonacuenebijavatsi. <sup>14</sup> Itsanë bo tonacuenebijitsipa itsanë pijabonexa. Nexata bo petoveretetsicujinae, isoto najetarucea ata, itsiata bo apo tajue tsipae isoto apo petajuejavanëta bo pexanetsixae. Nexata bo penacuenebinë matamotsipatsi. <sup>15</sup> Itsiata baitsi jane peveretetsibo itsa totajuejitsipatsi isoto petajuejavanëta, bo pexanetsixae, nexata naxuabijitsipa penacuenebijava. Bo

ata naxuabijitsipa. Penacuenebimatamo ata naxuabijitsipa. Itsiata bo pexanaenë apo naxuabi tsipae. Panepaejitsipa itsiata tsiquirijavayota. Bajara pijinia itsi Cristo pelivaisi papecatsipaebivi ata. Baitsi pamonaë xaniavaetsia pacatsipaeba, capanepaenatsi Dioso. Matamotsianatsinua Dioso. Tsipaji pacuenia Dioso yapëtaeyaexanatsi, pexanialivaisi pacatsipaebapona. Pamonaë pijinia apo pacatsipaebi xaniavaetsia, apo matamotsi tsanetsi. Tsipaji saya pejamatabëcueneta peyapëtaelivaisi, pacatsipaebapona. Itsiata bajarapamonaë ata tsiquirijavayota capanepaenatsi Dioso.

<sup>16</sup> Payapëtaneme rabaja mapacueneye. Paxamë rabaja Dioso bepapijatemplobomë. Tsipaji Espiritu Santo pacayajavaponapona. <sup>17</sup> Pajivi bijianaena bajarapatemplobo, Dioso pijabo, nexata juya bajarapajivi Dioso navecuaxuabianatsi. Dioso baja cajena pijatemplobo saicaya Diosonexa. Paxamë rabaja Dioso bepapijatemplobomë.

<sup>18</sup> Pëtsa pajamatabëcuenenavëxaniabame. Itsajivi paxamëyajuvënëjivi itsa jamatabëjumaitsi: “Xanë cajena daxitajivi matatoxenetsia bitso tayapëtaenë mapanacuapijilivaisije,” itsa jamatabëjai, nexata bajarapajivi becopata bajarapajamatabëcuene. Beveliajamatabëcuenejivi saya benatane. Nexata Dioso jamatabëcuenecaëjëpaeya exanaenatsi peyapëtaenexa jane baja Dioso pejumelivaisi.

<sup>19</sup> Daxita palivaisi bitso bepexaniajailivaisitane mapanacuapijivije, itsiata daxita bajarapalivaisi Dioso tsitanatsiquejemalivaisitsi saya. Dioso pejumelivaisibaxutota jumaitsi mapacueniaje: “Dioso cajena naneconitsiaexanaena bitso peyapëtaevi mapanacuapijilivaisije peyamaxëitojorobavanapaejavata itsamonae,” jai Dioso pejumelivaisibaxutota.

<sup>20</sup> Icatsia itsalivaisita Dioso pejumelivaisibaxutota jumaitsi mapacueniaje: “Pepo petuxanenë baja cajena yapëtane piamatamobicuene mapanacuapijilivaisije, bitso peyapëtaevi penajamatabëxainacuene,” jai Dioso pejumelivaisibaxutota. <sup>21</sup> Bajaraxuata itsajivi ata paxamëyajuvënëjivi, Dioso pejumelivaisi patacatsipaebivi, paxanë bepatajajivitonë apo benatae. Bepaayajamatabëcuenevinëna, apo bepanetae. “Xanë raja saicaya bajaraponë pijajivitonënë,” apo bejai paxanëyajuvënëvi yabara. Biji rajane paxanë bepanijajivinë panataniji Dioso pejumelivaisi patacatsipaebaponaexae. Tsipaji baja cajena Dioso pacatocopata daxita xua panamatavenoname.

<sup>22</sup> Xanë Pablonë, Apolos ata, Pedro ata, bajarapamatabëxëyo Dioso panecopata paxamë patacajamatabëcuene yavenonaenexa. Daxita mapanacuata panejinavanapaenexa ata, Dioso pacatocopata. Paneasaëtsavanapaenexa, panetëpaenexa ata, Dioso pacatocopata. Panejinavanapaenexa ajena, panevajënaeyabelia ata panejinavanapaenexa, Dioso pacatocopata. Daxita rabaja bajaraxua Dioso pacatocopata paxamënexa.

<sup>23</sup> Pematatsënëa rabaja Dioso pacatocopatana paxamë Cristo papijajivinexamë. Cristo rabaja pijinia Dioso bepajajivitonë, Dioso pejitsipaecuenia petoexanaexae.

#### 4

##### *Pacuenia Cristo pijajivi, apóstolevi, nacuenebavanapa yabara pelivaisi*

<sup>1</sup> Paxamë saya panetaema Cristo papijajivinëcuenia. Cristo raja panetocopata jivi patatsipaebavanapaenexa pexanialivaisi. Bajarapalivaisi Dioso pepo bajayata muetsia xainabuata. <sup>2</sup> Pajivi itsanë pijajivitonë naexana, bajarapajivi pijatuxanenë pitorobicueniatsi, xaniavaetsia betonacuenebaponapona. <sup>3</sup> Bajaraxuata xanë ata exanaponajë pacuenia vajatuxanenë nitoroba. Nexata paxamë panebaracuaicuaijamë tsabiabi ata, itsamonae ata nebaracuaicuaijai tsabiabi ata jivi tatsipaebaponaelivaisi yabara, taexanaponaejava ata yabara, itsiata apo nasivajamatabëcuenebëjanë patanebaracuaicuaijaittsabiabijava yabara. Apo nacuenecanaëjëtšinëna pacuenia tonacuenebajë vajatuxanenë. Nexata tajamatabëcueneta apo jamatabëjumaitsinë: “Xaniavaetsia meta tajatuxanenë tonacuenebaponaponajë. Itsa jume, bijiata meta tonacuenebaponaponajë,” apo jamatabëjanë. <sup>4</sup> “Jumecovënëtajë daxita pacuenia Dioso nitoroba. Nexata taneitorobicuenia xaniavaetsia tonacuenebajë. Bajaraxuata ajibi Dioso taneyabara naneconitsiaexanaejavanexa,” jamatabëjanë ata tsipae, itsiata ajumematamobinë tsipae. Bajaraxuata

evetajë vajatuxanenë pijacuata tanejumaitsinexa itsa apo jumecovënëtsinë taneitoro-bicuenia. <sup>5</sup> Bjaraxuata pëtsa pabaracuaicuaijamë itsamonae ata Dioso petonacuenebavanapaevi. Pacopiaevetavanapare abaxë vajatuxanenë pepatsijavatsica. Bjarapone itajëtsiana bjarapamonae muetsia pexanaejavanëmi ata. Pacuenia caejivi canacujitsia vajatuxanenë pijajivi bëpënëa najamatabëxaina petonacuenebavanapaejavata, vajatuxanenë itajëtsiananua. Bjaraxuacujinae nexata xaniavaetsia petonacuenebavanapaevi, caejivi canacujitsia, Dioso barëyataenatsi petonacuenebavanapaejava yabara.

<sup>6</sup> Tajamonae, bjarapacuenia pacatoyaquinatsi Apolos yabara, xanë ata yabara, pat-acayapëtaeyaexanaenexa. Bjarapacuenia pacatoyaquinatsi, Dioso pejumelivaisibaxutota pejumaitscueniavecua, bitso bepaayaijamatabëcuenenënebeje patanetaeyanivamë. Bjarapacuenia pacatoyaquinatsi itsamonae ata, pamona Dioso petonacuenebavanapaevi, najëpaeya paneyaiyataenexa. Pëtsa itsamonaevécua beayaijamatabëcuenenë pataneme caenë ata. Bajara pijinia pacuenia beveliajamatabëcuenenë pëtsa pataneme caenë ata. <sup>7</sup> Paxamë ata pëtsa itsamonaevécua bepaayaijamatabëcuenevimë panataneme. Itsa panavajunupaebabiabame, apo panavajunupaebabiabimë Dioso papecayavenonabiabijava. Xua daxita paxainame, Dioso baja cajena pacarajuta panexainaenexa. Pamonae ata pata paxamëjavata papecatsipaebinxaxa Dioso pejumelivaisi, bjarapamonae ata Dioso pacatocopata. Nexata daxita bjaraxua Dioso papecatocopat-sixae, bepaayaijamatabëcuenevimë pëtsa panataneme itsamonaevécua.

<sup>8</sup> Paxamë jamatabëcuenenavëxaniabiaya panajamatabëxainame mapacueniaje: “Pacuenia ricovi ayaijava pecobcovë xaina, bajara vaxaitsi itsitsi Dioso pejumelivaisi vajajumecovënëtsijava. Tsipaji ayailivaisi xainatsi. Tsipaji baja itsamonae bitso nacatsipaebabiaba Dioso pejumelivaisi. Nexata baja pematatsënëa apo namatavenonaetsi itsajivi ata vajanacatsipaebaponaenexa,” pajamatabëjamë tsabiabi jamatabëcuenenavëxaniabiaya. Jamatabëcuenenavëxaniabiaya Dioso pijacuene bepaneevetsivi panataneme. Nexata meta paxanë matatoxenetsia bitso bepaayaijamatabëcuenevimë panataneme. Dioso pijacuene itsa paneevetsivi tsipae, nexata pacasivajamatabëcuenenavëxanëtsi tsipae. Nexata vajanajuaevetsivi tsipae Dioso pijacuene. <sup>9</sup> Paxanë, paapóstolevinë, Dioso covë panetocopata daxitajivi patanetaenexa bijiaya. Panetocopata bepatananeconitsivicuenia patanebeyebinxaxa. Bjarapacuenia Dioso panetocopata bijiaya patanetaenexa ángelevi ata, daxitajivi ata. <sup>10</sup> Paxanë, Cristo xaniavaetsia patajumecovënëtsivi, itsamonae panetane bepatanematajemabivi. Paxamë, Cristo xaniavaetsia apo panejumecovënëtsivi ata, Cristo pijacuene bitso bepaneyapëtaevi itajara panataneme. Caranata paxanë itsamonae bepataajamatabëcuenesaëjibivi panetane. Caranata juya paxamë bepaneajamatabëcuenesaëvi panataneme. Paxanë itsamonae apo paneyaiyatae. Paxamë panayaiyataneme. <sup>11</sup> Cristo pelivaisi jivi itsa patsipaebaponajë mapamatacabijavaberena ataje, bitso baja cajena panabejiobitabiabajë. Patajani tsabiabi. Mera pajitsipabiabajë. Bitso pajumaesebejenë tsabiabi. Jivi panebeyabiaba pecobeta. Apo paxainabiabinë pabota panapatsijitsianë. <sup>12</sup> Pacueranabiabajë bitso patanacuenebabiabijava patacobeta. Jivi panebijataeyabiaba pibisiacuenia. Itsiata apo pajumeanaecanaviatabiabinë. Biji caranata paxanë bjarapamonae patovajëtabiabajë Diosojavabelia Dioso peyavenonaenexatsi. Jivi panebejiobiaexanabiaba. Itsiata pajamatabëcuenemoyanë tsabiabi. <sup>13</sup> Pibisiacuenia panebaracuaicuaijai tsabiabi itsamonaejavabelia. Itsiata bjarapamonae pexaniajamatabëcuenia xaniavaetsia pamuxujioabiabajë bajayajebi. Ajena, mapamatacabijavaberena ataje, panetaeyabiaba daxitajivivecua bepaveliajamatabëcuenevinë. Bepaavirinënu panetaeyabiaba.

<sup>14</sup> Apo pacatoyaquinaetsi raja mapacueniaje patacaurabinexa. Biji rajane pacatoyaquinatsi saya patacamuxujioabinexa xaniavaetsia. Pacuenia muxujiobijitsipajë taxi, bjarapacuenia pacamuxujioabatsi. <sup>15</sup> Xanë copiyaya pacatsipaebatsi pexanialivaisi, Cristo pelivaisi. Nexata baja panajamatabëcuenecopatame Jesucristojavabelia. Bjaraxuata xanë bepatacavitsatsivixae, panetaneme bepaneaxanë. Paxinae atamë tsipae diez mil

ponëbeje papecatsipaebivinexa Cristo pelivaisi, itsiata xanë caenënë panetaejitsipame bepaneaxanë. <sup>16</sup> Bajaraxuata asaëyata pacamuxujibatsi. Pacuenia baja pacatsitaexanaponaponatsi, bajarapacuenia necuenejëpaeya pajinavanapare.

<sup>17</sup> Bajaraxuata Timoteo baja pacatoitorobatsi paxamëjavabelia. Bajaraponë bitso tasivanë. Betaxënatocuenia tataenë. Xaniavaetsia pejumecovënëtaponaponanë Dioso. Bajaraponë Timoteo pacatoitorobatsi baja papecatsipaebinxaxa pacuenia ponaponajë. Nexata Timoteo pacatsipaebiananua pacuenia xanë Jesucristo pijajivitonëxaenë, tsi-taexanabiabajë daxita Dioso pejumecovënëtsijava, itsaxuayo tsipaebaponajë Cristo pelivaisi. <sup>18</sup> Itsamonae paxamëyajuvënëvi, taitorobicuenia apo exanae. Bajarapamonae beayaijamatabëcuenevi natane. Nexata itsa pacatoitorobatsi Timoteo, bajarapamonae xanë yabara jamatabëcuenenavëxaniabiaya jamatabëjumaitsi: “Pablo rabaja apo patsi tsane. Nacacujunava rabaja vajanacataenexa,” jamatabëjai bajarapamonae xanë yabara. <sup>19</sup> Itsiata baitsi jane Dioso itsa netocopatsiana patacataenexa, ponaenajë naxanitsiayo paxamëjavabelia. Nexata tajacuata taenajë pacuenia jamatabëcueneitsi tsavanapae pamonae beayaijamatabëcuenevi natane. Tsipaji raeta bajarapamonae pepacuene ajamatabëcuenesaë Diosojavabelia. Itsa jume, nexata meta saya pecuibovojotota jumaitsi. <sup>20</sup> Pamonae Dioso pijajivi, bajarapamonae nayapëtane. Tsipaji peneta Dioso pesaëta ajamatabëcuenesaë tsavanapae. Èpecuibovojotota apo jumaitsi. Biji rajane bajarapamonae pejamatabëëthëtojavavetsina Dioso jumecovënëta. <sup>21</sup> ¿Detsa xua pajitsipame paxamë itsa ponaenajë paxamëjavabelia? ¿Patacabijataejava tsaja pajitsipame? Itsa jume, ¿pajitsipame tsaja pexaniajamatabëcuenia asivaya patacataejava?

## 5

*Pacuenia Dioso pejumecovënëtsivi tuatuajëta ponapona bitso pibisiacuene pexanaponaponanë yabara pelivaisi*

<sup>1</sup> Paxamë tuatuajëta bitso pibisiacuene pexanaponaponanë pevitota, daxitajivi pina baracuaicuaijai tsabiabi. Dioso apo pejumecovënëtsivi ata, papibisiacuene apo exanae, bajaraponë pina exanaponapona. Bajaraponë paxamëyajuvënënenë pita pina pijavanexa paxa pijavami. <sup>2</sup> ¿Bajaraponë pibisiacuene pexanaejava, apo pacueneitavetsi atamë, itsi-ata bepaayaijamatabëcuenevimë panataneme! ¿Biji rajane bajaraponë pibisiacuene pexanaejava, bitso bepasivanajamatabëxainame! ¿Bepayapijivauramënuu bajaraponë! Bajaraponë pibisiacuene pexanaponaponanë, bepanavecuacapitsapame. <sup>3</sup> Paxamëjavata apo naponapona atanë, itsiata paxamëjavata betanaponaponanë, nataniji. Nexata tajëvelia bitso sivanajamatabëxainabiabajë bajaraponë Dioso penaneconitsiaexanaejavanexatsi yabara pibisiacuene pexanaponaponaexae. <sup>4</sup> Paxamë panacaetuare vajatuxanenë Jesucristo papijajivixamë. Apo pacayajava atatsi tsane, itsiata panenacaetuatsijavata, pacajamatabënajinaenatsi. Diosojavabelia pacatovajëtsianatsinua bajarapaepatota. Vajatuxanenë Jesucristo ata pesaë, pacayajava tsane bajarajota. <sup>5</sup> Pibisiacuene pexanaponaponanë paxamë tuatuajëta, panavecuacapitsapare baja dovathijavabelia. Nexata daxita pibisiacuene penatojitsipaecuenia pexanaejava yabara, dovathi pebejiobi-aexanaenexatsi. Nexata belia icatsia Dioso jumecovënëtsiana. Bajarapajamatabëcuene jane baja capanepaenatsi pamatacabi vajatuxanenë Jesús patsianica.

<sup>6</sup> Papibisiacuene bajaraponë exanaponapona, panaitaxutojematsi atamë, itsiata bepaayaijamatabëcuenevimë panataneme. Abeje raja pibisiacuene pexanaponaponanë panecuenenaitaxutojematsijava. Payapëtaneme rabaja mapacueneje. Pan pexanaematabënexa, ayaimatabë ata, levadurajava pijinia tsiquirijavayo ata, itsiata pematajërëabijavata, bacaëjëpa daxitamatabëjava. Nexata levadura, tsiquirijavayo ata, bafufunaeyaexana daxitamatabë. Bajara pijinia itsi tsipae caenë itsa pacuene-copatsipame pibisiacuene pexanaponaponaejava paxamë tuatuajëta. Daxitajivi belia pibisiacuene exanaponaejitsipa bajaraponë pejamatabëcueneta. <sup>7</sup> Bajaraxuata panavecuacapitsapare baja, ponë pibisiacuene exanaponapona paxamë tuatuajëta, daxitajivi

pejamatabëcuenebijianaeyaniva bajaraponë pejamatabëcueneta. Pacuenia itsi perujupanmatabë, levadurata pematajërëabimatabë, bajara jamatabëcueneitsi bajaraponë, pibisiacuene pexanaponaponaexae. Bajaraxuata bajaraponë panavecuacapitsapare baja. Paxamë rabaja Jesucristo pejamatabëcueneta pejanajamatabëcuene paxainame. Nexata pacuenia itsi levadurata apo pematajërëabipanmatabë, bajarapajamatabëcueneitsimë. Tsipaji baja Dioso aneconijibia pacatane. Paxamë baja aneconijibia Dioso pacatane. Tsipaji Cristo pacasivatëpa. Cristo baja cajena beovejayo tanetsi Dioso. Tsipaji nacasivatëpa cruzata pibisiacuene vajaexanaeneconimi vajanacavecuajibiaexanaenexa. <sup>8</sup> Nexata baja aeconoxae pibisiacuene apo beexanavanapaetsi. Jesucristo pijajivixaetsi, itsajamatabëcuene xainaenejevatsi, pexaniajailivaisi jumecovënëtavanapaenatsi. Bajarpacuenia itsa jumecovënëtavanapaenatsi, nexata pacuenia itsi levadurata apo pematajërëabipanmatabë, bajarajamatabëcuene itsanetsi aneconijibia vajajinavanapaexae.

<sup>9</sup> Itsabaxutota baja cajena pacatoyaquinatsi pevitota pibisiacuene pexanaponaevi paneyajavajinavanapaeyaniva. <sup>10</sup> Dioso apo pejumecovënëtsivi, itsamonae, pibisiacuene exana pevitota. Itsamonae najamatabëxaina ëpamonaenexa ayajava pexainaecuene pexainaenexa. Itsamonae nacobetoxota. Itsamonae, jumapecataeya pexanaenëanëjavabelia, navajëca. Bjarapitsicuene pexanaevi, Dioso apo pejumecovënëtsivi, panenavecuatsatsinexa, patacatoyaquinaebaxutota apo pacaitorobitsi. Bjarapitsicuene pexanaevi, Dioso apo pejumecovënëtsivi, itsa panavecuatsatsipame, nexata pepacuene mapanacuavecuaje athëbëabetsia ëpaneponaenexa tsipae. Tsipaji daxita mapanacuajavaje bajarapitsicuene pexanaevi yacaëjëpa. <sup>11</sup> Patacatoyaquinaebaxutota raja pacaitorobatsi mapacueniaje. Pajivi jumaitsi ata: “Xanë cajena Jesucristo pelivaisi jumecovënëtajë,” jai ata, itsiata pibisiacuene itsa exana pevitota, ëpamonaenexa ata pexainaecuene itsa natojitsipa, jumapecataeya pexanaenëanëjavabelia ata itsa navajëca, itsamonae ata pibisiacuena itsa baracuaicuaijai, itsa aitajibi tsabiabinua, itsa nacobetoxotanua, bajarapajivi pëtsa payajavajinavanapame. Pëtsa payavaxanemenua caejavata, pacajunatsi ata. <sup>12-13</sup> Pamonaev abaxë Dioso apo pejumecovënëtsivi, bajarapamonaev yabara tajumaitsinexa Dioso apo netocopatsi: “Bajarapamonaev cajena pijaneconi xaina Diosojavabelia,” tajainexa. Dioso cajena abaxë saicaya pepacuene naneconitsiaexanaena bajarapamonaev. Itsiata baitsi jane pamonaev Dioso panenajuajumecovënëtsivi, panenacaetuatabiabibota panenajuajoneyabiabivi, pibisiacuene itsa exana, paxamë bepacueneitavetame. Bjaraxuata nexata panavecuacapitsapare baja ponë paxamë tuatuajëta pevitota pibisiacuene exanapona.

## 6

*Pacuenia Dioso pejumecovënëtsivi itavetatsi Dioso penajuajumecovënëtavanapaevi peneconitsiyaniva juezmonaejavabelia yabara pelivaisi*

<sup>1</sup> Itsanë paxamëyajuvënënë, Dioso pejumecovënëtsinë, itsa pacaitsacueniaba paxamëjavaberena, nexata jueznëjavabelia paneconitabiabame. Pëtsa bajarapacuenia paexaname. Tsipaji raja juezmonae Dioso apo pejumecovënëtsivi. Bjaraxuata Dioso panenajuajumecovënëtsivi apo bepaneconitsimë juezmonaejavabelia. Biji rajane bepayanijobame Dioso pejumecovënëtsivijavabelia papecatoxanetsinexa bajarapalivaisi. <sup>2</sup> Payapëtaneme rabaja mapacueneje. Pamatacabi Cristo evetsiana mapanacuaje, daxita Dioso vajajumecovënëtsivi Dioso nacatocopatsiana vajananeconitsiaexanaenexa pamonaev pijaneconi pexanaevi. Daxita mapanacuapijivije, pamonaev Dioso apo pejumecovënëtsivi, vaxaitsi naneconitsiaexanaenatsi. Nexata aeconoxae ata pacacaëjëpa panelivaisixanetsinexa paneconi exana panetuatuajëta. Tsipaji mapanacuata jivi pevet-sijamatabëcuene beveliajamatabëcuene saya. Apo ayapëbeje bitso. <sup>3</sup> Payapëtaneme rabaja mapacueneje. Pamatacabi Cristo patsianica, vaxaitsi naneconitsiaexanaenatsi daxitajivi. Naneconitsiaexanaenatsi angelevi ata. Nexata abaxë aeconoxae panejivanavanapaepato mapanacuataje, pacacaëjëpa panelivaisixanetsinexa paneconi exana panetuatuajëta, mapanacuapijilivaisije. <sup>4</sup> Itsiata baitsi jane paxamëyajuvënëjivi itsa

pacaitsacueniaba mapanacuataje, itsiata panijacuata apo palivaisixanetabiabimë pacuenia picani bepaexaname. Nexata pajivi pacaitsacueniaba, pacaponabiabame juezmonaejavabelia penaneconitsiaexanaenexatsi. <sup>5</sup> Mapacuenia pacajumaitsitsije patacaurabinexa. Paxamëyajuvënëjivi itsa pacaitsacueniaba, çajibi tsabaja caenë ata paxamëyajuvënë pexanalivaisi peyapëtaenë pelivaisixanetsinexa bajarapalivaisi? <sup>6</sup> Dioso panejumecovënëtsivixae, juezmonaejavabelia apo bepaneconitsimë Dioso panenajuajumecovënëtsivi.

<sup>7</sup> Bajarapacuenia panacaevënavi atamë paneneconitabiabixae juezmonaejavabelia, daxitajivi pacacueneyapëtane xaniavaetsia apo panejinavanapaajava Dioso pitabarata. Nexata panacaevënavimë itsa pacaitsacueniaba, itsa pacatonacobetoxotana, Dioso panejumecovënëtsivixae, xanepanaejitsipa itsa pajamatabëcuenemoyamë tsipae. <sup>8</sup> Itsiata baitsi jane paxamë Dioso panenajuajumecovënëtsivijavabelia ata, paitsacueniababiabame. Yamaxëitojorobiaya pavecuanacobetoxotabiabamenua.

<sup>9-10</sup> Payapëtaneme rabaja mapacuenije. Pibisiacuene pexanaevi apo yajavajinavanapaetsi tsane Dioso pijanacuatatsia. Bajaraxuata pëtsa paexaname panijacuata panenatojitsipaecuenia. Dioso pijanacuatatsia apo yajavajinavanapaetsi tsane pevitota pibisiacuene pexanaevi. Apo yajavajinavanapaetsi tsane jumapecataeya pexanaenëjavabelia penavajëcaevi. Apo yajavajinavanapaetsi tsane pejaitsivi itsava pijavavecua. Apo yajavajinavanapaetsi tsane pejaitsivi itsanë pamonavecua. Apo yajavajinavanapaetsi tsane penaquenetsiataevi nacaevënapebibeje. Apo yajavajinavanapaetsi tsane penacobetoxotsivi. Apo yajavajinavanapaetsi tsane ëpamonaenexa pexinaecuene penatojitsipaevi. Apo yajavajinavanapaetsi tsane piitajibitsabiabivi. Apo yajavajinavanapaetsi tsane itsamonae pibisiacuena pebaracuaicuaijaivi. Daxita bajarapitsivi apo yajavajinavanapaetsi tsane Dioso pijanacuatatsia. <sup>11</sup> Bajara picani bajayata paxamëyajuvënëvi pacuenia exanavanapa. Itsiata baitsi jane aeconoxae baja pibisiacuene paneexanaeneconimi, Dioso baja pacavecuaajibiaexana. Pacatsata baja Dioso papijajivinexamë. Dioso baja aneconijibia pacatane vajatuxanenë Jesucristo pejamatabëcueneta. Espiritu Santo ata pesaëta pacayavenona panejumecovënëtsinexa vajatuxanenë papecaitorobicuenia.

*Pacuenia Dioso pejumecovënëtsivi xaniavaetsia bejinavanapa Dioso pitabarata yabara pelivaisi*

<sup>12</sup> Itsamonae jumaitsi: “Mapanacuata navita vajaexanaejavanexa. Itsajivi ata apo nacaitavetsi bajarapacuenie vajaexanaenexa,” jai itsamonae. Xaniajai rabaja picani. Itsiata baitsi jane daxita bajarapacuenie vajaexanaenexa, apo nacatoxanepanae. Mapanacuata navitsi ata vajaexanaejavanexa, xua itsajivi ata apo nacaitavetsi, itsiata bejamatabëjumaitsitsi mapacueniaje: “Papibisiacuene taexanaenexa tajamatabëcuene nitorobabiaba, apo exanaenë tsane Cristo pijajivitonëxaenë. Tsipaji itsa exanaejitsipajë bajarapapibisiacuene, nexata tajamatabëcuene beprijajivitonënëcuenia jumecovënëtabiabiitsipajë,” bejamatabëjaitsi pibisiacuene vajaexanaeyaniva. <sup>13</sup> “Vajaxaejava raja vajacotsorotopijijavanexa. Vajacotsoroto raja pijinia vajaxaejava peecaenexa,” pejailivaisi, xaniajai baja cajena. Itsiata baitsi jane itsamatacabi Dioso bajarapacueniebeje vereverecaeyaexanaena. Daxita raja vajaperabëtuareca pibisiacuene apo vajaexanavanapaenexa. Vajaperabëto raja Dioso nacatocopata vajatuxanenë vajatonacuenebavanapaenexa. Vajatuxanenë rabaja pijinia vajaperabëtota vajanacayajavaponaponanexa. <sup>14</sup> Dioso baja cajena icatsia asaëyaexanatsi vajatuxanenë petëpaecujinae. Bajara pijinia pacuenia vaxaitsi ata itsamatacabi Dioso pesaëta nacaasaëyaexanaena vajatëpaecujinae.

<sup>15</sup> Payapëtaneme rabaja mapacuenije. Pacaenëmë canacujitsia, caenë Cristo peperabëtojavabelia becaeperabëto panaexaname papijajivixaemë. Xanë ata rabaja Cristo bepeperabëttoyajuvënënenë. Bajaraxuata pibisiacuene apo bexanaenë tavitota pibisiacuene pexanabiabivajavabelia, bajarapova bepeperabëttoyajuvënëjavanë tanaexanaeyaniva. <sup>16</sup> Payapëtaneme rabaja mapacuenije. Pebi pibisiacuene itsa exana pevitota pibisiacuene pexanabiabivajavabelia, bajarapajivibeje becaeperabëto naexanabeje. Dioso pejumelivaisibaxutota jumaitsi penapitsijivibeje yabara mapacueniaje:

“Anijajivimibeje becaejivi naexanabeje,” jai. <sup>17</sup> Nexata pijinia pajivi najamatabëcuene copata vajatuxanenë Jesucristojavabelia, bajarapajivi becaejivi naexana vajatuxanenë Jesucristojavabelia.

<sup>18</sup> Pevitota pibisiacuene pexanaeyaexanaejamatabëcuene, pavecuanajetabajiravabi-abare. Itsajava raja pibisiacuene pexanaejava, bitso jivi apo jamatabëcuenebijianaetsi. Pacuenia pevitota pibisiacuene pexanaejava, jamatabëcuenebijianaetsi, apo itsi. Ponë jaita itsava pijavavecua pibisiacuene pexanaenexa pevitota, bitso pibisiacuene exana. Petiriva ata, pova jaita itsanë pamonavecua pibisiacuene pexanaenexa pevitota, bitso pibisiacuene exana. Pajivi bajarapapibisiacuene exana, bitso najamatabëcuenebijiana. <sup>19</sup> Payapëtaneme rabaja mapacueneye. Paneperabëto baja cajena Espiritu Santo pijabo papecatsijamatabëcaexae. Dioso cajena pacarajuta pijaEspiritu Santo papecatsijamatabëcaenexa. Dioso baja cajena papijajivimë. Nexata paneperabëto ata paxamënexa. Apo panaperabëxainaemë panijacuata panenatojitsipaecuenia paneexanavanapaenexa. <sup>20</sup> Tsipaji Dioso ayaimatamota pacacomuata. Nexata Dioso papijajivixaemë, xaniavaetsia panejamatabëëthëtovetsina Dioso jumecovënëtsiaya pajinavanapare. Nexata daxitajivi Dioso yaiyataeponaena paxamë xaniavaetsia itsa patsitajinavanapame.

## 7

*Pemuxujiobilivaisi penapitsijivibeje yabara pelivaisi*

<sup>1</sup> Xua yabara panetoyaquinaremena pataneyanijobinexamë, nexata aeconoxae pacajumecanaviatsijitsiatsi. Xaniajai rabaja picani. Xanepana itsa apo nacojiobi pebi. <sup>2</sup> Itsiata baitsi jane jivi navita pevitota pibisiacuene pexanaevi. Bajaraxuayaniva caepebi canacujitsia pijava bexaina. Bajara pijinia itsi petiriavi ata. <sup>3</sup> Nexata pebi pijava xaniavaetsia bevetaponapona pijavaxae. Bajara pijinia itsi petiriva ata. Xaniavaetsia bevetaponapona pamonaxae. <sup>4</sup> Petiriva, penacojiobiva, pijacuata apo naperabëxainae ëbajarapovanexa. Biji rajane petiriva baja itsa nacojioba, pamona pijaperabëtocuenia xainatsi. Bajara pijinia itsi pebi ata. Peperabëto apo naperabëxainae ëbajaraponënexa. Itsa baja nacojioba, pijava pijaperabëtocuenia xainatsi. Nexata namataenetsia naperabëxainabeje. <sup>5</sup> Papatirivimë panenacojiobivi baja, pëtsa panaperabëasivamë paneamonajivivecua. Bajara pijinia pacuenia paxamë ata papebijivimë. Pëtsa panaperabëasivamë panijavajivivecua. Matapania pamatacabimaxëto Diosojavabelia panavajëcaejitsiamëbeje, pacatocopatabeje panenavecuanaperabëasivanexabeje. Bajarapacuenia paexanaenamebeje itsa panajamatabëcuenejëpamebeje panenavajëcaenexabeje Diosojavabelia. Pamat-acabimaxëto panavajëcaejitsiamëbeje Diosojavabelia, bajarapamatacabimaxëto pëtsa panaimoxoyotamebeje. Itsa baja paveretsianamebeje Diosojavabelia panenavajëcaejavabeje, pëtsa baja panavecuanaperabëasivamëbeje. Tsipaji panevajënaeyabeliabeje itsa panavecuanaperabëasivamëbeje tsaponae tsipae, nexata dovathi pacajamatabëcuene yamaxëitojorobjitsipabeje. Nexata pibisiacuene paexanaejitsipamebeje, pacuene picani apo bepaexanaemëbeje.

<sup>6</sup> Itsa pacamuxujiobatsi panenacojiobinexa pibisiacuene paneexanaeyaniva panevitota, apo pacaitorobitsi daxita panenacojiobinexa. Pamona jitsipa penacojiobijava, nacojiobi. <sup>7</sup> Pacuenia xanë imasia ponaponajë, bajarapacuenia picani paxamë ata imasia panejinavanapaejava, pacatojitsipatsi. Itsiata baitsi jane Dioso pacaenëmë canacujitsia papecayavenonaponaexae, pacacajëpa baja pacuenia paexanavanapaejitsiamë. Itsamonae paxamëyajuvënëvi itsacuenia Dioso jamatabëcuene cajëpaeyaexanaponatsi Dioso pejitsipaecuenia petoexanavanapaenexa. Itsamonae pijinia saicaya itsacuenia Dioso jamatabëcuene cajëpaeyaexanaponatsi.

<sup>8</sup> Mapacuenia saicaya jumaitsinëje pimasiarubenaevijavabelia, pamonajivi pevecuatëpaevitsijavabelia ata. Bajarapamonae picani toxanepanatsi imasia pejinavanapaejava pacuenia xanë imasia ponaponajë. <sup>9</sup> Itsiata baitsi jane itsa apo cajëpaetsi penajamatabëcuenesaëtsijava, nexata pibisiacuene pevitota pexanaeyaniva, roviaalia benacojioba. Bajarapamonae toxanepanatsi roviaalia penacojiobijava. Tsipaji itsa apo nacojiobi

tsipae, ëpibisiacuene pexanaenexa najamatabëxainaejitsipa. Nexata najamatabëcuene bijianaponaejitsipa.

<sup>10</sup> Paxamë baja panenacojobivi mapacuenia pacajumaitsitsije. Itsiata xanë apo tajamatabëcuene. Pacuenia vajatuxanenë jumaitsi, pacaitorobatsi. Papetiriavimë, pëtsa pavecuanaviabame paneamonajivi. <sup>11</sup> Pacamuxujobi atatsi, itsiata pova vecuanaviata pamona, bajarapova beponapona imasia. Apo benacojobi baja. Itsa jume, benapitabeje icatsia pamonacovënëbeje. Bajara pijinia itsi pebi ata. Pebi apo bexuabi pijava.

<sup>12</sup> Paxamë tuatuajëta Dioso apo pejumecovënëtavapanapaevi yabara, jumaitsinë mapacueniaje. Itsiata vajatuxanenë apo pejumaitsi jume. Dioso pejumecovënëtsinë pijava, itsa apo pejumecovënëtsiva Dioso, itsiata bajarapova itsa jitsipa peponaponaenexa bajaraponëjavabelia, nexata bajaraponë pijava apo benavecuaitavetsi pevecuanaviatsinexatsi. <sup>13</sup> Dioso pijinia pejumecovënëtsiva pamona, itsa apo pejumecovënëtsinë Dioso, itsiata bajaraponë itsa jitsipa peponaponaenexa bajarapovajavabelia, nexata bajarapova pamona apo benavecuaitavetsi pevecuanaviatsinexatsi. <sup>14</sup> Dioso pejumecovënëtsiva pamona, apo jumecovënëtsi ata Dioso, itsiata bajaraponë Dioso copatsiaexanaenatsi mapanacuapijipibisiacuene pexanabiabijavami. Bajarapacuenia Dioso copatsiaexanaenatsi tsipaji bajaraponë pijava Dioso pejumecovënëtsiva. Bajara pijinia itsane Dioso pejumecovënëtsinë pijava. Apo jumecovënëtsi ata Dioso, bajarapova Dioso copatsiaexanaenatsi mapanacuapijipibisiacuene pexanabiabijavami. Bajarapacuenia Dioso copatsiaexanaenatsi tsipaji bajarapova pamona Dioso pejumecovënëtsinë. Bajarapacuenia Dioso itsa apo copatsiaexanae tsipae pibisiacuene pexanabiabijavami, nexata pacuenia Dioso coxitane pamona Dioso apo pejumecovënëtsivi, bajarapacuenia coxitaejitsipatsibeje Dioso. Nexata bajarapajivibeje caejivi pejumecovënëtsixae, Dioso coxitaenatsibeje bepenajuajumecovënëtsijivibeje Dioso. <sup>15</sup> Itsiata Dioso pejumecovënëtsiva pamona, itsa apo pejumecovënëtsinë Dioso, itsa jamatabëvecuanaviatatsi, nexata becopata roviaia pevecuanaviatsinexatsi. Dioso pijinia pejumecovënëtsinë pijava, itsa apo pejumecovënëtsiva Dioso, itsa jamatabëvecuanaviatatsi, nexata becopata roviaia pevecuanaviatsinexatsi. Nexata Dioso pejumecovënëtsinë, pijava pevecuanaviatsinëtsi, bepimasiarucaenë penaexanaenexa. Pova pijinia Dioso pejumecovënëtsiva, pamona pevecuanaviatsivatsi, bepimasiarucaeva penaexanaenexa. Bajarapacuenia bexana imasia peponaponaenexa. Tsipaji Dioso nacajunata jamatabëcuenexanepanaeya vajajinapanaponaenexa. <sup>16</sup> Papetiriavimë, paneamonajivi Dioso itsa apo pejumecovënëtsivi, paxamë xaniavaetsia panetsitajinapanapaxae tsane paneamonajivi, paneamonajivi ata meta najamatabëcuenecopatsiana Cristojavabelia. Papebijivimë pijinia, panijavajivi Dioso itsa apo pejumecovënëtsivi, paxamë xaniavaetsia panetsitajinapanapaxae tsane panijavajivi, panijavajivi ata meta najamatabëcuenecopatsiana Cristojavabelia. Bajaraxuata jamatabëcuenexanepanaeya panacajinapanapare. Pëtsa panavecuaviabame.

<sup>17</sup> Caenë canacujitsia tsiteca bexanapona pacuenia Dioso tocopatatsi pexanaponaenexa. Xua nacuenebaponapona Dioso pejunatsivajënaeyatsi Jesucristojavabelia penajamatabëcuenecopatsinexa, bajaraxua mapamatacabi ataje tsiteca benacuenebaponapona. Bajarapacuenia itorobaponajë daxita Dioso pejumecovënëtsivijava pexanialivaisi itsa tsipaebanajetarucajë. <sup>18</sup> Ponë Dioso junatatsi pepua peperabëcaucutsinëtsi baja judíovi pijacuenia, bajaraponë baja bajarapacuenia Dioso bejumecovënëtaponapona. Ponë pijinia Dioso junatatsi abaxë apo peperabëcaucutsinë atatsi judíovi pijacuenia, bajaraponë baja bajarapacuenia Dioso bejumecovënëtaponapona. Apo benaperabëcaucutsiaexanae. <sup>19</sup> Vajanacaperabëcaucutsijava, amatamobi Diosojavabelia. Apo vajanacaperabëcaucutsijava ata, amatamobi Diosojavabelia. Dioso rajane vajanacaitorobicuenia vajajumecovënëtavapanapaejava, bajara jane xua, namatamota Diosojavabelia. <sup>20</sup> Caejivi canacujitsia benacuenebaponapona xua nacuenebaponapona Dioso pejunatsivajënaeyatsi. <sup>21</sup> Itsamonae baja paxamëyajuvenëvi Jesucristojavabelia penajamatabëcuenecopatsivajënaeya, dajubicuenia canajetatsi itsamonaejavabelia amoneya petonacuenebavanaponaenexa. Nexata bajarapa-

monae pijatuxanevi amoneya tonacuenebabiaba. Itsiata baitsi jane bajarapamonae Dioso baja pejunatsixaetsi Jesucristojavabelia penajamatabëcuenecopatsinexa, pëtsa natsinajamatabëxaina pijatuxanevi amoneya penacuenebiaexanabiabijavatsi yabara. Jamatejema saya tonacuenebavanapae pijatuxanevi. Itsiata baitsi jane itsamatacabi itsa tocopiapatsianatsi pevecuapitsapaenexa baja bajarapamonae, nexata vecuapitsapaena amoneya petonacuenebabiabivi. <sup>22</sup> Ponë itsamonaejavabelia canajetatsi, nexata amoneya itsa tonacuenebaponapona, bajaraponë bitso pibisiacuene pexanabiabineconimi Cristo baja vecuaajibiaexanatsi. Bajarapacuenia vecuaajibiaexanatsi pamatacabi najamatabëcuenecopata Cristojavabelia. Copata baja pibisiacuene pexanabiabijavami. Nexata Dioso pitorobicueniatsi exanaponapona. Bajara pijinia itsi ponë ata apo canajetsitsi itsamonaejavabelia. Itsa najamatabëcuenecopata Cristojavabelia, bajaraponë Cristo pijajivitonë baja naexana. Nexata bajaraponë ata exanaponapona Dioso pitorobicueniatsi. <sup>23</sup> Dioso baja cajena pacacomuata ayaimatamota. Bajaraxuata pëtsa baja panacopatame itsajivi ata papecajamatabëcuenebijianaenexa Dioso panejumecovënëtavanapaejavavecu. Itsa bajarapacuenia panacopatsipame papecajamatabëcuenebijianaenexa, nexata bajarapajivi bepapijajivimë tsipae paneexanavana-paenexa papecaitorobicuenia. <sup>24</sup> Bajaraxuata, xua baja panacuenebavanapame, tsiteca panevajënaeyabelia xaniavaetsia panacuenebavanapare Dioso pitabarata. Pacaenëmë canacujitsia panacuenebavanapare xua panacuenebavanapame pamatacabi abaxë Dioso apo pacajunatsi panejumecovënëtsinexa. Itsa apo pacaperabëcaucutsi judíovi pijacuenia, nexata bajarapacuenia pajinavanapare. Itsamonaejavabelia papecacanajetsixa, nexata amoneya itsa patonacuenebavanapame, bajarapacuenia tsiteca patonacuenebavanapare.

<sup>25</sup> Itsa panetoyaquinaremena, paneyanijobame abaxë apo penacojiobavanapaevi yabara. Apo yapëtaenë pacuenia vajatuxanenë jumaitsi bajarapitsivi yabara. Itsiata baitsi jane pacatsipaebianatsi pacuenia sivanajamatabëxainajë bajarapitsivi. Dioso tajamatabëcueneta neyapëtaeyaexana taneitaxutotsoniataexae. Bajaraxuata pacatoxanepana pacuenia pacatsipaebijitsiatsi patanejumecovënëtsinexamë. <sup>26</sup> Dioso vajajumecovënëtavanapaevi, nacatsiyai bitso aeconoxae vajajinavanapaeepato abaxë mapanacuataje. Tsipaji itsamonae vajanacaitoyaxae, nacabejiobiaexanaponaena. Bajaraxuata netsitaxanepana bajarapamonae itsa apo nacojiobavanapae. <sup>27</sup> Itsa baja capanepaeya penacojiobivi, pëtsa xuaba pijava. Itsiata baitsi jane itsa abaxë apo nacojiobi, pëtsa jaita pijavanexa. <sup>28</sup> Ponë baja capanepaeya nacojioba, apo pibisiacuene. Petiriva ata baja itsa nacojioba, apo exanae pibisiacuene. Aeconoxae daxita Dioso vajajumecovënëtsivi bitso vajanacatsiayaixae, pamonae baja nacojioba, bajarapamonae toayapëbeje tsanetsi pevecuapanepaenexa bajarapapiayaicuene. Bajarapacuenia petoayapëbejeyanivatsi, bajarapamonae picani tojitsipajë imasia pejinavanapaenexa.

<sup>29</sup> Tajamonae, mara pacuenia jamatabëpacajumaitsitsije. Imoxoyo rabaja pevajëna vajatuxanenë icatsia pepatsijavanexatsica. Ajena, mapamatacabicujinaelia tsaneje, penacojiobivi ata bepimasiarubenaevicuenia asaëyata betonacuenebavanapa vajatuxanenë. <sup>30</sup> Daxitajivi bejamatabëcueneenatsi ëDioso pijacuene petonacuenebavanapaenexa. Pamonae bitso najamatabëxaina peyajuvënëtëpaexae, bajarapamonae ata najamatabëxainaenejeva asaëyata betonacuenebavanapa vajatuxanenë. Apo bepenajamatabëxainaevicuenia, bejinavanapa. Pamonae ata jamatabëcuenenarëya tsavanapae, asaëyata betonacuenebavanapa vajatuxanenë. Apo bepejamatabëcuenenarëyavicuenia betonacuenebavanapa. Pamonae ata comuaca pexinaejavanexa, asaëyata betonacuenebavanapa vajatuxanenë. Asivaya apo betae xua natocomuaca. <sup>31</sup> Pamonae ata, mapanacuata pexinaejava, canacuenebavanapa, bajarapamonae becanacuenebavanapa jamatabëcuenecënënaenejevatsi bajarapajamatabëcuene. Tsipaji mapanacuapijicuene vajataejavami vereverecapona.

<sup>32</sup> Apo pacatojitsipaetsi papecajamatabëcueneenaenexa mapanacuapijicueneje. Ponë abaxë imasia ponapona, jamatabëcueneenatsi ëvajatuxanenë pijacuene. Tsipaji jit-

sipa pesivajamatabëcuenebarëyanexatsi vajatuxanenë. <sup>33</sup> Itsiata baitsi jane penacojiobinë yajavajamatabëcueneenatsi pevetsinexa pijava pesivajamatabëcuenebarëyanexatsi. <sup>34</sup> Apo najamatabëcuenejèpaebeje pijinia penacojiobivabeje pimasiarucaevabeje. Pova apo nacojiobi, jamatabëcueneenatsi ëvajatuxanenë pijacuene. Jitsipa pexaniacuene pexanaponaponaenexa. Jitsipanea pexaniacuene penajamatabëxainaponaponaenexa Dioso pesivajamatabëcuenebarëyanexatsi. Itsiata baitsi jane penacojiobiva yajavajamatabëcueneenatsi pevetsinexa pamona pesivajamatabëcuenebarëyanexatsi.

<sup>35</sup> Bajarapacuenia itsa pacajumaitsitsi, apo penacojiobivi apo itavetsinë penacojiobiva. Patacjamatabëcuene yavenonaenexa raja, pacajumaitsitsi bajarapacuenia. Tsipaji pacatojitsipatsi xaniavaetsia panejinavanapaenexa. Vajatuxanenë bepatonacuenebavanapame daxita panejamatabëcueneta, panajamatabëcuene epatajërërëcaenejevamë.

<sup>36</sup> Ponë pexënatoyo xaina, itsa tsitaxanepanatsi pexënatoyo petonacojiobinexatsi, nexata betocopata penacojiobinexa. Tsipaji baja penaveretsiva tsaponapona. Bajarpova ata baja itsa jitsipa penacojiobinexa, betocopata penacojiobinexa. Itsa tocopata pexënatoyo penacojiobinexa, apo pibisiacuene. <sup>37</sup> Ponë pijinia pexënatoyo itsa apo jitsipae abaxë penacojiobinexa, bajaraponë ata itsa najamatabëcuenevereta apo petocopatsinexa pexënatoyo penacojiobijava, nexata bajaraponë ata pexaniacuene exana. <sup>38</sup> Nexata ponë apo tocopatsi pexënatoyo penacojiobinexa, bajaraponë itsanëvecua bitso pexaniacuene exana.

<sup>39</sup> Penacojiobiva baja acuenebi pevecuanaviatsinexa pamona. Tsipaji pamona pi-asaëtsaponaponaepato, bajaraponë abaxë tsiteca pijava tsaponapona. Tsipaji bajarapacuenia Dioso najumecopata. Itsiata baitsi jane pamona itsa vecuatëpatsi, bajarapova tocopatatsi icatsia penacojiobinexa. Tocopatatsi penacojiobinexa ponëjavabelia jamatabënacojioba, itsa bajaraponë ata Dioso pejumecovënëtsinë. <sup>40</sup> Itsiata bajarapova pamona pevecuatëpaecujinaetsi, imasia abaxë itsa ponapona, jamatabëcuenebarëya tsaponapona tsane ëDioso pijacuene pejamatabëcueneenaponaponaexaetsi. Nexata baja itsa nacojiobiana, bevelia baja jamatabëcuenebarëya tsane. Pacuenia copiaya jamatabëcuenebarëya tsaponapona, apo itsi tsane baja. Bajarapacuenia najamatabëxainajë bajarapacuenie yabara. Bajarapacuenia itsa pacajumaitsitsi, Espiritu Santo neyavacuauicuaijai.

## 8

### *Jumapecataeya pexanaenëanëjavabelia perajutsiviyajuvënëjava yabara pelivaisi*

<sup>1</sup> Jumapecataeya pexanaenëanë itsamonae tane beprijadiosovi. Nexata bajarapamonae dajubi beyabiaba perajutsinexa bajarapavi jumapecataeya pexanaenëanëjavabelia. Bajarapaviyajuvënëjava panexaejava ata yabara, paneyanijobame itsa panetoyaquinaremena. Nexata bajaraxua yabara juya mapacatoyaquinatsije. Xaniajai rabaja cajena. Daxitatsi baja cajena bajarapacuenie yapëtanetsi. Pavi rajuta jumapecataeya pexanaenëanëjavabelia, bajarapaviyajuvënëjava xae atatsi tsipae, apo nacaitacueniabi tsipae. Itsiata vajaxaecujinae bajarapaviyajuvënëjava, itsa jamatabëjumaitsitsi: “Xanë bitso yapëtaniji pamona mapavije atsobabiaba matatoxenetsia,” itsa jamatabëjai, abeje rajane bajarapajamatabëcuene. Tsipaji beayaijamatabëcuenejivitsi nataejitsipatsi bajarapamonavecu. Biji rajane xanepana vajajamatabëjumaitsinexa mapacueniaje: “Asivaya taniji Dioso patanajuajumecovënëtsivi, pamona atsobabiaba jumapecataeya pexanaenëanëjavabelia perajutsiviyajuvënëjava. Nexata xanë ata apo xanë tsane bajarapaviyajuvënëjava. Nexata xaniavaetsia tsitaponaponaenajë bajarapamonae taneitaxutua jamatabëcuenesaënexa Diosojavabelia,” vajajamatabëjaijava xanepana. Bajarapacuenia itsa tsitaponaponaetsi Dioso pejumecovënëtsivi, nexata nacaitaxutua jamatabëcuenesaë tsaponae Diosojavabelia. <sup>2</sup> Pajivi jamatabëjumaitsi: “Xanë cajena bitso yapëtaniji daxitacuene,” jamatabëjai, bajarapajivi pejamatabëcuenenavëxaniabijivi. Abaxë ayaijava tosaicatsi xaniavaetsia peyapëtaenexa. <sup>3</sup> Itsiata baitsi jane pajivi Dioso jitsipa, bajarapajivi Dioso ata jamatabëcuene yapëtanetsi Dioso pejitsipaejava.

<sup>4</sup> Nexata jitsipajë patacayapëtaeyaexanaenexa itsamonae jumapecataeya pexanaenëanëjavabelia perajutsiviyajuvënëjava pexaejava yabara. Vaxaitsi baja cajena yapëtanetsi jumapecataeya pexanaenëanë apo pexaniajaicue. Tsipaji saya jivi pecobeta pexanaejavanë. Yapëtanetsi baja cajena caenë Dioso peponaponaejava. Pematatsënëa baja cajena itsadioso ajibi. <sup>5</sup> Jivi raja apo yapëtae. Bajaraxuata saya jamatabëcuenenavëxaniabiaya jumai tsabiabi: “Diosovi raja navitsiajinavanapa athëbëtatsia. Jinavanapa mapanacuajava ataje,” jai tsabiabi jivi jamatabëcuenenavëxaniabiaya. <sup>6</sup> Itsiata vaxaitsi yapëtanetsi caenë vaxa Dioso peponaponaejava. Bjaraponë daxitacuene pexanaenë. Bjaraponënexa tojinavanapatsi. Caenë rabaja pijinia pepo vajatuxanenë Jesucristo. Bjaraponë pejamatabëcueneta exana daxitacuene. Bjaraponë pejamatabëcuenetanua nacacapanepaena vajaneconivecua.

<sup>7</sup> Itsiata baitsi jane itsamonae Dioso pejumecovënëtsivi ata, abaxë apo yapëtae pacuenia picani apo caëjëpaetsi jumapecataeya pexanaenëanë pejamatabëcuenebijianaenexatsi. Bjarapamonae pejevaxijavaveliacujinae jumapecataeya pexanaenëanë taeyabiaba bepiasaëtsavanapaevi. “Papexaejava itsamonae rajutabiaba jumapecataeya pexanaenëanëjavabelia, diosovijavabelia rajutabiaba bajaraxua,” sivajamatabëjai tsabiabi bajarapamonae jamatabëcuenenavëxaniabiaya. Bjaraxuata bajarapamonae aeconoxae Dioso jumecovënëtsi ata, itsa xane jumapecataeya pexanaenëanëjavabelia perajutsiviyajuvënëjava, bajarapamonae jamatabëcuenenavëxaniabiaya jamatabëjumai tsabiabi: “Pibisiacuene meta exanajë Dioso pitabarata mapavi taxaexaeje,” jamatabëjai tsabiabi. Tsipaji Dioso jumecovënëtsi ata, abaxë apo yapëtae pacuenia picani apo caëjëpaetsi jumapecataeya pexanaenëanë pejamatabëcuenebijianaenexatsi. <sup>8</sup> Yapëtanetsi rabaja vaxaitsi. Vjaxaejava yabara Dioso pexitsi apo nacaexanae. Xae atatsi, apo xae atatsinua, najëpabeje. Vjaxaejava apo nacavënananeconitsiaexanae Dioso. <sup>9</sup> Paxae atamënua, apo paxae atamënua, itsiata picani apo pacaitsacueniabi tsipae. Itsiata baitsi jane xania baja tsane. Dioso panenajuajumecovënëtsivi asivaya panetaexae, pëtsa pat-sitaexaname itsacuenejavayo ata, xua bepibisiacuene taejitsipa bajarapamonae. Tsipaji itsa pacacuenetaejitsipa, exanaejitsipa bajarapajivi ata. Nexata Dioso pejumecovënëtsijavavecua pajopaeyaexanaejitsipame bajarapajivi. Tsipaji abaxë jamatabëcuenefaefaena Dioso pejumecovenëtsijava. <sup>10</sup> Paxamë pëtsa panabaneme pabojavata jumapecataeya pexanaenëanëjavabelia perajutsiviyajuvënëjava abatabiaba. Paxamë baja payapëtaneme pacuenia apo pacaitsacueniabi picani tsipae, bajarapaviyajuvënëjava paxae atamë. Nexata itsa paxaejitsipame bajarajota, panexaejavata pacataejitsipa itsanë Dioso pejumecovënëtsinë, ponë abaxë bepibisiacuene pexanaejava tane bajarapavi itsa naxaejitsipa. Nexata itsa pacajanitane, bjaraponë ata naxaejitsipa. Nexata penaxaeae, bepananeconitsinë Diosojavabelia nataejitsipa. <sup>11</sup> Paxamë picani bajarapitsinë matatoxentsia paneyapëtaexae, paxaejitsipame bajarapaviyajuvënëjava. Itsiata nexata bajarapacuenia pajamatabëcuenebijianaejitsipame, ponë Dioso pejumecovënëtsinë ata, abaxë jamatabëcuenefaefaena Dioso pejumecovënëtsijava. Bjaraponënexa ata cajena Cristo sivatëpatsi. <sup>12</sup> Bjarapacuenia itsa pajamatabëcuenebijianaejitsipame Dioso pejumecovënëtsijivi, nexata pananeconitsipame Cristojavabelia. <sup>13</sup> Bjaraxuata xanë itsa yapëtaniji pacuenia itsajivi, Dioso pejumecovënëtsijivi, belia jopaejitsipa Dioso pejumecovënëtsijavavecua xanë tatsitaxaejava pejamatabëcueneta, nexata caeto ata apo tsitaxaenë tsipae bajarapaviyajuvënëjava asivaya tataexae bajarapajivi.

<sup>1</sup> Payapëtaneme rabaja mapacueje. Xanë apo xae atanë jumapecataeya pexanaenëanëjavabelia perajutsiviyajuvënëjava, itsiata Dioso netocopata daxitacuene taexanaenexa Jesucristojavabelia tanajamatabëcuenecopatsixae. Payapëtanemenua vajatuxanenë Jesucristo taneitapetsijava apóstolenëxanë. Taitaxutota baja cajena taniji vajatuxanenë Jesús. Paxamë ata patacatsipaebixae Jesucristo pelivaisi, nexata baja panajamatabëcuenecopatame Jesucristojavabelia. Tsipaji asaëyata tonacuenebaponaponajë vajatuxanenë. <sup>2</sup> Itsamonae apo beapóstolenë netae ata, itsiata paxamë apóstolenëcuenenë paneyapëtaneme. Patacatsipaebixae pexanialivaisi, paxamë baja vajatuxanenë pajumecovënëtameme. Bajaraxuata picani daxitajivi xaniavaetsia beneyapëtaneme apóstolenëcuenenë.

<sup>3</sup> Itsajota pexanialivaisi jivi tsipaebaponaponajë, Dioso picani netocopata tanerajutsinexa tanamatavenonaejavaxi. Itsamonae paxamëyajuvënëvi nejumeababiabaliivaisi tatsipaebabiabijava mapacueniaje. <sup>4</sup> Paapóstolevinë itsa panacuenebajë Dioso pijacuene, panetocopata itsajota pexanialivaisi patsipaebavanapajë patanerajutsinexa pataxaejava, pataapaejava ata. <sup>5</sup> Itsa tanacojobinë tsipae, xanë ata pijinia Dioso netocopatsipa tabarëponaenexa tajava, Dioso pejumecovënëtsiva. Bajarapacuenia netocopatsipa tsipaji bajarapacuenia exanavanapa itsamonae apóstolevi. Vajatuxanenë pejuyapijivi ata, apóstolenë Pedro ata, pijava barëponabiaba. <sup>6</sup> Itsamonae itsa pacatsipaeba Cristo pelivaisi, pajamatabëcueneyavenonabiabame penamatavenonaejava yabara. Itsiata baitsi jane paxanëbeje Bernabébeje panacuenebabiabajëbeje patajacuatabeje patanaevetsinexabeje. Bajarapacuenia picani apo benacuenebinëbeje patajacuatabeje patanaevetsinexabeje. Nexata picani paxamë, paxanëbeje ata, bepanerajutame patanamataavenonaejavaxibeje. Tsipaji paxanëbeje Cristo pelivaisi patacatsipaebabiabixaebeje, Dioso picani panetocopatabeje patanerajutsinexamë patanamataavenonaejavaxibeje. <sup>7</sup> Payapëtaneme baja cajena mapacueje. Itsanë itsa tonacueneba pijatuxanenë, barajutatsi pexaejava. Pamonaeta pijinia vajabitsaë naexanavanapa, itsa rajutaponatsi pexaejava, apo matamotaponae pexaejavamatamo pijapalatata. Jume cajena. Tocomuatabiabatsi ponë itorobatsi. Pamonaeta pijinia xaina uvabacabo, itsajivi ata apo janiitavetsitsi pexaeyaniva penotsicuaiyajuvënëjava. Pamonaeta pijinia itsanë pijaoveja toeveta, itsajivi ata apo janiitavetsitsi pemiuyucaebarëmeneyajuvënëjava piapaeyaniva. Jume cajena. <sup>8</sup> “Maraeta pacuenia Pablo nacajumaitisije saya jivi petsitaxanepanaecueniatsi vajaexanavanapaenexa,” pajamatabëjamë pëtsa. Tsipaji rabaja Dioso pejumelivaisibaxutota ata bajarapacuenia jumaitsi. <sup>9</sup> Dioso pejumelivaisibaxutota jumaitsi pacuenia bueyu copatatsi pexaejava pexaenexa penacuenebijavata ata. Jumaitsi mapacueniaje: “Pabueyu canacuenebame trigoxu pecatotanabataxuabinexa, pëtsa pumuxatatame nepumuxatatabijavata. Pëtsa pumuxatatame trigoxu pexaenexa pecatotanabataxuabijavata,” jai Dioso pejumelivaisibaxutota. Bajarapacuenia Dioso pejumelivaisibaxutota itsa jumaitsi, ëbueyu yabara apo jumaitsi. <sup>10</sup> Biji rajane bajarapacuenia Dioso pejumelivaisibaxutota jumaitsi vajanacayapëtaeyaexanaenexa vajamatamotsijavanexa vajanacatonacuenebinë. Ponë canacueneba iracueno itsanë pijatrigoxu petoubinexa, penacuenebijavata jamatabëjumaitsi: “Pamatacabi naveretsiana trigoxu, bajarapaxuyajuvënëjava nerajutsiana tatonacuenebimatamo,” jamatabëjai. Nexata penaveretsimatacabi trigoxu rajutatsi. Ponë ata icatsia juya trigoxu penaveretsimatacabi totanabataxuaba, bajaraponë ata jamatabëjumaitsi: “Mapatrigoxuyajuvënëjavaje nerajutsiana tatonacuenebimatamo,” jamatabëjai. Nexata rajutatsi. Bajara pijinia pacuenia Dioso pijacuene patatonacuenebivi patanamataavenonaejavaxi, paxamë bepanerajutame Cristo pelivaisi patacatsipaebijamatabëcuene. <sup>11</sup> Paubajë baja cajena panejamatabëëthëtota Dioso pejumelivaisi. Jica, nexata juya itsa pacajamatabëcueneevetsipatsi patanerajutsinexamë patanamataavenonaejavaxi, ¿pacatsitaayajava tsaja tsipae bajarapacueni? <sup>12</sup> Paxamë rabaja Dioso pejumelivaisibaxutota papecaitorobicuenia, parajutabiabame itsamonae penamatavenonaejavaxi papecatsipaebijamatabëcuene Cristo pelivaisi. Paxanë biji picani panetoxanepana copiaya patanerajutsinexamë itsamonaevecua.

Dioso picani panetocopata patanerajutsinexamē patanamatavenonaejavaxi Cristo pelivaisi patacatsipaebaponaejamatabēcuene. Itsiata apo pacavajētsitsi patanerajutsinexamē. Biji rajane piayapēbejecuena panatonacuenebaponajē patajacuata patanaevetsinexa bajarapacuenia. Apo pacavajētsitsi caeto ata patanerajutsinexamē patanamatavenonaejavaxi. Itsa pacavajētsipatsi, itsajamatabēcuene meta paxinaejitsipame paxanējavaberena. Nexata meta apo pajumecovēnētšimē tsipae patacatsipaebilivaisi, pexanialivaisi, Cristo pelivaisi. <sup>13</sup> Payapētaneme rabaja mapacueneje. Templobota Dioso petonacuenebivi, tocopatatsi bajara patemplobopijipexaejava pexaenexa. Baitsi pamonae penacuenebivi altarvēnējavata, itsajota dajubi tobeyabiaba ofrendacuena perajutsinexa bajarapavi Diosojavabelia, bajarapamonae ata Dioso tocopatatsi pexaenexa bajarapavijavuvēnējava. <sup>14</sup> Bajara pijinia pacuenia vajatuxanenē Jesucristo itoroba Dioso pejumelivaisi petsipaebaponae vi penamatavenonaejavaxi perajutsinexatsi. Pamonae jumecovēnētaponae petsipaebilivaisitsi, bajarapamonae juya berajutaponae xua namatavenona petsipaebivitsi. <sup>15</sup> Itsiata baitsi jane xanē bajarapacuenia netocopatsi ata, apo pacavajētsitsi itsacuenejavayo ata. Mapabaxutoje pacatoyaquinae atatsi, apo pacatoyaquinaetsi patanerajutaponaeexamē itsacuenejavaxi. Bitso cajena jamatabēcuenebarēyanē. Tsipaji Cristo pelivaisi pacatsipaebabiabatsi, apo panerajutsi atamē itsacuenejavayo ata. Bajaraxuata baja cajena apo jitsipaenē patanematamotsijavamē. Itsa panematamotsijitsiamē tsipae, nexata jitsipaejitsipajē tatēpaejava patanematamotsiyanivamē. Tsipaji itsa panematamotsipame, copiarucae jitsipa baja patacasivajamatabēcuenebarēya tsabiabijavami. Tsipaji amoneya patacatsipaebabiabixae Cristo pelivaisi, pacasivajamatabēcuenebarēyatsi tsabiabi.

<sup>16</sup> Apo jamatabējumaitšinē: “Ayaijamatabēcuenenēnē tatsipaebinēxae jivi pexanialivaisi pecapanepaelivaisinexatsi Diosojavabelia,” apo jamatabējanē. Jume baja cajena. Pexanialivaisi jivi tsipaebabiabajē. Tsipaji baja vajatuxanenē nitoroba. ¡Bitso meta naneconitsipajē Diosojavabelia jivi itsa apo tsipaebinē tsipae bajarapalivaisi! <sup>17</sup> Dioso nitorobinejeva, saya xanē tajamatabēcueneta jivi itsa tsipaebaponaejitsipajē pexanialivaisi, Jesucristo pelivaisi, nexata jamatabēcuene evetabiabijitsipajē jivi tanematamotabiabinexa pexanialivaisi tatsipaebabiabijamatabēcuene. Itsiata baitsi jane pexanialivaisi jivi tsipaebaponajē vajatuxanenē taneitorobixae. Jumecovēnētaponaponajē pacuenia Dioso nitorobapona. <sup>18</sup> Bajaraxuata apo nematamotsi ata, tsipaebaponajē pexanialivaisi jivi pecapanepaelivaisinexatsi Diosojavabelia. Dioso netocopatsi ata jivi tanematamotsinexa pexanialivaisi tatsipaebaponaejamatabēcuene, itsiata apo vajētsinē tanerajutsinexa itsacuenejavayo ata. Jivi itsa tsipaebaponajē bajarapalivaisi, bitso jamatabēcuenebarēyanē tsaponae. Bajaraxuata apo jitsipaenē tanematamotsijava.

<sup>19</sup> Apo tanecanajetsinē raja dajubinēcuena itsamonaejavabelia amoneya tatonacuenebinexa. Itsiata baitsi jane daxitajivi bepijajivitonēnēcuena ponaponajē. Bajarapacuenia exanaponaponajē itsamonae ayaibitsaēto xaneto ata tayavenonaenexa, penajamatabēcuene copatsinexa Cristojavabelia, pecapanepaenexatsi Diosojavabelia. <sup>20</sup> Judíovi jumecovēnētšiajinavanapa bajayata Dioso Moiséspijinēta penajumecopatsilivaisi. Xanē picani apo jitsipaenē taexanaponaponaeenexa pacuenia itoroba Dioso Moiséspijinēta penajumecopatsilivaisi. Tsipaji baja najamatabēcuene copatajē Cristojavabelia tajaneconi tanevecuaajibiaexanaenexa. Itsiata judíovijava itsa naponaponabiabajē, pacuenia Dioso Moiséspijinēta penajumecopatsilivaisi itorobatsi, judíovi itsa exana, xanē ata bajarapacuenia naexanabiabajē. Bajarapacuenia naexanabiabajē bajarapamonae judíovi xaniavaetsia tanenamuxunaevetsinexa Cristo pelivaisi itsa tsipaebajē. Nexata judíovi itsa najamatabēcuene copata Cristojavabelia, pecapanepaenexatsi Diosojavabelia. <sup>21</sup> Bajara pijinia pacuenia apo judíovijava ata itsa naponaponabiabajē, judíonē atanē, pacuenia apo judíovi jinavanapa, cuenejēpaeya naponaponabiabajē. Bajarapacuenia apo judíovi cuenejēpaeya naponaponabiabajē bajarapamonae xaniavaetsia tanenamuxunaevetsinexa Cristo pelivaisi itsa tsipaebajē. Nexata apo judíovi ata itsa najamatabēcuene copata Cristojavabelia, pecapanepaenexatsi

Diosojavabelia. Bajarapamonae apo judíovi apo jumecovënëtsiajinavanapae bajayata Dioso Moiséspijinëta penajumecopatsilivaisi. Bajarapamonaejava naponaponabiabi atanë, itsiata apo copatsinë tajumecovënëtsijava Dioso pejumelivaisi saicaya tajitsipaecuenia taponaponaenexa. Jume baja cajena. Tsipaji jumecovënëtajë Cristo taneitorobicuenia. <sup>22</sup> Itsamonae abaxë ajena najamatabëcuenecopaba Cristojavabelia. Nexata abaxë apo ajamatabëcuenesaë tsavanapae Dioso pejumecovënëtsijava. Bajarapamonaejava cuenejëpaeya naponaponabiabajë. Bajarapacuenia cuenejëpaeya naponaponabiabajë tajamatabëcueneyavenonaenexa bajarapamonae pevajënaeyabelia piamatabëcuenesaë tsavanapaenexa vajatuxanenëjavabelia. Baitsi pacuenia caeviria canacujitsia jivi pijasalinaicuenia jinavanapa, bajarapacuenia xanë ata cuenejëpaeya naponaponabiabajë. Bajarapacuenia cuenejëpaeya naponaponabiabajë bajarapamonae tajamatabëcueneyavenonaenexa. Jamatabëcueneyavenonaejitsianë bajarapamonaeyajuvënëvi ayaibitsaëttoxaneto ata penajamatabëcuenecopatsinexa Cristojavabelia pecapanepaenexatsi Diosojavabelia. <sup>23</sup> Bajarapacuenia exanaponaponajë baja jivi pejumecovënëtsinexa pexanialivaisi pecapanepaelivaisinexatsi Diosojavabelia, bajarapamonae ata taneyajavacapanepaenexatsi Diosojavabelia.

<sup>24</sup> Payapëtaneme rabaja mapacueje. Penayacobivi pecujinaejinaejava, bacujinaejina daxita. Itsiata baitsi jane ponë bitsojina pecujinaejinaejava daxita penayacobivi matatoxenetsia, bajaraponë caenë bapita xua tsipaebatsi pecujinaejinaematamo, premiovënëjjava. Pacuenia penayacobivi pecujinaejinaejava, daxitasaëta bacujinaejina, bajara pijinia pacuenia paxamë ata daxita panesaëta panevajënaeyabelia patonacuenebavanapare Dioso. <sup>25</sup> Daxita pamonaë penayacobivinexa pecujinaejinaejava, tajëvelia banajamatabëveretavanapa pebitsojinaenexa itsamonae matatoxenetsia. Naxaniavaetavanapanua. Daxitamatacabi canacujitsia nasisaëjëbavanapa caenë canacujitsia. Bajarapamonae najamatabëcuenesaëtavanapa, daxita xua abeje, pexanaeyaniva piamumalisaënexa. Bajarapacuenia naxaniavaetavanapa, penayacobijavata itsamonae matatoxenetsia pebitsojinaenexa, perajutsinexatsi corona, naebaxucorona. Itsiata baitsi jane bepimia saya piabejecoronanexa. Biji rajane vaxaitsi Dioso vajajumecovënëtsivi, Dioso tonacuenebavanapatsi athëbëtatsia vajanacarajutsinexa xua nacatsipaeba, apo peverevereaejavanexa. <sup>26</sup> Pacuenia pebitsojinaenë asaëyata cujinaejina rovia pepatsinexalia petocaëjëtsijavabeliatsi, bajara pijinia pacuenia xanë ata asaëyata tavajënaeyabelia exanaponaponajë vajatuxanenë taneitorobicuenia. Tonacuenebaponaponajë asaëyata. Apo tonacuenebinë saya jema penaxuabinexa tatonacuenebijava. <sup>27</sup> Bajaraxuata naperabëevetsia naevetaponaponajë pibisiacuene taexanaeyaniva. Bajarapacuenia naperabëevetsia naevetaponaponajë tsipaji jitsipajë vajatuxanenë taneisivajamatabëcuenebarëya tsaponaejava itsamonae itsa tsipaebaponajë pexanialivaisi. Apo jitsipaenë tanecopatsiaexanaejava Dioso tatonacuenebijava. Itsamonae pexanialivaisi tatsipaebicujinae, bijiata itsa ponaponaejitsipajë, Dioso necopatsiaexanaejitsipa tatonacuenebijava.

## 10

*Pemuxujobilivaisi penavajëcaeyaniva jumapecataeya pexanaenëanëjavabelia yabara pelivaisi*

<sup>1</sup> Tajamonae, pacatojitsipatsi icatsia panenajamatabënapitsinexa pacuenia bajayatami vajasalinaivimi Moiséspijinë barëpitsaparena Egipto nacuaverena. Moiséspijinë Dioso tsitajëtaPONATSi itsaxuayo vajasalinaivimi barënajetarucæjitsia. Vajasalinaivimi pematatsënëatsia itarërëbo namataxainaeja najetaruca. Nexata bajarapaitarërëbo vajasalinaivimi pënanajetarubena. Daxitabitsaëto vajasalinaivimi Moiséspijinë barënicabarena Rojovënë manuamenemaxërana epatuarena. <sup>2</sup> Pacuenia pebi itsa bautisabatsi merata, naexana Dioso pijajivitonë, bajara pijinia pacuenia vajasalinaivimi Moiséspijinë pijajivi naexana itsa pënaponarena Egipto nacuaverena. Moiséspijinë pijajivi naexana vajasalinaivimi itarërëbo pebëxëpana itsa pënanajetarubena Moiséspijinë. Rojovënë

manuamenemaxërana epatuarena ata itsa barënicabarenatsi, Moiséspijinë pijajivi naexana vajasalinaivimi. <sup>3</sup> Daxita vajasalinaivimi caeviriajava pexaejava najuanabanepona itsa najetarubena bajarapatusato nacuayarena. Papexaejava Dioso rajutaponatsi, bajarapamonaemi xaepona. <sup>4</sup> Itsa najetarubena, caeviriamera najuaapaepona, Dioso perajutsiratsi. Bajarapamera Dioso tocapitsapatsi ibotoxanetojavaverena. Bajarapamatacabi vajasalinaivimi Cristo yajavaponatsi. Cristo rabaja cajena bajarapaibotoxaneto. <sup>5</sup> Itsiata baitsi jane vajasalinaivimiyajuvënëvi, caejiviyobeje, saya jumecovënëta pacuenia Dioso najumecapanepaeya jumaitsitsi. Nexata bajarapajiviyobeje Dioso siva-jamatabëcuenebarëyatsi. Daxita itsamonae apo jumecovënëtsi Dioso. Bajaraxuata vajasalinaivimi Dioso verebiabatsi petusato nacuata.

<sup>6</sup> Nexata vaxaitsi becanaëjëtatsi pacuenia vajasalinaivimi bajayata Dioso verebiabatsi pibisiacuene pexanaexae. Nexata vaxaitsi ata vajajamatabëëthëtovetsina becanaëjëtatsi pibisiacuene vajaexanaeyaniva. <sup>7</sup> Bajaraxuata apo benavajëcaetsi jumapecataeya pexanaenëanëjavabelia pacuenia bajayata vajasalinaivimiyajuvënëvi navajëca jumapecataeya pexanaenëanëjavabelia. Dioso pejumelivaisibaxutota jumaitsi pacuenia vajasalinaivimi pibisiacuene exanavanapa, fiesta itsa toexana jumapecataeya pexanaenëanënexa. Dioso pejumelivaisibaxutota vajasalinaivimi yabara jumaitsi mapacueniaje: “Bajarapamonaenabiaba penabaninexa, piapaenexanua. Bajaraxuacujinae nonobapunabiaba peyavajibinexa,” jai Dioso pejumelivaisibaxutota vajasalinaivimi yabara. <sup>8</sup> Apo bexanaetsinua vajavitota pibisiacuene pacuenia bajayata vajasalinaivimiyajuvënëvi exana. Bajarapitsivi tëpa caematacabita veintitrés mil pajivibeje. <sup>9</sup> Apo bejamatabëcueneëjëtsitsinua vajatuxanenë pacuenia bajayata vajasalinaivimiyajuvënëvi Dioso jamatabëcueneëjëta. Papibisiacuene vajasalinaivimi pejamatabëëthëtota natojitsipa pexanaenexa, Dioso jamatabëcueneëjëtsiaya exanavanapa, peyapëtaenexa pacuenia Dioso exanaejitsia bajarapamonaejavaberena. Bajaraxuata vajasalinaivimi jomo pesinicujiruatsi vereverecapona. <sup>10</sup> Pëtsa panaepaname Dioso pejumelivaisi papecatsipaebavanapaevijavabelia pacuenia bajayata vajasalinaivimiyajuvënëvi anaepanabiaba Moiséspijinëbeje Aarónpijinëbejejavabelia. Bajaraxuata Dioso itoroba pijaängel peverebinexatsi vajasalinaivimiyajuvënëvimi.

<sup>11</sup> Bajarapacuenia exanatsi bajayata vajasalinaivimi. Dioso baja cajena nacayapëtaeyaexana pacuenia bajayata vajasalinaivimi Dioso naneconitsiaexanatsi pibisiacuene pexanaexae. Bajarapalivaisi itanerubena Dioso pejumelivaisibaxutota vajanacamuxujibinexa, vaxaitsi ata bajarapacuenia pibisiacuene vajaexanaeyaniva. Vaxaitsi rabaja nacua pevereveceaitabarayota jinavanapatsi. <sup>12</sup> Itsa pajamatabëjumaitsimë: “Xanë cajena ajamatabëcuenesaënë Dioso tajumecovënëtsijava. Nexata apo exanaenë tsane pibisiacuene pacuenia bajayata tajasalinaivimi exana,” itsa pajamatabëjamë, xania baja tsane! Tsi-paji paxamë ata bajarapacuenia pibisiacuene paexanaejitsipame. <sup>13</sup> Xua baja aeconoxae pataeponame, dovathi pejamatabëcueneta papecajamatabëcueneëjëtsijava, bajaraxua daxita Dioso pejumecovënëtsivi tocopiapataponatsi mapanacuataje. Itsiata baitsi jane Dioso pacayavenonaponaena pacuenia najumecapanepaeya jumaitsi. Dioso cajena apo pacacopatsi tsane dovathi papecajamatabëcueneëjëtaponanexa paneajamatabëcuenesaëjava matatoxenetsia. Nexata dovathi itsa pacajamatabëcueneëjëta, itsiata Dioso pacayavenonaponaena paneajamatabëcuenesaë tsaponanexa. Nexata papecajamatabëcueneëjëtsijava, pavecuapanepaponaename pibisiacuene paexanaenejevamë.

<sup>14</sup> Tajamonae bitso patacaasivavi, jumapecataeya pexanaenëanëjavabelia itsamonae penavajëcaecuene, nayajivitaeya pajinavanapare. <sup>15</sup> Pacajamatabëcuenecaëjëpa baja cajena panejumeyapëtaenexa patacatsipaebilivaisi. Nexata panejumecanaëjëre patacatsipaebilivaisi paneyapëtaenexa itsa pexaniajailivaisi. <sup>16</sup> Itsa nacaetuanatsi vajanajamatabënapitsinexa xua yabara Cristo nacasivatëpa, najuaxanetsi pan. Najumatavëjëaapatsinua vajamatavëjëaapaera. Nexata pan yabara, vajamatavëjëaapaera ata yabara, Diosojavabelia jumaitsitsi: “Pexaniacuene bitso panetoexaname. Panerajutame pan.

Panerajutame patamatavějēapaera ata,” jaitsi. Itsa nacaetuatatsi vajanajamatabēnapitsinexa xua yabara Cristo nacasivatēpa, caebitsaēto naexanatsi Cristo yajava, ponē nacasivatēpa cruzata. <sup>17</sup> Ayaibitsaētoxfaneto atatsi, caepan itsiata najuaxanetsi. Nexata vaxaitsi Cristo vajayajavajinavanapaexae, caebitsaētotsi Cristo pijajivitsi naexanatsi.

<sup>18</sup> Pacanaējēre pacuenia judíovi baexana. Itsamonae dajubi beyabiaba bajarapavi ofrendacuenia perajutsinexa Diosojavabelia. Nexata pamonae naxane bajarapavi, caebitsaēto Dioso pijajivi naexana. <sup>19</sup> Mara pajamatabēcuene yabara jumaitsinēje. Jumapecataya pexanaenēanē, itsacuenējavayo ata pexanaenexa, apo caējēpaetsi. Bajara pijinia itsi pavi ata jumapecataeya pexanaenēanējavabelia rajuta. Apo caējēpaetsi jivi xae ata pejamatabēcuenebijianaenexatsi. Tsipaji jumapecataeya pexanaenēanē, bajarapavi apo itothianae bajarapavivecua. <sup>20</sup> Nexata abaxē pamonae Dioso apo yapētae, dajubinē itsa tobeyaxuaba ofrendacuenia pevi perajutsinexa jumapecataeya pexanaenēanējavabelia, bajarapavi dovathinexa saya. Apo Diosonexa cajena. Bajaraxuata apo pacatojitsipaetsi panenaxaenexa bajarapamonaejavata. Itsa panaxaejitsipame bajarapamonaejavata, nexata caebitsaēto panaexanaejitsipame dovathi yajava. <sup>21</sup> Paxamē baja panenabanivi, paneapaevinua, vajatuxanenē pijamesata. Nexata baja acuenēbi panenabaninexa, paneapaenexanua, itsajota Dioso apo pejumecovēnētsivi dovathi pijacuene exanavanapa. <sup>22</sup> Vaxaitsi Dioso vajajumecovēnētsivi, apo jitsipaetsi vajatuxanenē vajanacabaraanaepanaejava. Dioso pijacuene, dovathi pijacuene ata, anijacuenebeje itsa exanaponaejitsipatsi, nexata vajatuxanenē nacabaraanaepanaejitsipa. Vaxaitsi cajena apo vecuaasaētsi vajatuxanenē. Nexata apo vecuapanepaetsi tsipae vajatuxanenē itsa nacananeconitsiaexana.

*Pacuenia Dioso pejumecovēnētsivi bejinavanapa itsamonae pejamatabēcuenebijianaeyaniva yabara pelivaisi*

<sup>23</sup> Xaniajai rabaja pacuenia itsamonae jumaitsi. Mapanacuata navita vajaexanaejavanexa. Itsajivi ata apo nacaitavetsi bajarapacuenē vajaexanaenexa. Itsiata baitsi jane apo nacatoxanepanae daxita bajarapacuenē vajaexanaenexa. Daxitacuene, xua itsajivi ata apo nacaitavetsi vajaexanaenexa, exanae atatsi tsipae, itsiata apo nacajamatabēcueneasaēyaexanae tsipae Dioso vajajumecovēnētsijava. <sup>24</sup> Pētsa pajamatabējumaitsimē: “¿De tsaeta xua natoexanaenājē, xua ēxanēnēna netoxanepanaejitsia?” pajamatabējamē pētsa. Biji rajane pajamatabējumaitsimēre. “¿De tsaeta xua toexanaenājē, xua itsamonaeenexa toxanepanaejitsiatsi?” pajamatabējamēre.

<sup>25</sup> Dioso baja cajena pacatocopata panexaenexa itaxutojema. Nexata pacatocopata panexaenexa pavi canajeta pecanajetsibota. Nexata pētsa payanijobame. “¿Matsa pavi jumapecataeya pexanaenēanējavabelia peyajuvēnērajutsivije?” pajamē pētsa. Itsa payanijobijitsipame bajarapacuenia: “Jājā, bajarapayajuvēnēvi,” pacajai tsipae. Nexata paxamē pajamatabējumaitsimē tsipae bajarapavi yabara: “Mapavije itsa xaejitsipajē, nexata pibisiacuene exanaejitsipajē Dioso pitabarata,” pajamatabējamē tsipae. Saya pacomuare payanijobinejevamē. <sup>26</sup> Dioso baja cajena pacatocopata itaxutojema panexaenexa. Tsipaji mapanacuaje, daxita mapanacuapijicuene ataje, Dioso baja cajena pijajava.

<sup>27</sup> Dioso apo pejumecovēnētsijivi ata itsa pacajunata panenanabaninexa pijaboyabelia, panaponare panenanabaninexa itsa pajitsipame. Xua pacaabata, paxaema payanijobinejevamē. “¿Matsa pavi jumapecataeya pexanaenēanējavabelia peyajuvēnērajutsivije?” pajamē pētsa. <sup>28</sup> Itsamonae Dioso pejumecovēnētsivi bepibisiacuene pexanaejava taejitsipa itsa xaejitsipa bajarapayajuvēnēvi. Nexata panexaevajēnaeya, bajarapamonaejavuvēnēnē itsa pacajumaitsi: “Mara pavije jumapecataeya pexanaenēanējavabelia ofrendacuenia peyajuvēnērajutsivije,” itsa pacajai, pētsa patsitaxaneme. Itsa apo patsitaxaemē tsane, nexata apo pajamatabēcuenebijianaemē tsane bajaraponē. <sup>29</sup> Itsa patsitaxaejitsipame, bajaraponē ata naxaejitsipa. Nexata bajaraponē jamatabējumai tsipae: “Pibisiacuene baja cajena exanājē Dioso pitabarata mapavije tanaxaexae,” jamatabējai tsipae.

Bajarapacuenia patacatsipaebijava, itsanë Dioso pejumecovënëtsinë itsa jumetaena, jamatabëcuenenavëxaniabiaya meta jumaitsi tsane mapacueniaje: “Jumapecataeya pexanaenëjavabelia perajutsiviyajuvënëjava taxaeyabiabinexa, Dioso netocopata. Nexata baja xaeyabiabajë. Itsiata icatsia aeconoxae nitaveta itsanë Dioso pejumecovënëtsinë itsa tsitaxaniji bajarapayajuvënëvi, bepibisiacuene petaeyaniva. ¿De meta xuajitsia xanë epatua copatsipajë bajarapayajuvënëvi taxaeyabiabijavami? <sup>30</sup> Taxaevajënae bajarapavi, ‘Xanepana rabaja,’ janë tsabiabi Diosojavabelia tanerajutsixae taxaenexa. ¿Detsa nexata xuajitsia jivi nebaracuacuajai tsipae bepibisiacuene taexanaenë taxaeramatabëcuene bajarapayajuvënëvi?” jai meta tsane jamatabëcuenenavëxaniabiaya itsanë Dioso pejumecovënëtsinë. <sup>31</sup> Mara pacuenia pacatsipaebatsije panecopatsinexa paneexanabiabijavami ata, itsajivi ata panejamatabëcuenebijianaeyaniva panetsitaexanaejava pejamatabëcueneta. Itsa paxaneme, itsa papamenua, daxitacuene itsa paexanamenua, xaniavaetsia itsamonae patsitaexanavanapaname paxamë panetsitaexanaejava yabara jivi papecasivajamatabëjumaitsinexa: “Dioso cajena ayaijamatabëcuenenë. Tsipaji pijajivi yavenona xaniavaetsia petojinavanapaenexatsi,” papecasivajamatabëjainexa. <sup>32</sup> Bajaraxuata pëtsa patsitaexaname itsacuenejavayo ata itsajivi ata Diosovecua itsajamatabëcuene pexainaeyaniva. <sup>33</sup> Pacuenia xanë tsitaexanapononajë itsamonae tanesivajamatabëcuenebarëyanexa, bajarapacuenia paxamë ata patsitaexanavanapare itsamonae. Apo najamatabëxainabiabinë taexanaenexa xua ëxanënexa netoxanepana. Biji rajane najamatabëxainabiabajë tatoexanaenexa xua toxanepanatsi itsamonae ata. Bajarapacuenia toexanaponajë bajarapamonae ata Dioso pejumecovënëtsinexa peca-panepeanexatsi pijaneconivecua.

## 11

<sup>1</sup> Itsamonae patsitaexanavanapare pacuenia xanë pacatsitaexanaponatsi. Xanë raja pijinia cuenejëpaeya ponaponajë Cristo.

*Pacuenia petirivi namataacatsiaya bejunua Dioso pejumecovënëtsivi penacaetuatabiabitota yabara pelivaisi*

<sup>2</sup> Tajamonae, panejamatabënjabinabiabame. Pacuenia pacaitorobatsi, bajarapacuenia paexanavanapamenua. Bajaraxuata pacasivajamatabëcuenebarëyatsi. <sup>3</sup> Pacatojitsipatsi paneyapëtaenexa mapacuenije. Athëbëvetsica Dioso itorobicatsi Cristo. Nexata juya mapanacuataje Cristo caepebi canacujitsia itorobapona. Bajara pijinia itsi pebi ata. Pebi juya itorobapona pijava. Pebi peyaiyataenexa Cristo, apo benamataacatsi papaëbërëpanayota jivi penacaetuatsibota. <sup>4</sup> Bajaraxuata pebi Diosojavabelia penavajëtsijavata, itsamonaejavabelia ata Dioso pejumelivaisi petsipaebijavata, itsa namataacatsipa papaëbërëpanayota, nexata Cristo athëbëvetsica yapijiviaura tsipaetsi. <sup>5</sup> Petiriva rajane pamona pejumecovënëtabiavacuene itsamonae peyapëtaenexatsi, benamataacata papaëbërëpanayota jivi penacaetuatsibota. Bajarapacuenia benamataacata penavajëtsijavata Diosojavabelia, itsamonaejavabelia petsipaebijavata ata Dioso pejumelivaisi. Itsa apo namataacatsi tsipae, nexata pamona yapijiviaura tsipaetsi. Pacuenia petiriva amataura tsipae itsa mataxunaejitsipatsi, bajara pijinia pacuenia petiriva pamona yapijiviaura tsipaetsi, papaëbërëpanayota itsa apo namataacatsi tsipae jivi penacaetuatsibota. <sup>6</sup> Petiriva itsa apo namataacatsi tsipae papaëbërëpanayota, pacuenia pebi apo namataacatsi, nexata itsa bemataxunatsi pacuenia pebi bamataxunatsi, bajarapova namatacaura tsipae. Bajaraxuata petiriva jivi penacaetuatsibota, benamataacata papaëbërëpanayota pamona peyapijivaurayanivatsi. <sup>7</sup> Dioso itsa exana pebi, nacujirujëpaeyaexana. Nexata pacuenia itsi Dioso, bajara itsi pebi. Nexata pebi xaniavaetsia itsa ponapona, jivi pecanaëjëtsinexa Dioso bitso ayaijamatabëcuene pexainaenëcuene. Bajaraxuata pebi apo benamataacatsi papaëbërëpanayota penavajëtsijavata Diosojavabelia, itsamonaejavabelia Dioso pejumelivaisi petsipaebijavata ata. Itsiata baitsi jane petiriva benamataacata papaëbërëpanayota penayapëtaenexa pamonavecua beveliajamatabëcuene pexainaevacuene. <sup>8</sup> Copiata Dioso pebi itsa exana, petiriva peyenyajuvënësitomita

apo exanae. Biji rajane pebi peyenyajuvënësitomita cotocaevi Dioso exana petiriva. <sup>9</sup> Petiriva baja cajena Dioso exana pebinexa. <sup>10</sup> Bajarapajamatabëcuene yabara petiriva benamataacata papaëbërëpanayota. Petiriva namataacatsia itsa ponapona, ángelevi tanetsi pamona pejumecovënëtabiavacuene. <sup>11</sup> Vaxaitsi Dioso vajajumecovënëta-vanapaevi, xanepana namataenetsia vajanajamatabëcuene asaëyaexanaenexa. Pebi namatavenona petiriva. Petiriva pijinia namatavenona pebi. <sup>12</sup> Xaniajai rabaja. Pebi peyenyajuvënësitota Dioso exana petiriva. Itsiata baitsi jane bajaraxuacujinae petirivavita naexanapona pebijivi. Tshipaji Dioso pejamatabëcueneta bajarapacuenia copata.

<sup>13</sup> Panijacuata pacanaëjere. ¿Xanepana tsaja petiriavi penavajëtsinexa Diosojavabelia papaëbërëpanayota namataacatsinejeva? Jume raja. Namataacatsiaya raja papaëbërëpanayota petiriavi benavajëta Diosojavabelia. <sup>14</sup> Vaxaitsi baja cajena vajajamatabëëthëtota yapëtanetsi mapacueneje. Pebi itsa amatanapiareca, amataura tshipae. <sup>15</sup> Vajajamatabëëthëtota yapëtanetsinua mapacueneje. Petiriva pijinia itsa amatanapiareca, toxanepanatsi. Yabarëya pematana. Dioso cajena petiriva tocopatatsi piamatanapiareca. Nexata bepemataacatsitsi pematana. <sup>16</sup> Itsajivi itsa jamatabëpanejumenaenota petiriavi papaëbërëpanayota penamataacatsijava yabara, nexata bajarapajivijavabelia pajumaitsinë tsane mapacueniaje: “Paxanë bajarapacuenia panajamatabëxainajë petiriavi papaëbërëpanayota penamataacatsijava yabara. Bajarapacuenia itsamonae ata, pamona Dioso pejumecovënëtsivi, najamatabëxaina. Tshipaji baja cajena patajacuene,” pajanë tsane pajivijavabelia jamatabëpanejumenaenota petiriavi papaëbërëpanayota penamataacatsijava yabara.

*Pacuenia itsamonae ayaijava xaeyabiaba itsa nacaetuatabiaba penajamatabënapitsinexa xua yabara Cristo sivatëpatsi yabara pelivaisi*

<sup>17</sup> Pacatoyaquinatsi mapalivaisije patacamuxujiobinexa. Aeconoxae xua paexanabiabame, apo pacatoxanepanae. Panacaetuatabiabi atamë, itsiata apo pajamatabëcuenesaëmë tsaponae panevajënaeyabelia Dioso panejumecovënëtsijava. Caranata saya panevajënaeyabelia pajamatabëcuenecueranaponame. <sup>18</sup> Najamatabëxainajë copiaya patacujumaitsinexa mapacueniaje. Pacavënëlivaisitanetsi. Apo panajamatabëcuenejëpabiabimë pina itsa panacaetuatabiabame panenacaetuatabiabibota. Caebota pina panacaetuatabiabi atamë, navecuanatsanaeya pina panavecuaenabiabame pacaebitsaëtoximë canacujitsia. “Xaniajai raeta baja. Baja raeta pacuenia exanabiaba,” jamatabëjanë belia paxamë yabara. <sup>19</sup> Baja raeta pacuenia navecuanatsanaeya panavecuaenabiabame. Tshipaji meta pajamatabëjumaitsimë tsabiabi: “Vaxaitsi cajena Dioso pepacuene jumecovënëtsi. Nexata vajanacaetuatsijavata, Dioso apo pejumecovënëtsivi navecuaetsatsianatsi Dioso apo ëpejumecovënëtsivi saicaya penaenexa,” pajamatabëjamë meta tsabiabi. <sup>20</sup> Xua yabara Cristo pacasivatëpa, panenajamatabënapitsinexa panacaetuatabiabi atamë, najamatabëcuenejëpaeya apo panacaetuatabiabimë. Nexata Dioso pacatane saya jema bepanenacaetuatsivi. <sup>21</sup> Tshipaji copiaya panepatsivi panenabaniepatota, ayaijavanë paxaeyabiabame. Apo paevetabiabimë abaxë itsamonae pepatsijava caecuenia panenajuanabaninexa. Itsamonae paxamëyajuvënëvi ayaijava xaeyabiaba. Ayaira vinora matavëjëa apaeyabiabanua. Nexata vënaaitajibi tsabiabi. Nexata pamona cotocaevi pepatsivi, yavererecabiaba. Nexata pijani tsabiabi. <sup>22</sup> Èpanexaejavanexa itsa pasivanacaetuatabiabame, panijabonë paxainame panijabonëjava panenabaninexa, paneapaenexanua. Bijiaya pataeyabiabame pamona nacaetuatabiaba penavajëcaenexa Diosojavabelia. Paurababiabamenua pamona bepejiobivi, pexaejava apo penacapatsivi. Pexaniacuene cajena apo paexanabiabimë bajarapacuenia itsa paexanabiabame. Bajarapacuenia saya paneexanabiabixae, pananeconitame Diosojavabelia.

*Pajamatabëcuene yabara nacaetuatabiaba Dioso pejumecovënëtsivi caejumeto canacujitsia yabara pelivaisi*

(Mt 26.26-29; Mr 14.22-25; Lc 22.14-20)

<sup>23</sup> Imata baja cajena pacatsipaebatsi pacuenia vajatuxanenë Jesús pijajivi barëexana. Pameravi vajatuxanenë pijavajabitsaë pecobeyabelia canajetsijitsiatsi, bajarapameravi vajatuxanenë cobenanuca panbë. <sup>24</sup> “Pexaniacuene panetoexaname. Pan panerajutame,” pejaicujinae Diosojavabelia, panbë epatsënëca. Jumaitsi pijajivijavabelia: “Mara tavije patacasivatëpaejava paxamënëxa. Mapacueniaje tacovëta paexanabiabianame patanenajamatabënapitsinexamë,” jai vajatuxanenë Jesús pijajivijavabelia. <sup>25</sup> Penabanicujinae bajara icatsia pacuenia Jesús cobenanuca pecaapaejava. Nexata icatsia jumaitsi pijajivijavabelia: “Dioso baja cajena najumecapanepaeya jumaitsi papecacapanepaenëxa. Nexata pacuenia Dioso najumecapanepaeya jumaitsi, pacaapanepaena tajana pejamatabëcueneta. Tajana raja nevecuarunaena tatëpaejavata papeacomuatsinëxa panijaneconivecua. Mapacaapaejavataje, ita papaeyabiabianame, panenajamatabënapitabiabianame,” jai vajatuxanenë Jesús pijajivijavabelia. <sup>26</sup> Nexata paxamë bajarapacuenia ita paexanabiabame, patsitanaitajëtabiabame itsamonaejavabelia xua yabara vajatuxanenë pacasivatëpa cruzata. Bajarapacuenia paexanabiabare vajatuxanenë icatsia pepatsimatocabitsicajavabelianëxa.

*Pacuenia Dioso pejumecovënëtsivi benaxaniavaeta, ita nacaetuata penajamatabënapitsinëxa xua yabara Cristo sivatëpatsi, yabara pelivaisi*

<sup>27</sup> Jivi ita nacaetuata penajamatabënapitsinëxa xua yabara Cristo sivatëpatsi, becanaëjëtëna. Tspijaji canaëjëtësiñejeva ita naxane pan, ita apanua vajatuxanenë pecaapaejavata, bajarapajivi naneconitsipa vajatuxanenëjavabelia, vajatuxanenë pevito, pijana ata, apo peyayataexae. <sup>28</sup> Bajaraxuata caejivi canacujitsia xaniavaetsia benajamatabëcuenejaita pecaxitajarabinëxa paneconi xainaponapona Dioso pitabarata. Bajarapacuenia benajamatabëcuenejaita pan penaxaevajënaeya, pematavëjëaapaera ata penaapaevajënaeya. <sup>29</sup> Itsa naxane pan, ita naapanua pematavëjëaapaera, becanaëjëtë pajamatabëcuene yabara vajatuxanenë sivatëpatsi cruzata. Pajivi canaëjëtësiñejeva naxane pan, naapanua pematavëjëaapaera, bajarapajivi pijacuata naneconitapona Diosojavabelia. <sup>30</sup> Bajaraxuata paxamë ayaibitsaëto payajuvënëavitanemë. Nexata itsamonae payajuvënëcueraname. Itsamonae payajuvënëtëpame baja. <sup>31</sup> Bajaraxuata vaxaitsi vajanaxaevajënae pan, vajanapaevajënae ata pematavëjëaapaera, benajamatabënapitatsi Jesucristo vajanacasivatëpaejava vaneconi yabara. Benajamatabëcuenejaitatsinua paneconi xainatsi Dioso pitabarata vajanavajunupaebinëxa Diosojavabelia. Bajarapacuenia ita exanaenatsi, vajatuxanenë apo nacananeconitsiaexanae tsane. <sup>32</sup> Itsa naneconitsianatsi, nexata vajatuxanenë nacabejiobiaexanaponaena Dioso apo pejitsipaecuene vaxaxanaejava vajacopatsinëxa. Bajarapacuenia vajatuxanenë nacaexanaena Dioso apo pejumecovënëtsivi yajava Diosovecua vajanaxuabiyaniya.

<sup>33</sup> Bajaraxuata ita panacaetuata panenajamatabënapitsinëxa xua yabara Cristo pacasivatëpa, paevetabiabianame abaxë daxita pepatsijava caecuenia panenajuaxaenëxa. <sup>34</sup> Pajivi pijajani, bajarapajivi copiaya benabane pijabota pejonevajënaeya panenacaetuatsibojavaberena. Nexata panenacaetuatsijavata, bajarapajivi apo naneconitsi tsane Diosojavabelia. Itsajamatabëcuenejavaxi pematatsënëa, xua yabara paneyanijobame, abaxë apo pacatoyaquinaetsi mapabaxutotaje. Itsa pacataenatsi, pacatsipaebianatsi bajarajotalia.

## 12

*Pacuenia Dioso pejumecovënëtsivi Espíritu Santo pejamatabëcueneta jamatabëcuenecaëjëpaeaxanatsi pexanaenëxa pacuenia Dioso itorobaponatsi yabara pelivaisi*

<sup>1</sup> Tajamonae, jitsipajë patacatoyaquinaejava paneyapëtaenëxa mapacuenëje. Caejivi canacujitsia Dioso pejumecovënëtsivi Espíritu Santo pejamatabëcueneta jamatabëcuene caëjëpaeaxanaponatsi pexanaenëxa pacuenia Dioso itorobaponatsi.

<sup>2</sup> Paxamë rabaja payapëtaneme mapacuenëje. Pamatacabi abaxë Dioso apo pajumecovënëtsimë, dovathi pacayamaxëitojorobabiaba. Nexata panevajëtësinëxa jumapecataeya pexanaenëjavabelia, panematabacabëta patonubenabiabame.

Jumapecataeya raja pexanaenēanē, apo caējēpaetsi itsacuenejavayo ata pexanaenexa.  
<sup>3</sup> Bajaraxuata pacatoyaquinatsi paneyapētaenexa mapacueneje. Pajivi jumaiti: “Jesús raja Dioso apo pexēnato,” jai, bajarapajivi Espíritu Santo apo yajavaponaponatsi. Pajivi rajane jumaiti: “Jesucristo raja pepo petuxanenē,” jai, bajara jane pajivi Espíritu Santo yajavaponaponatsi.

<sup>4</sup> Daxita xua Dioso pejumecovēnētsivi Espíritu Santo pejamatabēcueneta jamatabēcuenē caējēpaeyaexanaponatsi, apo najēpae. Caenē canacujitsia saicayacuenia jamatabēcuenē caējēpaeyaexanaponatsi. Itsiata baitsi jane caenē Espíritu Santo pejamatabēcueneta jamatabēcuenē caējēpaeyaexanaponatsi daxita bajarapamonae.

<sup>5</sup> Xua jivi Dioso tonacuenebavanapa, apo caevirianacuenebijava. Navita cajena xua jivi Dioso tonacuenebavanapa. Itsiata caenē Dioso pijacuene tonacuenebavanapa.

<sup>6</sup> Dioso pijacuene petonacuenebivi, apo nacuenejēpae. Itsiata rabaja caenē Dioso daxita yavenonatsi petonacuenebavanapaenexa. <sup>7</sup> Caejivi canacujitsia, Dioso pejumecovēnēt-sivi, Espíritu Santo pejamatabēcueneta jamatabēcuenēcaējēpaeyaexanatsi xua Dioso tonacuenebavanapaejitsia. Nexata bajarapamonae, caejivi canacujitsia, caējēpatsi peyavenonaenexa bajarapajamatabēcueneta daxita Dioso pejumecovēnētsivijavabelia.

<sup>8</sup> Itsamonae Dioso pejumecovēnētsivi, Espíritu Santo pejamatabēcueneta jamatabēcuenē caējēpaeyaexanaponatsi pemuxujobinexa xaniavaetsia itsamonaejavabelia, xaniavaetsia pejinavanapaenexa Dioso pitabarata. Itsamonae pijinia jamatabēcuenē caējēpaeyaexanaponatsi jivi xaniavaetsia peyapētaeyaexanaenexa pexaniajailivaisi, Jesús pelivaisi. Itsiata baitsi jane caeEspíritu Santo pejamatabēcueneta bajarapacuenia jamatabēcuenē caējēpaeyaexanaponatsi bajarapamonae. <sup>9</sup> Itsamonae pijinia jamatabēcuenē caējēpaeyaexanaponatsi penajamatabēcuenērutsinexa Diosojavabelia

Dioso peyavenonabiabinexatsi dexitacuene yabara. Itsamonae pijinia jamatabēcuenē caējēpaeyaexanaponatsi pejamatejemayaexanaenexa piavitanevi. CaeEspíritu Santo rabaja pejamatabēcueneta bajarapacuenia jamatabēcuenē caējēpaeyaexanaponatsi.

<sup>10</sup> Itsamonae pijinia jamatabēcuenē caējēpaeyaexanaponatsi Dioso pesaēta pinijicuene pexanaejavanē pexanaenexa. Itsamonae pijinia jamatabēcuenē caējēpaeyaexanaponatsi petsipaebinexa itsamonaejavabelia pacuenia Dioso yapētaeyaexanatsi.

Itsamonae pijinia jamatabēcuenē caējēpaeyaexanaponatsi pejumeyapētaenexa itsajivi itsa tsipaebatsi penajumetsēnētsilivaisi dovathi pejamatabēcueneta. Jamatabēcuenē caējēpaeyaexanatsinua pejumeyapētaenexa itsajivi itsa tsipaebatsi pexaniajailivaisi Espíritu Santo pejamatabēcueneta. Itsamonae pijinia jamatabēcuenē caējēpaeyaexanaponatsi pecuaicuaijainexa itsajivi ata mapanacuata apo pejumetaejumeta.

Itsamonae pijinia jamatabēcuenē caējēpaeyaexanaponatsi pejumetaenexa bajarapajume juya pejumevajunupaebaponaenexa itsamonaejavabelia. Nexata bajarapamonae tsipaebapona pajamatabēcuenelivaisi xainapona caelivaisi canacujitsia, palivaisianē tsipaebapona pamonae cuaicuaijai itsajivi ata mapanacuata apo pejumetaejumeta. <sup>11</sup> Itsiata baitsi jane caeEspíritu Santo pejamatabēcueneta

jamatabēcuenē caējēpaeyaexanaponatsi daxita bajarapamonae. Pacuenia Espíritu Santo jitsipa pejamatabēcuenēcaējēpaeya exanaponaenexa Dioso pejumecovēnētsivijavabelia, bajarapacuenia Espíritu Santo caejivi canacujitsia jamatabēcuenē caējēpaeyaexanaponatsi Dioso pejumecovēnētsivi.

*Pacuenia daxita Dioso pejumecovēnētsivi caenē Cristo bepeperabēto yabara pelivaisi*

<sup>12</sup> Pavi xainatsi vajaperabētota, caevito canacujitsia pevēnē xainapona. Vajavi xainatsi navitsiaya. Caevito canacujitsia saicaya pexanaejavanexa, xainapona. Itsiata baitsi jane caeperabētotsireca. Bajara pijinia itsitsi daxita Dioso vajajumecovēnētsivi. Caejivitsi canacujitsia saicaya vajanacuenebijavanexa, Espíritu Santo pejamatabēcueneta nacajamatabēcuenē caējēpaeyaexanaponaenexa, itsiata caenē Cristo bepeperabētotsi.

<sup>13</sup> Daxitatsi rabaja Dioso vajajumecovēnētsivi, itsa nacabautisaba, caeEspíritu Santo nacatsijamatabēca caebitsaētonexatsi, caenē Cristo bepeperabētonexatsi. Judíovi atatsi, apo judíovi atatsi, dajubicuenia vajanacacanajetsivi ata itsamonaejavabelia

amoneya vajatonacuenebinexa, apo vajanacacanajetsivi ata itsamonaejavabelia, daxitatsi, caeEspíritu Santo nacatsijamatabeeca.

<sup>14</sup> Pavi jivi peperabētuareca xaina, caevito canacujitsia pevënë xainapona. Nexata caevënëvito jivi apo xinae peperabētuareca. <sup>15</sup> Nexata jivi petaxu itsa caējēpaejitsipatsi pecuaicuaijainexa, petaxu meta jumaitsi tsipae: “Apo pecobenē raja. Bajaraxuata maapo paperabētōyajuvēnjavanēje,” jai meta tsipae. Itsiata baitsi jane cajena jemajai tsipae. Tsitecaeya bajarapaperabētōyajuvēnjava tsipae. Pijumeta saya apo naexanae tsipae saicayajava. <sup>16</sup> Jivi pemuxuyoroto ata itsa caējēpaejitsipatsi pecuaicuaijainexa, pemuxuyoroto meta jumai tsipae: “Apo pitaxutonē raja. Bajaraxuata maapo paperabētōyajuvēnjavanēje,” jai meta tsipae. Itsiata baitsi jane cajena jemajai tsipae. Tsitecaeya bajarapaperabētōyajuvēnjava tsipae. Pijumeta saya apo naexanae tsipae saicayajava. <sup>17</sup> Jivi daxitanē peperabētuareca itsa xinaejitsipa ēpitaxutonē, ¿detsa nexata pacuenia jumetaejitsipa? Acuenebi tsipae. Daxitanē peperabētuareca itsa xinaejitsipa ēpemuxuyorotonē, ¿detsa nexata pacuenia tuxunijitsipa? Acuenebi tsipae. <sup>18</sup> Bajaraxuata jivi peperabētuareca caevënëvito Dioso apo torutsi. Saicaya pevënë pexainaevitonē, caevito canacujitsia, jivi peperabētuareca Dioso torutapona itsajota jitsipa petorutsinexa. <sup>19</sup> Itsa meta jivi peperabētuareca xinaejitsipa caevitoreca, aithia meta tsipae. Nexata apo bejivitonē perabēto tsipae. <sup>20</sup> Itsiata baitsi jane maitisije. Jivi peperabētuareca navitsiaxinae ata saicaya caevito canacujitsia pevënë pexinaevi, itsiata rabaja caeperabētoreca.

<sup>21</sup> Nexata jivi pitaxutobeje caējēpae atatsibeje tsipae pecuaicuaijainexabeje, itsiata acuenebi tsipae pejumaitsinexabeje pecobebejejavabelia: “Apo pacanamataavenonaetsibeje cajena,” pejainexabeje. Jivi pematocotota ata caējēpae atatsi tsipae pecuaicuaijainexa, itsiata acuenebi tsipae pejumaitsinexa petaxubejejavabelia: “Apo pacanamataavenonaetsibeje cajena,” pejainexa. Tsipaji daxita pavi xainatsi vajaperabētota, namataavenonatsi. <sup>22</sup> Bajaraxuata vajaperabētota pavi xainatsi, pavi itajara apo bevajanacatsitanamatavenonae, bajarapavi bitso pepacuene namataavenonatsi. <sup>23</sup> Pavi xainatsi vajaperabētota, pavi vaxaitsi natanetsi beveliavi, bajarapavi banaperabēxatatatsi naitabētsiaya. Pavi naperabēcauratsi, naperabēcaranatsiaya banaperabēxatatatsi xaniavaetsia. <sup>24</sup> Pavi apo naperabēcauratsi, apo naperabēxatatatsi xaniavaetsia. Bajarapacuenia vajaperabētota Dioso nacavimataropobiaruba. Nexata picani pavi bevelia vajanamatavenonaevi, bajarapavi itsiata naitabētsia banaperabēxatatatsi. Nexata bajarapacuenia bajarapavi ata bevajanamatavenonaevi tanetsi. <sup>25</sup> Nexata pavi vajaperabētota xainatsi, apo navecuanatsanae. Nexata daxita pavi xainatsi vajaperabētota, namataenetsia naeveta. <sup>26</sup> Vajaperabētota pavi xainatsi, caevito itsa atane, nexata daxita itsavijavabelia ata baatane. Caevito ata pijinia itsa naitabētsianaxatatatsi, nexata daitaperabētotsireca bayajavarēyatsi.

<sup>27</sup> Daxita rabaja paxamē Dioso papijajivimē. Nexata caenē Cristo beperabēto panaexaname. Pavi Cristo peperabētota xaina, bajara bepajuvēnēvi Dioso pacatane pacaenēmē canacujitsia. <sup>28</sup> Vajaperabētota pavi xainatsi, caevito canacujitsia saicaya xainapona pexanaponaevanexa. Bajara pijinia itsi Dioso pejumecovēnētsivi. Caejivi canacujitsia Dioso itapetaponatsi saicaya caejivi canacujitsia pexanaponaenexa xua Dioso tocopatatsi. Copiata Dioso itapeta apóstolevinexa. Xuacujinae icatsia cotocaevi itapeta petsipaebivinexa itsamonaejavabelia pacuenia Dioso yapētaeyaexanatsi. Xuacujinae icatsia Dioso itapeta, pacuenia Dioso pejumelivaisibaxutota jumaitsi, peyapētaeyaexanaevinexa itsamonaejavabelia. Xuacujinae icatsia Dioso itapeta Dioso pesaēta pinijicuepe pexanaevanexa pexanaponaevinexa. Xuacujinae Dioso itapeta piavitanevi pejamatejemayaexanaevinexa. Xuacujinae icatsia Dioso itapeta bepejiobivi peyavenonaevinexa. Xuacujinae icatsia Dioso itapeta Dioso pejumecovēnētsivi penamatacaitorobivinexa. Xuacujinae icatsia Dioso itapeta pecuaicuaijainexa itsajivi ata mapanacuata apo pejumetaejumeta. <sup>29</sup> Nexata daxita apo epóstolevi. Nexata pijinia daxita apo epetsipaebivinexa itsamonaejavabelia pacuenia Dioso yapētaeyaexanatsi. Nexata pijinia

daxita apo ëpeyapëtaeyaexanaponaevinexa itsamonaejavabelia pacuenia Dioso pejumelivaisibaxutota jumaitsi. Nexata pijinia daxita Dioso pesaëta pinijicueene pexanaejava, apo ëpexanaponaevinexa. <sup>30</sup> Nexata pijinia daxita apo ëpejamatejemayaexanaevinexa piavitanevi. Nexata pijinia daxita apo ëpecuaicuaijaivinexa itsajivi ata mapanacuata apo pejumetaejumeta. Nexata pijinia daxita apo ëpejumetaevinexa bajarapajume, juya itsamonaejavabelia pejumevajunupaebaponaenexa pajamatabëcuenelivaisi xainapona caelivaisi canacujitsia, palivaisianë tsipaebapona pamonaë cuaicuaijai itsajivi ata mapanacuata apo pejumetaejumeta. <sup>31</sup> Bajarapacuenia itsamonae pejamatabëcuenecaëjëpaeya exanaejavatsi matatoxenetsia panevajënaeyabelia bitso pajitsipare Dioso papecajamatabëcuenecaëjëpaeya exanaenexa, paneyavenonaenexa daxita Dioso pejumecovënëtsivijavabelia. Daxita baja xua yabara pacatsipaebatsi, daxita bajaraxua matatoxenetsia panevajënaeyabelia bitso pajitsipare Dioso papecajamatabëcuenecaëjëpaeya exanaenexa itsamonae ata paneasivanexa.

## 13

### *Pacuenia jivi namataenetsia benaasiva yabara pelivaisi*

<sup>1</sup> Dioso nejamatabëcuenecaëjëpaeya exanaejitsipa tacuaicuaijainexa itsajivi ata mapanacuata apo pejumetaejumeta. Angelevi ata pijajumeta cuaicuaijanë tsipae. Nexata jivi netaejitsipa ayaijamatabëcuenenënë. Bajarapacuenia Dioso nejamatabëcuenecaëjëpaeyaexanae ata tsipae, itsiata itsamonae ata itsa apo asivanë tsipae, nexata saya bajaraxua netoamatamobi tsipae Dioso pitabarata. Nexata palivaisi ata tsipaebaponaejitsipajë jivi pejumetaejumeta, apo nejumecovënëtsi tsipae. Nexata pacuenia tambor, itsa jume, plato itsajivi penajumetsiaexanaejava namuxujematatsi, bajarapacuenia nenamuxujematsipa tatsipaebilivaisi. <sup>2</sup> Dioso nejamatabëcuenecaëjëpaeya exanaejitsipa xaniavaetsia tayapëtaenexa Dioso pejumelivaisi, asaëyata tatsipaebinexa itsamonaejavabelia. Yapëtaejitsipajënuaxua daxita Dioso muetsia penajamatabëxainaelivaisianë ata. Yapëtaejitsipajënuaxua daxita Dioso pijacuene ata. Bajarapacuenia xaniavaetsia yapëtae atanë tsipae, itsiata itsamonae ata itsa apo asivanë tsipae, nexata saya bajaraxua netoamatamobi tsipae Dioso pitabarata. Dioso bitso tajumecovënëtsinë tsipae. Nexata itsa jumaitsinë tsipae: “Dioso baja cajena mapatsutoxanetoje nevecuatixitsiana,” itsa janë tsipae, nexata Dioso nevecuatixitsipa. Bajarapacuenia exanae atanë tsipae, itsiata itsa apo asivanë tsipae itsamonae ata, nexata saya bajaraxua netoamatamobi tsipae Dioso pitabarata. <sup>3</sup> Rajutaponaejitsipajë bepejiobivijavabelia daxita taxainaejavaximi. Nacaevetsipajënuaxua tanetajuitsinexa, tanebeyaxuabinexa ata, Dioso pejumelivaisi yabara. Bajarapacuenia nacaevetsi atanë tsipae, itsiata itsa apo asivanë tsipae itsamonae ata, nexata saya bajaraxua netoamatamobi tsipae Dioso pitabarata.

<sup>4</sup> Majamatabëcueneitsije pajivi asiva itsamonae ata. Bajarapajivi bajayajebi itsacueniabi atatsi, ajamatabëcuenesaë bajarapamonaejavabelia. Pajivi asiva itsamonae ata, itaxutotsoniatane bajarapamonae. Pajivi asiva itsamonae ata, apo cuenecaëbi bajarapamonae. Pajivi asiva itsamonae ata, “Xanë ayaijamatabëcuenenënë bajarapamonae matatoxenetsia,” apo jai itsajivijavabelia. <sup>5</sup> Pajivi asiva itsamonae ata, bajarapajivi apo ataejitsibi itsajivi ata. Apo exanae itsacuene ata piurabinexa bajarapamonaejavabelia. Pajivi asiva itsamonae ata, daxita xua xanepana, ëponënexa apo natonajamatabëxainae. Pajivi asiva itsamonae ata, bepijia apo anaepanae bajarapamonaejavabelia. Pajivi asiva itsamonae ata, itsacueniabi atatsi, apo jamatabëtsitecae juya pecuenececanaviatsinexa bajarapamonaejavabelia. <sup>6</sup> Pajivi asiva itsamonae ata, bajarapamonae itsa tocopiapatatsi pibisiacuene, bajarapajivi apo sivajamatabëcuenenarëya bajarapamonae pibisiacuene petocopiapatsijavatsi yabara. Biji rajane pajivi asiva itsamonae ata, itsa bajarapamonae Dioso pejitsipaecuenia exanavanapa, bajarapajivi sivajamatabëcuenenarëya bajarapamonae Dioso pejitsipaecuenia pexanavanapaejava yabara. <sup>7</sup> Pajivi asiva itsamonae ata, bajarapajivi piasivaviyajuvënëvi itsacueniabi atatsi, najamatabëcuenesaëta pevajënaeyabelia piasivajava bajarapamonae. Pajivi asiva itsamonae ata, bajarapajivi apo

peyapëtaevi ata, sivajamatabëjumaitsi mapacueniaje: “Maraeta pamonaē ata pexaniajamatabëcuenēvije,” sivajamatabëjai. Pajivi asiva itsamonae ata, bajarapajivi pibisiacuene pexanaevi ata, sivajamatabëjumaitsi mapacueniaje: “Maraeta pamonaē itsamatacabi pexaniacuene pexanaevi tsaneje,” sivajamatabëjai. Pajivi asiva itsamonae ata, bajarapajivi tsiayapëbeje atatsi daxitacuene yabara, apo copatsi piasivajava itsamonae ata.

<sup>8</sup> Itsamonae Espiritu Santo pejamatabëcueneta jamatabëcuene caëjëpaeyaexanaponatsi petsipaebinea itsamonaejavabelia pacuenia Dioso yapëtaeyaexanatsi. Itsamonae pijinia jamatabëcuene caëjëpaeyaexanaponatsi pecuaicuaijainexa itsajivi ata mapanacuata apo pejumetaejumeta. Itsamonae pijinia jamatabëcuene caëjëpaeyaexanaponatsi pacuenia Dioso pejumelivaisibaxutota jumaitsi peyapëtaeyaexanaenexa itsamonaejavabelia. Daxita bajarapacuene, xua Dioso Espiritu Santo pejamatabëcueneta Dioso pejumecovënëtsivi jamatabëcuenecaëjëpaeyaexanatsi, itsamatacabi tocopiarucaenatsi. Itsiata baitsi jane jivi namataenetsia penasivacuene, apo copiarucaē tsane. <sup>9</sup> Dioso nacajamatabëcuene caëjëpaeyaexanaē ata vajayapëtaenexa, abaxë tsiquirijavayo yapëtaeponatsi. Palivaisi ata tsipaebatsi itsamonaejavabelia Dioso pejumelivaisi, apo ayaijava. <sup>10</sup> Pamatacabi icatsia Cristo patsianica, Espiritu Santo pejamatabëcueneta vajanacajamatabëcuene caëjëpaeyaexanaejamatabëcuenemi, nacatocopiarucaena. Nexata jane baja bajarapamatacabi vajatuxanenë xaniavaetsia nacayapëtaeyaexanaena daxitacuene Dioso pijacuene.

<sup>11</sup> Pamatacabi abaxë pejevaxinëyonë, cuaiicuaijanë pejevaxinëyonëcuenia. Najamatabëxainajënuā pejevaxinëyonëcuenia. Jumetanijinua abaxë pejevaxinëyonëcuenia. Itsa baja tanaveretsinë, pejevaxijamatabëcuenemi baja copatajë. <sup>12</sup> Bajara pijinia itsinë Dioso tajamatabëcueneyapëtaejava. Tsiquirijavayo abaxë Dioso jamatabëcueneyapëtaniji. Pacuenia pitatsëcënaetsaxuta itsa naitatanetsi, apo nacatonapebetsi, bajarajamatabëcueneitsinë Dioso tajamatabëcueneyapëtaejava. Abaxë saya tsiquirijavayo Dioso jamatabëcueneyapëtaniji. Itsiata baitsi jane itsamatacabi Dioso xaniavaetsia jamatabëcueneyapëtaenajë. Pacuenia aeconoxae Dioso xaniavaetsia nejamatabëcueneyapëtanë, bajara pijinia pacuenia xanë ata itsamatacabi xaniavaetsia Dioso jamatabëcueneyapëtaenajë. <sup>13</sup> Apo vereverecae daxitamatacabi vaxaitsi vajanajamatabëcuenecopatsijava Diosojavabelia. Vaxaitsi evetavanapatsinua Dioso vajanacapanepaenexa. Nexata vajanajamatabëcuenecopatsijava Diosojavabelia, vajeavetavanapaejava ata Dioso vajanacapanepaenexa, bajaraxuabeje matatoxenetsia bitso xanepana vajaasivajava itsamonae ata.

## 14

*Pacuenia Espiritu Santo pejamatabëcueneta itsamonae cuaiicuaijaiyaexanatsi itsajivi ata mapanacuata apo pejumetaejumeta yabara pelivaisi*

<sup>1</sup> Panajamatabëcueneverere panevajënaeyabelia panecasaëtsavanapaenexa itsamonae ata paneasivajava pacuenia panijacuata panaasivamë. Panatojitsiparenua xua Dioso pacatojitsipa papecajamatabëcuene caëjëpaeyaexanaenexa Espiritu Santo pejamatabëcueneta. Bitso jane panatojitsipare palivaisi Dioso payapëtaeyaexana panetsipaebinea itsamonaejavabelia. Nexata patsipaebianame palivaisi Dioso pacayapëtaeyaexana. <sup>2</sup> Itsamonae Espiritu Santo pejamatabëcueneta jamatabëcuene caëjëpaeyaexanaponatsi pecuaicuaijainexa itsajivi ata mapanacuata apo pejumetaejumeta. Nexata bajarapajivi itsajivi ata mapanacuata apo pejumetaejumeta livaisi itsa paeba, tsipaeba Diosojavabelia. Nexata Dioso jumetanetsi palivaisi paeba. Bajarapajivi apo tsipaebi jivijavabelia. Nexata bajarapajivi livaisi itsa paeba itsajivi ata mapanacuata apo pejumetaejumeta, jivi jumetae atatsi, itsiata itsajivi ata apo jumetaetsi palivaisi paeba. Tsiapaji itsajivi ata mapanacuata apo pejumetaejumeta paeba. Bajarapajivi Espiritu Santo pejamatabëcueneta livaisi paebiaexanatsi. Palivaisi Espiritu Santo bëpënëā xainaponapona, paebiaexanatsi. <sup>3</sup> Itsamonae

pijinia Espíritu Santo pejamatabécueneta jamatabécuenecaējēpaeyaexanatsi jivi pejumetaejumeta petsipaebinexa palivaisi Dioso yapētaeyaexanatsi. Nexata bajarapajivi tsipaeba jivi pejumetaejumeta pejumetaenexatsi paivaisi tsipaeba. Nexata jivi pejumetaejumeta bajarapalivaisi bajarapajivi itsa tsipaeba, itsamonae pevājēnaeuabelia sivaajamatabécuenesaē tsaponae Dioso pejumecovēnētavanapaejava. Bajarapajivi jamatabécuenebabatanua bitso penajamatabēxainaevi.<sup>4</sup> Pajivi Espíritu Santo pejamatabécueneta jamatabécuenecaējēpaeyaexanatsi livaisi pepaebinexa itsajivi ata mapanacuata apo pejumetaejumeta, bajarapajivi pijacuata jamatabécuenevitsabapona Diosojavabelia bajarapalivaisita. Itsiata baitsi jane pajivi jamatabécuenecaējēpaeyaexanatsi jivi pejumetaejumeta petsipaebinexa palivaisi Dioso yapētaeyaexanatsi, bajarapajivi petsipaebilivaisita Diosojavabelia jamatabécuenevitsabiaexanapona daxita Dioso pejumecovēnētsivi.

<sup>5</sup> Pacatojitsipatsi picani daxita paxamē Espíritu Santo pejamatabécueneta papecajamatabécuene caējēpaeyaexanaenexa panecuaicuajainexa itsajivi ata mapanacuata apo pejumetaejumeta. Itsiata rajane bajaraxua matatoxenetsia bitso pacatojitsipatsi papecajamatabécuene caējēpaeyaexanaenexa jivi pejumetaejumeta panetsipaebinexa palivaisi Dioso pacayapētaeyaexana. Pajivi tsipaebapona jivi pejumetaejumeta palivaisi Dioso yapētaeyaexanatsi, bajarapajivi bitso jamatabécueneavenona itsamonae Dioso pejumecovēnētsivi. Pajivi livaisi tsipaeba itsajivi ata mapanacuata apo pejumetaejumeta, bajarapajivi apo jumetaetsi palivaisi tsipaeba. Nexata bajarapajivi Dioso pejumecovēnētsivi apo jamatabécuenevitsabiaexanae Diosojavabelia. Itsiata bajarapajivi itsa caējēpatsinua jivi pejumetaejumeta penajumevajunupaebinexa pejumetaenexatsi palivaisi tsipaeba, nexata bajarapajivi Dioso pejumecovēnētsivi jamatabécuenevitsabiaexana Diosojavabelia.<sup>6</sup> Bajaraxuata xanē ata pijinia paxamējavata itsa patsipajē livaisi patacatsipaebinexa apo panejumetaejumeta, nexata apo panejumetaemē tsipae palivaisi pacatsipaebijitsipatsi. Nexata apo pacajamatabécuene vitsabiaexanae tsipaetsi Diosojavabelia. Itsiata baitsi jane itsa patsipajē panejumetaejumeta patacatsipaebinexa pacuenia Dioso bemajitsinaebota netsitajēta, nexata pacajamatabécuene vitsabiaexanaejitsipatsi Diosojavabelia. Itsa pacatsipaebijitsipatsinua pexaniaajailivaisi, nexata pacajamatabécuene vitsabiaexanaejitsipatsi Diosojavabelia. Palivaisi Dioso neyapētaeyaexana, palivaisi ata Dioso jumaitsi, pexaniaajailivaisi, itsa pacatsipaebijitsipatsi, nexata pacajamatabécuene vitsabiaexanaejitsipatsi Diosojavabelia.

<sup>7</sup> Pamona Espíritu Santo pejamatabécueneta jamatabécuenecaējēpaeyaexanatsi pecuaicuajainexa itsajivi ata mapanacuata apo pejumetaejumeta, bajarapamonae livaisi tsipaebi ata, itsajivi ata apo jumetaetsi palivaisi tsipaeba. Bajara pijinia itsi tsipae penaxēanaejavanē peracatsivi ata xaniavaetsia itsa apo racatsi tsipae. Flauta piobinē, bijiata itsa obijitsipa, arpa pijinia peracatsinē ata, bijiata itsa racatsipa, nexata itsajivi ata apo vajiyapētaetsibeje tsipae, pavaji picani naxēanaeyaexanabeje. Flauta piobijava, arpa ata peracatsijava, amatamobi tsipae.<sup>8</sup> Bajara pijinia itsi tsipae vajabitsaē trompeta piobijava ata. Vajabitsaē itsa ponaejitsia penavajabitsaētsinexa, trompeta baoba penajunatsinexa. Nexata trompeta piobijava vajabitsaē itsa jumetane, bamuxunaothopa penacatuatsinexa. Nexata trompeta piobinē xaniavaetsia itsa apo obi tsipae, nexata trompeta piobijava vajabitsaē jumetae ata tsipae, apo muxunaothopae tsipae penacatuatsinexa penavajabitsaētsinexa.<sup>9</sup> Bajara pijinia paitsimē tsipae paxamē ata. Itsajivi ata mapanacuata apo pejumetaejumeta itsa patsipaebijitsipame itsamonaejavabelia palivaisi Dioso pacayapētaeyaexana, nexata apo pacajumetae tsipae palivaisi patsipaebame. ¡Nexata saya pajumenaxuabijitsipame bajarapalivaisi panetsipaebijava!<sup>10</sup> Daxitaviriajumevi bitso navita mapanacuajavaje. Caeviriajumevi canacujitsia yapētaepona xaniavaetsia pijajume.<sup>11</sup> Itsiata baitsi jane tajanacuapijinē ata itsa nebarēcuaicuajai tsipae itsaviriavi pijajumeta, apo tajumetaejumeta, nexata besaicaya nacuapijinē taejitsipajē bajaraponē. Bajaraponē ata pijinia itsaviriavi pijumeta, apo pejumetaejumeta, itsa barēcuaicuajianē tsipae, besaicaya nacuapijinēnē netaejitsipa.<sup>12</sup> Itsa pajitsipame

Dioso papecajamatabëcuene caējēpaeyaexanaenexa daxitacuene, nexata panatovajēre Diosojavabelia papecajamatabëcuene caējēpaeyaexanaenexa. Itsiata baitsi jane bitso panatojitsipare Dioso papecajamatabëcuene caējēpaeyaexanaenexa itsamonaejavabelia panetsipaebinexa palivaisi Dioso pacayapētaeyaexana. Nexata Dioso pejumecovēnētsivi itsa pacajumetane palivaisi patsipaebame, ajamatabëcuenesaē tsane Dioso pejumecovēnētsijava.

<sup>13</sup> Nexata pajivi Espiritu Santo pejamatabëcueneta jamatabëcuenecaējēpaeyaexanatsi jivijavabelia livaisi petsipaebinexa itsajivi ata mapanacuata apo pejumetaejumeta, bajarapajivi bevajēta Diosojavabelia pejamatabëcuenecaējēpaeya exanaenexatsinua jivi pejumetaejumeta penajumevajunupaebinexa bajarapalivaisi. Nexata bajarapajivi Dioso itsa jamatabëcuenecaējēpaeyaexanatsi jivi pejumetaejumeta penajumevajunupaebinexa daxitajivijavabelia, itsa najumevajunupaebiana, yapētaeyaexanaena palivaisi tsipaeba. <sup>14</sup> Xanē ata apo tajumetaejumeta vajētsi atanē tajamatabëthētojavavetsina, itsiata apo yapētaenē xua vajētajē Diosojavabelia. <sup>15</sup> Mara pacuenia tavajēnaeyabelia xanē exanaenajēje. Vajētsianajē Diosojavabelia anijavirijumetabeje. Vajētsianajē apo tajumetaejumeta. Vajētsianajēnua tajajumeta ata daxitajivi tanejumetaenexa. Tanaxēanaejavata ata pijinia bajarapacuenia exanaenajē. Naxēanaenajē apo tajumetaejumeta. Naxēanaenajēnua tajajumeta ata daxitajivi tanejumetaenexa. <sup>16</sup> Pexaniacuene Dioso papecatoexanaejava yabara itsa pavajētsipame Diosojavabelia itsajivi ata mapanacuata apo pejumetaejumeta, nexata pajivi pacajumetaeyeca, apo pacajumetae tsipae xua yabara pavajētsipame Diosojavabelia. Nexata bajarapajivi toacuenebitsi tsipae papecayavenonaeyavajētsinexa Diosojavabelia. <sup>17</sup> Paxamē picani Dioso pexaniacuene papecatoexanaexae, Diosojavabelia pavajētsipame xaniavaetsia. Itsiata baitsi jane itsajivi ata mapanacuata apo pejumetaejumeta panevajētsixae Diosojavabelia, pajivi pacajumetaeyeca, ajamatabëcuenecovēbi tsipae. Tsipaji apo pacajumetae tsipae xua yabara pavajētsipame. Nexata apo pacamuxunajamatabëcuenevitsabi tsipae Diosojavabelia. <sup>18</sup> Dioso baja cajena xanē nejamatabëcuenecaējēpaeyaexana tacuaicuaijainexa itsajivi ata mapanacuata apo pejumetaejumeta. Bajarapacuenia cuaicuaijanē itsajivi ata mapanacuata apo pejumetaejumeta daxita paxamē matatoxenetsia. Bajarapacuenia Dioso tanejamatabëcuene caējēpaeyaexanaexae, jumaitsinē tsabiabi Diosojavabelia: “Xanepana rabaja. Pexaniacuene bitso netoexaname,” janē tsabiabi Diosojavabelia. <sup>19</sup> Itsiata baitsi jane Dioso pejumecovēnētsivi penacaetuatsijavata, ayailivaisi tsipaebi atanē tsipae itsajivi ata mapanacuata apo pejumetaejumeta, bajarapamonae apo nejumetae tsipae palivaisi tsipaebajē. Bajaraxuata Dioso pejumecovēnētsivi penacaetuatsijavata, apo jitsipañē tatsipaebinexa itsajivi ata mapanacuata apo pejumetaejumeta. Biji rajane jitsipajē bajarapamonae pejumetaejumeta tatsipaebinexa saya tsiquirilivaisiyo ata tanejumetaenexa, palivaisi tsipaebajē.

<sup>20</sup> Tajamonae, pacuenia pejevaxi bajamatabëcueneitsi, pētsa bajara pajamatabëcueneitsimē. Xaniavaetsia panajamatabëxainaname. Pacuenia penaveretsivi bajamatabëcueneitsi, bajara pajamatabëcueneitsimē tsane. Itsiata baitsi jane pibisiacuene paneexanaeyaniva, bepapejevaxijiviximē panataename. Tsipaji pejevaxijivixi abaxē bitso apo najamatabëxainae pibisiacuene pexanaenexa.

<sup>21</sup> Dioso pejumelivaisibaxutota tajēvelia jumaitsi mapacueniaje: “Itsamonaecuaicuaijaiyaexanaenajē itsajivi ata mapanacuata apo pejumetaejumeta. Nexata bajarapamonae tajumelivaisi netotsipaebiana tajajivijavabelia. Itsiata baitsi jane tajajivi apo jumecovēnētsi tsane tajumelivaisi,” jai tajēvelia Dioso pejumelivaisibaxutota judíovi Dioso apo pejumecovēnētsijavanexa yabara. <sup>22</sup> Nexata Dioso pejumecovēnētsivi Espiritu Santo pejamatabëcueneta jamatabëcuene caējēpaeyaexanaponaenatsi pecuaicuaijainexa itsajivi ata mapanacuata apo pejumetaejumeta. Nexata Dioso apo pejumecovēnētsivi itsa taena bajarapacuenie, canaējētsiana Diosojavabelia. Canaējētsiananua bajarapamonae penaneconitavanapaejava Diosojavabelia. Dioso pejumecovēnētsivi jamatabëcuene caējēpaeyaexanaenatsi petsipaebinexa itsamonaejavabelia palivaisi Dioso yapētaeyaexanatsi. Nexata itsamona

Dioso pejumecovënëtsivi xaniavaetsia pejumetaexae palivaisi tsipaebatsi, canaējëtsiana pepacuene Dioso pitaxutotsoniataejavatsi pecapanepaenexatsi pijaneconivecua. <sup>23</sup> Nexata pijinia itsamonae Dioso apo pejumecovënëtsivi napatsipa panenacaetuatsijavata. Nexata bajarajota paxamë livaisi patsipaebijitsipame itsajivi ata mapanacuata apo pejumetaejumeta. Nexata pamonaē penapatsivi apo papecajumetaexae palivaisi patsipaebame itsajivi ata mapanacuata apo pejumetaejumeta, nexata pacabarajamatabëjumai tsipae: “Mara pamonaēje saya pematājemabivitsije,” pacabarajamatabëjai tsipae. Tsipaji apo pacajumetae tsipae palivaisi patsipaebame. <sup>24</sup> Jivi pejumetaejumeta panetsipaebijavata palivaisi Dioso pacayapëtaeyaexana, Dioso apo pejumecovënëtsijivi napatsipa. Nexata bajarapajivi papecajumetaexae palivaisi patsipaebame, najamatabëxainaejitsipa. Nayapëtaejitsipānua bajarapajivi penaneconitsijava Diosojavabelia. Nexata pijaneconi bitso yanajamatabëxainaejitsipa Diosojavabelia. <sup>25</sup> Papecanamuxunaevetsijavata, bajarapajivi muetsia penajamatabëxainabiabijava najamatabëcueneyapëtaejitsipa. Nexata nayapëtaejitsipa penaneconitsijava Diosojavabelia. Nexata pematābacabëta nucaejitsipa. Vajëtsipa Diosojavabelia. Pevajëtsijavata jumai tsipae Diosojavabelia: “Diosomë, bitso baja cajena ayaijamatabëcuenenëmë,” jai tsipae Diosojavabelia. Nexata paxamëjavaberena ata bajarapajivi pacajumaitsi tsipae: “Pepacuene majotaje paxamë Dioso pacayajavaponapona,” pacajai tsipae.

*Pacuenia Dioso pejumecovënëtsivi muxujibatsi peyapëtaenexa pacuenia exanaejitsia culto pexanaejavata yabara pelivaisi*

<sup>26</sup> Tajamonae, itsa panacaetuame Dioso pejumelivaisi yabara, mapacuenia paexanaenameje. Itsamonae naxëanaena vaji. Itsamonae najamatabëcueneveretsiana jivi pejumetaejumeta livaisi petsipaebinexa daxitajivijavabelia. Itsamonae najamatabëcueneveretsiana palivaisi Dioso yapëtaeyaexanatsi juya petsipaebinexa itsamonaejavabelia. Itsamonae najamatabëcueneveretsiana livaisi petsipaebinexa itsajivi ata mapanacuata apo pejumetaejumeta. Itsamonae pijinia najamatabëcueneveretsiana jivi pejumetaejumeta juya pejumevajunupaebaponaenexa daxitajivijavabelia, palivaisi tsipaeba itsajivi ata mapanacuata apo pejumetaejumeta pecuaicuaijai. Bajarapacuenia paexanaename panenacaetuatsijavata daxita Dioso pejumecovënëtsivi pevajënaeyabelia pejamatabëcuenevitsabaponaenexa Dioso pejumecovënëtsijava. <sup>27</sup> Panenacaetuatsijavata, jivijavabelia itsamonae livaisi itsa tsipaebijitsia itsajivi ata mapanacuata apo pejumetaejumeta, nexata Dioso tocopatatsi petsipaebinexa anijajivibeje, acueyabi pajivibeje ata. Baitsi pejumevajunupaebinexatsi palivaisi tsipaeba itsajivi ata mapanacuata apo pejumetaejumeta. Itsiata baitsi jane caecuenia acueyabi pajivibeje apo benajuatsipaebi. Nexata pajivi jivijavabelia livaisi tsipaebijitsia itsajivi ata mapanacuata apo pejumetaejumeta, bajarapajivi copiata betsipaeba. Nexata pijinia pajivi jumevajunupaebaponaejitsia jivi pejumetaejumeta, bajarapajivi cotocaevi bejumevajunupaebapona jivijavabelia. Bajarapacuenia itsamonae jivijavabelia livaisi itsa tsipaeba itsajivi ata mapanacuata apo pejumetaejumeta, nexata juya itsajivi jivi pejumetaejumeta bejumevajunupaebapona daxitajivijavabelia peyapëtaenexa palivaisi tsipaeba itsajivi ata mapanacuata apo pejumetaejumeta. <sup>28</sup> Nexata itsa ajibi jivi pejumetaejumeta pejumevajunupaebijivinexatsi daxitajivi peyapëtaenexa palivaisi tsipaeba itsajivi ata mapanacuata apo pejumetaejumeta, nexata panenacaetuatsijavata livaisi apo betsipaebi itsajivi ata mapanacuata apo pejumetaejumeta. Bajarapamonae moya beena. Bëpënëa saya pejamatabëëthëtota becuaiçuaijai tsenae itsajivi ata mapanacuata apo pejumetaejumeta. Diosojavabelia ata pijinia bajarapacuenia bëpënëa pejamatabëëthëtota bevajëtena. <sup>29</sup> Bajara pijinia pacuenia Dioso tocopata itsamonae ata jivijavabelia petsipaebinexa palivaisi Dioso yapëtaeyaexanatsi. Bajarapamonae ata Dioso tocopata jivijavabelia petsipaebinexa anijajivibeje, acueyabi pajivibeje ata. Nexata petsipaebijavata, itsamonae xaniavaetsia benamuxunaevetena pejumeyapëtaenexa itsa xaniajai Dioso pejamatabëcueneta bajarapamonae tsipaebatsi bajarapalivaisi. <sup>30</sup> Nexata

bajarapamonae livaisi petsipaebaponaejavata, bajarajota penamuxunaevetecaenë Dioso pejamatabëcueneta livaisi itsa yapëtaeyaexanatsi, nexata ponë jivijavabelia livaisi tsi-paebapona, benajumecopata baja. Nexata ponë penamuxunaevetecaejavata, Dioso livaisi yapëtaeyaexanatsi, bajaraponë juya daxitajivijavabelia betsipaeba palivaisi Dioso yapëtaeyaexanatsi penamuxunaevetecaejavata.<sup>31</sup> Bajarapacuenia daxita paxamë Dioso pejumelivaisi papecayapëtaeyaexanaevi Dioso pacatocopata jivijavabelia livaisi panetsipaebinexa pacaejivimë tsaponae. Bajarapacuenia Dioso pacatocopata daxitajivi peyapëtaenexa Dioso papecayapëtaeyaexanaelivaisi, pesivaajamatabëcuenesaë tsaponaeanaxana Dioso pejumecovënëtsijava panetsipaebilivaisita.<sup>32</sup> Pamona tsipaeba daxitajivijavabelia palivaisi Dioso yapëtaeyaexanatsi, bajarapamonae yapëtane paepatota najumecopatsijitsia. Tsipaji Espiritu Santo pejamatabëëthëtota itorobatsi paepatota najumecopatsijitsia. Nexata itsa najumecopata bajaraponë, juya itsanë petsipaebinexa daxitajivijavabelia.<sup>33</sup> Dioso apo tocopatsi caecuenia anijajivibeje jivijavabelia livaisi penajuatsipaebinexa. Tsipaji caecuenia anijajivibeje livaisi itsa najuatsipaebijitsipabeje, xaniavaetsia apo jumetaetsi tsipae penajuanacaetuatsivi. Bajaraxuata Dioso tocopata jivijavabelia livaisi petsipaebinexa caejivi tsaponae.

Pacatsipaebijitsiatsi pacuenia exanabiaba daxita Dioso pejumecovënëtsivi penacaetuatsijavata.<sup>34</sup> Petiriavi moya beena Dioso pejumecovënëtsivi penacaetuatsijavata. Tsipaji petiriavi Dioso apo tocopatsi Dioso pejumecovënëtsivi penacaetuatsijavata pecuaicuaijaitsecaenexa. Petiriavi pamonajivi bejumecovënëtsiajinavanapa pacuenia Dioso pejumelivaisibaxutota itorobatsi.<sup>35</sup> Petiriva itsa jamatabëyanijoba itsalivaisiyo, nexata bota beyanijoba pamonajavabelia. Piauracuene exanaejitsipa Dioso pejumecovënëtsivi penacaetuatsijavata petiriva itsa cuaicuaijai tsecae tsipae.

<sup>36</sup> Pëtsa pacopatame Dioso pejumecovënëtsivi penacaetuatsijavata petiriva pecuaicuaijaitsecaenexa. Tsipaji itsatomanëjaya Dioso pejumecovënëtsivi bajarapacuenia apo exanae. Pëtsa bepaayaijamatabëcuenemimë panataneme bajarapacuenia paneexanavanapaenexa.<sup>37</sup> Itsamonae paxamëyajuvënëvi natane bepetsipaebarsivinexa daxitajivijavabelia palivaisi Dioso yapëtaeyaexanatsi. Itsamonae natane Espiritu Santo pejamatabëcueneta bepejamatabëcuene caëjëpaeyaexanaevitsi pacuenia Dioso jitsipa. Nexata bajarapamonae itsa xaniajai Espiritu Santo yajavajinavanapa, beyapëtane picani patacatoyaquinaelivaisi, mapalivaisije vajatuxanenë pitorobilivaisi jivi pejumecovënëtsinexa.<sup>38</sup> Itsiata baitsi jane pajivi apo namuxunaevetsi pejumecovënëtsinexa mapalivaisije, pëtsa pajumecovënëtame bajarapajivi penavajunupaebijava Dioso pejamatabëcuenecaëjëpaeya exanaejavatsi.

<sup>39</sup> Bajaraxuata asaëyata panatojitsipare Dioso papecajamatabëcuene caëjëpaeyaexanaenexa panetsipaebinexa daxitajivijavabelia palivaisi Dioso pacayapëtaeyaexana. Itsiata baitsi jane pëtsa pajumeitavetame itsamonae itsa cuaicuaijai itsajivi ata mapanacuatata apo pejumetaejumeta.<sup>40</sup> Nexata panenacaetuatsijavata, itsa patsipaebame daxitajivijavabelia palivaisi Dioso pacayapëtaeyaexana, xaniavaetsia pacanenëmë tsaponae patsipaebabianame.

## 15

### *Jesucristo petëpaecujinae Dioso icatsia piasaëyaexanaejavatsi yabara pelivaisi*

<sup>1</sup> Tajamonae, pacatojitsipatsi panenajamatabënapitsinexa palivaisi baja imata pacatsipaebatsi. Bajarapalivaisi, pexanialivaisi, papecacapanepalivaisinexa panijaneconivecua. Pajumecovënëtame baja bajarapalivaisi. Nexata panevajënaeyabelia asaëya pajumecovënëtavanapaenename bajarapalivaisi.<sup>2</sup> Panevajënaeyabelia itsa pajumecovënëtavanapaenename bajarapalivaisi, nexata pibisiacuene paneexanaeconivecua Dioso pacacapanepaena. Matababi apo pevereverecaejava paxainaenename. Itsiata baitsi jane copiaya panejamatabëëthëttojavavetsina itsa apo pajumecovënëtsimë tsane bajarapalivaisi, nexata Dioso apo pacacapanepae tsane.

<sup>3</sup> Copiaya baja cajena pacatsipaebatsi palivaisi vajatuxanenë copiaya netsipaeba. Pacatsipaebatsi baja cajena Cristo vajanacasivatëpaejava pibisiacuene vajaexanaeconi

yabara. Cristo baja cajena nacasivatëpa pacuenia Dioso pejumelivaisibaxutota tajëvelia jumaiti. <sup>4</sup> Nexata Cristo petëpaenë pemëthëtsicujinaetsi, acueyabi matabacabita, icatsia Dioso asaëyaexanatsi. Bajarapacuenia Cristo Dioso icatsia asaëyaexanatsi pacuenia baja cajena tajëvelia Dioso pejumelivaisibaxutota jumaiti Cristo yabara. <sup>5</sup> Nexata Cristo Dioso piasaëyaexanaecujinaetsi, copiaya Pedrojavabelia tsitanaitajëta. Bajaraxuacujinae Jesús pijajivi, doce ponëbeje apóstolevijavabelia, tsitanaitajëta. <sup>6</sup> Bajaraxuacujinae Jesús pijajivi quinientos pematatsënëa pajivibejevavabelia penacaetuatsijavata, tsitanaitajëta. Bajarapamonaeyajuvënëvimi Jesús petaevitsi itsamonae baja tëpae ata, itsiata ayaibit-saëtoxaneto abaxë asaë tsavanapae. <sup>7</sup> Bajaraxuacujinae icatsia Santiagojavabelia Jesús tsitanaitajëta. Bajaraxuacujinae icatsia daxita apóstolevijavabelia Jesús tsitanaitajëta.

<sup>8</sup> Xanë daxita apóstolevivecua bexëjavaberena apóstolenënë nexana. Nexata pacuenia pexi pexinaejivi cotocaevi pexinaenacueto itsi, bajarapacuenia nataniji bajarapamonaevivecua. Itsiata baitsi jane daxita Jesús pijajivijavabelia petsitanaitajëtsicujinae, xanëjavaberena ata Jesús netsitanaitajëta tataenexa. <sup>9</sup> Daxita apóstolevivecua xanë beveliajamatabëcuenenënë nataniji. Tsipaji abaxë xanë Jesús itsa apo jumecovënëtsinë, Jesús pijajivi bejiobiaexanabiabajë. Bajaraxuata: “Apóstolenë,” tanejainexa ata, auranë tsabiabi. <sup>10</sup> Itsiata baitsi jane Dioso taneitaxutotsoniataexae, nitapeta baja apóstolenëxanë. Xanëjavaberena Dioso taneitaxutotsoniataejava, apo nacueratsi. Biji rajane xanë daxita itsaapóstolevi matatoxenetsia bitso Dioso tonacuenebaponaponajë. Itsiata xanë tajamatabëcuenesaëta apo tonacuenebaponaponanë. Dioso raja pesaëta tonacuenebaponaponajë. Nexata Dioso pesaëta nejamatabëcueneyavenonapona asaëya tatonacuenebaponaponanë. <sup>11</sup> Xanë meta bitso Dioso tonacuenebaponaponajë itsamonae apóstolevi matatoxenetsia. Itsa jume, nexata meta bajarapamona bitso Dioso tonacuenebavanapa xanë matatoxenetsia. Itsiata baitsi jane bajarapacuenie yabara apo canaëjëtsinë. Bitso rajane pacatojitsipatsi paneyapëtaenexa palivaisi baja pacatsipaebatsi, pexanialivaisi, Jesucristo pelivaisi. Nexata baja bajarapalivaisi pajumecovënëtavanapame.

*Pacuenia itsamatacabi Dioso icatsia asaëyaexanaejitsia petëpaevimi yabara pelivaisi*

<sup>12</sup> Pacatsipaebatsi baja cajena Cristo petëpaecujinae Dioso icatsia piasaëyaexanaejavatsi. Itsiata baitsi jane itsamonae paxamëyajuvënëvi jamatabëcuenenavëxaniabiaya jumai tsabiabi: “Jivi rabaja petëpaecujinae ajibi icatsia piasaëjavanexa,” jai tsabiabi. Nexata bajarapacuenia apo bejumaiti bajarapamona. <sup>13</sup> Tsipaji peneta itsa pepacuene ajibi tsipae petëpaevi icatsia piasaëjavanexa, nexata baja Cristo ata icatsia Dioso apo asaëyaexanaetsi tsipae petëpaecujinae. <sup>14</sup> Itsa baja Cristo petëpaecujinae icatsia Dioso apo asaëyaexanaetsi tsipae, nexata palivaisianë pacatsipaebavanapatsi, amatamobi tsipae. Paxamë ata panenajamatabëcuenecopatsijava Cristojavabelia Dioso papecacapanepaenexa panijaneconivecua, amatamobi tsipae. <sup>15</sup> Pematatsënëa xua Dioso exana patavajunupaebijava, panajumetsënëtsipajë. Tsipaji pajumaitsinë tsabiabi mapacueniaje: “Cristo raja petëpaecujinae Dioso baja icatsia asaëyaexanatsi,” pajanë tsabiabi. Itsa pepacuene ajibi tsipae petëpaevi icatsia piasaëjavanexa, nexata baja Cristo Dioso icatsia apo asaëyaexanaetsi tsipae. <sup>16</sup> Itsa peneta pepacuene ajibi tsipae petëpaevi icatsia piasaëjavanexa, nexata Cristo ata petëpaecujinae icatsia Dioso baja apo asaëyaexanaetsi tsipae. <sup>17</sup> Nexata Cristo petëpaecujinae Dioso baja icatsia itsa apo asaëyaexanaetsi tsipae, nexata paxamë ata panenajamatabëcuenecopatsijava Cristojavabelia Dioso papecacapanepaenexa panijaneconivecua, panacueratsipame baja. Tsiteca abaxë panijaneconi paxinaejitsipame. <sup>18</sup> Bajarapacuenia itsa itsipae, nexata baja pamonaemi tëpa Cristo pepua pejumecovënëtsivi, bajarapamonaemi ata naxuabijitsipa baja. <sup>19</sup> Vaxaitsi ata pijinia Cristojavabelia vajanajamatabëcuene copatsicujinae, xua Dioso nacayavenonabiaba, saya nacayavenonaejitsipa vajajinavanapaeepatojebi mapanacuataje. Vajatëpaecujinae, Cristo pejamatabëcueneta Dioso itsa apo nacacapanepaejitsia tsipae vajaneconivecua, vajajamatabëcuenenavëxaniabivi baja tsipae. Tsipaji vaxaitsi

jamatabējumaitsi tsabiabi mapacueniaje: “Cristo pejamatabēcueneta Dioso nacacapanepaena,” jamatabējaitsi tsabiabi. Nexata ayaicuenia Dioso vajatonacuenebabiabijava ata, nacueratsipatsi. Matababi apo peveverecaevajava Dioso vajanacarajutsinexa vjaevetavanapaejava ata, nacueratsipatsi. Caranata meta jitsipaejitsipatsi Dioso apo pejumecovēnētsivi vajanacaitaxutobejiobiataenexa.

<sup>20</sup> Itsiata baitsi jane mapalivaisije xaniajai cajena. Tsipaji baja Cristo petēpaecujinae, capanepaeya baja icatsia Dioso asaēyaexanatsi. Nexata pacuenia Cristo petēpaecujinae mēthēvecua pitsapa, bajara pijinia pacuenia itsamatacabi mēthēvecua pitsapaena daxita pamonaemi tēpa Dioso pepua pejumecovēnētsivi. Nexata baja Cristo petēpaecujinae, mēthēvecua itsa pitsapa, daxita petēpaevivecua Cristo baja namataxainaeya pitsapa mēthēvecua. <sup>21</sup> Caenē Adānpijinē pejamatabēcueneta taxuxuaba jivi petēpaejava mapanacuataje pibisiacuene pexanaexae. Bajara pijinia pacuenia caenē Cristo pejamatabēcueneta vajanacasivatēpaexae cruzata, taxuxuaba petēpaevimi itsamatacabi mēthēvecua pepitsapaejavanexa. <sup>22</sup> Daxitajivi tēpaponā Adānpijinē petaxuxuabicuenia. Bajara pijinia pacuenia daxita pamonaē Cristo pijajivi, petēpaecujinae icatsia Dioso asaēyaexanaenatsi pacuenia Cristo Dioso asaēyaexanatsi. <sup>23</sup> Paepatota Dioso jitsipa petēpaevi piasaēyaexanaenexa, caejivi canacujitsia asaēyaexanaponaena. Cristo baja petēpaecujinae, Dioso itsa asaēyaexanatsi, daxita petēpaevivecua namataxainaeya baja asaēyaexanatsi. Bajaraxuacujinae icatsia pamatacabi Cristo patsianica, daxita pamonaē Cristo pijajivi, Dioso icatsia asaēyaexanaenatsi. <sup>24</sup> Bajaraxuacujinae jane baja daxitacuene pecopiarucaeyaexanaejavanexa, copiapatsiana. Bajarapamatacabi Cristo copiarucaeyaexanaena daxita xua Cristo pijavajabitsaē evetavanapa. Nexata bajaraxua Cristo pecopiarucaeyaexanaecujinae, xua paxa Dioso tocopatatsi Cristo pevetsinexa, bajaraxua tocanaviatsiana baja paxa Dioso javabelia. <sup>25</sup> Cristo evetaponaponaena daxitacuene. Matapania Dioso cueneamoneyabiana daxita Cristo pijavajabitsaē, Cristo copatsiana daxitacuene pevetsijava. <sup>26</sup> Daxita Cristo pijavajabitsaē verebiabiana. Bajaraxuacujinae cotocaevi copiarucaeyaexanaena jivi petēpaecuenemi. <sup>27</sup> Dioso pejumelivaisibaxutota tajēvelia jumaitsi mapacueniaje: “Dioso itsamatacabi pexēnato Cristo tocopatsiana daxitacueneviria petoevetsinexatsi,” jai Dioso pejumelivaisibaxutota. Itsiata baitsi jane Dioso pexēnatojavabelia apo jumaitsi: “Xanē ata nitorobianame,” apo jai Dioso. Dioso raja itorobiana pexēnato petoevetsinexatsi daxitacueneviria. <sup>28</sup> Nexata itsamatacabi Cristo daxitacueneviria itsa evetsiana, daxitacueneviria Cristo pitorobicuenia jumecovēnētabiabianatsi. Nexata jane baja bajarapamatacabi Cristo jumecovēnētsiana paxa Dioso pitorobicueniatsi. Bajarapacuenia Cristo paxa Dioso pejumecovēnētsixae tsane, nexata bajarapamatacabi Dioso daxitanacuanējava daxitacueneviria pitorobinē tsane.

<sup>29</sup> Itsamonae pepua penabautisabivi baja, pijamonaemi totēpatsi. Pijamonaemi ata baja pepuanajamatabēcuenecopabi Cristojavabelia, totēpatsi. Itsiata baitsi jane bajarapamonaemi tēpa nabautisabinejeva. Nexata pajivi pijamonaemi totēpatsi, bajarapajivi penabautisabijivi ata baja, pijamonaē pevēnamuto icatsia nabautisaba. Bajarapacuenia anijatobeje nabautisaba pevecuatēpaejivitsi bepenabautisabijivi petotaenexatsi Dioso. Petēpaevimi peneta icatsia Dioso itsa apo asaēyaexanaetsijitsia tsipae, penabautisabijivi baja pijamonaē pevēnamuto icatsia apo nabautisabi tsipae, nabautisabinejeva pevecuatēpaejivitsi bepenabautisabijivi petotaenexatsi Dioso.

<sup>30</sup> Petēpaevimi peneta icatsia Dioso itsa apo asaēyaexanaejitsiatsi tsipae, nexata Dioso pejumelivaisi apo patsipaebavanapaenē tsipae, daxitamatacabi panetsiyai tsabiabi ata. <sup>31</sup> Tajamonaē, daxitamatacabi baja cajena netsiyai tsabiabi. Itsamonae picani jamatabēnebexuababiaba. Bajaraxua paneyapētaenexa, pacatsipaebatsi. Tsipaji pacasivajamatabēcuenēbarēyatsi vajatuxanenē Jesucristo xaniavaetsia panejumecovēnētavanapaexae. <sup>32</sup> Majotaje Efeso tomarapijivi ata jamatabēnebexuaba picani. Bajarapamonaē benevēthējamatabēcuenēvi. Tsiquirijavayota vecuapanepajē. Jivi petēpaecujinae icatsia Dioso itsa apo asaēyaexanaejitsiatsi tsipae, nexata xanē ata nacueratsipajē. Nacueratsipajē, netsiyai ata, jivi tatsipaebaponaevajava Dioso pejumelivaisi. Va-

jatëpaecujinae icatsia Dioso itsa apo nacaasaëyaexanaejitsia tsipae, nexata xaniavaetsia jumecovënëtsipatsi pamonae jamatabëcuenenavëxaniabiaya nacatsipaeba mapacuenia pejumaitsilivaisije: “Ayaijavanë vajaxaejava xaeyabiabianatsi. Aitajibitsinua tsabiabi tsane vajabarëyatsabiabinexa. Tsipaji raja bepijia tëpaenatsi,” pejailivaisi vajanacatsipaebivi jumecovënëtsipatsi.

<sup>33</sup> Itsiata baitsi jane pëtsa panacopatame papecayamaxëitojorobinexa bajarapacuenia pejumaitsvi. Tsipaji raja itsamonae bajumaitsi: “Itsa yajavaponaponaejitsipame pibisiajamatabëcuenevi, cajamatabëcuenebijianaejitsipa. Nexata pexaniajamatabëcueneënë atamë, bajarapamonae cuenejëpaeya ponaponaejitsipame,” bajai itsamonae. <sup>34</sup> Panajamatabëxainare xaniavaetsia. Pëtsa baja pematatsënëa pibisiacuene paexaname. Itsamonae paxamëyajuvënëvi Dioso apo yapëtae. Mapacuenia pacajumaitsijsije paneauranexa.

*Pacuenia petëpaevimi Dioso icatsia itsa asaëyaexanatsi, perabëitohianaejitsiatsi yabara pelivaisi*

<sup>35</sup> Itsamonae raeta yanijobiana petëpaevimi icatsia Dioso piasaëyaexanaejavanexatsi yabara. Jumaitsi meta tsane bajarapamonae: “¿Detsa meta pacuenia petëpaevimi icatsia asaëyaexanaenatsi? ¿Detsa meta nexata pitsiperabëto icatsia xainaena bajarapamonae?” jai meta tsane bajarapamonae. <sup>36</sup> Bajarapacuenia itsa yanijobiana, apo canaëjëtsinejeva jamatabëcuenenavëxaniabiaya bajarapacuenia yanijobiana. Vajaubijava, pexuto itsa ubatsi, pejuvicujinae bajarapaxutomi batsabana pepitsapaenexa pejananae. <sup>37</sup> Arrozxuto, itsaviriauxutoxi ata, pexu saya ubatsi. Apo mëthëcaetsi pepabotonë. <sup>38</sup> Peubixu, caeviriauxu canacujitsia, peubicujinae capitsapapona pijaviriabotonë, pijaviriabaxu yajava. Dioso baja cajena pecopatsicuenia caeviriaboto canacujitsia naexanapona. <sup>39</sup> Mapanacuata Dioso copatsi ata daxitacueneviria pejinavanapaenexa, itsiata apo naperabëjëpae. Jivi saicaya itsaviriaperabëto xaina. Unupijidujuai pijinia saicaya itsaviriaperabëto xaina. Pepunaevi pijinia saicaya itsaviriaperabëto xaina. Menepijidujuai pijinia saicaya itsaviriaperabëto xaina. <sup>40</sup> Bajara pijinia itsi athëbëtatsia pejinavanapaevi ata. Bajarapamonae saicaya itsaviriaperabëto xaina mapanacuapijivivecuaje. Athëbëtatsia pejinavanapaevi nacavecuapexaniaperabëtovi. Mapanacuata pejinavanapaevi ata, itsamonae nacatsitapexaniaperabëtovi picani. Itsiata pijinia saicayacuenia. <sup>41</sup> Matabacabipijiuameto itayota. Meravipijiuameto ata itayota. Itsiata saicayacuenia navecuaitayotabeje. Tulupu ata pijinia itayota. Itsiata caetuluputo canacujitsia saicayacuenia navecuaitayotapona. <sup>42</sup> Bajara pijinia nacavecuaitane petëpaevimi. Saicayaperabëto nacavecuaxainaena Dioso icatsia itsa asaëyaexanaenatsi. Petëpaejivi irabelia mëthëtatsi. Nexata baja tsabana. Bajaraxuacujinae Dioso icatsia itsa asaëyaexanaenatsi, apo petsabanaeperabëtonexa jane baja xainaena. <sup>43</sup> Petëpaejivi mëthëtatsi vajaataejitsibiperabëto yajava. Bajaraxuacujinae Dioso icatsia itsa asaëyaexanaenatsi, pexaniapenivenivenaeperabëto jane baja xainaena. Petëpaejivi mëthëtatsi pecueranaeperabëtomi yajava. Bajaraxuacujinae Dioso icatsia itsa asaëyaexanaenatsi, daxita matabacabijavabelianexa jane baja pesaë pexainaeperabëto xainaena. <sup>44</sup> Petëpaejivi mëthëtatsi mapanacuapijiperabëto yajava. Bajaraxuacujinae Dioso icatsia itsa asaëyaexanaenatsi, athëbënacuapijiperabëto xainaena. Itsaviriaperabëto abaxë aeconoxae xainatsi mapanacuata vajajinavanapaenexa. Bajara icatsia pacuenia itsamat-acabi itsaviriaperabëto xainaenatsi athëbënacuatatsia vajajinavanapaenexa.

<sup>45</sup> Dioso pejumelivaisibaxutota jumaitsi mapacueniaje: “Adánpijinë copiaya Dioso exanatsi mapanacuataje. Bajaraponë Dioso exanatsi pecueranaeperabëto yajava peponaponaenexa mapanacuataje,” jai Dioso pejumelivaisibaxutota. Itsiata baitsi jane Adánpijinë matatoxenetsia Cristo bitso ayaijamatabëcueneënë. Nexata Cristo petëpaecujinae icatsia Dioso itsa asaëyaexanatsi, caëjëpatsi vajanacajamatabë cueneasaëyaexanaenexa Diosojavabelia. Caëjëpatsinua vajanacarajutsinexa matabacabi apo peverevereaejava.

<sup>46</sup> Pacuenia athëbënacuapijivi perabëitsi, abaxë copiaya apo perabëitsi. Biji rajane

pacuenia mapanacuapijivi perabëitsije, bajaraperabëitsitsi. Itsiata baitsi jane vajatëpae-cujinae Dioso icatsia itsa nacaasaëyaexanaena, pacuenia athëbënacuapijivi perabëitsi, bajara vaxaitsi ata perabëitsi tsanetsi. <sup>47</sup> Adánpijinë copiaya Dioso exanatsi mapanacu-ataje. Atsabenota exanatsi. Bajaraxuacujinae bexëajavabelia athëbëvetsica Cristo patsica, ponë vajatuxanenë. Bajaraponë saicaya athëbëvetsica pepatsinë. <sup>48</sup> Daxitatsi vaxaitsi, mapanacuapijivitsije, perabëjëpatsi Adánpijinë, atsabenota pexanaenëtsi. Itsiata baitsi jane itsamatacabi daxitatsi, Cristo vajajumecovënëtsivi, perabëjëpaenatsi Cristo. Nexata pacuenia athëbënacuapijivi perabëitsi, bajaraperabëitsi tsanetsi Cristo vajajumecovënëtsivi. <sup>49</sup> Aeconoxae abaxë perabëjëpatsi Adánpijinë, ponë atsabenota pexanaenëtsi. Bajara icatsia pacuenia itsamatacabi Cristo perabëjëpaenatsi, ponë athëbëvetsica pepatsinë.

<sup>50</sup> Tajamonae, jitsipajë patacatsipaebinxaxa mapacueneye. Acuenebi caejivi ata mapanacuapijivije mapanacuapijiperabëto yajava pejonenexa Dioso pijanacuayabetsia. Tshipaji vajaperabëto saya peverevereaejavanexa. Bajaraxuata acuenebi vajayajava-jinavanapaenexa bajarapaperabëto daxita matacabijavabelianexa. <sup>51</sup> Nexata panamuxunaevere mapalivaisije, Dioso bajayata muetsia pexainabuatsilivaisimi, palivaisi aeconoxae Dioso nacayapëtaëyaexanapona. Daxitatsi raja vaxaitsi Cristo icatsia pepat-simatacabinexatsica pevajënaëya, apo tëpaetsi tsane. Itsiata baitsi jane apo tëpae atatsi tsane, pamatacabi Cristo patsianica, daxitatsi nacaperabëithianaena Dioso. <sup>52</sup> Itsa najumetsiana cotocaevi piobijava trompeta, bepijiayo tsatabi tsane, paepatoy-ovajëto banaitatsaquetajarabatsi, bajarapaepatoyovajëto Dioso nacaperabëithianajonena. <sup>53</sup> Vajaperabëto raja peverevereaejavanexa. Bajaraxuata xanepana vajanacaperabëithianaenexa, apo peverevereaeperabëto vajaxainaenexa. <sup>54</sup> Nexata paepatota bajarapacuenia nacaperabëithianajonena, copiajopaena jane baja pacuenia Dioso pejumelivaisibaxutota tajëvelia jumaitsi. Dioso baja cajena pejumelivaisibaxutota tajëvelia jumaitsi mapacueniaje: “Jivi petëpaecuenemi itsamatacabi copiarucaena. Pinijicuenia Dioso copiarucaëyaexanaena jivi petëpaecuenemi. <sup>55</sup> Jivi petëpaëyaexanaecuenemi ajibi tsane pesaë vajanacaavitaniaexanaëyaniva. Ajibi tsane vajanacatëpaëyaexanaecuenemi,” jai tajëvelia Dioso pejumelivaisibaxutota jivi petëpaëyaexanaecuenemi Dioso pecopiarucaëyaexanaëjavanexa yabara. <sup>56</sup> Pibisiacuene vajaexanaeneconi yabara tëpaenatsi. Palivaisi bajayata Dioso Moiséspijinëta najumecopata, bajarapalivaisi pejamatabëcueneta yapëtanetsi vajatëpae-cujinae Diosovecua picani vajanaxuabijavanexa pibisiacuene itsa exanatsi. <sup>57</sup> Itsiata baitsi jane baja vajatëpae-cujinae Diosovecua apo naxuabitsi tsane. Tshipaji baja vajatuxanenë Jesucristo nacasivatëpa cruzata vajanacapanepaenexa vajanecunivecua. Bajaraxuata vaxaitsi Diosojavabelia jumaitsitsi tsabiabi mapacueniaje: “Pexaniacuene rabaja panetoexaname,” jaitsi tsabiabi.

<sup>58</sup> Tajamonae, bitso patacaasivavi. Payapëtaneme rabaja mapacueneye. Dioso panetonacuenebijava, apo panacueratsimë tsane. Bajaraxuata panevajënaeyabelia asaëya patonacuenebavanapare Dioso. Pëtsa pacopabame Dioso panejumecovënëtsi-java. Panevajënaeyabelia asaëya Dioso patonacuenebaponare.

## 16

*Pacuenia Pablo itoroba Corinto tomarapijivi ofrenda pexanaenexa Jerusalén tomarata Dioso pejumecovënëtavanapaevi petoitorobinexa yabara pelivaisi*

<sup>1</sup> Pacatsipaebijitsiatsi pacuenia pacaetuatsijitsiamë ofrenda panetoitorobinexa Jerusalén tomarata Dioso pejumecovënëtavanapaëvijavabelia bajarapacuenia paneyavenonaenexa. Pacuenia Galacia nacuata Dioso pejumecovënëtsivi, caebitsaëto canacujitsia, itorobajë ofrenda pecaetuataponaenexa, bajara pijinia pacuenia paxamë ata pacaetuataponaenexa ofrenda. <sup>2</sup> Pacaëjivimë canacujitsia, caesemana canacujitsia panenacanabipalatayajuvënëjjava, ofrendanexa saicaya patsataponanexa caedomingo canacujitsia. Pajivi tsiquirijavayo nacanaba, tsiquirijavayo pijinia saicaya tsatsiana. Pajivi ayaijava nacanaba, ayaijavayo pijinia saicaya tsatsiana. Bajarapacuenia

paxaniavaetaponaename palata. Nexata pamatacabi paxamëjavabelia patsianajë, palata ofrendanexa apo pacaetuataponaemë tsane. <sup>3</sup> Nexata pamatacabi paxamëjavabelia patsianajë, paitapetsianame bajarapapalata pecaponaevinexa Jerusalén tomarapijivijavabelia. Pamonae palata pecaponaevinexa, tsicobeyaquinaenajë cuyalato. Bajarapacuyalato bajarapamonae peyjavacaponaenexa, panecaetuatsiofrenda itsa tocaponaena Jerusalén tomarata Dioso pejumecovënëtsivijavabelia. Nexata bajarapapalata pecaponaevi, Jerusalén tomarapijivi yapëtaenatsi xaniavaetsia Dioso pejumecovënëtsivicuene, peyjavacaponaexae tsane tatsicobeyaquinaebaxuto. <sup>4</sup> Xanë ata itsa jitsipaenajë taponaeenexa, ponaenajë Jerusalén tomarabelia. Nexata meta bajarapamonae naponaeena tapëta.

*Pacuenia Pablo tajëvelia navajunupaeba pacuenia exanaejitsia yabara pelivaisi*

<sup>5</sup> Itsa ponaenajë paxamëjavabelia, tapatsivajënaeya paxamëjavabelia, copiaya pataponaenajë Macedonia nacujava. Bajaraxuacujinae jane baja patsianajë paxamëjavabelia, Corinto tomarata. <sup>6</sup> Ponaponaenajë meta paxamëjavata bajayajebi. Daxita emarapaejebi ata meta naponaponaenajë paxamëjavata. Nexata bajaraxuacujinae paneyavenonaename tajanamutonexa, itsabelia jitsipajë taponaeenexa icatsia. <sup>7</sup> Caepatoyo saya tanaponaponaenajë paxamëjavata, apo jitsipaenë. Biji rajane jitsipajë bajayajebi taponaponaenexa paxamëjavata pacuenia vajatuxanenë netojitsipa. <sup>8</sup> Itsiata baitsi jane abaxë aeconoxae ponaponaenajë majotaje Efeso tomarata. Pentecostësvënë fiestacujinae meta, matapania vecuaponaenajë Efesotomara. <sup>9</sup> Majotaje aeconoxae baja bitso xanepana tatsipaebinxexa Dioso pejumelivaisi. Tsipaji mapatomarapijivije bitso baja jitsipapona pejumetaenexa Dioso pejumelivaisi. Itsiata baitsi jane itsamonae ayaibitsaëto apo jitsipae. Nexata tatsipaebilivaisi pejumecovënëtsivi, jamatabëcopabiaexanaponatsi.

<sup>10</sup> Timoteo itsa patsiana paxamëjavabelia, pacopiapitsianame xaniavaetsia jamatabëcuenebarëyaya peponaponaenexa paxamëjavata. Bajarapacuenia xaniavaetsia pacopiapitsianame. Tsipaji pacuenia xanë vajatuxanenë pejamatabëcueneta tonacuenebaponaponajë, bajara pijinia pacuenia bajaraponë ata vajatuxanenë pejamatabëcueneta tonacuenebaponapona. <sup>11</sup> Bajaraxuata pëtsa itsajivi ata pacopatame pequenetsiataenexatsi. Biji rajane payavenonaename pijanamutonexa jamatabëcuenexanepanaeya pepatsinexa xanëjavaberena. Xanë, itsamonae yajava, vajënaeevetaponaenajë Timoteo pepatsinexarena xanëjavaberena.

<sup>12</sup> Vajabananë Apolos pelivaisi pacatsipaebijitsiatsi. Bajaraponë picani itorobajë itsamonae Dioso pejumecovënëtsivi pepëta penaponaenexa paxamëjavabelia papecataenexa. Itsiata baitsi jane aeconoxae abaxë apo jamatabëponae. Ponaena meta itsiata itsajota cuenecaëjëpatsi.

*Pacuenia Pablo jamatabënajina Corinto tomarapijivi yabara pelivaisi*

<sup>13</sup> Dovathi pejamatabëcueneyaniva, jamatabëcuenenaëcotsiaya pajinavanapare. Pajamatabëcuenesaëmëre tsavanapae Jesucristojavabelia panenajamatabëcuenecopatsijava. Pëtsa jamatabëcueneaitajepaebiaya pajinavanapame. Pajamatabëcueneaitatsacamëre tsavanapae pebicuenia. Itsamonae patsitaajamatabëcuenesaëmëre tsavanapae. <sup>14</sup> Daxita xua paexanavanapame, itsamonae ata asivaya paexanavanapare.

<sup>15</sup> Tajamonae, payapëtaneme rabaja mapacuenije. Estëfnas pijabopijivi barëjumecovënëta Jesús pelivaisi. Bajarapamonae daxita pijanacuapijivivecua copiaya jumecovënëta Jesús pelivaisi Acaya nacuata. Nexata bajarapamonae jamatabëcueneenabiabatsi ëDioso pijacuene. Bajaraxuata bajarapamonae asaëyata bitso yavenonabiaba itsamonae Dioso pejumecovënëtsivi. <sup>16</sup> Pacatojitsipatsi xaniavaetsia panejumecovënëtsinexa xua pacaitoroba bajarapitsivi. Bajarapitsivi peyajavanacuenebivi ata, xua pacaitoroba,

pajumecovënëtsianame. <sup>17</sup> Paxamëyajuvënëvi parena xanëjavaberena mapamatabëxëyoje. Estéfanas, Fortunato, Acaico, bajarapamatabëxëyo parena. Bajaraxuata sivajamatabëcuenebarëyanë. Bitso picani pacaitaxanabiabatsi. Itsiata baitsi jane bajarapamonae tanetopatsixaerena, neyavenonabiaba pacuenia paxamë itsa papatsiparemena, paneyavenonaejitsipame. <sup>18</sup> Nexata bajarapamonae itaxutuanajamatabëcuenesaëtajë. Paxamë ata bajarapamonae pacajamatabëcueneasaëyaexanaena icatsia itsa naviabiana paxamëjavabelia. Bajarapitsivi bepayaivaneme.

<sup>19</sup> Caebitsaëto canacujitsia Dioso pejumecovënëtsivi, Asiavënë nacuapijivi, pacabajacobalia. Aquila pijava, Prisca, pacabajacobalia. Aquila ata pacabajacobalia. Daxita Dioso pejumecovënëtsivi, pamonae nacaetuatabiaba bajarapajivibeje pijabota, bajarapamonae ata, daxita pacabajacobalia vajatuxanenë pevënëta. <sup>20</sup> Daxita Dioso pejumecovënëtsivi, majotaje pejinavanapaevi, pacabajacobalia. Paxamë ata Dioso panejumecovënëtsixae, xaniavaetsia namataenetsia bitso nasivaya panabajacobabiabare.

<sup>21</sup> Xanë Pablonë, tajacuata tacobeta pacatoyaquinatsi mapacotocaevilivaisiyoje. Apo itorobinë taneyavenonabiabinë tanetoyaquinaenexa. Bitso pacabajacobatsi.

<sup>22</sup> Pajivi apo jitsipae vajatuxanenë Jesucristo, bajarapajivi Dioso navecuaxuabianatsi. ¡Vajatuxanenë raja naxanitsiayo patsianica!

<sup>23</sup> Pacatovajëtabiabatsi Diosojavabelia vajatuxanenë Jesucristo papecayavenonabinexa. <sup>24</sup> Daxita paxamë asivaya pacajamatabënajinatsi caenë Jesucristo pijajivixatsi.

## Mapabaxutoje San Pablo cotocaevi toyaquina Corinto tomarapijivijavabelia

*Pacuenia Pablo toyaquina mapabaxutoje Dioso pejumecovënëtsivi, Corinto tomarapijivijavabelia, yabara pelivaisi*

<sup>1</sup> Xanë Pablonë, Dioso tanetojitsipaexae, nitapeta Jesucristo pijaapóstolenënexanë. Nexata Jesucristo nitoroba jivi tatsipaebinexa pexanialivaisi. Vajabananë Timoteo xanëjavata ponapona. Nexata pacatoyaquinatsibeje mapalivaisije Dioso panejumecovënëtsivi, paCorinto tomarapijivimë. Patoyaquinajëbejenua mapalivaisije Acaya nacujava pejinavanapaevi ata. <sup>2</sup> Pacatovajëtatsi vaxa Diosojavabelia, vajatuxanenë Jesucristojavabelia ata, papecaitaxutotsoniataenexa jamatabëcuenexanepanaeya panejinavanapaenexa.

*Pacuenia Pablo navajunupaeba itsamonae pebejiobiaexanaejavatsi yabara pelivaisi*

<sup>3</sup> “Ayaicuenia panejamatabëcueneyavenoname,” pajanë vaxa Diosojavabelia. Bajaraponë Dioso, vajatuxanenë Jesucristo paxa. Dioso, vajanacaitaxutotsoniataenë, vajanacajamatabëcuenebabatsinë bitso vajanajamatabëxainaeyaniva. <sup>4</sup> Pamatacabi panetocopiapatabiaba daxita xua bitso panenajamatabëxainaeya exanaejitsia, itsiata Dioso panejamatabëcuenebabatabiaba bajaraxuavecua. Bajara pijinia pacuenia paxanë ata panejamatabëcuenecaējëpa itsamonae juya patajamatabëcuenebabatsinexa pamatacabi bajarapamonae ata tocopiapatatsi xua bitso najamatabëxainaeya exanaejitsiatsi. <sup>5</sup> Itsamonae bitso panebejiobiaexanabiaba Jesucristo patajumecovënëtsixae. Nexata pijinia Jesucristo pejamatabëcueneta Espíritu Santo panejamatabëcuenebabatabiaba bitso patanajamatabëxainaeyaniva. <sup>6</sup> Nexata paxanë itsamonae itsa panebejiobiaexanabiaba, Dioso panejamatabëcueneyavenonabiaba patanejamatabëcuenebabatsinexa. Nexata paxanë ata panejamatabëcuenecaējëpaena juya itsamatacabi paxamë patacajamatabëcuenebabatsinexa itsa pacatocopiapata xua bitso pacanajamatabëxainaeya exanaejitsia. Nexata itsa pacajamatabëcuenebabatsianatsi, bajayajebi pajamatabëcuenesaëmë tsane Dioso panejumecovënëtsijava matapania Dioso papecacapanepaejavabelianexa. Paxamë ata raja itsamonae pacabejiobiaexanabiabiana. <sup>7</sup> Payapëtaniji baja cajena paxamë ata Dioso papecacapanepaejavanexa. Pacuenia paxanë itsamonae panebejiobiaexanabiaba, bajarapacuenia paxamë ata itsamonae pacabejiobiaexanabiabiana. Nexata paxamë ata itsamonae itsa pacabejiobiaexanabiabiana, Dioso pacajamatabëcuenebabatabiabinexa panevajënaeyabelia panejamatabëcuenesaënexa Dioso panejumecovënëtsijava. Bajarapacuenia Dioso pacajamatabëcuenebabatabiabinexa matapania Dioso papecacapanepaejavabelianexa.

<sup>8</sup> Tajamonae, pajitsipajë paxamë ata paneyapëtaenexa itsamonae Asiavënë nacuata patanebejiobiaexanabiabijava. Ayaicuenia bitso panebejiobiaexanabiaba. Nexata baja picani pasaējibinë tsaponae. Apo panecaējëpae baja picani patavajënaeyabelia pataponaenexa. Nexata pajamatabëjumaitsinë tsabiabi: “Patëpaenajë meta baja rovia,” pajamatabëjanë tsabiabi. <sup>9</sup> “Pepacuene raeta baja panebeyebiana,” pajamatabëjanë tsabiabi. Dioso baja cajena panetocopata bajarapacuenia itsamonae patanebejiobiaexanabiabinexa. Nexata paepatota panebejiobiaexana patajamatabëjumaitsinexa mapacueniaje: “Xanë tajacuata apo necaējëpae tavecua-panepaenexa mapacuenije. Matapania Dioso neyavenonaena, necaējëpaena tavecua-panepaenexa mapacuenije,” patajamatabëjainexa. Dioso caējëpatsi pataneyavenonaeenexa. Tsipaji baja cajena Dioso pematocotsinë petëpaevi ata. <sup>10</sup> Dioso baja panecapanepa itsamonae patanebejiobiaexanaejavata patanebeyaxuabiyanima. Icatsia bajarapacuenia itsamonae itsa panebejiobiaexanaena, Dioso icatsia panecapanepaena.

Bajaraponëjavabelia panajamatabëcuenecopatajë bajarapacuenia pataneyavenonabiabinexa. <sup>11</sup> Paneyavenonaeyavajëtaponaname Diosojavabelia bajarapacuenia Dioso pataneyavenonabiabinexa. Paayaibitsaëttoxanetomë itsa panetovajëtaponaname Diosojavabelia, nexata Dioso paneyavenonabiabiana. Nexata pijinia jivi ayaibitsaëttoxaneto paxanë yabara jumai tsabiabi tsane Diosojavabelia: “Pexaniacuene bitso toexaname Pablobana. Ayaicuenia yavenoname pebeyejebiyativatsi,” jai tsabiabi tsane.

*Pajamatabëcuene yabara Pablo apo ponae Corinto tomarabelia yabara pelivaisi*

<sup>12</sup> Itsa pajinavanapajë daxitajivijava, paxamëjava ata, xaniavaetsia pajinavanapajë Dioso pitabarata. Itsa pajinavanapajë paxamëjava, pibisiacuene apo pacasivanajamatabëxainaetsi. Bajaraxuata panasivajamatabëcuenenabarëyanë. Paxanë raja saya mapanacuapijilivaisita apo panejamatabëcueneyavenonae xaniavaetsia patajinavapanenexa. Dioso raja patanejamatabëcueneyavenonaexae, bajarapacuenia xaniavaetsia pajinavanapajë. <sup>13</sup> Palivaisianë baja pacatoyaquinabiabatsi, caelivaisita anijajamatabëcuenelivaisibeje apo xainaponae. Palivaisianë pajumetaneme itsa palebame patacatoyaquinaelivaisianë, bajarapalivaisianë saya caejamatabëcuenelivaisi xainapona. Pematatsënëa itsajamatabëcuenelivaisi apo xainaponae. Pacatojitsipatsi xaniavaetsia panejumeyapëtaenexa palivaisianë pacatoyaquinatsi. <sup>14</sup> Pacatojitsipatsi xaniavaetsia patanejamatabëcueneyapëtaenexamë. Tsipaji abaxë xaniavaetsia apo panejamatabëcueneyapëtaemë pacuenia pajamatabëcueneitsinë tsavanapae. Nexata pamatacabi vajatuxanenë Jesús icatsia patsianica, paxamë panesivajamatabëcuenenabarëyamë tsane. Bajara pijinia pacuenia paxanë ata pacasivajamatabëcuenenabarëyatsi tsane.

<sup>15</sup> Nexata xanë pacasivajamatabëcuenenajumaititsi mapacueniaje: “Corinto tomarapijivi baja cajena xaniavaetsia nejamatabëcueneyapëtane. Yapëtane pacuenia apo sivanajamatabëxainaenë itsajamatabëcuene bajarapamonaejavabelia,” pacasivajamatabëjaitsi. Bajaraxuata picani jamatabëpatajë paxamëjavata patanesivajamatabëcuene barëyanexamë itsa patajë paxamëjavata. <sup>16</sup> Pamatacabi ponajë Macedonia nacuyabelia, talianë picani jamatabëpacataeponatsi bajaraxuayo. Bajaraxuacujinae icatsia tanaviatsinërena jamatabëpacataeponatsi picani icatsia bajaraxuayo. “Bajarajota bajarapamonae neyavenonaena tajanamutonexa, Judea nacuyabelia taponanexa,” pacasivajamatabëjaitsi picani. <sup>17</sup> Pacuenia najamatabëxainabiabajë taponanexa itsajavabelia, ponabiabajë baja cajena. Itsiata aeconoxae bajarapacuenia apo exanaenë taponanexa paxamëjavabelia. Mapanacuata itsamonae najamatabëxainae ata itsacuenejavayo pexanaenexa, itsiata apo exanabiabi. Bajarapacuenia itsiata xanë apo jamatabëcueneitsinë. Paxamë baja cajena panecueneyapëtaneme. <sup>18</sup> Dioso ata panecueneyapëtane apo patacayamaxëitojorobicuene. Dioso baja cajena pejumelivaisi pacatsipaebabiabatsi. Nexata icatsia xuacujinae bajarapalivaisi itsa pacatsipaebabiabatsi, saicayalivaisicuenia icatsia apo pacatsipaebabiabatsi. <sup>19</sup> Xanë Pablonë, Silvano, Timoteo, bajarapamatabëxëyo, pacatsipaebabiabatsi Jesucristo, Dioso pexënato, pelivaisi. Bajaraponë Jesucristo caejamatabëcuene xainabiaba. Nexata pacuenia jumaitsi, xaniajai tsabiabi. <sup>20</sup> Jesús pejamatabëcueneta Dioso baja daxita nacatoexana pacuenia tajëvelia najumecapanepaeya jumaitsi vajanacatoexanaenexa. Bajaraxuata Diosojavabelia vajavajëtsijavata itsa jumaititsi: “Diosomë, bitso ayaijamatabëcuenenëmë,” itsa jaitsi, nexata Jesucristo pejamatabëcueneta jumaititsi. <sup>21</sup> Dioso pacajamatabëcueneyavenonapona panevajënaeyabelia panejamatabëcuenesaënexa Cristojavabelia panenajamatabëcuenecopatsijava. Bajarapacuenia paxanë ata Dioso panejamatabëcueneyavenonapona. Dioso nacaitapeta Jesucristo pijajivinexatsi, Dioso pijacuene vajatonacuenebavanapenexa. <sup>22</sup> Dioso raja Espíritu Santo nacatsijamatabëcaeyaexana. Nexata nayapëtanetsi Dioso pexicuenetsi. Bajaraxuata yapëtanetsi pepacuene xaniajai Dioso vajanacacapanepaejavanexa.

<sup>23</sup> Mapacuenia pacajumaititsije Dioso pitabarata. Dioso baja cajena nejamatabëcueneyapëtane. Pamatacabi picani jamatabëponabiabajë paxamëjavabelia, caecuenia itsa ponaejitsipajë, nexata pacabijataejitsipatsi. Tsipaji abaxë apo

paexanavanapaemë patacaitorobicuenia. Bajaraxuata abaxë apo navecuaponaenë paxamëjavabelia, itsa pacabijatanetsi, bitso panenajamatabëxainaeyaniva. <sup>24</sup> Nexata apo jitsipaeenë icatsia patacatsipaebaponaenexa paneyapëtaenexa pacuenia bepaexanavanapame. Tshipaji baja xaniavaetsia Dioso pajumecovënëtavanapame. Jamatabëpacayavenonatsi. Pacuenia baja pajamatabëcuenebarëyamë tsavanapae, matatoxenetsia icatsia panejamatabëcuenebarëyanexa Dioso pitabarata.

## 2

<sup>1</sup> Najamatabëcopatajë baja taponaejava paxamëjavabelia. Tshipaji jamatabëjumaitsinë paxamë yabara mapacueniaje: “Apo ponaenë abaxë tsane Corinto tomarapijivijavabelia tanajamatabëxainaeyaexanaeyaniva bajarapamonae,” jamatabëjanë. <sup>2</sup> Paxamë itsa pajamatabëcuenebarëyamë, nexata xanë ata pacasivajamatabëcuenebarëyatsi tsabiabi. Itsiata itsa pacanajamatabëxainaeya exanaejitsipatsi, nexata apo pajamatabëcuenebarëyamë tsipae. Nexata xanë ata apo pacasivajamatabëcuenebarëyatsi tsipae. Tshipaji ajibi tsipae patacasivajamatabëcuenebarëyajanexa. <sup>3</sup> Bajaraxuata taponaejavënaeya paxamëjavabelia copiata baja cajena pacatoitorobaliatsi itsabaxuto, patacatoyaquinaebaxuto. Bajarapacuenia pacatoyaquinatsi tsipaji abaxë apo jamatabëponaenë paxamëjavabelia patacasivanajamatabëxainaeyaniva, itsa pacatanetsi panejinavanapaejava apo patacaitorobicuenia. Jitsipajë picani paxamë patacasivajamatabëcuenebarëyanexa. Paxamë yabara jamatabëjumaitsinë mapacueniaje: “Corinto tomarapijivi baja cajena nejamatabëcueneypëtane. Bajarapamonae itsa jamatabëcuenebarëya, xanë ata bajarapamonae sivajamatabëcuenebarëyanë tsabiabi,” jamatabëjanë. <sup>4</sup> Apo jitsipaeenë picani patacatoyaquinaenexa bajarapabaxuto. Itsiata itsa pacatoyaquinatsi, nuajë paxamëjitsia. Najamatabëxainajë cajena bitso tamatabëëthëtovetsina. Apo pacatoyaquinaetsi raja saya patacanajamatabëxainaeya exanaenexa. Ayaicuenia raja patacaasivajava patanejamatabëcueneypëtaenexamë, pacatoyaquinatsi.

*Pacuenia Pablo itoroba Corinto tomarapijivi barajamatabëcuenexanepanaeya baja petaenexa pibisiacuene pexanaponaponaenëmi yabara pelivaisi*

<sup>5</sup> Ponë pibisiacuene exana, caenënë xanë apo nenajamatabëxainaeyaexanae. Daxita paxamë ata bajarapacuenia pacanajamatabëxainaeyaexana. <sup>6</sup> Ponë yabara itsabaxutota pacatoyaquinatsi, paxamë baja cajena najamatabëcuenejëpaeya panavecuaitavetame bajaraponë, pibisiacuene pexanaenë, penapatsiyaniva panenacaetuatsijavata. Nexata baja bajaraponë belia copata pibisiacuene pexanaejava. Xanepana rabaja. Pëtsa baja pematatsënëa icatsia panavecuaitavetame bajarapacuenia. <sup>7</sup> Aeconoxae baja pajamatabëcueneceavare bajaraponë pibisiacuene pexanaejava. Pabarajamatabëcuenexanepanare baja. Bajaraponë juya pajamatabëcueneypavenonaename piaurayaniva. Bajarapacuenia pajamatabëcueneypavenonaename pejamatabëcuene matatoxenetsiyanivatsi bitso pejamatabëcuenebëjaijava pijaneconi yabara. <sup>8</sup> Bitso pacatojitsipatsi panetsitanajamatabëcueneitajëtsinexa paneasivajava bajaraponë. <sup>9</sup> Nexata pabaxuto copiaya pacatoyaquinatsi, bajarapabaxuto pacatoyaquinatsi saya patacajamatabëcuenejëtsinexa. Jitsipajë xaniavaetsia tayapëtaenexa itsa panejumecovënëtsijitsiamë daxita pacuenia pacaitorobatsi. <sup>10</sup> Nexata baja aeconoxae itsa pajamatabëcueneceavame papibisiacuene bajaraponë exana paxamë tuatuajëta, xanë ata baja jamatabëcueneceavajë bajaraponë pibisiacuene pexanaejava. Xanë baja jamatabëcueneceavajë paneconi bajaraponë exana xanëjavaberena. Jamatabëcueneceavajë baja bajaraponë pibisiacuene pexanaejava, daxita paxamë aneconijibia jamatabëcuenebarëyaya panejinavanapaenexa Cristo pitabarata. <sup>11</sup> Jamatabëcueneceavatsi baja papibisiacuene bajaraponë exana vaxaitsijavaberena. Tshipaji vaxaitsi itsa apo jamatabëcueneceavitsi tsipae bajarapapibisiacuene pexanaejava, vaxaitsi ata dovathi nacayamaxëitojorobijitsipa. Vaxaitsi baja dovathi

cueneyapëtanetsi, xua exanabiaba vajanacacopabiaexanaenexa Dioso pejumelivaisi vajajumecovënëtsijava.

*Pacuenia bitso Pablo Tito sivanajamatabëxaina yabara pelivaisi*

<sup>12</sup> Patajopajë Troas tomarata tatsipaebinexa Cristo pelivaisi. Troas tomarata tapatsivajënaeya, taniji Dioso tanetoxanepanaeyaexanaejava tatsipaebinexa pejumelivaisi bajarapatomarata. Nexata Troas tomarata itsa tsipaebabiabajë Dioso pejumelivaisi, Troas tomarapijivi nenamuxunaevetabiaba xaniavaetsia. <sup>13</sup> Itsiata baitsi jane bajarajota abaxë apo jamatabëcuenebarëyanë. Najamatabëxainajë vajabananë Tito yabara. Tsipaji abaxë Tito apo caxitajarabaxuabinë Troas tomarata. Nexata baja napëjjobajë Troas tomarapijivi taponaenexa baja Macedonia nacuayabelia.

*Pacuenia Cristo nacajamatabëcueneyavenona yabara pelivaisi*

<sup>14</sup> “Pexaniacuene rabaja panetoexaname,” pajanë Diosojavabelia, Cristo pejamatabëcueneta Dioso patanejamatabëcuene yavenonabiabixae. Itsajavabelia itsa paponajë, Dioso paneyajavaponabiaba. Panejamatabëcueneyavenonabiaba pacuenia Dioso jitsipa pataexanaenexa. Panejamatabëcueneyavenonabiabanua itsamonaejavabelia xaniavaetsia patatsipaebinexa Dioso pejumelivaisi. Pamonae jumecovënëta bajarapalivaisi, tsitapexanialivaisitsi bitso. <sup>15</sup> Dioso sivajamatabëcuenebarëyatsi pajivi itsamonaejavabelia tsipaeba Cristo pelivaisi. Paxanë ata Dioso panesivajamatabëcuenebarëya. Tsipaji patsipaebabiabajë Cristo pelivaisi daxitajivijavabelia. Itsamonae baja jumecovënëta pona Cristo pelivaisi Dioso pecapanepaevinexatsi. Itsamonae pijinia apo jumecovënëtsi Cristo pelivaisi Diosovecua penaxuabivinxaxa. <sup>16</sup> Pamonae Diosovecua naxuabiana apo pejumecovënëtsixaxa Cristo pelivaisi, naxuabiana. Pamonae pijinia Dioso capanepaenatsi pejumecovënëtsixaxa Cristo pelivaisi, capanepaenatsi. Paxanë, paapóstolevinë, Dioso paneyavenonabiaba. Nexata panejamatabëcuenecajëpa patatsipaebabiabinexa pexanialivaisi, Cristo pelivaisi, jivi pecapanepaelivaisinexatsi. <sup>17</sup> Pacuenia itsamonae tsipaebabiaba Cristo pelivaisi epematamotsinexatsi, paxanë apo paitsinë. Biji rajane itsajamatabëcuene ata apo pasivanajamatabëxainaenë jivijavabelia itsa patsipaebabiabajë Cristo pelivaisi. Dioso baja cajena panejamatabëcueneyapëtane. Dioso paneitoroba Cristo patatonacuenebinexa.

### 3

*Pacuenia Dioso pejanalivaisi najumecapanepaeya jumaitsi jivi pecapanepaenexa yabara pelivaisi*

<sup>1</sup> Itsa pacanavajunupaebatsi paneyapëtaenexa Dioso patanitorobijava Cristo pelivaisi patacatsipaebinexa, paayaijamatabëcuenevinë apo panataenë. Itsamonae pata paxamëjavata penajumetsënëtsilivaisi papecatsipaebinexa beDioso pejumelivaisicuenia. Bajarapamonae pacatocapata cuyalato itsamonae petsicobeyaquinaebaxutotsi. Bajarapabaxutota pacatoyaquina: “Dioso raja pejumelivaisi pepaebivi,” pejailivaisi. Bajaraxuata xaniavaetsia pacopiapitame bajarapamonae. Itsiata baitsi jane paxanë itsa papatajë paxamëjavata, apo pacarajutsitsi itsamonae patanetsicobeyaquinaecuyalato. “Pablo raja apóstolenë,” pejailivaisi itsamonae patanetsicobeyaquinaebaxuto, apo pacarajutsitsi xaniavaetsia patanecopiapitsinexamë. Apo panamatavenonaenë paxamë ata cuyalato patanetsicobeyaquinaenexamë patacaponaenexa itsamonaejavabelia bajarapamonae pataneyapëtaenexa xaniavaetsia patanecopiapitsinexa. <sup>2</sup> Bajarapacuenia cuyalato apo panamatavenonaenë patacaponaenexa jivi pataneyapëtaenexa xaniavaetsia patanecopiapitsinexa. Tsipaji baja jivi yapëtane xaniavaetsia Jesucristo pelivaisi patacatsipaebixae panenajamatabëcuene pënëyorotsijava Diosojavabelia pibisiacuene paneexanabiabijavamivecua. Nexata jivi bajarapamonae yapëtanenua Dioso patanitorobijava. <sup>3</sup> Paxamë xaniavaetsia panejumecovënëtame patacatsipaebilivaisi, Jesucristo pelivaisi. Nexata itsamonae, apo pataneyapëtaevi ata, itsa pacavënëlivaisitane patanejumecovënëtsijavamë, panesivajamatabëjumaitsi: “Pablobana Corinto tomarapijivi

cuyalato apo tsicobeyaquinae atatsi, itsa jume, ibopanata ata apo tsicobeyaquinae atatsi vajayapëtaenexa, itsiata yapëtanetsi Dioso pitorobijavatsi pexaniajailivaisi, Jesucristo pelivaisi, jivi petsipaebavanapaenexa,” panesivajamatabëjai. Piasaëtsaponaponaenë baja cajena Espiritu Santo pacatsijamatabëeca. Nexata baja pacajamatabëcuenepënëy-oroata pejanajamatabëcuene panexainaenexa. Nexata itsamonae xaniavaetsia itsa pat-sitajinavanapame, bajarapamonae ata baja pacayapëtane Cristo pelivaisi papecatsijamatabëecaajava.

<sup>4</sup> Paxanë payapëtaniiji Dioso patanitorobijava pepacuene Cristo pelivaisi jivi patatsipaebavanapaenexa. Tsipaji baja Dioso paneyavenonabiaba Jesucristo pejamatabëcueneta. <sup>5</sup> Paxanë patasaëta Dioso patatonacuenebinexa, apo panejamatabëcuenecaëjëpae. Nexata xua Dioso patoexanavanapajë, Dioso baja cajena paneyavenonabiaba. <sup>6</sup> Dioso panejamatabëcueneyavenonabiaba patatsipaebabiabinexa itsamonaejavabelia Dioso najumecapanepaeya pejanalivaisi pejumaitsijava jivi pecapanepaenexa. Bajarapamonaejavabelia apo pajumaitsinë tsabiabi: “Pajumecovënëtavanapare Dioso Moiséspijinëta penajumecopatsilivaisi. Itsa apo pajumecovënëtsimë tsane, nexata panaxuabianame,” apo pajanë tsabiabi. Biji rajane jivi patsipaebabiabajë pacuenia Espiritu Santo jamatabëcueneasaëyaexanaejitsiatsi. Palivaisi bajayata Dioso Moiséspijinëta najumecopata, itoroba pebeyaxuabinexatsi pajivi apo jumecovënëtsi bajarapalivaisi. Itsiata baitsi jane pajivi jumecovënëta papejanalivaisi jivi patsipaebabiabajë, Espiritu Santo pesaëta jamatabëcueneasaëyaexanaponatsi.

<sup>7</sup> Bajayatami Dioso Moiséspijinëta najumecopata. Bajarapalivaisi Dioso yaquina ibopanabejumata. Bajarapalivaisita Dioso itoroba pajivi apo jumecovënëtsi bajarapalivaisi pebeyaxuabaponaenexatsi. Bajarapacuenia Dioso Moiséspijinëta itsa najumecopata bajarapalivaisi, Moiséspijinë itabaranivenivena bitso. Nexata Israelpijinë pemomoxi apo itabaranaëcotsicapanepaetsi. Itsiata baitsi jane bajaraxuacujinae itsamatacabianëjavabelia, itabaracotiacaevapona baja. <sup>8</sup> Palivaisi bajayata Dioso Moiséspijinëta najumecopata, xanepana baja picani caepatoyonexa saya. Bajarapalivaisimi mata-toxenetsia bitso xanepana papejanalivaisi mapamatacabitaje jumecovënëtavanapatsi Dioso vajanacapanepaenexa. Bajarapacuenia Dioso nacacapanepaena Espiritu Santo vajanacatsijamatabëecaexae daxitamatacabijavabelianexa. <sup>9</sup> Bajayata Dioso Moiséspijinëta najumecopata. Nexata bajarapalivaisi xanepana. Tsipaji bajarapalivaisi pejamatabëcueneta, jivi yapëtane Dioso penaneconitsiaexanaejavanexatsi pibisiacuene pexanaeconi yabara. Itsiata baitsi jane bajarapalivaisimi matatoxenetsia bitso xanepana papejanalivaisi pejamatabëcueneta Dioso nacacapanepaejitsia. Bajarapapejanalivaisi pejamatabëcueneta, Dioso baja aneconijibia nacatane. <sup>10</sup> Palivaisi bajayata Dioso Moiséspijinëta najumecopata, xanepana baja picani. Itsiata baitsi jane palivaisi Dioso cotocaevi najumecopata, bajarapalivaisi bitso xanepana. Bajaraxuata palivaisimi copiaya Dioso najumecopata Moiséspijinëta, aeconoxae baja nacatsitaajumematamobi. <sup>11</sup> Palivaisi copiaya Dioso Moiséspijinëta najumecopata, xanepana picani caepatoyonexa saya. Biji rajane palivaisi cotocaevi Dioso najumecopata, bitso xanepana. Tsipaji daxitamatacabijavabelianexa bajarapalivaisi tsitecaena.

<sup>12</sup> Payapëtaniiji papejanalivaisi Dioso cotocaevi najumecopata bitso pexanepanaejava. Tsipaji daxitamatacabijavabelianexa apo vereverecae tsane bajarapalivaisi. Bajaraxuata apo pajumejunavabiabinë bajarapalivaisi patatsipaebinexa jivijavabelia. Palivaisivajëto payapëtaniiji, patsipaebabiabajë jivijavabelia. <sup>13</sup> Bajayata Moiséspijinë yapëtae ata livaisi. itsiata xaniavaetsia apo tsipaebi pijajivijavabelia. Itsiata paxanë bajarapacuenia apo paitsinë. Bajayata Moiséspijinë itsa itabaranivenivena, naitabaraacata papaëbërëpanata. Bajarapacuenia naitabaraacata pijajivi, Israelpijinë pemomoxi, pitabarataeyanivatsi bajarapacotia pecaevaponaejava. <sup>14</sup> Itsiata baitsi jane bajarapamonaejavabelia Moiséspijinë tsipaebi ata, apo jumeyapëtaetsi pajamatabëcuenelivaisi yabara tsipaeba. Bitso ajamatabëcuenetaja bajarapamonaemi. Nexata apo jumeyapëtae palivaisi tsipaebatsi. Bajara pijinia pacuenia ajena mapamatacabijavaberena ataje, tsiteca abaxë

ajamatabëcuenetaja bajarapamonae pemomoxi ata. Bajarapamonae penacaetuatabi-abibota, itsa lebabiaaba Dioso Moiséspijinëta penajumecopatsilivaisimi, apo jumeyapëtaeyabiabi pajamatabëcuenelivaisi xaina. Bajarapamonae itsa jumecovënëtsipa Cristo pesivatëpaejavatsi, nexata matapania jumeyapëtaejitsipa pajamatabëcuenelivaisi xaina palivaisi bajayata Moiséspijinë tsipaebabiaba. <sup>15</sup> Ajena mapamatacabijavaberena ataje, judíovi penacaetuatabiabibota itsa lebabiaaba Dioso Moiséspijinëta penajumecopatsilivaisimi, apo jumeyapëtaeyabiabi pajamatabëcuenelivaisi xaina. Bitso ajamatabëcuenetaja bajarapamonae. <sup>16</sup> Itsiata baitsi jane pajivi najamatabëcuenecopata vajatuxanenë Jesucristojavabelia, bajarapajivi Dioso vecuaajibiaexanatsi pibisiacuene pexanaeconimi. Nexata bajarapajivi xaniavaetsia jumeyapëtane pajamatabëcuenelivaisi xaina palivaisi bajayata Moiséspijinë tsipaebabiaba. <sup>17</sup> Vajatuxanenë Jesucristobeje, Espíritu Santobeje, najamatabëcueneyëpabeje. Jesucristo pejamatabëcueneta Espíritu Santo ponapona vajajamatabëthëtota. Nexata Espíritu Santo nacajamatabëcueneyavenonapona pibisiacuene vajaexanaeyaniva. <sup>18</sup> Nexata Jesucristo pejamatabëcueneta, Espíritu Santo nacayavenona. Nexata pacuenia Moiséspijinë jivi vecuanaitabaraacata pitabaracotiataeyanivatsi pitabaranivenivenaejava, bajara vaxaitsi apo itsitsi. Biji rajane tsitanacueneitajëtsiaya jinavanapatsi xaniavaetsia jivi peyapëtaenexa Dioso ayaijamatabëcuenepexinaejava. Espíritu Santo nacajamatabëcueneyavenonapona vajavajënaeyabelia pejanajamatabëcuenepexinaejava. Nexata pacuenia Jesucristo jamatabëcuenetsi, bajara vaxaitsi ata vajajamatabëcuenetsinexa.

## 4

<sup>1</sup> Dioso baja cajena patanitaxutotsoniataexae, panetocopata patatsipaebabiabinexa jivijavabelia pexanialivaisi, Jesucristo pelivaisi. Bajaraxuata itsajavata panetsiayai tsabiabi ata, itsiata apo pajamatabëcopatsinë patatsipaebabiabijava Jesucristo pelivaisi. Tsipaji baja Dioso panetocopata bajarapacuenia. <sup>2</sup> Muetsia apo paexanaenë itsacuenejava ata. Apo paexanaenë daxita xua piauracuene ata. Jivi patayamaxëitorobinexa, itsacuenejava ata apo paexanaenë. Apo patsipaebabiabinënu saicayalivaisi Dioso pejumelivaisivecu. Dioso baja cajena yapëtane jivijavabelia ëpexaniajailivaisi patatsipaebabiabijava. Patanejumetaeyenaevi ata bajarapacuenia jumai tsipae. <sup>3</sup> Itsa patsipaebabiabajë jivi pecapanepelivaisinexatsi, jumenapebetsiaya patsipaebabiabajë xaniavaetsia patanejumeyapëtaenexa. Nexata patsipaebi atanë, pajivi apo jumecovënëtsi bajarapalivaisi, bajarapajivi pijacuata nanaxuabiaexanaena Diosovecu. Nexata bajarapajivi daxitamatacabijavabelianexa, Diosovecu naxuabiana. <sup>4</sup> Bajarapacuenia apo jumecovënëtsi tsipaji dovathi pejamatabëcueneta ajamatabëcuenetaquiriayaxanatsi pejumecovënëtsiyaniva bajarapalivaisi. Bajarapapexanialivaisi, Cristo pelivaisi, bepinijicotia jivi pejamatabëcueneyayotsinexa itsa jumecovënëta bajarapalivaisi. Nexata dovathi, mapanacuapijivi pijatuxanenë, apo jitsipae bajarapalivaisi jivi pejumecovënëtsinexa pejamatabëcueneyayotsiyanivatsi. Cristo paxa Dioso jamatabëcueneyajëpa. Nexata pacuenia Dioso jamatabëcuenetsi, bajara Cristo ata jamatabëcuenetsi. <sup>5</sup> Livaisi itsa pacatsipaebabiabatsi, paxanë apo panalivaisipaebabiabinë pataneyaiyataenexamë. Biji rajane vajatuxanenë Jesucristo pelivaisi pacatsipaebabiabatsi. Paxanë saya panataniji bepanijajivinë. Jesucristo bitso pajitsipajë. Bajaraxuata paxamë ata jamatabëpacayavenonatsi. <sup>6</sup> Bajayata Dioso mapanacuaje itsa exana, pitaquirijavata pitayotsinexa, itoroba juameto penaexanaenexa. Bajara pijinia pacuenia paxanë ata patajamatabëcuenetaquirijavami, Jesucristo pelivaisi itsa pajumecovënëtajë, Dioso panejamatabëcueneyayota. Bajarapacuenia itsa panejamatabëcueneyayota, payapëtaniji Dioso bitso ayaijamatabëcuenepexinaejava. Jesucristo itsa itabaranivenivena Dioso pexënatoxae, paxa Dioso jamatabëcueneyajëta Dioso bitso ayaijamatabëcuenepexinaejava.

*Pacuenia Dioso jamatabëcueneyavenona pijajivi, itsa tonacuenebavanapatsi, yabara pelivaisi*

<sup>7</sup> Paxanë Dioso patanejamatabëcueneitayotsivi ata, pataperabëto apo ajamatabësaë. Pacuenia atsavaxi bajayajebi apo ajamatabësaë, bajara saya itsi. Pataperabëto apo paperabësaë atanë, Dioso pataneyavenonaexae, pajamatabëcuenesaënë tsavanapae. Nexata bajarapacuenia pataajamatabëcuenesaë tsavanapaejava patanetaevi, jamatabëjumai tsane paxanë yabara: “Mapamonaëje ajamatabëcuenesaë tsavanapae Dioso pesaëta,” jamatabëjai tsane. <sup>8</sup> Nexata panetocopiapatabiabi ata itsacuene patanetoyapëbejecuene, itsiata Dioso paneyavenonabiaba patavecuapanepaenexa bajarapacuenie. Apo payapëtaeyabiabi atanë pajamatabëcuene yabara panetocopiapata patanetoayapëbejecuene, itsiata paxanë apo pacopatsinë Dioso patajumecovënëtsijava. <sup>9</sup> Itsamonae panebejiobiaexanabiabi ata Dioso patajumecovënëtsijava yabara, itsiata Dioso apo panecopatsi patajaepato. Itsamonae irata panepenatabiabi ata patanebeyejebinexa picani, itsiata pepacuenie apo panebeyaxuababiabi Dioso pataneyavenonabiabixae. <sup>10</sup> Pacuenia Jesús pijavajabitsaë bajayajebi picani jamatabëbeyaxuababiabatsi, bajarapacuenia paxanë ata Jesús papijajivixaenë, itsamonae jamatabëpanebejebabiaba picani. Itsiata apo panebejebicapanepae. Bajaraxuata daxita jivi yapëtane Jesús pataneyavenonabiabijava. <sup>11</sup> Daxitamatacabi patajinavanapaematacabianë, panetsiyai tsabiabi itsamonae patanebeyejebinexa Jesús papijajivixaenë. Bajarapacuenia panetocopiapatabiaba jivi pataneyapëtaenexa Jesús pataneyajavaponaponaejava. <sup>12</sup> Panetsiyai tsabiabi itsamonae patanebeyejebinexa patacatsipaebabiabixae papecacapanepaelivaisinexa Diosojavabelia. Nexata paxanë patacatsipaebilivaisi panejumecovënëtsixae, itsamatacabi athëbëtatsia Dioso pacarajutsiana matacabi apo pevereverecejava.

<sup>13</sup> Dioso pejumelivaisibaxutota jumaitsi mapacueniaje: “Jumecovënëtajë Dioso taneyavenonaëjavanexa. Bajaraxuata tsipaebajë jivijavabelia Dioso taneyavenonaëjavanexa,” jai. Bajara pijinia pacuenia paxanë ata pajamatabëcueneitsinë. Pajumecovënëtajë Dioso pataneyavenonaëjavanexa. Bajaraxuata patsipaebabiabajë jivijavabelia Dioso pataneyavenonaëjavanexa. <sup>14</sup> Vajatuxanenë Jesús petëpaecujinae Dioso icatsia asaëyaexanatsi. Bajaraxuata payapëtaniji baja pexaniajaicuene Dioso icatsia paxanë ata pataniasaëyaexanaëjavanexa patatëpaecujinae, Dioso patayajavajinavanapaenexa pijanacuatatsia. <sup>15</sup> Paxanë itsamonae panebejiobiaexanabiabi ata, itsiata apo pacopatsinë patacatsipaebabiabijava pexaniajailivaisi. Nexata panevajënaeyabelia pajumecovënëtaponame patacatsipaebilivaisi. Nexata baja itsa paayaibitsaëtomë tsaponae Dioso panejumecovënëtsivi, paayaibitsaëtomë baja pijinia tsaponae Diosojavabelia panejumaitsvinexa: “Xanepana rabaja. Tsipaji bitso pexaniacuene panetoexaname,” panejaivinexa Diosojavabelia. Nexata papecajumetaevi ayaiBITSaëto yapëtaena Dioso bitso ayajamatabëcuene pexinaejava.

<sup>16</sup> Bajaraxuata itsamonae panebejiobiaexanabiabi ata, itsiata apo pajamatabëcopatsinë jivi patatsipaebabiabijava pexaniajailivaisi. Pataperabëto cueranaponae ata, itsiata patavajënaeyabelia, caematacabi canacujitsia, pajamatabëcuenesaënë tsaponae Dioso patajumecovënëtsijava. <sup>17</sup> Xua nacatocopiapatabiaba itsamonae vajanacabejiobiaexanabiabinexa, saya caeepatoyo bajarapacuenia nacabejiobiaexanabiaba mapanacuataje vajajinavanapaeepatoyo. Bajaraxuacujinae athëbëtatsia xainaenatsi daxitacuenevene pexaniajava, baitsi matacabi apo pevereverecejava. <sup>18</sup> Nexata apo vajënaeevetavanapaetsi vajanacatocopiapatsinexa, xua nacacajëpa vajataenexa. Biji rajane jamatabënjajinavanapatsi vajanacatocopiapatsinexa xua apo nacacajëpae vajataenexa. Tsipaji xua nacacajëpa vajataenexa, daxita bajaraxua, vereverecaena. Itsiata baitsi jane xua apo nacacajëpae vajataenexa, daxitamatacabijavabelianexa apo vereverecae tsane.

## 5

<sup>1</sup> Mapanacuata jivi pexanaebobërëto bepijia baabeje. Bajara pijinia itsi vajaperabëto ata. Bepijia vereverecaena. Itsiata baitsi jane yapëtanetsi mapacuenieje. Vajatëpaecujinae itsamatacabi Dioso athëbëtatsia nacarajutsiana apo peverevereceaerabëtonexa.

<sup>2</sup> Xaniajai cajena. Itsa abaxë jinavanapatsi mapanacuataje, bitso picani jitsipabiabatsi vajanacaperabëtothianaenexa athëbëpijiperabëtonexa. Jitsipabiabatsi picani

vajaponaenexa athëbëabetsia pejanaperabëto vajayajavajinavanapaenexa athëbëtatsia. <sup>3</sup> Athëbëtatsia raja aperabëjibia apo jinavanapae tsanetsi. Biji rajane pejanaperabëto yajavajinavanapaenetsi. <sup>4</sup> Itsa abaxë jinavanapatsi mapanacuataje, bitso picani jitsipabiabatsi vajanacaperabëitothianaenexa. Apo jitsipaetsi picani vajatëpaejava. Itsiata baitsi jane yapëtanetsi mapacueneje. Vajatëpaecujinae itsamatacabi athëbëtatsia yajavajinavanapaenetsi pejanaperabëto, apo pevereverecaeperabëtonexa jane baja. Nexata mapanacuata vajayajavajinavanapaeperabëtomu ajibi baja tsane. Xainaenetsi juya apo pevereverecaeperabëtonexa. <sup>5</sup> Bajarapacuenia vajanacaperabëitothianaenexa Dioso nacatoxaina. Nexata Dioso nacatocopata Espiritu Santo vajanacayajavaponaponaenexa. Nexata Dioso yabara bejamatabëjumaititsi mapacueniaje: “Mapacueniaje Espiritu Santo Dioso pataneyajavaponaponaeyaexanaexae, nexata payapëtaniji xaniajai pepacuene itsamatacabi Dioso patanepërabëitothianaenexa. Xaniajai baja cajena. Pepacuene itsamatacabi Dioso panepërabëitothianaena pacuenia baja najumecapanepaeya jumaiti,” bejamatabëjaiti Dioso yabara.

<sup>6</sup> Bajaraxuata apo jamatabëcopatsitsi vajajumecovënëtsijava Dioso. Vajavajënaeyabelia jamatabëcuenebarëyatsi. Yapëtanetsi mapacueneje. Itsa abaxë vajaperabëto yajavajinavanapatsi mapanacuataje, panacuata itsamatacabi vajatuxanenë daxitamatacabijavabelianexa yajavajinavanapaejitsiatsi, bajarapanacua abaxë tajë vecuajinavanapatsi. <sup>7</sup> Apo taetsi abaxë athëbëtatsia vajatuxanenë vajayajavajinavanapaejavanexa. Itsiata yapëtanetsi itsamatacabi xaniajai vajatuxanenë athëbëtatsia vajayajavajinavanapaejavanexa. <sup>8</sup> Bajaraxuata jitsipatsi vajatëpaejava. Tsipaji mapanacuata vajajinavanapaejava, matatoxenetsia bitso jitsipatsi vajatuxanenë pijanacuatatsia vajayajavajinavanapaenexa. <sup>9</sup> Bajaraxuata mapanacuata vajajinavanapaematacabibeje, asaëyata vajatuxanenë tonacuenebavanapatsi. Tsipaji jitsipatsi vajanacasivajamatabëcuene barëyajava. Vajatëpaecujinae ata, pijanacuatatsia jamatabëtojinavanapatsi pejitsipaecuenia. <sup>10</sup> Vajatuxanenë pejitsipaecuenia jamatabëtojinavanapatsi mapanacuata ata vajajinavanapaeepato. Tsipaji caejivitsi canacujitsia Cristo pitabarata tonaitajëtaeponaenetsi. Nexata bajarapamatacabi nacarajutsiana daxita pijajivitsi xua nacatoxaina vajanacarajutsinexa. Xaniavaetsia vajatuxanenë itsa tonacuenebavanapatsi, nacarajutsiana xua nacatoxaina vajanacarajutsinexa. Pamona xaniavaetsia apo tonacuenebavanapae, nacueratsiana.

*Pacuenia Dioso nacabarajamatabëcuenexanepana vajaneconi yabara Cristo vajanacasivatëpaexae yabara pelivaisi*

<sup>11</sup> Payapëtaniji baja cajena itsamatacabi vajatuxanenë pitabarata cujunaviaya patananubenaenexa. Bajaraxuata asaëyata jivijavabelia patsipaebabiabajë Jesucristo pesivatëpaejavatsi pejumecovënëtsinexa. Itsajamatabëcuene apo panajamatabëxainabiabinë bajarapalivaisivecua. Dioso baja cajena panejamatabëcueneyapëtanë pacuenia pajamatabëcueneitsinë. Pajitsipajë paxamë ata patanejamatabëcueneyapëtaenexamë. <sup>12</sup> Bajarapacuenia paxanë apo pacanavajunupaebitsi saya pataneyaiyataenexamë. Pacanavajunupaebatsi rajane pataneyapëtaenexamë vajatuxanenë papijajivicuene. Nexata bajarapacuenia paxamë papecajamatabëcuenecaëjëpaenexa panejumecanaviatsijava pamona pibisiacuenia panebaracuaicuaijai. Bajarapamona paneyalivaisiaexanabiaba. Beayajamatabëcuenevi nataeyabiaba. Pexaniacuene exanabiabi ata, bajaraxua exanabiaba saya jivi petaenexatsi. Itsiata baitsi jane bitso naneconita Diosojavabelia pibisiacuene pexanaeniconi yabara. Apo canaëjëtsi pexaniajamatabëcuene pexainaenexa. <sup>13</sup> Paxanë picani xaniavaetsia Dioso jumecovënëtsiaya jivi patsipaebabiabajë Jesús pelivaisi. Itsiata Dioso apo pejumecovënëtsivi, panejumai tsabiabi: “Pematajemavitsi raja saya,” panejai tsabiabi. Itsiata itsa pacatsipaebabiabatsi bajarapalivaisi, Jesucristo pelivaisi, pacatsipaebabiabatsi paxamë ata Dioso papecacapanepaenexa. Paxamë apo panetaemë bepattanematajemabivi. <sup>14</sup> Cristo raja paneasiva tsabiabi. Bajaraxuata patonacuenebavanapajë. Pajamatabëjumaitinë tsabiabi: “Caenë

Cristo nacasivatëpa daxitanexatsi. Bajaraxuata Dioso baja nacatane Cristo bevajayajavatëpaevi. Nexata baja bevajananeconimatamotsicapanepaevi Dioso nacatane," pajamatabëjanë tsabiabi. <sup>15</sup> Cristo jivi sivatëpa. Petëpaecujinae Dioso icatsia asaëyaexanatsi. Nexata daxita pamonaë jumecovënëta Cristo pesivatëpaejavatsi, maticabi apo peverevereceaëjava xainaena. Nexata bajarapamonaë apo bexanavanapae pijacuata penatojitsipaecuenia. Biji rajane bexanavanapa pacuenia Cristo tojitsipatsi pesivajamatabëcuenebarëyanexatsi. <sup>16</sup> Bajaraxuata ajena mapamatacabijavaveliacujinaeje, patavajënaeyabelia taponae, Dioso pejumecovënëtsivi yabara apo bepanajamatabëxainaenë pibisiacuenia, pacuenia Dioso apo pejumecovënëtsivi banajamatabëxaina. Tsipaji pamonaë Dioso pejumecovënëtsivi pacuenia bëpënëaverena jamatabëcueneitsi, apo pajamatabëcuenyapëtaenë. Xanë ata rabaja picani Jesucristojavabelia tanajamatabëcueneocopatsivajënaeya, Jesucristo yabara najamatabëxainajë pibisiacuenia, pacuenia banajamatabëxaina Dioso apo pejumecovënëtsivi. Bepenajumetsënëtsinë taniji Cristo. Itsiata baitsi jane aeconoxae baja bajarapacuenia apo najamatabëxainaenë Cristo yabara. Tsipaji baja yapëtaniji Cristo pexaniajainëcuene. <sup>17</sup> Pajivi najamatabëcueneocopata Jesucristojavabelia, bajarapajivi xaina pejanajamatabëcuene. Pijaperujamatabëcuenemi baja vecuaajibiaexanatsi. Nexata bajarapajivi daxitacuene sivanajamatabëxaina pexaniajamatabëcueneta.

<sup>18</sup> Daxitatsi Dioso pejanajamatabëcuene nacarajuta. Dioso nacabarajamatabëcueneanepana Cristo vajanacasivatëpaexae vajaneconi yabara. Nexata Dioso panetocopata pejumelivaisi patatsipaebanajetarubenaenexa daxitajivijava, bajarapamonaë ata itsa jumecovënëta, Dioso pebarajamatabëcueneanepanaenexatsi. <sup>19</sup> Nexata Cristo cruzata itsa sivatëpa mapanacuapijivije, Cristo pesivatëpaexaetsi, Dioso barajamatabëcueneanepanaeya tanetsi daxita pamonaë jumecovënëta Cristo pesivatëpaejavatsi. Paneconi picani bajarapamonaë xaina, Dioso baja vecuaajibiaexanatsi Cristo pesivatëpaejamatabëcuenetatsi. Bajarapalivaisi Dioso panetocopata patatsipaebanajetarubenaenexa jivijavabelia. <sup>20</sup> Nexata paxanë Cristo papijajivinë tsanajetarubenaë. Cristo baja cajena pejamatabëcueneta, papatajë paxamëjavata patacatsipaebinxaxa pexanialivaisi. Pacuenia Dioso itsa patsipa, pacamuxujiojitsipa, bajarapacuenia xanë ata pacamuxujiojibatsi Cristo papecasivatëpaexae panijaneconi yabara Dioso papecabarajamatabëcueneanepanaenexa. <sup>21</sup> Cristo pibisiacuene apo exanaë, tsiquirijavayo ata. Itsiata baitsi jane Cristo Dioso tsijumaxuabatsi daxita vaxaitsi vajaneconimi. Nexata vajaneconi yabara Cristo bepibisiacuene pexanaenëcuena cruzata beyaxuabatsi. Bajarapacuenia Cristo cruzata vajanacasivatëpaexae, nexata Dioso aneconijibia nacatane itsa jumecovënëtsi Cristo vajanacasivatëpaejava vajaneconi yabara.

## 6

<sup>1</sup> Dioso pataneyajavanacuenebixae, asaëyata pacamuxujiojibatsi. Dioso pinijicuenia papecaitaxutotsoniataejava, pacatsipaebatsi panejumeeabiyaniva. Itsa pajumeeabijitsipame, nexata Dioso nacueratsipa papecaitaxutotsoniataejava. <sup>2</sup> Tsipaji Dioso jivi pitaxutotsoniataejavaenexa, tajëvelia Dioso pejumelivaisibaxutota jumaitsi mapacueniaje:

Pamatacabi jivi itaxutotsoniataenajë, cajumetaenatsi. Nexata pamatacabi jivi canepaenajë, xamë ata cayavenonaenatsi,  
jai tajëvelia Dioso pejumelivaisibaxutota.

Aeconoxae rabaja naticocopiapata Dioso vajanacaitaxutotsoniataejava vajanacacapanepaenexa jane baja.

<sup>3</sup> Itsa patonacuenebavanapajë Dioso, pajitsipajë daxitajivi xaniavaetsia patatsitajinavanapaejava, daxitajivi Dioso pejumecovënëtsinexa. Apo paexanaenë pibisiacuene, tsiquirijavayo ata, pataexanaejava yabara jivi patanejumeeabiyaniva Dioso pejumelivaisi

itsa patsipaebajë. <sup>4</sup> Biji rajane daxita xua paexanavanapajë, xaniavaetsia patsitaexanavanapajë jivi pataneyapëtaenexa Dioso papijajivicuenenë. Itsamonae panebejio-biaexanabiaba. Itsajavata bitso panamatavenonabiabajë itsacuenejavaxi. Itsajavata bitso panetsiayai tsabiabi itsamonae patanebeyejebinexa. Bajarapacuenia panetsiayai tsabiabi ata, itsiata bajayajebi pajamatabëcuenesaënë tsavanapae Dioso pejumelivaisi jivi patatsipaebavanapaejava. <sup>5</sup> Itsajavata panejumatitibabeyabiaba. Itsajavata penaneconitsivi pejebabiabota panejebabiaba. Itsajavata Cristo pelivaisi jivi itsa patsipaebajë, itsamonae anaeya panebarajinabiaba patanebeyejebinexa picani. Itsajavata bitso panacuenebabiabajë. Itsajavata meravi ata apo pamajitabiabinë Dioso pejitsipaecuenia pataexanaenexa. Itsajavata bitso patajani tsabiabi. Bajarapacuenia panetoayapëbeje tsabiabi ata, itsiata bajayajebi pajamatabëcuenesaënë tsavanapae Dioso pejumelivaisi jivi patatsipaebavanapaejava. Nexata jivi paneyapëtane Dioso papijajivicuenenë. <sup>6</sup> Dioso papijajivicuenenë jivi pataneyapëtaenexa, jivi patsitajinavanapajënu mapacueniaje. Pamat-acabibeje pajinavanapajë, pibisiacuene apo paexanavanapaenë. Biji rajane jivi patsitajinavanapajë pexaniajailivaisi patayapëtaevicuena. Bajayajebi itsamonae pibisiacuene paneexanabiabi ata, apo pacuenecanaviatabiabinënu. Pexaniacuene patoexanabiabajënu itsamonaejavabelia. Patsitajinavanapajënu pacuenia Espiritu Santo paneyapëtaeyaexanapona Espiritu Santo patanetsijamatabëcaexae. Patsitanajamatabëcuene itajëtavanapajënu itsamonae ata pataasivajava patajamatabëëthëtojavavetsina. Bajarapacuenia patatsitajinavanapaexae, jivi xaniavaetsia paneyapëtane Dioso papijajivicuenenë. <sup>7</sup> Dioso papijajivicuenenë jivi pataneyapëtaenexa, patsitajinavanapajënu mapacueniaje. Ëpexaniajailivaisi jivi patsipaebabiabajë. Patsitanacueneitajëtavanapajënu daxita xua paexanavanapajë, Dioso pataneyavenonabiabijava. Dioso baja aneconijibia patanetaexae, Espiritu Santo paneyavenonabiaba patanayajivitaeyabiabinexa dovathi pijacuene. Paneyavenonabiabanua Espiritu Santo patacueneamoneyabinexa dovathi. Bajarapacuenia patatsitajinavanapaexae, jivi paneyapëtane Dioso papijajivicuenenë. <sup>8</sup> Itsamonae paneyaiyataeyabiaba. Itsamonae pijinia apo paneyaiyataeyabiabi. Itsamonae pexaniacuena panebaracuaicuaijai tsabiabi. Itsamonae pijinia pibisiacuena panebaracuaicuaijai tsabiabi. Itsamonae panetaeyabiaba pexaniajailivaisi patatsipaebivicuene. Itsamonae pijinia panetaeyabiaba bepatanajumetsënëtsivi. <sup>9</sup> Itsamonae pataneyapëtaevi ata, itsiata apo bepataneyapëtaevi panetaeyabiaba. Itsajavata itsamonae jamatabëpanebejebabiaba picani. Itsiata tsiteca asaëya bajarapalivaisi patsipaebavanapajë. Dioso baja cajena panetocopata itsamonae ayaicuenia patanebejio-biaexanabiabinexa, itsiata apo patanebeyejebinexa. <sup>10</sup> Panajamatabëxainabiabi atanë bitso itsamonae pibisiacuene pexanaejava yabara, itsiata bëpënëa pepacuene pajamatabëcuenebarëyanë tsavanapae daxitamatabijavabelianexa. Patabejobivi picani. Itsiata jivi ayaibitsaëtoxanetonë ricovi paexanaponajë Dioso pejumelivaisi patatsipaebijamatabëcueneta pejumecovënëtsixae. Apo paxainaenë picani mapanacuapijicuene. Itsiata baitsi jane Diosojavabelia daxitacuene paxainajë, apo peverevere-caejavanexa jane baja.

<sup>11</sup> Tajamonae, paxamë paCorinto tomarapijivimë, pacanajamatabëcuene vajunupae-batsi baja cajena roviaia. Apo pacavecuana-jamatabëcuene matayatsitsi. <sup>12</sup> Asivaya pacatae atatsi, paxamë itsiata bajarapacuenia asivaya apo panetaemë. <sup>13</sup> Pacuenia pexi pexainaenë asaëya banacoximuxujioba, bajara pijinia pacuenia paxanë ata pacamuxujibatsi. Paxamë ata panejamatabëcuenevetsina asivaya panetaema pacuenia baja paxanë asivaya pacatanetsi.

*Pacuenia piasaëtsaponaponaenë Dioso nacatane bepijatemplobotsi tsavanapae yabara pelivaisi*

<sup>14</sup> Dioso apo pacatojitsipae mapacueneje. Paxamëyajuvënëva, Dioso pejumecovënëtsiva, pëtsa pitatsi Dioso apo pejumecovënëtsinë. Paxamë ata papebijivimë, pëtsa papitame Dioso apo pejumecovënëtsiva. Bajayajebinexa ata pëtme Dioso apo

pejumecovënëtsivi. Tsipaji apo pacajamatabëcuenejëpae tsipae. Dioso pejumecovënëtsivi apo jamatabëcuenejëpae Dioso apo pejumecovënëtsivi. Tsipaji Dioso jivi pejamatabëcuene itayotsijamatabëcuenetsi, mapanacuata pitaquirijamatabëcuenebeje, apo najamatabëcuenejëpaebeje. <sup>15</sup> Cristobeje dovathibeje apo najamatabëcuenejëpaebeje. Nexata pijinia pajivi Dioso pejumecovënëtsijivi, Dioso apo pejumecovënëtsijivibeje, acuenebi bajayajebi penajuanacuenebaponaponaenexabeje. Tsipaji apo najamatabëcuenejëpaebeje. <sup>16</sup> Bajara pijinia navecuaitsibeje Dioso pijatemplobobeje, jumapecataeya pexanaenëanë penubenaetemplobobeje. Apo najamatabëcuenejëpaebeje. Vaxaitsi baja cajena piasaëtsaponaponaenë Dioso, ncatane bepijatemplobotsi tsavanapae. Bjarapacuenia ncatane tsipaji pacuenia bajayata Dioso templobota ponaponabiaba, bajara pijinia pacuenia aeconoxae Dioso nacayajavaponapona. Bjarapajamatabëcuene yabara bajayata Dioso vaxaitsi yabara tajëvelia jumaitsi mapacueniaje: Tsijamatabëcaenajë bjarapamonae tayajavaponaponaenexa. Bjarapamonae pija-Diosonë tsane. Bajara pijinia pamonaë tajajivi tsane, jai Dioso bajayata tajëvelia vaxaitsi yabara.

<sup>17</sup> Bjaraxuata Dioso apo pejumecovënëtsivi vajavecuapitsapaejavanexa, vajatuxanenë Dioso tajëvelia nacavajunupaeba. Vajanacavajunupaebijavata jumaitsi mapacueniaje: Pamonaë tuatuajëta pajinavanapaename, pavecuapitsapaename. Bjarapamonae navecuatsatsia pajinavanapaename. Paxamë pëtsa pibisiacuene panaexanaename bjarapamonaeta papecajamatabëcuene bijianaeyaniva. Nexata xanë pacasivarëya tsanetsi. <sup>18</sup> Paneaxanë tsane. Nexata daxita paxamë pataximë tsane, jai bajayata vajatuxanenë Dioso tajëvelia vaxaitsi yabara, daxitacuene pevetsinë.

## 7

<sup>1</sup> Tajamonae bitso patacaasivavi, daxita baja pacuenia Dioso pejumelivaisibaxutota tajëvelia najumecapanepaeya jumaitsi pexicueniatsi vajanacataenexa, yapëtanetsi baja. Bjaraxuata Dioso pitabarata aneconijibia jinavanapaenatsi. Vajavitota pibisiacuene vajaexanabiabijavami, copatsianatsi baja. Vajajamatabëëthëtota pibisijamatabëcuene vajajamatabëxainabiabijavami ata, copatsianatsi baja. Dioso yaiyataeya jinavanapaenatsi Dioso vajanacatojitsipaecuenia.

*Pacuenia Pablo sivajamatabëcuenebarëya Corinto tomarapijivi yabara pelivaisi*

<sup>2</sup> Panetsitanajamatabëcueneitajëre pataniasivajavamë. Caejivi ata paxamëyajuvënëjivi apo pacayajuvënëitsacueniabitsi. Apo pacayajuvënë jamatabëcuenebijianaetsinua. Apo pacayajuvënë yamaxëitojorobitsinua bjarapacuenia panijapalata patacavecuapitsinexa. <sup>3</sup> Itsa pacajumaitsitsi mapacueniaje, apo pacabijataetsi. Jume baja cajena. Pacuenia baja cajena copiaya pacajumaitsitsi, daxita matabijavabelianexa asivaya pacajamatabënajinabiabatsi. <sup>4</sup> Payapëtanijinua caejamatabëcuene panenajamatabëxainaejava. Bjaraxuata bitso pacasivajamatabëcuenebarëyatsi. Paepatota ata itsamonae panebejioaexanabiaba, apo panasivabëjanë tsabiabi. Tsipaji bjarapaepatota itsa pacavënëlivaisitaeyabiabatsi xaniavaetsia panejinavanapaejava, pacasivana-jamatabëcuene saëtabiabatsi. Nexata panebejioaexanabiabi ata, bitso pabarëyanë tsabiabi paxamë yabara.

<sup>5</sup> Macedonia nacuata patapatsicujinae, caeto ata cajena xaniavaetsia apo panacueravetsinë. Daxitajava, itsaxuayo panajetarubenajë, paneyalivaisiaexanabiaba. Nexata itsa panayajumetaeyabiabajë itsacuenelivaisi, patajamatabëëthëtota bëpënëa payajunaviajinavanapabiabajë. <sup>6</sup> Itsiata baitsi jane Dioso, jivi pejamatabëcueneasaëyaexanaenëxae, panejamatabëcueneasaëyaexana. Bjarapacuenia Dioso panejamatabëcueneasaëyaexana paxamëjavaverena peponaenë, Tito, itsa patajopa paxanëjavata. <sup>7</sup> Tito pepatsixae paxamëjavaverena, panejamatabëcueneasaëyaexana. Itsiata Tito ëpëpatsijava, apo panejamatabëcueneasaëyaexanae. Biji rajane Tito paxamëjavabelia itsa patajopa, paxamë pina Tito pajamatabëcueneasaëyaexaname. Bjarapacuenia paneexanaejava, Tito itsa pacavajunupaeba paxanëjavaverena, pamuxunanajamatabëcueneasaëtajë.

Bitso pina picani jamatabëpanetaneme. Bajarapalivaisinua Tito panetsipaeba. Panetsipaebanua bitso paneyanajamatabëxainaejava pibisiacuene paneexanaeconi. Panetsipaebanua bitso patanesivanajamatabëxainaejavamë itsa panevënëlivaisitaneme bitso patacasivanajamatabëxainaejava. Bajarapacuenia paneexanaejava, Tito itsa pacavajunupaeba paxanëjavaberena, bitso pamuxunajamatabëcuenebarëyanë.

<sup>8</sup> Pabaxutomi copiaya pacatoyaquinatsi, itsa palebame, bitso pacanajamatabëxainaeaxana. Itsiata saya caeepatoyonexa. Bajarapacuenia papecanajamatabëxainaeaxanae, bajarapabaxutomi yabara jamatabëjumaitsinë mapacueniaje: “Apo betoyaquinaenë picani bajarapabaxutomi,” jamatabëjanë. Itsiata baitsi jane aeconoxae baja bajarapabaxutomi yabara bajarapacuenia apo sivanajamatabëxainaeenë. <sup>9</sup> Aeconoxae baja sivabarëyanë patacatoitorobixae bajarapabaxutomi. Itsiata apo sivabarëyanë xua pacanajamatabëxainaeaxanatsi panijaneconi yabara. Biji rajane sivabarëyanë tsipaji patacanajamatabëxainaeaxanaejavata bajarapabaxutomita, pacopabame baja pibisiacuene paneexanabiabijava. Panajamatabëcuenepeñëyorotame baja Diosojavabelia. Nexata pacuenia Dioso pacatojitsipa, paexanavanapame. Itsiata apo pacaitsacueniabi patacatoyaquinaebaxutomi. Biji rajane bajarapabaxutomi pejamatabëcueneta, pacajamatabëcueneavenonatsi. <sup>10</sup> Nexata pacuenia Dioso pacatojitsipa, bitso payanajamatabëxainame panijaneconi. Nexata baja pacopabame pibisiacuene paneexanaejavami. Panajamatabëcuenepeñëyorotame baja Diosojavabelia. Nexata paxamë Dioso pacacapanepaena. Pamona Dioso capanepaenatsi, apo jumaitsi tsane: “Apo jitsipaenë picani Dioso tanecapanepaejava,” apo jai tsane. Itsiata baitsi jane pamona yanajamatabëxainavanapae ata pibisiacuene pexanaeconi, itsiata itsa apo copabi tsane pibisiacuene pexanabiabijava, itsa apo najamatabëcuenepeñëyorotsi Diosojavabelia, bajarapamona Diosovecua naxuabiana daxitamatacabijavabelianexa. <sup>11</sup> Panajamatabëcuenecanaëjère mapacuenieje. Pacuenia Dioso pacatojitsipa, bitso paxamë payanajamatabëxainame panijaneconi. Nexata baja aeconoxae paneconijibimë Dioso pitabarata. Najamatabëcuenereviabiaya baja pacanaëjëtame panijaneconi. Pepacuene panavajunupaebamenua Diosojavabelia pacuenia paexanavanapame. Paxamë picani bitso pabaraanaepanabiabame paxamëyajuvënënë, ponë pibisiacuene exanaponapona paxamë tuatujëta. Panecujunavabiabamenua picani bajaraponë pijaneconi yabara. Itsiata bitso pajitsipame paneexanaenexa Dioso papecattojitsipacuenia. Pasivanajamatabëcueneveretamenua panenaneconitsiaexanaenexa paxamëyajuvënënë, ponë pibisiacuene exanaponapona paxamë tuatujëta. Bajarapacuenia itsa pasivanajamatabëxainame pibisiacuene pexanaponaponaenë, Dioso patsitanajamatabëcueneitajëtame Diosojavabelia apo panenaneconitsijava. <sup>12</sup> Itsa pacatoyaquinatsi copiaya pabaxutomi, pacatoyaquinatsi padaxitamë patacamuxujiobinexa. Apo toyquinaenë caenë paxamëyajuvënënë tamuxujiobinexa, ponë pibisiacuene exanaponapona paxamë tuatujëta. Apo toyaquinaenënuu tamuxujiobinexa ëponë ata pibisiacuene toexanatsi itsanë. Pacatoyaquinatsi bajarapabaxutomi padaxitamë patacamuxujiobinexa. Pacatoyaquinatsi bajarapabaxutomi tsipaji pajitsipajë panijacuata panenajamatabëcueneypëtaenexa juya pataniasivajavamë. Baitsi pacuenia pajitsipame, Dioso pitabarata patanejumecovënëtsinexamë patacasivajamatabëcuenebarëyanexa. <sup>13</sup> Nexata baja panejumecovënëtame. Bajarapacuenia patanejumecovënëtsixaemë, bitso pacasivajamatabëcuenebarëyatsi.

Pibisiacuene itsa paexaname, Tito bitso pacasivanajamatabëxaina. Itsiata baja aeconoxae daxita paxamë Dioso pitabarata xaniavaetsia panejinavanapaexae, apo pacasivanajamatabëxainae baja. Bajaraxuata pacasivajamatabëcuenebarëya Tito. Nexata Tito papecasivajamatabëcuenebarëyajava yabara, paxanë ata bitso pacasivajamatabëcuenebarëyatsi. <sup>14</sup> Tito peponaevajënaeya paxamëjavabelia, jumaitsinë bajaraponëjavabelia: “Corinto tomarapijivi, Dioso pejumecovënëtsivi, tatoyaquinaebaxuto pejamatabëcueneta, itsiata najamatabëcueneexanebiania Diosojavabelia,” janë paxamë yabara Titojavabelia. Nexata bajarapacuenia paexaname baja. Bitso nexata

Tito pacasivajamatabëcuenebarëya. Pacuenia xanë pacatsipaebabiabatsi pexaniajailivaisi, bajarapacuenia paxamë yabara tsipaebajë Titojavabelia. Bajarapacuenia itsa tsipaebajë, xaniajanë cajena. Tsipaji pacuenia pacatoyaquinatsi, paexanavanapame. Bajaraxuata pacasivajamatabëcuenebarëyatsi. <sup>15</sup> Tito najamatabënapitabiaba panejumecovënëtabiabijava pacuenia pacaitoroba. Najamatabënapitabiabanua yaiyataeya panecopiapitsijava ata. Bajaraxuata Tito bitso pacaitaxanapona pevajënaeyabelia. <sup>16</sup> Pacasivajamatabëcuenebarëyatsi. Tsipaji xaniavaetsia yapëtaniji paneexanavanapajava pacuenia Dioso pacatojitsipa.

## 8

*Pacuenia Dioso pejumecovënëtsivi penajamatabëcuenerajutsixae Diosojavabelia, ofrenda tojeba Diosonexa yabara pelivaisi*

<sup>1</sup> Tajamonae, pacatoyaquinatsi mapalivaisije paneyapëtaenexa pacuenia Dioso jamatabëcueneavenonatsi Dioso pejumecovënëtsivi, Macedonia nacuapijivi. <sup>2</sup> Macedonia nacuapijivi petoayapëbejecuenetsi tocopiapataponae atatsi ayaicuenia pejamatabëcueneëjëtsinexatsi, itsiata jamatabëcuenebarëya tsavanapae. Bajarapamonae bitso bepejiobivi picani. Itsiata ofrenda itsa exana petoitorobinexa bepejiobivi Jerusalén tomarapijivijavabelia, ayaijava jebabiaba. <sup>3</sup> Xanë yapëtaniji bajarapamonae bepejiobivicuene. Itsiata bepejiobivi ata, ayaijava jebabiaba ofrenda itsa exanabiaba. Bajarapamonae jebabiaba bajarapacuenia, itsajivi ata apo itorobi atatsi ayaijava pejebinexa. <sup>4</sup> Bajarapamonae pinijicuenia paneitoroba patatocaponaeenexa pejebiofrenda. Panejumaitsi mapacueniaje: “Pexaniacuene panetoexanaename. Panetocaponaeenexa mapafrendaje Jerusalén tomarajavabelia Dioso pejumecovënëtsivi panerajutsinexa. Paxanë ata bitso jamatabëpayavenonajë bajarapamonae,” panejai. <sup>5</sup> Nexata bajarapamonae bepejiobivixae, pasivajamatabëjumaitsinë picani: “Tsiquirijavaxi meta bajarapamonae jebiana,” pasivajamatabëjanë picani. Itsiata bajarapamonae ayaijava jeba. Bajarapamonae ëofrenda apo rajutsi Diosojavabelia. Biji rajane copiaya najamatabëcuenerajuta Diosojavabelia pacuenia Dioso itorobaponatsi pexanabiabinexa daxitamatacabijavabelianexa. Bajaraxuacujinae pejebiofrenda paxanëjavaberena panerajuta patatocaponaeenexa bepejiobivijavabelia. Bajarapacuenia itsa exana, exana Dioso petojitsipaecueniatsi. <sup>6</sup> Paxamë, paCorinto tomarapijivimë, paofrenda paxamë ata pacaetuatae panerajutsinexa Dioso pejumecovënëtsivi, Jerusalén tomarapijivi, Tito pacajamatabëcueneavenona panecaetuatsijava. Itsiata abaxë apo paveretsimë panecaetuatsijava. Bajaraxuata aeconoxae baja icatsia Tito paitorobajë paxamëjavabelia paneveretsinexa jane baja bajarapaofrenda panecaetuatsijava. <sup>7</sup> Paxamë itsamonaevecua xaniavaetsia Dioso patojinavanapame. Xaniavaetsia panajamatabëcueneocopatame Diosojavabelia. Payapëtanemenua xaniavaetsia Dioso pejumelivaisi. Pacacaëjëpanua xaniavaetsia Dioso pejumelivaisi panetsipaebinexa itsamonae. Bitso pacajamatabëcueneenabiabanua Dioso pijacuene panetonacuenebavanapaenexa. Bitso paneasivamënu. Nexata paneyavenonaenexa bepejiobivi, Jerusalén tomarapijivi, ayaijava bepajebame ofrenda itsa paexaname.

<sup>8</sup> “Macedonia nacuapijivi, bepejiobivi ata, ayaijava ofrenda jeba,” itsa janë, apo pacaitorobitsi paxamë ata ayaijava ofrenda panerajutsinexa. Biji rajane saya pacatsipaebatsi paneyapëtaenexa pacuenia Macedonia nacuapijivi bitso jamatabëcuenebarëyaya toxana ofrenda bepejiobivi peyavenonaenexa. Bajarapacuenia paxamë ata itsa paexanaename, itsamonae patsitanajamatabëcuene itajëtsianame panexaniajaicuene Dioso paneasivajava. <sup>9</sup> Bajarapacuenia paxamë ata ofrenda parajutsianame. Tsipaji payapëtaneme pacuenia vajatuxanenë Jesucristo nacayavenona vajanacaasivaxae. Bajarapone picani ayaijamatabëcuenenë. Daxitacuene pevetsinë. Itsiata papecaasivaxae, nabejiobiaexana papecayavenonaenexa. Bajarapacuenia papecasivanabejiobiaexanaexae, nexata paxamë ata itsamatacabi paayaijamatabëcuenevimë tsane Dioso pijanacuatatsia.

<sup>10</sup> Pacatsipaebatsi paneyapëtaenexa pacuenia panetsitaxanepana paxamë paneexanaenexa bajarapaofrenda. Paxamë picani imata pavaimi bitso jamatabëpayavenoname Dioso pejumecovënëtsivi, Jerusalén tomarapijivi. Nexata paxamë daxitajivivajënaeya jamatabëpatoexaname ofrenda. <sup>11</sup> Paxamë picani imata pavaimi Jerusalén tomarapijivi bitso jamatabëpayavenoname ofrendanexa. Bajarapacuenia aeconoxae ata tsiteca paexanare paneveretsinexa jane baja palata panecaetuatsijava bajarapaofrendanexa. Parajutsianame pacuenia pacacaëjëpa. <sup>12</sup> Nexata itsa pepacue ne parajutsianame pacuenia pacacaëjëpa, Dioso pacasivajamatabëcuenebarëya tsane. Tsipaji apo pacaitorobi xua apo paxainaemë panerajutsinexa.

<sup>13</sup> Apo pacaitorobitsi raja mapacueniaje: “Itsamonae paneyavenonaenexa, ofrenda itsa paexaname, pabuare daxita panexainaepalatayomi,” apo pacajaitsi. Tsipaji juya paxamë panamatavenonaejitsipame. <sup>14</sup> Jitsipatsi namataenetsia vajanayavenonaenexa vajanamatavenonaejavaxi yabara. Aeconoxae baja pacacaëjëpa paneyavenonaenexa bepejiobivi, Jerusalén tomarapijivi. Itsamatacabijavabelia, pamatacabi paxamë panamatavenonaename, caëjëpaenatsi juya bajarapamonae papecayavenonaenexa. Bajarapacuenia nexata daxita paxamë panenamataavenonaejavaxi, apo panamatavenonaemë tsane. <sup>15</sup> Bajarapajamatabëcuenelivaisi yabara Dioso pejumelivaisibaxutota jumaitsi mapacueniaje: “Itsajivi bitso ayaijava xinae ata, itsiata apo toyajuvënënacopatsitsi. Itsajivi pijinia tsiquirijavayo xinae ata, itsiata apo namatavenonae,” jai Dioso pejumelivaisibaxutota. Bajaraxuata paxamë ata panexainaeyajuvënëjava, beparajutame penamatavenonaevijavabelia.

*Pacuenia Tito, anijanëbeje yajava, pona Corinto tomarabelia yabara pelivaisi*

<sup>16</sup> Xanë bitso jitsipajë paxamë patacayavenonaenexa. Tito ata bajarapacuenia jitsipa papecayavenonaenexa. Bajaraxuata pexaniajamatabëcuene rajutajë Diosojavabelia. Tsipaji Espíritu Santo pejamatabëcueneta Titobeje panajamatabëcuenejëpajëbeje paxamë yabara. <sup>17</sup> Nexata Tito itorobajë papecataenexalia, papecayavenonaenexanua bajarapaofrenda panecaetuatsijava paneveretsinexa baja tavajënaelia. Barëyaya Tito jejai peponaenexa paxamëjavabelia. Bajaraponë ata pijacuata pejitsipaexae peponaejava paxamëjavabelia, ponaena papecayavenonaenexa.

<sup>18</sup> Tito pepëta paitorobajë itsanë Dioso pejumecovënëtsinë. Bajaraponë Macedonia nacuata daxita Dioso pejumecovënëtsivi bitso peyapëtaenëtsi. Peyaiyataenëtsinua. Tsipaji xaniavaetsia tsipaebabiaba Dioso pejumelivaisi jivi pecapanepaelivaisinexatsi. <sup>19</sup> Ponë, Tito yajava, ponaejitsia paxamëjavabelia, bajaraponë Macedonia nacuata itapetatsi daxita Dioso pejumecovënëtsivi. Nexata pamatacabi paponaeenajë Jerusalén tomarajavabelia, bajaraponë payjavaponaenajë. Nexata paofrenda pacaponaejitsianë, bajaraponë paneyavenonaeyacaponaena. Bajarapaofrenda pacaponaenajë Jerusalén tomarapijivi pesivajamatabëcuenebarëyanexa Dioso. Patsitanajamatabëcuene itajëtsianajënuua patajitsipaejava patayavenonaenexa pamonae bepejiobivi. Nexata bajarapamonae jamatabëjumai tsane: “Matsaena pamonae jitsipa peyavenonaenexa bepejiobivije,” jamatabëjai tsane. <sup>20</sup> Bajarapacuenia Macedonia nacuapijinë payjavaponaenajë itsajivi ata patanebaracuaicuajaiyaniva bajarapapalataxaneto yabara. “Pabloana raeta bajarapapalata yajuvënëcopata,” patanejaiyaniva. <sup>21</sup> Dioso baja cajena paneyapëtane apo patanacobetoxotsivicuene. Itsiata pajitsipajë daxitajivi ata pataneyapëtaenexa apo patanacobetoxotsivicuene.

<sup>22</sup> Titobeje icatsia itsanë patsicueyaitorobajë Dioso pejumecovënëtsinë peyjavaponaenexabeje paxamëjavabelia. Bajaraponë anijatonë pajamatabëcuenejëtëbiabajë. Xaniavaetsia bitso paneyavenonabiaba. Nexata aeconoxae paxamë bitso jamatabëpacyavenona. Tsipaji pacavënëlivaisitane paneyavenonaejavanexa Jerusalén tomarapijivi. <sup>23</sup> Nexata Tito yabara itsajivi itsa pacayanijobiana: “¿Detsa pacuenia maponë

peponaponaenëje?” itsa pacajai tsane, pajumaitsimë tsane: “Pablobeje raja penajuaponaponaenëbeje. Bajaraponë Tito Pablo yavenonabiaba vaxaitsi juya Pablo vanacayavenonaenexa,” pajamë tsane. Itsajivi itsa pacayanijobiana Tito peyajavaponaponaenëbeje yabara, pajumaitsimë tsane: “Bajaraponëbeje Dioso pejumecovënëtsivi pitorobinëtsibeje. Bajaraponëbeje xaniavaetsia Cristo petoponaponaejavabeje jivi petaexae, nexata jivi yaiyatane Cristo pelivaisi,” pajamë tsane. <sup>24</sup>Nexata bajaraponëbeje itsa patsianabeje paxamëjavata, patsitanajamatabëcuene itajëtsianame paneasivajava bajaraponëbeje. Nexata Dioso pejumecovënëtsivi, pamonaie itorobatsibeje bajaraponëbeje, pacavënëlivaisitaena paneasivajava bajaraponëbeje. Nexata asivaya itsa pacopiapitsianame Dioso pejumecovënëtsivi pitorobinëtsibeje, nexata Dioso pejumecovënëtsivi jamatabëjumai tsane paxamë yabara: “Pacuenia baja Pablobana nacatsipaeba, xaniajai baja cajena. Corinto tomarapijivi asivaya tane daxitajivi,” jamatabëjai tsane.

## 9

### *Ofrenda pecaetuatsijava Dioso pejumecovënëtsivijavabelia peyavenonaenexa yabara pelivaisi*

<sup>1</sup> Ofrenda pacaetuataponame paneyavenonaenexa bepejiobivi, Dioso pejumecovënëtsivi, Jerusalén tomarapijivi. Apo jitsipaenë picani icatsia patacatoyaquinaenexa bajaraxua yabara. <sup>2</sup> Tsipaji baja yapëtaniji pacuenia bitso jamatabëpayavenoname bajarapamonae. Bajaraxuata pacasivajamatabëcuenebarëyatsi. Nexata paxamë yabara jumaitsinë Macedonia nacuapijivijavabelia: “Acaya nacuapijivi, Corinto tomarata penacaetuatabiabi, imata baja cajena pavaimi najamatabëcuenevereta perajutsinexa ofrenda Jerusalén tomarapijivijavabelia,” janë paxamë yabara. Nexata Macedonia nacuapijivi itsa pacavënëlivaisitane paneyavenonaejavanexa Jerusalén tomarapijivi, Macedonia nacuapijivi ata ayaibitsaëtoxaneto tocaetuatapona ofrenda peyavenonaenexa Jerusalén tomarapijivi. <sup>3</sup> Nexata pacatoitorobatsi Titobana papecayavenonaenexa paneveretsinexa baja bajarapaofrenda panecaetuatsijava panerajutsinexa Jerusalén tomarapijivi. Tavajënaelia itsa apo paveretsimë tsipae ofrenda panecaetuatsijava, paxamë yabara pexaniacuena tajumaitsijava, najumecovëauranë tsipae Macedonia nacuapijivijavabelia. <sup>4</sup> Tsipaji itsamonae Macedonia nacuapijivi belia naponaejitsipa tapëta paxamëjavabelia. Itsa bajarapamonae taejitsipa bajarapaofrenda apo paneveretsijava, nexata bitso paxamë yabara auranë tsipae. Tsipaji paxamë yabara bajaya baja jumaitsinë: “Corinto tomarapijivi jamatabëveretapona baja ofrenda pecaetuatsijava,” janë paxamë yabara. Nexata paxamë ata bitso pauramë tsipae. <sup>5</sup> Bajaraxuata jamatabëjumaitsinë: “Titobana Corinto tomarabelia tavajënaeyabelia itorobianajë,” jamatabëjanë. Nexata Titobana pacajamatabëcuene yavenonaena ofrenda panecaetuatsijava, paneveretsinexa baja pacuenia najumecapanepaeya panetocaëjëtame. Nexata baja tavajënaelia bajarapaofrenda itsa paxaniavaetabuatsianame, panajamatabëcueneitajëtsianame Jerusalén tomarapijivi paneasivaxae paneyavenonaejava, apo ëpatacaitorobixae.

<sup>6</sup> Pacanaëjère mapalivaisije. Tsiquirijavayo peubinë, tsiquirijavayo pijinia batopitsapatsi. Ayaijava pijinia peubinë, ayaijava batopitsapatsi. Nexata ayaijava itsa parajutsianame itsamonaejavabelia, Dioso juya pacarajutsiana ayaijava. <sup>7</sup> Nexata caejivi canacujitsia berajuta pacuenia najamatabëcuenevereta perajutsinexa. Pëtsa pajamatabëjumaitsimë: “Apo jamatabërajutsi atanë picani, itsiata taneitorobixae, rajutsianajë,” pajamatabëjamë pëtsa. Tsipaji pajivi rajuta itsajivijavabelia jamatabëcuenebarëyaya, Dioso asivatsi. <sup>8</sup> Dioso baja cajena caëjëpatsi papecarajutaponaenexa pacuenia panamatavenoname matatoxenetsia. Nexata xua panamatavenoname, paxainaponaename. Pacatonacopatsiananua panerajutsinexa bepejiobivijavabelia. <sup>9</sup> Dioso pejumelivaisibaxutota jumaitsi mapacueniaje:

Ponë rajutabiaba bepejiobivi panamatavenonaecuene, bajaraponë pexaniacuene exanabiaba Dioso pitabarata. Nexata bajarapacuene Dioso apo nacofënëtsi daxitamatabijavabelianexa,

jai Dioso pejumelivaisibaxutota.

<sup>10</sup> Dioso rajuta jivi peubixunexa. Bajaraxuacujinae icatsia Dioso pejamatabëcueneta penaveretsixu capitsapa penotsinexa jivi pexaejavanexa. Bajara pijinia pacuenia Dioso pacarajutsiana panexainaejavanexa, panerajutsinexanua bajaraxuayajuvënëjjava bepejiobivijavabelia. Pacacaëjêpaeyaexanaenanua ëpexaniacuene ayaijava paneexanaenexa. <sup>11</sup> Bajarapacuenia Dioso pacarajutsiana panexainaenexa ayaijava. Nexata pacacaëjêpaena bajaraxuayajuvënëjjava juya panerajutsinexa bepejiobivijavabelia. Nexata paofrenda panerajutame patatocaponanexa Dioso pejumecovënëtsivi, Jerusalén tomarapijivi, itsa parajutsianajê bajarapamonae, pexaniajamatabëcuene rajutsiana Diosojavabelia bajarapacuenia paneyavenonaexae. <sup>12</sup> Bajarapacuenia Dioso pejumecovënëtsivi, bepejiobivi, itsa parajutame, payavenoname bitso penamatavenonaejavata. Bajarapamonae paneyavenonaejava itsa taena, pexaniajamatabëcuene Diosojavabelia perajutabiabijava pematatsënëa bitso pexaniajamatabëcuene rajutsiana Diosojavabelia. <sup>13</sup> Bajarapacuenia Jerusalén tomarapijivi ofrenda itsa parajutsianame paneyavenonaenexa, bajarapamonae patsitanajamatabëcuene itajëtsianame pepacuene xaniajai panejumecovënëtsijava pexanialivaisi, Cristo pelivaisi. Nexata bajarapamonae pexaniajamatabëcuene rajutsiana Diosojavabelia Cristo pelivaisi panejumecovënëtavanapaejava yabara. Ofrenda ata panerajutsijava Jerusalén tomarapijivi, paofrenda ata parajutame itsamonaejavabelia, bajaraxua ata yabara Jerusalén tomarapijivi pexaniajamatabëcuene rajutsiana Diosojavabelia. <sup>14</sup> Nexata bajarapamonae bitso asivaya pacajamatabënajinaeya pacatovajëtabiabiana Diosojavabelia. Tsipaji paxamë bajarapamonae payavenoname Dioso pejamatabëcueneta papecaitorobixae. <sup>15</sup> Vaxaitsi pexaniajamatabëcuene rajutabiabatsi Diosojavabelia. Tsipaji Dioso pexënato athëbëvetsica nacatoitorobica vajanacasivatêpaenexa mapanacuataje. ¡Cristo vajanacasivatêpaejava pexaniacuene bitso!

## 10

*Pacuenia Pablo navajunupaeba Cristo pitorobijavatsi Dioso pejumelivaisi daxitanacuanëjjava jivi petsipaebanajetarucaenexa yabara pelivaisi*

<sup>1</sup> Pacuenia Cristo pexaniacuena pacaitorobijitsipa, bajarapacuenia xanë ata pexaniacuena ajumesaëya pacaitorobatsi. Itsiata baitsi jane itsamonae paxamëyajuvënëvi xanë yabara jamatabëcuenenavëxaniabiaya jumai tsabiabi: “Itsa abaxë Pablo tajë nacavecuaponapona, ajumelivaisisaëya nacatoyaquinabiabarena. Itsiata baitsi jane majotaje, vaxaitsijavata, itsa patajopaena, piaitejepaebinëcuenia patajopaena. Ajumejibia ponaponaena piauimeuraxae,” jai tsabiabi paxamëyajuvënëvi xanë yabara jamatabëcuenenavëxaniabiaya. Itsiata bajarapacuenia apo itsinë tsane. <sup>2</sup> Nexata pexaniacuene pacavajëtatsi. Pëtsa itsajamatabëcuene panetoexaname, itsa patsialiajê paxamëjavabelia, ayaijumeta pacabijataeya patacamuxujiobianiva. Itsamonae paxamëyajuvënëvi xanë yabara jamatabëcuenenavëxaniabiaya jumai tsabiabinua: “Pablo apo ponapona Dioso pejumecovënëtsinëcuenia. Saya ponapona Dioso apo pejumecovënëtsinëcuenia. Yajavaponapona pijaperujumatabëcuene,” jai tsabiabi paxamëyajuvënëvi xanë yabara. Bajarapacuenia xanë yabara pecuaicuajitsabiabivijavabelia ayaijumeta bijataeya cuaicuajianë tsane. <sup>3-4</sup> Mapanacuapijivi, Dioso apo pejumecovënëtsivi, saicayacuenia nayajiviyapëtane pijavajabitsaëvecua penaevetsinexa pitsacueniabiyantatsi. Vaxaitsi ata mapanacuata vajajinavanapaevi, Dioso vajajumecovënëtsivi, saicayacuenia pijinia nayajiviyapëtanetsi vajanaevetsinexa dovathivecua. Dovathivecua apo naevetsitsi mapanacuapijicueneta. Pajamatabëcuenesaë Dioso nacarajuta, bajarapajamatabëcuenesaëta jamatabëcueneamoneyabaponatsi dovathi. <sup>5</sup> Nexata Dioso pejamatabëcuenesaëta, paajibiaexanaponajê jivi Dioso yabara penajumetsënëtsilivaisimi. Bajarapamonae dovathi pejamatabëcueneta itorobatsi penajumetsënëtsilivaisi petsipaebabiabinexa itsamonaejavabelia. Nexata pamonae Dioso yabara penajumetsënëtsivi, pajumecovënëtsiaexanaponajê Cristo pelivaisi Dioso pejamatabëcuenesaëta. Itsamonae

pijinia dovathi pejamatabëcueneta beayaijamatabëcuenevi natane. Pamonaë bajarpacuenia najamatabëxaina, apo yapëtae Dioso. Bajaraxuata bajarapajamatabëcuenemi paajibiaexanaponajë baja. Nexata pamonaë ata bajarapacuenia beayaijamatabëcuenevi natane, pajumecovënëtsiaexanaponajë Cristo pelivaisi Dioso pejamatabëcuenesaëta. <sup>6</sup> Bajarapacuenia paxamëjava ata paexanaponaenajë. Paxanë panajamatabëcuenevertajë pataexanaenexa mapacueniaje. Paxamë baja xaniavaetsia Dioso itsa pajumecovënë-tavanapaenaxa, paxanë pacavecuacapitsapaenatsi pamonaë apo jitsipae patanejumecovënëtsinexa Cristo pelivaisi.

<sup>7</sup> Paxamë raja saya jema pataneme daxitajivi. Nexata daxitajivi pataneme pacuenia Dioso apo pejumecovënëtsivi tane daxitajivi. Nexata apo payapëtaemë pacuenia paxanë pajamatabëcueneitsinë. Pajivi nayapëtane Cristo pijajivitonëcuene, bajarapajivi bepaneyapëtane paxanë ata Cristo papijajivicueneënë. <sup>8</sup> Paxamë meta xanë yabara pajamatabëjumaitsimë tsabiabi: “Pablo saya bitso navajunupaebabiaba Dioso pitapetsijavatsi apóstolenënexa,” pajamatabëjamë meta tsabiabi xanë yabara. Dioso baja cajena paneitoroba patacajamatabëcuene asaëyaexanaenexa. Apo paneitorobi patacajamatabëcuene faefaenaëyaexanaenexa. Bajaraxuata apo ajumeuranë tsabiabi tanavajunupaebabiabijava apóstolenëjavanë. <sup>9</sup> “Pablo saya nacajamatabëcuenenabenajacaëya exanabiaba vajanacatoyaquinaelivaisianëta,” panejajiva xanë yabara apo jitsipañë. Tsipaji bajaraxua yabara apo pacatoyaquinaetsi. <sup>10</sup> Itsamonae xanë yabara jumai tsabiabi: “Pablo ajumelivaisisaëya nacatoyaquinabiabarena. Itsiata bajaraponë itsa patajopa majotaje, vaxaitsijavata, apo ajumesaë tsabiabi. Saya ajumelivaisixaebi tsabiabi,” jai tsabiabi itsamonae xanë yabara. <sup>11</sup> Itsiata baitsi jane pamonaë bajarapacuenia jumai tsabiabi xanë yabara, beyapëtane pacuenia bajarapamonaejavabelia exanaejitsianë itsa papatsialiajë paxamëjavabelia. Pacuenia baja pacatoyaquinialiaitsi taexanaenexa paxamëjavabelia, bajarapacuenia exanaenajë paxamëjavabelia.

<sup>12</sup> Palivaisi paxanë pacatsipaebabiabatsi, bajarapalivaisivecua saicayalivaisi itsamonae pacatsipaebabiaba. Bajarapamonae apo canaëjëtsi pacuenia Dioso pejumelivaisibaxutota jumaitsi. Nexata bajarapamonae namataenetsia natane bepexaniamatabëcuenevi. Nexata pamonaë apo bajarapamonae yajuvënëvi, bepibisiajamatabëcuenevi tane. Saya xua bajarapamonae tsitaxanepanatsi, bajaraxua yabara jumai tsabiabi: “Maxuaje pexaniacuene,” jai tsabiabi. Xua pijinia apo tsitaxanepanaetsi, bajaraxua yabara jumai tsabiabi: “Maxuaje pibisiacuene,” jai tsabiabi. Bajarapamonae cajena bitso apo yapëtae. Paxanë raja bajarapacuenia apo pajamatabëcueneitsinë. <sup>13</sup> Paxanë Dioso paneitoroba Dioso pijacuene patatonacuenebinexa. Nexata panacuanëjava Dioso paneitoroba, bajarapanacuanëjava Dioso pejumelivaisi patsipaebanajetarubenajë. Dioso paneitoroba tajë ata paxamë paCorinto tomarapijivimejavabelia ata pataponaenexa patacatsipaebinxaxa pejumelivaisi. Nexata itsa panavajunupaebabiabajë Dioso patanitorobijava, xuayovajëto Dioso panetocopata patatonacuenebinexa, panavajunupaebabiabajë. Ayailivaisi apo panavajunupaebabiabinë saya itsamonae pataneyaiyataenexa patanavajunupaebijava yabara. <sup>14</sup> Bajaraxuata itsa papatajë paxamëjavata, pacatsipaebatsi pexanialivaisi, Cristo pelivaisi. Tsipaji bajarapanacuanëjava Dioso paneitoroba pejumelivaisi patacatsipaebinxaxa. Bajarapalivaisi copiaya baja paxanë pacatsipaebatsi. <sup>15</sup> Itsamonae baja Cristo pelivaisi jumecovënëta itsamonae petsipaebixaxaetsi. Nexata Cristo pelivaisi pejumecovënëtsivi yabara najumetsënëtsiaya apo pajumaitsinë tsipae mapacueniaje: “Paxanë raja patatsipaebixaxa, bajarapamonae jumecovënëta Cristo pelivaisi,” apo pajanë tsipae. Pacatojitsipatsi panevajënaeyabelia panejumecovënëtanapaenexa Dioso. Nexata pajitsipajë orijibia patacatsipaebavanapaenexa pexanialivaisi, Cristo pelivaisi. Itsiata baitsi jane ëpanacuanëjava Dioso paneitoroba patatsipaebavanapaenexa pejumelivaisi, bajaraëpanacuanëjava patsipaebavanapaenajë. <sup>16</sup> Nexata paxamë majotaje patacatsipaebicujinaë, panepënëyabelia penaetomaranëjava ata jamatabëpatsipaebajë pexanialivaisi, Cristo pelivaisi. Apo pajitsipañë patatsipaebinxaxa bajarapalivaisi itsaxuayo baja patavajënaëya itsamonae

tsipaebapona bajarapalivaisi.

<sup>17</sup> Pajivi itsamonaejavabelia navajunupaeba pexanaejava, benavajunupaeba Dioso peyavenonaejavatsi. Bajarapacuenia benavajunupaeba pejumetaevitsi peyaiyataenexa Dioso. Bajarapajivi apo benavajunupaebi pijacuata pexanaejava jivi saya peyaiy-  
ataenexatsi. <sup>18</sup> Pajivi pijacuata navajunupaebabiaba: “Xanë ra bitso pexaniacuen  
exanabiabajë,” jai tsabiabi, bajarapajivi ajumematamobi. Tshipaji saya pijacuata nava-  
junupaebabiaba. Itsiata baitsi jane pajivi yabara vajatuxanenë jumaitsi: “Mara pajivije  
xaniavaetsia netoponapona,” jai, nexata tojumenamatamotatsi.

## 11

### *Pablo pelivaisi, penajumetsënëtsilivaisi petsipaebaponaevi ata, yabara pelivaisi*

<sup>1</sup> Natsiquejemalivaisi pecuaicuaijainë, xua exana, pijacuata banavajunupaeba  
itsamonaejavabelia. Bajara pijinia pacuenia xanë ata, xua exanajë, tajacuata  
pacanavajunupaebijitsiatsi. Bajarapacuenia tajacuata pacanavajunupaebi ata tsanetsi,  
itsiata jitsipajë xaniavaetsia ajamatabëcuenesaëya patanenamuxunaevetsinexamë.  
<sup>2</sup> Bajarapacuenia pacanavajunupaebijitsiatsi tshipaji bitso pacaasivatsi pacuenia  
Dioso pacaasiva. Pacatojitsipatsi ëCristo panejitsipaenexa. Pacuenia petiriva caenë  
jitsipa ëpamonanexa, bajarapacuenia caenë Cristo pajitsipare. <sup>3</sup> Bajayata Evapijiva  
yamaxëitojorobatsi dovathi penajumetsënëtsicueneta. Pacacacujunavatsi paxamë  
ata bajarapacuenia dovathi papecayamaxëitojorobianiva. Nexata paxamë yabara  
jamatabëjumaitsinë mapacueniaje: “Dovathi meta jamatabëcuenebijianaenatsi Corinto  
tomarapijivi. Cristo meta pejitsipaejavami copabiana,” jamatabëjanë paxamë yabara.  
<sup>4</sup> Pacacacujunavatsi penajumetsënëtsilivaisi petsipaebaponaevi papecatsipaebianiva.  
Tshipaji bajarapamonae pata baja paxamëjavata. Xanë Jesús pelivaisi  
pacatsipaebabiabatsi. Nexata Jesús pelivaisivecua bajarapamonae saicayacuenia  
pacatsipaebabiabi ata, itsiata bajarapalivaisi panamuxunaevetabiabame xaniavaetsia.  
Espíritu Santo, ponë pacatsijamatabëeca, pelivaisi, xanë pacatsipaebabiabatsi.  
Nexata Espíritu Santo pelivaisivecua saicayacuenia bajarapamonae pacatsipaebabiabi  
ata, itsiata bajarapalivaisi ata panamuxunaevetabiabame xaniavaetsia. Xanë  
pacatsipaebabiabatsi pexanialivaisi papecacapanepaelivaisinexa Diosojavabelia.  
Nexata bajarapalivaisivecua bajarapamonae saicayalivaisi pacatsipaebabiabi ata,  
itsiata panamuxunaevetabiabame xaniavaetsia. <sup>5</sup> Pamonae penajumetsënëtsilivaisi  
pacatsipaebabiaba, ayaijamatabëcuenivi nataeyabiaba. Paxanë paapóstolevinë  
bajarapamonae bitso panevecuaayaijamatabëcuenivi natane. Itsiata baitsi jane  
xanë bajarapamonaevecua beveliajamatabëcuenenënë apo nataenë. <sup>6</sup> Jivijavabelia  
xaniavaetsia livaisi tatsipaebinexa, apo necujani ata, itsiata xaniavaetsia yapëtaniji  
xua yabara tsipaebajë. Xaniavaetsia Jesús pelivaisi patayapëtaejava paneyapëtaenexa,  
pacatsitanajamatabëcuene itajëtabiabatsi paxamëjavata itsa pacatsipaebavanapatsi  
Jesús pelivaisi.

<sup>7</sup> Paxamëjavata itsa pacatsipaebaponaponatsi pexanialivaisi papecacapanepaeliv-  
aisinexa Diosojavabelia, itsacuenejavayo ata paxamëjavabelia apo pacavajëtsitsi. Xanë  
tacobeta asaëyata nacuenebabiabajë tanaevetsinexa. Bajarapacuenia betajibicuenia  
nacuenebabiabajë tanaevetsinexa pamatacabi pacatsipaebaponaponatsi Jesús pelivaisi.  
Nexata baja pajumecovënëtame Jesús pelivaisi itsamatacabi panexainanexa mata-  
cabi apo pevereverecaejava. <sup>8</sup> Itsamonae Dioso pejumecovënëtsivi itsa netoitoroba  
palata, itsiata pitajë paxamëjavata tanaevetaponaponanexa bajarapapalatata. Nexata  
pacayavenonaponaponatsi. Bajarapacuenia paxamëjavata naevetaponaponajë. Pax-  
amë apo panerajutsimë palata. <sup>9</sup> Nexata pamatacabi paxamëjavata ponaponajë, na-  
matavenonae atanë, apo pacavajëtsitsi panexainayajuvënëjava patanerajutsinexamë.  
Itsiata Dioso pejumecovënëtsivi, Macedonia nacuaverena pepatsivi, netocapata daxita  
tanamatavenonaejava. Bajarapacuenia paxamëjavata ponaponajë itsacuenejavayo ata

pacavajëtsinejevatsi patacajamatabëitonotsiyaniya. Apo najamatabëxainaenë bexëajavabelia ata patacavajëtsinexa. <sup>10</sup> Yapëtaniji Cristo pelivaisi pepacuene pexaniajailivaisicuene. Bajaraxuata daxita Acaya nacujava Cristo pelivaisi amoneya asaëya tatsipaebaponaejava, sivajamatabëcuenebarëyanë. <sup>11</sup> Itsamonae xanë yabara jamatabëcuenenavëxaniabiaya pacajumaitsi: “Pablo raja apo pacaasiva. Bajaraxuata apo pacavecuapitsi palata,” pacajai. Jemajai raja bajarapamonae. Dioso raja yapëtane bitso patacaasivajava.

<sup>12</sup> Itsiata tavajënaeyabelia Dioso pejumelivaisi pacatsipaebaponaenatsi pacavajëtsinejevatsi itsacuenejavayo ata. Pamonaen penajumetsënëtsilivaisi pacatsipaebabiaba, bajarapamonae pacamatamoyanijobabiaba papecatsipaebimatamo. Bajarpacuenia papecamatamoyanijobabiabixae, nexata toacuenebitsi pevajënaeyabelia papecajumaitsaponaenexa: “Paxanë ata patonacuenebavanapajë Dioso pacuenia Pablo tonacuenebapona Dioso,” papecajainexa. <sup>13</sup> Bajarapamonae apo pepo apóstolevi. “Paxanë raja paapóstolevinë,” itsa pacajai, saya raja pacayamaxëitojoroba. Paxanë Cristo papijajivinë, paapóstolevinë, bajarapamonae saya panecuenecataeya apóstolevi naexana. <sup>14</sup> Paxamë apo bepasivajamatabëcuenenabenajacaemë bajarapamonae. Bajarpacuenia saya bajarapamonae exanavanapa papecayamaxëitojorobinexa. Dovathi raja caëjëpatsi Dioso bepijaängelne penaexanaenexa, bepexaniajailivaisi itajara petsipaebinë jivi petaenexatsi. <sup>15</sup> Nexata dovathi pijajivi ata pexaniacuene itajara exanavanapae ata, itsiata apo besivajamatabëcuenenabenajacaetsi. Paneconivajëto bajarapamonae xaina, bajarapaneconivajëtota itsamatacabi Dioso naneconitsiaexanaena bajarapamonae.

*Pacuenia Pablo apóstolenëxae nabejibitsiaponapona yabara pelivaisi*

<sup>16</sup> Icatsia pacajumaitsi. Xua aeconoxae pacajumai tsanetsi, bajaraxua yabara pëtsa panetaneme betanematajemabinë. Bajarpacuenia panetae atamë, itsiata panenamuxunaevere palivaisi pacatsipaebijitsiatsi. Pacuenia peyamaxëitojorobiapóstolevi ajumeurajibia pacanavajunupaebabiaba paneyaiyataenexa, bajara pijinia pacuenia xanë ata ajumeurajibia pacanavajunupaebijitsiatsi pataneyaiyataenexamë. <sup>17</sup> Vajatuxanenë picani apo nitorobi patacanavajunupaebinexa. Itsiata pacuenia pematajemabinëtsi ajumeurajibia banavajunupaeba xua exana, bajarpacuenia xanë ata aeconoxae ajumeurajibia pacanavajunupaebijitsiatsi pataneyaiyataenexamë. <sup>18</sup> Pamonaen peyamaxëitojorobiapóstolevi, ayaijamatabëcuenevi nataeyabiaba. Nexata ajumeurajibia pacanajamatabëcuene vajunupaebabiaba bajarapamonae. Nexata xanë ata bajarpacuenia ajumeurajibia pacanajamatabëcuene vajunupaebijitsiatsi. <sup>19</sup> Paxamë bitso ayailivaisi bepaneyapëtaevi panataneme. Itsiata apo payapëtaemë. Tsipaji saya jamatabëcuenebarëyaya panamuxunaevetabiabame palivaisi pacatsipaebabiaba peyamaxëitojorobiapóstolevi. Pacuenia pematajemabinëtsi ajumeurajibia banavajunupaeba xua exana, bajarpacuenia ajumeurajibia pacanavajunupaebabiaba peyamaxëitojorobiapóstolevi. <sup>20</sup> Bajarapamonae bepapijajivitonëmëcuenia pacaitorobabiabi ata, itsiata xaniavaetsia panamuxunaevetabiabame. Panexinaejavaxi pacavecuaveretaponaen ata, itsiata xaniavaetsia panamuxunaevetabiabame. Bijiaya pacanaëcotabiabi ata, itsiata xaniavaetsia panamuxunaevetabiabame. Pacaitabarapacababeyabiabi ata, itsiata xaniavaetsia panamuxunaevetabiabame. <sup>21</sup> Paxanë bajararpacuenia apo pacaexanaetsi pamatacabi pajinavanapajë paxamëjavata.

Xua yabara bajarapamonae ajumeurajibia pacanavajunupaebabiaba, xanë ata necaëjëpa bajarapitsicuene yabara ajumeurajibia patacanavajunupaebinexa pataneyaiyataenexamë. <sup>22</sup> Bajarapamonae ayaijamatabëcuenevi nataeya itsa pacanavajunupaebabiaba, pacajumai tsabiabi paneyaiyataenexa: “Paxanë raja pajudíovinë,” pacajai tsabiabi. Xanë ata raja judíonënë. Itsiata bajararpacuenia apo pacajumaitsiatsi pataneyaiyataenexamë. Bajarapamonae pacajumai tsabiabinua: “Paxanë raja Israelpijinë papemomoxinë,” pacajai tsabiabi. Xanë ata raja Israelpijinë pemomonë. Itsiata bajararpacuenia apo pacajumaitsiatsi. Bajarapamonae pacajumai

tsabiabinua: “Paxanë raja Abrahampijinë papemomoxinë,” pacajai tsabiabi. Xanë ata raja Abrahampijinë pemomonë. Itsiata bajarapacuenia apo pacajumaitsitsi. <sup>23</sup> Bajarapamonae Cristo beprijajivi nataeya ajumeurajibia pacanavajunupaebabiaba. Xanë xaniavaetsia Cristo tonacuenebaponaponajë. Xanë picani apo jitsipañë patacanavajunupaebinexa. Itsiata Cristo tatonacuenebaponaponaejava, xanë ajumeurajibia pacanavajunupaebijitsiatsi. Pacuenia pematajemabinëtsi ajumeurajibia banavajunupaeba xua exana, bajarapacuenia ajumeurajibia pacanavajunupaebijitsiatsi. Itsiata mapacuenia pacanavajunupaebijitsiatsije. Xanë bitso Cristo tonacuenebaponaponajë bajarapamonae matatoxenetsia. Bajarapamonae matatoxenetsia xanë bitso nejumaconibabeyabiaba penaneconitsivi pejumaconibabeyabiabimacata. Bajarapamonae matatoxenetsia nenaneconitsiaexanabiaba penaneconitsivi pejebabiabibota taneetsinexa. Bajarapamonae matatoxenetsia anijatonë imoxo tanebeyaxuababiabi. <sup>24</sup> Cinco xuabeje judíovi nevaetaba tanenaneconitsiaexanaenexa. Caenevaetabi canacujitsia nejumaconibabeyabiaba penaneconitsivi pejumaconibabeyabiabimacata. Itsa nejumaconibabeyabiaba, treinta y nueve xuabeje nejumaconibabeyabiaba caenevaetabita. <sup>25</sup> Acueyabi icatsia xuabeje apo judíovi nevaetaba tanenaneconitsiaexanaenexa. Bajaraxuanë saicaya naebota nejumaconibabia. Icatsia itsamatacabijavabelia caeto judíovi ibotonëta netsecona. Acueyabi pijinia panamutobeje menia barcota tanaponaejavata, acueyabi xuabeje nayabubunajë manuameneta. Caepayajopaetanë, caemeravi, caematacabi yajava, manuameneta juenajetarucajë. <sup>26</sup> Xanë ayaicuenia jinarutabiabajë Cristo pelivaisi jivi tatsipaebaponaejava. Nexata itsajavata netsiayai tsabiabi menia taponabiabijava. Itsajavata namutua itsa ponajë, netsiayai tsabiabi tanevecuanacobetoxotsinexa tacobecovëjavaxi. Itsajavata netsiayai tsabiabi tajanacuapijivi taneitsacueniabinexa. Itsajavata netsiayai tsabiabi saicayanacuapijivi taneitsacueniabinexa. Itsajavata netsiayai tsabiabi tomaranëjava, petusato nacuanëjava ata, manuamenejava ata. Itsajavata netsiayai tsabiabi pamonaejava Dioso bepejumecovënëtsivi penataevijava. <sup>27</sup> Itsajavata bitso nacuenebabiabajë. Cueranabiabajënu. Itsajavata apo majitabiabinë. Itsajavata bitso tajani tsabiabi. Meranua jitsipabiabajë. Itsajavata taxaejava xaenejevanë ponaponabiabajë. Itsajavata bitso aquenë tsabiabi apo taxainaexae tanaxatatsijava.

<sup>28</sup> Bajaraxua icatsia pematatsënëa mapacuenije. Caematacabi canacujitsia bitso sivanajamatabëxainabiabajë caetomarapijivi canacujitsia, Dioso pejumecovënëtsivi. <sup>29</sup> Pajivi jamatabëcuenecuerana Dioso pejumecovënëtsijava, xanë ata sivajamatabëcuenecueranabiabajë. Pajivi itsajivi pejamatabëcueneta pibisiacuenexanaeyaexanatsi pejopaenexa Dioso pejumelivaisivecua, bajarapajivi yapijiviauranë tsabiabi Diosojavabelia. Baraanaepanabiabajënu pajivi pejamatabëcueneta jopaeyaexanatsi. <sup>30</sup> Itsajivi itsa nitoroba tanajamatabëcuenevajunupaebinexa, nexata najamatabëcuenevajunupaebianajë tanajamatabëcueneitajëtsinexa tajamatabëcuenefaenaejava. <sup>31</sup> Vajatuxanenë Jesucristo paxa Diosojavabelia pexaniajamatabëcuene berajutabiabatsi daxitamatacabijavabelianexa. Dioso baja cajena yapëtane jivi tatsipaebilivaisi pexaniajaicuenë. <sup>32</sup> Imata ponaponajë Damasco tomarata. Nexata pepo iraevetinë, Aretasvënënë, eveta bajarapaira. Nexata pijajivitonë eveta Damascotomara. Damascotomara matatoyorotsia yacaranata piatayaëibopanaxanetota. Bajara payacaranatsijavaxaneto ibopananë mataropotsia catsanaeya pefaratsijava. Bajaraxua apia athëbëabetsia pacuenia pinijinaejavaxaneto apia. Nexata Damascotomara pevetsinë pijajivi itoroba tanevajënaeevetsinexa pabaupajava pitsapaejitsianë picani bajarapatomaravecua. Bajaraponë itoroba pijajivi tanevaetabinexa tanecaponaenexa picani penaneconitsivi pejebabiabiboyabelia. <sup>33</sup> Itsiata baitsi jane itsamonae Dioso pejumecovënëtsivi bemapirecuenia pexanaejavaxanetoënëta neecaeyaexana. Nexata Damascotomara matatoyorotsia peyacaranatsi ibopanaxanetojumabelia neyamaëyacopareca athëbëyo perucaeventanavojotualia. Bajarapacuenia Damasco tomarata vecuapanepajë

Damascotomara pevetsinē pijajivi.

## 12

*Pacuenia Pablo navajunupaeba bemajitsinaebota vajatuxanenē petsitanaitajētabiabijavatsi yabara pelivaisi*

<sup>1</sup> Apo netsitaxanepanae picani ajumeurajibia patacanavajunupaebinexa. Itsiata baitsi jane pamonaē peyamaxēitojorobiapóstolevi, ajumeurajibia pacanavajunupaebabiaba saya paneyaiyataenexa. Nexata xanē ata ajumeurajibia pacanavajunupaebatsi bemajitsinaebota vajatuxanenē Jesucristo tanetsitanaitajētabiabijava. Neyapētaeayaexananua pajamatabēcuenelivaisi xaina xuanē ata netsitajētabiaba. <sup>2-3</sup> Catorce pavaibeje xainajē tanecapanepaecujinae athēbēabetsia Dioso pijanacuayabetsia. Apo nayapētaenē athēbēabetsia tanecaponaējava taperabēto yajava. Itsa jume, ētajamatabēcuenē meta saya capona. Caenē Dioso yapētane pacuenia necapona athēbēabetsia. <sup>4</sup> Itsiata necapona paraísojavabetsia. Bajarajotatsia jumetaniji Dioso muetsia pexainabuatsilivaisi. Bajarapalivaisi Dioso apo netocopatsi tatsipaebinexa itsajivi ata. <sup>5</sup> Bajarapacuenia athēbēabetsia tanecaponaējava tanavajunupaebinexa, necaējēpa picani jivi taneyaiyataenexa. Itsiata apo navajunupaebabiabinē tsane bajaraxua. Ētasaējibijava saya navajunupaebabiabianajē. <sup>6</sup> Ayailivaisi picani xainajē ajumeurajibia tanavajunupaebaponaenexa pacuenia taniji athēbētatsia. Ajumeurajibia itsa navajunupaebaponaējitsipajē, apo navajunupaebaponaenē tsipae betanematajemabinēcuenia. Tsipaji ēpexaniajailivaisi navajunupaebaponaējitsipajē. Itsiata baitsi jane apo navajunupaebaponaenē tsane daxita xua yapētaniji. Tsipaji apo jitsipaenē bajarapalivaisita jivi taneyaiyataenexa. Biji rajane jitsipajē jivi taneyaiyataenexa taexanaponaējava yabara, livaisi tatsipaebaponaējava ata yabara.

<sup>7</sup> Dioso netocopata tanavixaetaeyabinexa. Bajarapacuenia Dioso netocopata tanavixaetaeyabiabinexa tajacuata tanabarajamatabējumaitsiyaniva mapacueniaje: “Xanē baja cajena pinijicuenē Dioso netsitajētabiaba xua itsajivi ata apo tae. Bajaraxuata bitso xanē ayaijamatabēcuenenēnē daxitajivi matatoxenetsia,” tanabarajamatabējaiyaniva, Dioso netocopata tanavixaetaeyabiabinexa. Dioso netocopata dovathi pejamatabēcueneta tanevixaeitonotabiabinexa daxitamatacabi. <sup>8</sup> Diosojavabelia picani vajētajē acueyabi xuabeje tanevecuaajibiaexanaenexa bajarapavixae. <sup>9</sup> Itsiata baitsi jane vajatuxanenē nejumaitsi mapacueniaje: “Jume. Apo cavecuaajibiaexanaetsi tsane. Bitso casivatsi. Nexata cayavenonaenatsi daxita xua namatavenoname. Pajivi apo jamatabēcuenecaējēpae atatsi pesaēta tanetonacuenebinexa tajacuene, itsiata baja itsa caējēpatsi tanetonacuenebinexa, nayapētane tayavenonaecuene,” nejai vajatuxanenē. Bajaraxuata vajatuxanenē pijacuene tatonacuenebinexa, xanē tasaēta apo tanejamatabēcuenecaējēpaejava, nasivajamatabēcuenēbarēyanē. Tsipaji Cristo pesaēta neyavenonabiaba daxitacuene yabara. <sup>10</sup> Apo tanejamatabēcuenecaējēpaexae tasaēta tatonacuenebinexa vajatuxanenē pijacuene, nasivajamatabēcuenēbarēyanē tsabiabi. Itsamonae pibisiacuenia itsa nebijataeyabiaba Cristo pijajivitonēxaenē, nasivajamatabēcuenēbarēyanē tsabiabi. Itsacuenejavaxi itsa namatavenonabiabajē, itsiata nasivajamatabēcuenēbarēyanē tsabiabi. Itsamonae itsa nebejiobiaexanabiaba Cristo pijajivitonēxaenē, itsiata nasivajamatabēcuenēbarēyanē tsabiabi. Itsa netsiayapēbeje tsabiabi tatonacuenebinexa Cristo pijacuene, itsiata nasivajamatabēcuenēbarēyanē tsabiabi. Tsipaji paepatota apo nejamatabēcuenecaējēpae, bajarapaepatota vajatuxanenē bitso nejamatabēcueneyavenonabiaba.

*Pacuenia bitso Pablo sivanajamatabēxaina Dioso pejumecovēnētsivi, Corinto tomarapijivi, yabara pelivaisi*

<sup>11</sup> Pamonaē peyamaxēitojorobiapóstolevi, saya jivi peyaiyataenexatsi ajumeurajibia navajunupaebabiaba pacuenia pematajemabinētsi banavajunupaeba ajumeurajibia. Bajarapacuenia xanē ata navajunupaebajē. Apo jitsipaenē picani tanavajunupaebinexa.

Paxamë xaniavaetsia itsa panevajunupaebijitsipame pacuenia exanaponaponajë paxamëjavata, nexata xanë tajacuata apo navajunupaebinë tsipae. Beveliajamatabëcuenenë atanë, itsiata pamonaë peyamaxëitojorobiapóstolevivecua, xanë apo beveliajamatabëcuenenë. <sup>12</sup> Paxamëjavata itsa ponaponajë, netsiyapëbeje ata, bajayajebi pacatsitaexanaponaponatsi pacuenia Dioso nitoroba. Pacatsipaebaponaponatsi Jesús pelivaisi. Nexata pacatsitaexanabiabatsi pinijicuene taexanaejava Dioso pesaëta. Nexata paneyapëtaneme Dioso taneyavenonabiabijava. <sup>13</sup> Pacuenia taniji daxita Dioso pejumecovënëtsivi, bajarapacuenia paxamë ata pacatanetsi. Nexata itsamonae Dioso pejumecovënëtsivivecua bepaveliajamatabëcuenëvimë, apo pacataetsi. Itsamonae Dioso pejumecovënëtsivi, neyavenonabiaba itsajota namatavenonajë. Itsiata bajarapacuenia paxamë ata pataneyavenonaenexamë, apo pacavajëtsitsi. Pamatacabi ponaponajë paxamëjavata, apo pacavajëtsitsi itsacuenëjavayo ata. Pëtsa itsiata bajaraxua pasivana-jamatabëxainame. Biji rajane pasivajamatabëcuenëbarëyamëre itsacuenëjavayo ata apo patacavajëtsijava.

<sup>14</sup> Mabaja panamutotaje, acueyabi namuto taponae nexa paxamëjavabelia naxaniavaetaponaponajë baja. Itsiata apo pacamatamoyanijobi tsanetsi Dioso pejumelivaisi patacatsipaebimatamo. Tsipaji palata apo jitsipaenë. Jitsipajë rajane xaniavaetsia panejumecovënëtsinexa Dioso. Bepataximë pacatanetsi. Pacuenia pejevaxi paxajavabelia apo rajutsi palata paxa penaevetsinexa, bajara pijinia pacuenia paxamë ata apo panerajutsimë palata tanaevetsinexa. <sup>15</sup> Xanë patacayavenonaenexa, mapacuenia exanaejitsipajëje. Daxita taxinaejavami, veretsipajë jamatabëcuenëbarëyaya. Tasaëtsaponaponaeepatojebi abaxë mapanacuataje, pacayavenonabiabijitsipatsi. Bajara-pacuenia pacayavenonabiabijitsipa patacajamatabëcueneyavenonaenexa, xaniavaetsia Dioso panejumecovënëtsinexa. Tavajënaeyabelia bitso pacaasiva tsaponae atatsi, itsiata covë paxamë juya bevelia saya paneasivamë tsaponae.

<sup>16</sup> Itsamonae paxamëyajuvënëvi xanë yabara jamatabëcuenënavëxaniabiaya jumai tsabiabi: “Xaniajai. Vaxaitsi Pablo apo rajutsitsi palata, Dioso pejumelivaisi vajanacatsipaebimatamo. Itsiata Pablo piatatsacanë. Nexata meta itsacuenia nacayamaxëitojorobiaya nacavecuapitabiaba palata,” jai tsabiabi itsamonae xanë yabara. <sup>17</sup> Itsanë ata cajena, paxamëjavabelia xanë taitorobiviyajuvënë, yamaxëitojorobiaya palata apo pacavecuapitsi. <sup>18</sup> Itorobajë baja Tito peponae nexa paxamëjavabelia papecataenexa. Itorobajëna itsanë Dioso pejumecovënëtsinë Tito peyajavaponae nexa. Nexata pamatacabi Tito ponapona paxamëjavata, ¿pacavajëta tsaja palata? Jume. Apo pacavajëtsi cajena. Paxanëbeje Titobeje panajamatabëcuenëjöpajëbeje. Nexata panacuenëjöpajëbeje.

<sup>19</sup> Panesivajamatabëjumaitsimë raeta: “Bajarapacuenia Pablobana nacanajamatabëcuenelivaisipaeba saya penayajivicuaicuaijainexa vaxaitsi vajananeconitsiaexanaeyaniva,” panesivajamatabëjamë raeta. Bajarapacuenia itsa pacanavajunupaebatsi, apo pacanavajunupaebitsi patacujunavixae patanenaneconitsiaexanaejavamë. Pacatsipaebatsi raja Dioso pitabarata pacuenia Cristo panetojitsipa. Tajamonae bitso patacaasivavi, daxita palivaisi baja pacatsipaebabiabatsi, pacatsipaebabiabatsi patacajamatabëcuenë yavenonaponae nexa. Nexata bajarapalivaisi panevajënaeyabelia pacatsijamatabëvitsabaponaena Dioso papijajivixamë. <sup>20</sup> Pamatacabi ponaenajë paxamëjavabelia, bitso meta najamatabëxainaeya patsianajë paxamëjavata. Aeconoxae pajitsipame tapatsinexa paxamëjavata. Itsiata meta itsa patsianajë paxamëjavata, apo pajitsipaemë tsane patacananeconitsiaexanaenexa. Tsipaji meta apo pacacaxitarabi tsanetsi pexaniacuenia panejinavanapaejavata pacuenia pacatojitsipatsi. Itsa patsianajë paxamëjavata, pacataenatsi meta panenajumeanaenotabiabijava. Pacataenatsi meta panenacaëbabiabijava ata. Pacataenatsi meta panenabaraanaepanabiabijava ata. Pacataenatsi meta apo paneyavenonaejava itsajiviyo ata. Pacataenatsi meta itsamonae pepëya pibisiacuenia najumetsënëtsia panebaracuaicuaijaitsiabijava ata. Pacataenatsi meta itsamonaevecua paayajamatabëcuenëvimë panenataeyabiabijava ata. Pacataenatsi meta apo panenajamatabëcuenëjöpaxae navecuanatsanaeya panejinavanapaejava ata. <sup>21</sup> Paxamëjavata icatsia itsa patsianajë, Dioso meta

pitabarata pacayapijiviaura tsanetsi pibisiacuene paneexanavanapaejava yabara. Bajaraxuata bitso pacasivanajamatabëxainatsi icatsia patacataenexalia. Tsipaji itsa apo pajinavanapaemë tsane pacuenia pacaitorobatsi, patacasivajamatabëcuenebarëyavami, nevecuaajibi meta tsane. Paxamëyajuvënëvi bajayatajavaverenacujinae pibisiacuene pexanavanapaexae, sivajamatabënuenajë. Bajarapamonae pibisiacuene pexanavanapaejava pevitota, apo sivajamatabëcuenebëjai. Apo jamatabëcopatsinua pibisiacuene pexanavanapaejava pevitota.

## 13

*Pacuenia icatsia Pablo itaveta Corinto tomarapijivi Diosojavabelia penaneconitsiyanima yabara pelivaisi*

<sup>1</sup> Aeconoxae baja icatsia ponaejitsianë paxamëjavabelia acueyabi namutonexa. Pibisiacuene pexanaejivi yabara, Dioso pejumelivaisibaxutota jumaitsi mapacueniaje: “Pajivi pibisiacuene exana, xanepana pevjunupaebinxatsi anijajivibeje, acueyabi pajivibeje ata, petaevitsi. Nexata xuacujinae xanepana jane baja penaneconitsiaexanaenexatsi,” jai Dioso pejumelivaisibaxutota. Nexata paxamëjavabelia itsa patsianajë, bajarapacuenia xanë pacananeconitsiaexanaenatsi. <sup>2</sup> Imata panamutomi pacaitavetatsi daxita paxamë pibisiacuene paneexanavanapaejava panecopatsinexa, Diosojavabelia pananeconitsiyanima. Bajarapacuenia itavetajë itsamonae ata pibisiacuene pexanavanapaeyanima. Aeconoxae tajë pacavecuaponaponae atatsi, pacatoyaquinatsi icatsia patacavitetsinexa pibisiacuene paneexanaeyanima. Icatsia paxamëjavabelia itsa patsianajë, pacananeconitsiaexanaenatsi padaxitamë. Caejivi ata apo bejiobiataenë tsane pibisiacuene pexanaeneconi yabara. <sup>3</sup> Itsa pacananeconitsiaexanaenatsi, ajumesaënë tsane patacananeconitsiaexanaenexa. Nexata bajarajota xaniavaetsia paneyapëtaename tayajavacuaijaijitsabiabijava Cristo. Cristo baja cajena pijamatabëcuene-saëjava, pacatsitanajamatabëcueneitajëta itsa pacayavenonaponapona paxamëjavata. <sup>4</sup> Xaniajai rabaja. Pacuenia vaxaitsi mapanacuapijivitsi ajamatabëcuene-saëjibitsi, bajara pijinia itsi Cristo ata mapanacuata itsa naexana pacuenia vaxaitsi banaexanatsi. Nexata Cristo cruzata itsa beyaxuabatsi, Dioso pesaëta icatsia asaëyaexanatsi petëpaecujinae. Paxanë pajamatabëcuene-saëjibi atanë, itsiata aeconoxae Dioso pesaëta Cristo payajavajinavanapajë patacajamatabëcuene-yavenonaenexa.

<sup>5</sup> Jica jane. Panajamatabëcuene-livaisiëjère itsa xaniajai pepacuene Cristo papijajivimë. Itsa pepacuene Cristo papijajivimë, nexata payapëtaename Cristo papecayavaponaponaejava. Itsa Cristo apo papijajivimë, nexata Cristo apo pacayajavaponaponae. <sup>6</sup> Paxanë pajamatabëjumaitsinë paxamë yabara mapacueniaje: “Corinto tomarapijivi vaxaitsi itsa nacacuenecanaëjëtsiana, xaniavaetsia yapëtaena pepacuene Cristo pijajivicuenetsi,” pajamatabëjanë. <sup>7</sup> Pacatovajëtaponatsi Diosojavabelia pibisiacuene paneexanaponaejanë. Bajarapacuenia itsa pacatovajëtaponatsi Diosojavabelia, itsajamatabëcuene apo pacasivanajamatabëxainaetsi. Nexata apo pajamatabëjumaitsinë paxamë yabara: “Itsa bajarapamonae xaniavaetsia jinavanapaena, nexata pijinia daxitajivi nacayapëtaena pepacuene apóstolevicuenetsi,” apo pajamatabëjanë paxamë yabara. Bajarapacuenia Diosojavabelia pacatovajëtatatsi tsipaji pacatojitsipatsi ëpexaniacuene paneexanavanapaejava. Xaniavaetsia itsa pajinavanapaename, nexata itsa papatsianajë paxamëjavabelia, ajibi tsane patacayabarananeconitsiaexanaejava. Pacuenia Cristo panetocopata patananeconitsiaexanaenexa pijaneconi pexainaevi, bajarapacuenia apo pacaexanaetsi tsane. <sup>8</sup> Tsipaji acuenebi patananeconitsiaexanaejava pajivi baja jumecovënëta pexaniajailivaisi, Jesucristo pelivaisi. Pananeconitsiaexanaenajë ëpijaneconi pexainaevi. <sup>9</sup> Aneconijibia itsa pajinavanapaename, acuenebi patacananeconitsiaexanaenexa. Itsiata pacasivajamatabëcuenebarëyatsi. Tsipaji apo paxainaemë paneconi yabara pacananeconitsiaexanaejitsiatsi. Pacatovajëtaponatsinua

Diosojavabelia panevajënaeyabelia panejamatabëcuenevitsabaponaenexa Dioso panejumeconvënëtsijava. <sup>10</sup> Pacatoyaquinaliatsi mapabaxutoje taponaevajënaeya paxamëjavabelia tavajënaelia panenajamatabëcuenexanebinexa pibisiacuene paneexanaejavavecua. Nexata itsa patajopaeliajê paxamëjavabelia, apo pacabijatae tsanetsi. Apo pacananeconitsiaexanaetsinua tsane. Dioso nitoroba patacaevetsinënexa. Nexata itsa patsialiajê paxamëjavabelia, apo jitsipænê tsane patacananeconitsiaexanaenexa. Biji rajane jitsipajê patacajamatabëcuene saëyaexanaejava panevajënaeyabelia paneajamatabëcuenesaënexa Dioso panejumeconvënëtsijava.

<sup>11</sup> Tajamonae, pajamatabëcuenebarëyamëre tsavanapae. Panevajënaeyabelia panajamatabëcuene vitsabiaexanaponare Dioso panejumeconvënëtsijava. Panamuxunaevere palivaisi pacatoyaquinaliatsi. Najamatabëcuenejêpaeya pajinavanapare jamatabëcuenexanepanaeya. Dioso vajanacaasivanê. Bajaraponê jamatabëcuenexanepanaeya nacajinavanapaeyaexana. Nexata Diosojavabelia pacatovajëtabiabatsi Dioso papecayajavaponaponaenexa. <sup>12</sup> Paxamê ata Dioso panejumeconvënëtsixae, xaniavaetsia nasivaya namataenetsia panabajacobabiabare. <sup>13</sup> Daxita pamonaë Dioso pejumeconvënëtsivi, majota pejinavanapaevije, pacabajacobalia.

<sup>14</sup> Pacatovajëtabiabatsi Diosojavabelia vajatuxanenê Jesucristo papecayavenonabinexa. Pacatovajëtabiabatsinua itsamonae ata asivaya panetaenexa pacuenia paxamê ata Dioso pacaasiva. Pacatovajëtabiabatsinua Espíritu Santo ata papecayajavaponaponenexa.

## Mapabaxutoje San Pablo toyaquina Galacia nacuapijivijavabelia

*Pacuenia Pablo toyaquina mapabaxutoje Dioso pejumecovënëtsivi, Galacia nacuapijivijavabelia, yabara pelivaisi*

<sup>1</sup> Xanë Pablonë, apóstolenënë. Jivi pejamatabëcueneta apo nitorobi tatsipaebapon-aenexa Jesucristo pelivaisi. Nitorobabeje raja Jesucristobeje, paxa Diosobeje, ponë icatsia Jesucristo asaëyaexanatsi petëpaecujinae. <sup>2</sup> Pacatoyaquinatsi mapabaxutoje paGalacia nacuapijivimë, Dioso panejumecovënëtsivi. Daxita majota Dioso pejumecovënëtsivi pacajamatabënajinalia. <sup>3</sup> Pacatovajëtabiabatsi vaxa Diosojavabelia, vajatuxanenë Jesucristojavabelia ata, papecaitaxutotsoniataenexa jamatabëcuenexanepanaeya panejinavanapaenexa. <sup>4</sup> Pacuenia vaxa Dioso itorobatsi, vajatuxanenë Jesucristo pijacuata tonacaeveta pebeyaxuabinexatsi pibisiacuene vaxaxanaeneconi yabara. Nexata Jesucristo pejamatabëcueneta vaxa Dioso aneconijibia nacatane. <sup>5</sup> Bajaraxuata vaxaitsi Diosojavabelia jumaitsitsi tsabiabi: “¡Xamë Diosomë, bitso ayaijamatabëcuenenëmë!” jaitsi tsabiabi daxitamatacabijavabelianexa. Bajara itsi tsane.

*Pacuenia baja Jesús pelivaisivecua pematatsënëa ajibi itsalivaisi jivi pecapanepaelivaisinexatsi yabara pelivaisi*

<sup>6</sup> Paxamë saya caematacabibejecujinae, pacopabame Dioso panejumecovënëtsijava. Bajaraxuata xanë bitso pacasivajamatabëcuene nabenajacatsi. Jesucristo picani pejamatabëcueneta, Dioso pacaitaxutotsoniatane itsa pacajunata papecacapanepaenexa. Itsiata baja aeconoxae jamatabëcuenenavëxaniabiaya pavecuanajamatabëcuene pënëy-orotame saicayalivaisijavabelia, bepapecacapanepaelivaisinexa itajara panejumetaexae. <sup>7</sup> Itsiata baitsi jane baja pematatsënëa ajibi itsalivaisi papecacapanepaelivaisinexa. Itsamonae pata paxamëjavata livaisi papecatsipaebinexa. Bajarapamonae pata papecajamatabëcuene naepatajërëcaeyaexanaenexa. Bajarapamonae saicayalivaisi jamatabëpacatsipaebapona panecopabinexa panejumecovënëtsijava pexanialivaisi, Jesucristo pelivaisi. <sup>8</sup> Copiaya baja cajena paxanë pacatsipaebatsi pexanialivaisi, Jesucristo pelivaisi, papecacapanepaelivaisinexa Diosojavabelia. Nexata acuenebi paxanë pataithianaenexa bajarapalivaisi. Athëbëvetsica pepatsinë ata tsipae, ángelnë, acuenebi piathianaenexa bajarapalivaisi. Jesucristo pelivaisivecua, saicayalivaisi, itsa pacatsipaebijitsipatsi, nexata Diosojavabelia pananeconitsipajë. Nexata Dioso pananeconitsiaexanaejitsipa daxitamatacabijavabelianexa. <sup>9</sup> Copiaya baja cajena pacuenia pacatsipaebatsi, bajara icatsia pacuenia aeconoxae ata pacatsipaebatsi. Pajivi Jesucristo pelivaisivecua, saicayalivaisi pacatsipaeba bepapecacapanepaelivaisinexa itajara, nexata bajarapajivi Dioso naneconitsiaexanaenatsi daxitamatacabijavabelianexa. Tsipaji pacacopatsiaexana panejumecovënëtsijava pexanialivaisi, Jesucristo pelivaisi.

<sup>10</sup> Payapëtaneme rabaja xua yabara bajarapacuenia pacajumaitsitsi. Bajarapacuenia itsa pacajumaitsitsi, apo pacajumaitsitsi saya jivi tanesivabarëyanexa. Jume cajena. Jivi apo nesivabarëya ata Jesucristo pelivaisi jivi tatsipaebaponaejava yabara, itsiata jitsipajë jivi tatsipaebinexa Jesucristo pelivaisi, Dioso tanesivajamatabëcuenebarëyanexa. Saya jema jivi livaisi itsa tsipaebijitsipajë saya tanesivabarëyanexa, nexata pacuenia Jesucristo nitoroba, apo tsipaebaponaenë tsipae. Nexata Jesucristo apo pijajivitonënë tsipae.

*Pacuenia Pablo Dioso junatatsi apóstolenëxaxa yabara pelivaisi*

<sup>11</sup> Tajamonae, jitsipajë patacatsipaebinexa mapalivaisije. Palivaisi tsipaebaponaejë jivi pecapanepaelivaisinexatsi Diosojavabelia, bajarapalivaisi itsajivi ata pejamatabëcueneta apo pexanaelivaisi. <sup>12</sup> Itsajivi ata cajena bajarapalivaisi apo netsipaebi. Jesucristo raja

neyapëtaeyaexana bajarapalivaisi. Nexata Jesucristo nitoroba jivi tatsipaebaponaenexa bajarapalivaisi.

<sup>13</sup> Panevënëlivaisitaneme rabaja pacuenia exanaponaponajë pamatacabi abaxë jume-covënëtajë Dioso Moiséspijinëta penajumecopatsilivaisi. Bajarapalivaisi Dioso Moiséspijinëta najumecopata pajudfóvinë patajumecovënëtsinexa. Panevënëlivaisitanemenua pacuenia barajinabiabajë Jesucristo pijajivi. Apo itaxutobejiobiataeyaabiabinë cajena tsiquirijavayo ata. Jamatabëverebiaxuababiabajë Jesucristo pijajivi. <sup>14</sup> Xanë abaxë itsa pevëjëatonë, jumecovënëtajë bitso Dioso Moiséspijinëta penajumecopatsilivaisi. Xanë bitso asaëyata jumecovënëtsiaponaponajë bajarapalivaisi pitorobicuenia. Daxita pamonae pevëjëavi judfóvi, Israel nacuapijivi, matatoxenetsia xanë bitso casaënë tajumecovënëtsijava bajarapalivaisi. <sup>15</sup> Itsiata baitsi jane tanaexanaevajënaeya ata, Dioso nitapeta Jesucristo tajumecovënëtsinexa. Dioso taneitaxutotsoniataexae, nejunata apóstolenëxanë. <sup>16</sup> Nexata pamatacabi ponajë Damasco tomarabelia, namutoepatota Dioso netsitajëta pexënato. Nexata Dioso neyapëtaeyaexana pexënato pelivaisi. Bajarapacuenia Dioso pexënato pelivaisi neyapëtaeyaexana tatsipaebaponaenexa apo judfóvijava. Nexata Dioso taneyapëtaeyaexanaecujinae pexënato pelivaisi, apo ponaenë itsajivijavabelia ata tayanijobinexa Dioso pexënato pelivaisi. Apo ponaenë tanemuxujobinexanua Dioso pexënato pelivaisita. <sup>17-18</sup> Pamatacabi namutoepatota Dioso netsitajëta pexënato, apo naviatecaenë Jerusalén tomarabelia tayanijobinexa pamonaejavabelia xanëvecua copiaya exanatsi apóstolevi. Biji rajane rovia paliajë Damasco tomarabelia. Nexata Damasco tomarata tapatsicujinae, caenënë ponajë Arabia nacuayabelia, petusato nacuayabelia. Nexata petusato nacuata Dioso xaniavaetsia neyapëtaeyaexanapona pexënato pelivaisi. Bajaraxuacujinae icatsia bexëa Arabia nacuaverena naviarenajë Damasco tomaraberenä. Bajaraxuacujinae tapuaxainae baja acueyabi pavaibeje tajumecovënëtsicujinae Dioso pexënato pelivaisi, ponajë jane baja Jerusalén tomarabelia apóstolenë Pedro tacaxitajarabinexa. Nexata Jerusalén tomarata, Pedrojavata, naponaponajë quince pamatacabibeje. <sup>19</sup> Itsiata Jerusalén tomarata pematatsënëa itsaapóstolenë apo taenë. ËSantiago saya, vajatuxanenë pejuyapijinë, taniji. <sup>20</sup> Xaniavaetsia pacajumaitsitsi Dioso pitabarata. Palivaisi pacatoyaquinatsi, pexaniajailivaisi cajena.

<sup>21</sup> Jerusalén tomarata taponaponaecujinae, ponajë icatsia Siria nacuayabelia Jesucristo pelivaisi jivi tatsipaebaponaenexa. Ponajë Cilicia nacuayabelia ata. <sup>22</sup> Jesucristo pelivaisi jivi itsa tsipaebanajetarucajë, Jesucristo pelivaisi pejumecovënëtsivi, Judea nacuapijivi, abaxë apo neyapëtae. Tsipaji abaxë Judea nacuata apo tsipaebaponaenë Jesucristo pelivaisi. <sup>23</sup> Bajarapamonae saya nevënëlivaisitane itsamonae xanë yabara pejumaitsijava: “Ponë pina nacabarajinabiaba Jesucristo pelivaisi vajajumecovënëtsivi, aeconoxae pina baja bajaraponë ata jumecovënëta. Nexata pina itsamonae ata pejumecovënëtsinexa Jesucristo pelivaisi, bajaraponë tsipaebapona. Bajarapalivaisi yabara bajaraponë jamatabënacaverebiaxuaba picani,” pejaijava, itsamonae xanë yabara nevënëlivaisitane Judea nacuapijivi, Jesucristo pelivaisi pejumecovënëtsivi. <sup>24</sup> Bajaraxuata Judea nacuapijivi, Jesucristo pelivaisi pejumecovënëtsivi, jumai tsabiabi Diosojavabelia: “Diosomë, bitso ayaijamatabëcuenenëmë. Tsipaji Pablo ata najamatabëcuenecopatsiaexaname nexënato Jesucristojavabelia,” jai tsabiabi xanë yabara.

## 2

*Pacuenia Pablo pevëna apóstolevi Jerusalén tomarata xaniavaetsia copiapitatsi yabara pelivaisi*

<sup>1</sup> Jerusalén tomarata naropotajë Jesucristo pelivaisi jivi tatsipaebanajetarucaenexa Siria nacuajava, Cilicia nacuajava ata. Nexata Jesucristo pelivaisi jivi tatsipaebanajetarucaecujinae bajarapanacuabejejava, catorce pavaibejecujinae matapania icatsia patajë tacovëyaberena, Jerusalén tomarata. Bernabébeje Titobeje barëpatajë. <sup>2</sup> Patajë Jerusalén tomarata tsipaji Dioso nitoroba tapatsinexa Jerusalén tomarata. Nexata

Jerusalén tomarata Dioso pejumecovënëtsivi ëpenamatacaitorobivi penacaetuatsijavata, navajunupaebajë bajarapamonaejavabelia. Bajarapacuenia navajunupaebajë Dioso pejumecovënëtsivi penamatacaitorobivijavabelia, taneyapëtaenexa Jesucristo pelivaisi tatsipaebaponaejava apo judíovijava pecapanepaelivaisinexatsi Diosojavabelia. Bajarapacuenia navajunupaebajë Dioso pejumecovënëtsivi penamatacaitorobivijavabelia tsipaji jamatabëjumaitsinë: “Maraeta pamonaë apo pejitsipaecuenia, tsipaebaponajë apo judíovijavaje,” jamatabëjanë. Itsiata baitsi jane Dioso pejumecovënëtsivi penamatacaitorobivi, tsitanepanatsi pacuenia tsipaebaponajë apo judíovijava. <sup>3</sup> Bajarapacuenia tanavajunupaebixae, taneyanabinë Tito, apo judíonë ata, Dioso pejumecovënëtsivi penamatacaitorobivi pajudíovinë patajacuenia apo perabëcaucutsiaexanaetsi. Baitsi apo boupiperabëcaucutsiaexanaetsi. <sup>4</sup> Itsamonae, judíovi, Jesucristo pelivaisi apo jumecovënëtsi. Nexata bajarapamonae Jesucristo pelivaisi bepejumecovënëtsivicuenia, saya jema najunua paxanë Jesucristo pelivaisi patajumecovënëtsivijavaberena. Bajarapamonae picani jitsipa Tito peperabëcaucutsiaexanaenexatsi. Itsiata apo perabëcaucutsiaexanaetsi. Bajarapamonae saya jema najunua patanenaitaxutocaevetsinexa patanetaenexa jamatejema patavecuajinavanapaejava Dioso Moiséspijinëta penajumecopatsilivaisi, palivaisimi patajasalinaivi jumecovënëta. Bajarapalivaisi patajumecovënëtsijavami, pacopatajë baja Jesucristo pejamatabëcueneta. Nexata pamonaë panenaitaxutocaeveta, jamatabëpanejumecovënëtsiaexana picani icatsia Dioso Moiséspijinëta penajumecopatsilivaisi. <sup>5</sup> Itsiata baitsi jane tsiquirijavayo ata apo paexanaenë pacuenia bajarapamonae paneitoroba. Nexata Jesucristo pelivaisi jivi itsa patsipaebaponajë, apo payajavatsipaebaponaenë Dioso Moiséspijinëta penajumecopatsilivaisi. Dioso Moiséspijinëta penajumecopatsilivaisi, itsa pacatsipaebijitsipatsi, jamatabëcuenenavëxaniabiaya pajamatabëjumaitsimë tsipae: “Naperabëcaucutsiaexanaenajë pacuenia judíovi naperabëcaucuba. Jumecovënëtsianajënu Dioso Moiséspijinëta penajumecopatsilivaisi. Nexata Dioso pepacuene necapanepaena,” pajamatabëjamë tsipae jamatabëcuenenavëxaniabiaya.

<sup>6</sup> Jerusalén tomarata Dioso pejumecovënëtsivi penamatacaitorobivijavabelia, navajunupaebajë Jesucristo pelivaisi tatsipaebaponaejava apo judíovijava pecapanepaelivaisinexatsi Diosojavabelia. Itsiata bajarapamatacabi Dioso pejumecovënëtsivi penamatacaitorobivi, apo netsipaebi itsalivaisiyo ata Jesucristo pelivaisi tayajavatsipaebaponaenexa apo judíovijava. Bajarapamonae yabara itsamonae jamatabëjumai tsabiabi: “Mapamonaeje Dioso pejumecovënëtsivi bitso pepo penamatacaitorobivi. Nexata bitso ayaijamatabëcuenevi,” jamatabëjai tsabiabi. Itsiata xanë apo sivanajamatabëxainaenë bajarapamonae ayaijamatabëcuenevi tataenexa. Tsipaji cajena daxita vaxaitsi, Jesucristojavabelia vajanajamatabëcuenecopatsivi, Dioso najëpaeya nacatane. <sup>7</sup> Dioso pejumecovënëtsivi penamatacaitorobivi, apo nitorobi itsalivaisiyo ata tayajavatsipaebaponaenexa apo judíovijava itsa tsipaebajë Jesucristo pelivaisi pecapanepaelivaisinexatsi Diosojavabelia. Biji rajane Dioso pejumecovënëtsivi penamatacaitorobivi, neyapëtane Dioso taneitorobinëcuene. Nexata Dioso pejumecovënëtsivi penamatacaitorobivi, jumaitsi xanë yabara: “Xaniajai. Pablo Dioso itorobatsi Jesucristo pelivaisi petsipaebaponaenexa apo judíovijava. Pacuenia copiaya Pedro Dioso itorobatsi Jesucristo pelivaisi petsipaebaponaenexa judíovijava, bajara pijinia pacuenia Pablo ata Dioso itorobatsi Jesucristo pelivaisi petsipaebaponaenexa apo judíovijava,” jai Dioso pejumecovënëtsivi penamatacaitorobivi xanë yabara. <sup>8</sup> Apóstolenë Pedro Dioso pesaëta Jesucristo pelivaisi petsipaebaponaexae judíovijava, judíovi baja najamatabëcuenecopabapona Jesucristojavabelia. Bajara pijinia pacuenia xanë ata Dioso pesaëta Jesucristo pelivaisi tatsipaebaponaexae apo judíovijava, apo judíovi ata baja najamatabëcuenecopabapona Jesucristojavabelia.

<sup>9</sup> Mara pamatabëxëyo Jerusalén tomarata Dioso pejumecovënëtsivi penamatacaitorobivije. Santiago, Pedro, Juan, bajarapamatabëxëyo. Dioso pejumecovënëtsivi penamatacaitorobivi, itsa neyapëtane Dioso taneitorobinëcuene tatsipaebaponaenexa Jesucristo

pelivaisi apo judíovijava, nexata Dioso pejumecovënëtsivi penamatacaitorobivi, panebajacobabeje pexaniacuena Bernabébeje. Bajarapacuena Dioso pejumecovënëtsivi penamatacaitorobivi, pexaniacuena panebajacobabeje tsipaji paneyapëtanebeje patatona-juanacuenebivicuene Dioso pijacuene. Bajaraxuata paxanëbeje Bernabébeje, Jesucristo pelivaisi patavajënaeyabeliabeje patsipaebaponajëbeje apo judíovijava. Santiagobana pijinia, Pedrohana, Juanhana, tsipaebapona judíovijava. <sup>10</sup> Bajarapamonae caelivaisiyo panejumaitisibeje Jerusalén tomarata. Paneitorobabeje patayavenonaenexabeje Dioso pejumecovënëtsivi, bitso bepejiobivi, Jerusalén tomarata pejinavanapaevi. Bajaraxuata xanë jamatabëcuenebarëyaya bajarapamonaenexa ofrenda toexanaeyaexanaponajë itsaxuayo tatsipaebilivaisi, Jesucristo pelivaisi, jumecovënëtaþona.

*Pacuenia Pablo muxujioba Pedro Antioquía tomarata yabara pelivaisi*

<sup>11</sup> Perujulivaisimi, judíovi pijalivaisi, itavetatsi judíovi caejavata peyajavana-baniyaniva apo judíovi. Pedro itsa ponapona Antioquía tomarata, muxujiobajë daxitajivi pitabarata. Tsipaji Pedro apo pexanepanaecuene exana. Pedro apo judíovijavata itsa naponapona, jemata apo judíovi vecuanasaicayaba. <sup>12</sup> Pedro, judíonë ata, pecopatsixae baja pejumecovënëtsijava perujulivaisimi, judíovi pijalivaisi, abaxë picani Pedro jamatejema nanabanebiaba apo judíovijavata. Nexata itsa pata Santiago pijajivi Antioquía tomarata, Pedro baja vecuanasaicayaba apo judíovi. Tsipaji Pedro cunajava Santiago pijajivi petayenivatsi apo judíovijavata penanabanijava. Pedro baja nexata copata apo judíovijavata penanabanebiabijava. Santiago pijajivi perujulivaisi tsiteca jumecovënëtaþanapa. Nexata Santiago pijajivi jumai tsabiabi: “Pamonae apo judíovi ata, Jesús pelivaisi itsa jumecovënëta, bajarapamonae ata benaperabëcaucubiaexana,” jai tsabiabi. Nexata Pedro cunajava bajarapamonae. Nexata Pedro jamatabëjumaitis: “Itsa netaejitsipa Santiago pijajivi tananabanijava apo judíovijavata, neneconitsipa judíovijavabelia Jerusalén tomarata. Nexata judíovi ayacuena nebijataejitsipa,” jamatabëjai Pedro. Bajaraxuata Pedro vecuanasaicayaba baja apo judíovi. <sup>13</sup> Pedro yapëtae ata pacuenia picani apo bevecuanasaicayabi apo judíovi, itsiata vecuanasaicayaba. Nexata daxita judíovi, pamonae najamatabëcuene copaba Jesucristojavabelia, itsa tane Pedro pevecuanasaicayabijava apo judíovi, bajarapamonae ata vecuanasaicayaba apo judíovi. Bernabé ata yapëtae ata pacuenia picani apo bevecuanasaicayabi apo judíovi, itsiata vecuanasaicayaba apo judíovi. <sup>14</sup> Nexata pacuenia jumaitis pexanialivaisi jivi pecapanepelivaisinexatsi Diosojavabelia, bajarapamonae apo exanae. Nexata saya bajarapamonae vecuanasaicayaba apo judíovi. Bajaraxuata itsa taniji bajarapamonae pevecuanasaicayabijava apo judíovi, nexata muxujiobajë. Daxita Dioso pejumecovënëtsivi pitabarata, jumaitsinë Pedrojavabelia: “Xamë judíonë atamë, itsiata apo judíovijavata naponaponame. Nexata pacuenia apo judíovi jinavanapa, naponaponabiabame picani. Apo ponaponabiabimë judíonëcuena. Pacuenia baja picani naponaponabiabame apo judíovijavata, xanepana baja picani. Xamë judíonë atamë, itsa apo ponaponaemë judíonëcuena, ¿detsa nexata xuajitsia caranata apo judíovi aeconoxae jamatabëjinavanapaeyaexaname judíovicuena?” janë Pedrojavabelia pevecuanasaicayabixae apo judíovi.

*Pacuenia judíovi ata xanepana penajamatabëcuene copatsinexa Cristojavabelia pecapanepaenexatsi Diosojavabelia yabara pelivaisi*

<sup>15</sup> Paxanë baja cajena pajudíovinë. Patanaexanaejavaveliacujinae itsa pavitsabaponajë, payapëtaniji patajumecovënëtsinexa pexaniajailivaisi, Dioso pejumelivaisi. Nexata pacuenia apo judíovi pejevaxijavaveliacujinae apo yapëtae pejumecovënëtsinexa pexaniajailivaisi, Dioso pejumelivaisi, apo paitsinë. <sup>16</sup> Pexaniajailivaisi patajumecovënëtsinexa, patajamonae baja cajena paneyajavavitsata. Nexata payapëtaniji mapacueneje. Itsajivi jumecovënëtsi ata tsipae Dioso Moiséspijinëta penajumecopatsilivaisi, itsiata Dioso aneconijibia apo taetsi tsipae. Bajarapacuene paxanë pajudíovinë payapëtaniji. Bajaraxuata paxanë pajudíovi atanë, panajamatabëcuene copatajë

Jesucristojavabelia. Nexata Dioso aneconijibia panetane patanajamatabëcuenecopat-sixae Jesucristojavabelia. Dioso aneconijibia apo panetae patajumecovënëtsixae Dioso Moiséspijinëta penajumecopatsilivaisi. Tsipaji itsajivi ata apo jumecovënëtsicapanepae bajarapalivaisi. Nexata itsamonae jumecovënëtsi ata bajarapalivaisi, itsiata Dioso aneconijibia apo taetsi.

<sup>17</sup> Pexaniajailivaisi patacatsipaebijavata, itsajivi jamatabëcuenenavëxaniabiaya nejumaitsi tsipae: “Xamë jumaitsimë tsabiabi: ‘Dioso aneconijibia netane tajumecovënëtsixae Cristo tanesivatëpaejava tajaneconi yabara. Nexata baja apo jumecovënëtsinë Dioso Moiséspijinëta penajumecopatsilivaisi,’ jamë tsabiabi. Dioso Moiséspijinëta penajumecopatsilivaisi apo nejumecovënëtsixae, nexata Dioso catane pibisiacuene nexanaenë,” nejai tsipae itsajivi jamatabëcuenenavëxaniabiaya. Itsiata baitsi jane bajarapacuenia itsajivi nejumaitsi ata tsipae, itsiata Dioso apo netae tsipae pibisiacuene taexanaenë. <sup>18</sup> Diosojavabelia rajane naneconitsipajë mapacuenia itsa exanaejitsipajë. Dioso Moiséspijinëta penajumecopatsilivaisi, tajumecovënëtsijavami tacopatsicujinae, icatsia caevëalia itsa jumecovënëtsipajë, nexata Diosojavabelia naneconitsipajë. <sup>19</sup> Pamatacabi abaxë ajamatabëcuenesaenë tsabiabi tajumecovënëtsijava Dioso Moiséspijinëta penajumecopatsilivaisi, naneconitajë picani Diosojavabelia. Tsipaji ajamatabëcuenesaenë tsabiabi ata tajumecovënëtsijava bajarapalivaisi, itsiata apo necaëjêpae tajumecovënëtsicapanepaenexa daxita pacuenia jumaitsi bajarapalivaisi. Itsa meta abaxë tsiteca bajarapalivaisi jumecovënëtaaponaponaejitsipajë, yajavatëpaejitsipajë meta tajaneconi. Bajaraxuata aeconoxae baja icatsia bajarapalivaisi tajumecovënëtsinexa, apo sivanajamatabëxainanë. Pacuenia baja petëpaejivi itsacuenejavayo apo sivanajamatabëxainae, bajara itsinë taexanaeyaniva icatsia pacuenia bajarapalivaisi nitoroba. Biji rajane aeconoxae baja Dioso nerajuta pejanajamatabëcuene taexanaponaenexa pacuene Dioso jitsipa. <sup>20</sup> Cristo cruzajavabelia itsa cobematabiabarutatsi, xanë ata tajaneconi yabara nesivatëpa. Nexata xanë ata Cristo betaneyajavatëpae. Bajaraxuata perujujamatabëcuenemi, pibisiacuene taexanaenexa taneitorobabiabijamatabëcuenemi, nevecuatëpa baja cruzata. Nexata baja piasaëjamatabëcuene, pejanajamatabëcuene, xainajë. Cristo baja neyjavaponapona. Pajamatabëcuene yaasaenë tsaponapona, Dioso pexënatojavabelia najamatabëcuenecopatsiaya ponaponajë. Dioso pexënato nejitsipa. Nesivatëpanua baja cajena. <sup>21</sup> Apo namuxujematsinë Dioso vajanacaitaxutotsoniataejava. Dioso Moiséspijinëta penajumecopatsilivaisi, jivi pejumecovënëtsixae, Dioso aneconijibia jivi itsa taejitsipa, nexata Cristo jivi apo sivatëpae tsipae pijaneconi yabara. Nexata Cristo saya jema tēpaejitsipa.

### 3

*Pacuenia Cristo pejumecovënëtsivi, Dioso aneconijibia tanetsi pecapanepaenexatsi pijaneconivecua, itsa jumecovënëta pacuenia Abrahampijinë jumecovënëta, yabara pelivaisi*

<sup>1</sup> ¡Paxamë paGalacianacuapijivimë, bitso cajena paneajamatabëcuenetajavi! Itsamonae raeta saicayalivaisi yamaxëitojorobiaya pacatsipaeba, pexaniajailivaisi, palivaisi baja picani pajumecovënëtame, panecopabinexa. Xanë Jesucristo pelivaisi patacatsipaebijavata, xaniavaetsia baja cajena pacatsipaebatsi, pacuenia Jesucristo cruzajavabelia cobematabiabarutatsi. Nexata baja picani panijacuata bepanetae Jesucristo papecasivatëpaejava cruzata. <sup>2</sup> Caejumeyo pacayanijobatsi. ¿Detsa xua yabara pacatsijamatabëjunua Espíritu Santo? Apo pacatsijamatabëjone raja panejumecovënëtsixae Dioso Moiséspijinëta penajumecopatsilivaisi. Espíritu Santo raja pacatsijamatabëjunua panejumecovënëtsixae Jesucristo papecacapanepaejavanexa panijaneconivecua. <sup>3</sup> Paxamë bitso pajamatabëcuenetajamë. Pamatacabi pataxuxuabame panejumecovënëtsijava Jesucristo papecacapanepaejavanexa panijaneconivecua, panajamatabëxainabiabame Espíritu Santo papecayavenonabiabinexa. Aeconoxae baja icatsia caevëalia panajamatabëxainame panejumecovënëtsinexa Dioso Moiséspijinëta penajumecopatsilivaisi. Itsiata apo caëjêpaetsi bajarapalivaisi papecacapanepaenexa.

<sup>4</sup> Itsamonae bitso pacabejiobiaexanabiaba pexanialivaisi, Jesucristo pelivaisi, panejumecovénëtsixae. Bajaraxuata apo bepacopatsimë panejumecovénëtsijava Jesucristo pelivaisi, palivaisi yabara itsamonae pacabejiobiaexanabiaba. Tsipaji itsa pacopabijitsipame panejumecovénëtsijava Jesucristo pelivaisi, saya panacueratsipame. <sup>5</sup> Payapëtaneme rabaja Dioso papecarajutsijava Espiritu Santo. Pinijicuene pexanaejavanë ata Dioso pacatsitaexana paxamë tuatuajëta. Baitsi piavitanevi jamatejemaya exanapona. Petëpævimi ata asaëyaexanapona. ¿Detsa xua yabara bajarapacue Dioso pacatsitaexana? Dioso raja apo pacatsitaexanae bajarapacue panejumecovénëtsixae Dioso Moiséspijinëta penajumecopatsilivaisi. Dioso raja pacatsitaexana bajarapacue panejumecovénëtsixae patacatsipaebilivaisi, Jesucristo pelivaisi.

<sup>6</sup> Bajayata Abrahampijinë Diosojavabelia najamatabëcuenecopatsiaya jamatabëjumaitsi: “Xaniajai. Dioso netoexanaena pacuenia najumecapanepaeya nejumaitsi,” jamatabëjai. Bajaraxuata Dioso Abrahampijinë aneconijibia tanetsi Dioso pijanacuayabetsia pecapanepaenexatsi. <sup>7</sup> Bajaraxuata paxamë bepapapëtaneme mapacueje. Pamonae jumecovënëta pacuenia Dioso najumecapanepaeya jumaitsi, bajarapamonae Abrahampijinë apo pemomoxi ata, itsiata Dioso tanetsi Abrahampijinë bepepo pemomoxi. Bajarapamonae Dioso capanepaenatsi. <sup>8</sup> Dioso pejumelivaisibaxutota tajëvelia jumaitsi pacuenia apo judíovi ata Dioso capanepaejitsiatsi pijaneconivecua. Nexata apo judíovi ata Dioso itsa jumecovénëtsiana, capanepaenatsi pacuenia Dioso najumecapanepaeya jumaitsi. Dioso jivi pecapanepaejavanexa yabara, tajëvelia Abrahampijinëjavabelia Dioso jumaitsi mapacueniaje: “Tacatsipaebilivaisi tanejumecovénëtsixaemë, daxitanacuapijivi ata aneconijibia taenajë, bajarapamonae ata itsa nejumecovénëtsiana pacuenia xamë nejumecovénëtame,” jai Dioso Abrahampijinëjavabelia. Bajarapacuenia Dioso pejumelivaisibaxutota tajëvelia jumaitsi. <sup>9</sup> Nexata baja vaxaitsi xaniavaetsia yapëtanetsi mapacueje. Pamonae jumecovënëta Jesucristo pelivaisi, bajarapamonae Dioso aneconijibia tanetsi pecapanepaenexatsi pijaneconivecua. Tsipaji bajarapamonae ata jumecovënëta pacuenia bajayata Abrahampijinë jumecovënëta pacuenia Dioso najumecapanepaeya jumaitsi.

<sup>10</sup> Pajivi Dioso Moiséspijinëta penajumecopatsilivaisi apo jumecovénëtsicapanepae ata, jamatabëjumaitsi: “Bajayata Dioso Moiséspijinëta najumecopata jivi pejumecovénëtsinexa. Nexata baja xanë bajarapalivaisi jumecovënëtaponaponajë Dioso tanecapanepaenexa,” jamatabëjai, itsiata bajarapajivi Dioso naneconitsiaexanaenatsi. Tsipaji Dioso pejumelivaisibaxutota jumaitsi mapacueniaje: “Pamonae apo jumecovénëtsicapanepae tsane daxita pacuenia itorobatsi Dioso Moiséspijinëta penajumecopatsilivaisi, bajarapamonae cajena Dioso naneconitsiaexanaenatsi,” jai Dioso pejumelivaisibaxutota. <sup>11</sup> Nexata baja vaxaitsi xaniavaetsia yapëtanetsi bajarapacue. Dioso Moiséspijinëta penajumecopatsilivaisi, jivi jumecovënëtsi ata, itsiata itsajivi ata Dioso aneconijibia apo taetsi pecapanepaenexatsi Diosojavabelia. Tsipaji itsajivi ata apo jumecovënëtsicapanepae daxita pacuenia itorobatsi Dioso Moiséspijinëta penajumecopatsilivaisi. Bajarapacue vaxaitsi yapëtanetsi. Tsipaji Dioso pejumelivaisibaxutota icatsia jumaitsi mapacueniaje: “Pajivi pepacue Dioso pejumecovénëtsixae, jamatabëjumaitsi: ‘Xanë pepacue Dioso neyavenonaena pacuenia najumecapanepaeya jumaitsi,’ jamatabëjai, Dioso aneconijibia tanetsi. Bajarapajivi xainaena matacabi apo peverevereaejava,” jai Dioso pejumelivaisibaxutota. <sup>12</sup> Dioso Moiséspijinëta penajumecopatsilivaisi jivi jumecovënëtsi ata, itsiata apo jumecovénëtsicapanepae daxita pacuenia itorobatsi bajarapalivaisita. Bajaraxuata Dioso Moiséspijinëta penajumecopatsilivaisi yabara, Dioso pejumelivaisibaxutota jumaitsi mapacueniaje: “Pajivi apo jumecovénëtsicapanepae ata Dioso Moiséspijinëta penajumecopatsilivaisi, itsiata itsa jamatabëjumaitsi tsane: ‘Xanë pepacue Dioso neyavenonaena pacuenia najumecapanepaeya jumaitsi,’ itsa jamatabëjai tsane, apo jumecovénëtsicapanepae ata, bajarapajivi Diosojavabelia capanepaenatsi,” apo jai. Biji rajane Dioso Moiséspijinëta penajumecopatsilivaisi yabara, Dioso pejumelivaisibaxutota jumaitsi mapacueniaje: “Pajivi matapania jumecovénëtsicapanepaena

daxita pacuenia itorobatsi Dioso Moiséspijinëta penajumecopatsilivaisi, bajarapajivi capanepaenatsi Diosojavabelia. Itsa apo jumecovënëtsicapanepae tsane daxita pacuenia itorobatsi Dioso Moiséspijinëta penajumecopatsilivaisi, nexata tēpaena. Naxuabiana Diosovecua,” jai Dioso pejumelivaisibaxutota Dioso Moiséspijinëta penajumecopatsilivaisi yabara.

<sup>13</sup> Vaxaitsi baja cajena naneconitatsi Diosojavabelia. Tsipaji apo jumecovënëtsicapanepaetsi Dioso Moiséspijinëta penajumecopatsilivaisi. Itsiata baitsi jane Cristo ita tēpa cruzata, nacaneconimatamota pijanata. Dioso Moiséspijinëta penajumecopatsilivaisi apo vajajumecovënëtsicapanepaexae, naneconitatsi picani Diosojavabelia. Itsiata Cristo cruzata ita tēpa, nacavecuaajibiaexana baja bajarapaneconimi. Nexata baja Dioso apo nacananeconitsiaexanae tsane. Cristo saya tsijumaxuabatsi vajaneconimi. Nexata Dioso tanetsi Cristo bepenaneconitsinë vajaneconi pejamatabēcueneta. Nexata vajaneconi yabara Cristo nacopata pebexuabinexatsi pacuenia Dioso pejumelivaisibaxutota jumaitsi. Dioso pejumelivaisibaxutota jumaitsi mapacueniaje: “Pajivi bitso naneconita Diosojavabelia pibisiacuene pexanaeneconi yabara, bajarapajivi naejavajavabelia rutatsi,” jai. <sup>14</sup> Nexata Cristo pibisiacuene bepexanaenë vajaneconi yabara, nacopata cruzajavabelia pecobematabiabarutsinexatsi. Bajarapacuenia Cristo ita nacopata cruzajavabelia pecobematabiabarutsinexatsi vajaneconi yabara, copiajopa jane baja pacuenia tajëvelia Dioso najumecapanepaeya jumaitsi Abrahampijinëjavabelia. Nexata apo judíovi ata Dioso capanepaenatsi Jesucristo pejamatabēcueneta. Vaxaitsi vajanajamatabēcuenecopatsixae Jesucristojavabelia vajanacacapanepaenexa Diosojavabelia, nexata pacuenia Dioso tajëvelia najumecapanepaeya jumaitsi, bajarapacuenia Dioso nacatsijamatabëcaeyaexana Espíritu Santo.

*Pacuenia Abrahampijinëjavabelia Dioso najumecapanepaeya jumaitsi, pacuenia ata icatsia cotocaevi Moiséspijinëjavabelia najumecapanepaeya jumaitsi, yabara pelivaisi*

<sup>15</sup> Tajamonae, livaisi pacatsipaebijitsiatsi paneyapētaenexa mapacuenieje. Pepacuenie raja Dioso exanaena pacuenia bajayata tajëvelia Abrahampijinëjavabelia Dioso najumecapanepaeya jumaitsi. Mapanacuapijinë ata, pecobecovë pexainaenë, petēpaevajēnae bayaquina pecobecovë yabara. Nexata pecobecovë pexainaenë ita tēpa, pevēnamuto pexi penatsicobetsanaenexa. Nexata jumenamatamota pecobecovë pexainaenë peyaquinaelivaisi. Nexata acuenebi itsajivi ata pejumaitsinexa: “Ajumematamobi mapalivaisije,” pejainexa. Mataropotsia ata itsanë peyaquinaponaenexa, acuenebi. Tsipaji pecobecovë pexainaenë peyaquinaelivaisi, jumenamatamota. <sup>16</sup> Bajara pijinia pacuenia Dioso jumenamatamota bajayata tajëvelia Dioso najumecapanepaeya pejumaitsijava Abrahampijinëjavabelia. Baitsi Abrahampijinë pemomo pejamatabēcueneta, jivi ayaibitsaëto Dioso aneconijibia petaejavanexa, Dioso jumenamatamota. Bajayata tajëvelia Dioso najumecapanepaeya jumaitsi Abrahampijinëjavabelia ayaibitsaëto mapanacuapijivi Abrahampijinë pemomo pejamatabēcueneta Dioso aneconijibia petaenexa. Ayaibitsaëto Abrahampijinë pemomoxi pejamatabēcueneta Dioso jivi aneconijibia petaenexa, bajarapacuenia tajëvelia Dioso najumecapanepaeya apo jumaitsi. Biji rajane caenë, Jesús, pejamatabēcueneta Dioso jivi aneconijibia petaenexa, tajëvelia najumecapanepaeya jumaitsi. “Abrahampijinë pemomo,” ita jai, tajëvelia jumaitsi Cristo yabara. <sup>17</sup> Palivaisi pacatsipaebatsi, maitsije. Bajayatami copiaya Dioso tajëvelia najumecapanepaeya jumaitsi Abrahampijinëjavabelia pacuenia Dioso toexanaejitsia Abrahampijinëjavabelia. Bajaraxuacujinae icatsia cotocaevi, cuatrocientos treinta pavaibejecujinae, Dioso icatsia Moiséspijinëta najumecopata jivi pejumecovënëtsinexa. Itsiata palivaisi copiaya Dioso tajëvelia najumecapanepaeya jumaitsi Abrahampijinëjavabelia, bajarapalivaisi acuenebi Dioso penajumeamatamobiaexanaenexa. <sup>18</sup> Nexata palivaisi cotocaevi Dioso Moiséspijinëta najumecopata, bajarapalivaisi jivi pejumecovënëtsixae, Dioso aneconijibia jivi ita taejitsipa pecapanepaenexa pijaneconivecua, nexata palivaisi copiaya Dioso tajëvelia najumecapanepaeya jumaitsi

Abrahampijinējavabelia, ajumematamobi tsipae. Itsiata baitsi jane palivaisi cotocaevi Dioso Moiséspijinēta najumecopata, jivi jumecovēnētsi ata tsipae, itsiata Dioso apo capanepae tsipaetsi. Nexata yapētanetsi pejumenamatamotsijava palivaisi copiaya Dioso tajēvelia najumecapanepaeya jumaitisi Abrahampijinējavabelia. Tsipaji pajivi jumecovēnēta pecapanepaejavanexatsi pacuenia Dioso tajēvelia najumecapanepaeya jumaitisi Abrahampijinējavabelia, bajarapajivi Dioso aneconijibia tanetsi.

<sup>19</sup> Itsa baja jumenamatamota palivaisi copiaya Dioso tajēvelia najumecapanepaeya jumaitisi Abrahampijinējavabelia, ¿detsa nexata xuajitsia icatsia Dioso Moiséspijinēta nacatonajumecopata bajarapalivaisi? Dioso raja nacatonajumecopata bajarapalivaisi saya vajanacueneyapētaenexa pibisiacuene vajaexanavanapaejava Dioso pitabarata. Bajarapalivaisi Dioso nacatonajumecopata vajajumecovēnētavanapaenexa matapania Abrahampijinē pemomo, Cristo, pepatsimatacabitsicajavabelianexa. Tajēvelia Dioso najumecapanepaeya jumaitisi Cristo pejamatabēcueneta ayaibitsaētoxaneto mapanacuapijivije Dioso aneconijibia petaenexa. Palivaisi Dioso Moiséspijinēta najumecopata, pijacuata Dioso apo jumaitisi Moiséspijinējavabelia. Dioso saya itoroba ángelevi Moiséspijinē petsipaebinexatsi. Nexata juya Moiséspijinē tsipaeba jivijavabelia. Moiséspijinē jivi petocuaicuaijainē Diosojavabelia. Dioso juya Moiséspijinē itorobatsi petocuaicuaijainexa jivijavaberena. <sup>20</sup> Pamatacabi Dioso najumecapanepaeya jumaitisi Abrahampijinējavabelia pacuenia Dioso toexanaejitsia Abrahampijinējavabelia, Dioso pijacuata jumaitisi Abrahampijinējavabelia. Dioso apo itorobi ángelevi petotsipaebinexatsi Abrahampijinējavabelia. Dioso pijacuata najumecapanepaeya jumaitisi Abrahampijinējavabelia pacuenia pepacuene toexanaejitsia.

*Pajamatabēcuenelivaisi yabara bajayata Dioso Moiséspijinēta najumecopata yabara pelivaisi*

<sup>21</sup> Dioso icatsia cotocaevi Moiséspijinēta itsilivaisi najumecopatsi ata, palivaisi copiaya Dioso najumecapanepaeya jumaitisi Abrahampijinējavabelia, itsiata apo ajumematamobiaexanae. Tsipaji Dioso Moiséspijinēta penajumecopatsilivaisi pejamatabēcueneta, jivi Dioso apo capanepaejitsiatsi. Jivi itsa caējēpaejitsipatsi pejumecovēnētsicapanepaenexa daxita palivaisi Dioso Moiséspijinēta najumecopata, nexata Dioso jivi capanepaejitsipa pijaneconivecua Dioso Moiséspijinēta penajumecopatsilivaisi pejumecovēnētsicapanepaexae. <sup>22</sup> Itsiata baitsi jane itsajivi ata apo caējēpaetsi pejumecovēnētsicapanepaenexa Dioso Moiséspijinēta penajumecopatsilivaisi. Dioso pejumelivaisibaxutota jumaitisi pacuenia daxitajivi pibisiacuene pexanaexae, Dioso naneconitsiaexanaejitsiatsi Diosovecua penaxuabinexa. Bajarapacuenia Dioso pejumelivaisibaxutota jumaitisi vajayapētaenexa. Nexata yapētanetsi vajanajamatabēcuenecopatsinexa Jesucristojavabelia, vajanacapanepaenexa pacuenia Dioso copiaya tajēvelia najumecapanepaeya jumaitisi Abrahampijinējavabelia.

<sup>23</sup> Cristo abaxē athēbēvetsica pepatsivajānaeyatsica, Dioso Moiséspijinēta penajumecopatsilivaisi nacayapētaeyaexana pamatacabi Cristo patsica vajanajamatabēcuenecopatsinexa Cristojavabelia. Nacayapētaeyaexananua pacuenia vajacuata vajaexanaejava pejamatabēcueneta, acuenebi Dioso vajanacapanepaenexa. Nexata Dioso Moiséspijinēta penajumecopatsilivaisi, nacajamatabēcueneevetapona matapania Cristo athēbēvetsica pepatsimatacabitsicajavabelianexa. Nexata bajarapalivaisi vajanacajamatabēcueneevetsijavata, Cristo baja nacacaxitajaraba. <sup>24</sup> Pacuenia pejevaxi pevetsijivi, pejevaxi baeveta, bajarapacuenia Dioso Moiséspijinēta penajumecopatsilivaisi, nacajamatabēcueneeveta daxita vajajumecovēnētsivi bajarapalivaisi. Bajarapacuenia nacajamatabēcueneeveta matapania Cristo athēbēvetsica pepatsimatacabitsicajavabelianexa. Nexata jane baja athēbēvetsica Cristo pepatsicujinaetsica, vajanajamatabēcuenecopatsixae bajaraponējavabelia, Dioso aneconijibia nacatane. <sup>25</sup> Aeconoxae baja najamatabēcuenecopatatsi Cristojavabelia. Nexata pacuenia pejevaxi pevetsijivi, pejevaxi baeveta, bajarapacuenia baja Dioso Moiséspijinēta penajumecopatsilivaisi, apo nacajamatabēcueneevetsi.

<sup>26</sup> Paxamë rabaja Dioso papeximë panenajamatabëcuenecopatsixae Jesucristojavabelia. <sup>27</sup> Nexata baja daxita paxamë panabautisabame panetsitanaitajëtsinexa jivijavabelia Cristo papijajivicuenemë. Nexata Cristo, Dioso pexënatojavabelia, panenajamatabëcuenecopatsixae, paxamë ata baja Dioso papeximë. <sup>28</sup> Daxitatsi vaxaitsi vajanajamatabëcuenecopatsivi Jesucristojavabelia, pajudíovinë, apo pajudíovi atamë, aeconoxae baja Dioso najëpaeya nacatane. Paxamë ata pijinia dajubicuenia papecanajetsivi itsamonaejavabelia amoneya panetonacuenebavanapaenexa, apo patanecacanajetsivi ata itsamonaejavabelia amoneya panetonacuenebavanapaenexa, daxitatsi Dioso najëpaeya nacatane. Paxanë papebijivinë, paxamë pijinia papetiriavi atamë, bajarapacuenia daxitatsi Dioso najëpaeya nacatane. <sup>29</sup> Cristo pijajivixaetsi, nexata Abrahampijinë bepepo pemomoxitsi Dioso nacatane. Nexata pacuenia Dioso bajayata tajëvelia najumecapanepaeya jumaitsi Abrahampijinëjavabelia, bajarapacuenia Dioso nacacapanepaena.

## 4

<sup>1</sup> Mara pacuenia jitsipajë patacajumaitsinexaje. Pejevaxinëyo paxa itsa vecuatëpatsi, paxami riconë ata, abaxë apo rajutsitsi paxami pecobecovë pepitsinexa pijajavanexa. Tshipaji abaxë pejevaxinëyo. Pacuenia itorobabiabatsi pevetsijivitsi, bajarapacuenia exanabiaba. Daxitacuene pexainaenënexa ata, bajaraponëyo jumecovënëtabiaba pevetsijivitsi pitorobicueniatsi. <sup>2</sup> Itsa abaxë pejevaxinëyo, pevetsijivitsi evetatsi. Xua ata pijajavanexa, tovetatsi. Matapania baja itsa tocopiapatatsi paxapijinë petocaëjëtsimatacabitsi, tocopatatsi jane baja petoevetsijavatsi pevetsinexa baja pijacuata. Pevetsijavatsi ata baja copatatsi. <sup>3</sup> Bajara pijinia paitsinë pajudíovinë Jesucristo abaxë athëbëvetsica pepatsivajënaeysatsica. Itsa abaxë apo payapëtaenë pexaniajailivaisi, Jesucristo pelivaisi, pajumecovënëtabiabajë pacuenia paneitoroba Dioso Moiséspijinëta penajumecopatsilivaisi. Nexata pacuenia pejevaxinëyo jumecovënëtabiaba pevetsijivitsi pitorobicueniatsi, bajarapacuenia pajumecovënëtabiabajë Dioso Moiséspijinëta penajumecopatsilivaisi. Jamatabëcuenenavëxaniabiaya pajamatabëjumaitsinë tsabiabi: “Pacuenia Dioso Moiséspijinëta najumecopata vajaexanaexae, nacacapanepaena Dioso,” pajamatabëjanë tsabiabi. <sup>4</sup> Itsiata Dioso pecaëjëtsimatacabi itsa copiapata, Dioso pexënato itorobica judíovata penaexanaenexa mapanacuataje. Nexata Dioso pexënato mapanacuataje judíonëcuenia ponapona. Nexata pacuenia itoroba Dioso Moiséspijinëta penajumecopatsilivaisi, bajarapacuenia Dioso pexënato exanaponapona. <sup>5</sup> Bajarapacuenia Dioso pexënato naexana mapanacuataje vajanacavecuajibiaexanaenexa pibisiacuene vaneconimi. Nexata baja nacacopatsiaexana vajaexanabiabijavami pacuenia nacaitoroba Dioso Moiséspijinëta penajumecopatsilivaisi. Bajarapacuenia Dioso nacatoexana pexicueniatsi Dioso vajanacataenexa.

<sup>6</sup> Bajaraxuata paxamë Dioso papexicuenemë panenayapëtaenexa, Dioso pacaitorobica Espíritu Santo papecatsijamatabëjonenexa. Nexata Espíritu Santo pejamatabëcueneta: “¡Taxa!” pacajaiyaexana Diosojavabelia. <sup>7</sup> Nexata Dioso papexixaemë, aeconoxae baja apo pajumecovënëtsimë pacuenia pacaitoroba Dioso Moiséspijinëta penajumecopatsilivaisi. Dioso papexixaemë, itsamatacabi pacarajutsiana xua Dioso toxaina pexi perajutsinexa.

*Pacuenia Pablo sivanajamatabëxaina Galacia nacuapijivi, Dioso pejumecovënëtavanapaevi, yabara pelivaisi*

<sup>8</sup> Pamatacabi abaxë Dioso apo payapëtaemë, panematabacabëta panubenabiabame panevajëcabiabinexa bediosovi panetaevijavabelia. Bajarapamonae baja cajena apo diosovi. Nexata saya panacueratabiabame. <sup>9</sup> Itsiata baitsi jane aeconoxae baja payapëtaneme pepo Dioso. Bajaraponë jane xaniavaetsia pacayapëtane. ¿Detsa xuajitsia nexata pajitsipame panejumecovënëtsinexa Dioso Moiséspijinëta penajumecopatsilivaisi? Pamatacabi abaxë apo payapëtaemë pepo Dioso, panematabacabëta pavajëcabiabame

bediosovi panetaevijavabelia. Itsiata baitsi jane bajarapamonae apo caējēpaetsi papecapanepaenexa. Bajara pijinia itsi Dioso Moiséspijinēta penajumecopatsilivaisi. Pajumecovēnētsi atamē tsipae Dioso Moiséspijinēta penajumecopatsilivaisi, itsiata Dioso aneconijibia apo pacatae tsipae papecapanepaenexa. <sup>10</sup> Judíovi nacueraevetabiaba penacueraevetsimatacabita. Exanabiabanua fiesta Dioso Moiséspijinēta penajumecopatsilivaisi pitorobicueniatsi. Bajara pijinia pacuenia paxamē ata paexanabiabame. Pajuametota, pavaita ata, judíovi nacueraevetabiaba, fiesta ata exanabiaba, bajara pijinia pacuenia paxamē ata paexanabiabame. Jamatabēcuenenavēxaniabiaya pajamatabējumaitsimē tsabiabi: “Bजारapacuenia vaxaitsi ata itsa exanaenatsi, Dioso aneconijibia nacataena,” pajamatabējamē tsabiabi. <sup>11</sup> Bजारapacuenia paneexanabiabixae, bitso pacasivanajamatabēxainatsi. Tsipaji paxamē yabara jamatabējumaitsinē mapacueniaje: “Ayaicuenia Jesucristo pelivaisi tatsipaebabiabijava bajarapamonaejavabelia, saya meta nacueratajē,” jamatabējanē paxamē yabara.

<sup>12</sup> Tajamonae, pacaitorobatsi paxamē ata panenajamatabēcuenecopatsinexa Jesucristojavabelia pacuenia xanē najamatabēcuenecopatajē. Tanajamatabēcuenecopatsixae baja Jesucristojavabelia, judíonē atanē, copatajē baja tajumecovēnētsijavami Dioso Moiséspijinēta penajumecopatsilivaisi. Nexata pacuenia paxamē, apo pajudíovimē, apo pajumecovēnētsimē picani Dioso Moiséspijinēta penajumecopatsilivaisi, bajarapacuenia xanē ata baja apo jumecovēnētsinē Dioso Moiséspijinēta penajumecopatsilivaisi. Nexata pētsa baja pajumecovēnētame Dioso Moiséspijinēta penajumecopatsilivaisi. Pamat-acabi copiaya pacatsipaebatsi Jesucristo pelivaisi, paxamē apo paneitsacueniabimē. <sup>13</sup> Paxamē baja cajena payapētaneme mapacuenieje. Tavitanexae, copiaya patajopajē paxamējavata. Nexata bajarapacuenia paxamējavata pacatsipaebatsi pexanialivaisi, Jesucristo pelivaisi, papecapanepaelivaisinexa Diosojavabelia, palivaisi picani abaxē apo payapētaemē. <sup>14</sup> Dioso baja cajena netocopata tanevaetabinexa bajarapavitane pataneyaaaitajitsibinexamē picani. Itsiata baitsi jane bajarapavitane yabara bijiata apo panetaemē. Apo panenavecuaitorobimē patacavecuaponaenexa itsajavabelia. Biji rajane xaniavaetsia panecopiapitame. Pacuenia ángel xaniavaetsia pacopiapitsipame, itsa jume, pacuenia Jesucristo xaniavaetsia pacopiapitsipame, bajarapacuenia xaniavaetsia panecopiapitame. <sup>15</sup> Bजारapamatacabi bitso pajamatabēcuenebarēyamē patacatsipae-bixae pexanialivaisi, Jesucristo pelivaisi. ¿Detsa baja aeconoxae paitsimē panejamatabēcuenebarējajavami? Bजारapamatacabi meta itsa pacavajētsipatsi, paneitaxuto ata panerajutsipame tanaitaxutorutsinexa. <sup>16</sup> Aeconoxae meta bepanijavajabitsaēnēnē panetaejitsipame patacatsipae-bixae pexaniajailivaisi, Jesucristo pelivaisi.

<sup>17</sup> Pamonae saicayalivaisi Jesucristo pelivaisivecua petsipaebaponaevi, pata paxamējavata bajarapalivaisi papecatsipaebinexa. Bजारapamonae najamatabēxainabiaba pexanaenexa xua yabara pasivabarēyamējitsia bajarapamonae. Itsiata baitsi jane bajarapamonae apo najamatabēxainae papecatsipaebinexa pexaniajailivaisi papecapanepaelivaisinexa Diosojavabelia. Bजारapamonae jitsipa paxanē patanevecuana-saicayabinexamē. Jitsipa panejamatabēcuenējēpaenexa bajarapamonae. <sup>18</sup> Xanepana picani itsamonae ata panesivabarēyanexa itsa pacayavenona, itsa baitsi jane pepacuenie xaniavaetsia pacasivanajamatabēxaina papecayavenonaenexa. Bepacayavenona bajarapamonae daxitamatacabijavabelianexa. Nexata paxanē ētapatsimatacabi paxamējavata, apo bepacayavenona. <sup>19</sup> Paxamē bepataximē pacatanetsi. Petiriva itsa vix-aenotatsi penacueto pevecuanaexanaenexatsi, bitso banajamatabēxaina epexanaejavabelianexa. Bajara pijinia pacuenia xanē ata bitso pacasivanajamatabēxainatsi. Tsipaji bitso patojitsipatsi, pacuenia Cristo jamatabēcuenieitsi, bajara paxamē ata panejamatabēcuenieitsinexa. <sup>20</sup> Bitso picani jitsipajē aeconoxae taponaponaejava paxamējavata bitso patacasivanajamatabēxainaexae. Nexata itsa ponaponaejitsipajē paxamējavata, apo patacatoyaquinae tsipaetsi. Pacabarēcuaicuaijaitsi tsipae pexaniacuenia. Apo patacataexae, nexata abaxē xaniavaetsia apo yapētaenē pacuenia exanaejitsianē paxamējavabelia.

*Agarpijivabeje Sarapijivabeje yabara pelivaisi*

<sup>21</sup> Paxamë pajumaitsimë tsabiabi: “Jumecovënëtsianatsi Dioso Moiséspijinëta pena-jumecopatsilivaisi Diosojavabelia vajanacapanepaenexa,” pajamë tsabiabi. ¡Nexata panamuxunaevere xaniavaetsia paneyapëtaenexa pacuenia Dioso jumaitsi bajarapalivaisi yabara! <sup>22</sup> Dioso pejumelivaisibaxutota jumaitsi pacuenia bajayata Abrahampijinë xaina pexënatobeje. Abrahampijinë pexënato itsanë xaina Agarpijivata. Agarpijiva, Abrahampijinë bedajubicuenia pecomuatsiva amoneya petonacuenebaponaponaenexatsi pijabota. Nexata Agarpijiva jumecovënëtabiaba pijatuxanejivibeje pitorobicueniatsi. Bajaraxuacujinae icatsia Abrahampijinë itsanë xaina Sarapijivata, pepo pijavata jane baja. Bajarapova apo pecomuatsiva. <sup>23</sup> Panacuetonëyo Abrahampijinë xaina Agarpijivata, pecomuatsivata jane baja, xaina pacuenia baxaina pexi pexainaevi. Panacuetonëyo pijinia xaina Sarapijivata, pepo pijavata jane baja, mavecova ata bitso pepua perujavata, xaina. Bajarapanacuetonëyo xaina petocopiapatsixaetsi pacuenia Dioso tajëvelia najumecapanepaeya jumaitsi Abrahampijinë pexënato pexainaenexa. <sup>24</sup> Bajarapovabeje pelivaisita Dioso nacayapëtaeyaexana pacuenia Dioso jivi tane anijacueniabeje. Dioso Moiséspijinëta najumecopata Moiséspijinë pijajivi pebarëjumecovënëtsinexa bajarapalivaisi. Bajarapalivaisi Dioso najumecopata Moiséspijinëta Sinaivënë tsutojumata, Arabia nacuata. <sup>25</sup> Itsamonae abaxë mapamatacabi ataje tsiteca jumecovënëtavanapa Dioso Moiséspijinëta penajumecopatsilivaisi. Bajarapamonae abaxë tsiteca pejumecovënëtavanapaexae Dioso Moiséspijinëta penajumecopatsilivaisi, Abrahampijinë pecomuatsivami, Agarpijivami, cuenejëpavanapa. Tsipaji pacuenia Agarpijiva daxitamatacabi jumecovënëtabiaba pijatuxaneva pitorobabiabicueniatsi, bajara pijinia pacuenia bajarapamonae jumecovënëtabiaba Dioso Moiséspijinëta penajumecopatsilivaisi pitorobicueniatsi. <sup>26</sup> Vaxaitsi pijinia Jesucristojavabelia vajanajamatabëcuenecopatsivi, Abrahampijinë pepo pijavami, Sarapijivami, cuenejëpavanapatsi. Nexata itsamatacabi Dioso pijatomarata, pejanaJerusalén tomarata, jinavanapaenatsi. Tsipaji pacuenia Abrahampijinë pepo pijavami, Sarapijivami, itsajivi ata apo pijajivitova pitorobabiabicueniatsi pexanaenexa, bajara pijinia vaxaitsi ata itsitsi. Tsipaji Dioso Moiséspijinëta penajumecopatsilivaisi pitorobicuenia apo jumecovënëtavanapaetsi. <sup>27</sup> Nexata ayaibitsaëtotsi tsaponae Jesucristojavabelia vajanajamatabëcuenecopatsivi. Abrahampijinë pepo pijavami, Sarapijivami, yabara, Dioso pejumelivaisibaxutota tajëvelia jumaitsi mapacueniaje:

Mavecovamë, nexi apo nexainaeva. Jamatabëcuenebarëyamë tsane. Caeto ata apo nenavixaetaeva ata, itsiata jamatabëcuenebarëyaya vavajamë tsaxuabi tsane, navixaetae atamë. Tsipaji nemomoxi ayaibitsaëto xainaename. Xainaename ayaibitsaëto nemomoxi, nijajivitova pemomoxi matatoxenetsia, jai tajëvelia Dioso pejumelivaisibaxutota ayaibitsaëtotsi Jesucristojavabelia vajanajamatabëcuene copatsijavanexa yabara.

<sup>28</sup> Tajamonae, pacuenia Abrahampijinë pepo pijavata, Sarapijivata, naexana Isaacpijinë pacuenia Dioso tajëvelia najumecapanepaeya jumaitsi, bajara pijinia pacuenia vaxaitsi ata Dioso nacatane. Jesucristojavabelia vajanajamatabëcuenecopatsixae, Dioso nacatane Sarapijiva bepepo pemomoxitsi. Nexata pacuenia Dioso tajëvelia najumecapanepaeya jumaitsi vajanacapanepaenexa, bajarapacuenia Dioso nacapanepaena. <sup>29</sup> Bajayata Abrahampijinë pexënato, matapijinë, ponë naexana Agarpijivata, bajaraponë jamatabëitonotabiaba pejuyapijinë, ponë naexana Sarapijivata Dioso pejamatabëcueneta Espíritu Santo peyavenonaexaetsi. Bajara pijinia pacuenia aeconoxae ata, pamona casaë tsavanapae pejumecovënëtsijava Dioso Moiséspijinëta penajumecopatsilivaisi, nacajamatabëitonotabiaba Dioso pejamatabëcueneta Espíritu Santo vajanacatsijamatabëcaevi. <sup>30</sup> Pijuyapijinë, pejamatabëitonotabiabinë yabara, Dioso pejumaitsi sija Abrahampijinëjavabelia Dioso pejumelivaisibaxutota jumaitsi mapacueniaje: “Ponë nexënato xainame necomuatsivata, apo rajutsimë tsane nexainaeyajuvënëjava

nevënamuto pepitsinexa. Daxita rajutsianame ponë xainame pepo nijavata. Bajaraxuata nijabovecua pitsapaeyaexanaename necomuatsiva, nexënato yajava,” jai Dioso pejumelivaisibaxutota Abrahampijinëjavabelia Dioso pejumaitsijava. <sup>31</sup> Tajamonaë, Dioso apo nacatae Abrahampijinë pecomuatsiva bepemomoxitsi. Biji rajane Dioso nacatane Abrahampijinë pepo pijava bepemomoxitsi. Bajaraxuata vaxaitsi baja apo jumecovënëtsitsi Dioso Moiséspijinëta penajumecopatsilivaisi.

## 5

*Pacuenia icatsia apo bejumecovënëtsi Dioso Moiséspijinëta penajumecopatsilivaisi, pamonaë baja najamatabëcuenecopaba Cristojavabelia, yabara pelivaisi*

<sup>1</sup> Cristo pejamatabëcueneta nacacopatsiaexana Dioso Moiséspijinëta penajumecopatsilivaisi vajajumecovënëtsijavami. Nexata Dioso Moiséspijinëta penajumecopatsilivaisi panejumecovënëtsijavami panecopatsijava, tsiteca baja pacopatavanapare. Pëtsa icatsia caevëalia pajumecovënëtame Dioso Moiséspijinëta penajumecopatsilivaisi, bajarapalivaisi bepapijajivimë papecaitorobabiabicuenia paneexanavanapaeyaniva.

<sup>2</sup> Xanë Pablonë, panenamuxunaevere palivaisi pacatsipaebijitsiatsi. Jamatabëcuenenavëxaniabiaya pëtsa pajamatabëjumaitsimë: “Xanë rabaja taneperabëcaucutsinë. Bajaraxuata tajaneconivecua Dioso necapanepaena,” pajamatabëjamë pëtsa. Bajara-pacuenia itsa panajamatabëxainaejitsipame, nexata Cristo papecasivatëpaejava papecacapanepaenexa panijaneconivecua, saya pacasivanacueratsipa. Nexata pajumecovënëre Cristo papecasivatëpaejava papecacapanepaenexa panijaneconivecua. <sup>3</sup> Icatsia pacamuxujiobatsi asaëyata. Pajivi jamatabëcuenenavëxaniabiaya jamatabëjumaitsi: “Xanë naperabëcaucutsiaexanaenajë tajaneconivecua Dioso tanecapanepaenexa,” jamatabëjai, bajarapajivi bejumecovënëtsicapanepa daxita pacuenia Dioso Moiséspijinëta penajumecopatsilivaisi itorobatsi. <sup>4</sup> Jamatabëcuenenavëxaniabiaya itsa pajamatabëjumaitsimë tsipae: “Xanë jumecovënëtsianajë Dioso Moiséspijinëta penajumecopatsilivaisi. Nexata Dioso aneconijibia netaena tanecapanepaenexa,” itsa pajamatabëjamë tsipae, nexata pacopabijitsipame panejumecovënëtsijavami Cristo papecasivatëpaejava panijaneconi yabara. Dioso papecaitaxutotsoniataexae aneconijibia papecataejavami ata, pacopabijitsipame. <sup>5</sup> Vaxaitsi baja cajena yapëtanetsi Dioso vajanacacapanepaejavanexa. Tsipaji jumecovënëtatsi Jesucristo vajanacasivatëpaejava vajaneconi yabara. Bajaraxuata Espiritu Santo pejamatabëcueneta vajanacayavenonaexae, evetavanapatsi Dioso vajanacajumaitsinexa: “Paxamë rabaja paneconijibimë,” vajanacajainexa, pamatacabi Dioso pitabarata nubenaenatsi. <sup>6</sup> Vaxaitsi baja Jesucristo pijajivitsi. Nexata nacaperabëcaucutsi ata, apo nacaperabëcaucutsi ata, itsiata bajarapacuenë amatamobi Dioso pitabarata. Namatamota rajane asivaya vajayavenonaponaejava itsamonae ata vajanajamatabëcuenecopatsixae Jesucristojavabelia.

<sup>7</sup> Pajumecovënëtavanapame baja picani pexaniajailivaisi. Jipatsa nexata pacacopatsiaexana bajarapalivaisi panejumecovënëtsijavami? <sup>8</sup> Dioso raja apo pacacopatsiaexanae. Biji rajane Dioso pacajunata Jesucristojavabelia panenajamatabëcuenecopatsinexa. <sup>9</sup> Pëtsa panacofënëtame mapalivaisije. Pan pexanaematabënexa ayaimatabë ata, levadurajava pijinia tsiquirijavayo ata, itsiata pematajërëabijavata, bacaëjëpa daxitamatabëjava. Nexata bafufunaeyaexana daxitamatabë. Bajara pijinia itsi penajumetsënëtsilivaisi jivi petsipaebaponaevi. Penajumetsënëtsilivaisi jivi petsipaebaponaevi, caenëbeje ata, itsiata ayaibitsaëto Jesucristojavabelia penajamatabëcuenecopatsivi, jamatabëcuenëbijianapona. <sup>10</sup> Yapëtaniji baja cajena mapacuenëje. Paxamë baja Jesucristo papijajivimë. Nexata Dioso pacayavenonaena. Xanë yapëtaniji pacuenia paexanaejitsiamë. Tsiteca pajumecovënëtavanapaname patacatsipaebilivaisi. Dioso cajena itsamatacabi naneconitsiaexanaenatsi ponë Jesucristo pelivaisivecua pacajamatabëcuenëbijiana penajumetsënëtsilivaisita.

<sup>11</sup> Tajamonaē, Jesucristo pelivaisi apo judíovi tatsipaebabiabijavata, itsa jumaitsinē tsabiabi tsipae: “Paxamē apo pajudíovimē, Jesucristojavabelia panenajamatabēcuenecopatsivi, bepanaperabēcaucubiaexaname Diosojavabelia papecacapanepaenexa,” itsa janē tsabiabi tsipae, nexata judíovi apo nebejiobiaexanabiabi tsipae. Apo judíovi ata, Jesucristojavabelia penajamatacuenecopatsivi, itsa itorobaponaejitsipajē peperabēcaucubinexatsi, nexata Jesucristo cruzata petēpaelivaisi tsipaebi atanē, itsiata judíovi apo nitoya tsipae. <sup>12</sup> Pamonaē pacajamatabēitonotabiaba panenaperabēcaucutsiaexanaenexa, bajarapamonaē tojitsipajē mapacueniaje. Tojitsipajē bajarapamonaē papacavecuapitsapaenexa, papecacopatsinexa baja papecajamatabēitonotabiabijava.

<sup>13</sup> Tajamonaē, Dioso pacajunata panecopabinexa Dioso Moiséspijinēta penajumecopatsilivaisi panejumecovēnētsijavami. Itsiata baitsi jane pētsa pajamatabējumaitsimē: “Dioso Moiséspijinēta penajumecopabilivaisi tajumecovēnētsijavami, tacopatsixae baja, nexata exanaenajē daxita pibisiacuene pacuenia jitsipajē,” pajamatabējamē pētsa. Biji rajane Dioso Moiséspijinēta penajumecopatsilivaisi panejumecovēnētsijavami, panecopabixae baja, Jesucristojavabelia penajamatabēcuenecopatsivi bepapijajivimē panataema namataenetsia panenayavenonabiabinexa. Bajarapacuenia namataenetsia panayavenonabiabianame panenasivaxae. <sup>14</sup> “Asivamēre itsamonaē ata pacuenia nijacuata nasivamē,” pejailivaisi itsa pajumecovēnētsianame, nexata daxita palivaisi Dioso Moiséspijinēta najumecopata, pajumecovēnētsicapaneaname. <sup>15</sup> Itsa panaitoyamē, itsa panabaracuaicuaijamēnua pibisiacuena, nexata xaniavaetsia panaitavere. Tsipaji itsa panaitoyamē tsipae, itsa panabaracuaicuaijamēnua tsipae pibisiacuena, nexata Jesucristojavabelia panenajamatabēcuenecopatsijava, namataenetsia panajamatabēcuene faefaenaeyaexanaejitsipame. Pacopatsipamenua baja Dioso pejumelivaisi yabara panenacaetuatabiabijava ata.

*Pacuenia Espíritu Santo nacajamatabēcueneyavenona yabara pelivaisi*

<sup>16</sup> Mapacuenia pacajumaitstsije. Pacuenia Espíritu Santo pacaitorobabiaba, paexanabiabare daxitamatacabi canacujitsia. Pētsa pibisiacuene paexanabiabame panijacuata panenajamatabēxainaejava. <sup>17</sup> Xua vajacuata vajajamatabēēthētota najamatabēxainabiabatsi pibisiacuene vajaexanabiabinexa, bajaraxua vajaexanaenexa, Espíritu Santo apo jitsipae. Xua pijinia Espíritu Santo nacaitorobabiaba pexaniacuene vajaexanabiabinexa, bajaraxua juya vajajamatabēcuene vajaexanabiabinexa apo jitsipae. Nexata vajajamatabēcuenebeje, Espíritu Santobeje apo najamatabēcuenejēpaebeje. Bajaraxuata pexaniacuene pajamatabēexanabiabi atamē, itsiata apo paexanabiabimē pexaniacuene. <sup>18</sup> Itsa baja paexanavanapaename pacuenia Espíritu Santo pacaitorobabiaba, nexata baja tsiteca apo paexanavanapaemē tsane pacuenia pacaitoroba Dioso Moiséspijinēta penajumecopatsilivaisi. Tsipaji baja pacuenia Espíritu Santo pacaitoroba, paexanavanapaename.

<sup>19</sup> Xua jivi pijacuata najamatabēxaina, itsa exana, yapēxanepana vajayapētaenexa. Tsipaji xua jivi pijacuata najamatabēxaina itsa exana, pebi itsava jaita pijavavecu. Petiriva pijinia jaita itsanē pamonavecu. Pamonaē pevitota pibisiacuene exana pacuenia pijacuata najamatabēxaina, bajarapamonaē jitsipanua daxita xua pibisiacuene pexanaenexa. <sup>20</sup> Pamonaē pibisiacuene exana pacuenia pijacuata najamatabēxaina, pematabacabēta nubenabiaba pevajētabiabinexa jumapecataeya pexanaenēanējavabelia. Junatabiabanua penajorobivi. Bajarapamonaeyajuvēnēvi naexananua penajorobivi. Itoyanua tsabiabi itsamonaē. Jumeanaenotabiabanua itsamonaē. Cuenecaēbabiabanua itsamonaē. Anaepanabiabanua apo vajayabaraanaepanaejavayo ata. Natoexanabiabanua daxitacuene ēpamonaenexa. Vecuanasaicayababiabanua itsamonaē Dioso pejumecovēnētsivi. Caebitsaēto caejavata apo najuanacaetuanabiabi. <sup>21</sup> Pamonaē pibisiacuene exana pacuenia pijacuata najamatabēxaina, jamatabēyacajērētabiabanua itsamonaē pexinaejava. Jamatabēbeyaxuababiabanua jivi. Aitajibinua tsabiabi pijabonējava. Aitajibinua tsabiabi fiestajava ata. Itsacuenenua pematatsēnēa, bajara bepitsipibisiacuene, exanabiaba. Pacuenia copiata pacamuxujibatsi, bajara icatsia pacuenia

pacamuxujobatsi. Pamonaē bajarapacuenia pibisiacuene exana, bajarapamonaē apo jinavanapae tsane Dioso pijanacuatatsia.

<sup>22</sup> Pacuenia peubinae, pexanianaē, pexaniacuai capitsapa, bajara pijinia pacuenia Espírítu Santo vajajamatabēēthētovetsina capitsapa mapacuenēje. Capitsapa itsamonaē ata vajaanivajamatabēcuene. Capitsapa vajabarēyajamatabēcuene. Capitsapa Dioso javabelia, itsamonaē javabelia ata, barajamatabēcuenexanepanaēya vajataenexa. Capitsapa, itsamonaē nacaitacuēniabi ata, vajavajēnaēyabelia vajaanamatabēsaējamatatabēcuene. Capitsapa itsamonaē vajaitaxutotsoniataē jamatabēcuene. Capitsapa itsamonaē pexaniacuene vajatoexanaējamatabēcuene. Capitsapa Dioso vajajumecovēnetsijava vajaanamatabēsaējamatatabēcuene. <sup>23</sup> Espírítu Santo vajajamatabēēthētovetsina capitsapa vajaanitejepaēbijamatabēcuene. Capitsapa vajanajamatabēcataitsi jamatabēcuene pibisiacuene vajaananaēyaniva. Daxita bajarapajamatabēcuene, Espírítu Santo vajajamatabēēthētovetsina pecapitsapaejamatabēcuene, xanepana. Itsalivaisi ata cajena apo itavetsi daxita bajarapacuenē. <sup>24</sup> Pamonaē Jesucristo pijajivi, bajarapamonaē jamatabējumaitsi: “Jesucristo cruzajavabelia itsa cobematabiabarutatsi, tajaperujujamatabēcuenemi yajavatēpa,” jamatabējai. Nexata vecuaajibiaexanatsi pajamatabēcuene itorobabiabatsi pibisiacuene pexanaenexa. <sup>25</sup> Vaxaitsi Espírítu Santo nacayajavaponapona. Nexata betonacopatabiabatsi vajanacaitorobinexa pacuenia Espírítu Santo nacatojitsipa vajaanabiabinexa.

<sup>26</sup> Ayaijamatabēcuenejivitsi apo benataetsi. Namataenetsia itsacuenejavayo ata pibisiacuene apo benatoexanaetsi vajanabaraanaepanaēyaniva, vajanacuene caēbivaniva ata.

## 6

*Pacuenia Dioso pejumecovēnētsivi itorobatsi namataenetsia penajamatabēcueneyavenonaeenexa yabara pelivaisi*

<sup>1</sup> Tajamonaē, itsa pacaxitajarabame Dioso pejumecovēnētsijavavecua pejopaejivi, paxamē pacuenia Espírítu Santo pacaitoroba panejinavanapaevi, payavenonare bajarapajivi. Payavenonare bajarapajivi piamamatabēcuenesaēnēxa icatsia Dioso pejumecovēnētsijava. Itsiata baitsi jane pexaniajamatabēcuenia xaniavaetsia payavenonare. Paxamē ata pibisiacuene nayajivitaēya pajinavanapare. Belia paxamē ata Dioso panejumecovēnētsijavavecua, pajopaejitsipame dovathi itsa pacajamatabēcueneējēta pibisiacuene paneexanaenexa. <sup>2</sup> Namataenetsia panayavenonabiabare dovathi itsa pacajamatabēcueneējēta, pibisiacuene paneexanaēyaniva. Namataenetsia itsa panayavenonabiabianame panenasivaxae, nexata pajumecovēnētsianame pacuenia Cristo pacaitoroba.

<sup>3</sup> Pajivi jumaitsi itsa vēnēlivaisitane itsajivi Dioso pejumecovēnētsijavavecua pejopaejava: “Xanē cajena ayaijamatabēcuenenēnē bajarapajivi matatoxenetsia. Nexata Dioso tajumecovēnētsijavavecua apo jopaenē tsane,” jai, bajarapajivi najamatabēcuenecapaeba. Tsipaji bajarapajivi ata dovathi itsa jamatabēcueneējētatsi pibisiacuene pexanaenexa, apo ajamatabēcuenesaē tsipae Dioso pejumecovēnētsijava. <sup>4</sup> Caejivi canacujitsia benacuene canaējēta peyapētaenexa xua exanaponapona Dioso pitabarata. Nexata pajivi pexaniacuene exanaponapona, bajarapajivi jamatabēcuene barēya Dioso pitabarata. Itsiata baitsi jane bajarapajivi pexaniacuene exanaponaponaē ata, apo bejamatabējumaitsi mapacueniaje: “Xanē itsamonaēvecua pexaniacuene Dioso toexanaponaponajē,” apo bejamatabējai. <sup>5</sup> Caejivi canacujitsia baja cajena saicaya xaina pexanaponae javanexa Dioso pitobobicueniatsi.

<sup>6</sup> Pamonaē tsipaebatsi Dioso pejumelivaisi, bajarapamonaē pexainaēyajuvēnējava juya berajuta Dioso pejumelivaisi petsipaēbinētsijavabelia.

<sup>7</sup> Pētsa pajamatabēcuenenavēxaniabame saicayacuēnia paneexanaēyaniva Dioso pecaitorobicuenevecua. Tsipaji itsajivi ata apo caējēpaetsi peyamaxēitojorobinexa Dioso. Xua jivi bauba pabita, pamatacabi baja navereta bajaraxua, icatsia banota.

Bajara pijinia itsane Dioso ata. Pajivi pibisiacuene exana, bajarapajivi juya pibisiacuene tocopiapatsianatsi pamatacabi Dioso naneconitsiaexanaenatsi. <sup>8</sup> Pajivi pibisiacuene exanaponapona pijacuata penatojitsipaecuenia, nexata bajarapajivi itsa tēpaena, pepacuene Diosovecua naxuabiana. Pajivi pijinia pexaniacuene exanaponapona Espírítu Santo pesivabarēyanexatsi, nexata bajarapajivi tēpae ata, xainaena matacabi apo pev-everevecaejava. <sup>9</sup> Vaxaitsi itsa apo yabaracueranaetsi tsane pexaniacuene vajaexanavanapaejava, nexata Dioso pecaējētsimatacabita nacarajutsiana pexaniacuene. Bajaraxuata pexaniacuene vajaexanavanapaejava, apo beyabaracueranaetsi. <sup>10</sup> Nexata itsajota nacacuenecaējēpa, pexaniacuene betoexanabiabatsi itsamonaejavabelia. Pamonaes Jesucristo vajanajuajumecovēnētsivi, bajarapamonae bitsoyo beyavenonaponatsi.

*Pacuenia Pablo pemuxujobilivaisi Galacia tomarapijivi toyaquina peveretsinexa baja petoyaquinaelivaisi mapabaxutotaje yabara pelivaisi*

<sup>11</sup> Pataema mapaayaiitanetonēje. Xanē raja Pablonē tajacuata pacatoyaquinatsi mapalivaisije. <sup>12</sup> Itsamonae judíovi ajumesaēya pacajumai tsabiabi: “Paxamē apo pajudíovi atamē, Jesucristo pelivaisi itsa pajumecovēnētame, bepanaperabēcaucubiaexaname papecacapanepaenexa Diosojavabelia,” pacajai tsabiabi. Pajudíovi bajarapacuenia pacajumai tsabiabi, jamatabēcuenenavēxaniabiaya jamatabējumai tsabiabi: “Jesucristo pelivaisi apo judíovi itsa tsipaebianatsi, yajavaitorobianatsi penaperabēcaucubiaexanaenexa. Nexata bajarapacuenia itsa exanaenatsi, vajamonae judíovi nacasi-vajamatabēcuenenavēxaniabiaya tsane. Nexata vajamonae judíovi apo nacaitsacueniabi tsane, apo judíovi tsipaebi atatsi Cristo vajanacasivatēpaejava cruzata,” jamatabējai tsabiabi bajarapajudíovi jamatabēcuenenavēxaniabiaya. <sup>13</sup> Pajudíovi bajarapacuenia pacajumai tsabiabi, pijacuata naperabēcaucubiaexanae ata, itsiata apo exanavanapae daxita pacuenia itorobatsi Dioso Moiséspijinēta penajumecopatsilivaisi. Bajarapamonae jitsipa panaperabēcaucubiaexanaenexa, saya papecavajunupaebinexa pevēna judíovijavabelia: “Paxanē patajamatabēcueneta Galacia nacuapijivi naperabēcaucubiaexana,” pejainexa paxamē yabara. Tsipaji bajarapajudíovi jitsipa pesivajamatabēcuenenavēxanavatsi pevēna judíovi. <sup>14</sup> Xanē cajena bajarapacuenia apo exanaenē. Apo najamatabēxainaenē, xua exanajē, tanavajunupaebinexa jivi saya tanesivabarēyanexa. Itsiata jitsipajē caelivaisiyo jamatabēcuenenavēxaniabiaya jivi tatsipaebinexa. Jitsipajē jivi tatsipaebinexa Jesucristo vajanacasivatēpaejava cruzata. Jesucristo cruzata tanesivatēpaexae, nevejamatabēcaeva baja tajitsipaejavami mapanacuapijicueneneje. Mapanacuapijivi pijinia tanejitsipaejamatabēcuenemi ata ajibi baja. <sup>15</sup> Espírítu Santo vajanacaitorobicuenia itsa exanavanapatsi, nacaperabēcaucutsi ata, apo nacaperabēcaucutsi ata, najēpabeje. Tsipaji cajena amatamobi bajarapacuenia Dioso pitabarata. Vajanajamatabēcuenia pēnyorotsijava rajane pejanajamatabēcuenenavēxanavatsi, namatamota vajanacacapanepaenexa Diosojavabelia. <sup>16</sup> Nexata pamonaes exanavanapae pacuenia pejanajamatabēcuenia itorobatsi, bajarapamonae jamatabēcuenenavēxanavatsi jinavanapaena Dioso pitabarata. Dioso itaxutotsoniataenatsinua. Bajarapamonae daxita Dioso baja pepo pijajivi tsane.

<sup>17</sup> Tavajēnaeyabelia baja apo jitsipaenē tanejamatabēitonotaponaenexa pamonaes nejumaeaba Jesucristo taneitorobinēcuenia. Jesucristo pelivaisi yabara tanejumaconibabeyabiabijavata, nejumatatitibabeyabiaba. Bajarapavajēncovēanē tanetsijumarubenaexae, daxitajivi neyapētane Jesucristo pijajivitonēcuenenē.

<sup>18</sup> Tajamonae, pacatovajētabiabatsi Diosojavabelia vajatuxanenē Jesucristo papecayavenonabinexa. Bajara itsi tsane.

## Mapabaxutoje San Pablo toyaquina Efeso tomarapijivijavabelia

*Pacuenia Pablo toyaquina mapabaxutoje Dioso pejumecovënëtsivi, Efeso tomarapijivijavabelia, yabara pelivaisi*

<sup>1</sup> Xanë Pablonë, Dioso tanetojitsipaexae, nitapeta Jesucristo pijaapóstolenënexanë. Nexata Jesucristo nitoroba jivi pexanialivaisi tatsipaebaponaenexa. Pacatoyaquinatsi mapabaxutoje Dioso papijajivimë, Jesucristojavabelia panenajamatabëcuenecopatsivi, panejinavanapaevi Efeso tomarata. <sup>2</sup> Pacatovajëtatsi vaxa Diosojavabelia, vajatuxanenë Jesucristojavabelia ata, papecaitaxutotsoniataenexa jamatabëcuenexanepanaeya panejinavanapaenexa.

*Pacuenia Dioso jivi capanepaejitsia pijaneconivecua Jesucristo pesivatëpaexaetsi yabara pelivaisi*

<sup>3</sup> “Pexaniacuene rabaja panetoexaname,” jaitsi vaxaitsi, vajatuxanenë Jesucristo paxa, Diosojavabelia. Jesucristo baja pijajivixaetsi, daxitacuenejavabelia Dioso nacayavenon-pona vajanacajamatabëcuene asaëyaexanaenexa. Nexata Dioso nacajamatabëcuenexaniavaetapona vajanaponaenexa Dioso pijanacuayabetsia. <sup>4</sup> Dioso mapanacuaje pexanaevajënaeya ata, tajëvelia nacaitapeta pijajivinexatsi. Tsipaji baja Dioso tajëvelia yapëtane Jesucristojavabelia vajanajamatabëcuene copatsijavanexa Jesucristo vajanacasivatëpaexae. Bajarapacuenia Dioso tajëvelia nacaitapeta pijajivinexatsi vajajinavapanenexa aneonijibia Dioso pitabarata. <sup>5</sup> Dioso bitso vajanacajitsipaexae, tajëvelia najamatabëcuenevereta pexicueniatsi vajanacataenexa. Jesucristo nacasivatëpa Dioso petojitsipaecueniatsi. Bjaraxuata nexata Dioso nacamatacabi canacujitsia Diosojavabelia jumaitsitsi tsabiabi. “Xanepana rabaja. Tsipaji pexaniacuene panetoexaname,” jaitsi tsabiabi Diosojavabelia. Dioso pexënato piasivanë pijajivixaetsi, Dioso nacaitaxutotsoniatane. <sup>7</sup> Pinijicuenia Dioso vajanacaitaxutotsoniataexae, nexata pexënato itorobica mapanacuayabetsicaje vajanacasivatëpaenexa. Bjarapacuenia Dioso nacavecuajibi-aexana pibisiacuene vaxaxanaeconimi. <sup>8</sup> Dioso pinijicuenia vajanacaitaxutotsoniataexae, nacayapëtaeyaexana pexaniajailivaisi. Nacayapëtaeyaexananua pacuene nacamatacabi Dioso pejitsipaecuenia vaxaxanapanenexa. <sup>9</sup> Xua Dioso tajëvelia najamatabëcuenevereta pexanaenexa, bjaraxua baja aeconoxae Dioso nacayapëtaeyaexana. Bjaraxua picani abaxë itsajivi ata apo yapëtae. Xua Dioso tajëvelia najamatabëcuenevereta pexanaenexa, maitsije. Dioso itorobijitsiatsica pexënato mapanacuayabetsicaje petoexanaeveretsinexatsi daxita pacuenia itoroba. <sup>10</sup> Pacuenia Dioso tajëvelia najamatabëcuenevereta, bjarapacuenia daxita Cristo pijajivitsi nacacaetuatsiana Dioso pecaëjëtsimatacabi itsa copiapatsiana. Dioso pecaëjëtsimatacabi itsa copiapatsiana daxitacuene mapanacuapijicuenije, athëbëpijicuenie ata, Dioso baja tocopatsiana pexënato juya pevetsinexa.

<sup>11</sup> Jesucristo pijajivinexatsi tajëvelia Dioso nacaitapeta. Bjarapacuenia Dioso tajëvelia nacaitapeta tsipaji baja cajena Dioso tajëvelia najamatabëcuenevereta bjarapacuenia pexanaenexa. Dioso daxitacuene exana pacuenia tsitanepanatsi. <sup>12</sup> Bjarapacuenia Dioso tajëvelia nacaitapeta vajanajamatabëcuenecopatsinexa Jesucristojavabelia. Nexata vaxaitsi Dioso tojinavanapatsi Diosojavabelia vajajumaitsitsabiabinexa: “Diosomë, ayajamatabëcuenenëmë bitso,” vajajitsabiabinexa Diosojavabelia. <sup>13</sup> Pexaniajailivaisi papecacapanepelivaisinexa, paxamë ata itsa pajumetaneme, nexata baja panajamatabëcuenecopatame Jesucristojavabelia papijajivexamë. Nexata pacuenia Dioso tajëvelia najumecapanepaeya jumaitsi, pacarajuta baja Espiritu Santo papecatsijamatabëcaenexa. Nexata bjarapacuenia panayapëtaneme Dioso papijajivicuenemë.

<sup>14</sup> Espíritu Santo vajanacatsijamatabëecaexae, yapëtanetsi pexaniajaicuene Dioso vajanacarajutsinexa matababi apo peverevereaejava. Yapëtanetsinua Dioso vajanacapanepaejavanexa pexënato vajanacasivatëpaexae. Bajaraxuata vaxaitsi bejumaitsitsi Diosojavabelia: “Diosomë, ayaijamatabëcuenenëmë bitso,” bejaitsi.

*Pacuenia Pablo tovajëta Diosojavabelia Dioso pejumecovënëtsivi, Efeso tomarapijivi, yabara pelivaisi*

<sup>15</sup> Pacavënëlivaisitanetsi panenajamatabëcuenecopatsijava vajatuxanenë Jesucristojavabelia. Pacavënëlivaisitanetsinua paneasivajava daxita pamonaë Dioso pejumecovënëtsivi. <sup>16</sup> Bajaraxuata itsa vajëtajë Diosojavabelia, pacatovajëtabiabatsi. Nexata pexaniajamatabëcuene rajutabiabajë Diosojavabelia paxamë yabara. <sup>17</sup> Ayaijamatabëcuenenë Dioso, vajatuxanenë Jesucristo paxa. Bajaraponëjavabelia pacatovajëtabiabatsi. Pacatovajëtabiabatsi Espíritu Santo pejamatabëcueneta xaniavaetsia panevajënaeyabelia papecayapëtaeyaexanaponanexa pacuenia Dioso jamatabëcueneitsi. Nexata Espíritu Santo pejamatabëcueneta panevajënaeyabelia pacayapëtaeyaexanaponanexa pacuenia Dioso jamatabëcueneitsi. Pacayapëtaeyaexanaponanexa pacuenia Dioso nacatsitanajamatabëcueneitajëta. <sup>18</sup> Pacatovajëtabiabatsinua Diosojavabelia Dioso papecajamatabëcueneitayotsinexa panevajënaeyabelia paneyapëtaeponanexa pajamatabëcuene yabara Dioso pacajunata papijajivinexamë. Pacatovajëtabiabatsinua Diosojavabelia paneyapëtaenexa xua Dioso pacarajutsijitsia, bitso ayaijamatabëcuenejava, matababi apo peverevereaejava. Tajëvelia Dioso najumecapanepaeya jumaitsi Dioso pijajivitsi vajanacarajutsinexa matababi apo peverevereaejava. <sup>19-20</sup> Pacatovajëtabiabatsinua paneyapëtaenexa Dioso bitso piasaënëcuene. Vajanacayavenonaenë vajanajamatabëcuenecopatsivi bajaraponëjavabelia. Dioso bitso piasaënëcuene jivi tsitanajamatabëcueneitajëta pamatababi Cristo asaëyaexanatsi petëpaecujinae. Nexata baja Cristo paxa Dioso athëbëtatsia pemuxuneneta ecaeyaexanatsi pecujuanenia penajuaevetsinexabeje daxitacuene. Nexata bajarapasaëta vaxaitsi ata Dioso nacayavenonaponan. <sup>21</sup> Bajarapacuenia Cristo athëbëtatsia, paxa Dioso pemuxuneneta, ecaeyaexanatsi pecujuanenia Cristo pevetsinexa daxitacuene. Nexata daxitanacuanëjava pevetsivi matatoxenetsia aeconoxae jane baja daxitacuene Cristo pepo pevetsinë. Cristo baja daxitacuene eveta mapamatababitaje. Pejanamatababijavabelianexa ata evetsiana. <sup>22</sup> Dioso tocopatatsi Cristo daxitacuene pevetsinexa. Nexata Cristo pepo pitorobinë daxita pamonaë najamatabëcuenecopata bajaraponëjavabelia. <sup>23</sup> Daxita baja pamonaë najamatabëcuenecopata Jesucristojavabelia, Dioso tanetsi Cristo pijajivi. Cristo nexata itoroba bajarapamonae. Nexata Cristo bajarapamonae yajavaponaponan daxita mapanacuajavaje.

## 2

*Pacuenia Dioso pijajivi, piasivaxae, capanepaejitsia yabara pelivaisi*

<sup>1</sup> Dioso baja cajena pacajamatabëcueneaitavayaexana Jesucristo pejamatabëcueneta. Paxamë abaxë bajayata Dioso itsa apo pajumecovënëtsimë, naxuabiaya picani Diosovecua pajinavanapame pibisiacuene paneexanavanapaeneconi yabara. Nexata pacuenia itsi petëpaevi, bajara picani pajamatabëcueneitsimë Diosojavabelia itsa abaxë Dioso apo pajumecovënëtsimë. <sup>2</sup> Pacuenia Dioso apo pejumecovënëtsivi, pibisiacuene exanavanapa, bajara picani pacuenia paxamë ata bajayata pibisiacuene paexanavanapame. Pajumecovënëttavanapame picani ëdovathi, ponë eveta pitaquirijamatabëcuene mapanacuataje. Aeconoxae dovathi jamatabëcueneasaëyaexanaponan pamonaë Dioso apo pejumecovënëtsivi pibisiacuene pexanaenexa. <sup>3</sup> Daxita picani bajayata vaxaitsi pibisiacuene exanavanapatsi. Pacuenia vajajamatabëëthëtota jitsipatsi vajaexanaenexa, exanabiabatsi. Xua najamatabëxainatsi, exanabiabatsi. Bajaraxuata pacuenia daxita itsamonae naneconita Diosojavabelia, bajara picani pacuenia vaxaitsi ata naneconitatsi Diosojavabelia vajanacananeconitsiaexanaenexa. <sup>4</sup> Itsiata baitsi jane

Dioso, bitso jivi pitaxutotsoniataenë, vaxaitsi bitso nacajitsipa. <sup>5</sup> Diosovecua naxuabiaya picani vajajinavanapaevimi ata pibisiacuene vajaexanaeneconi yabara, itsiata Dioso nacajamatabëcueneaitavayaexana, Jesucristo Dioso itsa asaëyaexanatsi petëpae-cujinae. Bajarapacuenia Dioso nacatoexana vajanacaitaxutotsoniataexae. Nexata Dioso nacacapanepaena pibisiacuene vajaexanaeneconimivecua. <sup>6</sup> Jesucristo petëpae-cujinae, Dioso icatsia asaëyaexanatsi petëpaejavavecua. Nexata vaxaitsi Jesucristo-javabelia vajanajamatabëcuene copatsixae, Dioso nacatane bevajanacayajavaasaëyaex-anaevi. Dioso nacatanenua Jesús athëbëtatsia bevajanacayajavaeaevi daxitacuene vajanacabarëevetsinexa. <sup>7</sup> Bajarapacuenia Dioso nacatoexana vajanacatsitanaja-matabëcuene itajëtsinexa daxitamatacabijavabelianexa vajanacajitsipaecuene. Nacat-sitanajamatabëcueneitajëtanua vajanacaitaxutotsoniataecuene Jesucristo vajanacasi-vatëpaexae. <sup>8</sup> Dioso cajena bitso pacajitsipa. Bajaraxuata Jesucristojavabelia itsa pana-jamatabëcuene copatame, Dioso pacacapanepaena panijaneconivecua. Bajarapacue-nia Dioso papecacapanepaejavanexa, panijacuata apo panatoexanaemë. Biji rajane Dioso pejamatabëcueneta pacacapanepaena. <sup>9</sup> Itsajivi ata Dioso petonacuenebapon-aponaejamatabëcuene, Dioso apo capanepaetsi tsane. Biji rajane Jesucristojavabelia penajamatabëcuene copatsixae, Dioso capanepaenatsi. Bajaraxuata itsajivi ata beayai-jamatabëcuenejivi apo benatae Dioso pecapanepaejavanexatsi yapëtae ata. Apo bejumaitsinua: “Xanë Dioso tatonacuenebixae, nexata necapanepaena,” apo bejai. <sup>10</sup> Vaxaitsi raja Dioso nacaexana. Nacaexananua Jesucristo pijajivitsi Dioso vaja-toexanavanapaenexa pexaniacuene. Bajarapacuenia Dioso tajëvelia najamatabëxaina vajoexanavanapaenexa.

*Pacuenia Dioso pejumecovënëtsivi jamatabëcuenexanepanaeya jinavanapa Jesucristo peja-matabëcueneta yabara pelivaisi*

<sup>11</sup> Panajamatabënapire pacuenia picani paxamë bajayata pajamatabëcueneitsimë tsavanapae itsa abaxë Dioso apo pajumecovënëtsimë. Paxamë apo pajudíovimë. Judíovi saicaya peperabëcaucubivitsi Dioso pijajivi penayapëtaenexa. Nexata judíovi jumai tsabiabi: “Vaxaitsi vajanacaperabëcaucubivi, Dioso pijajivitsi nayapëtanetsi,” jai tsabiabi. Paxamë pijinia apo pajudíovixaemë, judíovi paxamë yabara jumai tsabiabi: “Bajarapamonae apo peperabëcaucubivitsi. Nexata Dioso apo pijajivi,” jai tsabiabi judíovi paxamë yabara. <sup>12</sup> Bajarapamatacabi abaxë apo pajumecovënëtsimë Cristo. Pasaicayavimë abaxë tsavanapae Diosovecua. Pasaicayavimë abaxë tsavanapae judíovi atavecua. Bajarapamatacabi abaxë apo payapëtaemë pacuenia Dioso pacayavenonae-jitsia papecacapanepaenexa. Mapanacuata picani abaxë naxuabiaya Diosovecua pajina-vanapame. “Pamatacabi tēpaenajë, pepacuene naxuabianajë,” pajamatabëjamë tsabiabi. <sup>13</sup> Paxamë picani Diosovecua bitso naxuabiaya pajinavanapame. Itsiata baitsi jane aeconoxae baja Cristo papijajivimë. Cristo papecasivatëpaexae, aeconoxae baja paya-javajinavanapame Dioso. <sup>14</sup> Paxanë pajudíovinë, paxamë apo pajudíovi atamë, Jesucristo pejamatabëcueneta daxitatsi Dioso nacajamatabëcuenexanepanaeyaexana namataenetsia vajanasivatsavanapaenexa. Jesucristo pejamatabëcueneta benacaemonaetsi Dioso nacaexana. Jesucristo daxitatsi vajanacasivatëpaexae, ajibi vajanayabaraitoyacuene vajanavecuanatsanaenexa. <sup>15</sup> Jesucristo cruzata itsa tēpa, copiarucaeyaexana baja namataenetsia vajanaitoyacuenemi. Tsipaji baja Jesucristo itsa tēpa, copiarucaeyaex-ana palivaisimi bajayata Dioso Moiséspijinëta najumecopata. Bajarapalivaisimi pax-anë pajudíovinë bitso picani asaëyata pajumecovënëtavanapajë. Nexata bajarapali-vaisimi Jesucristo baja copiarucaeyaexana. Dioso Moiséspijinëta penajumecopatsilivaisi itsa pajumecovënëtavanapajë, paxamë apo pajudíovimë apo pacabarajamatabëcuenex-anepanaetsi. Aeconoxae baja Jesucristo vajajumecovënëtsixae, Jesucristo pijajivitsi nacaexana. Nexata baja Jesucristo pejamatabëcueneta nacanabarajamatabëcuene xanepanaeyaexana. <sup>16</sup> Jesucristo cruzata vajanacasivatëpaexae, copiarucaeyaexana baja namataenetsia vajanaitoyacuenemi. Nexata paxanë pajudíovinë, paxamë pijinia apo

pajudíovi atamë, Cristo baja caebitsaëtotsi nacaexana pijajivinexatsi. Nexata baja Dioso jamatabëcuenexanepanaeya nacatane.

<sup>17</sup> Jesucristo patajopa mapanacuayabetsicaje. Nexata capatsica pexanialivaisi vajayapëtaenexa daxitatsi Dioso jamatabëcuenexanepanaeya vajanacataejava. Paxamë apo pajudíovimë bitso picani Diosovecua naxuabiaya pajinavanapame. Bajaraxuata Dioso pacatocopata Jesucristo pelivaisi panejumecovënëtsinexa. Paxanë pajudíovinë pajumecovënëtajë picani palivaisi bajayata Dioso Moiséspijinëta najumecopata. Nexata paxanë ata Dioso panetocopata Jesucristo pelivaisi patajumecovënëtsinexa. <sup>18</sup> Nexata Jesucristo daxitatsi vajanacasivatëpaexae, paxanë pajudíovinë, paxamë pijinia apo pajudíovi atamë, vaxa Dioso nacatocopata vajajonenexa Dioso pijatomarabetsia. Bajarapacuenia vaxa Dioso nacatocopata vajajonenexa pijatomarabetsia Espíritu Santo vajanacayavenonaexae. <sup>19</sup> Bajaraxuata apo pajudíovi atamë, aeconoxae baja Dioso panejumecovënëtsixae, bepasaicayavimë baja Dioso apo pacatae. Biji rajane itsamonae, Dioso pejumecovënëtsivi yajava, paxamë baja Dioso papeximë pacaexana Dioso pijanacuatatsia panenajuajinavanapaenexa. <sup>20</sup> Palivaisi bajayata Diosojumepaebivi profetavi tajëvelia yaquina, Jesucristo baja cajena pelivaisi, bajarapalivaisi pajumecovënëtame baja. Paxanë ata Jesucristo papijajivinë, paapóstolevinë, paneitoroba patacatsipaebaponaenexa bajarapalivaisi, Jesucristo pelivaisi. Nexata bajarapalivaisi panejumecovënëtsixae, panajamatabëcuenecopabame baja Jesucristojavabelia papeccapanepaenexa. Bajaraxuata Dioso baja papeximë pacaexana. <sup>21</sup> Nexata baja itsamonae ata ayabitsaëttoxaneto najamatabëcuenecopabapona Jesucristojavabelia. Nexata Cristo pejamatabëcueneta itorobaponatsi bajarapamonae. Daxita bajarapamonae Dioso baja pexi exanatsi. Nexata pacuenia Dioso tojitsipatsi, jinavanapa. <sup>22</sup> Bajara pijinia pacuenia paxamë ata, itsamonae yajava, pamonaes Jesucristojavabelia penajamatabëcuenecopabivi, caebitsaëto Dioso papeximë pacaexana. Nexata Dioso pacayajavaponapona Espíritu Santo papeccatsijamatabëcaexae.

### 3

*Pacuenia Pablo itorobatsi pexanialivaisi, Jesucristo pelivaisi, petsipaebaponaenexa apo judíovijava yabara pelivaisi*

<sup>1</sup> Paxamë apo pajudíovi atamë, Dioso papijajivixaemë, pacatovajëtabiabatsi Diosojavabelia. Xanë Pablonë, Jesucristo pijajivitonënë. Nexata Jesucristo pelivaisi jivi tsipaebabiabajë. Nexata Jesucristo pelivaisi jivi tatsipaebabiabixae, nenaneconitsiaexaneta penaneconitsivi pejebabiabibota. Jesucristo pelivaisi jivi tatsipaebabiabijavata, jumaitsinë tsabiabi: “Pamonae apo judíovi ata, itsa jumecovënëta Jesucristo pelivaisi, bajarapamonae ata Dioso pijajivi,” janë tsabiabi paxamë yabara. Bajarapacuenia Jesucristo pelivaisi jivi tatsipaebabiabixae, penaneconitsivi pejebabiabibota tavëna judíovi neeta. <sup>2</sup> Bepayapëtaneme xanë Dioso taneitorobicuene patacatsipaebinexa apo pajudíovi atamë Dioso papeccaitaxutotsoniataejava. <sup>3</sup> Apo pajudíovi atamë, Dioso papeccaitaxutotsoniataejava tayapëtaenexa, Dioso baja cajena neyapëtaeyaexana. Dioso papeccaitaxutotsoniataexae papeccapanepaejavanexa ata tayapëtaenexa, Dioso baja cajena neyapëtaeyaexana. Nexata Dioso papeccaitaxutotsoniataejava paneyapëtaenexa, pacatoyaquinarutetatsi caelivaisiyobeje saya. <sup>4</sup> Itsa palebianame, payapëtaename pacuenia Dioso neyapëtaeyaexana ëpajudíovinë Dioso apo patanitaxutotsoniataejava. Payapëtaenamenua pacuenia Dioso neyapëtaeyaexana, apo pajudíovi atamë, Dioso papeccaitaxutotsoniataejava. <sup>5</sup> Bajayata abaxë itsajivijavabelia ata Dioso apo yapëtaeyaexanae, apo pajudíovi atamë, Dioso papeccaitaxutotsoniataejavanexa. Aeconoxae baja paxanë Dioso papijajivinë, paapóstolevinë, Dioso paneyapëtaeyaexana, apo pajudíovi atamë, Dioso papeccaitaxutotsoniataejava. Profetavijavabelia ata Dioso yapëtaeyaexana, apo pajudíovi atamë, Dioso papeccaitaxutotsoniataejava. Aeconoxae baja bajarapacuenia

Dioso paneyapëtaeyaexana Espíritu Santo pejamatabëcueneta. <sup>6</sup> Xua picani itsajivijavabelia ata Dioso apo yapëtaeyaexanae, bajaraxua maitsije. Paxanë pajudíovinë, itsa pajumecovënëtajë pexanialivaisi, Jesucristo pelivaisi, panecapanepaena Dioso. Bajara pijinia pacuenia paxamë ata, apo pajudíovi atamë, itsa pajumecovënëtame pexanialivaisi, Jesucristo pelivaisi, pacacapanepaena Dioso. Pajudíovinë, apo pajudíovi atamë, daxitatsi benacaemonaetsi nataenatsi. Jesucristo pelivaisi vajajumecovënëtsixae, daxitatsi Dioso nacarajutsiana xua Dioso najumecapanepaeya nacarajutsiapaeba.

<sup>7</sup> Piasaënë Dioso taneitaxutotsoniataexae, netocopata Jesucristo pelivaisi tatsipae-baponaenexa daxitajivijava. Dioso necaëjëpaeyaexananua xaniavaetsia jivi tatsipae-baponaenexa bajarapalivaisi. <sup>8</sup> Xanë itsiata beveliajamatabëcuenenënë nataniji daxita Dioso pejumecovënëtsivivecua. Itsiata baitsi jane mapapexaniacueneje Dioso netocopata. Dioso netocopata apo pajudíovimëjava patacatsipae-baponaenexa pexanialivaisi, Jesucristo pelivaisi. Nexata pacatsipae-baponaetsi ayaicuenia Jesucristo vajanacayavenonaponaevajanexa. <sup>9</sup> Dioso nitoroba patacatsipae-baponaenexa, apo pajudíovi atamë, Dioso papecacapanepaejavanexa. Dioso daxitacuene pexanaenë mapanacuataje. Dioso cajena tajëvelia najamatabëxaina paxamë ata, apo pajudíovi atamë, papecacapanepaenexa. Itsiata itsajivijavabelia ata Dioso apo yapëtaeyaexanae, apo pajudíovi atamë, Dioso papecacapanepaejavanexa. <sup>10</sup> Bajarapacuenia Dioso pacacapanepaena, apo pajudíovi atamë, petsitanajamatabëcuene itajëtsinexa athëbëtatsia pevetsivijavabelia. Nexata athëbëtatsia pevetsivi itsa nacataena daxitatsi Dioso vajajumecovënëtsivi, pajudíovinë, apo pajudíovi atamë, benacaemonaetsi vajanajuajinavanapaejava, athëbëtatsia pevetsivi yapëtaena bitso Dioso peyapëtaenëcuene daxitacuene pexanaenexa. <sup>11</sup> Pacuenia Dioso tajëvelia copiaya najamatabëxaina, mapanacua pexanaevajënaeya ataje, bajarapacuenia baja Dioso exanaevereta. Tspaji baja Dioso itorobica vajatuxanenë Jesucristo vajanacasivatëpaenexa cruzata. <sup>12</sup> Vaxaitsi baja najamatabëcuenecopatatsi Jesucristojavabelia vajanacacapanepaenexa. Bajaraxuata Diosojavabelia vajëtabiabatsi ajumejunavijibia. <sup>13</sup> Bajaraxuata Diosojavabelia asaëyata pacatovajëtabiabatsi patanesivajamatabëcuene cueranaeyanivamë abaxë naneconitsia taponaponaevajava penaneconitsivi pejebabiabibota. Jesucristo pelivaisi jivi tatsipae-bijavata, jumaitsinë tsabiabi: “Pamonae apo judíovi ata itsa jumecovënëta Jesucristo pelivaisi, bajarapamonae ata Dioso pijajivi,” janë tsabiabi paxamë yabara. Bajarapacuenia Jesucristo pelivaisi jivi tatsipae-biabixae, penaneconitsivi pejebabiabibota tavëna judíovi nenaneconitsiaexaneta. Bajaraxuata panesivajamatabëcuenebarëyamëre naneconitsia taponaponaevajava penaneconitsivi pejebabiabibota.

*Pacuenia Pablo Diosojavabelia tovajëta Dioso pejumecovënëtsivi yabara pelivaisi*

<sup>14</sup> Itsa najamatabënapitabiabajë, apo pajudíovi atamë, Dioso papecacapanepaejavanexa, nexata tamatabacabëta nucabiabajë asaëyata patacatovajëtsinexa vajatuxanenë Jesucristo paxa Diosojavabelia. <sup>15</sup> Daxita Dioso pijajivi, pamonae athëbëtatsia jinavanapa, pamonae ata mapanacuataje jinavanapa, daxita bajarapamonae Dioso tanetsi benacaemonae. Caenë paxa exana Dioso. <sup>16</sup> Dioso baja cajena bitso piasaënë. Ayaijamatabëcuene pexainaenë. Bajaraxuata pacatovajëtabiabatsi Diosojavabelia Dioso pesaëta papecajamatabëcuene asaëyaexanaenexa Espíritu Santo pejamatabëcueneta. <sup>17</sup> Pacatovajëtabiabatsinua Jesucristo papecatsijamatabëcaenexa panesivanajamatabëcopatsixae bajaraponëjavabelia. Pacatovajëtabiabatsinua bitso paneasivanexa itsamonae ata, pamonae Dioso pejumecovënëtsivi. <sup>18</sup> Pacatovajëtabiabatsinua daxita Dioso panejumecovënëtsivi panejamatabëcueneyapëtaenexa Jesucristo bitso papecaasivajava. <sup>19</sup> Pacatovajëtabiabatsinua panijacuata xaniavaetsia paneyapëtaenexa Jesucristo vajanacaasivajava. Jesucristo vajanacaasivajava, bitso pexaniacuene, apo vajayapëtaecapanepaejava xaniavaetsia vajayapëtaenexa. Nexata itsa payapëtaename Jesucristo vajanacaasivajava, paxainaename pajamatabëcuene Dioso pacatojitsipa.

<sup>20</sup> “Diosomë, bitso ayaijamatabëcuenenëmë,” jaitsi vaxaitsi Diosojavabelia. Bajarapacuenia jumaitstsi tspaji bitso Dioso pecaëjëpaenëtsi vajanacayavenonaenexa. Dioso

caējēpatsi vajanacatoexanaenexa vajavajētsicuenia. Vajanajamatabēxainaejava ata matatoxenetsia, Dioso caējēpatsi vajanacatoexanaenexa. Dioso pesaēta nacayavenonabiaba. <sup>21</sup> Dioso pejumecovēnētsivi Dioso peyavenonaponaexaetsi, itsamonaejavabelia tsipaebavanapa Dioso bitso ayaijamatabēcuene pexainaenēcuene. Jesucristo ata itsa ponapona mapanacuataje, nexata Dioso tsitanajamatabēcueneitajēta jivijavabelia Dioso bitso ayaijamatabēcuene pexainaenēcuene. Bajaraxuata daxitajivi bejumai tsabiabi Diosojavabelia: “¡Diosomē, bitso ayaijamatabēcuenenēmē!” bejai tsabiabi Diosojavabelia daxitamatacabijavabelianexa. Bajara itsi tsane.

## 4

*Pacuenia Espíritu Santo pejamatabēcueneta daxita Dioso pejumecovēnētsivi najamatabēcuenejēpaeya jinavanapaena yabara pelivaisi*

<sup>1</sup> Naneconitsiaponaponajē majotaje, penaneconitsivi pejebabiabibota, tajumecovēnētsixae vajatuxanenē Jesucristo taneitorobicuenia. Asaēyata pacamuxujibatsi panejinavanapaenexa pacuenia Dioso pacatojitsipa Dioso papecajunatsivi papijajivinexamē. <sup>2</sup> Itsamonaevēcua beveliajamatabēcuenevi nataeya pajinavanapare. Panajamatabēxainarenua pexaniajamatabēcuene daxitajivijavabelia. Pajamatabēcuenesaēmērenua tsavanapae bajayajebi, itsamonaepacaitfacueniababiabi ata. Namataenetsianua panayavenonabiabare namataenetsia panenasivaxae. <sup>3</sup> Pajamatabēcuenesaēmēre tsavanapae najamatabēcuenejēpaeya panejinavanapaenexa. Bajaraxua yabara Diosojavabelia panatovajētabiabare papecaayavenonaenexa Espíritu Santo. Nexata nabarajamatabēcuenexanepanaeya pajinavanapaename. <sup>4</sup> Jesucristojavabelia vajanajamatabēcuenecopatsixae, vaxaitsi baja nexata caenē Jesucristo pijajivitsi. Xainatsi baja caeEspíritu Santo Dioso vajanacajunatsivi. Bajaraxuata caejamatabēcuene xainavanapatsi. Evetavanapatsi pacuenia Dioso najumecapanepaeya jumaitsi vajanacapanepaenexa. <sup>5</sup> Caenē rabaja vajatuxanenē Jesucristo. Daxitatsi najamatabēcuenecopatatsi caenējavabelia. Nacabautisabanua caenē Jesucristo pevēnēta. <sup>6</sup> Xainatsi caenē vaxa Dioso. Caenē Dioso daxitatsi vajanacanamatacaitorobinē. Dioso pijajivitsi, daxitatsi, nacayavenona. Nacayajavaponapanua.

<sup>7</sup> Caejivitsi canacujitsia, Cristo pejisipaecuenia nacajamatabēcuene caējēpaeyaexanapona pecovēta vajatonacuenebavanapaenexa vajanacaitorobicuenia. <sup>8</sup> Tsipaji baja cajena Dioso pejumelivaisibaxutota tajēvelia jumaitsi Jesucristo yabara mapacueniaje:

Ayaibitsaētoxaneto pitoyavitsi pepuajamatabēcueneamoneyabi, athēbēabetsia naviatsiania. Pijajivi pijinia pepuajamatabēcuenecaējēpaeyaexanae pecaējēpajamatabēcuenetsi pecovēta petonacuenebavanapaenexatsi, naviatsiania, jai tajēvelia Dioso pejumelivaisibaxutota Jesucristo yabara.

<sup>9</sup> Bajarapacuenia Dioso pejumelivaisibaxutota Jesús yabara tajēvelia jumaitsi. Tsipaji Jesús patsijitsiatsica mapanacuayabetsicaje. Bajaraxuacujinae icatsia Jesús naviatsijitsia athēbēabetsia. Mapanacuaje bevelianacua saya Dioso pijanacuavecua. <sup>10</sup> Ponē yabara Dioso pejumelivaisibaxutota bajarapacuenia tajēvelia jumaitsi, patsica baja mapanacuayabetsicaje. Bajaraxuacujinae icatsia bajaraponē naviatsia baja tajēnacuyaabetsia. Bajaraxuacujinae Jesucristo itorobica Espíritu Santo. Nexata daxitanacuanējava Espíritu Santo yajavaponapona daxita Dioso pejumecovēnētsivi. <sup>11</sup> Nexata Dioso pejumecovēnētsivi, caejivi canacujitsia, Espíritu Santo jamatabēcuene caējēpaeyaexanapontsi saicayacuenia. Itsamonae Espíritu Santo jamatabēcuenecaējēpaeyaexanatsi apóstolevinexa Jesucristo pexanaejavanē pevajunupaebaponaenexa. Itsamonaepijinia Espíritu Santo jamatabēcuenecaējēpaeyaexanatsi peyapētaenexa pajamatabēcuenelivaisi xaina Dioso pejumelivaisi. Nexata tsipaeba itsamonaejavabelia.

Itsamonae pijinia Espíritu Santo jamatabëcuene caējëpaeyaexanatsi petsipaebapon-aenexa apo peyapëtaevi abaxë pexanialivaisi, Jesucristo pelivaisi. Itsamonae pijinia Espíritu Santo jamatabëcuene caējëpaeyaexanatsi pevetsinexa Dioso pejumecovënëtsivi. Jamatabëcuene caējëpaeyaexanatsinua xaniavaetsia peyapëtaeyaexanaenexa Dioso pijacuene. <sup>12</sup> Bajarapacuenia Espíritu Santo, daxita Dioso pejumecovënëtsivi, jamatabëcuene caējëpaeyaexanatsi petonacuenebavanapaenexa Dioso pijacuene. Nexata daxita Dioso pejumecovënëtsivi, caejivi canacujitsia, ajamatabëcuene saë taponae pevajënaeyabelia. <sup>13</sup> Nexata belia daxitatsi bajarapacuenia najamatabëcuene jëpaeya jumecovënëtsianatsi Dioso. Jamatabëcuene yapëtaenatsinua xaniavaetsia vajatuxanenë Jesucristo, Dioso pexënato. Nexata daxitatsi Espíritu Santo nacajamatabëcuene caējëpaeyaexanaena Dioso vajajumecovënëtsinexa. Nacajamatabëcuene caējëpaeyaexanaenanua xaniavaetsia Dioso vajatojinavanapaenexa. Nexata pacuenia Jesucristo jamatabëcuene itsi, bajara vaxaitsi ata jamatabëcuene itsi tsane. Nexata jinavanapae natsi pacuenia Dioso nacatojitsipa. <sup>14</sup> Nexata pacuenia pejevaxi caejamatabëcuene apo najamatabëxainae, bajara vaxaitsi apo jamatabëcuene itsi tsane. Itsajamatabëcuene apo vecuanajamatabëxainae tsane, palivaisi baja jumecovënëtavanapatsi. Nexata itsamonae penajumetsënëtsilivaisi bepexaniajailivaisicuenia nacatsipaebi ata tsane vajanacayamaxëitojorobinexa picani, itsiata apo nacayamaxëitojorobi tsane. <sup>15</sup> Nexata itsamonae javabelia itsa tsipaebaponatsi pexaniajailivaisi, bajarapamonae asivaya betanetsi. Pacuenia Cristo vajanacaitorobinë jamatabëcuene itsi, bajara vaxaitsi ata vajajamatabëcuene itsinexa, benatojitsipatsi Cristo vajajamatabëcuene jëpaenexa. <sup>16</sup> Daxitatsi Cristo pelivaisi vajajumecovënëtsivi, caenë Cristo pijajivitsi. Vajaperabëtota caevitoyo canacujitsia exanapona pacuenia Dioso tocopatatsi. Bajara pijinia pacuenia vaxaitsi ata, caejivitsi canacujitsia, Cristo nacatocopatapona vajatonacuenebavanapaenexa pacuenia nacatojitsipa. Nexata namataenetsia nayavenonaeya natonacuenebianatsi. Namataenetsianua nasivatsi tsavanapae tsane. Bajarapacuenia nexata jamatabëcuene vitsabaponaenatsi Dioso vajajumecovënëtsijava.

*Pacuenia Cristo pijajivi pejanajamatabëcuene xaina yabara pelivaisi*

<sup>17</sup> Jesucristo taneitorobixae, mapacuenia pacajumaitsi jitsiatsije. Pëtsa baja pajinavanapame pacuenia jinavanapa Dioso apo peyapëtaevi. Dioso apo pejumecovënëtsivi najamatabëxainavanapa pexanaenexa piamatamobicuene Dioso javabelia. <sup>18</sup> Dioso apo pejumecovënëtsivi ajamatabëcuene itaquiri tsavanapae. Tsipaji apo yapëtae Dioso. Bitso saya ajamatabëcuene taja. Bajaraxuata Dioso pejitsipaecuenia apo tojinavanapae. Diosovecua naxuabiaya jinavanapa. <sup>19</sup> Nexata apo yapëtae piauracuene. Casaë bitso pexanaenexa daxita xua pibisiacuene. <sup>20</sup> Itsiata baitsi jane paxamë itsa pajumecovënëtame Jesucristo pelivaisi, apo pacaitorobi pibisiacuene paneexanaenexa. <sup>21</sup> Pajumetaneme baja cajena Jesucristo pelivaisi. Jesucristo pelivaisi panejumecovënëtsixae, nexata Jesucristo pijajivi pacatsipaeba pexaniajailivaisi pacuenia copiaya Jesucristo tsipaebatsi. <sup>22</sup> Nexata pacopabare panijaperujamatabëcuene. Bajarapajamatabëcuene bajayata abaxë Dioso itsa apo pajumecovënëtsimë, pacaitorobabiaba pibisiacuene paneexanaenexa. Panijaperujamatabëcuene cajena bitso abeje. Bajarapajamatabëcuene picani pacayamaxëitojorobabiaba panejitsipaecuenia pibisiacuene paneexanaenexa. <sup>23</sup> Paxamë Diosojavabelia panajamatabëcuene pënëyorore. Papejanajamatabëcuene vimë panaexanare. <sup>24</sup> Pacuenia Dioso jamatabëcuene itsi, bajara paxamë ata pajamatabëcuene itsimëre. Nexata jivi xaniavaetsia patsitajinavanapaenapacuenia Dioso pacatojitsipa.

<sup>25</sup> Bajaraxuata pëtsa baja panajumetsënëtame. Pacaenëmë canacujitsia namataenetsia panatsipaebare pexaniajailivaisi. Tsipaji daxitatsi caenë Jesucristo pijajivitsi.

<sup>26</sup> Itsa panabaraanaepaname, pëtsa pibisiacuene panaexaname panenabaraanaepanaejavata. Pëtsa panasivajamatabëcuene sitecame itsamatacabijavabelia ata. <sup>27</sup> Tsipaji itsa panasivajamatabëcuene sitecaejitsipame, nexata dovathi pacayamaxëitojorobijitsipa. Nexata pibisiacuene paexanaejitsipame.

<sup>28</sup> Pajivi penacobetoxotsijivi, copatsi baja penacobetoxotabiabijava. Nacuenebi pepitsinexa xua namatavenona, peyavenonaenexanua bepejiovivijavabelia.

<sup>29</sup> Pëtsa pacuaicuaijamë pibisialivaisi. Biji rajane pacuaicuaijamëre pexanialivaisi. Pexanialivaisi itsa pacuaicuaijamë tsane, nexata papecajumetaevi pajamatabëcueneyavenonaename. Tsipaji paepatota jamatabëcuenefaefaena, itsa pacajumetaena, pacamuxunaajamatabëcuenesaë tsane. <sup>30</sup> Pëtsa itsacuene paexaname Espiritu Santo papecatojitsipaecuenevecua panejamatabëcuenebejioBITSIYANIVA Espiritu Santo. Dioso pijaEspiritu Santo papecatsijamatabëcaexae, panayapëtaneme pepacuene Dioso papijajivicuenemë. Nexata Dioso pacacapanepaena pamatacabi Dioso pijajivi capanepaena mapanacuavecuaje.

<sup>31</sup> Daxita pibisijamatabëcuene pacopabare. Pacopabarena baja, itsajivi itsa pacaitacueniaba, bajayajebi panejamatabësitecabiabijava. Pëtsa bajayajebi pajamatabësitecame paneanaepanaejava. Bepijia pajamatabëcaevare. Pacopabarena baja paneajamatabëcuenebejjava ata. Pacopabarena baja panenabaraanaepanabiabijava ata. Pacopabarena baja itsamonae pibisiacuenia panebijataeyabiabijava ata. Pacopabarena baja itsamonae pibisiacuenia panebaracuacuajitsabiabijava ata. <sup>32</sup> Biji rajane pexaniajamatabëcuene paxainare. Namataenetsia panaitaxutobejioBIAETAEMA. Pacuenia Jesucristo pejamatabëcueneta Dioso pacabarajamatabëcuenexanepana pibisiacuenepaneexanaevi ata, bajara pijinia pacuenia paxamë ata panabarajamatabëcuenexanepanare, paxamëyajuvënëvi pacaitsacueniabi ata.

## 5

### *Pacuenia Dioso pexi bejinavanapa yabara pelivaisi*

<sup>1</sup> Paxamë Dioso papeximë. Pacuenia Dioso jamatabëcueneitsi, bajara paxamë ata pajamatabëcueneitsimëre tsavanapae. <sup>2</sup> Pacuenia bitso Cristo nacaasiva, bajara pijinia pacuenia paxamë ata bitso pasivamërë tsavanapae itsamonae ata. Bajayata judíovi Diosojavabelia pijaneconi itsa xaina, oveja pebito beyaxuababiaba. Nexata judíovi ofrendacuena ovejavi rajutabiaba Diosojavabelia pijaneconi Dioso pevecuaajibiaexanaenexatsi. Bajara pijinia pacuenia Cristo bitso vajanacaasivaxae, nacopata pebeyaxuabinexatsi vaxaitsi vaneconi vajanacavecuajibiaexanaenexa. Bajarapacuenia Cristo bitso vajanacaasivaxae, itsa nacopata vajanacasivatëpaenexa, nexata paxa Dioso bitso sivajamatabëcuenebarëyatsi.

<sup>3</sup> Paxamë rabaja Dioso papijajivimë. Bajaraxuata pëtsa baja paexaname daxita xua pibisiacueni. Pëtsa panajamatabëxainamenua pibisiacueni paneexanaenexa panevitota. Pëtsa panajamatabëxainamenua bitso panenaxainaeyabinexa daxitacuene mapanacuapijicueneje. <sup>4</sup> Pëtsa panabarëcuacuajiamënuu piauracuene yabara ata. Pëtsa panabarëcuacuajiamënuu saya jema natsiquejomalivaisixi ata. Tsipaji apo pexanepanaecuene. Biji rajane Diosojavabelia pexaniajamatabëcuene parajutabiabianame. <sup>5</sup> Payapëtaneme rabaja pexaniajaicuene mapalivaisije. Pajivi daxita pibisiacueni exana, apo jone tsane Dioso pijanacuayabetsia. Ponë jaita itsava pijavavecuu, pova pijinia jaita itsanë pamonavecuu, apo jone tsane Dioso pijanacuayabetsia. Pamonaevi ata bitso jitsipa pexainaenexa daxitacuene mapanacuapijicueneje, apo jone tsane Dioso pijanacuayabetsia. Pamonaevi bitso jitsipa pexainaenexa daxitacuene mapanacuapijicueneje, jamatabëcuenejëpa pamonaevi vajëcabiaba jumapecataeya pexanaenëanëjavabelia. Bajarapamonaevi jamatabëcuenejëpa tsipaji bitso jitsipa saicayacuene Diosovecuu. <sup>6</sup> Pëtsa pacayamaxëitojoroba itsajivi ata paxamë ata paneexanaenexa bajarapitsipibisiacueni. Tsipaji Dioso ayaicuenia naneconitsiaexanaena pamonaevi Dioso apo pejumecovënëtsivi, bajarapitsipibisiacueni pexanaevi. <sup>7</sup> Bajaraxuata pëtsa payajavajinavanapame pibisiacueni pexanaevi.

<sup>8</sup> Paxamë picani bajayata pajamatabëcueneaitaquirimë tsavanapae itsa abaxë apo payapëtaemë pexanialivaisi, Jesucristo pelivaisi. Itsiata baitsi jane aeconoxae baja Jesucristojavabelia panenajamatabëcopatsixae, Dioso baja pacajamatabëcueneitayota.

Bajaraxuata pajinavanapare Dioso pejitsipaecuenia, pacuenia Dioso pijajivi jinavanapa.<sup>9</sup> Dioso baja papecajamatabëcueneitayotsixae pexanialivaisita, paexanavanapare ëpexaniacuene. Pacanaëjëtaponarenuia ëpexaniajaicuene paneyapëtaenexa, xaniavaetsia panejinavanapaenexa Dioso pejitsipaecuenia.<sup>10</sup> Panevajënaeyabelia pacanaëjëtaponare paneyapëtaenexa xua yabara Dioso pacasivajamatabëcuene barëyajitsia. Nexata itsa payapëtaename xua yabara Dioso pacasivajamatabëcuene barëyajitsia, bajaraxua tsiteca asaëyata panevajënaeyabelia paexanavanapaename.<sup>11</sup> Dioso apo pejumecovënëtsivi pibisiacuene itsa exanavanapa, pëtsa panaexaname bajarapapibisiacuene. Biji rajane paitavetsianame bajarapamonae pibisiacuene pexanaeyaniva Dioso pitabarata.<sup>12</sup> Xua bajarapamonae exana muetsia, bajaraxua bitso pibisiacuene. Nexata itsajivi itsa cuenetaejitsipatsi bajaraxua pexanaejava, bajarapajivi bitso ajumeura tsipae juya pet-sipaebinexa itsamonaejavabelia. Tsipaji bitso pibisiacuene xua muetsia exana bajarapamonae.<sup>13</sup> Itsiata baitsi jane bajarapamonae itsa paitavetsianame Dioso pejumelivaisita, nacueneyapëtaena bajarapamonae bitso pibisiacuene pexanaejava.<sup>14</sup> Bajaraxuata pina bajarapamonae yabara, itsamonae Dioso pijajivi jumaitsi mapacueniaje:

Jamatejema saya pajinavanapame, pibisiacuene paexanavanapae atamë. Bajaraxuata Diosovecua naxuabiaya pajinavanapame. Pacopabare baja pitaquirijamatabëcuene. Nexata Cristo pejamatabëcueneta panijaneconivecua Dioso pacapanepeana. Pacajamatabëcueneitayotsiana, jai pina itsamonae Dioso pijajivi.

<sup>15</sup> Nexata baja xania tsane. Panayajivitaema pibisiacuene xaniavaetsia panejinavanapaenexa. Pëtsa pajinavanapame pacuenia bajinavanapa Dioso apo peyapëtaevi. Biji rajane pajinavanapare pacuenia bajinavanapa bitso peyapëtaevi Dioso pijacuene.<sup>16</sup> Dioso papecaitorobicuenia xaniavaetsia patojinavanapare daxitamatacabijavabelianexa. Pamuxujobabiabare itsamonae ata Cristo pelivaisi pejumecovënëtsinexa. Tsipaji mapanacuapijivije, Dioso apo pejumecovënëtsivi, ëpibisiacuene exanavanapa.<sup>17</sup> Pëtsa pajinavanapame pacuenia Dioso apo peyapëtaevi jinavanapa. Pacaasaëmëre tsavanapae Dioso panejumecovënëtsijava, pacuenia Dioso pacatojitsipa paneexanavanapaenexa.<sup>18</sup> Pëtsa paitajibimë tsabiabi. Tsipaji bajarapacuene Diosovecua pacanaxuabiaexanaejitsipa infernojavabelia. Biji rajane panacopatabiabare Espiritu Santo papecatsijamatabëvënëcaenexa, Espiritu Santo papecaitorobicuenia paneexanabiabinexa.<sup>19</sup> Namataenetsia panatsipaebabiabare vajatuxanenë ayajamatabëcuene pexainaecuene. Bajarapacuena namataenetsia itsa panatsipaebabianame, daxita panejamatabëëthëtovetsina panaxëanabiabianame pavajianë rubena Salmosbaxutota. Panaxëanabiabianamenua himnobaxutota ata pavajianë rubena. Panaxëanabiabianamenua pavaji ata Espiritu Santo jemata pacanaxëanaeyaexanaena.<sup>20</sup> Pajumaitsimë tsabiabi tsane Diosojavabelia: “Xanepana rabaja. Tsipaji bitso pexaniacuene panetoexaname,” pajamë tsabiabi tsane daxitacuene yabara vaxa Diosojavabelia vajatuxanenë Jesucristo pevënëta. Bajarapacuena Diosojavabelia pajumaitsimë tsabiabi tsane pexanepanaecuene yabara, apo pexanepanaecuene ata yabara.

### *Pacuenia muxujobatsi penapitsijivibeje yabara pelivaisi*

<sup>21</sup> Padaxitamë namataenetsia panajamatabëcueneevere, xua jamatabëpanaitorobame, namataenetsia panenaitorobabiabinexa Cristo panejumecovënëtsivixae.

<sup>22</sup> Paxamë papetirivimë, pacuenia yaiyataeya pajumecovënëtabiabame vajatuxanenë Jesucristo papecaitorobicuenia, bajara pijinia pacuenia yaiyataeya pajumecovënëtabiabare paneamonajivi ata.<sup>23</sup> Pacuenia Cristo Dioso tocopatatsi daxita vaxaitsi Dioso vajajumecovënëtsivi vajanacaitorobinexa, bajara pijinia pacuenia pebi Dioso tocopatatsi pijava pitorobinexa. Cristo nacopata pebeyaxuabinexatsi vajanacapanepaenexa daxita vaxaitsi vajanajamatabëcuenecopatsivi Cristojavabelia. Daxitatsi caenë Cristo pijajivitsi.

<sup>24</sup> Nexata bejumecovënëttavanapatsi pacuenia nacaitorobapona Cristo. Bajara pijinia

pacuenia paxamē ata, papetiriavimē, bepajumecovēnētavanapame daxita pacuenia pacaitoroba paneamonajivi.

<sup>25</sup> Paxamē pijinia papebijivimē, pasivamēre panijavajivi. Bepaasivamē panivajivi pacuenia daxitatsi Cristo nacaasiva daxita Dioso vajajumecovēnētsivi. Vajanacaasivaxae, Cristo nacopata pebeyaxuabinexatsi vajanacacapanepaenexa vajaneconivecua. <sup>26</sup> Bajarapacuenia Cristo exana caenē Cristo pijajivitsi vajanacaexanaenexa. Nexata baja Cristo vajanacaajamatabēcuene xuirajibiaexanaejava, najamatabēcueneitajētatsi vajanacabautisabijavata. Vajajumecovēnētavanapaexae Dioso pejumelivaisi, nacaajamatabēcuene xuirajibiaexanapona. <sup>27</sup> Bajarapacuenia Cristo exana daxita Dioso vajajumecovēnētsivi itsamatacabi vajanubenaenexa Cristo pitabarata. Nexata itsamatacabi nubenaenatsi Cristo pitabarata vajaanekonijibivi, Dioso vajanacajamatabēcuenexaniavaetsivi. <sup>28</sup> Nexata pebijivi bitso biasiva pijavajivi. Pacuenia pijacuata naperabēasiva, bajarapacuenia biasiva pijavajivi. Nexata ponē asiva pijava, bajaraponē asiva pijava pacuenia pijacuata naperabēasiva. <sup>29</sup> Itsajivi ata apo naperabēitoja. Biji rajane xaniavaetsia naperabēeveta. Bajara pijinia pacuenia Cristo ata nacaeveta daxita Dioso vajajumecovēnētsivi. <sup>30</sup> Tsipaji vaxaitsi Cristo pijajivitsi, ayaibitsaēto atatsi, becaejivitsi Dioso nacatane. <sup>31</sup> Nexata nayapētane pexaniajaicuene mapacuenije. Pebi petiriva itsa pita pijavanexa, naexanabeje becaejivi peperabētocuenia. Tsipaji Dioso pejumelivaisibaxutota jumaitsi mapacueniaje: “Pebi itsa nacojioba, paxavecua, pena atavecua, bavecuanatsata pijavajavabelia. Nexata anijajivimibeje becaejivicuenia naexanabeje,” jai Dioso pejumelivaisibaxutota. <sup>32</sup> Mapalivaisije bitso ayapēbeje vajajumeyapētaenexa. Itsiata baitsi jane comparaciōncuenia nacayapētaeyaexana. Cristo vajanacaasivaxae, vaxaitsi Cristo pijajivitsi Dioso nacatane becaenē Cristo peperabētotsi. <sup>33</sup> Bajarapalivaisi comparaciōncuenia pacayapētaeyaexana nexata paxamē, pacaenēmē canacujitsia, paneasivanexa panijavajivi. Nexata panijavajivi pasivamēre. Pacuenia panijacuata panaperabēasivamē, bajara pijinia pacuenia panijavajivi pasivamēre. Panijavajivi ata pijinia bepacayaiyatane.

## 6

<sup>1</sup> Paxamē papeximē, Dioso panejumecovēnētsivixae, pajumecovēnētabiabare paneaxajivi, paneenajivi ata. Bajarapacuenia panijamonae pajumecovēnētabiabare. Tsipaji bajarapacuenia Dioso pacatocopata panejumecovēnētabiabinexa panijamonae. <sup>2-3</sup> Dioso pejumelivaisibaxutota jumaitsi mapacueniaje: “Yaiyataema axa. Yaiyataema ena ata nejamatabēcuenebarēyanexa, neponaponaenexanua bajayajebi mapanacuataje,” jai Dioso pejumelivaisibaxutota. Bajarapalivaisi Dioso itsa najumecopata jivi pejumecovēnētsinexa, yajavanajumecopata pacuenia Dioso yavenonaejitsia pajivi jumecovēnēta bajarapalivaisi. Itsalivaisianē copiaya Dioso najumecopatsi ata, apo yajavanajumecopatsi pacuenia yavenonaejitsia pajivi jumecovēnēta bajarapalivaisianē. Nexata matapania mapalivaisitaje Dioso yajavanajumecopata pacuenia yavenonaejitsia pajivi jumecovēnēta bajarapalivaisi.

<sup>4</sup> Paxamē panexi panexinaeivi, anaeyacuenia pētsa panexi paitorobabiabame papecbaraanaepanaeyaniva. Biji rajane xaniavaetsia panacoxivitsare papecajumecovēnētabiabinexa paneitorobijava. Pacujarubarenuua Dioso pejumelivaisi pejumecovēnētsinexa.

<sup>5</sup> Paxamē pijinia itsamonae papijajivimē, dajubicuenia papecacanajetsivi, itsamonae amoneya panetonacuenebavanapaenexa. Patoexanabiabare pacuenia panijatuxanevi pacaitoroba. Payaiyataema panijatuxanevi. Cujunaviaya panijatuxanevi patonacuenebabiabare asaēyata. Pacuenia Cristo panejitsipaexae, xaniavaetsia patonacuenebabiabame Cristo pijacuene, bajara pijinia pacuenia xaniavaetsia panijatuxanevi patonacuenebabiabare.

<sup>6</sup> Xaniavaetsia panijatuxanevi patonacuenebabiabare daxitamatacabi canacujitsia pacuenia patonacuenebijitsipame Cristo. Pētsa matapania itsajota pacanaitaxutocaeveta panijatuxanevi, asaēyata patonacuenebame papecasivabarēyanexa panet-

onacuenebijava yabara. Patoexanabiabare panijatuxanevi pacuenia Dioso pacatojitsipa panetoexanaenexa daxita panejamatabëethëtovetsina. <sup>7</sup> Jamatabëcuenebarëyaya patonacuenebavanapare panijatuxanevi. Xua panijatuxanevi patonacuenebavanapame, bajaraxua yabara pasivajamatabëjumaitsimëre: “Maxuaje nacuenebajë apo ëtajatuxanenëxa. Taniji pepo tajatuxanenë, Cristo, betatonacuenebijava,” pasivajamatabëjamëre panijatuxanevi panetonacuenebijava yabara. <sup>8</sup> Payapëtaneme rabaja mapacueneje. Pajivi pexaniacuene toexana itsamonae ata, bajarapajivi matamotsianatsi Dioso. Pamonaë ata dajubicuenia canajetatsi itsamonae amoneya petonacuenebabiabinexa, bajarapamonae ata Dioso matamotsianatsi pexaniacuene itsa toexana itsamonae ata. Pamonaë ata apo pecanajetsivitsi, bajara pijinia pacuenia bajarapamonae ata Dioso matamotsianatsi pexaniacuene itsa toexana itsamonae ata.

<sup>9</sup> Paxamë pijinia papijatuxanevimë, pacamuxujobatsi mapacueniaje. Xaniavaetsia pataema panijajivi, papecatonacuenebivi. Pëtsa anaeya patiobabiabame panijajivi asaëya papecatonacuenebabiabinexa. Pacanaëjère pacuenia paxamë ata panijatuxanenë Dioso eca athëbëtata. Pamonaë ata apo pecanaia. Bajaraponëjavabelia pananeconitsipame. Bajaraponë panijajivi ata pijatuxanenë baja cajena. Bajaraponë saya najëpaeya nacatane daxitatsi. Nexata paneconivajëto xainatsi caejivitsi canacujitsia, bajarapaneconivajëtota nacananeconitsiaexanaponaena. Bajaraxuata panijajivi ata itorobajë xaniavaetsia papecatonacuenebabiabinexa.

*Pacuenia Dioso pejumecovënëtsivi itorobatsi penayajivitaenexa dovathi yabara pelivaisi*

<sup>10</sup> Tajamonae, icatsia cotocaevi patacatoyaquinaelivaisita, pacajumaitssiti mapacueniaje. Pajamatabëcuenesaëmëre tsavanapae vajatuxanenë pesaë paneyajavajinavana-paexae. <sup>11</sup> Vajabitsaënë banayajivinaxatata piatajajava pijavajabitsaënë pejorojoronaeyanivatsi. Bajara pijinia pacuenia paxamë ata panayajivinajamatabëcuenexatare Dioso pejumelivaisita. Nexata bajarapacuenia pajamatabëcuenesaëmë tsane dovathi papecajamatabëcuene yamaxëitojorobianiva.

<sup>12</sup> Tsipaji Dioso vajanacatojitsipaecuenia itsa exanavanapatsi, nexata dovathi jamatabënacaitasacueniaba. Nexata bëpënëa vajajamatabëcuenesaëta asaëyata vajabitsaë bexanatsi, dovathi pijajivijavabelia, apo vajataevijavabelia. Dovathi cajena pijajivi ayaibitsaëttoxaneto. Dovathi pijajivi xaina penamatacaitorobivitsi, bitso piagamatabëcuenesaëvi. Nexata dovathi pijajivi jinavanapa athëbëtatsia. Jinavanapa mapanacuata ataje. Nexata dovathi pijajivi itoroba daxitajivi pibisiacuene pexanaeyaexanaenexatsi mapanacuataje. Bajaraxuata bëpënëa vajajamatabëcuenesaëta, asaëyata vajabitsaë bexanatsi dovathi pijajivijavabelia. <sup>13</sup> Nexata paxamë dovathi papecajamatabëcuene yamaxëitojorobianiva, panayajivinajamatabëcuenexatare Dioso pejumelivaisita. Nexata pamatacabi pibisiacuene pacatocopiapatsiana dovathi pejamatabëcueneta papecajamatabëcuenejëtsinexa, itsiata pajamatabëcuenesaëmë tsane bajarapalivaisita. Nexata pibisiacuene apo paexanaemë tsane. <sup>14</sup> Vajabitsaënë itsa nayajivinaxatata piatajajava, caecovëta banuca. Nexata pijavajabitsaë apo tixitsiti pecovëvecua. Bajara pijinia pacuenia paxamë ata pajamatabëcuenesaëmëre Dioso pejumelivaisita dovathi papecajopaeyaexanaeyaniva Dioso pejumelivaisi panejumecovënëtsijavavecua. Vajabitsaënë piatajajava itsa nayajivinaxatata, bayanaepacëta penaepacëtsijavata pesarabianivatsi penayajivinaxatatsijava. Bajara pijinia pacuenia paxamë ata Dioso pejumelivaisita, pexaniajailivaisita, panayajivinajamatabëcuenexatare. Vajabitsaënë piatajajava banamëpabëxatata pijavajabitsaënë pejorojoronaeyanivatsi. Bajara pijinia pacuenia paxamë ata Dioso pejumelivaisita panayajivinajamatabëcuenexatare. Pajamatabënjinavanapare Dioso baja aneconijibia papecataejava. Nexata dovathi nayajivitaeya pajinavanapare papecajamatabëcuene yamaxëitojorobianiva. <sup>15</sup> Vajabitsaënë najamatabëcueneveretsiaya pexaniazapato banataxuxatata pijavajabitsaëjavabelia jamatejema peponaenexa. Bajara pijinia pacuenia

paxamë ata panajamatabëcueneverere, jamatejema pexanialivaisi jivi panetsipaebavanapaenexa. Daxita baja pamonaë jumecovënëta bajarapalivaisi, Dioso baja barajamatabëcuenexanepanaeya tanetsi. <sup>16</sup> Panajamatabëcuenecopare Diosojavabelia papecayavenonabiabinexa. Vajabitsaënë banayajivicapona escudovënëjava, pijavajabitsaënë itsa bixabajarabatsi piupiitarunutsipuyaeneta, penacaranatsinexa bajarapaescudota, penayajiviitacaëbinexanua. Bajara pijinia pacuenia paxamë ata dovathivecua Dioso pacajamatabëcuenecaranatsiana, itsa panajamatabëcuenecopatsianame Diosojavabelia papecayavenonabiabinexa. <sup>17</sup> Vajabitsaënë banamataxatata piatajajava, cascovënëjava, pematathinaxuabiyaniatsi pijavajabitsaënë. Bajara pijinia pacuenia paxamë ata panayajivinajamatabëcuenexatare Dioso pejumelivaisita. Pajumecovënëre papecacapanepaelivaisinexa panijaneconivecua. Vajabitsaënë itsa pona pijavajabitsaëjavabelia, banayajivicapona espada. Bajara pijinia pacuenia paxamë ata panayajivicapona Dioso pejumelivaisi, palivaisi baja pacayapëtaeyaexana Espiritu Santo. <sup>18</sup> Dioso pejumelivaisita najamatabëcuenexatatsiaya itsa pajinavanapaenename, nexata pacuenia Espiritu Santo pacaitoroba, daxitamatacabi canacujitsia Diosojavabelia pavajëtabiabianame Dioso papecajamatabëcuene yavenonabiabinexa. Pajamatabëcueneitatsacamëre tsavanapae dovathi papecajamatabëcuene yamaxëitojorobiyaniava. Nexata pacopatsinejevamë Diosojavabelia panevajëtabiabijava, ajamatabëcueneitatsacaya Diosojavabelia panayajivivajëtabiabare. Asaëyata patovajëtabiabarenuua daxita Dioso pejumecovënëtsivi. <sup>19</sup> Xanë ata panetovajëtabiabarenuua Dioso taneyapëtaeyaexanaenexa paepatota bajarapalivaisi tsipaebajë itsamonaejavabelia. Panetovajëtabiabarenuua ajumeurajibia tatsipaebabiabinexa apo judíovi ata Dioso pecapanepaejavanexatsi. <sup>20</sup> Naneconitsiaponaponajë majotaje, penaneconitsivi pejebabiabibota, itsamonaejavabelia tatsipaebabiabixae bajarapapexanialivaisi, Dioso tanetocopatsilivaisi. Bajaraxuata Diosojavabelia panetovajëtabiabare, naneconitsiaponaponae atanë, ajumeurajibia jivijavabelia tatsipaebabiabinexa bajarapalivaisi pacuenia jamatabëtsipaebajë.

*Pacuenia Pablo toyaquina Efeso tomarapijivi peveretsinexa baja petoyaquinaelivaisi mapabaxutotaje yabara pelivaisi*

<sup>21</sup> Vajabananë Tíquico itsa patsiana paxamëjavabelia, pacatsipaebiana daxita pacuenia netane. Bajaraponë bitso vajaasivanë. Xaniavaetsia paneyavenonabiaba itsa patonacuenebabiabajë pacuene vajatuxanenë paneitoroba. <sup>22</sup> Bajaraxuata Tíquico pacatoitorobatsi baja paxamëjavabelia papecatsipaebinxaxa pacuenia pajinavanapajë. Nexata Tíquico itsa pacatsipaebiana pacuenia pajinavanapajë, pamuxunaajamatabëcueneñaëmë tsane. <sup>23</sup> Pacatovajëtabiabatsi vaxa Diosojavabelia, vajatuxanenë Jesucristojavabelia ata, jamatabëcuenexanepanaeya panejinavanapaenexa. Pacatovajëtabiabatsinua namataenetsia panenasivanexa Diosojavabelia panenajamatabëcuenecopatsivixae. <sup>24</sup> Pacatovajëtabiabatsinua Diosojavabelia daxita paxamë Dioso papecayavenonabiabinexa. Paxamë abaxë tsiteca bitso pasivamë tsavanapae vajatuxanenë Jesucristo. Bajara itsi tsane.

## Mapabaxutoje San Pablo toyaquina Filipos tomarapijivijavabelia

*Pacuenia Pablo toyaquina mapabaxutoje Dioso pejumecovënëtsivi, Filipos tomarapijivijavabelia, pamatacabi naneconitsia ponapona penaneconitsivi pejebabiabibota yabara pelivaisi*

<sup>1</sup> Xanë Pablonë, Timoteobeje, Jesucristo papijajivitonënëbeje. Pacatoyaquinatsibeje mapabaxutoje padaxitamë paFilipos tomarapijivimë, Jesucristo pelivaisi panejumecovënëtavanapaevi. Paancianovimë, paxamë ata padiaconovimë, pacatoyaquinatsibeje. <sup>2</sup> Pacatovajëtatsibeje vaxa Diosojavabelia, vajatuxanenë Jesucristojavabelia ata, papecaitaxutotsoniataenexa jamatabëcuenexanepanaeya panejinavanapaenexa.

*Pacuenia Pablo Diosojavabelia tovajëta Jesucristo pelivaisi pejumecovënëtsivi yabara pelivaisi*

<sup>3</sup> Itsa pacanajamatabënapitatsi Diosojavabelia tavajëtsijavata, jumaitsinë tsabiabi Diosojavabelia: “Xaniavaetsia yavenonabiabame nijajivi, Filipos tomarapijivi,” janë tsabiabi Diosojavabelia paxamë yabara. <sup>4</sup> Itsa vajëtajë Diosojavabelia, nexata pacatovajëtabiabatsi jamatabëcuenenëbarëyaya. <sup>5</sup> Bajarapacuenia pacatovajëtabiabatsi tsipaji Dioso pejumelivaisi, pexanialivaisi, panejumecovënëtsijavaveliacujinae, paneyavenonabiabame tanamatavenonaejavaxi yabara. Patsipaebabiabamenua Jesucristo pelivaisi itsamonaejavabelia. <sup>6</sup> Yapëtaniji baja cajena pacuenia Dioso pacayavenonaejitsia bitso pexaniajamatabëcuene panexainavanapaenexa. Tsipaji baja Dioso taxuxuaba papecajamatabëcuene xanepanaeyaexanaenexa. Bajaraxuata panevajënaeyabelia Dioso pacajamatabëcuene xanepanaeyaexanaponaena copatsinejeva matapania Jesucristo icatsia pepatsimatacabitsicajavabelianexa. <sup>7</sup> Bajarapacuenia paxamë patacasivanajamatabëxainaejava, netsitaxanepana. Tsipaji bitso pacaasivatsi. Pamatacabi naneconitsiaponaponajë penaneconitsivi pejebabiabibota, panejamatabëcueneyavenoname. Panejamatabëcueneyavenonamenua pamatacabi nacuaevetsivi pitabarata nenuta Jesucristo pelivaisi jivi tatsipaebaponaejava yabara. Nexata bajarapamatacabi jumaitsinë bajarapamonaejavabelia: “Mara palivaisije, Jesucristo pelivaisi, pexaniajailivaisi cajena jivi pecapanepaelivaisinexatsi Diosojavabelia,” janë nacuaevetsivijavabelia. <sup>8</sup> Dioso cajena nejamatabëcueneyapëtane pacuenia bitso paxamë pacaasivatsi. Jesucristo neyavenona bitso patacaasivanexa. <sup>9</sup> Pacatovajëtatsi Diosojavabelia itsamonae ata bitso paneasivatsavanapaenexa panevajënaeyabelia. Pacatovajëtatsinua paneyapëtaenexa Dioso. Pacatovajëtatsinua paneyapëtaenexa xua Dioso pacatojitsipa paneexanavanapaenexa. <sup>10</sup> Nexata payapëtaename paneitapetsinexa palivaisi bitso xanepana daxitalivaisivecua, panejumecovënëtsinexa bajarapalivaisi. Nexata bajarapacuenia pacacajëpaena xaniavaetsia panejinavanapaenexa aneconijibia. Matapania Jesucristo icatsia pepatsimatacabitsicajavabelianexa, bajarapacuenia panaevetavanapaenename. <sup>11</sup> Nexata ëpexaniajamatabëcuene paxainaename panejamatabëëthëtojavavetsina Jesucristo papijajivixaemë. Nexata itsamonae paxamë yabara jamatabëjumaitsi tsane Diosojavabelia: “Diosomë, ayajamatabëcuenenëmë bitso. Pexaniacuene bitso toexaname Filipos tomarapijivi ëpexaniajamatabëcuene pexainaenexa pejamatabëëthëtota,” jamatabëjai tsane itsamonae Diosojavabelia paxamë xaniavaetsia panetsitajinavanapaexae.

*Pacuenia Pablo jumecovënëtaponapona Cristo yabara pelivaisi*

<sup>12</sup> Tajamonae, payapëtaneme rabaja pajamatabëcuene yabara naneconitsia ponaponajë penaneconitsivi pejebabiabibota. Jitsipajë paneyapëtaenexa mapacueneye. Majotaje penaneconitsivi pejebabiabibota neeta pexanialivaisi, Jesucristo pelivaisi, jivi tatsipaebaponaexae. Xanë neetsi ata penaneconitsivi pejebabiabibota, itsiata apo yacaranatsicapanepe pexanialivaisi, Jesucristo pelivaisi, peyacajëpaponaeenexa daxitanacuanëjava. Nexata baja aeconoxae bajarapalivaisi pevajënaeyabelia yacajëpaponae

daxitanacuanējāva daxitajivi Diosojavabelia pecapanepaenexatsi. <sup>13</sup> Nacuaevetsinē pijabopijivi, vajabitsaē, daxita itsamonae ata, neyapētane majota naneconitsia taponaponaejāva Jesucristo pijajivitonēxaenē. <sup>14</sup> Mapatomarataje ayaibitsaētoxaeto Dioso pejumecovēnētsivi, itsa nevēnētane tananeconitsiaponaponaejāva, najamatabēcuenesaētavanapa. Diosojavabelia asaēyata najamatabēcuenecopaba peyavenonaenexatsi. Nexata ajumejunavijibia Dioso pejumelivaisi tsipaebapona itsamonaejavabelia.

<sup>15</sup> Pamonaē ajumejunavijibia Dioso pejumelivaisi tsipaebapona itsamonaejavabelia, bajarapamonaeyajuvēnēvi, panecuenecaēba. Nexata itsamonaejavabelia asaēya tsipaebapona Cristo pelivaisi. Bajarapamonaē xanē yabara jamatabējumaitsi: “Pablo bitso ayaicuenia Dioso pejumelivaisi jivi nacatsutsipaebapona. Pacuenia bajaraponē tsipaebapona, matatoxenetsia vaxaitsi tsipaebaponaenatsi jivi vajanacayaiy-ataenexa,” jamatabējai bajarapamonaē. Itsiata itsamonae, bajarapamonaeyajuvēnēvi, taneyavenonaenexa, itsamonaejavabelia tsipaebapona Cristo pelivaisi bajarapamonaē ata xaniavaetsia pejumecovēnētsinexa. <sup>16-17</sup> Itsamonae tsipaebapona Cristo pelivaisi pejumetaevitsi saya peyaiyataenexatsi, pepēnaponaenexatsinua. Bajarapamonaē pejamatabēēthētovetsina apo jumecovēnētsi ata Cristo, saya jema Cristo pelivaisi tsipaebapona. Jamatabējumaitsi: “Vecae Pablo naneconitsiaponaponaē penaneconitsivi pejebabiabibota, pecovēta itsajamatabēcuenē xainaeyaxanaenatsi Cristo pelivaisi pejumecovēnētsivi. Bajarapacuenia Pablo jamatabēcuenēbējaiyaxanaenatsi,” jamatabējai bajarapamonaē xanē yabara. Itsiata itsamonae xaniavaetsia tsipaebapona Cristo pelivaisi pejumecovēnētsixae Cristo. Bajarapamonaē yapētane Dioso tanetocopatsijava penaneconitsivi pejebabiabibota naneconitsia taponaponaejavata, tajumaitisijavanexa nacuaevetsivijavabelia mapacueniaje: “Jesucristo pelivaisi jivi pecapanepelivaisinexatsi, pexaniajailivaisi cajena,” tajaijavanexa nacuaevetsivijavabelia, bajarapamonaē yapētane. <sup>18</sup> Majotaje nenaneconitsiaexanaē ata, apo natsinajamatabēxainaenē. Itsamonae pejamatabēēthētovetsina Cristo pelivaisi pejumecovēnētsixae, tsipaebapona jivi pejumecovēnētsinexa bajarapalivaisi. Itsamonae pijinia pejamatabēēthētovetsina apo jumecovēnētsi ata, itsiata Cristo pelivaisi tsipaebapona jivi pejumecovēnētsinexa bajarapalivaisi. Bajaraxuata bajarapamonaē ata jivi petsipaebaponaejāva yabara, itsiata sivajamatabēcuenēbarēyanē.

Bitso orijibia tavajēnaeyabelia jamatabēcuenēbarēyanē tsaponae tsane. <sup>19</sup> Tsipaji yapētaniji pacuenia panetovajētaponame Diosojavabelia. Espiritu Santo, ponē Jesucristo itorobica, bajaraponē neyavenonapona. Bajaraxuata yapētaniji daxita pacuenia netoxanepanaejitsia. Nexata baja pitsapaenajē tananeconitsia ponaponaejavavecua. <sup>20</sup> Bitso jitsipajē ēpexaniacuenē taexanaenexa. Apo jitsipaenē taexanaenexa itsacuenējavayo ata, xua yabara auranē tsipae. Cristo tajumecovēnētsijavaveliacujinae, aeconoxae ata, ajunavijibia jitsipajē taexanaenexa Cristo pejitsipaecuenia daxitamatacabijavabelianexa. Bajarapacuenia jitsipajē taexanaponaenexa ēbajaraponēnexa. Bajaraponē tanetojitsipaecuenia abaxē taasaētsaponaponaēepato mapanacuataje, tatēpaeepatotanexa ata, jitsipajē taexanaenexa xua pejamatabēcueneta daxitajivi yaiy-ataejitsia Cristo. <sup>21</sup> Tasaētsaponaponaēepato abaxē mapanacuataje, Cristo pejitsipaecuenia toexanaponaenajē. Itsa pamatacabi tēpaenajē, netoxanepanaejitsia mapanacuata tasaētsaponaponaejāva matatoxenetsia. Tsipaji Cristo yajavaponaenajē athēbētatsia. <sup>22</sup> Tasaētsaponaponaēepato abaxē mapanacuataje, necaējēpa tatoexanaponaenexa Cristo tanetojitsipaecuenia. Itsiata apo yapētaenē xua pepacuenē jitsipajē. <sup>23</sup> Itsajavata bitso jitsipabiabajē tatēpaejāva taponaponaenexa Cristo pijanacuayabetsia. Bajaraxua bitso netoxanepanaejitsipa. <sup>24</sup> Itsiata paxamē panenamatavenoname abaxē taponaponaenexa mapanacuata, patacayavenonaponaenexa. <sup>25</sup> Yapētaniji baja cajena abaxē taponaponaejāva paxamēnexa. Ponaponaenajē abaxē patacayavenonaenexa, panejamatabēcuenesaēnexa panevajēnaeyabelia, panejamatabēcuenēbarēyanexanua panejumecovēnētsixae Cristo pelivaisi papecapanepaenexa panijaneconivecua. <sup>26</sup> Nexata pamatacabi Jesucristo neyavenonaena

penaneconitsivi pejebabiabibovecua tapitsapaenexa, ponaponaenajë icatsia paxamëjavata. Nexata jamatabëcuenebarëyaya panevajunupaebianame itsamonaëjavabelia pacuenia Jesucristo neyavenona tapitsapaenexa penaneconitsivi pejebabiabibovecua.

<sup>27</sup> Pajinavanapare xaniavaetsia, pacuenia pexanialivaisi, Cristo pelivaisi, pacaitoroba. Nexata itsa pacataenatsi, apo pacatae atatsinua tsane, itsiata jitsipajë patacavënëlivaisi-taeponaëjava najamatabëcuenejëpaeya panecasaëtsavanapaejava Cristo pelivaisi panejumecovënëtavanapaejava. Jitsipajë patacavënëlivaisitaëjava asaëyata najamatabëjëpaeya jivi panetsipaebavanapaejava Jesucristo pelivaisi jivi pecapanepaelivaisinexatsi. <sup>28</sup> Pëtsa pacujunavame pamonaë pacaitoya. Dioso papecayavenonaëxae, itsa apo pacujunavimë tsane itsamonaë pacabejiobiaexanaë ata, nexata bajarapamonae jamatabëjumaitsi tsane: “Pexaniajailivaisi cajena bajarapamonae tsipaebapona. Tsi-paji Dioso yavenonatsi. Nexata vaxaitsi bajarapamonae vajabejiobiaexanaëxae, Dioso nacaverebiabiana,” jamatabëjai tsane. Yapëtaenanua paxamë papecacapanepaejavane Dioso. <sup>29</sup> Cristo pejamatabëcueneta pacatocopata bajaraponë panejumecovënëtsinexa. Itsiata baitsi jane apo pacatocopatsi ëbajaraponë panejumecovënëtsinexa. Pacatoyajavacopatana baje cajena itsamonaë papecabejiobiaexanaënaë bajaraponë papijajivixaemë. <sup>30</sup> Pacuenia Cristo pijajivitonëxaenë itsamonaë nebejiobiaexanapona, bajara pijinia pacuenia paxamë ata itsamonaë pacabejiobiaexanaëna. Pacuenia baje imata panetaneme itsamonaë tanebejiobiaexanaëjava, bajarapacuenia abaxë tsiteca nebejiobiaexanapona pacuenia baje panevënëlivaisitaneme.

## 2

*Pacuenia Dioso pejumecovënëtsivi itavetatsi beayajamatabëcuenevi penataeyaniva yabara pelivaisi*

<sup>1</sup> Payapëtaneme rabaja mapacueneye. Jesucristo panejavajinavanapaëxae, panajamatabëcueneësaëtame panejumecovënëtsijava. Payapëtaneme rabaja. Jesucristo papecaasivaxae, pacajamatabëcueneëbabata. Payapëtaneme rabaja Espiritu Santo papecatsijamatabëceajava papecayajavaponaponaënaë. Payapëtaneme rabaja Jesucristo papecaita xutotsonia taeyabiabijava. <sup>2</sup> Bajaraxuata nexata pacaitorobatsi mapacuenia panejinavanapaenexaje patacasivabarëyanexa. Najamatabëcuenejëpaeya pajinavanapare. Najamatabëcuenejëpaeya namataenetsia panaasivamëre tsavanapae. Xua paexanaëjitsiamë Dioso pejamatabëcueneta, najamatabëcuenejëpaeya paexanavanapare. <sup>3</sup> Pëtsa panatoexaname itsacueneyavayo ata, xua ëpaxamënaënaë pacatoxanepana. Biji rajane paexanare xua itsamonaënaënaë ata toxanepanatsi. Pëtsa paexanamenua itsacueneyavayo ata saya bepaayajamatabëcuenevimë papecataenexa itsamonaë. Biji rajane beveliajamatabëcuenevi panataeyabiabianame. Itsamonaë paxamëvecua ayajamatabëcuenevi pataeyabiabianame. <sup>4</sup> Pëtsa panajamatabëxainabiabame ëpaxamë panenatojitsipaecuene. Biji rajane payajavanajamatabëxainabiabianame itsamonaë ata penatojitsipaecuene.

<sup>5</sup> Pacuenia Jesucristo jamatabëcueneitsi, bajara pijinia paxamë ata pajamatabëcueneitsimëre. <sup>6</sup> Pacuenia Dioso jamatabëcueneitsi, bajara pijinia Jesucristo ata jamatabëcueneitsi. Itsiata baitsi jane Jesucristo apo jamatabëjumaitsi: “Jitsipajë daxitajivi taneyaiyataenexa pacuenia taxa Dioso yaiyatanetsi,” apo jamatabëjai. <sup>7</sup> Bajaraponë picani ayajamatabëcuenenë. Paxa Dioso yajavaponapona athëbëtsatsia. Itsiata itsa patsica mapanacuayabetsicaje, naexana pacuenia vaxaitsi banaexanatsi mapanacuataje. Nexata paxa Dioso bepijajivitonë naexana, pacuenia Dioso itorobatsi pexanaënaë. <sup>8</sup> Bejivitonëcuenia itsa naexana, beveliajamatabëcuenenëcuenia ponapona. Paxa Dioso pitorobicueniatsi jumecovënëta. Pacuenia bitso pibisiacuene pexanaëvi pijaneconi yabara cruzajavabelia bacobematabiabarutatsi pebeyaxuabinexatsi, bajara pijinia pacuenia Jesucristo ata nacopata cruzajavabelia pecobematabiabarutatsinexatsi. <sup>9</sup> Bajaraxuata Dioso mëthëvetsina matacotatsi. Caponatsi athëbëbetsia peecaenexa paxa Dioso javatatsia, pebarëevetsinexatsi

daxitacuene. <sup>10</sup> Nexata bajaraponë ita vënëlivaisitaenatsi, pematabacabëta yaiyataeya tonubenaenatsi daxitajivi. Athëbëtatsia pejinavanapaevi, mapanacuapijivi ata, petëpaevimi ata, pematabacabëta yaiyataeya tonubenaenatsi. <sup>11</sup> Nexata daxitajivi jumai tsane Jesucristo yabara: “Jesucristo rabaja cajena pepo petuxanenë,” jai tsane. Nexata daxitajivi yapëtaena pacuenia paxa Dioso bitso ayaijamatabëcuenenë.

*Pacuenia Dioso pejumecovënëtsivi pexaniajailivaisi pejumecovënëtavanapaexae, bepecotia mapanacuataje yabara pelivaisi*

<sup>12</sup> Tajamonae bitso patacaasivavi, pacuenia panejumecovënëtame pamatacabi pacat-sipaebaponaponatsi Dioso pejumelivaisi, bajarapacuenia matatoxenetsia Dioso pajumecovënëtavanapare, aeconoxae xanë tajë pacavecuaponaponae atatsi. Pacae-jivimë canacujitsia cunjaviaya Dioso pajumecovënëre. Nexata ëpexaniacuene paex-avanapaename. Tsipaji Dioso papecacapanepaevinexa. <sup>13</sup> Dioso rabaja pacajamatabëcueneyavenona panejamatabëëthëtovetsina jitsipaeya paneexanaenexa, pacuenia Dioso pacatojitsipa. Dioso pacajamatabëcuene caëjëpaeyaexananua paneexanaenexa bajarapacuenia.

<sup>14</sup> Daxitacuene paexanavanapare pajamatabëcuenenatsipaebinejevamë. Pëtsa anaeya namataenetsia najumenotsia panabijatanemenua. <sup>15</sup> Bajarapacuenia ita pajinavana-paename, nexata daxita paxamë aneconijibia jivi patsitajinavanapaename Dioso papexixaemë. Nexata mapanacuapijivi pibisiacuene pexanaevi tuatuajëta pajinavana-pae atamë tsane, itsajivi ata acuenebi tsane pibisiacuena papecabaracuaicuaijainexa. Pacuenia pecotia itayota pitaquirijavata, bajara pijinia pacuenia paxamë ata paitsimë tsane. Bepapecotiamë tsane pexaniajailivaisi panejumecovënëtavanapaexae bajarapamonaejavata. <sup>16</sup> Bepapecotiamë tsane xaniavaetsia ita patsitajumecovënëtavanapaename bajarapamonaejavata pexaniajailivaisi, Jesucristo pelivaisi. Bajarapacuenia ita patsitajumecovënëtavanapaename, pacasivabarëyatsi tsane pamatacabi icatsia Cristo patsianica. Bajarapacuenia pacasivabarëyatsi tsane tsipaji baja yapëtaenajë apo tanacueratsijava asaëya tanacuenebijava paxamëjavata. <sup>17</sup> Dioso pacasivabarëya panenajamatabëcuenerajutsixae Diosojavabelia panetoinavanapaenexa bajaraponë papecatojitsipaecuenia. Itsamonae nebeyaxuabijitsia ata tsipae Cristo pelivaisi patacatsipaebixae, xanë itsiata nasivajamatabëcuenebarëyanë tsipae. Tsipaji Cristo pelivaisi bajarapacuenia patacatsipaebinexa, Dioso netocopata. Nexata daxita paxamë pacayajavajamatabëcuenebarëyatsi tsane. <sup>18</sup> Bajarapacuenia paxamë ata pajamatabëcuenebarëyamëre tsavanapae. Paneyajavabarëyamërenua tsavanapae.

*Timoteobeje Epafroditobeje yabara pelivaisi*

<sup>19</sup> Itsa vajatuxanenë Jesús jitsipa, naxanitsiayo jamatabëitorobajë Timoteo papecataenexalia. Pepatsicujinaerena, ita pacavënëlivaisitaenatsi pacuenia pajinavana-pame, nejamatabëcuenebarëyaya exanaejitsia. <sup>20</sup> Bajaraponë caenë nejamatabëcuenejëpa. Bajaraponë bitso pacasivanajamatabëxaina xaniavaetsia panejinavanapaenexa. <sup>21</sup> Daxita itsamonae bitso najamatabëxaina ëpenatojitsipaecuenia pexanaenexa. Apo sivanajamatabëxainae Jesucristo petonacuenebinexa. <sup>22</sup> Paxamë baja payapëtaneme pacuenia Timoteo pacatsitaponapona pexaniajamatabëcuenia. Pacuenia itsamonae paxa penacuenebijava bayavenona, bajara pijinia pacuenia Timoteo neyavenona jivi tatsipaebaponaejava pexanialivaisi, Jesucristo pelivaisi. <sup>23</sup> Bajaraxuata jamatabëitorobajë Timoteo paxamëjavabelia papecataenexalia. Itsa yapëtaenajë pacuenia nexanaejitsia penaneconitsivi pejebabiabibota tananeconitsiaponaponaevajava yabara, nexata bajaraxuacujinae pacatoitorobialiatitsi Timoteo papecataenexalia. <sup>24</sup> Xanë jamatabëjumaitsinë paxamë yabara: “Itsa Dioso netojitsipaena xanë ata taponanexa bajarabelia, nexata neyavenonaena bepimia taponanexa tataenexalia Filipos tomarapijivi,” jamatabëjanë paxamë yabara.

<sup>25</sup> Panetoitorobaremena rabaja vajabananë Epafrodito pataneyavenonaenexamë bajarapacuenia tanamatavenonaepatota. Nexata Jesucristo patonajuanacuenebajëbeje.

Asaëyata panajuanacuenXanë jamatabëjumaitsinë paxamë yabara: “Itsa Diosoeba-jëbeje, Dioso apo pejumecovënëtsivi paneitsacueniababiabi atabeje. Nexata icatsia netsitaxanepana bajaraponë patacatoitorobinexalia. <sup>26</sup> Majotaje Epafrodito pi-avitanecujinae, jamatejema baja. Nexata aeconoxae bitso jamatabëpona paxamë-javabelia papecataenexa. Bitso jamatabëpona tsipaji yapëtane panevënëlivaisitae-java pebitsojava piavitanecuene. <sup>27</sup> Xaniajai rabaja picani. Avitane petëpaejav-abelianexa. Itsiata baitsi jane Dioso itaxutotsoniatanetsi. Xanë ata Dioso nitaxutotso-niatane. Tsipaji itsa nevecuatëpaejitsipa, xanë bitso najamatabëxainaejitsipajë. Tsipaji penaneconitsivi pejebabiabibota taneetsixae tanajamatabëxainaejavata, nevecuatëpae-jitsipa. <sup>28</sup> Bajaraxuata bitso jitsipajë bajaraponë patacatoitorobinexalia panetaenexa, nexata paxamë panejamatabëcuenebarëyanexa itsa pataneme icatsia bajaraponë. Nex-ata xanë ata paxamë yabara bevelia najamatabëxainaenajë. <sup>29</sup> Pacopiapitsianame bajaraponë bitso jamatabëcuenebarëyaya Dioso pejamatabëcueneta vajabananëxae. Pamonaë jamatabëcueneitsi pacuenia bajaraponë jamatabëcueneitsi, payaiyataeneme. <sup>30</sup> Paxamë apo papatsi atamërena maberenaje pataneyavenonaenexamë, itsiata pane-jamatabëcueneta bajaraponë panetoitorobaremena taneyavenonaenexa. Nexata ba-jaraponë neyavenonabiaba Cristo pijacuene tatonacuenebijava. Bajaraxuacujinae itsa avitane, imoxo picani petëpae.

## 3

*Pacuenia jivi Dioso pejitsipaecuenia betojinavanapa yabara pelivaisi*

<sup>1</sup> Tajamonae, palivaisi capanepaeya pacatoyaquinatsi baja, bajarapalivaisi pasivaja-matabëcuenebarëyamëre Cristo papijajivixaemë. Xanë apo pacasivacueranaetsi pat-acatoyaquinaenexa icatsia bajarapalivaisi. Tsipaji xanepana icatsia panejumetaenexa bajarapalivaisi. <sup>2</sup> Panayajivitaema pijamatabëcuenebejevi, pamonaë beaviri pi-anaepanaevi. Tsipaji raja bajarapamonae apo aura pexanaejava yabara. Bajara-pamonae jamatabëcuenenavëxaniabiaya jumaitsi tsabiabi Jesucristo pijajivijavabelia: “Xanepana paxamë ata papecaperabëcaucubinexa judíovicuenia Dioso pepacuene pa-pecacapanepaenexa panijaneconivecua,” jai tsabiabi. <sup>3</sup> Nacaperabëcaucutsi ata tsi-pae, vajanacaperabëcaucutsijava yabara, Dioso pexitsi apo nacaexanae tsipae. Vax-aitsi pepacuene vajanacacapanepaevinexa Diosojavabelia. Tsipaji vajamatabëëthë-tojavavetsina najamatabëcuenecopatatsi Diosojavabelia vajanacacapanepaenexa. Ja-matabëcuenebarëyatsi Jesucristo pijajivixaetsi. Yapëtanetsinua pacuenia Dioso apo nacacapanepae tsipae vajacuata vajaexanaejava pejamatabëcueneta. <sup>4</sup> Itsajivi itsa caëjëpaejitsipatsi pijacuata penacapanepaenexa Diosojavabelia judíonëxae, Dioso pet-onacuenebijava yabara ata, nexata xanë ata necaëjëpaejitsipa tajacuata tanaca-panepaenexa. <sup>5</sup> Xanë picani mataitsinëje. Itsa baja xainajë ocho pamatacabibeje tanaexanaecujinae, tajasalinaivicuenia neperabëcaucuta. Baitsi neboupiperabëcaucuta. Xanë raja tajasalinainëmi Israelpijinë. Benjamínpijinë pemomoxiyajuvënënënë. Taxa judíonë. Taena ata judíova. Xanë picani fariseonë. Pacuenia fariseovi bitso jumecovënëta Dioso Moiséspijinëta penajumecopatsilivaisi, bajara pijinia pacuenia xanë ata itsinë. <sup>6</sup> Daxita tajamatabëcuenesaëta caasaënë tajumecovënëtsijava Dioso Moiséspijinëta penajumecopatsilivaisi. Jamatabëcuenenavëxaniabajë tsaena bitso. Jesús pelivaisi pejumecovënëtsivi yabara, jumaitsinë tsabiabi: “Dioso Moiséspijinëta penajumecopatsilivaisivecua saicayalivaisi jumecovënëta. Nexata bajarapamonae be-beyejebatsi,” janë tsabiabi. Nexata Jesús pijajivi bejibiaexanabiabajë. Dioso Moiséspi-jinëta penajumecopatsilivaisi, bitso xaniavaetsia jumecovënëtaaponaponajë. Nexata itsajivi ata acuenebi pejumaitsjava xanë yabara: “Pablo xaniavaetsia apo jumecov-ënëtsi Dioso Moiséspijinëta penajumecopatsilivaisi,” pejaijava. <sup>7</sup> Daxita bajarapalivaisi yabara xanë picani sivabarëyanë. “Itsa jumecovënëtsianajë bitso, netonamatamotsiana Diosojavabelia,” jamatabëjanë picani. Itsiata aeconoxae yapëtaniji daxita bajarapalivaisi

piamatamobilivaisicuene. Tshipaji baja najamatabëcuenecopatajê Cristojavabelia tanevecuaajibiaexanaenexa tajaneconi. <sup>8</sup> Aeconoxae baja yapëtaniji daxita bajarapalivaisi piamatamobilivaisicuene. Daxita bajarapalivaisivecua netonamatamota tayapëtaenexa xaniavaetsia tajatuxanenê Jesucristo. Jesucristo taneyajavaponaponaexae, nexata piamatamobilivaisi tajumecovënëtsijavami, copatajê baja. <sup>9</sup> Dioso aneconijibia apo netae tajumecovënëtsixae Dioso Moiséspijinëta penajumecopatsilivaisi. Aeconoxae baja Dioso aneconijibia netane tshipaji najamatabëcuenecopatajê Jesucristojavabelia tanevecuaajibiaexanaenexa tajaneconi. <sup>10</sup> Tavajënaeyabelia bitso jitsipajê daxitacuenevecua tayapëtaenexa pacuenia Cristo jamatabëcueneitsi. Pasaëta Dioso matacotatsi Cristo petëpaejavavecua, bajarapaasaë jitsipajê tayajavaponaponaenexa. Cristo pijajivitonëx-aenê, jitsipajê xanê ata tanebejiobiaexanaenexa, tatëpaenexa ata. <sup>11</sup> Tshipaji xanê ata copiaevetaponaponaenexa Dioso tanematacotsinexa tatëpaejavavecua.

*Pacuenia Pablo najamatabëcuenesaëta xaniavaetsia Cristo peyajavaponaponaenexa, pepatsinexa Dioso pijanacuayabetsia, yabara pelivaisi*

<sup>12</sup> Xanê apo jamatabëjumaitsinê: “Daxita baja Dioso pejitsipaecuenia toexanajê. Nejamatabëcuenecaëjêpa baja tajumecovënëtsinexa pacuenia Dioso netojitsipa taexanaenexa,” apo jamatabëjanê. Itsiata tavajënaeyabelia tanejamatabëcuene caëjêpapon-aenexa, caasaenê tsaponapona taexanaejava pacuenia Dioso netojitsipa. Jitsipajê bitso tajamatabëcuenexanepanaejava tavajënaeyabelia pacuenia Dioso netojitsipa. Tshipaji bajarapacuenia yabara Jesucristo nesivatëpa. <sup>13</sup> Tajamonae, apo jamatabëjumaitsinê: “Xanê rabaja nejamatabëcuenecaëjêpa Dioso tajumecovënëtsinexa pacuenia Dioso netojitsipa taexanaenexa,” apo jamatabëjanê. Jume baja cajena. Mapacuenia najamatabëxainajêje. “Daxita xua exanajê Jesús pelivaisi tajumecovënëtsivajënaeya, nacofënëtajê baja,” jamatabëjanê. Najamatabëcuenesaëtajê xaniavaetsia tatoaponaponaenexa Dioso. Pacuenia pebitsojinaenê pecujinaejinaejava penayacobijavata, nasaëta pepatsinexa petocaëjët-sijavabeliatsi, bajara pijinia pacuenia xanê ata najamatabëcuenesaëtajê xaniavaetsia tatoaponaponaenexa Dioso. Tavajënaeyabelia najamatabëcuenesaëtajê taexanaenexa pacuenia Dioso netojitsipa. Bajarapacuenia najamatabëxainaponaponaenexa. <sup>14</sup> Pacuenia pecujinaejinaenê nasisaëta penacanabinexa perajutsinexatsi premiovënëjjava, bajara pijinia pacuenia najamatabëcuenesaëtajê. Najamatabëcuenesaëtajê xaniavaetsia tatoaponaponaenexa Dioso tanerajutsinexa athëbëtatsia taxainaejavanexa tayajavaponaponaexae Jesucristo.

<sup>15</sup> Daxita pamona xaniavaetsia jumecovënëtavanapa Dioso, bajarapamonae ata benjamatabëcuenesaëtavapanapa xaniavaetsia petojinavanapaenexa Dioso. Itsa abaxê paxamê saicaya itsajamatabëcuene paxainame, nexata Dioso pacayapëtaeyaexanaena saicaya abaxê itsajamatabëcuene panexainaejava. <sup>16</sup> Nexata palivaisivajêto jumeyapëtanetsi pexaniajailivaisi, bajarapalivaisi bejumecovënëtavanapatsi. Becaasaë tsavana-peatsinua vajavajënaeyabelia orijibia vajajumeyapëtaeponaenexa.

<sup>17</sup> Tajamonae, pacuenia baja pacatsitaponaponaenexa, bajara pijinia pacuenia paxamê ata pajinavanapare. Itsamonae paxamëyajuvënëvi xaniavaetsia jinavanapa pacuenia pacatsitaponaponaenexa. Bajarapamonae ata panaitaxutocaevetsianame paxamê ata xaniavaetsia panejinavanapaenexa pacuenia bajarapamonae jinavanapa. <sup>18</sup> Ayaibitsaëtoxoneto paxamëyajuvënëvi apo jumecovënëtsi Jesucristo cruzata pesivatëpaejavatsi peca-panepaenexatsi. Bajarapamonae yabara pacatsipaebatsi baja anijatonê. Itsiata icatsia aeconoxae yaitaxutonueya pacatsipaebianatsi. <sup>19</sup> Mapanacuaje pecopiarucaematacabita, bajarapamonae Dioso verebiabianatsi. Tshipaji bitso jitsipa pijacuata penatojitsipaecuenia pexanavanapaenexa. Piauracuene exanabiabi ata, jamatabëcuenenavëxaniabiaya jamatabëjumaitsi tsabiabi: “Pexaniacuene bitso vaxaitsi exanavanapatsi,” jamatabëjai tsabiabi bajarapamonae. Emapanacuapijicuene saya sivanajamatabëxainabiaba. <sup>20</sup> Vaxaitsi baja cajena jinavanapaenatsi Dioso pijanacuatatsia. Bajaraxuata copiaevetavanapatsi vajatuxanenê Jesucristo pepatsijavatsica vajanacacapanepaenexa Dioso pijanacuayabetsia. <sup>21</sup> Vajaperabëto vereverecaena. Itsiata vajatuxanenê Jesús nacaperabëitothianaena. Nexata pacuenia bajaraponê perabëitsi athëbëtatsia, bajara

vaxaitsi ata perabëitsitsi tsane. Nexata pasaëta Jesús caëjöpatsi pitorobinexa daxitacuene, bajarapasaëta nacaperabëitothianaena.

## 4

*Pacuenia vaxaitsi besivabarëyatsi tsabiabi vajatuxanenë Jesucristo yabara pelivaisi*

<sup>1</sup> Tajamonae bitso patacaasivavi, pacaitaxanatsi. Bitso jamatabëpacatanetsi. Bitso pacasivajamatabëcuenebarëyatsi. Tsipaji xaniavaetsia pajumecovënëtavanapame Jesús pelivaisi pacuenia baja pacatsipaebatsi. Pajamatabëcuenesaëmëre tsavanapae pacopatsinejevamë panejumecovënëtsijava Jesús pelivaisi.

<sup>2</sup> Papetirivamëbeje, Evodia Síntique, paxamëbeje pacatoyaquinatsibeje patacaitavetsinexabeje mapacueniaje. Pëtsa baja icatsia pematatsënëa namataenetsia panajumeanaenotamebeje. Panajamatabëcuenejëparebeje Jesús pelivaisi panejumecovënëtsivaxaabeje. <sup>3</sup> Xamë ata xaniavaetsia taneyavenonaenëmë Dioso pijacuene tanacuenebijava, catoyaquinatsi. Jitsipajë neyavenonaenexa bajarapapetirivabeje, penabarajamatabëcuenexanepanaenexabeje namataenetsia icatsia penajumeanaenotsiyanivabeje. Bajarapovabeje bitso neyavenonabeje tatsipaebijava itsamonaejavabelia pexaniajailivaisi pecapanepaelivaisinexatsi Diosojavabelia. Bajarapacuenia Clemente ata neyavenona. Itsamonae ata patanajuanacuenebivi, bajarapacuenia neyavenona. Daxita baja bajarapamonae vënërubena Dioso pijabaxutota, itsa pabaxutota vënëyaquinarubatsi pamonaepexainaevinexa matababi apo peverevereaejava.

<sup>4</sup> Jesús pelivaisi panejumecovënëtsivixae, pajamatabëcuenebarëyamëre daxitamatabijavabelianexa. Icatsia pematatsënëa pacajumaitsitsi. ¡Pajamatabëcuenebarëyamëre tsavanapae! <sup>5</sup> Jamatabëcuenexanepanaeya xaniavaetsia pajinavanapaename daxitajivi papecajamatabëcueneypëtaenexa. Tsipaji rabaja vajatuxanenë imoxoyo pevajëna pepatsinexatsica.

<sup>6</sup> Pëtsa pajamatabëcuenebëjamë itsacuenejavayo ata yabara. Biji rajane pavajëre Diosojavabelia daxitacuenejavanë yabara. Pexaniajamatabëcuenenua parajutabiabare Dioso papecajavavenonaevavanë yabara. <sup>7</sup> Nexata Dioso pacajamatabëjemayaexanaena panejamatabëcuenebëjaiyaniva. Pexaniacuene bitso bajarapajamatabëcuene. Dioso itsa nacajamatejemayaexana vajajamatabëcuenebëjaiyaniva, itsiata apo yapëtaetsi pacuenia nacajamatejemayaexana vajajamatabëcuenebëjaiyaniva. Dioso itsa pacajamatejemayaexanaena panejamatabëcuenebëjaiyaniva, nexata apo pajamatabëcuenebëjamë tsane. Jesucristo itsa pajumecovënëtavanapame, daxitacuene yabara panenajamatabëxainaejava atavecua Dioso pacaevetsiana.

*Pacuenia benajamatabëxainabiabatsi ëpexaniacuene yabara pelivaisi*

<sup>8</sup> Tajamonae, pecotocaevilivaisi pacatoyaquinatsi mapacueniaje. Panajamatabëxainabiabare ëpexaniajailivaisi yabara. Panajamatabëxainabiabarenua panenayaiyataecuene ata yabara. Panajamatabëxainabiabarenua xua xanepana paneexanavanaenexa. Panajamatabëxainabiabarenua Dioso papecajamatabëcuene barëyayaexanaenexa. Panajamatabëxainabiabarenua xua jivi baracuaicuaijijitsia pexaniacuena. Panajamatabëxainabiabarenua daxita xua pexaniacuene. Panajamatabëxainabiabarenua xua yabara Dioso pacabarëyataejitsia.

<sup>9</sup> Daxita pacuenia pacatsipaebatsi, pacuenia pacatsitaponaponatsinua, bajarapacuenia paexanavanapare. Nexata Dioso, ponë pacajamatejemayaexanaejitsia panejamatabëcuenebëjaiyaniva, pacayajavaponaponaena.

*Pacuenia Filipos tomarapijivi ofrenda tojebabiabatsi Pablonexa yabara pelivaisi*

<sup>10</sup> Vajatuxanenë bitso nejamatabëcuenebarëyayaexana. Tsipaji baja paxamë icatsia panesivanajamatabëxainame pataneyavenonaenexamë. Nexata baja icatsia ofrenda panetoitorobaremena. Bajayajebi apo panetoitorobi atamë ofrenda, itsiata paxamë

yabara apo jamatabëjumaitsinë: “Apo jitsipae raeta icatsia taneyavenonaenexa bajarapamonae,” apo jamatabëjanë. Jume cajena. Yapëtaniji pacuenia picani jamatabëpanetoitorobi atamë ofrenda pataneyavenonaenexamë, itsiata apo pacacuenecaëjêpae patanetoitorobinexamë. <sup>11</sup> Apo pacatoyaquinaetsi mapacueniaje ofrenda patanetoitorobivajënaeyamë bitso tanamatavenonaexae itsacuenejavayo. Dioso tanejamatejemayaexanaexae tajamatabëcuenebëjaiyaniva daxitacuene yabara, sivajamatabëcuenebarëyanë saya xuayovajëto xainajë. <sup>12</sup> Yapëtaniji pacuenia ponaponajë, pamatacabi tsiquirijavayo xinae atanë. Yapëtanijinua pacuenia ponaponajë pamatacabi ayaijava xainajë. Yapëtanijinua pacuenia jamatabëcuenebarëyanëjitsia daxitamatacabijavabelianexa. Nexata itsa xainajë daxita tanamatavenonaejavaxi, barëyanë. Apo xinae atanë itsacuenejavayo ata, itsiata barëyanë tsabiabi. <sup>13</sup> Nejamatabëcueneecaëjêpa tanajamatabëcuene-saëtsinexa daxitacuene yabara. Tsipaji Cristo pesaëta nejamatabëcueneecaëjêpaeyaexana. <sup>14</sup> Itsiata baitsi jane paxamë pexaniacuene bitso panetoexaname itsa panetoitorobaremena bajarapaofrenda bitso tanamatavenonaejavata.

<sup>15</sup> Payapëtaneme rabaja mapacuenije. Pamatacabi copiaya tsipaebanajetarucajê jivi pecapanepaelivaisinexatsi Macedonia nacujava, paxamë paFilipos tomarapijivimë panijanacuavecua itsa ponajë, paxamë panerajutame ofrenda pataneyavenonaenexamë. Itsatomarapijivi, Dioso pejumecovënëtsivi ata, apo nerajutsi ofrenda bajarapacuenia taneyavenonaenexa. Ëpaxamë itsiata paneyavenoname. <sup>16</sup> Nexata bajaraxuacujinae, itsa abaxë ponaponajë Tesalónica tomarata, panetoitorobabiabame icatsia ofrenda anijatonë tanamatavenonabiabijavata. <sup>17</sup> Sivabarëyanë tsabiabi itsa panetoitorobabiabame bajarapacuenia. Itsiata apo sivabarëyanë tsabiabi tanetoxanepanaexae bajarapacuenia pataneyavenonaejavamë. Jume baja cajena. Biji rajane sivabarëyanë tsabiabi bajarapacuenia pataneyavenonaejavamë. Tsipaji juya paxinaejitsiamë Diosojavabelia papecarajutsijavanexa athëbëtatsia. <sup>18</sup> Nexata pitajë daxita patanetoitorobijavamë Epafroditota. Xainajë baja nexata bitso ayaijava, tanamatavenonaejava matatoxenetsia. Xua panetoitorobame ofrendacuena, tsitapexaniacuene Dioso. Bajaraxua Dioso sivajamatabëcuenebarëya. <sup>19</sup> TajaDioso bitso pexainaenë. Nexata pacarajutsiana daxita pacuenia panamatavenoname. Bajara pijiniä pacuenia ayaijava Dioso pacarajutsiana Jesucristojavabelia xaniavaetsia panenajamatabëcuene copatsixae. <sup>20</sup> ¡Vaxa Dioso ayaijamatabëcuenenë daxitamatacabijavabelianexa! Bajara itsi tsane.

*Pacuenia Pablo tonajumeitoroba Dioso pejumecovënëtsivi pebajacobinexatsi yabara pelivaisi*

<sup>21</sup> Nebajacobiana paxamëjavata daxita Jesús pelivaisi pejumecovënëtsivi, pamonaë Dioso pijajivi. Dioso pijajivi, pamonaë xanëjavata jinavanapa, pacabajacobalia. <sup>22</sup> Daxita Dioso pijajivi, mapatomarataje pejinavanapaevi, pacabajacobalia. Romanonacua pepo pevetsinë pijabota penacuenebivi ata bitso pacabajacobalia.

<sup>23</sup> Pacatovajëtabiabatsi Diosojavabelia, vajatuxanenë Jesucristo papecayavenonabiabinexa. Bajara itsi tsane.

## Mapabaxutoje San Pablo toyaquina Colosas tomarapijivijavabelia

*Pacuenia Pablo toyaquina mapabaxutoje Dioso pejumecovënëtsivi, Colosas tomarapijivijavabelia, yabara pelivaisi*

<sup>1-2</sup> Xanë Pablonë, Dioso tanetojitsipaexae, nitapeta Jesucristo pijaapóstolenënexanë. Nexata Jesucristo nitoroba jivi pexanialivaisi tatsipaebaponaenexa. Pacatoyaquinatsi mapabaxutoje xaniavaetsia Jesucristo pelivaisi panejumecovënëtsivi, Colosas tomarata panejinavanapaevi. Vajabananë Timoteo ata pacajamatabënajina. Aeconoxae baja nacaemonaetsi, paxamë ata Jesús pelivaisi panejumecovënëtsixae. Pacatovajëtatsi vaxa Diosojavabelia papecaitaxutotsoniataenexa jamatabëcuenexanepanaeya panejinavanapaenexa.

*Pacuenia Pablo Diosojavabelia tovajëtabiaba Colosas tomarapijivi, Jesús pelivaisi pejumecovënëtsivi, yabara pelivaisi*

<sup>3</sup> Paxanëbeje Timoteobeje pacatovajëtabiabsibeje vajatuxanenë Jesucristo paxa Diosojavabelia. Nexata Diosojavabelia patacatovajëtsijavatabeje, paxamë yabara Diosojavabelia pajumaitsinëbeje tsabiabi mapacueniaje: “Pexaniajamatabëcuene pacarajutatsibeje. Tsipaji pexaniacuenia yavenonabiabame Colosas tomarapijivi,” pajanëbeje tsabiabi Diosojavabelia paxamë yabara. <sup>4</sup> Bajarapacuenia pajumaitsinëbeje tsabiabi tsipaji pacavënëlivaisitanetsibeje xaniavaetsia panejumecovënëtavanapaejava Jesús pelivaisi. Pacavënëlivaisitanetsibejenua paneasivatsavanapaejava daxita Jesús pelivaisi pejumecovënëtsivi. <sup>5</sup> Bajara pajamatabëcueneitsimë tsipaji baja xaniavaetsia payapëtaneme xua Dioso pacatoxaniavaeta athëbëtatsia papecarajutsinexa. Pamatacabi ajena pajumetaneme pexanialivaisi papecacapanepelivaisinexa, bajarapamatacabi payapëtaneme baja xua Dioso pacatoxaniavaeta athëbëtatsia papecarajutsinexa. <sup>6</sup> Bajarapapexanialivaisi pajumetaneme baja pamatacabi copiaya Epafra pacatsipaeba Dioso papecaasivajava. Bajarapalivaisi baja aeconoxae daxitanacuanëjava yacaëjëpaponä. Nexata daxitanacuanëjava, pamonaë jumecovënëtaponä bajarapalivaisi, copataponä baja perujujamatabëcuenemi. Nexata baja pejanajamatabëcuene xainaponä. Bajarapamonäe pejanajamatabëcuene xainaponä, pacuenia paxamë ata pejanajamatabëcuene paxainame pamatacabi ajena pajumecovënëtame bajarapalivaisi. Bajara pamatacabijavaverenacujinae paxamë baja payapëtaeponame pepacuene Dioso papecaitaxutotsoniataejava. <sup>7</sup> Dioso papecaitaxutotsoniataejava, copiaya baja cajena vajasivanë Epafra pacatsipaeba. Bajaraponë Jesucristo xaniavaetsia petonacuenebinë. Nexata bajaraponë panetoitorobaremena pataneyavenonaenexabeje Dioso patatonajuanacuenebinexa majotaje. <sup>8</sup> Nexata pamatacabi Epafra pata paxanëbejjavaberena, panetsipaebabeje xaniavaetsia panejinavanapaejava. Panetsipaebabejenua Espiritu Santo papecayavenonaejava paneasivanexa itsamonäe ata.

<sup>9</sup> Nexata patacavënëlivaisitaecujinaebeje, pacatovajëtabiabsi Diosojavabelia. Pacatovajëtabiabsi xua Dioso pacatojitsipa papecayapëtaeyaexanaenexa. Nexata Dioso itsa pacayapëtaeyaexana xua Dioso pacatojitsipa, bajaraxua paneexanavanapaenexa. Bajarapacuenia pacatovajëtabiabsi daxitacuene, Dioso pijacuene ata, Dioso papecayapëtaeyaexanaenexa. <sup>10</sup> Pacatovajëtabiabsinua xaniavaetsia jivi panetsitajinavanapaenexa, Dioso papecasivabarëyanexa pexaniacuene paneexanabiabixae. Pacatovajëtabiabsinua Diosojavabelia panevajënaeyabelia Dioso panejamatabëcueneyapëtaeponäenexa. <sup>11</sup> Pacatovajëtabiabsinua Dioso papecajamatabëcuene asaëyaexanaenexa pesaëta. Nexata bajayajebi itsamonäe pacaitsacueniababiabi ata, pacajamatabëcuenecaëjëpaena panejamatabëcuenesaë tsavanapaejava. <sup>12</sup> Pacatovajëtabiabsinua paxamë panejumaitsabiabinexa

Diosojavabelia: “Xanepana rabaja. Tshipaji bitso pexaniacuene panetoexaname,” panejitsabiabinexa Diosojavabelia. Bajarapacuenia pajumaitsimë tsabiabi tsane tshipaji bajaraponë pacavecuajibiaexana baja panijaneconimi. Nexata baja Dioso aneconijibia pacatane. Nexata paxamë ata Dioso pacarajutsiana xua xaina pijajivi perajutsinexa pijapenivenivenaenacuatatsia. <sup>13</sup> Vaxaitsi bajayata apo yapëtaetsi pexaniajailivaisi. Nexata picani bepitaquirinacuata vajajinavanapaevi. Tshipaji picani dovathi pijajivitsi tsavanapae. Pibisiacuene exanabiabatsi pacuenia dovathi nacaitoroba. Itsiata baja aeconoxae Dioso nacapita dovathivecua. Nexata baja Dioso pexënato, piasivanë, pijajivitsi nacaexana. <sup>14</sup> Nacasivatëpa Cristo. Nexata baja Cristo pejamatabëcueneta Dioso nacavecuajibiaexana vajaneconimi. Nexata baja aneconijibia jinavanapatsi.

*Pacuenia Dioso nacavecuajibiaexana pibisiacuene vajaexanaeconimi Cristo vajanacasi-  
vatëpaexae yabara pelivaisi*

<sup>15</sup> Dioso cajena caeto ata apo vajataenë. Itsiata Dioso pexënato, Cristo, naexana mapanacuataje. Cristo paxa jëpa. Dioso daxitacuene mapanacuata pexanaevajënaeya ata, Cristo baja cajena ponapona athëbëtatsia. <sup>16</sup> Cristo baja cajena exana daxitacuene Dioso pejamatabëcueneta. Athëbëtatsia xua apo taetsi, Cristo exana. Daxitacuene xua tanetsi mapanacuata ataje, Cristo exana. Cristo daxitacuene itsa exana, ángelevi ata exana. Angelevi penamatacaitorobivinexa ata, Cristo exana. Bajarapacuenia Cristo ángelevi ata exana pacuenia Cristo jitsipa petonacuenebavanapaenexatsi. <sup>17</sup> Daxitacuene Cristo pexanaevajënaeya ata, Cristo baja cajena athëbëtatsia ponapona. Daxitacuene xua Cristo exana, bajaraxua pexanaecujinae abaxë Cristo pesaëta mapamatacabita ataje tsitecana-jetaruca. <sup>18</sup> Cristo baja cajena pevetsinë daxita Dioso pejumecovënëtsivi. Nexata daxita Dioso pejumecovënëtsivi Cristo penamatacaitorobinë. Cristo pejamatabëcueneta daxita Dioso pejumecovënëtsivi Dioso pijajivi exanatsi. Cristo taxuxuaba jivi petëpaecujinae icatsia jivi piasaëjavanexa. Bajaraxuata itsamonae ata icatsia asaë tsane petëpaecujinae. Nexata Cristo daxitajivi matatoxenetsia bitso ayaijamatabëcuenenë. <sup>19</sup> Bajarapacuenia Cristo bitso ayaijamatabëcuenenë tshipaji Dioso pexënato tojitsipa pejamatabëcuenejë-paenexatsi. <sup>20</sup> Daxitajivi, pamonaë jinavanapa mapanacuataje, naneconita Diosojavabelia. Pamonaë ata jinavanapa athëbëtatsia, naneconita Diosojavabelia. Nexata Dioso jitsipa daxita bajarapamonae pebarajamatabëcuenexanepanaenexa. Nexata Dioso itorobica Cristo mapanacuayabetsicaje cruzata pesivatëpaenexa daxita bajarapamonae. Nexata daxita bajarapamonae Dioso aneconijibia tane Cristo pesivatëpejamatabëcueneta. Bajaraxuata Dioso baja barajamatabëcuenexanepana bajarapamonae.

<sup>21</sup> Paxamë picani abaxë bajayata Diosovecua naxuabiaya pajinavanapame. Dioso bepapijavajabitsaëmë tsavanapae pibisiacuene paneexanavanapaexae. Itsiata baitsi jane aeconoxae baja Dioso pacabarajamatabëcuenexanepana. <sup>22</sup> Dioso baja aeconoxae pacabarajamatabëcuenexanepana. Tshipaji Jesucristo bepejibicuenia cruzata pacasivatëpa. Nexata baja Dioso pacavecuajibiaexana pibisiacuene paneexanaeconimi. Bajaraxuata aeconoxae baja Dioso papijajivimë. Dioso baja pitabarata aneconijibia pajinavanapame. <sup>23</sup> Nexata panevajënaeyabelia aneconijibia Dioso pitabarata panejinavanapaenexa, asaëyata pajumecovënëtavanapare Cristo papecasivatëpaejava panijaneconi yabara. Palivaisi baja pajumecovënëtame papecacapanepelivaisinexa, pëtsa pacopatame panejumecovënëtsijava. Bajarapalivaisi baja yacaëjëpa daxitanacuanëjjava petsipaebaponaëjava. Xanë ata, Pablonë, tsipaebaponajë bajarapalivaisi.

*Pacuenia Pablo itorobatsi peyavenonaenexa Dioso pejumecovënëtsivi yabara pelivaisi*

<sup>24</sup> Xanë Pablonë, majotaje penaneconitsivi pejebabiabibota, naneconitsiaponaponajë paxamë apo pajudíovimëjava Cristo pelivaisi patacatsipaebaponaexae. Itsiata jamatabëcuenebarëyanë tsaponaponaë, nebejibiaexanabiabi ata. Pacuenia Cristo bejibiaexanatsi pijajivi pecapanepaenexa, bajara pijinia pacuenia xanë ata itsamonae nebejibiaexanabiaba. Bajarapacuenia Dioso netocopata tanebejibiaexanabiabinexa tavajënaeyabelia tajamatabëcuenesaëtsaponaenexa Dioso tajumecovënëtsijava. Nexata tanesivaajamatabëcuenesaënexa daxita pamonaë jumecovënëta Cristo pelivaisi. <sup>25</sup> Dioso

netocopata tayavenonaenexa Dioso pijajivi, pamonaē Cristo pelivaisi jumecovēnēta. Bajaraxuata paxamē ata pacayavenonatsi. Tsipaji Dioso nitoroba daxitajivi xaniavaetsia tatsipaebaponaenexa pexanialivaisi, Dioso pejumelivaisi. <sup>26</sup> Dioso nitoroba jivi tatsipaebaponaenexa pacuenia Dioso tajēvelia najamatabēxaina pijajivi pecapanepaenexa. Dioso baja cajena nacua pexanaevajēnaeya ata, najamatabēxaina pacuenia exanaejitsia pijajivi pecapanepaenexa. Abaxē picani itsajivi ata Dioso apo yapētaeyaexanae bajarapacuenē. Itsiata baitsi jane aeconoxae baja Dioso tocopata daxita Dioso pejumecovēnētsivi peyapētaenexa pacuenia Dioso exana pijajivi pecapanepaenexa. <sup>27</sup> Dioso tojitsipa apo judfovi ata peyapētaenexa pexanialivaisi, palivaisi picani itsajivijavabelia ata Dioso apo yapētaeyaexanae. Bajarapalivaisi mapacuenia itsije. Cristo cajena pacatsijamatabēeca papecayavaponaponaenexa. Bajaraxuata nexata payapētaneme itsamatacabi Cristo paneyajavavinavanapaejavanexa Dioso pijapenivenivenaenacuatacasiā.

<sup>28</sup> Paxanē patanecaējēpaecuenia, daxitajivi xaniavaetsia patsipaebaponajē Cristo pelivaisi. Pamuxujiobaponajēnua xaniavaetsia daxita bajarapamonae pejumecovēnētsinexa Cristo pelivaisi. Bajarapacuenia pamuxujiobaponajē pevajēnaeyabelia pijamatabēcuenesaētsaponaenexa Cristo pelivaisi pejumecovēnētsijava. <sup>29</sup> Bajaraxuata asaēyata Dioso tonacuenebaponajē daxita pasaēta Cristo nerajutapona.

## 2

<sup>1</sup> Jitsipajē paneyapētaenexa pacuenia bitso pacasivanajamatabēxainatsi. Nexata asaēyata Diosojavabelia pacatovajētabiabatsi. Laodicea tomarapijivi ata tovajētabiabajē. Itsamonae ata, pamonaē abaxē apo netae, bajarapamonae ata tovajētabiabajē. <sup>2</sup> Asaēyata Diosojavabelia pacatovajētabiabatsi papecajamatabēcuenē asaēyaexanaenexa Cristo pelivaisi panejumecovēnētsijava. Pacatovajētabiabatsinua najamatabēcuenējēpaeya panejinavanapaenexa namataenetsia panenasivaxae. Pacatovajētabiabatsinua panejamatabēēthētota ayailivaisi paneyapētaeponaenexa xaniavaetsia itsa payapētaneme Cristo. Bajarapacuenia pacatovajētabiabatsi xaniavaetsia paneyapētaenexa pexaniajailivaisi, palivaisi picani Dioso apo yapētaeyaexanae itsajivijavabelia ata, baitsi jane baja Cristo pelivaisi. <sup>3</sup> Cristo pelivaisi xaniavaetsia itsa yapētanetsi, nexata yapētanetsi pacuenia Cristo nacatojitsipa vajatonacuenēbavanapaenexa. <sup>4</sup> Bajarapacuenia pacatsipaebatsi itsajivi ata papecayamaxēitojorobivaniva, penajumetsēnētsilivaisi itsa pacatsipaeba, bepexaniajailivaisi itajara panejumetaeyaniva. <sup>5</sup> Apo pacayavaponaponaē atatsi, itsiata pacajamatabēnājinabiabatsi. Jamatabēcuenēbarēyanē itsa pacavēnēlivaitsitanetsi najamatabēcuenējēpaeya panejinavanapaejava. Jamatabēcuenēbarēyanēnua itsa pacavēnēlivaitsitanetsi panevajēnaeyabelia panejamatabēcuenesaē tsavanapaejava panejumecovēnētsijava Cristo pelivaisi.

<sup>6</sup> Bajaraxuata pacuenia baja copiaya panajamatabēcuenecopatame vajatuxanenē Jesucristojavabelia papecacapanepaenexa Diosojavabelia, bajarapacuenia tsiteca panajamatabēcuenecopatavanapare. Panajamatabēcuenecoparenua panevajēnaeyabelia Cristo papecayavenonaponaenexa daxitacuenē yabara. Nexata pajinavanapaename Cristo papecatojitsipaecuenia. <sup>7</sup> Paxamē xaniavaetsia panajamatabēcuenecopare Jesucristojavabelia papecayavenonaenexa. Nexata Jesucristo pacajamatabēcuenesaēyaexanaena. Nexata papexaniajailivaisi itsamonae pacatsipaeba, tsiteca pajumecovēntavanapaename. Pajumaitsimēnua tsabiabi tsane Diosojavabelia: “Xanepana rabaja. Tsipaji bitso pexaniacuenē panetoexaname,” pajamē tsabiabi tsane Diosojavabelia.

### *Pacuenia Cristo pijajivi pejanajamatabēcuenē xainavanapa yabara pelivaisi*

<sup>8</sup> Xania. Nayajivitaeya pajinavanapare. Pētsa panacopatame papecayamaxēitojorobinexa pamonaē tsipaebavanapa saicayalivaisi Dioso pejumelivaisivecua. Bajarapamonae apo tsipaebaponaē Cristo pelivaisi. Saya tsipaebapona mapanacuapijivi penajamatabēxainaelivaisi, penajumetsēnētsilivaisi, saya natsiquejemalivaisi.

<sup>9</sup> Pacuenia Dioso jamatabëcueneitsi, Cristo itajëta mapanacuata itsa ponapona. <sup>10</sup> Pacuenia Dioso jamatabëcueneitsi, bajara paxamë ata itsamatacabi pajamatabëcueneitsimë tsane. Tsipaji Cristo payajavajinavanapame. Bajaraponë bitso ayaijamatabëcuenenë. Caëjêpatsi pitorobinexa daxitacuene. Caëjêpatsinua pitorobinexa daxitanacuanë pevetsivi ata. <sup>11</sup> Itsa panajamatabëcuenecopatame Cristojavabelia, nexata baja Dioso pacavecuajibiaexana pibisiacuene paneexanaeconomicsi papecacapanepaenexa. Pibisiamatabëcuene ata baja pacavecuajibiaexana. Nexata pacuenia judíovi pijacuenia perabëcaucubatsi, bajarapacuenia paxamë apo pacaperabëcaucubi pibisiacuene paneexanaeconomicsi Dioso papecavecuajibiaexanaenexa. Jume baja cajena. Biji rajane Cristo papecasivatêpaejava panejumecovënëtsixae, Dioso pacavecuajibiaexana pibisiacuene paneexanaeconomicsi. <sup>12</sup> Itsa pacabautisaba, merata pacabubutaxuareca. Nexata papecabautisabijavata itsa pacabubutaxuareca, Dioso pacatane Cristo bepapecayajavamêthëtsivi itsa mëthëtatsi petêpaecujinae. Nexata papecabautisabijavata, papecabubutaxuabicujinaereca icatsia itsa pacamatacotsina menevetsina, Dioso pacatane Cristo icatsia bepapecayajavaasaëvi petêpaecujinae icatsia itsa asaë. Bajarapacuenia Dioso pacatane tsipaji Cristo yabara pajamatabëjumaitsimë mapacueniaje: “Xaniajai rabaja. Dioso pesaëta Cristo asaëyaexanatsi petêpaecujinae,” pajamatabëjamë. <sup>13</sup> Paxamë picani abaxë bajayata bepanetêpaevi. Diosovecua naxuabiaya pajinavanapame pibisiacuene paneexanaeconomicsi yabara. Bajarapacuenia picani Diosovecua naxuabiaya pajinavanapame apo pajudíovixaemë. Itsiata baitsi jane aeconoxae baja Cristo payajavajinavanapame papecacapanepaenexa. Tsipaji baja Cristo pejamatabëcueneta Dioso pacavecuajibiaexana pibisiacuene paneexanaeconomicsi. <sup>14</sup> Bitso picani pibisiacuene exanavanapatsi. Tsipaji apo exanaetsi pacuenia Dioso pejumelivaisita nacaitoroba. Itsiata baitsi jane Dioso baja nacavecuajibiaexana daxita bajarapaneconomicsi Cristo cruzata vajanacasivatêpaexae. <sup>15</sup> Bajarapacuenia Cristo cruzata vajanacasivatêpaexae, Cristo baja cueneamoneyaba dovathi. Tsipaji bajarapacuenia Cristo itsa nacasivatêpa cruzata, asaëjibiaexana dovathi, pijajivi yajava. Pacuene dovathi pijajivi barëevetaponapona pitorobinexa, bajarapacuenia Cristo cueneamoneyaba. Nexata Cristo daxitajivijavabelia tsitanacueneitajëta pecueneamoneyabijava dovathi, pijajivi yajava.

*Pacuenia Pablo muxujioba Jesús pelivaisi pejumecovënëtsivi pejamatabënjinavanapaenexa Cristo peecaejava athëbëtatsia yabara pelivaisi*

<sup>16</sup> Cristo baja pecueneamoneyabixae dovathi, pëtsa panacopatame itsajivi ata papecapaniitavetsinexa panexaejava, panematavëjêaapaejava ata. Itsamonae abaxë tsiteca jumecovënëtavanapa perujulivaisi, Dioso Moiséspijinëta penajumecopatsilivaisi. Nexata pacuenia itorobatsi bajarapalivaisita, fiestanë exanabiaba caevai canacujitsia. Itsafiestanë exanabiaba caejumeto canacujitsia, pejanajumeto itsa ecaica. Itsafiestanë exanabiaba penacueraevetsimatacabianë canacujitsia. Pëtsa pajumecovënëtame, itsajivi pacajunatsi ata panenaponaenexa bajarapafiestanëjavabelia. <sup>17</sup> Bajayata picani jivi ponabiaba bajarapafiestanëjavabelia. Tsipaji palivaisi bajayata Dioso Moiséspijinëta najumecopata, itorobatsi penaponabiabinexa bajarapafiestanëjavabelia. Itsiata baja Cristo itsa patsica mapanacuayabetsicaje, Cristo baja copiarucaeyaexana bajarapacuenemi. Nexata pacuenia Cristo nacaitoroba, bajarapacuenia exanavanapaenatsi. <sup>18</sup> Pëtsa pajumecovënëtame itsamonae pacajumaitsi ata mapacueniaje: “Beveliajamatabëcuenevi panataema. Pavajëtabiabarenua ángelevijavabelia Diosovecua panenaxuabiyaniva. Bemajitsinaebota baja cajena pataniji bajarapacuenia vaxaxanabiabinexa,” pacajai ata, pëtsa pajumecovënëtame. Bajarapamonae beayaijamatabëcuenevi nataeyabiaba pejamatabëcuenevijilivaisi saya petsipaebaponaejava yabara. <sup>19</sup> Bajarapamonae Cristo apo pejumecovënëtsivi. Daxita vaxaitsi Cristo vajajumecovënëtsivi, Cristo pijajivitsi. Nexata Dioso nacatane caenë Cristo bepeperabëtotsi. Caejivi canacujitsia peperabëtota vinamataropotsiarubenaponareca. Bajara pijinia pacuenia vaxaitsi ata caenë

Cristo bepeperabëtotsi Dioso nacatane. Bajarapacuenia Dioso nacatane Cristo pejamatabëcueneta. Nexata Dioso nacajamatabëcueneyavenonapona. Nacajamatabëcuene vitsabiaexanaponanua pacuenia Dioso nacatojitsipa.

<sup>20</sup> Itsamonae jamatabëcuenenavëxaniabiaya jumai tsabiabi: “Vajanacacapanepaenexa Diosojavabelia, pexaniacuene toexanavanapaenatsi itsamonaejavabelia. Jumecovënë-tavanapaenatsinua daxita pacuenia nacaitoroba mapanacuapijivije,” jai tsabiabi itsamonae jamatabëcuenenavëxaniabiaya. Itsiata baitsi jane paxamë baja payapëtaneme bajarapalivaisi apo pexaniajailivaisicuene. Cristo itsa tëpa, paxamë ata, Cristo bepapecayajavatëpaevi, Dioso pacatane. Nexata baja picani paxamë mapanacuapijicuene yabaraje apo bepasivanajamatabëxainaemë. ¿Detsa nexata xuajitsia itsiata pajumecovënë-tavanapame mapanacuapijivi jamatabëcuenenavëxaniabiaya papecatsipaebilivaisije? <sup>21</sup> Bajarapamonae jumai tsabiabi: “Dioso pitabarata panenajamatabëcuene bijianaeyaniva, pëtsa pajayatame maxuaje. Pëtsa paxaneme maxuaje. Pëtsa papitame panecobeta maxuaje,” jai tsabiabi bajarapamonae. <sup>22</sup> Bajarapamonae xua itaveta itsamonae pejayatsiyaniva, pexaeyaniva ata, pepitsiyaniva ata, bajarapacuenë daxita vereverecaena. Bajarapacuenia pitavetsicuene saya jivi pejamatabëcuenepijilivaisita itaveta. <sup>23</sup> Pamonaë bajarapacuenia pacaitavetapona, bepacatsita peyapëtaevi itajara. Tsipaji bajarapamonae jamatabëpacaitoroba panevajëtabinexa ángelevijavabelia. Bajarapamonae pacaitorobanua beveliamatabëcuenevi panenataenexa. Pacaitavetanua panijacuata panenatojitsipaecuene paneexanaeyaniva. Bajarapamonae papecaitavetsicuene pajumecovënëtaponaë atamë tsipae, itsiata apo pacajamatabëcueneyavenonaë tsipae papecavecuaajibiaexanaenexa papibisiajamatabëcuene paxainame panejamatabëëthëtota.

### 3

<sup>1</sup> Cristo petëpaecujinae Dioso icatsia itsa asaëyaexanatsi, paxamë ata Cristo bepapecayajavaasaëyaexanaevi, Dioso pacatane. Bajaraxuata athëbëpijicuene pajamatabënajinavanapare, Dioso pijanacuapijicuene. Athëbëtatsia Cristo eca Dioso pemuxuneneta, pecujanenia, penajuaevetsinexabeje daxitacuene. <sup>2</sup> Pasivanajamatabëxainabiabare ëathëbëpijicuene. Pëtsa pasivanajamatabëxainabiabame mapanacuapijicueneje. <sup>3</sup> Cristo itsa tëpa, paxamë ata Cristo bepaneyajavatëpaevi, Dioso pacatane. Aeconoxae baja paxamë Cristo papecayajavaponaponaëjava, itsamonae apo tae. Apo yapëtaenua. Pacuenia Cristo Dioso yajavaponapona, bajara pijinia pacuenia paxamë ata Dioso payajavajinavanapame. <sup>4</sup> Cristo baja cajena nacayajavaponapona. Vaxaitsi ata pijinia Cristo yajavajinavanapatsi. Pamatacabi Cristo icatsia athëbëvetsica patsianica, paxamë ata paxainaename penivenivenaecotia Cristo papijajivixaemë.

*Pacuenia Dioso pejumecovënëtsivi perujujamatabëcuenemi baja copata pejanajamatabëcuene pexainaenexa yabara pelivaisi*

<sup>5</sup> Mapacuenia pajamatabëjumaitsimëre tsavanapaeje: “Tajaperujujamatabëcuenemi baja copatajë. Nexata baja apo jitsipaenë icatsia taxinaejava perujujamatabëcuene, mapanacuapijijamatabëcueneje. Apo jitsipaenë baja itsapetiriva tajaitsijava tajavavecua. Apo jitsipaenë baja piauracuene ata taexanaponaëjava. Apo jitsipaenë baja pibisiacuene ata tanajamatabëxainaejava. Apo jitsipaenë baja pibisiajamatabëcuene ata tajitsipaejava. Apo jitsipaenë baja ayaijava taxinaejava tanaxinaeyabinexa. Daxita baja bajarapajamatabëcuenemi copatajë. Nexata baja matavëjëa apo jitsipaenë bajarapajamatabëcuene taxinaejava,” pajamatabëjamëre tsavanapae. Tsipaji itsa pajitsipaejitsipame ayaijava panexinaejava panenaxinaeyabinexa, nexata pacopabijitsipame Dioso panejitsipaejavami. Tsipaji Diosovecua bitso pajitsipaejitsipame mapanacuapijicueneje. Nexata pajamatabëcuenejëpaejitsipame pamonaë vajëcabiaba jumapecataeya pexanaenëanëjavabelia. Tsipaji bajarapamonae Diosovecua jitsipa jumapecataeya pexanaenëanë. <sup>6</sup> Daxita pamonaë Dioso apo pejumecovënëtsivi, bajarapitsipibisiacuene pexanavanapaevi, Dioso ayaicuenia naneconitsiaexanaenatsi. <sup>7</sup> Paxamë ata picani daxita

bajarapitsicuene paexanavanapame Dioso panejumecovënëtsivajënaeya. <sup>8</sup> Nexata baja aeconoxae pacopabare daxita mapajamatabëcueneje. Paneanaepanabiabijava itsamonaejavabelia, pacopabare. Pibisiacuene paneexanaenexa panenajamatabëxainabiabijava ata, pacopabare. Pibisiacuenia itsamonae panebaracuaicuajitsabiabijava ata, pacopabare. Itsa pacuaicuaijamë, pëtsa pacuaicuaijamë pibisialivaisi. <sup>9</sup> Pëtsa namataenetsia panatsipaebame penajumetsënëtsilivaisi. Perujujamatabëcuene picani bajayata panexainaexae, bajarapacuenia paexanavanapame. Itsiata baja aeconoxae pacopabame bajarapaperujujamatabëcuenemi. <sup>10</sup> Nexata baja pejanajamatabëcuene paxainavanapame. Panevajënaeyabelia payapëtaeponame paneexanavanapaenexa pexaniacuene. Dioso, ponë pacaexana, pacuenia jamatabëcueneitsi, bajara pijinia paxamë ata pajamatabëcueneitsimëre tsavanapae. <sup>11</sup> Daxita pamona Dioso pejumecovënëtsivi, pejanajamatabëcuene xaina. Nexata daxita Dioso pejumecovënëtsivi Dioso najëpaeya tane. Judíovi, apo judíovi ata, daxita bajarapamona Dioso najëpaeya tane. Pamona peperabëcaucubivitsi, pamona ata apo peperabëcaucubivitsi, daxita bajarapamona Dioso najëpaeya tane. Saicayanacuapijivi ata, pamona ata dajubicuenia canajetsitsi itsamonaejavabelia amoneya petonacuenebavanapaenexa, pamona ata apo canajetsitsi itsamonaejavabelia amoneya petonacuenebavanapaenexa, daxita bajarapamona Dioso najëpaeya tane. Tsipaji bajarapamona Cristo tsijamatabëcatsi peyjavajinavanapaenexa caejivi canacujitsia. Nexata bajarapamona xaina baja pajamatabëcuene Dioso tane bitso penamatamotsicuene mapanacuataje.

<sup>12</sup> Dioso bitso pacaasiva. Pacaitapetania papijajivinexamë. Bajaraxuata paitaxutotsoniaeyabiabianame itsamonae ata. Nexata ëpexaniajamatabëcueneta pajinavanapaename. Beveliajamatabëcuenevi nataeya pajinavanapaename. Pajamatabëcuenesaëmë tsavanapae tsane itsamonae, bajayajebi pacaitsacueniababiabi ata. <sup>13</sup> Namataenetsia panajamatabëcueneyavenonare bajayajebi ata. Itsa pacaitsacueniaba itsajivi, bajarapajivijavabelia pabarajamatabëcuenexanepanare. Pacuenia paxamë ata Cristo pacabarajamatabëcuenexanepana pibisiacuene paneexanaevi ata, bajara pijinia pacuenia paxamë ata pabarajamatabëcuenexanepanare itsamonaejavabelia. <sup>14</sup> Matavëjëa mapacuenia paexanavanapareje. Namataenetsia bitso panaasivamëre tsavanapae. Bajarapacuenia nexata najamatabëcuenejëpaeya pajinavanapaename. <sup>15</sup> Pavajëtabiabare Diosojavabelia papecayavenonaenexa jamatabëcuenexanepanaeya panejinavanapaenexa. Bajarapacuenia panejinavanapaenexa, Dioso pacajunata caebitsaëto papecaexanaenexa Cristo yajava. Nexata Dioso itsa pacayavenona jamatabëcuenexanepanaeya panejinavanapaenexa, pajumaitsimë tsabiabi tsane Diosojavabelia. “Xanepana rabaja. Tsipaji bitso pexaniacuene panetoexaname,” pajamë tsabiabi tsane Diosojavabelia.

<sup>16</sup> Pavajëtabiabare Diosojavabelia Cristo pelivaisi itsamona papecatsipaebijava papecajamatabëcueneenabiabinexa. Pavajëtabiabarenua Diosojavabelia xaniavaetsia Dioso panejamatabëcueneyapëtaenexa. Namataenetsia panatsipaebabiabare Cristo pelivaisi. Namataenetsia panajamatabëcuene yavenonabiabarenua panejamatabëcuenesaënexa Cristo pelivaisi panejumecovënëtsijava. Daxita panejamatabëcuenevetsina pexaniajamatabëcuene rajutsiaya Diosojavabelia panaxëanabiabare vaji. Palivaisianë ata rubena Salmosbaxutota, panaxëanabiabare. Pavajianë ata rubena vajibaxutonëta, panaxëanabiabare. Pavajianë ata Espíritu Santo pejamatabëcueneta pacanaxëanaeyaexana, panaxëanabiabare. <sup>17</sup> Daxita xua paexanavanapame, paexanavanapare vajatuxanenë Jesucristo pejitsipaecuenia. Palivaisianë ata pacuaicuaijamë tsabiabi, pacuaicuaijamë tsane vajatuxanenë Jesucristo pejitsipaecuenia. Pexaniajamatabëcuene itsa parajutabiabianame vajatuxanenë Jesucristo paxa Diosojavabelia, Dioso papecayavenonabiabixae, Jesucristo pevënëta pexaniajamatabëcuene parajutabiabianame.

*Pacuenia Pablo Dioso pejumecovënëtsivi muxujioba yabara pelivaisi*

<sup>18</sup> Paxamë papetirivimë, pajumecovënëtabiabare pacuenia pacaitoroba paneamonajivi. Tsipaji bajarapacuenia vajatuxanenë pacatojitsipa paneexanavanapaenexa.

<sup>19</sup> Paxamë pijinia papebijivimë, pasivamëre panijavajivi. Pëtsa anaeyacuenia paitorobabiabame panijavajivi. <sup>20</sup> Paxamë pijinia papeximë, daxita xua paneaxajivi, pannenajivi ata, pacaitoroba paneexanaenexa, pajumecovënëtabiabare. Tsipaji bajarapacuenë vajatuxanenë sivabarëya. <sup>21</sup> Paxamë pijinia panexi panexainaevi, pëtsa panexi anaeya paitorobabiabame papecajumecovënëtabiabinxua xua paitorobame. Tsipaji saya belia panexi jamatabëcuenefaefaenaajitsipa Dioso pejumecovënëtsijava. <sup>22</sup> Paxamë pijinia itsamonae papijajivimë, dajubicuenia papeccanajetsivi itsamonae amoneya panetonacuenebavanapaenexa. Pacuenia panijatuxanevi pacaitoroba, bajarapacuenia patonacuenebabiabare panijatuxanevi. Pëtsa matapania itsajota pacanaitaxuto caeveta panijatuxanevi, asaëyata patonacuenebame papecasivabarëyanexa panijatuxanevi panetonacuenebijava yabara. Biji rajane daxitamatacabi asaëyata xaniavaetsia patonacuenebabiabare. Panejamatabëcuenevetsina cuenejitsipaeya panijatuxanevi patonacuenebabiabare papecasivabarëyanexa vajatuxanenë. <sup>23</sup> Daxita xua panijatuxanevi patonacuenebabiabame, jamatabëcuenebarëyaya patonacuenebabiabare panijatuxanevi. Xua panijatuxanevi patonacuenebabiabame, bajaraxua yabara pajamatabëjumaitsimëre tsabiabi mapacueniaje: “Xua tajatuxanenë tonacuenebajë, bajaraxua taniji Cristonexa betonacuenebijava. Apo ëtajatuxanenënexa,” pajamatabëjamëre tsabiabi. <sup>24</sup> Payapëtaneme rabaja mapacuenieje. Vajatuxanenë pacarajutsiana pacuene pijajivi toxaina perajutsinexa, baitsi matacabi apo pevereverecejava. Patonacuenebavanapame baja cajena Cristonexa. Bajara jane ponë pepacuene panijatuxanenë. <sup>25</sup> Panejumecovënëre pacuenia pacaitorobatsi. Tsipaji pajivi pibisiacuene exana, bajarapajivi itsamatacabi Dioso naneconitsiaexanaenatsi pibisiacuene pexanaeneconi yabara. Pamatacabi Dioso daxitajivi naneconitsiaexanaena, paneconivajëto caejivi canacujitsia xainapona, bajarapaneconivajëtota Dioso naneconitsiaexanaponaena caejivi canacujitsia. Nexata itsajivi ata apo vecuapanepae tsane Dioso jivi penaneconitsiaexanaecuene.

#### 4

<sup>1</sup> Paxamë papetuxanevimë, xaniavaetsia paevere panijajivi, papeccatonacuenebabiabivi. Panajamatabënapitabiabare paxamë ata panijatuxanenë athëbëtatsia peecaejava.

<sup>2</sup> Daxita Dioso panejumecovënëtsivi icatsia pacatoyaquinatsi mapacueniaje. Diosojavabelia pavajëtabiabare ajamatabëcueneitatsacaya pajamatabëcuene majitsinejevamë. Itsa pavajëtabiabianame Diosojavabelia, Dioso papeccayavenonabiabijava yabara, pajumaitsimë tsabiabi tsane mapacueniaje: “Xanepana rabaja. Tsipaji bitso pexaniacuene panetoexaname,” pajamë tsabiabi tsane Diosojavabelia. <sup>3</sup> Itsa pavajëtabiabianame Diosojavabelia, paxanë ata panetovajëtabiabianame. Panetovajëtabiabianame Diosojavabelia Dioso pataneyavenonaenexa nacuanë pevetsivi patanitavetsiyaniva jivi patatsipaebaponaejava Cristo pelivaisi. Pajitsipajë jivi patatsipaebinexa pacuenia Jesucristo patsica mapanacuayabetsicaje vajanacasivatëpaenexa pibisiacuene vaxanaeneconi yabara. Bajarapalivaisi jivi tatsipaebaponaexae, nenaneconitsiaexana. Nexata abaxë naneconitsiaya ponaponajë penaneconitsivi pejebabiabibota. <sup>4</sup> Cristo pelivaisi jivi itsa tsipaebabiabajë, jitsipajë jumenapebetsiaya tatsipaebabiabinexa. Nexata panetovajëtabiabianamenua Cristo pelivaisi jivi jumenapebetsiaya tatsipaebabiabinexa tanejumeyapëtaenexa xaniavaetsia.

<sup>5</sup> Paepatota pacatoxanepana pexanialivaisi, Cristo pelivaisi, panetsipaebinexa itsamonaejavabelia, patsipaebabiabare. Xaniavaetsianua patsitajinavanapare pamona Dioso apo pejumecovënëtsivi. Tsipaji rabaja imoxoyo pevajënae Cristo icatsia pepsijavanexatsica. <sup>6</sup> Daxita palivaisianë pacuaicuanetsipaebilivaisi. Panajamatabëcuenevererenua xaniavaetsia panejumecanaviatsinexa caejivi canacujitsia bajarapamonae itsa pacayanijobapona Dioso pejumelivaisi yabara.

*Pacuenia Pablo toyaquina pecopatsinexa baja petoyaquinaelivaisi mapabaxutotaje yabara pelivaisi*

<sup>7</sup> Vajabananë Tíquico, bitso vajaasivanë. Bajaraponë xaniavaetsia tonacuenebabiaba vajatuxanenë. Vajatuxanenë pijacuene patonajuanacuenebajëbeje. Bajaraponë pacatsipaebiana daxita pacuenia xanë ponaponajë. <sup>8</sup> Bajaraxuata bajaraponë pacatitorobaliatsi papecatsipaebinexa pacuenia pajinavanapajë. Bajaraponë nexata itsa pacatsipaebiana, nexata panesivaajamatabëcuenesaëmë tsane. <sup>9</sup> Bajaraponë paxamëjavabelia yajavaponaejitsia vajabananë Onésimo. Bajaraponë Onésimo panijatomarapijinë. Tonacuenebabiaba xaniavaetsia vajatuxanenë. Bajaraponëbeje pacatsipaebiana daxita pacuenia Dioso pejumecovënëtsivi jinavanapa majotajë Roma tomarata.

<sup>10</sup> Aristarcobeje naneconitsia paponaponajëbeje penaneconitsivi pejebabiabibota. Aristarco ata pacabajacobalia. Marcos ata, Bernabé pejuyapijinë, pacabajacobalia. Paxamë rabaja payapëtaneme pacuenia paexanaejitsiamë. Nexata Marcos itsa patsialia paxamëjavabelia, pacopiapitsianame xaniavaetsia. <sup>11</sup> Pacabajacobalia Jesús ata, ponë itsavënë, Justo. Judíovi picani ayaibitsaëto Jesucristo pelivaisi jumecovënëta. Itsiata bajarapamonaeyajuvënëvi, caenëbeje saya, neyavenona vajatuxanenë pijacuene tatonacuenebijava. Neyavenona saya mapamatabëxëyoje. Aristarco, Marcos, Jesús. Bajara saya pamatabëxëyo neyavenona. Bajarapamona bitso neyavenona. <sup>12</sup> Epafraas ata, Cristo pijajivitonë, panijatomarapijinë. Bajaraponë ata pacabajacobalia. Bajaraponë bitso pacatovajëtabiaba Diosojavabelia. Pacatovajëtabiaba ajamatabëcuenesaëya panejumecovënëtanapaenexa Dioso pejumelivaisi. Pacatovajëtabiabanua xaniavaetsia paneexanabiabinexa pacuene Dioso pacatojitsipa. <sup>13</sup> Pacatsipaebatsi baja cajena pacuenia Epafraas pacatovajëtabiaba Diosojavabelia bitso papecajamatabënajinaexae. Bajara pijinia pacuenia bitso tovajëtabiaba Dioso pejumecovënëtsivi, pejinavanapaevi Laodicea tomarata. Bitso tovajëtabiabanua Hierápolis tomarata pejinavanapaevi ata. <sup>14</sup> Vajaasivanë Lucas, ponë jivi vaëbabiaba, bajaraponë ata pacabajacobalia. Demasvënënenë ata pacabajacobalia.

<sup>15</sup> Nebajacobi vajamonae, daxita Dioso pejumecovënëtsivi, Laodicea tomarata pejinavanapaevi. Nebajacobi Ninfas ata. Pamonae ata nacaetuatabiaba bajaraponë pijabota, nebajacobi. <sup>16</sup> Itsa baja paveretame panelebijava mapabaxutoje, patoitorobianame Laodicea tomarapijivijavabelia penalebinexa bajarapamonae ata. Bajarapamonae ata tatoyaquinaebaxuto juya pacatitorobiana panenalebinexa paxamë ata. <sup>17</sup> Arquipojavabelia pajumaitsimë tsane mapacueniaje: “Dioso pecatocopatsijava netonacuenebinexa, verere xaniavaetsia,” pajamë tsane.

<sup>18</sup> Xanë Pablonë, pacatoyaquinatsi baja cajena tacobeta mapalivaisiyoje patanebajacobinexamë. Pajamatabënajinavanapare penaneconitsivi pejebabiabibota taponaponaejava. Pacatovajëtabiabatsi Diosojavabelia papecayavenonabiabinexa Dioso. Bajara itsi tsane.

## Mapabaxutoje San Pablo copiaya toyaquina Tesalónica tomarapijivijavabelia

*Pacuenia Pablobana, Silvanobana, Timoteobana toyaquina mapabaxutoje Dioso pejumecov-  
ënëtsivijavabelia yabara pelivaisi*

<sup>1</sup> Xanë, Pablonë, Silvano, Timoteo, mapamatabëxëyoje pacatoyaquinatsi mapabaxutoje. Pacatoyaquinatsi Dioso panejumecovënëtsivi, paTesalónica tomarapijivimë. Panenajamatabëcuenecopatsivi baja vaxa Diosojavabelia, vajatuxanenë Jesucristojavabelia ata. Pacatovajëtatsi vaxa Diosojavabelia papecaitaxutotsoniataenexa jamatabëcuenexanepanaeya panejinavanapaenexa.

*Pacuenia Tesalónica tomarapijivi Dioso pejumecovënëtsivi xaniavaetsia Dioso jumecovënëtsia jinavanapa yabara pelivaisi*

<sup>2</sup> Itsa pavajëtabiabajë Diosojavabelia, pexaniajamatabëcuene parajutabiabajë Diosojavabelia paxamë yabara. Pacatovajëtabiabatsi Diosojavabelia daxitamatacabi canacujitsia Dioso papecayavenonabiabinexa. <sup>3</sup> Itsa pacatovajëtabiabatsi vaxa Diosojavabelia, panajamatabënäpitiababajë Dioso pinijicuenia panetonacuenebavanapaejava panenajamatabëcuenecopatsixae Diosojavabelia. Panajamatabënäpitiababajënuua bitso pinijicuenia panejitsipaejava Dioso. Paxamë rabaja pajamatabëcuenesaëmë tsavana-pae panecopiaevetavanapaejava vajatuxanenë Jesucristo icatsia pepatsijavanexatsica. <sup>4</sup> Tajamonae, Dioso baja cajena pacaasiva. Payapëtaniji baja cajena Dioso papecaitapetsijava papijajivinexamë. <sup>5</sup> Bajayata itsa pacatsipaebatsi mapapexanialivaisije Diosojavabelia papecacapanepelivaisinexa, saya patacuibovojotota apo pacatsipaebitsi. Jume baja cajena. Biji ra Espiritu Santo pesaë yajava pacatsipaebabiabatsi. Nexata baja payapëtaneme palivaisi pacatsipaebatsi, pexaniajailivaisicuene. Payapëtanemenua pacuenia paxanë xaniavaetsia panajinavanapajë paxamëjavata patanitaxutua ajamatabëcuene-saënexamë.

<sup>6</sup> Pacuenia paxanë pajinavanapajë, pacuenia Jesús ata ponapona, bajarapacuenia paxamë ata pajinavanapame. Barëyaya baja pajumecovënëtavanapame patacatsipaebilivaisi Espiritu Santo papecatsijamatabëecaexae. Bajarapacuenia barëyaya pajumecovënëtavanapame patacatsipaebilivaisi, itsamonae bitso pacabejiobiaexanabiabi ata. <sup>7</sup> Bajarapacuenia panejinavanapaejava daxita Dioso pejumecovënëtsivi, Macedonia nacuapijivi, Acaya nacuapijivi ata, itsa pacavënëlivaisitane, bajarapamonae ata yapëtane bajarapacuenia xaniavaetsia Dioso petojinavanapaenexa. Nexata bajarapamonae ata xaniavaetsia jinavanapa pacuenia paxamë pajinavanapame. <sup>8</sup> Itsiata ëMacedonia nacuapijivi, ëAcaya nacuapijivi ata, bajarapacuenia xaniavaetsia panejinavanapaejava, apo pacavënëlivaisitane. Tajë nacuapijivi ata pacavënëlivaisitane panenajamatabëcuenecopatsijava Diosojavabelia. Bajarapacuenia itsa pacavënëlivaisitane, bajarapamonae ata yapëtane baja Jesús pelivaisi pexaniajailivaisicuene. Bajaraxuata paxanë apo pacavajunupaebitsi daxita bajarapamonaejavabelia. Tsipaji baja yapëtane. <sup>9</sup> Biji rajane bajarapamonae pijacuata panetsipaeba paxamë xaniavaetsia patanecopiapitsijavamë pamatacabi pacanasivaxainatsi. Paxamë picani jumapecataeya pexanaenëänëjavabelia panavajëcabiabame. Itsiata baja aeconoxae pacopatame jumapecataeya pexanaenëänëjavabelia panenavajëcabiabijavami. Nexata baja pepo Diosojavabelia panajamatabëcuenecopatame. Patonacuenebavanapame pepo Dioso, ponë piasaëtsaponaponaenë daxitamatacabijavabelianexa. Bajarapacuenia paxamë yabara panetsipaeba baja cajena daxita bajarapamonae. <sup>10</sup> Bajarapamonae panetsipaebanua panecopiaevetavanapaejava Jesús, Dioso pexënato, athëbëvetsica icatsia pepatsijavanexatsica. Bajaraponë, Jesús, Dioso baja cajena asaëyaexanatsi petëpaecujinae. Jesús nacacapanepaena pibisiacuene vajaexanaeconi yabara Dioso vajanacananeconitsia exanaejavaminexavecua.

## 2

*Pacuenia Pablo nacueneba Tesalónica tomarata yabara pelivaisi*

<sup>1</sup> Tajamonae, apo panacueratsinë itsa pacasivaxainatsi. Bajarapacuenē paxamē pani-jacuata payapētaneme. <sup>2</sup> Paxamē baja cajena payapētaneme mapacuenēje. Paxanēbeje Silasbeje patapatsivajēnaebeje paxamējavabelia, Filipos tomarata panenaneconitsiaex-anabeje itsaneconi apo paxainae atanēbeje. Panebejiobiaexanabejenua bajarapamonae. Itsiata baitsi jane Dioso pataneyavenonaexaebeje, ajumeurajibia pacatsipaebatsi pexanialivaisi Diosojavabelia papecacapanepaelivaisinexa. Pacatsipaebatsi bajarapalivaisi, patanitoyavi picani apo panetocopatsi ata patacatsipaebinexa. <sup>3</sup> Palivaisi pacatsipaebatsi, pexaniajailivaisi cajena. Apo penajumetsēnētsilivaisi. Apo pacatsipaebitsi bajarapalivaisita patacayamaxēitojorobinexa. <sup>4</sup> Biji ra Dioso paneitoroba. Panetocopatania jivi patatsipaebinexa pexanialivaisi pecapanepaelivaisinexatsi Diosojavabelia. Bajaraxuata bajarapalivaisi jivi itsa patsipaebaponajē, apo patsipaebapon-aenē saya jivi patanebarēyataenexa bajarapalivaisi patatsipaebijava yabara. Biji ra bajarapalivaisi jivi patsipaebaponajē Dioso patanebarēyataenexa. Tspijai Dioso vajanacajamatabēcueneyapētanē. <sup>5</sup> Paxamē baja cajena payapētaneme mapacuenēje. Caeto ata paxanē itsalivaisi apo pacabarēcuaicuaijatsi saya jema bajarapalivaisi yabara patanebarēyataenexamē. Yamaxēitojorobiaya livaisi apo pacatsipaebitsi palata patacavecuapitsinexa. Dioso baja cajena daxita bajarapacuenē panejamatabēcueneyapē-tane. <sup>6</sup> Cristo patanitorobixae, panejamatabēcuenecaējēpa picani patacaitorobinexa pataneyaiyataenexamē. Itsiata baitsi jane caeto ata apo pacaitorobitsi pataneyaiyataenexamē. Apo paitorobinē itsamonae ata pataneyaiyataenexa. <sup>7</sup> Biji rajane pacuenia petiriva asivaya xaniavaetsia baevetaponapona pexi, bajara pijinia pacuenia paxanē ata asivaya xaniavaetsia pacaevetavanapatsi. <sup>8</sup> Bitso pacaasivatsi. Nexata pacatsipaebatsi Dioso pejumelivaisi. Bitso patacaasivaxae, itsamonae jamatabēpanebejejababiabi ata, itsiata apo pacopatsinë patacayavenonaponaejava. <sup>9</sup> Tajamonae, panecuenecanaējēre mapacuenēje. Pamatacabi paxamējavata pajinavanapajē, pinijicuenia panacuenebabi-abajē. Pinijicuenia panacuenebabiabajē patajacuata patanaevetsinexa. Pacatsipaebaponatsinua pexanialivaisi, palivaisi Dioso nacayapētaeyaexana. Paepatota pacuenesajinajē, panatonacuenebabiabajē matababita, meravi ata. Bajarapacuenia panatonacuenebabiabajē itsanē ata paxamēyajuvēnēnē petoayapēbejeyanivatsi patanevetaponaejava.

<sup>10</sup> Paxamē baja cajena paneyapētaneme pacuenia pajinavanapajē. Dioso ata paneyapē-tane. Paxamē baja cajena paneyapētaneme paxanē pibisiacuene apo pataexanaevi. Paxamē baja cajena paneyapētaneme paxanē bitso Dioso patajumecovēnētsivi. Paxamē baja cajena paneyapētaneme paxanē itsacueneneconiyo ata apo paxainanē, paneconi yabara pananeconitsijitsianē paxamējavata itsa pacatsipaebavanapatsi Dioso pejumelivaisi. <sup>11</sup> Paxamē baja cajena paneyapētaneme paxamē pacaenēmē canacujitsia patacamuxujiobaponaejava panejamatabēcuenesaēnēxa Diosojavabelia. Pacuenia pexi pexainanē nacoximuxujioba, bajara pijinia pacuenia paxanē ata pacamuxujio-batsi. <sup>12</sup> Pacaitorobatsi baja cajena xaniavaetsia panetojinavanapaenexa Dioso papecabarēyataenexa. Dioso baja cajena pacajunata daitacuene papecabarēevetsinexa pijapenivenivenaenacuatatsia.

<sup>13</sup> Itsa pacatsipaebatsi Dioso pitorobilivaisi, panenamuxunaevetame. Nexata panejumecovēnētame patacatsipaebilivaisi. “Xaniajai baja cajena. Dioso pejumelivaisi nacatsipaeba,” panejamatabējaixae, panejumecovēnētame. Apo pajumetaemē saya bejivitonē pejamatabēcueneta pepaebilivaisi. Xaniajai cajena. Dioso pejumelivaisi pacatsipaebaponatsi. Bajarapalivaisi panejumecovēnētsixae, panevajēnaeyabelia paex-avanapame pacuenia Dioso pacaitoroba. Bajaraxuata paxamē yabara pexaniajamatabēcuenē parajutabiabajē Diosojavabelia. <sup>14</sup> Tajamonae, pacuenia Judea nacuata Dioso pejumecovēnētsivi bejiobiaexanatsi pijanacuapijivi, judíovi, bajara pijinia pacuenia pacabejiobiaexana panijanacuapijivi. <sup>15</sup> Pacuenia bajarapajudíovi pijasalinaivimi

bajayata beyaxuabapona Diosojumepaebivimi profetavi, bajara icatsia pacuenia bajarapamonaemi pemomoxi beyaxuaba pepo petuxanenë Jesús. Nexata Jesús papijajivixanë, paxanë ata bajarapamona panecapitsapa judíovi penacaetuatabibovecua. Dioso apo pejitsipaecuene bajarapajudíovi exanapona. Bajarapajudíovi daxitajivi bitso itoya. <sup>16</sup> Paxanë pexanialivaisi itsa patsipaebabiabajë apo judíovijavabelia, apo judíovi ata pecapanepaenexatsi Diosojavabelia, nexata bajarapajudíovi panejumeitavetabiaba. Bajarapacuenia patanejumeitavetabiabixae, pibisiacuene pexanaeneconi pematatsënë ayaineconi natsixaina Diosojavabelia. Nexata baja aeconoxae bajarapamonaecopiapatatsi ayaicuenia Dioso penaneconitsiaexanaematacabinexatsi.

*Pacuenia picani icatsia Pablo jamatabëtane Tesalónica tomarapijivi yabara pelivaisi*

<sup>17</sup> Tajamonaecopatacavecuaponaecujinae, caematacabibeje apo pacatae atatsi, itsiata pacajamatabënanjinavanapatsi. Bitso picani icatsia jamatabëpaponajë paxamëjavabelia patacataenexa. <sup>18</sup> Jamatabëpaponajë picani paxamëjavabelia. Xanë Pablonë, jamatabëponabiabajë picani. Itsiata dovathi apo panecopatsi. <sup>19</sup> Vajatuxanenë Jesucristo icatsia itsa patsianica, pacavajunupaebianatsi bajaraponëjavabelia xaniavaetsia Dioso panejumecovënëtsijava. Bitso pacasivajamatabëcuenebarëya tsanetsi. <sup>20</sup> Paxamë yabara baja cajena pexaniajamatabëcuene parajutabiabajë Diosojavabelia. Pacasivajamatabëcuene barëyatsinua tsabiabi.

### 3

<sup>1</sup> Bajayajebi baja cajena apo pacataetsi. Nexata baja belia apo panajamatabëcuene saëtaponaejitsipaenë matavëjëa patavetaponaejava patacataenexa. Nexata baja panajamatabëxainajëbeje ëTimoteo pataitorobinexabeje, peponaenexa paxamëjavabelia papecataenexa. Paxanëbeje Silvanobeje, Atenas tomarata panacopatsianajëbeje. <sup>2</sup> Nexata baja pacatoitorobatsibeje vajabananë Timoteo. Timoteobeje baja cajena Dioso pata-tonajuanacuenebinëbeje, jivi patatsipaebaponaenexabeje pexanialivaisi, Cristo pelivaisi. Pacatoitorobatsibeje Timoteo papecayavenonaenexa, papecajamatabëcuene asaëyaexanaenexa Dioso panejumecovënëtsijava yabara. <sup>3</sup> Pacatoitorobatsibeje Timoteo papecayavenonaeya tsipaebabiabinexa pexanialivaisi, caenë ata paxamëyajuvënënë Dioso pejumelivaisi pejumecovënëtsijava pecopabianiva, itsamonae itsa bejiobiaexanaponatsi. Paxamë baja cajena payapëtaneme Dioso vajanacatocopatsijava itsamonae vajanacabejiobiaexanaponaenexa. <sup>4</sup> Pamatacabi abaxë pacayajavajinavanapatsi, tajëvelia baja cajena pacatsipaebabiabatsi itsamonae papecabejiobiaexanaponaejavanexa Dioso papijajivixanë. Nexata jane baja bajarapacuenia aeconoxae pacatocopiapata. <sup>5</sup> Bajaraxuata baja apo najamatabëcuene saëtaponaejitsipaenë matavëjëa taevetaponaejava patacataenexa. Nexata baja itorobajë Timoteo peponaenexa paxamëjavabelia papecataenexa pacuenia pajumecovënëtavanapame Dioso pitorobilivaisi. Xanë picani paxamë yabara jamatabëjumaitsinë: “Dovathi meta bajarapamonaecopata pexanialivaisi tatsipaebabiabijava,” jamatabëjanë picani paxamë yabara.

<sup>6</sup> Timoteo nexata itsa parena paxamëjavaverena, Tesalónica tomaraverena, panetsipaebabeje pexanialivaisi. Xaniavaetsia pina Dioso pajumecovënëtavanapame. Paxamë pina pasivamë tsavanapae itsamonae ata. Panajamatabënanjinavanapame pina pexaniajamatabëcuena. Bitso pina jamatabëpanetaneme picani pacuenia paxanë ata jamatabëpacatanetsi picani. <sup>7</sup> Tajamonaecopatanetocopiapata rajane baja pibisiacuena itsamonae patanebejiobiaexanaponaenexa. Itsiata baitsi jane panajamatabëcuenesaëtavanapajë paxamë yabara. Panajamatabëcuenesaëtajë itsa pacavënëlivaisitanetsi asaëya Dioso panejumecovënëtsijava. <sup>8</sup> Itsa pacavënëlivaisitanetsi asaëya Dioso panejumecovënëtsijava, nexata pacasivanajamatabëcuenesaëtatsi. <sup>9</sup> Nexata pexaniajamatabëcuene parajutajë Diosojavabelia paxamë yabara. Pexaniajamatabëcuene parajutajë Diosojavabelia bitso patacasivajamatabëcuenebarëyaxae Dioso pitabarata. <sup>10</sup> Matacabit, meravi ata, daxita patajamatabëëthëtovetsina pavajëtabiabajë Diosojavabelia patanetocopatsinexa

icatsia pataponaenexa paxamëjavabelia patacataenexa. Pacatovajëtabiabatsinua Dioso papecayapëtaeyaexanaenexa palivaisi abaxë pacatosaica xaniavaetsia panejumecovënëtsinexa Dioso pejumelivaisi.

<sup>11</sup> Pavajëtajë vaxa Diosojavabelia, vajatuxanenë Jesucristojavabelia ata, pataneyavenonaenexa pataponaenexa paxamëjavabelia. <sup>12</sup> Pacuenia paxanë pacaasivatsi tsavanapae, bajarapacuenia paxamë ata caejivi canacujitsia panevajënaeyabelia namataenetsia panenasivanexa, pacatovajëtatsti Diosojavabelia papecayavenonaenexa. Pacatovajëtatsti Dioso papecayavenonaenexa itsamonae ata paneasivanexa. <sup>13</sup> Pacatovajëtatsti Dioso papecajamatabëcuene asaëyaexanaenexa, jamatabëcuenexanepanaeya panejinavanapaenexa. Nexata paneconijibimë tsane. Paneconijibimë tsane Dioso pitabarata panenubenaevavata, pamatacabi vajatuxanenë Jesús, daxita pijajivi yajava, patsianica.

## 4

*Pacuenia Dioso pitabarata xaniavaetsia bejinavanapatsi Dioso vajanacasivajamatabëcuenebarëyanexa yabara pelivaisi*

<sup>1</sup> Tajamonae, nexata pinijicuenia pacamuxujibatsi. Vajatuxanenë Jesús pejamatabëcueneta pacaitorobatsi xaniavaetsia panejinavanapaenexa. Pacatsipaebatsi rabaja cajena pacuenia pajinavanapaejitsiamë Dioso papecasivajamatabëcuenebarëyanexa. Bajarapacuenia panevajënaeyabelia xaniavaetsia pajinavanapare daxitamatacabijavabelianexa.

<sup>2</sup> Payapëtanemenua baja cajena palivaisi vajatuxanenë Jesús pejamatabëcueneta pacaitorobatsi panejumecovënëtsinexa. <sup>3</sup> Dioso raja jitsipa xaniavaetsia panetojinavanapaenexa ëponënexa. Dioso raja pacatojitsipa panecopabinexa pibisiacuene panevitota paneexanaejava. <sup>4</sup> Dioso raja pacatojitsipa pacaenëmë canacujitsia paneypëtaenexa mapacueneye. Petiriva itsa papitame panijavanexa, xaniavaetsia paevere. Payaiy-ataermanua. <sup>5</sup> Pëtsa petiriva papitame pibisiacuene saya panevitota paneexanaenexa bajarapovajavabelia pacuenia Dioso apo pejumecovënëtsivi baexana. <sup>6</sup> Dioso cajena apo jitsipae itsanë ata pevitota pibisiacuene pexanaenexa itsanë pijavajavabelia. Vajatuxanenë cajena pinijicuenia naneconitsiaexanaena daxita pamonaexana bajarpacuene. Bajarapacuene yabara imata baja cajena pacatsipaebatsi pamatacabi abaxë pajinavanapajë paxamëjavata. <sup>7</sup> Dioso baja cajena nacajunata ëpexaniacuene vajaexanavanapaenexa. Dioso apo nacajunatsi pibisiacuene vajaexanavanapaenexa. <sup>8</sup> Itsamonae apo panejumecovënëtsi patatsipaebilivaisi. Bajarapamonae itsa apo panejumecovënëtsi paxanë, apo jumecovënëtsi Dioso, ponë nacarajuta Espíritu Santo.

<sup>9</sup> Paxamë rabaja namataenetsia panaasivamë tsavanapae itsamonae Dioso pejumecovënëtsivijavabelia. Dioso baja cajena pacayapëtaeyaexana bajarapacuenia panenasivanexa. Bajaraxuata apo namatavenonaenë baja patacatoyaquinaenexa patacayapëtaeyaexanaenexa bajarapacuene. Tsipaji baja payapëtaneme. <sup>10</sup> Xaniajai rabaja. Passivamë tsavanapae daxita vajamonae, Macedonia nacujava pejinavanapaeivi. Itsiata icatsia pacaitorobatsi namataenetsia bitsoyo orijibia panenasivanexa. <sup>11</sup> Pacuenia baja cajena copiaya pacaitorobatsi, bajarapacuenia jamatabëcuenexanepanaeya pajinavanapare. Èpanijacuene saya paexanare panejamatabëitonotsiyaniva itsamonaejavabelia. Panijacuata panatonacuenebare bajarapacuenia panenaevetavanapaenexa. <sup>12</sup> Bajarapacuenia nexata Dioso apo pejumecovënëtsivi pacayaiyataena. Nexata apo pacatosaica tsane itsacuenejavayo ata panenamatenonaejava.

*Pacuenia pepo petuxanenë Jesús icatsia patsijitsiatsica yabara pelivaisi*

<sup>13</sup> Tajamonae, pacatojitsipatsi xaniavaetsia paneypëtaenexa pacuenia itsamatacabi itsijitsia Dioso pepua pejumecovënëtsivi petëpaevi. Pacatsipaebatsi baja cajena bitso panenajamatabëxainaeayaniva itsa pacavecuatëpa itsajiviyo. Pacatsipaebatsi baja cajena

bitso panenajamatabëxainaeayaniva, pacuenia bitso banajamatabëxaina Dioso apo pejumeconvënëtsivi itsa vecuatëpatsi itsajiviyo. Bajarapamonae jamatabëcuenenavëxaniabiaya bajumaitsi: “Petëpaevi rabaja peponaxuabi,” bajai Dioso apo pejumeconvënëtsivi. <sup>14</sup> Vaxaitsi baja cajena jumeconvënëtsi Jesús vajanacasivatëpaejava. Jesús vajanacasivatëpaecujinae, Dioso icatsia asaëyaexanatsi petëpaejavavecua. Dioso icatsia itsamat-acabi asaëyaexanaena daxita pamonae Dioso pepua pejumeconvënëtsivi petëpaevimi. Bajarapalivaisi vaxaitsi baja jumeconvënëtsi.

<sup>15</sup> Palivaisi pepo petuxanenë Jesús netsipaeba, bajarapalivaisi pacatsipaebijitsiatsi. Vaxaitsi abaxë mapanacuata vajaasaëtsavanapaevi pamatacabi pepo petuxanenë Jesús icatsia patsianica. Vaxaitsi athëbëabetsia apo namataxainatsia tsane. Petëpaevimi rajane copiaya namataxainanena. <sup>16</sup> Angelevi penamatacaitorobinë vavajai tsaxuabi tsane. Dioso pijatrompeta najumetsiana. Pepo petuxanenë jane baja pijacuata patsianica athëbëvetsica. Nexata pamonae Cristo pepua pejumeconvënëtsivi tëpa, bajarapamonae asaëyaexanaenatsi petëpaejavamivecua. <sup>17</sup> Bajaraxuacujinae vaxaitsi, abaxë mapanacuata vajaasaëtsavanapaevi bajarapamatacabita, itarërebotsia nacacaetusiania petëpaevimi yajava. Caxitarabianatsi jane baja athëbëtsia pepo petuxanenë Jesús. Nexata jane baja daxitamatacabijavabelianexa yajavajinavanapaenatsi bajaraponë. <sup>18</sup> Bajaraxuata panajamatabëcuenesaëtavanapare mapalivaisitaje.

## 5

<sup>1</sup> Tajamonae, itsiata apo panamatavenonaenë patacatoyaquinaenexa patacayapëtaeyaexanaenexa pamatacabita, paepatota ata, copiapatsijitsia daxita bajarapacueni. <sup>2</sup> Payapëtaneme baja cajena pepo petuxanenë Jesús icatsia pepatsijavanexatsica. Paepatota apo vajënaeevetsitsi, jemata patsianica. Pacuenia penacobetoxotsinënexa meravi bapata itsajota apo jamatabënajinaetsi, bajarapacuenia jemata patsianica pepo petuxanenë Jesús. <sup>3</sup> Pamatacabita jivi jumai tsaponae tsane: “Daxitanacuanëjava baja cajena xanepana. Daxitajivi xaniavaetsia jinavanapa,” jai tsane, bajarapaepatota jemata tocopiapatsianatsi Dioso apo pejumeconvënëtsivi peverebiabinexatsi. Nexata acuenebi tsane Dioso apo pejumeconvënëtsivi pevecuarëcëpecaenexa bajarapacueni. Pacuenia petiriva, penacoxitsiva, itsa vixaenotatsi penacueto pevecuanaexanaenexatsi, acuenebi pevecuanajetabajiravijava bajarapavixae, bajara pijinia itsane pamonae Dioso apo pejumeconvënëtsivi. <sup>4</sup> Tajamonae, paxamë baja apo pajamatabëcueneaitaquirimë. Pacuenia Dioso apo pejumeconvënëtsivi ajamatabëcueneitaquiri, bajarapacuenia apo pajamatabëcueneitaquirimë. Pepo petuxanenë Jesús pepatsimatacabinexatsica pacopi-aevetavanapame. Nexata pamatacabi pepo petuxanenë patsianica, apo pajamatabëcuenenabenajacemë tsane. Pacuenia penacobetoxotsinë itsa pata, basivajamatabëcuenenabenajacatsi, apo paitsimë tsane. <sup>5</sup> Tspaji baja daxita paxamë pexanialivaisita pacajamatabëcueneitayota. Nexata baja daxita vaxaitsi pitaquirijamatabëcuene apo xainaetsi. <sup>6</sup> Bajaraxuata nexata vaxaitsi apo bejamatabëcuenemajitsi. Pacuenia Dioso apo pejumeconvënëtsivi jamatabëcueneitsi, bajara apo bejamatabëcueneitsi. Biji rajane jamatabëcueneaitavaya bejinavanapatsi. Nayajivitaeya bejinavanapatsinua pibisiacuene vajaexanaeyaniva. <sup>7</sup> Pamonae jamatabëcueneaitaquiri, jamatabëcuenemajitabiaba. Aitajibi tsabiabinua meravi. <sup>8</sup> Itsiata baitsi jane vaxaitsi baja pexanialivaisita nacajamatabëcueneitayota. Nexata nayajivitaeya jinavanapatsi pibisiacuene vajaexanaeyaniva. Najamatabëcuenecopatatsi baja ëDiosojavabelia. Asivatsi tsavanapae Dioso. Itsamonae ata asivatsi tsavanapae. Copiaevetavanapatsi Cristo vajanacacapanepaenexa Diosojavabelia. Bajarapacuenia itsa copiaevetavanapatsi Cristo vajanacacapanepaenexa Diosojavabelia, nexata dovathi pejamatabëcuenevecua nayajivinajamatabëcuenexatatatsi Dioso pejumelivaisita. Nexata pacuenia vajabitsaënë nayajivinaxatata piatajajava, namataxatatanua piatajajava pejorojoronaeyanivatsi pijavajabitsaënë, bajara vaxaitsi ata itsitsi dovathi vajanacayamaxëitojorobianiva. <sup>9</sup> Dioso apo nacaitapetsi vajanacananeconitsiaexanaenexa pibisiacuene vajaexanaeneconyabara.

Biji rajane Dioso nacaitapeta vajanacacapanepaenexa pibisiacuene vajaexanaeeneconivecua pepo petuxanenë Jesucristo pejamatabëcueneta. <sup>10</sup> Jesucristo baja cajena nacasivatëpa vajanacayajavaponaponaenexa vajaasaëtsavanapaevi mapanacuataje. Vajatëpaecujinae ata, Dioso pijanacuatatsia Cristo nacayajavaponaponaena. <sup>11</sup> Bajaraxuata pacuenia baja namataenetsia panajamatabëcueneasaëya exanaponame, bajarapacuenia panevajënaeyabelia tsiteca paexanavanapare.

*Pacuenia Pablo Dioso pejumecovënëtsivi muxujioba yabara pelivaisi*

<sup>12</sup> Tajamonae, pinijicuenia pacamuxujiobatsi paneyaiyataenexa pamonaë paxamë tuatuajëta Dioso tonacuenebavanapa. Bajarapamonae Dioso pitorobicueniatsi pacaevetavanapa. Pacamuxujiobabiabanua. <sup>13</sup> Payaiyataema bajarapamonae. Asivaya pataema. Tsipaji bajarapamonae xaniavaetsia Dioso tonacuenebavanapa. Jamatabëcuenexanepanaeya panajuajinavanapare.

<sup>14</sup> Pacaitorobatsinua panemuxujiobinexa pamonaë piafaetabivi. Pamonaë pijinia jamatabëcuenecuerana itsamonaë bepejiobiaexanaponaexaetsi Dioso pejumecovënëtsijava yabara, pajamatabëcueneasaëyaexanare. Payavenonare pamonaë jamatabëcuenefaefaena Dioso pejumelivaisivecua. Itsa pamuxujiobianame bajarapamonae, itsa pamuxujiobianamenua itsamonaëjavabelia ata, ajamatabëcueneasaëya pamuxujiobianame bajayajebi pacopatsinejevamë.

<sup>15</sup> Pëtsa bajarapamonaejavabelia pibisiacuene panamatamoexaname, copiaya pibisiacuene pacaexanae ata. Biji pajamatabënjinavanapare pexaniacuene namataenetsia panenatoexanaponaenexa. Pajamatabënjinavanapare daxitajivijavabelia ata pexaniacuene panetoexanaenexa.

<sup>16</sup> Daxitamatacabi pajamatabëcuenebarëyamëre tsavanapae. <sup>17</sup> Daxitamatacabi Diosojavabelia pavajëtabiabare pacopatsinejevamë. <sup>18</sup> Daxita pacuene apo panejitsipaecuene ata, Dioso itsa pacatocopata papecatocopiapatsinexa, nexata itsa pacatocopiapata bajarapacuene, itsiata pexaniajamatabëcuene parajutabiabianame Diosojavabelia bajarapacuene yabara. Bajarapacuenia paneexanavanapaenexa, Dioso pacatojitsipa Jesucristo papijajivixaemë.

<sup>19</sup> Espíritu Santo itsa pacajamatabëcueneitoroba itsacuenejavayo paneexanaenexa, pëtsa pajamatabëjumaitsimë: “Apo exanaenë tsane bajarapacuenia,” pajamatabëjamë pëtsa. <sup>20</sup> Pëtsa panamuxujematame Espíritu Santo peyajavacuaicuaijaivi, Dioso pejumelivaisianë pepaebivi. <sup>21</sup> Nexata pacuenia bajarapamonae pacaitoroba panejumecovënëtsinexa, copiaya pajaire Dioso pejumelivaisibaxutota paneyapëtaenexa. Nexata xaniajai bajarapacuenia Dioso pejumelivaisibaxutota itsa jumaitsi, bajarapacuenia paexanare. <sup>22</sup> Daxita xua pibisiacuene, panayajivitaema.

<sup>23</sup> Dioso baja cajena vajanacajamatabëcuenexaniavaetsinë. Bajaraponë pibisiacuene paneexanaeeneconimi pacavecuaajibiaexanaena. Dioso evetsiana panejamatabëcuene, paneperabëto ata, pibisiacuene paneexanaeyaniva. Bajarapacuenia Dioso pacaevetsiana matapania vajatuxanenë Jesucristo icatsia pepatsimatatabitsicajavabelianexa. <sup>24</sup> Bajarapacuenia Dioso pacaevetsiana, ponë pacajunata papexinexamë. Dioso cajena pacatoexanaena daxita pacuenia najumecapanepaeya pacajumaitsi.

*Pacuenia Pablo jamatabënjina Tesalónica tomarapijivi, pacuenia ata tovajëta Dioso peyavenonaenexatsi, yabara pelivaisi*

<sup>25</sup> Tajamonae, Diosojavabelia panetovajëtabiabare.

<sup>26</sup> Asivaya nebajacobiana daxita bajarajotalia Dioso pejumecovënëtsivi.

<sup>27</sup> Pacaitorobatsi Dioso pejamatabëcueneta. Patsimumulebianame mapabaxutoje daxita Dioso pejumecovënëtsivi pejumetaenexa.

<sup>28</sup> Pacatovajëtabiatsi Diosojavabelia vajatuxanenë Jesucristo papecayavenonabiabinexa.

## Mapabaxutoje San Pablo cotocaevi toyaquina Tesalónica tomarapijivijavabelia

*Pacuenia icatsia Pablobana, Silvanobana, Timoteobana, toyaquina mapabaxutoje Dioso pejumecovënëtsivijavabelia yabara pelivaisi*

<sup>1</sup> Xanë Pablonë, Silvano, Timoteo, mapamatabëxëyoje pacatoyaquinatsi mapabaxutoje. Pacatoyaquinatsi Dioso panejumecovënëtsivi, paTesalónica tomarapijivimë. Panenajamatabëcuenecopatsivi baja vaxa Diosojavabelia, vajatuxanenë Jesucristojavabelia ata. <sup>2</sup> Pacatovajëtatsi vaxa Diosojavabelia, vajatuxanenë Jesucristojavabelia ata, papecaitaxutotsoniataenexa jamatabëcuenexanepanaeya panejinavanapaenexa.

*Pacuenia Dioso naneconitsiaexanaena pibisiacuene pexanaevi pamatacabi Cristo icatsia patsianica yabara pelivaisi*

<sup>3</sup> Tajamonae, panevajënaeyabelia bitso orijibia panajamatabëcuenecopataponame Diosojavabelia. Pacaenëmë canacujitsia namataenetsia panaasivamënua tsavana-pae. Bajaraxuata daxitamatacabi paxamë yabara pajumaitsinë tsane Diosojavabelia: “Xanepana rabaja. Pexaniacuenia yavenonaponame Tesalónica tomarapijivi,” pajanë tsane. <sup>4</sup> Diosojavabelia pajamatabëcuenesaëmë tsaponae itsamonae pinijicuenia pacabijataeyabiabi ata, pacabejiobiaexanabiabi atanua. Bajaraxuata paxanë barëyaya pacavënëlivaisipaebaponatsi itsatomaranëjava, Dioso pejumecovënëtsivijava. <sup>5</sup> Bajarapacuenia pacabejiobiaexanabiabi ata, Diosojavabelia panejamatabëcuenesaë tsaponaeaxae, nayapëtane Dioso papecajamatabëcueneyavenonaevanexa pamatacabi naneconitsiaexanaena pijaneconi pexinaevi. Bajarapamatacabi Dioso papecasivajamatabëcuenearëyaxae, pacatocopatsiana panejonenexa Dioso pijanacuayabetsia Dioso papecaevetsinexa.

<sup>6</sup> Dioso baja cajena najamatabëcuenevereta pacuenia exanaejitsia. Nexata juya Dioso bejiobiaexanaena pamonaë pacabejiobiaexanapona maparucaeje. <sup>7</sup> Paxamë abaxë pacabejiobiaexanaponaena pacuenia paxanë ata panebejiobiaexanapona. Itsiata Dioso nacayavenonaena bajarapacuenivecua. Bajarapacuenia Dioso nacayavenonaena pamatacabi pepo petuxanenë Jesús icatsia patsianica piasaëängelevi yajava, pitarunutsicotia ata yajava. <sup>8</sup> Jesús jane baja patsianica penaneconitsiaexanaenexa pamonaë apo yapëtae Dioso. Pamonaë ata apo jumecovënëtsi pepo petuxanenë Jesucristo pelivaisi, Jesús naneconitsiaexanaena. <sup>9</sup> Bajarapamonae pijaneconi yabara Jesús naneconitsiaexanaenatsi daxitamatacabijavabelianexa. Dioso pitabaravecua tajë xuabianatsi. Bajarapamonae Dioso pijapenivenivenaecotia apo tae tsane caeto ata. <sup>10</sup> Pamatacabi vajatuxanenë icatsia patsianica, pinijicuenia pijajivi yaiyataenatsi. Pinijicuenia sivajamatabëcuene nabenajacaenatsi daxita Jesús pejumecovënëtsivitsi. Bajarapacuenia tocopiapatsianatsi pamatacabi patsianica vajatuxanenë. Paxamë ata Jesús pijajivi payajavamë tsane patanejumecovënëtsixaëmë patacatsipaebilivaisi.

<sup>11</sup> Bajaraxuata pacatovajëtabiabatsi Diosojavabelia. Pacatovajëtabiabatsi vajaDiosojavabelia papecajamatabëcuene xaniavaetsinexa. Pacuenia bejamatabëcueneitsi Dioso pijajivi, bajara panejamatabëcueneitsinexa. Pacatovajëtabiabatsinua Diosojavabelia pecaëjëpaejamatabëcuenetatsi papecajamatabëcueneyavenonaenexa, paneexanaenexa daxita pacuenia pajamatabëexanaponame. Pacatovajëtabiabatsinua Diosojavabelia papecayavenonaponaenexa daxita pacuene paexaname Jesucristo papijajivixaëmë. <sup>12</sup> Nexata paxamë xaniavaetsia panejinavanapaejamatabëcueneta, vajatuxanenë Jesucristo daxitajivi yaiyataenatsi. Paxamë ata juya Dioso pacayaiyataeyaexanaena daxitajivi. Bajarapacuenia pacayaiyataeyaexanaena papecaitaxutotsoniataexae vajaDioso, vajatuxanenë Jesucristo ata.

## 2

*Pibisiacuene bitso pexanabiabinë yabara pelivaisi*

<sup>1</sup> Tajamonae, pacatsipaebatsi baja cajena paneyapëtaenexa pacuenia vajatuxanenë Jesucristo patsijitsiatsica. Pacatsipaebatsinua baja cajena pacuenia ata nacacaetuatsijitsia bajaraponëjavabelia pamatacabi patsianica. <sup>2</sup> Nexata pajivi najumetsënëtsiaya pacajumai tsane: “Espíritu Santo raja neyapëtaeyaexana. Jesucristo rabaja patsica,” pacajai tsane, pëtsa pajumecovënëtame. Pajivi pijinia najumetsënëtsiaya pacajumai tsane: “Pepacuene rabaja Jesucristo patsica,” pacajai tsane, pëtsa pajumecovënëtame. Pajivi pijinia najumetsënëtsiaya pacajumai tsane: “Pabloana raja nacatoyaquina: ‘Jesucristo rabaja patsica,’ jai raja vajanacatoyaquinaebaxutota,” pacajai tsane, pëtsa pajumecovënëtame. Itsamonae najumetsënëtsia itsa pacatsipaeba Jesús pepatsijavatsica yabara, pëtsa panajamatabëcueneepatajërërëcame panejumecovënëtavanapae livaisivecua. Pëtsa pajamatabëcuenenabenajacamenua. <sup>3</sup> Pëtsa pajumecovënëtame pematatsënëa itsalivaisicuenia itsa pacatsipaeba Jesucristo pepatsijavatsica yabara. Jesucristo raja abaxë apo patsitsica tsane. Peneta raja itsa baja imoxoyo pevajënae tsane Jesucristo pepatsinexatsica, jivi ayaibitsaëtonë Dioso pejumelivaisi pejumecovënëtsijava copabiana. Bajara pijinia pamatacabi patsiana ponë bitso pibisiacuene pexanabiabinënexa. Bajaraponë itsamatacabi Dioso xuabiana isotuabelia, bitso bejiobiaya peponaponaenexa daxitamatacabijavabelianexa. <sup>4</sup> Bajaraponë cueneitoya tsane Dioso pijacuene. Pamonaë ata vajëcabiaba bedioso petaevijavabelia, itavetsiana pevajëcabiabianiva. Dioso pijatemplobota ata belia ecaena bediosonë jivi petaenexatsi. Bajaraponë jumai tsane: “Xanë rajane baja diosonë,” jai tsane. Bajarapacuenia jivi ayaibitsaëto bajaraponë yamaxëitojorobiana.

<sup>5</sup> Pamatacabi abaxë paxamëjavata naponaponajë, tajëvelia baja cajena pacatsipae-babiabatsi bajarapalivaisi. ¿Panacofënëtame tsabaja bajarapalivaisi? <sup>6</sup> Payapëtaneme baja cajena pacuenia abaxë Dioso yacaranata pibisiacuene bitso pexanabiabinënexa pepatsiyaniva. Dioso petocaëjëtsimatacabita bajaraponë patsiana. <sup>7</sup> Mapamatacabita ataje jivi pibisiacuene pexanaejava navitapona pevajënaeyabelia. Itsiata abaxë apo patsi ponë bitso pibisiacuene pexanabiabinënexa. Matapania pamatacabi Dioso copatsiana pecaranatsijava bajaraponë pepatsiyaniva, patsiana jane baja pibisiacuene bitso pexanabiabinexa. <sup>8</sup> Bajarapamatacabi bajaraponë patsiana bitso pibisiacuene pexanabiabinexa. Nexata pepo petuxanenë Jesús pijumalisaëta bajaraponëmi beyaxuabiana. Pamatacabi Jesús patsianica, bajaraponëmi Jesús vereverecaeyaexanaena pijapenivenivenaecotiata. <sup>9</sup> Bajaraponë patsiana dovathi pejamatabëcueneta pibisiacuene bitso pexanabiabinexa. Nexata bajaraponë dovathi pesaëta pinijicuene pexanaejava exanaponaena jivi peyamaxëitojorobinexa, beayaijamatabëcuenenë petaenexatsi. <sup>10</sup> Bajaraponë exanaena daxita xua pibisiacuene, jivi peyamaxëitojorobinexa. Nexata bajaraponë pejamatabëcueneta Diosovecua jivi naxuabiana. Jivi Diosovecua naxuabiana tsipaji apo jitsipae pejumecovënëtsinexa pexaniajailivaisi pecapanepelivaisinexatsi Diosojavabelia. <sup>11</sup> Bajaraxuata Dioso tocopatsiana bajaraponë penajumetsënëtsilivaisi petsipaebinxatsi peyamaxëitojorobinexatsi. Nexata bajarapamonae jumecovënëtsiana ëpenajumetsënëtsilivaisi. <sup>12</sup> Bajaraxuata nexata daxita bajarapamonae Dioso naneconitsiaexanaenatsi. Tsipaji apo jumecovënëtsi tsane pexaniajailivaisi. Caranata saya sivabarëya tsabiabi tsane ëpibisiacuene pexanaejava.

*Pacuenia Dioso pijajivi itapeta pecapanepaenexa yabara pelivaisi*

<sup>13</sup> Tajamonae Dioso papecaasivavi, pepo bajayata abaxë itsa apo panaexanaemë, vajatuxanenë baja cajena tajëvelia pacaitapeta papecacapanepanexa. Dioso baja cajena pacacapanepaena. Espíritu Santo pesaëta pacajamatabëcuenexaniavaetsiana panejumecovënëtsixae pexaniajailivaisi, Jesús pelivaisi. Bajaraxuata paxamë yabara pajumaitsinë tsabiabi Diosojavabelia: “Xanëpana rabaja. Pexaniacuene exaname. Tsipaji tajëvelia

itapetame Tesalónica tomarapijivi pecajumecovënëtsinexa. Nexata baja cajumecovënëta,” pajanë tsabiabi. <sup>14</sup> Dioso paneitoroba patacatsipaebinxexa pexanialivaisi papeca-capanepaelivaisinexa Diosojavabelia. Nexata baja pajumecovënëtae bajarapalivaisi. Bajarapacuenia Dioso pacajunata panepatsinexa vajatuxanenë Jesucristojavabetsia, papecajavavaponaponaenexa.

<sup>15</sup> Tajamonae, bajaraxuata panevajënaeyabelia pacaasaëmëre tsavanapae panejumecovënëtsijava Dioso. Pajumecovënëtavanapare patacatsipaebilivaisi. Palivaisi ata patacatoyaquinatsi panejumecovënëtsinexa, pëtsa panacofënëtame. <sup>16</sup> Vajatuxanenë Jesucristo, vaxa Dioso ata, nacaasiva. Bajaraponëbeje nacaitaxutotsoniatane. Bajaraxuata nacajamatabëcueneasaëyaexanapona daxitamatacabijavabelianexa. Nacatocopatanua vajacopiaevetavanapaenexa pepo petuxanenë Jesucristo icatsia pepatsijavanexatsica. <sup>17</sup> Nexata pacatovajëtatsi vajatuxanenë Jesucristojavabelia, vaxa Diosojavabelia ata, papecajamatabëcuene asaëyaexanaenexa. Pacatovajëtatsinua jivi panetsipaebinxexa pexanialivaisi. Pacatovajëtatsinua paneexanaenexa daxita xua pexaniacuene.

### 3

*Pacuenia Pablo toyaquina Dioso pejumecovënëtsivi: “Panetovajëre Diosojavabelia,” pejailivaisi yabara pelivaisi*

<sup>1</sup> Tajamonae, pecopiarucaelivaisi rabaja maje pacatoyaquinatsije. Panetovajëre Diosojavabelia Dioso pejumelivaisi bepijia peyacaëjëpaenexa daxitanacuajava. Patovajërenua daxitajivi pejumecovënëtsinexa Dioso pejumelivaisi pacuenia baja paxamë pajumecovënëtame bajarapalivaisi. Patovajërenua daxitajivi peyaiyataenexa Dioso pejumelivaisi. <sup>2</sup> Panetovajërenua Dioso patanevetsinexa pibisijamatabëcuenevivecua. Bajarapacuenia panetovajëre tsipaji raja daxitajivi Dioso apo jumecovënëtsi. <sup>3</sup> Itsiata baitsi jane vajatuxanenë nacayavenonabiaba. Bajaraponë pacajamatabëcueneasaëyaexanaena. Pacaevetsiananua dovathivecua. <sup>4</sup> Paxamë yabara baja cajena pajamatabëjumaitsinë: “Bajarapamonae vajatuxanenë yavenonaenatsi. Nexata xaniavaetsia exanavanapaena daxita pacuenia itorobatsi. Pevajënaeyabelia xaniavaetsia exanavanapaena pacuenia itorobatsi,” pajamatabëjanë baja cajena paxamë yabara. <sup>5</sup> Diosojavabelia pacatovajëtatsi xaniavaetsia paneyapëtaenexa Dioso papecaasivajava. Pacatovajëtatsinua panevajënaeyabelia paneajamatabëcuenesaë tsavanapaenexa Cristo papecajamatabëcuene yavenonabiabinexa.

*Pacuenia daxitajivi benacueneba penaevetsinexa yabara pelivaisi*

<sup>6</sup> Tajamonae, vajatuxanenë Jesucristo pejamatabëcueneta pacaitorobatsi. Dioso pejumecovënëtsivi ata itsa piafaetabivi, bajarapamonae panavecuatsare. Bajarapamonae apo nacuenebabiabi penaevetsinexa pacuenia picani paitorobajë. <sup>7</sup> Payapëtaneme rabaja pacuenia paxanë paexanavanapajë pamatacabi panajinavanapajë paxamëjavata. Nexata pacuenia pacatsitajinavanapatsi, bajarapacuenia bepajinavanapame. Pamatacabi abaxë panajinavanapajë paxamëjavata, apo pafaetabinë tsavanapae. <sup>8</sup> Amoneya baja cajena itsajivi ata apo pavecuaxaenë itsacuenejavayo ata. Biji rajane panatonacuenebabiabajë pinijicuenia. Matacabita, meravivi ata, panatonacuenebabiabajë patanaevetsinexa. Bajarapacuenia panatonacuenebabiabajë itsajivi ata paxamëyajuvënëvi petoayapëbejyanivatsi patanevetsijava patanajinavanapaejavata. <sup>9</sup> Paxamëjavata pexanialivaisi patacatsipaebavanapaexae, vajatuxanenë picani panetocopata patacavajëtsinexa xua panamatavenonajë patanerajutsinexamë. Itsiata baitsi jane apo pacavajëtsitsi. Pacatsitanacuenebabiabatsi baja cajena. Bajarapacuenia paxamë ata panatonacuenebabiabare panenaevetsinexa. <sup>10</sup> Pamatacabi abaxë panajinavanapajë paxamëjavata, pacajumaittsitsi baja cajena: “Pajivi afaetabi, pëtsa naxane,” pacajaittsi baja cajena. <sup>11</sup> Pavënëlivaisitaniji pacuenia itsamonae paxamëyajuvënëvi saya jinavanapa nacuenebinejeva. Bajarapamonae pina bitso jamatabëitonotabiaba itsamonae.

<sup>12</sup> Bajarapamonaejavabelia pajumaitsimë tsane: “Pablo raja vajatuxanenë Jesucristo pejamatabëcueneta jumaitsi: ‘Panacuenebianame pina panenaevetsinexa,’ jai raja Pablo,” pajamë tsane.

<sup>13</sup> Tajamonaë, pëtsa pajamatabëcuenecueraname pexaniacuene paneexanavanapaejava. <sup>14</sup> Pajivi apo nacuenebi tsane penaevetsinexa, apo jumecovënëtsinua tsane palivaisi pacatoyaquinatsi mapabaxutotaje, bajarapajivi panavecuatsare. Pëtsa payajavajinavanapame. Nexata aura tsane apo penacuenebijava yabara. <sup>15</sup> Itsiata baitsi jane bajarapajivi bepanijavajabitsaëjivi pëtsa pataneme. Dioso panenajuajumecovënëtsivixae, pexaniajamatabëcuenia pamuxujobianame.

*Pacuenia Pablo toyaquina peveretsinexa baja petoyaquinaelivaisi mapabaxutotaje yabara pelivaisi*

<sup>16</sup> Vajatuxanenë vajanacajamatabëcuene xanepanaeyaexanaenë. Pacatovajëtatsi bajaraponëjavabelia daxitamatacabi papecajamatabëcuene xanepanaeyaexanaenexa, itsamonae pacaitsacueniababiabi ata. Pacatovajëtatsi vajatuxanenë papecayajavaponaponabiabinexa.

<sup>17</sup> Xanë Pablonë, tacobeta pacatoyaquinatsi mapalivaisiyoje patacajamatabënajinaexae. Paitanecuenia yaquinabiabajë daxita tayaquinaebaxutonëta, bajarapaitanecuenia pacatoyaquinatsi mapalivaisiyoje paneyapëtaenexa xanë patacatoitorobicuene mapabaxutoje. <sup>18</sup> Pacatovajëtabiabatsi Diosojavabelia daxita paxamë vajatuxanenë Jesucristo papecayavenonabiabinexa.

## Mapabaxutoje San Pablo copiaya toyaquina Timoteojavabelia

### *Pacuenia Pablo mapabaxutoje toyaquina Timoteojavabelia yabara pelivaisi*

<sup>1</sup> Xanë Pablonë, Jesucristo pijaapóstolenënë. Dioso, ponë nacacapanepaejitsia, bajaraponë nitoroba pijacuene tatonacuenebinexa. Vajatuxanenë Jesucristo, ponë pejamatabëcueneta Dioso nacacapanepaejitsia, bajaraponë ata nitoroba pijacuene tatonacuenebinexa. <sup>2</sup> Timoteo, bepepo taxënatomë tacataenë, Jesucristo pelivaisi xamë ata nejumecovënëtsixae. Catoyaquinatsi mapabaxutoje. Catovajëtatsi vaxa Diosojavabelia, vajatuxanenë Jesucristojavabelia ata, pecayavenonaenexabeje pecaasivaxaabeje. Catovajëtatsinua bajaraponëbeje pecaitaxutotsoniataenexabeje pecajamatatabëcuene xanepanaeyaexanaenexabejenua.

### *Pacuenia Pablo itoroba Timoteo pejumetavetsinexa penajumetsënëtsilivaisi petsipaebaponaevi yabara pelivaisi*

<sup>3</sup> Pamatacabi baja ponajë Macedonia nacuyabelia, capuenetatsi neponaponaenexa Efeso tomarata. Nexata icatsia matavëjëa caitorobatsi tsiteca abaxë neponaponaenexa bajarajota. Tsipaji itsamonae bajarajota tsipaebavanapa saicayacuenia Dioso pejumelivaisivecua. Palivaisi tsipaebavanapa bajarapamonae, apo pexaniajailivaisi cajena. Jumeitavetsianame bajarapamonae matavëjëa baja petsipaebaponaeyaniva bajarapalivaisi. <sup>4</sup> Itavetsianamenua bajarapamonae penajamatabëxainabiabiyanima saya jemalivaisixi, perujulivaisiximi. Itavetsianamenua pijasalinaivimi pevënëxi yabara ata penajamatabëxainabiabiyanima. Bajarapitsilivaisixi ajumematamobi baja cajena itsa nabarëcuaicuaijai tsaponae jivi. Bajarapalivaisixi apo nacajamatabëcueneyavenonae tsipae pacuenia Dioso nacaitoroba jumecovënëtsiaya vajatoexanaenexa.

<sup>5</sup> Bajarapacuenia caitorobatsi nejumetavetsinexa bajarapamonae pecopatsinexa bajarapalivaisi pecuaicuaijaitabiabijava. Nexata juya pexanaenexa pacuenia Dioso jitsipa. Dioso cajena jitsipa jivi pejamatabëëthëtovetsina jamatabëcuenexanepanaeya namataenetsia penaaasivatsavanapaejava. Dioso jitsipanua jivi pejinavanapaenexa aneconijibia Dioso pitabarata. Dioso jitsipanua jivi pejamatabëëthëtovetsina xaniavaetsia pejumecovënëtavanapaenexa Dioso pejumelivaisi. <sup>6</sup> Bajarapamonae pacuenia Dioso jitsipa apo pexanavanapaexae, Dioso pejitsipaejavami vecuanajamatabëcuenemuxufeta. Nexata jamatabëcuenenaxuaba natsiquejemalivaisixi pecuaicuaijaitabiabinexa. <sup>7</sup> Bajarapamonae picani jamatabënaexana jivi livaisi petsipaebabiabivinexa. Palivaisi Dioso Moiséspijinëta najumecopata, bajarapalivaisi picani jivi asaëya jamatabëtsipaeabapona. Itsiata baitsi jane bajarapamonae apo jumeyapëtae pajamatabëcuenelivaisi xaina bajarapalivaisi.

<sup>8</sup> Vaxaitsi baja cajena yapëtanetsi pexanepanaecuene palivaisi Dioso Moiséspijinëta najumecopata. Bajarapalivaisi Dioso nacatocopata vajatsipaebbinexa jivijavabelia, jivi peyapëtaenexa penaneconitsicueene Diosojavabelia. <sup>9</sup> Pamonaë pexaniacuene exanavanapa, apo toyaquinabiabitsi pitavetsilivaisinexatsi. Biji rajane pamonaë pibisiacuene exanavanapa, toyaquinabiabatsi pitavetsilivaisinexatsi. Pamonaë ata apo yayatae itsacuenejavayo ata Dioso pijacuene, toyaquinabiabatsi pitavetsilivaisinexatsi. Pamonaë ata najamatabëcuenebijiana Dioso pijacuenevecua, toyaquinabiabatsi pitavetsilivaisinexatsi. Pamonaë ata jivibeve, paxa ata, pena ata, pebeyaxuabivi, toyaquinabiabatsi pitavetsilivaisinexatsi. <sup>10</sup> Pamonaë ata pijavajivi vecuanamatayajita itsavajavabelia, toyaquinabiabatsi pitavetsilivaisinexatsi. Pamonaë ata pevëna pebijavabelia pevitota pibisiacuene exana, toyaquinabiabatsi pitavetsilivaisinexatsi. Bajara pijinia pacuenia

petiriavi ata. Pamonaē pamonajivi vecuanamatayajita itsanējavabelia, toyaquinabiabatsi pitavetsilivaisinexatsi. Pamonaē ata pevēna petiriavijavabelia pevitota pibisiacuene exana, toyaquinabiabatsi pitavetsilivaisinexatsi. Pamonaē ata jivi nacobetoxotsiaya pita, toyaquinabiabatsi pitavetsilivaisinexatsi. Pamonaē ata najumetsēnēta, toyaquinabiabatsi pitavetsilivaisinexatsi. Pamonaē ata itsamonaē yabara najumetsēnētsiaya baracuaicuaijai tsabiabi, toyaquinabiabatsi pitavetsilivaisinexatsi. Pamonaē ata apo jitsipae pexaniajailivaisi jivi petsipaebaponaenexa, toyaquinabiabatsi pitavetsilivaisinexatsi. <sup>11</sup> Bajarapalivaisicuenia xanē ata itavetaponajē itsa tsipaebaponajē palivaisi Dioso netocopata jivi tatsipaebaponaenexa. Bajarapalivaisi itsa tsipaebaponajē, tsipaebaponajē daxitajivi peyapētaenexa pacuenia Dioso itaxutotsoniatanetsi pecapanepaenexatsi.

*Pacuenia Pablo pexaniajamatabēcuene rajuta Jesucristojavabelia yabara pelivaisi*

<sup>12</sup> Pexaniajamatabēcuene rajutajē vajatuxanenē Jesucristojavabelia tanerajutsixae pesaē tatonacuenebinexa. Jesucristo nesivanajamatabēxaina xaniavaetsia tatonacuenebinexa. Bjaraxuata pexaniajamatabēcuene rajutajē. <sup>13</sup> Copiata abaxē itsa apo jumecovēnētsinē Jesucristo, pibisiacuenia picani baracuaicuijanē tsabiabi Jesucristo. Pijajivi ata tobarajinabiabajē tabejiobiaexanaenexa. Pibisiacuenia bijataeyabiabajē Jesucristo pijajivi. Bjarapacuenia taexanabiabinē ata, Dioso itsiata nebejiobiatane. Tsipaji jamatabēcuenenavēxaniabiaya bjarapacuenē exanabiabajē. Apo yapētaenē picani xua exanaponajē Jesucristojavabelia. Tsipaji abaxē apo jumecovēnētsinē Jesucristo Dioso pexēnatocuene. <sup>14</sup> Nexata baja itsiata belia vajatuxanenē Jesucristo pinijicuenia neyavenona tanajamatabēcuenecopatsinexa bjaraponējavabelia. Bjaraxuacujinae pijajivitonēxaenē, neyavenona tasivanexa itsamonaē ata.

<sup>15</sup> Mapalivaisije pacatsipaebijitsiatsi. Bjarapalivaisi pexaniajailivaisi cajena. Nexata daxitajivi xaniavaetsia bejumecovēnēta mapalivaisije. Jesucristo baja cajena patsica mapanacuayabetsicaje pibisiacuenē pexanaevimi pecapanepaenexa Diosojavabelia. Xanē ata picani bitso pibisiacuenē taexanaenēmi daxitajivi matatoxenetsia. <sup>16</sup> Xanē itsiata bajara taitsinēmi ata, Dioso itsiata nebejiobiatane. Bjarapacuenia Dioso nebejiobiatane daxitajivi peyapētaenexa Jesucristo bajayajebi tanesivaajamatabēcuenesaējava tajumecovēnētsinexa, pibisiacuenē taexanaenēmi ata. Nexata pamonaē bexējavabelia ata Jesucristojavabelia najamatabēcuenecopataponaena, xainaena matacabi apo pevereverecaejava. Bjarapamonaē nesivaajamatabēcuenesaē tsane itsa nevēnēlivaisitaena Jesús taneitapetsijava pijajivitonēnēxanē, pibisiacuenē bitso taexanabiabinēmi ata. <sup>17</sup> Bjaraxuata vaxaitsi pepo Dioso, daxitacuenē peyapētaenējavabelia, jumaitsitsi tsabiabi: “Xamē Diosomē bitso ayajamatabēcuenenēmē. Bitso ayaicuenē nexanaenē,” jaitsi tsabiabi. Bjaraponē Dioso daxitacuenē peyapētaenē. Pepo pevetsinēnua daxitacuenē. Apo petēpaenēnēxanua daxitamatacabijavabelianexa. Apo petāenētsinua itsajivi ata.

<sup>18</sup> Timoteo, betaxēnatomē tacataenē. Pacuenia caitorobatsi, exanaename. Bajayata baja cajena itsamonaē Dioso pejumecovēnētsivi Dioso pejamatabēcueneta tajēvelia cavajunupaeba pacuenia exanaejitsiamē. Bjarapacuenia Dioso asaējyata tocanacuenebaponare mapalivaisije. Nexata bjarapacuenia Dioso pitorobilivaisi daxitajivi yapētaena. Catoayapēbeje ata dovathi pecajamatabēcueneējētsixae, ajamatabēcuenesaēmēre Diosojavabelia nenajamatabēcuenecopatsijava. Exanabiabare xua yapētaneme pexaniajaicuenē nenajamatabēcuenēbijianaeyaniva Diosovecua. <sup>19</sup> Itsamonaē baja yapētae ata pacuenia Dioso itorobatsi, itsiata pibisiacuenē exana. Nexata bjarapamonaē Diosovecua naxuabiana pecopabixae Cristo pejumecovēnētsijavami. <sup>20</sup> Bjarapamonaeyajuvēnēnēbeje Himeneobeje Alejandrobeje. Pibisiacuenia Dioso baracuaicuaijabeje tsabiabi. Nexata pecopatsinexabeje Dioso pebaracuaicuaijajavabeje, bjaraponēbeje copatajē dovathijavabelia. Nexata bexēa itsa najamatabēxainabeje pexanialivaisi, xaniavaetsia jane baja Dioso pejumecovēnētsinexabeje.

## 2

*Pacuenia Dioso pejumecovënëtsivi daxitajivi betovajëta Diosojavabelia yabara pelivaisi*

<sup>1</sup> Timoteo, copiaya caitorobatsi mapacueniaje. Caitorobatsi panetovajëtabiabina nexa daxitajivi Diosojavabelia. Daxitajivi Diosojavabelia patovajëtabiabianame pitaxutotsoniataenexatsi Dioso. Itsa baja Dioso itaxutotsoniataenatsi bajarapamonae, nexata pexaniajamatabëcuene parajutsianame Diosojavabelia bajarapamonae yabara. <sup>2</sup> Patovajëtsianamenua Diosojavabelia presidentevi ata. Patovajëtsianamenua daxita gobierno pijalivaisi pevetsivi ata. Bajarapacuenia patovajëtsianame bajarapamonae Dioso peyavenonaenexatsi. Nexata xaniavaetsia jinavanapaenatsi avajabitsaëjibia. Nexata xaniavaetsia Dioso jumecovënëtavanapaenatsi. Nexata exanavanapaenatsi ëpexaniacuene. <sup>3</sup> Bajarapacuenia Diosojavabelia daxita bajarapamonae vajatovajëtsijava, xanepana Dioso, ponë nacacapanepaejitsia, vajanacasivabarëyanexa. <sup>4</sup> Bajarapacuenia daxitajivi vajatovajëtsijava Dioso jitsipa. Tshipaji Dioso jitsipa daxitajivi pecapanepaenexa bajaraponëjavabelia. Dioso tojitsipanua daxitajivi peyapëtaenexa pexaniajailivaisi, Jesucristo pelivaisi. <sup>5</sup> Nexata daxitajivi itsa yapëtaena pexaniajailivaisi, Jesucristo pelivaisi, yapëtaenanua pacuenia caenë Dioso daxitajivi capanepaejitsia. Yapëtaenanua pacuenia pijinia caenë Jesucristo daxitajivi petocuaicuaijainënexa Diosojavabelia. <sup>6</sup> Jesucristo rabaja nacopata pebeyaxuabinexatsi. Nexata Jesucristo petëpaejavata, daxitajivi pijaneconimi matamota. Bajarapacuenia daxitajivi peyapëtaenexa, Dioso pecaëjët-simatacabita pijajivi itoroba daxitanacuanëjava pexaniajailivaisi jivi petsipaebinexa. Tshipaji baja cajena Dioso jitsipa daxitajivi pecapanepaenexa. <sup>7</sup> Bajarapalivaisi jivi tatsipaebinexa Dioso nitoroba. Dioso nitoroba bajarapalivaisi tatsipaebinexa pamonae apo judíovi ata penajamatabëcuenecopatsinexa Diosojavabelia. Nexata pexaniajailivaisi jivi tatsipaebijava, itsa canavajunupaebatsi, xaniajanë cajena. Cristo tajumecovënëtsinëxæ, pexaniajailivaisi jivi tsipaebaponajë. Apo najumetsënëtsinë cajena.

<sup>8</sup> Bajaraxuata daxitanacuanëjava pebijivi, pamonae baja Dioso pitabarata aneconijibi, itsa vajëta Diosojavabelia, jitsipajë nacobeyotsiaya pevajëtsijava Diosojavabelia. Bajarapamonae bevajëta Diosojavabelia anaepanaenejeva itsajiviyojavabelia, jumeananotsinejevanua itsajiviyojavabelia. <sup>9</sup> Jitsipajë pijinia petiriavi penaxatabinexa xanepanaeya. Pëtsa bitso naitabëtsiaya naxataba. Itsa naxaniavaeta, bitso pëtsa namataitabëta pexaniacuena. Pëtsa bitso naitabëta oronanitota pexanaejavanëta. Pëtsa naitabëta penamatamotsiviriaibotoxita ata. Pëtsa naitabëtsiaya naxataba bitso penamatamotsinavanë ata. <sup>10</sup> Petiriavi, pamonae baja xaniavaetsia najamatabëcuenecopata Diosojavabelia, pëtsa naitabëta bitso. Bajarapamonae Dioso pitabarata pexaniacuene betoexanabiaba itsamonaejavabelia penajamatabëcueneitabëtsinexa bëpënëjavaverena. <sup>11</sup> Dioso pejumecovënëtsivi itsa nacaetuata Dioso pejumelivaisi penamuxunaevetsinexa, petiriavi beveliajamatabëcuenevi nataeya ajumejibia benamuxunaevetena pejumecovënëtsinexa palivaisi tsipaebatsi. <sup>12</sup> Petiriavi apo tocopatsinë pemuxujiobinexa pebijivi. Apo tocopatsinënuu petiriavi beayajamatabëcuenevi nataeya pitorobabiabinexa pebijivi. Biji rajane petiriavi beveliajamatabëcuenevi nataeya ajumejibia benamuxunaevetena. <sup>13</sup> Bajarapacuenia itorobajë tshipaji copiaya Dioso exana pebi. Bajaraponë pevënë Adán. Bajaraxuacujinae cotocaevi Dioso exana petiriva. Bajarapova pevënë Eva. <sup>14</sup> Adán cajena picani dovathi apo yamaxëitorobitsi. Biji rajane copiaya petiriva dovathi yamaxëitorobatsi. Nexata petiriva copiaya pibisiacuene exana. <sup>15</sup> Bajaraxuata daxita petiriavi Dioso tocopatatsi pevixaeitonotsinexatsi penacueto itsa vecuanaexanatsi. Itsiata baitsi jane bajarapamonae capanepaenatsi Diosojavabelia itsa casaë tsane penajamatabëcuenecopatsijava Diosojavabelia. Capanepaenatsi Diosojavabelia daxitajivi ata asivaya itsa taena, Dioso ata asivaya itsa taena. Capanepaenatsi Diosojavabelia xaniavaetsia itsa jinavanapanua pacuenia Dioso tojitsipatsi.

## 3

*Pacuenia ancianovinexa bejamatabëcueneitsi yabara pelivaisi*

<sup>1</sup> Pexaniajailivaisi cajena maje. Ponë jitsipa pitapetsinexatsi ancianonënexa, Dioso pejumecovënëtsivi pevetsinënexa, bajaraponë pexaniacuene, Dioso pijacuene, jamatabëtonacueneba. <sup>2</sup> Ancianonënexa, xanepana ponë apo xainae itsacueneneconi ata, paneconi yabara itsamonae neconitsijitsiatsi. Caevayo pepitsinë. Penajamatabëcuenereviabinë. Xaniavaetsia penajamatabëxainanë. Peyaiyataenëtsi. Xaniavaetsia pecopiapitabiabinë pijaboyaberena pesivaxainavitsi. Pecaëjëpaenëtsi xaniavaetsia jivi Dioso pejumelivaisi petsipaebinxaxa. <sup>3</sup> Ancianonënexa, xanepana ponë apo piapaenë piatajibinxaxa. Pevëna pebi apo pebenë. Apo pejitsipaenë itsajivi ata yamaxëitojorobiaya palata pevecuanacobetoxotsinexa. Biji rajane ancianonënexa xanepana ponë pexaniajamatabëcuenenë. Anaeya itsajivi ata apo pejumepitsinë pebarënajumeanaenotsinexa. Bitso pexainanexa ata pexainaejava, apo penajamatabëxainanë. <sup>4</sup> Ancianonënexa, xanepana ponë xaniavaetsia eveta pexi, pijava yajava. Pexi pejumecovënëtsinëtsi. Pejumeiyataenëtsinua. <sup>5</sup> Ponë apo caëjëpaetsi xaniavaetsia pexi pevetsinexa, pijava yajava, nexata bajaraponë apo caëjëpae tsipaetsi pevetsinexa Dioso pejumecovënëtsivi. <sup>6</sup> Apo xanepanae tsipae ancianonënexa ponë abaxë ajena jumecovënëta Dioso. Beayaijamatabëcuenenë itajara nataejitsipa bajaraponë. Nexata epatua Diosovecua jopaejitsipa. Bajarapacuenia bajayata dovathi penajamatabëxainanë, Dioso vecuajopaica. Nexata dovathi daxitamatacabijavabelianexa naneconita Diosojavabelia. <sup>7</sup> Ancianonënexa, xanepana ponë peyaiyataenëtsi pamona Dioso apo pejumecovënëtsivi ata. Bajarapitsinë xanepana ancianonënexa ancianonë pexanaecujinaetsi jivi pequenetsiataeyanivatsi, dovathi ata peyamaxëitojorobiyanivatsi.

*Pacuenia diáconovinexa bejamatabëcueneitsi yabara pelivaisi*

<sup>8</sup> Diáconovinexa pijinia, xanepana pamona penajamatabëcuenereviabivi. Itaxutojema apo pecuaicuaijaiivi. Apo piapaevi piatajibinxaxa. Apo pejitsipaevi itsajivi ata yamaxëitojorobiaya palata pevecuanacobetoxotsinexa. <sup>9</sup> Diáconovinexa, xanepana pamona xaniavaetsia najamatabëcuenecopata Cristojavabelia. Pejamatatabëthëtota peyapëtaevi pexaniajaicue palivaisi jumecovënëta. <sup>10</sup> Pamona diáconovinexa, copiyaya bitorobatsi itsacuenejavayo pevetsinexa bajarapacuenia pejamatabëcuenejëtsinexatsi. Nexata xaniavaetsia itsa eveta xua evetsiaexanatsi, diáconovi jane baja bexanatsi. Nexata jane baja bitorobatsi penacuenebinxaxa xua diáconovi banacueneba. <sup>11</sup> Diáconovi pijinia pijavajivi xanepana penajamatabëcuenereviabinexa, apo bebaracuicuaijai itsamonae. Xaniavaetsia benajamatabëxainanë. Nexata xaniavaetsia bexanabiaba pacuenia itorobatsi. <sup>12</sup> Diácononënexa, xanepana ponë caeva pepitsinë. Pecaëjëpaenëtsinua xaniavaetsia pevetsinexa pexi, pijava yajava. <sup>13</sup> Diáconovi xaniavaetsia itsa eveta penacuenebijava, nexata diáconovi xaniavaetsia yaiyataenatsi daxitajivi. Ajumeurajibianua jivijavabelia navajunupaebiana Jesucristojavabelia penajamatabëcuenecopatsijava.

*Pacuenia Timoteo toyaquinatsi peyapëtaenexa pacuenia exanaponaponaejitsia Dioso pejumecovënëtsivi tuatujëta yabara pelivaisi*

<sup>14</sup> Timoteo, bepjjia picani jamatabëponajë xamëjavabelia tacataenexa. Itsiata tava-jënaeyabelia catoyaquinatsi mapacuene yabaraje. <sup>15</sup> Nexata abaxë itsa cuenenajemat-sianajë tapatsijava xamëjavabelia, neyapëtaenexa pacuenia exanaponaponaejitsiamë Dioso pejumecovënëtsivi tuatujëta. Pamona baja Dioso pejumecovënëtsivi, Dioso rabaja piasaenë pijajivi. Bajarapamona Dioso pejumelivaisi, pexaniajailivaisi, xaniavaetsia baja jumecovënëtavanapa. Daxita nacuanëpijivi ata pejumecovënëtsinexa

bajarapalivaisi. Bajarapamonae pexaniajailivaisi itsamonaejavabelia tsipaebapona. Bajarapamonae apo tocopatsinua itsajivi ata pexaniajailivaisivecua saicayalivaisi pejumecovënëtsiyaniva. <sup>16</sup> Pepo pexaniajailivaisi cajena Cristo pelivaisi. Bajaraponë baja vaxaitsi jumecovënëtavanapatsi. Itsiata baitsi jane itsamonae apo jamatabëcueneyapëtae bajaraponë. Bajaraponë Cristo ayaijamatabëcuenenë bitso:

Bajaraponë Cristo mapanacuata naexana bevaxaitsi jivitonëcuenia. Espiritu Santo pejamatabëcueneta daxitajivi yapëtaeyaexanatsi Cristo planeconijibinëcuenia. Angelevi ata Cristo tanetsi. Cristo pijajivi vënëlivaisipaebaponatsi daxitanacuanëpijivijava. Nexata daxitanacuanëpijivi najamatabëcuenecopabapona Cristojavabelia. Dioso pijanacuatatsia ata Cristo copiapitatsi.

#### 4

##### *Dioso pejumelivaisi pejumecovënëtsijava pecopabivi yabara pelivaisi*

<sup>1</sup> Espiritu Santo baja cajena tajëvelia nacayapëtaeyaexana pacuenia bexëajavabelia itsamonae copabijitsia Dioso pejumelivaisi pejumecovënëtsijavami. Bajarapamonae nexata jumecovënëtsiana penajumetsënëtsilivaisi petsipaebaponaevitsi. Nexata bajarapamonae asaëya jumecovënëtaponae itsamonae dovathi pejamatabëcueneta petsipaebilivaisitsi. <sup>2</sup> Bajarapamonae namuxunaevetsiana penajumetsënëtsilivaisi petsipaebaponaevitsi, betsitapexaniajamatabëcuenevitsi itajara tsane, pibisiajamatabëcuenivi ata. Bajarapamonae tsipaebaponaena penajumetsënëtsilivaisi. Apo acueneura cajena tsane. <sup>3</sup> Bajarapamonae itavetsiana penacasabicuene. Bajarapamonae itavetsiananua itsacuenejavanë jivi pexaeyaniva. Dioso cajena daxitacuene pexaejava exanae ata, jivi pexaeyaniva apo itavetsi. Bajaraxuata Dioso pejumecovënëtsivi, pexaniajailivaisi peyapëtaevi, jumai tsabiabi pexaejava yabara: “Xanepana rabaja,” jai tsabiabi Diosojavabelia pexaejava pexaevajënae. <sup>4</sup> Daxitacuene, xua Dioso exana vajaxaejavanexa, pexaniacuene bitso. Nexata apo biatsobitsi itsacuenejavayo ata Dioso pexanaejava. Biji rajane itsa pitatsi Dioso pexanaejava, “Xanepana rabaja,” bejai tsabiabitsi Diosojavabelia vajanacarajutsixae vajaxaejavanexa. <sup>5</sup> Bajarapacuenia Dioso pejumelivaisi-baxutota pejumaitsixae, xanepana daxitacuene vajaxaenexa. Pexaniajamatabëcuene rajutatsi Diosojavabelia vajaxaejavanexa vajanacarajutsixae. Bajaraxuata Dioso nacatoxanepanaeyaexana vajaxaejavanexa.

##### *Pacuenia Timoteo itorobatsi xaniavaetsia peponaponaenexa, xaniavaetsia petsipaebinxanua Dioso pejumelivaisi, yabara pelivaisi*

<sup>6</sup> Itsa tsipaebianame pexaniajailivaisi Dioso pejumecovënëtsivijavabelia, penajumetsënëtsilivaisi petsipaebaponaevi pejumecovënëtsiyaniva, nexata xaniavaetsia Jesucristo netonacuenebinë tsane. Nijamatabëcuenesaënexa nevajënaeyabelia, asaëya jumecovënëtaponaponare palivaisi baja jumecovënëtavanapatsi. Pexaniajailivaisi, Dioso pejumelivaisi, palivaisi itsamonae catsipaeba, tsiteca asaëya jumecovënëtaponaponare. <sup>7</sup> Itsiata baitsi jane pëtsa jumecovënëtame mapanacuapijilivaisianëje, saya natsiquejomalivaisianë. Daxita nesaëta nacujaubare xaniavaetsia neponaponaenexa Dioso pejitsipaecuenia. <sup>8</sup> Vajajumalixanepanaenexa, xanepana picani vajaperabësaëta vajacujinaejinaejava. Itsiata baitsi jane daxitacuenevecua xanepana bitso vajajinavana-paenexa pacuenia Dioso nacatojitsipa. Bajarapacuenia nacatoxanepana tsipaji vajatëpae-cujinae ata Dioso nacajamatabëcueneyavenonaena xaniavaetsia vajajinavanapaenexa. <sup>9</sup> Bajarapalivaisi pexaniajailivaisi cajena. Nexata daxitajivi xaniavaetsia bejumecovënëta bajarapalivaisi. <sup>10</sup> Bajaraxuata Dioso tonacuenebaponaponatsibeje. Casaëtsibeje tsaponapona Dioso vajatonacuenebaponaponaevajabeje, itsamonae pibisiacuena nacabijataeyabiabi atabeje. Bajarapacuenia exanatsibeje tsipaji najamatabëcuenecopatatsibeje piasaënë Diosojavabelia. Bajaraponë Dioso daxitajivi pecapanepaenë pijaneconivecua. Dioso capanepaena daxita pamonaenajamatabëcuenecopata bajaraponëjavabelia.

<sup>11</sup> Bajarapalivaisi tsipaebaponaevi. Itorobaponarenua bajarapacuenia pexanaenexa.

<sup>12</sup> Pëtsa nacopatame pevëjëatoxaemë itsajivi ata pecaquenetsiataenexa. Biji rajane Dioso

pejumecovënëtsivijava, xaniavaetsia tsitaponaponare. Cuaicuaijamëre xaniavaetsia. Livaisi ata itsa tsipaebame, tsipaebare xaniavaetsia. Ponaponare xaniavaetsia. Asivamëre daxitajivi. Najamatabëcopare xaniavaetsia Diosojavabelia pecayavenonaenexa daxitacuene yabara. Ëpexaniacuene yabara najamatabëxainare. Bajarapacuenia itsa tsitaexanaponaponaename, nexata Dioso pejumecovënëtsivi cacuenejêpaeyajinavanapaena. <sup>13</sup> Tavajënaelia bajarapacuenia exanaponaponare. Jivi penacaetuatsijavata, Dioso pejumelivaisibaxuto tsimumulebabiabare. Tsipaebaponarenua pacuenia jumaitsi Dioso pejumelivaisibaxutota bajarapamonae piamatabëcuenesaënexa Diosojavabelia. <sup>14</sup> Dioso baja cajena carajuta pecacajêpajamatabëcuene xaniavaetsia jivi livaisi netsipaebinexa, pecacajêpaenexanua xaniavaetsia nevetsinexa Dioso pejumecovënëtsivi. Bajaraxua xaniavaetsia najamatabëcuenevetaponaponare. Pamatacabi ancianovi nacaetuata, catsimatanacobebuatsiaya catovajêta Diosojavabelia. Nexata bajarajota Dioso carajuta pecacajêpajamatabëcuene.

<sup>15</sup> Daxita nesaëta evetaponaponare daxita pacuenia caitorobatsi nexanaenexa. Nexata daxitajivi cayapëtaena xaniavaetsia tanejumecovënëtaponaponaejavamë pacuenia caitorobatsi. <sup>16</sup> Pibisiacuene nayajivitaeya ponaponare. Palivaisi ata tsipaebaponame, xaniavaetsia tsipaebaponare. Saicayacuenia pëtsa bajarapalivaisivecua tsipaebaponame. Bajarapacuenia nexanaejava casaëmëre tsaponapona. Nexata Dioso cacapanepaena. Pamonaeta cajumecovënëta netsipaebilivaisi, Dioso capanepaenatsi.

## 5

*Pacuenia Timoteo itorobatsi penaponaponaenexa Dioso pejumecovënëtsivijava yabara pelivaisi*

<sup>1</sup> Pëtsa asaëya muxujiobame pamonaeta nevajënaeyapijivi. Biji xaniavaetsia yaiyataeya beaxacuenia muxujiobare. Necovëpijivi pijinia benejuyapijivicuenia muxujiobare. <sup>2</sup> Petiriavi ata nevajënaeyapijivi beenacuenia muxujiobare. Necovëpijivaxi pijinia benejuyapijivaxicuenia muxujiobare. Ëpexaniajamatabëcuenia taema bajarapovaxi itsajamatabëcuene bëpënëa nejamatabëëthëtota sivanajamatabëxainaenejevamë.

<sup>3</sup> Pamona pevecuatêpaevatsi, Dioso pejumecovënëtsiva, yaiyataeya yavenonare itsa bitso bejiobi. <sup>4</sup> Itsiata baitsi jane pamona pevecuatêpaevatsi, itsa xaina pexi, pemomoxi ata, bajarapamonae xanepana pevetsinexatsi. Bajarapamonae xanepana peyavenonaenexa pijamonae. Bajarapamonae juya beveta paxa, pena ata, pamo ata, pacue ata, pamonaeta vitsatsi. Bajarapacuenia itsa exana, exana pexaniacuene. Nexata Dioso barëyataenatsi. <sup>5</sup> Pamona pevecuatêpaevatsi, Dioso pejumecovënëtsiva, itsa apo xinaeta itsajivi ata pevetsinexatsi, bajarapova najamatabëcuenecopataponaponaeta Diosojavabelia peyavenonaenexatsi. Navajëtabiabi Diosojavabelia matacabita, meravivi ata. <sup>6</sup> Itsiata baitsi jane pamona pevecuatêpaevatsi pejitsipaecuenia pibisiacuene itsa exanaponapona, Dioso tanetsi bepetêpaeva, abaxë asaë tsaponaponaeta ata. <sup>7</sup> Bajarapacuenia itorobare Dioso pejumecovënëtsivi pijamonae peyavenonaenexa itsa bitso bejiobi. Nexata pamonaeta Dioso apo pejumecovënëtsivi, toacuenebi tsanetsi pebaracuaicuaijajavatsi bajaraxua yabara. <sup>8</sup> Dioso pejumecovënëtsivi, pijamonae beveta. Pajivi apo itaxutotsoniataeta pevetsinexa pepo pijamonae ata, bajarapajivi apo exanaeta pacuenia Dioso itorobatsi. Nexata pijamonae itsa apo evetsi, bajarapajivi bitso pibisiacuene exana Dioso apo pejumecovënëtsijivi matatoxenetsia.

<sup>9</sup> Petiriva sesenta pavaijebe pexinaeva, caeto penacojiobicujinaeta pamona pevecuatêpaevatsi, xanepana pevënëyaquinarutsinexatsi pamona pevecuatêpaevitsi pevënëyaquinarubibaxutota. Nexata daxita Dioso pejumecovënëtsivi peyavenonabiabinexatsi. <sup>10</sup> Pova pamona pevecuatêpaevatsi itsa cueneyapëtanetsi pexaniacuene pexanaejava, bajarapova xanepana pevënëyaquinarutsinexatsi pamona pevecuatêpaevitsi pevënëyaquinarubibaxutota. Mabaitsi pacuene pexanaeva xanepana pevënëyaquinarutsinexatsije. Pexi xaniavaetsia pevitsatsiva. Jivi ata itsa sivaxainatsi, xaniavaetsia pijabota pecopiapitsiva. Ajamatabëcuenecovëbia Dioso pejumecovënëtsivi peyavenonaeva. Peyavenonaevanua itsamonae itsa bejiobiaexanatsi

Dioso pejumecovënëtsijava yabara. Daxita xua pexaniacuene, pexanaeva, xanepana pevënëyaquinarutsinexatsi pamona pevecuatëpaevitsi pevënëyaquinarubibaxutota.

<sup>11</sup> Itsiata baitsi jane pova abaxë sesenta pavaibeje apo pexainaeva, pëtsa vënëyaquinarutame nevënëyaquinarubibaxutota peyavenonaenexatsi daxita Dioso pejumecovënëtsivi. Tsipaji bajarapova itsa jitsipa pexanaenexa pacuenia natojitsipa, copatsipa Cristo pejumecovënëtsijavami. Nexata icatsia nacojobijitsipa.

<sup>12</sup> Nexata pijaneconi xinaejitsipa Diosojavabelia. Tsipaji copatsipa Cristojavabelia penajamatabëcuenecopatsijavami: “Capanepaeya baja jumecovënëtajë Cristo,” jai ata. <sup>13</sup> Pematatsënëa bajarapova sivaxainarutsipa itsa bonëjava. Afaetabinua tsipae. Pematatsënëa baracuaicuaijai tsabiabi tsipae itsamonae. Jamatabëitonotabiabijitsipa itsamonae. Xuaxi yabara ata apo becuaiicuaijaisi, cuaiicuaijai tsabiabi tsipae.

<sup>14</sup> Bajaraxuata pamona pevecuatëpaevatsi, pova abaxë bitso apo perujuva, jitsipajë icatsia penacojobijava pexi pexainaenexa, pijabo ata xaniavaetsia pevetsinexa. Nexata bajarapacuenia vajanacacueneyoyavi ata toacuenebi tsanetsi pebaracuaicuaijajavatsi bajarapitsiva. <sup>15</sup> Bajarapacuenia jumaitsinë tsipaji baja itsamonae pamonajivi pevecuatëpaevitsi copaba baja Cristo pejumecovënëtsijavami. Nexata pacuenia dovathi itorobatsi, exanavanapa.

<sup>16</sup> Dioso pejumecovënëtsivi, pebijivi, petiriavi ata, itsa pijamonae yajuvënëva pamona vecuatëpatsi, nexata bajarapamonae bitaxutotsoniatane bajarapova. Bajarapacuenia nexata apo namatavenonae tsane peyavenonaenexatsi daxita Dioso pejumecovënëtsivi. Tsipaji baja pijamonae evetatsi. Nexata Dioso pejumecovënëtsivi cajëpaejitsiatsi peyavenonaenexa pamona bitso bepejobivi, pamona pevecuatëpaevitsi pijamonae petoajibivitsi.

<sup>17</sup> Ancianovi, pamona xaniavaetsia evetabiaba Dioso pejumecovënëtsivi, bajarapamonae xaniavaetsia bematamotatsi. Beyaiyatanetsinua. Ancianovi, pamona Dioso pitorobilivaisi bitso tsipaeba, bitso cujarubanua, bajarapamonae xaniavaetsia bematamotatsi. <sup>18</sup> Dioso pejumelivaisibaxutota jumaitsi pacuenia bueyu copatsi pexaejava pexaenexa penacuenebijavata. Jumaitsi mapacueniaje: “Pabueyu canacuenebame trigoxu pecatotanabataxubinexa, pëtsa pumuxatatame nepumuxatatabiabijavata. Pëtsa pumuxatatame trigoxu pexaenexa pecatotanabataxubinexa,” jai Dioso pejumelivaisibaxutota. Itsalivaisita pijinia Dioso pejumelivaisibaxutota xaniavaetsia pematamotsijavanexa yabara jumaitsi mapacueniaje: “Penacuenebinë bematamotatsi,” jai Dioso pejumelivaisibaxutota. Bajaraxuata bematamotatsi ancianovi Dioso pejamatabëcueneta bitso penacuenebivi.

<sup>19</sup> Pëtsa jumexaniataneme caejivi pepaebijava ancianonë pibisiacuene pexanaejava yabara. Matapania anijajivibeje, acueyabi pajivibeje ata, petaevitsi catsipaebiana, jumecovënëtsianame. <sup>20</sup> Nexata xaniajai ancianovi pibisiacuene itsa exanapona, itavere daxita Dioso pejumecovënëtsivi pitabarata. Nexata pijinia itsamonae ancianovi itsa cacuenetane nitavetsijava pibisiacuene pexanaevi, cujunaviana pibisiacuene pexanaejava. <sup>21</sup> Dioso pitabarata, vajatuxanenë Jesucristo ata pitabarata, Dioso pijangelevi ata pitabarata, xanë jamatabëcuenereviaya caitorobatsi pacuenia caitorobatsi nexanaponaponaenexa. Daxita ancianovi, pibisiacuene pexanaevi, najëpaeya itavetsianame. Ponë ancianonë, bitso pecayapëtaenë, pibisiacuene itsa exana, pëtsa sivaajumeuramë nitavetsinexa pibisiacuene pexanaejava. <sup>22</sup> Pëtsa itsanë ata bepïjia exaname ancianonënexa. Tsipaji ponë bepïjia ancianonënexa exanaejitsipame, bepïjia pibisiacuene itsa exana, nexata itsamonae cataejitsipa pibisiacuene pexanaevi benejamatabëcueneyavenonaenë. Daxita pibisiacuenevecua, xaniavaetsia naevetsiaya ponaponare.

<sup>23</sup> Xamë raja ajamatabëepatanemë tsabiabi. Nexata pëtsa apaeyabiabame ëpitaranae. Tsiquirijavayo vinorayo, pitaranae yajava, apaeyabiabianame.

<sup>24</sup> Itsamonae pibisiacuene itsa exana, bananeconitsiaexanatsi daxitajivi pepuacueneypëtaetsi. Itsamonae pijinia pibisiacuene exanae ata, bepïjia apo

cueneyapëtaetsi. Bexëa matapania xaniavaetsia vënëlivaisinaitajëta pibisiacuene pexanaejava. <sup>25</sup> Bajara pijinia itsi itsamonae pexaniacuene itsa exana. Pexaniacuene itsa exana, daxitajivi cuenetanetsi pexaniacuene pexanaejava. Itsajavata pexaniacuene exanae ata, jivi apo cuenetaetsi. Itsiata baitsi jane bajarapajivi pexaniacuene itsa exana, acuenebi navënëmatayatsia peponaponaejava. Nexata bexëajavabelia daxitajivi vënëlivaisitanetsi pexaniacuene pexanaejava.

## 6

<sup>1</sup> Pamonaе dajubicuenia canajetatsi itsamonaejavabelia amoneya pet-onacuenebabiabinexa, bajarapamonae Jesús pelivaisi itsa pejumecovënëtsivi, yaiyataeya tonacuenebi pijatuxanenë. Bajarapacuenia tonacuenebi pijatuxanenë pesivajamatabëcuenebarëyanexatsi. Nexata pijatuxanenë Dioso pibisiacuena apo baracuaicuaijai tsane. Jesús pelivaisi ata, palivaisi vaxaitsi jivi tsipaebaponatsi, pijatuxanenë pibisiacuena apo baracuaicuaijai tsane. <sup>2</sup> Dajubicuenia pecanajetsivitsi pijatuxanenë, Dioso itsa pejumecovënëtsinë, pecanajetsivitsi pëtsa jamatabëjumaitsi pijatuxanenë yabara mapacueniaje: “Tajatuxanenë rabaja abaxë Dioso pejumecovënëtsinë. Nexata asaëyata apo tonacuenebi atanë tsane, itsiata apo nebijatae tsane,” jamatabëjai pëtsa. Biji rajane asaëya xaniavaetsia tonacuenebi pijatuxanenë. Tsipaji raja Dioso pejumecovënëtsinë yavenonaeya tonacueneba Dioso penajuaasivavitsiyajuvënënë. Bajarapalivaisi tsipaebaponare. Itorobarenua bajarapacuenia pexanavanapaenexa.

### *Pacuenia Dioso pejumecovënëtsijivi jamatabëcuenebarëya yabara pelivaisi*

<sup>3</sup> Itsamonae saicaya itsalivaisi tsipaebapona. Bajarapalivaisibeje apo najamatabëcuenejëpaebeje palivaisi vajatuxanenë Jesucristo tsipaebapona. Palivaisi vaxaitsi jumecovënëtavanapatsi, apo nalivaisijëpaebeje. <sup>4</sup> Cueneyapëtanetsi pamonaе penajumetsënëtsilivaisi tsipaebapona. Bajarapamonae beayaijamatabëcuenevi itajara natane. Itsiata bajarapamonae pexaniajailivaisi apo yapëtae. Bitso bepematajemavitsi jinavanapa. Nexata bajarapamonae jitsipabiaba itsamonaejavabelia pejumeanaeyanotabiabinexa saya jema itsacuenelivaisixi peyanijobijavata. Apo barënajamatabëcuenejëpae itsajivi ata. Bajarapamonaeyajuvënëvi itsa xaina itsacuenejavayo, bajarapamonae nacobecaëbabiaba. Anaepanabiaba. Nabijataeyabiaba. “Itsamonae covë nitsacueniabijitsia,” jamatabëjai tsabiabi, itsamonae apo itsacueniabijitsia atatsi. <sup>5</sup> Bajarapamonae anaeya namataenetsia najumenotabiaba. Tsipaji pijamatabëcuenebejevi. Bajarapamonae pexaniajailivaisi, Cristo pelivaisi, apo yapëtae xaniavaetsia jivi petsipaebinexa. Saya bajarapamonae jamatabëjumai tsabiabi: “Xanë raja Dioso pejumelivaisi tatsipaebaponaexae, palata nacanabianajë,” jamatabëjai tsabiabi bajarapamonae. Bajarapitsivi nayajivitsare. <sup>6</sup> Vaxaitsi Dioso vajajumecovënëtsivi, bitso cajena vajaxinaevi Diosojavabelia, itsa sivajamatabëcuenebarëyatsi xuayovajëto Dioso nacatocopata vajaxinaenexa mapanacuataje. <sup>7</sup> Pamatacabi vaxaitsi naexanatsi mapanacuataje, itsacuenejavayo ata apo capatsitsi. Pamatacabi pijinia tëpaenatsi, apo caponaе tsanetsi itsacuenejavayo ata mapanacuapijicueneje. <sup>8</sup> Bajaraxuata nexata itsa xainatsi vajaxaejava, vajanaxatabijava ata, besivajamatabëcuenebarëyatsi. <sup>9</sup> Itsiata baitsi jane pamonaе najamatabëxaina ëpexinaejavanexa, bajarapamonae dovathi jamatabëcueneçëtatsi. Nexata pibisiacuene exana palata pepitsinexa. Jamatabëcuenebijianatsi. Nexata bajarapamonae Diosovecua naxuabiaya jinavanapa. <sup>10</sup> Pamonaе bitso palata jitsipa, daxita xua pibisiacuene exana palata pepitsinexa. Itsamonae bitso najamatabëxaina ëpexinaecuene pexainaenexa. Nexata baja copaba Dioso pejumecovënëtsijavami. Nexata bajarapajamatabëcuene bëpënëa bitso yajamatabëcuenebëjai.

*Pacuenia Timoteo muxujibatsi pijamatabëcuenesaënexa Diosojavabelia penajamatabëcueneçopatsijava yabara pelivaisi*

<sup>11</sup> Timoteo, xamë Dioso pijajivitonëmë. Navecuatsare mapanacuata jivi palata pejetsipaejamatabëcuene. Biji jane ajamatabëcuensaëmëre Dioso nejumecovënë-taponaponaejava. Dioso asivamëre. Diosojavabelia najamatabëcuenecopatsiaya ponaponare. Itsamonae ata asivamëre tsaponaponae. Itsamonae caitsacueniababiabi ata, bajayajebi casaëmëre tsaponaponae Dioso nejumecovënë-taponaponaejava. “Xanë ayaijamatabëcuenenënë,” nejaiyaniva, beveliajamatabëcuenenë nataeya ponaponare. <sup>12</sup> Catoayapëbeje ata Diosojavabelia nenajamatabëcuenecopatsijava, ajamatabëcuensaëmëre nepitsinexa xua Dioso carajutsijitsia, matakabi apo peverevereaejava. Pamatakabi navajunupaebame nejumecovënëtsijava Jesús Dioso pexënatocuene, Dioso cajunata pecarajutsinexa matakabi apo peverevereaejava. Ayaibitsaëtoxaneto Dioso pejumecovënëtsivi pitabarata, Dioso cajunata pecarajutsinexa matakabi apo peverevereaejava. <sup>13</sup> Dioso baja cajena pesaëta daxita vaxaitsi asaë tsavanapaetsi. Pamatakabi Jesucristo nutatsi Poncio Pilato pitabarata, ajumejunavijibia navajunuapaeba pexaniajailivaisita. Nexata Diosobeje Jesucristobeje pitabarata caitorobatsi aeconoxae mapacueniaje. <sup>14</sup> Caitorobatsi xaniavaetsia nejumecovënë-taponaponaejava daxita pacuenia jumaitsi pexanialivaisi, Cristo pelivaisi. Nexata acuenebi tsane itsajivi ata pecaitavetsinexa. Bajarapacuenia vajënaeevetaponaponare vajatuxanenë Jesucristo matapania pepatsimatacabitsicajavabelianexa. <sup>15</sup> Pamatakabi Dioso caëjëta, itsa copiapatsiana, Cristo icatsia patsianica. Caenë Dioso bitso ayaijamatabëcuenenë daxitanacuanë pevetsivivecua. <sup>16</sup> Caenë Dioso apo tēpae tsane daxita matakabijavabelianexa. Dioso peyacotiyaponaponae. Bajaraxuata itsajivi ata acuenebi pimoxoyotsijava Dioso. Itsajivi ata cajena caeto ata apo tae Dioso. Tsipaji apo caëjëpaetsi petaejava. ¡Daxitamatakabi Dioso pijajivi yaiyatanetsi! ¡Dioso cajena ayaijamatabëcuenenë daxitamatakabijavabelianexa!

<sup>17</sup> Pamona bitso pexainaevi mapanacuapijicueje, bajarapamonae muxujiobare beayaijamatabëcuenevi penataeyaniva. Muxujiobarena pejamatabëjumaitsiyaniva: “Palata baja taxainaexae, apo namatavenonaenë itsacuenejava ata,” pejamatabëjaiyaniva. Tsipaji saya palata peverevereaejava. Biji rajane itorobare bitso pexainaevi penajamatabëcuenecopatsinexa piasaëtsaponaponae Diosojavabelia. Dioso nacarajuta daxita vajaxinaejava barëyaya vajacajinavanapaenexa. <sup>18</sup> Itorobarena bajarapamonae pijapalata pecanacuenebinexa, itsamonaejavabelia pexaniacuene petoexanabinexa bajarapapalatata. Itorobarena penajamatabëcueneveretsinexa palata perajutsinexa bepejiobivijavabelia, bajarapacuenia peyavenonaenexa. Itorobarena petsicobetsanaponaejava pexainaejava bepejiobivijavabelia. <sup>19</sup> Bajarapacuenia itsa exanaena, nexata athëbëtatsia Dioso tobuataponaeatsi pepacuene penamatamotsijava pexainaejava daxitamatakabijavabelianexa. Xainaeana matakabi apo peverevereaejava.

*Pacuenia Pablo Timoteo pemuxujiobilivaisi toyaquina, pecopatsivajënae petoyaquinaelivaisi mapabaxutotaje, yabara pelivaisi*

<sup>20</sup> Timoteo, exanaponaponare daxita xua Dioso catocopata nexanaenexa. Pëtsa namuxunaevetame pamona bitso pecuaicuajiaivi saya mapanacuapijicue yabaraje. Pëtsa namuxunaevetame pecuaicuajiaivi natsiquejemalivaisixi. Pëtsa namuxunaevetame pamona jivi tsipaebapona penajumetsënëtsilivaisi. Bajarapamonae tsipaebapona itajara pepacuene bepexaniajailivaisi. Itsiata cajena apo pexaniajailivaisi. <sup>21</sup> Itsamonae bajarapalivaisi jumecovënëta. Nexata baja copaba Dioso pejumecovënëtsijavami.

Catovajëtatsi Dioso pecayavenonaenexa.

## Mapabaxutoje San Pablo cotocaevi toyaquina Timoteojavabelia

*Pacuenia icatsia Pablo cotocaevibaxuto toyaquina Timoteojavabelia yabara pelivaisi*

<sup>1</sup> Xanë Pablonë, Jesucristo nitoroba Dioso pejamatabëcueneta. Jesucristo nitoroba daxitanacuanëjava jivi tatsipaebinexa pacuenia Dioso najumecapanepaeya jumaitsi vajanacarajutsinexa matababi apo peverevereaejava. Dioso nacarajutsiana matababi apo peverevereaejava, Jesucristo vajajumecovënëtsivi. <sup>2</sup> Timoteo, bitso tacaasivanë, betaxënatomëcuenia tacataenë. Catoyaquinatsi mapabaxutoje. Catovajëtatsi vaxa Dioso, vajatuxanenë Jesucristo ata, pecayavenonaenexa pecaasivaxaebeje. Catovajëtatsi pecaitaxutotsoniataenexabeje, pecajamatabëcuene xanepanaeyaexanaenexanua bajaraponëbejejavabelia.

*Pacuenia Pablo Cristo vajunupaeba yabara pelivaisi*

<sup>3</sup> Pexaniajamatabëcuene rajutabiabajë Diosojavabelia. Dioso tonacuenebabiabajë pacuenia bajayata tajasalinaivimi ata Dioso tonacuenebavanapa. Pacuenia Dioso nitoroba, bajarapacuenia xaniavaetsia toponaponajë. Itsa canajamatabënapitatsi tavajëtsijavata Diosojavabelia, meravi, matababita ata, Diosojavabelia pexaniajamatabëcuene rajutabiabajë xamë yabara. <sup>4</sup> Najamatabënapitabiabajë tanepënuayabaxu-abijavamë pamatababi navecuanatsatsibeje. Bitso icatsia jamatabëcatanetsi taca-sivajamatabëcuenebarëyanexa itsa catanetsi. <sup>5</sup> Najamatabënapitabiabajë pacuenia daxita nejamatabëëthëtovetsina najamatabëcuenecopatame Diosojavabelia. Copiaya acue Loidabeje, ena Eunicebeje, pejamatabëëthëtovetsina najamatabëcuenecopatabeje Diosojavabelia. Nexata yapëtaniji bajarapacuenia xamë ata nenajamatabëcuenecopatsi-  
java Diosojavabelia.

<sup>6</sup> Bajaraxuata canajamatabënapitsiaexanatsi mapacueniaje. Exanaponaename pacuenia Dioso caitoroba pecavejamatabëcaevianiva Dioso pecacajëpaeyaexanaejamatabëcuene. Nexata xaniavaetsia evetaponaponaename Dioso pejumecovënëtsivi. Pajamatabëcuene Dioso cacajëpaeyaexana, Dioso carajuta pamatababi catsimatanacobeuatatsi tacatovajëtsijavata Diosojavabelia. <sup>7</sup> Dioso cajena nacarajuta Espíritu Santo. Espíritu Santo nexata vajanacayavaponaponaexae, apo cujunavitsi itsacuenëjava ata. Espíritu Santo pesaëta nacacajëpaeyaexana pacuenia Dioso nacatojitsipa vaxaexanabiabinexa. Nacayavenonanua vaxaasivanexa itsamonae ata. Nacanajamatabëcuene cataitsiaexananua pibisiacuene ata vaxaexanaeyaniva. <sup>8</sup> Pëtsa ajumeuramë nevajunupaebaponaejava vajatuxanenë Jesús. Pëtsa ajumeuramë xanë ata tanevajunupaebijavamë, Jesucristo pijajivitonëxanë penaneconitsivi pejebabiabibota taneetsijava. Biji rajane xamë ata tonacopare itsamonae pecabejiobiaexanaenexa, jivi Diosojavabelia pecapanepaelivaisinexatsi yabara. Itsamonae pecabejiobiaexanaejavata, Dioso cajena cajamatabëcuenebabatsiana. <sup>9</sup> Dioso cajena nacacapanepaena pibisiacuene vaxaexanaeneconimivecua. Nacajunata vajatojinavanapaenexa xaniavaetsia. Itsacuenëjavayo pexaniacuene apo exanae atatsi, Dioso itsiata nacajunata. Nacajunata tsipaji Dioso jitsipa vajanacajunatsinexa. Dioso nacaitaxutotsoniatanenua Jesucristo pejamatabëcueneta. Pepo bajayatamicujinae, pamatababi abaxë Dioso nacua ata apo exanae, Dioso baja cajena nacajitsipa. <sup>10</sup> Dioso cajena nacatsitanajamatabëcueneitajëta vajanacaasivajava. Dioso vajanacaasivaxae, pexënato itorobica vajanacacapanepaenexa. Nexata tēpae ata tsanetsi, apo nacatoitsacuene. Tsipaji itsa najamatabëcuenecopatatsi Jesucristojavabelia, nacacapanepaena Diosojavabelia. Nexata xainaenatsi matababi apo peverevereaejava.

<sup>11</sup> Dioso cajena nitapeta jivi tatsipaebaponanexa bajarapapexanialivaisi. Nitoroba apóstolenëxanë tatsipaebaponanexa bajarapalivaisi apo judíovijavabelia.

<sup>12</sup> Bajarapalivaisi jivi tatsipaebaponaexae, itsamonae nebejiobiaexanapona mapacueniaje. Itsiata baitsi jane apo auranë tanebejiobiaexanaejava yabara. Tspiji ponëjavabelia najamatabëcuenecopatajë, jamatabëcueneyapëtaniji. Jamatabëcueneyapëtaniji pacuenia bajaraponë jamatabëcuenecaëjëpatsi taneyavenonaenexa. Nexata bajaraponë neyavenonabiabiana pacuene netocopata taexanaponaenexa matapania icatsia Cristo pepatsimatacabitsicajavabelianexa.

<sup>13</sup> Timoteo, casaëmëre tsaponapona nejumecovënëtsijava pexaniajailivaisi, palivaisi baja catsipaebatsi. Pacuenia baja catsipaebatsi, bajarapacuenia juya itsamonaejavabelia tsipaebabiabianame. Bajarapalivaisi jamatabënaponaponare. Xaniavaetsia jumecovënëtsia ponaponare. Asivaya taeyabiabare itsamonae ata Jesucristo pijajivitonëxaemë.

<sup>14</sup> Espiritu Santo cajena nacayajavaponaponabeje. Nexata nacayavenonaponaponabeje. Bajaraxuata pexaniajailivaisi xaniavaetsia tsipaebaponaponare. Pacuenia Dioso caitoroba, exanabiabare. Saicayalivaisicuenia pëtsa tsipaebaponame. Espiritu Santo cayavenonaena.

<sup>15</sup> Xamë baja cajena yapëtaneme pacuenia Asíavënë nacuapijivi, daxita Dioso pejumecovënëtsivi, nexuabarëcëpeca. Tanexuabarëcëpecaevi yajuvënënebeje Figelobeje Hermógenesbeje. <sup>16</sup> Onesíforo, pijamonae yajava, Dioso pitaxutotsoniataenexatsi, tovajëtajë Diosojavabelia. Onesíforo nejamatabëcuenebabatabiaba. Penaneconitsivi pejebabiabibota ecae atanë, nesivaxaina anijatonë. Onesíforo cajena apo neyabaraaura, penaneconitsivi pejebabiabibota ecae atanë. <sup>17</sup> Biji rajane Onesíforo itsa patajopa Roma tomarata, nejaitaruta. Apo copatsi cajena tanejaitarutsijava. Matapania itsa necaxitajaraba penaneconitsivi pejebabiabibota, copata baja tanejaitarsijava. <sup>18</sup> Diosojavabelia Onesíforo tovajëtajë Dioso pitaxutotsoniataenexatsi pamatacabi icatsia Cristo patsianica. Xamë baja cajena yapëtaneme pacuenia Onesíforo nacayavenonabeje pamatacabi ponaponatsibeje Efeso tomarata.

## 2

*Pacuenia Jesucristo pijajivitonë jamatabëcueneitsi, ponë xaniavaetsia jumecovënëta, yabara pelivaisi*

<sup>1</sup> Timoteo, xamë betaxënatomëcuenia tacataenë. Catovajëtatsi Diosojavabelia peca-jamatabëcuene asaëyaexanaenexa. Nacayavenonaena Jesucristo pijajivixaeitsi. <sup>2</sup> Xamë rabaja cajena nejumetaeyabiabame palivaisi tsipaebabiabajë jivi ayaibitsaëtoxanetonëjavabelia. Bajarapalivaisi juya tsipaebare itsamonaejavabelia. Pamonae apo piacuenejitsibivi pexanaenexa pacuenia itorobatsi, pecaëjëpaevitsinua xaniavaetsia jivi livaisi petsipaebinexa, bajarapamonae itorobare juya mataropotsia bajarapalivaisi petsipaebinexa itsamonaejavabelia.

<sup>3</sup> Dioso pejumelivaisi jivi netsipaebaponaejavata, itsa catoayapëbeje, itsamonae itsa cabejiobiaexanaejitsianua, pëtsa najetabajiravame. Jesucristo pijajivitonëxaemë, jamatabëcueneevetaponaponare pacuenia caitoroba nexanaenexa. Pacuenia pexaniavajabitsaënë itsi, bajaraitsimëre. <sup>4</sup> Vajabitsaënë pitorobabiabinëtsi jamatabëcueneevetaponapona pacuenia itorobatsi pexanaenexa. Nexata apo vecuanajamatabëcueneepatajërëtsi saicayacuene pevetaponaenexa. <sup>5</sup> Bajara pijinia pacuenia pebitsojinavei pecujinaejinaejava, penayacobijavata, kujinaejina pacuenia itorobatsi pijatuxanevi. Penacanabinë jamatejema perajutsinexatsi itsacuenejavayo. Pajivi xaniavaetsia apo kujinaejinae pacuenia itorobatsi, bitsojinae ata pecujinaejinaejava, itsiata apo nacanabi. Nexata apo rajutsitsi pecujinaejinaematamo. <sup>6</sup> Ponë pijinia pabi nacueneba peubinexa peubijava, bajaraponë copiaya nacueneba asaëyata. Nexata peubijava itsa tonaveretatsi, pita baja penacuenebimatamo. Bajara pijinia pacuenia xamë ata asaëya tonacuenebare vajatuxanenë. Nexata vajatuxanenë carajutsiana netonacuenebimatamo. <sup>7</sup> Najamatabëxainare tacatsipaebilivaisi. Nexata vajatuxanenë cayapëtaeyaxanaena bajarapalivaisi.

<sup>8</sup> Canaējēre Jesucristo. Bajaraponē cajena Dioso asaēyaexanatsi petēpaecujinae. Bajaraponē cajena Davidpijinē pemomoxiyajuvēnēnē. Bajaraponē pelivaisi jivi tsi-paebabiabajē. Itsa jumecovēnēta bajarapalivaisi, pecapanepaelivaisinexatsi Diosojavabelia. <sup>9</sup> Bajarapalivaisi tatsipaebaponaexae, penaneconitsivi pejebabiabibota neeta tavajēnaeyabelia daxitanacuanējāva tatsipaebaponaeyaniva. Cadenamaētonēta xanē necēta, pacuenia bitso pibisiacuene pexanaenē bacētatsi. Itsiata Jesucristo pelivaisi apo cētšicapanepae. Nexata xanē majotaje naneconitsia ponaponaē atanē, aeconoxae baja Jesucristo pelivaisi yacaējēpāona daxitanacuanējāva. <sup>10</sup> Bajaraxua tayapētaexae, tonacaevetajē itsamonae ayaiacuenia tanebejiochiaexanaenexa, Dioso pitapetsivitsi pecapanepaenexatsi Jesucristo pelivaisi pejumecovēnētsixae. Nexata bajarapamonae ata Dioso capanepaenatsi pexainaenexa matababi apo pevereverecaējava daxita matababijavabelianexa. Nexata bajarapamonae Jesucristo yajavajinavanapaena pinijicotia yajava. <sup>11</sup> Palivaisi aeconoxae jumaitšinējitsia, pexaniajailivaisi cajena:

Itsa xaniajai Cristo yajavatēpatsibeje, nexata icatsia Cristo yajavaasaētsibeje tsaponaponaē tsane. <sup>12</sup> Itsa casaē tsaponaponaētsibeje tsane Cristo pelivaisi vajajumecovēnētsijavabeje, itsamonae nacabejiochiaexanae atabeje, nexata daxitacuene Cristo cobenaevetsianatsibeje pamatacabi daxitacuene evetsiana pijanacuatatsia. Itsa vaxaitsibeje bajaraponē pelivaisi vajajumecovēnētsijavabeje nayavajunuaxainaenatsibeje jivijavabelia, nexata juya bajaraponē pijajivitonēcuenetsibeje nacayavajunuaxainaenabeje paxa Diosojavabelia. <sup>13</sup> Vaxaitsi itsajamatabēcuenē Dioso vecuanajamatabēxainae atatsi, itsiata Dioso nacatoexanaena pacuenia baja cajena najumecapanepaeya jumaitsi.

*Pacuenia jamatabēcuenētsi xaniavaetsia Dioso petonacuenebinē yabara pelivaisi*

<sup>14</sup> Daxita Dioso pejumecovēnētsivi najamatabēnapitsiaexanaename palivaisi catsipaebatsi. Vajatuxanenē pitabarata tsipaebare bajarapamonae. Pētsa bajarapamonae anaeya jumenota saya itsamonae pecuaicuaijajava. Pejumeanaenotsijava itsamonae, apo jamatabēcueneyavenonae tsipaetsi itsajivi ata. Saya jamatabēcuenēbijinaejit-sipatsi daxita pejumetaevitsi. <sup>15</sup> Pacuenia cacaējēpa, Dioso pecaitorobicuenia exanaponaponare. Nexata pamatacabi naitajētsianame Dioso pitabarata, cabarēyataena xaniavaetsia nejumecovēnētsixae pacuenia caitoroba. Ajibi tsane neyabaraaurajava Diosojavabelia. Tsipaji xaniavaetsia jivi tsipaebaponaponame Dioso pejumelivaisi, pepo pexaniajailivaisi. <sup>16</sup> Pētsa namuxunaevetame pamonaē tsipaebapona natsiquejemalivaisi, mapanacuapijilivaisi. Tsipaji raja bajarapamonae petsipaebaponaelivaisita, jivi Dioso pejumecovēnētsijavami copabiaexanapona pevajēnaeyabelia. <sup>17</sup> Bitso cajena abeje bajarapalivaisi. Pacuenia ayaivajēnē banaexanapona pevajēnētsabananajetarucaējava, bajara pijinia jamatabēcuenētsi bajarapamonae petsipaebaponaelivaisi. Tsipaji pevajēnaeyabelia jivi ayaibitsaēto jamatabēcuenēbijianaponatsi bajarapalivaisi petsipaebaponaexaetsi. Bajarapalivaisi petsipaebaponaēvi yajuvēnēnēbeje Himeneobeje Fileto-beje. <sup>18</sup> Bajaraponēbeje copatabeje baja pexaniajailivaisi pejumecovēnētsijavamibeje. Jamatabēcuenēnavēxaniababeje saya. Tsipaji jumaitsidebeje tsabiabi: “Panepa rabaja jivi petēpaecujinae icatsia Dioso piasaēyaexanaponaējavaminexa,” jaibeje tsabiabi. Nexata bajarapacuenia Dioso pejumelivaisivecua najamatabēcuenē epatajērērcaponabeje. Nexata bajaraponēbeje itsamonae ata Dioso pejumecovēnētsijavamivecua najamatabēcuenēepatajērērcāeya exanaponabeje. <sup>19</sup> Pacuenia ibotoxaneto apo tixitsicapanepaetsi, bajara pijinia itsi Dioso pejumelivaisi, pexaniajailivaisi. Caelivaisi rabaja tsiteca. Nexata itsalivaisijavabelia apo tixitsicapanepaetsi. Bajarapalivaisijavata mapacuenia pejumaitsilivaisiyo rucaje: “Pepo petuxanenē cajena yapētane pijajivi,” pejailivaisiyo ruca. Itsalivaisijavata pijinia mapacuenia pejumaitsilivaisiyo rucaje: “Pajivi jumaitsi: ‘Xanē raja Cristo pijajivitonēnē,’ jai, bajarapajivi becopata pibisiacuene pexanaējava,” pejailivaisiyo ruca.

<sup>20</sup> Riconë pijaboxanetota jivi pecanabaninëanënexa, xaina daxitacuenevirianëanë. Itsanëanë oronanitota pexanaenëanë. Pamatacabi riconë topatatsi petuxanevi, ayaijamatabëcuenevi, pexaejava abatabiaba bajaraponëanëta. Itsanëanë bevelianëanë, naejavanëanë. Itsanëanë atsaninëanë. Bajaraponëanë xaina daxitamatacabi jivi pecanabaninexa. <sup>21</sup> Bajara pijinia jamatabëcueneitsi Dioso pejumecovënëtsivi ata. Pajivi xaniavaetsia najamatabëcunevetaponapona pibisiacuene pexanaeyaniva, bajarapajivi jamatabëcueneitsi pacuenia oronanitota pexanaenëanë itsi. Baitsi baja ajamatabëcuenexuirajibi. Nexata pijatuxanenë tsitaxanepana pitorobinexatsi xua pexaniacuene pijatuxanenë petonacuenebinexa. Timoteo, bajaraxuata xaniavaetsia benaevetaponaponame pibisiacuene nexanaeyaniva.

<sup>22</sup> Pacuene pevëjëavi najamatabëxaina pibisiacuene pexanaenexa, bajarapacuene vecuanajetabajiravaponare. Casaëmëre tsaponapona epxaniacuene nexanaponaponaeyava. Diosojavabelia najamatabëcuene copatsiyaponapona. Asivamëre tsaponaponaeyatsamonaeyata. Jamatabëcuenexanepanaeya ponapona Dioso pitabarata. Bajarapacuenia barëajamatabëcuenesaëmëre tsaponaponaeyapamonaeyaxaniavaetsia penaevetavapanapaevi pibisiacuene pexanaeyaniva, penavajëcabiabivina Diosojavabelia peyavenonaenexatsi. <sup>23</sup> Namuxujemare natsiquejemalivaisixi pecuaicuaijivi. Yapëtaneme rabaja. Bajarapitsilivaisixi jivi itsa cuaicuaijai, belia najumeanaenotabiabapona. <sup>24</sup> Jesús cajena pijajivitonë, itsamonaeyapo bejumeanaenotsi. Biji rajane pexaniajamatabëcuene bexaina daxitajivijavabelia. Livaisi jivi betsipaeaba xaniavaetsia. Bajayajebi ata apo becopsi livaisi petsipaebaponaeyava. <sup>25</sup> Xaniavaetsia muxujiobiaya livaisi betsipaeabaponaeyapamonaeyaposo apo pejitsipaevi ata. Nexata bevetaponapona bajarapamonaeyata pecopabinexa pibisiacuene pexanabiabijava penajamatabëcuene pënëyorotsinexa Diosojavabelia. Nexata bajarapamonaeyata Dioso yapëtaeyaxanaenatsi Jesús pelivaisi pexaniajailivaisicuene. <sup>26</sup> Nexata icatsia najamatabëxainaena xaniavaetsia Dioso pejumecovënëtsinexa. <sup>25</sup> Xaniavaetsia muxujiobiaya livaisi betsipaeabaponaeyapamonaeyaposo apo pejitsipaevi ata. Nexata bevetaponapona bajarapamonaeyata Nexata dovathi pejamatabëcuene itorobabiabijavatsivecua najamatabëcuenepënëyorotsiana Diosojavabelia.

### 3

*Pacuenia jivi itsane itsa baja imoxoyo pevajënae nacua pevereverecaenexa yabara pelivaisi*

<sup>1</sup> Timoteo, xaniavaetsia beyapëtaneme mapacueneje. Itsa baja imoxoyo pevajënae tsane nacua pevereverecaenexa, bajarapamatacabi bitso ayapëbeje tsane daxitacuenejavabelia. <sup>2</sup> Bajarapamatacabi cajena caejivi canacujitsia pexainaejava, natoasiva tsane ëbajarapamonaeyayajava pexainaejava. Navajunupaebiana saya peyaiyataenexatsi pejumetaevitsi. Beayaijamatabëcuenevi nataena. Navajunupaebiana pexanaeyayabara peyaiyataenexatsi. Bajarapamonaeyapibisiacuenia baracuaicuaijai tsane Dioso. Apo jumecovënëtsi tsane paxajivi, penajivi ata, pitorobicueniatsi. Vitsatsi atatsi, yavenonabiabi atatsi, apo jamatabënajinae tsane pijamonaeyapo yaiyatae tsane itsamonaeyaposojavabelia pevajëcabiabijava. <sup>3</sup> Bajarapamatacabita bajarapamonaeyapo asiva tsane pijamonaeyata. Apo itaxutotsoniatae tsane itsamonaeyavabelia ata. Najumetsënëtsiaya baracuaicuaijai tsabiabi tsane itsamonaeyapo caëjëpaetsi tsane penajamatabëcuenecataitsinexa pibisiacuene pexanaeyava. Anaepanabiabiana bitso pebejiobiaexanaenexa itsamonaeyapitoya tsane daxita pexaniacuene pexanaevi. <sup>4</sup> Bajarapamonaeyacanajetsiana penajuajinapanapaevi ata pijavajabitsaë pecobeyabelia. Xaniavaetsia najamatabëxainaenejeva, exanaena daxitacuene. Bijiaya naëcotsiana itsamonaeyaposo apo jamatabënajinae tsane. Jaitsiana biji pebarëyajamatabëcuene saya pebarëyanexa. <sup>5</sup> Bajarapamonaeyaitajara najonena Dioso pejumecovënëtsivijavabelia. Itsiata baitsi jane apo jumecovënëtsi tsane Dioso pejumelivaisi, jumetaeyata.

Bajarapamonae navecuatsatsianame. <sup>6</sup> Bajarapamonae navecuatsatsianame tsi-paji bajarapamonaeyajuvënëvi itsamonae pijabonëjavabelia joneyabiabiana. Nexata bajarapabonëpijivi, petiriavi, bajarapamonae yamaxëitojorobabiabiana. Bajarapapetiriavi jamatabëcuenefaefaena. Daxitacuene pibisiacuene jamatabëexanabiabiana. Nexata pamatacabi bajarapapetiriavi pibisiacuene jamatabëexana, patabiabi-ana penajumetsënëtsilivaisi petsipaebinexatsi. Nexata bajarapapetiriavi itsa tsipae-bianatsi penajumetsënëtsilivaisi, beDioso itajara pejumelivaisi petsipaebivi taeyabiabi-ana. <sup>7</sup> Bajarapapetiriavi picani jitsipaena petsipaebabiabinexatsi Dioso pejumelivaisi. Itsiata baitsi jane apo tsijamatabëjonetsi tsane pepo pexaniajailivaisi pecapanepaelivaisinexatsi Diosojavabelia. <sup>8</sup> Bajayata penajorobinëmibeje, Janespijinëmibeje Jambrespijinëmibeje, nayajiviitavetabeje Moiséspijinë pexaniajailivaisi petsipaebivanivatsibeje. Bajara pijinia pacuenia pamona petiriavijavabelia penajumetsënëtsilivaisi tsipaebaponaena. Bajarapamonae nayajiviitavetaponaena pepo pexaniajailivaisi petsipaebivanivatsi. Bajarapapetiriavi apo caëjëpaetsi tsane penajamatabëxainanexa xaniavaetsia. Bajarapamonae saya yamaxëitojorobiaya jumai tsabiabi tsane itsamonaejavabelia: “Paxanë raja Dioso patajumecovënëtsivi,” jai tsabiabi tsane. <sup>9</sup> Itsiata bajarapamonae ayaibitsaëto jivi apo pënaponaetsi tsane. Daxitajivi cueneyapëtaenatsi bajarapamonae saya jema livaisi petsipaebaponaejava. Nexata pacuenia bajayata Janespijinëmibeje Jambrespijinëmibeje daxitajivi cueneyapëtanetsibeje pibisiacuene pexanaponaejavabeje, bajara pijinia pacuenia bajarapamonae ata daxitajivi cueneyapëtaenatsi penajumetsënëtsilivaisi petsipaebaponaejava.

*Pacuenia baja Pablo copatsijitsia Timoteo pemuxujibijava yabara pelivaisi*

<sup>10</sup> Timoteo, xamë baja cajena yapëtaneme palivaisi tsipaebabiabajë jivibitsaëtoxanetojavabelia. Yapëtanemenua baja cajena pacuenia xaniavaetsia ponaponajë. Yapëtanemenua pacuene yabara Dioso tonacuenebaponaponajë. Yapëtanemenua pacuenia Dioso jumecovënëtaponaponajë. Yapëtanemenua pacuenia itsamonaejavabelia livaisi tsipaebaponajë bajayajebi copatsinejevanë. Yapëtanemenua pacuenia itsamonae ata asivanë. Yapëtanemenua pacuenia casaënë tsaponaponae jivi livaisi tatsipaebaponaejava netoayapëbeje ata. <sup>11</sup> Yapëtanemenua pacuenia itsamonae pibisiacuenia nebaracuaicuaijai tsabiabi Jesucristo tajumecovënëtsinëxae. Yapëtanemenua pacuenia nebejiobiaexanapona. Yapëtanemenua pacuenia nebejiobiaexana Antioquía tomarata, Iconia tomarata ata, Listra tomarata ata. Bajarapatomaranëpijivi bitso nebejiobiaexana. Itsiata baitsi jane Dioso necapanepa daxita bajarapacuenivecua. <sup>12</sup> Xaniajai cajena. Daxita pamona najamatabëcuene copata xaniavaetsia petojinavanapaenexa Jesucristo, bajarapamonae bejiobiaexanaponaenatsi. <sup>13</sup> Nexata pibisiamatabëcuenevi, pamona dovathi pejamatabëcueneta jivi yamaxëitojorobapona, orijibia bitso pevajënaeyabelia pibisiacuene exanaponaena. Bajarapamonae dovathi pejamatabëcueneta jivi yamaxëitojorobaponaena. Nexata pijinia bajarapamonae ata bitsoyo dovathi yamaxëitojorobaponaenatsi.

<sup>14</sup> Timoteo, itsiata baitsi jane xamë casaëmëre tsaponaponae palivaisi baja capanepaeya jumecovënëtame. Tsi-paji baja cajena xamë jamatabëcueneyapëtaneme pacuenia jamatabëcueneitsi pamona catsipaeba bajarapalivaisi. <sup>15</sup> Tsiquirinëyomëjavaveliacujinae baja cajena yapëtaneme Dioso pejumelivaisi. Bajarapalivaisi cayapëtaeyaexana pecapanepaejavanexa Diosojavabelia nenajamatabëcuene copatsixae Jesucristojavabelia. <sup>16</sup> Dioso pijajivi Espíritu Santo itorobatsi peyaquinaenexa Dioso pejumelivaisi. Nexata pacuenia Espíritu Santo itorobatsi, bajarapacuenia Dioso pijajivi yaquina daxita Dioso pejumelivaisibaxutonënexa. Nexata nacatoxanepana Dioso pejumelivaisi itsamonae vajanacatsipaebinexa vajayapëtaenexa pexaniajailivaisicuene. Nacatoxanepanua Dioso pejumelivaisi vajanacaitavetsinexa apo pexanepanaecuene itsa exanatsi. Nacatoxanepanua Dioso pejumelivaisi vajanacajamatabëcueneitorobinexa ëDioso pejitsipaecuene vajatoexanabiabinexa.

Nacatoxanepananua Dioso pejumelivaisi vajanacayapëtaeyaexanaenexa xaniavaetsia vajatojinavanapaenexa Dioso. <sup>17</sup> Nexata Dioso pejumecovënëtsinë itsa yapëtane Dioso pejumelivaisi, jamatabëcuenecaējëpaenatsi daxita xua pexaniacuene pexanaenexa.

## 4

<sup>1</sup> Pepo petuxanenë Jesucristo patsianica penaneconitsiaexanaenexa daxita pibisiacuene pexanaevi. Naneconitsiaexanaena piasaëtsavanapaevi, petëpaevi ata. Bajaronë itsa patsianica, daxitacuene pevetsinexa, patsianica. Jesucristo pitabarata, Dioso ata pitabarata, xanë jamatabëcuenereviaya caitorobatsi mapacueniaje. <sup>2</sup> Daxitamatacabi jivi tsipaebare Dioso pitorobilivaisi. Ajamatabëcuenesaëya Dioso pitorobilivaisi tsipaebaponare. Paepatota jivi jitsipa pecanamuxunaevetsinexa, tsipaebare. Paepatota ata apo jitsipae pecanamuxunaevetsinexa, itsiata tsipaebare. Dioso pitorobilivaisi jivi jumecovënëtsiaexanare. Itavere pibisiacuene pexanaejava. Muxujiobare pija-matabëcuenesaënexa Diosojavabelia. Tsipaebaponare xaniavaetsia Dioso pejumelivaisi bajayajebi jamatabëcuenecueranaenejevamë. <sup>3</sup> Bajarapacuenia tsipaebaponare tsipaji raja itsamatacabi jivi apo namuxunaevetsi tsane pexaniajailivaisi petsipaebijavatsi. Biji rajane itsamatacabi jivi pijacuata natojaitsiana saicayalivaisi Dioso pejumelivaisivecua ayaibitsaëto petsipaebinxatsi. Bajarapamonae pijacuata junatsiana petsipaebinxatsi palivaisi muxujitsipa. <sup>4</sup> Nexata pexaniajailivaisi petsipaebiyativatsi, navecuaitavetsiana. Jumecovënëtsiana saya ënatsiquejemalivaisixi. <sup>5</sup> Itsiata baitsi jane xamë saicaya naya-jivitaeyaponaponare. Daxita pacuenia Dioso catocopata nexanaenexa, veretsianame. Catoayapëbeje ata, itsamonae cabejiobiaexanae ata, casaëmëre tsaponaponae nevajë-naeyabelia. Casaëmëre tsaponaponae jivi netsipaebijava pexanialivaisi pecapanepaelivaisinxatsi Diosojavabelia.

<sup>6</sup> Xanë baja netoimoxoyo tsaponae tatonacaevetsinexa tanebeyaxuabinexa. <sup>7</sup> Pacuenia pebitsojinaenë pecujinaejinaejava daxitasaëta kujinaejinaeya pata, bajarapacuenia xanë ata xaniavaetsia daxita tasaëta tonacuenebajë tajatuxanenë. Toveretaponajë baja tatonacuenebijava taneitorobicuenia. Apo copatsinë cajena tanajamatabëcuenecopatsijava Diosojavabelia. <sup>8</sup> Pacuenia penayacobijavata, pebitsojinaenë pecujinaejinaejava, barajutatsi corona pecujinaejinaematamo, bajara pijinia pacuenia xanë ata vajatuxanenë athëbëtatsia nerajutsiana pexaniacuene taneitorobicuenia tatoponaponaexae. Bajarapacuenie nerajutsiana pamatacabi vajatuxanenë patsianica. Itsiata baitsi jane ëxanë apo nerajutsi tsane bajarapacuenie. Daxita pamonaë ata ajamatabëcuenesaëya vajënaeevetavanapa pepatsijavatsica Jesucristo, bajarapamonae ata rajutsianatsi bajarapacuenie. Vajatuxanenë itsa patsianica, naneconitsiaexanaena daxita pamonaë naneconita bajaraponëjavabelia. Vajatuxanenë itsa naneconitsiaexanaena daxita pamonaë naneconita bajaraponëjavabelia, itaxutojema apo naneconitsiaexanae tsane. Paneconivajëto caejivi canacujitsia xainapona, bajarapaneconivajëtota naneconitsiaexanaponaena.

*Pacuenia Pablo jumaitsi Timoteojavabelia yabara pelivaisi*

<sup>9</sup> Itsa cacuenecaējëpa neponaejava, bepijiayo netaeyojopaeremena. <sup>10</sup> Demasvënënë rabaja nexuabatabajirava. Tsipaji Dioso pejumelivaisi matatoxenetsia jitsipa bitso mapanacuapijicuenieje. Pona baja nexata Tesalónica tomarabelia. Crescentevënënë baja itorobajë Galacia nacuyabelia. Tito pijinia itorobajë Dalmacia nacuyabelia. <sup>11</sup> Caenë Lucas xanëjavata ponapona. Jaire Marcos. Bajaraponë caējëpatsi taneyavenonaenexa Dioso tatonacuenebijava. Nexata barërenamë tsane. <sup>12</sup> Tíquico baja itorobajë Efeso tomarabelia. <sup>13</sup> Itsa renamë tsane xanëjavaberena, Troas tomarata tajacamisajumavelia tanaxatatsijava netopitaponaeremena. Carpovënënë raja pijabota puenetarutajë. Tajal-ibronënu, tajacuyalatobaxutoxinua, netopitaponaeremena. Bitso tajacuyalatobaxutoxi namatavenonajë.

<sup>14</sup> Alejandro, cobrenanita daxitacuene pexanaenë, bitso baja cajena pibisiacuene nexana. Itsiata baitsi jane Dioso neyamatomotsiana tanebejiobiaexanaematamo.

<sup>15</sup> Nayajivitaema bajaraponë. Tsipaji raja bitso itoya patatsipaebaponaelivaisi.

<sup>16</sup> Pamatacabi nayajivicuaicuaijanë majotaje Roma tomarata, nacua pevetsivi pitabarata, itsajivi ata apo neyavenonaeyacuacuaijai. Daxita nexuabanuta. Nex-ata bajarapamonae tovajëtajë Diosojavabelia penaneconitsiaexanaeyanivatsi tanexuabanutsijamatabëcuene. <sup>17</sup> Itsiata baitsi jane bajarapaepatota vajatuxanenë neyavenona. Vajatuxanenë pesaë nerajuta daxitalivaisi tatsipaebinexa. Apo judíovi ata pejume-covënëtsinexa, bajarapalivaisi tsipaebaponajë Diosojavabelia pecapanepaelivaisinexatsi. Tanexuabanutsijavata picani netsiayai tanebeyaxuabinexa. Itsiata vajatuxanenë necapanepa tanebeyaxuabijavaminexavecua. <sup>18</sup> Vajatuxanenë cajena necapanepapon-aena daxita pibisiacuene taneexanaeyaniva. Necaponaena athëbëabetsia bajaraponë pevetsinacuayabetsia. Vaxaitsi jumai tsabiabi tsanetsi Diosojavabelia daxitamatacabi-javabelianexa: “Diosomë, pinijicuene baja cajena nexanaenë,” jai tsabiabi tsanetsi.

*Pacuenia Pablo Timoteo tonajumeitoroba Efeso tomarabelia pebajacobinexatsi peyapëtaevitsi yabara pelivaisi*

<sup>19</sup> Nebajacobiana Prisca. Prisca pamona ata, Aquila, nebajacobiana. Nebajacobiana Onesíforo pijamonae ata. <sup>20</sup> Erasto nacopatajopa Corinto tomaratalia. Trófimo pijinia puenetajë Mileto tomaratalia. Tsipaji avitane. <sup>21</sup> Itsa cacuenecaëjëpa, naxanitsiayo renamë tsane emarapae pecopijopaevajënaeya. Cajamatabënajina pina Eubulo, Pudente ata, Lino ata, Claudia ata, daxita itsamonae Dioso pejume-covënëtsivi yajava.

<sup>22</sup> Catovajëtat si vajatuxanenë Jesucristo pecayajavaponaponanexa. Daxita paxamë pacatovajëtat si Diosó papecayavenonaenexa.

## Mapabaxutoje San Pablo toyaquina Titojavabelia

### *Pacuenia Pablo mapabaxutoje toyaquina Titojavabelia yabara pelivaisi*

<sup>1</sup> Xanë Pablonë, Dioso pijajivitonënë. Jesucristo ata pijaapóstolenënë. Jesucristo baja cajena nitoroba jivi tayavenonaenexa Diosojavabelia penajamatabëcuenecopatsinexa. Dioso baja cajena tajëvelia itapeta bajarapamonae penajamatabëcuenecopatsinexa Diosojavabelia. Jesucristo nexata nitoroba bajarapamonae tatsipaebinexa pexaniajailivaisi Dioso pitabarata bajarapamonae xaniavaetsia pejinavanapaenexa. <sup>2</sup> Jesucristo nitoroba tatsipaebinexa pexaniajailivaisi bajarapamonae ata pexainaenexa matababi apo peverevereaejava. Pepo bajayatami, Dioso abaxë nacua ata itsa apo exanae, Dioso najumecapanepaeya jumaitsi vajanacarajutsinexa matababi apo peverevereaejava. Dioso baja cajena apo penajumetsënëtsinë. <sup>3</sup> Nexata baja Dioso pecaëjësimatecabita, bajarapalivaisi nacayapëtaeyaexana. Nexata Dioso, vajanacacapanepaenënexa, xanë nitoroba jivi tatsipaebinexa bajarapalivaisi. Nexata xanë daxitajivi tsipaebaponajë bajarapalivaisi. <sup>4</sup> Tito, betaxënatomëcuenia tacataenë. Tsipaji cayavenonatsi xamë ata nejumecovënëtsinexa Jesucristo pelivaisi. Catoyaquinatsi mapabaxutoje. Catojitsipatsi vaxa Dioso pecayavenonaenexa, Jesucristo ata, vajanacacapanepaenënexa, pecayavenonaenexa. Catojitsipatsi pecaitaxutotsoniataenexa, pecajamatabëcuene xanepanaeyaexanaenexana.

### *Pacuenia Pablo Tito puenetanuta Cretatunaeto nacuata petonacuenebinexa Dioso pijacuene yabara pelivaisi*

<sup>5</sup> Capuenetatsi baja cajena Cretatunaeto nacujavata. Capuenetatsi nexanaponaponaenexa, xua abaxë catosajina nejamatabëcueneasaëyaexanaenexa Dioso pejumecovënëtsivi. Caitorobatsinua baja cajena caetomarapijivi canacujitsia nitapetsinexa ancianovinexa, Dioso pejumecovënëtsivi pevetsivinexa. <sup>6</sup> Nejumenamatabënapire pacuenia caitorobatsi. Itsa itapetsijitsiamë ponë ancianonënexa, itapetsianame ponë toajibitsi jivi peyabaraneconitsijavanexatsi. Caeva pepitsinë. Pexi Dioso petojumecovënëtsinëtsi. Pexi apo petoacujirubejenëtsi. Pacuenia ata pexi itoroba, pejumecovënëtsinëtsi. <sup>7</sup> Tsipaji ponë itapetsianame ancianonënexa, Dioso pijacuene tonacuenebiana. Bajaraxuata ancianonënexa, itapetsianame ponë xaniavaetsia peponaponaenë, planeconijibinë. Beayaijamatabëcuenenë apo penataenë. Bepijia apo pianapanaenë. Apo piapaenë piatajibinexa. Pevëna pebi apo pebenë. Apo pejitsipaenë itsajivi ata yamaxëitojorobiaya pevecuanacobetoxotsinexa palata. <sup>8</sup> Ancianonënexa, xanepana ponë xaniavaetsia copiapitabiaba pijabota pepatsivi. Pexaniacuene pexanaenë. Xaniavaetsia copiaya penajamatabëxainanë pacuene exanaejitsia. Xaniavaetsia peponaponaenë jivi pitabarata, Dioso ata pitabarata. Pexanaponaponaenë daxita pacuenia Dioso pejumelivaisita itoroba jivi pexanaenexa. Pecaëjëpaenëtsi penajamatabëcuenecataitsinexa pibisiacuene pexanaeyaniva. <sup>9</sup> Ancianonënexa, xanepana ponë casaë tsaponapona pejumecovënëtsijava palivaisi tsipaebatsi, pexaniajailivaisi. Bajarapacuenia nexata bajaraponë caëjëpaenatsi itsamonae ata pejamatabëcuenebatsinexa pexaniajailivaisita. Caëjëpaenatsinua xaniavaetsia pejumecanaviatsinexa pamonae jamatabëcuenenavëxaniabiaya pibisiacuena baracuaicuajai Dioso pejumelivaisi. Nexata ancianonë xaniavaetsia itsa jumecanaviatsiana pamonae pibisiacuena baracuaicuajai Dioso pejumelivaisi, bajarapamonae ata jumecovënëtsiana Dioso.

<sup>10</sup> Bajarapitsijamatabëcuenevi itapetaponaename ancianovinexa. Tsipaji raja Cretatunaeto nacuata, Dioso pejumecovënëtsivi tuatuajëta, ayaibitsaëto jinavanapa apo pejumecovënëtsivi pacuenia itorobatsi pevetsivitsi. Bajarapamonaeyajuvënëvi ayaibitsaëto judíovi. Bajarapajudíovi jumai tsabiabi: “Pamonae apo judíovi ata Jesús pelivaisi itsa jumecovënëta, bajarapamonae ata benaperabëcaucubiaexana,” jai tsabiabi. Bajarapajudíovi natsiquejemalivaisi saya cuaicuajai tsabiabi. Nexata yamaxëitojorobapona

Dioso pejumecovënëtsivi. <sup>11</sup> Bajarapajudíovi bejumeitavetame. Tsipaji saya penajumetsënëtsilivaisi jivi tsipaebapona Dioso apo pejitsipaecuenia. Bajarapajudíovi, caebopijivi canacujitsia, Dioso pejumecovënëtsivi, najamatabëcuene epatajërërëcaeyaexanapona Dioso pejumecovënëtsijavavecua. Bajarapajudíovi penajumetsënëtsilivaisi jivi tsipaebapona saya pematamotsinexatsi palata.

<sup>12</sup> Bajayata pina livaisi bitso peyapëtaenëmi ponapona Cretatunaeto nacuata. Nexata pina bajaraponëmi jumaitsi Cretatunaeto nacuapijivi yabara mapacueniaje: “Cretatunaeto nacuapijivi cajena bitso penajumetsënëtsivi. Bitso piacujirubejevi. Ayaijavanua jamatabëxaeyabiaba. Bitso afaetabinua,” jai pina cajena bajayata Cretatunaeto nacuapijinëmi. <sup>13</sup> Xaniajai baja cajena pacuenia jumaitsi bajaraponëmi. Bajara jamatabëcueneitsi Cretatunaeto nacuapijivi. Tito, nexata xamë asaëyata itorobare bajarapamonae xaniavaetsia penajamatabëcuene copatsinexa Dioso javabelia. <sup>14</sup> Itavere bajarapamonae penamuxunaevetsiyaniva judíovi pijasalinaivimi pijalivaisixi. Itaverenua bajarapamonae pejumecovënëtsiyaniva pacuenia itorobaponatsi pamona copaba pexaniajailivaisi pejumecovënëtsijavami.

<sup>15</sup> Pajivi jumecovënëta Jesucristo pesivatëpaejavatsi, bajarapajivi ajamatabëcuenexuirajibi. Bajarapajivi daxita xua tane, epexaniacuenia sivanajamatabëxaina. Nexata itsacuenejavayo ata apo jamatabëcuenebijianaetsi. Pajivi pijinia apo jumecovënëtsi Jesucristo pesivatëpaejavatsi, bajarapajivi ajamatabëcuenexuira. Nexata bajarapajivi daxita xua tane, pibisiacuenia sivanajamatabëxaina. Nexata daxitacuene jamatabëcuenebijianatsi. Pibisiacuenia exanabiabi ata, jamatejema saya ponapona. <sup>16</sup> “Xanë rabaja bitso Dioso yapëtaniji,” jai tsabiabi. Itsiata baitsi jane bajarapamonae pibisiacuenia exanavanapa. Nexata nayapëtane Dioso apo peyapëtaejava. Bajarapamonae itoya Dioso. Bajarapamonae apo jumecovënëtsi pacuenia Dioso itorobatsi. Nexata apo cajëpaetsi itsacuenejavayo ata pexaniacuenia pexanaenexa.

## 2

### *Pacuenia Pablo Tito itoroba pexaniajailivaisi jivi petsipaebaponaenexa yabara pelivaisi*

<sup>1</sup> Tito, xamë jivi livaisi itsa tsipaebabiabianame, tsipaebabiabianame epexaniajailivaisi. <sup>2</sup> Perujupetiriavi muxujobabiabianame penajamatabëcuenereviabinexa. Muxujobabiabianame xaniavaetsia pejinavanapaenexa jivi peyaiyataenexatsi. Muxujobabiabianame penajamatabëcuene cataitsinexa pibisiacuenia pexanaeyaniva. Muxujobabiabianame pexaniajailivaisi, Jesús pelivaisi, xaniavaetsia pejumecovënëtsinexa. Muxujobabiabianame daxitajivi asivaya petaenexa. Muxujobabiabianame, itsamonae bejio-biaexanae atatsi Dioso pejumelivaisi yabara, pevajënaeyabelia pecaasaënexa Dioso pejumecovënëtsijava. <sup>3</sup> Bajara pijinia pacuenia muxujobabiabianame perujupetiriavi ata jamatabëcuenereviaya pejinavanapaenexa Dioso pitabarata. Bajarapamonae pibisiacuenia itsamonae apo bebaracuacuajai. Apo biatjibi tsabiabinua. Bajarapapetiriavi itsamonae pexaniacuenia betsitaexanavanapa. <sup>4</sup> Nexata perujupetiriavi itsamonae pexaniacuenia itsa tsitaexanavanapa, jamatabëcuene cjarubiana pecovëpijipetiriavi ata xaniavaetsia pamonajivi piasivanexa, penacoxiasivanexanua. <sup>5</sup> Perujupetiriavi itorobianame pemuxujobabiabinexa pecovëpijipetiriavi ata penajamatabëcuenereviabinexa, pexaniajamatabëcuene ata penajamatabëxainaenexa. Perujupetiriavi muxujobabiabianame pijabo ata xaniavaetsia pevetsinexa, pexaniacuenia ata pexanabiabinexa, pamonajivi ata xaniavaetsia pejumecovënëtabiabinexa. Nexata juya perujupetiriavi muxujobabiabianame pecovëpijipetiriavi xaniavaetsia pejinavanapaenexa. Nexata bajarapamonae xaniavaetsia itsa jinavanapaena, itsajivi ata pibisiacuenia Dioso pejumelivaisi apo baracuacuajai tsane.

<sup>6</sup> Bajara pijinia pacuenia muxujobabiabianame pevëjëavi penajamatabëcuene cataitsinexa pibisiacuenia pexanaeyaniva. <sup>7</sup> Xamë xaniavaetsia bajarapamonae epexaniacuenia tsitaexanaponaponaenexa. Nexata bajarapacuenia

daxitajivi cacuenetaena xaniavaetsia neponaponaejava. Pexanialivaisi itsa tsipaebabiabianame, tsipaebabiabianame nejamatabëëthëtovetsina nexaniajajijumeta jamatabëcuenereviaya. <sup>8</sup> Xaniavaetsia tsipaebabiabianame pexaniajailivaisi. Bajarapacuenia itsa exanabiabianame, pecaitoyavi ata aura tsane. Tsipaji ajibi tsane pecayabarananeconitsiaexanaejava.

<sup>9</sup> Pajivi bedajubicuenia canajetatsi petonacuenebabiabinexa amoneya pijatuxanenë, bajarapajivi muxujiobabiabianame pijatuxanenë pejumecovënëtsinexa daxita pacuenia itorobatsi. Muxujiobabiabianame xaniavaetsia pijatuxanenë petonacuenebabiabinexa pesivajamatabëcuenebarëyanexatsi. Pëtsa bajarapajivi apo jejai pijatuxanenë pitorobijavatsi. Pëtsa jumaitsi pijatuxanenëjavabelia: “Jume raja. Bajarapacuenia apo xanepanae tacatoexanaenexa. Mara jane pacuenia xanepana tacatoexanaenexaje,” jai pëtsa. <sup>10</sup> Pëtsa bajarapajivi muetsia pita pijatuxanenë pijajava. Biji rajane pijatuxanenëjavabelia tsitanajamatabëcueneitajëtsi daxitacuene xaniavaetsia petonacuenebabiabijava nacobetoxotsinejeva. Bajarapacuenia itsa exanaena bajarapajivi, nexata daxitajivi yapëtaena Dioso vajanacacapanepaenënexa pejumelivaisi pexaniajailivaisicuene.

<sup>11</sup> Dioso baja cajena nacayapëtaeyaexana vajanacaitaxutotsoniataejava. Nexata Dioso nacacapanepaena daxitanacuapijivitsi. <sup>12</sup> Dioso vajanacayapëtaeyaexanaexae vajanacaitaxutotsoniataejava vajanacacapanepaenexa, nexata becopatatsi pibisiacuene vajaexanaejavami. Bitso vajajitsipaejava ata mapanacuapijicuene vajaxainaenexa, becopatatsi. Dioso rajane jitsipa mapanacuata nayajivitaeya vajajinavanapaenexa pibisiacuene vajaexanaeyaniva. Nexata Dioso pejitsipaecuena betoexanavanapatsi. Dioso cunjaviaya xaniavaetsia bejinavanapatsi. <sup>13</sup> Bajarapacuenia Dioso cunjaviaya xaniavaetsia bejinavanapatsi paepatojebi Jesucristo copiaevetavanapatsi icatsia pepatsijavanexatsica. Nexata icatsia pamatacabi Jesucristo patsianica, sivajamatabëcuenebarëyatsi tsane. Pacuenia Dioso tajëvelia najumecapanepaeya nacajumaitsi Jesucristo pepatsijavanexatsica, bajarapacuenia xaniajai Jesucristo patsianica. Jesucristo rabaja cajena, pinijiDiosonë, vajanacacapanepaenexa. Bajaraponë penivenivenaecotia yajavapatsianica. <sup>14</sup> Bajaraponë pijacuata tonacaeveta pijavajabitsaë pebeyaxuabinexatsi. Nexata Jesucristo itsa beyaxuabatsi, pijanata nacacomuata pibisiacuene vajaexanaeiconivecua. Nacavecuajibiaexana baja bajarapaneconimi Jesucristo pijajivitsi vajanacaexanaenexa. Nacajitsipaeyaexananua épexaniacuene Jesucristo vajatoexanaenexa.

<sup>15</sup> Daxita bajarapacuenia muxujiobaponaenename. Jamatabëcuenebabataponaenename asaëya bajarapamonae. Asaëya muxujiobabiabianame pibisiacuene itsa exanapona. Bajarapacuenia muxujiobabiabianame Dioso pecatocopatsixae bajarapacuenia nexanaponaenexa. Pëtsa copatame itsajivi ata bijiaya pecataenexa.

### 3

#### *Pacuenia Dioso pejumecovënëtsivi pexaniacuene bexanavanapa yabara pelivaisi*

<sup>1</sup> Dioso pejumecovënëtsivi, Cretatunaeto nacuapijivi, najamatabënapitsiaexanaenename yaiyataeya pejumecovënëtsinexa gobierno pitorobilivaisi, pejumecovënëtsinexanua gobierno pijajivi ata. Itorobianamenua bajarapamonae pexanaenexa daxitaxua pexaniacuene. <sup>2</sup> Muxujiobabiabianame bajarapamonae itsajivi ata pibisiacuena pebaracuaicuaijainiva. Muxujiobabiabianame bajarapamonae, itsamonae itsacueniabi atatsi, pecueneconaviatsiyaniva. Muxujiobabiabianame bajarapamonae pexaniajamatabëcuena pebarëcuaicuaijainexa daxitajivijavabelia. Itorobianamenua daxitajivivecua beveliamatabëcuenevi nataeya pejinavanapaenexa.

<sup>3</sup> Itsa abaxë vaxaitsi ata Dioso apo jumecovënëtsitsi, saya picani jema jinavanapatsi. Apo exanavanapaetsi pacuenia Dioso nacaitoroba. Apo exanavanapaetsinua pacuenia nacuaeetsivi ata nacaitoroba. Naxuabiaya saya jinavanapatsi Dioso pejumelivaisivecua. Pibisiacuene, pacuene vajavitota jamatabëexanatsi, exanavanapatsi. Pacuene ata nacajamatabëcuenebarëyayaexana, exanavanapatsi. Pibisiacuene bitso exanavanapatsi itsamonaejavabelia. Itsamonae cuenecaëbabiabatsi. Daxitajivi

nacaitoya tsabiabi. Vaxaitsi ata namataenetsia naitoyatsi tsabiabi. <sup>4</sup> Bajara vajait-sivimi ata, itsiata Dioso, vajanacacapanepaenënexa, nacayapëtaeyaexana vajanacaitax-utotsoniataecuene. Nacayapëtaeyaexananua pacuenia ata Dioso nacaasiva daxitatsi mapanacuapijivitsije. <sup>5</sup> Dioso nacacapanepaena vajaneconivecua. Itsiata baitsi jane pexaniacuene vajaexanaejava yabara, Dioso apo nacacapanepae tsane. Jume baja cajena. Dioso raja nacacapanepaena tsipaji nacaitaxutotsoniataene. Nexata nacajamatabëcuenequiata. Dioso vajanacaitaxutotsoniataexae, nacacapanepaena. Espiritu Santo pejamatabëcueneta pejanajamatabëcuenevitsi baja nacaexana. <sup>6</sup> Dioso baja cajena ayaicuenia vajanacayavenonaenexa, Espiritu Santo nacatoitorobica vaxaitsijavabetsica. Bajarapacuenia Dioso Espiritu Santo nacatoitorobica Jesucristo vajanacapanepaenënexa pejamatabëctsoniatane. Nexata nacajamatabëcuenequiata. Dioso vajanacaitaxutotsueneta. <sup>7</sup> Bajaraxuata Dioso vaxaitsi yabara jumaitsi: “Bajarapamonae baja aneconijibia taniji,” jai Dioso. Tsipaji nacaitaxutotsoniataene. Nexata vaxaitsi xainaenatsi matababi apo pevereverecaejava, xua copiaevetavanapatsi.

<sup>8</sup> Daxita baja palivaisi pacatoyaquinatsi, pexaniajailivaisi cajena. Nexata jitsipajë ajumesaëya jivi netsipaebaponaenexa bajarapalivaisi. Nexata Dioso pejumecovënëtsivi ëpexaniacuene pexanaenexa pejamatabëcueneenaenexatsi. Bajarapalivaisi bitso xanepana daxitajivi pejumecovënëtsinexa. <sup>9</sup> Nexata navecuaitavetsianame saya jema natsiquejemalivaisixi itsamonae pecabarëcuaicuaijaiyaniva. Navecuaitavetsianamenua judíovi pijasalinaivimi pevënëxi yabara pecabarëcuaicuaijaiyaniva. Navecuaitavetsianamenua Dioso Moiséspijinëta penajumecopatsilivaisi yabara anaeya pecajumenotsiyaniva. Bajarapacuenia pecabarëcuaicuaijajava apo xanepanae tsipae itsacuenejavayonexa ata.

<sup>10</sup> Itsamonae penajumetsënëtsilivaisi jivi tsipaebapona. Nexata bajarapamonae penajumetsënëtsilivaisita Dioso pejumecovënëtsivi navecuanatsanaeyaexanapona. Bajarapamonae jumeitavetsianame. Anijatobeje ata jumeitavetsianame. Nexata bajarapamonae copatsiana penajumetsënëtsilivaisi jivi petsipaebaponaejava. Jumeitavetsi atamë, itsiata itsa apo cajumecovënëtsi tsane, nexata bajarapamonae itorobianame itsajavabelia peponaenexa. <sup>11</sup> Yapëtaneme rabaja mapacuneje. Ponë peneta copata pexaniajailivaisi pejumecovënëtsijavami, pibisiacuene exana. Nexata bajarapone nanekonita Diosojavabelia pibisiacuene pexanaexae.

*Pacuenia icatsia Pablo itsalivaisi toitoroba Tito asaëya Dioso petonacuenebinexa yabara pelivaisi*

<sup>12</sup> Catoitorobialiatzi Artemas. Itsa jume, catoitorobialiatzi Tíquico. Bajarapone itsa patsialia xamëjavabelia, nexata xamë bepíjia renamë tsane xanëjavaberena. Nacaxitajarabianatsibeje Nicápolis tomarata. Daxita emarapae raja ponaponaenajë Nicápolis tomarata. <sup>13</sup> Itsa baja pacavecuaponaena Zenasbeje Apolosbeje, nexata yavenonaename pacuenia namatavenonaenabeje pijanamutobejenexa. Zenas raja abogadonë, penaneconitsivi peyavenonaeyacuaicuaijainë. Rajutsianame pacuenia namatavenonabeje, itsacuenejavayo ata petosajinaeyanivatsibeje itsa najetarucabeje namuto. <sup>14</sup> Pamonaë vaxaitsi pexanialivaisi tsipaebatsi, bajarapamonae tojitsipajë peyapëtaenexa xua pexaniacuene. Nexata ëpexaniacuene pexanaenexa. Nexata bajarapamonae tojitsipajë asaëya penacuenebinexa, peyavenonaenexa pamonaë bitso bepejiobivi. Pëtsa saya bajarapamonae jinavanapa nacuenebinejeva.

*Pacuenia Pablo itsamonae jamatabënajina yabara pelivaisi*

<sup>15</sup> Daxita pamonaë yajavaponaponajë, cajamatabënajinalia. Pajamatabënajinaliajë daxita pamonaë pataniasivavi, Dioso pejumecovënëtsivi. Pacatovajëtatsi Diosojavabelia daxita paxamë Dioso papecayavenonaenexa.

## Mapabaxutoje San Pablo toyaquina Filemónjavabelia

### *Pacuenia Pablo mapabaxutoje toyaquina Filemónjavabelia yabara pelivaisi*

<sup>1</sup> Xanë Pablonë, Jesucristo pijajivitonëxaenë, Jesucristo pelivaisi jivi tsipaebabiabajë. Bajaraxuata nenaneconitsiaexana. Nexata penaneconitsivi pejubabiabibota naneconitsiaponaponajë. Filemón, paxanëbeje vajabananë Timoteobeje, bitso pacaasivatsibeje patacayajavanacuenebabiabinëxaebje. Paxanëbeje, pacatoyaquinatsibeje mapabaxutoje. <sup>2</sup> Patoyaquinajëbejenua mapabaxutoje pamonaë Dioso pejumecovënëtsivi, nijabota penacaetuatabiabi. Patoyaquinajëbejenua mapabaxutoje vajabanava Apiavënëva ata. Patoyaquinajëbejenua mapabaxutoje Arquipovënëna ata. Pacuenia xanë Dioso pijacuene tonacuenebabiabajë, bajarapacuenia Arquipo ata Dioso pijacuene tonacuenebabiaba. <sup>3</sup> Pacatovajëtabiabat si vaxa Diosojavabelia, vajatuxanenë Jesucristojavabelia ata, papecaitaxutotsoniataenexa jamatabëcuenexanepanaeya panejinavana paenexa.

### *Pacuenia Pablo tovajëta Filemón Diosojavabelia yabara pelivaisi*

<sup>4-5</sup> Filemón, cavënëlivaisitanetsi niasivajava vajatuxanenë Jesucristo, daxita Dioso pejumecovënëtsivi yajava. Cavënëlivaisitanetsinua nenajamatabëcuenecopatsijava pepo petuxanenë Jesúsjavabelia. Bajaraxuata itsa cajamatabënajinatsi, catovajëtabiabat si Diosojavabelia. Nexata pexaniajamatabëcuene rajutabiabajë Diosojavabelia xamë yabara. <sup>6</sup> Pamonaë ata Diosojavabelia najamatabëcuenecopaba xamë pexanialivaisi netsipaebixae, bajarapamonaë ata tovajëtabiabajë Diosojavabelia. Tovajëtabiabajë bajarapamonaë xaniavaetsia peyapëtaenexa Dioso vajanacayavenonabiabijava Jesucristo pijajivixae. <sup>7</sup> Itsamonaë ata Dioso pejumecovënëtsivi niasivaxae, casivajamatabëcuenebarëyatsi. Cavënëlivaisimuxua najamatabëcueneesaëtsi. Tsipaji daxita Dioso pejumecovënëtsivi jamatabëcuenebabatabiabame.

### *Pacuenia Pablo itoroba, Filemónjavata Onésimo itsa pata, xaniavaetsia Filemón pecopitsinexa yabara pelivaisi*

<sup>8</sup> Xanë Cristo taneitorobinëxae, nejamatabëcuenecaëjëpa picani tacaitorobinexa xua bexaname Dioso pecasivabarëyanexa. Itsiata baitsi jane apo caitorobi tsanetsi. <sup>9</sup> Tacaasivaxae, saya pexaniacuena cavajëtsi pexaniacuene tanetoexanaenexamë. Xanë Pablonë, perujunëna baja. Maparucæje naneconitsiaponaponajë penaneconitsivi pejubabiabibota Jesucristo pijajivitonëxaenë. <sup>10</sup> Majotaje, xanëjavata, nijajivitonë Onésimo patajopa, pecavecuanajetabjiravinë. Nexata cavajëtsi pexaniacuene tanetoexanaenexamë Onésimojavabelia. Onésimo raja betaxënatocuenia tataenë pejumecovënëtsixae Jesucristo pelivaisi. Pexanialivaisi, Jesucristo pelivaisi, Onésimo tatsipaebixae, jumecovënëta baja Jesucristo pelivaisi. Jesucristo pelivaisi Onésimo jumecovënëta majotaje, penaneconitsivi pejubabiabibota.

<sup>11</sup> Onésimo baja cajena bajayata bedajubinëcuenia comuatame amoneya nijabota pecatonacuenebabiabinexa. Nexata bajarapamatacabi catonacuenebi ata, itsiata itsacuenejavayo ata xaniavaetsia apo catonacuenebi. Itsiata baitsi jane maparucæje Jesucristo baja pelivaisi Onésimo pejumecovënëtsixae, xanënexa xaniavaetsia netonacuenebaponapona. Nexata baja aeconoxae itsa naviatsipa xamëjavabelia, xamënexa ata xaniavaetsia catonacuenebijitsipa. <sup>12</sup> Nexata icatsia Onésimo catoitorobaliatsi mapabaxuto yajavaje. Copiapitsianame xaniavaetsia. Tsipaji Onésimo bitso tasivanë. Itsa baja ponaponaena xamëjavatalia, jamatabënajinabiabianajë bitso. <sup>13</sup> Naneconitsiaya ponaponajë penaneconitsivi pejubabiabibota pexanialivaisi, Jesucristo pelivaisi, jivi tatsipaebabiabixae. Bitso picani Onésimo asivanë xanëjavata peponaponaenexa. Nexata Onésimo itsa ponaponaëjitsipa xanëjavata, neyavenonaponaëjitsipa xaniavaetsia. Taneyavenonaenexa, betanetoitorobinëmëcuenia neyavenonabiabijitsipa.

<sup>14</sup> Itsiata baitsi jane apo jitsipaenë Onésimo taneyavenonaponaponaenexa copiaya cavajëtsinejevatsi. Apo jitsipaenënu tacavajëtsinexa tanetocopatsinexamë bajaraponë taneyavenonabiabinexa. Biji rajane picani jitsipajë cavajëtsinejevatsi nijacuate tanetocopatsinexamë bajaraponë. <sup>15</sup> Onésimo picani itsa cavecuanajetabajirava, cavecuanatsata caematacabibeje. Itsiata baja icatsia aeconoxae xamëjavabelia naviatsijitsialia. Nexata jane baja daxitamatacabijavabelianexa nijajivitonë tsaponaponae tsane. <sup>16</sup> Pëtsa baja taneme saya nijajivitonëcuenia. Biji rajane nijajivitonë ata, Dioso pejamatabëcueneta asivaya taeneme benejuyapijinëcuenia. Xanë picani bitso asivanë Onésimo. Itsiata xanë bajaraponë tasivajava matatoxenetsia, xamë bitso asivamë tsane. Tsipaji xamë bajaraponë nijajivitonë. Nejuyapijinënu baja Dioso pejamatabëcueneta.

<sup>17</sup> “Pablobeje rabaja patanajuaponaponaenëbeje,” itsa nesivajamatabëjamë tsane, nexata Onésimo xaniavaetsia copiapitsianame, pacuenia xanë necopiapitabiabame. <sup>18</sup> Onésimo itsa catonaneconita, itsa camoneyabanua, nexata xanë bajaraxuamatamo neyanijobianame. <sup>19</sup> Peneta raja paitanebërëtoyo jumaiti: “Xanë Pablonë. Camatomtsianatsi cajena,” jai, xanë tajacuata tacobeta yaquinajë. Itsiata pijinia pacuenia niamoneyabame, apo catoitajëtsitsi. Tsipaji itsa catoitajëtsipatsi pacuenia niamoneyabame, nexata jitsipaejitsipame daxitanëmë, nejamatabëcuene yajava, tanerajutsinexamë. <sup>20</sup> Tajabananë, pacuenia cavajëtatsi, xaniavaetsia copiapitsianame Onésimo Jesucristo pijajivitonëxaemë. Xaniavaetsia Onésimo itsa copiapitsianame, bitso nejamatabëcuenebarëyaya exanaeneme.

<sup>21</sup> Catoyaquinatsi mapabaxutoje tsipaji yapëtaniji tanejumecovënëtsijavanexa tacaitorobicuenia. Casivajamatabëjumaititsi mapacueniaje: “Filemón cajena taitorobicuenia matatoxenetsia xaniavaetsia copiapitsiana Onésimo,” casivajamatabëjaiti. <sup>22</sup> Caecuenia tavajënaeyabelia cavajëtatsi tavajënaelia nijabota tanetoxaniavaetsinexamë, itsajota patsijitsianë itsa ponajë paxamëjavabelia. Tsipaji bajayajebi panetovajëcabiabame Diosojavabelia tapatsinexa paxamëjavabelia. Nexata jamatabëjumaitinë: “Pacuenia bajarapamonae netovajëcabiaba Diosojavabelia, bajarapacuenia Dioso netocopatsiana,” jamatabëjanë taponaponaenexa paxamëjavabelia.

*Pacuenia itsamonae jamatabënajinatsi Filemón yabara pelivaisi*

<sup>23</sup> Epafra, ponëbeje panajuaponaponaenëbeje penaneconitsivi pejebabiabibota Jesucristo pijinia pijajivitonëxae, bajaraponë cajamatabënajinalia. <sup>24</sup> Cajamatabënajinalia Marcos ata, Aristarco ata, Demas ata, Lucas ata. Cajamatabënajinalia daxita bajarapamonae patanajuanaacuenebivi Dioso pijacuene. <sup>25</sup> Pacatovajëtabiabatsi Diosojavabelia vajatuxanenë Jesucristo papecayavenonabiabinexa.

## Mapabaxutoje Dioso pijajivitonē toyaquina judíovijavabelia

*Pacuenia Dioso pexēnato itoroba jivijavabelia petocuaicuaijainexatsi yabara pelivaisi*

<sup>1</sup> Bajayatami Dioso anijatonē najamatabēcueneitajētabiaba Diosojumepaebivi profetavijavabelia. Nexata juya profetavi tsipaebabiaba vajasalinaivimijavabelia pacuenia Dioso itorobatsi. Bajarapacuenia Dioso najamatabēcueneitajētabiaba profetavijavabelia matababita bemajitsinaebocuenia. Itsajavata Dioso najamatabēcueneitajētabiaba profetavijavabelia meravi majitsinaebota. Itsajavata pepacuene Dioso rovialexa barēcuaicuaijai tsabiabi profetavijavabelia. Nexata juya profetavi tsipaebabiaba vajasalinaivijavabelia pacuenia Dioso itorobatsi. <sup>2</sup> Nexata jane baja aeconoxae, mapamatababitate, Dioso itorobica pexēnato vajanacatsitanajamatabēcuene itajētsinexa, vajayapētaenexa Dioso vajanacatojitsipaejava. Bajayata Dioso itoroba pexēnato pexanaenexa mapanacuaje, daxitacuene yajava. Nexata daxitacuene mapanacuateje Dioso pexēnato tocopata pevetsinexa. <sup>3</sup> Nexata pacuenia Dioso bitso ayaijamatabēcuenenē, pexaniajamatabēcuenenēnua, bajara pijinia Dioso pexēnato ata jamatabēcueneitsi. Dioso pexēnato caējēpatsi daxitacuene pexanaenexa pijumesaēta. Nexata pijumeta itsa itoroba mapanacuaje penaexanaenexa, daxitacuene yajava naexana. Bajaraponē pexanaecujinae mapanacuaje, bajaraponē pejamatabēcueneta abaxē tsiteca xanepana mapamatababijavaberena ataje. Bajaraponē nacasivatēpa cruzata vajanacavecuaxuabinexa pibisiacuene vajaexanaeneconimi. Bajaraxuacujinae pona jane baja athēbēabetsia peacaenexa paxa Dioso pemuxuneneta, pecujuanenia, penajuaevetsinexabeje daxitacuene.

*Pacuenia Dioso pexēnato bitso ayaijamatabēcuenenē ángelevi matatoxenetsia yabara pelivaisi*

<sup>4</sup> Dioso pexēnato bitso ayaijamatabēcuenenē ángelevi matatoxenetsia. Bajarapajamatabēcuene yapētanetsi. Tsipaji Dioso pexēnato tocopata daxitacuene pevetsinexa. Dioso saya ángelevi tocopata beveliajamatabēcuenejava pevetsinexa. <sup>5</sup> Dioso baja cajena jumaitsi pexēnatojavabelia mapacueniaje:  
Xamē raja taxēnatomē. Xanē raja axanē,  
jai Dioso.

Dioso icatsia jumaitsi pexēnato yabara mapacueniaje:  
Xanē raja bajaraponē paxanē. Xanē raja bajaraponē taxēnato,  
jai Dioso pexēnato yabara.

Bajarapacuenia Dioso apo jumaitsi ángelevi yabara. Biji rajane Dioso pexēnato yabara jumaitsi. Bajaraxuata nayapētane Dioso pexēnato bitso ayaijamatabēcuenenēcuene ángelevi matatoxenetsia. <sup>6</sup> Pacujinae Dioso itorobijitsiatsica pepo caenē pexēnato mapanacuata penaexanaenexa, Dioso jumaitsi pexēnato yabara mapacueniaje:  
Daxita tajajivi, ángelevi, pematabacabēta tonubenaena ayaijamatabēcuene perajutsinexa bajaraponējavabelia,  
jai Dioso pexēnato yabara.

<sup>7</sup> Dioso icatsia jumaitsi ángelevi yabara mapacueniaje:  
Tajajivi, ángelevi, tanelivaisipaebinxexa, bepijia pona pacuenia jovibo. Bajarapamonae beisotocotiata verebiabiana daxita pamonaenaneconita xanējavaberena,  
jai Dioso ángelevi yabara.

<sup>8</sup> Itsiata baitsi jane icatsia Dioso pexēnatojavabelia jumaitsi mapacueniaje:  
Diosomē, daxita xua evetame, daxitamatababijavabelianexa evetsianame. Xua xamē evetame, xaniavaetsia evetabiabianame. <sup>9</sup> Xamē jitsipame jivi pexaniacuene pexanaejava. Apo jitsipaemē pibisiacuene pexanaejava. Bajaraxuata xanē,

nijaDiosonē, cajamatabēcuenēbarēyayaexanatsi. Cajamatabēcuenēbarēyayaexanatsi daxita itsamonae matatoxenetsia, jai Dioso pexēnatojavabelia.

<sup>10</sup> Icatsia Dioso pexēnatojavabelia jumaitsi mapacueniaje:

Xamē petuxanenēmē. Itsa abaxē daxitacuene ajibi, xamē exaname mapanacuaje. Nesaēta exaname daxita itaboxopijicuene yajava. Xua jivi apo tae, bajaraxua ata exaname. <sup>11</sup> Daxita bajaraxua, nexanaejava, vereverecaena. Itsiata baitsi jane xamē apo vereverecaemē tsane daxitamatacabijavabelianexa. Daxita xamē nexanaejava, perujujava naexanaena. Pacuenia jivi penaxatatsijava, perujujava banaexana, bajara pijinia itsi tsane nexanaejava. <sup>12</sup> Pacuenia jivi baquiona penaxatatsijava, bajarapacuenia itsamatacabi xamē quionaename itaboxo, ira yajava, pejananacua icatsia nexanaenexa. Itsiata baitsi jane xamē tsitecaename. Apo vereverecaemē tsane,

jai Dioso pexēnatojavabelia.

<sup>13</sup> Dioso baja cajena caeto ata ángeleviyajuvēnēnējavabelia apo jumaitsi mapacueniaje: Ecare abaxē tacujuanenia daxitacuene vajanajuaevetsinexabeje. Nijavajabitsaē abaxē copiaya vecatsivajēnae jumecovēnētsiaexanaenatsi nitorobicuenianexa, apo jai Dioso ángeleviyajuvēnēnējavabelia.

Biji rajane Dioso pexēnatojavabelia bajarapacuenia jumaitsi. <sup>14</sup> Daxita ángelevi apo taetsi vajaitaxutota. Bajarapamonae saya Dioso tonacuenebabiaba pacuenia Dioso itorobatsi. Nexata ángelevi yavenona pamonaē jumecovēnēta Dioso pecapanepaejavanexatsi.

## 2

*Pacuenia apo benamuxujematitsi pexaniajailivaisi Dioso vajanacapanepaenexa yabara pelivaisi*

<sup>1</sup> Dioso pexēnato bitso ayaijamatabēcuenenē ángelevi matatoxenetsia. Bajaraxuata vajanacatsipaebilivaisi xaniavaetsia benamuxunaevetatsi. Bitso baja cajena pexaniajailivaisi nacatsipaeba. Nexata vajavajēnaeyabelia asaēyata bejumecovēnētatsi bajarapexaniajailivaisi vajajumecovēnētsijava, itsamatacabijavabelia ata vajacopatsiyaniva. <sup>2</sup> Bajayata palivaisi Dioso najumecopata Moiséspijinēta, Dioso najumeitoroba ángelevita. Nexata juya ángelevi bajarapalivaisi tsipaeba Moiséspijinējavabelia. Xaniajai baja cajena bajarapalivaisi. Pamonaē apo jumecovēnētsi bajarapalivaisi, paneconivajēto xaina, bajarapaneconivajētota Dioso naneconitsiaexanatsi. <sup>3</sup> Itsa namuxujematatsi papinijicueneta Dioso nacacapanepaejitsia, ¿detsa pacuenia nacacajēpaejitsipa vajacuata vajanacapanepaenexa? Ajibi. Vajatuxanenē Jesucristo baja cajena copiaya tsipaeba itsamonaejavabelia pacuenia capanepaejitsia daxitajivi. Nexata bajarapamonae yapētane bajarapalivaisi pexaniajailivaisicuene. Nexata juya bajarapamonae vaxaitsijavaberena nacatsipaeba bajarapalivaisi. <sup>4</sup> Nexata nayapētane bajarapamonae vajanacatsipaebilivaisi pexaniajailivaisicuene. Tsipaji Jesucristo petsipaebilivaisitsi, jivi itsa tsipaebavanapa, Dioso pesaēta pinijicuene pexanaejavanē tsitaexanapona. Bajarapamonae pivitanevi ata jamatejemayaexanapona. Petēpaevi ata icatsia asaēyaexanapona. Espíritu Santo ata jamatabēcuenē caējēpaeyaexanaponatsi, caejivi canacujitsia, bajarapamonae pexanaenexa pacuenia Dioso tojitsipatsi.

*Pacuenia baja Jesucristo naexana bejivitonēcuenia yabara pelivaisi*

<sup>5</sup> Papejananacua yabara pacatsipaebatsi, Dioso baja itsa exanaena bajarapanacua, Dioso apo tocopatsi tsane ángelevi pevetsinexa. Biji rajane jivi tocopatsianatsi pevetsinexa bajarapanacua. <sup>6</sup> Tsipaji Dioso pejumelivaisibaxutota, tajēvelia jumaitsi pacuenia jivi ayaijamatabēcuenēvi Dioso exanaejitsiatsi ángelevi matatoxenetsia. Bajaraxua yabara Dioso pejumelivaisibaxutota jumaitsi mapacueniaje:

Diosomē, jivi matatoxenetsia bitso ayaijamatabēcuenenē atamē, ¿detsa xuajitsia itsiata jivi sivanajamatabēxainame nevetsinexa? <sup>7</sup> Jivi itsa exaname, ángelevivecua jivi beveliajamatabēcuenēvi exaname. Bajarapacuenia picani exaname. Itsiata baitsi jane aeconoxae jivi pecajumecovēnētsixae, ayaijamatabēcuenēvi baja exaname

ángelevi matatoxenetsia. <sup>8</sup> Nexata itsamatacabi tocopatsianame jivi pevetsinexa daxitacuene nexanaejava,  
jai Dioso pejumelivaisibaxutota Dioso pejumecovënëtsivi yabara.

Bajarapacuenia Dioso itsa tocopatsiana daxitacuene Dioso pexanaejava jivi pevetsinexa, itsacuenejavayo ata Dioso apo vecuacopatsi tsane jivi pevetsiaexanaejava. Itsiata baitsi jane abaxë apo taetsi vajaitaxutota jivi pevetsijava daxita bajaraxua. <sup>9</sup> Pamatacabi Jesús bejivitonëcuenia naexana mapanacuataje, bajaraponë ata ángelevivecua beveliajamatabëcuenenë picani naexana. Dioso pitaxutotsoniataexae daxita mapanacuapijivije, Dioso pexënato itorobica penaexanaenexa mapanacuata, pesivatëpaenexa daxitajivi pijaneconi yabara. Jesús baja daxitajivi pesivatëpaexae, aeconoxae baja Dioso tocopatatsi Jesús athëbëtatsia peecaenexa paxa Dioso pemuxuneneta.

<sup>10</sup> Dioso baja cajena daxitacuene natoexana bajaraponënexa. Dioso daxitacuene pexanaecujinae, Dioso abaxë pejamatabëcueneta daxitacuene tsiteca xanepana mapamatacabijavaberena ataje. Daxita pamonaie jumecovënëtatsi, pexicuenia petaevi, Dioso jitsipa pebarëevetsinexa daxitacuene Dioso pexanaejava. Bajaraxuata Dioso tocopata Jesucristo cruzata ayaicuenia bepejiobiaexanaenexatsi. Nexata Jesucristo capanepaena daxita pamonaie najamatabëcuenecopata Jesucristojavabelia, peyajavaponaponaenexa Dioso pijapenivenivenaenacuataatsia. <sup>11</sup> Jesucristo bajacajena jivi tsata Dioso pijajivinexa. Nexata pamonaie Jesucristo tsata Dioso pijajivinexa, bajarapamonaie, Jesús yajava, benacaeaxapijivi baja tanetsi Dioso. Bajaraxuata Jesús, Dioso pexënato, pijajivi yabara itsa cuaicuaijai, apo ajumeura: “Tajuyapijivi,” pejaijava. <sup>12</sup> Jesús pijajivi yabara pejumaitsijavanexa, Dioso pejumelivaisibaxutota tajëvelia jumaitsi mapacueniaje:

Taxa Diosomë, tajuyapijivijavabelia cavajunupaebianatsi. Nexata daxita bajarapamonaie tabarënaeatsijavata, xamënexa catonaxëanaenatsi, tanaxëanaejavata ayaijamatabëcuene tacarajutsinexa,

jai Dioso pejumelivaisibaxutota Jesús paxa Diosojavabelia pejumaitsijavanexa.

<sup>13</sup> Jesús icatsia pijajivi yabara pejumaitsijavanexa, Dioso pejumelivaisibaxutota tajëvelia jumaitsi mapacueniaje:

Xanë ata najamatabëcuenecopatsianajë taxa Diosojavabelia taneyavenonaenexa pacuenia najamatabëcuenecopaba tajuyapijivi,

jai Dioso pejumelivaisibaxutota.

Jesús icatsia pijajivi yabara pejumaitsijavanexa, Dioso pejumelivaisibaxutota tajëvelia jumaitsi mapacueniaje:

Yajavaponaponaie baja mapamonaieje, Dioso pexi tanetocopatsivi tatoevetsinexa,

jai Dioso pejumelivaisibaxutota.

<sup>14</sup> Vaxaitsi, Dioso pexitsi, mapanacuata jinavanapatsi. Bajaraxuata Jesús ata naexana mapanacuataje, pacuenia vaxaitsi banaexanatsi, peponaponaenexa mapanacuataje. Nexata Jesús penaexanaexae mapanacuataje pacuenia vaxaitsi banaexanatsi, caëjëpatsi pebeyaxuabinexatsi vajanacasivatëpaenexa. Jesús baja itsa nacasivatëpa, jamatabëcuenematatoxeneta dovathi. Nexata baja copiaruca dovathi vajanacaitorobabiabijava. Nexata jivi tēpae ata tsane, itsiata icatsia asaë tsane petëpaecujinae. <sup>15</sup> Bajarapacuenia Jesús vajanacasivatëpaexae, nacavecuajibiaexana baja vajacujunavabiabijavami, vajatëpaejava. Vajatëpaejava picani cujunavabiabatsi daxita vajajinavanapaematacabanë. <sup>16</sup> Jesús baja cajena patsica mapanacuayabetsicaje, jivi peyavenonaenexa, pamonaie Abrahampijinë pepo pemomoxi, baitsi Dioso pejumecovënëtsivi. Jesús apo patsi peyavenonaenexa ángelevi. <sup>17</sup> Bajaraxuata Jesús naexana mapanacuataje pacuenia vaxaitsi banaexanatsi, jivi petocuaicuaijainexa Diosojavabelia. Jesús nacaitaxutotsoniatane. Nacatoexana pexaniacuene. Jesús nacatoexana pacuenia Dioso itorobatsi vajanacatoexanaenexa. Jesús pijacuata nacopata pebeyaxuabinexatsi, bajaraponë pejamatabëcueneta Dioso

vajanacavecuajibiaexanaenexa pibisiacuene vajaexanaeconimi. <sup>18</sup> Nexata Jesús jamatabëcuenecaëjèpatsi peyavenonaenexa pijajivi, dovathi pejamatabëcueneëjètsivitsi. Tsipaji baja copiaya Jesús ata jamatabëcueneëjètatsi dovathi. Bejibiaexanatsinua.

## 3

*Pacuenia bitso Jesús ayaijamatabëcuenenë Moiséspijinë matatoxenetsia yabara pelivaisi*

<sup>1</sup> Tajamonae, Dioso papijajivimë, Dioso pacajunata papijajivinexamë. Nexata xaniavaetsia pacanaëjère Jesucristo yabara. Bajaraponë Dioso nacatoitorobica vajanacatsipaebinea Dioso pejumelivaisi, vajanacatocuaicuaijainexanua vajatuxanenë Diosojavabelia. <sup>2</sup> Bajayatami Moiséspijinë daxita Dioso pijajivi toevetabiaba Dioso pitorobicueniatsi. Bajara pijinia pacuenia Jesús ata mapanacuataje jumecovënëta Dioso pitorobicueniatsi. <sup>3</sup> Nexata Jesús jivi pecapanepaenëxae, ayaijamatabëcuenenë Moiséspijinë matatoxenetsia. Pacuenia bo pexainaenë, ayaijamatabëcuene xaina pijajivitonë matatoxenetsia, bajara pijinia pacuenia Jesús ayaijamatabëcuenenë Moiséspijinë matatoxenetsia. <sup>4</sup> Caebo canacujitsia tanetsi jivi pexanajebixae bajarapabonë. Itsiata baitsi jane mapanacuata Dioso pexanaejavanëta, jivi exanejeba bonë. <sup>5</sup> Bajayata Moiséspijinë Dioso itorobatsi daxita Dioso pijajivi petoevetsinexa xaniavaetia. Nexata Moiséspijinë Dioso pijajivi itsa tovetaponapona, tajëvelia itorobatsi petsipaebinea jivijavabelia pacuenia itsamatacabijavabelia Dioso jumaitisijitsia pijajivijavabelia. <sup>6</sup> Cristo Dioso pexënatoxae, xaniavaetsia toveteta paxa Dioso pijajivi. Vaxaitsi baja Dioso vajajumecovënëtsivi, Dioso nacatane pijajivitsi. Tsipaji baja nacayajavaponapona Jesucristo. Bajarapacuenia vajavajënaeyabelia Dioso nacataeponaena xaniavaetsia Jesucristo itsa jumecovënëtanapaenatsi vajatëpaejavabelianexa. Jamatabëcuenebarëyaya jinavanapatsi. Tsipaji yapëtanetsi Dioso pexaniajaicuene vajanacacapanepaenexa.

*Pacuenia Dioso pejumecovënëtsivi tocopatatsi pejonenexa Dioso pijanacuayabetsia yabara pelivaisi*

<sup>7-8</sup> Jesucristo baja cajena ayaijamatabëcuenenë Moiséspijinë matatoxenetsia. Angelevi ata matatoxenetsia ayaijamatabëcuenenë. Bajaraxuata Espiritu Santo Dioso pejumelivaisibaxutota jumaitis mapacueniaje:

Ajena, mapamatacabitaje, itsa pajumetaneme pacuenia Dioso jumaitis, pëtsa pajamatabëcuenetajamë panejumecovënëtsinexa. Pacuenia bajayata panijasalinaivimi ajamatabëcuenetaja baja, pëtsa paitsimë. Bajarapamonaemi pamatacabi petusato nacuata jinavanapa, apo jitsipae pexanaenexa pacuenia Dioso itorobatsi. Bajarapacuenia bajayajebi Dioso apo jumecovënëtsi ata, bajarapamonaemi itsiata abaxë Dioso apo verebiabitsi. <sup>9</sup> Bajarajota petusato nacuata panijasalinaivimi jamatabëitonotabiaba Dioso. Apo jumecovënëtsi pacuenia Dioso itorobatsi pejinavanapaenexa. Cuarenta picani pavaijebe Dioso ayaicuene pexanaejavanë, tsitaexanapona bajarapamona peyavenonaenexa. Bajaraxua panijasalinaivimi taeyabiabi ata, itsiata Dioso apo jumecovënëtsi. <sup>10</sup> Bajaraxuata Dioso baraanaepana panijasalinaivimijavabelia. Nexata panijasalinaivimi yabara Dioso najumecapanepaeya jumaitis: “Najamatabëxainabiaba saya ëpibisiacuene yabara. Apo jitsipae pejinavanapaenexa pacuenia picani tojitsipajë,” jai Dioso. <sup>11</sup> Bajaraxuata Dioso bitso baraanaepana panijasalinaivimijavabelia. Nexata Dioso najumecapanepaeya jumaitis: “Bajarapamona apo jone tsane xanëjavaberena. Nexata apo jinavanapae tsane itsajota picani toxaniavaetajë pejinavanapaenexa,” jai Dioso,

jai Espiritu Santo panijasalinaivimi yabara Dioso pejumelivaisibaxutota.

<sup>12</sup> Tajamonae, dovathivecua panajamatabëcuenevetavanapare, paxamëyajuvënëjivi ata, pacuenia panijasalinaivi najamatabëxaina pibisiacuene pexanaenexa, penajamatabëxainaeyaniva. Tsipaji Dioso itsa apo pajumecovënëtsimë tsipae, nexata pacopabijitsipame panejumecovënëtsijavami Dioso, daxitamatacabijavabelianexa piasaëtsaponaponaenë. <sup>13</sup> Nexata namataenetsia panajamatabëcuenejavanonare

daxitamatacabi canacujitsia panecasaëtsavanapaenexa Dioso panejumecovënëtsijava. Bajarapacuenia panajamatabëcueneyavenonare itsajivi ata paxamëyajuvënëjivi dovathi peyamaxëitorobiyaniavatsi pibisiacuene pexanaeyaniva. Panajamatabëcueneyavenonare itsajivi ata paxamëyajuvënëjivi pecopabiyaniava Dioso pejumecovënëtsijava. <sup>14</sup> Vajataxuxuabijavaveliacujinae Dioso vajajumecovënëtsijava, tsiteca abaxë Dioso jumecovënëtavanapatsi vajatëpaejavabelianexa. Nexata daxita xua Cristo Dioso rajutsianatsi, bajaraxua vaxaitsi ata Dioso nacarajutsiana.

<sup>15</sup> Bajaraxuata papecamuxujobinexa, Dioso pejumelivaisibaxutota jumaitsi mapacueniaje:

Ajena, mapamatacabije, itsa pajumetaneme Dioso papecajumaitsijava, pëtsa pajamatabëcuenetajamë. Pacuenia panijasalinaivimi petusato nacuata ajamatabëcuenetaja, pëtsa paxamë bajarapacuenia paitsimë, jai Dioso pejumelivaisibaxutota.

<sup>16</sup> ¿Detsa pamonaë bajayata bajarapacuenia jumetae ata Dioso pejumaitsijavatsi, itsiata apo jumecovënëtsi? Baitsi pamonaemi bajayata Moiséspijinë matacapona Egipto nacuaverena. <sup>17</sup> ¿Detsa jane pamonaemijavabelia Dioso baraanaepana cuarenta pavaibeje? Dioso baraanaepana pamonaemijavabelia pibisiacuene exana petusato nacuata. Nexata daxita bajarapamonaemi pijaneconi yatëpa petusato nacuata. <sup>18</sup> ¿Detsa jane pamonaemijavabelia Dioso najumecapanepaeya jumaitsi: “Apo pajonemë tsane xanëjavaberena,” jai? Bajarapacuenia Dioso najumecapanepaeya jumaitsi apo pejumecovënëtsivitsijavabelia. <sup>19</sup> Nexata yapëtanetsi panijasalinaivimi apo pejonejava Diosojavabelia. Tsipaji apo jumecovënëtsi Dioso pitorobicueniatsi.

#### 4

<sup>1</sup> Dioso baja cajena najumecapanepaeya jumaitsi vajajonenexa bajaraponë pijanacuayabetsia vajanacueraevetavanapaenexa, itsajotatsia nacatoxaniavaeta vajajinavanapaenexa. Bajaraxuata nexata benajamatabëcuenexaniavaetavanapatsi. Tsipaji itsamonae paxamëyajuvënëvi apo jonecapanepae tsipae Dioso pijanacuayabetsia itsa apo jumecovënëtsi Dioso. <sup>2</sup> Vaxaitsi ata rabaja jumetanetsi pexanialivaisi vajanacapanepaelivaisinexa pacuenia bajayata vajasalinaivimi ata jumetane picani. Itsiata baitsi jane vajasalinaivimi apo toxanepanaetsi bajarapalivaisi pecapanepaenexatsi. Tsipaji jumetae ata, apo jumecovënëtsi. <sup>3</sup> Nexata vaxaitsi Dioso vajajumecovënëtsivi, nacacajëpaena vajajonenexa Dioso pijanacuayabetsia, itsajotatsia nacatoxaniavaeta vajajinavanapaenexa. Dioso apo pejumecovënëtsivi apo jone tsane. Tsipaji bajarapitsivi yabara Dioso bajayata jumaitsi mapacueniaje:

Anaepanaenajë apo tanejumecovënëtsivijavabelia. Nexata najumecapanepaeya jumaitsinë baja: “Bajarapamonae apo jone tsane xanëjavaberena,” janë, jai Dioso.

Dioso nacua pexanaejavaveliacujinae, toxaniavaetsi atatsi picani panijasalinaivimi pejinavanapaenexa bajaraponëjavatatsia, itsiata apo jone. <sup>4</sup> Yapëtanetsi pacuenia Dioso petoxaniavaetsicujinaetsi, copiaevetatsi picani panijasalinaivimi pejonenexa pejinavanapaenexa bajaraponëjavatatsia. Tsipaji Dioso pejumelivaisibaxutota jumaitsi mapacueniaje:

Dioso baja daxita mapanacuaje, daxitacuene yajava, itsa vereta pexanaejava, vemaxënacueraeveta siete matababita, jai Dioso pejumelivaisibaxutota.

<sup>5</sup> Icatsia Dioso pejumelivaisibaxutota jumaitsi Dioso apo pejumecovënëtsivi yabara mapacueniaje:

Bajarapamonae apo jone tsane xanëjavaberena, pejinavanapaenexa xanëjavata,” jai Dioso pejumelivaisibaxutota.

<sup>6</sup> Pamonaë baja picani copiaya jumetane pexanialivaisi pecapanepaelivaisinexatsi, itsiata apo pejumecovënëtsixae, nexata apo jone tsane Dioso pijanacuayabetsia. Itsiata baitsi jane Dioso najumecapanepaeya jumaitsi mapacueniaje: “Pamonaë tajajivi,

jonena xanëjavaberena,” jai. Nexata pamonaë jumeconvënëtaþona Dioso, jonena Dioso pijanacuayabetsia. <sup>7</sup> Bajarapacuenia bajayata itsamonae Dioso apo pejumecovënëtsixae, nexata icatsia Dioso caëjëta itsamatacabi itsamonae pejonenexa. Bajarapacuenia Dioso itsa caëjëta itsamonae pejonenexa, mapamatacabitaje cajena caëjëta itsamonae pejonenexa. Bajayata Davidpijinë Dioso itorobatsi tajëvelia pevajunupaëbinexa itsamonae mapamatacabitaje pejoneponaejavanexa Diosojavabelia. Nexata bajayata Davidpijinë tajëvelia itsa vajunupaëba itsamonae mapamatacabitaje pejonejavanexa Diosojavabelia, jumaitsi mapacueniajaje:

Mapamatacabitaje itsa pajumetaneme Dioso papecajumaitsijava, pëtsa pajamatabëcuenetajamë panejumecovënëtsinexa Dioso, jai Davidpijinë tajëvelia.

<sup>8</sup> Bajayata Josuépijinë vajasalinaivimi petusato nacujavaverena matacapona Israel nacujavaberena. Panacua bajarapamonaenexa Dioso toxaniavaetatsi pejonenexa, bajarapanacua daxitamatacabijavabelianexa. Bajarapanacua cajena xaina Dioso pijanacuataatsia. Nexata panacua yabara jumaitsi: “Dioso pijajivi pejinavanapaenacuanexa, toxaniavaeta,” itsa jai, Israelnacua yabara apo jumaitsi. Itsa meta peneta Israelnacua yabara jumai tsipae, nexata mapamatacabitaje Dioso apo caëjëtsi tsipae itsamonae pejonenexa Diosojavabelia. Tsipaji baja vajasalinaivimi bajayata baja pata Israel nacuata. <sup>9</sup> Bajaraxuata yapëtanetsi pacuenia abaxë Dioso tocopata mapamatacabitaje itsamonae ata Dioso pejumecovënëtsinexa pejonenexa Dioso pijanacuayabetsia. <sup>10</sup> Pajivi jonena Dioso pijanacuayabetsia peponaponaenexa Diosojavatatsia, bajarapajivi penacuenebabiabijava vemaxënacueraevetsiana. Pacuenia bajayatami Dioso ata nacua baja pexanaejava itsa vereta, vemaxënacueraeveta, bajarapacuenia vemaxënacueraevetsiana. <sup>11</sup> Daxita vaxaitsi vajajitsipaejamatabëcueneta, bejitsipatsi Dioso pijanacuayabetsia vajajonenexa, bajaraponëjavatatsia vajajinavanapaenexa. Bajayata pamonaemi Dioso apo jumecovënëtsi, nexata apo jone Dioso pijanacuayabetsia. Nexata vaxaitsi bajarapamonaemi apo becuenejëpaetsi.

<sup>12</sup> Dioso cajena pejumelivaisi bitso asaë. Nexata Dioso pejumelivaisi caëjëpatsi ayaicuepe pexanaenexa pijumesaëta. Dioso pejumelivaisi bitso pexiujailivaisi anijabarëneniabeje espada matatoxenetsia. Nexata bajarapalivaisi itsa yapëtanetsi, nacayapëtaeyaexana pacuenia pepacuepe jamatabëcueneitsitsi. <sup>13</sup> Vaxaitsi Dioso vajanacaexanaevi, apo nacacajëpae Dioso vajavecuanamatayabinexa. Bajaraponë tane daxita xua exanatsi. Nexata itsamatacabi bajaraponëjavabelia navajunupaëbianatsi daxita xua exanatsi.

*Pacuenia Jesús ayajamatabëcuenenë, jivi petocuaicuajainë Diosojavabelia, yabara pelivaisi*

<sup>14</sup> Jesús cajena Dioso pexënato, ayajamatabëcuenenë. Pepo sacerdotenë vajanacatocuaicuajainë Diosojavabelia. Jesús baja pona Diosojavabetsia vajanacayavenonaenexa. Bajaraxuata nexata vaxaitsi becaasaë tsavanapaetsi Dioso vajajumecovënëtsijava mapanacuatajaje. <sup>15</sup> Jesús, Diosojavabelia vajanacatocuaicuajainë, nacajamatabëcueneypëtanë pacuenia vaxaitsi jamatabëcueneitsitsi. Nexata dovathi itsa nacajamatabëcuenejëta pibisiacuepe vaxaxanaenexa, Jesús nacajamatabëcueneypëtanë. Bajarapacuenia nacajamatabëcueneypëtanë tsipaji Jesús ata abaxë itsa ponapona mapanacuatajaje, jamatabëcuenejëtatsi dovathi. Itsiata baitsi jane Jesús caeto ata pibisiacuepe apo exanae. <sup>16</sup> Bajaraxuata ajumejunavijibia vajacuata benavajëtatsi Diosojavabelia. Dioso nacaitaxutotsoniatane vajanacaasivaxae. Nexata nacayavenonaena peapatota vaxaitsi namatavenonatsi vajanacayavenonaenexa.

## 5

<sup>1</sup> Sacerdotevivyajuvënënë, caenë, itapetatsi sacerdotevi penamatacaitorobinënexa, daxitajivi petocuaicuajaitisabibinexa Diosojavabelia. Nexata jivi Diosojavabelia ofrendacuenia perajutsijavanexa, capatabiaba sacerdotenëjavaberena. Nexata juya sacerdotenë rajutabiaba Diosojavabelia bajarapaofrenda. Dajubinë, pijana ata yajava, bajara-

pacuenia rajutabiaba Diosojavabelia, daxitajivi pibisiacuene pexanaeconi Dioso peve-cuaajibiaexanaenexatsi. <sup>2</sup> Sacerdotenē caējēpatsi dovathi pejamatabēcueneējētsinexatsi pibisiacuene pexanaenexa. Tsipaji bajaraponē ata saya jivitonē. Nexata sacerdotenē jamatabējumaitsi jivi yabara: “Jamatabēcueneyapētaniji pamonaē abaxē apo yapē-tae Dioso pejumelivaisi. Nexata pibisiacuene exana. Jamatabēcueneyapētanijinua pamonaē dovathi jamatabēcueneējētatsi pibisiacuene pexanaenexa,” jamatabējai sacerdotenē. Bajaraxuata jivi pibisiacuene itsa exana, sacerdotenē itaxutotsoniatane jivi. <sup>3</sup> Sacerdotenē ata apo ajamatabēcuenesaē. Sacerdotenē dajubinē, pijana yajava, Diosojavabelia ofrendacuenia rajutabiaba jivi pibisiacuene pexanaeconi Dioso peve-cuaajibiaexanaenexatsi. Bajarapacuenia itsa rajutabiaba, bajaraponē ata pibisiacuene pexanaeconi Dioso pevecuaajibiaexanaenexatsi, yajavarajutabiaba.

<sup>4</sup> Itsanē ata pijacuata pepo sacerdotenē apo naexanaē daxitajivi petocuaicuaijainexa Diosojavabelia daxitajivi peyaiyataenexatsi. Biji rajane sacerdoteviyajuvēnēnē, caenē, Dioso itapetatsi pepo sacerdotevi penamatacaitorobinē pexanaenexatsi, pacuenia bajay-ata Aarónpijinē ata Dioso itapetatsi pepo sacerdotenē pexanaenexatsi. Nexata bajayata Aarónpijinē ata daxitajivi yaiyatanetsi. <sup>5</sup> Bajara icatsia itsi Cristo ata. Pijacuata apo naexanaē pepo sacerdotenē, vajanacatocuaicuaijainexa Diosojavabelia. Biji rajane Dioso itapetatsi Cristo pepo sacerdotenēnēnē daxitajivi peyaiyataenexatsi. Cristojavabelia copaiya Dioso jumaitsi mapacueniaje:  
Xamē raja taxēnatomē. Xanē raja axanē,  
jai Dioso.

<sup>6</sup> Icatsia itsabaxutota, Dioso pejumelivaisibaxutota, jumaitsi pacuenia Dioso itapeta pexēnato pepo sacerdotenēnēnē. Jumaitsi mapacueniaje:  
Xamē raja pepo sacerdotenēmē tsane daxitamatacabijavabelianexa. Jivi netocuaicuai-jainē tsane xanējavaberena. Pacuenia bajayatami itsi Melquisedec, bajara xamē  
ata itsimē tsane,  
jai Dioso pexēnatojavabelia.

<sup>7</sup> Jesucristo abaxē itsa ponapona mapanacuataje, pinijijumeta yaitaxutonueya va-jēta Diosojavabelia. Bajarapacuenia vajēta Diosojavabelia pecapanepaenexatsi petē-paejavavecua. Nexata Jesucristo xaniavaetsia Dioso jumetanetsi. Tsipaji Jesucristo jamatabējumaitsi Dioso yabara: “Jitsipajē taneexanaenexa pacuenia taxa netojitsipa,” jamatabējai. <sup>8</sup> Jesucristo, Dioso pexēnato, ayaijamatabēcuenenē ata, itsiata paxa jumecovēnēta. Nexata pijacuata nacopata pebejiobiaexanaenexatsi pacuenia Dioso tojitsipatsi. <sup>9</sup> Nexata Jesucristo paxa itsa jumecovēnēta, nacopata pebeyaxuabinexatsi jivi pesivatēpaenexa. Nexata daxita pamonaē jumecovēnētavanapa pacuenia Jesucristo itorobatsi, Dioso rajutsianatsi matababi apo peverevereaejava. <sup>10</sup> Dioso baja cajena itapetatsi Jesús pepo sacerdotenēnēnē, jivi petocuaicuaijainexa Diosojavabelia, pacuenia bajayata itsi Melquisedecpijinē.

*Pacuenia Dioso pejumecovēnētsivi muxujibatsi pecopabiyanima Dioso pejumecovēnētsijava yabara pelivaisi*

<sup>11</sup> Xainajē picani ayailivaisi patacatsipaebinexa paneyapētaenexa pacuenia Cristo pepo sacerdotenē vajanacatocuaicuaijainexa Diosojavabelia. Itsiata baitsi jane ayapēbeje patacajumeyapētaeayaexanaenexa bajarapalivaisi. Pacuenia pejevaxi beaxayo bayapētaepona vajacujarubijava, bajara pajamatabēcueneitsimē. <sup>12</sup> Bajayajebi baja picani Jesucristo pajumecovēnētame. Juya baja picani bepatsipaebaponame itsamon-aejavabelia. Itsiata baitsi jane abaxē panamatavenoname icatsia papecatsipaebinexa bajarapalivaisi. Palivaisi picani yapēxanepana, Dioso pejumelivaisi, itsiata apo pa-jumeyapētaemē. Nexata abaxē panamatavenoname icatsia papecatsipaebinexa bajara-palivaisi. Pacuenia pejevaxinacuetoxi emitobarēmene apa, apo xae abaxē pexaejava, bajara pajamatabēcueneitsimē. Tsipaji palivaisi ayapēbejevajēto, apo pacacaejēpae orijibia panejumeyapētaenexa. <sup>13</sup> Pamonaē abaxē namatavenona petsipaebinexatsi peyapēxanepanaelivaisixi, Dioso pejumelivaisi, bajarapamonaē pejamatabēcuene abaxē

mito bepiapaenacuetoxi. Bajarapamonae abaxë apo yapëtae pexanaenexa pacuenia Dioso tojitsipatsi. <sup>14</sup> Pacuenia penaveretsivi pijacuata xane pexaejava, bajara jamatabëcueneitsi pamonae pejamatabëcuenevitsabivi Diosojavabelia. Nexata pacuenia Dioso itorobatsi, jumecovënëta. Najamatabëxainabiaba pexanaenexa ëpexaniacuene. Apo jitsipae pibisiacuene pexanaejava.

## 6

<sup>1</sup> Vaxaitsi Dioso vajajumecovënëtsijavaveliacujinae, vajavajënaeyabelia jumecovënëtaaponatsi vajajamatabëcuenevitsabaponaenexa Diosojavabelia, pacuenia jamatabëcuenevitsabapona bitso Dioso pejumecovënëtsivi. Bajaraxua baja vaxaitsi yapëtanetsi. Nexata baja apo namatavenonaetsi icatsia vajanacatsipaebinexa Cristo pelivaisi, pacuenia copiaya nacatsipaeba pamatacabi ajena najamatabëcueneocopatatsi Diosojavabelia. Vaxaitsi baja copabatsi pibisiacuene vajaexanabiabijava. Najamatabëcuenepënëyorotatsi baja Diosojavabelia. Bajaraxuata apo namatavenonaetsi baja icatsia itsajivi ata vajanacatsipaebaponaenexa bajaraxua vajayapëtaenexa. <sup>2</sup> Apo namatavenonaetsinua baja icatsia vajanacatsipaebaponaenexa vajayapëtaenexa pajamatabëcuenelivaisi xaina vajanacabautisabijava. Apo namatavenonaetsi baja icatsia vajanacatsipaebaponaenexa vajayapëtaenexa pajamatabëcuene yabara pijinia tsimatanacobeuata ancianovi Dioso pejumecovënëtsivijavabelia. Pacuenia ata icatsia Dioso asaëyaexanaejitsia petëpaevimi, vajayapëtaexae baja, apo namatavenonaetsi icatsia vajanacatsipaebaponaenexa. Pacuenia ata daxita pamonae naneconita Diosojavabelia, naneconitsiajinavanapaejitsia daxitamatacabijavabelianexa, vajayapëtaexae baja, apo namatavenonaetsi vajanacatsipaebaponaenexa. <sup>3</sup> Dioso ita nacatocopataponaena, vajavajënaeyabelia jamatabëcuenevitsabaponaenatsi pacuenia Dioso nacatojitsipa.

<sup>4</sup> Itsamonae baja picani yapëtane pexaniajailivaisi. Jumecovënëtanua baja picani Jesucristo pelivaisi Dioso pecapanepaenexatsi. Espíritu Santo ata baja picani tsijamatabëecatsi. <sup>5</sup> Yapëtanenua baja picani pacuenia Dioso pejumelivaisi bitso xanepana. Yapëtanenua baja picani pacuenia taejitsia Dioso pinijicuene pexanaejava pamatacabi pejananacua Dioso exanaena. <sup>6</sup> Itsiata baitsi jane bajarapamonae ita copaba baja Jesucristo pelivaisi pejumecovënëtsijavami, nexata baja acuenebi icatsia penajamatabëcuenepënëyorotsijava pibisiacuene Diosojavabelia. Pecopabixae Jesucristo pelivaisi pejumecovënëtsijava, naexana quenetsiataeya bepecapocaponaevi Jesucristo pelivaisi. Bajaraxuata bajarapamonae jamatabëcuenejëpa pamonaemi bajayata Jesucristo beyaxuabatsi cruzata. Tsipaji pamonaemi Jesucristo beyaxuabatsi, quenetsiataeya capocaponatsi daxitajivi pitabarata. <sup>7</sup> Ema ita runa mapairataje, Dioso pejamatabëcueneta pecopatsixae, runa bajarapaema. Nexata Dioso pejamatabëcueneta perunaexae, bajarapaema banacale naxaniabiaexana mapairataje. Nexata capitsapa pexaniabanacale. <sup>8</sup> Itsiata baitsi jane mapanacuataje saya ita juva piabejejava, apo xanepanae itsacuenejavayonexa ata. Nexata bajaraxua tajuatsi. Bajara pijinia itsi tsane jivi ata. Pamonae Jesucristo pelivaisi pejumecovënëtsicujinae, copabiana bajarapalivaisi pejumecovënëtsijavami, nexata tajuenatsi infiernojavabelia.

*Pajamatabëcuene yabara Dioso pejumecovënëtsivi casaë tsavanapae Dioso pejumecovënëtsijava yabara pelivaisi*

<sup>9</sup> Tajamonae bitso patacaasivavi, pacuenia itsamonae jumecovënëtsi ata Dioso pecapanepaejavanexatsi, itsiata copaba, bajara paxamë apo paitsimë tsane. Dioso panejumecovënëtsijava apo pacopabimë tsane. Yapëtaniji baja cajena paxamë xaniavaetsia panejinavanapaejavanexa. Dioso baja nexata panejumecovënëtsixae, Dioso pacapanepaena.

<sup>10</sup> Dioso ëpexaniacuene exana. Apo nacofënëtsinua xua baja paexaname paneyavenon-aenexa itsamonae Dioso pejumecovënëtsivi. Tsiteca abaxë payavenonaponame bajarapamonae. Bajarapacuenia itsa payavenonaponame itsamonae, patsitanacueneitajëtaaponame Cristo bitso panejitsipaejava. <sup>11</sup> Pacatojitsipatsi, pacaajivimë canacujitsia, itsamonae panetsitanacueneitajëtaaponae nexa namataenetsia bitso panenasivajava panetëpaejavabelianexa. Nexata bajarapacuenia itsa paexaname, pacacapanepaena Diosojavabetsia. <sup>12</sup> Apo pacatojitsipaetsi paneayabaraetaabijava Dioso panejumecovënëtsijava. Biji rajane pacatojitsipatsi paneajamatabëcuenesaënexa, pacuenia itsamonae ajamatabëcuenesaë bajayajebi penajamatabëcuenecopatsijava Diosojavabelia. Bajarapamonae rajutsianatsi xua Dioso najumecapanepaeya jumaitsitsi perajutsinexatsi.

<sup>13</sup> Bajayata Dioso pexaniajaijumeta tajëvelia najumecapanepaeya jumaitsi pacuenia Dioso toexanaejitsia Abrahampijinëjavabelia. Dioso navënëcacuaicuaijaiya jumaitsi mapacueniaje: “Xanë Diosonëxaenë, najumecapanepaeya cajumaitsitsi pepacuene taca-toexanaenexa pacuenia najumecapanepaeya cajumaitsitsi,” jai Dioso Abrahampijinëjavabelia. Bajarapacuenia Dioso najumecapanepaeya jumaitsi Abrahampijinëjavabelia pepacuene petoexanaenexa pacuenia najumecapanepaeya jumaitsi. Jivi namataenetsia penajumexaniataenexa Dioso pevënë bacacuaicuaijai. “Xaniajanë. Pepacuene Dioso pitabarata cajumaitsitsi,” banajai. Itsiata baitsi jane ponë pevënë Dioso cacuaicuaijaijitsia, ajibi. Tshipaji baja pematatsënëa Dioso matatoxenetsia ayaijamatabëcuenenë ajibi. Bajaraxuata Dioso pexaniajaijumeta navënëcacuaicuaijaiya jumaitsi pacuenia toexanaejitsia Abrahampijinëjavabelia. <sup>14</sup> Nexata Dioso jumaitsi Abrahampijinëjavabelia mapacueniaje: “Pepacuene xanë cayavenonabiabianatsi. Xainaenamenua ayaibitsaëto nemomoxi,” jai Dioso pexaniajaijumeta. <sup>15</sup> Nexata Abrahampijinë Dioso jamatabëcueneevetsiaponapona bajayajebi. Nexata jane baja belia Abrahampijinë Dioso rajutatsi pacuenia najumecapanepaeya jumaitsitsi. <sup>16</sup> Itsamonae Dioso pevënë bacacuaicuaijai pejumexaniataenexatsi xua toexanaejitsia itsajivijavabelia. “Paxaniajanë. Pepacuene Dioso pitabarata pacajumaitsitsi,” bajai. Nexata bajarapacuenia itsa jumaitsi, acuenebi itsajivi ata pejumaitsijava bajarapamonaejavabelia: “Apo pacajumexaniataetsi,” pejaijava. Tshipaji Dioso pevënë cacuaicuaijai pexaniajaijumeta. <sup>17</sup> Dioso baja cajena pexaniajaijumeta najumecapanepaeya jumaitsi jivi peyavenonaenexa. Dioso najamatabëcueneitajëta jivijavabelia xaniajai peyavenonaejava jivi pejumeaebiyativatsi, “Jemajai raja. Dioso epatua itsajamatabëcuene xainaena,” pejaiyanivatsi. Bajaraxuata nexata Dioso tajëvelia navënëcacuaicuaijaiya jumaitsi Abrahampijinëjavabelia mapacueniaje: “Xanë Diosonëxaenë, najumecapanepaeya cajumaitsitsi pepacuene taca-toexanaenexa pacuenia najumecapanepaeya cajumaitsitsi,” jai Dioso Abrahampijinëjavabelia. <sup>18</sup> Bajarapacuenia Dioso najumecapanepaeya pejumaitsicujinae, acuenebi epatua itsajamatabëcuene pexinaejava. Tshipaji baja Dioso acuenebi penajumetsënëtsijava. Nexata vaxaitsi Dioso vajanacacapanepaejavanexa vajajumecovënëtsivi, bejamatabëjematsi. Apo bejamatabëcuenebëjaitsi. Tshipaji baja yapëtanetsi Dioso pexaniajaijava vajanacacapanepaenexa, pacuenia baja bajayata tajëvelia najumecapanepaeya jumaitsi. <sup>19</sup> Cristo vajanacasivatëpaenë, athëbëtatsia peecaexae Dioso pemuxuneneta, nexata baja yapëtanetsi vajanacacapanepaejavanexa Diosojavabelia. Nexata ajamatabëcuenesaëtsi tsavanapae Dioso vajajumecovënëtsijava. <sup>20</sup> Jesús athëbëabetsia vajavajënaeyabetsia pona vajanacatoexanarutsinexatsia namuto. Nexata jane baja Jesús athëbëtatsia pepo sacerdotenë Dioso exanatsi, jivi petocuaicuaijainexa Diosojavabelia daxitamatacabijavabelianexa. Nexata Jesús pepo sacerdotenë pacuenia bajayatami itsi Melquisedecpijinë.

## 7

*Pacuenia Jesús pepo sacerdotenë pacuenia bajayatami itsi Melquisedecpijinë yabara pelivaisi*

<sup>1</sup> Bajayatami Melquisedecpijinë ponapona. Salemtomara pevetsinëmi. Bajaraponëmi sacerdotenë, jivi petocuaicuaijainexa, athëbëtatsia peecaenë, Diosojavabelia. Nexata bajarapamatacabi Abrahampijinë vajabitsaë exana itsanacuanë pevetsivijavabelia. Itsa

baja Abrahampijinē verebiaba pijavajabitsaē, naviarena. Nexata penaviatsinērena caxitarabatsi Melquisedecpijinē. Nexata Melquisedecpijinē jumaitsi Abrahampijinējavabelia: “Catovajētsianatsi Diosojavabelia pecayavenonabibinexa,” jai. <sup>2</sup> Abrahampijinē pijavajabitsaē peverebiabivimi pecobecovē penotsijavanē, caponapona. Nexata bajaraxua diez xuabejeyajuvēnjavanē tsaponae, Abrahampijinē caejavayo ofrendacuenia rajutapona Melquisedecpijinējavabelia. “Melquisedec,” itsa jai hebreojumeta, mapajumetaje pejumaitisijume: “Dioso pitabarata aneconijibia xaniavaetsia jivi pevetsinē,” pejajijume. “Salemtomara pevetsinē,” itsa jai hebreojumeta, mapajumetaje pejumaitisijume: “Jamatabēcuenexanepanaeya tomara pevetsinē,” pejajijume. Nexata Melquisedecpijinē Salemtomara pevetsinēmi. <sup>3</sup> Melquisedecpijinē paxa yabara, pena ata yabara, pamojivimi ata yabara, Dioso pejumelivaisibaxutota apo jumaitsi. Penaexanaejava ata yabara, petēpaejava ata yabara, apo jumaitsi. Nexata pacuenia Dioso pexēnato, Jesucristo, jivi petocuaicuaijainē Diosojavabelia daxitamatacabijavabelianexa, bajara pijinia itsi Melquisedecpijinē. Melquisedecpijinē jivi petocuaicuaijainē Diosojavabelia daxitamatacabijavabelianexa.

<sup>4</sup> Nexata aeconoxae pacanaējēre mapacuenije. Melquisedecpijinē bitso ayaijamatabēcuenenē vajasalinainēmi Abrahampijinē matatoxenetsia. Bajaraxuata Abrahampijinē ayaijamatabēcuenenēmi ata, ofrenda rajuta Melquisedecpijinējavabelia. Pamatacabi Abrahampijinē pijavajabitsaē verebiaba, pecobecovē nota. Nexata Abrahampijinē itsa caxitaraba Melquisedecpijinē, diez xuabejeyajuvēnjavanē tsaponae, caejavayo rajutapona Melquisedecpijinējavabelia. <sup>5</sup> Bajayatami Dioso najumecopata Moiséspijinēta. Bajarapalivaisi juya itorobatsi Levípijinēmi pexi, pemomoxi ata, sacerdotevi penaexanaponaevinexa, jivi petocuaicuaijainevinexa Diosojavabelia. Nexata Levípijinē pemomoxi, sacerdotevi naexanapona. Nexata bajarapamonae Dioso tocopatatsi perajutsinexatsi daxita judíovi pexainaeyajuvēnjava. Baitsi tocopatatsi pematamoyanijobinexa diez xuabejeyajuvēnjavanē tsaponae, caejavayo pevecuapitaponaenexa. Nacaevirivi ata, daxita bajarapamonae Abrahampijinē epemomoxi ata, itsiata Dioso tocopatatsi nacaevirivi ata pexainaeyajuvēnjavanē perajutsinexatsi. <sup>6</sup> Melquisedecpijinē picani Levípijinē apo pemomo. Itsiata Melquisedecpijinē ayaijamatabēcuenenēxae, Abrahampijinē ofrenda rajuta Melquisedecpijinējavabelia. Diez xuabejeyajuvēnjavanē tsaponae, caejavayo rajutapona. Nexata Melquisedecpijinē jumaitsi Abrahampijinējavabelia: “Catovajētsianatsi Diosojavabelia pecayavenonabibinexa,” jai Abrahampijinējavabelia, ponējavabelia Dioso najumecapanepaeya jumaitsi peyavenonaenexa. <sup>7</sup> Pajivi jumaitsi: “Catovajētsianatsi Diosojavabelia pecayavenonaenexa,” jai, bajarapajivi ayaijamatabēcuenējivi Dioso pitabarata pajiviyo tovajētsijitsia matatoxenetsia. Daxita baja cajena yapētanetsi bajarapacuenē. <sup>8</sup> Majotaje, vaxaitsijavata, itsamonae sacerdotevijavabelia ofrenda rajutabiaba. Diez xuabeje pexainaeyajuvēnjavanē, caejavayo rajutabiaba sacerdotevijavabelia. Pasacerdotevijavabelia rajutabiaba bajaraxuanē, petēpaevinexa. Tsipaji saya jivi. Itsiata baitsi jane Dioso pejumelivaisibaxutota Melquisedecpijinē yabara jumaitsi pacueniaje: “Melquisedec abaxē mapamatacabita ataje asaē tsaponapona. Nexata tsiteca jivi tocuaicuaijai tsabiabi Diosojavabelia,” jai. <sup>9-10</sup> Bajayatami Abrahampijinē ofrenda rajuta Melquisedecpijinējavabelia. Bajarapamatacabi abaxē Levípijinē apo naexanae. Pexi ata abaxē ajibi. Pemomoxi ata abaxē ajibi, pamonaē jane baja mapamatacabitaje sacerdotevi naexana jivi petocuaicuaijainexa Diosojavabelia. Itsiata paofrenda Abrahampijinē rajuta Melquisedecpijinējavabelia, bajaraxua Dioso tane Levínexa, daxita Leví pemomoxinexa ata. Bajarapacuenia Abrahampijinē daxitanexa yaiyataeya ofrenda rajuta Melquisedecpijinējavabelia.

<sup>11</sup> Pamatacabi Aarónpijinē, pexi ata, sacerdotevi baja tsavanapae, bajarapamatacabi judíovi pejumecovēnētsinexa Dioso Moiséspijinēta najumecopata. Pamonaē Aarónpijinē pexi, Levípijinē baja cajena pemomoxi. Judíovi itsa jumecovēnētsipa Dioso Moiséspijinēta penajumecopatsilivaisi Dioso aneconijibia petaenexatsi, nexata Dioso apo itorobitsica tsipae Cristo, ponē beMelquisedecjamatabēcuenenē, jivi petocuaicuai-

jainexa Diosojavabelia daxitamatabijavabelianexa. Dioso Moiséspijinëta penajumecopatsilivaisi pejamatabëcueneta Dioso aneconijibia judíovi ita taejitsipa, nexata icatsia Dioso saya mataropotsia pepo sacerdotenë exanaponaejitsipa Aarónpijinë pemomoxi. <sup>12</sup> Nexata Cristo sacerdotenë ita exanatsi, jivi petocuaicuaijainexa Diosojavabelia daxitamatabijavabelianexa, yajavacopatatsi pijinia itsalivaisi Dioso Moiséspijinëta penajumecopatsilivaisivecua. <sup>13</sup> Vajatuxanenë, ponë Dioso pejumelivaisibaxutota tajëvelia vajunupaebatsi, bajaraponë Levípijinë apo pemomo. Biji rajane saicayavirianë. Bajaronë pijaviriavi bajayata caenë ata sacerdotenë apo naexanae. <sup>14</sup> Vajatuxanenë ita naexana mapanacuataje, daxitajivi baja cajena yapëtane penaexanaejava mapanacuataje. Vajatuxanenë naexana Judápijinë pemomoyota. Daxitajivi yapëtanenua pacuenia bajayata Moiséspijinë tajëvelia vajunupaeba pamonae sacerdotevi naexanaponaejitsia. “Judápijinë pemomoxi ata sacerdotevi naexanaena,” apo jai picani.

<sup>15</sup> Bajaraxuata vaxaitsi xaniavaetsia jane baja yapëtanetsi pepatsijava itsaviriasacerdotenë. Tsipaji Cristo, ponë jane baja pepo sacerdotenë jivi petocuaicuaijainexa Diosojavabelia daxitamatabijavabelianexa, bajaraponë beMelquisedecjamatabëcuenenë. <sup>16</sup> Levípijinë pemomoxi sacerdotevi exanaponatsi. Tsipaji bajayata Moiséspijinë tocopata bajarapamonaeyajuvënëvi sacerdotevi pexanaenexatsi. Itsiata baitsi jane Cristo, pepo sacerdotenë ita exanatsi jivi petocuaicuaijainexa Diosojavabelia daxitamatabijavabelianexa, Levípijinë pemomoxae, pepo sacerdotenë apo exanaetsi. Jume baja cajena. Biji rajane Cristo pepo sacerdotenë exanatsi icatsia piasaëxae petëpaecujinae. <sup>17</sup> Dioso baja cajena tajëvelia pexënatojavabelia pejumaitsijava, Dioso pejumelivaisibaxutota jumaitsi mapacueniaje:

Xamë raja pepo sacerdotenëmë tsane daxitamatabijavabelianexa. Pacuenia Melquisedec jamatabëcueneitsi, bajarajamatabëcueneitsimë tsane, jai baja cajena tajëvelia Dioso pejumelivaisibaxutota Dioso pejumaitsijava pexënatojavabelia.

<sup>18-19</sup> Nexata baja palivaisimi copiaya Dioso Moiséspijinëta najumecopata jivi pejumecovënëtsinexa, Dioso baja copiarucaeyaexana. Tsipaji bajarapalivaisimi apo caëjëpaetsi jivi pevecuaajibiaexanaenexatsi pibisiacuene pexanaeconi. Nexata palivaisi aeconoxae Dioso nacatocopata, xanepana bitso bajarapalivaisimi matatoxenetsia. Tsipaji baja Cristo vajanacasivatëpaexae, bajaraponë pejamatabëcueneta Dioso baja aneconijibia nacatane. Nexata nacatocopata vajajamatabëcuene saya vajaimoxoyotsinexa Dioso.

<sup>20</sup> Dioso baja cajena tajëvelia najumecapanepaeya jumaitsi Cristo pepo sacerdotenë pexanaenexatsi, jivi petocuaicuaijainexa Diosojavabelia daxitamatabijavabelianexa. <sup>21</sup> Pamonaemi bajayata copiaya Cristo pevajënaeya sacerdotevi exanaponatsi, bajarapamonaemi yabara Dioso bajarapacuenia apo jumaitsi. Itsiata baitsi jane tajëvelia Dioso najumecapanepaeya jumaitsi Cristo pepo sacerdotenë pexanaenexatsi. Bajaraxuata tajëvelia Dioso pejumelivaisibaxutota jumaitsi mapacueniaje:

Dioso baja cajena najumecapanepaeya ita jumaitsi, itsajamatabëcuene icatsia epatua apo xainae. Bajaraxuata tajëvelia Dioso pexënatojavabelia pejumaitsijava, Dioso pejumelivaisibaxutota jumaitsi mapacueniaje: “Xamë baja cajena pepo sacerdotenëmë tsane daxitamatabijavabelianexa. Pacuenia Melquisedec jamatabëcueneitsi, bajarajamatabëcueneitsimë tsane,”

jai Dioso pejumelivaisibaxutota tajëvelia Dioso pejumaitsijava pexënatojavabelia.

<sup>22</sup> Bajarapacuenia tajëvelia Dioso najumecapanepaeya pejumaitsixae Cristo yabara, nexata yapëtanetsi xua Cristo nacatoexana, bitso pexaniacuene. Bajaraxua bitso pexaniacuene, palivaisimi copiaya Dioso Moiséspijinëta najumecopata matatoxenetsia. <sup>23</sup> Copiaya pamonaemi sacerdotevi exanaponatsi, ayaibitsaëto jonepona sacerdotevinexa. Tsipaji tēpona. Nexata apo caëjëpaetsi pevetsinexa daxitamatabijavabelianexa. <sup>24</sup> Itsiata baitsi jane Jesús baja icatsia apo tēpae tsane. Nexata pepo sacerdotenë tsane daxitamatabijavabelianexa. Nexata baja icatsia itsanë pepo sacerdotenë

apo exanaetsi tsane. <sup>25</sup> Nexata pajivi najamatabëcuenecopata Diosojavabelia pibisiacuene pexanaeneconi Dioso pevecuaajibiaexanaenexatsi, daxitamatacabijavabelianexa Dioso vecuaajibiaexanaenatsi. Bajarapacuenia daxitamatacabijavabelianexa pibisiacuene pexanaeneconi vecuaajibiaexanaenatsi Jesús pejamatabëcueneta. Tsipaji Jesús daxitamatacabijavabelianexa asaë tsaponaponae tsane jivi petocuaicuaijainexa Diosojavabelia.

<sup>26</sup> Pacuenia baja Jesús pepo sacerdotenë, bajarapitsinë vaxaitsi vajanamatavenon-aexae, Jesús baja patsica. Jesús cajena Dioso pejamatabëcuenejëpaenë, pianeconijibinë Diosojavabelia. Pibisiacuene pexanaevi ata, apo jamatabëcuenebijianaetsi. Tocopatatsi peecaenexa athëbëtatsia, paxa Dioso pemuxuneneta, penajuaevetsinexabeje daxitacuene. <sup>27</sup> Pacuenia itsamonae pepo sacerdotevi jamatabëcueneitsi, bajara Jesús apo jamatabëcueneitsi. Itsamonae pepo sacerdotevi, daxitamatacabi dajubi beyabiaba ofrendacuenia bajarapavi perajutsinexa Diosojavabelia, perajutsinexa pijana ata. Bajarapacuenia sacerdotevi exanabiaba, pibisiacuene pexanaeneconi Dioso pevecuaajibiaexanaenexatsi, itsamonae ata pibisiacuene pexanaeneconi Dioso pevecuaajibiaexanaenexatsi. Bajarapacuenia Jesús apo exanae. Jesús saya nacopata pebeyaxuabinexatsi ofrendacuenia penarajutsinexa Diosojavabelia. Bajarapacuenia Jesús itsa nacopata pebeyaxuabinexatsi, caecuenia matamota daxitajivi pibisiacuene pexanaeneconimi daxitamatacabijavabelianexa. <sup>28</sup> Bajayata palivaisi Dioso Moiséspijinëta najumecopata, bajarapalivaisi Dioso tocopata pepo sacerdotevi penaexanaenexa mapanacuapijivi. Bajarapamonae apo caëjëpae atatsi pejinavanapaenexa pibisiacuene exanaenejeva, itsiata Dioso tocopata pepo sacerdotevi penaexanaenexa. Itsiata baitsi jane bajaraxuacujinae Dioso najumecapanepaeya jumaitsi Dioso pexënato pepo sacerdotenë penaexanaenexa daxitamatacabijavabelianexa. Jesús caeto ata pibisiacuene apo exanae.

## 8

### *Pacuenia Jesús daxitajivi petocuaicuaijainë Diosojavabelia yabara pelivaisi*

<sup>1</sup> Xua yabara baja pacatsipaebatsi, maitsije. Aeconoxae baja xainatsi Jesús, pepo sacerdotenë vajanacatocuaicuaijainexa Diosojavabelia. Bajaraponë ecaeyaexanatsi athëbëtatsia, Dioso ayaijamatabëcuenenë pemuxuneneta, pecujuanenia, penajuaevetsinexabeje daxitacuene. <sup>2</sup> Nexata jane baja aeconoxae Jesús Dioso pijatemplobota athëbëtatsia nacueneba pepo sacerdotenë penacuenebijava. Bajarapatemplobo Dioso pexanaetemplobo. Jivi apo pexanaetemplobo. <sup>3</sup> Daxita pamonae pepo sacerdotevi, tocopatatsi perajutabiabinexa ofrenda Diosojavabelia. Dajubi ata beyabiaba ofrendacuenia bajarapavi perajutsinexa Diosojavabelia. Bajaraxuata Jesucristo ata, vajanacatocuaicuaijainë Diosojavabelia, ofrenda rajuta Diosojavabelia. Nexata Jesucristo ofrenda itsa rajuta Diosojavabelia, pijacuata nacopata pebeyaxuabinexatsi ofrendacuenia penarajutsinexa Diosojavabelia. <sup>4</sup> Itsa abaxë Jesucristo mapamatacabi ata ponaponaejitsipa mapanacuataje, apo sacerdotenë tsipae. Jesucristo apo exanae tsipae pacuenia itsamonae sacerdotevi exanabiaba. Bajarapamonae saya dajubi beyabiaba ofrendacuenia bajarapavi perajutsinexa Diosojavabelia Moiséspijinë pitorobicueniatsi. <sup>5</sup> Xua Jesucristo athëbëtatsia exanaponapona, bajaraxua saya sacerdotevi cuenecataeya exanavanapa templobota mapanacuataje. Bajaraxua sacerdotevi cuenecataeya pexanavanapaenexa, Dioso tocopatatsi. Yapëtanetsi baja cajena xua Jesucristo athëbëtatsia exana, bajaraxua mapanacuapijisacerdotevi saya cuenecataeya exanavanapa. Tsipaji pamatacabi Dioso Moiséspijinë itorobatsi mapanacuata pexanaenexa Dioso pijacarpaboxaneto, Moiséspijinëjavabelia Dioso jumaitsi mapacueniaje: “Exanaename daxita pacuenia baja catsitajëtatsi petsutojumata,” jai Dioso. Bajaraxuata mapamatacabijavaberena ataje sacerdotevi templobota exanapona pacuenia Moiséspijinë Dioso tsitajëtatsi petsutojumata. <sup>6</sup> Itsiata baitsi jane Cristo, ponë pepo sacerdotenë, xua Dioso athëbëtatsia tocopatatsi petonacuenebinexa, bajaraxua bitso ayaijamatabëcuene. Xua bajayata sacerdotevi Dioso tonacuenebavanapa mapanacuataje, beveliajamatabëcuenejava saya.

Tsipaji Cristo jivi tocuai cuaijai tsane Diosojavabelia daxitamatacabijavabelianexa. Cristo nacayavenonabiabiana. Pepacuene baja Cristo pejamatabëcueneta Dioso nacavecuajibiaexana vajaneconimi. Cristo nacayavenonaenanua Dioso vajanacarajutsinexa xua yabara Dioso najumecapanepaeya jumaiti vajanacarajutsinexa, baitsi matacabi apo pev-ereverecaeyava. Bajaraxua bitso pexaniacuene. Palivaisimi copiaya Dioso Moiséspijinëta najumecopata, bevelialivaisimi saya.

<sup>7</sup> Itsa baja xanepanaejitsipa copiaya palivaisi Dioso Moiséspijinëta najumecopata, nexata baja icatsia cotocaevi itsalivaisi Dioso najumecapanepaeya apo nacatonajumecopatsi tsipae. <sup>8</sup> Israelpijinë pemomoxi xaniavaetsia apo jumecovënëtsi palivaisi bajayata Dioso najumecopata Moiséspijinëta. Bajaraxuata Dioso tajëvelia najumecapanepaeya pejumaitisijava, Dioso pejumelivaisibaxutota jumaiti mapacueniaje:

Itsamatacabijavabelia icatsia najumecapanepaeya jumaitinë tsane pejanalivaisi jivi pejumecovënëtsinexa. Pajivi jumecovënëtsiana bajarapalivaisi, rajutsianajë matacabi apo pev-ereverecaeyava. Bajarapacuenia najumecapanepaeya jumaitinë tsane Israel nacuapijivijavabelia, Judea nacuapijivijavabelia ata. <sup>9</sup> Bajarapamonae pijasalinaivimi bajayata matacarenanë Egipto nacuaverena. Bajarapamatacabi baja najumecapanepaeya jumaitinë pacuenia bajarapamonaemi yavenonaejitsianë picani. Itsiata baitsi jane bajarapamonaemi apo nejumecovënëtsi. Bajaraxuata copatajë baja bajarapamonaemi tayavenonaejava,

jai Dioso pejumelivaisibaxutota tajëvelia Dioso pejumaitisijava Israelpijinë pemomoxi yabara.

<sup>10</sup> Dioso icatsia tajëvelia pejumaitisijava, Dioso pejumelivaisibaxutota jumaiti mapacueniaje:

Nexata icatsia itsamatacabijavabelia najumecapanepaeya jumaitinë tsane Israel nacuapijivi yabara mapacueniaje: “Caejivi canacujitsia pejamatabëthëtota yapëtaeyaexanaponaenajë pacuenia netojinavanapaejitsia. Nexata bajarapamonae pejamatabëthëttojavavetsina jitsipaena tanejumecovënëtsinexa. Nexata bajarapamonae pijaDiosonënë tsane. Bajarapamonae pijinia tajajivi tsane.

<sup>11</sup> Nexata bajarapamatacabi itsajivi ata apo jumai tsane itsanëjavabelia, pijamonanëjavabelia ata: “Xamë ata beyapëtaneme Dioso,” apo jai tsane. Tsipaji baja dajitajivi neyapëtaena. Neyapëtaena beveliamatabëcuenevi. Neyapëtaena ayaijamatabëcuenevi ata. Daxita bajarapamonae neyapëtaena. <sup>12</sup> Xanë baja daxita tajajivi pibisiacuene pexanaenconimi, vecuajibiaexanaenajë. Apo najamatabënapitsinë tsane bajarapapibisiacuenemi,

jai Dioso pejumelivaisibaxutota bajayata tajëvelia Dioso pejumaitisijava.

<sup>13</sup> Bajarapacuenia Dioso itsamatacabijavabelia icatsia najumecapanepaeya pejumaitisijavanexa yabara jumaiti. Tsipaji baja ajumematamobi palivaisimi copiaya Dioso najumecapanepaeya jumaiti judíovi pijasalinaivimijavabelia. Pacuenia mapanacuapijicuene ajibi tsaponae, bajara itsi bajarapalivaisimi. Vereverecaona baja.

## 9

*Pacuenia mapanacuata eca Diosojavabelia jivi penavajëcabiabibo, bajara pijinia pacuenia athëbëtatsia ata peccaëbo, yabara pelivaisi*

<sup>1</sup> Dioso copiaya najumecopata Moiséspijinëta. Bajarapalivaisita itoroba Israel pemomoxi pexanaenexa Dioso pijacarpoboxaneto, bajarapabota Diosojavabelia penavajëcabiabinexa. Itorobanua sacerdotevi Dioso pijacuene petonacuenebavanapaenexa bajarapacarpabota. <sup>2</sup> Itsa baja vereteta carpoboxaneto Diosojavabelia penavajëcabiabibonexa, bajarapabo ënëtuatuajë yatuucutsiaya epatajërëtsiarena rurena ayaipapaëbërëpana. Bajarapaënëyatuucutsijava jumavereca, paënëtuatuajë pevënë Lugar Santo. Bajarajota nuta candelerovënëjava pitayotanucaenexa. Mesa ata nuta bajarajota. Bajarapame-sajumata pejebinexa pan, papan ofrendacuenia rajutabiaba Diosojavabelia. <sup>3</sup> Bajara papapaëbërëpanacujinaereca, paënëtuatuajë, pevënë pijinia Lugar Santísimo, itsajota

baitsi Dioso peponaponaenexa yatuucuta. <sup>4</sup> Bajarapaënnyatuucutsijava tuatuajëta, nuca orota pexanaejava, altarvënëjava. Bajara paaltarjumata jeba petuxujuvjavanë, inciensovënëjavanë, petajuitsinexa. Bajarapaënnyatuucutsijava tuatuajëta boca baula, orota pexanaebaula. Bajarapabaula ënëtuatuajëta nuca orota pexanaebotellabë. Bajarapabotellabëta yanuca pexaejava, manávënëjava. Bajarapabaula ënëtuatuajëta bocanua Aarónpijinëmi pijanaeboyo. Bajarapanaeboyo bajayata Aarónpijinë: “Baxujuvare,” itsa jai, baxujuvatababiaba. Bajarapabaula ënëtuatuajëta bocabejenua ibopanabeje. Bajarapaibopanatabeje Dioso jivi pitavetsilivaisi najumeyaquinabuata. <sup>5</sup> Bajarapabaula matatsënëta anijanëbeje pecorofeto pexainaenëbeje nucabeje. Bajaraponëbeje beángelnëbeje, jumapecataeya pexanaenëtsibeje. Bajaraponëbeje nutatsibeje Dioso pijapenivenivenaecotia pitajëtsinexabeje. Bajaraponëbeje pecorofetota baula matatsënëcaranatanucabeje. Nexata pepo sacerdotenë caevai canacujitsia bajarapabaula jumatsicababiaba dajubinë pijanata. Pepo sacerdotenë bajarabaula itsa jumatsicababiaba, jamatabëjumai tsabiabitsi: “Dioso nacaitaxutotsoniataena. Nacavecuaajibiaexanaena pibisiacuene vajaexanaeneconimi,” jamatabëjai tsabiabi pepo sacerdotenë dajubinë pijanata baulajuma petsicababiabijavata. Itsiata aeconoxae apo necuenecaëjëpae pat-acatoyaquinaponaenexa pajamatabëcuenelivaisi xainapona daxita bajaraxua.

<sup>6</sup> Bajarapacuenia bajayata Diosojavabelia penavajëcabiabibonexa, vereteta Dioso pijacarpaboxaneto. Nexata sacerdotevi joneyabiaba daxitamatacabi canacujitsia bajarapoboxavelia. Bajarapabo pënnyatuucutsijava penamataxainaeënëtuatuajëtatsina, sacerdotevi jinavanapabiaba. Sacerdotevi joneyabiaba penacuenebinexa Dioso pijacuene petonajumecopatsicueniatsi. <sup>7</sup> Nexata bajarapabo pënnyatuucutsijava penamataxainaeënëtuatuajëtatsina kujinaereca, paënëtuatuajëjavabereca, sacerdotevi pepo penamatacaitorobinë caenë joneyabiaba. Bajarapacuenia joneyabiaba caeto caevai canacujitsia. Itsa joneyabiaba, cajoneyabiaba dajubi pijana. Bajarapajanata sacerdotevi pepo penamatacaitorobinë jumatsicababiaba bajarapabaula. Bajarapacuenia exanabiaba bajarapajana ofrendacuenia perajutsinexa Diosojavabelia. Bajarapacuenia exanabiaba pibisiacuene pexanaeneconi Dioso pevecuaajibiaexanaenexatsi. Bajarapacuenia exanabiaba daxita itsamonae xua pibisiacuene exanae ata, itsiata apo nacueneyapëtae, Dioso pevecuaajibiaexanaenexatsi. <sup>8</sup> Espíritu Santo pejamatabëcueneta nacayapëtaeyaexana mapacueneye. Pamatacabi abaxë Dioso pijacarpaboxaneto piapiapapaëbërëpanaxanetota ënëtuatuajë yatuucutarurena, sacerdotevi Dioso pijacuene tonacuenebavanapa bajarapacarpaboxanetota. Bajarapamatacabi Dioso apo tocopatsi jivi pejonenexa Lugar Santísimojavabelia pijacuata pevajëtsinexa Diosojavabelia. Bajaraxua vajayapëtaenexa Espíritu Santo pejamatabëcueneta nacayapëtaeyaexana. <sup>9</sup> Bajaraxua bajayata sacerdotevi exana comparacióncuenia ajena mapamatacabijavaberena je vajanacayapëtaeyaexanaenexa bajaraxua yabara. Jivi dajubi beyabiaba ofrendacuenia bajarapavi perajutsinexa Diosojavabelia. Vaxaitsi baja yapëtanetsi mapacueneye. Bajarapacuenia jivi exanae ata, nacueratabiaba. Tsipaji jivi dajubinëvi ofrendacuenia rajutabiabi ata Diosojavabelia, tsiteca pijaperujumatabëcuene xainavanapa. <sup>10</sup> Paperujulivaisimi bajayata Dioso Moiséspijinëta najumecopata, jivi apo itorobitsi penajamatabëcuenexaniavaetsinexa. Biji rajane saya itorobatsi pexaejavanexa xaniavaetsia pevetsinexa, piapaeranexa ata xaniavaetsia pevetsinexa, xaniavaetsia penaperabëquiatsinexanua. Bajarapacuenia itorobatsi bajarapalivaisimi pejumecovënëtavanapaenexa abaxë Cristo pepatsivajënaeyatsica. Nexata Cristo pepatsicujinaetsica, Dioso jane baja bajarapalivaisimi pevereverecaeyaexanaenexa pejanalivaisita.

<sup>11</sup> Capanepaeya baja pata Cristo, pepo sacerdotenë. Bajaraponë vajanacatocuaicuaijainënexa Diosojavabelia daxitamatacabijavabelianexa. Aeconoxae baja Cristo pexaniacuene nacatoexana. Cristo baja pona athëbëabetsia, Dioso pepo pijaboyabetsia. Bajarapabo bitso pexaniabo mapanacuata jivi pexanaebo matatoxenetsia. Dioso saicaya pexanaebo. <sup>12</sup> Bajarabetsia Cristo itsa junua bajarapabotatsia, caecueneta junua bajarapaboënëalia, Lugar Santísimojavabelia, itsajota baitsi Dioso peponaponaenexa

yatuucuta. Cristo itsa junua, apo cajone chivojana, becerrojana ata. Biji rajane Cristo najanacajunua daxitajivinexa. Nexata baja caecuenia nacaneconimatamota daxitamatacabijavabelianexa Dioso vajanacapanepaenexa. <sup>13</sup> Xaniajai. Bajayata Israelpijinē pemomoxi itsa naneconita Diosojavabelia, abaxē apo tocopatabiabitsi penajonenexa Diosojavabelia penavajēcabiabibojavabelia. Nexata Israelpijinē pemomoxi copiaya matatsicababiabatsi chivojanata, torojanata ata. Becerrami altarvënëjavajumata petajuitsipumana ata tsimataothoothotabiabatsi. Nexata jane baja xuacujinae tocopatabiabatsi icatsia penajonenexa Diosojavabelia penavajēcabiabibojavabelia. <sup>14</sup> Bajarapacuenia bajayata Dioso tocopatatsi dajubinē pijana pejamatabēcueneta Israelpijinē pemomoxi pejonenexa Diosojavabelia penavajēcabiabibojavabelia. Dajubinē pijana matatoxenetsia Cristo bitso caējēpatsi vajanacayavenonaenexa Dioso pexēnatoxae. Espiritu Santo, apo pevereverecaenē daxitamatacabijavabelianexa, Cristo yavenonatsi. Nexata Cristo nacopata pebeyaxuabinexatsi vajanacasivatēpaenexa. Cristo cajena caeto ata pibisiacuene apo exanae. Nexata Cristo pijanata nacavecuaajibiaexana baja pibisiacuene vajaexanae neconimi. Bajarapaneconi yabara picani Diosovecua vajanaxuabiviminexa. Bajarapacuenia Cristo vajanacatoexanaexae, tonacuenebavanapatsi piasaētsaponaponae nē Dioso.

<sup>15</sup> Nexata Jesucristo pejamatabēcueneta nacavecuaajibiaexana baja vajaneconimi. Nexata baja aneconijibia Dioso nacatane. Bajaraxuata daxita pamonaē Dioso junatatsi, rajutsianatsi matacabi apo pevereverecaējava, pacuenia baja Dioso najumecapanepaeya jumaitsi perajutsinexatsi. Cristo itsa nacasivatēpa, nacaneconimatamota baja. Nexata nacavecuaajibiaexana daxita paneconimi xainatsi itsa abaxē jumecovënëtavanapatsi copiaya palivaisimi Dioso Moiséspijinēta najumecopata. <sup>16-17</sup> Itsajivi petēpaevajēnae, yaquina pecobecovē yabara. Bajarapajivi itsa tēpa, pijamonae pevēnamuto penatsicobetsanaenexa. Nexata yaquina pacuenia caejivi canacujitsia pitaponaejitsia. Itsiata baitsi jane abaxē itsa asaē tsaponaponae pecobecovē pexinaejivi, ajumematamobi abaxē bajarapalivaisi. Matapania baja itsa tēpa pecobecovē pexinaejivi, jumenamatomota jane baja bajarapalivaisi. Nexata jane baja xanepana pijamonae penatsicobetsanaenexa pacuenia petēpaejivi yaquina petēpaevajēnaeya pecobecovē yabara. <sup>18</sup> Bajara pijinia itsi paperujulivaisimi bajayata Dioso Moiséspijinēta najumecopata Israelpijinē pemomoxi pejumecovënëtsinexa. Jumenamatamotapona Israelpijinē pemomoxi dajubi pebeyabiabixae ofrendacuenia bajarapavi perajutsinexa Diosojavabelia. <sup>19</sup> Bajayata Moiséspijinē copiaya tsipaeba daxitajivijavabelia daxitajivi bajarapalivaisi pejumecovënëtavanapaenexa. Nexata Moiséspijinē pita hisopovënë naeboxi pepacētetsicunuyo petsobialanamaētota. Bajaraxuacujinae bajarapacunuyo Moiséspijinē jabuta merata, becerrojanata, chivojanatanua, peyajavamatajērēabijanarata. Nexata Moiséspijinē tsimatatsicaba pabaxutota itanerubena palivaisi Dioso najumecopata Moiséspijinēta. Bajaraxuacujinae Moiséspijinē daxitajivi tsimatatsicabapona. <sup>20</sup> Nexata Moiséspijinē jumaitsi jivijavabelia: “Mara pacuenia pacamatatsicabatsije. Nexata patacamatatsicabixae, xaniavaetsia jane baja Dioso pajumecovënëtavanapaename. Nexata pacuenia Dioso najumecapanepaeya pacajumaitsi, pacatocopiapatsiana,” jai Moiséspijinē jivijavabelia. <sup>21-22</sup> Bajaraxuacujinae icatsia Moiséspijinē tsicabanajanaejaeba Diosojavabelia penavajēcabiabibo enētatuajē. Xuanē bajarapabo enētatuajēta xaina pecanacuenebinexa Dioso pijacuene, daxita bajaraxuanē yajavatsicabanajanaejaeba. Bajarapacuenia pexanaenexa itoroba baja cajena Dioso Moiséspijinēta penajumecopatsilivaisimita. Itoroba dajubinē pijanata daxitacuene petsicabinexa, petsicabicujinae Dioso axuirajibia petaenexa daxita bajaraxuanē, jivi ata Dioso aneconijibia petaenexa. Tsipaji jivi pibisiacuene pexanae neconi yabara, acuenebi Dioso aneconijibia petaenexatsi. Matapania dajubinē itsa beyaxuaba, pijanata itsa matatsicabatsi, Dioso jane baja aneconijibia tanetsi.

*Pacuenia Cristo nacopata pebeyaxuabinexatsi mapanacuapijivi pijaneconi pevecuaajibiaexanaenexa yabara pelivaisi*

<sup>23</sup> Diosojavabelia penavajęcabiabibota, xuabeje xaina pecanacuenebinexa Dioso pijacuene, dajubině pijanata bajayata Moiséspijině tsicabanajaenajaeba. Bajarapacuenia Moiséspijině itsa exana, tajěvelia comparacióncuenia itajětapona jivi peyapětaenexa itsamatacabijavabelia Cristo pesivatěpaejavanexa mapanacuapijivi. Cristo dajubině pijanata apo tsicabanajaenajaebi Diosojavabelia penavajęcabiabibo ěnėtuatuajě. Biji rajane Cristo nacopata pebeyaxuabinexatsi. Nexata Cristo pijana pejamatabęcueneta, mapanacuapijivi pibisiacuene pexanaeneconi, Dioso baja vecuaajibiaexanatsi. Cristo cajena bitso jananamatomota Dioso pitabarata, dajubině pejana matatoxenetsia. <sup>24</sup> Cristo baja cajena vajanacasivatěpaecujinae, athěbėabetsia pona. Aeconoxae baja Cristo athěbėtatsia eca, paxa Dioso pemuxuneneta, vajanacatocuaicuaijaitsecaenexa Diosojavabelia. Nexata Dioso pepo pijabotatsia Cristo nacatocuaicuaijai tsaponae. Bajarapabo apo pexanaebo itsajivi ata. Apo bemapanacuapijibo. Tsipaji pacarpaboxaneto mapanacuata jivi exana Diosojavabelia penavajęcabiabibonexa, bajarapabo saya cuenecataeya exana pacuenia athěbėtatsia Dioso pepo pijabo itsi. <sup>25</sup> Sacerdotevi pepo penamatacaitorobině, bajaraponě judíoně. Caevai canacujitsia cajoneyabiaba dajubině pijana Lugar Santísimověnjavabelia, itsajota baitsi Dioso peponaponaenexa yatuucuta. Itsiata baitsi jane Cristo bajarapacuenia apo exanabiabi caevai canacujitsia. Caeto penacopatsicujinae pebeyaxuabinexatsi vajanacasivatěpaenexa, icatsia baja pematatsěnėa apo nacopatsi petěpaenexa. <sup>26</sup> Dioso mapanacuaje pexanaejavaveliacujinae, Dioso itsa tocopatsipa Cristo jivi pesivatěpaponaeenexa caevai canacujitsia, nexata Cristo bitso anijatoně jivi pijaneconi yabara sivatěpaponaejitsipa. Itsiata baitsi jane Cristo caeto petěpaecujinae, icatsia baja apo tēpae. Itsa baja copiarucaejitsia perujulivaisimi, Cristo naexana mapanacuataje. Nexata caeto nacopata pebeyaxuabinexatsi vajanacasivatěpaenexa, pibisiacuene vajaexanaeneconimi vajanacavecuajibiaexanaenexa. <sup>27</sup> Bajara pijinia pacuenia vaxaitsi ata caeto tēpaponaeenatsi. Bajaraxuacujinae jane baja Dioso naneconitsiaexanaponaena daxita pamonaе pijaneconi pexinaevi. <sup>28</sup> Bajara pijinia pacuenia Cristo caeto nacopata pebeyaxuabinexatsi vajanacasivatěpaenexa, ayaibitsaětoxanetotsi pibisiacuene vajaexanaeneconi vajanacavecuajibiaexanaenexa. Bajaraxuacujinae Cristo baja athěbėabetsia pona. Icatsia patsianica cotocaevijava. Itsiata baitsi jane baja icatsia apo nacasivatěpae tsane pibisiacuene vajaexanaeneconi yabara. Saya baja nacasivapatsianica vajavajěnaeevetavanapaevi vajanacacaponaeenexa athěbėabetsia.

## 10

<sup>1</sup> Palivaisi bajayata Dioso Moiséspijiněta najumecopata, bajarapalivaisi saya Dioso najumecopata tajěvelia vajayapětaenexa papexaniacuene aeconoxae Cristo nacatoexana. Pacuenia jumaitsi Dioso Moiséspijiněta penajumecopatsilivaisi, sacerdotevi exanabiaba Cristo pepatsivajěnaeyatsica. Caevai canacujitsia dajubině beyaxuababiaba ofrendacuenia pevi perajutsinexa Diosojavabelia, pibisiacuene pexanaeneconi Dioso pevecuaajibiaexanaenexatsi. Itsiata baitsi jane bajarapacuenia exanabiabi ata, pepacuene apo jamatabęcuenexaniavaetsitsi. <sup>2</sup> Pacuenia bajayata itorobatsi Dioso Moiséspijiněta penajumecopatsilivaisi, sacerdotevi exanabiaba. Dajubině beyaxuababiaba ofrendacuenia pevi perajutsinexa Diosojavabelia. Bajarapacuenia pexanabiabixae, pepacuene Dioso itsa vecuaajibiaexanaejitsipatsi pibisiacuene pexanaeneconi, nexata bajarapamonaе apo yanajamataběxainae tsipae pijaneconi. Nexata baja itsa aneonijibi tsipae, pematatsěnėa dajubině apo beyaxuababiabi tsipae ofrendacuenia pevi perajutsinexa Diosojavabelia pijaneconi yabara. Caeto saya ofrenda rajutsipa Diosojavabelia. <sup>3</sup> Bajarapacuenia dajubině caevai canacujitsia beyaxuababiabi ata ofrendacuenia pevi perajutsinexa Diosojavabelia, itsiata jivi jamatabęcuenenabarėyaya apo jinavanapae. Biji rajane bajarapacuenia exanabiabi ata, pevajěnaeyabelia tsiteca yanajamataběxainapona pijaneconi. <sup>4</sup> Bajarapacuenia beyaxuababiabi ata toro, chivo ata, bajarapajana apo caějěpaetsi jivi pijaneconi pepacuene pevecuaajibiaexanaenexatsi.

<sup>5</sup> Bajaraxuata Cristo pepatsicujinaetsica mapanacuayabetsicaje, paxa Diosojavabelia jumaitsi mapacueniaje:

Apo jitsipaemë xamë xua jivi carajutabiaba ofrendacuenia. Apo jitsipaemë nua dajubinë ata pebeyaxuababiabijava pevi pecarajutsinexa ofrendacuenia. Bajaraxuata xanë nitorobimica pacuenia banaexana mapanacuapijivi, tanaexanaenexa mapanacuta, mapanacuapijivi tasivatëpaenexa pijaneconi yabara. <sup>6</sup> Jivi picani dajubinë beyaxuababiaba ofrendacuenia pevi pecarajutabiabinexa, altarvënëjavajumata pecatotajuitsinexa. Jamatabëjumai tsabiabi bajarapamonae: “Tajaneconi Dioso nevecuaajibiaexanaena mapacuenia itsa exanaenajëje,” jamatabëjai tsabiabi. Itsiata baitsi jane apo sivajamatabëcuenebarëyamë bajaraxua yabara. <sup>7</sup> Bajara jane manucajëje pacuenia jitsipame tacatoexanaenexa, pacuenia nijumelivaisibaxutota tajëvelia jumaitsi xanë yabara, tasivatëpaenexa nijajivi, jai Cristo paxa Diosojavabelia.

<sup>8</sup> Nexata bajarapacuenia Cristo pejumaitsixae, aeconoxae baja vaxaitsi yapëtanetsi mapacuenieje. Dioso aeconoxae apo sivajamatabëcuenebarëya jivi dajubinë pebeyaxuababiabijava ofrendacuenia pevi perajutabiabinexa Diosojavabelia. <sup>9</sup> Icatsia Cristo jumaitsi paxa Diosojavabelia mapacueniaje: “Bajara jane manucajëje pacuenia jitsipame tacatoexanaenexa,” jai Cristo. Cristo baja mapanacuapijivi pibisiacuene pexanaeneconi yabara sivatëpa cruzata pacuenia paxa Dioso itorobatsi. Nexata sacerdotevi dajubinë pebeyaxuababiabijava ofrendacuenia pevi perajutabiabinexa Diosojavabelia, Cristo baja copiarucaeyaexana. <sup>10</sup> Pacuenia Dioso tojitsipatsi, Jesucristo nacopata pebeyaxuabinexatsi vajanacasivatëpaenexa cruzata. Bajarapacuenia Jesucristo nacasivatëpa vajanacavecuajibiaexanaenexa pibisiacuene vajaexanaeneconimi. Caeto baja Jesucristo nacasivatëpa daxita mapanacuapijivitsije.

<sup>11</sup> Caematacabi canacujitsia picani sacerdotevi nubenabiaba altarvënëjava muxuneneta, dajubinë itsa beyaxuaba, ofrendacuenia pevi perajutabiabinexa Diosojavabelia. Itsiata baitsi jane bajarapacuenia exanabiabi ata, Dioso pepacuenie apo vecuaajibiaexanaetsi pibisiacuene pexanaeneconi. <sup>12</sup> Jesucristo baja cajena nacopata pebeyaxuabinexatsi, vajanacaneconimatamotsinexa pibisiacuene vajaexanaeneconimi. Caeto baja Jesucristo tëpa pibisiacuene vajaexanaeneconi vajanacaneconimatamotsinexa daxitamatacabijavabelianexa. Bajaraxuacujinae Jesucristo athëbëtatsia eca, paxa Dioso pemuxuneneta, penajuaevetsinexabeje daxitacuene. <sup>13</sup> Cristo abaxë aeconoxae athëbëtatsia ecaya. Jamatabëcueneevetecaya abaxë pijavajabitsaë paxa Dioso petojamatabëcueneamoneyabinexatsi. Nexata Jesús pijavajabitsaëmi ata pacuenia itoroba, pejumecovënëtsinexatsi. <sup>14</sup> Caeto baja Cristo nacopata vajanacasivatëpaenexa. Nexata vaxaitsi, Cristo pelivaisi vajajumecovënëtavanapaevi, Cristo pejamatabëcueneta Dioso nacavecuajibiaexana pibisiacuene vajaexanaeneconimi daxitamatacabijavabelianexa. <sup>15</sup> Cristo baja cajena caeto vajanacasivatëpaejavanexa daxitamatacabijavabelianexa, Espiritu Santo tajëvelia nacayapëtaeyaexana. Espiritu Santo tajëvelia nacayapëtaeyaexana pexaniajaicuene, xua baja aeconoxae Cristo nacatoexana. Tsipaji baja cajena Dioso pejumelivaisibaxutota tajëvelia jumaitsi mapacueniaje:

<sup>16</sup> Najumecapanepaeya tajajivi yabara pejanalivaisi itsamatacabi jumaitsinë tsane mapacueniaje: “Caejivi canacujitsia pejamatabëëthëtota yapëtaeyaexanaponapon-aenajë pacuenia netojinavanapaejitsia. Nexata bajarapamonae pejamatabëëthëttojavavetsina jitsipaena tanejumecovënëtsinexa,” jai Dioso.

<sup>17</sup> Bajaraxuacujinae icatsia Dioso jumaitsi mapacueniaje: Apo najamatabënapitsinë tsane itsamatacabijavabelia ata daxita papibisiacuene bajarapamonae exana, jai Dioso tajëvelia pija-jivi yabara.

<sup>18</sup> Nexata jane baja Cristo nacasivatëpa pibisiacuene vajaexanaeneconimi Cristo pejamatabëcueneta Dioso vajanacavecuajibiaexanaenexa. Nexata baja pematatsënëa

dajubinë apo beyaxuababiabi tsanetsi ofrendacuenia pevi vajarajutabiabinexa Diosojavabelia, pibisiacuene vajaexanaeneconi Dioso vajanacavecuaajibiaexanaenexa.

*Pacuenia saya vajajamatabëcuene imoxoyotsijitsiatsi Dioso yabara pelivaisi*

<sup>19</sup> Tajamonae, Jesucristo baja vajanacasivatëpaexae, aeconoxae baja Dioso nacatocopata ajunavijibia vajajonenexa Dioso pijanacuayabetsia. Nacatocopatanua bajarajotatsia vajajonenexa Lugar Santísimovënëjavabelia, itsajota baitsi Dioso ponapona. <sup>20</sup> Jesucristo nacatoexana pejananamuto vajaponaenexa athëbëabetsia, Dioso vajanacarajutsinexa matababi apo peverevereaejava. Jesucristo baja itsa nacasivatëpa cruzata, nacasivatëpa vajapatsinexa Diosojavabetsia. <sup>21</sup> Bajayata sacerdotevi toevetavanapa Dioso pijacarpaboxaneto. Bajara pijinia pacuenia aeconoxae Jesucristo, pepo sacerdotenë jane baja, nacaevetaponapona vaxaitsi vajanacatocuaicuaijainexa Diosojavabelia. <sup>22</sup> Bajaraxuata vajajamatabëthëtojavavetsina vajajamatabëcuene saya bimoxoyotatsi Dioso. Bëpënëa vajajamatabëcueneta Dioso yamaxëitorobiaya apo bejumecovënëtsitsi. Tsipaji yapëtanetsi Dioso vajanacacapanepaejavanexa. Bajarapacuenia Dioso nacacapanepaena tsipaji baja pibisiacuene vajaexanaeneconimi Dioso nacavecuaajibiaexana. Nexata baja nacaajamatabëcuene xuirajibiaexana Jesucristo vajanacasivatëpaexae. Vajanacabautisabijavata, nacaperabëquiatanua piaxuirajibimerata. <sup>23</sup> Vajavajënaeyabelia asaëyata copiaevetavanapaenatsi Dioso vajanacacapanepaejavanexa. Bajarapacuenia asaëyata copiaevetavanapaenatsi Dioso jumeaebinejevatsi. Nexata itsamonaejavabelia navajunupaebabibianatsi Dioso vajanacacapanepaejavanexa. Tsipaji baja pacuenia Dioso najumecapanepaeya nacajumaitsi, xaniajai baja cajena. Dioso nacacapanepaena. <sup>24</sup> Nexata vaxaitsi namataenetsia benayavenonatsi vajanajamatabëcueneitajëtsinexa vajanasivacuene. Namataenetsianua pexaniacuene benatoexanabiabatsi. <sup>25</sup> Itsamonae baja vaxaitsiyajuvënëvi copabapona penajoneyabibijava vajanacaetuatabibibojavabelia. Vaxaitsi nexata bajarapamonae apo becuenejëpaetsi. Namataenetsia benajamatabëcueneasaëyaexanaponatsi. Aeconoxae baja bitsoyo biamatabëcuenesaëtsi tsavanapae. Tsipaji baja imoxoyo pevajënae vajatuxanenë pepatsinexatsica.

<sup>26</sup> Vaxaitsi tsiteca vajavajënaeyabelia pibisiacuene itsa exanaponaejitsipatsi, yapëtae atatsi Cristo vajanacasivatëpaejava, nexata nacatoacuenebi tsipae Dioso vajanacavecuaajibiaexanaenexa pibisiacuene vajaexanaeneconi. <sup>27</sup> Bajarapacuenia vajavajënaeyabelia tsiteca pibisiacuene itsa exanaponaejitsipatsi, nexata saya copiaevetavanapaejitsipatsi pinijicuenia Dioso ëvajanacananeconitsia exanaejavanexa. Pamatacabi Dioso pijavajabitsaë naneconitsiaexanaena pinijiisotojavabelia peverebiabinexa, bajarapamatacabi vaxaitsi ata, bajarapamonae yajava, pinijicuenia Dioso nacayajavananeconitsia exanaejitsipa. <sup>28</sup> Bajayata Dioso Moiséspijinëta najumecopata jivi pejumecovënëtsinexa. Nexata pajivi apo jumecovënëtsi Dioso Moiséspijinëta penajumecopatsilivaisi, beyaxuabaponatsi. Anijajivibeje, acueyabi pajivibeje ata, itsa jumaitsi pibisiacuene pexanaejivi yabara: “Pataniji pepacuene pibisiacuene pexanaejava mapajivije,” itsa jai, nexata bajarapajivi apo itaxutotsoniataetsi. Beyaxuabatsi pibisiacuene pexanaeneconi yabara. <sup>29</sup> Pacanaëjère mapacuenije. Pajivi apo jumecovënëtsi Dioso Moiséspijinëta penajumecopatsilivaisi, naneconitsiaexanatsi. Nexata bajaraxua matatoxenetsia Dioso bitso naneconitsiaexanaenatsi pajivi copata pejumecovënëtsijava Dioso pexënato pesivatëpaejavatsi pijaneconi yabara. Pajivi copata pejumecovënëtsijava Dioso pexënato pesivatëpaejavatsi pijaneconi yabara, bajarapajivi tane Dioso pexënato pesivatëpaejavatsi bepiamatamobicujiru. Apo canaëjëtsinua Espíritu Santo piasivajavatsi. <sup>30</sup> Yapëtanetsi baja cajena Dioso pejumaitsijava mapacueniaje: “Pamonae pibisiacuene exanapona itsamonaejavabelia, bajarapamonae xanë naneconitsiayaexanaenajë,” pejaijava. Jumaitsinua Dioso mapacueniaje: “Xanë Diosonënë, naneconitsiaexanaenajë tajajivi,” jai. <sup>31</sup> Pajivi Dioso apo jumecovënëtsi, nexata Dioso itsa naneconitsiaexanaenatsi, ¡bitso piayacuene taeyaexanaenatsi piasaëtsaponaponaenë Dioso!

<sup>32</sup> Panajamatabēnapire pacuenia pajamatabēcuenēitsimē tsavanapae pamatacabī ajena Cristo pajumecovēnētame. Bajarapamatacabī pajamatabēcuenesaēmē tsavana-pae panejumecovēnētsijava vajatuxanenē pelivaisi, itsamonae pacabejiobiaexanae ata bajarapalivaisi yabara. <sup>33</sup> Paxamēyajuvēnēvi baja cajena jivi ayaibitsaēto pitabarata itsamonae capocaponatsi. Ayaicuenia baja cajena bejiobiaexanatsinua bajarapamonae pitabarata. Nexata pijinia itsamonae paxamēyajuvēnēvi bitso sivanajamatabēxaina bajarapacuenia papecayajuvēnēbejiobia exanaexaetsi. <sup>34</sup> Paxamē paitaxutotsoniataneme pamonaē jebatsi penaneconitsivi pejebabiabibota Dioso pejumelivaisi yabara. Paxamē itsamonae pacavecuanotsi ata panijairanēmi, panecobecovējavaximi yajava, itsiata paxamē pajamatabēcuenēbarēyamē. Bajarapacuenia pajamatabēcuenēbarēyamē tsipaji baja payapētaneme xua athēbētatsia paxinaejitsiamē. Bajaraxua mapanacuapijicuene matatoxenetsia bitso pexaniacuenejava. Tsipaji daxitamatacabijavabelianexa apo peverevereaejavanexa. <sup>35</sup> Bajaraxuata pētsa pacopabame panesivanajamatabēcuenecopatsijava Diosojavabelia papecayavenonaenexa. Dioso cajena athēbētatsia pacarajutsiana ayaicuenējava panenajamatabēcuenecopatsixae bajaraponējavabelia. <sup>36</sup> Bajayajebi ata panevajēnaeyabelia paexanaponare pacuenia Dioso pacatojitsipa. Nexata xua yabara tajēvelia Dioso najumecapanepaeya jumaiti papecarajutsinexa, bajaraxua Dioso pacarajutsiana. <sup>37</sup> Cristo icatsia pepatsijavanexatsica yabara, Dioso pejumelivaisibaxutota tajēvelia jumaiti mapacueniaje:

Bepijia patsianica ponē patsijitsiatsica. Apo cuenenajematsi tsane pepatsinexatsica. <sup>38</sup> Nexata pajivi Dioso aneconijibiatanetsi Diosojavabelia penajamatabēcuenecopataponaponaexae, bajarapajivi xainaena matacabī apo peverevereaejava. Itsiata baitsi jane pajivi nevecuanaviata pecovēyabelia, apo sivajamatabēcuenēbarēyanē tsane, jai Dioso pejumelivaisibaxutota.

<sup>39</sup> Itsiata baitsi jane vaxaitsi vajacovēyabelia Diosovecua apo naviabi tsanetsi Diosovecua vajanaxuabianiva. Biji rajane vaxaitsi najamatabēcuenecopabatsi Diosojavabelia ēvajanacacapanepaejavabelianexa.

## 11

*Pacuenia Dioso pejumecovēnētsivi apo jumeaebi xua Dioso najumecapanepaeya jumaiti yabara pelivaisi*

<sup>1</sup> Itsa pepacuene vaxaitsi xaniavaetsia najamatabēcuenecopatatsi Diosojavabelia, nexata najamatabēxainatsi mapacueniaje: “Abaxē daxitacuene apo copiapatsi ata, xua yabara Dioso najumecapanepaeya jumaiti, itsiata yapētaniji pexaniajaicuene. Pacuenia Dioso najumecapanepaeya jumaiti, xaniajai baja cajena. Pepacuene Dioso exanaena,” jamatabējaiti. <sup>2</sup> Bajayata vajasalinaivimi jumecovēnēta Dioso. Nexata bajarapamonaemi jamatabējumaiti tsabiabi: “Pacuenia Dioso najumecapanepaeya jumaiti, pepacuene neyavenonaena,” jamatabējai tsabiabi. Bajaraxuata bajarapamonaemi yabara Dioso jumaiti: “Sivajamatabēcuenēbarēyanē,” jai.

<sup>3</sup> Vaxaitsi ata jumecovēnētatsi Dioso. Nexata yapētanetsi pexaniajaicuene mapacuenia pejumaitsilivaisije: “Dioso baja cajena nacua exana daxitacuene yajava. Dioso saya pijumeta daxitacuene exana. Daxita xua aeconoxae vajaitaxutota tanetsi, Dioso baja cajena exana. Abaxē pamatacabī ajibi itsacuenejavayo ata mapanacuataje, Dioso baja cajena exana daxitacuene,” pejailivaisi yapētanetsi pexaniajaicuene.

<sup>4</sup> Bajayatami Abelpijinē najamatabēcuenecopata Diosojavabelia. Abelpijinē jumecovēnēta pacuenia Dioso itorobatsi. Nexata Abelpijinē dajubinē beyaxuaba. Nexata ofrendacuenia pevi rajuta Diosojavabelia. Dioso nexata sivajamatabēcuenēbarēyatsi. Abelpijinē pijinia pematapijinēmi, Caínpijinē, apo jumecovēnētsi pacuenia Dioso itorobatsi. Saicaya pijinia itsavirijava ofrendacuenia rajuta Diosojavabelia. Dioso nexata apo sivajamatabēcuenēbarēyatsi Caínpijinē. Nexata Abelpijinē bajayatami baja tēpae ata, itsiata mapamatacabijavaberena ataje vēnēlivaisitaeponatsi Dioso pejumecovēnētsijava.

Nexata baja vaxaitsi yapëtanetsi, vaxaitsi ata Dioso itsa jumecovënëtsi, Dioso vajanaca-sivabarëyajavanexa.

<sup>5</sup> Bajayata Enocpijinë ata najamatabëcuenecopata Diosojavabelia. Bajaraxuata apo tēpaenejeva Dioso caponatsi athëbëabetsia. Jemata pitajarabatsi. Nexata itsamonae jaitsi atatsi, itsiata apo caxitajarabitsi. Dioso pejumelivaisibaxutota jumaitsi pacuenia Enocpijinë Dioso pepitsivajënaeyatsi, Dioso sivajamatabëcuenenecopatsi. <sup>6</sup> Pajivi apo najamatabëcuenecopatsi Diosojavabelia, bajarapajivi yabara Dioso apo jamatabëcuenenecopatsi. Pajivi najamatabëcuenecopatsijitsia Diosojavabelia, bajarapajivi copiaya bejamatabëjumaitsi mapacueniaje: “Xaniajai tsaena baja. Dioso ponapona. Bajaraponë jivi pitaxutotsoniataenë. Nexata pamonaē asaëyata vajëta Diosojavabelia pibisiacuene pexanaeneconi pevecuaajibiaexanaenexatsi, bajarapamonaē pijaneconi Dioso vecuaajibiaexanatsi,” bejamatabëjai copiaya.

<sup>7</sup> Bajayata Noëpijinëmi ata najamatabëcuenecopata Diosojavabelia. Nexata Noëpijinëmijavabelia tajëvelia Dioso jumaitsi pacuenia mapairaje Dioso bubutsiaexanaejitsia. Nexata Noëpijinëmi abaxë apo tae ata mapairaje pebubutsijava, itsiata jumecovënëta pacuenia Dioso jumaitsi. Nexata baja pinijibarcoxaneto exana pebarëpanepaenexa pijamonae mapaira pebubutsijavavecuaje. Bajarapacuenia Noëpijinëmi pijamonae pebarëjumecovënëtsixae Dioso, nexata Dioso aneconijibia tanetsi. Bajarapamatacabi daxita mapanacuapijivimi apo jumecovënëtsi Dioso. Caenë Noëpijinë pijamonae barëjumecovënëta Dioso. Nexata daxita pamonaemi apo jumecovënëtsi Dioso, nayapë-tane bitso penaneconitsijava Diosojavabelia.

<sup>8</sup> Bajayata Abrahampijjinëmi ata najamatabëcuenecopata Diosojavabelia. Nexata Dioso itsa itorobatsi Abrahampijjinë pevecuapitsapaenexa pijanacuami, jumecovënëta. Nexata baja Abrahampijjinë pona itsanacuayabelia. Panacua Dioso rajutsiapaebatsi, bajarapanacuayabelia pona. Abrahampijjinë abaxë apo natsivajënaeyapëtae ata panacuayabelia patsijitsia, itsiata vecuapitsapa pijanacuami Dioso pitorobixaetsi. <sup>9</sup> Panacuata Abrahampijjinë Dioso patsiaexanatsi, bajarapanacuata itsiata Abrahampijjinë pepo pijabo apo exanae. Carpabota saya ponapona. Becaematacabibejenexa saya pepatsinëcuenia carpabota Abrahampijjinë ponapona. Itsiata bajayajebi bajarapanacuata carpabota ponapona. Abrahampijjinë pexënato ata, Isaacpijinë, bajarapaira Dioso rajutsiapaebi atatsi, itsiata Isaacpijinë ata carpabota ponapona. Bajara icatsia itsi Isaacpijinë pexënato ata, Jacobpijinë, Abrahampijjinë jane baja pemomo. Jacobpijinë bajarapaira Dioso rajutsiapaebi atatsi, itsiata Jacobpijinë ata carpabota ponapona. <sup>10</sup> Bajarapacuenia Abrahampijjinë bajayajebi carpabota saya ponapona. Tsipaji abaxë vajënaeevetaponapona pecapon-aenexatsi athëbëabetsia, Dioso pexanaetomarabetsia, apo pevereverecaetomarabetsia, daxitamatacabijavabelianexa jane baja peponaponaenexa bajarapatomaratsia.

<sup>11</sup> Bajayata Abrahampijjinë pijava pevënë Sara. Bajarapovami ata najamatabëcuenecopata Diosojavabelia. Bajarapova mavecova picani. Nexata bitso pepua perujuva ata, itsiata Dioso caëjēpaeyaexanatsi pexënato pexainaenexa. Jumecovënëta pacuenia Dioso najumecapanepaeya jumaitsitsi pexënato pexainaenexa. Bajaraxuata xaina pexënatonëyo. <sup>12</sup> Bajarapacuenia Abrahampijjinë bitso pepua perujunë ata, pexënato xaina. Nexata Abrahampijjinë pevënamuto pemomoxibitsaëto baja tsaponae. Athëbëtatsia, itaboxota, bitso navita tulupu. Mapanacuata pijinia tajetabota bitso navita tajetaboatsapërë. Nexata acuenebi itsajivi ata penamataëjësicapanepeaenexa tulupu, tajetaboatsapërë ata. Bajara pijinia itsaponae Abrahampijjinë pemomoxi. Bitso cajena Abrahampijjinë pemomoxi navita.

<sup>13</sup> Daxita pamonaemi bajayata Dioso jumecovënëta, tēpa baja. Bajarapamonaemi xua yabara Dioso najumecapanepaeya jumaitsitsi perajutsinexatsi, pitsinejeva tēpa baja. Abaxë apo tocopiapatsi atatsi xua yabara Dioso najumecapanepaeya jumaitsitsi perajutsinexatsi, itsiata sivajamatabëcuenenecopatsi bajarapamonaemi. Jamatabëjumai tsabiabi mapacueniaje: “Daxita pacuenia Dioso najumecapanepaeya jumaitsi, bajarapacuenia pepacuene Dioso exanaena,” jamatabëjai tsabiabi bajarapamonaemi. Ba-

jarapamonaemi namataenetsia najumai tsabiabi: “Mara panacuataje pepacue ne apo jinavanapaetsi tsane daxitamatacabijavabelianexa. Vaxaitsi saya caematacabibeje bevajanajinavanapaevinexa. Bevajanapatsivi mapanacuataje,” najai tsabiabi bajarapamonaemi. <sup>14</sup> Pamonaemi bajarapacuenia namataenetsia najumai tsabiabi, itsamona tsitanajamatabëcueneitajëtavanapa. Bajarapamonaemi tsitanajamatabëcueneitajëtavanapa peveta vanapaejava athëbëabetsia Dioso pecaponaejavanexatsi, bajarajotatsia jane baja pejinavanapaenexa daxitamatacabijavabelianexa. <sup>15</sup> Bajarapamonaemi apo najamatabëxainavanapae caevëalia icatsia penaviabinexa pijanacuamijavabelia. Itsa najamatabëxainaejitsipa caevëalia icatsia penaviabinexa pijanacuamijavabelia, nexata naviabijitsipa. <sup>16</sup> Biji rajane bajarapamonaemi najamatabëxainavanapa peponaenexa athëbëabetsia. Tspaji athëbëtatsia panacua, bitso pexanianacua, mapanacua mata-toxenetsia. Bajaraxuata bajarapamonaemi: “Taja Diosomë,” pejaijava Diosojavabelia, Dioso sivabarëyatsi. Vaxaitsi ata baja yapëtanetsi bajarapamonaemi Dioso pesivabarëyajavatsi. Tspaji baja athëbëtatsia bajarapamonaemi Dioso toxaniavaetatsi pepo pijatomaranexa.

<sup>17-18</sup> Copiaya Dioso tajëvelia najumecapanepaeya jumaitsi Abrahampijinëjavabelia. Abrahampijinë pexë nato, Isaac, yabara Dioso jumaitsi mapacueniaje: “Nexë nato Isaac xainaena pexi. Nexata nemomoxi xainaename,” jai Dioso. Bajaraxuacujinae icatsia Abrahampijinë Dioso itorobatsi penacoxibeyaxuabinexa picani. Bajarapacuenia Abrahampijinë Dioso itorobatsi penacoxibeyaxuabinexa picani saya pejamatabëcueneëjëtsinexatsi. Abrahampijinë Dioso itorobatsi penacoxibeyaxuabinexa ofrendacuenia perajutsinexa Diosojavabelia. Nexata baja picani Abrahampijinë jejai. Nacoxibeyaxuabijitsia picani. <sup>19</sup> Bajarapacuenia picani Abrahampijinë exanaejitsia Dioso pitorobicueniatsi. Tspaji Abrahampijinë jamatabëjumaiti: “Dioso baja cajena cajëpatsi piasaëyaexanaenexatsi taxë nato icatsia piasaënexa,” jamatabëjai Abrahampijinë. Ajena baja picani Abrahampijinë nacoxicacuatsijitsia cusiupata penacoxibeyaxuabinexa, nexata Abrahampijinë jamatabëjumaiti: “Taxë nato baja aeconoxae tëpaena,” jamatabëjai. Nexata bajarapaepatota Abrahampijinë Dioso itavetatsi penacoxibeyaxuabianiva. Nexata baja itsiata Abrahampijinë apo nacoxibeyaxuabi. Nexata itsiata Abrahampijinë bepetëpaenë baja nacoxitane. Nexata bajaraxuacujinae icatsia Dioso bepetoasaëyaexanaenëtsi nacoxitane.

<sup>20</sup> Bajayata Abrahampijinë pexë nato ata, Isaacpijinë, najamatabëcuene copata Diosojavabelia. Bajaraxuata Isaacpijinë itsa baja perujunë, pexë natobejejavabelia tajëvelia najumecapanepaeya jumaiti: “Dioso pacayavenonabianabeje,” jai Isaacpijinë pexë natobejejavabelia. Isaacpijinë pexë natobeje itsanë pevënë Jacob. Itsanë pevënë Esaú. Jacobpijinë itsavënë, Israel. <sup>21</sup> Nexata Jacobpijinë ata najamatabëcuene copata Diosojavabelia. Nexata baja pamatacabi Jacobpijinë perujunë, itsa baja nayapëtane petëpaejavanexa, bajarapamatacabi Diosojavabelia tovajëta pemomobeje Dioso peyavenonabianexatsibeje. Ponëbeje Jacobpijinë pemomobeje tovajëta Diosojavabelia, Josépijinë pexë natobeje. Bajarapacuenia Jacobpijinë itsa tovajëta Diosojavabelia, pemomobeje, caenë canacujitsia, tovajëta pona. Pecobenaeboupita saya Jacobpijinë nayaëtanucaeya vajëtanuca Diosojavabelia. <sup>22</sup> Bajayata Josépijinë ata najamatabëcuene copata Diosojavabelia. Bajarapamatacabi Egipto nacuata Josépijinë daxita pijamonae barëpona pona, Israelpijinë pemomoxi. Nexata baja Josépijinë itsa nayapëtane petëpaejavanexa, tajëvelia vajunupaeba daxita Israelpijinë pemomoxi Dioso pejamatabëcueneta pecapitsapaejavanexatsi Egipto nacuavecua. Josépijinë petëpaevajënae, najumepuënetanua pijamonae pesicaponaenexatsi pamatacabi Dioso pejamatabëcueneta daxita Israelpijinë pemomoxi capitsapatsi Egipto nacuavecua.

<sup>23</sup> Bajayata Moisépijinë paxapijinë, penapijiva ata, tajëvelia yapëtanebeje Dioso peyavenonaejavanexatsibeje. Nexata bajaraxuacujinae pexë natonëyo xinaabeje, Moisésnexa jane baja. Nexata matayatsia caponabeje acueyabi pajuameto beje. Bajarapacuenia matayatsia caponabeje tspaji bitso

tsitapexanianëyotsibeje. Egiptonacua pepo pevetsinë itoroba picani daxita Israelpijinë pemomoxi penacoxibeyaxuabaponaenexa itsa tonaexanatsi pebinëyo. Itsiata bajarapajivibeje apo jumecovënëtsibeje penacoxibeyaxuabinexabeje. Tsipaji apo jumecujunavibeje. <sup>24</sup> Bajaraxuacujinae Moiséspijinë jane baja vitsatatsi Egiptonacua pepo pevetsinë pexënatoyo. Moiséspijinë bajarapova vitsatatsi bepexënatonëyocuenia. Moiséspijinë baja itsa penaveretsinë, yapëtane Dioso peyavenonaejavanexatsi. Nexata Moiséspijinë apo jitsipae Egiptonacua pepo pevetsinë bepemomocuenia petaenexatsi. <sup>25</sup> Nexata Moiséspijinë najamatabëcueneveretsia jamatabëjumaitsi: “Tajamonae, Israelpijinë pemomoxi, Dioso pijajivinexa. Nexata yavenonaenajë tajamonae. Egipto nacuapijivi nebejiobiaexanae ata tsane, pacuenia tajamonae bejiobiaexanabiabatsi, itsiata yavenonaenajë,” jamatabëjai Moiséspijinë. Nexata baja Moiséspijinë Egiptonacua pevetsinë bepemomocuenia petaejavatsi itsa vecuapitsapa, copata baja pibisiajamatabëcuene, mapanacuapijijamatabëcuene. Tsipaji saya bajarapajamatabëcuene caepatoyonexa jamatabëcuenebarëya. <sup>26</sup> Moiséspijinë Dioso jumecovënëta pacuenia tajëvelia Dioso jumaitsi pijajivi pecapanepaenexa Egipto nacuavecua. Nexata Moiséspijinë tajëvelia jamatabëjumaitsi: “Itsamatacabi Cristo itsamonae bejiobiaexanaenatsi. Bajarapacuenia xanë ata Egipto nacuapijivi nebejiobiaexanaejitsia ata tsane, itsiata Dioso pejitsipaecuenia toexanaenajë. Tsipaji xua Dioso athëbëtatsia nerajutsijitsia, bajaraxua bitso pexaniacuene daxita Egipto nacuapijivi pexainacuene matatoxenetsia,” jamatabëjai Moiséspijinajëvelia Dioso jumaitsi pijajivi pecapanepaenexa Egipto nacuavecua. Nexata Moiséspijinë tajëvelia jamatabëjumaitsi: “Itsamatacabi Cristo itsamonae bejiobiaexanaenatsë. <sup>27</sup> Nexata baja Moiséspijinë Egipto nacuavecua pitsapa. Tsipaji najamatabëcuenecopata Diosojavabelia peyavenonaenexatsi. Egiptonacua pepo pevetsinë Moiséspijinë baranaepanae atatsi, apo cujunavi. Pevajënaeyabelia ajamatabëcuenesaë tsanajetaruae pacuenia Dioso itorobatsi pexanaenexa. Moiséspijinë baja apo naviatsi pecovëyabelia. Tsipaji abaxë Moiséspijinë apo tae ata Dioso, itsiata yapëtane Dioso bitso piasaënëcuene Egiptonacua pepo pevetsinë matatoxenetsia.

<sup>28</sup> Moiséspijinë Dioso peyavenonaenexatsi, tajëvelia najamatabëcuenecopata Diosojavabelia. Bajaraxuata pamatacabi Moiséspijinë pijamonae barëpitsapa Egipto nacuavecua, ayaicuenia Dioso yavenonatsi pijamonae pebarëpanepaenexa. Bajaraxuata Moiséspijinë pacuenia Dioso itorobatsi, juya daxita pijamonae itoroba. Moiséspijinë pijamonaejavabelia jumaitsi mapacueniaje: “Daxita paxamë, pacaebopijivimë canacujitsia, pabename ovejaxi, pejanapebitoxi. Nexata panijabobaupanë, caebaupa canacujitsia, pamuxunenetsicabianame ovejajanata. Nexata ajena, pameravi, ángelnë najetaruae ata tsane peverebiabinexa pebinacuetoxi, matapijinacuetoxi, itsiata apo pacoxitëpaemë tsane,” jai Moiséspijinë pijamonaejavabelia. Nexata Moiséspijinë pijamonae pijabobaupanë, caebaupa canacujitsia, tsicaba ovejajanata. Nexata ángelnë najetaruae ata peverebiabinexa pebinacuetoxi, matapijinacuetoxi, itsiata Moiséspijinë pijamonae apo coxitëpae. <sup>29</sup> Bajayata pamatacabi Moiséspijinë pijamonae barëpitsapa Egipto nacuaverena, Egipto nacuapijivi picani barajinatsi pebeyejebinexatsi. Nexata bajarapamatacabi Moiséspijinë pijamonae barënajamatabëcuenecopata Diosojavabelia peyavenonaenexatsi. Nexata ayaicuenia Dioso yavenonatsi. Bajarapamonae Dioso pejamatabëcueneta nicaba Rojovënë manuamenemaxërana tuatuajëalia. Dioso pejamatabëcueneta benamutocuenia totseviaexanaxualiat. Nexata jane baja Egipto nacuapijivi, pamonaë jane baja picani barajinatsi pebeyejebinexatsi, nanicabarubenapona. Ajena baja epatota najetarubena, mera baja icatsia avajubua tsaxuabi. Bubuna baja nexata Egipto nacuapijivi.

<sup>30</sup> Bajayata Jericó tomarapijivi piatayaëibopanaxaneto exana pijatomara matatoyorotsia penayajivicaranatsinexa pijavajabitsaëvecua. Bajara payacaranatsijavaxaneto mataropotsia catsanaruba ibopananë. Bajaraxua athëbëabetsia apia pacuenia pinijinaejavaxaneto apia. Nexata Israelpijinë pemomoxi vajabitsaë pexanaevajënaeya Jericó tomarapijivijavabelia, tajëvelia najamatabëcuenecopaba Diosojavabelia peyavenon-

aenexatsi. Israelpijinē pemomoxi itsa pata Jericó tomarata, jinavanapa bajara payacaranatsijavaxaneto jumavelia. Nexata jane baja vajabitsaë exana Jericó tomarapijivijavabelia. Israelpijinē pemomoxi Dioso pitorobicueniatsi Jericótomara matatoyorotsia najetarubena seis xuabeje. Seis baitsi baja pijinia pamatacabibeje. Nexata jane baja siete matakabita, caematacabita, matatoyorotsia najetarubena siete xuabeje. Nexata jane baja siete matakabita bajarapayacaranatsijavaxanetomi jopaica. <sup>31</sup> Bajayata Rahabpijiva, Jericó tomarata peponaponaeva, pibisiacuene pevitota pexanabiabiva ata, marapijivimi Dioso verebiabatsi. Itsiata baitsi jane Rahabpijiva bajarapamonae apo yajavatëpae. Tsipaji pexaniacuene exana. Dioso pejamatabëcueneta Jericó tomarapijivimi peverebiabivajënaetsi, Israelpijinē pemomobeje yaenebabeje Jericó tomarapijivi. Bajarapacuenia yaenebabeje vajabitsaë jane baja pexanaenexa Jericó tomarapijivijavabelia. Bajarapamatacabi Rahabpijiva xaniavaetsia copiapita Israelpijinē pemomobeje. Bajaraxuata Jericó tomarapijivimi Dioso verebiabi atatsi, Rahabpijiva apo yajavabeyaxuabitsi.

<sup>32</sup> Apo necuenecaëjëpae baja pematatsënëa itsamonae pelivaisi patacatoyaquinaenexa patacamuxujiobinexa, panenajamatabëcuenecopatsinexa Diosojavabelia papecayavenonaenexa. Apo necuenecaëjëpae patacatoyaquinaenexa Gedeónpijinē pelivaisi, Baracpijinē ata pelivaisi, Sansónpijinē ata pelivaisi, Jeftépijinē ata pelivaisi, Davidpijinē ata pelivaisi, Samuelpijinē ata pelivaisi. Apo necuenecaëjëpaenua patacatoyaquinaenexa itsamonae, Diosojumepaebivimi profetavi, pelivaisi. <sup>33</sup> Daxita bajarapamonaemi ata najamatabëcuenecopaba Diosojavabelia peyavenonaenexatsi. Bajaraxuata bajarapamonaemi Dioso yavenonaponatsi. Bajarapamonaemi itsa navajabitsaëtatuatopona itsanacuanëpijivijavabelia, bajarapanacuanëpijivimi verebabilia Dioso peyavenonaexaetsi. Bajarapamonae pijanacuanëjjava pijajivi itsa eveta, xaniavaetsia evetabiaba. Tsipaji Dioso yavenonaponatsi. Bajaraxuata xaniavaetsia pijajivi evetabiaba. Paepatota ata toayapëbejetsi itsacuenejavayo yabara, Dioso yavenonabiabatsi. Yavenonabiabatsi pacuenia Dioso tajëvelia najumecapanepaeya jumaitsitsi peyavenonaenexatsi. Bajaraxuata bajarapamonaeyajuvënëvi xuabi atatsi nevëthëbitsaëto penubenaebayabelia, bajarapacuenia picani pebeyaxuabinexatsi, itsiata Dioso yavenonatsi. Nexata Dioso peyavenonaexaetsi Dioso pejamatabëcueneta nevëthëvecua cuibocataitatsi. Nexata baja nevëthë apo itsacueniabitsi. <sup>34</sup> Itsamonae pijinia bajarapamonaeyajuvënëvi xuabi atatsi pinijiisotualia, Dioso peyavenonaexaetsi, itsiata apo tajueti. Itsamonae pijinia jamatabëbeyaxuabi atatsi espadata, vecuapanepa Dioso peyavenonaexaetsi. Pamonaë pijinia apo aitatsaca picani penavajabitsaëtsinexa, bajarapamonae ata bitso baja piatatsacavi naexanapona vajabitsaë penaexanabataponaejavata Dioso peyavenonaexaetsi. Nexata bajarapamonae pijavajabitsaë cueneamoneyaba. Vecuarëcëpecatsi. <sup>35</sup> Bajayata pijinia petiriavi penajamatabëcuenecopatsixae Diosojavabelia peyavenonaenexatsi, itsa coxitëpa, Dioso icatsia toasaëyaexanabiabatsi.

Bajayata pijinia itsamonae Dioso pejumecovënëtsiviyajuvënëvi bejiobiaexanatsi Dioso pejumecovënëtsixae. Bajarapacuenia pebejiobiaexanaejavatatsi, itsamonae tëpabiaba. Bajarapacuenia yajuvënëexanatsi pecopabinexa picani Dioso pejumecovënëtsijava. Itsiata baitsi jane apo copabi Dioso pejumecovënëtavanapaejava. Bajarapacuenia apo copabi Dioso pejumecovënëtsijava. Tsipaji bajarapamonae jamatabëjumaiti tsavanapae: “Mapanacuataje taponaponaejava matatoxenetsia bitso jitsipajë matakabi apo pevereverecaejava Dioso tanerajutsinexa,” jamatabëjai tsavanapae bajarapamonae. <sup>36</sup> Itsamonae pijinia Diosojavabelia penajamatabëcuenecopatsixae, itsamonae capocaponabiabatsi. Jumatitibabeyabiabatsinua penaneconitsivi pejumaconitabiabimacata. Itsamonae pijinia cadenamaëtota cëbejebabiabatsi. Penaneconitsivi pejebabiabibota jebabiabatsi. <sup>37</sup> Itsamonae pijinia ibotonëta saya tseconabiabatsi pebeyaxuabinexatsi. Itsamonae pijinia petëpaenexa, epacaucubatsi sierrata. Itsamonae pijinia jamatabëcueneëjëtatsi pecopabinexa Dioso pejumecovënëtsijava. Bajaraxuacujinae espadata beyaxuababiabatsi. Itsamonae pijinia pijabovëcua capitsapatsi. Apo pexainaexae

penaxatabijava, bajarapamonaē naxataba ovejaboco, chivoboco ata. Pexainaejava ata apo xainae. Nexata bitso bejiobi bajarapamonaē. Barajinabiabatsi. Bejiobiaexanatsinua.<sup>38</sup> Bajarapamonaemi petusato nacuanējjava jinaruta. Petsutonē nacuanējjava ata, jinaruta. Pitajanitonējjava perubenaevajuanē jaita meravi pemajitabiabinexa. Bajarapamonaē yabara itsamonaē najumaitsi: “Mapamonaēje vajatomarata pejinavanapaenexa, apo betocopatsitsi,” najai. Itsiata bajarapamonaemi Dioso asivatsi.<sup>39</sup> Daxita bajarapamonaemi najamatabēcuenecopaba Dioso javabelia peyavenonaenexatsi. Bajaraxuata bajarapamonaemi Dioso aneconijibia tanetsi. Itsiata baitsi jane abaxē bajarapamonaemi itsa asaē tsavanapae, mapanacuataje Dioso abaxē apo rajutsitsi xua yabara Dioso najumecapanepaeya jumaitsi perajutsinexatsi. Matapania baja bajarapamonaē itsa tēpa, Dioso jane baja rajutatsi matabi apo peverevereaejava.<sup>40</sup> Dioso abaxē evetavanaepaeyaxanatsi xua rajutsijitsiatsi bajarapamonaē. Tsipaji Dioso apo najamatabēxainae ēbajarapamonaējavabelia perajutsinexa bajaraxua. Vaxaitsi ata mapamatacabita vajajinavanapaevi, bajarapamonaē yajava, Dioso jamatabēnacarajuta bajarapapexaniacuene, matabi apo peverevereaejava.

## 12

*Pacuenia vajavajēnaeyabelia becaasaē tsavanapaetsi Dioso vajajumecovēnētsijava Jesucristo cruzata vajanacasivatēpaexae yabara pelivaisi*

<sup>1</sup> Pamonaē yabara pacatoyaquinatsi, bajayata najamatabēcuenecopaba Dioso javabelia peyavenonaenexatsi. Nexata bajarapamonaemi vajavēnlivaisitaexae, bemuxunana-jamatabēcuenesaētatsi vaxaitsi ata Dioso vajanacayavenonaenexa. Itsa nayacobijitsiatsi vajacujinaejinaejava, nexata najonotatsi piarevejjava bitsojinaeya vajacujinaejinaenexa, vajapatsinexa itsabelia nacatocaējēta vajanacaitorobinē. Bajara pijinia pacuenia Dioso pitabarata xaniavaetsia bejinavanapatsi asaēyata vajatonacuenebinexa pacuenia Dioso nacaitoroba. Nexata copiaya benavecuacopatatsi papibisiajamatabēcuenexainatsi. Tsipaji bajarapapibisiajamatabēcuenenacaitorobabiaba pibisiacuene vajaexanaenexa. Bajarapapibisiajamatabēcuenenabaja becopabatsi vajaexanavanapaenexa xua Dioso nacaitoroba.<sup>2</sup> Itsa najamatabēcuenecopatatsi Dioso javabelia vajanacayavenonaponaenexa, nexata benajamatabēnapitabiabatsi Jesús. Tsipaji Jesús vajanacasivatēpaexae, Dioso aneconijibia nacatane. Jesús pejamatabēcueneta Dioso nacayavenonana vajaanamatabēcuenesaē tsavanapaenexa Dioso vajajumecovēnētsijava matapania vajanacapanepaejavabelianexa. Pajivi naneconita, cruzata rutatsi pebeyaxuabinexatsi pijaneconi yabara. Bajarapacuenia itsa naneconitsiaexanatsi, bitso piauracuene. Itsiata baitsi jane Jesús nacopata bajarapacuenia pebeyaxuabinexatsi. Bajarapacuenia Jesús nacopata pebeyaxuabinexatsi tsipaji natsivajēnaeyapētane pejamatabēcuenenabarēyavanexa icatsia itsa asaē petēpaecujinae, daxitajivi pijaneconi pematamotsixae. Aeconoxae baja nexata Jesús tronovēnējavata athēbētatsia eca, Dioso pemuxuneneta, pecujanenia, penajuae vetsinexabeje daxitacuene.

<sup>3</sup> Pacanaējēre Jesús pijamatabēcuenesaē tsaponaponaejava, pibisiacuene pexanaevi pinijicuenia bejiobiaexanae atatsi. Bajarapacuenenapacanaējētsianame itsamonaē itsa pacabejiobiaexana Jesús panejumecovēnētsijava yabara. Nexata apo pacueranaemē tsane Dioso panetonacuenebijava. Apo pajamatabēcuenefaenaemēnua tsane.<sup>4</sup> Paxamē panajamatabēcuenesaētavanapame pibisiacuene paneexanaeyaniva. Bajarapacuenia panajamatabēcuenesaētavanapae atamē pibisiacuene paneexanaeyaniva, itsiata abaxē pibisiacuene pexanaevi apo pacayajuvēnēbeyaxuabi. Bajaraxuata panevajēnaeyabelia bepanajamatabēcuenesaētavanapame pibisiacuene paneexanaeyaniva.<sup>5</sup> Pētsa panacofēnētame Dioso papecamuxujibijava papecajamatabēcuenesaēyaxanaenexa itsa pacamuxujioa bepapeximēcuenia. Tsipaji Dioso pejumelivaisibaxutota paxamē yabara jumaitsi mapacueniaje:

Taxi, xanëjavaberena panenaneconitsixae, itsa pacananeconitsiaexanaenatsi, pëtsa payaanaepaname. Pëtsa pasivajamatabëcuenefaefaenamenua itsa pacabijatanetsi xua yabara pananeconitame. <sup>6</sup> Pacananeconitsiaexanaenatsi. Tsipaji xanë muxujiobiaya bananeconitsiaexanajë pajivi asivanë, baitsi daxita pamona taxicuenia tataevi,

jai Dioso pejumelivaisibaxutota paxamë yabara.

<sup>7</sup> Nexata patonacaevere Dioso muxujiobiaya papecananeconitsiaexanaenexa. Tsipaji Dioso papeximëcuenia pacatane. Jivi ata baja cajena pexi muxujiobiaya banacoxivitsata. <sup>8</sup> Nexata Dioso muxujiobiaya itsa apo pacaevetsi tsipae, Diosojavabelia pananeconitsi atamë, nexata Dioso papeximëcuenia apo pacatae tsipae. Tsipaji jivi ata, pexi pexainaevi, muxujiobiaya banacoxiconita. <sup>9</sup> Vaxaitsi abaxë pamatacabi pejevaxitsi mapanacuata, vaxajivi nacamuxujiobiaya banacaconita. Nexata vaxajivi yaiyatanetsi. Nexata biji vaxaitsi bitsoyo bejumecovënëtatsi vaxa Dioso, ponë eca athëbëtatsia, vajanacarajutsinexa matacabi apo pevereverecaejava. <sup>10</sup> Itsa abaxë vaxajivi mapanacuata nacavitsata, muxujiobiaya banacaconita. Tsipaji vaxajivi nacatojitsipa xaniavaetsia vajatojinavanapaenexa. Bajaraxuata nacamuxujiobiaya banacaconita pacuenia vaxajivi nacatojitsipa vajatojinavanapaenexa. Itsiata baitsi jane vaxa Dioso muxujiobiaya nacananeconitsiaexana pepacuene vajacopatsinexa pibisiacuene vaxaexanaejava. Nexata bajarapacuenia Dioso nacajamatabëcueneyavenona vajaperujumatabëcuene-mivecua vajanajamatabëcuene pënëyorotsinexa Diosojavabelia. Nexata pacuenia Dioso jamatabëcueneitsi, bajara vaxaitsi ata vajajamatabëcueneitsinexa. <sup>11</sup> Paepatota vaxa Dioso nacamuxujiobiaya nacananeconitsiaexana, bajarapaepatota abaxë apo sivajamatabëcuenebarëyatsi xua nacatocopiapata. Itsiata baitsi jane pajivi Dioso muxujiobiaya naneconitsiaexanatsi, yapëtane baja xua yabara naneconitsiaexanatsi. Nexata baja copata bajaraxua. Nexata baja jamatabëcuenebarëyaya xaniavaetsia ponapona.

*Pacuenia tsiayaitsi tsane pajivi namuxujemata Dioso pejumelivaisi yabara pelivaisi*

<sup>12</sup> Pacopabare baja panejamatabëcuenecueranaejavami. Panevajënaeyabelia panajamatabëcuenesaëtaPONARE. Tsipaji baja panajamatabëcuenecopatame Diosojavabelia papecayavenonaenexa. <sup>13</sup> Pëtsa pajumecovënëtame itsalivaisi Dioso pejumelivaisivecua. Èpexaniajailivaisi, Dioso pejumelivaisi, panevajënaeyabelia pajumecovënëtavanapare. Nexata itsamonae Dioso pejumecovënëtsivi, pamona abaxë apo ajamatabëcuenesaë Dioso pejumecovënëtsijava, pacaitaxutua ajamatabëcuenesaë tsaponae tsane.

<sup>14</sup> Daxitajivijavabelia pexaniajamatabëcuene patoxainare. Nexata aneconijibia pajinavanapaename Dioso pitabarata. Pajivi aneconijibia apo ponapona tsane Dioso pitabarata, bajarapajivi Dioso apo yajavaponapona tsane. <sup>15</sup> Xania baja panayajivitaema. Pëtsa pacopabame Dioso panejumecovënëtsijava, Dioso papecacopatsiyaniva papecaitaxutotsoniataejava panepuajumecovënëtsivi Dioso. Pacuenia piatsaxaënëboto daxitamera bijianaejitsipa, bajara pajamatabëcueneitsimë tsipae caenë ata, paxamëyajuvënënë, pibisiacuene itsa exanaejitsipa. Pacajamatabëcuene bijianaejitsipa padaxitamë. <sup>16</sup> Panayajivitaemanua itsanë ata, paxamëyajuvënënë, pejaitsiyaniva itsava pepo pijavavecua. Petiriva ata pejaitsiyaniva itsanë pepo pamonavecua. Panayajivitaemanua panejumeaebiyani Dioso najumecapanepaeya papecajumaitsijava. Pëtsa Dioso panejumeaebame pacuenia bajayata Esaúpijinë jumeaeba Dioso najumecapanepaeya pejumaitsijavatsi. Esaú picani matapijinëxae, Dioso yavenonabiabijitsiatsi. Nexata itsajota Esaú bitso piyani, pejuyapijinëjavabelia pexaejava caenabani namitsavajëta. Nexata pejuyapijinë jumaitsitsi: “Pacuenia nexaejava nevajëtame, carajutsianatsi. Nexata xua Dioso cayavenonabiabiapaeba, bajaraxua juya xanë netocopatsianame,” jaitsi. Nexata Esaú jejai. Pejuyapijinëjavabelia baja tocopata xua picani Dioso yavenonabiabijitsiatsi. <sup>17</sup> Payapëtaneme rabaja pacuenia Esaúpijinë exana pejuyapijinë petocopatsicujinae xua picani Dioso yavenonabiabiapaebatsi. Esaúpijinë picani paxa itoroba Diosojavabelia petovajëtsinexatsi Dioso peyavenonabiabinexatsi paxa pevënamuto. Itsiata baitsi jane paxa apo jumejejaitsi. Nexata Esaúpijinë bitso nua pejuyapijinë petocopatsixae xua

picani Dioso yavenonabiabijitsiatsi. Itsiata baja acuenebi pexanaejava. Bajaraxuata paxamë ata pëtsa pacopabame Dioso panejumecovënëtsijava Dioso najumecapanepaeya papecajumaitsijava.

<sup>18</sup> Paxamë panejumecovënëtsixae Dioso, pacatocopata roviaia panevajëtsinexa Diosojavabelia. Nexata apo panamatavenonaemë paneponaenexa itsanacuajavabelia panevajëtsinexa Diosojavabelia. Bajayata Israelpijinë pemomoxi pata ibotsutoxane-totabuyaberena. Nexata bajarapatsutotabuta navajëca Diosojavabelia. Nexata bajarapatsutojumatsia Israelpijinë pemomoxi tane beisotocotia itsajota aitaquiri. Bajarapaepatota bitso emaxaneto, ayaijovibo yajava. <sup>19</sup> Bajarapaepatota Israelpijinë pemomoxi jumetane penajumetsijava trompeta. Jumetanenua Dioso pecuaicuaijajavatsica athëbëvetsica bajarapamonaejavabelia. Nexata judfovi pecajunavi bitso, vajëta Diosojavabelia Dioso pecuaicuaijayaniva pematatsënëa. <sup>20</sup> Bajarapacuenia Israelpijinë pemomoxi vajëta Diosojavabelia tsipaji bitso jumecujunava Dioso pejumaitisijavatsicatsi mapacueniaje: “Pajivi ponaena mapatsutoyenepanajavaje, bajarapajivi tseconaenatsi ibotonëta. Itsa jume, becuererebonëta cacuatsianatsi pebeyaxuabinexatsi bajarapacuenia. Dajubinë ata itsa ponaena mapatsutoyenepanajavaje, bajarapacuenia exanaenatsi,” pejaijavatsica Dioso athëbëvetsica, Israelpijinë pemomoxi bitso jumecujunava. <sup>21</sup> Nexata Israelpijinë pemomoxi bajarapajume itsa jumetane, pecajunavi, bitso neconecojai. Moiséspijinë ata jumaitsi: “Xanë ata rabaja tacajunavi, bitso neconecojanë,” jai.

<sup>22</sup> Itsiata baitsi jane paxamë baja aeconoxae Dioso panejumecovënëtsixae, Dioso baja pacatocopata panepatsinexa Dioso pijatomarabetsia roviaia panevajëtsinexa Diosojavabelia. Bajarapatomaratsia eca Dioso, piasaëtsaponaponaenë. Bajarapatomara pevënë Jerusalén. Eca Siónvënë tsutojumata. Bajarapatomaratsia Dioso pijajivi ángelevi, miles paángelevibeje, yajavaponapona. <sup>23</sup> Bajarapatomaratsia payajavanacaetuatsianame itsamonae, pamonaë panevajënaeya jumecovënëta Dioso. Bajarapamonae vënëyaquinarubatsi bajarapatomaratsia. Panacaetuatsianame Dioso pitabarata, ponë naneconitsiaexanaena daxita pamonaë naneconita bajaraponëjavabelia. Payajavanacaetuatsianamenua daxita pamonaemi tëpa Dioso pepua pejumecovënëtsivi. <sup>24</sup> Panajamatabëcuenecopatame baja Jesucristojavabelia, ponë pejamatabëcueneta Dioso nacavecuajibiaexana vajaneconimi. Nexata Dioso aneconijibia nacamata. Bajayata Abelpijinë itsa beyaxuabatsi, ponë beyaxuabatsi, juya picani xanepana peyamatomobeyaxuabinexatsi. Itsiata baitsi jane pamatacabi Jesús beyaxuabatsi cruzata, itsajivi ata apo najamatabëxainae Jesús peyamatomobeyaxuabinexatsi. Tsipaji Jesús petëpaejava pejamatabëcueneta, Dioso aneconijibia taejitsia daxita pamonaë jumecovënëta Dioso.

<sup>25</sup> Bajaraxuata Dioso pejumelivaisi vajanacatsipaebijava, bejumecovënëtatsi. Bajayata pamonaë apo jumecovënëtsi Dioso Moiséspijinëta penajumecopatsilivaisi, naxuaba Diosovecua. Dioso apo capanepaetsi bajarapamonae. Vaxaitsi ata bitsoyo Dioso nacananeconitsiaexanaejitsipa itsa apo jumecovënëtsitsi ponë nacajunata athëbëvetsica. <sup>26</sup> Paepatota pina Dioso athëbëvetsica Sinaivënë tsutojumavetsica cuaicuaijai, baja pina paepatota ira najëaba. Nexata icatsia xuacujinae bexëa Dioso tajëvelia najumecapanepaeya jumaitsi mapacueniaje: “Itsamatacabi icatsia ira najëabiaexanaenajë. Nexata jane baja caecuenia ira, itaboxo yajava, najëabiana,” jai Dioso tajëvelia najumecapanepaeya. <sup>27</sup> Xua yabara tajëvelia Dioso najumecapanepaeya jumaitsi, maitsi tsaneje. Mapairaje, itaboxo yajava, itsa najëabiana, daxitacuene xua Dioso exana mapanacuataje, vereverecaena. Itsiata Dioso pejumelivaisi, pijatomara ata, apo vereverecae tsane. <sup>28</sup> Xua itsamatacabi Dioso nacamatacabsiana athëbëtatsia vajatoevetsinexa, bajaraxua apo vereverecae tsane. Bajaraxuata vaxaitsi pexaniajamatabëcuene rajutatsi Diosojavabelia. Yaiyataeya vajajamatabëthëtovetsina Diosojavabelia jumai tsabiabi tsanetsi: “Diosomë, bitso ayaijamatabëcuenenëmë,” jai tsabiabi tsanetsi Dioso vajanacasivajamatabëcuene barëyanexa. <sup>29</sup> VajaDioso jivi penaneconitsiaexanaenë. Pacuenia isoto vayafa itsa tajuenajetaruca, verebiaba daxita piabejjava petajuejavata, bajara pijinia pacuenia

Dioso verebiabiana pamonae pibisiacuene pexanaevi.

### 13

*Pacuenia bexanavanapatsi Dioso vajanacasivajamatabëcuene barëyanexa yabara pelivaisi*

<sup>1</sup> Pëtsa pacopabame namataenetsia panenasivajava Dioso panejumecovënëtavana-paevi. Panevajënaeyabelia namataenetsia panaasivamëre. <sup>2</sup> Pëtsa panacofënëtame xaniavaetsia panecopiapitabiabinexa apo paneyapëtaevi ata itsa pata panijaboyaberena. Bajayata pina bajarapacuenia xaniavaetsia jivi pecopiapitabiabivi, xaniavaetsia copipita ángelevi, apo yapëtae ata ángelevicuene.

<sup>3</sup> Panajamatabënapitabiabare pamonae jebatsi penaneconitsivi pejebabiabibota Dioso pejumecovënëtsixae. Paxamë ata, bajarapamonae yajava, bepanenajuananeconitsivi panataema. Pamonae ata bejiobiaexanatsi Dioso pejumelivaisi yabara, bajarapamonae ata pajamatabëcueneyavenonare. Paxamë ata, bajarapamonae yajava, bepepecabejiobiaexanaevi panataema.

<sup>4</sup> Daxitajivi beyaiyatane penacojiobijivi. Pajivibeje baja napitabeje, apo benavecuana-matayajitsibeje. Pebi apo bejaiti itsava pijavavecu. Petiriva pijinia apo bejaiti itsanë pamonavecu. Tsipaji Dioso naneconitsiaexanaena bajarapitsipibisiacuene pexanaevi.

<sup>5</sup> Pëtsa bitso pajitsipame palata. Pasivajamatabëcuenebarëyamëre saya xuayovajëto paxainame. Tsipaji Dioso jumaiti mapacueniaje: “Apo copatsinë tsane patacayajavaponaponaevajava,” jai Dioso. <sup>6</sup> Bajaraxuata ajumejunavijibia namataenetsia najumaititsi mapacueniaje:

Dioso cajena vajanacayavenonaenë. Nexata apo junavitsi tsane, itsajivi nacaitsacueniabijitsia ata, najaiti vaxaiti namataenetsia.

<sup>7</sup> Panajamatabënapitabiabare pamonae bajayata pacatsipaeba Dioso pejumelivaisi. Pacanaëjere pacuenia bajarapamonaemi Dioso pejumecovënëtsijavaveliacujinae, xaniavaetsia jinavanapa Dioso pitabarata matapania petëpaejavabelianexa. Bajarapacuenia paxamë ata Dioso pitabarata xaniavaetsia pajinavanapare matapania panetëpaejavabelianexa.

<sup>8</sup> Jesucristo epatua itsajamatabëcuene apo xinae tsane. Pamatacabibeje ponapona, caejamatabëcuene xainaponaponaena. Pevajënaeyabelia ata daxitamatacabijavabelianexa, caejamatabëcuene xainaponaponaena. <sup>9</sup> Pëtsa pacopabame panejumecovënëtsijava palivaisi baja pajumecovënëtame. Pëtsa pajumecovënëtame itsalivaisi bajarapalivaisivecu. Paxamë baja Dioso panejumecovënëtsijava, pajamatabëcuenesaëmë tsavanapae Dioso asivaya papecayavenonaexae. Diosojavabelia apo pajamatabëcuenesaëmë tsavanapae tsipae, panexaejava paatsobi atamë. Itsamonae jumecovënëta pexaejava piatsobinexa pitavetsilivaisi. Nexata pexaejava atsobabiaba. Itsiata baiti jane pexaejava piatsobijava pejamatabëcueneta apo jamatabëcueneasaëyaexanaetsi Dioso pejumecovënëtsijava.

<sup>10</sup> Jesús itsa cobematabiabarutatsi cruzajavabelia, vaxaiti nacasivatëpa. Nexata pamonae tsiteca ëperujulivaisimi sivajamatabëjumaiti: “Itsa jumecovënëtaponaponaenajë Dioso Moiséspijinëta penajumecopatsilivaisi, nexata xanë ata Dioso necapanepaena,” sivajamatabëjai, bajarapamonae saya jamatabëcuenenavëxaniaba. Bajarapitsijamatabëcuene penajamatabëxainaevi, apo capanepaetsi tsane Diosojavabetsia. Tsipaji Jesús pesivatëpaejavatsi, apo jumecovënëtsi. <sup>11</sup> Sacerdotevi pepo penamatacaitorobinë dajubinë beyaxuababiaba. Nexata bajarapajana cajoneyabiaba Lugar Santísimojavabelia, itsajota baiti Dioso peponaponaenexa yatuucuta. Bajarapayatuucutsijavaënëta sacerdotenë dajubinë pijana rajutabiaba ofrendacuenia Diosojavabelia, Dioso pevecuaajibiaexanaenexatsi pibisiacuene pexanabiabineconi. Nexata bajarapadajubinë pevi sacerdotenë itsa tajuita, tomarapënëyabelia tajuitabiaba. <sup>12</sup> Bajaraxuata Jesús ata Jerusalén tomarapënëyabelia bejiobiaexanatsi. Bajaraxuacujinae beyaxuabatsi. Nexata daxita pamonae jumecovënëta Jesús pesivatëpaejavatsi, bajarapamonae Jesús pijana pejamatabëcueneta Dioso vecuaajibiaexanatsi pibisiacuene pexanaeneconimi.

<sup>13</sup> Nexata vaxaitsi ata becopatatsi baja perujulivaisi vajajumecovënëtsijavami. Nexata bejumecovënëtatsi Jesús pelivaisi. Nexata pacuenia Jesús nacopata itsamona pebejiobiaexanaenexatsi vajanacasivatëpaenexa vajaneconi yabara, bajara pijinia pacuenia vaxaitsi ata benacopatatsi itsamona vajanacabejiobiaexanaenexa Jesús pelivaisi yabara.

<sup>14</sup> Mapanacuataje apo xainaetsi patomarata daxitamatacabijavabelianexa jinavanapaejitsiatsi. Biji rajane abaxë vajënaeevetavanapatsi athëbëpijtomara, patomarata patsijitsiatsi athëbëtatsia. <sup>15</sup> Jesucristo vajanacasivatëpaexae, Dioso nacatocopata vajavajëtabiabianexa Diosojavabelia. Nexata itsa vajëtabiabianatsi Diosojavabelia, jumaititsi tsabiabi tsane: “Diosomë, bitso ayaijamatabëcuenenëmë,” jaitsi tsabiabi tsane Diosojavabelia. Bajarapacuenia vajajumaitsabibijava Diosojavabelia, Dioso taena ofrendacuenia bevajarajutaponaejava Diosojavabelia. Bajaraxuata itsa vajëtabiabianatsi Diosojavabelia, bajarapacuenia jumai tsabiabi tsane. <sup>16</sup> Pëtsa panacofënëtame pexaniacuene panetoexanavanapaejava itsamonaejavabelia. Itsajivi penamatavenonaejava, parajutsianame paneyavenonaenexa bajarapacuenia. Bajarapacuenia itsa parajutsianame itsajivi penamatavenonaejava, Dioso pacasivajamatabëcuenenbarëya tsane.

<sup>17</sup> Pamonaë ancianovi, xua pacaitoroba, pajumecovënëtabiabare. Itsamonaë ata, pamonaë pijinia Dioso tocopatatsi papecaevetsinexa Dioso panejumecovënëtsivixae, xua pacaitoroba, pajumecovënëtabiabare. Bajarapamonaë yapëtanenua pacuenia Diosojavabelia naneconitsipa, xaniavaetsia itsa apo pacaevetsi. Itsa pajumecovënëtabiabianame papecaevetsivi papecaitorobicuenia, nexata papecaevetsivi jamatabëcueneyavenonaeya pajinavanapaename. Nexata pacasivajamatabëcuenenbarëya tsane papecaevetavanapaejava yabara. Paxamë itsa apo pajumecovënëtsimë tsipae, nexata papecaevetsivi pacasivajamatabëcuenenbëjai tsipae. Nexata papecaevetsivi toacuenebi tsipaetsi papecajamatabëcueneyavenonaenexa Dioso panejumecovënëtsijava yabara.

<sup>18</sup> Panetovajëtaponaename Diosojavabelia. Paxanë pajamatabëjumaitsinë: “Vaxaitsi baja apo naneconitsitsi Diosojavabelia, jivijavabelia ata,” pajamatabëjanë. Bajarapacuenia patavajënaeyabelia Dioso pitabarata aneconijibia patajinavanapaenexa, panetovajëtsianame Diosojavabelia. <sup>19</sup> Panetovajëtaponaenamenua Diosojavabelia Dioso patanetocopatsinexa pataponaenexa paxamëjavabelia. Tsipaji icatsia pajitsipajë bepijia patapatsinexa paxamëjavabelia.

*Pacuenia Pablo Dioso pejumecovënëtsivi tovajëta Diosojavabelia, pacuenia ata jamatabënjina itsamonaë Dioso pejumecovënëtsivi, yabara pelivaisi*

<sup>20-21</sup> Jesucristo vajanacasivatëpaecujinae, vaxa Dioso icatsia asaëyaexanatsi. Bajaraxuata yapëtanetsi pexaniajaicuene Dioso athëbëabetsia vajanacacapanepaejavanexa daxitamatacabijavabelianexa. Dioso yavenona daxitajivi jamatabëcuenexanepanaeya pejinavanapaenexa. Nexata pacatovajëtatsi Diosojavabelia papecarajutsinexa xua panamatavenoname, panetoexanavanapaenexa pacuenia Dioso pacatojitsipa. Vajëtajënuu Diosojavabelia Jesucristo pejamatabëcueneta vajanacajamatabëcuenexanebinexa pacuenia jitsipa. Pacuenia oveja pexainaenë xaniavaetsia evetaponapona pijaoveja, bajara pijinia pacuenia vajatuxanenë Jesucristo xaniavaetsia nacaevetaponapona. ¡Jesucristo bitso ayaijamatabëcuenenë tsaponaponaë daxitamatacabijavabelianexa! Bajara itsi tsane.

<sup>22</sup> Tajamonaë, pacaitorobatsi xaniavaetsia panenamuxunaevetsinexa palivaisi pacatoyaquinatsi mapabaxutotaje. Tsiquirilivaisiyo saya pacatoyaquinatsi patacamuxujiobinexa panevajënaeyabelia panejamatabëcuenesaënexa Dioso panejumecovënëtsijava. <sup>23</sup> Pexanialivaisiyo pacatoyaquinatsi patacatsipaebinexa mapacuenije. Vajabanenë Timoteo rabaja pitsapa pananeconitsivi pejebabiabibovecua. Itsa patsiarena bepijiayo xanëjavaberena, nexata barëponaenajë paxamëjavabelia.

<sup>24</sup> Nebajacobiana daxita Dioso pejumelivaisita papecaevetsivi, daxita vajamonaë Dioso pejumecovënëtsivi yajava. Vajamonaë ata, Italia nacuapijivi, pacajamatabënajinalia.

<sup>25</sup> Daxita paxamë pacatovajëtatsi Diosojavabelia papecayavenonaenexa Dioso. Bajara itsi tsane.

## Mapabaxutoje Santiago toyaquina Dioso pejumecovënëtsivijavabelia

*Pacuenia Santiago toyaquina mapabaxutoje Dioso pejumecovënëtsivi nacayajatsia pejinavanapaevi yabara pelivaisi*

<sup>1</sup> Xanë Santiagonë, Dioso pijajivitonënë, vajatuxanenë Jesucristo ata pijajivitonënë. Pacatoyaquinatsi pajudíovimë patacabajacobinexa. Israelpijinëmi pexi doce ponëmibeje papemomoxiyajuvënëvimë. Pepo panijanacuata picani panejinavanapaevimimi. Aeconoxae baja pepo panijanacuamivecua, nacayajatsia pajinavanapame daxita nacuanëjava.

*Pacuenia Dioso pejumecovënëtsivi itsa jamatabëyapëtane pacuene xanepana pexanaenexa, bevajëta Diosojavabelia yabara pelivaisi*

<sup>2</sup> Tajamonae, pasivajamatabëcuenebarëyamë tsane daxitacuene, apo panejitsipaeuene ata, itsa pacatocopiapatsiana. Tsipaji raja bajarapacuene pacatocopiapatsiana papecajamatabëcueneëjëtsinexa Dioso panejumecovënëtsijava yabara. <sup>3</sup> Bajarapacuenia Dioso panejumecovënëtsivi pacajamatabëcueneëjëtaponae paneajamatabëcuenesaë tsaponaeenexa panevajënaeyabelia Dioso panejumecovënëtsijava. Payapëtaneme rabaja bajarapacuene yabara. <sup>4</sup> Apo panejitsipaeuene pacatocopiapatsi ata, pajamatabëcueneesaëmë tsavanapae tsane bajayajebi. Nexata pajamatabëcuenevitsabaponae name Diosojavabelia. Nexata apo pacatosai cae tsane itsalivaisi ata panejamatabëëthëtota.

<sup>5</sup> Paxamë itsa pajamatabëyapëtaneme pacuene xanepana paneexanaenexa, nexata bepavajëtame Diosojavabelia papeca yapëtae yaexanaenexa Dioso. Nexata Dioso pacayapëtae yaexanaena pacuene xanepana paneexanaenexa. Dioso cajena bayapëtae yaexana daxita pamonaë vajëta bajaraponëjavabelia. Apo jumeitavetsi cajena itsa vajëtatsi. <sup>6</sup> Itsa pavajëtame Diosojavabelia, pajamatabëjumaitsimëre: “Dioso cajena nacayapëtae yaexanaena xua vajëtatsi,” pajamatabëjamëre. Pëtsa pajamatabëjumaitsimë: “Dioso cajena itsiata apo nacayapëtae yaexanae tsane xua vajëtatsi,” pajamatabëjamë pëtsa. Pajivi jumeaeba Dioso peyapëtae yaexanaejavanexatsi, bajarapajivi xaniavaetsia apo najamatabëxainae. Bajarapajivi pejamatabëcuene bemalataca picani. Pacuenia malataca xaniavaetsia apo rucae jovibota, bajara saya jamatabëcueneitsi bajarapajivi. Apo najamatabëxainae caelivaisi, palivaisi Dioso yapëtae yaexanaejitsiatsi. <sup>7-8</sup> Bajarapajivi anijamatabëcuenebeje xaina. Najamatabëcuene epatajërërëcabiaba itsa exana daxitacuene. Nexata pajivi jumeaeba Dioso peyapëtae yaexanaejavanexatsi, pëtsa patocopatame pejamatabëjumaitsinexa: “Dioso cajena nerajutsiana tavajëtsijava,” pejamatabëjainexa. Dioso cajena apo rajutsitsi tsane xua vajëta bajarapajivi.

<sup>9</sup> Dioso pejumecovënëtsinë apo xainae ata pecobecovëjavayo, jivi apo yaiyatae atatsinua, itsiata bejamatabëcuenebarëya Dioso pejumecovënëtsinëxae. Tsipaji Dioso pejunatsixaetsi Dioso pijajivitonënëxa, apo bejiobi tsane daxitamatacabijavabelianexa. <sup>10</sup> Dioso pejumecovënëtsinë itsa bitso pexainaenë pexinaejava, itsamonae itsa yacajërëtatsi pexinaecuene, itsiata bejamatabëcuenebarëya Dioso pejumecovënëtsinëxae. Tsipaji pacuenia ponatoxi bepimia matonoverevereca, bajara pijinia itsi tsane bitso pexinaecuene ata. Bepimia vereverecaena. <sup>11</sup> Itsa baja juameto tajë rucaina, icotia bitso ataju. Nexata ponatoxi tsaquena. Pematono ata othopa. Nexata pexaniamatonojavami ata verevereca bepimia. Bajara pijinia itsi tsane bitso pexinaejava pexinaevi ata. Yajavavereverecaena pexinaejava pecanajetanucaepatota ata.

*Pacuenia Dioso jivi apo jamatabëcueneëjëtsi pibisiacuene pexanae yaexanaenexa yabara pelivaisi*

<sup>12</sup> Pamonae jamatabëcueneējētsi atatsi, najamatabëcueneecataita pibisiacuene pexanaeyaniva, bajarapamonae jamatabëcuenebarëya. Tsipaji itsa vecuapanepa pejamatabëcueneējētsijavatsi, pibisiacuene exanaenejeva, nexata bajarapamonae Dioso rajutsianatsi pexaniacuenejava. Rajutsianatsi matababi apo pevereverecejava. Bajarapacuene yabara Dioso najumecapanepaeya jumaiti perajutsinexatsi pamonae jitsipa Dioso. <sup>13</sup> Itsa pacajamatabëcueneējēta pibisiacuene paneexanaenexa, pētsa jamatabëcuenenavëxaniabiaya pajumaitsimē: “Dioso raja nejamatabëcueneējēta pibisiacuene taexanaenexa,” pajamē pētsa. Dioso cajena apo jamatabëcueneējētsi itsajivi ata pibisiacuene pexanaeyaexanaenexa. Itsajivi ata pijinia apo caējēpaetsi pejamatabëcueneējētsinexa Diosojavabelia pibisiacuene pexanaenexa Dioso. <sup>14</sup> Pajivi jamatabëcueneējētatsi pibisiacuene pexanaenexa, bajarapajivi copiaya pejamatabëēthētota jamatabënaponapona papibisiacuene jamatabëexana. Nexata jane baja itsa jamatabëcueneējētatsi pibisiacuene pexanaenexa, bajarapapibisiacuene exana. <sup>15</sup> Pajivi pibisiacuene exana, bajarapajivi exana pacuenia copiaya pejamatabëēthētota najamatabëxaina. Nexata tsiteca pibisiacuene itsa exanapona, pepacuene Diosovecua naxuabiana bajarapapibisiacuene pexanaponaexae.

<sup>16</sup> Tajamonae bitso patacaasivavi, jamatabëcuenenavëxaniabiaya pētsa pajamatabëjumaitsimē: “Dioso nejamatabëcueneējēta pibisiacuene taexanaenexa,” pajamatabëjamē pētsa. <sup>17</sup> Tsipaji daxita pacuene pepo pexaniacuene, Dioso baja cajena vajanacatoitorobicuenetsica. Bajaraponē pexanaenē daxita xua naitayotarubena itaboxotatsia. Dioso cajena daxitamatababijavabelianexa caejamatabëcuene penajamatabëxainaenē. Caejamatabëcuene Dioso nacasivanajamatabëxaina vaxaitsijavaberena. <sup>18</sup> Dioso baja cajena copiaya najamatabëxaina pexanaenexa pacuenia jitsipa. Nexata nacayapētaeyaexana pejumelivaisi pexaniajailivaisi. Bajaraxuata nacarajuta pejanajamatabëcuene pitavajamatabëcuene. Vaxaitsi copiaya Dioso itsa jumecovënētatsi, Dioso pexitsi nacaexana. Pamonae ata cotocaevi Dioso jumecovënēta, bajarapamonae ata Dioso pexi exanatsi. Nexata vaxaitsi, copiaya Dioso vajajumecovënētsivi, Dioso nacatane bematapijivitsi. Cotocaevi pijinia Dioso pejumecovënētsivi, Dioso tanetsi bejuyapijivi.

*Pacuenia bexanavanapa pamonae xaniavaetsia jumecovënēta Dioso yabara pelivaisi*

<sup>19</sup> Tajamonae bitso patacaasivavi, pacanaējētsianame mapalivaisije, palivaisi pacatsipaebijitsiatsi. Daxita paxamē xaniavaetsia bepanamuxunaevetame Dioso pejumelivaisi. Apo bepacuaicuaijamē abaxē copiaya xaniavaetsia panajamatabëxainaenejevamē. Apo bepaanaepanaemēnua bepijia. <sup>20</sup> Tsipaji itsa anaepanatsi, Dioso apo toexanaetsi pexaniacuene, pacuene Dioso jitsipa. <sup>21</sup> Bajaraxuata pacopabare daxita pibisiacuene panenajamatabëxinaejava. Pacopabarena daxita pibisiacuene paneexanaejava itsamonaejavabelia. Dioso raja pejumelivaisi pacatsijamatabëuba. Bajaraxuata bevelijamatabëcuenevi nataeya pajumecovënēre Dioso pejumelivaisi. Bajarapalivaisi itsa pajumecovënētame, nexata pacacapanepaena Diosojavabelia.

<sup>22</sup> Pacuenia Dioso pejumelivaisita jumaiti, jumecovënētsiaya paexanaponare. Pētsa pajamatabëjumaitsimē: “Pacuenia Dioso pejumelivaisita jumaiti, apo exanae atanē, apo itsacuene,” pajamatabëjamē pētsa. Tsipaji saya pajamatabëcuenenavëxaniabijitsipame. Nexata itsa apo paexanaemē tsipae pacuenia Dioso pejumelivaisita jumaiti, pananeconitsipame Diosojavabelia. <sup>23</sup> Pajivi jumetae ata Dioso pejumelivaisi, itsiata itsa apo exanae pitorobicueniatsi, bajarapajivi jamatabëcueneitsi pacuenia itsi ponē naitabaratanē tsaxuta. <sup>24</sup> Ponē tsaxuta naitabaratanē, penaitabarataecujinae pona baja. Nexata bajaraponē bepijia nacofënēta pacuenia itabarajumapeitsi. <sup>25</sup> Dioso cajena pejumelivaisi bitso xanepana. Caējēpatsinua vajanacacapanepaenexa bajaraponējavabelia. Pajivi daxita bajarapalivaisi pitorobicueniatsi exanapona copatsinejeva, bajarapajivi bitso Dioso yavenonaenatsi daxitacuenejavabelia.

<sup>26</sup> Pajivi jumaitsi ata: “Xanë bitso toexanaponaponajë Dioso pejitsipaecuenia,” jai ata, itsiata itaxutojema itsa cuaicuaijai tsabiabi, bajarapajivi saya jamatabëcuene-navëxaniaba. Tsipaji Dioso apo pejitsipaecuenia cuaicuaijai. Nexata bajarapajivi xua Dioso toexanaponapona apo tonamatamotsi tsanetsi Diosojavabelia. <sup>27</sup> Dioso pejumecovënëtsijivi, pajivi Dioso aneconijibiatanetsi, exanaponapona mapacueniaje. Yavenona tsonijivixi. Yavenonanua pamona pevecuatëpaevitsi bitso itsa namatavenona itsacuenjavaxi. Pajivi Dioso pejumecovënëtsijivi, nayajivitaeyaponapona pibisiacuenepexanaeyaniva, pacuene exanabiaba mapanacuapijivi, Dioso apo pejumecovënëtsivi.

## 2

*Pacuenia Dioso pejumecovënëtsivi muxujibatsi daxitajivi najëpaeya jamatabëcuenexanepanaeya petaenexa yabara pelivaisi*

<sup>1</sup> Tajamonae, ayaijamatabëcuenenë vajatuxanenë Jesucristo panejumecovënëtsixae, daxitajivi najëpaeya pataema. Pëtsa itsamonae bijiaya pataneme. <sup>2</sup> Nexata panenacaetuatsijavata, riconë, pexaniajava penaxatatsinë, napatsipa, oro anillo penacobexatatsinë. Bajarapaepatota pijinia bepejibinë, perujuesetoyo penaxatatsinë, napatsipa. ¿Detsa pacuenia pacopiapitsipame bajarapitsinëbeje? <sup>3</sup> Caenë meta xaniavaetsia pacopiapitsipame, pexaniajava penaxatatsinë. Paecaeyaexanaejitsipame pexaniajavata. Ponë bepejibinë, apo pacopiapitsimë tsipae xaniavaetsia. Saya panucaeyaexanaejitsipame. Itsa jume, paecaeyaexanaejitsipame irata. Nexata bajarapacuenia itsa paexanaejitsipame, pexaniacuenepaexanaemë tsipae Dioso pitabarata. <sup>4</sup> Bajarapacuenia itsa paexanaejitsipame, najëpaeya bajaraponëbeje apo pataemë tsipae. Caenë payaiyataejitsipame. Itsanë saya bijiaya pataejitsipame. Nexata bajarapacuenia itsa paexanaejitsipame, pibisiacuenia panajamatabëxainaejitsipame.

<sup>5</sup> Tajamonae bitso patacaasivavi, panejumetaema. Dioso raja itapetatsi pamonaepoxainaevi mapanacuataje. Bajarapamonae Dioso itapetatsi pexi pexanaenexatsi. Nexata bajarapamonae itsa najamatabëcuenecopatsiana Cristojavabelia, bitso pexainaevi tsane athëbëtatsia, Dioso pijanacuataatsia, itsajotatsia Dioso eveta daxitacuene. Bajarapamonae ata tocopatsianatsi Cristo pebarëevetsinexatsi daxitacuene, pacuenia Dioso najumecapanepaeya jumaitsi Dioso pijajivi yabara. <sup>6</sup> Itsiata baitsi jane bajarapacuenia bepejibivi yabara pejumaitsijava payapëtae atamë, paxamë bijiaya pataeyabiabame bepejibivi. Ricovi baja cajena xainapona bitso pexinaejava panejumata. Bajarapamonae pacaneconitabiabanua juezmonaejavabelia juezmonae papecananeconitsiaexanaenexa. <sup>7</sup> Ricovi cuaicuaijai tsabiabi pibisiacuenia Cristo yabara, ponë vaxaitsi yaiyataeya jumecovënëtavanapatsi.

<sup>8</sup> Dioso pejumelivaisibaxutota jumaitsi mapacueniaje: “Asivamëre itsamonae ata pacuenia xamë nijacuata nasivamë,” jai. Bajarapalivaisi pexanialivaisi bitso daxitalivaisianë matatoxenetsia. Nexata bajarapalivaisi pepacuene itsa pajumecovënëtsianame, pexaniacuenepaexanaename. <sup>9</sup> Itsa payaiyataejitsipame itsamonae, itsamonae pijinia bijiaya itsa pataejitsipame, nexata paexanaejitsipame pibisiacuenepananeconitsipame Diosojavabelia. Tsipaji najëpaeya apo pataemë tsipae daxitajivi Dioso papecaitorobicuenia. <sup>10</sup> Pajivi jumecovënëtsi ata Dioso Moiséspijinëta penajumecopatsilivaisi, itsiata bajarapalivaisita caelivaisiyo itsa apo jumecovënëtsi, nexata itsiata naneconitsiana Diosojavabelia bajarapalivaisita caelivaisiyo apo pejumecovënëtsixae. Nexata bajarapajivi daxita bajarapalivaisi apo bepejumecovënëtsijivivicuenia, Dioso taenatsi. <sup>11</sup> Dioso jumaitsi: “Pëtsa jaitame itsava nijavavecua,” jai. Petiriavinexa pijinia jumaitsi: “Pëtsa jaitame itsanë amonavecua,” jai. Dioso icatsia itsajumeyo jumaitsi: “Pëtsa beyaxuabame jivitonë,” jai. Nexata ponë apo jaitsi ata itsava pijavavecua, itsiata itsa beyaxuaba jivitonë, Dioso tanetsi daxita bajarapalivaisi apo pejumecovënëtsinëcuenia. <sup>12</sup> Jesucristo papecaitorobicuenia itsa paexanaename, nexata apo pananeconitsimë tsane Diosojavabelia. Itsa apo pajumecovënëtsimë tsane, nexata pananeconitsianame

Diosojavabelia. Bajaraxuata itsa pacuaicuaijamë, pacuaicuaijamëre pexanialivaisi. Paexanavanaparenua pexaniacuene pacuenia Jesucristo pacaitoroba. <sup>13</sup> Paxamë itsa apo paitaxutotsoniataemë itsamonae ata, nexata juya Dioso apo pacaitaxutotsoniatae tsane pamatacabi Dioso naneconitsiaexanaena daxitajivi pibisiacuene pexanaeconi yabara. Itsiata baitsi jane itsa paitaxutotsoniataneme itsamonae ata, juya Dioso pacaitaxutotsoniataena. Nexata Dioso apo pacananeconitsiaexanae tsane.

*Pacuenia Dioso pejumecovënëtsivi pexaniacuene bexanavanapa yabara pelivaisi*

<sup>14</sup> Tajamonae, pajivi jumaitsi ata: “Xanë jumecovënëtajë Jesús pelivaisi,” jai ata, itsiata itsa apo exanae pexaniacuene itsamonaejavabelia pacuenia Dioso nacaitoroba, bajarapajivi apo jumenamatamotsi Diosojavabelia. Bajarapacuenia saya itsa jumaitsi tsane pecuibota, bajarapajivi Dioso apo capanepae tsanetsi. <sup>15-16</sup> Itsamonae Dioso pejumecovënëtsivi bitso namatavenonaejitsipa penaxatatsijava, pexaejava ata. Nexata bajarapamonaejavabelia paxamëyajuvënëjivi jumaitsi ata tsipae: “Xaniavaetsia baja paponare. Dioso pacayavenonaena panenaxatatsijavanexa paneaqueyaniva. Pacarajutsiananua panexaejavanexa ata,” jai ata tsipae, nexata itsiata bajarapajivi apo jumenamatamotsi tsipae. Tsipaji apo itaxutotsoniatae. Saya itoroba peponaenexa. <sup>17</sup> Bajara pijinia itsi Jesús pelivaisi vajajumecovënëtsijava. Pajivi pexaniacuene apo toexanae itsamonaejavabelia, bajarapajivi jumaitsi ata: “Xanë jumecovënëtajë Jesús pelivaisi,” jai ata, itsiata apo jumenamatamotsi. Tsipaji pacuenia Dioso itorobatsi, apo exanae.

<sup>18</sup> Nexata pajivi Jesús pelivaisi jumecovënëtsi ata, itsiata pexaniacuene itsa apo toexanabiabi tsane itsamonaejavabelia, nexata meta itsajivi jumai tsane bajarapajivijavabelia: “Xamë jumaitsimë tsabiabi: ‘Xanë jumecovënëtajë Jesús pelivaisi,’ jamë tsabiabi. Itsiata pexaniacuene apo toexanabiabimë itsamonaejavabelia pacuenia Dioso nacaitoroba. Nexata apo cajamatabëcueneypëtaetsi nexaniajaicuene nejumecovënëtsijava Jesús pelivaisi. Tsipaji pexaniacuene apo toexanabiabimë itsamonaejavabelia pacuenia Dioso nacaitoroba. Xanë rajane pexaniacuene toexanabiabajë itsamonaejavabelia pacuenia Dioso nacaitoroba. Bajarapacuenia pexaniacuene tatoexanabiabixae itsamonaejavabelia catsitanajamatabëcueneitajëtatsi taxaniajaicuene tajumecovënëtsijava Jesús pelivaisi,” jai meta tsane itsajivi pajivijavabelia pexaniacuene apo toexanabiabi itsamonaejavabelia, Jesús pelivaisi jumecovënëtsi ata. <sup>19</sup> “Caenë rabaja tsaponaponae Dioso,” pejailivaisi paxamë pajumecovënëtame. Xanepana rabaja picani. Itsiata pexaniacuene itsa apo patoexanaemë tsipae itsamonaejavabelia, pajemajamë tsipae. Tsipaji dovathi ata, pijajivi yajava, jumecovënëta: “Caenë rabaja tsaponaponae Dioso,” pejailivaisi. Bajaraxuata dovathi pijajivi barëneconecojai pecajunavi. <sup>20</sup> Paxamë pajamatabëcuene livaisijibimë. Vaxaitsi jumaitsi atatsi: “Xanë jumecovënëtajë Jesús pelivaisi,” jai paxamë pajumecovënëtame. Xanepana rabaja picani. Itsiata pexaniacuene itsa apo patoexanaemë tsipae itsamonaejavabelia, pajemajamë tsipae. Tsipaji dovathi ata, atatsi, itsiata pexaniacuene itsa apo toexanabiabitsi itsamonaejavabelia pacuenia Dioso nacaitoroba, ajumematamobitsi cajena Diosojavabelia. <sup>21</sup> Bajayata vajasalinainëmi Abrahampijinë xaina pexënatonëyo. Pevënë Isaac. Nexata Abrahampijinë Dioso jamatabëcueneëjëtsiaya itorobatsi penacoxibeyaxuabinexa picani. Dioso jumaitsi Abrahampijinëjavabelia: “Nexënatonëyo beyaxuare ofrendacuena tanerajutsinexamë,” jai Dioso Abrahampijinëjavabelia. Nexata Abrahampijinë ajena nacoxibeyaxuabijitsia, Dioso itavetatsi. Abrahampijinë pejumecovënëtsixae pacuenia Dioso itorobatsi, nacoxicëtabuata picani penacoxibeyaxuabinexa. Bajaraxuata Abrahampijinë Dioso aneconijibiatanetsi. <sup>22</sup> Abrahampijinë cajena Dioso jumecovënëta pacuenia tajëvelia Dioso najumecapanepaeya jumaitsi. Bajaraxuata exana pacuenia Dioso itorobatsi. Bajarapacuenia itsa exana Abrahampijinë, najamatabëcueneitajëta pepacuene Dioso pejumecovënëtsijava pejamatabëthëtojavavetsina. <sup>23</sup> Nexata bajarapajamatabëcuene livaisi yabara Dioso pejumelivaisibaxutota jumaitsi Abrahampijinë yabara mapacueniaje: “Abrahampijinë jumecovënëta pacuenia Dioso najumecapanepaeya jumaitsi. Bajaraxuata Dioso aneconijibia tanetsi,” jai baja cajena Dioso pejumelivaisibaxutota

Abrahampijinē yabara. Nexata Abrahampijinē yabara jivi jumai tsabiabi: “Abraham raja Dioso piasivanētsi,” jai tsabiabi.

<sup>24</sup> Nexata baja paxamē payapētaneme mapacueneye. Pajivi jumecovēnētsi ata pacuenia Dioso najumecapanepaeya jumaitsi, itsiata itsa apo exanabiabi pexaniacuene, bajarapajivi aneconijibia Dioso apo taetsi. Pajivi jumecovēnēta pacuenia Dioso najumecapanepaeya jumaitsi, nexata itsa exanabiaba pexaniacuene, bajarapajivi Dioso aneconijibia tanetsi. <sup>25</sup> Bajara pijinia pacuenia bajayata Dioso aneconijibia tanetsi Rahabpijivami pibisiacuene pexanabiabivami ata. Bजारapovami palata pepitsinexa, pibisiacuene exanabiaba pevitota. Itsiata baitsi jane bajarapovami pexaniacuene exana. Tsipaji copiapita xaniavaetsia Israelpijinē pemomobeje. Bजारaponēbeje jivi peyaenebinēbeje vajabitsaē pexanaenexa bajara patomarapijivijavabelia. Rahabpijivami yavenonana bajaraponēbeje peponaenexabeje saicaya namutua pijavajabitsaē pebeyaxuabiyansibeje. Bजारapacuenia Rahabpijivami pexaniacuene pexanaexae Dioso aneconijibia tanetsi. <sup>26</sup> Piasaētsaponaponaejivi ata itsa baja ajumalijibi, tēpa baja. Apo exanae baja itsacueneyavayo ata pexaniacuene pevajēnaeyabelia. Bajara pijinia vaxaitsi ata jamatabēcuenetsitsi Jesús pelivaisi vajajumecovēnētsivi. “Xanē jumecovēnētajē Jesús pelivaisi,” jai atatsi, itsiata itsa apo exanaetsi pexaniacuene pacuenia Dioso nacaitoroba, bevajajamatabēcuenetēpaevi Dioso tsitajinavanapatsi.

### 3

#### *Pacuenia itsi vajeabarēto yabara pelivaisi*

<sup>1</sup> Tajamonae, paxamēyajuvēnēvi vēnēlivaisitaniji pacuenia ayaibitsaēto jitsipa penaexanaenexa Jesús pelivaisi jivi petsipaebivinexa. Itsiata baitsi jane ayaibitsaēto apo benaexanae jivi livaisi petsipaebaponaevinexa. Paxamē rabaja payapētaneme mapacueneye. Paxanē Jesús pelivaisi jivi patatsipaebaponaevi, paitavetaponajē pibisiacuene pexanaejava. Nexata pibisiacuene pexanaejava pataitavetsicujinae, bajarapapibisiacuene itsa paexanaejitsipajē, Dioso bitso ayaicuenia panenaneconitsiaexanaejitsipa daxitajivi matatoxenetsia. <sup>2</sup> Daxitatsi vaxaitsi itsajavata banacajumejemaba pibisiacuena vajacuaicuaijainexa, pacuenia picani apo becuaiicuaijaitsi. Pajivi pibisiacuena apo cuaicuaijai, bajarapajivi jamatabēcuenesaē baja Diosojavabelia. Nexata bajarapajivi caējēpatsi penajamatabēcuenesaētsinexa daxita pibisiacuene pexanaeyaniva. <sup>3</sup> Caballo vajavēsimumufetsinexa tsicuiboxatatatsi freno. Nexata freno caballovecua tsiquirijavayo ata, itsiata caējēpa caballo vajavēsimumufetsinexa itsabelia jitsipatsi vajaponaenexa. <sup>4</sup> Bajara pijinia itsi barco ata, pinijimo ata. Jovibo ayai ata, itsiata petabufetaicaenē tsiquiritenapayo ata, barcotabufe cajēnapona itsabelia jamatabēpona peponaenexa. <sup>5</sup> Bajara pijinia itsi tsiquiriisotoyo ata. Itsa tajua, naexana ayaiisoto petajuena pinijiunu ata. Bajara pijinia itsi vajeabarēto ata. Tsiquirijavayo picani vajeabarēto. Itsiata caējēpatsi pecuaicuaijainexa ayailivaisi. <sup>6</sup> Vajeabarēto cajena ayai, pacuenia isoto ayai. Vajeabarētota raja pibisiacuene exanatsi daxita vajavi matatoxenetsia. Nexata vajacuaicuaijajava nacajamatabēcuenebijiana. Tsiquirijiviyotsijavaveliacujinae vajatēpaejavabelianexa, bajarapacuenia cuaicuaijaitsi. Dovathi vajanacaitorobijava vajajumecovēnētsixae, cuaicuaijaitsi pibisiacuena. <sup>7</sup> Pacanaējēre mapacueneye. Jivi caējēpatsi penaitajuaniaexanaenexa daxitaviriadajubiyajuvēnēvi. Caējēpatsinua penaitajuaniaexanaenexa unupijivi ata, pepunaevi ata. Caējēpatsinua penaitajuaniaexanaenexa pecotobēxēta pejinavanapaevi ata, manuamenepijidujuai ata. Itsamonae bajarapacuenia naitajuaniaexana baja pejumecovēnētsinexatsi. <sup>8</sup> Itsiata baitsi jane itsajivi ata apo caējēpaetsi penaabarētoitavetsinexa jumejemabiaya pibisiacuena pecuaicuaijajava pecopatsinexa. Vajeabarēto cajena bitso abeje. Apo nacacaējēpae vajanajumecataitsinexa. Nexata pacuenia jomo pijaveneno xaina pebeyaxuabinexa, bajara pijinia itsi vajeabarēto. <sup>9</sup> Vajeabarētota pexaniacuena jumaitsi vaxa Diosojavabelia: “Xamē bitso ayaijamatabēcuenenēmē,” jaitsi. Vajeabarētota icatsia pibisiacuena cuaicuaijaitsi itsamonaejavabelia. Bजारapamonae picani beyaiyatantsi. Tsipaji Dioso

nacuenecataeya pexanaevitsi. <sup>10</sup> Caebarëtota pexaniacuenia cuaicuaijaitsi Diosojavabelia. Pibisiacuenia ata cuaicuaijaitsi itsamonaejavabelia. Tajamona, apo bexanaetsi cajena bajarapacuenia. <sup>11</sup> Pacanaëjère mapacuenije. Mera pepitsapaemëthëatsina pitsapaina caera, pexaniara. Apo pitsapae pexaniara, piatsaxara yajava. <sup>12</sup> Bajara pijinia itsi peubijava ata. Higeranaejavaverena apo pitsapae saicayacuai. Uvanaejavaverena ata apo pitsapae saicayacuai. Jume cajena. Bajara pijinia itsi mera pepitsapaemëthë. Caejavatsina apo pitsapae pexaniara, piatsaxara yajava. Bajara pijinia itsi vajebarëto ata. Caebarëtota apo becuaiicuaijaitsi pibisialivaisi, pexanialivaisi yajava. Nexata becuaiicuaijaitsi ëpexanialivaisi.

*Pacuenia Dioso pijajivi yapëtaeyaexana pexanaenexa pexaniacuenie yabara pelivaisi*

<sup>13</sup> Paxamë rabaja xaniavaetsia pajumeyapëtaneme Dioso pejumelivaisi. Nexata itsamona pexaniacuenie bepatsitaexanavanapame pacuenia pajumetaneme Dioso pejumelivaisita. Bajarapacuenia itsamona pexaniacuenie bepatsitaexanavanapame beveliajamatabëcuenevi nataeya. Nexata daxitajivi pacacueneyapëtaena bitso panejumeyapëtaevicuenie Dioso pejumelivaisi. <sup>14</sup> Itsiata baitsi jane bitso itsa pacuenecaëbabiabame itsamona, itsa pajitsipabiabamenua jivi paneevetsivinexa papecaexanaenexa, pëtsa jamatabëcuenenavëxaniabiaya pajumaitsimë mapacueniaje: “Xanë bitso xaniavaetsia yapëtaniji Dioso pejumelivaisi,” pajamë pëtsa. Tsipaji saya panajamatabëcuenie capaebijitsipame xaniavaetsia Dioso pejumelivaisi paneyapëtaejava. <sup>15</sup> Dioso pejumelivaisi itsa payapëtaejitsipame xaniavaetsia, nexata apo panajamatabëxainamë tsipae bajarapacuenia. Dovathi rajane pejamatabëcueneta pacaitoroba panenajamatabëxainamë bajarapacuenia. Itsa jume, nexata paxamë panejamatabëcueneta panajamatabëxainame bajarapacuenia. <sup>16</sup> Itsajota jivi cuenecaëba itsamona, itsa jitsipabiabanua jivi pevetsivinexa pexanaenexatsi, bajarajota nexata jivi najamatabëcueniejëpaeya apo jinavanapae. Daxitacuenie pibisiacuenie ata exanavanapa. <sup>17</sup> Biji rajane Dioso itsa nacayapëtaeyaexana pexaniajamatabëcuenie, nexata pexaniajamatabëcuenie xainatsi. Apo namaxëvanitsitsi. Itsamona yaiyatanetsi vajeaxanaeyaniva bajarapamonaejavabelia apo pejitsipaecuenia. Najamatabëxainatsi itsamona ata vajanacamuxujiobilivaisi vajajumeyapëtaenexa. Itaxutotsoniatanetsi itsamona ata. Pexaniacuenie exanatsi. Apo najamatabëcuenie epatajërërëcaetsi. Apo yamaxëitojorobitsi itsamona ata. Bajarapacuenia exanatsi Dioso pejamatabëcueneta pexaniajamatabëcuenie itsa nacayapëtaeyaexana. <sup>18</sup> Vaxaitsi jivi itsa nabarajamatabëcuenie xanepanaeyaexanaenatsi, namataenetsia penaitoyavi ata, nexata vaxaitsi ata nabarajamatabëcuenexanepanaeya jinavanapaenatsi. Pexaniacuenenua exanavanapaenatsi.

4

*Pacuenia jamatabëcuenieitsi pajivi jitsipa mapanacuapijicuenieje yabara pelivaisi*

<sup>1</sup> ¿Detsa xuajitsia paxamëyajuvënëvi anaeya namataenetsia pijanajumenotabiabi pecanabeyabiabi? Bajarapacuenia najumeanaenotabiaba tsipaji pejamatabëëthëtota bitso jitsipa pexanaenexa daxita xua pibisiacuenie. Bajaraxuata nabeyabiaba. <sup>2-3</sup> Paxamë picani pajitsipame itsacueniejava panexainamë. Itsiata apo pacacaëjëpae panepitsinexa. Bajaraxuata nexata pexainamëvi payabarabeyaxuababiabame. Pacobecaëbabiabame itsamona pexainamëjava. Nexata pexainamëvi payabarabeyabiabame paneyacajërëtsinexa pecobecovë. Paxamë apo paxainamë panejitsipaecuenie. Tsipaji pavajëcabiabi atamë Diosojavabelia, itsiata apo pacarajutabiabi xua pavajëcame. Tsipaji saya bajaraxua pavajëcabiabame paneexanaenexa daxita xua pibisiacuenie. <sup>4</sup> Caejamatabëcuenie Diosojavabelia apo paxainamë. ËDioso pijacuenie apo pajitsipaemë. Mapanacuata pexainamëcuenie ata bitso payajavajitsipame. Bajarapacuenia panenajamatabëxainamë, pacuenia petiriva jamatabëcuenieitsi, pova pamonavecuajaita itsanë, bajarapajamatabëcuenieitsimë. Payapëtaneme rabaja mapanacuapijicuenie bitso pejitsipaevi, bajarapamonae Dioso bepajavajabitsaë naexana. Bajara pijinia paxamë ata paitsimë. <sup>5</sup> Bajarapajamatabëcuenie yabara Dioso pejumelivaisibaxutota jumaitsi

mapacueniaje vajacanaëjëtsinexa xaniavaetsia Diosojavabelia: “Espíritu Santo, ponë nacatsijamatabëeca, bajaraponë bitso nacaasiva. Bitso nacatojitsipa vajaasivanexa ëDioso,” jai Dioso pejumelivaisibaxutota vajajitsipaeyaniva mapanacuapijicueneye. <sup>6</sup> Dioso cajena nacayavenona vajanajamatabëcuene cataitsinexa pibisiacuene vajaexanaeyaniva. Dioso pejumelivaisibaxutota jumaitsi mapacueniaje: “Dioso yavenona pamonaë beveliajamatabëcuenevi natane. Pamonaë pijinia beayaijamatabëcuenevi natane, Dioso apo yavenonaë,” jai Dioso pejumelivaisibaxutota. <sup>7</sup> Nexata beveliajamatabëcuenevi nataeya paexanavanapare pacuenia Dioso pacatojitsipa. Panavecuaitavere dovathi. Nexata dovathi pacavecuanajetabajiraviana. <sup>8</sup> Pavajëre Diosojavabelia. Nexata Dioso pacayavenonaena. Paxamë pibisiacuene paneexanaevi, pacopare bajarapacuene. Paxamë anijajamatabëcuenebeje panexainaevi, Dioso pijalivaisi, pibisijamatabëcuene yajava. Pacopare bajarapajamatabëcuene Dioso papecajamatabëcuene xaniavaetsinexa pibisijamatabëcuenevecua. <sup>9</sup> Pibisiacuene paneexanaeconi yabara, bitso panatsinajamatabëxainare. Bitso payaauramërenua. Pëtsa payabarëyamë. <sup>10</sup> Beveliajamatabëcuenevi panataema Dioso pitabarata. Nexata pibisiacuene paneexanaeconimivecua, Dioso pacajamatabëcuene yavenonaena. Nexata panajamatabëcuene yotsianame Diosojavabelia.

*Pacuenia nacaitaveta itsamonae Dioso pejumecovënëtsivi pibisiacuenia vajabaracuaicuajaiyaniva yabara pelivaisi*

<sup>11</sup> Tajamonae, pëtsa najumetsënëtsia namataenetsia panabaracuaicuajiamë. Pajivi najumetsënëtsia baracuaicuajiai Dioso penajuajumecovënëtsivi, bajarapajivi naneconita Diosojavabelia. Dioso penajuajumecovënëtsivi, pibisiacuene pexanaejava xaniavaetsia cueneyapëtaenejeva, itsa jamatabëjumaitsinua: “Bajarapamonae Diosovecua naxuabiana pibisiacuene pexanaexae,” itsa jamatabëjai, nexata bajarapajivi ata naneconita Diosojavabelia. Dioso penajuajumecovënëtsivi, najumetsënëtsia itsa baracuaicuajiai, nexata apo jumecovënëtsi pacuenia Dioso itorobatsi. Pacuenia Dioso itorobatsi, itsa apo jumecovënëtsi, nexata apo bepexaniajailivaisi tane. Caranata bajarapajivi jivi bepenaneconitsiaexanaenë natane. <sup>12</sup> Caenë Dioso nacatonajumecopata vajajumecovënëtsinexa. Bajara jane ponë nacaneconitsiaexanaena pibisiacuene vajaexanaeconi yabara. Bajaraponë caenë caëjëpatsinua pejumaitsinexa itsajiviyojavabelia: “Xamë pepacuene naneconitame. Nexata nevecuanaxuabianame infiernojavabelia,” pejainexa. Itsa jume, caëjëpatsi pejumaitsinexa: “Xamë baja caaneconijibiaexanatsi. Nexata aneconijibia catanetsi. Nexata cacapanepaenatsi,” pejainexa. Bajaraxuata paxamë Dioso apo pacatocopatsi itsamonae yabara panejumaitsinexa mapacueniaje: “Bajarapamonae Diosovecua naxuabiana pibisiacuene pexanaexae,” panejainexa.

*Pacuenia itsajivi ata apo natsivajënaeyapëtae pacuene meravia pitsijavata tocopiapatsijitsiatsi yabara pelivaisi*

<sup>13</sup> Panenamuxunaevere mapalivaisije. Paxamë abaxë xaniavaetsia payapëtaenejevamë xua Dioso pacatocopatsijitsia paneexanaenexa, ayaijamatabëcuenevi nataeya tajëvelia panavajunupaebabiabame. Tajëvelia pajumaitsimë tsabiabi: “Ajena. Itsa jume, pepacuene jane baja meravia, ponaenatsi bajarapatomarabelia. Bajarajotalia caevai nacuenebianatsi palata vajanacanabinexa,” pajamë tsabiabi. <sup>14</sup> Pëtsa bajarapacuenia ayaijamatabëcuenevi nataeya tajëvelia panavajunupaebabiabame. Tsipaji raja apo panatsivajënaeyapëtaemë xua pacatocopiapatsijitsia meravia pitsijavata. Vajajinavanapaeepatoyo saya tsiquirimatacabiyota jinavanapatsi vajatëpaenexa. Pacuenia itsi nojobo, bajara saya itsitsi vaxaitsi. Nojobo pitsapa bajayacunua caepatoyonexa saya. Bajaraxuacujinae icatsia ajibi baja. Bajara pijinia itsitsi vaxaitsi ata. <sup>15</sup> Nexata saya bepajumaitsimë: “Itsa Dioso nacatocopatsiana abaxë vajaasaëtsavanapaenexa, jinavana-paenatsi. Exanaenatsi mapacueniaje. Itsa jume, itsacuenia exanaenatsi,” bepajamë

saya. <sup>16</sup> Paxamē saya bepaayaijamatabēcuenemimē panataeyabiabame. Nexata paneexanaejavanexa, abaxē tajēvelia panavajunupaebabiabame panatsivajēnaeyapētaenejevamē xua Dioso pacatocopatsijitsia paneexanaenexa. Bajarapacuenia ayaijamatabēcuenenē nataeya panenavajunupaebabiabijava, pibisiacuene. Tsipaji panajamatabēxainabiabame bepanijacuata itajara paneexanaejavanexa. Apo pacanaējētsimē bajaraxua Dioso papecatocopatsijava, bajarapacuenia paneexanaenexa. <sup>17</sup> Pajivi yapētae ata pacuenia picani bexana, itsiata itsa apo exanae, bajarapajivi naneconita Diosojavabelia.

## 5

*Pacuenia bitso pexainaevi muxujibatsi yabara pelivaisi*

<sup>1</sup> Bitso panexainaevi, jpanenamuxunaevere mapalivaisije! Panatsinuema bitso ayaijumeta. Tsipaji raja Dioso pacabejiobiaexanaena. <sup>2</sup> Bitso panexainaeuene panexaniavaetsijavami, pacatotsabanaena. Pexaniavirijavanē, panenaxatabijavanēmi ata, daxita pacatoucubaxaena. <sup>3</sup> Palatanēanē ata, bitso penamatamotsinēanē, pacatotasibianatsi. Nexata nayapētaena bajarapalata apo panecanacuenebijava. Bajarapalatata apo paneyavenonaexae itsamonae, pacatotasibianatsi. Isoto pacaverijaviana daxita panexainaejava yajava. Pacaetuataponame picani papecatoayaijavanexa. Itsiata baitsi jane pamatacabi Dioso naneconitsiaexanaejitsia daxitajivi, imoxoyo baja pevajēnae tsaponae pecopiapatsinexa. Dioso pacananeconitsiaexanaena. Tsipaji ēpaxamēnexa panatoxaniavaetame panexainaeuene. <sup>4</sup> Panejumetaema. Pamonaē pacatonacueneba panijacuene, bajarapamonae tsipaeba itsamonaejavabelia paneyamaxēitojorobijava. Apo pamatamotsimē xaniavaetsia pacuenia picani pamatamotsiapaebame. Nexata vajatuxanenē Dioso, daxita athēbēnacuatatsia pevetsinē, jumetanetsi bajarapamonae pepaebijava xaniavaetsia apo panematamotsijava. <sup>5</sup> Mapanacuata picani panatsitajinavanapame xaniavaetsia. Pacabarēyamē tsavanapae panexainaeuene. Paexanavanapame panejitsipaecuenia. Pacuenia baca bitso penasitsiepatota beyaxuabatsi, bajara pijinia pacuenia paxamē ata pacatoimoxoyo baja Dioso papecananeconitsia exanaematacabinexa, bitso panenaneconitsixae Diosojavabelia. <sup>6</sup> Jivi pananeconitsiaexanabiabame. Pabeyaxuababiabamenua pianeconijibivi ata. Bajarapacuenia paexanabiabame pamonaejavabelia apo caējēpaetsi papecanayajiviitavetsinexa.

*Pacuenia icatsia petuxanenē patsijitsiatsica yabara pelivaisi*

<sup>7</sup> Tajamonae, pajamatabēcuenesaēmēre tsavanapae panecopiaevetavanapaejava vajatuxanenē matapania icatsia pepatsimatacabitsicajavabelianexa. Pabi penacuenebinē, vajēnaeeveta ema peubinexa peubijava. Peubiveretsicujinae peubijava, bajayajebi ajamatabēcuenesaēya evetaponapona petonaveretsijavabelianexatsi. <sup>8</sup> Bajara pijinia pacuenia paxamē ata bajayajebi itsamonae pibisiacuene pacaexanae ata, pajamatabēcuenesaēmē tsane. Pētsa pajamatabēcuenefaefaename. Tsipaji rabaja imoxoyo pevajēnae tsaponae vajatuxanenē pepatsinexatsica. <sup>9</sup> Tajamonae Dioso panenajuajumecovēnētsivi, pētsa namataenetsia panabaracuaicuaijamē Diosojavabelia pananeconitsiyaniva. Tsipaji rabaja Jesucristo, ponējavabelia panavajunupaebijitsiamē daxita pacuene paexanavanapame mapanacuataje, imoxoyo baja pevajēnae tsaponae pepatsinexatsica. Bajaraponē pacaejivimē canacujitsia pacarajutaponaena xuavajēto pacatoxainapona. <sup>10</sup> Tajamonae, pacanaējēre profetavimi, pamonaemi bajayata Diosojumelivaisi paeba. Bajarapamonaemi bajayajebi bejiobiaexanae atatsi, ajamatabēcuenesaē tsavanapae. Itsajamatabēcuenē apo xinae. <sup>11</sup> Pamonaē ajamatabēcuenesaē, bajayajebi bejiobiaexanae atatsi, bajarapamonae aeconoxae baja topexaniacuenetsi tsane Diosojavabelia. Pavēnēlivaisitaneme rabaja pacuenia bajayata Jobpijinē bejiobiaexanae atatsi, itsiata ajamatabēcuenesaē Diosojavabelia. Pavēnēlivaisitanemenua pacuenia pejamatabēcuenējētsicujinaetsi, bitso Dioso yavenonatsi. Bajaraxuata nexata payapētaneme Dioso jivi pitaxutotsoniataenēcuene.

<sup>12</sup> Tajamonae, palivaisi baja pacatsipaebatsi, matatoxenetsia mapalivaisiyoje bitso pajumecovēnētsianame. Itsa pacuaicuaijamē itsamonaejavabelia, pexaniajailivaisi

pacuaicuaijamë tsabiabi tsane. Pëtsa Dioso pevënë pacuaicuaijamë itsamonae papecajumexaniataenexa. Nexata pëtsa pajumaitsimë mapacueniaje: “Xaniajanë raja. Cajumaitsimë mapacueniaje Dioso pitabarata,” pajamë pëtsa. Tsipaji baja pexaniajailivaisi itsa pacuaicuaijamë tsabiabi tsane, itsamonae ata pacacueneyapëtaena apo panenajumetsënëtabiabicuene. Nexata itsa pacayanijoba itsacueneyavayo yabara, roviaia pajumaitsimë pacuenia panajamatabëxainame. Itsa pajejamëjitsia, pajejamë roviaia. Itsa jume, “Jume!” pajamë roviaia. Bajarapacuenia roviaia itsa paxaniajamë tsabiabi tsane, nexata apo pananeconitsimë tsane Diosojavabelia. Tsipaji Dioso pevënë apo pacuaicuaijamë tsabiabi tsane papecajumexaniataenexa itsamonae.

<sup>13</sup> Paxamëyajuvënëjivi itsa tocopiapatatsi pibisiacuene, bajarapajivi bevajëta Diosojavabelia. Itsa jume, barëyaya itsa ponapona, betonaxëana Diosojavabelia: “Xamë ayaijamatabëcuenenëmë,” bejai Diosojavabelia penaxëanaejavata. <sup>14</sup> Itsa jume, itsa avitane, bejunata ancianovi, Dioso pejumecovënëtsivi pevetsivi. Nexata ancianovi patsiana petovajëtsinexatsi Diosojavabelia. Nexata ancianovi piavitanejivi aceiterata perabëcalirabiana vajatuxanenë pevënëta. <sup>15</sup> Petovajëcaejavata, daxita ancianovi itsa jamatabëjumaitsi: “Dioso cajena pepacuene jamatejemayaexanaenatsi mapajivije,” itsa jamatabëjai ancianovi, nexata Dioso jamatejemayaexanaenatsi piavitanejivi. Piavitanejivi pibisiacuene itsa exana piavitanevajënaeya, itsiata Dioso vecuaajibiaexanaenatsi bajarapaneconimi. <sup>16</sup> Bajaraxuata pibisiacuene namataenetsia itsa panatoexaname, namataenetsia panatsipaebare. Itsa pavitanemënu, namataenetsia panatovajëre Diosojavabelia papecajamatejemayaexanaenexa Dioso. Xaniavaetsia peponaponaenë Dioso pitorobicueniatsi, daxita pejamatabëthëtojavavetsina itsa vajëta, bajaraponë jumenamatamota Diosojavabelia. Ayaicuenia Dioso pexaniacuene toexanaenatsi. <sup>17</sup> Diosojumepaebinëmi, profeta Eláspijinë, bevaxaitsijamatabëcuenenëmi. Bajayata bajaraponëmi asaëyata vajëta Diosojavabelia ema pejopaeyaniva. Nexata acueyabi pavaibeje epatua ema apo jopae bajaraponëmi pijanacuata. Nexata daxita peubijavaximi, totëpatsi. Nexata daxita bajarapanacuapijivi bitso janibo. <sup>18</sup> Bajaraxuacujinae icatsia asaëyata Eláspijinë vajëta Diosojavabelia ema pejopaenexa. Nexata icatsia ema jopa. Ira icatsia capitsapa pexaejavanexa. Bajarapacuenia vaxaitsi ata asaëyata bevajëtatsi Diosojavabelia.

<sup>19</sup> Tajamonae, paxamëyajuvënëjivi itsa copaba Dioso pejumelivaisi pejumecovënëtsijavami, nexata icatsia bepajumecovënëtsiaexaname bajarapalivaisi. <sup>20</sup> Bepayapëtaneme mapacuenije. Pajivi icatsia copabiaexana itsamonae pibisiacuene pexanaejavami, pejumecovënëtsinexa icatsia Dioso, bajarapajivi jamatabëcueneyavenonaena bajarapamonae penaxuabiyaniva pibisianacuayabelia. Jamatabëcueneyavenonaenanua bajarapamonae Dioso pevecuaajibiaexanaenexatsi ayaineconi ata, pibisiacuene pexanaeconimi.

## Mapabaxutoje San Pedro copiaya toyaquina Dioso pejumecovënëtsivijavabelia

*Pacuenia Pedro mapabaxutoje toyaquina Dioso pejumecovënëtsivi, nacayajatsia penaevijavabelia, yabara pelivaisi*

<sup>1</sup> Xanë Pedronë, Jesucristo taneitorobinë. Nitoroba jivi tatsipaebaponaenexa Jesucristo pelivaisi. Pacatoyaquinatsi mapabaxutoje paxamë pepo panijatomaravecuca, Jerusaléntomara, nacayajatsia paneenarutsivi. Nacayajatsia pajinavanapame Ponto nacujava, Galacia nacujava ata, Capadocia nacujava ata, Asiavënë nacujava ata, Bitinia nacujava ata. <sup>2</sup> Vaxa Dioso baja cajena bajayata tajëvelia panenaexanaevajënaeya ata, pacaitapeta papijajivinexamë. Bajarapacuenia tajëvelia Dioso papecaitapetsixae, aeconoxae baja Espiritu Santo pejamatabëcueneta pacatsata Jesucristo panejumecovënë-tavanapaenexa. Dioso pacaitapeta papecavecucaajibiaexanaenexa, daxita pibisiacuene paneexanaeconimi Jesucristo papecasivatëpaexae. Pacatovajëtatsi Diosojavabelia ayaicuenia Dioso papecayavenonabiabinexa. Pacatovajëtatsinua jamatabëcuenexanepanaeya panejinavanapaenexa daxitacuenevecua.

*Pacuenia Jesucristo pelivaisi pejumecovënëtsivi Dioso rajutsianatsi matakabi apo peverevere-caejava yabara pelivaisi*

<sup>3</sup> Vaxaitsi vajatuxanenë Jesucristo paxa Diosojavabelia jumaitsitsi tsabiabi: “Xanepana rabaja. Pexaniacuene panetoexaname,” jaitsi tsabiabi. Ayaicuenia Dioso vajanacaitaxutotsoniataexae, pejanajamatabëcuenevitsi nacaexana Jesucristo vajajumecovënëtsixae. Jesucristo petëpaecujinae, Dioso icatsia asaëyaexanatsi. Bajaraxuata vaxaitsi ata evetavanapatsi vajanacarajutsinexa matakabi apo peverevere-caejava. <sup>4</sup> Nexata Dioso nacarajutsiana xua nacatoxaina athëbëtatsia vajanacarajutsinexa. Bajaraxua apo vereverecae tsane. Apo abejenua tsane. <sup>5</sup> Bajaraxua Dioso nacatoxaniavaeta athëbëtatsia vajanajamatabëcuenecopatsixae Diosojavabelia. Nexata abaxë vajajinavanapaeepato mapanacuataje, Dioso pesaëta nacaevetaponapona. Bajarapacuenia Dioso pesaëta nacaevetaponapona vajanacapanepaenexa. Pamatakabi mapanacuataje vereverecaena, nayapëtaena jane baja xua Dioso nacarajutsiana.

<sup>6</sup> Bajaraxuata paxamë Dioso papecacapanepaejavanexa, pasivajamatabëcuenebarëyamëre tsavanapae. Aeconoxae abaxë mapamatacabitaje pacajamatabëcuenebejiobitsi ata daxitacuene papecajamatabëcueneëjëtsijava, itsiata pasivajamatabëcuenebarëyamëre tsavanapae. <sup>7</sup> Pacajamatabëcueneëjëtaponapapecajamatabëcueneypëtaenexa pepacuene panenajamatabëcuenecopatsijava Jesucristojavabelia. Oronanito ata itsa ëjëta, baseta isotota peyapëtaenexa itsa pepacuene orojava. Panenajamatabëcuenecopatsijava Jesucristojavabelia, bitso namatamota orojava matatoxenetsia. Nexata pijinia paxamë ata pacajamatabëcueneëjëtaponapona papecajamatabëcueneypëtaenexa xaniavaetsia panenajamatabëcuenecopatsijava Jesucristojavabelia. Nexata itsa pavecuapanepaenexa papecajamatabëcueneëjëtsijava, panevajënaeyabelia pajamatabëcuenesaëmë tsaponae tsane Jesucristojavabelia panenajamatabëcuenecopatsijava. Nexata pamatakabi vajatuxanenë Jesucristo patsianica, pacasivajamatabëcuenebarëya tsane. Dioso ata pacasivabarëya tsane. Daxitajivinua pacayaiyataena.

<sup>8</sup> Paxamë abaxë Jesucristo apo patae atamë, itsiata pajitsipame. Aeconoxae apo patae atamë Jesucristo, itsiata panajamatabëcuenecopatame bajaraponëjavabelia. Jesucristo bitso pasivajamatabëcuenebarëyamë tsavanapae. Jesucristo panesivajamatabëcuenebarëyajava, itsa panajamatabëcuenevajunupaebame itsamonaejavabelia,

epatua saya payapëtaeyaexaname. Tsipaji xaniavaetsia apo payapëtaemë xaniavaetsia panenajamatabëcuene vajunupaebinea itsamonaejavabelia peyapëtaenexa pacuenia bëpënëa pajamatabëcuenebarëyamë. <sup>9</sup> Jesucristo papecasivatëpaexae, panajamatabëcueneocopatame Diosojavabelia papecacapanepaenexa. Bajaraxuata Dioso paccapanepaena Dioso papecananeconitsia exanaejavaminexavecua pibisiacuene paneexanaeconimi yabara.

<sup>10</sup> Bajayatami Diosojumepaebivimi profetavi bajayajebi livaisijaitapona peyapëtaenexa. Nexata baja profetavi itsa yapëtane pacuenia Dioso pijajivi capanepaajitsia, nexata profetavi tajëvelia vajunupaebapona jivijavabelia. Profetavi tajëvelia vajunupaebapona pacuenia Cristo pejamatabëcueneta Dioso pacaitaxutotsoniataejitsia papecacapanepaenexa. <sup>11</sup> Espiritu Santo baja cajena pejamatabëcueneta bajayata tajëvelia profetavimi yapëtaeyaexanaponatsi. Nexata profetavimi bajayata tajëvelia yaquina pacuenia yapëtaeyaexanaponatsi Espiritu Santo pejamatabëcueneta. Nexata profetavimi yaquina pacuenia itsamona Cristo bejiobiaexanaejitsiatsi pebeyaxuabinexatsi. Yaquinanua pacuenia Cristo petëpaecujinae, icatsia itsa asaë, athëbëabetsia caponaejitsiatsi peecaenexa paxa Dioso pemuxunenetsia. Nexata bajarapaprofetavimi jamatabëjumai tsabiabi: “¿De tsaeta pacujinae copiapatsiana xua tajëvelia vaxaitsi vajunupaebaponatsi?” jamatabëjai tsabiabi. <sup>12</sup> Itsiata baitsi jane bajarapaprofetavimi Dioso yapëtaeyaexanatsi pacuenia bajarapamonaemi pevënamuto bexëa bajaraxua copiapatsijitsia. Nexata vaxaitsi, bajarapamonaemi pecovëpijivitsi, vajajinavanapaematacabita matapania jane baja copiapata pacuenia tajëvelia Cristo yabara vajunupaebapona profetavimi. Nexata baja paxamë bajarapalivaisi itsamona pacatsipaeba papecacapanepaelivaisinexa. Espiritu Santo, ponë Cristo athëbëvetsica itorobica, bajaraponë pesaë pacayajavatsipaeba bajarapamona. Angelevi ata bitso jitsipa xaniavaetsia peyapëtaenexa bajarapalivaisi.

*Pacuenia Dioso nacajunata xaniavaetsia vajatojinavanapaenexa yabara pelivaisi*

<sup>13</sup> Panajamatabëcueneocopare Diosojavabelia. Tsipaji rabaja payapëtaneme xua Dioso pacarajutsijitsia. Bajaraxua Dioso pacarajutsiana papecaitaxutotsoniataexae pamatacabi Jesucristo icatsia patsianica. Bajaraxuata xaniavaetsia panajamatabëcueneverere paneexanaenexa daxita xua Dioso pacatocopata. Najamatabëcueneevetsiayanua xaniavaetsia pajinavanapare. <sup>14</sup> Pajumecovënëtavanapare Dioso. Pëtsa panajamatabëxainame panenatojitsipaacuenia pibisiacuene paneexanaenexa, pacuenia paexanavanapame pamatacabi abaxë Dioso apo payapëtaemë. <sup>15</sup> Xaniavaetsia saya pajinavanapare pibisiacuene paexanaenejevamë. Tsipaji raja Dioso, ponë pacajunata papijajivinexamë, xaniavaetsia peponaponaenë. Pibisiacuene baja cajena caeto ata Dioso apo pexanaenë. <sup>16</sup> Dioso baja cajena pejumelivaisibaxutota jumaitsi mapacueniaje: “Xaniavaetsia pajinavanapare. Tsipaji xanë apo jitsipaenë pibisiacuene paneexanaejava,” jai Dioso pejumelivaisibaxutota.

<sup>17</sup> Paxamë itsa pavajëtame Diosojavabelia, pajumaitsimë tsabiabi: “Taxa Dioso,” pajamë tsabiabi. Bajaraponë Dioso najëpaeya tane daxita pamona jumecovënëtatsi, ayaijamatabëcuenevi, beveliajamatabëcuenevi ata. Dioso cajena yapëtane paneconivajëto exanapona caejivi canacujitsia. Bajaraxuata Dioso cjunaviaya bepajinavanapame pamatacabibeje abaxë pasaëmë tsavanapae mapanacuataje. <sup>18</sup> Paxamë picani naxuabiaya Diosovecua pajinavanapame panijasalinaivimi abaxë pijacuene itsa pacaasaëmë tsavanapae. Itsiata baitsi jane aeconoxae baja bajarapacuenivecua Dioso baja paccapanepa. Payapëtaneme rabaja Dioso ayaimatamota papecaneconimatamotsijava papecacapanepaenexa. Apo pacacomuatsi baja cajena pevereverecaejavata, pacuenia oro itsi, palata ata. <sup>19</sup> Dioso baja cajena pacacomuata bitso penamatamotsijavata, Cristo pijanata. Pajivi pijaneconi xaina Diosojavabelia, bajarapajivi oveja, pejanapebito, peperabëxanepanaenë, beyaxuaba ofrendacuenia pevi perajutsinexa Diosojavabelia.

Nexata bajarapajivi pijaneconi Dioso baja vecuaajibiaexanatsi bajarapaoveja pijana pejamatabëcueneta. Nexata pacuenia oveja, peperabëxanepanaenë, beyaxuabatsi, bajara pijinia itsi Cristo. Baitsi Cristo, planeconijibinë, nacopata pebeyaxuabinexatsi. Nexata Cristo petëpaejamatabëcueneta, pacavecuajibiaexana panijaneconimi. <sup>20</sup> Bajayatami Dioso mapanacuaje pexanaevajënaeya ata, Dioso itapetatsi Cristo papecasivatëpaenexa. Belia jane baja mapamatacabitaje Cristo patsica papecasivatëpaenexa. <sup>21</sup> Itsiata baitsi jane Cristo petëpaecujinae, acueyabi matacabita, Dioso icatsia asaëyaexanatsi. Athëbëtatsia, paxa Dioso pecujuanenia, Cristo ecaëyaexanatsi. Bajaraxuata panajamatabëcuenecopatame Diosojavabelia papecarajutsinexa matacabi apo pevereverecaejava.

<sup>22</sup> Nexata baja aeconoxae paxamë pajumecovënëtame pexaniajailivaisi, Jesucristo pelivaisi, Espiritu Santo papecajamatabëcueneitayotsixae. Nexata pibisiacuene paneexanaeneconimi, Dioso pacavecuajibiaexana. Nexata xaniavaetsia pasivamë tsavanapae itsamonae ata, Dioso pejumecovënëtsivi. Bajarapacuenia asaëyata namataenetsia bepanaasivamë tsavanapae daxita panejamatabëëthëtovetsina. <sup>23</sup> Pacuenia pejananaexanaenacueto yo itsi, bajara paxamë pajamatabëcueneitsimë Dioso pejumelivaisita pejanajamatabëcuene panexainaexae. Itsiata baitsi jane bajarapapejanajamatabëcuene paneaxajivi apo pacarajutsi. Dioso raja pejumelivaisi, apo pevereverecaelivaisinexa panejumecovënëtsixae, pejanajamatabëcuene baja paxainame. <sup>24</sup> Dioso pejumelivaisi apo pevereverecaejavanexa yabara, Dioso pejumelivaisibaxutota jumaitsi mapacueniaje: Pacuenia vayafopijipona bepijia tsaquena, petsaquenaecujinae tëpa, bajara pijinia saya itsi jivi ata. Bepijia tëpa. Pacuenia pematono ata bepijia tsaquena, nexata othopa, bajara pijinia saya itsi ayaijamatabëcuene pexainaenë ata. Bepijia tëpa.

<sup>25</sup> Itsiata baitsi jane Dioso pejumelivaisi apo vereverecae tsane dexitamatacabijavabelianexa, jai Dioso pejumelivaisibaxutota.

Bajarapalivaisi papecacapanepaelivaisinexa, itsamonae baja pacatsipaeba.

## 2

<sup>1</sup> Bajaraxuata pacopare baja daxita pibisiacuene paneexanabiabijava itsamonaejavabelia. Pacoparenua paneyamaxëitojorobabiabijava. Pacoparenua saya yamaxëitojorobiaya panecuaicuaijaitabiabijava. Tsipaji paxamë yamaxëitojorobiaya pacuaicuaijamë tsabiabi itsamonae bepapexaniajamatabëcuenevimë papecataenexa. Pacoparenua panecuenecaëbabiabijava itsamonae. Pacoparenua panebaracuicuaijaitabiabijava pibisiacuena itsamonae. <sup>2</sup> Pacuenia pejananaexanaenacueto bitso bajitsipa mitobarëmene piapaenexa, bajara pijinia pacuenia paxamë bitso pajitsipare Dioso pejumelivaisi. Bajarapalivaisi baja cajena bevaxaxaejava tanetsi vajajamatabëëthëtonexa. Nexata bajarapalivaisi panelebabiabixae, pacatsijamatabëcuenevitsabaponaena pevajënaeyabelia. Nexata bajarapalivaisi pejamatabëcueneta Dioso pacajamatabëcuene naveretsiaexanaena pacuenia Dioso pacatojitsipa. <sup>3</sup> Nexata baja pepacuene pajamatabëcuenyapëtaeneme vajatuxanenë pexaniajamatabëcuenenëcuene. Bajaraxuata pajitsipaponare orijibia panevajënaeyabelia Dioso pejumelivaisi.

*Pacuenia iboto apo vereverecae mapanacuataje, bajara pijinia pacuenia Cristo apo pevereverecaenë dexitamatacabijavabelianexa yabara pelivaisi*

<sup>4</sup> Vajatuxanenë Cristo raja bepیاتajaiboto tsaponaponae. Apo pevereverecaenë dexitamatacabijavabelianexa. Nexata paimoxoyore bajaraponë. Vajatuxanenë Cristo itsamonae apo pejumecovënëtsixaetsi, pacuenia ibota bo pexanaevi pibisiaiboto naitaxutojematabuata, bajaraitsitsi. Itsiata baitsi jane Dioso tanetsi bepیاتajaiboto, bepexania penamatamotsiiboto tsaponaponae. <sup>5</sup> Paxamë ata rabaja Jesucristojavabelia panenajamatabëcuenecopatsixae, bepaibotonëmë Dioso pacatane. Nexata padaxitamë Cristo papijajivixaemë, Dioso pacatane bepijatemplobo, ibotonëta bepexanaetemplobo. Tsipaji pacuenia Dioso ponapona templobota, bajara pijinia pacuenia Espiritu

Santo pacatsijamatabëeca. Paxamë rabaja cajena Dioso panetonacuenebavanapaevi, baitsi papijasacerdotevimë. Nexata Jesucristo pejamatabëcueneta aneconijibia papecataexae, Diosojavabelia najamatabëcuenegerajutsiaya pavajëtabiabianame Dioso papecasivajamatabëcuenegarëyanexa. <sup>6</sup> Cristo, ponë athëbëvetsica Dioso itorobijitsiatsica jivi pecapanepaenexa, bajaraponë yabara tajëvelia Dioso jumaitsi: “Ponë itorobianajë, beiboto tsane,” jai. Nexata tajëvelia Dioso pejumaitsiyava, Dioso pejumelivaisibaxutota jumaitsi mapacueniaje:

Taitapetsinë netoponaponaena Jerusalén tomarata. Bajaraponë beiboto tsane. Nexata pacuenia ibota bo pexanaevi, itsaiboto bitso tsitaxanepanatsi daxitaibotonëvecua, bajaraitsitsi tsane. Bepitapetsiibototsi tsane. Bitso bepenamatamotsiibotonua tsane. Nexata pajivi najamatabëcuenecopatsiana bajaraponëjavabelia, bajarapajivi apo nacueratsi tsane, jai mapacueniaje Dioso pejumelivaisibaxutota tajëvelia Dioso pejumaitsiyava Cristo yabara.

<sup>7</sup> Paxamë Cristo pelivaisi panejumecovënëtsivi, pataneme Cristo bepiatajaiboto tsaponaponaevi, bitso bepenamatamotsiibotonua. Itsiata baitsi jane pamonaevi Cristo pelivaisi apo pejumecovënëtsivi, bajarapamonaevi bepiabejeiboto tanetsi Cristo. Tsipaji baja copiajopa pacuenia Dioso pejumelivaisibaxutota tajëvelia najumecapanepaeya jumaitsi Cristo yabara. Tajëvelia Cristo yabara comparacióncuenia jumaitsi mapacueniaje:

Paiboto boexanaevi naitaxutojematabuata bepetsitaabejexaetsi itajara, bajarapaiboto itsamonae pita. Nexata bajarapaibotota xaniavaetsia yaëta botabu daxita itsaibo matatoxenëtsia, jai Dioso pejumelivaisibaxutota comparacióncuenia Cristo yabara.

Bajarapacuenia jumaitsi itsamonae Cristo apo pejumecovënëtsijavanexatsi yabara. <sup>8</sup> Copiajopanua jane baja Dioso pejumelivaisibaxutota tajëvelia Cristo yabara pejumaitsiyava mapacueniaje: “Bajarapaiboto jivi pefirapecaeyaexanaeviboto tsane,” pejaiyava Cristo yabara. Bajarapacuenia Dioso pejumelivaisibaxutota jumaitsi jivi itsa apo jumecovënëtsi Cristo pelivaisi, Diosovecua penaxuabijavanexa yabara jumaitsi. Tsipaji tajëvelia Dioso yapëtane jivi apo pejumecovënëtsijavanexa pexanialivaisi, Cristo pelivaisi, peca-panepaelivaisinexatsi picani.

#### *Dioso pijajivi yabara pelivaisi*

<sup>9</sup> Dioso apo pejumecovënëtsivivecua, paxamë baja Dioso pacaitapeta papijajivinexamë. Dioso baja papijasacerdotevimë tsavanapaua, daxitacuene pepo pevetsinë panetonacuenebavanapaexae. Dioso baja papijajivimë tsavanapae panevajunupaebavanapaenexa Dioso ayaicuene pexanaevanë. Dioso baja cajena pacajunata pibisiamatabëcuenivecua, mapanacuataje pitaquirijamatabëcuenivecua. Nexata baja pajunuame pexaniajamatabëcuenjavabelia, Dioso pitayotsijamatabëcuenjavabelia. <sup>10</sup> Paxamë abaxë Cristo panejumecovënëtsivajënaeya, Dioso picani apo papijajivimë. Itsajivi ata picani abaxë paxamëyajuvënëvi Dioso apo itaxutotsoniataetsi. Itsiata baitsi jane aeconoxae baja Dioso papijajivimë pacaexana papecaitaxutotsoniataexae.

#### *Pacuenia Dioso pejumecovënëtsivi jinavanapa Dioso petonacuenebavanapaenexa yabara pelivaisi*

<sup>11</sup> Tajamonae bitso patacaasivavi, mapanacuataje abaxë pajinavanapae atamë, athëbëtsatsia baja Dioso pijanacuatsia bepanejinavanapaevi panataema. Saya raja caeepatoyonexa mapanacuataje pajinavanapame. Bajaraxuata pacatoyaquinatsi mapacueniaje daxita picani papibisiacuene jamatabëpaexaname panecopabinexa. Bajarapitsijamatabëcuene jamatabënacajamatabëcuene bijianaeyaexana vajajamatabëcuenejavavetsina. <sup>12</sup> Dioso apo peyapëtaevi petuatuajëa itsa pajinavanapame, xaniavaetsia patsitajinavanapaenename. Aeconoxae pacabaracuacuajai ata bepibisiacuene paneexanaevi papecataexae, itsiata itsamatacabijavabelia itsa najamatabënapitsiana pexaniacuene paneexanaevia, bajarapamonaevi ata Dioso jumecovënëtsiana. Nexata bajarapamonaevi jumaitsi tsane Diosojavabelia: “Diosomë, bitso ayaijamatabëcuenenëmë,” jai

tsane. Bjarapacuenia jumaitsi tsane itsa copiapatsiana pamatacabi Dioso naneconitsiaexanaejitsia daxita pamona Dioso apo pejumecovënëtsivi.

<sup>13</sup> Dioso papijajivixaemë, pajumecovënëre pacuenia pacaitoroba pamona nacua pevetaavanapaevi. Daxita raja bjarapamonae mapanacuapijivi pejamatabëcueneta evetsiaexanatsi. Nexata pajumecovënëre presidentenë, ponë jane baja daxitajivi pevetsinë. <sup>14</sup> Pajumecovënërenua nacua pevetsivi. Bjarapamonae presidentenë itorbatsi penaneconitsiaexanaenexa pibisiacuene pexanaevi. Itorbatsinua pejumaitsinexa pexaniacuene pexanavanapaevijavabelia: “Xanepana rabaja xua paexaname,” pejainexa. <sup>15</sup> Bjarapamonae pajumecovënëre. Tspaji raja Dioso pacatojitsipa xaniavaetsia panejinavanapaenexa. Nexata bjarapacuenia itsa patsitajinavanapaename, belia moya tsane itsamonae papecabaracuaicuajijava, pamona apo pejumecovënëtsivi pexanialivaisi, Cristo pelivaisi.

<sup>16</sup> Paxamë picani pajumecovënëtavanapame Dioso Moiséspijinëta penajumecopatsilivaisi. Nexata picani paexanabiabame pacuenia pacaitoroba Dioso Moiséspijinëta penajumecopatsilivaisi. Aeconoxae baja Cristo pelivaisi panejumecovënëtsixae, apo pajamatabëcueneevetsimë baja pacuenia Dioso Moiséspijinëta penajumecopatsilivaisi pacaitoroba paneexanaenexa. Itsiata baitsi jane pibisiacuene paneexanaenexa apo pacatocopatsi. Biji rajane Dioso pacatocopata pacuenia Dioso jitsipa panetonacuenebavanapaenexa. <sup>17</sup> Daxitajivi yayataeya pajinavanapare. Itsamonae ata, pamona Dioso pejumecovënëtsivi, pasivamëre. Cujunaviaya Dioso payaiyataema. Payaiyataema presidentenë ata.

*Pacuenia itsamonae Cristo bejiobiaexanae atatsi, itsiata ajamatabëcuenesaë tsaponapona, bajara pijinia pacuenia Cristo pejumecovënëtsivi ata itsamonae bejiobiaexanae atatsi, pijamatabëcuenesaë tsavanapaenexa, yabara pelivaisi*

<sup>18</sup> Paxamë itsamonae panetonacuenebavanapaevi, pacamuxujibatsi mapacueni-aje. Pajumeyaiyataeyabiabare pacuenia pacaitorobabiaba panijatuxanevi. Èpexaniajamatabëcuenevi pëtsa panijatuxanevi pajumeyaiyataneme. Pajumeyaiyataema panijatuxanevi, piacujirubejevi ata. <sup>19</sup> Panijatuxanevijavabelia itsacueneneconi apo paxainae atamë, panijatuxanevi pacabejiobiaexanabiabijitsipa. Nexata panijatuxanevi papecabejiobiaexanabiabijavata: “Dioso nitaxutobejiobiataena,” itsa pajamatabëjamë tsabiabi tsipae, nexata Diosojavabelia pacatonamatamotsipa. <sup>20</sup> Itsa pananeconitsipame panijatuxanevijavabelia, nexata bjarapaneconi yabara panijatuxanevi pacaconitsipa. Nexata papecabejiobiaexanaejavata: “Dioso nitaxutobejiobiataena,” pajamatabëjamë ata tsipae, itsiata Diosojavabelia pacatoamatamobi tsipae. Itsa jume, pexaniacuene paexanae atamë, panijatuxanevi pacaconitsipa. Nexata papecabejiobiaexanaejavata: “Dioso nitaxutobejiobiataena,” itsa pajamatabëjamë tsipae Diosojavabelia, nexata Diosojavabelia pacatonamatamotsipa. <sup>21</sup> Bjarapacuenia itsacueneneconi apo paxainaenejevamë, itsamonae pacabejiobiaexanaponaena. Tspaji Dioso bjarapacuenia pacatocopata itsamonae papecabejiobiaexanaponaenexa. Payapëtaneme rabaja mapacuenije. Cristo itsa pacasivatëpa, bejiobiaexanatsi itsacueneneconi xainaenejeva. Nexata paxamë ata Dioso pacatocopata itsamonae papecabejiobiaexanaenexa. <sup>22</sup> Itsacuenejava ata pibisiacuene apo exanae Cristo. Apo yamaxëitojorobi cajena itsajiviyojavabelia ata. <sup>23</sup> Pibisiacuenia Cristo bijatae atatsi itsamonae, itsiata juya pibisiacuenia apo jumecanaviatsi. Bejiobiaexanae atatsi jivi, “Neyamatamotsiana Dioso,” apo jai Cristo bjarapamonaejavabelia. Biji rajane bjarapamonaejavabelia Cristo cujirucanaviatsinejeva, copata bjarapamonae Dioso penaneconitsiaexanaenexatsi pamatacabi Dioso naneconitsiaexanaena pijaneconi pexanaevi. <sup>24</sup> Cristo cruzata itsa tëpa, tsijumaxuabatsi vaxaitsi pibisiacuene vajaexanaeneconi. Bjarapacuenia Cristo nacatoexana vajacopatsinexa pibisiacuene vajaexanaejava. Bjarapacuenia Cristo nacatoexananua vajavajënaeyabelia vajajinavanapaenexa Dioso pejitsipaecuenia. Cristo pacasivavajënërubatsi paxamë papecajamatabëcuene xaniavaetsinexa pibisijamatabëcuenevecua, xaniavaetsia panejinavanapaenexa Dioso pitabarata. <sup>25</sup> Paxamë picani Diosovecua

naxuabiaya pajinavanapame. Pacuenia oveja pevetsinëtsivecua naxuabiaya jinavanapa, bajara picani paitsimë. Itsiata baitsi jane aeconoxae baja Cristo pejamatabëcueneta panaviabame Diosojavelia. Pacuenia pijaoveja pevetsinë xaniavaetsia baevetaponapona pijaoveja, bajara pijinia pacuenia Cristo pacaevetaponapona. Panejamatabëcuene ata Cristo evetaponapona.

### 3

#### *Pacuenia penacojobivi xaniavaetsia benabarëjinavanapa yabara pelivaisi*

<sup>1</sup> Paxamë papetiriavimë, pacamuxujobatsi mapacueniaje. Pacaevamë canacujitsia paneamonajivi jumecovënëtsiaya pajinavanapare. Pova pamona abaxë apo jumecovënëtsi Jesús pelivaisi, bajarapova xaniavaetsia tsitaponapona pamona, pamona ata Jesús pelivaisi pejumecovënëtsinexa. Nexata bajarapova pamonajavelia Jesús pelivaisi apo tsipaebi ata, pamona ata jumecovënëtsiana Jesús pelivaisi xaniavaetsia petsitaponaponaexae pamona. <sup>2</sup> Bajarapacuenia pamona ata Jesús pelivaisi jumecovënëtsiana, pijava itsa cuenetaena Dioso paneyaiyataejava, itsa cuenetaenanua pijava Dioso pitabarata aneconijibia peponaponaejava. <sup>3</sup> Papetiriavimë, pëtsa pajamatabëjumaitsimë mapacueniaje: “Bepexaniavanë jivi tanetaenexa, naxatatsianajë naitabëtsiaya. Namatafaratsianajë naitabëtsiaya. Oronanita pexanaejavanëta naitabëtsianajë. Itsa jume, nexata bitso pexaniaviriana naxatatsianajë,” pajamatabëjamë pëtsa. Pëtsa bajarapacuenia panajamatabëxainame saya naniavelia panenaitabëtsinexa. <sup>4</sup> Biji rajane bēpēnēaverena panajamatabëcueneitabëre. Bēpēnēaverena panenajamatabëcueneitabëtsinexa, xaniavaetsia aneconijibia pajinavanapaename Dioso pitabarata. Nexata itsamonae pacaitsacueniabi ata, pëtsa pacuenecanaviatame. Nexata xua bēpēnēaverena panajamatabëcueneitabëtame, apo pacatoverevereae tsane. Bajarapitsijamatabëcuene pexainaeva tonamatamotsianatsi Diosojavelia. <sup>5</sup> Pamonaemi petiriavi bajayatami Dioso pejitsipacuenia exanavanapa, bajarapacuenia bēpēnēaverena Dioso pejumelivaisita najamatabëcueneitabëta. Bajarapamonaemi najamatabëcueneitabëta Diosojavelia. Jumecovënëtanapanua pamonajivi. <sup>6</sup> Bajarapamonaeyajuvēnēvami, Sarapijivami, Dioso pejumelivaisita najamatabëcueneitabëta bēpēnēaverena. Sarapijivami jumecovënëtsia ponapona pamona, Abrahampijinë. Itsa junata pamona, “Tajatuxanenë,” jai tsabiabi pamonajavelia. Papetiriavimë, panajamatabëcueneitabëtanapare Diosojavelia. Paexanavanaparenua pexaniacuene. Pëtsa pacujunavamenua pacaitsacueniabijitsia ata itsajivi papecaitoxaxae. Nexata bajarapacuenia itsa paexanavanapaename, pajamatabëcuenejēpaename Sarapijivami.

<sup>7</sup> Paxamë papebijivimë, pacamuxujobatsi mapacueniaje. Xaniavaetsia pabarëjivanavanapare panijavajivi. Pacuenia Dioso nacaitoroba, bajarapacuenia payaiyataema panijavajivi. Bajarapacuenia payaiyataema tsipaji raja bajarapamonae vaxaitsi pebijivitsi nacavecuasaëjibi. Payaiyataema tsipaji raja bajarapamonae ata yajava Dioso pacarajutsiana matacabi apo peverevereaejava. Bajarapacuenia panijavajivi yaiyataeya pabarëjivanavanapare paneajumeurayaniva panenavajëtsijava Diosojavelia.

#### *Pacuenia pexaniacuene pexanaevi ata itsamonae bejiobiaexanaenatsi yabara pelivaisi*

<sup>8</sup> Tajamonae bitso patacaasivavi, pematatsënëa pacamuxujobatsi mapacueniaje. Najamatabëcuenejēpaeya pajinavanapare. Paxamëyajuvēnējivi itsacuene itsa tocopiapatatsi, nexata bajarapacuenia yabara bitso itsa najamatabëxaina, paxamë ata pacobenanamatabëxainare. Daxita Dioso panenajuajumecovënëtsivixae, namataenetsia panaasivamëre. Naitaxutotsoniataeyanua pajinavanapare. Beveliajamatabëcuenevinua nataeya pajinavanapare. <sup>9</sup> Itsajivi pibisiacuene itsa pacaexana, pëtsa pacuenecanaviatame. Pibisiacuena itsa pacabijatanenua, pëtsa pajumecanaviatame. Biji rajane bajarapajivi patovajëre Diosojavelia Dioso peyavenonaenexatsi. Tsipaji pamatacabi Dioso pacajunata papijajivinexamë, bajarapacuenia paneexanaenexa, pacaitoroba. Nexata juya paxamë Dioso pacaitaxutotsoniataena pacuenia najumecapanepaeya pacajumaitsi

papacayavenonaenexa. <sup>10</sup> Bajarapacuene yabara Dioso pejumelivaisibaxutota jumaitsi mapacueniaje:

Pajivi jitsipa peponaponaenexa jamatabëcuenebarëyaya, bajarapajivi benaebaretoeveta pibisialivaisi pecuaicuaijayaniva. Benaebaretoevetanua penajumetsënëtsiyaniva ata. <sup>11</sup> Bajarapajivi becopata pibisiacuene pexanabiabijavami pexanaponaenexa pexaniacuene. Beponapona xaniavaetsia itsajivi ata pebaraanaepanaeyanivatsi. <sup>12</sup> Bajarapacuenia beponapona. Tsipaji raja Dioso naitaxutocaeveta xaniavaetsia pejinavanapaevi. Namuxunaevetanua penavajëtsijavatsi bajaraponëjavabelia. Dioso cajena baraanaepana pamona pibisiacuene pexanavanapaevi,

jai Dioso pejumelivaisibaxutota.

<sup>13</sup> Itsa pajamatabëcuenesaëmë tsavanapae tsane pexaniacuene paneexanavanapaejava, nexata itsamonae pacabejiobiaexanae ata, itsiata apo pacajamatabëcuene bijianaecapanepae tsane. <sup>14</sup> Itsa pacabejiobiaexanaena xaniavaetsia pajinavanapae atamë, itsiata pajamatabëcuenebarëyamë tsane. Tsipaji raja Dioso pacayavenonaena. Pëtsa pacujunavame bajarapamonae. Pëtsa panasivajamatabëcuenebëjamënua papacabejiobiaexanaejava yabara. <sup>15</sup> Biji rajane panejamatabëthëtojavavetsina yayataeya pajumecovënëre vajatuxanenë Cristo. Panajamatabëcuene veretavanaparenua xaniavaetsia panejumecanaviatsinexa itsajivi itsa pacayanijoba vajatuxanenë Cristo panejumecovënëtsijava yabara. Nexata itsa pacayanijoba mapacueniaje: “¿Detsa xuajitsia xamë jumecovënëtame Cristo?” itsa pacajai, nexata xaniavaetsia pajumecanaviatsianame. Itsiata baitsi jane itsa pajumecanaviatame, paxamë beveliamatabëcuenevi panataename. Nexata bajarapajivi yayataeya pajumecanaviatsianame. <sup>16</sup> Cristo papijajivixamë, pexaniacuenia pajinavanapaename. Nexata payapëtaename Dioso pitabarata aneconijibia panejinavanapaejava. Nexata itsamonae najumetsënëtsiaya pacabaracuaicuaijai tsabiabi ata tsane, bajarapamonae belia najumecopatsiana papacabaracuaicuaijajava. Naurabiana papacabaracuaicuaijaitsabibijava yabara. <sup>17</sup> Pexaniacuene paexanabiabi atamë, Dioso itsa pacatocopatsiana itsamonae papacabejiobiaexanaenexa, nexata bajaraxua pacatonamatamotsiana Diosojavabelia. Itsiata baitsi jane itsamonae itsa pacabejiobiaexanaejitsipa pibisiacuene paneexanaejava yabara, nexata bajaraxua apo pacatonamatamotsi tsipae Diosojavabelia.

<sup>18</sup> Cristo ata bejiobiaexanatsi itsa nacasivatëpa pibisiacuene vajaexanaeconiconi yabara. Caeto rabaja Cristo tëpa. Pematatsënëa baja apo nacasivatëpae tsane. Bjaraponë pepo pexaniacuene pexanaenë. Itsiata bejiobiaexanatsi vaxaitsi yabara, pibisiacuene vajaexanaevi, vajanacapanepaenexa Diosojavabelia. Peperabëtomì baja picani tëpa. Itsiata baitsi jane pepo pejamatabëcuene jane baja icatsia Dioso asaëyaexanatsi. <sup>19</sup> Nexata abaxë Cristo petëpaenë itsa boca, pepo pejamatabëcuene jane baja pona petëpaevijavabelia pexanalivaisi petsipaebinexa. Tsipaji bajarapamonae naneconitsia jinavanapa petëpaevi pijanacuata. <sup>20</sup> Bajarapamonaemi bajayata jinavanapa, pamatacabi Noëpijinë ponapona. Bajarapamonaemi petëpaevajënae Dioso apo jumecovënëtsi. Noëpijinë abaxë itsa exanabuatapona pinijibarcotaneto, Dioso picani bajayajebi jamatabëcueneeveta pejumecovënëtsinexatsi daxita mapanacuapijivije. Itsiata baitsi jane apo jumecovënëtsitsi. Saya ocho pajiviyobeje, Noëpijinë, pijamonae yajava, bajarapamota Dioso capanepatsi mapanacuaje pebubutsijavavecua. Yajavacapanepatsinua mapanacuataje pibisiacuene pexanaejavavecua. <sup>21</sup> Bajara pijinia itsi itsa nacabautisaba merata. Vajanacabautisabicujinae, meravecua itsa notajunatsi, itajëtatsi vajacopabijava pibisiacuene vajaexanaejavami. Apo nacabautisabi baja cajena saya vajanacaperabëquiatsinexa. Biji rajane nacabautisaba vajanacajamatabëcuenequiatsinexa vajavajëtsixae Diosojavabelia. Nexata Dioso vajanacajamatabëcuenequiatsijava, pexaniajaicuene. Tsipaji Jesucristo vajanacasivatëpaecujinae, icatsia Dioso asaëyaexanatsi. Bajarapacuenia Jesucristo Dioso piasaëyaexanaeatsi, nexata yapëtanetsi pepacuene Dioso vajanacapanepaejavaneja. <sup>22</sup> Jesucristo Dioso piasaëyaexanaecujinaetsi, pona jane baja athëbëabetsia.

Nexata athëbëtatsia Jesucristo eca paxa Dioso pecujuanenia. Daxita ángelevi Jesucristo jamatabëcueneevetatsi pitorobinexa.

## 4

*Pacuenia Dioso asaëyata betonacuenebavanapatsi, pacuenia Dioso nacajamatabëcuene caëjëpaeyaexana, yabara pelivaisi*

<sup>1</sup> Cristo abaxë itsa ponapona mapanacuataje, itsamonae bejiobiaexanatsi. Bajara pijinia pacuenia paxamë ata tajëvelia bepaevetavanapame itsamonae papecabejiobiaexanaenexa. Pajivi bejiobiaexanatsi Cristo pelivaisi pejumecovënëtsixae, bajarapajivi pevajënaeyabelia jamatabëcuenesaë baja tsaponae. Copata baja pibisiacuene pexanaejava. <sup>2</sup> Pevajënaeyabelia jamatabëexanaponapona pacuenia Dioso tojitsipatsi. Pibisiacuene baja apo exanae pacuenia Dioso apo pejumecovënëtsivi penatojitsipacuena baexana. <sup>3</sup> Dioso panejumecovënëtsivajënaeya, pibisiacuene paneexanavanapaeneconi yabara, ayaicuenia picani pananeconitame Diosojavabelia. Dioso panejumecovënëtsivajënaeya, panevitota pibisiacuene paexanabiabame. Panajamatabëxainabiabamenua ëpibisiacuene yabara. Paitajibimënu tsabiabi panijabonëjava. Paitajibimënu tsabiabi fiestajava ata. Jumapecataeya pexanaenëjavabelia ata panavajëcabiabame. Itsiata baitsi jane aeconoxae baja daxita bajarapacuene pacopabame. <sup>4</sup> Nexata pamona Dioso apo peyapëtaevi, pibisiacuene panenajuaexanabiabivimi, aeconoxae baja pacasivajamatabëcuenenabenajaca. Tspaji papibisiacuene bajarapamonae exana, paxamë baja apo pajamatabëcuenyavenonaemë. Bajaraxuata bajarapamonae pibisiacuenia pacabaracuaicuaijai. <sup>5</sup> Itsiata baitsi jane bajarapamonae itsamatacabi Dioso pitabarata nubianatsi. Nexata daxita bajarapamonae pibisiacuene pexanavanapaeneconi yabara, Dioso naneconitsiaexanaenatsi. Piasaëtsavanapaevi, petëpaevimi ata, daxita Dioso naneconitsiaexanaena. <sup>6</sup> Petëpaevimijavabelia baja picani bajayata itsamonae tsipaebatsi pexanialivaisi, Cristo pelivaisi, itsa abaxë asaë tsavanapae bajarapamonaemi. Itsiata daxita bajarapamonaemi apo jumecovënëtsi Cristo pelivaisi. Itsiata bajarapamatacabi itsamonae baja jumecovënëta Cristo pelivaisi. Nexata xuacujinae daxita bajarapamonaemi tëpapona. Itsiata baitsi jane pamonae baja pepuajumecovënëtsi Cristo pelivaisi, tëpa, bajarapamonae xaina baja matacabi apo pevereverecaejava.

<sup>7</sup> Imoxoyo rabaja pevajënae pevereverecaenexa mapanacuaje. Bajaraxuata itsacuenejava ata pibisiacuene paexanaejevamë, xaniavaetsia pajinavanapare. Namataenetsianua najamatabëcueneevetsiaya xaniavaetsia pajinavanapare panenajuavajëtabinexa Diosojavabelia. <sup>8</sup> Namataenetsia panaasivamëre tsavanapae. Bajarapacuene daxitacuene matatoxenetsia bitso nacatoxanepana vajaexanaenexa. Tspaji itsa asivatsi itsajivi ata, nexata pibisiacuene nacaexanabiabi ata, bajarapajivi apo barajamatabësitecaetsi. <sup>9</sup> Namataenetsia xaniavaetsia panacopiapire panijaboyaberena jamatabëcuenexanepanaeya. <sup>10</sup> Pacaenëmë canacujitsia Dioso saicayacuenia pacajamatabëcuene caëjëpaeyaexanapona Dioso pijacuene panetonacuenebavapanexa. Nexata namataenetsia panajamatabëcuenyavenonare xua Dioso pacaenëmë canacujitsia pacajamatabëcuene caëjëpaeyaexanapona paneexanaenexa. Bajarapacuenia Dioso patonacuenebavanapare xaniavaetsia. <sup>11</sup> Itsajivi itsamonaejavabelia itsa tsipaeba Dioso pejumelivaisi, bajarapajivi betsipaeba palivaisi Dioso yapëtaeyaexanatsi. Itsajivi pijinia itsa yavenonaejitsia itsanë, bajarapajivi beyavenona pacuenia Dioso jamatabëcuenecaëjëpaeyaexanatsi peyavenonaenexa. Daxita xua paexanaejitsiamë Jesucristo papijajivixaemë, paexanare jivi peyayataenexa Dioso. Dioso baja cajena daxitacuene pitorobinë, penivenivenaectotia pexainaenë daxitamatacabijavabelianexa. Bajara itsi tsane.

*Pacuenia Jesucristo pelivaisi pejumecovënëtsivi itsamonae bejiobiaexanaponatsi yabara pelivaisi*

<sup>12</sup> Tajamonae bitso patacaasivavi, pëtsa pajamatabëcuenenabenajacame, itsamonae bitso pacabejiobiaexanaponae ata. Bajarapacuene pacatocopiapatsiana

papecajamatabëcueneëjëtšinexa papecajamatabëcueneyapëtaenexa pepacuene panenajamatabëcuenecopatsijava Diosojavabelia. Nexata pëtsa pajamatabëjumaitsimë: “Xanë cajena Dioso tajumecovënëtsinë. Nexata bajarapacuenia caenënë netocopiapatapona,” pajamatabëjamë pëtsa. Tsipaji raja daxita Dioso pejumecovënëtsivi bajarapacuenia tocopiapataponatsi pejamatabëcueneëjëtšinexatsi pejamatabëcueneyapëtaenexatsi pepacuene penajamatabëcuenecopatsijava Diosojavabelia. <sup>13</sup> Nexata saya panasivajamatabëcuenebarëyamëre tsavanapae paxamë ata itsa pacabejiobiaexanapona pacuenia Cristo bejiobiaexanatsi. Nexata pamatacabi pataename Cristo pepatsijavatsica pijapenivenivenaecotia yajava, pasivajamatabëcuenebarëyamë tsane. <sup>14</sup> Pibisiacuenia itsamonae itsa pacabijatane Jesucristo pelivaisi panejumecovënëtsivixae, pasivajamatabëcuenebarëyamëre. Tsipaji raja paepatota itsamonae pacabijatane, ayaijamatabëcuenenë Espiritu Santo, ponë pacayajavaponapona, ayaicuenia pacayavenonaena. <sup>15</sup> Pëtsa jivitonë pabeyaxuabame. Pëtsa panacobetoxotame. Pëtsa paexaname itsacuenejava ata pibisiacuene. Pëtsa patoebetame itsamonae pijacuene pacajunatsinejeva panetoevetsinexa, bajarapacuenia itsamonae panejamatabëitonotsiyaniva. Pëtsa bajarapitsicuene paexaname itsajivi ata paxamë yabara pejumaitsiyaniva: “Pibisiacuene pexanaevixae, bejiobiaexanatsi bajarapamonae,” pejaiyaniva itsa pacabejiobiaexana itsamonae. <sup>16</sup> Pajivi bejiobiaexanatsi Jesucristo pelivaisi pejumecovënëtsixae, bajarapajivi apo benacaura pebejiobiaexanaejavatsi. Pexaniajamatabëcuene berajuta Diosojavabelia Jesucristo pelivaisi pejumecovënëtsixae.

<sup>17-18</sup> Dioso yapëtane pacuenia daxita pijajivi tojinavanapatsi. Nexata aeconoxae Dioso tocopiapatatsi pijajivijavabelia pejumaitsinexa: “Paxamë xaniavaetsia pane-tojinavanapame. Pexaniacuenenua patoexanabiabame itsamonaejavabelia. Nexata pacasivajamatabëcuenebarëyatsi,” pejinexa Dioso, pexaniacuene pijajivi itsa toexanavanapatsi. Itsiata pamonaie Dioso pijajivi ata, xaniavaetsia Dioso apo tojinavanapae, pexaniacuenenua apo toexanabiabi itsamonaejavabelia, bajarapamonaejavabelia Dioso jumaitsi tsane: “Paxamë apo pacasivajamatabëcuenebarëyatsi. Tsipaji tajitsipaecuenia apo paexanavanapaemë,” jai tsane. Bajarapacuenia Dioso itsa jumaitsi tsane pejumecovënëtsivitsijavabelia ata, ¿detsa nexata Dioso jumaitsi tsane Dioso apo pejumecovënëtsivitsijavabelia? Nexata Dioso ayaicuenia naneconitsiaexanaena bajarapamonae. Pamonaiejavabelia Dioso jumaitsi tsane: “Pacasivajamatabëcuenebarëyatsi,” jai tsane, bajarapamonae Dioso capanepaena pijanacuayabetsia. Pamonaiejavabelia ata Dioso jumaitsi tsane: “Paxamë apo pacasivajamatabëcuenebarëyatsi,” jai tsane, bajarapamonae ata itsiata tsiquirijavayota Dioso capanepaena pijanacuayabetsia. Bajarapacuenia Dioso itsa exanaena pejumecovënëtsivitsijavabelia ata, nexata biji pamonaie apo jumecovënëtsi Dioso pejumelivaisi, pamonaie pibisiacuene pexanaevi, Dioso apo capanepae tsane pijanacuayabetsia. <sup>19</sup> Nexata paxamë Dioso pacatocopatsi ata itsamonae papecabejiobiaexanaponaenexa, pëtsa pajamatabëcuenebëjamë. Tsiteca panevajënaeyabelia pexaniacuene paexanavanapare. Panajamatabëcuenecopare papecaexanaenë, Diosojavabelia, papecayavenonaenexa. Dioso cajena pacuenia najumecapanepaeya jumaitsi, bajarapacuenia pacatoexanaena.

## 5

*Pacuenia Dioso pejumecovënëtsivi muxujibatsi yabara pelivaisi*

<sup>1</sup> Aeconoxae ancianovi papecayajavajinavanapaevi, muxujibijitsianë. Xanë ata rabaja ancianonënë. Pacuenia itsi bajarapaancianovi, xanë ata rabaja itsinë. Taniji pacuenia Cristo cruzata bejiobiaexanatsi. Pamatacabi icatsia Cristo patsianica, daxitatsi, Cristo pijajivitsi, nacabarëevetsiana xua Cristo evetsiana. <sup>2</sup> Pacuenia oveja pevetsivi

xaniavaetsia baevetavanapa, bajara pijinia pacuenia paxamē ata xaniavaetsia paevetavanapare Dioso pejumecovēnētsivi, pamonaē Dioso pacatocopata panetoevetsinexa. Jamatabēcuenebarēyaya Dioso pejitsipaecuenia patoebetavanapare Dioso pejumecovēnētsivi. Pētsa pajamatabējumaitsimē: “Apo jitsipae atanē tatoevetsinexa Dioso pejumecovēnētsivi, itsiata toevetsianajē. Tshipaji Dioso netojitsipa tatoevetsinexa,” pajamatabējamē pētsa. Pētsa pajamatabējumaitsimēnua: “Tanematamotsinexa toevetsianajē,” pajamatabējamē pētsa. Paxamē panejamatabēthētojavavetsina panejitsipaexae Dioso pejumecovēnētsivi panetoevetsinexa, patoebetavanapare. <sup>3</sup> Pamonaē Dioso pacatocopata panetoevetsinexa, bajarapamonaē pētsa bepapijatuxanēvimē panataneme saya jema paneitorobabiabinexa. Biji rajane xaniavaetsia patsitajinavanapare pacuenia patojitsipame bajarapamonaē pejinavanapaenexa. <sup>4</sup> Nexata pamatacabi icatsia Cristo patsianica, ponē jane baja pepo vajanacaevetsinēnēnēnē, nacarajutsiana pinijicuene. Xua Cristo nacarajutsiana, apo vereverecae tsane daxita matabicabijavelianexa.

<sup>5</sup> Paxamē papevējēavimē, pacuenia ancianovi pacaitoroba, pajumecovēnētābābare. Pacaejivimē canacujitsia namataenetsia panayavenonabiabianame beveliajamatabēcuenevi nataeya. Bajarapacuenia panataema tshipaji raja Dioso pejumelivaisibaxutota jumaitsi mapacueniaje:

Dioso apo yavenonaē pamonaē beayaijamatabēcuenevi penataevi. Itsiata baitsi jane Dioso pitaxutotsoniataexae, pexaniajamatabēcuena yavenona pamonaē beveliajamatabēcuenevi penataevi, jai Dioso pejumelivaisibaxutota.

<sup>6</sup> Nexata saya paxamē beveliajamatabēcuenevi panataema ayaijamatabēcuenevē Dioso pitabarata. Nexata Dioso pecaējētsimatacabita, paayaijamatabēcuenevimē pacaexanaena. <sup>7</sup> Dioso papecaasivaxae, pacaebetaponapona. Bajaraxuata daxita panejamatabēcuenebējāijava, pacopare. Pavajēre Diosojavabelia papecayavenonaenexa.

<sup>8</sup> Nayajivitaeyanua pajinavanapare panijavajabitsaēnē, dovathi, papecayamaxētojorobianiva. Pacuenia nevēthē itsa piājani, jaitaponapona pexaeyabuatsinēnēnēnē, bajarajamatabēcueneitsi dovathi papecayamaxētojorobinexa. <sup>9</sup> Paepatota dovathi jamatabēpacayamaxētojoroba panecopabinexa Jesús pelivaisi panejumecovēnētsijava, bajarapaepatota pajamatabēcuenesaēmēre Jesús pelivaisi panejumecovēnētsijava. Diosojavabelia najamatabēcuene copatsiaya dovathi panayajiviitavere. Itsamonae itsa pacabejiobiaexana dovathi pejamatabēcueneveta, panajamatabēnapire pacuenia itsamonae ata, Dioso pejumecovēnētsivi, daxitanacuanējava dovathi pejamatabēcueneveta bejiobiaexanaponatsi. <sup>10</sup> Itsiata baitsi jane saya caepatoyo Dioso pacacopatsiana papecabejiobiaexanaenexa. Bajaraxuacujinaē Dioso pacajamatabēcueneasaēyaexanaena. Bajaraponē Dioso vajanacayavenonaenē daxitacuenejavabelia. Nacajunatanua Jesucristo yajava athēbētatsia vajanacayajavaecaenexa, penivenivenaenacuatatsia, daxitamatabicabijavelianexa. <sup>11</sup> Dioso baja cajena daxitacuene pevetsinē daxitamatabicabijavelianexa. Bajara itsi tsane.

*Pacuenia Pedro toyaquina peveretsinexa baja petoyaquinaelivaisi mapabaxutotaje yabara pelivaisi*

<sup>12</sup> Silvano betajuyapijinē taniji bajaraponē ata Dioso pejumecovēnētsixae. Silvano yaquinaeyaexanajē palivaisi pacatoitorobijitsiatsilia. Bajaraponē ponaejitsia baja paxamējavabelia. Nexata pacatoyaquinatsi mapabaxutoje patacajamatabēcuene asaēyaexanaenexa. Dioso vajanacayavenonabiabixae, yapētanetsi baja xaniajai pepacuene Dioso vajanacaasivacuene. Bajaraxuata pacabejiobiaexanabiabi ata, pajamatabēcuenesaēmēre tsavanapae paneyapētaexae baja bajarapacuene.

<sup>13</sup> Dioso pejumecovēnētsivi, Babilonia tomarapijivi, pacajamatabēnajina. Pacuenia paxamē Dioso pacaitapeta papijajivinexamē, bajara pijinia pacuenia bajarapamonaē ata Dioso itapetatsi pijajivinexa. Marcos, ponē betaxēnatocuenia tataenē, bajaraponē ata pacajamatabēnajina. <sup>14</sup> Namataenetsia naasivaya panabajacobare bepanacaemonaemē panenataexae.

Pacatojitsipatsi daxita paxamë jamatabëcuenexanepanaeya panejinavanapaenexa Jesucristo papijajivixaemë. Bajara itsi tsane.

## Mapabaxutoje San Pedro cotocaevi toyaquina Dioso pejumecovënëtsivijavabelia

*Pacuenia Pedro mapabaxutoje cotocaevi toyaquina Dioso pejumecovënëtsivijavabelia yabara pelivaisi*

<sup>1</sup> Xanë Simón Pedronë, Jesucristo taneitorobicuenia tatonacuenebaponaponaenë. Nitorobanua jivi tatsipaebabiabinexa Jesucristo pelivaisi. Pacatoyaquinatsi mapabaxutoje paxamë baja Dioso panejumecovënëtsivi. Jesucristo patanesivatëpaejava patajaneconi yabara patajumecovënëtsijava, paxanë panetonamatamota Diosojavabelia. Bajara pijinia paitsimë paxamë ata. Jesucristo papecasivatëpaejava panijaneconi yabara panejumecovënëtsijava, pacatonamatamota Diosojavabelia. Bajarapacuenia daxitatsi Jesucristo vajanacasivatëpaejava vajaneconi yabara vajajumecovënëtsijava, nacatonamatamota Diosojavabelia. Tsipaji vajatuxanenë Jesucristo, vajanacacapanepaenë, nacaneconimatamota baja. <sup>2</sup> Pacatovajëtatsi Diosojavabelia bitso papecayavenonaponae nexa daxitacuene yabara. Pacatovajëtatsinua jamatabëcuene xanepanaeya panejinavanapaenexa. Bajarapacuenia Dioso pacayavenonaponaena panevajënaeyabelia, Dioso itsa pajamatabëcuene yapëtaeponaename, vajatuxanenë Jesucristo ata itsa pajamatabëcuene yapëtaeponaename.

*Pacuenia Dioso pejumecovënëtsivi jamatabëcuene itsi tsavanapae yabara pelivaisi*

<sup>3</sup> Dioso, ponë nacajunata pijajivinexatsi, yapëtanetsi baja bitso ayaijamatabëcuene pexainaenëcuene. Bajaraponë Dioso bitso pexaniacuene pexainaenë. Bajaraponë Dioso pesaëta pinijicuene pexanaejava, itsa exana mapanacuataje, nacatsitanajamatabëcuene itajëta bitso ayaijamatabëcuene pexainaenëcuene. Bajarapacuenia itsa yapëtaeponatsi Dioso, nexata Dioso nacarajutapona pesaë vajajinavanapaenexa xaniavaetsia pacuenia Dioso nacatojitsipa. <sup>4</sup> Bajarapacuenia Dioso pinijicuene pexanae javanë pexanaexae mapanacuataje, nexata yapëtanetsi Dioso xaniajai vajanacacapanepae javanexa pacuenia najumecapanepaeya jumaitsi. Dioso vajanacacapanepae javanexa pinijicuene bitso. Jumecovënëtatsi Dioso vajanacacapanepae javanexa. Nexata Dioso nacayajavaponapona. Bajaraxuata Dioso pesaëta nacajamatabëcuene asaëyaexanaena vajajinavanapaenexa xaniavaetsia. Nexata nacajamatabëcuene caëjëpaeyaexanaena vajavecuapanepaenexa mapanacuata pibisiacuene vajanacaexanaeyaexanae jamatabëcuene. Nexata pacuenia Dioso jamatabëcuene itsi tsaponapona, bajara vaxaitsi ata jamatabëcuene itsi tsavanapae tsane. <sup>5</sup> Nexata pacuenia Dioso jamatabëcuene itsi tsaponapona, bajara panejamatabëcuene itsinexa, asaëyata Dioso pajumecovënëtaponare. Asaëyata Dioso itsa pajumecovënëtaponae name, nexata icatsia itsajava payapëtaeponaename. Asaëyata paexanavanapare ëpexaniacuene. Asaëyata itsa paexanavanapaename ëpexaniacuene, nexata icatsia orijibia pajamatabëcuene yapëtaeponaename Dioso. Nexata payapëtaename pacuenia Dioso pacatojitsipa asaëyata panetoexanavanapaenexa. <sup>6</sup> Paneyapëtaecujinae pacuenia Dioso pacatojitsipa asaëyata panetoexanavanapaenexa, icatsia payapëtaename panenajamatabëcuene cataitsinexa pibisiacuene panenajamatabëxainaeyaniva. Paneyapëtaecujinae panenajamatabëcuene cataitsinexa pibisiacuene panenajamatabëxainaeyaniva, icatsia payapëtaename dovathi pejamatabëcuene ta bajayajebi pacajamatabëcuene ëjëtaponae ata, asaëyata panenajamatabëcuene asaëtsinexa ëDiosojavabelia. Paneyapëtaecujinae dovathi pejamatabëcuene ta bajayajebi pacajamatabëcuene ëjëtaponae ata, asaëyata panenajamatabëcuene asaëtsinexa ëDiosojavabelia, icatsia payapëtaename xaniavaetsia panejinavanapaenexa pacuenia Dioso pacatojitsipa. <sup>7</sup> Paneyapëtaecujinae xaniavaetsia panejinavanapaenexa pacuenia Dioso pacatojitsipa, icatsia payapëtaename asaëyata paneyavenonaenexa itsamonae ata Dioso pejumecovënëtsivi. Paneyapëtaecujinae paneyavenonaenexa itsamonae ata Dioso pejumecovënëtsivi, icatsia payapëtaename asaëyata namataenetsia bitso panenasivanexa bajarapamonaejavabelia.

<sup>8</sup> Daxita bajaraxua asaëyata panevajënaeyabelia itsa paexanavanapaename, nexata pacuenia Dioso jamatabëcueneitsi tsaponaponae, bajara pajamatabëcueneitsimë tsane. Bajarapacuenia asaëyata itsa paexanavanapaename, nexata pajamatabëcuenevitsabaponaename Dioso panejumecovënëtsijava. Nexata Dioso ata tsitanepanaenatsi xua patonacuenebavanapame. Nexata vajatuxanenë Jesucristo panejamatabëcueneyapëtaejava, apo panacueratsimë tsane. <sup>9</sup> Itsiata baitsi jane pajivi apo exanae tsane daxita bajaraxua, nexata apo yapëtae tsane Dioso pijacuene. Tsipaji bajarapajivi nacofënëtsiana Dioso picani pevecuaajibiaexanaejavatsi pibisiacuene pexanaeconimi. <sup>10</sup> Tajamonae, bajaraxuata pacaasaëmëre tsavanapae Dioso panejumecovënëtsijava, jivijavabelia panetsitanaitajëtsinexa Dioso papecajunatsijava, papecaitapetsijava ata papijajivinexamë. Nexata bajarapacuenia itsa paexanavanapaename, Dioso panejumecovënëtsijavavecua, apo pajopaemë tsane. Pacacapanepaena Dioso. <sup>11</sup> Nexata Dioso pacatocopatsiana panejonenexa vajatuxanenë Jesucristo vajanacacapanepaenënexa, pijanacuayabetsia, apo pevereverecaenacuayabetsia, paneyajavajinavanapaenexa.

<sup>12</sup> Daxita rabaja bajaraxua payapëtaneme. Pajamatabëcuenesaëmënuua baja panejumecovënëtsijava pexaniajailivaisi. Itsiata icatsia pematatsënëa pacanajamatabënapitsiaexanaponatsi. <sup>13</sup> Abaxë tasaëtsaponaponaeepato mapanacuataje, netsitanepana patacamuxujiobinexa, bajarapacuenia patacanajamatabënapitsia exanaponaeenexa. <sup>14</sup> Tsipaji baja vajatuxanenë Jesucristo tajëvelia neyapëtaeyaexana bepijia tatëpaejavanexa. <sup>15</sup> Itsiata baitsi jane pacuenia necaëjëpa, xaniavaetsia pacatoyaquinaenatsi panenacofënëtsiyaniva. Nexata itsa tëpajë, paxamë tavënamuto panenajamatabënapitabiabinexa pacuenia pacamuxujibatsi.

*Pacuenia Jesucristo pijajivijavabelia tsitanajamatabëcueneitajëta ayaijamatabëcuene pexainanenëcuene yabara pelivaisi*

<sup>16</sup> Imata vajatuxanenë Jesús pelivaisi itsa pacatsipaebatsi, xaniavaetsia pacatsipaebatsi mapacueniaje: “Vajatuxanenë Jesucristo baja cajena bitso pecaëjëpaenëtsi Dioso pesaëta pinijicuene pexanaejava pexanaenexa. Bajaraponë icatsia patsianica,” pacajaitsi. Saya jivi pejamatabëcueneta penajumetsënëtsilivaisi, apo pacatsipaebatsi. Tsipaji baja pataitaxutota pataniji vajatuxanenë ayaijamatabëcuene pexainanenëcuene. <sup>17</sup> Xaniavaetsia baja cajena pajumetaniji pamatacabi paxa Dioso athëbëvetsica barëcuaicuaijaisi. Bajarapaepatota daxitanë Cristo nivenivenareca. Athëbëvetsica paxa Dioso jumaitsitsica mapacueniaje: “Mara ponë taxënatoje, tasivanë. Bitso sivajamatabëcuenebarëyanë,” jaitsica paxa Dioso athëbëvetsica. <sup>18</sup> Vajatuxanenë Jesucristo payajavanubenajë petsutojumata, itsajota jane baja paxa Dioso athëbëvetsica barëcuaicuaijaisitsica. Nexata bajarapatsutojumata paxanë patajacuata pajumetaniji vajatuxanenë Jesucristo paxa Dioso athëbëvetsica pebarëcuaicuaijajavatsitsica.

<sup>19</sup> Nexata pataniji. Payapëtanijinua. Xua bajayata Diosojumepaebivimi profetavi tajëvelia vajunupaeba pecopiapatsinexa, bajaraxua jane baja aeconoxae copiapata. Paxamë pibisiacuene panenayajivitaenexa, pajumecovënëre profetavimi pepaebilivaisi. Profetavimi pepaebilivaisi, pexaniajailivaisixae, belámpara picani. Pacuenia lámpara itayota pitaquirijavata, bajara pijinia itsi profetavimi pepaebilivaisi pibisiacuene panenayajivitaenexa mapanacuataje. Pajumecovënëre xaniavaetsia profetavimi pepaebilivaisi. Nexata bajarapalivaisi pacajamatabëcueneyavenonaena pibisiacuene panenayajivitaevanapaenexa mapanacuataje. Bajarapacuenia pacajamatabëcueneyavenonaena matapania icatsia Jesucristo pepatsimatacabitsicajavabelianexa. Nexata bitso pabarëyamë tsane pamatacabi icatsia Jesucristo patsianica. <sup>20</sup> Xaniavaetsia pacanaëjëre daxitacuenevecua paneyapëtaenexa mapalivaisije. Daxita xua copiapatsijitsia mapanacuataje, tajëvelia Dioso pejumelivaisibaxutota vajunupaeba. Itsajivi ata cajena apo caëjëpaetsi saya pejamatabëcueneta bajaraxua xaniavaetsia pevajunupaebinexa itsamonaejavabelia, itsamonae ata peyapëtaenexa pajamatabëcuenelivaisi xaina bajaraxua. Matapania pajivi Espíritu Santo yapëtaeyaexanatsi, caëjëpatsi xaniavaetsia

pevajunupaebinexa bajaraxua. <sup>21</sup> Bajayata Diosojumepaebivimi profetavi tajëvelia itsa vajunupaeba daxita xua copiapatsijitsia mapanacuataje, pejamatabëcueneta apo exanae bajarapalivaisi. Profetavimi Dioso pijajivixae, pacuenia Espiritu Santo yapëtaeyaexanatsi, paebabiaba.

## 2

*Pacuenia Dioso pejumecovënëtsivi muxujiobatsi penajumetsënëtsilivaisi petsipaebaponaevi pejumecovënëtsiyaniva yabara pelivaisi*

*(Jud 4-13)*

<sup>1</sup> Bajayata itsamonae tsipaebapona penajumetsënëtsilivaisi Israel nacuapijivijava Dioso pejumelivaisi bepaebivi petaenexatsi. Bajara icatsia aeconoxae ata itsane paxamëjava. Itsamonae pacatsipaebiana penajumetsënëtsilivaisi. Bajarapamonae yamaxëitojorobiaya pacatsipaebiana penajumetsënëtsilivaisi. Nexata bajarapalivaisita pacacopabiaexanaena Dioso panejumecovënëtsijavami. Bajarapamonae apo pejumecovënëtsivi tsane vajatuxanenë Jesucristo, ponë picani sivatëpatsi pecapanepaenexatsi. Bajarapacuenia pexanaexae tsane bajarapamonae, nexata bepijia Dioso verebiabiana bajarapamonae. <sup>2</sup> Bajarapamonae pevitota pibisiacuene exanavanapaena. Nexata bajaraxua yabara jumaitsi tsane: “Apo itsacuene itsiata, bajaraxua exanae atatsi,” jai tsane bajarapamonae. Nexata ayaibitsaëto paxamëyajuvënëvi jumecovënëtsiana. Naexanaenanua papibisiacuene bajarapamonae exana. Nexata bajarapacuenia paxamëyajuvënëvi pibisiacuene petsitaexanaexae tsane, pamona Dioso apo pejumecovënëtsivi pibisiacuena baracuaicuajjai tsane pexanialivaisi, Jesucristo pelivaisi. <sup>3</sup> Nexata pamona penajumetsënëtsilivaisi tsipaebaponaena, bitso jitsipaena palata. Bajaraxuata pacatsipaebiana penajumetsënëtsilivaisi papecatsipaebijamatabëcuene papecavecuapitsinexa panijapalata. Itsiata baitsi jane Dioso tajëvelia najamatabëcuenevereta bajarapamonae penaneconitsiaexanaenexa. Nexata bajarapamonae bajarapitsixae tsane, pepacuene jemata Dioso naneconitsiaexanaena.

<sup>4</sup> Angelevi ata baja cajena itsa naneconita, aneconijibia Dioso apo copatsi. Angelevi ata itsa naneconita, nexata Dioso xuaba infiernojavabelia. Nexata bajarajota, pitaquirinacuata, cëbiaya Dioso jinavanapaeyaexana. Nexata bajarapaängelevi Dioso jane baja naneconitsiaexanaena pamatacabi Dioso naneconitsiaexanaena daxita pijaneconi pexinaeivi. <sup>5</sup> Dioso cajena aneconijibia apo copatsi bajayatami ata pamona pibisiacuene exana. Dioso ira bubutsiaexana bajarapamonae penaxuabinexa. Caenë, Noépijinë, Dioso capanepa pijamonae yajava, siete pajiviyobeje. Noépijinë picani itavetabiaba jivi pibisiacuene pexanaeyaniva. <sup>6</sup> Bajayata Dioso isotota verebiaba Sodoma tomarapijivimi. Bajara pijinia pacuenia Dioso verebiaba Gomorra tomarapijivimi ata. Nexata Dioso copiarucaeyaexana bajarapatomaramibeje. Tsipaji bitso pibisiacuene exana bajarapatomaramibejepijivi. Bajarapatomaramibeje nacopata ëipumana. Bajarapacuenia Dioso verebiaba bajarapamonaemi, pamona cotocaevi jinavanapa, peyapëtaenexa, bajarapamonae ata pibisiacuene pexanaeyaniva. <sup>7</sup> Pamatacabi Dioso verebiaba bajarapatomaramibejepijivi, caenë, Lotpijinë, Dioso capanepa pexaniacuene pexanabiabixae. Lotpijinë itsa taeyabiaba bajarapamonaemi bitso pibisiacuene pexanaejava, nexata bitso sivanajamatabëxainabiaba. <sup>8</sup> Lotpijinë pexaniacuene pexanaenë, bajarapamonaemi tuatujëta naponapona. Nexata caematacabi canacujitsia Lotpijinë bitso sivanajamatabëxainabiaba, itsa tane bajarapamonaemi pibisiacuene pexanaejava, itsa vënëlivaisitanenua pibisiacuene pexanaejava. <sup>9</sup> Bajaraxuata vaxaitsi baja yapëtanetsi mapacueneje. Vajatuxanenë caëjëpatsi pejamatabëcueneasaëyaexanaenexa pajivi najamatabëcuenecopata vajatuxanenëjavabelia. Nexata pajivi najamatabëcuenecopata vajatuxanenëjavabelia, dovathi itsa jamatabëcuenejëtatsi, vajatuxanenë jamatabëcueneasaëyaexana. Vajatuxanenë caëjëpatsinua pibisiacuene pexanaevi, nabejibitsiaya pejinavanapaeyaexanaenexa, mapanacuataje abaxë itsa asaë tsavanapae. Bajarapacuenia vajatuxanenë nabejibitsiaya jinavanapaeyaexanaena penaneconitsiaexanaenexa

icatsia petēpaecujinae ata, pamatacabi naneconitsiaexanaena daxita pijaneconi pexaevia.

<sup>10</sup> Pamonaē bitso casaē tsavanapae pibisiacuene pexanaejava pijacuata penatojitsipaecuēnia, bajarapamonaē bitso ayaicuēnia Dioso naneconitsiaexanaena itsamonaē penaneconitsiaexanaejava matatoxenetsia. Pamonaē ata apo jumecovēnētsi vajatuxanenē pevetsicuenetsi, bajarapamonaē ata Dioso bitso ayaicuēnia naneconitsiaexanaena. Pamonaē penajumetsēnētsilivaisi petsipaebaponaēvi, apo yaiyataē itsamonaē ata. Ajamatabēcuenetajanua. Apo jumejunavinua bajarapamonaē pibisiacuēnia pebaracuaicuaijainexa ángelevi. <sup>11</sup> Angelevi biji picani bitso piasaēvi penajumetsēnētsilivaisi petsipaebaponaēvi matatoxenetsia. Nexata ángelevi vajatuxanenē pitabarata pejinavanapaexae, bitso piasaēvi ata penajumetsēnētsilivaisi petsipaebaponaēvi matatoxenetsia, itsiata pibisiacuēnia apo baracuaicuaijai penajumetsēnētsilivaisi petsipaebaponaēvi.

<sup>12</sup> Pamonaē penajumetsēnētsilivaisi petsipaebaponaēvi, beveliajamatabēcuenēvi saya. Pacuēnia saya jinavanapa unupijidujuai, bajara saya jamatabēcuenētsi bajarapamonaē. Apo najamatabēxainae pexanialivaisi. Saicaya xua jamatabēexana, exanabiaba. Unupijidujuai saya jema bajinavanapa. Nexata jivi jemata itsa tane, vaetaba. Beyaxuabanua. Pamonaē penajumetsēnētsilivaisi petsipaebaponaēvi, pibisiacuēnia baracuaicuaijai tsabiabi xaniavaetsia apo peyapētaejava ata. Nexata pacuēnia unupijidujuai baverebiabatsi, bajara pijinia pacuēnia jemata Dioso verebiabiana bajarapamonaē. <sup>13</sup> Nexata Dioso bajarapamonaē juya bejiobia jinavanapaeyaexanaena. Tsipaji bajarapamonaē itsamonaē bejiobiaexanabiaba. Bajarapamonaē pibisiacuēnia itsa exanabiaba, barēya tsabiabi. Bajarapamonaē apo pacajamatabēcuenējēpae ata, nanacae tuatsiana itsa panacae tuatame. Nexata yamaxēitojorobiaya pacayajavanabanebiabiana fiesta paneexanaematacabi. Bajarapamonaē pibisiacuēnia pexanabiabixae tsane, nexata panetuatuajēta bepiaxuirajava tsane.

<sup>14</sup> Bajarapamonaē itsa tane petiriva, pibisiacuēnia jamatabēexanabiaba pevitota bajarapovajavabelia. Apo yabaracueranaē pibisiacuēnia pexanaejava. Penajumetsēnētsilivaisi petsipaebaponaēvi, pibisiacuēnia exanaeyaexanabiaba pamonaē abaxē apo jamatabēcuenesaē Dioso pejumecovēnētsijava. Bajarapamonaē bitso jitsipa daxitacuēnia pexanaejava ēpamonaenexa. Bitso yapētanēnia pepitsinexa xua jitsipa. Nexata bajarapamonaē Dioso bitso ayaicuēnia naneconitsiaexanaena. <sup>15</sup> Bajarapamonaē baja Diosovecua naxuabiaya jinavanapa. Tsipaji baja copaba pexaniajailivaisi pejumecovēnētsijavami. Apo jumecovēnētsi Dioso. Nexata bajarapamonaē cuenējēpa Diosojumepaēbinēmi, profeta Balaampijinēmi, Beorpijinēmi pexēnato. Balaampijinēmi bajayata itsamonaē tsipaebatsi palata pibisiacuēnia picani pexanaenexa. Nexata baja picani Balaampijinēmi jejai pibisiacuēnia pexanaenexa. <sup>16</sup> Itsiata baitsi jane Balaampijinē Dioso itavetatsi bajarapapibisiacuēnia bitso pexanaeyaniva Dioso pitabarata. Balaampijinē pijaburrota yanajetaruca. Dioso cuaicuaijaiyaexana burro. Nexata pacuēnia jivitonē bacuaicuaijai, bajarapacuēnia Balaampijinē pijaburro barēcuaicuaijaitsi pitavetsinexatsi pibisiacuēnia pexanaeyaniva. Nexata picani xua Balaampijinē jamatabēexana, copata baja.

<sup>17</sup> Pamonaē penajumetsēnētsilivaisi petsipaebaponaēvi, apo jumenamatamotsi. Yapētanetsi pacuēnia baitsi meramatathaibēmi itsa tseveca. Meramatathaibēmi itsa tseveca, apo jamatabēcueneyavenonaē itsajiviyo ata. Tsipaji itsajivi mera jitsipae ata, piapaenexa apo puatsi bajarajota. Bajara pijinia itsi pamonaē petsipaebaponaēvi penajumetsēnētsilivaisi. Itsajivi ata apo jamatabēcueneyavenonaē bajarapamonaē petsipaēbilivaisita. Pacuēnia itarērēbo ata jovibota xaniavaetsia caecovēta apo rucae, bajara jamatabēcuenētsi bajarapamonaē. Caejamatabēcuenē apo xainae. Nexata Dioso bajarapamonaē bitso ayaicuēnia naneconitsiaexanaena. Bajarapamonaē pitaquirinacuata naneconitsia jinavanapaena daxitamatacabijavabelianexa. <sup>18</sup> Bajarapamonaē ayaijamatabēcuenēvi nataeya cuaicuaijai tsabiabi. Itsiata baitsi jane saya natsiquejemalivaisi

cuaicuajjai tsabiabi. Bजारapamonae yamaxëitojorobiaya jumai tsabiabi: “Apo itsacuene raja apo payaiyatae atamë petiriva. Pibisiacuene itsa jamatabëpaexaname panevitota petirivajavabelia, paexanare,” jai tsabiabi bajarapamonae. Bजारapacuenia bajarapamonae othopaeyaexanapona pamona pejanajumecovënëtsivi Dioso. Tsipaji pibisiacuene exanaeyaexanapona.<sup>19</sup> Bजारapamonae yamaxëitojorobiaya jumai tsabiabinua: “Itsa panejumecovënëtsianame patacatsipaebilivaisi, nexata pacatoxanepanaena paneexanabiabinexa daxitacuene,” jai tsabiabi pamona pejanajumetsënëtsilivaisi petsipae-baponaevi. Itsiata baitsi jane bajarapamonae apo jamatabëcuenecaëjëpaetsi daxita xua pexaniacuene pexanaenexa. Saya ëpibisiacuene exanabiaba. Bजारaxuata Dioso bajarapamonae verebiabiana. Tsipaji bajarapamonae pibisiacuene exanabiaba pijacuata penatojitsipaecuenia, pacuenia pejamatabëcuene itorobatsi. Caejivitsi canacujitsia vajacuata vajanatojitsipaecuenia itsa exanaponatsi, vajajamatabëcuene beprijavitonëtsi naexanatsi. Tsipaji pacuenia vajajamatabëcuene nacaitoroba, exanaponatsi.<sup>20</sup> Pamona baja yapëtane vajatuxanenë Jesucristo, ponë capanepaejitsiatsi pibisiacuene pexanaeconimivecua, bajarapamonae baja Dioso vecuaajibiaexanatsi pibisiacuene pexanaeconimi. Pajamatabëcuenemi ata jitsipaeyaexanabiabatsi pibisiacuene pexanaenexa, bajarapajamatabëcuenemi ata baja vecuaajibiaexanatsi. Itsiata baitsi jane bajarapamonaeyajuvënëvi icatsia pibisiacuene itsa exanapona, nexata icatsia bajarapajamatabëcuene pejumecovënëtaponaexae, bitso naneconitsiana Diosojavabelia. Nexata jane baja copiaya pexanaeconimi matatoxenetsia, bitsoyo ayaineconi natsixaina.<sup>21</sup> Pamona copaba pexaniajailivaisi pejumecovënëtsijavami, bitso ayaineconi natsixaina Diosojavabelia. Bजारapamonae itsa apo tsipaebi tsipaetsi bajarapapexaniajailivaisi, bevelia naneconitsipa Diosojavabelia. Tsipaji apo yapëtae tsipae bajarapalivaisi. Nexata baja peyapëtaexae bajarapalivaisi, pecopabixanua pejumecovënëtsijavami bajarapalivaisi, naneconita bitso Diosojavabelia. Toxanepanaejitsipatsi meta bajarapamonae itsa apo tsipaebi tsipaetsi bajarapalivaisi bevelia penaneconitsinexa Diosojavabelia.<sup>22</sup> Bajayatapijilivaisi jumaitsi mapacueniaje: “Aviri peyacabicujinae, icatsia nayacabixane. Marrano pijinia tsorobota peboacaecujinae, itsa matavanetsi pexaniamerata, pematavaecujinaetsi, icatsia caevëalia tsorobota boca,” jai bajayatapijilivaisi. Xaniajai baja cajena bajarapalivaisi. Bajara pijinia jamatabëcueneitsi pamona icatsia caevëalia pibisiacuene exana.

### 3

#### *Pacuenia icatsia Jesucristo patsijitsiatsica yabara pelivaisi*

<sup>1</sup> Tajamonae bitso patacaasivavi, copiaya baja cajena pacatoyaquinatsi itsabaxuto. Nexata icatsia mapabaxutoje cotocaevi pacatoyaquinatsi. Pacatoyaquinatsi bajarapabaxutobeje patacamuxujiobinexa nexata xaniavaetsia panenajamatabëxainaenexa.<sup>2</sup> Panajamatabënapire pacuenia Diosojumepaebivimi profetavi bajayata tajëvelia jumaitsi. Panajamatabënapirenu pacuenia baja cajena apóstolevi pacatsipaeba vajatuxanenë Cristo pelivaisi. Cristo, ponë papecacapanepaenënexa, copiaya tsipaeba apóstolevijavabelia. Nexata juya apóstolevi paxamëjavabelia pacatsipaeba.<sup>3</sup> Xaniavaetsia panamuxunaevere daxitacuenevecua paneyapëtaenexa mapacuenieje. Nacua pecopiarucaevajënaeyotanexa, najetarubenaena itsamonae pecapocaponaevinexa pexaniajailivaisi. Bजारapamonae exanavanapaena pibisiacuene pacuenia pijacuata natojitsipa.<sup>4</sup> Bजारapamonae Cristo pepatsijavanexatsica apo pejumecovënëtsixae, najumequenetsiataeya saya jumaitsi tsane: “¿Jica Cristo icatsia pepatsijavanexatsica pacuenia baja Cristo tajëvelia najumecapanepaeya jumaitsi? Bajayata vajavajënaeyapijivimi, pamona jumecovënëta Cristo pepatsijavanexatsica, vajënaeevetavanapa picani. Itsiata Cristo apo patsitsica. Nexata bajarapamonaemi belia baja tëpa Cristo patsinejevatsica. Daxitanacua abaxë itsiata tsitecanuca Dioso pexanaecujinae,” jai tsane saya bajarapamonae apo pejumecovënëtsixae Cristo pepatsijavanexatsica.<sup>5</sup> Bजारapacuenia jumaitsi tsane tsipaji bajarapamonae apo canaëjëtsi tsane pacuenia bajayata Dioso itoroba saya pijumeta

itaboxo penaexanaenexa mapanacua yajavaje. Nexata mapairanexaje, manuamene tuatujëatsina Dioso ira jumapitsapaeyaexanaina. <sup>6</sup> Bajayata pijinia mapanacujaje Dioso itsa bubutsiaexana, daxitajivi Dioso verebiaba merata. <sup>7</sup> Itsiata baitsi jane itaboxo, ira yajava, daxita xua tanetsi, Dioso pejamatabëcueneta abaxë xaniavaetsia tsitecanuca. Dioso abaxë xaniavaeta itsamatacabi isotota peveriapaenexa. Dioso isotota veriapaena mapanacujaje, itaboxo yajava, pamatacabi naneconitsiaexanaena daxita pijaneconi pex-ainaevi. Bajarapamatacabi Dioso naneconitsiaexanaena pibisiacuene pexanaevi. Dioso verebiabiana daxitacuene.

<sup>8</sup> Tajamonae bitso patacaasivavi, pëtsa panacofënëtame mapacueneye. Vajatuxanenë saya tsitacaematacabitsi mil pavaibeje ata. Mil pavaibeje ata apo tsitabajayajebitsi. Betsitacaematacabi tsanucaetsi saya vajatuxanenë. <sup>9</sup> Itsamonae jamatabëcuenenavëx-aniabiaya jamatabëjumaitsi: “Dioso bitso cuenenajemata pexanaenexa pacuenia najumecapanepaeya jumaitsi,” jamatabëjai. Vajatuxanenë raja apo cuenenajematsi. Xua raja vajatuxanenë bajayajebi becuenenajematsi, abaxë saya eveta jivi pejumecov-ënëtsinexatsi. Tsipaji vajatuxanenë apo jitsipae itsajivi ata pevecuanaxuabijavatsi. Vajatuxanenë raja jitsipa daxitajivi pecopabinexa pibisiacuene pexanabiabijava, pena-jamatabëcuenepënëyorotsinexa Diosojavabelia.

<sup>10</sup> Vajatuxanenë baja cajena icatsia jemata patsianica. Pamatacabi jivi jamatejema jivananapaena, jemata vajatuxanenë patsianica. Pacuenia penacobetoxotsinënexa jemata bapata, itsajota apo jamatabënajinaetsi, bajara pijinia itsi tsane vajatuxanenë. Jemata patsianica. Nexata jane baja bajarapamatacabita itaboxo copiarucaena. Ayaijume najumetsiana. Daxita athëbëpijicuene vereverecaena isotota. Mapanacuamije, daxita xua tanetsi mapanacuataje, yajavatajuena isotota.

<sup>11</sup> Daxitacuene bajarapacuenia vereverecaena. ¡Bajaraxuata bitso xaniavaetsia bepa-jinavanapame Dioso papecatojitsipaecuenia! <sup>12</sup> Bepacopiaevetavanapame vajatuxanenë pepatsijavanexatsica. Vajatuxanenë pijacuene bepatonacuenebavanapame bepimia pepatsinexatsica. Pamatacabita vajatuxanenë patsianica, itaboxo vereverecaena isotota. Daxita athëbëpijicuene veriajaviana isotocotiata. <sup>13</sup> Itsiata baitsi jane xuacujinae Dioso icatsia pejanaitaboxo, pejanairanua, exanaena pacuenia tajëvelia najumecapanepaeya jumaitsi. Nexata vaxaitsi evetavanapatsi vajataenexa pejanaitaboxo, pejanairanua. Itsamatacabi pejanairata daxitajivi ëpexaniacuene exanavanapaena, xua Dioso tojitsipatsi.

<sup>14</sup> Tajamonae bitso patacaasivavi, pejanaitaboxo, pejanairanua, panetaenexa, panecopiaevetavanapaeepato xaniavaetsia pajinavanapaename. Nexata pamatacabi vajatuxanenë icatsia patsianica, pacasivabarëya tsane. Bajarapacuenia pacasivabarëya tsane itsa pacacaxitarabiana jamatabëcuenexanepanaeya aneconibia panejinavana-paejavata. <sup>15</sup> Pacanaëjère xua yabara abaxë vajatuxanenë apo patsitsica. Abaxë raja apo patsitsica daxitajivi apo pejumecovënëtsixae Dioso. Tsipaji daxitatsi vajatuxanenë jamatabënacapanepa pijanacuayabetsia. Pacuenia daxitatsi vajatuxanenë jamatabënacapanepa pijanacuayabetsia, bajaraxua vajaasivanë, vajabananë Pablo, peyapëtaenexa Dioso yavenonatsi. Nexata Pablo peyaquinaebaxutonëta, pacatoyaquina pacuenia vajatuxanenë daxitatsi jamatabënacapanepa pijanacuayabetsia. <sup>16</sup> Pablo baja cajena peyaquinaebaxutonëta, pacatoyaquina pacuenia vajatuxanenë daxitatsi jamatabënacapanepa pijanacuayabetsia. Pablo peyaquinaelivaisianë, itsalivaisi ayapëbeje tsabiabi vajajumeyapëtaenexa xua yabara Pablo yaquina. Nexata palivaisi apo jumeyapëtaetsi, apo yapëtaetsi pajamatabëcuenelivaisi xaina. Nexata pamona xaniavaetsia apo jumeyapëtae Pablo peyaquinaelivaisianë, juya tsipaebabiaba itsamonaejavabelia apo jumeyapëtae ata. Pamona ata caejamatabëcuene apo xinae Dioso pejumecovënëtsijava, juya itsamonaejavabelia tsipaebabiaba Pablo peyaquinaelivaisianë. Nexata bajarapamonae itsamonaejavabelia itsa tsipaebabiaba, Pablo peyaquinaelivaisianë mataropotsia saicayacuenia tsipaebabiaba. Bajarapacuenia itsabaxutonëta ata, perubenaelivaisianë ata, bajarapamonae saicayacuenia

mataropotsia tsipaebabiaba. Bjarapamonae itsamonaejavabelia itsa tsipaebabiaba, apo tsipaebabiabi pacuenia Dioso pejumelivaisibaxutota jumaitsi. Saicayacuenia saya tsipaebabiaba. Nexata bjarapamonae pijacuata naneconita Diosojavabelia. Nexata Dioso verebiabianatsi.

<sup>17</sup> Tajamonae bitso patacaasivavi, paxamë baja cajena tajëvelia payapëtaneme bjaraxua yabara. Bjaraxuata panayajivitaema pibisiacuene pexanaevi penajumetsënëtsilivaisi papecatsipaebiyanima. Tsipaji papecatsipaebilivaisita, pacajopaeyaexanaejitsipa Dioso panejumecovënëtsijavavecua. <sup>18</sup> Pacatojitsipatsi paneajamatabëcuenesaë tsavanapaenexa Dioso panejumecovënëtsijava Jesucristo papecaitaxutotsoniataexae. Panevajënaeyabelia payapëtaeponarenuajajatuxanenë Jesucristo, ponë paccapanepaejitsia pibisiacuene paneexanaeneconivecua. Jesucristojavabelia daxisajivi jumai tsabiabi tsane: “¡Xamë Jesucristomë, bitso cajena ayajamatabëcuenenëmë!” jai tsabiabi tsane daxisamatacabijavabelianexa. Bajara itsi tsane.

## Mapabaxutoje San Juan copiaya toyaquina Dioso pejumecovënëtsivijavabelia

### *Cristo vajanacajamatabëcuene asaëyaexanaenë yabara pelivaisi*

<sup>1-2</sup> Pacatoyaquinatsi Dioso pexënato pelivaisi. Bajaraponë athëbëtatsia ponapona baja cajena pepo bajayatami ata, itsa abaxë Dioso apo exanae mapanacuaje. Nexata bajaraponë patsica mapanacuayabetsicaje. Bajaraponë itsa patsica mapanacuayabetsicaje, naexana pacuenia vaxaitsi baexanatsi. Nexata abaxë itsa ponapona mapanacuataje, bajaraponë patanetsipaebilivaisianë pajumetaniji. Bajaraponë pataniji baja cajena pataitaxutota. Pajayabajënuu patacobeta. Nexata bajaraponë pelivaisi pacatsipaebatsi. Bajaraponë matababi apo pevereveceajava pexainaenë. Paxa Dioso yajavaponapona. <sup>3</sup> Pacatojitsipatsi paxamë ata paneyajavajinavanapaenexa Dioso. Pacatojitsipatsi Dioso pexënato, Jesucristo, ata paneyajavajinavanapaenexa. Bajaraxuata pacuenia pataniji, pacuenia ata pajumetaniji bajaraponë patanetsipaebilivaisianë, juya paxamëjavabelia pacatsipaebaponatsi. <sup>4</sup> Nexata pacuenia pataniji, pacuenia ata pajumetaniji bajaraponë patanetsipaebilivaisianë, pacatoyaquinatsi mapabaxutotaje paxamë ata paneyapëtaenexa, bitso panesivajamatabëcuenebarëyanexa Jesús.

### *Dioso pejumelivaisita vajanacajamatabëcueneitayotsinë yabara pelivaisi*

<sup>5</sup> Palivaisianë rabaja Jesucristo panetsipaeba, bajara mapalivaisianëje juya paxamëjavabelia pacatoyaquinatsije. Dioso raja pejumelivaisita vajanacajamatabëcueneitayotsinë. Dioso raja apo pijamatabëcueneitaquirinë. <sup>6</sup> Bajaraxuata vaxaitsi jumaitsi atatsi: “Dioso raja vaxaitsi yajavajinavanapatsi,” jai atatsi, itsiata pibisiacuene itsa exanavanapatsi, nexata najamatabëcuenecepaebatsi. Najumetsënëtatsi saya Dioso vajayajavajinavanapaejava. Najumetsënëtatsinua pexaniacuene vajaexanaejava ata. <sup>7</sup> Itsiata vaxaitsi xaniavaetsia itsa jumecovënëtavanapaenatsi Dioso pejumelivaisi pacuenia Dioso ata pijacuata bajarapalivaisi najumecovënëtaponapona, nexata vaxaitsi ata mapanacuata xaniavaetsia najamatabëcuenejëpaeya najujinavanapaenatsi. Bajarapacuenia vaxaitsi itsa jinavanapaenatsi, nexata Jesucristo, Dioso pexënato, vajanacasivatëpaexae, nacavecuajibiaexanaena daxita vajapibisijamatabëcuenemi.

<sup>8</sup> Vaxaitsi pibisiacuene exanae atatsi, itsiata itsa jumaitsitsi: “Vaxaitsi cajena aneconijibitsi. Tsipaji pibisiacuene apo exanaetsi,” itsa jaitsi, nexata saya jamatabëcuenenavëxaniabatsi. Pexaniajailivaisi, Dioso pejumelivaisi, apo nacatsijamatabëceae. <sup>9</sup> Dioso baja cajena nacayavenonabiaba pacuenia najumecapanepaeya nacajumaitsi. Dioso pexanepanaecuene exanabiabanua. Bajaraxuata pibisiacuene vajaexanaejavami, itsa navajunupaebatsi Diosojavabelia, nexata Dioso nacavecuajibiaexana pibisiacuene vajaexanaeneconimi. Nacavecuajibiaexananua daxita pibisijamatabëcuene vajaxainaejavami. <sup>10</sup> Vaxaitsi pibisiacuene exanae atatsi, itsiata itsa jumaitsitsi: “Vaxaitsi cajena caeto ata pibisiacuene apo exanaetsi,” itsa jaitsi, nexata saya jamatabëcuenenavëxaniabatsi. Dioso pejumelivaisi ata apo nacatsijamatabëceae. Bajarapacuenia itsa jumait-sitsi, nexata Dioso tanetsi bepenajumetsënëtsinë. Tsipaji Dioso pejumelivaisibaxutota jumaitsi pacuenia daxitatsi pibisiacuene ëvajaexanaevi.

## 2

### *Cristo vajanacatocuaicuaijainë Diosojavabelia yabara pelivaisi*

<sup>1</sup> Tajamonae, pacatoyaquinatsi mapalivaisije patacamuxujiobinexa pibisiacuene paneexanaeyaniva. Itsiata baitsi jane cajena itsajivi pibisiacuene itsa exana, xainatsi Jesucristo, vajanacayavenonaenë, vajanacatocuaicuaijainë Diosojavabelia. Bajaraponë cajena caeto ata pibisiacuene apo pexanaenë. <sup>2</sup> Jesucristo vajanacasivatëpaexae, nacavecuajibiaexana baja daxita pibisiacuene vajaexanaeneconimi. Itsiata ëvaxaitsi

apo nacasivatēpae. Daxita mapanacuapijivije pibisiacuene pexanaeneconi pevecuaajibi-  
iaexanaenexa, Jesucristo sivatēpa.

<sup>3</sup> ¿Detsa pacuenia nayapētanetsi Dioso pijajivitsi? Itsa exanavanapatsi pacuenia  
Dioso nacaitoroba, nayapētanetsi Dioso pijajivitsi. <sup>4</sup> Itsajivi jumaitsi ata: “Xanē raja  
cajena Dioso yapētaniji,” jai ata, itsiata itsa apo jumecovēnētsi pacuenia Dioso itoro-  
batsi, bajarapajivi saya najumetsēnēta. Pexaniajailivaisi cajena, Dioso pejumelivaisi,  
apo tsijamatabēecaetsi. <sup>5</sup> Pajivi exanaponapona Dioso pitorobicueniatsi, bajarapajivi  
pepacuene jumecovēnēta Dioso bajarapajivi bitso pejitsipaexae Dioso. Bajarapacuenia  
vaxaitsi ata itsa jumecovēnētavanapaenatsi Dioso, nexata nayapētaevanapaenatsi va-  
jayajavajinavanapaejava Dioso. <sup>6</sup> Pajivi jumaitsi: “Xanē rabaja Dioso yajavaponaponajē,”  
jai, bajarapajivi xaniavaetsia beponapona pibisiacuene exanaenejeva. Pacuenia Jesús  
ponapona, bajarapacuenia bajarapajivi beponapona.

*Palivaisi baja bajayata jivi jumecovēnēta, bajarapalivaisi icatsia bepejanalivaisicuenia jivi  
pejumecovēnētsinexa, yabara pelivaisi*

<sup>7</sup> Tajamonae, pacatoyaquinatsi mapalivaisije panejumecovēnētsinexa. Apo pejanali-  
vaisi ra picani. Itsiata baitsi jane palivaisi baja copiaya bajayata pajumetaneme, pamat-  
acabi ajena pajumecovēnētame Jesús pelivaisi, bajarapalivaisi jumejēpa. <sup>8</sup> Nexata ma-  
palivaisije pacatoyaquinatsi pejanalivaisicuenia panejumecovēnētsinexa. Mapalivaisije  
pexaniajailivaisi cajena. Cristo cajena pijacuata bajarapalivaisi natoexanaponapona.  
Paxamē ata baja pajumecovēnētavanapame bajarapalivaisi. Nexata mapanacuapijija-  
matabēcuenemije, pitaquirijamatabēcuenemi, pacavecuaajibi baja tsaponae. Tsipaji  
bajarapalivaisita Jesucristo nacajamatabēcueneyotapona.

<sup>9</sup> Itsajivi jumaitsi ata: “Xanē raja Dioso pitorobicuenia exanaponaponajē,” jai ata,  
itsiata itsa itoya itsajivi Dioso penajuajumecovēnētsivi, nexata bajarapajivi abaxē  
tsiteca ajamatabēcueneyotapona. <sup>10</sup> Pajivi bitso asiva itsajivi ata, Dioso  
penajuajumecovēnētsivi, bajarapajivi Dioso jamatabēcueneyotatsi. Nexata bajara-  
pajivi apo caējēpaetsi itsacuenejavayo ata pibisiacuene itsajivi pexanaeyaexanaenex-  
atsi. <sup>11</sup> Pajivi itoya itsamonae ata Dioso penajuajumecovēnētsivi, bajarapajivi abaxē  
tsiteca ajamatabēcueneyotapona. Apo yapētae pibisiacuene pexanaejava.  
Apo yapētaenua itsabelia caponaejitsiatsi pibisiacuene pexanaeneconi yabara. Bajara  
jamatabēcueneyotatsi tsipaji pevajēnaeyabelia dovathi yaajamatabēcueneyotapona.

<sup>12</sup> Tajamonae, pacatoyaquinatsi mapalivaisije. Tsipaji baja Dioso pacave-  
cuaajibiaexana pibisiacuene paneexanaeneconimi Jesucristo papecasivatēpaexae.  
<sup>13</sup> Patavajēnaepijivimē, pacatoyaquinatsi mapalivaisije. Tsipaji baja payapētaneme  
Jesucristo, ponē baja cajena athēbētatsia ponapona pepo bajayatami ata, Dioso  
daxitacuene mapanacuata pexanaevajēnaeya. Paxamē ata papevējēavimē,  
pacatoyaquinatsi mapalivaisije. Tsipaji baja dovathi pajamatabēcueneyotapona.

Bepataxicueniamē patacataevi, imata baja cajena itsabaxuto pacatoyaquinatsi. Tsi-  
paji baja vaxa Dioso payapētaneme. <sup>14</sup> Patavajēnaeyapijivimē, imata baja cajena  
itsabaxuto pacatoyaquinatsi. Tsipaji baja payapētaneme Jesucristo, ponē baja cajena  
athēbētatsia ponapona pepo bajayatami ata, Dioso daxitacuene mapanacuata pexanae-  
vajēnaeya. Paxamē ata papevējēavimē, imata baja cajena itsabaxuto pacatoyaquinatsi.  
Tsipaji baja pajamatabēcuenesaēmē Dioso panejumecovēnētsijava. Pacatsijamatabēca  
baja Dioso pejumelivaisi. Nexata baja dovathi pajamatabēcueneyotapona.

<sup>15</sup> Pētsa pajitsipame mapanacuapijicueneye. Pētsa pajitsipame mapanacuapijip-  
ibisiacuene ataje. Itsa pajitsipaejitsipame mapanacuapijipibisiacueneje, nexata apo  
pajitsipaemē tsipae Dioso. <sup>16</sup> Pajamatabēcueneye jivi jitsipaeyaexanabiabatsi pibisi-  
acuene pexanaenexa, bajarapajamatabēcueneye apo pitsapae Diosojavaverena. Bajara-  
pajamatabēcueneye pitsapa mapanacuataje. Pajamatabēcueneye ata jivi najamatabēx-  
ainaeyaexanabiabatsi penaxainaeyabinexa xua itajitsipa, bajarapajamatabēcueneye ata  
pitsapa mapanacuataje. Pajamatabēcueneye ata jivi najamatabēxainaeyaexanabiabatsi

beayaijamatabëcuenevi penataenexa, bajarapajamatabëcuene ata pitsapa mapanacuataje. Daxita bajarapajamatabëcuene pitsapa mapanacuataje. Bajarapajamatabëcuene apo pitsapae vaxa Diosojavaverena. <sup>17</sup> Imoxoyo rabaja pevajënae tsaponae pevereverecaenexa mapanacuaje. Nexata daxita pajamatabëcuene jivi jitsipaeyaexanabiabatsi pibisiacuene pexanaenexa, yajavavereverecaena mapanacuaje. Itsiata baitsi jane pamona exanavanapa Dioso pitorobicueniatsi, jinavanapaena daxitamatacabijavabelianexa.

*Pexaniajailivaisi, penajumetsënëtsilivaisi ata, yabara pelivaisi*

<sup>18</sup> Tajamona, imoxoyo rabaja pevajënae tsaponae pevereverecaenexa mapanacuaje. Pavënëlivaisitaneme rabaja pacuenia najetarucaejitsia ponë cueneitoyatsi Cristo. Pata rabaja cajena ayaibitsaëto, pamona Cristo cueneitoyatsi. Bajarapamona pepatsixae, yapëtanetsi imoxoyo baja pevajënae tsaponae pevereverecaenexa mapanacuaje. <sup>19</sup> Pamona Cristo cueneitoyatsi, bajarapamona vaxaitsiyajuvënëvimi picani. Itsiata baja nacavecuapitsapa. Bajarapamona pepacuene apo vaxaitsiyajuvënëvi cajena. Itsa peneta bajarapamona vaxaitsiyajuvënëvi tsipae, nexata tsitecaeya najinavanapaejitsipa vaxaitsita. Bajaraxuata bajarapamona nacavecuapona baja. Nexata daxitajivi xaniavaetsia yapëtan bajarapamona pepacuene Dioso apo pejumecovënëtsivicuene.

<sup>20</sup> Cristo rabaja pacarajuta Espíritu Santo. Bajaraxuata daxita paxamë payapëtaneme baja pexaniajailivaisi, Dioso pejumelivaisi. <sup>21</sup> Pacatoyaquinatsi mapabaxutoje tsipaji baja payapëtaneme pexaniajailivaisicuene Jesús pelivaisi. Nexata apo pacatoyaquinaetsi matapania patacayapëtaeyaexanaenexa pexaniajailivaisicuene Jesús pelivaisi. Tsipaji baja bajaya payapëtaneme bajarapalivaisi pexaniajailivaisicuene. Payapëtanemenua baja Jesús pelivaisijavaverena acuenebi pepitsapaejava penajumetsënëtsilivaisi. Tsipaji pexaniajailivaisijavaverena acuenebi pepitsapaejava penajumetsënëtsilivaisi.

<sup>22</sup> ¿De jane peneta jumaiti pepo penajumetsënëtsijivi? Pajivi peneta pepo penajumetsënëtsijivi, jumaiti mapacueniaje: “Jesús raja apo Cristo, ponë Dioso athëbëvetsica itorobijitsiatsica vajanacacapanepaenexa,” jai. Bajara peneta pejumaitisijivi, pepo penajumetsënëtsijivi jane baja. Bajarapajivi Cristo pijavajabitsaëjivi. Bajarapajivi apo jumecovënëtsi Dioso. Apo jumecovënëtsinua Dioso pexënato ata. <sup>23</sup> Pajivi peneta jumaiti: “Jesús raja Dioso apo pexënato,” jai, bajarapajivi Dioso apo yjavaponaponatsi. Pajivi pijinia peneta jumaiti: “Jesús raja Dioso pexënato,” jai, bajara jane pajivi Dioso yjavaponaponatsi.

<sup>24</sup> Bajaraxuata paxamë baja palivaisi pajumetaneme panejumecovënëtsijavaverenacujinae, panevajënaeyabelia tsiteca pacajinavanapare. Bajarapalivaisi tsiteca itsa pacatsijamatabëecaena, nexata panevajënaeyabelia payajavajinavanapaename Dioso. Payajavajinavanapaenamenua Dioso pexënato ata, Cristo. <sup>25</sup> Jesucristo rabaja najumecapanepaeya jumaiti vajanacarajutsinexa matababi apo pevereverecaejava.

<sup>26</sup> Pacatoyaquinatsi mapabaxutoje patacayapëtaeyaexanaenexa panenayajivitaenexa pamona jamatabëpacayamaxëtojoba. <sup>27</sup> Paxamë rabaja Espíritu Santo pacatsijamatabëeca, ponë pacarajuta Jesucristo. Bajaraxuata apo panamatavenonaemë baja itsajivi ata papecatsipaebinexa paneyapëtaenexa daxitacuene. Tsipaji baja daxita xua Espíritu Santo pacayapëtaeyaexanapona, pexaniajaicuene baja cajena. Penajumetsënëtsicuene baja cajena Espíritu Santo apo pacayapëtaeyaexanapona. Pacuenia Espíritu Santo pacayapëtaeyaexanapona, bajarapacuenia pajumecovënëtaponare panevajënaeyabelia paneyajavajinavanapaenexa Cristo.

<sup>28</sup> Tajamona, ajamatabëcuenesaëya yjavajinavanapaenatsi Cristo. Bajarapacuenia yjavajinavanapaenatsi vajacujunaviyaniva pamatacabi bajaraponë patsianica. Nexata apo aura tsanetsi bajaraponëjavabelia pamatacabi patsianica. <sup>29</sup> Paxamë rabaja payapëtaneme Jesucristo, Dioso pexënatoxae, pexaniacuene pexanabiabijava. Nexata bepapapëtaneme mapacueneje. Pamona peneta pexaniacuene exana, bajarapamona Dioso pexi.

## 3

*Dioso pexi yabara pelivaisi*

<sup>1</sup> Pacanaējēre vaxa Dioso vajanacaasivacuene. Nacaasiva bitso. Bajaraxuata Dioso pexicueniatsi nacatane. Xaniajai rabaja. Dioso pexitsi. Mapanacuapijivije Dioso apo peyapētaexae, nexata bajarapamonae vaxaitsi ata apo nacayapētae Dioso pexicuenetsi.

<sup>2</sup> Tajamonae bitso patacaasivavi, aeconoxae rabaja vaxaitsi daxitatsi Dioso pexitsi. Apo yapētaetsi abaxē pacuenia itsamatacabi vaxaitsi cueneitsijitsiatsi. Itsiata Cristo itsamatacabi itsa patsianica, vaxaitsi cuenetaenatsi Cristo pacuenia cueneitsi. Nexata vaxaitsi itsa cuenetaenatsi Cristo, cuenejēpaenatsi. Tsipaji cuenetaenatsi pacuenia Cristo cueneitsi. <sup>3</sup> Cristo pibisiacuene apo pexanaenē caeto ata. Bajaraxuata daxita pamonae copiaevetavanapa Cristo pepatsijavanexatsica, pevajēnae tonajamatabēcuene xaniavaetavanapaena. Pibisiacuene apo exanavanapae tsane.

<sup>4</sup> Pajivi pibisiacuene exana, apo jumecovēnētsi palivaisi Dioso najumecopata jivi pejumecovēnētsinexa. Pibisiacuene itsa exana, nexata Dioso pitavetsijava exana.

<sup>5</sup> Payapētaneme rabaja mapacueneye. Cristo patsica mapanacuayabetsicaje vajanacave-cuaajibiaexanaenexa pibisiacuene vajaexanaeneconimi. Cristo baja cajena caeto ata pibisiacuene apo pexanaenē. <sup>6</sup> Bajaraxuata pajivi baja Cristo yajavaponapona, pibisiacuene apo exanaponapona. Pajivi tsiteca pevajēnaeyabelia pibisiacuene exanaponapona, bajarapajivi apo tae baja cajena Cristo. Apo yapētaenua cajena. <sup>7</sup> Tajamonae, pētsa panacopatame itsajivi ata papecayamaxētojobinexa. Pajivi exanabiaba pexaniacuene, Dioso pejitsipaecuene, bajarapajivi Dioso aneconijibia tanetsi. Pacuenia Cristo jamatabēcueneitsi, bajarajamatabēcueneitsi bajarapajivi. <sup>8</sup> Pajivi tsiteca pevajēnaeyabelia pibisiacuene exanaponapona, bajarapajivi dovathi pijajivitonē tsaponapona. Dovathi pibisiacuene pexanaecujinae, apo copatsi. Tsiteca pevajēnaeyabelia pibisiacuene exanaponapona mapanacuataje. Bajaraxuata Dioso pexēnato patsica mapanacuayabetsicaje daxitajivi dovathi pejamatabēcueneta pibisiacuene pexanabiabijavami piajibiaexanaenexa.

<sup>9</sup> Pajivi baja Dioso pexijivi exanatsi, bajarapajivi baja pibisiacuene apo exanaponapona. Tsipaji baja Dioso najamatabēcuenerajutatsi. Bajarapajivi baja copata pibisiacuene pexanabiabijava. Tsipaji baja Dioso pexijivi exanatsi. <sup>10</sup> Bajarapacuenia xaniavaetsia yapētanetsi pajivi Dioso pexijivi exanatsi. Pajivi pijinia dovathi pexijivi exanatsi, yapētanetsi. Tsipaji pajivi Dioso pexijivi apo exanaetsi, pexaniacuene apo exanae. Apo asivanua itsamonae ata.

*Pacuenia vaxaitsi namataenetsia benaasivatsi tsavanapae yabara pelivaisi*

<sup>11</sup> Dioso baja cajena panejumecovēnētsijavaveliacujinae, pajumetaeyabiabame pejumaitsilivaisi mapacueniaye: “Vaxaitsi namataenetsia benaasivatsi tsavanapae,” pejailivaisi. <sup>12</sup> Vaxaitsi nexata apo bitoyatsi itsamonae ata. Pacuenia bajayatami Caínpijinē itoya pejuyapijinēmi, bajara apo bitsitsi vaxaitsi. Caínpijinē dovathi pijajivitonē tsaponapona. Nexata beyaxuaba pejuyapijinēmi. Pacatsipaebijitsiatsi pacuene yabara Caínpijinē beyaxuaba pejuyapijinēmi. Caínpijinē dovathi pitorobicueniatsi, pibisiacuene exanaponapona. Pejuyapijinēmi pijinia pexaniacuene, Dioso pitorobicueniatsi, exanaponapona. Bajaraxuata Caínpijinē beyaxuaba pejuyapijinēmi.

<sup>13</sup> Tajamonae, pētsa pajamatabēcuenenabenajacame paxamē ata itsa pacaitoya mapanacuapijivije. <sup>14</sup> Vaxaitsi picani bajayata Dioso pitabarata jamatabēcuenetēpavanapatsi. Itsiata baja aeconoxae Dioso nacajamatabēcueneasaēyaexana vajanajamatabēcuene copatsixae bajaraponējavabelia. Yapētanetsi baja cajena Dioso vajanacajamatabēcuene asaēyaexanaejava. Tsipaji itsamonae ata Dioso vajanajuajumecovēnētsivi, asivatsi tsavanapae. Pajivi apo asiva itsamonae ata, Dioso penajuajumecovēnētsivi ata, bajarapajivi Dioso pitabarata jamatabēcuenetēpaponapona. <sup>15</sup> Pajivi itoya itsajivi, Dioso penajuajumecovēnētsivi ata, bajarapajivi jamatabēcuenejēpaponapona jivibenē. Paxamē rabaja payapētaneme mapacueneye. Jivibenē baja cajena apo xinae tsane matacabi apo pevereverecejava. <sup>16</sup> Yapētanetsi baja cajena mapacueneye. Jesucristo

vajanacaasivaxae, nacopata pebeyaxuabinexatsi vajaneconi yabara. Nexata vaxaitsi ata vajaasivaxae Dioso vajanajuajumecovënëtsivi, bejamatabëjumaitsitsi mapacueniaje: “It-samonae nebeyaxuabijitsia ata tsane, yavenonaenajë Dioso patanajuajumecovënëtsivi,” bejamatabëjaisi. <sup>17</sup> Ponë Dioso pejumecovënëtsinë, bitso pexainaenë pexinaejava, tae ata itsanë pijinia Dioso pejumecovënëtsinë penamatavenonaejava, itsiata itsa apo yavenonae, nexata acuenebi pejumaitsijava: “Xanë bitso Dioso jitsipajë tajamatabëëthë-tojavavetsina,” pejaijava. <sup>18</sup> Tajamonae, “Asivanë raja itsamonae ata,” apo bejaisi saya vajacuibovojotota pexaniacuene toexanaenejevatsi bajarapamonaejavabelia. Biji rajane bajarapamonae vajanacayapëtaenexa pepacuene vajaasivajava, pexaniacuene betoexanatsi. Beyavenonatsi bitso penamatavenonaejavata.

*Pacuenia apo auratsi Dioso pitabarata yabara pelivaisi*

<sup>19</sup> Daxitatsi vaxaitsi itsa asivatsi tsavanapae tsane itsamonae ata, Dioso vajana-juajumecovënëtsivi, nexata nayapëtaenatsi Dioso pexicuenetsi. Ajunavijibianua jina-vanapaenatsi Dioso pitabarata. Dioso baja cajena pexaniajailivaisi jivijavabelia petsipaebinë. <sup>20</sup> Dioso baja cajena bitso ayaijamatabëcuenenë. Dioso peyapëtaenë daxitacuene. Bajaraxuata vaxaitsi jamatabëjumaitsi atatsi: “Xanë bitso ajamatabëcuenenebenenë pibisiacuene taexanaejava yabara,” jamatabëjai atatsi, itsiata xainatsi Dioso vajanacayavenonaenë. Dioso vajanacaitaxutotsoniataenë. Tsiteca nacaasiva. Nacaevetanua. <sup>21</sup> Tajamonae bitso patacaasivavi, vajajamatabëëthëtota itsacueneneconi itsa apo xainaetsi, nexata apo auratsi Diosojavabelia vajavajëtsinexa. Jamatejematsi Dioso pitabarata. <sup>22</sup> Dioso nacarajutsiana daxita xua vajëtsianatsi Diosojavabelia. Bajarapacuenia Dioso nacarajutsiana tsipaji Dioso jumecovënëtavanapatsi pacuenia nacaitoroba. Pacuene yabara Dioso sivajamatabëcuenenëbarëya, bajarapacuenia ata vaxaitsi exanavanapatsinua. <sup>23</sup> Dioso raja nacaitoroba vajajamatabëjumaitsinexa mapacuenieje: “Jesús baja patsica, ponë copiaevetavanapatsi vajanacacapanepaenexa. Bajaraponë Dioso baja cajena pexënato,” vajajamatabëjainexa. Nacaitorobanua namataenetsia vajanaasivatsavanapaenexa. <sup>24</sup> Pajivi jumecovënëta Dioso pitorobilivaisi, bajarapajivi Dioso yajavaponaponaena. Bajarapajivi ata pijinia Dioso yajavaponaponaenatsi. Yapëtanetsi pepacuene Dioso vajanacayajavaponaponaejava. Tsipaji Espiritu Santo, ponë Dioso nacarajuta, bajaraponë nacayapëtaeyaexana pepacuene Dioso vajanacayajavaponaponaejava.

4

*Espiritu Santo yabara, Cristo pijavajabitsaë ata, yabara pelivaisi*

<sup>1</sup> Tajamonae bitso patacaasivavi, itsamonae itsa pacajumai tsane mapacueniaje: “Espiritu Santo raja, ponë netsijamatabëeca, netsipaeba. Nexata juya bajarapalivaisi pacatsipaebatsi,” itsa pacajai tsane, pëtsa abaxë caecuenia pajumecovënëtame. Copiaya abaxë pajamatabëcuenenëjëbianame paneyapëtaenexa itsa xaniajai bajarapamonae Espiritu Santo petsipaebilivaisitsi pacatsipaebiana. Bajarapacuenia pajamatabëcuenenëjëbianame tsipaji raja daxitajava mapanacuajavaje yacajëpa penajumetsënëtsilivaisi petsipaebanajetarubenaevi. Bajarapamonae penajumetsënëtsilivaisi daxitajivijava tsipaebanajetarubena. BeDioso itajara pejumelivaisi petsipaebivicuenia, tsipaebanajetarubena. <sup>2</sup> Nexata bajarapacuenia copiaya itsa pajamatabëcuenenëjëbianame, payapëtaename pamona tsijamatabëecatsi Espiritu Santo. Pamona raja peneta pepacuene Espiritu Santo tsijamatabëecatsi, jumaitsi mapacueniaje: “Jesucristo itsa patsica mapanacuayabetsicaje, naexana pacuenia vaxaitsi baexanatsi mapanacuataje,” jai peneta pamona pepacuene Espiritu Santo tsijamatabëecatsi. <sup>3</sup> Pamona peneta jumaitsi mapacueniaje: “Jesucristo raja Dioso apo pexënato,” jai, bajarapamonae cajena apo tsijamatabëecaetsi Espiritu Santo. Bajarapamonae tsijamatabëecatsi ponë cueneitoyatsi Cristo. Ponë baja pavënëlivaisitaneme pepatsijavanexa, ponë Cristo cueneitoyatsi, bajaraponë pata baja. Ponapona rabaja mapanacuajavaje. <sup>4</sup> Tajamonae, paxamë rabaja Dioso papijajivimë. Nexata baja penajumetsënëtsilivaisi papecatsipaebivi, apo pacayamaxëitojorobicapanepae. Apo cajëpaetsi papecayamaxëitojorobijava. Tsipaji

ponë pacatsijamatabëeca, bajaraponë bitso piasaënë, ponë ponapona mapanacuajavaje, matatoxenetsia. <sup>5</sup> Pamona tsipaebapona penajumetsënëtsilivaisi, bajarapamona saya Dioso apo peyapëtaevi. Bajaraxuata mapanacuapijicuene cacuaicuaijai. Nexata pamona bitso jitsipa maëpanacuapijicueneje, namuxunaevetabiabatsi. <sup>6</sup> Vaxaitsi raja Dioso pijajivitsi. Pajivi yapëtane Dioso, vaxaitsi ata nacanamuxunaeveta. Pajivi Dioso apo jitsipae, vaxaitsi ata apo nacanamuxunaevetsi. Nexata bajarapacuenia nayapëtane pajivi tsijamatabëecatsi Espíritu Santo. Espíritu Santo baja cajena jivi pexaniajailivaisi petsipaebinë. Bajara pijinia pacuenia nayapëtane pajivi ata tsijamatabëecatsi dovathi. Dovathi baja cajena penajumetsënëtsilivaisi jivi petsipaebinë.

*Dioso vajanacaasivanë yabara pelivaisi*

<sup>7</sup> Tajamonae bitso patacaasivavi, daxitatsi namataenetsia benaasivatsi tsavanapae. Tsipaji Diosojavaverena pitsapa vajanacaasivajamatabëcuene. Pajivi peneta asiva Dioso penajuajumecovënëtsivi, bajarapajivi Dioso pexijivi. Bajarapajivi yapëtane Dioso. <sup>8</sup> Pajivi apo asiva itsamonae ata, bajarapajivi apo yapëtae Dioso. Tsipaji baja cajena Dioso bitso asiva daxitajivi. <sup>9</sup> Dioso raja vajanacaasivajava, nacayapëtaeyaexana mapacueniaje. Dioso athëbëvetsica nacatoitorobica pepo caenë pexënato mapanacuayabetsicaje. Bajarapacuenia Dioso pexënato nacatoitorobica matabacabi apo pevereverecaejava vajaxainaenexa pexënato vajanacasivatëpaexae. <sup>10</sup> Bajarajamatabëcueneitsi Dioso bitso vajanacaasivajava. Vaxaitsi rajane bevelia Dioso jitsipatsi. Dioso ra picani bitso vaxaitsi nacajitsipa. Bajaraxuata Dioso nacatoitorobica pexënato cruzata vajanacasivatëpaenexa. Nexata Jesús vajanacasivatëpaexae, Dioso baja nacavecuajibiaexana daxita pibisiacuene vajaexanaeconomy.

<sup>11</sup> Tajamonae bitso patacaasivavi, itsa Dioso bajarapacuenia bitso nacaasiva, nexata vaxaitsi ata daxitatsi namataenetsia benaasivatsi tsavanapae. <sup>12</sup> Itsajivi ata cajena abaxë Dioso apo tae. Itsiata bailsi jane vaxaitsi namataenetsia itsa nasivatsi, Dioso baja nacayajavaponapona. Dioso vajanacatojitsipaecuenia itsamonae ata vajaasivanexa, Dioso nacajamatabëcueneasaëyaexanapona. <sup>13</sup> Vaxaitsi yajavajinavanapatsi Dioso. Bajara pijinia pacuenia Dioso ata nacayajavaponapona. Yapëtanetsi pexaniajaicuene Dioso vajanacayajavaponapona. Tsipaji baja Dioso nacarajuta Espíritu Santo. <sup>14</sup> Vaxaitsi baja cajena tanetsi Dioso pexënato. Nexata vaxaitsi tsipaebabiabatsi itsamonaejavabelia Dioso pexënato pitorobijavatsica mapanacuayabetsicaje pecapanepaenexa daxita mapanacuapijivije. <sup>15</sup> Pajivi jumaiti mapacueniaje: “Jesús raja Dioso pexënato,” jai, bajarapajivi Dioso yajavaponapona. Bajarapajivi pijinia Dioso ata yajavaponaponatsi.

<sup>16</sup> Nexata vaxaitsi jamatabëcuenyapëtanetsi pacuenia bitso Dioso nacaasiva. Dioso cajena piasivanë daxitanacuapijivi. Pamona itsamonae ata namataenetsia naasiva tsavanapae, bajarapamona Dioso yajavaponapona. Bajarapamona ata pijinia Dioso yajavajinavanapa. <sup>17</sup> Nexata pacuenia Dioso nacatojitsipa itsamonae ata vajanasivatsavanapaenexa, bajarapacuenia itsamonae ata asivatsi tsavanapae tsane. Nexata pamatabacabi Dioso naneconitsiaexanaponaena daxita pibisiacuene pexanaevi, bajarapamatabacabi vaxaitsi Dioso pitabarata apo junavitsi tsane. Apo junavitsi tsane Dioso pitabarata tsipaji baja mapanacuataje vaxaitsi asivatsi tsavanapae tsane itsamonae ata pacuenia Cristo daxitatsi nacaasiva. <sup>18</sup> Itsa yapëtanetsi Dioso vajanacaasivajava, apo cujunavitsi itsacuenejava ata. Tsipaji Dioso itsa nacaasiva, nacavecuajibiaexana vajajunavijavami. Pajivi Diosojavabelia naneconita, yapëtane Dioso penaneconitsiaexanaejavanexatsi. Bajaraxuata daxitacuene cujunava. Pajivi cujunava daxitacuene, abaxë xaniavaetsia apo yapëtae pacuenia Dioso asivatsi. Bajaraxuata cujunava.

<sup>19</sup> Vaxaitsi Dioso asivatsi tsipaji Dioso copiaya nacaasiva. <sup>20</sup> Pajivi jumaiti ata mapacueniaje: “Xanë raja Dioso asivanë,” jai ata, itsiata itsa itoya itsajivi Dioso pejumecovënëtsijivi ata, nexata saya bajarapajivi penajumetsënëtsijivi. Bajarapajivi itsa apo asiva itsajivi ata, petaeyabiabijivi ata, nexata biji bitsoyo bajarapajivi apo asiva Dioso. Tsipaji biji cajena caeto ata apo tae Dioso. <sup>21</sup> Pajivi asiva Dioso, bajarapajivi biasiva

itsajivi ata, Dioso penajuajumecovënëtsijivi. Tsipaji baja cajena Cristo nacaitoroba vajaasivanexa itsamonae ata.

## 5

### *Pacuenia vaxaitsi mapanacuataje dovathi jamatabëcueneamoneyabatsi yabara pelivaisi*

<sup>1</sup> Pajivi jumecovënëta: “Jesús raja Cristo, ponë Dioso athëbëvetsica itorobijitsiatsica vajanacapanepaenexa,” pejailivaisi, bajarapajivi Dioso pexijivi exanatsi. Pajivi asiva itsajivi ata, caejivi apo biasiva. Nexata bajarapajivi daxita pexi beyajavaasiva. <sup>2</sup> Bajara pijinia pacuenia vaxaitsi ata bexanatsi itsa asivatsi Dioso. Itsa jumecovënëtatsi pacuenia Dioso nacaitoroba, nexata beyajavaasivatsi itsamonae ata, Dioso vajanajuajumecovënëtsivi. Tsipaji bajarapamonae Dioso pexi exanatsi. <sup>3</sup> Vaxaitsi itsa asivatsi Dioso, nexata pacuenia Dioso nacaitoroba, jumecovënëtatsi. Pacuenia Dioso nacaitorobapona vajatoexanaenexa, apo nacatsitaayapëbeje. <sup>4</sup> Apo nacatsitaayapëbeje tsipaji baja Dioso pexitsi. Nexata caejivitsi canacujitsia Dioso nacacaëjëpaeyaexanapona vajaexanaenexa pacuenia Dioso nacaitorobapona. Najamatabëcueneocopatatsi baja Cristojavabelia vajanacayavenonaenexa mapanacuapijijamatabëcuenevecuaje. Nexata bajarapacuenia mapanacuataje dovathi jamatabëcueneamoneyabaponatsi. <sup>5</sup> Pajivi jumecovënëta Jesús Dioso pexënatocuene, bajarapajivi caëjëpatsi dovathi pejamatabëcueneamoneyabinexa.

### *Pacuenia yapëtanetsi Jesús pepacuene Dioso pexënatocuene yabara pelivaisi*

<sup>6</sup> Jesucristo baja cajena athëbëvetsica pepatsinë. Yapëtanetsi Jesús pepacuene Dioso pexënatocuene. Tsipaji copiaya bautisabatsi merata. Bajaraxuacujinae cruzata beyaxuabatsi. Nexata saya Jesús ëpebautisabicujinaetsi apo ponaponae. Biji rajane copiaya bautisabatsi. Bajaraxuacujinae cruzata beyaxuabatsi. Espíritu Santo ata nacayapëtaeyaexana Jesucristo pepacuene Dioso pexënatocuene. Espíritu Santo baja cajena pexaniajainë. Nexata Espíritu Santo vajanacayapëtaeyaexanaejava, Jesús Dioso pexënatocuene, bejumecovënëtatsi. <sup>7</sup> Athëbëtatsia jinavanapa acueyabi ponëbeje, penajamatabëcuenejëpaevi, pevajunupaebivi Jesucristo Dioso pexënatocuene. Pamona jinavanapa athëbëtatsia, mapamonaeje: Dioso, Jesucristo, Espíritu Santo. Bajarapamonae acueyabi ponëbeje, penajamatabëcuenejëpaevi, caenë rabaja picani tsaponapona. <sup>8</sup> Mapanacuata ataje acueyabi xuabeje pejamatabëcueneta yapëtanetsi Jesucristo pepacuene Dioso pexënatocuene. Yapëtanetsi Espíritu Santo pejamatabëcueneta. Yapëtanetsinua Jesús pebautisabijavatsi ata pejamatabëcueneta. Yapëtanetsinua Jesús cruzata pebeyaxuabijavatsi ata pejamatabëcueneta. Bajarapaacueyabi xuabeje pejamatabëcueneta yapëtanetsi Jesucristo pepacuene Dioso pexënatocuene. <sup>9</sup> Dioso baja cajena nacayapëtaeyaexana Jesús Dioso pexënatocuene. Mapanacuapijivi ata, itsa nacatsipaeba itsacuenelivaisiyo, nexata jumecovënëtabiabatsi pacuenia nacatsipaebabiaba. Itsiata baitsi jane Dioso itsa nacatsipaeba, bejumecovënëtatsi xaniavaetsia pacuenia nacatsipaeba. Tsipaji Dioso bitso pejumenamatomotsinë. Bitso pexaniajainë. <sup>10</sup> Pajivi jumecovënëta Jesús Dioso pexënatocuene, bajarapajivi pejamatabëëthëtota yapëtane bajarapalivaisi pexaniajailivaisicuene. Pajivi apo jumecovënëtsi Jesús Dioso pexënatocuene, bajarapajivi Dioso bepenajumetsënëtsinë tane. Tsipaji bajarapajivi Dioso peyapëtaeyaexanaejavatsi, apo jumecovënëtsi, Jesús Dioso pexënatocuene. <sup>11</sup> Dioso itsa nacayapëtaeyaexana Jesús Dioso pexënatocuene, nacayapëtaeyaexana mapalivaisije. Nacayapëtaeyaexana Dioso vajanacarajutsijavanexa matababi apo peverevereaejava. Nexata Dioso pexënatocuene pejamatabëcueneta xainaenatsi matababi apo peverevereaejava. <sup>12</sup> Pajivi yajavaponaponaena Dioso pexënatocuene, bajarapajivi xainaena matababi apo peverevereaejava. Pajivi apo yajavaponapona tsane Dioso pexënatocuene, bajarapajivi apo xainae tsane matababi apo peverevereaejava.

*Pacuenia Juan muxujioba pecopatsivajënae baja petoyaquinaelivaisi mapabaxutotaje yabara pelivaisi*

<sup>13</sup> Pacatoyaquinatsi mapalivaisije panejumecovënëtsivi Dioso pexënato. Pacatoyaquinatsi paneyapëtaenexa matabi apo peverevereaejava panexinaejavanexa.

<sup>14</sup> Yapëtanetsi Dioso vajanacajumetaejava ita vajëtatsi vajanacatojitsipaecuenia. Bajaraxuata apo jumejunavitsi vajavjëtšinexa Diosojavabelia. Jamatejematsi Dioso pitabarata. <sup>15</sup> Yapëtanetsi Dioso vajanacajumetaejava ita vajëtatsi. Nexata yapëtanetsi Dioso vajanacarajutsijavanexa xua vajëtatsi.

<sup>16</sup> Dioso panenajuajumecovënëtsivi ita pataename pibisiacuene pexanaejava, patovajëtšaname Diosojavabelia, Dioso pejamatabëcuenexaniavaetsinexatsi pibisiacuene pexanaejivi. Bjarapacuenia Diosojavabelia patovajëtšaname ita payapëtaename paneconi yabara abaxë Dioso apo vecuanaxuabijitsia. Itsajava raja jivi pibisiacuene ita exana, bjarapaneconi yabara pepacuene jivi Diosovecua naxuabiana. Nexata baja ita payapëtaename paneconi yabara pepacuene baja bjarapajivi Diosovecua naxuabijitsia, pëtsa patovajëtame Diosojavabelia. Bjarapitsineconi baja pexanaevi panetovajëtšinexa Diosojavabelia, apo pacaitorobitsi. <sup>17</sup> Daxitacuene xua apo pexanepanaecuene jivi exana, pibisiacuene baja cajena. Itsiata baitsi jane bjarapapibisiacuene jivi pexanaejava ita copabiana, nexata bjarapaneconi yabara itsiata jivi pepacuene Dioso apo vecuanaxuabi tsane.

<sup>18</sup> Yapëtanetsi baja cajena mapacuenije. Pajivi Dioso pexijivi exanatsi, bjarapajivi copata baja pibisiacuene pexanaejava. Tsipaji baja Dioso pexënato, Jesucristo, evetatsi bjarapajivi. Nexata dovathi apo itsacueniabitsi.

<sup>19</sup> Yapëtanetsi daxita vaxaitsi Dioso pexicuenetsi. Yapëtanetsinua itsamonae dovathi pitorobabiabijavatsi pibisiacuene pexanaenexa.

<sup>20</sup> Yapëtanetsinua baja Dioso pexënato, Jesucristo, athëbëvetsica pepatsijavatsica. Patsica vajanacajamatabëcuene yapëtaeyaexanaenexa pepo Dioso. Vaxaitsi baja yajavajinapanatsi Dioso. Tsipaji baja yajavajinapanatsi Dioso pexënato, Jesucristo. Bjaraponë ata pepo Dioso baja cajena, vajanacarajutsinënexa matabi apo peverevereaejava. <sup>21</sup> Tajamonae, panayajiviitavere papecatsipaebianiva palivaisi tsipaebapona pamonaevajëcabiaba jumapecataeya pexanaenënejavabelia.

## Mapabaxutoje San Juan cotocaevi toyaquina Dioso pejumecovënëtsivijavabelia

### *Pexaniajailivaisi yabara, jivi ata penaasivacuene, yabara pelivaisi*

<sup>1</sup> Xanë ancianonënë, pacatoyaquinatsi mapabaxutoje Dioso pecaitapetsiva, nexi yajava. Xanë bitso pacaasivatsi. Itsamonae ata, pamonaе jumecovënëta Dioso pejumelivaisi, bajarapamonae ata pacaasiva. <sup>2</sup> Bajarapacuenia pacaasivatsi tsipaji paxamë ata Dioso pejumelivaisi pajumecovënëtame. Bajarapalivaisi cajinavanapatsi vajajamatabëëthëtota daxitamatacabijavabelianexa. <sup>3</sup> Pacatovajëtabiabatsi Diosojavabelia, Jesucristo, Dioso pexënatojavabelia ata. Pacatovajëtabiabatsi papecayavenonabiabinexa, papecaitaxutotsonia taeyabiabinexanua. Pacatovajëtabiabatsinua jamatabëcuenexanepanaeya panejinavanapaenexa. Bajarapacuenia Dioso pacatoexanaena pexaniajailivaisi, Dioso pejumelivaisi, itsa pacajinavanapame, itsamonae ata asivaya itsa pajinavanapamenua.

<sup>4</sup> Bitso sivajamatabëcuenearëyanë itsa caxitajarabaxuabajë nexiyajuvënëvi, pejumecovënëtavanapaevi pacuenia vaxa Dioso nacaitoroba. <sup>5</sup> Tajabanava, aeconoxae catsipae-batsi namataenetsia vajanasivanexa. Bajarapalivaisi apo pejanalivaisi picani. Bajayata palivaisi itsa copiaya jumetaneme Jesús pelivaisi, bajarapalivaisi jumejëpa. <sup>6</sup> Vaxaitsi itsa jitsipatsi Dioso, nexata pacuenia Dioso nacaitoroba, bejumecovënëtavanapatsi. Bajarapalivaisi papecatsipaebijavaveliacujinae, pacaitoroba baja cajena namataenetsia panenasivatsavanapaenexa.

### *Penajumetsënëtsilivaisi daxitanacuanëjava petsipaebanajetarubenaevi yabara pelivaisi*

<sup>7</sup> Penajumetsënëtsilivaisi petsipaebanajetarubenaevi, ayaibitsaëto najetarubena daxitanacuanëjava. “Pacuenia vaxaitsi banaexanatsi, bajarapacuenia Jesucristo naexana mapanacuataje,” pejailivaisi, bajarapamonae apo pejumecovënëtsivi. Bajarapitsijamatabëcuenepexinaevi peyamaxëitojorobivi baja cajena. Bajarapamonae Cristo pijavajabitsaë. <sup>8</sup> Panayajivitaevanapare papecavecuaxuabiyaniva xua pasivanacuenebavanapame Dioso papecarajutsinexa. Bajarapacuenia panayajivitaevanapare Dioso papecarajutsinexa daxitajavayo panetonacuenebimatamo.

<sup>9</sup> Pajivi tsiteca pevajënaeyabelia jumecovënëtaponaпona palivaisi Cristo tsipae-bapona, bajarapajivi vaxa Dioso yajavaponaponatsi. Vaxa Dioso pexënato ata yajavaponaponatsi. Pajivi pijinia copata pejumecovënëtsijava palivaisi Cristo tsipae-bapona, bajarapajivi Dioso apo yajavaponaponatsi. <sup>10</sup> Nexata bajarapitsijivi itsa pona paxamëjavabelia livaisi papecatsipaebinexa, pëtsa pacajunuame panijaboyaberenena. Pëtsa pabajacobamenua bajarapitsijivi. <sup>11</sup> Pajivi bajacobijitsipa bajarapitsijivi, jamatabëcueneyavenonaejitsipa pibisiacuene pexanaejava. Bajaraxuata pëtsa pabajacobame bajarapitsijivi.

### *Pacuenia Juan jumaitsi pecopiarutaponaelivaisita yabara pelivaisi*

<sup>12</sup> Xanë picani xainajë ayailivaisi patacamuxujiobinexa. Itsiata abaxë apo jitsipaenë bajarapalivaisi patacatoyaquinaenexa mapabaxutotaje. Evetajë abaxë taponaejava paxamëjavabelia patacataenexa, patacabarëcuaicuajainexanua, vajajamatabëcuenearëyanexa bitso.

<sup>13</sup> Nejuyapijiva Dioso pitapetsivatsi pexi, catonajumeitoroba nebajacobinexa.

## Mapabaxutoje, acueyabibaxuto, San Juan toyaquina Dioso pejumecovënëtsivijavabelia

### *Pacuenia Juan pexaniajamatabëcuenia tane Gayovënënë yabara pelivaisi*

<sup>1</sup> Gayo bitso tacaasivanë. Xanë ancianonënë, catoyaquinatsi mapabaxutoje. Casivatsi bitso tsipaji xamë ata pexaniajailivaisi jumecovënëtame.

<sup>2</sup> Catovajëtabiabatsi Diosojavabelia. Catovajëtabiabatsi daxitacuenejavanë pecatoxanepanaenexa, jumalixanepanaeya neponaponanexanua. Cavënëlvaisitanetsi rabaja Dioso pitabarata xaniavaetsia Dioso netoponaponaejava pibisiacuene exanaenejevamë.

<sup>3</sup> Itsamonae Dioso pejumecovënëtsivi parena xanëjavaberena. Nexata bajarapamonae xanëjavaberena cavënëlvaisipaeba xaniavaetsia neponaponaejava. Netsipaeba xaniavaetsia asaëya nejumecovënëtaponaponaejava pexaniajailivaisi, Dioso pejumelivaisi. Nexata bitso casivajamatabëcuenebarëyatsi. <sup>4</sup> Pamonae tsipaebabiabajë Dioso pejumelivaisi, bajarapamonae taniji betaxicuenia. Nexata itsa vënëlvaisitaniji bajarapamonae Dioso pejumecovënëtavanapaejava, nexata bitso sivajamatabëcuenebarëyanë tsabiabi. Itsacuenejava ata pematatsënëa bajarapacuenia apo nejamatabëcuenebarëyayaexanae.

<sup>5</sup> Xamë xaniavaetsia Dioso tonacuenebabiabame itsa yavenoname Dioso pejumecovënëtsivi. Bajarapamonae saicayanacuaverena pepatsivi ata, yavenoname. <sup>6</sup> Pamonae Dioso pejumecovënëtsivi parena xanëjavaberena, daxita majotaje Dioso pejumecovënëtsivi pitabarata, cavënëlvaisipaeba bajarajotalia asivaya neyavenonaejava Dioso pejumecovënëtsivi. Bajarapamonae itsa ponaena pevajënaeyabelia, Dioso pejumelivaisi jivi petsipaebaponanexa, yavenonaename pacuenia namatavenonaena pijanamutonexa. Bajarapacuenia bajarapamonae itsa yavenonaename, Dioso casivabarëya tsane. <sup>7-8</sup> Bajarapamonae naropoba Jesucristo petonacuenebinexa pexaniajailivaisi, Dioso pejumelivaisi, daxitajivijava petsipaebanajetarubenaenexa. Bajarapamonae apo jitsipae peyavenonaenexatsi pamonae Dioso apo pejumecovënëtsivi. Bajaraxuata vaxaitsi Dioso vajajumecovënëtsivi, xanepana vajayavenonaenexa bajarapamonae. Bajarapacuenia itsa yavenonatsi, nexata Dioso nacetane bajarapamonaeta Dioso pijacuene bevajatonanacuenebivi.

### *Pacuenia Diótrufes pibisiacuene exana yabara pelivaisi*

<sup>9</sup> Xanë bajayata copiaya toyaquinajë Dioso pejumecovënëtsivi, panijatamarata pejinavanapaevi. Itsiata bajarapabaxutota taitorobicuenia Diótrufes apo jumecovënëtsi. Jesucristo ata taneitorobinëcuene, apo jumecovënëtsi. Bajaraponë ayaijamatabëcuenenë jamatabënaexana papecanamatacaitorobinënexa. <sup>10</sup> Bajaraxuata itsa patsianajë xamëjavata, catsipaebianatsi daxita pacuenia Diótrufes exana. Bajaraponë pibisiacuena tanebaracuaicuaijajava, taneyabaranajumetsënëtsijava ata, catsipaebianatsi. Itsacuenejavanënuua pematatsënëa pibisiacuene exanabiaba. Diótrufes apo copiapitabiabi xaniavaetsia pamonae Dioso pejumecovënëtsivi. Itsamonae ata itaveta pecopiapitsivaniva pepatsivi. Nexata picani pamonae Diótrufes itaveta, itsiata copiapitabiaba Dioso pejumecovënëtsivi. Nexata pamonae Diótrufes itavetsi ata, itsiata copiapitabiaba, bajarapamonae Diótrufes jamatabëvecuacapitsapa Dioso pejumecovënëtsivi penacaetatsibovecua bajarapamonae pematatsënëa penajoneyaniva bajarapabota.

<sup>11</sup> Gayo, pëtsa exanaponaponame pacuenia pibisiajamatabëcuene pexainaevi baexanavanapa. Exanaponaponare jane pacuenia pexaniacuene pexanaevi baexanavanapa. Pajivi Dioso pexijivi exanatsi, bajarapajivi pexaniacuene exanaponapona. Pajivi Dioso pexijivi apo exanaetsi, bajarapajivi pibisiacuene exanaponapona. Tsipaji bajarapajivi Dioso apo yapëtae.

### *Pacuenia Demetrio pexaniacuene exana yabara pelivaisi*

<sup>12</sup> Daxitajivi pexaniacuenia Demetrio vënëlivaisipaebatsi pexaniacuene pexanapon-aponaejava. Espiritu Santo baja cajena pexaniajailivaisi jivi peyapëtaeyaexanaenë. Nexata Espiritu Santo jivi yapëtaeyaexanaponatsi pexaniacuene Demetrio pexanapon-aponaejava. Paxanë ata baja cajena payapëtaniji Demetrio pexaniacuene pexanapon-aponaejava. Nexata daxitajivijava patsipaebaponajë bajarapalivaisi. Paxamë ata paneyapëtaneme pexaniajailivaisi patatsipaebaponaejava.

*Pacuenia Juan jumaitsi pecopiarutsilivaisiyota yabara pelivaisi*

<sup>13</sup> Xanë picani xainajë ayailivaisi tacamuxujiobinexa. Itsiata abaxë apo jitsipaenë bajarapalivaisi tacatoyaquinaenexa mapabaxutotaje. <sup>14</sup> Tsipaji jamatabëcatanetsi bepijia. Nexata abaxë tajacuata cabarëcuaicuaijaitsi tsane.

<sup>15</sup> Catovajëtatsi Diosojavabelia pecayavenonaenexa jamatabëcuenexanepanaeya neponaponaejava. Daxita pecayapëtaevi, majotaje pejinavanapaevi, cabajacobalia. Nebajacobiana caejivi canacujitsia, daxita vajayapëtaevibeje.

## Mapabaxutoje San Judas toyaquina Dioso pejumecovënëtsivijavabelia

*Pacuenia Judas mapabaxutoje toyaquina Dioso pejumecovënëtsivijavabelia yabara pelivaisi*

<sup>1</sup> Xanë Judasnë, Jesucristo pijajivitonënë, Santiago pejujapijinënë. Pacatoyaquinatsi mapabaxutoje paxamë Dioso papecaasivaivi. Dioso pacajunata papijajivinexamë. Paxamë asaëya Dioso pajumecovënëtavanapame Jesucristo papecayajavaponaponaexae. <sup>2</sup> Pacatovajëtatsi Diosojavabelia bitso papecaitaxutotsoniataenexa. Pacatovajëtatsinua Diosojavabelia itsamonae ata Dioso pitabarata barajamatabëcuenexanepanaeya panejivanapanaenexa. Pacatovajëtatsinua Diosojavabelia namataenetsia panenasivanexa.

*Pacuenia Judas toyaquina Dioso pejumecovënëtsivijavabelia pejumecovënëtsiyaniva penajumetsënëtsilivaisi petsipaebavanapaveitsi yabara pelivaisi*

*(2 Pe 2.1-7)*

<sup>3</sup> Tajamonae bitso patacaasivavi, jamatabëpacatoyaquinatsi picani matavëjëa paneyapëtaenexa Dioso papecacapanepaejavanexa panijaneconivecua. Jamatabëpatoyaquinatsinua picani paneyapëtaenexa paxanë ata Dioso patanecapanepaejavanexa. Itsiata bajaraxua yabara apo pacatoyaquinae tsanetsi mapabaxutotaje. Vënëlvaisitaniji paxamëjavata pepatsijava penajumetsënëtsilivaisi petsipaebaponaevi. Bajaraxuata jitsipajë patacatoyaquinaenexa panejumecovënëtsiyaniva bajarapamonae papecatsipaebilivaisi. Tsipaji bajarapamonae pexaniajailivaisi, palivaisi vaxaitsi jumecovënëtatsi, bajarapalivaisivecua, saicayalivaisi pacatsipaebavanapa. Nexata paxamë bajarapamonae ajumesaëya patsipaebare palivaisi vaxaitsi jumecovënëtavanapatsi. <sup>4</sup> Tsipaji bajarapamonae, penajumetsënëtsilivaisi papecatsipaebavanapaevi, paxamë tuatuajëta najoneyabiaba pacatsitanajamatabëcuene itajëtsinejeva. Bajarapamonae jamatabëcuenenavëxaniabiaya jumai tsabiabi: “Dioso baja cajena nacaitaxutotsoniatane vajanacapanepaenexa. Bajaraxuata pibisiacuene exanae atatsi, apo itsacuene,” jai tsabiabi bajarapamonae. Bajarapamonae apo jumecovënëtsi caenë Dioso vajanacaevetsicuene. Apo jumecovënëtsinua caenë Jesucristo vajatuxanenëcuene. Bajarapamonae apo exanae pacuenia Dioso jitsipa. Apo exanaenua pacuenia Jesucristo ata jitsipa. Bajarapamonae itsamatacabi Dioso penaneconitsiaexanaejavanexatsi pijaneconi yabara, Dioso tajëvelia pejumelivaisibaxutota vajunupaebatsi.

<sup>5</sup> Payapëtaneme rabaja mapacueneje. Bajayata vajatuxanenë Dioso pijajivi capanepa Egipto nacuavecua, Israel nacuayaberena. Nexata baja payapëtae atamë bajarapacuene, itsiata jitsipajë panenajamatabënapsinexa icatsia bajarapacuene. Bajarapacuenia vajatuxanenë Dioso pijajivi capanepae ata, pecapanepaecujinae icatsia verebiaba bajarapamonaemiyajuvënëvi. Bajarapacuenia verebiaba tsipaji bajarapamonae apo jumecovënëtsitsi. <sup>6</sup> Panajamatabënapiarena pacuenia Dioso exana ángelevijavabelia ata. Angelevi Dioso tonacuenebavanapa athëbëtatsia. Angeleviyajuvënëvi apo exanae pacuenia Dioso itorobatsi. Apo jinavanapaenua itsajota picani Dioso tocopata pejinavanapaenexa. Bajaraxuata Dioso ángeleviyajuvënëvi cëbiaya jinavanapaeyaexana itsanacuata, pitaquirinacuata. Bajarajota ángelevi copiaevetavanapaeyaexanatsi Dioso penaneconitsiaexanaejavanexatsi. Nexata pamatacabi Dioso dexitamatacabi-javabelianexa naneconitsiaexanaena daxita pamonaenaneconita Diosojavabelia, bajarapamatacabi Dioso bajarapaángelevi ata naneconitsiaexanaena dexitamatacabijavabelianexa.

<sup>7</sup> Panajamatabënapiarena Sodoma tomarami ata, Gomorra tomarami ata, pemuxuneneta penaetomaranëmi ata. Pamonaemi jinavanapa bajarapatomaranëta, bitso pibisiacuene exanabiaba. Bajarapamonaemi apo jumecovënëtsi Dioso. Apo jumecovënëtsinua ángelevi ata. Bajarapamonaemi pevitota bitso pibisiacuene exanabiaba

pevëna pebijivijavabelia. Bajaraxuata Dioso verebiaba bajarapamonaemi. Bajarpacuenia Dioso verebiaba bajarapamonaemi, pamonaecotocaevi jinavanapa mapamat-acabitaje, peyapëtaenexa. Nexata bajarapamonaeta pibisiacuene pexanaeyaniva, apo peverevereaeisotojavabelia Dioso penaneconitsiaexanaeyanivatsi.

<sup>8</sup> Bajarapacuenia bajayata Dioso naneconitsiaexana pamonaemi pibisiacuene exanavanapa. Bajarapacuenia Dioso naneconitsiaexanaeta pamonaemi bajayata pibisiacuene exanavanapa, itsiata pamonaepenajumetsënëtsilivaisi pacatsipaebavanapa, apocanaëjëtsi Dioso penaneconitsiaexanaejavanexatsi. Pamonaepenajumetsënëtsilivaisi pacatsipaebavanapa, pibisiacuene exanabiaba. Bajarapamonaepina majitsinaebotatane papibisiacuene bajarapamonaexanaejitsia. Bajaraxuata nexata bajarapamonaepibisiacuene exanabiaba pevitota. Apo jumecovënëtsi pacuenia Dioso itorobatsi. Dioso pijaängelevi atabajarapamonaepibisiacuena baracuaicuaijai tsabiabi. <sup>9</sup> Angelnë Miguel, Ángelevi penamatacaitorobinë. Angelnë Miguel bitso ayaijamatabëcueneenëata, yayiatane dovathi. Pibisiacuena apo baracuaicuaijai. Apo bijataenua. Bajayata Moiséspijinë petëpanucaenë jamatabëpitatsi picani dovathi. Nexata ángelnë Miguel apocopatsi Moiséspijinë dovathi pepitsinexatsi. Nexata dovathibeje, ángelnë Miguelbeje, najumenotabeje Moiséspijinëmi yabara. Itsiata bajarajota ángelnë Miguel pibisiacuena apo bijatae dovathi. Saya xaniavaetsia ángelnë Miguel jumaitsi dovathijavabelia: “Diosorajacabijataena,” jai. <sup>10</sup> Itsiata baitsi jane pamonaepenajumetsënëtsilivaisi pacatsipaebavanapa, xaniavaetsia Ángelevi apo taeata, apo yapëtae atanua, pibisiacuena baracuaicuaijai tsabiabi. Nexata pacuenia unupijidujuai apo cujarubi atatsi, itsiata pijacuata yapëtane pexanaejavanexa, bajara pijinia pacuenia bajarapamonaeta saya pijacuata yapëtane mapanacuapijicuene pexanaenexa. Nexata exanavanapa pibisiacuene pacuenia jamatabëexana. Nexata itsamatacabi Dioso verebiabiana bajarapamonaebajarapapibisiacuene pexanaexae.

<sup>11</sup> ¡Bitso bejiobi tsane pamonaepenajumetsënëtsilivaisi pacatsipaebavanapa! Bajarapamonaeta Dioso naneconitsiaexanaena. Tsipaji pacuenia bajayata Caínpijinë jamatabëcueneitsi, bajarapamonaeta jamatabëcueneitsi tsavanapae. Bajayata Caínpijinë pibisiacuene exanaponapona pacuenia jamatabëexana. Pacuenia bajayata Balaampijinë atajamatabëcueneitsi, bajarajamatabëcueneitsi tsavanapae pamonaepenajumetsënëtsilivaisi pacatsipaebavanapa. Bajayata Balaampijinë Dioso apojumecovënëtsi pacuenia itorobatsi. Balaampijine palata pepitsinexa, jivi matacapona pibisiacuene pexanaenexa. Pacuenia bajayata Corépijinë atajamatabëcueneitsi, bajara jamatabëcueneitsi tsavanapae pamonaepenajumetsënëtsilivaisi pacatsipaebavanapa. Bajayata Corépijinë apojumecovënëtsi pacuenia Moiséspijinë itorobatsi. Nexata Corépijinë beyaxuabatsi Dioso. Bajara pijinia pacuenia pamonaepenajumetsënëtsilivaisi pacatsipaebavanapa, pibisiacuene pexanaexae, nexata Dioso verebiabiana bajarapamonaeta. <sup>12</sup> Pamonaepenajumetsënëtsilivaisi pacatsipaebavanapa, payajavanacaetuatabiabame itsapanacaetuatabiabame panenabaninexa. Paxamë panacaetuatabiabame namataenetsia panenasivaxae. Nexata bajarapamonaenajoneyabiaba panenacaetuatsijavata. Bajarapamonaepibisiacuene pexanabiabixae, bepiaxuirajava paxamë tuatuajëta. Bajarapamonaetaurajibia ayaijava xaeabiaba. Petocopatsinexa itsamonae atapenaxaenexa, aponajamatabëxainabiabi. Pacuenia pijaovejapevetsivi xaniavaetsia baeveta pijaoveja, bajarapacuenia itajara pacaeveta. Itsiata apopacaevetsi xaniavaetsia. Epamonaesaya naeveta. Bajarapamonaepexanaejava, itsacueneyavayonexa atapo xanepanaeta. Yapëtanetsi pacuenia itsi vaita. Vaita itarërëbo pitsapaeata, itsiata ema apojopae. Jovibo saya caponatsi. Nexata itsamonapeubijavaxi totsaquenae atatsi, apojamatabëcueneyavenonaetsi. Bajara saya jamatabëcueneitsi tsavanapae pamonaepenajumetsënëtsilivaisi pacatsipaebavanapa. Tsipaji apojamatabëcueneyavenonaeta itsajiviata. Peubinae, ponae aponacuaityabiabi penacuaityamatacabitaata, bajaraponaeta xanepanaeta itsacueneyavayonexaata. Bajara saya jamatabëcueneitsi tsavanapae pamonaepenajumetsënëtsilivaisi pacatsipaebavanapa. Tsipaji apojamatabëcueneyavenonaeta itsajiviata. Peubinae,

ponae apo nacuaitabiabi penacuaitsimatacabita ata, bajaraponae peubinē yatabutopaya juta petajuitsinexa isotojavabelia. Bajara pijinia pacuenia Dioso naneconitsiaexanaena pamonae penajumetsēnētsilivaisi pacatsipaebavanapa pibisiacuene pexanabiabixae. Nexata bajarapamonae Dioso xuabianatsi infiernojavabelia. <sup>13</sup> Pacuenia malataca caecovēta apo rucae, caponanua piaxuirapērē pitapayabelia, bajara saya jamatabēcueneitsi tsavanapae pamonae penajumetsēnētsilivaisi pacatsipaebavanapa. Caejamatabēcuene apo xainabiabi. Bajarapamonae piauracuene pexanabiabixae, nexata bepiaxuirajava paxamē tuatujēta. Bajarapamonae pejamatabēcueneta jamatabēcuenebijanabiaba itsamonae Dioso pejumecovēnētsivi. Pacuenia athēbēvetsica tulupu othopaena pevereverecaenexa, bajara pijinia pacuenia bajarapamonae ata vereverecaena. Diosovecua naxuabiana. Tsipaji copaba pejumecovēnētsijavami pexaniajailivaisi. Bajaraxuata Dioso bajarapamonae naneconitsiaexanaenatsi. Nexata bajarapamonae pitaquirinacuata jinanavanaena daxitamatacabijavabelianexa.

<sup>14</sup> Enocpijinē bajayata ponapona. Bajaraponēmi Adánpijinē pemomoxiyajuvēnēnē. Nexata Enocpijinē Dioso pejamatabēcueneta bajayata tajēvelia vajunupaeba, pamonae aeconoxae mapamatacabitaje penajumetsēnētsilivaisi pacatsipaebavanapa. Enocpijinē baja cajena bajayata tajēvelia bajarapamonae yabara jumaitsi mapacueniaje: “Vajatuxanenē Cristo, pijajivi ángelevi, ayaibitsaētoxfaneto yajava, najetarucaena. <sup>15</sup> Najetarucaena penaneconitsiaexanaenexa daxita pamonae apo exanae Dioso pitorobicueniatsi. Najetarucaena penaneconitsiaexanaenexanua daxita pamonae pibisiacuena baracuaicuajai Dioso,” jai baja cajena bajayata tajēvelia Enocpijinē. <sup>16</sup> Pamonae penajumetsēnētsilivaisi pacatsipaebavanapa, apo sivajamatabēcuenebarēya itsacuenejavayo ata. Nexata pibisiacuena baracuaicuajai tsabiabi daxita xua bajarapamonae tocopiapataponatsi. Apo jumecovēnētsi pacuenia Dioso itorobatsi. Nexata bajarapamonae exanavanapa pijacuata penatojitsipaecuenia. Bajarapamonae ayaijamatabēcuenevi nataeya navajunupaebabiaba xua exana. Itsamonaejavabelia itsa cuaicuajai, pexaniacuena cuaicuajai tsabiabi. Bajarapacuenia pexaniacuena cuaicuajai tsabiabi saya pebarēyataenexatsi, perajutsinexatsinua penamatavenonaejavanē.

*Pacuenia Dioso pejumecovēnētsivi muxujibatsi pejumecovēnētsiyaniva penajumetsēnētsilivaisi petsipaebavanapaevitsi yabara pelivaisi*

<sup>17</sup> Tajamonae bitso patacaasivavi, panajamatabēnapire pacuenia baja cajena tajēvelia pacatsipaeba apóstolevi, vajatuxanenē Jesucristo pijajivi. Apóstolevi baja cajena tajēvelia pacatsipaeba pepatsijavanexa penajumetsēnētsilivaisi papecatsipaebivinexa. <sup>18</sup> Apóstolevi baja cajena tajēvelia pacajumaitsi mapacueniaje: “Nacua pecopiarucaevajēnaeyota, itsamonae capocaponaena pexaniajailivaisi, Dioso pejumelivaisi. Bajarapamonae exanavanapaena pibisiacuene, pacuenia pijacuata natojitsipa,” pacajai baja cajena tajēvelia apóstolevi. <sup>19</sup> Pamonae penajumetsēnētsilivaisi pacatsipaebavanapa, bajarapamonae papecatsipaebilivaisita, Dioso panejumecovēnētsivi pacanavecuanatsanaeyaexanapona. Bajarapamonae saya najamatabēxaina ěmapanacuapijijamatabēcueneje. Nexata pibisiacuene exanavanapa pacuenia pijacuata natojitsipa. Bajarapamonae Espíritu Santo apo tsijamatabēcaetsi.

<sup>20</sup> Tajamonae bitso patacaasivavi, asaēyata Dioso pajumecovēnētavanapare. Pacuenia Espíritu Santo pacaitoroba, pavajētabiabarē Diosojavabelia. <sup>21</sup> Paxamē bitso Dioso pacaasiva. Bajaraxuata pacuenia Dioso pacaitoroba, pajinavanapare pibisiacuene paneexanaeyaniva. Bajayajebi pacopatsinejevamē, pacopiaejetavanapare matacabi apo pevereverecaeyava papecarajutsinexa vajatuxanenē papecaitaxutotsoniataexae.

<sup>22</sup> Itsamonae jumecovēnētsi ata pexaniajailivaisi, Dioso pejumelivaisi, itsiata jumeabapona. Bajarapitsivi payavenonare xaniavaetsia pejumecovēnētsinexa bajarapalivaisi. <sup>23</sup> Bajarapamonae isotojavabelia bepejopaevinexa. Tsipaji pibisiacuenejavabelia jamatabējopa. Bajaraxuata payavenonare bajarapitsivi. Itsamonae pijinia bitso pibisiacuene exanavanapa. Bajarapapibisiacuene paitoyamēre. Bajarapamonae itsiata paitaxutobejiobiataema. Payavenonapona bajarapapibisiacuene pecopatsinexa. Itsiata

baitsi jane xania. Panayajivitaema. Pëtsa paxamë ata bajarapamonaeta pibisiacuene panaexaname.

*Pacuenia apóstolenë Judas itoroba daxita Dioso pejumecovënëtsivi: “Dioso, bitso ayaijamatabëcuenenëmë,” pejainexa Diosojavabelia yabara pelivaisi*

<sup>24</sup> Dioso caëjëpatsi papecaevetsinexa pibisiacuene paneexanaeyaniva. Nexata pamatacabi Dioso naneconitsiaexanaena daxita pijaneconi pexainaevi, paxamë ata pacanubenaeyaexanaena bajaraponë Dioso, penivenivenaecotia pexainaenë, pitabarata. Itsiata baitsi jane paxamë paneconijibimë tsane. Bitso pabarëyamë tsane. <sup>25</sup> Bajaraponë pepo caenë Dioso. Bajaraponë Dioso nacacapanepaena vajatuxanenë Jesucristo cruzata vajanacasivatëpaexae vajaneconi yabara. Bajaraxuata daxitajivi bejumaitsi Diosojavabelia: “Diosomë, bitso ayaijamatabëcuenenëmë,” bejai. Betsipaebaponanua itsamonaevajabelia Dioso bitso ayaijamatabëcuene pexainaenëcuene. Dioso cajena daxitanacua pevetsinë. Betsipaebaponanua itsamonaevajabelia Dioso pecaëjëpaejavatsi pevetsinexa daxitajivi. Bajarapacuenia Dioso jamatabëcueneitsi tsaponaponae mapanacuae pexanaevajënaeya, mapamatacabi ataje, daxitamatacabijavabelianexa ata. Bajara itsi tsane.

## San Juan peyaquinaelivaisi pacuenia tajëvelia Dioso tsitajëtatsi pacuenia itsijitsia mapanacuataje

*Pacuenia tajëvelia Jesucristo Dioso tsitajëtatsi, juya bajarapacuenia Jesucristo petsitajëtsijava Juanjavabelia yabara pelivaisi*

<sup>1</sup> Daxita xuanë Jesucristo tajëvelia Dioso tsitajëtatsi, daxita bajaraxuanë pelivaisi, xanë Juannë, yaquinajë mapabaxutotaje. Bajaraxuanë baja bepjiayo copiapatsiana. Xuanë tajëvelia Dioso tsitajëtatsi Jesús, bajaraxuanë juya Jesús tsitajëtsiana pijajivi-javabelia. Bajaraxuata nexata Jesús itorobica pijaángel xanëjavabetsica. Nexata bajaraxuanë jumapecataeya tajëvelia netsitajëta Jesús pijaángel. Neyapëtaeyaexanua pajamatabëcuenelivaisi xaina bajaraxuanë. <sup>2</sup> Nexata daxita bajaraxuanë pacuenia taniji, pelivaisi yaquinajë mapabaxutotaje. Pacuenia Dioso nejumlahitsi, yaquinajë. Pacuenia Jesucristo ata jumaitsi, bajaraxua ata yaquinajë.

<sup>3</sup> Pajivi tsimumulebiana mapabaxutoje Dioso pejumecovënëtsivi penacaetuatsijavata, jamatabëcuenebarëya tsane. Pamonaë ata namuxunaevetsiana mapalivaisije, nexata itsa jumecovënëtsiana pacuenia Dioso tajëvelia jumaitsi, bajarapamonaë ata jamatabëcuenebarëya tsane. Bajarapacuenia jamatabëcuenebarëya tsane tsipaji baja imoxoyo pevajënaë tsaponae pecopiapatsinexa daxita xuanë pelivaisi yaquinajë mapabaxutotaje.

*Pacuenia Juan toyaquina siete patomarabejepijivi, Dioso pejumecovënëtsivi, yabara pelivaisi*

<sup>4</sup> Xanë rabaja Juannë. Pacatoyaquinatsi siete papabitsaëtomëbeje, Dioso panejumecovënëtsivi, Asiavënë nacuata panejinavanapaevi. Ajena, mapamatacabitaje, Dioso ponapona. Dioso nacua pexanaevajënaeya ata, Dioso ponapona. Daxitamatacabijavabelianexa ata Dioso ponapona. Pacatovajëtatsi Diosojavabelia papecajamatabëcuene barëyayaexanaenexa, papecaayavenonaenexanua. Siete paespiritubeje nubena Dioso peecaejava, tronovënëjava, pitabarata. Pacatojitsipatsi bajarapamonaë papecajamatabëcuene barëyayaexanaenexa, papecaayavenonaenexanua. <sup>5</sup> Jesucristojavabelia ata bajarapacuenia pacatovajëtatsi. Jesucristo baja cajena pexaniajailivaisi, Dioso pejumelivaisi, jivi tsipaebabiaba. Daxita petëpaevivecua, Jesús baja namataxainaea Dioso asaëyaexanatsi petëpaejavavecua. Mapanacuata jivi pevetsivi ata matatoxenetsia, Jesús pepo pevetsinë daxitacuene. Jesús vajanacaasivaxae, nacasivatëpa. Nexata baja nacavecuaajibiaexana daxita pibisiacuene vajaexanaeconimi. <sup>6</sup> Nexata baja Jesús pijajivitsi nacaexana itsamatacabi vajanacabarëevetsinexa daxitacuene. Jesús baja nacaexanua sacerdotevitsi, Jesús paxa Diosojavabelia jivi vajatovajëtabiabinexa. Nexata vaxaitsi daxitamatacabijavabelianexa ayaijamatabëcuene rajutabiabinatsi Jesúsjavabelia. ¡Apo vereverecae tsane Jesús daxitacuene pevetsijava! Bajara itsi tsane.

<sup>7</sup> ¡Panenamuxunaevere mapalivaisije! Cristo raja najetarucaena athëbëvetsica itarërëbota. Pamatacabi Cristo najetarucaena athëbëvetsica, daxitajivi taenatsi. Pamonaë ata yencacuatatsi, bajarapamonaë ata taenatsi. Daxita nacuanëpijivi, pamonaë Dioso apo pejumecovënëtsivi, itsa taena Cristo penajetarucaejava athëbëvetsica, nuena pecajunavi. Bajara itsi tsane jivi itsa taena Cristo athëbëvetsica penajetarucaejava.

<sup>8</sup> Jesús nayabarajumaitsi mapacueniaje: “Xanë rajane baja daxitacuene pepo tataxuxuabinë. Xanë rajane baja icatsia daxitacuene tacopiarucaeyaexanaenëna,” nayabarajai Jesús daxitacuene pevetsinë, daxitacuene pexanaenexa ata pecaëjëpaenëtsi. Ajena mapamatacabitaje Jesús ponapona. Dioso nacua pexanaevajënaeya ata, Jesús ponapona. Daxitamatacabijavabelianexa ata Jesús ponapona.

*Pacuenia Juan Jesús yacotiaya tsitanaitajëtatsi yabara pelivaisi*

<sup>9</sup> Xanë Juannë, panijabananënë. Tsipaji najuajumecovënëtavanapatsi Jesucristo. Nexata pacuenia paxamë ata itsamonae pacabejiobiaexanapona Dioso papijajivix-aemë, bajara pijinia pacuenia xanë ata itsamonae nebejiobiaexanapona. Jesucristo pijajivitsi nacaexana itsamatacabi vajanacabarëevetsinexa daxitacuene. Jesucristo papecayavenonaexae, pacaasaëmë tsavanapae Dioso panejumecovënëtsijava. Bajara pijinia xanë ata itsinë. Dioso pejumelivaisi jivi tatsipaebabiabixae, naneconitsia ponaponajë Patmosvënë tunaetota. Jesucristo pelivaisi ata jivi tatsipaebabiabixae, naneconitsiaponaponajë. <sup>10</sup> Nexata Patmosvënë tunaetota domingota Espiritu Santo netsijamatabëvënëca. Nexata tapënëverena pecuaicuaijajava ayaijume, betrompetajume penajumetsijava, jumetaniji. <sup>11</sup> Pecuaicuaijajava nejumaitsi mapacueniaje:

—Xanë rajane baja daxitacuene pepo tataxuxuabinë. Daxitacuene icatsia tacopiarucaeyaexanaenënexa. Xua baja taneme, bajaraxua baja pelivaisi copiaya yaquinare. Xuanë ata icatsia aeconoxae taeponaename, bajaraxuanë ata pelivaisi yaquinaename. Bajaraxuacujinae bajarapalivaisi toitorobianame Dioso pejumecovënëtsivi, siete patomarabejepijivijavabelia, Asiavënë nacuata pejinavanapaevi. Toitorobianame bajarapalivaisi Efeso tomarapijivijavabelia, Esmirna tomarapijivijavabelia ata, Pérgamo tomarapijivijavabelia ata, Tiatira tomarapijivijavabelia ata, Sardis tomarapijivijavabelia ata, Filadelfia tomarapijivijavabelia ata, Laodicea tomarapijivijavabelia ata, nejai mapacueniaje tapënëverena pecuaicuaijajava.

<sup>12</sup> Nexata napënëyorotajë tataenexa ponë tapënëverena nebarëcuaicuaijai. Nexata taenubajë siete xuabeje orota pexanaejavanë. Bajaraxuanë pematatuta naitayotanubena. <sup>13</sup> Bajaraxuanë petuatuajëta taenutajë pebi. Bajaraponë yabara jamatabëjumaitsinë:

—Jesús raeta, Daxitajivi Pematapijinë, jamatabëjanë.

Bajaraponë penaxatatsijava apiareca. Nacorobëcëtanuca orota pexanaepana. <sup>14</sup> Mataniojai bitso pacuenia baniojai papaëputo. Pitaxutobeje naitayota. Pacuenia isotocotia bacotia itsi, bajara itaxutocotia itsi. <sup>15</sup> Petaxubeje ata nivenivenabeje pacuenia banivenivena broncevënëjava pesetsijava, beoronanitomi. Pecuaicuaijajava najumeta pacuenia banajumeta jonca. <sup>16</sup> Pecujanenia cobenanuca siete patuluputobeje. Pecuibuatsina pitsapa anijabarëneniabeje pexiujaiespada. Pacuenia matacabipijiuameto itsa aitavajënae, xaniavaetsia baitayota, bajarapacuenia itabaranaitayota.

<sup>17</sup> Itsa taniji bajaraponë, betatëpaenë irataeya bocajunuajë bajaraponë pitabarata. Itsiata baitsi jane bajaraponë nejayarena pecujuacobeta. Nejumaitsi:

—Pëtsa necujunavame. Xanë rajane baja daxitacuene pepo tataxuxuabinë. Daxitacuene icatsia tacopiarucaeyaexanaenënexa. <sup>18</sup> Xanë rajane baja pepo tasaëtsaponaponaenë daxitamatacabijavabelianexa. Xanë picani tëpajë. Itsiata baitsi jane icatsia asaënë tatëpaecujinae. Nexata baja asaënë tsaponaponae daxitamatacabijavabelianexa. Dioso netocopata tacapanepaenexa tajajivi peponaeyaniva infiernojavabelia. Netocopatanua tananeconitsiaexanaenexa pijaneconi pexainaevi peponaenexa infiernojavabelia. <sup>19</sup> Xua baja taneme, bajaraxua baja pelivaisi yaquinare. Xuanë ata icatsia aeconoxae taeponaename, bajaraxuanë ata pelivaisi yaquinaename. <sup>20</sup> Xuanë, siete patuluputobeje, tacujanenia cobenaucajë, mapajamatabëcuenelivaisi xainaje. Siete rabaja pijinia patomarabejepijivi Dioso pejumecovënëtsivi penamatacaitorobivi tsavanapae. Xuanë pijinia siete xuabeje orota pexanaejavanë pematatuta naitayotanubena, mapajamatabëcuenelivaisi xainaje. Siete rabaja pijinia patomarabejepijivi Dioso jumecovënëtavanapa, nejai Jesús, ponë taenutajë, siete xuabeje orota pexanaejavanë tuatua-jëta penucaenë.

## 2

*Pacuenia Juan vajatuxanenë Jesús itorobatsi petoyaquinaenexa Efeso tomarata Dioso pejumecovënëtavanapaevi penamatacaitorobinëjavabelia yabara pelivaisi*

<sup>1</sup> Jesús icatsia nejumaitsi:

—Efeso tomarata peecaenë, Dioso pejumecovënëtavanapaevi penamatacaitorobinëjavabelia, toyaquinare. Nexata daxita pijajivi yajava yapëtaena mapalivaisije, nejai Jesús, ponë siete patuluputobeje pecujanenia cobenanuca, siete xuabeje orota pexanaejavanë pematatuta penaitayotanubenaejavanë tuatujëta penucaenë.

Jesús nitoroba Efeso tomarata peecaenë, Dioso pejumecovënëtavanapaevi penamatacaitorobinëjavabelia, tatoyaquinaenexa mapejumaitsilivaisije: <sup>2</sup> “Yapëtaniji daxita xua paexanavanapame. Yapëtanijinua ayaiucenia Dioso panetonacuenebijava. Yapëtanijinua ajamatabëcuenesaëya Dioso panejumecovënëtavanapaejava. Yapëtanijinua panecueneataejitsibijava pibisiacuene pexanaevi. Yapëtanijinua nayajivitaeya panejivananapaejava itsamonae papecayamaxëitojorobianiva. Itsamonae picani papecayamaxëitojorobinexa, pacajumai tsabiabi: ‘Paxanë raja paapóstolevinë,’ pacajai tsabiabi. Itsiata penajumetsënëtsivicuene payapëtaeyabiabame panenayajiviyapëtaexae. <sup>3</sup> Paxamë bajayajebi pacaajamatabëcuenesaëmë tsavanapae Dioso panejumecovënëtavanapaejava, itsamonae pacabejiobiaexanabiabi ata. Ayaicuenia panacuenebame patacaitorobicuene. Apo payabaracueranaemë cajena. Bajarapacuenia panenacuenebavana paexae, pacasivajamatabëbarëyatsi. <sup>4</sup> Itsiata baitsi jane caejavayo yabara pananeconitame xanëjavaberena. Tsipaji aeconoxae apo panejitsipaemë pacuenia picani bajayata copiaya panejitsipame. <sup>5</sup> Panenajamatabënapire icatsia pacuenia bajayata panejitsipame. Panajamatabëcuenepënëyorore xanëjavaberena. Panetonacuenebavanapare icatsia pacuenia bajayata xaniavaetsia panetonacuenebavanapame. Itsa baja apo panejitsipaemë tsane icatsia, nexata baja apo patajajivimë tsane. <sup>6</sup> Itsiata baitsi jane pacasivajamatabëcuenearëyatsi patanejamatabëcuenëjëpaexaemë mapacuene yabaraje. Pacujiruitoyamë nicolaítavi pibisiacuene pexanaponaejava. Bajaraxua pexanaejava xanë ata cujiruitoyanë. <sup>7</sup> Itsa pamuxuvojorubename, panatojumetaema pacuenia Espiritu Santo jumaitsi Dioso pejumecovënëtsivijavabelia. Jumaitsi mapacueniaje: ‘Pajivi Cristo jumecovënëtaponapona ëpetëpaejavabelianexa, bajarapajivi Dioso tocopatsianatsi pejonenexa Dioso pijanacuayabetsia,’ jai Espiritu Santo,” pejailivaisi toyaquinare Efeso tomarata peecaenë, Dioso pejumecovënëtavanapaevi penamatacaitorobinëjavabelia, nejai Jesús, siete xuabeje orota pexanaejavanë tuatujëta penucaenë.

*Pacuenia Juan vajatuxanenë Jesús itorobatsi petoyaquinaenexa Esmirna tomarata Dioso pejumecovënëtavanapaevi penamatacaitorobinëjavabelia yabara pelivaisi*

<sup>8</sup>Jesús icatsia nejumaitsi:

—Esmirna tomarata peecaenë, Dioso pejumecovënëtavanapaevi penamatacaitorobinëjavabelia, toyaquinare daxita pijajivi yajava peyapëtaenexa mapalivaisije, nejai Jesús, ponë dexitacuene pepo petaxuxuabinë, dexitacuene icatsia pecopiarucaeyaexanaenënexa.

Bajaraponë picani tëpa. Itsiata baitsi jane icatsia asaë petëpaecujinae. Nexata baja asaë tsaponaponae daxitamatacabijavabelianexa. Jesús nitoroba Esmirna tomarata peecaenë, Dioso pejumecovënëtavanapaevi penamatacaitorobinëjavabelia, tatoyaquinaenexa mapejumaitsilivaisije: <sup>9</sup> “Yapëtaniji daxita xua paexanavanapame. Yapëtanijinua itsamonae papecabebiobiaexanaponaejava. Yapëtanijinua bepanejio-bivicuene. Itsiata baitsi jane itsamatacabi Diosojavatatsia bitso panexinaevi tsane. Yapëtanijinua pibisiacuenia papecabaracuicuajijajava judíovi, Dioso apo pejumecovënëtsivi. Bajarapamonae cajena saya dovathi pijajivi. <sup>10</sup> Pëtsa pacujunavame itsamonae, pacabejiobiaexanaejitsia ata. Dovathi raja pejamatabëcueneta penaneconitsivi pejebabiabibota, pacananeconitsiaexanejebiana. Bajarapacuenia pacananeconitsiaexanejebiana dovathi papecajamatabëcuenëjëbinexa, papecajamatabëcueneyapëtaenexa xaniajai pepacuene patanejumecovënëtsijavamë. Pacabejiobiaexanaponaena diez pamatacabibeje. Bajarapacuenia pacaexanae ata tsane, itsiata panejumecovënëtsianame matapania panetëpaejavabelianexa. Nexata xanë pacarajutsianatsi matacabi apo peverevereaejava. <sup>11</sup> Itsa pamuxuvojorubename, panatojumetaema pacuenia Espiritu Santo jumaitsi Dioso pejumecovënëtsivijavabelia. Jumaitsi mapacueniaje: ‘Pajivi Cristo

jumecovënëtaaponapona ëpetëpaejavabelianexa, bajarapajivi apo itsacueniabi tsanetsi cotocaevi patëpaejava, 'jai Espiritu Santo,' pejailivaisi toyaquinare Esmirna tomarata peecaenë, Dioso pejumecovëtavanapaevi penamatacaitorobinëjavabelia, nejai Jesús, siete xuabeje orota pexanaejavanë tuatujëta penucaenë.

*Pacuenia Juan vajatuxanenë Jesús itorobatsi petoyaquinaenexa Pérgamo tomarata Dioso pejumecovënëtavanapaevi penamatacaitorobinëjavabelia yabara pelivaisi*

<sup>12</sup> Jesús icatsia nejumaitsi:

—Pérgamo tomarata peecaenë, Dioso pejumecovënëtavanapaevi penamatacaitorobinëjavabelia, toyaquinare daxita pijajivi yajava peyapëtaenexa mapalivaisije, nejai Jesús, ponë pecuibuatsina pitsapa anijabarëneniabeje pexiujaiespada.

Jesús nitoroba Pérgamo tomarata peecaenë, Dioso pejumecovënëtavanapaevi penamatacaitorobinëjavabelia, tatoyaquinaenexa mapejumaitsilivaisije: <sup>13</sup> “Yapëtaniji daxita xua paexanavanapame. Yapëtanijinua dovathi pijajivi tuatujëta panejinavanapaejava. Itsiata baitsi jane pajamatabëcuenesaëmë tsavanapae patanejumecovënëtavanapaejavamë. Bajayata Antipaspijinë tajumelivaisi jivijavabelia tsipaebabiaba. Nexata Antipaspijinë paxamë tuatujëta dovathi pijajivi pebeyaxuabijavatsi, patae atamë, itsiata apo pacopatsimë patanejumecovënëtavanapaejavamë. Bajarapacuenia patanejumecovënëtavanapaexaemë, pacasivajamatabëcuenebarëyatsi. <sup>14</sup> Itsiata baitsi jane itsajamatabëcuenejavaxi yabara pananeconitame xanëjavaberena. Bajarajota Pérgamo tomarata paxamëyajuvënëvi muxubijiapenetaaponaa itsamonae pibisiacuene pexanaenexa. Bajayata Balaampijinëmi jivi peyamaxëitojorobabiabinëmi ponapona. Nexata Israelpijinë pemomoxi penaneconitsinexa Diosojavabelia, Balaampijinëmi itoroba Balacpijinëmi pemuxubijiapenetaaponaa Israelpijinë pemomoxijavabelia. Nexata Balacpijinëmi muxubijiapeneta Israelpijinë pemomoxi penaponaenexa fiestajavabelia. Nexata fiestajavata itsamonae dajubinë itsa beyaxuaba, jumapecataeya pexanaenëanëjavabelia ofrendacuenia perajutsiyajuvënëvi naxane Israelpijinë pemomoxi. Balacpijinëmi muxubijiapenetanua Israelpijinë pemomoxi pibisiacuene pexanaenexa pevitota. Bajara pijinia pacuenia aeconoxae paxamëyajuvënëvi ata exanapona. Pérgamo tomarapijivi pibisiacuene pexanaenexa, muxubijiapenetaaponaa. <sup>15</sup> Itsamonae pijinia paxamëyajuvënëvi nicolaiftavi petsipaebaponaelivaisi jumecovënëtavanapa. Nexata tanejumecovënëtsivi pibisiacuene pexanaenexa, bajarapamonae muxubijiapenetaaponaa. <sup>16</sup> Bajaraxuata paxamë xaniavaetsia panajamatabëcuenepeñëyorore Diosojavabelia. Itsa jume, xanë nexata naxanitsiayo ponaenajë paxamëjavabereca tabarënenexa bajarapamonae tacuibuatsina pepitsapaeespadata. <sup>17</sup> Itsa pamuxuvojorubename, panatolumetaema pacuenia Espiritu Santo jumaitsi Dioso pejumecovënëtsivijavabelia. Jumaitsi mapacueniaje: ‘Pajivi Cristo jumecovënëtaponapona ëpetëpaejavabelianexa, bajarapajivi rajutsianajë pexaenexa manávënëjava, athëbëpijijava, pejamatabëcuene asaëyaexanaejavanexatsi. Rajutsianajënua penioponaeboto. Bajarapaiboto pijumata bajarapajivi vënërutsianajë pejanavënë. Itsajivi ata apo vënëyapëtae tsanetsi. Caejivi, bajarapaiboto pepitsijivi, navënëyapëtaena, 'jai Espiritu Santo,' pejailivaisi toyaquinare Pérgamo tomarata peecaenë, Dioso pejumecovënëtavanapaevi penamatacaitorobinëjavabelia, nejai Jesús, siete xuabeje orota pexanaejavanë tuatujëta penucaenë.

*Pacuenia Juan vajatuxanenë Jesús itorobatsi petoyaquinaenexa Tiatira tomarata Dioso pejumecovënëtavanapaevi penamatacaitorobinëjavabelia yabara pelivaisi*

<sup>18</sup> Jesús icatsia nejumaitsi:

—Tiatira tomarata peecaenë, Dioso pejumecovënëtavanapaevi penamatacaitorobinëjavabelia, toyaquinare pijajivi yajava peyapëtaenexa mapalivaisije, nejai Dioso pexënato, ponë pitaxutobeje naitayota. Pacuenia isotocotia bacotia itsi, bajara pitaxutocotiaitsinë, ponë petaxubejenivenivena ata pacuenia banivenivena broncevënëjava pesetsijava, beoronanitomi.

Jesús nitoroba Tiatira tomarata peecaenë, Dioso pejumecovënëtavanapaevi penamatacaitorobinëjavabelia, tatoyaquinaenexa mapejumaitsilivaisije: <sup>19</sup>“Yapëtaniji daxita xua paexanavanapame. Yapëtanijinua itsamonae ata paneasivatsavanapaejava. Yapëtanijinua patanesivanajamatabëcuene copatavanapaejavamë. Yapëtanijinua panetonacuenebijava Dioso. Yapëtanijinua paneajamatabëcuenesaë tsavanapaejava, itsamonae pacaitsacueniababiabi ata. Yapëtanijinua pacuenia panetonacuenebavanapame pamatacabi ajena panejumecovënëtame. Yapëtanijinua pacuenia jane baja aeconoxae bitsoyo panetonacuenebavanapame. Bajarapacuenia paneexanavanapaexae pacasivajamatabëbarëyatsi. <sup>20</sup> Itsiata baitsi jane itsajamatabëcueneyo yabara pananeconitame xanëjavaberena. Tsiptaji apo pacujiruitavetsimë Jezabelvënëva pibisiacuene pexanaejava. Bajarapova beprofetava, Diosojumelivaisi bepepaebiva, natane. Nexata patajajivimë bajarapova pacayajuvënëyamaxëitojorobapona baja. Bajarapova papecajajuvënëyamaxëitojorobinexa jumai tsabiabi: ‘Pebijivi pijavavecua jaitsi ata itsava, itsiata apo itsacuene. Bajara pijinia itsi petiriavi ata. Itsanë jaitsi ata pamonavecua, itsiata apo itsacuene. Bajara pijinia itsi pevi ata. Dajubinë itsa beyaxuaba ofrendacuena pevi perajutsinexa jumapecataeya pexanaenëanëjavabelia, bajarapavijajuvënëjava xae atatsi, itsiata apo itsacuene,’ jai tsabiabi bajarapova patajajivimë papecajajuvënëyamaxëitojorobinexa. <sup>21</sup> Bajarapova picani pecopatsijava pibisiacuene pexanabiabijavavecua, bajajajebi evetaponaponajë. Itsiata baitsi jane apo jamatabëcopatsi pevitota pibisiacuene pexanabiabijava. Apo najamatabëcuenepënëyorotsi xanëjavaberena. <sup>22</sup> Bajarapova nexata avitaniaexanaenajë camata pebobocaenexa. Nexata pamonaë paxamëyajuvënëvi itsa apo copatsi tsane bajarapova pitorobicueniatsi pexanavanapaejava, pamatabëxëyo pevitota pibisiacuene exana bajarapova pitorobicueniatsi, nexata bajarapamonae ata bitso nabejibitsiaexanaenajë. <sup>23</sup> Bajarapova pexi ata verebiabianajë. Nexata daxita Dioso pejumecovënëtsivi nejamatabëcueneyapëtaena. Nejamatabëcueneyapëtaena daxitajivi bëpënëa pejamatabëëthëtota, penajamatabëxainacuene ata, tayapëtaenëcuene. Pacaejivimë canacujitsia xuavajëto panetonacuenebavanapame, bajara pijinia pitsijavavajëto pacarajutsianatsi. Xuavajëto pijinia panijaneconi paxainame, bajara pijinia paneconivajëtota pacananeconitsiaexanaponaenatsi. <sup>24</sup> Paxamë apo panejumecovënëtsivi, Jezabel pacaitorobi ata pibisiacuene picani paneexanaenexa, mapacuenia pacajumaitssijsje. Paxamë apo pajumecovënëtsimë dovathi pijalivaisi, palivaisi Jezabel jivi tsiptaebapona. Bajarapalivaisita cujarubapona dovathi pijacuene pevajënaeyabelia peyapëtaeyaexanaponaenexa. Bajaraxuata apo pacaitorobitsi panejumecovënëtsinexa pematatsënëa itsalivaisi, piayapëbejelivaisi. <sup>25</sup> Nexata pacaasaëmëre tsavanapae panejumecovënëtsijava Dioso pejumelivaisi matapania ëtapatsimatacabitsica javabelianexa. <sup>26</sup> Itsamonae ëpetëpaejavabelianexa, catsitecavanapaena tanesivanajamatabëcuene copatavanapaejava. Tajitsipaecuene ata netoexanavanapaena. Bajarapamonae itsamatacabi tocopatsianajë pevetsinexa daxitanacuapijivi. <sup>27</sup> Bajarapamonae itsamatacabi daxitanacuapijivi itsa evetsiana, ajumesaëya itorobabiabiana pejumecovënëtsinexatsi. Pacuenia xanë ata taxa netocopata daxitanacuapijivi taevetsinexa, bajara pijinia pacuenia bajarapamonae ata pevetsinexa daxitanacuapijivi, tocopatsianajë. Pacuenia atsananito pefaratsicanalito toxobixuabatsi, hierronaebota itsa conitaxuabatsi, bajara pijinia itsanetsi pamonaë Dioso apo pejumecovënëtsivi. Tajajivi verebiabiana daxita Dioso apo pejumecovënëtsivi. <sup>28</sup> Pamonaë tajajivi, rajutsianajë pexainaenexa papinijicotia xainajë ayaijamatabëcuenevinexa. <sup>29</sup> Itsa pamuxuvojorubename, panatojumetaema pacuenia Espiritu Santo jumaitsi Dioso pejumecovënëtsivijavabelia,” pejailivaisi toyaquinare Tiatira tomarata peecaenë, Dioso pejumecovënëtavanapaevi penamatacaitorobinëjavabelia, nejai Jesús, siete xuabeje orota pexanaejavanë tuatuajëta penucaenë.

## 3

*Pacuenia Juan vajatuxanenë Jesús itorobatsi petoyaquinaenexa Sardis tomarata Dioso pejumecovënëtavanapaevi penamatacaitorobinëjavabelia yabara pelivaisi*

<sup>1</sup>Jesús icatsia nejumaitsi:

—Sardis tomarata peecaenë, Dioso pejumecovënëtavanapaevi penamatacaitorobinëjavabelia, toyaquinare pijajivi yajava peyapëtaenexa mapalivaisije, nejai Jesús, ponë xaina siete paespíritubeje, Dioso pijaespíritu, ponë cobenanuca siete patuluputobeje.

Jesús nitoroba Sardis tomarata peecaenë, Dioso pejumecovënëtavanapaevi penamatacaitorobinëjavabelia, tatoyaquinaenexa mapejumaitsilivaisije: “Yapëtaniji daxita xua paexanavanapame. Yapëtanijinua itsamonae papecasivajamatabëjumai tsabiabijava: ‘Bajarapamonae bitso tonacuenebavanapa Dioso pijacuene,’ papecasivajamatabëjai tsabiabijava. Itsiata baitsi jane xanë yapëtaniji pibisiacuene paneexanaejava. Yapëtanijinua bëpënëa panejamatabëcuenefaefaenaejava patanejumecovënëtsijavamë. <sup>2</sup>Nexata namataenetsia panajamatabëcueneasaëyaexanare. Pajamatabëcueneitsamonae papecasivajamatabëjumai tsabiabijava: ‘Bajarapamonae bitso tonacuenebavanapa Dioso pijacuene,’ papecasivajamatabëjai tsabiabijava. Itsiata baitsi jane xanë yapëtaniji pibisiacuene exanaenamenua itsamonae ata, pamonaë pijinia jamatabëcuenefaefaenapona tanejumecovënëtsijava. Tsipaji baja bajarapamonae imoxo pecopatsi tanejumecovënëtsijavami. Xua paexanavanapame, bajaraxua picani paxamë pacatsitapexaniacuene. Itsiata baitsi jane bajaraxua Dioso apo tsitapexaniacuene. <sup>3</sup>Panajamatabënapire palivaisi baja copiaya itsamonae pacatsipaeba xanë patacapanepaejavanexa yabara. Pacaasaëmëre tsavanapae bajarapalivaisi panejumecovënëtavanapaejava. Pacopabare pibisiacuene paneexanabiabijava. Panajamatabëcuenepënëyorore Diosojavabelia. Namataenetsia itsa apo panajamatabëcueneasaëyaexanaemë tsane patanejumecovënëtsijavamë, nexata jemata patsiarecajë patacananeconitsiaexanaenexa. Apo payapëtaemë tsane paepatota patsijitsianëreca. Tsipaji paepatota apo panejamatabënajinaemë, jemata patsiarecajë. Pacuenia penacobetoxotsinënexa jemata bapata, paepatota apo jamatabënajinaetsi, bajara pijinia xanë ata itsinë tsane. <sup>4</sup>Paxamë Sardis tomarata panejinavanapaevi, itsamonae paxamëyajuvënëvi pibisiacuene apo exanae. Pacuenia itsi pamonaë apo toxuiratsi penaxatabijavanë, bajara pijinia jamatabëcueneitsi tsavanapae bajarapamonae Dioso pitabarata aneconijibia pejinavanapaexae. Itsamatacabi bajarapamonae xanëjavata jinavanapaena. Bajarapamonae itsamatacabi xanëjavata itsa jinavanapaena, pianeconijibixae, naxatabiana penioponaejavanë. <sup>5</sup>Pamonaë nejumecovënëtavanapaena ëpetëpaejavabelianexa, bajarapamonae naxatabiana penioponaejavanë. Bajarapamonae apo vënëiquinaenë tsane pabaxutota vënërubena pamonaë matacabi apo pevereverecaejava pexainaevinexa. Biji rajane pamonaë tajajivi, vënëyapëtaeyaexanaponaenajë taxajavabelia, taxa pijaängelevijavabelia ata. <sup>6</sup>Itsa pamuxuvojorubename, panatojumetaema pacuenia Espiritu Santo jumai Dioso pejumecovënëtsivijavabelia,” pejailivaisi toyaquinare Sardis tomarata peecaenë, Dioso pejumecovënëtavanapaevi penamatacaitorobinëjavabelia, nejai Jesús, siete xuabeje orota pexanaejavanë tuatuajëta penucaenë.

*Pacuenia Juan vajatuxanenë Jesús itorobatsi petoyaquinaenexa Filadelfia tomarata Dioso pejumecovënëtavanapaevi penamatacaitorobinëjavabelia yabara pelivaisi*

<sup>7</sup>Jesús icatsia nejumaitsi:

—Filadelfia tomarata peecaenë, Dioso pejumecovënëtavanapaevi penamatacaitorobinëjavabelia, toyaquinare pijajivi yajava peyapëtaenexa mapalivaisije, nejai Jesús, ponë pianeconijibinë, ponë copiaevetavanapatsi icatsia pepatsijavanexatsica vajanacapanepaenexa.

Pacuenia bajayata Davidpijinë eveta Israelnacua, bajara pijinia pacuenia Jesús evetsiana mapanacuaje. Evetsiana athëbëtatsia ata, Dioso pijanacua. Nexata itsamatacabi Jesús pijajivi itorobiana daxitanacuanëjava jivi petsipaebanajetarubenaenexa Diosojavabelia pecapanepaelivaisinexatsi. Nexata panacuanëjava Jesús pijajivi itorobiana, bajarapanacuanëjava pejinavanapaevi Jesús pijajivi tsipaebanajetarubenaena Diosojavabelia pecapanepaelivaisinexatsi. Nexata itsajivi ata apo caëjëpaetsi tsane

Jesús pijajivi pitavetsinexa petsipaebanajetarubenaeyaniva bajarapanacuanējjava pejinavanapaevi. Panacuanējjava pijinia Jesús pijajivi apo tocopatsi tsane Diosojavabelia jivi pecapanepaelivaisinexatsi petsipaebanajetarubenaenexa, bajarapanacuanējjava pejinavanapaevi Jesús pijajivi apo tsipaebanajetarubena tsane. Nexata itsajivi ata apo caējēpaetsi tsane Jesús pijajivi pitorobinexa petsipaebanajetarubenaenexa bajarapanacuanējjava pejinavanapaevi. Jesús nitoroba Filadelfia tomarata peecaenē, Dioso pejumecovēnētavanapaevi penamatacaitorobinējavabelia, tatoyaquinaenexa mapejumaitsilivaisije: <sup>8</sup> “Yapētaniji daxita xua paexanavanapame. Apo pasaēmē. Itsiata panejumecovēnētavanapame. Apo panayavajunuaxainaemē pafajajivicuenemē. Bajaraxuata pacatocopatatsi talivaisi jivi panetsipaebaponaenexa panevajēnaeyabelia. Nexata itsajivi ata apo caējēpaetsi tsane papecacopatsiaexanaenexa talivaisi jivi panetsipaebaponaejava. <sup>9</sup> Panejumetaema. Itsamonae rabaja judíovi ata, dovathi pijajivi. Tsipaji apo nejumecovēnētsi. Bajarapamonae jamatabēcuenenavēxaniabiaya jumai tsabiabi: ‘Paxanē raja pajudíovinē, Dioso papijajivinē,’ jai tsabiabi. Itsiata baitsi jane Dioso apo pijajivi. Tsipaji apo nejumecovēnētsi. Bajarapamonae itsamatacabi paneitabarata pematabacabēta pacatonubenaeyaexanaenatsi. Nexata bajarapamonae yapētaena paxamē patacaasivacuene. <sup>10</sup> Pacaitorobatsi patanejumecovēnētsijavamē bajayajebi panecasaētsavanapaenexa. Nexata baja bajarapacuenia panejumecovēnētavanapame. Bajaraxuata nexata pamatacabi daxitanacuapijivi piayaicuene taeponaena, paxamē pacaevetsianatsi. Nexata paxamē apo pacaitsacueniabi tsane. <sup>11</sup> Naxanitsiayo rabaja ponaenajē paxamējavabereca. Xaniavaetsia baja pacaasaēmēre tsavanapae patanejumecovēnētavanapaejavamē. Nexata itsajivi ata apo pacavecuapitsi tsane xua taxa Dioso pacarajutsiana athēbētatsia. <sup>12</sup> Pamonaē nejumecovēnētavanapaena ēpetēpaejavabelianexa, bajarapamonae taxa Dioso bepijatemplobonaesiturutonē taenatsi athēbētatsia. Bajarapacuenia taxa Dioso bepijatemplobonaesiturutonē taenatsi bitso pijamatabēcuenesaē tsavanapaexae tsane tanejumecovēnētavanapaejava. Bajarapamonae taxa Dioso athēbētatsia yajavajinavanapaena daxitamatacabijavabelianexa. Nexata taxa Dioso pevēnē yaquinarutsianajē bajarapamonaejavabelia. Yajavayaquinarutsianajē taxa Dioso pijatomara pevēnē. Bajarapatomara, pejana Jerusaléntomara. Bajarapatomara athēbēvetsica patsianica, taxa Diosojavavetsica. Tavēnē ata, pejanavēnē, yaquinarutsianajē bajarapamonaejavabelia. <sup>13</sup> Itsa pamuxuvojorubename, panatojumetaema pacuenia Espíritu Santo jumaitsi Dioso pejumecovēnētsivijavabelia,” pejailivaisi toyaquinare Filadelfia tomarata peecaenē, Dioso pejumecovēnētavanapaevi penamatacaitorobinējavabelia, nejai Jesús, siete xuabeje orota pexanaejavanē tuatujēta penucaenē.

*Pacuenia Juan vajatuxanenē Jesús itorobatsi petoyaquinaenexa Laodicea tomarata Dioso pejumecovēnētavanapaevi penamatacaitorobinējavabelia yabara pelivaisi*

<sup>14</sup> Jesús icatsia nejumaitsi:

—Laodicea tomarata peecaenē, Dioso pejumecovēnētavanapaevi penamatacaitorobinējavabelia, toyaquinare pijajivi yajava peyapētaenexa mapalivaisije, nejai Jesús, ponē copiaevetavanapatsi icatsia pepatsijavanexatsica vajanacacapanepaenexa.

Bajaraponē pexaniajailivaisi jivi tsipaebabiaba. Pexanaenēnua daxitacuene, xua Dioso exana mapanacuataje. Jesús nitoroba Laodicea tomarata peecaenē, Dioso pejumecovēnētavanapaevi penamatacaitorobinējavabelia, tatoyaquinaenexa mapejumaitsilivaisije: <sup>15</sup> “Yapētaniji daxita xua paexanavanapame. Yapētanijinua patanejumecovēnētsivi atamē, panejamatabēcuenevetsina bevelia patanejitsipaejavamē. Yapētanijinua bevelia patanetonacuenebavanapaejavamē. Pacuenia apo tanejumecovēnētsivi jamatabēcuenetsi xanējavaberena, itsiata picani bitso apo pajamatabēcuenetsimē. Pacuenia pijinia xaniavaetsia tanejumecovēnētsivi jamatabēcuenetsi xanējavaberena, itsiata apo pajamatabēcuenetsimē. Pacuenia jamatabēcuenetsi pamonaē

apo tanejumecovënëtsivi, itsa pajamatabëcueneitsimë tsipae, nexata xanepanaejitsipa. Itsa jume, pacuenia jamatabëcueneitsi pamona xaniavaetsia tanejumecovënëtsivi, itsa pajamatabëcueneitsimë tsipae, nexata xanepanaejitsipa. Tsipaji rovia alia panajamatabëcuene yapëtaejitsipame pacuenia pajamatabëcueneitsimë tsavana pae xanëjavaberena. <sup>16</sup> Nexata pacuenia mera perëbënaera apo cainejebi, bitso apo atajunua, bajara pajamatabëcueneitsimë xanëjavaberena. Bajarapitsira apo jitsipaetsi vajaapaenexa. Nexata vajaapaeyaniva, navecuapatajarabatsi penaxuabinexa. Bajara pijinia pacuenia pacanavecuaxuabianatsi. Tsipaji apo jitsipaenë pacuenia bëpënë panejamatabëcuenevetsina pajamatabëcueneitsimë tsavanapae. Baitsi apo jitsipaenë bevelia patanejitsipaejavamë. Bjaraxuata pacanavecuaxuabianatsi. <sup>17</sup> Paxamë pajamatabëjumaitsimë tsabiabi: ‘Xanë baja cajena bitso daxitacuene taxainaenë. Daxita xua nacuenebaponaponajë taxinaejavanexa, netocapitsapapona. Nexata itsacuenejava ata apo namatavenonaenë,’ pajamatabëjamë tsabiabi. Itsiata baitsi jane Diosojavabelia apo panejamatabëcuene xanepanaexae, pepacuene apo pajamatabëcuenebarëyamë tsavana pae. Apo payapëtaemënu bitso bepenejibicuene Dioso pitabarata. Paxamë cajena Dioso pacatane bepeneitaxutotsëcënaevi bitso, bepenejumasajinaevinua. <sup>18</sup> Bjaraxuata pacamuxujibijitsiatsi. Panevecuapire bitso penamatamotsijava paricovinexamë jane baja Diosojavatatsia. Panevecuapirenu peniozonaenaxatatsijava panenaxatatsinexa, panenaperabëcaranatsinexa Dioso pitabarata paneaurajavavecu. Panevecuapirenu paneitaxutotsëcënaevaë panetaenexa jane baja xaniavaetsia. Nexata dovathi pijacuene panayajivitaename papecayamaxëitojorobianiva. <sup>19</sup> Daxita pamona tasivavi, muxujibajë peyapëtaenexa. Naneconitsiaexanjënu pecopatsinexa apo tajitsipaecuene pexanaejava. Nexata asaëyata panejumecovënëre. Pacopabare pibisiacuene paneexanabiabijava. Panajamatabëcuene pëpënëyore Diosojavabelia. <sup>20</sup> Panejumetaema. Itsajivi itsa pata panijabota, nexata itsa pacajunata, patobaupatame pejonenexa. Bajara pijinia pacuenia xanë ata panejamatabëëthëto itsa panetobaupatsianame, pacatsijamatabëjonenatsi. Nexata pacayajavapononaenatsi daxitamatacabijavabelianexa. <sup>21</sup> Xanë baja cajena taxa Dioso taneitorobicuenia jumecovënëtaponaponajë ëtatëpaejavabelianexa. Nexata baja aeconoxae yajavaecajë taxa peecaejavata, pijatronovënëjavata. Pamona pijinia nejumecovënëtavapanena ëpetëpaejavabelianexa, bajarapamona pijinia tocopatsianajë tayajavaecaenexa tronovënëjavata. <sup>22</sup> Itsa pamuxuvojorubename, panatumetaema pacuenia Espíritu Santo jumaitsi Dioso pejumecovënësvijavabelia,” pejailivaisi toyaquinare Laodicea tomarata peecaenë, Dioso pejumecovënëtavapanaevi penamatacaitorobinëjavabelia, nejai Jesús, siete xuabeje orota pexanaejavanë tuatuajëta penucaenë.

## 4

*Pacuenia Juan tane Dioso pijajivi Dioso pijanacuatatsia yabara pelivaisi*

<sup>1</sup> Icatsia taniji baupa penabaupatanucaejava athëbëtatsia. Ponë baja copiaya jumetaniji pecuaicuajijajava betrompetajume, bajaraponë icatsia pecuaicuajijajava jumetaniji. Nejumaitsi mapacueniaje:

—Junaimina xanëjavabetsina. Catsitajëtsianatsi majotatsinaje pacuenia pevajënaeyabelia itsi tsaponaejitsia bajarapanacuatareca, nejai ponë jumetaniji pecuaicuajijajava.

<sup>2</sup> Nexata bajarapaepatota nayapëtaniji athëbëtatsia Espíritu Santo pesaë tayajavapononaejava. Athëbëtatsia taniji tronovënëjava. Bjarapatronota Dioso taeyetajë.

<sup>3</sup> Dioso, ponë eca bajarapatronota, itabaracotiabatsi. Pacuenia cotiaitsi penamatamot-siibotonë, bajara itabaracotiatsi. Pacuenia cotiaitsi jaspevënëiboto, pacuenia cotiaitsi cornalinavënëiboto ata, bajaraitabaracotia itsi. Bjarapatrono matatoyorotsia aravalibo taenutajë. Pacuenia esmeraldavënëiboto cotiaitsi, bajaracotia itsanuca bajara paaravalibo. <sup>4</sup> Bjarapatrono matatoyorotsia taenubajënu veinticuatro patronobeje.

Caetronota canacujitsia ecapona ancianonëanë. Bajarapaancianovi naxatabena penioponaejavanë. Orota pexanaecoronanë mataena. <sup>5</sup> Patronota eca Dioso, bajarapatronojavaverena yamaxë binebinejai. Najumetajunujunua. Siete xuabeje pitayotanubenaejavanë taenubajë bajarapatronoitabarata. Bajarapaitayotanubenaejavanë mapajamatabëcuenelivaisi xainaje. Siete rabaja pijinia patomarabejepijivi, Dioso pejumecovënëtavanapaevi, Espíritu Santo peyavenonabiabijavanexatsi. <sup>6</sup> Bajarapatronoitabarata taeyetajë bemanuamene picani. Itsiata baitsi jane piatajajava. Pacuenia vidriojava nasaba, bajarapitsijava.

Bajarapatronojavata taenubajë cuatro ponëbeje piaitothiavi, ayainëanë. Trono matatoyorotsia nubena. Bajarapamonae pitabarayareca, pejumareca ata, itaxutorubenaonareca. <sup>7</sup> Copiaya ponë, benevëthë petsobianë. Bajaraxuacujinae cotocaevinë, betoro. Bajaraxuacujinae acueyabinë, bejiviitabaranë. Bajaraxuacujinae cuatronë, pacuenia cotsala itsa punanajetaruca baitsi, bajaraitsi. <sup>8</sup> Ponëanë, cuatro ponëbeje piaitothiavi taniji, xainapona seis pacorofetobeje caenë canacujitsia. Bajarapamonae daxitanëanëreca itaxutorubenaonareca. Bëpënëaverena ata bajarapacuenia itaxutorubenaonareca. Matabacijebi, meravijebi ata, apo copatanubena pejumaitsanubenaejava Diosojavabelia.

Bitso nianeconijibinë. Bitso ayaijamatabëcuenenëmë. Nexata cacaëjëpa daxitacuene nexanaenexa. Ajena, mapamatacabitaje, ponaponame. Mapanacuaje nexanaevajënaeya ata, ponaponame. Daxitamatacabijavabelianexa ata ponaponame, jai tsanubena bajarapamonae Diosojavabelia.

<sup>9</sup> Pamona cuatro ponëbeje piaitothiavi, pexaniajamatabëcuenenua rajutabiaba Diosojavabelia. Bajarapamonae pexaniajamatabëcuene itsa rajutabiaba Diosojavabelia, jumai tsabiabi mapacueniaje:

—¡Diosomë, nenivenivenaecotia bitso pinijicuene! ¡Ayaijamatabëcuenenëmë bitso! jai tsabiabi.

Bajarapacuenia jumai tsabiabi tronota pecaenëjavabelia, daxitamatacabijavabelianexa peponaponaenëjavabelia. <sup>10</sup> Pamona cuatro ponëbeje piaitothiavi, bajarapacuenia itsa jumai tsanubena Diosojavabelia, nexata pijinia bajarapaepatota pamona veinticuatro ponëbeje ancianovi pematabacabëta tonubenajunua Dioso pitabarata, daxitamatacabijavabelianexa peponaponaenë pitabarata. Bajarapacuenia tonubenajunua Dioso pitabarata peyayataexae. Bajarapaancianovi Dioso pijatronojavabelia topenelia pijacoronanë. Bajarapaancianovi Diosojavabelia jumai tsanubena:

<sup>11</sup> Patajatuxanenëmë, patajaDiosonëmë. Xanepana itsamonaejavabelia patacavajunupaebaponaejava nenivenivenaecotia pexinaejava. “Diosomë, bitso ayaijamatabëcuenenëmë,” pacajai tsaponaetsinua. Xanepanua patajumaitsaponaejava: “Dioso cajena bitso piasaënë,” patajaitsaponaejava. Tsipaji baja daxitacuene nexanaenë. Nejitsipaecuenia daxitacuene exaname. Mapamatacabijavaberena ata abaxë tsiteca daxitacuene nexanaejava nexanaecujinae. Bajarapacuenia abaxë tsiteca daxitacuene nexanaejava xamë nejamatabëcueneta, jai tsanubena ancianovi Diosojavabelia.

## 5

*Pacuenia Juan athëbëtatsia cobetaeyeta Dioso pequionaecuyalatobaxuto pecobenaecaejava yabara pelivaisi*

<sup>1</sup> Athëbëtatsia taeyetajë Dioso. Tronota eca. Pequionaecuyalatobaxuto cobenaeca pecujanenia. Bajarapacuyalatobaxuto peboxoverena, pejumavelia ata, xaina pitane. Bajarapacuyalatobaxuto siete pasellotabeje upicatsanaruba. <sup>2</sup> Nexata taenutajë bitso piasaéángelnë. Bajarapaángelnë pinijijumeta jumaitsi mapacueniaje:

—ǂipatsa nexata jamatabëcuenecaëjêpatsi Dioso petocopatsinexatsi pesaracaenexa sellovënëjavaxi, bajarapacuyalatobaxuto piupicatsanarubiseloxi? jai.

<sup>3</sup> Itsiata baitsi jane ajibi pejamatabëcuenecaëjêpaejivitsi bajarapacuyalatobaxuto piupicatsanarubiseloxi pesaracaenexa. Athëbëpijivi ata, mapanacuapijivi ataje, petëpaevimi ata, apo jamatabëcuenecaëjêpaetsi cajena. Nexata itsajivi ata Dioso apo tocopatsi pesaracaenexa bajarapacuyalatobaxuto piupicatsanarubiseloxi bëpënëa paitane rubena petaenexa. <sup>4</sup> Nexata xanë bajaraxua itsa taniji, bitso cajena nuajë. Bitso nuajë tsipaji baja ajibi pejamatabëcuenecaëjêpaejivitsi bajarapacuyalatobaxuto pequionaejava pebaxuisinaenexa pelebinexa. <sup>5</sup> Nexata itsanë ancianoviyajuvënëne nejumaitsi:

—Pëtsa baja nuame. Caenë raja jamatabëcuenecaëjêpatsi bajarapacuyalatobaxuto pequionaejava pebaxuisinaenexa. Bajaraponë Judápijinë pemomoxiyajuvënëne. Piasaënë bitso. Nexata bajaraponë yabara itsamonae jumai tsabiabi: “León,” jai tsabiabi. Bajaraponë nacuaevetsinëmi Davidpijinë pemomoxiyajuvënëne. Bajaraponë jamatabëcueneamoneyaba baja dovathi. Nexata bajaraponë jamatabëcuenecaëjêpatsi pesaracaenexa bajarapacuyalatobaxuto piupicatsanarubiseloxi, nejai ancianoviyajuvënëne Jesucristo yabara.

<sup>6</sup> Nexata jane baja taenutajë Corderonë. Nuca veinticuatro ponëbeje ancianovi pitabarata. Nucanua trono pitabarata. Nucanua pamonaе cuatro ponëbeje piaitothiavi pitabarata. Cordero nayapëtane pebeyaxuabinëmitsicuene. Tsipaji cruzajavabelia pecobematabiabarutsivajënëmitsi ruca pecobeta. Corderonë xaina siete pamataetobeje, siete pijinia paitaxutobeje. Xuanë, siete paitaxutobeje, mapajamatabëcuenelivaisi xainaje. Siete rabaja pijinia paespíritubeje, Dioso pijaespírituanë. Bajarapasiete paespíritubeje Dioso baja itoroba daxitanacuanëjava. <sup>7</sup> Nexata jane baja Dioso, ponë eca tronota, ponë pequionaecuyalatobaxuto cobenaeca pecujuanenia. Corderonë cujitabilia. Corderonë jane baja vecuapita bajarapacuyalatobaxuto. <sup>8</sup> Corderonë baja itsa pita bajarapacuyalatobaxuto, nexata pamonaе cuatro ponëbeje piaitothiavi, Corderonë pitabarata pematabacabëta tonubenajunua. Bajara pijinia pacuenia pamonaе veinticuatro ponëbeje ancianovi, Corderonë pitabarata pematabacabëta tonubena-junua. Caeanciano canacujitsia saicaya xainapona pijaarpa. Bajarapaancianovi capona orota pexanaecopanë. Bajarapacopanë vënëca petuxujuvijava. Bajarapatuxujuvijava xaina mapajamatabëcuenelivaisije. Dioso pijajivi pevajëtaonaеjavami Diosojavabelia, Dioso tane bajarabepitsituxujuvijava. <sup>9</sup> Nexata pamonaе cuatro ponëbeje piatothiavi, pamonaе pijinia veinticuatro ponëbeje ancianovi, daxita bajarapamonaе, naxëana Corderojavabelia mapapejanavajije. Penaxëanaеjavata vajita jumaitsi Corderojavabelia mapacueniaje:

Cajamatabëcuenecaëjêpa rabaja Dioso pecatocopatsixae nepitsinexa mapacuyalatobaxutoje. Nexata baja cajamatabëcuenecaëjêpanua bajarapacuyalatobaxuto piupicatsanarubiseloxi ata nesaracaenexa. Bajarapacuenia cajamatabëcuenecaëjêpa baja tsipaji baja cabeyaxuaba pataneneconimatamotsinexamë. Nexata padaxitavirijumevi atanë, padaxitanacuanëpijivi atanënu, nijanata baja panecomutatame Diosonexa. <sup>10</sup> Paneexanamenua baja Dioso papijajivinë itsamatacabi Dioso patanebarëevetsinexa daxitacuene. Paneexanamenua baja pasacerdotevinë jivi patatocuaicuaijaitabiabivinexa Diosojavabelia. Paneexanamenua baja nacuanë pataevetsivinexa,

jai ancianovi Corderonëjavabelia penaxëanaеjavata mapapejanavajije.

<sup>11</sup> Trono matatoyorotsia nubena cuatro ponëbeje piaitothiavi. Nexata piaitothiavi pepënëvelia matatoyorotsia nubena ancianovi. Bajaraxuacujinae jane baja ancianovi matatoyorotsia nubenatsi ángelevi. Angelevi bitso ayaibitsaëto, millones paángelbeje nubena. Nexata bajarapaángelevi pecuaicuaijajjava jumetaniji. <sup>12</sup> Angelevi ayaijumeta jumaitsi mapacueniaje:

Corderonë, ponë picani beyaxuabatsi, bitso ayaijamatabëcuenenë. Bajaraxuata Dioso tocopatsi pevetsinexa daxitacuene mapanacuataje. Tocopatatsinua daxitacuene pexainaenexa. Tocopatatsinua daxitacuene peyapëtaenexa. Tocopatatsinua

pinijisaë pexainaenexa. Tocopatatsinua itsamonae pejumaitsinexatsi: “Xamë bitso ayaijamatabëcuenenëmë,” pejainexatsi. Tocopatatsinua pevajunupaebinexatsi penivenivenaecotia pexainaejava. Tocopatatsinua daxita pamonaë jumecovënëtatsi, pexaniajamatabëcuene perajutsinexatsi bajaraponëjavabelia. Bajarapacuenia tocopatatsi tsipaji ayaijamatabëcuenenë bitso, jai tsanubenae mapacueniaje ángelevi Jesús yabara.

<sup>13</sup> Jumetanijinua icatsia daxita Dioso pexanaevi pecuaicuaijajava. Athëbëpijivi cuaicuaijai. Mapanacuapijivi ata cuaicuaijai. Petëpaevimi ata cuaicuaijai. Manuamenianëpijivi ata cuaicuaijai. Nexata daxita bajarapamonae Diosobeje Jesúsbeje yabara jumaitsi mapacueniaje:

Diosomë, tronota neecaenë. Xamë pijinia Corderonëmë. Paxamëbejejavabelia pexaniajamatabëcuene pacarajutatsi. Paxamëbeje bitso ayaijamatabëcuene panexainaenëbeje. Panenivenivenaecotiabeje paxainamebeje. Nexata panenivenivenaecotiabeje panexainaejavabeje itsamonaejavabelia pacavajunupaebaponatsi. Pinijisaë bitso panexainaenëbeje. Bajarapajamatabëcuene panejamatabëcuenetsitecaenëbeje daxita matabijavabelianexa, jai daxita Dioso pexanaevi Diosobeje Jesúsbeje yabara.

<sup>14</sup> Pamonaë pijinia cuatro ponëbeje piaitothiavi jumaitsi tsaponae mapacueniaje:

—¡Bajara itsi tsane! jai bajarapamonae.

Nexata pamonaë veinticuatro ponëbeje ancianovi, pematabacabëta tonubenajunua Dioso pitabarata. Pexaniajamatabëcuene rajutanubena Diosojavabelia, daxitamatabijavabelianexa peponaponaenëjavabelia.

## 6

### *Siete pasellobeje yabara pelivaisi*

<sup>1</sup> Corderonë taenutajë. Penamataxainaesello sarananuca. Nexata pamonaë cuatro ponëbeje piaitothiaviyajuvënënë, caenë pecuaicuaijajava ayaijumeta, jumetaniji. Pecuaicuaijajava, beyamaxëjume najumeta. Nexata jumetaniji: “¡Naxanitsia!” pejaijava caballojumata peponaenëjavabelia.

<sup>2</sup> Nexata bajaraxuacujinae icatsia taniji perenajava penioponaecaballota peyanajetarucaenë. Caballojumata peecaenë, cobenaeca bitsabi. Rajutatsi corona penamataxatatsinexa. Bajaraxuacujinae pona pijavajabitsaë pebarënabenexa. Nexata pijavajabitsaë cueneamoneyabanajetaruca pepacuenë ëpecopiarucaeya exanaejavabelianexa.

<sup>3</sup> Bajaraxuacujinae icatsia Corderonë sarananuca itsasello, pecotocaevijava. Nexata pamonaë cuatro ponëbeje piaitothiaviyajuvënënë, icatsia itsanë: “¡Naxanitsia!” pejaijava, jumetaniji.

<sup>4</sup> Nexata bajaraxuacujinae icatsia taniji perenajava petsobiacaballota peyanajetarucaenë. Caballojumata peecaenë, piapiaespada rajutatsi. Tocopatatsi pecopiarucaeyaexanaenexa mapanacuata jivi xaniavaetsia pejinavanapaecuenemi. Jivi jane baja namataenetsia nabeyaexanaejitsia daxita nacuanëjava.

<sup>5</sup> Bajaraxuacujinae icatsia Corderonë sarananuca itsasello, acueyabijava. Nexata pamonaë cuatro ponëbeje piaitothiaviyajuvënënë, acueyabinë icatsia: “¡Naxanitsia!” pejaijava, jumetaniji.

Nexata bajaraxuacujinae icatsia taniji perenajava petsaebiacaballota peyanajetarucaenë. Caballojumata peecaenë, cobenaeca pepesabaponaejava. <sup>6</sup> Icatsia jumetaniji pamonaë cuatro ponëbeje piaitothiavijavata pejumaitsijava mapacueniaje: “Janibomatabixae, caedenariota pecomuatsinexa caëjëpa saya caekilo trigoxu. Itsa pijinia cebadaxu, caëjëpa saya acueyabi pakilobeje. Nexata caedenariota pecomuatsinexa aceitera, itsa jume, vinora, apo caëjëpae. Tsipaji bajaraparanë bitso namatamota,” pejaijava, jumetaniji.

<sup>7</sup> Bjaraxuacujinae icatsia Corderonē sarananuca itsasello, cuatrojava. Nexata pamonae cuatro ponēbeje piaitothiavi, pecopiarucaenē jane baja: “¡Naxanitsia!” pejajjava, jumetaniji.

<sup>8</sup> Nexata bjaraxuacujinae icatsia taniji perenajava pevayanaecaballota peyanajetarucaenē. Caballojumata peecaenē, pevēnē Jivi Petēpaeyaexanaponaenē. Itsanē pēnaponatsi. Bjaraponē pijinia ponē pevēnē Infiernonē. Bjaraponēbeje Dioso tocopatsianatsibeje jivi ayaibitsaēto pebeponaenexabeje. Pitsibitsaētovajēto beponaenabeje, bjarapitsibitsaētovajēto matatoxenetsia nacopatsiana mapanacuataje. Daxita mapanacuajavaje bjarapacuenia exanaponaenabeje. Bjaraponēbeje pejamatabēcueneta beyaexanaponaenabeje jivi vajabitsaēcuenia, janibocuenia ata, piavitaneucuenia ata. Unupijinēanē piayainēanē pitsapaena. Nexata bjarapapiayainēanē jivi beponaenatsi. Bjarapacuenia itsi tsane mapanacuataje pamatacabi Dioso jivi nananeconitsiaexanaena pibisiacuene pexanaeneconi yabara.

<sup>9</sup> Bjaraxuacujinae icatsia Corderonē sarananuca itsasello, cincojava. Nexata daxita pamonae bajayata beyejebatsi Dioso pejumelivaisi yabara, taeyejebajē pebobenaajava altarjavabēxēpanata. Bjarapamonae bajayata beyejebatsi apo pecopatsixae Dioso pejumelivaisi jivi petsipaebaponaajava. <sup>10</sup> Daxita pamonae bajayata beyejebatsi, Diosojavabelia pinijijumeta jumai tsanubenaē:

—Diosomē, pepo pexaniajamatābēcuenenēmē. Pacuenia najumecapanepaeya jumaitsimē, bjarapacuenia exanabiabame. ¿Detsa pamatacabibeje abaxē saica nenaneconitsiaexanaenexa mapanacuata pejinavanapaevije, pamonae panebeyejeba? jai tsanubenaē altarjavabēxēpanata pebobenaevi.

<sup>11</sup> Nexata jane baja bjarapamonae Dioso rajutatsi penioponaenaxatabijavanē. Abaxē Dioso itorobatsi bjarapamonae penacueraevetanubenaenexa. Tsipaji abaxē saica itsamonae Dioso pijajivi, Jesucristo ata petonacuenebivi, pebeyejebinxatsi. Bjaraxuata bjarapamonae abaxē nacueraevetsiaexanejebatsi Dioso.

<sup>12</sup> Bjaraxuacujinae icatsia Corderonē sarananuca itsasello, seisjava. Nexata icatsia taniji bitso ira penajēabijava. Matacabipijijuameto bitso itaxutotsaebia. Pacuenia meravi bitso itsa aitaquiri, bitso batsaebia, bajara itaxutoitsi. Meravipijijuameto pijinia bitso itaxutotsobia. Pacuenia pijana batsobia, bajara itaxutoitsi. <sup>13</sup> Nexata tulupu irabetsica othopaica. Pacuenia naejavacuai baothopaica, naejava itsa najēaba pinijjovibota, bjarapacuenia othopaica tulupu. <sup>14</sup> Pacuenia cuyalato baquiona, bjarapacuenia quiona daxita itaboxomi. Ajibi baja nexata itaboxo. Daxita petsutonēmi, petunaetonēmi ata, najēaba. <sup>15</sup> Nexata daxita mapanacuanējavaje jivi pevetsivi, namatayaba ibovajuanējava. Namatayaba ibotoxanetonē tuatujajējava ata. Daxita ayaijamatābēcuenenēanē, bitso riconēanē ata, namatayaba. Vajabitsaē penamatacaitorobinēanē ata, piasaēnēanē ata, namatayaba. Dajubicuenia pecanajetsivitsi ata itsamonaejavabelia amoneya petonacuenebavanapaenexa, namatayaba. Apo pecanajetsivitsi ata itsamonaejavabelia amoneya petonacuenebavanapaenexa, namatayaba. Bjarapacuenia daxita namatayaba. <sup>16</sup> Nexata penamatayabivi jumaitsi ibotsutonējavabelia, ibotoxanetonējavabelia ata:

—Panetsimataothopare. Dioso, ponē eca tronota, bjaraponēvecua panematayatsianame. Pinijicuenia raeta paneneconitsiaexanaena Corderonē. Bjaraxuavecua panematayatsianame, jai picani pamonae penamatayabivi.

<sup>17</sup> Tocopiapatatsi jane baja pinijicuenia Dioso penaneconitsiaexanaematacabitsi. It-sajivi ata cajena apo caējēpaetsi pevecuapanepaenexa Dioso penaneconitsiaexanaecuenetsi.

## 7

*Pacuenia Juan tane athēbētatsia pacuenia itsamatacabi itapaitanerubijitsiatsi Israel nacuapijivi Dioso pijajivixae yabara pelivaisi*

<sup>1</sup> Icatsia taniji cuatro ponēbeje ángelevi. Bajarapaángelevi nacua matatoyorotsia nubena. Caenē canacujitsia ángelevi caranatanubena jovibo. Irajava jovibo peponaeyaniva, caranatanubena. Manuamene atavecua caranatanubena. Caenae ata naejava penajēabiyániva jovibota, caranatanubena ángelevi. <sup>2</sup> Tanijinua icatsia itsaángelnē penajetarucaenē orientejavavetsina. Bajarapaángelnē caponapona piasaēnē Dioso pijasello. Bajarapasellota Dioso pijajivi pitapaitanerubaponaenexa. Bajarapaángelnē vavajai ayajumeta cuatro paángelnēbejevavelia. Pamonaē cuatro ponēbeje, ángelevi, Dioso tocopatatsi pebijianaenexa ira, manuamene ata. Nexata orientejavavetsina paángelnē najetaruca, cuatro paángelnēbejevavelia jumaitsi mapacueniaje:

<sup>3</sup> —Dioso pijajivi yajava peitsacueneyaniva, pētsa abaxē pabijianame ira, naejavanē ata, manuamene ata. Matapania baja Dioso pijajivi Dioso pijasellota vaxaitsi itapaitanerubianatsi, bajara jane pabijianaenexa, jai ángelnē orientejavavetsina penajetarucaenē.

<sup>4</sup> Bajaraxuacujinae jumetaniji jivi ayaibitsaētoxoneto Dioso pijasellota pitapaitanerubijavatsi. Ciento cuarenta y cuatro mil pina pajivibeje itapaitanerubatsi Dioso pijasellota. Pamonaē itapaitanerubatsi Dioso pijasellota, daxita bajarapamonaē Israelpijinēmi pexi doce ponēmibeje pemomoxiyajuvēnēvi. <sup>5</sup> Nexata Dioso pijasellota itapaitanerubatsi doce mil pajivibeje, Judápijinēmi pemomoxiyajuvēnēvi. Doce mil pijinia pajivibeje, Rubénpijinēmi pemomoxiyajuvēnēvi. Doce mil pijinia pajivibeje, Gadpijinēmi pemomoxiyajuvēnēvi. <sup>6</sup> Doce mil pijinia pajivibeje, Aserpijinēmi pemomoxiyajuvēnēvi. Doce mil pijinia pajivibeje, Neftalípijinēmi pemomoxiyajuvēnēvi. Doce mil pijinia pajivibeje, Manasépijinēmi pemomoxiyajuvēnēvi. <sup>7</sup> Doce mil pijinia pajivibeje, Simeónpijinēmi pemomoxiyajuvēnēvi. Doce mil pijinia pajivibeje, Levípijinēmi pemomoxiyajuvēnēvi. Doce mil pijinia pajivibeje, Isacarpijinēmi pemomoxiyajuvēnēvi. <sup>8</sup> Doce mil pijinia pajivibeje, Zabulónpijinēmi pemomoxiyajuvēnēvi. Doce mil pijinia pajivibeje, Josépijinēmi pemomoxiyajuvēnēvi. Doce mil pijinia pajivibeje, Benjamínpijinēmi pemomoxiyajuvēnēvi. Nexata bajarapacuenia caejavata Dioso pijasellota itapaitanerubatsi ciento cuarenta y cuatro mil pajivibeje, Israelpijinēmi pexi doce ponēmibeje pemomoxiyajuvēnēvi.

*Pacuenia Juan athēbētatsia tane jivi ayaibitsaētoxonetonē, penioponaejavanē penaxatabivi, yabara pelivaisi*

<sup>9</sup> Icatsia taniji jivi ayaibitsaētoxonetonē. Bajarapamonaē daxitanacuanēpijiviayajuvēnēvi, daxitaviriajumeviyajuvēnēvi. Bajarapamonaē nubena Dioso peecaetrono pitabarata, Corderonē ata pitabarata. Jivi cajena ayaibitsaētoxonetonē bitso. Itsajivi ata cajena apo caējēpaetsi penamataējētsicapaneapenexa bajarapajivibitsaētoxonetonē. Daxita bajarapamonaē ēpenioponaejavanē penaxatabivi. Cobenanubena benaxarebobaxutonē. <sup>10</sup> Daxita bajarapajivibitsaētoxonetonē vavajai tsanubenaē ayajumeta. Jumaitsi tsanubenaē mapacueniaje:

VajaDioso, ponē Corderonē yajavaeca tronota, bajaraponē nacacapanepa pibisiacuenē vajaexanaeeneconimivecua. Bajarapacuenia nacacapanepa Corderonē pejamatabēcueneta, jai tsanubenaē bajarapajivibitsaētoxonetonē.

<sup>11</sup> Trono matatoyorotsia nubena cuatro ponēbeje piaitothiavi. Nexata piaitothiavi pepēnēvelia matatoyorotsia nubena ancianovi. Bajaraxuacujinae jane baja ancianovi matatoyorotsia nubenatsi ángelevi. Daxita ángelevi ira taenubenaeya bobena irata Dioso peecaetrono pitabarata. Bobenaeya pexaniajamatabēcuenē rajutanubena Diosojavavelia. <sup>12</sup> Bajarapaángelevi ira taenubenaeya jumai tsanubenaē mapacueniaje:

¡Bajara itsi tsane! PatajaDiosomē, pexaniajamatabēcuenē pacarajutabiabianatsi daxitamatabijavabelianexa. Nenivenivenaēcotia nexainaejava, daxitacuenē neyapētaenēcuenē ata, pacavajunupaebaponaenatsi daxitajivijavavelia. Daxitajivi casivajamatabēcuenēbarēya tsabiabi tsane itsa yavenonabiabianame bajarapamonaē. Daxitajivi cayaiyataeyabiabiana. Bitso cajena niasaēnē daxitamatabi-

javabelianexa. Cajamatabëcuenecaëjëpa nexanaenexa daxitacuene ata daxita-matacabijavabelianexa. Bajara itsi tsane, jai tsanubena irataeya daxita bajarapaánglevi Diosojavabelia.

<sup>13</sup> Nexata itsanë ancianonë nejumaitsi:

—¿Detsa mapamonae penioponaejava penaxatabivije? ¿Detsa verena pata bajarapamonae? nejai ancianonë.

<sup>14</sup> Xanë nexata jumaitsinë:

—Xamë raeta jane yapëtaneme, janë ancianonëjavabelia.

Nexata ancianonë nejumaitsi:

—Mara pamonaeye nacua pecopiarucaevajënaeya, piyaijunavixaneto pecanica-banubenaevimije. Corderonë pesivatëpaexaetsi, bajarapamonae pibisiacuene pexanaeconimi vecuaajibiaexanatsi baja. Bajaraxuata penioponaejavanë naxataba. <sup>15</sup> Bajaraxuata baja bajarapamonae nubena Dioso peecaetrono pitabarata. Copatsinejeva Dioso petonacuenebijava, tonacuenebavanapa Dioso pijatemplobota. Dioso, ponë eca tronota, bajaraponë evetsianatsi peyajavajinavanapaexae. <sup>16</sup> Bajarapamonae baja apo namatavenonaë tsane pexaejava. Apo namatavenonaë tsane mera ata. Icotia ata apo tsajavi tsanetsi. Icotia piatajajava ata apo jamatabëitonotsi tsanetsi. <sup>17</sup> Bajara itsane tsipaji Corderonë, ponë nuca trono pitabarata, evetsianatsi bajarapamonae. Evetsianatsi xaniavaetsia. Pacuenia pijaoveja pevetsinë xaniavaetsia baeveta pijaoveja, bajarapacuenia evetsianatsi. Bajaraponë matacaponabiabianatsi itsabelia rubena iravetsina pepit-saparubenaemeranë, jivi piitavayaexanaemeranëjavabelia. Daxita bajarapamonae Dioso pijanacuatatsia jamatabëcuenearëya tsavanapae tsane. Tsipaji ajibi tsane peyabaranuejavanexa, nejai ancianonë mapacueniaje.

## 8

### *Sietejava sello yabara pelivaisi*

<sup>1</sup> Icatsia Corderonë sarananuca cuyalatobaxuto piupicatsatarutsisello, sietejava. Nexata jane baja athëbëtatsia ajumejibi. Bajayaepatovajëto ajumejibi. <sup>2</sup> Bajaraxuacujinae icatsia taniji siete ponëbeje ánglevi. Dioso pitabarata nubena. Nexata bajarapaánglevi rajutatsi siete patrompetabeje. <sup>3</sup> Icatsia xuacujinae itsanë ángelnë najetaruca. Cobenanajetaruca orota pexanaevaxi. Bajarapavaxita pecaponaenexa pitatsajaviitaire. Nexata nucojopa altarvënëjava pitabarata. Nexata jane baja rajutatsi ayajava petuxujuvijava. Nexata bajarapatuxujuvijava Dioso tane daxita Dioso pijajivi pevajëtaeponaejumemi Diosojavabelia bepematajërëabijava. Nexata bajarapatuxujuvijava ángelnë buta altarjumata. Bajarapaaltar, orota pexanaealtar, nuca Dioso peecaetrono pitabarata. <sup>4</sup> Nexata jane baja bajarapatuxujuvijavami ángelnë tajuita. Nexata petsëxë athëbëabetsia junaya. Patsëxë athëbëabetsia junaya altarjavavetsia, ángelenë pecobejavavetsia junaya Diosojavabetsia. Bajarapatsëxë yajavajunaya Dioso pijajivi pevajëtaeponaejumemi Diosojavabelia. <sup>5</sup> Bajaraxuacujinae ángelnë altarjumavecua nota pitatsajaviitaire. Bajarapaitatsajaviitaire vënëta pijavaxi. Bajaraxuacujinae ángelnë bajarapaitatsajaviitaire bajarapavaxi ënëtuatuajëvecua othotajarabareca irabereca. Nexata yamaxë iratareca najumeta. Yamaxë binebinejai iratareca. Iranë jane baja ayaicuenia najëaba.

### *Siete patrompetabeje yabara pelivaisi*

<sup>6</sup> Siete paánglebeje canaveretanubena pijatrompetanë piobinexa.

<sup>7</sup> Nexata jane baja penamataxainaeángelnë oba pijatrompeta. Nexata bitso pecainejebimatarejetonë othopareca irabereca. Bajara pacainejebimatarejetonë matajërëaba isoto. Matajërëabanua pijana yajava. Nexata jane baja ira tajuepona daxita nacuanëjava. Panacuanëjava ira tajuepona, páravajëto tajuepona matatoxenetsia itsiata yajuvënënacopatapona. Daxitaira apo veriajavapona. Nexata panacuanëjava ira tajuepona, daxitanaejavanëmi, pejuvijavanëmi ata, yajavatajuepona.

<sup>8</sup> Bjaraxuacujinae icatsia pecotocaeviángelnë oba pijatrompeta. Taniji bepinijitsutoxaneto petajueyecajava. Bjaraxua jopareca manuameniareca. Manuamenemí nexata pijana. Pamenevajëto ëpijanamene tsarucae, bjarapamenevajëto matatoxenetsia itsiata pijananejeva yajuvënënacopata. <sup>9</sup> Pamanuamene ëpijanamene tsarucae, bajara pamanuamenepijidujuai tëpa baja. Pamanuamene pijinia pijananejeva nacopata, bajara pamanuamenepijidujuai apo tëpae. Pamanuamene ëpijanamene tsarucae, bjarapamanuameneta perubenaebarcocoxanetonëmi ata napeneta. Pamanuamene pijinia pijananejeva nacopata, bjarapamanuameneta perubenaebarcocoxanetonë apo napenetsi.

<sup>10</sup> Bjaraxuacujinae icatsia acueyabiángelnë oba pijatrompeta. Nexata pinijituluputoxaneto jopareca irabereca. Bjarapatuluputoxaneto tajuerucaponareca. Pacuenia bepinijiisotocotiaxaneto bacotia itsi, bjaracotia itsi tsarunaereca. Panacuata jopa bjarapatuluputo, bjarapanacuata daxita perubenaemenianëmi, bijiana baja. Iravetsina mera pepitsaparubenaejavanëmi ata, bijiana baja. Nexata baja abeje daxita bjarapameranëmi. Panacuata apo jopae bjarapatuluputo, bjarapanacuata perubenaemenianë, apo bijiana. Nexata xanepana daxita bjarapameranë. Mera iravetsina pepitsaparubenaejavanëjava ata, xanepanarubena. <sup>11</sup> Bjarapatuluputo pevënë Ajenjo. Pamerajavareca jopareca bjarapatuluputo, bjarapamera atsaxa baja. Jivi ayaibitsaëtoxanetonë tëpa penatsiapaexae bjarapamera.

<sup>12</sup> Bjaraxuacujinae icatsia cuatroángelnë oba pijatrompeta. Nexata jane baja itaxutobijiana matcabipijijuameto. Itaxutobijiana meravipijijuameto ata. Itaxutobijiana tuluputonë ata. Nexata matcabipijijuameto bijiaya naitayota. Meravipijijuameto ata bijiaya naitayota.

<sup>13</sup> Bjaraxuacujinae icatsia taniji itsanë ángelnë pepunanajetarucaenë. Pepunanajetarucaenë ángelnë jumai tsanajetarucaae ayaijumeta:

—¡Toabejetsi baja tsaponae tsane mapanacuapijivije itsa obiana trompeta acueyabi paángelnëbeje penacopabivi! jai tsanajetarucaae ángelnë pepunanajetarucaenë.

## 9

<sup>1</sup> Bjaraxuacujinae icatsia cincoángelnë oba pijatrompeta. Nexata taniji athëbëvereca ángelnë perunaejavareca irabereca. Nexata bjarapaángelnë Dioso rajutatsi llave, iravetsina pepitsapaemëthëxaneto pijallave. <sup>2</sup> Nexata jane baja bjarapallaveta ángelnë mëthëxaneto vëpacasarana. Ángelnë jane baja vëpata mëthëxaneto. Nexata bjarapamëthëxanetojavatsina pitsapaina ëtsëxëxaneto. Pitsitsëxëxaneto bapitsapa pinijipabixaneto itsa tajuita, bjarapitsitsëxëxaneto pitsapaina bjarapamëthëxanetojavatsina. Nexata bjarapatsëxëta matcabipijijuametomi itaxutoaitaquiriayaexana. Itaboxo ata aitaquiriayaexana. <sup>3</sup> Bjarapatsëxëjavaverena pitsapa bosesë. Bjarapabosesë daxitanacuanëjava punanajetarubena. Bjarapabosesë caëjëpaeyaexanatsi jivi pecacuatsinexa pebosotota. Pacuenia aqueto cacuata pebosotota, bjarapacuenia jivi pecacuataponaenexa. <sup>4</sup> Bjarapabosesë apo itorobitsi pebijianaenexa itsacuenejava ata xua pejuvija. Nexata bjarapabosesë apo bijianaponae pona. Apo bijianaponae naejavanë ata. Tsipaji itorobatsi pecacuatsinexa saya ëjivi. Nexata pamona Dioso pijasellota apo itapaitanerutsitsi, bjarapamonae pecacuatsinexa. <sup>5</sup> Itsiata baitsi jane apo tocopatsitsi caecuenia pebeyaxuabaponaenexa. Tocopatatsi saya jivi itsa cacuata, penavixaetaeyaexanaenexa cinco pajuametobeje. Nexata bjarapabosesë jivi itsa cacuatsianatsi, bitso jivi navixaetaena. Pavixaevajëto aqueto itsa cacuata, baatane, bjarapavixaevajëto jivi navixaetaena. <sup>6</sup> Nexata pamona cacuatsianatsi bjarapabosesë, jitsipaena picani petëpaenexa bajayajebi penavixaetaeyaniva. Itsiata baitsi jane bjarapamonae Dioso abaxë apo tocopatsi tsane petëpaenexa. Penabeyaxuabinexa ata, Dioso apo tocopatsi tsane.

<sup>7</sup> Bjarapabosesë ajumabocotaja. Pacuenia vajabitsaë itsa nabejitsia, pijacaballo bajumaxataba hierropananë pijavajabitsaë petojorojoronaeyanivatsi, bajara itsanubena bjarapabosesë. Beorota pexanaecoronanë namataxatabanubena. Pacuenia pebi

itabaraitsi, bajaraitabaraitsi. <sup>8</sup> Pematana xaina. Pacuenia petiriva matanaitsi, bajara matanaitsi. Pevonotonë pijinia benevëthëvonotonë. <sup>9</sup> Bajarapamonae pejumabocotonë yajavanaexana baja cajena behierrojumabocotonë pejorojoronaeyanivatsi itsajivi ata. Pecorofe najumeta. Pacuenia vajabitsaë penabenexa itsa pona pijavajabitsaëjavabelia, caballo itsa roboboca carrozavënëmonë banajumeta, bajarapacuenia najumeta bosese pecorofe. <sup>10</sup> Bajarapabosese pebosotonëcopiata xaina peetonë jivi pecacuatsinexa. Pacuenia aqueto pebosotocopiata xaina peeto, bajnia benevëthëvonotara itsi. Tocopatatsi peetota pecacuatsinexa jivi, jivi penavixaetaenexa cinco pajuametobeje. <sup>11</sup> Bosese cajena xaina ángelnë pitorobinënexatsi, pinijimëthëxaneto pevetsinë. Bajarapaángelnë hebreojumeta pevënë Abadón. Griegojumeta pijinia Apolión, “Peverebiabinë,” peajijume.

<sup>12</sup> Bajarapapiayaicuene penamataxainaejava. Itsiata baitsi jane abaxë saica anijajavabeje.

<sup>13</sup> Bajaraxuacujinae icatsia seisángelnë oba pijatrompeta. Paaltar nuca Dioso pitabarata, bajarapaaltarjavaverena penajumetsijava, ayaijume, jumetaniji. Bajarapaaltar orota pexanaealtar. Bajarapaaltar cuatro pamataetobeje xaina. Caeupi canacujitsia mataerucapona. Bajarapamataetonë tuatuajëta jumepitsapa. <sup>14</sup> Bajarapaaltarjavaverena jumaitsi seisángelnë trompeta pexainaeñjavabelia mapacueniaje:

—Isicare cuatro ponëbeje ángelevi, pamonaë cëbejebatsi pinijimenejavata, Eufratesvënë menejavata, jai bajarapaaltarjavaverena.

<sup>15</sup> Nexata jane baja pecëbejebiánglelevimitsi isicatsi. Isicatsi bajarapaánglelevi pebenexa jivi. Bajarapaánglelevi jivi ayaibitsaëtonë beponaejitsia daxitanacuanëjava. Bajara saya cajena ëxuanexa, paánglelevi Dioso jamatabëcueta pexainaeñjavabelia mapacueniaje:

—Isicare cuatro ponëbeje ángelevi, pamonaë eneevetanubena Dioso pitorobinexatsi jivi pebeponaenexa paepatota tocaëjëtatsi. <sup>16</sup> Nexata icatsia jumetaniji bajarapaánglelevi pijajivi, vajabitsaëvi, pitorobijava peponaenexa caballota. Doscientos millones ponëbeje vajabitsaëvi pona jivi pebeponaenexa daxitanacuanëjava.

<sup>17</sup> Bemajitsinaebota taniji bajarapamonae caballota peponaejava. Vajabitsaëvi namëpabëxataba hierropananë pejorojoronaeyanivatsi pijavajabitsaë. Vajabitsaëvi penamëpabëxatabijavanë itabëta acueyabi paviriabejejavata. Itabëta mapaviriabejejavataje. Itabëta petsobiajavata. Itabëta perajenaëjavata. Itabëta pevayanaëjavata. Bajarapaviriabejejavata itabëta. Pacuenia nevëthëmatabocoto itsi, bajaramataboco itsi bajarapacaballuanë. Pecuibovojotonëjavavetsina pitsapa pitarunutsicotia, ëtsëxë yajava, azufre ata yajava. <sup>18</sup> Xuanë caballuanë pecuibovojotonëjavavetsina pitsapa, bajaraxuanë jivi ayaibitsaëtoxanetonë yatëpaponaxitanacuanëjava. Pabitsaëtovajëto tëpa, bajarapabitsaëtovajëto matatoxenetsia nacopata mapanacuataje. <sup>19</sup> Bajarapacaballuanë caëjëpatsi jivi pebeponaenexa pecuibovojotonëta, pebosotonëta ata. Bajarapacaballuanë pebosotonëupianë bejomomatabocotonë. Pacuenia jomo pematabocotota caëjëpatsi jivi pesininexa pebeyaxuabinexa, bajara itsi bajarapacaballuanë pebosotonëupianë.

<sup>20</sup> Itsiata baitsi jane pamonaë peyajuvënëtëpaevi, pamonaë penacopabivi, bajarapamonae tsiteca pibisiacuene exanavanapa. Apo copatsi dovathivijavabelia penavajëcabiabijava. Apo copatsinua pecobeta jumapecataeya pexanaenëanëjavabelia ata penavajëcabiabijava. Bajaraxuanë saya pexanaenëanë oronanitonëta, platananitonëta ata, broncejavanëta ata, ibotonëta ata, naëjavanëta ata. Nexata bajaraxuanë apo caëjëpaetsi petaenexa. Apo caëjëpaetsi pejumetaenexa ata. Apo caëjëpaetsi peponaenexa ata.

<sup>21</sup> Pamonaë peyajuvënëtëpaevi, pamonaë penacopabivi, bajarapamonae apo copatsi jivi pebejava. Apo copatsi penajorobijava ata. Apo copatsi pevitota pibisiacuene pexanaëjava ata. Apo copatsi penacobetoxotsijava ata.

<sup>1</sup> Icatsia taniji itsaángelnë athëbëvetsica perunaejavatsica. Runaica mapanacuaya-betsicaje. Bajarapaángelnë bitso piasaéángelnë. Itarërëbo tuatuajëta najetaruca. NatsimatatsënërutanaJETARUCA aravalibo. Itabaranaitayotanajetaruca. Pacuenia mat-acabipijiuameto baitayota, bajarapacuenia itabaranaitayotanajetaruca. Petopabeje pijinia pacuenia isotocotia tsobia, bajarapacuenia cotiatsobia. <sup>2</sup> Cuyalatobaxutoyo baxupatanuca. Pecujanenia pataxu nataxunutanuca manuameneboxovereca. Petsavenone-nia pijinia pataxu nataxunutanuca irajumavereca. <sup>3</sup> Nexata vavajai tsaxuabi ayaijumeta. Pacuenia nevëthë itsa fiaba ayaijume, bajarapacuenia ayaijume. Pevavajaicujinae siete payamaxëbeje najumeta athëbëtatsia. <sup>4</sup> Yamaxë penajumetsicujinae, yaquinaejitsianë picani pajamatabëcuene yabara yamaxë penajumetsijava neyapëtaeyaexana. Itacarajeta athëbëvetsica tanejumaitsijava, jumetaniji. Nejumaitsi athëbëvetsica mapacueniaje:

—Muetsia saya xainare pajamatabëcuene yabara yamaxë penajumetsijava, cayapëtaeyaexana. Pëtsa yaquiname bajarapalivaisi, nejai athëbëvetsica.

<sup>5</sup> Bajaraxuacujinae ángelnë, ponë nataxunutanuca manuameneboxovereca, irajumavereca ata, bajaraponë nacobeyotanuca athëbëabetsia pecujanenia pacobe.

<sup>6</sup> Bajarapaángelnë nacobeyotsiaya jumai tsanuca:

—Dioso, daxitamatacabijavabelianexa peponaponaenë, caecuenia exana mapanacuaje, itaboxo yajava. Nexata caecuenia yajavaexana mapanacuapijicueneje, itaboxopijicuene ata yajava. Caecuenia yajavaexana manuamene ata, manuamenepijicuene ata yajava. Bajaraponë pitabarata najumecapanepaeya cajumaitsijitsiatsi mapacueniaje. Copiapatsijitsia rabaja pacuenia Dioso tajëvelia najamatabëxaina pexanaenexa. <sup>7</sup> Itsa rabaja paepatota siete ángelnë obiana pijatrompeta, bajarapaepatota Dioso jane baja taxuxuabiana pexanaejava pacuenia baja cajena tajëvelia Dioso najamatabëxaina pexanaponaenexa jivijavabelia. Muetsia pexainabuatsilivaisimi itajëtsiana. Copiapatsiana jane baja pacuenia bajayata Dioso tajëvelia najumecapanepaeya jumai profetavimijavabelia, jai tsanuca nacobeyotsiaya ángelnë.

<sup>8</sup> Copiaya pajume jumetaniji athëbëvetsica tanejumaitsijava, bajarapajume icatsia jumetaniji. Nejumaitsi icatsia athëbëvetsica mapacueniaje:

—Ponë ángelnë nataxunutanuca manuameneboxovereca, irajumavereca ata, bajarapaángelnë cujiremelia. Vecuapire pacuyalatobaxutoyo bajarapaángelnë baxupatanuca, nejai athëbëvetsica.

<sup>9</sup> Nexata cujiliajé ángelnë. Vajëtajé nexata tanerajutsinexa bajarapacuyalatobaxutoyo. Bajarapaángelnë nejumaitsi mapacueniaje:

—Ájã, pire baja. Xaema necuiboxaicaenexa. Pacuenia jabëra xaica, bajara itsi mapacuyalatobaxutoyoje. Itsiata baitsi jane necotsorotubereca atsaxa tsane, nejai ángelnë.

<sup>10</sup> Nexata baja ángelnë bajarapacuyalatobaxutoyo vecuapitajé. Xaniji jane baja. Nexata jane baja cuiboxaicajé. Pacuenia jabëra xaica, bajara itsi. Itsiata baitsi jane taquijonicujinae tacotsorotubereca atsaxa. <sup>11</sup> Nexata icatsia ángelnë nejumaitsi:

—Tsipaebare pacuenia Dioso sivanajamatabëxaina daxitanacuanëpijivi. Tsipaebare pacuenia Dioso sivanajamatabëxaina daxitavirijumevi ata. Tsipaebare pacuenia Dioso sivanajamatabëxaina caenacua canacujitsia pevetsinëanë ata, nejai ángelnë.

## 11

*Pacuenia itsamatacabi anijanëbeje jivi tsipaebaponaenabeje palivaisi Dioso yapëtaeyaexanaenatsibeje yabara pelivaisi*

<sup>1</sup> Icatsia taniji ángelnë. Nerajuta piapianaebo. Nejumaitsi mapacueniaje:

—Nonotapunare. Caponare mapanaeboje necaëjëbinexa Dioso pijatemplobo, necaëjëbinexa altarvënëjjava ata. Namatajëjtsianamenua pajivibeje bajarapatemplobota navajëca Diosojavabelia. <sup>2</sup> Itsiata pëtsa caëjëtame templobopanabo. Tsipaji bajarapanabo tocopata baja Dioso apo pejumecovënëtsivinexa, pamona

saicayanacuaverena pepatsivi pejinavanapaenexa. Bajarapamonae jinavanapaena Jerusalén tomarata cuarenta y dos pajuametobeje. Saicayanacuaverena pepatsivi, apo yayatae tsane judíovi pijatomara. <sup>3-4</sup> Bajayata profetanëmi peyaquinaebaxutota, comparacióncuenia tajëvelia jumaitsi mapacueniaje: “Anijanaebeje, olivonaebeje, anijavabeje pijinia pitayotanucaejavabeje, nubenaena mapanacuapijivi pijatuxanenë Dioso pitabarata,” jai. Bjarapacuenia comparacióncuenia tajëvelia itsa jumaitsi, tajëvelia vajunupaeba anijanëbeje jivi petsipaebanajetarucaejavanexabeje palivaisi Dioso yapëtaeyaexanaenatsibeje. Nexata anijanëbeje Dioso itorobiana jivi petsipaebanajetarucaenexabeje palivaisi Dioso yapëtaeyaexanaenatsibeje. Palivaisi bajaraponëbeje Dioso yapëtaeyaexanaenatsibeje, bajarapalivaisi mil doscientos sesenta pamatacabibeje jivi tsipaebanajetarucaenabeje. Naxatatsianabeje piayopapaëbërëjava. Bjarapacuenia naxatatsianabeje bitso pesivajamatabëcuenebëjaixabeje tsane pamonaepo peyayataevi Jerusaléntomara, nejai ángelnë.

<sup>5</sup> Itsajivi itsa jamatabëitsacueniabianatsibeje, bajaraponëbeje nayajivitajuitsianabeje pecuibovojotovetsina pepitsapaecotiata, pitarunutsicotiata. <sup>6</sup> Bjaraponebanajetarucaenabeje. Naxatatsianabeje piayopapaëbërëjava. Bajëbeje caëjëpaenatsibeje pitavetsinexabeje ema pejopaeyaniva. Pamatacabibeje jivi tsipaebanajetarucaenabeje palivaisi Dioso yapëtaeyaexanaenatsibeje, bajarapamatacabibeje abaxë ema apo jopaeyaexanaebeje tsane. Caëjëpaenatsibejenua mera ata pijanara pexanaenexabeje. Caëjëpaenatsibejenua daxitaviria piayaicuepecapitsapaenexabeje pamatacabita jitsipaenabeje. <sup>7</sup> Bjaraponebeje itsa veretsianabeje palivaisi Dioso yapëtaeyaexanaenatsibeje jivi petsipaebanajetarucaejavabeje, bitso piayainë pitsapaenina pinijimëthëxanetojavatsina. Bitso piayainë pitsapaenina pebenexatsibeje bajaraponëbeje. Nexata amoneyabianatsibeje. Nexata baja beyaxuabianatsibeje. <sup>8</sup> Nexata petëpaenëbeje bocaenabeje Jerusalén tomaraxaneto callejavata. Bjarapatomarata bajayatami vajatuxanenë ata cobematabiabarutatsi cruzajavabelia. Bjarapatomara yabara jivi itsajavata: “Sodomatomara raja,” jai tsabiabi. Itsajavata: “Egiptotomara raja,” jai tsabiabi. Bjarapacuenia jumai tsabiabi Jerusaléntomara yabara tsipaji bajarapatomarapijivi bitso pibisiacuepe exana. <sup>9</sup> Nexata bajaraponëbeje, Jerusaléntomara callejavata petëpaenëbeje, bocaenabeje acueyabi pamatacabibeje epatua. Tsipaji Jerusaléntomara pevetsivi apo tocopatsi tsane itsajivi ata pemëthëtsinexatsibeje bajaraponëbeje. Nexata daxitavirijumevi, daxitanacuanëpijivi ata, taeyabuatsianatsibeje. <sup>10</sup> Dioso apo pejumecovënëtsivi sivajamatabëcuenëbarëyatsibeje tsane petëpanucaejavabeje. Bitso cajena barëya tsane Dioso apo pejumecovënëtsivi. Nexata pebarëyajamatabëcuene fiesta exanaena. Namataenetsia narajutsiana amoneya itsacuenëjavanë. Bjarapacuenia exanaena Dioso apo pejumecovënëtsivi bajaraponëbeje petëpaejavabeje yabara. Tsipaji Dioso apo pejumecovënëtsivi jumaitsi tsane: “Copiaruca rabaja maponëbeje livaisi vajanacatsipaebabiabijavaje. Copiaruca baja vajanacajamatabëitonotabiabijava,” jai tsane. <sup>11</sup> Itsiata baintsi jane petëpaecujinaebeje, acueyabi pamatacabibejecujinae itsamatacabi epatua, icatsia Dioso piasaëjumali rajutsianatsibeje. Nexata petëpaejavabejevecua namatacotsianabeje. Daxita cajena pamonaepo taeyabuatsianatsibeje petëpanucaejavabeje, bitso cujunavianatsibeje. <sup>12</sup> Bjaraxuacujinae bajaraponëbeje jumetaenabeje athëbëvetsica pinijijumeta pejumaitsijavatsibeje: “Pajunaiminabeje,” pejaijavatsibeje. Nexata bajaraponëbeje junaeniabeje athëbëabetsia itarërëbo tuatuajëjavabetsia. Daxita pitoyavitsibeje pëtaenubenaenatsibeje. <sup>13</sup> Bajara jane paepatota ira najëabiana. Nexata Jerusalén tomarata, itsajota diez pabobeje najuaenaena, caebo yajuvënëjopaponaena. Nueve nexata pabobeje nacopataponaena. Nexata Jerusalén tomarata ayajava bo othopaena. Siete mil pijinia pajivibeje bajarapairanajëabita tëpaena. Jerusalén tomarapijivi, pamonaepo nacopabiana, bitso cajena junaviana. Nexata bajarapamonae pecajunavi, Diosojavabelia jumaitsi tsane:

—Diosomë, ayajamatabëcuenenëmë bitso, jai tsane pecajunavi Diosojavabelia,

athëbëtatsia peecaenëjavabelia.

<sup>14</sup> Anijapiayaicuenebeje rabaja panepaena. Itsiata baitsi jane icatsia itsajava pi-ayaicuenejava bepimia najetarucaena, acueyabijava.

*Sietenë baja ángelnë pijatrompeta piobijava yabara pelivaisi*

<sup>15</sup> Sietenë jane baja ángelnë oba pijatrompeta. Nexata athëbëvetsica pinijijumeta pejumaitisijava, jumetaniji. Jumaitsi mapacueniaje:

Daxitanacuanëpijivi rajane baja vajatuxanenë Cristobeje, Diosobeje, evetaponaponaenabeje. Bajaraponëbeje evetaponaponaenabeje daxitamatacabijavabelianexa, pejajijava athëbëvetsica, jumetaniji.

<sup>16</sup> Nexata pamona veinticuatro ponëbeje ancianovi, pamona ena pijatronota Dioso pitabarata, daxita bajarapamona irataeya bobena. <sup>17</sup> Bajarapamona ancianovi irataeya jumai tsanubenae Diosojavabelia:

Xamë Diosonëmë, nijamatabëcuenaenë daxita mapanacuanë pevetsivivecuaje. Ajena, pamatacabi, ponaponame. Bajayata mapanacuaje nexanaevajënaeya ata, ponaponame. Daxitamatacabijavabelianexa ata ponaponame. Pexani-ajamatabëcuene pacarajutatsi. Tsipaji baja taxuxuabame pinijisaëta nevetaponaponaenexa daxita mapanacuanëpijivije. <sup>18</sup> Daxita mapanacuanëpijivije cabaraanaepana bitso. Bajaraxuata tocopiapatatsi baja nenaneconitsiaexanaenexa daxita bajarapamona. Tocopiapatatsinua baja petëpaevimi ata nenaneconitsiaexanaenexa. Tocopiapatatsinua baja nijajivi, xuavajëto catonacuenebavanapa, bajarapitsijavavajëto nerajutsinexa pecatonacuenebavanapaematamo. Pamona catotsipaebavanapa nijumelivaisi itsamonaejavabelia, bajarapamona jane baja rajutsianame xua toxainame bajarapamona nerajutsinexa. Pamona ayaijamatabëcuene pexainaevi ata, cavënëlivaisiyaiyatane. Pamona beveliamatabëcuene pexainaevi ata, cavënëlivaisiyaiyatane. Bajarapamona ata jane baja rajutsianame xua toxainame bajarapamona nerajutsinexa. Tocopiapatatsinua baja pijinia neverebiabinexa daxita pamona bijiana mapanacuaje, pamona ata jamatabëcuenebijiana pecajumecovënëtsivi, jai tsanubenae irataeya ancianovi Diosojavabelia.

<sup>19</sup> Nexata athëbëtatsia Dioso pijatemplobo nabaupata. Bajarapatemplobo ënëtatsia taeyabuatsiajë baula. Bajarapabaulaënëta jeba Dioso pejumelivaisi peyaquinajebijava. Bajarapaitane jumai tsarubenae pacuenia Dioso najumecapanepaeya jumaitsi pijajivi pecapanepaenexa pijaneconivecu. Yamaxë binebinejai. Najumetanua. Ira najëabanua. Bitso pecainejebimatarejetonë irabetsica othopaica pinijicuenia.

## 12

*Pacuenia Juan athëbëtatsia tane dragón bitso pianaepanaejava yabara pelivaisi*

<sup>1</sup> Athëbëtatsia ayaicuene naitajëta vajanacayapëtaeyaexanaenexa pacuenia itsamatacabi pevajënaeyabelia itsi tsaponaejitsia mapanacuataje. Athëbëtatsia petiriva taenutajë. Petiriva jumanava naitayotanuca. Pacuenia matacabipijijuameto baitayota, bajarapacuenia jumanava naitayotanuca. Meravipijijuametojavavelia nataxunutanuca. Namataxatatanuca doce patuluputobeje pexinaecorona. <sup>2</sup> Bajarapova petiriva penacueto peyacotajinaeva. Pevixaenotsijavatatsi bitso yaaëajai. <sup>3</sup> Nexata bajarajotatsia naitajëta piayainë, petsobianë, pinijinëxaneto dragón, baitsi dovathi. Xaina siete pamatabocotobeje, diez pamataetobeje. Caematabocoto canacujitsia namataxatatapona corona. <sup>4</sup> Bajaraponë, dragón, nabosovebabia. Nexata penabosovebabejavata tulupu ayajijava penetsica irabetsica. Xuavajëto tulupu othopaica irabetsica, bajaraxuavajëto matatoxenetsia nacopabarubenaya athëbëtatsia. Bajaraponë, dragón, nucojopa penacueto pevixaenotsivatsi pitabarata, bajarapova itsa vecuanaexanatsi penacueto, pecoxiaenexatsi picani. <sup>5</sup> Nexata jane baja petiriva vecuanaexanatsi pebinëyo. Bajaraponëyo caponatsi Diosojavabetsia Dioso pijatronota peecaenexa. Nexata baja

bajaraponëyo apo xaetsi dragón. Bajaraponë itsamatacabi mapanacuata jivi pepo pevetsinë tsane. Itsa evetsiana, ajumesaëya itorobabiabiana pejumecovënëtsinexatsi.

<sup>6</sup> Nexata petiriva penacuetonëyo pevecuanaexanaecujinaetsi, najetabajirava petusato nacuayabelia, itsabelia Dioso tsivajënaexaniavaetatsi peponaponaenexa. Bajarajota pexaejava baja Dioso rajutatsi mil doscientos sesenta pamatacabibeje.

<sup>7</sup> Bajaraxuacujinae athëbëtatsia vajabitsaë exana. Angelevi penamatacaitorobinë, Miguelvënënë, pijaángelevi yajava, barënabia dragónjavabelia. Dragón pijinia, pijaángelevi yajava, barënabia Migueljavabelia. <sup>8</sup> Itsiata baitsi jane dragón cujiruamoneyabatsi. Nexata apo tocopatsitsi caenë ata dragón pijajivitonë penacopatsinexa athëbëtatsia.

<sup>9</sup> Dragón cajena ayainëxaneto. Itsiata baitsi jane xuabocatsi athëbëvetsica daxita pijajivi yajava. Nexata bajaraponë pevënë Dovathi. Itsavënë Satanás. Bajaraponë bajayata itsa naitajëta jivijavabelia, naitajëta bejomocuenia. Bajaraponë jivi yamaxëitojorobabiaba daxitanacuanëjava.

<sup>10</sup> Nexata jumetaniji pinijijumeta athëbëvetsica pejumaitsijava. Jumaitsi mapacueni-aje:

—Copiapata rabaja Dioso vajanacacapanepaejavanexa vajaneconivecua. Copiapata rabaja Dioso pesaëta jivi pevetaponaponaenexa. Copiapata rabaja Dioso pijajivi pitorobaponaenexa. Copiapata rabaja Cristo ata pitorobaponaenexa mapanacuajavaje. Bajarapacuenia copiapata baja daxita bajarapacueni tsipaji baja ponë neconitabiaba Diosojavabelia Dioso vajanajuajumecovënëtavanapaevi, bajaraponë baja xuabocatsi athëbëvetsica. Baitsi dovathi. Bajaraponë picani Dioso pitabaratsia nuca. Nexata bajaraponë daxita matacabijebi, daxitameravijebi ata, Diosojavabelia neconitabiaba Dioso vajanajuajumecovënëtavanapaevi. <sup>11</sup> Dioso vajanajuajumecovënëtavanapaevi pejumecovënëtsixae Cristo pesivatëpaejavatsi cruzata, cueneamoneyabapona dovathi. Bajarapacuenia cueneamoneyabapona tsipaji navajunupaebaponanua itsamonaejavabelia Cristo pecapanepaejavanexatsi pijaneconivecua. Dioso vajanajuacovënëtavanapaevi jamatabëjumai tsabiabi: “Itsa nebeyaxuabiana Dioso pejumelivaisi yabara, jema baja nebeyaxuabiana,” jamatabëjai tsabiabi. <sup>12</sup> Athëbënacuatatsia panejinavanapaevi, pasivajamatabëcuenebarëyamëre Dioso mapanacuayabetsicaje papecavecuaxuabijavatsica dovathi. Mapanacuataje panejinavanapaevi, bitso cajena bepajiobimë tsane. Paxamë ata, manuameneta panejinavanapaevi, bitso cajena bepajiobimë tsane. Bajarapacuenia bitso bepajiobimë tsane tsipaji baja panetuatuajëatsica dovathi xuabocatsi. Nexata baja aeconoxae bitso bajaraponë anaepanapona. Tsipaji baja yapëtane caematacabibeje saya petonacopatsijavatsi pexuabinexatsi infiernojavabelia, pejaijume athëbëvetsica pinijijumeta, jumetaniji.

<sup>13</sup> Nexata dragón, ponë dovathi, itsa yapëtane athëbëvetsica pexuabijavatsitsica irabetsica, nexata barajinapona pova vecuanaexanatsi pebinëyo. <sup>14</sup> Itsiata baitsi jane bajarapova rajutatsi anijacorofetobeje, becotsalacorofetobeje. Bajarapova nexata dragón vecuapuna tajëbelia, petusato nacuayabelia, bajarajotalia peponaponaenexa. Nexata bajarajotalia Dioso rajutabiabatsi pexaejava acueyabi pavaibeje epatua. <sup>15</sup> Dragón pecuibovojotuatsina capitsapa mera, ayaira. Pecuibovojotuatsina pepitsapaemera naexana pepamene pecaponaenexatsi picani petiriva. <sup>16</sup> Itsiata baitsi jane petiriva Dioso yavenonatsi. Ira nexata navoconareca ayajava. Nexata pamerami dragón pecuibovojotuatsina pitsapaina, bajarapamëthëareca joneca. <sup>17</sup> Bajaraxuata nexata dragón bitso anaepana petirivajavabelia. Nexata baja icatsia dragón pona petiriva pexi penacopabivi pebejebinxata. Bajarapamonaë jumecovënëtavanapa Dioso pejumelivaisi pitorobicueniatsi. Bajarapamonaë caasaë tsavanapaenua penavajunupaebijava Jesucristo pejumecovënëtavanapaejava. Nexata bajarapamonaë dragón tsimaxëponatsi pebejebinxatsi.

<sup>1</sup> Nucajē manuamene tajetabota. Nexata taenucajē manuamenejavatsina pepitsapaejavatsina piayainē. Siete pamatabocotobeje diez pamataetobeje pexainaenē. Caemataeto canacujitsia xainapona corona. Caematabocoto canacujitsia Dioso apo pejit-sipaevēnēanē itanerubena. <sup>2</sup> Ponē piayainē taenucajē pepitsapaejavatsina, benevēthē picani. Itsiata petaxu betsonētaxu. Pecuibovojoto pijinia benevēthē petsobianēcui-bovojoto. Bajaraponē nasaērajutatsi dragón. Pijatrono ata rajutatsi. Jamatabēcuenecaējēpaeyaexanatsinua ayaicuenia pitorobinexa daxitajivi mapanacuajavaje. <sup>3</sup> Piayainē caematabocoto matabocovajjēnēbatsi apo bepeyaasaēvajjēnēnēna itajara. Itsiata baja bajarapavajjēnē matanacēta. Nexata daxitanacuanēpijivi itsa tane bajaraponē pematavajjēnēnacētsijava, bitso jamatabēcuenenabenajaca. Nexata bajarapamonae jumecovēnēta bajaraponē. <sup>4</sup> Dragón tocopatatsi pitorobinexa daxitajivi mapanacuajavaje. Bajaraxuata daxitajivi pematabacabēta navajēcabiaba dragónjavabelia. Pematabacabēta navajēcabiabanua piayainējavabelia ata. Bajarapamonae najumaitsi mapacueniaje:

—Ajibi cajena itsanē ata pejamatabēcuenecaējēpaenētsi pacuenia itsi mapapiayainēje. Ajibi cajena itsanē ata pecaējēpaenētsi pebarēnabenexa maponēje pecueneamoneyabinexa, najai bajarapamonae piayainē yabara.

<sup>5</sup> Piayainē tocopatatsinua pibisiacuenia Dioso pebaracuaicuaijainexa. Tocopatatsinua pejumaitsiabinexa: “Xanē cajena bitso ayaijamatabēcuenenēnē Dioso matatoxenetsia,” pejaitsiabinexa. Tocopatatsinua pitorobinexa jivi mapanacuajavaje cuarenta y dos pajuametobeje, baitsi acueyabi pavaibeje epatua. <sup>6</sup> Bajaraponē exanapona pacuenia tocopatatsi. Bitso pibisiacuenia Dioso baracuaicuaijai tsabiabi. Dioso pijatemplobo ata pibisiacuenia baracuaicuaijai tsabiabi. Athēbētatsia pejinavanapaevi ata pibisiacuenia baracuaicuaijai tsabiabi. <sup>7</sup> Tocopatatsinua vajabitsaē pexanaenexa Dioso pijajivijavabelia. Tocopatatsinua pecueneamoneyabinexa vajabitsaē itsa exana Dioso pijajivijavabelia. Tocopatatsinua pitorobinexa daxitaviriajumevi ata. Tocopatatsinua pitorobinexa daxita nacuanēpijivi ata. <sup>8</sup> Nexata daxita mapanacuapijivije pematabacabēta navajēcabiaba piayainējavabelia. Dioso nacua pexanaevajjēnaeya, Dioso nacua pexanaecujinae ata, bajarapamonae apo vēnērubenaē Corderonē pijacuyalatobaxutota. Corderonē jivi rajuta matabacabi apo pevereverecaejava pesivatēpaexae cruzata.

<sup>9</sup> Itsa pamuxuvojorubename, panatojumetaema mapalivaisije. <sup>10</sup> Pamonaē Dioso pijajivi naneconitsiaexanaena, nexata penaneconitsivi pejebabiabibojavabelia jebiana, bajarapamonae juya itsamonae naneconitsiaexanaenatsi. Pamonaē pijinia Dioso pijajivi espadata bona, bajarapamonae juya itsamonae bajarapitsiespadata benatsi. Bajaraxuata itsamonae Dioso pijajivi bejiobiaexanabiabi atatsi, xanepana xaniavaetsia penajamatabēcuenecopatsinexa Diosojavabelia epatua copatsinejeva.

<sup>11</sup> Bajaraxuacujinae icatsia taenucajē iravetsina pepitsapaejava itsanē piayainē. Anijamataetobeje pexainaenē. Pacuenia oveja pebito mataeitsi, bajara pemataeitsinē. Itsiata baitsi jane pecuaicuaijaijava, pacuenia dragón pecuaicuaijaijava jumeitsi, bajarajumeitsi. <sup>12</sup> Papiayainē copiaya pitsapaina manuamenejavatsina, bajaraponē yajavaponapona. Nexata papiayainē copiaya pitsapaina manuamenejavatsina, nasaērajuta iravetsina papiayainē cotocaevi pitsapainajavabelia. Nexata papiayainē cotocaevi iravetsina pitsapaina, daxita mapanacuapijivi itoroba papiayainē copiaya manuamenejavatsina pitsapainajavabelia pematabacabēta penavajjēcaenexa. Baitsi ponē apo bepeyaasaēvajjēnēnēna itajara matavajjēnēnacēta baja, bajaraponējavabelia daxita mapanacuapijivije pematabacabēta penavajjēcaenexa. <sup>13</sup> Nexata papiayainē iravetsina cotocaevi pitsapaina, ayaicuenia pexanaejava jivi tsitaexanapona. Pitatsajaviitaire ata athēbēvet-sica othopaeyaexana irabetsica daxitajivi petaenubenaējavata. <sup>14</sup> Bajarapacuenia ayaicuenia pexanaejava pexanaponaexae, yamaxēitojoroba mapanacuajava pejinavanapaevi. Bajarapaayaicuenia exanapona, papiayainē copiaya manuamenejavatsina pitsapaina, pitabarata. Bajaraxuacujinae, papiayainē cotocaevi iravetsina pitsapaina, itorobapona Dioso apo pejumecovēnētsivi pexanaenexa pejumapecataenē. Nexata Dioso apo pejumecovēnētsivi, papiayainē copiaya manuamenejavatsina pitsapaina,

bajaraponë jumapecataeya exana jane baja. <sup>15</sup> Nexata papiayainë cotocaevi iravetsina pitsapaina, caëjêpatsi piasaëyaexanaenexa Dioso apo pejumecovënëtsivi jumapecataeya pexanaenë. Nexata asaëyaexana. Bajarapacuenia asaëyaexana papiayainë copiaya manuamenejavatsina pitsapaina Dioso apo pejumecovënëtsivi jumapecataeya pexanaenë pecuaicuaijainexa. Pamonaë pematabacabëta apo nanavajëcae bajarapajumapecataenëjavabelia, beyaxuabiaexanapona. <sup>16</sup> Papiayainë cotocaevi iravetsina pitsapaina, bajaraponë jane baja pejamatabëcueneta, daxitajivi mapanacuata pejinavanapaevi, cobejumaitanerubaponatsi, pecujanenia pacobe. Itsa jume, pitapathaitota ata itapaitanerubaponatsi. Nexata bajaraponë pejamatabëcueneta itanerubaponatsi daxitajivi. Itanerubaponatsi beveliajamatabëcuenevi. Itanerubaponatsi ayaijamatabëcuenevi ata. Itanerubaponatsi ricovi ata. Itanerubaponatsi bepejiobivi ata. Itanerubaponatsi pamonaë ata dajubicuenia canajetatsi itsamonaëjavabelia amoneya petonacuenebabibinexa. Itanerubaponatsi pamonaë ata dajubicuenia apo canajetsitsi itsamonaëjavabelia amoneya petonacuenebabibinexa. <sup>17</sup> Nexata pajivi aitanejibi, apo tocopatsitsi itsacuenejavayo ata pecomuatsinexa. Apo tocopatsitsinua itsacuenejavayo ata pecanajetsinexa. Paitanetota jivi itanerubaponatsi, papiayainë copiaya manuamenejavatsina pitsapaina, bajaraponë pevënë. Itsa apo pevënë, nexata pijanúmero. <sup>18</sup> Mapajamatabëcuenelivaisi bepacanaëjëtameje xaniavaetsia paneyapëtaenexa. Pajivi yapëtane, canaëjëtisi piayainë pijanúmero. Tsipaji bajaraponë panúmero xaina pevënënexa. Panúmero bajaraponë xaina seiscientos sesenta y seis.

## 14

### *Pacuenia Juan tane 144.000 pajivibeje Dioso pijajivi penaxëanaejava yabara pelivaisi*

<sup>1</sup> Taenutajë Corderonë penucaejava Siónvënë tsutojumata. Barënuca ciento cuarenta y cuatro mil pajivibeje. Bajarapamonaë pitapathaitota itanerubena Corderonë pevënë, Corderonë paxa ata pevënë. <sup>2</sup> Bajaraxuacujinaë jümetaniji athëbëvetsica pecuaicuaijajava. Pecuaicuaijajava najumeta pacuenia bitso banajumeta pinijjonca. Najumetanua beyamaxë penajumetsijume ata. Pecuaicuaijajava najumetanua pacuenia arpa banajumeta, ayaitsaëtoxaneto itsa najuaracata. <sup>3</sup> Corderonë pijajivi naxëananubena pejanavaji trono pitabarata, cuatro ponëbeje piaitothiavi pitabarata ata, ancianovi ata pitabarata. Itsajivi ata cajena apo caëjêpaetsi pecujaninexatsi bajarapavaji. Pamonaë ciento cuarenta y cuatro mil pajivibeje, ëbajarapamonaë, caëjêpatsi penaxëanaenexa bajarapavaji. Bajarapamonaë neconimatamotatsi Corderonë pijanata. Nexata baja bajarapamonaë Dioso capanepatsi mapanacuavecuaje. <sup>4</sup> Bajarapapebijivi penaexanaëjavaverenacujinaë apo naperabëquenetsiataë petirivajavabelia. Apo jamatabëcuenebijianaetsi itsajivi ata. Bajarapamonaë pënajinavanapa Corderonë itsaxuayo ponapona. Bajarapamonaë Corderonë pijanata neconimatamotatsi. Nexata baja bajarapamonaë capanepatsi Diosojavabelia mapanacuavecuaje. Bajarapamonaë baja namataxainaëya capanepatsi Dioso pijajivinexa, Corderonë ata pijajivinexa. <sup>5</sup> Bajarapamonaë caeto ata apo najumetsënëtsi. Aneconijibi tsavanapae Diosojavabelia.

### *Pacuenia acueyabi ponëbeje ángelevi vajunupaeba pacuenia itsamatacabi itsijitsia mapanacuataje yabara pelivaisi*

<sup>6</sup> Icatsia ángelnë taniji pepunanajetarucaejava. Canajetaruca pexanialivaisi, apo pevereverecaelivaisi. Tsipaëbijitsia bajarapalivaisi mapanacuajava pejinavanapaevi. Tsipaëbijitsia daxitanacuanëpijivi, daxitaviriajumevi ata. <sup>7</sup> Ángelnë pinijijumeta jumai tsanajetarucaë:

—Dioso cjunaviaya pajinavanapare. “Xamë bitso ayaijamatabëcuenenëmë,” pajamëre tsabiabi Diosojavabelia. Copiapata rabaja Dioso penaneconitsiaexanaponaenexa daxitajivi. Ponë itaboxo exana, ira ata, manuamene ata, mera pepitsaparubenaëjavanë ata, bajaraponëjavabelia panematabacabëta panavajëtabiabare, jai tsanajetarucaë ángelnë pinijijumeta.

<sup>8</sup> Icatsia cotocaevi taniji itsanē ángelnē pepunanajetarucaejava. Jumai tsanajetarucaejava bajarapaángelnē:

—Verebiabatsi rabaja Babilonia tomaraxanetomita pejinavanapaevimi. Tsipaji Babilonia tomarapijivimi navajécabiaba jumapecataeya pexanaenēanējavabelia. Nexata belia daxita nacuanēpijivi ata navajécabiaba jumapecataeya pexanaenēanējavabelia. Babilonia tomarapijivimi jumapecataeya pexanaenēanējavabelia penavajécacajamatabécueneta, jamatabécuenebijianapona daxitanacuanēpijivi. Nexata pacuenia pevitota pibisiacuene pexanabiabiva pejamatabécueneta, daxitajivi jamatabécuenebijianapona, bajara pijinia pacuenia Babilonia tomarapijivimi ata jumapecataeya pexanaenēanējavabelia penavajécabiabijamatabécueneta, jamatabécuenebijianapona daxitanacuanēpijivi. Bajaraxuata bajarapacuenia verebiabatsi, jai tsanajetarucaejava ángelnē, ponē cotocaevi taniji pepunanajetarucaejava.

<sup>9</sup> Bajaraxuacujinae icatsia taniji acueyabiángelnē pepunanajetarucaejava. Bajarapaángelnē pinijijumeta jumai tsanajetarucaejava:

—Pajivi pematabacabēta navajécabiaba piayainējavabelia, bajaraponē jumapecataeya pexanaenētsijavabelia ata, bajarapajivi naneconitsiana Diosojavabelia. Bajarapajivi itsa nacopatanua piayainē pevēnēta pitapaitanerutsinexatsi, itsa jume, pecobejumata ata pecobejumaitanerutsinexatsi, nexata bajarapajivi naneconitsiana Diosojavabelia.

<sup>10</sup> Dioso bitso pebaraanaepanaexaetsi, bajarapajivi bevelia apo naneconitsiaexanaetsi tsane. Ayaicuenia naneconitsiaexanaenatsi isotojavabelia, azufre petajueisotojavabelia. Nexata bajarapajivi isoto petajuta bitso jamatabēfaenaena Dioso pijaángelevi pitabarata, Corderonē ata pitabarata. <sup>11</sup> Athēbēabetsia bajarapaisototsēxē junaenia daxitamatacabijavabelianexa. Ayaicuenia bajarapajivi Dioso penaneconitsiaexanaejavatsi, tsitecaena daxitamatacabijavabelianexa. Bajarapajivi isoto petajuta bitso pejamatabēfaenaejava, caepatoyo ata apo copatsi tsane. Bajarapacuenia Dioso naneconitsiaexanaenatsi pajivi pematabacabēta navajécabiaba piayainējavabelia, bajaraponē jumapecataeya pexanaenētsijavabelia ata. Bajarapajivi itsa nacopatanua piayainē pevēnēta pitanerutsinexatsi, bajarapacuenia Dioso naneconitsiaexanaenatsi. <sup>12</sup> Bajaraxuata Dioso pijajivi xaniavaetsia bejumecovēnētavanapa Dioso pitorobilivaisitsi. Becaasaēnua tsavanaepae Jesúsjavabelia penajamatabécuenecopatsijava, jai tsanajetarucaejava acueyabi ángelnē pepunanajetarucaejavata.

<sup>13</sup> Bajaraxuacujinae jumetaniji athēbēvetsica tanejumaitsijava. Nejumaitsi athēbēvetsica mapacueniaje:

—Yaquinarure mapacuenia pejumaitsiitaneje: “Mapamatacabijavaveliacujinaeje, pevajēnaeyabelia ata, jamatabécuenēbarēya baja tsavanapae tsane pamonaē tēpaponae Dioso pepua pejumecovēnētsivi,” pejaiitane, yaquinarure, nejai athēbēvetsica.

Espíritu Santo ata nejumaitsi bajarapamonae yabara mapacueniaje:

—Xaniajai rabaja tsane. Bajarapamonae nacueraevetsiana penacuenebijava. Pamatcabi abaxē bajarapamonae asaē tsavanapae mapanacuataje, daxita xua pexaniacuene exanavanapa, bajaraxuajamatabécuenē Dioso athēbētatsia matamotsianatsi. Bajaraxuata jamatabécuenēbarēya tsavanapae tsane bajarapamonae, nejai Espíritu Santo.

*Pacuenia itsamatacabijavaveliacujinaeje, pevajēnaeyabelia ata, jamatabécuenēbarēya baja tsavanapae tsane pamonaē pijaneconi pexainaevi yabara pelivaisi*

<sup>14</sup> Icatsia taniji penioponaetarērēbo. Bajarapaitarērēbo tuatuajēta jivitonē eca. Itarērēbo tuatuajēta peecaenē yabara jamatabējumaitsinē:

—Jesús raeta, Daxitajivi Pematapijinē, jamatabējanē.

Namataxatateca orocorona. Cobenaeca bemasete pexiujajava pecaucubinexa penaveretsiruanē. <sup>15</sup> Nexata icatsia itsanē ángelnē pitsaparena temploboēnēverena. Bajarapaángelnē asaēyata vavajai itarērēbo tuatuajēta peecaenējavabelia. Jumaitsi bajarapaángelnē:

—Caucubare jane baja penaveretsiruanë mapanacuayaberecaje. Copiapata rabaja pecaetuatsinexa penaveretsixu mapanacuatarecaje, jai ángelnë, ponë pitsaparena temploöenëverena.

<sup>16</sup> Nexata bajaraxuacujinae ponë eca itarërëbo tuatuajëta, bemasete pexiujaijava yota irajumabereca. Caucuba jane baja penotsinexa penaveretsiruanë. Pecaucubijava penaveretsiruanë penotsinexa, mapajamatabëcuenelivaisi xainaje. Pacuenia caucuba penaveretsiruanë penotsinexa, bajara pijinia pacuenia itsamatacabi daxita Jesús pijajivi pitsiana.

<sup>17</sup> Bajaraxuacujinae icatsia athëbëtatsia itsaángelnë pitsaparena temploöenëverena. Bajaraponë ata capona bemasete pexiujaijava pecaucubinexa penaveretsiruanë. <sup>18</sup> Icatsia itsaángelnë pitsaparena altarjavaverena. Bajarapaángelnë altarpijiisoto pevetsinë. Junata pinijijumeta itsaángelnë, bemasete pexiujaijava pecaponaenëjavabelia. Jumaitsi bajarapaángelnëjavabelia mapacueniaje:

—Mapanacuayaberecaje caucubaremeca daxita uvaruanë, penaveretsiruanë, jai.

<sup>19-20</sup> Nexata jane baja bajarapaángelnë bemasete pexiujaijava yota irajumabereca. Caucuba jane baja uvaruanë, penaveretsiruanë. Nexata bajarapauvaruanë othotajarabaxuaba pinijivaxixaneto ënëabelia, bajarapavaxixanetoënëta pemarëbeneyujubataxuabinexa. Nexata jane baja uvacuaimarëbene yujubataxuaba tomara jumaverena. Nexata pemarëbeneyujubataxuabijavata, pinijijanmaraxaneto pitsapona. Nexata bajarapanmaraxaneto navotanucapona. Bajarapanmaraxaneto penavotanucaponaeva, piapiajava xaina trescientos pakilómetrobeje. Piavajubajava pijinia xaina bejamatabëcuene caemetro epatua. Xua taniji, uvaruanë penaveretsiruanë pecaucubijava, xua ata taniji, pinijivaxixaneto ënëabelia piothotajarabijava pemarëbeneyujubataxuabinexa, xaina mapajamatabëcuenelivaisije. Itsamatacabi ángelnë caetuatsiana daxita pibisiacuene pexanaevi penaneconitsiaexanaenexa. Nexata pibisiacuene pexanaevi ayabitsaëtoxanetonë tēpaena. Nexata bajarapacuenia ayajana xuabiana.

## 15

*Pacuenia Juan tane athëbëtatsia siete ponëbeje ángelevi, siete xuabeje piayajavanë pecaponaevi peverebiabinexa mapanacuaje, yabara pelivaisi*

<sup>1</sup> Icatsia taniji athëbëtatsia pinijicuene pitajëtsijava pacuenia itsamatacabi itsijitsia mapanacuataje. Pinijicuene pitajëtsijava itsa taniji, nabenjajacajë bitso. Siete paángelnëbeje capona siete xuabeje piayajavanë peverebiabinexa mapanacuaje. Bajarapapiayaicuene pepanepaecujinae, Dioso bitso jivi pebaraanaepanaejava, copiarucaena baja.

<sup>2</sup> Nexata icatsia taeyetajë bemanuamene picani. Itsiata baitsi jane piatajajava. Pacuenia vidriojava nasaba, bajarapitsijava. Itsiata bajarapaboxoya pitarunutsicotia xaina. Tanijinua jivi bajarapamene boxojumavereca penubenaevi. Bajarapamonae cueneamoneyaba piayainë. Cueneamoneyabanua bajaraponë jumapecataeya pexanaenëtsi ata. Tsipaji pamonaev nubena bajarapamene boxojumavereca, itorobi atatsi bajaraponëbejavabelia pematabacabëta pevajëcaenexa, apo jumecovënëtsi. Apo nacopatsinua pitanerubinexatsi piayainë pijanúmerota, panúmero xaina piayainë pevënënexa. Bajaraxuata bajarapamonae canubena arpa, Dioso perajutsiarpatsi. <sup>3</sup> Bajarapamonae naxëananubena Moiséspijinë, Dioso pijajivitonë, pevaji. Bajarapavaji Corderonë ata pevaji. Penaxëanaevjavata, bajarapamonae vajita jumai tsanubenaev mapacueniaje:

Xamë Diosomë, nijamatabëcuenesaenë daxita mapanacuata jivi pevetsivi matatoxenetsia. Xua pinijicuene exaname, bitso pexaniacuene. Xamë daxitanacuanë nevetsinë. Daxita xua pexaniacuene, nexanaenë. Penajumetsënëtsicuene jivi neyamaxëitojorobinexa, apo nexanaenë. <sup>4</sup> Daxitajivi xamë pecacujunavinë tsane. “Dioso cajena bitso ayajamatabëcuenenë,” cajai tsane. Xamë rabaja cajena caenëmë nianeconijibinë, caeto ata pibisiacuene apo nexanaenë. Daxita

nacuanëpijivi xamëjavaberena patsiana pematabacabëta xamëjavabelia penava-jëcaenexa. Bajarapacuenia catoitsane tsipaji baja daxitajivi tane ëpexaniacuene nexanaponaponaejava,

jai tsanubena Diosojavabelia bajarapamonae penaxëanaejavata.

<sup>5</sup> Bajaraxuacujinae icatsia taniji athëbëtatsia templobo ënëtuatuajëalia peyatuucutsipana penapatsijava. Bajara paënëyatuucutsijavaënëta bajayatami Dioso Moiséspijinëta penajumecopatsilivaisi peyaquinaeibopananë xaniavaetejeba. <sup>6</sup> Bajarapatemploboënëverena pitsaparena siete paängelnebeje. Bajarapamonae capona siete xuabeje piyaijavanë, bajaraxuanëta mapanacuaje peverebiabinexa. Bajarapaängelevi naxataba pexaniaviriapapaëbërëjavanë, piaxuirajibijavanë. Peniojaijavanë bitso. Nacorobëcëbanubena oropananë. <sup>7</sup> Bajaraxuacujinae pamonaе cuatro ponëbeje piaitothiaviyajuvënëne, ángelevijavabelia rajuta copanë. Piayainë caeängelne canacujitsia rajutapona caecopa. Bajarapacopanë orocopanë. Dioso, ponë daxitamatacabijavabelianexa peponaponaenë, ayaicuenia anaeya naneconitsiaexanaena pamonaе naneconita bajaraponëjavabelia. Xuanë vënëba bajarapacopanë, bajaraxuanëta Dioso naneconitsiaexanaena bajarapamonae. <sup>8</sup> Bajarapatemplobo tuatuajëmi bitso vënëca ëtsëxë. Bajarapatsëxë pitsapa Dioso ayaijamatabëcuenenëjavaverena. Itsajivi ata cajena apo caëjëpaetsi pejonenexa bajarapatemplobo ënëtuatuajëabelia. Xuanë siete paängelnebeje capona, piyaijavanë, itsa baja panepaena, matapania jivi caëjëpaenatsi pejonenexa bajarapatemplobo ënëtuatuajëabelia.

## 16

*Pacuenia Juan tane athëbëtatsia pacuenia itsamatacabi Dioso naneconitsiaexanaejitsia daxita pijaneconi pexainaevi yabara pelivaisi*

<sup>1</sup> Icatsia jumetaniji templobojavaverena pinijijumeta pejumaitsijava. Siete paängelnebejejavabelia jumaitsi mapacueniaje:

—Paponare baja iranëjavabereca paneepacaponaenexa jane baja xuanë siete pacopabeje vënëca, piyaijavanë. Dioso jane baja anaeya ayaicuenia penaneconitsiaexanaenexa, daxita pamonaе naneconita bajaraponëjavabelia, pejaijava, templobojavaverena jumetaniji.

<sup>2</sup> Nexata jane baja pona penamataxainaeängelne. Pecaponaera epatajaraba iranëjavabereca. Nexata daxita pamonaе piayainë pevënëitanetota itanerubatsi, daxita bajarapamonae bajarapaepatota bitso perabëtsabanareca. Nexata bitso aperabëtane bajarapamonae. Bajarapamonae bajarapapiayainë jumapecataeya pexanaenëtsijavabelia ata pematabacabëta penavajëcaevi.

<sup>3</sup> Bajaraxuacujinae icatsia pecotocaeviängelne pijacopapijira epatajaraba manuamenejavabereca. Manuamenemi nexata naexana bepetëpaenë pijanara. Daxita baja tëpa manuameneta pejinavanapaevimi.

<sup>4</sup> Bajaraxuacujinae icatsia acueyabiängelne pijacopapijira epatajaraba menianëjavabereca mera, iravetsina pepitsaparubenaejavanëjavabereca ata. Nexata daxita bajarapameranëmi naexana ëpijanaranë. <sup>5</sup> Bajaraxuacujinae jumetaniji mera pevetsiängelne pejumaitsijava Diosojavabelia. Jumaitsi mapacueniaje:

—Diosomë, caeto ata pibisiacuene apo nexanaenë. Ajena, pamatacabi, ponaponame. Bajayata mapanacuaje nexanaevajënaeya ata, ponaponame. Pibisiacuene pexanaevi, paneconivajëto xaina, bajarapaneconivajëtota naneconitsiaexaname. Bajaraxuata meranëmi pijanaranë naexanaeyaexaname. Tobijianame meranë piayainë pijajivi bajarapameranë penatsiapaenexa. <sup>6</sup> Bajarapamonae bajayata beyejeba nijajivimi. Pamonaе ata cavajunupaebapona, beyejeba. Bajaraxuata bajarapacuenia meranë pijanaranë naexanayaexaname penatsiapaenexa bajarapamonae, jai Diosojavabelia mera pevetsiängelne.

<sup>7</sup> Icatsia jumetaniji itsaángelnë altarjavaverena pejumaitsijava. Jumaiti mapacueni-aje:

—Xamë Diosomë, nijamatabëcuenesaënë daxita mapanacuata jivi pevetsivi matatoxenetsia. Itsa naneconitsiaexaname jivi, paneconivajëto xaina, bajarapaneconivajëtoatabananeconitsiaexaname. Itsa aneonijibi tsipae, nexata cajena apo naneconitsiaexanaemë tsipae, pejaijava itsaángelnë altarjavaverena jumetaniji.

<sup>8</sup> Bajaraxuacujinae icatsia cuatroángelnë pijacopapijira epatajaraba. Epatajaraba matcabipijijuametojavabetsica. Nexata matcabipijijuameto pecotiata jivi bitso ayaiacuenia tsajavatsi. <sup>9</sup> Itsiata bajarapamonae apo copabi pibisiacuene pexanabiabijava. Apo najamatabëcuenepënëyorotsi Diosojavabelia. “Xamë bitso ayaijamatabëcuenenëmë,” apo jai ata cajena Diosojavabelia. Biji rajane Dioso, ponë cajëpatsi daxitacuene pexanaenexa, bajaraponë caranata pibisiacuena baracuaicuaijai.

<sup>10</sup> Bajaraxuacujinae icatsia cincoángelnë pijacopapijira epatajaraba. Epatajaraba piayainë pijatronojavabereca. Piayainë jane baja pevetsinacuami aitaquiri tsanucae. Piayainë jane baja pijajivi bitso penavixaetaexae, navonosine. <sup>11</sup> Itsiata baitsi jane bajarapamonae apo copabi papibisiacuene exanavanapa. Apo najamatabëcuenepënëyorotsi Diosojavabelia. Biji rajane Dioso, ponë athëbëtatsia peecaenë, bajaraponë caranata bajarapamonae pibisiacuena baracuaicuaijai. Bajarapacuenia bajarapamonae Dioso pibisiacuena baracuaicuaijai penavixaetaexae, bitso peperabëtsabanaexaenua.

<sup>12</sup> Bajaraxuacujinae icatsia seisángelnë pijacopapijira epatajaraba. Epatajaraba pini-jimenexanetojavabetsica, Eufratesmenejavabetsica. Nexata Eufratesmenexaneto tsevajunua. Nexata bajarapacuenia namuto torucarenatsi iranë pevetsivi penicabinexa, penajetarubenaevi orientejavavetsina.

<sup>13</sup> Bajaraxuacujinae taniji acueyabi padovathibeje. Bajarapadovathivi becuaitoxicuenia pitsapa. Itsanë pitsapa dragón pecuibovojotuatsina. Itsanë pitsapa piayainë pecuibovojotuatsina. Itsanë pitsapa peyamaxëitojorobiprofetanë pecuibovojotuatsina.

<sup>14</sup> Bajarapadovathivi pinijicuene pexanaejava, exanapona. Pona baja pecaetuatsinexa daxitanacuanë pevetsivi. Bajarapadovathivi caetuatapona jivi vajabitsaë pebarëexanaenexa Diosojavabelia. Dioso pijamatabëcuenesaënë daxitanacuanë pevetsivi mata-toxenetsia. Bajarapamatacabi Dioso exanaena daxita pacuenia tajëvelia najumecapanepaeya jumaiti. <sup>15</sup> Bajaraxuacujinae jumetaniji Jesús pejumaitsijava: “Panenamuxu-naevere. Itsajota apo panejamatabënajinaemë, bajarajota jemata patsianicajë. Pacuenia penacobetoxotsinë jemata bapata itsajota apo jamatabënajinaetsi, bajara itsinë tsane. Nexata pajivi jamatabëcueneaitavaya ponaponaena tanecopiapitsinexa, bajarapajivi barëya tsane. Pacuenia itsajavabelia peponaejivinexa, baxaniavaeta penaxatatsijava pecaponaenexa pejumasajinaeyaniva, bajara itsi tsane bajarapajivi. Nexata pamatacabi patsianicajë, apo aura tsane,” pejaijava Jesús, jumetaniji. <sup>16</sup> Nexata jane baja dovathi pijajivi caetuataxi daxitanacuanë pevetsivi. Caetuataxi caejavata penacaetuatsinexa. Itsajota nacaetuata daxitanacuanë pevetsivi hebreojumeta pevënë Armagedón.

<sup>17</sup> Bajaraxuacujinae icatsia sieteángelnë pijacopapijira epatajaraba. Epatajaraba itaboxojavabetsia. Nexata athëbëtatsia templobo ënëtuatuajëta Dioso pecaetronojavaverena pinijijumeta jumaiti:

—Daxita rajane baja vereta, jai athëbëtatsia templobo ënëtuatuajëta.

<sup>18</sup> Nexata jane baja binebinejai yamaxë. Pinijijovibo bitso najumeta. Yamaxë ata najumeta. Iranë ata najëba pinijicuenia. Jivi pejinavanapaejavaveliacujinae mapanacuataje, caeto ata bajarapacuenia ira penajëabijava pinijicuenia apo tae.

<sup>19</sup> Pinijitomaraxanetomi, Babilonia tomarami, acueyabi xuabeje natsanaeya othopa. Bajarapacuenia itsanacuanëpijitoraranëmi ata othopa irata. Dioso nexata najamatabënápita pinijitomaraxanetopijivimi, Babilonia tomarapijivimi. Ayaiacuenia Dioso baraanaepana Babilonia tomarapijivimijavabelia pibisiacuene bitso pexanaexae. Bajaraxuata pinijicuenia Dioso naneconitsiaexana Babilonia tomarapijivimi. <sup>20</sup> Itsa ira najëba, daxitatunaetonëmi, daxitatsutonëmi ata, ajibi baja. Ira namatajëpa baja.

<sup>21</sup> Athëbëvetsica othopaica jivijavabetsica bitso pecainejebimatarejetonë. Bajarapamatarejetonë xaina piarevejava cuarenta pakilobeje. Nexata mapanacuapijivi pibisiacuenia Dioso baracuaicuaijai. Tshipaji athëbëvetsica piothopaejava, bitso pecainejebimatarejetonë, bitso piayaicue.

## 17

*Pacuenia itsamatacabi Dioso naneconitsiaexanaena pamonae navajëcabiaba jumapecataeya pexanaenëanëjavabelia yabara pelivaisi*

<sup>1</sup> Pamonae siete paängelnebeje, siete pacopabeje pecaponaevi, bajarapaängeleviyajuvenënë, caenë rena xanëjavaberena. Bajarapaängelne nejumlahtsi:

—Naxanitsia. Catsitajëtsianatsi pacuenia Dioso naneconitsiaexanaejitsia Babilonia tomarapijivi, patomaraxaneto eca menexanetonë imoxoyojava. Bajarapatomarapijivi Diosojavabelia apo navajëcabiabi. Caranata saya navajëcabiaba jumapecataeya pexanaenëanëjavabelia. Nexata pacuenia petiriva pevitota bitso pibisiacue pexanabiabiva jamatabëcueneitsi, bajarajamatabëcueneitsi Babilonia tomarapijivi. Pova petiriva pibisiacue pevitota exanabiaba, bajarapova pejamatabëcueneta jamatabëcuenebijiana itsamonae ata. Bajara pijinia pacuenia Babilonia tomarapijivi ata pexanabiabijava pejamatabëcueneta, jamatabëcuenebijiana ayaibitsaëtoxaneto itsanacuanëpijivi ata. <sup>2</sup> Tshipaji itsanacuanë pevetsivi patabiaba Babilonia tomaraberena. Nexata bajarapamonae ata copaba Diosojavabelia penavajëcabiabijava. Caranata saya Babilonia tomarapijivi cuenejëpaeya navajëcabiaba jumapecataeya pexanaenëanëjavabelia. Nexata jamatabëcuenebijianatsi bajarapamonae ata, nejai bajarapaängelne.

<sup>3</sup> Bajaraxuacujinae Espiritu Santo netsijamatabëvënëca. Nexata bemajitsinaebota ángelnë nebarëpona petusato nacuayabelia. Bajarajotalia taeyetajë petiriva. Bajarapova eca piayainë, petsobianë, pejumata. Bajaraponë peperabëtuareca, Dioso apo pejitsipaevënëanë, itanerubena. Bajarapapiayainë xaina siete pamatabocotobeje diez pamataetobeje. <sup>4</sup> Nexata bajarapova penaxatatsijavareca itsajava pabanaeya saëjai. Itsajava tsobia. Naitabëteca orojavanëta, perlavënëjavanëta ata, penamatamotsiibotonëta ata. Cobenaeca orocopa. Pibisiacue bitso pexanaejava pevitota, bajarapajamatabëcuenelivaisi vënëca bajarapacopata. <sup>5</sup> Bajarapova pitapathaitota vënëyaquinarutatsi. Pajamatabëcuenelivaisi yabara bajarapova pitapathaitota vënëyaquinarutatsi, itsajivi ata apo yapëtae. Pejumaitsijume picani mapacueniaje: “Pinijitomaraxaneto Babiloniatomara. Bajarapatomaraverena pitsapa jivi pejamatabëcuenebijianaejavatsi, jumapecataeya pexanaenëanëjavabelia penavajëcabiabinexa. Bajarapatomaraverena pitsapanua jivi pejamatabëcuenebijianaejavatsi, daxitaxua pibisiacue pexanaenexa mapanacuataje,” pejaijume, picani bajarapova pitapathaitota vënëyaquinarutatsi. <sup>6</sup> Taeyetajë icatsia bajarapova. Aitajibi tsecae Dioso pijajivimi pijanarata. Pamonae ata beyejebatsi pevajunupaebixae Jesús, bajarapamonae ata pijanarata aitajibi tsecae bajarapova. Bajarapitsecaejava itsa taniji, bitso baja cajena jamatabëcuenenajunaviacajë. <sup>7</sup> Nexata ángelnë nejumlahtsi:

—¿Detsa xuajitsia jamatabëcuenenajunaviacame? Cayapëtaeyaexanaenatsi pajamatabëcuenelivaisi xaina mapovaje. Ponë piayainë siete pamatabocotobeje diez pamataetobeje pexainaenë, ponëjumata bajarapova eca, bajaraponë ata pajamatabëcuenelivaisi xaina, cayapëtayaexanaenatsi. <sup>8</sup> Mapapiayainë tanemeje, bajaraponë picani bajayata ponapona mapanacuataje. Itsiata baja aeconoxae bajaraponë ajibi. Itsiata baitsi jane itsamatacabi pinijimëthëxanetojavatsina pitsapaenina icatsia peponaponaeenexa mapanacuataje. Bajaraxuacujinae bajaraponëmi beyaxuabianatsi pepacue jane baja bajaraponë pecopiarucaenexa. Daxita mapanacuapijivije, pamonae Corderonë pijacuyalatobaxutota apo vënërubenae Dioso nacua pexanaevajënaeya, Dioso nacua pexanaecujinae ata, bajarapamonae matacabi apo peverevereaejava apo xinae tsane. Bajarapamonae jamatabëcuenenajunaviacaena piayainë itsa pitsapaenina pinijimëthëxanetojavatsina, nejai ángelnë.

<sup>9</sup> Icatsia ángelnē nejumlahtsi:

—Pamonae baja peyapētaevi, pamonae baja caējēpatsi pejumeyapētaenexa, bajarapamonae pejumeyapētaenexa mapalivaisije. Papiyainē xaina siete pamatabocotobeje, ponējumata taeyetame petiriva, anijajamatabēcuenelivaisibeje itajēta. Bajaraponē pematabocotonē, siete pamatabocotobeje, mapajamatabēcuenelivaisi xainaje. Siete rabaja pijinia patsutobeje eca Babilonia tomarata. Bajarapasiete pamatabocotobeje mapajamatabēcuenelivaisi yjavaxainaje. <sup>10</sup> Siete rabaja pijinia ponēbeje Babiloniatomara pevetsivi. Nexata Babiloniatomara pevetsiviyajuvēnēvi cinco baja ponēbeje pitsapa. Seisnē abaxē aeconoxae eveta Babiloniatomara. Sietenē abaxē apo taxuxuabi pevetsinexa. Itsiata sietenē itsa evetsiana, bajayajebi apo evetsi tsane. <sup>11</sup> Papiyainē, petsobianē, taneme, mapajamatabēcuenelivaisi xainaje. Bajaraponē picani bajayata eveta Babiloniatomara. Itsiata baja aeconoxae bajaraponē apo evetsi. Tsipaji baja tēpa. Itsiata baitsi jane icatsia bajaraponē pinijimēthēxanetojavavetsina pitsapaenina Babiloniatomara icatsia pevetsinexa. Nexata icatsia bajaraponē itsa evetsiana, ochonē baja evetsiana Babiloniatomara. Bajaraponē abaxē bajayata itsa ponapona, siete ponēbeje Babiloniatomara pevetsiviyajuvēnēnēmi baja cajena. Bajaraponē icatsia Babiloniatomara itsa evetsiana, pevetsicujinae bajaraponēmi beyaxuabianatsi pepacuene jane baja bajaraponē pecopiarucaenexa, nejai ángelnē.

<sup>12</sup> Icatsia ángelnē nejumlahtsi:

—Ponē piyainē pemataetonē taneme diez pamataetobeje, mapajamatabēcuenelivaisi xainaje. Diez rabaja pijinia ponēbeje, itsamatacabi nacuanē evetsiana. Nexata bajarapamonae itsamatacabi nacuanē itsa evetsiana, evetsiana diez panacuabeje. Tsipaji caenē canacujitsia evetaponaena caenacua. Bajarapamonae abaxē apo taxuxuabi bajarapanacuanē pevetavanapaenexa. Itsiata baitsi jane itsa taxuxuabijitsia nacuanē jane baja pevetavanapaenexa, copatsianatsi pijanacuanējava pevetsinexa saya caepatoyovajēto. Bajarapamonae itsa evetsiana pijanacuanējava, piyainē barēevetsianatsi. <sup>13</sup> Pamonae diez ponēbeje, diez pijinia panacuabeje itsamatacabi itsa evetsiana, barēnajamatabēcuenējēpaenatsi piyainē. Nexata bajarapadiez ponēbeje jumaitsi tsane piyainējavabelia:

—Xamē pacatocopatsianatsi patanematacaitorobinēnexamē, jai tsane.

<sup>14</sup> Pamatacabi bajarapadiez ponēbeje evetavanapaena pijanacuanē, piyainē vajabitsaē barēexanaenatsi Corderonējavabelia. Daxita pamonae Corderonē pijajivi, pamonae Dioso pejunatsivi, bajarapamonae pijinia Corderonē barēbena piyainējavabelia. Nexata Corderonē cueneamoneyabiana piyainējavabelia. Cueneamoneyabiana tsipaji Corderonē daxita petuxanevi pijatuxanenē baja cajena. Nexata Corderonē daxita nacuanē pevetsivi matatoxenetsia pepo pevetsinē, nejai ángelnē.

<sup>15</sup> Ángelnē icatsia nejumlahtsi:

—Pamanuameneboxovereca taeyetame pibisiacuene pexanaeva, bajarapamanuamene mapajamatabēcuenelivaisi xainaje. Mapanacuata jinavanapa jivibitsaētoxonetonē daxitavirijumevi, daxitanacuanēpijivinua. Bajarapajamatabēcueneyabara taneme bajarapamanuamene. <sup>16</sup> Pamonae diez panacuabeje pevetsivinexa, bajarapamonae piyainē barēitoya tsane pibisiacuene pexanaevajavabelia. Nexata bajarapamonae beyaxuabiana bajarapova. Jumasa xuababuatsiana. Xaeyabuatsiananua. Bajaraxuacujinae tajuitsiana isotota. <sup>17</sup> Pamonae diez ponēbeje itsamatacabi nacuanē itsa evetsiana, bajarapamonae najamatabēcuenējēpaena petocopatsinexa piyainē pijanacuanē petoevetsinexatsi. Bajarapacuenia najamatabēcuenējēpaena tsipaji baja cajena Dioso jamatabēcuenēitorobatsi bajarapacuenia pexanaenexa bajarapamonae. Nexata piyainē bajarapamonae pijanacuanē bajayajebi toevetsianatsi matapania pecopiapatsijavabelianexa daxita pacuenia Dioso tajēvelia najumecapanepaeya jumaitsi. <sup>18</sup> Pova pibisiacuene pexanaeva taeyetame manuameneboxovereca, bajarapova mapajamatabēcuenelivaisi xainaje. Pinijitomaraxaneto Babiloniatomara.

Bajarapatomarapijivi pejamatabëcueneta mapanacuanë pevetsivi pibisiacuene exanapona, nejai ángelnë.

## 18

### *Pacuenia Babilonia tomaraxanetomi copiaruca yabara pelivaisi*

<sup>1</sup> Icatsia itsaángelnë taniji perunaejavatsica athëbëvetsica. Caëjëpatsi pinijicuenia piayaiacuene pitorobinexa. Bajarapaángelnë pinijicotia yajavarunaica. Ira itayota daxitanacuanëjava. <sup>2</sup> Ayaijumeta vavajai. Jumaitsi mapacueniaje:

—Verebiabijitsiatsi rabaja Babilonia tomaraxanetota pejinavanapaevi. Nexata baja ëjoriminacua tsarucae tsane. Daxita xua pibisiacuene pexanaedovathivi, juya bajarapatomarata jinavanapaena. Bitso pibisiaviriavi pepunaevi, pamonaе daxitajivi apo itajitsipae petaenexa, juya bajarapatomarata jinavanapaena. <sup>3</sup> Babilonia tomarapijivi navajëcabiaba jumapecataeya pexanaenëanëjavabelia. Nexata belia daxitanacuanë pevetsivi ata, pijajivi yajava, navajëcapona jumapecataeya pexanaenëanëjavabelia. Nexata Babilonia tomarapijivi jumapecataeya pexanaenëanëjavabelia penavajëcabiabijamatabëcueneta, daxita xua pibisiacuene pexanaejamatabëcuenetanua, jamatabëcuenebijanapona daxitanacuanëpijivi. Babilonia tomarapijivi bitso xainapona ayaijava palata pibisiacuene pexanaejamatabëcueneta. Nexata pijinia pamonaе Babilonia tomaraberena capatabiaba daxitacuene pecanajetsinexa Babilonia tomarapijivijavabelia, bajarapamonaе ata baja bitso ayaijava palata xainapona. Bajarapacuenia Babilonia tomarapijivimi pibisiacuene pexanabiabixae, ayaicuenia naneconita Diosojavabelia. Bajaraxuata Babilonia tomarapijivi Dioso baja verebiabijitsiatsi, jai ángelnë.

<sup>4</sup> Bajaraxuacujinae icatsia athëbëvetsica jumetaniji itsajume. Jumaitsi mapacueniaje:

—Paxamë patajajivimë, papitsapare baja Babilonia tomaravecua. Papitsapare baja pibisiacuene paxamë ata paneexanaeyaniva, bajarapatomarapijivi yajava Dioso papecananeconitsiaexanaeyaniva. <sup>5</sup> Babilonia tomarapijivi pijaneconi baja bitso ayaijava xaina. Pijaneconi itsa napebetsipa, itsa najumaetaponaеjitsipa, nexata copiapatsipa itaboxojavabetsia. Dioso cajena yapëtane daxita Babilonia tomarapijivi pibisiacuene pexanaejava. <sup>6</sup> Bajarapamonaе bejiobiaexanabiaba itsamonaе. Nexata Dioso itsa naneconitsiaexanaena, bajarapamonaе bitso ayaicuenia bejiobiaexanaena. <sup>7-8</sup> Babilonia tomarapijivi bitso beayaijamatabëcuenevi natane. Natocomuacabiaba ayaijava penamatamotsijavanë pibisiacuene pexanabiabimatamota. Bajarapamonaе pejamatabëëthëtota jamatabëjumaitsi tsabiabi: “Xanë raja majota ecajë nacua betaevetsinë. Nexata apo jamatabëcuenebëjanë tsane itsacuenejavayo ata yabara. Apo namatavenonaenë tsane itsacuenejavayo ata,” jamatabëjai tsabiabi bajarapamonaе pejamatabëëthëtota. Bajarapacuenia Babilonia tomarapijivi pejamatabëjumaitsixae, ayaicuenia Dioso bejiobiaexanaenatsi. Babilonia tomarapijivi caecuenia caematacabita Dioso tocopiapatsiaexanaenatsi petëpaecuene, pematantueyabicuene ata, janibocuene ata. Tajuenatsi isotota bajarapatomarapijivimi. Bajarapacuenia Dioso naneconitsiaexanaenatsi bajarapamonaе tsipaji vajatuxanenë Dioso bitso piasaënë.

<sup>9</sup> Babilonia tomarapijivi pejamatabëcueneta daxitanacuanë pevetsivi jamatabëcuenebijanapona. Nexata daxitanacuanë pevetsivi copaba Dioso pejumecovënëtsijavami. Natocomuacabiabanua ayaijava penamatamotsijavanë. Nexata bajarapamonaе itsa tsëxëtaena Babilonia tomarapijivimi petajuejavatsi, yaitaxutonueya vavajai tsane. <sup>10</sup> Bajarapamonaе pecajunavi, tajë vecuanubenaena Babilonia tomarapijivimi itsa tajuenatsi. Bajarapamonaе najumai tsane:

—¡Bitso baja rovia bejiobi mapamonaеje! ¡Pinijitomaraxanetota, Babilonia tomaraxanetota, pejinavanapaevimi peyaiyataevimitsi! Caepatoyocujinae baja veriajavatsi Dioso penaneconitsiaexanaexaetsi, najai tsane bajarapamonaе.

<sup>11</sup> Daxitanacuanëjava, pamonaе pecanajetabiabavanapaevi, yaitaxutonueya vavajai tsane. Bajarapacuenia yaitaxutonueya vavajai tsane tsipaji baja xua capatabiaba pecanajetsinexa, ajibi baja pecomuacaevitsi tsane. <sup>12</sup> Bajarapamonaе capatabiaba oronanita

pexanaejavanë, platananita pexanaejavanë ata, perlavënëjavanë ata, penamatamotsiibotonë ata. Capatabiabanua pexaniaviriapapaëbërë ata. Itsapapaëbërë linovënëjavanë. Itsajava sedajavanë. Bajarapapaëbërë itsajavanë peraënaejavanë. Itsajavanë petso-biajavanë. Capatabiabanua daxisvirianaejava petuxujuvinaejavanë. Capatabiabanua pexaniajavanë, marfilvënëjavata pexanaejavanë, penamatamotsinaejavanë ata, broncenani ata, hierronani ata, mármolvënëibo ata. <sup>13</sup> Capatabiabanua canelavënëjavanë, especiavënëjavanë ata, inciensovënëjavanë ata, mirravënëjavanë ata. Capatabiabanua petuxujuviranë, vinoranë ata, aceiteranë ata, pexaniaviriatrigobenonë ata, trigobultonë ata. Capatabiabanua baca, oveja ata, caballo ata, perobobocaemonë ata, carrozavënëmonë. Jivi ata capatabiaba dajubicuenia pecanajetsinexa itsamonaejavabelia amoneya petonacuenebabiabivinexa. <sup>14</sup> Nexata daxita bajaraxua pecanajetabiabavanapaevi, yaitaxutonueya najumai tsane Babilonia tomarapijivi yabara:

—¡Daxitacuene pejisipaecuenemi tovereverecatsi baja! ¡Tovereverecatsi baja bitso pexinaejavami, xua picani mapanacuapijivi tane penamatamotsijava! najai tsane bajarapamonae yaitaxutonueya.

<sup>15</sup> Babilonia tomarapijivimi abaxë itsa apo tajuetsi, pamonaë pecanajetabiabavana-paevi, ayaijava palata xainapona, xua capata, pecanajetabiabixae Babilonia tomara-pijivimijavabelia. Bajarapamonae itsa taena Babilonia tomarapijivimi petajuejavatsi, yaitaxutonueya vavajai tsane. Tajë vecuanubenaena pecajunavi. <sup>16</sup> Bajarapamonae daxita najumai tsanubenaë tsane:

—¡Bejibitatsi bitso pinijitomaraxanetota pejinavanapaevimi! Bajarapatomarapijivimi naxatabiaba pexaniaviriapapaëbërë, linovënëjavanë. Itsajava peraënaejava. Itsajava petsobiajava. Naitabëtabiaba orojavanëta, perlavënëjavanëta ata, penamatamotsiibotonëta ata. <sup>17</sup> ¡Caepatoyocujinaë saya verevereca baja bitso pexinaejavami! najai tsanubenaë tsane daxita bajarapamonae.

Daxita pamonaë barcoxanetonë pevetsivi, bajarapamonëta penaponaevi ata, bajarapamonëta penacuenebivi ata, bajarapamonëta pecaponaejavanë pecanajetaponaevi ata, daxita bajarapamonae tajë vecuanubenaena pecajunavi Babilonia tomarapijivimi itsa tajuenatsi. <sup>18</sup> Bajarapabarcoxanetonëta peponaevi, tsëxëtaenubenaena Babilonia tomarami itsa tajuenatsi. Nexata vavajaiya najumai tsanubenaë tsane bajarapamonae:

—¡Itsanacuanëjava ata baja ajibi itsatomara mapitsipinijitomaraxanetoje! ¡Caetomarami baja maje pinijitomaraxanetomi, tajuatsije! najai tsanubenaë tsane.

<sup>19</sup> Pamonaë tsëxëtaenubenaena, natsimataothocaena atsabenonë, bitso pesivanajamatabëxainaexae Babilonia tomarapijivimi. Yaitaxutonueya najumai tsanubenaë tsane:

—¡Bitso pinijicuenia bejibitatsi pinijitomaraxanetomita pejinavanapaevimi! Babilonia tomarapijivimi ayaijava palata pexainaexae, bitso pexinaevi naexana daxita pamonaë barco pexinaevi, pecanajetabiabixae xua capata bajarapatomaraberena. ¡Caepatoyocujinaë saya bajarapatomarami verevereca baja! najai tsanubenaë tsane bajarapamonae.

<sup>20</sup> Dioso baja cajena itsamatacabi naneconitsiaexanaena Babilonia tomarapijivi pebejibiaexanabiabijamatabëcuene Dioso pijajivi. Nexata itsamatacabi, Babilonia tomarami itsa vereverecaena, pevereverecaejava yabara, sivajamatabëcuenebarëya tsane daxita athëbëtatsia pejinavanapaevi. Daxita Dioso pijajivi, mapanacuata pejinavanapaevi ata, sivajamatabëcuenebarëya tsane. Apóstolevi ata, Diosojumelivaisi pepaebivi ata, sivajamatabëcuenebarëya tsane Babilonia tomarami itsamatacabi itsa vereverecaena.

<sup>21</sup> Bajaraxuacujinaë piasaëángelnë yotaxuaba ibotoxaneto. Bajarapaiboto pinijibotoxaneto bitso. Nexata ángelnë manuameniabereca asaëyata xuabareca bajarapai-botoxaneto. Ángelnë jumaitsi mapacueniaje:

—Pacuenia asaëyata xuaecajë mapai-botoxanetoje, bajara pijinia pacuenia pinijitomaraxaneto, Babiloniatomara, itsamatacabi pinijicuenia xuabianatsi. Apo taetsi baja tsane icatsia matavëjëa. <sup>22</sup> Ajumejibi baja tsane pijacallejava arpa peracatabi-bijava. Ajumejibi baja tsane flauta ata piobabiabijava. Ajumejibi baja tsane trompeta ata

piobabiabijava. Itsajivi ata baja apo nacuenebi tsane bajarajota. Apo najumetsi baja tsane icatsia matavējēa trigoxu pecaquiatabiabiabijava pecaquiatabiabiibotoxanetota. <sup>23</sup> Itsalámpara ata baja apo naitayotsi tsane bajarajota. Ajumejibi baja tsane jivi penabarēcuaijaiitsabiabijava. Penacasabifiesta ata baja pexanabiabijava, ajibi tsane. Bajarapatomarapijivi pexainaejava pecanajetabiabavanapaevi, daxitanacuanējjava pevēnjoneyabiabivimi, ajibi baja tsane. Ajibinua baja tsane bajarapatomarapijivi daxitanacuanējjava yamaxēitojorobiaya penajorobabiabijava, jai bajarapaángelnē.

<sup>24</sup> Dioso yapētane pacuenia Babilonia tomarapijivi pejamatabēcueneta, Dioso jumepaebivimi profetavi beyejebiabatsi. Babilonia tomarapijivi pejamatabēcueneta, Dioso pijajivimi ata beyejebiabatsi. Bajaraxuata juya Dioso ayaicuenia naneconitsiaexanaena Babilonia tomarapijivi.

## 19

<sup>1</sup> Bajaraxuacujinae jumetaniji jivi ayaibitsaētoxfaneto athēbētatsia. Pinijijumeta jumai tsaponae mapacueniaje:

“Diosomē, ¡ayaijamatabēcuenenēmē bitso!” jaitsi vaxaitsi Diosojavabelia. Bajaronē nacacapanepa vajaneconivecua. Penivenivenaecotia pexainaenē. Pijamatabēcuenesaenē bitso. Daxitacuenē pexanaenexa pecaējēpaenētsi. <sup>2</sup> Itsa naneconitsiaexana jivi, paneconivajēto jivi xaina bajaraponējavabelia, bajarapaneconivajētota bananeconitsiaexana. Pajivi aneconijibi, apo naneconitsiaexanae cajena. Nexata baja Dioso naneconitsiaexana pibisiacuene bitso pexanaevi, Babilonia tomarapijivimi. Bajarapamonaemi pibisiacuene pexanaejamatabēcueneta jamatabēcuenebijianapona daxitanacuanēpijivi. Bajarapamonaeami pejamatabēcueneta Dioso pijajivimi beyejebatsi. Bajaraxuata Dioso juya naneconitsiaexana bajarapamonaev, jai jivi ayaibitsaētoxfaneto athēbētatsia.

<sup>3</sup> Bajaraxuacujinae bajarapamonaev icatsia jumaitsi:

—“¡Diosomē, ayaijamatabēcuenenēmē bitso!” jaitsi vaxaitsi Diosojavabelia. Athēbēabetsia petsēxējunaejavatsia Babilonia tomarapijivimi petajuetsēxētsi, apo vereverecanucaev tsane daxitamatacabijavabelianexa, jai bajarapamonaev.

<sup>4</sup> Pamonaev veinticuatro ponēbeje ancianovi, pamonaev pijinia cuatro ponēbeje pi-aitothiavi, daxita bajarapamonaev Dioso yayataeya irata bobena. Ira taenubena. Bajarapamonaev irata jumai tsanubenaev Diosojavabelia, tronota peecaenējavabelia:

—¡Xanepana rabaja nexanaejava! ¡Bitso ayaijamatabēcuenenēmē! jai tsanubenaev irata bajarapamonaev Diosojavabelia.

<sup>5</sup> Bajaraxuacujinaev icatsia tronojavaverena daxita Dioso pijajivijavabelia jumaitsi:

Dioso panecujunavivi, ayaijamatabēcuenē panexainaevi, beveliajamatabēcuenē panexainaevinua, pexaniajamatabēcuenē parajutabiabare vajaDiosojavabelia, jai tronojavaverena.

### *Corderonē penacasabifiesta yabara pelivaisi*

<sup>6</sup> Icatsia jumetaniji ayaibitsaētoxfaneto jivi pecuaicuaijaijava. Bajarapamonaev pecuaicuaijaijava, jumetaniji bepiniijoncajume. Beyamaxējume ata, ayaijume, najumeta. Jumai tsaponae bajarapamonaev mapacueniaje:

VajaDioso pijamatabēcuenesaenē daxita mapanacuata jivi pevetsivi matatoxenetsia. Taxuxuaba rajane baja daxitanacuanējjava Dioso jivi pevetsinexa. Bajaraxuata vaxaitsi jumaitsi: “Diosomē, ¡ayaijamatabēcuenenēmē bitso!” jaitsi vaxaitsi Diosojavabelia. <sup>7</sup> Sivajamatabēcuenēbarēyatsi Dioso. Nexata tsipaebatsi itsamonaevjavabelia pacuenia sivajamatabēcuenēbarēyatsi Dioso. “Diosomē, ¡bitso pinijicuenē nexanaenē!” jaitsi vaxaitsi Diosojavabelia. Bajarapacuenia jumaitsi tsipaji baja copiapata fiesta pexanaematacabinexa, Corderonē penacasabifiestanexa. Petiriva rabaja naxaniavaeta Corderonē penacasabivanexa.

<sup>8</sup> Bajarapova rajutatsi bitso pexaniaviriapapaëbërëjava penaxatatsinexa, pi-  
axuirajibijava, bitso peniojaijava,  
jai bajarapamonae.

“Bajarapova rajutatsi bitso pexaniaviriapapaëbërëjava penaxatatsinexa,” itsa jai,  
comparacióncuenia pejumaitsinexa picani mapacueniaje: “Dioso pijajivi aneconi-  
jibia tane Cristo pesivatëpaexaetsi pijaneconi yabara,” pejainexa picani. Bajarapa-  
jamatabëcuenelivaisi: “Bajarapova rajutatsi bitso pexaniaviriapapaëbërëjava penax-  
atatsinexa,” pejaijava comparacióncuenia.

<sup>9</sup> Nexata bajaraxuacujinae ángelnë nejumaitsi:

—Yaquinare mapejumaitsilivaisije: “Jamatabëcuenebarëya pamonaë junatatsi  
Corderonë penacasabifistajavaberena,” pejailivaisi. Daxita xua catsipaebatsi, bajaraxua  
pepacuene Dioso taneitorobijava, nejai ángelnë.

<sup>10</sup> Nexata tamatabacabëta tonucajunuajë ángelnë pitabarata. Pexaniajamatabëcuene  
picani tarajutsinexa ángelnëjavabelia. Itsiata baitsi jane ángelnë nejumaitsi:

—Pëtsa bajaraxua exaname. Tsipaji saya xanë ata Dioso pijajivitonë. Pacuenia  
xamë, pacuenia itsamonae ata, Dioso panenajuajumecovënëtsivi xaniavaetsia pajume-  
covënëtanapame papexaniajailivaisi Jesús pacatsipaeba, bajara saya xanë ata taitsinë.  
Nexata pexaniajamatabëcuene rajure Diosojavabelia, nejai ángelnë.

Papexaniajailivaisi Jesús pacatsipaeba, bajarapalivaisita jamatabëcueneasaëyaex-  
anatsi pamonaë jivijavabelia tsipaebapona Dioso pejumelivaisi.

*Pacuenia athëbëtatsia Juan tane Cristo penioponaecaballojumata peecaejava yabara pelivaisi*

<sup>11</sup> Taniji itaboxo penapatsijava. Tanijina penioponaecaballo. Bajarapacaballojumata  
jivitonë eca. Ponë bajarapacaballojumata eca, pevënë Najumecapanepaya Pejumait-  
sicuenia Pexanaenë. Itsavënë Pepo Pexaniajailivaisi Petsipaebinë. Bajaraponë jivi  
naneconitsiaexana paneconivajëtota jivi naneconita. Vajabitsaë ata exana pibisiacuene  
pexanaevijavabelia. <sup>12</sup> Pitaxutobeje naitayota. Pacuenia isoto bacotiatsobia, bajara  
itaxutocotiaitsi. Bajaraponë matapona ayaijava coronanë. Pitapata vënëruca. Itsiata  
baitsi jane itsajivi ata apo vënëyapëtaetsi. Èbajaraponë pijacuata navënëyapëtane.

<sup>13</sup> Penaxatatsijavareca tsobia. Pijanarata pejabutsijava. Bajaraponë pevënë Dioso-  
jamatabëcuenelivaisi itajëtsinë. <sup>14</sup> Bajaraponë pënaponatsi vajabitsaë ayaibitsaëtox-  
aneto, athëbëpijivi. Bajarapamonae naxataba bitso pexaniaviriapapaëbërëjavanë, pi-  
axuirajibijavanë, bitso peniojaijavanë. Bajarapamonae ata yapona penioponaecaballu-  
anëta. <sup>15</sup> Ponë vajabitsaë barëexana, bajaraponë pecuibuatsina pitsapa pexiujaiespada  
penaneconitsiaexanaenexa daxitanacuanëpijivi. Bajaraponë daxitanacuanëjava jivi  
pevetsinëexa. Itsa evetsiana, ajumesaëya itorobabiabiana pejumecovënëtsinexatsi.  
Pacuenia uvaruanë ita barëmeneyujubataxuaba, ayaibarëmene pitsapa pexanaenexa  
vinoranë, bajara pijinia pacuenia daxitanacuanëpijivi, pijaneconi pexinaevi, Dioso  
itsa verebiabiana, ayaijana xuabiana. Dioso, ponë pijamatabëcuenesaënë dxi-  
tanacuanë pevetsivi matatoxenetsia, ayaiacuenia naneconitsiaexanaena bajarapamonae  
pebaraanaepanaexae. <sup>16</sup> Ponë vajabitsaë barëexana, bajaraponë pijacamisajumavelia  
penaxatatsijavata, pevënëitanebërëtoyo ruca. Pethaëtojumata ata pevënëitanebërëtoyo  
ruca. Jumai tsarucæ bajarapaitanebërëtoyo: “Maponëje daxitanacuanë pevetsivi ata  
pepo pevetsinë. Daxita petuxanevi ata pijatuxanenë,” jai tsarucæ.

<sup>17</sup> Bajaraxuacujinae taenutajë ángelnë, icotiata penucaenë. Pinijijumeta vavajai  
tsanucæ daxita quequeremonaëjavabelia. Jumai tsanucæ mapacueniaje:

—Naxanitsia. Panacaetuanare payaibitsaëtoxanetomë ayaijava panenabaninexa  
Dioso pejamatabëcueneta. <sup>18</sup> Naxanitsia. Daxita petëpaevi pevi panexaenexa. Pa-  
ponaremena nacuanë pevetsivimi, vajabitsaë penamatacaitorobivimi ata, vajabitsaë  
piatatsacavimi ata, pevi panexaenexa. Caballuanëmi, caballuanëjumata peponaevimi  
ata, pevi panexaenexa. Pamonaemi dajubicuenia pecanajetsivimitsi itsamonaejav-  
abelia amoneya petonacuenebinexa, apo pecanajetsivimitsi ata, beveliajamatabëcuene

pexainaevimi ata, ayaijamatabëcuene pexainaevimi ata, daxita bajarapamonae pevi panexaenexa paponaremena, jai tsanucae ángelnë quequeremonaejavabelia.

<sup>19</sup> Bajaraxuacujinae taniji piayainë. Tanijinua daxitanacuanë pevetsivi pijajivi, vajabitsaë, pecaetuatsijava ata. Daxita bajarapamonae nacaetuana vajabitsaë penaexanaenexa. Nexata barënabia penioponaecaballota peponaenëjavabelia, bajaraponë pijajivijavabelia ata. <sup>20</sup> Nexata penioponaecaballota peponaenë vaetaba piayainë. Vaetaba peyamaxëitorobiprofetanë ata. Ponë peyamaxëitorobiprofetanë, jivi peyamaxëitorobinexa, bajayata pinijicuene exanaponapona piayainë pitabarata. Bajarpacuenia bajayata pinijicuene pexanaexae, peyamaxëitorobiprofetanë jivi yamaxëitorobapona. Nexata jivi nacaeveta piayainë pevenëitanetota pitanerubaponaenexatsi. Bajarpacuenia bajayata peyamaxëitorobiprofetanë jivi yamaxëitorobapona piayainë jumapecataeya pexanaenëtsijavabelia ata jivi pematatababëta penavajëcabinexa. Bajaraxuata nexata piayainëbeje, peyamaxëitorobiprofetanëbeje, xuabaliatsibeje abaxë piasaënëbeje isotopucabelia. Bajarapapuca tajueyabiaba azufre yajava. <sup>21</sup> Nexata daxita bajaraponëbeje pijajivi, pamonaenacopaba, beyejebatsi. Beyejebatsi penioponaecaballota peponaenë, pecuibuatsina pepitsapaeespadata. Nexata jane baja daxita quequeremonae napeneyaba bajarapamonaemi pevi.

## 20

*Pacuenia Juan tane pacuenia itsamatacabi Cristo mil pavaibeje evetsijitsia mapanacuaje yabara pelivaisi*

<sup>1</sup> Icatsia taniji ángelnë perunaejavatsica athëbëvetsica. Cobenarunaica pinijimëthëxaneto pijallave. Cobenarunaicanua ayaicadenamaëtoxaneto. <sup>2</sup> Bajarapaángelnë vaetaba dragón, ponë pevenë Dovathi. Itsavënë Satanás. Bajaraponë dovathi bajayata itsa naitajëta jivijavabelia, naitajëta bejomocuenia. Nexata ángelnë cëtabuata dovathi mil pavaibejenexa. <sup>3</sup> Pinijimëthëxanetojavareca xuareca. Yavëpaxatatabuata bajarapamëthëxanetojavareca. Pematatsënëa icatsia sellovënëjavata yamëthëvëpajumacatsata. Nexata dovathi apo caëjëpaetsi tsane peyamaxëitorobinexa mapanacuapijivi mil pavaibeje. Bajaraxuacujinae icatsia isinaenatsi caepatoyo icatsia jivi peyamaxëitorobaponaenexa.

<sup>4</sup> Bajaraxuacujinae icatsia taniji jivi tronojumata penaevi. Bajarapatronojumata penaevi, Dioso itorobatsi penaneconitsiaexanaenexa jivi, pijaneconi pexainaevi. Tanijinua itsamonae ata, pamonaenae bajayata vësiucubejebatsi. Bajarpacuenia bajarapamonaemi bajayata vësiucubejebatsi tsipaji jivi tsipaebapona Jesús pelivaisi. Tsipaebanajetarubenanua Dioso pejumelivaisi. Bajarapamonae apo navajëcae pematatababëta piayainëjavabelia, piayainë jumapecataeya pexanaenëtsijavabelia ata. Apo nacopatsinua piayainë pevenëitanetota pitapaitanerubinexatsi. Apo nacopatsinua pecobejumaitanerubinexatsi. Nexata bajarapamonaemi icatsia Dioso piasaëyaexanaejavatsi, taniji. Pacuenia ata bajarapamonae mil pavaibeje Cristo barëevetatsi mapanacuaje, taniji. <sup>5-6</sup> Bajarapamonae Dioso asaëyaexanatsi Dioso copiaya jivi piasaëyaexanaematacabita. Bajarapamonae Dioso asaëyaexanatsi caecuenia ayaibitsaëto. ¡Pamonaenae copiaya Dioso jivi piasaëyaexanaematacabita asaëyaexanatsi, bajarapamonae pejamatabëcuenebarëyavi, pianeconijibivinua! Cotocaevi patëpaejavanexa, acuenebi baja itsacuene pexanaenexatsi bajarapamonae. Biji rajane bajarapamonae Dioso, Cristo ata, pijasacerdotevinexa, jivi petocuaicuaijaitabiabivinexa Diosojavabelia. Bajarapamonae Cristo barëevetsianatsi mapanacuaje mil pavaibeje. Itsamonae petëpaevimi, pamonaenae abaxë nacopabanubena, Dioso icatsia asaëyaexanaenatsi bajarapamil pavaibejecujinae.

<sup>7</sup> Itsa baja panepaena mil pavaibeje, dovathi icatsia isinaenatsi mëthëvecua pepitapaenexa. <sup>8</sup> Pitsapaena icatsia jivi peyamaxëitorobinexa daxitanacuanëjava. Bajarpacuenia yamaxëitorobiana jivi ayaibitsaëtoxanetonë, Dioso apo pejumecovënëtsivi. Nexata bajarapacuenia dovathi vajabitsaë caetuatsiana. Dovathi pijajivi bitso ayaibitsaëtoxaneto tsane. Pacuenia tajetaboatsapërë navita, bajara itsi tsane dovathi pijajivi,

vajabitsaë. <sup>9</sup> Bajarapamonae vajabitsaë copiata jivi benajetarubenaena daxitanacuanëjava. Bajaraxuacujinae matatoyoronaena jane baja Jerusaléntomara peverebiabinexa picani Dioso pijajivi, Dioso piasivatomarata, Jerusalén tomarata, pejinavanapaevi. Itsiata baitsi jane dovathi pijajivi Dioso tsixuabianicatsi isoto athëbëvetsica. Nexata tajuenatsi daxita vajabitsaëmi, dovathi jane baja pijajivimi. <sup>10</sup> Nexata dovathi, ponë jivi yamaxëitojorobaponaena daxitanacuanëjava, xuabialiatsi isotopucalia, azufre yajava petajueyabiabipucalia. Bajarapapucalia baja cajena copiaya xuabatsibeje piayainëbeje peyamaxëitojorobiprofetanëbeje. Nexata bajarajota bajarapamonae Dioso naneconitsiaexanaenatsi daxitamatacabijavabelianexa. Nexata bajarajota bajarapamonae isoto petajuta bitso jamatabëfaenaena. Bajarapamonae bitso pejamatabëfaenaajava isoto petajuta tsitecaena daxitamatacabijavabelianexa.

*Pacuenia Juan tane pacuenia itsamatacabi jivi nubenaajitsia penioponaetrono pitabarata Dioso penaneconitsiaexanaenexatsi yabara pelivaisi*

<sup>11</sup> Icatsia taniji penioponaetronoxanetojumata peecaenë. Bajaraponë nacua baja vereverecaeyaexana. Itaboxo ata baja vereverecaeyaexana. <sup>12</sup> Taenubajë daxita petëpaevimi penubenaajava Dioso pitabarata. Nubena Dioso penaneconitsiaexanaenexatsi. Bajarapamonae ayaijamatabëcuene pexainaevimi. Itsamonae beveliajamatabëcuene pexainaevimi. Taeyejebajënuua cuyalatobaxutonë. Bajarapacuyalatobaxutonë baxupanejeba. Bajarapacuyalatobaxutonëta itanerubena daxita petëpaevimi pacuenia exananapa petëpaevajënaeya mapanacuataje. Itsacuyalatobaxuto ata taeyabuatajë. Bajarapacuyalatobaxuto ata baxupatabuata. Bajarapabaxutota vënërubena pamonaë matakabi apo pevererecaejava pexainaevinexa. Nexata caejivi canacujitsia Dioso pijaneconi petorutaponaexaetsi, caejivi canacujitsia paneconivajëto xaina. Bajarapaneconivajëtota Dioso naneconitsiaexanaponatsi. <sup>13</sup> Manuameneta petëpaevimi ata, daxita pitsapaina. Jivi ata petëpaecujinae, pejinavanapaenacuajavavetsina, ira bëxëpanavetsina, daxita pitsapaina. Nexata caejivi canacujitsia paneconivajëto xaina, bajarapaneconivajëtota Dioso naneconitsiaexanaponatsi. <sup>14</sup> Bajaraxuacujinae jivi petëpaeyaexanaejamatabëcuenemi, jivi petëpaecujinae pejinavanapaenacuami ata yajava, Dioso xualia isotopucalia. Bajarapapuca jivi cotocaevi patëpaejava petëpaeyaexanaepuca. <sup>15</sup> Pamonaë apo vënërubenaë, pabaxutota vënërubena pamonaë matakabi apo pevererecaejava pexainaevinexa, bajarapamonae peneliatsi bajarapapucalia.

## 21

*Pacuenia Juan tane pacuenia itsamatacabi Dioso icatsia pejanaitaboxo, pejananacua yajava, exanaajitsia yabara pelivaisi*

<sup>1</sup> Icatsia taniji pejanaitaboxo, pejananacua yajava. Paitaboxo, panacua ata, Dioso copiaya exana, ajibi baja. Manuamene ata ajibi. <sup>2</sup> Xanë rabaja Juannë. Taniji Dioso pijatomara, pejana Jerusaléntomara. Athëbëvetsica, Diosojavavetsica, runaica bajarapatomara. Daxita rabaja Dioso xaniavaeta. Pacuenia petiriva pamonanexa itsa sivapatsijitsiatsi, pevajënae banaxaniavaeteca, bajara pijinia pacuenia Dioso xaniavaeta baja Jerusaléntomara pijajivi petojinavanapenexatsi. <sup>3</sup> Nexata jumetaniji pinijijume athëbëvetsica, tronojavavetsica. Jumaitsi mapacueniaje:

—Taema. Dioso rabaja jivijava ponapona. Dioso baja jivi yajavaponapona daxitamatacabijavabelianexa. Bajarapamonae pepo Diosonë pijajivi tsane. Dioso pijinia bajarapamonae pijatuxanenë tsane. <sup>4</sup> Dioso itaxutobarëmeneiquinaponaena bajarapamonae. Ajibi baja tsane petëpaecuene, penuecuene ata, bitso penajamatabëxainaecuene ata, penavixaetaecuene ata. Daxita bajarapitsicuenemi copiarucaena jane baja, jai athëbëvetsica.

<sup>5</sup> Bajaraxuacujinae Dioso, tronojumata peecaenë, jumaitsi:

—Taema. Daxitacuene bajayata taexanaejavami, xuami baja picani vereverecaeyaexanajë, pejanajava icatsia exanajë, jai.

Bajaraxuacujinae xanëjavaberena icatsia nejumaitsi:

—Yaquinare bajaraxuanë pelivaisi. Tsipaji baja palivaisi catsipaebatsi, bajarapalivaisi pexaniajailivaisi cajena. Xanepana nexata daxitajivi pejumecovënëtsinexa bajarapalivaisi, nejai.

<sup>6</sup> Bajaraxuacujinae icatsia nejumaitsi Dioso, tronojumata peecaenë:

—Daxita rabaja icatsia pejanajava taexanaejava, veretajë. Xanë rajane baja daxitacuene tataxuxuabinë. Daxitacuene icatsia tacopiarucaeyaexanaenënexa. Pacuenia jivi pejamatabëëthëtojavavetsina bitso jitsipa mera piapaenexa, bajara pijinia pacuenia jivi bitso itsa jitsipaena tacapanepaejavanexa, nexata bajarapamonae rajutsianajë mat-acabi apo peverevereaejava. Tocopatsianajë bajarapamonae amoneya pexainaenexa matacabi apo peverevereaejava itsa jumecovënëta taxënato, Cristo, pesivatëpaejavatsi. Bajaraponë Cristo jivi pejamatabëcueneasaëyaexanaenë. <sup>7</sup> Pajivi tsiteca jumecovënëtaPONAPONA tajumelivaisi ëpetëpaejavabelianexa, bajarapajivi xanë pijaDiosonënë tsane. Bajarapajivi pijinia taxënatojiviyo tsane. <sup>8</sup> Itsiata baitsi jane pamona pejunavivi tajumelivaisi yabara itsamonae pebejiobiaexanaeyanivatsi, pamona ata apo tanejumecovënëtsivi, pamona ata pitoyavi itsamonae, pamona ata pevitota pibisiacuene pexanaevi, bajarapamonae ponaena petajueyabiabipucajavabelia. Pamona ata penajorobivi, pamona ata jumapecataeya pexanaenëanëjavabelia penavajëcaevi, pamona ata penajumetsënëtsivi, daxita bajarapamonae ponaena petajueyabiabipucajavabelia. Bajarapapuca tajueyabiaba azufre yajava. Bajarapatëpaejava cotocaevi jane baja petëpaejava tsane, nejai Dioso, tronojumata peecaenë.

*Pacuenia Juan tane pejana Jerusaléntomara pacuenia itsamatacabi itsijitsia yabara pelivaisi*

<sup>9</sup> Nexata jane baja rena caenë ángelnë. Bajarapaángelnë siete paángelnëbeje siete pacopabeje piayaijavanë pevënëcaecopanë pepacaeviyajuvënënë. Bajarapaángelnë nexata nejumaitsi:

—Naxanitsia. Catsitajëtsianatsi pova Corderonë pijavanexa, nejai ángelnë.

<sup>10</sup> Bajaraxuacujinae Espíritu Santo netsijamatabëvënëca. Nexata bemajitsinaebota ángelnë nebarëpona pinijitsutoxanetojavabelia, piapiatsutoxanetojavabelia. Nexata bajara patsutoxanetojavatalia ángelnë netsitajëta Dioso pijatomara, pinijitomaraneto, Jerusaléntomara. Athëbëvetsica Diosojavavetsica runaica bajarapatomara. <sup>11</sup> Bajarapatomara cotianiveniveneca Dioso pijapenivenivenaecotiata. Pacuenia penamatamotsiiboto jaspevënëiboto cotianivenivena, bajarapacuenia cotianiveniveca. Nasabanua pacuenia nasaba vidriojava. <sup>12</sup> Bajarapatomara matatoyorotsia yacaranata piatayaëibopanaxanetota. Bajara payacaranatsijavaxaneto mataropotsia catsanaruba ibopananë. Bajara payacaranatsijavaxaneto apia athëbëabetsia pacuenia pinijinaejavaxaneto apia. Bajara payacaranatsijavaxaneto matatoyorotsia xaina doce pabaupabeje. Nexata ángelevi, caenë canacujitsia, nucapona caebaupa canacujitsia. Bajarapabau-panëjava Israelpijinë pexi, doce ponëmibeje, pevënëanë vënërubena. <sup>13</sup> Acueyabi pabaupabeje xainapona caeyenepana canacujitsia. Estevënënenia payenepana xaina acueyabi pabaupabeje. Nortevënënenia pijinia payenepana xaina acueyabi pabaupabeje. Oestevënënenia pijinia payenepana xaina acueyabi pabaupabeje. <sup>14</sup> Jerusaléntomara matatoyorotsia pey-acaranatsiibopanaxanetonexa, ibo penajumaetaponaejavata, copiaya pinijiibotoxanetonë sasavia jebapona, doce paibotoxanetobeje. Bajarapaibotoxanetonë, caeibotoxaneto canacujitsia pejumavelia, Corderonë pijajivi doce ponëbeje, apóstolevi, pevënëanë rubena.

<sup>15</sup> Paángelnë nebarëcuaicuajai, cobenaponapona oronaebo. Bajarapaoronaebota pecaëjëbinexa Jerusaléntomara, pecaëjëbinexa baupanë ata, pecaëjëbinexa Jerusaléntomara matatoyorotsia peyacaranatsiibopanaxaneto ata. <sup>16</sup> Jerusaléntomara matatoyorotsia peyacaranatsiibopanaxaneto, daxitayenepananë namatajëpaeya apia. Pacuenia apiareca matonotsiareca payenepanabeje, bajara pijinia pacuenia apialia epatajërët-sialia ata payenepanabeje. Nexata jane baja ángelnë pecaëjëbinaebota caëjëba Jerusaléntomara. Nexata Jerusaléntomara matonotsiareca piapiajava xaina dos mil doscientos

pakilómetrobeje. Epatajërëtsialia ata xaina bajarapacuenia, dos mil doscientos pakilómetrobeje. Athëbëabetsia ata piapiajava bajarapacuenia xaina, dos mil doscientos pakilómetrobeje. <sup>17</sup> Bajaraxuacujinae ángelnë caējëba Jerusalén tomara matatoyorotsia peyacaranatsiibopanaxaneto peyapëtaenexa paitayaëtovajëto xaina. Jerusaléntomara matatoyorotsia peyacaranatsiibopanaxaneto, paitayaëjava xaina sesenta y cuatro pametrobeje. Pavirianaebota mapanacuapijivi bacaējëba, bajarapavirianaebota ángelnë caējëba.

<sup>18</sup> Jerusaléntomara matatoyorotsia peyacaranatsiibopanaxaneto, exana jaspevenëibota. Jerusaléntomara ërojojanëta pexanaetomara. Nexata Jerusaléntomara nasaba bitso. Pacuenia bitso nasaba piaxuirajibividriojava, bajara itsi. <sup>19</sup> Jerusaléntomara matatoyorotsia peyacaranatsiibopanaxanetonexa, itsa taxuxuaba pexanaejava, copiaya pinijiibotoxanetonë sasavia tsivajënaejeba. Bajarapaibotoxanetonë itabëtsiaya jumacatsanaruba daxitaviria ibotonëta, bitso penamatamotsiibotonëta. Penamataxainaeibotoxaneto itabëta jaspevenëibotonëta. Pecotocaeviibotoxaneto itabëta zafirovenëibotonëta. Acueyabiibotoxaneto itabëta ágatavënëibotonëta. Cuatroibotoxaneto itabëta esmeraldavënëibotonëta. <sup>20</sup> Cincoibotoxaneto itabëta ónicevënëibotonëta. Seisibotoxaneto itabëta cornalinavënëibotonëta. Sieteibotoxaneto itabëta crisólitovënëibotonëta. Ochoibotoxaneto itabëta berilovënëibotonëta. Nueveibotoxaneto itabëta topaciovënëibotonëta. Diezibotoxaneto itabëta crisoprasavënëibotonëta. Onceibotoxaneto itabëta jacintovënëibotonëta. Doceibotoxaneto itabëta amatistavënëibotonëta. <sup>21</sup> Doce rabaja pabaupabeje. Doce rabaja pijinia paperlavënëjavatabeje, bitso penamatamotsijavanëta, exana caebaupa canacujitsia. Bajarapatomarata caecalle ruca daxitacallevecua bitso ayaicallexaneto. Bajarapacalle ërojojanëta pexanaecalle. Nasaba bitso. Pacuenia nasaba vidriojava, bajara itsi.

<sup>22</sup> Bajarapatomarata apo taenë templobo. Itsiata baitsi jane daxita bajarapatomara betemplo. Bajarapacuenia betemplobo tsipaji Dioso, daxita mapanacuata jivi pevet-sivi matatoxenetsia pijamatabëcuenesaënë, Corderonëbeje, ponaponabeje bajarapatomarata. <sup>23</sup> Dioso ayaijamatabëcuenenë pijapenivenivenaecotiata itayota bajarapatomara. Corderonë ata itayota pijapenivenivenaecotiata bajarapatomara. Bajaraxuata apo namatavenonae bajarapatomarata pitayotsinexa matabacabipijijuameto, meravipijijuameto ata. <sup>24-26</sup> Daxitanacuanëpijivi, pamonaë baja Dioso capanepatsi pijaneconivecua, bajarapamonaë itsamatabi jinavanapaena Diosobeje Corderonëbeje pijapenivenivenaecotiata. Daxitanacuanë pevetsivi pijatomaranëjavaverena capatsiana bajarapatomaraberena bitso penamatamotsijavanë, Dioso yaiyataeya perajutsinexa. Daxitamatabijavabelianexa, bajarapatomara baupatanutsiana. Bajarapatomarata ajibi tsane meravi. <sup>27</sup> Itsiata baitsi jane bajarapatomaraberena pibisiajamatabëcuene pexainaevi, apo jone tsane. Piauracuene pexainaevi, penajumetsënëtsivi ata, apo jone tsane. Jonena ëpamonae vënërubena Corderonë pijacuyalatobaxutota. Corderonë pijacuyalatobaxutota vënërubena pamonaë matababi apo pevereverecejava pexainaevinexa.

## 22

<sup>1</sup> Bajaraxuacujinae icatsia ángelnë netsitajëta pepamene, bitso pitaranaemene. Nasaba bitso. Pacuenia vidriojava nasaba, bajara itsi. Bajarapamene jivi petëpaejavavecua paitavayaexanaemene. Bajarapamene pitsaparena Diosobeje Corderonëbeje pijatronojavaverena. <sup>2</sup> Bajarapamene bocapona ayaicallexaneto tuatuajëareca. Bajarapamene itapayareca anijamuxubërëneniabeje nubena naejavanë, jivi petëpaejavavecua paitavayaexanaenaenë. Bajaraponaenë caevaita nacuaिताpona doce panacuaitsibeje. Caejuameto canacujitsia nacuaिताpona. Bajaraponaenë pebaxuta xanepana daxitanacuanëpijivi penavaëbinexa, pejamatejemanexa piavitanejavavecua. <sup>3</sup> Nexata bajarapatomarata ajibi tsane jivi pejamatabëcuenebijianaëjavanexatsi. Nexata jivi pibisiacuene apo exanaë tsane. Diosobeje Corderonëbeje pijatronota ecaenabeje pijajivi pitorobabiabinexabeje daxitamatabijavabelianexa bajarapatomarata. Nexata daxita pamonaë Dioso pijajivi, pexaniajamatabëcuene rajutsiana Diosojavabelia.

<sup>4</sup> Bajarapamonae Dioso itabarataena. Dioso pevënë ata rucaena bajarapamonae pitapathaitota. <sup>5</sup> Bajarapatomarata ajibi tsane meravi. Pepo petuxanenë Dioso pijapenivenivenaecotia itayotsiana. Nexata bajarapatomarata pejinavanapaevi apo namatavenonae tsane lámparacotia, matababipijijuametocotia ata. Pamona jivanapaena Dioso pijanacuata, Dioso pijanacua barëevetsianatsi daxitamatababijavabelianexa.

*Pacuenia baja imoxoyo pevajënae Jesucristo pepatsijavanexatsica yabara pelivaisi*

<sup>6</sup> Icatsia ángelnë nejumlahtsi:

—Palivaisi baja yaquiname, pexaniajailivaisi cajena. Daxita xua yabara yaquiname, pepacuene copiapatsiana. Dioso baja cajena bajayata tajëvelia yapëtaeyaexana profetavimi peyapëtaenexa pacuenia itsamatacabi itsijitsia mapanacuataje. BajarapaDiosonë icatsia itoroba pijaángelnë. Nexata Dioso pijaángelnë tsitajëta Dioso pijajivijavabelia, Dioso pijajivi peyapëtaenexa pacuenia baja imoxoyo pevajënae pecopiapatsinexa xua copiapatsijitsia mapanacuataje, nejai ángelnë.

<sup>7</sup> Icatsia ángelnë nejumlahtsi:

—Jesús raja jumaitsi: “¡Bepijia patsianicajè!” jai. ¡Nexata pajivi jumecovënëta Dioso pejumelivaisi, neyaquinaelivaisi mapabaxutotaje, bajarapajivi jamatabëcuenebarëya tsane Jesús itsa patsianica! nejai ángelnë.

<sup>8</sup> Xanë rabaja Juannë, daxita baja palivaisi yaquinajë, jumetaniji. Tanijinua. Bajaraxuacujinae ángelnë, ponë netsitajëta daxita bajaraxua, pitabarata yayataeya picani tamatabacabëta tonucajë. <sup>9</sup> Itsiata baitsi jane ángelnë nejumlahtsi:

—Pëtsa bajaraxua exaname. Tsipaji saya xanë ata Dioso pijajivitonënë. Pacuenia xamë, pacuenia itsamonae ata, pamona Diosojumepaebivi profetavi, pacuenia ata pamona jumecovënëtsiana mapabaxutotaje neyaquinaelivaisi, bajara saya xanë ata taitsinë. Nexata Dioso yayataeya nematabacabëta tonucare nevajëtsinexa Diosojavabelia, nejai ángelnë.

<sup>10</sup> Icatsia ángelnë nejumlahtsi:

—Pëtsa nejumeyavajunuaxainame Dioso pejumelivaisi, neyaquinaelivaisi mapabaxutotaje. Tsipaebianame daxitajivijava daxitajivi peyapëtaenexa. Tsipaji rabaja imoxoyo pevajënae pecopiarucaenexa mapanacuataje. Pacuenia baja cajena Dioso tajëvelia najumecapanepaeya jumaitsi, bajarapacuenia Dioso exanaena. <sup>11</sup> Neponaponaepato abaxë mapanacuataje, tocopare pibisiacuene pexanaponaevi, pibisiacuene pexanaejava pecatsitecaenexa. Èpibisiacuene yabara penajamatabëxainaevi ata, tocopare pecatsitecaenexa penajamatabëxainaejava èpibisiacuene yabara. Itsiata baitsi jane pijinia pamona pexaniacuene pexanavanapaevi, catsitecae pevajënaeyabelia pexaniacuene pexanavanapaejava. Pamona ata Dioso aneconijibia tanetsi pejumecovënëtsixae Jesucristo pesivatëpaejavatsi, casaë pevajënaeyabelia aneconijibia pejinavanapaenexa, nejai ángelnë.

<sup>12</sup> Icatsia ángelnë nejumlahtsi:

—Jesús raja jumaitsi: “Panejumetaema. Bepijia patsianicajë. Capatsianicajë tajajivi tarajutsijavanexa. Bajaraxua rajutsianajë caejivi canacujitsia, pamona xaniavaetsia netonacuenebavanapa. Pamona pijinia pibisiacuene exanavanapa, naneconitsiaexanaenajë. <sup>13</sup> Xanë rajane baja daxitacuene tataxuxuabinë. Daxitacuene icatsia tacopiarucaeyaexanaenënexa,” jai raja Jesús, nejai ángelnë.

<sup>14</sup> Icatsia ángelnë nejumlahtsi:

—Jamatabëcuenebarëya baja pamona pibisiacuene pexanaeconimi Dioso vecuaajibiaexanatsi, pejumecovënëtsixae Jesucristo pesivatëpaejavatsi. Bajarapamonae itsamatacabi Dioso tocopatsianatsi penajonenexa Dioso pijatomara baupanëjava. Tocopatsianatsinua jivi petëpaejavavecua piavitavaexanaenae pecuaixaenexa. <sup>15</sup> Itsiata baitsi jane daxita pamona Dioso apo pejumecovënëtsivi, nacopabanubenaena Dioso pijatomarajumavelia. Nacopabanubenaena pamona bitso èpibisiacuene pexanaevi, penajorobivi ata, pevitota pibisiacuene pexanaevi ata, jivivevi ata, jumapecataeya

pexanaenēanējavabelia penavajēcabiabivi ata, bitso penajumetsēnētsivi ata. Daxita bajarapamonae nacopabanubenaena Dioso pijatomarajumavelia, nejai ángelnē.

<sup>16</sup> Nexata Jesús nejumaitsi:

—Xanē rabaja Jesúsnē. Itorobajē tajaángelnē pecatsipaebinexa palivaisi baja catsipaeba. Bajarapacuenia itorobajē daxita Dioso pejumecovēnētsivi peyapētaenexa palivaisi baja tajaángelnē catsipaeba. Xanē rabaja nacuaevetsinēmi Davidpijinē pemo-moxiyajuvēnēnē. Xanē rabaja tajamatabēcuenēitayotsinē daxitajivi pexaniajailivaisita, nejai Jesús.

<sup>17</sup> Espíritu Santo jumaitsi. Petiriva ata, pova Corderonē pijavanexa, bajarapova ata jumaitsi. Jumaitsi beje Jesúsjavabelia mapacueniaje:

—Naxanitsiayo patsianimica, jaibeje.

Pamonae jumetane bajarapacuenia pejumaitsijavabeje Jesúsjavabelia, bajarapamonae ata bejumaitsi Jesúsjavabelia:

—Naxanitsiayo patsianimica, bejai bajarapamonae ata.

Pacuenia jivi pejamatabēēthētojavavetsina bitso jitsipa mera piapaenexa, bajara pijinia pacuenia jivi bitso itsa jitsipaena Dioso pecapanepaejavanexatsi, nexata bajarapamonae Dioso rajutsianatsi matababi apo peverevereaejava. Tocopatsianatsi bajarapamonae amoneya pexainaenexa matababi apo peverevereaejava itsa jumecovēnēta Cristo pesivatēpaejavatsi. Tsipaji Cristo jivi petēpaejavavecua piatavayaexanaenē.

<sup>18</sup> Daxita pamonae leba Dioso pejumelivaisi, tayaquinaelivaisi mapabaxutotaje, jamatabēcuenereviaya tsipaebijitsianē roviaia mapacueniaje. Mapabaxutotaje tayaquinaelivaisi itsajivi icatsia saicayalivaisi mataropotsia itsa yaquinaena, bajarapajivi naneconitsiana Diosojavabelia. Nexata Dioso naneconitsiaexanaenatsi. Papiayaicue yabara jumaitsi mapabaxutotaje, bajarapacue Dioso taeyaexanaenatsi bajarapajivi. <sup>19</sup> Mapabaxutotaje tayaquinaelivaisi, itsajivi itsa xuabiana itsalivaisiyo, nexata bajarapajivi naneconitsiana Diosojavabelia. Nexata bajarapaneconijamatabēcueneta bajarapajivi vēnēyaquinae atatsi pabaxutota vēnērubena daxita pamonae matababi apo peverevereaejava pexinaevinexa, matababi apo peverevereaejava apo xinae tsane. Dioso pijatomarabetsia ata pejonenexa, apo tocopatsi tsanetsi. Pabaxutota vēnērubena matababi apo peverevereaejava pexinaevinexa pelivaisi, Dioso pijatomara ata pelivaisi, jumaitsi mapabaxutotaje.

<sup>20</sup> Jesús, ponē itoroba pijaángelnē tanetsipaebinexa pacuenia itsamatababi itsijitsia mapanacuataje, bajaraponē nejumaitsi mapacueniaje:

—Bepijia patsianicajē, jai.

Nexata xanē jumaitsinē:

—Je. Xanepana rabaja. Jesús pepo petuxanenēmē, ¡naxanitsiayo patsianimica! janē.

<sup>21</sup> Pacatovajētatsi daxita paxamē vajatuxanenē Jesucristo papecayavenonaenexa. Bajara itsi tsane.